


# Kankanaey Bible



The Holy Bible in the Kankanaey language of the Republic of  
the Philippines

## **Kankanaey Bible**

### **The Holy Bible in the Kankanaey language of the Republic of the Philippines**

copyright © 2016 Wycliffe Bible Translators of Canada, Inc.

Language: Kankanaey

Translation by: Wycliffe Bible Translators of Canada, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2016-06-08

---

PDF generated using Haiola and XeLaTeX on 21 Feb 2024 from source files dated 31 Aug 2023

287e9051-f62a-52c2-b51a-3c821ef89a36

## Contents

Genesis . . . . .	1
Exodo . . . . .	45
Levitico . . . . .	76
Bilbilang . . . . .	87
Deuteronomio . . . . .	104
Josue . . . . .	125
Papangolo . . . . .	137
Ruth . . . . .	150
1 Samuel . . . . .	152
2 Samuel . . . . .	170
1 Aari . . . . .	179
2 Aari . . . . .	196
1 Cronicas . . . . .	212
2 Cronicas . . . . .	216
Ezra . . . . .	220
Nehemias . . . . .	224
Job . . . . .	232
Salmo . . . . .	243
Proverbio . . . . .	379
Ecclesiastes . . . . .	409
Kantan Solomon . . . . .	412
Isaias . . . . .	414
Jeremias . . . . .	446
Ladladingit . . . . .	465
Ezekiel . . . . .	466
Daniel . . . . .	477
Hosea . . . . .	492
Joel . . . . .	497
Amos . . . . .	500
Jonas . . . . .	505
Mikias . . . . .	508
Habakkuk . . . . .	513
Zefanias . . . . .	516
Zekarias . . . . .	518
Malakias . . . . .	525
Mateo . . . . .	529
Marcos . . . . .	582
Lucas . . . . .	614
Juan . . . . .	667
Inam-amag . . . . .	705
Roma . . . . .	752
1 Corinto . . . . .	776
2 Corinto . . . . .	798
Galacia . . . . .	813
Efeso . . . . .	823
Filipos . . . . .	831
Colosas . . . . .	837
1 Tessalonica . . . . .	843

2 Tessalonica . . . . .	849
1 Timoteo . . . . .	852
2 Timoteo . . . . .	859
Tito . . . . .	864
Filemon . . . . .	868
Hebreo . . . . .	870
Santiago . . . . .	888
1 Pedro . . . . .	895
2 Pedro . . . . .	902
1 Juan . . . . .	907
2 Juan . . . . .	913
3 Juan . . . . .	914
Jude . . . . .	916
Naipaammo . . . . .	919

## Genesis Maipanggep Sin Libro Ay Nay

Din nangisolat sin Genesis et si Moses ay nangipaisolatan met laeng Diyos sin maisned ay opat ay libro. Ad-ado di maistorya isna manlogi sin namarsuaan Diyos sin lobong enggana sin inmeyan di ipogaw Diyos ed Egipto.

Din olog di Genesis et “napoan.” Mabalín ay magodwa din linaona maibasar isnan olog na ay nay. Sin kapitolo 1-11, maistorya di napoan di lobong ya ipogaw. Mabasas na din maipanggep sin damo ay ipogaw ay da Adan en Eva, din damo ay basol, din damo ay namses biyag, da Noe ya din nalbengan di lobong, ya din nankinalasian di kalin di ipogaw.

Sin maisned ay kapitolo 12-50, maistorya din napoan di ipogaw en Diyos ay makwani en Judio ono Israelita. Mabasas na din maipanggep en da Abraham, si Isaac ay anak na, ya din apo na ay si Jacob ay manngadan abe si Israel. Si Jacob ay nay di aman di sinpo ya dowá ay lallalaki ay maibilang ay aap-on di sinpo ya dowá ay tribun di Israelita. Manlogi sin kapitolo 37, madad-at din nakaskasdaaw ay naamag en Jose ay esay anak en Jacob ya din nan-etanan da Jacob ay en nakiili ed Egipto.

Peteg ay nabanol din libro ay nay en datako, tan say pan-adalan tako sin ogali ya panakabalin di tet-ewa ay Diyos, din tinawid tako ay basol, ya din iyat Diyos ay mangay-ayowan si ipogaw ay mamati en sisya ya manosa si mangam-amag si lawa.

### **Din Linaona**

Din namarsuaan Diyos sin lobong ya din damo ay ipogaw 1:1–2:25

Din damo ay basol ya din dosa ay inkeddeng Diyos 3:1-24

Da Cain en Abel ya odom ay polin Adan 4:1–5:32

Da Noe ya din nanlebngan Diyos sin daga 6:1–10:32

Din nankinalasian di kalin di ipogaw 11:1-9

Din listaan di aap-on Abraham 11:10-32

Da Abraham en Isaac ya si Jacob 12:1–35:29

Da Jose ya din aag-i na 37:1–45:28

Din inmeyan da Jacob ed Egipto 46:1–50:26

### *Din Namarsuaan Diyos Sin Am-in Ay Wada*

<sup>1</sup> Sin damodamo, pinarsuan Diyos din daga ya am-in din wada ed daya. <sup>2</sup> Asi et din daga ay nay yan baken naolnos downan iwed abe di maila, tan mabolinget ya nalilimotan si napigsa ay dalloyon. Ngem wadas di din Ispiriton Diyos\* ay mangil-ila.

<sup>3</sup> Idi siya di, inbilin Diyos ay pomat-a, et pinmat-a. <sup>4</sup> Idi inila na ay napat-a, napnek sisya. Pag nan pansianen din napat-a ya din mabolinget. <sup>5</sup> Nginadanana din napat-a si kaagawan ya din mabolinget si labi. Idi nakdeng pay din labi et kasin mapat-a, say damo ay agew.

<sup>6</sup> Asi kanan Diyos, “Mawada di mangodwa sin danom ta maitken din danom ay wada ed kayang sin danom ay wada sin daga.” <sup>7-8</sup> Et natongpal, tan inamag na din nginadananas daya ay maikasinan din danom ed kayang sin danom ed dallem.† Idi nakdeng kasin din labi yan kasin mapat-a, say maikadwa ay agew.

---

\* **1:2** Di dowá abe ay kaiologan nina sin Hebreo et: panakabalin Diyos ono dagem ay napon Diyos. † **1:7-8** Din pannemnem di Judio sin timpon di Daan ay Tolag et wada di kanan da en daya ay kad-an di liboo, agew, bowan ya talaw. Wada abey nasisinop ay danom ay kaman baybay sin ngato na ay say kapoan di odan. Ilaen abe sin Genesis 7:11 ya Salmo 104:3 ya 148:4.

<sup>9</sup> Pag ibilin Diyos ay maolnong din danom ay wada sin labaw di daga ta mabonsian din lota, et natongpal. <sup>10</sup> Din lota ay sana, say ngingadananas daga, ya din naolnong ay danom, ngingadananas baybay. Et napnek sisya sin nangilaanas di.

<sup>11</sup> Asi na pag ibilin ay mawada amin ay kalasin di gomabay isnan lota, ay kaman din natnateng ya din kakaiw, din manlames ya din waday bin-i na. <sup>12</sup> Ginmabay da tetewa, et napnek si Diyos sin nangilaana. <sup>13</sup> Makdeng pay din labi yan kasin mapat-a, say maikatlo ay agew.

<sup>14</sup> Nankali si Diyos kasin yan kanana, “Mawada di silsilaw ed daya ta say maikasin din kaagawan ya labi ya ta mailasin abe di agew ya tawen ya siya abe din deam ya tiyagew <sup>15</sup> ya ta wada abey maninggaw sin daga.” Et natongpal. <sup>16</sup> Nan-amag si Diyos si doway napigsa ay silaw. Din kapigsaan, siya di din agew, et say mansey-ang sin kaagawan, yan din maikadwa pay et din bowan ay say maningtinggaw sin labi. Inamag na abe din tatalaw. <sup>17</sup> In-amag na am-in dana ed daya ta tinggawan da din daga <sup>18</sup> sin kaagawan ya siya abe sin labi ta say maikasin din mapat-a ya din mabolinget. Et napnek sin nangilaana. <sup>19</sup> Makdeng pay din labi yan kasin mapat-a, say maikap-at ay agew.

<sup>20</sup> Asi pag kanan Diyos, “Mawada di am-in ay kalasin di matago sin baybay ya din mantaytayaw abe ed daya.” <sup>21</sup> Et say namarsuaan Diyos sin am-in ay kalasin di nigay ya odom ay manbeey sin baybay, pati din dadakke ya kaeegyat, ya am-in abe ay kalasin di titit ed daya. Idi inila na din pinarsua na ay sana, napnek sisya. <sup>22</sup> Binindisyonanas daida ay mangwani, “Man-ganak kayo ta omad-ado kayo sin baybay ya sin daga.” <sup>23</sup> Makdeng pay din labi yan kasin mapat-a, say maikalima ay agew.

<sup>24</sup> Pag kanan Diyos en mawada di am-in ay kalasin di parsua isnan lota, din matalaken ya atap ay animal, din mankodkodap ya manbodbodod, et natongpal. <sup>25</sup> Inamag Diyos daida am-in, yan napnek sin nangilaana.

<sup>26</sup> Pag nan kanan, “Manparsua takos ipogaw ay kaman si datako ta say daida di makaoway sinan lobong ya din am-in ay parsua ay wadas na.” <sup>27</sup> Et pinarsuan Diyos di ipogaw ay lalaki ya babai, yan kaman sisya met laeng di iso da. <sup>28</sup> Binindisyonanas daida ay mangwani, “Man-ganak kayo ta omad-ado kayo ta mapno nan lobong. Makaoway kayo abe sin nigay ya titit ya amin abe ay parsua sinan labaw di daga. <sup>29</sup> Din lames di kakaiw ya odom ay mais-is-ek et idawat ko en dakayo ta say kanen yo. <sup>30</sup> Din kanen aben di titit ya am-in ay parsua ay mantee sin daga et din am-in ay kalasin di maata ay gomabay.” Et natongpal. <sup>31</sup> Inilan Diyos am-in di pinarsua na yan napnenapnek sisya tan maptemapteng. Makdeng pay din labi yan kasin mapat-a, say maikan-em ay agew.

## 2

<sup>1</sup> Siya di san nakdengan di namarsuaan Diyos sin daga ya din am-in ay wadas di ya din am-in abe ay wada ed daya.

<sup>2</sup> Domateng pay din maikapito ay agew et say nan-ibbayan Diyos, tan enggay nakdeng din obla na. <sup>3</sup> Binindisyonana din agew ay nay et tinodingana ta mailasin sin odom ay agew, tan say nangisaldengana sin obla na ay namarsuas am-in.

### *Din Siged Ay Daga Ed Eden* (2:4-9,15-17)

<sup>4</sup> Naey pay di dad-at ay maipanggep sin naamag sin lobong ya din am-in ay wada ed daya idi nakdeng ay pinarsuan Diyos. <sup>5</sup> Sin damo, maga pay laeng di mola ay ginmabay ya bin-i si sinmimit, tan maga pay laeng di pinawadan Diyos si odan. Maga abe di ipogaw si mangsokay isnan daga. <sup>6</sup> Ngem olay mo siya di ay maga di odan, wada pay dedan di danom ay mapmapo sin dallem ay say mamasas lota.

<sup>7</sup> Siya na di inyat Diyos ay nangamag sin ipogaw. Nan-as tapok et say pinke nas awak na. Pag nan esib-ok sin eng na din leng-ag ay mangidawat si biyag, et pag matago din ipogaw.

<sup>8</sup> Idi siya di, waday insaganaan Diyos ay mayat ay daga ta panbeeyan din ipogaw ay inamag na. Din daga ay sana, wada ed Eden ay maibanda sin belaan di agew. <sup>9</sup> Say nangipagabayan Diyos sin am-in ay kalasin di kaiw ay din mayat di boya na ya din makan abe di lames na. Sin gawan di daga ay sana, waday kaiw ay mo mangan di ipogaw sin lames na, matago das eng-enggana. Wada abey kaiw ay mo mangan das di et ammoan da din siged ya lawa. <sup>10 11 12 13 14</sup>

<sup>15</sup> Din daga ed Eden ay sana, say nangipay-an Diyos sin ipogaw ay inamag na ta ay-ayowanana ay kosto. <sup>16</sup> Tinogonas sisya ay nangwani, “Mabalin ay mangan ka sin am-in ay lames di kaiw ay wadas na <sup>17</sup> powira din esay kaiw ay pangammoam sin siged ya lawa, tan sin agew ay panganam sidi, sigurado ay makedngan ka ay matey yan maisian ka abe en sak-en.”

### *Din Nangamagan Diyos Sin Damo Ay Babai (2:18-25)*

<sup>18</sup> Pag kanan Diyos si nemnem na, “Baken siged mo man-es-esa din lalaki ay nay. Man-amagak ngarud si kabadang na ay maibagay en sisya.” <sup>19</sup> Asi na pay en alaen am-in ay animal ya titit ay inamag na sin lota et in-ey na sin lalaki ta ngadananas daida. Olay sino ay inpangadana en daida yan say ngadan da tet-ewa. <sup>20</sup> Et say napoan di ngadngadan di am-in ay matalaken ya atap ay animal ya titit. Ngem magay mabalin si pan-ib-ib-an en Adan.

<sup>21</sup> Idi siya di, inpaseyep Diyos sisya. Idi naseseyep pay, kinaana di esay tadlang na, et pag nan iimag din lamalames sin nangaanana. <sup>22-25</sup> Asi na pay alaen din tadlang ay kinaana et nanbalinenas babai. Bomangon pay din lalaki, wada et din babai ay in-ey Diyos en sisya. Nakalabos da ay dowang, ngem adi da mabain. Kanan din lalaki, “Si naey pay di bagay ko, tan din tong-ak et tong-a na met laeng, ya din lamalames ko et lamalames na abe. Ngadanak sisyas babai,\* tan napo sin lalaki.” Say gapo na ay taynan di lalaki da ama na en ina na ta ibeey na din asawa na, et manbalin das es-esa.†

## 3

### *Din Damo Ay Basol*

<sup>1</sup> Asi et wada di eweg ay kasisikapan sin am-in ay atap ay pinarsuan Diyos. Waday esay agew, kanan din eweg sin babai, “Ay siya od ay inbagan Diyos ay maiparit ay mangan kayo sin olay sino ay lames di kaiw ay wadas na?”

<sup>2</sup> Kanan din babai ay sinombat, “Inbagan Diyos ay mabalin ay mangan kami sin am-in ay lames di kaiw <sup>3</sup> powira din wada sin gawan di daga ay nay. Kanana en mo kanen mi di ono giwiten mi anggoy, matey kami.”

<sup>4</sup> Asi et kanan din eweg, “Ay siya mo matey kayo? <sup>5</sup> Say inbagan Diyos sa en dakayo tan ammo na ay mo mangan kayos di, mais-o kayo en sisya, et ammoen yo din siged ya lawa.”

<sup>6</sup> Pag kasin isin-eng din babai din lames di kaiw ay doy. Siged ya mam-is di kailaana, dowan kanan nemnem na en siged ay kapoan di panlaingana, isonga nan-a sin lames di kaiw et kinana. Asi na indawtan si asawa na yan kinana abe. <sup>7</sup> Idi kosto ay kinan da, inawatan da din napasamak en daida, yan dinlaw da ay nakalabos da. Nan-a da ngarud si bolong di kaiw ay igos et dinait da ta say panlingeb da sin awak da.

<sup>8</sup> Idi masmasdem pay, dinnge da ay manmandan si Diyos sin daga ay kad-an da, et intabonan da sin kakakkaiwan. <sup>9</sup> Asi et kinalian Diyos din lalaki yan kanana, “Intoy kad-am?”

<sup>10</sup> Sinongbatan din lalaki, “Dinngék ay manmandan ka sin daga ay nay, et enak nantabon tan nakalabosak yan emegyatak en sik-a.”

\* **2:22-25** Sin Hebreo, mais-o di kadngan di kali ay babai (ishshah) sin lalaki (ish). † **2:22-25** Mateo 19:5, Marcos 10:7-8, 1 Corinto 6:16, Efeso 5:31.

<sup>11</sup> Kanan Diyos en sisya, “Intoy nangammoam ay nakalabos ka? Ay tan nangan ka sin lames di kaiw ay inparit ko en dakayo?”

<sup>12</sup> Kanan din lalaki ay sinombat, “Din babai dedan ay in-alim en sak-en. Sisya di nangidawat sin lames di kaiw ay doy, et kinan ko.”

<sup>13</sup> Asi pag kanan Diyos sin babai, “Apay nga say inamag mo di?”

Sinongbatan din babai, “Inmietek tomet din eweg, isonga kinan ko din lames di kaiw ay doy.”

### *Din Nanosaan Diyos En Da Adan Ya Din Eweg*

<sup>14</sup> Pag kanan Diyos sin eweg, “Maitken ka sin am-in ay parsua tan dosaek sik-a. Enggana sin kateyam, manbodbodods ka yan makiokmon moy lota. <sup>15</sup> Manipod abe ed wani, man-ib-ibaw kayo sin babai ya siya abe sin ipoli yo. Katem din mokod di poli na, ngem din poli na pay et pis-itenan toktok mo.”

<sup>16</sup> Kanan aben Diyos sin babai, “Aped na ay omad-ado di ligat mo, namnamed no man-anak ka, ngem aklongam pay dedan si asawam yan sisya di mangituray en sik-a.”

<sup>17</sup> Asi kanan Diyos sin lalaki, “Gapo ta pinatim din asawam yan nangan ka sin inparit ko, lomawlawa din lota. Masapol ay manligat ka ay mangsokay ta way omanay si kanen yo enggana ay mapospos di biyag mo, <sup>18</sup> tan mawada di pagat ya am-in ay kalasin di lawlawa ay logam et mangan kayo sin owat gomabgabay ay mola. <sup>19</sup> Katet-ewa na, masapol ay manling-et ka ay man-obla ta say waday kanen yo enggana ay mantaoli ka sin lota. Tan napo kas lota, et mo matey ka, lota met laeng di panbalinam.”

<sup>20-21</sup> Makdeng pay ay inbaga na di, en nan-as kopkop di animal et inamag nas bado et inpabado na en daida.

Et si Adan, nginadanas asawa na si Eva,\* tan sisya din napowakan di am-in ay ipogaw.

### *Din Nangipakaan Diyos En Da Adan Sin Daga Ed Eden*

<sup>22</sup> Idi siya di kanan Diyos si nemnem na, “Nais-o din lalaki ya babai en datako, tan inammoan da din siged ya din lawa. Gapo ta say inyat da di, sigaak mo man-a da abe sin lames di kaiw ay mangidawat si biyag. Tan mo say kanen da di, matago da ay eng-enggana.” <sup>23</sup> Isonga pag pakaanen Diyos daida sin siged ay daga ed Eden ta en da oblaen din lota, tan lota met laeng di inamag Diyos si awak di lalaki ed idi. <sup>24</sup> Asi na ibaa di kaeegyat ay gogowardiya† ay napod langit ta siliban da din segpan di daga ed Eden ay naibanda sin belaan di agew. Tinood na abe di man-ganggangab ya manposposipos ay kampilan sin segpan, et say manawsawad sin danan ay emey sin kaiw ay mangidawat si biyag ta maga polos di omasag-en.

## 4

### *Da Cain En Abel*

<sup>1</sup> Pag siya di et nandaag da Adan en Eva ay asawa na et mawad-an sisya. Idi nan-anak pay, lalaki, et nginadanas Cain ay nangwani, “Binadangan Diyos sak-en ay mangipabelas lalaki.” <sup>2</sup> Man-anak pay kasin, esa abe ay lalaki, et nginadanan das Abel.

Idi nadakdake din sin-agi ay sana, nankinalasi di obla da. Si Abel di nangay-ayowan sin karnero da. Si Cain pay et nansamsama. <sup>3</sup> Idi namingsan, nan-as Cain sin naom ay lames di inis-ek na et indatona en Diyos. <sup>4</sup> Mo si Abel pay yan nanpilis malames ay besag di karnero, et indatona en Diyos din kamayatan ay parti na ay waday taba na. Idi inilan Diyos din indaton da ay sana, napnek en Abel ya din indatona, <sup>5</sup> ngem adi napnek en Cain ya din indatona. Isonga palalo di bonget Cain yan manmimidoot.

\* **3:20-21** Din olog di Adan sin Hebreo et “kaipoipogaw.” Mo din ngadan Eva pay et mais-o di kadngeana sin kalin di Hebreo ay din olog na et “biyag.” † **3:24** Din gogowardiya ay nay et napayakan ay parsua ay makwani abe en kerubim. Ilaen abe sin Exodo 25:18-22 ya Naipaammo 4:6-8.



<sup>6</sup> Asi et nginalat Diyos sisya yan kanana, “Apay nga manmimidoot kas bonget mo? <sup>7</sup> Mo doy ya kosto di inamag mo koma, inawat ko abe din indaton mo.\* Ngem gapo ta lawa din inamag mo, nakasaganas Satanas ay manolisog en sik-a kasin. Laydena ay awisen sik-a ay manbasol, isonga masapol ay abakem sisya.”

<sup>8</sup> Idi siya di, nakingalat si Cain sin iyogtana ay si Abel yan kanana, “En ta sin dontog.” Idi nadipos da, binigla na ay pinse din iyogtana.

<sup>9</sup> Siya pay di kanan Diyos en Cain, “Intoy kad-an iyogtan mo ay si Abel?”

“Toan adi. Ay tan sak-en od di makaammo en sisya?” kanana.

<sup>10</sup> Asi et kanan Diyos, “Apay nga say inamag mo di? Inilak din dadan iyogtan mo ay inmayos sin lota, yan kaman mankedaw ay maibaes. <sup>11</sup> Isonga din lota met laeng di kapoan di dosam, tan sinepsepana din dadan iyogtan mo. <sup>12</sup> Manipod ed wani, mo way is-ek mo sin lota et matiltil ya manngidngid. Pilit abe ay lomikeliked kas owaoway sinan daga, tan mamaga di kosto ay ilim.”

<sup>13</sup> Idi dinngen Cain din inkeddeng Diyos ay dosa na, kanana, “Adiak kaya din dosa ay sana, tan nalabes ay madagsen. <sup>14</sup> Nay et ay omipakaan ka sin lota, yan maisianak abe en sik-a. Maga abe di kosto ay ilik, mo adi lomikelikedak si owaoway sinan daga. Mo wada pay di mangabet en sak-en, pomse da.”

<sup>15</sup> “Aga met a,” kanan Diyos, “tan mo way mamse en sik-a, maibaes si biyag di pito ay ipogaw.” Et minalkaanas Cain ta adi peslen di mangabet en sisya. <sup>16</sup> Pag komaan si Cain sin kad-an Diyos et inmey ed Nod<sup>†</sup> ay esay ili ay naibanda sin belaan di agew mo ed Eden.

### *Din Polin Cain*

<sup>17</sup> Idi siya di, nangasawa si Cain et nan-anak da si lalaki ay nginadanan da si Enok. Pag man-amag sisya si siyodad, et inngadana din ngadan di anak da ay si Enok sin siyodad ay doy. <sup>18</sup> Nangasawa abe si Enok et waday anak na ay manngadan si Irad ay say aman en Mehujael. Si Mehujael et sisya di aman en Metusael ay say nangin anak en Lamek. <sup>19</sup> Dowa di asawan Lamek ay da Ada en Zilla. <sup>20</sup> In-anak Ada si Jabal ay say nangipoli si mantaltalaken si animal ya manbebbeey si tolda. <sup>21</sup> Si Jubal din iyogtan Jabal ay nangipoli si omaayam si gitara ya tongali. <sup>22</sup> Inmanak abe si Zilla et nangadanan si Tubal Cain, et sisya abe di nangipoli si manpanpanday si nankakalasi ay laminta ay bronsi ya landok. Wada di agin Tubal Cain ay babai ay manngadan si Naama.

<sup>23</sup> Sin namingsan, inayagan Lamek din dowa ay asawa na yan kanana en daida ay nangikanta,

“Dakayo ay asawak ay da Ada en Zilla,  
dengngen yo kod nan enak ikanta.

Waday nanakit en sak-en ay baro,  
et pinsek ay inbaes ko.

<sup>24</sup> Si Cain, mo waday mamse en sisya,  
maibaes si biyag di pito ay ib-a,  
ngem si sak-en pay et mo pomse da,  
pitopolo ya pito di matey. Siya man sa.”

<sup>25</sup> Idi nan-anak kasin da Adan si esa ay lalaki, kanan asawa na, “Indawtan Diyos sak-en si anak ay lalaki ta waday maiskat en Abel ay pinsen Cain.” Siya di et nginadanana si Set din anak na ay doy. <sup>26</sup> Idi nangasawa si Set et doy bemela din anak da, nginadanana si Enos. Din timpo ay doy et say nangilogian di ipogaw ay mangosal sin ngadan Diyos sin panaydayawan da en sisya.

\* **4:7** Di esa abe ay kaiologan nina sin Hebreo et: masiyek ka abe. † **4:16** Di olog di Nod et “lomikeliked.”

## 5

*Din Polin Da Adan*  
(5:1,3-32)

<sup>1a</sup> Naey di listaan di polin Adan. <sup>1b</sup> <sup>2</sup> <sup>3</sup> Idi nantawen si Adan si 130, binmala di anak na ay is-iso na, et ngingadanas Set. <sup>4</sup> Natago pay laeng si Adan si 800 ay tawen yan waday odom ay anak na. <sup>5</sup> Idi waday 930 ay tawena, natey.

<sup>6</sup> Si Set abe, idi nantawen si 105, binmala di anak na ay si Enos. <sup>7</sup> Makdeng di, natago pay laeng si Set si 807 ay tawen yan waday odom ay anak na. <sup>8</sup> Asi matey ay mantawen si 912.

<sup>9</sup> Idi mantawen pay si Enos si 90, binmala di anak na ay si Kenan. <sup>10</sup> Nanbiyag pay laeng si Enos si 815 ay tawen yan wada abey odom ay anak na. <sup>11</sup> Idi waday 905 ay tawena, natey.

<sup>12</sup> Idi mantawen abe si Kenan si 70, naianak si Mahalalel. <sup>13</sup> Makdeng di, natago pay laeng si Kenan si 840 ay tawen yan wada abey odom ay anak na. <sup>14</sup> Asi matey ay mantawen si 910.

<sup>15</sup> Idi mantawen pay si Mahalalel si 65, naianak si Jared. <sup>16</sup> Makdeng di, nanbiyag pay laeng si Mahalalel si 830 ay tawen yan wada abey odom ay anak na. <sup>17</sup> Asi matey ay mantawen si 895.

<sup>18</sup> Idi mantawen pay si Jared si 162, naianak si Enok.\* <sup>19</sup> Makdeng di, natago pay laeng si 800 ay tawen yan wada abey odom ay anak na. <sup>20</sup> Asi matey ay 962 di tawena.

<sup>21</sup> Idi 65 di tawen Enok, naianak si Metusela. <sup>22</sup> Nanipod sisi, siged di pakikadkad-waana en Diyos si 300 ay tawen yan wada abey odom ay anak na. <sup>23</sup> Idi mantawen si 365, <sup>24</sup> makikadkadwa pay laeng en Diyos, et namaiwed, tan inan Diyos sisya.

<sup>25</sup> Idi mantawen pay si Metusela si 187, naianak si Lamek. <sup>26</sup> Manipod sisi, natago pay laeng si Metusela si 782 ay tawen yan wada abey odom ay anak na. <sup>27</sup> Mantawen sisya si 969, asi matey.

<sup>28</sup> Idi nantawen pay si Lamek si 182, binmala di anak na ay lalaki, <sup>29</sup> et ngingadanas Noe† ay nangwani, “Din anak ay nay, palaglag-anena din ligat tako ay mangobla sin lota ay inpalawlawan Diyos.” <sup>30</sup> Manipod sin naianakan Noe, natago pay laeng si Lamek si 595 ay tawen yan wada abey odom ay anak na. <sup>31</sup> Asi matey ay mantawen si 777.

<sup>32</sup> Si Noe pay, idi enggay nantawen si 500, asi man-ganak si tolo ay lalaki ay da Sem en Ham ya si Jafet.

## 6

*Din Kinamanagbasol Di Ipogaw*

<sup>1</sup> Idi siya di, inmad-ado di ipogaw sinan daga yan inmad-ado abe din anak da ay babai.

<sup>2</sup> Idi inilan di anan-ak di Diyos\* din kinabasang di babbabai ay sana, nanpili das layden da ay asawaen. <sup>3</sup> Asi et kanan Diyos, “Adi anosan din Ispiritok san iyat di ipogaw ay eng-enggana,† tan owat dan ipogaw dedan, isonga mo emey di sin-gasot ya downpo ay tawen, pap-enggek din panbiyagan das nan daga.”‡

<sup>4</sup> Sin siya di ay timpo ay nandaagan di anan-ak di Diyos ya din inasawa da ay babbabai yan sin omon-onod ay tawen abe, say binmelaan di ipogaw ay palalo ay dadakke. Din ipogaw ay sana et ad-adoy naidaddad-at ay maipanggep sin inam-amag da ed nabaon.

\* **5:18** Da Enok en Lamek (v.25) ay naibaga sin kapitolo ay nay et polin Set. Natken di kangadngadanan da ay polin Cain sin 4:17-18. † **5:29** Mais-o di kadngan di Noe sin kalin di Hebreo ay din olog na et “nalaglag-an di ligat.”

\* **6:2** Toloy pangawat di ipogaw sin olog di anan-ak di Diyos: 1) aanghel (ilaen sin Jude 6-7); 2) nadiyosan ay polin Set; 3) polin di aari. † **6:3** Di dowab abe ay kaiologan nina sin Hebreo et: Adi mantetee din Ispiritok sin ipogaw ay eng-enggana ono Adiak ipalobos ay matago di ipogaw ay eng-enggana. ‡ **6:3** Di esa abe ay kaiologan nina sin Hebreo et: isonga manipod ed wani, adi da matago si nasursurok ay sin-gasot ya downpo ay tawen.

<sup>5</sup> Idi inilan Diyos ay palalo ay lawlawa di am-amagen di ipogaw ya lawa abe di nemnememen das kankanayon, <sup>6</sup> mansakit di nemnem na yan manbabbabawi ay namarsuas ipogaw sinan daga. <sup>7</sup> Yan kanana, “Dosaek din ipogaw ay sana ay pinarsuak, pati din animal ya titit, ta maga di mabay-an isnan labaw di daga, tan nay et ay manbabawiak ay namarsua en daida.” <sup>8</sup> Ngem napnek pay si Diyos en Noe.

<sup>9-10</sup> Naey di dad-at ay maipanggep en sisya. Waday toloy anak Noe ay lalaki ay da Sem en Ham ya si Jafet. Sin doy ay timpo, eng-enggay na si nalinteg ay ipogaw ay magay nankolangana. Siged abe di pakikadkadwaana en Diyos. <sup>11</sup> Mo din odom pay ay ipogaw, peteg ay lawa di ogali da sin pangilan Diyos yan masepsep ay mandinadael da.

### *Din Inyat Noe Ay Nangamag Sin Daong*

<sup>12</sup> Idi inilan Diyos ay pag lawa di am-amagen di ipogaw, <sup>13</sup> kanana en Noe, “Ninemnem ko ay gedngan di biyag di am-in ay ipogaw, tan enggay napno nan lobong si lawa ay inam-amag da. Awni et dadlonak dosaen daida pati din lobong. <sup>14</sup> Man-amag ka ngarud si dakdake ay daong ono bapor ay ad-adoy kowarto na. Makneg ay tabla di iamag mo. Asi ka allidan si niket sin nanbinas-il. <sup>15</sup> Din kadakdake na pay et 450 ay piya di kaando na, 75 ay piya di kaannawa na, ya 45 ay piya di kakayang na. <sup>16</sup> Amagem si toloy galado yan atpam ya taangam si 18 ay polgada. Man-amag ka abes pantew sin dingding na. <sup>17</sup> Say iyat mo di, tan awni et lebnggek din lobong et matey am-in di waday leng-ag na sin labaw di daga. <sup>18</sup> Ngem mo sik-a pay, waday ikarik en sik-a. Mo makdeng din daong ay sana, senggep kayo ay sin-asawa pati din an-ak yo ya din as-awa da. <sup>19-20</sup> Ipasgep yo abe di manparis sin am-in ay kalasin di animal ya mantaytayaw, pati manbododos ya mankodkodap, ta way iyat da ay matago. <sup>21</sup> Man-olnong kayo abe si am-in ay kalasin di makan et ipenpen yo sin daong ta way kanen yo ya kanen aben di animal ya titit ay sana.” <sup>22</sup> Siya sa di inbilin Diyos en Noe, et tinongpal na am-in.

## 7

### *Din Nanlebngan Diyos Sin Daga*

<sup>1</sup> Idi makdeng pay din daong, kanan Diyos en Noe, “Senggep kayo am-in ay pamilya, tan sik-a anggoy di ammok sin labaw di daga ay nalinteg di ogali na. <sup>2</sup> Ipasgep yo abe di manparis sin am-in ay kalasin di animal ay maibilang ay kadodogis. Mo din maibilang ay nalinis pay,\* ipasgep yo di sagpipito ay manparis. <sup>3</sup> Siya abe sin am-in ay kalasin di titit, ipasgep yo di sagpipito ay manparis. Say iyat mo di ta way iyat da am-in ay manganak ya maad-ado kasin isnan daga. <sup>4</sup> Tan mo emey di pito ay agew, ibaak di odan, et iweswes na ay mandeges si opatapolo ay agew ya labi enggana ay malned am-in ay pinarsuak isnan labaw di daga.” <sup>5</sup> Say inbagan Diyos di, et inamag Noe amin di naitogon en sisya.

<sup>6</sup> Enem ay gasot di tawen Noe sin sinenggepana sin daong. <sup>7</sup> Daida ay sin-asawa ya din an-ak da ay da Sem en Ham ya si Jafet ya din as-awa da et sinenggep da am-in ta way iyat da ay mangilsot sin lebeng. <sup>8</sup> Inmey abe sin kad-an da Noe di manparis ay am-in ay kalasin di animal ya titit, pati manbododos ya mankodkodap, waday maibilang ay nalinis, wada abey kadodogis, <sup>9</sup> et nakisgep da am-in, tan siya met laeng di inbilin Diyos. Et asi pag in-eb Diyos.

<sup>10</sup> Malabas pay di pito ay agew, dinmateng tet-ewa din lebeng. <sup>11</sup> Naitompong sin pitsa 17 di maikadwa ay bowan sin maikan-em ay gasot ay tawen Noe. Sin siya di ay agew, binomtak din poon di obbog ya ginawang et kabelang am-in di danom sin oneg di daga. Kabokat abes Diyos sin kad-an di danom ed kayang <sup>12</sup> et logiana ay mandeges. <sup>13</sup> Ngem mo da Noe pay, laton ay sinesenggep da am-in ay pamilya sin daong, <sup>14-16</sup> pati am-in ay

\* **7:2** Din maibilang ay kadodogis et din maiparit ay maidaton en Diyos ya maisida. Din nalinis pay et din maibagay ay maidaton ya maisida.

kalasin di animal ya titit ay inbilin Diyos, ay din maayew ya din atap, din dadakke ya din kinittoy ay lalaki ya babai.

<sup>17</sup> Intoltoloy din odan ay dinmegegedes si opatapolo ay agew ya labi dowan dinmakdake din danom enggana ay tomay-apew din daong. <sup>18</sup> Intoltoloy din danom pay laeng ay domakdake et tinmay-atay-apew din daong sin labaw di danom. <sup>19</sup> Neyneyna et nalim-otan am-in di kakayangan ay dontog <sup>20</sup> enggana ay nasurok ay opat ay depa di kalosong di danom sin kayang di dontog ay sana. <sup>21</sup> Et nalned am-in di ipogaw ya am-in abe ay animal ya titit isnan labaw di daga. <sup>22</sup> Olay sino ay manlenglang-ag et natey, <sup>23</sup> tan dinosan Diyos daida. Din naipowira anggoy et da Noe ya din naitapi en daida sin daong. <sup>24</sup> Et kinmakaman din lebeng sin daga si sin-gasot ya limapolo ay agew.

## 8

### *Din Natdokan Di Lebeng*

<sup>1</sup> Idi siya di, laton ay ninemnem Diyos da Noe ya am-in ay animal ay nakisgep en daida sin daong. Yan inbaa nay napigsa ay dagem ta madageman din daga. <sup>2</sup> Pintet aben Diyos din bemelbelaan di danom sin oneg di daga yan inpasaldeng na abe din odan. Et pag ilogin din danom ay matyadan. <sup>3</sup> Idi nalabas di sin-gasot ya limapolo ay agew, binmaba din danom <sup>4</sup> enggana ay sinmeeng din daong sin esay dontog sin kadondontogan ed Ararat. Say naamag di sin pitsa 17 di maikapito ay bowan. <sup>5</sup> Neyneyna matmatyadan din danom enggana ay nabonsian din toktok di dontog sin omona ay agew di maikasinpo ay bowan.

<sup>6</sup> Makdeng abe di opatapolo ay agew, binokatan Noe din inamag na ay tawa <sup>7</sup> et inbolos nay gayang. Din gayang ay sana et adi nantattaoli sin daong mo adi et oway di inimeyana engganans namgaan din daga. <sup>8</sup> Inbolos na abey kalapati ta say pangammoana mo binmaba din danom, <sup>9</sup> ngem gapo ta deda ay nanalbeng din daga yan maga di dintenganas ompaana, nantaoli sin daong. In-adawan Noe din takkay na ta say ompaan din kalapati et inpasgep na kasin. <sup>10</sup> Nanseed pay laeng si pito ay agew, asi na kasin pabelaen. <sup>11</sup> Malablabi pay, nantaoli ay nangidateng si kapotpoting na ay tobon di kaiw ay olivo. Et say nangammoan Noe ay enggay binmaba din danom sin daga. <sup>12</sup> Idi inmey abe di pito ay agew, inbolos na kasin din kalapati, ngem adi nantaoli.

<sup>13</sup> Idi wada pay di enem ay gasot ya esay tawen en Noe sin omona ay agew di damo ay bowan, enggay natdok din danom sin labaw di daga. Kinaan Noe din odom ay atep din daong ta way iyat na ay mangisin-eng ay kosto, et inila na ay mammamgaan din lota.

<sup>14</sup> Sin pay pitsa 27 di maikadwa ay bowan, enggay namgaan din daga, <sup>15</sup> et kanan Diyos en Noe, <sup>16</sup> “Bomala kayo am-in sin daong, dakayo ay sin-asawa ya din aan-ak yo ya din asawa da. <sup>17</sup> Pabelaen yo abe am-in ay titit ya animal ta say mansisian da ya man-anak da ta way iyat da ay omad-ado kasin sin daga.”

<sup>18</sup> Siya di et binmela da Noe ay sinpamilya, <sup>19</sup> yan siya abe din animal ya titit ay nakitettee en daida sin daong et nankokoyog da insigon sin kalasi da.

<sup>20</sup> Idi siya di, nan-amag si Noe si altar. Pag man-as saes-a sin am-in ay kalasin di animal ya titit ay maibilang ay nalinis et pinooana sin altar ay sana ay mangidaton en Diyos. <sup>21</sup> Idi sinongsong Diyos din seng-ew di indaton Noe en sisya, kananas nemnem na, “Laton, adiak kasin dosaen din daga begew sin amagen di ipogaw, tan ammok ay lawlaway pay dedan din nemnemnemen da manipod sin kakitkittoy da. Isonga adiak ipidpidwa ay dosaen din am-in ay manlenglang-ag ay kaman din inyat ko ed wani. <sup>22</sup> Engganans deda nan lobong, wada di pinag-eesek ya pinag-aani, omatongana ya temeg-inana, deam ya tiyagew, ya din kaagawan ya labi.”

## 9

### *Din Inkarin Diyos En Noe*

<sup>1</sup> Binindisyonan Diyos si Noe ya din an-ak na ay mangwani, “Man-ganak kayo ta omad-ado kayo kasin isnan lobong. <sup>2</sup> Manipod ed wani, emegyat en dakayo am-in ay kalasin di atap ay animal, pati manbodbodos ya mankodkodap ya am-in abe ay mantaytayaw ed daya ya mantettes baybay, tan idawat ko en dakayo di lebbeng ay mangituray en daida. <sup>3</sup> Manipod ed wani abe, mabalin ay isida yo di olay sino en daida ay kaman din in-inyat yo ay mangan sin kompormi ay gomabgabay, tan ipalobos ko ay mangan kayo sin am-in. <sup>4</sup> Din iparit ko anggoy ay isida yo et din karni ay deda pay laeng di dada na, tan din dada et say kad-an di biyag na.

<sup>5-6</sup> “Nabanol abe di biyag yo ay ipogaw, tan inamag kos dakayo ay mais-o en sak-en met laeng. Isonga mo sinoy manpeses ipogaw, keddengak ay man-ikaro, tan mo waday animal ay manpeses ipogaw, dosaek ta say kateyana. Mo wada abey ipogaw ay manpeses ib-a na, ipogaw met laeng di mamse en sisya. <sup>7</sup> Isonga adi kayo manpesese mo adi et man-ganak kayo ta way iyat yo ay omad-ado yan maiwaras kayo isnan daga.”

<sup>8</sup> Kanan aben Diyos en Noe ya din an-ak na, <sup>9</sup> “Wada di ikarik en dakayo ya din ipoli yon to. <sup>10</sup> Mailak-am abe am-in ay parsua ay nakibela en dakayo sin daong. <sup>11</sup> Din ikarik en dakayo et siya na. Manlogi ed wani, adiak kasin lebngen nan daga ta malned amin ay matmatago ya madadael am-in din wadas na.

<sup>12</sup> “Din pangammoan yo ay komakaman si eng-enggana nan inkarik en dakayo ya sin am-in abe ay parsua <sup>13</sup> et waday ipeey ko ay badkong ono abonga ed kayang, ta say sinyal di inkarik ay nay. <sup>14</sup> Siya di, basta waday ipadateng ko ay liboo ed kayang yan maila di badkong sidi, <sup>15-17</sup> ilaek abe yan nemnemek din inkarik en dakayo ya am-in abe ay matmatago ay maga kasin di lebeng ay kateyan di am-in ay matmatago. Siya adi di sinyal di inkarik en dakayo ya sin am-in abe ay parsua.”

### *Si Noe Ya Din Anan-ak Na*

<sup>18</sup> Da naey di anak da Noe ay binmela sin daong, da Sem en Ham ya si Jafet. (Din si Ham ay nay et say nangipoli en Canaan.) <sup>19</sup> Din toloy anak na ay nay et daida di napowakan di am-in ay ipogaw isnan labaw di daga.

<sup>20</sup> Si Noe et say damo ay mantaltalon ay nan-esek si obas. <sup>21</sup> Idi namingsan, nabeteng sin ininom na ay danom di obas ay naamag si arak. Siya et di nanlalabos ay naseyep sin beey da ay tolda. <sup>22</sup> Idi inilan Ham ay aman Canaan ay nanlalabos si ama da, kabela et ena ibaga sin aag-i na. <sup>23</sup> Pag et man-as da Sem en Jafet si nagayad ay bado et igaley da en ama da. Nanbindayangan da ay insasampay da sin padanga da. Pag dan mansansanod ay sinenggep sin beey da ay nangaley en ama da ta say adi da ilaen sisya ay nanlalabos. <sup>24</sup> Idi naimosngan si ama da yan inammoana din inamag Ham ay say anongos ay anak na, <sup>25</sup> kanana, “Awni man et madosa si Canaan ya manbalin ay kababaan ay bag-en di aag-i na. <sup>26-27</sup> Ngem sapay koma ta madaydayaw si Diyos ay din Diyos en Sem. Paannawaen koma aben Diyos din dagan Jafet ya makilak-am koma sin bindisyon ay gon-oden Sem. Siya man et maibag-en si Canaan en daida ay dowa.”

<sup>28</sup> Nanipod sin nanlebngan Diyos sin daga, natago si Noe si 350 ay tawen pay laeng. <sup>29</sup> Indasana di 950 ay tawen, asi matey.

## 10

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32

## 11

### *Din Nankinalasian Di Kalin Di Ipogaw (11:1-9)*



<sup>1</sup> Idi siya di, es-esa di kalin di am-in ay ipogaw isnan daga. <sup>2</sup> Idi manbiyahi da pay ay emey sin kad-an di belaan di agew, waday dinatngan da ay annawa ay tanap ed Sinar\* et nan-ili das di.

<sup>3</sup> Idi namingsan, nanngangalat da yan kanan da, “En tako mandamilis linang ta way amagen tako si beey tako.” Et say inyat da di. Inset da ay nangioto sin linang ta komenteg, et aspalto abe di inpakpak da. <sup>4</sup> Asi da kanan, “Man-amag tako et si siyodad ay way beey ay omdas ed daya ta say madayaw tako ya adi tako mansisian sin labaw di daga.”

<sup>5</sup> Osdongan pay Diyos din siyodad ya din nakayang ay beey ay am-amagen da, <sup>6</sup> kanana, “Mo say iyat da sa ed wani tan es-esay nemnem ya kali da, maga di adi da kabaelan sin tapin di agew. <sup>7</sup> En tako ngarud isdi ta pankinalasien tako di kali da ta say adi da mankinaawatan.” <sup>8</sup> Et say inamag Diyos di, et pag mansisian din kaipoipogaw sin labaw di daga yan adi da intoloy ay nangamag sin siyodad ay doy. <sup>9</sup> Say begew ay ngingadanan da din ili ay doy si Babel† ono Babilonia, tan say nangipankinalasian Diyos sin kalin di ipogaw. Et nanlogi isdi, enggay naiwarawaras da sin intiro ay lobong.  
10 11 12 13 14 15 16 17 18 19 20 21 22 23 24 25 26

### *Din Listaan Di Polin Sem Ay Ap-on Abram (11:27-32)*

Naey di listaan di polin Sem ay anak Noe. Si Sem et say aman Arfaxad ay aman aben Sela. Si Sela yan aman Eber ay aman aben Peleg. Si Peleg et say aman Reu ay aman aben Serug. Si Serug di aman Nahor, yan si Nahor di aman Tera. (11:10-26)

<sup>27</sup> Si Tera et say aman da Abram en Nahor ya si Haran. Si Haran pay di aman Lot. <sup>28</sup> Asi et natey si Haran sin ili na ay Ur ay sakop di Babilonia idi deda pay laeng si ama na. <sup>29</sup> Nakiasawa abes da Abram en Nahor. Din asawan Nahor et si Milca ay pangpangoan Isca ay anak Haran, yan din asawan Abram et si Sarai. <sup>30</sup> Asi et maga di anak da Abram, tan basig din asawa na.

<sup>31</sup> Idi namingsan, inayagan Tera din anak na ay si Abram ya din apo na ay si Lot ay anak en Haran ya din innapo na ay si Sarai ay asawan Abram, et kinmaan da ed Ur ay sakop di Babilonia ta emey da koma ed Canaan. Ngem idi sinmawang da ed Haran, nan-ili das di. <sup>32</sup> Et say ili ay nateyan Tera idi nantawen si 205.

## 12

### *Din Namilian Diyos En Abram*

<sup>1</sup> Waday esay agew, kanan Diyos en Abram, “Taynam din ilim ya toton-od mo ta emey ka sin ili ay itdok en sik-a. <sup>2</sup> Paad-adoek to din polim ta manbalin das madayaw ya napigsa ay nasyon. Bindisyonak sik-a abe si amin ay pansigdan, et madamag di ngadan mo isnan daga ta say sik-a abe di kapoan di bindisyon di odom. <sup>3</sup> Din mangamag si siged en sik-a et bindisyonak, ngem din manglaslasoy pay en sik-a et dosaek. Begew abe en sik-a, mabindisyonan di kaipoipogaw sin am-in ay ili.”\*

<sup>4</sup> Sin nangwanian Diyos sidi, pitopolo ya lima di tawen en Abram. Pinati na din inbilin Diyos et kinmaan ed Haran. <sup>5</sup> Inkoyog na si asawa na ay si Sarai ya din kaanakana ay si Lot ya am-in abe din bag-ena ya din gamgameng na ay emey ed Canaan.

Idi sinmawang das di, <sup>6</sup> nandad-an da enggana ed Sekem sin kad-an di inayan ay kaiw en More. Din kaiw ay nay di panaydayawan din taga-Canaan ay man-ili pay laeng isdi sin didiyosen da. <sup>7</sup> Say nanpailaan Diyos en Abram yan kanana, “Si naey din

\* **11:2** Di esa abe ay ngadan din ili ay nay et Babilonia. † **11:9** Mais-o di kadngan di Babel sin kalin di Hebreo ay din olog na et “nankinalasi.” \* **12:3** Di esa abe ay kaiologan nina sin Hebreo et: Yan din kaipoipogaw sin am-in ay ili, mankedaw das bindisyon ko ay kaman din iyat ko ay mamindisyon en sik-a.

daga ay idawat ko sin polim.” Pag mantopog si Abram si bato et man-amag si altar ay pangidatonanas animal en Diyos ay nanpaila en sisya.

<sup>8</sup> Idi siya di, komaan da Abram sidi et manpaabagatan da engganans domateng da sin kadondontogan sin nan-gawaan di Betel ya Ai. Nankampo das di si nabaybayag, et nan-amag kasin si Abram si altar, et nankararag en Diyos sidi.

<sup>9</sup> Asi manlobwat kasin da Abram et man-etaetan da ay manpaabagatan ed Negev ay wada sin sakop di Canaan met laeng.

### *Din Inmeyan Da Abram Ed Egipto*

<sup>10</sup> Domteng pay di betil ed Canaan, intoloy da ay nanpaabagatan ay emey ed Egipto ta mantetee das di si mabaybayag, tan enggay nasepsep din betil ed Canaan. <sup>11</sup> Idi nganngani ay domateng da ed Egipto, kanan Abram en asawa na ay si Sarai, “Mapmapteng ka kayman ay babai. <sup>12</sup> Adi pay mo ilaen daka sin taga-Egipto, kanan da en sin-asawa ta et pomse da ta asi daka asawaen. <sup>13</sup> Isonga ibagam ay sin-iyogtan ta ta balbalang adi da pomse mo adi et mayat di iyat da en sak-en begew en sik-a.”

<sup>14</sup> Idi dinmateng da pay ed Egipto, inilan tet-ewa din omili ay peteg ay mapteng si Sarai. <sup>15</sup> Et din odom ay oopisyal di ari, init-ek da din kinapintas na sin ari. Isonga inpaayag na ta maitapi sin kabebbeey na. <sup>16</sup> Manbegew en sisya, siged di inyat di ari en Abram et indawtanans ad-ado ay karnero, kalding, baka, dangki, kamel, ya bag-en.

<sup>17</sup> Asi et pinaligat Diyos si kaegyay ay sakit din ari ya am-in da ay bemebeey begew en Sarai ay asawan Abram. <sup>18</sup> Isonga inpaayag din ari si Abram yan kanana en sisya, “Apay nga adim inbaga ay sin-asawa kayo? <sup>19</sup> Apay nga inbagam anggoy ay sin-agi kayo et intolok mo ay ibeey kos sisya? Naey si asawam. Ayagam ta komaan kayo damdama!” <sup>20</sup> Et inbilin din ari sin sosoldado na ta itlod das daida sin beddeng di ili. Siya di kinmaan da Abram ay sin-asawa et intakin da abe din am-in ay gangameng da.

## 13

### *Din Nansianan Da Abram En Lot*

<sup>1-2</sup> Sin kad-an da Abram ed Egipto, enggay binmangkang sisyas karnero, kalding, baka, palata, ya balitok. Sin kinmaanana pay sidi, nantaoli ed Negev sin abagatan di Canaan ay nangitakin en asawa na ya am-in di gangameng na. Nakeey abe din kaanakana ay si Lot.

<sup>3</sup> Manipod ed Negev, intoltoloy da ay manpatongdo ay nansepsepad sin inil-ili engganans domateng da sin nankampoan da ed idi ay nan-gawaan di Betel ya Ai. <sup>4</sup> Say kad-an abe di inamag Abram ay altar ed idi, isonga idi sinmawang das di, nandayaw si Abram en Diyos.

<sup>5</sup> Si Lot pay et ad-ado abey baka, karnero ya kalding na. Wada abey pamilya na ya babag-ena. <sup>6</sup> Siya di mankolang din panpastolan das animal da tan nankoykoyog da ay dowang. <sup>7</sup> Et say nan-iibawan din panpaspastolen da ay dowang. Wada abe di Canaaneo ya Perezeeo ay man-ilis di.

<sup>8</sup> Idi siya di, inayagan Abram si Lot yan kanana en sisya, “Adi koma man-iibaw din babag-en ta, tan sin-ama ta damdama. <sup>9</sup> Piliem ngarud din laylaydem ay daga ta mansian ta. Mo sin kannigid di emeyam, emeyak abe sin kannawan. Mo din kannawan pay di piliem, emeyak abe sin kannigid.”

<sup>10</sup> Tamangen pay Lot din nandinmang ay daga, inila na ay maymayat din nanbinasil di ginawang ay Jordan engganad Zoar, tan nabaknang si danom ay kaman din siged ay daga ed Eden ono ed Egipto. Tan daan pay laeng dosaen Diyos din ili ay Sodoma ya Gomorra ay wadas di. <sup>11</sup> Isonga say pinili na din intiroy ay mapteng ay tanap ed Jordan. Tinaynan das Abram et inmey da sin patag di belaan di agew. <sup>12-13</sup> En da nakiili sin ipogaw sidi sin tanap, et in-amag dan tolda ay pankampoan da sin asag-en ed Sodoma

ay ilin di lawlawa ay ipogaw ay ad-adoy basol da en Diyos. Da Abram pay et nantetee da sin sakop di Canaan.

### *Din Nan-etanan Da Abram Ed Hebron*

<sup>14</sup> Idi kinmaan da Lot, kanan Diyos en Abram, “En ka mantamang ed amyanan ya ed abagatan ya sin belaan di agew ya siya abe sin diposan di agew. <sup>15</sup> Tan am-in ay matamang mo et idawat ko en sik-a ya din polim ta say daga yo si eng-enggana. <sup>16</sup> Paad-adoek abe din polim si kaman din tapok ay adi kabilang. <sup>17</sup> En ka ngarud mandan sin intiro ay daga ay sana ta boyoem, tan idawat ko am-in en sik-a.” Say inkarin Diyos en Abram.

<sup>18</sup> Et pag komaan da Abram sidi et man-etan da ed Hebron ay asag-en sin inayan ay kakaiw en Mamre. Et say nangamaganas esa ay altar ay pangidatonanas animal en Diyos.

## 14

1 2 3 4 5 6 7 8 9 10

### *Din Nangisalakanan Abram En Lot*

*(14:11-16)*

Idi siya di, waday opat ay ari ay en nangobat sin ari ed Sodoma ya Gomorra pati din aarin di tolo ay nandinmang ay ili. Din kangatoan sin oopat ay ari et si Kedorlaomer.

Idi nanlalaban da, inabak din opat ay ari ya din soldado da din sosoldadon di taga-Sodoma ya taga-Gomorra ya din gagait da, et pinse day odom downan linmayaw odom sin kadondontogan. *(14:1-10)*

<sup>11</sup> Et pinos da Kedorlaomer am-in din makan ya odom ay gamgameng ed Sodoma ya Gomorra et intagtag da. <sup>12</sup> Intagtag da abe din kaanakan Abram ay si Lot ya din gamgameng na, tan ed Sodoma met laeng di nan-iliana.

<sup>13</sup> Idi siya di waday linmayaw ay en nangisodsod si am-in en Abram ay din Hebreo ay mantetee sin asag-en di inayan ay kakaiw en Mamre. Din si Mamre ay sana ya din ag-i na ay da Escol en Aner et Amorreo da. Nakigait da am-in en Abram.

<sup>14</sup> Idi inammoan Abram ay nakidpap da din kaanakana ay si Lot, inayagana din nabayag ay babag-ena ay nalaing ay makigobat ta en da atikoen din nangitagtag en sisya. Tolon gasot ya sinpo ya wao da am-in. Inatiko das daida enggana ay indasan da ed Dan.

<sup>15</sup> Asi godwaen Abram din ipogaw na et senggep da sin kad-an da Kedorlaomer sin labi et inabak das daida. Inatiko da enggana ed Hoba ay amyanan di Damascus, <sup>16</sup> et insalakan das Lot ya din odom ay ipogaw ay intagtag da Kedorlaomer, pati babai ya lalaki. Tinaoli da abe am-in din naakew ay gamgameng.

### *Din Namindisyonan Melkizedek En Abram*

*(14:17-24)*

<sup>17</sup> Idi somaa pay da Abram ay napo sin nangabakan da en da Kedorlaomer ya din iib-a na ay aari, en inabat din ari ed Sodoma sin tanap ed Save ay kanan da abe en Tanap di Ari. <sup>18</sup> Wada abes Melkizedek ay ari ed Salem ay en nangabet en da Abram ay nangitakin si makan ya inom para en sisya. Gapo ta sisya din padin di Kangatoan ay Diyos, <sup>19</sup> binindisyonanas Abram ay nangwani, “Sapay koma ta bindisyonan daka sin Kangatoan ay Diyos ay namarsua ed daya ya sin daga. <sup>20</sup> Sapay koma abe ta madaydayaw si owaoway din Kangatoan ay Diyos ay namadang en sik-a ay nangabak sin kaibaw mo.” Asi pag idawat Abram en sisya din inkasinpon di gamgameng ay tinaoli na.

<sup>21</sup> Asi komali din ari ed Sodoma yan kanana en Abram, “Olay mo okaem amin din gameng, basta itaolim anggoy din ipogaw ko.”



<sup>22</sup> Kanan Abram ay sinombat, “Isapatak en Yahweh, din Kangatoan ay Diyos ay namarsua ed daya ya sin daga, <sup>23</sup> ay maga polos di alaek sin gameng mo, olay owat sinolid ono iket di sinilas tan into et ya kanam en sik-a di nangipabaknang en sak-en. <sup>24</sup> Isonga maga polos di alaek powira din kinan anggoy di ipogaw ko ya din bingay di iib-ak ay nay ay da Aner en Escol ya si Mamre.”

## 15

### *Din Inkarin Diyos En Abram (15:1-18)*

<sup>1</sup> Idi nakdeng amin dadi, waday inpailan Diyos en Abram ay kaman iitaw, yan dinngenas Diyos ay mangmangwani, “Ay Abram, adi ka emeg-egyat, tan salaknibak sik-a sin am-in ay kaeegyat. Dakdake abe di gon-gona ay idawat ko en sik-a.”

<sup>2-3</sup> Kanan pay Abram, “Aw ay Kangatoan ay Diyos, ngem sino ngin di pansigdak, tan nay et ay maga pay laeng di indawat mo ay anak ko, yan din bag-en ko anggoy ay si Eliezer ay taga-Damascus di manawid sin am-in ay gameng ko.”

<sup>4</sup> Asi et kanan Diyos, “Baken si sana di manawid sin gameng mo, mo adi et din kosto ay anak mo.” <sup>5</sup> Asi na ibala si Abram yan kanana, “Tangadem ed daya yan bilangem din talaw mo kabaalam, tan say kaad-adon di bilang di polim.” <sup>6</sup> Et dadlon pinatin Abram din kanan Diyos, isonga inbilang Diyos ay nalinteg sisya.

<sup>7</sup> Pag kanan Diyos en sisya, “Sak-en si Diyos ay nangipango en sik-a ay komaan ed Ur ay sakop di Babilonia ta idawat ko en sik-a din daga ay nay ta say okaem.”

<sup>8</sup> “Aw, Kangatoan ay Diyos,” kanan Abram, “ngem intoy pangammoak pay ay okaek?”

<sup>9</sup> Kanan pay Diyos en sisya, “Omya kas bomalasang ay baka ya kalding ya bomaro ay karnero ay sagtotoloy tawena ya doway kalasin di kalapati.” <sup>10</sup> Et inan Abram dadi et in-ey na en Diyos. Pag nan biiken din awak di animal et in-olnos na sin doway linya ay nanpatpatag. Ngem mo din awak di kalapati pay, adi na ginodwa. <sup>11</sup> Idi madadwes pay di dadakke ay titit ay mangan koma sin karni, inab-abo na.

<sup>12</sup> Idi madipdipos pay din agew, naimayet si Abram si seyep na et nilikob di kaeegyat ay mabolinget. <sup>13</sup> Asi pag kanan Diyos en sisya, “Kadi man et mangili din polim sin ilin di natken ay ipogaw ta maibag-en da en daida ya mapaligatan da enggana ay emey di opat ay gasot ay tawen. <sup>14</sup> Asiak dosaen din nakin bag-en en daida et komaan din polim isdi ay mangitaktakin si ad-ado ay gamgameng. <sup>15-16</sup> Ngem emey pay dedan sin pitlon di ganak, asi da mantaoli sin ili ay nay, ta dowan masepsep din kinamanagbasol di Amorreo ay man-ilis na et kapilitan ay dosaek daida. Siya sa di mapasamak sin polim, ngem mo sik-a pay, makamakay ka, asi ka matey et iponpon daka. Laton ay adi ka edasan din ligat ay doy,” kanan Diyos.

<sup>17</sup> Idi nadipos pay din agew yan enggay nalabi, wada et di nanpaila ay pan-otoan ay kaman banga ay binmebelaan di asok ya apoy, et nalabas sin gawan di doway linya ay karni. <sup>18</sup> Say nangisiglotan Diyos sin inkari na en Abram ay nangwani, “Kadi man et idawat ko sin polim amin din daga ay nay ay manlogi sin ginawang ay Nile ed Egipto enggana sin ginawang ay Eufrates.” <sup>19 20 21</sup>

## 16

### *Din Anak Da Abram En Hagar Ay Si Ismael*

<sup>1-3</sup> Idi nantettee da Abram ed Canaan si sinpo ay tawen, maga pay laeng di anak da en Sarai ay asawa na. Ngem waday balasang ay bag-en Sarai ay taga-Egipto ay manngadan si Hagar. Isonga kanan Sarai en Abram, “Olay en ka daagen din bag-en ko ay nay balbalang mo man-anak, ta say maibilang si anak ta, tan nay binasig Diyos sak-en.” Et inaw Abram, isonga inpolang Sarai din bag-ena en sisya ta say maikadwa ay asawa na.

<sup>4</sup> Idi siya di, nandaag tet-ewa da Abram en Hagar, et nawad-an si Hagar. Idi nadlaw na ay masikog sisya, linaslasoy na si Sarai. <sup>5</sup> Pag kanan Sarai en Abram, “Basol mo nan lawa ay am-amagen di bag-en kon sak-en. Sak-en kayman di nangipalobos ay daagem, ngem ed wani ay ammo na ay nawad-an sisya, doy et ay lomaslasoy. Sapay koma ta osigen Diyos mo sino en daita di akin basol.”

<sup>6</sup> Kanan Abram, “Bag-en mos sisya et mabalin ay amagem di laydem.” Pag et palaloan Sarai ay paligaten si Hagar, isonga linmayaw.

<sup>7</sup> Dintengan di anghel Diyos sisya sin kad-an di esay obbog sin lugar ay magay omili sin danan ay emey ed Shur. <sup>8</sup> Kanan din anghel, “Hagar ay bag-en Sarai, intoy napoam ya intoy emeyam?”

Songbatana pay yan kanana, “Ilaylawak si Sarai ay apok.”

<sup>9</sup> Pag kanan din anghel Diyos en sisya, “Mantaoli ka sin apom ta mansilbi ka en sisya. <sup>10</sup> Paad-adoek din apom et adi dan kabilang. <sup>11</sup> Lalaki di ianak mo et ngadanam si Ismael, tan pinatgan Diyos din kararag mo ay nanpapakpakaasi. <sup>12</sup> Ngem din ianak mo ay sana et kaman atap ay dangki. Kaibaw na amin ay ipogaw, yan amin ay ipogaw et ibawen da abes sisya. Olay abe din aag-i na et ibilang na ay kalaban.”

<sup>13</sup> Pag et waday inpangadan Hagar en Diyos ay kangalat na. Kanana, “Sik-a din Diyos ay Makaila,” tan kanas nemnem na, “Inilak si Diyos ay omil-ila ngem nay matmatagoak pay laeng.” <sup>14</sup> Siya din gapo ay nangadanan din obbog ay sana sin nangawaan di Kades ya Bered si Beer-lahai-roi ono Obbog di Matmatago ay Omil-ila.

<sup>15</sup> Idi man-anak pay, lalaki, et nginadanan Abram si Ismael.\* <sup>16</sup> Waopolo ya enem ay tawen en Abram sin nangianakan Hagar sin anak na ay sana.

## 17

### *Din Sinyal Di Intolag Diyos*

<sup>1</sup> Idi nantawen si Abram si siyamapolo ya siyam, nanpaila kasin si Diyos en sisya yan kanana, “Sak-en di Manakabalin ay Diyos. Patiem sak-en si owaoway ta iwed di kolkolang sin kinaogalim. <sup>2</sup> Tan ipatet-ewak din inkarik en sik-a ay paad-adoek din polim.”

<sup>3</sup> Idi dinngen Abram di, nandokmog ay nanyakog-ong, dowan itoloy Diyos ay nangwani, <sup>4-5</sup> “Siya na di itolag kon sik-a. Manipod ed wani, baken si Abram di ngadan mo, mo adi et si Abraham,\* tan panbalinek sik-a ay mapowakan di omili sin ad-ado ay nasyon. <sup>6</sup> Paad-adoek din polim ta maiwaras da sin kailili, yan wada abe en daida di man-ari.”

<sup>7</sup> Kanan aben Diyos, “Adi polos masoksokatan din intolag ko en sik-a mo adi komakaman si eng-enggana, tan siya met laeng di itolag ko sin polim. Sak-en di Diyos ay daydayawem ya siya abe din polim si eng-enggana. <sup>8</sup> Idawat ko abe en sik-a am-in din ili ay nay ed Canaan ay naibilangam ay mangili ed wani ta say tawiden din polim ay eng-enggana, yan sak-en met laeng di Diyos ay dayawen da.”

<sup>9</sup> Intoloy Diyos ay nangwani en Abraham, “Mo sik-a pay ya din ganakem, masapol ay onodan yo din intolag ko en sik-a. <sup>10-11</sup> Si naey di sinyal ay pangipailaan yo ay on-onodan yo din intolag ko. Masapol ay makogit amin di lalaki en dakayo. <sup>12</sup> Manlogi ed wani, siyat yon kogiten amin di bemela ay lalaki sin maikawao ay agew na, pati din bag-en ay maianak sin beey yo ya siya abe din bag-en ay laklakoan yo si mangili. <sup>13</sup> Dadlon yon kogiten amin dadi, tan say sinyal ay pangipailaan yo ay maibilang kayo sin komakaman ay intolag ko. <sup>14</sup> Ngem mo wada pay di baken nakogit en dakayo, maipowira en dakayo ay ipogaw ko, tan nilabsing na od dedan din intolag ko.”

\* **16:15** Din olog di Ismael et “dengngen Diyos.” \* **17:4-5** Din olog di Abram et “nangato ay ama.” Din olog abe di Abraham et “napowakan di ad-adoy ipogaw.”

<sup>15</sup> Kanan aben Diyos en Abraham, “Mo si asawam pay ay si Sarai, manlogi ed wani baken si Sarai di ngadana mo adi et si Sara.† <sup>16</sup> Bindisyonak sisya ta way iyat na ay man-anak ta sisya di mangipabelas anak yo ay lalaki. Din tapin di bindisyon ko abe et omad-ado din polin di anak na ta maiwaras da sin kailili, yan wada abe en daida di man-ari.”

<sup>17</sup> Idi dinngen Abraham din kanan Diyos ay sana, nandokmog ay nanyakog-ong dowan et masis-iyek ay mangwanis nemnem na, “Ay mabalin aya ay way ganakek tan nay et ay sin-gasot di tawen ko yan si Sara abe et siyamapolo di tawena.” <sup>18</sup> Pag nan kanan en Diyos, “Mo mabalin koma, ta bindisyonam abe din anak ko ay si Ismael.”

<sup>19</sup> “Aw pay dedan,” kanan Diyos, “ngem wada met pay laeng di ianak Sara ay lalaki et ngadanan yos Isaac.‡ Daida met sin poli na di manawid sin intolag ko en sik-a ay adi masoksokatan. <sup>20</sup> Ngem dinngek pay kayman din kindaw mo maipanggep en Ismael, isonga sigurado ay bindisyonak sisya ta maad-ado abe din poli na. Tan man-anak si sinpo ya dowan ay pangolo yan din poli na abe, omad-ado da sin madamdamag ay nasyon da. <sup>21</sup> Ngem din kaiturongan pay di inkarik en sik-a et si Isaac ay ianak en asawam sin siya na ay timpo sin omali ay tawen.” <sup>22</sup> Makdeng pay ay makingalat si Diyos en Abraham, kinmaan.

<sup>23-27</sup> Yan si Abraham pay, tinongpal na ay dagos din inbilin Diyos en sisya. Tan sin siya di ay agew, kinogit nas Ismael ya am-in din bag-ena ay lalaki ay naianak sin beey na ya am-in abe ay nilakoana. Sin doy met laeng ay agew, nanpakogit abes Abraham, isonga nandededsan da am-in ay nakogit. Siyamapolo ya siyam ay tawen Abraham sin nakogitana. Si Ismael abe ay anak na et mantawen si sinpo ya tolo.

## 18

### *Din Tolo Ay Bisitan Da Abraham*

<sup>1</sup> Idi mabaybayag, nanpailas Diyos kasin en Abraham sin nankamkampan da sin kad-an di inayan ay kakaiw en Mamre. Din inyat na ay naamag et tinmotokdo si Abraham sin belaan di tolda na, tan enggay alas dosi yan palalo ay man-atong din agew. <sup>2</sup> Manmeswat pay sisya, kambaw wada et di tolo ay lalaki ay pinmipika sin dagas. Dinalas na ay en nangabet et mandokmog ay manyakog-ong yan kanana, <sup>3</sup> “Apo, anosan yo adi ta maspad kayo sin beey mi ay nay, tan naeyak sina ay mansilbi en dakayo. <sup>4</sup> Man-illeng kayo kod sin poon di kaiw ay nay ta dowanak en man-as danom ay iowas yo sin siki yo. <sup>5</sup> Enak aben man-otos kanen yo ta way ikileg yo sin pandanan yo si awni. Tan malaydanak sin inmalian yos na.”

“Aw kod kayman,” kanan da.

<sup>6</sup> Pag dalasen Abraham ay mantaoli sin tolda yan kanana en Sara, “Dalasem kod! Oma ka sin kasigedan ay arina tako ta man-oto kas ad-ado ay tinapay tan way bisita tako.” <sup>7</sup> Pag managtag ay en manpili sin malames ay olbon sin baka na, et indawat na sin esay baa na ta dalasena abe ay mangisagana. <sup>8</sup> Idi naoto am-in, nan-a abes gatas ya odom ay makan et nakiey na sin karni sin kad-an di bisita na sin poon di kaiw ay doy. Et insango na en daidas di.

<sup>9</sup> Idi nakakan da pay, kanan da en Abraham, “Into pay si Sara ay asawam?”

“Dooy sin tolda yan,” kanana.

<sup>10</sup> Pag kanan di esa en daida ay si Diyos, “Mo emey di siyam ay bowan, ipailak din kabaalak en dakayo, yan say pan-anakan asawam si anak yo ay lalaki.”

Sin nangwanianas di, kambaw wada si Sara sin likod na sin pantew di tolda ay mandengdenge. <sup>11</sup> Mo da Abraham en Sara yan enggay nakay das nabakes da, et si Sara yan enggay adi mabalin ay man-anak. <sup>12</sup> Isonga nasiyek sin nemnem na ay nangwani, “Ay siya mo mabalin ay lak-amek din ragsak di man-anak? Tan enggay nabakesak met, yan nakay abes asawak.”

† 17:15 Din olog di Sara et “prinsesa.” ‡ 17:19 Din olog di Isaac et “masis-iyek.”

<sup>13</sup> Asi et kanan Diyos en Abraham, “Apay nga nasiyek si asawam? Apay nga kanaan nemnem na en adi mabalin ay man-anak tan enggay nabakes? <sup>14</sup> Ay siya mo waday adak kabaelan ay amagen? Tet-ewa met din inbagak ay ipailak din kabaalak en dakayo mo emey di siyam ay bowan, yan say pan-anakan Sara si anak yo ay lalaki.”

<sup>15</sup> Asi et insaot Sara tan emegyat iman, yan kanana, “Aga kadi, adiak nasiyek.”  
“Nasiyek ka met,” kanan Diyos ay sinombat.

### *Din Kindaw Abraham Para Sin Man-ili Ed Sodoma*

<sup>16</sup> Idi kinmaan din tolo ay bisita, nanpa-Sodoma da, et nakeey si Abraham ay nangitlod en daida. Os-osdongan da pay ed Sodoma, <sup>17</sup> kanan Diyos si nemnem na, “Olay adiak bokbokodan din enak amagen mo adi et ipaammok en Abraham. <sup>18</sup> Tan sisya di mangipoli sin ad-ado ay ipogaw ay man-ili sin madayaw ya napigsa ay nasyon. Manbegew abe en sisya, mabindisyonan am-in di ipogaw isnan lobong. <sup>19</sup> Pinilik abes sisya ta bilinena din ganakena ta onodan das sak-en ya amagen da din siged ya kosto. Tan mo say iyat da di, tongpalek abe din intolag ko en sisya.”

<sup>20</sup> Isonga kanan Diyos en Abraham, “Peteg ay madagsen din maipabasbasol sin man-ili ed Sodoma ya Gomorra, tan enggay nalabes di basbasol das di. <sup>21</sup> Enak ngarud ilaen mo tet-ewa din dinamag ko ay maipanggep en daida ta say ammoek ta asiak dosaen.”

<sup>22</sup> Idi nakdeng ay kanan Diyos di, inmey din doway gait na ed Sodoma, et nataynan si Diyos sin kad-an Abraham. <sup>23</sup> Inmasag-en si Abraham en sisya yan kanana, “Apo, ay pakidosam aya din siged sin lawa? <sup>24</sup> Mo kaspangarigan waday limapolo ay adi nakibasol sin odom, ay bakasem aya din intiro ay ili da? Aga ngin, tan mabalin siguro ay seg-angam daida am-in begew sin limapolo ay magay basol na. <sup>25</sup> Adi ngin mabalin ay pakidosam din siged sin lawa, tan mo say iyat mo kayman, adi pay is-om din amagem sin siged ya sin lawa. Adi met mabalin ay say amagem di, tan sik-a kayman di mangokom sin amin ay ipogaw isnan daga, yan kapilitan ay kosto di iyat mo ay mangokom.”

<sup>26</sup> Kanan Diyos ay sinombat, “Mo waday datngak ay limapolo ay ipogaw ed Sodoma ay adi nakibasol sin kailian da, laton ay seg-angak din intiro ay ili begew en daida.”

<sup>27</sup> Kanan aben Abraham, “Pasinsiyaam kod ay Apo din kinatoled ko ay mangitoley, tan owatak ipogaw ay napo sin lota yan iwed di kalebbengak ay mangibagas olay sino en sik-a. <sup>28</sup> Ngem into et ya waday opatapolo ya lima ay nalinteg ay ipogaw, ay bakasem pay laeng din intiro ay ili gapo ta kolang di lima anggoy?”

“Maga,” kanan Diyos ay sinombat. “Adiak pay dosaen din ili da mo waday datngak ay opatapolo ya lima ay ipogaw ay adi naitapi sin basol di odom.”

<sup>29</sup> Nankali kasin si Abraham yan kanana, “Mo kaspangarigan wada di opatapolo anggoy?”

“May ngarud,” kanan Diyos, “mo wada di opatapolo, adiak pay dosaen din ili da.”

<sup>30</sup> Kanan Abraham kasin, “Apo, adi ka kod omibongbonget sin nay ay kasinak ibaga en sik-a. Ngem into et ya wada anggoy di tolonpo?”

“Mo way datngak ay tolonpo, adiak dosaen din ili da,” kanan aben Diyos.

<sup>31</sup> Kanan kasin Abraham, “Apo, pasinsiyaam kod kasin din kinatoled ko, tan wada pay di ibagak. Mo kaspangarigan dowanpo anggoy di datngam?”

“Mo dowanpo di wadas di, adiak aben dosaen din ili da,” kanan Diyos.

<sup>32</sup> Kasin pay nankalis Abraham yan kanana, “Apo, adi ka kod omibongbonget, tan si naey met di omanongos ay ibagak. Into et ya sinpo anggoy di wada?”

Kanan Diyos, “Olay mo sinpo anggoy ay siged di datngak isdi, laton ay adiak dosaen din ili da begew en daida.” <sup>33</sup> Idi nakdeng pay din ngalat da, kinmaan si Diyos et sinmaas Abraham.

## 19

### *Din Kinalawan Di Taga-Sodoma*

<sup>1</sup> Idi sinmawang din doway anghel ed Sodoma sin siya di ay labi, wadas Lot ay tinmotokdo sin kad-an di segpan di ili. Idi inila nas daida, ena inabat. Et mandokmog ay manyakog-ong sin sangoanan da yan kanana, <sup>2</sup>“Apo, naeyak ay mansilbi en dakayo. Omali kayo kod ed bebbeey ta say pangowasan yo sin siki yo. Maseyep kayo abes di ta asi kayo masapa ay manlobwat si bigat.”

“Aga,” kanan da. “Olay din plaza di kaseypan mi.” <sup>3</sup> Ngem pinilit Lot ay nakisaa da en sisya. Domateng da pay sin beey na, tinogon Lot din bag-ena ta mandono das mam-is ay makan, pati tinapay ay iwed di labadura na. Idi naoto am-in, nangan da.

<sup>4</sup> Daan da pay maseyep yan sinmawang amin din lallalakin di ili, pati nanakay ya babbaro. Nilikob da din beey <sup>5</sup> yan binogawan das Lot ay nangwani, “Into pay da din sangailim ay doy? Ipabela mo man ta piliten mi ay alaen din kinalalaki da.”

<sup>6</sup> Binmel-ay si Lot et in-eneb na. <sup>7</sup> Pag nan kanan en daida, “Pangaasi yo kod ay iib-a. Adi yo kod amagen san lawa, tan nalabes damdama. <sup>8</sup> Naey pay din doway balasang ko ay iwed pay laeng di nangas kinababai da. Olay ibelak si daida ta oway di iyat yo en daida. Basta bay-an yo nan lallalaki ay sangailik, tan kapilitan ay bantayak daida.”

<sup>9</sup> Dowan da et kanan, “Komaan kas sa! Ay siya mo way lebbeng mo ay mamilin en dakami? Owat ka et aben mangili. Iay-ayed mo man tan into et mo masepsep di iyat mi en sik-a mo din sangailim ay sana.” Siya di et kaitodon da en Lot ta en da koma piliten din pantew. <sup>10</sup> Ngem din doway lalaki sin oneg, kabokat da sin pantew et kaigoyod da en Lot ay mangisgep dowan dan kasin in-eb. <sup>11</sup> Pag da pay godaben am-in din wada sin bel-ayan ta adi da makadteng sin pantew.

### *Din Kinmaanan Da Lot Ed Sodoma*

<sup>12</sup> Pag dan kanan en Lot, “Mo waday anak yo, innapo yo ya ton-od yos nan ili, en ka ayagan ay dagos ta komaan kayo am-in, <sup>13</sup> tan bakasen mi nan ili. Dinngen dedan Diyos din madagsen ay maipabasbasol sin ipogaw isna, isonga inbaa nas dakami ta bakasen mi nan ili da.” <sup>14</sup> Idi siya di, inmey si Lot sin kad-an di doway lalaki ay naikaising sin an-ak na yan kanana, “Dalasen yo ta komaan takos na, tan bakasen Diyos nan ili tako.” Ngem adi da inkaskaso tan kanan da en solsologenas daida et anggoy.

<sup>15</sup> Idi pomatpat-a pay, dagdagen din anghel si Lot ay nangwani, “Dalasem ay! Ayagam si asawam ya din doway balasang yo ta komaan kayo ay dagos ta adi kayo maitapi sin dosan di ili ay nay.” <sup>16</sup> Mandowadowa si Lot pay laeng ay manlobwat, ngem begew din seg-ang Diyos, kaitakkay din anghel en daida ay sin-asawa ya din doway anak da ay balasang et inpango da sin beddeng di ili. <sup>17</sup> Asi kanan di esa ay anghel, “Dalasen yo ay lomayaw ta emey kayo sin dontog ay doy. Adi kayo mansepsep pad sin tanap. Adi kayo aben manwingwingi mo adi et mandagas kayo ay managtag sin dontog tan into et ya makidosa kayo.”

<sup>18</sup> Ngem kanan Lot, “Dakey kod ay Apo. <sup>19</sup> Dakdake kayman di seg-ang yo ay mangisalakan en dakami. Ngem palalo met ay addawi din dontog. Daanak domateng yan mad-asanak sin dosa et mateyak met laeng. <sup>20</sup> Isonga mo mabalin, olay din kitkittoy ay ili ay doy di emeyan mi koma, tan baken palalo ay addawi. Ipalobos yo kod ta say emeyan mi ta maga di mapasamak en dakami. Tan maila ay kitkittoy ay ili dedan.”

<sup>21</sup> “Aw,” kanan din esay anghel. “Awek din kindaw mo ay sana et ipowirak din ili ay inbagam. <sup>22</sup> Ngem dalasen yo, managtag kayo, tan adiak makailogi sin amagek engganans domateng kayo.” Siya di din begew ay nangadanan din ili ay doy en Zoar,\* tan kanan Lot en kitkittoy ay ili.

### *Din Nabakasan Di Ed Sodoma Ya Gomorra (19:23-28)*

\* 19:22 Din olog di Zoar et “kitkittoy.”



<sup>23</sup> Idi maag-aggew, sinmawang si Lot ed Zoar. <sup>24</sup> Asi et kaekgas si Diyos si man-bidbidang ay bato ay makwani en sulfur ed Sodoma ya Gomorra. <sup>25</sup> Et napooan am-in ay wada sin tanap ya din doway ili ay doy, pati am-in di ipogaw ya am-in abe ay gomabgabay isdi. <sup>26</sup> Nakidosa abe din asawan Lot, tan nanwingi et nanbalin si sinan ipogaw ay asin.

<sup>27</sup> Sin kasin napat-a, nasapas Abraham ay emey sin kad-an di nanngalatan da en Diyos. <sup>28</sup> Domateng pay isdi, inosdongana ed Sodoma ya ed Gomorra ya din annawa ay tanap isdi, yan inila nay masde ay asok ay komaykayang ay kaman din asok ay napo sin panpooan das apog. <sup>29</sup>

### *Din Napoan Di Moabita ya Ammonita* (19:30-38)

<sup>30</sup> Gapo ta emegyat si Lot ay manbeey ed Zoar, nantikid sin kadondontogan. Inkoyog na din doway ay balasang ay an-ak na et nanbeey da si esa ay liyang. <sup>31</sup> Sin namingsan, kanan din pangpangoan, “Enggay makmakay si ama ta yan magay lalaki isnan daga si pakiasawaan ta. <sup>32</sup> Betengen ta et sisya asi tan daagen ta mantoltoloy din poli tako babaen en ama.” <sup>33</sup> Et bineteng das ama da sin labi ay sana, pag makidaag din pangpangoan ay anak na, ngem adi ammon Lot din napasamak. <sup>34</sup> Kasin pay mapat-a, kanan din pangpangoan sin iyogtana, “Nakidaagak en ama ta ed labi. Ed wani, betengen ta kasin ta sik-a abe di makidaag ta say mawadaan ta ay doway si anak babaen en sisya.” <sup>35</sup> Bineteng da kasin si ama da sin labi ay sana et nakidaag din iyogtan, ngem adi na ammo din nakidaagan di anak na. <sup>36</sup> Et nawad-an din doway ay an-ak Lot babaen sin mismo ay ama da. <sup>37</sup> Nan-anak din pangpangoan si lalaki ay nginadanana si Moab, et say nangipoli sin Moabita ay wada ed wani. <sup>38</sup> Nan-anak abe din iyogtan si lalaki ay nginadanana si Ben-Ammi ay say napoan di makwani en Ammonita ed wani.

## 20

1 2 3 4 5 6 7 8 9 10 11 12 13 14 15 16 17 18

## 21

### *Din Naianakan Isaac* (21:1-7)

<sup>1</sup> Idi siya di, binindisyonan Diyos si Sara et tinongpal na din inkari na en sisya. <sup>2</sup> Tan olay mo enggay nakay si Abraham, nawad-an met laeng si asawa na. Sin kosto ay timpo ay inbagan Diyos di nangianakana si anak da ay lalaki. <sup>3</sup> Nginadanan Abraham din anak da si Isaac, <sup>4</sup> et sin maikawao ay agew na, kinogit nas sisya ay nanongpal sin inbilin Diyos en sisya. <sup>5</sup> Sin-gasot di tawen Abraham sin binmelaan Isaac. <sup>6</sup> Mo si Sara abe, kanana en, “Indawtan Diyos sak-en si gapo ay panragsakak ya pansiyekak, isonga makisiyek abe am-in din mannge sin nay ay naamag en sak-en. <sup>7</sup> Tan ed idi, ay siya mo way mangwani en Abraham en manpasosos asawa na? Ngem naey pay di inpabelak ay anak mi sin nakayana.”

### *Din Nangipakaan Abraham En Da Hagar En Ismael* (21:8-20)

<sup>8</sup> Neyneyna dinmakdakes Isaac et pinsot ina na. Sin kosto ay agew ay napsotana, inpaltian Abraham si ad-ado ay animal. <sup>9</sup> Asi et inilan Sara din anak Abraham en Hagar ay taga-Egipto ay manis-iyek en Isaac\* <sup>10</sup> yan kanana en Abraham, “Pakaanem san bag-en ya din anak na ay sana, tan sigaak ay makitawid di anak di bag-en sin kinabaknang mo ta mongsanen koman anak ta ay si Isaac.”

\* **21:9** Di esa abe ay kaiologan nina sin Hebreo et: ...makiay-ayam en Isaac.

<sup>11</sup> Palalo ay mansakit di nemnem Abraham sin nangwanian Sara isdi, tan anak na met iman abe si Ismael. <sup>12</sup> Ngem kanan Diyos en sisya, “Adi ka madandanagan begew sin bag-en mo ya din anak na, mo adi et amagem din inbagan asawam, tan si Isaac pay dedan di kaiturongan di intolag ko maipanggep sin polim. <sup>13</sup> Ngem gapo ta anak mo met laeng si Ismael, paad-adoek abe din ganakena ta pon-en day intiro ay nasyon.”

<sup>14</sup> Sin kasin napat-a, nasapa ay nan-as Abraham si makan ya sopot ay lalat ay napayan si danom et inpatilid na en Hagar. Pag nan pakaanen sisya ya din anak na. Kinmaan da Hagar et nanlikeliked da sin lugar ay magay omili ed Beerseba.

<sup>15</sup> Idi naabos din baon da ay danom, tinaynana din anak sin poon di esay kitkittoy ay kaiw. <sup>16</sup> En tinmokdo sin baken onay addawi tan kananas nemnem na, “Adiak maitoled ay ilaen din anak ko ay matey.” Pag nan ilogi ay man-oga.

<sup>17</sup> Dinngen Diyos din ogan di anak et kanan din anghel na ed langit, “Hagar, apay mo? Adi ka madanagan, tan dinngen Diyos din ogan di anak. <sup>18</sup> En ka et itakkayan ta bomangon, tan paad-adoek din poli na.” <sup>19</sup> Pag ipailan Diyos en Hagar di esay obbog. Pinay-an Hagar din sopot ay lalat si danom et nan-inomena din anak na. <sup>20</sup> Inay-ayowanan Diyos din anak enggana ay nadakdake. Nantee sin lugar ay magay omili ed Paran yan nanbalin si nalaing ay pomapana. <sup>21 22 23 24 25 26 27 28 29 30 31 32 33 34</sup>

## 22

### *Din Nanpadasan Diyos En Abraham*

*(22:1-19)*

<sup>1</sup> Idi inmey di pigay tawen, kanan Diyos en padasenas Abraham. Isonga inayaganas sisya ay nangwani, “Ay Abraham.”

“Ay way ibagam, Apo?” kanana ay sinombat.

<sup>2</sup> Pag kanan Diyos, “Ayagam san es-esa ay anak mo,\* ay si Isaac ay laydelaydem, et emey kayo sin dontog ay itdok en sik-a sin sakop di Moria ta say pamseam ya panpooam sin anak mo ay sana ta idaton mon sak-en.”

<sup>3</sup> Mapat-a pay, nasapas Abraham ay en nangaiw si panpoo na et inpag-ena sin dangki na. Asi na ayagan si Isaac ya doway bag-en et nalobwat da ay emey sin lugar ay inbagan Diyos en sisya. <sup>4</sup> Sin maikatlo ay agew, tinamang Abraham din dontog ay emeyan da <sup>5</sup> yan kanana sin doway bag-en, “Mantee kayos na ay mamananbantay sin dangki ta dowan kamin emey sin anak kos di ay mandayaw en Diyos. Asi kami mantaoli.”

<sup>6</sup> Siya di et inan Abraham din kaiw ay itongo na sin daton et inpasakbat na en Isaac. Ina na abe di pantago nas apoy ya din bangig na et nadipos da ay doway. Idi mandad-an da pay, <sup>7</sup> nankalis Isaac yan kanana, “Ay ama!”

“Sino di?” kanan Abraham.

“Naey di pantagos apoy ya kaiw, ngem into ngay din anak di karnero ay idaton ta?” kanan Isaac.

<sup>8</sup> “Si Diyos met laeng di makaamos di,” kanan Abraham ay sinombat. Et intoloy da ay doway ay mantikid.

<sup>9</sup> Somawang da pay sin lugar ay inbagan Diyos ay emeyan da, nan-amag si Abraham si altar ay panpooanas idatona en Diyos et in-olnos na din kaiw sin sapew na. Pag nan baloden si Isaac ay anak na yan inpatang na sin kaiw. <sup>10</sup> Asi na pay itag-ay din bangig na ta peslena koma din anak na. <sup>11</sup> Ngem kabogaw din anghel en Diyos ay napod langit yan kanana, “Ay Abraham, Abraham!”

“Apay mo?” kanana ay sinombat.

<sup>12</sup> “Dakey! Adim pespeslen san anak mo, tan nay inammoak ay dadlon mon pasien si Diyos, tan sana ay adim kinayyawan din laydelaydem ay anak mo en sisya,” kanana.

\* **22:2** Si Ismael di esa ay anak Abraham, ngem si Isaac di es-esa ay anak da Abraham en Sara ay manawid sin intolag Diyos.

<sup>13</sup> Idi siya di, nanmeswat si Abraham yan inila na di karnero ay bomaro ay naisagwed di sakngod na sin pangan di kitkittoy ay kaiw. Isonga ena ina et say insokat na sin anak na ay indatona en Diyos. <sup>14</sup> Pag nan ngadanan din lugar ay doy si “Si Diyos di Mangilila.” Yan enggana ed wani way mangwani, “Sin dontog en Diyos, say pangil-ilaana sin kasapolan.”

<sup>15</sup> Siya di inpidwan din anghel en Diyos ed langit ay nankali yan kanana en Abraham, <sup>16</sup> “Sak-en ay si Diyos, isapatak sin awak ko ay gapo ta pinatim sak-en yan adim kinayyawan din es-esa ay anak mo, dadlonak bindisyonan sik-a <sup>17</sup> yan paad-adoek din polim ta kaman din kaad-adon di talaw ed daya ya din darat sin benget di baybay. Abaken da pay din kaibaw da. <sup>18</sup> Am-in abe ay ipogaw isnan labaw di daga, mankedaw das bindisyon ko begew sin polim ay sana. Mapasamak amin dana gapo ta pinatim din inbilin ko en sik-a,” kanan Diyos.

<sup>19</sup> Idi nakdeng ay kanan Diyos di, nantaolis da Abraham ay en nanag-os sin daway bag-en, et nankokoyog da ay somaa ed Beerseba, tan say kad-an da Abraham pay laeng.   
20 21 22 23 24

## 23

### *Din Nateyan Ya Naiponponan Sara (23:1-2,19-20)*

<sup>1</sup> Idi nantawen si Sara si sin-gasot ya dowanpo ya pito, <sup>2</sup> natey ed Hebron sin sakop di Canaan, et niladingitan Abraham sisya. <sup>3 4 5 6 7 8 9 10 11 12 13 14 15 16 17 18 19</sup> Pag nan iponpon sin liyang ay wada sin daga ay nilakoana sin man-ilis di ay Heteo. Din daga ay sana, wada ed Makpela ay asag-en ed Mamre (ay lak-am di Hebron met laeng), <sup>20</sup> et say nilakoan Abraham ta say pangiponponana sin minatay na.

## 24

### *Da Isaac En Rebeka (24:1-33,50-51,61-67)*

<sup>1</sup> Enggay nakay si Abraham, yan bininbindisyonan Diyos sisya sin amin ay inam-amag na. <sup>2</sup> Siya di, kanan Abraham sin kangatoan ay bag-ena ay din makaammo sin amin ay gamgameng na, “Kapayem nan poyong ko ta mansapata ka. <sup>3</sup> Tan laydek ay mansapata ka en Yahweh ay Diyos ay manturay ed langit ya sin daga ta adi ka manpilis asawaen din anak ko ay si Isaac sin babassang isnan ed Canaan ay panbeeyan tako, <sup>4</sup> mo adi et emey ka sin ili ay napoak ay kad-an di toton-od ko ta man-ila kas di si balasang ta say asawaena.”

<sup>5</sup> Sinongbatan din bag-ena yan kanana, “Et intoy iyat ko ngay mo sigaan din balasang ay komaan sin ili na ay makiali en sak-en isna? Ay asiak koyogen din anak mo ay emey sidi?”

<sup>6</sup> Kanan aben Abraham, “Dakey, adi mabalin ay iey mo din anak kos di, <sup>7</sup> tan si Yahweh ay Diyos di amin ay wada ed langit yan tinogonas sak-en ta komaanak sin ilik ya taynak din toton-od kos di. Inkari na abe ay nangisapata ay idawat na din ili ay nay sin polik. Sisya met laeng di mangibaa sin anghel na ay bomadang en sik-a ta way iyat mo ay omas asawan anak ko sin babassang isdi. <sup>8</sup> Yan mo sigaana pay ay makialis na, mawaswas din isapatam ay sana. Basta adim koyogen anak kos di,” kanan Abraham. <sup>9</sup> Siya di et kinapay din bag-en ay sana din poyong en Abraham ay apo na yan nansapata ay amagena din intogona en sisya.

<sup>10</sup> Pag nan isagana di sinpo ay kamel din apo na et inkarga na am-in ay kalasin di nankamamayay ay maidaatdateng. Asi da manlobwat sin kakoyog na ay emey sin ilin Nahor ay agin Abraham sin sakop di Mesopotamia.



<sup>11</sup> Idi dinmateng da sin segpan di ili, pinadokmog da din kamel sin dagas di obbog ay wadas di. Tan enggay masmasdem yan say oras ay en panaksakdoan di babbabai. <sup>12</sup> Asi nankararag ay nangwani, “Sik-a ay Yahweh ay Diyos di apok ay si Abraham, sapay koma ta bomadang ka ed wani ta matongpal din inkarim sin apok. <sup>13</sup> Tan naeyak sina sin kad-an di obbog yan doy ay omal-ali din babassang ay man-ilis na ay en manakdo. <sup>14</sup> Sapay koma ta mo kanak sin balasang en, ‘Ibabam kod san kolim ta man-inomak,’ yan kanana en, ‘Aw adi, asiak aben isakdoan din kamel mo,’ sapay koma ta din mangwanis di et siya di din pinilim ay asawaen Isaac. Mo say mapasamak, say pangammoak ay am-amagem din inkarim en Abraham ay apok,” kanana ay nangikararag.

<sup>15</sup> Daan pay makdeng din kararag na yan sinmawang si Rebeka ay nanasakbat si koli ay isaksakdo na. Din si Rebeka ay nay et anak en Betuel ay anak da Milca en Nahor ay agin Abraham. <sup>16</sup> Kagkagam-is ay balasang ay maga pay laeng di nangiwit en sisya. Nanballalong sin kad-an di obbog et nanakdo. Idi mantaoli pay sisya, <sup>17</sup> dalasen din bag-en en Abraham ay en nangabat yan kanana, “Man-inomak kod issa.”

<sup>18</sup> “Aw adi ay apo,” kanana. Kaibaba sin koli sin padanga na ta way iyat na ay man-inom. <sup>19</sup> Makainom pay, kanan Rebeka, “Enak aben isakdoan san kamel mo ta man-inom da si kosto.” <sup>20</sup> Kaisodag sin nabay-an sin koli sin balonglong ay pan-in-inoman di animal et katagtag ay kasin manakdo. Inpidwapidwa na enggana ay naiinoman am-in din kamel, <sup>21</sup> dowan pay ginmiginek din bag-en Abraham ay sana ay mangisisin-eng en sisya ta ammoana mo tet-ewa ay inturong Diyos sisya sin kosto ay asawaen Isaac.

<sup>22</sup> Idi nakdeng ay insakdoan din balasang din kamel, nan-a din lalakis nangina ay aritos ay balitok ya doway dadakke ay gading ay balitok et in-amag na en sisya. <sup>23</sup> Pag nan kanan, “Sinoy si amam? Ibagam kod abe mo nawaya din beey yo ta say pan-iyanan mi sin gagait ko.”

<sup>24</sup> Kanan din balasang ay sana, “Si amak yan si Betuel ay anak da Nahor en Milca. <sup>25</sup> Way nawaya abe ay pan-iyanan yos di, yan wada pay di sakati ay kanen di kamel yan ad-adoy allogangi abe ay kaseypan da.”

<sup>26</sup> Idi dinngen din lalaki din kanan di balasang ay sana, nandokmog ay nandayaw en Diyos <sup>27</sup> yan kanana, “Madayaw ka ay Yahweh, sik-a ay Diyos di apok ay si Abraham, tan inpailam kasin din komakaman ay seg-ang ya badang mo en sisya. Yan mo sak-en pay, inpangom sin beey di toton-od na.”

<sup>28</sup> Managtag pay si Rebeka ay somaa yan dinad-at na en da ina na din naamag. <sup>29</sup> Wada abe din agin Rebeka ay si Laban. <sup>30</sup> Idi inila na din aritos ya din in-gagading na ya dinnge na abe din inpadamag na, katagtag sin obbog ay en nangabat sin bisita da ay sana. Dinatngana din bag-en Abraham ay pinmipika sin kad-an di kamel, <sup>31</sup> yan kanana, “Sik-a ay binindisyonan Diyos, apay nga pomipika kas sa? En tako ed bebbeey tan way insaganak ay pan-iyanan yo ya pantean aben di kamel yo.”

<sup>32</sup> Domateng da pay sin beey, inpasgep Laban si daida. Kinaana din kargan di kamel ya insakatianas daida. Asi na aben iyaan din bisita nas danom ta owasan da din siki da. <sup>33</sup> Pag nan isango di kanen da. Asi et kanan din bag-en Abraham, “Awni kod. Adiak mangan enggana ay ibagak din panggep ko ay inmalis na.”

“May, ibagam,” kanan Laban.

Siya di dinad-at na en daida amin ay intogon apo na ay Abraham en sisya ya din inyat Diyos ay nangipango en sisya sin kosto ay danan. Dinad-at na abe din sinyal ay kindaw na en Diyos sin dinmatngana sin obbog ta say pangammoana mo sino di pinilin Diyos ay asawaen Isaac. Idi nakdeng ay dinad-at na, inbaga na en daida mo ipalobos da ay makiey si Rebeka en sisya. (24:34-49)

34 35 36 37 38 39 40 41 42 43 44 45 46 47 48 49

<sup>50</sup> Kanan da Laban en Betuel ay sinombat, “Maga di maibaga mi, tan enggay inpailan Diyos din laydena. <sup>51</sup> Itakin yo ngarud si Rebeka sin ili yo ta say asawaen din anak di apom, tan siya met laeng di intogon Diyos.”

<sup>52</sup> <sup>53</sup> <sup>54</sup> <sup>55</sup> <sup>56</sup> <sup>57</sup> <sup>58</sup> <sup>59</sup> <sup>60</sup>

<sup>61</sup> Sin kabigatana, nansagana si Rebeka ya din babassang ay bag-ena, et nangabayo da sin kamel da. Asi da manlobwat ay makiey sin bag-en Abraham.

<sup>62</sup> Idi dinmateng da ed Canaan, kadatdateng pay Isaac sin ili da ed Negev sin abagatan di Canaan, tan napo ed Beer Lahai Roi. <sup>63</sup> Malablabi pay, binmel-ay si Isaac ay en manliklied sin dagdagas di beey da downan mankarkararag. Manmeswat pay, tinamang nay nangakabayos kamel ay omal-ali. <sup>64</sup> Idi inilan aben Rebeka si Isaac, kababa sin kamel <sup>65</sup> yan dinamag na sin bag-en, “Sino din lalaki ay doy ay omas-asag-en ay omabet?”

“Din anak di apok,” kanana ay sinombat. Isonga nilingban Rebeka din mata nas sokdong, tan say ogalin di babassang isdi.

<sup>66</sup> Datngan da pay si Isaac, dinad-at din bag-en en Isaac amin di inamag na. <sup>67</sup> Et inbeey Isaac si Rebeka sin tolda ay nanbeeyan ina na ed idi. Dakdake abe din layad na en sisya. Siya et di, naliwliwa di nemnem na, tan nansaksakit iman nemnem na manlogi sin nateyan ina na.

## 25

1 2 3 4 5 6

### *Din Nateyan Abraham*

(25:7-10)

<sup>7-8</sup> Si Abraham pay et enggay insakngod nay peweg na, tan nantawen si sin-gasot ya pitopolo ya lima, asi matey. Et en naitapi din ab-abiik na sin ab-abiik di ap-apo na. <sup>9-10</sup> Inponpon din anak na ay da Isaac en Ismael sin naiponponan Sara ay asawa na sin liyang ed Makpela ay asag-en ed Mamre, tan siya met laeng din daga ay nilakoan Abraham ed idi en Efron ay anak Zohar ay Heteo. <sup>11</sup> <sup>12</sup> <sup>13</sup> <sup>14</sup> <sup>15</sup> <sup>16</sup> <sup>17</sup> <sup>18</sup> <sup>19</sup>

### *Din Naianakan Da Jacob En Esau*

(25:20-26)

<sup>20</sup> Mo si Isaac pay, opatapolo di tawena sin nan-asawaan da en Rebeka ay iyogtan Laban ay anak Betuel (ay esay Arameo\* ay napod Mesopotamia). <sup>21</sup> Asi et inmey di pigay tawen yan maga pay laeng di anak na. Isonga nankararag si Isaac en Diyos ay mankedaw si anak da. Dinngen Diyos din kararag na et nawad-an si Rebeka si singin. <sup>22</sup> Sin daan da pay laeng bemelaan, nansinikil da sin eges na, isonga kananas nemnem na, “Apay nas mapaspasamak en sak-en mo?” Et nankararag en Diyos ay nangipoot. <sup>23</sup> Kanan Diyos en sisya, “Din singin ay liton mo, man-ganak das man-ili si doway nasyon, ya din doway nasyon ay sana et mankinontra da. Napigpigsa din esa mo din esa, yan din inoona et mansilbi sin inoodi.”

<sup>24</sup> Idi man-anak pay si Rebeka, singin ay lalaki tet-ewa di binmala. <sup>25</sup> Din inmon-ona, manbalanga di awak na yan balbonan ay kaman kopkop di animal, isonga nginadanan das Esau.† <sup>26</sup> Din maikadwa pay, nanpapakod sin mokod di inoona sin binmelaan da, isonga nginadanan das Jacob.‡ Waday enemapolo ay tawen en Isaac sin naianakan da.

### *Din Nangipolangan Esau Sin Lebbeng Na En Jacob*

(25:27-34)

\* **25:20** Din olog di Arameo et “taga-Aram” ay makwani abe en Syria ono Mesopotamia. † **25:25** Mais-o di kadngan di Esau sin kalin di Hebreo ay din olog na et “nabagoan.” ‡ **25:26** Din olog di Jacob et “nanpapakod sin mokod,” di laydena ay kalien et maetek.

<sup>27</sup> Idi nadakdake da ay dowa, linmaing si Esau ay manganop yan pag sin kada di ememeyana. Si Jacob pay yan nanemneman ay ipogaw ay mameey. <sup>28</sup> Din laylayden Isaac et si Esau, tan ak-aklongana din an-anopana. Si Rebeka pay yan laylaydenas Jacob.

<sup>29</sup> Sin namingsan, sinmaas Esau ay napo sin kada yan dinatnganas Jacob ay manengdengdeng si manbalanga ay bokel. Palalo ay mandagaang, <sup>30</sup> isonga kanana en Jacob, “Omya ka kod sin manbalanga ay sana tan nay kamanak matey si dagaang ko.” (Gapo sin kinwanin Esau ay sana, bindayan da abe si Edom. §)

<sup>31</sup> Asi et kanan Jacob, “Ipolang mo agan-o en sak-en din lebbeng mo ay besag, asiak iyaan sik-a.”

<sup>32</sup> “Aw a, tan magay silbi na met laeng mo mateyak si dagaang,” kinwanin Esau.

<sup>33</sup> Kanan pay Jacob, “Mansapata ka ngarud.” Siya di nansapatas Esau ay nangipolang sin lebbeng na ay besag en Jacob. <sup>34</sup> Et pag idawtan Jacob si tinapay ya sin manbalanga ay dinengdeng ay sana. Nangan, asi mapika et madipos. Say inyat Esau di ay nangipalaso sin lebbeng na koma ay besag.\*

## 26

### *Da Isaac en Abimelek* (26:1-18)

<sup>1</sup> Idi siya di, wada kasin di betil sin ili, baken din betil ed idi sin timpon Abraham. Et inmey si Isaac sin kad-an Abimelek ay arin di Filisteo ed Gerar. <sup>2</sup> Ngem nangon-ona ay nanpaila si Diyos en Isaac yan siya na di inbaga na, “Adi ka em-emey ed Egipto. Mantee ka sin daga ay ibagak ay panteam. <sup>3</sup> Mantee ka sin daga ay nay et wadaak ay mangadkadwa en sik-a ya bindisyonak sik-a. Idawat ko amin din daga ay nay en sik-a ya sin polim ta say tongpalek din karik en amam ay Abraham. <sup>4</sup> Paad-adoek din polim ay kaman din kaad-adon di talaw ed daya ya idawat kon daida amin din daga ay nay. Mabindisyonan abe din kaipoipogaw sin amin ay nasyon begew sin ipolim. <sup>5</sup> Bindisyonak sik-a tan pinatin Abraham sak-en yan tinongpal na amin ay linteg ya bilin ko.” <sup>6</sup> Gapo sidi, nantee si Isaac ed Gerar.

<sup>7</sup> Idi nandamag din lallalaki ed Gerar si maipanggep sin asawa na, inbaga na en iyogtana si Rebeka. Emegyat ay mangibaga en asawa na tan into et mo peslen da begew en Rebeka ta asawaen da, tan napintas dedan sisya. <sup>8</sup> Nabayag ay nantees Isaac isdi.

Waday esay agew ay nan-osdong si Abimelek sin tawa, inila na et da Isaac en Rebeka ay nandadaag. <sup>9</sup> Inpaayag na si Isaac yan kanana, “Kambaw asawam yan apay nga inbagam en iyogtan mo?”

Songbatan Isaac yan kanana, “Tan ninemnem ko ay amangan mo pomse da gapo en sisya.”

<sup>10</sup> Kanan Abimelek, “Apay nas inyat mo? Nalaka koma ay dinaag di esay ipogaw ko si asawam et sik-a et di gapo si bomasolan mi.” <sup>11</sup> Isonga kanan Abimelek ay namagbaga sin amin ay ipogaw na, “Matey di olay sino ay mangamag si lawa sin lalaki ay nay ono si asawa na.”

<sup>12</sup> Nanmola si Isaac sin daga ay sana sin doy met laeng ay tawen et nan-apit si mamin gasot ay kaad-adon di inmola na. Binindisyonan Diyos sisya <sup>13</sup> et natapian ay natapian din sanikwa na enggana ay binmaknabaknang sisya. <sup>14</sup> Inmad-ado di karnero, baka ya bag-ena, isonga inapalan din Filisteo. <sup>15</sup> Tinab-okan das lota amin din sakdoan ay kinaotan di babag-en ama na ay Abraham sin timpo na.

<sup>16</sup> Pag kanan Abimelek en Isaac, “Masapol ay komaan kas nan ili mi tan nay enggay napigpigma ka mo dakami.” <sup>17</sup> Et kinmaan si Isaac sin ili ay doy yan nankampo sin tanap ed Gerar et isdi ay nantee. <sup>18</sup> Kinaotan kasin Isaac din sakdoan ay kinaotan ama na ay

§ 25:30 Din olog di Edom et “manbalanga.” \* 25:34 Hebreo 12:16.

Abraham sin timpo na ya tinab-okan din Filisteo sin nateyana. Inpangadana met laeng din inpangadan Abraham en daida. <sup>19 20 21 22 23 24 25 26 27 28 29 30 31 32 33 34 35</sup>

## 27

### *Din Namindisyonan Isaac En Jacob*

(27:1-29)

<sup>1</sup> Idi enggay nakay si Isaac downan komapsot mata na, inayagana si Esau ay pangpangoan ay anak na yan kanana, “Ay anak ko.”

“Apay mo!” kanan Esau.

<sup>2-4</sup> Kanan aben Isaac, “Alaem san panam ta en ka manganop ta asi ka ioto din kalasin di sida ay laylaydek. Mo makakanak pay, asiak bindisyonan sik-a, tan enggay nakayak yan nganngani samet di kateyak.”

<sup>5</sup> Sin nangibagaan Isaac isdi, kambaw wadas Rebeka ay nananngge. Madipos pay si Esau ay en manganop, <sup>6</sup> pag kanan Rebeka en Jacob, “Kadkadnggek din inbagan amam sin pangpangoan mo. Kanana en, <sup>7</sup> ‘En ka manganop ta man-oto kas mam-is ay isidak ta asiak bindisyonan sik-a sin sangoanan Diyos, tan nganngani samet di kateyak,’ kanana en sisya. <sup>8</sup> Dengngem ngarud ay kosto din itogon ko en sik-a ta estem ay amagen. <sup>9</sup> Emey ka sin pastolan tako ta pomili kas doway anak di kalding ay mankalalames. Ialim isna ta iotok din kalasin di sida ay laylayden amam <sup>10</sup> ta iey mo en sisya ta say sik-a di bindisyonana.”

<sup>11</sup> Asi et kanan Jacob, “Aw a, ngem si Esau yan balbonan. Mo sak-en pay yan nalinis di kodil ko. <sup>12</sup> Mo komapay si ama, maammoana ay sak-en, et adi pay kananas nemnem na en owatak laslasoyen sisya et sokatana din bindisyonas baos.”

<sup>13</sup> Ngem kanan ina na, “Olay sak-en di manglak-am sin baos na. Basta tongpalem din ibagak ta en ka et alan din kalding ay sana.”

<sup>14</sup> Idi siya di pinatin Jacob et ena ina, et in-oton ina na din kalasin di sida ay laylayden ama na. <sup>15</sup> Pag alan Rebeka din kasigedan ay badon Esau ay indolina sin beey et indawat na en Jacob ta say ibado na. <sup>16</sup> Ina na abe din kopkop di kalding et inlibot na sin takkay ya tenged na. <sup>17</sup> Pag nan idawat en sisya din mam-is ay sida ya odom ay makan ay inoto na ta iey na en ama na. <sup>18</sup> Idi indateng pay Jacob sin kad-an ama na, kanana, “Naeyak ay ama.”

“Sino ka od ay anak ko?” kanan ama na.

<sup>19</sup> “Sak-en si Esau ay besag mo. Naey di indateng ko ay sida ay intogon mo en sak-en. Ibangon mo kod ta mangan ka ta asi ka bindisyonan sak-en,” kanan Jacob.

<sup>20</sup> Kanan aben ama na, “Aye! Indateng mo kayman ay dagos mo?”

“Aw, tan binmadang si Yahweh ay Diyos mo,” kanan Jacob ay sinombat.

<sup>21</sup> Asi et kanan Isaac, “Omasag-en ka ay anak ko ta kapayek sik-a ta say pangammoak mo tet-ewa ay sik-as Esau.”

<sup>22</sup> Omasag-en pay si Jacob, kinapay ama na yan kanana, “Kaman din kalin Jacob san kalim, ngem din takkay mo pay et kaman din takkay en Esau.” <sup>23</sup> Say inbaga na di tan adi na iman naimatonan ay si Jacob begew sin balbonan ay takkay na. Bindisyonana koma, <sup>24</sup> ngem kanana kasin ay nangipoot, “Ay si Esau ka tet-ewa?”

“Aw yan,” kanan Jacob.

<sup>25</sup> “Mo siya sa, ialim san sida ta manganak ta asiak bindisyonan sik-a,” kanan ama na. Et inyaan Jacob sisya. Idi makakan si Isaac ya makainom sin arak ay in-ey Jacob, <sup>26</sup> kanana, “Omali kas na ay anak ko ta omongo ka.” <sup>27</sup> Omasag-en pay si Jacob ta ongoanas sisya, sinongsong ama na din bado na yan binindisyonana ay nangwani, “Nabanglo ka kayman ay anak ko, tan din banglom et kaman din banglon di kada ay binindisyonan Diyos. <sup>28</sup> Sapay koma ta omanay en sik-as owaoway din odan ay ibaan Diyos ay mapod daya ya mayat abe di gabay di olay sino ay is-ek mo isnan daga. Sapay

koma ta paad-adoen Diyos din apitem ya ta ad-ado abey tapeyem. <sup>29</sup> Sapay koma abe ta manturay ka en daida ay man-ili sin odom ay nanasyon ta mansilbi da en sik-a. Olay din aag-im ay anak en inam et mandokmog da en sik-a, tan sik-a di mangituray abe en daida. Sapay koma abe ta mabaosan din mamaos en sik-a dowan pay mabindisyonan din mamindisyon en sik-a.” Say kanan Isaac na ay namindisyon en Jacob ay anak na.

Idi dinmateng pay si Esau yan inammoana ay inawat Jacob din bindisyon ama da ay oka na koma, palaloy liget na sin iyogtana yan kanana en sed-ena din kateyan ya kaiponponan ama da, asi na peslen. Asi et inammoan Rebeka din plano na, isonga binagaanas Jacob ta lomayaw ed Haran sin kad-an Laban ay pangpangoan Rebeka ta isdi di pantetteana enggana ay makaan di bonget Esau en sisya. Kinwani na abe en asawa na en sigaana ay makiasawas Jacob sin taga-Canaan, isonga inbaan Isaac si Jacob ed Haran ta way iyat na ay man-ilas asawa na sin toton-od da. (27:30-46; 28:1-9)

30 31 32 33 34 35 36 37 38 39 40 41 42 43 44 45 46

## 28

1 2 3 4 5 6 7 8 9

### *Din Iniitaw En Jacob Ed Betel* (28:10-22)

<sup>10</sup>Idi siya di, nanlobwat si Jacob ed Beerseba ay emey ed Haran. <sup>11</sup>Nalabian sin danan, isonga nan-iyang sin esay lugar ay dinatnganas di. Nan-as bato ta say ipongana et pag bomaktad yan maseyep.

<sup>12</sup>Idi siya di nan-iitaw yan inila nay agdan ay natotood sin daga ay omdas ed langit, yan wada day anghel en Diyos ay somaksakyab ya omag-agpas sidi. <sup>13</sup>Wada abes Diyos ay pinmipika sin kad-ana yan kanana, “Sak-en si Yahweh ay Diyos da Abraham en Isaac. Awni man et idawat ko en sik-a ya sin polim din daga ay sana ay binmabaktadam. <sup>14</sup>Yan din polim ay sana, maad-ado da ta kaman din kaad-adon di tapok isnan daga et paannawaen da din beddeng di ili da sin amin ay banda. Manbegew abe en sik-a ya din ipolim, mabindisyonan amin di kaipoipogaw isnan lobong. <sup>15</sup>Dadlon aben tet-ewa ay wadaak en sik-as kankanayon ta ay-ayowanak sik-a sin olay intoy em-emeyam. Asiak aben itlod sik-a ay mantaoli isnan ili ay nay. Adiak pay taynan sik-a, mo adi et tongpalek amin di inkarik en sik-a,” kanan Diyos.

<sup>16</sup>Siya et di kabangon si Jacob yan kanana, “Wada baw si Diyos sina yan adiak dinlaw sin dinmatngak.” <sup>17</sup>Gapo ta emegyat sisya, kanana, “Inayan pay din lugar ay nay tan panbebbeeyan baw en Diyos. Adi pay isna met laeng din segpan ed langit.”

<sup>18</sup>Idi mapat-a pay, nasapas Jacob ay binmangon yan tinood na din bato ay inpongana ta say panginemnemnemana sin naamag. Asi na sinoyatan si lana ay mangidaton en Diyos. <sup>19</sup>Et nginadanana din ili sin kad-ana si Betel,\* tan Luz din ngadana ed idi.

<sup>20</sup>Asi pag mansapata en Diyos ay mangwani, “Sik-a ay Diyos, mo komoyog ka ya omay-ayowan ka sin nay ay pandad-anak, yan mo omya ka sin makan ya bado ay kasapolak, <sup>21</sup>ya mo laton ay mantaoliak sin beey en amak, ikarik ay sik-a anggoy ay Yahweh di Diyos ko. <sup>22</sup>Din bato pay ay nay ay tinood kos na et say pandaydayawan di ipogaw en sik-a. Am-in abe di idawat mo en sak-en yan itaolik di inkasinpo na en sik-a.”

## 29

1 2 3 4 5 6 7 8 9 10 11 12 13

### *Din Nangasawaan Jacob* (29:14b-30; 30:22-26)

\* **28:19** Din olog di Betel et “beey en Diyos.”



Asi pag itoloy Jacob ay mandad-an enggana ay sinmawang ed Haran. Et en nakitee sin kad-an da Laban down aben bomadbadang sin obla da. (29:1-14a)

<sup>14b</sup> Idi inmey di esay bowan, <sup>15</sup> kanan Laban en sisya, “Ammok kayman ay mansin-ama ta, ngem lagboak sik-a pay dedan. Ibagam ngarud mo sinoy laydem si lagbom.”

<sup>16-17</sup> Wada di doway anak Laban ay babassang ay da Lea en Raquel. Din pangpangoan ay si Lea, nakapoy\* din mata na. Mo din iyogtana pay ay si Raquel, mapmapteng di awak na yan napintas sisya.

<sup>18</sup> Gapo ta laydelayden Jacob si Raquel, kanana, “Man-oblaak en sik-a si pito ay tawen mo itay-on mo ay asawaek si Raquel.”

<sup>19</sup> Kanan pay Laban, “Agpos et kayman mo sik-a di mangasawa mo din odom ay ipogaw. Olay isna ngarud di panteteam ay man-obla.” <sup>20</sup> Isonga pito ay tawen di nan-oblaan Jacob ta way iyat na ay mangasawa en Raquel, ngem kaman owat sinkaattikan ay agew din panlikna na begew sin layad na en sisya.

<sup>21</sup> Asi pag kanan Jacob en Laban, “Idawat mo et en sak-en din anak mo ta ibeey kos sisya, tan nakdeng din tawen ay tolagan ta.”

<sup>22</sup> Siya di et inayagan Laban am-in din kailiana ta manpalti da sin kasal di anak na. <sup>23</sup> Ngem sin siya di ay labi, imbis ta si Raquel di ipasgep na koma sin kad-an Jacob ta say daagena, inpasgep nas Lea. Et dinaag Jacob sisya. ( <sup>24</sup> Indawat aben Laban en Lea di esay bag-ena ay balasang ay si Zilpa ta say kabadang na.)

<sup>25</sup> Idi bomangon pay si Jacob sin napat-aana, kambaw si Lea di wada. Isonga inmey si Jacob en Laban yan kanana, “Apay nga say inyat mo di? Si Raquel met di inlagboak. Apay nga sinikapam sak-en?”

<sup>26</sup> Kanan Laban ay sinombat, “Baken min ogali kayman isna ay pangon-onaen ay mangiasawa sin iyogtan mo din pangpangoan. <sup>27</sup> Awni ta malabas din domingo ay nay ta makdeng din palpaltien mi para sin kasal. Asiak aben idawat si Raquel en sik-a ta asawaem, dalo et mo man-obla kas pito kasin ay tawen.”

<sup>28</sup> Inaw Jacob din kanan Laban ay sana, et idi nakdeng din makadominggo ay doy, indawat Laban din anak na ay si Raquel en sisya ta asawaena. ( <sup>29</sup> Indawat na abe en Raquel din bag-ena ay balasang ay si Bilha ta say kabadang na.) <sup>30</sup> Et dinaag aben Jacob si Raquel, et say laylaydena mo si Lea. Asi pag man-obla en Laban si pito kasin ay tawen.

Idi inilan Diyos ay adi laylayden Jacob si Lea, sineg-anganas sisya et naganaganak, ngem si Raquel pay et basig. Idi nabayag yan maga pay laeng di anak na, man-apos si Raquel sin pangpangoana yan nanriri en Jacob. (29:31-35; 30:1-21)

31 32 33 34 35

## 30

1 2 3 4 5 6 7 8 9 10 11 12 13 14 15 16 17 18 19 20 21

<sup>22</sup> Idi siya di, ninemnem Diyos si Raquel. Sinongbatana din kararag na et mabalin ay man-anak sisya. <sup>23</sup> Et doy ay nanliton, et idi bemela yan lalaki. Asi kanan Raquel si ragsak na, “A siya, kinaan Diyos di kaibabainak tan inyaanas sak-en si anak.” <sup>24</sup> Siya di nginadanana din anak na ay doy si Jose\* ay mangwani, “Sapay koma ta tapian Diyos din anak ay nay si esa pay ay lalaki.”

<sup>25</sup> Idi nakdeng ay naianak si Jose, kanan Jacob en Laban, “May, palobosam kod sak-en ta somaaak sin ilik. <sup>26</sup> Palobosam aben asawak ya din an-ak mi ay in-ob-oblaak sin nansilsilbiak en sik-a ta somaa kami. Ammom met damdama di kasiged di inyaat ko ay nansilsilbi en sik-a.”

\* **29:16-17** Di esa abe ay kaiologan nina sin Hebreo et: napintas din mata na.

\* **30:24** Din olog di Jose et “sapay koma ta tapiana.”

Nanlogi sin dinmatngan Jacob ed Haran, nasurok ay dowanpo ay tawen di nanteanas di, asi komaan ay mantaoli sin ilin ama na ed Canaan. Sinpo ya esa di an-ak da ay lalaki. Enem di in-anak Lea, esa en Raquel, ya sagdodowa en da Bilha en Zilpa. Binmangkang abes baka, kalding, karnero, kamel, ya dangki. (30:27–31:55)

27 28 29 30 31 32 33 34 35 36 37 38 39 40 41 42 43

## 31

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51

## 32

### *Din Nansaganaan Jacob Ay Nangabet En Esau*

(32:1-13,20b-21)

<sup>1</sup> Idi wada pay da Jacob sin danan, waday aanghel ay nangabet en daida. <sup>2</sup> Idi inilan Jacob, kanana, “Da naey baw din sosoldadon Diyos.” Et ngingadanana din lugar ay doy si Mahanaim.\*

<sup>3</sup> Idi siya di, wada day bag-en ay inpaon-onan Jacob ed Edom ay kad-an di pangpangoana ay si Esau. <sup>4</sup> Tinogonas daida ay nangwani, “Ibaga yo sin pangpangoan ko en naey di ipadamag Jacob ay mansilsilbi en sisya ay apo na. Ibaga yo abe en nakitetteeak en da Laban enggana ed wani tan nataktakak si nabayag sisi. <sup>5</sup> Ibaga yo pay en nabaknangkak si baka, dangki, karnero, kalding, ya babag-en. Asi yo ibaga en enggay ninas ipadamag ko en sisya ay apok ta mo mabalin koma, siged di nemnem na en sak-en.”

<sup>6</sup> Inmey din babag-en ay en nangibaga en Esau sin inbilin Jacob en daida. Idi nantaoli da pay, kanan da ay nangisodsod, “Inabat mi din pangpangoan mo sin danan. Omonod ay ena abten sik-a ay mangoykoyog si opat ay gasot ay lalaki.”

<sup>7</sup> Idi dinngen Jacob din insodsod da ay sana, peteg ay inmegyat ya madanagan, isonga ginodwa na din kabeweg na pati din animal na et nansianenas daida, <sup>8</sup> tan ninemnem na ay mo labanen Esau din esay grupo, mabalin ay makalayaw din esay grupo.

<sup>9</sup> Makdeng pay di, nankararag ay nangwani, “Sik-a ay Yahweh ay Diyos apok ay Abraham ya si amak ay Isaac, dengngem kod nan kedawek, tan sik-a met laeng di nangibilin en sak-en ay mantaoliak sin kosto ay ilik ya toton-od ko ta asi ka pasigeden biyag ko. <sup>10</sup> Adiak maikari sin dakdake ay tolong ay indawdawat mo en sak-en ay mansilsilbi en sik-a. Ngem tinmolong ka pay dedan, tan sin nan-agadangkak sin ginawang ay Jordan ed idi, sokod anggoy di itaktakin ko. Ed wani pay et doway grupon di ipogaw ya gamgameng ko di wada. <sup>11</sup> Itoloy mo ngarud san tolong mo ta salaknibam dakami en Esau ay pangpangoan ko, tan nay ay omal-ali yan emegyatak tan mo et peslenas dakami am-in, pati din sin-iin-a. <sup>12</sup> Ngem sik-a pay, inkarim ay pasigedem biyag ko ya paad-adoem aben polik ta kaman din kaad-adon di darat sin benget di baybay.”

<sup>13</sup> Idi nakdeng ay nankararag si Jacob, pinmili sin animal na ay idawat na en Esau, <sup>14</sup> <sup>15</sup> <sup>16</sup> <sup>17</sup> <sup>18</sup> <sup>19</sup> <sup>20-21</sup> et inpaon-ona na sin odom ay babag-ena, tan kanana en say iabog na en sisya ta balbalang mo pasinsiyaanas sisya sin pan-abtan da. Mo si Jacob pay, nantettee sin pankampoan da sin kad-an di ginawang ay Jabbok.

### *Din Nakidamaan Jacob Ed Peniel*

(32:22-32)

<sup>22</sup> Idi daan pay laeng mapat-a sin siya di ay labi, binmangon si Jacob et inayagana din doway asawa na ya din doway bag-ena ay babai ya din sinpo ya esa ay anak na ta ipaagadang nas daida sin ginawang ay sana. <sup>23</sup> Asi na aben ipaagadang am-in din nabay-an ay gamgameng na <sup>24</sup> et nataynan sisya ay eng-enggay na.

\* **32:2** Din olog di Mahanaim et “dowa ay sinkabeweg” ono “dowa ay pankamkampan.”

Idi siya di, wada et di sinmawang ay lalaki ay nakidama en sisya engganang dandani ay mapat-a. <sup>25</sup> Idi pasalen din lalaki ay sana ay adi makaabak en Jacob, kadespeg sin lipad na et naikomsiw. <sup>26</sup> Asi na kanan, “Omibolos ka kod, tan enggay mapatpat-a.”

Ngem kanan Jacob, “Sigaak, adiak ibolos sik-a enggana ay bindisyonam sak-en.”

<sup>27</sup> “Sinoy ngadan mo?” kanan din lalaki.

“Si Jacob,” insongbat na.

<sup>28</sup> Pag kanan din lalaki, “Manlogi ed wani, baken Jacob di ngadan mo mo adi et Israel,† tan ed idi way inabak mo ay ib-am ay ipogaw, yan ed wani abe, nakidama ka en Diyos yan nangabak ka.”

<sup>29</sup> Kanan pay Jacob, “Ibagam kod abe din ngadan mo.”

Ngem kanan din lalaki, “Dakey, adi ka damdamagen ngadan ko.” Asi na pag bindisyonan si Jacob et madipos. <sup>30</sup> Et nginadanan Jacob din lugar ay sanas Peniel,‡ tan kanana, “Nansango kami baw en Diyos, yan matmatagoak pay laeng.”

<sup>31</sup> Maag-aggew sin kinmaanan Jacob ed Peniel, yan manpilpilay ay mandad-an begew sin naikomsiw ay lipad na. <sup>32</sup> Say gapo na ay mo way paltien din Israelita, adi da isida sin lamlames di lipad enggana ed wani, tan din lamlames ay sana din dinespeg di kinadaman Jacob.

### *Din Nan-abtan Da Jacob En Esau Ya Din Nateyan Da Raquel En Isaac*

Idi nan-abet da Jacob en Esau, laton ay nakaan bonget en Esau, et mayat di ngalatan da ay dowa. Idi nakdeng di ngalatan da, naisian da Esau ay somaa ed Edom. Intoloy pay aben da Jacob ay emey ed Canaan.

Nankampo da ed Sekem et say nantean das nabaybayag. Pag dan man-etan ed Betel. Sin kawada das di, inkarin Diyos kasin en Jacob ay bindisyonanas sisya ya din poli na. Pag dan manlobwat ay emey ed Betlehem.

Idi wada da sin danan, nan-anak si Raquel. Nanpalpaligat ay nan-anak, et idi nakdeng ay inpabela na din moyang, natey. Ngem din anak na pay, laton ay natago, et nginadanan Jacob si Benjamin. Asi na pag iponpon din bangkay asawa na et tinood na di bato ay mangipaila sin kad-an di naiponponana. Asi da ikanayon ay emey ed Mamre ay kad-an Isaac ay ama na.

Emey pay di nasurok ay sinpo ya dowo ay tawen, natey si Isaac ay mantawen si 180, et inponpon din anak na ay da Esau en Jacob. (33:1-20; 35:16-20,27-29)

## 33

1 2 3 4 5 6 7 8 9 10 11 12 13 14 15 16 17 18 19 20

## 34

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31

## 35

1 2 3 4 5 6 7 8 9 10 11 12 13 14 15 16 17 18 19 20 21

### *Din Lista Di Anak En Jacob (35:22b-26)*

<sup>22b</sup> Da naey di ngadngadan di sinpo ya dowo ay anak en Jacob. <sup>23</sup> Din in-anak en Lea et si Ruben (ay din besag en Jacob), si Simeon, si Levi, si Juda, si Issakar, ya si Zebulun. <sup>24</sup> Din in-anak pay en Raquel et da Jose en Benjamin. <sup>25</sup> Din in-anak abe en Bilha ay bag-en Raquel et da Dan en Naftali. <sup>26</sup> Din anak abe en Zilpa ay bag-en en Lea et da Gad en Aser. Am-in din anak Jacob ay sana et naianak da ed Mesopotamia. <sup>27 28 29</sup>

† 32:28 Din olog di Israel et “makidama en Diyos.” ‡ 32:30 Din olog di Peniel et “ropan Diyos.”



## 36

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43

## 37

*Din Iniitaw En Jose*

<sup>1</sup> Intoloy da Jacob ay nanbeey ed Canaan ay ilin ama na ed idi. <sup>2</sup> Naey pay di dad-at ay maipanggep sin naamag sin an-ak na ya ap-o na ay manlogi sin napasamak en Jose.

Idi mantawen si Jose si sinpo ya pito, nakikoykoyog sin aag-i na ay din an-ak en da Bilha en Zilpa ay asawan ama na. Daida di mangay-ayowan sin karnero ya kalding da. Yan waday insodsod na en ama na maipanggep sin inam-amag da ay lawa.

<sup>3</sup> Si Israel pay, say laylaydena ay anak si Jose, tan say naianak sin enggay nakayana. Siya di waday inpaamag na ay nagayad ya naaltian ay bado et indawat na en Jose.

<sup>4</sup> Idi inammoan din aag-i na ay sisya di laylayden ama da, kaliliget das sisya, isonga kabobonget di iyat da ay makingalat en sisya.

<sup>5</sup> Sin namingsan, waday iniitaw Jose yan dinad-at na sin aag-i na <sup>6</sup> ay nangwani, “Dengngen yo kod nan iniitaw ko. <sup>7</sup> Wada tako kano am-in sin payew ay manlablabed sin inani tako yan natood kano din nilabed ko. Din nilabed yo pay kano yan nilikob da din nilabed ko et nandokmog da en sisya.”

<sup>8</sup> Sin nanngenan das di, kanan din aag-i na ay sana, “Ay kanam en manbalin kas ari ta iturayam dakami? Ay ado paabe na!” Et nasepsep ay malmaliget da en sisya begew din iniitaw na ay sana ya din inbaga na maipanggep sidi.

<sup>9</sup> Idi siya di, nan-iitaw kasin si Jose yan kasinan dinad-at sin aag-i na. Kanana, “Wada di kasinak iniitaw, yan inilak kano din agew ya din bowan ya sinpo ya esa ay talaw ay nandodokmog en sak-en.”

<sup>10</sup> Dinad-at na abe din iniitaw na ay sana en ama na, ngem niyamyaman ama na ay nangwani, “Ay maney pay sas iitaw! Ay kanam en dakami en inam ya din aag-im yan mandokmog kami en sik-a?” <sup>11</sup> Siya di inapalan din aag-i nas sisya, ngem nemnenemnemen ama na mo sinoy layden ay kalien din iniitaw Jose ay sana.

*Din Nailakoan Jose Ya Din Inmeyana Ed Egipto  
(37:12-35)*

<sup>12</sup> Waday namingsan ay inmey din aag-in Jose ed Sekem ta en da ipastol din animal das di. <sup>13</sup> Kanan Jacob en Jose, “Laydek ay emey ka ed Sekem ay pangipasastolan di papangoam sin karnero ya kalding.”

“Aw adi,” kanana ay sinombat.

<sup>14</sup> “En ka ilaen mo laton ay maga di napasamak en daida ya din pastol da. Asi ka mantaoli ay en mangibaga en sak-en,” kanan ama na. Et inpalobwat nas Jose sin tanap ed Hebron ay emey ed Sekem.

Somawang pay ed Sekem, <sup>15</sup> inilan di esay lalakis sisya ay lomikeliked sin kad-an di pastolan, yan kanana, “Sinoy an-anapem?”

<sup>16</sup> “An-anapek din aag-ik ay mangipasastol sin karnero ya kalding da. Ay ammom di kad-an da?” kanan Jose ay sinombat.

<sup>17</sup> Kanan pay din lalaki, “Enggay nadipos da met, ngem didinngek ay kanan da en emey da ed Dotan.” Siya et di, inkanayon Jose ay emey ed Dotan, et dintengana din aag-i nas di.

<sup>18</sup> Idi tinamang das sisya ay omas-asag-en, nantotolag din odom ay peslen da. <sup>19</sup> Kanan da, “Sana din ad-adoy iitaw na. <sup>20</sup> Peslen tako et ta egasen tako sin esay bobon. Mabalin ay kanan tako en pinsen di maangat ay animal. Asi tako ilan mo siya ay temet-ewa din iniitaw na.”

<sup>21</sup> Ngem idi dinngan Ruben ay pangpangoan da din plano da ay sana, inandiyana ay nangwani, “Adi tako peslen damdama! <sup>22</sup> Olay egasen tako anggooy sin bobon ay nay

isnan lugar ay magay omili, tan lawa mo sakitan tako.” Say inbaga na di, tan panggep na ay ena enaten si Jose sin bobon ta ipasaa na en ama na.

<sup>23</sup> Domateng pay si Jose sin kad-an di aag-i na, kagamdot da en sisya et kakaan da sin naaltian ay bado na. <sup>24</sup> Pag da en egasen sin bobon ay sana ay iwed danom na.

<sup>25</sup> Makdeng pay di, tinmokdo da ay mangan. Ngem magas Ruben tan waday inmeyana.

Idi mangmangan da, tinamang day grupon di ipogaw ay polin Ismael ya polin Midian ay omas-asag-en ay napod Gilead. Nakakargaan din kamel das nangina ay kalkalasin di bangbanglo ya balsamo ay en da ilako ed Egipto. <sup>26</sup> Siya di, kanan Juda, “Magay pansigdan tako met mo peslen takon iyogtan tako ya asi tako isaot din inyat na ay natey. <sup>27</sup> Olay ilako tako et sin polin Ismael ay doy da ta adi tako peslen, tan iyogtan tako met dedan ay anak ama tako.” <sup>28</sup> Inaw din aag-in Juda din inbaga na ay sana. Idi dinmateng din man-ilaklako ay doy, innat das Jose sin bobon et inlako da en daidas downpo ay palata et intakin da ed Egipto.

<sup>29</sup> Mantaoli pay si Ruben sin bobon ay napo sin inmeyana, naiwed si Jose. Kabisngit sin bado na tan palalo ay mansakit nemnem na. <sup>30</sup> Pag en maitapi sin aag-i na yan kanana, “Naiwed si iyogtan tako ngay! Intoy iyat ko pay?”

<sup>31</sup> Idi siya di, pinse day kalding et insiblaw da din nagayad ay badon Jose sin dada na. <sup>32</sup> Pag dan paiey en ama da yan inpaibaga da ay mangwani, “Dinteng mi nan nagayad ay bado. Biliem kod mo siya na din badon di anak mo.”

<sup>33</sup> Naimatonan ama da ay dagos yan kanana, “Siya met! Ay kambaw binisngibisngit ya kinan di maangat ay animal si Jose ay anak ko!” <sup>34</sup> Kabisngit sin mismo ay bado na et manbados naamag si sako ta ipaila nay sakit di nemnem na. Nabayag ay inladingitanas Jose. <sup>35</sup> Olay mo inmali am-in di anak na ay en mangliwliwa en sisya, siya met laeng ay adi kaliwliwa, tan kanana, “Bay-an yo, itoltoloy ko ay mangiladingit sin anak ko engganay mateyak ya maitapiak en sisya sin kad-an di ab-abiik di natey.” <sup>36</sup>

## 38

### *Da Juda En Tamar*

<sup>1</sup> Sin siya di ay timpo, tinaynan Juda din aag-i na ay lallalaki sin kadondontogan et en nanbeey sin asag-en di lalaki ay taga-Adullam ay manngadan si Hira. <sup>2</sup> Isdi ay inilan Juda di Canaaneo ay babai ay anak Sua et inasawa na. <sup>3</sup> Nawad-an et in-anak na di lalaki ay nginadananas Er. <sup>4</sup> Nan-anak kasin si esay lalaki yan nginadananas Onan. <sup>5</sup> Nan-anak pay kasin si esa ay lalaki yan nginadananas Sela. Wada da ed Akzib sin nangianakana.

<sup>6</sup> Inpaasawan Juda di esa ay babai ay manngadan si Tamar sin inoona ay anak na ay si Er. <sup>7</sup> Ngem lawlaw di ogalin Er sin pangilan Diyos, isonga pinse nas sisya. <sup>8</sup> Pag kanan Juda en Onan, “Asawaem din tinaynan di pangpangoan mo, tan siya met di lebbeng na ay amagem ay bayaw na ta man-ipotot ka para sin natey ay pangpangoan mo.” <sup>9</sup> Ngem gapo ta ammon Onan ay adi maibilang ay anak na din ipotot na, ipogit na sin lota din similya na mo mandaag da en Tamar ta adi na ipototan din pangpangoana. <sup>10</sup> Basol sin pangilan Diyos din doy ay am-amagen Onan, isonga pinse na abes sisya.

<sup>11</sup> Idi siya di, kanan Juda en Tamar ay innapo na, “Somaa ka pay laeng sin beey amam, ngem adi ka makias-asawa ta sed-em ay madakdake si Sela.” Say kanana di tan madandanagan into et mo matey abes Sela ay kaman din pangpangoana. Et sinmaas Tamar sin beey da ama na.

<sup>12</sup> Idi malabas di katawetawen, natey din anak Sua ay asawan Juda. Makdeng pay din timpo ay nangiladladingitanan asawa na, nantikid ed Timna ay panpokpokisan da si karnero na. Nankoyog da sin gayyem na ay si Hira ay taga-Adullam.

<sup>13</sup> Idi nadamag Tamar ay inmey din katogangana ed Timna ta en da manpokis sin karnero na, <sup>14</sup> sinokatana din bado na ay badon di balo. Kinomotana din ropa na yan

en tinmokdo sin segpan di ili ay Enaim ay say danan ay emey ed Timna. Say ninemnem na di, tan ammo na ay enggay nadakdake si Sela, ngem adi pay laeng ipaasawan Juda en sisya.

<sup>15</sup> Idi inilan Juda sisya, inpagarup na en esa ay hostess, tan kinomotana din mata na.

<sup>16</sup> Et sinmag-en si Juda en sisya sin igid di kalsada yan tinolag na ay mandaag da, tan adi na inmatonan ay sisya baw din innapo na. Pag kanan Tamar, “Sino ngin di idawat mon sak-en ta asi ta mandaag?”

<sup>17</sup> Kanan Juda, “Ibaak to di mangidawat en sik-a si anak di kalding ko.”

Songbatan pay Tamar yan kanana, “Laydek mo omya ka si mangipasigurado ay idawat mo sa.” <sup>18</sup> Idi sinalodsod Juda mo sinoy laydena ay alaen, say kindaw na din singsing, bilko ya din baston Juda. Indawat na dadi et nandaag da yan nasikogan si Tamar.

<sup>19</sup> Idi sinmaas Tamar, kinaana din in-abbong nas ropa na yan inosal na kasin din badon di nalasang. <sup>20</sup> Idi inbaan Juda si Hira ta ena idawat din kalding ya taoliena din singsing, bilko ya baston, iwed si Tamar ay dintengana. <sup>21</sup> Nandamag si Hira sin lallalaki ed Enaim yan kanana, “Into din hostess ay doy ay mansesed sin segpan di ili?”

Ngem kanan da, “Maga met di hostess isna.”

<sup>22</sup> Isonga nantaoli sin kad-an Juda yan kanana, “Iwed met din babai ay nadtengak yan kanan abe din omilis di en maga polos di kaman nidi di obla na ay babai sin isdi.”

<sup>23</sup> Pag kanan Juda, “Mo siya sa, olay bay-am ta oka na din ina na ay pakasiguradoana, tan adi pay somiyek da et di ipogaw. Olay tan inpaitolod ko met din anak di kalding ay nay yan magas sisya.”

<sup>24</sup> Malabas pay di tolo ay bowan, waday nangipadamag en Juda ay masikog si Tamar tan nakikamalala. Inbilin ngarud Juda ay ibela das Tamar ta pooan da.

<sup>25</sup> Idi inbela das Tamar, waday inpaibaga na sin katogangana ay kanana, “Din akin oka isnan singsing, bilko ya baston yan say aman din sikog ko ay nay. Imatonam kod mo sinoy akin oka en dana.”

<sup>26</sup> Asi pag imatonan Juda ay oka na dadi et kanana, “Nalinlinteg iman din babai ay doy mo sak-en, tan adiak iman inpaasawas Sela ay anak ko en sisya.” Et adi na kasin dinaag si Tamar.

<sup>27</sup> Idi domteng din timpo ay pan-anakan Tamar, naammoan ay singin din sikog na.

<sup>28</sup> Sin panpalpaligatana, inpabelan din esay moyang din takkay na et tinngel din manpapaanak din takkay na ay sana, pag nan galotan si manbalanga ay sinolid. Kanana, “Sinay di nangon-ona.” <sup>29</sup> Ngem innat din moyang din takkay na yan namangpango din kasingina. Et kanan din manpapaanak ay masmasdaaw, “Apay nga sik-a et di nangon-ona?” Et nginadananas Perez. <sup>30</sup> Pag omonod din nagalotan di takkay nas manbalanga ay sinolid et nginadanan das Zera.

## 39

### *Din Naamag En Jose Begew Sin Asawan Potifar*

<sup>1</sup> Mo si Jose pay, indateng din polin Ismael ed Egipto et inlako das sisya en Potifar ay kapitan di gogowardian di ari. <sup>2</sup> Gapo ta wadas Diyos en sisya, siked di pantongpalan di olay sino ay am-amagena yan nakitettee sin beey di among na. <sup>3</sup> Idi inilan Potifar ay wadas Diyos en sisya ay mangipasigurado sin pantongpalan di amin ay am-amagena, <sup>4</sup> napnek en sisya, yan dinotokanas sisya ay kakoykoyog ya kabadang na. Intalek na abe en sisya din beey na ya am-in di gamgameng na ta sisya di makaammo. <sup>5</sup> Nanipod sisi, binindisyonan Diyos si Potifar ya am-in da ay bemeey begew en Jose, yan pinasiked na ya inpaad-ado na amin di gamgameng na sin beey na ya daga na. <sup>6</sup> Gapo ta intalek Potifar en Jose am-in di gamgameng na, maga di masapol ay nemnemnemena powiray makan.

Asi et gowapo abe si Jose yan mapmapteng di awak na. <sup>7</sup> Isonga baken nabayag yan inaklongan asawan Potifar sisya yan kanana, “En ta mandaag.”

<sup>8</sup> Ngem sigaana ay nangwani, “Lawa damdama na! Ammom ay maga di siyat asikasoen among ko sin beey ay nay mo wadaak isna, tan dinotokana od sak-en ay makaammo sin am-in ay gamgameng na. <sup>9</sup> Nais-o abe din lebbeng ko sin beey ay nay sin lebbeng na yan maga met iman di kinayyawana en sak-en powiras sik-a, tan sik-a di asawa na. Isonga adi mabalin ay amagek san lawa ay ibagbagam, tan bomasolak en Diyos.” <sup>10</sup> Yan olay mo ipilit din asawan Potifar ay mangawis en sisyas inag-agew, inapasnek na pay dedan ay manigaan ya adi aben makikadkadwa en sisya.

<sup>11</sup> Idi siya di, waday namingsan ay sinenggep si Jose sin beey ta amagena din obla na, yan kambaw maga di odom ay bag-en sidi. <sup>12</sup> Siya et di kaipakod din asawan Potifar sin bado na yan kanana, “En ta mandaag ay!” Ngem katagtag si Jose et binmela, isonga nataynan din bado na sin takkay din babai.

<sup>13</sup> Idi inilan din babai ay tinaynana din bado na sin nanagtagana ay binmela, <sup>14</sup> kaayag sin babag-ena yan kanana en daida, “Ilaen yo kadi! In-alin asawak san Hebreo ta ibabbainas datako! Sinenggep isnan kowartok ta pilitena komas sak-en, ngem nankilaladak. <sup>15</sup> Idi siya di, katagtag ay binmela, ngem kambaw tinaynana din bado na ay nay sin kad-ak.”

<sup>16</sup> Indolin din babai din bado ay doy sin kad-ana engganay sinmaas Potifar ay among Jose. <sup>17</sup> Asi na aben isodsod en sisya ay nangwani, “Din doy bag-en ay Hebreo ay in-alim sina, sinenggep sin kowartok ta pilitena komas sak-en. <sup>18</sup> Ngem nankilaladak, isonga katagtag ay binmela yan tinaynana din bado na ay nay sin kad-ak.”

<sup>19</sup> Idi dinngen din among Jose din insodsod asawa na, palalo di bonget na. <sup>20</sup> Kaipadpap en Jose et kaipabalod sin kad-an di balod di ari. Et say nantetteana. <sup>21</sup> Ngem olay sin balodan, wada pay si Diyos en sisya ay mamadbadang, isonga mapnek din gowardiya en sisya. <sup>22</sup> Inpolang na ngarud en Jose din gagait na ay balod ya din amin ay maamag sin balodan. <sup>23</sup> Siya di, basta obla ay naitalek en Jose, adi masapol ay asikasoen din gowardiya, tan wadas Diyos en Jose ay mamadbadang en sisya, isonga siged amin di pantongpalan din am-amagena.

## 40

### *Din Nangiologan Jose Sin Iniiitaw Di Gait Na Ay Balod*

<sup>1-2</sup> Idi nabaybayag, waday doway opisyal di ari ed Egipto ay binmasol en sisya, ay din ap-apon di mantagtagay si tapey ya din ap-apon di man-ot-otos tinapay. Isonga inbonget nas daida <sup>3</sup> et inpabalod na sin balodan ay partin di beey di kapitan di gowardiya ay kad-an Jose met laeng. <sup>4</sup> Gapo ta nangato ay opisyal din doway ay nay, dinotokan din kapitan si Jose ay mansilbi en daida.

Idi nabaybayag da sin balodan, <sup>5</sup> waday esay labi ay nan-iitaw da ay doway, yan ammo da ay way layden din iniitaw da ay kalien. <sup>6</sup> Idi mapat-a, inmey si Jose sin kad-an da. Inila na ay madandanagan da <sup>7</sup> yan kanana en daida, “Apay nga mansasadot kayo ed wani?”

<sup>8</sup> “Aw ngarud, tan nan-iitaw kami ay doway ed labi, yan maga polos di makaiolog sin layden di iitaw mi ay kalien,” kanan da.

“Si Diyos anggoy di mangidawat si laing ay mangiolog sin iitaw. Ibaga yo kod en sak-en din iniitaw yo ay sana,” kanan Jose.

<sup>9</sup> Nangon-ona din mantagtagay ay nandad-at yan kanana, “Siya na din iniitaw ko. Wada kanoy wakan di obas sin sangok <sup>10</sup> ay toloy panga na. Idi katobtobo na, nanbonga yan nanlames. Sinkaattikan abe yan naom din lames na. <sup>11</sup> Gapo ta iin-genak baw din tasan di ari, pinogopog ko din obas yan inpespes ko din danom na sin tasa ay sana. Asiak en itagay sin ari. Siya sa di iniitaw ko.”

<sup>12</sup> “Siya na di olog na,” kanan Jose ay nanongbat. “Din toloy panga na ay doy yan toloy agew di, <sup>13</sup> tan mo malabas di toloy agew, pasinsiyaan daka sin ari yan pataolien daka sin sigod ay oblam ta kasin kan itagtagay din inomena ay kaman din inyaat mo ed idi. <sup>14</sup> Mo kasin pay somiged di biyag mos di, pangaasim kod ta nemnemem sak-en yan ibagam kod sin ari din maipanggep en sak-en ta mo mabalin koma, ibolosanas sak-en sin balodan ay nay. <sup>15</sup> Tan pilit ay inmitagtag da dedan sin ilin di Hebreo, yan olay isnan ed Egipto, maga polos di inamag ko si omanay si maibalodak,” kanan Jose.

<sup>16</sup> Idi dinngen din ap-apon di man-ot-otos tinapay din siged ay olog di iitaw di kadwa na, kanana abe en Jose, “Mo din iniitaw ko pay, wada kanoy tolo ay baskit ay napay-an si tinapay ay inaagtok. <sup>17</sup> Din nakin kayang et napnos am-in ay kalasin di tinapay ay para sin ari. Asi et wada baw di titit ay mangmangan sin tinapay ay sana.”

<sup>18</sup> Kanan aben Jose, “Din olog aben di iniitaw mo et siya na. Din toloy baskit yan toloy agew met laeng, <sup>19</sup> tan mo emey di toloy agew, ipapoton din ari din toktok mo. Asi daka ibay-at sin posti et kanen di titit din lamlam mo.”

<sup>20</sup> Sin maikatlo ay agew, nanpalti din ari ta silibrarana din agew ay naianakana, et inpaayag na am-in di tuturay di ili. Asi na aben ipaayag sin kad-an da din ap-apon di mantagtagay ya din ap-apon di man-ot-otos tinapay. <sup>21</sup> Din ap-apon di mantagtagay, pinataoli na tet-ewa sin sigod ay obla na. <sup>22</sup> Mo din kadwa na pay, inpabay-at na sin posti. Et natongpal am-in din kanan Jose. <sup>23</sup> Asi et dadlon nilinglingan din ap-apon di mantagtagay si Jose.

## 41

### *Din Nangiologan Jose Sin Iniitaw Di Ari*

<sup>1</sup> Malabas pay di doway tawen, nan-iitaw abe din ari ed Egipto. Wada kanos sisya ay pinmipika sin benget di ginawang ay Nile, <sup>2</sup> yan inila na kanoy pito ay baka ay malames ya mankanapteng ay binmela sin danom, et man-alab das di. <sup>3</sup> Idi siya di wada kasin di pito ay baka ay binmela, ngem nabigobigot da ay mabilang din tataklang da. Inmey da kano sin kad-an di pito ay mankalalames, <sup>4</sup> yan kakan da sin mankalalames ay sana. Pag igibek din ari.

<sup>5</sup> Idi kasin naseyep sisya, nan-iitaw kasin, yan inila na kanoy pito ay leg-ey sin esay poon ay namoslingan di lames na. <sup>6</sup> Maaw-awni kano abe yan sinmimit ya ginmabay di pito abe ay leg-ey ay nanakpes di lames na tan kinset di man-atong ay dagem. <sup>7</sup> Yan kaikom-ot da sin namoslingan di lames na. Asi kasin bomangon din ari yan kambaw iitaw anggoy.

<sup>8</sup> Idi mapat-a pay, madandanagan sisya, isonga inpaayag na am-in din nalaing ay manpontos ya mankotom sin ili da ed Egipto ta damagena en daida mo sinoy layden din iitaw na ay kalien. Ngem idi dinad-at na en daida, maga di makaibaga sin olog na en sisya.

<sup>9</sup> Idi siya di, kanan din mantagtagay, “Apo Ari, manemnem ko din nankolangak ed idi. <sup>10</sup> Inbonget mos sak-en ya din ap-apon di man-ot-otos tinapay. Et inpabalod mos dakami sin kad-an di beey di kapitan di gowardiya. <sup>11</sup> Waday esay labi ay nan-iitaw kami ay doway yan ammo mi ay waday layden din iniitaw mi ay kalien. <sup>12</sup> Wada abey baro ay Hebreo ay bag-en di kapitan di gowardiya ay naitapian mi sin balodan. Idi dinad-at mi en sisya din iniitaw mi, inbaga na din laydena ay kalien. <sup>13</sup> Yan natongpal iman din inbaga na, tan mo sak-en yan inmipataoli ka sin sigod ay oblak, ngem din kadwak pay et inpabay-at mos sisya.”

<sup>14</sup> Idi dinngen din ari din inbagan di mantagtagay ay sana, inpaayag nas Jose et dalasen da ay en mangibolos sin balodan. Idi nanpapokis ya nansokat pay sisya, sinenggep sin kad-an di ari. <sup>15</sup> Kanan din ari, “Waday iniitaw ko, yan maga polos di



makaiolog. Isonga inpaayag kos sik-a tan basta dengngem kano di iitaw yan ammom di laydena ay kalien.”

<sup>16</sup> Sinombat si Jose yan kanana, “Adiak kabaelan, ngem si Diyos pay et kabaelana ay mangiolog ay kosto.”

<sup>17</sup> Pag kanan din ari, “Din iitaw ko pay et pinmipikaak kano sin benget di ginawang ay Nile, <sup>18</sup> yan inilak di pito ay baka ay mankalalames ya mankanapteng ay binmela sin danom, et ilogi da ay man-alab sin benget di ginawang. <sup>19</sup> Ngem siya et di, wada kasin di pito ay baka ay binmela, ngem nabigobigot da ay mabilang tadlang da. Lawlaw da ay baka. Maga polos di inil-ilak si kaman dadi sin intiro ay Egipto. <sup>20</sup> Din doy da ay nabigobigot ay baka, kakan da sin mankalalames, <sup>21</sup> ngem maga di kailasinana ay kinan da, tan siya met laeng ay nabigobigot da. Pagak igibek.

<sup>22</sup> “Idi naseyepak kasin, nan-iitawak kasin yan inilak kanoy pito ay leg-ey sin esay poon ay namoslingan di lames na. <sup>23</sup> Maaw-awni abe yan sinmimit ya ginmabay di pito abe ay leg-ey ay nanakpes di lames na tan kinset di man-atong ay dagem. <sup>24</sup> Asi kaikom-ot da sin namoslingan di lames na. Dinad-at ko din doway iitaw ko ay nay sin nalalaing ay manpontos, ngem maga en daida di makaiolog.”

<sup>25</sup> Kanan pay Jose, “Apo Ari, inpaaitaw Diyos en sik-a din doway iitaw mo ay sana ta maammoan din amagenan to. Man-iso di olog da ay doway. <sup>26</sup> Din pito ay baka ay malames ya din pito ay leg-ey ay namoslingan di lames na et pito ay tawen din olog dadi. <sup>27</sup> Din pito abe ay baka ay nabigobigot ya din pito ay leg-ey ay kinset di dagem et pito ay tawen di betil. <sup>28</sup> Kaman met laeng din inbagak ed kaonyan, ay inpaammon Diyos en sik-a din amagenan to. <sup>29</sup> Tan wadan to di pito ay tawen ay aped na ay ad-adoy lames di molmola ya kakaiw sin intiro ay ili ay Egipto. <sup>30</sup> Asi maisokat di pito abe ay tawen ay betil, et maliw-an din siged ay biyag sin nangon-ona ay tawen, tan enggay maabosan din ili ay nay si makan. <sup>31</sup> Et adi manemnem din kinabaknang di ili sin nangon-ona ay tawen, tan palalo ay kaeegyat din betil ay maodi. <sup>32</sup> Siya sa din olog di iitaw mo. Din nangipidwaam abe ay nan-iitaw, laydena ay kalien en enggay kineddangan Diyos din maamag ay nay yan adi aben mabayag di katongpalana.

<sup>33</sup> “Isonga din iyat mo koma ay apo, man-ila kas nanemneman ya nalaing ay ipogaw ta say makaammo sin ili ay nay. <sup>34</sup> Mandotok ka abes tuturay ay en mansingil sin inkaliman di anien di ipogaw sin omali ay pito ay tawen ay siged di apit. <sup>35</sup> Iyaam abe daida si lebbeng da ay mangiolnong sin inkalima ay sana ta idolin da ya bantayan da sin inil-ili. <sup>36</sup> Tan mo say iyat mo di, mawaday reserba takos makan yan maga di madagaangan mo domteng din pito ay tawen ay betil,” kanan Jose.

### *Din Nadotokan Jose Ay Man-gubernur Ed Egipto*

<sup>37</sup> Idi siya di, inaboloyan din ari ya din tuturay di ili din planon Jose ay sana <sup>38</sup> yan kanan din ari en daida, “Magan samet di datngen takos odom ay ipogaw ay kawadaan di Ispiriton di Diyos.” <sup>39</sup> Pag nan kanan en Jose, “Sik-a met laeng di nangipaammoan Diyos sin amin dana, isonga magan samet di mas nanemneman ya nalaing mo sik-a. <sup>40</sup> Sik-a ngarud di makaammo sin tuturay ko ay nay, ya am-in abe di ipogaw ko et pasien da din ibagam. Sak-en anggoy di nangatngato mo sik-a. <sup>41</sup> Et nay dotokak sik-a ay man-gubernur isnan intiro ay ili ay Egipto.” <sup>42</sup> Sin nangwanian di aris di, kinaana din singsing na ay naigolitan di malkan di ari et inpeey na sin gomot Jose. Nanbadoena abe sin kasisigedan ay nagayad ay bado yan kinekeanas balitok. <sup>43</sup> Indawat na abe en sisya din maikadwa ay kalisa na ta say panloganana yan wada abey mamangpango mo sisya ay manbogbogaw, “Iay-ayedan yo! Iay-ayedan yo!”\* Siya sa din inyat di ari ay nangdotok en Jose ay man-gubernur sin intiro ay ili ed Egipto. <sup>44</sup> Kanana abe en sisya, “Sak-en di ari pay laeng, ngem tet-ewa pay dedan ay maga polos di man-gido mo adim

\* **41:43** Di esa abe ay kaiologan nina sin Hebreo et: “Mandokmog kayo! Mandokmog kayo!”

ipalobos.”<sup>45-46</sup> Nginadanana abes Jose si Zafenat Panea ay ngadan di taga-Egipto, asi na iyaan si balasang ay asawa na. Din balasang ay sana et si Asenat ay anak en Potifera ay padi ed Heliopolis.

Tolonpo di tawen Jose sin nangilogiana ay mansilbi sin ari ed Egipto. Et en nanliklied sin intiro ay ili ay Egipto.<sup>47</sup> Sin pito ay tawen ay siged di apit,<sup>48</sup> inpaolnong Jose din inanin di ipogaw sin esa ya esa ay ili et inpadolina sin agamang das di.<sup>49</sup> Aped na ay tinmapog din naidolin ay kaman din kaad-adon di darat sin benget di baybay, isonga inpasaldeng Jose ay mangipabilang sin maipenpenpen.

<sup>50</sup> Sin daan domteng di betil, namidwa ay nan-anak din asawan Jose ay si Asenat.<sup>51</sup> Din besag da ay lalaki et nginadanan Jose si Manasses,<sup>†</sup> tan kanana, “Inpalingling Diyos en sak-en din ligat ko ya din toton-od ko.”<sup>52</sup> Lalaki abe din maikadwa, et nginadanan Jose si Efraim,<sup>‡</sup> tan kanana, “Inyaan Diyos sak-en si anan-ak sin ili ay nay ay napaligatak.”

<sup>53-54</sup> Idi siya di, tinmet-ewa din inpadton Jose. Idi nakdeng din pito ay tawen ay siged di apit, naisokat din pito ay tawen ay betil. Wada abey betil sin odom ay kailili, ngem ed Egipto pay, sobra pay laeng di makan.<sup>55</sup> Idi madagaangan abe din taga-Egipto, en da nankedaw si kanen da sin ari, yan kanan din ari, “En kayo ilan si Jose yan pasien yo amin ay ibaga na.”

<sup>56</sup> Idi nasepsep din betil sin intiro ay ili ed Egipto, inpabokat Jose din kaagaagamang et nan-ilakos makan sin taga-Egipto.<sup>57</sup> Ad-ado abey ipogaw ay inmey ed Egipto ay napo sin addawi ay il-ili ta en da manaoy en Jose, tan nakaro abe din betil sin kad-an da.

## 42

### *Din Inmeyan Din Aag-in Jose Ed Egipto Ay En Manaoy*

<sup>1</sup> Idi inammoan Jacob ay wada di pansaoyan si makan ed Egipto, kanana sin an-ak na, “Adi tako owat tomotokdo,<sup>2</sup> tan wada kano di makan ed Egipto. En kayo kod manaoy sidi ta adi tako matey si dagaang.”

<sup>3-5</sup> Siya di inmey din sinpo ay papangoan Jose ed Egipto ta en da manlakos kanen da, tan nakaro abe din betil ed Canaan. Ngem si Benjamin pay ay kosto ay iyogtana, adi pinalobosan Jacob ay makeey tan emegyat into et ya waday mapasamak en sisya.

Domateng pay din aag-in Jose ed Egipto, naitapi da sin odom ay kaipoipogaw ay en nanaoy.<sup>6</sup> Gapo ta si Jose di gobernador di ili, ya sisya met laeng di nangilaklakos makan sin napo sin odom ay kailili, en da mandokmog ay manyakog-ong en sisya.<sup>7</sup> Idi inilan Jose din aag-i na, naimatonana ay dagos, ngem nginalat nas daida ay kaman dan mangili yan kanana ay namodtak, “Intoy napoan yo?”

“Napo kami ed Canaan ay en manaoy,” kanan da ay sinombat,<sup>8</sup> tan kambaw adi da naimatonan sisya.<sup>9</sup> Pag nemnemen Jose din iniitaw na ed idi ay maipanggep en daida yan kanana, “Ispay kayon samet! Inmali kayo isna ta siimen yo din ili mi ay nay mo waday pankapoyana.”

<sup>10</sup> “Aga met ay apo,” kanan da. “Ibilang min awak mi ay bag-en mo yan tet-ewa met ay din panggep mi anggoy ay inmalis na et ta manlako kamin si. <sup>11</sup> Siag-i kami am-in. Tet-ewa met nan ibagbaga mi, baken kamin ispay.”

<sup>12</sup> “Ado na! Inmali kayo isna ta siimen yo nan ili mi,” kanan Jose ay sinombat.

<sup>13</sup> Asi da et kanan, “Apo, dakami din anak di esay nakay ay manbeey ed Canaan. Sinpo ya doway kami koma ay siag-i, ngem nataynan din inoodi sin kad-an ama mi yan namaga abe din esa.”

<sup>14</sup> “Iso met,” kanan pay Jose. “Ispay kayo tet-ewa. <sup>15</sup> Ngem padasek dakayo mo tet-ewa din inbaga yo. Isapatak sin ngadan di ari ay adi kayo komakkaan isna mo adi omali din

<sup>†</sup> **41:51** Mais-o di kadngean di Manasses sin kalin di Hebreo ay din olog na et “omipalingling.” <sup>‡</sup> **41:52** Mais-o di kadngean di Efraim sin kalin di Hebreo ay din olog na et “namidwa ay nan-anak.”

iyogtan yo ay sana. <sup>16</sup> Pomili kayos esa en dakayo ta ena ton-oden downan pay mataynan din odom sin balodan engganang maammoak mo tet-ewa din inbaga yo. Mo baken pay tet-ewa, say dadlonak pangammoan ay ispay kayo.” <sup>17</sup> Idi nakdeng ay inbaga na di, inpabalod nas daida si toloy agew.

<sup>18</sup> Sin maikatlo ay agew, kanan Jose en daida, “Sak-en di ipogaw ay mamati en Diyos, isonga adiak peslen dakayo dalo et mo onodan yo din ibagak. <sup>19</sup> Mo tet-ewa ay matalek kayo ay ipogaw, olay esa di mataynan isnan balodan. Din odom pay en dakayo et mabalin ay en yo isaa din lakoan yo ay makan sin madagdagaangan ay pamilya yo. <sup>20</sup> Ngem masapol ay koyogen yo din inoodi ay iyogtan yos na ta say mangipanekek sin katet-ewan di inbaga yo ta say adiak peslen dakayo.”

Inaw da din kanan Jose ay sana <sup>21</sup> yan kanan da ay manngangat, “Nay mapalpaligatan tako ed wani begew sin inamag tako sin iyogtan tako ed idi. Tan inila tako gamin din ligat na ya din sakit di nemnem na sin nan-adawagana en datako ngem tineteweng tako dedan. Siyan samet di begew ay naabotan tako sin ligat ay nay.”

<sup>22</sup> Kanan aben Ruben, “Inbagak dedan en dakayo ay adi yo amagen di lawa en sisya, ngem adi yon tomet inkaskaso. Yan nay et ay ikaro tako din nateyana.” <sup>23</sup> Say inbaga da di tan adi da iman ammo ay maawatan Jose din kali da, tan nanipod sin dinmatngan das di, waday inayagan Jose ay mangiol-olog.

<sup>24</sup> Siya di et kinmaan si Jose ay en man-oga. Idi mabalin ay makakali, nantaoli sin kad-an da yan inkasinas Simeon, et inpabalod na sin sangoanan da am-in.

### *Din Nantaolian Di Aag-in Jose Ed Canaan*

<sup>25</sup> Idi siya di, binilin Jose din babag-ena ta pon-en da din sakon di aag-i nas bakakew ya ta ikosnong da din pilak ay inbayad di esa ya esa sin sako na. Inbilina abe ay iyaan das baon ay omanay sin danan. Idi nakdeng di, <sup>26</sup> inpakargan din aag-i na din nilakoan da ay bakakew sin dangki da et manlobwat da.

<sup>27</sup> Idi nalabi, naspad da sin danan ta say pan-iyanan da. Bokatan pay di esa din sako na ta pakanenan dangki na, yan kambaw wada et din pilak na ay naisasapew sin bakakew. <sup>28</sup> Kinaliana din aag-i na yan kanana, “Ilan yo kadi! Intaoli dan pilak ko! Naey sinan sakok.” Isonga palalo ay madandanagan da, yan man-asisin-eng das egyat da yan kanan da, “Ay apaw na! Sino ngin na ay inamag Diyos en datako?”

<sup>29</sup> Domateng da pay sin kad-an ama da ed Canaan, insodsod da en sisya am-in di napasamak en daida. <sup>30</sup> Kanan da, “Binmodtak din gobernador ed Egipto ay nakingalat en dakami. Pinabasol nas dakami ay man-is-ispay kano sin ili da. <sup>31</sup> Insongbat mi en, ‘Baken kamin ispay, tet-ewa met din ibagbaga mi. <sup>32</sup> Sinpo ya dowang kami koma ay siagi ay anak di esay nakay ed Canaan, ngem namaga din esa yan din kotit pay, nataynan sin kad-an ama mi,’ kanan mi en sisya. <sup>33</sup> Siya di et kanan din gobernador ay sana, ‘Din pangammoak ay tet-ewa din ibagbaga yo et mataynan din esa en dakayos na downan isaan din odom din bakakew para sin madagdagaangan ay pamilya yo. <sup>34</sup> Asi kayo mantaolis na ay mangitakin sin inoodi ay iyogtan yo ay sana ta say pangammoak ay baken kayon ispay. Asiak ipataoli din nababalod ay agi yo et olay intoy em-emeyan yos na ay manlakos kanen yo,’ kanana,” kanan din aag-in Jose ay nangistorya.

<sup>35</sup> Idi inbokbok da din insako da, wada et din pilak ay inbayad da ed Egipto et inmegyat da am-in, pati din ama da ay si Jacob. <sup>36</sup> Kanan Jacob en daida, “Adi pay neyneyna yan abosen yo din anak ko. Namaga si Jose, namaga abes Simeon, yan nay et ay layden yo ay itagtag abes Benjamin. Sak-en met laeng di mapaligatan issa.”

<sup>37</sup> Siya di, kanan Ruben en ama na, “Mo adiak itaolis Benjamin en sik-a, olay peslem din dowang anak ko ay lalaki. Basta italek mo en sak-en, itaolik met laeng.”

<sup>38</sup> Ngem inandiyang Jacob ay nangwani, “Adi mabalin ay makey si Benjamin en dakayo, tan natey din pangpangoana yan sisya pay di es-esa ay anak ko. Mo itakin yo sin



emeyan yo yan waday mapasamak en sisya, mateyak si sakit di nemnem ko, tan enggay nakayak.”

## 43

### *Din Maikadwa Ay Inmeyan Di Aag-in Jose Ed Egipto*

<sup>1</sup> Idi siya di, kinmarkaro din betil ed Canaan, <sup>2</sup> engganas inabos da Jacob din sinaoyan da ed Egipto. Pag nan kanan sin an-ak na, “Mantaoli kayo ed Egipto ta en kayo manlakos at-atik ay kanen tako.”

<sup>3</sup> Asi et kanan Juda, “Aw a, ngem din turay ay doy ed Egipto yan dadlonan pinaegyat dakami ay nangwani, ‘Adi yon ipidpidwa ay manpaila en sak-en mo adi yo itakin din iyogtan yo.’ <sup>4</sup> Mo ipalobos mo ay makeey din iyogtan mi, en kami manlakos kanen tako. <sup>5</sup> Mo sigaam pay, bal-o na ay adi kami emey, tan inbagan dedan din turay ay adi mabalin ay kasin min ilaen sisya mo maga din iyogtan mi.”

<sup>6</sup> Kanan pay Jacob, “Dakayo di gapon di ligat ko ay nay, tan inbaga yon tomet en sisya ay way esay agi yo.”

<sup>7</sup> “Aw kayman,” kanan da ay sinombat, “ngem inpidwapidwan din turay ay sana ay manalodsod maipanggep en dakami ya din pamilya mi. ‘Ay dedas ama yo? Ay wada pay di agi yo?’ kanana. Kapilitan ay songbatan mi din salodsod na. Ay tan ammo mi ay ibaga na ay ton-oden mis Benjamin?”

<sup>8</sup> Kanan aben Juda en ama da, “Ipalobos mo kod ay makikoyog en sak-en ta emey kami ay dagos ta say adi tako mabtil. <sup>9</sup> Isapatak ay owayak en sisya. Mo adiak itaoli en sik-a, olay pabasolem sak-en si eng-enggana. <sup>10</sup> Mo doy ya adi koma nataktak din emeyan mi, namidwa koma ay inmey ya nantaoli kami.”

<sup>11</sup> Siya di et kanan ama da en daida, “Mo siya sa, man-a kayo ngarud sin kasigedan ay wadas nan ili tako ta say itakin yo ay idatdateng sin gobernador. Din alaen yo yan balsamo, anig, kakalasin di bangbanglo, mirra, ya din kanginaan ay lames di kaiw. <sup>12</sup> Doblien yo abe din itakin yo ay pilak, tan masapol ay itaoli yo din naipeey sin sako yo. Siguro, owat kamali di. <sup>13</sup> Itakin yo aben iyogtan yo ta emey kayo ay dagos. <sup>14</sup> Sapay koma ta iturong din Manakabalin ay Diyos di nemnem din gobernador ta seg-anganas dakayo yan ipalobos na ay makisaas da Benjamin en Simeon. Mo sak-en pay, mo kapilitan ay maawananak si anak ko, maawananak dedan.”

<sup>15</sup> Siya di inan din siag-i din maidatdateng sin gobernador ya din pilak et nanlobwat da ay emey ed Egipto ay nangikoyog en Benjamin. Domateng da pay sidi, en da nanpaila en Jose.

<sup>16</sup> Idi inilan Jose ay wadas Benjamin, kanana sin bag-en ay makaammo sin beey na, “Itlod mo da naey sin beey ko et pomalti kas isida mi ay animal, tan makialas dosi da en sak-en.” <sup>17</sup> Tinongpal din bag-en din intogon Jose ay sana, et initlod na din siag-i sin beey na.

<sup>18</sup> Domatdateng da pay sin beey, emegyat da yan kanan das nemnem da, “Inpaitlod nas datakos na tan begew din pilak ay naitaoli sin sako tako ed idi. Dompap dan samet ta panbalinen das datako ay bag-ena ya alan dan dangki tako.” <sup>19</sup> Idi sinmawang da sin pantew di beey, kanan da sin bag-en Jose, <sup>20</sup> “Apo, wada kod di ibaga mi. Inmali Kamis na sin namingsan ay en nanlakos makan. <sup>21</sup> Asi et idi naspad kami sin danan ta man-iyang Kamis di, binokatan mi din sako mi, yan siya di nangammoan mi ay naisapesapew sin sakon di esa ya esa din kosto ay pilak ay inbayad mi. Nay ay itaoli mi en sik-a, <sup>22</sup> yan wada abey intakin mi ay bayad di kasin min lakoan. Toan adi mo sinoy nangipeey sin pilak sin sako mi.”

<sup>23</sup> “Laton, adi kayo emeg-egyat,” kanan din bag-en ay sinombat. “Din Diyos yo ay Diyos aben ama yo di nangipeey sin sako yo, tan inawat ko met kayman din bayad yo.” Pag komaan ay en mangayag en Simeon et indateng na sin kad-an da. <sup>24</sup> Asi na ipasgep daida

sin beey et iyaanas danom ta owasan dan siki da. Pinakana abe din dangki da. <sup>25</sup> Mo din siag-i pay, insagana da din idawat da en Jose mo somaa sin alas dosi, tan inammoan da ay makiokob da en sisya.

<sup>26</sup> Domateng pay si Jose, nandokmog ya nanyakog-ong da ay nangidawat sin indateng da. <sup>27</sup> Kinomosta nas daida et pag nan kanan, “Ay deda din ama yo ay nakay ay inbaga yo en sak-en ed idi? Ay mabikas pay laeng?”

<sup>28</sup> “Aw yan, din baam ay si ama mi et laton ay mabikas pay laeng,” kanan da ay sinombat dowan dan kasin mandokmog ay mangidayaw en sisya.

<sup>29</sup> Idi inilan pay Jose din iyogtana ay si Benjamin, kanana, “Si sana baw din inoodi ay inbaga yo.” Et kanana en Benjamin, “Ay anak ko, sapay koma ta bindisyonan dakan Diyos.” <sup>30</sup> Sin nangwanianan di, binigla na ay kinmaan, tan adi makaitpe sin palalo ay iliw na sin iyogtana yan makaog-oga. Isonga inmey sin kowarto na et en nan-oga.

<sup>31</sup> Pag mandaop et nantaoli sin kad-an di aag-i na ay mangiitpe sin oga na. Kanana sin bag-en, “Mangan kami et.” <sup>32</sup> Et talatalen da din maisango en daida. Ang-anggoy Jose sin esay lamisaan yan din aag-i na pay sin esa. Wada da abey taga-Egipto ay naikakasin sin esay lamisaan, tan eweeween di taga-Egipto ay makikikan sin Hebreo. <sup>33</sup> Idi inilan pay din siag-i din inyat da ay naipatokdo, man-asisin-eng da ay masmasdaaw, tan nadapat da ay nanlogi sin kapangoanan enggana sin kaanongosan. <sup>34</sup> Naiyaan da abes napili ay makan ay napo sin lamisaan Jose, yan mamin lima din naidawat en Benjamin mo din odom en daida. Et nakikan ya nakiinom da en Jose engganay nabsonabsog da.

## 44

### *Din Nalitaw Ay Tasa Ay Palata* (44:1-18,30-34)

<sup>1</sup> Idi siya di, binilin Jose din bag-en ay makaammo sin beey na yan kanana, “Pon-em din sako das makan et isapew mo din pilak di esa ya esa sin sako na. <sup>2</sup> Pakisapew mo abe din tasak ay palata sin sakon di inoodi.” Et say tinongpal na di.

<sup>3</sup> Mapat-a pay, nasapa din bag-en ay mangipalobwat sin siag-i, et kinmaan da am-in, pati din dangki da. <sup>4</sup> Idi owat dan inmad-addawi sin siyodad, kanan Jose sin bag-en ay sana, “En ka atikoen din ipogaw ay doy. Mo edasam daida, siya na di kanam. ‘Apay nga sinobalitan yo din siged ay inyat apok en dakayo si lawa? <sup>5</sup> Apay nga inakew yo din tasa na ay palata? Madagsen dis basol yo, tan say pan-in-inomana ya os-osalena abe ay manpontos.’”

<sup>6</sup> Idi indasan din bag-en din siag-i, inbaga na en daida din intogon Jose ay sana. <sup>7</sup> Et kanan da ay sinombat, “Sino ngin di layden nisa ay kalien ay apo? Ammon Diyos ay maga polos di inamag mis kaman nisa. <sup>8</sup> Ammom met ay sin napoan mi ed Canaan, intaoli mi en sik-a din pilak ay dinteng mi sin sako mi. Isonga sino ngin di pangwaniam en inakew mi di palata ono balitok sin beey di apom? <sup>9</sup> May, anapem ngarud. Mo wada din tasa sin olay sino en dakami, olay peslen yos sisya yan panbalinem si dakami ay bag-en mo.”

<sup>10</sup> Kanan pay din bag-en, “May ngarud, ngem olay mo din nangakew anggoy di maibag-en en sak-en. Din odom pay et mabalin ay nawaya da.”

<sup>11</sup> Siya di et kaibaba da sin sako da et esa en mamokat. <sup>12</sup> Inset din bag-en ay nanganap ay manlogi sin pangpangoan enggana sin inoodi, yan dintengana din tasa sin sakon Benjamin. <sup>13</sup> Kabisngit din siag-i sin bado da begew si sakit di nemnem da. Asi da kasin ikarga din sako sin dangki da et mantaoli da sin siyodad.

<sup>14</sup> Idi dinmateng da Juda ya din iib-a na sin beey en Jose, dedas di et nanyakog-ong da en sisya. <sup>15</sup> Pag na et kanan, “Apay nga inyat yo di? Ammo yo koma dedan ay din nangato di saad na ay kaman sak-en et mabalin ay pontosana mo sinoy nangakew.”

<sup>16</sup> Sinongbatan Juda yan kanana, “Sinoy isongbat mi ngin? Intoy iyat mi ngin ay mangipaila ay maga di basol mi? Tan si Diyos met laeng di mangipail-ila ay waday nanbasolan mi ed idi. Olay manbalin kami am-in ay bag-en mo, baken anggoy din nantengan yo sin tasa.”

<sup>17</sup> Kanan pay Jose, “Aga met a! Ay siya mo say iyat ko di? Din nanga anggoy sin tasa di bag-en ko. Mo din odom pay, maga di mapasamak en daida. Mabaln ay somaa kayo en ama yo.”

<sup>18</sup> Sin nanngenas di, inmasag-en si Juda en Jose yan kanana, “Ay apo, sik-ay mais-iso sin ari, ipalobos mo kod ta ibagak din wadas nemnem ko. Adi ka kod omibongbonget.”

Et inpanemnem Juda en Jose din inbaga da en sisya sin damo ay nanngalatan da ay maipanggep en ama da ya din nalabes ay layad na en Benjamin ay ang-anggoy nas nabay-an ay anak da en Raquel. (44:19-29)

19 20 21 22 23 24 25 26 27 28 29

<sup>30-31</sup> Pag nan itoloy ay mangwani, “Siya di ay apo, mo taynak din iyogtan kos na yan adiak idateng en amak, matey si sakit di nemnem na, tan enggay nakay sisya yan din iyogtan mi ay nay di naimongsanan di layad na. <sup>32</sup> Mo sak-en pay, nansapataak abe en makaammoak en sisya, yan inbagak en ama mi ay mo adiak itaoli din anak na en sisya, sak-en di pabasolena si eng-enggana. <sup>33</sup> Isonga mo mabaln ay apo, sak-en di maisokat sin iyogtan ko ay maibag-en en sik-a ta way iyat na ay makisaa sin odom ay aag-i na. <sup>34</sup> Tan adiak met mabaln ay mantaoli en amak mo iwed din iyogtan ko ay koyogek. Adiak aben maanosan ay mangila sin palalo ay sakit di nemnem na.”

## 45

### *Din Nanpaimatonan Jose Sin Aag-i Na*

<sup>1</sup> Sin nanngenan Jose sidi, adi makaitpe sin likna na sin sangoanan di babag-ena, isonga binilinas daida ta komaan da am-in. Siya di et ang-anggoy da Jose sin aag-i na sin nangipaammoanas awak na en daida. <sup>2</sup> Pag kaogoog si Jose et dinngen din taga-Egipto ay wada sin beey, yan pag dan ipadamag sin beey di ari. <sup>3</sup> Asi pag kanan Jose sin aag-i na, “Sak-en si Jose. Ay deda pay laeng si amak?” Ngem adi da makasongbat, tan enggay nasngang da sin egyat da en sisya.

<sup>4</sup> Siya et di, kanan Jose en daida, “Omasag-en kayo kod.” Idi inmasag-en da pay, kanana, “Sak-en din iyogtan yo ay si Jose ay inlako yo en daida ay nangiali en sak-en isnan ed Egipto. <sup>5</sup> Ngem adi kayo madanagan. Adi yo aben pabasbasolen awak yo, tan si Diyos pay dedan di nangipaon-ona en sak-en isna ta way iyat di mabmabtil ay ipogaw ay matago. <sup>6</sup> Tan ed wani di maikadwa ay tawen anggoy di betil, wada pay di lima ay tawen ay iwed di maapit. <sup>7</sup> Isonga inamag Diyos di nakaskasdaaw. Inpaon-onanas sak-en en dakayo ta way iyat yo ay makalsot sin betil ay nay ta itoltoloy yo sin poli yo ay matago sinan daga. <sup>8</sup> Baken met si dakayo di nangibaa en sak-en isna mo adi et si Diyos. Nanbalinena abes sak-en si kangatoan ay opisyal di ari ta sak-en di mangituray sin odom ay oopisyal ya sin intiro ay ili ay nay.

<sup>9</sup> “Dalasen yo ngarud ay mantaoli en ama tako ta ibaga yo ay si naey di kanan Jose ay anak na: ‘Nanbalinen Diyos sak-en ay mangituray sin intiro ay ili ed Egipto, isonga omali kayo ay dagos, <sup>10</sup> dakayo sin an-ak mo ya din ap-om, pati din karnero, kalding, baka, ya odom ay gamgameng yo. Mabaln ay mantee kayo sin sakop di Gosen ay asag-en sin kad-ak <sup>11</sup> ta way iyat ko ay mangay-ayowan en dakayo. Tan wada pay laeng di limay tawen ay betil, yan sigaak ay mankolang kayo sin pamilya yo ya din talaken yo.’ ”

<sup>12</sup> Pag nan itoloy ay mangwani, “Ed wani, dakayo am-in pati si Benjamin, maimatonan yo ay dadlon sak-en si Jose. <sup>13</sup> En kayo ngarud ibaga en ama tako din kaipogaw ko isnan ed Egipto ya din am-in ay inila yo. Asi yo dalasen ay mangikoyog isna.”

<sup>14</sup> Idi kanan Jose di, kakawe en Benjamin et man-oga down aben man-ogas Benjamin ay nangawe en sisya. <sup>15</sup> Man-og-oga abe ay nangawe ya nangongo sin odom ay aag-i na. Et pag dan makingalat en sisya.

<sup>16</sup> Idi dinamag din ari ya din tuturay na ay sinmawang din aag-in Jose, manragsak da am-in, <sup>17</sup> yan kanan din ari en Jose, “Ibagam sin aag-im ta kargaan da din animal da ta mantaoli da ed Canaan <sup>18</sup> ta asi da ton-oden si ama yo ya din pamilya da ay mantaolis na. Tan idawat ko en daida din kasigedan ay daga isnan ed Egipto et aped nas panbiyagan da. <sup>19</sup> Ibagam abe en daida ta man-itakin das kalisa ay napos na ta say panloganan di as-awa da ya din anak da ta mo domateng das di, asi da ayagan da ama yo ta omali da am-in isna. <sup>20</sup> Adi da madanagan ay manaynan sin bonag das di, tan mo domateng das na, maidawat en daida din kasigedan ay bonag sin intiro ay ili ed Egipto.”

<sup>21</sup> Idi inbagan Jose sin aag-i na ay anak Jacob din kanan di ari, pinati da. Indawat Jose en daida din kakalisa ay intogon di ari, pati baonen da sin danan. <sup>22</sup> Inyaana abe din esa ya esa en daidas baro ay paris ay bado, ngem mo si Benjamin pay, lima ay paris ay bado di indawat na en sisya, pati tolody gasot ay palata ay pilak. <sup>23</sup> Din inpaw-it na abe para en ama na et sinpo ay dangki ay nakargaan sin kasigedan ay gamgameng ed Egipto ya sinpo kasin ay dangki ay bomalasang ay nakargaan si bakakew, tinapay, ya odom ay makan ay kasapolan da sin danan. <sup>24</sup> Idi naisagana am-in, pinalobwat Jose din aag-i na ay nangwani, “Adi kayo od man-iibaw ya manpinabasol sin danan.”

<sup>25</sup> Pag dan komaan ed Egipto et nantaoli da sin kad-an ama da ed Canaan. <sup>26</sup> Sin dinmatngan da, kanan da, “Matmatago baw si Jose! Manturay sisya sin intiro ay ili ed Egipto!” Sin nanngaan Jacob sidi, nasngang et adi na pasien din inbaga da. <sup>27</sup> Ngem idi dinad-at da en sisya amin di inbagan Jose en daida yan inila na abe din kakalisa ay inbaan Jose ta say panloganan da ay emey ed Egipto, nailit-ingan sisya <sup>28</sup> yan kanana, “Matmatago baw pay laeng si Jose ay anak ko. Masapol ay enak ilaen sisya ta asiak matey.”

## 46

### *Din Inmeyan Da Jacob Ed Egipto (46:1-7,26-34)*

<sup>1</sup> Asi pag balkoten da Jacob din bonag da et nanlobwat da ay nangitakin abe sin talaken da. Inmey da agan-o ed Beerseba et say nangidatonan Jacob si aanimal en Diyos, ay din Diyos ay dinaydayaw ama na ay si Isaac.

<sup>2</sup> Idi malabi, waday inpailan Diyos en sisya ay kaman iitaw. Kanana, “Jacob, Jacob!” “Naeyak,” insongbat na.

<sup>3</sup> “Sak-en si Diyos ay dinaydayaw amam. Adi ka emeg-egyat ay emey ed Egipto, tan paad-adoek din polim isdi. <sup>4</sup> Koyogek sik-a ay emey ed Egipto et asiak itaoli din polim met laeng sin ili ay nay. Et mo matey ka, wadas Jose ay mangila en sik-a.”

<sup>5</sup> Idi napat-a, nanlobwat da Jacob ed Beerseba. Inpalogan din an-ak nas sisya ya din sin-iin-a sin kakalisa ay inbaan din ari ed Egipto. <sup>6</sup> Intakin da abe din talaken da ya din odom ay gamgameng ay inling-etan da sin nantettean da ed Canaan, et inmey da ed Egipto. Nakeey abe am-in din ganak Jacob <sup>7</sup> ay din an-ak na ya din ap-o na. <sup>8</sup> <sup>9</sup> <sup>10</sup> <sup>11</sup> <sup>12</sup> <sup>13</sup> <sup>14</sup> <sup>15</sup> <sup>16</sup> <sup>17</sup> <sup>18</sup> <sup>19</sup> <sup>20</sup> <sup>21</sup> <sup>22</sup> <sup>23</sup> <sup>24</sup> <sup>25</sup> <sup>26</sup> Din bilang di ganak na ay nakeey ed Egipto et enemapolo ya enem, powira din as-awan di an-ak na. <sup>27</sup> Mo maibilang koma abe din doway anak en Jose ay naianak ed Egipto, emey ay pitopolo di bilang di pamilyan Jacob ay inmey sidi.

<sup>28</sup> Idi dandani ay domateng da, inpaon-onan Jacob si Juda sin kad-an Jose ta ena damagen din danan ay emey ed Gosen. Mantaoli pay si Juda, pag dan emey. <sup>29</sup> Si Jose abe, inpasagana nan kalisa na ta ena abten si ama na. Man-asiila da pay, kakawes Jose en sisya et nan-ogas nabayag. <sup>30</sup> Pag kanan ama na, “Ed wani yan nakasaganaak ay matey, tan laton ay inilak sik-a yan ammok ay sibibiyag ka pay laeng.”

<sup>31</sup> Pag kanan Jose sin aag-i na ya odom ay mimbron di pamilyan ama na, “Emeyak sin ari ta ipaammok ay inmali kayo ay pamilyan amak ya aag-ik ay napod Canaan. <sup>32</sup> Ibagak en sisya ay manpaspastol kayo yan inkoyog yo din aanimal yo ya am-in ay sanikwa yo. <sup>33</sup> Mo paayag nas dakayo ya damagena di obla yo, <sup>34</sup> ibaga yo ay manpaspastol kayo manipod pay sin kakitkitoy yo engganad wani ay kaman met laeng din oblan di ap-apo tako ed idi. Say ibaga yo di ta say ipalobos na ay mantee kayo isnan Gosen, tan sigsigaan di taga-Egipto di amin ay manpaspastol.”

## 47

<sup>1-2</sup> Et nanpilis Jose si lima sin aag-i na. Inkoyog nas daida sin kad-an di ari yan kanana, “Dinmateng da amak ya din aag-ik. Napo dad Canaan yan inkoyog da amin ay animal ya sanikwa da. Wada dad wani ed Gosen.” Pag nan iam-ammo din lima ay aag-i na sin ari.

<sup>3</sup> Sinalodsod din ari di obla da yan kanan da ay sinombat, “Apo ari, manpaspastol kami ay kaman met laeng din ap-apo mi. <sup>4</sup> Inmali Kamis na tan palaloy betil ed Canaan yan enggay magay pangipastolan mi sin animal mi. Pangaasim kod, apo, ta palobosam dakami ay manteed Gosen.”

<sup>5</sup> Pag kanan din ari en Jose, “Ed wani, inmali dan sik-a si amam ya din aag-im. <sup>6</sup> Naitalek met en sik-a nan daga ay Egipto, et makaammo ka ay mangidawat si pantean da. Idawat mo ed Gosen ay kamayatan ay lugar isnan Egipto. Mo waday makabael en daida, dotokam ay mangayowan sin aanimal ko.”

<sup>7</sup> Makdeng pay di, inkoyog Jose si ama na sin sangoanan di ari. Kinablaawan Jacob din ari, <sup>8</sup> pag kanan din ari, “Pigay tawen mo?”

<sup>9</sup> Yan kanan Jacob ay sinombat, “Nanbiyagak si 130 ay tawen ay owat nanliklied isnan daga. Naligligat ya ap-aptik di biyag ko mo din ap-apok ed idi.”

<sup>10</sup> Idi siya di, binindisyonan Jacob din ari, asi nan taynan. <sup>11</sup> Et indawtan Jose si ama na ya din aag-i na si daga da ed Rameses ay kamayatan ay lugar ed Egipto, tan say inbilin din ari. <sup>12</sup> Indawtana abes daida ya amin ay mimbron di pamilyan ama na si kanen da insigon sin kaad-ado da.

<sup>13</sup> Enggay maga polos di makan sin kailili, tan kinmaro din betil et enggay kinmapsot din ipogaw ed Egipto ya Canaan. <sup>14</sup> Si Jose pay yan tinopog na amin ay pilak ed Egipto ya Canaan ay inlako das makan et in-ey na sin palasyon di ari. <sup>15</sup> Idi naabos amin din pilak di taga-Egipto ya taga-Canaan, inmey din taga-Egipto en Jose yan kanan da, “Idawtam kod dakami si makan. Adi ka koman baybay-an dakami ay matey si dagaang, tan nay enggay naabos pilak mi.”

<sup>16</sup> Kanan aben Jose, “Mo naabos amin di pilak yo, iali yo din animal yo ta sokatak si makan.” <sup>17</sup> Et in-ey dan Jose din kabayo, baka, karnero ya dangki da yan sinokatanas makan. Indawtanas daida si kanen da sin tawen ay sana et say sokat din amin ay animal da.

<sup>18</sup> Idi domteng sin maisned ay tawen, inmey da kasin en Jose yan kanan da, “Apo, adi mi maisaot ay enggay naabos din pilak mi yan enggay inam din aanimal mi. Enggay maga polos di maidawat min sik-a malaksig sin awak ya daga mi. <sup>19</sup> Adim koman ipalobos ay matey kami si dagaang. Sokatam paabe din awak ya daga mi si makan. Olay manbalin kami ay bag-en din ari ya okaena din dagdaga mi, basta idawtam dakami si makan ay katagoan mi ya bin-i ay is-ek mi ta adi mataynan nan daga ay magay mantee.”



<sup>20</sup> Et linakoan Jose amin ay daga ed Egipto para sin ari. Kapilitan ay inlakon din taga-Egipto din taltalon da gapo sin palalo ay betil et inokan din ari amin ay daga. <sup>21</sup> Amin abe ay ipogaw ed Egipto yan nanbalin da ay bag-en din ari. <sup>22</sup> Say adi anggoy linakoan Jose din dagan di papadi, tan indawdawtan din aris daida si kanen da et adi masapol ay ilako dan daga da.

<sup>23</sup> Idi siya di, kanan Jose sin kaipoipogaw, “Enggay linakoak dakayo ya din daga yo para sin ari. Nay di bin-i ay is-ek yo. <sup>24</sup> Sin pinag-aani, masapol ay idawat yo din inkaliman di apit yo. Din mabay-an, mabalin ay say osalen yo ay bin-i yo ya kanen din pamilya yo.”

<sup>25</sup> Kanan da ay sinombat, “Insalakan mo din biyag mi et manbalin kami ay bag-en din ari mo say panlaydam, apo.” <sup>26</sup> Et nanbalinen Jose ay linteg ed Egipto ay okaen din ari din inkaliman di apit, yan say linteg da engganad wani. Anggoy nas adi inokan din ari din dagan di papadi.

<sup>27</sup> Et nantee ngarud din polin Israel ay manngadan abes Jacob ed Egipto sin lugar ay Gosen. Binmaknang da yan inmad-ado abe din an-ak da.

<sup>28</sup> Sinpo ya pito ay tawen di nantean Jacob ed Egipto enggana ay nantawen si 147. <sup>29</sup> Idi dandani ay matey, inpaayag nas Jose ay anak na yan kanana, “Wada kod di kedawek en sik-a. Kapayem nan poyong ko ta isapatam ay adi ka omikaot isnan Egipto. <sup>30</sup> Laydek ay omiey ka sin naikaotan di ap-apok et omikaot kas di ta maitapiak en daida.”

Kanan Jose ay nanongbat, “Aw ama, amagek san kedkedawem.”

<sup>31</sup> Pag kanan Jacob, “Isapatam ay tongpalem.” Et nansapatas Jose, pag mandokmog si Jacob sin toktokan di katri na ay nan-iyaman en Diyos.

## 48

### *Din Namindisyonan Jacob Sin An-ak Jose*

*(48:1-6,9b-14,17-20)*

<sup>1</sup> Malabas pay di timpo, naipaammo en Jose ay mansakit si ama na. Et intakina din doway ay lalaki ay anak na, da Manasses en Efraim. <sup>2</sup> Idi naipaammo en Jacob ay dinmateng si Jose ay anak na, inkaligatana ay binmangon sin katri na. <sup>3</sup> Pag nan kanan en Jose, “Nanpaila din Manakabalin ay Diyos en sak-en ed Luz ay sakop di Canaan yan kanana ay namindisyon en sak-en, <sup>4</sup> ‘Paad-adoek to din an-ak mo et manbalin din polim si dadakke ay nanasyon. Idawat ko en daida din daga ay nay ta okaen das eng-enggana.’”

<sup>5</sup> Pag itoloy Jacob ay nangwani, “Ibilang ko ay anak ko din doway ay lalaki ay anak mo ay naianak isnan Egipto sin daanak pay laeng omalis na. Ibilang kos daida ay kaman din mismo ay anak ko ay da Ruben en Simeon. <sup>6</sup> Mo wada pay di maianak ay an-ak mo, adi dan maibilang ay anak ko mo adi et anak mo. Mapo en da Manasses en Efraim di tawiden da.” <sup>7 8</sup>

<sup>9b</sup> Pag kanan Jacob, “Ialim daida ta bindisyonak.” <sup>10</sup> Sin doy ay timpo, enggay kinmapsot din matan Jacob gapo sin kanakay na et enggay nadabodab din pangila na. Insag-en Jose din an-ak na et kinawe ya inongoanas daida. <sup>11</sup> Kanan Jacob en Jose, “Adiak ninamnaya ay mailak pay laeng sik-a, ngem nay ay inpalobos Diyos ay mailak abe din an-ak mo.” <sup>12</sup> Kinaan Jose din anan-ak sin peweg ama na pag manyakogong sin lota. <sup>13</sup> Pag itakkayan Jose si daida et insag-ena en Jacob. Din kannawana en Efraim ta maipatag sin kannigid Jacob yan din kannigid na en Manasses ta maipatag sin kannawan ama na. <sup>14</sup> Ngem nansawasien Jacob din takkay na et din kannawan di inkapay na en Efraim ay iyogtan yan din kannigid na en Manasses ay pangpangoan. <sup>15 16</sup>

<sup>17</sup> Baken mayat sin pannemnem Jose din inila na ay nangikapayan ama na sin kannawan ay takkay na sin toktok Efraim, isonga in-etana ay inpakapay en Manasses

din takkay ama na. <sup>18</sup> Kanana, “Baken sa ay ama tan sinay din pangpangoan et say pangikapayam sin kannawan mo.” <sup>19</sup> Ngem kanan ama na, “Anak, ammok ay manbalin to abe ay dakdake ay nasyon din polin Manasses. Ngem wadwada di dayaw din iyogtana et manbalin to din poli na ay napigpigma ay nanasyon.” <sup>20</sup> Et binindisyonanas daida sin agew ay doy yan kanana, “Awni et osalen din Israelita din ngadan yo sin panbindisyonan da. Kanan dan to, ‘Panbalinen koman Diyos dakayo ay kaman da Efraim en Manasses.’ ” Siya di din kanana ay nangon-onaena din ngadan Efraim. <sup>21 22</sup>

## 49

### *Din Namindisyonan Jacob Sin An-ak Na* (49:1-2,8-12)

<sup>1-2</sup> Idi siya di, inayagan Jacob ay manngadan abe si Israel din an-ak na yan kanana, “Malikob kayo ay an-ak ko ta dengngen yo di ibagak, tan ipammok di mapasamak en dakayo sin tapin di agew.”

Pag bindisyonan Jacob din sinpo ya dow a ay anak na manlogi sin besag. Siya na di inbaga na ay namindisyon en Juda. (49:3-7)

3 4 5 6 7

<sup>8</sup> “Sik-a ay Juda, dayawen ya manyakog-ong din aag-im en sik-a ya seem din bagang di kalaban mo. <sup>9</sup> Maiarig kas layon ay peslena di depapena asi mantaoli sin pantatabonana. Kaman kan layon ay man-inat ay bomaktad yan magay makaitoled ay manistorbo. <sup>10</sup> Mansososkat ay manturay din polin Juda enggana ay maiskat di esa ay maikari ay mangawat sin bowis di nanasyon ya tongpalen das sisya. <sup>11</sup> Itaked na din dangki na sin poon di kamayatan ay obas ya labaana din bado na si arak di obas. <sup>12</sup> Din kolor di mata na yan maymayat mo din arak di obas. Din bab-a na abe yan mankilat mo din gatas.”

Idi nakdeng ay binindisyonan Jacob din aan-ak na, natey sisya ay mantawen si 147. Et pag itaolin din aan-ak na din bangkay na ed Canaan et en da inponpon sin liyang ed Makpela ay nilakoan Abraham ed idi. Asi da pag mantaoli ed Egipto. (49:13–50:14)

13 14 15 16 17 18 19 20 21 22 23 24 25 26 27 28 29 30 31 32 33

## 50

1 2 3 4 5 6 7 8 9 10 11 12 13 14

### *Din Nangipasim-etan Jose Sin Aag-i Na* (50:15-21)

<sup>15</sup> Idi nakdeng ay natey si ama da, nanngangalat din aag-in Jose yan kanan da, “Into et ya malmaliget pay laeng si Jose en datako et ibaes na din lawa ay inamag tako en sisya ed idi?” <sup>16</sup> Isonga inbaa day en mangibaga en Jose, “Sin daan kateyan ama tako, <sup>17</sup> inbaga na iman en mankedaw kami koma en sik-a ta pakawanem dakami sin basbasol mi en sik-a ed idi. Isonga pasinsiyaam paabe din basbasol mi ay baan Diyos ay dinaydayaw amam.” Idi dinngen Jose din inpadnge da ay sana, nan-oga.

<sup>18</sup> Asi pag emey din aag-i na sin kad-ana et nanyakog-ong da en sisya ay nangwani, “Naey kami ay bag-en mo.”

<sup>19</sup> Ngem kanan Jose en daida, “Adi kayo emeg-egyat. Ay siya mo sak-en si Diyos ta dosaek dakayo? <sup>20</sup> Lawlawa kayman din panggep yo ay amagen en sak-en ed idi, ngem nanbalinen Diyos si mapteng. Tan nay ay naisalakan di ad-ado ay ipogaw begew sin napasamak ay doy. <sup>21</sup> Iwed di pan-egyatan yo, tan laton ay ay-ayowanak dakayo ya din aan-ak yo.” Say inbagan Jose en daida san mayat ay kali ta tomalna di nemnem da.

*Din Nateyan Jose*  
(50:22-26)

<sup>22</sup> Intoltoloy Jose ay nanbeey ed Egipto, pati din pamilyan ama na, enggana ay mantawen si sin-gasot ya sinpo. <sup>23</sup> Indasana din anak di apon Efraim ay anak na, yan sinaklot na abe din an-ak en Makir ay anak en Manasses.

<sup>24</sup> Idi siya di, kanana sin aag-i na, “Dandani din kateyak, ngem laton ay ay-ayowanan Diyos dakayo et ipango nas dakayo ay komaan sin ili ay nay ta emey kayo sin ili ay insapata na ay idawat en da Abraham en Isaac ya si Jacob.” <sup>25</sup> Pag nan togonen daida ta isapata da ay itakin dan tong-a na mo ipangon Diyos daida sin ili ay sana. Et insapata da.

<sup>26</sup> Idi siya di, natey si Jose ay mantawen si sin-gasot ya sinpo. Et binalsamo da din bangkay na et inponpon da ed Egipto.

## Exodo Maipanggep Sin Libro Ay Nay

Din olog di Exodo et komaan. Din kapapatgan ay napasamak isna et din nawayaan ya kinmaanan di Israelita ed Egipto ay naibabag-enan das nabayag. Din kapapatgan abe ay ipogaw ay maistorya isna et si Moses ay dinotokan Diyos ay mangipangolo sin ipogaw na.

Ad-ado di nakaskasdaaw ay linaon din libro ay nay: din nanpailaan Diyos en Moses sin manbidbidang ay kaiw, din nangipaammoana sin ngadana ay Yahweh, din kaeegyat ay napasamak ay nanosaan Diyos sin taga-Egipto, din namalalatan din Israelita sin baybay ay Mandalangdang, ya din nangidawtan Diyos sin sinpo ay bilin ya odom ay linteg na en Moses sin dontog ay Sinai. Ad-ado abe di maipanggep sin Tolda ay Panpappailaan Diyos ya din kosto ay iyat di ipogaw ay mangdayaw en sisya.

### **Din Linaona**

Din naibabag-enan din Israelita ed Egipto 1:1-22.

Din naianakan ya nadakdak-an Moses 2:1-4:31.

Din nangonkontraan da Moses en Aaron sin ari ed Egipto 5:1-11:10.

Din damo ay fiesta ay makwani en Nalabas 12:1-28.

Din kinmaanan di Israelita ed Egipto 12:29-15:21.

Din nandad-anan da manipod sin baybay ay Mandalangdang enggana ed Sinai 15:22-18:27.

Din linteg Diyos ya din intolag na sin ipogaw na 19:1-24:18.

Din Tolda ay Panpappailaan Diyos ya bilbilin maipanggep sin iyat di Israelita ay mangdayaw en sisya 25:1-40:38.

### *Din Napalpaligatan Di Israelita Ed Egipto*

<sup>1</sup> Sin inmeyan Jacob ed Egipto, intakina din an-ak na ya din pamilya da. Da naey di ngadan din lallalaki ay an-ak Jacob ay manngadan abes Israel: <sup>2</sup> da Ruben, Simeon, Levi, Juda, <sup>3</sup> Issakar, Zebulun, Benjamin, <sup>4</sup> Dan, Naftali, Gad ya si Aser. <sup>5</sup> Pitopolo di bilang am-in din polin Jacob mo maitapis da Jose ay enggay wada ed Egipto.\*

<sup>6</sup> Idi nalabas di ad-ado ay tawen, natey am-in da Jose ay siag-i ya din am-in ay katawenan da ay napo ed Canaan. <sup>7</sup> Ngem din poli da pay ay makwani en Israelita yan paspas da ay inmad-ado et naganaganak da, isonga enggay mapno da sin ili ay kad-an da ed Egipto.

<sup>8</sup> Idi siya di, nasokatan di turay ed Egipto et nanturay di esa ay ari ay magay ammo nas maipanggep en Jose. <sup>9</sup> Kanan din ari ay sana sin oopisyal na, “Dengngen yo nan ibagak. Ilan yo nan Israelita et pomigpigsa da tan nay omad-ad-ado da. Dilikado di kasasaad tako. <sup>10</sup> Masapol ay mannemnem takos pamosposan ta adi dan masepsep ay omad-ado. Tan adi pay mo wada et di gobat, ya asi dan badangan din kaibaw tako et pag dan ikanayon ay lomayaw.”

<sup>11</sup> Idi siya di, nandotok das mankakekedse ay kapatas ay mangipilit si madagsen ay obla sin Israelita ta say mapaligatan ya madismaya da. Et inpaamag da en daida din siyodad ay Pitom ya Rameses ay say pan-idoldolinan din ari si makan ya odom ay kasapolan da. <sup>12</sup> Ngem olay mo intoy iyat di taga-Egipto ay mamalpaligat sin Israelita, masepsep pay dedan ay omad-ado ya maiwarwaras da. Begew sina, madandanagan ya malmaliget din taga-Egipto en daida, <sup>13-14</sup> et pinalaloan da din inpaobla dan daida ay adi da polos sineg-angan. Din nankadadagsen ay oblan di man-amag si beey ay kaman

\* **1:5** Ilaen abe sin Genesis 46:27. Sin Inam-amag 7:14, kanana en pitopolo ya lima da am-in, tan maibilang din doway anak Manases ya din doway anak ya esa ay apon Efraim.

din mankiwar ya mandamili si linang ya olay abe din am-in ay kalasin di obla sin payew yan inpilit dan daida. Isonga peteg ay kinmaseseg-ang din biyag di Israelita.

<sup>15</sup> Ngem adi pay laeng mapnek din ari et inpaayag na din doway babai ay Hebreo ay da Sifra en Pua, tan daida di manpapaanak. <sup>16</sup> Kanana en daida, “Mo waday paanaken yo ay Hebreo ya ilan yo ay lalaki di anak na, peslen yo din moyang, ngem mo babai yan bay-an yo.” <sup>17</sup> Asi et din manpapaanak et patgen ya egyatan das Diyos, isonga adi dan tinongpal din inbilin di ari. Binay-an da ay matago din am-in ay moyang, olay din lalaki.

<sup>18</sup> Idi siya di, inpaayag din ari din doway ay sana ay manpapaanak et kanana, “Apay nga say inamag yo na? Apay nga adi yon pinse din maianak ay lallalaki?”

<sup>19</sup> Ngem kanan da ay nanongbat, “Baken tomet kaman din babai ay taga-Egipto din babai ay Hebreo, tan nalaka pay di iyat da ay man-anak, isonga makdeng ay makaanak da asi domateng din manpapaanak.”

<sup>20-21</sup> Gapo isdi, binindisyonan Diyos din doway ay manpapaanak ay sana et naganak da. Din Israelita abe yan nasepsep ay naad-ado ya pinmigpigsa da.

<sup>22</sup> Idi siya et di, kanan din ari ay nangibilin sin am-in ay ipogaw na, “Am-in ay lalaki ay ianak di Hebreo, masapol ay en yo itep-a sin ginawang ay Nile, ngem bay-an yo pay din babai ta matago da.”

## 2

### *Din Naianakan Moses*

<sup>1</sup> Sin timpo ay sana, waday sin-asawa ay polin Levi, et nan-anak da. <sup>2</sup> Kasin pay nawad-an din babai et nan-anak si lalaki. Idi inila na ay siged ya kagam-is din moyang, inset na ay nangitabtabon. Ngem idi inmey di tolo ay bowan, <sup>3</sup> nadakdake din moyang et naligatan si ina na ay mangitabon ed bebbeey da. Isonga nan-a si baskit, asi na allidan si niket ta adi segpen di danom. Pag nan ikosnong din moyang et ena intabon sin katantanobongan sin benget di ginawang. <sup>4</sup> Sin baken onay addawi, wada din manang di moyang ay mangil-ila mo sinoy mapasamak sin iyogtana.

<sup>5</sup> Maaw-awni pay, wada et din babai ay anak di ari ay en man-ames sin ginawang ay doy. Din babalasang ay baa na pay yan mandaddad-an da sin benget di ginawang. Idi inilan din anak di ari din baskit sin kad-an di tanobong, inpa na sin esa ay baa na. <sup>6</sup> Idi bokatana din baskit ay sana, inila na et din moyang ay man-og-oga, isonga naseg-angan sisya. Kanana, “Anak baw di Hebreo na.”

<sup>7</sup> Asi et somag-en din manang di moyang sin anak di ari yan kanana, “Ay laydem ta man-ayagak si Hebreo ay ina ay mamaspasoso para en sik-a?”

<sup>8</sup> “Aw kod, emey ka,” kanan din anak di ari ay sinombat et ena inayagan si ina da. <sup>9</sup> Idi domateng sisya, kanan din anak di ari, “Alaem nan moyang ta ayowanam para en sak-en ta asiak lagboan sik-a.” Pag nan isaa et inayowanana. <sup>10</sup> Idi mapsot din moyang, in-ey na sin anak di ari et tinagibi na. Kanas nemnem na, “Si Moses\* di ngadana tan kinay-at ko sin danom.”

### *Din Linmayawan Moses Ed Midian*

<sup>11</sup> Idi nalabas di ad-ado ay tawen, enggay nadakdake si Moses.† Sin namingsan, inmey sin kad-an di kapoliana ay Hebreo, et naseg-angan ay nangila sin ligat da begew sin madagsen ay ipaob-oblan di taga-Egipto en daida. Sin kawada nas di, inila na di esa ay taga-Egipto ay manopsoplit si esa ay Hebreo ay kapoliana. <sup>12</sup> Kamokimokilang pay si Moses, yan idi inila na ay magay mangil-ila en sisya, kapese sin taga-Egipto ay sana, asi na ikaot sin kadaratan.

\* **2:10** Moses: Din ngadan ay nay et mais-o di kadngeana sin kalin di Hebreo ay din olog na et “nakay-at.” † **2:11** Opatapolo di tawen Moses sin ena namasyalan sin gagait na ay Hebreo. Ilaen sin Inam-amag 7:23.



<sup>13</sup> Kabigatana pay, nanpasyal kasin si Moses sin kad-an di gagait na ay Hebreo, yan inila na di doway ay Hebreo ay man-ib-ibaw. Kanan Moses sin akin basol, “Apay nga bokboksingem di gait mo?”

<sup>14</sup> Kasongbat et din lalaki ay sana yan kanana, “Ay tan sino ka od? Ay sinoy nangidawat si kalintegam ay mangituray ya mangowis en dakami? Ay kanam abe en pomse ka ay kaman din inyat mo sin taga-Egipto ay doy?” Gapo isdi, inmegyat si Moses, tan kananas nemnem na, “Kambaw way nangila sin inamag ko.”

<sup>15</sup> Idi naammoan din ari din napasamak, pinanggep na ay ipapse si Moses, ngem kalayaw si Moses ed Midian et isdi ay nantetee.

Sin namingsan ay tinmotokdos Moses sin kad-an di bobon, <sup>16</sup> wada et ay domateng din pito ay babai ay an-ak din padi ed Midian ay mangipainom sin karnero ya kalding ama da. Pinnopinno da din pan-in-inoman di animal da. <sup>17</sup> Dowan et somawang di lallalaki ay manpaspastol abe yan kaipakaan da sin babbabai ay sana. Kapika si Moses et ena binadangan din babbabai, pag nan painomen din karnero ya kalding da.

<sup>18</sup> Idi somaa da, kanan Reuel ay ama da, “Yan nay dagos nasapa kayo ed wani mo?”

<sup>19</sup> “Aw, tan waday taga-Egipto ay binmadang idi pakaanen din odom ay manpaspastol si dakami dowana et iman isakdoan ya painomen din animal tako,” kanan da ay nanongbat.

<sup>20</sup> Pag kanan ama da, “Yan into ngin sisya? Apay nga tinaynan yos di? En kayo ayagan ta makikan en datako.”

<sup>21</sup> En da inayagan si Moses, pag et awisen Reuel ay makitee en daida. Emey pay di timpo, inpaasawan Reuel din anak na ay si Zippora en sisya. <sup>22</sup> Man-anak pay si Zippora yan lalaki, et nginadanan Moses si Gersom,<sup>‡</sup> tan kananas nemnem na, “Mangiliak pay kayman isnan natken ay ili.”

<sup>23</sup> Inmey pay di piga ay tawen, natey din ari ed Egipto, ngem deda pay dedan ay naibabag-en din Israelita, et enggay ay manbaybayeweng da ya man-ad-adawag da en Diyos begew sin madagsen ay ligat da. <sup>24</sup> Dinngen Diyos din bayeweng da dowana et nemnemen din intolag na en da Abraham, Isaac ya en Jacob. <sup>25</sup> Masmaseg-ang abe ay mangil-ila sin ligat da.

### 3

#### *Din Manbidbidang Ay Kaiw*

<sup>1</sup> Sin namingsan, ipaspastol Moses sin lugar ay magay omili din kakarneron Jetro ay katogangana ay padi ed Midian. Asi na et ibas-il daida enggana ay dinmateng da sin dontog ay Sinai\* ay panpailaan Diyos. <sup>2</sup> Isdi ay nanpaila en sisya din anghel Diyos ay kaman apoy ay manbidbidang sin gawan di esay kaiw. Inilan Moses ay manbidbidang din kaiw ngem adi kapooan, <sup>3</sup> isonga kananas nemnem na, “Nakaskasdaaw et abe di mo, enak kod ilan mo apay nga adi kapooan din kaiw ay doy.”

<sup>4</sup> Idi ilan Diyos ay somag-en si Moses, nankali sin gawan di manbidbidang ay kaiw yan kanana, “Moses, Moses.”

Sinongbatan Moses yan kanana, “Sino di ibagam ay Apo.”

<sup>5</sup> Pag kanan Diyos, “Issa ka, adi ka somagsag-en. Kaanem san sandal mo<sup>†</sup> tan nasantoan ay lugar nan kad-am. <sup>6</sup> Sak-en din Diyos ay dinaydayaw amam ya siya abe sin aap-om ay da Abraham, Isaac ya si Jacob.” Idi dinngen Moses di, kaopop sin mata na tan emegyat ay mangila en Diyos.

<sup>7</sup> Kanan Diyos ay nangitoloy, “Inilak ay palalo di iyat din taga-Egipto sin ipogaw ko. Dinngkek din adawag da ay mankedkedaw si badang begew sin pamalpaligatan

<sup>‡</sup> **2:22** Gersom: Din ngadan ay nay et mais-o di kadngeana sin kalin di Hebreo ay din olog na et “mangili.” \* **3:1** Din kanana sin Hebreo et: Horeb. Di esa ay ngadana et Sinai. <sup>†</sup> **3:5** Din ogalin di Hebreo et kaanen dan sandal da mo senggep das lugar ay ibilang da ay nasantoan ta say ipaila day rispito da.

di mankakekedse ay kapatas da, et masmaseg-angak en daida. <sup>8</sup> Isonga binmabaak ta isalakan kos daida sin naibabag-enan da ed Egipto ta ipangok daida si annawa ya siged ay ili ay magabay di mola,‡ sin ilin di Canaaneo, Heteo, Amorreo, Perezeo, Heveo ya Jebuseo. <sup>9</sup> Dadlonak dinnge din adawag di Israelita yan inilak din pamalpaligatan di taga-Egipto en daida. <sup>10</sup> Isonga emey ka ta ibagam sin ari ay palobosana din ipogaw ko ta koyogem daida ay komaan ed Egipto.”

<sup>11</sup> Ngem kanan Moses, “Ay siya mo sinoak ta sak-en di makingalat sin ari ya mangibela sin Israelita ed Egipto?”

<sup>12</sup> Songbatan pay Diyos yan kanana, “Wadaak to ay mangadkadwa en sik-a. Kadi et mandayaw kayo en sak-en sin dontog ay nay mo ipangom din ipogaw ko ay komaan ed Egipto. Say pangammoam ay sak-en si Diyos ay nangibaa en sik-a.”

<sup>13</sup> Kanan Moses, “Mo ibagak sin Israelita en, ‘Inbaan din Diyos di aap-o tako si sak-en,’ yan kanan da ay mansalodsod, ‘Sinoy ngadana?’ sinoy ibagak ngin en daida?”

<sup>14</sup> Kanan Diyos, “Sak-en di nawawadas kankanayon. Siya nay ibagam en daida, ‘Din manngadan si Nawawadas Kankanayon di nangibaa en sak-en. <sup>15</sup> Si Yahweh ay Diyos di aap-o tako ay da Abraham, Isaac ya si Jacob di nangibaa en sak-en,’ kanam en daida, tan siya na di komakaman ay ngadan ko et say pangwanin di amin ay ipogaw en sak-en si eng-enggana. <sup>16</sup> Emey ka ta topogem din papangolon di Israelita yan ibagam na, ‘Nanpaila en sak-en si Yahweh ay Diyos di aap-o tako ay da Abraham, Isaac ya si Jacob yan kanana en inila na din mapasasamak en dakayo isnan Egipto. <sup>17</sup> Inkari na ay isalakana si dakayo sin ligat ay laklak-amen yo isnan Egipto ta ipango na si dakayo sin mayat ay ili ay magabay di mola, sin ilin di Canaaneo, Heteo, Amorreo, Perezeo, Heveo ya Jebuseo.’ <sup>18</sup> Patien to din papangolon di Israel din ibagam et koyogem daida ta emey kayo sin ari ed Egipto. Siya na di ibaga yo en sisya, ‘Nanpaila si Yahweh ay Diyos di Hebreo en dakami, isonga palobosam kod dakami ta en kami man-idaton en Yahweh ay Diyos mi sin lugar ay magay omili. Masapol ay mandad-an kami si tolo ay agew ay emey sidi.’ <sup>19</sup> Ngem ammok ay adi palobosan din ari si dakayo mo magay mapasamak ay kapilitana. <sup>20</sup> Isonga ipailak to din nakaskasdaaw ay panakabalin ko sin iyat ko ay manosa sin taga-Egipto ta say ipalobos nas dakayo.

<sup>21</sup> “Iturong ko abe di siged ay pannemnem di taga-Egipto sin ipogaw ko ta adi dan owat komaan ay magay maidawat en daida. <sup>22</sup> Tan din babbabai ay Israelita et emey da sin katokmang da ay taga-Egipto ya olay sino ay babbabai ay taga-Egipto ay makibebeey en daida ta en da mankedaw si bado ya al-altin di awak ay balitok ya palata. Ipaosal yo dana sin an-ak yo et say iyat yo ay mangikaan sin kinabaknang di taga-Egipto.”

## 4

### *Din Sinyal Ay Inpailan Diyos En Moses*

*(4:1-17)*

<sup>1</sup> Ngem kanan Moses, “Ngem intoy iyat ko ngin mo adi patien din Israelita din ibagak ya kanan da en adi ka nanpaila en sak-en?”

<sup>2</sup> Pag et kanan Diyos, “Sino san iin-genam?”

“Sokod,” kanan Moses.

<sup>3</sup> Idi siya di kanan Diyos, “Itep-am sin lota.” Idi intep-an Moses din sokod, nanbalin si eweg isonga katagtag si Moses. <sup>4</sup> Ngem kanan Diyos en sisya, “Depapem. Ig-en mo sin iko na.” Idi sinipdot Moses din iko na, nanbalin kasin si sokod. <sup>5</sup> Pag kanan Diyos, “Sinay di ipailam ta say patien din Israelita ay nanpaila en sik-a si Yahweh ay din Diyos di aap-o da ay da Abraham, Isaac, ya si Jacob.”

<sup>6</sup> Kasin binilin Diyos si Moses yan kanana, “Isoksok mo din takkay mo sin tak-ep di badom.” Say inyat tet-ewan Moses yan idi kaanena, natalektekan si mankilat ay

‡ 3:8 Din kanana sin Hebreo et: ili ay pan-oy-oyasan di gatas ya anig.

kakaman andap dowan et mankokolad ay dadlon naapiktalan si kaeegyat ay sakit di kodil. <sup>7</sup> Pag kanan Diyos, “Isoksok mo kasin sin badom.” Insoksok Moses asi nan kaanen, yan idi ilaena, nailatonan et kaman met laeng din kodil di odom ay partin di awak na.

<sup>8</sup> Idi siya di, kanan Diyos, “Mo adi dan mamati sin damo ay sinyal, mabalin ay mamati da sin maikadwa. <sup>9</sup> Ngem no adi da pay laeng mamati sin dowan ay nakaskasdaaw ay sinyal ay nay ta adi dan patien din ibagam, man-a kas danom sin ginawang ay Nile ta isiit mo sin lota. Mo amagem di, manbalin si dada din danom.”

<sup>10</sup> Ngem kanan Moses, “Apo, man-ibaa ka kod si odom tan manipod pay laeng ed idi yan bakenak nalaing ay mankali. Olay ed wani ay nakikalkali ka en sak-en, bakenak met laeng maapat.” <sup>11</sup> Pag et kanan Diyos, “Ay sino od di nangamag si tepek di ipogaw? Sino di namarsua sin naomel ya nateweng ono din nagodab ya baken nagodab? Ay baken ayan si sak-en ay Diyos? <sup>12</sup> May, emey ka et. Laton ay tolongak sik-a et itdok di kosto ay ibagam.”

<sup>13</sup> Ngem kanan pay laeng Moses, “Apo, pangaasim kod ta man-ibaa ka si odom.”

<sup>14</sup> Gapo isdi, nanbonget si Diyos yan kanana en Moses, “Wada met si Aaron ay agim ay Levita. Ammok ay nalaing sisya ay mankali. Katet-ewa na, wada ay omal-ali ay mangabat en sik-a et peteg di ragsak na ay mangila en sik-a. <sup>15</sup> Mabalin met ay makikali ka en sisya ta itdom di ibaga na. Tolongak to si dakayo et ibagak to di amagen yo ya ibaga yo. <sup>16</sup> Si Aaron di makikalkali sin ipogaw para en sik-a et kaman sik-a di Diyos ay mangibilbilin sin ibaga na. <sup>17</sup> Itakin mo san sokod mo ta say osalem ay man-amag si nakaskasdaaw.”

#### *Din Nantaolian Da Moses Ed Egipto (4:18-20,27-31)*

<sup>18</sup> Idi makdeng di, nantaoli si Moses sin kad-an katogangana ay Jetro yan kanana, “Palobosam kod sak-en ay mantaoli ed Egipto ta enak ilan mo deda ay matmatago din aag-ik ay Israelita sidi.” Pinalobosan Jetro sisya et nanpinakada da.

<sup>19</sup> Idi wada pay laeng si Moses ed Midian, nakikali si Diyos en sisya yan kanana, “Mantaoli ka ed Egipto tan enggay natey amin din manpangpanggep ay mamse en sik-a.”

<sup>20</sup> Idi siya di, nanlobwat da Moses ay emey ed Egipto. Inkoyog na si asawa na ya din aan-ak da, et nangabayoenas daida si dangki. Intakina abe din sokod ay kanan Diyos en itakina. <sup>21 22 23 24 25 26</sup>

<sup>27</sup> Sin siya di ay timpo, nakikali si Diyos en Aaron yan kanana, “En ka abaten si Moses sin lugar ay magay omili.” Pag en aspoen Aaron si Moses sin dontog ay panpailaan Diyos et inongoana. <sup>28</sup> Inistoryan Moses en Aaron am-in din inbagan Diyos sin nangibilinana ay mantaolis sisya ed Egipto ya din nakaskasdaaw ay inbilin Diyos ay amagena. <sup>29</sup> Pag dan mankoyog ay emey ed Egipto. Idi dinmateng das di, inpaayag da am-in din papangolon di Israelita, <sup>30</sup> et dinad-at Aaron en daida din amin ay inbagan Diyos en Moses. Pag aben ipailan Moses da doy ay nakaskasdaaw sin sangoanan da. <sup>31</sup> Idi inilan din kaipoipogaw, pinati da et nanyakog-ong da ay nandayaw en Diyos, tan naammoan da ay masmasang si Diyos ay mangil-ila sin ligat da.

## 5

#### *Din Damo Ay Nakingalatan Da Moses Sin Ari*

<sup>1</sup> Inmey da Moses en Aaron sin kad-an di ari ed Egipto yan kanan da, “Inbagan Yahweh ay Diyos di Israelita en palobosam din ipogaw na ta en da manfiesta ay pangdayaw dan sisya sin lugar ay magay omili.”

<sup>2</sup> Ngem kanan din ari, “Ay tan sino od san si Yahweh? Ay ken am-ammok sisya ta tongpalek san kanana? Aga! Adiak ipalobos.”

<sup>3</sup> Songbatan pay da Moses en Aaron yan kanan da, “Ngem nakikali met en dakami din Diyos ay daydayawen mi ay Hebreo, isonga palobosam dakami ay mandan si tolo ay agew sin lugar ay magay omili ta say en mi pan-idatonan en sisya. Mo adi kami amagen sa, dosaenas dakami et matey kami si sakit ono gobat.”

<sup>4</sup> Ngem kanan din ari en daida, “Adi mabalin ay sangawen yo din ipogaw sin obla da. Masapol ay itoloy san babag-en din obla da! <sup>5</sup> Enggay inmad-ado kayo et mo din taga-Egipto yan kanan yo en isaldeng yo din obla yo?”

<sup>6</sup> Sin doy ay agew, binilin din ari din kakapatas ya din Israelita ay nadotokan ay mangimanmandar sin gagait da. <sup>7</sup> Kanana, “Manipod ed wani, adi kayon idawdawtan din Israelita si garami ay mailaok sin madamili ay maiamag si beey. Daida di man-anap si garami, <sup>8</sup> ngem adi mabalin ay mabawasan si olay esa din kaad-adon di dinamili ay am-amagen da. Nasadot da dedan, isonga kanayon ay ibagbaga da en palobosak daida ta en da man-idaton sin Diyos da. <sup>9</sup> Idawtan yos daida si nadagdagsen ay obla ya adi yon pasalsaldengen daida ta say magay timpo da ay mandenge si owat etek ay istorya.”

<sup>10</sup> Inmey din kakapatas ya din man-imanmandar sin kad-an di Israelita yan kanan da, “Inbilin din ari en manipod ed wani yan adi min idawtan dakayo si garami. <sup>11</sup> Inbaga na ay dakayo di man-anap, ngem masapol ay adi mabawasan din kaad-adon di dinamili ay amagen yo.”

<sup>12</sup> Gapo sin bilin ay doy, enggay likeden da din intiro ay Egipto ay man-anap si garami. <sup>13</sup> Talaga ay inpapilit din kakapatas ay amagen da din sigod ay kabibilang di dinamili ay am-amagen da idi maidawdawtan da pay laeng si garami. <sup>14</sup> Pakakkaasien din kakapatas ay soplisopliten din Israelita ay nadotokan ay man-imanmandar. Kanan da, “Apay nga baken kosto di kabibilang di inpaamag yo ed nasdem ya ed wani ay baken kaman ed idi?”

<sup>15</sup> Inmey din man-imanmandar sin ari yan kanan da ay nanriri, “Apo ari, apay ngin ay say iyat yo na en dakami? <sup>16</sup> Maga met di idawat din oopisyal mo ay garami en dakami yan ipilit da ay amagen mi din sigod ay kaad-adon di am-amagen mi ay dinamili. Dowan da et soplisopliten dakami mo kolang din amagen mi, ngem daida met di akin basol.”

<sup>17</sup> Ngem kanan et din ari ay nanongbat, “Sadot! Nasadot kayo ay man-obla, isonga kanan yo en palobosak dakayo ay en man-idaton sin Diyos yo. <sup>18</sup> Itoloy yo et ay man-obla. Magay garami ay maidawat en dakayo, ngem masapol pay dedan ay amagen yo din sigod ay kaad-adon di dinamili si esay agew.” <sup>19</sup> Nailan din man-imanmandar ay dilikado di kasasaad da gapo sin inbagan di ari ay doy.

<sup>20</sup> Idi kosto ay komaan da, inabat das da Moses en Aaron ay mansesed en daida. <sup>21</sup> Kanan da en da Moses, “Sapay koma ta dosaen Diyos dakayo, tan nay dakayo dedan di gapo ay linmawlawa di pannemnem din ari ya oopisyal na en dakami. Waday rason da ay mamse en dakami begew sin inyat yo.”

### *Din Kararag Moses Ya Din Inkarin Diyos Ay Badang Na (5:22-23; 6:1-12)*

<sup>22</sup> Gapo isdi, en kasin nankararag si Moses en Diyos yan kanana ay nanriri, “Apo, ilaem kod san inyat mo sin ipogaw mo. Doy et ay nasepsep di ligat da! Apay ngin ay inmibaa ka asi ka pay say iyat na? <sup>23</sup> Tan manlogi sin nangibagaak sin ari sin inbilin mo, nasepsep et ay pinalpaligat na din ipogaw mo, yan maga polos di naibadang mon daida!”

## 6

<sup>1</sup> Pag kanan Diyos ay nanongbat en Moses, “Mailam ed wani di amagek sin ari, tan ipailak din panakabalin ko et mapilitan ay mangipabolos sin ipogaw ko. Awani et bakenan owat pabolosan mo adi et dagdagenas daida ay komaan.”

<sup>2</sup> Kanan aben Diyos en Moses, “Sak-en si Yahweh. <sup>3</sup> Sin nanpailaak en da Abraham, Isaac ya si Jacob, inpaammok ay sak-en din Manakabalin ay Diyos, ngem adiak inpaammo din ngadan ko ay Yahweh en daida. <sup>4</sup> Ngem inkarik en daida ay idawat ko din daga ay Canaan olay mo sin doy ay timpo yan owat dan mangili sin ili ay doy. <sup>5</sup> Ed wani ay dinngek din adawag di Israelita ay binabag-en di taga-Egipto et manemnem ko din intolag ko ay doy. <sup>6</sup> Isonga say ibagam na sin Israelita, ‘Siya na di kanan Diyos: Sak-en si Yahweh. Badangak dakayo ta mawayawayaan kayo sin namabag-enan di taga-Egipto en dakayo. Ipaalak di panakabalin ko sin iyat ko ay manosa en daida ta maisalakan kayo. <sup>7</sup> Ngem dakayo pay, panbalinek dakayo si ipogaw ko et sak-en di Diyos yo. Awni et maammoan yo ay sak-en si Yahweh ay Diyos yo ay nangipawaya en dakayo sin nankaliligat ay obla ay inpapapilit di taga-Egipto. <sup>8</sup> Iey kon to si dakayo sin ili ay inkarik en da Abraham, Isaac ya si Jacob et idawat ko en dakayo. Sak-en si Yahweh.’ ”

<sup>9</sup> Inbagan Moses na sin Israelita ngem adi dan inkaskaso tan enggay nadismadismaya da gapo sin palalo ay ligat ay laklak-amen da.

<sup>10</sup> Pag kanan Diyos en Moses, <sup>11</sup> “En ka ibaga sin ari ed Egipto ay ipalobos na din Israelita ay komaan sin ili na.”

<sup>12</sup> Ngem kanan Moses, “Mo adi pinatin din Israelita din inbagak, adi pay namnamed din ari, tan bakenak met nalaing ay mankali.” <sup>13</sup> <sup>14</sup> <sup>15</sup> <sup>16</sup> <sup>17</sup> <sup>18</sup> <sup>19</sup> <sup>20</sup> <sup>21</sup> <sup>22</sup> <sup>23</sup> <sup>24</sup> <sup>25</sup> <sup>26</sup> <sup>27</sup> <sup>28</sup> <sup>29</sup> <sup>30</sup>

## 7

<sup>1</sup> Ngem kanan Diyos en Moses, “Dengngem nan ibagak. Panbalinek sik-a ay kaman Diyos sin pangilan di ari et si Aaron ay agim di kaman mamadto ay makikalkali para en sik-a. <sup>2</sup> Ibagam en sisya amin ay inbilin ko ta ibaga na sin ari ay ipalobos na din Israelita ay komaan isnan Egipto. <sup>3</sup> Ngem sepsepek ay pakentegen din nemnem di ari ta adi nan ikaskaso si dakayo et amagek di ad-ado ay nakaskasdaaw isnan Egipto. <sup>4</sup> Dosaek daida ta pagak ipango din ipogaw ko ta komaan das na. <sup>5</sup> Say pangammoan to din taga-Egipto ay sak-en tet-ewa si Diyos mo lak-amen da din dosa ay idawat ko ya ipangok din ipogaw ko ay komaan isnan Egipto.” <sup>6</sup> Pinatin da Moses en Aaron din inbagan Diyos en daida. <sup>7</sup> Mantawen si Moses si 80 yan 83 en Aaron sin timpo ay sana ay nakikalkalian da sin ari.

### *Din Nanbalinan Di Sokod Aaron Si Eweg*

<sup>8</sup> Binilin Diyos da Moses en Aaron yan kanana, <sup>9</sup> “Mo kasapolan din ari di nakaskasdaaw ay pamaneknek yo, ibilin mo en Aaron ta itep-a na din sokod na sin sangoanan di ari et manbalin si eweg.” <sup>10</sup> Inmey da Moses en Aaron sin kad-an di ari et tinongpal da din inbilin Diyos. Nanbalin tet-ewa si kaeegyat ay eweg din sokod Aaron idi itep-a na sin sangoanan di ari ya din oopisyal na. <sup>11</sup> Idi siya di, inayagan din ari din nankalalaing ay ipogaw na ya mansalsalamangka et tinadon da din inamag Aaron. <sup>12</sup> Intep-a da din sokod da yan nanbalin abe si eweg. Ngem kaiseksek din sokod Aaron sin amin ay sokod da. <sup>13</sup> Ngem olay mo siya di, tinmet-ewa din inbagan Diyos en da Moses en Aaron ay ipakenteg din ari din nemnem na et adi nan pinati da Aaron en Moses.

### *Din Nanbalinan Di Danom Si Dada*

<sup>14</sup> Idi makdeng di, kanan Diyos en Moses, “Talaga ay natangken din nemnem di ari et doy ay adi nan palobosan din Israelita. <sup>15</sup> Isonga si agsapa, alaem din sokod ay nanbalin si eweg et en ka abaten sisya mo emey sin ginawang ay Nile. Sed-em sin benget na. <sup>16</sup> Siya na di ibagam en sisya, ‘Inbaan Yahweh ay Diyos di Hebreo si sak-en ay mangibaga en sik-a ta palobosam din ipogaw na ay en mandayaw en sisya sin lugar ay magay omili, ngem nay enggana ed wani yan adi ka pay laeng pinalobosan daida. <sup>17</sup> Isonga ed wani kanan Diyos en maammoam mo sino sisya begew sin amagena. Ilam, tan nay isepapat ko nan sokod ko sin ginawang et manbalin si dada. <sup>18</sup> Sigaan to di taga-Egipto ay manginom tan matey dan nigay et palalo di agob din danom.’ ”



<sup>19</sup> Kanan Diyos en Moses, “Ibagam en Aaron ta itdek na din sokod na sin amin ay kad-an di danom ed Egipto: sin ginawang ya kanal ya din odom pay ay kad-an di danom. Mo siya di manbalin si dada amin ay danom ed Egipto, pati din wadas panpaypay-an si danom ay kaiw ya bato.”

<sup>20</sup> Tinongpal da Moses en Aaron din inbilin Diyos. Sineppat Aaron din danom sin ginawang sin sangoanan di ari ya oopisyal na, pag manbalin si dada. <sup>21</sup> Nanbalin si dada abe amin ay danom ed Egipto et natey amin ay nigay, isonga palalo di agob din danom et sigaan da ay manginom. <sup>22</sup> Ngem tinadon abe din ipogaw di ari ay mansalsalamangka, isonga natongpal din inpadton Diyos ay pakekentege din ari din nemnem na. Tineteweng na din inbagan da Moses en Aaron <sup>23</sup> et kataynan en daida. Pag mantaoli sin palasyo. Olay din napasamak ay nay et adi na inkaskaso. <sup>24</sup> Din ipogaw pay yan nankotkot da sin ig-igid di ginawang ay Nile, tan adi mabalin ay inomen din danom sin ginawang. <sup>25</sup> Idi nakdeng ay nanbalinen Diyos din ginawang si dada, inmey di pito ay agew.

## 8

### *Din Bimelaan Di Ad-ado Ay Tokak*

<sup>1</sup> Idi makdeng di, kanan Diyos en Moses, “Emey ka sin ari ta kanam en sisya, ‘Siya na di inbagan Diyos: Palobosam din ipogaw ko ta en da mandayaw en sak-en, <sup>2</sup> tan mo sigaan, dosaek din ilim et pawadaek di ad-ado ay tokak. <sup>3</sup> Mapno din ginawang ay Nile si ad-ado ay tokak et somakyat da ay emey sin palasyom ya sin kowartom et pomatok da sin katrim. Emey da abe sin beey di oopisyal ya ipogaw mo dowan dan pomatok sin pan-ot-otoan ya banga yo. <sup>4</sup> Pomatok da en sik-a ya sin am-in ay oopisyal ya ipogaw mo.’”

<sup>5</sup> Kanan Diyos en Moses, “Ibagam en Aaron ta ikayang na din sokod na sin patag di ginawang, kanal ya posong ta somakyat din ad-ado ay tokak ta mapno da sin amin ay sakop di Egipto.” <sup>6</sup> Inkayang Aaron din sokod na sin amin ay bandan di kad-an di danom et nawada tet-ewa di ad-ado ay tokak, isonga pag tokak di maila sin amin ay ilin di Egipto. <sup>7</sup> Ngem say inyat aben din mansalsalamangka et inpasakyat da di ad-ado ay tokak ay napo sin ginawang.

<sup>8</sup> Inpaayag din ari da Moses en Aaron yan kanana, “Ikararag yo en Diyos ta pakaanena nan ad-ado ay tokak ta palobosak din ipogaw mo ay en man-idaton en Diyos.”

<sup>9</sup> Kanan Moses, “Mabalin ay ikararagak sik-a ya din oopisyal ya ipogaw mo. Basta ibagam mo pig-an et komaan to amin ay tokak sin kad-an yo malaksig din wadas ginawang ay Nile.”

<sup>10</sup> “Si bigat,” kanan din ari ay nanongbat et pag kanan Moses, “May, si bigat, ta say maammoam ay magay makaiso en Yahweh ay Diyos mi. <sup>11</sup> Komaan dan to din tokak ay napno sin kad-am, ya sin kad-an di oopisyal ya ipogaw mo et maga di mabaybay-an malaksig din wadas ginawang ay Nile.”

<sup>12</sup> Tinaynan da Moses en Aaron din ari et nankararag si Moses en Diyos ta pakaanena din ad-ado ay tokak ay say dosa ay indawat na sin ari. <sup>13</sup> Pinatgan Diyos din kararag Moses et natey amin ay tokak ay wada sin bebbeey, bel-ayan ya papayew. <sup>14</sup> Tinopog din taga-Egipto dadi et dadakke ay bonton di naitopogan da, isonga palalo ay man-akoo din ili. <sup>15</sup> Idi ilan pay din ari ay enggay natey amin din tokak, kinmenteg kasin din nemnem na et tinmet-ewa din inpadton Diyos ay adi na patpatien da Moses en Aaron.

### *Din Bimelaan Di Ad-ado ay Tilang*

<sup>16</sup> Idi siya di, kanan Diyos en Moses, “Ibagam en Aaron ta iseppat na din sokod na sin lota ta manbalin si tilang din tapok sin amin ay ili ed Egipto.” <sup>17</sup> Inseppat Aaron din sokod na et nanbalin tet-ewa si tilang din amin ay tapok ed Egipto et napno da sin amin ay ipogaw ya animal. <sup>18</sup> Pinadas din mansalsalamangka ay tadonen, ngem

adi dan kabaelan. Enggay pag way tilang sin amin ay sakop di Egipto, <sup>19</sup> isonga kanan din mansalsalamangka sin ari, “Naamag na begew sin panakabalin Diyos.” Ngem makenteg pay laeng din nemnem di ari, isonga adi na pinatpati da Moses en Aaron ay kaman met laeng din inpadton Diyos ay mapasamak.

### *Din Bimelaan Di Ad-ado Ay Lallaeg*

<sup>20</sup> Makdeng pay di, kanan Diyos en Moses, “Masapa ka si bigat ta en ka abaten din ari sin ginawang yan ibagam en sisya, ‘Siya na di inbilin Diyos: Palobosam din ipogaw ko ay en mandayaw en sak-en, <sup>21</sup> tan mo sigaam, dosaek sik-a et pawadaek di ad-ado ay lallaeg ta mapno da en sik-a ya sin oopisyal ya ipogaw mo. Awni et mapno di lallaeg sin bebbeey di taga-Egipto et pag lallaeg di maila sin lota. <sup>22</sup> Ngem ilisik ed Gosen ay kad-an di ipogaw ko et maga di lallaeg si mailas di. Amagek dana ta pangammoan yo ay sak-en si Diyos ay mangam-amag sin nay mapasasamak ed wani isnan ed Egipto. <sup>23</sup> Idomak din ipogaw ko sin ipogaw mo et mapasamak din nakaskasdaaw ay nay si bigat.’ ”

<sup>24</sup> Inpawadan Diyos di ad-ado ay lallaeg ay napno sin palasyo ya beey di oopisyal di ari et kinmadodogis din ili ay Egipto dowan madadael din molmola da. <sup>25</sup> Pinaayagan din ari da Moses en Aaron yan kanana, “En kayo man-idaton sin Diyos yo, ngem sin ili ay nay di pan-idatonan yo.”

<sup>26</sup> Ngem kanan Moses ay nanongbat, “Naligat met mo say amagen mi sa, tan abigen din taga-Egipto din pan-idatonan mis animal en Yahweh ay Diyos mi. Adi pay mo ilaen da din pan-idatonan mi, palalo ay masnit da et pigpigen das dakami. <sup>27</sup> Masapol ay mandan kami si tolo ay agew ay emey sin lugar ay magay omili ta isdi ay man-idaton kami en Yahweh ay Diyos mi, tan say inbilina.”

Kanan din ari, <sup>28</sup> “Palobosak dakayo ay en man-idaton en Yahweh ay Diyos yo sin lugar ay magay omili mo baken palalo ay addawi di emeyan yo. Ikararagan yo ngarud si sak-en ta makaan nan ligat ay nay.”

<sup>29</sup> Kanan Moses ay nanongbat, “Mo komaanak, mankararagak ay dagos en Diyos ta mo si bigat, komaan amin ay lallaeg sin kad-am ya sin oopisyal ya ipogaw mo. Ngem adim koma kasin ietekan si dakami ya adim iparit din kaipoipogaw ay en mandayaw en Diyos.”

<sup>30</sup> Tinaynan Moses din ari et nankararag en Diyos, <sup>31</sup> yan pinatgan Diyos din kararag na. Tinaynan din ad-ado ay lallaeg din ari ya din oopisyal ya ipogaw na et magay olay esay lallaeg si nabay-an. <sup>32</sup> Ngem olay mo siya di, pinakenteg kasin din ari din nemnem na et adi nan palobosan din ipogaw ay komaan.

## 9

### *Din Napistian Di Talaken*

<sup>1</sup> Binilin kasin Diyos si Moses yan kanana, “Emey ka sin ari ta ibagam nan sisya, ‘Siya na di kanan Yahweh ay Diyos di Hebreo, “Palobosam din ipogaw ko ta en da mandayaw en sak-en.” <sup>2</sup> Mo adi ka pay laeng palobosan daida, <sup>3</sup> ilaen yon to di iyat Diyos sin animal yo ay wada sin pastolan. Mapisti dan to din kabayo, dangki ya kamel yo. Siya abe sin baka, karnero ya kalding yo. <sup>4</sup> Ngem idoman pay Diyos din animal di Israelita et maga di olay esa ay matey en daida.’ ”

<sup>5</sup> Tinodingan Diyos di agew ay kapasamakan nadi yan kanana, “Si bigat di pangamagak isna sin ili ay nay.” <sup>6</sup> Sin kabigatana, siya tet-ewa di inamag Diyos tan napisti da din animal ay ipaspastol di taga-Egipto ngem maga polos di natey sin animal di Israelita. <sup>7</sup> Nan-ibaa din ari si en nanpoot et naammoan da ay maga polos di natey sin animal di Israelita. Ngem olay mo siya di, inapapati na ay adi nangipalobos sin Israelita.

### *Din Naboyoyan Di Ipogaw Ya Animal*

<sup>8</sup> Pag kanan Diyos en da Moses en Aaron, “Man-gamet kayo si dap-o ta isapowak Moses ed kayang sin sangoanan di ari <sup>9</sup> et manbalin si tapok ay maiwaras sin intiro ay Egipto. Gapo sidi, maboyoyan amin ay ipogaw ya animal.”

<sup>10</sup> Say inyat da tet-ewa et nan-a da si dap-o sin pantongtongoan, asi dan emey sin kad-an di ari. Insapowak Moses ed kayang, et pag maboyoyan amin din ipogaw ya aanimal. <sup>11</sup> Olay abe din mansalsalamangka et adi dan binaelan ay somango en Moses, tan naitapi da sin amin ay taga-Egipto ay naboyoyan. <sup>12</sup> Ngem sinepsep Diyos ay inpakenteg din nemnem di ari et adi na pay dedan pinati da Moses en Aaron ay kaman met laeng din inbagan Diyos en Moses.

### *Din Kaeegyat Ay Dalalo*

<sup>13</sup> Makdeng pay di, kanan Diyos en Moses, “Masapa ka si bigat ta en ka ibaga na sin ari, ‘Siya nay kanan Yahweh ay Diyos di Hebreo: Palobosam din ipogaw ko ta en da mandayaw en sak-en. <sup>14</sup> Tan mo adim pasien, idawat ko di kaeegyat ay dosa en sik-a ya sin oopisyal mo pati sin ipogaw mo ta say pangammoan yo ay magay makaiso en sak-en isnan intiro ay lobong. <sup>15</sup> Katet-ewa na, mabalin ay ed wani yan pawadaek di pisti ay mangolpi en dakayo am-in. <sup>16</sup> Ngem inpalobos ko ay matago kayo ta ipailak din panakabalin ko ya maammoan din ngadan ko sin intiro ay lobong. <sup>17</sup> Gapo ta deda ay palpaligatem ya adi kan palobosan din ipogaw ko, <sup>18</sup> pawadaek di kaeegyat ay dalalo ay adi pinadpadasan di taga-Egipto manipod sin ap-apo da enggana ed wani. Mapasamak na si bigat sin kaman nina ay oras. <sup>19</sup> Isonga ibilin mo sin ipogaw mo ta isidom da amin ay animal ya sanikwa yo ay wada sin payew ya nom-a, tan peslen di dalalo amin ay ipogaw ya animal ay adi naisidom.’ ”

<sup>20</sup> Pinatin di odom ay opisyal di ari din inpaibagan Diyos et dinalas da ay inpasidom din babag-en ya animal da. <sup>21</sup> Ngem adi pinatin di odom isonga kabay-an da sin babag-en ya animal da sin payew ya nom-a.

<sup>22</sup> Idi siya di kanan Diyos en Moses, “Itdek mo din sokod mo ed daya ta mandalalo isnan Egipto ta peslena amin ay animal ya ipogaw ay wada sin payew ya nom-a, pati din molmola ay wadas di.” <sup>23</sup> Idi initdek tet-ewan Moses din sokod na ed daya, <sup>24</sup> mankido ya mandalalo begew sin panakabalin Diyos dowan makimat din lota. Magay is-iso na di ay pewek si napasamak ed Egipto manipod ed bayag. <sup>25</sup> Dinadael di dalalo amin ay wada sin payew ya nom-a sin intiro ay Egipto. Natey amin ay ipogaw ya animal ay adi nansidom. Dinadael na amin ay mola dowan naspak amin ay kaiw. <sup>26</sup> Ed Gosen anggoy ay kad-an di Israelita di magay dalalo.

<sup>27</sup> Inpaayag din ari da Moses en Aaron yan kanana, “Nakabasolak baw ed wani. Si Diyos di kosto, ngem dakami sin ipogaw ko di baken kosto. <sup>28</sup> Mankararag ka kod en Diyos tan nay enggay palalo nan dalalo ya kido. Laton ay palobosak dakayo et komaan kayo ay dagos.”

<sup>29</sup> Pag kanan Moses, “Mo bemelaak sin siyodad, ikayang ko din takkay ko ay mankararag en Diyos et somaldeng din dalalo ya kimat. Say pangammoan yo ay si Diyos di akin oka isnan lobong. <sup>30</sup> Ngem ammok ay sik-a ya din oopisyal mo et adi yo pay laeng banolen ya egyatan si Yahweh ay Diyos.”

<sup>31</sup> Gapo sin napasamak ay sana, nadadael amin din mola ay nansabong pati din sabog, tan enggay ay nandawa. <sup>32</sup> Ngem laton pay din bakakew, tan maod-odi ay maom.

<sup>33</sup> Tinaynan Moses din ari et binmela sin siyodad. Inkayang na din takkay na ay nankararag en Diyos et sinmaldeng din dalalo ya kimat, siya abe sin odan. <sup>34</sup> Idi ilan din ari ay sinmaldeng din odan, dalalo ya kimat, kinmedse kasin. Inpakenteg na din nemnem na yan in-onod abe din oopisyal na <sup>35</sup> et adi na pinalobosan din Israelita, tan say inpaipadton dedan Diyos en Moses ay say amagen din ari.

## 10

### *Din Binnelaan Di Ad-ado Ay Dodon*

<sup>1</sup> Kasin kanan Diyos en Moses, “Emey ka sin ari, tan pinakenteg ko din nemnem na, olay abe sin oopisyal na ta ipailak en daida din nakaskasdaaw ay panakabalin ko.

<sup>2</sup> Inamag ko di ta say dad-aten yo sin an-ak ya ap-o yo din inamag ko ta say maibabain din taga-Egipto begew sin nakaskasdaaw ay inamag ko ya ta say pangammoan yo ay sak-en si Diyos.”

<sup>3</sup> Kasin pay emey da Moses en Aaron sin ari yan kanan da, “Siya na di kanan Yahweh ay Diyos di Hebreo, ‘Pig-an pay di panpakombabaam en sak-en? Palobosam din ipogaw ko ay en mandayaw en sak-en. <sup>4</sup> Tan mo sigaam, awni et ipaalik si bigat di ad-ado ay dodon isnan Egipto. <sup>5</sup> Maisak-eb da sin daga ay kaman tolda et adi kaila din lota begew sin kaad-ado da. Dowan dan kanen amin ay molmola yo ay binay-an di pewek ya dalalo, pati din kakaiw ay nabay-an. <sup>6</sup> Mapno da abe sin amin ay beey mo ya sin beey di oopisyal ya ipogaw mo. Polos ay magay is-iso nina si napasamak si inilan di aam-a ya aap-o yo ed idi enggana ed wani.’ ” Makdeng pay di, tinaynan Moses din ari.

<sup>7</sup> Asi pay kanan din oopisyal di ari en sisya, “Ay pig-an ngin ay isaldeng nisa ay mangidawdawat si problima en datako? Pangaasim ta palobosam et dedan din Israelita\* ta emey da mandayaw en Yahweh ay Diyos da. Ay adim pay laeng nadlaw ay enggay nadadael nan ili tako ay Egipto?”

<sup>8</sup> Isonga inpaayag din ari da Moses en Aaron et kanana en daida, “Mabalin baw ay emey kayo ta en kayo mandayaw sin Diyos yo. Ngem sino da di emey?”

<sup>9</sup> Songbatan pay Moses yan kanana, “Emey kami am-in pati din anan-ak, nankakay ya nankababkes ya din amin ay animal mi, tan masapol ay en kami manfiesta ay pangdayaw mi en Yahweh ay Diyos mi.”

<sup>10</sup> Idi siya di, kanan din ari, “Isapatak en Yahweh ay adiak ipalobos ay ikoyog yo din babbabai ya an-ak yo tan ammok ay natken di panggep yo. <sup>11</sup> Isonga adi mabalin! Dakayo ay lallalaki anggoy di emey ay en mandayaw en Diyos mo say layden yo.” Makdeng pay ay ibaga na di, kaipakaan en da Moses en Aaron.

<sup>12</sup> Idi siya di, kanan Diyos en Moses, “Ikayang mon takkay mo sin patag di daga ay Egipto ta emey di ad-ado ay dodon ta kanen da amin di mola ay binay-an di dalalo.”

<sup>13</sup> Tinongpal Moses di et inkayang na din sokod na, pag ipawadan Diyos di dagem ay napo sin naibandas belaan di agew. Nandagedagem si sin-agew ya sinlabi. Mapat-a pay, indateng din dagem ay sana di kadodododon <sup>14</sup> et nanwaras da sin amin ay lugar di Egipto. Enggay nadi si kaposkolan ay kaad-adon di dodon si naila ed idi ya olay pay sin omal-ali ay timpo. <sup>15</sup> Enggay mangitit di ila da sin lota ay tinomkapan da, et kinan da amin ay binay-an di dalalo, pati din lames da. Maga polos di maila si manbibiyag ay kaiw ono mola ed Egipto. <sup>16</sup> Gapo isdi, naagagan din ari et kaipaayag en da Moses en Aaron. Pag nan kanan, “Nanbasolak kayman en Yahweh ay Diyos yo pati en dakayo. <sup>17</sup> Pangaasi yo kod ta pakawanen yos sak-en olay mamingsan anggoy. Ikararag yo kod en Yahweh ay Diyos yo ta ipasaldeng na nan kaeegyat ay dosa.”

<sup>18</sup> Idi siya di, tinaynan Moses din ari et nankararag en Diyos. <sup>19</sup> Pag et ipawadan Diyos di napigsa ay dagem ay napo sin diposan di agew. Indagem din amin ay dodon et inturong na ed baybay ay Mandalangdang. <sup>20</sup> Ngem pinakenteg Diyos pay dedan din nemnem di ari et adi nan pinalobosan din Israelita.

### *Din Binmolingetana*

<sup>21</sup> Asi kanan Diyos en Moses, “Ikayang mo san takkay mo et palalo ay bomolinget sin amin ay kad-an di taga-Egipto ta say masapol ay mankapokap da.” <sup>22</sup> Inkayang Moses din takkay na et siya tet-ewa ay palalo ay binmolinget ed Egipto si tolo ay agew. <sup>23</sup> Enggay

\* **10:7** Di esa abe ay kaiologan nina sin Hebreo et: lallalaki ay Israelita.

magay iyat di taga-Egipto ay bemela sin beey da, tan polos ay adi da makaila sin gagait da. Ngem laton pay ay mapat-a sin kad-an di Israelita.

<sup>24</sup> Inpaayag kasin din ari da Moses en Aaron yan kanana, “May, emey kayo ay mandayaw en Diyos yo. Olay ikoyog yo din babbabai ya anan-ak yo, ngem bay-an yo amin din karnero, kalding ya baka yo.”

<sup>25</sup> Ngem kanan Moses sin ari, “Masapol ay ipalobos mo ay itakin mi abe din aanimal mi ta say waday pooan mi ay idaton en Diyos.” <sup>26</sup> Adi mabalin ay taynan mi di olay esa sin animal mi tan masapol ay din animal mi ay nay di en mi panpilian si idaton mi en Diyos. Esa pay, adi mi pay laeng ammo mo sino di animal ay idaton mi en Diyos enggana ay domateng Kamis di.”

<sup>27</sup> Ngem inpakenteg Diyos din nemnem di ari et adi na inpalobos din Israelita ay komaan. <sup>28</sup> Isonga kanana et ay namodtak en Moses, “Komaan kas na! Adi ka kasin manpappaila en sak-en, tan mo kasin kan manpaila et papsek sik-a.”

<sup>29</sup> “Tet-ewa san kanam,” kanan Moses, “tan adi kan to ilaen kasin si sak-en.”

## 11

### *Din Nangipadtoan Moses Sin Maodi Ay Dosa*

(11:1,4-10)

<sup>1</sup> Sigod ay inbagan Diyos en Moses, “Sinay di maodi ay dosa ay idawat ko sin ari ed Egipto ya sin ipogaw na. Mo makdeng di, sigurado ay palobosana si dakayo. Katet-ewa na, awni et dagdagena si dakayo amin ay komaan.” <sup>2 3</sup>

<sup>4</sup> Idi siya di, kanan Moses sin ari, “Siya na di inbagan Diyos, ‘Sin gawan di labi, malabasak to ed Egipto <sup>5</sup> et matey amin ay besag ay lalaki sin anak di taga-Egipto. Maitapi din pangpangoan ay anak di ari ay say maisokat koma ay manturay enggana sin anak di bag-en ay man-gilgiling, pati din besag di animal da. <sup>6</sup> Kadi et omanoga dan to amin ay ipogaw isnan Egipto. Maga polos di nadnadnge si kaman nidi ay oga nanipod ed bayag ya olay sin tapin di agew. <sup>7</sup> Ngem sin kad-an pay di Israelita, maga polos di mapasamak ay lawa en daida ya sin animal da.\* Siya nay pangammoan yo sin iyat Diyos ay mangikasin sin Israelita sin taga-Egipto.’ ” <sup>8</sup> Kanan Moses ay nangipaanongos, “Kadi et omali dan to amin din oopisyal mo ay mandokmog ya manpakaasi en sak-en ta koyogek amin din ipogaw ko ay komaan isna et komaanak tet-ewa.” Idi makdeng ay ibagan Moses di, palalo di bonget na ay nanaynan sin ari.

<sup>9</sup> Ngem inbabagan pay dedan Diyos en Moses na, “Adi dakan to patpatien sin ari ay mapasamak dadi ta way iyat ko ay mangamag si ad-ado ay nakaskasdaaw ed Egipto.”

<sup>10</sup> Inamag da Moses en Aaron am-in dana ay nakaskasdaaw sin sangoanan di ari, ngem inpakenteg Diyos di nemnem na, isonga adi nan pinalobosan din Israelita ay komaan.

## 12

### *Din Fiesta Ay Makwani En Nalabas*

<sup>1</sup> Siya na di inbilin Diyos en da Moses en Aaron ed Egipto, <sup>2</sup> “Din bowan ay nay di manbalin ay damo ay bowan di tawen para en dakayo et say onodan yo si tinawtawen.

<sup>3</sup> Ibaga yo sin intiro ay gimong di Israelita ta siya na di amagen da si tinawtawen: Mo domteng din maikasinpo ay agew sin siya na ay bowan, masapol ay manpili din aaman di pamilya si sag-eesa ay karnero ono kalding para en daida ay pamilya. <sup>4</sup> Mo di esa ay pamilya yan at-atik da et sobra di esay karnero para en daida, masapol ay makitapi da sin kaasag-enan ay kaaruba da et man-a da si animal ay komosto sin kaad-ado da, maibasar sin kabaalan di esa ay kanen. <sup>5</sup> Din maosal ay animal et masapol ay bomaro

† **10:25** Di esa abe ay kaiologan nina sin Hebreo et: “Sik-a ngarud di makaoway ay mangidawat si aanimal ay pooan mi ay idaton en Diyos.” \* **11:7** Din kanana sin Hebreo et: magay olay esa ay aso si mangiyak en daida ya sin animal da.



ay karnero ono kalding ay esay tawena yan masapol abe ay mapteng ay maga polos di kolang na. <sup>6</sup> Esten yo ay mangay-ayowan enggana ay malablabi sin maikasinpo ya opat ay agew di natodingan ay bowan. Say pamaltian di amin ay Israelita sin pinili da ay animal. <sup>7</sup> Masapol ay man-a da sin dada na et say iponas da sin nan-inigid ya ngaton di pantew di beey ay pangisidaan da. <sup>8</sup> Sin labi ay doy, ipangan da si manpait ay nateng ya tinapay ay magay labadura na din naidawis ay karni. <sup>9</sup> Adi yon isidsida mo baken nas-et ay naoto ya adi yon ilambong. Masapol ay dinawis ay sibobokel. Adi yon tadtadtaden ay isian din toktok, siki ya eges na. <sup>10</sup> Masapol ay magay baybay-an yo. Mo waday mabay-an enggana sin agsapa, masapol ay pooan yo. <sup>11</sup> Masapol ay paspasan yo ay mangan yan nakababado kayo ay nakasagana ay mandan. Iaamag yo din sandal yo ya eegnan yo din sokod yo. Siya di di fiesta ay makwani en Nalabas ay amagen yo ta panginemnemneman yo sin inamag ko ay Diyos yo. <sup>12</sup> Sin labi ay sana, mandanak to ed Egipto et peslek amin ay besag ay lalaki ay anak di ipogaw ya animal et say panosaak sin amin ay didiyosen di Egipto. Sak-en si Diyos. <sup>13</sup> Ngem din dada ay iponas yo sin pantew di pangilasinak sin beey ay kad-an yo, ta mo malabasak ya ilaek din dada ay sana, maga di lawa ay mapasamak en dakayo, olay mo dosaek din amin ay taga-Egipto.

<sup>14</sup> “Masapol ay silibraren yos eng-enggana din agew ay nay ay fiesta ay pangnemneman yo sin inamag ko.”

#### *Din Fiesta Ay Makwani En Tinapay Ay Magay Labadura Na*

<sup>15</sup> Kanan aben Diyos, “Sin oneg di pito ay agew, adi kayon mangmangan si tinapay ay waday labadura na, tinapay ay magay labadura na et anggoy di kanen yo. Sin damo ay agew, kaanen yo amin ay labadura sin beey yo. Tan mo wada di mangan si tinapay ay way labadura na sin lak-am di pito ay agew ay sana, masapol ay maipowira sin ipogaw ko.\* <sup>16</sup> Sin damo ya maodi ay agew, masapol ay matopog kayo amin ay mandayaw en Diyos. Masapol ay adi kayon man-obla sin da sana ay agew. Man-oto et enggay di mabalin ay amagen yo. <sup>17</sup> Masapol ay silibraren yo din fiesta ay nay ay makwani en Tinapay ay Magay Labadura na, tan din damo ay agew na et say agew ay pangipangoak en dakayo ay komaan ed Egipto. Isonga silibraren yo din agew ay nay si eng-enggana. <sup>18</sup> Manlogi sin kalablabian di maikasinpo ya opat di damo ay bowan enggana sin kalablabian di maikadowanpo ya esa ay agew, masapol ay mangan kayos tinapay ay magay labadura na. <sup>19-20</sup> Masapol ay magay labadura sin beey yo sin lak-am di pito ay agew ay sana. Tan mo waday mangan si tinapay ay waday labadura na, Israelita ono mangili, masapol ay maipowira sin ipogaw ko.”

<sup>21</sup> Idi siya di inayagan Moses din papangolon di Israelita yan kanana, “En kayo manpili si sag-eesa ay bomaro ay karnero ono kalding ay para sin papamilya yo ta paltien yo para sin fiesta ay makwani en Nalabas. <sup>22</sup> Manposngi kayo si pingin di hisopo ta isiwsiw yo sin napalangana ay dadan di karnero, asi yon iponas sin nan-inigid ya ngaton di pantew di beey yo. Masapol ay maga di bemelbela sin beey da enggana ay mapat-a. <sup>23</sup> Mo sokisoken Diyos din ili ay en manosa sin taga-Egipto ya ilaena din dada sin hamban di pantew yo, labsana din beey yo et adi nan ipalobos ay senggep sin beey yo din anghel ay mangidateng si pese ta peslena si dakayo. <sup>24</sup> Masapol ay tongpalen yo din bilin ay nay, enggana abe sin ipoli yo. <sup>25</sup> Amagen yo din seremonia ay nay mo domateng kayo sin lugar ay inkarik ay idawat kon dakayo. <sup>26</sup> Mo damagen din an-ak yo ya kanan da, ‘Ay sinoy olog ngin nan am-amagen tako?’ <sup>27</sup> kanan yo en daida, ‘Sinay di daton ay pangnemneman tako sin inamag Diyos sin kawada mi ed Egipto, tan pinse na din taga-Egipto ngem nilabsana pay din beebey tako ay Israelita.’” Idi nakdeng ay dinngen din Israelita din bilbilin ay nay, nanyakog-ong da ay nandayaw en Diyos.

<sup>28</sup> Idi siya di, inmey da et tinongpal da din inbilin da Moses en Aaron.

\* **12:15** Di esa abe ay kaiologan nina sin Hebreo et: masapol ay makeddengnan ay matey.

<sup>29</sup> Idi domteng sin gawan di labi, pinsen Diyos din amin ay pangpangoan ay lalaki sin an-ak di taga-Egipto. Natey din pangpangoan ay anak di ari ay maiskat koma ay manturay enggana sin pangpangoan ay anak di balod sin balodan. Natey abe amin ay besag di animal da. <sup>30</sup> Sin labi ay doy, kabanangon din ari ya din oopisyal na ya din amin ay taga-Egipto, tan pag waday natey sin amin ay beey et omanoga da sin intiro ay Egipto.

### *Din Kinmaan Di Israelita Ed Egipto*

<sup>31</sup> Sin labi ay doy, pinaayagan din ari da Moses en Aaron yan kanana, “May! Emey kayo! Koyogen yo amin ay Israelita ta komaan kayo isnan ili mi. En kayo mandayaw en Diyos, tan say kindaw yo. <sup>32</sup> Olay itakin yo amin ay karnero, kalding ya baka yo ay kaman din kindaw yo ta emey kayo et. Ikararag yo kod abe en Diyos ta bindisyonana si sak-en.”

<sup>33</sup> Man-aagag din taga-Egipto ay mangipakaan sin Israelita, tan kanan da, “Mo adi kayo komaan et sigurado ay matey kami amin.” <sup>34</sup> Pinnon din Israelita din pan-ototoan da si daan maoto ay tinapay ay magay labadura na down dan sengten si lopot, asi dan sakbaten. <sup>35</sup> Inamag din Israelita din inbilin Moses et nankedaw da si al-altin di awak ay balitok ya palata ya bado. <sup>36</sup> Inturong Diyos di siged ay nemnem di taga-Egipto sin Israelita, isonga kaidawadawat din taga-Egipto sin kedawen da. Dakdake ay kinabaknang din inan di Israelita sin taga-Egipto.

<sup>37</sup> Nanlobwat din Israelita ed Rameses et nandad-an da ay manturong ed Succot. Emey ay 600,000 di bilang din lallalaki ay adi makibilang din babbabai ya anan-ak.

<sup>38</sup> Ad-ado abe di baken Israelita ay naikoyog en daida ya ad-ado ay karnero, kalding ya baka. <sup>39</sup> Sin nan-ibbayan da, inoto da din tinapay ay intakin da ay napod Egipto. Magay labadura na, tan bigla dedan ay naipakaan da ed Egipto, isonga magay timpo da ay mangisagana si baon da ono tinapay ay waday labadura na.

<sup>40</sup> Nantee din Israelita si 430 ay tawen ed Egipto. <sup>41</sup> Sin agew ay pap-eng di 430 ay tawen, kinmaan amin din tribun di ipogaw Diyos<sup>†</sup> ed Egipto. <sup>42</sup> Sin doy ay labi, naninsin-labi ay binanbantayan Diyos din Israelita sin nangibelaana en daida ed Egipto. Siya na di gapo ay maninsinlabi ay manbantay din Israelita mo domteng din pangnemneman da sin agew ay nay, et say maitawtawid ay linteg sin an-ak ya ap-o da.

### *Din Maonodan Sin Fiesta Ay Makwani En Nalabas*

<sup>43</sup> Kanan Diyos ay nangibilin en da Moses en Aaron, “Siya na di linteg ay onoden yo sin fiesta ay makwani en Nalabas: Adi makikan di baken Israelita sin maisagana ay makan sin fiesta ay nay. <sup>44</sup> Mo wada di nanlako si bag-en ya pinakogit na, mabalin ay makikan din bag-en ay sana. <sup>45</sup> Ngem adi mabalin ay makikan di owat sangaili ono malaglagboan ay man-obla.

<sup>46</sup> “Masapol ay sin oneg di beey di panganan yo. Adi yon ibelbela din karni ya adi yon gopgopaken din tong-a. <sup>47</sup> Masapol ay maitapi amin ay Israelita. <sup>48</sup> Mabalin ay maitapi di baken Israelita ngem masapol ay nakogit amin ay lalaki sin pamilya na. Ngem adi mabalin ay makitapi di adi nakogit sin fiesta ay makwani en Nalabas. <sup>49</sup> Sinay di linteg ay masapol ay onodan di Israelita ya baken Israelita ay wada sin ili yo.”

<sup>50</sup> Tinongpal din am-in ay Israelita din inbilin Diyos en da Moses en Aaron. <sup>51</sup> Sin doy met laeng ay agew, inpangon Diyos din am-in ay tribun di Israelita ay komaan ed Egipto.

## 13

### *Din Kaidatonan Di Besag Ay Anak (13:1-2,11-16)*

<sup>1</sup> Kanan Diyos en Moses, <sup>2</sup> “Idaton yo amin ay pangpangoan ay anak en sak-en, tan okak amin ay lalaki ay besag di Israelita ya siya abe sin besag di animal da.” <sup>3 4 5 6 7 8 9 10</sup>

<sup>†</sup> 12:41 Din tribun di ipogaw Diyos et din polin di sinpo ya doway ay anak Jacob.

<sup>11</sup> Pag kanan Moses sin ipogaw, “Awni et ipangon Diyos dakayo sin dagan di Canaaneo ay insapata na ay idawat en dakayo ya sin ap-apo yo. Et mo okaen yo din daga ay doy, <sup>12</sup> masapol ay idaton yo en sisya din besag ay lalaki sin an-ak yo. Okan aben Diyos amin ay besag ay lalaki sin an-ak di animal yo, <sup>13</sup> ngem mo din anak di dangki yan masapol ay man-idaton kayo si bomaro ay karnero ta say maisobot sidi ono kaman say maisokat ay maidaton. Ngem mo sigaan yo ay manokat sin dangki, masapol ay gotloen yo din tenged na ay say iyat yo ay mamse. Masapol ay man-idaton kayo si maisobot sin amin ay pangangoan ay lalaki ay an-ak yo. <sup>14</sup> Mo sin tapin di agew ya pooten din an-ak yo di gapo na ay am-amagen yo dana, siya na di ibaga yo, “Tan ed idi yan naibabag-en kami ed Egipto, ngem winayawayaan Diyos dakami ay inbela begew sin nakaskasdaaw ay panakabalina. <sup>15</sup> Idi pakekentegegen din ari ed Egipto din nemnem na et sigaana ay mangipalobos en dakami, pinsen Diyos amin ay kapangoanan ay lalaki sin anak di taga-Egipto ya anak di animal da. Siya na di gapo ay maidaton amin ay kapangoanan ay lalaki sin an-ak di animal ya waday maidaton ay maisobot para sin amin ay lalaki ay kapangoanan sin anak di ipogaw. <sup>16</sup> Siya na di kaman sinyal ay maipeey sin takkay ya kitong\* ay mangipanpanemnem sin inyat Diyos ay nangipango en datako ay komaan ed Egipto babaen sin nakaskasdaaw ay panakabalina.’ Say ibaga yo di sin an-ak yo,” kanan Moses en daida.

#### *Din Liboo Ya Apoy Ay Nangipangpango Sin Israelita*

<sup>17</sup> Idi pinakaan din ari ed Egipto din Israelita, adi inturong Diyos daida sin kaaptikan ay danan ay mandan ed Filistia, tan kanan Diyos sin nemnem na, “Adiak layden ay manbabawi da et mantaoli da ed Egipto mo waday mangobat en daida.” <sup>18</sup> Inturong Diyos daida sin lugar ay magay omili ay manturong ed baybay ay Mandalangdang. Wada di intaktakin da ay armas da sin nandad-anan da.

<sup>19</sup> Intakin Moses din tong-an Jose tan say dadlon inpaisapatan Jose sin Israelita ay nangwani, “Mo domteng din timpo ay ipangon Diyos dakayo ay komaan isnan Egipto, dadlon yon itakin din tong-ak.”

<sup>20</sup> Tinaynan din Israelita ed Succot et nankampo da ed Etam sin benget di lugar ay magay omili. <sup>21</sup> Sin nandad-anan da, wada di kaman posti ay natotood ay liboo ay mangon-on-ona, tan say inyat Diyos ay mangipango en daida. Mo sin labi, manbalin si kaman posti ay apoy et mangon-ona ay manilsilaw sin danan da, isonga mabalin ay mandad-an da sin labi ya kaagawan. <sup>22</sup> Kanayon ay wada din apoy ya liboo ay mangipangpango en daida sin labi ya kaagawan.

## 14

#### *Din Nanbalasatan Da Sin Baybay Ay Mandalangdang*

<sup>1</sup> Idi siya di, kanan Diyos en Moses, <sup>2</sup> “Ibagam sin Israelita ta mantaoli kayo ed Pihahirod ay nan-gawaan di Migdol ya baybay ay Mandalangdang sin asag-en ed Baal Zefon ta mankampo kayos di. <sup>3</sup> Tan ipagarup din ari ay naiaw-awan kayo ay lomikeliked et naskok kayo sin kadardaratan. <sup>4</sup> Pakentegek din nemnem di ari et apayawenas dakayo, ngem awni et abakek din ari ya sosoldado na et say kailaan di panakabalin ko. Say pangammoan din taga-Egipto ay sak-en si Diyos.” Et pinatin din Israelita din naibilin en daida.

<sup>5</sup> Idi naammoan din ari ay enggay linmayaw din Israelita, nanbaliw kasin din nemnem na ya siya abe sin oopisyal na. Kanan da, “Ay sino ngin nas inamag tako? Inpalobos tako et din Israelita et magay bag-en tako.” <sup>6</sup> Inpaisaganan din ari din kaman kalisa ay logana ay pakigobat ya din sosoldado na. <sup>7</sup> Inkoyog na amin ay logan ay pakigobat pati din enem ay gasot ay kasigedan ay nanloganan di sag-eesa ay opisyal di soldado na.

\* **13:16** Di laydena ay kalien, sinyal ay nalaka ay maila. Ilaen abe sin Deuteronomio 6:6-8 ya 11:18.

8-9 Gapo ta inpakenteg Diyos din nemnem di ari ed Egipto, inapayaw na din Israelita ay nangipappailas toled da ay komaan, et indasan das daida sin nankamkampan da sin benget di baybay ay Mandalangdang sin asag-en ed Pihahirod ya Baal Zefon.

<sup>10</sup> Idi tamangen din Israelita ay enggay omas-asag-en din ari ya din sosoldado na, inmegyat da et nankararag da ay mankedaw si badang Diyos. <sup>11</sup> Nanriri da en Moses yan kanan da, “Ay tan magay kaikaotan mi ed Egipto isonga in-alim dakami isnan lugar ay magay omili ta say kateyan mi? <sup>12</sup> Inbaga mi met dedan ed Egipto en olay bay-am dakami ay maibag-en sin taga-Egipto. Agpos et pay laeng di komakaman ay bag-en isdi mo din matey isnan lugar ay magay omili.”

<sup>13</sup> Ngem kanan Moses en daida, “Adi kayon emegyat. Papigsaen yo di nemnem yo tan ed wani ay agew, ilaen yo di iyat Diyos ay mangisalakan en dakayo. Awni et adi kayo kasin mail-ila din taga-Egipto ay ilaen yo ed wani. <sup>14</sup> Adi kasapolan ay mankoti kayo, tan si Diyos di makilaban para en dakayo.”

<sup>15</sup> Idi siya di kanan Diyos en Moses, “Apay nga mankedkedaw kayo si badang? Ibagam sin Israelita ta itoloy yo et ay mandan. <sup>16</sup> Ikayang mo san sokod mo sin patag di baybay ta mansian din danom ta say mamgaan di pandanan di Israelita ay manbalasat sin baybay. <sup>17</sup> Sepsepek ay pakentegen din nemnem di taga-Egipto et apayawen da si dakayo ta say maila din panakabalin ko begew sin iyat ko ay mangabak sin ari ya sin amin ay sosoldado na. <sup>18</sup> Say pangammoan din taga-Egipto ay sak-en si Diyos mo abakek daida.”

<sup>19</sup> Idi siya di, nan-etan sin likod din anghel Diyos ay mangipangpango sin Israelita. Olay din kaman posti ay liboo sin sango da yan nan-etan sin likod <sup>20</sup> et nantee sin nangawaan di taga-Egipto ya Israelita. Sin labi ay sana nanbalin din kaman posti ay liboo si silaw sin kad-an di Israelita, ngem inpabolinget na din kad-an di taga-Egipto, isonga adi da mabalin ay mansinag-en sin labi ay doy.

<sup>21</sup> Inkakayang Moses din takkay na ay inpaturong sin baybay et inpawadan Diyos di napigsa ay dagem ay napo sin naibandas belaan di agew ay nangipasian sin danom. Naninsinlabi ay nandagdagem et namgaan din gawan di baybay, <sup>22</sup> isonga namgaan di nandan din Israelita ay nanbalasat sin baybay et kaman dingding din danom ay nansian sin nan-inigid. <sup>23</sup> Din taga-Egipto ay nangabakabayo ya nanlogan si para gobat et inapayaw da din Israelita sin gawan di baybay. <sup>24</sup> Ngem sin parbangon, inosdongan Diyos manipod sin kad-an di kaman posti ay liboo ya apoy din taga-Egipto et kinibtot na si daida. <sup>25</sup> Inlotlot na din pilid di logan da, isonga maligatan da ay mangapayaw sin Israelita. Inmegyat din taga-Egipto et kanan da, “Komaan tako et isna tan nay baw ay si Diyos di makilaban para sin Israelita!”

<sup>26</sup> Idi siya di kanan Diyos en Moses, “Ikayang mon takkay mo sin patag di baybay ta mantaoli din danom ta malned din taga-Egipto pati din kabayo ya logan da.” <sup>27</sup> Inkayang Moses din takkay na sin patag di baybay et nantaoli din danom sin sigod ay kad-ana idi kosto ay pomatpat-a. Pinadas din taga-Egipto ay komaan sin danom ngem intep-an Diyos daida sin gawan di baybay. <sup>28</sup> Nalned amin din taga-Egipto pati din kabayo ya logan da et magay nabay-an si olay esa en daida. <sup>29</sup> Ngem namgaan pay di nandan din Israelita sin timpo ay nanbalasat da sin baybay tan kaman dingding sin nan-inigid din danom ay nansian.

<sup>30</sup> Sin agew ay doy, insalakan Diyos din Israelita sin taga-Egipto, et inila da din natenatey ay taga-Egipto sin benget di baybay. <sup>31</sup> Sin nangilaan da sin nakaskasdaaw ay panakabalin Diyos sin inyat na ay nangabak sin taga-Egipto, inmegyat da ya nantalek da en Diyos yan siya abe ay nantalek da en Moses ay baa na.

## 15

*Din Kantan Da Moses En Miriam  
(15:1-11,20-21)*

- <sup>1</sup> Pag kantaen da Moses ya din Israelita din kanta ay nay ay pangidayaw da en Diyos.  
 “Sik-a ay Diyos di idayaw ko isnan kansiyon ko,  
 tan nakaskasdaaw din inyat mo ay nangabak sin kalaban mo,  
 tan inilned mo sin baybay din sosoldado ya kabayo.
- <sup>2</sup> Sik-a ay Diyos di pankamangak,  
 tan begew sin inyat mo et naisalakanak.  
 Sik-a ay Diyos di idayaw ko,  
 Diyos ay dinaydayaw di ap-apo,  
 din kinangatom et say ikankansiyon ko.
- <sup>3</sup> Si Yahweh di ngadan mo ay en ka inpaammo,  
 mo maipanggep si gobat, palaloy laing mo.
- <sup>4</sup> En ka et intep-a sin baybay ay annawa  
 din sosoldadon di Egipto pati din loglogan da.  
 Nalned din kalaingan ay ap-apon di soldado da  
 ed baybay ay Mandalangdang ay kanan da.
- <sup>5</sup> Sin malosong ay baybay et nalim-otan da,  
 kaman dan bato ay nalned sin lanad na.
- <sup>6</sup> Kaeegyat san bikas di takkay mo, Apo,  
 tan mekmekena tet-ewa amin ay kalaban mo.
- <sup>7</sup> Madaydayaw ka sin panakabalin mo  
 ay nangabak sin kalaban mo.  
 Kaman apoy din bonget mo,  
 et kaman dan garami ay domapo.
- <sup>8</sup> Sinib-okam din baybay et nansian din danom,  
 danom ay man-oy-oyas et natood ay kaman bonton,  
 kaman dan kinmenteg ay ginminek din dalloyon.
- <sup>9</sup> Din kalaban mi yan kanan da,  
 ‘Apayawen tako ta depapen takos daida,  
 asoten tako din kampilan tako et maabak da.  
 Alaen tako amin ay sanikwa da,  
 panbibingayan tako din gamgameng da.’
- <sup>10</sup> Ngem esay sib-ok mo  
 yan nalned dan taga-Egipto,  
 nalned da ay kaman ismay  
 sin kaeegyat ay baybay.
- <sup>11</sup> Magay didiyosen si makaiso en sik-a ay Apo,  
 tan magay makaiso sin kinasantom ya kinasiged mo,  
 maga abe di makaamag sin nakaskasdaaw ay inyat mo.” <sup>12</sup> <sup>13</sup> <sup>14</sup> <sup>15</sup> <sup>16</sup> <sup>17</sup> <sup>18</sup> <sup>19</sup>
- <sup>20</sup> Makdeng pay di, si Miriam ay esay mamadto ay manang da Aaron et nan-as tambol.  
 In-onod din amin ay babbabai et nanambol da dowan dan mansala.
- <sup>21</sup> Inkantaan Miriam daida yan kanana,  
 “Idayaw takos Diyos isnan kansiyon tako.  
 Nakaskasdaaw din inyat na ay nangabak sin kalaban tako,  
 tan inilned na sin baybay din sosoldado ya kabayo.”

### *Din Manpait Ay Danom Ed Mara*

<sup>22</sup> Makdeng pay di inpangon Moses din Israelita et tinaynan da din baybay ay Mandalangdang. Nanturong da sin lugar ay magay omili ay manngadan si Shur. Nandad-an das di si tolo ay agew, ngem magay danom si dinteng da. <sup>23</sup> Pag dan domateng ed Mara, ngem adi kainom di danom isdi tan palalo ay manpait. Siya nay



gapo na ay nangadanan din lugar ay nay si Mara.\* <sup>24</sup> Kanan din ipogaw ay nanriri en Moses, “Into ngin di inomen tako?” <sup>25</sup> Siya di nankararag si Moses ay manpabadang en Diyos, et pag ipailan Diyos di esay kaiw ay say intep-an Moses sin danom et pag somiged et mabalin ay mainom.

Isdi ay pinadas Diyos daida ya inbilina di kosto ay amagen da. <sup>26</sup> Kanana en daida, “Mo patien yos sak-en et amagen yo din kosto sin pangilak ya tongpalen yo din am-in ay bilbilin ko, adiak ipalak-am en dakayo din saksakit ay inpalak-am ko si taga-Egipto. Tan sak-en si Diyos ay mangagas en dakayo.”

<sup>27</sup> Intoloy da ay nandan enggana ay sinmawang da ed Elim ay kad-an di sinpo ya dow a ay obbog ya pitopolo ay kaiw ay palma. Isdi ay nankampo da sin asag-en di danom.

## 16

### *Din Manna Ya Din Titit (16:1-35)*

<sup>1</sup> Tinaynan din amin ay Israelita ed Elim, et sin maika-15 di maikadwa ay bowan manipod sin nanaynanan da ed Egipto, dinmateng da ed Sin ay esay lugar ay magay omili sin nan-gawaan di Elim ya Sinai. <sup>2</sup> Sin lugar ay sana, nanriri da amin en da Moses en Aaron <sup>3</sup> ay nangwani, “Olay et koman pinsen Diyos dakami ed Egipto. Sin isdi, mabalin ay mansida Kamis karni ya mangan Kamis kompormi ay layden mi enggana ay mabsog kami. Ngem inpango yo dedan dakami ay komaan isdi ta matey kami amin si dagaang isnan lugar ay magay omili.”

<sup>4-5</sup> Pag kanan Diyos en Moses, “Dengngem na: awni et pawadaek di ad-ado ay makan ay mapo ed daya ay kaman odan. Masapol ay inagew ay bemela din ipogaw ta man-olnong das omanay ay kanen da si esay agew. Sin maikan-em ay agew, masapol ay mamidwa di kaad-adon di olnongen da mo din sigod ya masapol ay otoen da. Say ibilin ko dana ta padasek daida mo onodan da met laeng din bilbilin ko.”

<sup>6-7</sup> Makdeng pay ay ibagan Diyos di, kanan da Moses en Aaron sin Israelita, “Sin malablabi ya agsapa, ipailan Diyos din panakabalina ta pangammoan yo ay sisya tet-ewa di nangipango en dakayo ay komaan ed Egipto. Tan dinnge na din ad-ado ay riri yo en sisya. Aw, tet-ewa ay si Diyos di nanririan yo ay baken dakami, tan owat kamin baa ay mantongtongpal sin bilina.”

<sup>8</sup> Kanan Moses ay nangitoloy, “Si Diyos di mangidawat si karni en dakayo sin malablabi ya tinapay sin agsapa olay intoy kaad-adon di layden yo, tan dinnge na din riri yo en sisya. Katet-ewa na, si Diyos di ib-ibawen yo sin panririan yo en dakami.”

<sup>9</sup> Pag kanan Moses en Aaron, “Ibagam sin amin ay Israelita ta omali da amin ay makisango en Diyos, tan dinnge na din ad-ado ay riri da.” <sup>10</sup> Idi mankalkali pay laeng si Aaron sin amin ay Israelita, sinagong da din lugar ay magay omili, et pag dan ilaen din koniniing en Diyos sin liboo.

<sup>11</sup> Pag kanan Diyos en Moses, <sup>12</sup> “Dinngék din ririn di Israelita isonga ibagam na en daida: Sin malablabi, mawada di karni ay sida da. Sin agsapa, mabsog da abes tinapay. Maamag na ta say pangammoan da ay sak-en si Yahweh ay Diyos yo.”

<sup>13</sup> Malablabi pay tet-ewa, domanateng di ad-ado ay titit\* et enggay tinmapog da sin lota sin kampon di Israelita. Sin agsapa abe, pag dono din nanniliked sin kampo. <sup>14</sup> Idi mamgaan pay din dono, waday naipayapayag sin kadaratan ay naingpis ay kakaman andap. <sup>15</sup> Idi ilaen din Israelita, kanan da ay nan-asibaga, “Ay sino pay na?” tan adi da ammo mo sino di. Pag kanan Moses, “Sinay din makan ay indawat Diyos en dakayo. <sup>16</sup> Kanan Diyos en man-olnong kayo si maikosto sin kasapolan yo. Sag-eesa ay salop sin esa ay mimbron di pamilya.”

\* **15:23** Din olog di Mara et “manpait.” \* **16:13** Din kalasin di titit ay nay et mais-o sin ngeweg ono ngewem.

<sup>17</sup> Say inamag tet-ewa din Israelita di. Waday odom ay nan-olnong si ad-ado yan wada abey at-atik, <sup>18</sup> ngem idi sokaten da, baken nansobra din nangolnong si ad-ado yan baken nankolang din nangolnong si at-atik. Pag naikostokosto din inolnong da. <sup>19</sup> Kanan Moses en daida, “Magay man-idolin si para si bigat.” <sup>20</sup> Ngem adi pinatin din odom si Moses et nan-idolin da. Sin kabigatana, nabigisan down nabangnges ay man-agob din indolin da, et manbonget si Moses gapo sin inamag da. <sup>21</sup> Inagsapa ay nan-olnong da insigon sin kaad-adon di kasapolan da. Din mabay-an sin lota yan matenaw mo mansey-ang.

<sup>22</sup> Sin maikan-em ay agew, mamidwa mo din sigod ay kaad-adon di ol-olnongen da di alaen da, isonga sagdodowa ay salop si esay ipogaw. Nasinop amin din papangolon di Israelita et inbaga da en Moses. <sup>23</sup> Pag kanan Moses en daida, “Inbilin Diyos ay mo si bigat yan nabanol ay agew ay pan-ibbayan para en Diyos, isonga magay man-obla. Man-oto kayo ed wani sin amin ay layden yo ay otoen. Idolin yo din mabay-an para si bigat.” <sup>24</sup> Tinongpal da din bilin Moses et indolin da din mabay-an para sin kabigatana, yan laton ay adi nabigis ono nabangnges. <sup>25</sup> Kanan Moses, “Say kanen yo sa ed wani, tan ed wani di makwani en agew ay pan-ibbayan tako ay para en Diyos. Magay maa ed wani si makan sin lota. <sup>26</sup> Man-olnong kayo sin enem ay agew si makan, ngem sin maikapito et maga, tan say agew ay pan-ibbayan.”

<sup>27</sup> Sin maikapito ay agew, wada pay laeng di binmela ay en man-a koma si makan, ngem maga polos di inila da. <sup>28</sup> Pag kanan Diyos en Moses, “Ay pig-an pay di panongpalan yo si ibagak? <sup>29</sup> Nenemnemen yo ay sak-en ay Diyos di nandotok si esay agew ay pan-illengan yo, isonga idawat ko sin maikan-em ay agew di kanen yo si doway agew. Magay omaddawi sin beey na sin maikapito ay agew mo adi et mantetee kayo sin beey yo.” <sup>30</sup> Nanlogi isdi, adi da man-obla sin maikapito ay agew.

<sup>31</sup> Nginadanan di Israelita si manna<sup>†</sup> din makan ay doy ay mapod daya. Din kailaana yan mankilat ya kinittoy ay kaman bokel yan kaman tinapay ay nalaokan si anig di katamtamana. <sup>32</sup> Kanan Moses, “Inbilin Diyos ay man-idolin tako sin manna ay nay ta waday pangil-ilaan din poli tako sin makan ay indawdawat Diyos sin kawada takos lugar ay magay omili sin nangipangoana en datako ay komaan ed Egipto.” <sup>33</sup> Kanan Moses en Aaron, “Man-a kas koli ta pey-am si esay salop ay manna. Igtom to sin Baol di Tolagan Diyos ta way pangil-ilaan din aap-o tako.” <sup>34</sup> Sin kosto ay timpo, inonodan Aaron din inbilin Diyos en Moses, et inpeey na sin sangoanan di nadampilak ay bato ay naigolitan di bilbilin Diyos sin Baol ta say kaidolinana. <sup>35</sup> Manna di kinkinan din Israelita si opatapolo ay tawen enggana ay dinmateng da ed Canaan ay say nan-ilian da. <sup>36</sup>

## 17

### *Din Binmelaan Di Danom Sin Bato*

<sup>1</sup> Tinaynan din am-in ay Israelita din kadardaratan ed Sin, et nan-etaetan da ay maibasar sin inbilin Diyos enggana ay domateng da ed Refidim, et pag dan mankampos di. Ngem magay danom sidis pan-inoman da. <sup>2</sup> Isonga nanriri da en Moses ay mangwani, “Iyaam dakamis danom ay inomen mi.” Asi et kanan Moses ay nanongbat, “Apay nga ririen yos sak-en? Apay magay talek yo en Diyos ta padpadasen yos sisya?”

<sup>3</sup> Ngem palalo ay manbigaw din ipogaw ay sana, isonga intoltoloy da ay nanriri en Moses ay mangmangwani, “Apay nga inbelam dakami ed Egipto? Ay kambaw in-alim dakami sina ta peslem dakami ya din an-ak mi ya talaken mi si bigaw!”

<sup>4</sup> Idi siya di, inpasnek Moses ay nankararag en Diyos et kanana, “Ay sino ngin di iyat ko sin ipogaw ay nay? Nay dandani et ay pigpigen das sak-en!”

<sup>†</sup> 16:31 Mais-o di kadngean di manna sin kalin di Hebreo ay din olog na et “sino pay na?” (ilaen sin v.15).

<sup>5</sup> Kanan Diyos en Moses, “Ikoyog mo din odom ay papangolon di Israelita ta mangon-ona kayo. Itakin mo din sokod ay inseppat mo sin ginawang ay Nile. <sup>6</sup> Awni et wadaak ay pomipika sin bato sin sangoanan yo sin dontog ay Sinai. Iseppat mo san sokod mo sin bato et bemelan to di danom ta way inomen din ipogaw ay sana.” Say inyat tet-ewan Moses di ay iniilan di papangolon di Israelita.

<sup>7</sup> Asi et nginadanan Moses din lugar ay sana si Massa ya Meriba,\* tan nanriri din Israelita dowan dan pinadpadas si Diyos ay nangwani, “Into ngin si Diyos?”

### *Din Nangobatan Di Israelita Sin Amalekita*

<sup>8</sup> Idi wada pay laeng din Israelita ed Refidim, inmey din Amalekita ay mangobat en daida. <sup>9</sup> Et kanan Moses en Josue, “Manpili ka si lallalaki ta en yo gobaten din Amalekita si bigat. Wadaak to sin toktok di dontog ay mangikakayang sin sokod ay kanan Diyos en itakin ko.” <sup>10</sup> Tinongpal Josue din inbilin Moses et inmey da ginobat din Amalekita. Mo pay da Moses en Aaron ya si Hur, nanikid da sin toktok di dontog.

<sup>11</sup> Mo ikayang Moses din takkay na, mangab-abak din Israelita, ngem mo ibaba na, mangab-abak abe din Amalekita. <sup>12</sup> Idi nabbay din takkay Moses, nan-as da Aaron en Hur si bato ay tomokdoana et pinmipika da ay sag-eesa da ay nangikakayang sin takkay Moses enggana ay nadipos din agew. <sup>13</sup> Idi say inyat da di, inabak da Josue din Amalekita.

<sup>14</sup> Pag kanan Diyos en Moses, “Isolat mo din kadad-atan di nangabakan yo ta waday pangnemnemneman yo. Ibagam en Josue ay awni et dosaek din Amalekita ta maga di kaingadngad-anan da.” <sup>15</sup> Asi pay man-amag si Moses si altar et nginadanana “Si Diyos di bandilak!” <sup>16</sup> Pag nan kapayen din altar yan kanana, “Si naey di kaman bandila ay mangipaila ay itoltoloy Diyos ay mangobat sin Amalekita si eng-enggana.”

## 18

1 2 3 4 5 6

### *Din Namasyalan Jetro en Moses*

(18:7-27)

Idi dinngen Jetro ay katogangan Moses din nakaskasdaaw ay inam-amag Diyos para en Moses ya din ipogaw na ay Israelita, inmey sin kad-an da Moses sin lugar ay magay omili, tan laydena ay en pasyalen sisya. Inkoyog na abe din asawan Moses ya din doway anak na ay sigod ay inpasaan Moses. (18:1-6)

<sup>7</sup> Binmala si Moses ay en nangabat en katogangana et nanyakog-ong sin sangoanana yan inongoana. Makdeng pay ay man-asidamag da si kasasaad di esa ya esa, sinenggep da sin tolda ay nanbeeyan Moses. <sup>8</sup> Pag dad-aten Moses en katogangana amin din inamag Diyos sin ari ed Egipto ya din ipogaw na begew sin Israelita. Dinad-at na amin din ligat da sin danan ya din inyat Diyos ay nangisalakan en daida. <sup>9</sup> Palalo di ragsak Jetro sin nanngeana sin amin dana ay siged ay inam-amag Diyos para sin Israelita. <sup>10</sup> Kanana, “Madaydayaw si Diyos ay nangisalakan en dakayo sin taga-Egipto ya din ari da. <sup>11</sup> Ed wani, ammok ay napigpigma si Diyos mo din amin ay didiyosen, tan insalakana din Israelita sin taga-Egipto ay nanglaslasoy ya namalpaligat en daida.”

<sup>12</sup> Pag idawat Jetro di maidaton en Diyos ay mapooan ya odom ay datdaton. Makdeng pay di, si Aaron ya din amin ay papangolon di Israel et nan-ookob dan da katogangan Moses sin sangoanan Diyos.

<sup>13</sup> Idi kasin napat-a, tinmokdo si Moses ay mangikeddeng sin kason di kaipoipogaw. Inalibongbongan din kaipoipogaw sisya manlogi sin agsapa enggana sin malabi. <sup>14</sup> Idi inilan katogangan Moses din amin ay am-amagena para sin kaipoipogaw, kanana, “Ay

\* 17:7 Din olog di Massa et “padpadasen.” Din olog pay di Meriba et “manriri.”

maney pay sas am-amagem para sin ipogaw. Apay dedan ay es-esam yan manlogi sin agsapa enggan malabi ay waday mangikamang si kaso dan sik-a?”

<sup>15</sup> Kanan Moses ay sinombat, “Tan omali da din ipogaw ay mangammo si layden Diyos. <sup>16</sup> Mo wada di man-iibaw, omali dan sak-en et ikeddeng ko mo sino di kosto yan ibagak abe din bilbilin ya linteg Diyos.”

<sup>17</sup> Kanan Jetro, “Baken kosto sas iyat mo. <sup>18</sup> Palpaligatem anggoy san awak mo, siya abe sin ipogaw. Tan palalo ay nadagsen sas oblam et adi kan kabaelan mo ang-anggoy mo. <sup>19</sup> Dengngem nan ibagak et tolongan dakan Diyos. Din oblam et panakaawak din ipogaw ay mangibaga en Diyos sin problima da. <sup>20</sup> Sik-a di mangitdon daida sin bilbilin ya linteg Diyos ya din ogali ay onodan da koma ya din odom ay lebbengen da ay amagen. <sup>21</sup> Ngem siya na abe di amagem koma. Manpili ka en daida si nalaing ay lallalaki ay emegyat en Diyos, matalek ya adi mabalin ay mapasoksokan. Isaad mos daida ay mangasikaso sin ipogaw ay mabingabingay si sagsisinlibo, sagsisin-gasot, saglilimapolo ya sagsisinpo. <sup>22</sup> Daida di kanayon ay mangowis sin ipogaw. Ikamang dan sik-a din nadadagsen ay kaso ngem daida di mangikeddeng sin nalalag-an. Mo siya di, lomag-an din oblam tan badangan das sik-a. <sup>23</sup> Mo say amagem di ya siya met laeng di bilin Diyos, adi kan to maligatan ya somaa abe din kaipoipogaw ay mapnek di nemnem da.”

<sup>24</sup> Pinatin Moses din inbagan katogangana. <sup>25</sup> Nanpili sin Israelita si makabael et dinotokanas daida ay mangipangolo sin ipogaw ay mabingabingay si sagsisinlibo, sagsisin-gasot, saglilimapolo ya sagsisinpo. <sup>26</sup> Et kanayon ay kinedkeddeng da din kason di kaipoipogaw. Din nadagsen, inkamang da en Moses, ngem din nalag-an yan kineddeng da.

<sup>27</sup> Makdeng pay di, nanopkada si Jetro en Moses et nantaoli sin ili na.

## 19

### *Din Kawadan Di Israelita Sin Dontog Ay Sinai*

<sup>1-2</sup> Tinaynan din Israelita ed Refidim et dinmateng da sin lugar ay magay omili ed Sinai, sin damo ay agew di maikatlo ay bowan manipod sin kinmaan da ed Egipto. Nankampo da sin asag-en di dontog ay Sinai <sup>3</sup> et pag manikid si Moses sin dontog ay en mangabet en Diyos. Nakikali si Diyos en Moses sin dontog, et inbilina di ibagan Moses sin Israelita ay polin Jacob ay kanana, <sup>4</sup> “Inila yo din inamag ko ay Diyos yo sin taga-Egipto. Ngem dakayo pay, inayowanak dakayo ay in-alis na babaen sin panakabalin ko ay kaman din iyat di titit ay agila ay mangayowan sin anak na mo iloglogi da ay mantayaw. <sup>5</sup> Mo dadlon yon patpatien sak-en ya tongtongpalen yo din intolag ko en dakayo, dakayo di piliek ay nabanol ay ipogaw ko, olay mo katet-ewa na et okak met laeng amin ay ipogaw isnan lobong. <sup>6</sup> Dakayo abe di iturayak ay naidadaton en sak-en ya papadi ay mansilsilbi en sak-en ay Ari yo.”\*

<sup>7</sup> Makdeng pay di, nanballalong si Moses, pag nan topogen din papangolon di Israelita et inbaga na en daida din am-in ay inbilin Diyos. <sup>8</sup> Idi inbagan Moses di, nantitimpoyog amin din ipogaw ay nangwani, “Amagen mi amin ay inbagan Diyos.” Et say en inbagan Moses en Diyos.

<sup>9</sup> Idi siya di, kanan Diyos en Moses, “Bomabaak to sin kad-am ay maikoyog si naposkol ay liboo ta say dengngen din ipogaw ay makikalkaliak en sik-a ya patien daka manipod ed wani.”

Idi dinad-at Moses din inbagan di ipogaw, <sup>10</sup> pag kanan Diyos, “En ka ibaga sin ipogaw ta ilogi dad wani ay manlinis enggana si bigat, ta say nalinis da ay mandayaw en sak-en. Masapol ay labaan da din bado da. <sup>11</sup> Masapol ay nakasagana da tan mo si loman, bomabaak isnan dontog ay Sinai ay iilaen din kaipoipogaw. <sup>12</sup> Markaam di beddeng

\* **19:6** Di esa abe ay kaiologan nina sin Hebreo et: papadi sin iturayak. Ilaen abe sin 1 Pedro 2:9.

sin nanniliked di dontog ta say kapap-engan di ipogaw. Ibagam en daida ta adi dan mantiktikid sin dontog ono somag-en ay mandan sin poona, tan mo waday mangamag sidi et masapol ay matey. <sup>13</sup> Panaen ono pigpigen yo ta adi kayo omasag-en. Olay ipogaw ono animal di somag-en et masapol ay matey, ngem mo wada ay dengngen yo din tanggoyob, mabalin ay somag-en din kaipoipogaw sin dontog.”

<sup>14</sup> Nanballalong si Moses sin dontog et inbaga na sin ipogaw ay mansagana da ay mandayaw en Diyos, isonga nilabaan da din bado da. <sup>15</sup> Kanan Moses, “Masapol ay nakasagana kayo si loman yan adi kayon daddaagen din asawa yo enggana ay makteng di.”

<sup>16</sup> Sin kaagsapaan di maikatlo ay agew, mankido down mankimat pag et mawada di naposkol ay liboo sin dontog. Dinngge da abe di napigsa ay tanggoyob et manpayegpeg din kaipoipogaw si egyat da. <sup>17</sup> Pag ipangon Moses daida et inmey da amin sin poon di dontog ay Sinai ta en da abaten si Diyos. <sup>18</sup> Enggay nalim-otan si asok din dontog ay Sinai tan kaman apoy di inyat Diyos ay nanpaila sin binmabaanas di. Komaykayang din asok ay kaman din asok di mapoppooan ay dontog, et enggay manpayegpeg dan ipogaw si egyat da.† <sup>19</sup> Down aben pomigsa ay pomigsa din tanggoyob. Idi mankali si Moses et songbatan Diyos yan kaman kido din kali na. <sup>20</sup> Binmaba si Diyos sin toktok di dontog ay Sinai, pag nan ayagan si Moses. Idi nantikid si Moses, <sup>21</sup> kanan Diyos en sisya, “En ka ibaga sin ipogaw ta adi dan lablabsan din beddeng tan mo kanan da et en somag-en da ay mangila en sak-en. Ad-ado di matey mo say iyat da. <sup>22</sup> Olay din papadi et dosaek mo somag-en da ay baken dan nalinis.”

<sup>23</sup> Kanan Moses ay nanongbat, “Latan ay adi mantikid din ipogaw, tan doy met ay inbabagam en markaan mi di beddeng sin nanniliked di dontog ta maiparit di somag-en, tan nasantoan gapo ta say pinilim ay panpappailaam.” <sup>24</sup> Ngem kanan Diyos en sisya, “Olay mo siya sa, emey ka pay dedan ta ikoyog mo si Aaron ay omalis na. Dadlon mon ibaga sin papadi ya ipogaw ta adi dan padpadasen ay omali ono malabas sin beddeng, tan dosaek daida mo say amagen da.” <sup>25</sup> Et pag manballalong si Moses ay mangibaga sin inbilin Diyos.

## 20

### *Din Sinpo Ay Bilin* (20:1-21)

<sup>1</sup> Idi makteng di, pag mankalis Diyos yan kanana, <sup>2</sup> “Sak-en si Yahweh ay Diyos yo ay nangipango en dakayo ay komaan ed Egipto ay naibabag-enan yo. <sup>3</sup> Adi kayo mandaydayaw si odom ay diyos mo adi sak-en et anggoy.

<sup>4</sup> “Adi kayon man-am-amag ono mankitkitikit si daydayawen yo sin kompormi ay kaman din wadad daya, wadas nan lota ono wada sin danom. <sup>5</sup> Adi kayon manyakog-ong ono mandayaw en daida, tan sak-en si Yahweh ay Diyos yo et adiak ipalobos ay waday ikadkadwa yon sak-en ay daydayawen yo. Dosaek di mangontra en sak-en ya din poli na enggana sin anak di apo na. <sup>6</sup> Ngem ipailak pay di layad ko sin manglaylayad en sak-en ya manongpal sin bilbilin ko engganans maikapiga ay libo ay apo.

<sup>7</sup> “Adi yon os-osalen din ngadan ko si owat magay silbi na, tan sak-en si Yahweh ay Diyos yo et dadlonak dosaen din adi mamananol sin ngadan ko.

<sup>8</sup> “Banolen yo din agew ay pan-ibbayan ta ikasin yo ay agew para en sak-en. <sup>9</sup> Enem ay agew di pan-oblaan yo, <sup>10</sup> ngem din maikapito ay agew et pan-ibbayan ay naidaton en sak-en. Isonga maga di man-obla sin agew ay doy, olay din an-ak ya bag-en yo, din animal yo ya din mangili ay wada sin ili yo. <sup>11</sup> Tan sak-en ay Diyos et pinarsuak sin enem ay agew din daga, ed daya, din baybay ya din amin ay wada en daida, ngem nan-ibbayak

† 19:18 Din naisolat si odom ay manuskrito sin Hebreo et: et enggay palalo ay nanyegyeg din dontog.



sin maikapito ay agew, isonga tinodingak di ay say agew ay pan-ibbayan ay mailasin para en sak-en.

<sup>12</sup> “Patgen yos da ama en ina yo ta say omando di biyag yo sin daga ay idawat ko en dakayo.

<sup>13</sup> “Adi kayo manpespese.

<sup>14</sup> “Adi kayon daddaagen di baken yon asawa.

<sup>15</sup> “Adi kayon mangak-akew.

<sup>16</sup> “Adi kayon mantistigo ay man-etek.

<sup>17</sup> “Adi kayon gangamangan din beey di ib-a yo, din asawa na, baa na, baka ya dangki na ya odom pay ay sanikwa na.”

<sup>18</sup> Manpayegpeg din ipogaw si egyat da idi dengngen dan kido ya tanggoyob downan dan ilaen din kimat ya omas-asok ay dontog, isonga adi da sinmag-en sin dontog. <sup>19</sup> Et kanan da en Moses, “Olay sik-a et di makikali en dakami et laton ay pasien mi. Basta baken si Diyos tan adi pay matey kami.”

<sup>20</sup> Ngem kanan Moses ay nanongbat, “Adi kayon emegyat tan inmali si Diyos ta ilaena mo tet-ewa ay pasien yos sisya ya itoltoloy yo ay manongpal sin bilina ta adi kayon manbasol.” <sup>21</sup> Ngem nantettee dan ipogaw sin ad-addawi et enggay Moses si sinmag-en sin naposkol ay liboo ay kad-an Diyos. <sup>22 23 24 25 26</sup>

## 21

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36

## 22

1 2 3 4 5 6 7 8 9 10 11 12 13 14 15 16 17 18 19 20

### *Odom Ay Bilbilin Diyos*

(22:21-28)

Intoloy Diyos ay nangibaga en Moses si bilbilin ay maipanggep sin kosto ay kabibiyag ya panagdayaw ay onodan koman din Israelita. Da naey din tapin di bilbilin ay sana. (21:1-22:20)

<sup>21</sup> “Adi yon sakitan ono paligaten di mangili. Nemnemnemen yo ay nanbalin kayo abe ay mangili ed Egipto.

<sup>22</sup> “Adi yon paligaten di nalasang ya naolila, <sup>23</sup> tan mo say iyat yo, sak-en ay Diyos et songbatak din adawag da ay mankedaw si badang ko. <sup>24</sup> Bomongetak et peslek dakayo sin gobatan ta malasang din asawa yo ya maolila abe din an-ak yo.

<sup>25</sup> “Mo man-iotang kayo sin nabibiteg ay ipogaw ko, adi kayon manpapatpatang ay kaman din iyat di manpapaotang. <sup>26</sup> Mo waday ina yo di tak-ep di bado na gapo ta say sinyal di tolagan ay bayadana din inotang na, masapol ay itaoli yo mo malablabi, <sup>27</sup> tan enggay na si pansalina si tengnin sin labi. Mo magay igaley na, intoy iyat na pay ay maseyep? Mo mankedaw adi si badang ko, badangak tan managseg-angak.

<sup>28</sup> “Adi yo laslasoyen si sak-en ay Diyos ya adi yo aben palawlawen din pangolon di ili yo.” <sup>29 30 31</sup>

## 23

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33

## 24

### *Din Nasiglotan Di Intolag Diyos*

(24:1-8)

<sup>1</sup> Pag kanan Diyos en Moses ay nangitoloy, “En ka ayagan da Aaron en Nadab ya si Abihu ya pitopolo ay papangolon di Israelita ta mantikid kayos na, ngem adi kayon

somag-en sin kad-ak mo adi et mandokmog kayo ed dagdagay ay mandayaw en sak-en. <sup>2</sup> Sik-a et anggoy di somag-en en sak-en, tan adi mabalin ay somag-en din odom. Mo din kaipoipogaw pay, iparit ko ay mantikid da sin dontog ay nay.”

<sup>3</sup> En inbagan Moses sin ipogaw din amin ay bilin ya linteg Diyos yan kanan da amin ay sinombat, “Siya, tongpalen mi amin ay inbagan Diyos.” <sup>4</sup> Et insolat Moses amin din bilbilin Diyos. Sin kabigatana, nasapa ay nan-amag si altar ay pan-idatonan sin poon di dontog. Tinood na di sinpo ya doway ay bato ay para sin sinpo ya doway ay tribun di Israelita. <sup>5</sup> Pag nan ibaa di babbaro ta poon da di maidaton en Diyos ya man-idaton da abe si odom ay baka ay say pan-ookoban di ipogaw ya makikadkadwaan da en Diyos.\*

<sup>6</sup> Pinalapalanganan Moses din kagodwan di dadan di animal ay naidaton, asi nan iwalsi din kagodwa na sin altar. <sup>7</sup> Pag nan alaen din naisolatan di intolag Diyos ay nanlaon sin bilbilina et inpigsa na ay mangibasa ta dengngen din kaipoipogaw. Idi makdeng ay ibasan Moses, kanan din ipogaw, “Tongpalen mis Diyos et amagen mi amin din inbilina.”

<sup>8</sup> Idi siya di, inan Moses din napalanggana ay dada et inwalsi na sin ipogaw dowan kanan, “Din dada ay nay di mangipaneknek sin intolag Diyos ya mangipaila ay nakitolag kayo ay tongpalen yo dana ay bilbilin.” <sup>9 10 11</sup>

### *Din Kasin Nantikidan Moses Sin Dontog (24:12-18)*

<sup>12</sup> Makdeng pay di, kanan Diyos kasin en Moses, “Mantikid kas nan kad-ak ay dontog et mantee kas na, ta idawat ko di doway ay nadampilak ay bato ay nangisolatak sin bilbilin ko ta maitdo sin kaipoipogaw.” <sup>13</sup> Nansaganas da Moses en Josue ay kabadang na ta mantikid da sin dontog ay kad-an Diyos. <sup>14</sup> Ngem kanana ay nangibilin sin papangolon di Israelita, “Sed-en yos dakami isnan kampo enggana ay mantaoli kami. Nay da Aaron en Hur ay kamangen yo mo waday adi yon pankinaawatan.”

<sup>15</sup> Intoloy Moses ay nantikid sin dontog ay Sinai yan wada et di liboo ay nanlikob sin dontog. <sup>16-17</sup> Naipaila din somili ay kinadiyos Yahweh ay binmaba sin toktok di dontog. Din nangilan di Israelita yan kaman apoy ay manbidbidang sin toktok di dontog. Enem ay agew ay nililikob di liboo din dontog. Pag sin maikapito ay agew dinngen Moses din kalin Diyos sin kad-an di liboo ay mangay-ayag en sisya. <sup>18</sup> Et nantikid si Moses sin dontog enggana ay nalingban sin liboo yan nantee isdi si opatapolo ay agew ya labi.

## 25

### *Bilbilin Maipanggep Sin Tolda Ya Din Maosal Sidi (25:1-2,8-10a,17-23a,30-31a,37,40)*

<sup>1</sup> Idi domateng si Moses, kanan Diyos en sisya, <sup>2</sup> “Ibagam sin Israelita ta man-idawat da si daton ay para en sak-en yan awatem mo sino di layden da ay idawat. <sup>3 4 5 6 7 8</sup> Ibagam abe ta man-amag das tolda ay makiteteak en dakayo <sup>9</sup> yan onodan da din amin ay inbilin ko ay iyat na ay maamag, pati din kaamagan di am-in ay maosal isdi. <sup>10a</sup> Man-amag kayo abe si baol ay kaiw ay acacia di amag na. <sup>11 12 13 14 15 16 17</sup> Man-amag kayo si kaleb na\* ay natanig ay balitok ay 45 ay polgada di kaando na ya 27 ay polgada di kaannawa na. <sup>18</sup> Man-a kayo si napitpit ay balitok ta man-amag kayo si doway ay sinan kerubim <sup>19</sup> sin doway ay soni, ngem masapol ay maikanayon sin kaleb. <sup>20</sup> Din iyat yo et pomipika da ay mansasagong sin doway ay sonin di kaleb yan nandedepa din payak da ay mamapayong sin baol. <sup>21</sup> Ikosnong yo sin baol din doway ay nadampilak ay bato ay naisolatan di bilin Diyos asi yon ikaleb. <sup>22</sup> Isdi ay makikaliak en sik-a et dengngem din

\* **24:5** Din damo ay kalasin di daton et napooan am-in. Din maikadwa pay et napooan din taba na, ngem din karni et insidan din papadi ya kaipoipogaw. \* **25:17** Ilaen din footnote sin Levitico 16:2.

kalik sin ngaton di kerubim ta ibagak amin din bilbilin ko ta itdom sin Israelita. <sup>23a</sup> Man-a kayos acacia ta amagen yo si lamisaan. <sup>24 25 26 27 28 29 30</sup> Masapol ay maipapatang din tinapay ay maidaton en sak-en sin lamisaan ay nay ta say wada sin sangoanak si kankanayon. <sup>31a</sup> Man-amag kayo abe si patangan di silaw ay balitok. <sup>32 33 34 35 36 37</sup> Asi kayo man-amag si pito ay silaw ay ipeey yo sin sakpaan di silaw isnan patangan, yan iimag yo ta masilawan din sango. <sup>38 39 40</sup> Ilaem ta dadlon yon onodan din plano ay naipailan sik-a sin dontog.”

## 26

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37

## 27

1 2 3 4 5 6 7 8 9 10 11 12 13 14 15 16 17 18 19 20 21

## 28

### *Bilbilin Maipanggep Sin Badon Da Aaron* (28:1-4,9-10,12,15-21,29-30)

<sup>1</sup> “Ayagam si agim ay Aaron ya din an-ak na ay da Nadab, Abihu, Eleazar ya si Itamar. Ikasin mos daida sin odom ay Israelita ta daida di papadi ay mansilbi en sak-en. <sup>2</sup> Iamagam si Aaron si bado ay maibagay sin kinabanol ya kinangaton di saad na ay padi. <sup>3</sup> Ayagam amin din inyaak si laing ay mandait ta mandait das badon Aaron ay say mapili ay padi ay mansilbi en sak-en. <sup>4</sup> Ibagam ta amagen da nan odom ay tapin di osal Aaron: din maitak-ep sin pagewan, din naabel ay sinadlay ay kanan da en efod, nagayad ay bado, din naabel ay osalen ay maidallem, apongot ya din balikes. <sup>5 6 7 8</sup>

<sup>9</sup> “Man-a ka si doway ay nabanol ay bato ay din kanan da en karnelia ta ikitikit mo din ngadan di sinpo ya doway ay lallalaki ay an-ak Israel. <sup>10</sup> Sag-eezem ay ngadan di maisolat si esa ay bato yan ilaem ta maiolos din iyat da ay maisolat ay manlogi sin pangpangoan enggana sin anongos. <sup>11 12</sup> Iimag mo dana sin sadlayan di efod ta say mangialagey sin sinpo ya doway ay tribun di Israelita. <sup>13 14 15</sup> Man-amag kas osalen din kangatoan ay padi sin pagew na ta say pangammoana sin layden Diyos. Kaman met laeng din naosal si efod di maiamag isna ya siya abe sin borda na. <sup>16</sup> Masapol ay sagsisiyam ay polgada di kaannawa ya kaando na mo maikolpi sin gawa na. <sup>17</sup> Iimag mo di opat ay linya ay nankababanol ay bato. Ipeey mo sin damo ay linya di rubi, topasio ya garnet. <sup>18</sup> Sin maikadwa, sag-eesa ay bato ay esmeralda, safiro ya diamante. <sup>19</sup> Sin maikatlo, sag-eesa ay bato ay hasinto, agate ya amatista, <sup>20</sup> yan sin maikap-at, sag-eesa ay bato ay berilio, karnelia ya jaspe. Masapol ay balitok di kaikapetan din batbato ay nay. <sup>21</sup> Sag-eesa ay maitiktik din ngadngadan di an-ak Israel sin sinpo ya doway ay nay ay bato ta say mangialagey sin amin ay tribun di Israel. <sup>22 23 24 25 26 27 28 29</sup> Mo senggep si Aaron sin Nasantoan ay Kowarto, osalena san naikitikitan di ngadngadan di tribun di Israelita ta say nemnemnemek din ipogaw ko. <sup>30</sup> Ipeey mo sin tak-ep di pagewan din makwani en Urim ya Tummim tan say pangammoana sin laydek ay amagen di Israelita, isonga masapol ay osalenas kanayon mo senggep sin Nasantoan ay Kowarto.”  
31 32 33 34 35 36 37 38 39 40 41 42 43

## 29

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46

## 30

1 2 3 4 5 6 7 8 9 10 11 12 13 14 15 16

### *Din Bronsi Ay Palanggana* (30:17-21; 31:18)

<sup>17</sup> Kanan aben Diyos en Moses, “Man-amag ka si bronsi ay palanggana ya bronsi met laeng ay patangana. <sup>18</sup> Ipeey mo sin nan-gawaan di Tolda ya altar yan pey-am si danom. <sup>19</sup> Say pan-owasan da Aaron ya din an-ak na sin takkay ya siki da <sup>20-21</sup> ta asi dan senggep sin Tolda ono somag-en sin altar ta pooan day idaton da en Diyos. Masapol ay owasan da din takkay ya siki da ta adi dan matey. Masapol ay onodan da na si eng-enggana ya siya abe sin poli da.” <sup>22 23 24 25 26 27 28 29 30 31 32 33 34 35 36 37 38</sup>

## 31

<sup>1 2 3 4 5 6 7 8 9 10 11 12 13 14 15 16 17 18</sup> Idi nakdeng ay nakikali si Diyos en Moses sin dontog ay Sinai, indawat na en sisya din doway ay nadampilak ay bato ay naisolatan di bilbilina. Si Diyos ay mismo di nangisolat.

## 32

### *Din Sinan Olbon Ay Baka Ay Balitok*

<sup>1</sup> Idi sed-esed-en din ipogaw si Moses yan mabayag ay mantaoli, inalibongbongan da si Aaron yan kanan da, “Man-amag ka et si didiyos ay mangipango en datako, tan adi mi ammo mo sinoy naamag en Moses ay sana ay nangipango en datako ay komaan ed Egipto.”

<sup>2</sup> Songbatan pay Aaron yan kanana, “Iali yo ngarud din aritos di asawa ya an-ak yo.”

<sup>3</sup> Et kinaan da tet-ewa din balitok ay aritos da yan indawat da en Aaron. <sup>4</sup> Tinenaw Aaron din aritos da, pag nan sokogen ya ilinis ay amagen si sinan olbon ay baka.

Idi siya et di, kanan din ipogaw, “Sinay di diyos tako ay Israelita ay nangipango en datako ay komaan ed Egipto.”

<sup>5</sup> Makdeng pay di, nan-amag si Aaron si altar sin sangoanan di balitok ay sinan baka yan kanana, “Mo si bigat, manfiesta tako ta mandayaw tako en Diyos.” <sup>6</sup> Sin kabigatana, nan-idateng da si aanimal ay idaton da. Pinooan da ay indaton din odom yan pinalti da ay para sin pan-ookoban da ay isida din odom. Nanpennek da ay nangan ya nan-iinom enggana ay nabetebeteng da et downan dan nansasala ya nandadaag, olay baken dan sin-asawa.

<sup>7</sup> Idi siya di, kanan Diyos en Moses, “Dalasem ay manballalong, tan doy ay nanbasol ya dinokogan das sak-en din ipogaw ay inpangom ay kinmaan ed Egipto. <sup>8</sup> Nasangaw da ay dagos sin danan ay inbagak ay pandanan da. Doy et ay nan-amag da si sinan olbon ay baka ay balitok ay say daydayawen da ya pan-idatonan da downan da et kanan en say diyos ay nangipango en daida ay komaan ed Egipto. <sup>9</sup> Ammok ay adi kayamyaman dadis ipogaw, <sup>10</sup> isonga adi ka makibiyang en sak-en ta peslek daida, tan nay palaloy bonget ko en daida, ta sik-a ya din polim di paad-adoek ta manbalin kayos madayaw ay nasyon.”

<sup>11</sup> Ngem nanpakpakaasi si Moses en Yahweh ay Diyos na et kanana, “Pangaasim kod, Apo, ta adi kan palalo ay mabonget sin ipogaw mo ay inpangom ay komaan ed Egipto begew sin nakaskasdaaw ay panakabalin mo. <sup>12</sup> Adi pay kanan et din taga-Egipto en planom baw ay ipango din ipogaw mo ta peslem amin daida isnan kadondontogan ta iwed polos di mabay-an. Pangaasim koma ta ibabawim san bonget mo ta adi kan pespeslen daida. <sup>13</sup> Nemnemem koma din insapatam sin baam ay da Abraham en Isaac ya si Jacob en paad-adoem din poli da ay kaman din kaad-adon di talaw ed daya ya din inkarim en idawtam daida si daga ay oka das eng-enggana.” <sup>14</sup> Idi siya et di, inbabawin Diyos din inbaga na en panosaana sin ipogaw na.

<sup>15</sup> Inan Moses din doway nadampilak ay bato ay nasolatan din nanbinas-il sin bilbilin Diyos et nanballalong ay mantaoli sin kad-an di gagait na. <sup>16</sup> Si Diyos ay mismo di nangamag sin nadampilak ay bato ya nangikitikit sin bilbilina.

<sup>17</sup> Dinngen Josue din ngalawngaw di ipogaw, isonga kanan Moses, “Manngalawngaw da sin kampo ay kaman way man-gogobat.”

<sup>18</sup> Ngem kanan Moses, “Baken met bogaw di nangabak ono adawag di naabak san madnge mo adi et kaman dan mankankanta.”

<sup>19</sup> Idi dandani ay domateng da et sin kampo da, inilan Moses din sinan baka ya din ipogaw ay mansasala, isonga palaloy bonget na, pag na et ipigpig sin poon di dontog din nadampilak ay bato ay iin-genana. <sup>20</sup> Tinenaw na din sinan baka, asi nan gilingen enggana ay napino ay kaman dap-o, pag nan ilaok sin danom, asi na inpainom sin Israelita.

<sup>21</sup> Makdeng pay di, kanan Moses en Aaron, “Intoy inyat aya da nan ipogaw en sik-a et nay pinalobosam daida ay mangamag isnan palalo ay madagsen ay basol?”

<sup>22</sup> Kanan Aaron ay nanongbat, “Apo, adi ka koman omibonget, tan ammom met dedan ay panam-ayen da ay man-amag si lawa. <sup>23</sup> Tan kanan da, ‘Man-amag ka kod si didiyos ay mangipango en datako, tan adi mi ammo mo sinoy naamag en Moses ay doy ay nangipango en datako sin kinmaanan tako ed Egipto.’ <sup>24</sup> Et kindaw ko din balitok ay aritos da, yan idi intep-ak sin apoy, pag et maamag si sinan baka.”

<sup>25</sup> Inammoan Moses ay pinalobosan Aaron din ipogaw ay mangamag si nalabes ya kaibabainan da sin kaibaw da. <sup>26</sup> Pinmika sin segpan di kampo, pag nan kanan ay nangibogaw, “Omalis na amin din laydena ay mangonod en Diyos.” Et natopog amin din Levita sin kad-ana. <sup>27</sup> Kanana en daida, “Inbilin Yahweh ay Diyos di Israelita ay alaen yo din kampilan yo ta sokisoken yo nan kampo, manipod sin segpan ay nay enggana sin esay segpan sin gedeng di kampo, ta peslen yo din aag-i, gagayyem ya katokmang yo.”

<sup>28</sup> Tinongpal din Levita di, et pinse da di emey ay tolo ay libo ay lallalaki sin agew ay doy. <sup>29</sup> Pag kanan Moses sin Levita, “Ed wani ay agew, indaton yo di awak yo ay mansilbi en Diyos gapo ta tinongpal yo din laydena et pinse yo din nanbasol, olay pay mo anak yo ya agi yo, isonga bindisyonan Diyos dakayo.”

<sup>30</sup> Sin kabigatana, kanan Moses sin ipogaw, “Madagsen di basol yo, ngem mantikidak ed wani sin dontog ta enak kod makikali en Diyos bareng mo pakawanena si dakayo.”

<sup>31</sup> Et kasin inmey si Moses sin kad-an Diyos yan kanana, “Madagsen kayman san inamag din ipogaw, tan nan-amag das balitok ay didiyosen et say dinaydayaw da, <sup>32</sup> ngem pangaasim kod ta pakawanem daida. Ngem mo adi mabalin, olay kaanem din ngadan ko sin libro ay nangisolatam si ngadngadan di ipogaw mo.”

<sup>33</sup> Ngem kanan Diyos en Moses, “Din nakabasol en sak-en et anggoy di kaanek di ngadan da sin librok. <sup>34</sup> Emey ka et ta ipangom daida sin lugar ay inbagak en sik-a. Nemnemnemem ay wada din anghel ko ay mangipango en sik-a. Ngem domteng to di agew ay dosaek da san ipogaw gapo sin basol da.”

<sup>35</sup> Adi nabayag et inpawadan Diyos di sakit ay nangidateng si pisti sin ipogaw gapo sin nangipaamagan da en Aaron si sinan baka ay balitok.

## 33

### *Din Nangibilinan Diyos Ay Komaan Da Ed Sinai*

<sup>1</sup> Kasin nakingalat si Diyos en Moses yan kanana, “Taynan yo nan lugar ay nay, dakayo ya din ipogaw ay inpangom manipod ed Egipto, ta emey kayo sin ili ay inkarik en da Abraham en Isaac ya si Jacob ay idawat ko sin poli da. <sup>2</sup> Man-ibaaak si anghel ay mangipango en dakayo et pakaanek to din Canaaneo, Amorreo, Heteo, Perezeo, Heveo, ya Jebuseo. <sup>3</sup> Emey kayo sin sana ay daga ay nabaknang ya magabay di mola, ngem adiak makikoyog en dakayo tan makenteg di nemnem yo ay ipogaw, tan into et mo peslek amin dakayo sin danan.”

<sup>4</sup> Idi dinngen din ipogaw san kaeegyat ay damag, palalo di ladingit da et insaldeng da ay mangosal sin nankababanol ay osal da, <sup>5</sup> tan binilin Diyos si Moses ay mangibaga en daida, “Natangken di nemnem yo ay ipogaw, isonga mo makikoyogak si olay sinkaattikan en dakayo, amangan mo peslek dakayo amin. Ed wani, kaanen yo din



nankababanol ay osal yo ta nemnemek mo into di iyat ko en dakayo.”<sup>6</sup> Siya di din gapo ay adi inos-osal din Israelita din nabanol ay osal da manipod sin kinmaan da sin dontog ay Sinai.

<sup>7</sup> Din kanayon ay am-amagen Moses mo domateng da si esay lugar ay pankampoan da et alaena din Tolda ay para en Diyos et isaad na sin ad-addawi sin lasin di kampo da. Nginaadana si Tolda ay Panpappailaan Diyos,\* et isdi di emeyan di ipogaw mo way layden da ay damagen en Diyos. <sup>8</sup> Mo senggep si Moses sin Tolda ay sana, mantee di esa ya esa sin segpan di mismo ay kampo na ay mamoboya enggana ay senggep. <sup>9</sup> Mo nakasgep si Moses, bomaba ay dagos din liboo ay natotood sin segpan di Tolda et kaman mapmapo sin kad-an di liboo ay sana din kalin Diyos ay makikali en Moses. <sup>10</sup> Isonga mo ilaen din ipogaw ay wada din liboo ay matood sin segpan di Tolda, manyakog-ong da. <sup>11</sup> Mismo ay si Diyos di makingalat en Moses ay ropan ropa ay kaman din iyat di ipogaw ay makikali si gayyem na. Mo makdeng di ngalat da, mantaoli si Moses sin kampo. Ngem mataynan sin Tolda din baro ay kabadang na ay si Josue ay anak Nun.

### *Din Inkarin Diyos Ay Koyogena Din Ipogaw Na*

<sup>12</sup> Kanan Moses en Diyos, “Tet-ewa kayman ay pinilim sak-en ay mangipango en da nay ay ipogaw, ngem adi ka met inbaga mo sino di ibaam ay komoyog. Kanam abe en dadlon kan am-ammo ya malaydan ka en sak-en <sup>13</sup> isonga mo tet-ewa na, ibagam koma ngarud din planom ta say ammoak di iyat ko ay mansilbi en sik-a ya masepsep ay malaydan ka. Nemnemnemem koma ay pinilim dana ay ipogaw ay inbilang mo ay ipogaw mo.”

<sup>14</sup> Kanan Diyos ay nanongbat, “May ngarud, koyogek ya badangak dakayo ta way iyat yo ay mangabak sin kaibaw yo ya asi kayo man-illeng sin ili ay emeyan yo.”

<sup>15</sup> Kanan kasin Moses, “Mo adi kan komoyog, adi ka koman pakaanen dakami isnan lugar ay nay. <sup>16</sup> Into ngin di pangilasinan di odom ay ipogaw en malaylaydan kan sak-en ya din ipogaw mo ay nay mo adi kan komoyog? Mo koyogem dakami, say pangammoan da ay naitken kami sin odom ay ipogaw isnan lobong.”

<sup>17</sup> Kanan Diyos en Moses, “Gapo ta dadlonak am-ammos sik-a ya malaylaydanak en sik-a, matongpal san kedkedawem.”

<sup>18</sup> Nanpakaasi kasin si Moses yan kanana, “Pangaasim kod ta ipalobos mo ay ilaek di kinadiyos mo.”

<sup>19</sup> Songbatan pay Diyos yan kanana, “Ipailak din amin ay kinasiged ko en sik-a ya ibagak abe en sik-a din ngadan ko ay Yahweh, tan ipailak din seg-ang ko sin laydek ay pangipailaan. <sup>20</sup> Ngem adi mabalin ay ilaem din ropak, tan binmal-o ay matey di ipogaw ay mangila sin ropak, <sup>21</sup> ngem pomika ka sin bato ay nay sin kad-ak. <sup>22</sup> Ta mo ilabas ko din mankoniniing ay kinadiyos ko, ilingeb kos sik-a sin nanbaetan di napitak ay bato, asiak isalin din takkay ko sin matam enggana ay malabasak. <sup>23</sup> Mo malabasak, asiak kaanen din takkay ko ta say ilaem din edeg ko ay baken din ropak.”

## 34

### *Din Kasin Naisolatan Di Bilbilin (34:1-15)*

<sup>1</sup> Idi makdeng di, kanan Diyos en Moses, “Mantiktik kas dowa ay nadampilak ay bato ay kaman din indawat ko sin damo ta pangisolatak kasin sin insolat ko sin damo ay ginopak mo. <sup>2</sup> Mansagana ka ay mantikid sin dontog ay Sinai sin agsapa si bigat ta sem-ed ka sin toktok di dontog. <sup>3</sup> Adi ka man-itaktakin si gait mo yan masapol ay magay ipogaw si maila sin olay into ay partin di dontog. Masapol abe ay maga di karnero

\* **33:7** Din Tolda ay nay et say nanpappailaan Diyos enggana ay naisaad din dakdake ay Tolda ay dodowa di kowarto na (Exodo 40:17-33). Din omona ay Tolda et wada sin lasin di kampo da. Din maikadwa pay et wada sin gawa na (Levitico 16:16).

ono baka ay naipastol sin poon di dontog.”<sup>4</sup> Dadlon tinongpal Moses din inbilin Diyos. Nasapa sin kabigatana et nantiktik si dowa ay nadampilak ay bato ay intikid na sin dontog ay Sinai.

<sup>5</sup> Binmaba si Diyos sin dontog ay kinoyog di liboo et pinmika sin kad-an Moses, pag nan ibaga din ngadana ay si Yahweh. <sup>6</sup> Nalabas sin sangoanan Moses pag nan kanan, “Sak-en si Yahweh, Diyos ay manageg-ang. Bakenak nalaka ay bomonget mo adi et managlayadak ya matalekak. <sup>7</sup> Adiak linglingan di inkarik sin niliblibo ay ipogaw et pakawanek di pankolkolangan da, din panlablabsingan da sin bilbilin ko ya odom ay basbasol da. Ngem adiak ipalobos ay mailsot di nakabasol ay ipogaw di dosa mo adi et dosaek enggan as anak di apo na.”

<sup>8</sup> Dagos ay nanyakog-ong si Moses ay mandayaw en Diyos. <sup>9</sup> Kanana, “Apo, mo tet-ewa ay malaydan ka en sak-en, pangaasim ngarud ta koyogem dakami. Tet-ewa kayman ay makenteg di nemnem da nan ipogaw ay nay, ngem pangaasim kod ta pakawanem din basol ya lawa ay ogali mi ta ibilang mos dakami ay ipogaw mo.”

<sup>10</sup> Kanan Diyos en Moses, “Ed wani, wada di itolag ko en dakayo ay Israelita. Amagek di nakaskasdaaw sin pangiilaan yo ay adi naam-amag sin olay sino ay ili isnan daga. Et ilaen din kaipoipogaw ay makiilian yo din nakaskasdaaw ay amagek para en dakayo. <sup>11</sup> Tongpalen yo din ibilin ko en dakayo ed wani. Awni et pakaanek din Amorreo, Canaaneo, Heteo, Perezeo, Heveo ya Jebuseo mo domateng kayo sin ili da. <sup>12</sup> Annadan yo ta adi kayon makitolag ay makikadwa sin ipogaw ay datngan yos di, tan mo say amagen yo et kaman tagdey ay mangiturong si kadadaelan yo. <sup>13</sup> Dadaelen yo din altar da, gemken yo din tinootood da ay bato ay pandaydayawan da downan yon potoen din posti ay pangidaydayaw da en Asera ay didiyosen da.

<sup>14</sup> “Adi kayon mandaydayaw si odom ay diyos, tan sak-en ay Diyos et adiak ipalobos ay waday ikadkadwa yon sak-en ay dayawen. <sup>15</sup> Adiak kayon makitolag ay makikadwa sin ipogaw isdi, tan mandaydayaw da si ad-ado ay didiyosen di pagano. Tan mo man-idaton da ya awisen das dakayo ay makiragragsak, into et mo masolisog kayo ay makikan sin naidaton si didiyosen da.” <sup>16 17 18 19 20 21 22 23 24 25 26 27</sup>

### *Din Mankoniniing Ay Ropan Moses* (34:28-35)

<sup>28</sup> Nakitees Moses en Diyos sin dontog si opatapolo ay agew ya labi ay adi polos nangnangan ya nan-in-inom. Isdi ay insolat na sin doway nadampilak ay bato din Sinpo ay Bilin ay siya din intolag Diyos sin Israelita. <sup>29</sup> Idi nanballalong ay napo sin dontog ay Sinai, iin-genana din doway ay bato ay naisolatan di bilbilin Diyos, yan adi na ammo ay mankoniniing din ropa na gapo sin nakikaliana en Diyos. <sup>30</sup> Inmegyat si Aaron ya din amin ay Israelita ay somag-en idi inila da din mankoniniing ay ropan Moses. <sup>31</sup> Ngem inayagan Moses daida, isonga sinmag-en si Aaron ya din papangolon di Israelita, et nakikali si Moses en daida. <sup>32</sup> Maaw-awni pay, sinmag-en amin ay Israelita en Moses et inbaga nan daida amin din bilbilin ay inbagan Diyos sin dontog ay Sinai.

<sup>33</sup> Idi makdeng ay ibagan Moses en daida din inbilin Diyos, nilingbana din ropa na si sokdong. <sup>34</sup> Sin tonggal somag-enana ay makikali en Diyos yan kaanena din sokdong na. Isonga mo bemela ay mangibaga sin Israelita sin inbilin Diyos, <sup>35</sup> ilaen da ay mankoniniing din ropa na. Mo makdeng yan lingbana din ropa na enggana ay makikali kasin en Diyos.\*

## 35

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35

\* **34:35** Di gapo ay nilingban Moses din ropa na et naisolat sin 2 Corinto 3:13.

**36**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38

**37**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29

**38**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31

**39**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41

*Din Nakdengnan Din Obla Ay Kaisaadan Di Tolda**(39:42-43; 40:17-33)*

Pag topogen Moses din kaipoipogaw et binilinas daida ta man-iali das balitok, palata, bronsi, lopot, lalat, kaiw ya odom ay kasapolan sin maamag ay Tolda. Inayagana abe di nankalalaing ay manpanday, mankarpintiro, mandait ya manborda ta amagen da din Tolda ya am-in ay maosal isdi. Inamag da din posti ya kurtina ya atep di Tolda ta say nalaka ay matopi. Din maosal abe ay madagsen ay kaman din Baol, lamisaan ya altar, et in-amagan das pangig-enan sin nansinoni ta way iyat da ay mangaksiw mo man-etan da. (35:1-39:41)

<sup>42</sup> Tinongpal din Israelita amin din obla ay inbilin Diyos en Moses ay amagen da. <sup>43</sup> Idi en pinaneknekan Moses mo kosto din inyat da, et siya ay tinongpal da din inbilin Diyos, isonga binindisyonanas daida.

**40**

1 2 3 4 5 6 7 8 9 10 11 12 13 14 15 16 17 Naisaad din Tolda ay Panpappailaan Diyos sin pitsa 1 di damo ay bowan sin maikadwa ay tawen manipod sin kinmaan da ed Egipto. <sup>18</sup> Idi insaad Moses din Tolda, tinood na din posti et pag nan ikapet din bagbag ya din odom ay manbabag ay amag na. In-amag na din kaosod ya lagat, <sup>19</sup> et pag nan iakbong din Tolda ay lalat di animal ay say maiatep ya maibobong. Tinongpal na amin din inbilin Diyos ay iyat na ay mangiamag sin Tolda.

<sup>20</sup> Inkosnong na sin Baol din dow a ay bato ay naisolatan di sinpo ay bilin, pag nan iamag din kaiw ay pangiegnan. Makdeng pay di, in-amag na din kaleb di Baol. <sup>21</sup> Inpasgep na din Baol sin Tolda, pag nan iamag din kurtina ay manasalin sin kowarto ay kad-an di Baol, tan say inbilin Diyos. <sup>22</sup> Inpasgep na abe din lamisaan sin Tolda et inpeey na sin naibanda si amyanan sin lasin di kurtina. <sup>23</sup> Inpatang na sin lamisaan ay sana din tinapay ay maidaton en Diyos, tan siya din inbilina.

<sup>24</sup> Inpasgep na din patangan di silaw sin Tolda sin naibandas abagatan, sin sagang di lamisaan, <sup>25</sup> et pag nan iamag din silaw sin sangoanan Diyos ay kaman met laeng din inbilin Diyos en siya.

<sup>26</sup> In-amag Moses din balitok ay altar sin Tolda sin sangoanan di kurtina <sup>27</sup> et nan-ipoo si nabanglo ay insinso, tan say inbilin Diyos. <sup>28</sup> In-amag na abe di kurtina sin segpan di Tolda, <sup>29</sup> pag man-amag sin lasin di kurtina si altar ay pan-idatonan si mapooan. Say pangipooan da si datdaton ay animal ya lames di inani da.

<sup>30</sup> Inpeey na din palanggana sin nan-gawaan di Tolda ya altar et piney-ana si danom ay pan-owasan, <sup>31</sup> ta say pan-owasan Moses ya da Aaron sin an-ak na sin takkay ya siki da. <sup>32</sup> Inbilin Diyos ay man-owas da mo senggep da sin Tolda ono somag-en da sin altar. <sup>33</sup> Makdeng pay di, in-amag Moses din kurtina ay nanliked sin Tolda ya altar ay kaman say alad na, pag nan ibitin di kurtina sin segpan di alad ay sana et say nakdengnan din obla ay kaisaadan di Tolda.

*Din Somili Ay Kinadiyos En Yahweh*  
(40:34-38)

<sup>34</sup> Idi makdeng di, nilikmot din liboo din Tolda et napno sin somili ay kinadiyos en Yahweh, <sup>35</sup> isonga adi nakasgep si Moses. <sup>36-37</sup> Sin am-in ay nan-etaetanan di Israelita, nantetee da si esa ay lugar enggana ay komayang din liboo sin Tolda. Mo komayang, asi da manlobwat ay man-etan. <sup>38</sup> Sin kaagawan, maila da din liboo ay kaipailaan di kawadan Diyos sin ngaton di Tolda. Sin labi pay, maila da di apoy sin kad-an di liboo. Nailan di Israelita din liboo ya apoy ay sana sin am-in ay nandad-anan da.

## Levitico Maipanggep Sin Libro Ay Nay

Din wada sin libro ay nay ay Levitico\* et din bilbilin ay inbagan Diyos en Moses maipanggep sin iyat di ipogaw na ay Israelita ay manaydayaw en sisya ed idi. Gapo ta din papadi di makaammo ay mangidaton si animal ya mangamag si odom ay seremonia sin Tolda ay Panpappailaan Diyos, wada abe di bilbilin maipanggep sin kosto ay pangitongpalan da sin obla da.

Din silbin di bilbilin ay nay et ta nemnemen din Israelita ay nasantoan si Yahweh ay Diyos da, isonga daida abe et masapol ay onodan da di nasantoan ay kabibiyag.

### **Din Linaona**

Din daton ay mapooan 1:1-17

Din daton para si basol ay adi maigagara ya maigagara 4:1-6:7

Din maibilang ay nalinis ya baken nalinis 11:1-14:8

Din agew ay malinisan di basol 16:1-31

Din kinasanton di dada 17:1-12

Din nasantoan ay kabibiyag ay maonodan 18:1-24:9

Din gon-gonan di managtongpal ya dosan di adi managtongpal 26:1-44

### *Din Daton Ay Mapooan (1:1-9)*

<sup>1</sup> Inayagan Diyos si Moses sin Tolda ay Panpappailaana et nakikali en sisya. <sup>2</sup> Binilina ta ibaga na dana sin Israelita: Mo waday man-idawat si daton, masapol ay baka, karnero ono kalding. <sup>3</sup> Mo maipanggep si daton ay mapooan, da naey di maonodan. Mo baka di idaton da, masapol ay mapteng ay bomaro ay magay kaoyawana. Iey na sin segpan di Tolda ta awaten Diyos. <sup>4</sup> Kapayen din ipogaw din toktok di maidaton ay mapooan et maawat din daton ay sana ta maisobot sin biyag na ya malinisan din basbasol na. <sup>5</sup> Paltiena din baka et pag alaen din papadi ay an-ak Aaron din dada na ta idaton da en Diyos. Mo makdeng di, isoyat da din dada sin opat ay solin di altar sin segpan di Tolda. <sup>6</sup> Lalatena din animal asi na tadtaden. <sup>7</sup> Din papadi pay yan olnosen da din kaiw sin altar, asi dan tetengan. <sup>8</sup> Pag dan ipatang din natadtad ay karni sin apoy, pati din toktok ya tabtaba. <sup>9</sup> Owasan din nanpalti din eg-eges ya sikin di animal et ipoon din papadi din intiro ay animal sin altar ta say daton ay mapooan ay mansengseng-ew para en Diyos.

Kinwanin aben Diyos en mabalin di karnero, kalding ono kalapati ay daton ay mapooan. Inbilina abe din kosto ay maonodan. Olay sino ay maidaton, masapol ay maisoyat din dada na sin kad-an di altar ya mapooan din intiro ay daton. (1:10-17)

10 11 12 13 14 15 16 17

**2**

1 2 3 4 5 6 7 8 9 10 11 12 13 14 15 16

**3**

1 2 3 4 5 6 7 8 9 10 11 12 13 14 15 16 17

---

\* : Din olog di Levitico et “maipanggep sin polin Levi ono Levita.” Levita da Aaron ya din an-ak na ay papadin di Judio. Levita met laeng din nanoltolong en daida sin obla da sin Tolda.



## 4

### *Din Daton Para Si Basol Ay Adi Maigagara Ya Maigagara (4:1-12)*

<sup>1</sup> Inbilin Diyos en Moses <sup>2</sup> ay ibaga na sin Israelita ay mo wada di manbasol ay mangamag si iparit di linteg Diyos ngem adi na in-gagara, masapol ay tongpalena da nay ay bilbilin.

<sup>3</sup> Mo manbasol di kangatoan ay padi et maibilang ay nanbasol abe din kaipoipogaw, masapol ay man-a din padi ay sana si bomaro ay baka ay magay kolang na ta ena idaton en Diyos ta say malinisan din doy ay basol na. <sup>4</sup> Iey na din baka sin pantew di Tolda ay Panpappailaan Diyos et asi na ikapay din takkay na sin toktok di baka et paltiena sin sangoanan Diyos. <sup>5</sup> Asi man-a sin dadan di napalti et isgep na sin oneg di Tolda. <sup>6</sup> Mo wadas sisya sin oneg, isiwsiw nan gomot na sin dada et asi na pay iwalsi si mamin pito sin sangoanan Diyos sin sangon di kurtina ay nanasalin sin Kasasantoan ay Kowarto. <sup>7</sup> Pag nan iponas din odom ay dada sin kaman sakngod sin solin di altar ay panpoppooan si insinso ay wada met laeng sin oneg di Tolda. Mo makdeng di, isoyat na din am-in ay nabay-an ay dada sin naisaadan di altar ay panpoppooan si daton ay wada sin pantew di Tolda. <sup>8</sup> Ilasina abe din am-in ay taban di eg-eges di baka ay napalti, <sup>9</sup> din doway ay batin ya din taba da pati din kamayatan ay partin di atey na <sup>10</sup> ay kaman met laeng di iyat da ay mangaan sin taban di baka ay idaton da ay pan-ookoban ya makikadkadwaan da en Diyos, asi na pooan sin altar ay doy. <sup>11</sup> Ngem alaena din kopkop, am-in ay lames, din toktok, din eg-eges ay adi nasosotan ya din sikin di animal, <sup>12</sup> et iey na ay pooan si kaiw sin lasin di pankamkampan da ay maiwaswasitan di dap-o, tan say ibilang da ay nalinis ay lugar maibasar sin linteg da.

Mo manbasol abe am-in din kaipoipogaw ay mangamag si iparit di linteg Diyos ngem adi da in-gagara, masapol ay man-a das bomaro ay baka ta maidaton en Diyos. Mo esa ay pangolo di manbasol, bomaro ay kalding di maidaton. Et mo kompormi ay ipogaw di manbasol, din maidaton et bomalasang ay kalding ono karnero.

Mo wada abey mangigagara ay manbasol yan sowitikena ono akewana din ib-a na ono amagena di odom ay kaman dadi ay basol, masapol ay itaoli na din ina na ya tapiana pay si inkaliman di banol na. Masapol abe ay iala na sin padi di bomaro ay kalding ono karnero ay maidaton ta say maisobot sin biyag na ya malinisan din basol na. (4:13-6:7)

13 14 15 16 17 18 19 20 21 22 23 24 25 26 27 28 29 30 31 32 33 34 35

## 5

1 2 3 4 5 6 7 8 9 10 11 12 13 14 15 16 17 18 19

## 6

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30

## 7

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38

## 8

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36

## 9

1 2 3 4 5 6 7 8 9 10 11 12 13 14 15 16 17 18 19 20 21 22 23 24

## 10

1 2 3 4 5 6 7 8 9 10 11 12 13 14 15 16 17 18 19 20

## 11

### *Din Mabalin Ya Adi Mabalin Ay Kanen Da (11:1-12,45-47)*

<sup>1</sup> Kanan Diyos en da Moses en Aaron, <sup>2</sup> Ibagay na sin Israelita: Sin amin ay animal, siya dana di mabalin ay kanen yo: <sup>3</sup> Din nagisgis di kokod na ya mangaga kasin si nakdeng ay kinana. <sup>4-6</sup> Ngem waday animal ay mangaga kasin si kinana ono nagisgis di kokod na ay adi yo kanen. Maiparit din kamel ya din atap ya naamo ay koneho, tan olay mo gagaen da kasin di kanen da baken nagisgis di kokod da. <sup>7</sup> Maiparit abe din besaang, tan olay mo nagisgis din kokod na, adi na kasin gagaen di kinana et kadodogis ay kanen yo. <sup>8</sup> Adi yo isidsida dana ya adi yo aben giwgiwiten din bangkay da. Ibilang yo ay kadodogis dana.

<sup>9</sup> Sin wadas danom, da nay di mabalin ay isida yo: din amin ay waday siksik ya balidbid na, olay wadas baybay ono ginawang. <sup>10-12</sup> Ngem olay sino ay wada sin danom ay magay siksik ono balidbid na, ibilang yo ay palalo ay kadodogis et adi yo isidsida ono olay giwiten din bangkay da.

Kinwanin Diyos en maiparit abe ay isida da di odom ay kalasin di titit ya mantaytayaw ay kaman din agila, kop, kolin, banog, paong, gayang ya kibkibalot. Maiparit abe din mankodkodap ay napayakan powira din manlaglagto ay kaman din dodon, boyasyas, bobboting ya pitpitan. Ad-ado abey odom ay ibilang di Israelita ay kadodogis ay kaman din kabayo, aso, posa, ya otot, siya abe din mankodkodap ya manbododos ay kaman din eweg, banyas, tabtabaan ya kalapakap, ya din nankinalasi ay bigis. Mo isidan din Israelita di olay sino en dana ay maiparit ono giwiten da anggoy din bangkay da, maibilang da ay kadodogis. Mo wada abey kompormi ay maosal ay maisagid si bangkay di maiparit, maibilang met laeng ay kadodogis. Inbilin Diyos am-in dana ta say mailalasin din ipogaw na para en sisya ya tadonen da din nasantoan ay ogali na. Kinwani na: (11:13-44)

13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44

<sup>45</sup> “Sak-en si Yahweh ay nangipango en dakayo ay komaan ed Egipto ta sak-en di Diyos yo, isonga masapol ay nasantoan kayo tan nasantoanak. <sup>46</sup> Siya sa di bilin ko maipanggep sin animal, titit, amin ay manbibiyag sin danom ya amin ay mankodkodap sin lota. <sup>47</sup> Masapol ay mailasin yo di nalinis ya kadodogis, mo sino di mabalin ay maisida ya din maiparit sin amin ay matmatago ay parsua.”

## 12

### *Din Kalinisan Di Babai Ay Man-anak*

<sup>1</sup> Inpaammon Diyos en Moses dana ay bilbilin <sup>2</sup> ta tongpalen din Israelita. Mo lalaki di ianak na, pito ay agew ay maibilang sisya ay kadodogis ay kaman din panriglaana. <sup>3</sup> Sin maikawao ay agew, masapol ay makogit din anak. <sup>4</sup> Din ina, palabasena di tolonpo ya tolo pay ay agew, asi maibilang ay nalinis et makdeng di kinmadodogisana gapo sin dada ay binmalbala. Maiparit ay giwitena di olay sino ay maibilang ay nasantoan ya adi mabalin ay senggop sin nasantoan ay Tolda enggana ay makdeng din agew ay kalinisana. <sup>5</sup> Mo babai di ianak na, sinpo ya opat ay agew di kaibilangana ay kadodogis ay kaman din panriglaana. Ngem palabasena pay di enemapolo ya enem ay agew, asi maibilang ay nalinis.

<sup>6</sup> Mo mapospos din agew ay kalinisana sin nangianakana si babai ono lalaki, masapol ay man-iey si bomaro ay karnero ay mantawen si esa sin padi ay wada sin segpan di Tolda ta say maidaton ay mapooan. Man-idawat abe si anak di pagaw ono kalapati ay say maidaton ay manglinis sin basol na. <sup>7</sup> Idaton din padi para sin babai et maibilang

sisya ay nalinis et makdeng di kinmadodogisana gapo sin dada ay binmala en sisya. Siya na di maibilin sin babai ay man-anak.

<sup>8</sup> Mo adi na kabaelan di bomaro ay karnero, man-idawat si dow a ay kalapati ono pagaw. Din esa yan maosal ay daton ay mapooan yan din esa et maidaton ay manglinis sin basbasol na. Amagen din padi din seremonia ay panglinis sin babai et maibilang ay nalinis sin sangoanan di linteg.

## 13

### *Din Kaeegyay Ay Sakit Di Kodil* (13:1-3,45-46)

<sup>1</sup> Binilin Diyos da Moses en Aaron yan kanana, <sup>2</sup> “Mo waday maila sin kodil di esay ipogaw ay lomat-ed ono bomalanga ono bayang yan manbalin si sakit di kodil ay makaalis, masapol ay manpaila en Aaron ono esa sin papadi ay an-ak na. <sup>3</sup> Esten din padi ay ilaen din bayang na. Mo kinmilat din book sin kad-an di bayang ya naoneg din bayang mo din kodil na, din sana yan kaeegyay ay sakit di kodil et ipaammon din padi ay maibilang sisya ay kadodogis sin sangoanan di linteg. <sup>4</sup> <sup>5</sup> <sup>6</sup> <sup>7</sup> <sup>8</sup> <sup>9</sup> <sup>10</sup> <sup>11</sup> <sup>12</sup> <sup>13</sup> <sup>14</sup> <sup>15</sup> <sup>16</sup> <sup>17</sup> <sup>18</sup> <sup>19</sup> <sup>20</sup> <sup>21</sup> <sup>22</sup> <sup>23</sup> <sup>24</sup> <sup>25</sup> <sup>26</sup> <sup>27</sup> <sup>28</sup> <sup>29</sup> <sup>30</sup> <sup>31</sup> <sup>32</sup> <sup>33</sup> <sup>34</sup> <sup>35</sup> <sup>36</sup> <sup>37</sup> <sup>38</sup> <sup>39</sup> <sup>40</sup> <sup>41</sup> <sup>42</sup> <sup>43</sup> <sup>44</sup> <sup>45</sup> Din ipogaw ay waday sakit na ay kaeegyay ay sakit di kodil, masapol ay manbado si nabisngibisngit. Adi na sagsagaysayen din book na ya kopopana din nanallem ay partin di ropa na yan ibogaw na ay kanana, ‘Kadodogisak, kadodogisak.’ <sup>46</sup> Maibilang sisya ay kadodogis enggana ay makaan din sakit di kodil na et mantee sin lasin di kampo ay addawi sin ipogaw.” <sup>47</sup> <sup>48</sup> <sup>49</sup> <sup>50</sup> <sup>51</sup> <sup>52</sup> <sup>53</sup> <sup>54</sup> <sup>55</sup> <sup>56</sup> <sup>57</sup> <sup>58</sup> <sup>59</sup>

## 14

### *Din Seremonia Ay Panglinis Mo Nakaan Di Kaeegyay Ay Sakit Di Kodil* (14:1-8a)

<sup>1</sup> Inbagan Diyos en Moses <sup>2</sup> da nan bilbilin maipanggep sin seremonia ay amagen di ipogaw ay nakaan di kaeegyay ay sakit di kodil na. Sin agew ay maibilang sisya ay nalinis sin sakit di kodil ay sana, koyogen das sisya ay emey sin padi. <sup>3</sup> Bomala din padi et ena ilaen sisya sin lasin di kampo. Mo nakaan din sakit na, <sup>4</sup> ibilin din padi ay man-ialis sisya si dow a ay titit ay maibilang ay nalinis, kaiw ay sidro, manbalanga ay lopot ya pingin di hisopo. <sup>5</sup> Ibilin din padi ay mapalti din esa ay titit yan sayangen da din dada na si dinamili ay banga ay napey-an si kasaksakdo ay danom di obbog. <sup>6</sup> Makdeng di, alaena din esa ay titit, sidro, manbalanga ay lopot ya hisopo ay isiwsiw na sin dadan di napalti ay titit. <sup>7</sup> Mamin pito ay walsiana sin dada din ipogaw ay malinlinisan sin sakit di kodil na, pag nan ipaammo en maibilang ay nalinis din ipogaw ay sana. Ibolos pay din padi din matmatago ay titit. <sup>8a</sup> Makdeng di, din ipogaw ay sana ay maibilang ay nalinis yan masapol ay labaana din bado na, koskosana amin din book na ya man-ames, et pag maibilang sisya ay nalinis. <sup>9</sup> <sup>10</sup> <sup>11</sup> <sup>12</sup> <sup>13</sup> <sup>14</sup> <sup>15</sup> <sup>16</sup> <sup>17</sup> <sup>18</sup> <sup>19</sup> <sup>20</sup> <sup>21</sup> <sup>22</sup> <sup>23</sup> <sup>24</sup> <sup>25</sup> <sup>26</sup> <sup>27</sup> <sup>28</sup> <sup>29</sup> <sup>30</sup> <sup>31</sup> <sup>32</sup> <sup>33</sup> <sup>34</sup> <sup>35</sup> <sup>36</sup> <sup>37</sup> <sup>38</sup> <sup>39</sup> <sup>40</sup> <sup>41</sup> <sup>42</sup> <sup>43</sup> <sup>44</sup> <sup>45</sup> <sup>46</sup> <sup>47</sup> <sup>48</sup> <sup>49</sup> <sup>50</sup> <sup>51</sup> <sup>52</sup> <sup>53</sup> <sup>54</sup> <sup>55</sup> <sup>56</sup>

## 15

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33

## 16

### *Din Agew Ay Malinisan Di Basbasol* (16:1-5,11-19)

<sup>1</sup> Idi nakdeng din nateyan di dow a ay anak en Aaron begew sin indaton da en Diyos ay baken nasantoan, nginalat Diyos si Moses <sup>2</sup> yan kanana, “Ibilin mo en agim ay Aaron ay baken kompormi mo adi et anggoy sin kostokosto ay timpo di senggepana sin Kasasantoan ay Kowarto ay wada sin likod di kurtina. Tan isdi san panpappailaak

babaen si liboo sin ngaton di kaleb\* di Baol di Tolagan. Et mo adi na tongpalen din bilin ay nay, matey sisya ay magay dowadowa. <sup>3-5</sup> Da naey di masapol ay amagen Aaron ta asi senggsep sin Kasasantoan ay Kowarto. Masapol ay manbado sin mankilat ay bado ay natodingan para sin agew ay nay ay siya da din nagayad ay bado, potot, bilko ya apongot. Ngem siyat man-ames ta asi na ibado, tan nasantoan da nay ay bado. Asi man-a si bomaro ay baka ay maidaton ta malinisan di basol. Man-a abe si bomaro ay karnero ay mapooan ay maidaton. Awatena pay sin Israelita di dowa ay bomaro ay kalding ay maidaton ta malinisan di basol ya bomaro ay karnero ay mapooan ay maidaton. <sup>6 7 8 9 10</sup>

<sup>11</sup> “Mo kedngen Aaron ay idaton din baka ta maisobot sin biyag na ya malinisan din basol na ya siya abe din pamilya na, <sup>12</sup> masapol ay man-a si sinkapalanggana ay man-ganggangab ay oling ay napo sin altar, asi aben man-as dowa ay gamet ay napino ay insinso et isgep na sin Kasasantoan ay Kowarto. <sup>13</sup> Isdi sin sangoanan Diyos, ipeey na din insinso sin man-ganggangab ay oling ta salinan din asok na din kaleb di Baol di Tolagan et adi na maila ta say adi matey sisya. <sup>14</sup> Asi en omas sisya sin dadan di baka et isiwsiw na din gomot na et walsiana din kagodwan di kaleb ay wada sin patag na ya siya abe ay walsiana din sangoanan di Baol si mamin pito.

<sup>15</sup> “Et mo pay ta makdemakdeng di, paltiena abe din kalding ay maidaton ta malinisan din basbasol di kaipoipogaw. Alaena din dadan di animal ay doy et iey na abe sin Kasasantoan ay Kowarto. Et say onodana met laeng din inyat na ay nangiwalsi sin dadan di baka sin kaleb ya sangoanan di Baol. <sup>16</sup> Siya na ngarud di amagen Aaron ta say malinisan din Kasasantoan ay Kowarto ay kinmadodogis begew sin basbasol ya nankolkolongan din Israelita. Kaman nina abe di masapol ay amagena sin Nasantoan ay Kowarto, tan wada sin gawan di pankamkampanoan yo ay maibilang ay kadodogis. <sup>17</sup> Manlogi sin senggsep Aaron sin Kasasantoan ay Kowarto ay mangamag sin seremonia ay manglinis si kadodogis, maiparit ay wada di odom ay ipogaw sin Nasantoan ay Kowarto enggana ay bemelas sisya. Et mo makdeng ay amagena din seremonia ay nay para sin mismo ay awak na, pamilya na ya sin ipogaw, <sup>18</sup> emey sin altar ay panpoppooan si daton et amagena abe di seremonia ay manglinis abe sin altar. Say amagena ngarud et oma sin dadan di napalti ay baka ya kalding et iponas na sin am-in ay kaman sakngod di altar. <sup>19</sup> Isiwsiw na abe din gomot na sin dada et walsiana din altar si mamin pito. Siya sa di amagena ta linisana din altar ay kinmadodogis begew sin basol di ipogaw ta say panbalinena ay nasantoan.”

*Din Mailobos Ay Kalding  
(16:20-24,29-31)*

<sup>20</sup> “Mo pay ta ikdeikdeng Aaron din seremonia ay manglinis sin Kasasantoan ay Kowarto, din Nasantoan ay Kowarto ya din altar, iey na din matmatago ay kalding sin kad-an di altar ay panpoppooan si daton. <sup>21-22</sup> Asi na ikapay din dowa ay takkay na sin toktok di kalding dowan ipodno din am-in ay nankolkolongan ya nanbasbasolan di Israelita ta mait-an sin animal ay doy. Makdeng pay di yan waday nadotokan ay ipogaw ay en mangibolos sin kalding sin addawi ay lugar ay magay omili ta say iey din kalding din am-in ay basbasol di Israelita isdi.

<sup>23</sup> “Asi pag senggsep si Aaron sin Tolda et kaanena am-in din bado ay inosal na ay sinenggsep sin Kasasantoan ay Kowarto ta taynanas di. <sup>24</sup> Asi en man-ames sin esa ay nasantoan ay lugar et ibado na kasin din sigod ay osal na si kinapadi. Siya di yan bemela ay mangidaton si mapooan ta maisobot sin biyag na ya malinisan din basol na ya siya abe din am-in ay Israelita. <sup>25 26 27 28</sup>

\* **16:2** Din kaleb ay nay et say naipappailaan di inyat di basol ay malinisan ono mapakawan. Isdi di pangiwalsian din padi sin dada ay maisobot sin biyag di nakabasol ta say adi dosaen Diyos sisya mo adi et malinisan di basol na.

<sup>29</sup> “Da nay di bilbilin ay masapol ay matongpal si eng-enggana. Sin maikasinpo ay agew di maikapito ay bowan, din Israelita ya mangili ay makitee en daida yan masapol ay itpe da din dagaang da ya adi da man-obra. <sup>30</sup> Tan sin agew ay doy, maamag di seremonia ay panglinis en daida ta maisobot sin biyag da ya malinisan din basol da sin sangoanan Diyos. <sup>31</sup> Maibilang ay nasantoan din agew ay sana et masapol ay itpe da din dagaang da ya adi da polos man-obra. Masapol ay tongpalen da dana ay bilin si eng-enggana.” <sup>32 33 34</sup>

## 17

### *Din Kinasanton Di Dada* (17:1-7,10-12)

<sup>1</sup> Kinalin Diyos si Moses et kanana, <sup>2</sup> “Ibagam en Aaron ya sin an-ak na ya sin am-in ay Israelita, ‘Naey di inbilin Diyos: <sup>3-4</sup> Olay sino ay Israelita ay man-idaton si baka, karnero ono kalding si kompormi ay lugar et bomasol tan maibilang ay pinomse, isonga makeddangan ay maipowira sin iib-a na ay ipogaw en Diyos.\* Din amagena koma et iey na din animal sin segpan di Tolda ay Panpappailaan Diyos ta maidaton en sisya. <sup>5</sup> Siya ngarud na san maibilin ta say manlogi ed wani, din aanimal ay idatdaton di Israelita sin lasin di pankamkampan da et maiey sin padi sin segpan di Tolda ta say maidaton en Diyos ay say makikadkadwaan da en sisya. <sup>6</sup> Asi en walsian di padi si dada din altar en Diyos ay wada sin segpan di Tolda, asi na aben pooan din taba ta mansengseng-ew ay say panlaydan en Diyos. <sup>7</sup> Masapol ay isaldeng da ay idatdatonan din sinsinan kalding sin lasin di pankamkampan da, tan din panaydayawan da sin sinan didiyos ay nay et kaman dan makikamkamalala. Din bilin ay nay et masapol ay tongpalen da ya siya abe sin poli da si eng-enggana. <sup>8 9</sup>

<sup>10</sup> “ ‘Mo sino en dakayo ay Israelita ono mangili ay makitete en dakayo di mangisida si dada, dokogan Diyos sisya et ipowira na sin ipogaw na.† <sup>11</sup> Tan din dada di mangidawat si biyag di awak. Din dada abe di inbilin Diyos ay maiwalsi sin altar ay manglinis sin basbasol yo, tan din dada et say pansobot si biyag. <sup>12</sup> Siya na di begew ay inbilin Diyos sin am-in ay Israelita ay adi da mansida si dada ya siya abe din mangili ay makitete en daida.’ ” <sup>13 14 15 16</sup>

## 18

### *Din Onodan Di Israelita* (18:1-5)

<sup>1</sup> Kanan Diyos en Moses, <sup>2</sup> “Ibagam sin am-in ay Israelita, ‘Naey di kanan Diyos: Sak-en si Yahweh ay Diyos yo. <sup>3</sup> Adi yo on-onodan din ogalin di taga-Egipto ay nakitetean yo ed idi ono din ogalin di ipogaw ed Canaan ay say pangipangoak en dakayo, <sup>4-5</sup> mo adi et tongpalen yo din linlinteg ko ya din am-in ay ibilin ko en dakayo. Et mo say amagen yo di, gon-oden yo di tet-ewa ay biyag. Nay kasinak ibaga ay si sak-en si Yahweh ay Diyos yo.’ ” <sup>6 7 8 9 10 11 12 13 14 15 16 17 18 19 20 21 22 23 24 25 26 27 28 29 30</sup>

## 19

### *Din Bilbilin Panggep Di Siged Ay Ogali* (19:1-2,9-18,31-37)

<sup>1</sup> Kanan Diyos en Moses, <sup>2</sup> “Ibagam sin am-in ay Israelita, ‘Naey di inbilin Diyos: Masapol ay nasantoan kayo, tan sak-en si Yahweh ay Diyos yo et nasantoanak. <sup>3 4 5 6 7 8</sup>

<sup>9</sup> “ ‘Mo man-ani kayo sin payew yo, adi yon palaloan ay anien din wadas benget na ya sageyen din nilabsan yo. <sup>10</sup> Mo manbolas kayo abe si obas, adi yon taolien di nilabsan

\* **17:3-4** Di esa ay kaiologan nina sin Hebreo et: makeddangan ay matey. † **17:10** Di esa ay kaiologan nina sin Hebreo et: keddangan Diyos sisya ay matey.



yo ya piditen di nag-as. Bay-an yo abe iman ta waday okan di nabiteg ya mangili. Sak-en si Yahweh ay Diyos yo, et siya say kanak.

<sup>11</sup> “ Siya abe ay masapol ay adi yon ak-akewan, sosowitiken ono iet-etekan di ib-a yo.

<sup>12</sup> Adi yo aben os-osalen din ngadan ko ay mantistigo si baken kosto ta adi maibabain di ngadan ko, tan sak-en si Yahweh ay Diyos yo.

<sup>13</sup> “ Mo wada abe di poldiyaen yo, adi yo taktaken ay mangidawat si lagbo da olay pay mo sinlabi, tan mo taktaken yo et kaman yo met laeng sinowitik ono inakewan si daida. <sup>14</sup> Adi yo aben babbaosan di naomel ono sapatien di nagodab, mo adi et patgen ya egyatan yo si sak-en ay Diyos yo, tan sak-en si Yahweh.

<sup>15</sup> “ Mo wada di kasoen yo, din kosto koma di iyat yo ay mangowis. Adi yon pabpaboran di nabiteg yan adi yo aben palaloan ay patgen di baknang. <sup>16</sup> Mo mantistigo kayo, adi yo aben palawlawen di ib-a yo ono amagen di olay sino ay baken kosto ay maiturong sin makeddengnan da ay matey.\* Sak-en si Diyos ay nangibagas na.

<sup>17</sup> “ Mo wada di pansaksakitan di nemnem yo si ib-a yo, adi yo ililiget, mo adi et mankakapya kayo ta say adi kayo manbasbasol begew en daida.† <sup>18</sup> Adi yo aben ibabbaes di lawa si ib-a yo ono ililiget si daida, mo adi et laylayden yo di ib-a yo ay kaman din pananglayad yo sin awak yo.‡ Sak-en si Diyos et siya say kanak en dakayo.   
19 20 21 22 23 24 25 26 27 28 29 30

<sup>31</sup> “ Adi kayo manpasip-ok ono manpatolong si man-gegey, tan komadodogis kayo begew met laeng en daida. Say patien yo din nay inbagak, tan sak-en si Yahweh ay Diyos yo.

<sup>32</sup> “ Mo pay abe din nankakay ya nankababkes, patgen ya dayawen yos daida. Patgen yo ay sipapakombaba si sak-en ay Diyos yo, tan sak-en si Yahweh.

<sup>33</sup> “ Adi yo palpaligaten din mangili ay makiili en dakayo. <sup>34</sup> Di iyat yo pay et ibilang yo ay kaman dedan ib-a yo ay Israelita. Laylayden yo si daida ay kaman din pananglayad yo sin awak yo. Nemnemen yo koma ay mangili kayo abe ed Egipto ed idi. Sak-en si Yahweh ay Diyos yo ay nangibilin sina.

<sup>35</sup> “ Adi yo sowitiken di ib-a yo si baken kosto ay panlokod, kiloan ono salopan, <sup>36</sup> mo adi et din kosto di osalen yo. Tan si sak-en si Yahweh ay Diyos yo ay nangibela en dakayo ed Egipto. <sup>37</sup> Kasinak kanan en sak-en si Yahweh ay Diyos yo. Tongpalen yo am-in ay linteg ya bilin ko.’ ”

## 20

1 2 3 4 5

### *Din Manpasip-ok (20:6-7)*

<sup>6</sup> Kanan Diyos, “ Mo waday ipogaw ay manpasip-ok, dokogak sisya et ipowirak sin amin ay ipogaw ko. <sup>7</sup> Kanayon koma ay onodan yo di nasantoan ay kabibiyag, tan sak-en si Yahweh ay Diyos yo.”   
8 9 10 11 12 13 14 15 16 17 18 19 20 21 22 23 24 25 26 27

## 21

1 2 3 4 5 6 7 8 9 10 11 12 13 14 15 16 17 18 19 20 21 22 23 24

## 22

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33

## 23

### *Din Nasantoan Ay Agew ya Fiesta*

\* **19:16** Di mabalin ay amagen di mantistigo ta say makeddengnan di ib-a na et mantistigos baken tet-ewa ono igiginek na di tet-ewa. Inparit Diyos din dowa. † **19:17** Di esa abe ay kaiologan nina sin Hebreo et: mo adi et bagaan yo ta say adi kayo makilak-am sin basol na. ‡ **19:18** Mateo 22:39; Roma 13:9; Galacia 5:14.

<sup>1</sup> Kanan Diyos en Moses, <sup>2</sup> “Ibagam sin am-in ay Israelita, ‘Naey da di tinodingan Diyos ay fiesta ay say masinopan ya pandaydayawan yo en sisya.’ ”

### *Din Agew Ay Pan-ibbayan*

<sup>3</sup> “Mabalin ay man-obla kayo si enem ay agew, ngem nemnemnemen yo ay sin maikapito ay agew, maga di man-obla, tan din agew ay nay et naitoding para en Diyos. Isonga olay mo into di kad-an yo, siya na di agew ay pan-ibbayan yo ya say masinopan yo ay mandayaw en Diyos.’ ”

### *Din Fiesta Ay Makwani en Nalabas Ya Tinapay Ay Magay Labadura Na*

<sup>4</sup> “Naey da din nasantoan ay fiesta ay inbilin Diyos, et say masinopan yo ay mandayaw en sisya sin kostokosto ay agew ay tinodingana. <sup>5</sup> Din fiesta ay makwani en Nalabas et manlogi sin kadiposan di agew sin pitsa 14 sin damo ay bowan, <sup>6</sup> et mo pay ta sin pitsa 15 et siya abe di panlogian di fiesta ay makwani en Tinapay ay Magay Labadura na. Manlogis na ay agew et adi kayo mangmangan si tinapay ay wada di labadura na si pito ay agew. <sup>7</sup> Maga abe di en mangamag sin obla na sin damo ay agew sin pito ay agew ay doy mo adi et masinop kayo ay mandaydayaw. <sup>8</sup> Siya abe ay sin pito ay agew ay doy, inag-agew ay man-idaton kayo si mapooan para en Diyos. Mo sin maikapito ay agew abe, adi yon amagen di obla yo mo adi et masinop kayo kasin ta mandaydayaw kayo.

<sup>9-10</sup> “Et mo wada kayo sin ili ay idawat ko en dakayo, iey yo sin padi din omona ay tan-ay mo man-ani kayo. <sup>11</sup> Itan-ang na ay mangidaton en Diyos ta say awaten Diyos si dakayo. Amagen din padi na sin kabigatan di agew ay pan-ibbayan. <sup>12</sup> Sin iso na met laeng ay agew, omiey kayo sin padi si bomaro ay karnero ay esa di tawena ya magay kolang na ta pooana ay mangidaton en Diyos. <sup>13</sup> Tapian yo abe din daton ay iey yo en sisya si doway kilo ay arina ay malaokan si mantikan di olivo. Mo mapooan dana ay daton, mansengseng-ew ay panlaydan en Diyos. Pakoyogan yo din daton ay nay si esay litro ay arak. <sup>14</sup> Et mo pay ta adi yo pay laeng inikdeng dadi, adi kayon mangmangan sin kaan-ani yo olay mo maata, naililog ono naoto si tinapay. Olay intoy ili ay kad-an yo, masapol ay tongpalen yo ya siya abe din poli yo si eng-enggana.’ ”

### *Din Fiesta Ay Makwani En Pentecostes*

<sup>15</sup> “Manlogi sin agew ay pangidatonan yo sin omona ay nasingay ay apit yo, manbilang kayo si opatapolo ya siyam ay agew. <sup>16</sup> Et mo sin maikalimapolo ay agew ay say kabigatan di maikapito ay agew ay pan-ibbayan, man-idaton kayo en Diyos si tinapay ay inoto yo sin baro ay apit yo.† <sup>17</sup> Doway tinapay ay naoto si sagdodowa ay kilo ay arina di iey yo sin padi ta itan-ang na ay mangidaton. <sup>18</sup> Wada abe di datdaton ay mapooan ay itapi yo sin doy ay tinapay. Din maitapi et pito ay lalaki ay karnero ay magay kolang da ay sag-eesay tawen da, esa abe ay bomaro ay baka ya doway bomaro ay karnero, pati din makidaton ay makan ya arak. Mapooan am-in dana ta mansengseng-ew ay panlaylaydan Diyos. <sup>19</sup> Masapol abe ay man-idaton kayos esa ay lalaki ay kalding ay manglinis si basol yo ya doway lalaki ay karnero ay saes-a di tawena ay say pan-ookoban yo ya makikadkadwaan yo en Diyos.‡ <sup>20</sup> Din nay doway karnero et pakitan-ang di padi sin tinapay ay say nasantoan ay maidaton en Diyos para sin papadi. <sup>21</sup> Sin doy met laeng ay agew, adi yo amagen di obla yo mo adi et masinop kayo ay mandaydayaw. Sinay ay bilin et masapol ay tongpalen yo ya siya abe din poli yo si eng-enggana, olay mo into di panbebeeyan yo.

\* **23:5** Natken di kalindaryon di Judio. Mo layden ay ammoan di maitompongan dana ay fiesta sin kalindaryo tako, ilaen di maipanggep si fiesta sin glosario sin likod di libro ay nay. † **23:16** Din omona ay nasingay ay apit da ay maibagbaga sin v.15 ya siya abe sin v.10-11 et tapin di inani da ay sabog. Mo emey di pito ay domingo, siya abe di pinag-aani si bakakew. ‡ **23:19** Din kalasin di daton ay say makikadkadwaan da en Diyos et nakikan din akin oka ay nangiali ya din padi ay nangidaton.

<sup>22</sup> “ ‘Mo man-ani kayo sin payew yo, adi yo palaloan ay anien din wadas benget na ya sageyen di labsan yo. Bay-an yo ta waday okan di nabiteg ya mangili. Tongpalen yo na tan sak-en si Yahweh ay Diyos yo.’ ”

### *Din Fiesta ay Makwani en Tanggoyob*

<sup>23-24</sup> “ ‘Din omona ay agew sin maikapito ay bowan<sup>§</sup> et nabanol ay agew ay pan-ibbayan yo. Mo dengngen yo di tanggoyob, masinop kayo ay mandayaw. <sup>25</sup> Adi yon amagen di obla yo, mo adi et en kayo man-idaton si mapooan para en Diyos.’ ”

### *Din Agew Ay Malinisan Di Basol*

<sup>26-27</sup> “ ‘Mo manpitsa 10 sin maikapito ay bowan, siya na di agew ay malinisan di basbasol di ipogaw. Sin siya di ay agew, adi kayo mangan, mo adi et masinop kayo ay mandayaw ya man-idaton si mapooan para en Diyos. <sup>28</sup> Adi kayo aben man-obla sin agew ay nay, tan siya na ay agew di kalinisan di basol yo sin sangoanan Yahweh ay Diyos yo. <sup>29</sup> Mo sino ay Israelita di mangan si kompormi sin isna ay agew et maipowira sin iiba na ay ipogaw en Diyos, <sup>30</sup> et mo sino abe di man-obla, si Diyos ay mismo di manosa en sisya ta matey. <sup>31</sup> Masapol ay tongpalen yo na ay bilin ya siya abe din poli yo si eng-enggana, olay mo intoy ili ay kad-an yo. <sup>32</sup> Manlogi sin kadiposan di agew sin pitsa 9 enggana sin kabigatana ay kadiposan aben di agew, ibilang yo ay nabanol na ay agew ay pan-ibbayan ya adi yo abe panganan si olay sino.’ ”

### *Din Fiesta Ay Makwani En Ab-abong*

<sup>33-43</sup> “ ‘Mo makedeng ay man-ani kayo, silibraren yo din fiesta ay makwani en Ab-abong ay pandaydayawan yo en Diyos. Pito ay agew di kabayag na ay manlogi sin maikasinpo ya lima ay agew di maikapito ay bowan. Sin damo ay agew, adi yo amagen di obla yo, mo adi et masinop kayo ay mandayaw. Man-a kayo si kamayatan ay prutas, tobon di palma, pangan di masaybog ay kaiw, ya napintas ay molmola ay gomabay sin kad-an di ginawang, et ilogi yo ay mansilibrar sin fiesta. Inagew ay man-idaton kayo si mapooan para en Diyos si pito ay agew. Et mo pay ta sin maikawao ay agew, masinop kayo ay mandaydayaw kasin ya man-idaton kayo abe si mapooan. Adi yo amagen di obla yo sin agew ay nay. Masapol abe ay man-iyen kayo am-in ay Israelita sin amagen yo ay ab-abong sin nay pito ay agew ta say maammoan di poli yo ay nanbebeeyen Diyos din aap-o da si ab-abong sin nangibelaana en daida ed Egipto. Tongpalen yo na ay bilin ya siya abe din poli yo si eng-enggana. Siya na di kanan Yahweh ay Diyos yo.

“ ‘Si da doy ngarud din nasantoan ay fiesta ay masapol ay tongpalen yo. Nabanol dadi ay masinsinopan ya pandaydayawan yo panggep si pan-idatonan si makan, apit, arak, daton ay mapooan, ya odom ay daton para en Diyos sin kosto ay agew ay maibagayan da. Maitapi dadi ay fiesta sin agew ay pan-ibbayan, et di maitapi abe sin datdaton yo ay doy et din sigod pay dedan ay idatdaton yo ay mapos nemnem yo ya din inkari yo ay datdaton en Diyos.’ ”

<sup>44</sup> Siya dadi din bilbilin ay inbagan Moses sin Israelita ay maipanggep sin amin ay nasantoan ay fiesta ay pandayawan da en Diyos.

## 24

### *Din Maay-ayowan Di Silaw*

(24:1-4)

<sup>1</sup> Kanan Diyos en Moses, <sup>2</sup> “Ibilin mo sin Israelita ta iali day kamayatan ay lana ay napo sin napespesan ay lames di olivo sin Tolda ay Panpappailaak. Amagen da di ta say kanayon ay manbidbidang din silaw <sup>3-4</sup> ay wada sin Nasantoan ay Kowarto sin sangon di kurtina ay nanasalin sin Baol di Tolagan. Minasdem ay tetengan Aaron din silaw ay

§ 23:23-24 Din maikapito ay bowan et Septiembre-Octobre sin kalindaryo tako.

nay ay naipeey sin patangan di silaw ay balitok ta say maninsinlabi ay manbidbidang sin sangoanak. Din bilin ay nay et masapol ay tongpalen yo ya siya abe din poli yo si eng-enggana.”

*Din Tinapay Ay Maidaton En Diyos*  
(24:5-9)

<sup>5</sup>“Man-a ka si sinpo ya dow a ay kilo sin kamayatan ay arina ta otoem si sinpo ya dow a ay tinapay. <sup>6</sup>Asi ka pay sag-eenemen ay dapaten si dow a ay linya ay maipatang da sin lamisaan ay napakpakan si natanig ay balitok sin sangoanak. <sup>7</sup>Man-ipeey ka abe si natanig ay insinso sin dow a ay linya ta say mapooan ay maidaton en sak-en et kaman say sokat din tinapay. <sup>8</sup>Sinabado ay wada di tinapay ay madapat sin sangoanak. Siya na di lebbengen di Israelita si eng-enggana. <sup>9</sup>Din tinapay ay nay et okan da Aaron ya din poli na. Kanen da sin Nasantoan ay Kowarto tan say kasasantoan si bingay da sin daton ay mapooan para en sak-en.” <sup>10</sup> <sup>11</sup> <sup>12</sup> <sup>13</sup> <sup>14</sup> <sup>15</sup> <sup>16</sup> <sup>17</sup> <sup>18</sup> <sup>19</sup> <sup>20</sup> <sup>21</sup> <sup>22</sup> <sup>23</sup>

## 25

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51

## 26

*Din Gon-gonan Di Managtongpal*  
(26:1-13)

<sup>1</sup>Inbilin Diyos en Moses ay ibaga na sin Israelita, “Naey di kanan Diyos. ‘Adi kayo man-amag si sinan didiyos. Ad i kayo aben mantood ya mantikitik si bato ta say dayawen yo. <sup>2</sup>Say tongpalen yo pay et din bilbilin ko maipanggep sin agew ay pan-ibbayan ya nasantoan ay fifiesta ya patgen yo din Tolda ay Panpappailaak. Sak-en si Yahweh ay Diyos yo ay nangibagas na.

<sup>3</sup>“ ‘Mo tongtongpalen yo din linteg ya bilbilin ko, <sup>4</sup>ibaak din odan sin kosto ay timpo ta manlames din mola ya kaiw sin daga yo. <sup>5</sup>Omad-ado di apiten yo et man-an-ani kayo pay laeng sin timpon di panagbobolas si obas ya siya abe ay manbolbolas kayo pay laeng sin timpon di panagbabangkag. Wada am-in di makan ay masapol yo et maga di pandandanagan yo ay manbibiyag sin daga yo.

<sup>6</sup>“ ‘Siya abe ay panturayek di talna sin ili yo, et maseyep kayo ay maga di pan-egyatan yo tan kaanek din maangat ay aanimal sin kad-an yo ya maga abe di en mangobat en dakayo. <sup>7</sup>Iso na abe dedan ay mo waday en yo gobaten, atikoen ya peslen yos daida. <sup>8</sup>Tan mo san lilima en dakayo et abaken da di sin-gasot ya di sin-gasot yan abaken day sinpo ay libo. <sup>9</sup>Bindisyonak abe si dakayo et omad-ado ya mabonat kayo et siya abe ay tongpalek din intolag ko en dakayo. <sup>10</sup>Ad-adon to di apiten yo et omanay si esay tawen ya mansobsobra pay et iwasit yo di odom ay baik ta waday pangipenpenan yo sin baro ay apiten yo. <sup>11</sup>Makibeeyak en dakayo et adiak polos taynan si dakayo, <sup>12</sup>mo adi et kadmakadwaek dakayo si kanayon. Sak-en di bigbigen yo ay Diyos yo yan si dakayo di ipogaw ko. <sup>13</sup>Sak-en si Yahweh ay Diyos yo ay nangibela en dakayo ed Egipto ta adi kayon maibabag-en si oway, et dinadael ko din panakabalin da ay kaman mangitatamed en dakayo ta say maiwayaan kayo ya makaan di panbainan yo.’ ”

*Din Dosan Di Adi Managtongpal*  
(26:14-20,46)

<sup>14-15</sup>“Siya abe ay kanan Diyos, ‘Mo sigaan yo ay tongpalen din linteg ya bilin ko ya labsingen yo abe din intolag ko, <sup>16</sup>dosaek si dakayo babaen si adi kaagasan ay sakit ya podot ay gomodab ya omin-inot ay pomse. Mo man-esek kayo abe yan sayang, tan din mangobat en dakayo di mangan sin lames da. <sup>17</sup>Iso na abe ay pandokogak si dakayo ta say din mangililiget ya mangobat en dakayo di mangabak ya mangituray en dakayo. Palalo abe di egyat yo, et tomagtag kayo olay mo magay mangatiko en dakayo.

<sup>18</sup> “ ‘Et mo makdeng am-in dadi ay ligat yan adi yo pay laeng pasien sak-en, dosaek si dakayo si mamin pito di dagsena begew sin basbasol yo. <sup>19</sup> Siya abe ay kaanek di begew ay palalo di panlastogan yo. Panbalinek ed langit ay kaman landok ta magay odan ya din lota si kaman gambang ta maga di tomobo si mola, <sup>20</sup> et mo man-obla kayo, owat maabos di pigsa yo, tan adi gomabay di molmola sin daga yo ya olay abe din kakaiw yan adi da manlames.’ ” <sup>21</sup> <sup>22</sup> <sup>23</sup> <sup>24</sup> <sup>25</sup> <sup>26</sup> <sup>27</sup> <sup>28</sup> <sup>29</sup> <sup>30</sup> <sup>31</sup> <sup>32</sup> <sup>33</sup> <sup>34</sup> <sup>35</sup> <sup>36</sup> <sup>37</sup> <sup>38</sup> <sup>39</sup> <sup>40</sup> <sup>41</sup> <sup>42</sup> <sup>43</sup> <sup>44</sup> <sup>45</sup>

<sup>46</sup> Siya dana di bilin ya linteg ay inbagan Diyos en Moses sin kawada na ed dontog ay Sinai ta ibaga na abe sin Israelita.

## 27

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34



## Bilbilang Maipanggep Sin Libro Ay Nay

Din libro ay nay et maipanggep sin naam-amag sin Israelita sin oneg di tolonpo ya wao ay tawen ay nan-etaetanan da sin lugar ay magay omili manlogi sin kinmaan da sin dontog ay Sinai enggana ay domateng da sin beddeng di ili ed Canaan ay inkarin Diyos ay idawat na en daida. Din paolon di libro ay Bilbilang et maibasara sin dowang ay nansinsosan ono namilangan Moses sin kaipoipogaw (kapitolo 1 ya 26).

Din maadal takos na et din nalaka ay nadisdismayaan din kaipoipogaw begew sin naligat ay kabibiyag da sin lugar ay magay omili. Nalaka ay nakaan di talek da en Diyos et inpidwapidwa da ay nanriri en sisya ya en Moses ay dinotokan Diyos ay mangipangolo en daida. Di nantongpalana et dinosan Diyos daida si apoy, sakit, ya eweg, ya kineddenganas daida ay lomikeliked sin lugar ay magay omili enggana ay natey da. Ngem inay-ayowanana pay dedan ta say din an-ak da di makasgep sin ili ay inkari na en daida.

### **Din Linaona**

Din nansaganaan di Israelita ay komaan sin dontog ay Sinai 1:1–10:10

Din nandad-anan da manipod ed Sinai enggana ed Kades 10:11–12:16

Din naam-amag sin nantean da ed Kades 13:1–20:13

Din nandad-anan da manipod ed Kades enggana ed Moab 20:14–22:1

Din kawada da sin tanap ed Moab 22:2–36:13

### *Din Damo Ay Sinsos Di Israelita*

Sin pitsa 1 di maikasinpo ya opat ay bowan manipod sin kinmaan di Israelita ed Egipto, nakikali si Diyos en Moses sin Tolda ay Panpappailaana. Inbilina ay pasinsos da Moses en Aaron din kaipoipogaw ta bilangen da din lallalaki ay mantawen si downpo ono nasurok ay mabalin ay makigobat. Din kabibilang da ay napo si esa ya esa ay tribu et: Ruben–46,500; Simeon–59,300; Gad–45,650; Juda–74,600; Issakar–54,400; Zebulun–57,400; Efraim–40,500; Manasses–32,200; Benjamin–35,400; Dan–62,700; Aser–41,500; Naftali–53,400. Din kabibilang da am-in et 603,550.

Adi da binilang din tribu Levi, tan inbilin Diyos ay daida di makaammo sin Tolda ay Panpappailaana ya din maosal sidi. Mo man-etan din Israelita, din Levita di manopi, manggen, ya kasin mangiamag. Mo mankampo kasin din kaipoipogaw, din Levita met laeng di mankampo sin nanniliked di Tolda. (1:1-54)

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51

## 2

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34

## 3

1 2 3 4

### *Din Pansilbian Di Levita Sin Papadi (3:5-10)*

<sup>5</sup> Inbagan Diyos en Moses, <sup>6</sup> “Ipaalim din Levita ta dotokam daida ay kabadang Aaron ay padi. <sup>7-8</sup> Daida di makaammo sin obla sin Tolda ay Panpappailaak. Ay-ayowanana da din am-in ay maosal sidi ya amagen da abe din panlebbengan da para sin odom ay Israelita. Say iyat da ay mansilbi en Aaron ya sin intiro ay gimong. <sup>9</sup> Din obla anggoy ay amagen di Levita et din pansilbian da en Aaron ya din aan-ak na ay lalaki. <sup>10</sup> Mo da Aaron ya din an-ak na ay sana, dotokam daida ay mansilbi ay papadi. Mo

sino di baken nadotokan yan amagena din oblan di padi et makeddengnan ay matey.”  
11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51

#### 4

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49

#### 5

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31

#### 6

### *Din Mangikari Ay Mangidaton Si Awak Na En Diyos (6:1-8,13-20)*

<sup>1</sup> Kanan Diyos en Moses, <sup>2</sup> “Ibagam na sin Israelita: Mo waday lalaki ono babai ay mangikari si nabanol ay kari ay mangidaton si awak na ay mansilbi en Diyos, <sup>3</sup> masapol ay adi man-in-inom si arak ono olay sino ay bemeteng. Adi aben man-inom si danom di obas ya soka di obas. Maiparit abe en sisya din lames di obas ya pasas. <sup>4</sup> Sin oneg di timpo ay inkari nay awak na ay mansilbi en Diyos, adi mabalin ay mangan si olay sino ay napo si obas, olay bokel ono okis na.

<sup>5</sup> “Sin intiro ay timpo ay inkari na ay pansilbiana en Diyos, masapol ay adi polos mapokisan, tan maibilang sisya ay nasantoan enggana ay makdeng din timpo ay inkari na. <sup>6</sup> Sin intiro ay timpo ay inkari na, adi aben mabalin ay somag-en si natey, <sup>7</sup> olay pay mo si ama na, ina ono agi na. Masapol ay adi na pakadodogisen din awak na, tan ipailan din book na <sup>8</sup> ay indatonay awak na ay mansilbi en Diyos. <sup>9 10 11 12</sup>

<sup>13</sup> “Siya na di linteg ay onodan di nangikari ay mangidaton si awak na en Diyos mo makdeng din timpo ay inkari na ay pansilbiana: Koyogen das sisya sin segpan di Tolda <sup>14</sup> yan idawat na din datona en Diyos. Tolo ay animal ay magay kaoyawana di idatona. Masapol di bomaro ay karnero ay mantawen si esa ta maidaton ay mapooan, esay bomalasang ay karnero ay mantawen si esa ta maidaton para sin basbasol na ya kalakian ay karnero para sin daton ay pan-ookoban da ya makikadkadwaan da en Diyos. <sup>15</sup> Man-idawat abe si esay baskit ay tinapay ay magay labadura na-naposkol ay tinapay ay nalaokan si mantikan di olivo ya naingpis ay napay-an si mantikan di olivo. Maitapi abe din naitoding ay daton ay arina ya arak.

<sup>16</sup> “Ipailan din padi dana sin sangoanan Diyos et idatona din daton para sin basbasol di ipogaw ay sana ya din daton ay mapooan. <sup>17</sup> Idatona abe din kalakian ay karnero ay say maidaton ay pan-ookoban da ya makikadkadwaan da en Diyos pati din esay baskit ay tinapay ya din daton ay arina ya arak. <sup>18</sup> Emey sin segpan di Tolda din ipogaw ay nangidaton si awak na yan koskosana din toktok na, asi na itep-a sin apoy ay naipatangan din daton ay pan-ookoban da ya pakikadkadwaan da en Diyos. <sup>19</sup> Alaen din padi din naoto ay padangan di karnero et ipag-ena sin ipogaw ay sana pati din esa ay naposkol ay tinapay ya esa ay naingpis ay kankanen. <sup>20</sup> Pag itan-ang din padi dana sin sangoanan Diyos tan nasantoan ay daton. Intoding di linteg ay okan din papadi dana pati din pagew ya opo. Mo makdeng di, mabalin ay man-inom si arak din ipogaw ay sana.” <sup>21</sup>

### *Din Pamindisyon Di Padi (6:22-27)*

<sup>22</sup> Inbilin Diyos en Moses, <sup>23</sup> “Ibagam en Aaron ya din an-ak na ay lalaki ta say kanan da na mo bindisyonan da din Israelita:

<sup>24</sup> ‘Sapay koma ta bindisyonan ya ay-ayowanan Diyos dakayo.

<sup>25</sup> Sapay koma ta ipailan Diyos di layad ya seg-ang na en dakayo.

<sup>26</sup> Sapay koma ta siged di amagen Diyos en dakayo ta say siged ya natalna abe di biyag yo.’”

<sup>27</sup> Pag kanan Diyos, “Mo din ngadan ko di os-osalen da Aaron ay mamindisyon sin Israelita, bindisyonak abes daida.”

## 7

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51

## 8

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26

## 9

1 2 3 4 5 6 7 8 9 10 11 12 13 14

### *Din Liboo Ay Nangipango Sin Israelita (9:15-23)*

<sup>15-16</sup> Manipod sin agew ay naiamagan din Tolda ay Panpappailaan Diyos, nawada di liboo ay nanlikmot sin Tolda. Sin labi yan kaman apoy di kailaan din liboo ay sana. <sup>17</sup> Mo basta komayang din liboo, taynan din Israelita din nankampoan da, et asi da kasin mankampo mo intoy lugar ay bomabaan din liboo. <sup>18</sup> Taynan da din kampo da mo say ibilin Diyos yan iamag da abe mo say ibilina. Mo basta mantee din liboo sin kayang di Tolda, adi dan taytaynan din kampo da. <sup>19</sup> Mo mabayag di pantean din liboo sin kayang di Tolda, siya abe di kabayag da ay mankampo ay nanongpal sin bilin Diyos. <sup>20</sup> Mo mamingsan yan owat at-atik ay agew di pantean din liboo sin kayang di Tolda, et mantee da ya man-etan da insigon sin ibilin Diyos. <sup>21</sup> Mo mamingsan, mantee din liboo manlogi sin malablabi enggana sin agsapa anggoy, et malobwat da ay komaan mo basta komayang din liboo. Olay sino ay timpo et man-etan da mo komayang din liboo. <sup>22</sup> Olay doway agew, esay bowan, esay tawen ono mabaybayag pay, adi da man-et-etan mo mantetee din liboo sin kayang di Tolda. Ngem mo komayang yan man-etan da. <sup>23</sup> Mankampo ya man-etan da insigon sin ibilin Diyos en Moses.

## 10

1 2 3 4 5 6 7 8 9 10

### *Din Kinmaanan Di Israelita Ed Sinai (10:11-12,33-34)*

<sup>11</sup> Sin pitsa baintin di maikasinpo ya opat ay bowan manlogi sin kinmaanan di Israelita ed Egipto, kinmayang din liboo manipod sin Tolda ay Naidolinan di Tolagan. <sup>12</sup> Pag dan manlobwat ay komaan sin lugar ay magay omili ed Sinai, et nan-etaetan da enggana ay somaldeng din liboo sin lugar ay magay omili ed Paran. <sup>13 14 15 16 17 18 19 20 21 22 23 24 25 26 27 28 29 30 31 32 33</sup> Sin nanlobwatan da sin dontog ay Sinai ay panpappailaan Diyos, nandad-an das tolo ay agew. Inpangpango da din Baol di Tolagan Diyos ta man-anap das pankampoan da. <sup>34</sup> Mo taynan dan kampo da, wada sin kayang ay patag da din liboo ay kailaan di kawadan Diyos. <sup>35 36</sup>

## 11

1 2 3

### *Din Namilian Moses Si Pitopolo Ay Papangolo (11:4-6,10-17,24-30)*

<sup>4</sup> Wada et di odom ay ipogaw ay nakibewbeweg sin Israelita, yan palalo di aklong da ay mansidas karni. Olay abe din Israelita et kanan da, “Wada koma di karni ay sida tako. <sup>5</sup> Ed Egipto et nan-om-oma takos nigay ay magay bayad na. Wada pay di kasimon, sandya, danggo, siboyas ya bawang. <sup>6</sup> Ngem ed wani yan magay gan-ganas tako ay mangmangan, tan kanayon ay din manna ay nay di kankanen tako.” <sup>7 8 9</sup>

<sup>10</sup> Dinngen Moses din am-in ay ririn din kaipoipogaw ay wada sin pantew di kampo da ay tolda. Idi siya di, palalo di bonget Diyos et nadismaya si Moses. <sup>11</sup> Pag nan kanan en Diyos, “Apay ngin ay say inyat mo na en sak-en? Ay lawlawa di inamag ko sin pangilam? Apay nga inpabiyang mo en sak-en din kaipoipogaw ay nay? <sup>12</sup> Baken met sak-en di nangamag ono nakin anak en daida. Apay nga inbagam ay sak-en di mangayowan ay kamanak para ay-ayowan si moyang ay ab-abaek ay iey sin daga ay inkarim sin aam-a da? <sup>13</sup> Intoy enak pangaan si karni ay para sin kaipoipogaw ay nay? Kanayon ay manmaymayotmot da ay mangwani, ‘Omya ka si karni.’ <sup>14</sup> Adiak kabaelan mo es-esak ay mangayowan sinan kaipoipogaw. Palalo ay madagsen na ay maipaobla en sak-en. <sup>15</sup> Mo kaman dana di paamag mo en sak-en, pangaasim ta pomse ka et ta say adiak namosen din kaitoloyan di ligat ay nay.”

<sup>16</sup> Kanan Diyos en Moses, “Manpili ka ngarud si pitopolo ay lalaki ay mabigbig di kaipogaw da sin papangolon di Israelita. Pasinop mos daida sin Tolda ay Panpappailaak ta isdi ay makipika da en sik-a. <sup>17</sup> Bomabaak ay en makingalat en sik-a. Yan ibingayak daida sin indawat kon sik-a ay Ispirito.\* <sup>18 19 20 21 22 23</sup> Badangan das sik-a ay mangayayowan sin kaipoipogaw ta baken kan es-esa.”

<sup>24</sup> Pag bemela si Moses et inbaga na sin kaipoipogaw din inbilin Diyos. Inayagana din pitopolo ay papangolo et inpapika nas daida ay linikob da din Tolda. <sup>25</sup> Asi bomabas Diyos ay napo ed langit ay naikoyog sin liboo et nakingalat en Moses. Pag nan ibingay din Ispirito ay wadan Moses sin pitopolo ay papangolo. Idi sinenggep din Ispirito en daida, nan-ipadto da, ngem adi dan inpidpidwa.

<sup>26</sup> Mo sin pitopolo ay papangolo, wada et di dowan en daida ay manngadan si Eldad ya Medad ay nataynan sin kampon di kaipoipogaw ay adi inmey sin Tolda ay Panpappailaan Diyos. Sinenggep abe din Ispirito en daida, pag da et man-ipadto. <sup>27</sup> Idi siya di katagtag di esa ay baro yan inbaga na en Moses din inam-amag da Eldad en Medad.

<sup>28</sup> Wada et si Josue ay anak Nun ay namadbadang en Moses manlogi sin kabaro na yan kanana en Moses, “Apo, ipasaldeng mos daida!”

<sup>29</sup> Pag kanan Moses, “Adi ka koman madanagan begew sin panangisakit mo en sak-en. Laydek ay am-in koma ay ipogaw en Diyos et maidawtan das Ispirito na ta man-ipadto da ay kaman dan mamadto.” <sup>30</sup> Idi nakdeng di, nantaolis da Moses ya din pitopolo ay papangolon di Israelita sin nankampoan da.

### *Din Titit Ay Inbaan Diyos*

(11:31-34)

<sup>31</sup> Pag et bigla ay pawadaen Diyos di dagem ay nangidateng si titit† ay napo sin baybay. Tolo ay piya manipod sin lota di kakayang di pantayawan da yan madad-an si esay agew manipod sin kampo di kaannawan di kad-an da sin nanniliked di kampo. <sup>32</sup> Sin sisi ay agew, naninsin-agew da ay nandepdepap olay sin nalabi. Say inamag da kasin sin kabigatana. Esa ya esa et nan-olnong si sinlibo ay kilo ono nasurok. Pinalti da asi da pay inbilag ay nanniliked sin kampo da. <sup>33</sup> Nanpalti da abes insida da, ngem idi daan da pay laeng okmonen, nansakiten Diyos daidas kaeegyat, tan palalo di bonget na. <sup>34</sup> Kibrot Hattaava‡ di ngadan din ili ay nay, tan say nangiponponan da sin ipogaw ay palalo di aklong das karni. <sup>35</sup>

## 12

### *Din Nadosaan Miriam*

\* **11:17** Di esa abe ay kaiologan nina sin Hebreo et: ispirito. Di laydena ay kalien et kabaelan ono laing. † **11:31** Din kalasin di titit ay nay et mais-o sin ngeweg ono ngewem. ‡ **11:34** Din olog di Kibrot Hattaava et “naiponponan di nan-aklong.”

<sup>1</sup> Idi wada din Israelita ed Hazerot, pinispis-oy da Miriam en Aaron si Moses gapo sin Cusita\* ay inasawa na. <sup>2</sup> Kanan da, “Ay siya mo si Moses anggoy di nankalkalian Diyos? Wada met abe di inpaibaga na en daita.” Dinngen Diyos din inbaga da ay sana. <sup>3</sup> Ngem di katet-ewa na, napakombaba si Moses, sisya di kapakombabaan ay ipogaw isnan daga.

<sup>4</sup> Kakali et si Diyos en da Moses, Aaron ya si Miriam yan kanana, “Omali kayo ay tolo sin Tolda ay Panpappailaak.” Et inmey da. <sup>5</sup> Pag bomaba si Diyos ay naikoyog si natotood ay liboo et pinmika sin segpan di Tolda. Inayaganas da Aaron en Miriam et sinmag-en da ay dowya yan <sup>6</sup> kanana, “Dengngen yo nan ibagak. Mo waday mamadto en dakayo, ipaammok en sisya din wadas nemnem ko babaen si iitaw ya kaman iitaw. <sup>7</sup> Ngem baken say iyat ko en Moses ay baak, tan matalek ay mangay-ayowan sin amin ay ipogaw ko. <sup>8</sup> Sangosango ay makikaliak en sisya yan baken bontiya mo adi et maawatan di iyat ko ay makikali en sisya. Inila na pay sak-en. Natoled kayo et kayman ay mamispis-oy en Moses ay baak.”

<sup>9</sup> Palalo di bonget Diyos en daida et kinmaan. <sup>10</sup> Idi komaan din liboo sin Tolda, bigla et ay nawada di kaeegyay ay sakit di kodil en Miriam et kinmilakilat ay kaman andap din kodil na. Sin nangilaan Aaron sin kaeegyay ay sakit di kodil en Miriam, <sup>11</sup> kanana en Moses, “Pangaasim ay apok ta adi ka koman domosa isnan nanbasolan mi gapo si kinaong-ong mi. <sup>12</sup> Adi ka koman ipalobos ay manbalin sisya si kaman liton ay enggay nanatey ya nadodonot din awak na sin binmelaana.”

<sup>13</sup> Et nanpakaasi si Moses en Diyos ay kanana, “Pangaasim kod ay Diyos ta agasam si Miriam.”

<sup>14</sup> Pag kanan Diyos en Moses, “Mo kaspangarigan tinogpaan ama na din ropa na, masapol ay lak-amena di panakaibabaina si pito ay agew. Isonga masapol ay panteen yos sisya sin lasin di kampo si pito ay agew ta asi yo pataolien.” <sup>15</sup> Et inpabela da si Miriam sin lasin di kampo si pito ay agew yan adi da kinmaan din Israelita enggana ay naitaolis sisya. <sup>16</sup> Makdeng pay di, tinaynan da ed Hazerot et nan-etan da sin lugar ay magay omili ed Paran.

## 13

### *Din Inmey Nansiim ed Canaan (13:1-3,17-33)*

<sup>1</sup> Pag kanan Diyos en Moses, <sup>2</sup> “Manpili kas sinpo ya dowya ay lalaki ay emey ed Canaan ay mansiim sin daga ay idawat ko en dakayo. Sag-eesa ay pangolo di mangialagey sin sinpo ya dowya ay tribu.” <sup>3</sup> Tinongpal Moses din inbilin Diyos et pag nan ibaas daida. Napo da sin lugar ay magay omili ed Paran. Am-in da et papangolon di Israelita. <sup>4</sup> <sup>5</sup> <sup>6</sup> <sup>7</sup> <sup>8</sup> <sup>9</sup> <sup>10</sup> <sup>11</sup> <sup>12</sup> <sup>13</sup> <sup>14</sup> <sup>15</sup> <sup>16</sup>

<sup>17</sup> Idi inbaan Moses daida, kanana, “Manpaamyanan kayo sin ed Negev ay akin abagatan ay sakop di Canaan, asi yo ikanayon ay emey sin kabilbiligan. <sup>18</sup> Esten yo ay ilaen mo intoy ison din daga ay sana ya din ipogaw ay mantetees di mo napigsa ono nakapsot da maipanggep si gobat, mo ad-ado ono at-atik da. <sup>19</sup> Ilaen yo abe mo mayat ono lawlawa din daga ay panteteen da, mo intoy ison din siyodad ay kad-an da, mo naaladan si batbato din nannilikad ono aga. <sup>20</sup> Ilaen yo abe mo magabay di mola ya mo waday kakaiw ono maga. Mo mantaoli kayo, man-idateng kayo si lames di nais-ek sidi.” Say kanana di, tan sin timpo ay doy di panlogian di obas ay maom.

<sup>21</sup> Idi siya di nanlobwat din lallalaki ay naibaa. Nanpaamyanan da ay mangil-ila sin daga manipod sin lugar ay magay omili ed Zin enggana ed Rehob\* ay asag-en ed Lebo Hamat. <sup>22</sup> Nandan da omona ed Negev et dinmateng da ed Hebron ay kad-an da Ahiman, Sesai ya Talmi. Da naey di palaloy kadadakke da ay ipogaw ay makwani en

\* **12:1** Din olog di Cusita et “polin Cus.” Si Cus et anak Ham ay anak aben Noe.

\* **13:21** Emey ay opat gasot ay kilometro di kaaddawin di Rehob sin lugar ay magay omili ed Zin.



Anakim. (Nangon-ona ay nabangon nan Hebron si pito ay tawen, asi mabangon di Zoan ed Egipto). <sup>23</sup> Idi dinmateng da sin tanap ed Escol, nanpoto das esa ay pangan di obas ay namengyet di lames na. Dowa ay ipogaw di nangaksiw et wada pay di odom ay ingenan da ay prutas ay makwani en granada ya igos. <sup>24</sup> Nangadanan ay Tanap ed Escol din ili ay nay begew sin namengyet ay obas ay pinosngin di Israelita.†

<sup>25</sup> Idi nakdeng di opatapolo ay agew, nantaoli din lalaki ay naibaa ay mansiim sin daga. <sup>26</sup> Nantaoli da sin kad-an da Moses en Aaron ya din am-in ay Israelita ed Kades ay wada sin lugar ay magay omili ed Paran. Inpadamag da en daida din inil-ila da ya inpaila da aben lames di kaiw ay indateng da. <sup>27</sup> Kanan da en Moses, “Inmey kami et inila mi din daga ay nangibaaam en dakami. Naammoan mi ay maymayat ay daga ay magabay di mola.‡ Naey di tapin di lames di gomabay sisi. <sup>28</sup> Ngem din ipogaw ay mantetees di et napigsa da yan dadakke abe din siyodad ay kad-an da et nanliked di batbato ay alad da. Inila mi pay din higanti ay Anakim ay wadas di. <sup>29</sup> Mantetee din Amalekita sin akin abagatan; din Heteo, Jebuseo, ya Amorreo et mantetee da sin il-ili ay kabilbiligan; yan din Canaaneo et wada da abe sin benget di Baybay ay Mediterranean ya sin benget di Ginawang ay Jordan.”

<sup>30</sup> Pag et paginken Caleb din ipogaw sin kad-an Moses yan kanana, “Masapol ay en tako gobaten si daida ta okaen tako din daga, tan masiguradok ay kabaelan tako.”

<sup>31</sup> Ngem din lallalaki ay ginait Caleb et kanan da, “Adi takon kabaelan ay abaken din ipogaw sisi, tan napigpigs da mo datako.” <sup>32</sup> Et pinalawlaw da sin Israelita din ili ay en da inila. Kanan da, “Kaman pomse din daga ay doy, tan nalaka ay matey di man-ilis di. Yan dadaddadakke am-in ay ipogaw ay inila mi. <sup>33</sup> Wada abes di din hihiganti ay Anakim ay palaloy kadadakke da. Din panlikna mi sin awak mi et kaman kamin owat dodon et siya abe di pangila da en dakami.”

## 14

### *Din Nanririan Din Kaipogaw*

<sup>1</sup> Sin labi ay doy, palaloy ogan di am-in ay Israelita. <sup>2</sup> Am-in da et nanriri da en da Moses en Aaron et kanan da, “Agpos et mo natey kami ed Egipto ono isnan lugar ay magay omili. <sup>3</sup> Apay nga ipangon Diyos datakos sa ay daga ta peslen das datako? Depapen da din asawa ya an-ak tako. Maymayat et mo mantaoli tako ed Egipto.” <sup>4</sup> Pag kanan di esa ya esa en daida, “Manpili tako et si mangipangolo en datako ay mantaoli ed Egipto!”

<sup>5</sup> Pag mandokmog da Moses en Aaron ay manyakog-ong sin sangoanan di kaipogaw. <sup>6</sup> Da Josue abe ay anak Nun en Caleb ay anak Jefane ay en nakisiim ed Canaan yan kabisngit da sin mismo ay bado da begew sin sakit di nemnem da <sup>7-8</sup> yan kanan da sin ipogaw, “Maptemapteng din daga ay en mi inila ya magabay di molas di. Mo siged di pangilan Diyos en datako, ipango nas datakos di et idawat na en datako din daga ay doy. <sup>9</sup> Adi yo konkontraen si Diyos ya adi kayo emegyat sin ipogaw ay mantetees di, tan nalaka ay abaken tako. Wadas Diyos en datako et enggay inabak na din sinan didiyos ay manalsalagnib en daida. Isonga adi kayo emegyat.” <sup>10</sup> Ngem dandani ay pigpigen din gimong di kaipogaw si daida, asi et bigla ay inila da din mankoniniing ay kinadiyos en Yahweh ay nanopaila sin kayang di Tolda ay Panpappailaana.

### *Din Nangikaragan Moses Sin Kaipogaw*

<sup>11</sup> Kanan Diyos en Moses, “Aye pay di kabayag di lomaslasoyan dana ay ipogaw! Ay daetan abey panigaan da ay mantalek en sak-en yan ad-adoy nakaskasdaaw ay sinyal ay inpailak en daida! <sup>12</sup> Awni man ta dosaek daida si kaeegyat ay sakit ay ikatey da, ngem asiak pay paad-adoen din an-ak mo ya napigpigs da mo daida ed wani.”

† 13:24 Din olog di Escol et “namengyet.” ‡ 13:27 Din kanana sin Hebreo et: daga ay pan-oy-oyasan di gatas ya anig.

<sup>13</sup> Ngem kanan Moses en Diyos, “Inpangom dana ay ipogaw ay komaan ed Egipto begew sin panakabalin mo. Mo dosaem daida ed wani, adi pay maammoan din taga-Egipto <sup>14</sup> et ibaga da sin man-ilis na. Da naey pay et enggay nadamag da ay wada ka ay Diyos en dakami. Ammo da ay dadlon kan manpappaila babaen sin liboo ay somaldeng sin kayang ay pinapatag nas dakami. Ammo da pay ay ipangpangom dakami sin nandad-anan mi, tan mo kaagawan, waday natotood ay liboo yan mo sin malabi waday manbidbidang ay apoy. <sup>15</sup> Ed wani mo peslem am-in nan ipogaw mo, adi pay ibagan di ipogaw sin il-ili ay nakadnge sin maipanggep en sik-a <sup>16</sup> ay adi ka kabaelan ay mangipango sin daga ay inkarim ay idawat mo, isonga pinsem daida sin lugar ay magay omili. <sup>17</sup> Kedawen mi ngarud ay Diyos ay ipailam din panakabalin mo ta amagem din inkarim ed idi ay kanam, <sup>18</sup> ‘Sak-en ay Diyos et bakenak nalaka ay bomonget mo adi et komakaman din napalalo ay layad ko. Pakawanek abe di basol yo ya din komonkontraan yo en sak-en. Ngem olay mo siya sa, dosaek pay dedan di nakabasol enggana sin maikatlo ya maikap-at ay kapototan begew sin basbasol di aam-a da.’ <sup>19</sup> Kedawek ngarud ay pakawanem koma din basbasol dana ay ipogaw begew sin napalalo ya adi manbalbaliw ay seg-ang ya layad mo ay kaman din inyat mo ay namakpakawan en daida manipod sin kinmaanana da ed Egipto.”

<sup>20</sup> Sinmongbat si Diyos et kanana, “Amagek din kindaw mo et pakawanek si daida sin am-in ay basbasol da. <sup>21-23</sup> Ngem tet-ewa pay dedan ay maga di olay esa en daida ay nanigaan en sak-en ay makasgep sin ili ay inkarik ay idawat ko sin aam-a da. Tan naila da din mankoniniing ay kinadiyos ko ya din nakaskasdaaw ay inam-amag ko ed Egipto ya sin lugar ay magay omili, ngem inpidwapidwa da pay laeng ay namadpadas sin anos ko. Sinigaan da abe ay tongpalen sak-en. Isonga maga polos en daida di makasgep sin ili ay doy. Dadlon tet-ewa na ay kaman met laeng din katet-ewa na ay matmatagoak ya napno din intiro ay daga sin kinadiyos ko. <sup>24</sup> Ngem gapo ta adi in-onod Caleb ay bag-en ko di nemnem na en daida et inpapasnek na ay mangonod en sak-en, awni et ipangok sisya sin ili ay ena inila, et okaen din aan-ak ya aap-o na. <sup>25</sup> Ngem gapo ta isdi ay tanap di pantetean din Amalekita ya Canaaneo, mantaoli kayo si bigat sin dinan yo ta emey kayo sin lugar ay magay omili. Onoden yo din danan ay emey sin Baybay ay Mandalangdang.”\*

### *Din Nanosaan Diyos Sin Kaipogaw Sin Nanririan Da*

<sup>26</sup> Kanan Diyos en da Moses en Aaron, <sup>27</sup> “Ay daetan pay di romiriririan da san lawlawa ay ipogaw! Enggay naomaak sin ad-ado ay mayotmot da. <sup>28</sup> Ibagam ngarud en daida ay dadlon temet-ewa nan isapatak ay kaman din katet-ewan di kamatagok: Din dinngek ay inbaga yo et siya met laeng di amagek en dakayo.† <sup>29</sup> Am-in kayo ay naibilang sin sinsos ay mantawen si dowanpo ono nasurok et matey ya maiwalang din awak yo isnan lugar ay magay omili begew sin nanririan yo en sak-en. <sup>30</sup> Maga di olay esa en dakayo ay makasgep sin ili ay insapatak ay panbalinek si panbeeyan yo malaksid da Caleb en Josue. <sup>31</sup> Inbaga yo ay madpap din aan-ak yo, ngem awni et ipangok daida sin daga ay sinigaan yo, et daida din mantetees di. <sup>32</sup> Ngem mo dakayo pay, maiwalang din awak yo sinan lugar ay magay omili. <sup>33</sup> Din aan-ak yo et man-etaetan das na ay manlikeliked si opatapolo ay tawen. Daida di mangikaro sin dosa begew sin nanokogan yo en sak-en enggana ay matey kayos nan lugar ay magay omili. <sup>34</sup> Nam-osen yo din dosan di basbasol yo si opatapolo ay tawen, et say pangammoan yo mo intoy ison di biyag yo mo kontraek dakayo. Opatapolo ay agew di nansiiman yo sin daga ay doy, yan esa ay tawen di kaibilangan di esa ay agew. <sup>35</sup> Isapatak ay dadlonak tongpalen dana en dakayo ay lawlawa ay ipogaw, dakayo ay nantitimpoyog ay mangontra en sak-en.

\* **14:25** Din kanana sin Hebreo et: Baybay ay Katantanobongan. Kanan di odom en si naey di kanan da en Baybay ay Aqaba ed wani. † **14:28** Din inbaga da et wada sin 13:2.

Awni man et matey kayo am-in isnan lugar ay nay ay magay omili. Sak-en si Diyos ay nangibagas na.”

<sup>36-37</sup> Pag pansakiten Diyos din inbaan Moses ay en nansiim et natey da, tan baken tet-ewa din inpadamdamag da maipanggep sin ili ay inmeyan da et say begew ay nanriri din kaipoipogaw si maikontra en Moses. <sup>38</sup> Sin daida ay sinpo ya dow a ay en nansiim, da Josue en Caleb anggoy di adi natey.

### *Din Namadasan Din Israelita Ay Mangobat Sin Amalekita Ya Canaaneo*

<sup>39</sup> Idi inpaammon Moses na sin Israelita, napalaloy ladingit da. <sup>40</sup> Sin kabigatana, nasapa da ay nanikid sin kadondontogan. Kanan da, “Nakabasol tako kayman, ngem nay ay nakasagana tako ed wani ay emey sin lugar ay inkarin Diyos.”

<sup>41</sup> Ngem kanan Moses, “Apay nga adi yo tongpalen din bilin Diyos? Adi kayo mangabak. <sup>42-43</sup> Magas Diyos en dakayo, tan sinigaan yo ay omonod en sisya. Adi kayo ngarud em-emey, tan mo makigobat kayo sin Amalekita ya Canaaneo, abaken ya peslen das dakayo.”

<sup>44</sup> Ngem olay mo siya sa, inpilit da pay dedan ay emey sin kadondontogan, olay mo nataynan sin kampo da si Moses ya din Baol di Tolagan Diyos. <sup>45</sup> Idi siya di, nanballalong din Amalekita ya Canaaneo ay mantetee sin kadondontogan. Linaban da et inabak dan Israelita, isonga kaapayaw dan daida enggana ed Horma.

## 15

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41

## 16

### *Din Basol Da Kora en Datan Ya Si Abiram*

<sup>1</sup> Da Kora, Datan, Abiram ya si On et kinontra das Moses. Si Kora et anak Izar, si Izar ay nay et anak Kohat, yan si Kohat et Levita. Da Datan en Abiram et sin-iyogtan da ay anak Eliab. Si On abe et anak Pelet. Da Datan, Abiram ya si On et polin Ruben. <sup>2</sup> Wada abey 250 ay papangolon di Israelita ay naitapi sin opat ay nay. Da naey ay papangolo et sigod ay nadotokan da ay mangialagey sin gimong et mabigbig di kaipogaw da. <sup>3</sup> Natopog da am-in sin sangoanan da Moses en Aaron et pag dan kanan, “Palalo ay ipapangato yon kaipogaw yo. Am-in met ay Israelita ay naitatapi sin gimong et nasantoan da, et wadas Diyos en datako am-in. Apay nga inbilang yon awak yo ay nangatngato mo din odom ay ipogaw Diyos?”

<sup>4</sup> Sin nanngean Moses sidi, kalakob-o sin lota ay mankararag. <sup>5</sup> Pag nan kanan en da Kora, “Si bigat sin agsapa, ipaammon Diyos en datako mo sino di nasantoan ay ipogaw na ay pinili na ay omasag-en en sisya. Din ipalobos Diyos ay omasag-en sin kad-an di altar et si dooy di pinili na. <sup>6-7</sup> Say onodan yo dana ay Kora ya din gagait mo. Si bigat sin agsapa, man-a kayos pay-an yos man-ganggangab ay oling ya insinso, asi yo iey sin altar sin sangoanan Diyos. Din pilien Diyos en dakayo et sisya di nasantoan. Dakayo et adi ay Levita di palalo ay nangipapangato sin kaipogaw yo!”

<sup>8</sup> Intoloy Moses ay nangibaga en Kora, “Dengngen yo ta waday ibagak en dakayo ay Levita. <sup>9</sup> Din Diyos di Israelita et inlasinas dakayo sin odom ay Israelita ta say dakayo di makasag-en en sisya ay mangamag sin obla sin Tolda ay Panpappailaana. Dakayo di dinotokana ay mangialagey sin gimong ay mansilbi en daida. Apay adi omanay dana en dakayo? <sup>10</sup> Enggay inpangato nas sik-a ya din iib-am ay Levita, tan inpalobos na ay somag-en kayo en sisya. Ed wani layden yo pay laeng ay alaen din turay di kinapadi! <sup>11</sup> Din inkalim ya din inkalin di gagait mo ay maikontra en Aaron et si Diyos di konkontraen yo.”

<sup>12</sup> Pag pinaayagan Moses da Datan en Abiram, ngem kanan da, “Sigaan mi ay omali!

<sup>13</sup> Enggay nalabes di inyat mo, tan inpakaan mos dakami sin maymayat ay daga ed

Egipto ay gomabayan di am-in ay mais-ek ta peslem dakami isnan lugar ay magay omili. Ed wani et yan sepsepem ay mamilibilin en dakami? <sup>14</sup> Adi ka pay inmipango sin sigesiged ay ili ay gomabayan di am-in ay mais-ek ya adi ka pay indawtan dakamis payew ya daga ay nas-ekan si obas. Yan ed wani pay, laydem ay ietekan dakami? Ado paabe na! Adi kami omali!”

<sup>15</sup> Pag et palalo ay binmonget si Moses et kanana en Diyos, “Adi ka aw-awaten di olay sino ay idaton dana ay ipogaw. Maga di inamag ko ay lawa sin olay esa en daida ya maga pay di inak ay olay koman dangki ay talaken da.”

<sup>16</sup> Pag kanan Moses en Kora, “Mo si bigat, masapol ay omali ka ya din 250 ay gagait mo sin Tolda ay Panpappailaan Diyos. Wada abes di si Aaron. <sup>17</sup> Esa ya esa en dakayo et alaena din panpey-ana si man-ganggangab ay oling ya insinso, asi na iey sin altar. Siya abe di iyat Aaron.” <sup>18</sup> Tinongpal da et pag dan man-a si pinay-an das man-ganggangab ay oling ya insinso et en da nakipika en da Moses en Aaron sin segpan di Tolda ay Panpappailaan Diyos. <sup>19</sup> Tinopog aben Kora din intiro ay gimong. Idi wada da ay nakisagang en da Moses en Aaron sin segpan di Tolda, nanpaila et din mankoniniing ay kinadiyos Yahweh sin am-in ay wadas di. <sup>20</sup> Pag kanan Diyos en da Moses en Aaron, <sup>21</sup> “Addawian yo din kaipoipogaw ay sana ta peslek daida ay dagos.” <sup>22</sup> Ngem nandokmog ay nanyakog-ong da Moses en Aaron ay nangwani, “Sik-a ay Diyos di napoan di biyag di am-in ay way leng-ag na. Ay manbonget ka aya sin amin da nan kaipoipogaw olay mo es-esa anggoy di nakabasol?”

<sup>23</sup> Kanan Diyos en Moses, <sup>24</sup> “Ibagam sin kaipoipogaw ta omaddawi da sin toldan da Kora en Datan ya si Abiram.” <sup>25</sup> Kinoyog Moses din papangolon di Israelita ay inmey sin kad-an da Datan en Abiram.

<sup>26</sup> Kanana sin kaipoipogaw, “Omaddawi kayo sin tolda ay kad-an san lawlawa ay ipogaw! Adi yon sagsagiden di kompormi ay bonag da ta adi kayon maitapi en daida ay madosa begew sin basbasol da.” <sup>27</sup> Idi siya di, tinongpal da din inbagan Moses et inaddawian da din tolda ay kad-an da Kora, Datan ya si Abiram. Bimela da Datan en Abiram ya din aasawa ya aan-ak da et pinmika da sin segpan di tolda da. <sup>28</sup> Pag kanan Moses, “Ed wani, say pangammoan yo ay si Diyos di nangibaa en sak-en ay mangamag sin amin dana. Baken sak-en di akin nemnem. <sup>29</sup> Mo matey dana ay ipogaw ay maga di mapasamak ay panosaan Diyos en daida, say pangammoan yo ay adi inbaan Diyos sak-en. <sup>30</sup> Ngem mo wada di nakaskasdaaw ay amagen Diyos ay maga di kais-iso na, say pangammoan yo ay da naey ay ipogaw et linaslasoy ya sinigaan das Diyos. Di mapasamak et man-ekang din lota ay mangokmon en daida ya amin ay sanikwa da, et maonog da ay sibibiyag sin kad-an di natey.”

<sup>31</sup> Idi nakdeng ay inbagan Moses na, nan-ekang din lota ay kad-an da Datan en Abiram. <sup>32</sup> Kaman waday tepek din lota ay nangokmon en daida ya sin pamilya da. Am-in abe din gagait Kora ya din sanikwa da et naitapi da ay inokmon din lota. <sup>33</sup> Sibibiyag da ay inmey ed dallem sin kad-an di natey ay naitapi din amin ay sanikwa da. Nan-omot din lota, et maga da ay mail-ila. <sup>34</sup> Sin nanngedan din odom ay Israelita sin kilalad da, katanagtag da ay kinmaan et kanan da ay nangibogaw, “Dalasen yo tan mo makionog tako!” <sup>35</sup> Idi nakdeng di, wada et di manbidbidang ay apoy ay napo en Diyos, et pag mapoan din 250 ay lalaki ay nangidaton si insinso.

<sup>36</sup> Pag kanan Diyos en Moses, <sup>37</sup> “Ibagam en Eleazar ay anak Aaron ay padi ta ena kaanen am-in din bronsi ay palanggana ay wada sin kad-an di bangkay di napoan ay lalaki ya iwalang na din man-ganggangab ay oling sin natken ay lugar, tan din palanggana ay sana et nasantoan da. <sup>38</sup> Nanbalin da ay nasantoan tan naosal da ay naidatonan di insinso sin sangoanan Diyos. Alaena ngarud din palangganan di lallalaki ay natey begew sin basol da ta pitpitena enggana ay omingpis ta say maamag si pankaleb sin altar. Manbalin ay sinyal ono pannemneman di Israelita.”



<sup>39-40</sup> Idi siya di, tinongpal Eleazar ay padi am-in ay inbilin Diyos en sisya babaen en Moses. Tinopog na am-in din bronsi ay palanggana ay inosal din lalaki ay napooan. Inpapatpit na enggana ay inmingpis et inamag das kaleb di altar. Say mangipanemnem sin Israelita ay maga en daida di mabalin ay man-ipoos si insinso sin sangoanan Diyos malaksid di polin Aaron. Tan mo waday mangipoo, matey ay kaman din napasamak en da Kora ya din gagait na.

### *Din Nangisalamanan Aaron Sin Kaipogaw*

<sup>41</sup> Sin kabigatana, nanriri kasin din am-in ay Israelita en da Moses en Aaron ay nangwani, “Dakayo di namse sin odom ay ipogaw Diyos.” <sup>42</sup> Idi matoptopog da ta say pabasolen das da Moses en Aaron, sinagong da et din Tolda ay Panpappailaan Diyos yan kambaw wada et din liboo ay nanlingeb. Nanpaila abe din mankoniniing ay kinadiyos en Yahweh. <sup>43</sup> Pag emey da Moses en Aaron sin sangoanan di Tolda <sup>44</sup> et kanan Diyos en Moses, <sup>45</sup> “Addawiam dana ay ipogaw ta peslek ay dagos.” Pag et mandokmog da Moses en Aaron ay manyakog-ong.

<sup>46</sup> Kanan Moses en Aaron, “Alaem din palangganam ta pay-am si man-ganggangab ay oling ay mapo sin altar, asi ka pay-an si insinso. Dalasem ay emey sin kad-an di ipogaw ta amagem din seremonia ay manglinis sin basbasol da. Tan enggay inpailan Diyos din bonget na yan nanlogi di kaeegyat ay sakit.” <sup>47</sup> Tinongpal Aaron din inbagan Moses. Ina na din palanggana na et nanagtag ay inmey sin gawan di natotopogan di ipogaw. Enggay nanlogi din sakit ay man-inalis sin kaipogaw, ngem indatona din insinso ta malinisan basbasol da. <sup>48</sup> Din inamag Aaron ay nay di nangipasaldeng sin nateyan di ipogaw yan wadas sisya ay pinmipika sin nan-gagawaan di sibibiyag ya natey ay ipogaw. <sup>49</sup> Sinpo ya opat ay libo ya pito ay gasot di natey ay ipogaw begew sidi ay sakit ay adi maibilang din natey begew sin inamag da Kora. <sup>50</sup> Idi sinmaldeng din kaeegyat ay nay ay sakit, nantaoli si Aaron sin kad-an Moses sin segpan di Tolda ay Panpappailaan Diyos.

## 17

### *Din Sokod En Aaron*

<sup>1</sup> Kanan Diyos en Moses, <sup>2</sup> “Ibagam sin Israelita ta man-a da si sinpo ya doway ay sokod, sag-eesa sin pangolon di sinpo ya doway ay tribu, ta idawat da en sik-a. Isolat mo din ngadan di esa ya esa ay pangolo sin sokod na. <sup>3</sup> Isolat mo abe din ngadan Aaron sin sokod ay mangialagey sin Levita, tan masapol ay waday sag-eesa ay sokod ay napo sin pangolon di am-in ay tribu. <sup>4</sup> Ipeey mo dana sin Tolda ay Panpappailaak sin sangoanan di Baol di Tolagan ay pangab-abatak en sik-a. <sup>5</sup> Tomobo din sokod di ipogaw ay piliek, et say iyat ko ay mangipasaldeng sin kanayon ay panriririan di Israelita ay maikontra en dakayo.”

<sup>6</sup> Siya di nakingalat si Moses sin gagait na ay Israelita et din pangolon di esa ya esa ay tribu yan indawat day sag-eesa ay sokod da, isonga sinpo ya doway am-in mo maitapi din sokod Aaron. <sup>7</sup> Inpeey Moses din am-in ay sokod sin Tolda ay Panpappailaan Diyos sin sangoanan di Baol di Tolagan.

<sup>8</sup> Sin kabigatana, sinenggep si Moses sin Tolda yan inila na ay tinmobo din sokod Aaron ay nangialagey si Levita. Baken owat tinmobo mo adi et nanbonga yan nanlames si naom ay almond. <sup>9</sup> Inbelan Moses am-in din sokod ay napo sin sangoanan Diyos et inpaila na sin Israelita. Inila da din napasamak et esa ya esa yan alaena din sokod na.

<sup>10</sup> Pag kanan Diyos en Moses, “Itaolim din sokod Aaron sin sangoanan di Baol di Tolagan. Masapol ay maidolin na ay sinyal sin komonkontra ay Israelita ta ammoan da ay matey da mo adi da isaldeng ay manmaymayotmot ay maikontra en sak-en.”

<sup>11</sup> Tinongpal Moses din inbilin Diyos.



<sup>12</sup> Idi siya di, kanan din Israelita en Moses, “Enggay et baw sa! Matey kami am-in!  
<sup>13</sup> Tan mo sino di omasag-en sin Tolda ay Panpappailaan Diyos et matey. Adi pay say kateyan tako am-in!”

## 18

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32

## 19

### *Din Dap-on Di Napooan Ay Mandalangdang Ay Bomalasang (19:1-10,14-20)*

<sup>1</sup> Binilin Diyos da Moses en Aaron <sup>2</sup> ay ipaammo da din bilbin ay nay sin Israelita. Kanana, “Man-idawat kayo en da Moses en Aaron si mandalangdang ay bomalasang ay baka ay magay kolang na ya adi pay laeng napakpakoan, <sup>3</sup> ta idawat da en Eleazar ay padi. Pag waday mangiey sin baka sin lasin di kampo, et paltiena sin sangoanan Eleazar. <sup>4</sup> Pag isiwsiw Eleazar din gomot na sin dada na ta iwalsi na sin sangoanan di Tolda si mamin pito. <sup>5</sup> Masapol ay mapooan am-in din partin di animal ay din kopkop, lamlames, dada ya eges ay iniilan di padi. <sup>6</sup> Pag man-a din padi si nabanglo ay kaiw ay makwani en sidro ya pingin di hisopo ya manbalanga ay lopot ta itapi na ay ipoo. <sup>7</sup> Mo makdeng pay di, masapol ay labaana din bado na ya man-ames, asi pag mabalin ay senggep sin kampo, ngem maibilang pay dedan ay kadodogis enggana sin malablabi. <sup>8</sup> Siya abe sin ipogaw ay nangipoo sin baka. Masapol ay labaana din bado na ya boyatana si danom din awak na, ngem maibilang abe ay kadodogis enggana sin malablabi.

<sup>9</sup> “Pag alaen di esay lalaki ay baken maibilang ay kadodogis din dap-on di napooan ay baka ta ipeey na sin lugar ay maibilang ay nalinis sin lasin di kampo. Maigto dana ta say osalen din Israelita ay mangisagana sin danom ay maosal ay panglinis sin maibilang ay kadodogis. <sup>10</sup> Din ipogaw ay mangakop sin dap-o yan masapol ay labaana din bado na, ngem maibilang pay dedan ay kadodogis enggana sin malablabi. Din linteg ay nay et masapol ay on-onodan din Israelita ya mangili ay makitetee en daida si eng-enggana. <sup>11</sup> <sup>12</sup> <sup>13</sup>

<sup>14</sup> “Siya na di linteg ay maonodan mo waday matey sin oneg di pankampoana ay tolda. Olay sino ay ipogaw ay wada sin tolda sin timpon di nateyana ya mo sino abe ay senggep sidi yan maibilang da ay kinmadodogis si pito ay agew. <sup>15</sup> Olay sino abe ay koli ya banga ay baken nakakaleban et maibilang abe ay kinmadodogis.

<sup>16</sup> “Mo wada abe di ipogaw sin lasin di kampo yo ay managid si bangkay di pinse da ono gandat na ay natey ono tong-an di ipogaw ono kaot, maibilang ay kinmadodogis si pito ay agew.

<sup>17</sup> “Din amagen yo ta say madalosan din maibilang ay kinmadodogis et siya dana. Masapol ay man-a kayo si dap-on din manbalanga ay baka ay panglinis ta ipeey yo si koli, asi yon pay-an si danom ay napos obbog. <sup>18</sup> Pag man-a di esay ipogaw ay maibilang ay nalinis si pingin di hisopo ta isiwsiw na sin danom ay sana, asi nan walsian din tolda ya bonbonag ya din amin ay ipogaw ay wadas di. Masapol abe ay walsiana mo waday ipogaw ay managid si tong-an di ipogaw, kaot, pinse da ay ipogaw ono gandat na ay natey. <sup>19</sup> Masapol ay walsian din ipogaw ay maibilang ay nalinis din maibilang ay kinmadodogis sin maikatlo ya maikapito ay agew ta say makdeng ay malinisan sin maikapito ay agew. Sin siya di ay agew, din ipogaw ay kinmadodogis et masapol ay labaana din osal na ya man-ames ta maibilang ay nalinis sin malablabi. <sup>20</sup> Mo din naibilang ay kinmadodogis yan adi na amagen din seremonia ay kalinisana, komakaman ay kadodogis, tan baken nawalsian sin danom ay panglinis. Masapol ay maipowira sin gagait na ay Israelita, tan inpakadodogis na din Tolda ay Panpappailaan Diyos.” <sup>21</sup> <sup>22</sup>

## 20

### *Din Nanbasolan Da Moses En Aaron Ed Kades (20:1-13)*

<sup>1</sup> Sin damo ay bowan, dinmateng din intiro ay gimong di Israelita sin ed Zin ay magay omili et pag dan mankampo ed Kades.\* Isdi ay lugar di nateyan ya naiponponan Miriam. <sup>2</sup> Magay danom sidi, isonga natopog din ipogaw ay manriri en da Moses en Aaron <sup>3</sup> yan kanan da, “Agpos et koma mo naitapi kami ay natey sin toton-od mi ay dinosan Diyos sin sangoanan di Tolda. <sup>4</sup> Apay nga inpangom dakamis nan lugar ay magay omili? Ay kanam en ta isna kami ay matey ya siya abe sin aanimal mi? <sup>5</sup> Apay dedan ay tinon-od yos dakami ed Egipto, asi kayo ipangos dakami isnan lawlawa ay lugar ay maga polos di gomabay ay mola? Maga di bakakew, igos, obas ya granada dowan et maga polos di danom ay inomen!” <sup>6</sup> Tinaynan da Moses en Aaron din kaipoipogaw et inmey da sin segpan di Tolda ay Panpappailaan Diyos. Nandokmog da ay nanyakog-ong, pag da et ilaen din mankoniniing ay kinadiyos en Yahweh.

<sup>7</sup> Pag kanan Diyos en Moses, <sup>8</sup> “Alaem din sokod ay wada sin sangoanan di Baol ta topogen yon Aaron din amin ay Israelita. Mo wada am-in din ipogaw ay mangiila, ngalaten yo din bato ay sana ta bomala di danom. Siya say amagen yo ta say bomala di danom isnan bato ta waday pan-inoman din ipogaw ya din animal da.”

<sup>9</sup> Tinongpal Moses din inbagan Diyos et ina na din sokod. <sup>10</sup> Tinopog da Moses en Aaron din am-in ay Israelita et pag kanan Moses, “Dengngen yo nan ibagak, dakayo ay nariri ay ipogaw! Ay piliten yos dakami ay mangipabala si danom isnan bato ta waday inomen yo?” <sup>11</sup> Idi siya di kaiseppat si Moses si namin dowan sin sokod na sin bato, pag et kabala di ad-ado ay danom, et say nan-inoman din kaipoipogaw ya din animal da.

<sup>12</sup> Ngem niyamyaman Diyos da Moses en Aaron et kanana, “Gapo ta nakapsot di pammati yo yan adi yon binigbig din nasantoan ay panakabalin ko sin pangiilaan di Israelita, baken dakayo di mangipangolo isnan ipogaw ay emey sin daga ay inkarik ay idawat kon daida.”

<sup>13</sup> Napasamak na ed Meriba† ay say nanririan di Israelita en Diyos et say nangi-pailaana sin kinasanto na. <sup>14</sup> <sup>15</sup> <sup>16</sup> <sup>17</sup> <sup>18</sup> <sup>19</sup> <sup>20</sup> <sup>21</sup>

### *Din Nateyan Aaron (20:22-29)*

<sup>22</sup> Pag dan komaan am-in din Israelita ed Kades et sinmawang da sin dontog ay Hor <sup>23</sup> sin beddeng di Edom. Sin isdi, kanan Diyos en da Moses en Aaron, <sup>24</sup> “Adi makasgep si Aaron sin daga ay inkarik ay idawat ko sin Israelita, tan matey sisya gapo ta adi yo inonodan ay dowan din bilin ko sin kawada yo ed Meriba. <sup>25</sup> Ayagam si Aaron ya din anak na ay si Eleazar ta mantikid kayo sin dontog ay Hor. <sup>26</sup> Pag kan kaanen din badon di padi ay inbabadon Aaron ta ipabadom en Eleazar, tan isdi ay matey si Aaron.” <sup>27</sup> Tinongpal Moses din inbilin Diyos, et inilan din am-in ay Israelita din nantikidan da sin dontog ay Hor. <sup>28</sup> Pag kaanen Moses din badon Aaron et inbabado na en Eleazar. Sidi ay natey si Aaron sin toktok di dontog, pag aben manballalong da Moses en Eleazar. <sup>29</sup> Naammoan din intiro ay gimong di Israelita ay natey si Aaron, et nanladingit da si tolonpo ay agew.

## 21

1 2 3

### *Din Sinan Eweg Ay Bronsi (21:4-9)*

\* **20:1** Din bowan ay nay et din damo ay bowan sin maikaopatapolo ay tawen manipod sin kinmaan da ed Egipto. Ed Kades met laeng di kad-an da ed idi sin nantaolian din en nansiim ed Canaan (13:26). † **20:13** Din olog di Meriba et “panririan.”

<sup>4</sup> Idi siya di kinmaan din Israelita sin dontog ay Hor et inonod da din danan ay emey sin Baybay ay Mandalangdang ta say likawen da din ili ay Edom. Ngem sin kawada da sin danan, enggay ay adi makaanos din ipogaw, isonga <sup>5</sup> nanriri da en Diyos ya en Moses. Kanan da, “Apay nga inpangom dakami ay komaan ed Egipto ta say matey kamis nan lugar ay magay omili ay maga di makan ya mainom? Enggay naoma kamis nan makan ay lawlaw.”

<sup>6</sup> Idi siya di pag et ipawadan Diyos di nagitaan ay kaeweeweg sin kad-an da et ad-ado di natey tan kinat da. <sup>7</sup> Pag emey din ipogaw sin kad-an Moses et kanan da, “Nanbasol kami kayman begew sin kinali mi ay maikontra en Diyos ya en sik-a. Ngem pangaasim kod ta ikararag mon Diyos ta pakaanena da nan eweg isnan kad-an tako.” Idi siya di inkararagan Moses din ipogaw. <sup>8</sup> Pag bilinen Diyos si Moses ta man-amag si sinan eweg ay bronsi ta itakap na si posti ta mo sino di katen di eweg yan tangadena di et maagasan. <sup>9</sup> Tinongpal Moses, et nan-amag si sinan eweg ay intakap na si posti, yan tet-ewa ay am-in din kinat di eweg ay nanangad isdi yan naagasan da.

### *Din Nangabakan Di Israelita En Da Sihon En Og*

Pag intoloy din Israelita ay mandad-an enggana ay somawang da sin ilin di Amorreo. Dinamag da en Sihon ay arin di Amorreo mo mabalin ay mandan da sin ili na, ngem sinigaana et en nakigobat sin Israelita. Begew sin badang Diyos, dadlon inabak din Israelita si daida yan inoka da din ili da. Siya abe di napasamak en da Og ay ari ed Basan. (21:10-35)

10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35

## 22

### *Din Nangayagan Din Ari Ed Moab En Balaam* (22:1-20)

<sup>1</sup> Idi siya di, intoloy din Israelita ay nandad-an enggana ay domateng da sin tanap ed Moab sin igid di ginawang ay Jordan sin demang na ed Jerico. Et nankampo das di.

<sup>2</sup> Sin timpo ay doy, wada di ari ed Moab ay manngadan si Balak ay anak en Zippor. Idi nadamag na din kaad-adon di Israelita ya din inyat da ay nangabak sin Amorreo, <sup>3</sup> palalo di egyat na et siya abe sin ipogaw ay iturayana. <sup>4</sup> Idi siya di kanan din Moabita sin papangolo ed Midian, “Awni kadi et abosen da nan ad-ado ay ipogaw am-in ay wadas nan kad-an tako ay kaman dan baka ay man-alab sin pastolan.” <sup>5</sup> Pag man-ibaa si Balak si en mangayag en Balaam ay anak en Beor ay wada ed Petor ay asag-en di ginawang ay Eufrates sin ili ed Amaw. Kanana ay nangibaga, “Laydek ay ammoam ay wada di kaipoipogaw ay napo ed Egipto ay napno da sin inil-ili et nankampo da sin dagdagas di ili mi. <sup>6</sup> Palalo ay ad-ado da mo dakami, isonga pangaasim ta omali ka ta baosam daida ta say abaken mi ya pakaanen mis daida. Ammok ay mo waday bindisyonam ay ipogaw et temet-ewa ay mabindisyonan yan mo waday baosam et mabaosan abe.”

<sup>7</sup> Inmey din papangolon di Moabita ya Midianita et intakin da di pilak ay ilagbo da en Balaam ta baosana din Israelita. Idi sinmawang da sin kad-an Balaam, inbaga da en sisya din inbagan Balak. <sup>8</sup> Pag kanan Balaam, “Maseyep kayos na ed wani ay labi ta mo si bigat, ibagak en dakayo mo sino di inbagan Diyos en sak-en.” Isonga naseyep din papangolo ay sana sin beey Balaam.

<sup>9</sup> Sin labi ay doy, nginalat Diyos si Balaam ay kanana, “Ay sino nan lallalaki ay sangailim?”

<sup>10</sup> Sinbat Balaam ay kanana, “Inbaan Balak ay ari ed Moab ta ibaga dan sak-en <sup>11</sup> ay wada di ad-ado ay ipogaw ay napo ed Egipto ay napno sin intiro ay daga. Laydena ay enak baosan daida ta say abakena ya pakaanenas daida.”

<sup>12</sup> Pag kanan Diyos en Balaam, “Adi ka makiey en daida ya adi ka aben babbaosan din Israelita, tan nakdeng ay binibindisyonak daida.”

<sup>13</sup> Sin kabigatana, inmey si Balaam sin kad-an di inbaan Balak et kanana, “Somaa kayo et, tan adi palobosan Diyos sak-en ay maikoyog en dakayo.” <sup>14</sup> Pag dan mantaoli sin kad-an en Balak et inbaga da ay adi layden Balaam ay makiey en daida.

<sup>15</sup> Idi siya di, nan-ibaa kasin si Balak si papangolo ay ad-ad-ado ya nangatngato di saad da mo din nangon-ona ay inbaa na. <sup>16</sup> Inmey da en Balaam et inpaammo da na ay inbagan Balak: “Pangaasim kod ta dadlon kan omali. <sup>17</sup> Ad-ado di idawat kon sik-a ay gon-gona ya tongpalek am-in ay ibagam. Omali ka koma ta baosam da dooy ay ipogaw.”

<sup>18</sup> Ngem kanan Balaam, “Olay mo idawat Balak en sak-en di am-in ay palata ya balitok ay wada si palasyo na, adiak mabalin ay labsingen si olay at-atik din bilin Yahweh ay Diyos ko. <sup>19</sup> Ngem olay mo siya sa, maseyep kayos na ed wani ay labi ay kaman din inyat di namangpango ay naibaa ta say maammoak mo wada pay di odom ay ibagan Diyos en sak-en.”

<sup>20</sup> Sin labi ay doy, nakingalat kasin si Diyos en Balaam et kanana, “Gapo ta inmali din lallalaki ay nay ta en daka ayagan, mansagana ka ta makiey ka, ngem din ibagak anggoy di tongpalem.”

### *Din Nankalian Din Dangkin Balaam (22:21-35)*

<sup>21-22</sup> Sin kabigatana, nakiey si Balaam sin papangolon di Moabita ay kakoyog na din dow a ay baa na. Ngem manbonget si Diyos begew sin nakieyan Balaam. Isonga idi wadas da Balaam sin danan ay nangakabayo sin dangki na, wada din anghel Diyos ay pinmipika ta sawadenas sisya. <sup>23</sup> Idi ilaen pay din dangki din anghel ay pinmipika ay nananggen si kampilan, nanliglig sin danan et kinombas sin papayew. Sinoplit Balaam din dangki et inpataoli na sin danan. <sup>24</sup> Pag man-etan din anghel sin nailipitan di danan sin nan-gawaan di dow a ay inobasan ay naaladan si batog. <sup>25</sup> Idi ilaen din dangki din anghel, nansaldet sin batog et naipit din sakin Balaam, isonga sinoplit na kasin. <sup>26</sup> Namangpango kasin din anghel et en pinmipika sin nailipitan di danan ay maga polos di pandanan sin nanbinas-il. <sup>27</sup> Idi siya et di, idi ilaen din dangki din anghel yan kalakpap. Binmonget si Balaam et nilogiana ay sopliten din dangki sin sokod na. <sup>28</sup> Pag pankalien Diyos din dangki et kananan Balaam, “Ay sino ngin di inamag ko si gapo ay sinmoplitam si namitlo?”

<sup>29</sup> Kanan Balaam, “Aw a, tan panbalbalinem sak-en ay kaman magay nemnem na. Kaman et mo way intakin kos kampilan ta peslek sik-a ed wani!”

<sup>30</sup> Kanan din dangki ay sinombat, “Ay baken ayan sak-en met laeng din dangki ay nangabkabayoam ed idi engganad wani? Ay wada aya di inam-amag kos kaman nina ed idi en sik-a?”

Et kanan Balaam, “Iwed met kitdi.”

<sup>31</sup> Pag ipailan Diyos en Balaam din anghel na ay pinmipika sin danan ay nananggen si kampilan, isonga kalakpap si Balaam sin lota. <sup>32</sup> Kanan din anghel, “Apay nga sinoplit mo din dangkim si namitlo? Inmaliak ay manawad en sik-a, tan baken kosto mo emey kas di. <sup>33</sup> Inmala din dangkim et namitlo ay nilisianas sak-en. Mo adi nanlisi et sigurado ay pinsek sik-a koma yan binay-ak pay sisya!”

<sup>34</sup> Pag kanan Balaam sin anghel, “Nanbasolak kayman. Adiak ammo ay wada ka ay pinmipika sin danan ta sawadem sak-en. Mantaoliak adi mo kanam en lawa di emeyak isdi.”

<sup>35</sup> Ngem kanan din anghel, “Mabalin ay makiey ka sin lallalaki ay nay, ngem say ibagam et enggay din itogon ko en sik-a ay ibagam.” Idi siya di nakeey si Balaam en daida. <sup>36 37 38 39 40 41</sup>

## 23

1 2 3 4 5 6

### *Din Damo Ay Inpadton Balaam* (23:7-12)

<sup>7</sup> Et siya dana di inpadton Balaam:  
“Inmayag din ari ed Moab ay si Balak.  
Din kadondontogan ed Syria sin naibanda si belaan di agew di napoak.  
Kanana, ‘Omali ka ta baosam din Israelita.’

<sup>8</sup> Ngem kanak abe en sisya:  
Ay mabalin aya ay baosak din adi binaosan Diyos ay namarsua  
ono mankaliak si lawa ay maikontra en daida  
yan si Diyos pay et maga di inkeddeng na ay dosa da?

<sup>9</sup> Mo wadaak sin kadondontogan, tamtamangek daida,  
manipod sin kabatbatoan et os-osdongak daida.

Daida di nasyon ay omalagey si bokbokod da,  
tan naitken da, waday nanlasinan da.

<sup>10</sup> Din Israelita et kaman tapok di kaiarigan da,  
tan adi kabilang di kaad-ado da.

Mo mateyak yan sapay koma  
ta kaman met laeng din kateyan da  
ay nalinteg di kabibiyag da.”

<sup>11</sup> Pag et kanan Balak en Balaam, “Apay ngin sas inamag mo? Inayagak sik-a ta say  
baosam din kaibaw ko, ngem din inamag mo et binindisyonam daida.”

<sup>12</sup> Sinombat si Balaam yan kanana, “Din inbagan anggoy Diyos en sak-en di mabalin  
ay ibagak.” <sup>13 14 15 16 17 18 19 20 21 22 23 24 25 26 27 28 29 30</sup>

## 24

### *Di Odom ay Inpadton Balaam* (24:2-7,15-17)

Inpidwapidwan Balak ay mangawis en Balaam ta baosana koma din Israelita, ngem  
pag bindisyon di inpadto na. Da naey di tapin di maikatlo ya maikap-at ay padto na.  
(23:13-24:1)

<sup>1 2</sup> Tinamang Balaam din Israelita ay natopotopog din kampon di esa ya esa ay tribu.  
Siya et di, sin-gep din Ispiriton Diyos sisya <sup>3</sup> yan kanana ay nan-ipadto, “Siya na di  
ipadton Balaam ay anak Beor ay nalawag di pangila na <sup>4</sup> ya makadnge sin ibagbagan  
Diyos. Adiak naseyep yan inilak di kaman iitaw ay inpailan Diyos ay Manakabalin Am-  
in. Siya na di inilak: <sup>5</sup> Mapmapteng din tolda ay panbebbeeyan di Israelita. <sup>6</sup> Maiarig das  
annawa ay kakakkaiwan ay palma ya garden sin benget di ginawang. Kaman da aben  
manseng-ew ay kaiw ay makwani en aloe ay inmolan Diyos ya kaman dan nakayang  
ay sidro sin benget di danom. <sup>7</sup> Mansobsobran to di danom da, isonga masibsibogan  
ay kosto din imola da. Nangatngaton to din ari da mo si Agag ya maidayaw din  
panturayana.” <sup>8 9 10 11 12 13 14</sup>

<sup>15</sup> Idi makdeng di, inpadto na abe na, “Siya na di ipadton Balaam ay anak Beor ay  
nalawag di pangila na <sup>16</sup> ya makadnge sin ibagbagan Diyos ay Kangatoan ya nakaawat  
sin inpaammo na. Waday inpailan Diyos ay Manakabalin Amin idi binmabaktadak,  
ngem adiak naseyep. <sup>17</sup> Il-ilaek din mapasamak ed Israel sin tapin di agew. Wadan to  
di ari ay bomala ed Israel ay kaman talaw ono bolalakaw di koniniing na. Abakena din  
sosoldadon di Moab ya am-in ay an-ak Set.” <sup>18 19 20 21 22 23 24 25</sup>

### *Din Maikadwa Ay Sinsos Di Israelita*



Sin nantetean din Israelita sin tanap ed Moab, inawis Balaam di odom ay lallalaki ta en da makidaag si babbabai ay Moabita ya Midianita. Nakisida da abe sin man-ilis di ya nakidayaw da sin diyos da ay Baal. Begew sin basbasol da ay doy, dinosan Diyos daida et 24,000 di natey.

Idi nakdeng di, inbilin Diyos en da Moses en Eleazar ay bilangen da kasin din Israelita ay mantawen si dowanpo ono nasurok ay mabalin ay makigobat. Din kabibilang di esa ya esa ay tribu et: Ruben-43,730; Simeon-22,200; Gad-40,500; Juda-76,500; Issakar-64,300; Zebulun-60,500; Efraim-32,500; Manasses-52,700; Benjamin-45,600; Dan-64,400; Aser-53,400; Naftali-45,400. Din kabibilang da am-in et 601,730. Inbilin Diyos ay mo okaen da din daga ay inkari na, maibasas din bingay di esa ya esa ay tribu sin kabibilang da. (25:1-9; 26:1-65)

## 25

1 2 3 4 5 6 7 8 9 10 11 12 13 14 15 16 17 18

## 26

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52

## 27

1 2 3 4 5 6 7 8 9 10 11

### *Din Kadotokan En Josue Ay Manokat En Moses (27:12-23)*

<sup>12</sup> Pag kanan Diyos en Moses, “Manikid ka sin dontog ay Abarim ta en ka tamangen din daga ay idawat ko sin Israelita. <sup>13</sup> Mo makdeng ay ilaem et matey ka abe ay kaman si Aaron ay manong mo, <sup>14</sup> tan adi yo inonodan din bilin ko sin lugar ay magay omili ed Zin. Idi nanriri din ipogaw en sak-en, adi yo binigbig din nasantoan ay panakabalin ko sin pangiilaan di kaipoipogaw.” (Meriba din ngadan di obbog ed Kades sin lugar ay magay omili ed Zin.)

<sup>15</sup> Kanan Moses, <sup>16</sup> “Sik-a ay Yahweh, Diyos ay poon di biyag di am-in ay way leng-ag na, sapay koma ta mandotok kas pangolon da nan ipogaw <sup>17</sup> ay kabaelana ay mangipango en daida sin am-in ay am-amagen da, ta say din ipogaw mo yan baken dan kaman karnero ay maga di mangayowan en daida.”

<sup>18</sup> Pag kanan Diyos en Moses, “Piliem si Josue ay anak Nun tan kabaelana, et ikapay mo din takkay mo sin toktok na ay mangipaila ay sisya di napili ay mangipangolo. <sup>19</sup> Ipapikam sin sangoanan Eleazar ay padi ya sin intiro ay gimong ta say ipaammom en daida ay sisya di maiskat en sik-a. <sup>20</sup> Ibingay mon sisya din odom ay lebbeng mo ta say tongpalen din am-in ay Israelita. <sup>21</sup> Si Eleazar di pangammoana sin am-in ay panlaydak babaen sin pangosalana sin Urim ya Tummim.\* Si naey di amagen Eleazar ay mangitdo en Josue ya din am-in ay Israelita sin am-in ay amagen da.”

<sup>22</sup> Tinongpal Moses din inbilin Diyos en sisya et inpapika na si Josue sin sangoanan Eleazar ay padi ya sin intiro ay gimong. <sup>23</sup> Inkapay na din takkay na sin toktok Josue, et pag nan ipaammo ay si Josue din maiskat en sisya.

### *Maodi Ay Bilbilin*

Idi nakdeng di, inpidwan Diyos ay nangibaga en Moses sin bilbilina ay maipanggep sin datdaton ya fiesta ay onodan koman din Israelita. Pag nan ibilin ay en da gobaten din Midianita ta madosa da begew sin nakidaagan di babbabai da sin lallalaki ay Israelita. Idi siya di, inmey nakigobat di sagsisinlibo ay lalaki ay napo sin sinpo ya doway ay tribu,

\* **27:21** Din Urim ya Tummim et siya dana di kinittoy ay bato ay pangammoan din kangatoan ay padi mo “aw” ono “aga” di songbat Diyos sin salodsod na. Os-osalena dana mo waday problima ono mapasamak ta say pangammoana mo sinoy layden Diyos ay amagen din Israelita.

et dadlon dan inabak din Midianita. Pinse da din lima ay ari da ya am-in ay soldado da. Pinse da abe si Balaam ay anak Beor ya am-in din babbabai ay nakibasol sin Israelita.

*Maodi Ay Bilbilin*

Idi nakdeng di, inmey din papangolon di tribun Ruben ya Gad ya din kagodwan di tribun Manasses en Moses ta kedawen da din daga ay maibanda sin belaan di agew di ginawang ay Jordan. Layden da ay okaen din daga ay doy gapo ta siged ay panpastolan, tan ad-adoy karnero ya kalding da. Kanan Moses en mabalin ay man-ili das di, ngem masapol ay makiagadang da on-ona sin ginawang ay Jordan ta badangan da din iib-a da ay Israelita ay mangabak sin kaibaw da. Siya di naibingay din daga sin belaan di agew ed Jordan sin dow a ya kagodwa ay tribu. Naibingay abe din wada sin bas-il di Jordan sin nabay-an ay siyam ya kagodwa ay tribu. Mo din Levita et inbilin Diyos ay ibingayan di esa ya esa ay tribu si ili ya panpastolan ay okaen da. (28:1-31; 29:1-40; 31:1-18; 32:1-33; 35:1-3)

**28**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31

**29**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40

**30**

1 2 3 4 5 6 7 8 9 10 11 12 13 14 15 16

**31**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51

**32**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42

**33**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51

**34**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29

**35**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34

**36**

1 2 3 4 5 6 7 8 9 10 11 12 13

## Deuteronomio Maipanggep Sin Libro Ay Nay

Din libro ay Deuteronomio et naolnos ay pamagbaga ono diskurson Moses sin Israelita sin kawada dad Moab idi nakdeng di nan-etaetanan da sin lugar ay magay omili ya dandani di senggapan da ed Canaan. Enggay natey din katawenan Moses ay nanrirriri ya nangonkontra en Diyos, et layden Moses ay masasagana din aan-ak ya aap- o da ay en da okaen din ili ay inkarin Diyos en daida.

Ipanemnem na en daida din nakaskasdaaw ay inam-amag Diyos para en daida. Pag nan itdo en daida din Sinpo ay Bilin ya odom ay linteg ay intolag Diyos sin Israelita sin dontog ay Sinai. Ipanemnem na en daida din bindisyon ay lak-amen di manongtongpal ya din dosa ay nam-osen di manglablabsing ya bagaanas daida ta dadlon dan onodan ya laylayden si Yahweh ay Diyos da. Pag nan sinag-eesa ay binindisyonan din sinpo ya dow a ay tribu ya dotokanas Josue ay maisokat en sisya.

Din kapapatgan ay versikulo sin libro ay nay et 6:4-6 ay siya din kapapatgan ay bilin ay maibagabaga sin Baro ay Tolag: “...Imongsan yo din am-in ay nemnem, bikas ya laing yo ay manglaylayad en Yahweh ay Diyos yo...”

### **Din Linaona**

Din nangipanemneman Moses sin Israelita sin inam-amag Diyos para en daida 1:1-4:43

Din intolag Diyos sin kaipoipogaw 4:44-28:68

Mabagaan din kaipoipogaw ta onodan da din intolag Diyos 29:1-30:20

Din maodi ay pamagbagan Moses ya din nateyana 31:1-34:12

### *Din Panlogian Di Libro*

*(1:1-8)*

<sup>1-5a</sup> Naisolat sin libro ay nay din inbagbagan Moses sin Israelita sin kawada da sin tanap ay magay omili sin lak-am di Moab ay naibanda si belaan di agew sin ginawang ay Jordan. Din kosto ay kad-an da yan asag-en ed Suf ay nan-gawaan di Paran, Tofel, Laban, Hazerot ya Dizahab. <sup>2</sup> Sinpo ya esa ay agew di pandad-anan manipod sin dontog ay Sinai enggana ed Kades Barnea mo idan sin kadondontogan ay ili ed Edom. <sup>3</sup> Sin damo ay agew di maikasinpo ya esa ay bowan sin maikaopatapolo ay tawen manipod sin kinmaan an da ed Egipto, inbagan Moses din amin ay inbilin Diyos ay ibaga na en daida. <sup>4</sup> Napasamak na idi nakdeng ay inabak da Moses da Ari Sihon ay Amorreo ay mangituray ed Hesbon ya si Og ay ari ed Basan ay mangituray ed Astarot ya Edrei. <sup>5b</sup> Dadlon inpalawag Moses da nan linteg Diyos ay nangwani, <sup>6</sup> “Sin kawada tako sin dontog ay Sinai, kanan Yahweh ay Diyos tako, ‘Aped na ay nabayag di nantean yo sin kad-an di dontog ay sana. <sup>7</sup> Topien yo din tolda yo ta manlobwat kayo. Emey kayo sin kadondontogan ay panbeeyan di Amorreo ya siya abe sin nandinmang ay il-ili: din tanap ed Jordan, din kadondontogan ya nababa ay bilbilig, din abagatan di Canaan ya din benget di baybay ay Mediterranean. Emey kayo abe ed Canaan, ed Lebanon enggana sin dakdake ay ginawang ay Eufrates. <sup>8</sup> Sak-en ay Diyos yo et insapatak ay idawat ko am-in din daga ay nay sin ap-apo yo ay da Abraham en Isaac ya si Jacob ya siya abe sin poli da. En kayo et okaen.’ ”

Pag dad-aten Moses di maipanggep sin sinpo ya dow a ay en nansiim ed Canaan, din nangaan di kaipoipogaw ay en mangobat sin man-ilis di, ya din nanliklikedan da sin lugar ay magay omili enggana ay natey am-in din mantawen si downanpo ono nasurok ay makabael ay makigobat sin timpon di damo ay sinsos. (1:19-2:15)

9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46

## 2

1 2 3 4 5 6 7 8 9 10 11 12 13 14 15

### *Din Dagan Di Polin Lot* (2:16-19)

<sup>16</sup> Intoloy Moses ay nangwani, “Idi natey amin din enggay makabael ay makigobat sin timpo ay kinmaan da ed Egipto, <sup>17</sup> kanan Diyos en sak-en, <sup>18</sup> ‘Malabas kayo ed wani ed Ar ay sakop di Moab. <sup>19</sup> Asag-en kayo sin ilin di Ammonita ay polin Lot, ngem adi yon palpaligaten ono gobgobaten daida, tan maga polos di idawat kon dakayo sin sakop di ili da, tan nakdeng ay indawat ko en daida.’ ” <sup>20</sup> <sup>21</sup> <sup>22</sup> <sup>23</sup>

### *Din Naabakan Ari Sihon* (2:24-37)

<sup>24</sup> “Idi nalabas tako ed Moab, kanan Diyos en datako, ‘Agadangen yo ed wani din ginawang ay Arnon tan nay ay ipalobos ko ay abaken yo din Amorreo ay si Sihon ay ari ed Hesbon ta okaen yo din ili na. Gobaten yo ta ilogi yo ay okaen din iturayana ay ili. <sup>25</sup> Ed wani ay agew, ilogik ay paegyaten en dakayo din amin ay ipogaw isnan intiro ay daga. Gapo sin madamag da maipanggep en dakayo et manpayegpeg das egyat da sin domatngan yo.’ <sup>26</sup> Idi wada tako ed Kedemot, waday inbaak en Ari Sihon ay mangituray ed Hesbon, ay mangipaammo sin siged ay nemnem tako en daida. Siya na di inpaibagak, <sup>27</sup> ‘Ipalobos mo kod ay malabas kami isnan ilim. Laton ay mantartaros kami sin kalsada ay baken oway di em-emeyan mi sin lak-am di iturayam. <sup>28</sup> Amin abe ay kanen ya inomen mi ay mapo en dakayo yan bayadan mis kosto. Say kedawen mi anggoy din pamalobos mo ay mandan kami isnan ili yo <sup>29</sup> enggana ay agadangen mi din ginawang ay Jordan ta emey kami sin ili ay indawat Yahweh ay Diyos mi en dakami. Ipalobos mo koma ay kaman din inyat di polin Esau ed Seir\* ya din polin Moab ay man-ili ed Ar.’ <sup>30</sup> Ngem adi pinalobosan Ari Sihon si datako, tan inpakenteg Diyos din nemnem na ta way iyat Diyos ay mamadang en datako ay mangabak en sisya ta okaen tako din ili na ay sinakop tako pay laeng engganad wani. <sup>31</sup> Idi siya di, kanan Diyos en sak-en, ‘Ed wani ay agew, ipolang ko en dakayo da Sihon ta abaken yo, isonga ilogi yo ed wani ay okaen din ili na.’ <sup>32</sup> Idi inmabat da Sihon ya din sosoldado na ed Jaas, <sup>33</sup> ginobat tako et pinse takos sisya ya din an-ak na ya din amin ay sosoldado na, tan indawtan Diyos datako si pigsa ay mangabak en daida. <sup>34</sup> Inabak tako amin din ili ay sakop di iturayana et pinse tako amin ay ipogaw isdi, amin ay lallalaki, babbabai ya anan-ak, isonga maga polos di nabay-an en daida. <sup>35</sup> Ngem ina tako din aanimal ya odom ay sanikwa da. <sup>36</sup> Begew sin pigsa ay indawat Diyos, inabak tako am-in din il-ili manipod ed Aroer enggana sin inil-ili sin benget di tanap ed Arnon ya olay sin siyodad isdi enggana ed Gilead. Maga polos di ili ay adi tako inabak, olay nabaked di alad na. <sup>37</sup> Ngem inbilin Diyos ay adi tako emey sin ilin di Ammonita ya din ili sin benget di ginawang ay Jabbok enggana sin il-ili sin kadondontogan, isonga say tinongpal tako.”

## 3

1 2 3 4 5 6 7 8 9 10 11 12 13 14 15 16 17 18 19 20 21 22

### *Din Nanamangan Moses Sin Daga Ay Inkarin Diyos* (3:23-28)

<sup>23</sup> “Sin doy ay timpo, nanpakaasiak en Diyos ay nangwani, <sup>24</sup> ‘Diyos ay Kangatoan, nay nilogiam ay ipaila en sak-en ay baam din kinangatom ya panakabalin mo. Maga polos di odom ay diyos ed langit ono isnan daga ay makaamag sin nakaskasdaaw ay inamag mo. <sup>25</sup> Ipalobos mo kod ay agadangek din ginawang ay Jordan ta ilaek din siged

\* **2:29** Di esa abe ay ngadan Seir et Edom.

ay ili sin bas-il na ay din mayat ay kadondontogan ya ed Lebanon.’<sup>26</sup> Ngem gapo dedan en dakayo et inbonget Diyos sak-en, isonga adi na inpalobos ay madmangak. Kanana en sak-en, ‘Kosto! Adi ka kasin ibagbaga sa.’<sup>27</sup> Mantikid ka et sin dontog ay Pisga ta tamangem din manniliked sin amin ay banda. Owat kan tamangen din ili ay inkarik, tan adiak ipalobos ay agadangem din ginawang ay Jordan.<sup>28</sup> Isonga dotokam si Josue ya papigsaem din nemnem na ta say maisokat en sik-a ay mangipangolo sin ipogaw ta okaen da din daga ay tamangem.’ ”<sup>29</sup>

## 4

### *Din Pamagbagan Moses Ay Managtongpal Din Israelita (4:1-14)*

<sup>1</sup> Pag itoloy Moses ay nangwani, “Dakayo amin ay Israelita, dengngen yo da nan linteg Diyos ay itdok en dakayo. Tongpalen yo dana ta say matago kayo ya okaen yo din ili ay idawat Yahweh ay Diyos di ap-apo tako en dakayo.<sup>2</sup> Adi yon taptapian ono kolkolangan da nan bilbilin Diyos ay ibagak en dakayo.<sup>3</sup> Dadlon yo met inila din napasamak ed Baal Peor sin nanosaan Diyos sin amin ay gagait yo ay nandayaw en Baal ay sinan didiyos di taga-Peor,<sup>4</sup> ngem binay-ana pay dakayo am-in ay nangipapati ay adi nanokog en sisya, isonga nay deda ay sibibiyag kayo ed wani.

<sup>5</sup> “Initdok amin din linteg Diyos ay inbilina ay itdok en dakayo ta tongpalen yo mo domateng kayo sin ili ay en kayo gobaten ta okaen yo.<sup>6</sup> Esten yo ay onodan dana ay linteg, et dayawen din am-in ay nasyon si dakayo, tan mo dengngen da di maipanggep en dana ay linteg et kanan da, ‘Magay makaiso si nemnem ya laing dana ay ipogaw.’<sup>7</sup> Maga polos di odom ay ili ay mais-o di diyos da en Diyos tako, olay intoy kadakdake na ay ili. Tan si Diyos ay daydayawen tako et asag-en en datako ay manongsongbat sin kararag tako mo kasapolan tako din badang na.<sup>8</sup> Maga abe di makaiso sin kinalinteg di bilbilin Diyos ay itdok en dakayo ed wani ay agew.

<sup>9</sup> “Ngem ilaen yo ta esten yo ay nemnemnemen din amagen yo ta adi yon polos linglinglingan amin din inil-ila yo. Itdo yo sin anak ya apo yo<sup>10</sup> din maipanggep sin agew ay doy ed Sinai\* idi nasinop kayo sin sangoanan Diyos sin nangwaniana en sak-en, ‘Sinopem din kaipoipogaw ta dengngen da din ibagak ta say maitdoan da ay mangegyay ya mangipateg en sak-en sin intiro ay biyag das nan daga ya say itdo da abe sin anak da.’<sup>11</sup> Et doy ay sinmag-en kayo sin poon di dontog ay nililikmot di mangitit ay asok ya naposkol ay liboo ay say kad-an di apoy ay enggay kaman domateng ed daya di bidang na.<sup>12</sup> Daddad-aten yo din inyat na ay nakikali en dakayo ay kaman mapmapo din kali na sin kad-an di apoy, et dinnge yo ngem adi yon inila di iso na.<sup>13</sup> Inbaga nan dakayo ay tongpalen yo din sinpo ay bilin ay insolat na si doway ay nadampilak ay bato, tan say iyat yo ay manongpal sin intolag na en dakayo.<sup>14</sup> Sin doy ay timpo, binilin Diyos sak-en ta itdok en dakayo din linteg na ta say onodan yo mo domateng kayo sin daga ay dandani ay datngen yo ta okaen yo.”

### *Maiparit Din Pandaydayawan Si Sinan Didiyos (4:15-24)*

<sup>15</sup> “Magay inila yo si olay sino ay kais-oan Diyos sin nakikalkaliana en dakayo sin kad-an di apoy sin dontog ay Sinai.<sup>16</sup> Isonga siliban yo ta adi kayon bomasol ay man-amag si sinan ip-ipogaw ay lalaki ono babai,<sup>17-18</sup> ono mais-o di ila na si olay sino ay animal, mankodkodap, manbodbodod, titit ono nigay.<sup>19</sup> Adi kayon masolsolisog ay mandayaw si olay sino ay matangad ed daya ay kaman din agew, bowan ya talaw ay tinodingan Diyos para sin am-in ay ipogaw isnan daga.<sup>20</sup> Tan insalakan pay Diyos si dakayo sin palalo ay nanligligatan yo ed Egipto ta maikasin kayo ay ipogaw na ay kaman ed wani.

\* **4:10** Din kanana sin Hebreo et: Horeb. Di esa ay ngadana et Sinai.



<sup>21</sup> Begew en dakayo, inbonget Yahweh ay Diyos takos sak-en,<sup>†</sup> isonga insapata na ay adiak makaagadang sin ginawang ay Jordan et adiak makadateng sin ili ay ipatawid na en dakayo. <sup>22</sup> Mateyak isna ay ili et adiak makaagadang ed Jordan, ngem dakayo pay et dandani ay man-agadang kayo et okaen yo din mayamayay ay ili ay idawat Diyos en dakayo. <sup>23</sup> Ilaen yo ta adi yon linglinglingan din intolag Yahweh ay Diyos yo en dakayo. Adi kayo polos man-am-amag si olay sino ay daydayawen yo, <sup>24</sup> tan inayan si Diyos ay kaman manbidang ay apoy yan iparit na ay waday ikadkadwa yo en sisya ay daydayawen.” <sup>25 26 27 28 29 30 31</sup>

*Si Yahweh Anggoy Di Diyos  
(4:32-40)*

<sup>32</sup> Intoloy Moses ay nangwani, “Nemnemen yo kod din napasasamak ed nabaon sin daan yon bomalaan. Olay damagen yo si amin ay solin di daga. Manlogi sin namarsuaan Diyos si ipogaw enggana ed wani, ay wada aya di napasamak ay kaman din nakaskasdaaw ay napasamak en dakayo? <sup>33</sup> Magay odom ay nasyon si nakadnge sin kalin Diyos ay mapmapo sin kad-an di apoy yan nabiyag pay laeng. <sup>34</sup> Magay odom ay diyos ay nangisalakan ay mismo si ipogaw na ay binag-en di odom ay nasyon ay kaman din inila yo ay inyat Yahweh ay Diyos tako ed Egipto. Inpaila na din panakabalina begew sin nakaskasdaaw ya kaeegyay ay inam-amag na ya din namadpadasana en datako ya nanalsalaknibana en datako sin gobatan. <sup>35</sup> Inpailan Yahweh amin da nan nakaskasdaaw ay nay ta paneknekanan dakayo ay sisya anggoy di Diyos ay magay odom. <sup>36</sup> Dinnge yo din kali na ay mapmapod daya ta bagaanas dakayo. Isnan daga abe yan inpaila na din kaeegyay ay apoy ay nangipaamos kawada na et dinnge yo din kali na ay mapmapo sin kad-an di apoy ay sana. <sup>37</sup> Gapo sin layad na sin ap-apo yo, siya din gapo ay pinili nas dakayo ya sisya ay mismo di nangipango en dakayo ay komaan ed Egipto babaen sin nakaskasdaaw ay panakabalina. <sup>38</sup> Inpakaana di ipogaw ay napigpigsya ya ad-ad-ado mo dakayo sin il-ili da ta ipatawid na en dakayo ay kaman ed wani. <sup>39</sup> Isonga ed wani ay agew, nemnemen yo ta adi yon linglingan ay magay odom si Diyos ed langit ya isnan daga. <sup>40</sup> Onodan yo din nay bilbilina ay ipalawag ko en dakayo ta say mayat di biyag yo ya siya abe sin an-ak yo ya itoltoloy yo ay mantee sin daga ay idawat Yahweh ay Diyos yo en dakayo si eng-enggana.” <sup>41 42 43 44 45 46 47 48 49</sup>

## 5

*Din Sinpo Ay Bilin  
(5:1-21)*

<sup>1</sup> Pinaayagan Moses din kaipoipogaw, et idi nasinop da amin, kanana, “Dakayo am-in ay Israelita, dengngen yo nan bilbilin ya linteg Diyos ay ibagak en dakayo ed wani ay agew ta dadlon yon ad-adalen ya on-onodan. <sup>2</sup> Wada di intolag Apo Diyos en datako sin dontog ay Sinai. <sup>3</sup> Baken sin ap-apo tako anggoy di nangitolagan Diyos isna mo adi et pati si datako am-in ay wadas na ed wani. <sup>4</sup> Dadlon nakisango si Diyos en dakayo et dinnge yo din kali na ay mapmapo sin kad-an di apoy sin dontog. <sup>5</sup> Sin doy ay timpo, wadaak ay pinmipika sin nan-gawaan di kad-an Diyos ya en dakayo et sak-en di nangibagbaga en dakayo sin ibagan Diyos, tan emegyay kayo sin apoy, isonga adi kayon nantikid sin dontog.

“Et siya na din kanan Diyos: <sup>6</sup> Sak-en si Yahweh ay Diyos yo ay nangipango en dakayo ay komaan ed Egipto ay naibabag-enan yo.

<sup>7</sup> “Adi kayo mandaydayaw si odom ay diyos mo adi sak-en et anggoy.

<sup>†</sup> 4:21 Din istorya ay maipanggep isna et madteng sin Bilbilang 20:1-12.

<sup>8</sup> “Adi kayo man-am-amag ono mankitkitikit si daydayawen yo sin kompormi ay kaman din wadad daya, wadas nan lota ono wada sin danom. <sup>9</sup> Adi kayon manyakog-ong ono mandayaw en daida, tan sak-en si Yahweh ay Diyos yo et adiak ipalobos ay waday ikadkadwa yon sak-en ay daydayawen yo. Dosaek di mangontra en sak-en ya din poli na enggana sin anak di apo na. <sup>10</sup> Ngem ipailak pay din layad ko sin manglaylayad en sak-en ya manongpal sin bilbilin ko engganas maikapiga ay libo ay kapototan.

<sup>11</sup> “Adi yon os-osalen din ngadan ko si owat magay silbi na, tan sak-en si Yahweh ay Diyos yo et dadlonak dosaen din adi mamanol sin ngadan ko.

<sup>12</sup> “Banolen yo din agew ay pan-illengan ta ikasin yo ay agew para en sak-en, tan siya na din inbilin ko en dakayo. <sup>13</sup> Enem ay agew di pan-oblaan yo, <sup>14</sup> ngem din maikapito ay agew et pan-ibbayan ay naidaton en sak-en. Isonga maga di man-obla sin agew ay doy, olay din an-ak ya bag-en yo, din animal yo ya din mangili ay wada sin ili yo. Tan masapol ay man-illeng din babag-en yo ay kaman dakayo sin agew ay doy. <sup>15</sup> Nemnemnemen yo ay naibag-en kayo abe ed Egipto, ngem sak-en ay si Yahweh ay Diyos yo di nangipawaya en dakayo babaen sin nakaskasdaaw ay pigsa ya panakabalin ko, isonga ibilin ko en dakayo ay banolen yo din agew ay pan-illengan.

<sup>16</sup> “Patgen yos da ama en ina yo tan say bilin ko ay Diyos yo en dakayo ta say omando di biyag yo ya mayat di pantongpalan di amagen yo sin daga ay idawat ko en dakayo.

<sup>17</sup> “Adi kayon manpespese.

<sup>18</sup> “Adi kayon daddaagen di baken yon asawa.

<sup>19</sup> “Adi kayon mangak-akew.

<sup>20</sup> “Adi kayon mantistigo si baken tet-ewa.

<sup>21</sup> “Adi kayon gamgamgaman din asawan di ib-a yo, din beey na, daga na, baa na, baka ya dangki na ya odom pay ay sanikwa na.” <sup>22 23 24 25 26 27 28 29 30 31 32 33</sup>

## 6

### *Din Kapatgan Ay Bilin*

<sup>1</sup> “Da nay din bilin ya linteg Yahweh ay Diyos yo ay intogona ay itdok en dakayo ta onodan yo sin daga ay awni et okaen yo. <sup>2</sup> Sin intiro ay biyag yo ya siya abe sin biyag di ipoli yo, masapol ay dayawen yo si Diyos ya tongpalen yo amin din linteg na ay ibagak en dakayo ed wani ta say omando di biyag yo. <sup>3</sup> Dengngen yo ay Israelita yan ilaen yo ta tongpalen yo dana ta say somiged di biyag yo ya omad-ado kayo sin nabaknang ay daga ay magabay di mola ay kaman din inkarin Yahweh ay Diyos di ap-apo tako. <sup>4</sup> Dengngen yo na ay Israelita! Si Yahweh et anggoy di Diyos tako, magay odom.\* <sup>5</sup> Imongsan yo din am-in ay nemnem, laing ya bikas yo ay manglaylayad en Yahweh ay Diyos yo. <sup>6</sup> Igto yo koma sin nemnem yo amin da nan linteg ay ibagak ed wani ay agew en dakayo. <sup>7</sup> Masapol ay esten yo ay itdo dana sin anak yo et ibagbaga yo mo wada kayo sin bebbeey yo ono sin danan, mo man-illeng kayo ono sin pan-ob-oblaan yo. <sup>8</sup> Igading yo sin takkay yo ya ibedbed yo sin kitong yo ta panginemnemneman yo. <sup>9</sup> Isolat yo sin hamban di pantew yo ya sin segpan di ili yo.”

### *Pamagbagan Moses Ta Onodan Da Din Bilbilin Diyos*

<sup>10</sup> “Tongpalen Diyos din inkari na sin ap-apo yo ay da Abraham, Isaac ya si Jacob et idawat na en dakayo din lugar ay nankababaknang ya dadakke di siyodad na ay adi yon insaad. <sup>11</sup> Din bebbeey yan napno si kasapolan ay adi yon inligatan, din daga et namolaan si obas ya kakaiw ay olivo ay baken dakayo di nangimola, yan wada amin di layden yo ay kanen. Et mo idateng Diyos dakayo sin lugar ay sana <sup>12</sup> siliban yo ta adi yon linglinglingan si Diyos ay nangwayawaya en dakayo sin naibabag-enan yo ed Egipto.

\* **6:4** Di esa abe ay kaiologan nina et: Si Yahweh ay Diyos tako et sisya anggoy di Diyos, magay odom.

<sup>13</sup> Daydayawen yo si Yahweh ay Diyos yo et sisya anggoy di dayawen ya pansapataan yo. <sup>14</sup> Masapol ay adi yon daydayawen di sinan didiyos ay daydayawen di odom ay il-ili ay nanniliked en dakayo. <sup>15</sup> Tan si Diyos ay wada sin kad-an yo et iparit na ay waday ikadkadwa yon sisya ay dayawen. Mo pabongeten yo gapo sin pandayawan yos didiyosen, kaman apoy din bonget na ay manosa en dakayo enggana ay maiwed kayo sin labaw di daga. <sup>16</sup> Adi kayon padpadasen si Yahweh ay Diyos yo ay kaman din inyat yo ed Massa. <sup>17</sup> Masapol ay dadlon yon pasien din bilin ya linteg ay indawat na en dakayo. <sup>18</sup> Say amagen yo din kosto ya siged sin pangilan Diyos ta say mayat di pantongpalan yo ya maisokat kayo ay mangoka sin nabaknang ay daga ay inkarin Diyos sin ap-apo yo. <sup>19</sup> Mo say iyat yo di, pakaanen Diyos amin din kaibaw yo, tan say inkari na.

<sup>20</sup> “Mo sin tapin di agew ya mansalodsod din an-ak yo ya kanan da, ‘Apay ngin ay inbilin Yahweh ay Diyos tako ay tongpalen tako am-in dana ay linteg?’ <sup>21</sup> kanan yo en daida, ‘Ed idi yan binag-en din ari ed Egipto si dakami, ngem inmisalakan si Diyos babaen sin nakaskasdaaw ay panakabalina. <sup>22</sup> Dadlon min inila din nakaskasdaaw ya kaeegyat ay inamag na sin taga-Egipto ya sin ari da ya oopisyal na. <sup>23</sup> Ngem dakami pay yan inpango nas dakami ay komaan isdi ta idawat nan dakami nan lugar ay nay ay inkari na sin ap-apo tako. <sup>24-25</sup> Inbilin Diyos ay tongpalen tako amin din bilbilina ya dayawen takos sisya. Mo ipapasnek tako ay mangon-onod sin linteg na, kanayon ay ay-ayowanana ya pabaknangena din ili tako ay kaman din inyat na en datako ed wani dowan aben kosto di pakikadkadwaan tako en sisya.’ ”

## 7

### *Din Pinilin Diyos Ay Ipogaw Na (7:1-11)*

<sup>1</sup> Kanan Moses ay nangitoloy, “Inpangon Yahweh ay Diyos yo si dakayo ta okaen yo din daga ay nay ay dandani ay datngan yo, tan pakaanena din ad-ado ay man-ili sin isdi. Awni et pakaanena din man-ili sin pito ay ili ay napigpigsa ya ad-ad-ado mo si dakayo. Daida din makwani en Heteo, Gergeseo, Amorreo, Canaaneo, Perezeo, Heveo ya Jebuseo. <sup>2</sup> Mo enggay ipaabak Diyos daida en dakayo, masapol ay peslen yos daida amin. Adi kayon makitolag ay makikadwa ono maseg-angan en daida. <sup>3</sup> Adi kayon makias-asawa en daida ya adi yon ipaasawa din anak yo, <sup>4</sup> tan awisen dan anak yo ay manokog en Diyos ta mandayaw da sin didiyosen da. Dosaen Diyos dakayo ay dagos mo say maamag di. <sup>5</sup> Isonga dadaelen yo din altar da ya gemken yo din tinootood da ay bato ay pandaydayawan da. Potoen yo din posti ay pangidaydayaw da en Asera dowan yon poan din didiyosen da. <sup>6</sup> Say amagen yo na tan dakayo din inkakasin Yahweh ay Diyos yo ay ipogaw na. Pinili nas dakayo sin amin ay ipogaw isnan lobong et inbilang nas dakayo ay nabanol ay ipogaw na. <sup>7</sup> Baken din kaad-ado yo di gapo ay laylayden ya pinilin Diyos dakayo, tan dakayo din kaat-atikan ay ipogaw isnan lobong. <sup>8</sup> Di gapo na et laylayden Diyos dakayo ya matalek sisya ay manongpal sin inkari na sin ap-apo tako, isonga inosal na din panakabalina ay nangwayawaya en dakayo sin naibabag-enan yo sin turay din ari ed Egipto. <sup>9</sup> Say pangammoan yo ay si Yahweh ay Diyos yo et tet-ewa ay Diyos ya matalek. Tongpalena din inkari na ya kanayon ay ipaila na din layad na sin manglayad en sisya ya manongpal sin bilina enggana sin maikapiga ay libo ay kapototan. <sup>10</sup> Ngem dadlonan dosaen ay dagos din mangililiget en sisya. <sup>11</sup> Isonga ilaen yo ta tongpalen yo da nan bilbilin ay ipaammok en dakayo ed wani ay agew.”

12 13 14 15 16 17 18 19 20 21 22 23 24 25 26

## 8

### *Din Inadal Di Israelita Sin Lugar Ay Magay Omili*

<sup>1</sup> “Masapol ay esten yo ay manongtongpal sin amin da nan bilin ay ipaammok en dakayo ed wani ay agew ta say matago kayo, omad-ado kayo ya okaen yo din daga ay inkarin Diyos sin ap-apo yo. <sup>2</sup> Nemnememen yo din inyat Diyos ay nangipangpango en dakayo si opatapolo ay tawen sin lugar ay magay omili. Begew sin ligligat ay linaklakam yos di, initdoanas dakayo ay mangibaba sin nemnem yo ya pinadpadas nas dakayo ta maammoan mo panggep yo ay tongpalen din bilina ono maga. <sup>3</sup> Inpalobos Diyos ay madagaangan kayo, asi nan pakanen dakayo si manna ay adi yon kinkinan ed idi, olay abe sin ap-apo yo. Say inyat na di ta say maitdoan kayo ay manpakombaba ya ammoan yo ay baken makan et anggoy di katagoan di ipogaw mo adi et masapol da abe di amin ay ibagbagan Diyos.\* <sup>4</sup> Laton met ay adi nadonot din bado yo ya adi linmadag din siki yo sin opatapolo ay tawen ay nandad-anan yo. <sup>5</sup> Nemnememen yo ay bagbagaan ya sopliten Diyos si dakayo ay kaman din iyat di esay ama ay mamagbaga sin anak na. <sup>6</sup> Isonga masapol ay tongpalen yo din bilin Diyos. Onodan yo din laydena dowan yon patgen ya egyatan sisya. <sup>7</sup> Tan inpangon Yahweh ay Diyos yo si dakayo si mayamayay ay daga ay ad-ado di ginawang ya obbog na ay manandanom sin dontog ya tanap. <sup>8</sup> Din ili ay nay et mayat di molmola ay kaman din bakakew, sabog, obas, igos, granada ya olivo yan ad-ado abe di anig isdi. <sup>9</sup> Din dontog yan mabalin ay panminasan si landok ya gambang. Adi kayon mankolang isdi tan wada amin ay masapol yo. <sup>10</sup> Isonga mo domateng kayos di yan mangan kayo ay kosto, man-iyaman kayo en Yahweh ay Diyos yo sin mayamayay ay daga ay indawat nan dakayo.”

### *Pamagbaga Ta Adi Da Pandokdokogan Si Diyos*

<sup>11</sup> “Siliban yo ta adi yon pandokdokogan si Yahweh ay Diyos yo begew sin pamaybayan yo sin bilbilina ay ibagak en dakayo ed wani. <sup>12</sup> Mo mawada amin di layden yo ay kanen ya makaisaad kayo si mankanapteng ay beey yo <sup>13</sup> ya mo omad-ado di baka, karnero, palata ya balitok yo ya omad-ado di odom ay sanikwa yo, <sup>14</sup> ilaen yo ta adi ngomato di nemnem yo ta adi kayon linglinglingan si Yahweh ay Diyos yo ay nangwayawaya en dakayo sin naibabag-enan yo ed Egipto. <sup>15</sup> Inay-ayowananas dakayo sin kawada yo si annawa ya kaeegyay ay lugar ay magay omili ay kad-an di ad-ado ay nagitaan ay eweg ya gayaman. Din lugar ay sana et namgaan ay magay dandanom na, ngem inpabela na di danom sin moling ay bato ta waday pan-inoman yo. <sup>16</sup> Pinakanas dakayo si manna sin lugar ay magay omili, makan ay adi yon tinamtamtaman ed idi ya olay din ap-apo yo. Inamag na di ta say ipababa na di nemnem yo ya padasenas dakayo, ngem sin odi na et binindisyonanas dakayo. <sup>17</sup> Isonga adi yon kanan en binmaknang kayo sin bokod yo ay pigsa ya kabaelan. <sup>18</sup> Nemnememen yo ay si Diyos anggoy di mangidawat si kabaelan yo ay bomaknang, tan say panongpalana sin intolag na sin ap-apo yo ed idi ay kaman met laeng ed wani. <sup>19</sup> Ibabagak en dakayo ed wani ay sigurado ay dosaen Yahweh si dakayo mo pandokkogan yos sisya ay Diyos yo ta mandayaw ya mansilbi kayo si odom ay didiyosen. <sup>20</sup> Mo adi yon patien sisya, dosaenas dakayo ay kaman din iyat na sin ipogaw si odom ay ili ay awni et datngen yo.”

## 9

### *Din Pangabakan Da Begew Sin Badang Diyos*

(9:1-4)

<sup>1</sup> Kanan Moses ay nangitoloy, “Dengngen yo ay Israelita: Agadangen yo ed wani ay agew din ginawang ay Jordan et okaen yo din ilin di ipogaw ay ad-ad-ado ya napigpiga mo dakayo. Dadakke di siyodad isdi ay nankakakayang di alad da. <sup>2</sup> Nankakakayang ya napipigsa abe di man-ili sin isdi et nadamag ay magay makaabak en daida begew sin kadadakke da. <sup>3</sup> Ngem ed wani et ilaen yo ay mangon-ona si Diyos mo dakayo et

\* **8:3** Din versikulo ay nay et insongbat Jesus en Satanas. Ilaen sin Mateo 4:4 ya Lucas 4:4.

kaman mabidang ay apoy ay manadael sin kalaban yo ta nalaka di iyat yo ay mangabak en daida, tan say inkari na. <sup>4</sup>Ngem mo makdeng ay pakaanen Diyos daida, adi yon it-it-ek din awak yo en tinolongan Diyos dakayo gapo sin kinalinteg yo, tan pakaanen Diyos din man-ilis di gapo sin basbasol da.” <sup>5 6 7 8 9 10 11 12 13 14 15 16 17 18 19 20 21 22 23 24 25 26 27 28 29</sup>

## 10

1 2 3 4 5 6 7 8 9 10 11

### *Din Ibilin Diyos Ay Onodan Da (10:12-22)*

<sup>12</sup>“Dengngen yo ay Israelita nan ibilin Yahweh ay Diyos yo ay onodan yo: Laylayden yo si Yahweh ay Diyos yo, imongsan yo din nemnem yo ay mansilbi en sisya, <sup>13</sup>ya patien yo din bilina ay ibagbagak en dakayo ed wani ta say pansigdan yo. <sup>14</sup>Si Yahweh ay Diyos tako di akin oka ed daya ya am-in ay wadas di, siya abes nan daga ya amin ay wadas na. <sup>15</sup>Ngem olay mo siya di, palalo di layad Diyos sin ap-apo yo, isonga dakayo ay poli da di pinili na ay ipogaw na ay baken din odom ay ipogaw isnan daga, et siya sa di kasasaad yo enggana ed wani. <sup>16</sup>Isaldeng yo ngarud ay mangipakenteg sin nemnem yo ta say manang-awat ya managtongpal kayo en Diyos. <sup>17</sup>Tan si Yahweh ay Diyos yo di kangatoan ay Diyos ya Apo. Madamdamag di kinangato na, nakaskasdaaw ya kaeegyat di panakabalina, maga di pabpaborana, ya adi mabalin ay mapasoksokan. <sup>18</sup>Ikalintegana din naolila ya nalasang ay babbabai. Laylaydena abe din mangili ay makitete en datako et idawtanans daida si bado ya kanen da. <sup>19</sup>Isonga ipaila yo di layad yo sin mangili, tan sin kawada yo ed Egipto et mangili kayos di. <sup>20</sup>Patgen ya egyatan yo si Yahweh ay Diyos yo ta sisya anggoy di daydayawen ya pansilbian yo. Itoltoloy yo ay mantalek en sisya ya sisya anggoy di pansapataan yo. <sup>21</sup>Idaydayaw yos sisya tan sisya di bigbigen yo ay Diyos yan inila yo ay mismo din nakaskasdaaw ya kaeegyat ay inamag na para en dakayo. <sup>22</sup>Idi inmey din ap-apo yo ed Egipto, owat dan pitopolo, ngem ed wani yan nay inpaad-adon Diyos dakayo ay kaman din kaad-adon di talaw.”

## 11

1 2 3 4 5 6 7

### *Din Kinasiged Di Daga Ay Inkarin Diyos (11:8-15,18-21,26-28,31-32)*

<sup>8</sup>Intoloy Moses ay nangwani, “Tongpalen yo amin ay inbilin ko ed wani ay agew ta say makaagadang kayo sin ginawang ay Jordan ya ta kabaelan yo ay okaen din daga ay datngan yo. <sup>9</sup>Mo say iyat yo et omando di biyag yo sin daga ay inkarin Diyos sin ap-apo yo ya sin poli da. Din daga ay doy et nabaknang ya magabay di mola. <sup>10</sup>Baken kaman ed Egipto din daga ay awni et okaen yo, tan mo manmola kayo sin kawada yo ed Egipto et masapol ay manling-et kayo ay manibsibog, <sup>11</sup>ngem din daga ay dandani ay okaen yo et kadondontogan ya tanap ay sibsibogan di odan. <sup>12</sup>Kanayon ay ayayowanen Diyos din daga ay sana sin amin ay agew di tawen. <sup>13</sup>Mo tongtongpalen yo da nan ibilin ko en dakayo ed wani ay agew ta laylayden yos Yahweh ay Diyos yo ya imongsan yo din nemnem yo ay mansilbi en sisya, <sup>14</sup>ipawada na di odan sin kosto ay timpo ta say kanayon ay way anien yo ya wada abey obas ay amagen yos arak ya olivo ay panpespesan yos lana. <sup>15</sup>Gomabay abe din sakati ay para sin animal yo. Wadan to amin din layden yo ay kanen sin daga ay doy. <sup>16 17</sup>

<sup>18</sup>“Adi yon linglinglingan da nan bilbilin. Igading yo sin takkay yo ya ibedbed yo sin kitong yo ta say mangipanemnem en dakayo. <sup>19</sup>It-itdo yo sin an-ak yo mo mantoktokdo kayo sin beey yo ono manmandan kayo sin danan ya mo bomaktad ya bomangon kayo. <sup>20</sup>Isolat yo sin hamban di pantew yo ya sin segpan di ili yo. <sup>21</sup>Mo tongtongpalen yo dana, omando di biyag yo ya biyag di an-ak yo sin daga ay inkarin Apo Diyos sin ap-apo



yo ya mantee kayos di si eng-enggana ay kaman din kawadan di daya ay kankanayon sin kayang di daga. <sup>22 23 24 25</sup>

<sup>26</sup> “Manpili kayo ed wani ay agew mo sino di layden yo, mo say layden yo din bindisyon ono dosa. <sup>27</sup> Mabindisyonan kayo mo pasien yo din bilbilin ay itdok en dakayo ed wani. <sup>28</sup> Ngem madosa kayo mo adi yon pasien yan masangaw kayo ay mandayaw si didiyosen ay adi yon dinaydayaw ed idi. <sup>29 30 31</sup> Dandani ay agadangen yo din ginawang ay Jordan ta en yo okaen din daga ay indawat Yahweh ay Diyos yo en dakayo. Mo enggay inoka yo ya mantee kayos di, <sup>32</sup> masapol ay dadlon yon tongpalen amin din linteg ay ibagak en dakayo ed wani ay agew.”

## 12

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32

## 13

1 2 3 4 5 6 7 8 9 10 11 12 13 14 15 16 17 18

## 14

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29

## 15

### *Din Tawen Ay Mapakawan Di Amin Ay Otang (15:1-11)*

<sup>1</sup> Kanan Moses, “Mo mantapos di tonggal maikapito ay tawen, masapol ay adi yon singsingilen mo waday adi nabayadan ay inpaotang yo sin gagait yo. <sup>2</sup> Siya na di amagen yo: Amin ay waday inpaotang na sin gait na ay Israelita yan masapol ay adi dan singsingilen mo domteng din timpo ay tinodingan Diyos ay kaponasan di amin ay otang. <sup>3</sup> Mabalin ay singilen yo din otang di mangili, ngem masapol ay ponasen yo din otang di gagait yo ay Israelita. <sup>4</sup> Maga koma di mabiteg en dakayo, tan bindisyonan Diyos dakayo sin daga ay idawat na en dakayo <sup>5</sup> dalo et mo ipakat yo din kabaelan yo ay manongtongpal sin bilbilina ay ipalawag kon dakayo ed wani. <sup>6</sup> Inkarin Diyos en pabaknangenas dakayo et dakayo di mangiotang sin odom ay ili, isonga baken yon kasapolan ay man-otang. Maga di mangituray en dakayo mo adi et dakayo di mangituray sin ad-ado ay ili. <sup>7</sup> Mo waday nabiteg ay gait yo ay Israelita ay man-ili sin olay into ay ili sin daga ay indawat Diyos en dakayo, adi yon paidaman mo kasapolana din badang yo. <sup>8</sup> Malaydan kayo et koma ay mangipaotang sin kasapolana. <sup>9</sup> Adi yon ipaidam din badang yo gapo ta nemnememen yo ay dandani din tawen ay tinodingan Diyos en pamonasan yo si otang di gagait yo. Tan mo say nemnem yo di ya man-adawag en Diyos gapo ta pinaidaman yo et maibilang ay basol yo. <sup>10</sup> Maga koma di sakit di nemnem yo mo adi et naimposan di iyat yo ay bomadang ta say bindisyonan Diyos din amin ay obla yo. <sup>11</sup> Kanayon ay wada di Israelita ay nabiteg ya makasapol si tolong, isonga ibilin ko en dakayo ay maragsakan kayo ay mangidawat sin kasapolan da.” <sup>12 13 14 15 16 17 18 19 20 21 22 23</sup>

## 16

1 2 3 4 5 6 7 8 9 10 11 12 13 14 15 16 17 18 19 20 21 22

## 17

1

### *Din Kadosaan Di Mandayaw Si Sinan Didiyos (17:2-7)*

<sup>2</sup> “Mo wada di olay sino ay ipogaw, lalaki ono babai, sin kompormi ay ili ay indawat Yahweh ay Diyos yo en dakayo yan labsingena din intolag Diyos <sup>3</sup> et mandayaw da ya

mansilbi da si sinan didiyos ono sin agew, bowan ya talaw ay maikontra sin bilin Diyos, <sup>4</sup>masapol ay esten yo ay paneknekan. Mo mapaneknekan ay tet-ewa ay wada en dakayo ay Israelita di nangamag si kaman nina ay madagsen ay basol, <sup>5</sup>iey yo di ay ipogaw sin lasin di ili ta pigpigen yo enggana ay matey. <sup>6</sup>Makeddeng an ay matey di esa ay ipogaw mo wada di dowan ono tolo ay manistigo sin basol na, ngem adi mabalin ay peslen yo mo es-esa anggoy di tistigo. <sup>7</sup>Masapol ay din tistigo di mangon-ona ay mamigpig sin nakabasol, asi din odom ay ipogaw. Say iyat yo na ay mangaan sin basol sin kad-an yo.”  
8 9 10 11 12 13 14 15 16 17 18 19 20

## 18

1 2 3 4 5 6 7 8

### *Din Ogali Ay Kaliliget Diyos* (18:9-13)

<sup>9</sup>“Mo okaen yo din daga ay indawat Yahweh ay Diyos yo, masapol ay adi yo tadtadonen din kaliliget na ay am-amagen di sigod ay omilis di. <sup>10-11</sup>Masapol ay maga polos en dakayo di mangidaton si anak da ay mapooan. Adi yo aben ipalobos ay wada en dakayo di manpontos, mankotom, mansapo, mansip-ok, man-gengey ya manboyon. <sup>12</sup>Kaliliget Diyos di mangamag si kaman dana et say gapo ay pakaanena dana ay ipogaw sin domatngan yo. <sup>13</sup>Masapol ay magay ikadkadwa yo en Diyos ay dayawen mo adi et napodno kayo en sisya.”

### *Din Inkarin Diyos Ay Man-ibaa Si Mamadto* (18:14-22)

<sup>14</sup>Pag kanan Moses, “Din ipogaw sin ili ay dandani ay okaen yo et mamatpati da si man-gengey ya mansip-ok, ngem adi ipalobos Yahweh ay Diyos yo ay amagen yo di. <sup>15</sup>Awni kadi et mawaday mamadto ay kaman sak-en ay ibaan Diyos en dakayo. Kailian takos sisya ay Israelita. Masapol ay pasien yo di amin ay ibagbaga na. <sup>16</sup>Tan sin agew ay nasinopan yo sin poon di dontog ay Sinai, nanpakaasi kayo ta adi makikali si Diyos en dakayo ya adi yon ilaen din kaman apoy ay panpailaana tan emegyat kayo ay matey, <sup>17</sup>isonga kanan Diyos en sak-en, ‘Kosto din ibagbaga da. <sup>18</sup>Awni et man-ibaaak si mamadto ay kaman sik-a ay kailian da ay Israelita. Ibagak to en sisya di ibaga na et ibaga na sin ipogaw amin ay ibilin ko. <sup>19</sup>Mankali ay panakaawak ko et ibaga na din paibagak en sisya, isonga dosaek din adi mamati en sisya. <sup>20</sup>Ngem mo wada di natangsit di nemnem na ay mangwani en pankalkaliak sisya ngem din ibagbaga na et adiak inpaibaga, masapol ay matey. Siya abe din man-ipadto ay mangwani en sisya di pankalkalian di odom ay diyos.’ <sup>21</sup>Siguro ay salodsoden yo sin nemnem yo mo intoy iyat ay mangilasin mo inpakalin Diyos ono maga. <sup>22</sup>Say pangammoan yo ay baken napon Diyos din ibagbagan di mangwani en mamadto mo adi temet-ewa din ipadto na. Din ipogaw ay sana et ipapangato nan awak na ay mangibagbagas napo sin nemnem na, isonga adi yon egyatan sisya ya din ibaga na.”

## 19

### *Din Siyodad Ay Pankamangan*

<sup>1</sup>“Mo makdeng ay peslen Yahweh ay Diyos yo din man-ili sin daga ay idawat na en dakayo et enggay inoka yo din siyodad da ya beey da ya logian yo ay mantees di, <sup>2-3</sup>pankatloen yo din daga ay sana yan lokoden yo din kaaddawin di il-ili isdi. Asi kayo todingan di sag-eesa ay siyodad ay nalaka ay emeyan di ipogaw olay intoy kad-ana. Amagen yo di ta mo waday nakapese si gait na, kompormi di lomayawana ay pankamangan sin tolo ay siyodad ay sana et laton ay adi maan-ano. <sup>4</sup>Din maibagbagas na et din nakapese si bakenan kaibaw ay adi na in-gagara. <sup>5</sup>Mo kaspangarigan waday doway ipogaw ay emey sin kada ay mangaiw ya man-getgetad din esa, asi et makaan

din wasay sin paek na ya pontaana din kadwa na yan matey, mabalin ay kompormi di panagtagana sin tolo ay siyodad ay sana et adi maan-ano. <sup>6</sup> Mo owat es-esa di siyodad ay pankamangan, asi palalo ay addawi, adi pay edasan din mangibaes ay agin di natey et peslenas bonget na din ipogaw ay sana ay magay basol na. Tan din katet-ewa na et adi nan ginagara ay namse sin kadwa na tan bakenan inibaw. <sup>7</sup> Siya na di gapo ay ibilin ko ay man-itoding kayo si tolo ay siyodad.

<sup>8-9</sup> “Mo esten yo ay onodan amin ay ibilin ko ed wani ay agew ya laylayden yo si Yahweh ay Diyos yo dowan kayon ibasar din iyat yo ay manbiyag sin amin ay itdo na, paannawaena din sakop di daga yo ay kaman din insapata na sin ap-apo yo. Idawat na abe en dakayo amin din daga ay inkari na en daida. Mo matongpal di, masapol ay manpili kayo kasin si tolo ay siyodad ay maitapi sin siyodad ay pankamangan. <sup>10</sup> Say amagen yo na ta magay matey si bakenan basol sin daga ay idawat Diyos en dakayo ya adi kayon bomasol ay manpese.

<sup>11</sup> “Ngem mo kaspangarigan waday ipogaw ay man-ed sin kaliliget na et peslena, asi mankamang sin siyodad ay pankamangan, <sup>12</sup> ipadpap din papangolo sin ili na ta ipolang da sin ag-in di pinse na ay akin lebbeng ay mangibaes ta peslen da. <sup>13</sup> Adi kayon segangan di kaman nidi, tan masapol ay daosan yo di makapeses magay basol na sin kad-an yo ay Israelita ta say mayat di kabibiyag yo.”

### *Din Gedeng Di Dagdaga*

<sup>14</sup> “Adi kayon padendendenen din sigod ay gedeng di dagan di kailian yo sin daga ay idawat Diyos en dakayo.”

### *Maipanggep Si Mantistigo*

<sup>15</sup> “Adi omanay di es-esa ay tistigo ay mangipaneknek ay binmasol di esa ay ipogaw. Masapol di dowan ono tolo ay mangipaneknek. <sup>16</sup> Mo waday mantistigo yan pabasolena di gait na si baken tet-ewa ta say makedngan si madagsen ay dosa, <sup>17</sup> masapol ay emey da ay dowan sin es-esa ay tinodingan Diyos ay pandaydayawan ta din papadi ya howis ay nadotokan di mangosig en daida. <sup>18</sup> Masapol ay esten da ay mangosig sin kaso ay sana et mo mapaneknekan ay baken tet-ewa din pamabasol din esa sin ib-a na ay Israelita, <sup>19</sup> din nangipabasol di mangibaklay sin dosa ay dosan koman di pinabasol na. Say amagen yo na ta somaldeng di kaman nina ay basol. <sup>20</sup> Tan mo dengngen din kaipoipogaw din napasamak, emegyat da ay mangamag abe si kaman nina ay basol. <sup>21</sup> Adi kayon maseg-angan sin kaman dana ay pasamak. Sinay di iyat yo: biyag di bayad di biyag, mata si mata, bab-a si bab-a, takkay si takkay ya siki si siki.”\*

## 20

1 2 3 4 5 6 7 8 9 10 11 12 13 14 15 16 17 18 19 20

## 21

1 2 3 4 5 6 7 8 9 10 11 12 13 14 15 16 17 18 19 20 21

### *Odom Ay Linteg*

(21:22-23)

<sup>22</sup> “Mo waday nakeddengnan ay matey ya maibay-at si posti gapo sin basol na, <sup>23</sup> adi yo baybay-an din bangkay na sin posti ay maninsinlabi. Masapol ay maiponpon sin agew ay sana met laeng, tan mo waday maibay-at si posti, say kailaan di nanosaan Diyos en sisya.\* Ikaot yo ta say adi komadodogis din daga ay ipatawid Diyos en dakayo.”

## 22

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30

\* **19:21** Mateo 5:38. \* **21:23** Din inbagan Pablo maipanggep en Jesus sin Galacia 3:13 et maibasar sin versikulo ay nay.

**23**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25

**24***Mansian ya Kasin Mangasawa**(24:1-4)*

<sup>1</sup> “Mo wada di lalaki ay mangasawa, asi et mabaybayag yan laydena ay isian si asawa na gapo ta waday naammoana ay makagapo si panigaana, masapol ay idawtana si kasolatan ay pangisianana, asi nan pakaanen sin beey na.\* <sup>2</sup> Mo kaspangarigan makiasawa kasin din babai <sup>3</sup> ya asi et aben sigaan kasin din nangasawa et idawtana si kasolatan ay pangisianana ya pakaanena sin beey na ono kaspangarigan matey din maikadwa ay asawa na, <sup>4</sup> adi mabalin ay taolien din damo ay asawa na tan maibilang ay kinmadodogis din babai ay sana. Palalo ay lawa sin pangilan Diyos mo taoliena din asawa na. Adi kayon man-amag si kaman nina ay basol sin daga ay idawat Yahweh ay Diyos yo.” <sup>5</sup> <sup>6</sup> <sup>7</sup> <sup>8</sup> <sup>9</sup> <sup>10</sup> <sup>11</sup> <sup>12</sup> <sup>13</sup> <sup>14</sup> <sup>15</sup> <sup>16</sup> <sup>17</sup> <sup>18</sup> <sup>19</sup> <sup>20</sup> <sup>21</sup> <sup>22</sup>

**25**

1 2 3

*(25:4-6)*

<sup>4</sup> “Adim bosbosalan di baka ay mangigatgatin ay mangirik si pagey ta waday iyat na ay mangan.\*

*Din Lebbeng Di Lalaki Ay Natey Di Agi Na*

<sup>5</sup> “Mo waday sin-iyogtan ay lallalaki ay manteees esay beey ya matey din waday asawa na yan magay anak da, adi mabalin ay makiasawa din nalasang si odom mo baken din agin asawa na. Lebbeng na ay asawaen din kabsat di natey din asawan agi na. <sup>6</sup> Maibilang din damo ay anak da ay anak din natey ta say mantoltoloy din katontonan di poli na sin Israelita.” <sup>7</sup> <sup>8</sup> <sup>9</sup> <sup>10</sup> <sup>11</sup> <sup>12</sup> <sup>13</sup> <sup>14</sup> <sup>15</sup> <sup>16</sup> <sup>17</sup> <sup>18</sup> <sup>19</sup>

**26***Din Pangidatonan Das Damo Ay Apit Da**(26:1-11)*

<sup>1</sup> Intoloy Moses, “Mo enggay inoka yon daga ay idawat Yahweh ay Diyos yo et dakayo di man-ilis di, <sup>2</sup> esa en mangipeey sin damo ay apit na si baskit ta iey na sin es-esa ay lugar ay napili ay pandayawan. <sup>3</sup> Emey kayo sin padi ay mansilsilbi sin doy ay timpo yan kanan yo en sisya, ‘Ed wani ay agew, ibagak sin sangoanan Yahweh ay Diyos tako ay wadaak isnan daga ay insapata na sin ap-apo ay idawat nan datako.’

<sup>4</sup> “Alaen din padi din baskit ta ipeey na sin sangoanan di altar ay pan-idatdatonan en Yahweh ay Diyos yo. <sup>5</sup> Mo makdeng di, kanan yo sin sangoanan Diyos, ‘Si apok et esay Arameo\* ay owat lomikeliked ay intakina din pamilya na ay inmey ed Egipto. At-atik di bilang da ay inmey isdi ngem inmad-ado da et nanbalin da si madamdamag ya napigsa ay nasyon. <sup>6</sup> Pinalpaligat din taga-Egipto si dakami dowan dan panbalinen dakami si bag-en ay pan-oblaen si nankadadagsen. <sup>7</sup> Pag kami et man-adawag ay mankedaw si badang en sik-a ay Diyos ay dinaydayaw di ap-apo. Dinngem din adawag mi et inilam din ligat mi ya kaseseg-ang ay kasasaad mi. <sup>8</sup> Insalakam si dakami sin naibabag-enan mi ed Egipto babaen sin nakaskasdaaw ay pigsam ya panakabalin mo ya sin ad-ado ay kaeegyat ya nakaskasdaaw ay inam-amag mo. <sup>9</sup> In-alim dakami isna et indawat mo nan maymayat ay daga ay magabay di mola. <sup>10</sup> Isonga nay ed wani yan in-alik nan damo

\* **24:1** Inbagan Jesus din linteg ay nay sin Mateo 5:31. Ilaen abe sin Mateo 19:7-8. \* **25:4** 1 Corinto 9:9-10; 1 Timoteo 5:17-18. \* **26:5** Din olog di Arameo et “taga-Aram” ay makwani abe en Syria ono Mesopotamia.

ay apit ko sin daga ay indawat mo.' Mo makdeng pay di yan ipayag yo din baskit sin sangoanan Yahweh ay Diyos yo ta mandayaw kayo en sisya. <sup>11</sup> Asi kayo manragragsak begew sin am-in ay maymayat ay indawat Diyos en dakayo ya sin pamilya yo. Ilaen yo abe ta makiragsak din Levita ya mangili ay makiili en dakayo." <sup>12 13 14 15</sup>

*Din Naimongsanan Di Intolag Diyos*  
(26:16-19)

<sup>16</sup> Kanan Moses, "Ed wani ay agew, bilbilinen Diyos dakayo ta tongpalen yo din amin ay linteg na, isonga ipasnek yo ya imongsan yo di amin ay nemnem yo ay manongpal. <sup>17</sup> Ed wani ay agew, binigbig yo ay sisya di Diyos yo yan inkari yo ay onodan yos sisya ya pasien yo amin ay linteg ya bilbilina. <sup>18</sup> Ed wani ay agew, inbilang Diyos dakayo ay nabanol ay ipogaw na tan say inkari na, dalo et mo tongpalen yo amin din linteg na. <sup>19</sup> Panbalinenas dakayo ay napigpigma mo din odom ay nasyon ay pinarsua na ta say madaydayaw kayo<sup>†</sup> ya panbalinenas dakayo ay nasantoan ay ipogaw na, tan siya din inkari na."

## 27

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26

## 28

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52

*Din Dosan Di Adi Manongpal Sin Bilbilin Diyos*  
(28:58-64)

<sup>58</sup> "Mo adi kayon ipapasnek ay manongpal sin bilin Diyos ay naisolat sin libro ay nay ya adi kayon banolen din peteg ay nangato ya kaeegyat ay ngadan Yahweh ay Diyos yo, <sup>59</sup> pawadaena en dakayo ya sin ipoli yo di adi kaagasan ay sakit ya kaeegyat ay mapasamak ya pisti ay adi kaipasaldeng. <sup>60</sup> Ipalak-am na kasin en dakayo din nilak-am yo ed Egipto ay kaeegyat ay sakit et adi kayo polos maagasan. <sup>61</sup> Ipawada na abe amin ay kalasin di sakit ya pisti ya kaeegyat ay mapasamak ay adi naibaga isnan libro ay naisolatan di linteg Diyos enggana ay matey kayo amin. <sup>62</sup> Olay mo omad-ado kayo ay kaman din talaw ed daya, at-atik pay dedan di mabay-an en dakayo, tan adi yon tinongtongpal si Yahweh ay Diyos yo. <sup>63</sup> Mo intoy ison di ragsak Diyos ay nangipasiged sin biyag yo ya nangipaad-ado en dakayo, siya met laeng sin iyat na ay manosa en dakayo ta maabos kayo. Awni et mapilitan kayo ay komaan sin daga ay okaen yo. <sup>64</sup> Pansisianen Diyos dakayo ay iwaras sin amin ay ili sin amin ay solin di lobong et mansilbi kayo si sinan didiyos ay kaiw ya bato di amag na ay adi yo dinaydayaw ed idi enggana abe sin ap-apo yo." <sup>65 66 67 68</sup>

## 29

*Din Intolag Diyos Sin Israelita Ed Moab*  
(29:1-15)

<sup>1</sup> Danay din inbilin Diyos en Moses ay itolag na sin Israelita sin kawada da ed Moab ay maitapi sin intolag Diyos en daida ed dontog ay Sinai. <sup>2</sup> Pinaayagan Moses amin din Israelita, pag nan kanan en daida, "Inila yo ay mismo din inyat Diyos sin ari ed Egipto ya sin oopisyal na ya sin amin ay ipogaw na. <sup>3</sup> Inila yo din kaeegyat ay dosa ya nakaskasdaaw ay inam-amag Diyos pati din nakaskasdaaw ay sinyal ay inpappaila na. <sup>4</sup> Ngem enggana pay laeng ed wani yan adi indawat Diyos en dakayo di nemnem ay makaawat, mata ay makaila ya inga ay makadnge. <sup>5</sup> Sin opatapolo ay tawen ay nangipangpangoan Diyos en dakayo sin lugar ay magay omili, adi nabisbisngit din bado

<sup>†</sup> 26:19 Di esa abe ay kaiologan nina et: ta say kaidayawana...



ya sapatos yo. <sup>6</sup> Magay tinapay si kinkinan yo ya arak ay inin-inom yo, ngem indawat Yahweh amin ay masapol yo ta say ammoen yo ay sisya di Diyos yo.

<sup>7</sup> “Idi dinmateng tako sin lugar ay nay, ginobat da Sihon ay ari ed Hesbon ya si Og ay ari ed Basan si datako, ngem inabak takos daida. <sup>8</sup> Ina tako din daga da et nanbibingayan din tribun da Ruben en Gad ya kagodwan di tribun Manasses.

<sup>9</sup> “Isonga ipapasnek yo ay manongpal sin amin ay linteg ay intolag Diyos en dakayo ta say kosto di pantongpalan di amin ay amagen yo. <sup>10</sup> Ed wani ay agew, nay wada kayo amin sin sangoanan Yahweh ay Diyos yo. Wada amin ay papangolo ya oopisyal, lallalaki, <sup>11</sup> babbabai ya anan-ak. Wada abe da din mangili ay makitetee en dakayo ay pangakkaiwen yo ya panaksakdoen yo. <sup>12</sup> Wada kayo amin isna ta isapata yo ay awaten ya tongpalen yo din intolag Diyos en dakayo <sup>13</sup> ta manipod ed wani yan ibilang nas dakayo ay ipogaw na ya sisya di dayawen yo ay Diyos ay kaman din inkari na sin ap-apo yo ay da Abraham, Isaac ya si Jacob. <sup>14</sup> Nan itolag Diyos ay ibagak en dakayo ya din isapata yo ay tongpalen yo et baken datako anggoy <sup>15</sup> ay pinmipika isnan sangoanan Diyos di makilak-am mo adi abe din ipoli tako ay maisoksokat en datako sin tapin di agew.” <sup>16 17 18 19 20 21 22 23 24 25 26 27 28 29</sup>

## 30

### *Din Bindisyon Diyos Mo Mansagong Da Kasin En Sisya*

<sup>1</sup> Kanan Moses ay nangitoloy, “Nanpilie dakayo si layden yo mo sino di pilien yo sin bindisyon ono dosa, et wada ay nemnemen yo na mo lak-amen yo am-in da nan bindisyon ya dosa sin tapin di agew ya pansisianen Diyos dakayo et maiwaras kayo si odom ay il-ili. <sup>2</sup> Ngem mo dakayo ya din ipoli yo yan manbabawi kayo ta sagongen yos Diyos yan imongsan yo din amin ay nemnem yo ay manongpal sin bilbilina ay ibagak en dakayo ed wani, <sup>3</sup> seg-angan Diyos si dakayo. Ayaganas dakayo sin lugar ay naiwarasan yo et sinopenas dakayo ta pasigedena din biyag yo. <sup>4</sup> Olay mo nansisian kayo ay inmey sin kaaddawian ay partin di lobong et sinopen ya pataolien pay dedan Yahweh ay Diyos yo si dakayo <sup>5</sup> ta okaen yo kasin din daga ay nanbebeeyan di ap-apo yo ed idi. Awni et panbalinen Diyos dakayo ay mas ad-ado ya mas maymayat din biyag yo mo din ap-apo yo. <sup>6</sup> Idawat Yahweh ay Diyos yo di manakaawat ya managtongpal ay nemnem ta imongsan yo din amin ay nemnem yo ay manglaylayad en sisya ta matagotago kayo. <sup>7</sup> Et mo siya di, ipabanes en Yahweh ay Diyos yo din dosa sin kaibaw yo ay mangililiget ya mamalpaligat en dakayo. <sup>8</sup> Patien yo kasin sisya ya onodan yo din amin ay bilbilina ay ibagak ed wani ay agew en dakayo. <sup>9</sup> Aped na ay bindisyonan Yahweh ay Diyos yo din amin ay amagen yo et paad-adoena din ganak yo, animal ya apit yo, tan malaydan kasin sisya ay mangipasiged sin biyag yo ay kaman din inyat na sin ap-apo yo ed idi. <sup>10</sup> Ngem masapol ay onodan yos sisya ya tongpalen yo amin din linteg na ay naisolat sin libro ay nay. Masapol abe ay imongsan yo din amin ay nemnem yo ay mamati ya mandayaw en sisya.

<sup>11</sup> “Din ibilin ko en dakayo ed wani et baken naligat ay maawatan ya tongpalen.

<sup>12</sup> Baken met wada ed langit ta kanan yo en, ‘Sino ngin di somakyab ed kayang ay en manga ta iali nas na ta say dengngen ya tongpalen tako?’ <sup>13</sup> Baken aben wada sin labes di baybay ta kanan yo en, ‘Sino ngin di mangagadang sin baybay ay en manga ta way iyat tako ay mannge ya tongpalen tako?’ <sup>14</sup> Aga met, tan wada isnan mismo ay kad-an yo et ammo yo ya mabalin ay ibaga yo, isonga kabaelan yo ay tongpalen.

<sup>15</sup> “Nemnemen yo, tan nay panpilie dakayo ed wani ay agew. Sino di pilien yo? Ay layden yo ay matagotago ya komagam-is di biyag ono madosa ya matey? <sup>16</sup> Mo tongpalen yo din bilbilin Diyos ay ibagak ed wani ay agew en dakayo ta ipaila yo din layad yo en sisya sin panongtongpalan yo sin laydena ya bilbilina, matagotago ya omad-ado kayo yan bindisyonanas dakayo sin ili ay emeyan yo ay okaen. <sup>17</sup> Ngem mo

sigaan yo ay dengngen ya tongpalen ta masangaw kayo ay mandayaw si didiyosen, <sup>18</sup> ibagbagak ed wani ay agew ay madosa kayo et adi kayon bomayag ay mantee sin nay dandani ay okaen yo ay daga sin bas-il di ginawang ay Jordan. <sup>19</sup> Nawaya kayo ay manpili si layden yo mo din biyag ono pese, ya mo bindisyon ono dosa. Ayagak din langit ya daga ay manistigo ay nanpiliiek dakayo mo pilien yo din biyag ono pese, bindisyon ono dosa. Say pilien yo koma din biyag ta matagotago kayo ya din ipoli yon to. <sup>20</sup> Ipaila yo din layad yo en Yahweh ay Diyos yo, pasien yos sisya ya ipapasnek yo ay mansilbi en sisya ay adi mankeykeyat ta say matagotago kayo ya din ipoli yo sin daga ay insapatan Diyos ay idawat na sin ap-apo yo ay da Abraham, Isaac ya si Jacob.”

## 31

### *Din Nadotokan Josue Ay Maisokat En Moses* (31:1-8,24-26)

<sup>1</sup> Intoloy Moses ay nankali sin sangoanan di Israelita yan kanana, <sup>2</sup> “Sin-gasot ya dowanpo di tawen ko ed wani. Enggay nakayak et adiak kabaelan ay mangipango en dakayo ya dowan et inbagbagan Diyos ay adiak agadangen din ginawang ay Jordan. <sup>3</sup> Si Yahweh ay Diyos yo di mangipango en dakayo et peslena din man-ili sin daga ay datngan yo ta okaen yo din daga da. Si Josue di mangipango en dakayo tan say inbagan Diyos. <sup>4</sup> Awni et dosaen Diyos da sana ay ipogaw ay kaman din inyat na ay namse en da Sihon en Og ay arin di Amorreo et dinadael na din ili da. <sup>5</sup> Idawtan Diyos dakayo si pigsa ay mangabak en daida, ngem masapol ay amagen yo en daida din am-in ay inbilin ko. <sup>6</sup> Papijsaen yo din nemnem yo ya tomoled kayo. Adi kayon emeg-egyat en daida tan si Yahweh ay Diyos yo di mangoykoyog en dakayo, et adi na polos taytaynan ono pandokdokogan dakayo.”

<sup>7</sup> Idi makdeng pay di, inpaayag Moses si Josue, pag nan kanan en sisya sin sangoanan di amin ay Israelita, “Papijsaem din nemnem mo ya adi kan emeg-egyat, tan sik-a di mangipango en da nay ay ipogaw ta en da okaen din daga ay insapatan Diyos sin ap-apo da ay idawat na en daida. <sup>8</sup> Laton tan si Diyos ay mismo di mangipango ya mangoyog en dakayo. Adi kayon emegyat ono madismaya, tan adi na polos taytaynan ono pandokdokogan dakayo.” <sup>9 10 11 12 13 14 15 16 17 18 19 20 21 22 23</sup>

<sup>24</sup> Insolat Moses amin din linteg Diyos si esa ay libro et inset na ta maga di malabsan. <sup>25</sup> Idi nakdeng ay insolat na, binilina din papadi ay Levita ay makaammo ay manggen sin Baol di Tolagan Diyos et kanana en daida, <sup>26</sup> “Alaen yo din libro ay nay ay naisolatan di linteg ta itakdo yo sin Baol di Tolagan Yahweh ay Diyos yo ta mantee isdi ay say tistigo mo dokogan yos Diyos.” <sup>27 28 29</sup>

### *Din Kantan Moses* (31:30; 32:1-44)

<sup>30</sup> Indaniw Moses din intiro ay kanta ay nay sin sangoanan di Israelita.

## 32

<sup>1</sup> “Dengngen yo ay langit ya daga din nay enak ibaga.

<sup>2</sup> Din pamagbagak et sapay koma  
ta kaman odan ya dono ay manibsibog sin daga.  
Kaman koman odan ay manibsibog sin naganos ay mola  
ya mamasbasa sin logam ay kagabgabay na.

<sup>3</sup> Idaydayaw ko din ogalin Diyos ay wada ed daya,  
dakayo ay ipogaw na et dad-aten yo din kinangato na.

<sup>4</sup> Si Diyos di komakaman ay pankamangan yo,  
am-in ay amagena et nalinteg ya kosto.

Matalek ay adi manbalbaliw sisya,

- maga polos di ipaksaw na.
- <sup>5</sup> Ngem baken kayon matalek ay ipogaw na,  
enggay adi kayo maibilang ay anak na,  
tan managbasol ya makaetek kayo,  
et say kaibabainan yo.
- <sup>6</sup> Ay siya baw na di isobalit yo en Yahweh ay Diyos yo?  
Naong-ong kayo ya magay nemnem yo!  
Sisya di Ama yo ya namarsua en dakayo,  
sisya di nangipaad-ado en dakayo!
- <sup>7</sup> Nemnemen yo ed bayag,  
damagen yo sin am-a yo mo sino di naamag.
- <sup>8</sup> Idi nansisianen Diyos ay Kangatoan din kaipoipogaw isnan daga,  
indawtana din amin ay nasyon si daga da,  
inkeddeng na di pantean di esa ya esa  
ta say din naitoding ay dagan di Israelita  
et omanay sin kaad-ado da.\*
- <sup>9</sup> Ngem pinili na din polin Jacob ay ipogaw na.
- <sup>10</sup> Sin lugar ay magay omili et dintenganas daida,  
sin kadardaratan ay kad-an di dagem ay napigsa.  
Sinalaknibana ya inayowanana si daida,  
inbilang nas daida ay nabanol en sisya.
- <sup>11</sup> Kaman din iyat di agila ay mangitdo sin anak na  
sin damo ay tomayawan da,  
nakasagana din payak na  
ay manikpaw mo ilaena ay mag-as da.
- <sup>12</sup> Ang-anggoy Diyos ay nangipango sin ipogaw na,  
magay odom ay diyos si nanolong en daida.
- <sup>13</sup> Sin kadondontogan et nanturayenas daida,  
pinakpakana sin amin ay maapit sin payew ya nom-a.  
Ad-ado di anig sin kabatbatoan ay in-ina da.  
Olay isdi yan gomabay din olivo ay nannan-aan das mantika.
- <sup>14</sup> Napnek da sin gatas di baka ya kalding da,  
ya sin karnin di mankalalames ay animal da.  
Pag din kamayatan ay bakakew di inani da  
ya kam-isan ay arak din danom di obas da.
- <sup>15</sup> Binmaknang din ipogaw Diyos et kinmedse da,  
nanpennek da ay nangan et tinmaba da.  
Dinokogan da si Diyos ay namarsua en daida,  
sinigaan da din manakabalin ay mangisalakan en daida.
- <sup>16</sup> Nan-imon si Diyos tan waday odom ay daydayawen da,  
binmonget begew sin sinan didiyos da.
- <sup>17</sup> Baken si Diyos mo adi et anito di indatdatonan da,  
baro ay sinan didiyos ay adi dinaydayaw di ap-apo da.
- <sup>18</sup> Dinokogan das Diyos ay nangidawat si biyag da,  
din komakaman ay pankamangan da.
- <sup>19</sup> Binmonget si Diyos ay nangila sin inamag da,  
et nilaksig nas daida ay an-ak na.
- <sup>20</sup> Kanana, 'Adiak badangan daida

\* **32:8** Din wada ed ngato et din kanana sin Hebreo. Din kanana sin Septuagint et natken: Amin ay ili yan waday anghel Diyos ay dinotokana ay mangay-ayowan en daida.

- ta ilaek mo intoy pantongpalan da,  
tan adi da matalek ya pag lawa di am-amagen da.
- 21 Nan-imonak sin sinan didiyos ay daydayawen da,  
binmongetak begew sin didiyosen da ay baken tet-ewa.  
Pan-aposek ya pabongetek daida  
begew si kaipoipogaw ay laslasoyen da  
ay mo maipanggep en sak-en et magay ammo da.†
- 22 Awni et bomidang ay kaman apoy din bonget ko,  
amin ay wadas nan daga et mapooan to.  
Olay abe din kad-an di natey ed Sheol ay kanan da  
ya din naisaadan di dontog isnan daga.
- 23 Ibonton ko en daida di paspasamak ay lawlawa,  
amin ay panak et maiturong en daida.
- 24 Awni et matey das betil, podot ya sakit ay magay agas na.  
Ibaak di mankaaangat ay animal ya nagitaan ay eweg ay mangat en daida.
- 25 Ad-adoy matey si gobat ay maiwalang sin kalsada.  
Olay sin beey da, matey das palalo ay egyat da.  
Matey din babbaro ya babalasang,  
momoyang ya naobanan.
- 26 Peslek koma amin si daida  
ta malinglingan da sin labaw di daga.
- 27 Ngem adiak layden ay manlastog din kaibaw da.  
Into et mo kanan da en inabak da  
din ipogaw ko ay baken sak-en di nanosa,  
kinwanin Diyos ay namarsua.
- 28 Ngem adi maawatan din Israelita,  
tan maga polos di nemnem da.
- 29 Adi da ammo di gapo ay naabak da,  
adi da maawatan din napasamak en daida.
- 30 Apay nga inabak di es-esa di sinlibo?  
Apay nga inabak di dodowa di sinpo ay libo?  
Tan binaybay-an Yahweh ay Diyos da,  
din komakaman ay pankamangan da  
et dinokoganas daida.
- 31 Ammon din kalaban da ay baken manakabalin din diyos da  
ay kaman din Diyos di Israelita.
- 32 Palalo ay lawlawa di nemnem din kalaban da  
ay kaman din ipogaw ed Sodoma ya Gomorra.  
Kaman dan obas ay manpait ya makasabidong di lames na,  
33 kaman arak ay mapos gitan di eweg di kaiarigan da.
- 34 Adi linglingan Diyos din inamag di kalaban da,  
sedsed-ena din kosto ay timpo ay panosaana en daida.
- 35 Kinwani na, 'Sak-en di man-ibaes ya manobalit en daida.‡  
Domteng di timpo ay maabak da,  
asag-en di timpo ay madosa da.'
- 36 Ikalintegan Diyos din ipogaw na  
mo ilaena ay enggay nakapsot da.  
Seg-angana din mansilsilbi en sisya  
mo ilaena ay magay kabaelan da

† 32:21 Roma 10:19. ‡ 32:35 Roma 12:19; Hebreo 10:30.

ya kaman magay nabay-an, bag-en ya baken bag-en, en daida.

<sup>37</sup> Asi na damagen en daida,

‘Et into ngin din didiyosen ay nantalkan yo?’

<sup>38</sup> Indatdatonan yos daida si arak ya tabtaba.

May kod adi, mankedaw kayo si badang da.

Ilaen tako mo siya ay omali da.

<sup>39</sup> Magay odom si tet-ewa ay Diyos mo adi et sak-en.

Amagek di laydek, mo enak peslen ono tagoen.

Mabalin ko ay pansakiten asiak agasan met laeng.

Magay makatopap mo waday laydek ay dosaen.

<sup>40</sup> Ikayang ko din takkay ko ay mansapata.

Isapatak sin awak ko ay matmatago si eng-enggana,

<sup>41</sup> ay mo palidek din somilsilap ay kampilan ko,

dadlonak ilaen ta nalinteg di iyat ko

ay mangokom ya manobalit sin lomiliget ay kaibaw ko.

<sup>42</sup> Malamos din panak si dada da,

olay din nasogatan ya balod et matey da.

Ad-adoy peslek sin kampilan ko,

magay mabay-an sin papangolon di kalaban ko.’

<sup>43</sup> Dakayo ay kaipoipogaw isnan daga,

makiragsak kayo sin ipogaw na,

tan si Diyos et dosaena din namse sin baa na.

Sisya di manobalit sin amin ay kalabana,

ngem pakawanena din basol di ipogaw na.”

<sup>44</sup> Indaniw Moses ya si Josue ay anak Nun din kanta ay nay ta dengngen din Israelita.

### *Din Maodi Ay Inbilin Moses*

<sup>45</sup> Idi nakdeng ay inbagan Moses sin Israelita din bilbilin Diyos ay nay, kanana en daida, <sup>46</sup> “Ilaen yo ta dadlon yon nemnemen ya tongpalen amin da nan bilbilin ay inbagak en dakayo ed wani ay agew. Itdo yo sin an-ak yo ta ipapasnek da ay tongpalen din bilbilin Diyos. <sup>47</sup> Danay ay nait-itdo et baken owat kali ay magay olog na mo adi et say poon di biyag yo. Tongpalen yo dana ta omando di biyag yo sin daga ay okaen yo mo agadangen yo din ginawang ay Jordan.”

<sup>48</sup> Sin doy met laeng ay agew, kanan Diyos en Moses, <sup>49</sup> “Emey ka ed Abarim ay kadondontogan sin ili ed Moab ay wada sin demang di Jerico. Mantikid ka sin dontog ay Nebo ta tamangem din ili ay Canaan ay siya din idawat ko sin Israelita. <sup>50</sup> Matey ka sin isdi ay dontog ay kaman din napasamak en Aaron ay agim ed dontog ay Hor, <sup>51</sup> tan nan-isoen yo ay adi kayon inpaila di talek yo en sak-en sin sangoanan di Israelita. Inbabain yos sak-en sin sangoanan di kaipoipogaw idi wada kayo sin kad-an di danom ed Meriba ay asag-en ed Kades ay sakop di lugar ay magay omili ay makwani en Zin. <sup>52</sup> Tamangem anggoy ngem adi ka makadateng sin lugar ay sana ay idawat ko sin Israelita.”

## 33

### *Din Namindisyonan Moses Sin Tribun Di Israelita*

<sup>1</sup> Idi dandani ay matey si Moses ay nankalkalian Diyos, da nay di inbaga na ay bindisyon sin Israelita:

<sup>2</sup> “Napo si Diyos ed Sinai ay dontog na,

kaman din bomalaan di agew sin patag na ed Edom din nanpailaana,

manipod sin dontog ay Paran, siney-angana din ipogaw na.

Adi kabilang ay anghel di kakoyog na,



- iin-genana di manbidbidang ay apoy sin kannawana.
- <sup>3</sup> Laylayden Diyos ya silibana din ipogaw na,  
isonga manyakog-ong tako sin sangoanana  
ya tongpalen tako din bilbilina.
- <sup>4</sup> Tongpalen tako din linteg ay inpolang Moses en datako  
tan say kapatgan ay sanikwan di ili tako.
- <sup>5</sup> Idi nasinop din tribun di Israelita ya din papangolo da,  
si Diyos di nanbalin ay ari da.”
- <sup>6</sup> Mo maipanggep sin tribun Ruben, kinwanin Moses na:  
“Adi koman malitaw din polin Ruben olay mo at-atik da.”
- <sup>7</sup> Mo maipanggep sin polin Juda, siya na di kinwani na:  
“Sik-a ay Yahweh, dengngem kod din adawag da,  
itapim koma si daida sin odom ay tribu ay iib-a da.  
Sik-a koma di mangipabikas en daida,  
badangam koma ta abaken dan kaibaw da.”
- <sup>8</sup> Mo maipanggep sin tribun Levi, siya na abe di kinwani na:  
“Ipaammom ay Diyos din laydem babaen sin Urim ya Tummim,\*  
ipaammom sin Levita tan daida nan matalek ay baam.  
Pinadas mos daida ed Massa et pinaneknekam ay matalek da  
sin kad-an di danom ed Meriba.
- <sup>9</sup> Nanlaslasinen da din pantongpalan da en sik-a  
mo din layad da sin ama ya ina da, aag-i ya an-ak da.  
Matalek da sin intolag mo  
et tinongpal da din bilbilin mo.
- <sup>10</sup> Itdoan da din ipogaw mo ay mantongpal sin linteg mo,  
daida di mangipoo sin sangoanam si insinso  
ya mangidaton si animal ay mapooan sin altar mo.
- <sup>11</sup> Sik-a ay Diyos, bindisyonam kod ta pomigsa din tribu da.†  
Sapay koma ta mapnek ka sin amin ay am-amagen da.  
Dosaem koma din kalaban da  
ya adim ipalobos ay kasin dan pomigsa.”
- <sup>12</sup> Maipanggep sin tribun Benjamin yan kinwani na:  
“Sinay din tribu ay laylayden Diyos ya ay-ayowanana.  
Silsilibanas daida si kasinsin-agew na  
ya makitee en daida.”
- <sup>13</sup> Mo maipanggep abe sin tribun Jose, kinwani na:  
“Bindisyonan koman Diyos si odan din daga da  
ya obbog ay mapo sin oneg di daga.
- <sup>14</sup> Mabindisyonan da koma si kamayatan ay lames di kaiw da  
ay maomaom sin poon da ya maapit sin timpo da.
- <sup>15</sup> Mapno koma din kadaan ay dontog da  
sin kamayatan ay molmola.
- <sup>16</sup> Amin koma ay siged di mawada sin ili da,  
bindisyon ay mapmapo sin kinasiged Diyos ed daya  
ay sin manbidbidang ay kitkittoy ay kaiw di nanteana.  
Maidawat koma dana ay bindisyon sin polin Jose  
tan sisya di nangipangolo en daida ay siag-i.
- <sup>17</sup> Din pigsan Jose et kaman pigsan di bomaro ay baka,  
kaman waday sakngod na

\* 33:8 Exodo 28:30. † 33:11 Di esa abe ay kaiologan nina et: ...bindisyonam od ta masepsep ay lomalaing da.

- ay kaman sakngod di atap ay baka.  
 Din piga ay libo ay polin Manasses ya kalibolibo ay polin Efraim ay an-ak na  
 et maiarig da sin kaeegyat ay sakngod ay sana.  
 Daida di idanggol na sin kalabana  
 enggana ay maidenden da sin benget di daga.”
- 18 Mo maipanggep sin tribun da Zebulun en Issakar, kinwani na:  
 “Sapay koma ta somiged di biyag da,  
 sin am-in ay panbibiyahian da.  
 Et olay mo mantetee da sin ili da,  
 sapay koma ta bomaknang da.
- 19 Awisen da din odom ay ipogaw sin dontog da  
 et idaton das di din kosto ay daton da.  
 Sin baybay ya darat sin igid na  
 di kapkapoan di panbaknangan da.”
- 20 Mo maipanggep abe sin tribun Gad, kinwani na:  
 “Madaydayaw si Diyos ay nangipaannawa sin ili da,  
 kaman layon si Gad ay manseseed sisya  
 ta bisngibisngitena din takkay ono toktok di depapena.
- 21 Pinili da ay okaen din kasigedan ay partin di daga,  
 kaman bingay di pangolo di naidawat en daida,  
 tan din linteg Diyos et tinongpal da  
 sin nasinopan di papangolon di Israelita.”
- 22 Sinay abe di kanana maipanggep sin tribun Dan:  
 “Kaman bomaro ay layon din tribun Dan  
 ay pomadtok ay mapo ed Basan.”
- 23 Mo maipanggep sin tribun Naftali, siya na abe di kanana:  
 “Begew sin seg-ang Diyos en daida,  
 aped na ay mabindisyonan da.  
 Enggana sin abagatan et sakopen da  
 manipod sin lebeng ay Galilea.”
- 24 Mo maipanggep pay sin polin Aser, kinwani na:  
 “Ad-ado di bindisyon da mo din odom ay Israelita.  
 Daida koma di laylayden di aag-i da,  
 ya omad-ado koma di olivo sin daga da.
- 25 Masalagniban koma si landok ya bronsi ay pasbol din ili da  
 ta maga di pandandanagan da  
 enggana ay mapospos di biyag da.
- 26 Dakayo am-in ay ipogaw na, magay makaiso sin Diyos yo,  
 agadangena ed daya ta ena badangan dakayo.  
 Maila din kinangato na tan maikoyog sin liboo.
- 27 Si Diyos ay magay logiana di kanayon ay pankamangan yo.  
 Kanayon ay nakasagana din takkay na ay manalaknib en dakayo.  
 Din kaibaw yo ay datngan yo et inab-abo na,  
 inbilina ay peslen yo amin daida.
- 28 Isonga dakayo ay polin Jacob et natalna di biyag yo,  
 ad-ado di makan ya arak sin kad-an yo,  
 masibsibogan si odan ay mapod daya din daga yo,  
 et maga di pandandanagan yo.
- 29 Din kalaban yo, awni et manpakpakaasi da  
 et dakayo di mangituray en daida.”

## 34

### *Din Nateyan Moses*

<sup>1</sup> Makdeng pay ay bindisyonan Moses din Israelita, nantikid sin dontog ay Nebo et dinmateng sin toktok di dontog ay Pisga sin naibandas belaan di agew ed Jerico. Isdi ay inpailan Diyos en sisya din intiro ay ili manipod sin sakop di Gilead enggana sin amyanan ay maidawat sin polin Dan, <sup>2</sup> din amin ay sakopen di polin Naftali ya din sakop di polin da Efraim en Manasses. Inila da abe amin din sakopen di polin Juda enggana sin baybay ay Mediterranean, <sup>3</sup> pati din naibandas abagatan ya din tanap manipod ed Jerico ay kaad-adoan di kaiw ay palma enggana ed Zoar. <sup>4</sup> Pag kanan Diyos en Moses, “Dooy din daga ay insapatak en da Abraham, Isaac ya si Jacob ay idawat ko sin ap-o da. Ipailak en sik-a ngem adiak ipalobos ay makadateng kas di.”

<sup>5</sup> Natey si Moses ay baan Diyos ed Moab ay kaman din inbagan Diyos ay mapasamak.

<sup>6</sup> Inponpon Diyos sisya sin tanap ed Moab sin demang na ed Betpeor, ngem magay makaammo sin kosto ay naiponponana enggana ed wani. <sup>7</sup> Mantawen si Moses si sin-gasot ya downpo sin nateyana, ngem adi kinmapkapsot din mata na ya adi naknaksayan din pigsa na. <sup>8</sup> Nanladingit din Israelita si tolonpo ay agew sin tanap ed Moab.

<sup>9</sup> Mo si Josue ay anak Nun et naidawtan si palalo ay laing ay napon Diyos sin nangapayan Moses ay nangdotok en sisya. Pinatin din Israelita sisya et tinongpal da din bilbilin Diyos en daida ay inpaibaga na en Moses. <sup>10</sup> Magay odom ay mamadto ed Israel si makaison Moses ay nakikali en Diyos si sangosango. <sup>11</sup> Magay odom ay nankalkalian Diyos si nakaamag sin nakaskasdaaw ay inpaamag Diyos en sisya sin sangoanan di ari ed Egipto ya amin ay oopisyal ya ipogaw na. <sup>12</sup> Magay odom ay nakaamag sin nakaskasdaaw ya kaeegyat ay inam-amag na sin sangoanan di am-in ay Israelita.

## Josue

### Maipanggep Sin Libro Ay Nay

Din linaon din libro ay nay et din kaitoloyan din naisolat sin Deuteronomio. Madad-at isna din inyat di Israelita ay sinenggep ed Canaan, din nangabakan da sin man-ili ed Jerico, Ai ya odom ay ili isdi, din naibingayan din daga ay sakopen di esa ya esa ay tribun di Israelita, ya din naodi ay diskurson Josue.

Din olog di ngadan Josue et “Si Diyos di Mangisalakan.” Indasana din naibabag-enan din Israelita ed Egipto ya din nangipangoan Diyos en daida sin kinmaanan da. Sisyang gogoy di kakoyog Moses sin kasinan nantikidan sin dontog ay Sinai ay mangawat sin Sinpo ay Bilin (Exodo 24:13-14). Si Josue di nangipangolo sin sosoldado ay Israelita sin nangabakan da sin Amalekita (Exodo 17), ya sisyang met laeng di naiskat en Moses ay pangolon din Israelita sin nangobgotan da sin Canaaneo.

Di esa ay versikulo ay laylayden di ad-ado ay ipogaw et din pamagbagan Josue sin Israelita sin 24:15. “Masapol ay manpili kayo ed wani mo sino di pansilbian yo. Ngem mo dakami pay ay sinpamilya, si Diyos di pansilbian mi.”

#### **Din Linaona**

Din nangabakan di Israelita sin taga-Canaan 1:1-12:24

Din naibingayan din daga ed Canaan 13:1-21:45

Din nantaolian din tribu ay sin dayaen di Jordan di daga da 22:1-34

Din naodi ay diskurson Josue 23:1-16

Din kasin nasiglotan din intolag Diyos ed Sekem 24:1-28

Din nateyan ya naiponponan da Josue en Eleazar 24:29-33

#### *Din Bilin Diyos En Josue Ay Segpen Da Ed Canaan (1:1-11)*

<sup>1</sup> Idi natey si Moses, kinalin Diyos si Josue ay kabadang Moses ya anak aben Nun. <sup>2</sup> Kanan Diyos en sisyang: “Enggay natey din baak ay si Moses, isonga mansagana ka ta ipangom din am-in ay Israelita. Agadangen yo san ginawang ay Jordan et emey kayo sin daga ay idawat ko en dakayo. <sup>3</sup> Idawat ko san intiro ay daga ay gatinan di siki yo ay kaman din inkarik en Moses ed idi. <sup>4</sup> Din beddeng di daga ay idawat ko et manlogi sin lugar ay magay omili ed abagatan enggana sin kadondontogan ed Lebanon sin amyanan; manlogi abe sin kad-an di dakdake ay ginawang ay Eufrates sin bomanda sin belaan di agew, maitapi abe din am-in ay ilin di Heteo, enggana sin baybay ay Mediterranean ed kadiposan di agew. <sup>5</sup> Maga di makaabak en sik-a si gobat engganang kateyam. Kankanayon ay wadaak en sik-a ay kaman din kawadak en Moses. Adiak polos taytaynan sik-a.

<sup>6</sup> “Isonga papigsaem din nemnem mo ya tomoled ka, tan sik-a di mangipango sin kaipoipogaw ay nay ta okaen yo san daga ay inkarik ed bayag sin ap-apo yo. <sup>7</sup> Ngem masapol ay dadlon kan papigsaem din nemnem mo ya adi kan emeg-egyat. Masapol abe ay adi ka masangsangaw mo adi et dadlon mon patien din am-in ay inbilin Moses ay baak en dakayo. Mo say iyat mo di, siged di pantongpalam olay intoy em-emeyam. <sup>8</sup> Kanayon abe ay ibasbasam din libro ay naisolatan dana ay linteg. Ilaem ta inagew ya linabi ay ad-adalem ya nemnemnemem ta say estem ay onodan din am-in ay linaona. Mo say amagem na, sigurado ay somiged di biyag mo ya mayat di pantongpalam di am-in ay amagem. <sup>9</sup> Isonga adim linglinglingan kanak, din inbagak en sik-a. Masapol ay papigsaem din nemnem mo ya tomoled ka. Adi ka aben emeg-egyat ya madisdismaya, tan sak-en si Yahweh ay Diyos mo et kankanayon ay kadmadaek sik-a olay mo intoy em-emeyam.”

<sup>10</sup> Idi siya di, kanan Josue ay nangibilin sin papangolo, <sup>11</sup> “Manliked kayo sin am-in ay kampon di gagait yo ta ibaga yo ay mansagana das omanay ay baon da, tan sin maikatlo ay agew, manbalasat tako sin ginawang ay Jordan ta en tako okaen din daga ay inkarin Diyos en datako.” <sup>12</sup> <sup>13</sup> <sup>14</sup> <sup>15</sup> <sup>16</sup> <sup>17</sup> <sup>18</sup>

## 2

### *Din Namadangan Rahab Sin Dowa Ay Ispay Di Israelita*

<sup>1</sup> Sin nankakampoan di Israelita ed Acacia, inbaan Josue di dowa ay lalaki ta en da siimen din daga ed Canaan, namnamed din siyodad di Jerico. Idi dinmateng sisi din dowa ay ispay, en da nan-iyang sin beey di esa ay babai ay manngadan si Rahab ay mangiab-abang si awak na. <sup>2</sup> Ngem inammoan baw din ari ed Jerico ay waday dinmateng ay Israelita sin siya di ay labi ay en mansiim sin ili da. <sup>3</sup> Isonga nan-ibaa si en nakikali en Rahab. Kanan da, “Ispay kano din dowa ay lalaki ay in mali isnan beey mo. Ipabelam ta depapen mis daida.”

<sup>4-6</sup> “Aw, tet-ewa ay waday lallalaki ay in mali sina, ngem adiak ammo mo intoy napoan da. Enggay met ay kinmaan da sin oras ay nadiposan di agew sin daan pay laeng main-eb din segpan di siyodad. Adiak kayman ammo di inmeyan da. Ngem mo dalasen yo ay mangonod en daida, siguro edasan yos daida sin danan.” Say kanan Rahab di, ngem di katet-ewa na, wada da sin toktok di beey ay ginagab-onana si tobon di magey ay ibilbilag na.

<sup>7</sup> Idi nakabela din baan di ari sin siyodad, kasin dan in-eb din segpan, down aben dalasen din baan di ari ay en mangonod sin ispay enggana ay dinmateng da sin pangadangan sin ginawang ay Jordan.

### *Din Nantolagan Da Rahab Ya Din Ispay*

<sup>8</sup> Daan pay laeng maseyep din dowa ay ispay idi nantaoli si Rahab sin toktok di beey ay kad-an da. <sup>9</sup> Kanana en daida, “Ammok ay idawat Diyos en dakayo ay Israelita din daga ay kad-an mi. Peteg di egyat mi am-in ay man-ilis na en dakayo. <sup>10</sup> Tan nadamag mi ay pinamgaan Diyos din Baybay ay Mandalangdang sin sangoanan yo idi tinaynan yo ed Egipto. Dinamag mi abe ay pinse yo din dowa ay arin di Amorreo ay da Sihon en Og sin belaan di agew di Jordan. <sup>11</sup> Isonga peteg kayman di egyat mi am-in en dakayo idi dinnge mi danay ay damag. Nakaan di toled mi, tan si Yahweh ay Diyos yo et say tet-ewa ay Diyos ed langit ya isnan daga. <sup>12</sup> Gapo ta tinolongak dakayo ed wani, kedawek abe en dakayo ta isapata yo sin ngadan Yahweh ay seg-angan yo din pamilyak. Ipaila yo aben sak-en di sinyal <sup>13</sup> ay ilisi yo da amak en inak, din am-in ay aag-ik ya din pamilya da ta adi kami matey.”

<sup>14</sup> Kanan din ispay ay nanongbat, “Olay dosaen Diyos si dakami mo waday masamak en dakayo. Basta adim ibagbaga si olay sino din am-amagen mi, matalek kami ay manongpal sin kindaw mo et mayat di iyat mi en dakayo mo domteng din timpo ay idawat Diyos din daga ay nay en dakami.”

### *Din Nantaolian Din Dowa Ay Ispay Sin Kampo Da*

<sup>15</sup> Din beey Rahab et naisaad sin nakayang ay binatang da ay alad di siyodad, isonga nan-ioy-oy si tali sin tawa ta pandanan din ispay ay lomayaw. <sup>16</sup> Idi daan da pay laeng komaan, kanan Rahab en daida, “En kayo sin kadondontogan et mantabon kayos di si tolo ay agew ta say adi edasan din inbaan di ari si dakayo. Awni ta makataoli da, asi kayo aben somaa.”

<sup>17</sup> Kanan da ay nanongbat, “Tongpalen mi din inbagam ay isapata mi <sup>18</sup> dalo et mo amagem dana: mo omali kami ay mangobat en dakayo, ioy-oy mo kasin din nay manbalanga ay tali ay say pan-alos-osan mi ed wani ay lomayaw. Sinopem abe da amam en inam, din aag-im ya din pamilya da sin nay beey mo. <sup>19</sup> Mo wadan to di bomala en



dakayo sin beey ay nay, basol na mo peslen das sisya, baken min basol. Ngem mo wada di mamse en dakayo sin oneg di beey ay nay, dakami di makabasol. <sup>20</sup> Mo pay ta ibagam si odom din am-amagen mi, mawaswas din insapata mi.” <sup>21</sup> Inaw Rahab din inbaga da yan binadanganas daida ay lomayaw. Sin dinmatngan di timpo, pag na kasin ioy-oy din manbalanga ay tali sin tawa.

<sup>22</sup> Inmey din doway ay ispay sin kadondontogan et nantabon das di. Mo pay abe din inbaan di ari et en da inan-anap daida sin am-in ay lugar enggana sin maikatlo ay agew, ngem adi dan dintengan. Isonga pag da et mantaoli ed Jerico. <sup>23</sup> Nanballalong din doway ay ispay et nan-agadang da sin ginawang. En da inpadamag en Josue di am-in ay napasasamak en daida. <sup>24</sup> Kanan da, “Sigurado ay idawat Diyos di pigsa tako ay mangabak sin intiro ay daga. Di katet-ewa na et peteg di egyat di am-in ay ipogaw sidi ya nakaan di toled da ay makigobat en datako.”

### 3

#### *Din Nanbalasatan Din Israelita Sin Ginawang ay Jordan (3:1-6,14-17)*

<sup>1</sup> Sin kabigatana, nasapa si Josue ya din am-in ay Israelita ay binmangon et tinaynan da din nankampoan da ed Acacia. En da nankampo sin sag-en di Jordan ta panpan-edan da sin timpo ay pan-agadangan da. <sup>2</sup> Sin maikatlo ay agew, nanliked din papangolo sin kampo. <sup>3</sup> Kanan da sin ipogaw, “Mo ilaen yo din papadi ay mamabatawil sin Baol di Tolagan Yahweh ay Diyos tako, manlobwat kayo ay dagos ta onoden yos daida. <sup>4</sup> Daida di mangipango sin danan, tan damdamo yo pay laeng sina. Ngem ilaen yo pay ta adi kayo omas-asag-en sin Baol di Tolagan. Addawian yo si pasal di esay kilometro.”

<sup>5</sup> Kanan aben Josue sin ipogaw, “Isagana yo di awak yo ta say natalos kayo sin pangilan Diyos. Tan si bigat, waday nakaskasdaaw ay amagen Diyos para en datako.”

<sup>6</sup> Binilina abe din papadi ay namabatawil sin Baol di Tolagan ta ion-ona da, et natongpal am-in ay inbaga na. <sup>7 8 9 10 11 12 13</sup>

<sup>14-15</sup> Timpon di pinag-aani idi napasamak am-in dana. Dakdake din danom sin ginawang et malmalbeng pay din benget na. Idi siya di, tinaynan din ipogaw din nankampoan da ta man-agadang da. Namangpango din papadi ay namabatawil sin Baol di Tolagan. Idi inpisok din papadi din siki da sin danom, <sup>16</sup> pag et kasaldeng ay man-ayos din danom sin kad-an di ili ay makwani en Adam\* ay addawi di kad-ana ed naongdo sin sag-en di Zaretan. Nabonton din danom sidi ay kaman nakayang ay dingding. Isonga namaga di danom ay man-ayos ay emey sin makwani en Natey ay Baybay,† et nakabalasat din Israelita sin asag-en ed Jerico. <sup>17</sup> Idi madama ay manbalbalasat din ipogaw ay manmandan sin nanamgaan ay lota, inpipika aben din papadi ay namabatawil si Baol di Tolagan sin nanamgaan ay lota sin gawan di Jordan enggana ay nakabalasat da am-in.

### 4

#### *Din Nangibangonan Da Josue Sin Sinpo Ya Doway Ay Bato (4:1-8)*

<sup>1</sup> Idi nakabalasat am-in ay Israelita sin Jordan, kanan Diyos en Josue, <sup>2</sup> “Mandotok kayo si sinpo ya doway ay lalaki ay mangialagey sin esa ya esa ay tribun di Israelita, <sup>3</sup> et bilinen yos daida ta man-a da si sag-eesa ay bato sin gawan di ginawang ay pinmipikaan din papadi et iey da sin pankampoan yo si labi.”

<sup>4</sup> Idi siya di, dinotokan da Josue di sinpo ya doway ay lalaki, asi na pinaayagan <sup>5</sup> et kanana en daida, “Emey kayo sin kad-an di papadi ay namabatawil sin Baol di Tolagan

\* **3:16** Emey ay tolonpo ay kilometro di kaaddawin di Adam ed Jerico. † **3:16** Din ngadan di baybay ay nay sin Hebreo et Baybay ay Araba ay siya din Baybay ay Asin.

Yahweh ay Diyos tako et en kayo mantilid si sag-eesa ay bato ay alaen yo sin ginawang para sin tribu ay ialageyan yo. <sup>6</sup> Din batbato ay sana et say mangipanpanemnem sin ipogaw maipanggep sin nakaskasdaaw ay inamag Diyos sina. Et mo damagen din ganak yo sin tapin di agew mo sinoy silbin din bato ay nay, <sup>7</sup> dad-aten yo en daida din inyat Diyos ay nangipasaldeng sin danom ed Jordan ay man-ayos idi inbalasat tako din Baol di Tolagan Diyos et kanan yo en din bato ay nay di kanayon ay mangipanpanemnem en datako ay Israelita sin inam-amag Diyos sina.”

<sup>8</sup> Tinongpal din lallalaki din inbagan Josue et inamag da am-in din inbilin Diyos. Nan-a da si sinpo ya dow a ay bato sin gawan di ginawang, sag-eesa para sin tribun di Israelita, et en da inpayag sin lugar ay pankampoan da. <sup>9 10 11 12 13 14</sup>

### *Din Nankampoan Din Israelita Ed Gilgal*

*(4:15-24)*

<sup>15</sup> Idi siya di, inbagan Diyos en Josue <sup>16</sup> ay bilinena din papadi ay namabatawil sin Baol di Tolagan ta komaan da sin ginawang. <sup>17</sup> Siya tet-ewa di inyat Josue, <sup>18</sup> et idi kosto ay nakabalasat din papadi sin ginawang, intoloy kasin din danom ay man-ayos et nanlepyas sin benget na ay kaman din sigod ay inyaat na.

<sup>19</sup> Sin pitsa 10 di damo ay bowan, idi nanbalasat din Israelita ed Jordan, pag da en mankampo ed Gilgal ay bomanda sin belaan di agew ed Jerico. <sup>20</sup> Isdi din nanoodan da Josue sin sinpo ya dow a ay bato ay ina da ed Jordan. <sup>21</sup> Kanan Josue sin Israelita, “Mo damagen din ganak yo sin tapin di agew mo sinoy silbin din bato ay nay, <sup>22</sup> dad-aten yo en daida din inyat Diyos ay nangipasaldeng sin danom ed Jordan ay man-ayos, et nanbalasat din Israelita sin nanamgaan ay lota. <sup>23</sup> Si Yahweh ay Diyos tako ay mismo di nangamag sina ay kaman din inyat na ed idi ay pinamgaana din Baybay ay Mandalangdang ta say makabalasat kami. <sup>24</sup> Begew sina, ammoan am-in di ipogaw isnan daga di dakdake ay panakabalin Diyos, et kankanayon abe ay idaydayaw yos sisya.”

## 5

1

### *Din Nangibilinan Diyos Ay Makogit Din Lallalaki Ay Israelita*

*(5:2-3,5,9-12)*

<sup>2</sup> Pag kanan Diyos en Josue, “Man-a kayo si bato ay moling ta amagen yo ay gipan ta kogiten yo am-in ay lalaki ay Israelita.” <sup>3</sup> Tinongpal ngarud Josue din inbilin Diyos et kinogit da am-in ay lalaki sin lugar ay makwani en Dontog ay Pankogitan. <sup>4 5</sup> Inamag da na tan olay mo nakogit am-in ay lalaki ay nakibala ed Egipto, magay nakogit sin lallalaki ay naianak sin opatapolo ay tawen ay nandad-anan da sin lugar ay magay omili. <sup>6 7 8</sup>

<sup>9</sup> Asi et kanan Diyos en Josue, “Ed wani ay agew, enggay kinaan ko di poon di panglaslasoyan da en dakayo ay din nakabag-enan yo ed Egipto.” Siya di din begew ay nangadanan din lugar ay doy si Gilgal\* enggana ed wani.

<sup>10</sup> Sin nankakampoan di Israelita ed Gilgal, sin tanap ay naisasag-en ed Jerico, sinilibraran da din fiesta ay makwani en Nalabas sin masdem di maikasipno ya opat ay agew di bowan. <sup>11</sup> Sin kabigatana, en da nan-ani sin kapaypayewan ay wadas di. Di odom ay inani da et nilagitan da. Di odom pay et in-oto das tinapay ay magay labadura na. Siya na di nangon-ona ay nanganan da si makan ay naapit ed Canaan. <sup>12</sup> Manlogi sin agew ay sana, din apit da ed Canaan di kinkinan da, tan enggay sinmaldeng din manna ay mapmapo ed daya.

### *Si Josue Ya Din Lalaki Ay Nakakampilan*

*(5:13-15)*

\* 5:9 Mais-o di kadngean di Gilgal sin kalin di Hebreo ay din olog na et nakaan.

<sup>13</sup> Idi wada pay laeng da Josue sin sag-en di Jerico, bigla et ay inila na di esa ay lalaki ay pinmipika sin sangoanana ay nananggen si kampilan. Inmasag-en si Josue et kanana, “Ay esa ka sin soldado mi, ono esa ka ay kaibaw mi?”

<sup>14</sup> “Aga, sak-en di pangolon di sosoldadon Diyos,” kanan din lalaki ay sana. Kadokmog ay nanyakog-ong si Josue sin lota ay nangdayaw en sisya. “Esaak ay baam, apo. Nasasaganaak ay manongpal sin bilin mo,” kanan Josue.

<sup>15</sup> Kanana en Josue, “Kaanem san sandal mo, tan nasantoan ay lugar nan kad-am.”† Et pinatin Josue din inbaga na.

## 6

### *Din Nakosokosan Din Alad Di Jerico*

<sup>1</sup> Iin-eb da din segpan di Jerico, dowan da aben binabantayan ta say adi makasgep din Israelita. Olay din omili sidi et magay makasgep ono makabela en daida. <sup>2</sup> Kanan Diyos en Josue, “Pangabakek dakayo mo gobaten yo nan Jerico et pasokoen yo din ari ya din natoled ay sosoldado na. <sup>3</sup> Di iyat yo, sik-a ya din sosoldadom et likeden yo san siyodad si mamingsan si esa ay agew. Say iyat yo na si enem ay agew. <sup>4</sup> Wada di pito ay padi ay mamanggen si tanggoyob ay mangon-ona mo din Baol di Tolagan. Sin maikapito ay agew, mananggoyob din pito ay padi ay sana dowan yon liklikeden san siyodad si mamin pito. <sup>5</sup> Pag mananggoyob din papadi si mabayag di bongog na. Mo dengngen yo di, manbogaw kayo am-in si napigsa, et pag makosokos din nakayang ay batog ay alad di siyodad. Asi kayo et kadoritso ay senggep sin siyodad.”

<sup>6</sup> Idi siya di, inayagan Josue din papadi et binilinas daida ay kanana, “Pito en dakayo di manggen si tanggoyob et dakayo di mangon-ona isnan linya. Omonod en dakayo din papadi ay mamabatawil sin Baol di Tolagan.” <sup>7</sup> Asi na aben bilinen din sosoldado na ay mangwani, “Ilogi yo ay mangliked sin siyodad. Din odom en dakayo et manpowisto kayo sin sangoanan din papadi ta man-gowardiya kayo sidi.”

<sup>8-9</sup> Pinati da din inbilin Josue. Nangon-ona din sosoldado sin linya, naisned en daida din papadi ay mamoyppoyot sin tanggoyob da. Omon-onod abe din papadi ay namabatawil sin Baol di Tolagan ya naod-odi din sosoldado ay mambantay sin likodan. Sin panliklikedan da, adi somalsaldeng din ayoweng di tanggoyob. <sup>10</sup> Ngem inbilin Josue sin sosoldado na ay maga polos di mankalkali en daida enggana ay ibaga na. <sup>11</sup> Namingsan ay inliked da din Baol di Tolagan sin siyodad, asi da pay mantaoli sin kampo da.

<sup>12</sup> Sin kabigatana, nasapa si Josue ay binmangon et inolnos na kasin din grupo ay sana ay en mangliked sin siyodad. Idi siya di, tinilid din papadi din Baol di Tolagan <sup>13</sup> et liniked da kasin din siyodad ay kaman din inyat da sin damo: nangon-ona din sosoldado ay gowardiya sin sangoanan, maisned en daida din papadi ay manangtangoyob, omon-onod abe din papadi ay namabatawil sin Baol di Tolagan, et naodi din sosoldado ay gowardiya sin likodan. Adi polos sinmalsaldeng din ayoweng di tanggoyob sin panliklikedan da. <sup>14</sup> Liniked da din siyodad si namingsan sin nay maikadwa ay agew, asi da mantaoli sin kampo da. Say inam-amag da na enggana sin maikan-em ay agew.

<sup>15</sup> Sin maikapito ay agew nasapa da am-in ay binmangon et liniked da din siyodad ay kaman met laeng sin damo. Ngem sin doy ay agew anggoy di nanglikedan da si namin pito. <sup>16</sup> Idi nakdeng ay liniked da din siyodad si namin pito, nansagana din papadi ay mananggoyob. Dowan abe bilinen Josue din ipogaw ay mangwani: “Manbogaw kayo, tan indawat Diyos en datako din siyodad ay nay!” <sup>17</sup> Asi et itoloy Josue ay mangwani, “Masapol ay dadaelen yo din siyodad ya peslen yo am-in ay matmatago ay wadas di ta kaman daton para en Diyos. Ngem adi yo pay pespeslen si Rahab ya din papartido na, tan intabona iman din ispay tako. <sup>18</sup> Maga polos di al-alaen yo sin am-in ay inbagak

† 5:15 Ilaen din footnote ay matdengnan sin Exodo 3:5.

ay dadaelen yo; tan mo say iyat yo di, dakdake ay ligat di mapasamak sin kampo tako. <sup>19</sup> Ilasin yo abe am-in ay palata ya balitok ya din naamag si bronsi ya landok para en Diyos. Maidolin am-in danay sin pan-idoldolinan sin gameng na.”

<sup>20</sup> Idi nakdeng ay inbilin Josue dana, nananggoyob din papadi. Idi dinngen di ipogaw din ayoweng din tanggoyob, inpigsa da ay nanbogaw, et pag makosokos din alad di siyodad. Nanagtag din sosoldadon di Israelita ay sinenggep sin siyodad et inabak da.

<sup>21</sup> Pinse da sin kumpulan da am-in ay ipogaw sin siyodad, lalaki ya babai, moyang ya naket-eng. Pinse da abe din am-in ay animal: baka, karnero, ya dangki.

### *Din Naisalakanan Din Pamilyan Rahab*

<sup>22</sup> Idi siya di, kanan Josue sin dowang ay ispay, “Emey kayo sin beey din babai ay namadang en dakayo et ibela yos sisya ya din pamilya na ta tongpalen yo din insapata yo ay amagen yo.” <sup>23</sup> Inmey da tet-ewa et inbela da si Rahab, da ama na en ina na, ya siya abe din aag-i na ya odom ay wada sin beey na. In-ey da am-in daida sin sag-en di kampon di Israelita ta say adi da maan-ano. <sup>24</sup> Asi et pinooan din sosoldadon di Israelita din siyodad enggana ay dinmap-o di am-in ay wadas di, ngem naipowira din balitok ya pilak ya din naamag si bronsi ya landok, tan en da indolin sin pan-idoldolinan sin gameng Diyos.

<sup>25</sup> Ngem insalakan pay Josue si Rahab ya din am-in ay aag-i na, tan intabona iman din ispay ay inbaa na ed Jerico. (Et nakiili da Rahab ed Israel enggana ed wani.)

<sup>26</sup> Idi nakdeng ay nadadael din siyodad, kanan Josue, “Dosaen Diyos di olay sino ay mamadpadas ay mangibangon kasin sin alad ya eneb di siyodad ay nay:

Mo isaad na din fondasyona,  
matey din besag na.

Mo amagena abe din eneb na,  
matey din anongos na.”\*

<sup>27</sup> Naipaila tet-ewa di kawadan Diyos en Josue, et nandindinamag din kinangato na sin intiro ay ili.

## 7

### *Din Nanlabsingan Akan Sin Bilin Diyos*

<sup>1</sup> Palalo din bonget Diyos sin Israelita, tan wada en daida di nanglabsing sin bilina ay adi da manman-a si okaen da sin alikamen ay naikeddeng ay madadael ono mailasin para en Diyos. Si Akan ay anak Carmi ya apon Zabdi sin polin Zera ay napo sin tribun Juda et linabsing na din bilin Diyos ay sana. <sup>2</sup> Adi ammon Josue din naamag ay sana idi nan-ibaa si sosoldado na ay napo ed Jerico ta en da siimen din siyodad di Ai, esa ay ili ay wada sin belaan di agew mo ed Betel ay asag-en ed Bet-aven. Tinongpal din naibaa din bilin Josue, <sup>3</sup> et idi nantaoli da, kanan da en sisya, “Adi masapol ay emey tako am-in ay en mangobat isnan siyodad di Ai. Olay owat dowang ono tolo ay libo ay sosoldado et anggoy di ibaam tan kitkitooy ay ili.” <sup>4</sup> Isonga emey ay tolo ay libo ay sosoldado anggoy di en nangobat, ngem naabak da et kapilitan ay nanagtag da. <sup>5</sup> Inapayaw din sosoldadon di Ai daida manipod sin segpan di siyodad enggana sin panpan-aan si bato et pinse da di tolonpo ya enem ay sosoldadon di Israelita sin panbalballalongan da. Begew sin napasamak ay doy, nakaan di toled din Israelita ya peteg di egyat da.

<sup>6</sup> Idi siya di, sinmag-en da Josue ya din papangolon di Israelita sin Baol di Tolagan Diyos et binisngit da din bado da dowan dan pay-an din toktok da si dap-o ay mangipaila sin sakit di nemnem da, asi da manlokbob sin lota enggana sin masdem. <sup>7</sup> Idi manlolokbob da, kanan Josue ay man-adawag, “Kangatoan ay Diyos, aye pay na si inyat mo en dakami. Ay tan in-alim baw dakami sina ta ipapsem dakami sin Amorreo? Agpos

\* **6:26** Din inpadton Josue ay nay et natongpal sin timpon Ari Ahab (1 Aari 16:34).

et baw mo pag min intetee sin bas-il di Jordan. <sup>8</sup> Apo, adiak et ammo di maibagak ed wani ay naabakan mi isnan kagobat mi. <sup>9</sup> Mo dengngen din taga-Canaan ya din odom ay man-ili sina ay naabak kami, awni et lomikob da et peslen da am-in dakami. Et mo say maiyat sa, adi pay kanan di ipogaw en adim baw kabaelan ay manalaknib sin ipogaw mo.”

<sup>10</sup> Asi et kanan Diyos en da Josue, “Ipikam. Pagaten yo ay manlolokbob sin lota? <sup>11</sup> Ay adi yon ammo ay binmasol nan Israelita en sak-en? Linabsing da din inbilin ko ay adi kayo manman-a si okaen yo sin alikamen ay naikeddeng ay madadael ono mailasin para en sak-en. Wada din inakew da ay intatabon da sin kad-an di odom ay bonag da, yan insaot da. <sup>12</sup> Say begew na ay adi kayo makaabak isnan kagobat yo. Kapilitan ay naabak da tan inkeddeng ko ay madosa da. Adiak aben badbadangan dakayo enggana ay dadaelen yo din alikamen ay inbagak en dakayo ay adi yo al-alaen. <sup>13</sup> En ka et ibaga sin ipogaw ta dalosan dan awak da ya mansagana da ay manpaila en sak-en si bigat, tan sak-en si Yahweh ay Diyos yo ay Israelita et kanak en daida, ‘Wada en dakayo di nangidodolin sin inbagak ay dadaelen yo. Adi kayo polos makaabak isnan kagobat yo enggana ay iwasit yo dasa.’ <sup>14</sup> Isonga ibagam en daida ay si bigat sin agsapa, bomala am-in ay tribun di Israelita ta mapili mo sino di binmasol. Bomala abe din tonggal partido sin tribu ay mapili, din tonggal pamilya sin partido ay mapili, ya din saes-a ay mimbron di pamilya. <sup>15</sup> Din ipogaw ay mapili ya madtengan ay mangidodolin sin alikamen ay inbagak en dadaelen yo et peslen yos daida ay sinpamilya, asi yon poan ay maitapi sin am-in ay bonag da, tan linabsing na din bilin ko et palalo ay inbabaina di am-in ay Israelita.”

<sup>16</sup> Sin kabigatana, nasapa si Josue ay nangipaayag sin am-in ay tribun di Israelita. Naiparang da sin sangoanan Diyos et napili din tribun Juda. <sup>17</sup> Naiparang abe din am-in ay kapototan sin tribun Juda et napili si Zera. Naiparang abe din am-in ay pamilya sin kapototan Zera et napili san pamilyan Zabdi. <sup>18</sup> Naiparang abe din pamilyan Zabdi et napili si Akan ay anak Carmi ya apon Zabdi. <sup>19</sup> Kanan Josue, “Anak, dayawem si Yahweh ay Diyos tako ay Israelita et ipodnom di tet-ewa ay inamag mo. Din kosto di ibagam en sak-en, adim isassaot.”

<sup>20</sup> Kanan Akan, “Tet-ewa kayman ay nanbasolak en Yahweh ay Diyos tako. <sup>21</sup> Sin tinopog mi ay gamgameng, wada di inilak ay mapmapteng ay nagayad ay bado ay napo ed Babilonia, dowa ay kilo ay palata, ya kagodwan di kilo ay balitok. Inaklongak danay isonga inak. Wada da ay inkakaot ko sin oneg di toldak ay naidadalle din palata.” <sup>22</sup> Nanagtag din lallalaki ay inbaan Josue et inmey da sin kampon Akan. Dinteng da tet-ewa din inkakaot Akan, et naidadalle din palata sin naikaotan da. <sup>23</sup> Inbela da sin tolda et in-ey da sin kad-an da Josue ya din am-in ay Israelita, asi da ipayag sin sangoanan Diyos. <sup>24</sup> Idi siya di, in-ey Josue ya din am-in ay Israelita si Akan ya din am-in ay inakew na sin tanap ay makwani en Ligat. Intakin da din an-ak na, din baka, dangki ya karnero na, din tolda na ya am-in ay bonag na. <sup>25</sup> Idi wada das di, kanan Josue, “Gapo ta pinaligat mos dakami, paligaten aben Diyos sik-a.” Pag et pigpigen din am-in ay ipogaw si Akan enggana ay natey. Pinigpig da abe din pamilya na, asi da poan daida ay maitapi sin bonag da. <sup>26</sup> Ginab-onan das daida sin ad-ado ay bato ay wada pay laeng sidi enggana ed wani. Isonga nginadanan da din lugar ay sana si Ligat et say ngadana enggana ed wani. Idi enggay natey si Akan, nakaan et din bonget Diyos.

## 8

### *Din Nangabakan Din Israelita Sin Siyodad Di Ai (8:1-29)*

<sup>1</sup> Asi et kasin kanan Diyos en Josue, “Adi ka emegyat ya madisdismaya. Ayagam et din am-in ay sosoldadom ta en yo kasin gobaten ed Ai. Awni et ipaabak ko en dakayo din



ari ya din ipogaw na et okaen yo din siyodad ya din daga da. <sup>2</sup> Kaman din inyat yo sin siyodad di Jerico ya din ari na di iyat yo sin siyodad di Ai ya din ari na. Ngem ed wani, mabalin yo ay alaen din alikamen ya animal para en dakayo. Isonga mansagana kayo ta en kayo mantabon sin likodan di siyodad asi kayo kabigla ay mangobat en daida sisi.”

<sup>3</sup> En nansagana tet-ewa da Josue ta en da gobaten ed Ai. Di inyat na et pinili na di tolonpo ay libo sin kalalaingan ay sosoldado na et inbaa nas daida sin labi. <sup>4</sup> Kanana ay namilin en daida, “En kayo mantabon sin baken onay addawi sin likodan di siyodad. Mansasagana kayos di ay makilaban. <sup>5</sup> Sak-en pay ya din odom ay sosoldado, en mi sag-enen din siyodad, et mo omali din sosoldadon di Ai ay gomobat, managtag kami ay mantaoli ay kaman din inyat tako sin damo. <sup>6</sup> Omapayaw da tan kanan da en itagtagtagan mis daida ay kaman sin damo enggana ay omaddawi da sin siyodad. <sup>7</sup> Asi kayo aben kabela sin nantatabonan yo et gobaten yo san siyodad. Laton ay ipaabak Yahweh ay Diyos tako en dakayo. <sup>8</sup> Et mo makdeng ay inabak yo, kapoo kayo ay dagos sin siyodad ay kaman din inbilin Diyos. Siya na din bilin ko en dakayo.”

<sup>9</sup> Idi siya di, inbaan Josue din tolonpo ay libo ay sosoldado, et en da nantabon sin bomanda sin diposan di agew ed Ai sin nan-gawaan di Ai ya Betel et nanseed das di. Si Josue pay, en naseyep sin kampo da.

<sup>10</sup> Sin kabigatana, nasapa si Josue ay binmangon et sininop na din sosoldado na et nanlobwat da ay emey ed Ai. Inpangon Josue ya din papangolon di Israelita daida, <sup>11</sup> et inmey da sin sag-en di segpan di siyodad. Nankampo da sin bomanda sin amyanan. Esa ay tanap di nan-gawaan da sin siyodad di Ai.

<sup>12</sup> Inbilin Josue ay en mantabon di lima ay libo sin sosoldado sin bomanda sin kadiposan di agew sin siyodad, sin nan-gawaan di Ai ya Betel. <sup>13</sup> Naiolnos din sosoldado ay en makigobat. Din kaad-adoan en daida, nanpowisto da sin amyanan di siyodad et din odom, nanpowisto da abe sin bomanda sin kadiposan di agew sin siyodad. Ngem si Josue pay, en nantee sin tanap sin labi ay doy.

<sup>14</sup> Sin kabigatana, inilan din arin di Ai din sosoldadon Josue. Nan-aagag sisya ya din sosoldado na ay binmela et nanturong da sin tanap ay Jordan ta en da gobaten din sosoldadon di Israelita sin lugar met laeng ay nangobatan da sin damo. Ngem adi na ammo ay wada baw di nakasagana ay mangobat sin ili na ay mapo sin likodan di siyodad. <sup>15</sup> Agin tatagtag si Josue ya din sosoldado na ay manturong sin kadardaratan. <sup>16</sup> Idi siya di, naayagan amin ay lalaki sin siyodad ta en da makiapayaw sin sosoldadon di Israelita. Inonod das daida enggana ay inmaddawi da sin siyodad. <sup>17</sup> Am-in ay lalaki ed Ai et en da nakiapayaw, isonga nataynan din siyodad ay nabobokatan din segpan ya maga di nabay-an ay mamantay.

<sup>18</sup> Asi et kanan Diyos en Josue, “Ikayang mo san gayang mo ta tedkena ed Ai, tan ipaabak ko din siyodad ay sana en dakayo.” Tinongpal Josue din inbagan Diyos. <sup>19</sup> Idi inkayang na din gayang na, kabela din sosoldado ay nantatabon et nanagtag da ay inmey sin siyodad, et inabak da dowan dan poon.

<sup>20-21</sup> Idi manwingi din sosoldadon di Ai, inila da et din asok di mapoppooan ay ili da ay komaykayang ed daya. Inilan aben da Josue ya din sosoldado na din asok, et say nangammoan da ay enggay inabak din gagait da din siyodad ya enggay pinooan da. Isonga nantaoli da sin panagtagtagan da et ilogi da ay mamse sin kagobat da. Mo din sosoldadon di Ai, maga et di iyat da ay lomayaw, tan din Israelita ay ap-apayawen da et nantaoli da baw ay en mangobat en daida. <sup>22</sup> Din Israelita ay en namoo sin siyodad et nanballalong da ay en naitapi sin gobatan. Siya di, linikob din doway ay grupon di Israelita din sosoldadon di Ai. Maga di nakalayaw en daida tan natey da am-in, <sup>23</sup> powira din ari da. Dinpap da din ari et in-ey da en Josue.

<sup>24</sup> Pinsen din Israelita din am-in ay kagobat da sin kadardaratan ay en nangapayawan di sosoldadon di Ai en daida. Idi nakdeng di gobat sisi, nantaoli da ed Ai et pinse da abe

am-in ay wadas di. <sup>25-26</sup> Intoltoloy Josue ay inkakayang din gayang na ay naituturong ed Ai, et adi na inbabbaba enggana ay natey am-in ay ipogaw ay wadas di. Emey ay sinpo ya doway ay libo di bilang di lallalaki ya babbabai ay omili ed Ai ay natey sin agew ay sana. <sup>27</sup> Inan din Israelita din aanimal ya am-in ay bonag sin siyodad ta say okaen da, tan say inbilin Diyos en Josue. <sup>28</sup> Pinooan da Josue din siyodad di Ai et tinaynan da ay nabakas, et kaman nidi di iso na enggana ed wani. <sup>29</sup> Mo din arin di Ai, pinse da et inbay-at Josue sin kaiw. Binaybay-an da din awak na sidi enggana ay masdem. Idi dandani ay madipos din agew, inbilin Josue ay ipababa da din awak na. Inamag da di et intep-a da sin lota sin segpan di siyodad. Asi da et tab-okan si dadakke ay bato et wada pay laeng ay nabobonton sidi enggana ed wani. <sup>30 31 32 33 34 35</sup>

### *Din Nangietekan Di Taga-Gibeon En Da Josue*

Idi nadamag din taga-Gibeon din inyat da Josue ay nangabak ed Jerico ya Ai, inbaa day lallalaki ay makitolag sin Israelita ta say adi gobaten din Israelita si daida. Di inamag din naibaa et inbado day baak ay bado ya insapatos day enggay nangpos ay sandal. Inbaon da abey tinapay ay enggay namgaan ya nabootan. Idi dinmateng da sin kad-an da Josue, kanan da ay nangisapit en napo da sin addawi ay ili ya layden da ay makitolag sin Israelita, ngem kambaw asag-en di napoan da. Tinamtaman din papangolon di Israelita din inbaon da, ngem adi dan dinamag en Diyos mo sinoy kosto ay amagen da.

Idi siya di, nakitolag da Josue ay adi dan gobaten mo adi et ipalobos das daida ay matago. Idi inmey di tolo ay agew, naammoan din Israelita ay napo da baw sin asag-en ay ili. Palaloy bonget din Israelita et layden da ay peslen din taga-Gibeon begew sin etek da. Ngem gapo sin tolagan da, adi dan pinse mo adi et nanbalinen das daida ay bag-en ay para sakdo ya para kaiw. (9:1-27)

## 9

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27

## 10

### *Din Nataktakan Din Nadiposan Di Agew (10:1-15)*

<sup>1</sup> Nadamag Adonizedek ay ari ed Jerusalem ay inabak ya dadlon binakas Josue ed Ai ya pinse na din ari da ay kaman din inyat na ed Jerico ya din ari da. Nadamag na abe ay nakikapya din taga-Gibeon sin Israelita et nakiili da en daida. <sup>2</sup> Palalo di danag na tan dakdake ay ili ed Gibeon ay kaman din dadakke ay siyodad ay iturayan di aari. Dakdake pay mo ed Ai yan nankalalaing ay makigobat din amin ay lallalaki isdi. <sup>3</sup> Gapo sidi, nanpatolong si Adonizedek en da Hoham ay ari ed Hebron, Piram ay ari ed Jarmut, Jafia ay ari ed Lakis ya Debir ay ari ed Eglon. <sup>4</sup> Siya na di inpaibaga na: “Bomadang kayo kod ay mangobat sin taga-Gibeon, tan doy nakikapya da en Josue ya din Israelita.” <sup>5</sup> Da nay ay lima ay arin di Amorreo ay aari ed Jerusalem, Hebron, Jarmut, Lakis ya Eglon yan nan-es-esa din sosoldado da et nantikid da ed Gibeon. Linikob da, pag dan gobaten.

<sup>6</sup> Idi siya di, pinakaammoan din lallalaki ed Gibeon si Josue sin kampo da ed Gilgal ay kanan da, “Adi ka koman baybay-an dakami ay mansilsilbi en dakayo. Kagosam kod ay en bomadang ya omisalakan tan nay manbabadang din aari sin il-ili sin kadondontogan ay mangobat en dakami.”

<sup>7</sup> Et nanlobwat da Josue ed Gilgal yan inkoyog na amin din sosoldado na pati din katoledan ay sosoldado. <sup>8</sup> Kanan Diyos en sisya, “Adi ka emegyat tan pangabakek sik-a. Maga polos di makabael ay lomaban en sik-a.”

<sup>9</sup> Manipod ed Gilgal, nanlablabis da Josue ay inmey ed Gibeon et nabiglaan din Amorreo. <sup>10</sup> Inolaw Diyos daida sin nangilaan da sin sosoldadon di Israelita et ad-adoy pinsen da Josue en daida ed Gibeon. Inapayaw das daida enggana sin ballalongan ed

Bet-horon. Intoltoloy da ay namse sin Amorreo enggana sin abagatan ed Azeka ya Makkeda. <sup>11</sup> Idi ilaylayawan din Amorreo din Israelita sin ballalongan ed Bet-horon, inpaodan Diyos di dadakke ay dalalo en daida enggana ed Azeka et ad-ado di natey. Ad-ad-ado di pinsen di dalalo mo din pinsen di Israelita si kampilan.

<sup>12</sup> Sin agew ay doy ay namadangan Diyos sin Israelita ay mangabak sin Amorreo, nakikali si Josue en Diyos sin sangoanan di Israelita. Kanan Josue, “Sik-a ay agew, somaldeng ka sin patag nan Gibeon. Sik-a ay bowan, somaldeng ka sin patag di tanap ay Aijalon.” <sup>13</sup> Sinmaldeng tet-ewa din agew ya bowan enggana ay inabak din Israelita din kalaban da. Naisolat dana sin Libron Jashar. Sinmaldeng din agew sin gawa nad daya et nataktak si dandani ay esay agew din kadiposana koma. <sup>14</sup> Maga polos di kaman nidi ay pinatgan Diyos di kalin di esay ipogaw, olay ed idi ono manipod sin agew ay doy, tan makilablaban dedan si Diyos para sin Israelita.

<sup>15</sup> Makdeng pay di, nantaolis Josue ya din amin ay Israelita sin kampo da ed Gilgal.  
16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43

**11**

1 2 3 4 5 6 7 8 9 10 11 12 13 14 15 16 17 18 19 20 21 22 23

**12**

1 2 3 4 5 6 7 8 9 10 11 12 13 14 15 16 17 18 19 20 21 22 23 24

**13**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33

**14**

1 2 3 4 5 6 7 8 9 10 11 12 13 14 15

**15**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52

**16**

1 2 3 4 5 6 7 8 9 10

**17**

1 2 3 4 5 6 7 8 9 10 11 12 13 14 15 16 17 18

**18**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28

**19**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51

**20**

1 2 3 4 5 6 7 8 9

**21**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45

**22**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34

**23***Din Diskurson Josue Sin Papangolo*

<sup>1</sup> Idi nabayag, pinangabak Diyos din Israelita sin am-in ay kagobat da et indawtanans daida si talna. Si Josue pay, enggay nakay sin timpo ay sana, <sup>2</sup> isonga inpaayag na din mangialagey sin am-in ay Israelita: din nankakay di ili, papangolo, hohowis ya oopisyal.

Pag nan kanan, “Nay enggay nakayak et dandani di timpok. <sup>3</sup>Laydek ay ipanemnem en dakayo din am-in ay inamag Yahweh ay Diyos tako sin nanasyon begew en datako, tan inila tako ay mismo di inyat na ay nakigobat para en datako. <sup>4</sup>Enggay inpatawid ko sin tribu yo din am-in ay dagan di nanasyon ay inabak tako ya daan pay maabak. Naibingay am-in en dakayo manlogi sin ginawang ay Jordan sin bandas belaan di agew enggana sin baybay ay Mediterranean sin diposan di agew. <sup>5</sup>Awni et mismo ay si Yahweh ay Diyos yo di mangipakaan en daida sin domatngan yo et okaen yo din daga da ay kaman din inkari na.

<sup>6</sup>“Isonga esten yo ay mangonod sin am-in ay linaon din libro ay naisolatan di linteg Moses. Adi kayo masangsangaw si olay at-atik. <sup>7</sup>Adi kayo makikadkadwa sin nabayan ay ipogaw ay makiili en dakayo. Ilaen yo abe ta adi kayo mankarkarag sin diyos da ono os-osalen din ngadan di diyos da ay mansapata. Adi kayo mandokmog ay mandayaw en daida, <sup>8</sup>mo adi et ipapasnek yo ay mantalek ya mansilbi en Diyos ay kaman san inyaat yo enggana ed wani.

<sup>9</sup>“Nemnemen yo ay pinakaan Diyos din dadakke ya napipigsa ay nasyon ay dinatngan yo, et enggana ed wani, maga di nakabael ay nangabak en dakayo. <sup>10</sup>Olay es-esa en dakayo yan kabaelana ay ipalayaw di sinlibo, tan si Yahweh ay Diyos tako di makigobgobat para en dakayo ay kaman din inkari na. <sup>11</sup>Isonga mo banolen yon biyag yo, ilaen yo ta ipapasnek yo ay manglaylayad en sisya.

<sup>12</sup>“Tan mo dokogan yo si Yahweh ay Diyos tako ya makikadwa kayo sin nabayan ay man-ili isna ya makiasawa kayo en daida, <sup>13</sup>sigurado ay adi itoloy Diyos ay mangipakaan sin nanasyon ay datngan yo. Manbalin da ay kaman tagdey ono bito ay kaknaan yo. Maiarig da abe si mansakit ay soplit sin edeg yo ya pagat ay manbek sin mata yo enggana ay maga en dakayo di mabay-an isnan mayamayay ay daga ay indawat Yahweh ay Diyos tako.

<sup>14</sup>“Ed wani, enggay dandani di timpok. Dakayo pay, dadlon ammon di esa ya esa ay indawat Diyos din am-in ay inkari na ay pansigdan yo. Tinongpal na am-in ay inkari na, magay olay esa ay adi nan tinongpal. <sup>15-16</sup>Ngem mo kas-ano di kinamatalek na ay nanongpal sin am-in ay kari na, siya met laeng di iyat na ay mangipatongpal sin inbaga na ay dosa. Tan mo labsingen yo din intolag nan dakayo et mandayaw ya mansilbi kayo si odom ay diyos, bomonget sisya yan dosaenas dakayo. Adi mabayag yan iwed en dakayo di mabay-an isnan mayamayay ay daga ay indawat na.”

## 24

### *Din Kasin Nasiglotan Din Intolag Diyos Ed Sekem (24:1-3,14-31)*

<sup>1</sup>Idi siya di, inpasinop Josue din am-in ay tribun di Israelita ed Sekem. Inpaayag na abe din nankakay di ili, papangolo, hohowis ya oopisyal, et nasinop da am-in sin sangoanan Diyos. <sup>2</sup>Kanan Josue sin amin ay ipogaw, “Siya na di ibagan Yahweh ay Diyos tako ay Israelita: ‘Ed nabaon, nan-ili din aap-o yo pati da Tera ay aman da Abraham en Nahor sin bas-il di ginawang ay Eufrates, yan nandaydayaw das odom ay diyos. <sup>3</sup>Siya di, inayagak si Abraham ay apo yo sin daga ay sana, et inpangok sin intiro ay daga ed Canaan. Inpaad-adok abe din poli na babaen en Isaac ay anak na ay indawat ko en sisya.’ Siya din kinwanin Diyos. <sup>4 5 6 7 8 9 10 11 12 13</sup>

<sup>14</sup>“Isonga ed wani, patgen ya egyatan yo koma si Diyos, dowan naimposan ya napasnek di iyat yo ay mansilbi en sisya. Iwasit yo abe din sinan didiyos ay dinaydayaw di ap-apo yo ed Mesopotamia ya ed Egipto ta si Diyos et anggoy di pansilbian yo. <sup>15</sup>Ngem mo sigaan yo ay mansilbi en sisya, masapol ay pilien yo ed wani ay agew mo sino di pansilbian yo, mo din diyos ay dinaydayaw di aap-o yo ed Mesopotamia ono din

daydayawen di Amorreo ay akin daga isnan kad-an yo ed wani. Mo sak-en pay ya din pamilyak, si Diyos di pansilbian mi.”

<sup>16</sup> Kanan din ipogaw ay sinombat, “Adi mi polos dokdokogan si Yahweh ta mansilbi kamis odom ay diyos, <sup>17</sup> tan si Yahweh ay Diyos tako di nangipango sin ap-apo tako ay komaan ed Egipto ay naibabag-enan da. Sisya di nangam-amag sin da dooy ay nakaskasdaaw ay inila tako. Sinilibanas datako sin am-in ay nandad-anan tako ya sin am-in ay ipogaw ay nilabsan tako. <sup>18</sup> Inpakaana am-in din Amorreo ay man-ili sin daga ay nay ay dinatngan tako, isonga dakami abe et mansilbi kami en Yahweh, tan sisya di Diyos tako.”

<sup>19-20</sup> Ngem kanan Josue sin ipogaw, “Adi yon kabaelan ay mansilbi en Diyos, tan nasantoan sisya et iparit na ay waday ikadkadwa yon sisya ay daydayawen. Isonga mo taynan yos sisya ta mansilbi kayos diyos di odom ay nanasyon, adi nan pakawanen din basbasol yo. Olay mo siged di inyat na en dakayo ed idi, kontraena ya dosaenas dakayo enggana ay mamaga kayo.”

<sup>21</sup> “Aga, mansilbi kamin Diyos,” kinwani da ay sinombat.

<sup>22</sup> Kanan Josue en daida, “Dakayo met laeng di manistigo ay pinili yo ay mansilbi en Diyos.”

“Aw, dakami di tistigo,” kinwani da.

<sup>23</sup> “Iwasit yo ngarud din sinan didiyos di odom ay nasyon ay wadan dakayo yan ikari yo ay magay dayawen yo mo adi si Yahweh ay Diyos tako ay Israelita,” kanan Josue ay nangibilin.

<sup>24</sup> Pag kanan din ipogaw ay nanongbat, “Mansilbi kami en Yahweh ay Diyos tako et tongpalen mi din bilbilina.”

<sup>25</sup> Sin siya di ay agew, inamag Josue di tolagan para sin kaipoipogaw yan initdo na din linlinteg ya bilbilin ay onodan da. <sup>26</sup> Insolat na dana sin libro ay naisolatan di linteg Diyos. Pag man-a si dakdake ay bato et tinood na sin poon di dakdake ay kaiw sin kad-an din nasantoan ay lugar isdi ed Sekem.\* <sup>27</sup> Pag nan kanan sin kaipoipogaw, “Ilan yo nan bato ay nay ay say manbalin ay tistigo tako, tan dinnge na am-in din inbagan Diyos en datako. Isonga say mangipanemnem en dakayo mo kontraen yos Diyos.” <sup>28</sup> Idi nakdeng ay inbagan Josue di, inpasaa na din ipogaw et esa en inmey sin bingay na ay daga.

<sup>29</sup> Idi siya di, natey si Josue ay anak Nun ay baan Diyos. Sin-gasot ya sinpo di tawena sin nateyana. <sup>30</sup> Inponpon da sin tawid na ay daga ed Timnatsera sin kadondontogan ed Efraim sin bomandas amyaman di dontog ay Gaas. <sup>31</sup> Nansilbilin din Israelita en Diyos sin kamatagon Josue. Olay sin nakdeng ay nateyana, intoltoloy da pay ay nansilbilin en sisya idi wada pay laeng din papangolo da ay mismo ay nakaila sin amin ay nakaskasdaaw ay inam-amag Diyos para en daida. <sup>32 33</sup>

---

\* **24:26** Genesis 12:6-7.



## Papangolo

### Maipanggep Sin Libro Ay Nay

Idi nakdeng ay natey si Josue, wada di naipidwapidwa ay naamag sin Israelita ed Canaan. Imbis nga bigbigen da komas Diyos ay ari da, namin piga ay nasangsangaw da ay mandayaw ya mansilbi si sinan didiyos di taga-Canaan. Sin tonggal nangiyatan das di, inpalobos Diyos ay abaken ya paligaten di kaibaw das daida enggana ay ibabawi dan basbasol da ya mansagong da kasin en sisya. Sin da doy ay timpo, pag waday panbalinena ay pangolo da ay mangisalakan en daida sin kagobat da. Din libro ay nay et maipanggep sin madamdama ay papangolo ay doy ay inbabbaan Diyos manlogi sin nateyan Josue enggana sin timpon di aari. Din paolon nan libro sin Ilocano ay Biblia et Uk-ukom, ngem din maistorya isna et baken din iyat da ay mangokom sin ipogaw mo adi et din pangipangoloan dan daida sin makigobatan da.

Maadal takos na ay din somigedan di biyag di Israelita et maibasar sin panong-tongpalan da en Diyos. Mo inmaddawi dan sisya, madosa da ay madosa, ngem mo mansagong da kasin en sisya, naanos ay bomadang en daida.

#### **Din Linaona**

Din adi nangobatan din Israelita sin odom ay taga-Canaan ya din nanokogan da en Diyos 1:1-3:6

Din dinotokan Diyos ay mangipangolo sin Israelita 3:7-16:31

Din kinamanagbasol di Israelita sin timpon di papangolo 17:1-21:25

#### *Din Adi Nangobatan Din Israelita Sin Odom Ay Taga-Canaan*

Idi nakdeng ay natey si Josue, intoltoloy di odom ay tribun di Israelita ay mangobat sin teeng ay man-ili ed Canaan ay maibasar sin bilin Diyos. Nantinolong din polin Juda ya din polin Simeon ay mangabak sin Canaaneo ya Perezee yan dadlon dan dinadael di odom ay siyodad da dowan dan peslen din omili. Pinsen abe din polin da Manasses en Efraim din man-ili ed Betel. Ngem adi dan inabak din wada sin odom ay ili. Mo pay din odom ay tribu, adi dan ginobat din omili sin bingay da ay daga, mo adi et nanbalinen das bag-en da ono owat dan binaybay-an ay makiili da en daida. (1:1-2:5)

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36

## 2

1 2 3 4 5

Din naisolat sin 2:6-3:6 et kasinopan di kasasaad di Israelita sin timpon di papangolo. Maipidwa din istoryan di nateyan Josue (ilaen abe sin Josue 24:28-29) ta say maawatan din mamasa din inyat di Israelita ay inmaddawi en Diyos manlogi sin timpo ay doy.

#### *Din Nateyan Josue (2:6-10)*

<sup>6</sup> Idi inpasaan Josue din nasinop ay Israelita,\* esa en inmey ay mangoka sin bingay na ay daga. <sup>7</sup> Nansilsilbi din Israelita en Diyos sin kamatagon Josue. Olay sin nakdeng ay nateyana, intoltoloy da pay ay nansilsilbi en sisya idi wada pay laeng din papangolo da ay mismo ay nakaila sin amin ay nakaskasdaaw ay inam-amag Diyos para en daida. <sup>8</sup> Din nay baan Diyos ay si Josue ay anak Nun yan natey idi mantawen si sin-gasot ya sinpo. <sup>9</sup> Naiponpon sin bingay na ay daga ed Timnatsera sin kadondontogan ed Efraim ay wada sin amyanan di dontog ay Gaas. <sup>10</sup> Natey abe din dededsana ay doy et din

\* **2:6** Din versikulo ay nay et kaitoloyan di Josue 24. Nasisinop din Israelita ed Sekem ta paneknekan da ono siglotan da kasin din intolog Diyos en daida.

naiskat en daida ay poli da yan adi da am-ammo si Diyos ya din inam-amag na para en daida ay Israelita.

*Din Nanokogan Din Israelita En Diyos*  
(2:11-23)

<sup>11</sup> Pag da et mandayaw en da Baal<sup>†</sup> et inamag da din lawa sin pangilan Diyos. <sup>12-13</sup> Dinokogan das Yahweh ay dinaydayaw di ap-apo da ya nangipango en daida ay komaan ed Egipto, et inpabonget das sisya sin nanaydayawan dan Baal ya en Astarte<sup>‡</sup> ay din sinan didiyos ay daydayawen di inil-ili sin nanniliked. <sup>14</sup> Gapo si bonget Diyos sin Israelita, inpalobos na ay omali di manpos si molmola ya gangameng da. Inpalobos na abe ay abaken din nanniliked ay kalaban das daida et enggay adi binaelan din Israelita ay manalaknib sin ili da. <sup>15</sup> Kanayon ay kontraen Diyos daida sin amin ay pakigobatan da ay kaman din inbaga na ay amagena, et palalo ay naligatan da.

<sup>16</sup> Makedeng pay di, insaad Diyos di papangolo ay nangisalakan en daida sin manpos si gangameng da. <sup>17</sup> Ngem adi da inkaskaso da nay ay papangolo mo adi et kaman dan nakibabbabai, tan tinaynan das Yahweh ay Diyos da ta mandayaw das odom ay diyos. <sup>§</sup> Baken dan kaman din ap-apo da ay nangon-onod sin bilin Diyos, tan sinkaattikan yan nasangaw da et adi da tinongtongpal. <sup>18</sup> Binadbadangan Diyos amin din nanbalinena ay pangolo da et insalsalakanas daida sin kalaban da enggana ay sibibiyag din papangolo ay sana, tan sineg-angan Diyos din ipogaw na sin nan-ad-adawagan da begew sin napalpaligatan da. <sup>19</sup> Ngem mo matey din pangolo da, taolien da din sigod ay am-amagen da yan mas pay nakarkaro din amagen da mo din am-a da sin panaydayawan ya pansilsilbian da sin sinan didiyos. Sinigaan da ay manokog sin lawa ay ipapati da ay am-amagen.

<sup>20</sup> Siya di, palalo ay inpabonget din Israelita si Diyos. Kanana, “Gapo ta nilabsing da din intolag ko sin ap-apo da ya adi dan omikaskaso, <sup>21</sup> adiak pakaanen din ipogaw ay adi pay laeng inpakaan Josue sin kamatago na. <sup>22</sup> Daida di osalek sin iyat ko ay mamadas sin Israelita ta maammoak mo pasien da din bilin ko ay kaman din ap-apo da.” <sup>23</sup> Kinwanin Diyos di, tan sigod ay inpalobos na ay mantetee dadi ay ipogaw ed Canaan. Adi na inpakaan ay dagos ono inpaabak en Josue.

### 3

1 2 3 4 5 6

*Si Otniel*  
(3:7-11)

<sup>7</sup> Inamag din Israelita din lawa sin pangilan Yahweh ay Diyos da, tan nilinglingan das sisya et nansilbi da en da Baal en Asera. <sup>8</sup> Palalo din bonget Diyos sin Israelita, isonga pinalobosana ay iturayan Cusan Risataim ay ari ed Mesopotamia si daida si wao ay tawen. <sup>9</sup> Pag manpakaasi din Israelita en Diyos, et dinotokanas Otniel ay anak Kenaz ay iyogtan Caleb ta say mangisalakan en daida. <sup>10</sup> Sin-gep din Ispiriton Diyos sisya et inpangolo na din Israelita. Ginobat na din ari ed Mesopotamia et nangabaken Diyos sisya. <sup>11</sup> Et tinmalna din ili da si opatapolo ay tawen enggana ay natey si Otniel.

*Si Ehud*  
(3:12-15)

<sup>†</sup> 2:11 Esa ya esa ay ili ed Canaan yan waday diyos da ay manngadan si Baal, isonga ad-ado da. Ad-ado abe di manngadan si Astarte (v.13). <sup>‡</sup> 2:12-13 Din diyos di taga-Canaan et lalaki ya babai. Si Baal et lalaki ay makaammo sin odan ya molmola. Din olog di Baal et apo ono akin oka. Baal met laeng di pangawag di babai ay taga-Canaan sin asawa da. Mo si Astarte pay et kadwan Baal ay babai ay makaammo sin gobat ya pan-ganakan di babbabai. <sup>§</sup> 2:17 Maibagay din pangarig ay nay, tan din tapin di panaydayawan di lallalaki en Baal et din panaddaagan da sin babbabai ay mantee sin timplo na.

<sup>12</sup> Kasin inamag din Israelita din lawa sin pangilan Diyos, isonga pinapigsan Diyos si Eglon ay ari ed Moab mo din Israelita. <sup>13</sup> Nakitolag si Eglon sin Ammonita ya Amalekita et nanbabadang da ay nangobat sin Israelita et sinakop da ed Jerico, din siyodad ay kaad-adoan di palma.\* <sup>14</sup> Inturayan Eglon din Israelita si sinpo ya wao ay tawen.

<sup>15</sup> Siya di, nanpakaasi kasin din Israelita en Diyos et nandotok si mangisalakan en daida. Pinili na si Ehud ay esa ay nakannigid ay anak Gera ay polin Benjamin. Inbaan din Israelita sisya ay mangiey si bowis da en Eglon ay ari ed Moab.

Idi sinenggep sin kowarton di ari, indawat na din bowis, pag kaoksot sin kampilana ay intatabona sin bado na et pinse na. Pag lomayaw sin kadondontogan ed Efraim, inayagana din Israelita ay wadas di, et en da ginobat din Moabita sin kad-an di panagadangan sin ginawang ay Jordan. Sin agew ay doy, dadlon dan inabak din sosoldado ay Moabita et pinse da di sinpo ay libo en daida. Manlogi isdi, tinmalna din ilin di Israelita si waopolo ay tawen. (3:16-30)

16 17 18 19 20 21 22 23 24 25 26 27 28 29 30 31

## 4

### *Da Debora En Barak* (4:1-24)

<sup>1</sup> Idi nakdeng ay natey si Ehud, say inamag kasin din Israelita din lawa sin pangilan Diyos. <sup>2</sup> Gapo sidi, inpalobos Diyos ay abaken Jabin daida. Si Jabin ay nay yan Canaaneo ay ari ed Hazor. Si Sisera ay manbeey ed Haroset ay ilin di Gentil di komander din sosoldado na. <sup>3</sup> Waday 900 ay kalisan Jabin ay para gobat ay landok di amag na, yan palalo di inyat na ay namaligat sin Israelita si dowanpo ay tawen, isonga nanpakaasi dan Diyos ta badanganas daida.

<sup>4</sup> Sin doy ay timpo, si Debora ay esa ay mamadto ya asawan Lappidot di pangolo ed Israel. <sup>5</sup> Kaadoan ay tomokdos sisya sin poon di makwani en Palman Debora sin nangawaan di Rama ya Betel sin kadondontogan ed Efraim. Isdi di emeyan din Israelita ay mangikamang sin problima da. <sup>6</sup> Inpaayag na si Barak ay anak Abinoam, ay taga-Kedes ay siyodad ed Naftali yan kanana, “Wada di inbilin Yahweh ay Diyos di Israelita en sik-a. Kanana en ipangoloam di sinpo ay libo ay lallalaki ay mapo sin tribun da Naftali en Zebulun ta emey kayo ed dontog ay Tabor. <sup>7</sup> Iturong nan to si Sisera ay komander di sosoldadon Jabin ta ena gobaten dakayo sin ginawang ay Kison. Ikoyog na din sosoldado na ya kalisa ay para gobat, ngem pangabaken Diyos sik-a.”

<sup>8</sup> Kanan Barak ay nanongbat, “Emeyak mo komoyog ka, ngem mo adi kan komoyog, adiak emey.”

<sup>9</sup> Kanan Debora, “May ngarud, koyogek sik-a. Ngem baken sik-a di maidayaw sin pangabakam, tan awni et babai di pangipapsean Diyos en Sisera.” Et kinoyog Debora si Barak ay inmey ed Kedes. <sup>10</sup> Inpaayag Barak din tribun da Zebulun en Naftali et nakikoyog en sisya di sinpo ay libo ay lallalaki yan nakikoyog abe si Debora.

<sup>11</sup> Sin doy ay timpo, in-amag Heber ay Kineo din tolda ay kampo na sin asag-en ed Kedes sin asag-en di dakdake ay kaiw ed Zaanannim. Naisian sisya sin gagait na ay Kineo ay polin Hobab ay bayaw Moses.

<sup>12</sup> Idi naipaammo en Sisera ay inmey si Barak sin dontog ay Tabor, <sup>13</sup> inpasinop na din 900 ay kalisa na ay para gobat ya din amin ay soldado na. Nanlobwat da ed Haroset ay ilin di Gentil et inmey da sin ginawang ay Kison.

<sup>14</sup> Kanan Debora en Barak, “Dalasem, emey ka! Tan ed wani ay agew, pangabaken Diyos sik-a, tan sisya di mangipango en sik-a et abakem si Sisera.”

\* **3:13** Din palma et kaman niyog di kailaana. Din lames na et namongyet ya kinittoy.

Idi siya di, nanlobwat da Barak sin dontog ay Tabor et nanballalong da ya din sinpo ay libo ay soldado na. <sup>15</sup> Idi dinmateng da, kinibtot Diyos da Sisera ya din amin ay soldado na pati din nanlogan si kalisa ay para gobat. Kaagpas et si Sisera sin kabayo na yan katagtag. <sup>16</sup> Inapayaw da Barak din kalisa ay para gobat ya sosoldadon Sisera enggana ed Haroset ay ilin di Gentil et pinse da amin daida. Maga di olay esa ay nakalasad.

<sup>17</sup> Si Sisera pay yan nanagtag ay inmey sin toldan Jael ay asawan Heber ay Kineo, tan gayyem dedan Jabin ay ari ed Hazor din pamilyan Heber. <sup>18</sup> Inabat Jael si Sisera sin bel-ayan di tolda yan kanana, “Senggep ka sin toldak, adi ka emegyat.” Sinenggep tet-ewa si Sisera yan ginaleyan Jael.

<sup>19</sup> Kanan Sisera, “Pangaasim kod ta omya kas at-atik ay danom tan nay palalo ay manbigawak.” Linokatan Jael din sopot ay lalat ay naipey-an di gatas et nan-inomena si Sisera, asi na ginaleyan kasin. <sup>20</sup> Kanan Sisera, “Mantee ka sin pantew ta mo waday mandamag mo waday inmali ay ipogaw yan ibagam ay maga.”

<sup>21</sup> Palalo di boway Sisera et nas-et di seyep na. Pag man-as Jael si martilyo ya pasek di tolda yan nan-in-inayad ay sinmag-en en sisya. Pinasekana din toktok na enggana ay nantaros din pasek sin lota et natey.

<sup>22</sup> Idi malabas si Barak ay mangan-anap en Sisera, inabat Jael sisya yan kanana, “Senggep ka ta ipailak din lalaki ay an-anapem.” Sinenggep si Barak yan inila nas Sisera ay nanatey ay napasekan din toktok na. <sup>23</sup> Sin doy ay agew, inabak Diyos si Jabin ay ari ed Canaan sin sangoanan di Israelita. <sup>24</sup> Idi siya di, pinaspasan din Israelita ay nangobat en Jabin enggana ay dadlon dan inabak.

Pag mankantas da Debora en Barak ay mangidayaw en Diyos. Et tinmalna din biyag di Israelita si opatapolo ay tawen. (5:1-31)

## 5

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31

## 6

### *Si Gideon*

<sup>1</sup> Kasin inamag din Israelita din lawa sin pangilan Diyos, isonga inpalobos na ay iturayan din Midianita si daida si pito ay tawen. <sup>2</sup> Napigpigsa din Midianita mo din Israelita et palalo ay pinalpaligat da, isonga nantabon da si liyang ya odom ay mabalin ay pantabonan da sin kadondontogan. <sup>3</sup> Kanayon ay mo pinag-eesek di Israelita, itompong abe din Midianita, Amalekita ya odom ay tribu ay napo sin naibandas belaan di agew ay mangobat en daida. <sup>4</sup> Mankampo da sin dagan di Israelita et dadaelen da din molmola enggana sin abagatan ay asag-en ed Gaza. Maga polos di bay-an da si kanen din Israelita. Maga di olay karnero, baka ono dangki. <sup>5</sup> Intakin da abe din babaka ya tolda da et kaman dan dodon ay adi kabilang di kaad-ado da pati din kamel da. Dinadael da din ili <sup>6</sup> enggana ay peteg ay binmiteg ya kinmaseseg-ang din Israelita. Pag manpakaasi din Israelita en Diyos.

<sup>7</sup> Idi nankedaw das badang Diyos begew sin Midianita, <sup>8</sup> nan-ibaa si mamadto ay nangibaga en daida, “Siya na di kanan Yahweh ay Diyos di Israelita, ‘Winayawayaak dakayo ed Egipto ay naibabag-enan yo. <sup>9</sup> Insalakan kos dakayo sin taga-Egipto ya sin am-in ay namalpaligat en dakayo sin ili ay nay. Pinakaan kos daida sin inmalian yo et indawat ko en dakayo din daga da. <sup>10</sup> Inbagak en dakayo ay sak-en si Yahweh ay Diyos yo ya adi kayon dayawen din sinan didiyos di Amorreo ay akin daga isnan kad-an yo ed wani, ngem adi kayon inmikaskaso.’”

<sup>11</sup> Makdeng pay di, wada din anghel Diyos ay dinmateng ed Ofra et tinmokdo sin poon di esay dakdake ay kaiw ay okan Joas ay polin Abiezer. Man-ir-irik si Gideon ay anak

na sin kad-an di panpespesan si obas ta adi ilaen din Midianita. <sup>12</sup> Nanpailan sisya din anghel en Diyos yan kanana, “Wadas Diyos en sik-a, natoled ya napigsa ay lalaki.”

<sup>13</sup> Ngem kanan Gideon, “Apo, mo wadas Diyos en dakami, apay ngin ay siya na di napasamak en dakami? Apay ngin ay magay inamag Diyos ay nakaskasdaaw ay kaman din dinaddad-at di aam-a mi ay inam-amag na ed idi sin nangipangoana en daida ay komaan ed Egipto? Nay pay ed wani yan binaybay-an Diyos dakami et inpalobos na ay iturayan din Midianita dakami.”

<sup>14</sup> Pag et kanan Diyos ay nangibilin en sisya, “Osalem san pigsam ta en ka isalakan din Israelita sin pangiturayan din Midianita. Mismo ay sak-en di mangibaa en sik-a.”

<sup>15</sup> Songbatan pay Gideon yan kanana, “Ngem Apo, intoy iyat ko ay mangisalakan sin Israelita? Dakami ay sintoton-od di kakapsotan sin polin Manasses yan sak-en abe di kababaan sin pamilya mi.”

<sup>16</sup> Ngem kanan Diyos en sisya, “Kabaelam tan kadwaek sik-a. Awni et nalaka di iyat mo ay mangabak sin Midianita ay kaman dan owat esay ipogaw.”

<sup>17</sup> Kanan Gideon, “Mo malaylaydan ka en sak-en, paneknekam kod ay sik-a tet-ewa si Diyos. <sup>18</sup> Pangaasim ta adi ka pay laeng komakkaan ta enak man-a si makan ay idaton kon sik-a.”

“May, isnaak enggana ay mantaoli ka,” kanana.

<sup>19</sup> Sinmaa si Gideon et nanparti si bomaro ay kalding ay in-oto na. Nanmasa si sinpo ay kilo ay arina et inamag nas tinapay ay magay labadura na. Inpeey na si baskit din karni yan inpeey na si banga din sabaw, pag nan iey sin anghel sin poon di kaiw. <sup>20</sup> Kanan din anghel en sisya, “Ipatang mo sin bato din karni ya tinapay ay sana, asi kan sodagan sin sabaw.” Tinongpal Gideon din naibaga en sisya. <sup>21</sup> Idi makdeng di, insagid din anghel din otdok din sokod ay iin-genana sin karni ya tinapay. Kabidang et di apoy sin bato ay namoo sin karni ya tinapay, pag et bigla ay mamaga din anghel.

<sup>22</sup> Say nangammoan Gideon ay din anghel Diyos din inila na, et peteg di egyat na ay nangwani, “Diyos ay Kangatoan, inilak ay sangosango din anghel mo!”

<sup>23</sup> Ngem kanan Diyos en sisya, “Talna koma di wadan sik-a. Adi kan emegyat tan laton ay adi kan matey.” <sup>24</sup> Et nan-amag si Gideon isdi si altar ay para en Diyos ay ngingadanana si Yahweh et Poon di Talna. Olay ed wani, wada pay laeng ed Ofra ay dagan di polin Abiezer.

<sup>25</sup> Sin labi ay doy, kanan Diyos en Gideon, “Alaem din maikadwa ay bomaro ay bakan amam ay mantawen si pito. Bakasem din altar ay inamag amam para en Baal yan poyoem din posti ay pangidaydayaw dan Asera ay naitatakdo. <sup>26</sup> Asi kan man-amag si kosto ay altar para en Diyos sin labaw di nakayang ay pankamangan ay nay. Mo makdeng di, osalem din pinoyom ay posti ay pangidaydayaw dan Asera ay pangipooam sin idaton mo ay baka.”

<sup>27</sup> Intakin Gideon di sinpo sin babag-ena et tinongpal na din inbilin Diyos. Ngem gapo ta emegyat sin aag-i na ya kailiana, baken sin kaagawan di nangamagana mo adi et sin labi.

<sup>28</sup> Idi binmangon din man-ili sin agsapa, inila da ay nadadael din altar Baal pati din posti ay pangidaydayaw dan Asera ay tinatakdo na. Inila da abe din bomaro ay baka ay naidaton sin kabarbaro ay altar. <sup>29</sup> Kanan da ay nan-asibaga, “Sino ngata di nangamag isna?” Idi dinamdamag da, naammoan da ay si Gideon ay anak Joas di nangamag. <sup>30</sup> Kanan da en Joas, “Ibelam din anak mo ta peslen mi, tan dinadael na din altar Baal yan gintad na din posti ay pangidaydayaw mi en Asera ay naitatakdo.”

<sup>31</sup> Ngem kanan Joas en daida, “Apay ngin ay isakit yo ya salakniban yo si Baal? Adi pay laeng pomat-a yan matey di mangisakit en sisya.\* Mo tet-ewa ay diyos si Baal, bay-an

\* **6:31** Din layden Joas ay kalien et makeddengan da ay matey tan panglasoy da en Baal mo makibiyang da ay manalaknib en sisya.



yo ta ikalintegnanay awak na tan altar na di nadadael.”<sup>32</sup> Manipod isdi, nginadanan das Gideon si Jerubbaal† begew sin nangwanian Joas en “Bay-an yo ay salakniban Baal di awak na, tan altar na di nadadael.”

<sup>33</sup> Makedng pay di, nasinop din Midianita, Amalekita ya din odom ay tribu ay napo sin naibandas belaan di agew. Inagadang da din ginawang ay Jordan et nankampo da sin tanap ay Jezreel. <sup>34</sup> Idi siya di, sinenggep din Ispiriton Diyos en Gideon et nananggoyob ay nangayag sin lallalaki ay polin Abiezer ta omonod dan sisya. <sup>35</sup> Nan-ibaa abe si nangipaammo sin intiro ay polin Manasses ay makigobat da, siya abe sin polin da Aser, Zebulun ya Naftali et nantikid da ay nangaspo en sisya.

<sup>36</sup> Pag kanan Gideon en Diyos, “Laydek ay paneknekan mo osalem sak-en ay mangisalakan sin Israelita ay kaman din inkarim. <sup>37</sup> Ipayag ko ngarud nan dotdot di karnero sin lota ay pan-ir-irikan si bakakew ta mo din dotdot anggoy di mabasa si dono yan nanamgaan din lota, say pangammoak ay tet-ewa ay osalem sak-en ay mangisalakan sin Israelita.” <sup>38</sup> Et dadlon say napasamak. Idi binmangon si Gideon ay nasapa sin kabigatana, pinespesana din dotdot di karnero et napno di esay malokong sin dono.

<sup>39</sup> Idi siya di, kanan Gideon en Diyos, “Adi ka kod omibongbonget ta palobosam sak-en isnan maodi ay ibagak. Pangaasim kod ta ipalobos mo pay di esa ay pamaneknek babaen sin dotdot. Ed wani, say mabasa koma din lota yan say mamgaan din dotdot.”

<sup>40</sup> Sin isdi ay labi, say inyat tet-ewan Diyos et sin kabigatana, nabasa si dono din lota yan nanamgaan din dotdot di karnero.

## 7

### *Din Nangabakan Gideon Si Midianita (7:1-22)*

<sup>1</sup> Sin agsapa ay doy, nasapa ay binmangon da Jerubbaal ono Gideon ya din sosoldado na et en da nankampo sin kad-an di obbog ay nangadanan si Harod. Nankampo abe din Midianita sin tanap sin asag-en di dontog ay More ay amyanan di kad-an da. <sup>2</sup> Kanan Diyos en Gideon, “Palalo ay ad-ado san soldadom. At-atik anggoy di osalek ay mangabak sin Midianita tan into et mo kanan da en nangabak da begew sin kinapigsa da. <sup>3</sup> Ibagam en daida ay mo wada di emegyat yan komaan sin dontog ay Gilead ta somaa.” Et sinmaa di 22,000 yan nabay-an di 10,000.

<sup>4</sup> Kanan kasin Diyos en Gideon, “Ad-ado pay laeng san soldadom. Iballalong mos daida sin kad-an di danom ta isdi ay ikasin ko di makiey en sik-a. Mo din ibagak en maikoyog en sik-a yan itakin mo, ngem din ibagak en adi makiey yan adi kan itaktakin.”

<sup>5</sup> Idi siya di, inpangon Gideon daida sin kad-an di danom, pag kanan Diyos en sisya, “Ikasin mo din mandokmog ay man-inom sin maniplat sin danom ay kaman din iyat di aso.” <sup>6</sup> Tolo ay gasot di lallalaki ay nangigaok sin takkay da asi dan inomen, et din odom pay yan nandokmog da ay nan-inom. <sup>7</sup> Pag kanan Diyos en Gideon, “Say osalek nan tolo ay gasot ay lallalaki ay mangisalakan en dakayo ya mangabak sin Midianita. Pasaam amin din odom.”

<sup>8</sup> Siya di, inpaipayag Gideon din baon ya tanggoyob din odom ay Israelita et inpasaa nas daida, ngem din tolo ay gasot pay et inpakodana ta mataynan da sin kad-ana. Din kampon di Midianita yan wada sin tanap sin gowab di kad-an da.

<sup>9</sup> Idi malabi, kanan Diyos en Gideon, “Manballalong kayo sin kampon di Midianita ta en kayo gobaten daida, tan badangak si dakayo et abaken yos daida. <sup>10</sup> Ngem mo emegyat ka, ayagam si Pura ay kabadang mo ta emey kayo sin kampo da. <sup>11</sup> Mo dengngem din ibagbaga da et tomoled ka ay mangobat en daida.” Et inmey da Gideon en Pura sin asag-en di kampon di kalaban da. <sup>12</sup> Kaman dan dodon ay adi kabilang ay

† 6:32 Din olog di Jerubbaal et “si Baal koma di mangikalintegnan sin awak na.”

naiwaras sin tanap din Midianita, Amalekita ya tribu ay napo sin naibandas belaan di agew. Kaman aben darat sin benget di baybay di kaad-adon din kamel da.

<sup>13</sup> Idi dinmateng da Gideon, waday dinnge na ay mangis-istorya sin gayyem na si iitaw na. Kanan din sana ay man-istorya, “Iniitaw ko en wada kano di tinapay ay sabog\* ay napolag sin kampo tako yan dinalapos na din esa ay tolda et natokang ay naiaplag sin lota.”

<sup>14</sup> Kanan et din gayyem na, “Inayan pay sa! Magay odom si olog na mo adi et din kampilan Gideon ay Israelita ay anak Joas. Ipaabak Diyos en sisya din Midianita ya si datako am-in.”

<sup>15</sup> Idi dinngen Gideon din iitaw di esa ay sana ya din olog na, nandokmog ay nandayaw en Diyos. Pag dan mantaoli sin kampo da ay Israelita yan kanana, “Mansagana kayo tan ipaabak Diyos en datako din sosoldado ay Midianita.” <sup>16</sup> Nankatloena din tolo ay gasot ay sosoldado na, asi na idawtan daida si sag-eesa ay tanggoyob ya koli ay nailingeban di silaw. <sup>17</sup> Kanana ay nangibilin en daida, “Ilaen yo ta onodan yo din amagek mo domatengak sin igid di kampo da. <sup>18</sup> Mo mananggoyob kami sin gagait ko, mananggoyob kayo abe sin nanniliked di kampo da, asi kayon kanan ay mangibogaw, ‘Para en Diyos ya si Gideon.’ ”

<sup>19</sup> Dinmateng si Gideon ya din sin-gasot ay soldado na sin igid di kampo idi daan pay laeng di gawan di labi sin kosto ay owat nansinokat din gowardia. Nananggoyob da asi da pag gopaken din koli ay iin-gehan da, <sup>20</sup> et say inyat abe din doway ay bonggoy ay gagait da. Esa en nanggen si silaw sin kannigid ya tanggoyob sin kannawan downan dan manbogaw ay kanan da, “Kampilan para en Diyos ya si Gideon!” <sup>21</sup> Magay nan-et-etan en daida sin inmalageyan da ay nanlikob sin kampo. Tomanagtag amin din Midianita downan dan manngalawngaw. <sup>22</sup> Sin doyan nananggoyoban da Gideon ya din tolo ay gasot ay soldado na, nan-iibawen Diyos din Midianita sin kampo da et tinmagtag da ay nanturong ed Zerera enggana ed Bet-sitta ya ed Abel-mehola ay asag-en ed Tabbat.

Inapayaw da Gideon si daida enggana ay dadlon dan naabak. 120,000 di natey, pati din doway ay arin di Midianita ay da Zeba en Zalmunna. Makdeng pay di, tinmalna din biyag di Israelita si opatapolo ay tawen enggana sin nateyan Gideon. (7:23–8:28)

23 24 25

## 8

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28

### *Manipod Sin Timpon Gideon Engganan Samson*

Pitopolo di an-ak Gideon. Di esa en daida et manngadan si Abimelek ay naisaad ay ari ed Sekem. Istay pinse na am-in ay aag-i na, ngem nakalasad di esa. Baken nabayag ay nanturay, tan natey sin nangobatana sin esa ay ili ay asag-en ed Sekem. Din naisokat en Abimelek ay mangipangolo sin Israelita et si Tola pag si Jair. Si Tola et nanturay sin kadondontogan ed Efraim si downanpo ya tolo ay tawen. Si Jair pay et nanturay ed Gilead si downanpo ya doway ay tawen.

Pag maisokat si Jefta ay esa ay taga-Gilead ay nalaing ay makigobat. Insapata na ay mo pangabaken Diyos sisya sin Ammonita, idatona ay mapooan di olay sino ay bomala sin beey na sin somaaana ay mapo sin gobatan. Pag en makigobat da Jefta et dadlon dan inabak din Ammonita. Idi sinmaas sisya, kambaw din bogbogtong ay anak na ay balasang di binmala sin beey na ay en nangabat. Palalo ay mansakit di nemnem Jefta, ngem idi inmey di doway ay bowan ay nanpaspasyalan di anak na ya din gagait

\* **7:13** Maibagay din sabog ay kaiarigan din Israelita, tan malaslasoy ay mola. Din banol na et kagodwan di banol di bakakew.

na ay babassang, inapapati na ay nangidaton en sisya en Diyos. Enem ay tawen di nangipangoloan Jeftha sin Israelita.

Pag mansosokkat da Ibzan, Elon ya si Abdon ay manturay. Din kabayag di nanturayan da am-in et downpo ya lima ay tawen. (8:29–12:15)

29 30 31 32 33 34 35

## 9

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52

## 10

1 2 3 4 5 6 7 8 9 10 11 12 13 14 15 16 17 18

## 11

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40

## 12

1 2 3 4 5 6 7 8 9 10 11 12 13 14 15

## 13

### *Din Naianakan Samson (13:1-5,17-25)*

<sup>1</sup> Idi kasin inamag din Israelita din lawa sin pangilan Diyos, inpalobos na ay iturayan din Filisteo si daida si opatapolo ay tawen. <sup>2</sup> Sin doy ay timpo, waday lalaki sin tribun Dan ay manngadan si Manoa ay taga-Zora ay basig di asawa na. <sup>3</sup> Nanpaila din anghel Diyos sin babai yan kanana, “Adi kan nan-an-anak ed idi, ngem awni et mawad-an ka et ianak mo di esa ay lalaki. <sup>4</sup> Ilaem ta adi ka polos man-in-inom si arak ono kompormi ay nabobodan ya adi ka mangmangan si ibilang di linteg ay baken nalinis. <sup>5</sup> Mo bemela din anak yo, masapol ay adi kayon pokpokisan, tan naidadaton ay mansilbi en Diyos manipod sin kaianakana enggana sin kateyana. Sisya di mangilogi sin kaisalakanan di Israelita sin turay di Filisteo.”

Dinad-at din babai en asawa na din nanpailaan din anghel Diyos en sisya, ngem adi na baw ammo ay anghel, isonga kanana en ipogaw Diyos di nanpaila. Pag mankararag si Manoa ay mankedaw en Diyos ta omali kasin din ipogaw na ay mangitdo en daida si kosto ay iyat da ay mangay-ayowan sin anak. Pinatgan Diyos din kararag na et inmey kasin din anghel et inpidwa na din inbaga na sin babai sin damo. (13:6-16)

6 7 8 9 10 11 12 13 14 15 16

<sup>17</sup> Kanan Manoa sin anghel Diyos, “Ibagam kod di ngadan mo ta dayawen mis sik-a mo matongpal din inbagam.”

<sup>18</sup> Ngem kanan din anghel, “Apay nga damagen yo din ngadan ko? Palalo adi ay nakaskasdaaw.” <sup>19</sup> Pag man-a si Manoa si bomaro ay kalding ya daton ay arina et indatona sin altar Diyos ay mangam-amag si ad-ado ay nakaskasdaaw. <sup>20-21</sup> Idi komaykayang din apoy sin altar, inilan da Manoa din anghel Diyos ay maid-idsan sin apoy ay komaykayang. Say nangammoan Manoa ay anghel Diyos baw din lalaki ay doy. Et kalakpap da ay sin-asawa sin lota. Idi makdeng di, adi nanpaila kasin din anghel Diyos en daida. <sup>22</sup> Pag kanan Manoa en asawa na, “Adi pay matey ta tan inila ta si Diyos.”

<sup>23</sup> Ngem kanan asawa na ay sinombat, “Mo panggep Diyos ay mamse en daita, adi na koman inawat din daton ta. Adi na koman inpaila ya inbaga am-in dadi en daita.”

<sup>24</sup> Idi siya di, nan-anak tet-ewa din babai si lalaki et nginadanana si Samson. Dinmak-dake din anak ay sana et binindisyonan Diyos. <sup>25</sup> Sin kawadan Samson sin kampon di tribun Dan sin nan-gawaan di Zora ya Estaol, nilogian din Ispiriton Diyos ay tignayen sisya.

## 14

### *Si Samson Ya Din Babai Ay Taga-Timna*

<sup>1</sup> Sin esa ay agew, nanballalong si Samson ed Timna et isdi ay inila na di esay babai ay Filisteo. <sup>2</sup> Sinmaa yan kanana en da ama na en ina na, “Waday inilak ay babai ay Filisteo ed Timna ay naipketan di matak. En kayo koman makikali tan laydek ay asawaen.”

<sup>3</sup> Ngem kanan da ama na, “Apay nga mangasawa kas anak di baken nakogit ay Filisteo? Ay tan maga aya di mapilim si kapolian tako ono iib-a tako ay Israelita?”

Ngem kanan Samson en ama na, “Sisya met di laydek ay ton-oden yo ta asawaek.”

<sup>4</sup> Adin ammon da aman Samson ay si Diyos di mangiturturong en sisya ay mangamag isna ta way iyat na ay manglaban sin Filisteo ay madama ay mangiturturay sin Israelita.

<sup>5</sup> Et kinoyog Samson da ama na en ina na ay nanballalong ed Timna. Idi manmandan da sin kad-an di kaob-obasan isdi, wada et di manngangaed ay bomaro ay layon ay en mangabet en sisya. <sup>6</sup> Bigla ay inpapigsan din Ispiriton Diyos si Samson, isonga olay magay armas na yan binisngibisngit na din layon ay kaman owat olbon di kalding di inyat na. Ngem adi na inis-istoryan da ama na din inamag na. <sup>7</sup> Pag manballalong ay en makikali sin babai et nalaydalaydan sisya.

<sup>8</sup> Nalabas pay di piga ay timpo et kasin inmey si Samson ta asawaena din babai. Kinombas sin danan ta ilaena din layon ay pinse na, kambaw nanbeey di anig yan nalamsan. <sup>9</sup> Et nan-a si kinkinana sin danan. Idi domateng sin kad-an da ama na, inyaanas daida et kinan da abe. Ngem adi na inbagbagan daida ay ina na sin bangkay di layon.

<sup>10</sup> Inmey da sin beey di babai et nanparti si Samson isdi tan say ogali das di ay iyat di mangasawa. <sup>11</sup> Idi inilan din Filisteo sisya, nan-ibaa das tolonpo ay lalaki ay mangadkadwa en sisya. <sup>12</sup> Siya et di, kanan Samson en daida, “Manbontiyaak, et mo mapontosan yo sin oneg di pito ay agew ay ragragsak, idawtak dakayo si tolonpo ay mayamayay ay lopot ya tolonpo ay paris ay nangina ay bado. <sup>13</sup> Mo adi kayon makapontos, dakayo di omya si tolonpo ay lopot ya tolonpo ay bado.”

Kanan abe din Filisteo, “May kod kayman, ibagam san bontiyam ta dengngen mi.”

<sup>14</sup> Pag kanan Samson,  
“Nawaday makan ay napo sin mangamangan,  
Nawaday mam-is ay napo sin kapipigsaan.”

Inmey di tolo ay agew yan adi dan makasongbat. <sup>15</sup> Sin maikap-at ay agew,\* kanan da sin asawan Samson, “Sikapam si asawam ta ibaga nan sik-a di songbat din bontiya na. Mo sigaam, pooan mis sik-a ya din pamilyam ta matey kayo am-in. Ay inmayag kayo baw ta pabitegen yos dakami?”

<sup>16</sup> Inmey si asawan Samson sin kad-ana et nan-og-oga ay nangwani, “Malmaliget ka baw en sak-en! Baken tet-ewa ay laylaydem sak-en, tan waday bontiyam sin kailiak yan adi kan inbaga di songbat nan sak-en.”

Kanan Samson, “Adiak to pay inbaga en da amak en inak, apay nga ibagak en sik-a?”

<sup>17</sup> Ngem adi sinmaldeng ay nan-og-oga sin pito ay agew ay doy ay ragragsak, et kanayon ay damdamagena en sisya, isonga sin maikapito ay agew, inbagan Samson. Pag aben ibagan asawa na sin kailiana.

<sup>18</sup> Idi dandani ay madipos di agew sin maikapito, kanan din man-ili en Samson,  
“Ay baken anig di kakam-isan?  
Ay baken od layon di kapipigsaan?”

Kanan Samson en daida,  
“Mo adi kayon in-alado din bakak,  
Adi kayo koman nasongbatan din bontiyak.”

\* **14:15** Din kanana sin odom ay manuskrito et: Sin maikapito ay agew.

<sup>19</sup> Pag et senggep en sisya din Ispiriton Diyos ay nangipapigsa en sisya et nanballalong ed Askelon. Pinse na di tolonpo ay lalaki ay Filisteo et ina na din bado da ay say indawat na sin nanongbat sin bontiya na. Makdeng pay di, sinmaa ed beey da ama na, tan palalo di bonget na begew sin napasamak. <sup>20</sup> Din asawa na pay yan inpaasawa da sin lalaki ay nangadkadwa en sisya sin kasal na.

## 15

### *Din Namooan Samson Sin Molan Di Filisteo*

<sup>1</sup> Idi baken onay nabayag, sin pinag-aanis bakakew, nan-as Samson si anak di kalding ta ena ilaen si asawa na. Kanana, “Senggepak sin kowarton asawak,” ngem adi pinalobosan din aman di babai.

<sup>2</sup> Kanan katogangana, “Kanak to met en palalo ay kalkaliget mos sisya, isonga inpaasawak sin gayyem mo. Olay et adin say asawaem din iyogtana, tan doy laton ay napinpintas et abe.”

<sup>3</sup> Siya et di, kanan Samson en daida, “Ed wani, bakenak basol mo intoy amagek sin kailian yo ay Filisteo.” <sup>4</sup> Pag et kabelang yan en nandepap si tolon gasot ay atap ay aso, asi nan sinagdodwas daida ay in-galot din iko da dowanang igalot di sag-eesa ay silaw sin iko da. <sup>5</sup> Tinetengana pag nan ibolosan daida sin minolaan di Filisteo si bakakew, et pag napooan din naani ya daan maani, pati kaob-obasan ya kakakkaiwan ay olivo.

<sup>6</sup> Idi damagen pay din Filisteo mo sino di nangamag sidi, naammoan da ay si Samson ay innapo dad Timna, tan inpaasawan katogangana din asawa na sin gayyem na. Pag mantikid din Filisteo et pinooan da ay pinse da asawan Samson ay sin-ama.

<sup>7</sup> Idi siya di, kanan Samson en daida, “Gapo ta say inamag yo na, adiak somaldeng enggana ay ibaes ko din inyat yo.” <sup>8</sup> Palalo di inyat na ay nanglaban en daida, et ad-ado di pinse na. Makdeng pay di, nanballalong et nantee si esay liyang sin deppas ed Etam.

### *Din Nangabakan Samson Sin Filisteo*

<sup>9</sup> En nankampo din Filisteo ed Juda et in-olnos dan sosoldado da sin asag-en ed Lehi, <sup>10</sup> isonga kanan din man-ili ed Juda, “Apay ngin ay inmali kayo ay mangobat en dakami?”

Songbatan pay din Filisteo yan kanan da, “Inmali kami ay en manpap en Samson ta ibalod mi ya ibaes mi din inamag nan dakami.”

<sup>11</sup> Siya di inmey di tolon gasot ay lalaki ay taga-Juda sin liyang sin deppas ed Etam et kanan da en Samson, “Ay adi ka ayan ammo ay din Filisteo di mangituray en datako? Ay sino ngin nas inamag mo en dakami?”

Ngem kanan Samson, “Inbaes ko met anggoy din inyat da en sak-en.”

<sup>12</sup> Pag dan kanan, “Inmali kami ay mamalod en sik-a ta ipolang daka sin Filisteo.”

Idi siya di, kanan Samson en daida, “Ikari yo ngarud en sak-en ay baken dakayo ay mismo di pomse.”

<sup>13</sup> Et kanan da ay nanongbat, “Aw, adi dakan peslen. Baloden mi anggoy sik-a ay ipolang en daida.” Et binalod das Samson si dowang ay baro ay lobid, pag dan ibela sin liyang.

<sup>14</sup> Idi dinmateng da ed Lehi, tomanagtag din Filisteo dowan dan bomanogaw ay mangaspo en sisya. Ngem kasegop en sisya din Ispiriton Diyos et bigla ay pinmigma. Pag kasokpot sin lobid ay naibabalod en sisya et kaman owat sinolid ay naatongan. <sup>15</sup> Inila na et di makneg ay patang di dangki yan kapidit et say inosal na ay namse si sinlibo ay Filisteo. <sup>16</sup> Pag nan kanan,

“Babaen si patang di dangki,  
pinsek di sinlibo ay lalaki.  
Tinob-on kos daida adi.”



<sup>17</sup> Makdeng pay di yan kaitep-a sin patang. Din lugar ay napasamakan nina et nangadanan si Ramat Lehi.\* <sup>18</sup> Palalo di bigaw Samson, isonga kanana ay nan-adawag en Diyos, “Indawat mo kayman nan nakaskasdaaw ay nangabakak, ngem ay mateyak ed wani si bigaw ko ta dompap da nan baken nakogit ay Filisteo?” <sup>19</sup> Pag et pantekangen Diyos din longog ed Lehi et kabala di danom. Idi man-inom pay si Samson, nantaoli din bikas na. Et say gapo ay nangadanan si En Hakorre† din obbog ay doy ay wada enggana ed wani. <sup>20</sup> Inpangoloan Samson din Israelita si dowanpo ay tawen sin timpo ay nangiturayan di Filisteo sin ili da.

## 16

### *Si Samson Ed Gaza*

<sup>1</sup> Sin namingsan, inmey si Samson ed Gaza ay esa ay siyodad di Filisteo. Isdi ay inaspo na di esay babai ay mangiab-abang si awak na et dinaag na. <sup>2</sup> Idi ammoan din taga-Gaza ay wadas Samson isdi, linikob da din lugar ay doy et binantayan da ay naninsinlabi. Magay inamag da sin labi ay doy, tan kanan da ay nantotolag, “Bantayan tako enggana ay pomat-a ta asi takon peslen.”

<sup>3</sup> Ngem enggana anggoy si gawan di labi di nanteean Samson isdi. Idi bomangon pay, kabit-in sin liteb di siyodad pati din nanbabag ay landok et nakioksot din doway ay posti na. Sinakbat na am-in ay magay nabaybay-an et in-ey na sin toktok di dontog ay nangoosdong ed Hebron.\*

### *Da Samson en Delila*

<sup>4</sup> Baken nabayag yan waday laylayden Samson ay babai sin tanap ay Sorek ay manngadan si Delila. <sup>5</sup> Inmey din papangolon di Filisteo en sisya yan kanan da, “Sikapam si Samson ta ammoem di makagapo sin nakaskasdaaw ay bikas na ya mo intoy iyat mi ay mangabak ta baloden mi ta pan-oblaen mis madagsen. Asi kamin idawtan sik-a si sagsisinpo ya esa ay gasot ay palata.”

<sup>6</sup> Idi siya di, kanan Delila en Samson, “Pangaasim kod ta ibagam en sak-en di poon san nakaskasdaaw ay bikas mo. Mo kaspangarigan way manglayad ay mamalod en sik-a, intoy iyat na ngin ta say maabak ka?”

<sup>7</sup> Kanan Samson, “Mo bomalod da si pito ay baro ya baken nango ay lobid di pana, komapsotak ay kaman din odom ay ipogaw.”

<sup>8-9</sup> Indawtan di papangolon di Filisteo si Delila si pito ay baro ay lobid di pana. Wada abey lallalaki ay nantabonen Delila si esa ay kowarto. Binalod nas Samson, asi na kanan ay nangibogaw, “Samson, sana day Filisteo!” Ngem kasokpot si Samson sin lobid et kaman sinolid ay naatongan, isonga adi da inammo di poon din nakaskasdaaw ay bikas na.

<sup>10</sup> Pag kanan Delila en Samson, “Apay ngin ay omiet-etek ka ay owat kan pan-ay-ayaman sak-en? Ibagam kod mo intoy iyat ay mamalod en sik-a.”

<sup>11</sup> Kanan Samson, “Mo bomalod da si baro ay lobid ay adi naos-osal, komapsotak ay kaman met laeng din amin ay ipogaw.” <sup>12</sup> Nan-as Delila si baro ay lobid et binalod nas Samson, asi kabogaw ay nangwani, “Samson, sana day Filisteo!” Waday lallalaki ay mansesed sin esa ay kowarto, ngem kasokpot si Samson sin lobid et nag-as da sin takkay na ay kaman owat sinolid.

<sup>13</sup> Pag kanan Delila, “Engganad wani, pan-ay-ayamam sak-en ay adi ka ibaga di tetewa. Ibagam adi mo intoy iyat da ay mamalod en sik-a.”

Kanan Samson, “Mo makiabel mo sin sinolid din pito ay apid di book ko ya isetset mo, komapsotak et mais-oak si odom ay ipogaw.” <sup>14</sup> Inpaseyep Delila sisya, asi nan abelan

\* **15:17** Din olog di Ramat Lehi sin Hebreo et “dontog ay Patang.” † **15:19** Din olog di En Hakorre sin Hebreo et “obbog di nan-adawag.” \* **16:3** Din siyodad ay Hebron et nasurok ay 60 ay kilometro di kaaddawi na ed Gaza. Nakaykayang abe si 900 ay metro.

din pito ay apid ay book na et insetset na si sanat, asi na kanan ay nangibogaw, “Samson, sana day Filisteo!” Kabangon si Samson et kagoyod sin book na sin tilar.

<sup>15</sup> Pag kanan Delila, “Intoy iyat na ngin ay kanam en laylaydem sak-en ngem adi ka met ibaga di tet-ewa? Namitlo ay in-etekam sak-en ngem adi ka pay laeng ibaga di gapo ay napigsa ka.” <sup>16</sup> Inag-agew ay damdamagena et enggay naoma si Samson, <sup>17</sup> isonga neyney na yan inbaga na di tet-ewa. Kanana, “Adi polos napokpokisan nan book ko, tan naidatonak ay mansilbi en Diyos manipod sin naianakak. Komapsotak mo mapokisanak et mais-o din pigsak si kompormi ay ipogaw.”

<sup>18</sup> Idi pasalen pay Delila ay tet-ewa din inbagan Samson, inpaammo na sin papan-golon di Filisteo. “Omali kayo kasin, tan inbaga na di tet-ewa,” kanana. Inmey da et intakin da din pilak.

<sup>19</sup> Binakwan Delila din toktok Samson et inpaseyep na, asi nan-ayag si namokis sin book na ay naapid si nankapito. Say nanlogian di kinmapsotana enggana ay nakaan din bikas na. <sup>20</sup> Pag kanan Delila ay nanbogaw, “Samson, sana day Filisteo!” Binmangon yan kananas nemnem na, “Kabaelak ay bomolos ay kaman met laeng ed idi.” Ngem adi na ammo ay tinaynan Diyos sisya.

<sup>21</sup> Dinpap din Filisteo si Samson, pag dan sokiten din doway ay mata na, asi dan iballalong ed Gaza. Kinadinaan das bronsi et nan-gilgilingen das bakakew sin balodan.

<sup>22</sup> Ngem ginmabay kasin din book na.

### *Din Nateyan Samson*

<sup>23</sup> Idi siya di, nasinop din papangolon di Filisteo ta manragsak da ya man-idaton das ad-ado ay animal en Dagon<sup>†</sup> ay diyos da. Kanan da ay nangikanta, “Inabak tako si Samson ay kaibaw tako, tan tinmolong din diyos tako.”

<sup>24-25</sup> Idi enggay mabetbeteng da, kanan da ay nangibogaw, “Ibala yo si Samson ta paragsakenas datako!” Inbala da si Samson sin balodan et inpapika da sin nan-gawaan di tokod. Sin namoyboyaan din kaipoipogaw en sisya, nankanta da ay nangidaydayaw sin diyos da. Kanan da, “Inpalobos din diyos tako ay abaken tako din kaibaw ay nanadael sin daga tako ya namse si ad-ado ay gait tako.”

<sup>26</sup> Idi siya di, kanan Samson sin anak ay mangitaktakkay en sisya, “Ipakapay mon sak-en din tokod ay nananggen isnan beey tan laydek ay mansadag.” <sup>27</sup> Napno din beey si lallalaki ya babbabai yan wadas di amin din papangolon di Filisteo. Wada abey toloy libo ay ipogaw sin balkon ay mamoyboya en Samson.

<sup>28</sup> Pag kanan Samson ay nankararag en Diyos, “Diyos ay Kangatoan, nemnemem kod sak-en. Pangaasim kod ta papigsaem sak-en si para mamingsan anggoy. Ipalobos mo kod ta mamingpingsan ay baesak da nan Filisteo sin inyat da sin doway matak.”

<sup>29</sup> Pag kapayen Samson din doway tokod sin gawa ay dadlon nananggen sin timplo, din kannawan sin esa yan din kannigid sin esa. <sup>30</sup> Pag nan kanan, “Ipalobos mo koma ay makikateyak en dana ay Filisteo!” Inpeey na am-in ay pigsa na ay nangitodon et pag matokang din timplo ay nanab-ok sin papangolo ya din amin ay ipogaw ay wadas di. Isonga ad-ad-ado di pinsen Samson sin timpo ay nateyana mo sin odom ay agew ay nanbibiyagana.

<sup>31</sup> Nanballalong din aag-i na ya toton-od na ay en nangisaa sin bangkay na, et inponpon da sin naipay-an Manoa ay ama na sin nan-gawaan di Zora ya Estaol. Dowanpo ay tawen di nangipangoloan Samson sin Israelita.

### *Din Kinamanagbasol di Israelita Sin Timpon Di Papangolo*

<sup>†</sup> **16:23** Si Dagon et kanan da en aman Baal. Sisya di kangatoan ay diyos di Filisteo ay makaammo sin molmola. Din awak na et kaman nigay, yan din toktok ya takkay na yan kaman ipogaw.

Sin timpon di papangolo, iwed di ari ed Israel. Esa ya esa ay ipogaw et inamag na di ibilang na ay kosto sin mismo ay pangila na. Gapo isdi, linmawlawwa di ogali da. Di esa ay napasamak et waday taga-Efraim ay manngadan si Micah ay nanpaamag si sinan didiyos ya beey ay pandaydayawan. Linagboana abe di esa ay Levita ay padi na.

Idi siya di, waday polin Dan ay nangan-anap si daga ay panbeeyan da. Idi nilabsan da din beey da Micah, inakew da din sinan didiyos na yan inawis da din padi na ay manaynan en sisya ta manbalin si padi da. Asi dan ikanayon ay mandan ed Lais. Pinse da din man-ilis di et say nanbeeyan da.

Wada abe di Levita ay nanodowas asawa na, ngem din maikadwa ay asawa et tinaynanas sisya et sinmaa sin kad-an da ama na. Ena tinaoli yan idi wada da sin danan, nalabian da et nan-iyon da sin beey di esay nakay ed Gibeon ay esa ay siyodad sin dagan di polin Benjamin. Sin labi ay doy, linikob din kakailian di nakay din beey na yan ipilit da ay ibela na koma din bisita na ay lalaki ta piliten da ay alaen din kinalalaki na. Ngem sinigaana. Neyney na yan inpabelan din Levita din asawa na ta oway di iyaat da en sisya. Et nansisinkatan da ay dinaag ay naninsinlabi enggana ay natey.

Sin kabigatana, sinmaa din Levita yan insaa na din natey ay asawa na. Idi dinmateng, linabak nas sisya si sinpo ya dowwa et inpaw-it na sin esa ya esa ay tribun di Israelita.

Idi siya di, nasinop din Israelita sin sangoanan Diyos ed Mizpa ta damagen dan Diyos mo sinoy amagen da. Nantotolag da ay en gobaten din taga-Gibeon. Gapo ta sigaan din polin Benjamin ay tomolong, ginobat da abes daida, et pinse da di nasurok ay 25,000 ay polin Benjamin. At-atik di nabay-an. Isonga palalo ay mansakit di nemnem di Israelita, tan kaman nabawasan das esa ay tribu.

Kaman nidi di kinamanagbasol di Israelita sin timpon di papangolo, tan adi dan inononodan si Yahweh ay Diyos da mo adi et din ibilang da ay kosto sin mismo ay pangila da. (17:1-22:25)

## 17

1 2 3 4 5 6 7 8 9 10 11 12 13

## 18

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31

## 19

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30

## 20

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48

## 21

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25

## Ruth Maipanggep Sin Libro Ay Nay

Din istorya ay nay et napasamak sin timpon di papangolo. Sin timpo ay doy, inmad-dawi din Israelita en Diyos et pinalpaligat di ad-ado ay kaibaw da, ngem din istorya ay nay et kalalayad, tan maipanggep si matalek ay ipogaw ay napigsa di pammati na en Diyos. Si Ruth et esa ay babai ay Moabita ay nakiasawas Israelita. Idi natey si asawa na, adi na dinokogan din pammati na en Yahweh ay Diyos di Israelita. Adi na aben tinaytaynan si Naomi ay katogangana.

Maadal tako sin libro ay Papangolo ay lawa di pantongpalan mo dokogan di ipogaw Diyos sisya. Din maadal tako abe sin libro ay nay Ruth et mabindisyonan di olay mangili ay maitapi sin ipogaw Diyos ya mangonod en sisya. Si Ruth di nangin anak sin lolong David ay kangatoan ay arin di Israelita.

### *Da Ruth En Naomi (1:1-19a)*

<sup>1-2</sup> Ed bayag, sin timpon di papangolo ay insaad Diyos ay manturay ed Israel, waday sin-asawa ay polin Efrata ay da Elimelec en Naomi ay taga-Betlehem ay sakop di Juda. Dodoway anak da ay da Malon en Kilion. Idi domteng di betil sin ili da, en da nanbeey ed Moab. Sin kawada das di, <sup>3</sup> natey si Elimelec et tinaynana si Naomi ya din doway ay anak da. <sup>4</sup> Din an-ak da ay nay et nangasawa das Moabita ay babbabai ay da Orpa en Ruth. Idi malabas di emey ay sinpo ay tawen, <sup>5</sup> natey abes da Malon en Kilion et nataynan si Naomi ay namaga din an-ak na ya si asawa na.

<sup>6</sup> Idi wada da pay laeng ed Moab, dinamag Naomi ay binindisyonan Diyos din ipogaw na si mayat ay apit, isonga nansagana da ay mantaoli sin ili na ay kakoyog na din doway ay innapo na. <sup>7</sup> Tinaynan da din ili ay nantetean da, ngem idi wada da sin danan ay emey ed Juda, <sup>8</sup> kanan Naomi en daida, “Soma kayo sin beey da ina yo et sapay koma ta segangan Yahweh si dakayo ay kaman din kasiged yo en sak-en ya sin natey ay an-ak ko. <sup>9</sup> Sapay koma ta ipalobos na ay makiasawa kayo kasin ya mawad-an kayo si pamilya.”

Pag nan ongoan daida, ngem nan-oga da <sup>10</sup> yan kanan da en sisya, “Aga, makisaa kami en sik-a sin kad-an di kailiam.”

<sup>11</sup> Ngem kanan Naomi, “Dakayo ay anak ko, masapol ay somaa kayo. Sinoy gapo ay makisaa kayo en sak-en? Ay siya mo man-anakak pay laeng si mangasawa en dakayo?”

<sup>12</sup> Soma kayo et tan nay enggay nabakesak et adi mabalin ay makiasawaak. Olay pay mo kanak en way namnamak ta makiasawaak ed wani ay labi ya man-anakak, <sup>13</sup> ay tan sed-en yo enggana ay madakdake da? Ay adi kayo mangasawa begew en daida? Ay an-ak ko, adi mabalin. Mansakit kayman di nemnem ko isnan napasamak en dakayo gapo ta dinokogan Diyos sak-en.”

<sup>14</sup> Nan-oga da kasin din innapon Naomi, pag ongoan Orpa sisya ta manpakada et sinmaa, ngem pinopomket pay si Ruth en sisya. <sup>15</sup> Kanan Naomi, “Soma ka et adi abe. Ilam si abbilat mo et sinmaa sin kad-an di kailiana ya didiyosen da.”

<sup>16</sup> Ngem kanan Ruth, “Adi ka kod kedawen di panaynanak en sik-a. Ipalobos mo koma ay makieyak en sik-a olay intoy em-emeyam. Makiteyak en sik-a olay intoy panbeeyam. Din kailiam et say kailiak ya din Diyos mo et say Diyos ko. <sup>17</sup> Mo intoy kateyam, say kateyak abe ya kaiponponak. Olay domosas Diyos mo ipalobos ko di olay sino ay makagapo si pansianan ta, malaksig si pese.”

<sup>18</sup> Ginminek si Naomi idi ilaena ay ipapatin Ruth ay makieyak en sisya. <sup>19a</sup> Et intoloy da ay nandan enggana ay dinmateng da ed Betlehem.

Isdi ay inay-ayowanan Diyos daida babaen si esa ay baknang ay manngadan si Boaz ay ton-od Elimelec. Baken nabayag yan inasawa nas Ruth. Nawad-an si Ruth et nan-anak si lalaki ay nginadanan das Obed. Si Obed di aman Jesse ay aman Ari David. (1:19b-4:22)

20 21 22

1 2 3 4 5 6 7 8 9 10 11 12 13 14 15 16 17 18 19 20 21 22 23

**2**

1 2 3 4 5 6 7 8 9 10 11 12 13 14 15 16 17 18

**3**

1 2 3 4 5 6 7 8 9 10 11 12 13 14 15 16 17 18 19 20 21 22

**4**



## Omona ay Samuel Maipanggep Sin Libro Ay Nay

Din madad-at sin Omona ay Samuel et din nanbaliwan di turay ed Israel, tan nasokatan din nanturayan di papangolo si panturayan di aari. Si Diyos di maibilang ay kosto ay arin di Israelita, ngem gapo ta layden da ay waday ipogaw ay mangituray en daida ay kaman din arin di odom ay ili, waday insaad Diyos ay ari da. Importanti ay nemnemen tako ay si Diyos di kangatoan ay manturay ay makaammo sin kaipoipogaw ya siya abe sin ari (2:7-10). Mo onodan da din linteg Diyos, matonton di kalintegan di am-in ay ipogaw, baken anggoy din babaknang mo adi abe din nabibiteg.

Tolo di madamdag ay ipogaw ay maidad-at isna: si Samuel ay din naodi ay madaydayaw ay pangolo, si Saulo ay din damo ay arin di Israel, ya si David ay nadotokan ay maiskat en Saulo.

Maadal takos na ay mo ipapasnek di ipogaw ay mansilbi en Diyos, mayat di pantongpalana, ngem mo adi na onodan din bilbilin Diyos, dosaen Diyos sisya.

### **Din Linaona**

Si Samuel ay pangolon di Israel 1:1-7:17

Din naisaadan Saulo ay ari 8:1-12:25

Din nangon-ona ay tawtawen di nan-arian Saulo 13:1-15:35

Da David en Saulo 16:1-30:31

Din nateyan Saulo ya din an-ak na 31:1-13

### *Si Elkana Ya Din Pamilya Na*

<sup>1</sup> Waday lalaki ay manngadan si Elkana ay polin Efraim ay man-ili ed Rama sin kadondontogan ay sakop di Efraim. Sisya din anak Jeroham ay anak Elihu ay anak Tohu ay anak Zuf. <sup>2</sup> Dowa di asawan Elkana ay da Hanna en Peninna. Waday an-ak Peninna ngem basig pay si Hanna. <sup>3</sup> Tinawtawen ay emey da Elkana ed Shilo ay en mandayaw ya man-idaton en Diyos ay Kangatoan ay Turay. Sin isdi, da Hofni en Finehas ay an-ak Eli di papadi ay mansililbi en Diyos. <sup>4</sup> Tonggal man-idaton si Elkana, idawtanans da Peninna ya din an-ak na si sag-eesa ay bingay da sin karni. <sup>5</sup> Ngem si Hanna pay, dobli di bingay na tan laydelaydena iman sisya olay mo binasig Diyos. <sup>6</sup> Kanayon ay sinsiniten Peninna ay karibal na et pasadotena gapo sin kaiwed di anak na. <sup>7</sup> Kanayon ay say mapasamak nas tinawtawen. Tonggal emey da sin beey Diyos, pasadoten Peninna si Hanna enggana ay man-oga ya sigaana ay mangan. <sup>8</sup> Et kanayon abe ay damagen Elkana, “Apay nga man-og-oga ka ya sigaam ay mangan? Sinoy gapo ay kanayon ay pansasadotam? Ay bakenak ayan napatpateg en sik-a mo sinpo ay anak?”

### *Da Hanna En Eli*

<sup>9-10</sup> Sin namingsan ay kawada da sin beey Diyos ed Shilo, kapika si Hanna sin nakdangan da ay nangan. Palalo di ladingit na, isonga man-og-oga ay nankararag en Diyos. Sin nangam-amaganas di, wada din padi ay si Eli sin tomoktokdoana sin sagen di pantew di Timplon Diyos. <sup>11</sup> Kanan Hanna ay nansapata, “Diyos ay Kangatoan ay Turay, maseg-ang ka kod paabe ta nemnemem sak-en sinan ligat ko. Mo seg-angam sak-en ay bag-en mo ta omya ka si anak ay lalaki, ikarik ay idaton kos sisya ay mansilbi en sik-a si tongpal biyag na et adi polos mapokpokisan.”\*

<sup>12</sup> Intoltoloy Hanna ay nankarkararag en Diyos si nabayag yan iilaen Eli din tepek na.

<sup>13</sup> Adi madnge din kararag na tan adi na ipigsa, ngem maila din tepek na ay mantitiyam

\* **1:11** Din adi panpapokisan di Israelita et simbolo ay naidadaton sisya ay mansilbi en Diyos.

et inpagarup Eli en nabeteng, <sup>14</sup> isonga kanan sisya, “Ay nabeteng ka? Pig-an pay ay maimosngan ka ya isaldeng mo san kabebeteng mo?”

<sup>15</sup> Ngem kanan Hanna ay sinombat, “Apo, adiak met damdaman nabeteng tan adiak polos nan-in-inom si arak ono kompormi ay bemeteng, ngem ipappapas ko anggoy ay mangibaga si liknak en Diyos. <sup>16</sup> Adi ka koman ipagarup en magay silbi na ay babai nan baam, tan palalo di ladingit ko ay mankarkararag.”

<sup>17</sup> Pag kanan Eli, “Emey ka ay natalna di nemnem mo. Sapay koma ta idawat Diyos ay daydayawen tako ay Israelita din kedkedawem.”

<sup>18</sup> Songbatan pay Hanna yan kanana, “Sapay koma ta itoloy mo san seg-ang mo en sak-en.” Pag komaan et en nangan yan namaga din sakit di nemnem na.

### *Din Naianakan Ya Naidatonan Samuel*

<sup>19</sup> Nasapas da Elkana sin pamilya na ay binmangon sin kabigatana. Idi makdeng ay mandayaw da en Diyos, sinmaa da ed Rama. Dinaag Elkana si Hanna ay asawa na et pinatgan Diyos din kararag na. <sup>20</sup> Nawad-an et man-anak pay yan lalaki ay nginadananas Samuel† tan kanana, “Kindaw ko iman en Diyos.”

<sup>21</sup> Dinomteng kasin din timpo ay emeyan da Elkana ay sinpamilya ed Shilo ta mandaton sin maidatdaton si tinawen ya ta tongpalena din inkari na. <sup>22</sup> Ngem adi nakiey si Hanna tan kanana en asawa na, “Awni ta mapsot din anak ta asiak iey sin beey Diyos ta isdi ay mantee si tongpal biyag na.”

<sup>23</sup> “May ngarud,” kanan Elkana ay nanongbat, “mo intoy kosto si pannemnem mo, say amagem. Mantetee ka enggana ay posotem. Sapay koma ta ipatongpal Diyos san karim.” Et nantee si Hanna sin beey da ay namaspasoso ya nangay-ayowan sin anak na.

<sup>24</sup> Makdeng pay ay posotena si Samuel, in-ey da sin beey Diyos ed Shilo olay mo anak pay laeng sisya. Nan-itakin das bomaro ay baka ay toloy tawena, sinpo ay kilo ay arina ya arak ay naipeey si sopot ay lalat. <sup>25</sup> Idi makdeng ay paltien da din baka, in-ey da din anak sin kad-an Eli. <sup>26</sup> Pag kanan Hanna en sisya, “Wada kod di ibagak en sik-a ay apo. Ay manemnem mo si sak-en? Sak-en adi din babai ay doy ay pinmipikas na ay mankarkararag en Diyos. <sup>27</sup> Kindaw kon Diyos din anak ay nay yan nay iman ay pinatgana din kararag ko. <sup>28</sup> Isonga ed wani, idaton kos sisya ta mansilbi en Diyos engganang tongpal biyag na.” Makdeng pay di, dinaydayaw da si Diyos isdi.

## 2

### *Din Kararag Hanna*

*(2:1-11,19-21,26)*

<sup>1</sup> Kanan Hanna ay nankararag,  
“Palaloy layad ko begew en Diyos Apo!

Tan inmipangato ya indawat nay bikas ko.  
Mabalin ay siyekak din kalaban ko,  
maragsakanak tan tinmolong si Diyos Apo.

<sup>2</sup> Magay nasantoan ay kaman din Diyos tako,  
maga polos di makaiso.

Magay odom ay komakaman ay pankamangan tako  
mo adi et si Diyos Apo.

<sup>3</sup> Adi kayon palpalaloan san panlaslastogan yo,  
isaldeng yo san natangsit ay panagkalkali yo.  
Tan si Diyos ay makaammo si amin et okomena  
amin ay inam-amag di ipogaw tet-ewa.

† **1:20** Mais-o di kadngan di Samuel sin kalin di Hebreo ay din olog na et “dinngen Diyos.” Din kosto ay olog di Samuel et “ngadan Diyos.”

<sup>4</sup> Din napipigsa ay soldado et magotlo din pana da,  
ngem din nakapsot et pomigsa da.

<sup>5</sup> Din mansobsobra ed idi si kanen da,  
makilagbo dad wani ta mangan da.

Ngem din madagdagaangan ed idi  
et laton da ed wani.

Din basig et nakaanak si pito da,  
ngem din ina ay ad-adoy anak na  
et nataynan ay magay olay esa.

<sup>6</sup> Si Diyos et ena peslen ya biyagen,  
ipababa nay ipogaw sin kad-an di natey ya kasinan tagoen.

<sup>7</sup> Waday pabitegena, waday pabaknangena,  
waday ipababa na, wada abey ipangato na.

<sup>8</sup> Din nababa ya kaseseg-ang di kasasaad da,  
et ipangato na ya kaanenan kaibabainan da.

Pakitokdoenas daida sin ipogaw ay way banol na,  
et nangato ay turay di pangisaadana en daida.

Din naisaadan di lobong, si Diyos di akin oka,  
sisya di nangisaad isnan daga.

<sup>9</sup> Ay-ayowanana din biyag di ipogaw na,  
ngem din managbasol et sin mabolinget ay kad-an di natey di panturongan da,  
tan adi mabalin ay matago di ipogaw  
si bokbokod na ay pigsa.

<sup>10</sup> Dadlon abaken Diyos din kalabana,  
tan kaman kido ay mapod daya ay bomaba sin kad-an da.

Kadi et okomena am-in ay ipogaw isnan daga.  
Idawtanas panakabalin din ari ay pinili na  
ta say sisya di pangabakena.”

<sup>11</sup> Idi makdeng di, sinmaas da Elkana ed Rama, ngem nataynan si Samuel ay anak da ed Shilo ta mansilbi en Diyos sin babaen Eli ay padi. <sup>12</sup> <sup>13</sup> <sup>14</sup> <sup>15</sup> <sup>16</sup> <sup>17</sup> <sup>18</sup> <sup>19</sup> Tinawtawen ay man-amag si Hanna si nagayad ay bado ay idawat nan Samuel mo maikoyog en asawa na ay man-idaton sin idatdatonas tinawtawen. <sup>20</sup> Pag bindisyonan Eli da Elkana ay sin-asawa yan kanana, “Sapay koma ta idawtan Diyos dakayo sin asawam ay nay si odom ay anak ay kasokat din indaton yo ay nay ay mansilbi en sisya.” Makdeng pay di yan sinmaa da.

<sup>21</sup> Pag bindisyonan tet-ewan Diyos si Hanna et indawtanas tolo ay anak ay lalaki ya dowa ay babai. Mo si Samuel pay et nadakdakdake ay mansilsilbi en Diyos. <sup>22</sup> <sup>23</sup> <sup>24</sup> <sup>25</sup> <sup>26</sup> Nasepsep abe ay laylayden Diyos ya din kaipoipogaw sisya.

### *Din Naipadto Maipanggep Sin An-ak Eli*

Ngem lawlawa pay din ogalin da Hofni en Finehas ay an-ak Eli, isonga inbaan Diyos di mamadto ay mamagbaga en sisya. Kanana ay nangipadto en gapo ta inpalobos Eli ay nan-am-amag din an-ak na si lawa, mandesan da ay matey. Maga abe di polin Eli ay makay, mo adi et masapa da am-in ay matey. Kedngan Diyos din kinapadin da Eli ya din poli na ta natken di isaad na ay padi. Et pag mankedaw din polin Eli si obla sin naiskat ay padi ta say waday katagoan da. (2:27-36)

### 3

#### *Din Nangayagan Diyos En Samuel (3:1-20)*

<sup>1</sup> Sin timpo ay doy ay nansilsilbian Samuel en Diyos sin babaen Eli, at-atik anggoy di inpaammo ono inpailan Diyos babaen si pankalkaliana. <sup>2</sup> Sin esay labi, si Eli ay enggay magodgodab yan naseseyep sin kowarto na. <sup>3</sup> Si Samuel pay yan naseyep sin Timplo ay kad-an di Baol di Tolagan. Idi dandani ay parbangon yan manbidbidang pay laeng din silaw, <sup>4</sup> kinalian Diyos si Samuel. Songbatan pay Samuel yan kanana, “Aw, apo, sanaak.” <sup>5</sup> Kabangon pay yan nanagtag sin kad-an Eli ay kanana, “Naeyak ay apo tan doy inmayag ka.”

Ngem kanan Eli, “Adiak met inayagan sik-a. Mantaoli ka et ta en ka maseyep.” Siya di, en kasin binmaktad si Samuel.

<sup>6-7</sup> Kinalian kasin Diyos si Samuel. Adi na pay laeng ammo ay si Diyos din nankali, tan adi polos nakikalkali en sisya ed idi. Isonga kabangon ay inmey sin kad-an Eli yan kanana, “Kinaliam sak-en et naeyak ay apo.”

Kanan Eli, “Ay anak ko, adiak met kinalian sik-a. Mantaoli ka ay maseyep.”

<sup>8</sup> Kasin kinalian Diyos si Samuel si maikapitlo et kabangon yan inmey kasin sin kad-an Eli yan kanana, “Inmayag ka ay apo et naeyak.”

Pag et nemnemen Eli ay si Diyos din mangalkali sin anak, <sup>9</sup> isonga kanan sisya ay nangibilin, “Mantaoli ka sin kaseysepam, et mo kalian daka kasin yan kanam ay manongbat, ‘Apo Diyos, sino di? Nay mandengdengeak ay baam.’ ” Et siya di, en binmaktad kasin si Samuel.

<sup>10</sup> En pinmikas Diyos sin kad-an Samuel yan kinaliana ay kaman sin damo. “Samuel, Samuel,” kinwani na.

Songbatan pay Samuel yan kanana, “Sino di? Tan nay mandengdengeak ay baam.”

<sup>11</sup> Pag kanan Diyos en sisya, “Dengngem nan ibagak: Domteng to di agew ay waday kaeegyat ay amagek sin Israelita et makibtot amin ay mannge. <sup>12</sup> Sin doy ay timpo, dadlonak ipatongpal am-in ay inbabagak maikontra sin pamilyan Eli. <sup>13</sup> Indadaan ko en sisya en keddengak din pamilya na ay madosa ay eng-enggana, tan din an-ak na yan inmpalawlaw da. Ammon Eli na ay am-amagen da ngem adi na inpasaldeng daida. <sup>14</sup> Gapo sidi, insapatak ay adi polos mabalin ay mapakawan din basbasol di pamilyan Eli babaen si animal ya odom ay maidaton.”

<sup>15</sup> Binmaktad si Samuel enggana ay naaggew et pag nan bokatan din pantew di beey Diyos. Emegyat ay manad-at en Eli sin naipaammo en sisya, <sup>16</sup> ngem kinalian Eli sisya ay kanana, “Ay anak ko ay Samuel.”

“Sinoy ibagam?” kanan Samuel ay nanongbat.

<sup>17</sup> Kanan Eli ay nandamag, “Sinoy inbagan Diyos en sik-a? Ibagam amin ay magay isaot mo, tan palalo ay dosaen dakan Diyos mo way olay sino ay isaot mo.” <sup>18</sup> Et inbagan Samuel ay magay insassaot na. Pag kanan Eli, “Diyos sisya et amagena din kosto sin pangila na.”

<sup>19</sup> Kinadkadwan Diyos si Samuel sin nadakdak-ana et inpatet-ewan Diyos amin din inbaga na, <sup>20</sup> isonga inammoan din amin ay ipogaw sin intiro ay Israel ay pankalkalian Diyos sisya. <sup>21</sup>

#### *Din Nateyan Da Eli Ya Din Nangaan Di Filisteo Sin Baol Di Tolagan*

Sin namingsan en nakigobat din Israelita sin Filisteo, et intakin da din Baol di Tolagan, tan kanan da en say pangabakan da. Ngem inabak din Filisteo si daida et ina da din Baol. Pinse da di 30,000 ay Israelita pati din dow a ay anak Eli. Wadas Eli ay tinmotokdo sin tokdoana sin igid di kalsada. Idi nadamag na ay inan din Filisteo din Baol di Tolagan Diyos, natokang yan natey.

Insaan din Filisteo din Baol di Tolagan, ngem dinosan Diyos din kailili ay nangieyan da sin Baol. Isonga inpataolin din Filisteo din Baol ed Israel, et in-ey din Israelita ed Kiriath Jearim. (4:1-7:1)

1 2 3 4 5 6 7 8 9 10 11 12 13 14 15 16 17 18 19 20 21 22

## 4

1 2 3 4 5 6 7 8 9 10 11 12

## 5

1 2 3 4 5 6 7 8 9 10 11 12 13 14 15 16 17 18 19 20 21

## 6

1

## 7

### *Din Nangiturayan Samuel Sin Israelita (7:2-13)*

<sup>2</sup> Nabayag di kawadan din Baol di Tolagan sin siyodad ay Kiriath Jearim. Wadas di si dowanpo ay tawen. Sin doy ay timpo, nanladladingit amin din Israelita ya nan-ad-adawag dan Diyos. <sup>3</sup> Pag kanan Samuel en daida, “Mo tet-ewa ay sagongen yo si Diyos, dokogan yo ngarud din didiyosen di odom ay il-ili ya iwasit yo din rebolto ay kais-isoan Astarte. Imongsan yo abe di nemnem yo en Diyos yan sisya anggoy di pansilbian yo. Mo say iyat yo, isalakanas dakayo sin Filisteo.” <sup>4</sup> Et inwasit din Israelita din rebolto ay kais-is-oan da Baal en Astarte yan si Diyos et anggoy di dinaydayaw da.

<sup>5</sup> Idi siya di, inbilin Samuel ay masinop amin din Israelita ed Mizpa ta manpakaasis sisya en Diyos para en daida, <sup>6</sup> tan ed Mizpa di nantean Samuel ay nangituray en daida. Et nasinop das di yan nanakdo das danom ay insoyat da sin sangoanan Diyos. Sin doy ay agew, initpe day dagaang da yan kanan da, “Nanbasol kami en Diyos.”

<sup>7</sup> Idi nadamag din Filisteo ay nasinop din Israelita ed Mizpa, nanlobwat din papangolo da ya din sosoldado da ta en da gobaten din Israelita. Inmegyat din Israelita sin nanngaan da. <sup>8</sup> Kanan dan Samuel, “Adi ka somaldeng ay mankarkarag en Yahweh ay Diyos tako ta isalakanas datako sin Filisteo.”

<sup>9</sup> Pinaltin Samuel di mansossoso ay olbon di karnero yan inpoo na ay sibobokel ay indatona en Diyos. Nankararag ay nankedaw si badang Diyos sin Israelita yan pinatgan Diyos din kararag na. <sup>10</sup> Idi man-idatdaton pay laeng si Samuel, enggay dinmateng din Filisteo ay mangobat sin Israelita. Ngem inpawadan Diyos di kaeegyat ay man-agodood ay kido ay nangibtot ya nangolo en daida. Tinmanagtag din Filisteo et nansisian da. <sup>11</sup> Pag bomala din lallalaki ay Israelita ed Mizpa yan inapayaw da din Filisteo engganad Betcar et ad-adoy pinse da sin danan.

<sup>12</sup> Idi makdeng di, nan-a si Samuel si bato ay tinood na sin nan-gawaan di Mizpa ya Sen, yan nginadananas Ebenezer\* tan kanana, “Sinay di panginemnemneman sin badang Diyos en datako.” <sup>13</sup> Naabak din Filisteo et adi da kasin in-inmey sin sakop di Israel tan kanayon ay kinonkontran Diyos daida sin timpo ay sibibiyag si Samuel.   
14 15 16 17

## 8

### *Din Nankedawan Din Israelita Si Ari Ay Mangituray En Daida*

<sup>1</sup> Idi makay si Samuel, dinotokana din an-ak na ay papangolon di Israel. <sup>2</sup> Si Joel din pangpangoan yan si Abias din iyogtana, daida di pangolo ed Beerseba. <sup>3</sup> Ngem adi dan

\* **7:12** Din olog di Ebenezer et “bato ay panginemnemneman sin tolong Diyos.”



inonodan ogalin ama da, tan din pilak anggoy di ginamgamgaman da et inawat da di pasoksok, isonga baken kostoy inyaat da ay nangowis.

<sup>4</sup>Idi siya di, natopog din papangolon di Israel et inmey da en Samuel ed Rama. <sup>5</sup>Kanan da en sisya, “Enggay ay nakay ka asi et nan an-ak mo yan adi dan onodan din ogalim, isonga mandotok ka et si ari ay mangituray en dakami ta kaman kamin din odom ay ili ay way ari da.”

<sup>6</sup>Adi linayad Samuel din nankedawan das ari, isonga nankararag en Diyos, <sup>7</sup>ngem kanan Diyos en sisya, “Awem amin din ibagan di ipogaw en sik-a. Baken sik-a di sinigaan da mo adi et sak-en di sinigaan da ay ari da. <sup>8</sup>Manipod pay dedan sin nangipangpangoak en daida ay komaan ed Egipto, dinokogan das sak-en et nandaydayaw das odom ay sinan didiyos yan nay et ay say iyat da aben sik-a din kanayon ay inamamag dan sak-en. <sup>9</sup>Isonga pagostoam iman din layden da, ngem dadlon kan idadaan ya ilawlawag di iyat di ari ay mangituray en daida.”

<sup>10</sup>Inbagan Samuel sin kaipoipogaw ay mankedkedaw si ari din amin ay inbagan Diyos en sisya. <sup>11</sup>Kanana ay nangilawlawag, “Siya na di amagen di ari yo en dakayo: panbalinenan to ay sosoldado na din aan-ak yo ay lalaki. Mansilbi din odom ay manlogan si kalisa ay para gobat, mangabayon din odom, yan din odom abe et daida din managtag ay mamangpango mo din nanlogan si kalisa ay pakigobat. <sup>12</sup>Panbalinena din odom ay mangipangolo si sagsisinlibo yan din odom et mangipangolo si saglilimapolo. Pilitena abe din an-ak yo ay mangalado sin papayew na ya man-apit sin molmola na. Daida abe di man-amag si armas ya kasapolan sin kalisa na. <sup>13</sup>Panbalinena abe din an-ak yo ay babbabai ay para man-am-amag si bangbanglo ya para oto ay mansilbi en sisya. <sup>14</sup>Alaena din kamayatan ay papayew yo ya minolaan yos obas ya olivo ta idawat na sin oopisyal na. <sup>15</sup>Masapol ay man-idawat kayo si inkasinpon di anien yo ya borasen yo ay obas para sin oopisyal ay mansilsilbi sin palasyo na ya odom pay ay oopisyal na. <sup>16</sup>Alaena din babag-en yo, baka ya kamel yo ay man-obla para en sisya. <sup>17</sup>Alaena abe di inkasinpon di karnero ya kalding yo. Pati si dakayo et manbalin ay bag-ena. <sup>18</sup>Awni et sin timpo ay kapasamakan nidi, asi kayo pay manpakpakaasi begew sin ari ay pinili yo, ngem sigaan Diyos ay mannge en dakayo.”

<sup>19</sup>Ngem adi inkaskason din ipogaw din inbagan Samuel, isonga kanan da, “Aga, layden mi di ari ay mangituray en dakami <sup>20</sup>ta kaman kami aben din odom ay ili ay iturayan di ari ta say mangipangolo en dakami ay makigobat.”

<sup>21</sup>Dinngen Samuel amin ay inbaga da et ena idad-at en Diyos. <sup>22</sup>Kanan Diyos ay nanongbat, “Tongpalem din kedkedawen da ta idawtam daidas ari.” Idi makdeng di, inpasaan Samuel amin din ipogaw.

## 9

### *Din Nangisoyatan Samuel Si Lana Sin Toktok Saulo (9:1,2-3,15-17; 10:8)*

<sup>1a</sup>Wada et di mabigbig ay baknang ay manngadan si Kis sin tribun Benjamin. <sup>2</sup>Wada abey nadakdake ay anak na ay si Saulo ay mabikas ya gowapo. Nagogowapos sisya mo din am-in ay kailiana ay Israelita ya nakaykayang pay si esay piya mo si daida am-in.

<sup>3</sup>Sin namingsan, tinmagtag di odom ay dangkin Kis, et kanana en Saulo ay anak na, “Man-ayag kas esa ay baa ay gait mo ta en kayo anapen din dangki.”

Inanaanap das nabayag, ngem adi dan dinteng, isonga ninemnem da ay en da damagen en Samuel mo intoy panganapan da. Idi dinmateng da sin ili ay kad-ana, inabat das sisya ay bomalbala ay emey sin pan-idatdatonan. (9:4-14)

<sup>15</sup> Kambaw sakbay din agew ay doy, waday inpaammon Diyos en Samuel ay kanana, <sup>16</sup> “Si bigat sin kaman nina ay oras, waday ibaak en sik-a ay lalaki ay napo sin sakop di Benjamin. Soyatam din toktok na si lana ay mangipaila ay dinotokak sisya ay mangituray sin ipogaw ko ay Israelita. Isalakanas daida sin panakabalin di Filisteo, tan inilak din napalpaligatan da ya dinngek din adawag da.”

<sup>17</sup> Sin kosto ay nangilaan Samuel en Saulo, kanan Diyos en sisya, “Si naey di inbagak en sik-a. Sisya di mangituray sin ipogaw ko.”

Idi siya di, inayagan Samuel da Saulo ay makikan en sisya. Sin kabigatana, sinoy-atanas lana din toktok Saulo, yan pag nan kanan ay nangibilin, (9:18–10:1)

18 19 20 21 22 23 24 25 26 27

## 10

1 2 3 4 5 6 7

<sup>8</sup> “Mangon-ona ka ay manballalong ed Gilgal. Sem-ed kas di si pito ay agew. Asiak datngan dakayo ta man-idatonak si animal ay mapooan ya datdaton abe ay pakikad-kadwaan tako en Diyos. Asiak aben ibaga en sik-a din amagem.” <sup>9 10 11 12 13 14 15 16</sup>

*Din Naisaadan Saulo Ay Ari Sin Sangoanan Di Kaipopogaw  
(10:17-24)*

<sup>17</sup> Baken nabayag yan pinaayagan Samuel din kaipopogaw ta matopog da ed Mizpa ay mandayaw en Diyos. <sup>18</sup> Pag nan kanan en daida, “Siya na di kanan Yahweh ay Diyos tako ay Israelita: ‘Inpangok si dakayo ay komaan ed Egipto ta mawayaan kayo sin pamabag-enan da ya sin odom ay ipogaw ay mamalpaligat en dakayo.’ <sup>19</sup> Ngem nay ed wani yan dinokogan yos Diyos yo ay nangisalakan en dakayo sin amin ay ligligat yo, tan kindaw yo ay idawtak dakayo si ari yo. May ngarud, mo say kanan yo, maggrupo kayo ay manpaila sin sangoanan Diyos insigon sin tribu ya pamilya yo.”

<sup>20</sup> Idi siya di, inayagan Samuel di tonggal tribu sin sango, et pinilin Diyos din tribu Benjamin. <sup>21</sup> Pag saes-aen Samuel ay ayagan sin sango din papamilya sin tribu Benjamin et napili din pamilyan Matri. Nantongpalana yan si Saulo ay anak Kis di napili, ngem idi anapen das sisya, iwed ay maila da, <sup>22</sup> isonga kanan da en Diyos, “Ay inmalis sisya?”

Pag kanan Diyos ay nanongbat, “Wadas Saulo ay nantatabon sin likod di nakapin ay karga.” <sup>23</sup> Katagtag da ay en nangayag en sisya et idi nakipipika en daida, say nangilaan da ay nakaykayang si esay piya mo daida amin.

<sup>24</sup> Pag kanan Samuel sin kaipopogaw, “Si nay di lalaki ay pinilin Diyos. Magay makaiso si olay esa en datako.” Idi siya di, bomanogaw da ay nangwani, “Matagotago din ari!” <sup>25 26 27</sup>

## 11

1 2 3 4 5 6 7 8 9 10 11 12 13 14 15

## 12

*Din Nan-odanana Ya Nankidoana Si Tiyagew  
(12:1,13-25)*

<sup>1</sup> Pag kanan Samuel sin kaipopogaw, “Tinongpal ko amin ay inbaga yo et nay insaad ko di ari ay mangituray en dakayo. <sup>2 3 4 5 6 7 8 9 10 11 12 13</sup> Ed wani, nay din ari ay pinili yo ay kindaw yo et nay insaad Diyos ay mangituray en dakayo. <sup>14</sup> Sigid di pantongpalan yo mo say amagen yo dana, dakayo ya din ari yo: dayawen ya patgen yos Yahweh ay Diyos tako, mansilbi ya mantongpal kayon sisya ya adi kayon konkontraen din bilina. <sup>15</sup> Ngem no adi kayon tongpalen si Diyos ta kontraen yo din bilbilina, dosaena abes

dakayo ya din ari yo ay kaman din inyat na sin aap-o yo. <sup>16</sup> Ed wani, iginek yo ta ilaen yo di nakaskasdaaw ay amagen Diyos. <sup>17</sup> Ed wani et tiyagew ay pinag-aani si bakakew, ay baken siya? Mankararagak en Diyos ta mankido ya man-odan, et say pangammoan yo en madagsen ay basol yo en Diyos din nankedawan yos ari.”

<sup>18</sup> Nankararag si Samuel et sin doy met laeng ay agew, mankido dowan man-odan, isonga din kaipoipogaw yan inmegyat dan Diyos ya en Samuel. <sup>19</sup> Kanan da en Samuel, “Pangaasim kod ay apo ta ikararagam dakami en Yahweh ay Diyos mo ta adi kami matey. Inammoan mi ed wani ay malaksig sin odom pay ay basbasol mi, nanbasol kami baw kayman sin nankedawan mi si ari.”

<sup>20</sup> Ngem kanan Samuel, “Adi kayon emegyat. Olay mo siya di ay madagsen di nanbasolan yo en Diyos, adi kayon dokogan sisya, mo adi et imongsan yo din amin ay nemnem yo ay mansilbi en sisya. <sup>21</sup> Adi kayon masangsangaw si sinan didiyos ay adi makabadang ya makaisalakan en dakayo, tan magay silsilbin dadi. <sup>22</sup> Gapo sin madaydayaw ay ngadan Diyos, adi nan baybay-an dakayo, tan ninemnem na ay panbalinenas dakayo ay ipogaw na. <sup>23</sup> Mo maipanggep en sak-en, sapay koma ta adi ipalobos Diyos ay bomasolak en sisya gapo sin panliwayak ay mangikararag en dakayo. Say amagek et koma din mangitdoak en dakayo sin kosto ya siked. <sup>24</sup> Ngem masapol ay egyatan ya patgen yos Diyos. Ipapasnek yo ya imongsan yo din amin ay nemnem yo ay mansilbi en sisya. Nemnemen yo din nakaskasdaaw ay inam-amag na para en dakayo. <sup>25</sup> Ngem mo ipapati yo ay mangamag si lawa, matey kayo am-in, pati din ari yo.”

## 13

1

### *Din Nakigobatan Da Saulo Sin Filisteo Ya Din Nangyamyaman Samuel En Sisya (13:2-14)*

<sup>2</sup> Idi siya di, pinilin Saulo di tolo ay libo sin lalaki ay Israelita. Dowa ay libo di kinmoyog en sisya ed Micmas ya sin kadondontogan ay ili ay Betel yan sinlibo di gait Jonatan ed Gibeon ay sakop di tribun Benjamin. Inpasaa na amin din odom.

<sup>3</sup> Pinsen Jonatan din kapitan di sosoldado ay Filisteo\* ay nankampo ed Geba et dinamag din Filisteo. Pag ibilin Saulo ay mananggoyob da ta matopog amin ay Hebreo ta makigobat da. <sup>4</sup> Naipadamag sin amin ay Israelita din namsean Saulo sin kapitan di sosoldadon di Filisteo ya din pangililigitan din Filisteo en daida, isonga pinati dan naibilin ay maitapi da en da Saulo ed Gilgal.

<sup>5</sup> Natopog din Filisteo ta gobaten da din Israelita et waday tolo ay libo ay kalisa ay para gobat, enem ay libo ay nangabayo ya adi kabilang ay sosoldado ay kaman din kaadadon di darat sin benget di baybay. En da nankampo ed Micmas sin naibandas belaan di agew ed Bet-aven. <sup>6</sup> Idi ilaen din Israelita ay masmaskok da ya dilikado di kasasaad da, nantabon day odom sin liyang, longog, abot, batbato ya bobon. <sup>7</sup> Din odom yan inagadang da din ginawang ay Jordan et inmey da sin sakop di Gad ya Gilead. Nataynan si Saulo ed Gilgal, ngem enggay manpayegpeg das egyat da din sosoldado ay kadwa na. <sup>8</sup> Nanseed si pito ay agew tan siya din inkeddeng Samuel, ngem iwed pay laeng si Samuel ay domateng ed Gilgal et enggay ilogin din sosoldadon Saulo ay mansisian. <sup>9</sup> Isonga kanan Saulo, “Iali yo din daton ay mapooan ya din dataton ay pakikadkadwaan tako en Diyos.” Et indatona din mapooan.

<sup>10</sup> Idi kakkakdeng na ay nangidaton, pag et domateng si Samuel et inabat Saulo ay kinablaawan. <sup>11</sup> Ngem kanan Samuel, “Ay sino pay nas inamag mo?”

Kanan Saulo ay nanongbat, “Tan enggay to met ay tomaynan din sosoldado yan maga ka pay laeng sin timpo ay inbagam ay domatngam dowan et masinsinop din Filisteo

\* **13:3** Di dowa abe ay kaiologan nina et: 1) Ginobat Jonatan din sosoldadon di Filisteo; 2) Inabak Jonatan din sosoldadon di Filisteo.

ed Micmas. <sup>12</sup> Kanak en gobaten din Filisteo si sak-en isnan Gilgal yan adiak pay laeng nankedaw si seg-ang Diyos, isonga ninemnem ko en kapilitan ay idaton ko din daton ay mapooan.”

<sup>13</sup> Ngem kanan Samuel, “Inoong-ong sas inamag mo. Adi kan tinongpal din inbilin Yahweh ay Diyos mo en sik-a. Mo tinongpal mo koma et insaad Diyos sik-a ya din polim ay mangituray isnan Israel si eng-enggana. <sup>14</sup> Ngem ed wani, adi mantoltoloy din panturayam, tan waday pinili ya dinotokan Diyos ay peteg ay laydelaydena ay mangipangolo sin ipogaw na gapo ta adi ka tinongpal din bilina.” <sup>15 16 17 18 19 20 21 22 23</sup>

## 14

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52

## 15

### *Din Nangabakan Saulo Sin Amalekita*

*(15:1-3,7-9)*

<sup>1</sup> Sin namingsan, kanan Samuel en Saulo, “Sak-en di inbaan Diyos ay nangdotok en sik-a ay man-ari sin ipogaw na ay Israelita, isonga ed wani dengngem din ipaammon Diyos. <sup>2</sup> Siya na di kanan Diyos ay Kangatoan ay Turay, ‘Dosaek din Amalekita, tan ginobat din aap-o da din Israelita sin napoan da ed Egipto. <sup>3</sup> Ed wani, en kayo gobaten din Amalekita ta golpien yo ay dadaelen amin ay sanikwa da. Magay palobosan yo ay matago en daida. Peslen yo amin ay lalaki, babai, anak ya moyang pati din baka, karnero, kamel ya dangki.’” <sup>4 5 6</sup>

<sup>7</sup> Idi siya di, ginobat Saulo din Amalekita manipod ed Havila engganad Shur ay naibandas belaan di agew ed Egipto. <sup>8</sup> Dinpap na ay sibibiyag si Agag ay arin di Amalekita yan pinse das kumpulan amin din ipogaw na. <sup>9</sup> Ngem adi pinsen Saulo ya din sosoldado na si Agag ya din kamayatan ay kakarnero ya baka, din kalamesan sin an-ak di baka ya karnero, ya din amin ay nabanol et adi dan ginolpi ay dinadael. Ngem say dinadael da din amin ay lawlawa ay magay silbi na.

### *Din Nanigaan Diyos En Saulo Ay Man-ari*

*(15:10-35)*

<sup>10</sup> Idi siya di, nankali si Diyos en Samuel yan kanana, <sup>11</sup> “Manbabawiak ay nangisaad en Saulo ay ari. Dinokoganas sak-en et adi nan tinongpal din bilin ko.” Manbonget si Samuel et naninsinlabi ay nankararag en Diyos sin labi ay doy. <sup>12</sup> Sin kabigatana, nasapa si Samuel ay en nanganap en Saulo, ngem waday nangibaga ay inmey si Saulo ed Carmel yan waday tinood nas di ay panginemnemneman da en sisya, pag manballalong ay emey ed Gilgal.

<sup>13</sup> Idi datngen Samuel sisya, kanan Saulo, “Bindisyonan daka koman Diyos. Tinongpal ko din inbilina.”

<sup>14</sup> Ngem kanan Samuel, “Et apay ngarud san madmadngek ay kalin di karnero ya kangan di baka?”

<sup>15</sup> Kanan Saulo ay nanongbat, “Inan din sosoldado sin Amalekita. Adi dan pinse din kamayatan sin karnero ya baka ta maidaton en Yahweh ay Diyos mo, ngem pinse mi amin din odom.”

<sup>16</sup> “Iginek mo!” kanan Samuel en Saulo. “Ibagak en sik-a di inpaammon Diyos en sak-en ed labi.”

“Dad-atem kod,” kanan Saulo ay nanongbat.

<sup>17</sup> Kanan Samuel, “Ed idi, inbilang mo ay nababa ka, ngem ed wani et sik-a di ari sin amin ay tribun di Israel. Dinotokan dakan Diyos ay ari ay mangituray en daida.

<sup>18</sup> Kanana ay nangibaa en sik-a, ‘Emey ka ta peslem amin din Amalekita, daida ay managbasol ay ipogaw. Gobatem enggana ay peslem amin daida.’ <sup>19</sup> Ngem apay nga

adi kan tinongpal din inbilin Diyos? Apay nga inalistoam ay nan-a sin sinamsam mo ay sanikwa da et inamag mo di baken kosto sin pangilan Diyos?”

<sup>20</sup> Kanan Saulo, “Ngem nantongpalak met en Diyos. Inmeyak sin nangibaaana en sak-en et pinsek amin din Amalekita et insaak si Agag ay ari da. <sup>21</sup> Inan din sosoldado di baka ya karnero et in-ali da din kamayatan ta maidaton en Yahweh ay Diyos mo isnan ed Gilgal.”

<sup>22</sup> Ngem kanan Samuel ay nanongbat, “Ay malaydan aya si Diyos sin daton ay mapooan ya odom ay datdaton ono din pantongpalan si inbaga na? Maymayat pay laeng di mantongpal en sisya mo din man-idaton si kamayatan ay karnero.

<sup>23</sup> Tan din adi pantongpalan en sisya et kaman met laeng din kadagsen di basol di mansip-ok, mankotom ya manpontos. Din mangipapangato abe si nemnem na ay adi mangikaskaso sin ibagan Diyos et kaman met laeng din basol di mandaydayaw si sinan didiyos di kadagsen di basol na. Gapo ta sinigaam din ibagan Diyos, sigaana abes sik-a ay man-ari.”

<sup>24</sup> Pag kanan Saulo en Samuel, “Nanbasolak kayman tan adiak tinongpal din bilin Diyos ya din bilin mo. Inmegyatak to met sin ipogaw, isonga tinongpal ko din layden da. <sup>25</sup> Pangaasim kod ta pomakawan ka ya komoyog ka ay mantaoli ed Gilgal ta way iyat ko ay mandaydayaw en Diyos.”

<sup>26</sup> Ngem kanan Samuel en sisya, “Adiak makiey en sik-a tan sinigaam din kalin Diyos et sinigaana abes sik-a ay man-ari sin Israelita!”

<sup>27</sup> Idi nandokog si Samuel ay komaan koma, kapeden si Saulo sin bado na yan pag et mabisngit. <sup>28</sup> Kanan Samuel en sisya, “Ed wani ay agew, sinoktoban Diyos di turay mo ay ari isnan Israel et indawat na si ib-am ay sigsigid mo sik-a. <sup>29</sup> Din madaydayaw ay Diyos ay pantalkan di Israelita et adi mabalin ay man-etek ono manbalbaliw, tan baken ipogaw ta manbalbaliw di nemnem na.”

<sup>30</sup> Kanan Saulo ay nanongbat, “Nanbasolak kayman, ngem pangaasim kod ta komoyog ka sin enak pandayawan en Yahweh ay Diyos mo ta adi madadael di dayaw ko sin sangoanan di nankakay di ili ya am-in ay Israelita.” <sup>31</sup> Isonga kinoyog Samuel si Saulo ay nantaoli et nandaydayaw si Saulo en Diyos.

<sup>32</sup> Pag kanan Samuel, “Iali yo si Agag ay arin di Amalekita sin sangoanak.” Magay danag Agag ay sinmag-en tan kananas nemnem na, “Sigurado ay inlasat ko din pomsean da ay emegyatak.”\* <sup>33</sup> Ngem kanan Samuel, “Begew sin kampilan mo yan ad-adoy babbabai ay napokawan si anak, isonga si inam abe di maawanan si anak.”

Pag betbebetbeten Samuel si Agag et pinse na sin sangoanan Diyos ed Gilgal.

<sup>34</sup> Makdeng pay di, inmey si Samuel ed Rama ngem sinmaa pay si Saulo ed Gibeon.

<sup>35</sup> Engganas nateyan Samuel, adi na inil-ila kasin si Saulo, olay mo nanladladingit manbegew en sisya. Si Diyos abe yan mansakit di nemnem na ya babawiena di nangisaadanan Saulo ay ari ed Israel.

## 16

### *Din Nangdotokan Samuel En David (16:1-13)*

<sup>1</sup> Idi siya di, kanan Diyos en Samuel, “Ay maney pay sas pangiladladingitam en Saulo, tan nay sinigaak di pan-ariana isnan Israel. Ibaak sik-a sin kad-an Jesse ay taga-Betlehem, isonga pon-em din sakngod ay panpeypey-an si lana ta emey ka. Tan pinilik di esa sin an-ak na ta say man-ari.”

<sup>2</sup> Ngem kanan Samuel, “Intoy iyat ko ngin ay emey yan mo dengngen Saulo et pomse?”

\* **15:32** Di esa abe ay kaiologan nina et: Manpayegpeg si Agag ay sinmag-en tan kananas nemnem na, “Sigurado ay dandani di pomsean da ay emegyatak.”



Kanan Diyos, “Man-a ka si bomalasang ay baka yan kanam en inmey kas di ay mandaton en Diyos. <sup>3</sup> Ayagam si Jesse sin pan-idatonam ta asiak itdo di amagem. Dotokam ay man-ari din piliek.”

<sup>4</sup> Tinongpal Samuel din inbilin Diyos. Idi dinmateng ed Betlehem, manpayegpeg din papangolon di ili ay mangabat en sisya yan kanan da ay nansalodsod, “Apo, ay mayat di panggep mo en dakami sin inmaliam ay nay?”

<sup>5</sup> Kanan Samuel ay sinombat, “Aw. Inmaliaak ay man-idaton en Diyos. Linisan yo din awak yo ta makiali kayo sin pan-idatonak.” Pag nan amagen din seremonia ay panglinis en da Jesse sin an-ak na ay lalaki et inayaganas daida sin pan-idatonana.

<sup>6</sup> Idi dinmateng da, inilan Samuel si Eliab ay anak Jesse yan kananas nemnem na, “Sigurado ay si naey ay nakipipikas na sin sangoanan Diyos din pinili na.”

<sup>7</sup> Ngem kanan Diyos en Samuel, “Adi kan say nemnemen din kailaana ono kakayang na tan sinigaak sisya. Din pangilak et baken nais-o sin pangilan di ipogaw. Din ipogaw et din kailaana di pangibasaran da, ngem sak-en ay Diyos et say ilaek din nemnem.”

<sup>8</sup> Pag ayagan Jesse si Abinadab et inpalabas na sin sangoanan Samuel, ngem kanan Samuel, “Baken met say pinilin Diyos.” <sup>9</sup> Inpalabas aben Jesse si Samma, ngem kanan Samuel, “Olay sinay et baken say pinilin Diyos.” <sup>10</sup> Pito din an-ak Jesse ay inpalabas na sin sangoanan Samuel, ngem kanana, “Maga met en daida di pinilin Diyos. <sup>11</sup> Ay anggoy dana si an-ak mo?” kanana ay nansalodsod.

Kanan Jesse ay nanongbat, “Wada pay laeng din kaiyogtanan, ngem wada ay mangay-ayowan si karnero.”

Kanan Samuel, “En ka ipaayag tan adi takon ilogi ay man-idaton ya mangan enggana ay domateng.”

<sup>12</sup> Et siya di, nan-ibaa si nangayag et dinmateng yan kambaw gowapo ya nasalon-at di kailaana. Pag kanan Diyos, “Pomika ka ta bokbokam si lana ay mangipaila ay nadotokan, tan sisya di pinilik.” <sup>13</sup> Et siya di, inan Samuel din lana ay naipeey si sakngod et insoyat nan sisya sin sangoanan di aag-i na. Kasegep din Ispiriton Diyos en David, et manipod isdi ay agew, kinadkadwa na ya inturturayanas sisya. Makdeng pay di, sinmaa si Samuel ed Rama.

### *Din Nansilbian David En Saulo (16:14-17)*

<sup>14</sup> Kinmaan din Ispiriton Diyos en Saulo, pag ibaan Diyos di anito ay mamaligat en Saulo. <sup>15</sup> Kanan din mansilbi en sisya, “Ammo mi ay waday anito ay inbaan Diyos ay mamalpaligat en sik-a. <sup>16</sup> Mo ibaam dakami, en kami man-anap si lalaki ay nalaing ay mantokar si arpa ta mo paligaten daka sin anito, mantokar et mailatonan ka.” <sup>17</sup> Et binilin Saulo si daida ay man-anap si nalaing ay mantokar si arpa ta iey dan sisya.

Pag ibagan di esa ay baan Saulo ay nalaing si David ay anak Jesse ay mantokar et inpaayag Saulo sisya. Mo paligaten din anito si Saulo, mantokar si David et pag komaan din anito. Say inyat David ay nansilbi en Saulo. (16:18-23)

18 19 20 21 22 23

## 17

### *Din Nangkaritan Goliat Sin Israelita (17:1-11)*

<sup>1</sup> Dinomteng et di timpo ay natopog din Filisteo ed Soco ay sakop di Juda ta makigobat da. Nankampo da ed Efes Dammin sin nan-gawaan di Soco ya Azeka. <sup>2</sup> Da Saulo abe sin Israelita, nankampo da sin tanap ed Ela et sidi ay nansagana da ay makigobat sin

Filisteo. <sup>3</sup> Wada din Filisteo sin esay dontog yan din Israelita abe sin esa, et way nangawaan da ay tanap.

<sup>4</sup> Wada et di mangialagey sin Filisteo ay manngadan si Goliat ay taga-Gat. Binmela sin kampon di Filisteo ta karitena din Israelita. Siyam ay piya di kakayang na, <sup>5</sup> nanhelmet si bronsi yan bronsi met laeng di salida na ay emey ay limapolo ya pito ay kilo. <sup>6</sup> Nagadingan si bronsi di siki na yan sinasadlayana di bronsi ay gayang. <sup>7</sup> Din potan di gayang na ay sana yan dakdake ay kaman din os-osalen di man-abel yan emey ay pito ay kilo di dagsen din landok ay tadem na. Waday soldado ay mamangpangpango ay para egen sin kasay na. <sup>8</sup> En sinangon Goliat din sosoldadon di Israelita yan kanana ay nangibogaw, “Apay nga malinya kayo ay makigobat? Esaak met ay Filisteo yan dakayo din bag-en Saulo. Manpili kayo si esa ay makilaban en sak-en. <sup>9</sup> Mo omabak ta pomse, manbalin kami ay bag-en yo, ngem no abakek ta peslek, dakayo di manbalin ay bag-en mi et mansilbi kayo en dakami.” <sup>10</sup> Intoloy din Filisteo ay sana ay nangwani, “Ed wani met laeng, karitek din sosoldadon di Israelita. Manpili kayo si makilaban en sak-en!” <sup>11</sup> Idi dinngen da Saulo ya din amin ay Israelita din sana, palalo di egyat ya dismaya da.

*Din Inmeyan David Sin Kampon Da Saulo  
(17:12-37)*

<sup>12</sup> Si David yan anak Jesse ay polin Efrata. Ed Betlehem ay lak-am di Juda di ili da. Waday wao ay lalaki ay an-ak Jesse yan enggay nakay sisya sin timpo ay nanturayan Saulo. <sup>13</sup> Din tolo ay kapangoanan sin an-ak Jesse yan naikoyog da en Saulo sin gobatan. Si Eliab di ngadan din kapangoanan, pag si Abinadab, pag si Samma. <sup>14</sup> Si David di inoodi. Naikoyog din tolo ay kapangoanan en Saulo, <sup>15</sup> ngem si David pay yan mantinaoli ay emey sin kad-an Saulo ya somaa ay mangayowan sin karneron ama da.

<sup>16</sup> Sin oneg di opatapolo ay agew, binigat ya minasdem ay kariten Goliat din Israelita.

<sup>17</sup> Sin esay agew, kanan Jesse en David, “Dalasem ta iey mo nan sinpo ay kilo ay doom ya sinpo ay tinapay sin kad-an da manong mo. <sup>18</sup> Idawat mo abe nan sinpo ay nabanol ay makan sin kapitan di bonggoy da. En ka kod ilaen mo kas-ano din aag-im yan mo mantaoli ka, man-isaa kas pamaneknek ay mapo en daida ay mayat di kasasaad da. <sup>19</sup> Wadas da Saulo ya din amin ay lalaki ay Israelita sin tanap ed Ela ay makigobogat sin Filisteo.”

<sup>20</sup> Nasapas David sin kabigatana ay nangipolang sin kakarnero si esa ay manpaspastol, pag nan alaen din karga na et inmey ay nantongpal sin inbilin Jesse. Dinmateng sin kad-an di sosoldado idi kosto ay emey da sin powisto da et ipigpigma da din ibogbogaw da ay para gobat. <sup>21</sup> Nanpowisto da ay man-asisagang din Israelita ya Filisteo. <sup>22</sup> Inpayag David din karga na sin man-idoldolin si kasapolan di sosoldado, pag katagtag ay emey sin kad-an di aag-i na sin gobatan et sinalodsod na di kasasaad da. <sup>23</sup> Idi makikalkali sin aag-i na, wada et si Goliat ay pinmika sin sangoanan di gagait na yan manbogaw kasin ay mangarit sin Israelita ay kaman din sigod ay am-amagena, et dinngen David. <sup>24</sup> Tinmagtag din Israelita si egyat da sin nangilaan da sin lalaki ay sana. <sup>25</sup> Kanan da ay nan-asibaga, “Ilaen yo, kanayon ay kariten din ipogaw ay sana si datako ay Israelita. Gon-gonaan kano din ari si dakdake ay kinabaknang di mamse sin ipogaw ay doy yan ipaasawa na abe din anak na ya adi manbayad si bowis din pamilyan ama na.”

<sup>26</sup> Kanan David ay nansalodsod sin katakdo na ay lallalaki, “Sinoy gon-gonan di mamse sin Filisteo ay nay ta adi maibabain di Israel? Siya mo sino san adi nakogit ay Filisteo ay mangarkarit sin sosoldadon di matmatago ay Diyos.” <sup>27</sup> Et dinad-at dan sisya kasin din is-istoryaen da ay lagbon di mamse en Goliat.

<sup>28</sup> Dinngen Eliab ay din kapangoanan ay manong David din pakikalkaliana sin lallalaki et palaloy bonget na ay nanyamyam en sisya. Kanana, “Apay nga inmali kas na? Sino di mangayowan sin at-atik ay doy ay karnero sin lugar ay magay omili? Nalastog

ka dedan ya lawlaway nemnem mo, ammok ay inmali ka anggoy ay manboyas mangogobat.”

<sup>29</sup> Kanan David, “Ay sino od di inamag ko? Ay maiparit aya di pankaliak?” <sup>30</sup> Kinmaan si David sin kad-an manong na et siya met laeng di ena dinamag sin odom ay lallalaki yan iso na met laeng di songbat da ay kaman din inbagan di odom.

<sup>31</sup> Nandinamag din inbagan David enggana ay naibagan Saulo et inpaayag nas David.

<sup>32</sup> Kanan David en Saulo, “Madaydayaw ay ari, maga koma di emegyat sin Filisteo ay doy, tan sak-en ay bag-en mo di en makilaban en sisya.”

<sup>33</sup> Kanan Saulo ay nanongbat, “Adim kabaelan din Filisteo ay doy tan an-anak ka pay laeng yan sisya pay et nakigobgobat manipod sin kabaro na.”

<sup>34</sup> Ngem kanan David, “Apo ari, sak-en di mangay-ayowan sin kakarneron amak yan mo waday layon ono odom ay atap ay animal ay mangitagtag sin anak di karnero, <sup>35</sup> apayawek ay labanen ta isalakan ko din anak di karnero. Mo somagong yan kapedenak sin bagang na ta pat-oak enggana ay matey. <sup>36</sup> Wada day pinsek ay layon ya odom ay atap ay animal et siya met laeng di amagek sin adi nakogit ay doy ay Filisteo ay mangarkarit sin sosoldadon di matmatago ay Diyos. <sup>37</sup> Insalakan Diyos sak-en si layon ya odom ay atap ay animal et sisya met laeng di mangisalakan en sak-en sin Filisteo ay doy.”

Kanan Saulo, “Mo siya ngarud sa, emey ka et sapay koma ta si Diyos di mangadkadwa en sik-a.”

### *Din Nangabakan David En Goliat (17:38-52)*

<sup>38</sup> Inpadadon Saulo en David din mismo ay bado na ay maidallem sin salida, indawat na abe din salida na ya helmet na ay bronsi. <sup>39</sup> Idi in-amag David dadi, asi nan isiket din kampilan yan ipadas na ay idad-an, maikawa tan adi nan inpaingsa. Kanana en Saulo, “Maikawaak tan bakenak dedan nairuam,” isonga kinaana. <sup>40</sup> Pag nan alaen din sokod na ay manpaspastol yan en nanpili si lima ay mayat ay bato sin ginawang et inpeey na sin sopot na. Iin-genana din palsiit na ay sinmag-en sin Filisteo.

<sup>41</sup> Intoltoloy aben Goliat ay nangabat en David yan mamangpangpango din nananggen si kasay na. <sup>42</sup> Idi estena ay ilaen si David, nilaslasoy na tan inila na ay an-anak pay laeng ay gowapo ya nasalon-at di kailaana. <sup>43</sup> Kanana en David, “Ay siya mo asoak ta pat-o di iabat mon sak-en?” Et inbayos na sin didiyosena din baos na en David. <sup>44</sup> Kanana, “Omali kas na ta idawat ko san awak mo sin titit ya atap ay animal ta isida da!”

<sup>45</sup> Kanan aben David, “Kampilan ya gayang di armas mo ay makilaban en sak-en, ngem sak-en pay ay makisango en sik-a et panakaawak Yahweh ay Kangatoan ay Turay. Sisya din Diyos ay daydayawen di sosoldadon di Israel ay kinarit mo. <sup>46</sup> Ed wani ay agew, ipaabak Diyos sik-a en sak-en ta peslek sik-a ya potoak san toktok mo. Ed wani ay agew, idawat ko din bangkay di sosoldado ay Filisteo sin titit ya atap ay animal ta kanen da ta say pangammoan di intiro ay lobong ay wada di Diyos ed Israel. <sup>47</sup> Say pangilaan di amin ay natopog isna ay adi kasapolan Diyos di gayang ya kampilan ay mangisalakan sin ipogaw na, tan si Diyos di makigobat et ipaabak nas dakayo am-in en dakami.”

<sup>48</sup> Intoltoloy Goliat ay sinmag-en yan katagtag si David ay nangabat en sisya sin panlabanan da. <sup>49</sup> Kinawet na di bato sin sopot na et inpalsiit na en Goliat. Napontaan din kitong na yan linoak din bato din toktok na et natokang ay nanlakob-o sin lota. <sup>50</sup> Isonga inabak David din Filisteo ay sana, olay mo palsiit anggoy ya bato di armas na, tan maga di kampilan si intatakina. <sup>51</sup> Katagtag si David et pinmika sin kad-an di bangkay Goliat, pag nan oksoten din kampilan Goliat ay say inpoto na sin toktok na met laeng.

Idi ilaen din Filisteo ay natey din itangtangsit da, katanagtag da ay lomayaw. <sup>52</sup> Pag bo-manogaw din taga-Israel ya taga-Juda ay nangapayaw en daida sin danan ay manturong ed Saaram enggana sin segpan di ili da ed Gat ya Ekron, et kawanalang di nasogatan ay Filisteo sin danan enggana sin ili da ay doy. <sup>53 54 55 56 57 58</sup>

### *Din Nangaposan Saulo En David*

Manipod isdi, laylayden Jonatan ay anak Saulo si David. Si Saulo abe et inpakodanas David ay makitee en daida et nangato di nangisaadana en sisya sin sosoldadon di Israel. Olay intoy en nakigobatan da David et nangabak da, tan wadas Diyos ay nangadkadwa en sisya, isonga laylayden ya daydayawen di am-in ay Israelita. Gapo sidi, inapalan Saulo si David ya inmegyat abe en sisya.

Baken nabayag yan kanan Saulo en mabalin ay asawaen David si Mikal ay anak na mo waday peslenas sin-gasot ay Filisteo ay panbayad na. Di panggep na et ta matey si David sin gobatan, ngem di nantongpalana et downan gasot ay Filisteo di pinsen da David, isonga inpaasawan Saulo si Mikal en sisya. Say nangammoan Saulo ay wada tetewas Diyos ay mangadkadwa en David, et nasepsep ay inmegyat ya malmaliget en sisya. Namin piga ay pinadpadas na ay mamse en David. Sin namingsan, inayaganas David sin beey na yan ginayang na, ngem inlisian David din gayang. Sin namingsan abe, inbaa nay sosoldado ay maniiim sin beey David ta peslen da koma mo bomala sin kabigatana. Ngem binadangan Mikal sisya ay lomayaw. Siya di, nanlikeliked si David sin kailili ta ilayawanas Saulo ya din sosoldado na. (18:1-20:42)

## 18

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30

## 19

1 2 3 4 5 6 7 8 9 10 11 12 13 14 15 16 17 18 19 20 21 22 23 24

## 20

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42

## 21

### *Si David Ya Din Tinapay Ay Naidaton En Diyos (21:1-6)*

<sup>1</sup> Inmey si David ed Nob sin kad-an Ahimelek ay padi. Manpayegpeg sisya ay nangabat en David yan kanana, “Apay nga es-esam ay magay intakin mos gait mo?”

<sup>2</sup> Kanan David ay nanongbat, “Waday nangibaaan din ari en sak-en yan inbilina ay adiak ibagbaga si olay sino din inpaamag na en sak-en. Mo maipanggep sin ipogaw ko yan binilin kos daida ay man-aabat kami si esa ay lugar. <sup>3</sup> Sinoy makan ay wadan sik-a ed wani? Omya ka kod si lima ay tinapay ono kompormi ay makan ay wadas sa.”

<sup>4</sup> Kanan din padi, “Magay odom ay tinapay mo adi et anggoy din tinapay ay naidaton en Diyos. Mabalin ay kanen yo mo adi nakidadaag si babbabai din sosoldadom.”

<sup>5</sup> Kanan David, “Sigurado met kitdi ay adi dan nakidaag tan kanayon ay say iyat mi mo waday emeyan mi. Adi kamin makidadaag olay mo baken nasantoan ay gapo di biyahi mi, isonga masepsep et ed wani ay importanti ay gapo di naibaaan mi.” <sup>6</sup> Et siya di, indawat din padi en David din nasantoan ay tinapay tan anggoy nas wada. Kakakkaana sin lamisaan ay kaipatpatangan di tinapay ay maidaton en Diyos, tan sinokatanas kaototo. <sup>7 8 9 10 11 12 13 14 15</sup>

Idi dinamag Saulo en binadangan Ahimelek si David, inpaayag nas sisya ya din am-in ay pamilyan ama na. Binilina din sosoldado na ta peslen da din papadi, ngem sigaan

da. Isonga inpapse na en Doeg ay taga-Edom. Waopolo ya lima ay padi di pinse na sin agew ay doy. (22:6-23)

Intoltoloy da Saulo ay manganap en David ta peslena koma, ngem nanliklied da David sin lugar ay magay omili ya sin kadondontogan ay nantabtabon. Emey ay 600 di ipogaw ay naitapi en sisya. Sin namingsan, istay dinpap da Saulo si David, ngem kapilitan ay mantaoli da ay dagos ta gobaten da din Filisteo. (23:1-29)

## 22

1 2 3 4 5 6 7 8 9 10 11 12 13 14 15 16 17 18 19 20 21 22 23

## 23

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29

## 24

### *Din Naneg-angan David En Saulo* (24:1-22)

<sup>1</sup> Idi nantaoli si Saulo ay napo sin nakigobatan da sin Filisteo, waday nangwani en sisya en wadas David sin lugar ay magay omili ed En Gedi. <sup>2</sup> Siya di, pinilin Saulo di tolo ay libo ay kalalaingan ay soldado ed Israel, et en da inanap da David sin asag-en di makwani en Deppas di Atap ay Kalding.

<sup>3</sup> Idi wada da sin danan, dinmateng da sin liyang ay asag-en si kodal di karnero, et sinenggep si Saulo ta en mankatilyas. Kambaw wadas da David ya din ipogaw na sin dogon di liyang ay sana. <sup>4</sup> Kanan da en sisya, “Gondaway mo na! Tan inbagan Diyos ay ipolang na din kaibaw mo en sik-a ta oway di iyat mo en sisya.” Siya et di, inin-inayad David ay inmasag-en ay adi dinlaw Saulo, et pinotoana din gayadan di naloyong ay bado na.

<sup>5</sup> Idi nakdeng di, mansakit di konsensia na begew sin namotoana sin badon Saulo, <sup>6</sup> et kanana sin ipogaw na, “Sapay koma ta domosas Diyos mo sakitak ono peslek din apok, tan dinotokan iman Diyos sisya ay man-ari.” <sup>7</sup> Begew sin inbaga na ay doy, tinopap na din ipogaw na ay makilaban en Saulo.

Idi siya di, kinmaan si Saulo sin liyang ta madipos koma. <sup>8</sup> Ngem binmala abes David yan kinaliana ay nangwani, “Apo ari!” Nanwingi si Saulo, et pag mandokmog si David ay nanyakog-ong <sup>9</sup> yan kanana, “Apay nga patiem di kanan di odom ay ipogaw en waday panggep ko ay mamse en sik-a? <sup>10</sup> Ed wani ay agew et mismo ay inilan di matam ay inpalobos Diyos ay peslek sik-a koma isnan liyang. Sinogsogan pay di odom sak-en ay mamse en sik-a, ngem adiak inamag, tan kanak si nemnem ko en adiak man-amag si lawa en sik-a tan dinotokan dakan Diyos. <sup>11</sup> Ilaem kadi ay ama nan poton di badom ay ginedged ko sin gayada na ngem adiak pinses sik-a. Say pangilaam koma ay maga di panggep ko ay mangamag si lawa ono makilaban en sik-a. Maga met di lawa si inamag ko en sik-a, ngem nay et ay omap-apayaw ka tan laydem ay pomse. <sup>12</sup> Sapay koma ta okomen Diyos daita ay dowta ta sisya di manobalit sin lawa ay inam-amag mo en sak-en, ngem adiak polos sakitan sik-a. <sup>13</sup> Wada di apat ay kanana, ‘Din mangamag si lawa et din lawa ay ipogaw,’ isonga adiak sagiden sik-a. <sup>14</sup> Ay sinoak od ay ap-apayawen din arin di Israel ta peslena? Kamanak met owat nanatey ay aso ono kaman tilang. <sup>15</sup> Si Diyos di mangokom ya mangikeddeng mo sino en daita di binmasol. Ilaena koma na ay maam-amag ta somalaknib sin panakabalin mo.”

<sup>16</sup> Idi nakdeng ay inbagan David di, kanan Saulo ay nanpoot, “Ay sik-a ay anak ay David san mankalkali?” Pag nan ipigsa ay nan-oga. <sup>17</sup> Kanana, “Nalinteg ka mo sak-en tan siged di inyat mo en sak-en, ngem lawa di inam-amag ko en sik-a. <sup>18</sup> Inpailam ed kaonyan din mayat ay ogalim en sak-en, tan inpalobos Diyos ay oway di iyat mo koman sak-en, ngem adi ka pinomse. <sup>19</sup> Manmano di ipogaw ay mo datngan day kaibaw da yan



ipalobos da ay makalayaw ay adi naan-ano. Sapay koma ta gon-gonaan dakan Diyos ay kosto sin siked ay inyat mo en sak-en ed wani. <sup>20</sup> Enggay ammok ay dadlon kan man-ari ed Israel et manturay kas mabayag. <sup>21</sup> Isonga mansapata ka sin ngadan Diyos ay adi kan peslen din polik ta say adi malinglingan din ngadan ko ya din ngadan amak.” <sup>22</sup> Et nansapatas David. Pag somaas Saulo, ngem nantaolis da David ya din ipogaw na sin nantabonan da.

Sin timpo ay doy, natey si Samuel, et nanladingit din am-in ay Israelita. Pag dan iponpon sin kad-an di beey na ed Rama.

Mo si David pay, nangasawa kasin, tan inpaasawan Saulo si Mikal ay asawa na si odom ay ipogaw. Din ngadngadan di asawan David et da Ahinoam en Abigail. Idi nabaybayag, wada kasin di wayan David ay mamse koma en Saulo. Siya na di inyat na ay naamag. (25:1-44)

## 25

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44

## 26

### *Din Kasin Naneg-angan David En Saulo* (26:1-18,21-25)

<sup>1</sup> Waday odom ay lallalaki ay taga-Zif ay inmey en Saulo ed Gibeon yan inbaga da ay wadas David ay mantabtabon sin bilig ay Hakila sin benget di lugar ay magay omili. <sup>2</sup> Nanballalong ay dagos si Saulo sin lugar ay magay omili ed Zif. Kinoyog na di tolo ay libo ay napili ay soldadon di Israel ta anapen das David, <sup>3</sup> et nankampo da sin kad-an di kalsada sin bilig ay Hakila met laeng. Idi dinngen David ay inonod da Saulo si daida sin lugar ay doy, <sup>4</sup> inbaa nay ispay et pinaneknekan da ay tet-ewa ay wadas da Saulo.

<sup>5</sup> Inmey ay dagos si David yan inila na din kad-an di nankampoan da Saulo. Tinamang na din kaseyseyepan da Saulo en Abner ay anak Ner ay komander din sosoldadon di ari. Din kaseyseyepan Saulo yan wada sin nan-gawaan di sosoldado na.

<sup>6</sup> Idi siya di, nandamag si David en Ahimelek ay Heteo ya si Abisai ay anak Zeruyas ya agin Joab. Kanana, “Sino di komoyog ay emey sin kampon Saulo?”

“Sak-en,” kanan Abisai ay sinombat.

<sup>7</sup> Sin doy ay labi, sin-gep da David en Abisai din kampon Saulo. Wadas Saulo ay naseseyep yan naipapadsek din gayang na sin toktokana. Naseseyep abe si Abner yan siya abe sin sosoldado na ay nangigagawa en sisya. <sup>8</sup> Kanan Abisai, “Inpalobos Diyos ay peslem din kaibaw mo ed wani ay labi, isonga ipalobos mo koma ta idoyok ko en sisya din gayang na enggana ay maipadsek sin lota. Mamingsan anggoy ay doyokek, adi masapol ay mamidwa.”

<sup>9</sup> Ngem kanan David, “Adi kan pespeslen, tan sigurado ay dosaen Diyos di mamse sin dinotokana ay ari. <sup>10</sup> Sigurado ay si Diyos met laeng ay mismo di mamse en sisya sin tapin di agew. Mabalin ay owat matey ono matey sin gobatan. <sup>11</sup> Ngem sapay koma ta iaddawin Diyos ay peslek din dinotokana ay ari. Ngem alaen ta din gayang ya panpeyey-anas danom ta komaan ta.”

<sup>12</sup> Et inan David din gayang ya panpeyey-an si danom sin kad-an di toktokan Saulo, asi da kinmaan en Abisai. Magay nakaila ono nangammo sin napasamak. Maga abey binmangon. Nas-et di seyep da, tan si Diyos dedan di nangiturong.

<sup>13</sup> Makdeng pay di, nanbalasat da David sin tanap yan inmey da sin toktok di esay bilig. Nan-inaddawi da en da Abner ya din sosoldadon Saulo. <sup>14</sup> Pag nan kanan ay nangibogaw en daida, “Abner, apay nga adi kan somongbat?”

Songbatan pay Abner yan kanana, “Sino ka ay bomogbogaw ay mamalaga sin ari?”

<sup>15</sup> Kanan aben David, “Ay baken tet-ewa ay natoled ka ay ipogaw yan magay makaiso en sik-a isnan Israel? Apay ngarud ay adi kan binantayan din ari ay apom? Wada met di kakkaey na issa ay mamse en sisya. <sup>16</sup> Lawa sas inyat mo. Dadlon tet-ewa ay lebbeng na ay matey kayo am-in, tan adi yo dedan binantayan din apo yo ay dinotokan Diyos ay manturay. Estem ay ilaen. Intoy kad-an din gayang di ari ya din panpeypey-an si danom ay wada koma sin toktokana?”

<sup>17</sup> Inmatonan Saulo din kalin David yan kanana, “Anak ko ay David, ay sik-a san mankalkali?”

Songbatan pay David yan kanana, “Aw, sak-en, Apo ari!” <sup>18</sup> Pag nan itoloy ay nangwani, “Apay ngin ay at-atikoem pay laeng sak-en ay baam? Ay wada aya di basol ko en sik-a?” <sup>19 20</sup>

<sup>21</sup> Pag kanan Saulo, “Baken kosto di inamag ko. Mantaoli ka, anak ko ay David. Laton ay adiak kasin sakitan sik-a, tan inpailam ed wani ay agew di panangipateg mo sin biyag ko. Tet-ewa kayman ay naong-ongak et dakdake ay kamali di inamag ko.”

<sup>22</sup> Kanan David ay nanongbat, “Naey din gayang mo ay apo ari. Man-ibaa ka sin ipogaw mo si manga. <sup>23</sup> Sapay koma ta gon-gonaan Diyos di nalinteg ya napodno ay ipogaw. Ed wani ay agew, indawat Diyos di gondaway ko ay mamse en sik-a, ngem sinigaak ay namse en sik-a ay dinotokana. <sup>24</sup> Ed wani ay agew, inpailak di panangipateg ko sin biyag mo et sapay koma ta patgen aben Diyos din biyag ko et omisalakan sin amin ay ligat.”

<sup>25</sup> Pag kanan Saulo, “Sapay koma ta bindisyonan dakan Diyos, anak ko ay David. Siged di pantongpalan di am-in ay amagem.” Pag komaan si David yan sinmaa abe si Saulo.

Ngem kanan David si nemnem na en agpos et mo emey sin ilin di Filisteo ta isdi di pantean da sin ipogaw na ta say adi peslen Saulo. Et say inamag da di. Nantee da sin ilin di Filisteo si sinpo ya enem ay bowan. (27:1–30:30)

## 27

1 2 3 4 5 6 7 8 9 10 11 12

## 28

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25

## 29

1 2 3 4 5 6 7 8 9 10 11

## 30

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31

## 31

### *Din Nateyan Saulo* (31:1-6)

<sup>1</sup> Sin namingsan, nan-gogobat din Filisteo ya Israelita sin dontog ay Gilboa yan adadoy natey sin Israelita. Linmayaw din odom pati da Saulo sin aan-ak na. <sup>2</sup> Ngem indasan din Filisteo si daida et pinse da din tolo ay an-ak Saulo ay da Jonatan en Abinadab ya si Malkisua. <sup>3</sup> Napigsa di laban sin kad-an Saulo, isonga olay sisya et pinontaan di panan di kalaban da yan naoneg di sogat na. <sup>4</sup> Kanana sin baro ay para egen si salida na, “Asotem san kampilan mo ta pomse ka ta adi da pomaligat asi da pomse din adi nakogit ay Filisteo.” Ngem palalo di egyat din baro ay sana et sinigaana ay mamse, isonga kaa si Saulo sin mismo ay kampilana et sisya met laeng di namse sin awak na. <sup>5</sup> Idi ilan din baro ay sana ay natey si Saulo, kapese abe sin awak na sin bokod

na ay kampilan. <sup>6</sup>Et siya di di inyat Saulo ay natey sin agew ay doy pati din tolo ay an-ak na, din man-eg-egen si salida na ya din amin ay sosoldado na. <sup>7 8 9 10 11 12 13</sup>

## **Maikadwa Ay Samuel Maipanggep Sin Libro Ay Nay**

Din madad-at sin Maikadwa ay Samuel et din panturayan Ari David. Sin damo, nanturay sin tribun Juda ay maibanda sin abagatan di Israel, pag sin intiro ay nasyon. Begew sin tolong Diyos, inabak na din kagobat na et pinmigma di turay na. Napigsa di layad David en Diyos, et inkarin Diyos ay mansososkat di poli na ay manturay si eng-ggana.

Baken pag mayat di madad-at isna maipanggep en David, tan wada abey nadagsen ay basol na. Idi inbaan Diyos di pankalkaliana ay mamagbaga en sisya, nanbabawi et nansagong kasin en Diyos, ngem wada pay dedan di lawa ay nantongpalan din basol na ay sana.

Olay mo siya di, madamdamag di ngadan Ari David, et sin maod-odi ay timpon di ligat, nankedkedaw din Israelita si ari ay mais-o en sisya. Din kagdengan di libro ay nay et esa ay kantan David ay pangdayaw begew sin nangisalakanan Diyos en sisya sin kalabana. Din kanta ay nay et madtengan abe sin Salmo 18.

### **Din Linaona**

- Din nanturayan David ed Juda 1:1–4:12
- Din naisaadan David ay ari sin intiro ay Israel 5:1-5
- Din pinmigmaan di turay David 5:6–10:19
- Din nanbasolan David ya din nadosaana 11:1–12:25
- Ligligat ya lawa ay paspasamak 12:26–20:26
- Din kagdengan di libro 21:1–24:25

### *Din Nanturayan David Ed Juda*

Idi nadamag David ay natey da Saulo en Jonatan ay anak na sin gobat, binisngit nan bado na begew sin sakit di nemnem na yan inladingitanas daida. Pag emey ed Hebron ay ilin di tribun Juda, et insaad das sisya ay ari ed Juda. Ngem si Abner ay pangolon di sosoldadon Saulo et insaad nas Isboset ay anak Saulo ay say ari sin odom ay tribun di Israelita.

Idi siya di, nan-gogobat din sosoldadon da David en Isboset. Pinmigpigsa da David downan pay komapkapoy da Isboset. Pag waday namse en Isboset. (1:1–4:12)

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27

## **2**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32

## **3**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39

## **4**

1 2 3 4 5 6 7 8 9 10 11 12

## **5**

### *Din Naisaadan David Ay Ari Ed Israel (5:1-5)*

<sup>1</sup> Inmey din papangolon di am-in ay tribun di Israelita en David sin kad-ana ed Hebron yan kanan da en sisya, “Siag-i tako met. <sup>2</sup> Olay ed idi ay si Saulo pay laeng di ari tako, sik-a di nangipangpangolo sin nakigobgobatan di Israelita yan inkarin Diyos ay sik-a di mangay-ayowan ya mangituray sin ipogaw na.” <sup>3</sup> Sin kawadan din am-in ay papangolon di Israelita sin kad-an Ari David ed Hebron, nakitolag en daida sin

sangoanan Diyos, et sinoyatan da din toktok na si lana ay mangipaila ay insaad das sisya ay ari ed Israel. <sup>4</sup>Tolonpo di tawena sin naisaadana ay ari yan nanturay si opatapolo ay tawen. <sup>5</sup>Inturayana ed Juda si pito ya kagodwa ay tawen sin kawada na ed Hebron yan inturayana ed Israel ya Juda si tolonpo ya tolo ay tawen sin inmeyana ed Jerusalem.

### *Din Nangabakan Da David Ed Jerusalem*

(5:6-10)

<sup>6</sup>Idi nakdeng ay naisaad si David ay ari, inmey sisya ya din sosoldado na ed Jerusalem et ginobat da din Jebuseo ay man-ilis di. Kanan din Jebuseo sin nemnem da en adi kabaelan David ay senggep sin kad-an da, isonga kanan da en sisya, “Adi kan makasgep, tan olay din pilay ya nagodab et kabaelan das sik-a ay sawaden.” <sup>7-8</sup>Sin agew ay doy, kanan David sin sosoldado na, “Mo sinoy mayad ay mangabak sin Jebuseo, masapol ay mandan da sin osok ay mapo sin sakdoan ed dallem ta say makadateng da sin kad-an din doy ay napilay ya nagodab ay kanan da, ay kalkaliget ko.” Siya na di gapo ay wada nan apat ay kanana, “Adi makasgep sin Timplo\* din napilay ya nagodab.”

Idi siya di, inabak David din naaladan ay partin di siyodad ay makwani en Zion <sup>9</sup>et nanbeey sidi. Pag nan ngadanan si Siyodad en David. Inpasaad na kasin din kabeebeey sin siyodad manipod ed Millo enggana sin palasyo et inpaalad na din nanniliked. <sup>10</sup>Nantoltoloy ay pinmigma din turay en David tan wada en sisya si Yahweh ay say Diyos ay Kangatoan ay Turay. <sup>11 12 13 14 15 16 17 18 19 20 21 22 23 24 25</sup>

## 6

### *Din Nangieyan Da Sin Baol Di Tolagan Ed Jerusalem*

<sup>1</sup>Inpasinop kasin David din napili ay sosoldadon di Israel yan waday tolonpo ay libo. <sup>2</sup>Inkoyog nas daida amin ed Baala\* ay sakop di Juda ta alaen da din Baol di Tolagan Diyos ay naingadan din ngadan Diyos ay Kangatoan ay Turay ay tinmotokdo sin trono na sin ngaton di kerubim.† <sup>3</sup>Inkarga da si baro ay kariton, pag dan ikaan sin beey Abinadab ay wada sin toktok di bilig. Da Uzza en Ahio ay an-ak Abinadab di nannandan ay nangiturturong sin kariton, <sup>4</sup>yan si Ahio di wada sin sango. <sup>5</sup>Si David abe ya din amin ay Israelita yan inpakat da amin ay kabaelan da ay mankanta ya mansala ay mangidaydayaw en Diyos. Dowan da aben manambol, mangangsa, ya mantokar si arpa, gitara ya odom pay ay kalasin di matokar.

<sup>6</sup>Idi dinmateng da sin kad-an di pan-ir-irikan Nacon, naikados din baka, isonga pinden Uzza din Baol di Tolagan. <sup>7</sup>Binmonget si Diyos et pinse nas Uzza ay dagos isdi met laeng, sin kad-an di Baol, tan adi binanol Uzza din kinasanton di Baol.‡

<sup>8</sup>Mansakit di nemnem David sin nanosaan Diyos en Uzza gapo sin bonget na, et manipod sidi ay timpo enggana ed wani, nangadanan din lugar ay doy si Perez Uzza.§

<sup>9</sup>Siya et di, inmegyat si David en Diyos yan kanana, “Intoy iyat ko pay ay mangitakin sin Baol di Tolagan?” <sup>10</sup>Gapo sidi, ninemnem David ay adi na itakin din Baol ed Jerusalem ay makwani en Siyodad David. Inliglig na sin danan et in-ey na sin beey Obed Edom ay taga-Gat. <sup>11</sup>Kinmakaman sidi din Baol di Tolagan Diyos si tolo ay bowan yan binindisyonan Diyos si Obed-Edom ya din intiro ay pamilya na.

<sup>12</sup>Naipaammo en Ari David ay binindisyonan Diyos din pamilyan Obed Edom ya din amin ay sanikwa na gapo sin Baol di Tolagan, isonga inmey da David ta alaena din Baol ta iey na ed Jerusalem. <sup>13</sup>Idi owat dan nandan si enem ay kiyang din lallalaki ay nanggen sin Baol di Tolagan, inpasaldeng David daida, pag man-idaton en Diyos

\* **5:7-8** Di esa abe ay kaiologan nina et: Adi makasgep sin palasyo... \* **6:2** Di esa abe ay ngadana et Kiriath Jearim (1 Samuel 7:2). † **6:2** Exodo 25:18-22 ya Hebreo 9:5. ‡ **6:7** Mo maibasara sin linteg Diyos, maiparit ay kapayen di olay sino ay ipogaw din Baol di Tolagan. Mo it-an da, masapol ay batawilen da, ya Levita et anggoy di waday lebbeng da ay mamatawil. § **6:8** Din olog di Perez Uzza sin Hebreo et “dosan Uzza.”



si esa ay bomaro ay baka ya esay malames ay karnero. <sup>14</sup> Idi intoloy da ay mandan, inpakat David di kabaelana ay mansala ay manaydayaw en Diyos. Sin nansalsalaana, nanbabado si mankilat ay sinadlay ay makwani en efod. <sup>15</sup> Siya et di, in-ey David ya din amin ay Israelita din Baol di Tolagan ed Jerusalem yan nanbogbogaw ya nananggoyob da gapo si ragsak da.

<sup>16</sup> Idi wada ay idatdateng da sin siyodad din Baol di Tolagan, nan-osdong sin tawa si Mikal\* ay anak Saulo. Inila na si David ay mansalsala ya mantabtab-oy ay mangiday-dayaw en Diyos yan linaslasoy na sin nemnem na.

<sup>17</sup> Inisgep da din Baol di Tolagan sin Tolda ay in-amag David ay kaipey-ana. Pag mandaton si David si daton ay mapooan ya daton ay pan-ookoban da ya makikadkadaan da en Diyos. <sup>18</sup> Idi makdeng ay man-idaton, inosal na din ngadan Diyos ay Kangatoan ay Turay ay namindisyon sin kaipoipogaw. <sup>19</sup> Winarasana abe amin din ipogaw, lallalaki ya babbabai si sag-eesa ay tinapay, esay tadtad ay dinawis ay karni ya esa ay kalasin di mam-is ay tinapay ay nalaokan si pasas. Idi makdeng di, sinmaa amin din ipogaw.

<sup>20</sup> Idi sinmaas David ta ena bindisyonan din pamilya na, binmela si Mikal ay anak Saulo ay en nangabat en sisya. Kanana, “Kaman kayman inngatom di dayaw mo ay arin di Israel ed wani ay agew! Tan nanlabos ka sin sangoanan di babassang ay babag-en di oopisyal mo. Kaman kan ipogaw ay magay nemnem na.”

<sup>21</sup> Songbatan David yan kanana, “Baken para en daida din inamag ko mo adi et nansalaak ay pangidaydayaw ko en Diyos ay namili en sak-en ay mangituray sin ipogaw na ay Israelita. Baken si amam ono din pamilya na di pinili na. Itoltoloy kon to ay mansala ay mangidayaw en Diyos <sup>22</sup> et mas ibabak din awak ko mo din kanam ay sana. Mabalin ay kanam en magay kowintak, ngem omidayaw dan to din babassang ay inbagam.”

<sup>23</sup> Et begew sin napasamak ay nay, adi polos nan-anak si Mikal ay anak Saulo engganans nateyana.

## 7

### *Din Inpadton Natan En David*

(7:1-17)

<sup>1</sup> Idi siya di, tinmalna din iturayan David, tan inpasaldeng Diyos din amin ay kalabana. <sup>2</sup> Idi wadas sisya ay manbeey sin palasyo na, kanana en Natan ay din pankalkalian Diyos, “Ilaem kadi, sak-en yan manbeeyak si palasyo ay napili ay kaiw di amag na, ngem din Baol di Tolagan Diyos yan owat tolda di beey na.”

<sup>3</sup> Kanan Natan ay sinombat sin ari, “Amagem adi mo sino di nemnemnemem, tan laton ay wadas Diyos ay mangadkadwa en sik-a.”

<sup>4</sup> Ngem sin labi ay sana, nakikali si Diyos en Natan yan kanana, <sup>5</sup> “En ka ibaga en David ay baik, ‘Siya na di kinwanin Diyos: Baken sik-a di mangisaad si panbeeyak.

<sup>6</sup> Adiak polos nantee si beey manipod sin nangipangoak sin Israelita ay kinmaan ed Egipto engganad wani, tan tolda di nanbebeeyak ay nan-etaetan sin inil-ili. <sup>7</sup> Sin amin ay nakikoykoyogak sin Israelita ay ipogaw ko, adiak polos nansalsalodsod sin papangolo ay dinotdotokak ay mangay-ayowan en daida mo apay nga adi da man-amag si panbeeyak ay napili ay kaiw di amag na.’ <sup>8</sup> Isonga ed wani, kanam en David ay baik, ‘Siya na di kanan Diyos: Esa ka ay manpaspastol si karnero, ngem inayagak ya dotokak sik-a ay mangituray sin Israelita ay ipogaw ko. <sup>9</sup> Kanayon ay kinadkadwak sik-a ya inabak ko am-in ay kalaban mo sin en ka nakigobgobatan. Ipangatok sik-a ay kaman da din madaydayaw ay ipogaw isnan lobong. <sup>10</sup> Siya abe ay pinilik di lugar ay panbeeyan di Israelita ay ipogaw ko yan insaad kos daida ta mawadaan das kabokbokodan da ay pantean. Isdi, maga di manistolbo ya mamalpaligat en daida ay kaman ed idi,

\* **6:16** Si Mikal yan esa sin as-awan David. Ilaen sin 1 Samuel 18.

<sup>11</sup> manipod sin nandotokak si mangipangolo en daida. Ipasaldeng ko din kalaban mo et mawadaan kas talna. Ikarik abe ay isaad ko din polim ay ari ta mansososkat da ay manturay. <sup>12</sup> Mo matey ka ya maiponpon ka ay maitapi sin ap-apom, isaad kon to din esay polim ay maisokat en sik-a et papigsaek din turay na. <sup>13</sup> Sisy di mangisaad si Timplo ay panbeeyak yan ilaek ta din panturayan di poli na et maga polos di patingga na. <sup>14</sup> Sak-en di manbalin ay ama na et sisya di anak ko. Dosaek mo man-amag si lawa ay kaman din iyat di ama ay manoplit si anak na. <sup>15</sup> Ngem itoltoloy ko ay mangipaila si komakaman ay layad ya seg-ang ko en sisya. Adiak ibabawi ay kaman din inyat ko en Saulo et kinaan kos sisya ta sik-a di man-ari. <sup>16</sup> Mantoltoloy din polim ay man-ari sin pangiilaak si eng-enggana.' ” <sup>17</sup> Inpaammon Natan en David amin din naipadto ay nay.   
18 19 20 21 22 23 24 25 26 27 28 29

## 8

### *Din Nangab-abakan David Sin Kagobat Na (8:1-15)*

<sup>1</sup> Idi inmey di timpo,\* ginobat Ari David din Filisteo. Inabak nas daida et inpasaldeng na din turay da sin ili da.

<sup>2</sup> Inabak na abe din Moabita. Din inamag na en daida sin nakdenggan di gobat et inbabaktad nas daida ay dinalapat sin lota. Pag nan ibilin ay lokoden din sosoldado nas daida si tali ta peslen da din dowa ay inkatlo ya bay-an da ay matago din inkatlo. Siya et di nanpaituray din Moabita en David et nanbaybayad das bowis en sisya.

<sup>3</sup> Inabak aben David da Hadadezer ay anak Rehob ay ari ed Zoba ay sakop di Syria. Ginobat nas daida idi wada da Hadadezer sin danan ay en mangipapigsa kasin sin turay na sin kad-an di ginawang ay Eufrates. <sup>4</sup> Dinpap da David di sinlibo ya pito ay gasot† ay soldado ay nangakabayo ya dowanpo ay libo ay mandad-an. Binay-ana di kabayo ay omanay si sin-gasot ay kalisa, ngem pinilay na din odom.

<sup>5</sup> Idi inbaan din taga-Syria ay wadad Damascus di sosoldado ay tomolong en Ari Hadadezer, ginobat aben da David si daida et pinse da di 22,000. <sup>6</sup> Pag nan isaad di kakampon di sosoldado sin ili da. Siya et di inturayana din taga-Syria et nanbaybayad das bowis en sisya. Et olay intoy inmeyan David ay nakigobat, nangabaken Diyos sisya. <sup>7</sup> Inan David din kasay ay balitok ay okan din papangolon di sosoldadon Hadadezer et in-ey na ed Jerusalem. <sup>8</sup> Ad-ado abe di ina na ay bronsi sin siyodad ay Beta ya Berotai ay inturayan Hadadezer.

<sup>9</sup> Idi nadamag Ari Toi ed Hamat ay inabak David din am-in ay soldadon Hadadezer, <sup>10</sup> inbaa nas Joram ay anak na ta pakomostaana ya padayawana begew sin nangabakana. Tan namin ado ay nan-gobat da Toi en Hadadezer. Idi dinmateng si Joram, waday sagsagot ay indawat na en David ay balitok, palata ya bronsi di amag da. <sup>11</sup> Indaton David am-in dana en Diyos, pati din palata ya balitok ay ina na sin nanasyon ay inabak na <sup>12</sup> ay ed Edom, Moab, Ammon, Filistia ya Amalek. Indatona abe en Diyos din tapin di kinabaknang ay sinamsam na en Hadadezer.

<sup>13</sup> Idi pinsen David ya din sosoldado na di 18,000 ay taga-Edom sin tanap ay Asin, masepsep ay mandindinamag din pigsa na. <sup>14</sup> Insaad na di kampon di sosoldado sin il-ili da ed Edom et nanpaituray am-in di taga-Edom en sisya. Et olay intoy in-inmeyan David, nangabaken Diyos sisya. <sup>15</sup> Inturayana din intiro ay Israel et in-inset na ay nanturay ta say kosto ya nalinteg di maamag sin am-in ay ipogaw na. <sup>16 17 18</sup>

\* **8:1** Din kapitolo ay nay et kasinopan di nakigobgobatan David. Baken sigurado ay nangon-ona ay naamag din wada sin nangon-ona ay kapitolo. † **8:4** 1,700 di naisolat sin Masoretic Text. Din naisolat sin LXX, Dead Sea Scrolls ya 1 Cronicas 18:4 et 7,000.

## 9

### *Din Seg-ang David En Mefiboset*

<sup>1</sup> Sin namingsan, kanan David, “Ay wada pay laeng di nabay-an sin pamilyan Saulo? Mo wada, laydek ay ipaila di seg-ang ko begew en Jonatan.”\* <sup>2</sup> Sin doy ay timpo, wada di baa sin pamilyan Saulo ay manngadan si Ziba. Inayagan da ta manpaila en David, pag nan kanan en sisya, “Ay sik-a si Ziba?”

Songbatana pay yan kanana, “Aw apo, naeyak ay mansilbi en sik-a.”

<sup>3</sup> Kanan din ari ay nansalodsod, “Ay maga di nabay-an sin pamilyan Saulo si mabalin ay pangipailaak si seg-ang ay kaman din seg-ang Diyos?”

Kanan Ziba ay nanongbat, “Wada pay laeng di esa sin an-ak Jonatan ay napengkey di doway ay siki na.”

<sup>4</sup> “Intoy kad-ana?” pinoot din ari.

“Wada sin beey Makir ay anak Ammiel ed Lodebar,” kanan Ziba.

<sup>5</sup> Et inpaayag Ari David sisya.

<sup>6</sup> Idi domateng si Mefiboset ay anak Jonatan ay anak Saulo sin kad-an David, nanyakog-ong ay mangipaila si pangdayaw na. Kanan David, “Ay sik-a si Mefiboset?”

Songbatana pay yan kanana, “Aw apo, sak-en nan baam.”

<sup>7</sup> Kanan David, “Adi ka emegyat tan laton ay seg-angak sik-a begew en Jonatan ay amam. Itaolik amin en sik-a din dagan Saulo ay apom yan awisek sik-a ay makikan en sak-en si kanayon.”

<sup>8</sup> Nanyakog-ong kasin si Mefiboset yan kanana, “Ay siya mo sinoak ay baam ta siya na di kinasiged mo en sak-en? Kamanak met nanatey ay aso ay magay silbi na.”

<sup>9</sup> Pag ayagan din ari si Ziba ay baan Saulo yan kanana, “Idawat ko en Mefiboset ay apon di apom din amin ay sanikwan Saulo ya din pamilya na. <sup>10</sup> Sik-a, din an-ak mo ya baam di mangobla sin daga para sin pamilyan Saulo ay apom, asi kayon idawat di maapit ta way kanen da. Ngem si Mefiboset pay et makikan en sak-en si oway.” (Waday sinpo ya lima ay lalaki ay an-ak Ziba ya downpo ay baa na.)

<sup>11</sup> Kanan Ziba sin ari, “Apo ari, tongpalek ay baam di olay sino ay ipaamag mo.” Et nakikikan si Mefiboset en David ay kaman esa sin an-ak na. <sup>12</sup> Waday baron Mefiboset ay si Mica di ngadana. Nanbalin ay baan Mefiboset din amin ay pamilya ya baan Ziba. <sup>13</sup> Nanbeey ed Jerusalem si Mefiboset ay napengkey di doway siki na yan kanayon ay nakikikan sin ari.

## 10

1 2 3 4 5 6 7 8 9 10 11 12 13 14 15 16 17 18 19

## 11

### *Da David en Batseba* (11:1-17,26-27)

<sup>1</sup> Idi manlogi di tawen, sin timpo ay makigobgobatan di aari, inbaan David si Joab pati din iib-a na ay papangolon di soldado ya din sosoldadon di Israel ay en makigobat. Inabak da din Ammonita et linikob da din siyodad ay Rabba, ngem si David pay yan nataynan ed Jerusalem. <sup>2</sup> Waday esay masdem ay binmangon si David et en nanliklied sin nasingpa ay atep di palasyo, pag na et osdongan di babai ay man-am-ames yan napintas din babai ay sana. <sup>3</sup> Nan-ibaa si David si mangammo mo sino din babai ay sana et naammoana ay si Batseba ay anak Eliam ya asawan Urias ay Heteo.

<sup>4</sup> Idi siya et di, nan-ibaa si David si en nangayag en Batseba yan inmey sin kad-ana din babai ay sana et dinaag na. (Kakkakdeng na ay nangitongpal sin seremonia ay

\* 9:1 1 Samuel 18.

kalinisana begew sin binowan ay sakit di babai.) Idi nakdeng din nandaagan da sin ari, sinmaa si Batseba.

<sup>5</sup> Idi baken onay nabayag, nadlaw na ay masikog et nan-ibaa si mangipaammo en David. <sup>6</sup> Gapo isdi, inpaibagan David en Joab ay pasaaena si Urias ay Heteo, et inbaan Joab ay emey sin kad-an David.

<sup>7</sup> Idi domateng si Urias, nandamag si David si maipanggep en Joab ya din sosoldado ya mo intoy ison din gobat. <sup>8</sup> Makdeng pay di, kanana en Urias, “Somaa ka ta en ka ilan si asawam.”\* Kinmaan si Urias sin palasyo yan waday regalo ay inpatolod din ari sin beey na. <sup>9</sup> Ngem adi sinmaa, mo adi et nakiseyep sin amin ay baan di apo na sin segpan di palasyo. <sup>10</sup> Idi ammoan David ay adi sinmaa si Urias, kanana, “Apay nga adi ka sinmaa yan nabayag ay inmaddawi ka sin beey mo?”

<sup>11</sup> Kanan Urias en David, “Adi mabalin ay somaaak ay en mangan, man-inom ya manaag en asawak, tan din sosoldadon di Israel ya Juda yan wada da sin gobatan ya say kad-an met laeng din Baol di Tolagan. Din pangolok abe ay si Joab ya din iib-a na ay papangolo yan wada da ay mankamkampo sin nadontog. Isapatak ay adiak polos amagen di kaman nisa.”†

<sup>12</sup> Idi siya di kanan David en sisya, “Mantee kas na ed wani ta si bigat asiak ibaas sik-a ay mantaoli.” Et nantee si Urias ed Jerusalem sin doy ay agew. Sin kabigatana, <sup>13</sup> inawis David sisya ay makikan ya makiinom et bineteng na, ngem sin labi, nakiseyep si Urias sin baan di apo na ay ari et adi sinmaa.

<sup>14</sup> Sin kabigatana nansolat si David en Joab et inpaw-it na en Urias. <sup>15</sup> Siya na di nilaon din solat na, “Ipasangom si Urias sin lugar ay kapigsaan di gobat, asi kayon kataynan ta say kateyana.” <sup>16</sup> Et siya di, inbaan Joab si Urias sin lugar ay kapigsaan di kalaban. <sup>17</sup> Idi bomala din sosoldado sin siyodad ay nangobat en da Joab, natey din odom ay papangolon di soldadon David, pati si Urias ay Heteo. <sup>18 19 20 21 22 23 24 25</sup>

<sup>26</sup> Idi dengngen din asawan Urias ay natey sisya, inladladingitana. <sup>27</sup> Makdeng pay din timpo ay pangiladingitana, inpaayag David sin beey na et nanbalinena ay asawa na yan nan-anak si lalaki. Ngem baken nalaydan si Diyos sin inamag David.

## 12

### *Din Nanyamyaman Natan En David Ya Din Nanbabawiana (12:1-24)*

<sup>1</sup> Idi siya di, inbaan Diyos si Natan sin kad-an David. Idi domateng sin kad-ana, kanana, “Wada di doway ay lalaki sin esa ay ili. Nabaknang din esa yan nabiteg din esa. <sup>2</sup> Din baknang ay sana yan ad-adoy baka ya karnero na, <sup>3</sup> ngem din nabiteg pay yan maga polos di sanikwa na malaksig di esay kitkittoy ay bomalasang ay karnero ay nilakoana. Inay-ayowanana ya dinakdake na sin beey na ay kadwan din an-ak na. Din kankanena di ipakana, pan-inomena sin tasa na ya bakbakwaena, tan inbilang na ay esa sin an-ak na. <sup>4</sup> Sin namingsan, waday dinmateng ay sangailin din baknang ay sana. Sigaana di kapartian di esa sin animal na, ngem say ina na et din bomalasang ay karneron di nabiteg et say pinalti na ay inpasango sin bisita na.”

<sup>5</sup> Palalo di bonget David sin baknang, isonga kanana, “Isapatak sin matmatago ay Diyos ay masapol ay matey din ipogaw ay nangamag si kaman nisa. <sup>6</sup> Gapo sin inamag na ay magay seg-ang na, masapol abe ay mamin opat di kaad-adon di ibayad na sin ina na.”

<sup>7</sup> Pag kanan Natan en David, “Sik-a din ipogaw ay doy! Siya na di kanan Yahweh ay Diyos di Israelita: Nanbalinek sik-a ay arin di Israel ya insalakan kos sik-a sin panakabalin Saulo. <sup>8</sup> Indawat kon sik-a din iturayana ya din aasawa na et nanbalinek

\* **11:8** Din kanana sin Hebreo et: en ka owasan san sikim, ngem din laydena ay kalien isna et en ka man-ibbay ay kosto ta daagem si asawam. † **11:11** 1 Samuel 21:4-5.

sik-a ay ari ed Israel ya Juda. Mo kolang dana, dobliek pay koma di kaad-adon di idawat kon sik-a. <sup>9</sup> Apay pay laeng ay adi kan tinongpal din bilin ko? Apay nga inamag mo di kaman nina ay basol? Inpapsem si Urias sin gobatan. Inpapsem sin Ammonita, asi ka pay posen si asawa na. <sup>10</sup> Isonga ed wani, sin tonggal sinkapoli ay apom, wadan to ay wada di matey si kampilan, tan adi ka tinongpal sak-en yan pinos mo din asawan Urias. <sup>11</sup> Isapatak en sik-a ay pawadaek sin pamilyam di mangidawat si panligatam. Sin pangiilaam et ipolang kon to din aas-awam si ib-am et daagenas daida ay sipaparang sin kaagawan. <sup>12</sup> Inlimed mo ay inamag, ngem awni et ipaamag ko sin pangiilaan di amin ay Israelita.”

<sup>13</sup> Pag kanan David en Natan, “Nanbasolak kayman en Diyos.”

Songbatan pay Natan yan kanana, “Pinakawan Diyos sik-a sin basol mo et adi kan matey. <sup>14</sup> Ngem gapo ta dadlon kan nilaslasoy si Diyos isnan inamag mo, matey din anak mo.”

<sup>15</sup> Idi sinmaa si Natan, nansakiten Diyos din anak da David sin asawan Urias. <sup>16</sup> Nanpakpakaasi si David en Diyos ta mailatonan din anak. Adi nangnangan et en nanlaklakob-o ay maninsinlabi sin lota. <sup>17</sup> Pinadpadas din oopisyal na sin palasyo ay pabangonen sisya, ngem sinigaana ay bomangon ya makikan en daida.

<sup>18</sup> Sin maikapito ay agew, natey din anak. Emegyat din oopisyal David ay mangibaga en sisya, tan kanan das nemnem da, “Idi matmatago pay laeng din anak, adi ikaskason David din ibaga tako. Intoy iyat tako pay ay mangibaga ay natey din anak na? Amangan mo lawa di amagena sin awak na.”

<sup>19</sup> Inilan David ay man-aayasak din oopisyal na, yan naawatana ay natey din anak, isonga nansalodsod ay kanana, “Ay natey din anak?”

“Aw,” kanan da ay nanongbat.

<sup>20</sup> Idi siya di, binmangon si David yan nan-ames, nansagaysay ya nansokat. Pag en mandaydayaw sin beey di Diyos. Idi nantaoli sin palasyo, nankedaw si kanena et nangan.

<sup>21</sup> Kanan din oopisyal na ay nansalodsod, “Adi kamin maaw-awatan nan am-amagem. Idi matmatago din anak, inog-ogaam ya adi kan nangnangan, ngem ed wani ay natey yan binmangon ka ya nangan ka.”

<sup>22</sup> Kanana ay nanongbat en daida, “Idi matmatago din anak, inog-ogaak ya init-itpek di dagaang ko, tan kanak si nemnem ko en mo maseg-ang si Diyos en sak-en ya ipalobos na ay matago din anak. <sup>23</sup> Ngem ed wani ay natey din anak, sinoy gapo pay laeng ay itpek di dagaang ko? Ay siya mo mabalin ay tagoek sisya? Sin tapin di agew, enak datngen sisya, ngem adi mabalin ay mantaolis sisya en sak-en.”

<sup>24</sup> Makdeng pay di, niliwliwan David si asawa na ay Batseba. Nandaag da et nawad-an yan nan-anak si lalaki ay nginadanana si Solomon. <sup>25 26 27 28 29 30 31</sup>

### *Ligligat Ya Lawa Ay Paspasamak*

Idi nadakdake din aan-ak David ay in-anak din aasawa na, ad-adoy lawa ay napasamak. Si Amnon ay anak da David en Ahinoam et inak-aklonganas Tamar ay anak da David en Maaca. Binmaktad sin katri na ay agin sasakit et inpaayag nas Tamar ay mangioto ya mamakan en sisya. Pag nan piliten. Idi naammoan David din naamag, palaloy bonget na, ngem binaybay-anas Amnon. Ginmiginek abes Absalom ay agin Tamar, ngem nansesed si iyat na ay mangibaes en sisya.

Idi inmey di doway ay tawen, inayagan Absalom si Amnon ay en makipokis si karnero da. Inbilin Absalom sin gagait na ay mo makdeng di obla ya nakainom si Amnon, peslen das sisya. Tinongpal da din inbilina et pag lomayaw si Absalom ay en manbeey si addawi ay ili.



Idi inmey di pigay tawen, nantaolis Absalom et inawis na di odom ay Israelita ay mangonod en sisya. Naammoan David et linmayaw ed Jerusalem. Et say tinmet-ewaan din inpadton Natan en David ed idi, tan dinaag Absalom din aas-awan ama na sin atep di palasyo.

Idi siya di, binomtak di gobat. Naabak din sosoldadon Absalom et natey sisya. Din nateyana et nangakabayo, yan idi naipatag sin dallem di dakdake ay kaiw, naisab-it din ando ay book na sin panga na et naisad-ang sisya. Inilan da Joab ay pangolon di sosoldadon David sisya et pinse da. Wada abey esa ay manngadan si Seba ay nakigobat en David. Inatikon da Joab da Seba enggana ay indasan da ay nantatabon sin oneg di esa ay siyodad. Inawis Joab din man-ili ay mamse en sisya et pag mantaoli ed Jerusalem. (13:1-20:26)

**13**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39

**14**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33

**15**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37

**16**

1 2 3 4 5 6 7 8 9 10 11 12 13 14 15 16 17 18 19 20 21 22 23

**17**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29

**18**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33

**19**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43

**20**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26

**21**

1 2 3 4 5 6 7 8 9 10 11 12 13 14 15 16 17 18 19 20 21 22

**22**

*Din Kantan David Ay Pangdayaw*  
(22:1-7,21-29)

<sup>1</sup> Kinantan David din kanta ay nay sin nangisalakanan Diyos en sisya sin amin ay kalabana ya sin panakabalin Saulo. <sup>2-3</sup> Kanana, “Si Yahweh ay Diyos ko di omisalakan.

Maiarig si dontog ay enak pantabonan  
ono dakdake ay bato ay enak pankamangan.  
Mo wadaak en sisya, magay pan-egyatan,  
tan kaman mayat ay pantabonan  
ay adi makasgep di kalaban.

Kaman ko aben salida ay somalaknib sin lawa,  
napigsa ay omisalakan sin ipogaw ay magay seg-ang da.

<sup>4</sup> Mankedawak si badang Diyos et omisalakan sin kalaban ko.  
Lebbeng na ay madayaw si Diyos Apo.

<sup>5</sup> Nan pese et kaman dalloyon ay nanepyasepyat en sak-en,

- kaman layos ay dandani ay mangianod en sak-en.
- <sup>6</sup> Kamanak napolipolan si tali ay omigoyod sin kad-an di natey,  
din pese yan nangisagana si kaknaak koma ay tagdey.
- <sup>7</sup> Sin palalo ay ligat ko,  
kindaw ko din badang Yahweh ay Diyos ko,  
et sin Timplo na, dinnge na din adawag ko. <sup>8 9 10 11 12 13 14 15 16 17 18 19 20</sup>
- <sup>21</sup> Binindisyonan Diyos sak-en gapo sin kinalinteg ko,  
indawat nay gon-gonak tan maga di basol ko.
- <sup>22</sup> Tan nantongtongpalak sin laydena,  
adiak binmasol ay nanokog en sisya.
- <sup>23</sup> Tinongtongpal ko amin ay linteg na,  
magay linabsing ko ay bilina.
- <sup>24</sup> Sin sangoanan Diyos, magay maipabasol en sak-en,  
tan inaddawiak di enak panbasolan.
- <sup>25</sup> Isonga idawat na di gon-gonak gapo sin kinalinteg ko,  
tan ammo na ay maga di basol ko.
- <sup>26</sup> Sin ipogaw ay matalek, ipaila na ay matalek sisya,  
ipaila na din kinasanto na sin magay kaoyawana.
- <sup>27</sup> Sin nalinis et maila din kinalinis na,  
ngem sin nasikap ay manowitik si ib-a na,  
nalaing si Diyos ay mangabak en sisya.
- <sup>28</sup> Isalakana din napakombaba,  
ngem ipababa na din mangipapangatos awak na.
- <sup>29</sup> Si Yahweh ay Diyos ko di silaw ko,  
silawana din mabolinget ay danan ko.” <sup>30 31 32 33 34 35 36 37 38 39 40 41 42 43 44 45 46 47 48 49 50 51</sup>

## 23

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39

## 24

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25

## Omona Ay Libro Maipanggep Sin Aari Maipanggep Sin Libro Ay Nay

Din libro ay nay et say kaitoloyan din naisolat sin Omona ya Maikadwa ay Samuel maipanggep si nanturayan di aari ed Israel. Nalaka ay maammoan tako ay din nantongpalan di nanturayan di esa ya esa ay ari et maibasar sin kinamatalek na ay mansilbi en Diyos. Din matalek ay mangonod en Diyos et binindisyonan Diyos sisya ya din iturayana, ngem din nanokog en Diyos ay nasangaw si sinan didiyos ya odom ay lawa et dinosan Diyos sisya ya din iturayana. Din aari ay nanturturay sin maibandas amyanan ay sakop di ili ay ed Israel et pag lawa di ogali da. Mo pay din aari ed Juda sin abagatan, waday siged, wada abey lawa.

Ad-adoy madad-at isna maipanggep si mamadton Diyos ay natoled ay mamagbaga sin aari ya kaipoipogaw ta adi dan omaddawi en Diyos ya manlabsing si bilbilina. Mayamayat din istoryan di inyat Elias ay nangontra sin papadin Baal (kapitolo 18).

### **Din Linaona**

Din nakdengan di nanturayan David 1:1-2:12

Din nanturayan Solomon 2:13-11:43

Din naisianan di tribun di Israelita ay naibandas amyanan 12:1-14:20

Din aari ed Juda ya Israel enggana sin timpon da Asa en Ahab 14:21-16:34

Si Elias ay mamadto 17:1-19:21

Si Ahab ay ari ed Israel 20:1-22:40

Si Jehosafat ay ari ed Juda ya si Ahazias ay ari ed Israel 22:41-53

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51

## 2

### *Din Maodi Ay Bilbilin David En Solomon*

*(2:1-4,10-12)*

<sup>1</sup> Idi dandani ay matey si David, kanana ay nangibilin en Solomon ay anak na, <sup>2</sup> “Dandani di kateyak, isonga papigsaem di nemnem mo ya tomoled ka. <sup>3</sup> Tongpalem din ipaamag Diyos en sik-a ya din amin ay linteg ya bilin ay naisolat sin linteg Moses ta say mayat di pantongpalan di am-in ay amagem olay intoy em-emeyam. <sup>4</sup> Mo say iyat mo di, tongpalen Diyos din inkari na en sak-en. Tan kanana en mo ipakat din polik din kabaelan da ay mangonod en sisya ya esten da ay manongpal sin bilbilina, kanayon ay wada en daida di manturay ed Israel si eng-enggana.” <sup>5 6 7 8 9</sup>

<sup>10</sup> Idi siya di, natey si David et naiponpon sin sakop di Jerusalem ay nangadanan si Siyodad en David. <sup>11</sup> Nanturay ed Israel si opatapolo ay tawen, pito ay tawen sin kawada na ed Hebron yan tolonpo ya tolo ay tawen sin inmeyana ed Jerusalem.

<sup>12</sup> Et say naisokat ay nan-ari si Solomon ay anak na yan pinmigma din kinaturay na. 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46

## 3

1 2

### *Din Nankedawan Solomon Si Laing Ay Mapon Diyos*

*(3:3-15)*

<sup>3</sup> Inpailan Solomon din layad na en Diyos et tinongpal na din bilbilin David ay ama na, ngem asi et nan-idaton si animal ya nan-ipoo si insinso sin pandaydayawan ay wada sin dodontog. <sup>4</sup> Sin namingsan, inmey si Solomon ay nan-idaton ed Gibeon, tan say kadan din inbilang da ay kabanolan ay pandaydayawan. Sinlibo ay animal di indatonas

di. <sup>5</sup> Sin isdi ay lugar, nanpailas Diyos en Solomon sin labi babaen si iitaw yan kanana, “Mankedaw kas kompormi ay laydem ay kedawen en sak-en.”

<sup>6-7</sup> Kanan Solomon ay nanongbat, “Yahweh ay Diyos ko, inpappailam din dakdake ya adi manbalbaliw ay layad ya seg-ang mo en David ay amak ay baam, tan inpapasnek na ay mansilbi en sik-a. Nalinteg abe ya siged sin pangiilaam. Intoltoloy mo ay nangipaila si dakdake ay seg-ang mo en sisya tan indawtam si anak ay maisokat en sisya ay manturay ed wani ay agew. Et nay nanbalinem sak-en ay ari ta say maisokatak en amak ay David, ngem an-anakak pay laeng et adiak ammo di iyat ko ay manturay. <sup>8</sup> Naeyak sin kad-an di pinilim ay ipogaw mo yan palalo ay ad-ado da ay adi kabilang. <sup>9</sup> Isonga idawtam kod sak-en si laing ta say kosto di iyat ko ay mangituray sin ipogaw mo ya ammok ay mangilasin si siged ya lawa, tan naligat ay iturayan nan ipogaw ay palalo ay ad-ado.” <sup>10</sup> Nalaydan si Diyos sin kindaw Solomon ay doy, <sup>11</sup> isonga kanana en sisya, “Gapo ta say kindaw mo na ay baken ando ay biyag ono kinabaknang para en sik-a ya baken din kateyan di kalaban mo, mo adi et din laing ay mangilasin si siged, <sup>12</sup> patgak sa ay kindaw mo. Idawtak sik-a si laing ya kabaelan ay mangilasin si kosto et maga polos di makaiso en sik-a ed idi engganad wani ya olay sin tapin di agew. <sup>13</sup> Olay abe din adim kindaw et idawat ko. Idawtak sik-a si kinabaknang ya dayaw sin intiro ay biyag mo ay magay makaiso sin odom ay ari. <sup>14</sup> Mo tongpalem din bilbilin ya linteg ko ay kaman din inyat amam ay David, paandoek abe din biyag mo.”

<sup>15</sup> Pag bomangon si Solomon et say nangammoana ay iitaw baw di. Inmey ed Jerusalem et en pinmika sin sangoanan di Baol di Tolagan Diyos. Isdi, nan-idaton si mapooan ya daton ay pan-ookoban da ya makikadkadwaan da en Diyos. Pag manpalti si ad-ado para sin am-in ay opisyal na.

### *Din Nangikeddeng Solomon Si Esa Ay Kasos (3:16-28)*

<sup>16</sup> Baken nabayag, wada et di doway ay mangilaklakos kinababai da ay inmey sin ari. <sup>17</sup> Kanan din esa, Apo ari, es-esa ay beey di pantetean mi sin babai ay nay. Yan idi wadas sisya sin beey ay kad-ak, nan-anakak si lalaki. <sup>18</sup> Sin katlo na, nan-anak abes sisya si lalaki. Magay odom ay ipogaw sin beey ay doy mo adi et dakami anggoy ay doway. <sup>19</sup> Sin esay labi, natey din anak na tan tinap-ilana. <sup>20</sup> Idi naseseyepak, binmangon sin gawan di labi et nansokatena din doway ay moyang. Say inpadaag nan sak-en din anak na yan say dinaag na din anak ko. <sup>21</sup> Idi binmangonak sin kabigatana yan pansosoek koma din anak ko, inilak et ay nanatey. Ngem idi estek ay imatonan, nailak ay baken met din anak ko.

<sup>22</sup> Nankali abe din esay babai yan kanana, “Aga! Say natey din anak mo et anak ko din matmatago.” Et nansongbat da sin sangoanan di ari.

<sup>23</sup> Pag kanan din ari, “Kanan din esa en anak na din matmatago yan anak din esa din natey, ngem siya met laeng abe din ibagbagan di esa.” <sup>24</sup> Idi siya di kanana, “Man-iali kayo si kampilan.” Idi indateng da, <sup>25</sup> kanana ay nangibilin, “Godwaen yo din matmatago ay anak ta panbingayan da.” <sup>26</sup> Ngem gapo sin palalo ay layad ya seg-ang din tet-ewa ay akin anak, kanana sin ari, “Apo, pangaasim ta adi yo peslen. Olay idawat yo en sisya.”

Din esa pay yan kanana, “May et, godwaen yo. Olay magay mangoka en dakami.”

<sup>27</sup> Pag kanan din ari, “Adi yo peslen din moyang mo adi et idawat yo sin namangpango ay babai. Sisya di tet-ewa ay akin anak.” <sup>28</sup> Idi dinngen din amin ay Israelita din inkeddeng di ari, palalo ay pinatpateg ya dinaydayaw das sisya, tan naila da ay waday laing na ay napon Diyos ay mangikeddeng si kostokosto sin kaskasos.

*Din Inturturayan Solomon Ya Din Laing Na*  
(4:20-21,34)

<sup>20</sup> Kaman din kaad-adon di darat sin igid di baybay din kaad-adon di ipogaw ed Juda ya Israel. Napnek da ay nangnangan ya nan-in-inom et naragsak da. <sup>21</sup> Inturayan Solomon din amin ay nasyon manipod sin ginawang ay Eufrates engganad Filistia ya sin beddeng di Egipto. Nanbowis ya nansilbi dan Solomon sin intiro ay timpon di biyag na. <sup>22 23 24 25 26 27 28 29 30 31 32 33 34</sup> Nadamag di kaariari sin intiro ay lobong din kinalaing Solomon et nan-ibaa das ipogaw ay en nandenge en sisya.

## 5

*Din Tolagan Da Solomon En Hiram*  
(5:1-6,10,18)

<sup>1</sup> Idi dinngen Hiram ay ari ed Tiro ay nadotokan si Solomon ay maisokat en Ari David ay ama na, nan-ibaa si panakaawak na ay emey en Solomon. Si Hiram ay nay yan nabayag ay gayyem en David. <sup>2</sup> Idi nantaoli da din inbaan Hiram, siya na di inpaibagan Solomon, <sup>3</sup> “Ammom ay adi nasangon amak ay David ay mangisaad si timplo ay pandayawan di ipogaw en Yahweh ay Diyos na gapo ta kanayon ay ginobgobat di odom ay nasyon enggana ay nangabaken Diyos sisya sin amin ay kalabana. <sup>4</sup> Ngem ed wani, indawtan Yahweh sak-en si talna sin amin ay soli tan maga di kalaban ono lawa ay pasamak. <sup>5</sup> Isonga panggep ko ay mangisaad si timplo ay pandaydayawan di ipogaw en sisya ay kaman din inbaga na en amak ay David. Kanana, ‘Din anak mo ay isaad ko ay maisokat en sik-a ay manturay di mangamag si timplo ay pandaydayawan dan sak-en.’ <sup>6</sup> Isonga man-ibaa kas ipogaw mo ay en man-getad si sidro ed Lebanon para en sak-en. Mantinolong din ipogaw ta, ta asiak idawat en sik-a din lagbon di ipogaw mo, olay pigay ibagam, tan ammom ay maga en dakami di makaiso sin laing di taga-Sidon ay man-getad si kaiw.” <sup>7 8 9 10</sup> Et siya di, inpaiey Hiram amin din kasapolan Solomon ay nabanglo ay kaiw ay makwani en sidro ya bebe. <sup>11 12 13 14 15 16 17 18</sup> Et pag isaganaan di karpintiron da Solomon en Hiram pati din taga-Gebal\* din tabla ya bato ay kasapolan sin maamag ay timplo.

## 6

*Din Naamagan Di Timplo*  
(6:1,11-14,38b)

<sup>1</sup> Inlogin Solomon ay nangisaad sin Timplo sin maika-480 ay tawen manipod sin kinmaanan di Israelita ed Egipto, sin maikap-at ay tawen ay panturayana ed Israel. Inlogi na sin maikadwa ay bowan ay kanan da en Ziv. <sup>2 3 4 5 6 7 8 9 10</sup>

<sup>11</sup> Kanan Diyos en Solomon, <sup>12</sup> “Mo maipanggep sin Timplo ay nay ay am-amagem, ipatongpal ko babaen en sik-a din inkarik en amam ay David mo ipapasnek mo ay tongpalen amin ay linteg ya bilin ko. <sup>13</sup> Et makiteeak sin ipogaw ko ay Israelita ya adiak baybay-an daida.” <sup>14</sup> Et siya di, inamag Solomon din Timplo enggana ay nakdeng. <sup>15 16 17 18 19 20 21 22 23 24 25 26 27 28 29 30 31 32 33 34 35 36 37 38b</sup> Pito ay tawen di nangamagan Solomon sin Timplo ay sana.

## 7

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51

\* **5:18** Ed Gebal (Biblos sin pangikalian di Griego) yan tapin di iturayan Hiram. Din man-ili ed Gebal yan nalaing da ay karpintiro.



## 8

*Din Naipasgepan Di Baol Di Tolagan Sin Timplo*  
(8:1-6,9-13)

<sup>1</sup> Idi siya di, inpaayag Ari Solomon am-in ay papangolon di tribu ya familyan di Israelita ta matopog da ed Jerusalem ta en da alaen din Baol di Tolagan Diyos ed Zion ay makwani en Siyodad David ta itikid da sin Timplo. <sup>2</sup> Nasinop da am-in sin kad-an di ari sin timpon di fiesta ay makwani en Pansidoman sin maikapito ay bowan ay makwani en Etanim. <sup>3</sup> Idi dinmateng da am-in, tinilid din papadi din Baol di Tolagan, <sup>4</sup> et in-ey da sin Timplo. In-ey aben din papadi ya odom ay Levita din Tolda ay Panpappailaan Diyos ya din am-in ay maosal sidi. <sup>5</sup> Pag masinop da Solomon ya din am-in ay Israelita sin sangoanan di Baol et nan-idaton das adi kabilang ay baka ya karnero.

<sup>6</sup> Makedeng pay di, inpasgep din papadi din Baol di Tolagan Diyos sin Timplo et inpeey da sin Kasasantoan ay Kowarto sin pinapayongan di payak di kerubim, tan say lebbeng na ay kad-ana. <sup>7</sup><sup>8</sup><sup>9</sup> Magay odom si naigto sin Baol mo adi et din doway ay nadampilak ay bato ay inigton Moses sin kawada na sin dontog ay Sinai. Isdi di nangipaammoan Diyos sin intolag na sin Israelita sin nakdeng ay kinmaan da ed Egipto.

<sup>10</sup> Idi kinmaan din papadi sin Timplo, napno si liboo <sup>11</sup> ay mankoniniing begew sin kawadan Diyos, isonga adi da kasin makasgep ay mangitoloy sin am-amagen da. <sup>12</sup> Pag kanan Solomon ay nankararag, “Sik-a ay Diyos et kinwanim en naposkol ya mabolinget ay liboo di panbeeyam. <sup>13</sup> Nay di inpasaad ko ay maptemapteng ay timplo ay panbeeyam si eng-enggana.”

*Din Kararag Solomon Ay Nan-idaton Sin Timplo*  
(8:14-30,41-61)

<sup>14</sup> Idi wadas di din intiro ay gimong di Israelita ay pinmipika, sinagong din ari si daida, et pag nan bindisyonan daida. <sup>15</sup> Kanana, “Madaydayaw si Yahweh ay Diyos di Israelita. Babaen sin panakabalina, tinongpal na din inkari na en amak ay David. <sup>16</sup> Tan kanana, ‘Manipod sin agew ay nangipangoak sin Israelita ay ipogaw ko ay komaan ed Egipto, magay pinilik ay siyodad sin intiro ay Israel ay kaisaadan di Timplok ay pandaydayawan da en sak-en. Ngem pinilik si David ay mangituray sin Israelita ay ipogaw ko.’ <sup>17</sup> Layden amak ay David ay man-amag si timplo ay panbeeyan Yahweh ay Diyos di Israelita, <sup>18</sup> ngem kanan Diyos en sisya, ‘Kosto di ninemnem mo tan laydem kayman ay man-amag si timplo ay pandayawan da en sak-en. <sup>19</sup> Ngem baken sik-a di mangamag sin Timplo mo adi et din anak mo ay ipolim to. Sisya di mangisaad sin Timplo ay panbeeyak.’ <sup>20</sup> Tinongpal Diyos din kari na tan nay sak-en di naisokat en David ay amak ay manturay isnan Israel ay kaman met laeng din inkari na. Natongpal abe ay inamag ko din Timplo ay panbeeyan ya maidaydayawan Yahweh ay Diyos di Israelita. <sup>21</sup> Waday inpaisaganak isdi ay kaipay-an din Baol ay naidolinan di intolag Diyos sin ap-apo tako sin nangipangoana en daida ay komaan ed Egipto.”

<sup>22</sup> Pag pomika si Solomon sin sagang di altar sin sangoanan di intiro ay gimong di Israelita yan nandepa ay nangisagang sin takkay na ed langit. <sup>23</sup> Kanana, “Sik-a ay Yahweh ay Diyos di Israelita, magay odom ay Diyos si makaiso en sik-a ed daya ya isnan daga. Dadlon kan tongpalen din intolag mo ya ipailam din adi manbalbaliw ay layad ya seg-ang mo sin ipogaw mo ay mangitoltoy ay mangimongsan si amin ay nemnem da ay mansilbi en sik-a. <sup>24</sup> Tinongpal mo din inkarim en amak ay David ay baam. Ed wani ay agew, sik-a ay mismo di nanongpal babaen sin panakabalin mo.

<sup>25</sup> “Yahweh, sik-a ay Diyos ay daydayawen di Israelita, sapay koma ngarud ta tongpalem abe din esa ay inkarim en amak ay mantoltoy ay wadan to di dotokam sin poli na ay manturay isnan Israel, dalo et mo esten da ay manongpal en sik-a ay kaman din

inyat na. <sup>26</sup> Isonga ed wani, kedawek en sik-a ay Diyos di Israelita ta tongpalem kod na ay inkarim en amak ay David ay baam.

<sup>27</sup> “Ngem ay tet-ewa aya ay mantee ka isnan daga? Mo din kangatoan ay langit yan adi dakan malaon, adi pay masepsep et nan inamag ko ay Timplo. <sup>28</sup> Ngem olay mo siya di, dengngem kod ay Diyos ko nan kararag ko ay baam ay mankedaw si seg-ang mo. Dengngem kod nan kararag ya adawag ko isnan sangoanam ed wani ay agew. <sup>29-30</sup> Bantayam kod nan Timplo si inag-agew ya nilablabi tan sinay di lugar ay pinilim ay panbeeyam ya pandayawan da en sik-a, isonga dengngem koma di kararag ko ya din ipogaw mo ay Israelita mo mankararag kami ay manasagang isnan Timplo. Issan ed langit ay kad-am dengngem koma din kararag mi ya pakawanem dakami.   
31 32 33 34 35 36 37 38 39 40

<sup>41</sup> “Olay din mangili ed addawi ay baken Israelita ay ipogaw mo, et omali da begew sin kinangaton di ngadan mo. <sup>42</sup> Tan mandinamag to sin kailili din panakabalin mo ay mangamag si olay sino ay laydem. Mo omali da ay mankararag ay manasagang isnan Timplo, <sup>43</sup> dengngem koma issan ed langit ay kad-am din kararag da ta patgam amin ay kedawen da ta say maammoan di amin ay ipogaw isnan daga si sik-a et egyatan ya patgen das sik-a ay kaman din iyat di Israelita ay ipogaw mo. Et maammoan da abe ay din Timplo ay nay ay inamag ko yan say panbeeyam ya pandaydayawan di ipogaw en sik-a.

<sup>44</sup> “Mo en makigobat din ipogaw mo, olay intoy pangibaaam en daida ya mankararag da ay nakasango isnan siyodad ay pinilim ya sin Timplo ay inamag ko ay panbeeyam, <sup>45</sup> dengngem koma ed langit din kedawen da ta pangabakem daida. <sup>46</sup> Mo manbasol da en sik-a tan magay ipogaw ay adi manbasol, et bomonget kan daida ya bay-am ay abaken din kalaban da ya itakin da sin ili da ay addawi ono asag-en; <sup>47</sup> ngem no sin lugar ay naibalodan da ya manbabawi da et ipodno da din basol da, dengngem koma din kararag da. <sup>48</sup> Dengngem koma din kararag da mo tet-ewa ay manbabawi da ya sagongen das sik-a sin ili ay naibalodan da ya sagangen da din daga ay indawat mo sin ap-apo da, ya din pinilim ay siyodad ya Timplo ay inamag ko ay panbeeyam. <sup>49</sup> Dengngem koma din kararag da issan ed langit ay kad-am ta maseg-ang kan daida. <sup>50</sup> Pakawanem koma din ipogaw mo sin amin ay nanbasolan dan sik-a ta iturong mo ay seg-angan din nangibalod en daida. <sup>51</sup> Tan daida din mismo ay ipogaw mo ay inpangom ay komaan ed Egipto ay nanlak-aman das palalo ay ligat ay maiarig si manbidbidang ay apoy. <sup>52</sup> Sapay koma ta maseg-ang ka ya kanayon ay dengngem din adawag ya kararag ko ay baam ya din ipogaw mo ay Israelita. <sup>53</sup> Tan mismo ay sik-a ay Kangatoan ay Diyos yan pinilim daida sin amin ay nasyon isnan daga ta daida di manbalin ay ipogaw mo ay kaman din inbagam en Moses ay baam sin nangipangoam sin ap-apo mi ay komaan ed Egipto.”

<sup>54</sup> Idi nakdeng ay nankararag si Solomon, pinmika sin sangoanan di altar ay nandokmogana ay nangikayang sin takkay na. <sup>55</sup> Pinmika et inbogaw na ay namindisyon sin intiro ay gimong di Israelita. Kanana, <sup>56</sup> “Madaydayaw si Diyos ay nangidawat si pan-illengan din Israelita ay ipogaw na ay kaman din inkari na. Magay olay esa ay adi natongpal sin inkari na en Moses ay baa na. <sup>57</sup> Sapay koma ta si Yahweh ay Diyos tako yan kanayon ay komadkadwa ay kaman din inyat na sin aam-a tako. Sapay koma ta adi na taytaynan ya baybay-an si datako. <sup>58</sup> Sapay koma ta iturong nas datako ay mangonod sin amin ay laydena ya mantongpal sin linteg ya bilbilina ay inpaammo na sin ap-apo tako. <sup>59</sup> Sapay koma ta kanayon ay nemnemen Diyos dana ay inkararag ko en sisya ta kanayon ay seg-angana din ipogaw na ay Israelita ya din ari da sin kasapolan das inag-agew. <sup>60</sup> Et mo siya di, maammoan di ipogaw sin amin ay ili isnan lobong ay si Yahweh anggoy di Diyos ay magay odom. <sup>61</sup> Masapol koma ngarud ay imongsan yo din nemnem

yo en Yahweh ay Diyos tako ta kanayon ay tongtongpalen yo din linteg ya bilbilina ay kaman ed wani.” 62 63 64 65 66

## 9

### *Din Kasin Nanpailaan Diyos En Solomon*

(9:1-9)

<sup>1</sup> Idi kindeng Solomon din Timplo ay panbeeyan Diyos ya din palasyo, ya din amin ay laydena ay amagen, <sup>2</sup> nanpaila kasin si Diyos en sisya ay kaman din inyat na ed Gibeon. <sup>3</sup> Kanan Diyos en sisya, “Dinngek din kararag mo en sak-en et nanbalinek ay nasantoan din Timplo ay inamag mo babaen sin manteeak isdi si eng-enggana. Kanayon ay ayowanak ya salaknibak din Timplo ay doy. <sup>4</sup> Mo sik-a pay, mo kaman kan si amam ay David ta nalinteg ya kosto di amagem sin pangiilaak, ya patiem amin ay linteg ya ibilin ko, <sup>5</sup> tongpalek to din inkarik en amam ay David ay mantoltoloy di panturayan di poli na isnan Israel si eng-enggana. <sup>6</sup> Ngem mo sik-a ya din an-ak mo yan adi yon tongpalen din linteg ya bilbilin ko en dakayo ya mansilbi ya mandayaw kayo si sinan didiyos, <sup>7</sup> taynak to nan Timplo ay intoding ko ay panbeeyak. Pakaanek abe din Israelita sin lugar ay indawat ko en daida et palalo ay laslasoyen di odom ay nasyon si daida. <sup>8</sup> Dadlon mabakas din Timplo ay nay et masdaaw to di malabas. Kanan da, ‘Apay ngata ay say inamag Diyos na isnan ili ya Timplo ay nay?’ <sup>9</sup> Et kanan di odom ay manongbat, ‘Tan dinokogan das Yahweh ay Diyos da ay nangipango sin ap-apo da ay kinmaan ed Egipto. Sinagong da di odom ay diyos ta say pansilbian ya daydayawen da, et say gapo ay inpalak-am Diyos amin dana ay ligat en daida.’ ” 10 11 12 13 14 15 16 17 18 19 20 21 22 23 24 25 26 27 28

## 10

### *Din Nanbisitaan Di Reyna En Solomon*

(10:1-13)

<sup>1</sup> Idi dinngen din reyna ed Seba din mandinamag ay laing Solomon ay napo en Diyos, ena pinadas si Solomon si nankaliligat ay salodsod. <sup>2</sup> Ad-ado di inkoyog na ay baa. Kinoyog na abe di ad-ado ay kamel ay nailoganan di ad-ado ay bangbanglo, balitok ya nankangingina ay bato. Idi dinmateng da sin siyodad, inmey sin kad-an Solomon et sinalodsod na amin ay manemnem na. <sup>3</sup> Sinongbatan Solomon am-in et adi polos naligatan ay nangilawlawag en sisya. <sup>4</sup> Idi dinngen din reyna din kinalaing Solomon ya inila na din inamag na ay palasyo, <sup>5</sup> din makan ay maisagana sin lamisaana, din panakaolnos di oopisyal na, din mansilbi ya din nabanol ay osal da, din manitagtagay si arak ya din aanimal ay inpaidatdaton Solomon ay mapooan sin Timplon Diyos, palalo ay nasdaaw sisya. <sup>6</sup> Kanana, “Tet-ewa baw din dinngek sin ilik maipanggep sin inam-amag mo ya laing mo. <sup>7</sup> Ngem adiak pinati dana enggana ay inmaliak et inilak ay mismo. Di katet-ewa na baw et kolang pay si kagodwa din naipadamag en sak-en, tan din laing ya kinabaknang mo et addawi ay nasurok mo din naipadamag. <sup>8</sup> Nagasat da din aasawam\* ya din oopisyal mo ay kanayon ay wada sin sangoanam ay mandengdenge sin kinalaing mo. <sup>9</sup> Madaydayaw koma si Yahweh ay Diyos mo ay nangipaila si layad na en sik-a ya nangisaad en sik-a ay ari isnan Israel. Gapo sin adi manbalbaliw ay layad Diyos sin Israelita, insaad nas sik-a ay ari ta mantoltoloy di siked ya kinalinteg.”

<sup>10</sup> Idi nakdeng di, indawtan din reyna si Solomon si nasurok ay opat ay libo ay kilo† ay balitok, ad-ado ay bangbanglo ya nankangingina ay bato. Si doy di kaad-adoan ay bangbanglo ay inawat Solomon.

\* **10:8** Aasawam di kanana sin manuskrito ay Griego. Din kanana abe sin Hebreo et: ipogaw mo. † **10:10** Din kanana sin Hebreo et: 120 ay talento.

<sup>11</sup> Malaksig isdi, nan-idateng abe din bapor Hiram ay nankarkarga si balitok ay napo ed Ofir, ad-ado ay mankakakneg ay kaiw ay makwani en almug ya nankababanol ay bato. <sup>12</sup> Inosal din ari din kaiw ay nay ay para posti sin Timplon Diyos ya sin palasyo. Naamag abe si gitara ya arpa ay osalen din mantoktokar. Da nay ay almug di kamayatan ay kaiw ay naidateng ed Israel. Magay odom ay naila si kaman dadi enggana ed wani.

<sup>13</sup> Indawat Ari Solomon am-in ay kindaw din reyna ed Seba malaksig sin odom ay sagot ay indawat na. Makdeng pay di, sinmaa din reyna ay nangikoyog sin baa na. 14 15 16 17 18 19 20 21 22 23 24 25 26 27 28 29

## 11

### *Din Ad-ado Ay Asawan Solomon* (11:1-13)

<sup>1</sup> Ad-ado di laydelayden Solomon ay mangili ay babbabai. Baken anggoy din anak di ari ed Egipto, mo adi et nangasawa pay si babai ay Heteo ya Ammonita ya Moabita, ya taga-Edom ya Sidon. <sup>2</sup> Inasawa nas daida olay mo inbilin Diyos sin Israelita ay adi da makiasawa si mangili tan daida di mangawis en daida ay mandayaw sin diyos da.\* Ngem palalo pay dedan di layad Solomon en daida. <sup>3</sup> Pito ay gasot di asawa na ay anak di ari ya wada abey tolo ay gasot ay nababa di kasasaad da. Daida di gapo ay dinokoganas Diyos, <sup>4</sup> tan idi nakay sisya, inawis da ay mandayaw si odom ay diyos et naksayan din layad na en Diyos ay baken kaman si David ay ama na. <sup>5</sup> Nandayaw en Astarte ay daydayawen di taga-Sidon ya si Molek ay say kadodogis ay diyos di Ammonita. <sup>6</sup> Nanbasol si Solomon tan adi nan inmongsan di pammati na en Diyos. Baken kaman din inyat David ay ama na. <sup>7</sup> Nan-amag si pandaydayawan en Kemos ay kadodogis ay diyos di Moabita ya si Molek ay kadodogis ay diyos di Ammonita sin dontog ay naibandas belaan di agew ed Jerusalem. <sup>8</sup> Say inyat na met laeng sin odom ay mangili ay asawa na ta say waday pan-ipoon das insinso ya pan-idatonan da sin sinan didiyos da. <sup>9-10</sup> Olay mo namin doway ay nanpaila† en Solomon si Yahweh ay Diyos di Israelita ya inbilina ay adi mandayaw si odom ay diyos, adi pinatin Solomon sisya mo adi et dinokogana. Isonga binmonget si Diyos <sup>11</sup> yan kanana, “Gapo ta siya na di inamag mo ya adi kan tinongpal din intolag ya inbilin ko, soktobak din turay mo et idawat ko si esa ay opisyal mo. <sup>12</sup> Ngem gapo en David ay amam, adiak amagen sin kamatagom mo adi et sin timpon di anak mo. <sup>13</sup> Olay mo siya di, adiak golpien ay kaanen en sisya din intiro ay ili. Idawtak si esay tribu ay iturayana begew en David ay baak ya begew abe ed Jerusalem ay pinilik ay panbeeyak.” 14 15 16 17 18 19 20 21 22 23 24 25

### *Din Inkarin Diyos En Jeroboam* (11:26,29-36,40)

Idi siya di, wada da di nanbalinen Diyos ay kaibaw en Solomon ay si Hadad ay polin di aari ed Edom ya si Rezon ay nanturay ed Syria. (11:14-25)

<sup>26</sup> Wada abey esa ay opisyal Solomon ay nangontra en sisya, si Jeroboam ay anak Nebat ay taga-Zereda ed Efraim. Si Zerua ay esa ay balo di ina na. <sup>27 28 29</sup> Sin namingsan ay enggay nadipos si Jeroboam ed Jerusalem, wadas Ahias ay pankalkalian Diyos ay taga-Shilo ay nangabat en sisya sin kalsada. Ang-anggoy da ay doway. <sup>30</sup> Idi nan-abat da, kakaan din mamadto ay sana sin baro ay tak-ep di bado na asi na binisngit ay nansinpo ya doway. <sup>31</sup> Kanana en Jeroboam, “Alaem nan sinpo ay bisngit di badok tan kanan Yahweh ay Diyos di Israelita en sik-a, ‘Alaek din iturayan Solomon et idawat kon sik-a di sinpo ay tribu. <sup>32</sup> Mabay-an en Solomon di esa ay tribu begew en David ay baak ya begew ed Jerusalem ay siyodad ay pinilik sin intiro ay Israel. <sup>33</sup> Amagek na gapo

\* **11:2** Din inbilin Diyos et madtengan sin Deuteronomio 7:3-4. † **11:9-10** Din doway ay nanpailaan Diyos en Solomon et madtengan sin 1 Aari 3:5-14 ya 9:2-9.

ta dinokoganas sak-en et nandayaw en Astarte ay diyos di taga-Sidon ya si Kemos ay diyos di Moabita. Dinayaw na abe si Molek ay diyos di Ammonita et adi na inamag din kosto sin pangiilaak. Adi nantongpal sin linteg ya bilbilin ko ay baken kaman din inyat David ay ama na. <sup>34</sup> Ngem adiak kaanen amin en Solomon din iturayana, tan insaad kos sisya ay man-ari engganang tongpal biyag na begew en David ay baak ay pinilik ya nantongpal sin bilbilin ko. <sup>35</sup> Alaek din iturayan di anak Solomon et idawat kon sik-a din sinpo ay tribu. <sup>36</sup> Idawat kon esa sin anak na ay sana ta mo si David ay baak et mantoltoloy ay waday poli na ay manturay ed Jerusalem ay pinilik ay siyodad ay panbeeyak ya pandayawan di ipogaw en sak-en.’ ” <sup>37 38 39</sup>

<sup>40</sup> Pinanggep Solomon ay peslen si Jeroboam ngem tinmagtag ed Egipto. Nankamang en Sisak ay ari et nantees di enggana ay natey si Solomon.

### *Din Nateyan Solomon*

*(11:41-43)*

<sup>41</sup> Din inam-amag ya laing Solomon yan naisolat sin libro ay napaoloan si Kaistoryaan di Biyag Solomon. <sup>42</sup> Opatapolo ay tawen ay nantee ed Jerusalem sin nangiturayana sin amin ay tribun di Israelita. <sup>43</sup> Naiponpon sin naaladan ay partin di siyodad ay kanan da en Siyodad en David sin nateyana, et din anak na ay si Rehoboam di naisokat en sisya.

## 12

### *Din Nanigaan Din Sinpo Ay Tribun Di Israelita En Rehoboam*

*(12:1-20)*

<sup>1</sup> Idi siya di, inmey si Rehoboam ed Sekem, tan say nasinopan amin ay papangolon di Israelita ta isaad das sisya ay man-ari. <sup>2</sup> Wada pay laeng si Jeroboam ay anak Nebat ed Egipto ay kinamang na sin nangilayawana en Solomon. Idi dinnge na di, nantaoli ed Israel. <sup>3</sup> Inpaayag din Israelita si Jeroboam et nankokoyog da am-in ay inmey en Rehoboam yan kanan da, <sup>4</sup> “Palalo ay pinmalpaligat si amam. Madagsen abe di inpaob- obla na en dakami, ngem no palag-anem din obla mi ed wani, mansilbi kami en sik-a ay kosto.”

<sup>5</sup> Kanan Rehoboam ay nanongbat, “Soma kayo ta asi kayon mantaoli mo malabas di tolo ay agew.” Et sinmaa da. <sup>6</sup> Nakikali si Rehoboam sin papangolo ay nansilbi en Solomon idi matmatago pay laeng. Kanana ay nanpoot, “Sino di maibaga yo ay isongbat ko sin ipogaw?”

<sup>7</sup> “Mo ed wani ay agew yan manpakombaba ka en da nay ay ipogaw ya patgam din kedkedawen da, mansilbi da en sik-a si eng-enggana.”

<sup>8</sup> Ngem sinigaan Rehoboam din inbagan di nankakay ay papangolo et nakikali sin mansilbi en sisya ay katawenana. <sup>9</sup> “Sinoy maibaga yo ay isongbat ko sin kanan di ipogaw ay palag-anek din obla da?” kanana.

<sup>10</sup> Kanan din babbaro ay sana ay katawenana, “Siya na di isongbat mo: Dakdakdake di palpal-iking ko mo din gitang amak. <sup>11</sup> Mo madagsen di inpabaklay na en dakayo, madagdagsen pay di ipabaklay ko. Mo sinoplit nas dakayo, latiko di iablat ko en dakayo.”

<sup>12</sup> Malabas pay di tolo ay agew, inmey da Jeroboam sin kad-an Rehoboam ay ari tan say inbaga na en daida. <sup>13</sup> Bogtak di inyat Rehoboam ay nanongbat sin ipogaw. Sini-gaana din inbagan di nankakay et say inonodana din inbagan di babbaro. <sup>14</sup> Kanana, “Mo madagsen di inpabaklay amak en dakayo, mas madagdagsen pay di ipabaklay ko. Mo sinoplit nas dakayo, latiko di iablat ko en dakayo.” <sup>15</sup> Adi inkaskason din ari din kedkedawen di ipogaw, tan si Diyos di nangiturong ta matongpal din inbaga na en Jeroboam ay anak Nebat ay inpaipadtona en Ahias ay taga-Shilo.

<sup>16</sup> Idi ilaen din amin ay Israelita ay adi patgan din ari din inbaga da, kanan da ay nanongbat sin ari, “Maipababa koma si David ya din pamilya na. Ay sino od di



pansigdan ay indawat na en dakami? Somaa kami ay Israelita! Bay-an daka ay polin David ay makaammo sin mismo ay pamilyam.” Et sinmaa din Israelita. <sup>17</sup> Magay nabayan si iturayan Rehoboam mo adi anggoy din Israelita ay man-ili ed Juda. <sup>18</sup> Inbaan Ari Rehoboam si Adoniram ay kapatás di obla ay inkapilitan ta makingalat sin Israelita, ngem pinigpig da enggana ay natey. Gapo isdi, kalogan si Rehoboam sin kalisa na et linmayaw ay emey ed Jerusalem. <sup>19</sup> Manipod sisi, kanayon ay kontraen din Israelita ay man-ili sin amyanan din panturayan di polin David. <sup>20</sup> Idi ammoen din Israelita ay sana ay nantaoli si Jeroboam, inpaayag da sin nasinopan da et say insaad da ay ari da am-in ay tribun Israel.\* Din tribun Juda anggoy di kinmakaman ay namigbig sin turay di polin David. <sup>21 22 23 24</sup>

*Din Nanokogan Jeroboam en Diyos*  
(12:25-33)

<sup>25</sup> Inpaalad Jeroboam si batog din ili ay Sekem ed Efraim ay kadondontogan et nantees di. Asi nan tinaynan et ena aben inaladan ed Penuel. <sup>26-27</sup> Ngem kanan Jeroboam si nemnem na, “Mo kanayon ay em-emey din ipogaw ko ed Jerusalem ay en mandaton sin Timplo, sigurado ay manbaliw to di nemnem da et kasin dan manpaituray en Rehoboam ay ari ed Juda. Mo say maamag di, domteng to di timpo ay pomse da.”

<sup>28</sup> Siya di, idi nakdeng ay nankedaw si pamagbaga, nan-amag si dowá ay sinan baka ay balitok. Pag nan kanan sin ipogaw, “Palalo ay maligatan kayo ay mantikid ed Jerusalem. Naey da din diyos yo ay nangipango en dakayo ay Israelita ay komaan ed Egipto.” <sup>29</sup> Inpeey na din esa ay sinan baka ed Betel† yan din esa ed Dan. <sup>30</sup> Et nanbasol din ipogaw, tan nandaydayaw da ed Betel ya ed Dan. <sup>31</sup> Nan-amag abe si Jeroboam si pandayawan sin toktok di dodontog, ya nandotok si papadi ay olay baken Levita. <sup>32-33</sup> Dowana et todingan ay fiesta din pitsa 15 di maikawao ay bowan ay kaman din masilibraran ed Juda.‡ Sin agew ay doy, nantikid sin inamag na ay altar ed Betel, ya sisya ay mismo et nan-ipoo si daton isdi para sin dowá ay sinan baka ay inamag na. Insaad na abe ed Betel din papadi ay nansililbi sin inamag na ay pandayawan sin toktok di dontog.

## 13

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34

## 14

*Din Inpadton Ahias Maipanggep En Jeroboam*  
(14:1-14,17-20)

<sup>1</sup> Sin doy ay timpo, nansakit si Abias ay anak Jeroboam. <sup>2</sup> Idi siya di, kanan Jeroboam sin asawa na, “Emey ka ed Shilo sin kad-an di pankalkalian Diyos ay nangipadto ay man-ariak ed Israel, ngem masapol ay ilibak mo di kaipogaw mo ta adi da ammoan ay sik-a si asawak. <sup>3</sup> Man-itakin ka si sinpo ay tinapay, odom ay makan, ya anig ta emey ka sin kad-ana, et ibaga na di mapasamak sin anak.” <sup>4</sup> Tinongpal asawan Jeroboam din inbaga na et dinagdagos na ay inmey sin beey Ahias ed Shilo.

Sin doy ay timpo, nagodab si Ahias tan enggay nakay. <sup>5</sup> Ngem inbabagan Diyos en sisya ay wada ay emey din asawan Jeroboam ay mangilibak sin kaipogaw na ay mansalodsod maipanggep sin sakit di anak da. Inbagan aben Diyos di isongbat na. <sup>6</sup> Isonga idi dinngen Ahias din danegdeg di dapana sin segpan yan kanana, “Senggep

\* **12:20** Manipod sisi, nagodwa din nasyon ed Israel. Din sinpo ay tribu ay wada sin amyanan di ili et daida di makwani en tribun Israel. Din man-ili abe ed Juda ya Benjamin, et daida din kanan da en tribun Juda. † **12:29** Wada ed Betel sin beddeng di panturayana ay maibandas abagatan. Din kad-an aben di ed Dan yan sin amyanan. ‡ **12:32-33** Din fiesta ay nay di makwani en Ab-abong. Tinodingan Diyos ay masilibraran sin maikapito ay bowan (Levitico 23:34), ngem binaliwan Jeroboam din pitsa ay kasilibrarana.

ka. Ammok ay sik-a si asawan Jeroboam. Apay nga panggep mo ay sikapan sak-en ta say adiak ilasinan sik-a? Waday lawa ay ipadamag ko en sik-a. <sup>7</sup> En ka ibaga en Jeroboam ay siya na di inbagan Yahweh ay Diyos di Israelita, 'Pinilik sik-a sin kaipoipogaw et insaad kos sik-a ay mangituray sin Israelita ay ipogaw ko. <sup>8</sup> Sinoktobak din turay di polin David et indawat kon sik-a ngem baken kan kaman si David ay baik. Tan si David yan tinongpal na din bilbilin ko ya inpapasnek na ay nangonod sin laydek et say inamag na anggoy din kosto sin pangilak. <sup>9</sup> Madagdagsen di basbasol mo mo din amin ay namangpango mo sik-a. Dinaydayaw mo di natenaw ay balitok ay naamag si sinan didiyos. Dadlon ka aben dinokogan ya linaslasoy sak-en, isonga binmongetak en sik-a. <sup>10</sup> Gapo isdi, ipalak-am ko sin pamilyam di lawa ay mapasamak. Peslek amin ay lalaki sin polim, nakay ono anak. Kaman din iyat di manpoos logit di iyat ko sin polim enggana ay maabos da. <sup>11</sup> Kanen di aso din polim ay matey sin siyodad yan kanen di titit din matey sin away.' Siya na di inbagan Diyos."

<sup>12</sup> Intoloy Ahias ay nangibaga sin asawan Jeroboam, "Soma ka ed wani. Sin kosto ay oras ay domatngam sin ili yo, matey din anak yo. <sup>13</sup> Iladingitan di amin ay Israelita asi dan iponpon. Sisyang anggoy di mayat di iyat na ay maiponpon sin polin Jeroboam, tan anggoy na si napnekan Apo Diyos ay daydayawen di Israelita. <sup>14</sup> Wadan to di isaad Diyos ay man-ari isnan Israel et say mangabos sin pamilyan Jeroboam. Baken mabayag mo adi et mapasamak ay dagos." <sup>15 16</sup>

<sup>17</sup> Idi nakdeng ay nankali din mamadto, sinmaa din asawan Jeroboam ed Tirza. Idi kosto ay senggep sin pantew, natey din anak da. <sup>18</sup> Pag dan iponpon et nanladladingit am-in ay Israelita ay kaman met laeng din inpaibagan en Ahias ay pankalkaliana.

<sup>19</sup> Din odom ay naamag sin timpon Jeroboam ay kaman din nakigobatana ya din inyat na ay nanturay et naisolat da sin libro ay kaistoryaan di biyag di aari ed Israel. <sup>20</sup> Dowanpo ya esa ay tawen di nanturayan Jeroboam, pag matey et naiponpon. Naisokat ay nan-ari si Nadab ay anak na.

### *Din Nanturayan Ari Rehoboam Ed Juda (14:21-26,29-31)*

<sup>21</sup> Mo pay ed Juda, opatapolo ya esa di tawen Rehoboam ay anak Solomon sin naisaadana ay ari. Nanturay si sinpo ya pito ay tawen ed Jerusalem ay din siyodad ay pinilin Diyos sin amin ay tribun di Israelita ay say panbeeyana. Si Naama ay Ammonita di ina na. <sup>22</sup> Lawa di inam-amag din man-ili ed Juda sin pangilan Diyos. Gapo sin basol da, nasursurok di inyat da ay nangipabonget en sisya mo din ap-apo da. <sup>23</sup> Sin amin ay toktok di dontog ya poon di kaiw ay mayat si panlidoman, nan-am-amag da abe si pandayawan da si sinan didiyos. Nantootood da abes bato ay pandaydayawan da ya posti ay pangidaydayaw da en Asera ay didiyosen da. <sup>24</sup> Asi et naisepsep ay waday mantee sin pandaydayawan da ay mangilaklako sin kinalalaki ya kinababai da. Inamag da amin ay kadodogis sin pangilan Diyos ay kaman din am-amagen di sigod ay man-ili ay inpakaan Diyos ta maisokat da ay Israelita.

<sup>25</sup> Sin maikalima ay tawen ay nanturayan Rehoboam, ginobat Sisak ay arin di Egipto ed Jerusalem. <sup>26</sup> Ina na amin ay gameng sin Timplo ya sin palasyo pati da din kasay ay nam-es si balitok ay inpaamag Solomon. <sup>27 28</sup>

<sup>29-30</sup> Kanayon abe ay nan-gogobat da Rehoboam en da Jeroboam. Mo din odom ay napasamak sin nanturayan Rehoboam ya din am-in ay inamag na, naisolat da sin libro ay kaistoryaan di biyag di aari ed Juda. <sup>31</sup> Idi natey si Rehoboam, naitapi sin naiponponan di aap-o na sin Siyodad en David. Naisokat ay nan-ari si Abias ay anak na.

*Din Aari Ed Juda Enggana Sin Timpon Jehosafat*  
(15:2a,3,8,10-12,14,16,24)

<sup>2a</sup> Tolo ay tawen di nanturayan Abias ed Jerusalem. <sup>3</sup> Inamag na amin din basol ay inam-amag ama na. Baken kaman si apo na ay David ay naimongsan di nemnem na en Yahweh ay Diyos na. <sup>4 5 6 7 8</sup> Idi natey si Abias, naiponpon sin naidolinan di aap-o na sin Siyodad en David. Si Asa ay anak na di naisokat ay nan-ari, <sup>9 10</sup> et nanturay ed Jerusalem si opatapolo ya esa ay tawen. Si Maaca ay anak Absalom di apo na ay babai.

<sup>11</sup> Si Asa yan kaman si apo na ay David. Inamag na din kosto sin pangilan Diyos. <sup>12</sup> Inpakaana din lallalaki ya babbabai ay mangilaklakos awak da ay mantee sin pandaydayawan sin dodontog. Kinaana abe din sinan didiyos ay inam-amag di aap-o na. <sup>13 14</sup> Adi na kinaan din pandaydayawan ay wada sin dodontog, ngem naimomongsan di nemnem na ay mansilbi en Diyos sin intiro ay biyag na. <sup>15 16</sup> Sin timpon da Asa en Baasa ay ari ed Israel, kanayon ay nan-gogobat da. <sup>17 18 19 20 21 22 23 24</sup> Idi natey si Asa, naiponpon sin naipayagan di aap-o na sin Siyodad en David, et naisokat ay man-ari si Jehosafat ay anak na.

*Din Aari Ed Israel Enggana Sin Timpon Ahab*  
(15:25-30; 16:25-26,28-34)

<sup>25</sup> Mo ed Israel abe, naisaad ay ari si Nadab ay anak Jeroboam. Naamag na sin maikadwa ay tawen ay nanturayan Asa ed Juda, et inturayana ed Israel si doway ay tawen. <sup>26</sup> Iniso na din ogalin ama na, tan lawa di inam-amag na sin pangilan Diyos ya inpango na din Israelita ay manbasol.

<sup>27</sup> Asi et wadas Baasa ay anak Ahias ay polin Issakar ay nanplano ay mamse en Nadab. Et inapapati na ay namse sin nanlikoban Nadab ya din sosoldadon di Israelita ed Gebbeton ay ilin di Filisteo. <sup>28</sup> Pag maisokat, et sisya di nanturay ed Israel. Naamag na sin maikatlo ay tawen ay nanturayan Asa ed Juda.

<sup>29</sup> Idi nanturay sisya, dagos ay pinse na din am-in ay pamilyan Jeroboam. Iwed di olay es-esa ay nabay-an, ay siya met laeng di inpaipadton Diyos en Ahias ay pankalkaliana ay taga-Shilo. <sup>30</sup> Naamag na begew sin basbasol Jeroboam ya din nangiturongana abe sin Israelita ay manbasol ay say binmongetan Yahweh ay Diyos da.

Pag lawa din aari ay nansosokat ay nangituray ed Israel. Nanturay si Baasa si dowanpo ya opat ay tawen, pag matey et naisokat si Ela ay anak na. Idi nanturay si Ela si doway ay tawen, pinsen Zimri ay nangipangolo sin kagodwan di kalisa na ay para gobat, et insaad na din awak na ay ari. Pag nan peslen din am-in ay pamilyan Baasa ay nabay-an. Ngem idi nalabas di esa ay domingo et anggoy, insaad din kaipoipogaw si Omri ay ari da. Si Omri yan komander di sosoldado. Idi siya di, nanpokok si Zimri sin makneg ay pankamangan sin palasyo, asi na pooan, et say nateyana. Pag manturay si Omri ed Israel si sinpo ya doway ay tawen. (15:31-16:24)

31 32 33 34

## 16

1 2 3 4 5 6 7 8 9 10 11 12 13 14 15 16 17 18 19 20 21 22 23 24

<sup>25</sup> Ngem lawa di inam-amag Omri sin pangilan Diyos yan madagdagsen pay di basbasol na mo din amin ay nangon-ona ay nanturay mo sisya. <sup>26</sup> Inonodana amin din inamag Jeroboam ay anak Nebat ya inpangoloana din Israelita ay nanbasol, isonga binmonget si Yahweh ay Diyos da gapo sin magay silbi na ay sinan didiyos ay daydayawen da. <sup>27 28</sup> Idi natey si Omri yan naiponpon ed Samaria et si Ahab ay anak na di naisokat ay ari.

<sup>29</sup> Din naisaad Ahab ay anak Omri ay man-ari ed Israel yan naitompong sin maika-38 ay tawen ay nanturayan Asa ay ari ed Juda. Dowanpo ya doway ay tawen di

nanbeeyana ed Samaria ay mangituray sin Israelita. <sup>30</sup> Nakarkaro di basol ay inamamag Ahab ay anak Omri mo din nanturturay ay nangon-ona mo sisya. <sup>31</sup> Baken napnek sin nangam-amagana si kaman din basol Jeroboam ay anak Nebat. Inasawa na abe si Jezebel ay anak Etbaal ay ari ed Sidon et nansilbi ya nandayaw en Baal. <sup>32</sup> Nan-amag si altar ay para en Baal sin timplon Baal ay inamag na ed Samaria. <sup>33</sup> Tinood na abe di posti ay pangidaydayaw da en Asera. Nasursurok pay din inamag Ahab ay nangipabonget en Diyos mo din amin ay nangon-ona mo sisya ay nan-ari ed Israel.

<sup>34</sup> Sin timpon Ahab, binangon kasin Hiel ay taga-Betel din alad ya eneb ed Jerico. Et natongpal din inpaipadton Diyos en Josue ay anak Nun, tan idi nakdeng ay inaad na din fondasyona, natey si Abiram ay besag na, yan idi inamag na din eneb na, natey abe si Segub ay anongos na.\*

## 17

### *Din Adi Na Nan-od-odanan Sin Timpon Elias*

<sup>1</sup> Waday mamadto ay manngadan si Elias ay taga-Tisbe ay sakop di Gilead. Inmey en Ahab yan kanana, “Begew sin panakabalin Yahweh ay matmatago ay Diyos di Israelita ay pansilsilbiak, magay dono ono odan isnan omal-ali ay tawen enggana ay ibagak.”

<sup>2</sup> Idi makdeng di, kanan Diyos en Elias, <sup>3</sup> “Komaan kas na. Emey ka sin naibandas belaan di agew ta en ka mantabon sin asag-en di kitkittoy ay ginawang ay Kerit sin naibandas belaan di agew ed Jordan. <sup>4</sup> Say pan-inomam din ginawang ay doyan binilin ko din gayang ay man-iey da si kanem.” <sup>5</sup> Tinongpal na din inbagan Diyos et inmey sin kad-an di ginawang ay Kerit et nantees di. <sup>6</sup> Inagsapa ya minasdem ay man-idateng din gayang si karni ya tinapay yan sin ginawang di pan-in-inomana.

### *Si Elias Ya Din Nalasang Ed Zarefat*

<sup>7</sup> Baken nabayag yan namgaan din ginawang tan adi nan-od-odan sin daga ay doyan. <sup>8</sup> Pag kanan Diyos en sisya, <sup>9</sup> “Emey ka ay dagos ed Zarefat ay sakop di Sidon ta mantee kas di. Binilin ko di esay balo isdi ta panganen daka.” <sup>10</sup> Et inmey ed Zarefat.

Idi dinmateng sin segpan di ili, waday balo ay mangakkaiw. Kanana sin babai ay sana, “Man-inomak kod si danom yo.” <sup>11</sup> Idi em-emey din babai yan kanana, “Omya ka kod abe si esa ay tinapay.”

<sup>12</sup> Kanan din babai ay nanongbat, “Ammon Yahweh ay Diyos mo ay maga polos di tinapay ko. Wada anggoy di sinkagamet ay arina sin koli ya at-atik ay mantikan di olivo sin garapon. Mangakkaiwak ta waday pan-oto mi yan say longbos na dis kanen mi sin anak ko ay lalaki et sigurado ay matey kamis dagaang.”

<sup>13</sup> Ngem kanan Elias en sisya, “Adi kan madanagan. Somaa ka et ta en ka man-oto si kanen yo. Ngem pangon-onaem ay omioto si kitkittoy ay tinapay sin arina yo ta ialim, asi kan man-oto sin mabay-an si kanen yo sin anak mo. <sup>14</sup> Tan siya na di kanan Yahweh ay Diyos di Israelita, ‘Kadi et baken maabos din arina sin koli ya din mantika sin garapon enggana ay sak-en ay Diyos et ipawadak di odan.’ ” <sup>15</sup> Sinmaa et tinongpal na din inbagan Elias. Et waday inmanay ay kinkinan da Elias ya din sin-ina si inagagew, <sup>16</sup> tan tinmet-ewa din kalin Diyos ay inbagan Elias et adin naab-abos din arina sin kaipaypay-ana ya din mantika sin garapon.

<sup>17</sup> Idi baken nabayag, nansakit din anak di balo ay sana yan kinmaro ay kinmaro enggana ay natey. <sup>18</sup> Kanan din babai en Elias, “Sik-a ay ipogaw Diyos, sino pay di gapo ay say inamag mo nan sak-en? Ay inmali ka ay mangipanemnem en Diyos sin basbasol ko ta say matey din anak ko?”

<sup>19</sup> Kanan Elias ay nanongbat, “Ialim san anak mo.” Et ina na sin balo din anak, pag nan iey sin kowarto ed ngato ay panteteana et inpabaktad na sin katri na. <sup>20</sup> Kanana

\* **16:34** Din inpadton Josue et madtengan sin Josue 6:26.

ay nanpakaasi en Diyos, “Yahweh ay Diyos ko, ay olay nan balo ay pakidagdagosa yan paligatem tan nay adi kan naseg-ang sin anak na?”

<sup>21</sup> Pag lomakbab si Elias si namitlo sin awak di anak down mankararag en Diyos ay kanana, “Yahweh ay Diyos ay daydayawek, pangaasim kod ta tagoem nan anak ay nay.”

<sup>22</sup> Pinatgan Diyos din kararag Elias et natago kasin din anak. <sup>23</sup> Binakwan Elias et inbaba na ay en indawat en ina na yan kanana, “Ilaem, natago din anak mo.”

<sup>24</sup> Kanan din babai ay nanongbat en Elias, “Napaneknekak ed wani ay ipogaw Diyos sik-a et din kalin Diyos ay ibagam yan tet-ewa.”

## 18

### *Si Elias Ya Din Mamadton Baal (18:1-2a,17-46)*

<sup>1</sup> Nalabas pay di kaageagew et dinomteng sin maikatlo ay tawen, kanan Diyos en Elias, “En ka manpaila en Ahab et pawadaek di odan.” <sup>2a</sup> Et inmey si Elias ay nanpaila en Ahab.

<sup>3 4 5 6 7 8 9 10 11 12 13 14 15 16 17</sup> Idi inila na si Elias yan kanana, “Wada ka baw, sik-a ay namalpaligat sin Israelita.”

<sup>18</sup> Ngem kanan Elias, “Baken sak-en di namalpaligat sin Israelita. Sik-a et adi ya din familyan amam, tan linablabsing yo din bilbilin Diyos yan nandaydayaw kayo en Baal.

<sup>19</sup> Ed wani, ibilin mo sin amin ay ipogaw isnan intiro ay Israel ta en da omabat sin dontog ay Carmel. Itakin mo abe din 450 ay mamadton Baal ya din 400 ay mamadton Asera ay pakpakanen Jezebel.” <sup>20</sup> Et pinakaammoan Ahab din ipogaw sin intiro ay Israel et natopog da sin dontog ay Carmel, pati da din mamadto ay sana.

<sup>21</sup> Sinmag-en si Elias sin amin ay ipogaw yan kanana, “Pig-an pay ay isaldeng yo ay pankakadwaen din pammati yo? Mo si Yahweh di Diyos, say dayawen yo. Mo si Baal di Diyos et say dayawen yo.” Ngem ginmiginek din kaipoipogaw.

<sup>22</sup> Pag kanan Elias, “Es-esaak anggoy ay nabay-an sin mamadton Diyos, ngem waday 450 ay mamadton Baal. <sup>23</sup> Man-a kayos doway ay bomaro ay baka. Alaen da din esa ta partien da ya tadtaden da, asi dan ipatang sin kaiw ay pangipooan ngem adi dan tetengan. Isaganak abe din esa et ipatang ko sin kaiw ay pan-ipoan ngem adiak aben tetengan. <sup>24</sup> Mo makdeng di, mankararag kayo sin diyos yo yan mankararagak abe en Yahweh. Din manongbat si kararag ay mangipawadas apoy yan sisya di tet-ewa ay Diyos.” Et inbogaw din amin ay ipogaw ay apolbalan da din inbaga na.

<sup>25</sup> Siya di, kanan Elias sin mamadton Baal, “Manpili kayo si esa sin baka ta mangon-ona kayo ay mangisagana tan ad-ado kayo. Mankararag kayo sin diyos yo, ngem adi yon tetengan.” <sup>26</sup> Et ina da din baka yan insagana da. Nankararag da en Baal manipod sin agsapa enggana sin alas dosi. “Ay Baal, songbatam kod nan kararag mi,” kanan da ay nangibogbogaw down dan manaytayaw ay manliked sin altar ay inamag da, ngem magay nanongbat sin kararag da.

<sup>27</sup> Idi man-gawa pay di agew, inlogin Elias ay siniten daida ay kanana, “Ibogaw yo pay. Diyos met si Baal. Amangan mo way naoneg ay nemnemnemena ono ad-adoy amamagena, mo adi ya way inmeyana. Tan mo et naseseyep ya masapol ay bangonen.”

<sup>28</sup> Inpigpigs da din bogaw da down da et egden din awak da si kampilan ya gayang enggana ay manteted din dada da tan say ogali da. <sup>29</sup> Intoltoloy da ay nanbogbogaw ya nankalkali ay kaman dan naboge enggana ay dandani ay alas tres ay timpon di panidatonan, ngem down et magay nanngge ya nanongbat sin kararag da.

<sup>30</sup> Makdeng pay di, kanan Elias sin kaipoipogaw, “Omasag-en kayos na.” Et sinmag-en da en sisya. Nilogiana ay nangamag sin nadadael ay altar ay nandayawan da en Diyos ed idi. <sup>31</sup> Nan-a si sinpo ya doway ay bato, sag-eesa para sin tribun di polin Jacob ay nginadanan Diyos si Israel. <sup>32</sup> Say inosal na da san bato ay nan-amag si altar ay panidatonan si animal en Diyos. Nankaot si kanal ay nanliked sin altar. Din kalosong din



kanal yan laonena di nganngani ay opat ay galon ay danom. <sup>33</sup> Piney-ana si kaiw din altar asi nan tinadtad din baka et inpatang na sin kaiw. Pag nan kanan en daida, “Pon-en yo di opat ay koli si danom ta isodag yo sin naidaton ya sin kaiw.” Et tinongpal da. <sup>34</sup> “Say iyat yo kasin,” kanana et pinidwa da. Binilina kasin daida et say inyat da si maikapitlo. <sup>35</sup> Nan-ayos din danom sin altar et napno din kanal.

<sup>36</sup> Idi domteng din oras ay pan-idatonan, sinmag-en si Elias ay din mamadton Diyos sin altar yan kanana ay nankararag, “Sik-a ay Yahweh, Diyos ay dinaydayaw da Abraham, Isaac ya Israel, ipailam koma ed wani ay agew ay sik-a din Diyos ed Israel ya sak-en din baam, et inamag ko amin dana tan say inbilin mo. <sup>37</sup> Songbatam koma ay Diyos nan kararag ko ta say mapaneknekan nan kaipoipogaw ay sik-a ay Yahweh si Diyos ay mangitaoli sin pammati da en sik-a.” <sup>38</sup> Pag et kaekgas si Diyos si apoy et pinooana amin din naidaton, kaiw ya bato. Nakset din lota yan namgaan din kanal ay nanliked sin altar.

<sup>39</sup> Idi inilan din kaipoipogaw di, kalakpap da yan kanan da, “Si Yahweh di Diyos, si Yahweh anggoy di Diyos.”

<sup>40</sup> Idi siya di, binilin Elias daida, “Depapen yo din mamadton Baal. Adi yon ipalobos ay waday makalayaw.” Dinpap das daida et inpaiballalong Elias sin ginawang ay Kison yan isdi ay pinse nas daida.

<sup>41</sup> Idi makdeng di, kanan Elias en Ahab, “En ka mangan ya man-inom tan sanay madngek ay omal-ali ay napigsa ay odan.” <sup>42</sup> Et en nangan ya nan-inom si Ahab, ngem si Elias yan nantikid sin toktok di dontog ay Carmel, pag manyakog-ong ay nangidomog sin ropa na sin nan-gawaan di peweg na ay mankararag. <sup>43</sup> Pag nan kanan sin baa na, “En ka tamangen din baybay.”

Inmey din bag-ena ay nantamang asi nantaoli yan kanana, “Maga polos met di mailak.” Namin pito ay inbaan Elias din baa na. <sup>44</sup> Sin maikapito ay nantaoliana yan kanana, “Waday liboo ay kaman kadakdaken di adpan di ipogaw ay komaykayang sin baybay.”

Binilin Elias din bag-ena, “En ka ibaga en Ahab ta manlogan sin kalisa na ta somaa tan into et mo edasan di odan ya adi makalsot din kalisa na.” <sup>45</sup> Sinkaattikan yan binmolinget ed kayang si liboo, nandagem ya nilogiana ay mandeges. Nanlogan si Ahab sin kalisa na ta somaa ed Jezreel. <sup>46</sup> Siya et di, nawada en Elias di panakabalin Diyos et binilkoana din bado na asi nanagtag enggana sin beddeng di Jezreel\* yan inonaana si Ahab.

## 19

### *Din Inmeyan Elias Sin Dontog Ay Sinai*

<sup>1</sup> Dinad-at Ari Ahab en Jezebel ay asawa na amin din inamag Elias ya din namseana sin amin ay mamadton Baal. <sup>2</sup> Idi dinngen Jezebel di, waday inbaa na en Elias ay nangibaga, “Mo adiak amagen en sik-a din inamag mo sin mamadton Baal sin kaman nina ay oras si bigat, olay pomse da din diyos.”

<sup>3</sup> Inmegyat si Elias et linmayaw ta say adi da peslen. Intakina din baa na et inmey da ed Beerseba ay sakop di Juda yan tinaynanas di. <sup>4</sup> Naninsin-agew si Elias ay nandadan ay inmey sin kadardaratan. Waday dintengana ay kaiw et tinmokdo sin sidom na yan inkararag na ay matey koma. Kanana, “Sik-a ay Diyos, enggay adiak maanosan na, isonga taoliem kod nan biyag ko tan maga met laeng di naitkenak sin aap-ok.” <sup>5</sup> Idi makdeng di yan binmaktad et naseyep sin sinidoman di kaiw.

Idi siya di, wada et di anghel ay nangiwiw en sisya yan kanana, “Bomangon ka ta mangan ka.” <sup>6</sup> Manmokilang pay, wada di inila na ay tinapay sin kad-an di toktok na ay naoto sin man-atong ay bato ya esay koli ay danom, et nangan ya nan-inom

\* **18:46** Nasurok ay 26 ay kilometro di kaaddawin di Jezreel manipod sin dontog ay Carmel.

pag bomaktad kasin. <sup>7</sup> Nantaoli kasin din anghel Diyos et giniwit na yan kanana, “Bomangon ka ta mangan ka tan addawi di pandad-anam.” <sup>8</sup> Binmangon si Elias et nangan ya nan-inom. Pinmigma sin kinana ay sana et nandan si opatapolo ay agew ya labi enggana ay dinmateng ed Sinai\* ay nanpappailaan Diyos. <sup>9</sup> Sinenggep si esa ay liyang et isdi ay naseyep sin labi.

Kanan Diyos en sisya, “Sinoy am-amagem isna ay Elias?”

<sup>10</sup> Kanan Elias, “Inpakat ko din amin ay kabaalak ay nansilsilbi en sik-a ay Yahweh, Diyos ay Manakabalin Amin, ngem din Israelita yan dinokogan da din intolag mo. Dinadael da din aaltar mo yan pinse da amin din pankalkaliam, et sak-en anggo di nabay-an yan nay layden da abe ay pomse.”

<sup>11</sup> Kanan Diyos en sisya, “Bomala ka ta pomika ka sin sangoanak sin toktok di dontog tan sak-en ay Diyos et nganngani ay malabasak.”

Idi siya di, wada et di napigsa ay dagem ay nangosokos sin dontog et napitapitak dan bato, ngem maga si Diyos ay naikoyog sin dagem. Idi sinmaldeng din dagem, nanyegyeg, ngem magas Diyos sin yegyeg. <sup>12</sup> Makdeng din yegyeg yan way apoy, ngem magas Diyos sin apoy. Idi makdeng din apoy, waday nainayad ay ayasak. <sup>13</sup> Idi dengngen Elias din ayasak, in-opop na din tak-ep di bado na sin ropa na, pag bomala et pinmika sin segpan di liyang. Pag et waday kali ay kanana, “Sinoy am-amagem isna ay Elias?”

<sup>14</sup> Kanan Elias, “Yahweh, Diyos ay Manakabalin Am-in, inpakat ko di amin ay kabaalak ay nansilsilbi en sik-a, ngem din Israelita yan nilinglingan da din intolag mo. Dinadael da din aaltar mo yan pinse da amin sin kumpulan din pankalkaliam et sak-en anggo di nabay-an yan nay layden da abe ay pomse.”

<sup>15</sup> Kanan Diyos en sisya, “Mantaoli ka sin dinan mo ta emey ka sin kadardaratan ed Damascus. Mo domateng kas di, emey ka sin siyodad ta dotokam si Hazael ay man-ari ed Syria <sup>16</sup> yan dotokam abes Jehu ay anak Nimsi ay man-ari ed Israel. Dotokam si Eliseo ay anak Safat ay taga-Abel Mehola ay say maisokat en sik-a ay mamadto. <sup>17</sup> Din makalisi sin kumpulan Hazael, peslen ton Jehu yan din makalisi en Jehu et peslen Eliseo. <sup>18</sup> Ngem bay-ak di pito ay libo ay Israelita. Daida din adi nandayaw en Baal ya adi nang-ongo sin rebolto na.”

### *Din Nangayagan Elias En Eliseo Ay Kasokat Na*

<sup>19</sup> Inmey si Elias et dintengana si Eliseo ay man-al-alado. Waday sinpo ya doway ay paris ay napakoan ay baka ay on-onodena yan sisya di mangial-alado sin maodi ay paris. Kinaan Elias din tak-ep di bado na yan in-amag na en Eliseo.† <sup>20</sup> Kataynan si Eliseo sin baka na et inonod nas Elias yan kanana, “Palobosam kod sak-en ay en manpakada omona en da amak en inak ta asiak makikoyog en sik-a.”

Kanan Elias ay nanongbat, “Emey ka adi. Adiak pilpiliten sik-a.”

<sup>21</sup> Siya di, tinaynan Eliseo et sinmaa. Ina na din ial-alado na ay baka et pinalti na. Say intongo na din alado ya pako ay nangiatoana sin karni pag nan idawat sin ipogaw et kinan da. Idi makdeng di, inmonod en Elias et nansilbi en sisya ay kabadang na.

## 20

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41

### *Din Nangabakan Ahab En Benhadad*

(20:42-43)

Idi siya di, en nakigobat da Benhadad ay ari ed Syria sin Israelita. Waday inbaan Diyos ay mamadto ay en nangibaga en Ahab, “Ay inilam din kaad-adon di soldado da? Awni man et pangabakek sik-a ta say pangammoam ay sak-en di Diyos.” Et natongpal, tan nangabak da Ahab. Sin omali ay tawen, kasin ginobat da Benhadad din Israelita yan

\* **19:8** Din kanana sin Hebreo et: Horeb. Di esa ay ngadana et Sinai. † **19:19** Din nangamagan Elias sisi et sinyal ay si Eliseo di maiskat en sisya ay mamadto.

nangabak kasin da Ahab. Emegyat si Benhadad ay peslen Ahab sisya, isonga kanana ay nakitolag en itaoli na din il-ili ay sinakop ama na mo wayaan Ahab sisya, et awena. Asi et binmonget si Diyos tan adi pinsen Ahab si Benhadad, isonga nan-ibaa si mamadto ay emey en sisya. (20:1-41)

<sup>42</sup>Kanan din mamadto sin ari, “Siya na di ipaammon Diyos en sik-a. Gapo ta inpawayam din kineddengak ay matey koma, ikaroam sin biyag mo. Matey abe din sosoldadom gapo ta inpalobos mo ay matago din sosoldado na.” <sup>43</sup>Sin nanngenas di, sinmaa din ari ed Samaria ay mansasadot ya mabmabonget.

## 21

### *Din Nangamagan Ahab Sin Dagan Nabot*

(21:1-11,14-24,27-29)

<sup>1</sup>Malabas pay di timpo, waday napasamak manbegew sin kaob-obasan Nabot ay taga-Jezreel. Din daga na ay nay et asag-en sin palasyon Ahab ed Jezreel ay ari ed Samaria.\*

<sup>2</sup>Sin namingsan, kanan Ahab en Nabot, “Idawat mon sak-en din minolaam si obas ta eskak si natnateng tan asag-en sin palasyok. Sokatak si mas maymayat ay kaobasan ono lakoak mo say laydem. Bayadak olay piga di kanam.”

<sup>3</sup>Ngem kanan Nabot, “Pangaasim apo. Iparit Diyos ay idawat kon sik-a din daga ay nay, tan tinawid ko sin ap-apok.”

<sup>4</sup>Mansasadot ya mabmabonget si Ahab ay sinmaa gapo sin inbagan Nabot. Binmaktad sin katri na ay nanasango sin dingding yan sigaana ay mangan.

<sup>5</sup>Idi sinenggep si Jezebel ay asawa na, kanana, “Ay sinoy gapo ay masmasadot ka ya sigaam ay mangan?”

<sup>6</sup>Kanan Ahab, “Gapo sin inbagan Nabot. Tan kanak en lakoak din ineskanas obas ono sokatak mo say laydena ngem kanana et en adi mabalin ay idawat nan sak-en.”

<sup>7</sup>Kanan asawa na, “Ay baken ayan sik-a di ari isnan Israel? Bomangon ka et ta mangan ka ya manragsak ka. Alaek din inobasan Nabot para en sik-a.”

<sup>8</sup>Et nan-amag si solat asi nan inpirma din ngadan ya pirman Ahab, pag nan ipatolod sin oopisyal ya mabigbig ay omili ed Jezreel. <sup>9</sup>Siya na din nilaon din solat: “Man-ibilin kayo si agew ay pangitpean si dagaang ta sinopen yo din kaipoipogaw† yan patokdoen yo si Nabot sin sango. <sup>10</sup>Man-ipatokdo kayo si doway bayanggodaw sin sangoanana ay mangipabasol en sisya ay binaosanas Diyos ya din ari. Pag kayon ibala sin lasin di siyodad ta pigpigen yo ay peslen.”

<sup>11</sup>Inamag din oopisyal ya mabigbig ay omili din inbilin Jezebel sin solat ay inpatolod na en daida. <sup>12</sup><sup>13</sup><sup>14</sup>Makdeng pay di yan inpakaammo dan Jezebel en natey si Nabot.

<sup>15</sup>Idi nadamag Jezebel ay natey si Nabot, kanana en Ahab, “Emey ka ta en ka okaen din inobasan Nabot ay taga-Jezreel ay sinigaana ay ilakon sik-a, tan enggay natey sisya.”

<sup>16</sup>Idi dinngen Ahab ay natey si Nabot, kapika et inmey ay en nangoka.

<sup>17</sup>Pag kanan Diyos en Elias ay taga-Tisbe, <sup>18</sup>“Manballalong ka ay dagos ta en ka ilan si Ari Ahab. Wadad wani sin inobasan Nabot tan laydena ay okaen. <sup>19</sup>Ibagam en sisya ay siya na di inbagan Diyos, ‘Makdeng baw ay peslem sisya yan alaem din sanikwa na? Sin mismo ay lugar ay nanildilan di aso sin dadan Nabot, isdi met laeng di panildilan di aso sin dadam.’”

<sup>20</sup>Pinatin Elias din intogon Diyos. Idi inilan Ahab sisya, kanana, “Dinteng mo baw sak-en, sik-a ay omiibaw.”

“Aw yan,” kanan Elias ay nanongbat. “Et gapo ta inpakat mon kabaalam ay mangamag si lawa sin pangilan Diyos, <sup>21</sup>siya na di kanana en lak-amem ay dosa. Keddengan

\* **21:1** Manturay si Ahab ed Samaria ay kapital di Israel. Wada abey palasyo na ed Jezreel. † **21:9** Mo din oopisyal di ili yan man-ibilin das agew ay pangitpean si dagaang, say pangammoan di omili ay waday nanbasol si nadagsen. Masapol ay makeddenggan din nakabasol ay matey ta say adi makidosa din omili.

daka ay matey ya siya abe sin am-in ay pamilyam ay lalaki. Maga polos di mabay-an. <sup>22</sup> Di katet-ewa na et dosaen daka ay kaman din inyat na sin polin Jeroboam ay anak Nebat ya polin Baasa ay anak Ahias, tan binmonget si Diyos begew sin nangipangoloam sin Israelita ay manbasol. <sup>23</sup> Mo maipanggep en Jezebel, kanan Diyos en kanen di asos sisya sin poon di alad ay batog di ili ay Jezreel. <sup>24</sup> Olay sino abe ay naipoli en sik-a yan matey sin siyodad et kanen di aso. Mo pay din matey sin away et kanen di titit.”

<sup>25</sup> <sup>26</sup> <sup>27</sup> Sin nanngean Ahab isdi, binisngit nan bado na, et en nanbado si sako ay say inosal na olay sin labi. Init-itpe nay dagaang na yan kanayon ay masmasadot ya nadadagsenan.

<sup>28</sup> Pag kanan Diyos en Elias, <sup>29</sup> “Ay inilam di inyat Ahab ay nangipababa si nemnem na sin sangoanak? Gapo ta say inyat na di, adiak ipalak-am din dosa ay nay sin pamilya na sin timpo na mo adi et sin timpon di anak na.”

## 22

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28

### *Din Nateyan Ahab Ay Natongpalan Din Inpadton Micayas*

(22:29-30,34-38,40)

Idi siya di, adi nan-gogobat din Israelita ya taga-Syria si doway ay tawen. Sin maikatlo ay tawen, nantolag da Ahab en Jehosafat ay ari ed Juda ay mantinolong da ay makigobat en Benhadad ay ari ed Syria ta taolien da din siyodad ay Ramot sin sakop di Gilead. Tan kambaw adi intaolin Benhadad din siyodad ay doy ay say nakitolagana en Ahab ed idi. Waday mamadton Diyos ay manngadan si Micayas ay nangipadto ay matey si Ahab sin gobatan ya maabak din Israelita. Ngem inpapilit pay dedan Ahab din wadas nemnem na. (22:1-28)

<sup>29</sup> Siya di, inmey da Ari Ahab en Ari Jehosafat ay en makigobat ed Ramot. <sup>30</sup> Kanan Ahab en Jehosafat, “Mo ilogi tako ay makigobat, ibadom din osal di ari, ngem mo sak-en pay, ilimed ko mo sinoak.” Et naitapi din arin di Israelita sin gobatan ay adi maimatonan. <sup>31</sup> <sup>32</sup> <sup>33</sup> <sup>34</sup> Ngem naitompong ay waday soldadon di Syria ay nangibinat sin pana na yan napontaan si Ari Ahab sin nansisilpoan di salida na. “Aney! Napontaanak!” kanan Ahab sin mangiturturong sin kalisa na. “Manbowilta ka ta omaddawi ta!”

<sup>35</sup> Pomigsa ay pomigsa din gobat dowan pay si Ahab yan inpapika da sin kalisa na ay makisasango sin sosoldadon di Syria. Intoltoloy din dada na ay omay-ayos enggana ay nabasa din det-an di kalisa. Idi malablabi, natey. <sup>36</sup> Idi dandani ay madipos din agew, nan-asibogaw da ay nangwani, “Sooma di esa ya esa sin kosto ay ili na.”

<sup>37</sup> Siya na di nateyan Ahab ay ari ed Israel. Pag dan iey din awak na ed Samaria et inponpon da. <sup>38</sup> Waday posong isdi ay pan-amsan di babbabai ay nangilaklako sin awak da. Say nangowasan da sin kalisan Ahab ay para gobat et dinildilan di aso din dada na ay say inbagan Diyos ay maamag. <sup>39</sup>

<sup>40</sup> Idi nakdeng di, naisokat ay ari si Ahazias ay anak na.

### *Din Nanturayan Jehosafat Ed Juda*

(22:41-44,50)

<sup>41</sup> Sin maikap-at ay tawen ay nanturayan Ahab ed Israel, naisaad ay ari ed Juda si Jehosafat ay anak Asa. <sup>42</sup> Mantawen si Jehosafat si 35 sin nanbalinana ay ari yan nanturay ed Jerusalem si 25 ay tawen. Si Azuba ay anak Silai di ina na. <sup>43</sup> Inamag na din kosto sin pangilan Diyos ay kaman si Asa ay ama na, ngem adi nan dinadael din pandaydayawan di ipogaw si sinan didiyos ay wada sin dodontog, et intoltoloy da ay nan-ipoo si daton ya insinso isdi. <sup>44</sup> Sin nanturturayan Jehosafat, nakikapya sin ari ed Israel. <sup>45</sup> <sup>46</sup> <sup>47</sup> <sup>48</sup> <sup>49</sup> <sup>50</sup> Natey si Jehosafat et naiponpon ay naitapi sin aap-o na sin siyodad apo na ay David. Si Jehoram ay anak na di naisokat en sisya ay nan-ari. <sup>51</sup> <sup>52</sup> <sup>53</sup>

## **Maikadwa Ay Libro Maipanggep Sin Aari Maipanggep Sin Libro Ay Nay**

Din libro ay nay di kaitoloyan din naisolat sin Omona Ay Libro Maipanggep Sin Aari maipanggep sin nanturay sin nansian ay nasyon ay Israel ya Juda enggana sin naabakan da ay dowa. Din kapital di Israel ay Samaria et inabak Ari Salmaneser ay taga-Assyria sin 722 B.C. Inpakaana di odom ay Israelita et inpilit na ay en da makiili ed Assyria. Din kapital di Juda ay Jerusalem et inabak ya binakas Ari Nebukadnezzar ay taga-Babilonia sin 586 B.C. Am-in din Israelita ay babaknang, nangato di saad na ya nalaing et naipakaan da ay en makiili ed Babilonia. Naamag dana ay lawa begew sin naipidwapidwa ay nanokdokogan di aari ya ipogaw ed Israel ya Juda en Yahweh ay Diyos da.

Ngem baken omipasadot am-in ay naisolat isna. Maistorya abe din nakaskasdaaw ay inam-amag Eliseo ay naisokat en Elias ay mamadton Diyos.

### **Din Linaona**

Din inam-amag Eliseo ay mamadto 1:1-8:15

Din nansosokat ay aari ed Israel ya Juda 8:16-17:4

Din naabakan di Samaria 17:5-41

Din aari ed Juda manipod sin timpon Hezekias 18:1-24:20

Din nabakasan di Jerusalem 25:1-30

### *Da Elias En Ari Ahazias*

Idi namingsan, nag-as si Ahazias ay ari ed Israel ay napo sin atep di palasyo na et palalo ay nasakitan sisya. Isonga nan-ibaa si en manpasip-ok mo sinoy ipaammon din sinan didiyos ta ammoana mo mailatonan. Ngem inabat Elias ay mamadton Diyos din inbaan di ari et inpaammo na en daida din inbagan Diyos. Kinwanin Diyos en matey si Ahazias gapo ta nan-ibaa si manpasip-ok. Et natongpal, pag maisokat si Joram ay esa ay anak Ahab ay man-ari ed Israel, tan magay anak Ahazias. (1:1-18)

1 2 3 4 5 6 7 8 9 10 11 12 13 14 15 16 17 18

## **2**

### *Din Nangieyan Diyos En Elias Ed Langit (2:1-15)*

<sup>1</sup> Idi dandani ay alaen Diyos ed langit si Elias babaen si alinposapos, manmandan da en Eliseo ay napod Gilgal. <sup>2</sup> Kanan Elias en Eliseo, “Isna ka tan inbaan Diyos sak-en ed Betel.”

Ngem kanan Eliseo, “Isapatak sin matmatago ay Diyos ya en sik-a ay adiak taynan sik-a.” Et nankoyog da ay inmey ed Betel.

<sup>3</sup> Wada di grupon di mamadto ay mantee isdi ay inmey en Eliseo yan kanan da, “Ay ammom ay alaen Diyos din apom ay isian en sik-a ed wani ay agew?”

Kanan Eliseo, “Aw, ammok ngem adi takon ap-apat sa.”

<sup>4</sup> Kanan kasin Elias en Eliseo, “Mataynan kas na tan inbilin Diyos ay emeyak ed Jerico.”

Ngem kanan Eliseo, “Isapatak sin matmatago ay Diyos ya en sik-a ay adiak taynan sik-a.” Et nankoyog da ay inmey ed Jerico. <sup>5</sup> Wadas di di mantee ay grupon di mamadto ay nansalodsod en Eliseo, “Ay ammom ay alaen Diyos din apom et isianan sik-a ed wani ay agew?”

Kanan Eliseo, “Aw, ammok ngem adi takon ap-apat sa.”

<sup>6</sup> Pag kanan Elias en Eliseo, “Mataynan kas na tan inbilin Diyos ay emeyak ed ginawang ay Jordan.”



Ngem kanan Eliseo, “Isapatak sin matmatago ay Diyos ya en sik-a ay adiak taynan sik-a.” <sup>7</sup> Intoloy da ay nandan yan waday grupon di mamadton Diyos ay inmonod en daida ed Jordan. Sinmaldeng da Elias en Eliseo sin benget di ginawang yan wada da din mamadto sin baken onay addawi ay mangiila en daida. <sup>8</sup> Kinaan Elias din tak-ep di bado na asi na kinopin, pag nan iseppat sin danom yan nansian din danom et namgaan di dinan da Elias ay nanbalasat.

<sup>9</sup> Idi nakabalasat da, kanan Elias en Eliseo, “Sinoy laydem ay idawat ko asiak maiaddawi en sik-a?”

Kanan Eliseo, “Idawtam kod sak-en si dobli ay bingay sin panakabalin mo.”\*

<sup>10</sup> Kanan Elias, “Naligat san kedkedawem ngem matongpal sa mo mailam sak-en sin kaisianak en sik-a, ngem no maga et adi maidawat en sik-a.”

<sup>11</sup> Idi manmandan da dowan dan mankalkali, bigla et ay nawada di manbidbidang ay kalisa ya kabayo ay nandan sin nan-gawaan da, pag ikayang di alinposapos si Elias ed daya. <sup>12</sup> Inilan Eliseo et binogawanas Elias ay kanana, “Ama, ama! Napigsa ay manalagnib isnan Israel!” Manipod sidi yan adi na kasin inil-ilas Elias. Kabisngit si Eliseo sin bado na gapo si sakit di nemnem na. <sup>13</sup> Pinidit na din nag-as ay tak-ep di badon Elias pag mantaoli sin benget di ginawang ay Jordan. <sup>14</sup> Inseppat na sin danom din nag-as ay badon Elias yan kanana, “Intoy kad-an pay Yahweh ay Diyos en Elias?”

Idi sineppat na din danom, nansian et nandan ay nanbalasat. <sup>15</sup> Kanan din grupon di mamadto ay napod Jerico ay nangiilan sisya, “Wada en sisya din panakabalin Elias.” En da inabat, pag dan manyakog-ong sin sangoanana. <sup>16 17 18 19 20 21 22 23 24 25</sup>

### 3

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27

### 4

#### *Din Namadangan Eliseo Sin Nalasang Ay Naotangan*

(4:1-7)

<sup>1</sup> Sin namingsan, inmey en Eliseo din asawan di esa ay pankalkalian Diyos ay esa sin grupon di mamadto yan kanana, “Apo, natey si asawak. Ammom met ay pinatpateg na si Diyos, ngem ed wani yan inmali din nangiotang. Magay ibayad ko, isonga kanana en alaena din doway lalaki ay anak ko ta panbalinenas bag-ena.”

<sup>2</sup> Kanan Eliseo ay nansalodsod, “Sinoy maibadang ko en sik-a? Ibagam kod di wada ay sanikwam sin beey mo.”

Kanan din babai, “Apo, maga polos malaksig si at-atik ay lanan di olivo.”

<sup>3</sup> Kanan Eliseo, “En ka manbolod sin am-in ay tinokmang mo si ad-ado ay koli ay magay naigto. <sup>4</sup> Mo idateng mo sin beey yo, senggep kayo sin aan-ak mo ta in-eb yo, pag kayon ilogi ay pey-an si lana din amin ay koli et din mapno yan ikasin yo.”

<sup>5</sup> Tinaynan din babai si Eliseo yan sinenggep sisya ya din aan-ak na sin beey da et inin-eb da. Idawdawat din aan-ak na din koli dowan pey-pey-an. <sup>6</sup> Idi napno da amin din koli, kanana sin esa ay anak na, “Man-iali kayo si esa.”

Ngem kanan da, “Enggay nisa.” Idi siya di, sinmaldeng din lana ay man-ayos.

<sup>7</sup> Binmela din babai ay en nangipaammo en Eliseo yan kanan Eliseo en sisya, “En ka ilako din lana ta say ibayad mo sin otang mo. Omanay din mabay-an ay panbiyag yo sin an-ak mo.”

#### *Din Nakaskasdaaw ay Inamag Eliseo ed Sunem*

(4:8-37)

\* **2:9** Mo maibasat sin linteg di Israelita, dobli di tawid di besag ay anak mo din aag-i na. Wada abey lebbeng na ay adi inawat di aag-i na. Isonga din layden Eliseo ay kalien et mabigbig komas sisya ay din kosto ay nanawid sin panakabalin Elias ya dobli koma di tawidena ay panakabalin mo din odom ay mamadto.

<sup>8</sup> Sin namingsan ay inmeyan Eliseo ed Sunem, inayagan di esay baknang ay babai ta makikan sin beey da. Manipod isdi, kanayon ay maspad ay makikan mo emey isdi ay ili. <sup>9</sup> Kanan din babai sin asawa na, “Masiguradok ay nasantoan ay ipogaw Diyos din lalaki ay doy ay kanayon ay mandagdagos sin beey ta. <sup>10</sup> Man-amag ta si kitkittoy ay kowarto sin ngato, asi tan pey-an si katri, lamisaan, tokdoan ya pansilawan ay osalena ta isdi ay mandagdagos mo omali isnan beey ta.”

<sup>11</sup> Sin namingsan ay inmey si Eliseo isdi, en binmaktad sin akin ngato ay kowarto. <sup>12</sup> Kanana en Gehazi ay baa na, “En ka ayagan din babai.” Inayagana et en pinmika din babai sin kad-ana. <sup>13</sup> Kanan Eliseo en Gehazi, “Ibagam en sisya mo sino di maitolong ko ay isobalit isnan kinasiged na en daita. Amangan mo laydena ay enak makikali sin ari ono sin komander di sosoldado para en sisya.”

Ngem kanan din babai, “Wada met amin ay kasapolak isnan ilik ay kad-an di kakailiak.”

<sup>14</sup> Dinamag Eliseo en Gehazi, “Sino ngin ngarud di maidawat ko?”

Kanan Gehazi, “Magay anak da yan enggay nakay si asawa na.”

<sup>15</sup> Pag kanan Eliseo, “Ayagam sisya.” Inayagana et pinmika din babai sin segpan.

<sup>16</sup> Kanan Eliseo, “Sin siya na ay timpo sin omali ay tawen, manbakwa ka si anak ay lalaki.”

Ngem kanan din babai, “Apo, ipogaw daka en Diyos isonga adi ka koman iet-etekan nan mansilbi en sik-a.” <sup>17</sup> Ngem nawad-an din babai et nan-anak si lalaki sin kaman nidi ay timpo sin inmali ay tawen ay kaman din inbagan Eliseo.

<sup>18</sup> Dinmaktake din anak yan sin namingsan inmonod en ama na ay wada sin kad-an di man-an-ani. <sup>19</sup> Idi siya et di, bigla ay kinalianas ama na yan kanana, “Aney! Din toktok ko!”

Pag kanan ama na sin esa ay bag-ena, “Iey mo en ina na.” <sup>20</sup> Binakwan din bag-en ay in-ey sin inan di anak et binabakwan ina na enggana ay alas dosi, pag et matey din anak. <sup>21</sup> In-ey na din anak sin akin ngato ay kowarto, pag nan pabaktaden sin kaseyseyepan din mamadton Diyos. Binmala et in-eb na. <sup>22</sup> Inayagana si asawa na yan kanana, “Pangaasim kod ta man-ibaa kas na si esa ay bag-en ya dangki ta emeyak ay dagos sin kad-an din ipogaw Diyos, asiak mantaoli.”

<sup>23</sup> Kanan asawa na ay mandamag, “Sinoy gapo ay emey ka en sisya ed wani ay agew yan baken beskan di bowan ay pan-idatonan tako\* ono agew ay pan-illengan?”

Ngem kanan din babai, “Olay adi.” <sup>24</sup> Inpaiamag na din silyan di dangki yan nangabayo, pag na et kanan sin bag-ena, “Dagdagem din dangki. Adi kan pan-inayaden begew en sak-en mo adiak ibaga.” <sup>25</sup> Et inmey sin kad-an di mamadton Diyos sin dontog ay Carmel.

Idi tinamang Eliseo din babai sin addawi pay laeng, kananan Gehazi ay baa na, “Dooy ay omal-ali din babai ay taga-Sunem. <sup>26</sup> Dalasem, managtag ka ay en mangabat ta damagem mo mayat met laeng di kasasaad na, si asawa na ya din anak da.”

Idi dinamag Gehazi, kanan din babai ay nanongbat, “Mayat amin.”

<sup>27</sup> Idi domateng sin kad-an Eliseo sin dontog, kapakod sin sikin Eliseo.† Itodon koman Gehazi ngem kanan Eliseo, “Bay-am, tan palaloy ladingit na, ngem nay adi inpaammon Diyos en sak-en di gapo na.”

<sup>28</sup> Kanan din babai, “Apo, adiak met nankedaw en sik-a si anak yan kanak abe en adi ka koman omietek ay mangidawat si pannamnamaak.”

\* **4:23** Mo maibasar sin bilin Diyos (Bilbilang 28:11-15), tonggal beskan di bowan yan man-idaton din Israelita si aanimal ay mapooan. † **4:27** Ogalin di ipogaw sidi, mo manpakod da sin sikin di pankedawan da, say iyat da ay mangipadagsen sin kedawen da.

<sup>29</sup> Binilin Eliseo si Gehazi ay kanana, “Bilkoam san badom ta itagtag mo nan sokod ko ta ipatang mo sin ropan di anak. Adi kan somalsaldeng ay mangkablaaw mo waday abatem yan mo kablaawan das sik-a, adi ka masapol ay songbatan.”

<sup>30</sup> Ngem kanan din inan di anak, “Isapatak en sik-a ya din matmatago ay Diyos ay adiak taynan sik-a.” Isonga pinmika si Eliseo et nakikoyog en sisya.

<sup>31</sup> Nangon-ona si Gehazi ay inpatang na din sokod sin ropan di anak, ngem magay mailas nanbaliwana ay kailaana ay mabiyag isonga nantaoli ay en nangabat en Eliseo yan kanana, “Adi met binmangon din anak.”

<sup>32</sup> Idi somawang si Eliseo, wada din anak ay naipapabaktad sin katri na yan magay biyag na. <sup>33</sup> Sinenggep pag nan in-eb et ang-angoy da ay dowan sin anak, pag mankararag en Diyos. <sup>34</sup> Pag lomakpap sin awak di anak downan itakap din tepek, mata ya takkay na sin tepek, mata ya takkay di anak et inmatong din awak di anak.

<sup>35</sup> Kinmaan si Eliseo ay mandinad-an sin kowarto asi kasin lomakpap sin awak di anak. Kaakbis din anak si namin pito yan kiniyat na din mata na. <sup>36</sup> Inpaayag Eliseo en Gehazi din babai ay taga-Sunem. Idi domateng yan kanana, “Alaem nan anak mo.”

<sup>37</sup> Sinenggep et nanyakog-ong ay nandokmog sin sangoanan Eliseo, asi na alaen din anak na, pag bomala. <sup>38 39 40 41</sup>

#### *Din Namakanan Eliseo Si Sin-Gasot Ay Ipogaw (4:42-44)*

<sup>42</sup> Sin namingsan, waday lalaki ay napod Baal Salisa ay nangiey en Eliseo si kaap-apit na ay mais ay naidamdandam ya downpo ay tinapay ay napo sin sabog ay nangon-onaen da ay inani. Kanan Eliseo sin baa na, “Ipakan mo dana sin papasolot ko ay mamadto.”

<sup>43</sup> “Ngem adi met omanay sa si sin-gasot ay ipogaw,” kanana ay sinombat.

Kanan aben Eliseo, “Idawat mo od en daida, tan inbagan Diyos ay mangan da ay kosto yan wada pay di mabay-an.” <sup>44</sup> Siya di, insango na en daida et tinmet-ewa din inbagan Diyos, tan nangan da am-in yan wada abey nabay-an.

## 5

#### *Si Naaman Ya Din Balasitang Ay Israelita*

<sup>1</sup> Wada di si Naaman ay komander di sosoldadon din ari ed Syria. Madaydayaw ay ipogaw yan peteg ay binanbanol din apo na tan gapo en sisya, nangabaken Diyos ed Syria. Natoled ay soldado ngem nakaptan si kaeegyat ay sakit di kodil.

<sup>2</sup> Sin namingsan ay ginobat din taga-Syria ed Israel, waday balod da ay balasitang ay Israelita et nanbalin sisya ay bag-en din asawan Naaman. <sup>3</sup> Kanan din balasitang sin apo na ay babai, “Mo en koman manpaila din apok sin pankalkalian Diyos ed Samaria et agasana din sakit di kodil na.”

<sup>4</sup> Inmey si Naaman sin kad-an di ari et dinad-at na din inbagan di balasitang ay Israelita. <sup>5</sup> Kanan din ari, “Mabalin, emey ka. Mansolatak sin ari ed Israel.” Et inmey si Naaman yan nan-itakin si sinpo ay talento ay palata,\* pitopolo ay kilo ay balitok ya sinpo ay paris ay bado. <sup>6</sup> Indawat na din solat sin ari ed Israel yan siya nay kanan din solat: “Nay di solat ay mangipaammo ay inbaak nan si Naaman ay mansilsilbi en sak-enta agasam din sakit di kodil na.”

<sup>7</sup> Idi binasan din ari ed Israel din solat, kabisngit sin bado na yan kanana, “Apay nga inbaan san ari ed Syria nan kaeegyat di sakit di kodil na yan kanana en agasak? Ay Diyosak aya ta kabaalak ay mamse ya manago kasin? Gandat ay man-an-anap si pangapoana ay omibaw.”

\* **5:5** Nasurok ay 32 ay kilo di esa ay talento ay palata, isonga din intakin Naaman ay palata et emey ay 340 ay kilo.

<sup>8</sup> Idi dinngen Eliseo, ay mamadton Diyos, ay siya na di napasamak, nan-ibaa si nangibaga sin ari, “Apay nga binisngit mo din badom? Ibaam din lalaki ay sana en sak-en ta maammoana ay waday pankalkalian Diyos isnan Israel.”

<sup>9</sup> Et siya di, nanlogan da Naaman sin kalisa na ay inmey sin beey Eliseo et sinmaldeng da sin kad-an di segpan. <sup>10</sup> Waday inbaan Eliseo ay nangibaga en Naaman, “En ka man-ames si mamin pito sin ginawang ay Jordan et maagasan din kodil mo ya malinisan.”

<sup>11</sup> Ngem palaloy bonget Naaman ay kinmaan yan kanana, “Inpagarup ko ay en omabat ya mankararag en Yahweh ay Diyos na, asi nan iwasawas din takkay na sin patag di sakit ko ta maagasan! <sup>12</sup> Ay baken ayan nalinlinis di danom ed Abana ya Farfar ay ginawang ed Damascus mo din amin ay danom isnan Israel? Ay adiak malinisan mo say pan-amsak?”

<sup>13</sup> Ngem inmey sin kad-ana din baa na yan kanan da, “Mo naligat koma di ipaamag din mamadton sik-a, ay adim ayan amagen? Ay sino od abey adi kan pangamagan issan kanana en ‘Man-ames ka ta dadlon maagasan din kodil mo?’” <sup>14</sup> Et tinongpal Naaman din inbagan di mamadton Diyos. Nanballalong sin ginawang ay Jordan et en nantab-en sidi si namin pito. Pag maitaoli din sigod ay kodil na yan nalinis ay kaman kodil di moyang.

<sup>15</sup> Nantaolis sisya ya din amin ay kinoyog na sin kad-an Eliseo. En da pinmika sin sangoanana yan kanana, “Ed wani yan inammoak ay magay odom ay Diyos isnan intiro ay lobong mo adi et anggoy din Diyos di Israel. Pangaasim koma, apo, ta awatem nan isagot ko.”

<sup>16</sup> Ngem kanan din mamadto ay nanongbat, “Isapatak en Diyos ay matmatagos eng-ggana ay pansilbilbiak ay maga polos di awatek.” Ipilit Naaman ngem sinigaana.

<sup>17</sup> Kanan Naaman, “Mo sigaam, ipalobos mo kod ay isaak di kaad-adon di lota ay kabaelan di doway ay kabayo ay kalgaen,† tan manlogi ed wani, maga di idaton ko ay mapooan ya odom ay datdaton mo baken si Diyos di pangidatonak. <sup>18</sup> Ngem sapay koma ta pomakawan si Diyos mo makisgepak sin ari mi ay apok sin timplon Rimmon ay diyos mi ya makidokmogak en sisya sin sangoanan Rimmon.”

<sup>19</sup> “Somaa ka ay natalna di nemnem mo,” kanan Elias.

### *Din Dosan Gehazi*

Siya di, nanlobwat da Naaman ay somaa. Adi da onay inmaddawi <sup>20</sup> yan kanan Gehazi ay baan Eliseo sin nemnem na, “Palalo di kinaanos din apok sin taga-Syria ay doy. Adi na et inawat din idawdawat na. Isapatak en Diyos ay apayawek daida ta enak mankedaw.” <sup>21</sup> Et inapayaw Gehazi da Naaman.

Idi tinamang Naaman sisya ay managtagtag ay omasag-en, kadisaag sin kalisa na et inabat na yan kanana, “Sinoy napasamak?”

<sup>22</sup> Kanan Gehazi, “Maga, ngem inmibaa din apok tan waday dinmateng ay doway ay mimbro sin grupon di mamadto ay napo sin kadondontogan ed Efraim. Pangaasim kod ta idawtam daida si esay talento ay palata ya doway paris ay bado.”

<sup>23</sup> Kanan Naaman, “Pangaasim ta alaem nan doway ay talento.” Inpilit Naaman et inpeey na si doway ay sako din doway ay talento ay palata ya doway paris ay bado. Inpaga-ena si doway ay baa na et in-on-ona da en Gehazi. <sup>24</sup> Idi domateng si Gehazi sin bilig ay kad-an di beey da en Eliseo, ina na sin doway ay baa din in-genan da et indolina sin beey, pag nan ibaas daida ay mantaoli.

<sup>25</sup> Makdeng pay di, inmey sin kad-an Eliseo ay apo na. “Gehazi, intoy inmeyam?” kanan Eliseo yan kanan Gehazi ay nanongbat, “Maga met di inmeyak, apo.”

† 5:17 Kanan Naaman en adi mabalin ay dayawenas Yahweh ay Diyos di Israelita mo magay isaa na ay lota ay napo ed Israel. Tan din pannemnem da ed idi, din mabalin anggoy ay pandaydayawan da si diyos da et din daga ay okan din diyos ay sana.

<sup>26</sup> Ngem kanan Eliseo, “Inilak sin nemnem ko din nandisaagan di lalaki sin kalisa na ay en nangabat en sik-a. Baken kosto ay timpo ed wani ay pangaan si pilak ono pangawatan si bado, daga ay namolaan si olivo ya obas, animal ya baa. <sup>27</sup> Ed wani, komapet si eng-enggana en sik-a ya sin polim din sakit Naaman.” Idi kinmaan si Gehazi sin kad-an Eliseo, kinapet di kaeegyat ay sakit di kodil et kinmilakilat din kodil na ay kaman andap.

## 6

### *Din Wasay ay Tinmay-apew* (6:1-7)

<sup>1</sup> Sin namingsan, kanan din grupon di mamadto en Eliseo, “Palalo ay nalipit nan pakibebbeeyan min sik-a. <sup>2</sup> Palobosam kod dakami ay emey ed Jordan ta en kami manpoyo si sag-eesa ay kaiw ay iimag takos beey.”

Kanan Eliseo, “Aw a, emey kayo.” <sup>3</sup> Nanpakaasi di esa en makiey si Eliseo et nakiey en daida. <sup>4</sup> Inmey da ed Jordan et nilogian da ay nanpoyos kaiw.

<sup>5</sup> Idi man-getgetad din esa, nalokmos din wasay et nag-as sin posong, isonga kanana, “Apo, ay ta et na! Intoy iyat ko pay yan owat kon binolod?”

<sup>6</sup> Kanan Eliseo, “Intoy nag-asana?” Idi initdon din lalaki, nanpoto si Eliseo si kitkittoy ay pingin di kaiw ay intep-a na sin posong yan pag et tomay-apew din wasay.

<sup>7</sup> “Alaem!” kanan Eliseo et inan din lalaki.

### *Din Nangodaban Diyos Si Sosoldado Ay Taga-Syria* (6:8-23)

<sup>8</sup> Sin doy ay timpo, ginobat din ari ed Syria din Israelita. Nakikali sin oopisyal na et pinili na din ili ay en da gobaten. <sup>9</sup> Ngem nan-ibaas Eliseo si en mangidadaan sin ari ed Israel ay bantayan da koma din lugar ay doy tan planon din taga-Syria ay en gobaten. <sup>10</sup> Isonga inbaan din ari ed Israel di sosoldado ta gowardiyaan da di ay lugar. Namin piga ay napasamak di.

<sup>11</sup> Palalo di bonget din ari ed Syria, isonga inayagana din oopisyal na yan kanana, “Sino en dakayo di manglilipot ay nan-isodsod sin ari ed Israel?”

<sup>12</sup> Kanan di esa, “Apo ari, maga en dakami ngem si Eliseo ay mamadto ed Israel di mangibagbaga sin ari, olay pay din ibagam sin oneg di kowartom.”

<sup>13</sup> Kanan din ari, “En kayo anapen di kad-ana ta man-ibaaak si en manpap en sisya.” Wada di nangibaga en wadad Dotan <sup>14</sup> et nan-ibaa si ad-ado ay soldado ay nangabayoy ya nanlogan si kalisa ay para gobat. Labi di inmeyan da et nilikob da din ili.

<sup>15</sup> Nasapa ay binmangon sin kabigatana din baan Eliseo. Idi bomala, inila na di ad-ado ay sosoldado pati din nangakabayoy ya nangakalisa ay nanglikob sin ili. Kanana en Eliseo, “Apo, inayan et na! Sino pay di amagen ta?”

<sup>16</sup> Kanan din mamadto, “Adi ka emegyat tan ad-ad-ado di gait ta mo si daida.” <sup>17</sup> Pag nan kanan ay nankararag, “Sik-a ay Yahweh, bokatam kod din mata na ta ilaena.” Binokatan Diyos din mata na et inila na ay napno din dodontog si omap-apoy ay kabayoy ya kalisa ay para gobat ay nanglikob en Eliseo.

<sup>18</sup> Idi sinmag-en din kalaban da, kanan Eliseo ay nankararag, “Apo Yahweh, godabem kod da nan ipogaw ay nay.” Pinatgan Diyos din kararag Eliseo et ginodab nas daida.

<sup>19</sup> Idi siya di, inmey si Eliseo sin kad-an da yan kanana, “Baken sinay di danan ya ili ay kad-an din an-anapen yo. Omonod kayon sak-en ta itdok di kad-ana.” Et inpango nas daida ed Samaria.\*

\* **6:19** Ed Samaria di kapital di Israel. Naaladan di ay siyodad ay kad-an di ad-adoy soldado ay Israelita.



<sup>20</sup> Idi enggay sinenggep da sin siyodad, kanan Eliseo ay nankararag, “Yahweh, bokatam kod din mata da.” Binokatan Diyos din mata da et idi manmokilang da, kambaw wada da sin oneg di alad ed Samaria!

<sup>21</sup> Idi inilan din ari ed Israel daida, kanana en Eliseo, “Apo, ay peslek daida? Ay mayat mo peslek daida?”

<sup>22</sup> Ngem kanan Eliseo, “Adi yon pespeslen. Olay din depapen yo sin gobatan et adi yon peslen. Agpos et mo idawtan yos daida si kanen ya inomen da ta asi da mantaoli sin apo da.” <sup>23</sup> Siya et di inpaisagaman din ari di ad-ado ay makan et idi makakan ya makainom da, inbaa nas daida ay mantaoli sin apo da. Et say nangisaldengan din gugrupon di soldado ay taga-Syria ay en mamalpaligat sin Israelita.

### *Din Nanlikoban Da Benhadad Ed Samaria*

Idi inmey di pigay tawen, en nakigobat da Benhadad ay ari ed Syria ed Israel et linikob da din siyodad ay Samaria. Naabos di naidodolin ay makan et palalo ay nadagdagaangan din omili. Gapo sin palalo ay dagaang da, wada day odom ay babai ay namse ya nangisida sin mismo ay anak da.

Idi siya di, kanan Eliseo en Joram ay ari ed Israel en bigla ay ipasaldeng Diyos din betil. Sin labi ay doy, inpadngen Diyos sin sosoldado ay taga-Syria di ngalawngaw di ad-aad-ado ay soldado ay omas-asag-en. Kanan da en din dinnge da et din sosoldado ay Heteo ya taga-Egipto ay linagboan di Israelita ay en mangobat en daida, isonga kataynan da sin tolda ya am-in ay sanikwa da et linmayaw da ay somaa. Kambaw baken sosoldado di dinnge da mo adi et sinsinan ngalawngaw ay inpadngen Diyos en daida. Siya di, naisalakan din omili ed Samaria et makabala da kasin ay en manganap si kanen da. (6:24–7:20)

24 25 26 27 28 29 30 31 32 33

## 7

1 2 3 4 5 6 7 8 9 10 11 12 13 14 15 16 17 18 19 20

### *Din Nanongpalan Jehu Sin Inpadton Elias Ed Idi*

Sin nanturturayan Ari Joram ed Israel, dowa ay ari di nanturay ed Juda, si Jehoram ya si Ahazias ay anak na ay naisokat en sisya. Lawa di inamag da ay dowa sin pangilan Diyos. Sin timpon da Joram en Ahazias, inbaan Eliseo di gait na ay mamadto ta ena dotokan si Jehu ay ari ed Israel. Sin nangdotokana en sisya, binilina abe ta peslena am-in ay pamilyan Ahab ta maibaes din nateyan di ad-ado ay mamadton Diyos ay pinse da en Jezebel. Tinongpal Jehu din naibilin en sisya. Pinse nas da Joram ay ari ed Israel ya si Ahazias ay ari ed Juda, pati si Jezebel ay inan Joram. Inpapse na abe am-in din nabay-an ay poli ya toton-od Ahab ay say natongpalan din inpaipadton Diyos en Elias. Pag nan ipaayag am-in din mamadto ya papadin Baal ya am-in din mandaydayaw en sisya ta matopog da sin dakdake ay timplon Baal, et inpapse nas daida am-in. Pag nan bilinen din sosoldado na ta dadaelen da din timplon Baal, et tinongpal da. Nanbalin ay pan-isboan, et say pangos-osalan di ipogaw engganad wani. Say inamag Jehu dadi ay nangipasaldeng sin panaydayawan di ipogaw en Baal, ngem adi na inpasaldeng din panaydayawan da sin dowa ay sinan baka ay naames si balitok ay insaad Jeroboam ed Betel ya ed Dan. Dowanpo ya wao ay tawen di nanturayan Jehu ed Israel. (8:16–10:36)

## 8

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29

## 9

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37

**10**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36

*Din Kinalawan Atalia Ya Kinasiged Joas*

Idi naammoan Atalia ay inan Ahazias ay natey sisya, ipapse na koma am-in din pamilyan di anak na ay maisokat koma ay man-ari. Ngem waday nangilayaw en Joas ay anak Ahazias et intabonas sisya ya din manpasoso en sisya sin esa ay kowarto sin Timplo. Enem ay tawen di nantean das di.

Sin maikapito ay tawen, inpabalan Jehoyada ay kangatoan ay padi si Joas et inpaammo na ay sisya din kosto ay ari. Inbilin aben Jehoyada ay peslen din papangolon di soldado si Atalia et tinongpal da. Pito ay tawen Joas sin nanlogiana ay manturay ed Juda. Siged di inamag na sin pangilan Diyos et inpaiamag na din nadadael sin Timplo na. Ngem idi nanturay si opatapolo ay tawen, pinsen di doway ay opisyal na et naisokat ay ari si Amazias ay anak na. (11:1–12:21)

**11**

1 2 3 4 5 6 7 8 9 10 11 12 13 14 15 16 17 18 19 20 21

**12**

1 2 3 4 5 6 7 8 9 10 11 12 13 14 15 16 17 18 19 20 21

**13**

1 2 3 4 5 6 7 8 9 10 11 12 13

*Din Nateyan Eliseo  
(13:14-21)*

<sup>14</sup> Nansakit si Eliseo si nakaro yan idi dandani ay matey, en inilan Jehoas ay ari ed Israel. Nan-oga din ari yan kanana, “Ay amak, ay amak! Sik-a di napigsa ay nanalsalagnib isnan Israel.”

<sup>15</sup> Kanan Eliseo ay nangibilin en sisya, “Man-a ka si pana ya bala na.” Nan-a si Jehoas, <sup>16</sup> yan binilin Eliseo ay binatang din pana et tinongpal na yan kinapay Eliseo din takkay na. <sup>17</sup> Binilin Eliseo ay bokatana din tawa ay naisagang ed Syria ta ipana na din iingenana et say inyat na tet-ewa. Pag kanan Eliseo, “Sik-a di maiarig si panan Diyos ay pangabak na sin taga-Syria. Gobatem to daida ed Afek enggana ay dadlon kan abaken daida.”

<sup>18</sup> Idi makdeng di, inbilin Eliseo ay alaena din odom ay pana ta ipana na sin lota. Namitlo ay pinanan din ari din lota yan pag somaldeng. <sup>19</sup> Manbonget et si Eliseo yan kanana, “Pinanam koma si namin lima ono namin enem ta say dadlon mon abaken din taga-Syria. Ngem ed wani, namin tolo anggoy ay abakem daida.”

<sup>20</sup> Pag matey si Eliseo et naiponpon.

Idi siya di, tinawtawen ay gobaten din Moabita din Israelita. <sup>21</sup> Sin namingsan, waday en nangiponpon si minatay da. Inila da et di bonggoy di tollisan ay Moabita yan kaitep-a da sin bangkay sin naiponponan Eliseo pag dan katagtag. Idi kosto ay naigiwit din bangkay sin tong-an Eliseo, natago et din natey ay sana et pinmika. <sup>22 23 24 25</sup>

*Din Nansosokat Ay Ari Enggana Sin Naabakan Di Samaria*

Sin inmon-onod ay tawen, ad-ado di ari ay nansosokat ay nanturay ed Israel ya ed Juda. Siged di ogalin di odom, lawa di odom. Din naodi ay nangituray ed Israel et si Hoshea. (14:1–16:20)

**14**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29

**15**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38

**16**

1 2 3 4 5 6 7 8 9 10 11 12 13 14 15 16 17 18 19 20

**17***Din Naabakan Di Samaria  
(17:1-7a,13-19)*

<sup>1</sup> Sin maikasinpo ya dow a ay tawen ay nanturayan Ahaz ay ari ed Juda, naisaad si Hoshea ay anak Ela ay man-ari ed Israel. Ed Samaria di nangisaadan dan sisya ay ari et nanturay si siyam ay tawen. <sup>2</sup> Nanbasol en Diyos ngem baken kaman din inam-amag di aari ed Israel ay sinokatana. <sup>3</sup> Ginobat Salmaneser ay ari ed Assyria et sinmoko si Hoshea, isonga tinawen ay nanbaybayad si bowis en sisya. <sup>4</sup> Ngem sin namingsan, waday inbaan Hoshea en So ay ari ed Egipto ta manpatolong yan insaldeng na abe ay manbayad si tinawtawen ay bowis. Idi inammoan Salmaneser, inpadpap ya inpaibalod nas sisya. <sup>5</sup> Pag nan gobaten din intiro ay Israel et nilikob da ed Samaria si tolo ay tawen. <sup>6</sup> Sin maikasiyam ay tawen di nanturayan Hoshea, enggay sinakop din arin di Assyria\* ed Samaria et inkoyog na ed Assyria din Israelita ay balod na. Nanteenas daida ed Hala, din odom sin asag-en di ginawang ay Habor ay sakop di Gozan yan din odom sin il-ili ed Media.

<sup>7a</sup> Napasamak amin dana gapo ta nanbasol din Israelita en Yahweh ay Diyos da. <sup>8</sup> <sup>9</sup> <sup>10</sup> <sup>11</sup> <sup>12</sup> <sup>13</sup> Inpanemnem Diyos din linteg na sin man-ili ed Israel ya Juda ya binagba-gaanas daida babaen sin amin ay mamadto ya pankalkaliana ta dokogan da din lawa ay am-amagen da ya tongpalen da amin din linteg ay inbilina sin ap-apo da. <sup>14</sup> Ngem adi dan ikaskaso tan kinmenteg di nemnem da ay kaman din ap-apo da ay adi nantalek en Yahweh ay Diyos da. <sup>15</sup> Adi dan tinongpal din bilbilina ya din intolag na sin ap-apo da yan adi da aben inkaskaso din pamagbaga na. Nandaydayaw da si didiyosen ay magay silsilbi na et nanbalin da abes magay silsilbi na. Inonodan da din am-amagen di odom ay nasyon ay nandinmang olay mo inbilin Diyos ay adi da amagen di.

<sup>16</sup> Dinokogan da amin din bilbilin Yahweh ay Diyos da et nan-amag da si dow a ay sinan baka ay nam-es si balitok ay dinaydayaw da ya nantood da si posti ay pangidaydayaw da en Asera. Nandaydayaw da sin tatalaw yan dinayaw da abe si Baal. <sup>17</sup> Indaton da din an-ak da ay mapooan dowan da et mansip-ok, man-gengey ya manpontos, et enggay inmongsan dan nemnem da ay nangam-amag si lawa sin pangilan Diyos, isonga inpabonget das sisya. <sup>18</sup> Palalo di bonget Diyos sin Israelita et inpakaanas daida sin sangoanana. Say nabay-an din tribun Juda, <sup>19</sup> ngem olay din tribun Juda yan adi dan tinongpal din bilina, tan inonodan da din ogali ay inonodan di Israelita. <sup>20</sup> <sup>21</sup> <sup>22</sup> <sup>23</sup> <sup>24</sup> <sup>25</sup> <sup>26</sup> <sup>27</sup> <sup>28</sup> <sup>29</sup> <sup>30</sup> <sup>31</sup> <sup>32</sup> <sup>33</sup> <sup>34</sup> <sup>35</sup> <sup>36</sup> <sup>37</sup> <sup>38</sup> <sup>39</sup> <sup>40</sup> <sup>41</sup>

**18***Si Ari Hezekias  
(18:1-8)*

<sup>1</sup> Sin maikatlo ay tawen ay nanturayan Hoshea ay anak Ela ay ari ed Israel, nanlogi ay nanturay ed Juda si Hezekias ay anak Ahaz. <sup>2</sup> Mantawen si dowanpo ya lima sin nanbalinana ay ari yan nanturay ed Jerusalem si dowanpo ya siyam ay tawen. Si Abia ay anak Zekarias di si ina na. <sup>3</sup> Din siged sin pangilan Diyos di inam-amag na ay kaman si apo na ay si David. <sup>4</sup> Dinadael na din pandaydayawan sin dodontog, ginmek na din tinoood da ay bato ay inbilang da ay inayan, ya pinoyo na din posti

\* **17:6** Kanan di odom en din arin di Assyria sin nakdeng an di gobat ed Samaria et si Sargon II ay naisokat en Salmaneser.

ay pangidaydayaw da en Asera. Minekmek na abe din bronsi ay sinan eweg ay inamag Moses ay kanan da en Nehustan, tan enggay et ay pan-idatonan di ipogaw si ipoo da ay insinso. <sup>5</sup> Nantalek si Hezekias en Yahweh ay Diyos di Israelita. Magay makaiso en sisya sin aari ay namangpango ya naisokat en sisya. <sup>6</sup> Adi polos nankeykeyat mo adi et intoltoloy na ay nantalek ya nantongpal sin bilbilin ay inpaammon Diyos en Moses. <sup>7</sup> Kinadkadwan Diyos sisya et kosto amin di nantongpalan di inam-amag na. Kinontra na din ari ed Assyria et sinigaana ay paituray en sisya. <sup>8</sup> Inabak na abe din il-ilin di Filisteo, olay kakitkittoyan ay sitio ya siya abe din naaladan ay siyodad, engganad Gaza ya din nandinmang ay il-ili. <sup>9 10 11 12</sup>

*Din Nangobatan Sennakerib Ed Juda*  
(18:13-16,17a,28-30,33)

<sup>13</sup> Sin maikasinpo ya opat ay tawen ay nanturayan Hezekias, en ginobat Sennakerib ay ari ed Assyria am-in din naaladan ay siyodad ed Juda et inabak na. <sup>14</sup> Isonga sin kawada na ed Lakis inpatolod Hezekias di solat en sisya ay kanana, “Baken baw kayman kosto di inyat ko. Pangaasim ta komaan kayo isnan ilik ta bayadak olay sino ay ibagam.” Din insongbat Sennakerib et manbayad komas Hezekias si sinpo ay libo ay kilo ay palata ya sinlibo ay kilo ay balitok. <sup>15</sup> Isonga inpaw-it Hezekias am-in din palata ay naidodolin sin Timplon Diyos ya sin naidodolinan di kinabaknang sin palasyo. <sup>16</sup> Kinaana abe din balitok ay inpakpak na sin eneb ya hamban di pantew sin Timplon Diyos et inpatolod na abe en Sennakerib.

<sup>17a</sup> Idi siya di, inbaan Sennakerib din tolo ay kangatoan ay opisyal di sosoldado na ay emey sin kad-an Hezekias ed Jerusalem et inkoyog da di dakdake ay bonggoy di sosoldado ay nanlobwat ed Lakis. <sup>18 19 20 21 22 23 24 25 26 27 28</sup> Pinmika din komander yan kanana ay nangibogaw sin kalin di Hebreo, “Dengngen yo nan inbagan di madaydayaw ay ari ed Assyria. <sup>29</sup> Kanana, ‘Siliban yo ta adi ietekan Hezekias si dakayo, tan adi nan kabaelan ay isalakan dakayo. <sup>30</sup> Adi kayo aben maietekan mo awisenas dakayo ay mantalek en Diyos ya mo kanana en isalakan Diyos dakayo et adi na ipalobos ay abakek si dakayo. <sup>31 32 33</sup> Ay siya mo waday diyos di olay sino ay nasyon ay nangisalakan si ipogaw na ta say adiak makaabak en daida?’ ” <sup>34 35 36 37</sup>

## 19

*Din Pamagbagan Isaias*  
(19:1-7)

<sup>1</sup> Idi dinngen Ari Hezekias di, kabisngit sin bado na ay mangipaila sin sakit di nemnem na, pag manbado si makelsang ay sako yan inmey sin Timplo. <sup>2</sup> Inbaa nas da Eliakim ay pangolon di mangas-asikaso sin palasyo, si Sebna ay sekretaryon di palasyo ya din papangolon di papadi, et nanbado das sako ay inmey sin mamadto ay si Isaias ay anak Amoz. <sup>3</sup> Kanan da en sisya, “Siya na di kanan Hezekias: ‘Timpon di ligat ed wani ay agew, madosdosa ya maibabain tako. Kaman din dandani ay bomalaan di anak ngem magay pigsan din ina ay mangipabala. <sup>4</sup> Inbaan din ari ed Assyria din komander di sosoldado na yan sapay koma ta dinngen Yahweh ay Diyos mo din inbagbaga na ay manglaslasoy en sisya ay matmatago ay Diyos ta dosaena begew isdi ay kinali na. Isonga ikararagam koma din nabay-an ay kailian tako.’ ”

<sup>5</sup> Idi dinmateng din oopisyal ay inbaan Ari Hezekias yan dinngen Isaias din inbaga da, <sup>6</sup> kanana en daida, “Ibaga yo sin apo yo ay siya na di inbagan Diyos: ‘Adi kan emegyat sin inbagan di baan di ari ed Assyria ay manglaslasoy en sak-en. <sup>7</sup> Iturong kon to di nemnem na ta say mo dengngena di baken kosto ay ipadamag di esa ay baa na, somaa, et isdi ay ipapsek si kampilan.’ ”

Laton ay nadamag Hezekias din inbagan Isaias, ngem asi et wada di solat ay inpaw-it Sennakerib ay pangeg-egyat nan sisya ya din kakailiana ed Jerusalem. (19:8-13)

8 9 10 11 12 13

*Din Kararag Hezekias*  
(19:14-19)

<sup>14</sup>Idi inawat Hezekias din solat ay naipaw-it en sisya, binasa na, pag emey sin Timplon Diyos. Inoklag na din solat sin sangoanan Diyos, <sup>15</sup>yan kanana ay nankararag, “Sik-a ay Yahweh ay Diyos mi ay Israelita, wada ka ay tinmotokdo sin tronom sin nan-gawaan di dow a ay kerubim. Sik-a et anggoy di Diyos ay makaammo sin am-in ay nasyon isnan daga, tan sik-a di namarsua sin daga ya am-in ay wada ed daya. <sup>16</sup>Ed wani, Apo, ilaem kod din mapaspasamak en dakami. Dengngem abe din inbagan Sennakerib ay manglaslasoy en sik-a ay matmatago ay Diyos. <sup>17</sup>Tet-ewa iman ay begew sin aari ed Syria, naabosan di odom ay nasyon si omili ya nadadael di daga da. <sup>18</sup>Din aari ay nay et inwasit da abe din didiyosen da sin apoy et napooan da, tan baken dan tet-ewa ay diyos mo adi et owat bato ya kaiw ay inamag di ipogaw si sinan didiyos. <sup>19</sup>Isonga Yahweh ay Diyos mi, pangaasim ta isalakan mos dakami sin panakabalin nan ari ay nay, ta say pangammoan din omili sin am-in ay nasyon isnan daga ay sik-a et anggoy ay Yahweh di Diyos.”

*Din Inpadton Isaias*  
(19:20,32-37)

<sup>20</sup>Idi siya di, nan-ibaa si Isaias ay anak Amoz si en nangibaga en Hezekias ay dinngen Yahweh ay Diyos di Israelita din kararag na maipanggep en Sennakerib ay ari ed Assyria <sup>21 22 23 24 25 26 27 28 29 30 31 32</sup> et siya na di inbagan Diyos maipanggep en sisya: “Adi makasgep sin siyodad ay nay yan magay pana ay iturong nas na. Adi omasag-en di sosoldado na ay en mangobat. Maga abe di mangamag si somakyaban da ay manadael sin alad di siyodad. <sup>33</sup>Adi polos makasgep isnan ili, tan awni et mantaoli sin nandanana ay inmali. Sak-en si Diyos ay nangibaga. <sup>34</sup>Salaknibak ya isalakan ko din siyodad ay nay ta say madayawak ya matongpal din inkarik en David ay baik.”

<sup>35</sup>Sin labi ay doy, waday anghel Diyos ay inmey sin kampon di taga-Assyria yan pinse na di 185,000 ay sosoldado da. Idi bomangon din gagait da sin napat-aana, inila da din am-in ay natey. <sup>36</sup>Siya di, tinopin da Sennakerib ay ari ed Assyria din tolda da et nantaoli da ay en nantee ed Nineve.

<sup>37</sup>Sin namingsan ay wadas sisya ay mandaydayaw sin timplon Nisrok ay diyos na, pinsen da Adrammelek en Sarezer ay an-ak na et pag dan lomayaw ay emey ed Ararat. Et si Esarhaddon ay esa ay anak na di naisokat en sisya ay nan-ari.

## 20

*Din Nansakitan Ya Nailatonan Hezekias*

<sup>1</sup>Sin doy ay timpo, nansakit si Ari Hezekias yan enggay kaman matey. En inilan din mamadto ay si Isaias ay anak Amoz yan kananan sisya, “Inbilin Diyos en olnosem di amin sin beey mo tan adi ka mailatonan, et matey ka.”

<sup>2</sup>Siya di, sinagong Hezekias din dingding yan kanana ay nankararag, “Sik-a ay Diyos, nemnemem koma ay inpapasnek ko ay mansilbi en sik-a ya inpakat ko di amin ay kabaalak ay nangamag si kosto sin pangilam.” <sup>3</sup>Pag palalo ay man-anog-og.

<sup>4</sup>Tinaynan Isaias din ari, ngem idi wada pay laeng sin gawan di bel-ayan di palasyo yan kanan Diyos en sisya en <sup>5</sup>mantaoli sin kad-an Hezekias ay mangiturturay sin ipogaw Diyos ta ibaga na en sisya, “Siya na di inbagan Yahweh ay say Diyos ay dinaydayaw David ay apom: ‘Dinngek din kararag mo ya inilak din nan-og-ogaam, et agasak sik-a. Sin maikatlo ay agew manipod ed wani, emey ka sin Timplo. <sup>6</sup>Paandoek



pay si sinpo ya lima ay tawen di biyag mo ya isalakan kos sik-a ya din siyodad ay nay sin panakabalin di ari ed Assyria. Salaknibak din siyodad ay nay ta say madayawak ya matongpal din inkarik en David ay bag-en ko.’ ”

<sup>7</sup> Makdeng pay di, binilin Isaias din baa ay kakoyog di ari ta tapalan da si igos din boyoy na. Tinongpal da et naagasan.

<sup>8</sup> Sin daan pay laeng maagasan, kanan Hezekias ay nandamag en Isaias, “Into ngin di pangammoak ay agasan Diyos sak-en et makaeyak sin Timplo sin maikatlo ay agew?”

<sup>9</sup> Kanan Isaias, “Siya na di sinyal ay ipailan Diyos ay pangammoam ay tongpalena din inkari na: Piliem di laydem mo manballalong si sinpo ay paskitan din alidong sin pan-orasan ono mantikid si sinpo ay paskitan.”\*

<sup>10</sup> Kanan Hezekias, “Baken nakaskasdaaw mo manballalong si sinpo ay paskitan, isonga laydek ay mantikid.”

<sup>11</sup> Idi siya di, nankararag si Isaias et inpatikid Diyos din alidong si sinpo ay paskitan manipod sin gedeng na sin agdan ay in-amag Ari Ahaz.

### *Din Inpadton Isaias Ay Maiey Din Kinabaknang Hezekias Ed Babilonia*

<sup>12</sup> Sin timpo ay doy, nadamag Merodak Baladan ay ari ed Babilonia ay anak Baladan ay nansakit ya nailatonan si Hezekias, isonga inbaa na di mangiey si solat ya sagot en sisya. <sup>13</sup> Sinangailin Hezekias din naibaa et inpaila na en daida din am-in ay indodolina ay kinabaknang ay siya da din palata ya balitok, nankinalasi ay bangbanglo ya nangina ay balsamo, din armas ya salida na, ya am-in di odom ay gameng na. Magay adi na inpaila en daida sin am-in ay kalasin di kinabaknang na ay wada sin palasyo ya ili ay panturayana.

<sup>14</sup> Idi siya di, inmey din mamadto ay si Isaias en Hezekias yan kanana ay nandamag, “Intoy napoan dadi ay ipogaw, ya sinoy kanan da en sik-a?”

“Napo da sin addawi ay ili ay Babilonia,” kanan Hezekias ay nanongbat.

<sup>15</sup> “Yan sinoy inila da sin palasyom?” kanan Isaias.

“Inila da am-in. Maga di kinabaknang ko ay adiak inpaila en daida,” insongbat Hezekias.

<sup>16</sup> Pag kanan Isaias, “Siya na di ipaammon Diyos en sik-a: <sup>17</sup> ‘Awni man et domteng di timpo ay maiey ed Babilonia am-in din wada sin palasyom pati am-in abe ay indodolin di aap-om engganad wani. Maga di mabay-an. <sup>18</sup> Di odom abe ay polim et maiey da ed Babilonia ta mansilbi da sin palasyon di ari.’ ”

<sup>19</sup> Din pangawat Hezekias isnan inpadton Isaias et mayat ya natalna di kasasaad di panturayana engganans tongpal biyag na, isonga kanana, “Mayat di inpaibagan Diyos en sik-a.”

<sup>20</sup> Am-in di odom ay inam-amag Hezekias ay kaman din toled na ay makigobat, din nangamagana si tangkin di danom ya din inosok na ay kanal di danom ay emey sin siyodad et naisolat da sin libro ay kaistoryaan di biyag di aari ed Juda. <sup>21</sup> Idi matey si Hezekias, din anak na ay si Manasses di naisokat ay nan-ari.

## 21

### *Din Lawa Ay Ogalin Da Ari Manasses En Amon (21:1-6,10-15)*

<sup>1</sup> Sinpo ya dow a di tawen Manasses sin naisaadana ay ari, et nanturay ed Jerusalem si limapolo ya lima ay tawen. Si Hefziba di ina na. <sup>2</sup> Lawa di inam-amag na sin pangilan Diyos, tan inon-onodana din kadodogis ya kalkaliget Diyos ay ogalin di nanasyon ay inpakaan Diyos sin daga ay sinakop din Israelita. <sup>3</sup> Insaad na kasin din pandaydayawan

\* **20:9** Din pan-orasan da ed idi et waday agdan ay kostokosto di amag na ta say mo komayang din agew, waday alidong ay manballalong sin paskitan di agdan. Mo bomaba din agew, mantikid abe din alidong sin paskitan.

sin dodontog ay dinadael Hezekias ay ama na. Wada abey inamag na ay altar ay pandaydayawan dan Baal ya sinabatana ay posti ay pangidaydayaw dan Asera ay kaman din inyat Ahab ay ari ed Israel. Nandokdokmog abe ay mandaydayaw sin katalatalaw. <sup>4</sup> Waday insaad na ay aaltar ay pandaydayawan da si sinan didiyos sin oneg di Timplon Diyos sin lugar ay inbagan Diyos ay panbeeyana ya pandaydayawan di ipogaw en sisya. <sup>5</sup> Sin doway ay lugar sin bel-ayan di Timplo, nan-amag abe si aaltar ay pan-ipoan das insinso ay pangidaydayawan da sin katalatalaw. <sup>6</sup> Peteg ay madagsen di basbasol na ay say binmongetan Diyos, tan indatona ay inpoo din mismo ay anak na. Manpontos, mankotom ya dowan aben manpasip-ok ya manpatolong si man-geyey. <sup>7 8 9</sup>

<sup>10</sup> Isonga inpaibagan Diyos sin mamadto ay mansilbilbi en sisya, <sup>11</sup> “Peteg ay kadodogis di inam-amag Manasses ay ari ed Juda. Addawi ay lawlawa di basbasol na mo din taga-Canaan ed idi. Begew abe sin ad-ado ay sinan didiyos ay dinaydayaw na, inpango na din taga-Juda ay manbasol. <sup>12</sup> Isonga sak-en ay Yahweh ay Diyos di Israelita et waday kaeegyay ay pasamak ay ipadateng ko ed Jerusalem ya sin kailili ed Juda ay kasngangan di mannge. <sup>13</sup> Dosaek ed Jerusalem ay kaman met laeng din inyat ko en da Ari Ahab ed Israel ya din poli na. Maabosan ed Jerusalem si omili ay kaman palato ay ponasan da pag dan baliktaden. <sup>14</sup> Din ipogaw ay mabay-an et taynak daida ta dadlon abaken di kalaban da ya itagtag da am-in ay kinabaknang da. <sup>15</sup> Amagek dana sin ipogaw ko, tan lawa di inam-amag da sin pangilak ay mangipabonget en sak-en manipod sin kinmaan di ap-apo da ed Egipto enggana ed wani.”

Idi natey si Manasses, naisokat si Amon ay anak na. Nanturay si Amon si doway ay tawen anggoy, pag et peslen di odom ay opisyal na, et naisokat si Josias ay anak na. (21:16-26)

16 17 18 19 20 21 22 23 24 25 26

## 22

### *Din Nantengan Da Sin Linteg Diyos* (22:1-2)

<sup>1</sup> Wao di tawen Josias sin naisaadana ay ari, et nanturay ed Jerusalem si tolonpo ya esa ay tawen. Say si ina na si Jedida ay anak Adayas ay taga-Bozkat. <sup>2</sup> Kosto di inamag na sin pangilan Diyos, tan tinadtadona si David ay apo na et inpapasnek na ay nansilbi en Diyos ay adi nasangsangaw.

Sin maika-18 ay tawen ay nanturayana, pinabaroana din amag di Timplon Diyos. Idi man-ob-obla da, waday dinteng da ay kopyan di linteg Diyos et en da inbasa en Josias. Sin nanngena sin naisolat isdi, kabisngit sin bado na begew sin sakit di nemnem na, tan say nangammoana ay adi baw inon-onodan din ap-apo na din bilbilin Diyos. Pag nan ibaa di en mandamag si esa ay mamadto mo sinoy ibagan Diyos. Kanan Diyos en dosaena din taga-Juda begew sin nanokogan dan sisya, ngem gapo ta pinatin Ari Josias din naisolat sin linteg Diyos ya inapababa nan nemnem na sin sangoanana, laton ay adi na edasan din dosa ay doy. (22:3-20)

3 4 5 6 7 8 9 10 11 12 13 14 15 16 17 18 19 20

## 23

### *Din Inam-amag Josias Ta Tongpalena Din Linteg Diyos* (23:1-3,21-27)

<sup>1</sup> Idi siya di, inpaayag Ari Josias am-in din papangolon di ipogaw ed Juda ya ed Jerusalem, <sup>2</sup> et nankokoyog da ay inmey sin Timplon Diyos. Nakiey abe din papadi ya mamadto ya am-in din man-ili ay nabibiteg ya siya abe din babaknang. Idi wada da ay mandengdenge, inbasa na am-in din naisolat sin Libron di Tolagan ay dinteng da sin Timplon Diyos. <sup>3</sup> Pag en pomika sin kad-an di postin di Timplo et inkari na en Diyos ay patienas sisya ya imongsana din am-in ay nemnem na ay mangonod sin linlinteg ya bilbilina ta say matongpal din intolag Diyos ay naisolat sin libro ay doy. Et pag ikarin din kaipoipogaw ay tongpalen da abe din intolag Diyos.

Idi makdeng di, inbilin Ari Josias ay ipabala da sin Timplo am-in din altar ya posti ya odom ay inos-osal da ed idi ay manaydayaw en Baal ta en da ipoo sin lasin di ili. Dinadael na abe din am-in ay pandaydayawan di ipogaw sin dodontog, pinoyo na din posti ay pangidaydayaw da en Asera ya pinse na din papadi ay nangipoppoo si insinso ay manaydayaw en Baal ya din katalatalaw. (23:4-20)

4 5 6 7 8 9 10 11 12 13 14 15 16 17 18 19 20

<sup>21</sup> Pag nan ibilin sin kaipoipogaw ay silibraran da din fiesta ay makwani en Nalabas ta say madayaw si Yahweh ay Diyos da ay kaman din naisolat sin Libron di Tolagan. <sup>22-23</sup> Naamag na ed Jerusalem sin maika-18 ay tawen ay nanturayan Ari Josias. Di inyat da ay nangsilibrar sin fiesta ay nay ay Nalabas et maga di kais-iso na sin timpon di olay sino ay ari ed Israel ya ed Juda manipod sin timpon di papangolo.

<sup>24</sup> Wada pay di odom ay inamag Josias. Inpakaana ed Jerusalem ya sin kailili ed Juda am-in ay manpontos ya mansip-ok, din sinan didiyos ya rebolto ay wada sin beey di ipogaw, ya olay sinoy odom ay inos-osal da ay kadodogis sin pangilan Diyos. Inamag na di ta say matongpal din bilbilin ay naisolat sin libro ay dinteng Hilkiyas ay kangatoan ay padi sin Timplon Diyos. <sup>25</sup> Magay makaiso en Josias sin aari ay namangpango ya naisokat en sisya ay nangimongsan sin am-in ay nemnem ya bikas na ay mansilbi en Diyos maibasar sin am-in ay naisolat sin linteg Moses.

<sup>26</sup> Ngem adi nabaew din palalo ay bonget Diyos sin man-ili ed Juda begew sin lawa ay inam-amag Manasses. <sup>27</sup> Isonga kanan Diyos, “Ipakaan ko din taga-Juda sin sangoanak ay kaman din inyat ko sin taga-Israel. Dokogak abe din pinilik ay siyodad ay Jerusalem ya din Timplo ay nay ay inbagak en panbeeyak.”

*Din Nateyan Josias Ya Din Naisokat En Sisya*  
(23:28-30,36a,37)

<sup>28</sup> Din odom ay inam-amag Josias et naisolat da sin libro ay kaistoryaan di biyag di aari ed Juda. <sup>29</sup> Idi ari pay laeng sisya, inpangon Ari Neco ed Egipto di ad-ado ay soldado ay en tomolong sin ari ed Assyria sin kad-an di ginawang ay Eufrates. Inmey da Josias ay en mangipasaldeng koma sin taga-Egipto, ngem idi nan-abat da ed Megiddo, pinse das sisya sin gobatan. <sup>30</sup> Inpalogan din kakoyog na din awak na si kalisa et insaa da ed Jerusalem, pag dan ipayag sin naiponponana ay sanikwa na. Et pag pilien din kaipoipogaw si Jehoahaz\* ay anak Josias ay maisokat en sisya, et sinoyatan dan toktok na si lana ay mangisaad en sisya ay ari.

Idi nanturay si Jehoahaz si tolo ay bowan et anggoy, en dinpap Ari Neco et inpabalod na ed Egipto. Pag nan isaad si Jehoyakim ay maikadwa ay anak Josias ay ari et inpilit na ay manbayad din man-ili ed Juda si nangato ay bowis. (23:31-35)

31 32 33 34 35

\* **23:30** Si Jehoahaz di maikap-at ay anak Josias.

<sup>36a</sup> Mantawen si Jehoyakim si dowanpo ya lima sin naisaadana ay ari, et nanturay ed Jerusalem si sinpo ya esa ay tawen. <sup>37</sup> Tinadona din inyat di ap-apo na ay nangam-amag si lawa sin pangilan Diyos.

## 24

### *Din Nanturayan Jehoyakim* (24:1-4,6,10-17,20)

<sup>1</sup> Sin timpo ay nanturturayan Jehoyakim, ginobat Nebukadnezzar ay ari ed Babilonia din ili ay Juda. Kapilitan ay nanpaituray si Jehoyakim en sisya si tolo ay tawen, ngem idi makdeng di yan kinontra nas sisya. <sup>2</sup> Isonga nan-ibaa si Diyos si ad-ado ay bonggoy di tollisan ay taga-Babilonia, Syria, Moab ya Ammon ay mangobat en Jehoyakim ta dadaelen da ed Juda ay kaman din inpaibagan Diyos sin mamadto ay baa na. <sup>3</sup> Inbilin Diyos ay mapasamak dana sin ipogaw ed Juda ta mapakaan da sin sangoanana gapo sin amin ay basbasol Ari Manasses, <sup>4</sup> pati din namseana si ad-aad-ado ay ipogaw ay magay basol da. Gapo sin nangiyatanas di, sigaan Diyos ay mamakawan en sisya. <sup>5</sup>

<sup>6</sup> Idi natey si Jehoyakim, naisokat ay nan-ari si Jehoyakin ay anak na. <sup>7 8 9 10</sup> Sin doy ay timpo, ginobat din oopisyal Nebukadnezzar ed Jerusalem et nilikob da. <sup>11</sup> Idi madama ay liklikoben da din ili, inmey si Nebukadnezzar ay mismo ed Jerusalem. <sup>12</sup> Sin maikawao ay tawen ay nanturayan Nebukadnezzar, sinmoko en sisya si Jehoyakin, si ina na, din baa na, din papangolon di sosoldado na ya oopisyal na, et nanbalinenas daida ay balod. <sup>13</sup> Inan Nebukadnezzar amin ay gameng sin Timplon Diyos ya sin palasyo ya din amin ay bonag ay balitok ay inam-amag Ari Solomon para sin Timplon Diyos et tinmet-ewa amin din inbagan Diyos. <sup>14-16</sup> Intakina ay balod ed Babilonia amin ay ipogaw ed Jerusalem ay waday kowinta na: si Jehoyakin, si ina na, din aas-awa na, am-in ay oopisyal ya mabigbig ay ipogaw, am-in ay sosoldado ay pito ay libo di kabibilang da, ya sinlibo ay karpintiro, manpanday ya nankalalaing ay man-amag si kompormi. Danay ay sinlibo et kabaelan da am-in ay makigobat. Di kabibilang da amin ay naitakin ed Babilonia yan sinpo ay libo. Say nataynan anggoy din kabibitegan sin ili. <sup>17</sup> Insokat Nebukadnezzar si Mattanias ay pangamaen Jehoyakin ay say man-ari ed Juda yan nginadanana si Zedekias. <sup>18 19 20</sup> Am-in dana ay napasamak sin man-ili ed Jerusalem ya Juda, namnamed din nangipakaan Diyos en daida sin sangoanana, et natongpal begew sin bonget Diyos en daida.

## 25

### *Din Naabakan Di Jerusalem* (25:1-12,21b)

<sup>1</sup> Sin pitsa 10 di maikasinpo ay bowan sin maikasiyam ay tawen ay nanturayan Zedekias, inmey si Nebukadnezzar ay ari ed Babilonia ya din amin ay sosoldado na ed Jerusalem. Nankampo da sin lasin di siyodad et nan-amag das somakyaban da sin nanniliked ta way iyat da ay manadael sin alad na. <sup>2</sup> Nilikob da din siyodad enggana sin maikasinpo ya esa ay tawen ay nanturayan Zedekias. <sup>3</sup> Sin pitsa 9 di maikap-at ay bowan, kinmaro din betil sin siyodad et enggay magay makan. <sup>4</sup> Sin agew ay doy, nilokawan din kalaban da din batog ay alad di siyodad. Idi nalabi, pag et lomayaw si Zedekias ya amin ay sosoldado na sin labi olay mo nililikob din taga-Babilonia si daida, tan nandan da sin liteb sin nan-gawaan di doway ay batog sin asag-en di garden di ari et tinmagtag da ay nanturong sin tanap ed Jordan. <sup>5</sup> Ngem inapayaw din taga-Babilonia si daida et indasan da sin tanap ed Jerico. Nansiasian din sosoldadon Zedekias et tinaynan das sisya, <sup>6</sup> isonga dinpap din taga-Babilonia sisya et in-ey da en Nebukadnezzar ed Ribla et isdi ay kineddenganas sisya. <sup>7</sup> Pinse da din lallalaki ay an-ak na sin sangoanana pag dan boldingan sisya. Kinadinaan da si bronsi et in-ey da ed Babilonia.

<sup>8</sup> Sin pitsa 7 di maikalima ay bowan, sin maika-19 ay tawen ay nanturayan Ari Nebukadnezzar ed Babilonia, inmey ed Jerusalem si Nebuzaradan ay komander di gowardian di ari. <sup>9</sup> Pinooana din Timplon Diyos, din palasyo ya amin ay importanti ay bebbeey isdi. <sup>10</sup> Binakas abe din sosoldado na din alad di siyodad. <sup>11</sup> Inpakaan Nebuzaradan ed Babilonia din amin ay ipogaw ay nataynan sin siyodad, din nanaynan sin kakailian da ta maitapi da sin taga-Babilonia, ya din man-ili abe sin away di siyodad. <sup>12</sup> Ngem binay-ana din kabibitegan ta daida di man-obla sin kaobasan ya papayew. <sup>13</sup> <sup>14</sup> <sup>15</sup> <sup>16</sup> <sup>17</sup> <sup>18</sup> <sup>19</sup> <sup>20</sup> <sup>21b</sup> Siya di din kaistoryaan di nanbalinan di taga-Juda ay balod sin addawi ay ili. <sup>22</sup> <sup>23</sup> <sup>24</sup> <sup>25</sup> <sup>26</sup> <sup>27</sup> <sup>28</sup> <sup>29</sup> <sup>30</sup>



# Omona Ay Cronicas

## Maipanggep Sin Omona Ya Maikadwa Ay Cronicas

Din olog di Cronicas et “naisolat ay naam-amag.” Din linaon din Omona ya Maikadwa ay Cronicas et din kasin naidad-atan di wada sin Omona ya Maikadwa ay Samuel ya Omona ya Maikadwa ay Libro Maipanggep Sin Aari. Gapo ta madtengan din is-istoryan di aari sin libro ay nay da, at-atik di versikulo ay naitapis na.

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52

### 2

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52

### 3

1 2 3 4 5 6 7 8 9 10 11 12 13 14 15 16 17 18 19 20 21 22 23 24

### 4

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43

### 5

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26

### 6

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52

### 7

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40

### 8

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40

### 9

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44

### 10

1 2 3 4 5 6 7 8 9 10 11 12 13 14

### 11

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47

### 12

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40

### 13

1 2 3 4 5 6 7 8 9 10 11 12 13 14

### 14

1 2 3 4 5 6 7 8 9 10 11 12 13 14 15 16 17

### 15

*Din Nangieyan Da Sin Baol Di Tolagan Ed Jerusalem  
(15:1-4,11-16; 16:1-2)*

<sup>1</sup> Inpaamag Ari David di bebbeey sin Siyodad David para en daida ay sinpamilya. Pag aben mansagana si pantean din Baol di Tolagan Diyos et in-amag na di tolda ay

kaidolinana. <sup>2</sup> Pag nan kanan, “Din Levita et anggoy di mabalin ay manggen sin Baol di Tolagan, tan daida di pinilin Diyos ay manggen ya mansilbi en sisya si eng-enggana.”

<sup>3</sup> Pag ipasinop David ed Jerusalem din am-in ay Israelita ta iey da din Baol di Tolagan sin insagana na ay kaipay-ana. <sup>4</sup> Inpaayag na abe din polin da Aaron en Levi ta masinop da. <sup>5 6 7 8 9 10 11</sup> Pag nan ayagan da Zadok en Abiatar ay papadi ya da Uriel, Asayas, Joel, Semayas, Eliel ya si Amminadab ay Levita. <sup>12</sup> Kanana en daida, “Dakayo met di papangolon di papamilya sin tribun Levi. Dakayo ya din iib-a yo ay Levita, amagen yo din masapol ay tongpalen yo ta say maibilang kayo ay nalinis, ta asi kayo ialì din Baol di Tolagan Yahweh ay Diyos di Israelita isnan lugar ay insaganak ay kaipay-ana. <sup>13</sup> Tan din gapo ay dinosan Diyos dakami sin damo ay nangialian mi koma sin Baol et maga kayos di ay nanggen, et adi mi tinongpal din kosto ay maonodan ay iyat na ay maegnan.”

<sup>14</sup> Siya di, tinongpal din papadi ya Levita din maonodan ta maibilang da ay nalinis ta say mabalin ay it-an da din Baol di Tolagan. <sup>15</sup> Pag batawilen din Levita, tan say inbilin Diyos en Moses ay iyat na ay masakbat. <sup>16</sup> Binilin aben David din papangolon di Levita ta mandotok da sin odom ay iib-a da si mankanta ya mantokar si kalalayad ay tokar sin arpa, gitara ya gangsa. <sup>17 18 19 20 21 22 23 24 25 26 27 28 29</sup>

## 16

<sup>1</sup> Inisgep da din Baol di Tolagan sin tolda ay insaganan David ay kaipey-ana. Pag dan man-idaton si daton ay mapooan ya daton ay pan-ookoban da ya makikadkadwaan da en Diyos. <sup>2</sup> Idi makdeng di, inosal David din ngadan Diyos ay namindisyon sin kaipoi-pogaw. <sup>3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43</sup>

## 17

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27

## 18

1 2 3 4 5 6 7 8 9 10 11 12 13 14 15 16 17

## 19

1 2 3 4 5 6 7 8 9 10 11 12 13 14 15 16 17 18 19

## 20

1 2 3 4 5 6 7 8

## 21

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30

## 22

### *Din Naisaganaan Di Maamag Ay Timplo (22:1-6)*

<sup>1</sup> Kanan Ari David, “Isnan to di kaisaadan di Timplon Diyos et isna di altar ay pan-idatonan di Israelita sin daton ay mapooan.”

<sup>2</sup> Inbilin David ay masinop din mangili ay nakiili ed Israel, et wada di dinotokana en daida ay mantiktik si bato ay maisagana para sin maamag ay Timplo. <sup>3</sup> Nan-idawat abe si ad-ado ay landok ay maamag si lansa ay para sin liteb ya pandakig. Ad-ado abe di indawat na ay bronsi ay adi kabilang di kilo na. <sup>4</sup> Nan-isagana abe si adi kabilang ay troso ay din kanan da en sidro, tan ad-ado di in-ey din taga-Sidon ya taga-Tiro en David. <sup>5</sup> Tan kanan David, “Si Solomon ay anak ko yan an-anak pay laeng ay maga di padas na yan masapol ay magay ison di kamapteng na ay mandinamag isnan lobong din amagena ay beey Diyos, isonga masapol ay isaganak din masapol.” Et siya di, insaganan David din ad-ado ay masapol para sin kaamagan di Timplo sakbay ay matey sisya. <sup>6</sup> Pag

nan ipaayag din anak na ay si Solomon et inbilina ay man-amag si timplo para en Diyos.  
7 8 9 10 11 12 13 14 15 16 17 18 19

## 23

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32

## 24

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31

## 25

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31

## 26

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32

## 27

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34

## 28

1 2 3 4 5 6 7 8 9 10 11 12 13 14 15 16 17 18 19 20 21

## 29

### *Sagsagot Para Sin Kaibangonan Di Timplo (29:1-13)*

<sup>1</sup> Kanan Ari David sin intiro ay gimong, “Din anak ko ay si Solomon et anggoy na si pinilin Diyos, ngem an-anak pay laeng ya maga di padpadas na. Ngem din maamag yan dakdake ay obla, tan baken palasyo ay panbeeyan di ipogaw mo adi et timplo ay para en Diyos. <sup>2</sup> Inpakat ko di am-in ay kabaalak ay nangisagana sin maiamag sin Timplon Diyos ay daydayawek–balitok, palata, bronsi, landok, kaiw ya nankinalasi ay nankababanol ay bato. <sup>3</sup> Maitapi sin danay ay insaganak, man-idawatak pay ed wani si balitok ya palata ay mapo sin kabokbokodak ay gameng gapo sin layad ko sin Timplon Diyos ay daydayawek. <sup>4</sup> Man-idawatak si tolo ay libo ay talento ay kanginaan ay balitok ya pito ay libo ay talento\* ay natanig ay palata ay maipakpak sin dingding di Timplo <sup>5</sup> ya para sin am-in ay maamag ay pakasapolan si palata ya balitok. Ed wani, sino da di malaydan ay man-idawat si sagot ay mansilbi en Diyos?”

<sup>6</sup> Idi siya di, nanbolontaryo da ay nan-idawat din papangolon di pamilya, din oopisyal di tribu, din kakapitan di soldado ya din manbanbantay si sanikwan di ari. <sup>7</sup> Danay di indawdawat da para sin maisaad ay Timplo: lima ay libo ay talento ya 84 ay kilo ay balitok, sinpo ay libo ay talento ay palata, sinpo ya wao ay libo ay talento ay bronsi ya sin-gasot ay libo ay talento† ay landok. <sup>8</sup> Am-in ay wadaan si nankababanol ay bato yan nan-idawat da sin pan-idoldolinan si pilak di Timplo ay ay-ayowanan Jehiel ay polin Gerson. <sup>9</sup> Et naragsakan din kaipoipogaw tan naimposoan ya silalayad di inyat da ay nan-idawat para en Diyos. Olay aben si Ari David et palalo di ragsak na.

<sup>10</sup> Pag kanan David ay nangidaydayaw en Diyos sin sangoanan di gimong, “Sik-a ay Yahweh ay Diyos ay dinaydayaw Jacob ay apo mi, sapay koma ta madayaw ka si eng-enggana. <sup>11</sup> Wadan sik-a di banol ya panakabalin, kinadiyos ya kinangato, mankoniniing ka ay magay makaiso. Tan okam am-in ay wada ed langit ya isnan daga ya sik-a din ari, sik-a din kangatoan ay turay. <sup>12</sup> Dayaw ya kinabaknang, sik-ay napoana, sik-ay mangituray sin am-in ay wada. Wadan sik-a di turay ya panakabalin

\* **29:4** 3,000 ay talento ay balitok et 99,792 ay kilo. 7,000 ay talento ay palata et 235,872 ay kilo. † **29:7** 5,000 ay talento ay balitok et 172,368 ay kilo, 10,000 ay talento palata et 340,200 ay kilo, 18,000 ay talento ay bronsi et 612,360 ay kilo, ya 100,000 ay talento ay landok et 3,402,000 ay kilo.

ay mangipangato ya mangipapigsa sin am-in. <sup>13</sup> Man-iyaman kamin sik-a ay Diyos ed wani. San madaydayaw ay ngadan mo di idaydayaw mi.” <sup>14 15 16 17 18 19 20 21 22 23 24 25</sup>

*Din Nateyan David*

*(29:26-28)*

<sup>26</sup> Inturayan David ay anak Jesse din intiro ay Israel <sup>27</sup> si opatapolo ay tawen. Pito ay tawen di nanteanad Hebron yan tolonpo ya tolo ay tawen sin inmeyana ed Jerusalem. <sup>28</sup> Enggay nakay si David asi matey, et ginanas na di ando ay biyag, dayaw ya kinabaknang. Si Solomon ay anak na di naiskat en sisya ay nan-ari. <sup>29 30</sup>

# Maikadwa Ay Cronicas

1 2 3 4 5 6 7 8 9 10 11 12 13 14 15 16 17

**2**

1 2 3 4 5 6 7 8 9 10 11 12 13 14 15 16 17 18

**3**

1 2 3 4 5 6 7 8 9 10 11 12 13 14 15 16 17

**4**

1 2 3 4 5 6 7 8 9 10 11 12 13 14 15 16 17 18 19 20 21 22

**5**

1 2 3 4 5 6 7 8 9 10 11 12 13 14

**6**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42

**7**

1 2 3 4 5 6 7 8 9 10 11 12 13 14 15 16 17 18 19 20 21 22

**8**

1 2 3 4 5 6 7 8 9 10 11 12 13 14 15 16 17 18

**9**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31

**10**

1 2 3 4 5 6 7 8 9 10 11 12 13 14 15 16 17 18 19

**11**

1 2 3 4 5 6 7 8 9 10 11 12 13 14 15 16 17 18 19 20 21 22 23

**12**

1 2 3 4 5 6 7 8 9 10 11 12 13 14 15 16

**13**

1 2 3 4 5 6 7 8 9 10 11 12 13 14 15 16 17 18 19 20 21 22

**14**

1 2 3 4 5 6 7 8 9 10 11 12 13 14 15

**15**

1 2 3 4 5 6 7 8 9 10 11 12 13 14 15 16 17 18 19

**16**

1 2 3 4 5 6 7 8 9 10 11 12 13 14

**17**

1 2 3 4 5 6 7 8 9 10 11 12 13 14 15 16 17 18 19

**18**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34

**19**

1 2 3 4 5 6 7 8 9 10 11



**20**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37

**21**

1 2 3 4 5 6 7 8 9 10 11 12 13 14 15 16 17 18 19 20

**22**

1 2 3 4 5 6 7 8 9 10 11 12

**23**

1 2 3 4 5 6 7 8 9 10 11 12 13 14 15 16 17 18 19 20 21

**24**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27

**25**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28

**26**

1 2 3 4 5 6 7 8 9 10 11 12 13 14 15 16 17 18 19 20 21 22 23

**27**

1 2 3 4 5 6 7 8 9

**28**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27

**29**

*Din Nanongpalan Din Levita Sin Seremonia Ay Panglinis  
(29:12-19)*

Idi nilogian Ari Hezekias ay manturay, inpasinop na din papadi ya Levita sin kad-an di Timplo yan binilinas daida ta linisan dan awak da ya amagen da abe din seremonia ay panglinis sin Timplo ta say maibilang am-in ay nalinis sin pangilan Diyos. (29:1-11)

1 2 3 4 5 6 7 8 9 10 11

<sup>12</sup> Da nay din Levita ay wadas di: sin polin Coat, da Mahat ay anak Amasai en Joel ay anak Azarias; sin polin Merari, da Kis ay anak Abdi en Azarias ay anak Jehallelel; sin polin Gerson, da Joa ay anak Zimna en Eden ay anak Joa; <sup>13</sup> da Simri en Jeuel sin polin Elizafan yan da Zekarias en Mattanias sin polin Asaf; <sup>14</sup> sin polin Heman, da Jehuel en Simei yan da Semayas en Uzziel sin polin Jedutun.

<sup>15</sup> Sininop da din aag-i da ay Levita et inamag da din seremonia ay panglinis da. Idi nakdeng di, inamag da abe din seremonia ay panglinis sin Timplo ay kaman din naibaga sin linteg Diyos ay inbilin di ari ay amagen da. <sup>16</sup> Sinenggep din papadi sin oneg di Timplo ta amagen da din seremonia ay panglinis. Inbala da am-in ay baken nalinis et in-ey da sin bel-ayan di Timplo. Inbalan din Levita dana ay bonbonag et in-ey da sin alnap ay Kidron. <sup>17</sup> Inlogi da nan seremonia ay panglinis sin pitsa uno, sin damo ay bowan. Idi domteng sin maikawao ay agew di bowan, kindeng da enggana sin damo ay kowarto ay segpan sin Timplo. Nan-obla da pay si wao ay agew et sinpo ya enem ay agew di nan-oblaan da ay nangisagana sin Timplo ay pandayawan.

<sup>18</sup> Siya na di inpaammon din papadi en Ari Hezekias, “Enggay kindeng mi din kalinisan di intiro ay Timplo, din altar ay pan-idatdatonan si mapooan ya din am-in ay maos-osal isdi ya din lamisaan ay kaipatpatangan di maidaton ay tinapay ya din am-in ay maos-osal isdi. <sup>19</sup> Intaoli mi am-in din bonag ay inbalan Ari Ahaz sin timpo ay nanokogana en Diyos et nilinisan mi ya insagana mi ta maosal para en Diyos. Wada da ed wani sin sangoanan di altar Diyos.” <sup>20 21 22 23 24 25 26 27 28 29 30 31 32 33 34 35 36</sup>

**30**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27

**31**

1 2 3 4 5 6 7 8 9 10 11 12 13 14 15 16 17 18 19 20 21

**32**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33

**33**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25

**34**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33

**35**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27

**36**

1 2 3 4 5 6 7 8 9 10

*Din Nabakasan Di Jerusalem  
(36:11-23)*

<sup>11</sup> Dowanpo ya esa di tawen Zedekias sin naisaadana ay ari yan nanturay ed Jerusalem si sinpo ya esa ay tawen. <sup>12</sup> Say inamag na din lawa sin pangilan Yahweh ay Diyos na yan adi nanpakombaba en Jeremias ay nankalkalian Diyos. <sup>13</sup> Kinontra na abe si Ari Nebukadnezzar ay nangipasapata en sisya sin ngadan Diyos en adi komonkontra. Inpakenteg na di nemnem na et sinigaana ay manbabawi ya managong en Yahweh ay Diyos di Israelita. <sup>14</sup> Naisepsep abe din am-in ay papangolon di padi ya din kaipoipogaw ay nanokog en Diyos et in-onod da din am-in ay kadodogis ya kababain ay am-amagen di odom ay nasyon et inpakadodogis da din Timplo ed Jerusalem ay nanbalinen Diyos ay mismo ay nasantoan.

<sup>15</sup> Intoltoloy Yahweh ay Diyos di ap-apo da ay mamagbaga en daida babaen sin pinilpili na ay ipogaw ay nankalkaliana, tan maseg-ang sin ipogaw na et laydena ay isalakan daida ya din Timplo na. <sup>16</sup> Ngem nilaslasoy da din inbabbaan Diyos ay nankalkaliana ya din kali na enggana ay binmonget sisya sin ipogaw na et enggay maga di pamosposan.

<sup>17</sup> Say gapo ay inbaa na din ari ed Babilonia ay namse sin babbaro ya babalasang, nankakay ya nankababkes, olay sin Timplo. Inpolang Diyos daida am-in en Nebukadnezzar. <sup>18</sup> Ina na am-in ay bonag sin Timplon Diyos, dadakke ono kinittoy ya am-in ay kinabaknang ay wadas di. Ina na abe din kinabaknang di ari ya din oopisyal na et in-ey na am-in ed Babilonia. <sup>19</sup> Pinooan da din Timplon Diyos ya dinadael da din alad di Jerusalem. Pinooan da am-in din palasyo yan dinadael da am-in ay nabanol ay bonag isdi. <sup>20</sup> Din adi da pinse si kampilan yan intakina ed Babilonia et nanbalinena ay bagena ya bag-en din aan-ak na enggana ay say naisokat ay nanturay din ari ed Persia. <sup>21</sup> Et say natongpalan din inpaipadton Diyos en Jeremias ay kanana en mataynan ya manbalin si magay silbi na din daga da si pitopolo ay tawen ay kaman din bilang di adi dan nanongpalan sin linteg di agew ay pan-illengan.

<sup>22</sup> Sin damo ay tawen ay nanturayan Cyrus ay ari ed Persia, natongpal din inpaipadton Diyos en Jeremias, tan tinignay Diyos din ari et waday inpaisolat na ay bilin ay naipaammo sin intiro ay iturayana. <sup>23</sup> Siya na di naisolat, "Siya na di bilin Cyrus ay ari ed Persia: Insaad Yahweh ay Diyos ed langit si sak-en ay mangituray isnan intiro ay daga yan dinotokanas sak-en ay mangamag si Timplo ay pandayawan di ipogaw en sisya ed

Jerusalem ay lak-am di Juda. Ed wani, emey kayo ay ipogaw Diyos ed Jerusalem. Sapay koma ta si Diyos di komoyog en dakayo.”

## Ezra Maipanggep Sin Libro Ay Nay

Sin naodi ay kapitolon di Maikadwa ay Aari, maistorya din naabakan di Jerusalem ya din naieyan din Judio ed Babilonia ay maibalod. Sin libro ay Ezra, maistorya din nantaolian di odom en daida ed Jerusalem ya din kasin dan nangisaadan sin Timplo sin babaen Zerubbabel. Nakdeng din naamagan di Timplo sin 516 B.C.

Sin libro ay nay, maammoan tako din panakabalin Diyos ay mangiturong sin nemnem di pagano ay ari ta say matongpal din planon Diyos para sin ipogaw na. Maammoan tako abe ay mo din oblan Diyos di amagen tako, nankinalasi di mangontra, ngem mo esten tako ay manongpal sin layden Diyos, wadas sisya ay tomolong enggana ay makedang di obla.

### **Din Linaona**

Din damo ay nantaolian di Judio ed Jerusalem 1:1-2:70

Din naisaadan ya naidatonan di Timplo 3:1-6:22

Din inmeyan da Ezra ed Jerusalem 7:1-10:44

### *Din Bilin Cyrus Ay Mantaoli Din Judio*

*(1:1-7)*

<sup>1</sup> Sin damo ay tawen ay nanturayan Cyrus ay ari ed Persia, inturong Diyos di nemnem na ay mangipaammo si esa ay bilin ta matongpal din inpaibagan Diyos en Jeremias. Siya na di inpaisolat din ari ay maibasa sin intiro ay iturayana: <sup>2</sup> “Siya na di ibilin ko, sak-en si Cyrus ay ari ed Persia: Si Yahweh ay Diyos ed langit di nangisaad en sak-en ay mangituray isnan intiro ay lobong yan dinotokanas sak-en ay man-amag si timplo na ed Jerusalem ay sakop di Juda. <sup>3</sup> Si Diyos koma di wada en dakayo ay ipogaw na. Emey kayo ed Jerusalem ta amagen yo din Timplon Yahweh ay Diyos di Israelita, din Diyos ay wada ed Jerusalem. <sup>4</sup> Din katokmang di nabay-an ay ipogaw Diyos sin kailili ay kad-an da ed wani yan masapol ay man-idawat da si palata, balitok, din odom ay kasapolan da ya aanimal malaksig sin bolontaryo ay datdaton para sin Timplon Diyos ed Jerusalem.”

<sup>5</sup> Idi siya di, am-in di ipogaw ay inturong Diyos di nemnem na, pati din papangolo sin papamilyan di tribun da Juda en Benjamin, din papadi ya Levita et nanlobwat da ay en mangamag sin Timplon Diyos ed Jerusalem. <sup>6</sup> Nan-idawat amin din tinokmang da si tolong da ay palata, balitok, nabanol ay rigalo, aanimal ya odom ay kasapolan da, malaksig sin rigalo ay maidaton sin Timplo. <sup>7</sup> Dowan aben itaolin Ari Cyrus din mallokong ya odom ay bonbonag ay sigod ay naosal sin Timplon Diyos ay inan Nebukadnezzar ay inpeey na sin timplon di sinan didiyos ay dinaydayaw na. <sup>8 9 10 11</sup>

## 2

### *Din Nantaoli Ay Napod Babilonia*

*(2:1-2a,68-70)*

<sup>1</sup> Ad-ado di napo sin probinsiya ay pilit ay in-ey Ari Nebukadnezzar ed Babilonia ed idi. Nantaoli da sin mismo ay ili da ed Jerusalem ya Juda <sup>2a</sup> ay kinoyog da Zerubbabel en Jesua ay papangolo da.

Din kabibilang da am-in ay nantaoli ay napo ed Babilonia et 42,360, pati ad-ado ay kabayo, kamel ya dangki. *(2:2b-67)*

3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52 53 54

<sup>68</sup> Idi dinmateng da sin kad-an di Timplon Diyos ed idi ed Jerusalem, waday datdaton ay insagot di odom ay papangolon di pamilya ta say itolong da sin kasin kaamagan di

Timplo sin sigod ay naisaadana. <sup>69</sup> Nan-idawat da insigon sin kabaelan da et naipeey sin naidolinan di pilak para sin Timplo. Din indawat da et 500 ay kilo ay balitok, 2,800 ay kilo ay palata ya 100 ay naloyong ay badon di padi.

<sup>70</sup> Pag en manbeey din papadi, Levita, mankankanta, gogowardiya ya odom ay mansilsilbi sin Timplo sin il-ili da. Din nabay-an ay Israelita et en da aben manbeey sin il-ili da.

### 3

#### *Din Kasin Naamagan Di Altar Ya Din Nailogian Di Obla Sin Timplo* (3:1-3,6-8)

<sup>1</sup> Sin maikapito ay bowan,\* nan-es-esa din Israelita ay natopog ed Jerusalem ay napo sin il-ili ay enggay nanbeeyan da. <sup>2</sup> Si Jesua ay anak Jozadak ya din gagait na ay papadi ya si Zerubbabel ay anak Sealtiel ya din aag-i na et inamag da din altar Diyos ay daydayawen di Israelita ta pangipooan da si datdaton insigon sin naisolat sin linteg Moses ay ipogaw Diyos. <sup>3</sup> Olay mo emegyat da sin baken Judio ay nanbeey isdi ay daga, inamag da pay dedan din altar sin sigod ay naiamagana ed idi. Idi makdeng, inagsapa ya minasdem ay nan-idaton da si daton ay mapooan. <sup>4 5 6</sup> Nilogian da ay man-idaton en Diyos si daton ay mapooan sin pitsa uno di maikapito ay bowan olay mo adi pay laeng nalogian ay maisaad din Timplo.

<sup>7</sup> Idi siya di, nan-idawat din ipogaw si pilak ay mailagbo sin karpintiro ya odom ay oblantis. Nan-idawat da abe si makan, mainom ya lanan di olivo ta isokat da sin taga-Sidon ya Tiro si nabanglo ay kaiw ay makwani en sidro ay mapod Lebanon. Ianod da sin baybay enggana ed Joppa tan say inpalobos Cyrus ay ari ed Persia. <sup>8</sup> Sin maikadwa ay bowan di maikadwa ay tawen manipod sin dinmatngan da ed Jerusalem sin sigod ay naisaadana di Timplon Diyos, da Zerubbabel ay anak Sealtiel, Jesua ay anak Jozadak ya din aag-i da ay papadi ya Levita yan nilogian da ay nan-obla. Nakiobla amin din kakailian da ay naibalod ed Babilonia ay nantaoli ed Jerusalem. Dinotokan da din Levita ay mantawen si downpo ya nasurok ay mangimandar sin kaisaadana di Timplon Diyos. <sup>9 10 11 12 13</sup>

### 4

#### *Din Nangonkontra Sin Naisaadana Di Timplo* (4:1-5,24)

<sup>1</sup> Idi damagen din mangililiget si taga-Juda ya Benjamin ay am-amagen din nantaoli ay naibalod ay Israelita din Timplon Yahweh ay Diyos di Israelita, <sup>2</sup> inmey da en Zerubbabel ya din papangolon di pamilya yan kanan da, “Tolongan mis dakayo ay mangamag sin Timplo, tan mandaydayaw kami abe en Diyos ay daydayawen yo et nan-idatdaton kami en sisya manipod sin timpon Esarhaddon ay ari ed Assyria ay nangibaa en dakami isna.”\*

<sup>3</sup> Ngem kanan da Zerubbabel, Jesua ya din papangolon di pamilya, “Adi kayon makibiyang sin kaamagan di Timplon di Diyos mi. Inbilin Ari Cyrus ay ari ed Persia ay dakami anggoy di mangamag.”

<sup>4</sup> Idi siya di, nilogian din man-ilis di ay daga ay dismayaen ya egyaten din taga-Juda ta adi dan itoloy ay amagen din Timplo. <sup>5</sup> Down da et pasoksokan din oopisyal ed Persia ta matopap din plano da. Say inam-amag da di manipod sin nanturayan Cyrus enggana sin timpon Darius ay ari ed Persia. <sup>6 7 8 9 10 11 12 13 14 15 16 17 18 19 20 21 22 23 24</sup> Sinmaldeng din

\* **3:1** Din maikapito ay bowan et din kasasantoan ay bowan sin pangilan di Israelita. Tolo ay fiesta ono nabanol ay agew di maitompong sin bowan ay nay. Ilaen sin Levitico 23:23-43. \* **4:2** Idi pinakaan Ari Esarhaddon din Israelita ay nanbeey ed Samaria ed idi, sinokatanas daida si baken Judio ay napos odom ay il-ili.



obla sin maisasaad ay Timplon Diyos enggana sin maikadwa ay tawen ay nanturayan Darius ay ari ed Persia.

## 5

### *Din Kasin Dan Nangilogian Ay Nangisaad Sin Timplo*

(5:1-5)

<sup>1</sup> Sin timpo ay doy, waday doway ay mamadto ay da Zekarias ay polin Iddo en Haggai. Nan-ipadto da ay namagbaga sin taga-Juda ya Jerusalem babaen sin panakabalin Diyos ay daydayawen di Israelita, ay mangidaldalan en daida. <sup>2</sup> Idi siya di, intoloy kasin da Zerubbabel ay anak Sealtiel ya si Jesua ay anak Jozadak ay mangamag sin Timplon Diyos ed Jerusalem, et tinolongan din mamadto si daida.

<sup>3</sup> Asi et inmey da Tattenai ay gobernador di probinsiya ay makwani en Demang di Eufrates, en Setar Bozenai ya din iib-a da ay opisyal ed Jerusalem yan kanan da ay nanpoot, “Sinoy nangidawat si kalebbengan yo ay mangisaad sin Timplo ay sana ya mangisagana sin am-in ay maosal sidi? <sup>4</sup> Sino abe di ngadngadan di ipogaw ay mangam-amag?” <sup>5</sup> Ngem laton ay wadas Diyos ay mangil-ila sin papangolon di Judio, et ninemnem din oopisyal ay adi da ipasaldeng din Judio enggana ay mansolat da en Darius ya awaten day songbat na.

Siya di, nansolat da en Ari Darius ta ipaammo dan sisya din am-amagen di Judio ya damagen da mo tet-ewa ay inbilin Ari Cyrus ed idi ay isaad da din Timplo. Inbilin Darius ay anapen di oopisyal na sin papilis di gobierno ta paneknekan da mo tet-ewa, et dinteng da din bilin Cyrus ay doy. Pag et mansolat si Darius en da Tattenai yan inbilina ay adi dan sangsangawen din Judio sin obla da ay mangisaad sin Timplo. Inbilina abe ay itolong da din pilak di gobierno sin Judio ta say maidawat en daida di olay sino ay kasapolan da ta adi somaldeng di obla da. (5:6-6:12)

6 7 8 9 10 11 12 13 14 15 16 17

## 6

1 2 3 4 5 6 7 8 9 10 11 12

### *Din Nakdengyan Ya Naidatonan Di Timplo*

(6:13-22)

<sup>13</sup> Idi inawat da Gobernador Tattenai en Setar Bozenai ya din iib-a da ay opisyal din bilin Ari Darius, inset da ay nanongpal. <sup>14</sup> Et paspas din inyat di papangolon di Judio ay nangamag sin Timplo, tan napapigsa di nemnem da begew sin inkaskasaban din pankalkalian Diyos ay da Haggai en Zekarias. Kindeng da din Timplo ay kaman din inbilin Diyos ay daydayawen di Israelita ya inbilin aben da Cyrus, Darius ya Artaxerxes ay aari ed Persia. <sup>15</sup> Nakdeng sin pitsa 3 di bowan ay kanan da en Adar, sin maikan-em ay tawen ay nanturayan Ari Darius. <sup>16</sup> Pag dan idaton. Naragsakan din papadi, Levita ya amin din iib-a da ay Israelita ay nantaoli ay naibalod ed addawi, <sup>17</sup> et nan-idaton da si 100 ay bomaro ay baka, 200 ay kalakian ay karnero ya 400 ay bomaro ay karnero. Nan-idaton da abe si sinpo ya doway ay bomaro ay kalding ta say malinisan din basbasol di am-in ay Israelita, sag-eesa para sin tonggal tribu. <sup>18</sup> In-olnos da abe din papadi ya Levita sin grupo da insigon sin naisolat sin libron Moses ta say naolnos di iyat da ay mansilbi en Diyos ed Jerusalem.

<sup>19</sup> Sin pitsa 14 di damo ay bowan, sinilibraran din nantaoli ay Israelita din fiesta ay makwani en Nalabas. <sup>20</sup> Inamag din papadi ya Levita din seremonia ay kaibilangan da ay nalinis maibasas sin linteg da et nalinisan da, isonga pinaltin din Levita din karnero ay maidaton sin fiesta ay makwani en Nalabas para sin nantaoli ay Israelita, para sin gait da ay papadi ya para sin mismo ay awak da. <sup>21</sup> Et nangan da din nantaoli ay

Israelita ya din amin ay nanokog sin ogalin di pagano ay tinokmang da ta sagongen das Yahweh ay Diyos di Israelita. <sup>22</sup> Pito ay agew ay nanragragsak da ay nangsilibrar si fiesta ay makwani en Tinapay ay Magay Labadura na.\* Nalaydan da tan inturong Diyos din nemnem di ari ed Persia ay tomolong en daida sin naamagan di Timplon Diyos ay daydayawen di Israelita.

**7**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28

**8**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36

**9**

1 2 3 4 5 6 7 8 9 10 11 12 13 14 15

**10**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44

---

\* **6:22** Din fiesta ay nay et kaman kaitoloyan di fiesta ay makwani en Nalabas, tan naitompong sin pitsa 15-22.

## Nehemias Maipanggep Sin Libro Ay Nay

Sin timpon Ari Darius ed Persia, nantaoli di Judio ed Jerusalem et inamag da kasin din Timplon Diyos (ilaen sin Ezra 1-6), ngem din batog ay alad di Jerusalem et nadadael pay laeng. Din libro ay nay et maipanggep sin kasin naamagan di alad ay inpangolon Nehemias sin timpon Ari Artaxerxes (465-425 B.C.). Nangon-onas Ezra ay inmey ed Jerusalem mo si Nehemias, ngem nantinolong da ay dowa ay mangitdo sin linteg Diyos sin kaipoipogaw ya mangamag sin alad di siyodad.

Mayat ay ipogaw si Nehemias ay tadonen tako. Insaksakit na din ngadan Diyos ya din iib-a na ay ipogaw Diyos, alisto ay mankararag, nagaget ay man-obla, ya nalaing abe ay mangawis si iib-a na ay makiobla. Olay mo ad-ado di nangonkontra ay manangaw ya mangdismaya koma en sisya, inpapasnek na ay man-obla, et nakdeng din alad sin oneg di owat dowa ay bowan.

### **Din Linaona**

Din inmeyan Nehemias ed Jerusalem 1:1-2:20

Din kasin naisaadan di alad ed Jerusalem 3:1-7:73

Din nangibasaan Ezra sin linteg Diyos 8:1-10:39

Din odom ay inam-amag Nehemias 11:1-13:31

### *Din Nangisakitan Nehemias Sin Iib-a Na Ay Judio Ed Jerusalem*

<sup>1</sup> Siya na di inistoryan Nehemias\* ay anak Hacalias. Sin bowan di Kislev, sin maikadowanpo ay tawen ay nanturayan Artaxerxes ay ari ed Persia, wadaak ed Susa ay kapital di ili.† <sup>2</sup> Inmali si Hanani ay esa ay agik ay napod Juda yan waday kakoyog na ay odom ay lallalaki. Nandamagak en daida maipanggep sin Judio ay napilit ay naiey ed addawi ay nantaoli ya maipanggep ed Jerusalem. <sup>3</sup> Kanan da ay sinombat, “Dakdake di probliman din kaipoipogaw ay nantaoli ed Juda downan laslasoyen din ipogaw ay wadas di si daida. Tan nadadael pay laeng din alad ed Jerusalem ya adi naamag din eeneb na nanipod sin napooan da.”

<sup>4</sup> Sin nanngreak isna, tinmokdoak ay man-og-oga.‡ Nanladingitak ya initpek din dagaang ko si piga ay agew downan mankararag en Diyos ed langit. <sup>5</sup> Kanak ay nankararag, “Yahweh ay Diyos ed daya, madaydayaw ya kaeegyat ay Diyos. Manag-tongpal ka sin intolag mo ya adi manbalbaliw din layad mo sin manlaylayad en sik-a ya mantongpal sin bilbilin mo. <sup>6</sup> Sapay koma ta ilaem ya dengngem sak-en ay baam sin ikarkararag kos inag-agew ya nilablabi maipanggep sin mansilsilbi en sik-a ay din ipogaw mo ay Israelita. Nanbasol kami kayman ay Israelita, nanbasolak ya siya abe sin pamilyak. <sup>7</sup> Nadagsen di nanbasolan mi en sik-a ya adi kamin tinongtongpal din bilbilin ya linteg mo ay inbilin mo en Moses ay baam. <sup>8</sup> Nemnemem koma din nay ay inbagam en Moses, ‘Mo adi yon itoltoloy ay mantalek en sak-en, ipaaddawik dakayo ta mantee kayo sin odom ay il-ili. <sup>9</sup> Ngem no sagongen yo si sak-en ya tongpalen yo din bilbilin ko, itaolik dakayo sin lugar ay pinilik ay pandayawan yo en sak-en, olay naiwaras kayo sin kaaddawian ay partin di lobong.’

<sup>10</sup> “Apo Diyos, danay din mansilsilbi en sik-a ya ipogaw mo ay insalakan mo babaen sin nakaskasdaaw ay panakabalin mo. <sup>11</sup> Dengngem kod nan kararag ko ay baam ya kararag di iib-ak ay mansilsilbi en sik-a ay malaydan ay mangidayaw en sik-a. Iturong

\* **1:1** Din olog di ngadan Nehemias et “niliwliwan Diyos.” † **1:1** Ogalin di aari ed Persia ay en manbeey ed Susa sin temeg-inana. Din bowan di Kislev et Noviembre-December sin kalindaryo tako. ‡ **1:4** Mo manladingit di Judio, ogali da ay tomokdo si bangkito.

mo koma din nemnem di ari ta say mayat di pantongpalan di amagek ed wani ay agew ta maseg-ang en sak-en.”

Sin doy ay timpo yan sak-en di ap-apon di man-itagtagay si arak sin ari. §

## 2

### *Din Nangipalobosan Din Ari Ay Emey Si Nehemias Ed Jerusalem*

*(2:1-8,11,16-20)*

<sup>1</sup> Idi inmey di opat ay bowan, waday namingsan ay mangmangan din ari yan inpailak ay masmasadotak sin nangitagayak en sisya si arak. Maga polos di nangilaana ay masmasadotak ed idi, <sup>2</sup> isonga kanana ay nanpoot en sak-en, “Apay nga masmasadot ka yan baken ka met mansakit? Siguro ay wada di panladingitam.”\*

Palalo di egyat ko, <sup>3</sup> ngem kanak sin ari, “Apo Ari, matagotago ka koma si engengana! Adiak maitabon din ladingit ko gapo ta din siyodad ay naiponponan di ap-apok yan enggay nadadael ya napooan din eneb na.”

<sup>4</sup> Kanan din ari en sak-en, “Sino ngarud di laydem?”

Nankararagak en Diyos ed langit, <sup>5</sup> pagak kanan sin ari, “Mo say laydem ay apo ari ya maseg-ang ka en sak-en ay baam, ipakpakaasik ay ipalobos mo koma ay emeyak sin siyodad sin sakop di Juda ay naiponponan di ap-apok ta enak amagen kasin.”

<sup>6</sup> Sin nangwaniak sidi, wada din reyna ay nakitotokdo sin ari. Dinamag din ari mo kasano di kabayag ko sin emeyak ya mo pig-an di pantaoliak et idi inbagak, pinalobosanas sak-en. <sup>7</sup> Nanpakpakaasiak ta pakoyoganas sak-en si solat na ay emey sin gogobernador sin probinsiya sin demang di ginawang ay Eufrates ta ipalobos da ay malabasak ay emey ed Juda. <sup>8</sup> Nankedawak abe si solat na en Asaf ay mangay-ayowan sin kada ay okan di ari ta idawtanak sak-en si kaiw ay maamag si eneb di Timplo, eneb sin alad di siyodad ya sin beey ay panteak. Pinatgan din ari dana ay kindaw ko tan sineg-angan Diyos sak-en. <sup>9 10 11</sup> Inmeyak ed Jerusalem et nanteek isdi si tolo ay agew.

Sin gawan di labi, binmangonak et nanlikedak sin siyodad ta mailak din ison di alad. *(2:12-15)*

<sup>12 13 14 15</sup>

<sup>16</sup> Maga di opisyal ay makaammo sin inmeyak ya am-amagek, tan adiak inbagbaga sin papadi, papangolo, oopisyal ya olay sino ay Judio ay makioblan to. <sup>17</sup> Idi siya di, kanak en daida, “Maila yo din problima tako, nadadael ed Jerusalem yan napooan din eeneb na. Bangonen tako kasin din alad di siyodad ta adi takon maibabain.” <sup>18</sup> Dinad-at ko abe en daida din inyat Diyos ay daydayawek ay nangipaila si seg-ang na en sak-en ya din inbagan di ari.

Kanan da ay sinombat, “Ilogi tako et ay mangamag.” Et inlogi da din nay ay nabanol ay obla.

<sup>19</sup> Ngem idi dinngen da Sanballat ay taga-Bet Horon, si Tobia ay opisyal ay Ammonita ya si Gesem ay Arabo, sinis-iyekan ya nilaslasoy das dakami. Kanan da, “Ay sino nan am-amagen yo? Ay konkontraen yo aya din ari?”

<sup>20</sup> Kanak ay nanongbat en daida, “Idawat Diyos ed langit di kosto ay pantongpalan din obla mi. Dakami di mansilsilbi en sisya et ilogi mi ay mangamag sin alad, ngem dakayo pay, magay kalebbengan yo ay maitapi en dakami ay Judio ya mangituray en dakami ya magay biyang yo sin ogali mis na.”

§ 1:11 Din man-itagtagay si arak sin ari yan matalek ya nangato ay opisyal na. \* 2:2 Inayan mo din mansilsilbi sin ari yan masmasadot da, tan kanayon koma ay ipaila day ragsak da mo wada da sin kad-an di ari.

## 3

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32

## 4

*Din Pangonkontraan Da Sin Oblan Da Nehemias  
(4:1-23)*

Idi siya di, biningay din Judio din obla, et inlogin di esa ya esa ay grupo ay mangamag sin alad ya eneb di siyodad sin partin di siyodad ay asag-en sin panbeeyan da. (3:1-32)

<sup>1</sup> Idi nadamag Sanballat ay bangbangonen mi kasin din alad di siyodad, palalo di bonget na et inlogi na ay nanglaslasoy en dakami ay Judio. <sup>2</sup> Kanana sin sangoanan di gagait na ya sosoldado ed Samaria, “Sino aya di layden da nan kakkaasi ay Judio ay ipaila isnan am-amagen da? Ay kabaelan da aya ay bangonen kasin din alad yan kedngen da si esay agew? Ay man-idaton da? Ay mabalin aya ay itaoli da din napooan ay bato sin nadadael ay alad?”

<sup>3</sup> Kanan din tinatakdo na ay si Tobia ay Ammonita, “Sino pay di silbin san am-amagen da ay alad et? Olay bewet di somakyab et madadael din batog da.”

<sup>4</sup> Siya et di kanak ay nankararag, “Diyos mi, dengngem kod nan kararag mi tan nay laslasoyen das dakami. Itaolim koma en daida din pangoy-oyaw da. Wada koma di manga sin sanikwa da ya mangibalod en daida ay mangiaddawi sin ili da. <sup>5</sup> Adim koman pakawanan ya linglingan din basbasol da tan inoy-oyaw da din man-am-amag sin alad di siyodad.”

<sup>6</sup> Et inamag mi din nadadael ay alad enggana ay nagodwa din kakayang na, tan inpakat din ipogaw din amin ay kabaelan da ay nan-obla. <sup>7</sup> Palalo di bonget da Sanballat, Tobia, ya din Arabo, Ammonita ya taga-Asdod sin nanngaan da ay maitoltoloy ay maamag din alad ed Jerusalem ya dandani ay makdeng din nadadael sin alad.

<sup>8</sup> Idi siya di, nantotolag da amin ay gobaten ya goleen da ed Jerusalem. <sup>9</sup> Ngem nankararag kami en Diyos mi ya nandotok kami si manbantay sin kaagawan ya labi.

<sup>10</sup> Asi et waday inkankantan din ipogaw ed Juda ay kanana, “Enggay nabbanabbay tako,

Tan nay palalo ay ad-ado di naiwalang ay batbato.

Ay siya mo kabaelan tako ay mangdeng isnan alad tako?”

<sup>11</sup> Dowan aben kanan din kalaban mi, “Adi dan maila ono maammoan ay omas-asag-en tako, et mabiglaan da. Tan wada tako ay dagos sin kad-an da ay mamse en daida et adi matoloy din obla da.” <sup>12</sup> Ngem kanayon ay omal-ali din Judio ay katokmang da ay mangibaga sin lawa ay panggep da en dakami. <sup>13</sup> Gapo isdi, inpowistok din tonggal pamilya ay manbantay sin likod di adi nakdeng ay alad. Kampilan, gayang ya pana di armas da. <sup>14</sup> Nadlaw ko ay madanagan din ipogaw, isonga kanak en daida ya sin papangolo ya oopisyal, “Adi kayon emegyat en daida. Nemnemen yo si Diyos ay kaeegyat ya manakabalin amin yan makilaban kayo para sin aag-i, an-ak, asawa ya beey yo.” <sup>15</sup> Naammoan din kalaban mi ay ammo mi din plano da ya tinopap Diyos. Idi siya di, intoloy mi ay nangamag sin alad.

<sup>16</sup> Manipod sidi ay agew, man-obla din kagodwan di ipogaw ko yan manbantay din kagodwa ay nakaarmas si kampilan, gayang, pana ya salida. Tinolongan din oopisyal amin din ipogaw ed Juda <sup>17</sup> ay man-am-amag sin alad. Din manbonbonag si maosal yan nakaegen si armas din esay takkay da yan say osalen da ay man-obla din esa. <sup>18</sup> Amin ay man-obla yan insisiket da din kampilan da. Makitatakdo abe en sak-en din manangtangyob.



<sup>19</sup> Pagak kanan sin kaipoipogaw, sin papangolo ya oopisyal da, “Ando nan alad ay am-amagen tako et nan-inaddawi tako, <sup>20</sup> isonga mo dengngen yo din tanggoyob, omali kayo ay tomolong tan si Diyos di makilaban para en datako.”

<sup>21</sup> Inag-agew ay siya di di inamag mi, manbantay ay nakaarmas din kagodwa yan man-obla din kagodwa. Ilogi mi sin pomatpat-a enggana ay maila din talaw sin labi. <sup>22</sup> Sin doy ay timpo, inbagak abe sin lallalaki ya katolongan da ay mantee da sin oneg di siyodad sin labi ta bantayan da din siyodad sin labi yan man-obla da sin kaagawan. <sup>23</sup> Mo si sak-en ya din aag-ik, baak ya gogowardiya ay omon-onod en sak-en, adi kamin kakkaanen din bado mi sin labi. Kanayon abe ay nakaegen kami si armas.

## 5

1 2 3 4 5 6 7 8 9 10 11 12 13 14 15 16 17 18 19

## 6

### *Din Namadpadasan Da Ay Nangietek En Nehemias (6:1-14)*

<sup>1</sup> Nadamag da Sanballat, Tobia, Gesem ya din odom ay mangililiget en dakami ay kindeng mi din alad et enggay magay giswang na. (Ngem daan kami pay laeng iamag din eneb na.) <sup>2</sup> Idi siya di, pinakaammoan da Sanballat en Gesem sak-en ay man-aabat kami sin esa ay ili sin tanap ed Ono. Ngem waday lawa ay panggep da en sak-en, <sup>3</sup> isonga nan-ibaak si nangipaammo sin nay ay songbat ko en daida, “Nabanol di am-amagek, isonga adi mabalin ay manballalongak. Adiak layden ay somaldeng din obla begew sin enak pangabatan en dakayo.” <sup>4</sup> Namin opat ay siya met laeng di inpakaammo da en sak-en, ngem kanayon ay iso met laeng din songbat ko en daida.

<sup>5</sup> Sin maikalima ay nan-ibaa si Sanballat, inpaw-it na sin baa na di nakalokat ay solat <sup>6</sup> ay kanana, “Inbagan Gesem en sak-en ay waday ipadpadamag da isnan nandinmang ay nasyon ay panggep yo kano ay Judio ay labanen din mangiturturay en dakayo et say gapo ay am-amagen yo din alad. Kanan da abe en panggep mo ay man-ari <sup>7</sup> et tinolag mo di odom ay mamadto ay mangipaammo ed Jerusalem ay sik-a di ari ed Juda. Sigurado ay madamag din ari na, isonga omali ka ta pankalian ta.”

<sup>8</sup> Inpaw-it ko di songbat ko yan kanak, “Amin din ibagbagam yan magay katet-ewa na, tan sik-a met laeng di akin nemnem issa.” <sup>9</sup> Pinadpadas da amin ay egyaten dakami ta madismaya kami ya adi maitoloy din obla, ngem kanak ay nankararag, “Apo Diyos, papigsaem kod dakami ed wani.”

<sup>10</sup> Sin namingsan, inmeyak sin beey Semayas ay anak Delayas, ay anak Mehetabel tan adi makabala sin beey na. Kanana, “En ta man-abat sin Timplon Diyos. Man-eneb ta tan wada da di manpanggep ay mamse en sik-a sin labi.”

<sup>11</sup> Ngem kanak en sisya, “Ay siya mo naeegyatanak ta lomayawak ya enak mantabon sin Timplo? Aga, adiak emey!” <sup>12</sup> Naammoak ay adi nankali si Diyos en sisya mo adi et pinasoksokan da Tobia en Sanballat ta egyatenas sak-en. <sup>13</sup> Linagboan da ay mangegyat en sak-en ta bomasolak mo onodak di et madadael di dayaw ko ya maibabainak.

<sup>14</sup> Siya di, kanak ay nankararag, “Apo Diyos, adi ka koman linglinglingan din nay inamag da Tobia en Sanballat, siya abe sin babai ay mamadto ay si Noadias ya din odom ay mamadto ay en nangeg-egyaten en sak-en, ta dosaem daida.”

### *Din Nakdenggan Di Alad (6:15-16)*

<sup>15</sup> Limapolo ya doway ay agew din naamagan di alad, et nakdeng sin pitsa 25 di bowan ay Elul.\* <sup>16</sup> Idi nadamag din kalaban mi sin nandinmang ay nasyon, inmegyat da am-in ya nadismaya da, tan naila da ay nakdeng din obla babaen sin tolong Diyos. <sup>17 18 19</sup>

## 7

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52

## 8

### *Din Nangibasaan Ezra Sin Linteg Diyos Sin Kaipogaw (8:1-3,5-7a,8-10,12)*

<sup>1</sup> Sin maikapito ay bowan, enggay nanbeebeey din Israelita sin il-ili da. Nan-esa da ay natopog sin plaza sin kad-an di segpan di siyodad ay makwani en Danom. Inpaibala da en Ezra ay padi ya maestron di linteg din naisolatan di linteg Moses ay din bilbilin Diyos para sin Israelita. <sup>2</sup> Isonga sin pitsa 1 sin maikapito ay bowan, inbalan Ezra din naisolatan di linteg sin sangoanan di natopog ay kaipogaw, ay lallalaki ya babbabai ya anan-ak ay makaawat. <sup>3</sup> Inbasa na sin sangoanan di kaipogaw sin plaza sin sangoanan di segpan ay makwani en Danom. Inlogi na ay nangibasa sin napat-a enggana ay nan-gawa yan inpapasnek din amin ay ipogaw ay nandenge. <sup>4</sup>

<sup>5</sup> Inoklag Ezra din libro ay iniilan di kaipogaw, tan nakaykayang din pinmipikaana mo daida. Idi lokatana, pinmika da am-in. <sup>6</sup> Kanan Ezra, “Madaydayaw si Yahweh ay manakabalin ay Diyos.”

Inkayang din amin ay ipogaw din takkay da yan kanan da, “Amen! Amen!” Pag dan mandokmog ay manyakog-ong ay nanaydayaw en Diyos.

<sup>7a</sup> Pag dan pomika din ipogaw et inpalawag da Jesua ay Levita en daida din linteg. <sup>8</sup> In-olog da din linteg, asi dan inlawlawag ta maawatan din kaipogaw. <sup>9</sup> Omanoga din ipogaw sin nanngean da sin linteg, pag kanan da Nehemias ay gobernador, Ezra ay padi ya maestron di linteg, ya din Levita ay mangit-itdo sin ipogaw, “Nasantoan din agew ay nay ay para en Yahweh ay Diyos yo, isonga adi kayon manladingit ya man-oga.”

<sup>10</sup> Kanan Nehemias, “Somaa kayo ta manragsak kayo ay mangan ya man-inom yan idawtan yo din magay sagana na. Nasantoan din agew ay nay para en Diyos, isonga adi kayon manladingit, tan din ragsak yo sin panaydayawan yo en Diyos di pomigsaan di nemnem yo.” <sup>11 12</sup> Et sinmaa am-in din ipogaw ay en nanragsak ay nangan ya man-inom. Indawtan da abe din gagait da. Palalo di ragsak da, tan naawatan da din dinnge da ay naibasa.

Sin kabigatana, naammoan din kaipogaw ay silibraran da koma din fiesta ay makwani en Pansidoman, isonga sinilibraran da si pito ay agew ay maibasar sin kanan di linteg. Et inag-agew yan inbasbasan Ezra en daida din linteg Diyos. (8:13-18)

13 14 15 16 17 18

## 9

### *Din Inkararag Din Kaipogaw Ay Nangipodno Sin Basbasol Da (9:1-3,5-38)*

<sup>1</sup> Sin pitsa 24 di iso met laeng ay bowan, natopog din Israelita ta itpe da din dagaang da. Nanbado da si sako ya piney-an da si tapok din toktok da ay mangipaila si ladingit da. <sup>2</sup> Kinmasin din Israelita sin mangili et pinmika da ay nangipodno ya nangibabawi sin basbasol da ya basbasol di aap-o da. <sup>3</sup> Emey ay tolo ay oras ay naibasa en daida din

\* **6:15** Maikan-em ay bowan sin kalindaryon di Judio. Pitsa 2 di Octubre, 445 B.C. sin kalindaryo tako.

linteg Yahweh ay Diyos da. Tolo ay oras abe ay pinmipika da ay nangipodno sin basbasol da ya nandaydayaw dan Yahweh ay Diyos da. <sup>4</sup>

<sup>5</sup> Idi siya di, kanan din Levita ay da Jesua, Kadmiel, Bani, Hasabneyas, Serebias, Hodias, Sebanias ya si Petahias, “Pomika kayo ta idaydayaw yo si Yahweh ay Diyos yo.” Pag dan kanan ay nangikararag, “Maidaydayaw ka koma si eng-enggana olay mo adi omanay di kalin di ipogaw ay mangidayaw ay kosto sin kinangaton di ngadan mo. <sup>6</sup> Sik-a anggoy di Diyos. Pinarsuam ed daya ya ed langit pati din tatalaw ay wadas di. Pinarsuam din daga ya din baybay ya din amin ay wada en daida. Indawtam daida amin si biyag yan daydayawen daka sin adi kabilang ay aanghel ed langit.

<sup>7</sup> “Sik-a si Yahweh ay Diyos ay namili en Abram. Sik-a di nangipango en sisya ay komaan ed Ur ay lak-am di Babilonia ya nangipangadan en sisya si Abraham. <sup>8</sup> Napaneknekam ay matalek sisya et intolag mon sisya ay idawat mo sin ipoli na din dagan di Canaaneo, Heteo, Amorreo, Perezeeo, Jebuseo ya Gergeseo. Et tinongpal mo din karim tan nalinteg ka.

<sup>9</sup> “Inilam din ligat di ap-apo mi ed Egipto ya dinngem din adawag da ay mankedaw si badang mo sin kawada da sin Baybay ay Mandalangdang. <sup>10</sup> Inpailam di ad-ado ay nakaskasdaaw sin inyat mo ay nanosa sin Faraon ya din amin ay oopisyal ya ipogaw sin ili na, tan ammom di inyat da ay namaligat sin ipogaw mo. Ginon-od mo di dayaw ay wada en sik-a enggana pay laeng ed wani. <sup>11</sup> Nansianem din baybay sin sangoanan da et nangaan di nandan da. Ngem intep-am din mangap-apayaw en daida sin baybay et kaman dan bato ay nalned sin napigsa ay danom. <sup>12</sup> Sin kaagawan yan inpangom daida babaen si liboo, sin labi yan sinilawam din danan da babaen si apoy. <sup>13</sup> Manipod ed langit yan binmaba ka sin dontog ay Sinai et isdi ay nakikali ka en daida. Indawat mo en daida din linteg ya bilbilin mo ay kosto ya nalinteg.

<sup>14</sup> “Inbilin mon daida ay banolen da din agew ay pan-ibbayan yan inpaammom din linteg ya bilbilin mo babaen en Moses ay baam. <sup>15</sup> Sin nandagaangan da, pinakan mos daida si tinapay ay napod daya. Sin nanbigawan da, indawtam daida si danom ay napo sin dakdake ay bato. Inbagam en daida ay en da okaen din daga ay insapatam ay idawat mo en daida. <sup>16</sup> Ngem tinmangsit din ap-apo mi et sinigaan da ay tongpalen din bilin mo. <sup>17</sup> Sinigaan da ay mangonod sin bilin mo yan nilinglingan da din nakaskasdaaw ay inam-amag mo sin sangoanan da. Begew sin makenteg ay nemnem da, nanpili da si mangipango en daida ta mantaoli da koma sin naibag-enan da ed Egipto. Ngem sik-a din Diyos ay manangpakawan, managseg-ang, kanayon ay managlayad ya baken nalaka ay bomonget. Isonga adi kan dinokogan daida <sup>18</sup> olay mo nan-amag da si sinan baka asi dan kanan en si doy din diyos ay nangipango en daida ay komaan ed Egipto ya olay mo ininsolto das sik-a begew sin kasisinit ay inam-amag da. <sup>19</sup> Gapo sin dakdake ay seg-ang mo, adi kan binaybay-an daida sin lugar ay magay omili. Adi kan kinakkaan din kaman posti ay liboo ya apoy ay nangipangpango en daida sin kaagawan ya labi. <sup>20</sup> Indawat mo en daida din siged ay Ispiritom ta say maitdoan da sin masapol ay amagen da. Pinakan mos daida si manna ya pinainom mos daida. <sup>21</sup> Opatapolo ay tawen ay indawdawat mo din kasapolan da sin lugar ay magay omili. Maga polos di nankolang ay kasapolan da, adi nadondonot din bado da ya adi aben linmatlat-ed din siki da.

<sup>22</sup> “Nangabakem daida et inabak da di aari ya din ipogaw da et inbingay mo sin ipogaw mo din daga da. Inoka da ed Hesbon ay inturayan Sihon ya ed Basan ay inturayan Og. <sup>23</sup> Inpaad-adom din anak da ay kaman din kaad-adon di talaw ed daya ya inpangom daida sin daga ay inkarim sin ap-apo da. <sup>24</sup> Inmey din an-ak da et inoka da din daga, tan binadangam daida ay mangabak sin man-ili ed Canaan et inpakaan mo din omili isdi. Indawtam daida si kabaelan ay mangabak sin omili ya din ari da ya mangamag si layden da ay amagen en daida. <sup>25</sup> Inabak din ipogaw mo di siyodad ay nas-et di alad da ya daga ay magabay di mola. Inoka da di bebbeey ay napno si kinabaknang, naamag

ay sakdoan, kaob-obasan, kakakkaiwan ay olivo ya kakaiw ay manlames. Nangan da si am-in ay layden da et tinmaba da. Ginan-ganas da din nakaskasdaaw ay bindisyon mo en daida.

<sup>26</sup> “Ngem adi dakan tinongpal ya kinontra das sik-a. Dinokogan da din linteg mo ya pinse da din mamadto ay inbaam ay mamagbaga en daida ta mantaoli da en sik-a. Nadagsen di basol da ay nankalkali si maikontra en sik-a. <sup>27</sup> Siya din gapo ay inpalobos mo ay abaken din kalaban da ya paligaten das daida. Ngem idi naligatan da, nankedaw da si badang mo et dinngem ed daya. Gapo sin dakdake ay seg-ang mo, indawtam daida si mangisalakan en daida sin kalaban da. <sup>28</sup> Ngem idi sinmaldeng di ligat da, inamag da kasin di lawa sin pangilam. Isonga binay-am daida ay abaken din kalaban da et inturayan das daida. Idi nankedaw da kasin si badang mo, dinngem ed daya et insalakan mos daida. Kanayon ay kaman nidi di naam-amag.

<sup>29</sup> “Binagbagaam daida ta mantongpal da sin linteg mo, ngem inpapangato dan nemnem da et adi dan tinongpal. Sinigaan da ay manongpal sin linteg mo, olay mo say poon di biyag da din panongpalan das di. <sup>30</sup> Katawetawen ay inan-anosam ay namagbaga en daida babaen sin mamadto ay nankalkaliam, ngem tineteweng da. Isonga inpalobos mo ay iturayan din odom ay nasyon daida. <sup>31</sup> Ngem olay mo siya di, adi ka pinses daida amin ya adi kan nilinglingan, gapo ta managseg-ang ya managlayad ka ay Diyos.

<sup>32</sup> “Sik-a din nakaskasdaaw, manakabalin ya kaeegyat ay Diyos. Tongpalem di itolag mo ya adi manbalbaliw din layad mo, isonga adi ka koman ibilang ay nalag-an nan laklak-amen mi ay ligat. Nilaklak-am mi am-in sin aari mi, oopisyal, papadi, mamadto, ap-apo mi ya din amin ay ipogaw mo manipod sin nanturturayan di aari ay taga-Assyria engganad wani. <sup>33</sup> Nalinteg ka sin amin ay nanosaam en dakami, tan managtongpal ka sin inbagam, ngem nanbasol kami. <sup>34</sup> Din aari, papangolo, papadi ya ap-apo mi yan adi dan tinongpal din linteg mo. Adi dan inkaskaso din linteg mo ya pamagbagam en daida. <sup>35</sup> Mayat di kabibiyag ay inpalak-am mo en daida sin annawa ay daga ay inturayan da ay magabay di mola. Ngem olay mo siya di, adi dan dinokdokogan din lawa ay ogali da ta mansilbi dan sik-a. <sup>36</sup> Ed wani yan nay naibabag-en kami isnan ili ay indawat mo sin ap-apo mi ta say kapoan di kanen mi ya amin ay pansigdan ay magon-od mi. <sup>37</sup> Gapo sin basbasol mi, din aari ay insaad mo ay mangituray en dakami di kaidawtan din maapit. Mabalina ay amagen da di olay sino ay layden da en dakami ya sin aanimal mi et palalo ay maligligatan kami. <sup>38</sup> Ngem olay mo siya di di napasamak, man-amag kami ay Judio si kasolatan ay masapataan ay pirmaan din papangolo, Levita ya papadi mi.”

Idi nakdeng din kararag ay nay, insapatan din kaipoipogaw ya din papangolo da ay dadlon dan tongpalen din linteg ya bilbilin Yahweh ay Diyos da.

Sin maika-32 ay tawen ay nanturayan Ari Artaxerxes, nantaoli si Nehemias ta mansilbi kasin en sisya. Ngem idi inmey di timpo, nantaoli kasin ay man-gobernador ed Jerusalem. Kambaw waday Ammonita ay nanbeey si esay kowarton di Timplo ay kaipenpenan koman di datdaton ay makan, insinso ya odom. Kinmaan abe din Levita ay mansilsilbi koma sin Timplo, tan adi dan naidawdawtan si bingay da. Wada abe di man-ob-obla sin agew ay pan-ibbayan yan wada da pay di nangasawas babbabai ay mangili. Am-in dana ay nakabasol et yinamyaman Nehemias daida yan inpakat na din kabaelana ay mangipataoli sin kaipoipogaw en Diyos. Pag nan kanan ay nankararag, “Sapay koma ay Diyos ta nemnemem am-in dana ay inamag ko ta say siged di iyat mo en sak-en.” (10:1-39; 13:1-31)

**11**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36

**12**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47

**13**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31



## Job

### Maipanggep Sin Libro Ay Nay

Din libro ay Job et maipanggep si esay baknang ay nanaydayaw en Diyos ya nalinteg di ogali na. Asi et bigla ay datngan di nakalakalasi ay ligat. Sin pannemnem di gagait na, nalawag ay nanbasol si Job, tan din pangawat da et bindisyonan Diyos din siked di ogali na yan dosaena din nakabasol. Ngem magay ammon Job ay nanbasolana, isonga nakisongbat en daida ya nanriri abe en Diyos ay mangwani en adi lemebbeng ay namosena di kaman dadi ay ligat. Adi ammon Job ay inpalobos Diyos ay padasen Satanas sisya ta maila mo naimposan di pammati na, tan kanan Satanas en din pammati na et manbegew anggoy sin nakalakalasi ay bindisyon Diyos en sisya.

Adi sinongbatan Diyos din salsalodsod Job, ngem inpaammo na en sisya din kadakdaken di panakabalina ya sirib na. Binagbagaana abes sisya begew sin ad-ado ay kali na olay mo at-atik di ammo na. Pag ibabawin Job din bonget na en Diyos ya bigbigena din kinangato na. Asi pag kasin bindisyonan Diyos si Job et ad-ad-adoy kinabaknang na sin naodi mo sin damo.

#### **Din Linaona**

Din kabibiyag en Job ya din napasamak en sisya 1:1–2:13

Din nanngangalatan da Job ya din gagait na 3:1–37:24

Din songbat Diyos en Job 38:1–42:6

Din kasin namindisyonan Diyos en Job 42:7–7

#### *Din Kasasaad Job Ya Din Nanlaslasoyan Satanas Sin Nalinteg Ay Ogali Na*

<sup>1</sup> Sin ili ay Uz, waday lalaki ay manngadan si Job. Magay maipabasol en sisya ya kosto di ogali na, tan pinatpateg na si Diyos ya inaddawiana amin ay lawa. <sup>2</sup> Waday an-ak na ay pito ay lalaki ya tolo ay babai. <sup>3</sup> Wada abey 7,000 ay karnero na, 3,000 ay kamel, 1,000 ay baka, 500 ay dangki ya ad-ado ay bag-en. Sisya di kababaknangan sin bomandas belaan di agew. <sup>4</sup> Mansinoskat da ay manpalti din an-ak na ay lalaki yan man-asiyag da. Kanayon abe ay ayagan da din aag-i da ay babbabai. <sup>5</sup> Mo tonggal makdeng din ragragsak da, masapa si Job ay man-idaton si animal ay mapooan para sin esa ya esa ay anak na ta say malinisan da. Kanayon ay amagena di tan kananas nemnem na en amangan mo binaosan das Diyos sin nemnem da yan say binmasolan da.

<sup>6</sup> Sin namingsan ay nasinop din aanghel\* sin sangoanan Diyos, nakikoyog si Satanas† en daida. <sup>7</sup> Kanan Diyos en sisya, “Intoy napoam?”

Kanana ay sinombat, “Sinokisok ko din intiroy ay daga.”

<sup>8</sup> Pag kanan Diyos, “Sinoy pannemnem mo en Job ay mansilsilbi en sak-en? Magay makaiso en sisya sin intiroy ay daga. Magay maipabasol en sisya tan kosto di ogali na. Patgenas sak-en ay Diyos ya ad-addawiana di lawa.”

<sup>9</sup> Ngem kanan Satanas ay nanongbat, “Ay siya mo dayawen dakan Job mo magay gapo na? <sup>10</sup> Kanam adi mon sik-a ay mismo di nanalsalaknib en sisya ya din pamilya na pati amin ay sanikwa na. Binindisyonam amin ay obla na ya inpaad-adom din animal na et naiwaras da sin intiroy ay daga. <sup>11</sup> Padasem kadi ay kaanen din sanikwa na ta ilaem mo adi daka et baosan ay sangosango.”

<sup>12</sup> Pag kanan Diyos, “May, amagem din laydem sin amin ay sanikwa na, ngem adi kan sagsagiden sisya ay mismo.” Et siya di, kinmaan si Satanas sin sangoanan Diyos.

#### *Din Namagaan Di Sanikwan Job Ya Din Aan-ak Na*

\* **1:6** Din kanana sin Hebreo et: aan-ak Diyos. † **1:6** Din kanana sin Hebreo et: din satanas. Din kaiosalana sin libro ay Job et baken ngadan mo adi et titulo. Din olog na yan “din kaibaw” ono “din mangipabasol.”

<sup>13</sup> Sin namingsan, manragragsak din an-ak Job sin beey di pangpangoan da. <sup>14</sup> Sin agew ay doy, dinmateng et sin beey Job di mangipadamag en Job ay kanana, “Idi ial-alado mi din babaka ya man-al-alab dan dangki sin asag-en mi, <sup>15</sup> kadateng da et din taga-Sabe yan ina da amin daida. Pinse da din babag-en mo et sak-en anggoy di nabayan ay mangipadamag en sik-a.”

<sup>16</sup> Mankalkali pay laeng di yan domateng di esay bag-en yan kanana, “Nakimat din kakarnero‡ ya manpaspastol et sak-en anggoy di nabayan ay mangipaammo en sik-a.”

<sup>17</sup> Mankalkali pay laeng di, kadateng abey esay bag-en yan kanana, “Waday tolo ay bonggoy di Kaldeo ay in mali yan ina da amin ay kamel ya pinse da amin din bag-en mo. Sak-en anggoy di nabayan ay mangipaammo en sik-a.”

<sup>18</sup> Mankalkali pay laeng din lalaki ay sana yan domateng et di esa ay kanana, “Manragragsak din an-ak mo sin beey di pangpangoan da <sup>19</sup> yan kadateng et di kaeegyat ay alinposapos ay napo sin kadardaratan. Dinadael na din beey et natab-okan da. Natey da amin et sak-en anggoy di nabayan ay mangipaammo en sik-a.”

<sup>20</sup> Idi siya di, kapika si Job yan kabisngit sin bado na gapo si ladingit na. Kinoskoposana din book na, asi pag manpakleb sin lota ay mangdayaw en Diyos <sup>21</sup> yan kanana, “Magay intakin ko sin binmalaak en inak yan maga abey itakin ko mo mateyak. Si Diyos di nangidawat et sisya met laeng di nanaoli. Madaydayaw si Diyos.” <sup>22</sup> Olay mo siya di di napasamak, adi nanbasol si Job ya adi na aben pinabasol si Diyos.

## 2

### *Din Namaligatan Satanas En Job*

<sup>1</sup> Sin esay agew, kasin nasinop din aangel sin sangoanan Diyos yan wada si Satanas ay naitapi en daida. <sup>2</sup> Kanan Diyos en sisya, “Intoy napoam?”

Kanana ay sinombat, “Sinokisok ko din intiro ay daga.”

<sup>3</sup> Pag kanan Diyos, “Sinoy pannemnem mo en Job ay mansilsilbi en sak-en? Magay makaiso en sisya sin intiro ay daga. Magay maipabasol en sisya tan kosto di ogali na. Patgenas sak-en ay Diyos ya ad-addawiana di lawa. Pinatodonam sak-en ay mamaligat en sisya olay magay gapo na, ngem inpapasnek na pay dedan ay mangitoltoloy sin kosto ay ogali na.”

<sup>4</sup> Ngem kanan Satanas, “Idawat di ipogaw amin ay wada en sisya ta maisalakan di biyag na. <sup>5</sup> Ngem padasem ay paligaten din awak na et sigurado ay baosan daka.”

<sup>6</sup> Pag kanan Diyos, “May, ipalobos ko ay amagem di laydem en sisya ngem adi ka pespeslen.”

<sup>7</sup> Siya et di kinmaan si Satanas sin sangoanan Diyos et nansakitena si Job. Nabayabayangan manipod dapan enggana sin toktok na. <sup>8</sup> Nan-a si pit-ing di banga ay ikoskopos na sin bayang na sin tomotokdoana ay dap-o sin basuraan. <sup>9</sup> Kanan din asawa na en sisya, “Ay itoltoloy mo pay laeng din kosto ay ogalim? Adi ka et baosan si Diyos ta olay matey ka.”

<sup>10</sup> Ngem kanan Job, “Kaman magay nemnem mo. Awaten tako din bindisyon Diyos, ngem apay nga manmayotmot tako sin ligat?” Olay kas-ano di ligat Job, adi nankali si lawa.

<sup>11</sup> Idi dinngen din gagayyem Job din napasamak ay ligat na, nantotolag da ay en liwliwaen sisya. Di ngadan da yan si Elifaz ay taga-Teman, Bildad ay taga-Sua, ya si Zofar ay taga-Naama. <sup>12</sup> Idi tamangen da sin baken onay addawi, istay adi dan maimatonan sisya. Nan-oga da ya binisngit da din bado da dowan dan sapokan din toktok das tapok.

<sup>13</sup> Nakitotokdo da en sisya sin lota si pito ay agew ya labi, ngem magay nankalkali tan inila da ay palalo di ligat na.

‡ 1:16 Din kanana sin Hebreo et: “Kaekgas si Diyos si apoy sin kakarnero...”

### 3

#### *Din Nanririan Job* (3:1-2,8-13,20-26)

<sup>1</sup> Idi siya di, nankali si Job et binaosana din agew ay naianakana. <sup>2</sup> Kanana, <sup>3</sup><sup>4</sup><sup>5</sup><sup>6</sup><sup>7</sup><sup>8</sup> “Din nankalalaing ay manbaos ay makabael ay manbalaga sin kaeegyat ay bowaya sin baybay, binaosan da koma din agew ay sana. <sup>9</sup> Adi koma binmala din batakagan ay nansilaw sin pinmat-aana. Maga koma di nantongpalan di nansedsed-an din agew ay sana sin pinmat-aana. Adi koman natoloy din kaaggewana. <sup>10</sup> Mabaosan koma din labi ay sana tan adi na tinopap di binmalaak sin eges en inak, ta adiak koman lak-amen dana ay ligat. <sup>11</sup> Apay nga adiak et natey sin eges inak ono sin binmalaak? <sup>12</sup> Apay nga binmakwa pay laeng si inak ya nansosoak? <sup>13</sup> Ta mo nateyak et koma, ed wani yan man-il-illengak. <sup>14</sup> <sup>15</sup> <sup>16</sup> <sup>17</sup> <sup>18</sup> <sup>19</sup> <sup>20</sup> Apay nga matago pay laeng di ipogaw ay palalo di ligat ya ladingit da? <sup>21</sup> Laylayden da ay matey, ngem baken say maamag en daida. Nasursurok din iyat da ay manganap sin pese mo din gadget di manganap si naitabon ay kinabaknang. <sup>22</sup> Et palalo di ragsak da mo datngen dan pese ya maiponpon da. <sup>23</sup> Apay nga matago pay laeng di ipogaw ay sinalinan Diyos di masakbayana? <sup>24</sup> Adiak makakan begew sin ladingit ko. Kaman omayos ay danom din kaad-adon di bayeweng ko. <sup>25</sup> Amin din emeg-egyatak et tinmet-ewa da. <sup>26</sup> Magay talnak ya pan-illengak ya magay pap-eng di problimak.”

### 4

#### *Din Inbagan Elifaz* (4:1-9)

<sup>1</sup> Idi siya di, nankali si Elifaz ay taga-Teman yan kanana, <sup>2</sup> “Anosam koma din ibagak en sik-a tan adiak makaitpe si kalik. <sup>3</sup> Nemnemem din ad-ado ay initdoam ya din binadbadangam ay magay kabaelan da. <sup>4</sup> Pinapigsam abe sin kalim din nadismaya ya nadadagsenan sin ligat da. <sup>5</sup> Ngem ed wani ay sik-a di maligatan yan adi kan maanosan. <sup>6</sup> Patpatgem si Diyos ya magay maipabasol en sik-a, et lebbeng na ay mantalek ya mannamnama ka. <sup>7</sup> Nemnemem kod na. Ay wada aya di magay basol na ay dosaen Diyos ta matey? <sup>8</sup> Siya na di inilak: Din mangimola si basol ya problima et lawa di apiten da. <sup>9</sup> Tan kaman napigsa ay dagem din bonget Diyos ay manadael en daida.”  
<sup>10</sup> <sup>11</sup> <sup>12</sup> <sup>13</sup> <sup>14</sup> <sup>15</sup> <sup>16</sup> <sup>17</sup> <sup>18</sup> <sup>19</sup> <sup>20</sup> <sup>21</sup>

### 5

<sup>1</sup> <sup>2</sup> <sup>3</sup> <sup>4</sup> <sup>5</sup> <sup>6</sup> <sup>7</sup>

#### (5:8-13)

<sup>8</sup> “Mo sak-en si sik-a, mankamangak en Diyos et ibagak din ligat ko. <sup>9</sup> Adi takon maawatan din nakaskasdaaw ay am-amagena ya adi somaldeng ay mangamag si kaman dana. <sup>10</sup> Pawadaena di odan sin daga et danomana din papayew. <sup>11</sup> Ipangato na din napakombaba ya isalakana din mapalpaligatan. <sup>12</sup> Adi na ipalobos ay matongpal din planon di nasikap. <sup>13</sup> Et makna da sin tagdey ay daida met laeng di nangamag.”  
<sup>14</sup> <sup>15</sup> <sup>16</sup> <sup>17</sup> <sup>18</sup> <sup>19</sup> <sup>20</sup> <sup>21</sup> <sup>22</sup> <sup>23</sup> <sup>24</sup> <sup>25</sup> <sup>26</sup> <sup>27</sup>

### 6

#### *Din Songbat Job En Elifaz* (6:1-3,8-11,28-30)

<sup>1</sup> Idi songbatan Job yan kanana, <sup>2</sup> “Mo koma ta matimbang din ladingit ya ligligat ko <sup>3</sup> et nadagdagsen da mo din darat sin baybay, isonga adi kayo koma masdaaw mo oway di inbagbagak. <sup>4</sup> <sup>5</sup> <sup>6</sup> <sup>7</sup> <sup>8</sup> Mo dengngen koman Diyos din kararag ko ta ipalobos na din kedkedawek en sisya. <sup>9</sup> Maymayat et koma mo pomse. <sup>10</sup> Mo say iyat na koma

et maragsakanak olay mo palalo di ligat ko. Tan adiak polos nilabsing din bilbilin di Nasantoan ay Diyos. <sup>11</sup> Into pay di bikas ko ay mantoltoloy ay matago mo maga met laeng di namnamak? <sup>12 13 14 15 16 17 18 19 20 21 22 23 24 25 26 27 28</sup> Ominengneng kayo kod ta paneknekan yo mo man-et-etekak en dakayo. <sup>29</sup> Enggay nalabes kayo. Isaldeng yo koma san baken kosto ay ibagbaga yo. Adi yo pabasolen sak-en tan maga di basol ko. <sup>30</sup> Ay siya mo man-et-etekak ya adiak ammo ay mangilasin si siked ya lawa?

## 7

*(7:1-10)*

<sup>1</sup> “Din biyag di ipogaw isnan daga et maiarig si biyag di soldado ay naligat ya mapilitan ay mansilbi ya kaman biyag di makilaglagbo. <sup>2</sup> Kaman din bag-en ay manseseed si kademana ya din makilaglagbo ay manseseed si lagbo na. <sup>3</sup> Binowan ay magay silbin di panagbiyag ko, linablabi ay ladingit di laklak-amek. <sup>4</sup> Mo bomaktadak, laydek ay maaggew koma. Ngem ando din labi et owatak bomalibalin enggana ay pomat-a. <sup>5</sup> Pag bayang amin nan awak ko. Enggay nabigis ya nadanoman da. <sup>6</sup> Paspas ay malabas nan agew ay panbiyagak, mapospos nan agew ko yan magay namnamak.

<sup>7</sup> “Nemnemem koma ay Diyos ay owat kaman dagem nan biyag ko. Enggay napap-eng di ragsak ko. <sup>8</sup> Din omil-ila ed wani, awni et adi dan to omila. Olay mo omanap ka, magaak ay datngem. <sup>9</sup> Din ipogaw ay matey et kaman din liboo ay maomas ya malitaw, tan adi kasin mantaoli. <sup>10</sup> Adi mantaoli sin beey na et enggay maliw-an sisya.”  
11 12 13 14 15 16 17 18 19 20 21

## 8

*Din Inbagan Bildad*

*(8:1-7)*

<sup>1</sup> Nankali abe si Bildad ay taga-Sua yan kanana, <sup>2</sup> “Pig-an pay ay somaldeng ka issan ad-ado ay ibagbagam ay kaman owat dagem? <sup>3</sup> Ay siya mo ikillon Diyos ay Manakabalin din nalinteg ya baliktadena din kosto? <sup>4</sup> Binmasol met din an-ak mo et dinosanas daida begew sin basol da. <sup>5</sup> Kamangem et koma si Diyos ay Manakabalin Amin ta mankedaw ka si seg-ang na. <sup>6</sup> Mo tet-ewa ay nalinteg ka ya nalinis di nemnem mo, sigurado ay badangan dakan Diyos ya itaoli na amin ay namaga en sik-a. <sup>7</sup> Din sigod ay kasasaad mo et kaman kan nabiteg mo mais-o sin kinabaknang mo sin tapin di agew.”  
8 9 10 11 12 13 14 15 16 17 18 19 20 21 22

## 9

*Din Insongbat Job En Bildad*

*(9:1-22)*

<sup>1</sup> Songbatan pay Job yan kanana, <sup>2</sup> “Ammok kayman ay tet-ewa sa, ngem intoy iyat di ipogaw ay mangibaga sin sangoanan Diyos ay magay basol na? <sup>3</sup> Mo waday mangipadas ay makisongbat en Diyos et adi na masongbatan di olay esa sin nilibo ay salodsod na. <sup>4</sup> Nalaing ya manakabalin si Diyos, isonga magay makabael ay lomaban en sisya. <sup>5</sup> Bigla ay etanena din dontog ya tokangena gapo sin bonget na. <sup>6</sup> Panyegyegena din daga et maikiweg din tokod na.\* <sup>7</sup> Mabalin ay bilinena din agew ya talaw ta adi da bomala. <sup>8</sup> Ang-anggoy na ay nangipawada ed daya ya nangigatin sin dalloyon sin baybay. <sup>9</sup> Insaad na abe din grupon di talaw ed daya ay kaman din salibobo, ad-ado, todong, ya odom pay. <sup>10</sup> Adi takon maawatan din nakaskasdaaw ay am-amagena ya adi somaldeng ay mangam-amag si nakaskasdaaw.

<sup>11</sup> “Mo malabas sin kad-ak, adiak mailas sisya. <sup>12</sup> Alaena din laydena et magay makalapped en sisya. Magay makaitoled ay mangibaga en sisya, ‘Sinoy am-amagem

\* **9:6** Din pannemnem di Judio ed idi et waday dadakke ay tokod ay nananggen sin daga.

issa?’ <sup>13</sup> Adi na teppen din bonget na, et inabak na din kalabana ay binmadang sin dragon ay si Rahab.

<sup>14</sup> “Sinoak ngarud ay makisongbat en sisya? Intoy panganapak ngata si isongbat ko? <sup>15</sup> Olay magay basol ko, iwed met laeng maamag ko isonga manpakpakaasiak et anggoy en Diyos. <sup>16</sup> Olay pay pinaayagak sisya sin pangokoman ya tinongpal na, ammok ay adi na met laeng dengngen din salodsod ko. <sup>17</sup> Olay magay gapo na, inpawada na di mansisilpo ay ligat ko. <sup>18</sup> Adi na inpalobos ay makaleng-agak, tan pinno nan biyag ko si ladingit ya sakit di nemnem. <sup>19</sup> Mo kanak en ipakat ko di bikas ko, magay makaiso sin bikas na. Mo idarum ko, ay sino di makaiparang en sisya sin pangokoman? <sup>20</sup> Olay mo magay basol ko, makeddenganak pay dedan begew sin kalik. <sup>21</sup> Magay basol ko ngem adiak sakiten di biyag ko, tan enggay naomaak ay manbibiyag. <sup>22</sup> Tan iso met laeng. Olay nakabasol tako ono maga et nan-iiso ay peslen Diyos datako.”  
23 24 25 26 27 28 29 30 31 32 33 34 35

## 10

1 2 3 4 5 6 7 8 9 10 11 12 13 14 15 16 17 18 19 20 21 22

## 11

### *Din Inbagan Zofar (11:1-15)*

<sup>1</sup> Nankali abe si Zofar ay taga-Naama yan kanana, <sup>2</sup> “Ay siya mo magay manongbat issan ad-ado ay kali? Ay maibilang di ipogaw ay nalinteg mo paad-adoenan kali na? <sup>3</sup> Ay kanam en paginkem dakami sin ad-ado ay kalim ya maga di mamagbaga en sik-a sin panglaslasoyam en Diyos? <sup>4</sup> Kanam en tet-ewa din ibagbagam ya nalinis ka sin pangiilaan Diyos. <sup>5</sup> Ngem mo mankali koma si Diyos ta songbatan daka, <sup>6</sup> ta ipaammo na di laing ay naligat ay maawatam di ipogaw, maammoam ay nalaglag-an pay laeng din dosa ay indawat nan sik-a mo din basol mo.

<sup>7</sup> “Ay maawatam di naoneg ay banag maipanggep en Diyos ya maawatam ay kosto din panakabalina? <sup>8</sup> Din ammon Diyos et nangatngato mo ed daya ya naon-oneg mo din kad-an di natey. Ay siya mo makad-as ka ono maawatam? <sup>9</sup> Din kinangaton Diyos et dakdake mo nan daga ya annawa mo din baybay.

<sup>10</sup> “Mo depapen ya ibalod nas sik-a ono idarum daka sin pangokoman, maga polos di makalapped en sisya. <sup>11</sup> Ammo na di kinasikap di ipogaw ya il-ilaena din basol da et adi na liw-an. <sup>12</sup> Mabalin ay lomaing di naong-ong ay ipogaw mo maianak ay naamo din atap ay animal. <sup>13</sup> Isonga pasigedem san nemnem mo ta mankararag ka en Diyos. <sup>14</sup> Mo dokogam din lawa ay ogalim ya adi kan ipalobos ay mantee di basol sin beey mo, <sup>15</sup> magay panbainam ya pan-egyatam ay somango sin kaipoipogaw.” <sup>16 17 18 19 20</sup>

## 12

### *Din Songbat Job En Zofar (12:1-6)*

<sup>1</sup> Kanan Job ay nanongbat, <sup>2</sup> “Dakayo met kayman din nalaing ay ipogaw et mo matey kayo, makikatey di laing en dakayo. <sup>3</sup> Ngem wada abe di nemnem ko ay kaman si dakayo. Magay nanlasinan yo en sak-en, tan ammon di amin ay ipogaw din amin ay inbaga yo. <sup>4</sup> Somis-iyek din gagayyem ko olay mo nalintegak ay ipogaw ay magay maipabasol en sak-en. Nankararagak met en Diyos et sinongbatana. <sup>5</sup> Magay ligat yo yan somisiyek kayo. Palpaligaten yo di ipogaw ay nganngani ay matokang. <sup>6</sup> Ngem din mangakew yan natalna di biyag da. Siya abe sin adi emegyat en Diyos ya say diyos da din bikas da. <sup>7 8 9 10 11 12 13 14 15 16 17 18 19 20 21 22 23 24 25</sup>



## 13

(13:1-6)

<sup>1</sup> “Din amin ay inbagbaga yo et dinngék abe ya maawatak. <sup>2</sup> Ammok abe din ammo yo, magay nanlasinan yo. <sup>3</sup> Ngem si Diyos ay Manakabalin Amin di laydek ay kasongbat ko ta makinilawagak en sisya. <sup>4</sup> Dakayo et man-etek kayo ay mangwani en waday binmasolak. Kaman kayon doktor ay magay mailatonan ay agasana. <sup>5</sup> Agpos et gominek kayo tan siya say kostos amagen yo. <sup>6</sup> Dengngen yo et din iyat ko ay manpalawag maipanggep en sak-en.” <sup>7</sup> <sup>8</sup> <sup>9</sup> <sup>10</sup> <sup>11</sup> <sup>12</sup> <sup>13</sup> <sup>14</sup> <sup>15</sup> <sup>16</sup> <sup>17</sup> <sup>18</sup> <sup>19</sup>

*Din Kindaw Job En Diyos*

(13:20-23; 14:1-14)

<sup>20</sup> “Way dowá ay banag ay kedawek en sik-a ay Diyos, et adiak padasen ay itabonan sik-a. <sup>21</sup> Isaldeng mo koma ay pomalpaligat ya ipalobos mo koma ta baken palalo di egyat ko ay makisango en sik-a. <sup>22</sup> Mankali ka ta songbatak ono sak-en di mankali ta songbatam. <sup>23</sup> Piga aya di inamag ko ay basol? Ipaammom kod di binmasolak ya nankolkolangak. <sup>24</sup> <sup>25</sup> <sup>26</sup> <sup>27</sup> <sup>28</sup>

## 14

<sup>1</sup> “Amin ay ipogaw et aptik ya naligat di biyag da. <sup>2</sup> Kaman dan sabsabong ay gomabay ngem si awni et malaylay da. Kaman da aben alidong di liboo ay sinkaattikan yan malabas ya mamaga. <sup>3</sup> Mo kaman nidi di kasasaad ko, apay nga omila ka ay Diyos ta okomem sak-en sin sangoanam? <sup>4</sup> Adi met mabalin ay pabalaen di nalinis sin kadodogis. <sup>5</sup> Kineddengam di bilang di agew ya bowan ay panbiyagan di ipogaw. Kineddengam di kaandon di biyag da et adi mabalin ay mabaliwan. <sup>6</sup> Adi ka koman il-ilaen daida. Baybay-am koma ay ganasen da din naligat ay biyag da mo mabalin.

<sup>7</sup> “Mo mapoyo di kaiw et waday namnama na ay mabiyag ya mansaringit. <sup>8</sup> Olay mo mabayag ta kaman natey din lamot ya poona, <sup>9</sup> ngem no masibogan et mansaringit ya gomabay ay kaman baro ay mola. <sup>10</sup> Ngem no matey di ipogaw, mamaga di bikas na. Mo enggay nasokpot di leng-ag na, into pay di kad-ana? <sup>11</sup> Kaman din posong ya ginawang ay matdok, <sup>12</sup> say kaiarigan di ipogaw ay matey et adi kasin bomangon enggana ay mamaga amin ay wadad daya.\*

<sup>13</sup> “Apo Diyos, omitabon ka koma sin kad-an di natey enggana ay makaan din bonget mo, ta asi kan ikeddeng di timpo ay nemnemem kasin sak-en. <sup>14</sup> Mo matey di ipogaw, ay matago kasin? Mo tet-ewa koma na, maanosak nan timpon di ligat ko et namnamaek ay mabaroan to di biyag ko.” <sup>15</sup> <sup>16</sup> <sup>17</sup> <sup>18</sup> <sup>19</sup> <sup>20</sup> <sup>21</sup> <sup>22</sup>

## 15

*Din Nangipidwaan Da Elifaz En Bildad Ay Nankali*

Idi nakdeng ay nankararag si Job, inpidwan Elifaz ay nankali. Pinabasol nas Job begew sin nanririana en Diyos yan kanana en naligat di biyag di managbasol ay ipogaw tan kanayon ay emegyat begew sin domatdateng ay dosa na. Sinongbatan Job sisya yan kanana en gominek koma si Elifaz tan magay silbin din kali na ay mangliwliwa en sisya. Kanana abe en palpaligaten Diyos sisya ay magay gapo na tan magay basol na. Pag kasin manriri en Diyos yan kanana en si Diyos di begew ay laslasoyen di ipogaw sisya. Magay masmas-ed mo adi din kaitapiana sin kad-an di natey, isonga magay namnama na. Pag mankali abes Bildad yan inpalawag na kasin en Job din kaeegyat ay dosan di managbasol ay ipogaw. (15:1-18:21)

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35

\* **14:12** Din pannemnem di ipogaw ed idi et komakaman din wadad daya si eng-enggana.

1 2 3 4 5 6 7 8 9 10 11 12 13 14 15 16 17 18 19 20 21 22

**16**

1 2 3 4 5 6 7 8 9 10 11 12 13 14 15 16

**17**

1 2 3 4 5 6 7 8 9 10 11 12 13 14 15 16 17 18 19 20 21

**18****19***Din Insongbat Job En Bildad  
(19:1-27)*

<sup>1</sup> Pag kanan Job, <sup>2</sup> “Pig-an pay di somaldengan yo ay pomalpaligat ya domisdismaya begew sin ibagbaga yo? <sup>3</sup> Ay magay bain yo et namin piga\* ay inmin-insolto kayo? <sup>4</sup> Olay kaspangarigan waday inpaksaw ko, ay sino ngin di biyang yo?† <sup>5</sup> Kanan yo en sigsiged kayo mo sak-en et ibilang yo nan naibabainak ay mangpaneknek si basol ko. <sup>6</sup> Ay adi kayo ayan ilan ay si Diyos di nangikeddeng si baken kosto en sak-en? Et naknaak sin tagdey na. <sup>7</sup> Mo manpakaasiak begew sin mapalpaligatak, maga di somongbat. Adi mapatgan din kedkedawek ay nalinteg koma di maikeddeng en sak-en. <sup>8</sup> Sinawad Diyos sak-en ya inpabolinget na din pandanak et adiak makalosot. <sup>9</sup> Kinaana amin ay kinabaknang ko ya dinadael na din dayaw ko. <sup>10</sup> Sin amin ay pansagongak yan pomaligat enggana ay mateyak. Maopay abe din namnamak ay kaman kaiw ay nagabot ya nalaylay. <sup>11</sup> Palalo din bonget na en sak-en et omibilang ay kalabana. <sup>12</sup> Di kaiarigana et inbaa na di sosoldado ay gomobat. Linmikob da ay kamanak wada sin siyodad et nan-amag das somakyaban da ay manadael sin alad na, ngem din katet-ewa na yan owat tolda di kad-ak.

<sup>13</sup> “Inpaaddawi nan sak-en din toton-od ya gagayyem ko <sup>14</sup> et tinmaynan da. <sup>15</sup> Linmingling din sasangailik yan omibilang din babag-en ko ay mangiliak. <sup>16</sup> Mo waday ayagak en daida yan adi da somongbat, olay mo manpakpakaasiak ay bomadang koma. <sup>17</sup> Adi itoled asawak ay manongsong sin leng-ag ko. Sigaan da abe ay somagen din toton-od ko. <sup>18</sup> Olay din anan-ak yan lomaslasoy da ya somisiyek da mo omila da. <sup>19</sup> Omibilang da ay kadodogis din kasag-enan ay gagayyem ko yan linmaksig da din ipatpateg ko. <sup>20</sup> Enggay owat kodil di namobongon sin tong-ak et nganngani di kateyak.

<sup>21</sup> “Maseg-ang kayo paabe ay gagayyem ko tan nay dinmosa si Diyos. <sup>22</sup> Apay nga pomaligat kayo abe ay kaman din am-amagen Diyos? Ay adi kayo pay laeng mapnek ay pomalpaligat? <sup>23</sup> Mo wada komay mangisolat sin ibagbagak ta mailibro da. <sup>24</sup> Ono maitiktik si bato asi mapey-an si ismay ta say komakaman si eng-enggana. <sup>25</sup> Ngem mo sak-en pay, ammok ay matmatago din Somalagnib. Sisyas di maodi ay mankali et ipaneknek na isnan daga ay magay basol ko. <sup>26</sup> Olay madadael nan kodil ko gapo si sakit, ammok ay mailak to si Diyos. <sup>27</sup> Ilaen to nan mismo ay mata ay baken odom. Ay apaw nan palalo ay layad ko ay matongpal koma di. Kaman enggay namagay pigsan di nemnem ko.” <sup>28</sup> <sup>29</sup>

Pag itoloy din tolo ay iib-an Job ay makisongsongbat en sisya. Nansosokat da ay mangipapilit ay nanbasol si Job. Insongbat aben Job sin esa ya esa ay magay nanbasolana. Si naey di inbaga na idi nakakalis Bildad. (20:1–30:31)

**20**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29

\* **19:3** Din kanana sin Hebreo et: namin sinpo. † **19:4** Di odom abe ay kaiologan nina et: laton ay adi kayo makilak-am ono sak-en met anggoy di makaoway.

**21**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34

**22**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30

**23**

1 2 3 4 5 6 7 8 9 10 11 12 13 14 15 16 17

**24**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25

**25**

1 2 3 4 5 6

**26**

1 2 3 4 5 6 7 8 9 10 11 12 13 14

**27**

1 2 3 4 5 6 7 8 9 10 11 12 13 14 15 16 17 18 19 20 21 22 23

**28**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28

**29**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25

**30**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31

**31***Din Nangipapilitan Job Ay Magay Nanbasolana*

<sup>1</sup> “Inkarik ay adiak manemnem di lawa mo ilaek di esa ay balasang. <sup>2</sup> Sino ngin di gon-gona ay idawat Diyos ed langit ay Manakabalin Amin? <sup>3</sup> Ay baken ayan ligat di ipalak-am na sin mangam-amag si lawa? <sup>4</sup> Ammon met Diyos din am-amagek tan il-ilaena amin ay gonay ko.

<sup>5</sup> “Isapatak ay adiak nakitimpoyog si makaetek ya maga polos di in-etekak. <sup>6</sup> Olay timbangan Diyos sak-en sin kosto ay timbangana et maila na ay maga di maipabasol en sak-en. <sup>7</sup> Mo nasangawak sin kosto ay danan ono nan-gamgamak si inilak ono namansaan si basol nan takkay ko, <sup>8</sup> olay madadael din molak ono odom ay ipogaw di mangan sin apit ko.

<sup>9</sup> “Mo inarem ko di asawan di tinokmang ko ta sinsin-ed ko sin segpan da, <sup>10</sup> olay mansilbi si asawak si odom ay ipogaw ono daagen di odom ay lalaki. <sup>11</sup> Tan nadagsen di ay basol et lebbeng na ay madosaak sin sangoanan di linteg. <sup>12</sup> Kaman mabidang ay apoy ay dadlon manadael en sak-en ya siya abe sin sanikwak.

<sup>13</sup> “Mo waday bag-en ko ay nanriri en sak-en yan adiak pinatgan din kalintegana, <sup>14</sup> into pay di ibagak mo somangoak en Diyos sin pangokomana? <sup>15</sup> Si Diyos di namke en sak-en sin eges en inak yan si Diyos met laeng di nangamag abe sin babag-en ko.

<sup>16</sup> “Adiak inpaidam di badang ko sin nabiteg ya adiak inpalobos ay komaseseg-ang di biyag din nankalalasang. <sup>17</sup> Adiak met binaybay-an din naolila ay mandagdagaang yan sak-en anggoy di mangmangan. <sup>18</sup> Tan manipod ed idi, kanayon ay idawdawat ko din masapol da. <sup>19</sup> Mo waday inilak ay nabiteg ay adi makalako si bado na, <sup>20</sup> indawtak si bado ay napo sin dotdot di karnerok ta say adi maskaw et palalo di iyamana. <sup>21</sup> Mo waday sinowitik ko ay olila gapo ta ammok ay mangabakak sin pangokoman, <sup>22</sup> olay

magotlo nan takkay ko ta maisian sin padangak. <sup>23</sup> Ngem adiak maamag di kaman nidi tan emegyatak sin domosaan Diyos ya gapo sin kinangato na.

<sup>24</sup> “Polos met ay adiak nantalek sin kinabaknang ko <sup>25</sup> ya adiak malaydan sin ad-adoy sanikwak. <sup>26-27</sup> Adiak inongoan din takkay ko ay mangdayaw sin agew ay napigsa di silaw na ya din bowan ay mapteng di kailaana. Adiak polos nasolisog ay nandayaw en daida. <sup>28</sup> Mo say inyat ko koma, makeddenganak koma ay matey, tan bakenak napodno en Diyos ay wadad ngato.

<sup>29</sup> “Adiak maragsakan sin domteng ay ligat ya lawa ay pasamak sin biyag di mangililiget en sak-en. <sup>30</sup> Adiak inkarkararag di kateyan da tan mo say iyat ko et bomasolak. <sup>31</sup> Ammon di amin ay mansilsilbi en sak-en ay maga di sinangailik ay nandagaang. <sup>32</sup> Adiak binay-an ay maseyep da sin kalsada din nanbibiyahi mo adi et sinangailik daida. <sup>33</sup> Bakenak met kaman din odom ay ilimed da di basol da. <sup>34</sup> Adiak in-giginek ya adiak aben nanpopokok anggoy sin beey ko, tan adiak egyatan di mabalin ay ibagan di ipogaw ono lomaslasoyan di aag-ik.

<sup>35</sup> “Wada koma di mannge en sak-en, tan isapatak ay dadlon tet-ewa din am-in ay inbagak. Sapay koma ta somongbat si Diyos ay Manakabalin Amin. Mo maisolat koma din pamabasol di kalaban ko ta maipaila en sak-en, <sup>36</sup> malaydanak ay mangitakap sin badok ono mangibedbed ta ilaen di kaipoipogaw. <sup>37</sup> Adiak mabain ay somango en Diyos ta ipaammok en sisya amin ay inamag ko.

<sup>38</sup> “Mo pinnos ko koma din daga ay molmolaak, <sup>39</sup> ono kinan ko di apit ay adiak binayadan ya say begew ay nateyan di akin oka, <sup>40</sup> olay say gomabay di logam ya pagat sin dagak imbis ay bakakew ya sabog.” Say nakdengan di inbagan Job.

## 32

1 2 3 4 5 6 7 8 9 10 11 12 13 14 15 16 17 18 19 20 21 22

## 33

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33

## 34

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37

## 35

1 2 3 4 5 6 7 8 9 10 11 12 13 14 15 16

## 36

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33

## 37

1 2 3 4 5 6 7 8 9 10 11 12 13 14 15 16 17 18 19 20 21 22 23 24

## 38

### *Din Songbat Diyos En Job (38:1-11,16-21)*

<sup>1</sup> Idi siya di, sinongbatan Diyos si Job babaen si napigsa ay dagem yan kanana, <sup>2</sup> “Sino ka ay mangipalawlawwa sin sirib ko? Ipaammom sin kalim ay magay ammom. <sup>3</sup> Ipailam di kinalalakim ta songbatam din salodsod ko.

<sup>4</sup> “Intoy kad-am idi insaad ko nan lobong? May kod, mankali ka mo waday ammom. <sup>5</sup> Sino di nangikeddeng si lokod na? Sino di nanlokod si kaannawa na? Ammom amin na, ay baken siya? <sup>6</sup> Intoy naisaadan din tokod di daga? Sinoy nangiamag sin

naisaadana? <sup>7</sup> Sin parbangon di agew ay doy, nan-es-esa ay nankanta din tatalaw ya nanbogaw din aanghel\* gapo si ragsak da.

<sup>8</sup> “Sino di nangin-eb ta matngel din baybay idi kabala sin oneg di daga? <sup>9</sup> Sak-en di nangipabado si liboo sin baybay et nilikomotak si bolinget. <sup>10</sup> Insaad ko di beddeng din baybay et sinaradoak din eneb na. <sup>11</sup> Et inbilin ko sin baybay, ‘Engganas sa et anggoy di gedeng mo. Iparit ko ay labsan din napigsa ay dalloyon mo din gindeng ko.’ <sup>12</sup> <sup>13</sup> <sup>14</sup> <sup>15</sup>

<sup>16</sup> “Ay inmey ka aya sin obbog sin oneg di baybay? Ay pinadas mo ay nandan sin lanad na? <sup>17</sup> Ay naipailan sik-a din segpan di mabolinget ay kad-an di natey? <sup>18</sup> Ay ammom di kadakdaken din daga? Somongbat ka mo ammom dana. <sup>19</sup> Ay ammom di panbeeyan di pat-a ya bolinget? <sup>20</sup> Ay kabaalam ay ipangos daida sin somaaan da? <sup>21</sup> Mo siya ay kabaalam, adi pay wada ka sin timpo ay naparsuaan di lobong. Enggay nakanakay ka baw kayman!” <sup>22</sup> <sup>23</sup> <sup>24</sup> <sup>25</sup> <sup>26</sup> <sup>27</sup> <sup>28</sup> <sup>29</sup> <sup>30</sup> <sup>31</sup> <sup>32</sup> <sup>33</sup> <sup>34</sup> <sup>35</sup> <sup>36</sup> <sup>37</sup> <sup>38</sup> <sup>39</sup> <sup>40</sup> <sup>41</sup>

## 39

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30

## 40

1 2 3 4 5 6 7 8 9 10 11 12 13 14 15 16 17 18 19 20 21 22 23 24

## 41

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34

## 42

### *Din Insongbat Job En Diyos*

<sup>1</sup> Kanan Job ay nanongbat en Diyos, <sup>2</sup> “Ammok ay magay adi kan kabaalan ay amagen et matongpal amin ay laydem. <sup>3</sup> Dinamag mo mo sinoak ay mangipalawlawwa sin sirib mo olay magay ammok. Tet-ewa baw kayman ay din inbagbagak yan banag ay nakaskasdaaw ya adiak maawatan. <sup>4</sup> Kanam en denggek din ibagam ya songbatak din salodsod mo. <sup>5</sup> Ed idi kayman, nadamdama ko anggoy di maipanggep en sik-a, ngem ed wani mailak sik-a ay mismo. <sup>6</sup> Isonga ibabawik din amin ay inbagak et nay tinmotokdoak sin tapok ya dap-o ay mangipaila ay manbabawiak.”

<sup>7</sup> Idi nakdeng din inbagan Diyos en Job, kanana en Elifaz ay taga-Teman, “Mabongetak en sik-a ya sin dowa ay gagayyem mo tan baken kosto di inbaga yo maipanggep en sak-en, ay baken kaman si Job ay mansilsilbi en sak-en. <sup>8</sup> Isonga ed wani, en kayo man-a si pito ay bomaro ay baka ya pito ay kalakian ay karnero. Asi kayo emey en Job ta mandaton kayo si daton ay mapooan para en dakayo. Ikararaganas dakayo et awatek din kararag na ta adiak dosaen dakayo sin lebbeng na ay dosa yo, tan baken kosto di inbaga yo maipanggep en sak-en ay baken kaman si Job.”

<sup>9</sup> Tinongpal da Elifaz en Bildad ya si Zofar din inbilin Diyos ay amagen da et pinatgan Diyos din kararag Job. <sup>10</sup> Idi nakdeng ay inkararagan Job din gagayyem na, inpabaknang Diyos kasin sisya et nandobliena din sigod ay kinabaknang na. <sup>11</sup> Pag emey sin beey na amin din aag-i na ya din sigod ay gagayyem na ta en da makikan ya makiragsak en sisya. Nakirikna da ya niliwliwa da sin ligat ay inpalak-am Diyos en sisya. Saes-a da ay nanidawat si pilak ya singsing ay balitok.

<sup>12</sup> Ad-ad-ado di bindisyon Diyos en Job sin odi na mo sin damo, et nawad-an si 14,000 ay karnero, 6,000 ay kamel, 2,000 ay baka ya 1,000 ay dangki. <sup>13</sup> Nabindisyonan pay si pito ay anak ay lalaki ya tolo ay babai. <sup>14</sup> Nginaadanana si Jemima din pangpangoan, si Kezia din maikadwa, yan si Keren-Happuk din maikatlo. <sup>15</sup> Magay babai isnan intiro ay lobong ay napinpintas mo din an-ak Job ay sana. Tinawidan aben Job ay ama das daida ay kaman din lallalaki ay aag-i da.

\* **38:7** Ilaen din footnote sin 1:6.



<sup>16</sup> Idi nakdeng di, natago pay si Job si 140 ay tawen et naila na pay din ap-o na ya olay din an-ak di ap-o na. <sup>17</sup> Et enggay nakay sin nateyana.

## Salmo Maipanggep Sin Libro Ay Nay

Din Salmo et siya da di kankanta ya karkararag di ipogaw Diyos. Insolat di nado-madoma ay ipogaw sin oneg di pigay gasot ay tawen, ngem di kaad-adoan et naisolat da sin timpon da David en Solomon. Pag dan maolnong ta osalen di Israelita sin pandayawan da.

Ad-adoy kalasin di salmo. Waday kankanta ay pangdayaw ya pan-iyaman en Diyos, waday pamagbaga, wada abey kararag di ipogaw ay man-adawag, manriri, manpakom-baba, mankedaw si tolong ya mankedaw si panosaan Diyos sin kaibaw da. Di odom et kararag di esa ay ipogaw, di odom et kararag di am-in ay Israelita.

Nalaka ay makirikna tako sin nangisolat sin Salmo, tan inbalikas da din tet-ewa ay wadas nemnem da: din naimposan ay talek ya namnama da ya palalo ay ragsak da, ya siya abe sin bonget, dandanag, sakit di nemnem ya nadismayaan da.

Inosal Jesus din Salmo sin nan-it-itdoana, ya siya abe ay inosal din nangisolat sin Baro ay Tolag. Peteg ay nabanol din Salmo sin biyag di mamati en Cristo manipod sin damo.

### Salmo 1

#### 1

##### *Din Ipogaw Ay Tet-ewa Ay Nagasat*

<sup>1</sup> Nagasat di ipogaw ay kaman nina di ogali na:

din pamagbagan di lawa ay ipogaw et sigaana  
yan adi na tadonen din kabibiyag da.

Adi aben makikadkadwa en daida,  
tan si Diyos di laslasoyen da.

<sup>2</sup> Mo adi et din kalin Diyos di ad-adalena,  
tan siya na di panragragsakana.

Inagew ya linabi et nemnemnemena  
et kanayon ay say on-onodana.

<sup>3</sup> Isonga amin di sino ay amagena  
et mayat di pantongpalana.

Magmagabay ay kaiw di kaiarigana,  
sin benget di ginawang et say kad-ana.

Adi mangmango di tobo na  
et manlames sin timpo na.

<sup>4</sup> Ngem din managbasol et baken kaman nina,  
kaman teg-ap ay itayaw di dagem di kaiisoan da.

<sup>5</sup> Tan sin agew ay pangokoman Diyos en daida,  
iwed polos di ipambal da.

Keddengan Diyos dadi ay madosa,  
ikasina sin gimong di nalinteg ay ipogaw na.

<sup>6</sup> Tan din nalinteg et ay-ayowanan Diyos si daida,  
ngem din managbasol pay et maiturong das dosa.

### Salmo 2

#### 2

##### *Din Ari Ay Dinotokan Diyos*

<sup>1</sup> Apay nga nanplano din nanasyon si magay silbi na?

Apay nga panggep da ay labanen si Diyos ay wada ed daya?

- <sup>2</sup> Din aari isnan daga, nasinop ya nansagana da ta gobaten da si Diyos ya din ari ay dinotokana.
- <sup>3</sup> Kanan da, “Labanen tako din turay da ta en tako makawaya.”
- <sup>4</sup> Ngem masis-iyek si Diyos sin trono na ed daya ay manglaslasoy en daida.
- <sup>5</sup> Pag nan yamyaman si daida et palalo di egyat da sin manpoos ay bonget na.
- <sup>6</sup> Kanana, “Din pinilik ay ari et insaad ko ed Zion ay nasantoan ay dontog ko.”
- <sup>7</sup> Kanan din ari, “Ibagak din bilin Diyos Apo. Kananan sak-en, ‘Sik-a din anak ko. Ed wani ay agew, ipailak ay sak-en si tatang mo.
- <sup>8</sup> Mo mankedaw ka, amin ay nasyon et idawat ko, amin ay wadas nan daga et tawid mo.
- <sup>9</sup> Awni et dadlon kan abaken daida, ay kaman din kalakan di kagopakan di kalamba.’ ”
- <sup>10</sup> Isonga dakayo ay aari ya turay isnan daga, dengngen yo nan pamagbaga.
- <sup>11</sup> Emegyat kayo ya patgen yo si Diyos koma sin mansilsilbian yo en sisya.
- <sup>12</sup> Mandokmog kayo sin anak na ya manpakombaba kayo\* tan amangan mo bigla ay bomonget din Apo et sigurado ay matey kayo.
- Nagasad amin ay komamang en Diyos Apo.

## Salmo 3

### 3

#### *Kararag Sin Agsapa*

- <sup>1</sup> Sik-a ay Diyos, ilaem kod di kaad-adon di komonkontra, din kaibaw ko et ad-ado da.
- <sup>2</sup> Lomaslasoy da pay ay kankanan da, “Ilaen yo et adi man badangan Diyos sisya.”
- <sup>3</sup> Ngem kaman kan kasay ay salaknib ko, isonga laton ay abakek din kaibaw ko. Idawat mo kasin din dayaw ko, et papigsaem nan nemnem ko.
- <sup>4</sup> Mo man-adawagak ay mankedaw si badang mo, songbatam sak-en sin nasantoan ay dontog mo.\*
- <sup>5</sup> Ed labi, inbaktad ko ta maseyepak, et laton ay maga di nandanagak enggana sin kasinak binmangonan, tan wada ka ay mangay-ayowan.
- <sup>6</sup> Olay mo linmilikob di kalibolibo ay kagobat ko, adiak emegyat tan sik-a di salaknib ko.
- <sup>7</sup> Diyos ay Apok, dalasem ta omisalakan ka. Tan din kagobat ko et kanayon ay dinosdosam daida et kinakaan mo san kabaelan da.

\* **2:12** Di esa abe ay kaiologan nina sin Hebreo et: Mandokmog ya manpakombaba kayo ... Zion et say kad-an din Timplo.

\* **3:4** Din dontog ay

<sup>8</sup>Sik-a anggoy di makaisalakan,  
sapay koma ta din ipogaw mo et bindisyonam.

## Salmo 4

### 4

#### *Kararag Sin Labi*

- <sup>1</sup>Sik-a ay Diyos ay mangitonton sin kalintegak,  
somongbat ka kod mo mankararagak.  
Magay nanposiposak ed idi sin napaligatak,  
ngem gapo sin tolong mo, naiwayaanak.  
Ed wani, someg-ang ka ay Apo,  
ta dengngem kasin nan adawag ko.
- <sup>2</sup>Dakayo ay ipogaw, pig-an ngin di somaldengan yo  
ay manglaslasoy ya mangibabain sin kaipogaw ko?  
Apay nga laylayden yo pay laeng din magay silbi na  
ya on-onodan yo din baken tet-ewa?
- <sup>3</sup>Nemnemen yo ay si Diyos et inkasina  
din matalek ya nadiyosan ay ipogaw para en sisya,  
isonga din karkararag ko et dengdenggena.
- <sup>4</sup>Manpayegpeg kayo komas egyat yo  
ya isaldeng yo san basol yo.\*  
Mo bomaktad kayo ta maseyep kayo,  
mannemnem kayo ay kosto.
- <sup>5</sup>Mantalek kayo en Yahweh ay Diyos tako  
ya idawat yo en sisya di kosto ay daton yo.
- <sup>6</sup>Ad-ado di mangwani, “Sino di mangipasiged sin biyag tako?”  
O Diyos, ipailam kod en dakami din layad ya seg-ang mo.
- <sup>7</sup>Dakdakdake din ragsak ko ay indawat mo  
mo din ragsak di ad-adoy inani na  
ya din ad-adoy danom di obas ay arak na.
- <sup>8</sup>Mo ibaktad ko ay maseyep, natalna di nemnem ko,  
tan sik-a anggoy, Yahweh, di salaknib ko.

## Salmo 5

### 5

#### *Kararag Sin Agsapa Ay Mankedaw Si Panalakniban Diyos*

- <sup>1-2</sup>Arik ya Diyos ko, patgam koma nan kararag ko,  
dengngem kod nan bayeweng ya adawag ko,  
tan sik-ay pankararagak, Apo.
- <sup>3</sup>Inagsapa ay madngem din kararag ko,  
inagsapa ay ipaammok en sik-a din kedaw ko,  
yan sedsed-ek din songbat mo.
- <sup>4</sup>Tan sik-a ay Diyos, kaliliget mo din lawa,  
adim ipalobos ay makitee di managbasol en sik-a.
- <sup>5-6</sup>Din mangipapangatos awak na  
yan adi makasag-en en sik-a,  
tan am-in ay mangam-amag si lawa—  
din maetek, manglilipot, ya makapese si ib-a na—

\* **4:4** Di esa abe ay kaiologan nina sin Hebreo et: Adi kayo koma manbasol mo bomonget kayo.

kaliliget mo ya dosaem daida.

<sup>7</sup> Ngem gapo sin adi manbalbaliw ay layad mo,  
mabalin ay makasgepak sin nasantoan ay Timplo.

Patgek ya emegyatak en sik-a, Apo,  
et mandayawak sin sana ay beey mo.

<sup>8</sup> Omipango ka kod, Apo, begew sin kinalinteg mo,\*  
itdom kod din pandanak ay kosto,  
tan ad-adoy kalaban ko.

<sup>9</sup> Din kalaban ko yan adi matalek di kali da,  
tan say an-anapen da din panadaelan das gait da.

Kaman naisasagana ay kaot din tepek da.  
Pag boladas din kali da.

<sup>10</sup> Ay Diyos, keddengam ya dosaem komas daida  
ta mantaolin daida din lawa ay panggep da.

Sin sangoanam, pakaanem komas daida,  
tan nanbasol ya kinontra das sik-a.

<sup>11</sup> Ngem manragsak koma din mankamang en sik-a,  
et kanayon ay mankanta da si ragsak da.

Salaknibam koma ay Diyos din manglaylayad en sik-a,  
et gapon sik-a, tet-ewa ay manragsak da.

<sup>12</sup> Tan bindisyonam din manongtongpal en sik-a.  
Din layad mo yan kaman kasay ay salaknib da.

## Salmo 6

### 6

#### *Kararag Di Ipogaw Ay Maligligatan*

<sup>1</sup> Adi ka kod yomamyam ya domosdosa, Apo,  
begew sin bonget mo.

<sup>2</sup> Maseg-ang ka ta pabikasem kasin nan awak ko,  
tan enggay kinmapsotak, palalo nan sakit ko.

<sup>3</sup> Palalo abe ay magolo nan nemnem ko.  
Pig-an pay ay pasaldengem nan ligat ko?

<sup>4</sup> Somagong ka kod ta omisalakan ka, Apo,  
gapo sin adi manbalbaliw ay layad mo.

<sup>5</sup> Tan sin kad-an di natey, magay mannemnem en sik-a,  
sin isdi magay mandayaw en sik-a.

<sup>6</sup> Gapo sin ladingit ko, kinmapsokapsotak.  
Linablabi ay man-og-ogaak sin kaseyseyepak,  
et mabasbasa din pongan ko si lowak.

<sup>7</sup> Begew sin kalaban ko, kinmapsot nan matak,  
tan linmadaladag da gapo si kaoogak.

<sup>8</sup> Dakayo ay mangam-amag si lawa, omaddawi kayo,  
tan dinngen Diyos din adawag ko,  
<sup>9</sup> et sigurado ay patgana din kararag ko.

<sup>10</sup> Maabak din kalaban ko et emegyat da.  
Dalasen da ay lomayaw gapo si bain da.

## Salmo 7

\* **5:8** Di esa abe ay kaiologan nina sin Hebreo et: Omipango ka kod, Apo, ta onodak din kinalinteg mo.



## 7

*Kararag Di Nalinteg Ay Ipogaw Ay Mankedaw Si Kalintegana*

- <sup>1</sup> Yahweh ay Diyos ko, komamangak en sik-a.  
Omisalakan ya somalagnib ka koma,  
tan din kalaban ko yan omapayaw da.
- <sup>2</sup> Mo adi kan tomolong, dompap da,  
sin lugar ay magay omisalakan yan omiey da.  
Kaman dan layon, bomisngibisngit da.
- <sup>3</sup> Yahweh ay Diyos ko,  
mo waday binmasolak si gait ko,  
<sup>4</sup> mo way nilipotak ay gayyem ko  
ono pinos ko din sanikwan di kalaban ko  
ay maga di gapo,
- <sup>5</sup> olay bay-am ay dompap din kalaban ko.  
Bay-am ay pomse da  
ya taynan da din bangkay ko sin lota.
- <sup>6</sup> Pomika ka koma, Apo, gapo sin bonget mo  
ta sangoem din mabonget ay kalaban ko.  
Man-gonay ka ta bomadang ka, Diyos ko,  
tan waday timpo ay pangokomam ay inkeddeng mo.
- <sup>7</sup> Sinopem din ipogaw sin kailiili ta likoben das sik-a.  
Tomokdo kad langit ay mangituray en daida.
- <sup>8</sup> Sik-a di mangokom si am-in ay ipogaw, Apo.  
Ibagam di ikeddeng mon sak-en ta maammoan ay magay basol ko.
- <sup>9</sup> Ammom di am-in ay panggep ya nemnem  
yan kosto am-in ay amagem.  
Topapem din mangamag si lawa  
yan gon-gonaam din nalinteg di ogali da.
- <sup>10</sup> Isalakan Diyos din managtongpal en sisya.  
Sisya di somalagnib ay kaman kon salida.
- <sup>11</sup> Nalinteg si Diyos sin pangokomana,  
kanayon ay dosaena din mangamag si lawa.
- <sup>12</sup> Mo adi manbabawi di ipogaw, palidena din kampilana  
ya isagana na din pana na.
- <sup>13</sup> Alaena din mankatatadem ay armas na  
yan ipaturong na din bomidbidang ay pana na.
- <sup>14</sup> Ilaem din iyat di managbasol ay mannemnem si lawa.  
Manplanos manproblimaan ya ietekanay iib-a na.
- <sup>15</sup> Ngem sisya met laeng di makna  
sin bito ay inamag na para sin gagait na.
- <sup>16</sup> Madosa gapo met laeng sin lawa ay am-amagena  
tan din panakitana odom yan mantaoli met laeng en sisya.
- <sup>17</sup> Diyos ay Kangatoan, man-iyamanak sin kinalinteg mo.  
Mankantaak ay mangidaydayaw sin ngadan mo.

**Salmo 8**

## 8

*Din Kinangaton Diyos Ya Kinabanol di Ipogaw*

- <sup>1</sup> Diyos ay Apo mi, din panakabalin mo et maila  
sin intiro ay daga,

- din maidaydayawam et omabot ed daya!
- <sup>2</sup> Olay din anan-ak ya momoyang ay mansossoso et ikankanta da din nabanol ay ngadan mo.  
Begew sina, gominek da din kaibaw mo.
- <sup>3</sup> Mo tangadek ed daya ay inamag mo et mailak din bowan ya talaw ay insaad mo,
- <sup>4</sup> Masmadaawak et kankanak sin nemnem ko,  
“Sino aya di kasasaad di ipogaw ta nemnemnemem?  
Ay tan nabanol da od ta as-asikasoem?”
- <sup>5</sup> Ngem insaad mo ay nababbaba si at-atik mo din nailangitan ay parsua.\*  
Kaman din dayaw di ari et indayaw mos daida,  
<sup>6</sup> tan inpaituray mo en daida din am-in ay wada.
- <sup>7</sup> Iturayan da din matalaken ay karnero ya baka ya din atap ay aanimal sin kada.
- <sup>8</sup> Siya abe din titit ay mantaytayaw ed daya,  
din nigay ay wada sin baybay ay annawa.
- <sup>9</sup> Diyos ay Apo mi, din panakabalin mo et maila sin intiro ay daga.

## Salmo 9

### 9

#### *Din Nalinteg Ay Pangokoman Diyos Sin Nanasyon*

- <sup>1</sup> Naimposan ay man-iyamanak en sik-a, Apo,  
dad-atek am-in din nakaskasdaaw ay inamag mo.
- <sup>2</sup> Diyos ay Kangatoan, gapon sik-a palaloy ragsak ko,  
mankantaak ay mangidaydayaw sin ngadan mo.
- <sup>3</sup> Lomayaw dan kalaban ko mo sangoen daka,  
matokang da ya matey da.
- <sup>4</sup> Tan din iyat mo ay mangokom yan kosto,  
inkeddeng mo ay magay basol ko.
- <sup>5</sup> Dinosam din ipogaw sin kailili ay mangam-amag si lawa,  
pinonas mo et malinglingan das eng-enggana.
- <sup>6</sup> Din kalaban mi, namingpingsan ay naabak da.  
Binakas mo din siyodad da,  
et malinglingan das eng-enggana.
- <sup>7</sup> Ngem sik-a pay ay Diyos, magay pap-eng di panturayam.  
Insaad mo din tronom ay pangokomam.
- <sup>8</sup> Am-in ay ipogaw isnan labaw di daga,  
Nalinteg ya kosto di iyat mo en daida.
- <sup>9</sup> Din ipogaw ay paligaten di iib-a da,  
sik-a ay Diyos di pankamangan da  
sin timpon di ligat da.
- <sup>10</sup> Talken daka sin nangammo en sik-a,  
tan adi kan baybay-an din mankamang en sik-a.
- <sup>11</sup> Mankanta kayo ay mangidaydayaw en Diyos ay manturay ed Zion.  
Dad-aten yo din inamag na sin am-in ay nasyon.
- <sup>12</sup> Adi linglingan Diyos din mapalpaligat ya din adawag da,  
et dosaena din mamalpaligat en daida.

\* **8:5** Di esa abe ay kaiologan nina sin Hebreo et: ...nababbaba si at-atik mo si sik-a. Ilaen abe sin Hebreo 2:6-8.

- 13 Maseg-ang ka ay Apo,  
ilaem nan pomalpaligatan di kaibaw ko.  
Sin pese omisalakan ka koma,
- 14 ta sin sangoanan di ipogaw ed Jerusalem, idaydayaw kos sik-a  
ya manragsakak tan inmisalakan ka.
- 15 Din nanasyon yan nankaot da si bito ay nag-asan da  
yan siya met laeng di naknaan da.
- 16 Inpaammom mo sino ka ay Apo  
babaen sin nalinteg ay panangokom mo.  
Ngem din mangam-amag si lawa,  
kaman tagdey ay mangna en daida  
din mismo ay am-amagen da.
- 17 Pese di pantongpalan di mangam-amag si lawa.  
Katet-ewa na, am-in ay nanigaan en Diyos et say pantongpalan da.
- 18 Ngem din kakkaasi, baken kanayon ay mabaybay-an da,  
adi aben makaan din namnama da.
- 19 Apo, man-gonay ka koma,  
adi ka ipalobos ay makalisi di ipogaw en sik-a.  
Sinopem din nanasyon ta okomem daida.
- 20 Apo, kibtotem man daida ta ammoen da  
ay owat dan ipogaw tet-ewa.

## Salmo 10

### 10

#### *Kararag Di Napalpaligat Ay Ipogaw*

- 1 Ay Diyos, apay nga omaddawi kan dakami?  
Apay nga mantabon ka sin timpon di ligat mi?
- 2 Nangato di nemnem di ipogaw ay lawa,  
din kakkaasi yan palpaligaten da.  
Sapay koma ta makna da  
sin bito ay inamag da.
- 3 Tan din mangam-amag si lawa  
ya mangamgamgam si baken dan oka  
et it-it-ek da din kabaelan da  
ay manongpal sin layden da.  
Sigaan daka ay Diyos ya palawlawen das sik-a.
- 4 Gapo sin kinangaton di nemnem da,  
adi da pagan-anos sik-a,  
tan magay lugar mo ay Diyos sin nemnem da.
- 5 Matongpal din layden da sin am-in ay amagen da,  
ngem din pangokomam yan naligat ay maawatan da,  
laslasoyen da am-in din kalaban da.
- 6 Kanan das nemnem da en maga polos di panligatan da  
ono mapasamak ay lawa en daida.
- 7 Makabaos ya makaetek da.  
Eg-egyaten da abe din iib-a da  
ya nalaka ay mankali das kinekedse ya lawa.
- 8 Sin asag-en di ili yan mantabon da  
ta manseed das peslen da, olay magay gapo na.
- 9 Maiarig das layon ay man-eset ay mantabon,

- ta din kakkaasi yan en da depapen.  
 Manganop di esa ay kaiarigan da,  
 tan en da depapen din magay kabaelan da  
 ay makna sin tagdey da.
- <sup>10</sup> Gapo sin panakabalin da,  
 din kakkaasi et abaken da.
- <sup>11</sup> Kanan das nemnem da,  
 “Adi pagan-anon Diyos din napasamak isna,  
 tan nandokog et adi omila.”
- <sup>12</sup> Dosaem koma ay Diyos dana ay mangam-amag si lawa,  
 adi ka baybay-an din palpaligaten da.
- <sup>13</sup> Magay rispito dan sik-a din mangam-amag si lawa,  
 tan kanan das nemnem da en adi ka dosaen daida.
- <sup>14</sup> Ngem katet-ewa na, iilaem din ligat di palpaligaten da,  
 et nakasagana ka ay mamadang en daida,  
 tan sik-ay pankamangan di kakkaasi ya naolila.
- <sup>15</sup> Pakapsotem koma din mangam-amag si lawa,  
 estem ay dosaen daida  
 enggana ay ikaro da am-in ay basol da.
- <sup>16</sup> Sik-a ay Diyos, magay patinggan di panturayam,  
 ngem din manaydayaw si didiyosen, maponas da  
 isnan ili ay dagam.
- <sup>17</sup> Dengngem din kararag di kakkaasi et papigsaem din nemnem da.
- <sup>18</sup> Ikalintegam di kakkaasi ya naolila  
 ta magay ipogaw ay mangeg-egyat si iib-a da.

## Salmo 11

### 11

#### *Din Talek Di Nalinteg Ay Ipogaw En Diyos*

- <sup>1</sup> Si Diyos di pankamangak.  
 Ngem apay nga kanan yo en lomayawak  
 ta kamanak titit ay sin dontog di emeyak?
- <sup>2</sup> Kanan yo, “Doy ay isagsaganan din managbasol din pana da,  
 panaen da sin mabolinget din nalinteg di ogali na.
- <sup>3</sup> Mo mabakas di olnos, sino pay di maamag na  
 din nalinteg di ogali na?”
- <sup>4</sup> Wadas Diyos sin nasantoan ay Timplo na,  
 ed langit di panturayana.  
 Am-in ay ipogaw yan il-ilaena,  
 ammo na am-in din am-amagen da.
- <sup>5</sup> Din nalinteg ya managbasol yan timbangena,  
 kaliliget na din malaylaydan ay mamalpaligat si iib-a na.
- <sup>6</sup> Sin managbasol yan paodanena  
 din man-gangab ay oling ya asufre ay kanan da.  
 Man-atong ay dagem di dosa da.
- <sup>7</sup> Tan nalinteg si Diyos et din siged ay ogali di laydena.  
 Awni et ilaen di nalinteg sisya.

## Salmo 12

## 12

### *Makaetek Di Ipogaw Ngem Matalek Si Diyos*

- <sup>1</sup> Sik-a ay Diyos, bomadang ka koma,  
tan nay enggay magay nalinteg di ogali na,  
magay matalek si olay esa.
- <sup>2</sup> Am-in ay ipogaw, man-asieetek da.  
Kaman mayat din kali da ngem baken baw tet-ewa.
- <sup>3</sup> Apo, paginkem et koma din mangpaspasablog si ib-a da  
ya mangit-it-ek si awak da.
- <sup>4</sup> Kanan da, “Babaen sin kali mi, magon-od mi di layden mi.  
Ibaga mi di layden mi,  
magay makaipasaldeng en dakami.”
- <sup>5</sup> Ngem kanam, Apo, “Man-gonayak ed wani,  
tan mapalpaligat ya manbaybayeweng din kakkaasi.  
Idawat ko en daida  
din talna ay an-anapen da.”
- <sup>6</sup> Apo, matalek ka sin insapatam.  
Din karim yan palata di ena kaiarigan,  
ay namin pito ay nalinisan.
- <sup>7-8</sup> Am-in ay soli, likeden din mangam-amag si lawa,  
say it-it-ek di kaipoipogaw din kaloloya.  
Ngem sik-a ay Diyos, kanayon ay somalaknib ka  
sin ipogaw ay sana.

## Salmo 13

## 13

### *Kararag Di Nadismaya Ay Ipogaw*

- <sup>1</sup> Apo, kas-anoy kabayag na ay bomaybay-an ka?  
Ay bomaybay-an ka si eng-enggana?  
Pig-an pay ay somagong ka?
- <sup>2</sup> Pig-an ay mapap-eng nan panlak-amak si ligat ko  
ya innagew ay ladingit ko?  
Kas-anoy kabayag nan omam-amisan di kalaban ko?
- <sup>3</sup> Nemnemem komas sak-en, Yahweh ay Diyos ko,  
ya patgam din kararag ko.  
Ompabikas ka ta adi masokpot nan leng-ag ko.
- <sup>4</sup> Adim ipalobos ay kanan da en inmabak da  
et begew sisi yan manragsak da.
- <sup>5</sup> Ngem mantalekak sin adi manbalbaliw ay layad mo,  
manragsakak to sin panangisalakan mo.
- <sup>6</sup> Mankantaak ay mangidaydayaw en sik-a, Apo,  
gapo sin inpailam en sak-en ay kinasiged mo.

## Salmo 14

## 14

### *Din Kinalawan Di Am-in Ay Ipogaw*

- <sup>1</sup> Kanan din naong-ong sin nemnem da,  
“Ay siya mo waday Diyos tet-ewa?”  
Kadodogis sin pangilan Diyos din lawa ay am-amagen da,  
dadlon makadadael din kabibiyag da.



- Magay olay esa si kosto di am-amagena.
- <sup>2</sup> Si Diyos ed langit, os-osdongana di ipogaw isnan daga ta ilaena mo waday masirib en daida ay manganap ta ammoan das sisya.
- <sup>3</sup> Ngem man-iiso da am-in ay lawlawa, tan din kosto ay danan et tinaynan da. Magay mangam-amag si kosto, maga di olay esa.
- <sup>4</sup> Kanan Diyos ay nangibaga, “Ay daetan pay dana ay mangam-amag si lawa! Pig-an ngin di pannemneman da? Din pamalpaligatan da sin ipogaw ko et nalaka en daida ay kaman din kalakan di mangokmon si kanen da. Sigaan da abe ay mankararag en sak-en ay Diyos da koma.”
- <sup>5</sup> Ngem peteg to di kibtot ya egyat da mo ilaen da ay salakniban Diyos din ipogaw na.
- <sup>6</sup> Laslasoyen abe din ipogaw ay lawa din planon di nabibiteg ay magay kowinta na, ngem si Diyos pay et salaknibanas daida.
- <sup>7</sup> Sapay koma ta si Yahweh ay manbeey ed Zion sin Timplo na et isalakana din Israelita ay ipogaw na. Am-in ay polin Israel et maragsakan da koma mo ipataolin Diyos din sigod ay kinabaknang da.

## Salmo 15

### 15

#### *Din Kosto Ay Manaydayaw En Diyos*

- <sup>1</sup> Apo Diyos, sino ngin di waday kalebbengana ay senggep sin Timplom? Sino ngin di maikari ay mandayaw en sik-a sin nasantoan ay dontog mo ay Zion?
- <sup>2</sup> Din makasgep et din kanayon ay manongtongpal en sik-a ya pag kosto am-in di am-amagena. Mo mankali abe et tet-ewa ya naimposohan di ibagbaga na.
- <sup>3</sup> Adi na aben palawlawen di iib-a na ono man-istoryas lawa maipanggep sin katokmang na. Iwed abe di amagena ay lawa en daida.
- <sup>4</sup> Ibilang na ay magay pateg da din dinokogan Diyos begew sin basol da, ngem din mangipateg en Diyos et say bigbigena. Dadlonan tongpalen din inkari na olay mo siya na di begew si maligatana.
- <sup>5</sup> Mo manpaotang sisya, maga iman di patang na. Adi aben mapasoksokan ay mantistigo si baken tet-ewa ay maikontra sin magay basol na. Din am-in ay manadon sina, magay lawa ay maamag en daida.

## Salmo 16

### 16

#### *Iyaman Begew Sin Komadkadwaan Diyos*

- <sup>1</sup> Sik-a ay Diyos, somalagnib ka koma,  
 tan din pankamagak et sik-a.  
<sup>2</sup> Tet-ewa din inbagak ay sik-a di Diyos ko,  
 sik-a anggoy di kapoan di siged isnan biyag ko.  
<sup>3</sup> Din matalek ay ipogaw mo isnan daga,  
 bigbiggek din sigesiged ay ogali da  
 et maragsakanak ay makikadkadwa en daida.\*  
<sup>4</sup> Din mangdayaw si didiyosen,  
 ad-ado ay ligat di en da lak-amen.  
 Adiak maitapi en daida ay mangidaton si dada,  
 sigaak abe ay mangibaga sin ngadan di didiyosen da.  
<sup>5</sup> Ibilang kos sik-a, Apo, ay nabanol ay tawid ko,  
 mapon sik-a am-in ay masapol ko.  
 Sik-a di makaammo sin biyag kon to.  
<sup>6</sup> Maymayat di inpatawid mo  
 et palalo di ragsak ko.  
<sup>7</sup> Man-iyamanak, Apo, tan bomagbaga ka.  
 Olay sin labi et omitdo nan konsinsiya.  
<sup>8</sup> Adiak emegyat, tan ammok ay komadkadwa ka,  
 kankanayon abe ay bomadbadang ka.  
<sup>9</sup> Isonga palalo di ragsak ko  
 ya natalna di nemnem ko.  
<sup>10</sup> Tan adi ka tomaynan sin kaot ko,  
 adi ka aben ipalobos ay madonot nan awak ko,  
 sak-en ay matalek ay bag-en mo.†  
<sup>11</sup> Din danan ay maiturong sin biyag et en ka itdo,  
 makikadwaak en sik-a isonga peteg di ragsak ko.

## Salmo 17

### 17

#### *Kararag Di Nalinteg Ay Ipogaw*

- <sup>1</sup> Sik-a ay Diyos, dengngem kod nan kararag ko  
 ay manpapakpakaasi si badang mo  
 ta iturong mo kod din kosto,  
 tan naimposoan nan kararag ko.  
<sup>2</sup> Ikeddeng mo koma ay maga di basol ko,  
 tan ammom din kostokosto.  
<sup>3</sup> Ammom di wadas nemnem ko.  
 Mo sin labi yan pomadas ka, Apo,  
 mailam ay magay basol ko.  
 Magay binmasolak begew sin tepek ko,  
<sup>4</sup> ay kaman din am-amagen di odom ay gagait ko.  
 Din kedse da abe et baken say tinadtadon ko,  
 mo adi tinongtongpal ko din inbagam ay bilbilin mo.  
<sup>5</sup> Say kanayon ay inonodak din laydem, Apo,  
 maga polos di nilabsing ko.  
<sup>6</sup> Mankararagak en sik-a, Apo,

\* **16:3** Baken nalawag din kanana sin Hebreo. Di odom ay kaiologan nina sin Hebreo et: Magay silbin din sinan didiyos isnan daga, madosa am-in ay maragsakan ay manaydayaw en daida. † **16:10** Di esa abe ay kaiologan nina sin Hebreo et: Tan adi kan ipalobos nan matalek ay baam, ay sin kad-an di natey di ena pantongpalan.

tan patgam din kararag ko,  
 isonga dengngem ta songbatam nan kararag ko.  
<sup>7</sup> Ipailam kod din nakaskasdaaw ay layad mo,  
 tan sik-a di mangisalakan babaen sin panakabalin mo  
 sin am-in ay mangan-anap si pankamangan da  
 mo ilayawan da din kaibaw da.  
<sup>8</sup> Bomantay ka ay kaman din iyat mo  
 sin kabanolan ay gameng mo.  
 Somalaknib ka sin payak mo  
<sup>9</sup> ta adi omdas din kalaban ko ay mankakekedse,  
 tan nay linmikob da et layden da ay pomse.  
<sup>10</sup> Magay seg-ang da ya natangsit di kali da.  
<sup>11</sup> Enggay linmikob da, am-in ay emeyak yan wada da.  
 Manseseed das mayat ay timpo ta pomse da.  
<sup>12</sup> Kaman dan layon ay manseseed si kanen da,  
 tan mantabon da ta manseed das doklosen da.  
<sup>13</sup> Apo, din kalaban ko yan sangoem koma  
 ta say abakem daida.  
 Babaen sin kampilan mo, omisalakan ka  
 sin mangam-amag si lawa.  
<sup>14</sup> Babaen sin panakabalin mo, omisalakan ka koma  
 sin ipogaw ay naimongsan di nemnem da  
 sin gamgameng ay wadas nan daga.  
 Mapnek da koma sin insaganam para en daida.\*  
 Mansobsobra koma din an-ak da,  
 ya wada abey mabay-an para sin apo da.  
<sup>15</sup> Mo sak-en pay, mailak to din ropam, Apo,  
 gapo ta magay lawa ay inamag ko.  
 Mo bomangonak et manragsakak to  
 gapo sin kawadam, Apo.

## Salmo 18

### 18

*Kanta Ay Pan-iyaman David Begew Sin Naabakan Di Kaibaw Na*

<sup>1</sup> Laylaydek si Yahweh ay Diyos ko,  
 sisyyay poon di bikas ko.  
<sup>2</sup> Maiarig si dakdake ay bato ay enak pankamangan  
 ono dontog ay enak pantabonan,  
 tan napigsa ay omisalakan.  
 Mo wadaak en sisya, magay pan-egyatan.  
 Kasay ay somalaknib di ena kaiarigan,  
 kaman aben mayat ay pantabonan  
 ay adi makasgep di kalaban.  
<sup>3</sup> Mankedawak si badang Diyos et omisalakan sin kalaban ko.  
 Lebbeng na ay madayaw si Diyos Apo.  
<sup>4-5</sup> Din pese yan nangisagana si kaknaak koma ay tagdey.  
 Kamanak napolipolan si tali ay omigoyod sin kad-an di natey,

\* **17:14** Kanan di odom en din ibagbagan di versikulo ay nay et din dosa ay insaganan Diyos para sin mangam-amag si lawa. Di odom pay, kanan da en din maibagbaga isna et din bindisyon ay insaganan Diyos para sin ipogaw ay banbanolena. Baken nalawag din naisolat sin Hebreo.

- kaman omianod ay layos  
ono kaeegyat ay dalloyon ay domalapos.
- <sup>6</sup> Sin palalo ay ligat ko,  
kindaw ko din badang Yahweh ay Diyos ko,  
et sin Timplo na, dinnge na din adawag ko.
- <sup>7</sup> Pag manyegyeg ya naikiweg din daga,  
din naisaadan di dontog yan nagon-gon da  
gapo sin palalo ay bonget na.
- <sup>8</sup> Bomalbala di asok sin eng na  
ya manbidbidang ay apoy sin tepek na.
- <sup>9</sup> Binokatana ed langit et binmaba,  
waday mangitit ay liboo sin dallem di siki na.
- <sup>10</sup> Binmaba ay nanlogan si kerubim,  
napigsa ay tinmayaw babaen sin payak di dagem.
- <sup>11</sup> Binongona din awak na si bolinget,  
naposkol ay liboo ay nanapnos danom di nanlikmot.
- <sup>12</sup> Waday kimat sin sangoanana,  
dalalo ya somilsilap ay apoy di inpawada na,  
din mangitit ay liboo yan nilosot da.
- <sup>13</sup> Si Diyos ay kangatoan et nadnge din kali na,  
kaman kido ay mapo ed daya.
- <sup>14</sup> Inosal na din pana na  
et nansisian din kalabana.  
Nankimatena et nanagtag da.
- <sup>15</sup> Din lanad di baybay yan nabonsian da,  
siya abe sin naisaadan di daga,  
idi inpailan Diyos din palalo ay bonget na.
- <sup>16</sup> Ed langit ay kad-an Diyos, inadawa nas sak-en,  
et kinmay-at sin malosong ay danom.
- <sup>17</sup> Sin omililiget ay kalaban ko, inmisalakan sisya,  
tan nankapipigsa da et magay bael kon daida.
- <sup>18</sup> Dinmoklos da sin timpon di ligat ko,  
ngem wadas Diyos ay salaknib ko.
- <sup>19</sup> Gapo sin layad nan sak-en, inmisalakan sisya,  
et inmiey sin lugar ay nawaya.
- <sup>20</sup> Binindisyonan Diyos sak-en gapo sin kinalinteg ko,  
indawat nay gon-gonak tan magay basol ko.
- <sup>21</sup> Tan inon-onodak din ogali ay laydena,  
yan adiak dinokogan sisya.
- <sup>22</sup> Tinongtongpal ko din linteg na,  
magay nilabsing ko ay bilina.
- <sup>23</sup> Sin sangoanan Diyos, magay maipabasol en sak-en,  
tan inaddawiak di enak panbasolan.
- <sup>24</sup> Isonga gon-gonaanas sak-en tan nalintegak,  
ammo na ay magay binmasolak.
- <sup>25</sup> Sin ipogaw ay matalek, ipailan Diyos ay matalek sisya,  
ipaila na din kinasanto na sin magay kaoyawana.
- <sup>26</sup> Sin nalinis et maila din kinalinis na,  
ngem sin nasikap ay manowitik si ib-a na,  
nalaing si Diyos ay mangabak en sisya.

- 27 Isalakana din napakombaba,  
ngem ipababa na din mangipapangatos awak na.
- 28 Si Yahweh ay Diyos ko di silaw ko,  
silawana din mabolinget ay danan ko.
- 29 Gapo sin badang na, abakek di ad-ado ay kalaban ko,  
alad di ili yan makalay-at ko.
- 30 Sinay ay Diyos yan kostokosto di amagena,  
maila ay pag tet-ewa di inbagbaga na.  
Sin am-in ay mankamang en sisya,  
kaman kasay ay salaknib da.
- 31 Magay odom ay Diyos mo adi et din Apo.  
Magay odom ay pankamangan mo adi et si Diyos tako.
- 32 Sisya si Diyos ay mangidawdawat si pigsak,  
bantayana din pandanak et magay pan-egyatak.
- 33 Pinapigsa na din sikik et kaman din kapigsan di ogsa,  
et olay sin kakayangan ay dontog, adiak maisokba.
- 34 Din iyat ko ay makigobat yan itdo na  
ta say kabaalak ay mangosal si bronsi ay pana.
- 35 Sinmalaknib ya inmisalakan sisya,  
pinmigsak gapo sin badang na.  
Magay pandanagak gapo sin panakabalina.
- 36 Pinasiged mo din pandanak et inmannawa,  
isonga adiak naisokba.
- 37 Inapayaw ko din kalaban ko ya dinpap kos daida,  
adiak sinmaldeng enggana ay namaga da.
- 38 Adi da nakabangon sin nangtodokak en daida,  
sin sangoanak yan naiwalang da.
- 39 Tan din pigsak ay makigobat yan indawat na,  
inabak ko din kalaban ko begew en sisya.
- 40 Inturong Diyos et din kalaban ko yan tinmagtag da,  
din omililiget yan pinsek daida.
- 41 Nan-adawag da ngem magay binmadang en daida.  
Nanpakpakaasi dan Diyos ngem adi na pinatgan kararag da.
- 42 Minekmek kos daida et nanbalin das kaman lota  
ay sin dagem, nalaka ay maitayaw da.  
In-gatigatin kos daida ay kaman pitek sin kalsada.
- 43 Inmisalakan si Diyos sin ipogaw ay kinmonkontra,  
sin nanasyon, nanbalinenas sak-en ay pangolo da,  
ipogaw ay adiak am-ammo, yan nay iturayak daida.
- 44 Manyakog-ong din nanasyon sin sangoanak,  
tongpalen da ay dagos mo dengngen dan ibagak.
- 45 Enggay namaga din toled da,  
et manpayegpeg das egyat da  
ay bomala sin nantatabonan da.
- 46 Matagotago din Apo!  
Madaydayaw din salaknib ko!  
En yo et daddad-aten  
din kinangaton Diyos ay mangisalakan en sak-en.
- 47 Binmadang et inabak kon kalaban ko,  
inpaiturayanan sak-en din ipogaw ay ad-ado.



- 48 Sin mankakekedse ay kalaban ko, inmisalakan sisya,  
yan insaad nas sak-en ay nangatngato mo daida.  
49 Isonga sin kaipoipogaw, idaydayaw kos sisya,  
mankantaak ay mangidaydayaw sin ngadana.  
50 Dadlonan pangabaken din ari ay pinili na,  
ya ipaila na din adi manbalbaliw ay layad na  
en David ya din poli na si eng-enggana.

## Salmo 19

### 19

#### *Din Kinangaton Diyos Ya Din Kinasiged Di Linteg Na*

- 1 Am-in ay wada ed daya et kanayon ay ipappaila da  
din panakabalin Diyos ay nangamag en daida.  
2 Din kaagawan ya labi et ipaammo day kinadiyos na,  
siya abe di iyat di maisned ay labi ya agsapa.  
3 Olay mo gomiginek da ya magay madnge ay ibaga da,  
4 ngem din ipaammo da  
et kaman kali ay madnge sin intiro ay daga.  
Din agew et in-amagan Diyos si panteana ed daya.  
5 Kaman naragsak ay kaas-asawa na  
ono din napigsa ay managtag ay malaydan ay makilongba,  
say kaiarigan din agew mo bomala sin agsapa.  
6 Bomala sin esa ay soli ed daya  
enggana ay domateng sin esa abe ay soli na,  
et maga di makalisi sin atong na.  
7 Din kalin Diyos et kostokosto, magay kaoyawana,  
baro ay biyag ya pigsan di nemnem di idawdawat na.  
Din inpaammon Diyos ay pinaneknekana  
et kosto ay pantalkan tan dadlon tet-ewa.  
Say mangipalaing sin kolang di adal na.  
8 Din bilbilin Diyos et kosto di ibagbaga na,  
am-in ay mangonod et maragsakan da.  
Magay kinalawan di am-in ay linteg na,  
kaman silaw sin nemnem di ipogaw mo maawatan da.  
9 Din pamatpatgan di ipogaw en Diyos  
et dadlon nasantoan ya nadalos.  
Din panaydayawan da en sisya  
et mantoltoloy si eng-enggana.  
Am-in ay ikeddeng Diyos et kosto da  
tan polos ay magay pabpaborana.  
10 Din kalin Diyos et nabanbanol mo din balitok ay kanginaan,  
mammam-is abe mo din anig ay kam-isan.  
11 Babaen sin kalim, ay Diyos, mabagbagaanak,  
et dakdake di gon-gonak sin panongtongpalak.  
12 Magay makanemnem sin am-in ay ipaksaw na,  
namnamed din adi na ammo ay basol na.  
Sapay koma ay Diyos ta pomakawan ka.  
13 Adi ka koma aben ipalobos ay igagarak ay manbasol en sik-a  
ya omituray din basol ay kaman nisa.  
Et mo siya di, magay maipabasol en sak-en,

et mailisiak si basol ay nadagsen.

<sup>14</sup> Sapay koma ay Diyos ta malaydan kas nan kali ya nemnem ko, sik-a ay pankamangak ya manobot ko.

## Salmo 20

### 20

#### *Kararag Ta Pangabaken Diyos Din Ari*

<sup>1</sup> Sapay koma ta patgan Diyos din kararag mo sin timpon di ligat mo.

Si Diyos ay dinaydayaw Jacob, salaknibana komas sik-a.

<sup>2</sup> Manipod ed Zion sin Timplo na, padatngena koman sik-a din badang na.

<sup>3</sup> Sapay koma ta am-in ay datdaton mo yan nemnemenana, malaydan koma sin animal ay mapooan ay idaton mon sisya.

<sup>4</sup> Sapay koma ta idawat na din laydelaydem ya matongpal am-in ay planom.

<sup>5</sup> Ibogaw mi di ragsak mi mo mangabak kan to, ingato mi din bandila tako ta idaydayaw mi si Diyos Apo.

Sapay koma ta patgana am-in ay kararag mo.

<sup>6</sup> Ed wani, ammok ay pangabaken Diyos din ari ay pinili na.

Ed langit ay nasantoan ay kad-ana, songbatana din kararag di pinili na, et pangabakena babaen sin panakabalina.

<sup>7</sup> Din odom yan mantalek da sin para gobat ay kalisa da, din odom yan mantalek da sin kabayo da, ngem datako pay yan mantalek tako sin panakabalin Yahweh ay Diyos tako.

<sup>8</sup> Da doy ay ipogaw et maisokba da, ngem datako pay, napigsa tako ay pomika.

<sup>9</sup> Apo, pangabakem koma din ari ya patgam koma mo mankararag kami.

## Salmo 21

### 21

#### *Iyaman Begew Sin Nangabakan Di Ari Sin Kalabana*

<sup>1</sup> Apo, manragragsak din ari tan pinapigsam sisya, nangabakem et palaloy ragsak na.

<sup>2</sup> Pinatgam din kararag na et indawat mo din laydena.

<sup>3</sup> Inmey kan sisya ya ad-ado ay bindisyon di inkoyog mo, sin toktok na, korona ay balitok di inpeey mo.

<sup>4</sup> Biyag di kindaw nan sik-a, yan indawat moy biyag ay eng-enggana.

<sup>5</sup> Madaydayaw din ari gapo sin badang mon sisya, nanbalinem ay nangato ya mandinamag di ngadana.

<sup>6</sup> Wadan sisya din bindisyon mos eng-enggana, gapo sin kawadam, palalo di ragsak na.

<sup>7</sup> Diyos ay Kangatoan, mantalek din ari en sik-a, gapo sin layad mo, mantoltoloy di panturayana.

- <sup>8</sup> Depapen din ari am-in din kalabana  
ya am-in ay malmaliget en sisya.
- <sup>9</sup> Apo ari, sin timpo ay panpailaam,  
mabidang ay apoy di kaiarigam.  
Kaman okmonen Diyos daida,  
tan kanen di apoy daida gapo sin bonget na.
- <sup>10</sup> Ponasem din poli da isnan daga  
et maga polos di mabay-an en daida.
- <sup>11</sup> Manplano da si naikontra en sik-a,  
ngem maga polos di pantongpalan da,  
<sup>12</sup> tan panaem ropa da et managtag da.
- <sup>13</sup> Sik-a ay Diyos, ipailam koma din panakabalin mo,  
ta mankanta kami ay mangidaydayaw sin bikas mo.

## Salmo 22

### 22

#### *Din Nanligatan Ya Nangidayawan Di Nalinteg Ay Ipogaw*

- <sup>1</sup> Diyos ko, Diyos ko, apay nga tinmaynan ka?  
Ay daetan pay di adawag ko ay manpatolong en sik-a,  
ngem magay mas-ed kos badang mo tan kambaw inmaddawi ka.
- <sup>2</sup> Inag-agew ya linablabi ay man-ad-adawagak en sik-a, Apo,  
ngem adim polos songbatan nan kararag ko,  
isonga adi inmon-onina nan ligat ko.
- <sup>3</sup> Ngem ammok pay dedan ay Ari ka ay nangato.  
Sik-ay daydayawen di Israelita tan nasantoan ka ay Apo.
- <sup>4</sup> Din ap-apo mi ed bayag et sik-a di nantaltalkan da  
et siya met kayman ay insalakan mos daida.
- <sup>5</sup> Inlisim daida sin am-in ay kaeegyat idi nankararag da  
et adi da nadisdismaya idi sik-ay nantalkan da.
- <sup>6</sup> Ngem mo sak-en, baken ipogaw di omibilangan di iib-a  
mo adi et kaman bigis ay magay silbi na  
ay sigaan ya laslasoyen da.
- <sup>7</sup> Am-in ay omil-ila et somis-iyek da.  
Manwegweg da dowan dan omitidtidla.
- <sup>8</sup> Kanan da, “Mo siya ay si Diyos di nantalkam,  
apay ngarud ay adi dakan badangan?  
Mo tet-ewan kanam ay laylayden daka,  
into ngin di mangisalakan en sik-a?”
- <sup>9</sup> Ngem sik-a met ay Diyos di inmay-ayowan sin naianakak,  
siya abe sin kamoyang ko ay nansososoak.
- <sup>10</sup> Naitalekak en sik-a manlogi sin naianakak,  
sik-a din Diyos ko manipod sin naisikogak.
- <sup>11</sup> Adi ka koma tomaytaynan  
tan din problimak et adi makakkaan.  
Mo adi ka bomadang,  
magay odom si enak pankamangan.
- <sup>12</sup> Din linmilikob ay kaibaw ko, palalo ay ad-ado da.  
Kaman dan mabonget ay baka ed Basan ay nankapipigsa.
- <sup>13</sup> Kaman manngangaed ay layon ay manatakaw si tepek da,  
nasasagana da ay komat ta pomse da.

- 14 Isonga din bikas ko et enggay maga  
ay kaman danom ay naiwasit sin lota.  
Enggay namaga di pigsak,  
tan kaman naikomsiw din am-in ay tong-ak.  
Kaman natonaw ay allid din namnamak ya toled ko,  
tan enggay naabakak sin peteg ay egyat ko.
- 15 Enggay namgaan di bagang ko,  
din dilak et naipket sin tepek ko.  
Binaybay-am sak-en sin lota ta masokpot di leng-ag ko.
- 16 San bonggoy di makedse ay ipogaw et linmikob da,  
atap ay aso ay omas-asag-en di kaiarigan da.  
Din sikik ya takkay ko et tinodok da.\*
- 17 Am-in abe ay tong-ak et mabalin ay bilangen da,  
din kalaban ko et ominenengneng da.
- 18 Din badok et nanbibingayan da,  
din naloyong pay et nanbinonotan da.
- 19 Sik-a ay Diyos, baken koma sin addawi di panteam,  
dalasem pay et koma ay en bomadang.
- 20 Es-esa et anggoy di biyag ko,  
omisalakan ka kod sin kampilan di kaibaw ko,  
tan maangat da ay kaman natiwel ay aso.
- 21 Salaknibam sak-en tan kaman dan layon ay en omisida  
ono atap ay baka ay kaeegyat di sakngod na.†
- 22 Idad-at kon to din maipanggep en sik-a sin gimong di aag-i,  
idaydayaw kos sik-a sin kasinsinopan mi:
- 23 “Dakayo am-in ay mamatpateg en Diyos, idaydayaw yos sisya,  
dakayo ay polin Jacob, bigbigen yo din kinangato na.  
Dakayo am-in ay Israelita, patgen ya dayawen yos sisya.
- 24 Tan adi binaybay-an Diyos din kakaasi ya maligligatan,  
idi inmey da en sisya, adi nan dinokdokogan,  
et din ad-adawag da, ena aben sinongbatan.”
- 25 Begew sin inam-amag mo et idaydayaw kos sik-a  
sin sangoanan di am-in ay mamigbig en sik-a,  
et idawat ko abe din daton ay en ko insapata.
- 26 Mangan din nabibiteg enggana ay mabsog da,  
din mangan-anap en Diyos et idayaw das sisya,  
sapay koma ta matagotago da si eng-enggana.
- 27 Am-in ay nasyon isnan daga et bigbigen da  
ay si Diyos di kosto ay daydayawen da,  
isonga am-in ay tribu et mansagong da  
ay en mandayaw en sisya.
- 28 Tan si Diyos di ari ay mangituray sin intiro ay daga.
- 29 Din babaknang et makikan ya mandokmog da en sisya,  
siya abe din kaseseg-ang ya din dandani di kateyan da,  
mandokmog da am-in ay mandayaw en sisya.
- 30 Din kapototan tako sin maodi ay timpo  
et mansilbi da am-in en Diyos Apo.

\* 22:16 Di odom ay kaiologan nina sin Hebreo et: Din sikik ya takkay ko et binalod da ono ...katekaten da. † 22:21  
Di esa ay kaiologan nina sin Hebreo et: Tan inmilisi ka sin atap ay baka ay kaeegyat di sakngod na.

<sup>31</sup> Maibaga abe sin ipogaw ay daan bomala  
din kinalinteg Diyos ay nangisalakan sin ipogaw na.

## Salmo 23

### 23

#### *Din Omay-ayowan an Diyos\**

- <sup>1</sup> Sik-a ay Diyos, omay-ayowan ka ay kaman mon karnero.†  
Idawdawat mo amin ay masapol ko.
- <sup>2</sup> Ipangom sak-en sin magabay ay panpaspastolan  
ay say mayat si pan-illengan,  
iturong mo abes sak-en sin posong ay pan-in-inoman.
- <sup>3</sup> Mo madismayaak, papigsaem nemnem ko.  
Itdom abe din pandanak ay kosto  
ta say madaydayaw din ngadan mo.
- <sup>4</sup> Olay mo wadaak sin danan ay kaeegyat ya kabolingetan,  
laton ay maga di enak pan-egyatan  
tan sik-a ay mismo di tomatakdo.  
Din pat-om ya sokod mo di salaknib ko,‡  
et say pomigsaan di nemnem ko.
- <sup>5</sup> Sinangailim sak-en ay kaman bisita ay nangato,  
inpaltiam sak-en ay iniilan di kaibaw ko.  
Din tasak et manleplepyas si bindisyon mo.
- <sup>6</sup> Komakaman abe en sak-en din seg-ang ya layad mo  
sin am-in ay agew di biyag ko.  
Din beey mo ay Diyos et say makiteeak  
si eng-enggana et say kad-ak.

## Salmo 24

### 24

#### *Si Diyos Di Kangatoan Ay Ari*

- <sup>1</sup> Okan Diyos nan daga ya am-in ay linaona.
- <sup>2</sup> Insaad na din fondasyona sin dallem di danom,  
inbangona sin lanad di baybay ay malosong.
- <sup>3</sup> Sinoy way kalebbengana ay manikid sin dontog Diyos\* ay mangdayaw en sisya?  
Ya sino ngin di makasgep sin nasantoan ay Timplo na?
- <sup>4</sup> Sisya din ipogaw ay siged di am-amagena,  
ya kosto abe di nemnem ya panggep na,  
din adi manaydayaw si diyos ay baken tet-ewa,  
ya adi man-et-etek mo mantistigo sisya.
- <sup>5</sup> Bindisyonan ya isalakan Diyos sisya  
ya ibilang na ay magay basol na.
- <sup>6</sup> Kaman dana ay ipogaw di manglayad ay mandayaw en Diyos Apo  
ay dinaydayaw aben Jacob ay ap-apo tako.

\* **23:** 1-6 Dowa di kaiarigan Diyos sin Salmo ay nay. Sin vv. 1-4, maiarig si mangay-ayowan si karnero. Sin vv. 5-6, maiarig si mangipalti si bisita na. † **23:1** Din kanana sin Ilocano et: Ti APO ti pastorko. Din kali ay pastor et binolod da sin Espanyol. Di olog na sin Espanyol et mangay-ayowan si karnero. Ngem ed wani natken di pangawat di Ilocano ya Kankanaey sin olog di pastor tan say pangawag da sin pangolon di gimong. Isonga adi naosal din kali ay pastor sin versikulo ay nay, tan baken kosto di laydena ay ibaga. ‡ **23:4** Din mangay-ayowan si karnero, osalena di pat-o ay manalaknib sin karnero na. Osalena abe di sokod ay mangitdo en daida si emeyan da. \* **24:3** Din makwani en dontog Diyos et din dontog ay Zion ed Jerusalem ay naisaadan din Timplo.



- <sup>7</sup> Bokatan yo din kadaanan ay pantew di Timplo  
ta senggep san kangatoan ya madaydayaw ay Ari tako!
- <sup>8</sup> Sino ngin san Ari ay kangatoan?  
Sisya si Diyos ay kapipigsaan,  
magay makaabak en sisya sin gobatan.
- <sup>9</sup> Bokatan yo din kadaanan ay pantew di Timplo  
ta senggep san kangatoan ya madaydayaw ay Ari tako!
- <sup>10</sup> Sino ngin san Ari ay nangato?  
Si Diyos ay ap-apon di sosoldado,  
sisya san manakabalin ay Ari tako.

## Salmo 25

### 25

#### *Kararag Ay Mankedaw Si Panangiturong Ya Badang Diyos*

- <sup>1</sup> Mankararagak sin pandayawak en sik-a, Apo.  
<sup>2</sup> Mantalekak en sik-a ay Diyos ko.  
Adim kod ipalobos ay maibabainak, Apo,  
begew sin omabakan di kalaban ko.  
Adi ka kod ipalobos ay somiyek da, Apo.
- <sup>3</sup> Adi maabak din mantalek en sik-a,  
ngem din manlipot ya mangietek si iib-a da  
et maibabain da.
- <sup>4</sup> Itdom kod din pandanak ay kosto  
ta say amagek din laydem, Apo.
- <sup>5</sup> Itdom di iyat ko ay mangonod sin ibilang mo ay tet-ewa,  
tan din Diyos ay omisalakan et sik-a,  
isonga di pantalkak ay kanayon et sik-a.
- <sup>6</sup> Nemnemem koma din seg-ang mo  
ya adi manbalbaliw ay layad mo  
ay inpappailam manipod ed nabaon, Apo.
- <sup>7</sup> Pakawanem koma din basbasol ko sin kakitkitooy ko.  
Nemnemem komas sak-en gapo sin kinasiged mo  
ya adi manbalbaliw ay layad mo.
- <sup>8</sup> Sik-a ay Diyos, gapo ta siged ya nalinteg ka,  
itdom sin managbasol din danan ay onodan da koma.
- <sup>9</sup> Iturong mo din napakombaba sin kosto ay danan da  
ya itdom din laydem en daida.
- <sup>10</sup> Kanayon ay matalek ka ya ipailam din layad mo  
sin managtongpal sin intolag mo ya bilbilin mo.
- <sup>11</sup> Ad-ado kayman di basbasol ko,  
ngem pakawanem koma gapo sin ngadan mo.
- <sup>12</sup> Din mangipateg en sik-a et itdoam daida  
sin kosto ay danan ay onodan da.
- <sup>13</sup> Kanayon to ay mayat di biyag da  
ya din inkarim ay ili et tawiden din an-ak da.
- <sup>14</sup> Gagayyem Diyos din mangipateg en sisya  
et ipasigurado nan daida din intolag na.
- <sup>15</sup> Naimongsan din nemnem kon sik-a, Apo,  
tan omisalakan ka sin am-in ay ligat ko.
- <sup>16</sup> Somagong ka, Apo, ta maseg-ang ka,

- tan magay bomadang yan pomalpaligat da.  
<sup>17</sup> Palag-anem koma nan problimak,  
 omisalakan ka sin am-in ay panligatak.  
<sup>18</sup> Ilaem kod nan ladingit ya ligat ko  
 ta pakawanem am-in ay basol ko.  
<sup>19</sup> Ilaem man nan kaad-adon di kalaban ko  
 ya din liget dan sak-en ay napalalo.  
<sup>20</sup> Somalaknib ya omisalakan ka koma,  
 adi ka ipalobos ay omabak da  
 tan din pankamangak et sik-a.  
<sup>21</sup> Gapo ta siged ya nalintegak,\* omayowan ka koma,  
 tan mantalekak en sik-a.  
<sup>22</sup> Apo, isalakan mo kod din Israelita  
 sin am-in ay ligat da.

## Salmo 26

### 26

#### *Kararag Di Nalinteg Ay Ipogaw*

- <sup>1</sup> Ikeddeng mo koma ay magay basol ko,  
 tan say am-amagek din kosto  
 ya inmongsan ko din talek kon sik-a, Apo.  
<sup>2</sup> Estem kod ay ilaen sak-en, Apo,  
 ta linisam nan liknak ya nemnem ko.  
<sup>3</sup> Adiak polos linglingan din adi manbalbaliw ay layad mo,  
 kanayon ay napodnoak en sik-a, Apo.  
<sup>4</sup> Adiak makikadwa sin ipogaw ay magay silbi na.  
 Sin aginsisingpet, adiak makibonggoy en daida.  
<sup>5</sup> Kaliliget ko din mangam-amag si lawa,  
 adiak makikoyog sin nakillo di ogali na.  
<sup>6</sup> Manboak ay mangipaila ay magay basol ko.  
 Sin pandayawak en sik-a, likedek din altar mo.  
<sup>7</sup> Mankantaak ay man-iyaman en sik-a, Apo,  
 ya dad-atek am-in din nakaskasdaaw ay inamag mo.  
<sup>8</sup> Laylaydek din panteam ay beey mo  
 ay kailaan di mankoniniing ay kinadiyos mo.  
<sup>9</sup> Adim kod pakidosas sak-en sin ad-adoy basol da,  
 sin pantongpalan di makapese, omilisi ka.  
<sup>10</sup> Nakasagana da ay mangamag si lawa  
 ya mangawat si maipasoksok en daida.  
<sup>11</sup> Ngem sak-en pay, magay basol ko.  
 Maseg-ang ka ta omisalakan ka, Apo.  
<sup>12</sup> Wadaak si kad-an ay nasingpa,  
 sin dakdake ay gimong, idaydayaw kos sik-a.

## Salmo 27

### 27

#### *Talek En Diyos Ya Kararag Ay Mankedaw Si Tolong Na*

- <sup>1</sup> Si Diyos di manilsilaw sin enak pandanan,

\* **25:21** Di esa abe ay kaiologan nina sin Hebreo et: Gapo ta siged ya nalinteg ka ...

- sisya abe di omisalakan.  
 Gapo ta sisya di pankamangak,  
 maga polos di pan-egyatak.
- <sup>2</sup> Mo domoklos di lawa ay ipogaw ta pomse da,  
 daida ay kaibaw ko di maisokba yan maabak da.
- <sup>3</sup> Olay mo lomikob di ad-ado ay soldado,  
 maga polos di egyat ko.  
 Olay mo gomobat dadi ay kaibaw ko,  
 mantalekak pay dedan en Diyos ay Apo.
- <sup>4</sup> Esa anggoy di kinkindaw ko en Apo,  
 es-esa di panggep ko isnan biyag ko:  
 manteeak koma ay kanayon isnan Timplo na  
 ta mailak koma di am-in ay kinasiged na  
 ya ta manpaitdoak abe en sisya.
- <sup>5</sup> Tan sin timpon di ligat ko somalin sisya,  
 itabonas sak-en sin oneg di Timplo na.  
 Salaknibanas sak-en sin nakayang ay bato,  
 tan sidi, adi makaabot din kaibaw ko.
- <sup>6</sup> Awni et abakek din lomilikob ay kagobat ko,  
 et peteg di ragsak ko ay man-idaton si animal sin Timplo  
 yan ipigsak din kantik ay mangidaydayaw en Apo.
- <sup>7</sup> Dengngem koma mo mankararagak en sik-a, Apo.  
 Maseg-ang ka koma ta songbatam nan adawag ko.
- <sup>8</sup> Kanam en, “Omali kayo ay mandayaw en sak-en.”  
 Kanak abe, “Aw Apo, sik-a di enak daydayawen.”
- <sup>9</sup> Sak-en di baam, adi ka koma tomaytaynan,  
 adi ka omibonget ya omipakaan,  
 tan sik-a din kanayon ay en namadbadang,  
 sik-a, Apo, di Diyos ay mangisalakan.
- <sup>10</sup> Olay mo omiwasit da ama en ina,  
 sik-a pay ay Diyos di omil-ila.
- <sup>11</sup> Itdom ay Diyos di pandanak ay kosto  
 ta say nalinteg di kabibiyag ko,  
 tan nay ad-ado di kaibaw ko.
- <sup>12</sup> Adim ipalobos ay matongpal di panggep da,  
 tan pag etek di ipabpabasol da,  
 palalo di pangeg-egyat da.
- <sup>13</sup> Ngem ammok ay lak-amek to kasin san kinasiged mo,  
 olay ed wani ay kawadak ay matmatago.
- <sup>14</sup> Mantalek kayo en Diyos ay Apo,  
 mamati kayo ya papigsaen yo san nemnem yo.  
 Siya tet-ewa, mantalek kayo isnan Apo.

## Salmo 28

### 28

#### *Kararag Ay Mankedaw Si Badang Diyos*

- <sup>1</sup> Diyos ay komakaman ay pankamangak,  
 adi ka baybay-an nan panpapakpakaasiak,  
 tan mo tetewengem nan kararag ko, mateyak,  
 et sin kad-an di natey, maitapiak.

- <sup>2</sup> Naeyak ay mangitagtag-ay sin takkay ko  
ya manasagang sin nasantaon ay beey mo,  
ay mankedaw si badang mo.  
Dengngem koma din adawag ko.
- <sup>3</sup> Adi ka itapis sak-en ay pakidosa  
sin mangam-amag si lawa.  
Kaman mayat din kali da,  
ngem kedse baw di wadas nemnem da.
- <sup>4</sup> Dosaem daida begew sin basbasol da,  
isobalit mo en daida di katimbang din inamag da.
- <sup>5</sup> Adi dan banolen din nakaskasdaaw ay inam-amag mo,  
isonga mamingpingsan ay dosaem daida, Apo.
- <sup>6</sup> Daydayawek sik-a tan pinatgam din adawag ko  
ay mankedaw si badang mo.
- <sup>7</sup> Sik-a ay Diyos di poon di pigsak,  
sik-a di salidak ya pantalkak.  
Palalo di ragsak ko tan binmadang ka,  
mankantaak ay mangidaydayaw en sik-a.
- <sup>8</sup> Sik-a ay Diyos di mangipapigsa sin ipogaw mo,  
din pinilim ay ari, salaknibam ya isalakan mo.
- <sup>9</sup> Isalakan ya bindisyonam din ipogaw mo,  
ayowanam daida si eng-enggana ay kaman mon karnero.

## Salmo 29

### 29

#### *Din Napigsa Ay Kalin Diyos*

- <sup>1</sup> Dayawen yo si Diyos, dakayo ay wadad daya,  
bigbigen yo din kinangato na ya panakabalina.
- <sup>2</sup> Idaydayaw yo din nakaskasdaaw ay ngadana,  
mandokmog kayo en sisya  
begew sin mankoniniing ay kinasanto na.\*
- <sup>3</sup> Madnge din kali na sin danom ya baybay ay annawa,  
manakabalin si Diyos, kaman kido di kali na.
- <sup>4</sup> Mo mankali sisya, maila din panakabalina  
ya din nangatongato ay turay na.
- <sup>5</sup> Olay din mankanakneg ay sidro ed Lebanon, magotlo da,  
<sup>6</sup> din dontog ay Lebanon ya Hermon yan papadtokena  
ay kaman din iyat di anak di baka.
- <sup>7</sup> Babaen met laeng sin kali na, din kimat yan pansilapena,  
<sup>8</sup> din lugar ay magay omili ed Kades yan ikiweg na.
- <sup>9</sup> Pati abe din kadadak-an ay kaiw yan iwagawag na  
enggana ay maspak da.  
Sin Timplo na pay, ibogbogaw da,  
“Sik-a ay Diyos, madaydayaw ka!”
- <sup>10</sup> Sin timpon di layos ed idi,  
enggay nanturturay si Diyos ay ari.  
Maga abey patinggalan di panturturayana,  
tan man-ari sisya si eng-enggana.

\* 29:2 Di esa abe ay kaiologan nina sin Hebreo et: Manbado kayos nasantoan ta mandokmog kayo en sisya.

<sup>11</sup> Papigsaen Diyos din ipogaw na,  
ya bindisyonanas daida si talna.

## Salmo 30

### 30

*Iyaman Tan Nanbalinen Diyos Si Ragsak Din Ladingit*

<sup>1</sup> Apo, daydayawek sik-a,  
tan sin kateyak yan inmisalakan ka.  
Adim inpalobos ay din kalaban et lomaslasoy da.

<sup>2</sup> Nankedawak si badang mo  
yan inmagas ka, Yahweh ay Diyos ko.

<sup>3</sup> Dandani ay mapospos din leng-ag ko,  
ngem inmisalakan ka sin pese, Apo.

<sup>4</sup> Mankanta koma din napodno ay ipogaw mo,  
idaydayaw da koma din nasantoan ay ngadan mo.

<sup>5</sup> Tan sinkaattikan yan mamaga din bonget mo,  
ngem engganans tongpal biyag din seg-ang mo.  
Olay mo maninsinlabiak ay man-oga,  
ngem manragsakak sin kaagsapaana.

<sup>6</sup> Sin timpo ay mayat din biyag ko,  
kinwanik sin nemnem ko,  
“Maga polos di problima ay domteng sin biyag ko.”

<sup>7</sup> Gapo sin seg-ang mo,  
kamanak dakdake ay dontog ay insaad mo.  
Ngem idi binmaybay-an ka, Apo,  
palalo di egyat ko.

<sup>8</sup> Nan-adawagak en sik-a, Apo,  
et kinwanik sin kararag ko,

<sup>9</sup> “Sino pay di magon-od mo, mo mateyak  
et sin kad-an di natey di emeyak?  
Ay din natey yan dayawen daka  
ya dad-aten da ay matalek ka?”

<sup>10</sup> Dengngem koma din kararag ko,  
maseg-ang ka ta bomadang ka, Apo.”

<sup>11</sup> Et siya na di inyat mo,  
nanbalinem si ragsak din ladingit ko,  
isonga kinaan ko din inbabadok ay sako  
yan nay mansalsalaak begew sin ragsak ay indawat mo.

<sup>12</sup> Et siya na di pantongpalana,  
adiak gomiginek mo adi et enak mankanta  
ay mangidaydayaw en sik-a.  
Yahweh ay Diyos ko, man-iyamanak en sik-as eng-enggana.

## Salmo 31

### 31

*Talek En Diyos Sin Timpon Di Ligat*

<sup>1</sup> Apo, mankamangak en sik-a,  
adim polos ipalobos ay maibabainak koma.  
Gapo sin kinalinteg mo, omisalakan ka.

<sup>2</sup> Nan kararag ko, dengngem koma,



dalasem ta omisalakan ka.  
 Sik-a koma di salaknib ko  
 ay maiarig si dakdake ay bato  
 ono makneg ay beey ay pankamangak  
 ta maisalakanak.  
<sup>3</sup> Sik-a tet-ewa di kaman dontog ay enak pantabonan,  
 ta adi omdas di kalaban.  
 Gapo sin karim, omiturong ka.  
<sup>4</sup> Sin tagdey di kalaban ko, omilisi ka koma,  
 tan din pankamangak et sik-a.  
<sup>5</sup> Intalek ko din ab-abiik ko en sik-a,  
 tan Diyos ka ay matalek ya tet-ewa,  
 et namnamaek ay omisalakan ka.  
<sup>6</sup> Kaliliget mo din mandayaw si didiyosen ay magay silbi na,  
 ngem sak-en pay, mantalekak en sik-a.  
<sup>7</sup> Dadlonak manragragsak, Apo,  
 begew sin adi manbalbaliw ay layad mo,  
 tan ammom din problimak ya ligat ko.  
<sup>8</sup> Adim inpalobos ay dompap din kalaban ko  
 mo adi et inmiey ka sin lugar ay magay danag ko.  
<sup>9</sup> Maseg-ang ka, Apo, tan waday problimak.  
 Mansakit nan matak gapo si kaoogak  
 yan nay enggay nabbayak.  
<sup>10</sup> Begew sin palalo ay ladingit ko,  
 enggay inmaptik din biyag ko.  
 Gapo sin ligligat ko, enggay kinmapsotak,\*  
 olay abe din tong-ak.  
<sup>11</sup> Lomaslasoy din kalaban ko,  
 masepsep din katokmang ko.  
 Olay din gagayyem ko yan emegyat da,  
 lomisi da mo omila da sin kalsada.  
<sup>12</sup> Kamanak natey ay nilinglingan da  
 ono nagopak ay banga ay inwasit da.  
<sup>13</sup> Dedengngek din ayasak di kalaban ko,  
 kaeegyat sin nanliniked ko.  
 Mantotolag da ay omibaw da,  
 manpaplano da en pomse da.  
<sup>14</sup> Ngem mantalekak en sik-a, Apo,  
 sik-a di bigbiggek ay Diyos ko.  
<sup>15</sup> Sik-ay makaammo sin intiro ay biyag ko,  
 omisalakan ka koma sin pomalpaligat ay kalaban ko.  
<sup>16</sup> Maseg-ang ka koma en sak-en ay mansilsilbi en sik-a.  
 Gapo sin layad mo ay magay panbalbaliwana,  
 omisalakan ka koma.  
<sup>17</sup> Sik-a, Apo, di pankararagak,  
 adim kod ipalobos ay maibabainak.  
 Say maibabain koma din mangam-amag si lawa  
 ya sin kad-an di natey di panturongan da.  
 Isdi et kanayon ay gomiginek da.

\* **31:10** Din wada ed ngato et din naisolat sin Septuagint, Vulgate ya Syriac. Din naisolat abe sin Hebreo (Masoretic Text) et: Gapo sin basol ko, enggay kinmapsotak.

- 18 Din maetek, paginkem koma,  
tan ipapangato dan awak da  
ay manglaslasoy ya mangipalawlaw  
sin ipogaw ay nalinteg di ogali na.
- 19 Nakaskasdaaw din kinasiged mo  
sin mangipatpateg en sik-a, Apo.  
Din kaipoipogaw yan maila da  
din kinasiged mo sin mantalek en sik-a.
- 20 Wada ka ay manalsalaknib en daida  
sin planon di ipogaw ay lawa  
ya sin ipabasol di kalaban da.
- 21 Madaydayaw ka ay Diyos tan nakaskasdaaw din inyat mo  
ay nangipaila sin adi manbalbaliw ay layad mo  
idi linmikob din kagobat ko.
- 22 Madandanaganak en naisianak en sik-a, Apo,  
ngem dinngem din kararag ko  
sin nankedawak si badang mo.
- 23 Dakayo am-in ay matalek ay ipogaw di Apo,  
ipaila yo en sisya din layad yo.  
Din matalek yan ayowanana,  
ngem idawat na di kosto ay dosa  
sin mangipapangato si awak na.
- 24 Dakayo am-in ay mannamnama en Apo,  
papigsaen yo di nemnem yo ta tomoled kayo.

## Salmo 32

### 32

#### *Din Ragsak Di Ipogaw Ay Napakawan Di Basbasol Na*

- 1 Nagasat di pinakawan ya pinonas Diyos di basbasol na.
- 2 Nagasat di ipogaw ay inbilang Diyos ay magay basol na  
ay dadlon naimposan ay nanpodno en sisya.
- 3 Idi adiak pay laeng ipodno din nankolkolangak,  
nabbanabbayak sin kanayon ay nan-og-ogaak.
- 4 Inagew ya linabi ay dinmosdosa ka, Apo,  
et nay ay kinmapoyak si kosto,  
kamanak nanling-eling-et sin man-atong ay timpo.
- 5 Idi siya di, inpaammok en sik-a din basbasol ko,  
adiak intabtabon din lawa ay inam-amag ko.  
Ninemnem ko ay ipodnok am-in da na en sik-a, Apo,  
et laton met kayman ay pinakawan mo.
- 6 Isonga am-in ay mantalek en sik-a,  
sik-a koma di pankararagan da  
sin kosto ay timpo ay maanap ka,  
ta mo omali di kaman layos ay problima,  
adi domteng en daida.
- 7 Sik-a, Apo, di enak pantabtabonan  
et omisalakan ka sin enak panligatan,  
isonga ipigsak ay mankanta tan en ka omay-ayowan.
- 8 “Itdoak sik-a,” say kanan di Apo,  
“ta say maammoam san danan ay kosto.

- Ipangok sik-a ta adi ka masangaw sin danan mo.  
<sup>9</sup> Baken ka koma kaman atap ay kabayo  
 ay siyat mabosalan asi pay omamo.”  
<sup>10</sup> Ad-adoy ligat ay nam-osen di mangam-amag si lawa,  
 ngem kanayon pay ay laylayden ya seg-angan Diyos di mantalek en sisya.  
<sup>11</sup> Manragsak kayo ay nalinteg ya managtongpal en Apo.  
 Begew sin seg-ang na en dakayo,  
 ibogaw yo din ragsak yo.

## Salmo 33

### 33

#### *Kanta Ay Pangdayaw En Diyos*

- <sup>1</sup> Dakayo ay nalinteg, manragsak kayo  
 gapo sin inamag Diyos Apo.  
 Tan din managtongpal sin bilina  
 et lebbeng da ay mangdayaw en sisya.  
<sup>2</sup> Dayawen yo si Diyos babaen si gitara ya arpa.  
<sup>3</sup> Ikantaan yos sisya si baro ay kanta.  
 Esten yo ay mankotingting sin arpa  
 ya ipigsa yo ay mankanta.  
<sup>4</sup> Tan din kalin Diyos et pag tet-ewa  
 ya matalek si Diyos sin amin ay amagena.  
<sup>5</sup> Din kosto ya nalinteg di laydena.  
 Maila isnan intiro ay daga  
 din komakaman ay layad ya seg-ang na.  
<sup>6</sup> Babaen sin kali na et pinarsua na ed daya.  
 Amin ay wadas di et nawada babaen sin bilina.  
<sup>7</sup> Din danom sin baybay et sininop na,  
 inpeey na sin lugar ay laydena.  
<sup>8</sup> Patgen ya dayawen yos sisya,  
 dakayo amin ay ipogaw isnan daga.  
<sup>9</sup> Tan inbaga na et tinmet-ewa,  
 inbilina et nawada.  
<sup>10</sup> Din panggep di nanasyon yan dadaelena  
 et adi matongpal din plano da.  
<sup>11</sup> Ngem din planon Diyos et magay pap-eng da,  
 komakaman da si eng-enggana.  
<sup>12</sup> Nagasat din nasyon ay si Yahweh di Diyos da,  
 nagasat din pinili na ay ipogaw na.  
<sup>13-14</sup> Os-osdongan Diyos ay manturturay ed daya  
 amin ay ipogaw ay wadas nan daga.  
<sup>15</sup> Sisya di nangipawada si nemnem da  
 et ammo na amin ay am-amagen da.  
<sup>16</sup> Baken say kaisalakanan di ari din kaad-adon di soldado na.  
 Adi aben maisalakan di soldado babaen sin bikas na.  
<sup>17</sup> Din kabayo ay para gobat et baken pannamnamaan  
 ay say begew si pangabakan.  
 Tan din am-in ay pigsa da  
 et magay maitolong da.  
<sup>18</sup> Kanayon ay bantayan Diyos din mangipatpateg en sisya

- ya mantalek sin adi manbalbaliw ay layad na.  
<sup>19</sup> Sin pese et isalakanas daida,  
 olay timpon di betil et matagotago da.  
<sup>20</sup> Si Diyos di pannamnamaan tako,  
 tan sisya di mamadang ya manalaknib en datako.  
<sup>21</sup> Manragsak tako,  
 tan si Diyos ay nasantoan di pantalkan tako.  
<sup>22</sup> Apo, sapay koma ta lak-amen mi  
 din adi manbalbaliw ay layad mo en dakami,  
 tan sik-a din pantaltalkan mi.

## Salmo 34

### 34

#### *Din Pangay-ayowanan Diyos Sin Mangipateg En Sisya*

- <sup>1</sup> Man-iyamanak en Diyos si am-in ay timpo,  
 kanayon ay sisya di idaydayaw ko.  
<sup>2</sup> It-ek ko gapo sin kinasiged na.  
 Amin koma ay nabibiteg ya napakombaba  
 et dengngen da ya manragsak da.  
<sup>3</sup> Maitapi kayon sak-en ta man-es-esa tako  
 ay mamigbig sin kinangaton Diyos Apo.  
<sup>4</sup> Nankararagak en Diyos yan sinongbatana,  
 din amin ay pan-egyatak et kinaana.  
<sup>5</sup> Din mantalek en sisya et maragsakan da,  
 adi da polos madismaya.  
<sup>6</sup> Nankedaw nan kaseseg-ang ay ipogaw si badang na  
 et insalakana sin amin ay ligat na.  
<sup>7</sup> Bantayan din anghel Diyos din mangipateg en sisya  
 et isalakana si daida.  
<sup>8</sup> Padasen yo si Diyos ta maammoan yo din kinasiged na.  
 Nagasat din komamang en sisya.  
<sup>9</sup> Patgen yo si Diyos, dakayo ay ipogaw na,  
 tan din mangipateg en sisya et wada amin di kasapolana.  
<sup>10</sup> Olay din layon yan madagaangan da  
 tan mankolang das kanen da,  
 ngem din ipogaw ay si Diyos di kamangen da  
 et maga di pankolongan da.  
<sup>11</sup> Dengngen yo ay an-ak ko  
 ta itdoak dakayo ay mangipateg en Diyos Apo.  
<sup>12</sup> Sino en dakayo di manglayad ay matagotago  
 ta kagkagam-is ay biyag di ganasen yo?  
<sup>13</sup> Addawian yo ngarud ay mankali si etek ya lawa.  
<sup>14</sup> Dokogan yo din lawa  
 ta din siged di amagen yo koma.  
 Ipakat yo abe di kabaelan yo  
 ay makiolnos si iib-a yo.  
<sup>15</sup> Din nalinteg et bantayan Diyos daida  
 ya dengngena din kararag da.  
<sup>16</sup> Ngem kontraena din man-am-amag si lawa  
 et ponasena amin ay kanemneman da.

- 17 Dengngen Diyos mo mankedaw da  
din nalinteg si badang na  
et isalakana sin amin ay ligat da.
- 18 Asag-en si Diyos sin madisdismaya,  
isalakana din maawanan si namnama.
- 19 Din ipogaw Diyos et ad-adoy kapaligatana,  
ngem ilisin Diyos sin amin ay ligat na.
- 20 Ayowanan Diyos din ipogaw ay sana,  
magay magpong si olay esay tong-a na.
- 21 Din am-amagen di lawa di nemnem na  
et say begew si kateyana.  
Din mangiliget abe si nalinteg et madosa da.
- 22 Isalakan Diyos din mansilsilbi en sisya,  
maga polos di madosa ay komamang en sisya.

## Salmo 35

### 35

#### *Kararag Ay Mankedaw Si Badang Diyos*

- 1 Apo, kontraem kod din komonkontra,  
din gomobat yan gobatem koma.
- 2 Alaem kasay mo ya salidam  
ta omali ka ay bomadang.
- 3 San gayang ya wasay mo et isaganam koma,  
ikarim ay omisalakan ka.
- 4 Mo din manpanggep en sak-en si lawa  
ay mangwani en pomse da,  
sapay koma ta maabak ya lomayaw da  
ta say maibabain da ya adi da ammoy amagen da.
- 5-6 Teg-ap ay itayaw di dagem di kaiarigan da koma,  
manngaotoy ya mabolinget koma di pandanan da  
sin pangapayawan din anghel ay baam en daida.
- 7 Olay magay gapo yan insagana da  
di bito ta enak makna.
- 8 Sapay koma ta mabigla da ay makna  
sin bito ay insagana da.
- 9 Et palalon to di ragsak ko mo siya say iyat mo,  
tan omisalakan ka, Apo.
- 10 Naimposoan ay enak ibaga,  
“Apo, magay makaison sik-a.  
Salaknibam din magay bael na  
sin pamaligatan di napipigsa.”
- 11 Din lawlawa di nemnem da  
yan omipabasol das baken tet-ewa.  
Magay ammok sin ipabasol da.
- 12 Kaasiak pay isna, tan sobalitan das lawa  
din siged ay inamag kon daida.
- 13 Ngem sak-en pay sin nansakitan da  
yan nanladingitak tet-ewa.  
Nanbadoak si sako  
ya initpek di dagaang ko.  
Nanyakog-ongak ay nankararag,



- 14 kaman din iyat ay mangikararag si gayyem ono kabsat.  
 Kaman din iyat ay mangiladingit si ina  
 din ladingit ko ay paran daida.
- 15 Ngem idi sak-en di nanproblima,  
 linmikob ya sinmisiyek da.  
 Naitapi pay di mangili ay kinmonkontra,  
 magay saldeng di linmaslasoyan da,  
 binmisngibisngit da di kaiarigana.
- 16 Da din ipogaw ay nay ay magay silbi na,  
 mankayetket din bab-a da ay omila  
 gapo si bonget da.
- 17 Apo, pig-an pay di kabayag na  
 ay owat kan il-ilaen nan pomalpaligatan da?  
 Omisalakan ka koma en daida  
 ay layon di kaiarigana.
- 18 Asiak man-iyaman en sik-a, Apo,  
 sin gimong di ad-ado ay ipogaw mo.
- 19 Adim koman ipalobos ay manragsak da  
 gapo sin panladingitak ay iilaen da  
 nan omililiget ay magay gapo na.
- 20 Kasisinit di kali da  
 et man-istorya das baken tet-ewa  
 maipanggep si ipogaw ay managlayad si talna.
- 21 Din kali da yan napalalo.  
 Kanan da, “Hala, inila min inamag mo.”
- 22 Ngem sik-a ay Yahweh et inilam na,  
 isonga adim igiginek, somag-en ka.
- 23 Apok ya Diyos ko, pomika ka  
 ta din kalintegak, ipaneknek mo koma.
- 24 Ikeddeng mo ay magay basol ko,  
 tan nalinteg ka, Yahweh ay Diyos ko.  
 Adim ipalobos ay manragsak dan kalaban ko  
 begew sin ligat ko.
- 25 Adim ipalobos ay kanan da  
 en namingpingsan ay inmabak da  
 et natongpal din layden da.
- 26 Sapay koma ta din amin ay maragsakan  
 ya mangingatos awak da gapo sin enak panligligatan  
 et maabak ya mababainan da  
 ya adi da ammoy amagen da.
- 27 Ngem din manglayad ay mapaneknekan koma  
 ay maga di basol ko tet-ewa,  
 manbogaw da komas layad da  
 ya kanan da ay mangipidwapidwa,  
 “Nangatongato si Diyos ay say panlaydana  
 di mayat ay biyag di baa na.”
- 28 Asiak aben daddad-aten din kinalinteg mo,  
 maninsin-agew ay daydayawek sik-a, Apo.

## Salmo 36

## 36

### *Din Kinalawan Di Ipogaw Ya Din Kinasiged Diyos*

- <sup>1</sup> Magay egyat dan Diyos din mangam-amag si lawa,  
kanayon ay panbasolan di nemnememen da.
- <sup>2</sup> Palalo ay ingangato da di awak da,  
isonga kanan das nemnem da  
en adi maammoan ya adi kaliliget Diyos din basol da.\*
- <sup>3</sup> Kedse ya pag etek di kali da,  
din siged ay amagen di masirib ay ipogaw yan dinokogan da.
- <sup>4</sup> Lawlawawa di kabibiyag da.  
Sin kaseyseyepan da yan manplano das lawa,  
et sigaan da ay dokogan din lawa ay sana.
- <sup>5</sup> Din kinamatalek mo ya adi manbalbaliw ay layad mo, Apo,  
edasan da ed langit sin labes di liboo.
- <sup>6</sup> Adi aben manbalbaliw din kinalinteg mo.  
Kaman dontog ay adi kaigido,  
tan kanayon ay kosto din ikeddeng mo.  
Kaman aben lanad di baybay ay malosong,  
tan adi polos makad-as di nemnem.
- Amin ay ipogaw ya animal yan ay-ayowanam, Apo.
- <sup>7</sup> Palalo ay nabanol din adi manbalbaliw ay layad mo,  
isonga kamangen mi di panalaknib mo.
- <sup>8</sup> Mapnemapnek kami sin ad-ado ay makan sin beey mo,  
kaman ginawang ay pan-inoman din kinasiged mo.
- <sup>9</sup> Tan sik-a di poon di biyag mi  
ya silaw ay maningtinggaw sin nemnem mi.
- <sup>10</sup> Din layad ya seg-ang mo, mantoltoloy koma  
sin makaammo ya manongtongpal en sik-a.
- <sup>11</sup> Adim ipalobos ay domoklos ya omipatagtag da  
din nangato di nemnem na ya mangam-amag si lawa.
- <sup>12</sup> Ilaem din mangam-amag si lawa,  
doy naabak da et natey da.

## Salmo 37

### 37

### *Din Gon-gonan Di Lawa Ya Siged Ay Ipogaw*

- <sup>1</sup> Baken koman say distolbo en sik-a  
mo nemnemem din mangam-amag si lawa.  
Adi ka maapalan en daida.
- <sup>2</sup> Tan nabeas ya mola di kaiarigan da,  
sinkaattikan et matey ya mamaga da.
- <sup>3</sup> Si Diyos et di talkem  
ya din siged di amagem,  
ta omandoy biyag mos nan daga  
ya magay mapasamak en sik-a.
- <sup>4</sup> Malaydan ka koma ay mansilbi en Diyos ay wadad daya,  
et din amin ay laydem yan idawat na.
- <sup>5</sup> Italek mon biyag mo en sisya et tolongan daka.

\* **36:2** Di esa abe ay kaiologan nina sin Hebreo et: isonga adi dan maimatonan ya kaliliget din mismo ay basol da.

- 6 Paneknekanan to ay siged ya nalinteg ka,  
et kaman pat-an di alas dosi di kinalawag na.
- 7 Sin sangoanan Diyos, gominek ka koma  
ya anosam ay sed-en din amagena.  
Adi kan omapal en daida  
ay bomaknang gapo sin lawa ay am-amagen da  
ya matongpal din lawa ay panggep da.
- 8 Din apal ya bonget et pandokogam,  
tan din pantongpalan da et panbasolam.
- 9 Tan madosa dan to din mangam-amag si lawa,  
ngem din mantalek en Diyos et okaen da din daga.
- 10 Baken bomayag et mamaga din mangam-amag si lawa,  
olay estem ay anapen daida et maga da.
- 11 Ngem din napakombaba et okaen da din daga,  
ganasen da di siged ay biyag ya talna.
- 12 Din mangam-amag si lawa et man-gayetget das bonget da  
mo ilaen dan ipogaw ay siged di ogali na,  
et panggepen day lawa ay maikontra en sisya.
- 13 Ngem si Diyos pay et sis-iyekanas daida,  
tan ammo na ay dandani di kadosaan da.
- 14 Din makedse et isagana da din kampilan ya pana da  
ta peslen da din nabibiteg ya kaseseg-ang ay iib-a da  
ya siya abe din nalinteg di kabibiyag na.
- 15 Ngem din kampilan da di mamse sin mismo ay awak da  
ya magotlo din pana da.
- 16 Din at-atik ay sanikwan di nalinteg et nabanbanol da  
mo din kinabaknang di amin ay mangam-amag si lawa.
- 17 Tan kaanen Diyos din kabaelan di ipogaw ay lawa,  
ngem din nalinteg pay et salsalaknibanas daida.
- 18 Ay-ayowanan Diyos din managtongpal en sisya  
sin am-in ay agew di biyag da,  
ya din daga ay tinawid da et oka das eng-enggana.
- 19 Sin timpon di ligat, adi dan maligatan,  
olay mo betil, adi dan mankolang.
- 20 Ngem din kalaban Diyos ay din mangam-amag si lawa,  
sabsabong ya asok di kaiarigan da,  
tan sinkaattikan et mamaga da.
- 21 Man-otang di managbasol yan adi dan manbayad,  
ngem din nalinteg, man-idawat da ay silalayad.
- 22 Din binindisyonan Diyos et okaen da din daga  
ngem din dosaena et maipakaan da.
- 23 Si Diyos di mangitdo si kosto ay danan tako  
mo malaydan sin kabibiyag tako.
- 24 Olay mo maisokba tako, kasin takon bomangon,  
tan wadas Diyos ay tomoltolong.
- 25 Manipod sin kakitkittoy ko engganans nakayak,  
maga polos di nangilaak  
si nalinteg ay binaybay-an Diyos  
ono din an-ak na yan manpalpalimos.
- 26 Kanayon ay nakasagana

- ay man-idawat ya man-ibolod sin iib-a na,  
manbalin abe ay bindisyon din an-ak na.
- 27 Dokogan yo din lawa ta din siged di amagen yo  
ta say mantee kayos eng-enggana sin daga ay tinawid yo.
- 28 Tan si Diyos et din kinalinteg di laydena  
ya adi na baybay-an din matalek ay ipogaw na.  
Kanayon ay salaknibanas daida,  
ngem din an-ak di mangam-amag si lawa  
et maipakaan da sin daga.
- 29 Din nalinteg di mangoka sin daga  
et mantee das di si eng-enggana.
- 30 Din nalinteg et kostokosto din kali na,  
ipaila da din sirib na.
- 31 Nenemnemena din bilbilin di Diyos na  
et maga di kasangawana.
- 32 Din managbasol et siimena  
din nalinteg ay ipogaw ta peslena.
- 33 Ngem adi baybay-an Diyos sin panakabalin di kalabana,  
adi na ipalobos ay makeddenggan mo idarum da.
- 34 Mantalek kayon Diyos ya mantongpal kayon sisya,  
et mapadayawan kayo ay mangoka sin daga,  
ya ilaen yo din kadosaan di mangam-amag si lawa.
- 35 Waday enak inila ay lawlawwa di nemnem na  
yan ineg-egyatan di gagait na.  
Dakdake ay kaiw ed Lebanon di kaiarigana  
ay din sidro ay kanan da.
- 36 Idi kasinak nalabas yan maga sisya,  
inan-anap ko ngem iwed ay maila.
- 37 Ilaen yo din matalek ya siged di ogali da,  
tan din naolnos ay ipogaw et omad-ado din poli da.
- 38 Ngem din managbasol et mamingpingsan ay madosa da  
et mamaga din poli da.
- 39 Isalakan Diyos ya salaknibana  
din nalinteg sin timpon di ligat da.
- 40 Badangana ya isalakanas daida  
sin ipogaw ay lawa di nemnem da,  
tan sisya di kamangen da.

## Salmo 38

### 38

#### *Kararag Di Ipogaw Ay Mansakit*

- 1 Apo, adi ka kod mabonget sin domosaam.
- 2 Tan sin dinmosaam, kamanak nasogatan sin panam,  
kamanak aben natokang gapo sin dinmespegam.
- 3 Madagsen di sakit ko gapo sin bonget mo,  
mansakit amin awak ko begew sin basol ko.
- 4 Tan enggay nalim-otanak si basol ko,  
adiak makag-en tan madagsen dadlo.
- 5 Naboyok et man-agob din sogat ko  
gapo sin kinaong-ong ko.

- 6 Adiak makabangon gapo sin sakit ko.  
Maninsin-agew ay man-og-ogaak si ladingit ko.
- 7 Man-atong ay kaman apoy nan awak ko,  
palalo nan sakit ko.
- 8 Enggay kinmapsokapsotak, Apo,  
manbayewengak gapo sin sakit di nemnem ko.
- 9 Ammom din laydek, Apo,  
dedenggem amin ay bayeweng ko.
- 10 Mankayebkeb nan poso ya enggay kinmapoyak,  
kinmapsot abe nan matak.
- 11 Adi somag-en din gagayyem ya katokmang ko  
gapo sin bayang ko, olay abe din toton-od ko.
- 12 Din manpanggep sin biyag ko, man-amag das tagdey da,  
din manglayad ay domadael yan omipalawlawwa da,  
adi da somaldeng ay manplanos lawa.
- 13-14 Ngem kamanak nateweng, tan tetewengek daida,  
ya kamanak omel, tan adiak songbatan din ibaga da.
- 15 Tan sedsed-ek sik-a, Apo,  
songbatam kod kararag ko, Yahweh ay Diyos ko.
- 16 Adim ipalobos ay manragsak dan kalaban ko  
gapo sin kadadaelak ya ligat ko,  
17 tan kamanak matey sin kanayon ay sakit ko.
- 18 Ipodnok nan basbasol ko  
madandanaganak begew sin lawa ay inamag ko.
- 19 Napipigsa da din kalaban ko,  
ad-ado da ay omililiget, olay magay gapo.
- 20 Din manobalit si lawa sin siged ay inamag ko,  
daida din kalaban ko gapo sin pangamagak si kosto.
- 21 Adi ka kod bomaybay-an, Apo,  
adi ka omaddawi ay Diyos ko.
- 22 Dalasem ta bomadang ka, sik-a ay omisalakan ya Apo.

## Salmo 39

### 39

#### *Din Kinaaptik Di Biyag*

- 1 Kanak en man-annadak ta adiak bomasol sin ibagak,  
annadak din kalik sin kawadan di managbasol sin kad-ak.
- 2 Maga polos di inbagbagak si olay mayat,  
ngem nasepsep ay naligatanak.
- 3 Sin nannemnemnemak, madandanaganak,  
ya nasepsep abe ay binmongetak  
enggana ay adiak makaitpe sin liknak,  
et siya nay inbagak,
- 4 “Apo, ibagam koma mo pig-an di kateyak,  
ipaammom di kaandon di panbiyagak.
- 5-6 Nan indawat mo ay panbiyagak yan sinkaattikan,  
magay kabayag na sin pangilam.  
Katet-ewa na, amin ay ipogaw yan siya nay iso da,  
es-esay leng-ag ono owat alidong di kaiarigan da.  
Magay silbin di pangipakatan das amin ay kabaelan da,

- tan olay mo waday kinabaknang ay idolin da,  
 adi da ammoy mangon-od sin odi na.
- <sup>7</sup> Ed wani, sino pay di pantalkak?  
 Sik-a met anggoy di pannamnamaak.
- <sup>8</sup> Sin basbasol ko, omisalakan ka koma.  
 Adim ipalobos ay somisiyek da  
 di ipogaw ay magay nemnem na.
- <sup>9</sup> Igiginek ko, magay enak maibaga,  
 tan sik-a di nangamag sina.
- <sup>10</sup> Isaldeng mo koma ay domosa,  
 tan nay enggay namaga nan pigsa.
- <sup>11</sup> Begew sin basol di ipogaw yan dosaem,  
 maiarig kas bigis, tan din banolen da yan dadaelem.  
 Amin ay ipogaw yan owat kaman dagem.
- <sup>12</sup> Apo, dengngem koma ya patgam din kararag ko.  
 Man-og-ogaak ay mankararag en sik-a, Apo,  
 tan owatak mangili ay makidagos sin beey mo  
 ay kaman din inyat di ap-apo.
- <sup>13</sup> Isaldeng mo koma nan domosdosaam  
 ta manragsakak si sinkaattikan  
 ta asiak matey pag enggay kayman.”

## Salmo 40

### 40

#### *Kanta Ay Pangdayaw Di Ipogaw En Diyos Ya Kararag Ay Mankedaw Si Badang Na*

- <sup>1</sup> Inanosak ay sinsin-ed din badang Diyos Apo,  
 inmosdong et dinnge na din kararag ko.
- <sup>2</sup> Inmisalakan sin kaegyay ay bito ay naikosnongak  
 ay kad-an di pitek ay nailemlemak.  
 Inmipatang sin dakdake ay bato,  
 et mandanak ay magay egyat ko.
- <sup>3</sup> Baro ay kanta di initdo na ta ikansiyon ko.  
 Panangdayaw en sisya ay Diyos tako.  
 Ad-adon to di makaila et emegyat da  
 ya mantalek dan sisya.
- <sup>4</sup> Nagasat din mantalek en Diyos  
 ay adi masangaw ay makidayaw si sinan didiyos.
- <sup>5</sup> Magay makaison sik-a, Yahweh ay Diyos mi.  
 Nakaskasdaaw din inam-amag mo para en dakami,  
 et siya abe sin planom paran dakami.  
 Adiak makaibaga mo dad-atek amin dana,  
 tan palalo ay ad-ado da.
- <sup>6</sup> Baken din napalpalti ay animal ya odom ay daton di laylaydem.  
 Baken abe din kapopooan di animal ya odom ay daton para sin basbasol di  
 panragragsakam.  
 Ngem indawat mo din ingak ay mannge sin ibagam.
- <sup>7</sup> Et naeyak ay Diyos ay manongpal sin laydem  
 ay kaman din inpaisolat mo sin nalopilop ay libro maipanggep en sak-en.
- <sup>8</sup> Laydelaydek ay onodan din laydem ay Diyos ko.  
 Kanayon ay nemnemek din linteg mo.



- <sup>9</sup> Inpaammok din kosto sin gimong di am-in ay ipogaw mo,  
 adiak met ginmiginek et ammom ay Diyos Apo.
- <sup>10</sup> Magay binokbokodak, kanayon ay dinad-at ko  
 din omiparagsak ay pangisalakanam ya kinamatalek mo,  
 siya abe sin adi manbalbaliw ay layad ya seg-ang mo.
- <sup>11</sup> Din seg-ang mon sak-en, mantoltoloy koma.  
 Kanayon koma ay somalaknib ka,  
 begew sin komakaman ay layad mo  
 ya din kinamatalek mo.
- <sup>12</sup> Tan nanliniked nan problemak, palalo ay ad-ado.  
 Adiak makaila tan kaman tomab-ok nan basbasol ko,  
 ad-ado da mo din kabibilang di book ko,  
 et enggay nakaan di toled ko.
- <sup>13</sup> Apo Diyos, pangaasim koma  
 ta dalasem ay omisalakan ka.
- <sup>14</sup> Sapay koma ta maabak ya maibabain da  
 din manpanggep isnan biyag ko  
 ya malaydan sin ligat ko.
- <sup>15</sup> Din lomaslasoy, maibabain da koma  
 begew sin kaabakan da.
- <sup>16</sup> Ngem din mangan-anap en sik-a,  
 sapay koma ta manragsak da.  
 Amin ay man-iyaman sin panangisalakan mo,  
 kanayon koma ay kanan da, “Nangatongato si Diyos Apo.”
- <sup>17</sup> Kaseseg-angak ay nabiteg kayman,  
 ngem adi ka met lomiwliw-an.  
 Diyos ko ay omisalakan,  
 dalasem koma ay bomadang.

## Salmo 41

### 41

#### *Kararag Di Ipogaw Ay Mansakit*

- <sup>1</sup> Nagasat di ipogaw ay din kakkaasi yan seg-angana,  
 tan isalakan Diyos sin timpon di ligat na.
- <sup>2</sup> Salakniban ya ayowanan Diyos sisya  
 et naragsak di biyag na isnan daga.  
 Adi baybay-an Diyos sin kalabana.
- <sup>3</sup> Ayowanan Diyos sin pansakitana,  
 agasana sin amin ay sakit na.
- <sup>4</sup> Mo sak-en pay yan say kanak na,  
 “Apo, nanbasolak en sik-a,  
 maseg-ang ka koma ta omagas ka.”
- <sup>5</sup> Omipalawlawana din kalaban ko yan kanan da,  
 “Pig-an pay di kateyana ya kaliw-anan di ngadana?”
- <sup>6</sup> Baken aben matalek din ipogaw ay bomisita,  
 tan mo bomala da, omipalawlawana da  
 et iwaras da di ay istorya.
- <sup>7</sup> Amin din omiliget yan man-aayasak da,  
 Din kalawlawanan ay mapasamak en sak-en et say nemnemen da.
- <sup>8</sup> Kanan da en inayan di sakit ko

- et magay namnamak ay matago.  
<sup>9</sup> Olay din tinaltalek ko ay gayyem ko  
 ay nakiokob en sak-en yan nanbalin ay kaibaw ko.  
<sup>10</sup> Maseg-ang ka ay Diyos ta omipabikas ka  
 ta say makaibaesak en daida.  
<sup>11</sup> Mapnek kan sak-en, et siya nay pangammoak:  
 din kalaban ko yan adi dan omabak.  
<sup>12</sup> Gapo sin kinalinteg ko, omayowan ka,  
 manteeak sin kad-am si eng-enggana.  
<sup>13</sup> Yahweh ay Diyos di Israelita,  
 madaydayaw ka ed wani ya si eng-enggana.  
 Siya sa. Amen.

## Salmo 42

### 42

#### *Din Iliw Di Ipogaw en Diyos*

- <sup>1</sup> Din iliw ko, Apo, ay en mandaydayaw sin Timplom  
 et kaman din bigaw di ogsa si man-ay-ayos ay danom.  
<sup>2</sup> Palalo di iliw ko en sik-a, Diyos ay matmatago.  
 Pig-an pay di makaeyak ay mandayaw sin beey mo?  
<sup>3</sup> Inagew ya linabi ay enak manlolowa,  
 adiak pay mangmangan tan dagaang ko et maga.  
 Kankanayon abe ay kankanan di kaibaw ko,  
 “Into ngin din kanam en Diyos mo?”  
<sup>4</sup> Isonga palalo ay manladingitak mo manemnem ko  
 din nangipangpangoak sin ad-ado ay gait ko  
 ay en mandayaw en sik-a sin beey mo.  
 Naragsak kami ay nan-iyaman en sik-a, Apo,  
 ya nangikanta si dayaw mo.  
<sup>5</sup> Apay pay laeng ay mariribok ya manladingitak?  
 Sik-a, Apo di pantalkak,  
 tan sik-a di omisalakan ya Diyos ko  
 et sik-a kasin di idaydayaw ko.  
<sup>6</sup> Peteg di ladingit ko, isonga ninemnem kos sik-a  
 sin kawadak sin sakop di Jordan ay naiaddawi ay daga,  
 sin sag-en di dontog ay Hermon ya Mizar,  
 tan sina kayman di kad-ak ay lugar.  
<sup>7</sup> Kaman napigsa ay dalloyon di inpaalim ay ladingit ko,  
 et kamanak malmalned si sakit di nemnem ko.  
<sup>8</sup> Inagew ay inpapailam ed idi di komakaman ay layad mo,  
 ya sin labi, mapteng ay kankanta di inpanemnem mo  
 ay say inkarkararag ko  
 en sik-a ay Diyos ay poon di biyag ko.  
<sup>9</sup> Diyos ay salaknib ko, enak kod damagen,  
 “Apay ngin ay nilinglingam sak-en?  
 Apay ngin ay magay saldeng di ligat ko  
 ay idawdawat di makedse ay kaibaw ko?”  
<sup>10</sup> Kamanak natenaw si bain ko  
 begew sin kali da ay makainsolto.  
 Kankanan da, “Into ngin di Diyos mo?”

<sup>11</sup> Apay pay laeng ay mariribok ya manladingitak?  
 Sik-a, Apo di pantalkak,  
 tan sik-a di omisalakan ya Diyos ko,  
 et sik-a kasin di idaydayaw ko.

## Salmo 43\*

### 43

#### *Kararag Di Ipogaw Ay Napalpaligatan*

<sup>1</sup> Paneknekam koma ay Diyos di kinalinteg ko  
 en daida ay adi mangammo ay sik-a din Apo.  
 Omilisi ka koma ay Apo  
 sin nasikap ya makaetek ay kaibaw ko.  
<sup>2</sup> Sik-a di enak pankamangan.  
 Apay ngin ay en ka tinmaynan?  
 Apay ngin ay magay saldeng di ligat ko  
 ay idawdawat di makedse ay kaibaw ko?  
<sup>3</sup> Ipailam kod san silaw mo ay kaiarigan di seg-ang mo,  
 paneknekam abe din katet-ewan di intolag mo,  
 ta omipango da sin nasantoan ay dontog mo  
 ay say kad-an di Timplo ay beey mo.  
<sup>4</sup> Asiak dayawen sik-a sin kad-an di altar mo,  
 tan sik-a ay Diyos di poon di ragsak ko.  
 Man-gitaraak ay mangikanta si dayaw mo,  
 sik-a ay bigbigek ay Diyos ko.  
<sup>5</sup> Apay pay laeng ay mariribok ya manladingitak?  
 Sik-a, Apo di pantalkak,  
 tan sik-a di omisalakan ya Diyos ko,  
 et sik-a kasin di idaydayaw ko.

## Salmo 44

### 44

#### *Kararag Di Ipogaw Ay Naabak*

<sup>1</sup> Apo, dinnge mi ay mismo  
 din dad-at di ap-apo,  
 ay din en ka inamag  
 sin timpo da ed bayag.  
<sup>2</sup> Babaen sin panakabalin mo,  
 din nanasyon yan inpakaan mo,  
 et sin ili da, insaad mo din ipogaw mo.  
 Din nanasyon yan pinaligat mo,  
 ngem inpasiged mo din biyag di ipogaw mo.  
<sup>3</sup> Baken babaen si kampilan ya bikas da  
 di nangabakan ya nangokaan da sin ili ay sana,  
 mo adi et din panakabalin ya seg-ang mo en daida,  
 tan nilayad mos daida.  
<sup>4</sup> Sik-a din arik ya Diyos ko,  
 nangabakem din polin Jacob ay ipogaw mo.  
<sup>5</sup> Tinokang min kalaban mi gapo sin panakabalin mo,

\* **43:** Din Salmo ay nay et sigod ay naitapi sin Salmo 42. Man-iiso di koro ay madtengan sin 42:5,11 ya 43:5.

- in-gatigatin mi gapo sin panakabalin di ngadan mo.
- <sup>6</sup> Adiak mantalek sin kampilan ya panak  
para sin kaisalakanak,
- <sup>7</sup> tan sik-a di nangisalakan en dakami sin kalaban mi,  
sik-a di nangabak sin mangililiget en dakami.
- <sup>8</sup> Kanayon ay daydayawen mis sik-a  
ya man-iyaman kami si eng-enggana.
- <sup>9</sup> Ngem nay ed wani, dinokogam dakami,  
inpalobos mo ay omabak din kalaban mi,  
yan adi kan ipango din sosoldado mi.
- <sup>10</sup> Inpalobos mo ay itagtagan mi din kalaban mi,  
ya pinos da din sanikwa mi.
- <sup>11</sup> Binay-am ay peslen das dakami  
ay kaman karnero ay mapalti  
ya pansisianen das dakami  
ay iey sin kailili.
- <sup>12</sup> Nalaka di nangilakom sin ipogaw mo,  
maga di magon-od mo.
- <sup>13</sup> Inilan di nanasyon sin sag-en mi  
din inamag mon dakami  
et laslasoyen das dakami.
- <sup>14</sup> Nanbalinem dakami ay sis-iyekan di odom ay ili,  
manwegweg da ay mangoy-oyaw en dakami.
- <sup>15</sup> Kanayon ay maoy-oyawak  
et palalo ay mabmabainak
- <sup>16</sup> sin dengngek ay oyaw ya insolto  
ay ibagbagan di omililiget ay kalaban ko.
- <sup>17</sup> Napasamak en dakami amin dana  
olay adi mi nilinglingan sik-a.  
Maga met di nilabsing mi  
sin intolag mo en dakami.
- <sup>18</sup> Adi mi met dinokogan sik-a, Apo,  
tinongtongpal mi din bilin mo.
- <sup>19</sup> Ngem olay mo siya di,  
yan binaybay-am dakami  
sin lugar ay pantean  
di mankaaangat ay animal.  
Dakami yan en ka binaybay-an  
sin kabolingetan ay kad-an.
- <sup>20</sup> Mo dinokogan mi komas sik-a ay Diyos mi  
ya nankararag kami si didiyosen di odom ay ili,
- <sup>21</sup> sigurado ay naammoam tan ammom di nemnem mi.
- <sup>22</sup> Ngem begew met en sik-a, kanayon ay pese di sangsangoen mi,  
kaman kamin karnero ay dandani ay mapalti.
- <sup>23</sup> Apo, bomangon ka!  
Apay nga maseseyep ka?
- <sup>24</sup> Sinoy gapo ay nandokogam dakami?  
Ilaem koma nan pamalpaligatan dan dakami.
- <sup>25</sup> Tan naabak ya naibabain kami,  
sin tapok yan naipabaktad kami.

<sup>26</sup> Omali ka ay bomadang, Apo,  
Omisalakan ka gapo sin adi manbalbaliw ay layad mo.

## Salmo 45

### 45

#### *Kanta Sin Pankasalan Di Ari*

- <sup>1</sup> Napno di nemnem ko si mapteng ay kali  
ay laydek ay ikanta sin ari.  
Lapis di nalaing ay mansolat di kaiarigan di dilak,  
tan mapteng ay kansiyon di ikantak.
- <sup>2</sup> Sik-a, apo ari, di kagowapoan,  
mo mankali ka, ad-ado di malaylaydan,  
tan si Diyos et kanayon ay en daka binindisyonan.
- <sup>3</sup> Isiklang mo san kampilan mo, ari ay kapigsaan,  
madaydayaw ka tan sik-a di kangatoan.
- <sup>4</sup> Mo en ka makigobat, sin panakabalin mo pangabakem di tet-ewa,  
salaknibam abe din waday kalintegana.  
Begew sin pigsam, kanayon ay mangab-abak ka!
- <sup>5</sup> Din panam et matadem da,  
din poson di kaibaw mo et losoken da,  
ad-ado ay nasyon di somoko en sik-a.
- <sup>6</sup> Din panturayam ay Diyos\* et magay pap-eng na.  
Iturayam din ipogaw mo et nalinteg di iyat mon daida.
- <sup>7</sup> Laylaydem din siged ya kalkaliget mo din lawa.  
Isonga si Apo ay Diyos mo et sik-a di pinili na.  
Din ragsak ay indawat na en sik-a et ad-ado  
mo din ragsak di gagait mo.
- <sup>8</sup> San badom et manseng-ew dadlo,  
tan napay-an si nankinalasi ay bangbanglo.  
Gan-ganagem din kotingting di arpa  
sin oneg di palasyo ay nabanol di arkos na.
- <sup>9</sup> Din babbabai sin palasyom et madaydayaw da ay prinsesa.  
Din wada abe si makannawan mo et din nangato ay reyna.  
Kabanolan ay balitok di naialti sin awak na.
- <sup>10</sup> Dengngem san ibagak en sik-a ay ikasal di ari.  
Linglingam et din ogalin di kakailiam ay wadas addawi,  
<sup>11</sup> tan begew sin kinapintas mo maawis en sik-a.  
Sisya et di apom, isonga tongpalem sisya.
- <sup>12</sup> Din babaknang ed Tiro et isagotan das sik-a,  
tan kasapolan da di tolong mo en daida.
- <sup>13</sup> Peteg di pintas din reyna ay makiasawa,  
naidait di balitok sin bado na.
- <sup>14</sup> Maptemapteng din bado na idi maitlod sin kad-an di ari  
ay on-onoden din abay na ay babbabai.
- <sup>15</sup> Peteg abe ay maragsakan da  
idi sin palasyo di senggapan da.
- <sup>16</sup> Sik-a abe ay ari, man-ipotot kan to si ad-ado ay lalaki.  
Tadonen da din aap-om ay aari ed idi,  
tan din an-ak mo abe yan ari di kaisaadan da,

\* **45:6** Di esa abe ay kaiologan nina sin Hebreo et: Din panturayam ay indawat Diyos.

- panturayem daida isnan intiro ay daga.  
 17 Din kankantak et kanayon ay ipanpanemnem na  
 sik-a ay ari ta say daydayawen daka  
 sin ed wani ya si eng-enggana.

## Salmo 46

### 46

#### *Din Manakabalin Ay Diyos Ay Manalagnib En Datako*

- 1 Si Diyos di pankamangan ya mangipabikas en datako.  
 Kankanayon ay bomadbadang mo waday problema tako.  
 2 Adi tako ngarud emegyat ay iib-a,  
 olay mo mayegyeg din nay ay daga  
 ya din dontog makosokos da  
 ay emey sin lanad di baybay ay annawa.  
 3 Olay abe mo napigsa din dalloyon  
 ya din dontog et pag dan magon-gon.  
 4 Ngem wada pay di ginawang ay man-ay-ayos  
 ay mangidawat si ragsak di ipogaw sin siyodad Diyos.  
 Man-ay-ayos ay emey sin beey Diyos ay Kangatoan  
 ay siya din Timplo na ay nasantoan.  
 5 Wada si Diyos sin siyodad ay sana,  
 et adi nan itolok ay dadaelen da  
 mo adi et masapsapa ay salagnibana.  
 6 Magolo din kailili begew sin egyat da,  
 ya din aari ay manturturay et maabak da,  
 tan mankali si Diyos yan kaman kido di kali na,  
 et kaman matenaw din nay daga si egyat na.  
 7 Si Diyos ay Ap-apon di Sosoldado et wadan datako,  
 si Diyos ay dinaydayaw Jacob et say pankamangan tako.  
 8 Omali kayo et ilaen yo san inam-amag na,  
 din kaeetnga ay inam-amag Diyos isnan daga.  
 9 Pasaldengen Diyos din gobgobat isnan lota,  
 potlongena din gayang ya pana,  
 din kasay abe yan pooana.  
 10 “Kosto sa! Isaldeng yo!” kanan di Apo.  
 “Nemnemen yo ay sak-en di Diyos yo.  
 Bigbigen di am-in ay ipogaw ay sak-en di kangatoan.  
 Am-in ay nasyon yan enak iturayan.”  
 11 Si Diyos ay Ap-apon di Sosoldado et wadan datako,  
 si Diyos ay dinaydayaw Jacob et pankamangan tako.

## Salmo 47

### 47

#### *Si Diyos Di Kangatoan Ay Ari*

- 1 Dakayo amin ay nanasyon, mantampok kayo si ragsak yo.  
 Ipigsa yon kanta yo ay mangidayaw en Diyos Apo.  
 2 Tan si Diyos ay Kangatoan et kaeegyat sisya,  
 manakabalin ay ari isnan intiro ay daga.  
 3 Inpaabak nan dakami din nanasyon et inturayan mi.  
 4 Pinili na para en dakami nan daga ay pantean mi.



- Siya na di it-it-ek mi ay daga,  
 dakami ay polin Jacob ay laylaydena.
- <sup>5</sup> En tinmokdo si Diyos sin trono na,  
 madnge di tanggoyob ay napigsa.  
 Bomanogaw abe din ipogaw na  
 ay mangipaammo sin nangabakana.
- <sup>6</sup> Mankanta kayo ay mangidayaw en Diyos Apo,  
 idayaw yos sisya ay ari tako.
- <sup>7</sup> Tan sisya di mangituray sin intiro ay daga,  
 isonga dayawen yos sisya babaen si kankanta.
- <sup>8</sup> Tinmotokdo si Diyos sin nasantoan ay trono na.  
 Din nanasyon et iturayana.
- <sup>9</sup> Din tuturay di nanasyon yan masinop da  
 ta makikadwa da sin ipogaw na,  
 ipogaw Diyos ay dinaydayaw Abraham.  
 Tan sisya din kangatoan,  
 amin ay ari et ena iturayan.

## Salmo 48

### 48

#### *Din Mapteng Ay Siyodad Diyos*

- <sup>1</sup> Si Yahweh ay Diyos tako et peteg di kinangato na,  
 lebbeng na ay madayaw sisya sin siyodad na  
 ay kad-an di nasantoan ay dontog na.
- <sup>2</sup> Din dontog ay Zion, maptemapteng ya nakayang,  
 siyodad ay pantean Diyos ay say Ari ay Kangatoan.  
 Maragsakan amin ay ipogaw isnan daga  
 begew sin siyodad ay sana.
- <sup>3</sup> Si Diyos ay mismo et say kad-ana,  
 yan pinaneknekana ay sigurado ay salaknibana.
- <sup>4</sup> Din aari yan mantitinolong da  
 ay mangobat ed Zion ay sana.
- <sup>5</sup> Ngem idi inila da yan nasdaaw da,  
 inmegyat ya nanagtag da.
- <sup>6</sup> Manpayegpeg da si egyat da  
 ay kaman din ligat di babai ay dandani di pan-anakana.
- <sup>7</sup> Inabak mos daida  
 ay kaman din panadaelan di dagem ay napigsa  
 si bapor ay emey ed Tarsis ay kanan da.
- <sup>8</sup> Din nadamdag mi, maila mi ed wani  
 sin siyodad Diyos ay daydayawen mi,  
 Diyos ay Manakabalin Amin ay si Yahweh.  
 Sinay di siyodad ay salakniban Diyos si eng-enggana.
- <sup>9</sup> Nemnemnemen mi sin Timplo na  
 din adi manbalbaliw ay layad na.
- <sup>10</sup> Mandinamag din ngadan Diyos ya madaydayaw sisya  
 sin intiro ay daga.  
 Mangab-abak sisya gapo sin panakabalina.
- <sup>11</sup> Din ipogaw ed Zion, manragsak da koma,  
 siya abe sin omili ed Juda,

- tan nalinteg din pangeddeng na.  
<sup>12</sup> Din siyodad ay Zion, en yo likeden  
 ta din nankakakayang ay beey isdi, en yo bilangen.  
<sup>13</sup> Esten yo ay ilaen din dingding ya alad na  
 ta sin an-ak yo yan dad-aten yon daida  
<sup>14</sup> ay siya di di panakabalin Diyos tako,  
 sisya di kanayon ay mangilapo en datako.

## Salmo 49

### 49

#### *Pamagbaga Maipanggep Si Kinabaknang Ya Kateyan Di Ipogaw*

- <sup>1</sup> Amin ay ipogaw isnan daga,  
 dengngen yo nan enak ibaga,  
<sup>2</sup> olay nangato ono nababa ka,  
 baknang ono nabiteg ka.  
<sup>3</sup> Mangidawat si sirib di bomala sin tepek ko,  
 naoneg di panakaawat ko.  
<sup>4</sup> Estek ay mannge si esa ay pamagbaga  
 yan ilawlawag ko di olog na  
 downak toktokaren din arpa.  
<sup>5</sup> Adiak emegyat sin timpon di ligat ko  
 mo lomikob din makedse ay kalaban ko.  
<sup>6</sup> Mantalek da sin kinabaknang da  
 ya it-it-ek da din sanikwa da.  
<sup>7</sup> Adi kabaelan di ipogaw ay mangsobot sin awak na,  
 adi na mabayadan en Diyos din biyag na.  
<sup>8</sup> Tan din bayad di biyag et palalo ay nangina,  
 magay omanay si ibayad da  
<sup>9</sup> ta matago da si eng-enggana  
 et sin pese yan mailisi da.  
<sup>10</sup> Ammon di amin ay olay din masirib et matey da  
 ay kaman din naong-ong ya magay nemnem na.  
 Daida am-in yan taynan dan kinabaknang da,  
 et tawiden di aan-ak da.  
<sup>11</sup> Say beey da si eng-enggana din naiponponan da,  
 olay pay mo way bokod da ay daga  
 sin deda ay matmatago da.  
<sup>12</sup> Adi mailisi di ipogaw sin kateyana  
 gapo sin kinabaknang na.  
 Kaman met laeng animal ay matey sisya.  
<sup>13</sup> Siya nay pantongpalan di mantalek si awak da  
 ya mapnek sin kinabaknang da:  
<sup>14</sup> naitoding ay matey da, karneroy kaiarigan da.  
 Din pese, kaman say mangipaspastol en daida.  
 Awni et abaken din nalinteg ay ipogaw si daida,  
 madonot awak da sin kaiponponan da  
 ay addawi sin maptemapteng ay beey da.  
<sup>15</sup> Ngem mo sak-en pay, omisalakan si Diyos Apo,  
 tan sin panakabalin di pese sobotena din biyag ko.  
<sup>16</sup> Isonga mo waday bomaknang,

adi ka emegyat ono mariribokan,  
 olay mo din kinabaknang na yan mataptapian.

- <sup>17</sup> Tan mo matey, maga polos di itakina,  
 adi na ikoyog sin kaot din kinabaknang na.  
<sup>18</sup> Olay mo mapnek sin biyag nas nan daga  
 yan idaydayaw di iib-a na begew sin kabaelana,  
<sup>19</sup> awni et maitapi met laeng sin aap-o na  
 et adi na polos maila di pat-a.  
<sup>20</sup> Din kinabaknang yan magay maamag na  
 ay mangilisi si ipogaw sin kateyana.  
 Kaman met laeng animal ay matey sisya.

## Salmo 50

### 50

#### *Din Omalian Diyos Ay Mangokom*

- <sup>1</sup> Si Yahweh ay Manakabalin Amin ay Diyos yan ay-ayagana  
 din kaipoipogaw sin amin ay solin di daga.  
<sup>2</sup> Si Diyos yan kaman silaw ay napigsa.  
 Somili din koniniing na  
 manipod ed Zion ay palalo di kinapintas na.  
<sup>3</sup> Omali si Diyos tako yan adi gomiginek sin omaliana.  
 Waday bomidbidang ay apoy sin sangoanana  
 ya napigsa ay dagem ay nanlikmot en sisya.  
<sup>4</sup> Ay-ayagana din langit ya din daga  
 ta saksi da din pangokomanas ipogaw na.  
<sup>5</sup> “Ayagan yo din napodno ay ipogaw ko,” kanana,  
 “din nakitolag en sak-en babaen si datdaton da.”\*  
<sup>6</sup> Din amin ay wadad daya,  
 din kinalinteg Diyos di ipaneknek da,  
 tan din mangokom et sisya.  
<sup>7</sup> Kanan Diyos, “Dakayo ay Israelita ay ipogaw ko,  
 dengngen yo din ipaneknek ko ay maikontra en dakayo,  
 tan sak-en si Yahweh ay Diyos yo.  
<sup>8</sup> Baken say panyamyamak en dakayo din datdaton yo  
 ay kaman din kanayon ay idatdaton yo ay maipoo.  
<sup>9</sup> Ngem adiak pay dedan kasapolan din bomaro ay baka yo  
 ya kalding ay mapo en dakayo.  
<sup>10</sup> Tan okak amin ay animal sin kada  
 ya din wadas kadontodontog ay baka.  
<sup>11</sup> Okak abe amin ay mantaytayaw  
 ya amin ay parsua sin payew.  
<sup>12</sup> Mo kaspangarigan mandagaangak,  
 baken dakayo di pangibagaak,  
 tan din daga ya amin ay wadas labaw na yan okak.  
<sup>13</sup> Ay siya mo mansidsidaak si bomaro ay baka?  
 Din kalding yan adiak met inomen dada da.  
<sup>14</sup> Say laydek ay daton yo din en kayo pan-iyamanan  
 en sak-en ay Diyos ay kangatoan,  
 siya abe sin panongtongpalan yo

\* **50:5** Exodo 24:3-8.

- si amin ay ikari yo.
- 15 Mankararag kayon sak-en sin timpon di ligat yo,  
isalakan kos dakayo et omidaydayaw kayon to.”
- 16 Ngem sin mangam-amag si lawa, kanan Diyos Apo,  
“Magay lebbeng mo ay mangibagbaga sin bilbilin ko  
ya mangidaddad-at sin intolag ko,
- 17 tan din pamagbagak yan kaliliget mo,  
din kalik yan adi kan ikaskaso.
- 18 Mo way ilam si mangakew yan makigayyem ka  
ya makikadwa ka sin makikamkamalala.
- 19 Nakasagana ka ay mankali si lawa  
ya pag etek di en ka ibagbaga.
- 20 Olay din kabsat mo yan palawlawagem sisya.
- 21 In-giginek ko sin nangamagam sina  
yan kanam et en kamanak sik-a.  
Ngem ed wani, ibagak din basol mo et ilawlawag kon sik-a.
- 22 Nemnemen yo na, dakayo ay adi omikaskaso,  
tan mo maga, bisngibisngitek dakayo  
et magay makaisalakan en dakayo.
- 23 Din kosto ay daton ay pangdayaw yon sak-en  
et din panag-iyaman.  
Olay sino ay mantongpal en sak-en et enak isalakan.”

## Salmo 51

### 51

#### *Kararag Ay Mankedkedaw Si Pamakawan*

- 1 Someg-ang ka ay Apo.  
Begew sin komakaman ay layad mo  
ya din dakdake ay seg-ang mo,  
ponasem paabe din lawa ay inam-amag ko
- 2 ta say dadlon madalosan am-in ay inpaksaw ya basol ko.  
3 Tan ammok ay lawa di inam-amag ko  
et adi polos makaan dana sin nemnem ko.
- 4 Madagsen kayman san basol ko ay sana,  
sik-a anggoy di nangamagak sina,  
isonga magay ipambal ko mo ibagam ay basol ko,  
tan pag kosto am-in din dosa ay ikeddeng mo.
- 5 Apaw kayman na, tan sigod dedan ay sibabasolak,  
olay sin daanak pay laeng maianak.
- 6 Laydem ay din nemnem ko et naimposoan ya tet-ewa,  
isonga idawat mo din kinasirib ay mapo en sik-a.
- 7 Dalosam sak-en ta makaan basol ko,  
ta kamanak mankikilat ay dalalo.
- 8 Ipadngem koma en sak-en di pamakawan mo  
ta say maragsaragsakanak ay kosto,  
tan kamanak namekmek sin dosa ay inkeddeng mo.
- 9 Baken koma din basol ko di pag mon isisin-eng,  
mo adi et linisam komas sak-en.
- 10 Baro ay nemnem di idawat mo koma,  
ay nadalos, baken natapian si lawa,

ta say ipapasnek ko ay mansilbi en sik-a.

- <sup>11</sup> Adi ka koma omipakaan sin kad-am,  
ya adim aben ipalobos ay tomaynan  
din Ispiritom ay Nasantoan.
- <sup>12</sup> Ipataolim kasin din palalo ay ragsak ko  
begew sin panangisalakan mo.  
Idawat mo koma kasin din layad ko  
ay manongpal sin bilbilin mo.
- <sup>13</sup> Asiak itdoan din managbasol ay gagait ko  
ta tongpalen da abe din bilbilin mo.  
Dokogan da di lawa ay am-amagen da  
et pag dan mantaoli en sik-a.
- <sup>14-15</sup> Pangaasim kod adi ay Diyos ta omisalakan ka  
sin basol ko ay namseak si ib-a\*  
ta say mabalin ay idaydayaw kos sik-a.  
Asiak ipaammo din kinalinteg mo  
dowan kon ikankanta din dayaw mo.
- <sup>16</sup> Sigaam ay Diyos din datdaton ay mapooan,  
tan mo laydem koma, en nika idatonan.  
Ngem adi ka met baw interesado  
isnan mapalti ay idaton ko.
- <sup>17</sup> Din mabalin anggoy ay idaton ko  
et din mangibabawiak sin basol ko  
ya din napakombaba ay nemnem ko,  
tan siya baw dana di daton ay panlaydam, Apo.
- <sup>18</sup> Et sapay koma ta ipailam seg-ang mo  
ed Zion ono Jerusalem ay siyodad mo.  
Bangonem kasin san nakayang ay alad na  
ta way salaknib na sin kaibaw na.
- <sup>19</sup> Et mo siya di, awni et malaydan kan to  
sin kosto ay maidaton sin altar mo.  
Tan bomaro ay baka di iala min to  
ay say mapooan isnan altar mo.

## Salmo 52

### 52

#### *Din Pantongpalan Di Makedse Ay Ipogaw*

- <sup>1</sup> Sik-a ay mandindinamag di kedse na, apay nga it-it-ek mo  
din lawlawa ay inam-amag mo?  
Adi polos manbalbaliw din layad Diyos Apo.\*
- <sup>2</sup> Maninsin-agew ay en ka manplano  
si panligatan di gagait mo.  
Din tepek mo, kaman rabahas di katadem na,  
pag etek di en ka ibagbaga.
- <sup>3</sup> Sigaam din siged, say laydem din lawa.  
Laylaydem din etek mo din tet-ewa.
- <sup>4</sup> Maetek ka

\* **51:14-15** Di esa abe ay kaiologan nina sin Hebreo et: Pangaasim kod adi ay Diyos ta omisalakan ka, ta say adi da gan-gandaten di biyag kos na. \* **52:1** Siya na di kanana sin Hebreo. Din kanana abe sin Syriac et: din lawlawa ay inam-amag mo sin ipogaw Diyos Apo?

yan laylaydem amin din kali ay manadael si ib-a.  
<sup>5</sup> Ngem awni et dosaen Diyos sik-a  
 ta madadael kas eng-enggana.  
 Sipdotenas sik-a sin beey mo,  
 et kaanen daka isnan kad-an di matmatago.  
<sup>6</sup> Masdaaw din nalinteg ay ipogaw ay mamoyboya  
 et masiyek da yan kanan da,  
<sup>7</sup> “Ilaen yo san ipogaw ay sana.  
 Baken si Diyos di nankamangana  
 mo adi et nantalek sin kinabaknang na  
 ya sin lawa ay inam-amag na.”  
<sup>8</sup> Ngem sak-en pay, maiarigak si kaiw ay olivo  
 ay magmagabay sin beey di Apo.  
 Mantalekak si eng-enggana  
 sin adi manbalbaliw ay layad na.  
<sup>9</sup> Man-iyamanak si eng-enggana, Apo,  
 gapo sin inamag mo.  
 Enak ipaammo din kinasiged mo  
 sin sangoanan di ipogaw mo.

## Salmo 53

### 53

#### *Din Kinalawan Di Am-in Ay Ipogaw*

<sup>1</sup> Din naong-ong yan magay Diyos si pannemnem da.  
 Dadlon makadadael din kabibiyag da  
 ya kadodogis di am-amagen da.  
 Magay olay esa si kosto di am-amagena.  
<sup>2</sup> Si Diyos ed langit, osdongana di ipogaw isnan daga  
 ta ilaena mo waday masirib en daida  
 ay manganap ta ammoan das sisya.  
<sup>3</sup> Ngem man-iiso da am-in ay lawlawa,  
 tan din kosto ay danan et tinaynan da.  
 Magay mangam-amag si kosto, maga di olay esa.  
<sup>4</sup> Kanan Diyos, “Ay daetan pay dana  
 ay mangam-amag si lawa!  
 Pig-an ngin di pannemneman da?  
 Din pamalpaligatan da sin ipogaw ko et nalaka en daida  
 ay kaman din kalakan di mangokmon si kanen da.  
 Sigaan da abe ay mankararag en sak-en ay Diyos da koma.”  
<sup>5</sup> Ngem awni et palalo di egyat da,  
 egyat ay maga polos ed idi di kais-iso na.  
 Tan si Diyos et iwalang na  
 din tong-an di kalaban di ipogaw na.  
 Dadlon abaken din Israelita  
 tan sinigaan Diyos daida.  
<sup>6</sup> Sapay koma ta si Diyos ay manbeey ed Zion sin Timplo na  
 et isalakana din Israelita ay ipogaw na.  
 Am-in ay polin Israel et maragsakan da koma  
 mo ipataolin Diyos din sigod ay kinabaknang da.

## Salmo 54



## 54

### *Kararag Ay Mankedaw Si Panalakniban Diyos*

- <sup>1</sup> Omisalakan ka koma ay Diyos babaen sin panakabalin mo  
ya paneknekam ay magay basol ko.
- <sup>2</sup> Dengngem din adawag ko,  
songbatam kod din kararag ko.
- <sup>3</sup> Tan nay ay omibaw din mangipapangatos awak da.  
Nan ipogaw ay magay seg-ang da,  
kanan da en pomse da.  
Sik-a ay Diyos yan dinokogan da.
- <sup>4</sup> Ngem bomadang ka, Apo,  
tan sik-a di salaknib ko.
- <sup>5</sup> Sapay koma ta dosaem daida gapo ta matalek ka  
ta apiten da din lawa ay am-amagen da  
ya mamaga di biyag da isnan daga.
- <sup>6</sup> Maragsakanak to ay mangidawat si daton ko  
ya man-iyamanak gapo sin kinasiged mo,
- <sup>7</sup> tan inmisalakan ka sin amin ay ligat ko  
yan inilak di naabakan din kalaban ko.

## Salmo 55

## 55

### *Kararag Di Ipogaw Ay Linipotan Di Gait Na*

- <sup>1</sup> Dengngem koma ay Diyos nan kararag ko,  
adim kod pandokogan nan adawag ko.
- <sup>2</sup> Dengngem kod ta somongbat ka,  
tan nay magay talnak begew si problima.
- <sup>3</sup> Din kalaban ko yan bomogbogaw da,  
emegyatak sin pangeg-egyat da.  
Pomalpaligat da ya omililiget da.
- <sup>4</sup> Palalo ay madandanaganak, emegyatak si kateyak.  
<sup>5</sup> Palaloy egyat ko et manpayegpegak.
- <sup>6</sup> Mo kamanak koman kalapati ta way payak ko,  
tomayawak ay man-anap si pantalnaan di nemnem ko.
- <sup>7</sup> Tomayawak ay omaddawi  
ta enak mantetee sin lugar ay magay omili.
- <sup>8</sup> Dalasek ay man-anap si pansidomak  
gapo sin napigsa ay dagem ya pewek.
- <sup>9</sup> Apo, iturong mo koma  
ta adi da mankikinaawatan si kali da.  
Tan di mailak sin siyodad et siya na:  
palpaligaten da di iib-a da  
ya golo di am-amagen da.
- <sup>10</sup> Inag-agew ya linablabi ay likelikeden da,  
kedse ya problima di am-amagen da  
sin amin ay soli na.
- <sup>11</sup> Panangdadael di maam-amag sin siyodad ay sana,  
sin kakalsada, ad-adoy sowitiken ya paligaten da.
- <sup>12</sup> Mo kalaban ko di lomaslasoy, anosak koma.  
Mabalin abe ay ilisiak daida.

- 13 Ngem din nangamag isna  
et esa ay gayyem ya kabsat, esa ay ib-a.
- 14 Ed idi, mayat di panagkadwa mi ay dow a,  
sin Timplo yan mandaydayaw kamin sik-a.
- 15 Masapsapa koma din kalaban ko ay matey.  
Emey da koma ay sibibiyag sin kad-an di natey,\*  
tan mo daida, kaman dan panbeeyan di lawa,  
pag lawa di nemnememen da.
- 16 Ngem mankedawak si badang mo et omisalakan ka.
- 17 Inagsapa, minasdem ya linablabi, Apo,  
ay dengngem din adawag ya bayeweng ko.
- 18 Mantitinolong din ad-ado ay kalaban ko,  
ngem omisalakan ka et adiak maan-ano.
- 19 Sik-a ay Diyos ay nanturay manipod sin logi na,  
patgam koma din kararag ko et abakem daida,  
tan adi da manbalbaliw gapo ta adi da emegyat en sik-a.
- 20 Din gait ko ed idi yan kontraena din gagayyem na,  
dinokogana din kari na.
- 21 Din kali na yan nalamlamoyot mo mantikilya ya lana,  
ngem matadem ay kampilan di kaiarigana,  
sin nemnem na yan way liget na.
- 22 Apo, italek min sik-a din problima mi  
et salaknibam dakami,  
adi ka baybay-an ay maabak kami.
- 23 Makapese da ya maetek da,  
ngem sik-a ay Diyos yan iturong mos daida sin kaot da  
et matey da ay masapsapa.  
Ngem sak-en pay, mantalekak en sik-a.

## Salmo 56

### 56

#### *Si Diyos Di Pantalkan Sin Timpo Ay Pan-egyatan*

- 1 Maseg-ang ka ay Apo,  
tan kanayon ay pomaligat din kalaban ko.
- 2 Maninsin-agew ay omibaw da,  
ad-ado da ay komonkontra.
- 3 Diyos ay Kangatoan, sik-a di pantalkak  
mo wada di pan-egyatak.
- 4 Idaydayaw ko din karim ay omisalakan ka.  
Magay pan-egyatak tan mantalekak en sik-a,  
din owat ipogaw yan magay maamag da.
- 5 Din ibagak yan kanayon ay tilitilen da.  
Pag din pomaligatan da di kanayon ay nemnememen da.
- 6 Matopog ya mantabon da,  
siimen da amin ay amagek ta pomse da.
- 7 Dosaem daida gapo sin basol da,  
ipailam din bonget mo, abakem daida.
- 8 Ammom met mo kas-anoy lowak ya ligat ko,

\* **55:15** Laydena ay kalien, mabigla koma di kateyan da. Ilaen din napasamak en da Datan en Abiram sin Bilbilang 16:31-33.

sigurado ay insolat mo si libro.

<sup>9</sup> Sin agew ay kedawek din badang mo,  
lomayaw dan to din kalaban ko.

Ammok ay komadkadwa ka, Apo.

<sup>10</sup> Idaydayaw ko din karim ay omisalakan ka.

<sup>11</sup> Magay pan-egyatak tan mantalekak en sik-a,  
din owat ipogaw yan magay maamag da.

<sup>12</sup> Masapol ay idaton ko  
din inkarik en sik-a, Apo,

man-idatonak si iyaman ko,

<sup>13</sup> tan inmisalakan ka sin kateyak  
ya adim inpalobos ay maabakak.

Isonga nay ay wadaak sin pangilaam, Apo,  
et masilawanak sin silaw mo ay mangidawat si biyag ko.

## Salmo 57

### 57

#### *Kararag Ta Maseg-ang Si Diyos*

<sup>1</sup> Ay Diyos, bomadang ka, maseg-ang ka,  
tan din pankamangak et sik-a.

Mankamangak en sik-a

ay kaman kiyap ay manpasakoko en ina na  
enggana ay din kaeegyat ay ligligat ko et malabas da.

<sup>2</sup> Mankararagak en sik-a, Diyos ay kangatoan,  
ay mangidawdawat en sak-en si amin ay kasapolan.

<sup>3</sup> Manipod ed langit, omisalakan ka,  
din pomalpaligat, abakem daida.

Ipailam en sak-en din kinamatalek mo, Apo,  
ya din adi manbalbaliw ay layad mo.

<sup>4</sup> Linmilikob di kalaban ko ay kaman dan layon  
ay nakasagana ay omokmon.

Kaman gayang ya pana di bab-a da,  
kaman kampilan di dila da.

<sup>5</sup> Apo, din kinangatom ya panakabalin mo et ipailam koma  
sin am-in ay soli ed langit ya isnan daga.

<sup>6</sup> Inmisagana das tagdey din kalaban ko  
et palalo ay nadagsenan di nemnem ko.

Sin pandanak nankaot das bito,  
ngem din nag-as et daida met laeng ay kalaban ko.

<sup>7</sup> Apo, napodnoak en sik-a  
et mankantaak ay mangidayaw en sik-a.

<sup>8</sup> Bomangonak ay masapa  
ta tokarek din gitara ya arpa.

<sup>9</sup> Sin sangoanan di kaipoipogaw, man-iyamanak en sik-a,  
mankantaak ay mangidayaw en sik-a.

<sup>10</sup> Kaman din kakayang di ed daya, Apo,  
din adi manbalbaliw ay layad mo,  
din kinamatalek mo yan edasana din liboo.

<sup>11</sup> Apo, din kinangatom ya panakabalin mo et ipailam koma  
sin am-in ay soli ed langit ya isnan daga.

## Salmo 58

### 58

*Kararag Ta Dosaen Diyos Di Baken Nalinteg Ay Tuteuray*

- 1 Dakayo ay tuteuray, ay siya mo kosto di ikeddeng yo?  
Sin pangokoman yos ipogaw, ay nalinteg di iyat yo?
- 2 Aga met, tan lawlawa di nemnemnemen yo,  
lokoen yo abey iib-a yo.
- 3 Mo maipanggep si mangam-amag si lawa,  
sigod ay nasasangaw ya maetek da  
manipod sin naianakan da.
- 4 Kaman dan eweg ay way gita na.  
Oopen dan inga da ay kaman dan nateweng ay kobra
- 5 ay adi mannge sin pangayagan di mansalsalamangka,  
olay nalaing sisya.
- 6 Apo, nan maangat ay layon, mekmekem koma din bab-a da,  
bag-otem koma din sawing da.
- 7 Kaman din danom ay manlesep, maomas da koma.  
Kaman da koman logam ay naigatigatin ta malaylay da.
- 8 Kaman koman ginga ay maomas di ngaey na,  
ono binowang ay adi makailas pat-a.
- 9 Din panosaan Diyos en daida et mabigla.  
Kaman logam ay bigla ay magabot da,  
pag itayaw di dagem ay napigsa.
- 10 Maragsakan dan to din nalinteg ay mangila  
sin kadosaan di mangam-amag si lawa.  
Maiarig das nangabak ay sosoldado ay peteg di ragsak da  
mo gatigatinan da din dadan di kalaban da.
- 11 Din ipogaw yan kanan dan to,  
“Magon-gonaan din nalinteg ay sigurado.  
Tet-ewa ay waday Diyos ay mangokom  
sin kaipoipogaw isnan lobong.”

## Salmo 59

### 59

*Kararag Ay Mankedaw Si Panalakniban Diyos*

- 1 Omisalakan ka ya somalaknib ka, Apo,  
sin gomobat ay kalaban ko.
- 2 Omisalakan ka sin mankakekedse,  
daida ay manpanggep ay pomse.
- 3 Ilaem din kalaban ko ay magay seg-ang da,  
semsem-ed da ay pomse, olay magay basol kon daida.
- 4 Dalasen da ay mansagana ta pomse da,  
ilaem kod ta somalaknib ka.
- 5 Yahweh, Kangatoan ay Turay ay Diyos di Israelita,  
ilaem kod ta dosaem nan nanasyon ay nay da.  
Manglilipot da, adi ka kod seg-angan daida.
- 6 Nilablabi ay mantaoli dan kalaban ko,  
manngangaed da ay manliklied sin siyodad ay kaman dan aso.
- 7 Pag insolto di bomala sin tepek da,

- kaman kampilan ay makasogat din kali da,  
tan kanan da en magay mannge en daida.
- <sup>8</sup> Ngem sik-a ay Diyos, sis-iyekam ay laslasoyen daida.
- <sup>9</sup> Sik-ay pantalkak ya poon di bikas ko,  
kaman kan makneg ay beey ay pankamangak, Apo.
- <sup>10</sup> Omali ka ay bomadang begew sin adi manbalbaliw ay layad mo,  
ipailam en sak-en din kaabakan di kalaban ko.
- <sup>11</sup> Adi ka kapese en daida, Diyos ay salaknib ko,  
ta adi linglingan din ipogaw ko.  
Dosaem daida babaen sin panakabalin mo  
ta owat dan lomikeliked, Apo.
- <sup>12</sup> Basol ya pag lawlawa di kalien da.  
Kaman da koman titit ay matagdey sin kinatangsit da,  
tan maetek ya makabaos da.
- <sup>13</sup> Gapo sin bonget mo, mamingpingsan ay dosaem daida  
ta maammoan sin amin ay solin di daga  
ay iturayam din Israelita.
- <sup>14</sup> Nilablabi ay mantaoli dan kalaban ko.  
Manngangaed da ay lomikeliked sin siyodad ay kaman dan aso.
- <sup>15</sup> Kaman dan aso ay manlikliked ay man-anap si kanen da,  
manngisngis da mo magay datngen da ay kabsogan da.
- <sup>16</sup> Ngem sak-en pay, ikankantak din bikas mo,  
ipigsak ay mangikanta si inagsapa sin layad mo.  
Tan sik-a ay Diyos et kaman kan makneg ay beey ko  
ay kanayon ay pankamangak sin timpon di ligat ko.
- <sup>17</sup> Mankantaak ay mangidayaw en sik-a ay poon di bikas ko,  
tan sik-a di pankamangak, Apo.  
Sik-a ay Diyos di mangipappaila en sak-en sin adi manbalbaliw ay layad mo.

## Salmo 60

### 60

#### *Kararag Di Nasyon Ay Dinokogan Diyos*

- <sup>1</sup> Binmaybay-an ka, Apo, et naabak kami.  
Binmonget ka kayman en dakami,  
ngem ed wani, sagongem kod dakami.
- <sup>2</sup> Inkiweg mo din daga et nan-ekang da,  
ngem ed wani, iamag mo koma din dadael na  
ta adi masepsep di kasasaad na.
- <sup>3</sup> Inpalak-am mo sin ipogaw mo di palalo ay ligat.  
Indawtam dakami si bometeng ay arak.
- <sup>4</sup> Tinood moy sinyal para sin mangipateg en sik-a  
ay say pantopogan da  
ta mailisian da din panan di kalaban da.
- <sup>5</sup> Babaen sin panakabalin mo,  
isalakan mo din laylaydem ay ipogaw mo.  
Patgam kod din kararag mi  
ta isalakan mos dakami.
- <sup>6</sup> Sin Timplom yan kanam, Apo,  
“Mo makdeng ay mangabakak, bingayek to  
ed Sekem ya tanap ed Succot sin ipogaw ko.

- <sup>7</sup> Ed Manasses ya Gilead yan okak daida,  
ed Efraim yan helmet ko di kaiarigana  
yan sinyal di turay ko ed Juda.
- <sup>8</sup> Panbalinek ed Moab ay pan-owasak,  
ed Edom abe yan bag-en ay iturayak.  
Abakek ed Filistia et manbogawak.”
- <sup>9</sup> Sino pay di omiey sin siyodad ay naaladan, Apo?  
Ed Edom, sino di omipango?
- <sup>10</sup> Apo, ay enggay dinokogam tet-ewas dakami?  
Ay adi ka ipango ay makigobat din sosoldado mi?
- <sup>11</sup> Sin kalaban mi, bomadang ka koma,  
tan din badang di ipogaw et magay silbi na.
- <sup>12</sup> Mangabak kami mo wada ka ay kadwa mi,  
tan sik-ay mangabak sin kalaban mi.

## Salmo 61

### 61

#### *Kararag Ay Mankedaw Si Panalakniban Diyos*

- <sup>1</sup> Apo, dengngem kod nan adawag ko,  
patgam koma din kararag ko.
- <sup>2</sup> Isnan addawi ay ili, kedkedawek di badang mo  
sin timpo ay madisdismayaak, Apo.  
Omiey ka si nakayang ay bato  
<sup>3</sup> tan sik-a di salaknib ko,  
nabaked ay pankamangak ay adi makasag-en di kalaban ko.
- <sup>4</sup> Ipalobos mo koma ay manteeak sin beey mo  
sin intiro ay biyag ko.  
Somalaknib ka koma sin payak mo.
- <sup>5</sup> Tan din karik yan inawat mo  
yan idawat mon sak-en di bindisyon mo  
ay awaten di mandayaw en sik-a, Apo.
- <sup>6</sup> Din biyag di ari, paandoem koma.
- <sup>7</sup> Babaen sin panangayowan mo, manturay komas eng-enggana.  
Salaknibam komas sisya, Apo,  
babaen sin kinamatalek mo  
ya adi manbalbaliw ay layad mo.
- <sup>8</sup> Asiak kanayon ay mankanta ay mangidayaw en sik-a  
ya innagew ay tongpalek din inkarik en sik-a.

## Salmo 62

### 62

#### *Si Diyos Di Somalaknib*

- <sup>1</sup> Si Diyos anggoy di enak pantalkan,  
anosak ay sed-en din ena omisalakanan.
- <sup>2</sup> Sisya anggoy di somalaknib ya omisalakan,  
adiak maabak tan sisya enak pankamangan.
- <sup>3</sup> Amin kayo, ay adi kayon somaldeng ay pomalpaligat  
tan nay ay maiarigak si matoktokang ay alad?
- <sup>4</sup> Layden yo anggoy ay mangipababa  
en sak-en ay nangato di saad na.



Maragsakan kayo sin pan-etekan yo.

Mayat din kali yo ngem sin nemnem yo yan babbaosan yo.

<sup>5</sup> Si Diyos anggoy di pantalkak,  
sisya di pannamnamaak.

<sup>6</sup> Sisya anggoy di somalaknib ya omisalakan.  
Adiak polos maabak tan sisya enak pankamangan.

<sup>7</sup> Si Diyos anggoy di omisalakan ya mangidawat si dayaw ko,  
maiarig si pankamangan ay dakdake ay bato.

<sup>8</sup> Dakayo ay ipogaw, mantalek kayon Diyos Apo.  
Ibaga yon sisya amin di problima yo,  
tan sisya di pankamangan tako.

<sup>9</sup> Din ipogaw yan owat dagem di kaiarigan da,  
nangato ono nababa yan nan-iiso ay magay silbi da.

Mo timbangan et magay dagsen da,  
mayap-ew mo dagem di timbang da.

<sup>10</sup> Adi kayo mantalek si kabaelan yo  
ay mamaligat ono mangegyat si ib-a yo  
ta say bomaknangan yo.

Adi kayo aben mantalek si inakew yo.  
Olay matapian din kinabaknang yo,  
baken say pantalkan yo.

<sup>11</sup> Baken owat namingsan ay inbagan Diyos ay manakabalin sisya  
<sup>12</sup> ya adi manbalbaliw din layad na.

Gon-gonaana amin ay ipogaw insigon sin inamag da.

## Salmo 63

### 63

#### *Din Mailiw En Diyos*

<sup>1</sup> Peteg di iliw ko en sik-a, Yahweh ay Diyos ko.  
Sin am-in ay biyag ko et sik-an inan-anap ko.  
Kamanak namgaan ay lota ay siyat masibogan,  
din ab-abiik ko et masapol nay kawadam.

<sup>2</sup> Mailak komas sik-a sin oneg di Timplo  
ta ilaek din panakabalin ya kinadiyos mo.\*

<sup>3</sup> Din adi manbalbaliw ay layad mo  
et nabanbanol mo din mismo ay biyag ko,  
isonga ikankantak din dayaw mo.

<sup>4</sup> Idaydayaw kos sik-a engganay mapap-eng di biyag ko,  
kankanayon ay ikakayang kon takkay ko  
ay mankararagak en sik-a ay Apo.

<sup>5</sup> Napnenapnekak ay kaman din nangan si kosto,  
naragsakak ay mangidaydayaw en sik-a ay Diyos ko.

<sup>6</sup> Mo pay ta sin labi et ibakbaktad ko,  
enggana sin mapat-a et wada ka sin nemnem ko.

<sup>7</sup> Tan kankanayon ay wada ka ay binmadbadang,  
et kamanak kiyap ay sinasakokoan di oboan,  
isonga naragsakak ay mangikanta si inyat mo ay nangay-ayowan.

<sup>8</sup> Pomketak en sik-a, Apo,

\* **63:2** Di esa abe ay kaiologan nina sin Hebreo et: Tan inilak sik-a ed idi sin oneg di Timplo, inil-ilak din panakabalin ya kinadiyos mo.

- et ayowanam sak-en sin panakabalin mo.  
<sup>9</sup> Din pay mamadpadas ay mamse en sak-en,  
 awni et maitapi da sin kad-an di natey ed dallem.  
<sup>10</sup> Sin gobatan et matey da,  
 et kanen di atap ay aso din bangkay da.  
<sup>11</sup> Manragsak din ari tan nangabaken Diyos sisya.  
 Makiragsak abe din iib-a na  
 ay mansapata sin ngadan Diyos ed daya,  
 ngem din makaetek ay ipogaw et maipaginek da.

## Salmo 64

### 64

#### *Din Panosaan Diyos Sin Makedse Ay Ipogaw*

- <sup>1</sup> Apo, dengngem koma nan adawag ko,  
 isalakan mo kod din biyag ko  
 sin kaeegyat ay kalaban ko.  
<sup>2</sup> Omisalakan ka koma  
 sin planon di bonggoy di makedse ay nay da.  
<sup>3</sup> Kaman kampilan ay paliden da din dila da,  
 kaman pana din makasabidong ay kali da.  
<sup>4</sup> Din nalinteg ay ipogaw yan sed-en da  
 ta bigla ay panaen da,  
 maga polos di egyat da.  
<sup>5</sup> Manbabadang da sin lawa ay panggep da,  
 pantotolagan da di iyat da ay mangiamag sin tagdey da.  
 Kanan da en magay mangila en daida.  
<sup>6</sup> Manplano das lawa yan kanan da  
 en kostokosto din plano da.  
 Adi kaaw-awatan di nemnem di ipogaw, ay baken siya?  
<sup>7</sup> Ngem panaen Diyos daida  
 et bigla ay masogatan da.  
<sup>8</sup> Gapo sin kali da met laeng yan dadaelen Diyos daida,  
 et masdaaw amin ay mangila sin mapasamak en daida.  
<sup>9</sup> Et amin ay ipogaw yan emegyat dan to,  
 nemnemen ya dad-aten da din inamag di Apo.  
<sup>10</sup> Amin ay nalinteg, manragsak da koma  
 gapo sin inamag na.  
 Mankamang da koman sisya ya idaydayaw da.

## Salmo 65

### 65

#### *Pan-iyamanan Di Ipogaw En Diyos Begew Sin Bindisyona*

- <sup>1</sup> Apo Diyos, ed Zion lebbeng na ay dayawen mis sik-a  
 ya tongpalen mi din inkari mi en sik-a,  
<sup>2</sup> am-in ay ipogaw et omasag-en dan sik-a,  
 tan sik-a di manongsongbat sin kararag da.  
<sup>3</sup> Nadagsenan kami sin basbasol mi,  
 ngem sik-a di mamakawan en dakami.  
<sup>4</sup> Nagasat din pinilim ay mantee sin Timplo ay beey mo.  
 Mapnek kamin to sin bindisyon ay idawat mo

- ay gan-ganasen mi sin nasantoan ay beey mo.
- <sup>5</sup> Sik-a ay Diyos ay mangisalakan en dakami,  
nalinteg ya nakaskasdaaw di iyat mo ay manongbat sin kararag mi.  
Isonga sik-a di pantalkan di ipogaw sin intiro ay daga,  
olay mo kaaddawian ay ili di kad-an da.
- <sup>6</sup> Palalo tet-ewa san panakabalin mo,  
tan insaad mo din kadontodontog babaen sin bikas mo.
- <sup>7</sup> Maipaginek mo abe din agodood di dalloyon  
ya mapatalnam din golo sin nanasyon.
- <sup>8</sup> Din ipogaw sin solin di daga et masdaaw ya emegyat da  
sin nakaskasdaaw ay sinyal ay en ka ipaila.  
Gapo sin amagem et manragsak da ay mankanta,  
manipod sin belaan di agew enggana sin diposana.
- <sup>9</sup> Ay-ayowanam nan daga,  
sibsibogam ya pasigedem din lota na.  
Mapno din ginawang si danom ay mapon sik-a,  
insaganam din daga et pagabayem di maimola.
- <sup>10</sup> Paodanam din naalado ay payew ta masingpa,  
sibogam din lota ta lomokay da,  
et bindisyonam ta somiged di maimola.
- <sup>11</sup> Ad-ado di apit gapo sin bindisyon mo.  
Amin ay emeyam, ad-adoy bindisyon ay idawat mo.
- <sup>12</sup> Ad-adoy logam sin panpastolan,  
din bilbilig et kaman dan maragsakan.
- <sup>13</sup> Sin pastolan, ad-ado di karnero,  
sin tanap, pag bakakew di matamang mo,  
isonga manbogaw ya mankanta da  
begew si peteg ay ragsak da.

## Salmo 66

### 66

#### *Kanta Ay Pangdayaw En Diyos*

- <sup>1</sup> Dakayo amin ay ipogaw isnan daga,  
begew si ragsak yo, ipigsa yo koma  
ay mankanta en Diyos ay mangidaydayaw en sisya.
- <sup>2</sup> Ikanta yo din kinapateg di ngadana,  
ta say madaydayaw din nakaskasdaaw ay kinadiyos na.
- <sup>3</sup> Kanan yo, “Nakaskasdaaw din inam-amag mo,  
isonga manpalikotkot da din kalaban mo  
gapo sin kaeegyat ay panakabalin mo.
- <sup>4</sup> Amin ay ipogaw sin daga yan daydayawen daka,  
mankanta da ay mangidayaw en sik-a.”
- <sup>5</sup> Omali kayo ta ilaen yo  
amin din inamag di Apo.  
Inamag na di nakaskasdaaw  
ay inilan di kaipoipogaw.
- <sup>6</sup> Din baybay yan nanbalinena  
ay namgaan din lanad na,  
siya abe sin ginawang et nandan din ipogaw na

- sin nanbalasatan da,\*  
 isonga dayawen takos sisya.
- <sup>7</sup> Manturay si eng-enggana babaen sin panakabalina,  
 din nanasyon et kanayon ay il-ilaena,  
 maga koma di mangontra en sisya.
- <sup>8</sup> Amin ay ili, dayawen yo din Diyos tako,  
 ikanta yo din panangdayaw yo.
- <sup>9</sup> Inayowanana din biyag tako,  
 adi na inpalobos ay maisokba tako.
- <sup>10</sup> Tan pinadas mos dakami, Apo,  
 nilinisam dakami ay kaman balitok ay maioto.
- <sup>11</sup> Inpalobos mo ay matagdey kami,  
 inpabaklay mo di nadagsen en dakami.
- <sup>12</sup> Pinalobosam din kalaban mi  
 ay mangigatigatin en dakami.  
 Sin nanligligatan mi,  
 kaman apoy ya layos di nilasat mi,  
 ngem ed wani, in-ey mos dakami  
 si nabaknang ay ili ay pantean mi.†
- <sup>13</sup> Man-idatengak to si daton ay mapooan sin beey mo  
 et tongpalek din inkarik en sik-a, Apo,  
<sup>14</sup> sin timpon di ligat ko.
- <sup>15</sup> Man-idatonak si mankalalames ay karnero  
 ta maidaton ay maipoo.  
 Man-idatonak to abe en sik-a  
 si bomaro ay kalding ya baka.
- <sup>16</sup> Omali kayo ay mangipatpateg en Diyos Apo  
 ta din inam-amag nan sak-en, dad-atek en dakayo.
- <sup>17</sup> Nan-adawagak ay nankedkedaw si badang na,  
 nankankantaak ay nangidayaw en sisya.
- <sup>18</sup> Mo adiak inbabawi din basol ko,  
 adi koman dinngen Diyos din adawag ko.
- <sup>19</sup> Ngem siya met ay dinnge na ya sinongbatana.
- <sup>20</sup> Madaydayaw si Diyos tan din kararag ko et pinatgana,  
 din adi manbalbaliw ay layad nan sak-en yan intoltoloy na.

## Salmo 67

### 67

#### *Kanta Ay Pan-iyaman En Diyos*

- <sup>1</sup> Apo, maseg-ang ka koma en dakami  
 et ipailam di layad mo en dakami
- <sup>2</sup> ta say maammoan am-in ay ipogaw din panlaydam,  
 ya am-in ay nasyon et en da maisalakan.
- <sup>3</sup> Idaydayaw koma am-in ay ipogaw sik-a ay Apo,  
 idaydayaw da san nabanol ay ngadan mo.
- <sup>4</sup> Manragsak koma din nanasyon et mankanta da,  
 tan pag kosto am-in ay ikeddeng mo en daida  
 ya idaldalan mo abe din kailili isnan daga.
- <sup>5</sup> Idaydayaw koma am-in ay ipogaw sik-a ay Apo,

\* **66:6** Exodo 14:21-22 ya Josue 3:14-17 † **66:12** Din kanana sin LXX ya Vulgate et: si natalna ay pantean mi.

idaydayaw da san nabanol ay ngadan mo.

<sup>6</sup> Indawat Diyos ay Apo mi san nawadwad ay apit mi,  
tan binindisyonana din daga mi.

<sup>7</sup> Ad-ado ay bindisyon di indawdawat na,  
isonga dakayo am-in ay ipogaw isnan daga,  
patgen ya egyatan yos sisya.

## Salmo 68

### 68

#### *Mangabak Si Diyos Ay Manakabalin*

<sup>1</sup> Sapay koma ay Diyos ta man-gonay ka,  
din mangonkontra ya mangililiget en sik-a  
et pansisianem koma ta lomayaw da.

<sup>2</sup> Kaman da koman asok ay itayaw di dagem  
ya allid ay matenaw sin apoy mo isag-en,  
say iyat di managbasol ay madosa sin sangoanam.

<sup>3</sup> Ngem din nalinteg pay et manragsak da sin sangoanam,  
manbogbogaw da ay maragsakan.

<sup>4</sup> Mankanta kayo ta idaydayaw yo din Apo,  
sisya ay manlogan si liboo,  
din pandanana et isagana yo.

Si Yahweh di ngadana,  
manragsak kayo sin panaydayawan yo en sisya.

<sup>5</sup> Si Diyos ay wada sin nasantoan ay beey na,  
ay-ayowanana ya salsalagnibana din nalasang ya olila.

<sup>6</sup> Mo din kaseseg-ang ay magay ib-a na,  
ianapanas pamilya ay pakibeeyana,  
din balod yan wayawayaana et manragsak da.

Ngem din mangonkontra en sisya et mantee da  
sin kadardaratan ay magay danom na.

<sup>7-8</sup> Sik-a ay Diyos ay nanpaila ed Sinai, Diyos di Israelita,  
gapo ta wada ka,

nanyegyeg ya nan-odan si napigsa  
sin nangipangoam sin ipogaw mo  
ay manbalasat sin lugar ay batbato.

<sup>9</sup> Inpawadam di ad-ado ay odan  
et sinibogana din lota ay namgaan  
sin daga ay indawat mo kayman.

<sup>10</sup> Nanbeey das di din ipogaw mo,  
din kasapolan di kakkaasi yan indawat mo  
gapo sin kinasiged mo.

<sup>11</sup> Apo, inbagam din bilin mo  
yan inpaammon di babbabai ay ad-ado.

<sup>12</sup> Kanan da, “Din aari ya sosoldado da yan linmayaw da!”  
Din babbabai ay mantees beey yan panbibingayan da  
din nataynan ay sanikwa.

<sup>13</sup> Mo tomalna kasin di biyag di Israelita  
yan wada da ay man-ib-ibbay sin kad-an di karnero da,  
napintas ay kalapati di kaiarigan da,  
kaman nam-es si balitok din dotdot na

- ya mankoniniing ay palata din payak na.
- 14 Diyos ay Manakabalin Am-in,  
din aari yan en ka nansisianen,  
kaman andap sin dontog ay Zalmon.
- 15 Dakdake ay dontog ed Basan ay ad-adoy toktok na.
- 16 Sik-a ay dontog ay ad-adoy toktok na,  
apay nga maapal ka  
sin dontog ay pinilin Diyos ay panteana?  
Mantees di si eng-enggana.
- 17 Mo emey ka ay Diyos sin nasantoan ay beey mo,  
mapo da ed Sinai ay kakoyog mo  
di kalisam ay niliblibo.
- 18 Idi nantikid ka ay emey ed ngato,  
inkoyog moy ad-ado ay inabak mo.  
Inawat moy sagsagot ay napo sin mangonkontra en sik-a  
ta makitee ka en daida.
- 19 Madaydayaw ka ay Diyos ay mangisalakan en dakami,  
inag-agew ay bakbakwaem dakami.
- 20 Sik-a din mangisalakan ay Diyos mi,  
sin pese, isalakan mos dakami.
- 21 Ngem tegtegem din toktok di kalaban mo  
ay mangitoltoloy sin basol da ay napalalo.
- 22 Inkarim ay ialim daida  
ay mapod Basan ya sin lanad di baybay ay kad-an da,  
23 ta igatin mi din dada da  
ya dildilan di aso mi enggana ay mabsog da.
- 24 Ilaen to di kaipoipogaw din pandad-anam  
ay mangipaila si nangabakam  
sin emeyam sin Timplo ay nasantoan.
- 25 Mangon-ona da din komakanta,  
din babassang ay manamtambol di somigsigonda,  
maod-odi din mangitgitara.
- 26 Dakayo am-in ay Israelita, idaydayaw yo  
si Diyos sin gimong yo.
- 27 Din polin Benjamin di mangon-ona,  
daida di kakitkittoyan ay tribu da,  
pag din papangolon di polin Juda ya din grupo da.  
Pag omonod abes di  
din papangolon di tribu da Zebulun en Naftali.
- 28 Ipailam kod kasin, Apo,  
din inpailam en dakami ay panakabalin mo.
- 29 Et sin Timplom ed Jerusalem yan man-idateng da  
di aari si regalo dan sik-a.
- 30 Din ili ay Egipto, yamyamam koma,  
maangat ay animal sin katantanobongan di kaiarigana.  
Yamyamam abe din nanasyon ay kaiarigan da  
di bobomaro ya oolbon ay baka,  
enggana ay manpakombaba da  
ya idaton dan palata da.  
Din nanasyon ay gobat di laylayden da,



abakem ya pansisianem kod si daida.

<sup>31</sup> Din taga-Egipto yan idondon day oopisyal da,  
din taga-Etiopia yan itag-ay dan Diyos din takkay da  
ay mankararag en sisya.

<sup>32</sup> Kaipoipogaw sin amin ay nasyon isnan daga,  
dayawen yos Diyos babaen si kankanta,

<sup>33</sup> ya dengngen yo din napigsa ay bogaw na.  
Nanologan sisya ed daya,  
ed daya ay sipod ed nabaon di kawadaana.

<sup>34</sup> Idaydayaw yo din panakabalin Diyos ay mangituray sin Israelita,  
maipaila ed daya din panakabalina.

<sup>35</sup> Kaeegyat si Diyos sin kapoana  
sin nasantoan ay kad-ana.

Sisya din Diyos ay daydayawen di Israelita,  
idawtana si pigsa ya panakabalin din ipogaw na.  
Madaydayaw si Diyos!

## Salmo 69

### 69

#### *Adawag Di Ipogaw Ay Ad-adoy Ligat Na*

<sup>1</sup> Omisalakan ka koma, Apo,  
tan nay enggay dinmateng din danom sin bagang ko.

<sup>2</sup> Sin malosong ay pitek yan malmalnedak,  
magay kosto ay pan-gatinak.

Wadaak sin malosong ay danom,  
dandaniak malned begew sin dalloyon.

<sup>3</sup> Nankedakedawak si badang mo et nabbayak,  
enggay nasaekak ya linmadag pay nan matak  
gapo si kaoogak  
sin nangan-anapak en sik-a ay Diyos ay pantaltalkak.

<sup>4</sup> Ad-ad-ado mo din book ko  
din omililiget ay magay gapo.

Ad-ado din kaeegyat ay kalaban ko,  
layden da ay domadael, Apo.

Intoy iyat ko pay ay mangitaoli koma  
si banag ay adiak met ina?

<sup>5</sup> Apo, ammom di kinaong-ong ko,  
adi mailibak en sik-a di basol ko.

<sup>6</sup> Yahweh ay Diyos ay Kangatoan di Turay na  
ay daydayawen di Israelita,  
baken koman sak-en di gapo na  
ay maibabain din mantalek ya mandayaw en sik-a.

<sup>7</sup> Naibabainak gapon sik-a, Apo.

<sup>8</sup> Nanbalinak ay mangili sin kakabsat ko.

<sup>9</sup> Kaman kaiw ay mapoppooan di kasasaad ko  
begew sin palalo ay pangisaksakitak sin beey mo.  
Din panglaslasoyan di ipogaw en sik-a  
et ibilang ko ay sak-en met laeng di laslasoyen da.

- 10 Idi nanlolowaak ya init-itpek di dagaang ko,\* linmaslasoy da.  
 11 Sin nangibadoak si sako ay mangipailas ladingit ko, sinmis-iyek da.  
 12 Sak-en di ol-oliten da sin kakalsada,  
     din makabeteng yan sak-en di turong di kanta da.  
 13 Ngem sak-en pay, mankararagak en sik-a,  
     sin timpo ay laydem, somongbat ka koma.  
 Gapo sin dakdake ay layad mo ay magay kolang na,  
     tongpalem koma ay Diyos din karim ay omisalakan ka.  
 14 Nay ay lomlomnedak sin pitek. Komay-at ka!  
     Somalaknib ka kod sin kalaban ko ay nay da.  
     Malosong ay danom di kad-ak, omisalakan ka!  
 15 Adim kod ipalobos ay maianodak ono malnedak,  
     bomadang ka into et ya mateyak.  
 16 Patgam kod din kararag ko  
     gapo sin kinasiged di adi manbalbaliw ay layad mo,  
     somagong ka gapo sin dakdake ay seg-ang mo.  
 17 Adi ka koman itabonan nan baam, Apo,  
     songbatam koma ay dagos nan kararag ko,  
     tan nay palalo di ligat ko.  
 18 Somag-en ka ta omisalakan ka sin kalaban ko.  
 19 Ammom din omin-insoltoan da,  
     omibabain ya omipalawlawwa da,  
     amin ay kalaban ko, ammom daida.  
 20 Mansakit di nemnem ko  
     gapo sin en da pangin-insolto  
     et palaloy ladingit ko.  
 Ninamnamak en waday someg-ang,  
     ngem maga di madtengan.  
 Kanak en waday lomiwliwa,  
     ngem kambaw et maga.  
 21 Idi mandagaangak, manpait ay kaman sabidong di inpakan da,  
     idi manbigawak, soka di inpainom da.  
 22 Sapay koma ta bigla ay madpap da  
     sin pakipangpanganan da,  
 kaman titit ay sin tagdey yan makna da  
     ono animal ay sin bito yan mag-as da  
     olay mo kanan da en natalna di biyag da.†  
 23 Magodab da koma abe ta say adi da makaila  
     dowan da aben mabobok-ong si eng-enggana.  
 24 Ipalak-am mo koma din palalo ay bonget mo en daida  
     ta maedasan da sin inkeddeng mo ay dosa.  
 25 Dadaelem koma din kampo da  
     yan adi kan ipalobos ay way makalasad en daida.  
 26 Tan palpaligaten da din enggay dinosam,  
     yan sepsepen da ay sakitan din sinogatam.‡  
 27 Nemnemem koma amin di basol da

\* 69:10 Siya na din kanana sin Hebreo (MT). Din kanana abe sin LXX ya Syriac et: Idi inbabak din awak ko sin nangit-itpeak si dagaang ko, ... † 69:22 Siya na di esa ay kaiologan di Hebreo. Di esa abe ay kaiologana et: ...mag-as da, daida ya din gagait da. Din kanana abe sin LXX ya Vulgate et: ...mag-as da ta say kosto ay madosa da. ‡ 69:26 Siya na din kanana sin LXX. Din kanana abe sin Hebreo et: yan ap-apatén da din ligat di sinogatam.

sin pangokomam en daida  
ya adi kan itapi ay isalakan daida.

- 28 Ponasem koman ngadan da  
sin libro ay naisolatan di ngadngadan din waday biyag na,  
sin listaan di nalinteg adi kan ibilang daida.
- 29 Ngem sak-en yan palpaligaten da,  
omisalakan ya somalaknib ka koma.
- 30 Idayaw kos Diyos babaen si kankanta  
ya bigbigek di kinangato na  
sin man-iyamanak en sisya.
- 31 Tan siya dana di mas laylaydena  
mo din maidaton ay bomaro ay baka.
- 32 Malaydan din mapalpaligat mo ilaen da na,  
din manaydayaw en Diyos et mapapigsa din nemnem da.
- 33 Tan din kakkaasi, patgan Diyos din kararag da,  
ya adi nan baybay-an din naibabalod ay ipogaw na.
- 34 Dayawen yo si Diyos, dakayo ay langit ya daga,  
baybay ya amin ay manbibiyag en daida.
- 35 Tan isalakan Diyos ed Zion,  
din kailili ed Juda, amagena kasin.  
Manbeey dan to isdi din ipogaw na  
et okaen da di ay daga.
- 36 Tawiden din polin di baa na,  
amin ay malaydan en Diyos et isdi ay mantee da.

## Salmo 70

### 70

#### *Kararag Ay Mankedaw Si Badang Diyos*

- 1 Apo Diyos, omisalakan ka koma,  
dalasem ta bomadang ka.
- 2 Sapay koma ta maabak ya maibabain das palalo  
din manpanggep isnan biyag ko  
ya malaydan sin ligat ko.
- 3 Din lomaslasoy, maibabain da koma  
begew sin kaabakan da.
- 4 Ngem din mankamang en sik-a,  
sapay koma ta naragsak da.  
Amin ay man-iyaman sin panangisalakan mo,  
kanayon koma ay kanan da,  
“Nangatongato si Diyos Apo.”
- 5 Kaseseg-angak ay nabiteg kayman,  
dalasem koma ay Diyos ay bomadang,  
sik-ay omisalakan.

## Salmo 71

### 71

#### *Kararag Di Ipogaw Ay Enggay Nakay*

- 1 Sik-a ay Diyos di pankamangak,  
adim kod polos ipalobos ay maibabainak.
- 2 Bomadang ka tan nalinteg ka,

- dengngem kod adawag ko ta omisalakan ka.
- <sup>3</sup> Maiarig kas makneg ay bato ay pantabonak  
ay kanayon ay pankamangak.  
Inkeddeng mo ay omisalakan ka,  
din pankamangak ya salaknib ko et sik-a.
- <sup>4</sup> Diyos ko, omisalakan ka koma  
sin managbasol ay magay seg-ang da  
ya mangam-amag si lawa.
- <sup>5</sup> Tan sik-a, Kangatoan ay Diyos, di pannamnamaak,  
manipod kakitkittoy ko, sik-ay nantaltalkak.
- <sup>6</sup> Sik-a di nantalkak sin intiro ay biyag ko,  
manipod naianakak sik-ay salaknib ko,  
idaydayaw kos sik-a si amin ay timpo.
- <sup>7</sup> Ad-adoy masmasdaaw sin biyag ko,  
ngem sik-ay napigsa ay salaknib ko.
- <sup>8</sup> Maninsin-agew ay idaddad-at ko  
din kaidaydayawam ya kinangatom, Apo.
- <sup>9</sup> Adi ka koman bomaybay-an mo makayak,  
adi kan tomaytaynan mo komapsotak.
- <sup>10</sup> Tan din kalaban ko yan mantotolag da,  
planoen da di pomsean da.
- <sup>11</sup> Kanan da, “Enggay binaybay-an Diyos sisya.  
En tako depapen tan magay mangisalakan en sisya.”
- <sup>12</sup> Apo, somag-en ka koma,  
dalasem ta bomadang ka.
- <sup>13</sup> Din omipabpabasol et sapay koma  
ta madadael ya maibabain da.  
Malaslasoy da ya maabak da et koma  
din manpanggep ay pomaligat da.
- <sup>14</sup> Mo sak-en pay, kanayon ay mannamnamaak en sik-a,  
masepsep ay idaydayaw kos sik-a.
- <sup>15</sup> Idaddad-at kon to din siged ay inam-amag mo.  
Inag-agew ay dad-atek din panangisalakan mo,  
olay mo adiak maawatan ay kosto.
- <sup>16</sup> Enak idaydayaw sik-a, Apo,  
gapo sin panakabalin mo.  
Dad-atek din kinalinteg mo,  
sik-a anggoy, magay odom, Apo.
- <sup>17</sup> Initdoam sak-en manipod sin kakitkittoy ko,  
et kanayon ay indaddad-at ko  
din nakaskasdaaw ay inam-amag mo.
- <sup>18</sup> Isonga olay naobananak si kinalakay ko,  
adi ka kod bomaybay-an, Apo.  
Komadkadwa ka ay Apo  
sin pangidad-atak si panakabalin mo  
sin amin ay maipolin to.
- <sup>19</sup> Edasanad daya din kinalinteg mo,  
nakaskasdaaw din inamag mo,  
magay makaison sik-a, Apo.
- <sup>20</sup> Inpawadam di problima ya ligat ko,

ngem itaolim din bikas ko  
 ya omisalakan ka sin pese, Apo.  
 21 Masepsep ay ipangatom din dayaw ko  
 ya pabikasem nemnem ko.  
 22 Sik-a ay Diyos ko, mankantaak ya mantokarak si arpa  
 ay mangidaydayaw en sik-a, tan napodno ka,  
 nasantoan ay Diyos ay daydayawen di Israelita.  
 23 Ipigsak din kantik ay mangidayaw en sik-a,  
 naimposan di iyat ko tan inmisalakan ka.  
 24 Maninsin-agew ay idaddad-at ko  
 din kinalinteg mo ay Apo,  
 tan naibabain da ya en da naabak  
 din nanpanggep ay pomaligat.

## Salmo 72

### 72

#### *Kararag Ta Itdoan Ya Bindisyonan Diyos Din Ari*

1 Apo Diyos, itdoan din ari koma  
 ta magay pabpaborana sin pangowisana.  
 Idawtam komas sisya sin kinalinteg mo  
 2 ta say nalinteg di pangiturayana sin ipogaw mo,  
 din kalintegang di nabiteg et itontona ay kosto.  
 3 Mayat koma di apit sin daga  
 ya din ipogaw et nalinteg da.  
 4 Din kalintegang di nabibiteg et itonton din ari koma.  
 Din an-ak di kakaasi et tolongana koma  
 ya dosaena din mamalpaligat en daida.  
 5 Matagotago koma din ari si eng-enggana  
 ay kaman din kabayag di agew ya bowan ed daya.  
 6 Maiarig koma sin odan ay manibsibog si mola  
 ya mamasbasa sin namgaan ay lota.  
 7 Wada koma di kinalinteg ya talna sin timpo na  
 dalo et mo din bowan yan mawawada.  
 8 Sapay koma ta din kaannawan di iturayana,  
 manipod isnan ginawang ay Eufrates enggana sin gedeng di daga.  
 9 Paiturayan da koman sisya  
 din amin ay kalabana.  
 10 Din man-ari ed Mediterranean ya Espania  
 ya siya abe ed Arabia ya Etiopia,  
 iala da koma din bowis ya sagot da.  
 11 Amin koma ay ari yan manpaituray dan sisya  
 ya amin ay nasyon yan mansilbi dan sisya.  
 12-13 Tan isalakana din nabiteg ay mankedaw si badang na  
 ya din nabaybay-an ay makasapol en sisya.  
 Seg-angana ya isalakanas daida.  
 14 Isalakana din biyag da sin mamalpaligat en daida,  
 tan nabanol din biyag da en sisya.  
 15 Omando koma din biyag na  
 ya isagotan da si balitok ay mapod Arabia.\*

\* 72:15 Din sigod ay ngadan di ili ay nay et Seba.

- Kanayon koma ay ikararagan da  
 ta mantoltoloy di bindisyon Diyos en sisya.  
<sup>16</sup> Mawada koma di ad-ado ay makan sin daga.  
 Olay din toktok di dontog yan mamolaan da  
 ya kaman mola ed Lebanon ay ad-adoy lames da.  
 Din siyodad yan mapno si ipogaw koma  
 ay kaman din logam sin dontog di kaad-ado da.  
<sup>17</sup> Adi koman maliw-an din ngadana  
 ya mantoltoloy din dayaw na  
 basta mawawada din agew ed daya.  
 Mabindisyonan din kaipoipogaw begew en sisya  
 et amin ay nasyon yan idaydayaw das sisya.  
<sup>18</sup> Yahweh ay Diyos di Israelita, madaydayaw ka,  
 tan magay makaamag si kaeetnga  
 mo adi et anggoy sik-a.  
<sup>19</sup> Madaydayaw din napateg ay ngadan mo si eng-enggana  
 ya maammoan din kinadiyos mo sin intiro ay daga.  
 Amen, Amen.  
<sup>20</sup> Siya na din nakdenggan di karkararag David ay anak Jesse.

## Salmo 73

### 73

#### *Din Kinalinteg Diyos Ya Din Pantongpalan Di Lawa Ay Ipogaw*

- <sup>1</sup> Siged tet-ewa di iyat Diyos sin Israelita,  
 kosto di iyat na sin nalinis di nemnem na.  
<sup>2</sup> Ngem istay makaan di pammatik ya talek ko  
<sup>3</sup> gapo kayman si apos ko.  
 Tan ilaek yan mayat di biyag da,  
 din natangsit ya lawa di ogali na.  
<sup>4</sup> Adi da manligligat tan nasalon-at da.  
<sup>5</sup> Maga abe di lawa ay mapasamak en daida  
 ay kaman din laklak-amen di gagait da.  
<sup>6</sup> Isonga ipapaila day kinatangsit ya kedse da  
 ay kaman kowintas ono mapteng ay inbabado da.  
<sup>7</sup> Napno di nemnem das lawlawa  
 ya pag kedse di panggep da.  
<sup>8</sup> Sis-iyekan da di iib-a da ya mankalkali das lawa.  
 Begew sin kinatangsit da, egyaten da din gagait da.  
<sup>9</sup> Mankalkali das maikontra en Diyos ed daya,  
 ibaabaa da abe din iib-a da isnan daga.  
<sup>10</sup> Isonga olay din ipogaw Diyos et bigbigen das daida  
 yan pasien da ay dagos din lawa ay ibagbaga da.  
<sup>11</sup> Dowan da et kanan, "Laton ay adi maammoan  
 en Diyos ay Kangatoan."  
<sup>12</sup> Siya na di kasasaad din mangam-amag si lawa:  
 magay ligat da yan kankanayon ay bomakbaknang da.  
<sup>13</sup> Maga ngarud di silbin di nangan-annadak  
 ta maga koma di bomasolak,  
<sup>14</sup> tan inag-agew ay mapaligatak,  
 kankanayon ay madosaak.



- 15 Mo inbagak dana ay ninemnem ko,  
kamanak linipotan din ipogaw mo.
- 16 Pinadas ko na ay nemnemen,  
ngem palalo ay naligat para en sak-en,
- 17 enggana ay sinenggepak sin Timplo ay panbeeyam.  
Asiak naawatan din en da pantongpalan.
- 18 Di katet-ewa na, kaman mon inpeey daida si manngaotoy ay danan  
et inturong mo si en da kadadaelan.
- 19 Sinkaattikan et madosa da,  
kaeegyat di kateyan da.
- 20 Iitaw di arig da  
ay mo bomangon ka yan malinglingan da.
- 21 Sin timpo ay mansaksakit din nemnem ko,  
22 Animal di arig ko  
ay adi makaawat en sik-a ay Apo.
- 23 Ngem olay mo siya di, intakkayam din kannawan ko  
et wadaak ay kanayon sin sag-en mo.
- 24 Itdom di amagek babaen sin bilbilin mo,  
et sin omawatam sin tapin di agew yan way dayaw ko.
- 25 Magay odom si anapek mo adi et sik-a  
ed daya ya isnan daga.
- 26 Olay mo komapoy nan awak ya nemnem ko,  
sik-a ay Diyos di mangidawat si bikas ko,  
sik-a et anggoy di kapkapoan di masapol ko.
- 27 Din addawi en sik-a, awni man et mapospos di biyag da.  
Siya abe sin manokog en sik-a  
ta natken ay diyos di pansilbian da,  
Tan dosaem daida et matey da.
- 28 Ngem mo sak-en pay, Yahweh ay Diyos ko,  
malaylaydanak ay mantee sin sag-en mo.  
Sik-a di pinilik ay salaknib ko  
et dad-atek din am-in ay inam-amag mo.

## Salmo 74

### 74

#### *Kararag Para Sin Ili Sin Timpon Di Ligat*

- 1 Apo, apay nga bomaybay-an ka?  
Ay baybay-am dakami si eng-enggana?  
Apay nga palaloy bonget mo  
sin ipogaw mo ay kaman mon karnero?
- 2 Nemnemem koma ay Apo  
din pinilim ed idi ay ipogaw mo.  
Inbalam daida sin naibabag-enan da  
ta panbalinem ay ipogaw mos daida.  
Adi ka koman linglinglingan  
din dontog ay Zion ay nanteam.
- 3 En ka ilaen, Apo,  
din golpi ay nadadael ay Timplo.  
Dinadael din kalaban mi  
amin ay wada sin isdi.

- 4 Sin Timplo, din kalaban mo yan manbogbogaw da,  
tinood das di di bandila  
ay mangipaila ay nangabak da.
- 5 Kaman dan manpoyos kaiw sin kada  
babaen sin wasay da.
- 6 Amin ay kaiw ay amag na  
yan winasay ya minaso da.
- 7 Dinadael dan Timplom ya pinooan da,  
inpakadodogis da din pandaydayawan di ipogaw en sik-a.
- 8 Nantotolagan da ay amin kami yan peslen da,  
amin ay pandaydayawan di ipogaw en Diyos yan pinooan da.
- 9 Ed wani yan magay mamadto ya magay mailas milagro,  
kas-ano pay di kabayag nina, Apo?
- 10 Pig-an ay somaldeng din kalaban mo  
ay manis-iyek en sik-a ya manglaslasoy sin ngadan mo?
- 11 Apay nga gomiginek ka  
ay adi kan dosaen daida?
- 12 Ngem sik-a ay Diyos din ari mi manipod pay ed idi,  
namin ado ay insalakan mos dakami isnan daga mi.
- 13 Nansianem din baybay babaen sin nakaskasdaaw ay panakabalin mo.  
Din toktok di kaeegyat ay animal sin baybay yan tinegmil mo.
- 14 Tinegmil mo din toktok di animal ay makwani en Leviatan,  
inpakan mon awak na sin aanimal sin lugar ay kadardaratan.
- 15 Din danom sin obbog yan inpabalam,  
ngem pinamagam abe din danom sin adi katkatdok ay ginawang.
- 16 Inpawadam di labi ya kaagawan,  
pinarsuam di maninggaw ay agew ya bowan.
- 17 Inkeddeng mo din beddeng di daga,  
din tiyagew ya deam yan inkeddeng moy timpo da.
- 18 Nemnemem, Apo, ay sis-iyekan daka  
sin mangonkontra en sik-a.  
Naong-ong da yan laslasoyen das sik-a.
- 19 Adim ipalobos ay paligaten din kalaban da  
din ipogaw mo ay kalapati di kaiarigan da,  
adi ka linglinglingan daida.
- 20 Din intolag mon dakami, nemnemem koma,  
tan pag laway am-amagen da  
sin amin ay mabolinget ay solin di daga.
- 21 Adim ipalobos ay din mapalpaligat yan maibabain da,  
din nabiteg ya kakkaasi, daydayawen daka koma.
- 22 Adi kan gomiginek, Apo,  
ikalintegam din awak mo!  
Nemnemem koma din panlaslasoyan di naong-ong en sik-a,  
maninsin-agew ay laslasoyen daka.
- 23 Manggalawngaw si kanayon din mangonkontra en sik-a,  
adi kan linglinglingan din ibogabogaw da.

## Salmo 75

### 75

*Si Diyos Di Mangokom*

- <sup>1</sup> Peteg di iyaman mi en sik-a, Apo!  
Dad-aten mi din panakabalin mo  
ya din nakaskasdaaw ay inam-amag mo.
- <sup>2</sup> Kinwanim ay Apo,  
“Sin domtengan di inkeddeng ko ay timpo,  
sak-en ay mismo di mangokom si kostokosto.
- <sup>3</sup> Mo maikiweg din daga  
ya manpayegpeg amin ay ipogaw sin labaw na,  
sak-en di makatengel sin tokod na.
- <sup>4</sup> Dakayo ay mangam-amag si lawa  
ay mangit-it-ek si awak na,  
ibagak en dakayo ay adi yo ipapangato di nemnem yo,  
<sup>5</sup> isaldeng yo ay mangit-it-ek si awak yo.”  
Say kinwanim di ay Apo.
- <sup>6</sup> Tan magay mapos olay sino ay solin di lobong  
ay omali ay mangokom.
- <sup>7</sup> Sik-a anggoy di way lebbeng na ay mangokom,  
waday ipababam, waday ipangatom.
- <sup>8</sup> Iin-genam di tasa  
ay napnos arak ay palaloy ingel na.  
Ibokbok mo ta inomen di amin ay mangam-amag si lawa  
enggana ay abosen da.
- <sup>9</sup> Ngem sak-en pay, sik-ay kanayon ay daddad-atek,  
mankantaak yan sik-ay daydayawek,  
sik-a ay Diyos ay dinaydayaw Jacob.
- <sup>10</sup> Din panakabalin di mangam-amag si lawa yan abakem,  
ngem din nalinteg yan papigsaem.

## Salmo 76

### 76

#### *Si Diyos Di Mangabak*

- <sup>1</sup> Mandinamag di ngadan Diyos ed Juda,  
ed Israel yan madaydayaw sisya.
- <sup>2</sup> Ed Zion ay sakop di Jerusalem di panteana.
- <sup>3</sup> Isdi yan ginotlo na din panan di kalabana.  
Dinadael na din kasay ya kampilan da,  
dinadael na amin ay armas da.
- <sup>4</sup> Nakaskasdaaw di koniniing mo, Apo!  
Nangatngato ka mo din dontog ay nangabakam si kalaban mo.
- <sup>5</sup> Nakoskosan di nankatotoled ay soldado da  
sin armas ya odom ay sanikwa da.  
Kaman dan naseseyep, tan enggay natey da,  
magay silbin di bikas ya laing da.
- <sup>6</sup> Diyos ay dinaydayaw Jacob, idi niyamyamam daida,  
natokang da pati din kabayo da.
- <sup>7</sup> Palalo ay napateg ya maegyatan ka,  
magay makaitoled ay somango en sik-a  
mo bomonget ka.
- <sup>8-9</sup> Ed langit, pinmika ka ta ikeddeng moy sentensiya,  
et ginmiginek amin ay wada sin daga si egyat da,

- sin nangokomam en daida  
 ta maisalakan amin ay mapalpaligat isnan daga.  
 10 Begew sin bonget di ipogaw,  
 masepsep ay en ka maidayaw.  
 Olay din bonget da ay nabay-an,  
 iatip mo ay kaman mon kampilan.\*  
 11 Tongpalen yo din kari yo en Yahweh ay Diyos yo.  
 Dakayo ay nanasyon, idawat yon sagot yo  
 en Diyos ay lebbeng na ay egyatan ya patgen yo.  
 12 Tan ipababa na din papangolo ay nangato di nemnem da,  
 din aari isnan daga yan emegyat da en sisya.

## Salmo 77

### 77

#### *Panliwliwaan Di Ipogaw Ay Nadismaya*

- 1 Apo, man-adawagak en sik-a  
 yan ipigsak di kararag ko ta domnge ka.  
 2 Nankarakararak en sik-a isnan timpon di ligat ko.  
 Naninsinlabi ay intatag-ay kon takkay ko  
 ay mankararag en sik-a, Apo,  
 ngem magay makaliwliwa sin nemnem ko.  
 3 Mo nemnemek sik-a,  
 “Ay apaw na,” kanak, tan dadlonak nadismaya.  
 4 Gapon sik-a, adiak makaseyep ay naninsinlabi,  
 palalo ay nariribokanak et adiak makakali.  
 5 Din agew ya tawen ay nalabas yan manemnem ko,  
 6 maninsinlabi ay ad-adoy salodsod ko:  
 7 “Ay domokog si Diyos si eng-enggana?  
 Ay adi na ipaila kasin en sak-en din seg-ang na?  
 8 Ay enggay napap-eng din adi manbalbaliw ay layad na?  
 Ay polos ay adi matongpal din kari na?  
 9 Ay enggay magay seg-ang na?  
 Ay insaldeng na begew sin bonget na?”  
 10 Pagak kanan, “Siya nay pansakitan di nemnem ko,  
 din panakabalin Diyos ay Kangatoan yan baken kaman sin damo.”\*  
 11 Nemnemek din nakaskasdaaw ay inam-amag mod idi, Apo.  
 12 Nemnemek amin din kaeegyat ay inamag mo.  
 13 Nasantoan amin ay inamag mo,  
 sik-a ay Diyos mi yan magay makaiso.  
 14 Sik-a din Diyos ay makaamag si milagro,  
 inpailam sin nanasyon din panakabalin mo.  
 15 Insalakan mo babaen sin panakabalin mo  
 din polin da Jacob en Jose ay ipogaw mo.  
 16 Inmegyat din danom idi inila nas sik-a,  
 olay din malosong ay baybay, nanpayegpeg si egyat na.  
 17 Din odan, inig-as din liboo

\* **76:10** Baken nalawag din versikulo ay nay sin Hebreo. Di esa ay kaiologana et: Din makalawat sin bonget mo, pomika da sin nanliniked mo. Wada abey odom ay kaiologana sin odom ay Biblia. \* **77:10** Di esa abe ay kaiologan nina sin Hebreo et: Pagak kanan, “Manipod ed wani siya nay pangiturongak sin nemnem ko, din panakabalin Diyos ay Kangatoan manlogi sin damo.”

nankido ed kayang yan nankimat sin amin ay disso.

- <sup>18</sup> Din kidom yan man-agodood da,  
nasilawan din lobong sin kimat na,  
naikiweg ya nanpayegpeg din daga.
- <sup>19</sup> Nandan ka sin danom, Apo,  
din baybay yan binalasat mo,  
ngem adi maila din gatin mo.
- <sup>20</sup> Babaen en da Moses en Aaron, inpangom din ipogaw mo  
ay kaman kan manpaspastol si karnero.

## Salmo 78

### 78

#### *Si Diyos Ya Din Ipogaw Na*

- <sup>1</sup> Dakayo ay ipogaw ko,  
dengngen yo din itdok en dakayo.
- <sup>2</sup> Pangarig di osalek ay mankali en dakayo.  
Din napasamak ed idi, waday naoneg ay maitdo,  
et say ipalawag ko en dakayo.
- <sup>3</sup> Da nan dinnge ya inammoan tako ay inbagan di ap-apo,  
<sup>4</sup> adi tako isaot sin aan-ak tako,  
mo adi et dad-aten tako sin aap-o tako  
din panakabalin Diyos ya din inam-amag na  
ay kaeegyat ya kaeetnga.
- <sup>5</sup> Inbaga na din linteg na  
sin polin Jacob ay makwani en Israelita.  
Binilina din aap-o tako ay itdo da  
din linteg na sin aan-ak da
- <sup>6</sup> ta adalen din maisokat ay poli da  
ya itdo da abe sin aan-ak da.
- <sup>7</sup> Say inbilina di en daida  
ta si Diyos di pantalkan da  
ya adi da linglingan din inam-amag na  
et tongpalen da din bilbilina
- <sup>8</sup> ta baken dan kaman din ap-apo da  
ay nangonkontra en Diyos ya makenteg di nemnem da.  
Adi da nantalek en Diyos ya baken dan napodno en sisya.
- <sup>9</sup> Din polin Efraim yan nan-arms da si pana,  
ngem sin timpon di gobat, nanagtag da.
- <sup>10</sup> Nilabsing da din intolag Diyos en daida,  
sinigaan da ay tongpalen din linteg na.
- <sup>11</sup> Nilinglingan da din inam-amag na,  
din nakaskasdaaw ay inpaila nan daida.
- <sup>12</sup> Sin pangilaan di ap-apo da yan nan-amag si milagro  
sin tanap ed Zoan ay sakop di Egipto.
- <sup>13</sup> Din baybay yan nansianena et nandanenas daida,  
kaman dingding sin nan-inigid din danom ay inpaginek na.
- <sup>14</sup> Inpango nas daida babaen si liboo sin kaagawan  
ya maninsinlabi babaen si apoy ay mabidang.
- <sup>15</sup> Nan-ekangenay bato sin kadardaratan  
et inpawada nay danom ay kaman ginawang,

- mansobsobra ay en da nan-inoman.\*
- 16 Inpawada nay obbog sin bato  
et nan-oyas di danom ay ad-ado.
- 17 Ngem intoltoloy da ay nanbasol en Diyos ay Kangatoan,  
kinontra das sisya sin lugar ay kadardaratan.
- 18 Ginagara da ay namadas en sisya  
sin nankedawan das makan ay aklongan da.
- 19 Nankali das maikontra en Diyos sin en da nangwanian,  
“Ay tan maidawat Diyos di makan  
isnan lugar ay kadardaratan?”
- 20 Idi sinoplit na din bato,  
binmala kayman di danom ay ad-ado.  
Ngem kabaelana ngata ay mangipawada  
si karni ya makan para sin ipogaw na?”
- 21 Isonga idi dinngen Diyos na,  
palalo din bonget na  
et dinosanas apoy din ipogaw na.
- 22 Tan magay pammati dan sisya,  
et adi da nantalek ay isalakanas daida.
- 23 Ngem olay mo siya di, binilina ed daya,  
din pantew ed langit yan binokatana.
- 24 Kaman odan ay inig-as na di manna ay napod daya  
ta wada di kanen da.
- 25 Owat dan ipogaw ngem nangan da  
si kanen di angel et nabsog da.
- 26 Din dagem ay mapos belaan di agew yan binolosana,  
din mapos abagatan yan inpapigsa na  
babaen sin panakabalina.
- 27 Ad-ado ay titit di indawat nan daida,†  
kaman darat sin baybay di kaad-ado da.
- 28 Nag-as da sin nan-gawaan ya nanniliked di kampo da.
- 29 Isonga nangan ya nabsog da,  
tan indawat Diyos din ak-aklongan da.
- 30 Ngem adi dan napnek et deda ay mangmangan da
- 31 yan binmonget si Diyos en daida  
et pinse na din napili ay kapigsaan ay babbaro da.
- 32 Ngem olay pay siya di, intoltoloy da ay nanbasol en sisya.  
Olay ad-adoy nakaskasdaaw ay inpaila nan daida,  
adi da pay dedan nantalek en sisya.
- 33 Isonga kaman dagem din biyag da  
ay bigla ay pinap-eng na.
- 34 Idi pinse nay odom en daida,  
sinagong din odom sisya.  
Nanbabawi da ya inpasnek da  
ay nankararag en sisya.
- 35 Ninemnem da ay si Diyos ay Kangatoan  
di nanalagnib en daida ya nangisalakan.
- 36 Ngem pag etek amin ay kali da,  
maga polos di tet-ewa.

\* **78:15** Exodo 17:1-6 ya Bilbilang 20:10-13. † **78:27** Bilbilang 11:31-34.



- 37 Baken dan napodno en sisya,  
nilabsing da din intolag nan daida.
- 38 Ngem manageg-ang si Diyos sin ipogaw na  
et pinakawanas daida, adi na pinses daida.  
Namin ado ay intoled na din bonget na en daida.
- 39 Tan ninemnem na ay owat dan ipogaw  
ay kaman dagem ay malabas yan malitaw.
- 40 Sin lugar ay magay omili, kinontra das sisya,  
namin ado ay nanladingiten da.
- 41 Pinadapadas das sisya et nansakiten dan nemnem na,  
sisya ay nasantoan ay Diyos di Israelita.
- 42 Nilinglingan da din panakabalina  
sin agew ay nangisalkananan daida sin kalaban da.
- 43 Nakaskasdaaw di inamag na  
ed Egipto sin tanap ed Zoan ay kanan da.‡
- 44 Nanbalinena si dada din ginawang da  
et maga di inomen da.
- 45 Ad-ado ay ngilaw di inpawada na  
ay begew si naligatan da.  
Inpawada na abey tokak ay nanadael sin daga da.
- 46 Wada pay di dodon ay inbaa na  
ay nangan ya nanadael sin mola sin payew da.
- 47 Babaen si dalalo ya andap, dinadael na  
din obas ya sikomoro da.
- 48 Pinse nas dalalo ya kimat din baka ya karnero da.
- 49 Inpalak-am na din palalo ay bonget na en daida,  
et palalo ay nadosa da sin nangibaaana sin aanghel na  
ay mamaligat ya mamse en daida.
- 50 Adi nan intoled din bonget na  
ya adi nan inpalobos ay matago da,  
mo adi et babaen si pisti yan pinse nas daida.
- 51 Din besag di amin ay pamilya ed Egipto yan pinse na.
- 52 Pag nan ipango din ipogaw na  
sin lugar ay magay omili sin nanbalasatan da  
ay kaman dan karnero ay ipaspastol na.
- 53 Magay lawa ay napasamak sin nangipangoana en daida  
et magay nandanagan da,  
ngem nilim-otan din baybay din kalaban da.
- 54 In-ey na din ipogaw na sin nasantoan ay daga na,  
sin dontog ay inabak na babaen sin panakabalina.
- 55 Inabo nan omili sin dinmatngan di ipogaw na,  
biningabingay na din daga da sin Israelita,  
indawat na abe din beey da.
- 56 Ngem si Diyos ay Kangatoan yan kinontra da  
ya pinadapadas das sisya,  
adi dan tinongpal din bilbilina.
- 57 Baken dan napodno ya kinonkontra das sisya  
ay kaman met laeng din aam-a da.  
Adi dan kaiturong ay kaman dan natiko ay pana.

‡ 78:43 Din milagro ay madad-at sin 78:44-51 et madtengan da sin Exodo 7-12.

- 58 Tan si Diyos yan inpabonget da  
gapo sin pandaydayawan da  
ay sin dodontog di nangisaadan da.  
Nan-imonen da gapo sin didiyosen da.
- 59 Palalo ay binmonget si Diyos sin nangilaana isna,  
et dadlonan dinokogan din Israelita.
- 60 Din nanbeeyana ed Shilo yan binaybay-ana,  
din nakiteanas ipogaw ay tolda na.
- 61 Inpalobos na ay posen ya isaan di kalaban da  
din Baol di Tolagan ay sinyal di panakabalin ya dayaw na.
- 62 Binmonget sin ipogaw na  
et binaybay-ana ay peslen din kalaban da.
- 63 Natey sin gobatan din babbaro da,  
et magay mangasawa sin babalasang da.
- 64 Natey si kampilan di papadi da,  
ngem magay iyat din aas-awa da  
ay mangiladingit en daida.
- 65 Kaman naseseyep si Diyos ngem binmangon sin odi na,  
kaman soldado ay tinmoled sin arak ay ininom na.
- 66 Nansisianena din kalabana,  
naabak da et maibabain das eng-enggana.
- 67 Sinigaana din polin Jose,  
din polin Efraim yan adi nan pinili.
- 68 Ngem say pinili na et din tribun Juda,  
pinili na ed Zion ay laylaydena.
- 69 Insaad nas di din Timplo na  
ay kaman din beey na ed daya,  
kaman din daga ay insaad na  
ta komakaman si eng-enggana.
- 70 Pinili nas David ay mansilbi en sisya,  
inayagana sin panpaspastolanas karnero na  
<sup>71</sup>ya pangay-ayowanana sin olbon da  
ta panbalinena ay ari ed Israel ya mangayowan sin ipogaw na.
- 72 Napodno sisya ay mangay-ayowan en daida,  
nalaing ay mangipangpango en daida.

## Salmo 79

### 79

#### *Ladingit Begew Sin Nadadaelan Di Jerusalem*

- <sup>1</sup> Sik-a ay Diyos, pinnos din papagano  
din dagan di ipogaw mo.  
Din nasantoan ay Timplom yan inpakadodogis da,  
din siyodad ay Jerusalem yan dinadael da.
- <sup>2</sup> Din awak di napodno ay ipogaw mo ay mansilsilbin sik-a,  
inpakan da sin titit ya atap ay animal sin daga.
- <sup>3</sup> Kaman danom ay inbokbok da  
sin nanliniked ed Jerusalem din dada da,  
yan magay mangiponpon en daida.
- <sup>4</sup> Din nanasyon ay nanliniked en dakami,  
laslasoyen ya sis-iyekan das dakami.

- <sup>5</sup> Ay mabonget kan dakamis eng-enggana, Apo?  
Ay adi mad-ep din kaman apoy ay bonget mo?
- <sup>6</sup> Din bonget mo, ipalak-am mo koma  
sin nanasyon ay adi mandayaw ya mankararag en sik-a.
- <sup>7</sup> Tan din ipogaw mo yan pinse da,  
din ilim yan dinadael da.
- <sup>8</sup> Adi ka koman domosa begew sin basol di ap-apo mi.  
Maseg-ang ka kod en dakami ed wani,  
tan enggay magay namnama mi.
- <sup>9</sup> Bomadang ka kod ta omisalakan ka, Apo,  
pakawanem basbasol mi gapo sin dayaw mo.
- <sup>10</sup> Adim ipalobos ay din nanasyon yan kanan da,  
“Into pay din Diyos da?”  
Ipailam koman dakami din panosaam en daida  
begew sin namsean da sin mansilsilbi en sik-a.
- <sup>11</sup> Dengngem koma din adawag di balod, Apo,  
ta babaen sin panakabalin mo,  
din nakeddangan ay matey yan isalakan mo.
- <sup>12</sup> Baesam koma si mamin pito  
din nanasyon ay nangoy-oyaw en sik-a, Apo.
- <sup>13</sup> Et dakami ay ipogaw mo ay kaman mon karnero,  
man-iyaman kamis eng-enggana, Apo.

## Salmo 80

### 80

#### *Kararag Para Sin Nasyon Ay Israel*

- <sup>1</sup> Sik-a ay mangay-ayowan ya mangipangpango en dakami,  
dakami ay Israelita ay polin Jose,  
Dengngem kod nan adawag mi,  
tan kaman mon karnero si dakami.  
Sik-a ay tinmotokdo sin tronom sin ngaton din kerubim,\*  
<sup>2</sup> ipailam kod panakabalin mo en dakami ay polin Efraim  
ya tribun da Manasses en Benjamin,  
omali ka ay en omisalakan.
- <sup>3</sup> Apo Diyos, itaolim kod din sigod ay kasasaad mi.  
Maseg-ang ka koma ta isalakan mos dakami.
- <sup>4</sup> Yahweh ay Diyos ay Kangatoan ay Turay,  
adi ka kod pabayagen san bonget mo  
en dakami ay ipogaw mo  
ta dengngem nan adawag mi.
- <sup>5</sup> Kaman ladingit di inpakan mon dakami  
ya ad-ado ay lowa di inpainom mon dakami.
- <sup>6</sup> Inpalobos mo ay din kaibaw mi sin nandinmang ay il-ili  
yan pan-iibawan da din daga mi ya sis-iyekan das dakami.
- <sup>7</sup> Diyos ay Kangatoan ay Turay, itaolim kod dakami  
sin sigod ay kasasaad mi.  
Maseg-ang ka kod ta isalakan mos dakami.
- <sup>8</sup> Esa ay obas di kaiarigan mi ay ipogaw mo

\* **80:1** Din kerubim yan napayakan ay sinan paparsua ay wada sin kaleb di Baol di Tolagan. Ilaen sin Exodo 25:18-22.

- ay en ka inkaan ed Egipto,  
 et inmolam si odom ay daga  
 ay inpakaan mo di ipogaw na.
- <sup>9</sup> Nilinisam din daga ta say gomabayana.  
 Linmamot et kinmalapkap sin intiro ay daga.
- <sup>10</sup> Din dontog ya dadakke ay kaiw et linidomana.
- <sup>11</sup> Dinmateng sin baybay din panga na  
 enggana sin ginawang sin bas-il na.
- <sup>12</sup> Apay nga dinadael mo din alad na  
 et amin ay malabas yan alaen dan lames na?
- <sup>13</sup> Din bango et dadaelen da  
 ya din odom ay animal et kanen da.
- <sup>14</sup> Diyos ay Kangatoan ay Turay ay wadad daya,  
 mansagong ka koma.  
 Man-osdong ka ta ilaem ya ayowanam dana,
- <sup>15</sup> nan obas ay en ka inmola.
- <sup>16</sup> Kinsat di kaibaw mi ya pinooan da.  
 Ilaem kod ta dosaem daida.
- <sup>17</sup> Din ipogaw ay pinilim ya indawtam si pigsa  
 ta mansilbi en sik-a,  
 ayowanam ya salaknibam sisya.
- <sup>18</sup> Ipalobos mo ay matago kami koma  
 ta mandaydayaw kamin sik-a  
 et adi mi polos dokogan sik-a.
- <sup>19</sup> Yahweh ay Diyos ay Kangatoan ay Turay,  
 itaolim kod dakami sin sigod ay kasasaad mi.  
 Maseg-ang ka koma ta isalakan mos dakami.

## Salmo 81

### 81

#### *Pamagbagan Diyos Ta Patien Din Ipogaw Nas sisya*

- <sup>1</sup> Begew si ragsak yo, ibogaw yo din kanta yo  
 ay mangidaydayaw en Diyos ay napoan di pigsa tako.  
 Sisya din Diyos ay dinaydayaw Jacob ay apo tako.
- <sup>2</sup> Manambol kayo, ilogi yo ay mankanta!  
 Kompasnan yo si arpa ya gitara  
 ta say makaay-ayo di kadngeana.
- <sup>3</sup> Mananggoyob kayo ay mangipaammo sin fiesta  
 sin beskan di bowan ya pan-inatana.
- <sup>4</sup> Tan ed Israel, naibilin dana ay linteg,  
 bilin Diyos ay dinaydayaw Jacob.
- <sup>5</sup> Sin Israelita, inbilin di Apo  
 sin nangobatana si taga-Egipto.  
 Wada et di dinngek ay kali ay adiak ammo:
- <sup>6</sup> “Kinaan ko din nadagsen ay binaklay yo,  
 kinaan ko din baskit sin takkay yo.
- <sup>7</sup> Sin timpon di ligat yo, nankararag kayo  
 et insalakan kos dakayo.
- Sin kido ay nantatabonak, sinongbatak dakayo,  
 sin kad-an di obbog ed Meriba pinadas kos dakayo.

- <sup>8</sup> Dakayo ay ipogaw ko,  
dengngen yo din pamagbagak en dakayo,  
et sapay koma ta pomati kayo.
- <sup>9</sup> Maga koma di odom ay diyos yo,  
maiparit di sinan didiyos ay pandokmogan yo,
- <sup>10</sup> tan sak-en si Yahweh ay Diyos yo  
ay nangikaan en dakayo ed Egipto.  
Mantakaw kayo ngarud et pakanek dakayo.
- <sup>11</sup> Ay apaw kayo ay ipogaw ko,  
adi yo pinatpati din inbagak en dakayo.
- <sup>12</sup> Isonga binaybay-ak dakayo ta onodan yo  
din wadas makenteg ay nemnem yo.
- <sup>13</sup> Dakayo ay Israelita ay ipogaw ko,  
sapay koma ta pomati kayo,  
tan mo tongpalen yo din bilin ko,  
<sup>14</sup> abakek ay dagos amin ay kalaban yo.
- <sup>15</sup> Din omililiget et manyakog-ong dan sak-en si egyat da  
ya madosa da si eng-enggana.
- <sup>16</sup> Ngem pakanek pay dakayo  
si kamayatan ay bakakew ya kam-isan ay diro.”

## Salmo 82

### 82

#### *Pamagbaga Sin Mangikeddeng Si Baken Kosto*

- <sup>1</sup> Pinmikas Diyos sin korti ed daya ta okomena  
din makwani en diyos ay natotopog sin kad-ana.  
Siya na din inkeddeng na en daida:
- <sup>2</sup> “Pig-an pay ay isaldeng yo  
din pangikeddengan yo si baken kosto,  
din mangam-amag si lawa yan say pangabaken yo?”
- <sup>3</sup> Ikalintegan yo et koma din magay kabaelan da,  
din kaseseg-ang, mapalpaligatan, ya olila.
- <sup>4</sup> Isalakan yo sin panakabalin di mangam-amag si lawa.
- <sup>5</sup> Adi kayo makaawat ya magay ammo yo.  
Mabolinget di nemnem yo,  
et isnan daga, magay maamag ay kosto.
- <sup>6</sup> Sak-en ay Diyos ay Kangatoan, kanak en dakayo:  
Amin kayo yan diyos, anak ko si dakayo,
- <sup>7</sup> ngem olay mo siya di, matey kayo  
ay kaman din amin ay ipogaw ya olay papangolo.”
- <sup>8</sup> Sik-a ay Diyos, okam amin ay nasyon isnan daga,  
omali ka koma ta okomem daida.

## Salmo 83

### 83

#### *Kararag Ta Abaken Diyos Din Kalaban Di Ipogaw Na*

- <sup>1</sup> Apo, adi ka kod gomiginek issa,  
<sup>2</sup> tan doy labanen daka sin mangililiget en sik-a.
- <sup>3</sup> Nasikap da yan way lawa ay plano da  
sin ipogaw ay napateg en sik-a.

- <sup>4</sup> Kanan da, “Omali kayo ta peslen tako amin daida ta malinglingan ed Israel si eng-enggana.”
- <sup>5</sup> Nantotolag da ay manbabadang da ay manlaban en sik-a.
- <sup>6</sup> Nantotolag din Edomita ya Ismaelita, Hagareno ya Moabita,
- <sup>7</sup> din taga-Gebal, Ammonita ya Amalekita, din taga-Tiro ya Filistia.
- <sup>8</sup> Naitapi aben daida din taga-Assyria ay napigsa ay kabadang din polin Lot ay Ammonita ya Moabita.
- <sup>9</sup> Amagem koman daida din inyat mos taga-Midian ya da Sisera en Jabin sin ginawang ay Kison.
- <sup>10</sup> Inabak mo ed Endor si daida et naboyok awak da sin lota.
- <sup>11</sup> Kaman din inyat mon da Oreb en Zeeb koma di amagem sin papangolo da. Abakem din tuturay da ay kaman din panangabak mon da Zeba en Zalmunna.
- <sup>12</sup> Daida din nangwani en okaen da din okan Diyos ay daga.
- <sup>13</sup> Iwalang mos daida ay kaman tapok, kaman teg-ap ay itayaw di dagem.
- <sup>14</sup> Kaman koman din iyat di apoy sin kadondontogan ay mamoo sin kada,
- <sup>15</sup> apayawem ya kibtotem daida babaen si dagem mo ay napigsa.
- <sup>16</sup> Ibabain mos daida ta bigbigen da ay manakabalin ka.
- <sup>17</sup> Maabak ya emegyat da komas eng-enggana ya palalo koma ay maibabain da sin kateyan da.
- <sup>18</sup> Siya na di ammoen da koma: sik-a anggoy ay Yahweh di ngadana din kangatoan ay mangituray sin daga.

## Salmo 84

### 84

#### *Layad Di Emey Sin Beey Diyos*

- <sup>1</sup> Sik-a ay Diyos, Kangatoan ay Apo, peteg di layad ko sin beey mo.
- <sup>2</sup> Mailiwak ay senggep sin Timplo ta idayaw kos sik-a, Diyos ay matmatago.
- <sup>3</sup> Olay din titit et nan-amag da isdis obong da, din pipingew et waday dinteng das panbeeyan da, et man-itlog da pay sin sag-en di altar mo, sik-a ay arik ya Diyos ko.
- <sup>4</sup> Nagasat iman di ipogaw ay manbebeey sin Timplom tan mankankanta da ay manaydayaw en sik-as kankanayon.
- <sup>5</sup> Nagasat di ipogaw ay mantalek en sik-a ay sik-ay kapoan di am-in ay bikas da ya din emeyan da ed Zion et say laylayden da.
- <sup>6</sup> Mo manmandan da sin nanamgaan ay tanap ed Baca, dagos ay mawaday obbog et masibogan san lota.



- Mapno abey posong sin odan ay masapa.  
<sup>7</sup> Pomigsa da ay pomigsa sin pandad-anan da.  
 Mo domateng da ed Zion, awni et manpaila da  
 sin sangoanan Diyos\* ay kangatoan ed daya ya isnan daga.  
<sup>8</sup> Dengngem koma san adawag ko,  
 Yahweh, Kangatoan ay Apo,  
 sik-a ay dinaydayaw Jacob, itnengam nan karkararag ko.  
<sup>9</sup> Ay Diyos, bindisyonam koma san ari mi  
 tan pinilim sisya ay mangituray en dakami.  
<sup>10</sup> Di esa ay agew ay kawadak isnan Timplo  
 et sigsigid mo sinlibo ay agew sin odom ay disso.  
 Olay mo owatak pomipika sin pantew di beey di Apo,  
 maymayat na mo din makibeey sin ipogaw ay nakillo.  
<sup>11</sup> Si Diyos et maiarig sin agew ay maneysey-ang en datako.  
 Maiarig abes kasay ay salaknib tako.  
 Sisya din madaydayaw ya nangato ay ari tako.  
 Segseg-angana ya ipangpangato nas datako.  
 Adi nan kayyawan din siged ay wadan sisya  
 sin ipogaw ay nalinteg di kabibiyag da.  
<sup>12</sup> Sik-a ay Diyos ay Kangatoan,  
 nagasat di ipogaw ay sik-a di ena pantalkan.

## Salmo 85

### 85

#### *Kararag Ay Mankedaw Si Panmayatan Di Ili*

- <sup>1</sup> Binindisyonam din ilim, Apo,  
 et din biyag di polin Jacob yan inpasiged mo.  
<sup>2</sup> Pinakawan mo amin ay nanbasolan di ipogaw mo,  
<sup>3</sup> din palalo ay bonget mon daida yan kinaan mo.  
<sup>4</sup> Diyos ay omisalakan, pasigedem koma kasin din kasasaad mi,  
 isaldeng mo koma din panigsigaam en dakami.  
<sup>5</sup> Adi ka koman mabonget en dakamis eng-enggana.  
<sup>6</sup> Papijsaem kasin dakami ta manragsak din ipogaw mo gapon sik-a.  
<sup>7</sup> Ipailam koman dakami din adi manbalbaliw ay layad mo  
 ya isalakan mos dakami, Apo.  
<sup>8</sup> Dedengngek di ibagbagan Diyos ay kari na  
 en idawat na di talna en datako ay ipogaw na  
 mo adi tako taolien din inam-amag tako ay lawa.  
<sup>9</sup> Nakasagana ay mangisalakan sin mangipatpateg en sisya,  
 ta say mantoltoloy ay maipaila  
 sin ili tako din somili ay kinadiyos na.  
<sup>10</sup> Din layad ya kinamatalek yan awni et mantapi da,  
 yan mankoyog di kinalinteg ya talna.  
<sup>11</sup> Mawada di kinamatalek isnan daga,  
 si Diyos ed langit yan ipaila na abe di kinalinteg na.  
<sup>12</sup> Idawat Diyos di bindisyon et omad-adoy apit sin daga.  
<sup>13</sup> Mangon-ona di kinalinteg sin sangoanana

\* **84:7** Siya sa din kanana sin Masoretic Text sin Hebreo. Din kanana abe sin odom ay manuskrito et: Awni et manpaila en daida si Diyos ... Din kanana abe sin LXX et: Awni et maila da si Diyos ...

ay mangisagana sin pandanana.

## Salmo 86

### 86

#### *Kararag Di Ipogaw Ay Magay Bael Na*

- <sup>1</sup> Apo, dengngem koma ya patgam nan kararag ko,  
tan kaseseg-angak ya magay bael ko.
- <sup>2</sup> Diyos ay pantalkak, somalaknib ya omisalakan ka,  
tan napodnoak ay mansilbi en sik-a.
- <sup>3</sup> Apo, maseg-ang ka koma,  
tan maninsin-agew ay mankararagak en sik-a.
- <sup>4</sup> Paragsakem koma nan mansilsilbi en sik-a,  
tan di pankararagak et sik-a.
- <sup>5</sup> Nakasagana ka ay mamakawan ya managseg-ang ka,  
adi manbalbaliw din layad mo sin mankararag en sik-a.
- <sup>6</sup> Dengngem koma nan kararag ko  
ay mankedaw si badang mo.
- <sup>7</sup> Mankararagak en sik-a sin timpon di ligat ko,  
tan patgam din kararag ko.
- <sup>8</sup> Magay Diyos ay makaison sik-a, Apo,  
magay makaamag sin inam-amag mo.
- <sup>9</sup> Amin ay nasyon ay insaad mo et omali dan to,  
mandokmog dan sik-a ay mangidayaw sin ngadan mo.
- <sup>10</sup> Tan nangato ka, din amagem yan nakaskasdaaw da,  
magay odom ay Diyos mo adi et sik-a.
- <sup>11</sup> Itdom ay Diyos di pandanak ay kosto  
ta say napodnoak ay mamati en sik-a, Apo.  
Omiturong ka ta maimongsan di nemnem ko  
ay mangipateg sin ngadan mo.
- <sup>12</sup> Naimposoan di pan-iyamanak en sik-a, Apo,  
idaydayaw kos sik-as eng-enggana, Yahweh ay Diyos ko.
- <sup>13</sup> Tan din layad mon sak-en et palalo ay dakdake,  
et inmisalakan ka sin pese.
- <sup>14</sup> Komonkontra din mankakekedse ya mangipapangatos awak da,  
ipogaw ay adi mangikaskason sik-a.  
Nantotolag da en pomse da.
- <sup>15</sup> Ngem sik-a, Yahweh ay Diyos, et managseg-ang ka,  
naanos, managlayad ya napodno ka.
- <sup>16</sup> Somagong ka koma ta someg-ang ka,  
tan mansilsilbiak en sik-as eng-enggana.\*  
Maseg-ang ka kod ta omipabikas ya omisalakan ka.
- <sup>17</sup> Ipailam koman sak-en din kinasiged mo  
ta maibabain din kalaban ko  
mo ilaen da ay linmiwliwa ya binmadang ka, Apo.

## Salmo 87

### 87

#### *Din Kaidayawan Di Dontog Ay Zion*

\* **86:16** Din kanana sin Hebreo et: esaak ay anak di babai ay bag-en mo. Din anak di bag-en et maibilang ay bag-en engganang tongpal biyag.

- <sup>1</sup> Insaad Diyos din siyodad ay Zion sin dontog ay pinili na.  
<sup>2</sup> Binanbanol Diyos din siyodad ay sana mo din odom ay lugar di Israelita.  
<sup>3</sup> Dakayo ay man-ili isnan siyodad di Apo dengngen yo, nan nabanol ay ibaga na maipanggep en dakayo:  
<sup>4</sup> “Mo listaek di nanongtongpal sin bilin ko, itapik din taga-Babilonia ya Egipto. Din taga-Filistia, Etiopia ya Tiro et maibilang da ay man-ili ed Zion ay siyodad ko.”  
<sup>5</sup> Awni et si Diyos ay Kangatoan yan papigsaena din siyodad ay Zion, et din kaipoipogaw yan kanan da, “Man-ili kami abe sin isna.”  
<sup>6</sup> Kadi et mo listaen Diyos din ipogaw na, ibilang na ay naianak da am-in isna.  
<sup>7</sup> Awni et mansala da dowan dan kanan ay mangikankanta, “Din laklak-amen tako ay bindisyon et napo da am-in ed Zion.”

## Salmo 88

### 88

#### *Kararag Di Ipogaw Ay Palalo Ay Nadismaya*

- <sup>1</sup> Yahweh ay Diyos ay omisalakan, mankararagak en sik-a si labi ya kaagawan.  
<sup>2</sup> Dengngem kod nan kararag ko ay mankedaw si badang mo,  
<sup>3</sup> tan kamanak matey si palalo ay ligat ko  
<sup>4</sup> ya enggay magay bikas ko.  
<sup>5</sup> Sin kad-an di natey, kamanak nabaybay-an, kamanak naikaot ay soldado ay natey si gobatan ay enggay nilinglingam ya adi kan tolongan.  
<sup>6</sup> Inmikosnong ka sin kaot ay kalosongan ya kabolingetan.  
<sup>7</sup> Mariknak di kinadagsen di bonget mon sak-en, omilned ay kaman dadakke ay dalloyon.  
<sup>8</sup> Inturong mo din gagayyem ko ta tomaynan da, nanbalinak ay kadodogis sin pangila da. Adiak makabala isnan naipokokak,  
<sup>9</sup> begew si ladingit ko, kinmapsot nan matak. Inag-agew ay kedkedawek din badang mo, itag-ay kon takkay ko ay mankararagak en sik-a, Apo.  
<sup>10</sup> Adi ka met amagen di milagro para sin baken matmatago, adi aben makabangon di natey ta idayaw dan ngadan mo.  
<sup>11</sup> Sin kaot ay kadondonotan da yan adi da ipaammo din adi manbalbaliw ay layad ya kinamatalek mo.  
<sup>12</sup> Ay maipaila aya din nakaskasdaaw ay inam-amag mo ya mabigbig din kinasiged mo sin mabolinget ay doy ay kad-an da ay din emey yan enggay malinglingan da?  
<sup>13</sup> Inagsapa ay mankararagak ay mankedaw si badang mo.  
<sup>14</sup> Apay nga bomaybay-an ka, Apo?

- 15 Sipod pay sin kakitkittoy ko,  
kamanak matey si kanayon ay ligat ko,  
enggay naabakak sin dinmosdosaam ay napalalo.
- 16 Kaman danom ay dinmalapos din bonget mo,  
adiak makaleng-ag sin kaeegyat ay inpalak-am mo.
- 17 Kaman layos ay nanliniked en sak-en,  
maninsin-agew ay omilemlem.
- 18 Inpaaddawim en sak-en din gagayyem ko,  
et bolinget anggoy di gait ko.

## Salmo 89

### 89

#### *Din Intolag Diyos En David*

- 1 Apo Diyos, kanayon to ay ikansiyon ko  
din adi manbalbaliw ay layad mo  
ya din kinamatalek mo.
- 2 Din layad mo, magay panbalbaliwana.  
Matalek ka si eng-enggana  
ay kaman ed daya ay komakaman sin kad-ana.
- 3 Kanam, “Waday intolag ko sin pinilik,  
siya nay inkarik sin baak ay si David:
- 4 Awni et isaad ko din polim ay manturay si eng-enggana.”\*
- 5 Idaydayaw daka koma ed daya  
sin nasinop ay nasantoan ay paparsua,  
tan nakaskasdaaw din inam-amag mo ya matalek ka.
- 6 Tan sino di makaison sik-a  
sin amin ay wadad daya?
- 7 Mas kaeegyat ya nangatngato ka  
mo din nasinop ay nasantoan ay parsua,  
isonga egyatan ya patgen daka.
- 8 Yahweh ay Diyos ay Kangatoan ay Turay,  
magay makaison sik-a.  
Sin amin ay banag et matalek ka.
- 9 Iturayam din kaeegyat ay baybay et patalnaem din dalloyona.
- 10 Din dragon ay si Rahab<sup>†</sup> et pinis-it mo.  
Begew sin panakabalin mo,  
inabak mo din kalaban mo.
- 11 Okam ed daya ya nan daga,  
tan inamag mo nan lobong ya din amin ay wada.
- 12 Din wada ed amyaman ya abagatan, pinarsuam daida.  
Din dontog ay Tabor ya Hermon et manragsak da.  
Kaman dan ipogaw ay mangikankanta  
sin pangdayaw dan sik-a.
- 13 Palalo ay napigsa ka.
- 14 Din turay mo, kinalinteg di naisaadana.  
Din amin ay amagem, ipaila da  
ay managlayad ya matalek ka.
- 15 Ay apaw di ragsak da

\* **89:4** Din intolag Diyos ay nay et madtengan sin 2 Samuel 7:16. † **89:10** Si Rahab ay nay et kaeegyat kano ay dragon ed nabaon ay nanbeey sin baybay. Simbolon di am-in ay lawa ya golo.

- din manaydayaw en sik-a babaen si kankanta  
ya din mabindisyonan begew sin kawadam en daida.
- 16 Gapon sik-a, maninsin-agew ay manragsak da,  
et din kinalinteg mo, idaydayaw da.‡
- 17 Tan sik-a di poon di bikas mi,  
begew sin seg-ang mo, mangabak kami.
- 18 Nasantoan ay Diyos mi ay Israelita, sik-a din ari mi  
ay manalaknib en dakami. §
- 19 Waday kaman iitaw ay inpailam sin matalek ay baam,  
et siya na din kanam,  
“Binadangk di esay soldado ay napigsa,  
pinilik et inpangatok sisya.
- 20 Insaad ko ay ari si David ay baak.  
Sinoyatak din toktok na sin nasantoan ay lanak,  
say mangipaila ay sisya dinotokak.
- 21 Et kanayon ay papigsaek to  
babaen sin bikas ya panakabalin ko.
- 22 Din lawlawa di ogali na ay kalabana  
et adi da makaabak en sisya.
- 23 Gemkek din kalabana sin sangoanana  
et peslek din mangililiget en sisya.
- 24 Mantoltoy din kinapodnok ya layad kon sisya  
et begew en sak-en, maipangatos sisya.
- 25 Paannawaek din lak-am di iturayana  
et lomabes sin baybay di pap-eng na.
- 26 Awni et bigbigenas sak-en ay Ama ya Diyos na,  
manalaknib ya mangisalakan en sisya.
- 27 Din kalintegan di besag ay anak,  
idawat kon to en sisya.  
Panbalinek ay kangatoan ay ari isnan daga.
- 28 Adi manbalbaliw din layad kon sisya,  
ya komakaman din intolag ko si eng-enggana.
- 29 Mantoltoy din panturayan di poli na  
enggana ay mamaga din daya.
- 30-31 Ngem mo sigaan din poli na din linteg ko  
et adi da tongpalen din bilbilin ko,
- 32 dosaek et soplitek daida  
begew sin basbasol da.
- 33 Ngem din layad kon sisya, magay panbaliwana  
et tongpalek din inkarik en sisya.
- 34 Tongpalek din intolag kon sisya,  
magay ibabawik ay karik en sisya, ay olay esa.
- 35 Nasantoanak et tongpalek din karik.  
Adiak polos man-etek en David.
- 36-37 Mantoltoy din panturayan di poli na,  
magay pap-eng na  
ay kaman din agew ya bowan ed daya.”

‡ 89:16 Di esa abe ay kaiologan nina sin Hebreo et: et begew sin kinalinteg mo, maipangato da. § 89:18 Di esa abe ay kaiologan nina sin Hebreo et: ...sik-a di namili sin manalaknib en dakami, tan dinotokam din ari mi.

- 38 Ngem binaybay-am sisya ya dinokogam ed wani.  
Palaloy bonget mo sin ari ay en ka pinili.
- 39 Inbabawim din intolag mo en sisya  
et kinaan mo din turay na.
- 40 Pinadadael mo amin din alad di siyodad na,  
et dadlon binakas din kalabana  
din makneg ay beey ay pankamangan di ipogaw na.
- 41 Amin ay malabas et akewen da din sanikwa na.  
Laslasoyen aben di katokmang na.
- 42 Nangabakem din kalabana  
et pinaragsak mo amin daida.
- 43 Nanbalinem din armas na ay magay silbi na,  
adi kan binadangan sin kalabana.
- 44 Kinaan mo din madaydayaw ay saad na,  
intep-am sin lota din korona na.
- 45 Nanbalinem ay nakay ay nasapsapa  
et kababain di kasasaad na.
- 46 Pig-an pay ay denggem din kararag ko  
ya makaan din palalo ay bonget mo?
- 47 Nemnemem koma ay aptik di biyag mis na,  
pinarsuam amin ay ipogaw ay way gedeng di biyag da.
- 48 Sinoy natago ay magay kateyana  
ya makalisi sin kaiponponana.
- 49 Into pay din magay balbaliw na ay layad mo ed idi  
yan matalek ka ay nangikari en David adi?
- 50 Nemnemem koma din panglaslasoy dan dakami ay ipogaw mo  
ya din pangoy-oyaw di kaipoipogaw ay ninam-os ko.
- 51 Apo Diyos, laslasoyen din mangiliget en sik-a  
nan pinilim ay ari olay intoy emeyana.
- 52 Madaydayaw si Diyos si eng-enggana.  
Amen! Amen!

## Salmo 90

### 90

#### *Si Diyos Ay Magay Pap-eng Na*

- 1 Sik-a ay Diyos di nangay-ayowan en dakami.  
Kaman kan beey ay nansidsidoman mi  
manipod ed nabaon enggana ed wani.
- 2 Olay idi daan kan parsuaen din dontog ya am-in ay wada,  
nawawada ka ay Diyos si eng-enggana.
- 3 Mabalín mo ay ibaga sin ipogaw ta mantaoli da  
sin tapok ay say napoan da.
- 4 Din sinlibo ay tawen en sik-a  
et kaman sin-agew anggoy di kaando na.  
Kaman ed kogaban ay nalabas  
ono din kaseyepan mi si owat piga ay oras.
- 5 Mabalín ay pap-engem din biyag mi sina.  
Maiarig sin itaw ay sinkaattikan et mamaga  
ono kaman logam ay tomobo sin agsapa.
- 6 Gomabay et mansabong da,



- ngem mo malabi, malaylay ya mango da.
- <sup>7</sup> Palaloy egyat mi sin bonget mo,  
matey kami begew sin dosa ay inkeddeng mo.
- <sup>8</sup> Inpailam am-in ay basbasol mi sin sangoanam,  
olay din naitatabon ay inpaksaw mi et inpabelam.
- <sup>9</sup> Begew sin bonget mo, omaptik di biyag mis nan daga,  
din tawen mi et kaman dagem ay si awni et mamaga.
- <sup>10</sup> Pitopolo ay tawen di kaandon di biyag mis na.  
Mo mabikas kami, emey ay otsinta.
- Ngem olay mo intoy kaando na, pag ligat di iala da.  
Sinkaattikan yan mapap-eng di biyag mi et pag kamin mamaga.
- <sup>11</sup> Maga pay laeng di namadas sin am-in ay dosa ay inkeddeng mo,  
magay inmegyat ay kosto  
begew sin palalo ay bonget mo.
- <sup>12</sup> Isonga ipabigbig mo ngarud en dakamis na  
din kinaaptik di biyag mis nan daga  
ta say lomaing kami ay mangosal ay kosto  
sin am-in ay timpo ay indawat mo.
- <sup>13</sup> Pig-an pay di kabayag di omibobongetam?  
Maseg-ang ka koma ay Diyos en dakami ay baam.
- <sup>14</sup> Inag-agew koma ay mapnek kami sin komakaman ay layad mo  
ta say naragsak kami ay mankankanta sin kawada mi ay matmatago.
- <sup>15</sup> Paad-adoem abe di agew ay en mi panlaylaydan  
ay kaman din kaandon di timpo ay en mi nanligligatan.
- <sup>16</sup> Ipailam din panakabalin mo en dakami ay baam  
ya sin kapototan mi din nakaskasdaaw ay pigsam.
- <sup>17</sup> Yahweh ay Diyos mi, maseg-ang ka ta bindisyonam dakami  
ta say mayat di pantongpalan di am-in ay am-amagen mi.

## Salmo 91

### 91

#### *Si Diyos Di Manalagnib En Datako*

- <sup>1</sup> Olay sino ay emey en Diyos ay Manakabalin Am-in ya Kangatoan,  
ta sisya di kanayon ay ena pankamangan ya panpaayowanan,
- <sup>2</sup> kanana, "Sik-a, Yahweh, di salagnib ko ya pankamangak,  
sik-a din Diyos ay daydayawek ya pantalkak."
- <sup>3</sup> Ilisi daka sin kaman bito ay maknaam  
ya kaeegyat ay sakit ay kateyam.
- <sup>4</sup> Kaman kan kiyap ay sakokoan di ina na.  
Magay pan-egyatom tan wadas sisya ay mangayowan en sik-a.  
Matalek sisya et kaman mon salida.
- <sup>5</sup> Sin labi et magay pan-egyatom,  
olay din panan di kalaban sin kaagawan.
- <sup>6</sup> Sin labi ya kaagawan, magay pan-egyatom,  
olay dimonyo ono bigla ay sakit ay kateyan.
- <sup>7</sup> Olay ad-ado di matey sin asag-en mo,  
ngem adi ka pay maan-ano.
- <sup>8</sup> Mailam to ay mismo di kadosaan da  
din lawlawa di ogali na.
- <sup>9</sup> Gapo ta si Yahweh ay Kangatoan

- di kinamang mo ay pansalinan,  
<sup>10</sup> magay lawa ay mapasamak en sik-a  
 ono somag-en sin beey mo ay mamaligat en sik-a.  
<sup>11</sup> Bilinen Diyos din aanghel na ta en daka ayowanan,  
 olay intoy em-emeyam.  
<sup>12</sup> Aklopen das sik-a ta adi maidosnog sikim sin bato.  
<sup>13</sup> Din maangat ay layon ya eweg ay nagitaan et abakem ya igatin mo.  
<sup>14</sup> Kanan Diyos, “Din manglaylayad en sak-en et isalakan ko,  
 ya ayowanak din mamigbig ay sak-en din Apo.  
<sup>15</sup> Mo mankararag en sak-en et songbatak sisya,  
 kadmadaek sin timpon di ligat na  
 et isalakan ko ya bindisyonak ta madayaw sisya.  
<sup>16</sup> Gon-gonaak abe si ando ay biyag na  
 ta ganasena din pangisalakanak en sisya.”

## Salmo 92

### 92

#### *Kanta Ay Pangdayaw En Diyos*

- <sup>1</sup> Mayat di man-iyaman en sik-a, Diyos ay Kangatoan,  
 ya mangikanta si kaidayawam.  
<sup>2</sup> Inagsapa ya linablabi ay maikankansiyon  
 din adi manbalbaliw ay layad mo ya kinapodnom.  
<sup>3</sup> Mayat tet-ewa ay ikanta  
 ay makompasan si gitara ya arpa.  
<sup>4</sup> Tan pinaragsak mos sak-en sin nakaskasdaaw ay inamag mo  
 et ibogaw koy kantik gapo si ragsak ko.  
<sup>5</sup> Nakaskasdaaw din inam-amag mo,  
 adi maedasan di nemnem mo.  
<sup>6</sup> Adi maawatan di naong-ong ya magay nemnem na  
<sup>7</sup> din kasasaad di mangam-amag si lawa  
 ay olay mo kaman dan logam ay gomabay da  
 ya di biyag da et somiged pay,  
 ngem din pantongpalan da  
 et panakadadael si eng-enggana.  
<sup>8</sup> Ngem sik-a ay Apo di kangatoan si eng-enggana.  
<sup>9</sup> Amin ay kalaban mo, awni et matey da,  
 amin din mangam-amag si lawa  
 et maabak ya mansisian da.  
<sup>10</sup> Ngem inmipabikas ka ay kaman bomaro ay atap ay baka,  
 binindisyonam sak-en ya inmiparagsak ka.\*  
<sup>11</sup> Laton ay nailak din naabakan di lawa ay komonkontra,  
 nadngek abe din bogaw da sin naabakan da.  
<sup>12</sup> Din nalinteg yan gomabay da  
 ay kaman din sidro ed Lebanon ya din kaiw ay palma.  
<sup>13</sup> Kaman dan kaiw ay naimola sin beey di Apo,  
 gomabay da sin Timplon Diyos ay daydayawen tako.  
<sup>14</sup> Manbonga da olay ad-adoy tawen da,  
 kanayon ay makneg ya magabay da.

\* **92:10** Din kanana sin Hebreo et: nabokbokanak si baro ay lana.

<sup>15</sup> Siya nay mangipaila ay nalinteg din Apo,  
magay maipabasol en sisya ay salaknib ko.

## Salmo 93

### 93

#### *Nangato Ay Ari Si Diyos*

- <sup>1</sup> Apo Diyos, sik-a di ari mi ay ipogaw mo,  
dayaw ya pigsa et kaman mon inbabado.  
Adi maikiweg din daga tan insaad mo ay kosto.
- <sup>2</sup> Nanturturay ka manipod sin damodamo,  
nawawada ka sin daan manlogi di timpo.
- <sup>3</sup> Apo Diyos, dinmakdake din danom  
et man-agodood din dalloyon.
- <sup>4</sup> Ngem sik-a ay Diyos ed daya,  
addawi ay manakabalin ka  
mo din baybay ya dalloyona.
- <sup>5</sup> Apo, adi polos manbalbaliw din linteg mo.  
Bagay nas eng-enggana din kinasanton di beey mo.

## Salmo 94

### 94

#### *Si Diyos Di Mangokom Sin Kaipoopogaw*

- <sup>1</sup> Yahweh, din Diyos ay man-ibaes yan sik-a,  
din bonget mo ipailam koma.
- <sup>2</sup> Sik-a di mangokom sin am-in ay ipogaw isnan daga,  
et ipalak-am mo sin mangipapangatos awak da  
din lebbeng na ay dosa da.
- <sup>3</sup> Apo Diyos, kas-ano pay di kabayag na  
ay it-it-ek din makedse din awak da?
- <sup>4</sup> Amin din mangam-amag si lawa  
yan it-it-ek dan basol da.
- <sup>5</sup> Din pinilim ay ipogaw mo yan palpaligaten da,  
<sup>6</sup> peslen da din nalasang, mangili ya olila.
- <sup>7</sup> Ngem kanan da, “Si Yahweh ay Diyos di Israelita  
yan adi na ammo ya adi na ilaen na.”
- <sup>8</sup> Palalo sas kinaong-ong yo!  
Pig-an pay di kanemneman yo?
- <sup>9</sup> Ay adi makadnge ya makaila  
yan sisya nangamag si inga ya mata?
- <sup>10</sup> Ay siya mo adi na dosaen din ipogaw na  
yan sisya met di manosa sin kailiili isnan daga?  
Ay magay ammo na aya  
yan amin ay ipogaw et sisya mangitdo en daida?
- <sup>11</sup> Ammon Diyos di nemnem da,  
ammo na ay magay silbin di plano da.
- <sup>12</sup> Nagasat din bagbagaam, Apo,  
din itdoam sin bilbilin mo,
- <sup>13</sup> tan waday talnan di nemnem da  
sin timpon di ligat da  
enggana ay maisagana

- din kaot para sin mangam-amag si lawa.  
<sup>14</sup> Din ipogaw mo ay Diyos yan adi ka baybay-an,  
<sup>15</sup> mawadan to kasin di kinalinteg sin pangokoman,  
 et amin ay nalinteg yan en da apolbalan.  
<sup>16</sup> Ay wada aya di sinmalaknib sin mangam-amag si lawa?  
<sup>17</sup> Mo adi ka binmadang ay Diyos, nateyak koma ay nasapa.  
<sup>18</sup> Idi dandani ay matokangak, Apo,  
 inpapigsam sak-en begew sin adi manbalbaliw ay layad mo.  
<sup>19</sup> Mo ad-adoy pandandanagak,  
 wada ka ay lomiwliwa ya omiparagsak.  
<sup>20</sup> Adi ka met mabalin ay makikadwa  
 sin tuturay ay baken kosto di panangokom da  
 ay mangwani en kosto din lawa.  
<sup>21</sup> Manbabadang da ay mamalpaligat sin nalinteg di ogali na,  
 kedngan da ay matey din magay basol na.  
<sup>22</sup> Ngem sik-a, Yahweh ay Diyos ko,  
 di pankamangak ya salaknib ko.  
<sup>23</sup> Ipalak-am mon to en daida  
 di sobalit din lawa ay inam-amag da,  
 dosaem daida begew sin basol da.

## Salmo 95

### 95

#### *Dayawen Ya Onodan Tako Din Manakabalin Ay Diyos*

- <sup>1</sup> Omali kayo ta mankanta ya manragsak tako,  
 ipigsa takon pangdayaw takon Diyos Apo.  
 Maiarig sisyas dakdake ay bato  
 ay pankamangan ta maisalakan tako.  
<sup>2</sup> Emey tako sin sangoanana ay man-iyaman en sisya,  
 manragsak tako ay mangidayaw babaen si kankanta.  
<sup>3</sup> Tan si Yahweh yan manakabalin ay Diyos  
 ya ari ay nangatngato mo din amin ay sinan didiyos.  
<sup>4</sup> Iturayana din intiro ay daga manipod sin kaonegan ay liyang  
 enggana sin dontog ay kakayangan.  
<sup>5</sup> Oka na abe din baybay tan pinarsua na,  
 siya abe din daga ay inamag na.  
<sup>6</sup> Omali kayo ta mandokmog ya manyakog-ong tako  
 ay mandayaw en Yahweh ay namarsua en datako.  
<sup>7</sup> Tan sisya din Diyos tako ya datako di ipogaw na  
 ay maiarig si karnero ay ay-ayowanana.  
 Dengngen yo koma ed wani ay agew din kalin Diyos Apo.  
<sup>8</sup> Kanana, "Adi yo pakenkentegen din nemnem yo  
 ay kaman din inyat di aap-o yo  
 sin agew ay kawada dad Meriba,  
 sin lugar ay magay omili ed Massa.\*  
<sup>9</sup> Isdi ay pinmadpadas din aam-a yo  
 olay inil-ila da din inam-amag ko.  
<sup>10</sup> Opatapolo ay tawen ay sinigsigaak daida.

\* **95:8** Din istorya maipanggep sin naamag ed Meriba ya Massa et matdangan sin Exodo 17:1-7 ya Bilbilang 20:1-13.

Isonga kanak, 'Kankanayon ay masangsangaw das lawa.  
Sigaan da ay mangonod sin bilbilin ko en daida.'

<sup>11</sup> Gapo sin bonget ko inkarik ay adik polos pasgepen daida  
sin pan-illengan ay enak insagana."

## Salmo 96

### 96

#### *Si Diyos Din Kangatoan Ay Ari*

- <sup>1</sup> Ikantaan yos Diyos si baro ay kanta,  
ikantaan yos sisya, amin ay ipogaw isnan daga.
- <sup>2</sup> Dayawen yos sisya babaen sin kanta yo.  
Inag-agew ay dad-aten yo  
din nangisalakananan datako.
- <sup>3</sup> Dad-aten yo sin nanasyon din kinangato na  
ya din nakaskasdaaw ay inam-amag na.
- <sup>4</sup> Tan nangato si Diyos et lebbeng na ay daydayawen yo ay kosto,  
baken odom ay diyos mo adi et sisya anggoy di patgen yo.
- <sup>5</sup> Tan din daydayawen di odom ay nanasyon isnan daga  
et owat sinan didiyos ay magay silbi na,  
ngem si Diyos pay et pinarsua na din am-in ay wadad daya.
- <sup>6</sup> Madaydayaw sisya, mabigbig di kinangato na.  
Din panakabalina ya mankoniniing ay kinadiyos na  
et pon-en da din Timplo na.
- <sup>7</sup> Dayawen yo si Diyos, amin ay nasyon isnan daga,  
bigbigen yo din panakabalin ya kinadiyos na  
<sup>8</sup> ya din madaydayaw ay ngadana.
- Iey yon daton yon sisya  
ya senggep kayo sin Timplo na.
- <sup>9</sup> Mandokmog kayo ay mandayaw en sisya  
ay maptemapteng din kinasanto na.\*  
Manpayegpeg kayo si egyat yo sin sangoanana,  
amin ay ipogaw isnan daga.
- <sup>10</sup> Amin ay nasyon di pangibagaan yo  
ay enggay man-ari si Diyos Apo.  
Insaad na ay kosto din daga et adi maikiwkiweg.  
Din pangokomana sin kaipoipogaw yan nalinteg.
- <sup>11</sup> Manragsak kayo ay wadad daya ya isnan daga,  
manragsak kayo ay baybay ya amin ay linaona,
- <sup>12</sup> dakayo abe ay papayew ya amin ay molmola,  
ibogaw yo din ragsak yo, kakaiw sin kada.
- <sup>13</sup> Manragsak kayo sin omalian Diyos ay mangituray sin daga.  
Magay pabpaborana ya nalinteg di iyat na  
ay mangokom ya mangituray sin ipogaw isnan daga.

## Salmo 97

### 97

#### *Si Diyos Di Kangatoan Ay Manturay*

\* **96:9** Di odom ay kaiologan nina sin Hebreo et: 1) Nasantoan koma di bado yo ay mandayaw en Apo 2) Mandokmog kayo en sisya ay nasantoan, mo sin Timplo di ena panpailaan.

- <sup>1</sup> Si Diyos di manturay isonga manragsak kayo ay ipogaw isnan daga,  
olay dakayo ay wada sin kaaddawian ay soli na.
- <sup>2</sup> Nanliniked di liboo ya bolinget en sisya,  
nalinteg di panangituray na.
- <sup>3</sup> Waday apoy sin sango na,  
et pooana din kalabana ay nanlikob en sisya.
- <sup>4</sup> Masilawan din lobong sin kimat na,  
manpayegpeg din daga ay mangila.
- <sup>5</sup> Din dodontog yan kaman allid ay matenaw da  
sin sangoanan Diyos ay mangituray sin intiro ay daga.
- <sup>6</sup> Din wada ed daya yan ipaammo da din kinalinteg na,  
mailan di amin ay nasyon din kinangato na.
- <sup>7</sup> Amin ay mandayaw si kinitikitan et maibabain da,  
siya abe sin mangit-it-ek si didiyosen ay magay silbi na.  
Amin ay sinan didiyos et manyakog-ong da sin sangoanana.
- <sup>8</sup> Gapo sin panangokom Diyos yan manragsak da  
din ipogaw ed Zion ya Juda.
- <sup>9</sup> Tan si Yahweh di mangituray sin intiro ay daga,  
mo is-o sin didiyosen, addawi ay nangatngatos sisya.
- <sup>10</sup> Laylayden Diyos din manigsigaan sin lawa,  
salaknibana din biyag di ipogaw na  
ya isalakanas daida sin mangam-amag si lawa.
- <sup>11</sup> Masilawan din nalinteg et manragsak da.
- <sup>12</sup> Dakayo ay nalinteg, manragsak kayo  
gapo sin inam-amag di Apo.  
Nemnemen yo din inamag na,  
yan dayawen yo din nasantoan ay ngadana.

## Salmo 98

### 98

#### *Manragsak Tako Tan Nangabak Si Diyos*

- <sup>1</sup> Ikantaan yo si Diyos si baro ay kanta,  
tan nakaskasdaaw din inam-amag na.  
Nangabak sisya ay bokbokod na  
babaen sin nasantoan ay panakabalina.
- <sup>2</sup> Inpaammon Diyos sin nanasyon din ena nangabakan  
ya din kabaelana ay mangisalakan.
- <sup>3</sup> Tinongpal na din kari na sin Israelita,  
kanayon ay napodno en daida  
ya inpappaila na din layad na en daida.  
Amin ay ipogaw sin solin di daga,  
din nangabakan Diyos tako yan inila da.
- <sup>4</sup> Amin ay ipogaw sin daga,  
begew si ragsak yo, ipigsa yo ay mankanta  
ay pangdayaw yo en sisya.
- <sup>5</sup> Kompasnan yo si arpa din kanta yo  
ay mangidaydayaw en Apo.
- <sup>6</sup> Mananggoyob ya manbogaw kayo begew si ragsak yo  
sin sangoanan Diyos ay ari tako.
- <sup>7</sup> Manragsak kayo ay baybay ya amin ay linaona,



manragsak ka ay daga ya amin ay wadan sik-a.

- <sup>8</sup> Dakayo ay ginawang, manpalakpak kayo,  
dakayo ay dontog, man-es-esa kayo  
ay mankanta si ragsak yo sin sangoanan di Apo.
- <sup>9</sup> Tan omal-ali sisya ay mangituray sin daga,  
nalinteg ya magay pabpaborana  
sin pangokomana ya pangiturayana.

## Salmo 99

### 99

#### *Si Diyos Et Manakabalin Ya Nasantoan Ay Ari*

- <sup>1</sup> Manturay si Diyos et manpayegpeg din ipogaw si egyat da.  
Tinmotokdo sin trono na  
sin ngaton di napayakan ay paparsua  
yan manyegyeg din daga.
- <sup>2</sup> Mabigbig di kinangaton Diyos ed Zion,  
iturayana am-in ay ipogaw isnan lobong.
- <sup>3</sup> Amin ay ipogaw yan dayawen da  
din madaydayaw ya kaeegyat ay ngadana.  
Nasantoan sisya!
- <sup>4</sup> Manakabalin ay ari sisya,  
din nalinteg di laylaydena.  
Initdo na ed Israel di kosto ay amagen da,  
initdoanas daida ta somiged di ogali da  
ya magay pabpaboran da.
- <sup>5</sup> Si Yahweh ay Diyos tako, dayawen yos sisya,  
dayawen yo sin sangoanan di trono na.  
Nasantoan sisya!
- <sup>6</sup> Da Moses en Aaron din papadi na,  
si Samuel di esa ay nankarkarag en sisya,  
nankarag dan sisya yan pinatgana.
- <sup>7</sup> Sin natood ay liboo ay kad-ana,  
nakikali en daida.  
Tinongpal da din linteg ya bilbilina  
ay inbaga na en daida.
- <sup>8</sup> Sinongbatan Yahweh ay Diyos din kararag da,  
inpaila na ay manangpakawan ay Diyos sisya,  
ngem dinosa na pay dedan si daida sin basol da.
- <sup>9</sup> Si Yahweh ay Diyos tako, bigbigen yo din kinangato na,  
dayawen yos sisya sin nasantoan ay dontog na,  
tan si Yahweh ay Diyos tako, nasantoan sisya.

## Salmo 100

### 100

#### *Kanta Ay Pangdayaw En Diyos*

- <sup>1</sup> Kaipoipogaw isnan daga, ipigsa yo koma ay mangikanta  
sin pangidaydayawan yo en Diyos ed daya.
- <sup>2</sup> Omali kayo sin sangoanana ay mankankanta,  
naragsak kayo koma ay manaydayaw en sisya.
- <sup>3</sup> Bigbigen yo ay si Yahweh et Diyos Apo.

- Sisyay namarsua en datako et oka nas datako,  
 et kaman takon karnero sin pastolan di Apo.
- <sup>4</sup>Man-iyaman kayo ya dayawen yos sisya  
 mo senggep kayo sin Timplo na.
- <sup>5</sup>Tan si Yahweh et siged sisya.  
 Magay pap-eng din seg-ang ya layad na.  
 Matalek abe si eng-enggana  
 ay manongpal sin amin ay inkari na.

## Salmo 101

### 101

#### *Din Inkarin Di Ari En Diyos*

- <sup>1</sup>Mankantaak maipanggep si kinalinteg ya kinapodno,  
 kantaek paran sik-a, Apo.
- <sup>2</sup>Magay maipabasol to en sak-en sin panagbiyag ko,  
 nalinis abe di biyag ko sin beey ko.  
 Pig-an pay di omaliam en sak-en, Apo?
- <sup>3</sup>Pandokogak to di lawa ay plano ay magay silbi na,  
 sigaak abe din lawa ay ogalin di manokog en sik-a,  
 adiak polos maalinan si kaman nidi ay lawa.
- <sup>4</sup>Addawiak di ipogaw ay nakillo di nemnem na,  
 adiak ipalobos ay komadkadwa da.
- <sup>5</sup>Paginkek to di nalimed ay mangipalawlawwa si gait na,  
 adiak aben anosan din mangipapangatos awak na.
- <sup>6</sup>Din matalek ay ipogaw sin ili di piliek to  
 ay makitee sin beey ko.  
 Din nalinis di biyag na di ipalobos ko  
 ay mansilbi en sak-en, Apo.
- <sup>7</sup>Magay makitee sin beey ko ay maetek,  
 adi da mabalin ay mantee sin sangoanak.
- <sup>8</sup>Inagsapa ay kaanek din laway ogali na sin ili, Apo,  
 ponasek amin ay mangam-amag si baken kosto  
 sin pinilim ay siyodad mo.

## Salmo 102

### 102

#### *Kararag Di Ipogaw Ay Manligligat*

- <sup>1</sup>Apo, dengngem kod nan kararag ko  
 ta patgam nan adawag ko  
 ay mankedaw si badang mo.
- <sup>2</sup>Adi ka kod dokogan sak-en, Apo,  
 sin timpon di ligat ko.  
 Dengngem kod nan kararag ko  
 ta sin timpo ay kedawek din badang mo,  
 songbatam ay dagos, Apo.
- <sup>3</sup>Tan maomas ay kaman asok nan biyag ko,  
 kaman man-atong ay pogon nan awak ko.
- <sup>4</sup>Maiarigak si nango ay logam,  
 enggay magay ganas ko ay mangan.
- <sup>5</sup>Palalo di bayeweng ko,

- owat tong-a ya kodil nan awak ko.
- 6 Kamanak titit sin lugar ay magay omili,  
kamanak kop sin nataynan ya nadadael ay ili.
- 7 Adiak kaseyep olay bomaktadak,  
naladingit ay titit sin toktok di beey di kaiarigak.
- 8 Maninsin-agew ay lomaslasoy din kalaban ko,  
os-osalen das baos din ngadan ko.
- 9 Kamanak mangmangan si dap-o,\*  
din lowak yan pakiin-inom ko
- 10 gapo sin palalo ay bonget mo,  
tan pinidit mos sak-en ya inwasit mo.
- 11 Nan biyag ko yan kaman alidong sin masdem  
ya kaman mangmango ay logam.
- 12 Ngem manturay kas eng-enggana, Apo,  
ya kanayon ay mandinamag din ngadan mo.
- 13 Seg-angam to ed Zion et pomika ka,  
tan dinomteng din kosto ay timpo ay seg-angam sisya.
- 14 Tan olay mo nadadael din siyodad ay sana  
ya enggay naiwalawalang din bato ay amag na,  
patpatgen pay dedan din mansilsilbin sik-a,  
wada met laeng di seg-ang da sin ili da.
- 15 Patgen to din nanasyon sik-a, Apo,  
amin ay ari isnan daga et emegyat dan to  
sin panakabalin mo.
- 16 Tan ipailam din sana ay panakabalin mo  
sin kasin mon pangamagan ed Zion, Apo.
- 17 Awni et dengngem ya patgam to  
din kararag di nabaybay-an ay ipogaw mo.
- 18 Isolat yo din inam-amag di Apo  
ta say din maisokat en datako sin omal-ali ay timpo  
yan dayawen dan to din Apo.
- 19 Isolat yo ay si Diyos et wada  
sin nasantoan ay kad-ana ed daya,  
yan inosdongana din daga
- 20 ta din bayeweng di balod yan dengngena  
ya din nakeddengana ay matey et isalakana.
- 21 Et mandinamag to ed Zion din ngadana,  
ed Jerusalem, daydayawen dan tos sisya
- 22 mo din man-ili sin am-in ay nasyon, matopog dan to  
ay mandayaw en Apo.
- 23 Daanak makay yan inmipakapsot ka, Apo,  
inpaaptik mo din biyag ko.
- 24 Diyos ko, adi ka kod sapaen ay taolien nan biyag ko,  
tan magay pap-eng di biyag mo.
- 25 Ed bayag, insaad mo din lanad di daga  
ya inamag mo am-in ay wadad daya.
- 26 Mamaga dan to ngem sik-a pay yan komakaman ka.  
Kaman dan bado, domaan ya masokatan da,

\* 102:9 Din ogalin di manladladingit ay Judio et en tinmokdo sin kad-an di naiwasit ay dap-o. Piney-ana abes dap-o din toktok na.

tan awni et sokatam daida.  
<sup>27</sup> Ngem mo sik-a pay yan komakaman ka,  
 din biyag mo et magay pap-eng na.  
<sup>28</sup> Din aan-ak mi, dakami ay mansilsilbi en sik-a,  
 awni et natalna di biyag da.  
 Salaknibam to din poli da  
 et maga di pandanagan da.

## Salmo 103

### 103

#### *Din Nakaskasdaaw Ay Layad Diyos*

<sup>1</sup> Idayaw ko si Diyos Apo  
 sin am-in ay kabaelak ya nemnem ko.  
 Idayaw ko din nasantoan ay ngadana.  
<sup>2</sup> Adiak liw-an din ad-ado ay seg-ang na,  
 isonga dadlonak daydayawen sisya.  
<sup>3</sup> Pakawanena am-in ay basbasol ko  
 ya agasana am-in ay sakit ko.  
<sup>4</sup> Sin pese et omilislisi sisya.  
 Bindisyonanas sak-en sin seg-ang ya layad na.  
<sup>5</sup> Ad-ado ay pansigdan di idawat na  
 sin inagew ay panbiyagak isnan daga  
 ta say olay ed wani ay nakayak,  
 kinmakaman din sigod ay pigsak  
 ay kaman din titit ay napigsapigsa  
 ay makwani en agila.  
<sup>6</sup> Itonton Diyos din kalintegan  
 di am-in ay mapalpaligatan.  
<sup>7</sup> Inpaammo nan Moses din plano na,  
 et inilan din Israelita  
 din nakaskasdaaw ay inam-amag na.  
<sup>8</sup> Si Diyos yan managlayad ya managseg-ang.  
 Naanos ya din layad na et komakaman.  
<sup>9</sup> Adi kanayonen Diyos din panyamyamana,  
 ya adi na ililiget din ipogaw na.  
<sup>10</sup> Din dosa ay idawat nan datako  
 et mayap-ew mo is-o sin basol tako.  
<sup>11</sup> Tan kaman din kakayang di ed daya isnan daga  
 di kadakdaken din layad na sin mangipatpateg en sisya.  
<sup>12</sup> Din basbasol tako et enggay pinakawana  
 et palalo ay in-addawi na,  
 kaman nan kaaddawin di belaan di agew sin kadiposana.  
<sup>13</sup> Kaman din iyat di esay ama ay manegseg-ang sin anak na  
 din iyat Diyos ay manegseg-ang sin mangipatpateg en sisya,  
<sup>14</sup> tan ammo na dedan ay sin tapok di napoan tako,  
 et nemnemena din pankapsotan tako.  
<sup>15</sup> Din biyag tako et kaman din biyag di logam.  
 Kaman sabsabong ay maila din kamapteng na sin sinkaattikan,  
<sup>16</sup> tan madageman et makpit, mag-as et maliw-an.  
<sup>17</sup> Ngem din layad Diyos sin mangipatpateg en sisya,

- adi manbalbaliw ya maga di gedeng na.  
<sup>18</sup> Din adi manliwliw-an sin intolag na  
 mo adi et tongtongpalen dan bilbilina,  
 mantoltoloy din kinalinteg na enggana sin apo da.  
<sup>19</sup> Insaad Diyos din panturayana ed daya,  
 am-iam-in yan iturturayana.  
<sup>20</sup> Dayawen yo si Diyos, dakayo ay napipigsa  
 ya manakabalin ay anghel na,  
 dakayo ay manmannge sin ibaga na  
 ya manongtongpal sin bilina.  
<sup>21</sup> Dayawen yo si Diyos, dakayo am-in ay wadad daya  
 ay baa na ay mangon-onod sin panlaydana.  
<sup>22</sup> Dayawen yos Diyos, dakayo am-in ay pinarsua na  
 sin am-in ay lugar ay iturturayana.  
 Dayawek si Diyos sin am-in ay nemnem ko.

## Salmo 104

### 104

#### *Din Kinangaton Diyos Ay Namarsua*

- <sup>1</sup> Yahweh ay Diyos ko, dayawek sik-a,  
 tan tet-ewa ay manakabalin ka.  
 Dayaw ya kinangato, naipabadon sik-a,  
<sup>2</sup> manliniked en sik-a di pat-a.  
 Ed daya yan inoklag mo ay kaman tolda.  
<sup>3</sup> Insaad mo din beey mo sin danom ay wada ed daya.\*  
 Manlogan ka sin liboo ya mapges ay dagem ay kaman mon kalisa.  
<sup>4</sup> Din dagem ya kimat yan ibaam daida.  
<sup>5</sup> Inset mo ay insaad din daga  
 et maga polos di kaikiwegana.  
<sup>6</sup> Kaman mon binadoan si baybay ay malosong  
 et din dontog yan nilim-otan di danom.  
<sup>7</sup> Asi kan bilinen din danom et dinmenden da.  
<sup>8</sup> Sin dontog ya tanap yan inmayos da  
 enggana sin insaganam ay pantean da.  
<sup>9</sup> Inkeddeng moy gedeng da  
 ta say adi da mantaoli ay manlim-ot sin daga.  
<sup>10</sup> Inpawadam sin tanap di obbog,  
 et man-ayos da sin nan-gawaan di dontog.  
<sup>11</sup> Man-inom amin din atap ay animal isdi,  
 siya abe di pan-inoman din atap ay dangki.  
<sup>12</sup> Sin kakaiw sin benget da,  
 man-obong di titit ya mankanta da.  
<sup>13</sup> Manipod ed daya ay kad-am,  
 sibsibogam din dontog si odan,  
 et mapnek si bindisyon mo nan daga ay pinarsuam.  
<sup>14</sup> Inpagabay mo din logam para sin baka  
 ya molmola ay pangaan di ipogaw si kasapolan da,  
<sup>15</sup> ta mawada di arak ay panragsakan da,  
 lana ay mangipapteng sin ropa da,

\* **104:3** Ilaen din footnote sin Genesis 1:7-8.

- ya makan ay mangipabikas en daida.
- 16 Din kakaiw Diyos et masibogan da,  
din makwani en sidro ed Lebanon ay inpagabay na.
- 17 Din kinittoy ay titit yan isdi ay man-obong da,  
siya abe din dadakke sin kakayangan ay panga da.
- 18 Din atap ay kalding et sin nakayang ay dontog di pantean da,  
sin deppas yan panbeeyan di bewet ay kanan da.
- 19 Pinarsuam din bowan ay waday pan-inatana ya bemeskaana  
ta say din timpo et waday kailasinana.  
Din agew yan ammo na din oras ay kadiposana.
- 20 Inpawadam di bolinget et siya din labi ay kanan da,  
say bomalaan di atap ay animal sin kada.
- 21 Manngaed din bomaro ay layon ay manganap si anopen da,  
an-anapen da din indawat Diyos ay kanen da.
- 22 Mo bomala din agew yan mantaoli da  
sin liyang ay pantean da.
- 23 Din ipogaw abe yan bomala da  
ay maninsin-agew da ay man-obla.
- 24 Apo Diyos, napno nan daga sin adi kabilang ay inamag mo.  
Inamag mo amin babaen sin laing mo.
- 25 Wada abe din baybay ay adi kalokod din kaannawa na.  
Adi kabilang di manbibiyag isdi ay parsua,  
kinittoy ya dadakke da.
- 26 Din bapor yan isdi di en da panbiyahian.  
Isdi abe di pan-ay-ayaman  
din dakdake ay dragon ono bowaya ay pinarsuam  
ay makwani en Leviatan.
- 27 Amin ay parsua et sik-a din pannamnamaan da  
ay mangidawat si kanen da sin kosto ay timpo na.
- 28 Idawdawat mo din kanen di esa ya esa,  
et mangan da enggana ay mabsog da.
- 29 Emegyat da mo taynam daida.  
Matey da mo pasaldengem din leng-ag da  
et mantaoli da sin tapok ay napoan da.
- 30 Ngem babaen sin Ispiritom,† manparsua kas maiskat en daida,  
et wada kasin di matago isnan labaw di daga.
- 31 Apo Diyos, maipaila koma di panakabalin mo si eng-enggana  
ya malaydan ka koma sin pinarsuam isnan daga.
- 32 Manyegyeg din daga mo ilaem,  
omasok din dontog mo giwitem.
- 33 Mankantaak ta idaydayaw kos sik-a ay Diyos  
enggana ay nan leng-ag ko, malongbos.
- 34 Mapnek ka koma isnan kansiyon ko,  
tan sik-a di poon di ragsak ko.
- 35 Ikararag ko ay kaanem koma  
din managbasol isnan daga.  
Apo Diyos, idaydayaw kos sik-a!  
Tet-ewa ay madaydayaw ka!

† 104:30 Di esa abe ay kaiologan nina sin Hebreo et: Ngem babaen sin leng-ag mo, ...



## Salmo 105

### 105

#### *Matalek Si Diyos*

- <sup>1</sup> Man-iyaman kayo en Diyos ay wadad daya.  
 Idaddad-at yo din nakaskasdaaw ay kinadiyos na,  
 dad-aten yo sin kaipoipogaw din inam-amag na.
- <sup>2</sup> Idayaw yo si Diyos sin kankanta,  
 dad-aten yo din nakaskasdaaw ay inam-amag na.
- <sup>3</sup> It-ek yo din nasantoan ay ngadana,  
 manragsak kayo ay mandaydayaw en sisya.
- <sup>4</sup> Si Diyos di pankamangan yo  
 ya kanayon ay daydayawen yo.
- <sup>5</sup> Nemnemen yo din nakaskasdaaw ay inam-amag na  
 ya din dosa ay inkeddeng na,
- <sup>6</sup> dakayo ay polin Abraham ay baa na  
 ya siya abe en Jacob ay pinili na.
- <sup>7</sup> Si Yahweh et Diyos takos sisya.  
 Din ikeddeng na et maipaammo sin intiro ay daga.
- <sup>8</sup> Adi na polos liw-an din intolag na si eng-enggana,  
 siya abe sin inkari na, tan sigurado ay tongpalena.
- <sup>9-10</sup> Et siya na din adi manbalbaliw ay inkari na  
 en da Abraham, Isaac ya si Jacob ay aap-o tako ay Israelita.
- <sup>11</sup> Kanana, “Din daga ed Canaan et idawat ko en dakayo,  
 et say ipatawid yo sin ipoli yon to.”
- <sup>12</sup> At-atik da din ipogaw Diyos ed idi,  
 din kaibilangan da ed Canaan yan mangili,  
<sup>13</sup> tan nan-etaetan da sin inil-ili.
- <sup>14</sup> Ngem adi inpalobos Diyos ay waday mamaligat en daida.  
 Binagbagaana di aari ta masalakniban din ipogaw na.
- <sup>15</sup> Kanana, “Adi yon palpaligaten din pinilik ay baa,  
 din pankalkaliak yan bay-an yos daida.”
- <sup>16</sup> Inpawadan Diyos di betil sin daga da,  
 et maga polos di kanen da.
- <sup>17</sup> Ngem wada di inbaa na  
 ed Egipto ay namangpango mo daida,  
 si Jose ay nanbalin si bag-en tan inlakon din aag-i na.
- <sup>18</sup> Inbalod din taga-Egipto et kinadinaan dan siki na,  
 wada abey landok ay inpaiekeke da,
- <sup>19</sup> enggana ay tinmet-ewa din inpadto na  
 ya nakdeng ay pinadpadas Diyos sisya.\*
- <sup>20</sup> Pag wayawayaan din ari ay mangituray ed Egiptos sisya.  
<sup>21</sup> Dinotokanas Jose ay panakaawak na  
 ta say mangituray sin ili da  
<sup>22</sup> ya makaammo ay mangitdo ya mamagbaga  
 sin oopisyal na.
- <sup>23</sup> Pag omonod si Jacob ed Egipto et isdi di nanbeeyana.  
<sup>24</sup> Indawtan Diyos si ad-ado ay anak din poli na

\* **105:19** Di esa abe ay kaiologan nina sin Hebreo et: pinaneknekan Diyos ay nalinteg sisya.

- et pinapigsa nas daida mo din kalaban da.
- 25 Inturong na din nemnem di taga-Egipto ay kalaban da  
ta iliget ya sikapan da din ipogaw na,  
26 ngem inbaa nas da Moses en Aaron ay pinili na  
ta ed Egipto di emeyan da.
- 27 Idi dinmateng das di, ad-ado di inpaila da  
ay sinyal ya milagro ay inpaamag Diyos en daida.
- 28 Inpabolinget Diyos din ili da,  
ngem adi pinatin din taga-Egipto din bilina.
- 29 Nanbalinena si dada din danom sin ginawang da,  
et natey amin din nigay ay wada.
- 30 Napno si tokak din ili da,  
pati sin palasyo yan napno da.
- 31 Inbilin Diyos ay lallaeg ya tilang di mawada,  
et napno din intiro ay daga da.
- 32 Baken odan mo adi et dalalo ya kimat di inbaa na sin ili da,  
33 et nadadael din obas ya igos ay prutas da  
dowan aben naspak am-in di kaiw da.
- 34 Inbilina et adi kabilang ay dodon di nawada,  
35 et kinan da amin ay mola  
ay ginmabgabay sin dagan di taga-Egipto ay kad-an da.
- 36 Pinse na din besag ay lalaki sin amin ay pamilya da.
- 37 Idi makedang di, inpango na din Israelita ay ipogaw na,  
ay pag da amin nasalon-at ya napigsa,  
et kinmaan da ay nangitakin si balitok ya palata.
- 38 Peteg di layad din taga-Egipto sin kinmaan da  
tan egyatan das daida.
- 39 Inpawadan Diyos di liboo ay manlidom sin ipogaw na  
ya apoy sin labi ay mangsilaw en daida.
- 40 Nankedaw da et indawtan Diyos si daida  
si titit† ya makan ay napod daya ta mapnek da.
- 41 Idi magay danom si pan-inoman da,  
waday bato ay nan-ekangena,  
et nan-ayos di danom ay kaman ginawang  
sin lugar ay kad-an da ay kadardaratan.‡
- 42 Adi niliw-an Diyos din napateg ay inkari na  
en Abraham ay baa na.
- 43 Isonga inpango na din pinili na ay ipogaw na,  
et nankankanta das palalo ay ragsak da  
sin kinmaan da sin ili ay naibag-enan da.
- 44 Din dagan di odom ay ipogaw di indawat na en daida,  
din inling-etan di odom, inpalobos na ay okaen da.
- 45 Inamag Diyos di ta say tongpalen din ipogaw na  
din amin ay linteg ya bilbilina.  
Si Diyos et madaydayaw koma!

## Salmo 106

† 105:40 Exodo 16:13 ya Bilbilang 11:31-34. ‡ 105:41 Din istorya ay nay et matdangan sin Exodo 17:1-6.

## 106

### *Din Layad Diyos Ya Din Nanbasbasolan Di Ipogaw Na*

- <sup>1</sup> Madaydayaw din Apo!  
 Man-iyaman kayon Diyos tan siged sisya,  
 magay pap-eng din adi manbalbaliw ay layad na.
- <sup>2</sup> Ay wada aya di makaibaga  
 amin sin nakaskasdaaw ay inam-amag na?  
 Sino ngata di mabalin ay mandayaw ay kosto en sisya?
- <sup>3</sup> Nagasat din mantongpal sin bilina  
 ay kanayon ay din kosto di amagena.
- <sup>4</sup> Nemnemem komas sak-en, Apo,  
 sin pamadangam si ipogaw mo.  
 Omitapi ka koma sin pangisalaman en daida  
<sup>5</sup> ta ilaek din somigedan di biyag da  
 ya makiragsakak sin peteg ay ragsak da  
 gapo ta ipogaw mos daida.
- <sup>6</sup> Nanbasol kami ay kaman din aam-a mi,  
 lawa kayman di inam-amag mi.
- <sup>7</sup> Sin kawadan di aam-a mi ed Egipto,  
 adi da inawatan din nakaskasdaaw ay inam-amag mo.  
 Nilinglingan da din namin ado  
 ay nangipailaam en daida si layad mo.  
 Sik-a ay Kangatoan yan kinontra da  
 sin Baybay ay Mandalangdang\* ay kanan da.
- <sup>8</sup> Ngem olay siya di, insalakanas daida  
 ta ipaila na din kaeegyat ay panakabalina  
 ta say madaydayaw din ngadana.
- <sup>9</sup> Binilina din Baybay ay Mandalangdang et namgaan tet-ewa.  
 Inpango na ay manbalasat din ipogaw na  
 et namgaan di nandad-anan da.
- <sup>10</sup> Insalakanas daida sin panakabalin di kalaban da.
- <sup>11</sup> Ngem din kalaban da et nalned da,  
 magay olay esa ay nabay-an en daida.
- <sup>12</sup> Pag patien din ipogaw na din inbaga na  
 et nankanta da ay nangidayaw en sisya.
- <sup>13</sup> Ngem nilinglingan da ay dagos din inamag na,  
 adi da anosan ay sed-en din plano na.
- <sup>14</sup> Sin lugar ay magay omili, palalo di aklong da  
 et si Diyos yan pinadas da.
- <sup>15</sup> Et indawat na din kindaw da,  
 ngem inpawada na abe di kaeegyat ay sakit da.
- <sup>16</sup> Idi inapalan di odom da Moses en Aaron ay pinili na,  
<sup>17</sup> nan-ekang din lota et inokmona  
 da Daton en Abiram ya din gagait da.
- <sup>18</sup> Nawaday apoy ay binmaba sin pasolot da,  
 et pinooana nan managbasol ay nay da.
- <sup>19</sup> Nan-amag dad Sinai† si balitok ay sinan baka

\* **106:7** Siya na di ngadana sin LXX ya Baro ay Tolag. Din kanana sin Hebreo et: Baybay ay Katantanobongan.

† **106:19** Din kanana sin Hebreo et: Horeb. Di esa ay ngadana et Sinai.

- et say dinaydayaw da.
- 20 Nanlaslasinen da mo din kinadiyos na  
din ladawan di baka ay logam di kankanena.
- 21 Nilinglingan da si Diyos ay nangisalakan en daida,  
ed Egipto yan nakaskasdaaw di inam-amag na.
- 22 Nakaskasdaaw din inamag na sin sana ay ilin Ham  
ya sin Baybay ay Mandalangdang.
- 23 Idi kanan Diyos en dosaena din ipogaw na,  
nakikali si Moses en sisya  
ta adi na itoloy ay dosaen daida  
gapo sin bonget na.
- 24 Nilalasoy da din maymayat ay daga,  
tan adi da nantalek sin kari na.
- 25 Nanmaymayotmot da sin kampo da,  
adi dan pinatpati din kali na.
- 26 Isonga insapata na ay dosaenas daida  
ta sin lugar ay magay omili et say kateyan da  
<sup>27</sup> ya pansisianena sin kailili din poli da.
- 28 Idi siya di, ed Peor yan nakidaydayaw da  
en Baal ya nangan da  
si naidaton si didiyosen ay magay biyag na.
- 29 Inpabonget das Diyos gapo sin inam-amag da,  
et nawada di kaeegyat ay sakit en daida.
- 30 Ngem pinmika si Finehas et dinosa na  
din binmasol en daida,  
pag somaldeng din sakit ay sana.
- 31 Et maibilang di ay kinalinteg na  
engganans tapin di agew ay magay pap-eng na.
- 32 Inpabonget das Diyos sin kad-an di obbog ed Meriba  
et nadosas Moses gapo en daida.
- 33 Tan si Moses et palalo ay inpabonget da  
et adi nan inannadan din kinali na.
- 34 Adi da pinse din nanasyon ay inbilin Diyos ay peslen da,  
<sup>35</sup> ngem nakiasawa da et en daida  
et tinadon da din am-amagen da.
- 36 Dinayaw da din didiyosen da  
et kaman tagdey ay say nadadaelan da.
- 37 Sin dimonyo yan indaton da  
din lallalaki ya babbabai ay an-ak da.
- 38 Pinse da san aan-ak da ay magay basol da,  
et kinmadodogis din daga begew sin basol da ay sana.
- 39 Kinmadodogis da begew sin inamag da,  
kaiarigan da di manakikamalala.
- 40 Isonga binmonget si Diyos sin ipogaw na  
ya kalkaliget nas daida.
- 41 Binaybay-ana ay abaken di odom ay nasyon daida  
ya inturayan din kalaban da.
- 42 Pinalpaligat din kalaban da,  
dadlon dan inturayan daida.
- 43 Namin ado ay insalakanas daida,

ngem paagposen da din komontraan dan sisya  
 et nadadael din biyag da gapo sin basol da.  
 44 Ngem olay siya di, dinnge na din adawag da  
 et inila na din ligat da.  
 45 Gapo en daida, ninemnem na din intolag na,  
 et ginedngana din ligat da  
 gapo sin dakdake ya adi manbalbaliw ay layad na.  
 46 Inturong na ay seg-angan din am-in ay akin balod en daida.  
 47 Yahweh ay Diyos mi, isalakan mo kod dakami  
 ya taoliem dakami ay mapo sin kailiili  
 ta man-iyaman kamin sik-a ay nasantoan di ngadana  
 ya maragsakan kami ay mangidayaw en sik-a.  
 48 Madaydayaw ka si eng-enggana,  
 Yahweh ay Diyos di Israelita.  
 Amin koma ay ipogaw yan "Amen," kanan da.  
 Madaydayaw din Apo.

## Salmo 107

### 107

#### *Iyaman Sin Kinasiged En Diyos*

1 Man-iyaman tako en Diyos tan siged sisya,  
 ya magay pap-eng din adi manbalbaliw ay layad na.  
 2 Dakayo ay insalakan Diyos, ibagbaga yo koma  
 din peteg ay layad yo ay man-iyaman en sisya.  
 Insalakanas dakayo sin kalaban yo  
 3 et manipod sin amin ay solin di lobong, sininop nas dakayo.  
 4 Din odom et linmikeliked da sin lugar ay magay omili,  
 ngem magay maanapan da si pantean da ay ili.  
 5 Enggay nakaan din namnama da  
 gapo sin dagaang ya bigaw da.  
 6 Ngem idi maligligatan da,  
 nankedaw da si badang Diyos ed daya,  
 et insalakanas daida sin doy ay ligat da.  
 7 Inturong nas daida sin kosto ay pandanan da  
 enggana ay dinmateng da sin ili ay pantean da.  
 8 Man-iyaman da koma en Diyos sin adi manbalbaliw ay layad na  
 ya din nakaskasdaaw ay inam-amag na para en daida.  
 9 Tan olay sino ay manbigaw yan pan-inomena,  
 ya olay sino ay mandagaang yan pakanena.  
 10 Enggay mabolinget di kad-an di odom en daida,  
 nabalod da et nakadinaan da,  
 11 gapo ta kinontra da ya en da sinigaan  
 din bilbilin Diyos ay Kangatoan.  
 12 Inpababa na di nemnem da sin naligat ay obla da.  
 Idi naisokba da, magay bomadang en daida.  
 13 Ngem nankedaw da si badang Diyos sin ligat da ay sana  
 et insalakanas daida.  
 14 Winayawayaanas daida sin mabolinget ay kad-an da,  
 ya sinokpot na din kadina ay namabalod en daida.  
 15 Man-iyaman da koma en Diyos sin adi manbalbaliw ay layad na,

- ya din nakaskasdaaw ay inam-amag na para en daida.
- 16 Tan din bronsi ay eneb yan dinadael na  
ya din nanbabag ay landok et ginotlo na.
- 17 Waday odom ay naong-ong et nadosa da  
begew sin basbasol da.
- 18 Isonga amin ay makan yan sigsigaan da  
et dandani di kateyan da.
- 19 Ngem nankedaw da si badang Diyos sin sana ay ligat da  
et insalakanas daida.
- 20 Inbilina et naagasan da,  
isonga naisalakan da sin kateyan da koma.
- 21 Man-iyaman da koma en Diyos sin adi manbalbaliw ay layad na,  
ya din nakaskasdaaw ay inam-amag na para en daida.
- 22 Masapol abe ay man-idaton da en Diyos si pan-iyamanan da  
ya manragsak da ay mangikankanta sin inam-amag na.
- 23 Din odom yan wada da sin bapor sin baybay ay makilaglagbo,  
<sup>24</sup> et inila da din nakaskasdaaw ay inamag Diyos Apo.
- 25 Tan inbilina ay mandagem si napigsa,  
et dadakke ay dalloyon di nawada.
- 26 Dinalapos da din bapor et komayang ya bomaba,  
et enggay nakaan din namnama da.
- 27 Mandapidapig da ay kaman ad-adoy ininom da,  
et magay silbin din laing da.
- 28 Ngem nankedaw da si badang Diyos sin ligat da  
et insalakanas daida,  
<sup>29</sup> tan inpaginek na din pewek ya dalloyon ay sana.
- 30 Peteg di layad da tan din baybay yan tinmalna,  
yan inturong Diyos daida sin kosto ay pansangladan da.
- 31 Lebbeng na koma ay man-iyaman da  
gapo sin adi manbalbaliw ay layad na,  
ya din nakaskasdaaw ay inam-amag na para en daida.
- 32 Idaydayaw da koma din kinangato na  
mo matopog din kaipoipogaw ya din papangolo da.
- 33 Mabalin ay mamgaan din ginawang mo laydena,  
ya din obbog yan mabalin ay pasaldengena.
- 34 Kabaelana ay panbalinen din siged ay lota si magay silsilbi na  
gapo sin basol di man-ili sin isdi ay daga.
- 35 Ngem kabaelana abe ay pawadaen di posong sin kadardaratan  
ya obbog sin lugar ay nanamgaan.
- 36 Ipalobos na ay isdi di pantean  
din ipogaw ay madagdagaangan,  
et isaad da di siyodad ay en da panbeeyan.
- 37 Molaan da din papayew ya kaobasan da,  
et ad-ado di apiten da.
- 38 Bindisyonana din ipogaw na et omad-ado din an-ak da.  
Ayowanana abe din baka da  
ta magay makolkolangan en daida.
- 39 Mo maabak din ipogaw Diyos ya maibabain da  
gapo sin palalo ay pamalpaligatan di kalaban da,
- 40 ipailan Diyos din liget na sin mamalpaligat en daida



et dosaenas daida ta say lomikeliked da  
sin kadardaratan ay magay kosto ay pandanan da.

<sup>41</sup> Ngem din maligligatan et isalakana,  
et paad-adoena din anak da.

<sup>42</sup> Malaylaydan da din nalinteg ay makaawat isna,  
ngem din managbasol et maga di maibaga da.

<sup>43</sup> Din nalaing ay ipogaw yan nemnemen da koma dana,  
ta say kosto ay maawatan da  
din adi manbalbaliw ay layad Diyos ay magay pap-eng na.

## Salmo 108

### 108

*Kararag Ta Abaken Diyos Din Kagobat Da*

<sup>1-2</sup> Apo, napodnoak en sik-a  
et mankantaak ay mangidayaw en sik-a.

Bomangonak ay masapa  
ta tokarek din gitara ya arpa.

<sup>3</sup> Sin sangoanan di kaipoipogaw, man-iyamanak en sik-a,  
ikantak di maipanggep en sik-a.

<sup>4</sup> Labsana ed daya din adi manbalbaliw ay layad mo,  
din kinamatalek mo yan edasana din liboo.

<sup>5</sup> Apo, din kinangatom ya panakabalin mo et ipailam koma  
sin am-in ay soli ed langit ya isnan daga.

<sup>6</sup> Songbatam kod din kararag ko,  
isalakan mos dakami ay laylaydem ay ipogaw mo  
babaen sin panakabalin mo.

<sup>7</sup> Sin Timplom yan kanam, Apo,  
“Mo makdeng ay mangabakak, bingayek to  
ed Sekem ya tanap ed Succot sin ipogaw ko.

<sup>8</sup> Ed Gilead ya Manasses yan okak daida,  
ed Efraim yan helmet ko di kaiarigana,  
sinyal aben di turay ko ed Juda.

<sup>9</sup> Ed Moab yan kaman palanggana ay pan-owasak,  
ed Edom abe yan bag-en ay iturayak.  
Abakek ed Filistia et manbogawak.”

<sup>10</sup> Sino pay di omiey sin siyodad ay naaladan, Apo?  
Ed Edom, sino di omipango?

<sup>11</sup> Apo, ay tan enggay dinokogam tet-ewas dakami?  
Ay adi ka ipango ay makigobat din sosoldado mi?

<sup>12</sup> Sin kalaban mi, bomadang ka koma,  
tan din badang di ipogaw et magay silbi na.

<sup>13</sup> Mangabak kami mo wada ka ay kadwa mi,  
tan sik-ay mangabak sin kalaban mi.

## Salmo 109

### 109

*Kararag Di Ipogaw Ta Dosaen Diyos Din Kaibaw Na*

<sup>1</sup> Diyos ay daydayawek,  
adi ka koman gomiginek.

<sup>2</sup> Tan din lawa di nemnem da

- yan man-etek da ta omipalawlawwa da.
- <sup>3</sup> Lomikob da yan mankali das lawa gapo si liget da,  
omibaw da olay magay gapo na.
- <sup>4</sup> Say sobalit da sin layad kon daida  
din omipabasbasolan da,  
olay mo ikarkararagak daida.
- <sup>5</sup> Lawa ya liget di sobalit da  
sin kinasiged ya layad ko en daida.
- <sup>6</sup> Mandotok ka si howis ay lawlawwa  
ay mangokom sin kaibaw ko ay sana,  
pawadaem koma di mangidarum en sisya.
- <sup>7</sup> Okomen da komas sisya  
yan mapaneknekan ay waday basol na,  
maibilang koma abe ay basol din kararag na.
- <sup>8</sup> Aptik koma din biyag na  
ya maiskat di odom sin saad na  
<sup>9</sup> ta maolila din aan-ak na  
ya malasang din asawa na.
- <sup>10</sup> Lomikeliked da koma ay manpalimos din aan-ak na,  
maipakaan da sin nadadael ay beey da.
- <sup>11</sup> Sapay koma ta din nangiotang en sisya  
yan alaena amin ay sanikwa na  
ya alaen di mangili amin ay in-oblaana.
- <sup>12</sup> Sapay koma ta maga polos di maseg-ang en sisya  
ya sin naolila ay aan-ak na.
- <sup>13</sup> Matey koma amin din anak na  
ta maponas din ngadana manipod sin timpo da.
- <sup>14</sup> Nemnemen koman Diyos din basbasol di ap-apo na  
ya adi polos mapakawan din basol ina na.
- <sup>15</sup> Polos koma ay adi linglingan Diyos din basbasol da,  
ngem pap-engena pay koma  
di kanemnemneman din ngadan da isnan daga.
- <sup>16</sup> Maga polos di seg-ang na,  
pinaligat na ya pinse na  
din nabiteg, kakkaasi ya nadismaya.
- <sup>17</sup> Laylaydena ay manbaos, isonga mabaosan koma,  
sigaana ay mankedaw si bindisyon Diyos para sin iib-a na,  
et adi koma mabindisyonan sisya.
- <sup>18</sup> Kaman din kalakan di panbadoana,  
nalaka abe ay manbaos sisya.  
Kaman koma din danom ay inomena  
ay omoneg sin awak na din baos na  
yan kaman lana ay omoneg sin tong-a na.
- <sup>19</sup> Kaman koman bado ya bilko ay komakaman sin awak na.
- <sup>20</sup> Say iyat mo koma ay manosa, Apo,  
sin mangipalawlawwa en sak-en ay kalaban ko.
- <sup>21</sup> Ngem sik-a, Yahweh ay Diyos ko,  
bomadang ka koma ta say madaydayaw din ngadan mo,  
omisalakan ka gapo sin kinasiged mo  
ya adi manbalbaliw ay layad mo.

- 22 Tan nay kakkaasiak ya palaloy sakit di nemnem ko.  
 23 Dandani ay mamagaak ay kaman alidong sin masdem  
 ya kaman dodon ay itayaw di dagem.  
 24 Nakapsot nan peweg ko gapo si dagaang ko,  
 enggay mabilang di tadlang ko.  
 25 Somiyek ya manwegweg din ipogaw ay omila.  
 26 Yahweh ay Diyos ko, bomadang ka koma,  
 begew sin adi manbalbaliw ay layad mo, omisalakan ka.  
 27 Ipaammom koma sin kalaban ko  
 ay sik-a din omisalakan, Apo.  
 28 Mabalín ay bomaos da,  
 ngem sik-a pay yan bomindisyon ka.  
 Sapay koma ta maabak din pomalpaligat,  
 ngem sak-en pay ay mansilbilin sik-a yan manragsakak.  
 29 Kaman da koman malned si bain da din kalaban ko,  
 din bain da yan kaman dan inbabado.  
 30 Apo, ipidwapidwak ay man-iyaman en sik-a,  
 sin sangoanan di gimong, idaydayaw kos sik-a.  
 31 Tan din kakkaasi yan ikalintegam,  
 isalakan mo sin mangikeddeng si ena kateyan.

## Salmo 110

### 110

#### *Din Pinilin Diyos Ay Ari Ya Padi*

- 1 Kanan Diyos en Apok, “Tomokdo ka sin makannawan ko  
 enggana ay abakek din kaibaw mo.”  
 2 Si Diyos ed Zion, idawat nan panakabalin mo  
 ay mangituray sin kalaban mo.  
 3 Nakasagana ay makigobat din ipogaw mo  
 mo ipangom daida ay mangobat sin kalaban mo  
 sin nasantaon ay dontog mo.  
 Kaman din dono sin agsapa  
 din babbaro ay ipogaw mo ay emey en sik-a.\*  
 4 Insapatan Diyos et adi na ibabawi din kanana,  
 “Kaman din kinapadin Melkizedek, padi ka ay eng-enggana.”  
 5 Wada si Diyos Apo  
 sin makannawan mo.  
 Mo domteng di timpo ay ipaila na din bonget na,  
 aari yan abakena.  
 6 Okomena din nanasyon yan pis-itenan toktok da,  
 kawanalang din bangkay da sin intiro ay daga.  
 7 Man-inom sisya sin ginawang ay labsana.  
 Gapo amin dana, mangabak sisya.

## Salmo 111

### 111

#### *Kanta Ay Pangidayaw En Diyos*

\* **110:3** Di esa abe ay kaiologan nina sin Hebreo et: Dayaw di ari, sigod ay wadan sik-a sin timpo ay naianak ka. Manipod sin naisikog ka ya sin kakitkitooy mo, nadiyosan di dayaw mo.

- <sup>1</sup> Madaydayaw si Diyos!  
 Naimposoan ay man-iyamanak en sisya  
 sin gimong di nalinteg ay ipogaw na.
- <sup>2</sup> Nakaskasdaaw din amin ay inam-amag na,  
 ad-adalen din amin ay maragsakan gapo en dana.
- <sup>3</sup> Maipaila din dayaw ya kinangato na  
 sin amin ay amagena,  
 magay pap-eng din kinalinteg na.
- <sup>4</sup> Adi na bay-an ay maliw-an din nakaskasdaaw ay inamag na,  
 managseg-ang sisya.
- <sup>5</sup> Idawat nay kanen din mangipateg ya emegyat en sisya,  
 adi na linglingan din intolag na.
- <sup>6</sup> Inpaila na di panakabalina sin ipogaw na,  
 tan din dagan di odom ay nasyon yan indawat nan daida.
- <sup>7</sup> Napodno ya nalinteg sisya sin amin ay amagena,  
 matalek amin ay bilina
- <sup>8</sup> ya komakaman si eng-enggana.  
 Say inamag Diyos din nalinteg ya tet-ewa  
 sin nangipaammoana sin bilbilin ay nay da.
- <sup>9</sup> Winayawayaana din ipogaw na  
 yan waday intolag na ay komakaman si eng-enggana.  
 Nasantoan ya manakabalin sisya.
- <sup>10</sup> Say panlogian di somiriban  
 mo si Diyos yan patgen ya egyatan.  
 Indawtana si panakaawat din amin ay mantongpal en sisya,  
 madaydayaw sisya si eng-enggana.

## Salmo 112

### 112

#### *Din Bindisyon Di Nalinteg Ay Ipogaw*

- <sup>1</sup> Madaydayaw din Apo!  
 Nagasat din mangipateg ya emegyat en sisya  
 ya malaydan ay mantongpal sin bilbilina.
- <sup>2</sup> Mabigbig to sin daga din poli na,  
 din polin di nalinteg yan mabindisyonan da.
- <sup>3</sup> Bomaknang to din pamilya na,  
 yan komakaman din kinalinteg na si eng-enggana.
- <sup>4</sup> Din managseg-ang ya nalinteg di ogali na,  
 olay mo sin mabolinget di kad-ana,  
 masilawan pay dedan sisya.\*
- <sup>5</sup> Nagasat din managpabolod sin gagait na  
 ya maga di sowitik na.
- <sup>6</sup> Tan din nalinteg yan maga polos di kaisokbaana,  
 polos ay adi malinglingan sisya.
- <sup>7</sup> Adi emegyat si lawa ay maipadamag en sisya,  
 tan mantalek en Diyos, napigsa di pammati na.
- <sup>8</sup> Adi mandanag ono emegyat sisya,  
 awni et ilaena din kaabakan di kalabana.

\* **112:4** Di esa abe ay kaiologan nina sin Hebreo et: Silaw sin mabolinget di kaiarigana para sin iib-a na ay nalinteg abe di ogali na, tan managseg-ang ya nalinteg sisya.

- <sup>9</sup> Kaidawadawat sin nabiteg, magay pap-eng din seg-ang na,  
awni et manturay ya mabigbig sisya.
- <sup>10</sup> Din lawa di ogali da yan manbonget da ay mangila,  
palalo di liget ya dismaya da.
- Awni et mamaga da  
et adi polos matongpal din namnamaen da.

## Salmo 113

### 113

#### *Kanta Ay Pangidayaw En Diyos Ay Managseg-ang*

- <sup>1</sup> Madaydayaw din Apo!  
Dakayo ay mansilbilbin sisya,  
dayawen yos sisya.
- <sup>2</sup> Madaydayaw koma din ngadana  
ed wani ya si eng-enggana.
- <sup>3</sup> Manipod sin balaan di agew enggana sin diposana,  
madaydayaw koma din ngadana.
- <sup>4</sup> Iturayan Diyos din intiro ay daga,  
din kinangato na yan nangatangato mo ed daya.
- <sup>5</sup> Si Yahweh ay Diyos tako yan magay makaiso en sisya.
- <sup>6</sup> Nangatongato din trono na,  
ngem manyakog-ong ta osdongana  
din kad-an di talaw ed daya ya nan daga.
- <sup>7</sup> Badangana din nabiteg sin ligat da,  
et pasigedena din biyag da.
- <sup>8</sup> Patokdoenas daida sin kad-an di mabigbigbig ay ipogaw na.
- <sup>9</sup> Idawtana din basig ay babai si an-ak na,  
et maragsakan sisya sin beey na.
- Madaydayaw din Apo!

## Salmo 114

### 114

#### *Maipanggep Sin Kinmaan Din Israelita Ed Egipto*

- <sup>1</sup> Idi kinmaan din polin Jacob ay Israelita  
ed Egipto ay ilin di adi kaaw-awatan di kali da,
- <sup>2</sup> nanbalinen Diyos ed Juda ay pandayawan dan sisya,  
ya inturayana din Israelita.
- <sup>3</sup> Linmayaw din baybay sin nangilaanan Diyos,  
din ginawang ay Jordan yan sinmaldeng ay man-ayos.
- <sup>4</sup> Din dontog ya bilbilig yan nanyegyeg da,  
manlaglagto ay kalding ono karnero di kaiarigan da.
- <sup>5</sup> Apay nga sik-a ay baybay yan linmayaw ka,  
ya sik-a ay Jordan yan sinmaldeng ka?
- <sup>6</sup> Apay nga dakayo ay dontog ya bilig yan nanlagto kayo  
ay kaman din iyat di kalding ya karnero?
- <sup>7</sup> Manpayegpeg ka ay daga sin sangoanan Diyos  
ay dinaydayaw en Jacob.
- <sup>8</sup> Sin bato inpabala nay dakdake ay danom  
ay nanbalinena si posong.

## Salmo 115

### 115

*Din Tet-ewa Ay Diyos Di Lebbeng Na Ay Madayaw*

- 1 Baken din awak tako mo adi et anggoy Diyos Apo  
di lebbeng na ay dayawen tako,  
tan matalek yan adi manbalbaliw din layad na en datako.
- 2 Din nanasyon et magay pan-gapoan da  
ay manglaslasoy ay kanan da,  
“Into ngin din Diyos da?”
- 3 Tan si Diyos ay dinaydayaw tako et wadad daya,  
yan kabaelana ay amagen amin din laydena.
- 4 Ngem din sinan didiyos ay daydayawen da  
et owat inamag di ipogaw ay balitok ya palata.
- 5 Adi dan mankali olay waday tepek da,  
waday mata da ngem adi dan makaila.
- 6 Adi dan makadnge olay waday inga da,  
adi da makasongsong olay waday eng da.
- 7 Waday takkay da ngem adi dan makarikna.  
Adi dan makadan olay waday siki da,  
ya magay madnge ay kali da.
- 8 Kaman si daida ay magay kabaelana  
din nangamag ya mandaydayaw en daida.
- 9 Dakayo ay Israelita, si Diyos koma di pantalkan yo,  
tan salaknibana ya badanganas dakayo.
- 10 Mantalek kayo en Diyos ay papadin di Apo,  
tan salaknibana ya badanganas dakayo.
- 11 Dakayo amin ay manaydayaw en Diyos, sisya di pantalkan yo,  
tan salaknibana ya badanganas dakayo.
- 12 Adi liw-an Diyos datako, et bindisyonana  
amin ay Israelita ya amin din papadi na.
- 13 Awni et bindisyonana amin ay mangipateg en sisya,  
olay nangato ono nababa.
- 14 Sapay koma ta paad-adoen Diyos di anak yo,  
ya siya abe sin ipoli yo.
- 15 Sapay koma ta si Diyos ay namarsua ed daya ya isnan daga  
et dakayo di bindisyonana.
- 16 Say okan Diyos ed langit yan say panteana,  
ngem din indawat na sin ipogaw et din nay ay daga.
- 17 Olay sino ay nasokpot di leng-ag na,  
magay iyat na ay mangdayaw en Diyos ay wadad daya.
- 18 Ngem datako ay matmatago pay laeng isnan daga  
et man-iyaman tako en sisya ed wani ya si eng-enggana.  
Madaydayaw si Diyos!

## Salmo 116

### 116

*Din Pan-iyamanan Di Insalakan Diyos Si Pese*

- 1-2 Laylaydek si Diyos Apo,  
tan kanayon ay dengdenggena din kararag ko.



Isonga sin intiro ay biyag ko,  
 mankararagak en sisya ay Apo.  
<sup>3</sup> Waday namingsan ay dilikado di biyag ko,  
 isonga palalo di egyat ya dandanag ko.  
<sup>4</sup> Pagak man-adawag en Diyos et kanak en sisya,  
 “Pangaasim kod paabe ay Apo ta omisalakan ka.”  
<sup>5</sup> Siged si Diyos, masmasseg-ang sisya  
 ya ammo na ay makirikna.  
<sup>6</sup> Salakniban Diyos din magay laing ya kabaelana,  
 et sin timpo ay nanligligatak, inmisalakan sisya.  
<sup>7</sup> Isonga mabalin ay tomalna din nemnem ko  
 gapo sin kinasiged Diyos Apo.  
<sup>8</sup> Inlisi nas sak-en sin kateyak,  
 siya abe sin pansadotak ya kaisokbaak.  
<sup>9</sup> Isonga wadaak ay matmatago,  
 et mantongpalak sin layden di Apo.  
<sup>10</sup> Intoltoloy ko ay nantalek olay mo kankanak sin nemnem ko,  
 “Palalo nan ligat ko,”  
<sup>11</sup> ya gapo sin danag ko yan inbagak,  
 “Maga polos di ipogaw si pantalkak.”  
<sup>12</sup> Sino ngata di maisobalit ko en Diyos sin kinasiged na?  
<sup>13</sup> Man-idatonak si arak en sisya  
 ta man-iyamanak sin inmisalakanana.  
<sup>14</sup> Idaton ko din inkarik en sisya  
 sin sangoanan di nasinop ay ipogaw na.  
<sup>15</sup> Napateg en Diyos din kateyan di esa ay ipogaw na.  
<sup>16</sup> Mansilbiak en sik-a ay Apo  
 ay kaman met laeng din inyat en nanang ko.  
 Idi mateyak koma,  
 inmisalakan ka,  
<sup>17</sup> isonga man-idatonak en sik-a si pan-iyamanak  
 ya sik-a abe di pankararagak.  
<sup>18-19</sup> Din inkarik en sik-a et idaton ko  
 ed Jerusalem sin lak-am di Timplo  
 sin sangoanan di nasinop ay ipogaw mo.  
 Madaydayaw si Diyos Apo!

## Salmo 117

### 117

*Pangidayaw En Diyos Begew Sin Layad Ya Kinapodno Na*

<sup>1</sup> Dayawen yo si Yahweh,  
 kaipoipogaw sin amin ay ili.  
<sup>2</sup> Tan dakdake ya adi manbalbaliw din layad na,  
 napodno sin ipogaw na si eng-enggana.  
 Madaydayaw din Apo!

## Salmo 118

### 118

*Pan-iyaman Di Ipogaw En Diyos Sin Naabakan Di Kaibaw Da*

<sup>1</sup> Man-iyaman tako en Diyos tan siged sisya,

- ya magay pap-eng din adi manbalbaliw ay layad na.
- <sup>2</sup> Ibogaw yo koma ay Israelita,  
“Magay pap-eng din adi manbalbaliw ay layad na!”
- <sup>3</sup> Dakayo ay papadin Diyos et kanan yo koma,  
“Magay pap-eng din adi manbalbaliw ay layad na!”
- <sup>4</sup> Dakayo am-in ay manaydayaw en Diyos et kanan yo koma,  
“Magay pap-eng din adi manbalbaliw ay layad na!”
- <sup>5</sup> Nankedawak si badang Diyos sin timpon di ligat ko  
et inmisalakan tan dinnge na din adawag ko.
- <sup>6</sup> Magay makaamag si lawa en sak-en mo si Diyos di tomatakdo,  
isonga maga di iegyat ko.
- <sup>7</sup> Gapo ta si Diyos di kabadang ko,  
mailak din kaabakan di kalaban ko.
- <sup>8-9</sup> Agpos mo si Diyos di pantalkan ya pankamangan tako  
ay baken din iib-a tako ya olay din tuturay tako.
- <sup>10-12</sup> Din adi kabilang ay kalaban ko et linmikob da,  
kaman dan maangat ay anig ay inmalibongbong da,  
ta gobaten das sak-en sin am-in ay banda.
- Ngem begew sin panakabalin Diyos ed daya,  
laton ay inabak kos daida,  
tan din nango ay pagat et nalaka ay mapooan da,  
et siya met laeng di kaiarigan da.
- <sup>13</sup> Dandani ay maabakak gapo sin kapigsa da,  
ngem binmadang si Diyos ay wadad daya.
- <sup>14</sup> Si Diyos di pankamangak ya mangidawat si pigsak,  
begew sin inyat na, maisalakanak.\*
- <sup>15</sup> Dengngen yo din bogaw di Israelita  
ay wada sin tolda ay panbeeyan da  
ay manlaylayad sin nangabakan da.  
“Nakaskasdaaw din panakabalin Diyos,” kanan da.
- <sup>16</sup> “Madayaw si Diyos sin nangabakana  
gapo sin nakaskasdaaw ay panakabalina.”
- <sup>17</sup> Adiak matey mo adi et wadaak ay matmatago  
ta idaddad-at ko din inam-amag di Apo.
- <sup>18</sup> Nadagsen di indawat na ay dosak,  
ngem adi na inpalobos ay mateyak.
- <sup>19-20</sup> Bokatan yo din eneb di Timplo  
ay senggapan anggoy di nalinteg ya kosto  
ta senggepak ay man-iyaman en Apo.
- <sup>21</sup> Man-iyamanak en sik-a, Apo, tan dinngem din kararag ko.  
Inabak ko din kalaban ko begew sin badang mo.
- <sup>22</sup> Din bato ay sinigaan di kakarpintiro  
et say nanbalinen Diyos ay kabanolan ay bato  
ay mangipakneg sin beey si kosto.
- <sup>23</sup> Si Diyos di nangamag isna,  
et palalo ay kaeetnga.
- <sup>24</sup> Manragsak tako  
tan din agew ay nay di panginemnemneman tako

\* **118:14** Di esa abe ay kaiologan nina sin Hebreo et: Si Diyos di mangidawat si bikas ko ya din ikankansiyan ko, sisya abe di mangisalakan ko.

- sin nangabakan Diyos sin kaibaw tako.
- <sup>25</sup> Kedawen mi ay Diyos ta itoltoloy mo ay isalakan dakami, bindisyonam kod dakami ta somiged din biyag mi.
- <sup>26</sup> Mabindisyonan koma nan inbaan Diyos ay panakaawak na. Dakami ay wada sin Timplon di Apo et bindisyonan mi abes dakayo.†
- <sup>27</sup> Si Yahweh di Diyos tako ay nangsilaw ya namindisyon en datako. Ilogi yo ngarud ay mansilibrar, man-a kayos tobon di kaiw ta iliked yo sin altar.
- <sup>28</sup> Sik-a di daydayawek ay Diyos et man-iyamanak en sik-a, idaddad-at ko din panakabalin mo ay kaeetnga.
- <sup>29</sup> Man-iyaman tako en Diyos tan siged sisya, ya magay pap-eng din adi manbalbaliw ay layad na.

## Salmo 119

### 119

#### *Pangdayaw Sin Kalin Diyos*

- <sup>1</sup> Nagasat da din ipogaw ay magay maipabasol en daida, tan din kalin Diyos di on-onodan da.
- <sup>2</sup> Nagasat da din manongtongpal sin intolag na ya mangipakat sin amin ay kabaelan da ay mansilbi en sisya.
- <sup>3</sup> Adi dan man-am-amag si lawa mo adi et manbiyag da ay maikompas sin laydena.
- <sup>4</sup> Apo, sik-a ay mismo et intogon mo ay patien mi ay kosto din bilbilin mo.
- <sup>5</sup> Sapay koma ta ipapasnek ko ay mangonod sin linteg mo,  
<sup>6</sup> tan magay kaibabainak mo tongpalek amin din bilbilin mo.
- <sup>7</sup> Magay dowadowak ay manaydayaw en sik-a mo adalek ay kosto din inkeddeng mo ay magay kolang na.
- <sup>8</sup> Tongpalek din linteg mo ay inbagam, isonga polos koma ay adi kan bomaybay-an.
- <sup>9</sup> “Sino ngin di amagen di esa ay baro ta say nalinis din biyag na?” kanak sin nemnem ko.  
Din songbat na, “Masapol ay onodana din kalim ay inpaisolat mo.”
- <sup>10</sup> Ipakat ko amin ay kabaalak ay mansilbi en sik-a, Apo, adim kod ipalobos ay omaddawiak sin bilbilin mo.
- <sup>11</sup> Inigtok din nabanol ay kalim sin nemnem ko ta say adiak manbasol en sik-a, Apo.
- <sup>12</sup> Daydayawek sik-a ay Apo, isonga itdom kod en sak-en din linteg mo.
- <sup>13</sup> Laydelaydek ay ibaga sin gagait ko din inpaammom ay linteg mo.
- <sup>14</sup> Dakdake di layad ko ay manongpal sin pamagbagam ay kaman din layad di ipogaw ay bomaknang.
- <sup>15</sup> Kanayon ay nemnemnemek din bilbilin mo.

† **118:26** Din bindisyon ay nay et inbagan din papadi ay wada sin oneg di Timplo.

- 16 Din linteg mo et say dadlonak panragsakan,  
din kalim et adiak polos linglingan ono baybay-an.
- 17 Seg-angam ya badangam kod sak-en ay baam  
ta say matagoak ya onodak din pamagbagam.
- 18 Silawam kod nan nemnem ko  
ta maawatak din nakaskasdaaw ay maadal sin linteg mo.
- 19 Owat sinkaattikan di panbiyagak isnan daga  
isonga din bilbilin mo et ipaawat mo koma.
- 20 Kanayon ay palalo din layad ko  
ay mangawat sin bilbilin mo.
- 21 Yamyamam ya dosaem koma  
din mangipapangatos nemnem na,  
tan din linteg mo et dinokogan da.
- 22 Adim kod ipalobos ay lomaslasoy ya omibabain da,  
tan inon-onodak sik-a.
- 23 Din tuturay di ili et mantotolag da,  
tan panggep da ay mangamag en sak-en si lawa,  
ngem din kaimongsanan di nemnem ko  
et din inpaammom ay linteg mo.
- 24 Maragsakanak ay mangad-adal sin intolag mo,  
tan say mangitdo en sak-en si kosto.
- 25 Kamanak matmatey, dilikado di kasasaad ko,  
tongpalem koma din inkarim ta somiged kasin di biyag ko.
- 26 Idi inbagak en sik-a din ligligat ko,  
sinongbatam din kararag ko,  
isonga itdom kod din linteg mo.
- 27 Badangam kod sak-en ay mangawat sin bilbilin mo  
ta say nenemnemek din nakaskasdaaw ay inam-amag mo.
- 28 Gapo ta say inkarim, papigsaem kod di nemnem ko,  
tan nay kinmapsotak si ladingit ko.
- 29 Adi ka kod ipalobos ay man-amagak si baken kosto,  
maseg-ang ka ta itdom din kalim ay inpaisolat mo.
- 30 Ninemnem ko ay sik-a di tongtongpalek,  
isonga din linteg mo et say nemnemnemek.
- 31 Din intolag mo et banolek ya on-onodak,  
isonga adim kod ipalobos ay maibabainak.
- 32 Silalayadak ay manongpal sin bilbilin mo,  
tan taptapiam din panang-awat ko.
- 33-34 Ilawlawag mo kod en sak-en din linteg mo  
ta say imongsan ko din nemnem ko  
ya kanayon ay matongpal ko.
- 35 Itdom en sak-en di amagek babaen sin linteg mo,  
tan say kad-an di ragsak ko.
- 36 Idawat mo kod di layad ay manongpal sin linteg mo  
ta baken kinagamgam di wadas nemnem ko.
- 37 Iturong mo kod sak-en ta adiak banolen di magay silbi na  
ya idawat mo di biyag ay tet-ewa  
sin pangon-onodak en sik-a.
- 38 Din karim en sak-en ay baam et tongpalem koma,  
ay say inkarim sin amin ay mangipateg en sik-a.

- 39 Din nakaskasdaaw ay ikeddeng mo  
di mangilisi en sak-en sin kaibabainak ay ieg-egyat ko.
- 40 Laydelaydek ay tongpalen din bilbilin mo.  
Nalinteg ka isonga pabaroem kod nan biyag ko.
- 41 Ipailam kod en sak-en san adi manbalbaliw ay layad mo  
ya omisalakan ka tan say inkarim, Apo,
- 42 Et mo siya di, din lomaslasoy et mabalin ay songbatak,  
tan din karim et say pantalkak.
- 43 Idawat mo kod di kabaalak  
ta kanayon koma ay din tet-ewa di ibagbagak,  
tan din kosto ay ikeddeng mo di pantalkak.
- 44 Kanayon ay tongpalek din linteg mo  
enggana ay mapospos nan leng-ag ko.
- 45 Nawayawayaanak sin ligligat ko,  
tan ipakat ko din kabaalak ay mangonod sin bilbilin mo.
- 46 Olay sin sangoanan di aari ay nangato,  
adiak ibain ay mangibaga sin intolag mo.
- 47-48 Gan-ganasek ay mangonod sin bilbilin mo  
ya siya abe sin linteg mo,  
tan siya da di banolek ya laydelaydek,  
kankanayon ay say nemnemnemek.
- 49 Adi ka koman liw-an din inkarim en sak-en ay mansilbi en sik-a,  
tan say nangidawat en sak-en si namnama.
- 50 Siya na di liwliwak sin ligat ko,  
tan din karim et say poon di biyag ko.
- 51 Kanayon ay omoy-oyaw  
din nalalastog ay ipogaw,  
ngem adiak pay dedan inmaddawi  
sin inpaisolat mo ay kali.
- 52 Mo nemnemek din inkeddeng mo ed nabaon, Apo,  
say tomalnaan ya pomigsaan di nemnem ko.
- 53 Ngem palalo di bonget ko  
gapo sin makedse ay manokog sin inpaisolat mo.
- 54 Din linteg mo di enak ikankanta  
isnan aptik ay biyag kos nan daga.
- 55 Olay sin labi yan nemnemnemek sik-a, Apo,  
ya din kalim ay inpaisolat mo.
- 56 Siya na di kanayon ay inam-amag ko,  
tinongtongpal ko din bilbilin mo.
- 57 Sik-a ay Diyos anggoy di masapol ko,  
ikarik ay patiek din kalim ay inpaisolat mo.
- 58 Napasnekak ay manpakaasi en sik-a, Apo,  
ta kedawek din inkarim ay seg-ang mo.
- 59 Idi inadaadal ko din biyag ko,  
nanbabawiak et ikarik ay mangonod sin intolag mo.
- 60 Tongpalek ay dagos din bilbilin mo.
- 61 Nan-isagana din managbasol si enak kadadaelan,  
ngem din kalim et adiak liw-an.
- 62 Bomangonak sin gawan di labi ay mandayaw en sik-a, Apo,  
tan di iyat mo ay mangokom et kostokosto.

- 63 Makikadwaak sin amin ay mangipateg en sik-a  
ay din bilbilin mo di on-onodan da.
- 64 Mailas nan daga sin amin ay disso  
din adi manbalbaliw ay layad mo, Apo.  
Itdom kod en sak-en din linteg mo.
- 65 Din karim en sak-en et tinongtongpal mo,  
tan bininbindisyonam sak-en ay bag-en mo.
- 66 Kedawek en sik-a di sirib ya laing ko  
ay mannemnem ya mangamag si kosto,  
tan mantalekak sin bilbilin mo.
- 67 Ed idi, kanayon ay masangsangawak,  
et dinosam sak-en ta say manpakombabaak,  
ngem ed wani, din kalim di on-onodak.
- 68 Siged ka et siged amin ay am-amagem,  
itdom kod linteg mo en sak-en.
- 69 Domadael ya omipalawlaw  
din mangit-it-ek si awak da,  
ngem ipakat ko amin ay kabaelak  
ta din bilbilin mo di onodak.
- 70 Din kalim, adi da maawatan,  
ngem sak-en pay et say enak panragsakan.
- 71 Pansigdak din dosa ay indawat mo,  
tan begew isdi, maawatak din linteg mo.
- 72 Nabanbanol en sak-en din en ka initdo,  
mo din balitok ya palata ay kalibolibo.
- 73 Pinarsuam ya inayowanam sak-en si kosto,  
isonga idawat mo kod di laing ko  
ay mangawat sin bilbilin mo.
- 74 Omila din mangipatpateg en sik-a.  
Gapo ta mantalekak sin karim, malaydan da.
- 75 Ammok ay nalinteg din inkeddeng mo,  
isonga din panosdosaam en sak-en et kosto.
- 76 Liwliwaem komas sak-en sin adi manbalbaliw ay layad mo  
ay kaman din inkarim en sak-en ay bag-en mo.
- 77 Maseg-ang ka kod ta ganasek nan biyag ko,  
tan say panragsakak din kalim ay inpaisolat mo.
- 78 Maibabain da koma din mangipangpangato si awak da  
gapo sin ipabasbasol dan sak-en ay baken tet-ewa,  
tan mo sak-en pay et ipapasnek ko  
ay nemnemnemen din bilbilin mo.
- 79 Naey abe di pamagbaga  
sin am-in ay mangipateg en sik-a:  
omali da koma en sak-en ay manpaitdo  
ta say adalen da din intolag mo.
- 80 Sapay koma ta ipakat kon kabaelak  
ay manongpal sin linteg mo ay magay pankolangak  
ta mailisiak si kaibabainak.
- 81 Nabayag ay sinsin-ed ko din omisalakanam,  
ngem din karim di pantalkak pay dedan.
- 82 Din panongpalam sin karim, nabayag ay sinsin-ed ko.  
“Pig-an ngin ay omisalakan ka?” siya say salodsod ko.



- 83 Maiarigak si magay silbi na ay lalat ay nakpit ya napagitan,  
ngem din linteg mo et adiak nilinglingan.
- 84 Sak-en ay baam, intoy kabayag di panseedak?  
Pig-an pay ay dosaem din pomalpaligat?
- 85 Din nalastog ay ipogaw ay manigaan sin linteg mo  
et kaman dan nankaot si bito  
ta mo maknaak ya madadael din dayaw ko.
- 86-87 Da nan makaetek ay ipogaw, istay dan gagaraen nan biyag ko,  
ngem inapatik pay dedan ay nanongtongpal sin bilbilin mo.  
Bomadang ka kod, sik-a ay Diyos ko,  
tan ibilang ko ay kostokosto san bilbilin mo.
- 88 Gapo sin adi manbalbaliw ay layad mo,  
ipalobos mo kod ay adi masokpot di leng-ag ko  
ta waday iyat ko ay manongpal sin linteg mo.
- 89 Din kalim ay Diyos et komakaman si eng-enggana,  
din kalim et adi mabalbaliwan ed daya.
- 90 Matalek ka si eng-enggana.  
Nan insaad mo ay daga  
et komakaman sin kosto ay naisaadana.
- 91 Wada engganad wani amin ay naparsua,  
tan say inkeddeng mo en daida,  
tan mansilbi da am-in en sik-a.
- 92 Sigurado ay nateyak koma sin ligat ko  
mo baken say nanragsakak din linteg mo.
- 93 Adiak polos liw-an din bilbilin mo,  
tan say inosal mo ay mangipabaro sin biyag ko.
- 94 Omisalakan ka kod, tan sak-en di ipogaw mo,  
inamag koy kabaalak ay manongpal sin bilbilin mo.
- 95 Mansesed da din makedse ta pap-engen dan biyag ko,  
ngem ipapasnek ko ay nemnemnemen din linteg mo.
- 96 Nailak ay amin ay banag et way patingga na,  
ngem din linteg mo et maga.
- 97 San kalim et laydelaydek,  
et inag-agew ay nemnemnemek.
- 98 Manbalinak ay nalalaing mo din kalaban ko,  
tan kanayon ay nemnemnemek din bilbilin mo.
- 99-100 Naon-oneg di pangawat ko  
mo din nankakay ya odom ay omit-itdo,  
tan kanayon ay ad-adalek ya tongtongpalek din linteg mo.
- 101 Inaddawiak amin ay panbasolan  
tan din bilin mo et say laydek ay onodan.
- 102 Adiak baybay-an din inkeddeng mo,  
tan sik-a ay mismo di omit-itdo.
- 103 Din kalim et makaay-ayo di kadngeana,  
mam-is mo din anig di katamtamana.
- 104 Lomaingak gapo sin bilbilin mo,  
isonga amin ay lawa ay ogali et kaliliget ko.
- 105 Din kalim et kaman say silaw nan biyag ko,  
tan itdo na din amagek ay kosto.
- 106 Tongpalek din insapatak,

- din nalinteg ay bilbilin mo et onodak.
- 107 Sik-a ay Diyos, palalo nan ligat ko,  
tongpalem kod din inkarim ta isalakan mo nan biyag ko.
- 108 Awatem kod ay Diyos nan kararag kon sik-a ay pandayaw ko  
ya itdom koma en sak-en din bilbilin mo.
- 109 Kanayon ay ipospostak din biyag ko,  
ngem adiak nilinglingan din kalim ay inpaisolat mo.
- 110 Nan-isagana da din managbasol si enak kadadaelan,  
ngem din bilbilin mo, adiak dinokdokogan.
- 111 Din nabanol ay itdon di linteg mo,  
maiarig das komakaman ay tawid ko,  
daida di mangiparagsak isnan nemnem ko.
- 112 Ninemnem ko ay tongpalen din linteg mo  
engganans pap-eng di biyag ko.
- 113 Din nankadwa di pammati na et kalkaliget ko,  
ngem laylaydek pay din linteg mo.
- 114 Sik-a di pankamangak ya salidak,  
din karim di pannamnaak.
- 115 Dakayo amin ay managbasol, komaan kayo,  
ta say tongpalek din bilbilin Diyos ko.
- 116 Tomolong ka tan say inkarim ta manbiyagak,  
adim ipalobos ay madismayaak sin namnamak.
- 117 Omitakkay ka ta magay pandanagak,  
ta kanayon ay din linteg mo di onodak.
- 118 Am-in ay omaddawi sin linteg mo, sigaam si daida,  
tan magay silbin din sikap ya etek da.
- 119 Basura am-in di lawlawa ay ipogaw sin pannemnem mo,  
say begew ay laylaydek din linteg mo.
- 120 Begew en sik-a, palalo ay emegyatak,  
mo nemnemek din dosa ay ikeddeng mo, manpayegpegak.
- 121 Say inamag ko din nalinteg ya kosto,  
adi ka kod bomaybay-an sin kalaban ko.
- 122 Inkarim ay badangam sak-en ay mansilbilin sik-a,  
adim kod palobosan ay din mangipapangatos awak da  
yan pomaligat da.
- 123 Nabbay nan matak ay manseseed sin panangisalakan mo  
ta matongpal din inkarim, Apo.
- 124 Ipailam koman sak-en din adi manbalbaliw ay layad mo  
ya itdom din linteg mo.
- 125 Mansilbiak en sik-a, Apo,  
isonga ipaawat mo koma din intolag mo.
- 126 Timpo na ay man-gonay ka, Apo,  
tan adi da tongtongpalen din linteg mo.
- 127 Din pananglayad ko sin linteg mo yan nasursurok  
mo din layad ko si kanginaan ay balitok.
- 128 Isonga onodak amin ay bilbilin mo,  
amin ay lawa yan kaliliget ko.
- 129 Sigesiged din intolag mo,  
isonga ipakat ko amin ay kabaalak ta matongpal ko.
- 130 Mo waday mangilawag sin kalim sin magay ammo na,

- kaman silaw ay mangipalaing en daida.
- 131 Kaman bigaw si danom din layad ko  
ay mangammo sin linteg mo.
- 132 Dengngem kod sak-en ya maseg-ang ka,  
tan say iyat mo sin amin ay manglaylayad en sik-a.
- 133 Tongpalem koma din karim ta omayowan ka,  
ya adi ka ipalobos ay omituray din lawa.
- 134 Omisalakan ka kod sin mamalpaligat en sak-en  
ta say din bilbilin mo et mabalin ay enak tongpalen.
- 135 Maseg-ang ka en sak-en ay bag-en mo  
ta say itdom din linteg mo.
- 136 Kaman ginawang nan lowak begew si sakit di nemnem ko,  
tan adi tongpalen di ipogaw din linteg mo.
- 137 Nalinteg ka ay Diyos et siya abe sin ikeddeng mo.
- 138 Kostokosto din linteg mo.
- 139 Palalo nan bonget ko,  
tan adi ikaskason din kalaban ko din linteg mo.
- 140 Laylaydek din karim en sak-en,  
tan sigurado ay en ka tongpalen.
- 141 Nababaak ya maga di bilang ko,  
ngem adiak liw-an din bilbilin mo.
- 142 Nalinteg ka si eng-enggana,  
ya din kalim et dadlon tet-ewa.
- 143 Palalo di problemak ya ligat ko,  
ngem say panragsakak din bilbilin mo.
- 144 Kosto si eng-enggana din intolag mo,  
tapiam kod din pangawat ko ta way iyat ko ay matago.
- 145 Naimposoan ay mankararagak en sik-a, Apo,  
patgam koma et patiek din bilbilin mo.
- 146 Man-adawagak en sik-a ay mankedaw si badang mo,  
omisalakan ka ta tongpalek din intolag mo.
- 147 Daan pomat-a yan bomangonak ay mankararag,  
din kalim di pantaltalkak.
- 148 Maninsinlabi ay adiak maseyseyep  
ta say din karim di nemnemnemek.
- 149 Patgam koma din kararag ko  
gapo sin adi manbalbaliw ay layad mo.
- Isalakan mo koma nan biyag ko  
babaen sin nalinteg ay ikeddeng mo.
- 150 Din makedse ay pomaligat yan somag-en dan sak-en,  
din linteg mo yan polos ay adi da tongpalen.
- 151 Ngem asag-en ka en sak-en, Apo,  
ya pag tet-ewa din bilbilin mo.
- 152 Sin intolag mo, nabayag ay enak naammoan  
ay insaad mo ta magay pap-eng na ya komakaman.
- 153 Ilaem nan ligat ko ta en ka omisalakan,  
tan din bilbilin mo yan adiak nilinglingan.
- 154 Sapay koma ta ikalintegam sak-en ya somalagnib ka,  
tongpalem koma din karim ta omisalakan ka.
- 155 Adi maisalakan din mangam-amag si lawa,

- tan din linteg mo yan dinokogan da.
- 156 Dakdake din seg-ang mo, Apo,  
isalakan mo koma nan biyag ko  
babaen sin nalinteg ay ikeddeng mo.
- 157 Ad-ado di pomalpaligat ya kalaban ko,  
ngem adiak liwayan ay mantongpal sin intolag mo.
- 158 Malmaligetak ay mangila sin baken napodno,  
tan adi da tongpalen din bilbilin mo.
- 159 Ilaem mo kas-anoy pananglayad ko sin linteg mo,  
omisalakan ka gapo sin adi manbalbaliw ay layad mo.
- 160 Tet-ewa amin din kalim, Apo,  
komakaman si eng-enggana amin din nalinteg ay inkeddeng mo.
- 161 Pomaligat di tuturay olay mo magay gapo,  
ngem say egyatak anggoy din kalim, Apo.
- 162 Begew sin karim enak maragsakan,  
kaman ragsak di nakadteng si dakdake ay kinabaknang.
- 163 Kaliliget ko amin ay etek,  
ngem din linteg mo et laylaydek.
- 164 Mamin pito si esay agew ay man-iyamanak, Apo,  
gapo sin nalinteg ay inkeddeng mo.
- 165 Din manglaylayad si linteg mo yan mayat ya natalna di biyag da,  
maga polos di kaisokbaan da.
- 166 Sedsed-ek ay omisalakan ka, Apo,  
ya tongtongpalek din bilbilin mo.
- 167 Say onodak din intolag mo,  
tan peteg ay laylaydek, Apo.
- 168 Amin ay linteg ya bilbilin mo yan tongpalek,  
tan iilaem amin din am-amagek.
- 169 Sapay koma ta omdas en sik-a din kararag ko,  
gapo ta inkarim, lawlawagam nan nemnem ko.
- 170 Dengngem kod nan adawag ko  
ta omisalakan ka, tan say inkarim, Apo.
- 171 Kanayon ay idaydayaw kos sik-a tan itdom din linteg mo.
- 172 Din maipanggep sin kalim yan ikantak to,  
tan kosto amin ay bilbilin mo.
- 173 Nakasagana ka koma ay somalaknib, Apo,  
tan on-onodak din bilbilin mo.
- 174 Sedsed-ek din panangisalakan mo,  
maragsakanak sin linteg mo.
- 175 Ipalobos mo koma ay enak matago  
ta way iyat ko ay mangdayaw en sik-a, Apo.  
Sapay koma ta makatolong en sak-en din bilbilin mo.
- 176 Nasangawak ay kaman nalitaw ay karnero,  
anapem komas sak-en ay mansilsilbin sik-a, Apo,  
tan adiak linglinglingan din bilbilin mo.

## Salmo 120

### 120

#### *Din Manigaan Si Kapya*

<sup>1</sup> Sin enak nanligligatan,

- nankararagak en Diyos yan ena pinatgan.
- <sup>2</sup> Kanak, “Apo, omisalakan ka sin ipogaw ay maetek ya manangallilaw.”
- <sup>3</sup> Dakayo ay maetek, sinoy dosa yo ay ipalak-am Diyos en dakayo?
- <sup>4</sup> Mankatatadem ay panan di soldado ya man-gangangab ay oling ay say dosa yo.
- <sup>5</sup> Aye, Apo! Kaseseg-angak pay isna, tan din kakailiak et maiarig da sin taga-Mesek ya Kedar ay kanan da.\*
- <sup>6</sup> Nabayag ay nakiiliak isna, sin kad-an di ipogaw ay manigaan si kapya.
- <sup>7</sup> Mo mankaliak maipanggep si kapya, daida pay yan gobat di layden da.

## Salmo 121

### 121

#### *Si Diyos Di Manalagnib En Datako*

- <sup>1</sup> Mo tamtamangek di kadondontogan,\* kanak si nemnem ko, “Sino ngata di bomadang?”
- <sup>2</sup> Si Diyos ay nangamag ed daya ya din lobong, ammok ay sisya di tomolong.
- <sup>3</sup> Si Diyos di manalagnib en sik-a ta say adi ka maisokba. Adi kaseyseyep din mangil-ila en sik-a.
- <sup>4</sup> Dengngem tan tet-ewa na: din mangay-ayowan si ipogaw na† et banbantayan daka si eng-enggana.
- <sup>5</sup> Kanayon ay kadmawaen Diyos sik-a, kanayon ay salsalidaan daka.
- <sup>6</sup> Isonga olay labi ono kaagawan, wadas sisya ay mangay-ayowan.‡
- <sup>7</sup> Si Diyos di mangilislisi en sik-a si am-in ay lawa, di biyag mo et ay-ayowanana.
- <sup>8</sup> Koykoyogen daka olay intoy em-emeyam, siya abe sin pantaoliam. Sisya di manalsalagnib en sik-a ed wani ya si eng-enggana.

## Salmo 122

### 122

#### *Kanta Ay Pangdayaw Da Sin Ili Ay Jerusalem*

- <sup>1</sup> Maragsakanak idi inmawis da, “Emey tako sin beey en Diyos,” kanan da.

\* **120:5** Addawi ay il-ili ay kad-an di ipogaw ay natangsit ya mayad ay makigobat. \* **121:1** Kanan di odom en din Salmo ay nay et inkankantan di maniktikid ay emey ed Jerusalem ay en makifesta. Ad-adoy kaeegyat ay sangsangoen da sin danan, isonga madandanagan da mo tamtamangen dan dad-anen da ay kadondontogan. † **121:4** Din kanana sin Hebreo et: Israelita. Daida di ipogaw en Diyos ed idi. ‡ **121:6** Din kanana sin Hebreo et: Adi dakan sakitan sin segit sin kaagawan, siya abe sin selag di bowan. Din pannemnem di ipogaw ed idi, kaeegyat di atong di segit. Din selag aben di bowan et say napoan kano di odom ay sakit ay kaman din kedas, podot ya pispisita.

- <sup>2</sup> Yan nay sinenggep takod Jerusalem ed wani,  
yan pinmipika tako sin oneg di ili.
- <sup>3</sup> Ed Jerusalem yan esa ay siyodad  
ay nas-et ay naamag.
- <sup>4</sup> Isna ay masinop din am-in ay tribun di Israelita  
ta en Diyos yan man-iyaman da  
et tongpalen da din naibilin en daida.
- <sup>5</sup> Isna ay naisaad di turay da  
din polin David ay aari da.
- <sup>6</sup> Ikararag tako ay ed Jerusalem yan natalna.  
Sapay koma ta din manglaylayad en sisya  
yan somiged di biyag da.
- <sup>7</sup> Sapay koma ta waday talna sin sakop na  
ya siya abe sin papalasyo na.
- <sup>8-9</sup> Gapo sin layad kon dakayo ay toton-od ya gagayyem ko  
ya siya abe sin beey Yahweh ay Diyos tako,  
ikararag ko ay natalna ya somiged koma nan ili ay kad-an tako.

### Salmo 123

## 123

#### *Kararag Ta Maseg-ang Si Diyos Sin Ipogaw Na*

- <sup>1</sup> Sik-a, Apo, ay tinmotokdo ed daya  
sin tokdoan mo ay mangituray sin daga,  
mantangad kami ay mankararag en sik-a.
- <sup>2</sup> Kaman din iyat di mansilsilbi ay mantalek sin apo da,  
kanayon abe ay mantalek kamin sik-a  
enggana ay someg-ang ka.
- <sup>3</sup> Apo, maseg-ang ka paabe en dakami,  
tan enggay nalabes di ligat ay linak-am mi.
- <sup>4</sup> Enggay adi mi maanosan  
din lomaslasoyan ya pomalpaligatan  
di mangipapangatos awak da ya babaknang.

### Salmo 124

## 124

#### *Salakniban Diyos Din Ipogaw Na*

- <sup>1</sup> Sino ngata di napasamak mo adi binadangan Diyos si datako?  
Dakayo am-in ay Israelita, siya na koma di isongbat yo:
- <sup>2</sup> Mo adi koma binmadang si Apo  
idi ginmobat din kaibaw tako,
- <sup>3</sup> dadlon dan inmabak begew sin palalo ay bonget dan datako.
- <sup>4</sup> Tan kaman dan layos ay mangianod ya manlim-ot en datako,  
<sup>5</sup> begew sin kinapigsa da, sigurado ay malned tako.
- <sup>6</sup> Dayawen tako si Yahweh ay Diyos tako,  
tan adi nan inpalobos ay pomse di kaibaw tako.
- <sup>7</sup> Kaman takon linmobos ay titit  
sin tawang ay nabisngit.
- <sup>8</sup> Tan si Diyos ay namarsua ed daya ya isnan daga  
di kapkapoan di badang tako tet-ewa.

### Salmo 125



## 125

### *Din Panalagniban Diyos Sin Ipogaw Na*

- <sup>1</sup> Din mantalek en Apo yan kaman din dontog ay Zion  
ay komakaman si eng-enggana ya adi polos magon-gon.
- <sup>2</sup> Nanliniked di dontog ed Jerusalem et kaiarigana  
din panalagniban Diyos sin ipogaw na  
ed wani ya si eng-enggana.
- <sup>3</sup> Adi manturay si eng-enggana din mangam-amag si lawa  
sin daga ay para sin nalinteg di kabibiyag da  
tan into et mo din nalinteg yan man-amag da abes lawa.
- <sup>4</sup> Bindisyonam koma, Apo, din siged di ogali da  
ya nalinteg di nemnem da.
- <sup>5</sup> Ngem sin panosaam si mangam-amag si lawa,  
dosaem koma abe din manokog en sik-a.  
Sapay koma ta mawada ed Israel di talna!

## Salmo 126

## 126

### *Kararag Ta Manragsak Da Begew Sin Apiten Da*

- <sup>1</sup> Idi intaolin Diyos ed Jerusalem si dakami,  
kaman iitaw si pannemnem mi.
- <sup>2</sup> Palalo di siyek ya kanta mi begew si ragsak mi  
et nandinamag sin odom ay ili.  
Kanan da, "Nakaskasdaaw din inamag Diyos para sin ipogaw na."
- <sup>3</sup> Nakaskasdaaw din inam-amag na  
et peteg di ragsak mi tet-ewa.
- <sup>4</sup> Yahweh ay Diyos mi, itaolim kod en dakami  
din sigod ay dayaw mi,  
ay kaman din maamag mo domateng di odan  
sin natdok ay ginawang ay wada sin abagatan.
- <sup>5</sup> Ipalobos mo koma ta din nan-og-oga sin nanmolaan da  
et manragsak da koma sin pan-apitan da.
- <sup>6</sup> Din en nan-ibonobon ay nan-og-oga,  
ikanta dan to di ragsak da  
ay mangisaa sin inapit da.

## Salmo 127

## 127

### *Si Diyos Di Kapoan Di Bindisyon*

- <sup>1</sup> Mo baken si Diyos di mangibangon sin panbeeyan,  
am-in ay inoblan di karpintiro et pag sayang.  
Mo baken abe si Diyos di manilsilib sin siyodad,  
magay silbin di gowardiya ay naisaad.
- <sup>2</sup> Olay masapan bomangonam ya maladaw di kaseypam  
ay en man-an-anap si katagoan,  
am-in ay oblam et iwed silbi na,  
tan din laylayden Diyos ay ipogaw na,  
olay mo mam-is di seyep da,  
idawdawtana pay dedan si kasapolan da.

- <sup>3</sup> Din anan-ak et sagot Diyos si daida,  
nabanol dana ay bindisyon ay mapo en sisya.
- <sup>4</sup> Din nakay ay babbaro di an-ak na,  
maiarig si soldado ay ad-adoy armas na.\*
- <sup>5</sup> Nagasat di ipogaw ay ad-adoy anak na.  
Adi maabak mo waday mangidarum en sisya,  
tan badangan da iman sin isongsongbat na.

## Salmo 128

### 128

#### *Din Gon-gonan Di Mangipateg En Diyos*

- <sup>1</sup> Din amin ay mangipateg en Diyos et nagasat da,  
nagasat din mantongpal sin laydena.
- <sup>2</sup> Ganasen an to din bongan di obla na,  
et naragsak ya mayat di biyag na.
- <sup>3</sup> Maiarig si asawa na sin beey da  
si wakan di obas ay ad-adoy lames na.  
Kaman saringit di olivo din an-ak da  
ay malikob sin lamisaan da.
- <sup>4</sup> Din mangipateg en Apo et kaman nina di bindisyon da.
- <sup>5</sup> Si Diyos ay wadad Zion, sapay koma ta bindisyonan daka  
ta din somigedan di Jerusalem yan en ka maila  
sin timpo ay sibibiyag ka.
- <sup>6</sup> Din aap-om et edasam komas daida.  
Ed Jerusalem mawada koma di talna!

## Salmo 129

### 129

#### *Kararag Ay Maikontra Sin Kaibaw Di Israelita*

- <sup>1</sup> Dakayo ay Israelita, ibaga yo  
din namalpaligatan di kalaban yon dakayo  
manipod pay sin naisaadan di ili yo.
- <sup>2</sup> Kanan yo, “Kanayon ay pinmaligat di kalaban mi  
manipod sin nanlogian di ili mi,  
ngem polos ay adi da inabak dakami.
- <sup>3</sup> Palalo ay sinoplisoplit das dakami,  
nanbalinen da ay kaman payew ay naalado din edeg mi.
- <sup>4</sup> Ngem si Diyos ay nalinteg et winayawayaanas dakami  
sin naibabag-enan mi.”
- <sup>5</sup> Sapay koma ta amin ay mangililiget ed Zion  
yan maabak da ay maidenden.
- <sup>6</sup> Kaman da koman logam sin toktok di beey  
ay daan magabot yan enggay natey.
- <sup>7</sup> Maga di mangani ya mangsinop en daida.
- <sup>8</sup> Maga di malabas ay mangibaga,  
“Sapay koma ta si Diyos et bindisyonan daka.  
Gapo sin lebbeng mi ay napon Diyos, bindisyonan mis sik-a.”

## Salmo 130

\* **127:4** Din kanana sin Hebreo et: pana, tan say esa ay armas di soldado ed idi.

**130***Talek En Diyos Sin Timpon Di Ligat*

- <sup>1</sup> Yahweh ay Diyos mi, kedawek din badang mo  
isnan timpo ay kadagsenan di ligat ko.
- <sup>2</sup> Dengngem kod nan adawag ko  
ay mankedaw si seg-ang mo.
- <sup>3</sup> Mo nenemnemem din basbasol mi,  
maga polos di adi madosa sin pangokomam en dakami.
- <sup>4</sup> Ngem di katet-ewa na, pomakawan ka  
ta say patgen ya egyatan mis sik-a.
- <sup>5</sup> Napasnekak ay manseseed sin badang mo,  
tan din karim di pantalkak, Apo.
- <sup>6</sup> Nasursurok mo din ganat di gowardia  
ay manseseed si pomat-aana  
din iyat ko ay manseseed si badang ay mapo en sik-a.
- <sup>7</sup> Mantalek kayo en Diyos, dakayo ay Israelita,  
tan adi manbalbaliw din layad na,  
isalakanas dakayo ay magay dowadowa.
- <sup>8</sup> Tet-ewa ay sobotenas dakayo  
ta mawayaan kayo sin amin ay basbasol yo.

**Salmo 131****131***Kararag Di Napnek Ay Ipogaw*

- <sup>1</sup> Apo, adiak ipapangato  
di nemnem ya awak ko.  
Adik say nemnemen ono amagen  
di nalaed ya naligat paran sak-en,
- <sup>2</sup> mo adi et mapnekak ya natalna nan nemnem.  
Kamanak napsot ay anak ay inaaban en ina na  
ay gomiginek tan mapnek sisya.
- <sup>3</sup> Dakayo ay Israelita,  
masapol ay mantalek kayon Diyos tet-ewa  
ed wani ya si eng-enggana.

**Salmo 132****132***Din Inkarin Diyos En David*

- <sup>1-2</sup> Manakabalin ay Diyos ay dinaydayaw Jacob, nemnemem koma  
si David ya din ligligat ay inanosana,  
siya abe sin nay kari na en sik-a,
- <sup>3-4</sup> tan kanana, “Adi mabalin ay somaaak,  
adiak aben bomaktad ta maseyepak,
- <sup>5</sup> enggana ay makaisaadak si panteam, manakabalin ay Apo,  
ay dinaydayaw Jacob ay apo mi ay ipogaw mo.”
- <sup>6</sup> Nadamag mi din Baol di Tolagan sin kawada mi ed Betlehem,  
et dintengan mi sin papayew ed Jearim.
- <sup>7</sup> Et kanan mi, “Emey tako sin Timplon Diyos ay beey na

- ta mandokmog tako sin sangoanan di trono na\*  
ay mandaydayaw en sisya.”
- <sup>8</sup> Omali ka ay Diyos sin Timplo ta say panteam si kosto,  
koyogem din Baol di Tolagan ay sinyal di panakabalin mo.
- <sup>9</sup> Din papadim et sapay koma ta nalinteg di kabibiyag da,  
din ipogaw mo abe et ibogaw da koma di ragsak da.
- <sup>10</sup> Gapo sin inkarim en David ay bag-en mo,  
adi ka koman dokogan nan ari ay insaad mo.
- <sup>11</sup> Et siya nay karim en David ay en ka insapata,  
say dadlon kan tongpalen ay magay dowadowa:†  
“Isaad ko ay ari di esa ay polim ay maisokat en sik-a.
- <sup>12</sup> Et mo tongpalen din an-ak mo din intolag ko en sik-a,  
mansososkat di poli da ay manturay si eng-enggana.”
- <sup>13</sup> Pinilin Diyos ed Jerusalem ay say kosto ay panbeeyana.
- <sup>14</sup> Kanana, “Isnay laydek ay panteak ay manturay si eng-enggana.
- <sup>15</sup> Idawat ko din amin ay kasapolan di man-ilis na,  
olay din nabibiteg et mangan da enggana ay mabsog da.
- <sup>16</sup> Bindisyonak amin ay amagen di papadi sin isna  
et ibogaw din ipogaw di ragsak da.
- <sup>17</sup> Awni et dotokak sin polin David di esa  
ta manturay si eng-enggana.
- <sup>18</sup> Dadlonak abaken din mangonkontra en sisya,  
et kaman dan maomas si palalo ay bain da,  
ngem sisya pay, mankoniniing di korona na,  
et madayaw ya somiged din turay na.”

## Salmo 133

### 133

#### *Din Maoolnos Ay Siag-i*

- <sup>1</sup> Mapmapteng tet-ewa mo din siag-i yan maoolnos da!  
<sup>2</sup> Kaman din nangina ay lana  
ay naisoyat sin toktok Aaron sin naisaadana\*  
yan inmoyas sin emeng na enggana sin bado na.
- <sup>3</sup> Maiarig abe sin dono ay mag-as sin dontog ay Hermon,  
dono ay mag-as sin kadondontogan ed Zion.  
Tan isdi ay inkarin Diyos din bindisyona  
ay biyag ay magay pap-eng na.

## Salmo 134

### 134

#### *Pangidayaw En Diyos Sin Labi*

- <sup>1</sup> Omali kayo ay mandayaw en Apo,  
dakayo ay mansilsilbi en sisya  
si nilablabi sin Timplo na.
- <sup>2</sup> Mansagong kayo sin Kasasantoan ay Kowarto sin Timplo,  
yan ikayang yo din takkay yo ay mankararag en Apo.
- <sup>3</sup> Sapay koma ta si Diyos ay wadad Zion,

\* **132:7** Din Baol di Tolagan et simbolon di tronon Diyos isnan daga. † **132:11** Din inkarin Diyos en David et madtengan sin 2 Samuel 7:12-16. \* **133:2** Din ibagbaga nas na et din seremonia ay naisaadana Aaron ay kangatoan ay padi.

idawtanas dakayo si bindisyon,  
sisya ay namarsua si langit ya lobong.

## Salmo 135

### 135

#### *Din Kinasiged Ya Kinangaton Diyos*

- <sup>1</sup> Madaydayaw din Apo!  
Idaydayaw yo din ngadana,  
dakayo ay mansilsilbi en sisya,
- <sup>2</sup> dakayo ay mansilsilbi sin beey di Apo,  
sin Timplon Diyos tako.
- <sup>3</sup> Dayawen tako tan siged sisya,  
ikanta tako din ngadana tan managseg-ang sisya.
- <sup>4</sup> Tan pinili na din Israelita  
ay manbalin ay ipogaw na.
- <sup>5</sup> Ammok ay din Apo et manakabalin,  
nangatngato mo olay sino ay didiyosen.
- <sup>6</sup> Amagena amin ay laydena  
ed langit ya isnan daga,  
sin baybay ya sin lanad na.
- <sup>7</sup> Ipakayang na di liboo sin addawi ay solsolin di daga,  
kimat ay kakoyog di odan yan pawadaena,  
pabelaena abe din dagem sin pangidoldolinana.
- <sup>8</sup> Ed Egipto yan pinse na  
amin ay besag di ipogaw ya animal da.
- <sup>9</sup> Sinyal ay nakaskasdaaw et inpaipaila na  
ay manosa sin ari ya din amin ay tuturay na.
- <sup>10</sup> Ad-ado ay nasyon di dinadael na,  
napipigsa ay ari yan pinse na:
- <sup>11</sup> din arin di Amorreo ay si Sihon,  
si Og ay ari ed Basan  
ya amin ay ari ed Canaan.
- <sup>12</sup> Inpatawid na din daga da  
sin Israelita ay ipogaw na.
- <sup>13</sup> Adi polos malinglingan din ngadan Diyos Apo,  
sin amin ay ipogaw et mandinamag to.
- <sup>14</sup> Tan ikalintegang Diyos din ipogaw na  
ya seg-angana din mansilsilbi en sisya.
- <sup>15</sup> Ngem din didiyosen di odom ay nasyon isnan daga  
et owat inamag di ipogaw ay balitok ya palata.
- <sup>16</sup> Adi da makakali olay mo waday tepek da,  
waday mata da ngem adi dan makaila.
- <sup>17</sup> Adi dan makadnge olay mo waday inga da,  
maga dedan di biyag da.
- <sup>18</sup> Mais-o koma sin didiyosen ay sana  
din nangamag ya mantalek en daida.
- <sup>19</sup> Dayawen yo si Diyos, dakayo ay Israelita,  
dayawen yos sisya, dakayo ay papadi na.
- <sup>20</sup> Dakayo ay polin Levi, dayawen yos sisya,  
dayawen yo, dakayo ay mangipatpateg en sisya.

21 Dayawen yo si Diyos ed Zion,  
ed Jerusalem ay ili na.  
Madaydayaw din Apo!

## Salmo 136

### 136

#### *Din Adi Manbalbaliw Ay Layad Diyos*

- 1 Man-iyaman kayon Diyos tan siked sisya,  
komakaman din layad ya seg-ang na si eng-enggana.
- 2 Man-iyaman kayon Diyos ay nangato mo amin ay didiyosen,  
komakaman din layad ya seg-ang na si eng-enggana.
- 3 Man-iyaman kayon Diyos, kangatoan ay apo sisya,  
komakaman din layad ya seg-ang na si eng-enggana.
- 4 Sisya anggoy di makaamag si kaeetnga,  
komakaman din layad ya seg-ang na si eng-enggana.
- 5 Babaen sin sirib na, pinarsua na ed daya,  
komakaman din layad ya seg-ang na si eng-enggana.
- 6 Sin labaw di danom yan insaad na din daga,  
komakaman din layad ya seg-ang na si eng-enggana.
- 7 Din agew ya bowan yan pinarsua na,  
komakaman din layad ya seg-ang na si eng-enggana.
- 8 Insaad na din agew ay mansey-ang sin kaagawan,  
komakaman din layad ya seg-ang na si eng-enggana.
- 9 Din maningtinggaw abe sin labi, din tatalaw ya bowan,  
komakaman din layad ya seg-ang na si eng-enggana.
- 10 Din besag di taga-Egipto yan pinse na,  
komakaman din layad ya seg-ang na si eng-enggana.
- 11-12 Inpango na ay komaan ed Egipto din Israelita  
babaen sin panakabalina,  
komakaman din layad ya seg-ang na si eng-enggana.
- 13 Din Baybay ay Mandalangdang et nansianena,  
komakaman din layad ya seg-ang na si eng-enggana.
- 14 Isdi ay nandanena din ipogaw na,  
komakaman din layad ya seg-ang na si eng-enggana.
- 15 Ngem nalned pay din arin di Egipto ya din sosoldado na,  
komakaman din layad ya seg-ang na si eng-enggana.
- 16 Sin lugar ay magay man-ili, inpango na din ipogaw na,  
komakaman din layad ya seg-ang na si eng-enggana.
- 17-18 Napipigsa ya mandinamag ay aari yan pinse na,  
komakaman din layad ya seg-ang na si eng-enggana.
- 19-20 Din aari ay sana et din arin di Amorreo ay si Sihon  
ya si Og ay ari ed Basan,  
komakaman din layad ya seg-ang na si eng-enggana.
- 21 Inpatawid na din daga da sin ipogaw na,  
komakaman din layad ya seg-ang na si eng-enggana.
- 22 sin Israelita ay mansilsilbi en sisya,  
komakaman din layad ya seg-ang na si eng-enggana.
- 23 Adi na binaybay-an datako sin naabakan tako,  
komakaman din layad ya seg-ang na si eng-enggana.
- 24 Insalakanas datako sin kalaban tako,



- komakaman din layad ya seg-ang na si eng-enggana.  
<sup>25</sup> Idawtana si makan di amin ay naparsua,  
 komakaman din layad ya seg-ang na si eng-enggana.  
<sup>26</sup> Man-iyaman kayon Diyos ay wadad daya,  
 komakaman din layad ya seg-ang na si eng-enggana.

## Salmo 137

### 137

#### *Segseg-ang Di Israelita Ed Babilonia*

- <sup>1</sup> Sin benget di ginawang ed Babilonia ay tinmotokdoan mi,  
 nemnemen mi ed Zion yan nan-og-oga kami.  
<sup>2</sup> Gapo sin palalo ay ladingit mi,  
 insab-it mi din gitara mi sin kaiw sin asag-en mi.  
<sup>3</sup> Ngem din akin balod en dakami ay taga-Babilonia,  
 kanan da en ikantaan mis daida,  
 “Ikantaan yos dakami si maipanggep ed Zion,” kanan da.  
<sup>4</sup> Ngem intoy iyat mi ngin ay mangikanta  
 si pangidayaw en Diyos sin odom ay daga?  
<sup>5-6</sup> Olay mo maipket nan dilak ya makingking nan takkay ko,  
 mo liw-ak sik-a ay Jerusalem ay poon di ragsak ko.  
<sup>7</sup> Dosaem koma ay Diyos din taga-Edom gapo sin inamag da,  
 tan sin naabakan di Zion et malaylaydan da.  
 “Bakasen yo, bakasen yo,” ibogbogaw da.  
<sup>8</sup> Dakayo ay taga-Babilonia, awni et madosa kayo.  
 Nagasat di mangibaes sin inyat yo en dakami ay Judio  
<sup>9</sup> ya manga sin an-ak yo ta ipakpak da sin bato.

## Salmo 138

### 138

#### *Iyaman Sin Layad Ya Seg-ang Diyos*

- <sup>1</sup> Man-iyamanak en sik-a, Apo,  
 si amin ay liknak ya nemnem ko.  
 Mankantaak ay mangidaydayaw en sik-a  
 sin sangoanan di “kadiyodiyos” ay kanan da.\*  
<sup>2</sup> Manyakog-ongak ay mansagong sin nasantoan ay Timplom  
 ta idayaw kos sik-a gapo sin layad mo ya kinapodnom,  
 tan inpailam ay nangatongato  
 din karim ya ngadan mo.  
<sup>3</sup> Pinatgam din kararag ko  
 sin nankedawak si badang mo  
 yan indawat mo di toled ya bikas ko.  
<sup>4</sup> Awni et dayawen daka si amin ay ari isnan daga,  
 tan din karim yan dinnge da.  
<sup>5</sup> Ikanta dan to din inam-amag mo,  
 tan nakaskasdaaw di panakabalin mo.  
<sup>6</sup> Ay-ayowanam din nababa, olay mo nangato ka,  
 ngem adi makalisin sik-a din mangipapangato si awak da,  
 olay mo addawi di kad-an da.

\* **138:1** Nankinalasi di pangawat di ipogaw sin layden nina ay kalien: 1) nailangitan ay parparsua; 2) didiyosen di kailili; ono 3) tuturay isnan daga.

- <sup>7</sup> Olay mo nanliniked di ligat ko,  
 isalakan mo pay dedan din biyag ko.  
 Omisalakan ka sin bonget di kalaban ko  
 babaen sin panakabalin mo.
- <sup>8</sup> Tongpalem amin ay planom paran sak-en, Apo,  
 magay pap-eng din adi manbalbaliw ay layad mo,  
 itoloy mo koma din nilogiam ay oblam, Apo.

## Salmo 139

### 139

#### *Ammon Diyos Amin*

- <sup>1</sup> Sik-a ay Diyos, inilam amin ay wadas nemnem ko,  
 amin di maipanggep en sak-en yan dadlon kan ammo.
- <sup>2</sup> Ammom mo pomikaak ya siya abe mo enak tomokdo,  
 olay mo addawi ka, ammom di nemnem ya panggep ko.
- <sup>3</sup> Ammom mo way emeyak ya mo ibaktad ko ay man-ibbay,  
 tan omos-osdong ka si owaoway,  
 isonga amin di ogalik ya kabibiyag ko,  
 iwed polos di adi kan ammo,  
<sup>4</sup> olay din nemnemnemek ay ibagak to.
- <sup>5</sup> Bomanbantay ka sin sangok ya sin edegak,  
 babaen sin panakabalin mo, masalagnibanak.
- <sup>6</sup> Kaeetnga ya naoneg di panakaammom sin kaipogaw ko,  
 adi polos mad-asan di nemnem ko.
- <sup>7</sup> Magay mabalin si emeyak ta lomisiak en sik-a,  
 maga polos di enak pantabonan ta adi kan omil-ila.
- <sup>8</sup> Mo emeyak ed langit, wada ka,  
 mo bomabaak sin kad-an di natey, iso na ay wada ka.
- <sup>9</sup> Olay mo tomayawak ta sin belaan ono diposan di agew di enak pantean,  
<sup>10</sup> wada ka pay dedan isdi ay omipango sin danan,  
 wada ka ay omitakkay ya bomadang.
- <sup>11</sup> Mabalin ay kanak, “Awni ta malabi ta makdeng nan kaagawan,  
 ta waday mabolinget ay enak pantabonan.”
- <sup>12</sup> Ngem olay sin mabolinget, makaila ka pay dedan,  
 tan sin pangilam, mapat-a din labi ay kaman kaagawan.
- <sup>13</sup> Sik-a di namarsua sin awak ya nemnem ko,  
 pinkem sak-en sin eges nanang ko.
- <sup>14</sup> Dayawek sik-a, napateg ay Apo,  
 tan din nangamagam en sak-en et kaeetnga si pannemnem ko.  
 Nakaskasdaaw am-in di inam-amag mo,  
 magay dowadowak, dadlonak ammo.\*
- <sup>15</sup> Idi maam-amagak ay adi kaila sin eges inak,  
 inilam di nas-et ay nansisilpoan di tong-ak,  
<sup>16</sup> tan inmisisin-eng ka idi daanak maianak.  
 Naililista sin librom din kabibilang di agew ko,  
 olay daan pay laeng manlogi din biyag ko.
- <sup>17</sup> Sik-a ay Diyos, din wadas nemnem mo yan adi kabilang,  
 naligat ay maawatan.

\* **139:14** Di esa abe ay kaiologan nina sin Hebreo et: ya ammom amin ay kaipogaw ko.

- 18 Mo bilangek koma, ad-ado mo darat,  
mo bomangonak, wada ka pay laeng sin kad-ak.
- 19-20 Sik-a ay Diyos et sapay koma  
ta peslem din ipogaw ay makapese ya lawa  
ay mangipalawlawwa en sik-a  
ta say tomaynan da koma.
- 21 Kaliliget ko din manigaan en sik-a,  
laslasoyek mo konkontraen daka.
- 22 Ibilang kos daida ay kalaban ko,  
et adi makaan din liget ko.
- 23 Estem ay Diyos ay ilan nan nemnem ko,  
osigem abe din dandanag ko.
- 24 Ilaem kod tan mo manturongak sin danan ay lawa,  
omipango ka sin danan ay manturong en sik-a.

## Salmo 140

### 140

#### *Kararag Ay Mankedaw Si Panalakniban Diyos*

- 1 Apo, omisalakan ka kod sin mangam-amag si lawa,  
sin nay da ipogaw ay palaloy kedse da.
- 2 Kanayon ay lawa di panggep da  
ya ibaw di ilogi da.
- 3 Kaeegyat ay kaman eweg din tepek da,  
kaman gitan di kobra din kali da.
- 4 Apo, somalaknib ka  
sin panakabalin di mangam-amag si lawa,  
mankakekedse ay din kadadaelak di panggep da.
- 5 Nan-amag da sin danan si tagdey ay kaknaak koma  
din mangipapangatos nemnem da.
- 6 Kanak en Apo: Sik-a din Diyos ko,  
dengngem koma nan kararag ko  
ay mankedaw si badang mo.
- 7 Yahweh ay Apok ya manakabalin ay omisalakan,  
kaman kan salida ay somalaknib sin gobatan.
- 8 Apo, adim koman ipalobos din panggep di mangam-amag si lawa,  
adim ipalobos ay matongpal din lawa ay plano da.
- 9 Din kalaban ko yan ipapangato da din awak da,  
ipataolim koman daida din lawa ay kalkalien da.
- 10 Matekdag koma di man-gangab ay oling en daida,  
maitep-a da komas abot yan adi da makabala.
- 11 Adim koman ipalobos ay mayat di pantongpalan da  
din mangipalawlawwa si gait da.  
Sapay koma ta din makedse ay manglokloko si iib-a da  
et kanayon ay mapasamak di lawa en daida  
enggana ay dadlon madadael di biyag da.
- 12 Apo, ammok ay ikalintegam din magay mabalin da  
ya kosto di iyat mo ay mangokom en daida.
- 13 Sigurado ay din nalinteg, awni et dayawen daka  
ya sin kad-am di pantean da.

## Salmo 141

**141***Kararag Sin Timpon Di Solisog*

- <sup>1</sup> Apo, mankararagak en sik-a,  
dalasem koma ta bomadang ka,  
dengngem kod mo mankararagak en sik-a.
- <sup>2</sup> Awatem koma nan kararag ko  
ay kaman manseng-ew ay insinso  
ya kaman daton sin labi din itatag-ay ko ay takkay ko.
- <sup>3</sup> Bomadang ka kod, Apo,  
ta annadak din tepek ko.
- <sup>4</sup> Bomadang ka koma  
ta adiak masolisog ay mangamag si lawa  
ono makikadwa sin am-amagen di laway nemnem da  
ya adiak makikan sin fiesta da.
- <sup>5</sup> Mabalin ay domosa ya bomagbaga  
din nalinteg gapo sin seg-ang da.  
Ngem adiak polos awaten din panangidayaw  
di makedse ay ipogaw,  
tan kanayon ay ikararag ko di maikontra  
sin lawa ay am-amagen da.
- <sup>6</sup> Bigbigen to din kaipoipogaw ay tet-ewa din enak inbaga  
mo maitep-a sin deppas din tuturay da.
- <sup>7</sup> Maiwalang din tong-a da sin labaw di kaot da,  
namekmek ay bato di kaiarigan da.
- <sup>8</sup> Ngem sik-a, Yahweh ay Apok, di kanayon ay pantalkak,  
adi ka kod bomaybay-an, tan sik-a di pankamangak.
- <sup>9</sup> Omilisi ka koma sin tagdey ay in-amag da,  
in-amag di laway nemnem da.
- <sup>10</sup> Makna da koma sin mismo ay tagdey da,  
ngem sak-en pay yan mailisiak koma.

**Salmo 142****142***Kararag Di Napalpaligatan Ay Ipogaw*

- <sup>1</sup> Man-adawagak en sik-a, Apo,  
ay mankedaw si badang mo.
- <sup>2</sup> Isnan sangoanam et ibagak  
amin ay danag ko ya problimak.
- <sup>3</sup> Ammom di kosto ay amagek  
mo komapsot di namnamak.  
Nan-isagana dan kalaban ko sin pandanak  
si tagdey ay maknaak.
- <sup>4</sup> Anapek mo waday olay esa ay kabadang ko,  
ngem maga baw, tan adi dan pagan-ano.  
Maga di mabalin ay pankamangak,  
tan magay lawa na en daida mo mateyak.
- <sup>5</sup> Apo, kedawek din badang mo,  
sik-a din salaknib ko,  
sik-a anggoy di masapol ko isnan biyag ko.
- <sup>6</sup> Dengngem kod nan kararag ko,

tan nay kinmapsot nan nemnem ko.  
 Isnan kalaban ko omisalakan ka,  
 tan nay adiak kabaelan di pigsda.  
 7 Isnan naibalodak omisalakan ka koma  
 ta sin sangoanan di ipogaw mo idaydayaw kos sik-a,  
 din kinasiged mon sak-en di gapo na.

## Salmo 143

### 143

#### *Kararag Di Ipogaw Ay Magay Namnama Na*

- 1 Apo, dengngem kod nan kararag ko.  
 Gapo sin kinalinteg mo ya kinamatalek mo,  
 songbatam kod nan kararag ko.
- 2 Adi ka koman okomen sak-en ay baam,  
 tan magay ipogaw ay nalinteg sin pangilam.
- 3 Inmapayaw nan kalaban ko  
 et naabakak dadlo.  
 Inmibalod das nan mabolinget ay kad-ak,  
 kamanak din natey ay nabayag.
- 4 Isonga kinmapsot nan namnamak,  
 palalo ay madisdismayaak.
- 5 Manemnem ko ed bayag, Apo,  
 manemnem ko din inam-amag mo.
- 6 Itag-ay kon takkay ko ay mankararag en sik-a,  
 kamanak nakgang ay lota ay danom di kasapolana,  
 tan palalo di iliw ko en sik-a.
- 7 Sapay koma ta patgam ay dagos nan kararag ko,  
 tan nay enggay kinmapsot di nemnem ko.  
 Adi ka kod somigsigaan  
 into et mo din kad-an di natey di enak domatngan.
- 8 Inagsapa koma ay ipanemnem mo  
 din adi manbalbaliw ay layad ya seg-ang mo,  
 tan sik-a di pantalkak, Apo.  
 Sik-a anggoy di pankararagak,  
 itdom kod di kosto ay pandanak.
- 9 Sik-a di pankamangak ta somalagnib ka,  
 sin kalaban ko, omisalakan ka koma.
- 10 Itdoam kod sak-en ay mangonod sin laydem,  
 tan sik-a di enak daydayawen.  
 Manageseg-ang ka et sapay koma  
 ta omiturong ka si biyag ay natalna.\*
- 11 Salagnibam koma nan biyag ko  
 ta say maidayaw di ngadan mo.  
 Gapo sin kinalinteg mo,  
 omisalakan ka kod sin problimak, Apo.
- 12 Gapo sin adi manbalbaliw ay layad mo,  
 peslem koma amin din pomalpaligat ay kalaban ko,  
 tan esaak ay mansilbilin sik-a, Apo.

\* **143:10** Di esa abe ay kaiologan nina sin Hebreo et: Manageseg-ang din Ispiritom et sapay koma ta omiturong si biyag ay natalna.

**Salmo 144****144***Kararag Di Ari*

- <sup>1</sup> Sik-a ay Diyos, madaydayaw ka,  
din iyat ay makigobat yan omit-itdo ka.  
Kaman kan dakdake ay bato ay enak pankamangan  
<sup>2</sup> ono mayat ay pantabonan ay adi makasgep di kalaban.  
Managlayad ya napodno ka ay bomadang,  
sik-a di kanayon ay omisalakan.  
Maiarig ka abes kasay ko  
tan sik-a di somalagnib sin kalaban ko.  
Din nanasyon yan abakem  
et paituray mos daida en sak-en.
- <sup>3</sup> Apo, sino aya di kasasaad di ipogaw et nemnemem?  
Ay tan nabanol da od et ay-ayowanam?
- <sup>4</sup> Din biyag di ipogaw et owat kaman dagem,  
mamaga ay kaman alidong.
- <sup>5</sup> Apo, pansianem ed daya ta bomaba ka,  
giwitem din dontog et omasok da.
- <sup>6</sup> Pankimatem ta mansisian din kalaban ko,  
beksem din panam ta managtag da, Apo.
- <sup>7</sup> Iadawam san takkay mo issan kad-am ed daya,  
ta sin malosong ay danom, komay-at ka.  
Sin panangituray di mangili, omisalakan ka,  
<sup>8</sup> makaetek da olay sin sapata da.
- <sup>9</sup> Apo, enak mankanta ay makompanion si arpa,  
baro ay kanta paran sik-a.
- <sup>10</sup> Din aari yan pangabakem daida,  
isalakan mo nan si David ay mansilbin sik-a.
- <sup>11</sup> Sin makedse ay kalaban ko, omisalakan ka koma,  
mangili da ay makaetek olay sin sapata da.
- <sup>12</sup> Din babbaro ay an-ak mi yan domakdake da koma  
ya pomigsa da ay kaman mola.  
Din kaiarigan aben din babalasang ay an-ak mi, Apo,  
yan din posti ay naaltialtian sin solin di palasyo.
- <sup>13</sup> Sapay koma ta mapno din agamang mi  
si amin ay kalasin di apit mi.  
Din kakarnero sin pastolan mi et sapay koma  
ta niliblibo di an-ak da.
- <sup>14</sup> Din baka mi abe et sapay koma  
ta tomaba ya pomigsa da.  
Maga koma di mangobat sin ili  
ya magay maibalod sin addawi.  
Maga koma abe di man-adawag sin kalsada  
gapo si ligat da.
- <sup>15</sup> Nagasat di nasyon ay kaman nina di kasasaad da,  
nagasat di ipogaw ay si Yahweh di daydayawen da.

**Salmo 145**



# 145

## *Din Kinangato Ya Kinasiged Diyos*

- <sup>1</sup> Sik-a ay Diyos ko ya arik, it-ek kos sik-a,  
nan pan-iyamanak en sik-a et magay pap-eng na.
- <sup>2</sup> Inag-agew ay man-iyamanak en sik-a,  
idaydayaw kos sik-a si eng-enggana.
- <sup>3</sup> Lebbeng na ay madayaw ka ay Yahweh, tan nangato ka od,  
din kinangatom et magay makalokod.
- <sup>4</sup> Din nakaskasdaaw ay inam-amag mo et idaydayaw da  
sin amin ay mansinoskat ay ipogaw isnan daga.
- <sup>5</sup> Idaddad-at da din kinangatom ya dayaw mo,  
ipapasnek ko ay nemnemnemen din nakaskasdaaw ay inam-amag mo.
- <sup>6</sup> Idaddad-at din kaipoipogaw din panakabalin mo,  
din kinangatom abe di idaddad-at ko.
- <sup>7</sup> Kanayon ay ipaammo da din madaydayaw ay kinasiged mo  
ya ikanta da din kinalinteg mo.
- <sup>8</sup> Managseg-ang ka ay Diyos ya naanos ka,  
din layad mo et magay balbaliw na.
- <sup>9</sup> Siged di iyat mo ay Diyos sin amin ay ipogaw mo,  
managseg-ang ka sin amin ay parsua ay inamag mo.
- <sup>10</sup> Amin ay pinarsuam et daydayawen daka,  
amin ay ipogaw mo yan man-iyaman dan sik-a.
- <sup>11-12</sup> Dad-aten dan to din madaydayaw ay turay mo  
ya din nakaskasdaaw ay inam-amag mo,  
siya abe sin panakabalin mo,  
ta ammoan am-in di gagait da  
di maipanggep en sik-a.
- <sup>13</sup> Din panturayam ay Yahweh, magay pap-eng na,  
tan ari ka si eng-enggana.  
Amin ay karim et sigurado ay tongpalem,  
yan maila din seg-ang mo sin amin ay amagem.
- <sup>14</sup> Din maligligatan et badangam daida,  
ya papigsaem din nemnem di madisdismaya.
- <sup>15</sup> Sik-a di pannamnamaan di amin ay parsua,  
et idawat mo sin kosto ay timpo din kanen da.
- <sup>16</sup> Idawdawat mo din kanen di esa ya esa,  
et mangan da enggana ay mabsog da.
- <sup>17</sup> Sin amin ay amagem, nalinteg ka,  
kanayon abe ay managseg-ang ka.
- <sup>18</sup> Mo way ipogaw ay naimposoan di kararag dan sik-a,  
nakasagana ka ay mangidawat sin kedawen da.
- <sup>19</sup> Idawat mo din kasapolan di mangipateg en sik-a,  
dengngem din adawag da et isalakan mos daida.
- <sup>20</sup> Salaknibam amin ay manglaylayad en sik-a,  
ngem dosaem din ipogaw ay lawa.
- <sup>21</sup> Yahweh ay Diyos ko, it-ek kos sik-a,  
et sapay koma ta am-in ay ipogaw isnan daga,  
dayawen da din nasantoan ay ngadan mo si eng-enggana.

## **Salmo 146**

## 146

### *Si Diyos Di Pantalkan Tako*

- <sup>1</sup> Madaydayaw din Apo!  
“Daydayawem sisya,” kanak sin awak ko.
- <sup>2</sup> Daydayawek sisya sin kansiyon ko  
engganang tongpal biyag ko.
- <sup>3</sup> Baken koman tuturay isnan daga di pantalkan yo,  
tan magay bael di owat ipogaw ay mangisalakan en dakayo.
- <sup>4</sup> Mo matey da et mantaoli da sin tapok ay napoan da,  
say mapap-engan di amin ay plano da.
- <sup>5</sup> Nagasat din ipogaw tet-ewa  
ay din Diyos ay dinaydayaw Jacob di pantalkana  
ya say pannamnamaana si Yahweh ay Diyos na.
- <sup>6</sup> Si Diyos ay namarsua ed langit ya isnan daga,  
sin baybay ya amin ay wada en daida,  
kanayon ay tongpalena din kari na.
- <sup>7</sup> Sisya di mangiosay si kalintegan di mapalpaligat,  
din kanen di mandagaang yan sisya di mangidawat.  
Din balod et wayawayaana,  
<sup>8</sup> din nagodab yan pan-ilaena.  
Din nadadagsenan et papigsaena,  
din nalinteg yan laylaydena.
- <sup>9</sup> Ayowanang Diyos din mangili, nalasang ya olila,  
ngem sangawena din laway nemnem da  
ta adi matongpal din panggep da.
- <sup>10</sup> Dakayo ay man-ili ed Zion, si Yahweh ay Diyos yo  
et magay patinggan di panturayanan to.  
Madaydayaw din Apo!

## Salmo 147

## 147

### *Kanta Ay Pangdayaw En Diyos Ay Manakabalin*

- <sup>1</sup> Madaydayaw din Apo!  
Mayat ay mankanta si pangidayaw en Diyos tako,  
lebbeng na ay idayaw sin kanta din Apo.
- <sup>2</sup> Itaolin Diyos sin ili da  
din naipaaddawi ay Israelita  
et kasinan saaden  
din siyodad ay Jerusalem.
- <sup>3</sup> Panragsakena din palalo ay madisdismaya,  
ya papigsaena kasin di nemnem da.
- <sup>4</sup> Din tatalaw et inkeddeng na di kaad-ado da,  
nginadanana amin daida.
- <sup>5</sup> Si Yahweh ay Diyos tako et nangato ya manakabalin sisya,  
magay lokod di kinalaing na.
- <sup>6</sup> Ikalintegana ya ayowanana din napakombaba,  
ngem itpig na sin tapok din laway nemnem na.
- <sup>7</sup> Mankanta ya man-gitara tako  
ay man-iyaman sin Diyos tako.
- <sup>8</sup> Komotana si liboo ed daya,

- idawtana si odan din daga,  
 din logam sin dontog yan pagabayena.
- <sup>9</sup> Idawtana din animal si kanen da  
 ya din koyat di gayang mo mankedaw da.
- <sup>10</sup> Baken say panlaydan din Apo  
 di napigsa ay kabayo ya natoled ay soldado.
- <sup>11</sup> Ngem say panlaydana din mangipateg en sisya  
 ya mantalek sin adi manbalbaliw ay layad na.
- <sup>12</sup> Dakayo ay man-ili ed Zion ono Jerusalem,  
 si Yahweh ay Diyos yo di en yo dayawen.
- <sup>13</sup> Paknegena din liteb di siyodad yo  
 ya bindisyonana din an-ak yo.
- <sup>14</sup> Pawadaena di talna sin intiro ay ili yo,  
 mansobsobray makan ay idawat nan dakayo.
- <sup>15</sup> Ibaga na din bilina  
 et maammoan ay dagos sin intiro ay daga.
- <sup>16</sup> Kaman galey din andap ay iaplag na,  
 kaman tapok ay isapowak na.
- <sup>17</sup> Kaman bato di dalalo ay egasena,  
 magay makaitoled sin teg-in ay pawadaena.
- <sup>18</sup> Matenaw din andap ya dalalo mo ibilina,  
 et man-ayos din kinmenteg ay danom mo pandagemena.
- <sup>19</sup> Inpaammo na din bilina sin ipogaw na ay Israelita.
- <sup>20</sup> Magay odom ay nasyon ay nangamaganas na,  
 adi da ammo din linteg na.
- Madaydayaw din Apo!

## Salmo 148

### 148

#### *Idayaw Din Amin Ay Parsua Si Diyos*

- <sup>1</sup> Madaydayaw si Diyos!  
 Dayawen yo si Diyos, dakayo ay wadad daya.
- <sup>2</sup> Dayawen yos sisya, dakayo ay aanghel na  
 ya amin ay wadad daya ay mansilsilbi en sisya.
- <sup>3</sup> Dayawen yos sisya, dakayo ay agew ya bowan,  
 ya mankimkimmi ay talaw ed kayang.
- <sup>4</sup> Dayawen yos sisya, sik-a ay mismo ay daya  
 ya dakayo ay danom ay nasisinop sin ngato na.\*
- <sup>5</sup> Dayawen da koma si Yahweh ay namarsua,  
 tan inbilina et nawada da.
- <sup>6</sup> Inkeddeng na di pantean da si eng-enggana  
 et masapol ay tongpalen da.
- <sup>7</sup> Dayawen yo abe si Diyos, dakayo ay wadas nan daga,  
 amin ay danom sin baybay enggana sin lanad na,  
 ya dakayo ay manbeey sidi ay kaeegyat di ila na,
- <sup>8</sup> dakayo abe ay kimat, dalalo, andap ya liboo,  
 mapges ay dagem ay manongpal sin bilin di Apo.
- <sup>9</sup> Dakayo ay dontog ay nangato ya nababa,  
 olay dakayo ay kakaiw ya molmola,

\* **148:4** Ilaen din footnote sin Genesis 1:7-8.

- dayawen yo amin si Diyos ay namarsua.
- <sup>10</sup> Dakayo abe ay animal, omali kayo,  
mankodkodap ya mantaytayaw, naatap ya naamo,  
ta dayawen yo ay kosto si Diyos ay Apo yo.
- <sup>11</sup> Kaariari ya kaipoipogaw, dayawen yos sisya,  
dakayo am-in ay opisyal ya turay isnan daga.
- <sup>12</sup> Dayawen yo ay babbaro ya babalasang,  
anan-ak ya nataengan.
- <sup>13</sup> Amin kayo, dayawen yos sisya,  
tan sisya di kangatoan sin amin ay wada,  
napigpigsal di panakabalina  
mo din amin ay wadas nan daga ya ed daya.
- <sup>14</sup> Pinapigsal na din ipogaw na ay Israelita,  
ay patpatgena ya laylaydena,  
ta say idayaw da am-in sisya.†
- Madaydayaw si Diyos!

## Salmo 149

### 149

*Kanta Ay Pangidayaw En Diyos Begew Sin Nangabakan Din Ipogaw Na*

- <sup>1</sup> Madaydayaw din Apo!  
Mankanta kayo si baro ay kanta  
ay mangidaydayaw en sisya.  
Dayawen yos sisya  
sin gimong di matalek ay ipogaw na.
- <sup>2</sup> Manragsak kayo ay Israelita gapo sin namarsua en dakayo,  
manragsak kayo ay man-ili ed Zion gapo sin ari yo.
- <sup>3</sup> Mansala kayo ay mangidaydayaw sin ngadana,  
manambol ya mangitara kayo ay mangidaydayaw en sisya.
- <sup>4</sup> Tan malaydan si Diyos sin ipogaw na,  
gon-gonaana din napakombaba et pangabakenas daida.
- <sup>5</sup> Manragsak koma din ipogaw na tan nangabak da,  
maninsinlabi da koma ay mankanta  
begew sin palalo ay ragsak da.
- <sup>6</sup> Ipigsal da koma ay mangidaydayaw en sisya,  
dowan da pay man-egen si kampilan ay nanbinas-il di tadem na,
- <sup>7</sup> ta baesan da din nanasyon ya dosaen da,  
<sup>8</sup> ya kadinaan da abe din aari ya papangolo da.
- <sup>9</sup> Dosaen das daida ta matongpal din inkeddeng Diyos ay dosa,  
tan say kaidayawan din matalek ay ipogaw na.
- Madaydayaw din Apo!

## Salmo 150

### 150

*Madaydayaw Si Diyos*

- <sup>1</sup> Madaydayaw si Diyos!  
Dayawen yos sisya sin Timplo na,  
dayawen yo abe ed daya.

† **148:14** Di esa abe ay kaiologan nina sin Hebreo et: ta say maidayaw am-in daida.

<sup>2</sup> Dayawen yo begew sin nakaskasdaaw ay inam-amag na,  
dayawen yo tan magay makaiso sin kinangato na.

<sup>3</sup> Mananggoyob kayo ay mangidayaw en sisya,  
tokaren yo abe di gitara ya arpa.

<sup>4-5</sup> Manambol kayo down kayon mansala,  
ipigsa yo abe ay manganggangsa.

Maitapi kayo ay nalaing ay manolili,  
dakayo abe ay mankotingting si nakalakalasi.

Osalen yo koma am-in dana  
ay mangidaydayaw en sisya.

<sup>6</sup> Dayawen yos Diyos, dakayo amin ay naparsua.  
Madaydayaw si Diyos!

## Proverbio Maipanggep Sin Libro Ay Nay

Din libro ay Proverbio et kaolnongan di pamagbaga ya apat ay mangipaammo sin kosto ay kabibiyag ay panlaydan Diyos. Ipalawag na din kailasinan di masirib ay ipogaw ay mamatpateg en Diyos ya din naong-ong ay manglaslasoy si sirib. Adadoy madtengan isna ay pamagbaga, tan waday maipanggep si sin-asawa ya anan-ak, babaknang ya nabibiteg, mannigosyo ya manturay, masolisog ya mangitpe si awak, nasadot ya nagaget, ya ad-ado pay.

Wada da di versikulo ay mankokoyog ay kaman din linaon di kapitolo 5 ay maipanggep sin manakikamalala ay babai ya kapitolo 31 ay maipanggep sin ogalin di siged ay asawa, ngem di odom pay ay proverbio yan magay kaitoloyana ono kaisilpoana sin mangon-ona ya omon-onod ay versikulo. Esa ya esa yan waday laydena ay ibaga. Sapay koma ta esten tako ay adalen din wadas na, tan mo patgen takos Diyos ya onodan tako din pamagbaga ay inpaammo na, siya na di poon di ammo tako (1:7).

### **Din Linaona**

Din silbin di pamagbaga 1:1-7

Din banol di sirib para sin babbaro 1:8-9:18

Din pamagbagan Solomon 10:1-22:16

Din pamagbagan di masirib 22:7-24:34

Din pamagbagan Solomon ay inolnong da Hezekias 25:1-29:27

Din pamagbagan Agur 30:1-33

Din pamagbaga en Ari Lemuel 31:1-9

Din ogalin di siged ay asawa 31:10-31

### *Din Silbin Di Pamagbaga*

<sup>1</sup> Siya na di pamagbagan Solomon ay anak David ay ari ed Israel. <sup>2</sup> Makatolong dana en dakayo ta say maitdoan ya mabagbagaan kayo, manbalin kayo ay masirib ya mailasin yo di nabanol ay kali. <sup>3</sup> Maitdoan kayo abe ay manbiyag ay nanemneman ya naannad ta say nalinteg ya kosto di iyat yo ya magay idomdoma yo. <sup>4</sup> Da nan pamagbaga et palaingen da abe din magay ammo na ya din anan-ak ta say kosto di iyat da ay mannemnem. <sup>5</sup> Din nalaing et matapihan din ammo da yan din makaawat et maidalan da <sup>6</sup> ay mangawat sin pamagbaga, apat, pangarig ya bonbontihan di nankalalaing.

<sup>7</sup> Din egyat ya panangipateg di ipogaw en Diyos, say poon di panakaammo. Din naong-ong anggoy di manglasoy si sirib ya adi aben kabagbagaan.

### *Pamagbaga Si Esa Ay Baro Ta Adi Solisogen Di Tollisan*

<sup>8</sup> Sik-a ay anak ko, tongpalem din pamagbagan da amam en inam, <sup>9</sup> tan pasigedena din ogalim ay kaman din iyat di mapteng ay bedbed ya keke ay mangipapteng sin kailaam.

<sup>10</sup> Adi ka manpasolisog sin managbasol ay ipogaw <sup>11</sup> mo kanan da, “Omali ka ta manseed takos peslen tako, olay magay basol na. <sup>12</sup> Napigsa da ed wani ngem kaman tako din kaot ay mangokmon en daida ay sibibiyag. <sup>13</sup> Alaen tako din nabanol ay sanikwa da ta pon-en tako din beey tako si naakew. <sup>14</sup> Makibingay ka mo maitapi ka en dakami.”

<sup>15</sup> Adi kan on-onodan di kaman dadi ay ipogaw <sup>16</sup> tan alisto da ay man-amag si basol, nakasagana da ay manpese. <sup>17</sup> Kaman dan titit ay olay mo il-ilaena din kaiamagan di tagdey, ngem makna pay dedan. <sup>18</sup> Tan da nay ay ipogaw,\* kaman dan tinagdey din

\* **1:18** Baken nalawag din kanana sin Hebreo. Di odom ay kaiologan nina et: Magay silbi na mo maiamag di tagdey ay il-ilaen di titit, tan adi makna. Ngem da nay ay ipogaw,...



mismo ay awak da, din biyag da ay mismo di ipasobo da. <sup>19</sup> Tan din kinabaknang ay magon-od babaen si basol et omiturong si kateyan.

### *Din Pangayagan Di Sirib Sin Ipogaw Ta Dengngen Da*

<sup>20</sup> Si Sirib<sup>†</sup> et ipigsa nan kali na sin kalsada sin katoptopogan di ipogaw, <sup>21</sup> ya sin panilaklakoan sin asag-en di segpan di siyodad. Kanana ay mandiskurso sin ipogaw:

<sup>22</sup> “Dakayo ay magay ammo na, ay pig-an pay di panlaydan yo ay manemneman? Apay nga adi kayon somaldeng ay manlaslasoy ya manis-iyek sin sirib? <sup>23</sup> Dengngen yo din pamagbagak ta ipaammok din nemnem kon dakayo. <sup>24</sup> Ay-ayagak dakayo ngem polos ay adi kayon omikaskaso. <sup>25</sup> Tineteweng yo din indadaan kon dakayo. <sup>26</sup> Isonga siyekak dakayo mo domteng di kaeegyat ay ligat yo, <sup>27</sup> mo kaman pewek ay domteng sin biyag yo din ligat ya panladingitan yo. <sup>28</sup> Awni et kedawen yo di badang ko ngem adiak patgan, omanap kayo ngem adi kayo makadateng en sak-en. <sup>29</sup> Tan sinigaan yo ay maitdoan ya mangipateg en Diyos. <sup>30</sup> Dinokogan yo din pamagbagak ya adi yon inkaskaso din indadaan ko. <sup>31</sup> Ed wani, apiten yo din bongan di inam-amag yo enggana ay mapnga kayo. <sup>32</sup> Tan din magay ammo na ya naong-ong et madadael ya matey da, tan nandokogan das sak-en ay Sirib, ngem napnek da pay dedan sin kasasaad da yan din wadas nemnem da et pag ‘Oway nas di.’ <sup>33</sup> Ngem mo sino di mannge sin pamagbagak et natalna di biyag na ya magay pan-egyatana.”

## 2

### *Din Gon-gona Ay Idawat Di Sirib*

<sup>1</sup> Anak ko, patiem din ibagak ya igtom din bilbilin ko sin nemnem mo. <sup>2</sup> Estem ay mandenge si sirib yan ipasnek mo ay mangawat. <sup>3</sup> Mankararag ka ay mankedaw si panang-awat. <sup>4</sup> Anapem ay kaman din iyat mo ay manganap si palata ono naitabon ay kinabaknang. <sup>5</sup> Mo say iyat mo di, maawatam di iyat mo ay mangipateg en Diyos et maammoam sisya ay kosto. <sup>6</sup> Tan si Diyos di poon di sirib et sisya di mangidawat si laing ya panang-awat. <sup>7</sup> Idawat na di kosto ay sirib sin nalinteg ya salsalaknibanas daida <sup>8</sup> tan ay-ayowanana din nalinteg ya matalek. <sup>9</sup> Mo dengngem sak-en, maammoam to di kosto ya nalinteg ay amagem ya din iyat mo ta magay panlaslasinem. <sup>10</sup> Tan manbalin ka ay masirib et maragsakan ka gapo sin laing mo. <sup>11</sup> Din kinaannad mo ya panang-awat mo et kaman siya da di manalaknib en sik-a. <sup>12</sup> Ilisi das sik-a ay man-amag si lawa. Mailisi ka abe sin ipogaw ay mangipalawlaw si gait na. <sup>13</sup> Daida din manokog si nalinteg ay panagbiyag et kaman dan wadas mabolinget. <sup>14</sup> Maragsakan ya maganasan da ay mangamag si lawa. <sup>15</sup> Nasikap ya makaetek da, adi dan katalek.

<sup>16</sup> Mailisi ka abe sin makaawis ay kalin di manakikamalala ay babai <sup>17</sup> ay nanaynan si asawa na et niliw-ana din kari na sin sangoanan Diyos. <sup>18</sup> Din beey na yan kaman danan ay manturong si pese, tan din senggep sidi et omas-asag-en da sin kad-an di natey. <sup>19</sup> Din en manteng en sisya et adi polos mantaoli ya adi kasin makadteng sin danan ay manturong si biyag.

<sup>20</sup> Isonga say onodam din panagbiyag di siked ya nalinteg ay ipogaw. <sup>21</sup> Tan din kaman dadi et daida di matagotago ya mantetee sin ili, <sup>22</sup> ngem din mangam-amag si lawa ya din baken matalek yan makaan da.

## 3

### *Talek En Diyos*

<sup>1</sup> Anak ko, adi ka liwliw-an din init-itdok ya bilbilin ko mo adi et nenemnemem <sup>2</sup> ta say omando ya somiged di biyag mo. Kanayon koma ay ipailam din napodno ay layad mo

<sup>†</sup> 1:20 Sin nay da ay versikulo, maiarig din Sirib si ipogaw ay mangaskasaba ono mamagbaga sin iib-a na.

ya komakaman ka ay matalek. <sup>3</sup> Ipailam da nay ay ogali ay kaman kowintas ay maikeke ya igtom abe sin nemnem mo. <sup>4</sup> Mo say amagem di, malaydan si Diyos ya din ipogaw en sik-a et maidaydayaw ka.

<sup>5</sup> Imongsan mo di amin ay nemnem mo ay mantalek en Diyos, ta baken din bokod mo ay panang-awat di pantalkam. <sup>6</sup> Sisya di bigbigem ya onodam sin amin ay amagem et isagana na din pandanam ta maidoritso. <sup>7</sup> Adi ka ipapangato di nemnem mo begew sin mismo ay laing mo. Patgem si Diyos ya dokogam di lawa. <sup>8</sup> Mo say amagem na, pabikasen as sik-a ta nasalon-at ka ya mayat di liknam. <sup>9</sup> Dayawem si Diyos babaen sin pangidatonam si pilak ya damo ay apit mo. <sup>10</sup> Mo say iyat mo di, mapno din agamang mo ya mansobsobra di arak mo.

<sup>11</sup> Anak ko, adi kan lalasyen din pamagbagan Diyos. Adi koman mansakit di nemnem mo mo bagbagaan daka. <sup>12</sup> Tan bagbagaan Diyos din laylaydena ay kaman din iyat di ama sin laylaydena ay anak na. <sup>13</sup> Nagasat din makagon-od si sirib ya panang-awat. <sup>14</sup> Tan din sirib et nabanbanol mo palata ya balitok. <sup>15</sup> Nabanbanol mo olay sino ay nangina ay al-altin di awak ya magay makaiso sin olay sino ay laydelaydem. <sup>16</sup> Din sirib et iin-genana sin kannawana di ando ay biyag, sin kannigid na yan dayaw ya kinabaknang. <sup>17</sup> Paragsakena di biyag ya ilapo daka ta magay pandanagam. <sup>18</sup> Din sirib et maiarig si kaiw ay mangidawat si biyag ya poon di ragsak para sin ipogaw ay kokompet en sisya.

<sup>19</sup> Babaen sin sirib ya laing Diyos, pinarsua na din daga ya din wada ed daya. <sup>20</sup> Nanayosena abey obbog ya ginawang ya inpawada nay odan ay mapo sin liboo.

<sup>21</sup> Anak ko, kanayon ay igtom sin nemnem mo di kosto ay sirib ya panang-awat ta adi da mamaga en sik-a. <sup>22</sup> Idawat da en sik-a di ando ay biyag ya kaman kowintas ay mangipapteng en sik-a. <sup>23</sup> Mo say iyat mo et mayat di pandanam ya magay kaisokbaam. <sup>24</sup> Mabalina ay man-illeng ka ya maseyep kas kosto ay magay pan-egyatom. <sup>25</sup> Adi ka emegyat si bigla ay paspasamak ono din kadadaelan di managbasol, <sup>26</sup> tan si Diyos di mangayowan en sik-a et elisi daka sin kadadaelan ay kaman tagdey.

<sup>27</sup> Seg-angam din makasapol, dalo et mo waday maibadang mo. <sup>28</sup> Adi kan ibaga sin katokmang mo en si bigat asi kan idawat mo waday mabalina ay idawat mo ed wani. <sup>29</sup> Adi kan manpanggep si lawa sin katokmang mo, tan mantalek en sik-a. <sup>30</sup> Adi kan makiibaw si ib-am ay magay gapo na mo magay lawa ay inamag nan sik-a. <sup>31</sup> Adi kan omapal sin makedse ay ipogaw ya adi kan on-onodan din ogali na, <sup>32</sup> tan kaliliget Diyos din mangam-amag si lawa, ngem ibilang na ay gayyem na din nalinteg. <sup>33</sup> Baosana din beey di mangam-amag si lawa, ngem din beey di nalinteg et bindisyonana. <sup>34</sup> Adi na pagan-ano din mangipapangatos awak na, ngem seg-angana pay din napakombaba. <sup>35</sup> Maidaydayaw din masirib, ngem din naong-ong pay et maibabain.

## 4

### *Din Mayat Ay Pamagbagan Di Esa Ay Ama*

<sup>1</sup> Anak ko, estem ay dengngen din pamagbagan di esay ama ta mawadaan kas panang-awat. <sup>2</sup> Kosto din it-itdok en sik-a, isonga adi kan liwliw-an. <sup>3</sup> Sin kakitkitooy ko pay laeng, esaak ay anak sin beey da amak yan bogbogtong ay anak sin pangilan inak. <sup>4</sup> Kanan amak ay namagbaga en sak-en, “Adi ka liwliw-an din ibagak. Tongpalem din bilbilin ko ta matagotago ka. <sup>5</sup> Gon-odem di sirib ya panang-awat yan adi kan tetewengen ya liwliw-an din pamagbagak. <sup>6</sup> Adi kan dokdokogan et say mangayowan en sik-a, ipateg mo et salakniban daka. <sup>7</sup> Say kapatgan ay banag din sirib, isonga ipakat moy am-in ay kabaalam ay mangon-od olay intoy kaligat na, siya abe sin panakaawat. <sup>8</sup> Dakdake ay dayaw di magon-od mo mo awatem ya banolem din sirib. <sup>9</sup> Mo say iyat mo di, manbalin din sirib ay kaman mankanapteng ay sabsabong ay maikorona en sik-a.”

<sup>10</sup> Anak ko, dengngem ya patiem din ibagak ta omando din biyag mo. <sup>11</sup> Init-itdoak sik-a ta lomaing ka ya onodan di kosto ay danan. <sup>12</sup> Mo mandan kas di, magay manawad en sik-a ya adi kan maisokba mo managtag ka. <sup>13</sup> Adi kan linglinglingan din inad-adal mo. Ayowanam tan say poon di biyag mo. <sup>14</sup> Adi kan em-emey sin em-emeyan di mangam-amag si lawa ya adi kan on-onodan din am-amagen da. <sup>15</sup> Addawiam din mangam-amag si lawa, dokogam ya taynam daida. <sup>16</sup> Tan adi da maseyep mo adi da man-amag si lawa ya mo magay ipogaw ay kedsean da. <sup>17</sup> Din pangam-amagan das lawa ya kinekedse et kaman makan ya inom para en daida.

<sup>18</sup> Din pomatpat-aana sin agsapa et say kaiarigan din danan di nalinteg. Pomat-a ay pomat-a enggana ay komayang din agew. <sup>19</sup> Ngem mabolinget ay kaman labi din danan di managbasol et adi da ammo di kaisokbaan da.

<sup>20</sup> Anak ko, estem ay dengngen din kalik ya pamagbagak. <sup>21</sup> Adi kan liwliw-an mo adi et igtom sin nemnem mo. <sup>22</sup> Tan say poon di biyag ya salon-at di olay sino ay mamati isna. <sup>23</sup> Ilaem ta mas es-estem din nemnem mo mo olay sino ay nabanol en sik-a, tan say poon di biyag mo. <sup>24</sup> Adi ka man-et-etek ono manbolboladas. <sup>25</sup> Estem ay ilan din kosto ay sangoanam <sup>26</sup> ta doritso ya mapteng di pandanam. <sup>27</sup> Addawiam din lawa. Adi kan masangsangaw ay mandan sin kannawan ono kannigid mo adi et idoritsom sin kosto ay danan.

## 5

### *Pamagbaga Ta Addawian Di Makikamkamalala Ay Babai*

<sup>1</sup> Anak ko, estem ay dengngen din pamagbagak ay pangaam si sirib <sup>2</sup> ta kanayon ay naannad ka ya madnge sin kalim ay nanemneman ka. <sup>3</sup> Tan din kalin di makikamkamalala ay babai et mam-is ay kaman anig ya nalamlamoyot mo lana, <sup>4</sup> ngem sin odi na, maiarig din babai ay sana si manpait ay kedet ya matadem ay kampilan ay nanbinas-il di tadem na. <sup>5</sup> Din panturongan di siki na et pese, tan din pandanana et manturong sin kad-an di natey. <sup>6</sup> Adi na on-onodan din danan ay manturong si biyag. Nasangaw sisya ay manlikeliked sin nakillokillo ay danan, ngem adi na ammo.

<sup>7</sup> Isonga ed wani, dengngem din ibagak yan adi kan liwliw-an. <sup>8</sup> Addawiam din kaman nidi ay babai. Adi ka polos somag-en sin pantew di beey na. <sup>9</sup> Tan mo somag-en ka, posen di odom din dayaw mo yan pilit ay idawat mo si ipogaw ay magay seg-ang na din ginon-od mo sin pigay tawen di biyag mo. <sup>10</sup> Alaen di mangili din kinabaknang mo ay inligligatam. <sup>11</sup> Sin odi na, manbayeweng ka tan enggay komapsot din awak mo. <sup>12</sup> Et kanam, “Apay nga sinigaak ay maitdoan ya mabagbagaan? <sup>13</sup> Apay nga adiak dedan inkaskaso din omit-itdo? <sup>14</sup> Ed wani, sangsangoek di kaibabainak sin sangoanan di natopog ay kaipoipogaw.”

<sup>15</sup> Say inomem anggoy din danom ay mapo sin bobon mo. <sup>16</sup> Baken ka koman kaman ginawang ay mabalin ay pan-inoman di olay sino ay babai. <sup>17</sup> Din bobon mo et paran sik-a anggoy ay adi makibingay di odom. <sup>18</sup> Mabindisyonan koma din obbog mo. Maragsakan ka koma sin inasawam manipod sin kabarom. <sup>19</sup> Napintas sisya yan mapteng ay boyaen din gonay na ay kaman ogsa. Maragsakan ka koma sin soso na yan kanayon koma ay mapnemapnek ka sin layad na. <sup>20</sup> Anak ko, apay nga maawis ka sin asawan di odom ta say maragsakan ka sin soso na?

<sup>21</sup> Tan si Diyos et iilaena am-in ay am-amagen ya em-emeyan di ipogaw. <sup>22</sup> Din basol di mangam-amag si lawa et kaman tagdey ay mangna en sisya. <sup>23</sup> Matey sisya gapo ta adi makaitpe sin awak na, malitaw gapo sin palalo ay kinaong-ong na.

## 6

### *Odom Ay Pamagbaga*

<sup>1</sup> Anak ko, ay waday tinakderam ay otang di odom ay ipogaw? <sup>2</sup> Ay kaman kan nakna si tagdey gapo sin karim? <sup>3</sup> Mo siya di, tengel daka sin panakabalin di ipogaw ay sana, ngem siya na di amagem ta mailisi ka: emey ka ay dagos ta manpakombaba ka ay manpakaasi en sisya. <sup>4</sup> Adi kan man-illeng pay laeng ono maseyep. <sup>5</sup> Ipakat moy kabaalam ay bomolos ay kaman din iyat di ogsa ta ilayawana din manganop ono din iyat di titit ta ilisiana din tagdey.

<sup>6</sup> Sik-a ay nasadot, adalem din biyag di koton ta lomaing ka. <sup>7</sup> Maga di pangolo da, <sup>8</sup> ngem man-olnong das kanen da sin tiyagew ya pinag-aani ta say maisagana di kasapolan da sin pinag-oodan. <sup>9</sup> Ay daetan pay sas seyep mo? Pig-an pay di bomangonam? <sup>10</sup> May, maseseyep ka pay, man-illeng ka pay, <sup>11</sup> ngem di pantongpalana et bigla ay bomiteg ka ay kaman din inakewan di tollisan.

<sup>12</sup> Din makedse ay ipogaw ay magay silbi na yan lomikeliked ay man-et-etek. <sup>13</sup> Mankedyakedyat ya mansinyasinyas ta ietekan daka. <sup>14</sup> Sinisikap di naigto sin nemnem na, pag lawa di panggep na ya sisya di mangiloglogis adi pankikinaawatan. <sup>15</sup> Gapo isdi, bigla ay domteng di dosa na ay magay rimidyo na.

<sup>16</sup> Waday pito\* ay ogalin di ipogaw ay kalkaliget Diyos, kadodogis da sin pangila na: <sup>17</sup> din mangipapangatos awak na, din maetek, din manpeses ipogaw ay magay basol na, <sup>18</sup> din manplano si lawa, din alisto ay en man-amag si lawa, <sup>19</sup> din mangitistigos baken tet-ewa ya din mangilapo si adi pankikinaawatan di sinpamilya.

<sup>20</sup> Anak ko, tongpalem din bilbilin amam yan adi kan liwliw-an din init-itdon inam. <sup>21</sup> Kanayon koma ay nemnemnemem dasa. <sup>22</sup> Din init-itdo da di mangipango en sik-a mo waday emeyam ya manilib en sik-a mo maseyep ka. Mo bomangon ka et say mamagbaga en sik-a. <sup>23</sup> Tan din bilbilin ya pamagbaga da et maiarig si silaw ay mangipaila si iyat mo ay manbiyag. <sup>24</sup> Ilisi daka sin makasolisog ay kalin di makilallalaki ay babai. <sup>25</sup> Adi kan aklongan din kinapintas na ono maawis sin mata na. <sup>26</sup> Tan banol di tinapay di ibayad mo sin hostess, ngem dilikado di biyag mo sin babai ay waday asawa na. <sup>27</sup> Ay mabalin aya ay ibolsikom di apoy yan adi mapooan din badom? <sup>28</sup> Mo gatinan di esay ipogaw di man-ganggangab ay oling, ay adi maatongan din siki na? <sup>29</sup> Siya abe sin makidaag sin asawan di ib-a na, magay adi madosa ay mangamag sina. <sup>30</sup> Adi maoyaw di ipogaw ay mangakew ta pangagas nas dagaang na. <sup>31</sup> Ngem mo mad-asan, bayadana pay dedan di mamin pito ay banol din inakew na ono idawat na am-in ay wadan sisya. <sup>32</sup> Ngem din makibabai et magay nemnem na, tan owat nan dadaelen di awak na. <sup>33</sup> Sakit di awak ya kaibabainana ay adi kaponas di magon-od na. <sup>34</sup> Tan palalo ay bomonget din asawan di babai gapo si imona, et magay seg-ang na mo man-ibaes. <sup>35</sup> Adi kabaew di bonget na olay mo pigay idawat mo.

## 7

### *Din Babai Ay Makasolisog*

<sup>1</sup> Anak ko, estem ay dengngen ya adi kan linglinglingan din bilbilin ko en sik-a. <sup>2</sup> Tongpalem din bilbilin ko ta say matago ka. Ibilang mo din it-itdok ay say kabanolan ay gameng mo. <sup>3</sup> Ibedbed mo sin gomot mo ya igtom abe sin nemnem mo. <sup>4</sup> Panbalinem koma di sirib ay kaman mon agi ay babai yan ibilang mo din panang-awat ay kasigedan ay gayyem mo. <sup>5</sup> Daida di manalaknib en sik-a sin makasolisog ay kalin di babai ay makilallalaki.

<sup>6-9</sup> Sin namingsan ay labi, wadaak ay man-os-osdong sin tawan di beey ko yan waday insid-ip ko ay magay ammo da ay babbaro. Din esa en daida ay baken nanemnemman yan

\* **6:16** Din kanana sin Hebreo et: Waday enem ay banag ay kalkaliget Diyos, pito ay kadodogis sin pangila na. Din silbin di doway bilang et manparis da, tan manparis abe din doway ay linya ay kad-an da ya lawa di kadngeana mo owat maipidwa din bilang ay pito. Din kaman nina ay paris et madtengan abe sin kapitolo 30.

manmandan ay omas-asag-en sin solyon di kalsada ay kad-an din beey di esay babai ay makilallalaki. <sup>10</sup> Asi et en inaspon din babai ay sana ay sinisikap di ogali na ya ad-adoy al-altin di awak na ay kaman din kailaan di hostess. <sup>11</sup> Natoled ay magay baina yan kanayon ay adi mantee sin beey na. <sup>12</sup> Kanayon ay manmandan sin kalsada ya katoptopogan di ipogaw ta man-anap si lalaki ay ietekana. <sup>13</sup> Kakawe ya kaongo sin baro ay sana yan adi mabain ay mangwani, <sup>14</sup> “Nan-idatonak ed wani ay agew ay manongpal sin insapatak yan ad-adoy nabayan ay karni. <sup>15</sup> Isonga inmaliak ay manganap en sika yan naey ka baw tet-ewa. <sup>16</sup> Din ap-ap di katrik yan mapteng di kolor na ay napo ed Egipto, <sup>17</sup> yan pinay-ak si bangbanglo ay makwani en mirra, aloe ya cinnamon. <sup>18</sup> Emey tas di ta manragsak ta ay maninsinlabi. <sup>19</sup> Tan addawi di inmeyan asawak. <sup>20</sup> Ad-adoy intakina ay pilak et adi somaa enggana ay emey di doway dominggo.”\*

<sup>21</sup> Siya di, sinolisog na din baro babaen sin makaawis ay kali na. <sup>22</sup> Inmonod ay dagos din baro ay sana ay kaman din baka ay maiey sin panpaltian ono din ogsa ay makna sin ballasa <sup>23</sup> ta matey babaen si pana. Kaman din titit ay alisto ay emey sin tagdey ay adi na ammo ay say kateyana. <sup>24</sup> Isonga anak ko, estem ay dengngen din ibagak. <sup>25</sup> Adi kan nemnememen din kaman nadi ay babai ya adi kan malet-etekan en daida. <sup>26</sup> Din kaman nadi ay babai di makagapo si nadadaelan ya nateyan di ad-ado ay lallalaki. <sup>27</sup> Din beey na yan kaman danan ay manturong sin kad-an di natey.

## 8

### *Din Maikadwa Ay Pangayagan Di Sirib Sin Ipogaw*

<sup>1</sup> Dengngem tan man-ay-ayag din sirib, din panakaawat yan ipigsa nan kali na. <sup>2</sup> Pinmipika sin toktok di dontog, sin asag-en di nansisianan di danan. <sup>3</sup> Pinmipika abe sin kad-an di eneb ay pandanan di amin ay senggep sin siyodad yan kanana ay manbogaw, <sup>4</sup> “Ay-ayagak dakayo amin ay ipogaw isnan daga. <sup>5</sup> Mabalín ay lomaing din magay ammo na ya manemnehan din naong-ong. <sup>6</sup> Dengngen yo tan nabanol ya kosto din ibagak. <sup>7</sup> Tet-ewa amin din ibagak tan kaliliget ko ay man-etek. <sup>8</sup> Din amin ay kalik et matalek, maga polos di iaw-awana ono ietekana. <sup>9</sup> Mo waday panang-awat yo ya layden yo ay matapián di ammo yo, maila yo ay nalawag din kalik ya magay kaipaksawana. <sup>10</sup> Ibilang yo koma din pamagbagak ay nabanbanol mo palata ya din panakaammo ay nabanbanol mo din kanginaan ay balitok. <sup>11</sup> Tan nabanbanol din sirib mo din nangingina ay al-altin di awak. Olay sino ay laylayden yo yan adi makaiso en sisya.

<sup>12</sup> “Sak-en si Sirib ya si Annad din kakostoan ay gayyem ko. Wada aben sak-en di panakaammo ya panakaawat. <sup>13</sup> Mo patgen yo si Diyos et sigaan yo din lawa. Kaliliget ko din pangipangatoan si awak, lawa ay amag ya etek. <sup>14</sup> Manakabalinak yan mapon sak-en di siged ay pamagbaga ya nalinteg ay nemnem. <sup>15-16</sup> Babaen en sak-en, manturay di aari ya odom ay oopisyal isnan daga ya amagen din tuturay di kostokosto ay linteg.

<sup>17</sup> “Laylaydek amin din manglaylayad en sak-en, yan din napasnek ay oman-anap, detngen das sak-en. <sup>18</sup> Kabaalak ay idawat di mantoltoloy ay kinabaknang, dayaw ya kinalinteg. <sup>19</sup> Din bindisyon ay mapon sak-en et nabanbanol mo din kasigedan ay balitok ya palata. <sup>20</sup> Say am-amagek din kosto ya nalinteg, <sup>21</sup> tan pabaknang din amin ay manglaylayad en sak-en et pon-ek din pan-idoldolinan das gameng da.

<sup>22-23</sup> “Sin damodamo, idi daan pay laeng parsuaen Diyos din amin, inpawada nas sak-en. Nangon-onaak ay naparsua mo nan lobong. <sup>24</sup> Nawawadaak idi maga pay laeng di baybay ya obbog, <sup>25</sup> sin daan kaparsuaan di dontog ya bilbilig, <sup>26</sup> din daga, papayew ya olay din tapok. <sup>27</sup> Idi insaad Diyos din daya sin kosto ay kad-ana sin ngaton di baybay, wadaak sidi. <sup>28</sup> Iso na abe idi inpeey na din liboo ed daya ya sin namarsuaana sin

\* **7:20** Din kanana sin Hebreo et: enggana ay man-inat di bowan.



obbog ay kapoan di danom sin baybay. <sup>29</sup> Wadaak idi inbilina di gedeng di baybay ta say tongpalen din danom ya idi insaad na din lanad di daga. <sup>30</sup> Tinatakdok si Diyos ya binadagak ay nanplano ya nanparsua. Naragsakan sisya en sak-en sin inag-agew yan naragsakanak abe ay naitatakdo en sisya. <sup>31</sup> Peteg abe di ragsak ko begew sin daga ay pinarsua na ya sin ipogaw.

<sup>32</sup> “Dengngen yo ay an-ak ko. Nagasat din manongpal sin pamagbagak. <sup>33</sup> Esten yo ay dengngen din itdok ta lomaing kayo. Adi kayo baybay-an. <sup>34</sup> Nagasat din omali si inag-agew sin beey ko ay mandenge sin pamagbagak. <sup>35</sup> Din manteng en sak-en et mawadaan si biyag ya malaydan si Diyos en sisya. <sup>36</sup> Din adi makadteng en sak-en et paligatena di awak na. Din manigaan en sak-en et laylaydena ay matey.”

## 9

### *Din Pangayag Di Kinasirib Ya Kinaong-ong*

<sup>1</sup> Din kinasirib yan maiarig si ipogaw ay nangisaad si beey na ya tinood na din pito ay posti na. <sup>2</sup> Nanparti si animal na ya nantimpla si arak. Insagana na abe din lamisaan. <sup>3</sup> Binaa na din baa na ay babbabai ta emey da sin kakayangan ay lugar sin ili yan kanan da: <sup>4</sup> “Dakayo ay magay ammo na ya dakayo ay naong-ong, <sup>5</sup> omali kayo ta mangan kayo ya inomen yo din tinimplak ay arak. <sup>6</sup> Dokogan yo din ogalin di magay nemnem na yan onodan yo din panagbiyag di masirib ta matago kayo.”

<sup>7</sup> Din mamagbaga si manlaslasoy ya sin mangam-amag si lawa et maoyaw ya mapabainan anggoy. <sup>8</sup> Isonga adi kan bagbagaan di ipogaw ay makalasoy, tan iliget nas sik-a. Ngem mo say bagbagaam di masirib, laylayden daka. <sup>9</sup> Bagbagaam di masirib et matapian din sirib na. Itdoam di nalinteg et matapian din laing na.

<sup>10</sup> Din egyat ya panangipateg di ipogaw en Diyos, say poon di sirib. Din pangammoan di ipogaw en Diyos ay nasantoan et say lomaingana. <sup>11</sup> Tan begew sin sirib et omando di biyag mo, matapian si piga ay tawen. <sup>12</sup> Mo masirib ka, sik-a di manlak-am si siked. Mo makaoyaw ka, sik-a anggoy di man-ikaro.

<sup>13</sup> Din kinaong-ong et maiarig si babai ay ngalawngaw, magay ammo na ya magay baina. <sup>14</sup> Tomokdo sin pantew di beey na ono sin kangatoan ay partin di siyodad <sup>15</sup> yan ayagana din malablabas ay adi makibibiyang sin am-amagen di odom. <sup>16</sup> Kanana sin magay nemnem na, “Dakayo ay nengneng, omali kayos na, <sup>17</sup> tan mam-is di danom ay naakew. Mam-is abe di makan ay ilimed ay kanen.” <sup>18</sup> Ngem adi dan ammo ay matey di emey en sisya et din odom yan enggaw wada da sin kad-an di natey.

## 10

### *Din Pamagbagan Solomon*

<sup>1</sup> Da nay di pamagbagan Solomon: Paragsaken din masirib ay anak si ama na, ngem din naong-ong yan panladingitena si ina na.

<sup>2</sup> Magay maitolong di kinabaknang ay magon-od si lawa ay pamosposan, ngem din kinalinteg et omisalakan sin pese.

<sup>3</sup> Adi ipalobos Diyos ay mabtil din nalinteg, ngem adi na aben ipalobos ay gon-oden din mangam-amag si lawa din layden da.

<sup>4</sup> Mabiteg di ipogaw ay nasadot, ngem din nagaget et bomaknang.

<sup>5</sup> Nanemneman di nagaget ay man-ani sin pinag-aani, ngem din maseseyep et kababain.

<sup>6</sup> Mabindisyonan din nalinteg ay ipogaw, ngem kalkaloban di makedse babaen sin kali da din lawa ay am-amagen da.

<sup>7</sup> Adi maliw-an din nalinteg olay mo nabayag ay natey da, tan mabindisyonan di ipogaw ay mannemnem en daida, ngem din mangam-amag si lawa et maliw-an da.



<sup>8</sup> Din nanemneman et dengngena ya tongpalena di bilin, ngem din naong-ong ay ad-adoy kali na, dadaelena di mismo ay awak na.

<sup>9</sup> Magay pandanagam mo pag kosto di am-amagem, ngem din mangonod si nakillo ay danan et maammoan di kinasikap na.

<sup>10</sup> Din kinasikap yan pawadaena di problima, ngem din sangosango ay pamagbaga yan pawadaena di talna.\*

<sup>11</sup> Din kalin di nalinteg et maiarig si obbog ay poon di biyag, ngem kalkaloban di makedse babaen sin kali da din lawa ay am-amagen da.

<sup>12</sup> Din liget yan say begew si adi pankikinaawatan, ngem din layad yan kalobana di olay sino ay pankolangan di ib-a.

<sup>13</sup> Madnge sin kalin di nanemneman ay ipogaw di kinasirib na, ngem soplit di maibagay sin magay nemnem na.

<sup>14</sup> Din masirib et igto na sin nemnem na din ad-adalena, ngem din kalin di magay nemnem na et adi mabayag yan mangiturong si kadadaelana.

<sup>15</sup> Say pansalaknib di babaknang din kinabaknang da. Din nabiteg abe yan maligatan da gapo sin kinabiteg da.

<sup>16</sup> Biyag di gon-gonan di nalinteg, ngem din mangam-amag si lawa et basol di gon-oden da.

<sup>17</sup> Mo dengngem di pamagbaga et matagotago ka, ngem mo sigaam et maiaw-awan ka sin danan ay manturong si biyag.

<sup>18</sup> Din makaetek et ilibak da di liget da, yan naong-ong di man-istorya si makadadael.

<sup>19</sup> Manbasol ka si ibagam mo ad-adoem di kalim. Din naannad ay ipogaw et ammo na ay mangitpe si kali na.

<sup>20</sup> Din kalin di nalinteg yan maiarig si kanginaan ay palata, ngem din nemnem di mangam-amag si lawa yan magay silbi na.

<sup>21</sup> Ad-ado di matolongan begew sin pamagbagan di nalinteg, ngem matey din naong-ong gapo ta magay nemnem da.

<sup>22</sup> Say bomaknangan di ipogaw din bindisyon Diyos, et magay itapi na ay ladingit.†

<sup>23</sup> Maragsakan di naong-ong sin pangamaganas lawa, ngem din nanemneman yan maragsakan si kinasirib.

<sup>24</sup> Mapasamak sin mangam-amag si lawa din eg-egyatan da, ngem maidawat din layden di nalinteg.

<sup>25</sup> Mo domteng di ligat ay kaman pewek si biyag et malitaw da din mangam-amag si lawa, ngem din am-in ay manongtongpal en Diyos et kaman fondasyon ay komakaman si eng-enggana.

<sup>26</sup> Maiarig si soka ay komilem ya asok ay manpait si mata din nasadot sin pangilan di apo na.

<sup>27</sup> Omando di biyag di mamateg en Diyos, ngem din mangitoltoloy ay mangamag si lawa et omaptik di biyag na.

<sup>28</sup> Ragsak di pantongpalan din namnaman di nalinteg, ngem din namnaman di mangam-amag si lawa et magay pantongpalana.

<sup>29</sup> Salakniban Diyos am-in ay nalinteg, ngem dosaena am-in ay mangam-amag si lawa.

<sup>30</sup> Mantee da sin ili din nalinteg, ngem adi da bomayag sin ili din mangam-amag si lawa.

<sup>31</sup> Maipaammo di kinasirib sin kalin di nalinteg, ngem awni et maipaginek din makaetek.

<sup>32</sup> Din nalinteg et ammo na ay mankalis maibagay, ngem din lawa di ogali na et ammo na anggo ay mankali si etek ya magay silbi na.

\* **10:10** Siya na di kanana sin Septuagint (LXX). Din kanana sin Hebreo (Masoretic Text) et: ngem din naong-ong ay ad-adoy kali na, dadaelena di mismo ay awak na. † **10:22** Di esa abe ay kaiologan nina sin Hebreo et: magay itapin di gadget na.

## 11

<sup>1</sup> Kaliliget Diyos din manowitik si ib-a na si baken kosto ay kiloan ono salopan, ngem malaydan sin mangosal sin kosto.

<sup>2</sup> Awni et maibabain din mangipapangato si awak na. Din napakombaba et way sirib na.

<sup>3</sup> Din kinamatalek di nalinteg ay ipogaw et say mangipango en sisya, ngem din nasikap et madadael gapo sin kinasikap na.

<sup>4</sup> Magay maitolong di kinabaknang di ipogaw sin agew ay pangipailaan Diyos si bonget na. Din kinalinteg na anggoy di mangisalakan en sisya sin pese.

<sup>5</sup> Din kosto ay ogalin di nalinteg ay ipogaw di mangipasiged sin danan ay onodana, ngem din mangam-amag si lawa et madosa begew sin basol na.

<sup>6</sup> Din kinamatalek di nalinteg ay ipogaw di mangilisi en sisya si problima, ngem din nasikap et kaman naknas tagdey begew sin lawa ay ogali na met laeng.

<sup>7</sup> Din namnaman di mangam-amag si lawa ay bomaknang\* et magay silbi na, tan makilitaw sin kateyana.

<sup>8</sup> Din nalinteg yan mailisi sin ligat, ngem din lawa di nemnem na et ligat di lak-amena.

<sup>9</sup> Din magay Diyos na yan man-istorya das pangdadael sin katokmang da, ngem din nalinteg yan masakniban da begew sin kinasirib da.

<sup>10</sup> Manragsak din kakailian di nalinteg mo somiged din biyag na. Manbogaw da abe si ragsak da mo matey din mangam-amag si lawa.

<sup>11</sup> Maidayaw din siyodad gapo sin bindisyon di nalinteg, ngem madadael gapo sin kalin di mangam-amag si lawa.

<sup>12</sup> Magay nemnem na din manglaslasoy sin katokmang na. Din nanemneman et gomiginek.

<sup>13</sup> Din matalek et adi na dad-aten di lebbeng na ay adi madad-at, ngem din tayoktok et ibaga na di am-in.

<sup>14</sup> Maabak din ili ay magay mangituray, ngem masakniban ay kosto din ad-adoy nalaing ay pangolo na.

<sup>15</sup> Awni man et maligatan di mangitakder si otang di ipogaw ay adi na am-ammo, isonga agpos et adi kan am-amagen di ta say magay pandanagam.

<sup>16</sup> Din masmasang ay babai et maidaydayaw. Din lalaki ay magay seg-ang na yan owat kinabaknang di mabalin ay gon-odena.

<sup>17</sup> Magon-gonaan di managseg-ang, ngem din magay seg-ang na yan paligatena din awak na ay mismo.

<sup>18</sup> Din mangam-amag si lawa yan magay silbin di magon-od da, ngem din nalinteg yan kosto di gon-gona da.

<sup>19</sup> Mo ipapasnek mo ay mangamag si kosto, say mangiturong en sik-a si katagoam, ngem mo ipilit mo ay mangamag si lawa et say mangiturong si kateyam.

<sup>20</sup> Kaliliget Diyos din lawlaw di nemnem na, ngem malaydan sin nalinteg di panag-biyag na.

<sup>21</sup> Sigurado ay madosa din mangam-amag si lawa, ngem din nalinteg et mailisi da.

<sup>22</sup> Din napintas ay babai ay baken naannad yan maiarig si balitok ay singsing sin songsong di bisaang.

<sup>23</sup> Kosto di pantongpalan di nalinteg, ngem din mangam-amag si lawa yan dosa di pantongpalan da.

<sup>24</sup> Waday silalayad ay man-idawat, ngem bomakbknang pay dedan. Waday naimot yan masepsep ay bomitbiteg.

<sup>25</sup> Magon-gonaan di managseg-ang. Din mamadang si ib-a na et mabadangan abe.

\* **11:7** Di odom abe ay kaiologan nina sin Hebreo et: Din namnaman di mangam-amag si lawa ay maibasar sin kinapigsa da... ono Din namnaman di mangam-amag si lawa ay maibasar sin kinabaknang da...

<sup>26</sup> Mo man-idolin kas begas ta asi kan ingingina di lako na, baosan daka, ngem mo ilakom si kosto ay banol na, idayaw daka.

<sup>27</sup> Din mangam-amag si siged yan siged abe di pannemnem di iib-a na en sisya, ngem din mangan-anap si problima yan datngan met laeng di problimas sisya.

<sup>28</sup> Olay sino ay mantalek si kinabaknang et kaman tobon di kaiw ay mag-as, ngem din nalinteg yan gomabay da ay kosto.

<sup>29</sup> Din naong-ong ay mangidawat si problima sin pamilya et owat dagem di tawidena. Din pantongpalana et manbalin ay bag-en di masirib.

<sup>30</sup> Din ogalin di nalinteg yan maiarig si kaiw ay mangidawat si biyag, ngem din amagen di tollisan yan pese di pantongpalana.†

<sup>31</sup> Mo isnan daga yan magon-gonaan di nalinteg, sigurado abe ay madosa din mangam-amag si lawa.

## 12

<sup>1</sup> Din manglayad ay lomaing et laylaydena ay mabagbagaan, ngem din manigaan ay maitdoan yan magay nemnem na.

<sup>2</sup> Laylayden Diyos din nalinteg, ngem dosaena din manplano si lawa.

<sup>3</sup> Magay talna ay maidawat di basol, ngem din nalinteg yan maiarig si kaiw ay makneg di lamot na.

<sup>4</sup> Din nalaing ay babai ay siged di ogali na et maiarig si korona ay kaidayawan asawa na, ngem din babai ay mangibabain en asawa na yan maiarig si sakit di tong-a ay mangabos si bikas.

<sup>5</sup> Kosto din panggep di nalinteg, ngem sinisikap din panggep di makedse.

<sup>6</sup> Din kalin di managbasol yan maiarig si ipogaw ay manseed si peslena, ngem din ibagan di nalinteg yan say mangisalakan en daida.

<sup>7</sup> Mo maipababa din mangam-amag si lawa, enggay mamaga das eng-enggana, ngem din nalinteg yan komakaman din poli da.

<sup>8</sup> Maidayaw di ipogaw gapo sin sirib na, ngem din magay nemnem na yan malaslasoy.

<sup>9</sup> Maymayat di nababa di kasasaad na ay es-esa di katolong na\* mo din agin ngangato ngem magay kanena.

<sup>10</sup> Ayowanan din nalinteg din animal na, ngem din lawa ay ipogaw yan magay seg-ang na.

<sup>11</sup> Mansobsobra si makan din nagaget ay mangobla si daga na, ngem din owat ad-adoy plano na yan magay nemnem na.

<sup>12</sup> Gamgamen din makedse di magon-od da si lawa ay pamosposan, ngem din nalinteg yan maiarig si manlames ay kaiw ay makneg di lamot na.

<sup>13</sup> Din managbasol ay ipogaw yan kaman makna si tagdey begew sin lawa ay ibagbaga na met laeng, ngem din nalinteg yan mailisi si problima.

<sup>14</sup> Ad-ado ya maymayat di gon-gonan di ipogaw gapo sin kali na ay kaman met laeng magon-gonaan insigon sin inamag na.

<sup>15</sup> Din naong-ong yan kanan da en pag kosto di am-amagen da, ngem din masirib yan dengngen da di pamagbaga.

<sup>16</sup> Din naong-ong et adi makaitpe si bonget na, ngem din masirib yan gomiginek mo insoltoen da.

<sup>17</sup> Din tet-ewa di itistigon di matalek ay ipogaw, ngem din baken matalek et pag etek di ibaga da.

† **11:30** Din kanana sin LXX ya Syriac et: ngem din amagen... Din kanana abe sin Hebreo (Masoretic Text) et: masirib abe di “man-as biyag.” Din pangawat di odom sin layden nina ay kalien et: mangisalakan si biyag ono mangawis si ipogaw. \* **12:9** Di esa abe ay kaiologan nina sin Hebreo et: ...ay mangiobla si katagana...

<sup>18</sup> Din nasakit ay kali yan kaman kumpulan ay makasogat, ngem din kalin di masirib yan makaagas.

<sup>19</sup> Din tet-ewa yan komakaman si eng-enggana, ngem din etek yan baken mabayag et maammoan.

<sup>20</sup> Sikap di wadas nemnem di manplanos lawa, ngem ragsak di wada sin mangipawadas olnos.

<sup>21</sup> Magay lawa ay mapasamak sin nalinteg, ngem din managbasol yan ad-adoy lawa ay pasamak sin biyag da.

<sup>22</sup> Kaliliget Diyos din maetek, ngem laylaydena din matalek.

<sup>23</sup> Din naannad yan adi na dad-aten din ammo na, ngem din naong-ong yan ingalawn-gaw na din magay silbi na.

<sup>24</sup> Manbalin ay pangolo din nagaget, ngem manbalin ay bag-en din nasadot.

<sup>25</sup> Din danag yan nadagsen ay bakbaklayen, ngem din mayat ay kali yan omiparagsak.

<sup>26</sup> Din nalinteg yan itdo na di kosto ay danan sin iib-a na, ngem din mangam-amag si lawa yan iaw-awanas daida.

<sup>27</sup> Mandagaang di nasadot tan adi na idawis din inanopana, ngem din nagaget yan nabanol ay kinabaknang di gon-odena.

<sup>28</sup> Waday biyag sin danan di nalinteg. Din danan ay sana et adi maiturong sin pese.†

## 13

<sup>1</sup> Din nanemneman ay anak et dengngena di pamagbagan ama na, ngem din makalasoypay et adi kabagbagaan.

<sup>2</sup> Magon-gonaan din siged ay ipogaw gapo sin kali da, ngem din makalipot yan laylayden da ay paligaten din iib-a da.

<sup>3</sup> Din mangannad si kali na et salaknibanan awak na, ngem din ad-adoy kali na et madadael.

<sup>4</sup> Polos ay adi magon-od di nasadot din laydena, ngem din nagaget et mabalin ay alaena amin ay laydena.

<sup>5</sup> Sigaan di nalinteg ay man-etek, ngem din ibagan di lawa ay ipogaw et ibabaina di ib-a na.

<sup>6</sup> Din nalinteg di ogali na et magay pandanagana, ngem din mangamag si lawa et maiturong si kadadaelana.

<sup>7</sup> Waday odom ay agin babaknang ngem kambaw nakoskosan. Wada abey agin bibiteg ngem ad-ado baw di sanikwa na.

<sup>8</sup> Din baknang et sakaena di biyag na babaen sin pilak na, ngem din nabiteg et magay kaman nidi ay problima na.

<sup>9</sup> Din silaw di nalinteg et adi kad-ep, ngem din silaw di managbasol et sinkaattikan yan mad-ep.

<sup>10</sup> Din mangipapangatos nemnem na et pawadaena di ibaw, ngem nalaing di mandenges pamagbaga.

<sup>11</sup> Nalaka ay malitaw din kinabaknang ay bigla ay nagon-od, ngem din inligatan ay inlagboan et masensen ya omad-ado.

<sup>12</sup> Mo mabayag ay adi matongpal di namnama et masakitan di nemnem, ngem mo matongpal di layden, kaman kaiw ay mangidawat si biyag.

<sup>13</sup> Mo lasoyen di ipogaw din kali ya bilbilin Diyos, maiturong si kadadaelana, ngem mo tongpalena, waday gon-gona na.

<sup>14</sup> Din itdon di masirib et kaman obbog ay mangidawat si biyag. Ilisi na di ipogaw sin kaman tagdey ay pomse.

<sup>15</sup> Madayaw di masirib, ngem din baken matalek et manturong da si kadadaelan.

† 12:28 Di esa abe ay kaiologan nina sin Hebreo et: ..., ngem din danan di lawa et maiturong sin pese.

<sup>16</sup> Din naannad ay ipogaw et ibasar na din amagena sin laing na, ngem din naong-ong et ipaila na sin amagena din kinaong-ong na.

<sup>17</sup> Din laway nemnem na ay baa et pawadaena di problima,\* ngem din matalek et panragsakan di idawat na.

<sup>18</sup> Din manigaan si pamagbaga et bomiteg ya maibabain, ngem din mangawat si pamagbaga et madayaw.

<sup>19</sup> Peteg di ragsak mo matongpal din layden ay gon-oden, ngem din naong-ong et sigaan da ay balbaliwan din lawa ay ogali da.

<sup>20</sup> Din makikadwa si masirib et lomaing abe, ngem din makikoyog si naong-ong et ligat di lak-amena.

<sup>21</sup> Manproblima di managbasol, ngem din gon-gonan di nalinteg et somiged di biyag na.

<sup>22</sup> Din nalinteg yan waday ipatawid nan to sin aap-o na, ngem din kinabaknang di managbasol yan emey sin nalinteg.

<sup>23</sup> Olay mo ad-adoy maapit sin dagan di nabiteg, ngem mabalin ay malitaw gapo sin kinasikap di odom ay ipogaw.

<sup>24</sup> Din adi manoplit si anak na et adi na laylayden din anak na, tan din manglaylayad si anak na et estena ay mamilin.

<sup>25</sup> Adi mankolang si makan din nalinteg, ngem din lawa di nemnem na et kanayon ay mandagaang.

## 14

<sup>1</sup> Din masirib ay babai et pawadaena di olnos sin pamilya na, ngem din magay nemnem na yan sisya ay mismo di manadael sin pamilya na.

<sup>2</sup> Din nalinteg ay ipogaw yan patgena ya egyatanas Diyos, ngem din mangamag si lawa yan laslasoyena.

<sup>3</sup> Din naong-ong ay nangato di nemnem na yan madosa begew sin ad-ado ay kali na,\* ngem din kalin di masirib yan say salaknib na.

<sup>4</sup> Mo magay animal ay pantolong si obla, adi mapay-an di pangpanganan da, ngem mo waday napigsa ay baka, ad-adoy anien.

<sup>5</sup> Din matalek ay tistigo yan din tet-ewa di ibaga na, ngem din adi matalek et pag etek di itistigo na.

<sup>6</sup> Naligat ay somirib di makalaso, ngem nalaka ay lomaing din nanemneman.

<sup>7</sup> Addawiam di naong-ong, tan magay kosto ay itdo nan sik-a.

<sup>8</sup> Din masirib yan nemnemen day kosto ay amagen da, ngem din magay nemnem da yan ietekan day iib-a da.

<sup>9</sup> Din naong-ong yan adi dan pagan-ano din pangikaroan das basol da, ngem din nalinteg yan ipaila day mayat ay nemnem da.

<sup>10</sup> Sik-a anggoy di makaammo si ison di ladingit ono ragsak mo. Adi makilikna si kosto di odom ay ipogaw.

<sup>11</sup> Madadael din beey di managbasol, ngem din beey di nalinteg yan bomayag.

<sup>12</sup> Waday danan ay kaman mayat sin pangilan di ipogaw, yan din pantongpalana baw yan pese.

<sup>13</sup> Olay mo masis-iyek di esay ipogaw et mabalin ay manladingit pay dedan. Mabalin ay mantongpal di ragsak si ladingit.

<sup>14</sup> Madosa di makedse yan magon-gonaan di nalinteg gapo sin inam-amag da.

\* **13:17** Di esa abe ay kaiologan nina sin Hebreo et: ...mawadaan si problima. \* **14:3** Di odom abe ay kaiologan nina sin Hebreo et: 1) Din ad-ado ay kalin di naong-ong yan say kailaan di nangato ay nemnem na; ono 2) Din kalin di naong-ong yan say mangidawat si kadosaana.

<sup>15</sup> Din magay ammo na yan nalaka ay patiena am-in ay dengngena, ngem din naannad yan nemnemen a kosto di panturongana.

<sup>16</sup> Naannad di masirib et addawiana di pangamaganas lawa, ngem din naong-ong yan talantado, adi na ammo ay man-annad.

<sup>17</sup> Din nalaka ay bomonget et oway di iyaat na ay kaman naong-ong. Din manplanos lawa yan kaliliget di ipogaw.

<sup>18</sup> Din magay ammo da yan manbalin da ay naong-ong, ngem din nanemneman yan kaman dan makoronaan si laing da.

<sup>19</sup> Manpakombaba dan to din managbasol sin sangon di nalinteg.

<sup>20</sup> Olay din katokmang di nabiteg yan sigsigaan das daida, ngem din babaknang yan ad-adoy gayyem da.

<sup>21</sup> Bomasol di manglaslasoy sin nabiteg ay katokmang na, ngem nagasat din manegseg-ang en daida.

<sup>22</sup> Dakdake ay kamali di manplano si lawa, ngem din mannemnem si siged et mawadaan si napodno ay gayyem.

<sup>23</sup> Waday gon-oden di nagaget ay man-obla, ngem din tomotokdo ay komalikali et mankolang si kasapolana.

<sup>24</sup> Kaman koronan di masirib din kinabaknang da, ngem din naong-ong yan say korona da din kinaong-ong da.

<sup>25</sup> Din mantistigos tet-ewa et isalakanan biyag di ib-a na, ngem din mantistigos etek et lipotana.

<sup>26</sup> Din pamatpatgan di ipogaw en Diyos et kaman makneg ay pankamangan da ay sinpamilya.

<sup>27</sup> Kaman aben obbog ay mangidawat si biyag ya mangilisi en daida sin kaman tagdey ay pomse.

<sup>28</sup> Maidayaw di ari ay ad-adoy iturayana. Din magay iturayana et maga abey kowinta na.

<sup>29</sup> Din naanos ay ipogaw et peteg ay masirib, ngem din nalaka ay bomonget et palalo ay naong-ong.

<sup>30</sup> Nasalon-at di awak mo mapnek di nemnem, ngem din apal yan kaman sakit di tong-a ay mangabos si bikas.

<sup>31</sup> Din mamaligat si nabiteg yan laslasoyena si Diyos ay namarsua en daida, ngem din maseg-ang en daida et dayawenas Diyos.

<sup>32</sup> Maabak din managbasol begew sin basol na met laeng, ngem din pankamangan di nalinteg yan din kosto ay ogali na.

<sup>33</sup> Din nanemneman ay ipogaw et maiarig si kosto ay panbeeyan di sirib, ngem adi polos madtengan di sirib sin nemnem di naong-ong.

<sup>34</sup> Maidayaw di esa ay nasyon babaen si kinalinteg di ipogaw na, ngem maibabain babaen si basol da.

<sup>35</sup> Laylayden di ari din nalaing ay mansilbi en sisya, ngem dosaena din adi na ammo di am-amagena.

## 15

<sup>1</sup> Din nainayad ay songbat et sebsebana di bonget, ngem din nasakit ay kali et sepsepena.

<sup>2</sup> Din kalin di masirib et paragsaken da di man-adal, ngem din kalin di naong-ong et magay kowinta na.

<sup>3</sup> Ilaen Diyos di amin ay lugar, et iilaena amin ay mangamag si siged ya lawa.

<sup>4</sup> Din nainayad ay kali et maiarig si kaiw ay mangidawat si biyag, ngem din sinisikap ay kali et palalo ay pansakitenay nemnem.



<sup>5</sup> Lasoyen di naong-ong din pamagbagan ama na, ngem din nanemneman et onodana di pamagbaga.

<sup>6</sup> Din nalinteg et bomaknang da, ngem din lagbo ay gon-oden di lawa di nemnem da et makadadael.

<sup>7</sup> Mangidawat si laing din kalin di masirib, ngem din nemnem di naong-ong et magay silbi na.

<sup>8</sup> Sigsigaan Diyos din daton di laway nemnem na, ngem maragsakan sin kararag di nalinteg.

<sup>9</sup> Kaliliget Diyos din am-amagen di laway nemnem na, ngem laylaydena din mangi-papasnek ay mangonod si nalinteg ay panagbiyag.

<sup>10</sup> Madagsen di dosan di mangamag si baken kosto. Matey abe din manigaan si pamagbaga.

<sup>11</sup> Mo si Diyos yan kabaelana ay ilaen di am-in sin kad-an di natey, sigurado ay ammo na di nemnem tako.

<sup>12</sup> Din makalaso yan sigaana ay mabagbagaan. Polos ay adi manpaitdo sin masirib.

<sup>13</sup> Maila sin ropan di ipogaw mo naragsak. Mo manladingit, palalo abe ay madismaya.

<sup>14</sup> Din masirib yan laydena ay man-adal, ngem din magay nemnem na yan nemnemen di magay silbi na.

<sup>15</sup> Innagew ay naligat di biyag di kaseseg-ang, ngem din naragsak ay ipogaw et kanayon ay gan-ganasena di biyag na.

<sup>16</sup> Maymayat di kasasaad di nabiteg ay mangipatpateg en Diyos mo din palalo ay baknang ay ad-adoy pandandanagana.

<sup>17</sup> Maymayat di mansida si nateng ay waday layad mo din mansida si kam-isang ay karni ay waday liget sin nemnem.

<sup>18</sup> Din makabonget yan pawadaena di ibaw, ngem din naanos yan pawadaena di kapya.

<sup>19</sup> Ad-adoy ligat sin biyag di nasadot olay intoy em-emeyana, ngem din nalinteg yan magay problima ay domteng sin biyag na.

<sup>20</sup> Paragsaken di nanemneman ay anak din akin anak en sisya. Din naong-ong anggoy di manglasoy sin napoana.

<sup>21</sup> Maragsakan din magay nemnem na sin magay silbi na ay inoong-ong, ngem din masirib yan say amagena din kosto.

<sup>22</sup> Magay pantongpalan di plano mo magay kosto ay pamagbaga, ngem matongpal da mo ad-adoy mamagbaga.

<sup>23</sup> Palalo ay omiparagsak din kosto ay kali sin kosto ay timpo.

<sup>24</sup> Say pandanan di masirib din danan ay manturong si biyag ay baken din danan ay manturong si pese.

<sup>25</sup> Dadaelen Diyos din beey di mangipapangato si nemnem da, ngem salaknibana din sanikwan di nalasang.

<sup>26</sup> Kaliliget Diyos din nemnem di managbasol, ngem malaydan sin kalin di nalinis di nemnem na.

<sup>27</sup> Din mangamgam si kinabaknang yan pawadaena di problima sin pamilya na, ngem matago di manigaan si pasoksok.

<sup>28</sup> Din nalinteg et nemnemenas kosto di ibaga na, ngem din managbasol yan mankali si lawa ay adi na nemnemen.

<sup>29</sup> Patgan Diyos din kararag di nalinteg, ngem adi na ikaskaso din kararag di managbasol.

<sup>30</sup> Omiparagsak di manlamiing ay ipogaw yan omipasim-et di siged ay damag.

<sup>31</sup> Maibilang di ipogaw ay masirib mo denggena di kosto ay pamagbaga.

<sup>32</sup> Din adi kaitdoan et palpaligatena di awak na, ngem din mannge si pamagbaga et lomaing.

<sup>33</sup> Din panangipateg di ipogaw en Diyos yan say somiribana. Masapol ay manpakombaba di ipogaw asi maidayaw.

## 16

<sup>1</sup> Manplano di ipogaw, ngem si Diyos di mangiturong si ibaga na.

<sup>2</sup> Kaman kosto sin pannemnem di ipogaw din am-in ay am-amagen da, ngem si Diyos di akin ammo si panggep da.

<sup>3</sup> Mo italek mo din planom en Diyos et matongpal da.

<sup>4</sup> Waday planon Diyos sin am-in ay inamag na. Din inkeddeng na ay pantongpalan di ipogaw ay lawa di nemnem na et madosa da.

<sup>5</sup> Kaliliget Diyos am-in din mangipapangato si awak da. Sigurado ay dosaenas daida.

<sup>6</sup> Mapakawan di basol di ipogaw mo napodno di layad na ya komakaman ay matalek. Mo egyatan ya patgen di ipogaw si Diyos, addawiana di panbasolana.

<sup>7</sup> Mo mapnek si Diyos si esa ay ipogaw, iturong na din nemnem di kaibaw din ipogaw ay sana ay makikapya en sisya.

<sup>8</sup> Maymayat di nabiteg ay kosto di ogali na mo din bakanang ay makasowitik.

<sup>9</sup> Manplano di ipogaw, ngem si Diyos di mangiturong en sisya.

<sup>10</sup> Adi mankamali di ari si ikeddeng na, tan si Diyos di mangipanemnem.

<sup>11</sup> Say layden Diyos di kostokosto ay timbangan ya salopan.

<sup>12</sup> Napigsa di turay di ari mo nalinteg da, isonga sigaan da din lawa.

<sup>13</sup> Say layden ya patgen da din mangibaga si tet-ewa.

<sup>14</sup> Mo bomonget din ari, mabalin ay ipapse daka, isonga mo masirib ka, anapem di iyat mo ta mabaew din bonget na.

<sup>15</sup> Mo naragsak din ari ya malaydan en sik-a, seg-angan daka et mabalin ay say katagoam.

<sup>16</sup> Addawi ay nabanbanol di sirib ya panang-awat mo balitok ya palata.

<sup>17</sup> Addawian din nalinteg di lawa. Estena din ogali na et say salaknibanan biyag na.

<sup>18</sup> Din pantongpalan di mangipapangatos nemnem na et din kadadaelana.

<sup>19</sup> Maymayat di maitapis nabiteg ay napakombaba mo din makibingay si kinabaknang ay pinnos di ipogaw ay mangipapangatos nemnem na.

<sup>20</sup> Mayat di pantongpalan di ipogaw ay mangonod si mait-itdo en sisya. Din mantalek en Diyos yan naragsak.

<sup>21</sup> Mo kosto di iyat mo ay mangikeddeng et say kailaan di kinasirib mo. Mo mayat di iyat mo ay mankali, ad-ado di maitdoan.

<sup>22</sup> Din kinasirib yan maiarig si obbog ay mangidawat si biyag, ngem din kinaong-ong di ipogaw di mangidawat si kadosaana.

<sup>23</sup> Din masirib yan naannad ya makaawis di iyat na ay mankali.

<sup>24</sup> Din mayat ay kali yan kaman anig ay mam-is ya mangipasalon-at.

<sup>25</sup> Mo mamingsan, waday kaman mayat sin pangilan di ipogaw, ngem din pantongpalana et din kateyana.

<sup>26</sup> Gapo sin layad di ipogaw ay mangan, gomaget ay man-obla.

<sup>27</sup> Din ipogaw ay magay silbi na yan say nemnemnemen da di panproblimaan. Pati din kali da yan domadael ay kaman manbidbidang ay apoy.

<sup>28</sup> Lawa di mantayoktok, tan din apat yan pawadaena di ibaw ya dadaelena di panaggagayyem.

<sup>29</sup> Din makedse ay ipogaw yan solisogena din iib-a na, tan awisena ay man-amag si lawa.

<sup>30</sup> Din ipogaw ay manginenengneng ono mangililid-is en sik-a yan waday lawa ay panggep na.

<sup>31</sup> Din ando ay biyag et gon-gonan di nalinteg ay ipogaw, isonga kaman dan korona din oban da.

<sup>32</sup> Maymayat di naanos ay ipogaw ay kabaelana ay mangitpe si bonget na mo din nalaing ay makigobat ay makabael ay mangabak si esa ay siyodad.

<sup>33</sup> Manbobonot di ipogaw, ngem si Diyos di mangikeddeng si mapasamak.

## 17

<sup>1</sup> Maymayat pay laeng di mangan si kilabban yan waday talna ya olnos da ay bemeey mo din mangan si mankanam-is ngem man-iibaw da.

<sup>2</sup> Iturayan di masirib ay bag-en din anak di apo na ay kababain di ogali na ya maiskat en sisya ay makitawid sin aag-i na.

<sup>3</sup> Malinisan di balitok ya palata babaen si apoy. Idawtan aben Diyos si padas di ipogaw ta say somiged di nemnem na.

<sup>4</sup> Say dengngen di makedse din kalin di gait da ay makedse, din maetek yan din gait da abe ay maetek.

<sup>5</sup> Din mangoy-oyaw sin nabiteg yan laslasoyen das Diyos ay namarsua en daida. Madosa din manis-iyek si manligligat.

<sup>6</sup> It-it-ek din nankakay din aap-o da yan din anan-ak et it-it-ek da abe din akin anak en daida.

<sup>7</sup> Din makaay-ayo ay kali et adi maibagay si naong-ong; ngem masepsep ay eweewe mo man-etek di marispito ay ipogaw.

<sup>8</sup> Din pasoksok yan nakaskasdaaw di maamag na para sin mangidawat. Olay intoy iyat na, mayat di pantongpalana.

<sup>9</sup> Din mamakawan yan adi taynan di gagayyem na, ngem din mangistorya si basol di gagayyem na et dokogan das sisya.

<sup>10</sup> Nalaka ay maawatan di nanemneman di mamingsan ay pamagbaga, ngem din naong-ong yan adi makaawat olay mamin gasot ay sopliten.

<sup>11</sup> Din kanayon ay panggep din lawa ay ipogaw et kontraena din gobierno, ngem man-ibaa din ari si magay seg-ang na ay baa ay manpap en sisya.

<sup>12</sup> On-onina et ay abaten di maangat ay animal ay namaga di anak na mo din naong-ong ay ipogaw ay mangam-amag si niloloko.

<sup>13</sup> Kanayon di lawa ay pasamak sin ipogaw ay lawa di isobalit na sin siged ay maamag en sisya.

<sup>14</sup> Din panlogian di ibaw et kaman din panlogian di danom ay bomala sin lokaw di beyeng, isonga masapol ay mapasaldeng ay dagos ta baken komaro.

<sup>15</sup> Kaliliget Diyos din mangikeddeng ay magay basol din nakabasol ya siya abe sin mangeddeng ay madosa din magay basol na.

<sup>16</sup> Magay silbi na ay man-gastos ay man-adal di magay nemnem na, tan sigaana ay maitdoan.

<sup>17</sup> Di sin-gayyem et kanayon ay ipaila da di layad da. Di gapo ay waday siag-i et ta mantitolong das ligat.

<sup>18</sup> Magay nemnem di mangikari ay takderana di otang di gait na.

<sup>19</sup> Din manglaylayad si ibaw ya mangipapangato si awak na et laylaydena di basol ya an-anapena di kadadaelana.

<sup>20</sup> Magay pansigdan si gon-oden di ipogaw ay mannemnem ya mankalis lawa. Pag ligat di domteng en sisya.

<sup>21</sup> Din naong-ong ay anak yan magay ragsak si idawat na en ama mo adi et ladingit.

<sup>22</sup> Mangipabikas di ragsak ay kaman agas, ngem din ladingit yan pakapsotena di awak.

<sup>23</sup> Din lawa ay howis, awatena di pasoksok ay naililimed yan adi na itonton di kinalinteg.

<sup>24</sup> Din nalaing ay mangilasin si kosto et imongsana di nemnem na sin amagen di masirib, ngem din naong-ong yan magay kosto ay kaimongsanan di nemnem na.

<sup>25</sup> Ladingit ya sakit di nemnem di idawat di naong-ong ay anak en da ama na en ina na.

<sup>26</sup> Baken kosto mo moltaen di magay basol na ya sopliten di opisyal begew sin kosto ay am-amagena.

<sup>27</sup> Masirib di ipogaw ay makaitpe si bonget na ya naannad ay mankali.

<sup>28</sup> Olay din magay nemnem na et kaman nalaing mo gomiginek.

## 18

<sup>1</sup> Din ipogaw ay adi na ammo ay makikadwa si gait na ay ipogaw et din awak na anggoy di nemnemnemen. Kontraena am-in ay kosto sin pannemnem di odom.

<sup>2</sup> Adi layden di naong-ong ay man-adal, laydena anggoy ay mangibaga sin wadas nemnem na.

<sup>3</sup> Din pangamagan si lawa et say kalaslasoyan ya kaibabainan.

<sup>4</sup> Din kalin di masirib et maiarig si malosong ay ginawang ay adi katdok.

<sup>5</sup> Lawa mo pangabaken din nakabasol ya adi maitonton din kalinteg di magay basol na.

<sup>6</sup> Din kalin di naong-ong yan say begew si pakiibawana ya kasoplitana.

<sup>7</sup> Din kali na yan maiarig si bito ay kaknaana ya kadadaelana.

<sup>8</sup> Din apat di tayoktok yan kaman makan ay mam-is ay okmonen.

<sup>9</sup> Din kalawlawan di nasadot yan magay kaitkenana sin makadadael si ib-a na.

<sup>10</sup> Si Diyos yan maiarig si makneg ay pantabonan ay pankamangan din nalinteg ay ipogaw.

<sup>11</sup> Sin pannemnem di babaknang yan maiarig din sanikwa da si nakayang ay alad ay pansalanan da.

<sup>12</sup> Din mangipapangato si awak na yan say begew si kadadaelana. Masapol ay manpakombaba di esa ay ipogaw, asi maidayaw.

<sup>13</sup> Kababain mo waday somongbat ay adi na dengngen omona di salodsod, yan say kailaan di kinaong-ong na.

<sup>14</sup> Din pigsan di nemnem di ipogaw di makatolong en sisya sin sakit na, ngem mo magay pigsan di nemnem na, makaan abe di namnama na.

<sup>15</sup> Din masirib yan nakasagana ya laylaydena ay man-adal.

<sup>16</sup> Idawtam si sagot din nangato ay ipogaw mo laydem ay maam-ammos sisya.

<sup>17</sup> Din ibagan di damo ay mankali sin pangokoman yan kaman kosto mo daan mankali din kalabana.

<sup>18</sup> Mabalin ay makeddenggan di naligat ay kaso babaen si binonotan ay maikamang en Diyos.

<sup>19</sup> Naligligat ay itaoli din panakikadwan di napasakitan di nemnem na ay gayyem mo din iyat ay lomsot si alad di siyodad.

<sup>20</sup> Apiten di ipogaw di am-in ay ibongan di kali na.

<sup>21</sup> Din kali et makabalin ay say katagoan ono kateyan, isonga din manglaylayad ay mankali et masapol ay awatena mo sinoy ibongan di kali na.

<sup>22</sup> Din mangasawa, siged dis gon-odena, tan din asawan di ipogaw et kailaan di segang Diyos en sisya.

<sup>23</sup> Manpakpakaasi di nabiteg ay mankali, ngem din baknang yan bodtak di songbat na.

<sup>24</sup> Waday odom ay gagayyem ay domadael, ngem waday odom ay nasursurok mo agi di kinapodno da.

## 19

<sup>1</sup> Maymayat di nabiteg ay nalinteg mo din naong-ong ay maetek.

<sup>2</sup> Magay silbin di kinapasnek di ipogaw mo magay ammo na. Din man-aagag et nalaka ay maiaw-awan.

<sup>3</sup> Madadael di ipogaw babaen si kinaong-ong na, ngem si Diyos di pabasolena.

<sup>4</sup> Babaen si kinabaknang yan omad-ado di gagayyem, ngem din nabiteg yan olay din at-atik ay gayyem na et dokogan das sisya.

<sup>5</sup> Adi makalisi sin dosa din makaetek ya mangitistigos baken tet-ewa.

<sup>6</sup> Ad-ado di manganap si somigedana sin pangilan di nangato di saad na, yan gayyem di am-in ay ipogaw din waday idawat na.

<sup>7</sup> Din nabiteg yan dokogan din aag-i na, masepsep din gagayyem na. Mo kasapolanay badang, magay tomolong en sisya.

<sup>8</sup> Tolongam din awak mo ta man-adal ka, yan banolem din inadal mo ta somiged di biyag mo.

<sup>9</sup> Sigurado ay madosan to din makaetek ya mangitistigos baken tet-ewa.

<sup>10</sup> Adi maibagay di mayat ay biyag sin naong-ong, ngem masepsep ay lawlaway kanemnemana mo iturayan di bag-en din ari.

<sup>11</sup> Mo masirib ka, itpem di bonget mo. Kaidayawam mo palabsem di kamalin di gait mo.

<sup>12</sup> Mo bomonget di ari, kaman layon ay manngangaed, ngem mo malaydan et kaman din dono ay manibsibog si mola.

<sup>13</sup> Din naong-ong ay anak et ibabaina si ama na. Din makaibaw ay asawa ay babai et maiarig si danom ay tomedtetedted.

<sup>14</sup> Din beey ya kinabaknang yan mabalin ay itawid di ama ya ina, ngem din nanem-neman ay asawa et sagot Diyos.

<sup>15</sup> Mandagaang to din nasadot ay ipogaw, tan adi mankotkoti mo adi et owat maseseyep.

<sup>16</sup> Din mantongpal si bilin et salaknibanan biyag na, ngem din ipogaw ay oway di iyaat na et matey.

<sup>17</sup> Din maseg-ang sin nabiteg yan kaman si Diyos di nangibolodana et gon-gonaan Diyos sisya.

<sup>18</sup> Soplitem din anak mo sin kakitkitty da, tan wada pay laeng di namnama. Mo adi kan sopliten daida, kaman mon inturong daida si kateyan da.

<sup>19</sup> Kanayon ay manproblima din mabonget ay ipogaw. Mo badangam et masapol ay amagem kasin.

<sup>20</sup> Dengngem ya patiem di pamagbaga ta lomaing ka sin odi na.

<sup>21</sup> Ad-adoy planon di ipogaw, ngem si Diyos di mangipatongpal sin inkeddeng na ay mapasamak.

<sup>22</sup> Say nabanol et din kinapodnon di esa ay ipogaw. Maymayat di nabiteg mo din maetek.

<sup>23</sup> Mo egyatam ya patgem si Diyos, matagotago ka, et wada abey talnan di nemnem mo ya magay lawa ay mapasamak.

<sup>24</sup> Waday ipogaw ay palaloy sadot na. Owat nan kapayen din kanena, ngem adi na maidoo sin tepek na.

<sup>25</sup> Manemneman di magay ammo na mo ilaena di makalasoy ay masoplit, ngem din masirib et maitdoan babaen si pamagbaga.

<sup>26</sup> Palalo ay mangibabain di anak ay mangpasakit en ama na ya mangipakaan en ina na.

<sup>27</sup> Anak ko, mo isaldeng mo ay man-adal, omaddawi ka sin inadal mo.

<sup>28</sup> Din man-etek ay tistigo et laslasoyena di linteg. Kaman mam-is ay makan di pangibilangan di managbasol sin lawa.

<sup>29</sup> Enggay nakeddengan di makalaso y naong-ong ay manlak-am si soplit ya odom ay dosa.

## 20

<sup>1</sup> Din man-inom si arak et makalaso y makangalawngaw. Din mabeteng et magay nemnem na.

<sup>2</sup> Din mabonget ay ari yan maiarig si mabonget ay layon. Mo pabongetem et dilikado di biyag mo.

<sup>3</sup> Madayaw ay ogali di omaddawi si ibaw. Din naong-ong anggoy di laydena ay makiib-ibaw.

<sup>4</sup> Din nasadot ay adi man-obla sin pinag-aalado et magay apitena sin pinag-aani.

<sup>5</sup> Din nemnem di ipogaw yan naoneg ay kaman din malosong ay baybay, ngem mabalin ay ammoen di masirib.

<sup>6</sup> Ad-adoy mangibaga ay matalek da, ngem ay way makaanap si tet-ewa ay matalek ay ipogaw?

<sup>7</sup> Mo nalinteg di ipogaw ya kosto di am-amagen da, nagasat din aan-ak da.

<sup>8</sup> Sin pangokoman di ari, timbangena am-in ay pamaneknek ta ilasina di lawa sin siged.

<sup>9</sup> Ay wada aya di ipogaw ay makaibaga ay nalinis di konsensia na ya nalinisan sin bashasol na?

<sup>10</sup> Kaliliget Diyos din man-osal si baken kosto ay timbangan ya salopan.

<sup>11</sup> Olay esay anak yan maammoan mo siged ya kosto di kaipogaw na babaen sin amagena.

<sup>12</sup> Si Diyos di nangamag si inga ay para denge ya mata ay para ila.

<sup>13</sup> Mo kanayon ay maseseyep ka, bomiteg kan to, ngem mo bomangon ka ta man-obla ka, ad-adoy kanem.

<sup>14</sup> Din manlako yan manreklamo sin presyon di lakoana, ngem mo komaan yan it-ek na din laing na ay mantawal.

<sup>15</sup> Nabanbanol din kalin di masirib mo balitok ya nankangingina ay al-altin di awak.

<sup>16</sup> Din mangitakder si otang di sangsangaili et masapol ay tenglen din nangiotang din sanikwa na ta mangipasigurado ay manbayad sisya.

<sup>17</sup> Kaman mam-is di makan ay naa si sinasaor, ngem sin odi na yan kaman darat sin tepek.

<sup>18</sup> Matongpal di plano mo waday kosto ay pamagbaga, isonga mo makigobat ka, kamangem omona di pamagbagan di masirib.

<sup>19</sup> Olay palimed yan dad-aten di makatayoktok, isonga adi ka makipolapol en sisya.

<sup>20</sup> Mo waday mamaos en ama na ono en ina na, magan-gan-o di biyag na ay kaman silaw ay bigla ay mad-ep sin gawan di labi.

<sup>21</sup> Din tawid ay sapaen di ipogaw ay alaen et adi bindisyonan Diyos sin odi na.

<sup>22</sup> Adi ka man-ibaes sin mangamag si lawa en sik-a. Mantalek ka en Diyos et isalakan daka.

<sup>23</sup> Kaliliget Diyos din mansowitik babaen si baken kosto ay timbangan ya salopan.

<sup>24</sup> Adi ka ammo di mapasamak to, tan si Diyos di nangikeddeng sisi.

<sup>25</sup> Naligat di mangikari si esa ay banag en Diyos yan adi na nemnemen omona.

<sup>26</sup> Din masirib ay ari et ammo na ay mangilasin sin managbasol yan madagsen di ikeddeng na ay dosa da.

<sup>27</sup> Din nemnem ono konsensian di ipogaw yan kaman silaw ay osalen Diyos ay manokisok sin kaonegan ay nemnem na.

<sup>28</sup> Din manalagnib sin ari et din adi manbalbaliw ay layad ya seg-ang na ya din kinapodno na. Komakaman abe di panturayana mo nalinteg sisya.

<sup>29</sup> Say kaidayawan di babbaro din pigsa da, ngem din nankakay, din oban da.



<sup>30</sup> Mabalín ay mabalbaliwan di lawa ay ogali babaen si mansakit ay dosa.

## 21

<sup>1</sup> Si Diyos di mangiturong sin nemnem di ari ay kaman din iyat na ay mangiturong sin laydena ay emeyan di ginawang.

<sup>2</sup> Sin pangilan di ipogaw, pag kosto din am-amagen da, ngem ammon Diyos din panggep da.

<sup>3</sup> Mas malaydan si Diyos sin pangamagan si kosto mo din pan-idatonan.

<sup>4</sup> Din lawa ay ipogaw et ipapangato dan awak da, ngem magay pantongpalan di biyag da mo adi et basol.

<sup>5</sup> Din man-aagag et mankolang to, ngem din nagaget ya mangnemnem ay kosto si amagena et mansobsobra.

<sup>6</sup> Din kinabaknang ay magon-od babaen si etek et maiarig si kisp ay nalaka ay maomas. Kaman aben tagdey ay pomse.

<sup>7</sup> Madosa din managbasol begew sin kedse da, tan sigaan da ay mangamag si kosto.

<sup>8</sup> Nakillo di ogalin di managbasol, ngem nalinteg din magay basol na.

<sup>9</sup> Maymayat pay laeng di mantee sin bel-ayan di beey\* mo din makibeey si makaibaw ya makamayotmot ay asawa.

<sup>10</sup> Laylayden di managbasol ay mangamag si lawa. Magay seg-ang na, olay sin gagayem na.

<sup>11</sup> Mabalín ay manemneman di magay ammo na mo ilaena di makalaso ay madosa, ngem din masirib et mabalín ay maitdoan babaen si pamagbaga.

<sup>12</sup> Nalinteg si Diyos. Ammo na din am-amagen di managbasol et dosaenan tos daida.

<sup>13</sup> Din adi mangikaskaso sin nabiteg ay manpakaasi et domteng abe di timpo ay manpakaasi yan magay bomadang en sisya.

<sup>14</sup> Mabalín ay makaan di palalo ay bonget babaen si pasoksok.

<sup>15</sup> Maragsakan din mangam-amag si kosto mo maipakat di kinalinteg, ngem din managbasol yan emegyat da.

<sup>16</sup> Din adi mangos-osal si kosto ay nemnem et pese di pantongpalana.

<sup>17</sup> Bomiteg di ipogaw ay mangan-anap si ragragsak. Adi bomaknang di manglaylayad ay manginom si nangina ay arak ya mangosal si nankangingina ay bangbanglo.

<sup>18</sup> Nam-osen din managbasol din ligat ay panggep da ay ipalak-am sin nalinteg.

<sup>19</sup> Maymayat di man-es-esa ay manbiyag sin lugar ay magay omili mo din makibeey si makaibaw ya makamayotmot ay asawa.

<sup>20</sup> Kanayon ay wada di nankababanol ay bonag ya mayat ay makan sin beey di masirib, ngem din naong-ong yan abosena ay dagos din sanikwa na.

<sup>21</sup> Din mangipakat si kabaelana ay mangonod si nalinteg ya manageg-ang ay panag-bibiyag et baken kinalinteg anggoy di mawada en sisya, mo adi et matagotago abe ya maidayaw pay.

<sup>22</sup> Kabaelan di masirib ay abaken di ad-ado ay sosoldadon di esa ay siyodad et dadaelena din alad ay pantaltalkan da.

<sup>23</sup> Din naannad si kali na et mailisi si problima.

<sup>24</sup> Din makalaso ya mangipapangato si awak na et kanan di ipogaw en nalastog.

<sup>25</sup> Din nasadot ay manigaan ay man-obla et pespeslena di awak na met laeng.

<sup>26</sup> Kanayon ay mankolang si kasapolana, ngem din nalinteg yan kanayon ay man-idawat.

<sup>27</sup> Kaliliget Diyos din daton di managbasol, masepsep mo lawa di panggep na.

<sup>28</sup> Maipasaldeng di maetek ay tistigo, ngem mapati din mandenge ay kosto, asi mankali.

\* **21:9** Din kanana sin Hebreo et: solin di atep. Nasingpa di atep di beey da, isonga mabalín ay pan-isaadan si kitkittoy ay kowarto.

<sup>29</sup> It-it-ek di managbasol di kabaelana, ngem din nalinteg yan nemnemena ay kosto di amagena.

<sup>30</sup> Olay mo kas-anoy laing ya pigay planon di ipogaw, adi makaabak en Diyos.

<sup>31</sup> Olay mo isaganaan di sosoldado din kabayo da ay para gobat, si Diyos pay dedan di makaoway sin pangabakan da.

## 22

<sup>1</sup> Din dayaw di esay ipogaw et nabanbanol mo palata ya balitok.

<sup>2</sup> Siya na di nan-iisoan di babaknang ya nabiteg: pinarsuan Diyos daida am-in.

<sup>3</sup> Din naannad yan maila na di domteng ay problima et lisiana, ngem din magay ammo na yan dalasodos, isonga lak-amena di ligat.

<sup>4</sup> Din gon-gonan di napakombaba ya mangipateg en Diyos et kinabaknang, dayaw ya ando ay biyag.

<sup>5</sup> Din mamanol sin biyag na et addawiana din danan di laway nemnem da, tan ad-ado isdi di tombek ya tagdey.

<sup>6</sup> Itdoam din an-ak mo sin kabibiyag ay onodan da koma, et mo madakdake da, ipapasnek da ay onodan.

<sup>7</sup> Iturayan di baknang din nabiteg yan manbalin abe ay bag-en di man-iotang din mantang.

<sup>8</sup> Olay sino ay mangimola si baken kosto et problima di apitena, et pag somaldeng di mamaligatanas odom begew sin bonget na.

<sup>9</sup> Bindisyonan Diyos din managseg-ang ay mangibingay si makan sin nabiteg.

<sup>10</sup> Mo pakaanen yo din makalaso, somaldeng di ibaw, adi pankikinaawatan, ya oyaw.

<sup>11</sup> Gayyem di ari din nalinis di nemnem na ya omiparagsak di kali na.

<sup>12</sup> Ilaen Diyos ta mapaneknekan din tet-ewa, ngem dadaelena din planon di maetek ya nasikap.

<sup>13</sup> Kanan din nasadot ay manpambal, “Emegyatak ay en man-obla tan waday layon ay omisida.”

<sup>14</sup> Din kalin di manakikamalala ay babai yan kaman malosong ay bito. Mo pabongetem si Diyos et mag-as ka isdi.

<sup>15</sup> Naisisigod di kinaong-ong di amin ay anak, ngem no soplitem, mabalin ay mabal-baliwan.

<sup>16</sup> Mo paligatem di nabiteg ta waday iyat mo ay bomaknang, bomiteg ka pay dedan. Siya abe mo isagotam di baknang.

### *Tolonpo Ay Pamagbagan Di Masirib*

<sup>17</sup> Nay di pamagbagan di masirib. Estem ay dengngen nan itdok en sik-a.

<sup>18</sup> Maragsakan kan to mo igtom dana sin nemnem mo ya kabaalam ay ibaga. <sup>19</sup> Itdok dana en sik-a ed wani ay agew ta mantalek ka en Diyos. <sup>20</sup> Insolat ko nan tolonpo ay pamagbaga ay pakagon-odan si sirib. <sup>21</sup> Say pangammoam si tet-ewa ya kosto ay isongbat mo sin nan-ibaa en sik-a.

<sup>22</sup> Adi ka paligaten di nabiteg gapo anggoy ta magay kabaelan da, ya adi kan sowitiken sin pangokoman, <sup>23</sup> tan si Diyos di mangikalinteg en daida et peslena din mamaligat en daida.

<sup>24</sup> Adi kan makigayyem sin mabonget ay ipogaw, <sup>25</sup> tan maalinan ka en daida et kaman kan nakna si tagdey.

<sup>26</sup> Adi kan itakder di otang di odom ay ipogaw, <sup>27</sup> tan mo magay ibayad mo, alaen da din mismo ay kaseyseyepam.

<sup>28</sup> Adi kan etanen din sigod ay beddeng ay in-amag di aap-o yo.

<sup>29</sup> Mo nalaing ka ay man-obla, baken nababa ay ipogaw di pansilbiam mo adi et mansilbi ka sin ari.

## 23

<sup>1</sup> Mo ayagan daka ay makikan si nangato ay ipogaw, nemnemem mo sino di kasangsangom.\* <sup>2</sup> Mo naaklong ka, itpem. <sup>3</sup> Adi kan aklongan din mankanam-is ay makan, tan mabalin ay say pansikap na en sik-a.

<sup>4</sup> Masirib ka koma ta adi kan palaloan di awak mo ay mangan-anap si panbaknangan. <sup>5</sup> Tan adi ka ammo yan bigla ay tomayaw din pilak mo ay kaman din titit ay agila.

<sup>6</sup> Adi kan makikan si naimot ay ipogaw mo ayagan daka. Adi ka aklongan din mankanam-is ay makan ay inpasango na en sik-a, <sup>7</sup> tan nemnemnemen anggoy din gastos na. Olay mo kanana en mangamangan ka ngem baken naimposan. <sup>8</sup> Iotam amin ay kinan mo et masayang din mayat ay kalim.

<sup>9</sup> Adi ka sayangen di kalim si esa ay naong-ong, tan adi na ammo ay banolen din magon-od na ay sirib sin pamagbagam.

<sup>10</sup> Adi ka padendenen di sigod ay beddeng ya adi kan posen di dagan di olila, <sup>11</sup> tan manakabalin si Diyos ay mangitonton sin kalintegan da kontra en sik-a.

<sup>12</sup> Dengngem di pamagbaga ya ipakat moy kabaalam ay man-adal.

<sup>13</sup> Adi kan emegyat ay manoplit sin anak mo, tan adi matey mo say iyat mo di. <sup>14</sup> Di katet-ewa na, mabalin ay say kaisalakanana.

<sup>15</sup> Anak ko, palalo di ragsak ko mo manemneman ka. <sup>16</sup> Naragsakak to mo dengngek ay kalin di masirib di iyat mo ay mankali.

<sup>17</sup> Adi kan apalan din managbasol mo adi et kanayon ay patgem si Diyos. <sup>18</sup> Mo say iyat mo di, waday mayat ay namnamam sin tapin di agew yan sigurado ay matongpal.

<sup>19</sup> Anak ko, dengngem nan pamagbagak. Manemneman ka koma ta say onodam din kosto. <sup>20</sup> Adi ka maitaptapi sin makabeteng ya naaklong. <sup>21</sup> Tan din kaman dadi ay ipogaw et kanayon ay masmaseyep da, isonga bomiteg da ya manbado das nabisngibisngit.

<sup>22</sup> Dengngem din pamagbagan amam ay nakaotangam si biyag mo yan adi kan laslasoyen si inam mo enggay mabakes. <sup>23</sup> Ipakat mo din kabaalam ay mangadal si kosto ay todo ya sirib, pamagbaga ya panakaawat, yan adi kan linglinglingan. <sup>24</sup> Dadlon maragsakan din aman di nalinteg ya masirib begew en sisya. <sup>25</sup> Isonga paragsakem koma da amam en inam ay nangianak en sik-a.

<sup>26</sup> Anak ko, estem ay dengngen din ibagak ya ilaem abe di kabibiyag ko ta say tadonem koma. <sup>27</sup> Din hostess ya din makikamkamalala yan maiarig das malosong ay bito. <sup>28</sup> Maiarig da si tollisan ay manseseed et ad-ado di lalaki ay iturong da si basol.

<sup>29</sup> Sino di kanayon ay manproblima ya mansakit di nemnem na? Sino di kanayon ay makiibaw ya manriri? Sino di masogatan yan magay kosto ay gapo na? Sino di manbalangay mata na? <sup>30</sup> Daida di malabian manbegew si arak, tan laylayden da ay man-inom si nanlalaok ay arak. <sup>31</sup> Adi kan pasolisog sin arak olay manbalanga ay kaman mayat di kailaana sin baso. Manlamoyot kayman ay inomen, <sup>32</sup> ngem sin odi na yan kaman dakan kinat si nagitaan ay eweg. <sup>33</sup> Ad-adoy ilaem ay ol-olay yan baken kosto din nemnem mo ya kalim. <sup>34</sup> Enggay naolaw ka ya nagolo di nemnem mo ay kaiarigam di maseyep si bapor sin gawan di baybay sin timpon di pewek. <sup>35</sup> Et kanam to si nemnem mo, “Wadan samet di dinmespeg ono pinmat-o, ngem adi met mansakit. Magay liknak. Apay nga adiak makabangon ta daan ay man-inomak?”

## 24

<sup>1</sup> Adi kan omapal ono makigayyem sin managbasol, <sup>2</sup> tan kedse ya golo di nemnem-nemen da ya kalkalien da.

\* **23:1** Di esa abe ay kaiologan nina sin Hebreo et: estem ay ilan din naisango en sik-a.

<sup>3</sup> Babaen si sirib ya panakaawat, maisaad ya komneg di beey. <sup>4</sup> Babaen si laing, mapno di kowarto na si nankababanol ay gameng.

<sup>5</sup> Din masirib ay ipogaw yan dakdakdakey panakabalina mo din mabikas. Nabanbanol abe di laing mo din pigsan di awak. <sup>6</sup> Tan mangabak di ipogaw si gobat gapo sin siged ay pamagbaga ya ad-ado ay plano.

<sup>7</sup> Adi maawatan di naong-ong din planon di masirib ay ipogaw, isonga mo matopog di papangolo ta manngalat da, magay maibaga na.

<sup>8</sup> Am-in ay manplanos lawa et mandinamag ay makedse da. <sup>9</sup> Din planoen di naong-ong yan basol. Kaliliget di ipogaw di makalaso.

<sup>10</sup> Nakapsot di nemnem di ipogaw ay manpaabak si ligat.

<sup>11</sup> Isalakan mo din nakeddangan ay matey. Adi ka baybay-an mo ikaan da ta en da peslen. <sup>12</sup> Adi kan kanan en adi ka ammo, tan kabaelan Diyos ay ilaen din wadas nemnem mo. Ammo na di nemnemnemen ya am-amagen di am-in ay ipogaw et gongonaana am-in maibasar sin am-amagen da.

<sup>13</sup> Anak ko, mangan kas anig, tan waday panmayatana ya mam-is. <sup>14</sup> Siya abe ay waday panmayatan di sirib sin nemnem mo. Mo magon-od mo, waday mayat ay namnamam sin tapin di agew yan sigurado ay matongpal.

<sup>15</sup> Adi kan tadonen di tollisan. Adi kan mansiim si akewem sin beey di nalinteg. <sup>16</sup> Tan olay mo mamin pito ay maisokba din nalinteg, bomangon met laeng. Ngem mo din managbasol di maisokba, adi makabangon.

<sup>17</sup> Adi ka koman manragsak ay mangila sin kaisokbaan ya katokangan di kaibaw mo.

<sup>18</sup> Mo say iyat mo di, adi malaydan si Diyos et makaan din bonget na en daida.

<sup>19</sup> Baken koman magolo di nemnem mo begew sin mangam-amag si lawa ya adi kan apalan daida. <sup>20</sup> Tan magay mayat ay pantongpalan da et kaman dan lampa ay mad-ep.

<sup>21</sup> Anak ko, patgem ya egyatam si Diyos ya siya abe sin ari. Adi kan maitapi sin komontra en daida. <sup>22</sup> Tan magay makaammo sin bigla ay idawat da ay dosa.

### *Odom Ay Pamagbagan Di Masirib*

<sup>23</sup> Nay da di odom ay pamagbagan di masirib. Baken mayat mo waday pabpaboran sin pangokoman. <sup>24</sup> Din mangikeddeng ay magay basol di nakabasol et baosan ya kaliliget di kaipoipogaw isnan lobong. <sup>25</sup> Ngem din howis ay manosa si nakabasol et somiged di biyag da ya mabindisyonan da.

<sup>26</sup> Din ipogaw ay kosto ya naimposoan di songbat na et ipaila na di napodno ay panakigayyem.

<sup>27</sup> Isaganam din payew mo ya manmola ka omona asi kan amagen di beey mo.

<sup>28</sup> Adi kan pabasolen di ib-am mo magay kosto ay gapo na, adi ka aben palawlawan.

<sup>29</sup> Adi ka aben kanan en ibaes mo din inamag na met laeng en sik-a.

<sup>30</sup> Sin namingsan, nalabasak sin payew ya inobasan di nasadot ay ipogaw ay magay nemnem na. <sup>31</sup> Enggay nabeas ya nagodogod abe din batog ay alad na. <sup>32</sup> Idi inilak di, waday inadal ko. <sup>33</sup> Mo kanam en maseyep kas at-atik ono man-illeng ka anggoy, <sup>34</sup> di pantongpalana et bigla ay bomiteg ka ay kaman din inakewan di tollisan.

## 25

### *Din Pamagbagan Solomon Ay Inolnong Da Hezekias*

<sup>1</sup> Da naey di odom ay pamagbagan Solomon ay kinopyan di oopisyal Hezekias ay ari ed Juda.

<sup>2</sup> Maidayaw si Diyos gapo sin adi kaawatan ay adi na ipaammo, ngem din aari yan maidayaw da sin pangilawlawagan da si naligat ay maawatan. <sup>3</sup> Magay makaammo sin nemnem di ari, tan nangato ay kaman din kinangaton di ed daya ya kaman din kaoneg di daga.

<sup>4</sup> Masapol ay malinisan di balitok ya palata ta maamag si nabanol ay banag. <sup>5</sup> Masapol abe ay makaan din makedse sin kad-an di ari ta maila di kinalinteg sin iyat na ay manturay.

<sup>6</sup> Adi kan ipangaton awak mo sin sangoanan di ari. <sup>7</sup> Maymayat ay din ari di mangipangaton sik-a mo din maibabain ka sin sangoanan di oopisyal.

<sup>8</sup> Mo waday inilam, adi ka man-aagag ay en mandarum tan into et mo maabak ka et mabainan ka.

<sup>9</sup> Pankalian yo ay ang-anggoy yo din adi yo nankinaawatan sin katokmang mo, ngem adi kan dad-aten di palimed di odom, <sup>10</sup> into et mo maammoan ay makatayoktok ka et magay pap-eng di bain mo.

<sup>11</sup> Din kosto ay kali sin kosto ay timpo et maiarig si palata ay naaltian si balitok.

<sup>12</sup> Din panngean si siged ay pamagbaga et maiarig si balitok ay kowintas ono aritos.

<sup>13</sup> Din matalek ay baa et maiarig si mantetek ay danom sin tiyagew ay mangipabikas sin apo na.

<sup>14</sup> Din man-ikari si sagot ngem magay idawat na et kaman din manliboo ya mandagem yan adi man-odan.

<sup>15</sup> Mo naanos ka ya nainayad di kalim, mabalin ay patlokem din turay ya abakem din kapigsaan ay mangontra.

<sup>16</sup> Mo waday datngem si anig, ten-em di kanem. Adi ka palaloan tan into et mo mantaoli ay bomala sin tepek mo. <sup>17</sup> Adi kan kanayonen ay emey sin beey di gayyem mo tan maoma en sik-a et sigsigaan daka.

<sup>18</sup> Kaman mon pinat-oan ya sinogatan si kumpulan ono pana din gayyem mo mo man-istorya kas baken tet-ewa maipanggep en sisya.

<sup>19</sup> Mo adi matalek din gayyem mo sin timpon di ligat, kaman kan napilay ay mandan ono mansakit di bab-a na ay man-gaga.

<sup>20</sup> Eweewe mo ikantaam di manladladingit. Kaman kan kaanen din bado na sin timpon di teg-in ono pay-am sogat nas asin.

<sup>21</sup> Mo mandagaang di kaibaw mo, pakanem; mo nabigaw, painomem.

<sup>22</sup> Tan mo say iyat mo di, palalo ay mabainan sisya,\* et gon-gonaan dakan Diyos.

<sup>23</sup> Din mangipalawlaw si gait na et pawadaena di bonget. Di kaiarigana et din dagem ay mapo sin amyanan ay sigurado ay mangikoyog si odan.

<sup>24</sup> Maymayat di mantee sin bel-ayan di beey mo din makibeey si makaibaw ya makamayotmot ay asawa.

<sup>25</sup> Din siged ay damag ay mapo si addawi ay ili yan maiarig si mantetek ay danom sin ipogaw ay manbigaw.

<sup>26</sup> Mo itolok di nalinteg din kanan di managbasol, kaman din nalinis ay obbog ono sakdoan ay nakosnongan si kadodogis.

<sup>27</sup> Lawa mo palaloan di ipogaw ay mangan si anig ya lawa abe mo palalo di layad da ay madayaw.

<sup>28</sup> Maiarig si siyodad ay magay alad na di ipogaw ay adi makaitpe si awak na.

## 26

<sup>1</sup> Adi maibagay ay man-odan sin tiyagew ya mangandap sin omatongana. Iso na abe ay adi maibagay ay maidayaw di naong-ong.

<sup>2</sup> Adi demket di baos ay magay gapo na, kaman mantaytayaw ay titit ay magay ompaana.

<sup>3</sup> Masapol ay mabokadoan ya masoplit di dangki ya kabayo, siya abe sin naong-ong.

<sup>4</sup> Mo songbatam di naong-ong, adi ka ikompas di kalim sin kinaong-ong na ta adi ka

\* **25:22** Din kanana sin Hebreo et: pay-am din toktok nas man-ganggangab ay oling. Ilaen abe sin Roma 12:20.



mais-o en sisya. <sup>5</sup> Mo songbatam di naong-ong, ikompas mo din kalim sin kinaong-ong na ta way iyat na ay mangawat ay baken masirib sisya.

<sup>6</sup> Kaman mon binetbet di sikim ya kaman kan nan-inom si sabidong mo ibaam di naong-ong ay mangipaammo si esa ay damag. <sup>7</sup> Din pamagbagan di naong-ong et kaman siki ay napilay ay nalalaylay. <sup>8</sup> Din mangidayaw si naong-ong et kaman din mangitaked si bato sin palsiit. <sup>9</sup> Din pamagbagan di naong-ong et kaman pagat ay iwaswasawas di nabeteng. <sup>10</sup> Kaman ipogaw ay mamapan si am-in ay malabas din manglagbo si naong-ong ya makabeteng.

<sup>11</sup> Din naong-ong yan ipidwapidwa da din lawa ay am-amagen da, kaman dan aso ay nanaoli si ota da.

<sup>12</sup> Nalaklaka ay matongpal di namnama ay somiged di ogalin di naong-ong mo din ogalin di ipogaw ay nalaing sisya sin pannemnem na ay mismo.

<sup>13</sup> Din nasadot yan ipambal na ay waday layon ay komat sin gawan di danan.

<sup>14</sup> Kanayon ay manposposipos din tangeb sin bisagra, iso na din sadot ay owat manbalibalin sin kaseyseyepana. <sup>15</sup> Waday odom ay palaloy sadot na et masadot ay mamakan si awak na. <sup>16</sup> Ipagarup di nasadot ay nalalaing sisya mo piga ay ipogaw ay naannad ay mansongbat.

<sup>17</sup> Din makibiyang si ibaw di odom et kaman ipogaw ay mamden si ingan di malablabas ay aso. <sup>18</sup> Kaman naboge ay mangipanpana si matadem ya manbidbidang ay pana <sup>19</sup> din mangietek si gait na asi na kanan en solog na. <sup>20</sup> Mad-ep din apoy mo magay kaiw, maga abey man-iibaw mo magay mantaytayoktok. <sup>21</sup> Kaman din iyat di oling ya kaiw ay mangipabidang si apoy din iyat di makaibaw ay mangipapigsa si pan-iibawan.

<sup>22</sup> Din tayoktok yan kaman mam-is ay makan ay laylayden ay okmonen.

<sup>23</sup> Din mangilingeb si lawa ay nemnem na babaen si mayat ay kali et kaman dinamili ay banga ay nam-es si mankoniniing ay kaman palata. <sup>24</sup> Agin sisiged ay mankali din kalaban ta ilingeb na din liget na. <sup>25</sup> Kaman mayat ay dengngen, ngem adi ka mantalek, tan adi kabilang di lawa ay panggep na. <sup>26</sup> Mabalina ay ilingeb na di panggep na, ngem sin odi na et ammoen met laeng di kaipoipogaw. <sup>27</sup> Din mankaot si bito et sisya met laeng di maikosnong, mo manpolag si bato, mantaoli ya tegmilena sisya. <sup>28</sup> Kaliliget di maetek din palawlawana. Makadadael din boladas ay kali na.

## 27

<sup>1</sup> Adi kan it-it-ek din amagem si bigat, tan adi ka ammo din mapasamak sin inagew.

<sup>2</sup> Adi kan it-ek din awak mo, sed-em ay odom di mangit-ek en sik-a.

<sup>3</sup> Madagsen di bato ya darat, ngem madagdagsen pay di problima ay pawadaen di naong-ong.

<sup>4</sup> Makedse ya kaeegyat di ipogaw ay mabonget, ngem nakarkaro pay di man-imon, tan maga di makalisi en sisya.

<sup>5</sup> Maymayat di doritso ay pamagbaga mo din layad ay adi maipaila ono maipaammo.

<sup>6</sup> Mabalina ay talkem din panggep di esa ay gayyem ay nasakit di pamagbaga na, ngem et-etek din ad-ado ay ongon di kaibaw.

<sup>7</sup> Kaman baken mam-is di anig mo nanabsog di ipogaw, ngem mo mandagaang, olay din manpait yan kanana en mam-is.

<sup>8</sup> Din ipogaw ay addawi sin beey na yan kaman titit ay inmaddawi sin obong na.

<sup>9</sup> Omiparagsak din lana ya bangbanglo, ngem masepsep din pamagbagan di napodno ay gayyem.\*

<sup>10</sup> Adi kan dokogan di sigod ay gagayyem di familyam. Adi kan say emeyan din aag-im sin addawi mo waday ligat mo tan ad-ado di maitolong din katokmang mo mo daida.

\* **27:9** Siya na di kanana sin Hebreo. Din kanana abe sin Griego (LXX) et: ngem din ligat et dadaelena din talnan di nemnem.



<sup>11</sup> Anak ko, ipailam ay masirib ka ta maragsakanak ya waday isongbat ko si olay sino ay mangoyaw en sak-en.

<sup>12</sup> Din naannad yan maila na di domteng ay problima et lisiana, ngem din magay ammo na yan dalasodos, isonga lak-amena di ligat.

<sup>13</sup> Din mangitakder si otang di sangsangaili et masapol ay tenglen din nangiotang din sanikwa na ta mangipasigurado ay manbayad sisya.

<sup>14</sup> Mo sapaem ay bokaen di gayyem mo babaen si kablaaw mo et kaman mo met laeng binaosan.

<sup>15</sup> Din makaibaw ay asawa ay babai et maiarig si danom ay tomedtetedted.

<sup>16</sup> Nalaklaka pay ay depapen di dagem ya egenan di lanan di olivo mo din iyat ay mangipasaldeng en sisya.

<sup>17</sup> Maitdoan di ipogaw si gait na ay ipogaw, kaman din iyat di landok ay mapalid si gait na ay landok.

<sup>18</sup> Din mangayowan si igos, mangan sin lames na. Siya abe ay maidaydayaw din napasnek ay mansilbi sin apo na.

<sup>19</sup> Kaman din danom ay mailam din ropam ay sangosango, siya abe sin nemnem di ipogaw ay maila sin gait na ay ipogaw.

<sup>20</sup> Adi polos mapnek din pese ya kad-an di natey, siya abe sin ipogaw.

<sup>21</sup> Mapaneknekan di balitok ya palata babaen si man-gangab ay apoy, din ipogaw abe yan maammoan di kaipogaw na babaen sin kaidayawana.

<sup>22</sup> Olay mo bayoem di naong-ong, adi makaan di kinaong-ong na.

<sup>23</sup> Masapol ay ammom di kasasaad di kakarnerom ya bakam ya estem ay ayowanan daida, <sup>24</sup> tan adi komakaman di kinabaknang si eng-enggana. Olay din dayaw di ari et adi komakaman sin aap-o na sin tapin di agew.

<sup>25</sup> Mo pinatpat mo din sakati sin dontog, gomabay kasin. Gapasem abe din garami sin pinag-aani ta say waday kanen di animal. Mo amagem amin dadi, <sup>26</sup> mawadaan kas bado babaen sin kakarnero ya makalako kas payew babaen sin kalding mo. <sup>27</sup> Wada abey gatas di kalding ay omanay ay kanen di pamilyam ya baam ay babbabai.

## 28

<sup>1</sup> Lomayaw din managbasol olay magay mangap-apayaw en sisya, ngem din nalinteg yan natoled ay kaman layon.

<sup>2</sup> Mo manlalaban din omili, ad-ado di pangolo, ngem waday talna ya olnos mo masirib di manturay.

<sup>3</sup> Din manturay ay mamaligat sin nabiteg et kaman napigsa ay odan ay manadael sin mola.

<sup>4</sup> Din manokog sin linteg Diyos et daydayawen da din managbasol, ngem din manongpal sin linteg na et kontraen das daida.

<sup>5</sup> Adi maawatan di managbasol di hustisya, ngem din mangipatpateg en Diyos yan maawatana ay kosto.

<sup>6</sup> Maymayat din nabiteg ay magay kaoy-oyawana mo din baknang ay nakillo di ogali na.

<sup>7</sup> Nanemneman din anak ay mantongpal si linteg, ngem din makikadwa sin magay silbi na ay ipogaw et ibabaina si ama na.

<sup>8</sup> Din bomaknang si nangato ay porsienton di pilak na et ipaelbat nan to din kinabaknang na sin managseg-ang si nabiteg.

<sup>9</sup> Mo waday adi mangikaskaso si linteg Diyos, olay din kararag na yan kaliliget aben Diyos.

<sup>10</sup> Kaman kan nankaot si bito ay kag-asam mo ipangom si panbasolan din nalinteg, ngem din nalinteg pay, somiged di biyag da.

<sup>11</sup> Ipagarup din babaknang en masirib da, ngem din nabiteg ay nalaing ay mangilasin si ogalin di ipogaw et ammo na di katet-ewa na.

<sup>12</sup> Manragsak din omili mo say mangabak ay manturay din nalinteg, ngem mantabon da mo din makedse di mangabak.

<sup>13</sup> Baken mayat di biyag din mangisassaot si basol da, ngem seg-angan Diyos din mangipodno ya manokog si basol da.

<sup>14</sup> Nagasat din emeegyat ay manbasol, ngem lawa di pantongpalan din makenteg di nemnem da.

<sup>15</sup> Din lawa ay turay ay mamaligat si nabiteg et kaman manngangaed ay layon ya atap ay animal ay makwani en oso.

<sup>16</sup> Magay seg-ang di baken masirib ay manturay, ngem omando di biyag di manigaan ay mansowitik ta way iyat na ay bomaknang.

<sup>17</sup> Kanayon ay lomaylayaw din nakapese, adi kan toltolongan sisya.

<sup>18</sup> Magay pandanagan di ipogaw ay magay maipabasol en sisya, ngem am-in ay mangamag si lawa et bigla ay madadael da.

<sup>19</sup> Din nagaget ay man-obla yan ad-adoy kanena, ngem kanayon ay mabibiteg din manaysayang si timpo na.

<sup>20</sup> Ad-adoy bindisyon di matalek ay ipogaw, ngem din laydena ay bomaknang ay dagos et sigurado ay madosa.

<sup>21</sup> Baken mayat din waday pabpaboran, ngem wada pay dedan di odom ay mapasok-sokan si owat esay tinapay.

<sup>22</sup> Din naimot yan laydena ay bomaknang ay dagos. Adi na ammo ay masepsep ay bomiteg.

<sup>23</sup> Pan-iyamanan da sin odi na din mamagbaga mo din manpasablog.

<sup>24</sup> Din manowitik en da ama na en ina na asi na kanan en baken basol et maibilang ay tollisan.

<sup>25</sup> Din makagamgam ay ipogaw yan say mangiloglogi si ibaw, ngem din am-in ay mantalek en Diyos et somiged di biyag da.

<sup>26</sup> Naong-ong din mantalek si awak na, ngem din masirib yan magay pandanagana.

<sup>27</sup> Adi mankolang din man-idawat si nabiteg, ngem din adi mangikaskaso en daida et ad-adoy mamaos.

<sup>28</sup> Mantabon di kaipoipogaw mo say manturay di laway nemnem na. Ngem mo makaan ay turay, omad-ado di nalinteg ay ipogaw.

## 29

<sup>1</sup> Din kanayon ay mabagbagaan ngem pakekentegenana di nemnem na, awni et bigla ay domteng di kadadaelana ay maga di rimidyos.

<sup>2</sup> Naragsak din omili mo nalinteg di manturay, ngem manladingit da mo makedse di manturay.

<sup>3</sup> Din anak ay mangipateg si kinasirib yan paragsakena si ama na, ngem din mangagastos si hostess et owat nan abosen si niloloko din kinabaknang na.

<sup>4</sup> Mapapigsan di ari di esa ay nasyon babaen si nalinteg ay panangituray na, ngem din turay ay mansingil si nangato ay bowis et dadaelena di ili.

<sup>5</sup> Din mangpasablog si gayyem na et kaman nanpaod si tagdey ay kaknaana.

<sup>6</sup> Kaman tagdey ay mangna sin managbasol din basol na met laeng, ngem mankanta ya manragsak am-in ay nalinteg di panagbiyag na.

<sup>7</sup> Ammon di nalinteg ay ipogaw din kalintegan di nabiteg, ngem adi pagan-anon di managbasol.

<sup>8</sup> Din makalasoy yan pawadaena di golo sin intiro ay siyodad, ngem kabaelan di masirib ay edpen di kaman omap-apoy ay bonget.

<sup>9</sup> Mo idarum di masirib di esa ay naong-ong, magay silbi na, tan owat manbogaw din naong-ong si bonget na ya manlasoy.

<sup>10</sup> Kaliliget di makapese din magay kaoy-oyawan da, ngem daida pay di salakniban di nalinteg.\*

<sup>11</sup> Adi makaitpe di naong-ong si bonget na, ngem din masirib pay, ammo na ay gominek downan pabaewen di bonget na.

<sup>12</sup> Din manturay ay mamatpati si baken tet-ewa et mawadaan si lawlawa ay oopisyal.

<sup>13</sup> Din nan-isoan di nabiteg ya mamalpaligat en sisya et si Diyos di nangidawat si biyag da ay dowa.

<sup>14</sup> Din ari ay mangitonton si kalintegan di nabiteg, et magay mangpos sin turay na si eng-enggana.

<sup>15</sup> Somirib di anak ay masoplit ya mabagbagaan, ngem din mabaybay-an et ibabain dan to si ina da.

<sup>16</sup> Omad-ado di lawa ay maamag mo manturay di makedse, ngem ilaen to di nalinteg di kaabakan da.

<sup>17</sup> Mo bagbagaam din anak mo, paragsaken daka ya pantalnaena di nemnem mo.

<sup>18</sup> Mo baken si Diyos di mangiturong si nemnem di ipogaw, liw-an da din linteg. Mabindisyonan din mantongpal si linteg na.

<sup>19</sup> Naligat ay mabagbagaan di baa si kali anggoy, tan olay mo maawatan da, adi dan tongpalen.

<sup>20</sup> Maymayat pay laeng ay pannamnamaan di ipogaw ay magay nemnem na mo din alisto ay mankali ay adi na nemnemen omona.

<sup>21</sup> Din bag-en ay palalo ay tangtangeyem manipod sin kakitkittoy na, panladingiten daka sin odi na.

<sup>22</sup> Din nalaka ay bomonget et say mangilogi si ibaw ya ad-adoy bomasolana.

<sup>23</sup> Maibabain sin odi na din mangipapangato si awak na, ngem maidayaw din napakombaba.

<sup>24</sup> Din makikadwa sin mangakew et kamanan iliget din awak na met laeng, tan olay mo pansapataen da ay mantistigo, adi na ibaga din tet-ewa.†

<sup>25</sup> Kaman kan nakna si tagdey mo emegyat ka si ipogaw, ngem mo mantalek ka en Diyos, magay pandanagam.

<sup>26</sup> Ad-ado di manganap si somigedana sin pangilan di turay, ngem si Diyos di makaikeddeng si kalintegan di am-in ay ipogaw.

<sup>27</sup> Sigsigaan di nalinteg din managbasol, yan kaliliget aben di managbasol din nalinteg.

## 30

### *Din Kalin Agur*

<sup>1</sup> Da nay di kalin Diyos ay inbagan Agur ay anak Jakeh.\* Kanana: Apo Diyos, palalo ay nabbayak, enggay magay pigsak.† <sup>2</sup> Kamanak animal, adiak maibilang ay ipogaw tan magay nemnem ko. <sup>3</sup> Magay sirib ay inadal ko et magay ammok maipanggep en Diyos ay Nasantoan.

<sup>4</sup> Sino di nakaey ed langit ay nantaoli isnan daga? Ay waday makabael ay manpap sin dagem? Sinoy makabongon sin danom si lopot ya nangikeddeng si beddeng isnan daga? Mo waday ammom si makabael isna, ibagam di ngadana ya ngadan di anak na.

\* **29:10** Di esa abe ay kaiologan nina sin Hebreo et: ya layden da ay peslen din nalinteg. † **29:24** Din kanana sin Levitico 5:1, mo waday maayagan ay mantistigo yan igiginek na din katet-ewa na, mabaesan sisya. \* **30:1** Di esa abe ay kaiologan nina sin Hebreo et: Da nay di kalin Agur ay anak Jakeh ay taga-Massa. † **30:1** Siya na di kanana sin Griego (LXX). Din kanana abe sin Hebreo et: ... Agur ay anak Jakeh para en da Itiel en Ucal: Kanana: Kamanak animal...

<sup>5</sup> Din kalin Diyos et napaneknekan ay kostokosto. Kaman salida ay manalaknib sin komamang en sisya. <sup>6</sup> Adi ka taptapian din kalin Diyos tan yamyaman daka ya ipaila na ay maetek ka.

<sup>7</sup> Apo Diyos, waday doway ay banag ay kedawek en sik-a sakbay ay mateyak: <sup>8</sup> Panbalinem kod sak-en ay matalek ta adiak polos man-etek ya adi kan palaloan ay pabaknangen ono pabitegen sak-en. Say idawat mo koma din kostokosto ay kasapolak, <sup>9</sup> tan mo mansobsobraak, into et mo dokogak sik-a yan kanak, “Sino od si Yahweh?” Mo bomitegak abe, mangakewak et ibabain kos sik-a ay Diyos ko.

<sup>10</sup> Adi kan palawlawen di esa ay baa sin apo na tan baosan daka sin baa ay sana et man-ikaro ka.

<sup>11</sup> Waday odom ay ipogaw ay pankalian das lawa da ama da en ina da. <sup>12</sup> Din odom yan kanan da en magay basbasol da olay mo kinmadodogis da si basol da. <sup>13</sup> Din odom yan palalo ay ipapangato da di awak da. <sup>14</sup> Waday palalo di kinagamgam da et posen da din sanikwan di nabiteg ya kakkaasi.

<sup>15</sup> Waday singin ay matek. Kanan da ay doway, “Omya ka, omya ka.” <sup>16</sup> Wada abey opat<sup>‡</sup> ay banag ay adi kapkapnek, adi dan polos kanan en kosto: din kad-an di natey, din basig ay babai, din nakgang ay lota ya manbidbidang ay apoy.

<sup>17</sup> Din manglasoy en ama na ya adi manongpal en ina na, awni et okiten di gayang sin tanap din mata na ya isidan di dadakke ay titit din lamlames na.

<sup>18</sup> Waday opat ay nakaskasdaaw ay adiak maawatan: <sup>19</sup> din iyat di agila ay tomayaw ed kayang, din iyat di eweg ay manbodos sin kabatbatoan, din iyat di bapor ay manbalasat sin baybay ya din iyat di baro ya balasang ay manlinayad.

<sup>20</sup> Siya nay kaiarigan di makikamalala ay babai: mangan asi na ponasan din tepek na yan kanana en magay basol na.

<sup>21</sup> Waday opat ay banag ay panpayegpegan di kaipoipogaw isnan lobong, tan adi dan maanosan: <sup>22</sup> din bag-en ay manbalin ay ari, din naong-ong ay mawadaan si ad-ado ay makan ya amin ay kasapolana, <sup>23</sup> din sinigsigaan da ay babai ay maasawaan ya din balasang ay bag-en ay maiskat sin babai ay among na.

<sup>24</sup> Waday opat ay kinittoy ay animal isnan daga, ngem nankalalaing da: <sup>25</sup> Din koton, nakapsot da ngem ammo da ay man-idolin si makan sin tiyagew. <sup>26</sup> Din koneho, nakapsot da abe, ngem manbeey da sin deppas. <sup>27</sup> Din dodon, magay ari da, ngem naolnos da ay mankokoyog. <sup>28</sup> Din alalakkap, nalaka da ay depapen, ngem wada da sin palasyo.

<sup>29</sup> Waday opat ay mo manmandan da yan maila ay napigsa da: <sup>30</sup> din layon ay kapigsaan sin am-in ay animal ya magay egyatana en daida, <sup>31</sup> din taraki ay kawwitan, din kalakian ay kalding ya din ari ay mangipangolo sin sosoldado na.

<sup>32</sup> Mo naong-ong ka et it-it-ek mo di awak mo ya manpanggep kas lawa, opopem san tepek mo ta iginek mo. <sup>33</sup> Tan mo ikolog ya pespesan di gatas, mawada di mantikilya. Mo despegem abe din eng di ib-am, bomala di dada. Siya abe ay mo sepsepem di bonget mo et pawadaem di ibaw.

## 31

### *Pamagbaga En Ari Lemuel*

<sup>1</sup> Siya na di kalin Diyos ay inbagan Ari Lemuel\* ay initdon ina na: <sup>2</sup> Sino di ibagak en sik-a ay anak ko, sik-a ay songbat di kararag ko? <sup>3</sup> Adi kan abosen di bikas ya pilak mo si babai, tan ad-adoy nadadael ay ari begew en daida. <sup>4</sup> Baken lemebbeng ay maninom di ari si arak ya odom ay bemeteng <sup>5</sup> tan mo mabeteng da et liw-an da din linteg ay

‡ **30:16** Ilaen din footnote sin 6:16. Iso na din bilbilang sin 30:18,21,29.

\* **31:1** Di esa abe ay kaiologan nina sin

Hebreo et: Siya na di inbagan Lemuel ay ari ed Massa...

inkeddeng da ya adi dan itonton din kalintegan di nabiteg. <sup>6</sup> Say maidawtan si bemeteng din dandani ay matey ya palaloy ladingit da <sup>7</sup> ta liw-an da din ligat da ya kaseseg-ang ay kasasaad da. <sup>8</sup> Masapol ay salaknibam din adi makaitakder si kalintegan da. <sup>9</sup> Masapol ay magay panlaslasinem ya salaknibam din kalintegan di nabiteg ya kaseseg-ang.

*Din Ogalin Di Sigid Ay Asawa*

<sup>10</sup> Naligat ay man-ilas nalaing ay babai ay siged di ogali na. Din asawa ay kaman nidi et nabanbanol mo din kabanolan ay kowintas. <sup>11</sup> Mantalek din asawa na en sisya, yan kanayon di pansigdan ay idawat na. <sup>12</sup> Din amagena sin amin ay agew di biyag na et siged di pantongpalana en asawa na, baken lawa.

<sup>13</sup> Man-anap si sinolid et nagaget sisya ay man-amag si bado. <sup>14</sup> Maiarig sisya si bapor ay ad-adoy kalga na, tan man-isaa si makan ay napo sin addawi. <sup>15</sup> Daan pomat-a yan bomangon sisya ay mangisagana sin kanen di pamilya na ya baa na.†

<sup>16</sup> Estena ay man-ilas daga ta lakoana, asi na eskan si obas ay nilakoana si odom ay pansapolana. <sup>17</sup> Nagaget ya mabikas ay man-obla. <sup>18</sup> Ammo na di banol din am-agena et man-obla engganang emletan di labi.

<sup>19</sup> Sisya ay mismo di mangabel si lopot <sup>20</sup> ya badangana din nabiteg ay makasapol. <sup>21</sup> Waday kamayatan ya naposkol ay ibadon din pamilya na et magay pandanagana olay mo mangandap. <sup>22</sup> Sisya ay mismo di mangamag si galey ya ap-ap di katri et amin ay bado na yan mankanapteng ay kaman din osal di ari.

<sup>23</sup> Si asawa na yan esa ay mandinamag ya mabigbigbig ay pangolo sin ili.

<sup>24</sup> Man-am-amag sisya si bado ya bilko ay ilako na sin man-ilaklako.

<sup>25</sup> Mabikas sisya ya mapteng di ogali na, yan adi madanagan maipanggep sin omal-ali ay timpo. <sup>26</sup> Masirib sisya sin iyat na ay mankali yan nainayad di iyat na ay mamagbaga.

<sup>27</sup> Es-estena din pamilya na yan kanayon ay nagaget sisya.

<sup>28</sup> Idaydayaw din an-ak na yan it-it-ek aben asawa na ay kanana,

<sup>29</sup> “Ad-ado di siged ay babai, ngem sik-a di kasigedan.”

<sup>30</sup> Din kinapintas yan mangietek ya wada abey timpo ay komopas, ngem din babai ay mangipateg en Diyos et lebbeng na ay maidayaw.

<sup>31</sup> Bigbigen ya idaydayaw sisya sin sangoanan di kaipoipogaw begew sin inam-amag na.

† **31:15** Di esa abe ay kaiologan nina sin Hebreo et: mangisagana sin kanen di pamilya na ya mamilin sin baa na.

## Ecclesiastes

### Maipanggep Sin Libro Ay Nay

Din linaon di libro ay Ecclesiastes et din inbagan di masirib ay ipogaw maipanggep sin biyag isnan daga. Ad-adoy pinadpadas na ay nangan-anap mo sinoy way silbi na. Pinadas na di sirib, panragsakan, nabanol ay obla, kinabaknang ya dayaw, yan inkeddeng na ay magay silbi da am-in. Ngem binagbagaana pay dedan di ipogaw ta ipakat dan kabaelan da ay man-obla ya ganasen da di sagot Diyos, olay mo adi dan maawatan di panggep Diyos isnan daga.

Nabanol en datako din libro ay nay, tan ipalawag na en datako din pannemnem di ipogaw ay di namnamaen da et manpatingga sin biyag isnan daga.

#### *Magay Silbin Di Am-in Ay Banag*

*(1:1-2; 2:21-23)*

<sup>1</sup> Siya na di inbagan din mangit-itdo ay anak David ay ari ed Jerusalem. <sup>2</sup> Kanana, “Magay silbin di biyag. Di katet-ewa na, enggay magay silbin di amin ay banag!”  
3 4 5 6 7 8 9 10 11 12 13 14 15 16 17 18

## 2

<sup>1</sup> 2 3 4 5 6 7 8 9 10 11 12 13 14 15 16 17 18 19 20 21 Tan di ipogaw yan masapol ay ipakat na di laing ya kabaelana ay mangamag si obla na. Asi na pay taynan amin ay sanikwa na si ipogaw ay adi polos nanligat ay mangipawadas di ay sanikwa. Siya na di esa ay magay ol-olog na ya baken kosto. <sup>22</sup> Ay sino pay di magon-od di esa ay ipogaw sin amin ay pan-es-estana ay man-obla isnan daga? <sup>23</sup> Sin amin ay biyag na, lak-amenay ladingit ya ligat ay man-obla. Olay sin labi, magay pan-illengan di nemnem na. Esa abe na ay magay ol-olog na.  
24 25 26

## 3

#### *Din Kosto Ay Timpo Ay Tinodingan Diyos*

*(3:1-13)*

<sup>1</sup> Waday naitoding ay timpo para sin amin ay maam-amag isnan labaw di daga. <sup>2</sup> Waday timpo ay kaianakan ya kateyan, panmolaan ya pan-gabotan. <sup>3</sup> Wada abey timpo ay panpesean ya pan-agasan, panadaelan ya pangisaadan. <sup>4</sup> Wada pay di timpo ay pan-ogaan ya pansiyekan, panladingitan ya pansalaan begew si ragsak. <sup>5</sup> Waday pantopogan si bato ya pangiwalangan, timpo ay pankawean ya adi pankawean. <sup>6</sup> Waday timpo ay pan-anapan ya timpo ay somaldengan ay man-anap. Waday pan-idolinan ya pan-iwasitan. <sup>7</sup> Waday timpo ay panbisngitan si bado ya timpo ay pandaitan. Waday pankalian ya timpo ay gominkan. <sup>8</sup> Waday timpo ay pangipailaan si layad ya pangipailaan abe si liget. Waday timpon di gobat ya timpon di talna.

<sup>9</sup> Sino ngin di gon-oden di ipogaw sin amin ay obla na? <sup>10</sup> Inan-anap ko sin nemnem ko din maipanggep sin nadagsen ay ipaoblan Diyos si ipogaw. <sup>11</sup> Inkeddeng baw Diyos di amin ay mapasamak sin kosto ay timpo da. Ngem olay mo waday inigto na sin nemnem tako maipanggep si timpo ay eng-enggana, adi tako pay dedan maawatan din oblan Diyos manipod sin logi na engganang gedeng na. <sup>12</sup> Isonga kanak en iwed di maymayat si amagen di ipogaw mo adi et manragsak ya ganasena di biyag na.\* <sup>13</sup> Mangan ya man-inom tako koma ya ganasen tako din amin ay bongan di boway tako, tan regalon Diyos dana. 14 15 16 17 18 19 20 21 22

\* **3:12** Di odom ay kaiologan nina sin Hebreo et: ...manragsak ya amagena di siged sin timpon di biyag na ono ...manragsak ya amagena di amin ay kabaelana sin timpon di biyag na.



1 2 3 4 5 6 7 8 9 10 11 12 13 14 15 16

**4**

1 2 3 4 5 6 7 8 9 10 11 12 13 14 15 16 17 18 19 20

**5**

1 2 3 4 5 6 7 8 9 10 11 12

**6**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29

**7**

1 2 3 4 5 6 7 8 9 10 11 12 13 14 15 16 17

**8**

1 2 3 4 5 6

**9**

*Din Pantongpalan Di Biyag  
(9:7-12)*

<sup>7</sup> Isonga manragsak ka ay mangan ya adi ka mandanag, tan say layden Diyos ay amagem. <sup>8</sup> Kanayon koma ay manbado kas kosto ya osalem di bangbanglo ay mangipaila si ragsak mo. <sup>9</sup> Laylaydem si asawam, isonga ganasen yo din intiro ay timpo ay indawat Diyos ay panbiyagan yo isnan labaw di daga, timpo ay magay ol-olog na. Tan say gasat mo sin biyag mo ya oblam isnan daga. <sup>10</sup> Ipakat mo di amin ay kabaalam sin mabalin ay amagem, tan sin kaot ay pantongpalam et magay man-obla ya olay mannemnem, ya adi maosal di laing ya sirib di ipogaw.

<sup>11</sup> Wada abey odom ay naammoak. Isnan daga, baken say kanayon ay mangabak si longba din napasas ay managtag. Baken say kanayon ay mangabak si gobat din napigsa ya baken kanayon ay laing di pakagon-odan si makan ya kinabaknang. Baken amin ay makabael yan say maisaad si nangato ay turay. Insigon et di naikeddeng ay timpo ya gasat. <sup>12</sup> Dowan et magay makaammo mo pig-an di timpo na. Din nigay yan makna si tabokol, din titit yan makna si tagdey. Say iso na abe sin ipogaw, tan din timpo ya pasamak ay adi da ninamnana et kaman tagdey ay mangna en daida. <sup>13 14 15 16 17 18</sup>

1 2 3 4 5 6 7 8 9 10 11 12 13 14 15 16 17 18 19 20

**10**

**11**

*Din Amagen Di Masirib Ay Ipogaw  
(11:1-6)*

<sup>1</sup> Inigosityom din pilak mo sin odom ay il-ili, tan mo mabaybayag, waday ganansiyam.\*  
<sup>2</sup> Din wada en sik-a yan panpitoem ono panwaoem, tan adi kan ammo di lawa ay mapasamak.

<sup>3</sup> Mo enggay dinmagsen din liboo, pawadaena di odan sin daga. Olay intoy banda ay katokangan di kaiw et komakaman sin natokangana. <sup>4</sup> Din man-eman-ed si somigedan di timpo ta asi man-obla et magay ena imomola ya magay apitena.

<sup>5</sup> Adi kaawatan di iyat di moyang ay mabiyag ya madakdake sin eges ina na. Iso na abe din oblan Diyos ay namarsua si amin, naligat ay maawatan. <sup>6</sup> Masapa ka ay manmola engganang kalabiana, tan adi kan ammo mo sino di mayat sin inmolam, din esa ono amin da. <sup>7 8 9 10</sup>

\* **11:1** Din kanana sin Hebreo et: Itep-am din tinapay mo sin danom, tan mo emey di ad-ado ay timpo et detngem.

## 12

### *Pamagbaga Sin Ipogaw Ay Napigsa Pay Laeng (12:1-8)*

<sup>1</sup>Ed wani ay napigsa ka, nemnemem si Diyos ay namarsua en sik-a sakbay ay domteng di timpo ay lawlaw ay kanam en enggay magay ganas di biyag. <sup>2</sup>Sin timpo ay doy, komapsot di pangilam sin agew, bowan ya talaw ya adi omaddawi din liboo ay mangipawadas odan. <sup>3</sup>Din takkay mo ay pansalakhnib mo sin awak mo et manpayegpeg da gapo si kanakay mo, ya din peweg mo ay napigsa ed wani yan komapoy da. Adi kan to aben makagaga, tan magob-awan ka dowan ka aben magodab. <sup>4</sup>Eggay adi kan to madnge di ngalawngaw sin kalsada, siya abe sin gilingan ya kanta, ngem olay din kantan di titit et balagaen daka. <sup>5</sup>Emegyat kan to ay mandan sin nangato ay lugar ya olay din kalsada et kaman napnos kaeegyat. Maobanan kan to yan maligatan ka ay man-gido ay kaman dodon ay kinmenteg di siki na si teg-in. Eggay makaan abe di ganas mo ay makidaag. Dandani ka sin pan-illengam si eng-enggana et wadan to di manmandan sin kalsada ay manladladingit. <sup>6</sup>Nemnemem ngarud din namarsua en sik-a sakbay ay masokpot din kadina ay palata et mag-as din balitok ay silawan ay naibibitin, ono sakbay ay masokpot din tali sin bobon et magopak din kalamba. <sup>7</sup>Din awak tako et mantaoli sin tapok yan din ab-abiik tako abe, mantaoli en Diyos ay napoana.

<sup>8</sup>“Awan, magay silbi na! Eggay magay silbin di amin ay banag!” kanan din mangit-itdo. <sup>9 10 11 12</sup>

### *Kasinopan Di Naibagas Na (12:13-14)*

<sup>13</sup>Naey ngarud di kasinopan di am-in ay inbagak: Patgem ya egyatam si Diyos yan tongpalem din bilbilina, tan siya na di lebbeng na ay amagen di am-in ay ipogaw. <sup>14</sup>Tan okomen ton Diyos datako ay maibasar sin am-in ay inam-amag tako, pati din naililimed, din siged ya lawa.

## Kantan Solomon Maipanggep Sin Libro Ay Nay

Din linaon di libro ay nay et kankanta ay pangibalikasan di lalaki ya babai si man-asilaydan da. Kanan di odom en din kaiarigan din lalaki ya babai et si Diyos ya din ipogaw na ono si Cristo ya din mamati en sisya. Ngem kanan aben di odom en baken pangarig din kankanta ay nay mo adi et maipanggep si napigsa ay layad di esa ay lalaki ya babai.

1 2 3 4 5 6 7 8 9 10 11 12 13 14 15 16 17

### 2

1 2 3 4 5 6 7

#### *Din Kantan Di Babai (2:8-13)*

- <sup>8</sup> Madngek din laylaydek ay lalaki.  
Doy managtagtag sin dontog ay omali.
- <sup>9</sup> Kaman bomaro ay ogsa.  
Sin dingding di beey mi, pinmipika  
ay mantintining sin tawa.
- <sup>10</sup> Kananan sak-en, “Bomangon ka.  
Napintas ka, laylaydek sik-a.  
Omali ka ta mankoyog ta.
- <sup>11</sup> Enggay nalabas di timpon di teg-in,  
nakdeng di pinag-oodan.
- <sup>12</sup> Enggay ginmabay din sabsabong isnan daga,  
et dinomteng di pinagkakanta.
- <sup>13</sup> Din lames di igos yan enggay naom da,  
din manbongbonga ay obas yan mansengseng-ew da.  
Napintas ay laylaydek, omali ka,  
omali ka ta mankoyog ta.” <sup>14 15 16 17</sup>

### 3

1 2 3 4 5 6 7 8 9 10 11

### 4

1 2 3 4 5 6 7 8 9 10 11 12 13 14 15 16

### 5

1 2 3 4 5 6 7 8 9 10 11 12 13 14 15 16

### 6

1 2 3 4 5 6 7 8 9 10 11 12 13

### 7

1 2 3 4 5 6 7 8 9 10 11 12 13

### 8

1 2 3 4 5

#### *Din Inbagan Di Babai Sin Asawa Na (8:6-7)*

- <sup>6</sup> Sak-en koma anggoy di laylaydem,

magay odom si kaweem.  
Din layad et kaman nina,  
kaman pese ay napigsa,  
tan magay mangabak en sisya  
ya magay makapos sin sanikwa na.  
Mabidang ay legab di kaiarigana.  
<sup>7</sup>Din layad, adi edpen di olay ginawang,  
olay layos, adi na mabaelan.  
Mo waday mangwani en lakoana  
si amin ay gameng na,  
owat et malasoy sisya. <sup>8 9 10 11 12 13 14</sup>

## **Isaias**

### **Maipanggep Sin Libro Ay Nay**

Si Isaias et mandindinamag ay mamadton Diyos ay nanbeey ed Jerusalem sin naodi ay partin di maikawao ay siglo B.C. Mabalin ay magodwa din inpadto na ay linaon din libro ay nay:

1) Kapitolo 1-39 et maipanggep sin kinasanton Diyos ya din panakabalina ay mangituroy sin intiro ay daga. Gapo sin kinasanto na, kalkaliget na din lawa ay ogalin di ipogaw na ed Juda, namnamed din baken nalinteg ay iyat di oopisyal ay manturay. Isonga inpaipadton Diyos en Isaias ay dosaena din taga-Juda ya odom ay nasyon babaen sin nasyon ay Assyria ya Babilonia mo adi da kasin mansagong en sisya. Inpadton aben Isaias ay omalin to di polin David ay manturay et wadan to di timpon di talna sin intiro ay daga begew en sisya.

2) Kapitolo 40-66 et sakopena di timpo ay enggay naabak di taga-Juda yan naikaan di odom en daida ta manbeey da ed Babilonia. Isonga nadismaya da ya namagay namnama da. Inpadton Isaias ay wayawayaan ton Diyos daida ta somaa da ed Jerusalem. Inpaammo na abe din planon Diyos ay mabindisyonan am-in ay nasyon babaen sin ipogaw na. Ad-adoy madtengan isna ay padto ay maipanggep sin omali ay Messias ay makwani en Baan Diyos. Di maipanggep sin nangikaskasabaana sin siged ay damag et wada sin 61:1-2. Di maipanggep abe sin nanligatana et madtengan sin 52:13-53:12.

#### **Din Linaona**

Pamagbaga ya karkari 1-12

Din panosaan Diyos sin nanasyon 13-23

Din pangokoman Diyos sin kaipoipogaw ya tolong na sin ipogaw na 24-27

Odom ay pamagbaga ya karkari 28-35

Ari Hezekias ya din taga-Assyria 36-39

Din kaisalakanan ya kabaroan di Israel 40-48

Din baan Diyos ya din somigedan kasin di Israel 49-57

Din kaisalakanan ya dosa ay eng-enggana 58-66

#### *Din Nanyamyaman Diyos Sin Ipogaw Na (1:1-20)*

<sup>1</sup> Naisolat sin libro ay nay din inpaammon Diyos ay mapasamak ed Juda ya Jerusalem. Inpaammo na en Isaias ay anak Amoz sin timpon da Uzias, Jotam, Ahaz ya Hezekias ay aari ed Juda.

<sup>2</sup> Kanan Isaias: Dengngen yo ay daya ya daga, tan si Diyos nan mankali. Kanana, “Din an-ak ko ay inayowanak ya inpadakdakek et kinontra das sak-en. <sup>3</sup> Din baka et ammo day akin oka en daida. Ammon aben di dangki din pamakpakanan di apo na. Ngem din ipogaw ko ay Israelita et adi da am-ammos sak-en, adi da aben maawatan din pangay-ayowanak en daida.”

<sup>4</sup> Ay apaw kayo! Managbasol ay nasyon, ipogaw ay nadadagsenan sin pag lawa ay am-amagen da, makadadael ay an-ak Diyos, sinigaan ya dinokogan yos Yahweh, ya laslasoyen yos sisya ay nasantoan ay Diyos di Israelita. <sup>5</sup> Apay nga itoltoloy yo ay mangonkontra? Ay layden yo ay matapian din dosa yo? Enggay pag bayang san toktok yo yan baken mayat di likna ya nemnem yo. <sup>6</sup> Pag bayang manipod dapan engganans toktok yo. Magay nasalon-at ay partin di awak yo. Adi nadalosan din sogat yo, adi naagasan ya nabedbedan.

<sup>7</sup> Golpi ay nadadael din ili yo ya napooan din siyodad. Sin sangoanan yo, okaen di mangili din daga yo ya dadaelen da. <sup>8</sup> Say mabay-an anggoy din siyodad ay Zion ay kaman siyodad ay linilikob di kagobat da. Maiarig si abong di manbanbantay si obas ono pipino. <sup>9</sup> Mo adi inpalobos Diyos ay Kangatoan ay Turay ay way at-atik ay makalasad, mamingpingsan koma ay madadael ed Zion ay kaman ed Sodoma ya Gomorra.

<sup>10</sup> Dakayo ay papangolo ya man-ili, mais-o din ogali yo sin taga-Sodoma ya Gomorra, isonga dengngen yo din kanan Diyos ay daydayawen tako. <sup>11</sup> Siya na din kanana. “Ay kanan yo en malaydanak sin ad-ado ay datdaton yo? Enggay naomaak sin kakarnero ay idaton yo ay mapooan ya din tabtaban di kamayatan ay animal yo. Adiak malaydan sin dadan di karnero, kalding ya bomaro ay baka. <sup>12</sup> Sinoy nangipalobos en dakayo sin omalian yo sin sangoanak ay mangipakadodogis sin Timplok? <sup>13-14</sup> Isaldeng yo ay mangiali si daton ay magay silbi na, tan enggay naomaak sin insinso yo. Sigaak ay mangil-ila sin katoptopogan yo ay mansilibrar sin Fiestan di Beskan di Bowan, Agew ay Pan-illengan ya odom pay ay silsilibrarian yo ya banbanolen yo, tan enggay inpakadodogis din basbasol yo et sinmadotak ay mangil-ila. Maiarig das karga ay tinitilid ko yan enggay nabbayak ay manitilid. <sup>15</sup> Olay mo ingato yo din takkay yo ay mankararag en sak-en et pandokogak dakayo. Adiak patgan din kararag yo, tan namansaan din takkay yo si dada. <sup>16</sup> Owasan yo din basbasol yo ta malinisan kayo. Isaldeng yo ay mangamag si basol sin sangoanak. <sup>17</sup> Adalen yo ay man-amag si siged. Ilaen yo ta say amagen yo din nalinteg. Badangan yo din mapalpaligat ya badangan yo din olila ya nalasang ay manonton si kalinteg da.”

<sup>18</sup> Kanan aben Diyos, “Ed wani, omali kayo ta manlinawag tako. Olay mo palalo ay manbalanga din mansa yo begew sin basol yo, ngem linisak dakayo et pakilatek dakayo ay kaman andap ya dotdot di karnero. <sup>19</sup> Mo silalayad kayo ay mantongpal en sak-en, gon-oden yo din kamayatan ay apit sin daga. <sup>20</sup> Ngem mo adi kayon tongpalen sak-en ya komontra kayo, matey kayo babaen si kampilan.” Si Diyos ay mismo di nangibagas na. <sup>21 22 23 24 25 26 27 28 29 30 31</sup>

## 2

### *Din Omalin To Ay Timpon Di Talna (2:1-5)*

<sup>1</sup> Sinay di inpaammon Diyos en Isaias ay anak Amoz maipanggep ed Juda ya Jerusalem. <sup>2</sup> Mo domteng di maod-odi ay agew, manbalin ay kangatoan ay dontog din naisaadan di Timplo ay panbeeyan Diyos. Emey sidi di kaipoipogaw ay mapo sin ad-ado ay nasyon. <sup>3</sup> Kanan da, “Omali kayo ta mantikid tako sin dontog Diyos ta emey tako sin Timplon Diyos ay daydayawen di Israelita. En tako ta itdo na din laydena ay amagen tako ta say manbiyag tako ay maikompa sin laydena.” Kanan da di, tan din it-itdon Diyos et mapo ed Jerusalem ay makwani abe en Zion, tan isdi di makikalkaliana sin ipogaw na.

<sup>4</sup> Singpaenan to din adi pankikinaawatan di nanasyon. Pandayen da din kampilan da si alado ya din gayang da si kompay. Awni et din nanasyon yan adi dan mansagana para sin gobat ya adi da aben man-gogobat. <sup>5</sup> Omali kayo ay polin Jacob ta manbiyag tako ay maikompa sin layden Diyos ay inpaammo na en datako.\*

### *Din Pangipababaan Diyos Sin Nangato Di Nemnem Na (2:10-18)*

Pag kanan Isaias en dinokogan Diyos din ipogaw na gapo sin nanaydayawan das sinan didiyos ya gapo abe sin odom ay basbasol da et inpadto na ay mapasamak dana en daida. (2:6-9)

\* 2:5 Mikias 4:1-3.



6 7 8 9

<sup>10</sup> Mantabon dan to si liyang sin kad-an di batbato ya man-osok da sin lota ta ilisian da koma din kaeegyay ay panosaan Diyos en daida ya itabonan da din mankoniniing ay kinadiyos na. <sup>11-12</sup> Domteng to di timpo ay maipababa din mangipangpangato si awak da et manpatingga di kinangaton di nemnem da. Sin agew ay doy, amin din maibilang ay nangato et maipababa da, et si Diyos anggoy di maipangato ya maidayaw. <sup>13</sup> Poyoenan to amin din nakayang ay sidro ed Lebanon ya makneg ay kakaiw ed Basan. <sup>14</sup> Singpaena abe din nakayang ay dodontog ya bilbilig <sup>15</sup> ya dadaelena din nangangato ay pantamtamangan di gowardiya ya batog ay alad di ili. <sup>16</sup> Ilned na olay din kadakdakan ya kamayatan ay bapor. <sup>17-18</sup> Siya di et maipababa din mangipangpangato si awak da et manpatingga di kinangaton di nemnem da. Sin agew ay doy, mamingpingsan ay mamaga di sinan didiyos, et si Diyos anggoy di maipangato ya maidayaw. <sup>19 20 21 22</sup>

### 3

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26

### 4

1

#### *Din Panosaan Diyos Ed Jerusalem Ya Din Somigedana Kasin*

(4:2-6)

Sin agew ay doy, ipakaan Diyos din makan ya mainom ed Juda ya Jerusalem, pati din tuturay, sosoldado, mamadto ya nalaing ay karpintiro ya manpanpanday. Maga di manglayad ay mangituray sin ipogaw ay mabay-an et man-asipaligat da et anggoy. Mo din babbabai sin ili et makaan din napintas ay bado da, din aritos ya odom ay al-altin di awak da. Imbis ay napintas ya manseng-ew da, mapoltakan ya mabayangan da dowan da aben man-akoo. (3:1-26)

<sup>2</sup> Domteng to di timpo ay din Pingin Diyos et maptemapteng ya madaydayaw,\* ya din maapit sin ili et panragragsakan ya it-it-ek din mabay-an ay Israelita. <sup>3</sup> Daida di maibilang ay nasantoan ay naisosolat di ngadan da sin listaan di makalasad ya matago ed Jerusalem. <sup>4</sup> Osalen ton Diyos din panakabalina ay mangokom ya kaman apoy ay manglinis sin basol di babbabai ay taga-Jerusalem ya din dada ay naimansa sin ili. <sup>5</sup> Mo makdeng di, pawadaen Diyos di liboo sin kaagawan yan apoy sin labi ay manglidom ed Jerusalem ya din ipogaw ay nasinop sisi. Lidoman din panakabalin Diyos din intiro ay ili. <sup>6</sup> Kaman tolda ay panlidoman sin segit ya pansidoman sin timpon di pewek ya odan.

### 5

#### *Kanta Maipanggep Sin Namolaan Si Obas*

(5:1-7)

- <sup>1</sup> Para sin laylaydek, waday enak ikanta  
maipanggep sin inobasana:  
Waday inobasana ay mayat di lota na.
- <sup>2</sup> Inobla na ya din bato et kinaana,  
kasigedan ay obas di inmola na.  
Pansidoman di manbantay et inamag na,  
siya abe sin panpespesana.  
Ninamnama na ay siged di apitena,  
ngem lawlawa et baw di lames da.
- <sup>3</sup> Isonga kanan din akin daga ay sana,

\* **4:2** Di esa abe ay kaiologan nina sin Hebreo et: Domteng to di timpo ay pagabayen Diyos din molmola ya kakaiw sin ili ta say magmagabay ya maptemapteng. Ilaen abe sin 11:1 ya Zecarias 3:8, 6:12-13.

“Dakayo ay omili ed Jerusalem ya Juda,  
 sino pay di en yo maibaga  
 maipanggep en sak-en ya din obas ay enak inmola?  
<sup>4</sup> Sino pay di adiak inamag sin enak inmola?  
 Apay nga lawlawa di lames na  
 yan ninamnamak ay mayat koma?  
<sup>5</sup> Di amagek sin inobasak et siya na:  
 Kaanek din naialad ay pagat sin benget na  
 ya dadaelek din batog ay alad na  
 ta alaben di animal ya igatigatin da.  
<sup>6</sup> Baybay-ak ta olay mabeas da.  
 Adiak daldalosan din pingi da  
 ya adiak tabtab-okan din poon da.  
 Bay-ak ay komotan di pagat daida  
 ya bilinek pay din liboo ta adi na paod-odanan daida.”  
<sup>7</sup> Naey pay di olog din kanta ay sana.  
 Si Diyos ay Kangatoan ay Turay di akin daga.  
 Din taga-Israel ya namnamed din taga-Juda  
 di maiarig si inobasana  
 ya din obas ay inmola na ay panlaylaydana.  
 Ninamnama na ay din kosto ya nalinteg di amagen da,  
 ngem say maila na, waday manpespese ya waday palpaligaten da.

Pag ipadton Isaias ay domteng to di betil sin ili da. Kanana en pakaanen Diyos din taga-Juda ta maiey da si odom ay ili gapo sin layad da ay manbetbeteng ya makiragragsak ya din panigaan da ay mannemnem en sisya. Si Diyos ay mismo di mangayag si addawi ay nasyon ay en mangabak ed Juda ya mangipakaan sin omili. (5:8-30)

8 9 10 11 12 13 14 15 16 17 18 19 20 21 22 23 24 25 26 27 28 29 30

## 6

### *Din Nangayagan Diyos En Isaias Ay Manbalin Si Mamadto*

<sup>1</sup> Sin tawen ay nateyan Ari Uzias, inilak si Diyos ay tinmotokdo sin trono na. Maila din kinangato ya dayaw na yan inaplagan din tak-ep di bado na din intiro ay Timplo.

<sup>2</sup> Wada di omap-apoy ay paparsua ay mantaytayaw sin ngato na. Sag-eenem di payak da: dowa di ililingeb da sin ropa da ya dowa abe sin siki da ya dowa di os-osalen da ay tomayaw. <sup>3</sup> Mansinongbat da ay nangikanta, “Nasantoan, nasantoan, nasantoan si Diyos ay Kangatoan ay Turay. Maila din kinadiyos na sin intiro ay daga.” <sup>4</sup> Inkiweg din kali da din fondasyon di Timplo yan napno si asok din Timplo.

<sup>5</sup> Kanak si nemnem ko, “Kaasiak pay isna. Madosaak tan lawlawa amin ay kalik yan naitatapiak si ipogaw ay pag kadodogis ya lawlawa di ibagbaga da. Dowan aben inilak si Diyos ay din ari ay Kangatoan ay Turay.”

<sup>6</sup> Idi siya di, tinmayaw sin kad-ak din esa ay parsua. Iin-genana di man-ganggangab ay oling ay inipit na sin altar. <sup>7</sup> Insagid na sin tepek ko yan kanana, “Naisagid na sin tepek mo, isonga ed wani, nalinisan ya napakawan din basbasol mo.”

<sup>8</sup> Pagak dengngen din kalin Diyos ay kanana, “Sino di ibaak? Sino di ibaa tako?”  
 Et kinwanik, “Naeyak. Sak-en di ibaam.”

<sup>9</sup> Pag nan kanan, “En ka ibaga na sin kaipoipogaw: ‘Olay ipasnek yo ay mandenge, maga di maawatan yo. Olay esten yo ay ilaen et adi yo maawatan din mapaspasamak.’ ”

<sup>10</sup> Kanan Diyos ay nangitoloy, “Panbalinem da nan ipogaw ay nay si adi makaawat, nagodab ya nateweng tan into et mo sagongen das sak-en et maagasan da.”

<sup>11</sup> Pagak kanan ay nansalodsod, “Kas-ano ngin di kabayag dana ay mapasamak?”

Kanan Diyos, “Enggana ay madadael amin ay wada sin siyodad ya matey amin ay man-ili. Enggana ay mataynan din bebbeey ya madadael din payew ya nom-a da.

<sup>12</sup> Enggana ay ipaey ko sin addawi din kaipoipogaw et maga polos di mabay-an ay man-ili. <sup>13</sup> Olay mo wada anggoy di inkasinpo ay mabay-an sin omili, ngem wada kasin di mangabak ya mamse en daida. Maiarig din Israelita si napoyo ay kaiw ay owat din poona di mabay-an, ngem nan poon di kaiw et nasantoan ay bin-i ay gomabay kasin.”

## 7

1 2 3 4 5 6 7 8 9

### *Din Naipadto Ay Maipanggep En Immanuel*

(7:10-17)

Sin timpo ay nanturayan Ari Ahaz ed Juda, nantotolag da Ari Rezin ed Syria en Ari Peka ed Israel ay en mangobat sin siyodad ay Jerusalem. Inbaan Diyos si Isaias ta ena papigsaen di nemnem Ari Ahaz. Kanana en adi koma madanagan ono emegyat mo adi et ipapasnek na koma ay mantalek en Diyos, tan adi matongpal din planon di doway ay ari ay sana. Mo maipanggep abe sin nasyon ay Israel, dadlon maabak sin oneg di enemapolo ya lima ay tawen. (7:1-9)

<sup>10</sup> Wada kasin di inpaammon Diyos en Ahaz ay kanana, <sup>11</sup> “Mankedaw ka en Yahweh ay Diyos mo si pangilasinan ay temet-ewa din inkarin Diyos. Mabaln ay olay sino di kedawem ay sinyal, olay mapo ed dallem ay kad-an di natey ono mapod langit.”

<sup>12</sup> Ngem kanan Ahaz, “Aga, sigaak ay mamadas en Diyos.”

<sup>13</sup> Pag kanan Isaias en da Ahaz, “Dengngen yo ay polin David: Ay adi kayo pay laeng mapnek sin pamadpadasan yo si anos di ipogaw? Ay olay si Diyos ay pansilbilbiak yan padasen yo din anos na sin panigaan yo ay mankedaw? <sup>14</sup> Isonga din Apo ay mismo di mangidawat si sinyal. Mawad-an din balasang\* et man-anak si lalaki ay ngadananas Immanuel. <sup>15</sup> Mo madakdake ya enggay ammo na di am-amagena, gatas ya anig di kanena. <sup>16</sup> Adi pay laeng domteng di ay timpo yan enggay magay man-ili sin iturayan di doway ay ari ay egyatan yo. <sup>17</sup> Ipalak-am Diyos di palalo ay ligat en sik-a, sin ipogaw mo ya sin intiroy ay familyam, tan ibaa na din arin di Assyria. Din ligat ay nay yan nakarkaro mo din amin ay napasamak manipod sin naisianan di Israel ed Juda.” <sup>18</sup> <sup>19</sup> <sup>20</sup> <sup>21</sup> <sup>22</sup> <sup>23</sup> <sup>24</sup> <sup>25</sup>

## 8

1 2 3 4 5 6 7 8 9 10

### *Din Namagbagaan Diyos En Isaias*

(8:11-22)

<sup>11</sup> Naliknak din panakabalin Diyos yan binagbagaanas sak-en ay adiak on-onodan din am-amagen di kaipoipogaw. Kanana, <sup>12</sup> “Adi kan makitimpyog sin kanan di kaipoipogaw ay sana en tolagan di rebelde ya adi kan emegyat sin egyatan da. <sup>13</sup> Sak-en et koma ay Diyos ay Kangatoan ay Turay di bigbigem ay nasantoan, sak-en et anggoy di patgem ya egyatam. <sup>14-15</sup> Mo say iyat mo, laton ay sak-en di pankamangam, ngem mo din nandowa ay ilin di Israelita ya din taga-Jerusalem et maiarigak si bato ay kaisokbaan ya kasogatan di ad-ado en daida. Kamanak aben tagdey ay kaknaan da.” <sup>16</sup> Dakayo ay pasolot ko, masapol ay bantayan yo ta adi mabalbaliwan nan naisolat ay inpadtok ay inpaammon Diyos en sak-en. Lopilopen yo ya pay-an yo si kaman istam ta adi maoklag.

\* **7:14** Din kanana sin Hebreo et balasang. Din kanana abe sin Griego (LXX) ay inbagan Mateo sin Mateo 1:23 et balasang ay magay nangiwgiwit, tan sin pannemnem di Judio, basta balasang yan laydena ay kalien en magay nangiwgiwit.

<sup>17</sup> Dinokogan Diyos din ipogaw na ay polin Jacob, ngem mantalekak en sisya et say pankamangak. <sup>18</sup> Naeyak ya din an-ak ko ay indawat Diyos ay Kangatoan ay Turay ay manbeey sin Timplo ed Zion. Dakami di inbaa na ay kaman sinyal di mapasamak sin ipogaw na.\*

<sup>19</sup> Wadan to di mangibaga ay mandamag kayo sin mansip-ok ya man-gegey ay man-ay-ayasak ya mantibitibi. Kanan da, “Ay adi aya koman kedawen di ipogaw mo sinoy ipaammon di kadiyodiyos da ya din kakading para sin matmatago?” <sup>20</sup> Ngem siya nay kanak en dakayo. Onodan yo koma din bilbilin ya it-itdon Diyos. Mo din ibagbaga da yan adi maikompa sin kalin Diyos, deda da sin mabolinget ya adi dan edasan din pomat-aan di agew.

<sup>21</sup> Awni et madismaya ya mandagaang di ipogaw yan owat dan lomikeliked sin daga. Gapo si dagaang ya bonget da, baosan da din ari da ya din Diyos da. Olay tangaden da ed daya <sup>22</sup> ono isin-eng da din daga, magay maila da mo adi et palalo ay ligat ya kaegyay ay mabolinget ay say pantongpalan da.

## 9

### *Din Maianak Ay Ari* (9:1-7)

<sup>1</sup> Ngem olay mo kaman nidi di lak-amen da ay ligat ya mabolinget, makaan to din panladladingitan da. Dandani et ay maibabain din dagan da Zebulun en Naftali,\* ngem sin tapin di agew, maidaydayaw din daga ay nay ay wada sin benget di annawa ay lebeng ya sin demang di ginawang ay Jordan ya enggana sin sakop di Galilea ay kanan da en ilin di Gentil. <sup>2</sup> Din ipogaw isdi et kaman dan mantetee sin mabolinget, tan kaman nalilibooan din ili da si pese. Ngem awni et ilaen da di somisili ay silaw, tan manpaila sin kad-an da di maninggaw si nemnem da. <sup>3</sup> Sik-a ay Diyos yan paannawaem din ili da et palalo di ragsak da. Gapo sin amagem, manragsak da ay kaman din manani ono din manbibingay si sinamsam da. <sup>4</sup> Wayawayaam daida sin naibabag-enan da ya kaanem din ligat ay bakbaklayen da. Abakem din nasyon ay mamalpaligat si ipogaw mo ay kaman din inyat mo ay nangabak sin sosoldadon di taga-Midian ed idi. <sup>5</sup> Mapooan to amin ay sapatos ya nadadaan ay badon di sosoldado ay nakigobat. <sup>6</sup> Tan maianak en datako di esa ay lalaki ay mangituray en datako. Mangadanan to si Nalaing ay Mamagbaga, Manakabalin ay Diyos, Ama si Eng-enggana ya Ari ay Mangipawadas Talna. <sup>7</sup> Sisya di maisokat en Ari David ay manturay. Pomigsa ay pomigsa din panturayana ya kanayon ay natalna, tan pag kosto ya nalinteg di iyat na ay manturay manipod ed wani ya si eng-enggana. Awni et dadlon amagen Diyos ay Kangatoan ay Turay dana.

### *Din Panosaan Diyos Sin Israelita Ya Taga-Assyria*

Ngem sin timpon pay laeng Isaias, palalo ay dosaen Diyos din Israelita, tan inapati da ay manbasbasol yan adi da mansagong en Diyos. Maga polos di pamosposan da sin omalian di taga-Assyria ay makigobat. Ngem mo makdeng ay dosaen Diyos daida babaen sin taga-Assyria, dosaena met laeng din arin di Assyria ya din sosoldado na gapo sin nangipangatoan da sin awak da. Bigla ay pansakitena din sosoldado ay sana, et atatik da di makalsot. (9:8–10:19)

8 9 10 11 12 13 14 15 16 17 18 19 20 21

\* **8:18** Mansilbis da Isaias sin an-ak na ay kaman sinyal, tan din ngadan da et way olog da am-in. Din olog di Isaias et “si Yahweh di mangisalikan,” din olog di Sear Jasub et “Waday mabay-an ay mantaoli,” ya din olog di Maher-Salal-Has-Baz et “Alisto ay mansamsam.” \* **9:1** Natongpal din naipadto ay nay sin en nakigobatan Ari Tiglat-Pileser ay taga-Assyria ed Israel manlogi sin 734 B.C. Ilaen abe sin Mateo 4:13-16.

## 10

1 2 3 4 5 6 7 8 9 10 11 12 13 14 15 16 17 18 19

### *Din At-atik Ay Israelita Ay Mantaoli En Diyos*

(10:20-23)

<sup>20-21</sup> Sin doy ay timpo, wada di mabay-an sin polin Israel ay mansagong kasin en Diyos ay Manakabalin. Makaan di talek da sin nasyon ay namalpaligat en daida ta say pantalkan da anggoy si Yahweh ay din nasantoan ay Diyos da. <sup>22</sup> Olay mo ad-ado di Israelita ed wani ay kaman din kaad-adon di darat sin baybay, at-atik anggoy di mantaoli, tan enggay inkeddeng Diyos di kostokosto ay dosan di ipogaw na. <sup>23</sup> Tet-ewa ay tongpalen Apo Diyos ay Kangatoan ay Turay din inbaga na ay dosaena din intiroy ay ili. <sup>24 25 26 27 28 29 30 31 32 33 34</sup>

## 11

### *Din Natalna Ay Panturayan Din Polin Jesse*

(11:1-11)

<sup>1</sup> Maiarig din polin Jesse\* si kaiw ay napoyo ngem pomngi din poona, asi gomabay ya manlames din pingi. Say kaiarigana tan wadan to kasin di man-ari ay mapo sin poli na. <sup>2</sup> Mantee en sisya din Ispiriton Diyos ay mangidawat si sirib ya panakaawat. Idawat na abe di laing na ay mangikeddeng si kosto ya din kabaelana ay mangipatongpal sin ikeddeng na. Ammo na ya patgena si Diyos <sup>3</sup> et malaydan ay mansilbi en sisya. Adi na ibasar din iyat na ay mangokom sin ilaena ono dengngena. <sup>4</sup> Nalinteg din iyat na ay mangokom sin nabiteg ya salaknibana din kalintegan di napakombaba. Babaen sin kali na, dosaena din managbasol isnan daga ya keddengana ay matey di odom en daida. <sup>5</sup> Nalinteg ya matalek ay mangituray sin ipogaw na. <sup>6</sup> Sin doy ay timpo, mankokoyog dan to din atap ay aso ya karnero, leopard ya kalding. Man-okob dan to di baka ya layon yan anan-ak di mangayowan en daida. <sup>7</sup> Man-okob dan to di baka ya oso yan mandaag din anak da. Mangan da abes garami din layon ay kaman din baka. <sup>8</sup> Olay man-ayam di anak sin asag-en di nagitaan ay eweg et adi na katen. <sup>9</sup> Maga di panegyatan ay pomse ono domadael sin dontog Diyos, tan mapno din daga si ipogaw ay mangammo ya mamati en Diyos ay kaman din iyat di baybay ay napno si danom.

<sup>10</sup> Sin doy ay timpo, din polin Jesse ay sana et kaman naikayang ay bandila ay kasinopan ya pankamangan di ipogaw ay mapo sin kailili isnan daga. Matopog da sin kad-ana, et manbalin to ay maptemapteng ya madaydayaw din ili ay panturayana.

<sup>11</sup> Sin doy ay timpo, ipailan Diyos kasin din panakabalina ay mangipataoli sin ipogaw na ay nabay-an.† Ipasaa na din wada ed Assyria ya ed Egipto, ya din il-ili ay Patros, Sudan, Elam, Babilonia, Hamat ya din il-ili ay linilikob di baybay. <sup>12 13 14 15 16</sup>

## 12

### *Kanta Ay Pangidayaw En Diyos*

<sup>1</sup> Sin doy ay timpo ay domteng to, kanan din ipogaw ay mangikanta:

“Sik-a ay Diyos, idaydayaw kos sik-a,  
tan olay mo inmibonget ka,  
ngem nasokatan din bonget mos liwliwa.

<sup>2</sup> Sik-a ay Diyos di omisalakan,  
adiak emegyat tan sik-a di enak pantalkan.

Tan sik-a di kapoan di panakabalin ya pigsak,  
ya begew en sik-a, naisalakanak.”

\* **11:1** Si Jesse et aman Ari David, isonga din omali ay Messias et maibilang ay polin Jesse ono polin David. † **11:11** Din damo ay nangipataolian Diyos sin ipogaw na sin kosto ay ili da et din napoan da ed Egipto sin timpon Moses.



- <sup>3</sup> Manragsak kayo sin pangisalakanan Diyos Apo ay kaman din ragsak di manbigaw ay manakdo.
- <sup>4</sup> Mo domteng di ay timpo et kanan yo, “Idaydayaw yo si Diyos ya manpatolong kayo. Dad-aten yo sin amin ay nasyon din inamag na ya ipaammo yo din kinangato na.
- <sup>5</sup> Mankanta kayo ay mangidayaw en sisya gapo sin nakaskasdaaw ay inam-amag na. Ipaammo yo sin intiro ay daga.
- <sup>6</sup> Dakayo ay Israelita, manbogaw ya mankanta kayo ay man-ili ed Zion gapo sin ragsak yo. Tan nangato din nasantoan ay Diyos yo yan wada sin kad-an yo.”

## 13

1 2 3 4 5 6 7 8 9 10 11 12 13 14 15 16 17 18

### *Din Panosaan Diyos Ed Babilonia (13:19-22; 14:1-7,12-17)*

Pag waday ipadton Isaias ay maipanggep sin pangipababaan ya panosaan Diyos sin ari ed Babilonia ya din panturayana. Kanana: (13:1-18)

- <sup>19</sup> Ed Babilonia di kamaptengan ay ili yan it-it-ek din ipogaw ay wadas di, ngem awni et bakasen Diyos ay kaman din inyat na ay nanadael ed Sodoma ya Gomorra.
- <sup>20</sup> Maga kasin di man-ilis di si eng-enggana. Olay din lomikeliked ay Arabo et maga di en mangiamag sin tolda nas di, yan maga abes di di mangipaspastol si karnero.
- <sup>21</sup> Manbalin to ay panbeeyan anggoy di animal ya titit ay mantees kadardaratan. Isdi di pan-obongan di kop, ya man-ayam abe di atap ay kalding sin nadadael ay beey. <sup>22</sup> Din nankangangato ya nankamapteng ay beey di baknang et manbalin si owat panngakngakan di atap ay aso. Dandani et di kadadaelan di Babilonia, enggay nabibilang di agew na.

## 14

- <sup>1</sup> Seg-angan ton Diyos kasin din polin Israel yan kasinan panbalinen daida si ipogaw na. Ipataoli nas daida sin kosto ay ili da et wada abe di mangili ay maitapi en daidas di.
- <sup>2</sup> Ad-ado ay nasyon di tomolong sin Israelita ay mantaoli sin ili da ay siya met laeng din ilin Diyos, asi da mansilbi ay bag-en da. Din nangibalod ya namalpaligat sin Israelita ed idi yan daidan to di ibalod ya paligaten din Israelita.
- <sup>3</sup> Ipasaldeng ton Diyos din ligat ya ladingit ya kaseseg-ang ay kasasaad di ipogaw na ay bag-en. <sup>4</sup> Sin pangamaganas di, lasoyen da din ari ed Babilonia ay mangwani, “Kaman nidi baw di nantongpalan din natangsit ay doy! Maga kasin di paligatena!
- <sup>5</sup> Enggay kinaan Diyos din panakabalin din doy lawa ay ipogaw ay manturay. <sup>6</sup> Palalo ay pinalipaligat nas bonget na din ipogaw sin kailiili ay inabak na. <sup>7</sup> Ngem ed wani, sinmaldeng di gobat et tinmalna din kailiili isnan daga, isonga mankanta amin di ipogaw begew si ragsak da.” <sup>8</sup> <sup>9</sup> <sup>10</sup> <sup>11</sup>
- <sup>12</sup> Natekdag ka baw ay napod langit, sik-a ay makwani en batakagan ay kaman anak di pat-a. Ed idi, sik-a di nangabak sin kailiili, ngem ed wani, naitpig ka isnan daga.
- <sup>13</sup> Kanam si nemnem mo, “Ngomatoak ed langit ta isaad ko din tronok sin ngaton di talaw ay inamag Diyos. Tomokdoak ay manturay sin toktok di dontog ay addawi di kad-ana ed amyanan ay kasinsinopan di kadiyodiyos. <sup>14</sup> Ngomatoak sin ngaton di liboo et panbalinek din awak ko ay kaman si Diyos ay Kangatoan.” <sup>15</sup> Say kinwanim sa si nemnem mo, ngem din nantongpalam baw et naipababa ka ed dallem ay kad-an



di natey. <sup>16</sup> Din wadas sa et isisin-eng daka. Nasdaaw da ay mannemnem sin lawa ay nantongpalam. Kanan da, “Ay si naey aya din ipogaw ay nangikiweg sin kailili isnan daga? <sup>17</sup> Ay mabalin aya ay sisya di nanadael si piga ay siyodad et nanbalinena din lobong si kaman kadardaratan? Ay sisya abe di nanigaan ay mangipawaya sin inpabalod na ta somaa da? Ay apaw na!” kanan da. <sup>18 19 20 21 22 23 24 25 26 27 28 29 30 31 32</sup>

1 2 3 4 5 6 7 8 9

**15**

1 2 3 4 5 6 7 8 9 10 11 12 13 14

**16**

1 2 3 4 5 6 7 8 9 10 11 12 13 14

**17**

1 2 3 4 5 6 7

**18**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25

**19**

1 2 3 4 5 6

**20**

1 2 3 4 5 6 7 8 9 10 11 12 13 14 15 16 17

**21**

1 2 3 4 5 6 7 8 9 10 11

**22***Din Adi Nanbabawian Di Taga-Jerusalem**(22:12-14)*

Pag wada abe di inpadton Isaias ay maipanggep sin kaabakan di ili ay Assyria, Filistia, Moab, Damascus, Sudan, Egipto, Edom, Arabia ya Jerusalem. (14:24–21:17)

Mo maipanggep ed Jerusalem, kinwanin Isaias en waday kagobat da ay nanglilikob sin siyodad. Inamag din omili din kabaelan da ay mangipakneg sin batog ay alad di ili ya nan-olnong da abes danom ya odom ay kasapolan da, ngem adi dan ninemnem si Diyos ta sisya koma di pantalkan da. Isonga intoloy Isaias ay nangwani:\* (22:1-11)

<sup>12</sup> Sin timpo ay doy, inayagan Diyos ay Kangatoan ay Turay si dakayo ta man-oga ya manladingit kayo. Binilinas dakayo ta koskosan yon toktok yo ya manbado kayos sako. <sup>13</sup> Ngem nasis-iyek ya nanragragsak kayo. Nanparti kayos baka ya karnero et nansidsida kayos karni ya nan-in-inom kayos arak. Kanan yo, “Mangan tako, man-inom tako tan mo si bigat et matey tako.”† <sup>14</sup> Isonga kanan Yahweh en sak-en, “Adi mapakawan nan lawa ay am-amagen da sin intiro ay biyag da.” Siya sa di inbagan Diyos ay Kangatoan ay Turay.

*Din Saad Da Sebna En Hilkiass**(22:15,19-23)*

<sup>15</sup> Pag omibaa si Yahweh ay Diyos ay Kangatoan ay Turay ta enak anapen si Sebna ay din nadotokan ay makaammo sin palasyo ta ibagak na en sisya: <sup>16 17 18 19</sup> Kaanen dakan to en Diyos sin nangato ay saad mo et ipababa daka. <sup>20</sup> Kanan Diyos en sik-a, “Sin agew

\* **22:11** 22:1-13 Din naipadto ay nay et kaman enggay nakdeng sin pangilan Isaias. Kanan di odom en natongpal sin nakigobatan Ari Sennakerib ay taga-Assyria ed Jerusalem sin 701 B.C. ono din nangabakan Ari Nebukadnezar ay taga-Babilonia ed Jerusalem sin 588-586 B.C. † **22:13** Corinto 15:32.

ay sana, ayagak to din baak ay si Eliakim ay anak Hilkias. <sup>21</sup> Ipaosal kon to en sisya din nagayad ay badom ya bilkom ay ari. Idawat ko en sisya din am-in ay panakabalin ay naidawat ed idi en sik-a et sisya di manbalin ay panakaaman di ipogaw ed Jerusalem ya Juda. <sup>22</sup> Idawat ko abe en sisya din sosin di palasyon David. Din bokatana, maga di makain-eb. Din in-eb na, maga di makabokat.‡ <sup>23</sup> Estek ay isaad sin turay na ay kaman din pasek di tolda ay nas-et ay naipalok et manbalin ay kadayawan din intiro ay pamilya na.” <sup>24 25</sup>

## 23

1 2 3 4 5 6 7 8 9 10 11 12 13 14 15 16 17 18

## 24

1 2 3 4 5 6 7 8 9 10 11 12 13 14 15 16 17 18 19 20 21 22 23

## 25

### *Kanta Ay Pangidayaw En Diyos (25:1-9)*

Pag ipadton Isaias ay dosaen Diyos ed Tiro ta maipasaldeng di pannigosyoan das bapor si pitopolo ay tawen. Kanana abe en dosaen Diyos din intiro ay lobong ta dadlon madadael. Ngem pag mankanta ay mangidayaw en Diyos begew sin pangokomana sin daga ya din ragsak di ipogaw mo makedeng din timpon di dosa. Kanana: (23:1–24:23)

- <sup>1</sup> Apo Yahweh, sik-a din Diyos ko,  
ipangatok ya idaydayaw ko din ngadan mo.  
Tan nakaskasdaaw din inam-amag mo,  
matalek ka et din planom ed bayag yan tinongpal mo.
- <sup>2</sup> Dinadael mo din dadakke ya naaladan ay kailiili.  
Din siyodad ay insaad di mangili  
et madadael ay adi polos maitaoli.
- <sup>3</sup> Isonga din nanasyon ay makedse ya napipigsa  
et idaydayaw ya egyatan daka.
- <sup>4</sup> Din nabiteg ya kakkaasi, sik-a di pankamangan da.  
Sin pewek, sik-ay manalaknib en daida,  
sin podot di segit, sik-ay panlidoman da.  
Din natangsit ay ipogaw et kaman pewek ay napigsa  
<sup>5</sup> ya kaman aben atong di namgaan ay daga.  
Ngem sik-a ay Apo, inpaginek mo din kalaban mi,  
inpaginek mo din bogaw di mangili.  
Kaman din iyat di liboo ay mangipaliteng  
sin kaagawan ay palalo ay man-atong.
- <sup>6</sup> Sin tapin di agew, isaganaan Diyos ay Kangatoan  
sin dontog ay Zion  
di esa ay ragragsak ay ad-ado di makan,  
makan ya arak ay kam-isan  
para sin amin ay nasyon.
- <sup>7</sup> Kaanenan to sin dontog ay Zion  
din panladingitan ay kaman namabalkot si amin ay nasyon.
- <sup>8</sup> Din pese et kaanenas eng-enggana.  
Ponasanen to am-in ay lowa.  
Kaanena din naibabainan di ipogaw na isnan intiro ay daga.

‡ 22:22 Naipaammo 3:7.

Si Apo Diyos ay mismo di nangibaga isna.  
<sup>9</sup> Sin isdi ay agew et kanan dan to,  
 “Sisya din Diyos tako.  
 Nantalek takon sisya et insalakanas datako.  
 Manragsak tako ngarud sin nangisalakananan datako.” <sup>10 11 12</sup>

## 26

### *Din Tolong Diyos Sin Ipogaw Na (26:1-8,19)*

<sup>1</sup> Domteng to di timpo ay siya na di maikanta sin ili ay Juda:  
 Din siyodad tako et napigsapigsa!  
 Tan si Diyos ay mismo di kaman makneg ay alad na  
 ay manalaknib ya mangisalakan sin ipogaw na.  
<sup>2</sup> Din segpan di siyodad, bokatan yo koma  
 ta din kaipoipogaw ay nalinteg ya senggep da.  
<sup>3</sup> Sik-a ay Diyos di mangidawat si tet-ewa ay talna  
 sin adi mankeyat ay mantalek en sik-a.  
<sup>4</sup> Mantalek kayo si eng-enggana en Diyos Apo,  
 tan kaman makneg ya komakaman ay bato  
 ay say kanayon ay pankamangan tako.  
<sup>5</sup> Din nangato et inbababa na.  
 Dinadael na din napigsa ay ili da  
 ya tinokang na din alad na.  
<sup>6</sup> Ed wani din nabiteg ya napalpaligatan et gatigatinan da  
 din nabakas ay siyodad ay sana.  
<sup>7</sup> Sik-a ay Diyos di mangipasiged  
 ya maningpa sin danan di nalinteg.  
<sup>8</sup> Tongpalen mi din laydem ya mantalek kamin sik-a.  
 Magay odom si anapen mi mo adi et sik-a.  
<sup>9 10 11 12 13 14 15 16 17 18 19</sup> Din matey et matago da,  
 matago kasin din awak da.  
 Amin ay wada sin kaot da,  
 matago da ay mangibogaw si ragsak da.  
 Kaman din panibogan di odan si mola ta matago da,  
 say iyat Diyos sin natenatey ay manago en daida. <sup>20 21</sup>

## 27

1 2 3 4 5 6 7 8 9 10 11 12 13

## 28

1 2 3 4 5 6 7 8

### *(28:9-13)*

Pag dayawen Isaias si Diyos begew sin panosaanan to sin kaipoipogaw isnan daga ay nakabasol. Abakenan to din kalaban di Israelita ya ayowanana din ipogaw na ay kaman din mangay-ayowan si kaobasan. Dayawen aben Isaias si Diyos tan kaanenan to din basol di ipogaw na ya pasaldengena din panaydayawan das sinan didiyos. Asi na aben itaoli din ipogaw na sin kosto ay ili da ay mapo sin kailili ay naiwarasan da.

Pag ipadton Isaias din omalian di taga-Assyria ay manadael ed Samaria ay kapital di Israel. Tan olay din mamadto ya papadi ed Israel yan makabeteng da ya adi da kabagbagaan. (26:20-28:8)

<sup>9</sup> Manmayotmot da ay kanan da, “Ay sino pay di kanan nisa en itdoana? Maibagay anggoy sa sin anak ay kaposposot na. <sup>10</sup> Tan ipidwapidwa na ay mangitdo si esa ya esa ay letra ya linya ya leksiyon.”

<sup>11</sup> Isonga kanan Isaias, “Mo adi kayo domdomnge, wada di ibaan Diyos ay mapo sin addawi ay ili ay mankalis natken ay kali ta say ibaga da en dakayo din layden Diyos ay maibaga.\* <sup>12</sup> Kanana en idawtanans dakayo si talna ya pan-illengan, ngem adi yo inkaskaso. <sup>13</sup> Isonga panbalinen Diyos din kali na en dakayo si kaipidwapidwaan di esa ya esa ay letra ya linya ya leksiyon ta say mo mandan kayo, et mansanod kayo ay matokang. Masogatan kayo et madpap ya maibalod kayo.”

### *Din Dosan Di Lawa Ay Manturay*

(28:14-22)

<sup>14</sup> Dakayo ay makalaso ay mangituray si ipogaw isnan Jerusalem, dengngen yo din kalin Diyos. <sup>15</sup> Ilaslastog yo en nakitolag kayo sin pese ya din kad-an di natey. Namnamaen yo ay olay domteng di kaeegyat ay dosa sin biyag yo, tan nalaing kayo ay man-etek et say namnamaen yo ay pangsalin sin awak yo ono say pantabtabonan yo.

<sup>16</sup> Isonga siya na di kanan Yahweh ay Diyos, “Isaad ko ed Zion di napadas ya nabanobanol ay bato. Makneg di ay pansaad an ay mangipakneg sin beey. Adi polos mababainan di mantalek en sisya. <sup>17</sup> Din palteng ko yan kinalinteg, din boyon ko yan kinasiged.” Ngem din et-etek ay pantaltalkan yo ay pangsalin sin awak yo et magay silbi na, tan adi pasien di kalaban yo mo adi et abaken das dakayo ay kaman din iyat di dalalo ya layos ay manadael si beey. <sup>18</sup> Awni et maponas din nakitolagan yo sin pese ya din kad-an di natey. Mo domteng din kaeegyat ay dosa et maabak kayo ay kaman kayon magatigatinan. <sup>19</sup> Kanayon to ay manligat kayo. Innagew ya linablabi ay lakamen yo. Manpayegpeg kayos egyat yo tonggal waday baro ay ipaammon Diyos en dakayo. <sup>20</sup> Maiarig kayo si ipogaw ay padasena ay maseyep si aptik ay katri ya igaley na di adi omanay.

<sup>21</sup> Awni et makigobat si Diyos ay kaman din inyat na sin dontog ay Perazim ya sin tanap ed Gibeon† ta tongpalena din panggep na, olay mo kaman natnatken di amagena en dakayo ay ipogaw na. <sup>22</sup> Isaldeng yo ngarud ay manglaslasoy sin pamagbagak en dakayo ta adi masepsep ay domagsen di dosa yo. Tan inpaammon Diyos ay Kangatoan ay Turay en sak-en din naikeddeng ay dosan di intiro ay ili. <sup>23 24 25 26 27 28 29</sup>

## 29

1 2 3 4 5 6 7 8 9 10 11 12

### *Din Naipadto Ay Maipanggep Ed Jerusalem*

(29:13-24)

<sup>13</sup> Kanan Diyos, “Da nay ay ipogaw et omidaydayaw da anggoy sin kali da, ngem baken tet-ewa ay napo sin nemnem da. Din panaydayawan dan sak-en et maibasar sin owat bilbilin di ipogaw ay inadal da.\* <sup>14</sup> Isonga kibtotek daida si mansasaruno ay ligat ay adi da ninamnama. Et magan to di silbin din laing di nalaing.”

<sup>15</sup> Inayan pay di pantongpalan din mangilimed si plano da en Diyos et ipagarup da en magay makaila ya makaammo sin am-amagen da. <sup>16</sup> Baliktaden dan katet-ewa na. Kaman dan kankanan en baken nangatngato din mandamdabili mo din dinamili. Ay mabalin aya ay kanan di kalamba ay pinken di esa ay ipogaw, “Adi kan pinomke” ono “Adi kan ammoy am-amagem”?

<sup>17</sup> Sinkaattikan et manbalin din kakadkadaan ed Lebanon si daga ay magabay di mola dowan pay din namolaan ay daga et maibilang to si kada. <sup>18</sup> Sin doy ay timpo, dengngen

\* **28:11** 1 Corinto 14:21. † **28:21** Sin dontog ay Perazim, binadangan Diyos si Ari David ay mangabak sin Filisteo (2 Samuel 5:20). Sin tanap abe ed Gibeon, ad-adoy pinsen Diyos ay Amorreo babaen si dalalo. \* **29:13** Mateo 15:3,4.

to di nateweng din maibasa ay libro yan makaila abe di nagodab ay manbibiyag si mabolinget. <sup>19</sup> Maragsakan kasin din napakombaba ya nabiteg begew sin am-amagen Yahweh ay din nasantoan ay Diyos di Israelita.

<sup>20</sup> Sin timpo ay doy di pap-eng din mamalpaligat si iib-a da, din makalasoy ya din alisto ay mangamag si lawa. Mamaga dan to am-in. <sup>21</sup> Dosaen aben Diyos din mamabpabasol sin ib-a da, din mangan-anap si kali ay pankamalian din nangidarum si nakabasol ta adi makeddeng din way basol na ya din mangitistigos baken tet-ewa ta adi maiosay di kalintegan din magay basol na. <sup>22</sup> Isonga siya na di kanan Yahweh ay Diyos di Israelita ya nangisalakan en Abraham, “Enggay adi kasin maibabain din polin Jacob, adi da bomalanga si bain da. <sup>23</sup> Tan mo ilaen dan to din an-ak da ay indawat ko, bigbigen da ay sak-en din nasantoan ay Diyos di Israelita et dayawen ya egyatan das sak-en. <sup>24</sup> Din nasangaw si lawa et maawatan dan to din kosto, ya din makamayotmot et layden dan to ay maitdoan.”

## 30

1 2 3 4 5 6 7 8 9 10 11 12 13 14 15 16 17

### *Din Seg-ang Diyos Sin Ipogaw Na (30:18-21,23-26)*

Pag ipadton Isaias ay madosa din taga-Juda tan baken si Diyos di nantalktalkan da, mo adi et en da nakitolag sin taga-Egipto ta badangan das daida ay makigobat sin taga-Assyria. Binilin Diyos si Isaias ta isolat na din lawa ay ogalin di ipogaw na ta say waday mangipaneknek sin kinamanagbasol da sin tapin di agew. Kanana en magay silbin din tolong di taga-Egipto et bigla ay madosa din taga-Juda ay kaman kalamba ay dadlon magopak. Madosa da tan kanayon ay tetewengen da din ibagbagan Diyos babaen si mamadto ya adi dan kabagbagaan. Ngem pag nan kanan en daida: (30:1-17)

<sup>18</sup> Olay mo siya di, sedsed-en Diyos din pansagongan yo en sisya ta ipaila na di seg-ang na en dakayo. Tan nalinteg si Yahweh ay Diyos et nagasat amin ay mantalek en sisya. <sup>19</sup> Somaldeng to di pan-og-ogaan yo, dakayo ay man-ili ed Jerusalem. Managseg-ang si Diyos et badanganas dakayo mo mankedaw kayo si badang na. <sup>20</sup> Olay mo dosaen Diyos dakayo, kanayon pay dedan ay wada di mangit-itdo en dakayo ay adi masapol ay anapen yo. <sup>21</sup> Mo masangaw kayo sin kannawan ono kannigid sin pandanan yo, madnge yo din kali na sin likodan yo ay kanana, “Sinay di pandanan yo.” <sup>22</sup>

<sup>23</sup> Sin agew ay sana, paodanen Diyos mo tonggal manmola kayo et ad-ado di apiten yo ya annawa abe di pastolan di animal yo. <sup>24</sup> Olay din baka ya dangki ay pan-alado yo yan pakanen yo sin kamayatan ay makan ay nas-et ay naisagana. <sup>25</sup> Wadan to di man-oy-oyas ay danom sin am-in ay dontog ya bilig sin agew ay sakopen yo din naaladan ay pantean di kalaban yo et ad-ado di matey. <sup>26</sup> Din selag di bowan et manbalin ay kaman din kapat-an di sey-ang di agew ya mamin pito abe ay kaman din sigod ay kapigsan di sey-ang di agew din sey-ang na. Mapasamak dana sin timpo ay pangagasan ya pamedbedan Diyos sin sogat ay inpalak-am na en dakayo ay ipogaw na.

Salakniban Diyos ed Jerusalem, ngem dadlonan abaken ya dosaen din taga-Assyria. (30:27-31:9)

27 28 29 30 31 32 33

## 31

1 2 3 4 5 6 7 8 9

## 32

### *Din Panturayan Din Nalinteg Ay Ari* (32:1-8,14-20)

<sup>1</sup> Wadan to di ari ay kosto ya nalinteg di iyat na ay manturay ya siya met laeng din oopisyal na. <sup>2</sup> Maiarig di esa ya esa en daida si pansidoman mo waday dagem ono pewek. Kaman da aben ginawang ay man-ay-ayos sin kadardaratan ono dakdake ay bato ay panlidoman sin man-atong ay lugar. <sup>3</sup> Sin timpo ay doy, am-in ay makaila et kosto di pangila da ya din makadnge et esten da tet-ewa ay mandenge. <sup>4</sup> Manemneman dan to din dalosodos ya mandiwes di kalin din adi mandiwes di kali na. <sup>5</sup> Awni et maga di mamanol si naong-ong ya nasikap. <sup>6</sup> Tan din naong-ong et magay silbin di kalkaliena ya pag lawa di nemnemena. Maikontra en Diyos di ibaga na ya amagena. Adi nan pakanen din mandagaang ono painomen din manbigaw. <sup>7</sup> Din nasikap abe et pag lawa di panggep na ya am-amagena. Dadaelena din nabiteg babaen sin etek na, ya topapenas daida ay manonton sin kalintegan da. <sup>8</sup> Ngem din mabmabadang ya siged ay ipogaw et pag kosto di plano na. Mapaneknekan abe din kinasiged na, tan ipapasnek na ay tongpalen din plano na ay sana.

Dakayo ay babbabai ed Jerusalem, dengngen yo, tan dandani din pangokoman Diyos sin ili ay nay. (32:9-13)

9 10 11 12 13

<sup>14</sup> Mataynan to din intiro ay siyodad ya olay din palasyo. Madadael si eng-enggana din bebbeey da ya din pantean di manbanbantay. Et manbalin din lugar ay doy si pantean di atap ay dangki ya pan-alaban di kakarnero. <sup>15</sup> Ngem awni et ibaan Diyos din Ispirito na en datako. Din daga ay magay silbi da yan somiged di maimola et ad-adoy maapit sin payew ya nom-a.

<sup>16</sup> Wadan to di kinalinteg sin intiro ay daga. <sup>17</sup> Din bongan di kinalinteg et talna, isonga mawada di talna si eng-enggana. <sup>18</sup> Et natalnan to di biyag din ipogaw Diyos. Magay pandanagan da sin beey da et tomalna di nemnem da. <sup>19</sup> Olay mo dalaposen di dalalo din kada ya siyodad, <sup>20</sup> naragsak kayon to tan ad-ado di danom ay manibog sin molmola ya nawaya di pan-ayaman din dangki ya baka yo.

## 33

1 2 3 4 5 6 7 8 9 10 11 12 13 14 15 16 17 18 19 20 21 22 23 24

## 34

1 2 3 4 5 6 7 8 9 10 11 12 13 14 15 16 17

## 35

### *Din Nasantoan Ay Danan* (35:1-10)

Pag kasin ipadton Isaias din panosaan Diyos ed Assyria ya siya abe ed Edom. Ngem mo maipanggep sin ipogaw Diyos ya din ili da, siya na di kanana: (33:1-34:17)

<sup>1</sup> Awni et kaman manragsak din kadardaratan ay magay silsilbi na, tan mansabong dan to di sabsabong sin lugar ay sana. <sup>2</sup> Ad-adon to di sabong na et kaman manragsak din daga ay mankanta. Maidawat en sisya din kinapintas di kakaiw sin kadondontogan ed Lebanon, siya abe sin kinamapteng di pastolan sin dontog ay Carmel ya din mangitit ay lota sin tanap ay Saron. Et ilaen to din omili din panakabalin ya kinangaton Diyos.

<sup>3</sup> Papigsaen yo din kinmapoy di takkay ya peweg da. <sup>4</sup> Kanan yo sin amin ay nadismaya, "Papigsaen yo din nemnem yo ya adi kayon emegyat, tan omali si Diyos



ay mangisalakan en dakayo ya manosa sin kalaban yo.”<sup>5</sup> Makaila dan to di nagodab ya makadnge din nateweng.<sup>6-7</sup> Din napilay, kaman dan to makawas ay manlagto yan din naomel et manbogaw da si ragsak da. Sin man-atong ay kadardatan, mawadan to di obbog ya ginawang. Din nangaan ay lota et manbalin si posong et gomabay di gabgab, tanobong ya pa-o sin lugar ay nantean di atap ay aso.

<sup>8</sup> Isdi mawadan to di dakdake ay kalsada ay mangadanan si “Nasantoan ay Danan.” Adi mabalin ay mandan isdi di managbasol ay magay nemnem da.<sup>9</sup> Maga abe di layon ya odom ay maangat ay animal ay manbeey sin danan ay sana. Maga di mandan isdi ay somaa mo adi din winayaan Diyos.<sup>10</sup> Naragsak dan to ay domateng ed Jerusalem et mankanta ya manbogaw da si ragsak da. Magay pap-eng din ragsak da ay sana, maga abey panladingitan ono pan-ogaan da si eng-enggana.

Pag dad-aten Isaias din napasamak sin nakigobatan Ari Sennakerib ay taga-Assyria ed Juda sin timpon Ari Hezekias. Din istorya ay nay et madtengan abe sin 2 Aari, kapitolo 18-20. (36:1–39:8)

## 36

1 2 3 4 5 6 7 8 9 10 11 12 13 14 15 16 17 18 19 20 21 22

## 37

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38

## 38

1 2 3 4 5 6 7 8 9 10 11 12 13 14 15 16 17 18 19 20 21 22

## 39

1 2 3 4 5 6 7 8

## 40

### *Kali Ay Mangidawat Si Liwliwa Ya Namnama (40:1-11)*

<sup>1</sup> Kanan Diyos ay daydayawen tako, “Esten yo ay liwliwaen din ipogaw ko. <sup>2</sup> Naanos ya nainayad koma di iyat yo ay mankali sin ipogaw ed Jerusalem. Ibagayon daida ay omanay di nabayag ay nanligligatan da et enggay inkaro dan basbasol da, tan enggay linak-am da din kostokosto ay nanosaan Diyos en daida gapo sin basbasol da.”

<sup>3</sup> Wada di mangibogbogaw ay kanana, “Sin lugar ay magay omili, isagana yo din danan di Apo ay omali ta say siged di danan ay pandanana. <sup>4</sup> Din iyat yo et singpaen yo am-in ay dontog ya bilig ya tab-okan yo amin ay tanap. Singpaen yo pay din lasonglasong. <sup>5</sup> Pag maipaila din panakabalin Diyos et ilaen di amin ay ipogaw. Si Diyos ay mismo di nangikari isna.”\*

<sup>6</sup> Waday kali ay nangwani, “Ibagam na.” Idi sinalodsod ko mo sino di enak ibaga yan kanana, “Ipaammom ay din amin ay ipogaw et kaman dan logam. Din kaandon di biyag da et kaman din sabsabong sin kada. <sup>7</sup> Makpit din logam ya mag-as din sabsabong mo dalaposen di dagem ay ibaan Diyos. Et kaman nidi met laeng di kasasaad di ipogaw. <sup>8</sup> Tet-ewa ay makpit din logam ya mag-as din sabsabong, ngem din kalin Diyos ay Apo tako et komakaman si eng-enggana.”†

<sup>9</sup> Sik-a ay mangipaammo si siged ay damag ed Jerusalem, emey ka sin nakayang ay dontog. Adi ka emegyat mo adi et ibogaw mo ay mangipaammo sin siged ay damag. Ibagam sin kailili ed Juda ay wada din Diyos da ay omal-ali. <sup>10</sup> Ilaen yo tan omali si Diyos ay Kangatoan ay maila din panakabalina. Iturayana din ipogaw na babaen sin bokbokod na ay panakabalin ya itakina di gon-gona ay idawat na. <sup>11</sup> Ayowanana din

\* 40:5 Lucas 3:4-6. † 40:8 1 Pedro 1:24-25.

ipogaw na ay kaman din iyat di manpaspastol si karnero. Topogena din anak di karnero et bakwaenas daida. Naanos abe ay mangipango sin iin-a da.

### *Magay Makaiso Sin Diyos Di Israelita*

(40:12-17,25-31)

<sup>12</sup> Ay wada aya di ipogaw ay makalokod sin linaon di baybay babaen sin takkay na ono makadangan ay manlokod ed daya? Maga abe di makaisako sin am-in ay lota isnan daga ono makaitimbang sin dontog ya bilig. <sup>13</sup> Ay siya mo waday ipogaw si nakin ammo sin nemnem Diyos? Ay siya mo waday nakaitdo ono nakabagbaga en sisya?‡ <sup>14</sup> Maga di nanopaitdoan Diyos ta ammoena ay mangilasin si siged ya lawa. Maga abe di nangitdo en sisya ta mawadaan si laing ya maawatana di kosto ay amagena.

<sup>15</sup> Mo mais-o da en Diyos, maiarig di am-in ay nasyon si owat sinkatedted ay danom. Din dagdaga sin gawan di baybay et kaman tapok di kalag-an da sin sangoanana.

<sup>16</sup> Adi omanay di amin ay animal ed Lebanon ay maidaton en Diyos tako. Kolang abe din kakaiw isdi ay pangipooan. <sup>17</sup> Mo mais-o din am-in ay nasyon en Diyos, kaman enggay maga da, maga polos di kaibilangan da sin pangila na. <sup>18 19 20 21 22 23 24</sup>

<sup>25</sup> Kanan Diyos ay nasantoan, “Sino ngarud di pangis-oan yo en sak-en ono sino di makaison sak-en?” Say kanana di. <sup>26</sup> Tangaden yo ed daya. Sino di namarsua sin am-in ay mailas di? In-olnos Diyos daida ay kaman sosoldado. Ammo na di kabibilang da ya ayagana di tonggal esa sin ngadan da. Kaeegyat din bikas ya panakabalina, isonga maga di olay esa ay malitaw en daida.

<sup>27</sup> Apay nga manriri kayo ay taga-Israel? Apay nga kanan yo en adi ammon Diyos din problima yo ya baybay-ana din kalintegangan yo? <sup>28</sup> Ay adi kayo ammo ono dinnge ay si Diyos et magay pap-eng na ya say namarsua isnan intiro ay daga? Polos ay adi mabbay ono komapsot ya magay makad-as sin nemnem na. <sup>29</sup> Din nakapoy ya nabbay et papigsaena. <sup>30</sup> Olay din babbaro et mabbay ya maisokba da. <sup>31</sup> Ngem din mannamnama sin tolong Diyos et mapapigsa da. Kaman dan agila ay tomayaw ya adi dan mabbay ay managtag ya mandan.

## 41

1 2 3 4 5 6 7

### *Din Tulong Diyos Sin Israelita*

(41:8-10,13-20)

<sup>8</sup> Kanan Diyos, “Ngem dakayo ay Israelita ay mansilsilbi en sak-en, dakayo din pinilik ay ipogaw ko, dakayo din polin Abraham ay gayyem ko. <sup>9</sup> Inayagak dakayo sin kaaddawian ay solin di daga et kinwanik en dakayo, ‘Dakayo di mansilsilbi en sak-en. Adiak sinigaan mo adi et pinilik dakayo.’ <sup>10</sup> Isonga adi kayon emegyat tan sak-en ay Diyos yo di mangadkadwa en dakayo. Papigsaek ya badangak dakayo, salaknibak ya isalakan kos dakayo sin panakabalin ko. <sup>11 12</sup>

<sup>13</sup> “Tan sak-en si Yahweh ay Diyos yo. Itakkayak dakayo yan kanak en dakayo, ‘Adi kayo emegyat tan badangak dakayo! <sup>14</sup> Olay mo at-atik ya nakapsot kayo ay Israelita, adi kayo emegyat tan badangak dakayo. Sak-en ay nasantoan ay Diyos di mangsobot en dakayo.’ <sup>15</sup> Panbalinek sik-a ay Israel si baro ay gilingan ay matadem di bab-a na. Gilingem din dontog ya bilig\* ta mamekmek da ono manbalin das kaman garami. <sup>16</sup> Teg-apam daida et itayaw di napigsa ay dagem. Ngem sik-a pay yan manragsak ka ya idaydayaw mos sak-en ay si Yahweh ay nasantoan ay Diyos mo ay Israel.

<sup>17</sup> “Mo man-anap din kaseseg-ang ya mapalpaligatan ay ipogaw kos danom, mo mamgaan din bagang das bigaw da, patgak din kararag da ya adiak baybay-an daida, tan sak-en din Diyos ay daydayawen di Israelita. <sup>18</sup> Pawadaek di ginawang sin napoltakan

‡ 40:13 Roma 11:34. \* 41:15 Din kaiarigan di dontog ya bilig et din nanasyon ay kalaban di Israelita.

ay kadondontogan ya pawadaek di obbog sin tanap. Panbalinek abe si posong ya obbog din kadardaratan. <sup>19</sup> Pagabayek isdi din kakaiw ay makwani en sidro, acacia, olivo ya odom pay. Awni et manbalin si kada din daga ay adi gomabay di mola. <sup>20</sup> Mo ilaen di ipogaw dana et ammoen da ay sak-en ay nasantoan ay Diyos di Israelita di nangamag isna.” <sup>21 22 23 24 25 26 27 28 29</sup>

## 42

### *Din Baan Diyos*

(42:1-12)

<sup>1</sup> Kanan Diyos, “Si naey din baak ay papipigsæk. Sisyá din pinilik ay kakapnekak. Idawat kon sisyá din Ispiritok ta ialí na di kinalinteg sin kailili isnan daga.\* <sup>2</sup> Adi manbogaw, adi na aben ipipigsa din kali na ay mandiskurso sin kalsada. <sup>3</sup> Din napyok ay pa-o et adi na gotloen, ya din madmad-ep ay silaw et adi na edpen. Dadlonan ilaen ta say nalinteg di maikeddeng sin am-in ay ipogaw ay maibasar sin katet-ewa na. <sup>4</sup> Adi madisdismaya mo adi et ipapasnek na enggana ay say maonodan din kinalinteg isnan daga. Et sedsed-en din ipogaw sin olay addawi ay il-ili din itdo na.”†

<sup>5</sup> Si Yahweh ay Diyos di namarsua ed daya et inoklag na. Pinarsua na abe nan daga ya amin ay wadas na. Sisyá di nangidawat si biyag di ipogaw ya amin ay matmatago. Siya na di kanana: <sup>6</sup> “Sak-en ay Diyos et nalinteg di panggep ko ay nangdotok en sik-a. Ayowanak ya papigsæk sik-a ta say babaen en sik-a makitolagak sin ipogaw ya masilawan din nemnem di ipogaw sin kailili. <sup>7</sup> Gapo en sik-a makaila di nagodab yan mawayawayaan di naibabalod sin mabolinget.

<sup>8</sup> “Sak-en si Yahweh, siya say ngadan ko. Adiak ipalobos ay awaten di odom ay diyos din kinangatok ya dayaw ko. <sup>9</sup> Amin ay inpadtok ed idi et natongpal da. Ed wani waday baro ay ipaammok et ibabagak sakbay ay mapasamak da.”

<sup>10</sup> Ikanta yo di baro ay kanta ay mangidaydayaw en Diyos isnan intiro ay daga. Dakayo ay mantee sin baybay ya em-emey isdi, dayawen yos sisyá. Mankanta kayo abe ay manili sin addawi. <sup>11</sup> Dakayo ay polin Kedar ay mantee sin lugar ay magay silbi na ya din il-ili sin sakop na ay kaman ed Sela, idayaw yo si Diyos sin kankanta. Mantikid kayo sin toktok di dontog ta ibogaw yo din ragsak yo. <sup>12</sup> Dakayo abe ay mantee sin kaaddawian ay il-ili, dayawen yo ya ipangato yo si Diyos. <sup>13 14 15 16 17 18 19 20 21 22 23 24 25</sup>

## 43

### *Din Inkarin Diyos Ay Mangisalakan Sin Ipogaw Na*

(43:1-7)

<sup>1</sup> Siya nay kanan Diyos ay namarsua en dakayo ay Israelita: “Adi kayon emegyat tan sinobot kos dakayo. Inayagak dakayo ta manbalin kayo ay ipogaw ko yan dadlonak inbaga din ngadan yo ay polin Jacob. <sup>2</sup> Mo man-agadang kayo si malosong ay danom, wadaak ay mangadkadwa en dakayo ta adi kayo maanod. Mo palalo abe ay maligligatan kayo ay kaman kayon manmandan si apoy, adi kayon kaatongan. <sup>3</sup> Tan sak-en si Yahweh ay din nasantoan ay Diyos yo ay Israelita et sak-en di mangisalakan en dakayo. Paabak ko ed Egipto, Etiopia ya Seba ay kaman maisobot en dakayo ta say mawayawayaan kayo. <sup>4</sup> Inkeddeng ko ay matey di odom ay ipogaw ay kasokat yo ta say matago kayo. Binaybay-ak di odom ay nasyon ay madadael ta maisalakan kayo gapo ta napateg kayon sak-en ya laydelaydek si dakayo. <sup>5</sup> Isonga adi kayon emegyat tan wadaak ay mangadkadwa en dakayo. Awni et pasaaek din poli yo ay wada sin addawi, din wada sin balaan ya diposan di agew. <sup>6</sup> Awni et ibilin ko sin nanasyon sin amyanan ya abagatan ta palobosan das daida. Ibilin ko ay mapalobosan din ipogaw ko ay wada

\* **42:1** Di odom ay kaiologan nina sin Hebreo et: ...ta ipaammo na din nalinteg ay inkeddeng Diyos ono ...ta ipaammo na din nalinteg ay panturayan Diyos. † **42:4** Mateo 12:18-21.

sin amin ay solin di lobong. <sup>7</sup> Daida din pinilik ay ipogaw ko et pinarsuak daida para sin kaidayawak.”

*Say Tistigon Diyos Din Israelita*

(43:8-12)

<sup>8</sup> Kanan Diyos, “Papikaen yo sin sangoanak din ipogaw ko ay waday mata da ngem adi da makaila, waday inga da ngem adi da makadnge. <sup>9</sup> Ibaga yo sin odom ay nasyon ta masinop da amin ay makidnge. Dakayo ay napo sin kailili, ay waday diyos yo ay makaibaga si daan mapasamak? Sino di nakaipadto isnan napasamak en daida? Ibaga yo sin odom ay diyos ta pawadaen da di manistigo si katet-ewa da ya din ibagbaga da. <sup>10</sup> Dakayo pay ay taga-Israel di pinilik ay manistigo ya mansilbi en sak-en ta ammoan yo ya mamati kayo ay sak-en anggoy di Diyos. Magay odom ay Diyos ay nangon-ona en sak-en ono mawadas tapin di agew. <sup>11</sup> Sak-en si Diyos. Magay odom ay mangisalakan mo adi et sak-en. <sup>12</sup> Inpadtok ed idi din mapasamak ya inmaliak ay mangisalakan en dakayo. Maga polos di didiyosen ay nakaamag isna et dakayo di tistigok.”

*Din Baro Ay Amagen Diyos*

(43:16-25)

<sup>13</sup> <sup>14</sup> <sup>15</sup>

<sup>16</sup> Kanan Diyos, “Ed nabaon, sak-en di nangamag si danan sin gawan di baybay ay annawa ya malosong. <sup>17</sup> Sak-en abe di nangiturong sin bonggoy di sosoldado et naanod da pati din kalisa ya kabayo da. Natey da ay kaman nad-ep ay kandila. <sup>18</sup> Ngem adi kayon say nemnemen din napasamak ed idi <sup>19</sup> mo adi et nan baro ay banag ay amagek ed wani. Ay adi kayo ayan maila? Man-amagak to si danan sin lugar ay magay omili yan pawadaek di danom isdi. <sup>20</sup> Olay din atap ay animal ay kaman din atap ay aso ya kop et mandayaw dan to en sak-en tan pawadaek di ad-ado ay danom sin lugar ay magay omili ta pan-inoman din ipogaw ko. <sup>21</sup> Tan daida din ipogaw ay pinarsuak para en sak-en ta daida di mangidad-at sin inamag ko ay kaidayawak.

<sup>22</sup> “Ngem baken sak-en di dinaydayaw yo ay Israelita, tan naoma kayo en sak-en. <sup>23-24</sup> *Baken sak-en di nan-idatonan ya dinaydayaw yo sin nan-idatdatonan yo si karnero yo. Baken aben sak-en di inlakoan yo si insinso ya pinnek yo sin taban di daton yo. Adiak met pinaligat dakayo ay man-idawat si daton yo ono pinilpilit dakayo ay man-idawat si insinso. Ngem inpadagsen yo et di nemnem ko gapo sin basbasol yo et naomaak sin lawa ay am-amagen yo.* <sup>25</sup> Ngem olay mo siya di, sak-en pay dedan si Diyos, et gapo met laeng en sak-en, ponasek din basbasol yo et adiak polos nemnemen.” <sup>26</sup> <sup>27</sup> <sup>28</sup>

## 44

*Din Namilian Diyos Sin Polin Jacob Ay Mansilbi En Sisya*

(44:1-8,21-23)

<sup>1</sup> Kanan Diyos, “Dengngen yos sak-en ed wani, dakayo ay mansilbin sak-en ay polin Jacob ay pinilik ay ipogaw ko. <sup>2</sup> Sak-en si Diyos ay namarsua en dakayo ya namke en dakayo manipod pay laeng sin naisikogan yo. Sak-en di namadbadang en dakayo. Adi kayon emegyat ay polin Jacob ay baik, tan dakayo din pinilik ay ipogaw ko. <sup>3</sup> Tan pawadaek di danom et man-ayos di ginawang sin kaman manbigaw ay nakgang ay lota. Et ibokbok ko din Ispiritok ya ad-ado pay ay bindisyon sin poli yo. <sup>4</sup> Awni et madakdake da ay kaman din logam ay masibsibogan ya kaman kaiw ay ginmabay sin benget di ginawang. <sup>5</sup> Kanan di odom en ipogaw ko si daida ono daida yan polin Jacob. Wada pay di odom ay mangimarka sin takkay da, ‘Okan Diyos,’ yan ibilang dan awak da ay Israelita.”

<sup>6</sup> Isonga kanan Diyos ay Kangatoan ay Turay ay arin di Israelita ya manobot en daida, “Sak-en di omona ya maodi. Magay odom ay Diyos mo baken et sak-en. <sup>7</sup> Ay waday makaison sak-en? Ay waday makaipadto ay kaman din inpadpadtok nanipod sin

namarsuaak sin ipogaw ed nabaon? Mo wada, may kod ta paneknekanan sak-en. Siya di kod yan ipadto na din dandani ay mapasamak ya din mapasamak sin tapin di agew. <sup>8</sup> Adi kayon emegyat, tan enggay inbabagak ed bayag din mapasamak to, et dakayo di tistigok. Ay waday odom ay Diyos ay pankamangan malaksig en sak-en? Magay odom si ammok. <sup>9 10 11 12 13 14 15 16 17 18 19 20</sup>

<sup>21</sup> “Dakayo ay Israelita ay polin Jacob, nemnemen yo dana, tan dakayo din baik. Pinarsuak dakayo ta mansilbi kayon sak-en et adiak linglinglingan dakayo. <sup>22</sup> Pinonas ko din basbasol yo ay kaman din iyat di liboo ay malitaw. Sagongen yos sak-en tan sak-en di nangsobot en dakayo.” <sup>23</sup> Dakayo ay langit ya kaonegan ay partin di daga, mankanta kayo ay manragsak begew sin inamag Diyos. Mankanta kayo abe ay dontog, kada ya amin ay kaiw ay wadas di, tan insalakan Diyos din polin Jacob et maidaydayaw sisya ed Israel. <sup>24 25 26 27 28</sup>

## 45

### *Din Nangdotokan Diyos En Cyrus (45:1-8,11-13)*

<sup>1</sup> Dinotokan Diyos si Cyrus ay manturay ya indawtana si panakabalin ay mangabak si nanasyon ya mangaan sin kalebbengan di aari. Adi main-eb din segpan di ili mo adi et mailokat da para en sisya. Kanan Diyos, <sup>2</sup> “Sak-en di mangisagana sin danan mo et singpaek din dodontog. Dadaelek din bronsi ay segpan di il-ili ya nanbabag ay landok. <sup>3</sup> Ipalobos ko ay alaem din kinabaknang di il-ili sin naitatabon ay naidolinan da ta say pangammoam ay si sak-en ay si Yahweh ay Diyos di Israelita di namili en sik-a yan inbagak din mismo ay ngadan mo. <sup>4</sup> Dinotokak sik-a ay mamadang sin polin Israel ay pinilik ay mansilbi en sak-en, et idawat kon sik-a di nangato ay saad olay adim am-ammo si sak-en. <sup>5</sup> Sak-en si Yahweh. Magay odom si Diyos mo adi et sak-en et idawat ko din kasapolam ay pigsa olay adim am-ammo si sak-en. <sup>6</sup> Amagek na ta say ammoen di kaipoipogaw isnan intiro ay daga ay magay odom si Diyos mo adi et sak-en. <sup>7</sup> Sak-en di mangipawada si pat-a ya bolinget ya mangidawat si bindisyon ya ligat. Sak-en si Diyos ay mangamag amin isna. <sup>8</sup> Mawada koma sin daga di kinalinteg ay mapod langit ay kaman odan ay mapo sin liboo. Awaten koman di ipogaw ay kaman din lota ay mangawat sin odan ta say gon-oden da di mankoykoyog ay kaisalakan ya kinalinteg, tan sak-en si Diyos ay nangipawada en daida ay dowa.” <sup>9 10</sup>

<sup>11</sup> Si Yahweh ay din nasantoan ay Diyos di Israelita ay nangipabalin en daida ay nasyon et siya na di kanana: “Ay way lebbeng yo ay mansalodsod ono mangibilin en sak-en maipanggep sin mapasamak to sin an-ak ko ay inamag ko? <sup>12</sup> Sak-en met di namarsua sin daga ya din ipogaw ay mantetee sin labaw na. Babaen sin panakabalin ko, inoklag ko ed daya. Sak-en di nangisaad ya nangiturturong sin am-in ay wadas di. <sup>13</sup> Sak-en met laeng di nangtignay en Cyrus ay mangipatongpal sin nalinteg ay panggep ko, et singpaek amin ay pandanana. Awni et isaad na kasin din siyodad ko ay Jerusalem ya wayawayaana din naibalod si addawi yan baken mabayadan ono mapasoksokan ay mangamag isna.”\* <sup>14 15 16 17</sup>

### *Si Yahweh Et Anggoy Di Mangisalakan (45:18-25)*

<sup>18</sup> Si Yahweh di namarsua ed daya ya nan daga et insaad na si makneg ay fondasyon. Adi na pinarsua ay magay olnos ya silbi na mo adi et ta pantean di kaipoipogaw. Kanana, “Sak-en si Diyos et magay odom. <sup>19</sup> Adiak met insaot ono intabon din kalik sin mabolinget ay lugar. Adiak inbaga sin polin Jacob ay omanap da sin magay silbi na ay lugar ay adi da makadteng en sak-en. Sak-en si Yahweh et din tet-ewa ya kosto

\* **45:13** Din natongpalan di naipadto ay nay et matdengen sin Ezra 1:1-7.



di ibagak. <sup>20</sup> Masinop kayo amin ay nakalasad sin nanasyon. Din mangiliked si sinan didiyos ay kaiw di amag na ya mankararag si diyos ay adi makaisalakan et magay ammo da. <sup>21</sup> Masinop kayo ta ibaga yo di kaso yo. Sino di nangipadto ed bayag sin daan mapasamak? Ay baken sak-en? Magay odom ay Diyos ay nalinteg ya mangisalakan malaksig en sak-en. <sup>22</sup> Isonga dakayo ay ipogaw isnan intiro ay lobong, mansagong kayon sak-en ta maisalakan kayo. Tan magay odom si Diyos mo adi et sak-en. <sup>23</sup> Tet-ewa ya adi manbalbaliw din inkalik. Siya na di insapatak sin awak ko, 'Awni et omali amin ay ipogaw ay mandokmog sin sangoanak ay mangikari ay adi da mankeykeyat ay mansilbi ya mantongpal en sak-en.' <sup>24</sup> Ibaga dan to ay sak-en anggoy di kapoan di kinalinteg ya pigs. Ngem amin ay mangililiget en sak-en et maibabain da. <sup>25</sup> Isalakan kon to amin ay polin Jacob et omidaydayaw da."

## 46

1 2 3 4 5 6 7 8 9 10 11 12 13

## 47

1 2 3 4 5 6 7 8 9 10 11 12 13 14 15

## 48

1 2 3 4 5 6 7 8 9 10 11 12 13 14 15 16

### *Din Planon Diyos Para Sin Ipogaw Na (48:17-19)*

Kanan Diyos sin taga-Babilonia, "Awni et maabak kayo et maipakaan kayo ay maibalod sin odom ay ili, pati din didiyosen yo. Olay din nalaing ay mansalsalamangka ya manpontos en dakayo et adi dan kabaelan ay mangisalakan en dakayo. Madosa kayo ay kaman nidi begew sin kinakedse yo ay mamaligat sin ipogaw ko."

Pag kanan Diyos sin ipogaw na, "Ammok ay makenteg di nemnem yo, isonga inpadtopadtok din amagek ta say mo matongpal, adi yon kanan en din didiyosen yo di nangamag. Ed wani wada di baro ay ipadtok, isonga dengngen yo ay kosto. Pinilik si Cyrus ay kabadang ko ay mangabak ed Babilonia." (46:1-48:16)

<sup>17</sup> Si Yahweh di nasantoan ay Diyos yo ya din mangisalakan en dakayo ay Israelita. Kanana, "Sak-en si Yahweh ay Diyos yo. Itdok di pansigdan yo ya iturong kos dakayo sin kosto ay pandanan yo. <sup>18</sup> Mo pinati yo din bilbilin ko, kaman koman ginawang ay manayos di bindisyon yo ya kaman dalloyon sin baybay ay magay pap-eng na di kinalinteg yo. <sup>19</sup> Kaman koman darat di kaad-adon di poli yo ya adi koman maponas di ngadan da ay ipogaw ko sin pangiilaak." <sup>20 21 22</sup>

## 49

### *Din Dinotokan Diyos Ay Mansilbi En Sisya (49:1-18)*

<sup>1</sup> Dengngen yo nan ibagak, dakayo ay ipogaw sin addawi ay il-ili. Idi daanak pay laeng maianak, pinili ya dinotokan Diyos sak-en ay mansilbi en sisya. Wadaak sin eges inak yan nginadananas sak-en. <sup>2</sup> Inmay-ayowan yan nanbalinena din kalik ay kaman nanbinas-il di tadem na ay kampilan ay insisiket na ono napalid ay pana ay naisasagana ay maosal. <sup>3</sup> Kananan sak-en, "Israel, sik-a din baak ay kaidaydayawak."

<sup>4</sup> Ngem kanak, "Nan-oblaak ngem magay silbin din boway ko. Inpakat ko din amin ay pigsak ngem magay nantongpalana. Ngem olay mo siya di, italek ko din oblak en Diyos et sisya di mangidawat si gon-gonak."

<sup>5</sup> Inamag Diyos sak-en sin eges inak ta mansilbiak ay mangitaoli sin polin Jacob ta mansagong dan sisya. Si Diyos di mangidawat si bikas ya dayaw ko. <sup>6</sup> Kanana, "Wada



di nabanbanol ay ipaoblak en sik-a ay baak malaksig sin pangitaoliam sin makalasad ay polin Israel ta mansagong dan sak-en ya somiged kasin di kasasaad da. Panbalinek sik-a ay kaman silaw ay maningtinggaw sin nemnem di Gentil ta way iyat di amin ay ipogaw sin solin di daga ay maisalakan.”\*

<sup>7</sup> Wada di inbagan din nasantoan ay Diyos ay mangsobot sin nasyon ay Israel. Kinwani na sin baa na ay linaslasoy ya inliliget di kaipoipogaw ya baan aben di tuturay, “Awni et ilaen din aari ya tuturay sik-a et pomika da ay mangipailas rispito da, asi da manyakog-ong ay mandayaw en sik-a. Maamag na tan sak-en si Yahweh ay namili en sik-a ay baak. Sak-en din nasantoan ay Diyos di Israelita ya matalekak ay manongpal sin inkarik.”

<sup>8</sup> Siya abe na di kanan Diyos, “Dengngek din kararag mo sin timpo ay ninemnem ko ay maneg-ang en sik-a, ya badangak sik-a sin domatngan di kosto ay agew ay mangisalamanak en sik-a. Ay-ayowanak ya salaknibak sik-a, et babaen en sik-a maki-tolagak sin kaipoipogaw. Tolongak abes sik-a ta pasigedem kasin din nadadael ay ili ya ikeddeng mo din kosto ay akin oka sin daga ay nataynan ed wani. <sup>9</sup> Kanam to sin naibabalod ay wadas mabolinget, ‘Bomala kayos na ta mawayaan kayo.’ Kaman dan to karnero ay man-al-alab sin pandanan da et mawada di kanen da olay sin dontog ay magay gomabay. <sup>10</sup> Adi dan to mandagaang ono manbigaw. Adi da maatongan sin podot di dagem ya agew, tan din mangipango en daida et seg-angana et iturong nas daida sin kad-an di obbog. <sup>11</sup> Man-amagak to si annawa ay kalsada sin dontog et mawada di pandanan din ipogaw ko. <sup>12</sup> Ilaen yo, omali da ay mapo sin addawi. Mapo da sin amyanan ya ed Aswan sin abagatan ya siya abe sin diposan di agew.”

<sup>13</sup> Manragsak kayo ay mankanta, dakayo ay daga ya dontog. Tan masmasseg-ang si Diyos sin maligligatan ay ipogaw na et liwliwaenan to si daida. <sup>14</sup> Ngem kanan din taga-Jerusalem, “Binaybay-an ya nilinglingan Diyos datako.”

<sup>15</sup> Ngem kanan Diyos, “Ay linglingan ayan di ina di anak na ay mansossoso ono adi na seg-angan? Ngem olay mo linglingan da et adiak polos linglingan dakayo. <sup>16</sup> Adiak linglingan sik-a ay Jerusalem. Ilam, kamanak inkitikit din ngadan mo sin palad ko, et kanayon ay nenemnemek din alad mo. <sup>17</sup> Awni et omali di mangisaad kasin en sik-a ya komaan din namakas. <sup>18</sup> Manmokilang ka kod ta ilaem da nan ipogaw mo ay somaa et masinop da sin kad-am. Isapatak sin awak ko ay matmatago ay Diyos: Awni et it-ek mo din ipogaw mo ay kaman din pangit-it-ekan di mangasawa ay babai sin al-altin di awak na.” <sup>19 20 21 22 23 24 25 26</sup>

## 50

1 2 3

### *Din Panagtongpal Di Baan Diyos (50:4-10)*

<sup>4</sup> Initdon din Kangatoan ay Diyos di ibagak ta papigsaek din nabbay. Inagsapa ay pasim-etenas sak-en ay mandenge sin ibaga na. <sup>5</sup> Indawtanans sak-en si panakaawat et kanayon ay nantongpalak ya adiak dinokogan sisya. <sup>6</sup> Inpalobos ko ay sopliten da din edeg ko yan tinampik da din tamil ko ya ginabot da din emeng ko. Binaybay-ak abes daida ay nangin-insolto ya nanogtogpa en sak-en. <sup>7</sup> Si Diyos di bomadang isonga adiak masakitan sin pangin-insulto da. Intoled ko dadi tan ammok ay adiak mabainan, <sup>8</sup> tan adi bomaybay-an si Diyos et paneknekanan to ay magay basol ko. Sinoy makaitoled ay mangidarum en sak-en? Mo wada, somango kami sin pangokoman ta ibaga na di darum na. <sup>9</sup> Din Kangatoan ay Diyos di bomadang et sino di makapaneknek ay binmasolak? Awni et mamaga da amin ay mamabpabasol en sak-en ay kaman dan lopot ay madonot ya malakey. <sup>10</sup> Dakayo am-in ay mangipateg en Diyos ya manongpal sin kalin di baa na

\* **49:6** Inam-amag 13:47.

et mantalek kayo koma en Yahweh ay Diyos yo ta sisya di pankamangan yo, olay mo mabolinget pay laeng di pandanan yo. <sup>11</sup>

## 51

### *Kali Ay Mangipapigsa Sin Nemnem Di Taga-Jerusalem*

(51:1-16)

<sup>1</sup> Kanan Diyos, “Dengngen yo nan ibagak, dakayo ay mangipapasnek ay mangonod si nalinteg ay kabibiyag ya mansilbi en sak-en. Nemnemen yo din napoan yo, tan maiarig kayo si pit-ing di bato ay napo sin dakdake ay bato. <sup>2</sup> Nemnemen yos da Abraham en Sara ay ap-apo yo. Magay anak Abraham sin nangayagak en sisya, ngem binindisyonak et inpaad-adok din poli na. <sup>3</sup> Et siya abe ay ipailak to din seg-ang ko sin taga-Jerusalem ay nadadael din ili da ya liwliwaek si daida. Olay mo adi gomabay di mola sin isdi et pasigedek din lota na ta magabay di maimola ay kaman din mapteng ay daga ay insaad ko ed Eden. Et isdi, wadan to di ragsak ya madnge di kanta ay mangidaydayaw ya maniyaman en sak-en.

<sup>4</sup> “Dakayo ay ipogaw ko, esten yo ay dengngen nan ibagak. Tan maitdoan dan to din kailili et masilawan din nemnem da sin linteg ko. <sup>5</sup> Dalasek to ay isalakan daida, tan dandani ay mangabakak et sak-en di mangituray sin kaipoipogaw. Din wadas addawi ay il-ili et manseseed da si pangisalakanak en daida. <sup>6</sup> Tangaden yo ed daya ya ilaen yo nan daga. Maomas ed daya ay kaman asok. Din daga abe et kaman bado ay madonot yan matey din man-ilis di ay kaman lallaeg. Ngem din pangisalakanak et magay patingga na ay kaman met laeng din komakaman ay kinalinteg ko.

<sup>7</sup> “Dengngen yo nan ibagak, dakayo ay makaammo si nalinteg ya mangipapasnek ay mangon-onod sin it-itdok. Adi kayon emegyat mo siyekan ya oyawen di ipogaw si dakayo. <sup>8</sup> Din ipogaw ay kaman dadi et kaman dan lopot ay malakey. Ngem din kinalinteg ko ya din panakabalin ko ay mangisalakan et magay pap-eng na.”

<sup>9</sup> Apo Diyos, bomangon ka kod ta badangam dakami. Osalem din panakabalin mo ta isalakan mos dakami ay kaman din inamag mo ed idi. Tan sik-a met din nanadtad ay namse sin dragon ay si Rahab.\* <sup>10</sup> Gapo sin panakabalin mo, namgaan din baybay et inpawadam di danan sin baybay ta say makaagadang din kaipoipogaw ay sinobot mo. <sup>11</sup> Isonga mankanta dan to si ragsak da ay domateng ed Jerusalem din sinobot mo. Manragsak da si eng-enggana, tan makaan di ligat ya panladingitan da.

<sup>12</sup> Kanan Diyos, “Sak-en si Diyos ay mangipapigsa en dakayo. Apay nga emegyat kayo si ipogaw ay maiarig si logam ay owat sinkaattikan di biyag na? <sup>13</sup> Ay nilinglingan yo ngatas sak-en ay Diyos ay namarsua en dakayo? Sak-en ay namarsua ed daya ya nangisaad isnan fondasyon di daga. Kanayon ay emegyat kayo sin bonget di mamalpaligat en dakayo ya nakasagana ay manadadael en dakayo. Ngem enggay magay kabaelan din bonget da ay manakit en dakayo. <sup>14</sup> Awni et mawayawayaan din naibalod. Adi dan matey sin balodan ya adi dan maawanan si makan. <sup>15</sup> Tan sak-en si Yahweh ay Diyos yo. Kabaalak ay mangipapigsa sin dalloyon sin baybay ta palalo ay man-agodood da. Sak-en si Yahweh ay Kangatoan ay Turay. <sup>16</sup> Pinarsuak ed daya ya nan daga. Kanak sin taga-Jerusalem, ‘Dakayo din ipogaw ko. Indawat kon dakayo din bilbilin ko et sak-en ay mismo di manalagnib en dakayo.’ ” <sup>17 18 19 20 21 22 23</sup>

## 52

### *Din Pangisalakanan Diyos Ed Jerusalem*

<sup>1</sup> Sik-a ay ili ay Jerusalem, pomigsa ka ta maidayaw ka kasin. Osalem din nabanol ay badom, sik-a ay nasantoan ay siyodad, tan awni et adi da kasin senggep en sik-a din adi

\* **51:9** Din dragon ay si Rahab et simbolon di Egipto.

mamatin Diyos. <sup>2</sup>Wayawayaam san awak mo. Komaan ka issan tapok ta tomokdo ka sin tronom. Dakayo ay man-ili ed Jerusalem, kaanen yo din naikadina en dakayo. <sup>3</sup>Kanan Diyos sin ipogaw na, “Adi kayon nailakos pilak idi naibag-en kayo, isonga maga abey pilak si maisobot en dakayo mo mawayawayaan kayo. <sup>4</sup>Ed bayag, nanballalong kayo ed Egipto et nanbalin kayo ay mangili isdi. Baken nabayag yan pinaligat din taga-Assyria si dakayo ay magay gaggapo na. <sup>5</sup>Isonga ed wani, sino ngin di amagek? Naibalod kayo ay ipogaw ko ay magay gaggapo na et manpaspasikat din nangibalod en dakayo. Kanayon abe ay laslasoyen da din ngadan ko. <sup>6</sup>Ngem domteng to di timpo ay mabigbig yo ay sak-en si Diyos ay makikalkali en dakayo.”

<sup>7</sup>Peteg ay omiparagsak din omalian di mangibagas siked ay damag. Ibagas da sin taga-Jerusalem ay somiged ya tomalna di biyag da. Kanan da abe en maisalakan da ya say manturay din Diyos da. <sup>8</sup>Dengngen yo! Man-es-esa da ay bomanogaw din gowardiya yo si ragsak da. Maila da ay mismo din pantaolian Diyos ed Zion. <sup>9</sup>Dakayo ay nabakas ay luglugar ed Jerusalem, ibogaw yo din ragsak yo, tan isalakan Diyos dakayo ya liwliwaena din ipogaw na. <sup>10</sup>Osalena din nadiyosan ay panakabalina ay mangisalakan sin ipogaw na et ilaen di kaipoipogaw isnan intiro ay daga. <sup>11</sup>Taynan yo ed Babilonia ta maikakasin kayon daida. Adi yo aben al-alaen di sanikwa da, tan ibilang ko ay kadodogis. Mo dakayo pay ay manggen sin mallokong ya odom ay bonbonag ay naosal sin Timplok, masapol ay linisan yo din awak yo. <sup>12</sup>Ngem ed wani, adi masapol ay dalasen yo ay komaan sin siyodad. Adi masapol ay lomayaw kayo, tan ipangon Yahweh ay Diyos yo si dakayo yan sisya met laeng di manalaknib en dakayo sin likodan yo.

### *Din Napalpaligatan Di Baan Diyos*

<sup>13</sup>Kanan Diyos, “Awni et tongpalen nan baak din obla na et maingato ya maidayaw sisya. <sup>14</sup>Ad-ado di masdaaw sin pangilaan dan sisya, tan linmawlawa ay kaman baken ipogaw di kailaana. <sup>15</sup>Ngem ad-adon to ay nasyon di masdaaw en sisya et adi makakali din aari ay masmasdaaw, tan maila da din adi da inil-ila ya dengngen da din adi da dindinne ed idi.”

## 53

<sup>1</sup>Apay nga at-atik anggoy di namati sin inbagbaga mi? Apay nga at-atik di nangawat sin inpailan Diyos ay panakabalina? <sup>2</sup>Dinmakedake din baan Diyos sin pangilaana ay kaman mola ay ginmabay sin nakgang ay lota. Baken mapteng ya makaawis din kailaana ta layden tako ay sag-enen sisya. Adi aben mabigbig din kaipogaw na. <sup>3</sup>Linaslasoy ya sinigaan tako. Binaybay-an tako ya inbilang tako ay magay silbi na. Kanayon ay nilaklak-am na di ladingit ya sakit. Magay mayad ay mangilan sisya. <sup>4</sup>Sisya ay mismo di namaklay sin ladingit ya sakit tako, ngem kanan tako en nilak-am na dadi ay ligat tan dinosan Diyos sisya. <sup>5</sup>Ngem di begew ay nasogatan ya palalo ay nadagsenan sisya et din basbasol tako. Et begew sin nasoplitana ya din dosa ay inkaro na, nailatonan ya naisalakan tako. <sup>6</sup>Maiarig tako amin si nasangaw ay karnero ay esa en nanturong si laydena ay emeyan. Ngem inpabaklay Diyos en sisya din dosan di basol ay baklayen tako koma.

<sup>7</sup>Pinalpaligat da, ngem din inyat na et kaman din anak di karnero ay adi manpekpekeng mo iey da sin panpalpaltian. Kaman aben iyat di karnero ay igiginek na sin mamokisan da tan ginmiginek sisya. <sup>8</sup>Idi dinpap da, adi da binistigal si kosto mo adi et kineddangan da ay madosa et inbala da ta peslen da. Mo din ipogaw ay dededsana, adi dan pagan-ano ay nagagara din biyag na† isnan daga et natey begew sin basbasol tako

\* **53:1** Juan 12:38, Roma 10:16. † **53:8** Di odom abe ay kaiologan nina sin Hebreo et: a) ...ta peslen da. Maga abe di maseg-ang en sisya idi nagagara din biyag na... ono b) ...ta peslen da. Maga abe di manad-at maipanggep sin poli na, tan ginagara dan biyag na...

ay ipogaw Diyos.‡ <sup>9</sup> Olay maga polos di basol na ya adi nan-etek, ninemnem da ay ikaot sin kad-an di managbasol, ngem naiponpon sin kaot ay okan di baknang.

<sup>10</sup> Ngem si Diyos di akin nemnem ay lak-amena dadi ay ligat. Natey sisya ay maidaton ta mapakawan din basbasol di ipogaw. Gapo isdi, maila na din poli na ya omando di biyag na. Gapo en sisya, matongpal din layden Diyos. <sup>11</sup> Mo makdeng dadi ay ligligat, malaydan sisya et maila na ay way silbin din ligligat na. Kanan Diyos, “Awni et ibaklay din matalek ay baak din dosan di ad-ado ta maibilang da ay nalinteg. <sup>12</sup> Isonga idawat ko di nangato ay saad na ay maibagay sin nangato ya nabileg ay aam-a. Tan indawat na din biyag na et naibilang ay esa ay managbasol. Sisya di nangibaklay sin dosa da koma et inkararaganas daida ta mapakawan da.”

## 54

### *Din Layad Diyos Sin Ili Ay Israel* (54:1-14)

<sup>1</sup> Kanan Diyos, “Sik-a ay Jerusalem, maiarig ka si basig ay babai, ngem ed wani, ipigsam ay mankanta si ragsak mo. Maiarig ka si babai ay tinaynan di asawa na, ngem ad-adon to di anak mo mo din waday asawa na. <sup>2</sup> Paannawaem din tolda ay panteam. Silpoam din tali na ya is-et mo din pasek na. <sup>3</sup> Paannawaem din sakop di beddeng mo, tan mantaoli dan to din ipogaw mo ta maiskat da isnan pantean di odom ay nasyon ed wani, ya man-ili dan to abe sin sisiyodad ay nataynan.”

<sup>4</sup> Adi kan emegyat tan adi kan to maibabain ya malaslasoy. Awni et linglingam din naibabainam sin kabalasang mo ya din ligligat mo sin nalasangam. <sup>5</sup> Tan si Diyos ay Kangatoan ay Turay ay namarsua en sik-a et kaman asawa di pangibilanganan sik-a. Din nasantoan ay Diyos di Israelita ya Diyos di intiro ay lobong et say nangsobot en sik-a.

<sup>6</sup> Maiarig ka si babai ay nakiasawa sin panbasbasangana ay palaloy sakit di nemnem na tan tinaynan din asawa na, et kanan Diyos en sik-a, <sup>7</sup> “Tinaynak sik-a si sinkaattikan, ngem gapo ta masemaseg-angak en sik-a, taolie kasin sik-a. <sup>8</sup> Sinkaattikan ay binaybay-ak sik-a gapo sin palalo ay bonget kon sik-a, ngem ipailak ton sik-a di magay pap-eng na ay layad ya seg-ang ko,” kanan Diyos ay nangsobot en sik-a.

<sup>9</sup> “Paran sak-en, ed wani et kaman sin timpon Noe. Inkarik ay adiak polos layosen kasin nan daga ay kaman din napasamak sin timpo na. Ed wani abe, ikarik ay adiak to mabonget en sik-a, adiak kasin yamyaman ono dosaen sik-a. <sup>10</sup> Mabalin ay makosokos din dodontog ya bilbilig, ngem nan layad kon sik-a et magay pap-eng na. Adiak polos linglingan din intolag ko ay makikapyak en sik-a.” Siya na di kinwanin Diyos ay masemaseg-ang en sik-a.

<sup>11</sup> Kanan Diyos, “Kaasi ka ay Jerusalem, siyodad ay kaseseg-ang ya manligligat, maga di mangliwliwa en sik-a. Nankababanol ay bato di iamag ko sin fondasyon mo. <sup>12</sup> Din kakayangan ay kad-am yan bato ay makwani en rubi di iamag ko. Din segpan yan batbato ay kaman apoy ay mankoniniing, din dingding yan nankababanol ay bato. <sup>13</sup> Itdoak to am-in din ipogaw mo yan somiged ya natalna din biyag da. <sup>14</sup> Din kinalinteg di kapoan di panakabalin mo. Maga di mamalpaligat en sik-a ya maga di pan-egyatam.”  
15 16 17

## 55

### *Din Iay-ayag Diyos Ay Seg-ang Na*

<sup>1</sup> Kanan Diyos, “Dakayo ay mandagaang ya manbigaw, omali kayos nan kad-an di danom. Dakayo ay magay pilak na, omali kayo ay manlako si makan ta mangan kayo. Manlako kayos arak ya gatas, olay magay bayadan yo. <sup>2</sup> Apay gastosen yo di pilak yo si

‡ 53:8 Inam-amag 8:32-33.

baken kosto ay makan? Apay nga alaen yo ay sokat di boway yo di adi yo kapnekan? Esten yo ay dengngen ya tongpalen din ibagak ta mabsog kayo sin kam-isan ay makan.

<sup>3</sup>“Dengngen yo din ibagak ya omali kayon sak-en ta say matagotago kayo. Itolag kon dakayo di adi manbalbaliw ay tolagan, et idawat kon dakayo din bindisyon ay inkarik en David. <sup>4</sup>Dinotokak sisya ay mangipaammo sin kinadiyos ko sin kailili, et nanbalinek sisya ay pangolo ay mangituray en daida.

<sup>5</sup>“Ed wani, ayagam din ipogaw sin addawi ay il-ili. Adi da am-ammos sik-a, ngem ed wani dalasen da ay somag-en en sik-a. Tan sak-en si Yahweh ay Diyos mo. Sak-en din nasantoan ay Diyos di Israelita et ipangatok sik-a,” kinwanin Diyos.

<sup>6</sup>Anapen yo si Diyos ya mankararag kayon sisya ed wani ay wada pay laeng sin asag-en yo. <sup>7</sup>Masapol ay isaldeng din managbasol din lawa ay am-amagen da ya balbaliwan da din nemnem da. Sagongen da koma si Yahweh ay Diyos tako, tan managseg-ang ya silalayad ay mamakawan en daida.

<sup>8</sup>Kanan Yahweh, “Baken mais-o din nemnem yo sin nemnem ko ya din ogali yo sin ogalik. <sup>9</sup>Tan kaman din kinangaton di ed daya mo din daga di kaitkenan di nemnem ko sin nemnem yo ya kaitkenan di ogalik sin ogali yo.

<sup>10</sup>“Maiarig din kalik sin odan ya dalalo ay mapod daya ta sibogana din daga. Adi owat mantaoli ay magay silbi na mo adi et pagabayena din mola ay kapoan di bin-i ya makan. <sup>11</sup>Say ison din kalik ay adi owat mantaoli ay magay silbi na mo adi et ipatongpal na amin ay nangibaaak.

<sup>12</sup>“Awni et waday mangipango en dakayo et naragsak kayo ya waday talna en dakayo ay komaan ed Babilonia. Mankanta dan to din dontog ya bilbilig dowan aben manpalakpak din kakaiw. <sup>13</sup>Awni et say gomabay di mapteng ya way silbi na ay kaiw ay maisokat sin pagat. Et danay di pannemneman di ipogaw si eng-enggana sin inamag ko,” kinwanin Diyos.

## 56

### *Din Kaibilangan Di Ipogaw Ay Mapo Sin Amin Ay Nasyon Ay Ipogaw Diyos (56:1-8)*

<sup>1</sup> Kanan Diyos sin ipogaw na, “Say amagen yo din nalinteg ya din kosto tan dandani din pangisalamanak en dakayo et say kailaan din kinalinteg ko. <sup>2</sup> Nagasat din mangipapasnek ay mantongpal sin inbagak. Bindisyonak abe din man-illeng ya adi mangipakadodogis sin agew ay pan-ibbayan. Siya abe sin adi man-amag si basol.” <sup>3</sup> Adi koman nemnemen di mangili ay mamati en Diyos ay adi ipalobos Diyos ay maitapi da ay makidayaw sin ipogaw na. Adi koma aben nemnemen di nakapon ay ipogaw ay adi ipalobos Diyos daida ay maitapi sin ipogaw na gapo ta adi dan makaipoli. <sup>4</sup> Tan siya na di ibagan Diyos sin nakapon ay mamanol sin agew ay pan-ibbayan ya mangam-amag sin panlaydan Diyos ya mangipapasnek ay mantongpal sin intolag na: <sup>5</sup> “Awni et adi malinglingan din ngadan yo sin Timplok ya sin siyodad ko. Sigsiged di idawat kon dakayo mo din mawad-an si an-ak ay babbabai ya lallalaki, tan polos ay adi kayon malinglingan.”

<sup>6</sup> Siya na abe di kanan Diyos sin baken Israelita ay naitapi sin ipogaw na ay manglaylayad ya mansilsilbi en sisya, daida ay mangipateg sin agew ay pan-ibbayan ya mangipapasnek ay mantongpal sin intolag na en daida: <sup>7</sup> “Awni et iey kos dakayo sin nasantoan ay dontog ko et manragsak kayo sin beey ko ay pankararagan di ipogaw. Awatek abe din animal ay mapoan ya odom ay idaton yo sin altar ko, tan sin Timplok et pankararagan di ipogaw ay napo sin amin ay ili.” <sup>8</sup> Kanan aben Diyos ay nangitaoli sin Israelita ay napilit ay naiey sin addawi, “Awni et waday itapik en daida ay odom ay ipogaw.” <sup>9 10 11 12</sup>



## 57

1 2 3 4 5 6 7 8 9 10 11 12 13

*Din Inkarin Diyos Ay Badang Na*  
(57:14-21)

<sup>14</sup> Siya na di kanan Diyos, “Pataolien yon sak-en din ipogaw ko. Kaanen yo amin ay manawad en daida ya esten yo amin ay pandanan da. <sup>15</sup> Sak-en din nangato ya manakabalin ay Diyos ay matmatago si eng-enggana ya nasantoan di ngadana. Nangatongato ya nasantoan nan kad-ak, ngem makiteeak abe sin ipogaw ay mangibaba si nemnem da ya mangibabawi si basbasol da ta itaolik din talek ya namnama da. <sup>16</sup> Adi mantoltoloy din bonget ko ya pangidarumak en daida, tan mo say iyat ko et amangan mo matey da yan sak-en met di nangidawat sin biyag da. <sup>17</sup> Binmongetak en daida begew sin kinagamgam da ay manpos si baken dan oka et dinosak ya binaybay-ak daida, ngem makenteg din nemnem da et inapati da ay mangonod sin lawa ay ogali da.

<sup>18</sup> “Inilak din inamag da, ngem awni et agasak daida. Awni et ipangok ya badangak daida yan liwliwaek abe din maladingitan <sup>19</sup> ta say idayaw das sak-en. Iawis ko di talna sin amin ay ipogaw, asag-en ono addawi, et agasak daida. <sup>20</sup> Ngem din mangam-amag si lawa et kaman dan din dalloyon di baybay ay adi tomalna ya mangidateng si pitek ya kadodogis. <sup>21</sup> Magay talna sin mangam-amag si lawa,” siya nay kanan Diyos.

## 58

*Din Tet-ewa Ay Panagbabawi*

<sup>1</sup> Kanan Diyos, “Pan-ipigsam ay mangibogaw ay mangipaammo sin ipogaw ed Israel sin basbasol da. <sup>2</sup> Innagew ay mandaydayaw dan sak-en ay kaman dadlon tet-ewa ay layden da ay mangammo sin panlaydak. Et kaman da iman nalinteg ay nasyon ay managtongpal sin bilbilin di Diyos da. Tan kanan da en idawtak daida si kosto ay linteg ya malaydan da ay mandayaw en sak-en.”

<sup>3</sup> Kanan din ipogaw ay mansalodsod, “Sinoy silbi na ay itpe mi di dagaang mi ya ibaba mi din awak mi? Tan adi ka met laeng ikaskaso mo say amagen mi di.”

Ngem kanan Diyos ay sombat, “Di katet-ewa na, sin agew ay pangit-itpean yo si dagaang yo yan din bokbokod yo ay pansigdan di nemnemnemen yo met laeng. Palpaligaten yo abe din pan-ob-oblaen yo. <sup>4</sup> Sin pangit-itpean yo si dagaang yo yan mabonget kayo sin gagait yo ya man-iibaw kayo ya downan kayon man-asidespeg. Ay kanan yo en malaydanak ya denggek din kararag yo sin pangam-amagan yos di? <sup>5</sup> Sin pangit-itpean yo si dagaang yo, manyakog-ong kayo ay kaman logam. Iaplag yo di sako ay pey-an yos dap-o yan say bomaktadan yo. Ay siya di di kosto ay iyat ay mangitpe si dagaang? Ay kanan yo aya en malaydanak isdi ay am-amagen yo?

<sup>6</sup> “Siya na di laydek ay amagen di mangitpe si dagaang: Isaldeng yo ay mamalpaligat si iib-a yo ya manosowitik en daida. Wayawayaan yo din mapalpaligat. <sup>7</sup> Ibingayan yo sin kanen yo din mandagaang ya padagosan yo din nabiteg ay magay beey da. Badoan yo din magay bado na yan adi yon ipaidam din badang yo sin aag-i yo.

<sup>8</sup> “Mo say amagen yo di, din bindisyon ko et kaman segit sin agsapa ay maneysey-ang en dakayo et maganno ay mapey-an din sogat yo. Kaman mangon-ona ay mangipango en dakayo din kinalinteg yo ya din mankoniniing ay kinadiyos ko di manalaknib abe sin likodan yo. <sup>9</sup> Et mo mankararag kayo yan songbatak. Mo mankedaw kayo si badang, wadaak ay bomadang en dakayo.

“Mo isaldeng yo ay mamalpaligat, mangoy-oyaw ya mankalkali si lawa sin iib-a yo; <sup>10</sup> mo idawtan yo sin kanen yo din mandagaang ya idawtan yo din makasapol sin kasapolan da, awni et pomat-a ay kaman kaagawan din mabolinget ay nanlilikmot en dakayo. <sup>11</sup> Kanayon abe ay ipangpangok dakayo. Sin nakgang ay daga, idawat ko amin ay kasapolan yo ya papigsaek dakayo. Et kaman kayon garden ay masisibogan si



obbog ay adi katkatdok. <sup>12</sup> Awni et isaad kasin din poli yo din nabayag ay nabakas ay ili et saaden da din nabakas ay bebbeey. Et dakayo din makwani en nangibangon sin nadadael ay alad ya bebbeey.”

<sup>13</sup> Kanan aben Diyos, “Mo ibilang yo ay nasantoan din agew ay pan-ibbayan ya adi yon say anapen din bokbokod yo ay pansigdan sin agew ay sana, mo banolen yo et adi kayon manbiyahi, man-obla ono mankali si magay silbi na sin agew ay sana, <sup>14</sup> mawadan to di ragsak yo ay mansilbi en sak-en. Ipangatok dakayo sin pangilan di ipogaw sin intiro ay lobong. Lak-amen yon to din kinabaknang di daga ay indawat ko en ap-apo yo ay Jacob, tan sak-en si Diyos ay nangibagas na.”

## 59

### *Din Basol Di Israelita* (59:1-4,6-8)

<sup>1</sup> Adi yo kankanan en nakapsot si Diyos ay adi makaisalakan en dakayo ya nateweng ay adi makadnge. <sup>2</sup> Tan din basol yo di mangiaddawin dakayo en Diyos ya gapo ay adi na dengngen din kararag yo. <sup>3</sup> Tan din takkay yo et kaman namansaan si dada ya basol, ya din tepek yo et bomalaan di etek ya lawa ay kali. <sup>4</sup> Mo mandarum kayo ya somango kayo sin pangokoman, baken din nalinteg di amagen yo mo adi et man-etek kayo ta say mangabak kayo. Say nemnemen yo abe din iyat yo ay mangpasakit sin iib-a yo. <sup>5b</sup> *Say am-amagen yo din panbasolan yo ya pamalpaligatan yo si iib-a yo.* <sup>7</sup> Alisto kayo ay mangamag si lawa ya manpese si magay basol na. Kanayon ay lawa di panggep yo et olay intoy em-emeyan yo, waday dadaelen yo. <sup>8</sup> Adi yo dinan din danan ay maiturong si olnos ya talna, \**tan baken nalinteg di pandanan yo. Nakillo di inamag yo ay pandanan, isonga amin ay mandan isdi et adi da makadteng si talna.*

### *Din Nangipodnoan Di Ipogaw Sin Basbasol Da* (59:9-21)

<sup>9</sup> Kanan din ipogaw, “Siya na di gapo ay maga di mangisalakan en datako sin mamalpaligat en datako ya maga di mangitonton sin kalintegan tako. An-anapen tako di silaw ay maninggaw en datako, ngem mabolinget din pandanan tako. <sup>10</sup> Kaman takon nagodab ay mankapkapokap sin dingding ya maisokba sin kaagawan ay kaman et labi. Mo is-o tako din kasasaad tako sin nasalon-at ay ipogaw sin kad-an tako, kaman takon natey. <sup>11</sup> Maladingitan ya maganatan tako ay manseseed si kinalinteg ya kaisalakanan, ngem addawi en datako.

<sup>12</sup> “Apo, adi mabilang nan basbasol mi en sik-a et say kaman mantistigo ay maikontra en dakami, isonga ipodno mi dana ay binmasolan mi. <sup>13</sup> Kinonkontra mi ya dinokogan mis sik-a ay Diyos. Adi kami kayman nantongtongpal en sik-a ya pinalpaligat mi din iib-a mi. Pag etek di nemnemen ya ibagbaga mi. <sup>14</sup> Matopap din kinalinteg et addawi ay maamag din kosto. Malaslasoy din tet-ewa sin katoptopogan di ipogaw et adi maawat din kosto. <sup>15</sup> Magay mangibagas tet-ewa, isonga say mapaligat din mangisaldeng ay mangamag si lawa.”

Lawa sin pangilan Diyos dana ay mapaspasamak. <sup>16</sup> Nasdaaw sisya ay mangila ay magay olay esa ay bomadang sin mapaligatan, isonga say osalena din mismo ay panakabalina ya kinalinteg na ay mangisalakan en daida et mangabak sisya. <sup>17</sup> Din kinalinteg et kaman say manalida sin pagew na. Kaman helmet ay ikalogong na din pangisalakanana sin ipogaw na. Kamanan bado din napigsa ay nemnem na ay manosa ya mangibaes sin napalpaligatan di ipogaw na. <sup>18</sup> Din dosa ay idawat na sin mangililiget en sisya et maibasar sin inamag da, olay pay din wadas addawi ay il-ili. <sup>19</sup> Gapo isdi, egyatan ya idaydayaw di ipogaw si Diyos isnan intiro ay daga. Awni et domateng sisya ay kaman napigsa ay ginawang ya mapges ay dagem.

\* 59:8 Roma 3:15-17.

<sup>20</sup> Kanan Diyos, “Domateng to ed Jerusalem din mangsobot sin ipogaw ko ay mangibabawi si basbasol da. <sup>21</sup> Et mo sak-en pay, siya nay itolag kon dakayo: Manipod ed wani, mawada en dakayo din Ispiritok ya din inpaammok ay kali, et itdo yo nan kalik si odom ay ipogaw. Siya na abe di matongpal sin an-ak yo ya poli yo si eng-enggana.”

## 60

### *Din Kaidayawan Di Jerusalem Sin Tapin Di agew (60:1-9)*

<sup>1</sup> Bomangon ka ay Jerusalem ta mansilaw ka ay kaman din agew. Dinmateng di pat-a en sik-a tan silsilawan daka sin mankoniniing ay kinadiyos en Yahweh. <sup>2</sup> Olay malikmot si bolinget nan lobong, ngem matinggawan ka pay sin silaw ay mapon Diyos et maila din kinadiyos na sin patag mo. <sup>3</sup> Omali dan to en sik-a din nanasyon ya aari gapo sin silaw ay wadan sik-a.

<sup>4</sup> Manmokilang ka ta ilaem din maam-amag. Domateng ay masinop nan an-ak mo ay lalaki ay mapo sin addawi. Din an-ak mo abe ay babai yan kaman dan anak ay bakwaen da ay idateng en sik-a. <sup>5</sup> Mailam to dana et palalo di ragsak mo, tan iey dan to en sik-a din kinabaknang di il-ili. Ikarga da sin bapor ay iagadang sin baybay.

<sup>6</sup> Awni et domateng issa di ipogaw ay mapo ed Midian ya Efa ay mangidaydayaw en Diyos. Ikoykoyog da di ad-ado ay kamel ay manggen si ad-ado ay balitok ya insinso ay alaen da ed Seba. <sup>7</sup> Maiey to en sik-a din amin ay karnero ed Kedar ya Nebayot. Maidaton da sin altar Diyos et malaydan isdi. Awni et dadlon paptengen Diyos din Timplo na. <sup>8</sup> Sino ngin da din bapor sin baybay ay ad-ado ay kaman liboo ya kaman kalapati ay mantaoli sin beey da? <sup>9</sup> Daida din bapor ay napo sin addawi ay il-ili ay mangidateng sin ipogaw Diyos. Idateng da din palata ya balitok da ay pangidaydayaw dan Yahweh ay nasantoan ay Diyos tako ay Israelita. Sisya di nangiturong sin odom ay nasyon ay mangidayaw en dakayo ay ipogaw na. <sup>10</sup> <sup>11</sup> <sup>12</sup> <sup>13</sup> <sup>14</sup> <sup>15</sup> <sup>16</sup> <sup>17</sup> <sup>18</sup> <sup>19</sup> <sup>20</sup> <sup>21</sup> <sup>22</sup>

## 61

### *Din Pangisalakanan Diyos Sin Ipogaw Na*

<sup>1</sup> Wadan sak-en din Ispiriton Diyos, tan pinili nas sak-en ay en mangikasaba sin siked ay damag sin nabibiteg. Inbaa nas sak-en ay mangliwliwa sin palalo ay nadadagse-nan ya naladingitan, ya ta enak ibaga sin naibabalod ay malokatan din balodan ta mawayaan da. <sup>2</sup> Inmibaa abe ta ipaammok sin kaipoipogaw ay dinomteng din timpo ay pangipailaan Diyos sin seg-ang na\* *et abakena din kalaban da.* <sup>3</sup> Inmibaa ta enak paragsaken din maladingitan ay ipogaw ed Jerusalem. Sokatak din sadot ya sakit di nemnem da si ragsak da ay layad da ay mangidayaw en Diyos. Maiarig da si makneg ay kaiw ay si Diyos ay mismo di nangimola ta madayaw sisya. <sup>4</sup> Awni et isaad da kasin din nadadael ay beey yan bangonen da din il-ili ay nabayag ay nabakas ya nataynan.

<sup>5</sup> Dakayo ay ipogaw ko, awni et mansilbi di mangili en dakayo. Daida di mangayowan si karnero yo. Daida abe di mangobla sin dagdaga yo ya mangayowan sin kaob-obasan yo. <sup>6</sup> Ngem dakayo pay di papadi ay mansilbi en Yahweh ay Diyos tako. Awni et ganasen yo ya it-ek yo din ina yo ay kinabaknang di odom ay nasyon. <sup>7</sup> Gapo ta dobli di panakaibabain ya ligat ay linak-am din ipogaw ko, mandobli abe di ganasen da ay ragsak ya kinabaknang sin bokod da ay daga.

<sup>8</sup> Tan kanan Diyos, “Sak-en ay Diyos et laylaydek din kinalinteg, ngem kaliliget ko din akew ya odom ay lawa ay maam-amag. Sigurado ay idawat kon to din gon-gona da ya waday adi manbalbaliw ay itolag ko en daida. <sup>9</sup> Mandinamag to din poli da sin amin ay nasyon et amin ay mangila en daida yan ibaga da ay daida din ipogaw ay binindisyonak.”

\* **61:2** Lucas 4:16-19.

<sup>10</sup> Palalo di ragsak ko begew sin inamag Diyos, tan kamanan inpabado en sak-en din omisalakanana ya kinalinteg na. Maiarig sin osalen di mangasawa ay lalaki ay kaman bedbed di padi ya al-altin di awak ay osalen di makiasawa ay babai. <sup>11</sup> Awni et ipailan din Kangatoan ay Diyos di kinalinteg na sin biyag di ipogaw na et idayaw das sisya sin pangilaan di ipogaw sin amin ay ili. Sigurado ay matongpal dana ay kaman din kinasiguradon di bomngisan ya gomabayan di bin-i.

## 62

### *Din Baro Ay Ngadan Di Jerusalem (62:1-7,10-12)*

<sup>1</sup> Gapon sik-a ay Jerusalem, adiak gomiginek mo adi et mankaliak enggana ay maisalakan ka ya maila din pangabakam ay kaman din silaw sin labi. <sup>2</sup> Awni et ilaen di kaipoipogaw di pangabakam ya mailan di aari din kaidayawam. Wadan to di baro ay ngadan mo ay si Diyos ay mismo di mangipangadan. <sup>3</sup> Maiarig kan to si nabanol ay korona ay iin-gegan Yahweh ay Diyos mo. <sup>4</sup> Et enggay baken kan makwani en “Nabaybay-an ay Ili” ono “Tinaynan di Asawa na” mo adi et “Ili ay Laylayden Diyos” ya “Naragsak ay Nakiasawa” tan laylayden Diyos sik-a ya oka daka. <sup>5</sup> Din layad Diyos ay nangiamag kasin en sik-a et kaman din layad di baro sin balasang ay asawaena et maiarig ka ay asawa na.

<sup>6</sup> Kanan Diyos, “Ili ay Jerusalem, wada day binilin ko ay gowardiya sin alad mo et bantayan daka si labi ya kaagawan.” Dakayo ay gowardiya, adi kayo gomiginek, mo adi et kanayon koma ay ipanemnem yo en Diyos din kari na ta adi na polos linglingan. <sup>7</sup> Masapol ay itoltoloy yo ay mankararag en sisya enggana ay itaoli na din sigod ay kasasaad di Jerusalem et panbalinena kasin si siyodad ay idaydayaw di intiro ay lobong. <sup>8 9</sup>

<sup>10</sup> Dakayo ay taga-Jerusalem, bomala kayo sin siyodad ta man-amag kayo si kalsada ay pandanan din kailian yo ay mantaoli. Man-amag kayo si annawa ay kalsada yan kaanen yo din batbato. Mantood kayo abe si sinyal ta ilaen di ipogaw sin kailiili. <sup>11</sup> Siya na di ibilin Diyos sin amin ay solin di daga: “Ipaammo yo sin ipogaw ed Jerusalem ay omali din mangisalakan en daida yan itaktakina din gon-gona ay idawat na.” <sup>12</sup> Awni et dakayo nan makwani en “Nasantoan ay Ipogaw Diyos” ya “Ipogaw ay Sinobot Diyos.” Din ili yo abe ay Jerusalem et makwani en “Ili ay Laylayden Diyos” ya “Ili ay Adi Baybay-an Diyos.”

## 63

### *Din Pangabakan Diyos Sin Kailiili*

<sup>1</sup> Sino din mapmapo ed Bozra ay sakop di Edom\* ay nanbabados namansaan si mandada? Maptemapteng di bado na ya namalkaan si sinyal di kinangato na. Manmandan yan maila di palalo ay bikas na. Kanana, “Sak-en din nalinteg di kali na ay manakabalin ay mangisalakan.”

<sup>2</sup> Apay nga namansaan din bado nas mandada ay kaman din badon di nanpespes si obas? <sup>3</sup> Kanan Diyos, “Es-esak ay nangigatigatin sin nanasyon ay kaman din iyat di manpespes si obas. Magay inmali ay binmadang. In-gatin kos daida gapo sin bonget ko et nagolpi din badok ay minansaan din dada da. <sup>4</sup> Tan inkeddeng ko ay ed wani di timpo ay isalakan ko din ipogaw ko ya timpo ay dosaek din kalaban da.† <sup>5</sup> Nasdaawak tan ilaek yan maga di bomadang, ngem pinmigsak gapo sin bonget ko et nangabakak.

\* **63:1** Ed Edom yan simbolon di am-in ay nasyon ay mangililiget en Diyos ya din ipogaw na. † **63:4** Naipaammo 19:13,15.

<sup>6</sup> In-gatigatin kos daida si bonget ko yan pinabeteng kos dosak<sup>‡</sup> *et inmayos din dada da sin lota.*"

<sup>7</sup> Dad-atek din komakaman ay layad Diyos. Idaydayaw ko gapo sin amin ay inamag na para en datako. Dakdake din bindisyona en datako ay Israelita gapo sin seg-ang na ya magay pap-eng na ay layad na. <sup>8</sup> Kanan Diyos, "Daida din ipogaw ko et adi dan omietek." Et insalakanas daida. <sup>9</sup> Sin amin ay ligat da et mansakit din nemnem na. Baken baa ono anghel di nangisalakan en daida mo adi et si Diyos ay mismo. Insalakanas daida gapo sin layad ya seg-ang na. Kanayon ay inay-ayowananas daida ed idi, <sup>10</sup> ngem kinontra das sisya et nansadoten da din nasantoan ay Ispirito na. Isonga nanbalin sisya ay kalaban da.

<sup>11</sup> Pag da et nemnemen ed bayag sin timpon Moses ay baan Diyos et kanan da, "Into pay si Diyos ay nangisalakan sin ipogaw na ya din papangolo da sin baybay? Into pay sisya ay nangidawat sin nasantoan ay Ispirito na en da Moses ta mantee sin kad-an di kaipoipogaw? <sup>12-13</sup> *Into pay si Diyos ay nangipaila sin panakabalina babaen en Moses et nansianena din danom sin baybay yan inpango na din ipogaw na ay nandan sin gawa na?" Et gapo isdi yan madaydayaw din ngadana si eng-enggana. Si Diyos di nangipango en daida et kaman dan kabayo ay adi maisokba sin kadardaratan.* <sup>14</sup> Indawtanans daida si pan-illengan ay kaman din baka ay naipastol sin tanap ay magabay di kanen da. Say inyat na ay nangipango sin ipogaw na ta madayaw din ngadana.

<sup>15</sup> Apo, man-osdong ka kod issan ed daya ay nasantoan ya nangato ay beey mo. Into pay din pangay-ayowanam en dakami ya din layad ya seg-ang mo? Into pay din panakabalin mo? Adi ka kod bomaybay-an. <sup>16</sup> Sik-a din ama mi olay adi omibilang da Abraham en Jacob ay ap-apo mi. Sik-a din kanayon ay nangsobsobot en dakami manipod ed idi. <sup>17</sup> Apo Diyos, apay nga baybay-am dakami ay omaddawi sin laydem ya komenteg nemnem mi? Mantaoli ka koma ta badangam dakami ay nansilsilbin sik-a ay ipogaw mos eng-enggana. <sup>18</sup> Dakami ay ipogaw mo yan inoka mi din nasantoan ay lugar mo si sinkaattikan, ngem nay et ay in-gatigatin din kalaban mi din Timplom. <sup>19</sup> Ibilang mos dakami ay kaman nasyon ay adi kan polos inturturayan, kaman adi kamin naibilbilang ay ipogaw mo.

## 64

(64:1-9)

<sup>1</sup> Apo Diyos, bisngitem koma ed langit ta ilokat mo, ta bomaba ka isnan kad-an mi et manyegyeg din dontog gapo sin kawadam. <sup>2</sup> Din bomabaam et kaman koman din iyat di apoy ay mamoo sin maitongo ta panlowagena di danom. Et siya abe ay omali ka koma ta ipailam din panakabalin mo sin mangililiget en sik-a ya panpayegpegem si egyat din kailili sin sangoanam. <sup>3</sup> Sin binmabaam ed idi ay nangipailaam si nakaskasdaaw ay inamag mo, nanpayegpeg da din dontog sin kawadam. <sup>4</sup> Maga pay laeng di nakaila ono nakadnge si kaman sik-a ay Diyos ay nangamag si kaman nidi para sin mantalek en sisya. <sup>5</sup> Malaydan ka ay mangawat sin maragsakan ay mangamag si kosto ya mangonod sin laydem. Ngem binmonget ka gapo sin basol mi, tan manipod ed bayag, intoltoloy mi kayman ay nanbasol. Intoy iyat mi ngarud ay maisalakan? <sup>6</sup> Kinmadodogis kami am-in et am-in ay kinasiged mi yan maiarig si kadodogis ay trapo. Gapo sin basbasol mi, kaman kamin nango ay tobon di kaiw ay itayaw di dagem. <sup>7</sup> Maga di mankararag en sik-a ya mankedaw si badang mo, tan dinokogam ya binaybay-am dakami ta lak-amen mi di pantongpalan di basbasol mi.

<sup>‡</sup> 63:6 Din kanana sin Masoretic Text ya Dead Sea Scrolls et: pinabeteng kos dosak. Din dosan Diyos et maiarig si arak. Mo ad-adoy inomen di ipogaw ay arak, mabeteng da enggana ay matokang da. Siya abe ay ad-adoy lak-amen di nanasyon ay dosa enggana ay dadlon dan madadael. Ilaen abe sin Salmo 60:3; 75:8; Zecarias 12:2. Din kanana sin odom ay manuskrito et: minekmek ko.

<sup>8</sup> Ngem sik-a ay Diyos din ama mi. Dakami din koli yan sik-a din mandamdamily et inamag mo am-in dakami. <sup>9</sup> Adi ka koman palalo ay mabonget en dakami ya adi kan nenemnemen din basol mi si eng-enggana. Pangaasim koma ta seg-angam dakami ay ipogaw mo. <sup>10 11 12</sup>

## 65

### *Din Baro Ay Daya Ya Baro Ay Daga* (65:1-2,17-25)

<sup>1</sup> Kanan Diyos, “Din adi nankarkararag en sak-en et daida di nanpailaak. Din adi nangan-anap en sak-en et daida di nanteng.\* Din ipogaw ay adi nandaydayaw en sak-en et ay-ayagak daida ay mangwani, ‘Naeyak ay tomolong.’ <sup>2</sup> Naninsin-agew ay ay-ayagak di kaipoipogaw ay mangipipilit ay mangamag si lawa yan say tongtongpalen da din layden da.”†

Gapo ta ipipilit da ay manaydayaw si sinan didiyos ya mangamag si iparit di linteg ko, dosaek daida ay kosto. Ngem laton ay adiak pakidosa din at-atik en daida ay siged di ogali na, tan pinilik daida ay manawid sin ilik ya mansilbi en sak-en isdi. (65:3-16)

3 4 5 6 7 8 9 10 11 12 13 14 15 16

<sup>17</sup> “Ilaen yo! Dandani ay manparsuaak si baro ay daya ya baro ay daga et maming-pingsan ay malinglingan to din sigod. <sup>18</sup> Manragsak kayo et si eng-enggana gapo sin amagek. Tan din baro ay Jerusalem ay amagek et naragsak dan to din ipogaw ay mantee isdi ya panragsakan aben di odom ay ipogaw isnan daga. <sup>19</sup> Sak-en abe et malaydanak ed Jerusalem ya din ipogaw ko. Awni et sin isdi yan magay madnge ay man-oga ono man-adawag si ligat na. <sup>20</sup> Awni et magay matey ay moyang ya magay masapa ay matey ay nataengan. Tan din mantawen si sin-gasot et maibilang ay anak pay laeng, ya din adi mangdas si sin-gasot et maibilang ay binmasol ay madosa. <sup>21-22</sup> *Man-isaad dan to si beey yan daida ay mismo di manbeey, baken odom. Manmola das obas yan daida met laeng di mangan sin lames na. Omando abe di biyag da ay kaman din kaandon di panbiyagan di kaiw. Ganasen da din bonggan di boway da.* <sup>23</sup> Adi dan man-obla ay magay pantongpalana ono man-anak si lawa di pantongpalana, tan bindisyonak daida ya din ipoli da. <sup>24</sup> Olay daan dan ibaga ono mankalkali da pay laeng, songbatak din kararag da. <sup>25</sup> Awni et man-okob di atap ay aso si anak di karnero. Din layon yan mangan das nabeas ay kaman baka, yan din eweg, tapok di kanena. Magay komat ono domadael sin nasantoan ay dontog ko,” kanan Diyos.

## 66

### *Din Pangokoman Diyos Si Kaipoipogaw* (66:1-2,10-16,18-21)

<sup>1</sup> Kanan Diyos, “Ed langit di pantokdoak ay manturay, ya din lobong et say pandayak, isonga olay sino ay beey di saaden yo et adi omanay si panteak. <sup>2a</sup> *Tan sak-en di nangamag sin am-in ay wada et okak amin daida.*\* <sup>3 4 5 6 7 8 9</sup>

<sup>10</sup> “Dakayo ay mangipatpateg sin ili ay Jerusalem ya nanladingit ed idi gapon sisya, makiragsak kayo sin ipogaw na ya manragsak kayo gapo en sisya. <sup>11</sup> Mapnek kayon to sin kinabaknang na ay kaman din iyat di moyang ay mapnek sin soson ina na. <sup>12</sup> Tan kaman din iyat di danom si napno ay ginawang ay man-oyas din iyat ko ay mangipaey en dakayo sin kinabaknang di odom ay nasyon. Et mapnek kayo ya kaman kayo din

\* **65:1** Di esa abe ay kaiologan nina sin Hebreo et: “Nakasaganaak ay manongbat sin kararag di ipogaw ay adi nankarkararag ya nakasaganaak ay datngen da olay mo adi da inman-anap...” † **65:2** Roma 10:20-21. \* **66:2a** Inam-amag 7:49-50.



moyang ay ay-ayowanan din ina na dowanan bakwaen ay pasosoen ya abaen. <sup>13</sup> Awni et liwliwaek dakayo ed Jerusalem ay kaman din iyat di ina sin nadakdake ay anak na,” kanan Diyos.

<sup>14</sup> Mo ilaen yo ay mapasamak dana et manragsak ya pomigsa kayo. Et siya danay pangammoan yo ay badangan Diyos din mansilbi en sisya ngem mabonget sin mangonkontra et dosaenas daida.

<sup>15</sup> Awni et omali si Diyos ay mangikoyog si apoy. Din kalisa na et kaman alinposapos, yan palalo din bonget na ay manosa sin kalabana. <sup>16</sup> Tan babaen si apoy ya kampilan, dosaena am-in ay nakabasol et ad-ado di matey. <sup>17</sup>

<sup>18</sup> Kanan Diyos, “Ammok din nemnemnemen da ya am-amagen da. Omaliak ta sinopek din nanasyon ay nankinalasi di kali da et ilaen da din panakabalin ko. <sup>19</sup> Maammoan da ay sak-en di manosa en daida, yan din odom ay makalasad, ibaak sin nanasyon ya il-ili ay adi pay laeng nakadnge si maipanggep en sak-en ono nakaila sin panakabalin ko. Ibaak daida ed Espanya, Libya, Lydia, Tubal ya Grecia, et dad-aten dan to sin nanasyon ay nay din panakabalin ko. <sup>20</sup> Ikoyog dan to ay isaa din kakailian yo ay wada sin odom ay nasyon et kaman regalo ay idawat dan sak-en. Mangabayo da si kabayo, dangki ya kamel. Manlogan din odom si kariton ya kalisa ay para gobat, et emey da sin nasantoan ay dontog ko ed Jerusalem. Idateng das daida ay kaman din iyat di Israelita ay man-idateng si makan ay maidaton sin Timplok ay naipeey si pankargaan ay nalinis sin sangoanan di linteg. <sup>21</sup> Et panbalinek din odom en daida si papadi ya Levita.”  
22 23 24



## Jeremias

### Maipanggep Sin Libro Ay Nay

Si Jeremias et mamadto ay nansilsilbi en Diyos ed Juda manlogi sin 626 B.C. sin timpon Ari Josias. Inpadtopadto na ay dosaen Diyos din ipogaw na mo adi dan dokogan din panaydayawan das didiyosen ya odom ay basbasol da, et indasana din natongpalana, tan sin 586 B.C., dinadael Nebukadnezzar ay ari ed Babilonia din siyodad ay Jerusalem, et inpakaanas Ari Zedekias ya din odom ay taga-Juda ta maiey da ed Babilonia. Inpalobos na ay mataynan si Jeremias ed Juda, ngem baken nabayag yan inpilit di kailiana ay makiey ed Egipto tan emegyat da sin taga-Babilonia.

Ad-adoy linak-am Jeremias ay ligat. Gapo ta binagbagaana din taga-Juda ta somoko da koma sin taga-Babilonia, kanan da en makalipot sisya et inpaibalod da. Pinadas da abe ay ipapse. Nanriris Jeremias en Diyos begew sin ligligat na et inpaammo na din sakit di nemnem na. Gapos di, ad-ado di ammo tako ay maipanggep sin biyag ya ligat na mo din odom ay mamadto sin Daan ay Tolag. Mabalin ay mapapigsa di pammati tako mo basaen tako din napasamak en sisya, tan olay mo napalpaligatan begew sin nansilbiana en Diyos, adi emegyat sin kaibaw na, mo adi et inapasnek na ay nanongpal sin inbilin Diyos ay amagena.

Baken pag dosa di inpadton Jeremias, tan inpadto na abe din pantaolian di ipogaw Diyos sin kosto ay ili da ya din baro ay itolag Diyos en daida ay isolat na sin nemnem da (ilaen sin 31:31-34).

#### **Din Linaona**

Din nangayagan Diyos en Jeremias 1:1-19

Din naipadto maipanggep ed Juda 2:1-25:38

Din nangontraan Jeremias sin nangipadto baken tet-ewa 26:1-29:32

Din pantaolian di ipogaw Diyos ya din baro ay itolag na 30:1-33:26

Di odom ay napasamak en Jeremias 34:1-45:5

Din naipadto maipanggep sin odom ay nasyon 46:1-51:64

Din nadadaelan di siyodad ay Jerusalem 52:1-34

#### *Din Nangayagan Diyos En Jeremias*

*(1:1-10,17-19)*

<sup>1</sup> Siya na di dad-at Jeremias ay anak Hilcias ay esa ay padi ed Anatot ay sakop di Benjamin. <sup>2</sup> Inpaammon Diyos din kali na en sisya sin maikasinpo ya tolo ay tawen ay nanturayan Ari Josias ay anak Amon ed Juda. <sup>3</sup> Wada kasin di naipaammo en sisya sin timpon di turay Jehoyakim ay anak Josias. Idi nakdeng di, namin ad-ado pay ay waday inpaibagan Diyos en sisya enggana sin maikalima ay bowan di maikasinpo ya esa ay tawen ay nanturayan Zedekias ay anak Josias. Sin doy ay timpo din naabakan di Jerusalem. Naipakaan din omili isdi et napilit da ay naiey sin odom ay ili.

<sup>4</sup> Kanan Jeremias, “Siya na din kalin Diyos ay naipaammo en sak-en: <sup>5</sup> ‘Idi daan kon pekken sik-a sin eges inam, enggay inaammok sik-a. Sin daan ka pay laeng maianak, inlalsin kos sik-a ay mansilbi en sak-en yan dinotokak sik-a ay mangipaammo sin kalik sin nanasyon.’ ”

<sup>6</sup> Songbatak pay yan kanak, “Bakenak met maapat tan an-anakak pay laeng.”

<sup>7</sup> Ngem kanan Diyos, “Adi ka kanan en an-anak ka, tan masapol ay emey ka sin amin ay ipogaw ay pangibaaak en sik-a ta ibagam amin ay ibilin ko. <sup>8</sup> Adi kan emegyat en daida, tan wadaak ay mangadkadwa ya mangisalakan en sik-a.”

<sup>9</sup> Pag iadawan Diyos din takkay na et giniwit na din tepek ko yan kanana, “Nay ipaammok en sik-a di ibagam. <sup>10</sup> Et ed wani ay agew, idawat ko di kalebbengam ay

mangipadto si maamag sin nanasyon ay panturayan di ipogaw. Begew sin ipadtom, kabaalam ay manggabot ya mangipababa, manadadael ya mangabak. Kabaalam abe ay mangisaad ya mangimola. <sup>11 12 13 14 15 16</sup>

<sup>17</sup> “Isonga mansagana ka et ta en ka ibaga en daida am-in ay ibilin ko. Adi ka emegyat en daida tan mo emegyat ka, sepsepek ay paegyaten sik-a sin sangoanan da. <sup>18</sup> Tan ed wani ay agew, panbalinek sik-a si kaman naaladan ay siyodad, kaman posti ay landok ya bronsi ay dingding. Labanen dakan to sin am-in ay ipogaw ed Juda, pati din ari ya odom ay tuturay ya papadi. <sup>19</sup> Ngem olay mo labanen daka, magay bael da, tan wadaak ay mangadkadwa ya manalaknib en sik-a,” kanan Diyos.

## 2

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37

## 3

1 2 3 4 5 6 7 8 9 10 11 12 13 14 15 16 17 18

### *Din Nanokogan Din Israelita En Diyos* (3:19-25)

<sup>19</sup> Kanan Diyos, “Dakayo ay Israelita, laydelaydek ay ibilang dakayo ay an-ak ko ya idawtan si maymayat ay daga ay kamaptengan sin am-in ay nasyon. Kanak si nemnem ko en awagan yos sak-en ay ama ya itoltoloy yo ay mangonod en sak-en. <sup>20</sup> Ngem kaman kayon babai ay nanokat si asawa na tan dinmokog kayo.”

<sup>21</sup> Waday madnge ay oga sin toktok di dontog. Man-og-oga da ay manpakaasi di adado ay Israelita, tan nanbasbasol da ya nilinglingan da si Yahweh ay Diyos da.

<sup>22</sup> Kanan Diyos, “Dakayo ay baken matalek ay ipogaw, mantaoli kayon sak-en, tan laydek ay agasan dakayo ta manbalin kayo ay matalek.”

Asi yon kanan, “Aw, sagongen mis sik-a tan sik-a si Yahweh ay Diyos mi. <sup>23</sup> Magay naibadang na en dakami din nanaydayawan mi si sinan didiyos sin toktok di dontog. Sik-a anggoy ay Yahweh ay Diyos mi di mangisalakan en dakami ay Israelita. <sup>24</sup> Ngem din nandaydayawan min Baal ay din kadodogis ay didiyosen di gapo ay namaga din inligligatan di aap-o mi ay aan-ak da yan siya abe sin kakarnero ya baka da. <sup>25</sup> Manlakob-o kami ay mangipaila ay palalo di bain mi, tan dakami ya din aam-a mi yan nanbasol kami en sik-a ay Yahweh ay Diyos mi. Adi kami nantongpal en sik-a manipod sin kakitkitoy mi engganad wani.”

## 4

### *Din Kosto Ay Panagbabawi* (4:1-2)

<sup>1</sup> Kanan Diyos, “Dakayo ay Israelita, mo layden yo ay mantaolin sak-en, masapol ay iwasi yo din kaliliget ko ay didiyosen yo ta adi kayo kasin omaddawi. <sup>2</sup> Mo naimposoan di iyat yo ay mansapata en sak-en down aben nalinteg di kabibiyag yo, kedawen din nanasyon di bindisyon ko et idaydayaw das sak-en ay Diyos.”  
3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31

## 5

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31

## 6

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30

## 7

### *Din Panagdayaw Ay Magay Silbi Na* (7:1-15,22-28)

1-3 Inbaan Diyos si Jeremias ay emey sin segpan di Timplo ay senggapan di ipogaw ay taga-Juda ay en mandaydayaw. Inbilina ay en pomika isdi ta ipaammo na din kali na. Kanan Jeremias, “Siya na di inbagan Yahweh ay Kangatoan ay Turay en datako ay Israelita: Balbaliwan yo din panagbiyag yo ya din ogali yo ta say adiak pakaanen dakayo isnan ili ay nay. <sup>4</sup> Adi yo patpatien din ipidwapidwa da ay kanan en, ‘Laton ay adi tako maan-ano, tan sinay din Timplon Diyos,’ tan baken tet-ewa di.

<sup>5</sup> “Tet-ewa koma ay balbaliwan yo din biyag yo ya ogali yo ta kostokosto di iyat yo si esa ya esa. <sup>6</sup> Adi yo palpaligaten din mangili, olila ya balo. Adi kayo manpespese si magay basol na sin ili ay nay. Adi kayo aben mandaydayaw si didiyosen tan say kadadaelan yo. <sup>7</sup> Mo say iyat yo di, makiteteeak en dakayo si eng-enggana isnan ili ay indawat ko ed idi sin aap-o yo.

<sup>8</sup> “Ngem nay ay mantalek kayo si baken tet-ewa ay kali ay magay silbi na. <sup>9</sup> Mangakew kayo, manpese ya makikamalala kayo. Man-etek kayo ay mansapata. Man-idaton kayon Baal ya mandayaw kayo si didiyosen ay adi yo am-ammo. <sup>10</sup> Asi kayo pay omali sin Timplok ay kaidaydayawak yan kanan yo en adi kayo maan-ano et mabalin ay itoltoloy yo din kaliliget ko ay am-amagen yo. <sup>11</sup> Ay din pannemnem yo sin Timplok yan liyang ay pantean di tollisan? Sak-en et ilaek din maam-amag.

<sup>12</sup> “Emey kayo ed wani ed Shilo ay pinilik ay pandaydayawan da en sak-en ed idi ta ilaen yo di napasamak sin lugar ay doy\* gapo sin basol ay inam-amag di ipogaw ko ay Israelita. <sup>13</sup> Namin ado ay nakikaliak en dakayo, ngem adi yo inkaskaso. Ay-ayagak dakayo, ngem adi kayo somongsongbat. Isonga ed wani, gapo ta say inamag yo amin dana, <sup>14</sup> amagek di kaman din inyat ko ed Shilo sin Timplok ay pantaltalkan yo ya isnan lugar ay indawat kon dakayo ya sin aam-a yo. <sup>15</sup> Pakaanek abes dakayo sin sangoanak ay kaman din inyat ko sin aag-i yo ay polin Efraim.” <sup>16 17 18 19 20 21</sup>

<sup>22</sup> Kanan aben Diyos en Jeremias, “Idi inkaan ko ed Egipto din aam-a yo, magay inbagak ono inbilin ko maipanggep sin daton ay mapooan ono olay sino ay kalasin di daton. <sup>23</sup> Ngem inbilin ko en daida ay tongpalen das sak-en ta sak-en di Diyos da ya daida di ipogaw ko. Inbagak en daida ay onodan da din panagbiyag ay inbilin ko ta somiged di biyag da. <sup>24</sup> Ngem tineteweng da et adi da tinongpal. Say tinongpal da din makenteg ay nemnem da, isonga adi sinmiged di biyag da mo adi et linmawlawa. <sup>25</sup> Manipod sin kinmaanan di aam-a yo ed Egipto engganad wani, kanayon ay way inbaak ay mamadto en daida. <sup>26</sup> Ngem adi da inkaskaso et inpakekenteg da din nemnem da. Nasepsep di inamag da mo din inyat di aap-o da. <sup>27</sup> Isonga mo ibagam dana et adi da dengngen, kalam et adi dan somongbat. <sup>28</sup> Ibagam ngarud ay daida di nasyon ay adi manongtongpal en Yahweh ay Diyos da ya adi manmange sin pamagbaga na. Enggay maga polos di tet-ewa ay inbaga da.”

Kanan aben Diyos, “Kadodogis sin pangilak din inam-amag di taga-Juda, tan insaad da di sinan didiyos sin Timplok yan indaton da din mismo ay an-ak da ay mapooan sin Tanap ay Ben-Hinnom. Isonga mangadanan to din tanap ay doy si Tanap ay Namsean Das Ad-ado. Kolang di daga ay pangiponponan da sin natey, et maiwalawalang di bangkay da. Maiwalang abe din tong-an di ipogaw ay natey ed idi, tan kaanen di kagobat da sin naiponponan da.”

Palalo ay mansakit di nemnem Jeremias begew sin lawa ay panagbiyag di kakailiana ya din dosa ay ipalak-am Diyos en daida. Gapo ta dinokogan das Diyos ya din linteg na, pansisianen das daida ay iey si odom ay il-ili et maga di pamosposan da mo adi et din seg-ang Diyos anggoy, et say ipanemnem Jeremias en daida. (7:29–9:22)

\* **7:12** Ed Shilo din damo ay nangisaadan da Josue sin Baol di Tolagan sin dinmatngan da ed Canaan. Sin timpon Jeremias, nabayag ay nababakas. Ilaen abe sin 26:6.

29 30 31 32 33 34

## 8

1 2 3 4 5 6 7 8 9 10 11 12 13 14 15 16 17 18 19 20 21 22

## 9

1 2 3 4 5 6 7 8 9 10 11 12 13 14 15 16 17 18 19 20 21 22

### *Din It-ek Koman Di Ipogaw* (9:23-24)

<sup>23</sup> Kanan Diyos, “Adi koman it-it-ek din masirib din laing da ono din napigsa din bikas da ono din babaknang din kinabaknang da. <sup>24</sup> Ngem mo waday mayad ay mangit-ek si kompormi, say it-ek na koma din pangawat na ya nangammoana en sak-en, tan sak-en si Diyos ay mangipaila si adi manbalbaliw ay layad ya seg-ang ya kinalinteg isnan daga tan say panlaydak.”\* <sup>25 26</sup>

## 10

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25

## 11

1 2 3 4 5 6 7 8 9 10 11 12 13 14 15 16 17

### *Din Plano Da Ay Mamse En Jeremias* (11:18-20)

Pag ipanemnem Jeremias sin taga-Juda din linaon di intolag Diyos sin aap-o da babaen en Moses. Kanana en dosaen Diyos daida maibasar sin tolagan ay sana. Begew sin nangwanianas di, ninemnem din kailiana ay mamse en sisya, ngem adi natongpal. Kanan Jeremias: (11:1-17)

<sup>18</sup> Inaammok din panggep di omililiget, tan inpaammon Diyos en sak-en din amagen da. <sup>19</sup> Kamanak din naamo ay karnero ay iey da sin panpaltian, tan adiak ammo di lawa ay panggep da en sak-en. Kanan da ay nantotolag, “Poyoen tako din kaiw ed wani ay makneg pay laeng. Peslen tako ta say malinglingan di ngadana si eng-enggana.” <sup>20</sup> Ngem sik-a ay Kangatoan ay Turay, nalinteg di iyat mo ay mangokom ya inaammom di nemnem di ipogaw. Ipalobos mo kod ay ilaek di panosaam en daida tan intalek ko na ay problimak en sik-a. <sup>21 22 23</sup>

## 12

### *Din Salodsod Jeremias En Diyos* (12:1-6)

<sup>1</sup> Apo Diyos, olay mo makisongbatak en sik-a et sik-a pay dedan di kosto. Ngem olay mo siya di, waday laydek ay salodsoden en sik-a. Apay nga mayat di biyag din maetek ya mangam-amag si lawa? <sup>2</sup> Inmolam daida et nanlamot da, ginmabay ya nanbonga da. Idaydayaw daka sin kali da ngem addawi ka sin nemnem da. <sup>3</sup> Ngem sik-a ay Diyos et ammom sak-en. Il-ilaem din am-amagek ya ammom di ison di layad kon sik-a. Ngem nan ipogaw ay mangam-amag si lawa, igoyod mo koma ay kaman karnero ay maiey sin mapaltian da ta mailalasin da para sin agew ay way mamse en daida.

<sup>4</sup> Ayye pay nas kabayag na ay mamgaan nan daga mi ya makpit din amin ay logam isnan ili? Enggay natey din aanimal ya titit gapo sin basbasol di omili, dowan da et kanan en adi ka ilaen din am-amagen da. <sup>5</sup> Kanan Diyos ay sinombat, “Mo mabbay ka ay makilongba si ipogaw, into pay di iyat mo ay makilongba si kabayo? Mo sin mapteng ay ili yan maisokba ka, into pay di iyat mo ay manbiyag sin kada sin benget di ginawang

\* **9:24** 1 Corinto 1:31 ya 2 Corinto 10:17.

ay Jordan? <sup>6</sup> Tan olay din aag-im ya mismo ay pamilyam et linipotan daka. Man-eset da ay mangibaw en sik-a. Isonga adi ka mantalek en daida olay mo kaman mayat din kali da.” <sup>7 8 9 10 11 12 13 14 15 16 17</sup>

## 13

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27

## 14

### *Din Tiyagew Ay Kaeegyat* (14:1-10,19-22)

<sup>1</sup> Siya na di inpaammon Diyos en Jeremias maipanggep sin ando ay tiyagew:  
<sup>2</sup> “Manladingit din omili ed Juda tan maligligatan din siyodad da. Man-anog-og da din ipogaw ed Jerusalem begew sin daga da. <sup>3</sup> Din babaknang yan panakdoen da din babagen da et emey da sin sakdoan, ngem magay danom si madteng da, isonga mantaoli da ay magay naigto sin isakdo da. Et mansokdong da gapo si bain ya ladingit da. <sup>4</sup> Enggay nabtanabtak din lota gapo ta magay odan, isonga din manmolmola abe yan mansokdong da ay mangipaila si ladingit da. <sup>5</sup> Gapo ta enggay magay logam sin dontog, taynan din makawas din kaian-anak ay olbon da. <sup>6</sup> Din atap ay animal sin toktok di dontog yan manngasngas da ay kaman din atap ay aso. Komapsot din mata da gapo ta magay alaben da.

<sup>7</sup> “Din ipogaw ko yan man-adawag dan sak-en ay kanan da, ‘Ad-ado ya madagsen kayman nan basol mi ay pamaneknek kontra en dakami, tan namin ado ay dinokogan mis sik-a, ngem gapo sin dayaw mo, badangam kod dakami. <sup>8</sup> Tan sik-a anggoy di pannamnamaan di Israelita. Sik-a di mangisalakan en dakami sin timpon di ligat mi. Apay nga kaman kan mangili isnan ili mi ay mandagos si owat esay labi? <sup>9</sup> Apay nga kaman kan nakibtot ya kaman soldado ay adi makaisalakan si awak na? Wada ka met ay Diyos sin kad-an mi yan dakami di makwani en ipogaw mo. Adi ka paaben tomaytaynan!’ ”

<sup>10</sup> Pag kanan Diyos, “Layden dana ay ipogaw ay omaddawi en sak-en ya mangamag si adiak layden et adi dan makaitpe sin awak da, isonga adiak malaydan en daida. Adiak linglinglingan din basol da et dosaek daida.” <sup>11 12 13 14 15 16 17 18</sup>

<sup>19</sup> Kanan Jeremias, “Ay enggay inwasit mo ed Juda ya enggay kadodogis di pangilam ed Zion? Apay nga palalo ay sinogatam dakami et adi kami kaagasan? An-anapen mi di talna ngem magay siged si mas-ed mi. Namnamaen mi ay maagasan kami ngem danag et di wada. <sup>20</sup> Tet-ewa kayman ay binmasol kamin sik-a, dakami ya din aap-o mi. <sup>21</sup> Ngem gapo sin dayaw mo, adi ka kod dokogan dakami ta adi maibabain din madaydayaw ay turay mo. Adi ka koman linglinglingan din intolag mo en dakami. <sup>22</sup> Magay makaidawat si odan sin olay sino ay didiyosen di nanasyon. Ed daya yan adi na kabaelan si bokbokod na ay mangipawadas odan. Sik-a ay Yahweh ay Diyos mi di pannamnamaan mi, tan sik-a anggoy di makaamag amin isna.”

## 15

1 2 3 4 5 6 7 8 9 10 11 12 13 14

### *Din Nanririan Jeremias En Diyos* (15:15-21)

<sup>15</sup> Kanan Jeremias, “Apo Diyos, ammok ay makaawat ka. Nemnemem kod sak-en ta bomadang ka. Sik-a koma di mangibaes sin pomalpaligat. Adi ka koman pabaybayagen di anos mo en daida enggana ay pomse da. Nemnemem koma ay sik-a di gapo ay mapalpaligatak. <sup>16</sup> Nankali ka et pinatik amin ay inbagam. Naragsakanak tan sik-a ay Yahweh ay Diyos ay Kangatoan ay Turay yan inbilang mos sak-en ay mansilbin sik-a. <sup>17</sup> Adiak polos nakikoykoyog ya nakiragsak sin naayat si ragragsak. Nan-es-esaak tan



inturong mo din nemnem ko et palalo di bonget ko sin basol da. <sup>18</sup> Apay nga magay pap-eng nan ligat ko ya adi kaagasan nan sogat ko? Ay panggep mo ay domismaya et kaman kan obbog ay natdok?”

<sup>19</sup> Pag kanan Diyos ay sinombat, “Mo manbabawi ka, awatek sik-a kasin ay baik. Mo mankali ka si kosto ay baken din magay silbi na, manbalin ka kasin ay pankalkaliak. Baken koman sik-a di awisen di kaipoipogaw ay omonod sin wadas nemnem da, mo adi et sik-a di mangawis en daida. <sup>20</sup> Gobaten dakan to sin ipogaw ay nay, ngem laton ay panbalinek sik-a ay maiarig si makneg ay bronsi ay alad di ili. Adi da makaabak en sik-a, tan wadaak ay manalagnib ya mangisalakan en sik-a. <sup>21</sup> Isalakan kos sik-a sin panakabalin di makedse ay laway nemnem da.” Siya nay kinwanin Diyos.

## 16

### *Din Inparit Diyos En Jeremias Ay Mansilbi Ay Sinyal*

<sup>1</sup> Nankali kasin si Diyos en Jeremias yan kanana, <sup>2</sup> “Adi ka mangasawa ta say magay anak mo sin ili ay nay. <sup>3</sup> Tan nay ay ipaammok en sik-a din mapasamak to sin maianak isna ya din ama ya ina da. <sup>4</sup> Awni et matey das kaegyay ay sakit, gobat ya betil, ngem maga di mangiladingit ya mangiponpon, mo adi et maiwalang di bangkay da ay kaman tain di animal sin lota et kanen di titit ya atap ay animal.

<sup>5</sup> “Sak-en ay Diyos, naey pay di bilin ko en sik-a. Adi ka en makikan sin minatayan ya olay makiladingit en daida, tan nay ay kaanek din bindisyon ko sin ipogaw ay nay da, ya adiak ipaila din layad ya seg-ang ko. <sup>6</sup> Matey dan to din waday kabigbigana ya din nababa, ngem maga di mangiponpon en daida. Maga abe di mangged sin awak na ono mangoskos sin book na ay mangipailas ladingit na. <sup>7</sup> Maga abe di mangidawat si makan ya inom ay mangliwliwa sin manladingit, olay mo si ama na ono si ina na di natey.

<sup>8</sup> “Adi ka aben makikan ya makiinom sin beey ay nanpaltian da ay manraragsak, <sup>9</sup> tan sak-en ay si Yahweh ay Diyos di Israelita et sak-en din Kangatoan ay Turay yan siya na di ibagak: Awni et ipaginek ko din kalin di makiragragsak ay ipogaw sin kasalan ya odom ay ragragsak, tan maga di mankasal. Mapasamak na sin timpo yo ya sin pangilaan yo.

<sup>10</sup> “Mo ibagam am-in dana sin kaipoipogaw, damagen da mo sinoy gapo ay inkeddeng ko nan palalo ay dosa en daida. Layden da ay ammoan mo sinoy basol dan sak-en ay Diyos da. <sup>11</sup> Asi kan ibagan daida, ‘Siya na di songbat Diyos en dakayo. Di gapo na et tinmaynan din aam-a yo ta mandayaw ya mansilbi das odom ay diyos. Dinmokog da et adi dan tinongtongpal din linteg ko. <sup>12</sup> Ngem baken anggoy nidi, tan mo dakayo pay yan sinepsep yo din basbasol di aam-a yo. Tan nay ay on-onodan yo am-in din lawa ay laylayden di makenteg ay nemnem yo yan sigaan yo ay manongpal en sak-en. <sup>13</sup> Gapos na, ipakaan kos dakayo sin ili ay nay ta emey kayos odom ay ili ay adi yo ammo ya adi aben ammon di aam-a yo. Olay isdi kayo ay mansilbi si natken ay diyos si inagew ya nilabi, tan magan to di seg-ang kon dakayo.’ ”

### *Din Pantaolian Da Ay Mapos Addawi Ay Ili Ya Din Nangon-ona Ay Dosa Da*

<sup>14</sup> Kanan aben Diyos, “Domteng to di timpo ay adi dan kanan ay mansapata, ‘Isapatak sin matmatago ay Diyos ay nangikaan sin Israelita ed Egipto.’ <sup>15</sup> Kanan dan to, ‘Isapatak sin matmatago ay Diyos ay nangikaan sin Israelita sin nasyon ed amyanan ya sin amin ay il-ili ay nangipaaddawiana en daida.’ Tan itaolik daida sin daga ay indawat ko sin aap-o da. <sup>16</sup> Ngem sakbay ay amagek di, man-ibaaak si en manpap en daida ay kaman din iyat di manabtabokol. Mo makdeng di, man-ibaaak si en manganop en daida sin dodontog, bilbilig ya liyang. <sup>17</sup> Tan ilaek amin ay am-amagen da et adi mailingeb en sak-en din basbasol da. <sup>18</sup> Isonga kostokosto di panosaak en daida sin basbasol da tan inpakadodogis da din daga ay pinilik begew sin baken matmatago ay didiyosen da.”

### *Din Kararag Jeremias Ay Nangipailas Talek Na En Diyos*



<sup>19</sup> Kanan Jeremias ay nankararag, “Apo Diyos, sik-a di poon di bikas ko, sik-a abe di pankamangak ya salaknib ko sin timpon di ligat ko. Emey dan sik-a din nanasyon ay mapo sin amin ay solin di daga yan kanan da, ‘Pag magay silbi na ay didiyosen di wada sin aap-o mi yan magay pansigdan si idawat da. <sup>20</sup> Ay mabalin ay amagen di ipogaw di diyos da? Aw, ngem din amagen da et baken tet-ewa ay Diyos.’ ”

<sup>21</sup> Kanan Diyos ay sinombat, “Mo siya sa, itdoak daida. Ipailak en daida din panakabalin ko et ammoen dan to ay si Yahweh di ngadan ko.”

## 17

1 2 3 4

### *Nankinalasi Ay Pamagbaga* (17:5-10,13-14)

<sup>5</sup> Siya na di kanan Diyos, “Madosa di omaddawi en sak-en ya mantalek si kabaelan di ipogaw. <sup>6</sup> Maiarig si kaiw sin kadardaratan ono manpait ay lota ay magay gomabay et magay pansigdan si mas-ed na. <sup>7</sup> Ngem nagasat din ipogaw ay mantalek en sak-en ay Diyos. <sup>8</sup> Maiarig si kaiw ay ginmabay sin benget di danom et komamang din lamot na sin ginawang. Adi emegyat mo domteng di tiyagew, tan komakaman ay maata din tobo na. Adi madanagan mo adi man-odan yan magay somaldengan di panlamsana.

<sup>9</sup> “Sino di makaawat si nemnem di ipogaw? Tan din nemnem di ipogaw et maetek ay magay is-iso na ya adi kaagasan? <sup>10</sup> Sak-en ay Diyos di mangosig ya mamadas si nemnem ya panggep di ipogaw et gon-gonaak di ipogaw insigon sin inam-amag na.”  
11 12

<sup>13</sup> Sik-a ay Diyos di pannamnamaan di Israelita. Amin ay manlingling ono manokog en sik-a et maibabain da yan mantongpal da sin kad-an di natey ed dallem, tan dinokogan daka ay Yahweh ay kaman obbog ay kapoan di danom ay mangidawat si biyag. <sup>14</sup> Omagas ka kod ay Apo ta dadlonak mailatonan, omisalakan ka ta maisalakanak si kosto, tan sik-a di daydayawek. <sup>15 16 17 18 19 20 21 22 23 24 25 26 27</sup>

## 18

1 2 3 4 5 6 7 8 9 10 11 12 13 14 15 16 17 18 19 20 21 22 23

## 19

### *Din Nagopak Ay Koli*

<sup>1</sup> Inbilin Diyos en Jeremias ay en manlako si dinamili ay koli. Inbaga na abe en manitakin sin papangolo ya nankakay ay papadi <sup>2</sup> ta bomala da sin segpan ay makwani en Pit-ing di Koli ay emey sin Tanap ay Ben-hinnom ta ena ipaammo din inbagan Diyos. <sup>3</sup> Siya nay inbilin Diyos ay inbagan Jeremias, “Dakayo ay aarin di Juda ya ipogaw ed Jerusalem, dengngen yo din kalin Yahweh ay Kangatoan ay Turay ay Diyos di Israelita: Awni et ipawadak di kaeegyat ay pasamak isna ay lugar et masngang di amin ay mannge. <sup>4</sup> Say amagek di tan dinokogan das sak-en ya inpakadodogis da nan ili sin nanidatdatonan da si didiyosen ay adi da am-ammo ya adi aben am-ammon din aari ya aap-o da. Inpaoyas da abe sin ili di dadan di ad-ado ay magay basol da. <sup>5</sup> Nan-amag da pay sin toktok di dontog si pan-idatonan da en Baal et isdi ay pinooan da ay indaton din aan-ak da. Din nay ay inamag da et adiak polos inbilin ono inbaga ya adiak polos ninemnem. <sup>6</sup> Isonga domteng to di timpo ay baken Tofet ono Ben-hinnom di ibaga da ay ngadan din ili ay nay mo adi et Tanap ay Namsean das Ad-ado. <sup>7</sup> Isna ay lugar, awni et dadaelek di planon di taga-Juda ya taga-Jerusalem. Iturong kon to di pamsean din kalaban da en daida babaen si kampilan, et bay-ak to ay kanen di titit ya animal din awak da. <sup>8</sup> Ipawadak dana ay kaeegyat ay pasamak sin siyodad ay nay et masdaaw ya masngang dan to di malabas ay mangila sin ligat ay linak-am da. <sup>9</sup> Gapo sin doy ay

amagek, isida da din mismo ay aan-ak da ya man-asisida da, tan mankolang dan to si makan gapo sin panlikoban di kalaban da ay mangipapati ay mamse en daida.”

<sup>10</sup> Pag ibilin Diyos ay gopaken Jeremias din koli sin sangoanan di lallalaki ay koyogena, et inamag na di. <sup>11</sup> Pag nan kanan, “Siya nay kanan Diyos ay Kangatoan ay Turay. Ilaen yo san nagopak ay koli ay adi polos maiamag. Kaman nidi met laeng di iyat ko sin ipogaw ay nay da ya isnan ili. Maikaot din natey ed Tofet enggana ay magay lugar ay pan-ikaotan. <sup>12</sup> Panbalek to din lugar ay nay ay kaman ed Tofet, <sup>13</sup> et komadodogis ay kaman ed Tofet din kabeebeey ed Jerusalem ya din beey di aari. Komadodogis amin din beey ay di atep da et nan-ipoan das insinso ya nangisoyatan das arak ay naidaton sin amin ay naparsua ed daya ya didiyosen.”

<sup>14</sup> Idi nakdeng ay kinwani na di, pag mantaoli si Jeremias ay napod Tofet ay nan-gibaaan Diyos en sisya ay en mangipaammo sin mapasamak sin tapin di agew. Pinmika sin bel-ayan di Timplo yan kanana sin amin ay ipogaw, <sup>15</sup> “Siya na di kanan Yahweh ay Kangatoan ay Turay ay Diyos di Israelita, ‘Dadlonak ipadateng dana ay ligat ay inbagak ay amagek sin siyodad ay nay ya sin amin ay ili ay sakop na, tan inpakenteg yo din nemnem yo et sigaan yo ay mannge sin kalik.’”

## 20

1 2 3 4 5 6

### *Din Nanririan Jeremias En Diyos* (20:7-15)

Idi dinngen Pasur ay opisyal di papadi din inpadton Jeremias ay sana, inpasoplit na et inbilina ay ipeey dan siki na sin nalolokawan ay nandemilan di doway ay tabla, asi da pan-ipiten. Idi inpabulos na sin kabigatana, kanan Jeremias en ilaenan to din kateyan di gagayyem na si gobat. Mo sisya pay ya din pamilya na, maiey da ed Babilonia ta mantee das di engganas kateyan da. (20:1-6)

<sup>7</sup> Pag kanan Jeremias, “Apo Diyos, inmietek ka et naietekanak. Napigsa ka mo sak-en et inmabak ka. Somis-iyek din amin ay ipogaw si kankanayon. <sup>8</sup> Tonggal mankaliak masapol ay manbogbogawak ay mangiyew sin lawa ay maam-amag ya mangipadto sin domteng to ay panangdadael. Isonga kanayon ay omoy-oyaw ya lomaslasoy da gapo sin mangibagbagaak sin kalim. <sup>9</sup> Ngem no kanak en gominekak ta somaldengak ay mangibagbaga sin kalim, manbalin din kalim si kaman apoy sin nemnem ko ya oneg di awak ko. Et enggay nabbayak ay adiak kabaelan ay mangiitpe. <sup>10</sup> Ninemnem ko ay gominekak, tan dindinngak din iay-ayasak di ipogaw ay lomaslasoy. ‘Sanas Kaeegyat! Pag kaeegyat ay dosa di ipadtopadto na. Idarum tako!’ kanan da. Olay din gagayyem ko et sedsed-en da di kaisokbaak. Kanan da, ‘Mabalin siguro ay maietekan et depapen tako ta makaibaes tako!’

<sup>11</sup> “Ngem sik-a ay Diyos di komadkadwa ya manakabalin ka et maabak din pomalpaligat. Palalo ay maibabain da tan adi matongpal din layden da. Maibabain dan to si eng-enggana et adi polos malinglingan. <sup>12</sup> Ngem sik-a ay Diyos ay Kangatoan ay Turay et padasem din nalinteg ya mailam din nemnem di ipogaw. Ipailam kod di panangbaes mo sin kalaban ko, tan intalek kon sik-a din problimak.”

<sup>13</sup> Mankanta tako ay mangidaydayaw en Diyos, tan insalakana din maligligatan sin laway nemnem da.

<sup>14</sup> Ngem sapay koma dedan ta mabaosan din agew ay naianakak, din agew ay inmianakan inak. <sup>15</sup> Mabaosan koma abe din ipogaw ay nangipadamag en amak ay binmalay anak na ay lalaki et naragsakan sisya. <sup>16 17 18</sup>

## 21

1 2 3 4 5 6 7 8 9 10 11 12 13 14

**22**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30

**23***Din Nalinteg Ay Polin David Ay Maturay To**(23:1-8)*

Idi en ginobat din soldadon di Babilonia ed Jerusalem yan nilikob da din siyodad, inpaayag Ari Zedekias si Jeremias ta damagena mo mabalin ay man-amag si Diyos si milagro ta maabak din taga-Babilonia ya somaa da. Ngem kanan Jeremias en nakeddangan din siyodad ay mabakas ya mapooan. Din mayad ay matago et bomala da koma sin siyodad ta somoko da sin taga-Babilonia, tan din mantetee sin siyodad et sigurado ay matey da sin gobat, betil ono sakit. Pag ipaammon Jeremias sin kaipoipogaw din dosa ay inkeddeng Diyos sin lawa ay aari ay nanturturay ed Juda sin timpo na ay da Sallum en Jehoyakim ay anak Josias ya si Jehoyakin ay anak Jehoyakim. (21:1–22:30)

<sup>1</sup> Kanan Diyos, “Kaasi pay din maiarig si mangay-ayowan si karnero ay mangipap-papse ya mangipansisian sin ipogaw ko. <sup>2</sup> Sak-en si Yahweh ay Diyos di Israelita et siya nay kanak maipanggep sin tuturay ay lebbeng na ay mangayowan sin ipogaw ko: Nansisianen yo ya inpakaan yo din ipogaw ko. Adi kayo inayowanan daida, isonga dosaek dakayo gapo sin lawa ay inam-amag yo. <sup>3</sup> Awni et pataoliek din ipogaw ko manipod sin amin ay nasyon ay nangipansisianak en daida. <sup>4</sup> Man-isaadak si tuturay ay mangayowan en daida et magay pan-egyatan da ya magay malitaw en daida. Adi da aben madisdismaya,” kanan Diyos.

<sup>5</sup> “Sigurado ay domteng di timpo ay isaad kon to ay ari di esa ay nalinteg ay polin David ay maiarig si pingi. Nalaing sisya ay maturay et nalinteg ya kosto di iyat na sin kaipoipogaw isnan ili. <sup>6</sup> Sin timpon di turay na, maisalakan din taga-Juda ya Israel ya magay pan-egyatan da. Din maipangadan en sisya et ‘Si Diyos di Napoan di Kinalinteg mi.’

<sup>7</sup> “Gapo sidi, domteng to di timpo ay mansapata din ipogaw yan adi dan kanan, ‘Isapatak en Diyos ay nangikaan sin Israelita ed Egipto.’ <sup>8</sup> Tan kanan dan to, ‘Isapatak en Diyos ay nangikaan sin Israelita sin nasyon ed amyanan ya sin amin ay il-ili ay nangipaaddawiana en daida.’ Et mantee dan to sin bokod da ay daga.”

9 10 11 12 13 14 15 16 17 18 19 20 21 22

*Din Mangipadtos Baken Tet-ewa**(23:23-29)*

<sup>23</sup> Kanan Diyos, “Sak-en si Diyos ay wadas amin ay kad-an ay baken owat es-esa ay lugar. <sup>24</sup> Maga polos di makabael ay mantabon si lugar ay adiak maila, tan wadaak sin amin ay lugar ed langit ya isnan daga. <sup>25</sup> Dinnggek din inbagbagan di mamadto ay man-ipadto si baken tet-ewa ay mangos-osal sin ngadan ko. Kanan da en waday inpaammok en daida ay iitaw. <sup>26</sup> Ay maney pay di pan-ipadtoan dana si baken tet-ewa mo adi et din mapos nemnem da. <sup>27</sup> Ipagarup da ay gapo sin iitaw da yan linglingan din ipogaw kos sak-en ay kaman din inyat di aap-o da et say dinaydayaw das Baal. <sup>28</sup> Din mamadto ay owat nan-iitaw et olay ibaga na din iitaw na, ngem din nanngge sin kalik, matalek koma ay mangibaga si kosto. Baken man-iso di garami ya lames di bakakew. Addawi abe ay natken din owat iitaw sin inpaammok ay kali. <sup>29</sup> Tan din kalik et kaman apoy ya kaman martilyo ay manmekmek si bato.” <sup>30</sup> <sup>31</sup> <sup>32</sup> <sup>33</sup> <sup>34</sup> <sup>35</sup> <sup>36</sup> <sup>37</sup> <sup>38</sup> <sup>39</sup> <sup>40</sup>

*Din Dowa Ay Baskit Ay Napay-an Si Igos*

Idi inpakaan din taga-Babilonia da Ari Jehoyakin ay anak Ari Jehoyakim ya din papangolon di ipogaw ya nankalalaing ay man-oblá ed Juda ta mantee da ed Babilonia,

waday doway ay baskit ay inpailan Diyos en Jeremias. Di esa yan napay-an si mam-is ay igos, di esa pay yan lawlawa ay igos ay adi kakan. Kanan Diyos en din mam-is ay igos yan say kaiarigana din ipogaw ay enggay naiey ed Babilonia. Ayowananas daida et mantaoli din poli da sin bokod da ay ili. Mo din lawlawa pay ay igos, daidas da Ari Zedekias ya din nakalasad sin naabakan di Jerusalem. Dosaen Diyos daida am-in enggana ay magay mabay-an.

Sakbay ay naamag dana, waday inpaipadton Diyos en Jeremias sin maikap-at ay tawen ay nanturayan Ari Jehoyakim. Kanan Jeremias sin kaipoipogaw en inpidwapidwa na ay nangibaga sin kalin Diyos en daida sin oneg di downpo ya tolo ay tawen manlogi sin timpon Ari Josias ya siya met laeng di inam-amag din iib-a na ay mamadto, ngem adi dan pinatpati. Gapo sidi, siya na di mapasamak en daida. (24:1–25:7)

## 24

1 2 3 4 5 6 7 8 9 10

## 25

1 2 3 4 5 6 7

### *Din Pansilbian Da Sin Ari Ed Babilonia Si Pitopolo Ay Tawen* (25:8-14)

<sup>8</sup> Kanan Diyos ay Kangatoan ay Turay, “Gapo ta tineteweng yo din inbagbagak en dakayo, <sup>9</sup> ayagak din kailili sin amyanan ya si Ari Nebukadnezzar ay mansilbi en sak-en, et ipangok daida ay en makigobat sin taga-Juda ya din nandinmang ay il-ili. Tan din panggep ko et dadlon dan madadael si eng-enggana. Panbalinek daida ay il-ili ay laslasoyen di odom ay ipogaw et mo ilaen da, kanan da en, ‘Ay inayan!’ <sup>10</sup> Ipaginek ko din kalin di makiragragsak ay ipogaw sin kasalan ya odom ay ragragsak, tan maga di mankasal. Maga abe di magiling sin gilingan da ya lana ay pansilaw da. <sup>11</sup> Manbalin ay daga ay magay silbi na din intiro ay ili ay nay ya din nandinmang ay il-ili, et mansilbi da sin ari ed Babilonia si pitopolo ay tawen.

<sup>12</sup> “Ngem mo makdeng pay din pitopolo ay tawen ay sana, dosaek met laeng din ari ed Babilonia ya din ili na begew sin basbasol da et panbalinek din ili da si lugar ay magay silbi nas eng-enggana. <sup>13</sup> Ipalak-am kon to en daida am-in ay dosa ay naisolat sin libro ay nay ay inpaipadtok en Jeremias kontra en daida ya din odom abe ay nanasyon. <sup>14</sup> Gongonaak daida insigon sin inam-amag da ay mismo, et ad-ado di nasyon ya nankapipigsa ay aari ay mangibag-en met laeng en daida,” kinwanin Diyos.

Pag ipadton Jeremias din dosa ay ipalak-am Diyos sin am-in ay nasyon isnan daga. Kanana en peslen Diyos din nangam-amag si lawa sin am-in ay solin di lobong et maiwalang din bangkay da ay kaman din tain di animal sin lota. (25:15-38)

15 16 17 18 19 20 21 22 23 24 25 26 27 28 29 30 31 32 33 34 35 36 37 38

## 26

### *Din Istay Dan Pamsean En Jeremias* (26:1-19,24)

<sup>1</sup> Idi nanlogi ay manturay si Jehoyakim ay anak Josias ed Juda, waday inpaammon Diyos en Jeremias ay kanana, <sup>2</sup> “Pomika ka sin bel-ayan di Timplo ay beey ko ta ibagam amin ay inbilin kon sik-a sin amin ay ipogaw ed Juda ay en mandayaw isdi. Masapol ay maga di ilimed mo ay olay esay kali. <sup>3</sup> Siguro ay dengngen da et manbabawi da sin lawa ay am-amagen da. Mo say iyat da, adiak itoloy ay manosa en daida gapo sin basbasol da. <sup>4</sup> Ibagam en daida ay sak-en ay Diyos di nangibaga ay masapol ay tongpalen da din linteg

ay inbilin ko en daida. <sup>5</sup> Masapol abe ay tongpalen da din kalin di baak ay mamadto. Namin ado ay waday inbaak en daida, ngem adi dan pinatpati. <sup>6</sup> Mo adi dan pasien, bakasek to din Timplo ay nay ay kaman din inyat ko ed Shilo,\* et mo waday mamaos si ib-a na sin olay sino ay nasyon isnan daga, kanana, ‘Maamag koman sik-a di kaman din nanadaelan Diyos ed Jerusalem.’ ”

<sup>7</sup> Dinngen din papadi, mamadto ya kaipoipogaw nan inbagan Jeremias sin Timplo. <sup>8</sup> Idi makdeng ay inbaga na amin din inbilin Diyos, kadepap dan sisya yan kanan da, “Masapol ay matey ka. <sup>9</sup> Apay nga inosal moy ngadan Diyos ay nangipadto ay manbalin si kaman ed Shilo din Timplo ay nay et madadael nan siyodad ya magay mantee?” Et inalibongbongan din kaipoipogaw si Jeremias sin Timplo.

<sup>10</sup> Idi dinngen din oopisyal ed Juda di napasamak, binmala da sin palasyo et en da tinmokdo sin segpan di makwani en Baro ay Segpan di Timplo. <sup>11</sup> Idi siya di, kanan din papadi ya mamadto sin oopisyal ya kaipoipogaw, “Lebbeng na ay makeddeng na ay matey nan ipogaw ay nay, tan nan-ipadto si maikontra isnan siyodad et dakayo ay mismo yan dinnge yo.”

<sup>12</sup> Pag kanan Jeremias sin amin ay oopisyal ya ipogaw, “Si Diyos di nangibaan sak-en ay mangipadto sin dinnge yo ay maikontra sin Timplo ya isnan siyodad. <sup>13</sup> Isonga ed wani, balbaliwan yo koma din ogali yo ya am-amagen yo ta tongpalen yo din kalin Yahweh ay Diyos yo et ibabawi na din inkeddeng na ay dosa yo. <sup>14</sup> Mo pay sak-en, tengel yo din biyag ko, isonga amagen yo mo sino di nemnemen yo ay kosto para en sak-en. <sup>15</sup> Ngem sinay di nemnemen yo, dakayo ya din omili isnan siyodad: Mo pomse kayo, bomasol kayo ay manpese si magay basol na, tan si Diyos di nangibaan sak-en ay mangibagas na en dakayo.”

<sup>16</sup> Idi siya di, kanan din oopisyal ya kaipoipogaw sin papadi ya mamadto, “Baken lemabbeng ay matey din ipogaw ay nay, tan din inpadto nan datako et napon Yahweh ay Diyos tako.”

<sup>17</sup> Pag pomika di odom ay papangolo yan kanan da sin ipogaw ay nasisinop, <sup>18</sup> “Sin nanturayan Hezekias ed Juda, nan-ipadto si Mikias ay taga-Moreset yan kanana sin amin ay ipogaw, ‘Awni et mabakas ed Jerusalem. Maiwalang din amag di nadadael ay bebbeey et maalado di odom ay daga ay naisaadan di siyodad. Din bilig abe ay naisaadan di Timplo et mabeas.’† <sup>19</sup> Ngem adi pinsen Ari Hezekias ya din ipogaw na si Mikias. Inmegyat si Hezekias en Diyos et nankedaw si seg-ang na, isonga inbabawin Diyos din panggep na ay manosa en daida. Ay layden yo ay datako met laeng di mangianap si mawadaan di ligat tako?” <sup>20 21 22 23</sup>

<sup>24</sup> Begew isnan inbaga da ya gapo abe ta insakit Ahikam ay anak Safan si Jeremias, adi naipolang sin omili ay mamse en sisya.

### *Din Nanakwangan Jeremias Si Pako*

Sin maikap-at ay tawen ay nanturayan Jedekias ed Juda, inbilin Diyos ay man-amag si Jeremias si pako ta asi na iimag sin tenged na sin kad-an di palasyo. Pag kanan Jeremias sin oopisyal ay panakaawak di nandinmang ay il-ili ay en nakingalat en Ari Zedekias, “Awni et ipolang Diyos din il-ili yo en Ari Nebukadnezzar ed Babilonia et mansilbi kayo en sisya ya sin anak na ya siya abe sin apo na. Mo adi kayo manpaituray en sisya, dosaen Diyos dakayo et matey kayos gobat, betil ya sakit. Adi yo patpatien din kanan di mamadto, manpontos ya man-geengey mo kanan da en laton ay adi kayo mansilbi sin ari ed Babilonia, tan etek da di. Ngem mo manpaituray kayo en sisya, ipalobos Diyos ay mantee kayo sin bokod yo ay il-ili. Siya sa di kanan Diyos.”

\* 26:6 Jeremias 7:12. † 26:18 Mikias 3:12.



**27**

Siya met laeng di inbagan Jeremias en Ari Zedekias. Kanana abe en din nankangingina ay bonag ay nabay-an sin Timplo ya sin palasyo et maiey dan to ed Babilonia, ngem pag dan maitaoli sin kosto ay napoan da. (27:1-22) <sup>1 2 3 4 5 6 7 8 9 10 11 12 13 14 15 16 17 18 19 20 21 22</sup>

*Si Hananias Ay Nangipadtos Baken Tet-ewa*

Sin doy met laeng ay tawen, waday mamadto ay manngadan si Hananias ay en nakingalat en Jeremias sin Timplo. Kinaana din pako sin tenged Jeremias et ginotlo na sin sangoanan di papadi ya kaipoipogaw. Pag nan kanan, “Siya nay kanan Diyos: Sin oneg di doway ay tawen, gotloek abe din pako ay inpeey Ari Nebukadnezzar sin tenged di nanasyon. Kaanek di kabaelana et itaolik si Ari Jehoyakin ya am-in din kaipoipogaw ay napilit ay naiey ed Babilonia.”

Baken nabayag yan inbaan Diyos si Jeremias ay ena ibaga en Hananias, “Siya nay kinwanin Diyos: Ginotlom kayman di pako ay kaiw, ngem sokatak si landok. Awni man et mansilbi am-in da nan nasyon en Ari Nebukadnezzar ed Babilonia. Et mo sik-a pay, gapo ta inawis mo din kaipoipogaw ta mamati das etek ya kontraen das sak-en, matey ka sin oneg di tawen ay nay.”

**28**

Idi inmey di doway ay bowan, natongpal din inpadton Jeremias et natey si Hananias. (28:1-17) <sup>1 2 3 4 5 6 7 8 9 10 11 12 13 14 15 16 17</sup>

**29***(29:1,10-14)*

<sup>1</sup> Ed Jerusalem, nansolat si Jeremias sin papadi, mamadto ya amin ay ipogaw ay in-ey Nebukadnezzar ed Babilonia ay napod Jerusalem. <sup>2 3 4 5 6 7 8 9</sup>

<sup>10</sup> Kanan Jeremias sin solat na, “Siya na di kanan Diyos: Mo mantapos din pitopolo ay tawen ay pangiturayan di Babilonia sin odom ay nanasyon, omaliak sin kad-an yo ta tongpalek din inkarik ay itaolik dakayo sin ili yo. <sup>11</sup> Tan ammok di planok para en dakayo. Din planok et para sin pansigdan yo ay baken din panligatan yo, ta mawadaan kayo si mayat ay namnama sin tapin di agew. <sup>12</sup> Et mo mankararag kayon sak-en, songbatak din kararag yo. <sup>13</sup> Mo napasnek kayo ay manganap en sak-en et domteng kayo. <sup>14</sup> Ipalobos ko ay detngen yos sak-en yan ayagak dakayo sin amin ay nasyon ay nangipaaddawiak en dakayo ta itaolik dakayo sin ili yo.” <sup>15 16 17 18 19 20 21 22 23 24 25 26 27 28 29 30 31 32</sup>

**30**

<sup>1 2 3 4 5 6 7 8 9 10 11 12 13 14 15 16 17 18 19 20 21 22 23 24</sup>

**31**

<sup>1 2 3 4 5 6</sup>

*Din Pantaolian Di Israelita  
(31:7-17,23-37)*

<sup>7</sup> Kanan Diyos, “Ipigsa yo ay mangikantas ragsak yo begew ed Israel ay kabanolan sin amin ay nasyon. Mankanta kayo ay mandaydayaw et kanan yo, ‘Isalakan mo koma ay Diyos din ipogaw mo. Isalakan mo amin din nabay-an en daida.’\* <sup>8</sup> Alaek to daida sin nasyon ed amyanan ya sin kaaddawian ay solin di daga et itaolik daida sin ili da. Maikoyog en daida din nagodab, pilay, babbabai ay way anak da ya din masikog, et adado da ay somaa. <sup>9</sup> Man-og-oga ya mankararag da sin pangipangoak en daida ay somaa.

\* **31:7** Siya sa din kanana sin Hebreo (MT). Din kanana abe sin LXX et: Insalakan Diyos din ipogaw na. Insalakana amin din nabay-an en daida.



Ipangok daida si kad-an di ad-ado ay danom ya mapteng ay danan et adi dan maisokba, tan maibilangak ay aman din nasyon ay Israel yan ed Efraim di ibilang ko ay inoona.†

10 “Sak-en si Diyos. Dengngen yo ay nanasyon din kalik ta ipaammo yo sin addawi ay il-ili. Sak-en di nangipansisian sin Israelita ngem awni et sinopek daida kasin ya ayowanak daida ay kaman din iyat di manpaspastol si karnero. 11 Tan sinobot ko ed Israel et insalakan kos daida sin napipigsa ay nasyon ay nangabak en daida. 12 Manragsak da ay mankanta sin toktok di dontog ay Zion. Manragsak da gapo sin bindisyon ko ay makan, danom di obas, lana, ya anak di karnero ya baka da. Maiarig da si nas-et di sibog na ay garden et adi da kasin manladingit. 13 Mansala dan to din babalasang gapo si ragsak da yan manragsak da abe din babbaro ya nankakay. Liwliwaek daida et panbalinek si ragsak din ladingit da. 14 Mapnek dan to din papadi sin idawat ko ay makan yan idawat ko amin din kasapolan di ipogaw ko.”

15 Siya na di kanan Diyos, “Madnge di palalo ay man-og-oga ay manladladingit ed Rama, tan og-ogaan Raquel din aan-ak na. Adi polos kaliwliwa, tan namaga da.”‡

16 Isonga kanan Diyos, “Somaldeng ka ay man-og-oga ya manladladingit tan magongonaan ka sin oblam ya mantaoli din aan-ak mo ay mapo sin ilin di kalaban mo 17 et waday namnamam sin omal-ali ay agew.” 18 19 20 21 22

23 Kanan Yahweh ay Kangatoan ay Turay ay Diyos di Israelita, “Awni et mo itaolik din ipogaw ko ed Juda ya sin il-ili ay sakop na yan kanan da, ‘Sapay ta bindisyonan Diyos ed Jerusalem, din nasantoan ay dontog ay panbeeyana.’ 24 Awni et matopog da din man-ili ed Juda ya sin il-ili ay sakop na. Wada dan to di manmolmola ya waday manpaspastol si karnero. 25 Idawat kon to di kasapolan di kinmapsot ya nabbay ya papigsaek kasin daida.”

26 Idi siya di, binmangonak et nanmokilangak yan maymayat baw din seyep ko.

27 Kanan Diyos, “Domteng to di timpo ay paad-adoek di ipogaw ya animal ed Juda. 28 Mo intoy inyat ko ay nanggabot, nanadael ya namaligat en daida, siya met laeng di kinaannad ko ay mangimola ya mangipagabay en daida. 29 Sin domtengan di timpo ay sana, adi et kanan di ipogaw din apat ay nay, ‘Nangan din aam-a da si naalsem ay obas et nakilem di aan-ak da.’ 30 Tan din mangan si naalsem ay obas et sisya ay mismo di makilem. Iso na abe ay matey di ipogaw begew sin bokod na ay basol.

31 “Domteng to di timpo ay man-amagak si baro ay tolagan sin ipogaw ed Israel ya Juda. 32 Din nay baro ay tolagan et baken kaman din intolag ko sin aap-o da sin nangitakkayak en daida sin nangikaanak en daida ed Egipto, tan adi da tinongtongpal din doy ay intolag ko en daida, olay mo maiarigak si asawa da. 33 Ngem sin domtengana di ay timpo, siya na di itolag ko sin polin Israel: isolat ko din linteg ko sin nemnem da ta maigtos di, et sak-en di bigbigen da ay Diyos da ya daida di ipogaw ko. 34 Isonga sin doy ay timpo, adi masapol ay itdoan dan aag-i da ya kailian da ay mangwani en ammoan da komas Diyos, tan enggay ammo da am-in sak-en, olay din kababaan ay ipogaw ya olay abe din kangatoan. Tan pakawanek din basbasol da et adiak kasin nemnemnemen din lawa ay inam-amag da.”§

35 Siya na di kanan Diyos ay nangisaad sin agew ta say maneysey-ang sin kaagawan ya nangiolnos sin pantean din bowan ya tatalaw ay maningtinggaw sin labi. Papigsaena din dalloyon sin baybay et man-agodood. Sisya si Yahweh ay Kangatoan ay Turay. 36 Inkari na ay komakaman ed Israel ay kaman din mawawadaan abe dana ay pinarsua na ed daya sin kad-an da. 37 Kanana, “Naligat ay malkod ed daya ya maanap din lanad di daga. Iso na abe ay naligat ay dokogak din amin ay polin Israel gapo sin basbasol da.” 38 39 40

† 31:9 Ed Efraim di panakaawak din sinpo ay tribu ay tapin din nasyon ay Israel. Dowa abe ay tribu di naitatapi ed Juda. ‡ 31:15 Mateo 2:18. § 31:34 Hebreo 8:8-12.

## 32

*Din Nanlakoan Jeremias Si Daga*  
(32:1-15,26-41)

<sup>1</sup> Sin maikasinpo ay tawen ay nanturayan Zedekias ed Juda, waday kalin Diyos ay naipaammo en Jeremias. Siya abe di maikasinpo ya wao ay tawen ay nanturayan Nebukadnezzar ed Babilonia. <sup>2</sup> Sin doy ay timpo, linilikob ya gobgobaten din sosoldado ay taga-Babilonia din siyodad ay Jerusalem. Din mamadto ay si Jeremias yan wada ay naibabalod sin pantean di gogowardiyan di palasyon di ari ed Juda. <sup>3</sup> Inpaibalod Ari Zedekias si Jeremias begew sin inpadto na ay kanana, “Siya na di ibagan Diyos: Ipalobos ko ay abaken din ari ed Babilonia din siyodad ay nay <sup>4</sup> et adi makalisi si Ari Zedekias mo adi et maipolang sin ari ed Babilonia et maila na ya mankali da ay sangosango. <sup>5</sup> Maiey si Zedekias ed Babilonia et mantees di enggana ay dosaek sisya. Olay mo makigobat sin taga-Babilonia et adi mangabak.”

<sup>6</sup> Kanan Jeremias, “Inbagan Diyos en sak-en <sup>7</sup> ay omali si Hanamel ay anak Sallum ay pangamaek et damagena mo lakoak din payew na ed Anatot. Waday lebbeng ko ay manlako, tan sak-en di kaasag-enan ay ton-od na. <sup>8</sup> Natongpal din inbagan Diyos, tan inmali din kasingsing ko yan kanana, ‘Lakoam din dagak ed Anatot ay sakop di Benjamin. Sik-a di kaasag-enan ay ton-od ko et waday lebbeng mo ay manlako ya mangoka, isonga lakoam ta okaem.’ Naawatak ay siya na di inbilin Diyos ay amagek. <sup>9</sup> Et nilakoak din payew Hanamel et tinimbang ko din pilak yan manbanol si sinpo ya pito ay palata.

<sup>10</sup> “Pinirmaak ya pinatistigoak din kasolatan yan indawat ko din pilak. <sup>11</sup> Idi makdeng di, inak din kasolatan ay pamaneknek di nanlakoak, din nakalokat ay kopya ya din baken nakalokat ay say naisolatan din tolagan. <sup>12</sup> Indawat ko dana en Baruk ay anak Nerias ya apon Maseyas. Indawat kon sisya sin sangoanan Hanamel, din sasaksi ay nanpirma sin kasolatan ya sin Jujudio ay tomotokdo sin pantean di gogowardiya. <sup>13</sup> Sin sangoanan da amin, kanak en Baruk, <sup>14</sup> ‘Binilin daka en Yahweh ay Kangatoan ay Turay ay Diyos di Israelita ay alaem dana ay kasolatan ta idolin mo si koli ay dinamili ta adi da madadael. <sup>15</sup> Tan siya na din kanana: Awni et wada kasin di manlako ya mangilakos bebbeey, papayew ya kaobasan sin nay ay ili.’ ” <sup>16 17 18 19 20 21 22 23 24 25</sup>

<sup>26</sup> Idi makdeng di, waday inpaammon Diyos en Jeremias ay kanana, <sup>27</sup> “Sak-en si Yahweh ay Diyos di amin ay ipogaw. Maga polos di adiak kabaelan ay amagen. <sup>28</sup> Isonga ipalobos ko ay abaken da Nebukadnezzar ay ari ed Babilonia din siyodad ay nay. <sup>29</sup> Senggep dan to din mangobgobat sin siyodad et pooan da, pati din beey di kaipoipogaw ay nangipabonget en sak-en. Inmipabonget da gapo sin nan-ipoan da si insinso ay indaton dan Baal sin atep di beey da ya nan-isoyat das arak ay indaton da si didiyosen.

<sup>30-31</sup> “Manipod sin nanlogian da ay nasyon, pag din lawa sin pangilak di inam-amag din ipogaw ed Juda ya Israel. Manipod pay sin nabangonan nina ay siyodad engganad wani, palalo ay omipabonget da, isonga inkeddeng ko ay dadaelek. <sup>32</sup> Dadaelek gapo sin basbasol di omili ed Israel ya ed Juda—din basol di aari, papangolo, papadi, mamadto ya amin ay ipogaw, pati din taga-Jerusalem. <sup>33</sup> Dinokogan das sak-en yan olay mo kanayon ay itdoak daida, adi da dengngen ya adi da ipatpati di pamagbaga. <sup>34</sup> Inpeey da din kaliliget ko ay didiyosen da sin Timplo ay kaidaydayawak et inpakadodogis da. <sup>35</sup> Nan-amag da abe si altar para en Baal sin Tanap ay Ben-hinnom. Isdi ay indaton da din aan-ak da en Molek ay didiyosen. Adiak inbilin dana ay amagen da ya adiak polos ninemnem dana ay kadodogis ay panbasbasolan di ipogaw ed Juda.”

<sup>36</sup> Kanan Yahweh ay Diyos di Israelita, “Inbagbagam sin ipogaw ay abaken din taga-Babilonia din siyodad ay nay et matey da si gobat, betil ya kaeegyat ay sakit. Ed wani, dengngem din ibagak. <sup>37</sup> Awni et alaek daida sin inil-ili ay pangipaaddawiak en daida.

Pansisianek daida gapo sin palalo ay bonget ko, ngem asiak itaolis daida isnan ili ay nay ta natalna di biyag da. <sup>38</sup> Manbalin da ay ipogaw ko et sak-en di Diyos da. <sup>39</sup> Iturong ko di nemnem da ta say kanayon ay ipapasnek da ay mangipateg ya emegyat en sak-en, tan say pansigdan da ya din aan-ak da. <sup>40</sup> Waday itolag ko en daida ay magay pap-eng na. Adiak isaldeng ay man-amag si siged para en daida ya iturong kon to di nemnem da ay emegyat ya mangipateg en sak-en ta adi dan polos domokog. <sup>41</sup> Maragsakanak to ay mangidawat si pansigdan da ya naimposoan ay isaad kos daida sin daga ay nay.” <sup>42 43 44</sup>

## 33

1 2 3 4 5

### *Din Somigedan Kasin Di Juda Ya Israel*

(33:6-9,14-21)

<sup>6</sup> Kanan Diyos, “Ed wani, agasak di ipogaw sin siyodad ay nay ta somalon-at da. Agasak din ipogaw ko et ipalak-am ko en daida di ragsak gapo sin natalna ay kasasaad da. <sup>7</sup> Itaolik din naipaaddawi ay ipogaw ed Juda ya Israel yan bangonek kasin din ili da ta kaman din iso na ed idi. <sup>8</sup> Linisak daida sin amin ay basbasol dan sak-en ya pakawanek daida. <sup>9</sup> Manbalin to ed Jerusalem ay panragragsakak ya kaidaydayawak sin sangoanan di nanasyon ay makadnge sin amin ay siged ay inamag ko en daida. Et manpayegpeg das egyat da gapo sin amin ay bindisyon ya talna ay idawat ko.” <sup>10 11 12 13</sup>

<sup>14</sup> Kanan Diyos, “Domteng to di timpo ay tongpalek din karik sin ipogaw ed Israel ya Juda. <sup>15</sup> Sin doy ay timpo, pawadaek to di nalinteg ay polin David ay maiarig si pingi et kosto ya nalinteg di iyat na ay mangituray sin ili. <sup>16</sup> Sin doy ay timpo, maisalakan to din ipogaw ed Juda et natalna di biyag da ed Jerusalem. Din ipangadan da sin siyodad da et ‘Si Diyos di Napoan di Kinalinteg mi.’ <sup>17</sup> Sak-en si Diyos yan ikarik ay kanayon ay wada di polin David ay mangituray ed Israel. <sup>18</sup> Kanayon abe ay wada di papadi ay polin Levi ay mansilbi en sak-en ay man-idaton si mapoan ya arina, siya abe sin odom ay daton.”

<sup>19</sup> Kanan Diyos, <sup>20</sup> “Adi mabalin ay mabaliwan din inkeddeng ko ay iyat di kaagawan ya labi ay mansinokat et kanayon ay wada da sin inkeddeng ko ay timpo da. <sup>21</sup> Say iso na abe ay adi maibabawi din intolag kon David ay baak et adi mamaga di poli na ay maisokat ay man-ari. Adi aben maibabawi din intolag ko sin papadi ay polin Levi ay mansilbi en sak-en.” <sup>22 23 24 25 26</sup>

## 34

1 2 3 4 5 6 7 8 9 10 11 12 13 14 15 16 17 18 19 20 21 22

## 35

1 2 3 4 5 6 7 8 9 10 11 12 13 14 15 16 17 18 19

### *Din Nalopilop Ay Papil*

Sin maikap-at ay tawen ay nanturayan Ari Jehoyakim ed Juda, inbilin Diyos en Jeremias ay man-as nalopilop ay papil ta isolat na amin din inpaipadto na en sisya barbareng ibabawin din kaipoipogaw din basbasol da mo dengngen da kasin din kaeegyat ay inkeddeng Diyos ay dosa da. Tinongpal Jeremias din inbagan Diyos et inpaisolat na am-in en Baruk ay baa na. Pag nan ibaa sin Timplo ta ibasa na sin kaipoipogaw.

Idi inbasa na am-in, waday nangipadamag sin ari, et inpaialin din ari din nalopilop ay papil ta maibasa abe en sisya ya din oopisyal na. Napasamak di sin tinmeg-inana, isonga wada da am-in sin esa ay kowarto ay man-an-anido. Tonggal makdeng ay inbasan di baan di ari di esa ya esa ay paset di naisolat, potoen din ari si gipan et itep-a na sin apoy enggana ay napoan din intiro ay nalopilop ay papil. Magay inpailan din ari ya din iib-a na si egyat ono ladingit begew sin kalin Diyos ay dinnge da. Inbilin din ari ay depapen das da Jeremias en Baruk, ngem laton ay intabon Diyos daida.

Gapo sin doy ay inamag Jehoyakim, inkeddeng Diyos ay magan to di poli na ay manturay,\* et mo si Jehoyakim, maitep-a din awak na sin lasin di siyodad et adi maiponpon. Mo pay si Jeremias, nan-as esa ay nalopilop ay papil et inpaisolat na kasin en Baruk am-in din naisolat sin napooan ay papil. (36:1-32)

## 36

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32

### *Din Naibalodan Jeremias*

Sin timpo ay nanturayan Zedekias, inmali din taga-Babilonia ay mangobat ed Juda et linikob da ed Jerusalem. Pag manlobwat din taga-Egipto ay en bomadang sin taga-Juda. Idi inammoan din taga-Babilonia, kinmaan da ed Jerusalem ta en da gobaten din taga-Egipto.

Idi siya di, kanan Jeremias ay nangipadto, “Adi yo kankanan en bay-an din taga-Babilonia si datako, tan awni et somaa din soldadon di Egipto et mantaoli din taga-Babilonia isna. Abaken da din siyodad et poon da.” Pag dan pabasolen si Jeremias ay kanan da en panggep na ay maitapi sin taga-Babilonia, et inbalod da. (37:1-21)

## 37

1 2 3 4 5 6 7 8 9 10 11 12 13 14 15 16 17 18 19 20 21

## 38

<sup>1</sup> Dinngen da Sefatias ay anak Matan, Gedalias ay anak Pasur, Jehucal ay anak Selemias ya si Pasur ay anak Malkias din inbagan Jeremias sin amin ay ipogaw. Inbaga nan daida <sup>2</sup> din inbagan Diyos ay kanana, “Amin din adi komaan isnan siyodad et matey si gobat, betil ono kaeegyat ay sakit. Ngem adi matey din komaan ay somoko sin taga-Babilonia et makalisi ya matago dan to.” <sup>3</sup> Inbagan aben Jeremias din kanan Diyos en sigurado ay ipalobos na ay abaken din sosoldadon di ari ed Babilonia din siyodad.

<sup>4</sup> Pag kanan din oopisyal sin ari, “Lebbeng na ay matey din ipogaw ay nay, tan pakapkapsotena di nemnem din sosoldado ay nabay-an sin siyodad ya din kaipoipogaw begew sin ibagbaga na. Baken din pansigdan di ipogaw di nemnemnemena mo adi et din kadadaelan da.”

<sup>5</sup> Kanan Ari Zedekias, “Wadan dakayo mo sino di layden yo ay amagen en sisya. Adiak paritan dakayo.” <sup>6</sup> Wada di bobon Malkias ay anak di ari sin pantean di gogowardian di palasyo yan magay danom na, pitek anggoy di wada. Ina das Jeremias yan tinalian da, asi da in-oy-oy ay inkosnong sin bobon, et naillem sin pitek.

<sup>7</sup> Dinngen Ebed-Melek ay taga-Etiopia ay esa ay opisyal sin palasyon di ari ay inkosnong das Jeremias sin bobon. Sin doy ay timpo, wada din ari ay tinmotokdo ay manongtong si kaso sin kad-an di makwani en Segpan Benjamin. <sup>8</sup> Tinaynan Ebed-Melek din palasyo et en nakikali sin ari. <sup>9</sup> Kanana, “Apo ari, lawlawa di inamag da en Jeremias ay mamadto, tan inkosnong da si bobon et matey isdi si dagaang mo enggay magay tinapay sin siyodad.”

<sup>10</sup> Pag kanan din ari en Ebed-Melek, “Man-ikoyog ka si tolonpo\* ay lallalaki ay wadas na ta en yo enaten sin bobon si Jeremias ay mamadto ta adi matey.” <sup>11</sup> Et inkoyog Ebed-Melek din lallalaki, pag en nan-as daan ay lopot sin pan-idoldolinan sin palasyo. Tinaliana din lopot, pag nan ioy-oy en Jeremias sin bobon. <sup>12</sup> Pag kanan Ebed-Melek en Jeremias, “Imag mo sin gagayyek mo din lopot ay iapin mo sin lobid.” Et say inyat

\* **36:** Nanturay si Jehoyakin ay anak Jehoyakim si tolo ay bowan anggoy, asi naipakaan din turay na. \* **38:10** “Tolonpo” di kanana sin MT. Din kanana abe sin LXX ya esa ay manuskrito ay Hebreo et “tolo.”

Jeremias. <sup>13</sup> Ginoyod da din lobid et binmala si Jeremias sin sakdoan. Pag mantee sin kad-an di gogowardiya.

<sup>14</sup> Sin namingsan, inpaayag Ari Zedekias din mamadto ay si Jeremias et inparang dan sisya sin maikatlo ay segpan di Timplo. Kanana en Jeremias, “Waday salodsodek en sik-a yan maga koma di ilibak mo.”

<sup>15</sup> Kanan Jeremias ay nanongbat en Zedekias, “Mo ibagak din tet-ewa, omipapse ka met. Mo bagbagaak sik-a, adi ka met laeng patien.”

<sup>16</sup> Isonga inlimed Ari Zedekias ay nansapata en Jeremias ay kanana, “Isapatak sin matmatago ay Diyos ay nangidawat si biyag tako ay adiak peslen sik-a ono idawat sin ipogaw ay manpanggep si biyag mo.”

<sup>17</sup> Pag kanan Jeremias en Zedekias, “Siya na di kanan Yahweh ay Kangatoan ay Turay ay Diyos di Israelita: Mo somoko ka sin oopisyal di ari ed Babilonia, adi kan matey mo adi et makalisi kayo ay sinpamilya. Adi aben mapooan din siyodad. <sup>18</sup> Ngem mo adi ka somoko, abaken das dakayo ya segpen da ya pooan da din siyodad yan adi ka makalisi.”

<sup>19</sup> Kanan Ari Zedekias en Jeremias, “Emegyatak met sin Jujudio ay naitapi sin taga-Babilonia tan into et mo omipolang din taga-Babilonia en daida et pomaligat da.”

<sup>20</sup> Ngem kanan Jeremias, “Aga, adi mapasamak sa. Basta tongpalem din kalin Diyos ay ibagak en sik-a et kosto di pantongpalam ya makalisi ka. <sup>21</sup> Ngem mo adi ka somoko, wada di inpaammon Diyos en sak-en ay mapasamak: <sup>22</sup> Amin din babbabai ay nabayan sin palasyo et maipabala da ta maipolang da sin oopisyal di ari ed Babilonia. Mo labsan daka yan kanan da, ‘In-aw-awan daka sin pantaltalkam ay gagayyem mo et adi da binigbig din turay mo. Ed wani ay mailemlem din sikim sin pitek yan binaybay-an daka.’ ”

<sup>23</sup> Pag ipidwan Jeremias ay nangwani, “Amin din aas-awa ya aan-ak yo yan maipolang da sin taga-Babilonia. Olay sik-a yan adi ka makalisi et depapen daka ay balod din ari ed Babilonia yan mapooan abe din siyodad ay nay.”

<sup>24</sup> Pag kanan Zedekias en Jeremias, “Adi kan daddad-aten nan nankalian ta si olay sino tan mo say iyat mo et matey ka. <sup>25</sup> Mo dengngen din oopisyal ay nankali ta yan egyaten das sik-a ay peslen daka mo adi kan ibaga din inbagak. <sup>26</sup> Ibagam en daida ay nanpakaasi kan sak-en ta adi kan maiey ay en matey sin beey Jonatan.”

<sup>27</sup> Inmey tet-ewa amin din oopisyal ay en nansalodsod en sisya, ngem say insongbat na amin din inbagan di ari, et ginminek da tan magay nanngge sin nankalian da. <sup>28</sup> Et nantee si Jeremias sin kad-an di gogowardiya enggana sin agew ay naabakan di Jerusalem.

### *Din Naipaaddawian Da Jeremias Ed Egipto*

Sin maikasinpo ya esa ay tawen ay nanturayan Zedekias ed Juda, pinilit din sosoldado ay taga-Babilonia ay sinenggep sin alad ed Jerusalem. Linmayaw si Zedekias sin labi, ngem dinpap din sosoldado et initlod di odom ed Ribla ay sakop di Hamat. Isdi ay pinse da din aan-ak Zedekias sin sangoanana, pag dan boldingan sisya et inbaa da ed Babilonia ay maibalod. Din odom ay soldado et pinooan da din beebey ed Jerusalem ya binakas da din alad. Pag dan ikoyog din kaad-adoan ay omili ed Babilonia. Binay-an da anggoy din kabibitegan en daida et dinotokan das Gedalias ay gobernador.

Kanan da en oway si Jeremias mo makiey ed Babilonia ono mantee ed Juda. Pinili na ed Juda et en nantee ed Mizpa ay kad-an Gedalias. Ngem baken nabayag yan wada day namse en Gedalias. Emegyat di odom ay Judio sin amagen din taga-Babilonia et dinamag da en Jeremias mo sinoy layden Diyos ay amagen da. Inpadto na ay mo mantee da ed Juda, pasigeden Diyos di biyag da, ngem mo lomayaw da ed Egipto, matey da amin si gobat, betil ya kaeegyat ay sakit. Ngem adi dan inonodan din layden Diyos, mo adi et pinilit da ay makiey si Jeremias ed Egipto. Sin kawada nas di, waday inpaammon Diyos en sisya maipanggep en Baruk ay baa na. (39:1–44:14)



1 2 3 4 5 6 7 8 9 10 11 12 13 14 15 16 17 18

## 39

1 2 3 4 5 6 7 8 9 10 11 12 13 14 15 16

## 40

1 2 3 4 5 6 7 8 9 10 11 12 13 14 15 16 17 18

## 41

1 2 3 4 5 6 7 8 9 10 11 12 13 14 15 16 17 18 19 20 21 22

## 42

1 2 3 4 5 6 7 8 9 10 11 12 13

## 43

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30

## 44

## 45

### *Din Inkarin Diyos En Baruk*

<sup>1</sup> Siya na din inbagan din mamadto ay si Jeremias en Baruk ay anak Nerias idi nakdeng ay insolat Baruk si nalopilop ay papil din inbagbaga na en sisya. Sin doy ay timpo yan say maikap-at ay tawen ay nanturayan Jehoyakim ay anak Josias ay ari ed Juda. Kanan Jeremias, <sup>2</sup> “Siya na di kanan Yahweh ay Diyos di Israelita en sik-a ay Baruk: <sup>3</sup> Kankanam, ‘Kaasiak pay isna! Tinapian Diyos din ligat ko ya panladladingitak. Enggay nabbayak ay manpapakaaasi yan magay lomag-anana.’ ”

<sup>4</sup> Ngem kanan Diyos: “Dadaelek din insaad ko ya gabotek din inmolak. Amagek na isnan intiro ay daga. <sup>5</sup> Apay nga an-anapem di somigedan di kasasaad mo? Adi kan say iyat, tan dosaek amin ay ipogaw, ngem sik-a pay yan adi ka maan-ano olay intoy ememeyam.” Siya na di inbagan Diyos.

### *Din Naipadto Maipanggep Sin Odom Ay Nasyon Ya Din Nadadaelan Di Siyodad Ay Jerusalem*

Wada abe di inpadton Jeremias maipanggep si odom ay nasyon ay ed Egipto, Filistia, Moab, Ammon, Edom, Damascus, Kedar, Hazor ya Elam. Kanana en makilak-am da amin si dosa babaen sin taga-Babilonia, ngem asi pabaroan Diyos din kasasaad di nasyon ay Egipto, Moab, Ammon ya Elam. Pag dosaen aben Diyos ed Babilonia.

Sin naodi ay kapitolo (52:1-34) madad-at kasin din naabakan ya nadadaelan di Jerusalem. Din istorya ay nay et madtengan abe sin 2 Aari kapitolo 24-25. (46:1–52:34)

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28

## 46

1 2 3 4 5 6 7

## 47

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47

## 48

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39

## 49

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46

## 50



# 51

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51 52

# 52

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34

## Ladladingit Maipanggep Sin Libro Ay Nay

Din linaon di libro ay nay et din pangibalikasan di Judio sin palalo ay sakit di nemnem da begew sin nadadaelan di Jerusalem sin 586 B.C. Din nangisolat isna et ammo na ay nadosa din ipogaw Diyos begew sin basbasol da, ngem namnamaena abe ay seg-angan kasin Diyos din ipogaw na mo ibabawi dan basbasol da ya sagongen das sisya.

1 2 3 4 5 6 7 8 9 10 11 12 13 14 15 16 17 18 19 20 21 22

**2**

1 2 3 4 5 6 7 8 9 10 11 12 13 14 15 16 17 18 19 20 21 22

**3**

### *Dosa Ya Namnama* (3:1-3,17-26,31-33)

<sup>1</sup> Sak-en di esa ay nakilaklak-am sin dosan Diyos. <sup>2</sup> Inmipakaan sin kad-ana ta say manteeak sin kad-an di palalo ay mabolinget, <sup>3</sup> et sak-en di kanayon ay sopsoplitena.

4 5 6 7 8 9 10 11 12 13 14 15 16

<sup>17</sup> Enggay nilinglingak din ison di ragsak ya mayat ay biyag. <sup>18</sup> Isonga kanak si nemnem ko, “Enggay namaga di bikas ko ya siya abe sin namnamak en Diyos.” <sup>19</sup> Kaman pait di pedis ya sabidong di pannemnem ko mo nemnemek din ligligat ko ya kinaiwed di beey ko. <sup>20</sup> Kanayon ay nemnemek na yan palalo ay domismaya.

<sup>21</sup> Ngem pomigsa kasin di namnamak mo say nemnemek <sup>22</sup> din magay pap-eng na ay layad ya seg-ang Diyos. <sup>23</sup> Gapo sin palalo ay kinamatalek na, inag-agew ay ipaila nan seg-ang na. <sup>24</sup> Isonga kanak si nemnem ko, “Si Diyos anggoy di wada en sak-en, sisya di pannamnamaak.” <sup>25</sup> Siged si Diyos sin manganap ya mantalek en sisya. <sup>26</sup> Mayat ngarud mo anosan tako ay manseed sin omisalakanana. <sup>27 28 29 30</sup>

<sup>31</sup> Tan adi domokdokog si Diyos si eng-enggana. <sup>32</sup> Olay mo omipalak-am si ligat ya ladingit, ngem seg-angana pay dedan si datako gapo sin dakdake ya adi manbalbaliw ay layad na. <sup>33</sup> Tan baken silalayad ay mangipawadas sakit ya ladingit en datako ay ipogaw. <sup>34 35 36 37 38 39 40 41 42 43 44 45 46 47 48 49 50 51 52 53 54 55 56 57 58 59 60 61 62 63 64 65 66</sup>

**4**

1 2 3 4 5 6 7 8 9 10 11 12 13 14 15 16 17 18 19 20 21 22

**5**

1 2 3 4 5 6 7 8 9 10 11 12 13 14 15 16 17 18 19 20 21 22

## Ezekiel Maipanggep Sin Libro Ay Nay

Si Ezekiel et esa ay padi ya mamadto ay napilit ay naiey ed Babilonia idi inabak da Nebukadnezzar din siyodad ay Jerusalem sin 597 B.C. Si Jeremias di kadesana ay mamadto.

Din nangun-ona ay padpadto na et maipanggep sin kadadaelan di Jerusalem sin 586 B.C. Idi enggay natongpal di, wada abey inpadto na ay pannamnamaan di iib-a na ay mangipapigsa sin nemnem da.

Wada day inpailan Diyos en Ezekiel ay kaman iitaw, di esa et din tanap ay napnos nango ay tong-a (kapitolo 37). Ad-ado abey inpaamag na en sisya ay mangipaila sin mapasamak sin tapin di agew. Gapo ta padi si Ezekiel, ad-adoy inbaga na ay maipanggep sin Timplo ya din nasantoan ay kabibiyag ay panlaydan Diyos.

### **Din Linaona**

Din nangayagan Diyos en Ezekiel 1:1-3:27

Din panosaan Diyos ed Juda ya Jerusalem 4:1-24:27

Din panosaan Diyos sin odom ay nasyon 25:1-32:32

Din inkarin Diyos sin ipogaw na 33:1-37:28

Din kaabakan di Gog 38:1-39:29

Din kasin somigedan di Timplo ya ilin di Israelita 40:1-48:35

### *Din Mankoniniing Ay Kinadiyos En Yahweh*

*(1:1-6,15-22,26-28)*

<sup>1-3</sup> Sak-en si Ezekiel ay anak Buzi. Esaak ay padi ay naikoyog en da Ari Jehoyakin idi napilit kami ay naiey ed Babilonia. Inmey di lima ay tawen manipod sin napasamak di. Nakiiliak sin iib-ak ay Judio sin benget di ginawang ay Kebar ed Babilonia. Sin pitsa 5 di maikap-at ay bowan sin maikatolonpo ay tawen, \* wadaak sin benget di ginawang ay sana. Idi siya et di, nalokatan ed langit yan waday naipaila en sak-en ay kaman iitaw ay maipanggep en Diyos. Wada abey kalin Diyos ay inpaibaga nan sak-en yan naliknak din panakabalina.

<sup>4</sup> Idi nantangadak, inilak di napigsa ay dagem ay mapmapo sin amyanan. Waday somilsilap ay kimat ay mapmapo sin naposkol ay liboo et masilawan din nanliniked. Sin gawan di apoy, waday mankoniniing ay kaman bronsi. <sup>5</sup> Wada abey opat ay matmatago ay parsua. Kaman ipogaw di kailaan da, <sup>6</sup> ngem sag-ooapat di ropa da ya payak da. <sup>7 8 9 10 11 12 13 14</sup>

<sup>15</sup> Idi boyboyaek daida, inilak di sag-eesa ay baliling ay tinatakdo da ay maisagsagid sin lotta. <sup>16</sup> Siya na di kailaan da ya amag san baliling ay sana: Somilsilap da ay kaman nabanol ay bato yan nan-iiso da amin ay opat. Tonggal esa yan waday kasin baliling sin gawa na ay natken di tinurong da. <sup>17</sup> Olay into ay soli ay sagongen da yan mabalin ay emey da ay adi masapol ay manposwid din baliling. <sup>18</sup> Nakayang ya nakaskasdaaw da san baliling yan waday mata da sin nanliniked. <sup>19-21</sup> Mo mankoti ono somaldeng din matmatago ay parsua, say iyat met laeng abe din baliling ay tinatakdo da. Mo komayang da yan komayang abe din baliling. Mo intoy emeyan din ab-abiik da yan say emeyan da et makiey en daida din baliling, tan din ab-abiik di matmatago ay parsua yan wada met laeng sin baliling.

\* **1:1-3** Julyo 31, 593 B.C. sin kalindaryo tako. Kanan di odom en siya na di maikatolonpo ay tawen Ezekiel tan din padin di Judio, ilogi da ay mansilbi mo mantawen das tolonpo. Kanan aben di odom en siya na di maikatolonpo ay tawen nanipod sin nantengan da sin linteg Diyos sin Timplo sin timpon Ari Josias.

<sup>22</sup> Sin kayang di toktok da yan waday mankoniniing ay kaman din nabanol ay salming ay makwani en kristal. <sup>23</sup> <sup>24</sup> <sup>25</sup> <sup>26</sup> Sin kayang aben di salming, waday kaman tronon di ari ay din amag na yan kaman din nabanol ay bato ay makwani en safiro. Sin kayang di trono yan waday kaman ipogaw di kailaana <sup>27</sup> ay mankoniniing ay kaman naldang ay bronsi sin gawan di apoy et silawana din nanliniked. <sup>28</sup> Din kailaan di silaw na yan kaman din badkong sin pinag-oodan et ipaila na din mankoniniing ay kinadiyos en Yahweh.

## 2

### *Din Nangayagan Diyos En Ezekiel* (2:1-10; 3:3-9,14-15)

Idi inilak di, nanlakpapak sin lota yan waday dinngek ay kali. <sup>1</sup> Kanana, “Sik-a ay anak di ipogaw, pomika ka ta waday ibagak en sik-a.” <sup>2</sup> Idi inbaga na di, sinenggep din Ispiriton Diyos en sak-en et inmipapika yan dinngek ay makikalkali en sak-en. <sup>3</sup> Kanana, “Anak di ipogaw, ibaak sik-a sin Israelita. Kanayon ay kinmonkontra da ya linablabsing dan bilbilin ko enggana ed wani, daida ya din aap-o da. <sup>4</sup> Adi dan kabagbagaan ya makenteg di nemnem da, isonga ibaak sik-a ta ipaammom en daida din kalik ay Kangatoan ay Diyos. <sup>5</sup> Dengngen daka man sin komonkontra ono aga, ammoen da pay dedan ay waday mamadto ay inbaak en daida. <sup>6</sup> Ngem sik-a ay anak di ipogaw, adi ka emeg-egyat en daida ya sin ibaga da. Olay mo kaman dan pagat ya gayaman ay nanlikob en sik-a, adi kan emeg-egyat sin kali da ono sin kailaan da. <sup>7</sup> Masapol ay ibagam en daida din ibagak en sik-a, dengngen da man ono aga. Nemnemnemem koma ay makenteg dedan di nemnem da.

<sup>8</sup> “Sik-a ay anak di ipogaw, adi kan komonkontra ay kaman daida mo adi et dengngem din ibagak en sik-a. Bokatom san tepek mo ta kanem nan idawat ko en sik-a,” kanana. <sup>9</sup> Pag et waday inilak ay takkay ay mangidawat en sak-en si nalopilop ay papil. <sup>10</sup> Inoklag na yan kambaw nasolatan sin nanbinas-il. Din naisolat yan din kalin di ipogaw ay man-ey-eyaey, manladladingit ya manbaybayeweng.

## 3

<sup>1</sup> <sup>2</sup>

<sup>3</sup> Kanan Diyos, “Sik-a ay anak di ipogaw, kanem nan papil ay idawat ko en sik-a ta mabsog ka.” Kinan ko yan mam-is di katamtamana.

<sup>4</sup> Pag kanan Diyos, “Anak di ipogaw, emey ka et sin Israelita ta ipaammom en daida din ipaibagak en sik-a. <sup>5</sup> Tan din pangibaaak en sik-a et baken ipogaw ay kaman titit di kali da ay adi kaaw-awatan, mo adi et din iib-am ay Israelita. <sup>6</sup> Mo ibaak komas sik-a si napigsa ay nanasyon ay adi kan maawatan din natken ya naligat ay kali da, dengngen da pay dedan di ibagam. <sup>7</sup> Ngem mo din Israelita pay, maga en daida di mangasikaso, tan olay sak-en yan adi dan domnge. Tan pag dan nasokil ya makenteg di nemnem da. <sup>8-9</sup> Ngem olay mo kaman nidi di ogali da, adi kan emegyat en daida, tan panbalinek sik-a ay makenkenteg mo moling ay bato ono diamond ta say napigsa ya natoled ka mo daida.” <sup>10</sup> <sup>11</sup> <sup>12</sup> <sup>13</sup>

<sup>14</sup> Sin nangwanian Diyos sidi, inmikayang din Ispirito na ta omiey sin laydena ay emeyak. Mansakit di nemnem ko ya manbongetak, ngem dowanak aben nalikna din panakabalin Diyos. <sup>15</sup> Siya di, dinmatengak ed Tel Abib sin benget di ginawang ay Kebar ay pantean din iib-ak ay naikaan sin ili mi. Nakitokdoak en daida si pito ay agew yan kamanak nasngang sin nakaskasdaaw ya kaeegyat ay dinngek ya inilak.

### *Din Nangdotokan Diyos En Ezekiel Ay Mamanbantay* (3:16-21)\*

\* 3:15 3:16-21 - Ilaen abe sin 33:1-9.

<sup>16</sup> Idi malabas di pito ay agew, waday inpaammon Diyos en sak-en ay kanana, <sup>17</sup> “Sik-a ay anak di ipogaw, dinotokak sik-a ay mamananbantay sin Israelita. Isonga masapol ay idadaan mon daida am-in ay paibagak en sik-a. <sup>18</sup> Mo ipaammok en sik-a ay matey di esa ay ipogaw ay mangam-amag si lawa yan adi kan bagbagaan ay balbaliwana din ogali na ta say maisalakan din biyag na, matey sisya begew sin basol na, ngem singilek en sik-a din biyag na. <sup>19</sup> Ngem mo binagbagaam dowan adi manbabawi ya adi na isaldeng din lawa ay am-amagena, matey sisya gapo sin basol na, ngem sik-a pay yan maisalakan din biyag mo. <sup>20</sup> Mo wada abe di nalinteg ay ipogaw ngem isaldeng na ay mangamag sin kosto et say amagena din lawa, idawtak si kaisokbaana et matey mo adi ka bagbagaan. Matey sin basol na yan adiak nemnemen din siged ay inam-amag na, ngem songbatam en sak-en din biyag na. <sup>21</sup> Ngem mo bagbagaam sisya ay adi man-amag si lawa et adi manbasol, sigurado ay matagos sisya tan pinati na din pamagbaga yan matago ka abe.”  
22 23 24 25 26 27

1 2 3 4 5 6 7 8 9 10 11 12 13 14 15 16 17

**4**

1 2 3 4 5 6 7 8 9 10 11 12 13 14 15 16 17

**5**

1 2 3 4 5 6 7 8 9 10 11 12 13 14

**6**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27

**7**

1 2 3 4 5 6 7 8 9 10 11 12 13 14 15 16 17 18

**8**

1 2 3 4 5 6 7 8 9 10 11

**9**

1 2 3 4 5 6 7 8 9 10 11 12 13 14 15 16 17 18 19 20 21 22

**10**

1 2 3 4 5 6 7 8 9 10 11 12 13

**11**

*Din Inkarin Diyos Sin Napilit Ay Naiey Ed Babilonia  
(11:14-21)*

<sup>14</sup> Kanan Diyos en sak-en, <sup>15</sup> “Sik-a ay anak di ipogaw, waday ibagbagan din man-ili pay laeng ed Jerusalem maipanggep sin iib-am ay Israelita ay napilit ay naiey issan ed Babilonia. Kanan da en gapo ta inmaddawi kayo en sak-en, daida kano di nangidawtak sin daga yo. <sup>16</sup> Ngem siya nay ibagam sin iib-am issan ed Babilonia. Kanam en siya nay inbagan din Kangatoan ay Diyos: Olay mo nansisianek daida ay inpaaddawi sin odom ay nanasyon, ngem sin sinkaattikan ay kawada da isdi yan wadaak pay dedan ay kaman Timplo sin kad-an da. <sup>17</sup> Isonga ibagam en daida ay taoliek daida sin il-ili ay naipaaddawian da ta itaolik en daida din ili da ay Israel. <sup>18</sup> Sin domatngan das di, kaanen da am-in din kadodogis ya kaliliget ko ay didiyosen ay datngan da. <sup>19</sup> Awni et sokatak din binmato ay nemnem da si baro ay nemnem ay naimposoan ya manang-awat. Pan-es-esaek di nemnem da <sup>20</sup> ta say tongpalen da din bilbilin ko. Et daida din ipogaw ko yan sak-en di Diyos da. <sup>21</sup> Ngem din napasnek ay manaydayaw si kadodogis ya kaliliget ko ay didiyosen et dosaek daida begew sin inam-amag da.” Siya nay inbagak ay Kangatoan ay Diyos. 22 23 24 25

**12**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28

**13**

1 2 3 4 5 6 7 8 9 10 11 12 13 14 15 16 17 18 19 20 21 22 23

**14**

1 2 3 4 5 6 7 8 9 10 11 12 13 14 15 16 17 18 19 20 21 22 23

**15**

1 2 3 4 5 6 7 8

**16**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49 50 51

**17**

1 2 3 4 5 6 7 8 9 10 11 12 13 14 15 16 17 18 19 20 21

*Din Pangarig Ay Maipanggep Sin Kaiw Ay Sidro*  
(17:22-24)

<sup>22</sup> Siya na di kanan Yahweh ay Diyos, “Sin otbok di kaiw ay sidro, man-aak to si kasimsimit na ay pingi. Sak-en ay mismo di mangimola sin kakayangan ay dontog <sup>23</sup> ed Israel. Awni et manpanga ya manlames. Manbalin ay magabay ay kaiw. Mansidom isdi di am-in ay kalasin di titit ya man-obong da sin panga na. <sup>24</sup> Ammoen to di am-in ay kaiw sin daga ay sak-en si Diyos. Poyoek din nakayang ay kaiw yan pakayangek din kinittoy. Pagabayek din nango yan paangoek din magabay. Sak-en si Diyos ay nangibagas na et tongpalek dana.”

**18***Din Nakabasol Di Madosa*  
(18:1-4,21-32)

<sup>1</sup> Waday inpaibagan Diyos en sak-en ay kanana: <sup>2</sup> “Dakayo ay Israelita, apay nga ibagbaga yo din apat ay kanana: ‘Nangan din aam-a da si naalsem ay obas yan nakilem di aan-ak da.’

<sup>3</sup> Sak-en din Kangatoan ay Diyos et isapatak ay awni et enggay adi yon ibagbaga din apat ay nay ed Israel. <sup>4</sup> Nemnemen yo ay okak amin ay manbibiyag. Din biyag di ama ya anak yan nan-iso ay okak. Mo sino di nanbasol et sisya di matey. <sup>5</sup> <sup>6</sup> <sup>7</sup> <sup>8</sup> <sup>9</sup> <sup>10</sup> <sup>11</sup> <sup>12</sup> <sup>13</sup> <sup>14</sup> <sup>15</sup> <sup>16</sup> <sup>17</sup> <sup>18</sup> <sup>19</sup> <sup>20</sup>

<sup>21</sup> “Mo di managbasol yan dokogana din amin ay basol na yan tongpalena amin din linteg ko ya say amagena din nalinteg ya kosto, adi matey mo adi et matagotagos sisya.

<sup>22</sup> Mapakawan amin ay basol na et matago gapo sin siked ay inamag na. <sup>23</sup> Ay siya mo malaydanak sin kateyan di esa ay managbasol? Aga! Say panragsakak mo manbabawi ta matagos sisya. <sup>24</sup> Ngem matey di esa ay nalinteg mo isaldeng na ay mangamag si kosto yan amagena din kababain ya lawa ay am-amagen di managbasol. Maliw-an din siked ay inamag na et matey, tan baken napodno ay mangonod en sak-en et nanbasol.

<sup>25</sup> “Ngem kanan yo, ‘Baken nalinteg di am-amagen Diyos.’ Ay kanan yo en baken nalinteg di am-amagek? Dakayo di baken nalinteg di am-amagena. <sup>26</sup> Mo din nalinteg ay ipogaw yan isaldeng na ay mangamag si siked et say amagena din lawa, matey sisya gapo sin basol na. <sup>27</sup> Ngem mo isaldeng di managbasol ay mangamag si lawa yan say amagena din nalinteg ya kosto, maisalakan din biyag na. <sup>28</sup> Gapo ta binigbig na din basol na yan dinokogana, laton ay matagos sisya. <sup>29</sup> Ngem kanan yo ay Israelita, ‘Baken nalinteg din am-amagen Diyos.’ Ay sak-en di baken nalinteg di am-amagena? Ay baken ayan si dakayo?

<sup>30</sup> “Dakayo ay polin Israel, okomek dakayo insigon sin inam-amag yo, isonga dokogan yo din lawa ay am-amagen yo ta adi kayo madosa gapo sin basbasol yo. <sup>31</sup> Isaldeng yo



am-in din lawa ay am-amagen yo. Apay nga ipalobos yo ay matey kayo ay Israelita?  
<sup>32</sup> Adiak malaydan sin kateyan di olay sino ay ipogaw, isonga manbabawi kayo ta matago kayo,” kanan din Kangatoan ay Diyos.

**19**

1 2 3 4 5 6 7 8 9 10 11 12 13 14

**20**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49

**21**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32

**22**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31

**23**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49

**24**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27

**25**

1 2 3 4 5 6 7 8 9 10 11 12 13 14 15 16 17

**26**

1 2 3 4 5 6 7 8 9 10 11 12 13 14 15 16 17 18 19 20 21

**27**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36

**28**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26

**29**

1 2 3 4 5 6 7 8 9 10 11 12 13 14 15 16 17 18 19 20 21

**30**

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26

**31**

*Din Kaiarigan Di Kaiw Ay Sidro*  
*(31:1-6,10-14)*

<sup>1</sup> Sin pitsa 1 di maikatlo ay bowan sin maikasinpo ya esa ay tawen nanlogi sin naipakaan mi ed Juda, waday inpaibagan Diyos en sak-en.\* Kanana, <sup>2</sup> “Sik-a ay anak di ipogaw, kanam sin Faraon ay ari ed Egipto ya sin amin ay ipogaw na: Magay pangis-oak en sik-a sin kinangatom. <sup>3</sup> Nemnemem ed Assyria ay maiarig sin kaiw ay makwani en sidro ed Lebanon. Magabay ya masaybog di panga na yan palalo ay nakayang ay indasana din liboo. <sup>4</sup> Inpagabay di danom ay mapmapo sin obbog ay inmayos sin kad-ana et nasibogan amin ay kaiw sin kada. <sup>5</sup> Gapo ta kosto di sibog na, nakaykayang mo din amin ay kaiw. Inmad-ado ya inmando din panga na. <sup>6</sup> Nan-obong amin ay kalasin di titit sin panga na yan nan-anak din atap ay aanimal sin sinidomana. Laydena ay kalien, nanlidom di nankapipigsa ay nasyon sin poona. <sup>7 8 9</sup>

\* **31:1** Inbagan Ezekiel na sin 587 B.C. ta nemnemen koman din ari ed Egipto din napasamak ed Assyria. Sin 609 B.C. inabak din taga-Babilonia din taga-Assyria ed Carchemish, et Babilonia di naiskat sin Assyria ay mangituray sin odom ay nanasyon.

<sup>10</sup> “Sak-en din Kangatoan ay Diyos yan siya na di ibagak maipanggep sin kaiw ay sana ay kinmayang ya indasana din liboo. Gapo ta dinmakdake yan inpangato nan nemnem na, <sup>11</sup> isonga linaksig ko ya inpalobos ko ay poyoen din mangiturturay si ad-ado ay nasyon ta ipalak-am na di maitimbang sin kinalawa na. <sup>12</sup> Pinoyon din kakedsean ay nasyon et naiwalang din napotopoto ay panga na sin kadondontogan ya tanap. Et tinaynan din nanasyon ay nanlidom en sisya. <sup>13</sup> Nanbatay din titit sin natokang ay kaiw yan in-gatigatin din atap ay animal din panga na. <sup>14</sup> Isonga manipod ed wani, magay nasyon ay kaman kaiw ay komayang enggana sin liboo olay mo mas-et di sibog na. Nakeddengan da amin ay manpatingga ay kaman din ipogaw ay emey da amin sin kad-an di natey.” <sup>15 16 17 18</sup>

## 32

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32

## 33

### *Din Nangdotokan Diyos En Ezekiel Ay Mamanbantay (33:1-11)*

<sup>1</sup> Kinwanin Diyos en sak-en, <sup>2</sup> “Sik-a ay anak di ipogaw, ibagam sin kakailiam din mapasamak mo pawadaek di gobat sin esay ili. Mandotok din ipogaw sin ili ay sana si esa ay man-gowardiya. <sup>3</sup> Mo waday ilaena ay kalaban, mananggoyob ta ammoen amin di omili. <sup>4</sup> Din mannge ay adi mangikaskaso, mo matey da et basol da met laeng. <sup>5</sup> Dinngge da din tanggoyob ngem adi da inkaskaso, isonga daida met laeng di akin basol si nateyan da. Mo pinati da koma et naisalakan din biyag da. <sup>6</sup> Ngem no inilan din gowardiya yan adi nananggoyob, et adi napaammoan din ipogaw yan domateng din kalaban da et peslen da din managbasol, singilek to din biyag da sin gowardiya.

<sup>7</sup> “Sik-a ay anak di ipogaw, dinotokak sik-a ay mamanbantay sin Israelita. Isonga masapol ay idadaan mon daida am-in ay paibagak en sik-a. <sup>8</sup> Mo ipaammok en sik-a ay matey di esa ay ipogaw ay mangam-amag si lawa yan adi kan bagbagaan ay balbaliwana din ogali na, matey sisya gapo sin basol na ngem singilek en sik-a din biyag na. <sup>9</sup> Ngem mo binagbagaam yan adi manbabawi, matey da begew sin basol da ngem sik-a pay yan maisalakan din biyag mo.

<sup>10</sup> “Sik-a ay anak di ipogaw, siya nay ibagam sin Israelita, ‘Kankanan yo: Nadadagse-nan kami sin basbasol mi ya din lawa ay inam-amag mi et enggay komapkapsot kami. Into pay di iyat mi ay matago? <sup>11</sup> Ngem kanan din Kangatoan ay Diyos: Isapatak ay adiak malaydan sin kateyan di managbasol. Say panlaydak mo manbabawi da ta matago da. Isonga ipidwapidwak ay mangibaga ay manbabawi kayo. Apay nga layden yo ay matey, dakayo ay polin Israel?’ ” <sup>12 13 14 15 16 17 18 19 20 21 22 23 24 25 26 27 28 29 30 31 32 33</sup>

## 34

### *Din Mangay-ayowan Sin Israelita (34:1-16,20-24)*

<sup>1</sup> Kinwanin Diyos en sak-en, <sup>2</sup> “Sik-a ay anak di ipogaw, man-ipadto ka si maipanggep sin tuturay ed Israel ta kanam en daida: Kaasi kayo pay ay maiarig si manpaspastol si karnero ay din awak da anggoy di nemnemnemen da. Lebbeng na koma ay ayowanan yo din kakarnero, <sup>3</sup> ngem inomen yo met din gatas da ya amagen yo ay bado din dotdot da. Paltien yo abe din kalamesan ay karnero, ngem polos ay adi yo ayowanan daida. <sup>4</sup> Adi yo inay-ayowanan din nakapsot. Adi yo aben inag-agasan din mansakit ono binedbedan din nasogatan. Mo din nasangaw ya nalitaw yan adi yo aben inan-anap. Din inamag yo et pinalpaligat yos daida. <sup>5-6</sup> Et nansisian dan karnerok yan owat dan lomikeliked sin dodontog ya nakayang ay bilbilig, tan magay mangipastol en daida.

Nansisian da sin intiro ay daga yan magay manganap en daida. Isonga nalaka ay dinpap ya insidan di atap ay animal.

<sup>7-9</sup> “Dakayo ay tuturay, dengngen yo din ibagak en dakayo tan siya nay isapatak, sak-en ay matmatago ya Kangatoan ay Diyos: Dinpap din mankaaangat ay animal din kakarnerok et pinse da ya insida da tan magay mangay-ayowan en daida. Adi inanap din manpaspastol daida. Say inasikaso da din awak da ay baken din kakarnerok. <sup>10</sup> Isonga ibilang kos dakayo ay manpaspastol ay kalaban ko et singilek dakayo gapo sin kakarnerok. Taoliek daida et adiak ipalobos ay ipastol yo. Isalakan ko din karnerok ta somaldeng kayo ay mangisidsida en daida. <sup>11</sup> Tan sak-en ay Diyos di manganap ya mangayowan sin ipogaw ko <sup>12</sup> ay kaman din iyat di manpaspastol sin nansisian ay karnero na. Isalakan kos daida sin amin ay lugar ay naisianan da sin timpon di ligat da ay kaeegyat ya mabolinget. <sup>13-14</sup> Ipangok daida ay komaan sin nanasyon ay kad-an da et itaolik daida ta sinopek sin ili da. Kaman dan karnero ay ipastol ko sin mayat ay pastolan ay kad-an di obbog sin dodontog ya tanap ya olay intoy mayat ay pantean ed Israel, et man-alab das di ay magay pan-egyatan da. <sup>15</sup> Awni et sak-en ay mismo di mangipastol sin kakarnerok ya ianapak daida si pan-illengan da. <sup>16</sup> Anapek to din nalitaw ya itaolik din nasangaw. Agasak abe din nasogatan ya papigsaek din kinmapsot. Ngem paltiek din napigsa ya malames, tan sak-en ay manpaspastol et din kosto di amagek sin karnerok. <sup>17 18 19</sup>

<sup>20</sup> “Isonga siya nay ibagak en dakayo ay pastol ko: Okomek dakayo amin et ilasin kos dakayo ay malames sin nabigot. <sup>21</sup> Tan tinikdon yo ya sinangdo yo din nakapoy ya mansakit ta maipakaan da sin iib-a da ay karnero. <sup>22</sup> Ngem mo sak-en pay, isalakan ko din pastol ko ta adi da kasin mapaligatan. Asiak okomen di esa ya esa en daida. <sup>23</sup> Mo makdeng di, isaad ko di ari ay mangituray en daida ay kaman si David ay nansilsilbi en sak-en ed idi. Sisyay di es-esa ay mangayowan en daida. <sup>24</sup> Sak-en ay si Yahweh di Diyos da, ya kaman si David ay baak din ari ay mangituray en daida.” Siya say inbagak ay Diyos. <sup>25 26 27 28 29 30 31</sup>

## 35

1 2 3 4 5 6 7 8 9 10 11 12 13 14 15

## 36

1 2 3 4 5 6 7 8 9 10 11 12 13 14 15 16 17 18 19 20 21

### *Din Panlinisan Diyos Sin Ipogaw Na (36:22-28)*

<sup>22</sup> Kinwanin Yahweh ay Kangatoan ay Diyos, “Ibagam na sin Israelita: Baken dakayo ay Israelita di begew ay itaolik dakayo sin ili yo. Amagek na gapo sin nasantoan ay ngadan ko ay inpakadodogis yo sin amin ay lugar ay inmeyan yo. <sup>23</sup> Linisak to din madaydayaw ay ngadan ko ay inpakadodogis yo sin naitatapiyan yo sin nanasyon. Babaen en dakayo, paneknekak to ay nasantoanak et ammoen da ay sak-en si Yahweh ay Kangatoan ay Diyos. <sup>24</sup> Din iyat ko et ipangok dakayo ay komaan sin amin ay nanasyon et sinopek dakayo ay itaoli sin kosto ay ili yo. <sup>25</sup> Walsiak dakayo si danom ta malinisan kayo sin didiyosen yo ya am-in di odom pay ay nangipakadodogis en dakayo. <sup>26</sup> Awni et sokatak din binmato ay nemnem yo si baro ay nemnem ay manang-awat. <sup>27</sup> Ipasgep ko din Ispiritok en dakayo ya iturong kos dakayo ay mantongpal ya mangipateg sin linteg ay inbilin ko en dakayo. <sup>28</sup> Manbeey kayon to sin daga ay indawat ko sin ap-apo yo, et dakayo di ipogaw ko yan sak-en di Diyos yo.” <sup>29 30 31 32 33 34 35 36 37 38</sup>

## 37

### *Din Tanap Ay Napnos Nango Ay Tong-a* (37:1-14,21-28)

<sup>1</sup> Naliknak din panakabalin Diyos yan inmiey din Ispirito na sin tanap ay napnos tong-a et inmipayag sisi. <sup>2</sup> Inmiliked sin tanap et inilak di ad-ado ay nango ay tong-a. <sup>3</sup> Idi siya di, kananan sak-en, “Anak di ipogaw, ay mabalin ay matago dana ay tong-a?”

Kanak ay sinombat, “Sik-a anggoy ay Diyos di makaammo issa.”

<sup>4</sup> Pag nan kanan, “Man-ipadto ka ta kanam sin da sana ay tong-a: Dakayo ay nango ay tong-a, dengngen yo din kalin Diyos. <sup>5-6</sup> Tan kanan din Kangatoan ay Diyos en tapianas dakayo si owat ya lamlames, asi na bongonen si kodil, et pag nan idawtan dakayo si leng-ag ta matago kayo ya ammoen yo ay sisya si Diyos.”

<sup>7</sup> Tinongpal ko din naibilin ay ipadtok. Idi ibagbagak di, waday dinngek ay mankan-itikit yan nansisilpo da din tong-a. <sup>8</sup> Inilak ay nawadaan da si owat, lames ya kodil, ngem magay leng-ag da. <sup>9</sup> Pag kanan Diyos, “Sik-a ay anak di ipogaw, man-ipadto ka sin dagem. Ibagam sin dagem sin amin ay solin di lobong ay sak-en din Kangatoan ay Diyos et ibilin ko ay idawtan da si leng-ag da san bangkay ta matago da.” <sup>10</sup> Tinongpal ko di ay inibilin Diyos et nawadaan das leng-ag yan nabiyag da. Pinmika da yan palalo ay ad-ado da ay kaman dakdake ay bonggoy di soldado.

<sup>11</sup> Pag kanan Diyos, “Maiarig din amin ay Israelita sin da nay ay tong-a. Kanan da en nango da et enggay magay namnama da ya magay siged si pantongpalan da sin tapin di agew. <sup>12</sup> Isonga ipadtom sin ipogaw ko ay Israelita ay bokatak din kaot da ya ibalak daida ay itaoli sin ili da. <sup>13</sup> Mo bokatak din kaot da ya ibalak daida, ammoen da ay sak-en si Diyos. <sup>14</sup> Ipasgep ko en daida din Ispiritok ta matago da kasin ya mantaoli da sin ili da et say pangammoan da ay sak-en si Yahweh ay Diyos ay nangibaga isna. <sup>15 16 17 18 19 20</sup>

<sup>21</sup> “Awni et alaek din ipogaw ko sin nanasyon ay naieyan da et sinopek daida ay itaoli sin ili da. <sup>22</sup> Panbalinek daida si es-esa ay nasyon sin dodontog ed Israel ya es-esa di ari ay mangituray en daida am-in. Adi dan to kasin magodwa ay manbalin si doway ay nasyon. <sup>23</sup> Isaldeng dan to ay mangipakadodogis sin awak da babaen sin kadodogis ay didiyosen ya basbasol da. Ilisik daida si am-in ay kalasin di panbasolan ya pananglipot dan sak-en. Linisak to si daida et manbalin da ay ipogaw ko yan sak-en di Diyos da.

<sup>24-25</sup> “Es-esa ay ari ay mais-o en David ay baak di mangituray ya mangayowan en daida si eng-enggana, et napasnek da ay manongpal sin bilbilin ko. Mantee da sin daga ay indawat kon Jacob ay baak ya nantean din ap-apo da, et say pantean aben din ipoli da si eng-enggana. <sup>26</sup> Itolag ko en daida ay natalna ya mayat di biyag da si eng-enggana. Bindisyonak ya paad-adoek daida yan isaad ko din Timplok sin kad-an da ay komakaman si eng-enggana <sup>27</sup> ta isdi di panbeeyak. Manbalin da ay ipogaw ko yan sak-en di Diyos da. <sup>28</sup> Mantee din Timplok sin kad-an da si eng-enggana et say pangammoan din nanasyon ay sak-en si Diyos ay nangikasin sin Israelita ta manbalin da ay ipogaw ko.”

## 38

### *Din Panosaan Diyos En Gog* (38:1-2,14-23)

<sup>1</sup> Kinwanin Diyos en sak-en, <sup>2</sup> “Sik-a ay anak di ipogaw, waday paipadtok en sik-a ay maikontra en Gog ay man-ili ed Magog\* ay mangituray sin nanasyon ay Mesek ya Tubal. <sup>3 4 5 6 7 8 9 10 11 12 13 14</sup> Ibagam ay siya na di ipadngen din Kangatoan ay Diyos en sisya: Awni et natalna di biyag di ipogaw ko ay Israelita ya magay pan-egyatan da. Sin timpo ay doy, manlobwat kayo <sup>15</sup> sin addawi ay ili yo ed amyanan. Ipango yo di ad-ado ay sosoldado ay nangakabayo ay mapo sin ad-ado ay nasyon. Napigsapigsa kayo ay

\* **38:2** Naipaammo 20:8.

bonggoy di soldado. <sup>16</sup> Sin doy ay maod-odi ay agew, en kayo gobaten din ipogaw ko ay Israelita. Kaman kayon kaeegyat ay pewek ay mandan sin intiroy ay ili. Sak-en ay mismo di mangiturong en dakayo ta ipailak di kinasantok babaen sin mapasamak en dakayo ta say pangammoan di am-in ay nasyon ay sak-en si Diyos.”

<sup>17</sup> Kanan aben din Kangatoan ay Diyos, “Si Gog din inbagbagak ed idi babaen sin baak ay mamadto ed Israel. Inmey di pigay tawen ay nangipadtopadtoan da ay wadan to di ibaak ay mangobat en daida ay Israelita. <sup>18</sup> Sin agew ay doy ay gobaten Gog din Israelita et palalo di bonget ko. <sup>19</sup> Gapo sin imon ya palalo ay bonget ko, isapatak ay pawadaek di kaeegyat ay yegyeg ed Israel. <sup>20</sup> Manpayegpeg dan to si egyat dan sak-en din am-in ay nigay sin danom, titit, am-in ay animal pati din manbodbodos ya am-in abe ay ipogaw sin labaw di daga. Makosokos dan to din dodontog ya bilbilig yan matokang am-in ay beey. <sup>21</sup> Bilinek am-in ay kumpulan ay mangontra en Gog sin am-in ay dontog ko, et man-asipepese din sosoldado da. <sup>22</sup> Dosaek daida babaen si pisti ya kumpulan. Paodanak sisya si napigsa ay odan, dalalo, apoy ya asufre, siya abe sin am-in ay sosoldado na ya nanasyon ay gait na. <sup>23</sup> Siya na di iyat ko ay mangipaila sin kinangatok ya kinasantok sin am-in ay nasyon et maammoan dan to ay sak-en si Diyos.”

## 39

12

### *Din Kaabakan Da Gog* (39:3-8)

<sup>3</sup> Kanan aben Diyos, “Tikpayek din pana na sin takkay na. <sup>4-5</sup> Maiwalang to din bangkay na sin dontog ed Israel, siya abe sin sosoldado na ya din nanasyon ay gait na et bay-ak ay kanen di titit ya am-in ay atap ay animal. Sak-en si Yahweh ay nangibagas na. <sup>6</sup> Pooak to ed Magog ya din am-in ay ili ay natalna di biyag da sin benget di baybay et ammoan da ay sak-en si Diyos. <sup>7</sup> Masapol ay ammoen din Israelita din nasantoan ay ngadan ko yan adiak ipalobos ay ipakadodogis da kasin. Et say pangammoan din nanasyon ay sak-en si Yahweh ay nasantoan ay Diyos di Israelita. <sup>8</sup> Magay dowadowa ay mapasamak am-in dana,” kanan Yahweh ay Diyos. <sup>9 10 11 12 13 14 15 16 17 18 19 20</sup>

### *Din Somigedan Kasin Di Israel* (39:21-29)

<sup>21</sup> Kanan Diyos, “Ipailak to sin nanasyon din panakabalin ko sin iyat ko ay mangokom ya manosa en daida. <sup>22</sup> Manipod sin doy ay timpo, ammoen din Israelita ay sak-en si Yahweh ay Diyos da. <sup>23</sup> Yan ammoen din kailili ay nadpap da ay naipaaddawi din Israelita gapo sin basbasol da tan baken dan matalek. Isonga dinokogak daida ya binaybay-ak ay abaken din kalaban da et pag dan matey si kumpulan. <sup>24</sup> Dinokogak daida yan maitimbang sin basbasol ay nangipakadodogis en daida din inkeddeng ko ay dosa da.

<sup>25</sup> “Ed wani, seg-angak din Israelita et itaolik daida sin ili da ya pasigedek din biyag da. Salaknibak din nasantoan ay ngadan ko. <sup>26</sup> Natalnan to di biyag da ya magay emegyatan da, et liw-an dan to din naibabainan da gapo sin nanokdokogan dan sak-en. <sup>27</sup> Taoliek daida sin ilin di kalaban da et pasaaek daida ay sinopen sin ili da et ipailak din kinasantok babaen en daida. <sup>28</sup> Inpaaddawik daida sin odom ay nanasyon, ngem asiak taolien ay sinopen sin ili da et say pangammoan da ay sak-en si Yahweh ay Diyos da. Magay olay esa ay mataynan en daida. <sup>29</sup> Ibokbok ko din Ispiritok sin amin ay Israelita et adiak polos dokogan kasin daida.” Siya nay inbagan din Kangatoan ay Diyos.

### *Din Baro Ay Timplo*

Sin maikadowanpo ya lima ay tawen manipod sin napilitan mi ay naiey ed Babilonia, waday inpailan Diyos en sak-en ay kaman iitaw. Inmey din Ispiriton Diyos

ed Jerusalem et inilak di lalaki ay mankoniniing ay kaman bronsi ay nananggen si panlokod. Inmiliked sin baro ay Timplo et inpaila nan sak-en am-in di segpan ya kowarto na ya odom ay beey ay sakop na dowana aben lokoden.

Pag waday somili ay silaw ay sinenggep sin Timplo ay kailaan di kawadan Diyos et dinngkek din kalin Diyos ay kanana, “Manbeeyak isna ta iturayak din ipogaw ko ay Israelita, et adi da kasin ipakadodogis din nasantoan ay ngadan ko. Ngem masapol ay ipaammom en daida din bilbilin ko maipanggep sin Timplo ay nay ta say masalakniban din kinasanto na.”

Pag ibagan Diyos en sak-en din bilbilin ay maonodan maipanggep sin altar ya datdaton, din papadi ya Levita ya din kaibingayan di daga ay nanliniked sin Timplo. (40:1–46:24)

## 40

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35 36 37 38 39 40 41 42 43 44 45 46 47 48 49

## 41

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26

## 42

1 2 3 4 5 6 7 8 9 10 11 12 13 14 15 16 17 18 19 20

## 43

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27

## 44

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31

## 45

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25

## 46

1 2 3 4 5 6 7 8 9 10 11 12 13 14 15 16 17 18 19 20 21 22 23 24

## 47

### *Din Ginawang Ay Napo Sin Timplo*

(47:1-12)\*

<sup>1</sup> Idi siya di, intaolin din lalaki si sak-en sin segpan di Timplo. Waday ginawang ay mapmapo sin dallem di segpan yan manturong sin bomandas balaan di agew ay sinasagang di Timplo. Man-ayos ay bomallalong sin abagatan di altar. <sup>2</sup> Inbalan din lalakis sak-en sin Timplo et nandan kami sin segpan sin naibandas amyanan. Pag nan iturong sak-en sin segpan sin bel-ayan ay naisagang sin balaan di agew. Waday kitkittoy ay ginawang ay man-ay-ayos sin bomandas abagatan di segpan ay sana. <sup>3</sup> Nanlokod din lalaki si 500 ay metro sin bomandas balaan di agew, pag nan pandanen sak-en sin danom yan engganans mokmokling di kalosong na. <sup>4</sup> Nanlokod kasin si 500 ay metro, pag nan pandanen sak-en yan engganans peweg di kalosong na. Nanlokod kasin si 500 ay metro yan sin gitang ko di kalosong din danom. <sup>5</sup> Nanlokod kasin si 500 ay metro yan enggay linmosong ay adiak ammoy lokod na. Masapol ay langoyen mo agadangen.

<sup>6</sup> Kanan din lalaki en sak-en, “Sik-a ay anak di ipogaw, nemnemem si kosto am-in dana ay inilam.” Pag omipango et nantaoli kami sin benget di ginawang. <sup>7</sup> Idi dinmateng kami sin benget na, inilak di ad-ado ay kaiw sin nandinmang. <sup>8</sup> Kanan din lalaki, “Omayos din danom ay nay sin daga ay naibandas belaan di agew yan mantaros sin Tanap ay Jordan enggana ay domateng sin Lebeng ay Asin. Mo domateng sin lebeng

\* 47: 1-12 - Naipaammo 22:1-2.



ay doy yan pasigedena din danom isdi. <sup>9</sup> Amin ay omayosan din ginawang ay nay et mabiyag di olay sino ay parsua. Mawada abe di ad-ado ay nigay sin ginawang tan pasigedenan danom ya mangidawat si biyag sin amin ay lugar ay omayosana. <sup>10</sup> Ad-adon to di mannignigay sin benget di ginawang ay sana et ibilag da din tabokol da sin benget na manipod sin obbog ed Engedi enggana sin obbog ed Eneglaim. <sup>11</sup> Din mabiyag ay nigay isdi et kaman met laeng din wada sin Baybay ay Mediterranean. <sup>12</sup> Sin nandinmang ay benget di ginawang, gomabay di amin ay kalasin di kaiw ay manlames. Adi mango din tobo da yan kankanayon ay manlames da. Binowan ay mayat di lames da, tan din danom ay manibog en daida et mapmapo sin Timplo. Makan din lames da yan para agas din tobo da.” <sup>13 14 15 16 17 18 19 20 21 22 23</sup>

## 48

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32 33 34 35

## Daniel Maipanggep Sin Libro Ay Nay

Si Daniel et esa ay taga-Juda ay napilit ay naiey ed Babilonia sin kabaro na. Dad-aten din libro ay nay din nanbalinana ay nangato ay opisyal sin gobierno ed Babilonia ya din napodno ay nansilbiana en Diyos sin nanturayan da Ari Nebukadnezzar, Belsazzar, Darius ya Cyrus.

Madad-at abes na din inpail-ilan Diyos en Daniel ay kaman iitaw ay naipadtoan di nginmatoan ya binmabaan di odom ay nanasyon manlogi sin nasyon ay Babilonia ya din mapasamak abe sin tapin di agew.

Maipaila sin libro ay nay ay si Diyos di makaammo sin am-in ay maamag isnan daga. Sisyay di mangiturong sin kaisaadan ya kadadaelan di nanasyon. Sisyay abe di mangay-ayowan sin ipogaw na ya mangipawadan to si kinalinteg isnan daga.

### **Din Linaona**

Si Daniel ya din tolo ay iib-a na 1:1–6:28

Din inpail-ilan Diyos en Daniel ay kaman iitaw 7:1–12:13

### *Din Naitapian Da Daniel Sin Mansilbi Sin Palasyo*

<sup>1</sup> Sin maikatlo ay tawen ay nanturayan Ari Jehoyakim ed Juda, ginobat da Nebukadnezzar ay ari ed Babilonia din siyodad ay Jerusalem et linikob da. <sup>2</sup> Inpalobos Diyos ay abaken Nebukadnezzar si Jehoyakim ya alaena din odom ay nankababanol ay bonag sin Timplo. In-ey na ed Babilonia sin timplon di didiyosen ay daydayawena et inpeey na sin pan-idoldolinan si gameng di timplo ay sana.

<sup>3</sup> Binilin din ari si Aspenaz ay kangatoan ay opisyal sin palasyo ta pomili sin babbaro ay Israelita ay napo si pamilyan di aari ya mabigbigbig ay pamilya ay napilit ay naiali ed Babilonia. <sup>4</sup> Masapol ay magay dipikton di awak da, gowapo, nalaing, diadal, ya nalaka ay maitdoan ta say maibagay da ay mansilbi sin palasyo. Masapol ay itdoanas daida sin kali ya adal da ay taga-Babilonia. <sup>5</sup> Inbilin aben din ari ay inagew ay maidawtan da si makan ya arak ay kaman din kankanen ya in-inomen di mansilbi sin palasyo. Maitdoan da si tolo ay tawen et mo makdeng di, pag dan mansilbi sin ari. <sup>6</sup> Naitapi ay napili din taga-Juda ay da Daniel, Hananias, Misael ya Azarias. <sup>7</sup> Binaroan din apon di opisyal din ngadan da et si Daniel yan nginadanana si Beltesazzar, si Hananias yan si Sadrak, si Misael yan si Mesak, si Azarias yan si Abednego.

<sup>8</sup> Ninemnem Daniel ay addawiana di komadodogisana begew sin makan ya arak ay mapo sin palasyo et nankedaw sin opisyal ta palobosana ay adi mangan sisi. <sup>9</sup> Tinignay Diyos din opisyal et naseg-angan en Daniel. <sup>10</sup> Ngem kanan din opisyal ay sana, “Emegyatak sin apok ay ari. Tan inbilina di masapol ay kanen yo ya inomen yo, et mo ilaena ay nabigot ka mo din katawenam ay babbaro, sigurado ay ipapoto na din toktok ko.”

<sup>11</sup> Pag kanan Daniel sin dinotokan di kangatoan ay opisyal ay makaammo en sisyay ya da Hananias, Misael ya Azarias, <sup>12</sup> “Pangaasim ta padasem ay pakanen dakami si natnateng ya danom si sinpo ay agew. <sup>13</sup> Asi kan ilaen mo waday naitkenan mi sin babbaro ay mangan si mapo sin palasyo. Et mo intoy pangilam, asi kan makaoway si iyat mo.”

<sup>14</sup> Inaw din gowardiya ay say amagen da di. <sup>15</sup> Malabas pay di sinpo ay agew, inila na ay nasalsalon-at ya malamlames da mo din babbaro ay mangmangan si mapo sin palasyo. <sup>16</sup> Gapos di, adi inpilit din gowardiya din makan ya arak ay maidawat koma en daida et indawtanans daida si natnateng.

<sup>17</sup> Indawtan Diyos da nan opat ay babbaro si amin ay kalasin di laing. Indawtana abes Daniel si kabaelan ay mangiolog si iitaw ya din maipaila ay kaman iitaw.

<sup>18</sup> Idi nakdeng din tolo ay tawen ay inkeddeng Ari Nebukadnezzar, inkoyog din pangolon di oopisyal din babbaro sin sangoanana. <sup>19</sup> Nakikali din ari en daida am-in et naila na ay magay makaiso en da Daniel, Hananias, Misael ya Azarias, isonga naitapi da sin mansilsilbi sin palasyo. <sup>20</sup> Olay sino ay salodsod din ari en daida yan maila na ay mamin sinpo ay nalalaing da mo din amin ay mansalsalamangka ya mankotom sin intiroy ay iturayana. <sup>21</sup> Intoloy Daniel ay nansilbi sin palasyo enggana sin damo ay tawen ay nanturayan Cyrus.

## 2

### *Din Iitaw Nebukadnezzar*

<sup>1</sup> Sin maikadwa ay tawen ay nanturayan Nebukadnezzar, waday iniitaw na ay begew si nandandanagana ya adi nan naseyseyepan. <sup>2</sup> Idi siya di, inpaayag na amin ay mansalsalamangka, mankotom, man-gegey ya mansip-ok. Dinmateng da et pinmika da sin sangoanana. <sup>3</sup> Kananan daida, “Wada di iniitaw ko ay mangolgolo isnan nemnem ko et laydek ay ammoen di olog na.”

<sup>4</sup> Kanan da ay nanongbat si kalin di Arameo,\* “Apo ari, matagotago ka koma si eng-enggana. Dad-atem kod en dakami ay mansilsilbi en sik-a san iniitaw mo ta ibaga mi di olog na.”

<sup>5</sup> Kanan din ari en daida, “Siya na di inkeddeng ko: Mo adi yo maibaga din iitaw ko ya din olog na, matadtatadtad san awak yo ay kaman din animal ay mapalti ya dadlon mabakas din beey yo. <sup>6</sup> Ngem no maibaga yo din iitaw ko ya din olog na, idawtak dakayo si gon-gona ya dakdake ay pamadayaw. May ngarud, ibaga yo din iitaw ko ya din olog na.”

<sup>7</sup> Kanan da kasin ay sinombat, “Apo ari, ibagam koma din iitaw mo ta asi mi ibaga din olog na.”

<sup>8</sup> Ngem kanan din ari, “Ammok ay taktaktaken yo et anggoy di timpo, tan ammo yo ay inkeddeng ko din lebbeng na ay mapasamak. <sup>9</sup> Mo adi yon maibaga din iitaw ko, naniiso di dosa yo. Ammok ay nantotolagan yo ay sikapan sak-en bareng mo manbalbaliw din nemnem ko. Ibaga yo ngarud din iitaw ko ta say pangammoak ay kabaelan yo ay ibaga di olog na.”

<sup>10</sup> Kanan da ay nanongbat, “Apo ari, magay ipogaw isnan daga ay makaibaga issan laydem. Di katet-ewa na et magay ari ay nansalodsod si kaman nisa sin mansalsalamangka, mankotom ya mansip-ok, olay intoy kapigsa ya kinangato na ay ari. <sup>11</sup> Apo ari, palalo met ay naligat san damdamagem. Maga polos di makaibaga issa malaksig sin didiyosen, ngem adi da met makitee si ipogaw.”

<sup>12</sup> Gapo isdi, palalo di bonget din ari et inbilina ay peslen da amin din mamagbaga ay taga-Babilonia. <sup>13</sup> Naipaammo din bilin ay sana et inanap das Daniel ya din gagait na ta itapi da ay peslen daida. <sup>14</sup> Idi siya di, inmey si Daniel en Ariok ay kapitan di gowardiyan di ari ay nabilin ay mamse sin amin ay mamagbaga et inannadana di iyat na ay nakikali. <sup>15</sup> Sinalodsod na di gapo ay naibilin di kaman nidi ay nadagsen ay bilin et dinad-at Ariok en sisya di napasamak. <sup>16</sup> Pag et emey si Daniel sin kad-an di ari et nanpakaasi ta idawtan din ari si timpo ta asi nan ibaga din olog di iitaw na.

<sup>17</sup> Idi siya di, sinmaa si Daniel et ena inbaga en da Hananias, Misael ya Azarias di napasamak. <sup>18</sup> Inbilina ay mankedaw da si seg-ang Diyos ed daya ta ipaammo na din iitaw ya din olog na ta adi dan maitapi ay matey sin mamagbaga ay taga-Babilonia. <sup>19</sup> Isdi ay labi, naipaammo din banag ay doy en Daniel babaen si kaman

\* **2:4** Manlogi sin versikulo ay nay engganans 7:28, naisolat din sigod ay manuskriton di libro ay nay sin Aramaic ay kalin di am-in ay ipogaw ed Babilonia ya odom ay il-ili sin isdi ay banda.

iitaw et dinaydayaw na si Diyos ay wadad daya. <sup>20</sup> Kanana, “Madaydayaw koma si Diyos si eng-enggana, tan sisyaay poon di sirib ya panakabalin. <sup>21</sup> Ikeddeng na di amin ay mapasamak ya din timpo ay maamagan da. Sisya di mangaan ya mangisaad si ari ya idawtana si laing din makaawat. <sup>22</sup> Ipaammo na din naoneg ay adi maawatan. Ammo na din wadas mabolinget yan nanliniked di pat-a en sisya. <sup>23</sup> Apo Diyos ay dinaydayaw di apo mi, man-iyamanak ya daydayawek sik-a, tan indawtam sak-en si laing ya panakabalin. Pinatgam din kararag mi et inpaammom ed wani din masapol ay ibaga mi sin ari.”

<sup>24</sup> Idi siya di, inmey si Daniel en Ariok ay dinotokan di ari ay mamse sin mamagbaga ay taga-Babilonia. Kanan Daniel, “Adi ka koman peslen daida. Omipango ka kod sin sangoanan di ari ta ibagak en sisya din olog di iitaw na.”

<sup>25</sup> Dinagdagos Ariok ay inpango si Daniel sin sangoanan di ari yan kanana, “Apo ari, waday nadtengak ay taga-Juda ay naiali sinan ili tako ay makaibaga sin olog di iitaw mo.”

<sup>26</sup> Kanan din ari en Daniel ay nginadanan das Beltesazzar, “Ay kabaelam ay ibaga din iitaw ko ya din olog na?”

<sup>27</sup> Kanan Daniel ay sinombat, “Apo ari, magay makaibaga sin salsalodsodem, olay sino ay nalaing ay mankotom, mansalsalamangka ono man-gegey, <sup>28-29</sup> ngem waday Diyos ed daya ay mangipaammo si naligat ay maawatan. Idi naseseyep ka ay apo ari, inpaila na en sik-a di mapasamak sin maod-odi ay agew. <sup>30</sup> Di gapo ay naipaammo din olog na en sak-en et baken gapo ta nalalaingak mo din odom ay ipogaw mo adi et ta maipaammo en sik-a din olog di iniitaw mo. <sup>31</sup> Apo ari, siya na din iniitaw mo: Inilam di dakdake ay sinan ip-ipogaw ay pinmipika sin sangoanam yan mankoniniing ya kaeegyat di ila na. <sup>32</sup> Natanig ay balitok din toktok na, palata din pagew na ya takkay na yan bronsi din eges ya opo na. <sup>33</sup> Din siki na yan landok, ya din dapana et nanlinaok ay landok ya linang. <sup>34</sup> Idi il-ilaem din sinan ip-ipogaw ay sana, waday dakdake ay bato ay napolag ay napo sin dontog ay baken ipogaw di namolag. Pinontaana din landok ya linang ay dapan di sinan ip-ipogaw et nagopak da. <sup>35</sup> Pag et mamekmek din landok, linang, bronsi, palata ya balitok et nanbalin das kaman din tapok sin pan-ir-irikan mo tiyagew. Idi siya di, intayaw amin din dagem et maga polos di nabay-an sin partin di sinan ip-ipogaw ay sana. Ngem din bato ay nanmekmek yan nanbalin si dakdake ay dontog et kinopado na din intiro ay daga.

<sup>36</sup> “Siya na din iitaw mo et ibaga mi din olog na. <sup>37</sup> Sik-a ay apo ari di kangatoan sin amin ay ari. Si Diyos ed daya di nangisaad en sik-a yan indawtan daka si panakabalin, turay ya dayaw. <sup>38</sup> Insaad nas sik-a ay mangituray sin kaipoipogaw, olay intoy kadan da ay ili, siya abe sin animal ya titit. Sik-a din balitok ay toktok di sinan ip-ipogaw. <sup>39</sup> Wadan to di maisokat en sik-a, ngem nakapkapsot din iturayana mo sik-a. Maisokat abe di maikatlo ay ari et iturayana din intiro ay daga. Sisya din maiarig si bronsi. <sup>40</sup> Pag aben waday maikap-at ay kaman landok di kapigsana. Kaman din kapigsan di landok ay manmekmek si amin ay banag di iyat na ay manadael sin amin ay namangpango ay nanturay. <sup>41</sup> Inilam ay din dapana yan nanlinaok di landok ya linang. Laydena ay kalien, magodwan to din iturayana, ngem wada pay dedan di pigsa na ay kaman landok. <sup>42</sup> Landok ya linang din gomot di siki na et laydena ay kalien, din tapin di maiturayan et napigsa ngem din tapi na abe et nalaka ay madadael. <sup>43</sup> Esa abe ay kaliena et manlilinaok din poli da tan man-aasawa da, ngem adi dan man-es-esa tan kaman dan din landok ya linang ay adi mabalin ay man-es-esa. <sup>44</sup> Sin timpon di aari ay sana, isaad Diyos ay wadad daya di panturayan ay adi polos maabak ono madadael, mo adi et say manadael sin amin ay panturayan et komakaman si eng-enggana. <sup>45</sup> Tan say olog din inilam ay napolag ay bato ay napo sin dontog ay adi pinolag di ipogaw yan minekmek na

din landok, bronsi, linang, palata ya balitok. Inpaammon Diyos ay kangatoan en sik-a ay apo ari din mapasamak sin tapin di agew. Sigurado ay mapasamak din iniitaw mo.”

<sup>46</sup> Siya et di, kalakpap si Ari Nebukadnezzar sin sangoanan Daniel. Pag nan ibilin ay idatonan das Daniel si bakakew ya insinso. <sup>47</sup> Kanan din ari en Daniel, “Tet-ewa ay din Diyos mo di kangatoan sin amin ay diyos ya Apon di aari. Sisy di makaibaga si naligat ay maawatan, tan sik-a di nakaibagas na.” <sup>48</sup> Pag nan isaad si Daniel si nangato ay saad. Indawtana si ad-ado ay regalo ya nanbalinena ay gobernador sin intiro ay probinsiya ay Babilonia. Nanbalinena abe ay pangolon di amin ay mamagbaga sin ili. <sup>49</sup> Begew sin dawat Daniel, dinotokan din ari da Sadrak, Mesak ya Abednego ay mangipangolo sin maam-amag sin probinsiya ay Babilonia. Si Daniel pay yan nantee sin palasyo.

### 3

#### *Din Balitok Ay Sinan Ip-ipogaw Ay Inamag Nebukadnezzar*

<sup>1</sup> Sin namingsan, nanpaamag si Ari Nebukadnezzar si balitok ay sinan ip-ipogaw. Dowanpo ya pito ay metro di kakayang na ya tolo ay metro di kadakdaken di awak na. Tinood na sin tanap ed Dura sin probinsiya ay Babilonia. <sup>2</sup> Pag nan ibilin ay masinop amin din oopisyal-din tuturay, gogobernador, diputado, mamagbaga, tesorero, howis, abogado ya amin ay opisyal sin probinsiya. Inpasinop nas daida ta boyaen da din kaidatonan di sinan ip-ipogaw ay inpaamag na, <sup>3</sup> et pinmika da sin sangoanan di sinan ip-ipogaw ay sana.

<sup>4</sup> Idi siya di, kanan din mangipakpakaammo ay nangibogaw, “Kaipoipogaw ay napo sin amin ay nasyon ay nankinalasi di kali ya kodil da, siya na di maibilin en dakayo: <sup>5</sup> Mo dengngen yo din tanggoyob, kolalleng, gitara, arpa ya odom ay matoktokar, masapol ay mandokmog kayo ay manyakog-ong ay mandayaw sin sinan ip-ipogaw ay inpaamag Ari Nebukadnezzar. <sup>6</sup> Mo sino di adi manyakog-ong ay mandayaw, maitep-a ay dagos sin dakdake ay pogon ay kad-an di mabidang ay apoy.”

<sup>7</sup> Idi dinngen din kaipoipogaw din tokar, nandokmog da am-in ay nanyakog-ong, olay intoy napoan da ay nasyon ay nankinalasi di kodil ya kali da, et nandayaw da sin balitok ay inpaamag Ari Nebukadnezzar.

<sup>8</sup> Asi et ginondawayan din odom ay taga-Babilonia din napasamak ay sana, et indarum da din Jujudio. <sup>9</sup> Kanan da en Ari Nebukadnezzar, “Madaydayaw ay ari, matagotago ka koma si eng-enggana. <sup>10</sup> Inbilin mo ay manyakog-ong di amin ay ipogaw ta dayawen da din inpaamag mo ay balitok ay sinan ip-ipogaw mo manlogi din tokar. <sup>11</sup> Inkeddeng mo ay din adi manyakog-ong ay mandayaw et maitep-a ay dagos sin mabidang ay apoy. <sup>12</sup> Ngem din Jujudio ay nantalkam si maamag isnan probinsiya ay Babilonia yan adi dan tinongpal din bilin mo, daidas da Sadrak, Mesak ya Abednego. Apo ari, adi dan mandayaw sin diyos mo et adi dan dayawen din inpaamag mo.”

<sup>13</sup> Idi siya di, palalo di bonget Nebukadnezzar et inpaayag nas da Sadrak, Mesak ya Abednego. Idi dinmateng da sin sangoanana, <sup>14</sup> kanana en daida, “Dakayo ay Sadrak, Mesak ya Abednego, ay tet-ewa ay sigaan yo ay mansilbi sin daydayawek ay diyos ya sigaan yo ay dayawen din inpaamag ko ay balitok ay sinan ip-ipogaw? <sup>15</sup> Ed wani, mo nakasagana kayo ay mandayaw sin inpaamag ko ay sinan ip-ipogaw mo dengngen yo din tokar di tanggoyob, kolalleng, gitara, arpa ya odom pay ay instrumento, et mayat. Ngem mo adi kayon mandayaw, maitep-a kayo ay dagos sin mabidang ay apoy, et maga polos di diyos ay makaisalakan en dakayo.”

<sup>16</sup> Kanan da Sadrak, Mesak ya Abednego, “Madaydayaw ay ari, adi masapol ay ikalintegan mi din awak mi. <sup>17</sup> Mo maitep-a kami sin mabidang ay apoy, kabaelan met din pansilsilbian mi ay Diyos ay isalakan dakami, et omilisi sin apoy ya panakabalin



mo.\* <sup>18</sup> Ngem olay mo adi omisalakan, layden mi ay ammoem, apo ari, ay adi kamin mansilbi sin diyos mo ono mandayaw sin balitok ay sinan ip-ipogaw ay tinood mo.”

<sup>19</sup> Siya et di, palalo di bonget Nebukadnezzar en da Sadrak, Mesak ya Abednego et nanbaliw din ropa na. Inbilina ay paatongen da din pogon si mamin pito di kaatong na mo din sigod. <sup>20</sup> Binilina din odom ay kapipigsaan ay gowardiya ta baloden das da Sadrak, Mesak ya Abednego ta itep-a da sin manbidbidang ay apoy. <sup>21</sup> Adi dan kinaan din bado, kalogong ya odom ay osal da sin namalodan dan daida et intep-a da sin palaloy atong na ay apoy. <sup>22</sup> Gapo ta masapol ay dadlon matongpal din bilin di ari, palaloy atong din pogon et napooan din lallalaki ay nangitep-an da Sadrak, Mesak ya Abednego. <sup>23</sup> Ngem din tolo ay nay yan nag-as da sin manbidbidang ay apoy.

<sup>24</sup> Pag et kapika din ari ay palalo ay masmasdaaw yan kanana sin oopisyal na, “Ay baken ayan tolo da din lalaki ay binalod ya intep-a tako sin apoy?”

“Aw yan, apo ari,” kanan da ay nanongbat.

<sup>25</sup> Kanan din ari, “Ngem apay nga oopat din mailak ay manmandan sin gawan di apoy, ngem maga din balod da yan adi dan maan-ano, asi et din maikap-at yan kaman esa ay diyos di kailaana.”†

<sup>26</sup> Pag emey si Ari Nebukadnezzar sin asag-en di tangeb di pogon yan kanana, “Sadrak, Mesak ya Abednego ay mansilsilbi sin Diyos ay Kangatoan, bomala kayo.” Et binmala da ay kinmaan sin kad-an di apoy. <sup>27</sup> Nasinop din am-in ay tuturay ya odom ay oopisyal, et inila da ay adi da naan-ano sin apoy, olay din book ya bado da. Maga abey masongsong ay asok sin awak da. <sup>28</sup> Pag kanan Nebukadnezzar, “Madaydayaw din Diyos da Sadrak, Mesak ya Abednego ay nangibaa sin anghel na ay mangisalakan sin mansilsilbi ya mantalek en sisya. Adi dan tinongpal din bilin di ari et inposta dan biyag da ta say adi dan mansilbi si odom ay didiyosen malaksig sin Diyos da. <sup>29</sup> Isonga siya na di bilin ko: Olay sino ay ipogaw, mo intoy napoana ay nasyon ya sinoy kali ya kodil na, mo palawlawana din Diyos da Sadrak, Mesak ya Abednego, masapol ay matey et matadtatadtad din awak na ay kaman napalti ay animal ya madadael din beey na. Tan magay odom ay Diyos ay kaman nidi di iyat na ay mangisalakan.” <sup>30</sup> Idi makdeng di, inpangaton din ari di saad da Sadrak, Mesak ya Abednego sin probinsiya ay Babilonia.

## 4

### *Din Iitaw Nebukadnezzar Ay Maipanggep Si Kaiw*

<sup>1</sup> Siya na di solat Ari Nebukadnezzar sin amin ay ipogaw isnan intiro ay daga, olay sino di kodil ya kali da:

Sapay koma ta somigsiged di biyag yo. <sup>2</sup> Maragsakanak ay mangipaammo en dakayo sin milagro ya nakaskasdaaw ay sinyal ay inpailan Diyos ay Kangatoan en sak-en.\* <sup>3</sup> Kaeegyat din nakaskasdaaw ay inam-amag na! Manturay si eng-enggana ya magay pap-eng di kinangato na.

<sup>4</sup> Sak-en ay si Nebukadnezzar yan natalna ya mayat di biyag ko sin palasyo ay beey ko. <sup>5</sup> Asi et waday kaeegyat ay iniitaw ko et nakibtotak begew sin inilak. <sup>6</sup> Isonga inpaayag ko amin ay nankalalaing isnan Babilonia ta ibaga dan sak-en di olog na. <sup>7</sup> Idi dinmateng din mansalsalamangka, mankotom, man-gengey ya mansip-ok, inbagak en daida din iitaw ko, ngem adi dan maibagan sak-en di olog na. <sup>8</sup> Pag omali si Daniel ay nangadanan si Beltesazzar ay ngadan din diyos ay daydayawek. Wadan sisya din laing di nasantoan ay kadiyodiyos. <sup>9</sup> Kanak en sisya, “Beltesazzar ay apon di nankalalaing,

\* **3:17** Wada pay di doway ay kaiologan nina sin Aramaic: 1) Mo wada di diyos ay makaisalakan en dakami, magay odom mo adi din pansilsilbian mi ay Diyos. Sisya di omilisi sin apoy ya panakabalin mo. 2) Mo kabaalan din pansilsilbian mi ay Diyos ay omilisi sin apoy ya panakabalin mo, et omisalakan. † **3:25** Di esa ay kaiologan nina sin Aramaic et: kaman anghel di kailaana. \* **4:2** Din ibagbagan Nebukadnezzar isna et din napasamak en sisya ay naidad-at sin 4:4-37.



ammok ay wadan sik-a din laing di kadiyodiyos et magay naligat ay maawatan para en sik-a. Dengngem nan dad-atek ay iitaw ko ta ibagam en sak-en di olog na.

<sup>10</sup> “Idi naseseyepak siya di iniitaw ko: Waday inilak ay nakayang ay kaiw sin gawan di daga. <sup>11</sup> Dinmakdake ya makneg din kaiw ay sana. Enggay domateng ed daya din kakayang na et ilaen da sin amin ay solin di daga. <sup>12</sup> Mapteng din tobo na ya ad-adoy lames na ay omanay ay kanen di amin ay ipogaw. Say panlidoman di atap ay animal yan pan-obongan di titit din panga na. Say kanen di amin ay manbibiyag din lames na.

<sup>13</sup> “Idi nemnemnemek din inilak, waday nasantoan ay anghel ay manbanbantay ay napod langit. <sup>14</sup> Kanana ay nangibogaw, ‘Poyoem din kaiw yan salipangam din panga na. Aplotem din tobo na ya iwalang mo din lames na. Aboem din aanimal sin poona ya din titit sin panga na. <sup>15</sup> Ngem bay-am din tongod na sin lota. Potipotam si landok ya bronsi yan bay-am sin kad-an di gabgab sin pastolan. Bay-am ta mabasa sin dono ay mapod daya ya makitapi sin aanimal ay man-alab si gabgab. <sup>16</sup> Awni et baken nemnem di ipogaw di nemnem na mo adi et manbalin si kaman nemnem di animal si pito ay tawen. <sup>17</sup> Siya sa di inkeddeng din alisto ay manbanbantay ay aanghel. Ammoen koma ngarud di amin ay ipogaw sin amin ay lugar ay makaammo si Diyos ay Kangatoan sin amin ay panturayan di ipogaw. Mabalina ay paituray na dana ay ili si olay sino ay piliena, olay din kababaan ay ipogaw,’ kanan din anghel. <sup>18</sup> Siya sa di iniitaw ko,” kanan Ari Nebukadnezzar. “Beltesazzar, ed wani ibagam di olog na. Tan magay makaiolog sin amin ay mamagbaga isnan intiro ay iturayak. Ngem kabaalam ay ibaga tan wadan sik-a din laing di nasantoan ay kadiyodiyos.”

### *Din Nangiologan Daniel Sin Iitaw*

<sup>19</sup> Enggay nasngang si Daniel ay manngadan abes Beltesazzar begew sin kaeegyat ay nemnemnemena et adi makakali. Kanak en sisya, “Beltesazzar, adi kan madanagan begew sin iitaw ko ya din olog na.”

Kanak Beltesazzar ay sinombat, “Ay apaw kayman na, apo ari! Baken koman sik-a di katongpalan din iitaw mo ay sana mo adi et din kaibaw mo. <sup>20</sup> Inilam di nakayang ya makneg ay kaiw ay nangdas ed daya et il-ilaen di amin ay ipogaw isnan daga. <sup>21</sup> Mapteng di tobo na yan omanay din lames na ay kanen di amin ay ipogaw isnan daga. Din panga na yan nanlidoman di atap ay aanimal ya nan-obongan di titit. <sup>22</sup> Madaydayaw ay ari, sik-a din kaiw ay nakayang ya napigsa. Nginmato ka enggana ay kaman kan edasan ed daya. Sinakop di iturayam din intiro ay lobong.

<sup>23</sup> “Idi boyboyaem din kaiw, waday anghel ay napod daya yan kanana, ‘Poyoem din kaiw ta dadaelem, ngem bay-am din tongod na sin lota. Balodem si landok ya bronsi yan taynam sin pastolan ta mabasa si dono ya makitee sin aanimal si pito ay tawen.’

<sup>24</sup> “Siya na di olog din iitaw mo, madaydayaw ay ari. Siya na di inkeddeng Diyos ay Kangatoan ay mapasamak en sik-a. <sup>25</sup> Maipakaan kan to sin kad-an di kaipoipogaw et makitee ka sin atap ay aanimal si pito ay tawen. Mangan ka si gabgab ay kaman baka yan maseyep ka sin pastolan ay mabashasa si dono. Pito ay tawen ay kaman nidi di kasasaad mo. Mo makdeng di, bigbigem to ay si Diyos ay Kangatoan di makaammo sin amin ay ili ya mabalina ay isaad na ay mangituray di olay sino ay piliena. <sup>26</sup> Naibilin ay mabay-an din tongod di kaiw sin lota. Laydena ay kalien, maisaad ka kasin ay ari mo bigbigem ay si Diyos di mangituray sin intiro ay daga. <sup>27</sup> Isonga dengngem ay apo ari nan pamagbagak: Isaldeng mo ay manbasol ta din siged di amagem ya seg-angam din kakkaasi. Mo say iyat mo di, mantoltoloy ay somiged di biyag mo.”

### *Din Natongpalan Di Iitaw*

<sup>28-29</sup> Idi malabas di makatawen, napasamak amin dana en sak-en. Sin namingsan, manmandanak sin atep di palasyok ed Babilonia <sup>30</sup> yan kanak, “Tet-ewa ay mapteng

nan Babilonia ay nangisaadak si siyodad ko ay kailaan di panakabalin ko, pigsak ya kinangatok.”

<sup>31</sup> Idi mankalkaliak pay laeng, waday kali ay napod daya ay kanana, “Ari Nebukadnezzar, dengngem nan ibagak. Enggay nakaan din kinaarim. <sup>32</sup> Maipakaan ka sin kad-an di kaipoipogaw et makitee ka sin atap ay animal ya mangan kas gabgab ay kaman din baka si pito ay tawen. Mo makdeng di, bigbigem to ay si Diyos ay Kangatoan di makaammo sin amin ay panturayan di ipogaw et mabalin ay paituray na dana si olay sino ay ipogaw ay piliena.”

<sup>33</sup> Sin doy met laeng ay timpo, napasamak di en sak-en. Naipakaanak sin kad-an di kaipoipogaw et nanganak si gabgab ay kanen di baka ya nabasbasa si dono. Inmando di book ko et kaman dotdot di agila ya inmando abe di kokok ay kaman kokon di titit.

### *Din Nangidayawan Nebukadnezzar En Diyos*

<sup>34</sup> Malabas pay di pito ay tawen, tinangad ko ed daya et nantaoli din kosto ay nemnem ko. Dinaydayaw ko si Diyos ay Kangatoan ay matmatago si eng-enggana. Kinwanik: “Manturay si Diyos si eng-enggana,

magay panpatinggaan di panturayana.

<sup>35</sup> Din kaipoipogaw isnan daga  
et magay kaibilangan da sin pangila na.  
Way kabaelana ay mangamag sin laydena  
sin aanghel ed langit ya ipogaw isnan daga.  
Magay makabael ay mangontra sin laydena  
ya mansalodsod mo sinoy am-amagena.”

<sup>36</sup> Idi nantaoli din kosto ay nemnem ko, naitaolin sak-en din kinaturay ko, dayaw ko ya kinangatok. Naragsakan da ay nangawat en sak-en din oopisyal ko ya mabigbig ay ipogaw ko et nangatngato pay din panakabalin ya dayaw ko ay ari mo ed idi.

<sup>37</sup> Ed wani, sak-en ay si Nebukadnezzar yan idaydayaw ko ya ipangatok din Ari ed langit. Nalinteg di amin ay amagena ya mabalin ay ipababa na di olay sino ay mangipapangato si awak na.

## 5

### *Din Naisolat Sin Dingding*

<sup>1</sup> Sin namingsan, inawis Ari Belsazzar di sinlibo ay opisyal na sin dakdake ay sida na et nan-iinom das arak. <sup>2</sup> Idi nakainom, inbilina ay alaen da din balitok ya palata ay tasa ay inan ama na ay Nebukadnezzar\* sin Timplo ed Jerusalem. Inpa na ta pan-inomana ya din oopisyal na ya aas-awa na pati din maikadwa ay aas-awa na. <sup>3</sup> Naiey ay dagos din balitok ya palata ay tasa et inosal da ay nan-iinom. <sup>4</sup> Nan-inom da ya nandaydayaw da si didiyosen ay balitok, palata, bronsi, landok, kaiw ya bato di amag na.

<sup>5</sup> Idi siya di, wada et di inila da ay takkay di ipogaw ay mansolsolat sin napalitadaan ay dingding sin asag-en di patangan di silaw. Inilan aben di ari din takkay ay sana.

<sup>6</sup> Inmopsat begew sin palalo ay egyat na et kaman linmokay din nansisilpoan di gitang ya peweg na. <sup>7</sup> Inbogaw na ay paayagan da din mansalsalamangka, mankotom ya mansip-ok. Idi dinmateng da, kanana en daida, “Mo sino di makabasa ya makailawlawag sin naisolat, mabadoan si manbalanga ya nabanol ay badon di ari. Makekean abe si balitok ya maisaad ay maikatlo ay kangatoan† isnan panturayak.”

<sup>8</sup> Inmasag-en da amin din mamagbaga sin ari, ngem maga en daida di makabasa sin

\* **5:2** Mo mamingsan, din olog di ama sin Aramaic ya Hebreo et “apo.” Nanturay si Nebukadnezzar si 43 ay tawen, asi natey sin 562 B.C. Waday tolo ay ari ay nansosokat, asi naisokat ay ari si Nabonidus. Nanturay manipod sin 556 engganans 539 B.C. Si Belsazzar ay anak na et nakituray en ama na manipod sin 553 engganans 539 B.C. † **5:7** Si Nabonidus ay aman Belsazzar din kangatoan, si Belsazzar ay mismo din maikadwa.

naisolat ya makaibaga sin olog na sin ari. <sup>9</sup> Siya et di, nasepsep ay inmegyat si Ari Belsazzar et nasepsep abe ay inmopsat. Din oopisyal na abe yan enggay nagolo di nemnem da.

<sup>10</sup> Dinngen din reyna ay inan di ari din pankalkalian da sin oopisyal na et inmey sin pan-iinoman da. Kanana, “Matagotago koma din ari si eng-enggana. Apay nga palalo ay kinmilat ka? Adi ka koman palalo ay emegyat. <sup>11</sup> Waday esay lalaki isnan iturayam ay naidawtan si laing di nasantoan ay kadiyodiyos. Sin timpon di turay amam, napaneknekan ay kaman nidi di laing na et dinotokan amam ay Nebukadnezzar ay say pangolon di mansalsalamangka, mankotom ya mansip-ok. <sup>12</sup> Si Daniel ay nay ay nginadanan din ari si Beltesazzar et naila ay nakaskasdaaw di laing na ay mangiolog si iitaw ya naligat ay maawatan. Isonga paayagam ta ibaga na di olog na.”

<sup>13</sup> Intolod das Daniel sin sangoanan di ari et kananan Daniel, “Sik-a baw di si Daniel ay in-alin amak isna ay napod Juda? <sup>14</sup> Wada kanon sik-a di nakaskasdaaw ay laing ay kaman din laing di kadiyodiyos. <sup>15</sup> Inmali da din mamagbaga ya mansalsalamangka ta basaen da ya iolog da din naisolat ngem magay makaibaga. <sup>16</sup> Ngem dinngek ay kabaalam ay mangiolog si iitaw ya mangilawlawag si naligat ay maawatan. Mo kabaalam ay basaen ya iolog din naisolat, mabadoan ka si manbalanga ay naloyong ya makekean kas balitok. Maisaad ka abe ay maikatlo ay kangatoan isnan iturayak.”

<sup>17</sup> Kanan Daniel ay nanongbat sin ari, “Apo ari, olay okam din gon-gona ono idawat mos odom. Ngem olay mo siya di, basaek ya ibagak pay dedan din olog di naisolat. <sup>18</sup> Apo ari, insaad Diyos ay Kangatoan si amam ay Nebukadnezzar ay ari. Inpangato nas sisya ya indawtan palalo ay dayaw ya kalebbengan. <sup>19</sup> Gapo sin kinangato na ay sana, inmegyat en sisya amin ay nanasyon, olay sinoy kali ya kodil da. Pinse na amin din laydena ay peslen ya isalakana din laydena ay isalakan. Inpangato na din laydena ay ipangato ya inapababa na din laydena ay ipababa. <sup>20</sup> Ngem gapo ta nginmato ya kinmenteg din nemnem na, nakaan sin kinaari na et naipababa di dayaw na. <sup>21</sup> Naipakaan sin kad-an di kaad-adoan ay ipogaw yan nanbalin si kaman nemnem di animal din nemnem na. Nakitee ya nakikan sin atap ay aanimal et nabasbasa si dono ay mapod daya enggana ay binigbig na ay si Diyos di makaammo sin amin ay panturayan di ipogaw ya isaad na di laydena ay mangituray.

<sup>22</sup> “Ngem sik-a ay Belsazzar ay anak na yan adi kan manpakombaba, olay mo ammom amin dana. <sup>23</sup> Inamag mo di maikontra en Diyos ed langit. Inam din tasa ay napo sin Timplo na et nan-inoman yo si arak, dakayo sin oopisyal mo ya aas-awam pati din maikadwa ay aas-awam. Nandaydayaw kayo si didiyosen ay balitok, palata, bronsi, landok, kaiw ya bato di amag na-didiyosen ay adi makaila ya makadnge ya polos abe di ammo da. Ngem adi kan dinaydayaw si Diyos ay poon di biyag mo ya makaammo si amin ay am-amagem. <sup>24</sup> Siya din gapo ay inbaa na din takkay ay nangisolat isdi. <sup>25</sup> Et siya na din naisolat, ‘mene, mene, tekel, parsin.’ <sup>26</sup> Siya na abe di olog na: din kali ay mene yan laydena ay kalien, nabilang. Enggay binilang Diyos din agew ay panturayam et inkeddeng na ay pasaldengen. <sup>27</sup> Din olog di tekel yan natimbang. Natimbang ka et napaneknekan ay kolang di timbang mo. <sup>28</sup> Din olog aben di parsin et mabingay. Mabingay to din iturayam et maidawat sin taga-Media ya taga-Persia,” kanan Daniel.

<sup>29</sup> Pag binilin Belsazzar din baa na et binadoan das Daniel si manbalanga ay kaman din badon di ari. Kinekean da abe si balitok ya naipaammo ay sisya di maikatlo ay kangatoan sin iturayana. <sup>30</sup> Isdi met laeng ay labi, waday namse en Belsazzar ay ari ed Babilonia. <sup>31</sup> Et si Darius ay taga-Media di naisokat ay ari. Mantawen si Darius si enemapolo ya dowaw sin timpo ay doy.

## 6

*Din Naitep-aan Daniel Sin Liyang Ay Pokokan Di Layon*

<sup>1</sup> Inkeddeng Darius ay mandotok si 120 ay gobernador sin intiro ay iturayana. <sup>2</sup> Pinili nas Daniel ya doway ay pangolo ta say waday nakin tengel sin gogobernador ta adi malogi din ari. <sup>3</sup> Baken nabayag yan maila ay nalalaing si Daniel ya nas-et di obla na mo din iib-a na ay papangolo ya gogobernador. Gapo sin nakaskasdaaw ay kabaelana, panggep din ari ay isaad si Daniel ay makaammo sin intiro ay iturayana.

<sup>4</sup> Idi siya di, pinadpadas din odom ay mangipangolo ya gogobernador ay man-anap si pangipalawaan da en Daniel sin iyat na ay mangipangolo si pansigdan di ili. Ngem magay maanap das ipabasol da, tan matalek, adi na liwayan din obla na ya magay sinosowitik ay am-amagena. <sup>5</sup> Kanan da ay nankakali, “Magay maipabasol takon sisya, malaksig sin pammati na anggoy.”

<sup>6</sup> Nantotolag din papangolo ya gogobernador et inmey da sin ari yan kanan da, “Ari Darius, matagotago ka koma si eng-enggana. <sup>7</sup> Nantotolagan di amin ay mangipangpan-golo, gogobernador ya oopisyal isnan iturayam ay ibilin mo di esay linteg ay masapol ay matongpal. Ibilin mo ay sin oneg di tolonpo ay agew, magay mankarkararag si olay sino ay diyos ono ipogaw malaksig en sik-a. Mo sino di adi manongpal sin bilin ay nay, maitep-a sin liyang ay pokokan di layon. <sup>8</sup> Apo ari, ibilin mo koma ta maipatongpal na ay linteg ya pirmaam ta kaman din odom ay linteg tako ay taga-Media ya taga-Persia ay adi mabalin ay mabaliwan.” <sup>9</sup> Et pinirmaan Darius din bilin ay sana.

<sup>10</sup> Ammon Daniel ay enggay napirmaan din linteg ay doy, ngem intoltoloy na pay dedan ay nandayaw en Diyos sin akin ngato ay kowarton di beey na ay naisagang di tawa na sin bomanda ed Jerusalem. Mamitlo si esay agew ay mankararag ya mandayaw en Diyos ay kaman din sigod ay am-amagena. <sup>11</sup> Inmey din nantotolag ay oopisyal et indasan das Daniel ay mankarkararag ay mankedaw si tolong Diyos ay daydayawena. <sup>12</sup> Pag dan mankokoyog ay inmey sin ari et indarum da si Daniel. Kanan da, “Madaydayaw ay ari, wada met di pinirmaam ay bilin, ay sin oneg di tolonpo ay agew, mo waday mankararag si olay sino ay diyos ono ipogaw malaksig en sik-a et masapol ay maitep-a sin liyang ay pokokan di layon.”

Kanan din ari, “Aw yan, masapol ay matongpal din naibilin, tan adi mabalbaliwan di linteg tako ay taga-Media ya taga-Persia.”

<sup>13</sup> Pag dan kanan sin ari, “Si Daniel ay esa ay taga-Juda ay naipaaddawi sin ili na et linabsing na din linteg ay pinirmaam, tan mankarkararag si mamitlo sin esay agew.”

<sup>14</sup> Palalo di sakit din nemnem di ari sin nanngena si darum da. Man-an-anap si pamosposana ay mangisalakan en Daniel et naninsin-agew ay nannemnem. <sup>15</sup> Ngem inmali kasin din lallalaki ay nantotolag et kanan da sin ari, “Apo ari, ammom met ay adi mabalbaliwan di linteg tako ay taga-Media ya taga-Persia.”

<sup>16</sup> Et inbilin din ari ay madpap ya maitep-a si Daniel sin liyang ay pokokan di layon. Kanan din ari, “Sapay koma ta isalakan daka en Diyos mo ay pansilsilbiam ay sipapasnek.” <sup>17</sup> Inenban da si dakdake ay bato din segpan di liyang yan naimalka din pirman di ari ya papangolo ta magay mabalbaliwan sin naikeddeng en Daniel. <sup>18</sup> Pag somaa din ari sin palasyo na et naninsinlabi ay adi naseyep ya adi nangan. Sinigaana abe am-in ay panragsakan.

<sup>19</sup> Idi pomatpat-a, binmangon din ari et inmey ay dagos sin kad-an di liyang ay pokokan di layon. <sup>20</sup> Idi inmasag-en sin liyang, madandanagan ay namogaw yan kanana, “Ay Daniel! Sik-a ay mansilsilbi sin matmatago ay Diyos, ay insalakan daka en Diyos mo ay nangipapasnekam ay nansilbian?”

<sup>21</sup> Sinongbatan Daniel yan kanana, “Apo ari, matagotago ka koma si eng-enggana! <sup>22</sup> Si Diyos ay daydayawek yan nan-ibaa si anghel na et nandiyemena din tepek di layon ta adi dan komat, tan magay binmasolak en sisya ya siya abe en sik-a ay apo ari.” <sup>23</sup> Palalo di ragsak din ari et pag nan ibilin ay ibala da si Daniel sin liyang. Inbala da et maga di sogsogat na tan nantaltalek en Diyos. <sup>24</sup> Inbilin din ari ay maitep-a sin

pokokan di layon din namabasol en Daniel, pati din aas-awa ya aan-ak da. Adi da pay laeng domateng sin lota yan enggay sinikpaw din layon ya ginotlogotlo da din tong-a da.

<sup>25</sup> Idi siya di, nansolat si Ari Darius sin kaipoipogaw sin intiro ay daga, olay sino di kodil ya kali da. Kanana, “Sapay koma ta somiged di biyag yo! <sup>26</sup> Siya na di ibilin ko: Dakayo amin ay iturayak, patgen ya egyatan yo din Diyos ay daydayawen Daniel. Sisyay din matmatago ay Diyos ay magay pap-eng na.

Adi polos madadael din turay na  
mo adi et mantoltoloy si eng-enggana.

<sup>27</sup> Sisyay din mangisalakakan sin ipogaw na  
ya makaamag si nakaskasdaaw ed daya ya isnan daga,  
tan si Daniel et insalakakan  
sin layon ay mamse koman sisya.”

<sup>28</sup> Et mayat di biyag Daniel sin timpon di nanturayan Darius ya si Cyrus ay taga-Persia.

## 7

### *Din Opat Ay Kaeegyay Ay Animal Ay Naipaila En Daniel Ay Kaman Iitaw*

<sup>1</sup> Sin damo ay tawen ay nanturayan Belsazzar ed Babilonia,\* binmabaktad si Daniel sin katri na yan waday inila na ay kaman iitaw. Insolat na di et siya na di kanana ay manad-at:

<sup>2</sup> Sak-en si Daniel et siya na di inilak ay kaman iitaw sin labi. Inilak ay mapmapo di napigsa ay angin sin am-in ay soli ed daya yan papigpigsana din dalloyon sin malosong ay baybay. <sup>3</sup> Pag et bomala sin baybay di opat ay kaeegyay ay animal ay nankinalasi di kailaan da. <sup>4</sup> Din nangon-ona yan kaman layon ay napayakan ay kaman agila. Sin pamoyboyaak, inilak ay nakaan din payak na, pag maikayang sin lota et pinmika ay kaman ipogaw. Naidawtan si nemnem ay kaman ipogaw.

<sup>5</sup> Binmala din maikadwa ay animal yan kaman oso. Pinmika babaen sin doway ay maodi ay siki na yan intatanga na di tolo ay tadang. Pag et waday nangibilin en sisya, “May, manpennek ka ay mansida si karni.”

<sup>6</sup> Pagak ilaen abey esa ay animal ay kaman leopard. Waday opat ay payak na sin edeg na ay kaman payak di titit. Opat di toktok na yan naidawtan si kalebbengana ay manturay.

<sup>7</sup> Makdeng pay di, inilak sin labi ay doy di maikap-at ay kaeegyay ay animal. Kaeegyay di kailaana ya napigsapigsa. Dadakke ay landok di bab-a na ay pangalang na si depapena, asi na igatigatin. Naitken sin nangon-ona ay aanimal yan waday sinpo ay sakngod na. <sup>8</sup> Idi il-ilaek dadi ay sakngod, inilak di esay kitkittoy ay sakngod ay tinmobo sin nan-gawaan da. Inoknot na din tolo ay sakngod ay sigod ay wadas di yan waday mata na ay kaman matan di ipogaw. Wada abey tepek na yan it-it-ek na din awak na.

<sup>9</sup> Idi boyboyaek, wada da di trono ay naiolnos, et en tinmokdo di esa ay Adi Kabilang di Tawena. Din bado na yan mankilat ay kaman andap, din book na yan mankilat abe ay kaman dotdot di karnero. Din trono na ya din baliling ay naisaadana yan manbidbidang ay apoy. <sup>10</sup> Waday kaman ginawang ay apoy ay omay-ayos ay mapo sin trono na. Niliblibo di mansililbi en sisya ya adi kabilang ay libo din wadas sangoanana. Nanlogi din pangokomana et nalokatan di lilibro. <sup>11</sup> Intoltoloy ko ay nanboya. Gapo sin ngalawngaw di sakngod ay mangit-it-ek pay laeng sin awak na, pinse da din kaeegyay ay animal† et naitep-a din awak na sin apoy ta mapooan. <sup>12</sup> Nakaan di panakabalin din

\* **7:1** 553 B.C. Din linaon din kapitolo ay nay et nangon-ona mo din wada sin kapitolo 5. † **7:11** Wada pay di doway ay kaiologan nina sin Aramaic: 1) Intoltoloy ko ay nanboya gapo sin ngalawngaw di sakngod ay mangit-it-ek pay laeng sin awak na. Idi nanboyboyaak, pinse da din kaeegyay ay animal... 2) Intoltoloy ko ay nanboya dowan pay laeng manngalangawngaw din sakngod ay mangit-it-ek sin awak na. Idi nanboyboyaak,...



odom ay kaeegyat ay animal, ngem napalobosan da ay matago enggana ay domateng din naikeddeng ay timpo.

<sup>13</sup> Sin labi ay doy, inilak di kaman ipogaw, yan omas-asag-en ay maikoykoyog sin liboo ay mapod daya. Waday nangitlod en sisya ay somag-en sin Adi Kabilang di Tawena et en pinmika sin sangoanana. <sup>14</sup> Naidawat en sisya di panakabalin, dayaw ya kinaari ta mansilbi da en sisya din amin ay ipogaw isnan daga, olay sinoy kodil ya kali da, et manturay si eng-enggana.

### *Din Olog Di Iitaw*

<sup>15</sup> Palalo ay nadandanaganak ya inmegyatak begew sin sana ay inilak ay kaman iitaw. <sup>16</sup> Isonga sinmag-enak sin esa ay pinmipika ay mansilbi isdi yan dinamag kon sisya di kosto ay olog nidi, et kanana en ilawlawag na am-in. <sup>17</sup> Kanana, “Din opat ay kaeegyat ay animal yan opat ay ari ay manturay to sin daga. <sup>18</sup> Ngem pag ton idawat din Kangatoan ay Diyos sin ipogaw na di kalebbengan da ay manturay et maiskat da ay manturay si eng-enggana.”

<sup>19</sup> Pagak aben damagen din olog di maikap-at ay kaeegyat ay animal ay naitken sin gagait na. Landok di bab-a na, bronsi di koko na ay say ibisngibisngit na sin depapena asi na igatigatin. <sup>20</sup> Sinalodsod ko di maipanggep sin sinpo ay sakngod sin toktok na, din esa ay tinmobo, din tolo ay sigod ay sakngod ay nakaan, din mata na, din tepek na ay mangit-it-ek sin awak na ya mo apay nga kaman napigpigma mo din odom. <sup>21</sup> Dinad-at ko abe sin pinmipika ay sana ay sin namoyboyaak sidi, ginobat din sakngod ay sana din ipogaw Diyos yan inabak nas daida. <sup>22</sup> Pag domateng din Adi Kabilang di Tawena yan inkalintegana din ipogaw na. Enggay dinmateng din timpo ay pangawatan din ipogaw Diyos si panakabalin ay manturay.

<sup>23</sup> Siya na di kanana ay nangilawlawag: “Din maikap-at ay kaeegyat ay animal yan maikap-at ay panturayan di ari ay mawadan to sin daga yan maitken to sin odom ay iturayan di ari. Abakenan to din am-in ay nanasyon sin daga et igatigatinas daida. <sup>24</sup> Din sinpo ay sakngod yan sinpo ay ari ay mangituray to sin ili ay sana. Mo makdeng di, manturay to di esa ay ari ay naitken sin odom ay nangon-ona en sisya et abakena di tolo en daida. <sup>25</sup> Mankalis lawa maipanggep en Diyos ay Kangatoan ya paligatena din ipogaw Diyos. Laydena abe ay balbaliwan din linteg ya fiesta. Iturayanan to din ipogaw Diyos si tolo ya kagodwa ay tawen. <sup>26</sup> Ngem keddengan ton Diyos et makaan to din panakabalina ya dadlon madosa. <sup>27</sup> Maidawat to sin ipogaw Diyos ay Kangatoan di panakabalin ya kinangato sin am-in ay panturayan isnan lobong. Magay pap-eng din panakabalin da ay manturay et mansilbi ya mantongpal en daida din am-in ay tuturay isnan daga.” <sup>28</sup> Siya na di pap-eng din napasamak. Inmopsatak sin palalo ay egyat ko ngem adiak dinaddad-at na si odom.

### *Din Inilan Daniel Ay Kaman Iitaw Ay Maipanggep Si Karnero Ya Kalding*

Sin maikatlo ay tawen ay nanturayan Ari Belsazzar, waday inilan Daniel ay kaman iitaw ay maipanggep si bomaro ay karnero ya kalding ya din sakngod da, namnamed din sakngod di kalding. Inlawlawag Gabriel ay esa ay anghel din olog di iitaw ay sana. Kanana en din iitaw yan maipanggep si mapasamak sin maod-odi ay agew. Din iturayan di ari ed Grecia yan abaken da din iturayan di aari ed Media ya Persia. Pag wadan to di esa ay ari ay maisaad ed Grecia yan palalo ay lawa di ogali na. Ad-ado di peslena ay ipogaw Diyos yan kontraena abe din Kangatoan ay Ari, ngem asi pag maabak ya madosa, yan baken ipogaw di mangamag. (8:1-25)



## 9

### *Din Kararag Daniel Para Sin Ipogaw Na*

<sup>1</sup> Esa ay taga-Media si Darius ay anak Xerxes yan inturayana ed Babilonia. <sup>2</sup> Sin damo ay tawen ay nanturayana, inad-adal ko din Nasantoan ay Kasolatan, yan nem-nemnemek din inpaibagan Diyos sin mamadto ay si Jeremias ay kanana en pitopolo ay tawen ay mababakas ed Jerusalem. <sup>3</sup> Intoled ko di dagaang ko, nanbadoak si sako ya tinmokdoak si dap-o, et inpasnek ko ay nankararag ya nankedaw si seg-ang Diyos. <sup>4</sup> Nankararagak en Yahweh ay Diyos ko et inpodnok di basbasol din kailiak.

Kanak ay nankararag, “Sik-a ay Yahweh din kaeegyat ya nangato ay Diyos. Tong-palem din intolag mo ya adi manbalbaliw din layad mo sin manglaylayad en sik-a ya manongtongpal sin linteg mo. <sup>5</sup> Nanbasol kami ya say inamag mi din maikontra sin laydem, tan adi kamin tinongpal din bilbilin mo. <sup>6</sup> Adi mi pinatpati din baam ay mamadto ay nangibaga sin kalim sin aari, tuturay ya aap-o mi ya am-in abe ay kailian mi. <sup>7-8</sup> Sik-a ay Diyos yan kanayon ay nalinteg ka, ngem dakami am-in ay omili isnan Juda ya Jerusalem yan naibabain kami engganad wani, pati din aari mi, din mangiturturay en dakami ya aap-o mi, tan baken kamin napodno et binmasol kami en sik-a. Siya abe sin amin ay Israelita ay nansisianem ay inpaey sin addawi ya asag-en ay il-ili. <sup>9</sup> Ngem managseg-ang ka ya nakasagana ka ay mamakawan olay mo nilabsing mi din bilin mo. <sup>10</sup> Tan adi mi tinongpal din kalim ya bilbilin mo ay inpaibagam sin mamadto ay nansilsilbi en sik-a. <sup>11</sup> Sinalongasing din amin ay Israelita din linteg mo et sinigaan da ay nanongpal sin inbagam. Nanbasol kamin sik-a et inbokbok mo en dakami din dosa ay naisolat sin linteg Moses ay baam. <sup>12</sup> Tinongpal mo din amin ay inbagam ay amagem en dakami ya sin mangituray en dakami, tan nakarkaro di inyat mo ay nanosa en dakami mo din odom ay ili isnan daga. <sup>13</sup> Nilak-am mi amin din dosa ay naisolat sin linteg Moses. Ngem enggana ed wani, magay inam-amag mi ay kapnekam. Tan adi kami inbabawi din basbasol mi ya adi kami aben inon-onodan din inpaammom ay tet-ewa. <sup>14</sup> Isonga sin-ed mo di kosto ay timpo ay nanosaam en dakami. Ngem nalinteg ka ay Yahweh ay Diyos mi sin amin ay inamag mo tan sinalongasing mi din kalim.

<sup>15</sup> “Sik-a ay Yahweh ay Diyos mi, inpailam di panakabalin mo babaen sin nangway-awayaam sin ipogaw mo ed Egipto et adi malinglingan enggana ed wani. Nanbasol kami tan lawa di inam-amag mi. <sup>16</sup> Sinalaknibam dakami ed idi, isonga adi ka koman ibonget din siyodad mo ay Jerusalem ya din Timplom sin nasantoan ay dontog mo. Laslasoyen din amin ay ipogaw sin nanliniked din ili ay Jerusalem ya din ipogaw mo gapo sin basbasol mi ya lawa ay inam-amag di aap-o mi. <sup>17</sup> Isonga ed wani, dengngem koma nan kararag ko ay manpakaasi en sik-a. Ilaem koma nan ligat ay laklak-amen mi ya laklak-amen nan siyodad ay kaidaydayawan di ngadan mo. Isaad mo koma din nabakas ay Timplom ta ammoen di amin ay ipogaw ay sik-a si Diyos. <sup>18</sup> Apo Diyos, dengngem kod din kararag mi. Ilaem koma nan ligat mi ya panakadadael di siyodad ay kaidaydayawam. Din pankedawan mi et baken gapo sin siged ay am-amagen mi mo adi et gapo ta managseg-ang ka. <sup>19</sup> Dengngem koma din kararag mi ya pakawanem dakami. Adi kan bayagen ta ammoen di kaipoipogaw din kinadiyos mo tan okam nan siyodad ya da nan ipogaw.”

### *Din Nangiologan Gabriel Sin Naipadto*

<sup>20</sup> Intoltoloy ko ay mankararag yan inpodnok din basbasol ko ya din basol di kailiak ay Israelita. Nanpakpakaasiak en Yahweh ay Diyos ko para sin nasantoan ay siyodad ya Timplo na. <sup>21</sup> Idi mankarkararagak, paspas ay tinmayaw si Gabriel sin kad-ak. Sisa din lalaki ay inilak sin nangon-ona ay kaman iitaw. Sin oras ay doy yan say timpo ay pan-idatonan sin masmasdem. <sup>22</sup> Kanana, “Daniel, inmaliak ta tolongak sik-a ay

mangammo ya mangawat sin olog di inilam. <sup>23</sup> Idi inlogim ay nankararag en Diyos, pinatgana din kararag mo et inmaliak ay mangibagan sik-a tan laydelayden Diyos sik-a. Estem ay dengngen ta maawatam di olog din inilam. <sup>24</sup> Mamin pitopolo ay pito ay tawen di inkeddeng Diyos ay mapalabas, asi na wayawayaan din kailiam ya nasantoan ay siyodad mo sin basol. Mapakawan to din basol da ya manlogi di kinalinteg ay magay pap-eng na ta matongpal din naipaila ya naipadto et maidaton en Diyos din nasantoan ay Timplo. <sup>25</sup> Masapol ngarud ay ammoem ya nemnemem na: Opatapolo ya siyam\* ay tawen di malabas manipod sin kaibilinana ay maamag kasin din siyodad ay Jerusalem enggana sin domatngan di dinotokan Diyos ay manturay. Maamag to kasin din siyodad ay Jerusalem et mawada di kalsada ya makneg ay alad na. Komakaman to si oneg di mamin pito ay enemapolo ya doway ay tawen, ngem din timpo ay doy yan timpon di golo. <sup>26</sup> Mo malabas di ay timpo, peslen dan to din dinotokan Diyos ay manturay, et maga di mabay-an en sisya. Kaman layos ay domateng din sosoldadon di esay pangolo, et bakasen da din siyodad ya Timplo. Mantoltoloy di gobat ya waday madaddadael enggana sin kakdenggan di timpo ay doy, tan say inkeddeng Diyos. <sup>27</sup> Makitolag to din pangolo ay sana si ad-ado ay ipogaw si pito ay tawen. Mo emey di tolo ya kagodwa ay tawen manipod sin nakitolagana, pasaldengena din pan-idatonan di ipogaw. Maisaad to sin kakayangan ay partin di Timplo din kaliliget ay domadael et mantees di enggana ay domteng din inkeddeng Diyos ay kadosaan di nangisaad.”

## 10

### *Din Inilan Daniel Ay Kaman Iitaw Sin Benget Di Ginawang Ay Tigris*

<sup>1</sup> Sin maikatlo ay tawen ay nanturayan Ari Cyrus ed Persia, waday naipaammo en Daniel ay nangadanan abes Beltesazzar. Din naipaammo en sisya yan maipanggep si kaeegyat ay gobat yan dadlon tet-ewa. Naawatana din laydena ay kalien, tan nailawlawag en sisya babaen si inila na ay kaman iitaw. Siya na di dinad-at na:

<sup>2</sup> Sin timpo ay doy, enggay nanladingitak si tolo ay domingo. <sup>3</sup> Sin oneg din tolo ay domingo ay doy, adiak nangnangan si mam-is, adiak nansidsidas karni ya adiak nan-in-inom si arak. Adiak aben inap-aplosan din awak kos nabanglo ay lana.

<sup>4</sup> Sin maikadowanpo ya opat ay agew di damo ay bowan, wadaak ay pinmipika sin benget di annawa ay ginawang ay Tigris. <sup>5</sup> Idi nanmeswatak, inilak di lalaki ay nanbabados nangina ay mankilat ya nanbibilkos kamayatan ay balitok. <sup>6</sup> Mankoniniing din awak na ay kaman kowintas, kaman kimat din ropa na ya kaman apoy ay manbidbidang din mata na. Din takkay ya siki na yan kaman nalaslasan ay gambang di koniniing da, ya napigsa din kali na ay kaman din bogaw di ad-ado ay ipogaw.

<sup>7</sup> Magay nangila sin kaman iitaw ay nay mo adi et sak-en anggoy ay si Daniel. Din lallalaki ay gagait ko et magay inila da, ngem palalo ay nakibtot da et katagtag da ay en mantabon. <sup>8</sup> Isonga nabay-anak et es-esak ay mamoyboya isnan nakaskasdaaw ay kaman iitaw. Enggay namagay bikas ko ya palalo ay inmopsat di ropak. <sup>9</sup> Pagak dengngen din kali na et natalimodawak ay nanlakpap sin lota. <sup>10</sup> Idi siya di, in-adawa nan takkay na yan binadanganas sak-en ay nandokmog ya nantamed. Manpaypayegpegak pay laeng.

<sup>11</sup> Kanan din anghel, “Ay Daniel, laydelayden dakan Diyos. Ipikam ta estem ay dengngen di ibagak en sik-a, tan si Diyos di nangibaa en sak-en.” Sin nangwanianas di, pinmikaak ay manpaypayegpeg. <sup>12</sup> Pag na et kanan, “Daniel, adi kan emegyat. Manlogi sin damo ay agew ay nanpakombabaam ay nankedaw en Diyos si panangawat, pinatgana din kararag mo, et nay ay inmaliak ay kaman songbat na. <sup>13</sup> Ngem din anghel ay pangolo ed Persia yan tinmopap si dowanpo ya esa ay agew. Pag domateng si Miguel ay esa sin papangolon di anghel ay tomolong. Tinaynak sisyas di sin kad-an di

\* **9:25** Din kanana sin Hebreo et: mamin pito ay pito.

anghel ay pangolo ed Persia, <sup>14</sup> et inmaliak isna ta ilawlawag ko en sik-a di mapasamak sin kakailiam sin tapin di agew, tan siya na di ibagbagan din sana ay inilam ay kaman iitaw.”

<sup>15</sup> Sin nangibagaanas di, nandomogak et adiak makakali. <sup>16</sup> Pag kapayen din anghel ay kaman ipogaw di kailaana din sobil ko et kanak en sisya, “Apo, naabakak si egyat ko gapos nan inilak et kinmapsotak. <sup>17</sup> Intoy iyat ko ay owat esay bag-en ay makingalat en sik-a ay apok? Namagay bikas ko et kamanak adi makaleng-ag.”

<sup>18</sup> Pag na kasin kapayen sak-en et pinmigmaak. <sup>19</sup> Kanana, “Maga koma di emegyatam ono pandanagam, tan laydelayden dakan Diyos. Tomoled ka ngarud ta pomigma ka.”

Sin nangibagaanas di, pinmigmaak pay yan kanak, “Apo, ibagam kod di laydem ay ibaga, tan nay ay inmipapigma ka.”

<sup>20-21</sup> Pag nan kanan, “Ay ammom di panggep ko ay inmalis na? Inmaliak ta ipaammok en sik-a din naisolat sin libro ay pag tet-ewa di linaona. Asiak mantaoli ay mangobat sin pangolo ay makaammo ed Persia. Et mo makdeng di, maisokat ay kagobat ko din mangipangolo ed Grecia. Maga di bomadang ay makigobat en daida mo adi et si Miguel ay say pangolo yo ay Israelita.

## 11

<sup>1</sup> Et sak-en abe di namadang ya nanalakinib en sisya sin damo ay tawen ay nanturayan Darius ay taga-Media.”

2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30

### *Din Aari Sin Abagatan Ya Amyanan*

(11:31-45)

Pag ilawlawag din anghel di maipanggep sin bomtak to ay gobat. Kanana, “Wadan to di napigma ay ari ed Grecia ay mangabak si ad-ado ay nasyon, ngem pag matey et mabingay din iturayana si opat ay panturayan. Din dowan en daida ay manturay yan din ari sin amyanan ya din ari sin abagatan. Wadan to di pantolatolagan da ay dowan ya wada abey pan-gobagobatan da.”

“Pag waday maiskat ay ari sin amyanan ay magay lebbeng na ay manturay. Olay mo kitkittoy ay nasyon di iturayana, ngem pomigmaak pay dedan begew si tolagan ya gobat. Ena gobaten din ari sin abagatan et abakena. Pag somaa ay ad-ado sinamsam na ay kinabaknang. Sin timpo ay inkeddeng Diyos, kasinan gobaten din nasyon sin abagatan, ngem waday mangontra en sisya ay sosoldado ay mapo sin diposan di agew ay manlogan si bapor. Siya di, madismaya et somaa ay mandan ed Israel. Begew sin palalo ay bonget na, amagena di kabaelana ay manadael sin pammatin di ipogaw Diyos.” (11:2-30)

<sup>31</sup> “Domateng din sosoldadon di ari ay sana et ipakadodogis da din Timplo. Pasaldengen da din innagew ay daton yan isaad da din kaliliget ay domadael. <sup>32</sup> Ietekan to din ari din manokog si pammati da ta maawis da ay makikadwa en sisya, ngem din napasnek ay mantalek en Diyos et ipapati da ay mangontra en sisya. <sup>33</sup> Din masirib yan ad-ado di bagbagaan da, ngem sinkaattikan yan peslen das daida babaen si kampilan ya apoy. Maakewan ya maibalod di odom en daida. <sup>34</sup> Wadan to di tomolong en daida sin timpon di kapalpaligatan da, ngem ad-ado en daida di lawa di panggep da. <sup>35</sup> Maipapse din odom ay masirib, ngem maamag di ta mapadas ya malinisan din odom enggana ay domteng din kagdangan di timpo ay inkeddeng Diyos.

<sup>36</sup> “Amagen to din ari di am-in ay laydena. It-it-ek na ay nangatngatos sisya mo olay sino ay diyos ya palawlawenas Diyos ay Kangatoan. Kabaelana ay amagen dana enggana ay domteng din timpo ay panosaan Diyos en sisya, tan sigurado ay amagen Diyos din inkeddeng na ay amagen. <sup>37</sup> Adi bigbigen din ari ay sana din didiyosen ay dinaydayaw di aap-o na ya didiyosen ay laylayden di babbabai. Di katet-ewa na,

maga polos di bigbigena ay diyos, tan kanana en sisya di kangatoan si am-in. <sup>38</sup> Adi na dayawen daida mo adi et din didiyosen ay kanan da en manalsalagnib si alad di ili, didiyosen ay adi dinaydayaw di aap-o na. Idatonana si balitok, palata ya nankababanol ay bato ya odom pay ay nabanol ay regalo. <sup>39</sup> Olay din il-ili ay nasalagniban si kaknegan ay alad, ena gobaten babaen sin tolong di didiyosen di odom ay ili. Padayawanan to din manpaituray en sisya et idawtanas nangato ay saad ya daga ay gon-gona da.

<sup>40</sup> “Idi dandani ay makdeng din naikeddeng ay timpo, gobaten to din ari sin abagatan din ari ay sana sin amyanan, ngem din ari sin amyanan et kaman napigsa ay dagem di iyat na ay mangabat babaen si kalisa ay para gobat, nangakabayoy ay soldado ya ad-ado ay bapor. Kaman layos ay manalapos sin odom ay nanasyon. <sup>41</sup> Gobatena abe din kamaptengan ay nasyon et ad-ado di matey, ngem makalasad to din taga-Edom, Moab ya din papangolon di Ammonita. <sup>42</sup> Ad-ado di abakena ay nasyon et olay ed Egipto yan adi makalisi. <sup>43</sup> Okaenan to din balitok, palata ya amin ay nabanol ay sanikwan di Egipto. Abakena abe ed Libya ya Etiopia. <sup>44</sup> Ngem wadan to di maipadamag en sisya ay mapo sin bomandas balaan di agew ya amyanan et palalo ay madanagan sisya. Pag et palalo di iyat na ay makigobat et ad-ado di peslena gapo sin palalo ay bonget na. <sup>45</sup> Iamag na din dadakke ay tolda na ay toldan di ari sin nan-gawaan di baybay ya dontog ay naisaadan di Timplo. Ngem matey tos sisya ay magay mamadang.”

## 12

### *Din Maodi Ay Timpo*

<sup>1</sup> Intoloy din anghel ay nangwani, “Sin doy ay timpo, manpailas Miguel ay din kangatoan ay anghel. Sisya di mangay-ayowan sin kailiam. Sin doy ay timpo, wadan to di ligat ay magay is-iso na manipod pay laeng sin nanlogian di nanasyon. Mo domteng di ay timpo, maisalakan din kakailiam ay naisolat di ngadan da sin libron di biyag. <sup>2</sup> Awni et ad-ado di matago ay natey. Din odom yan matagotago da si eng-enggana, din odom yan maibabain das eng-enggana. <sup>3</sup> Din nalaing yan mansilaw da ay kaman din silaw ed daya. Din mangit-itdo sin kaipoipogaw si iyat da ay man-amag si siged et kaman dan din talaw ay mansilaw si eng-enggana.

<sup>4</sup> “Ngem sik-a ay Daniel, timbream din libro ta mapaneknekan ay kosto din linaona enggana sin maodi ay timpo. Tan ad-adon to di manganaanap si katapian di ammo da,” kanan din anghel.

<sup>5</sup> Pagak ilaen di doway ay lalaki. Pinmipika din esa sin benget di ginawang yan din maikadwa abe sin benget na sin demang. <sup>6</sup> Nansalodsod din esa sin lalaki ay nanbados nabanol ay lopot ay wada sin maibandas poon di ginawang. Kanana, “Pig-an pay ay matongpal dana ay nakaskasdaaw ay maamag?”

<sup>7</sup> Intag-ay din wada sin poon di ginawang din doway ay takkay na yan nansapata en Diyos ay magay pap-eng na. Dinngek din kanana, “Tolo ya kagodwa ay tawen. Makdeng dana mo enggay namagay kabaelan di ipogaw Diyos.”

<sup>8</sup> Dinngek din inbaga na, ngem adiak inawatan, isonga kanak ay nansalodsod, “Apo, sino pay di pantongpalan dana?”

<sup>9</sup> Kanana ay sinombat, “Daniel, emey ka et tan masapol ay adi maawatan dana ay padto enggana sin maodi ay agew. <sup>10</sup> Ad-adon to di malinisan sin basbasol da, ngem din mangam-amag si lawa et itoltoloy da din lawa ay am-amagen da. Adi maawatan din mangam-amag si lawa, ngem din nalaing et maawatan da.

<sup>11</sup> “Manipod sin timpo ay maisaldeng din inag-agew ay daton ay mapooan, ay siya din maisaadan din kaliliget ay domadael, malabas to di 1,290 ay agew. <sup>12</sup> Nagasat din makaanos enggana ay makdeng din 1,335 ay agew. <sup>13</sup> Mo sik-a pay ay Daniel, ipapasnek mo koma ay mansilbi en Diyos. Matey ka, ngem bomangon kan to sin maodi ay timpo ta awatem din gon-gonam.”

## Hosea Maipanggep Sin Libro Ay Nay

Si Hosea din naodi ay mamadto ay nangaskasaba ed Israel, asi pay abaken di taga-Assyria sin 721 B.C. Napigsa di Israel sin nanlogian Hosea ay nangasaba yan ad-ado abe di binmaknang. Begew sin kinabaknang da, inpangato dan nemnem da yan inmaddawi dan Diyos. Olay mo nangon-onas Amos ay namagbaga en daida, adi dan inkaskaso mo adi et inpapati da ay nanaydayaw en Baal ya din sinan baka ay wada ed Betel ya Dan.

Idi naisokat si Hosea ay mamadto, inpalawag na ay din basol da ay sana yan naispiritoan ay kamalala, tan nilablabsing da din intolag Diyos en daida. In-arig na din kasasaad da sin napasamak sin mismo ay pamilya na. Tan si Gomer ay asawa na et nasangaw si odom, et siya met laeng ay nasangaw din Israelita si sinan didiyos. Din nanaolian Hosea sin asawa na ya din kasinan nangipailaan sin layad na en sisya et kaiarigan met laeng din layad ya anos Diyos sin ipogaw na, tan olay namin piga ay dinokogan din Israelita si Diyos, pinakawana ya kasinan pay dedan binindisyonan si daida.

Indadaan Hosea sin kailiana ay waday gedeng di anos Diyos. Mo adi dan ibabawi din lawa ay kabibiyag da, dosaen Diyos daida. Madadael din ili da ya mapilit da ay maiey sin addawi ay ili. Ngem sin tapin di agew, gapo sin dakdake ay layad na, awisen Diyos din ipogaw na ta mantaoli da kasin en sisya.

### **Din Linaona**

Din nangasawaan Hosea ya din pamilya na 1:1-3:5

Din namagbagaan Hosea sin kailiana ay taga-Israel 4:1-13:16

Din inkarin Diyos ay kasinan bindisyonan din ipogaw na 14:1-9

### *Din Asawan Hosea Ya Din Aan-ak Na*

<sup>1</sup> Waday inpaibagan Diyos en Hosea ay anak Beeri sin timpon da Uzzias, Jotam, Ahaz ya si Hezekias ay aari ed Juda. Sin doy ay timpo, si Jeroboam abe ay anak Joas di ari ed Israel.

<sup>2</sup> Sin damo ay nakikalian Diyos en Hosea, kanana, “En ka mangasawa si manakikamalala, yan din anak yo abe et isoen das ina da.\* Say iyat mo di, tan din ipogaw sin ili ay sana yan kaman dan manakikamalala begew sin nanokogan dan sak-en ay Diyos.”

<sup>3</sup> Idi siya di, inasawa nas Gomer ay anak Diblaim et nawad-an sisya. Idi inpabela na din anak da, lalaki. <sup>4-5</sup> Pag kanan Diyos en Hosea, “Ngadanam sisya si Jezreel, tan baken mabayag yan dosaek din polin Jehu gapo sin pinsen Jehu ed Jezreel. Pap-engek abe din turay di Israel. Sin agew ay sana, paabak koy Israel sin tanap ay Jezreel ta mapap-eng din kabaelan da ay makigobat ya siya abe sin kasasaad da ay nasyon.”

<sup>6</sup> Nansikog kasin si Gomer yan babai di in-anak na. Kanan Diyos en Hosea, “Lo-Ruhama† di ipangadan mo, tan enggay adiak seg-angan din taga-Israel. Polos ay adiak kasin pakawanen daida. <sup>7</sup> Ngem seg-angak din taga-Juda et isalakan kos daida. Baken babaen si gobat, kumpulan, pana, kabayo ono sosoldado di iyat ko ay mangisalakan en daida mo adi et babaen sin mismo ay panakabalin ko ay si Yahweh ay Diyos da.”

<sup>8</sup> Idi pinsot Gomer si Lo-Ruhama, nawad-an kasin et lalaki di in-anak na. <sup>9</sup> Kanan Diyos, “Ngadanam si Lo-Ammi,‡ tan baken kon ipogaw dakayo ay Israelita yan baken yon Diyos si sak-en. <sup>10</sup> Ngem omad-ado kayon to ay Israelita et kaman din darat sin baybay ay adi kabilang ya adi kasokat. Et sin mismo ay lugar ay nangibagaak en baken

\* **1:2** Di odom abe ay kaiologan nina sin Hebreo et: 1) En ka mangasawa. Makikamalalan tos sisya, yan din anak yo abe et isoen das ina da. 2) En ka ngarud mangasawa si manakikamalala, yan tagibien yo abe din anak na ay bastardo.

† **1:6** Din olog di Lo-Ruhama sin Hebreo et “adi maseg-angan.” ‡ **1:9** Din olog di Lo-Ammi sin Hebreo et “baken kon ipogaw.”



kon ipogaw dakayo, mangadanan kayon to ay anak di matmatago ay Diyos. <sup>11</sup> Awni et man-es-esa din ipogaw ed Juda ya Israel yan mandotok da si esa ay pangolo da. Et pag da kasin omad-ado ya somiged di biyag da sin ili da. Nabanol to din agew ay sana ed Jezreel!”

## 2

1 2 3 4 5 6 7 8 9 10 11 12 13 14 15

### *Din Layad Diyos Sin Baken Napodno Ay Ipogaw Na (2:16-23)*

<sup>16</sup> Intoloy Diyos ay nangwani, “Sin agew ay sana, asawa di pangwani dan sak-en ay baken baal.\* <sup>17</sup> Tan pasaldengek si daida ay mangibaga sin ngadan Baal ay didiyosen da. <sup>18</sup> Mo makdeng di, makitolagak sin am-in ay atap ay animal ya titit sin daga ta adi da sakitan din ipogaw ko. Kaanek abe di pana ya kampilan yan pasaldengek di gobat isnan ili da ta say tomalna di biyag da. <sup>19</sup> Panbalinek din Israelita ay asawak si eng-enggana et kosto ya nalinteg di iyat ko en daida. Ipailak abe din adi manbalbaliw ay layad ya seg-ang ko en daida <sup>20</sup> ya din kinapodnok ay asawa et bigbigen das sak-en ay Diyos.

<sup>21</sup> “Sin agew ay sana, bilinek ed daya ay manibog isnan daga ay mankedkedaw si odan. <sup>22</sup> Gomabay din mola isnan daga et mawada di arak ya mantika ta masongbatan din kararag di ipogaw ko ay Israelita. <sup>23</sup> Sin timpo ay sana, kaman mola din Israelita ay isek ko sin daga da ya pagabayek ta manbalin da ay ipogaw ko. Seg-angak da din ipogaw ay nangadanan si ‘adi naseg-angan’ ed idi. Ibilang ko ay ipogaw ko din nangadanan si ‘baken kon ipogaw’ ed idi et kanan dan to, ‘Sik-a di Diyos mi.’ ”

## 3

### *Din Nanaolian Hosea En Asawa Na*

<sup>1</sup> Idi siya di, kanan Diyos en sak-en, “En ka taolien si asawam. Olay mo makilallalakis sisya ya laylayden di odom, ipailam din layad mon sisya ay kaman din iyat ko ay Diyos ay manglaylayad sin Israelita, olay dinokogan das sak-en ya nandayaw da si didiyosen ay indatonan da si kasigedan ay daton.” <sup>2</sup> Et sinobot ko si asawak si sinpo ya lima ay palata ya pito ay salop ay sabog. <sup>3</sup> Kanak en sisya, “Masapol ay mabayag ay makibeey ka en sak-en yan isaldeng mo ay makikamalala. Masapol ay adi ka makidaag si odom ay lalaki. Olay sak-en et adiak daagen sik-a.” <sup>4</sup> Siya nay mangipaila ay mabayag to ay magay ari ono pangolon din Israelita. Mababayag abe ay isaldeng da ay man-idaton ya mamaga din tinootood da ay bato ay pandayawan da. Mamaga abe din osalen da ay manpontos ya kinitikitan sin beey da. <sup>5</sup> Sin maod-odi pay ay agew, mansagong din Israelita en Yahweh ay Diyos da ya sin polin David ay ari da. Omali da ay manpayegpeg sin sangoanan Diyos ta bindisyonanas daida.

## 4

1 2 3 4 5 6 7 8 9 10 11 12 13 14 15 16 17 18 19

## 5

1 2 3 4 5 6 7 8 9 10 11 12 13 14

### *Din Baken Naimposan Ay Nanbabawian Di Ipogaw Diyos (5:15)*

<sup>15</sup> Kanan Diyos, “Taynak din ipogaw ko enggana ay ipodno da din basbasol da et omanap da sin timpon di ligat da.”

\* **2:16** Dowa di pangikalian di Hebreo sin asawa: ish ya baal. Di esa abe ay olog di baal et “among.” Gapo ta si Baal yan ngadan met laeng di sinan didiyos di taga-Canaan, kanan Diyos en adi dan to osalen din kali ay baal mo adi et ish



## 6

<sup>1</sup> Idi siya di, kanan din kaipoipogaw, “Sagongen tako et si Diyos! Pinaligat nas datako, ngem agasana met laeng datako. Sinogatanas datako, ngem awni et bedbedana din sogat tako. <sup>2</sup> Makdeng di dowo ono tolo ay agew, tagoena kasin datako et matago tako sin kad-ana. <sup>3</sup> Bigbigen takos Diyos ya ipakat tako din kabaelan tako ay mangammo en sisya. Sigurado din omaliana ay kaman din bomalaan di agew ya din domtengan di odan sin kosto ay timpo na ay manibog sin lota.”

<sup>4</sup> Ngem kanan Diyos, “Sino pay di amagek en dakayo ay Israel ya Juda? Din layad yo en sak-en et kaman liboo ono dono sin agsapa ay sinkaattikan yan mamaga. <sup>5</sup> Isonga inbaak din mamadtok ay mangibaga sin iyat ko ay mangokom ya manosa en dakayo. Nalawag din laydek ay amagen yo. <sup>6</sup> Say laydek et din mantoltoloy ay layad yon sak-en, baken din animal ay idaton yo. Mas laydek din panangammo yon sak-en mo din daton ay mapooan.

<sup>7</sup> “Ngem kaman kayon si Adan,\* adi yo tinongpal din intolag ko. Inpaila yo ay baken kayon matalek. <sup>8</sup> Kaspangarigan, ed Gilead et ilin di ad-ado ay managbasol. Ad-ado di pespeslen das di. <sup>9</sup> Din papadi da yan kaman bonggoy di tollisan ay mansesseed si peslen da sin kalsada ay emey ed Sekem. Ay inayan! Madagsen di basol da! <sup>10</sup> Palalo ay lawlawa din il-ilaek ay maam-amag ed Israel. Pinakadodogis dan awak da, tan daagen da di hostess sin timplon di sinan didiyos. <sup>11</sup> Sik-a abe ay Juda, waday naikeddeng ay timpo ay kadosaam.”

## 7

1 2 3 4 5 6 7 8 9 10 11 12 13 14 15 16

## 8

1 2 3 4 5 6 7 8 9 10 11 12 13 14

## 9

1 2 3 4 5 6 7 8 9 10 11 12 13 14 15 16 17

## 10

### *Din Panosaan Diyos Sin Taga-Israel (10:1-8)*

<sup>1</sup> Din Israelita yan maiarig da ed idi si magabay ay obas ay ad-adoy lames na. Ngem idi binmakhbknang da, ad-ad-ado abe din altar ay inamag da ay nanaydayawan das sinan didiyos. Masepsep abe ay inaltialtian da din tinootood da ay bato ay nandaydayawan da. <sup>2</sup> Baken naimposoan din nemnem di Israelita, isonga ed wani masapol ay manligat da ay mangikaro sin basbasol da. Awni et bakasen Diyos din aaltar da ya din tinootood da ay pandaydayawan. <sup>3</sup> Sin timpo ay doy, kanan da, “Magay ari mi tan adi mi inegyatan si Diyos, ngem sino pay dedan di maibadang di ari en dakami?” <sup>4</sup> Magay silbin din ad-ado ay kali da. Mansapata da ya makitolag da, ngem adi da tongpalen. Din kanan da en kinalinteg yan kaman makasabidong ay logam sin naalado ay payew.

<sup>5</sup> Madandanagan din taga-Samaria gapo sin balitok ay sinan baka ay didiyosen ed Bet-aven. Manladingit ya man-oga din ipogaw ya papadi na, tan awni et maiaddawi din mankanapteng ay arkos na. <sup>6</sup> Maiey din didiyosen da ed Assyria et maidaton sin nangato ay ari da. Et maibabain din Israelita gapo sin lawa ay pamagbaga ay inonodan da.\*

\* **6:7** Din kanana sin LXX et: Kaman ed Adam. Di esa abe ay kaiologana et: Kaman kayon din iib-a yo ay ipogaw, tan din olog di Adan sin Hebreo et “kaipoipogaw.” \* **10:6** Din pamagbaga ay nay et din inbagan Jeroboam ed idi ay ilogi da ay mangdayaw sin sinan baka (1 Aari 12:28-30). Di esa abe ay kaiologan nina sin Hebreo et: gapo sin mapasamak sin sinan didiyos da.

<sup>7</sup> Awni et maiey ed addawi din ari ed Samaria ya din kailiana ay kaman sapsap di kaiw ay maianod. <sup>8</sup> Madadael abe din pandaydayawan das didiyosen ed Aven ay begew si binmasolan di Israelita. Gomabay di pagat ay manab-ok sin aaltar da. Et kanan din ipogaw sin dodontog, “Magodogod kayo koma ta tab-okan yos dakami.” <sup>9</sup> <sup>10</sup> <sup>11</sup> <sup>12</sup> <sup>13</sup> <sup>14</sup> <sup>15</sup>

## 11

### *Din Layad Diyos Sin Ipogaw Na Ay Nanokdokog En Sisya (11:1-9)*

<sup>1</sup> Kanan Diyos, “Idi anak pay laeng din nasyon ay Israel, inpailak din layad ko. Inpangok din anak ko ay nay ay komaan ed Egipto. <sup>2</sup> Ngem sin nangayagak en daida, nasepsep et ay inmaddawi dan sak-en yan nan-idatdaton das animal ya insinso sin didiyosen ay makwani en Baal. <sup>3</sup> Sak-en ay mismo di nangitakkay ya nangitdo sin Israelita ay mandan, ngem adi da ammo ay sak-en di nangay-ayowan en daida. <sup>4</sup> Sin nangipangoak en daida, inpailak din seg-ang ya layad ko. Maiarigak si ipogaw ay mangipapaing si moyang sin tamil na. Nanyakog-ongak ay namakan en daida.

<sup>5</sup> “Mantaoli dan to ed Egipto et iturayan di taga-Assyria si daida, tan sigaan da ay mantaolin sak-en. <sup>6</sup> Mawada di gobat sin siyodad da et daddaelen din kalaban da din segpan di siyodad ya peslen das daida. Mapasamak na tan say pinati da di lawa ay pamagbaga. <sup>7</sup> Talaga ay ipapati da ay manokog en sak-en. Olay mo pigay iyat din mamadto ay mamagbaga en daida ta mantaoli da en sak-en ay Kangatoan ay Diyos, adi da pay dedan bomigbig.

<sup>8</sup> “Israel, ay maitoled ko aya ay mangipolang en sik-a sin kagobat mo? Ay maitoled ko aya ay mamaybay-an en sik-a? Ay siya mo mabalin ko ay daddaelen sik-a ay kaman ed Adma ya Zeboiim? Nay ay manbabawiak. Adiak baw maamag gapo sin palalo ay seg-ang ko. <sup>9</sup> Adiak manpaabak sin palalo ay bonget ko ya adiak kasin daddaelen ed Israel, tan Diyosak dedan ay baken ipogaw. Nasantoanak ay wada en dakayo et adiak omali ay mangipaila si bonget ko.” <sup>10</sup> <sup>11</sup> <sup>12</sup>

## 12

1 2 3 4 5 6 7 8 9 10 11 12 13 14

## 13

### *Din Kinalawan Di Israelita Ya Din Panggep Diyos Ay Manosa En Daida (13:1-16)*

<sup>1</sup> Ed idi, mo mankali din polin Efraim, emegyat din odom ay tribu, tan mabigbigbig din tribu Efraim ed Israel. Ngem binmasol da sin nandayawan da en Baal et nakeddengan da ay matey. <sup>2</sup> Yan ed wani, sepsepsepen da din basol da. Tan din nalaing ay manpanpanday et am-amagen da din palata da si didiyosen ay nas-et di amag na. Kanan da, “Man-idaton tako en daida,” dowan dan ongoan din didiyosen da ay sana ay sinan baka. <sup>3</sup> Isonga kaman dan liboo sin agsapa ya dono ay sinkaattikan yan mamaga. Kaman dan teg-ap ay itayaw di dagem ya asok ay bomala sin tawa.

<sup>4</sup> Ngem kanan Diyos, “Manipod sin kawada yo ed Egipto, sak-en si Yahweh ay Diyos yo. Magay odom ay Diyos yo tan magay odom ay mangisalakan en dakayo. <sup>5</sup> Sak-en di nangay-ayowan en dakayo sin lugar ay magay omili ay magay danom na. <sup>6</sup> Pinakpakan kos dakayo, ngem idi nabsog kayo, nginmato din nemnem yo et niliw-an yos sak-en. <sup>7-8</sup> Isonga kamanak layon ono leopard ay mansesseed sin benget di danan si katena ya kanena. Kamanak aben maangat ay oso ay way nangilayaw sin anak na. Enak abten ya peslen dakayo.

<sup>9</sup> “Mo dadaelek sik-a ay Israel, sino pay di makaisalakan en sik-a? <sup>10</sup> Into pay din ari ya tuturay yo ta isalakan das dakayo? Ed idi, nanpakpakaasi kayo ay nankedaw si ari

ya odom ay tuturay ay mangituray en dakayo. <sup>11</sup> Gapo si bonget ko, indawtak dakayo si ari, ngem gapo met laeng si bonget ko yan tinaolik.

<sup>12</sup> “Naililista din lawa ay inam-amag din Israelita et naidodolin din listaan. <sup>13</sup> Waday waya koman din Israelita ay matago, ngem baybay-an da. Maiarig das magay nemnem na ay liton. Manpalpaligat si ina na tan dinomteng din timpo na ay bomala, ngem sigaana ay bomala sin eges ina na.

<sup>14</sup> “Ay siya mo sobotek daida sin kad-an di natey ta maisalakan da sin panakabalin di pese? Dakayo ay pese ya din kad-an di natey, pawadaen yo di pisti ay makapese tan enggay nakaan di seg-ang kon daida.\*

<sup>15</sup> “Olay mo somiged di biyag di Israelita sin nan-gawaan di iib-a da, pawadaek di man-atong ay dagem ay mapo sin belaan di agew, sin lugar ay magay omili, et mamgaan di sakdoan da. Ilayaw na abe am-in ay nabanol ay sanikwa da sin pangidoldolinan si gameng. <sup>16</sup> Ikaron din taga-Samaria din dosan di nangontraan dan sak-en ay Diyos da. Matey dan to si gobat, mapis-it din an-ak da ya mabotyakan din eges di masakog.”

## 14

### *Din Inkarin Diyos Ay Kasinan Bindisyonan Din Ipogaw Na*

<sup>1</sup> Dakayo ay Israelita, sagongen yo si Yahweh ay Diyos yo, tan din basbasol yo di begew sin ligat yo. <sup>2</sup> Mantaoli kayo koma en Diyos et ikararag yo na en sisya, “Linisam kod din basbasol mi ya awatem koma nan kararag mi ta say idaydayaw mis sik-a ay say daton mi. <sup>3</sup> Adi makaisalakan din taga-Assyria en dakami ya enggay magay kabayo mi. Isaldeng mi ay manaydayaw si didiyosen ay inamag mi, tan sik-a di pankamangan di naolila.”

<sup>4</sup> Kanan Diyos, “Agasak to si daida sin kinasukir da et ipailak di naimposan ay layad ko, tan nakaan din bonget ko en daida. <sup>5</sup> Maiarigak si dono sin Israelita et mansabong da ay kaman kalalily ya manlamot da ay kaman din kakaiw ed Lebanon. <sup>6</sup> Omando din pingi da et mapteng di kailaan da ay kaman olivo, yan manseng-ew da ay kaman din kaiw ay sidro ed Lebanon. <sup>7</sup> Mantaoli dan sak-en et ayowanak kasin daida. Gomabay dan to ay kaman pagey ya manlames da ay kaman obas. Madamdamag da ay kaman din arak ed Lebanon. <sup>8</sup> Sino pay di pakasapolan di taga-Israel si didiyosen yan wadaak ay mangidawat sin kedawen da ya mangayowan en daida? Maiarigak si magabay ay bebe ay panlidoman da. Sak-en di kapoan di am-in ay bindisyon da.”

<sup>9</sup> Din nalaing, maawatan ya patgan da koma din naisolat isna. Tan doritso ya kosto di danan ay itdon Diyos, pandanan di nalinteg ngem kaisokbaan di managbasol.

---

\* **13:14** Di esa abe ay kaiologan nina sin Hebreo et: Awni et sobotek daida sin kad-an di natey ta maisalakan da sin panakabalin di pese. Dakayo ay pese ya din kad-an di natey, ay siya mo waday panakabalin yo ay mangipawadas pisti ay makapese? Adiak met balbaliwan di nemnem ko.

## Joel

### Maipanggep Sin Libro Ay Nay

Naey di insolat Joel ay esa ay mamadton Diyos. Sin timpo na, mayat di biyag di man-ili ed Juda tan bininbindisyonan Diyos si daida, ngem neyneyna et inmaddawi dan Diyos ya baken naimposan di nanaydayawan da en sisya, isonga inbaan Diyos di ad-ado ay dodon ay nanadael sin molmola ya inpasaldeng na abe din odan. In-arig Joel din dodon sin sosoldadon Diyos yan inbaga na ay da nay ay kaeegyat ay napasamak et sinyal ay wadan to di nakarkaro ay panosaan Diyos sin kaipoipogaw mo adi dan manbabawi. Binagbagaanas daida ta ibabawi dan lawa ay am-amagen da ta pakawanen ya kasin bindisyonan Diyos si daida. Inbaga na abe din inkarin Diyos ay wadan to di timpo ay pangibaaan Diyos sin Ispirito na sin am-in ay ipogaw (2:28).

#### **Din Linaona**

Din pamagbagan Joel begew sin inmalian di dodon 1:1-2:27

Din panggepen Diyos ay amagen sin tapin di agew 2:28-3:21

#### *Din Dinadael Di Kadodododon (1:1-12)*

<sup>1</sup> Siya na di inpaibagan Diyos en Joel ay anak Petuel. <sup>2</sup> Dengngen yo nan ibagak, dakayo ay nankakay ya am-in ay ipogaw isnan Juda. Nemnemen yo kod mo waday kaman nina ay napasamak sin timpo yo ono sin timpon di aap-o yo. <sup>3</sup> Dad-aten yo sin aan-ak yo ta dad-aten da sin aan-ak da ya dad-aten abe din aan-ak da sin mais-isned en daida. <sup>4</sup> Nansosokat day dodon ay nanadael sin mola. Din binay-an di namangpango yan inabos din naiskat. <sup>5</sup> Bomangon kayo ay makabeteng! Man-oga kayo, tan enggay nadadael din obas ay amagen da komas baro ay arak.

<sup>6</sup> Kaman esa ay nasyon di nanadael sin ili tako. Napigsa da ya adi da kabilang. Matadem din bab-a da ay kaman saong di layon. <sup>7</sup> Ginolpi da ay dinadael din mola tako ay obas. Kinibikiban da abe din kaiw tako ay igos. Ginotlo da din pingi da ya inokisan da et enggay kinmilat da. <sup>8</sup> Manladingit kayo koma ay kaman di esay balasang ay nanbabados sako ay mangipaila sin sakit di nemnem na gapo ta natey din mangasawa koma en sisya. <sup>9</sup> Magay bakakew ya arak ay maidaton sin Timplo, isonga manladingit din papadi ay mansilbilin Diyos. <sup>10</sup> Kaman aben manladingit din lota, tan nadadael din papayew ya din maani isdi, nango din obas ya natey din kakaiw ay olivo. <sup>11</sup> Manladingit kayo ay manmolmola ya mangay-ayowan sin kaobasan, tan nadadael din bakakew, sabog ya am-in abe ay mola. <sup>12</sup> Enggay nango din obas ya igos yan natey am-in ay kaiw ay manlames si makan, et sigurado ay namaga din ragsak di kaipoipogaw. <sup>13 14 15 16 17 18 19 20</sup>

## 2

#### *Din Pamagbaga Ta Manbabawi Din Kaipoipogaw (2:1-2,12-17)*

<sup>1</sup> Mananggoyob kayo ed Zion ay nasantoan ay dontog Diyos ta manpayegpeg din ipogaw sin daga si egyat da, tan enggay dandani din agew ay pangokoman Diyos en daida. <sup>2</sup> Kasasadot din agew ay sana, tan palalo ay mabolinget ya manliliboo. Pag et domateng di napigsa ya adi kabilang ay sosoldado\* ay kaman din bigla ay domatngan

\* **2:2** Kanan di odom en dodon di kaiarigan din sosoldado ay nay. Kanan aben di odom en tet-ewa ay dodon di ibagbagan Joel, ngem ibagbaga na abe din sosoldado ay taga-Assyria ay domateng sin tapin di agew.

di sey-ang sin toktok di dontog.† Magay is-iso na ay napasamak ed idi ya olay sin omal-ali ay timpo. <sup>3 4 5 6 7 8 9 10 11</sup>

<sup>12</sup> Ngem kanan Diyos en olay ed wani, naimposan di iyat yo ay manbabawi ta sagongen yos sisya. Itpe yo di dagaang yo, man-oga ya manladingit kayo. <sup>13</sup> Masapol ay napasnek kayo ay manbabawi, tan adi omanay din pamisngitan yos bado yo ay mangipaila si babawi yo. Mantaoli kayo en Yahweh ay Diyos yo, tan naanos ya managseg-ang sisya. Baken nalaka ay bomonget mo adi et managlayad. Nakasagana ay mamakawan ya adi na itoloy ay mandosa. <sup>14</sup> Bareng manbalbaliw din nemnem Yahweh ay Diyos yo et seg-angana ya bindisyonanas dakayo. Mo siya di, wada kasin di idaton yon sisya ay arina ya arak.

<sup>15</sup> Mananggoyob kayo sin dontog ay Zion ta sinopen yo din kaipoipogaw yan ibilin yo ay itpe da di dagaang da. <sup>16</sup> Isagana yos daida, tan nasantoan na ay masinopan tako. Sinopen yos daida am-in: din nankakay, nankababkes ya anan-ak pati din mansossoso. Olay kaas-asawa na, masapol ay bomala da sin beey da. <sup>17</sup> Din papadi ay mansilsilbi en Diyos sin nan-gawaan di altar ya segpan di Timplo yan masapol ay man-oga da ay mankararag yan kanan da, “Sik-a ay Diyos, seg-angam koma nan ipogaw mo. Adi ka kod ipalobos ay laslasoyen ya sis-iyekan di odom ay nasyon dakami ay mangwani, ‘Into pay din Diyos yo?’ ”

*Din Kasin Namindisyonan Diyos Sin Ili Ya Ipogaw Na*  
(2:18-19,21-27)

<sup>18</sup> Makdeng pay ay tinongpal da din bilbilin ay doy, inpailan Diyos din layad na sin ili ay pinili na et sineg-angana din ipogaw na. <sup>19</sup> Kanan Diyos en daida, “Ed wani ipawadak en dakayo di sabog, arak ya mantikan di olivo enggana ay waday omanay para en dakayo. Polos ay adiak kasin baybay-an dakayo ay laslasoyen di odom ay nasyon. <sup>20</sup>

<sup>21</sup> “Sik-a ay daga, adi ka emegyat mo adi et manragsak ka gapo sin nakaskasdaaw ay inam-amag ko. <sup>22</sup> Dakayo ay atap ay animal, adi kayo emegyat, tan ginmabay kasin din logam sin panpaspastolan. Manlames din kakaiw et ad-ado di lames din igos ya obas.

<sup>23</sup> “Manragsak kayo ay ipogaw ed Zion gapo en sak-en ay Diyos yo. Tan indawat ko din kostokosto ay damo ay odan en dakayo. Ipawadak din masapa ya maodi ay odan ay kaman ed idi. <sup>24</sup> Mapnon to si bakakew ya sabog din pan-irikan yan manleplepyas abe si arak ya mantika din pankargaan yo. <sup>25</sup> Sokatak din dinadael di nansososkat ay dodon ay kaman kon sosoldado ay inbabbaak sin kad-an yo sin oneg di pigay tawen. <sup>26</sup> Manpennek kayon to ay mangan ya dayawen yos sak-en ay Diyos yo ay nangamag si nakaskasdaaw en dakayo. Polos ay adi kasin maibabain din ipogaw ko. <sup>27</sup> Sin timpo ay doy, ammoen yo ay wadaak sin kad-an yo ay Israelita ya sak-en si Yahweh ay Diyos yo, magay odom. Polos ay adi kasin maibabain din ipogaw ko.”

*Din Nabanol Ay Agew Ay Omalian Diyos*  
(2:28-32)

<sup>28</sup> “Mo makdeng di, ibaak din Ispiritok ta senggép sin olay sino ay ipogaw.‡ Din anak yo et ibaga da din ipaibagak en daida, din babbaro et waday ipailak en daida ay kaman iitaw ya din nankakay et wada abey ipaiitaw kon daida. <sup>29</sup> Olay din lallalaki ya babbabai ay bag-en et ibaak din Ispiritok ay senggép en daida. <sup>30</sup> Awni et ipailak di nakaskasdaaw ed daya ya isnan daga. Maila dan to di dada, apoy ya kaeegyat ay asok. <sup>31</sup> Awni kadi et bomolinget din agew, ya din bowan yan domalangdang ay kaman dada. Asi pay domateng din nabanol ay agew ay magay kais-oana ay omaliak ay Diyos. <sup>32</sup> Yan am-in da ay manpakaasi en sak-en et maisalakan da. Tan wada dan to di piliek ay makalasad ed Jerusalem.”

† 2:2 Di esa abe ay kaiologan nina sin Hebreo et: et kaman dan bolinget ay maisak-eb sin kadontodontog. ‡ 2:28 Din kanana sin Hebreo et: ...ibokbok ko din Ispiritok sin olay sino ay ipogaw.

### 3

#### *Din Pangokoman Diyos Sin Am-in Ay Nasyon (3:1-3,9-13)*

<sup>1</sup> Kanan Diyos, “Sin doy ay timpo, pabaknangek kasin ed Juda ya Jerusalem. <sup>2</sup> Sinopek am-in ay nasyon et iey kos daida sin Tanap ay Pangokoman. Isdi di pangokomak en daida gapo sin am-in ay inam-amag da sin Israelita ay ipogaw ko. Nansisianen das daida ay inpaey sin odom ay ili ya nanbibingayan da din dagak ay Israel. <sup>3</sup> Nanbibinnonotan da mo sino di manga sin ipogaw ko ta balod da. Inlako da din anan-ak ay lalaki ya babai ta way ibayad das hostess ya arak. <sup>4 5 6 7 8</sup>

<sup>9</sup> “Ipaammo yo na sin am-in ay nasyon: ‘Mansagana kayo ay makigobat! Ayagan yo am-in ay sosoldado yo ta emey kayo. <sup>10</sup> Amagen yo ay kampilan din alado yo ya gayang din kompay yo. Olay din nakapoy, masapol ay makigobat. <sup>11</sup> Dalasen yo ay omali, dakayo am-in ay nasyon sin nanniliked ta masinop kayo sin tanap.’ ”

“Apo Diyos, ibaam koma din sosoldadom ay en mangobat en daida,” kinwanin di mamadto.

<sup>12</sup> Pag itoloy Diyos ay nangwani, “Masapol ay mansagana din nanasyon ta emey da sin Tanap ay Pangokoman. Tan isdi, okomek to din am-in ay nasyon. <sup>13</sup> Palaloy kinalawa da, isonga magapas da ay kaman din pagey sin pinag-aani ya mapespesan da ay kaman obas sin panpespesan engganay mapno.” <sup>14 15 16</sup>

#### *Din Pamindisyonan Diyos Sin Ipogaw Na (3:17-21)*

<sup>17</sup> “Din pangokomak en daida, say pangammoan yo ay Israelita ay sak-en si Yahweh ay Diyos yo ay mantee ed Zion ay nasantoan ay dontog ko. Manbalin ed Zion ay nasantoan ay siyodad ed Israel et polos ay adi kasin abaken di odom ay nasyon. <sup>18</sup> Sin doy ay timpo, mamolaan di dontog si obas ya omad-ado di baka sin bilig. Ad-adon to abe di danom ed Juda et wada di obbog ay mapo sin Timplon Diyos ay manibsibog sin tanap ay Acacia. <sup>19</sup> Mo ed Egipto ya Edom, manbalin das lugar ay magay omili ya magay silbi na gapo sin namsean das taga-Juda ay magay basol da. <sup>20-21</sup> Ibaes ko din pinse da, adiak pakawanen din nakabasol. Ngem ed Juda ya Jerusalem pay, wadan to di man-ili si eng-enggana, et sak-en ay Diyos yan manteeak ed dontog ay Zion.”



## Amos

### Maipanggep Sin Libro Ay Nay

Si Amos et taga-Tekoa ay kitkittoy ay ili sin abagatan di Betlehem. Din obla na et mangay-ayowan si karnero ya igos di sikomoro. Olay mo ed Juda di ili na, inbaan Diyos sisya ay mangipadto sin pangokoman Diyos sin taga-Israel. Din kaad-adoan ay inpadto na et naibaga sin nanteana ed Betel (760-750 B.C.) ay say kad-an di kapatgan ay pandaydayawan di ipogaw ed Israel. Din kadesana ay mamadto et da Hosea en Jonas.

Sin timpo ay nan-ipadpadtoana, enggay pinmigma ya binmangkang din nasyon ay Israel. Ngem nailan Amos ay baken am-in ay ipogaw yan manam-ay di biyag da. Din babangkang yan sinossowitik ya pinalpaligat da din nabibiteg ta say masepsep ay bomangkang da. Baken aben naimposan di iyat da ay mandayaw en Diyos, tan kanan da en basta tongpalen da din naibilin ay seremonia, olay oway di iyaat da.

Natoled si Amos ay nangipadto sin naikeddeng ay panosaan Diyos en daida. Bi-nagbagaanas daida ta isaldeng da ay manpasoksok ya mamaligat sin nabibiteg ya nalinteg koma di iyat da ay mangowis. Kanana en man-ayos koma din kinalinteg ay kaman ginawang ay adi katkatdok (5:24) ta barbareng seg-angan Diyos din ipogaw ay matmatago pay laeng sin nasyon ay Israel (5:15).

#### **Din Linaona**

Din naikeddeng ay dosan di nanniliked ay nasyon 1:1-2:5

Din naikeddeng ay dosan di Israel 3:1-6:14

Din lima ay naipaila en Amos ay kaman iitaw 7:1-9:10

Din mabaroan di Israel sin tapin di agew 9:11-15

(1:1)

<sup>1</sup> Siya na di inbagan Amos ay mangay-ayowan si karnero ed Tekoa. Dowa ay tawen sakbay ay mapasamak din yegyeg, inpaammon Diyos en sisya dana ay mapasamak to ed Israel. Sin doy ay timpo, si Uzzias di ari ed Juda yan si Jeroboam ay anak Joas di ari ed Israel.

#### *Din Naikeddeng Ay Dosan Di Nanniliked Ay Nasyon*

Sakbay ay inpaammon Amos din inpaipadton Diyos en sisya maipanggep sin Israelita, inlista na din basbasol di nanniliked ay siyodad ya nasyon: Damascus, il-ilin di Filisteo, Tiro, Edom, Ammon, Moab ya Juda. Inbaga na din dosa ay inkeddeng Diyos sin esa ya esa. Pag na aben bagaan din Israelita. (1:2-2:5)

2 3 4 5 6 7 8 9 10 11 12 13 14 15

**2**

1 2 3 4 5 6 7 8 9 10 11 12 13 14 15 16

**3**

#### *Din Begew Ay Dosaen Ton Diyos Din Israelita*

(3:1-2)

<sup>1</sup> Kanan Amos: Dakayo am-in ay Israelita ay inpangon Diyos ay komaan ed Egipto, dengngen yo nan ibaga na en dakayo. <sup>2</sup> Kanana en dakayo anggoy di pinili na ya inay-ayowanana ay ipogaw na sin am-in ay nasyon isnan daga, isonga masapol ay dosaenas dakayo begew sin basbasol yo.

#### *Din Begew Ay Masapol Ay Mankali Di Mamadto*

(3:3-8)

<sup>3</sup> Intoloy Amos ay nangwani: Ay mabalin aya ay mankoyog di doway ay ipogaw mo adi da mantolag omona? <sup>4</sup> Ay siya mo manngaed di layon sin kada mo baken dandani di panpapana sin an-anopena? Adi aben manngaed sin liyang na mo magay dinpap na. <sup>5</sup> Mo magay tapan sin tagdey, magay makna ay titit. Adi aben mabkas di tagdey mo magay mangiwit. <sup>6</sup> Mo dengngen da sin siyodad di tanggoyob ay mangipaammo ay waday gobat, sigurado ay mandanag da. Adi mapasamak di lawa si esa ay siyodad mo baken si Diyos di mangipawada. <sup>7</sup> Say iso na abe ay magay amagen din Kangatoan ay Diyos mo adi na ipaammo omona sin baa na ay mamadto. <sup>8</sup> Mo manngaed di layon, ay wada aya di adi emegyat? Et mo din Kangatoan ay Diyos di mankali, sino abe di adi mangipaammo sin ibaga na? <sup>9 10 11 12 13 14 15</sup>

## 4

1 2 3 4 5 6 7 8 9 10 11 12 13

## 5

1 2 3 4 5

### *Pamagbagan Amos Ay Manbabawi Din Israelita (5:6-7,10-15,18-27)*

<sup>6</sup> Sagongen yo si Diyos ta matago kayo. Tan mo sigaan yo, kaman apoy ay mamoo en dakayo am-in ay Israelita, pati din manbeey ed Betel, et maga polos di makad-ep. <sup>7</sup> Madosa kayo ay mamaliktad si linteg ya manowitik si ib-a yo ay ipogaw. <sup>8 9</sup>

<sup>10</sup> Mo waday kasos, kaliliget yo pay din mangipaneknek ay baken kosto di maam-amag ya din mangitistigo si tet-ewa. <sup>11</sup> Palpaligaten yo din nabiteg ya ipilit yo ay manbayad das sobra ay bowis sin apit da, isonga olay mo nan-amag kayos mankanakneg ya mankanapteng ay beey, adi yo met laeng panbeeyan. Olay mo mayat di mola yo ay obas, adi yo inomen din arak ay kaamagan da. <sup>12</sup> Tan ammok di kaad-ado ya kadagsen di basbasol yo. Palpaligaten yo din nalinteg ay ipogaw ya aw-awaten yo di pasoksok. Dowan yo et toptopapen di panontonan di nabiteg si kalintegan da mo waday kasos. <sup>13</sup> Isonga gomiginek din naannad ay ipogaw sin kaman dadi ay timpo ay lawlawa di maam-amag.

<sup>14</sup> Ipasnek yo et koma ay man-amag si siked ay baken din lawa ta say matago kayo ya temet-ewa abe din ibagbaga yo ay kadmakadwaen Yahweh ay Manakabalin ay Diyos si dakayo. <sup>15</sup> Dokogan yo koma din lawa ya say layden yo din kosto. Ilaen yo ta say maamag din nalinteg sin pangokoman. Bareng seg-angan Yahweh ay Manakabalin ay Diyos din matmatago pay laeng ay ipogaw isna ay nasyon. <sup>16 17</sup>

<sup>18</sup> Kaasi kayo pay ay maneseed sin agew ay pangokoman Diyos. Sino pay di namna-maen yo sin agew ay sana? Bolinget di idawat na en dakayo ay baken pat-a. <sup>19</sup> Din kaiarigana et intagtagan di esa ay ipogaw di layon ngem inabat na met laeng di maangat ay oso. Di esa abe ay kaiarigana et nantabon di esay ipogaw sin beey na, ngem wada et di eweg sin dingding ay nangat en sisya. <sup>20</sup> Sin agew ay pangokoman Diyos et mabolinget, maga polos di pat-a na, agew ay kasasadot, maga polos di ragsak.

<sup>21</sup> Kanan Diyos, “Dadlonak sigaan din panangdayaw yon sak-en sin fiesta yo. Madmadogisak isdi. <sup>22</sup> Adiak awaten din daton yo ay mapooan ya idaton yo ay arina, olay din inpalamas yo ay animal ay idaton yo. <sup>23</sup> Isaldeng yo san kanta yo ay owat ngalawngaw. Sigaak ay mannge sin gitara yo. <sup>24</sup> Kanayon et koma ay say amagen yo din kosto ta say man-ayos din kinalinteg ay kaman din ginawang ay adi katkatdok.

<sup>25</sup> “Dakayo ay polin Israel, adiak met binilin dakayo ay man-idaton en sak-en sin opatapolo ay tawen ay kawada yo sin lugar ay magay omili. <sup>26</sup> Ngem ed wani, masapol ay sakbaten yo din rebolton di didiyosen yo ay da Sakkut ay ari ya si Kaiwan ay talaw. <sup>27</sup> Tan dandani ay pakaanek dakayo isnan ili yo et mapilit kayo ay maiey sin ili sin labes di Damascus.” Siya say kinwanin Yahweh ay Manakabalin ay Diyos.

## 6

### *Pamagbagan Amos Sin Napnek Ay Babaknang (6:1-7)*

<sup>1</sup> Kaasi kayo pay ay nanam-ay di biyag da ed Zion ya din mangipagarup ay natalna di kasasaad da ed Samaria. Kaasi kayo ay papangolo isnan mandindinamag ay nasyon ay Israel, dakayo ay pankamangan koman di kakailian yo mo kasapolan day tolong. <sup>2</sup> En kayo ilaen din siyodad ay Calne, asi yo ikanayon ay emey sin mandindinamag ay siyodad ay Hamat. Mo makdeng di, emey kayo abe ed Gat ay siyodad di Filisteo. Ay napigpigsa da aya mo nan ili yo ay Juda ya Israel? Ay siya mo an-annawa din daga da mo din daga yo? <sup>3</sup> Sigaan yo ay awaten ay waday domteng ay agew ay kadosaan yo, ngem din am-amagen yo di mangisagsag-en sin agew ay sana. <sup>4</sup> Kaasi kayo pay ay mantoktokdo si nangingina ay kotson ya mansidsidas karnin di olbon ay baka ya anak di karnero. <sup>5</sup> Layden yo ay man-am-amag si kanta ya itokar yo sin gitara ay kaman din inyaat David ed idi. <sup>6</sup> Man-in-inom kayo si ad-ado ay arak ya man-osal kayo abes nankangingina ay bangbanglo, ngem adi mansakit di nemnem yo mo madadael ed Israel. <sup>7</sup> Isonga dakayo di mangon-ona ay mapilit ay maiey sin odom ay ili et mapap-eng din panragragsakan yo.

### *Din Inpailan Diyos En Amos Ay Kaman Iitaw*

Pag kanan Amos en kaliliget Diyos din kinangaton di nemnem din taga-Israel, isonga ibaa na di kagobat da ay mamaligat en daida.

Makdeng pay di, waday doway ay inpailan Diyos en Amos ay kaman iitaw. Di esa ay inpaila na et ad-ado ay dodon ay manadael to ed Israel. Di esa abe yan kaeegyat ay apoy ay nangan sin daga ya olay sin baybay. Ngem nanpakpakaasi si Amos en Diyos ta mo mabalin koma, adi matongpal dana ay kaeegyat, et intolok na. (6:8-7:6)

8 9 10 11 12 13 14

## 7

1 2 3 4 5 6

### *Din Inpaitaw Diyos Ay Maipanggep Si Boyon (7:7-9)*

<sup>7</sup> Wada kasin di inpailan Diyos en sak-en. Inilak sisya ay pinmipika sin kad-an di esay dingding ay naboyonan yan iin-genana di boyon. <sup>8</sup> Kanana, “Amos, sino di mailam?”

Songbatak pay yan kanak, “Beyon.”

Pag nan kanan, “Osalek na ta ipailak sin ipogaw ko ay maiarig das dingding ay adi naboyonan. Et adiak kasin pakawanen daida. <sup>9</sup> Awani et mabakas din pandaydayawan di polin Isaac sin dodontog ya din odom ay pandaydayawan di Israelita. Pasaldengek abe din panturayan di polin Ari Jeroboam.”

### *Din Nanigaan Amazias Ay Padi En Amos (7:10-17)*

<sup>10</sup> Idi siya di, waday inbaan Amazias ay padi ed Betel en Jeroboam ay ari ed Israel. Kanana, “Waday planon Amos ay maikontra en sik-a isnan mismo ay iturayam. Madadael nan ili sin ad-ado ay ibagbaga na. <sup>11</sup> Tan ibagbaga na ay matey ka ay Apo Ari sin gobatan ya sigurado abe ay mapilit ay maiey sin addawi ay ili din ipogaw isnan Israel.”

<sup>12</sup> Pag aben kanan Amazias en Amos, “Sik-a ay mamadto, komaan kas na! Mantaoli ka ed Juda ta isdi ka ay manpalagbo ay man-ipadto. <sup>13</sup> Ngem adi ka kasin man-ipadpadto isnan Betel, tan say kad-an din timplon di ili ay pandaydayawan din ari.”

<sup>14</sup> Songbatan pay Amos yan kanana, “Bakenak mamadto ono mimbrow sin grupon di mamadto ay manpalpalagbo. Esaak ay manpaspastol ya mangay-ayowan si igos di

sikomoro.\* <sup>15</sup> Ngem inmayag si Diyos sin manpaspastolak yan inmibaa ay enak man-ipadto sin ipogaw na ay Israelita. <sup>16</sup> Isonga ed wani, dengngem din kanan Diyos. Kanam en isaldeng ko ay man-ipadto si maikontra sin Israelita ay polin Isaac. <sup>17</sup> Isonga siya na di kanan Diyos en sik-a, 'Awni et manbalin din asawam si hostess sin siyodad. Din an-ak mo abe yan matey da sin gobatan. Din dagam yan panbibingayan di odom ay ipogaw. Sik-a pay yan matey ka sin odom ay ili. Din ipogaw abe isnan Israel yan mapilit da ay komaan isnan ili da ta maiey da sin addawi ay ili.' ”

## 8

### *Din Panosaan Diyos Sin Israelita*

(8:4-7; 9:8-10)

Pag kasin inpaiitaw Diyos si Amos yan inila na di baskit ay napay-an si naom ay prutas. Kanan Diyos en din laydena ay kalien, enggay dinmateng din timpo ay panosaana sin ipogaw na ay Israelita. Adi na kasin segseg-angan. Pag kanan Amos en daida: (8:1-3)

1 2 3

<sup>4</sup> Dengngen yo na, dakayo ay mamalpaligat ya mangoskos si nabiteg ya odom ay kaseseg-ang isnan ili. <sup>5</sup> Kanan yo, “Makdeng koma nan masilsilibranan ay fiesta ya agew ay pan-illengan ta man-ilako kami kasin si bakakew. Pakitkittoyen mi din salopan, ingina mi din lako mi ya sowitiken mi din manlako sin iyat mi ay mantimbang. <sup>6</sup> Nangina met laeng di pangilako mi sin magay silbi na ay bakakew. Di pantongpalana et mabalin mi ay lakoan din nabiteg tan adi dan makabayad sin otang da, olay din kababaan ay otang ay kaman owat lakon di sinilas.” Say kanan yos nemnem yo.

<sup>7</sup> Isonga si Yahweh ay it-it-ek din polin Jacob yan kinwani na ay nangisapata, “Polos ay magay liw-ak sin olay sino ay inamag da ay lawa.”

Kanan Diyos en panbalinena din fiesta da si pansadsadotan da. Ipawada na abe din maiarig si betil, ngem din pandagaangan di ipogaw et baken makan mo adi et kalin Diyos. Ngem olay mo anaanapen da, magay dengngen da ay kali na. Enggay napasnek di nemnem na ay manosa en daida, isonga olay intoy lomayawan da, olay sin addawi ay ili ay maieyan da ay balod, adi dan mailisian. (8:8-9:7)

8 9 10 11 12 13 14

## 9

1 2 3 4 5 6 7

<sup>8</sup> Intoloy Diyos ay nangwani, “Sak-en si Yahweh ay Kangatoan ay Diyos. Kanayon ay iilaek din am-amagen di managbasol ay ipogaw sin ili ay nay. Daosak to daida sin labaw di daga, ngem adiak kaanen am-in din polin Jacob. <sup>9</sup> Ed wani, ibilin ko ay mayakayak to din polin Israel sin pantean da sin odom ay nanasyon ta say mailasin am-in din lawa. <sup>10</sup> Matey si kampilan am-in din managbasol sin ipogaw ko ay mangwani en laton ay adi dan maabotan si lawa.”

### *Din Mabaroan Di Israel Sin Tapin Di Agew*

(9:11-15)

<sup>11</sup> “Din nasyon ay Israel yan kaman beey ay nadadael, ngem wadan to di agew ay isaad ko kasin ya baroak din nadadael ta pomigsa ay kaman ed idi sin timpon Ari David. <sup>12</sup> Et sakopen dan to din odom pay ay lak-am di Edom ya din am-in ay ili ay sigod ay maibilang ay okak.” Siya say inbagan Diyos et sisya di manongpal.

<sup>13</sup> Kanan aben Diyos, “Domteng to di timpo ay mayat ya palalo ay ad-ado di apit sin payew ya inobasan da. Din kaiarigana et mantededted di mam-is ay arak sin dodontog

\* **7:14** Din lames di sikomoro et kaman igos di ila na, ngem baken onay mam-is.

ya man-oy-oyas sin bilbilig. <sup>14</sup> Itaolik to din ipogaw ko sin daga da et amagen da kasin din nadadael ay siyodad da ta isdi di panbeeyan da. Man-esek das obas et daida di manginom sin arak ay kaamagana. Manmola da abe sin garden et daida di mangan sin apiten da. <sup>15</sup> Maiarig din ipogaw ko si mola ay is-ek ko sin daga ay indawat ko en daida et adi da polos magab-ot kasin.” Siya say inbagan Yahweh ay Diyos tako.

## Jonas

### Maipanggep Sin Libro Ay Nay

Naitken din libro ay Jonas sin odom ay libro maipanggep sin inpadton di mamadto, tan madad-at isna din padpadas di esa ay mamadto ay nanigaan ay manongpal sin inpaamag Diyos en sisya. Inbilin Diyos ay emey si Jonas ed Nineve ay kapital di Assyria ay kaibaw di Israel ta ipadto na din panosaan Diyos en daida. Ngem sinigaana ay en mangibaga, tan ammo na ay adi kadi bakasen Diyos din siyodad ay sana mo manbabawi da. Makdeng pay di nakaskasdaaw ay paspasamak, inmey met laeng et inkasaba na din inpaibagan Diyos en sisya. Asi et nasnit yan mansakit di nemnem na tan tet-ewa ay nanbabawi da et adi binakas Diyos din ili da.

Maipaila sin libro ay nay din panakabalin Diyos sin am-in ay pinarsua na. Ngem namnamed ay maipaila din layad ya seg-ang na, tan olay din kaibaw din ipogaw na yan pinakawan ya insalakan Diyos daida idi nanbabawi da.

#### **Din Linaona**

Din inbilin Diyos ya din adi nanongpalaan Jonas 1:1-17

Din nanbabawian Jonas ya din naisalakanana 2:1-10

Din nankasabaan Jonas ya din nanbabawian di taga-Nineve 3:1-10

Din bonget Jonas ya din seg-ang Diyos 4:1-11

#### *Din Adi Nanongpalaan Jonas En Diyos*

<sup>1</sup> Sin namingsan, waday inbilin Diyos en Jonas ay anak Amittai. <sup>2</sup> Kanana, “Emey ka ay dagos ed Nineve ay mandindinamag ay siyodad ta ibagam sin ipogaw isdi ay dandani ay dosaek daida, tan ammok din palalo ay basbasol da.” <sup>3</sup> Ngem natken din inmeyan Jonas, tan kananas nemnem na en ilayawanas Diyos. Nanballalong ed Joppa et waday dintengana ay bapor ay manloblobwat ay emey ed Tarsis ay siyodad di Espanya.\* Nanbayad et nakilogan ta say omaddawis sisya en Diyos.

<sup>4</sup> Ngem idi nadipos da, inpawadan Diyos di mappes ay dagem sin baybay. Palalo ay napigsa din pewek et kaman mabakas din bapor. <sup>5</sup> Inmegyat din man-ob-obla sin bapor et esa en nan-adawag si diyos na. Intep-a da abe din karga sin baybay ta yomap-ew din bapor.

Si Jonas pay yan wada ay nas-et di seyep na sin akin baba ay partin di bapor. <sup>6</sup> Dinatngan din kapitan di bapor et kanan sisya, “Apay nga naseseyep ka? Ibangon mo et ta mankararag ka sin diyos mo, bareng mo seg-anganas datako ta adi tako matey.”

<sup>7</sup> Pag mantotolag din oblantis yan kanan da, “Manbobonot tako ta maammoan mo sino di begew isnan lawa ay pasamak.” Idi say inyat da, si Jonas di nabonot. <sup>8</sup> Isonga kanan dan sisya, “Ibagam mo sino di mapabasol isnan napasamak. Sinoy am-amagem isna? Ya taga-ano ka?”

<sup>9</sup> Kanan Jonas ay nanongbat, “Esaak ay Hebreo. Daydayawek si Yahweh ay Diyos ed langit ay namarsua sinan daga ya baybay.”

<sup>10</sup> Dinad-at nan daida ay ilaylayawanas Diyos et palalo di egyat da ay nanngge isdi, isonga kanan dan sisya, “Ay inayan pay sas inamag mo!” <sup>11</sup> Idi pomigpigsa din pewek, kanan da en Jonas, “Sinoy amagen mi en sik-a ta somaldeng din pewek?”

<sup>12</sup> Kanana en daida, “Omitep-a kayo sin baybay ta somaldeng din pewek, tan ammok ay sak-en di gapo isnan laklak-amen tako.”

<sup>13</sup> Adi inonodan din man-ob-obla din inbagan Jonas mo adi et inpakat da di amin ay kabaelan da ay mangipaigid sin bapor, ngem adi dan kaya, tan nasepsep ay pomigpigsa

\* **1:3** Din siyodad ay Nineve et wada sin belaan di agew mo ed Israel. Ed Espanya di kaaddawian ay ili ay ammo da ed idi sin diposan di agew.



din pewek. <sup>14</sup> Isonga kanan da ay nan-adawag en Diyos, “Sik-a ay Yahweh, pangaasim koma ta adim peslen dakami begew sin kateyan di ipogaw ay nay. Adi ka koman ibilang ay pinomse kami si magay basol na, tan sik-a ay Diyos di makaammo isnan ligat mi. Sik-a ay mismo di nanongpal sin laydem.” <sup>15</sup> Pag dan bit-inen si Jonas et intep-a da sin baybay yan dagos ay sinmaldeng din pewek. <sup>16</sup> Begew isdi, palalo ay inegyatan ya pinateg din man-ob-obla sin bapor si Diyos, et nan-idaton da ya inkari da ay mansilbi dan sisya.

<sup>17</sup> Idi siya di, binilin Diyos di dakdake ay nigay ay nangokmon en Jonas et nantee sin eges di nigay si tolo ay agew ya tolo ay labi.

## 2

### *Din Kararag Jonas*

<sup>1</sup> Sin kawadan Jonas sin eges di nigay, kanana ay nankararag en Diyos, <sup>2</sup> “Idi maligligatanak ya istayak maitapi sin kad-an di natey, nankararagak en sik-a yan pinatgam din kararag ko. <sup>3</sup> Inmitep-a ka sin adalem ay lanad di baybay et nalim-otanak sin danom ya labsalabsan di napipigsa ay dalloyon. <sup>4</sup> Kanak en adiak makataoli sin sangoanam ya polos ay adiak kasin maila din nasantoan ay Timplom. <sup>5</sup> Nalnedak et adiak makayasyas. Enggay nalim-otanak si danom ya nakomotan toktok ko si logam di baybay. <sup>6</sup> Naieyak sin kaonegan ay poon di dontog, ay say daga ay naitetelbek di segpana si eng-enggana ta magay makabala. Ngem insalakan mo din biyag ko sin malosong ay kad-ak. <sup>7</sup> Idi dandani ay mateyak, nankararagak en sik-a, Yahweh ay Diyos ko, et sin nasantoan ay Timplom, dinngem din kararag ko. <sup>8</sup> Din mandayaw si didiyosen ay magay silsilbi na et dinokogan da din napodno ay layad dan sik-a.\* <sup>9</sup> Ngem sak-en pay, mankantaak to ay mangidaydayaw en sik-a. Man-idatonak en sik-a ya tongpalek din karik. Sik-a ay Diyos di mangisalakan.”

<sup>10</sup> Idi siya di, binilin Diyos din nigay ay mangiota en Jonas sin benget di baybay, et tinongpal na.

## 3

### *Din Nanongpalan Jonas En Diyos*

<sup>1</sup> Pag kasin bilinen Diyos si Jonas yan kanana, <sup>2</sup> “Emey ka sin mandinamag ay siyodad ay Nineve ta ibagam isdi din ipaibagak en sik-a.”

<sup>3</sup> Pinatin Jonas din bilin Diyos et inmey ed Nineve. Annaannawa din siyodad ay sana, tolo ay agew di pandad-anan ay manbalasat. <sup>4</sup> Nilogian Jonas ay sokisoken din siyodad et esay agew ay nannandan yan kanana ay nangipaammo en daida, “Mo malabas di opatapolo ay agew, mabakas nan siyodad ay Nineve.”

<sup>5</sup> Namati din taga-Nineve en Diyos, isonga ninemnem da amin ay itpe di dagaang da. Nanbado amin din omili si makelsang ay sako, olay nabiteg ono baknang, ta ipaila da ay manbabawi da sin basbasol da.

<sup>6</sup> Idi naipadamag di sin ari ed Nineve, kinmaan sin trono na et sinokatana din bado na. Nanbado si sako et tinmokdo si nabonton ay dap-o. <sup>7</sup> Pag nan paibaga sin kaipoipogaw ed Nineve, “Sinay di bilin din ari ya din oopisyal na: Dadlon maiparit ay mangan ya man-inom di ipogaw, baka ya karnero. <sup>8</sup> Amin ay ipogaw et masapol ay manbado das sako, ya magaleyan abe amin ay animal si sako. Masapol ay ipasnek amin din ipogaw ay mankararag en Diyos ya dokogan da din lawlawa ay ogali ya am-amagen da. <sup>9</sup> Amangan mo ibabawin Diyos din inbaga na ya mabaew din palalo ay bonget na et adi takon matey.”

\* **2:8** Di esa abe ay kaiologan nina sin Hebreo et: dinokogan daka ay napoan di adi manbalbaliw ay layad.

<sup>10</sup> Idi inilan Diyos din inamag da ya din nanokogan da sin basbasol da, inbabawi na din inbaga na et adi na dinosas daida.

## 4

### *Din Bonget Jonas Ya Din Seg-ang Diyos*

<sup>1</sup> Palalo ay nasnit si Jonas sin napasamak ay doy et binmonget. <sup>2</sup> Isonga kanana ay nankararag, “Apo Diyos, siya na di ineg-egyatak sin kawadak pay laeng ed ili, isonga dinagdagos ko ay linmayaw ed Tarsis, tan ammok ay managlayad ya managseg-ang ka ay Diyos, magay pap-eng di kinaanos mo et nakasagana ka ay mangibabawi sin panosaam. <sup>3</sup> Alaem koma ngarud ay Apo nan biyag ko. Agpos et mo mateyak.”

<sup>4</sup> Ngem kanan Diyos, “Apay nga manbonget ka?”

<sup>5</sup> Pag bomala si Jonas sin siyodad et en nan-amag si pansidomana sin maibandas belaan di agew. Isdi ay tinmokdo ta sed-ena mo sinoy mapasamak ed Nineve. <sup>6</sup> Idi siya di, inpagabay Yahweh ay Diyos di esa ay mola ay nanlidom en Jonas ta say adi masgitan, et palalo ay nalaydan si Jonas sin mola ay sana. <sup>7</sup> Ngem idi pinmat-a sin kabigatana, binilin Diyos di esay bigis ay nanadael sin mola ay sana et nakpit.

<sup>8</sup> Idi kinmayang din agew, inpawadan Diyos di man-atong ay dagem ay napo sin belaan di agew. Palalo abe ay man-atong din segit et enggay kaman matalimodaw si Jonas, isonga inkararag na en agpos et mo matey sisya.

<sup>9</sup> Ngem kanan Diyos en sisya, “Ay way kalintegam aya ay manbonget gapo sin napasamak sin mola?”

Kanan Jonas ay sinombat, “Wada met a. Palalo di bonget ko isonga laydek ay matey.”

<sup>10</sup> Pag kanan Diyos, “Ginmabay din mola ay sana si esay labi yan natey si esa ay labi. Mansakit nemnem mo yan maga met di ligat mo sin mola ay sana ya baken sika di nangipagabay. <sup>11</sup> Ay baken ayan lebbeng na abe ay maseg-angak sin man-ili sin mandindinamag ay siyodad ay Nineve? Isdi yan waday nasurok ay 120,000 ay anan-ak ay adi pay laeng makaammo si siged ya lawa.\* Wada abe isdi di ad-ado ay animal.”

---

\* **4:11** Din kanana sin Hebreo et: ...nasurok ay 120,000 ay ipogaw ay adi makailasin sin kannawan ya kannigid da.

## Mikias Maipanggep Sin Libro Ay Nay

Si Mikias et napo si kitkitty ay ili. Nangaskasaba sin ipogaw ed Juda ay nababa di kasasaad da. Nandedesan di nanbiyagan da Mikias, Isaias ya Hosea, ngem si Isaias et nan-ipadto ed Jerusalem ay kapital di Juda, si Hosea pay, ed Israel.

Indadaan Mikias sin kailiana ed Juda ay dandani ay lak-amen da din pangokoman Diyos ay kaman met laeng din dosa ay inpadton Amos ay mapasamak ed Israel, tan olay ed Juda, palpaligaten din babaknang din nabiteg ya baken nalinteg di iyat da ay mangowis. Ngem ad-ado abe di inbaga na maipanggep sin mamakawanan Diyos sin ipogaw ay mangibabawi sin basbasol da. Inpadto na ay nangatngaton to di dayaw ed Zion ono Jerusalem mo sin timpon Ari David begew sin omalian di Messias ay mangisalikan en daida.

Di odom ay versikulo ay laylayden di ipogaw ay basaen et maipanggep sin talna ay mawada sin intiro ay daga (4:1-4) ya din bomalaan di polin David ay mangituray ya mangay-ayowan sin ipogaw na (5:2-5). Din kasinopan di inkaskasaban di mamadton Diyos et madtengan sin 6:8. "...Siya na di laydena ay amagen tako: Amagen tako din nalinteg sin pangilan Diyos, ipaila tako di adi manbalaliw ay layad ya manpakombaba tako ay manongpal en Diyos ay daydayawen tako."

### **Din Linaona**

Din pangokoman Diyos sin taga-Israel ya Juda 1:1–3:12

Din masmas-ed ay timpon di talna ya bindisyon 4:1–5:15

Din pangidaruman Diyos sin ipogaw na ya din siked ay namnamaen dan to 6:1–7:20

### *Din Naipadto Maipanggep Ed Samaria Ya Jerusalem*

*(1:1-7)*

<sup>1</sup> Sin timpo ay nanturayan da Jotam, Ahaz ya si Hezekias ay ari ed Juda, inpaipadton Diyos dana en Mikias ay taga-Moreset. Inpailan Diyos en sisya amin dana ay mapasamak ed Samaria ya Jerusalem.

<sup>2</sup> Kanan Mikias: Dengngen yo na, dakayo am-in ay ipogaw isnan daga. Tan wada din Kangatoan ay Diyos sin timplo na ed langit yan awni et mankali ay mangipaneknek sin kinalawa yo. <sup>3</sup> Doy ay taynana din nasantoan ay beey na ta bomaba ay mandan sin toktok di kadondontogan. <sup>4</sup> Pag makosokos din dodontog ay gatinana ay kaman allid ay matenaw mo maisag-en si apoy, et magday da sin tanap ay kaman danom ay man-oyas sin deppas. <sup>5</sup> Mapasamak amin dana gapo ta binmasol din taga-Israel ya kinontra das Diyos. Sino di akin basol sin binmasolan di taga-Israel? Din taga-Samaria. Sino abe di nandaydayaw si didiyosen ed Juda? Din man-ili ed Jerusalem.

<sup>6</sup> Isonga kanan Diyos, "Bakasek ed Samaria et manbalin si owat panmolaan si obas. Iwalang ko din bato ay amag na et mapolag da sin tanap enggana ay mabonsian din fondasyona. <sup>7</sup> Mamekmek amin din daydayawen da ay kinitikitan et maiwasit da ay kaman basura. Mapooan abe amin din sagsagot ay indatdaton da sin didiyosen da. Din naolnong ay sagsagot ay sana et indawdawat di mandaydayaw si sinan didiyos, isonga maiey da met laeng sin odom ay ili ta osalen kasin di mandaydayaw si sinan didiyos."\*

8 9 10 11 12 13 14 15 16

## 2

1 2 3 4 5 6 7 8 9 10 11 12 13

---

\* **1:7** Din kanana sin Hebreo et: Din naolnong ay sagsagot ay sana et lagbon di hostess, isonga maosal da kasin ay lagbon di hostess sin odom ay ili. Say kanana di, tan din kaiarigan di manaydayaw si sinan didiyos et makikamalala.

### 3

1 2 3 4

#### *Din Man-ipadto Si Baken Tet-ewa Ya Din Papangolo Ed Israel (3:5-12)*

<sup>5</sup>Wada abe di ibagan Diyos en dakayo ay mamadto ay mangiet-etek si ipogaw na, tan man-ikari kayos talna sin mamakan en dakayo, ngem gobat di ipadto yo mo adi kayo mangan ay kosto. <sup>6</sup>Isonga siya na di kanan Diyos: “Dakayo ay mamadto, magan to di iitaw yo sin labi ya adi kayon to kabaelan ay mankotom. Enggay mapospos di timpo yo et olay din kaagawan yan mabolinget para en dakayo. <sup>7</sup>Maibabain kayon to ay man-ipadto ya mankotom gapo ta adi matongpal. Maibabain kayo amin tan adiak songbatan dakayo.” Siya say inbagan Diyos en dakayo, kanan Mikias.

<sup>8</sup>Ngem si sak-en pay, mapnoak si Ispirito ya panakabalin Diyos. Ipaammo nan sak-en di kinalinteg ya idawtanak sak-en si toled ay mangipaammo sin Israelita sin basbasol da.

<sup>9</sup>Dengngen yo nan ibagak, dakayo ay mangituray en dana ay Israelita, dakayo ay dadlon manigaan ya mangikillo si kosto ya nalinteg. <sup>10</sup>Insaad yo di ad-ado ay beey ed Jerusalem ay din siyodad Diyos babaen sin nanpespesean yo ya nangam-amagan yos lawa ay say inyat yo ay nangon-od si pilak ya panakabalin yo. <sup>11</sup>Dakayo ay tuturay yan mapaspasoksokan kayo. Dakayo abe ay papadi ya mamadto yan pilak di gangamgaman yo sin iyat yo ay mangipatongpal sin obla yo, yan kanan yo amin en si Diyos di mamadbadang en dakayo et magay lawa ay mapasamak en dakayo. <sup>12</sup>Isonga gapon dakayo, mabakas ed Jerusalem. Maiwalang din amag di nadadael ay bebbeey et maalado di odom ay daga ay naisaadan di siyodad. Din bilig abe ay naisaadan di Timplo et mabeas.

### 4

#### *Din Masmas-ed Ay Timpon Di Talna Ya Bindisyon (4:1-8)*

<sup>1</sup>Mo domteng di maod-odi ay agew, manbalin ay kangatoan ay dontog din naisaadan di Timplo ay panbeeyan Diyos. Mankokoyog dan to di ipogaw <sup>2</sup>ay mapo sin ad-ado ay nasyon ay emey isdi, et kanan da, “Omali kayo ta mantikid tako sin dontog Diyos ta emey tako sin Timplon Diyos ay daydayawen di Israelita. Emey tako ta itdo na din laydena ay amagen tako ta say manbiyag tako ay maikompas sin laydena.” Kanan da di, tan din it-itdon Diyos et mapo ed Jerusalem ay makwani abe en Zion, tan isdi di makikalkaliana sin ipogaw na. <sup>3</sup>Singpaenan to din adi pankikinaawatan di nanasyon, olay din napipigsa ya mandinamag ay nasyon sin asag-en ya addawi. Pandayen da din kampilan da si alado ya din gayang da si maosal sin pan-oblaan da. Awni et din nanasyon yan adi dan mansagana para sin gobat ya adi da aben man-gogobat. <sup>4</sup>Amin ay ipogaw et manbiyag da ay natalna sin payew ya garden da et maga di pan-egyatan da, tan siya na di inkarin Diyos ay Kangatoan ay Turay. <sup>5</sup>Tonggal nasyon yan mandaydayaw ya on-onodan da din didiyosen da ngem datako pay et dayawen ya tongpalen tako si eng-enggana si Yahweh ay Diyos tako.

<sup>6</sup>Kanan Diyos, “Sin agew ay sana, sinopek kasin din Israelita ay ipogaw ko ay dinosak ay inpaey ko sin odom ay ili. <sup>7</sup>Magay kabaelan da ya addawi da sin ili da ngem badangak din at-atik ay nakalasad en daida sin iyat da ay manlogi ta manbalin da si napigsa ay nasyon. Manipod sidi ay timpo, iturayak daida ed Zion si eng-enggana. <sup>8</sup>Et sik-a ay Jerusalem ay kad-ak ay mamananbantay sin ipogaw ko, maitaoli kasin din sigod ay dayaw mo et sik-a din mandindinamag ay kapital di nasyon ay iturayak ay ari.”

Ngem sakbay ay matongpal dadi, masapol ay mapaligatan din man-ili ed Jerusalem ya mapilit da ay maiey ed Babilonia. Wada abey timpo ay omalian di nanasyon ay

mangobat ed Jerusalem, ngem adi dan ammo din planon Diyos ay mangisalakan sin ipogaw na. (4:9-13)

9 10 11 12 13

## 5

### *Din Inkarin Diyos Ay Waday Manturay Ay Taga-Betlehem*

(5:1-6)

<sup>1</sup> Mantabon kayo sin alad di ili, dakayo ay wada ed Jerusalem, tan enggay nilikob di kalaban din ili yo. Awni et abaken das dakayo et ibabain da din ari yo ay Israelita.

<sup>2</sup> Ngem kanan Diyos, “Sik-a ay Betlehem ed Efrata, sik-a di kakitkitoyan ay ili sin lak-am Juda, ngem sik-a di bomalaan di nawawada nanipod ed nabaon ay mangituray sin ipogaw ko ay Israelita.” <sup>3</sup> Isonga baybay-an Diyos daida enggana ay makaanak din nawad-an ay babai, asi maitaoli ay maitapi kasin sin kailian da din kakailiana ay napilit ay naiey ed addawi. <sup>4</sup> Sin omaliana, ipango na ya ay-ayowanana din ipogaw na ay kaman din mangay-ayowan si karnero. Iturayanas daida babaen sin panakabalin ya kinangaton Yahweh ay Diyos na. Magay pan-egyatan din ipogaw na, tan awni et bigbigen di amin ay ipogaw isnan daga din kinangato na, <sup>5</sup> et sisya ay mismo di kapoan di talna. Mo omali din taga-Assyria ay mangobat en datako ya makasgep da sin makneg ay pankamangan tako, omanay din papangolo ay ipasango takon daida ay manalagnib en datako. <sup>6</sup> Isalakan das datako et abaken da din taga-Assyria, pag dan iturayan daida babaen si kampilan da. <sup>7 8 9 10 11 12 13 14 15</sup>

## 6

### *Din Pangidaruman Diyos Sin Ipogaw Na*

(6:1-8)

<sup>1</sup> Dengngen yo di ibagan Diyos maipanggep sin Israelita. Pomika ka ay Apo ta iparang mo din darum mo ta saksi din dodontog ya bilbilig. <sup>2</sup> Dengngen yo ay dontog ya adi manpatingga ay lanad di daga din kason Diyos tan waday nadagsen ay kaso ay pangidarumana sin Israelita ay ipogaw na.

<sup>3</sup> Kanan Diyos, “Dakayo ay ipogaw ko, sinoy inamag ko en dakayo? Intoy inyat ko ay nangpadagsen si biyag yo? Somongbat kayo. <sup>4</sup> Inpangok dakayo ay komaan ed Egipto. Inbaak da Moses, Aaron ya si Miriam ay mangipango en dakayo et insalakan kos dakayo sin naibag-enan yo. <sup>5</sup> Dakayo ay ipogaw ko, nemnemen yo din lawa ay pinanggep Balak ay ari ed Moab ay amagen en dakayo ya din songbat Balaam ay anak Beor en sisya. Nemnemen yo abe din napasamak manipod sin namalasatan yo sin ginawang ay Jordan ed Acacia enggana sin dinmatngan yo ed Gilgal.\* Nemnemen yo dana ta maammoan yo din kinalinteg ko ay nangisalakan en dakayo.”

Pag kanan di esa ay Israelita,

<sup>6</sup> “Sino ngin di mabalin ay idawat kon Diyos ed langit mo enak mandayaw en sisya? Ay man-idatonak en sisya si olbon ay baka ay sag-eesay tawen da ta mapoan da? <sup>7</sup> Ay mapnek si Diyos mo idawtak si kalibolibo ay bomaro ay karnero ya kaman obbog ay adi kaabos ay mantikan di olivo? Ay peslek din besag ay anak ko ta idaton kon sisya ay ibayad sin basol ko?”

Sinongbatan din mamadtos sisya yan kanana,

\* **6:5** Din maipanggep en da Balak en Balaam et madtengan sin Bilbilang 22-23. Din maipanggep abe sin ginawang et madtengan sin Josue 3-4.

<sup>8</sup> “Maga! Inlawlawag Diyos din kosto ay amagen. Siya na di laydena ay amagen tako. Amagen tako din nalinteg sin pangilan Diyos, ipaila tako di adi manbalbaliw ay layad ya manpakombaba tako ay mantongpal en Diyos ay daydayawen tako.”

Ngem din Israelita et adi dan inon-onodan din siged ay ogali ay sana mo adi et maetek da, sinossowitik dan iib-a da ya pinalpaligat dan nabiteg. Isonga kanan Diyos en olay mo mangan da, adi dan mabsog, ya olay mo man-olnong da, maga di maidolin, ya olay mo man-esek da, maga di apiten da. Dosaenan to si daida ta say maibabain da ya laslasoyen di odom ay nasyon si daida. Mansakit di nemnem Mikias mo nemnemena din lawa ay kasasaad din Israelita, isonga kanana: (6:9-16)

9 10 11 12 13 14 15 16

## 7

### *Din Kadodogis Ay Kabibiyag Di Israelita*

<sup>1</sup> Magay namnama! Kamanak din nadagaangan ay magay maanapanas nabay-an ay lames di kaiw ya lames di obas. Enggay naboras amin din lames di obas ya din laylaydek ay damo ay lames di igos. <sup>2</sup> Enggay maga polos di nalinteg ay ipogaw ay kanayon ay mantongpal en Diyos. Nakasagana da amin ay manpese. Man-asiaanop da amin din sinkakailian. <sup>3</sup> Nalaing da amin ay man-amag si lawa. Din oopisyal ya howis yan mankedaw da si pasoksok. Basta ibagan di mabigbigbig ay ipogaw din laydena yan mantotolag da ay mangikillo si nalinteg. <sup>4</sup> Olay din kasigedan ay ipogaw et maiarig das tombek ay logam ono kaiw ay napagatan. Dinomteng din agew ay panosaan Diyos en daida ay kaman met laeng din indadaan di mamadto ay namanbantay en daida, et adi da ammo mo sinoy amagen da. <sup>5</sup> Adi kayon mantalek sin tinokmang ya gayyem yo. Annadan yo din kali yo, olay en asawa yo. <sup>6</sup> Tan enggay adi banolen din an-ak ay lallalaki din am-a da, ya din anan-ak ay babbabai yan kontraen da din iin-a da. Din manogang ay babai yan ibawena din katogangana ay babai. Din kalaban di esay ipogaw et din pamilya na met laeng. <sup>7</sup> Ngem mo sak-en pay, sedsed-ek si Diyos. Sisya di namnamaek ay omisalakan. Ammok ay si Diyos ay daydayawek et patgana din kararag ko.

### *Din Pangisalakanan Diyos Sin Ipogaw Na*

<sup>8</sup> Magay panragsakan di kalaban tako, tan olay naisokba tako, bomangon tako kasin. Ed wani, tinmotokdo tako sin mabolinget, ngem si Diyos di kapoan di silaw tako. <sup>9</sup> Nanbasol tako en Diyos, isonga masapol ay anosan tako din bonget na. Ngem awni et salaknibanas datako sin kalaban tako. Dosaenas daida gapo sin ligat ay inpalakam dan datako. Ibala nas datako sin mapat-a et maila tako din kinalinteg na sin pangisalakanana en datako. <sup>10</sup> Mo ilaen din kaibaw tako din iyat Diyos ay omisalakan, palalo ay mabainan da. Daida met laeng di nanglaslasoy en datako ed idi ay nangwani, “Into ngin si Yahweh ay Diyos yo?” Edasan tako din kaabakan da et boyaen takos daida ay maipababa ay kaman pitek ay magatgatinan sin kalsada.

<sup>11</sup> Dakayo ay taga-Jerusalem, omalin to di timpo ay pangisaadan yo kasin sin alad di ili yo\* ya paannawaen yo din beddeng di daga yo. <sup>12</sup> Sin timpo ay sana, omali sin kad-an yo di mapod Assyria ya din ginawang ay Eufrates ay maibandas belaan di agew, mapod Egipto ay maibandas abagatan, ya mapo sin addawi ay baybay ya kadondontogan. <sup>13</sup> Tan dana ay kailili isnan daga et madadael da ya manbalin da ay kadardaratan begew sin lawa ay inam-amag di omili.

### *Kararag Di Ipogaw Diyos Ta Seg-anganas Daida*

\* **7:11** Din natongpalan nina et madtengan sin Nehemias 6:15-16.



<sup>14</sup> Apo Diyos, ayowanam komas dakami ay pinilim ay ipogaw mo ta ipastol mos dakami ay kaman karnero. Ang-anggoy mi sin kada, ngem nanliniked sin kad-an mi di mayat ay pastolan. Ipastol mo komas dakami ed Basan ya Gilead ay kaman ed idi. <sup>15</sup> Ipailam koma kasin di nakaskasdaaw ay kaman sin nangipangoam en dakami ay komaan ed Egipto. <sup>16</sup> Ilaen to din odom ay nasyon et magay bael da olay mo pigay pigsa da. Gapo sin palalo ay masdaawan da, masngang ya mateweng da. <sup>17</sup> Pakiokmon dan to di tapok ay kaman din eweg. Bomala dan to sin naaladan ay ili da et manpayegpeg das egyat da ay somag-en en sik-a ay Diyos mi.

<sup>18</sup> Magay odom ay diyos ay makaiso en sik-a, Apo. Tan pakawanem din basbasol mi ay ipogaw mo ay nakalasad. Baken eng-enggana din bonget mo, mo adi et malaydan ka ay mangipaila en dakami sin layad mo ay adi manbalbaliw. <sup>19</sup> Maseg-ang ka kasin en dakami. Abakem din basbasol mi ay kaman mon in-gatin ya kaanem ay ikosnong mo sin lanad di baybay. <sup>20</sup> Ipailam din adi manbalbaliw ay layad ya seg-ang mo en dakami ay ipogaw mo ay polin da Abraham en Jacob, ay kaman din inkarim ed nabaon sin ap-apo mi.

## Habakkuk Maipanggep Sin Libro Ay Nay

At-atik di ammo tako maipanggep en Habakkuk. Gapo sin inpadto na sin 1:6 ay maipanggep sin pomigsaan di taga-Babilonia, maawatan tako ay nan-ili ed Juda sin timpon Ari Josias (2 Aari 23:29-30) ono Ari Jehoyakim (2 Aari 24:1). Din taga-Babilonia et inabak day Nineve ay kapital di Assyria sin 612 B.C. ya siya abey Egipto sin 605 B.C. Asi dan ikanayon ay makigobat sin odom ay kailiili enggana ay inabak day Jerusalem sin 597 B.C. Mabalin ay indasan Habakkuk din gobat ay sana.

Naitken din libro ay nay sin libro ay insolat di odom ay mamadto, tan din naisolat isna et baken din inpaammon Diyos sin ipogaw na babaen en Habakkuk, mo adi et din nanngalatan da Habakkuk en Diyos. Sin 1:2-4, nanriri si Habakkuk ay mansalodsod mo sinoy gapo ay binaybay-an Diyos din mangam-amag si lawa ed Juda. Sinongbatan Diyos ay nangwani en ibaa na di taga-Babilonia ay manosa en daida. Asi et nasepsep ay nagolo di nemnem Habakkuk, tan adi na maawatan mo intoy iyat din nasantoan ay Diyos ay mangosal si makedse ay ipogaw ay manongpal sin panggep na. Ngem naammoan Habakkuk ay masapol ay sed-ena din katongpalan di planon Diyos sin kosto ay timpo na, isonga sin naodi (3:1-19), nankararag ay mangidayaw sin kinangaton Diyos ya mangibalikas sin pammati na en sisya.

Din libro ay nay et maipanggep sin nanngalatan da Habakkuk en Diyos, ngem dakdake di silbi na sin am-in ay ipogaw Diyos ay nagolo di nemnem na gapo ta adi da maawatan din panggep Diyos.

### **Din Linaona**

Din ririn Habakkuk ya din songbat Diyos 1:1-2:4

Din kararag Habakkuk 3:1-19

### *Din Ririn Habakkuk Ya Din Songbat Diyos (1:1-11)*

<sup>1</sup> Siya na di inpaammon Diyos en Habakkuk ay esa ay mamadto babaen si iitaw.  
<sup>2</sup> Kanan Habakkuk ay nanriri, “Sik-a ay Diyos, nabayag ay nanpakpakaasiak en sik-a ay mankedaw si badang mo. Pig-an pay ay patgam nan kararag ko ya isalakan mos dakami sin mamalpaligat en dakami? <sup>3</sup> Apay nga ipalak-am mon sak-en di ad-ado ay ligat ya ipalobos mo ay maam-amag di lawa? Kanayon ay mailak di ipogaw ay mangipakaseseg-ang ya mamalpaligat sin iib-a da. Sin amin ay lugar yan waday mankokontra ya man-iibaw. <sup>4</sup> Isonga magay silbin di linteg ya maga polos di mangowis si kosto, tan din mangam-amag si lawa yan abaken da din magay basol na sin kastos da.”

<sup>5</sup> Kanan Diyos, “Sipotan yo din nanasyon sin asag-en yo et palalo ay masdaaw kayon to si maila yo, tan waday amagek sin timpo ay sibibiyag kayo ay masdaawan yo mo madamag yo. <sup>6</sup> Panturayek to din makedse ya dalosodos ay taga-Babilonia et likeden din sosoldado da din intiro ay daga ta posen da di baken dan oka. <sup>7</sup> Paegyaten dan kaipoipogaw sin odom ay ili. Gapo sin kinalastog da, din laylayden da ay amagen et say panbalinen da ay linteg. <sup>8</sup> Paspas din kabayo da mo din kanan da en leopard.\* Maangat da mo din mandagaang ay atap ay aso ay man-anap si anopen da sin labi. Paspas di tagtag din kabayon di sosoldado da ay mapo sin addawi. Biglaen da din kalaban da ay kaman din iyat di agila ay manipdot si depapen da. <sup>9</sup> Domateng da amin ay mamaligat yan napodot di toktok da ay kaman din dagem ay mapmapos belaan di agew. Din balod da et kaman din kaad-adon di darat. <sup>10</sup> Din aari ya tuturay yan laslasoyen da. Magay alad di ili ay makasawad en daida, tan mantob-on das lota ay somakyaban da

\* **1:8** Din leopard et kaman tigre ngem nalabalabangan.

ay manadael sin alad, asi dan abaken din ili. <sup>11</sup> Pag dan dalasen ay madipos ay kaman din dagem. Nakabasol da, tan mantalek da sin bokbokod da ay pigsa ay kaman dan say diyos.”

*Din Kasin Nanririan Habakkuk Ya Din Songbat Diyos*  
(1:12-13; 2:1-4)

<sup>12</sup> Pag kanan Habakkuk, “Sik-a ay Yahweh din nasantoan ay Diyos ko. Magay nanlogiam ya magay pap-eng mo. Sik-a ay Diyos ay pankamangan di nangdotok en daida ay man-ikeddeng ya mandosa. <sup>13</sup> Nasantoan ka et adi kan maitoled ay mangiila si mangam-amag si lawa. Ngem mo siya sa, apay ngin ay baybay-am da nan manglilipot ay mamaligat sin ipogaw ay nalinteg mo daida?” <sup>14 15 16 17</sup>

## 2

<sup>1</sup> Emeyak sin nakayang ay pantean di gowardiya ta sed-ek mo sino di ibagan Diyos ya din songbat na sin kararag ko. <sup>2</sup> Siya na di songbat Diyos en sak-en, “Estem ay isolat si bato din ibagak en sik-a ta nalaka ay mabasa. <sup>3</sup> Masapol ay isolat mo dana tan daan pay laeng di naikeddeng ay timpo ay katongpalan da. Olay mo kaman mabayag, masapol ay sed-em, tan sigurado ay matongpal dana ay adi mataktak. <sup>4</sup> Din managbasol yan magay kosto ay pantongpalan da, ngem din nalinteg ay ipogaw et maibasar din biyag da sin pammati da.” <sup>5 6 7 8 9 10 11 12 13 14 15 16 17 18 19 20</sup>

## 3

*Din Kararag Habakkuk*

- <sup>1</sup> Siya na di kararag din mamadto ay si Habakkuk.  
<sup>2</sup> “Apo Diyos, dinngek din inam-amag mo  
 et nasdaawak dadlo.  
 Amagem koma abe ed wani ay timpo mi  
 din nakaskasdaaw ay inam-amag mo ed idi.  
 Olay mo manbonget ka, maseg-ang ka koma.  
<sup>3</sup> Omali kasin si Diyos ay nasantoan  
 ay mapo ed Edom ya sin kadondontogan ed Paran.  
 Din koniniing na et silawana amin ed daya,  
 et idaydayaw da sin amin ay solin di daga.  
<sup>4</sup> Kaman agew di koniniing na,  
 somilsilap di silaw ay mapo sin takkay na  
 ay kad-an di naidodolin ay panakabalina.  
<sup>5</sup> Wada di doway ay kaeegyay ay makiey en sisya:  
 din nakaro ay sakit ay ipaon-ona na,  
 ya din pese ay ipaonod na.  
<sup>6</sup> Mo isaldeng na ay mandan, manyegyeg nan daga,  
 manpayegpeg din kaipoipogaw mo ilaenas daida.  
 Din makneg ay dontog et makosokos da,  
 din bilig ay nannandanana ed bayag et magday da.  
<sup>7</sup> Inilak ay emegyay din taga-Cusan,  
 manpayegpeg da abe din taga-Midian.  
<sup>8</sup> Apo Diyos, ay din baybay ya ginawang di binmongetam  
 idi nanlogan ka sin kalisam ay mangisalakan?  
<sup>9</sup> Insaganam din panam  
 ya nansianem din daga babaen si ginawang.  
<sup>10</sup> Manpayegpeg das egyay da  
 din dontog ay mangilan sik-a

ya nan-odan si napigsa.  
 Din malosong ay baybay yan man-agodood da,  
 et pomigsa din dalloyon da.  
 11 Gominek din agew ya bowan sin kad-an da  
 ay mangila sin panam ay napigsa  
 ya gayang mo ay somilsilap di tadem na.  
 12 Gapo din bonget mo,  
 din nanasyon yan in-gatigatin mo.  
 13 Inmali ka ay mangisalakan sin ipogaw mo  
 ya din arim ay pinilim, Apo.  
 Pinsem din pangolon di mangam-amag si lawa,  
 maga polos di binay-am sin sosoldado na.  
 14 Pinanam din toktok di pangolo da  
 idi kaman dan pewek ay inmali  
 ta pansisianen das dakami.  
 Naragsakan da abe ay namalpaligat en dakami  
 ay kaseseg-ang sin nantabtabonan mi.  
 15 Nangabayo ka ay nangigatigatin sin baybay  
 et manlowag din napigsa ay danom na.  
 16 Sin nanngreak isna, palalo di egyat ko,  
 et nan-gayenggeng din sobil ko.  
 Kinmapoyak ya nanpayegpeg din peweg ko,  
 ngem gominekak ay man-ed sin panosaan Diyos ay Apo mi  
 sin inmali ay mangobat en dakami.  
 17 Olay mo din igos, obas ya olivo yan magay lames da,  
 sin payew yan magay maapit da,  
 olay matey amin ay karnero ya baka,  
 18 naragsakak pay dedan,  
 tan si Diyos di omisalakan.  
 19 Din kapoan di pigsak et si Diyos ay Kangatoan,  
 sisya di omay-ayowan sin kadondontogan.  
 Panbalinenas sak-en ay kaman ogsa  
 ay adi maisoksokba.”

## Zefanias

### Maipanggep Sin Libro Ay Nay

Si Zefanias et mabigbig ay ipogaw ed Juda, tan naipoli en Ari Hezekias. Din kadesana ay mamadto et da Jeremias, Nahum ya siguro si Habakkuk. Nangaskasabas sisya sin timpon Ari Josias idi daan pay laeng baroan Josias din pammatin di ipogaw en Diyos.

Inpadto na ay domteng di agew ay pangokoman ya panosaan Diyos sin ipogaw na ed Juda begew sin nanaydayawan da si sinan didiyos. Dosaena abe amin ay nasyon. Ngem olay mo mabakas ed Jerusalem, seg-angan ton Diyos din ipogaw na. Maamag kasin din siyodad yan napakombaba ya nalinteg di man-ilis di.

#### **Din Linaona**

Din pangokoman Diyos ed Juda ya sin amin ay nasyon (1:1-3:8)

Din kasin kabaroan ya panragsakan di ipogaw Diyos (3:9-20)

#### *Din Dandani Ay Pangokoman Diyos Sin Kaipopogaw (1:1,7,12-18)*

<sup>1</sup> Siya na di inpaibagan Diyos en Zefanias ay anak Cusi idi nanturturay si Josias ay anak Amon ed Juda. Si Zefanias et anak Cusi ya apon da Gedalias, Amarias ya ari Hezekias. <sup>2 3 4 5 6</sup>

<sup>7</sup> Dandani ay domteng din pangokoman Diyos, isonga iginek yo sin sangoanana. Mansagsaganas Diyos ay manosa sin ipogaw na ed Juda ay kaman dan animal ay maidaton, et inayagana di kalaban da ay mangabak ya mamse en daida. <sup>8 9 10 11</sup>

<sup>12</sup> Kanan Diyos, “Sin doy ay timpo, man-aak si silaw ta sokisokek ed Jerusalem. Dosaek din ipogaw ay mapnek ya mantalek sin awak da et anggoy. Daida di mangwanis nemnem da, ‘Maga polos di amagen Diyos, olay siged ono lawa.’ <sup>13</sup> Ilayaw to din kalaban da din kinabaknang da ya madadael din bebbeey da. Polos ay adi dan to panbeeyan din bebbeey ay am-amagen da ya adi dan inomen din arak ay mapo sin obas ay is-is-ek da.

<sup>14</sup> “Enggay dandani ya madalas ay domteng din agew ay pangokomak sin kaipopogaw. Palalon to di ligat sin agew ay sana, tan olay din katoledan ay sosoldado et man-adawag da tan magay namnamaen da ay badang. <sup>15</sup> Din agew ay doy di kailaan di bonget ko, agew ay panlak-aman si ladingit ya ligat, agew di panakadadael ya agew di bolinget ya liboo. <sup>16</sup> Sin agew ay doy, madnge di ad-ado ay tanggoyob ay mangipaammo si kawadan di gobat. Madnge abe din bogaw di sosoldado ay mangobat si naaladan ay siyodad ay waday nakayang ay pantamangan di gowardiya da.”

<sup>17</sup> Kanan aben Diyos, “Idawtak din ipogaw si panligatan da enggana ay kaman dan nagodab ay mankapkapokap. Gapo ta binmasol dan sak-en, manbolos din dada da ay kaman owat danom ay maiwasit sin lota ya maiwalang din bangkay da ay maboyok. <sup>18</sup> Adi makaisalakan en daida din palata ya balitok da sin agew ay pangipailaak si bonget ko. Tan din bonget ko et kaman apoy ay mangan sin intiro ay daga, et peslek amin ay ipogaw ay matago sin labaw na.”

## 2

1 2

#### *Din Pamagbagan Zefanias Ta Malisian Da Koma Di Dosa (2:3)*

<sup>3</sup> Ipapasnek yo ay mansagong en Diyos, dakayo ay napakombaba ya managtongpal en sisya. Man-amag kayo si siged ya ipababa yo di nemnem yo sin sangoanana. Mo siya say iyat yo, mabalin ay malisian yo di dosa sin agew ay pangipailaan Diyos si bonget na. <sup>4 5 6 7 8 9 10 11 12 13 14 15</sup>

### 3

#### *Din Basol Di Taga-Jerusalem (3:1-2)*

<sup>1</sup> Kaseseg-ang pay din siyodad ay Jerusalem. Ad-ado di omili ay kadodogis di ogali da ay mangonkontra en Diyos ya mamalpaligat si gait da. <sup>2</sup> Adi da patpatien di pamagbaga. Adi da aben mantalek en Diyos ono somag-en en sisya. <sup>3 4 5 6 7 8</sup>

#### *Din Kasin Kabaroan Di Ipogaw Diyos (3:9-13)*

<sup>9</sup> Kinwanin Diyos, “Sin doy ay timpo, linisak din kadodogis ay nemnem ya tepek di ipogaw ta man-es-esa da ay mandayaw ya mansilbin sak-en ay Diyos. <sup>10</sup> Olay din ipogaw ko ay wada ed addawi ay ili ay Etiopia, omali dan to ay mankararag ya man-idaton en sak-en. <sup>11</sup> Sin agew ay doy, adi kayon maibabain gapo sin kinmontraan yo. Tan manipod sin doy ay timpo, kaanek din mangipapangato si awak da et maga di natangsit sin nasantoan ay dontog ko. <sup>12</sup> Tan bay-ak issa di napakombaba et sak-en di pankamangan da. <sup>13</sup> Din mabay-an ay Israelita et adi dan to man-amag si lawa ya man-etek. Awni et mayat di biyag da ya magay pan-egyatan da.”

#### *Din Kasin Panragsakan Di Ipogaw Diyos (3:14-20)*

<sup>14</sup> Ibogaw yo din kanta yo, dakayo ay taga-Israel, ya ipapas yo di amin ay likna yo ay manragsak, dakayo ay taga-Jerusalem. <sup>15</sup> Tan insaldeng Diyos ay manosa en dakayo yan kinaana amin din kalaban yo. Si Diyos ay ari tako ay Israelita et wada sin kad-an yo, isonga magay gapo ay emegyat kayo.

<sup>16</sup> Domteng to di timpo ay kanan da sin taga-Jerusalem, “Dakayo ay ipogaw ed Jerusalem, adi kayon emegyat ya madismaya. <sup>17</sup> Wadas Yahweh ay Diyos yo sin kad-an yo et abaken yo din kalaban yo babaen sin panakabalina. Maragsakan sisya en dakayo et gapo sin layad na, idawtanas dakayo si baro ay biyag. Awni et mankanta si ragsak na gapo en dakayo, <sup>18</sup> ay kaman din ragsak di ipogaw ay makifiesta.”

Kanan Diyos, “Adiak ipalobos ay wada kasin di mamaligat en dakayo ya maibabain kayo. <sup>19</sup> Domteng to di timpo ay dosaek din mamaligat en dakayo. Isalakan ko amin ay magay kabaelana ya itaolik sin ili da din napilit ay naiey sin addawi ay ili. Panbalinek ay dayaw din naibabainan da et madayaw dan to sin intiro ay daga. <sup>20</sup> Domteng to di timpo ay itaolik sin bebbeey da din ipogaw ko ay naisiasian sin odom ay ili. Panbalinek dakayo ay mandinamag ya madaydayaw sin amin ay ipogaw isnan daga ya ipailak en dakayo ay pasigedek kasin di biyag yo.” Siya nay inbagan Diyos.



## Zekarias

### Maipanggep Sin Libro Ay Nay

Si Zekarias et baken owat mamadto mo adi et padi abe. Din olog di ngadana et adi linglinglingan Diyos. Naianak sisya ed Babilonia et naitapi sin 50,000 ay Judio ay nantaoli ed Juda sin 538 B.C. ay inpangon da Zerubbabel en Josue. Inlogin din kaipoipogaw ay mangisaad kasin sin Timplo, ngem begew sin nangonkontra en daida, insaldeng dan obla si nasurok ay sinpo ay tawen.

Din panggep Zekarias ay nangaskasaba et ta papigsaena din nemnem di kailiana ta itoloy da ay mangamag sin Timplo ya ta mabaroan abe di ogali da. Ad-ado di inpadton Zekarias ay maipanggep sin Mesias mo din odom ay mamadto, powiras Isaias. Inpadto na din damo ay inmaliana ya kaipogaw na (6:12), din kinapadi na ya turay na (6:13), din kinadiyos na (13:7), din nalipotana (11:12-13), din panturayana (9:10) ya din kasinan omalian (14:4). Ad-ado abe di inpadto na maipanggep ed Jerusalem ya din pangokoman Diyos sin nanasyon. Mo basaen tako din libro ay nay, maawatan tako din panakabalin Diyos ay mangituray sin ipogaw ya nanasyon ed nabaon, ed wani, ya siya abe sin tapin di agew.

#### Din Linaona

Din nangayagan Diyos sin ipogaw na ta manbabawi da 1:1-6

Din naipaila en Zekarias ay kaman iitaw 1:7-6:8

Din nadotokan Josue ay kangatoan ay padi 6:9-15

Din maipanggep si kaitpean di dagaang 7:1-14

Din kasin pamindisyonan Diyos ed Israel 8:1-23

#### *Din Nangayagan Diyos Sin Ipogaw Na Ta Manbabawi Da (1:1-6)*

<sup>1</sup> Sin maikawao ay bowan sin maikadwa ay tawen di turay Darius, waday inpaibagan Diyos sin mamadto ay si Zekarias ay anak Berekias ay anak Iddo. <sup>2</sup> Kanan Zekarias, “Palalo di bonget Diyos ay Kangatoan ay Turay sin aap-o yo. <sup>3</sup> Isonga kanana en dakayo, ‘Sagongen yos sak-en ta awatek dakayo. <sup>4</sup> Adi yo tadonen din aap-o yo ed idi. Kinaskasabaan di mamadto si daida ta manbabawi da sin basbasol da ya sagongen das sak-en ngem adi da pinatpati. <sup>5</sup> Ed wani, enggay natey da amin din aap-o yo ya mamadto. <sup>6</sup> Binagbagaak ya inpaammok din bilbilin ko sin aap-o yo babaen sin mamadto, ngem adi da pinatpati, isonga nadosa da. Pag dan manbabawi yan kanan da: Kosto baw din inkeddeng Diyos ay dosa tan maibagay sin inam-amag tako.’ ”

#### *Din Nangon-ona Ay Naipaila En Zekarias Ay Kaman Iitaw*

7 8 9 10 11 12 13 14 15 16 17 18 19 20 21

#### *(2:10-13; 3:7-10)*

Wada di wao ay kaman iitaw ay inpailan Diyos en Zekarias ta say mapapigsa di nemnem di ipogaw ay nantaoli ed Juda. Din damo ay inila na et lalaki ay nangakabayo si manbalanga ay kabayo. Wada di odom ay nangakabayo ay inmey sin kad-ana et inpadamag da en sisya din mayat ay kasasaad di odom ay nanasyon isnan daga, downan kaseseg-ang da pay laeng ed Juda. Pag kanan din anghel ay kangalat Zekarias en laton ay seg-angan Diyos ed Jerusalem et maamag kasin din Timplo. Bomaknang abe kasin din kailili ed Juda.

Din maikadwa ay iniitaw na et inila na di opat ay sakngod ay kaiarigan din napigsa ay nanasyon ay nangisian sin taga-Israel ya Juda ed idi. Asi et dinmateng di opat ay karpintiro ay nananggen si martilyo ta paegyaten da din sakngod ya abaken das daida.

Din maikatlo ay iniitaw na et inila na di lalaki ay nananggen si panlokod. Linokod na ed Jerusalem ta way iyat na ay kasin mangamag. Kanan din anghel en palalo ay ad-adon to di ipogaw ya animal ed Jerusalem isonga magay alad di ili si omanay, ngem laton tan salakniban Diyos ay mismo din siyodad babaen si apoy sin nanniliked di siyodad. (1:7-2:9)

## 2

1 2 3 4 5 6 7 8 9

<sup>10</sup> Kanan din Anghel Diyos, “Dakayo ay taga-Jerusalem, ikanta yo di ragsak yo, tan kanan Diyos en omaliak ay makitee en dakayo. <sup>11</sup> Sin doy ay timpo, ad-ado ay nasyon di komamang en Diyos et manbalin dan to ay ipogaw na. Makitee si Diyos en dakayo et say pangammoan yo ay sisya di nangibaen sak-en en dakayo. <sup>12</sup> Manbalin kasin ed Juda ay nabanol ay sanikwa na sin pinili na ay daga. Ed Jerusalem abe di piliena kasin ay siyodad. <sup>13</sup> Gominek kayo amin ay ipogaw sin sangoanan Diyos tan omali ay mapo sin nasantoan ay panteana.”

Din maikap-at ay naipaila en Zekarias et inila nas Josue ay din kangatoan ay padi sin timpo na. Nanbabados nalogit yan pinmipika sin nan-gawaan din Angel Diyos ya si Satanas. Niyamyaman din Anghel si Satanas et kinaana din nalogit ay badon Josue ay kaiarigan di basol na yan insokat nay nalinis. Pag kanan din Anghel Diyos en Josue, (3:1-6)

## 3

1 2 3 4 5 6

<sup>7</sup> “Siya na di inbagan Diyos ay Kangatoan ay Turay, ‘Mo tongpalem din linteg ko ya amagem din inbilin ko, sik-an to di makaammo sin Timplok ya sin pangokoman. Dengngék abe din kararag mo ay kaman din iyat ko ay mannge sin kararag di anghel sin sangoanak. <sup>8</sup> Isonga sik-a ay Josue ay kangatoan ay padi, dengngem din ibagak, siya abe en dakayo ay gagait na ay padi. Dakayo di sinyal di mayat ay maamag sin tapin di agew tan ipailak to din baak ay makwani en Pingi. <sup>9</sup> Ipeey ko sin sangoanan Josue di bato ay pito di ropa na. Waday kali ay ikitikit kos di yan sin oneg di esay agew, ponasek din basbasol di ipogaw isnan ili. <sup>10</sup> Sin agew ay sana, man-asiawis kayon to sin katokmang yo sin kad-an di ineskan yos obas ya igos ta ganasen yo din kinatalnan di ili yo.’ ”

### *Din Maod-odi Ay Naipaila En Zekarias Ay Kaman Iitaw*

Din maikalima ay inpaaitaw Diyos en Zekarias et inila na di patangan di silaw ay balitok ay naisaad sin nan-gawaan di doway ay kaiw ay olivo. Kanan Diyos en din kaiarigana et kedngen Zerubbabel ay amagen din Timplo, baken babaen si panakabalin di ad-ado ay soldado ono din mismo ay pigsa na mo adi et din Ispiriton Diyos.

Din maikan-em ay inila na et waday nalopilop ay papil ay mantaytayaw. Din naisolat sin esa ay balina et “Maipakaan di am-in ay mangakew.” Din naisolat abe sin bas-il et “Maipakaan di am-in ay man-etek ay mantistigo.”

Din maikapito ay inila na et waday babai ay tinmotokdo sin baskit. Kanan din Anghel en din kaiarigana et din basbasol di man-ili ed Israel ya Juda. Idi siya di, waday doway ay babai ay anannawa di payak da. Intayaw da din baskit ed Babilonia. Din laydena ay kalien, kaanen Diyos am-in di basol ed Israel.

Din naodi ay inpaaitaw Diyos en Zekarias et inila na di opat ay kalisa ay para gobat ay mandan sin nan-gawaan di doway ay bilig ay bronsi. Kanan din Anghel en emey da sin am-in ay bandan di daga ta idateng da din dosa ay inkeddeng Diyos. (4:1-6:8)

## 4

1 2 3 4 5 6 7 8 9 10 11 12 13 14

1 2 3 4 5 6 7 8 9 10 11

## 5

1 2 3 4 5 6 7 8

## 6

*Din Korona Para En Josue  
(6:9-15)*

<sup>9</sup> Kanan Diyos en Zekarias, <sup>10</sup> “Alaem din rigalon di balod ay napod Babilonia ay da Heldai, Tobias ya Jedayas yan emey ka ay dagos sin beey Josias ay anak Zefanias. <sup>11</sup> Alaem din insagot da ay balitok ya palata ta amagem si korona ay ikoronam sin kangatoan ay padi ay si Josue ay anak Josadac. <sup>12</sup> Ibagam en Josue ay kinwanin Diyos ay Kangatoan ay Turay en naey di ipogaw ay manngadan si Pingi.\* Domakdake sin daga ay kad-am et isaad na din Timplon Diyos. <sup>13</sup> Sisya di mangamag yan maidayaw ay kaman ari et tomokdo sin trono na ta iturayana din ipogaw na. Et baken ari et anggoy di saad na sin tinmokdoana ay manturay mo adi et padi abe, yan mankompas din dow a ay saad na ay sana.† <sup>14</sup> Din korona et komakaman sin Timplon Diyos ta say panginemnemnenman en da Heldai, Tobias, Jedayas ya si Josias ay anak Zefanias. <sup>15</sup> Omali dan to din manbeey sin addawi et tomolong da sin kaisaadan di Timplon Diyos. Maamag din Timplon Diyos et say pangammoan yo ay si Diyos ay Kangatoan ay Turay di nangibaan sak-en. Mapasamak dana mo napasnek kayo ay mantongpal sin kalin Yahweh ay Diyos yo.”

## 7

1 2 3 4 5 6 7 8 9 10 11 12 13 14

## 8

*Din Karin Diyos Ay Pasigedena Ed Jerusalem*

<sup>1</sup> Siya dana di inbagan Diyos ay Kangatoan ay Turay en Zekarias. <sup>2</sup> Kanana, “Lay-delaydek ay tomolong ed Zion begew sin dakdake ay layad ko sin ipogaw ay man-ilis di. Begew sin layad ko ay nay, palalo abe di bonget ko sin kaibaw da. <sup>3</sup> Mantaoliak to ed Jerusalem ay nasantoan ay siyodad ko et manteeak isdi. Mangadanan din siyodad si Napodno ay Siyodad, yan din dontog ay panteak et mangadanan si Nasantoan ay Dontog. <sup>4</sup> Wadan to di nankakay ya nankababkes ay mantoktokdo sin katoptopogan di ipogaw, et mansokod da ay mandan tan enggay nakanakay ya nabakebakes da. <sup>5</sup> Ad-ado abe kasin di anan-ak ay man-ay-ayam sin kakalsada.

<sup>6</sup> “Kaman naligat ay mapasamak dana sin pannemnem di at-atik ay ipogaw ay deda ay matmatago sin timpo ay sana, ngem nalaka en sak-en. <sup>7</sup> Isalakan kon to din ipogaw ko sin kailili sin belaan ya diposan di agew <sup>8</sup> ta itaolik daida ed Jerusalem et isdi di panbeeyan da. Daidan to di ipogaw ko yan sak-en di Diyos da, et nalinteg ya kosto si kanayon di iyat ko ay mangituray en daida.

<sup>9</sup> “Papigsaen yo din nemnem yo, tan din dinnge yo ed wani et siya met laeng din inbagbagan di mamadto sin naisaadan di fondasyon di maamag kasin ay Timplok. <sup>10</sup> Tan sin daan pay laeng domateng din timpo ay doy, magay makabael ay manglagbo si ipogaw ya mangabang si animal. Emegyat di amin ay ipogaw ay bomala sin beey da, tan inturong ko di nemnem da ay man-asililiget. <sup>11</sup> Ngem ed wani, baken kaman din inyat ko ed idi di iyat ko sin nakalasad ay ipogaw isna ay ili. <sup>12</sup> Awni et magay emegyatan da mo man-esek da. Omanay di odan ay manibog sin mola da et ad-ado di lames din obas da. Mayat abe di apit da. Idawat ko am-in dana ay bindisyon sin nakalasad ay ipogaw ay nay da. <sup>13</sup> Dakayo ay man-ili ed-Juda ya Israel, adi kayo emegyat mo adi et papigsaen yo di nemnem yo. Tan ed idi mo man-asibaos di mangili, kanan da, ‘Madosa ka koma ay

\* **6:12** Isaias 4:2. † **6:13** Di esa abe ay kaiologan nina sin Hebreo et: Et wada abey padi sin kad-an di trono na yan mankompas da ay dow a.

kaman din taga-Juda ya Israel.' Ngem isalakan kos dakayo, isonga ibagan to di mangili, 'Mabindisyonan ka koma ay kaman din taga-Juda ya Israel.' ”

<sup>14</sup> Kinwanin aben Diyos ay Kangatoan ay Turay, “Idi inmipabonget din aap-o yo, ninemnem ko ay waday kaeegyat ay mapasamak en daida, et adiak inbabawi mo adi et tinongpal ko. <sup>15</sup> Ngem ed wani, panggepek ay bindisyonan dakayo ay taga-Jerusalem ya Juda, isonga adi kayo emegyat. <sup>16</sup> Siya dana di masapol ay amagen yo. Din tet-ewa di ibaga yo sin gagait yo. Nalinteg di iyat yo ay mangowis ta mawaday talna ya olnos. <sup>17</sup> Adi kayo manpanggep si lawa sin gagait yo. Adi kayo aben man-etek ay mantistigo, tan kaliliget ko dana ay maamag.”

<sup>18</sup> Siya na abey inpaammon Diyos ay Kangatoan ay Turay en Zekarias. <sup>19</sup> Kanana, “Din pangit-itpean yo si dagaang yo sin maikap-at, maikalima, maikapito ya maikasinpo ay bowan et manbalin to ay fiesta ay panragragsakan di taga-Juda, isonga patgen yo di tet-ewa, olnos ya talna.”

<sup>20</sup> Kanan Diyos ay Kangatoan ay Turay, “Sin tapin di agew, emey dan to ed Jerusalem din ad-ado ay ipogaw ay mapo sin kailiili. <sup>21</sup> Kanan to din ipogaw di esa ay siyodad sin omili si esa ay siyodad, ‘En kami mandaydayaw en Diyos ay Kangatoan ay Turay ya mankedaw si bindisyona. Emey tako!’ <sup>22</sup> Emey din nanasyon ed Jerusalem ta en da mandayaw ya mankedaw si bindisyon ko ay Kangatoan ay Turay. <sup>23</sup> Sin doy ay timpo, sinpo ay ipogaw ay mapos nanasyon ay nankinalasi di kali da yan manpakod da sin badon di esa ay Judio yan kanan da, ‘Layden mi ay omonod en sik-a tan dinamag mi ay wadas Diyos en sik-a.’ ”

## 9

1 2 3 4 5 6 7 8

### *Din Omalian Din Arin Di Jerusalem (9:9-13)*

<sup>9</sup> Dakayo ay taga-Jerusalem, manragsak kayo,  
ibogaw yo din ragsak yo,  
tan dandani ay omali din ari yo.

Nangabak ngem napakombaba,  
anak di dangki di nangabayoana.

<sup>10</sup> Kanan Diyos, “Awni et kaanek ed Israel amin dana:  
din kalisa, kabayo ya pana  
ay gobat di kaosalan da.

Din ari yo, awni et makikapya  
sin kailiili isnan daga.

Sakopen to di iturayana  
manlogi sin benget di baybay enggana sin esay benget na,  
manlogi sin ginawang ay Eufrates enggana sin gedeng di daga.

<sup>11</sup> Gapo sin intolag kon dakayo  
ay siniglotan di dadan di daton yo,  
wayawayaak to din ipogaw yo  
sin bobon ay magay danom na ay naibalodan yo.

<sup>12</sup> Dakayo ay naibalod sin addawi ay daga,  
balod ay wada di namnama da,  
mantaoli kayo sin ili yo ay makneg di alad na.

Ed wani, ibagak en dakayo,  
dobl di bindisyon ay idawat kon dakayo  
mo din ligat ay linaklak-am yo.

<sup>13</sup> Dakayo ay taga-Juda ya Israel, dengngen yo,

dakayo abe ed Zion, tan osalek dakayo  
ay kaman pana ya kampilan di soldado  
ay makigobat sin ipogaw ay Griego.”

*Si Diyos Di Mangayowan Sin Taga-Juda*

Si Diyos di mangisalakan sin ipogaw na tan abakena din kalaban da. Sisy di mangipawadas odan ta gomabay di molmola, ya panbalinena din ipogaw na ay nasalon-at ya napigsa. Mo pay din manpontos ya mankotom, owat dan ietekan din manpatolong en daida, isonga masangangaw din kaipoipogaw ay kaman dan kakarnero ay iwed di mangay-ayowan en daida. Dosaen Diyos din papangolo ay mangam-amag si kaman nidi yan isalakana ya papigsaena din ipogaw na. Olay mo nansianenas daida sin kailili ed idi, sinopenan tos daida et onodan das sisy. (9:14–10:12)

14 15 16 17

## 10

1 2 3 4 5 6 7 8 9 10 11 12

## 11

1 2 3

*Din Dowa Ay Mangay-ayowan Si Karnero  
(11:4-17)*

<sup>4</sup> Kanan Yahweh ay Diyos ko, “Waday laydek ay amagem ay kaman pangarig. En ka manpastol si sinkabeweg ay karnero ay nakeddengnan ay mapalti. <sup>5</sup> Pinalpaltin di nanlaklako en daida ngem adi da madosa. Kanan din nangilaklako en daida, ‘Madaydayaw si Diyos tan nay binmaknangak.’ Olay din nangipaspastol en daida et adi da naseg-angan en daida.

<sup>6</sup> “Tan enggay adiak seg-angan din ipogaw sin ili ay sana. Sak-en ay mismo di mangipolang en daida sin panakabalin di turay ya ari da. Dadaelen din tuturay ay nay din ili et maga di isalakan ko,” kinwanin Diyos.

<sup>7</sup> Idi siya di, linmagbo da din nanlako si kakarnero et inpastol ko din kakarnero ay natodingan ay mapalti. Nan-aak si dowa ay sokod ay nginadanak si Seg-ang ya Timpoyog et inayowanak din kakarnero. <sup>8</sup> Sin oneg di esay bowan, kinaan ko di tolo ay manpaspastol. Ngem enggay naabos abe di anos ko sin kakarnero yan malmaliget da abe en sak-en.\* <sup>9</sup> Idi siya di, kanak sin kakarnero, “Manipod ed wani, baken sak-en di mangayowan en dakayo. Mo waday matey, bay-ak ay matey. Mo waday malitaw, bay-ak ay malitaw. Din mabay-an, olay man-asiabos da.”

<sup>10</sup> Inak din sokod ko ay manngadan si Seg-ang et ginotlok ta mangipaila ay nawaswas din intolag Diyos sin amin ay ipogaw. <sup>11</sup> Isonga sin isdi ay agew, naokas din tolagan. Omiila din man-ilaklako ya manlaklako si kakarnero yan ammo da ay si Diyos di nankalkali babaen sin inam-amag ko. <sup>12</sup> Kanak en daida, “Mo layden yo, idawat yo din lagbok, mo sigaan yo et olay maga.” Pag dan idawat di tolonpo ay palata ay say lagbok.

<sup>13</sup> Kanan Diyos en sak-en, “Itep-am sin kad-an di man-am-amag si banga.”† Et intep-ak sin Timplo sin kad-an di man-am-amag si banga din sana ay kalalaso ay kanan da en banol ko. <sup>14</sup> Idi makdeng di, ginotlok din maikadwa ay sokod ay makwani en Timpoyog. Say nangipaammo ay madadael di timpoyog di Juda ya Israel.

<sup>15</sup> Pag kanan Diyos en sak-en, “Ed wani, manbalin ka si manpaspastol ay magay silbi na. <sup>16</sup> Tan nay mandotokak isnan ili si mangipastol sin kakarnerok, ngem baybayana din nalitaw. Adi na anapen din nasangaw, adi na agasan din nasogatan ya adi na

\* **11:8** Di esa abe ay kaiologan nina sin Hebreo et: kinaan ko di tolo ay manpaspastol tan enggay naabos di anos kon daida yan malmaliget da abe en sak-en. † **11:13** Din kanana sin Syriac et: “Itep-am sin pan-idoldolanan si gameng sin Timplo.”



pakanen din napigsa pay laeng, mo adi et isida na din kalamsan ay karnero et loksobena din kokob da. <sup>17</sup> Madosa din manpaspastol ay sana ay mamaybay-an sin kakarnero. Sapay koma ta madoyok din kannawan ay mata na si kampilan ta maboldingan ya mabetbet abe din takkay na ta makingking.”

## 12

### *Din Pangisalakanan Diyos Sin Siyodad Ay Jerusalem*

(12:1-14; 13:1)

<sup>1</sup> Si Diyos di namarsua ed daya ya isnan daga ya nangidawat si biyag di ipogaw. Siya nay inbaga na maipanggep ed Israel: <sup>2</sup> “Panbalinek to ed Jerusalem si kaman bason di arak ay pan-inoman din nanasyon sin nanniliked et kaman dan nabeteng ay mandinapig. Likoben dan to abe din odom ay ili ed Juda sin panlikoban da ed Jerusalem. <sup>3</sup> Pantitinolongan di amin ay nasyon isnan daga ay gobaten di Jerusalem. Ngem sin domtengana di ay timpo, panbalinek ed Jerusalem si kaman madagsen ay bato et madadael di amin ay nasyon ay mamadas ay mamidking en sisya. <sup>4</sup> Sin doy ay timpo, kibtotek din kabayo da ya bogeek din nangabayo en daida. Godabek din kabayon di nanasyon, ngem bantayak pay din ipogaw ed Juda. <sup>5</sup> Et kanan din papangolo ed Juda, ‘Si Yahweh ay Kangatoan ay Turay ay Diyos tako di mangidawat si pigsan din ipogaw na ay man-ili ed Jerusalem.’

<sup>6</sup> “Sin doy ay timpo, panbalinek din papangolo ed Juda ay kaman apoy sin kada ono sin garami ta abaken ya dadaelen da amin ay ili ay wada sin nanliniked. Ngem ed Jerusalem pay et laton ay adi maabak din omili mo adi et komakaman das di. <sup>7</sup> Ngem pangon-onaek ay pangabaken din sosoldadon Juda ta din polin David ya omili ed Jerusalem yan adi da it-ek din awak da.” <sup>8</sup> Sin doy ay timpo, salakniban Diyos din omili ed Jerusalem et olay din kakapsotan en daida yan pomigsa ay kaman si David. Din polin David et kaman si Diyos ono kaman din Anghel Diyos ay mangipangolon daida. <sup>9</sup> Tan inkeddeng ko ay dadaelek amin ay nasyon ay mangobat ed Jerusalem.

<sup>10</sup> “Awni et panbalinek din polin David ya ipogaw ed Jerusalem ay managseg-ang ya managkararag. Ilaen dan to din dinoyok da et manladingit da ay kaman din nateyan di bogbogtong ono besag ay anak. <sup>11</sup> Sin agew ay sana, palalo di ladingit ed Jerusalem ay kaman din ladingit da paran Hadad-rimmon\* sin tanap ed Megiddo. <sup>12-14</sup> Tonggal pamilya sin intiro ay ili yan manladingit da ay ang-anggoy da. Manladingit din polin David, Levi, Natan, Simei ya din odom ay poli. Maikasin ay manladingit din lallalaki sin babbabai.”

## 13

<sup>1</sup> Kanan Diyos, “Sin timpo ay sana, mawadan to di obbog para sin polin David ya din ipogaw ed Jerusalem ta malinisan da sin basbasol da ya kinmadodogisan da.”

Pasaldengek abe din panaydayawan das sinan didiyos ya mamaga di mamadto ay mangibagas etek, tan mo waday kaman nidi ay mamadto, mabain ay mangipodno. (13:2-6)

2 3 4 5 6

### *Din Kateyan Di Mangay-ayowan Si Karnero*

(13:7-9)

<sup>7</sup> Kanan Diyos ay Kangatoan ay Turay, “Matood ka ay kampilan ta idoyok kos sik-a. Tan awni et peslek din ib-ak ay manpaspastol et mansisian karnero da. Dosaek din ipogaw ko <sup>8</sup> et sin intiro ay ili yan matey din doway ay inkatlo. <sup>9</sup> Din inkatlo ay mabay-an

\* **12:11** Kanan di odom en si naey di ngadan di sinan didiyos ay makaammo sin molmola. Idi nango din molmola si tinawen, nanladingit din ipogaw tan kanan da en natey din diyos da.



yan linisak ay kaman din iyat ay manlinis si palata ya balitok babaen si apoy. Awni et mankararag dan sak-en et songbatak daida. Ibagak ay daida di ipogaw ko yan ibaga da abe ay sak-en di Diyos da.”

## 14

### *Din Omalian Diyos Ay Manturay (14:1-16)*

<sup>1</sup> Ilaen yo ay taga-Jerusalem, tan dandani din agew ay pangokoman Diyos. Sin doyo ay timpo, omalin to di manamsam sin sanikwa yo et panbibingayan da sin sangoanan yo.

<sup>2</sup> Din iyat na ay maamag et sinopen Diyos din am-in ay nasyon et gobaten da din siyodad ay Jerusalem. Abaken da et alaen da am-in ay layden da sin bebbeey ya piliten da abe din babbabai. Din kagodwan di omili yan maiey da ay maibalod sin addawi, ngem din odom pay yan mabay-an da.

<sup>3</sup> Pag bomala si Diyos ay en mangobat sin nanasyon ay sana ay kaman met laeng din inyat na ay nakigobgobat ed idi. <sup>4</sup> Sin agew ay sana, pomikas sisya sin toktok di dontog ay Olivo sin bomandas belaan di agew ed Jerusalem. Magodwa din dontog et mawada di annawa ay tanap sin nan-gawaana manipod sin bandan di belaan enggana sin diposan di agew. Demenden sin amyanaan din kagodwa yan sin abagatan din godwa na. <sup>5</sup> Lomayaw kayo ay mandan sin tanap ay sana sin nan-gawaan di dontog Diyos, tan domateng sa enggana ed Azel. Managtag kayo ay kaman din inyat di aap-o tako sin nanyegyegana sin timpon Uzias ay ari ed Juda.\* Pag omali si Yahweh ay Diyos ko yan ikoyog na din nasantoan ay aanghel na.

<sup>6</sup> Mo domteng di ay timpo, maga di teg-in ono andap. <sup>7</sup> Maga abe di labi, pag kaagawan, tan olay sin labi et mapat-a pay dedan. Din domtengana di ay timpo et si Diyos anggoy di makaammo. <sup>8</sup> Sin agew ay sana, man-oyas di danom ay mapo ed Jerusalem sin intiro ay tawen, sin pinag-oodan ya siya abe sin tiyagew. Omayos din godwa na sin baybay ay Mediterranean yan din godwa na sin lebeng ay Asin.

<sup>9</sup> Pag man-ari si Diyos sin intiro ay lobong. Am-in ay ipogaw et dayawen das sisya ay Diyos yan es-esa di ammo da ay ngadana.

<sup>10</sup> Masingpan to din intiro ay ili manipod ed Geba sin amyanaan enggana ed Rimmon sin abagatan, ngem ed Jerusalem pay yan komakaman ay nakaykayang mo din am-in ay ili ay wada sin nanliniked. Sakopen din siyodad manipod sin Segpan Benjamin enggana sin Segpan sin Soli, ay naiamagan di sigod ay segpan, manipod abe sin pan-gowardiyaan ed Hananel enggana sin panpespesan si obas ay okan di ari. <sup>11</sup> Mailian to ya polos ay adi kasin madadael. Natalna abe di biyag din omili ay magay pan-egyatan da.

<sup>12</sup> Awni et ipalak-am Diyos di kaeegyat ay sakit sin nanasyon ay nangobat ed Jerusalem. Maboyok din lamlames, mata ya dila da olay matmatago da pay laeng.

<sup>13</sup> Sin timpo ay sana, palalo ay kibtoten Diyos daida et esa en mangamdot ya mangibaw sin ipogaw ay katakdo na. <sup>14</sup> Din taga-Juda abe yan makigobat da ay manalagnib ed Jerusalem. Samsamen da din sanikwan di am-in ay nasyon ay balitok, palata ya lopot ay ad-ado. <sup>15</sup> Wadan to abe di kaeegyat ay sakit di kabayo, dangki, kamel ya am-in ay animal sin kampon di nanasyon ay sana. <sup>16</sup> Mo makdeng di, am-in din makalasalat sin nanasyon ay nangobat ed Jerusalem yan tinawen ay emey da ed Jerusalem ta en da mandayaw en Diyos ay bigbigen da ay Kangatoan ay Turay. Silibraren da abe din fiesta ay makwani en Ab-abong. <sup>17 18 19 20 21</sup>

\* **14:5** Din kanana sin LXX et: Matab-okan din tanap ay sana sin nan-gawaan di dontog enggana ed Azel ay kaman din inyat na sin nanab-okan di yegey sin timpon Uzias ay ari ed Juda.

## Malakias

### Maipanggep Sin Libro Ay Nay

Din olog di Malakias et “baak.” Naisolat din libro ay nay sin timpon Nehemias ono naod-odi pay, idi nakdeng ay naisaad kasin din Timplo ed Jerusalem. Nadismadismaya din Judio ay nantaoli ed Juda, tan olay mo nakdeng ay naamag din Timplo ya alad di Jerusalem, daan matongpal din inpadton di mamadto ed idi maipanggep sin pomigsaan ya kadayawan di nasyon da ya daan pay laeng omalis Diyos sin Timplo ay mangipaila sin panakabalina. Isonga waday dowadowa da maipanggep sin layad ya kinalinteg Diyos yan makakkaan di namnama da. Begew sidi, sinossowitik das Diyos tan adi dan indawdawat din inkasinpon di sapol da ya kosto ay datdaton. Adi da aben inon-onodan di odom ay linteg Diyos, tan ad-ado di mangas-asawas adi mamati en Diyos, mangisissian si asawa na, mamalpaligat si ib-a na ya mangam-amag si odom ay kadodogis. Kanan Malakias en omalin to si Diyos ay mangokom ya manglinis en daida, ngem waday pangon-onaena ay baa ay mangisagana sin danena ya mangipaammo sin intolag na.

Din iyat Malakias ay mangasaba et ibagbaga na din salodsod ay wadas nemnem di mandengenge, asi na songbatan. Isonga ad-adoy salodsod ya songbat ay linaon din libro ay nay.

#### **Din Linaona**

Din layad Diyos sin polin Israel 1:1-5

Din inpabasol Diyos sin Israelita 1:6-2:16

Din ibaan Diyos ay mangon-ona mo sisya 2:17-3:5

Din namaybay-an da sin inkasinpon di sapol da ya din bindisyon ay inkarin Diyos 3:6-12

Din seg-ang Diyos sin mansilbi en sisya 3:13-18

Din agew ay pangokoman Diyos sin kaipoipogaw 4:1-6

#### *Din Layad Diyos Sin Polin Israel*

<sup>1</sup> Siya na din kalin Diyos ay inbaga nan Malakias ta ipaammo na sin Israelita. <sup>2</sup> Kanan, “Kanyon ay inpailak din layad kon dakayo, ngem kanan yo, ‘Intoy inyat mo ay nangipaila si layad mo en dakami?’ ” Et kanan Diyos, “Sin-iyogtan da Esau en Jacob, ngem inpailak di layad ko en Jacob ya din poli na <sup>3</sup> yan sinigaak si Esau ya din poli na. Dinadael ko din kadondontogan ay ili na et nanbalin ay pantean di atap ay animal.”

<sup>4</sup> Mo kanan din taga-Edom ay polin Esau, “Nadadael din il-ili tako ngem bangonen tako kasin,” kanan Diyos ay Kangatoan ay Turay, “Olay amagen da ngem dadaelek kasin. Mangadanan dan to si managbasol ay nasyon ya ipogaw ay kaliliget Diyos si eng-enggana. <sup>5</sup> Kadi man et ilaen din Israelita dana ay mapasamak et kanan dan to, ‘Manakabalin baw si Diyos olay sin ili ay lasin di Israel.’ ”

#### *Din Inpabasol Diyos Maipanggep Sin Indatdaton Da*

<sup>6</sup> Kanan Diyos ay Kangatoan ay Turay, “Rispitoen din anak si ama na ya din bag-en din apo na. Sak-en si Ama yo ya Apo yo, ngem apay nga adi yon dayawen sak-en? Dakayo ay papadi yan laslasoyen yos sak-en ngem kanan yo pay laeng, ‘Intoy inyat mi pay ay nanglasoy en sik-a?’ <sup>7</sup> Din songbat ko yan nan-idaton kayo si kadodogis sin altar ko. Asi yo kanan, ‘Intoy inyat mi ay nangipakadodogis en sik-a?’ Ibagak en dakayo. Maipaila sin am-amagen yo din panglaslasoyan yo sin altar ko. <sup>8</sup> Ay kanan yo en kosto din pangidatdatonan yon sak-en si naboldingan, napilay ya mansaksakit ay animal? Padasen yo man ay idawat sin gobernador ta maila mo malaydan en dakayo.”

<sup>9</sup>“Ed wani, padasen yo ay papadi ay manpakaasi en sak-en ay Diyos ta seg-angak din kaipoipogaw. Ngem adiak dengngen din kararag yo et dakayo di akin basol.”

<sup>10</sup>Kanan aben Diyos ay Kangatoan ay Turay, “Wada koma di esa en dakayo ay mangin-eb sin Timplo ta adi kayon makasgep ay man-ipoo si daton ay magay silbi na sin altar ko, tan adiak malaydan en dakayo et adiak awaten di olay sino ay idaton yo. <sup>11</sup>Tan awni et dayawen ya patgen di kaipoipogaw sak-en isnan intiro ay daga. Am-in ay ili yan man-ipoo dan to si insinso ya makaay-ayo ay daton. <sup>12</sup>Ngem dakayo pay, lomaslasoy kayo begew sin pangwanian yo en kadodogis din altar ya makan ay naidaton isdi. <sup>13</sup>Natangsit kayo ay manglaslasoy yan kanan yo en naoma kayo. Ay kanan yo aya en awatek din idaton yo ay naakew, napilay ya mansaksakit ay animal? <sup>14</sup>Madosa din maetek ay mangikari en idatona din kamayatan ay animal na ngem kadodogis di idatona olay mo waday mapteng ay bomaro ay karnero na. Tan nangatoak ay ari et patgen ya egyatan das sak-en sin am-in ay nasyon isnan daga.”

## 2

### *Din Pamagbagan Diyos Sin Papadi*

<sup>1</sup>Kanan Diyos ay Kangatoan ay Turay, “Siya na di ibilin ko en dakayo ay papadi. <sup>2</sup>Masapol ay dayawen yos sak-en babaen sin am-amagen yo. Mo adi kayon pomatpati ya baken napasnek di nemnem yo ay mangidaydayaw en sak-en, baosak dakayo ya din am-in ay awaten yo ay panbiyagan yo. Di katet-ewa na et enggay binaosak dana, tan baken kayon napasnek ay mantongpal sin bilin ko. <sup>3</sup>Dosaek to din poli yo ya pababainak dakayo sin sangoanan di kaipoipogaw. Di kaiarigana et pakpakak din ropa yo sin tain di animal ay idatdaton yo et kaman kayon maitapi sin tai ay maiwasit sin basuraan. <sup>4</sup>Et say pangammoan yo ay inbilin ko na en dakayo ta matoloy din intolag ko sin Levita. <sup>5</sup>Intolag ko ay idawtak daida si mayat ya ando ay biyag mo patgen ya egyatan das sak-en et siya din inamag da. <sup>6</sup>Say initdo da din kosto et inam-amag da din maikompas sin laydek. Nalinteg di ogali da ya ad-ado di tinolongan da ay mangisaldeng ay manbasol. <sup>7</sup>Lebbeng na ay itdon din papadi din kosto ay panangammo en sak-en ay Diyos. Daida di lebbeng na ay panpaitdoan di ipogaw sin linteg ko, tan daida din baak. <sup>8</sup>Ngem dakayo ay papadi yan naisian kayo sin kosto ay danan yan linablabsing yo din intolag ko en Levi. Ad-ado abe di binmasol begew sin init-itdo yo. <sup>9</sup>Gapo ta adi yon inon-onodan din laydek ta baken man-iiso di iyat yo sin ipogaw, panbalinek dakayo ay lawa sin pangilan di Israelita ta laslasoyen das dakayo.”

### *Din Baken Napodno Ay Ogalin Di Taga-Juda*

<sup>10</sup>Ay baken ayan es-esa di Ama tako yan sisya din Diyos ay namarsua en datako? Apay ngarud ay laslasoyen tako din intolag Diyos sin aap-o tako babaen sin panokogan tako sin kari tako si esa ya esa? <sup>11</sup>Dinokogan din taga-Juda din kari da en Diyos et palalo ay lawlawa di naamag ed Jerusalem ya sin intiro ay Israel. Inpakadodogis da din Timplon Diyos begew sin nangasawaan da sin babbabai ay mandaydayaw si sinan didiyos di odom ay ili. <sup>12</sup>Sapay koma ta dosaen Diyos di manbasol si kaman nina et maipakaan isnan ili tako ta maisian sin ipogaw ay man-idatdaton en Diyos ay Kangatoan ay Turay.

<sup>13</sup>Siya abe dana di odom ay am-amagen yo: Man-oga ya manpilalak kayo et enggay bassaen yo din altar Diyos si lowa yo, tan adi nan awaten din idatdaton yo. <sup>14</sup>Salodsoden yo di begew ay adi na awaten din daton yo. Say gapo et ammo na ay adi yo tinongpal din kari yo sin aas-awa yo olay mo nabayag ay kinadkadwa yo ya nansapata kayo en Diyos. <sup>15</sup>Pinarsuan Diyos sisya ay waday awak ya ab-abiik na yan di panggep na ay nangipan-es-esa en dakayo et ta mawadaan kayo si an-ak ay tet-ewa ay ipogaw Diyos. Isonga annadan yo ta adi yo liwliw-an din kari yo ya komakaman kayo ay napodno sin asawa yo.

<sup>16</sup> Kanan Diyos ay Kangatoan ay Mangituray sin Israelita, “Kaliliget ko di idang. Kaliliget ko din mamalpaligatan di lalaki sin asawa na begew sin pangisianana en sisya. Isonga siliban yo ta komakaman kayo ay napodno sin asawa yo.”

### *Din Ibaan Diyos Ay Mangon-ona Mo Sisya*

<sup>17</sup> Enggay naoma si Diyos sin kali yo. Salodsoden yo di gapo na, ngem say begew et din pangwanian yo en siged sin pangilan Diyos din am-in ay mangam-amag si lawa ya kanan yo en malaydan en daida. Siya abe sin pangwanian yo en “Into pay di kanan da en nalinteg ay Diyos.”

## 3

<sup>1</sup> Siya nay songbat Diyos ay Kangatoan ay Turay, “Awni et ibaak din mangisagana sin danek et bigla ay domatengak sin Timplok, sak-en ay Diyos ay an-anapen yo. Omalin to din baak ay sedsed-en yo ay mangipaammo sin itolag ko.” <sup>2</sup> Maga polos di makalasad sin omaliana, tan maiarig si apoy ya napigsa ay sabon ay manglinis. <sup>3</sup> Omali ay mangokom et linisana din Levita ay kaman din iyat ay manlinis si balitok ya palata babaen si apoy ta say nalinteg da ay man-idaton en Diyos. <sup>4</sup> Et mo siya di, malaydan kasin si Diyos sin daton di taga-Juda ya Jerusalem ay kaman ed idi. <sup>5</sup> Kanan Diyos ay Kangatoan ay Turay, “Omaliak to ay mangokom en dakayo et mantistigoak ay dagos ay mangipaneknek sin basbasol di mansip-ok ya man-gegey, manakikamalala, man-etek ay mantistigo, din mansosowitik si makilaglagbo, din mamalpaligat si nalasang, olila ya mangili, ya din am-in ay adi mangipateg en sak-en.”

### *Din Namaybay-an Da Sin Inkasinpo Ya Din Bindisyon Ay Inkarin Diyos*

<sup>6</sup> Kanan Diyos ay Kangatoan ay Turay, “Sak-en si Diyos ay adi manbalbaliw, isonga dakayo ay polin Jacob yan adi magolpi ay malitaw. <sup>7</sup> Manipod sin aap-o yo, dinokogan yo din bilbilin ko et adi yon tinongtongpal. Mantaoli kayon sak-en et taoliek dakayo. Ngem kanan yo, ‘Intoy amagen mi ta makataoli kamin sik-a?’

<sup>8</sup> “Isalodsod ko na ay manongbat: Ay kosto aya mo akewan di ipogaw si Diyos? Ngem nay ay ak-akewan yos sak-en. Salodsoden yo mo intoy inyat yo ay nangakew, ngem ibagak en dakayo ay din adi yon pangidawtan si inkasinpo ya daton yo. <sup>9</sup> Dakayo ay intiro ay nasyon di Israelita, nakeddangan kayo ay madosa tan ak-akewan yos sak-en. <sup>10</sup> Iey yo sin Timplo din am-in ay inkasinpon di apit yo ta omad-ado di makan isdi. Say iyat yo ay mamadas en sak-en ta maila yo di iyat ko ay mangilokat sin kaidoldolinan di kinabaknang ed langit ta ibokbok ko di ad-ado ay bindisyon en dakayo. <sup>11</sup> Adiak ipalobos ay kanen di bigis din mola yo yan ad-ado abey lames di obas yo. <sup>12</sup> Mo siya di, ibilang di am-in ay nasyon dakayo ay nagasat gapo sin bindisyon ay aw-awaten yo.”

### *Din Seg-ang Diyos Sin Mansilbi En Sisya*

<sup>13</sup> Kanan aben Diyos, “Palawlawaen yos sak-en asi yo pay kanan, ‘Ay sino pay di lawa ay kinali mi maipanggep en sik-a?’ <sup>14</sup> Din inbaga yo et: ‘Magay silbin di pansilbian takon Diyos. Sino pay di gon-gona tako ay mantongtongpal sin bilbilin Diyos ay Kangatoan ay Turay ya mangibabawi sin basbasol tako? <sup>15</sup> Di katet-ewa na, ed wani et naragsak ya mayat din biyag di natangsit ya mangam-amag si lawa. Padpadasen das Diyos, ngem maga met di lawa ya mapasamak en daida.’”

<sup>16</sup> Idi makdeng di, nanngangalat din mangipatpateg en Diyos yan dinngen Diyos din am-in ay inbagbaga da. Sin sangoanana, naisolat di libro ay naisolatan din ngadan di am-in ay mangipatpateg ya mandaydayaw en sisya. <sup>17</sup> Kanan Diyos ay Kangatoan ay Turay, “Sin agew ay pangokomak, ibilang kos daida ay kapatgan ay sanikwa et seg-angak daida ay kaman din iyat di esa ay ama sin anak ay mansilbi en sisya. <sup>18</sup> Et mo siya di, maila yo kasin di nailasinan di nalinteg sin managbasol ya din mansilbi sin baken mansilbi en Diyos.”

## 4

### *Din Agew Ay Pangokoman Diyos Sin Kaipoipogaw*

<sup>1</sup> Kanan Diyos ay Kangatoan ay Turay, “Ilaen yo tan dandani din kadosaan di am-in ay natangsit ya mangam-amag si lawa. Sin agew ay doy, kaman dan logam ay mapooan si mabidang ay apoy et maga polos di mabay-an. <sup>2</sup> Ngem dakayo pay ay mangipatpateg en sak-en, awni et domteng di kinalinteg ay kaman segit ay bomala ay mangagas en dakayo, et manlagto kayos ragsak yo ay kaman din iyat di kilaw ay baka ay naibolos. <sup>3</sup> Sin agew ay doy ay pangokomak, abaken yon to din mangam-amag si lawa et igatigatin yo ay kaman tapok.

<sup>4</sup> “Nemnemenen yo din init-itdon Moses ay baak ay siya din bilbilin ya linteg ay inbagak en sisya ed Horeb ta tongpalen din am-in ay Israelita. <sup>5</sup> Ngem mangon-ona ay ibaak si Elias asi domteng din agew ay doy ay kaeegyat. <sup>6</sup> Et pankakapyaena din aam-a sin aan-ak ta adiak omali ay manadael sin ili yo.”



## **Din Siged Ay Damag Ay Insolat San Mateo Maipanggep Sin Libro Ay Nay**

Din Siged ay Damag ay Insolat San Mateo et ipaammo na ay si Jesus din Messias ay dinotokan Diyos ay manturay ay mangisalakan sin Judio ya siya abe sin am-in ay ipogaw ay mamati en sisya. Di kaad-adoan ay nangisolatan Mateo et Judio, isonga dadlonan paneknekan ay di inkarin Diyos sin ipogaw na ay Judio sin Daan ay Tolag et natongpal da babaen en Jesus.

Ipailan din libro ay nay ay si Jesus din kangatoan ay man-it-itdo ay inbaan Diyos, isonga waday kalebbengana ay mangiolog sin linteg Diyos ya man-itdos maipanggep di panturayana. Di kaad-adoan ay init-itdo na ay naisolat isna et naiolnos da ay maibasar sin banbanag ay ibagbaga da. Siya dana di lima ay naolnosana. 1. Din pamagbagan Jesus sin kad-anas kadondontogan maipanggep si kabibiyag, obla, lebbengen ya gononan di maitapi sin panturayan Diyos (kapitolo 5-7). 2. Din intogon Jesus sin sinpo ya doway ay pasolot na sin nangibaaana en daida ay en mangaskasaba (kapitolo 10). 3. Din papangarig ay maipanggep sin panturayan Diyos (kapitolo 13). 4. Din initdon Jesus sin papasolot na maipanggep si ogali ya lebbengen da (kapitolo 18). 5. Din initdon Jesus maipanggep sin panpatinggaan di timpo ed wani ya din omalian di panturayan Diyos (kapitolo 24-25).

Ad-ado di daddad-at ay sin isna ay libro et anggoy di kad-ana ay kaman din namasyalan di nankalalaing ay mangibagas olog di talaw ed Betlehem, din nandan Pedro sin labaw di danom, din nangagasan Jesus sin doway ay nagodab, din nangaan da Jesus sin panbayad das bowis sin tepek di nigay, ya din papangarig maipanggep sin man-ob-obla sin kaobasan, din doway ay anak, din kasal di anak di ari, ya din sinpo ay babassang.

### **Din Linaona**

Din listaan di ap-apon Jesus ya din naianakana 1:1-2:23

Din nankaskasabaan Juan ay Mamonbonyag 3:1-12

Din nabonyagan Jesus ya din namadasan Satanas ay nanolisog en sisya 3:13-4:11

Din nan-it-itdoan Jesus ed Galilea 4:12-18:35

Din oblan Jesus manlogi ed Galilea enggana ed Jerusalem 19:1-20:34

Din naodi ay dominggon Jesus ya din nateyana 21:1-27:66

Din kasin natagoan Jesus ya din narpail-ilaana 28:1-20

### *Din Listaan Di Ap-apon Jesus (Luc. 3:23-28)*

<sup>1</sup> Siya na di listaan di ap-apon Jesu Cristo ay polin David ya polin aben Abraham. <sup>2</sup> Si Abraham et aman Isaac ay aman Jacob ay aman aben Juda ya din aag-i na. <sup>3</sup> Si Juda et aman da Perez en Zera, ya si Tamar di ina da. Si Perez et aman Hezron ay aman Ram. <sup>4</sup> Si Ram abe et aman Amminadab ay aman Nason ay aman Salmon. <sup>5</sup> Si Salmon et say aman Boaz, ya si Rahab di ina na. Si Boaz abe et aman Obed, ya si Ruth di ina na. Si Obed et sisya di aman Jesse, <sup>6</sup> et si Jesse di aman Ari David.

Si David et aman Solomon, ya din ina na et sigod ay asawan Urias. <sup>7</sup> Si Solomon et aman Rehoboam ay aman Abias ay aman aben Asa. <sup>8</sup> Si Asa abe et aman Jehosafat ay aman Jehoram ay aman Uzias. <sup>9</sup> Si Uzias et aman Jotam ay aman Ahaz ay aman Hezekias. <sup>10</sup> Si Hezekias abe et aman Manasses ay aman Amon ay aman Josias. <sup>11</sup> Et si Josias di aman Jeconias ya din aag-i na sin timpo ay napilit ay naiey di Judio ed Babilonia.



<sup>12</sup> Idi nakdeng ay naikaan di Judio sin ili da, naianak si Sealtiel ay si Jeconias di ama na. Si Sealtiel et aman Zerubbabel. <sup>13</sup> Si Zerubbabel abe et aman Abiud ay aman Eliakim ay aman Azor. <sup>14</sup> Si Azor et say aman Zadok ay aman Akim ay aman aben Eliud. <sup>15</sup> Si Eliud abe di aman Eleazar ay aman Mattan ay aman Jacob. <sup>16</sup> Si Jacob di aman Jose, et si Jose di asawan Maria ay inan Jesus ay makwani en Cristo.

<sup>17</sup> Din katontonan di kapototan Jesu Cristo et sinpo ya opat manlogi en Abraham enggana en David. Wada abe di sinpo ya opat ay kapototan manlogi en David enggana sin timpo ay napilit ay naiey di Judio ed Babilonia. Et wada abe kasin di sinpo ya opat ay kapototan manlogi sin naieyan das di enggana sin kaianakan din makwani en Cristo.

### *Din Naianakan Jesu Cristo (Luc. 2:1-7)*

<sup>18</sup> Siya na di kadad-atan di naianakan Jesu Cristo. Naitotolag si Maria ay ina na ay makiasawa en Jose, ngem sin daan dan man-asawa, naammoan ay nawad-an sisya babaen sin panakabalin di Ispirito Santo. <sup>19</sup> Managtongpal si Jose sin linteg Moses, ngem adi na aben layden ay maibabain si Maria, isonga ninemnem na ay isiana ay adi maammoan di kaipoipogaw.\* <sup>20</sup> Say nemnem na di, asi et nan-iitaw ay wada di anghel Apo Diyos ay nanpaila en sisya ay nangwani, “Jose ay polin David, adi ka madanagan ay mangibeey en Maria, tan din nawad-ana et babaen din panakabalin di Ispirito Santo. <sup>21</sup> Man-anak si lalaki, et ngadanam si Jesus, tan sisya di mangisalakan si ipogaw na sin basbasol da.”

<sup>22</sup> Naamag am-in dana ta say matongpal din inpaibagan Apo Diyos sin esa ay mamadto ay nangwani, <sup>23</sup> “Mawad-an di esa ay balasang ay magay nangiwgiwit en sisya, et man-anak si lalaki ay mangadanan si Immanuel,”† di olog na et “wadas Diyos en datako.”

<sup>24</sup> Idi binmangon si Jose, pinati na din inbagan di anghel, et inbeey na si Maria, <sup>25</sup> ngem adi na dinaddaag sin daan bomalaan di anak na. Idi pay binmala, nginadananas Jesus.

## 2

### *Din Nanpasyal Ed Betlehem Ay Napo Sin Belaen Di Agew*

<sup>1</sup> Naianak si Jesus ed Betlehem ay ilin di Judea sin kaarin Herod. Pag wada da di emey ed Jerusalem ay napo sin belaen di agew ay nankalalaing ay mangibagas olog di talaw.

<sup>2</sup> Idi dinmateng das di, pinoot da ay nangwani, “Into din naianak ay arin di Judio? Tan inila mi din binnelaan di talaw ay sinyal di naianakana, et inmali kami ay mandayaw en sisya.”

<sup>3</sup> Sin nanamagan Ari Herod sidi, peteg di egyat na ya siya abe sin am-in ay man-ili ed Jerusalem. <sup>4</sup> Isonga inpasinop na din papangolon di papadi ya din mamaestron di linteg, et pinoot na en daida mo into di maianakan di Messias. <sup>5</sup> “Ed Betlehem isnan nay ay probinsiya ay Judea,” kanan da ay sinombat. “Tan siya na di inpaisolat Diyos sin mamadto ed nabaon ay kanana,

<sup>6</sup> ‘Sik-a ay Betlehem sin dagan Juda, sik-a di kapatgan sin madaydayaw ay il-ili ay lak-am Juda, tan sik-a di kapoan di manturay ay mangipango ya mangay-ayowan si ipogaw ko ay Israelita.’ ”\*

<sup>7</sup> Pag paayag Herod din doy ay nankalalaing ay mangibagas olog di talaw ta say makikali da en sisya ay eng-enggay da, et inammoana en daida din kosto ay timpo ay binmalaan din talaw. <sup>8</sup> Pag nan ibaas daida ed Betlehem ay nangwani, “Emey kayos

\* **1:19** Din ogalin di Judio et mo waday naitotolag ay mangasawas balasang, enggay naibilang ay asawa na. Mo waday napasamak et ninemnem na ay adi na toloyen, masapol ay idawat na sin balasang di papil ay mangipanekek ay isianas sisya. Masapol abe ay waday doway ay tistigo. † **1:23** Isaias 7:14. \* **2:6** Mikias 5:2.

di, et esten yo ay manganap sin moyang ay sana. Mo datngan yo, mantaoli kayos na ta ibaga yo en sak-en ta say emeyak abe ay mandayaw en sisya.”

<sup>9-10</sup> Sin nanngedan da sin intogon di ari, nanlobwat da, et peteg di ragsak da, tan inila da kasin din mismo ay talaw ay inila da ay binmela ed idi. Inpangpango nas daida enggana ay dinmateng sin patag di beey ay kad-an di moyang, yan pag somaldeng. <sup>11</sup> Idi sinmawang da sin kad-an di beey ay sana, sinenggep da et inila da din moyang ya si Maria ay ina na. Nandokmog da ay nanyakog-ong ay mandayaw sin moyang, et pag dan bokatan din naigtoan di nangina ay isagot da, et indawtan das sisya si balitok, nabanglo ay insinso ay makwani en frankincense, ya mirra.

<sup>12</sup> Idi siya di, inpaaitaw Diyos daida, et intogona en daida ay adi da mantaoli en Herod, isonga natken di nandan na da ay sinmaa ed ili da.

### *Din Linmayawan Da Jose En Maria Ya Si Jesus Ed Egipto*

<sup>13</sup> Idi nadipos da, nanpaila di anghel Apo Diyos en Jose sin iitaw na yan kanana en sisya, “Ibangon mo, et ikoyog mo din moyang ya si ina na ta lomayaw kayo ed Egipto. Mantee kayos di enggana ay ibagak ay mantaoli kayo, tan din panggep Herod et ipaanap na din moyang ta ipapse na.”

<sup>14</sup> Siya et di, kabangon si Jose et kalobwat sin gawan di labi ay mangikoyog sin moyang ya si ina na ta emey da ed Egipto. <sup>15</sup> Et say nantetean da enggana sin nateyan Herod. Naamag na ta say matongpal din inpaibagan Apo Diyos sin mamadto ay kanana, “Awni et ayagak din anak ko ay komaan ed Egipto.”<sup>†</sup>

### *Din Nangipapsean Herod Sin Kamoyamoyang*

<sup>16</sup> Idi inammoan Herod ay sinikahan din nankalalaing ay mangibagas olog di talaw sisya, palaloy bonget na, et inbilina ay en peslen di soldado na din am-in ay lalaki ay mantawen si dowo ono kolang ed Betlehem ya sin nandinmang ay il-ili. Tan pinasal na ay say kosto ay kabayag di timpo manlogi sin binmalaan di talaw ay maibasar sin inammoana sin doy ay nankalalaing ay sangaili. <sup>17</sup> Isonga natongpal din inpaibagan Diyos sin mamadto ay si Jeremias ay kanana,

<sup>18</sup> “Madmadnge di palalo ay man-og-oga ay manladladingit ed Rama, tan og-ogaan Raquel din aan-ak na. Adi polos kaliwliwa, tan namaga da.”<sup>‡</sup>

### *Din Inmeyan Da Jose Ed Nazaret Ay Napo Ed Egipto*

<sup>19</sup> Idi natey si Herod, nanpaila di anghel Apo Diyos en Jose sin iitaw na sin kad-an da ed Egipto, <sup>20</sup> yan kanana, “Ibangon mo ta ikoyog mo din moyang ya si ina na ta mantaoli kayo sin ili yo ay Israel, tan enggay natey din mangwani en mamse sin moyang.” <sup>21</sup> Siya di et binmangon da Jose et nantaoli da ed Israel.

<sup>22</sup> Asi et dinngen Jose ay naiskat si Arkelaus ay anak Herod ay manturay ed Judea, isonga emegyat ay mantaoli. Gapo ta wada kasin di naitogon en sisya sin iitaw na, inmey da sin probinsiya ay Galilea, <sup>23</sup> et nakiili da ed Nazaret. Naamag na ta say matongpal din inpaibagan Diyos sin doy da ay mamadto ay kanana, “Awni et makwanis sisya en taga-Nazaret.”<sup>§</sup>

## 3

### *Din Nankaskasabaan Juan Ay Mamonbonyag (Mar. 1:1-8; Luc. 3:1-20; Jn. 1:19-28)*

<sup>†</sup> **2:15** Hosea 11:1. <sup>‡</sup> **2:18** Jeremias 31:15. Sin pannemnem Jeremias, Si Raquel di maibilang ay inan di am-in ay Judio, ya din aan-ak na et din polin di an-ak Israel ay naabak ya naibag-en ed Babilonia. Si Mateo pay et osalenas Raquel ay kaiarigan di iin-a ed Betlehem ay natey di aan-ak da. **§ 2:23** Din kali ay Nazaret et maga sin Daan ay Tolag, ngem sin timpon Jesus, kitkitooy ya malaslasoy ay ili ed Nazaret (Juan 1:46), isonga din layden Mateo ay kalien et ad-adoy mamadto si nangibaga ay laslasoyen di ipogaw si Jesus.

<sup>1</sup> Sin siya di ay timpo ay nantetean pay laeng da Jesus ed Nazaret, inmey si Juan ay Mamonyag sin lugar ed Judea ay magay omili, et nangaskasaba sin en nandengdenge. <sup>2</sup> Kanana, “Ibabawi yo din basbasol yo, tan dandani di panturayan Diyos.” <sup>3</sup> Si Juan di inbagbagan Isaias ay mamadto ay nangwani,

“Wada sin lugar ay magay omili di mangibogbogaw ay mangmangwani, ‘Isagana yo din danen di Apo ay omali ta say siged di danan ay pandanana.’ ”\*

<sup>4</sup> Din badon Juan et owat inabel ay book di kamel ya kopkop di animal di bilko na. Din kankanena abe et dodon ya danom di iyokan. <sup>5</sup> Em-emey en sisya di omili ed Jerusalem ya din man-ili sin am-in ay ili ed Judea ya sin nandinmang di ginawang ay Jordan.

<sup>6</sup> Inpodpodno dan basbasol da et pag bonyagan Juan si daida sin ginawang ay Jordan.

<sup>7</sup> Ngem sin nangilaana sin ad-ado ay Fariseo ya Sadduceo ay omal-ali ay manpabonyag koma, kanana en daida, “Ay peteg kayo kayman ay kaman nasikap ay eweg! Sino ngata di nangibaga en dakayo ay mailsot yo din panosaan Diyos en dakayo mo mabonyagan kayo? <sup>8</sup> Adi met mabalin, tan masapol ay amagen yo din mangipaila ay tet-ewa ay inbabawi yo din basbasol yo. <sup>9</sup> Adi yo aben kankanen en mailisi kayo tan si Abraham din apo yo, tan olay dana ay bato et mabalin met ay amagen Diyos si polin Abraham! <sup>10</sup> Din panosaan Diyos en dakayo et maiarig si wasay ay naibibiyad ay mamoyo sin kaiw, et am-in ay kaiw ay adi manlames si siged et mapoyo sin poona ta asi maitongo.”

<sup>11</sup> Pag nan itoloy ay nangwani, “Wada di nangatngato mo sak-en ay omonod. Et begew din nay kinangato na, adiak maikari ay olay manggen sin sapatos na.† Danom anggoy di ibonyag ko en dakayo ta maipaila ay inbabawi yo din basbasol yo, ngem mo sisya pay et bonyaganas dakayo si Ispirito Santo ya apoy. <sup>12</sup> Maiarig sisyas ipogaw ay nananggen si liga-o ay paneg-ap na sin nabayo ay pagey. Din lames na et ena idolin sin beey na, ngem din teg-ap pay et ipoo na sin apoy ay adi kaddad-ep.”

### *Din Nabonyagan Jesus*

*(Mar. 1:9-11; Luc. 3:21-22)*

<sup>13</sup> Sin timpo ay doy ay nanbonbonyagan Juan, napo si Jesus ed Galilea et inmey sin ginawang ay Jordan ay manpabonyag en Juan. <sup>14</sup> Sinigaan Juan ay nangwani, “Sak-en di masapol ay manpabonyag en sik-a. Apay nga omali ka ay manpabonyag en sak-en?”

<sup>15</sup> Ngem kanan Jesus ay sinombat, “Olay itay-on mo ed wani, tan bagay na ay tongpalen ta din am-in ay panggep Diyos.” Isonga pag bonyagan Juan sisya.

<sup>16</sup> Makdeng pay ay nabonyagan si Jesus, pag et komaan sin danom downan et mabokatan ed langit, et inila na din Ispirito Santo ay kaman kalapati ay bomabbaba enggana ay pinmatong en sisya. <sup>17</sup> Pag et wada di kali ay napod langit ay kanana, “Si naey di laydelaydek ay anak ko. Sisya di kakapnekak.”

## 4

### *Din Namadasan Satanas Ay Nanolisog En Jesus*

*(Mar. 1:12-13; Luc. 4:1-13)*

<sup>1</sup> Pag ipangon din Ispirito Santo si Jesus sin lugar ay magay omili ta say solisogen din Diablo. <sup>2</sup> Nantetees di si opatapolo ay agew ya labi ay adi polos nangnangan, et pag nan liknaen di dagaang na. <sup>3</sup> Asi et din manolisog et inmey sin kad-ana yan kanana, “Mo tet-ewa ay Anak Diyos sik-a, bilinem din batbato ay nay ta manbalin das makan.” <sup>4</sup> Ngem sinongbatan Jesus ay nangwani, “Din naisolat ay kalin Diyos et kanana, ‘Baken makan et anggoy di katagoan di ipogaw, mo adi et masapol da abe di am-in ay ibagbagan Diyos.’ ”\*

\* **3:3** Isaias 40:3. † **3:11** Din esa ay obla ay naidawat sin kababaan ay baa ono bag-en ed idi et iali na din sapatos di among na mo waday emeyana ya kaanena abe mo somaa et senggep sin beey. Isonga din layden Juan ay kalien et adi na ibilang din awak na ay maikari ay mansilbi ay olay owat bag-en en Jesus. \* **4:4** Deuteronomio 8:3.

<sup>5</sup> Pag ipangon din Diablo sisya sin nasantoan ay siyodad, et inpapika na sin kakayan-gan ay partin di Timplo. <sup>6</sup> Asi na pag kanan, “Mo tet-ewa ay Anak Diyos sik-a, mantekgas ka kod, tan kanan din naisolat ay kalin Diyos, ‘Bilinen Diyos din aanghel na ta ayowanan daka. Aklopen das sik-a ta say adi maidosnog sikim sin bato.’ ”†

<sup>7</sup> “Aw kayman,” kanan Jesus ay sinombat, “ngem din naisolat ay kalin Diyos et kanana abe en, ‘Adi yo padpadasen si Diyos ay Apo yo.’ ”‡

<sup>8</sup> Idi nakdeng di, pag iturong din Diablo sin nakayakayang ay dontog et inpaila na en sisya din am-in ay nasyon isnan lobong ya din kinabaknang da. <sup>9</sup> Kanan din Diablo, “Idawat ko am-in dana en sik-a mo mandokmog ka ay mandayaw en sak-en.”

<sup>10</sup> Ngem sinombat si Jesus ay nangwani, “Komaan ka et ay Satanas! Tan din naisolat ay kalin Diyos et kanana, ‘Magay odom si dayawen yo ya pansilbian yo mo adi anggoy si Diyos ay Apo yo.’ ”§

<sup>11</sup> Pag komaan din Diablo, et dinmateng di aanghel ay mamadang en Jesus.

### *Din Nanlogian Jesus Ay Nan-itdo*

*(Mar. 1:14-15; Luc. 4:14-15)*

<sup>12</sup> Idi dinngen Jesus ay naibalod si Juan, nantaoli ed Galilea. <sup>13</sup> Ngem adi nakiili ed Nazaret mo adi et nantee ed Capernaum ay esa ay ili sin benget di annawa ay lebeng ay Galilea sin sakop di dagan Zebulun ya Naftali. <sup>14</sup> Naamag na ta say matongpal din inpaibagan Diyos en Isaias ay mamadto ay kanana,

<sup>15</sup> “Din dagan da Zebulun en Naftali et wada sin benget di annawa ay lebeng ya sin demang di ginawang ay Jordan ya enggana sin sakop di Galilea ay kanan da en ilin di Gentil. <sup>16</sup> Din ipogaw isdi et kaman dan mantetee sin mabolinget, tan kaman nalilibooan din ili da si pese. Ngem awni et ilaen da di somisili ay silaw, tan manpaila sin kad-an da di maninggaw si nemnem da.”\*

<sup>17</sup> Manlogi sin timpo ay doy, inlogin Jesus ay mangaskasaba ay mangmangwani, “Ibabawi yo din basbasol yo, tan dandani di panturayan Diyos.”

### *Din Nangayagan Jesus Sin Damo Ay Papasolot Na*

*(Mar. 1:16-20; Luc. 5:1-11)*

<sup>18</sup> Sin namingsan ay mandad-an si Jesus sin benget di annawa ay lebeng ay Galilea, inila na di sin-iyogtan ay manabtabokol, tan say obla da. Daidas da Simon ay nabdayan si Pedro ya si Andrew. <sup>19</sup> Kanana en daida, “Enggana ed wani, manabtabokol kayos nigay. Manbalin kayo et si pasolot ko† ta itdoak dakayo ay mangawis si ipogaw.”‡

<sup>20</sup> Kaipayag da sin tabokol da yan nakiey da en sisya.

<sup>21</sup> Mandad-an da pay sin benget di lebeng, inilan Jesus di doway ay sin-agi ay da Santiago en Juan ya din ama da ay si Zebedeo. Nanlologan da sin bangka da ay mangisagsagana sin tabokol da. Inayagan Jesus din sin-iyogtan ay sana, <sup>22</sup> et kataynan da sin bangka ya en ama da, et nakiey da abe en Jesus.

### *Din Nan-it-itdoan Ya Nangaskasabaan Jesus Ya Din Nangag-agasana Sin Mansaksakit*

*(Luc. 6:17-19)*

<sup>23</sup> Nanliklied si Jesus sin intiro ay probinsiya ay Galilea. Nan-it-itdo sin kasinasi-nagoga ay nangikaskasaba sin siged ay damag ay maipanggep sin panturayan Diyos, ya inag-agasana abe di mansaksakit si am-in ay kalasin di sakit ya ligat di awak da.

<sup>24</sup> Isonga nandindinamag din inam-amag Jesus enggana sin intiro ay sakop di Syria, et in-ey da en sisya din am-in ay mansaksakit ya manligligat ay kaman din kinapet di anito, din mankedas ya din paralitiko. Et inagasanan daida am-in. <sup>25</sup> Isonga ad-adoy ipogaw

† 4:6 Salmo 91:11-12. ‡ 4:7 Deuteronomio 6:16. § 4:10 Deuteronomio 6:13. \* 4:16 Isaias 9:1-2. † 4:19 Din kanana sin Griego et: Omonod kayo ... Di laydena ay kalien et makiey da en Jesus ay pasolot na. ‡ 4:19 Din kanana sin Griego et: ... ta itdoak dakayo ay manabokol si ipogaw.

ay inmonod en sisya ay napo ed Galilea, din Sinpo ay Siyodad, Jerusalem ya odom ay il-ili ed Judea, ya sin demang di ginawang ay Jordan.

## 5

### *Din Pamagbagan Jesus Sin Kad-anas Kabilbiligan*

<sup>1</sup> Sin nangilaan Jesus sin ad-ado ay ipogaw, nantikid sin kabilbiligan\* et tinmokdo. Idi nasinop din papasolot na sin kad-ana, <sup>2</sup> inlogi na ay nangitdo en daida yan kanana,

### *Din Nagasat Ay Ipogaw*

<sup>3</sup> “Nagasat di ipogaw ay mangammo ay nabibiteg das kabaelan sin pangiilaan Diyos, tan daida di naitatapi sin panturayana.

<sup>4</sup> “Nagasat di ipogaw ay manladladingit begew si basol, tan liwliwaen Diyos daida.

<sup>5</sup> “Nagasat di naanos ay ipogaw ay mangibabas nemnem da, tan daida di manawid sin daga.

<sup>6</sup> “Nagasat di ipogaw ay peteg ay laydelayden da ay mangamag sin layden Diyos, tan mapnek da.

<sup>7</sup> “Nagasat di ipogaw ay managseg-ang, tan seg-angan aben Diyos daida.

<sup>8</sup> “Nagasat di ipogaw ay naimomongsan di nalinis ay nemnem da sin layden Diyos, tan daida di mangila en sisya.

<sup>9</sup> “Nagasat di ipogaw ay mangikapy si iib-a da, tan daida di maibilang ay an-ak Diyos.

<sup>10</sup> “Nagasat di ipogaw ay mapalpaligat begew sin kinalinteg da, tan daida di naitatapi sin panturayan Diyos.

<sup>11</sup> “Nagasat kayo mo pabainan di ipogaw si dakayo ya paligaten das dakayo ya manetek da ay mangipalawlaw en dakayo begew en sak-en. <sup>12</sup> Peteg koma ay manragsak kayo, tan palalo ay dakdake di gon-gona ay naidodolin para en dakayo ed langit. Tan din iyat di ipogaw en dakayo et siya met laeng din naiyaat en daida ay mamadto ed nabaon.”

### *Maipanggep Si Asin Ya Silaw*

(*Mar. 9:50; Luc. 14:34-35; Mar. 4:21-25; Luc. 8:16-18*)

<sup>13</sup> Intoloy Jesus ay nan-itdo et kanana, “Dakayo di maiarig si asin para sin kaipoipogaw isnan daga. Ngem mo omamsit di asin, adi met mabalin ay pataolien din pait na. Magay silbi na, isonga maiwasit et gatinan di ipogaw.

<sup>14</sup> “Maiarig kayo abe si silaw ay maninggaw si nemnem di ipogaw isnan daga. Nemnemen yo kadi ay mo waday ili sin toktok di dontog, dadlon maila. <sup>15</sup> Maga abe di maneteng si silaw ta asi na sakoboan si palanggana, mo adi et ipatang na ta din am-in ay bemeey et ilaen dan am-amagen da. <sup>16</sup> Siya abe ay masapol ay mansilaw kayo sin pangiilaan di ipogaw ta say ilaen da din siged ay ogali yo et dayawen da si Ama yo ed langit.”

### *Maipanggep Sin Linteg Moses*

<sup>17</sup> Pag kanan Jesus, “Adi yo nemnemnemen ay inmaliak ay mangwaswas sin linteg Moses ya din insolat di mamadto, mo adi et inmaliak ta say tongpalek din inbagbaga da.† <sup>18</sup> Tet-ewa nan ibagak en dakayo ay engganay mankaiiwed din daga ya langit, maga polos di linaon di linteg Diyos ay mamaga, olay din kaaptikan ay kali ono esesa ay toldok, engganas matongpal din am-in ay panggep Diyos. <sup>19</sup> Mo wada ngarud di manglabsing si olay din kayap-ewan ay bilin Diyos ya itdo nas iib-a na ay olay adi da patpatien, maibilang ay kababaan sin panturayan Diyos. Ngem din manongtongpal ya mangit-itdo sin bilbilin ay nay et maibilang ay nangato sin panturayan Diyos. <sup>20</sup> Ibagak

\* **5:1** Din olog na sin Griego et baken esa ay nakayang ay dontog mo adi et din kadondontogan ono kabilbiligan. Ad-adoy bilig sin diposan di agew mo din lebung ay Galilea. † **5:17** Dodowa pay di olog nina sin Griego: 1) ... inmaliak ta say ipaammok din kosto ay layden da ay kalien; 2) ... inmaliak ta say komplitoek din inbagbaga da.



ngarud en dakayo ay adi kabalin ay maitapi kayo sin panturayan Diyos mo baken kayon nalinlinteg mo din Fafariseo ya mamaestron di linteg.”

### *Maipanggep Si Bonget*

<sup>21</sup> Intoloy Jesus ay nangwani, “Dindinnye yo din naibilin sin aap-o tako ed nabaon ay adi da manpese, et mo pomse das biyag, maikom ya makeddangan da ay madosa. <sup>22</sup> Ngem ibagak en dakayo ay olay din mangibonget si gait na et maikom ya makeddangan ay madosa. Din ipogaw abe ay mamabbain si gait na ay mangwani en ‘Magay silsilim’ et maidarum sin papangolo. Et din ipogaw abe ay mangwani sin gait na en, ‘Naong-ong ka’ et em-emey sin apoy ed inferno. <sup>23</sup> Isonga mo waday idatdaton mo en Diyos sin Timplo, asi ka et nemnemen ay waday inamag mo ay panigaan di gait mo en sik-a, <sup>24</sup> masapol ay taynam din daton mo sin sangoanan di altar ta en ka makikapya omona sin gait mo, asi ka pay mantaoli ay mangidaton sin sagot mo en Diyos.

<sup>25</sup> “Mo wada abe di mangiey en sik-a ed korti ta say idarum daka begew si otang mo, dalasem ay makikapya en sisya mo wada kayo pay laeng sin danan. Tan mo maga pay, ipolang daka sin howis, et pag ipolang din howis sik-a sin polis ta say maibalod ka. <sup>26</sup> Tet-ewa nan ibagak en sik-a ay adi ka makabala sin balodan enggana ay bayadam din am-in ay otang mo.”

### *Maipanggep Si Makibabai*

<sup>27</sup> “Dindinnye yo abe din naibilin en daida ed nabaon ay adi da makibabbabai. <sup>28</sup> Ngem ibagak en dakayo ay din mangila si babai ta aklongana et enggay nakibabai en sisya sin nemnem na. <sup>29</sup> Isonga mo din makannawan ay matam di bomasolam, okitem ta iwasit mo. Tan agpos mo makolongan di awak mo si esa ay parti na mo din magay kolang di awak mo yan maitpig kad inferno. <sup>30</sup> Mo pay din makannawan ay takkay mo di bomasolam, potoam ta iwasit mo. Tan agpos mo makolongan di awak mo si esa ay parti na mo din magay kolang di awak mo yan maitpig kad inferno.”

### *Maipanggep Si Mangisian Si Asawa Na*

*(Mar. 10:11-12; Luc. 16:18)*

<sup>31</sup> “Naibilbilin abe ed idi ay mo waday lalaki ay mangisian si asawa na, masapol ay idawtanas kasolatan ay mangipaneknek ay nansian da. <sup>32</sup> Ngem ibagak en dakayo ay din lalaki ay mangisian si asawa na malaksig mo nakilalakis sisya et panbalinena si makilalaki mo makiasawa kasin. Din lalaki abe ay mangasawa si babai ay naiidang et makabasol met laeng si kamalala.”

### *Maipanggep Si Mansapata*

*(Sant. 5:12)*

<sup>33</sup> Intoloy Jesus ay nangwani, “Dindinnye yo abe din naibilin sin ap-apo tako ed nabaon ay masapol ay adi da lablabsingen di insapata da, mo adi et tongpalen da di insapata da en Apo Diyos. <sup>34</sup> Ngem ibagak en dakayo ay adi kayo polos mansapsapata. Adi yo kanan, ‘Ilam ay langit,’ tan say pantokdoan Diyos ay manturay. <sup>35</sup> Adi yo aben kanan, ‘Ilam ay daga,’ tan siya na di pan-andayan di siki na, ono ‘Ilam ay Jerusalem,’ tan siya di din ilin di nangato ay Ari. <sup>36</sup> Olay din toktok yo et adi yo isapsapata, tan adi yo kabaelan ay mangipakilat ono mangipangitit si olay esay book. <sup>37</sup> Agpos et mo kanan yo anggoy en ‘Aw’ ono ‘Aga’ ay adi yo taptapian si sapata. Tan olay sino ay itaptapi yo ay sapata et mapo en Satanas.”

### *Maipanggep Si Man-ibaes*

*(Luc. 6:27-36)*

<sup>38</sup> “Dindinnye yo abe din naibilin ed idi ay kanana, ‘Mata di bayad di mata, bab-a si bab-a.’<sup>‡</sup> <sup>39</sup> Ngem ibagak en dakayo ay adi yo ibabbaes di lawa ay amagen di gait yo en

<sup>‡</sup> 5:38 Deuteronomio 19:21.



dakayo, mo adi et kaman nina di amagen yo. Mo waday manampik sin kannawan ay tamil mo, patampik mo abe din esa. <sup>40</sup> Mo wada abey mangidarum en sik-a ta alaena din badom, itay-on mo ay alaena abe din tak-ep di badom. <sup>41</sup> Et mo waday mangipapilit en sik-a ay aligidam din egen si esay kilometro, olay aligidam si dow. <sup>42</sup> Mo waday mankedaw en sik-a, idawtam, ya mo wada abey manbolod, pabolodam.”

### *Din Layad Tako Sin Kaibaw Tako*

*(Luc. 6:27-28,32-36)*

<sup>43</sup> “Dindinnye yo din naibilin ed idi ay kanana, ‘Laydelaydem din gagayyem mo, ngem kaliget mo din kaibaw mo.’ <sup>44</sup> Ngem ibagak en dakayo ay laydelayden yo koma din kaibaw yo ya ikararagan yo din mamaligat en dakayo <sup>45</sup> ta say maibilang kayo ay an-ak Ama tako ed langit. Tan mo sisya et ipalpalobos na din agew ay pinarsua na ay maneysey-ang sin siged ay ipogaw ya siya abe sin lawa. Ibaa na abe di odan ta maodanan dagan di nalinteg ay ipogaw ya siya abe sin baken nalinteg. <sup>46</sup> Mo anggoy din manglaylayad en dakayo si laylayden yo, ay magon-gonaan kayo aya? Olay din malaslasoy ay mansingsingil si bowis et kabaelan da di. <sup>47</sup> Et mo anggoy din gagayyem yo si ngalngalaten yo, sino aya di nanlasinan yo? Olay din adi nangaammo en Diyos et am-amagen da di. <sup>48</sup> Masapol ngarud ay magay pankolkolongan yo ay kaman si Ama tako ed langit ay magay pankolkolangana.”

## 6

### *Din Iyat Tako Ay Bomadang Si Makasapol*

<sup>1</sup> Intoloy Jesus ay nan-itdo et kanana, “Ilaen yo ta mo man-amag kayos siged, adi yo amagen sin pangilaan di ipogaw ta say dayawen das dakayo. Tan mo say amagen yo di, magay gon-gona si idawat Ama tako ed langit en dakayo.

<sup>2</sup> “Isonga mo man-idawat kayos badang sin nabibiteg, adi yo ipappaila ya ingalngalawngaw ay kaman din am-amagen di agin sisiged sin simbaan ya kalsada ta say dayawen di ipogaw si daida. Tet-ewa nan ibagak en dakayo: enggay ginon-od da din gon-gona da. <sup>3</sup> Mo wada ngarud di idawat yos nabiteg, adi yo ipaammo si olay din kapatgan ay gayyem yo <sup>4</sup> ta say magay mangammo. Et si Ama tako ay mangil-ila sin am-amagen yo ay adi maammoan di mangon-gona en dakayo.”

### *Maipanggep Si Kararag*

*(Luc. 11:1-13)*

<sup>5</sup> Kanan aben Jesus, “Mo mankararag kayo, adi yo koma tadtadonen di agin sisiged, tan laylayden da ay en pomipika ay mankararag sin simbaan ya sin solyon di kalsada ta say ilaen di kaipoipogaw si daida. Tet-ewa nan ibagak en dakayo: enggay ginon-od da din gon-gona da. <sup>6</sup> Mo mankararag kayo ngarud, senggep kayos kowarto ay ang-anggoy yo et in-eb yo, asi kayo mankararag en Ama tako ay adi kaila. Et si Ama tako ay mangil-ila sin am-amagen yo ay ang-anggoy yo et gon-gonaanas dakayo.

<sup>7</sup> “Sin pankarkararagan yo, adi yo paandoandoen ay adi mangnemnemnem sin olog di ibagbaga yo ay kaman din ipogaw ay adi nangaammo en Diyos. Say am-amagen da di, tan kanan da en madnge di karkararag da begew sin ad-ado ay kali da. <sup>8</sup> Adi yo tadtadonen daida, tan si Ama tako et enggay ammo na din kasapolan yo sin adi yo pay laeng kindaw en sisya. <sup>9</sup> Kaman nina ngarud di iyat yo ay mankararag:

‘Ama mi ay wada ed langit, madaydayaw koma din nasantoan ay ngadan mo.

<sup>10</sup> Domteng koma din panturayam isnan daga ta say matongpal din laydem isnan daga ay kaman ed langit. <sup>11</sup> Iyaam dakami ed wani sin kanen ay kasapolan mi.

<sup>12</sup> Pakawanem din basbasol mi, tan pinakawan mi abe din binmasol en dakami.

<sup>13</sup> Bomadang ka abe ta adi kami masolsolisog mo adi et mailisi kami si lawa.’\*

\* **6:13** Di esa abe ay kaiologan nina sin Griego et: ... mailisi kami sin Diablo.

<sup>14</sup>“Masapol ay pakawanen yo din binmasol en dakayo, tan mo pakawanen yos daida, pakawanen aben Ama tako ed langit si dakayo. <sup>15</sup>Ngem mo adi yo pakawanen daida, adi aben pakawanen Ama tako ed langit din basbasol yo.”

### *Maipanggep Si Mangitpe Si Dagaang Na*

<sup>16</sup>Pag itoloy Jesus ay nangwani, “Sin pangitpean yo si dagaang yo, adi yo ipappaila ay masmasadot kayo ay kaman din agin sisiged. Tan layden da ay ammoan di kaipoipogaw ay it-itpe day dagaang da, isonga adi da mandaddaop ya mansagsagaysay. Tet-ewa nan ibagak en dakayo: enggay ginon-od da din gon-gona da. <sup>17</sup>Mo ngarud man-itpe kayos dagaang yo, mandaop ya mansagaysay kayo <sup>18</sup>ta say magay mangammo ay it-itpe yo di dagaang yo mo adi anggoy si Ama tako ay adi kaila. Tan il-ilaena din am-amagen yo ay adi yo ipaam-ammos odom, et sisya di mangon-gona en dakayo.”

### *Din Kinabaknang Ed Langit*

*(Luc. 12:32-34)*

<sup>19</sup>“Adi kayo man-idoldolin si kinabaknang yo isnan daga, tan din bonbonag yos na et nalaka ay dadaelen di lakey ya lati,<sup>†</sup> ya wada abey mangakew ay manaltal si telbek ta senggep ya akewen da. <sup>20</sup>Man-idolin kayo ngarud si kinabaknang yo ed langit ay maga polos di lakey ya lati ay manadael, ya maga abe di senggep ay mangakew. <sup>21</sup>Tan din kad-an di kinabaknang yo et siya abe di kad-an di nemnem yo.

### *Din Matan Di Ipogaw*

*(Luc. 11:34-36)*

<sup>22</sup>“Din mata et kaman silaw di ipogaw. Isonga mo siged di pangilam, kaman dadlon nasilawan di nemnem mo. <sup>23</sup>Ngem mo lawa di pangilam, kaman palalo ay mabolinget di nemnem mo. Mo kanam ngarud en nasilawan nemnem mo ngem kambaw et mabolinget, adi pay peteg ay mabolinget!”

### *Din Pangay-ayowanen Diyos En Daida Ay Mantalek En Sisya*

*(Luc. 16:13; 12:22-31)*

<sup>24</sup>“Adi mabalin ay madodowa di among di bag-en, tan laylaydena din esa yan sigaana din esa. Patgena abe din esa dowanen laslasoyen din esa. Isonga adi mabalin ay pandesanan yo din pansilbian yo en Diyos ya din pilak.

<sup>25</sup>“Siya na di begew ay ibagak en dakayo, adi kayo madandanagan si makan, mainom ya maibado ay kasapolan yo sin biyag ay nay. Tan addawi ay nabanbanol din biyag yo mo din makan, ya nabanbanol met abe din awak yo mo din bado. <sup>26</sup>Nemnemen yo din titit ay mantaytayaw ed kayang. Adi da man-esek ya man-ani, maga abe di agamang da si pangidoldolinan das kanen da, ngem laton ay adi da madagdagaangan, tan idawdawtan Ama tako ed langit si kanen da. Addawi met ay nabanbanol kayo mo din titit, ay baken siya? <sup>27</sup>Di esa pay, olay mo kankanayon ay mandandanag kayo, ay mabalin ay paandoen yo di biyag yo si olay esa ay oras?

<sup>28</sup>“Apay nga madandanagan kayo abe si ibado yo? Ilaen yo din iyat di sabsabong ay madakdake sin kadondontogan. Adi da man-obla ya man-abel si bado da, <sup>29</sup>ngem kanak en dakayo en olay si Ari Solomon ay palalo di kinabaknang na<sup>‡</sup> et magay bado na ay kaman din kinapintas di esa sin nay da ay sabsabong. <sup>30</sup>Mo kaman nidi din kinapintas ay idawdawwat Diyos sin nabeas ay wada ed wani ya mapooan si bigat, ay baken sigsigurado ngata ay ammo na ay mangidawat si bado yo? Apay ngin ngarud ay at-atik et anggoy di talek yo? <sup>31</sup>Isonga adi kayo madandanagan ay nangwani, ‘Into ngin di ia takos kanen ya bado tako?’ <sup>32</sup>Tan say gangamgamen di ipogaw ay adi nangammo en Diyos. Ngem mo si dakayo pay et ammon din Ama yo ed langit ay masapol yo am-in

<sup>†</sup> 6:19 Sin Griego, ad-adoy kaiosalan di kali ay lati. Di laydena ay kalien, kompormi ay mangan ya manadael ay kaman lati, otot, taki ya bokbok. <sup>‡</sup> 6:29 1 Aari 10:4-7.

dana. <sup>33</sup> Isonga imongsan yo koma di nemnem yo sin panturayan Diyos ya din nalinteg ay kabibiyag ay inbilina, et idawat na abe am-in dana en dakayo. <sup>34</sup> Isonga adi kayo madandanagan si ligat ay lak-amen yo ngin si bigat. Awni ta si bigat, asi yo sangoen di ligat ay domateng sin agew ay doy. Tan kosto din ligat ay laklak-amen tako si esa ya esa ay agew. Olay adi tako taptapian.”

## 7

### *Din Adi Tako Panpabasbasolan Si Ib-a Tako (Luc. 6:37-42)*

<sup>1</sup> Intoloy Jesus ay nan-itdo ay nangwani, “Adi yo panbalbalinen din awak yos mangokom si gait yo ta adi aben okomen ya keddengan Diyos dakayo. <sup>2</sup> Tan din lokod ay pangokom yo si gait yo et siya abe din lokod ay osalen Diyos ay mangokom en dakayo. <sup>3</sup> Apay nga delawem din kitkittoy ay mokat sin matan di ib-am, yan adim madlaw din dakdake ay mokat sin matam? <sup>4</sup> Apay nga ibagam sin ib-am, ‘Pangaasim kod ta ponasak san mokat mo,’ dowan pay wada di dakdake ay mokat mo abe? <sup>5</sup> Sik-a ay agin sisiged, ponasam on-ona din dakdake ay mokat mo ta say makaila ka ay kosto, asi ka pay mabalin ay ponasan din mokat di ib-am.”

<sup>6</sup> Pag kanan Jesus, “Adi yo ipapati ay mangitdo sin nasantoan ay kalin Diyos si ipogaw ay manglaslasoy ya manigaan ay mandenge, tan maiarig das aso ya bisaang. Tan olay mo nangina di idawat mos maangat ay aso, katen daka pay dedan. Et mo perlas di itep-am sin sangoanan di bisaang, owat dan gatigatinan.”

### *Din Pankedkedawan Tako En Diyos (Luc. 11:9-13)*

<sup>7</sup> Kanan aben Jesus, “Kanayon koma ay mankedkedaw kayo en Diyos, et idawat na en dakayo din kedkedawen yo. Itoltoloy yo abe ay man-an-anap et datngen yo din an-anapen yo. Iapati yo koma abe ay mantogtog et mabokatan pantew ta senggep kayo. <sup>8</sup> Tan olay sino di mankedaw en Diyos et maidawtan, ya olay sino di man-anap et datngena din an-anapena. Olay sino abe di mantogtog et mabokatan pantew para en sisya. <sup>9</sup> Tan ilan yo, dakayo ay aam-a, mo mankedaw di anak yo si tinapay, ay idawtan yo aya si bato? <sup>10</sup> Ono mo mankedaw si piskaw, ay idawtan yo aya si eweg? <sup>11</sup> Dakayo ngarud ay lawa, mo ammo yo ay idawtan di anak yo si siged, adi namnamed pay ay idawat Ama tako ed langit di siged en daida ay mankedaw.

<sup>12</sup> “Isonga amagen yo sin iib-a yo din layden yo ay amagen da en dakayo, tan siya na di kasinopan di linteg Moses ya din insolsolat di mamadto.”

### *Din Nalipit Ay Segpan (Luc. 13:24)*

<sup>13</sup> “Senggep kayo sin nalipit ay segpan, tan annawa di segpan ya mapteng di danan ay emey ed inferno, et ad-ado di senggep ya mandad-an sidi. <sup>14</sup> Ngem nalipit di segpan ya ad-adoy ligat sin danan ay emey sin biyag ay iwed patingga na, et at-atik di manteng sin danan ay nay.”

### *Din Kaiw Ya Din Lames Na (Luc. 6:43-45)*

<sup>15</sup> “Siliban yo di makaetek ay mamadto ay omali sin kad-an yo, tan naanos di kailaan da ay kaman karnero, ngem din tet-ewa ay ogali da et kaman maangat ay aso. <sup>16</sup> Din pangilasinan yo en daida et din am-amagen da. Tan adi met dedan pogpogen di obas sin ewey ono pogasen di igos sin kawayan. <sup>17</sup> Din siged ay kaiw et siged di lames na, ngem din lawa ay kaiw et lawa abe di lames na. <sup>18</sup> Tan adi mabalin ay manlames di

sigid ay kaiw si lawa, ya adi aben mabalin ay manlames di lawa ay kaiw si siged. <sup>19</sup> Am-in ay kaiw ay lawa di lames na et mapoyo sin poona ta asi maitongo. <sup>20</sup> Iso ngarud ay mailasinan yo di makaetek ay mamadto begew sin am-amagen da.”

### *Din Adi Maitapi Sin Panturayan Diyos*

<sup>21</sup> “Din maitapi sin panturayan Diyos ed langit et baken am-in di mangwani en ‘Apo, Apo,’ mo adi et anggoy din mangam-amag sin layden Amak ed langit. <sup>22</sup> Mo domateng din agew ay pangokoman Diyos sin kaipoipogaw, ad-ado di mangwani en sak-en, ‘Apo, Apo, nanpadpadto kami ay panakaawak mo, inos-osal mi abe din ngadan mo ay mangipakaan si aanito ya mangamag si ad-ado ay milagro!’ <sup>23</sup> Ngem asiak ipodno en daida, ‘Adiak polos am-ammo si dakayo. Komaan kayos na, dakayo ay mangam-amag si lawa!’ ”

### *Din Dowa Ay Nangisaad Si Beey (Luc. 6:46-49)*

<sup>24</sup> “Am-in ay mannge ya mamati sin ibagbagak et maiarig si nalaing ay ipogaw ay nangisaad sin beey na sin bato. <sup>25</sup> Pag mandeges et inmad-ado din danom sin ginawang. Napigsa abe din dagem ay nanalapos sin beey, ngem laton ay adi natokang, tan din fondasyona et naisaad sin bato. <sup>26</sup> Ngem din ipogaw ay nandengdenge sin kankanak yan adi na patpatien et maiarig si naong-ong ay ipogaw ay nangisaad sin beey na sin darat. <sup>27</sup> Pag mandeges et inmad-ado din danom sin ginawang. Napigsa abe din dagem ay nanalapos sin beey. Natokang et dadlon nabakas.”

<sup>28</sup> Idi nakdeng ay initdon Jesus am-in dana sin nasisinop ay ipogaw, nasdaaw da sin inyat na ay nan-itdo, <sup>29</sup> tan sin nan-it-itdoana, maila da ay waday turay na, ay baken say in-inyat di mamaestron di linteg.

## 8

### *Din Nangagasan Jesus Sin Mansakit Si Kaeegyat Ay Sakit Di Kodil (Mar. 1:40-45; Luc. 5:12-16)*

<sup>1</sup> Idi binmallalong si Jesus sin kadondontogan, ad-ado di ipogaw ay nangon-onod en sisya. <sup>2</sup> Pag et somag-en di lalaki ay mansakit si kaeegyat ay sakit di kodil, et nandokmog sin sangoanan Jesus ay nangwani, “Apo, ammok ay kabaalam ay mangaan sin sakit ko mo laydem.”

<sup>3</sup> Inoyad Jesus din takkay na ta ikapay na sin lalaki ay sana. Pag nan kanan, “Laydek, madalosan ka.” Et nakaan ay dagos din sakit na. <sup>4</sup> Asi ibilin Jesus en sisya, “Adi ka idaddad-at na si olay sino ay ipogaw mo adi et emey ka ay en manpaila sin padi ta ilaena ay nakaan sakit mo. Asi ka idawat en sisya din inbilin Moses ay idaton yo en Diyos ta say pangammoan din kaipoipogaw ay tet-ewa ay sinmigid ka.”\*

### *Din Nangagasan Jesus Sin Baan Di Kapitan (Luc. 7:1-10)*

<sup>5</sup> Sin sinmawangan Jesus ed Capernaum, wada di kapitan di soldado ay taga-Roma ay en nangabat en sisya. Nanpakpakaasi ay nangwani, <sup>6</sup> “Apo, wada di baik ay binmabaktad ed beebey. Adi makagido ya peteg di ligat na.”

<sup>7</sup> “En ta ngarud ta kaanek sakit na,” kanan Jesus.

<sup>8</sup> Ngem kanan et din kapitan, “Olay adi ka omali, Apo, tan adiak maikari ay senggep kas beey ko. Olay ibilin mo et anggoy, tan omanay din kalim ay mangagas sin baik. <sup>9</sup> Tan sak-en abe et wada di nangatngato ay mamilbilin en sak-en, ya wada abey sosoldadok ay bilbilinek. Mo kanak sin esa en, ‘Emey ka,’ emey, ya mo kanak abe sin esa, ‘Omali ka,’ omali, ya mo ibagak abe sin bag-en ko en, ‘Amagem na,’ amagena.”

\* 8:4 Levitico 14:1-8.

<sup>10</sup> Nasdaaw si Jesus sin nanngañas di, et kanana sin kaipoipogaw ay omon-onod en sisya, “Tet-ewa adi nan ibagak en dakayo ay magay dinatdatngak ay waday talek na ay kaman nina, olay en datako ay taga-Israel. <sup>11</sup> Nemnemen yo na! Ad-ado di maitapi sin panturayan Diyos ay mapo sin belaan ya kadiposan di agew, et makiokob da en da Abraham en Isaac ya si Jacob. <sup>12</sup> Ngem din Judio ay maitapi koma sin panturayan Diyos et maiwasit da sin kad-an di mabolinget, et man-anog-og da dowan da aben mangaygayetget si bonget da.” <sup>13</sup> Pag kanan Jesus sin kapitan, “Somaa ka, tan din pinatim ay maamag et matongpal.” Et nailatonan din baan di kapitan sin kostokosto ay oras ay doy.

*Din Nangagasan Jesus Sin Ad-ado Ay Mansakit*

*(Mar. 1:29-34; Luc. 4:38-41)*

<sup>14</sup> Sin namingsan, inmey si Jesus sin beey da Pedro, et inila na ay binmabaktad din katogangan Pedro ay babai, tan manpodpodot. <sup>15</sup> Sinmag-en si Jesus en sisya, yan kinapay na din takkay na. Pag et makaan din podot na, et binmangon ay mamakan en sisya.

<sup>16</sup> Madipos pay din agew, in-ey din omili en Jesus di ad-ado ay kinapet di anito ya mansaksakit. Et pinakaana din aanito si kali na et anggoy dowana aben ag-agasan din am-in ay mansaksakit. <sup>17</sup> Naamag na ta say matongpal din inpaibagan Diyos en Isaias ay mamadto ay kanana, “Sisya ay mismo di nangaan sin ligat di awak ya sakit tako.”†

*Din Ligat Di Makiey En Jesus*

*(Luc. 9:57-62)*

<sup>18</sup> Sin esa ay agew, inilan Jesus din ad-ado ay ipogaw ay nangaalibongbong en sisya, et tinogona din pasolot na ay nangwani, “Omagadang tako.” <sup>19</sup> Ngem dowan et somag-en di maestron di linteg yan kanana en sisya, “Apo maestro, omonodak en sik-a olay intoy em-emeyam.”

<sup>20</sup> Asi et kanan Jesus, “Olay din bewet et waday lokaw ay panbeeyan da, ya din titit abe et waday obong da, ngem sak-en ay Anak di Ipogaw et magay kosto ay kaseypak.”

<sup>21</sup> Wada abe di pasolot na ay nangwani, “Apo, awni kod ta en mi iponpon agan-o si amak.”

<sup>22</sup> “Bay-am,” kanan Jesus, “ta din iib-an amam ay kaman dan nanatey di en mangiponpon en sisya.‡ Ngem mo sik-a pay, manbalin ka ay pasolot ko.”§

*Din Nangipaginkan Jesus Sin Dagem Ya Dalloyon*

*(Mar. 4:35-41; Luc. 8:22-25)*

<sup>23</sup> Pag manlogan si Jesus ya din papasolot na si bangka et nanlobwat da. <sup>24</sup> Idi nanlologan da, naseyep et sisya. Siya et di kadateng di mappes ay dagem et sepyasepyatan di dalloyon din bangka et nganngani ay malned da. <sup>25</sup> Isonga binangon das sisya ay nangwani, “Ay Apo, omisalakan ka! Nay malned tako!”

<sup>26</sup> Pag kanan Jesus, “Apay nga emegyat kayo? Apay nga at-atik et anggoy di talek yo?” Pag bomangon et bilinena din dagem ya dalloyon, et ginminek da ay kosto. <sup>27</sup> Peteg ay nasdaaw da am-in et kanan da, “Sino di kaipogaw nina? Kambaw olay dagem ya dalloyon et patien day ibaga na!”

*Din Lallalaki ay Taga-Gadara Ay Kinapet Di Aanito*

*(Mar. 5:1-20; Luc. 8:26-39)*

<sup>28</sup> Intoloy da Jesus ay mangagadang sin lebeng enggana ay domateng da sin sakop di Gadara. Idi kinmaan si Jesus sin bangka, inabat di dowa ay lalaki ay kinapet di aanito ay napo sin kad-an di liliyang ay kamposanto. Palalo ay makedse ya maangat da, isonga maga di makaitoled ay mandan sidi. <sup>29</sup> Kaibogaw da ay nangwani, “Sik-a ay Anak Diyos,

† 8:17 Isaias 53:4. ‡ 8:22 Ilaen din footnote sin 9:9. § 8:22 Kaman dan nanatey sin pangilan Diyos, tan adi da namati en Apo Jesus.



apay nga domisdistolbo ka? Ay in mali kas na ay manosa en dakami yan nay daan di kosto ay timpo?”

<sup>30</sup> Wada et di ad-ado ay kabisabisaang ay lomanoblob sin dagdag, <sup>31</sup> isonga manpak-pakaasi din aanito en Jesus ay nangwani, “Mo pakaanem dakami, ibaam kod dakami sin doy kabisabisaang ta say kapten mis daida.”

<sup>32</sup> “May, en kayo,” kanan Jesus. Isonga tinaynan da din lallalaki, et en da kinmapet sin bibisaang. Pag tomanagtag din bibisaang ay namallalong et pag dan maekgas sin lebeng et nalned da.

<sup>33</sup> Mo din nangibanbantay sin kabisabisaang, katagtag da sin ili da et inpadamag da am-in dana sin kailian da, pati din naamag sin lallalaki ay kinapet di aanito.

<sup>34</sup> Isonga din am-in ay man-ili et inmey da sin kad-an Jesus ta makingalat dan sisya. Idi sinmawang da, nanpakpakaasi da en sisya ta komaan sin sakop di ili da.

## 9

### *Din Nangagasan Jesus Sin Paralitiko*

*(Mar. 2:1-12; Luc. 5:17-26)*

<sup>1</sup> Pag somakyab da Jesus sin bangka et nan-agadang da ay mantaoli sin ili na. <sup>2</sup> Idi siya di, wada et di nangiali en sisyas paralitiko ay binmabaktad si dayon. Sin nangilaan Jesus sin talek da en sisya, kanana sin paralitiko ay doy, “Papigsaem nemnem mo ay ib-a. Napakawan din basbasol mo.”

<sup>3</sup> Asi et din mamaestron di linteg ay wadas di et kanan da sin nemnem da, “Din ipogaw ay nay et is-is-o nan awak na en Diyos.”

<sup>4</sup> Ngem ammon pay dedan Jesus ay say wada sin nemnem da, et kanana, “Apay nga lawa san nemnememen yo? <sup>5</sup> Nalaklaka kayman ay kanan en, ‘Mapakawan san basbasol mo’ mo din ‘Ibangon mo ta mandan ka.’ <sup>6</sup> Ngem mo siya sa, ibagak ngarud din naligat ta say paneknekak en dakayo ay sak-en ay Anak di Ipogaw et waday kalebbengak isnan labaw di daga ay mamakawan si basol.” Pag nan kanan sin paralitiko ay doy, “Ibangon mo, bidkingem san dayon mo ta somaa ka.” <sup>7</sup> Pag bomangon din sana et sinmaa. <sup>8</sup> Inmegyat din kaipoipogaw sin nangilaan das di dowan da aben dayawen si Diyos begew sin nangidawtana si kaman nadi ay kalebbengan si ipogaw.

### *Din Nangayagan Jesus En Mateo*

*(Mar. 2:13-17; Luc. 5:27-32)*

<sup>9</sup> Maaw-awni pay sin pandad-anan Jesus, inila na di mansingsingil si bowis ay manngadan si Mateo ay tinmotokdo sin opisina na. “Manbalin ka et si pasolot ko,”\* kanan Jesus. Kapikas Mateo et nakiey en sisya.

<sup>10</sup> Mangmangan pay da Jesus ya din papasolot na sin beey da Mateo, ad-adoy sinmawang ay mansingsingil si bowis ya odom ay managbasol ay ipogaw, et nakiokob da. <sup>11</sup> Idi inilan di Fariseo si daida, kanan da sin papasolot Jesus, “Apay nga makikan din maestro yo sin mansingsingil si bowis ya odom ay managbasol ay ipogaw?”

<sup>12</sup> Ngem dinngen Jesus din pinoot da et kanana ay nangiarig, “Baken din nasalon-at ay ipogaw di makasapol si mangagas mo adi din mansaksakit. <sup>13</sup> Adiak in mali ta enak ayagan din nalinteg ay ipogaw mo adi din nakabasol. En kayo ngarud adalen din kosto ay olog din inpaisolat Diyos ay kanana, ‘Nabanbanol en sak-en din panegseg-angan yos gagait yo mo din pangidatdatonan yos animal en sak-en.’”†

### *Maipanggep Sin Kaitpean Di Dagaang*

*(Mar. 2:18-20; Luc. 5:33-35)*

\* **9:9** Din kanana sin Griego et: Omonod ka ... Di laydena ay kalien et makiey en Jesus ay pasolot na. † **9:13** Hosea 6:6.



<sup>14</sup> Pag emey din papasolot Juan en Jesus yan kanan da en sisya, “Mo si dakami ya din Fafariseo et waday agew ay pangit-itpean mis dagaang mi. Ngem mo din pasolot mo pay et maga. Apay?”

<sup>15</sup> Sinombat si Jesus ay nangiarig, “Mo waday mankasal, ay kanan yo aya en masasadot koma din gagayyem di mangasawa ay inayagana? Ngem mo domateng di timpo ay maipakaan en daida din mangasawa, siya di din pangitpean da sin dagaang da.”

*Maipanggep Sin Baro Ay Initdon Jesus  
(Mar. 2:21-22; Luc. 5:36-39)*

<sup>16</sup> Kanan aben Jesus ay nangiarig, “Iwed di ipogaw ay mangilkeb si baro ay lopot sin baak ay bado. Tan komsen din mailkeb et masepsep ay mabisngit din nailkebana.

<sup>17</sup> Iwed abe dedan di mangipeey si kabobbobod ay danom di obas sin nakpit ay sopot ay lalat,‡ tan mo maget, mabtakan din lalat et madadael din sopot dowan aben maiwasit din danom di obas. Din kabobbobod ay danom di obas ngarud et siyat baro ay lalat di kaipay-ana ta say maga di madadael ono maiwasit.”

*Din Anak Di Turay Ya Din Babai Ay Nangiwit Sin Tak-ep Di Badon Jesus  
(Mar. 5:21-43; Luc. 8:40-56)*

<sup>18</sup> Mankalkali pay laeng si Jesus en daida dowan et somawang di turay di Judio. Nandokmog sin sangoanana yan kanana, “Katkatey din anak mi ay babai, ngem omali ka kod ta kapayem sisya et matago.” <sup>19</sup> Isonga inmonod si Jesus en sisya, ya nakiey abe din papasolot na.

<sup>20</sup> Wada et di babai ay adi katkatdok di manbolos ay dada na si sinpo ya doway ay tawen. Inmasag-en sin edegan Jesus yan giniwit na din gayadan di bado na. <sup>21</sup> Tan kananas nemnem na, “Olay mo owatak giwiten koma din bado na, mailatonanak.”

<sup>22</sup> Pag et mansagong si Jesus et inila nas sisya. Pag nan kanan, “Papigsaem nemnem mo. Begew din talek mo, nailatonan ka.” Et nailatonan sisya ay dagos.

<sup>23</sup> Somawang pay da Jesus sin beey di turay, inila na din mangolkolalleng ya din nasisinop ay kaipoipogaw ay manngalngalawngaw, <sup>24</sup> et kanana, “Komaan kayo, tan din balasang ay nay et adi natey, naseseyep et anggoy.” Pag dan siniyesiyekan sisya. <sup>25</sup> Asi na et pinakaan din kaipoipogaw, et sinenggep sin kad-an di balasang. Pag nan itakkayan et kabangon. <sup>26</sup> Siya di et nandinamag din inamag Jesus ay nay sin am-in ay nandinmang ay il-ili.

*Din Nangagasan Jesus Sin Doway Ay Nagodab Ya Esa Ay Naomel*

<sup>27</sup> Idi kinmaan si Jesus, inmonod di doway ay lalaki ay nagodab ay nangibogbogaw, “Sik-a ay Polin David,§ maseg-ang ka paabe!” <sup>28</sup> Intoltoloy Jesus ay mandan enggana ay somawang sin beey ay emeyana et sinenggep. Sinenggep abe din doway ay nagodab. Pag nan kanan en daida, “Ay patien yo ay kabaalak ay mangaan sin godab yo?”

“Aw, Apo,” kanan da.

<sup>29</sup> Pag kapayen Jesus din mata da yan kanana, “Maitongpal en dakayo begew sin talek yo.” <sup>30</sup> Et nakaan ay dagos din godab da. Pag nan dadlon bilinen daida ay nangwani, “Adi yo polos ap-apat nan inamag ko en dakayo si olay sino ay ipogaw!” <sup>31</sup> Ngem kinmaan da et en da inapaapat di maipanggep en Jesus sin am-in ay nandinmang ay ili.

<sup>32</sup> Sin komakanaan da, waday nangitlod sin kad-an Jesus si lalaki ay naomel ay kinapet di anito. <sup>33</sup> Pinakaan Jesus din anito et nilogian din lalaki ay mankali. Peteg

‡ 9:17 Din pangipay-an di Judio si danom di obas et lalat di kalding. § 9:27 Polin David et titolon di masmas-ed ay Messias, isonga din nay pangawag di nagodab en Jesus et pamigbig da ay sisya din Messias ono Cristo ay dinotokan Diyos ay manturay.

ay nasdaaw din kaipoipogaw et kanan da, “Anna! Maga polos di inil-ila takos kaman nina sin intiro ay ili tako ay Israel!”

<sup>34</sup> Ngem wada da di Fariseo ay nangwani, “Din ap-apon di aanito di nangidawat en sisya si panakabalina ay mangipakpakaan si anito.”

### *Din Naseg-angan Jesus Sin Kaipoipogaw*

<sup>35</sup> Pag manlikliked si Jesus sin kailili ay man-it-itdo sin kasinasinagoga ay mangikaskasaba sin siged ay damag maipanggep sin panturayan Diyos. Inag-agasana abe di mansaksakit si am-in ay kalasin di sakit ya ligat di awak da. <sup>36</sup> Sin nangilaana sin ad-ado ay kaipoipogaw, naseg-angan en daida, tan maligligatan ya nadisdismaya da ay kaman dan karnero ay iwed di mangay-ayowan en daida. <sup>37</sup> Isonga kanana ay nangiarig sin papasolot na, “Ad-ado di ipogaw ay maani koma, ngem kolang di mangan-ani en daida. <sup>38</sup> Kedawen yo ngarud sin akin payew ta man-ibaa si odom ay en makiani.”

## 10

### *Din Nangibaaan Jesus Sin Sinpo Ya Dowa Ay Pasolot Na*

*(Mar. 3:13-19; 6:7-13; Luc. 6:12-16; 9:1-6)*

<sup>1</sup> Idi esay agew, inayagan Jesus din sinpo ya dowa ay pasolot na, et nasinop da. Pag nan iyaan daida si kalebbengan ay mangipakaan si anito ya mangaan si am-in ay kalasin di sakit ya ligat di awak. <sup>2</sup> Siya dana di ngadngadan di sinpo ya dowa ay aapostol: din kangatoan et si Simon ay nabdayan si Pedro, ya wada abe din agi na ay si Andrew, da Santiago en Juan ay anak Zebedeo, <sup>3</sup> da Felipe en Bartolome, si Tomas ya si Mateo ay mansingsingil si bowis, da Santiago ay anak Alfeus en Taddeus, <sup>4</sup> si Simon ay makwani en Patriota tan insakit na din ili na, ya si Judas Iscariot ay nanglipot en Jesus.

<sup>5</sup> Inbaan Jesus dana ay sinpo ya dowa ya tinogonas daida ay nangwani, “Adi yo idan sin danan ay emey sin il-ilin di Gentil. Adi kayo aben em-emey sin il-ili ed Samaria, <sup>6</sup> mo adi et emey kayo sin iib-a tako ay Israelita ay kaman nasangaw ay karnero. <sup>7</sup> Sin am-in ay em-emeyan yo, ikaskasaba yo ay dandani di panturayan Diyos. <sup>8</sup> Agasan yo di mansaksakit, tagoen yo di natey, pasigeden yo din mansakit si kaegyay ay sakit di kodil, ya pakaanen yo di aanito. Magay inbaybayad yo sin nay kalebbengan ay indawat ko en dakayo, isonga adi yo aben ipabaybayad di badang yo. <sup>9</sup> Adi kayo man-itaktakin si pilak ay dadakke ya olay silsilyo. <sup>10</sup> Adi kayo aben man-itaktakin si sangi, pansokatan ay bado ya sinilas, ya sokod. Tan din man-obla et maikari ay mangawat si katagoana.

<sup>11</sup> “Mo somawang kayo si esa ay ili, man-anap kayos maikari ay manangaili en dakayo, et isdi di pantean yo engganay taynan yo din ili ay doy. <sup>12</sup> Mo sengggep kayo sin esa ay beey, kanan yo en, ‘Sapay koma ta bindisyonan Diyos dakayo ay bemeey.’ <sup>13</sup> Mo maikari da ay mangawat sin bindisyon ay inbaga yo, mabindisyonan da tet-ewa, ngem mo adi da maikari, adi da aben mabindisyonan. <sup>14</sup> Mo somawang kayos esa ay ili ono beey yan adi da sangailien dakayo ya sigaan da abe ay mannge sin ibagbaga yo, pokpokan yo din dapan yo sin komaanan yo ta say pangammoan da ay makaoway da sin dosa da. <sup>15</sup> Tet-ewa nan ibagak en dakayo ay mo domateng din pangokoman Diyos sin kaipoipogaw, madagdagsen din dosan di man-ili isdi mo din dosan di taga-Sodoma ya taga-Gomorra.”\*

### *Din Timpon Di Ligat Ay Domateng Sin Tapin Di Agew*

*(Mat. 24:1-14; Mar. 13:1-13; Luc. 12:11-12; 21:12-17)*

<sup>16</sup> Intoloy Jesus ay nangwani, “Nemnemen yo na. Ibaak dakayo sin makedse ay ipogaw ay kaman kayon karnero ay emey sin kad-an di mabongget ay aso. Masapol ngarud ay nalaing ya naannad kayo ay maga abe di maipabasol en dakayo. <sup>17</sup> Siliban yo, tan depapen ya idarum das dakayo ya sopliten das dakayo sin kasinasinagoga. <sup>18</sup> Begew

\* **10:15** Genesis 19:24-28.

sin pammati yo en sak-en, maidarum kayo abe sin gogobernador ya aari, et say waday waya yo ay mangibaga sin siked ay damag en daida ya din iturturayan da ay Gentil. <sup>19</sup> Mo bistigalen das dakayo, adi kayo madandanagan si isongbat yo ya ibaga yo, tan sin oras ay doy, maipaammo en dakayo din kosto ay ibaga yo. <sup>20</sup> Tan baken si dakayo di nakin kali mo adi din Ispiriton Diyos ay Ama tako.

<sup>21</sup> “Sin doy ay timpo, wada da di manglipot si agi na sin tuturay ta peslen da. Iso na sin aam-a ay lipotan dan aan-ak da sin tuturay ta peslen da. Din anan-ak abe et kontraen das da am-a en in-a da et ipapse da. <sup>22</sup> Am-in di ipogaw et kaliliget das dakayo begew sin nakies-esaan yo en sak-en. Ngem mo ipapasnek yo ay mamati ay adi mankeykeyat enggana ay makdeng di panpaligatan yo, maisalakan kayo. <sup>23</sup> Mo paligaten das dakayo sin esa ay ili, lomayaw kayo ta emey kayo si esa ay ili. Tet-ewa nan ibagak en dakayo ay mo omaliak ay Anak di Ipogaw, adi yo pay laeng kedngen din inpaoblak en dakayo sin inil-ili ed Israel.

<sup>24</sup> “Maga di man-ad-adal ay nangatngato mo din maestro na. Maga abe di bag-en ay nangatngato mo din among na. <sup>25</sup> Isonga mapnek koma di man-ad-adal mo din lak-arena et mais-o sin maestro na, ya siya abe sin bag-en mo mais-o sin among na. Mo sak-en ay maiarig si akin beey et kanan da en sak-en si Beelzebul, adi pay masepsep ay lawlawa di pangwani da en dakayo ay makibebbeey.”

### *Din Emegyatan Koman Di Ipogaw (Luc. 12:2-7)*

<sup>26</sup> “Isonga adi kayo emeg-egyat en daida, tan am-in ay naitatabon ya adi naammoan ed wani et maipaila ya maammoan sin tapin di agew. <sup>27</sup> Din inbagbagak en dakayo ay magay nakadnge et masapol ay ipaammo yo sin kaipoipogaw. Din in-ay-ayasak ko abe en dakayo et masapol ay ibogaw yo ta dengngen di kaipoipogaw. <sup>28</sup> Adi kayo emeg-egyat en daida ay mamse sin awak et anggoy di ipogaw ngem adi da kabaelan ay mamse sin ab-abiik na, mo adi et emegyat kayo en Diyos. Tan kabaelana ay manosa sin awak ya siya abe sin ab-abiik di ipogaw ed inferno. <sup>29</sup> Ngem nemnemen yo abe din iyat Diyos ay Ama yo sin boding. Mailako di doway ay boding si balkeg et anggoy, ay baken siya? Ngem maga di olay esa en daida si matey ya matekdag mo adi na ipalobos. <sup>30</sup> Namnamed kayo ay ipogaw! Tan olay din book yo et ammo na di kabibilang da. <sup>31</sup> Isonga adi kayo emeg-egyat, tan addawi ay nabanbanol di esa ya esa en dakayo mo kaad-adon di boding!”

### *Din Mangipodno Ay Mamati En Jesus Ya Din Mangisaot (Luc. 12:8-9)*

<sup>32</sup> “Isonga olay sino ay mangipodno sin sangoanan di kaipoipogaw en mamati en sak-en, siya met laeng di ipodnok sin sangoanan Amak ay wada ed langit. <sup>33</sup> Ngem din mangwani en adi na am-ammos sak-en sin sangoanan di kaipoipogaw, siya abe di ibagak sin sangoanan Amak ay wada ed langit.”

### *Si Jesus Di Mangipasian Sin Kaipoipogaw (Luc. 12:49-53; 14:26-27; 9:24)*

<sup>34</sup> Kanan aben Jesus, “Adi yo kanan en inmaliak ay mangiali si talna isnan daga, tan din katet-ewa na et inmaliak ay mangiali si pan-iibawan ya pansisianan di kaipoipogaw. <sup>35</sup> Isonga awni et mankokontra di sin-ama ya sin-ina. Mankontra abe di sinkakatogangan, <sup>36</sup> ya din kaibaw di ipogaw et din mismo ay pamilya na.

<sup>37</sup> “Olay sino ay dakdakdake din layad na en da ama na en ina na ya olay sin anan-ak na mo din layad na en sak-en et adi maikari ay maibilang ay pasolot ko. <sup>38</sup> Olay sino abe ay adi manilid sin krus na ta asi makiey en sak-en et adi maikari ay maibilang ay pasolot

ko.† <sup>39</sup> Tan din mangipatpateg sin awak na et matey met laeng, ngem din matey begew sin pammati na en sak-en et waday biyag na ay iwed patingga na.”

*Din Gon-gona Ay Idawat Diyos*  
(Mar. 9:41)

<sup>40</sup> “Olay sino ay mangawat en dakayo et sak-en di inawat na, yan din mangawat en sak-en et inawat na abe din nangibaa en sak-en. <sup>41</sup> Mo waday manangaili si pankalkalian Diyos gapo ta pankalkalian Diyos sisya, man-iso di awatena ay gon-gona sin gon-gonan di pankalkalian Diyos. Et mo wada abey manangaili si nalinteg ay ipogaw gapo ta say kaipogaw na, man-iso di awatena ay gon-gona sin gon-gonan di nalinteg ay ipogaw. <sup>42</sup> Tet-ewa nan ibagak en dakayo ay olay din owat mangipainom si esa ay tasa ay danom sin kababaan ay pasolot ko gapo ta pasolot ko et dadlon magon-gonaan.”

## 11

*Din Inbagan Jesus Sin Inbaan Juan*  
(Luc. 7:18-23)

<sup>1</sup> Idi nakdeng ay binilin Jesus din sinpo ya dow a ay pasolot na, kinmaan sidi et inmey nan-itdo ya nangasaba sin nandinmang ay il-ili.

<sup>2</sup> Mo pay si Juan ay Mamonbonyag, deda ay naibabalod. Sin nanngena sin inam-amag Cristo, inbaa na di papasolot na <sup>3</sup> ta en da pooten en Jesus, “Ay sik-a din inkarin Diyos ay omali ono waday natken si masmas-ed?”

<sup>4</sup> Kanan Jesus, “Mantaoli kayo en Juan ta en kayo ibaga en sisya din inila ya dinnge yo, <sup>5</sup> ay din nagodab et makaila da, din napilay et makadan da, din waday kaeegyat ay sakit di kodil na et nailatonan da, din nateweng et makadnge da, din natey et natago da kasin, ya din siged ay damag et maikaskasaba sin nabibiteg. <sup>6</sup> Ibaga yo abe en sisya en nagasat din ipogaw ay magay dowadowa na maipanggep en sak-en.”

*Din Inbagan Jesus Maipanggep En Juan*  
(Luc. 7:24-35)

<sup>7</sup> Idi madipdipos da doy ay pasolot Juan, nilogian Jesus ay mangibaga sin kaipoipogaw si maipanggep en Juan. Kanana, “Sin doy inmeyan yo sin kad-an Juan sin lugar ay magay man-ili, sinoy layden yo ay en ilaen? Ay esa aya ay ipogaw ay kaman pa-o ay igiwgiwed di dagem? Baken samet. <sup>8</sup> Sino ngarud di en kayo inila? Ay esay ipogaw ay nanbabado si kagkagam-is? Baken met abe dedan, tan din nanbabado si kaman nadi et sin beey di aari di pantetean da. <sup>9</sup> Ibaga yo ngarud mo sino di en kayo inila. Ay esay mamadto? Aw met a, ngem din katet-ewa na et nangatngato mo mamadto. <sup>10</sup> Tan si Juan di ibagbagan din naisolat ay kalin Diyos ay kanana en, ‘Waday ibaak ay mangon-ona mo sik-a ay mangisagana sin danem.’ ” <sup>11</sup> Pag itoloy Jesus ay nangwani, “Tet-ewa nan ibagak en dakayo ay magay ipogaw ay naianak isnan daga ay nangatngato mo si Juan, ngem olay mo siya di, din kababaan sin panturturayan Diyos et nangatngato pay mo sisya. <sup>12</sup> Manlogi sin nangaskasabaan Juan enggana ed wani, wada da di mangipapati ay mangikaskasaba sin panturayan Diyos, ya wada da abe di mangipapilit ay maitapi sin panturayana.\* <sup>13</sup> Tan din insolsolat di mamadto ya din linteg Moses et inpadto da am-in din panturayan Diyos, pag domateng si Juan ay nangilogi ay manongpal sin inpadto da. <sup>14</sup> Et mo layden yo ay pasien din inbagan di esa ay mamadto, maawatan yo ay si Juan

† **10:38** Sin pannemnem Mateo, din manilid sin krus na et din ipogaw ay mangipapasnek ay mangonod en Jesus olay mo say kateyana. \* **11:12** Wada pay di dow a ay kaiologan nina sin Griego: 1) ... wada da di mangipapati ay mangonkontra sin panturayan Diyos, ya wada da abe di makedse ay mangiparit koma si maitapis di. 2) ... wada da di mangipapati ay mangikaskasaba sin panturayan Diyos, ya wada da abe di makedse ay mangiparit koma si maitapis di.

met laeng din si Elias ay inpadto na ay omali.† <sup>15</sup> Dakayo ay manmange, nemnemen yo san dinnge yo.”

<sup>16</sup> Intoloy Jesus ay nangwani, “Sino ngata di pangiarigak sin ipogaw ed wani? Kaman dan anan-ak ay man-ay-ayam sin plaza ay adi polos mapmapnek. Kanan da sin kaay-ayam da, <sup>17</sup> ‘Nangangangsa kami met, ngem sinigaan yo ay manayaw. Isonga nan-eyaey kami, ngem sinigaan yo pay dedan ay maitapi.’ <sup>18</sup> Daida di kaiarigan yo, tan inmali si Juan yan init-itpe nay dagaang na ya adi nan-in-inom si bemeteng yan kanan yo, ‘Nadimonyo di et abe.’ <sup>19</sup> Mo sak-en pay ay Anak di Ipogaw et nakikikanak ya nakiin-inomak en dakayo yan kanan yo en, ‘Ilan yo kadi nan ipogaw ay nay! Makaem ay mangan ya makabeteng dowana pay gayyemen din mansingsingil si bowis ya odom ay managbasol ay ipogaw!’ Ngem olay mo siya di din kanan yo, maila pay dedan din kakoston di sirib Diyos sin am-amagen di ipogaw ay mangawat.”

### *Daida Ay Nanigaan Ay Manbabawi*

*(Luc. 10:13-15)*

<sup>20</sup> Pag yamyaman Jesus din man-ili sin il-ili ay nangamagana sin kaad-adoan ay nakaskasdaaw, tan adi da inbabawi din basbasol da. <sup>21</sup> Kanana, “Kaseseg-ang kayo ay taga-Korazin ya siya abe en dakayo ay taga-Betsaida! Tan ad-ado di nakaskasdaaw ay inam-amag ko sin ili yo, ngem adi yo inbabawi din basbasol yo. Mo koma ed Tiro ya ed Sidon di nangam-amagak sin nakaskasdaaw ay nay, nanbado da komas sako ay dagos ya dowan da pay sapowakan toktok das dap-o ay mangipaila ay nanbabawi da. <sup>22</sup> Isonga kanak en dakayo en on-onina din dosan di taga-Tiro ya taga-Sidon mo si dakayo sin agew ay pangokoman Diyos sin kaipoipogaw. <sup>23</sup> Dakayo pay abe ay taga-Capernaum, ay kanan yo aya en maingato kayo ed langit ay madayaw? Awni man et maibaba kayo ed inferno. Tan ad-ado di nakaskasdaaw ay inam-amag ko sin ili yo, ngem adi yo inbabawi din basbasol yo. Mo koma ed Sodoma di nangam-amagak sin nakaskasdaaw ay nay, nanbabawi da koma et wada pay koma din ili da ed wani. <sup>24</sup> Isonga kanak en dakayo en on-onina din dosan di taga-Sodoma mo si dakayo sin agew ay pangokoman Diyos sin kaipoipogaw.”

### *Din Nan-iyamanan Jesus*

*(Luc. 10:21-22)*

<sup>25</sup> Sin siya di ay timpo, nankararag si Jesus ay nangwani, “Ama, sik-a ay Apo ed langit ya isnan daga, dakdake di iyaman ko en sik-a, tan din adi ka inpaammo sin masirib ya diadal ay ipogaw et say inpaammom sin baken diadal. <sup>26</sup> Et inamag mo di ay Ama, tan siya kayman din nilayad mo ay naiyat.”

<sup>27</sup> Pag kanan Jesus sin kaipoipogaw, “Sak-en di nangipolangan Amak sin am-in. Tan magay mangam-ammo si kosto en sak-en mo baken si Amak, ya maga abe di mangam-ammo en Amak mo baken si sak-en ya din ipogaw ay laydek ay pangiammoan.

<sup>28</sup> “Dakayo am-in ay nabbay ya nadadagsenan et omali kayo en sak-en ta pan-ibbayek dakayo. <sup>29</sup> Onodan yo din bilbilin ko ya manpaitdo kayo en sak-en, tan say pantalnaan di nemnem yo, tan naanosak ya adiak ipapangato di awak ko. <sup>30</sup> Baken aben madagsen di ipabaklay ko en dakayo mo adi et mayap-ew ay tiliden yo.”

## 12

### *Maipanggep Sin Agew Ay Pan-ibbayan*

*(Mar. 2:23-28; Luc. 6:1-11)*

<sup>1</sup> Sin namingsan ay Sabado ay pan-ibbayan di Judio, mandad-an da Jesus sin kapay-payewan ay nas-ekan si bakakew. Mandagaang din papasolot na, isonga manposposngi das lames na et kotkotimen da. <sup>2</sup> Asi et wada da di Fariseo ay nangila sin inyat da et

† 11:14 Malakias 4:5.



kanan da en Jesus, “Ilam, din papasolot mo et lablabsingen da din linteg tako ay Judio ay mangiparit si man-ani sin agew ay pan-ibbayan.”

<sup>3</sup> Sinongbatan Jesus ay nangwani, “Binasa yo met din inyat Ari David ya din gagait na sin dinmagaangan da. <sup>4</sup> Sinenggep sin beey en Diyos yan ina na din tinapay ay naidaton en Diyos ay iparit di linteg ay kanen di baken padi. Ngem kinana pay dedan et inbingayana abe din kakoyog na.\* <sup>5</sup> Nemnemen yo koma abe din naisolat sin linteg Moses ay mangiparit si man-obla sin agew ay pan-ibbayan. Kanana en din papadi ay man-ob-obla sin Timplo sin agew ay pan-ibbayan et lablabsingen da di linteg ngem baken da pay dedan basol. <sup>6</sup> Kanak pay en dakayo en din wadas na ed wani et napatpateg mo din Timplo. <sup>7</sup> Waday inpaisolat Diyos ay kanana, ‘Nabanbanol en sak-en din panegseg-angan yos gagait yo mo din pangidatdatonan yos animal en sak-en.’ Mo naawatan yo koma din layden nina ay kalien, adi yo koma pinabasol din magay basol na. <sup>8</sup> Tan sak-en ay Anak di Ipogaw di akin lebbeng sin mabalin ay maam-amag sin agew ay pan-ibbayan.”

### *Din Lalaki Ay Nakingking Di Esay Takkay Na* (Mar. 3:1-6; Luc. 6:6-11)

<sup>9</sup> Sin kinmaan Jesus sidi, inmey sin sinagoga da et sinenggep. <sup>10</sup> Wada et sidi di lalaki ay nakingking di esay takkay na. Wada da abe di ipogaw ay mangan-anap si ipabasol da en Jesus ta way pangidaruman da, isonga kanan da en sisya, “Ay ipalobos di linteg tako di mangagas si mansakit sin agew ay pan-ibbayan?”

<sup>11</sup> Sinongbatan Jesus ay nangwani, “May kod mo waday karnero yo si matekdag sin bito sin agew ay pan-ibbayan, en kayo enaten, ay baken siya? <sup>12</sup> Addawi ay nabanbanol di ipogaw mo karnero, isonga ipalobos dedan di linteg tako ay badangan takon gait tako sin agew ay pan-ibbayan.” <sup>13</sup> Pag nan kanan sin nakingking di takkay na, “Oyadem san takkay mo.” Inoyad na et dadlon nailatonan ay kaman din esa ay takkay na. <sup>14</sup> Ngem asi et kinmaan din Fariseo et en da nantotolag mo intoy iyat da ay mamse en Jesus.

### *Din Pinilin Diyos Ay Mansilbi En Sisya*

<sup>15</sup> Ammon Jesus di panggep da, isonga kinmaan sidi. Ad-ado di inmonod en sisya, et inag-agasana din am-in ay mansakit <sup>16</sup> dowana aben bilbilinen daida ay adi da ibagbaga di maipanggep en sisya. <sup>17</sup> Inamag na di ta say matongpal din inpaibagan Diyos en Isaias ay kanana,

<sup>18</sup> “Si naey di pinilik ay mansilbi en sak-en. Sisya di laydelaydek ya kakapnekak. Ibaak din Ispiritok ay mantetee en sisya ta ipaammo na sin Gentil din iyat di ipogaw ay mapalinteg sin pangiilaan Diyos. <sup>19</sup> Adi makisongbat ya manbogaw, ya adi na aben ipipigsa din kali na sin kalsadan di ili. <sup>20</sup> Din napyok ay pa-o et adi na gotloen, ya din madmad-ep ay silaw et adi na edpen.† Itoltoloy na di obla na enggana ay matongpal din nalinteg ay panggep Diyos. <sup>21</sup> Et sisya di pannamnamaan di am-in ay ipogaw.”‡

### *Si Jesus Ya Si Beelzebul* (Mar. 3:20-30; Luc. 11:14-23)

<sup>22</sup> Sin namingsan, wada da di nangiey en Jesus si lalaki ay nagodab ya naomel tan kinapet di anito. Pinakaan Jesus din anito, et makaila ya makakali din lalaki ay sana. <sup>23</sup> Peteg ay nasdaaw din kaipoipogaw, et kanan da, “Ay si naey ngata din polin David ay sedsed-en tako?”

\* **12:4** 1 Samuel 21:1-6; Levitico 24:9. † **12:20** Din layden dana ay pangarig ay kalien et adi taynan ono dokogan Jesus di ipogaw ay nadismaya ono nakapoy di pammati na, mo adi et badanganas daida. ‡ **12:21** Isaias 42:1-4.



<sup>24</sup> Ngem idi dinngen di Fafariseo, kanan da, “Baken met a! Din panakabalina ay mangipakpakaan si anito et magay odom ay nangidawat en sisya mo baken si Beelzebul ay ap-apon di aanito.”

<sup>25</sup> Ngem ammon Jesus di wada sin nemnem da, isonga kanana en daida, “Mo man-asigobat din kaipoipogaw sin esa ay ili, madadael din ili ay doy. Siya abe sin pamilya ono sinkakailian, mo man-iibaw da, mansisian da. <sup>26</sup> Iso na abe en Satanas. Mo pak-pakaanena din iib-a na ay anito, laydena ay kalien ay ib-ibawenas daida, et madadael met din panturayana. <sup>27</sup> Kanan yo en si Beelzebul di nangidawat si panakabalin ko ay mangipakaan si anito. Mo tet-ewa sa, intoy inyat ngarud din papasolot yo ay mangipakpakaan si anito? Olay daida et paneknekan da ay naipaksaw din kankanan yo. <sup>28</sup> Tan din katet-ewa na et din Ispiriton Diyos di nangidawat si panakabalin ko ay mangipakaan si anito, et say pangammoan yo ay dinmateng din panturayan Diyos en dakayo.

<sup>29</sup> “Si Satanas et maiarig si mabikas ay ipogaw, tan magay makasgep sin beey na ta akewena din bonag na mo adi na baloden omona sisya. Asi mabalin ay itagtag na din bonag na.

<sup>30</sup> “Olay sino di adi maitapi en sak-en et komonkontra, ya din adi bomadang ay maninop si karnero et pansisianenas daida. <sup>31</sup> Isonga kanak en dakayo en olay sino ay basol di ipogaw ya olay sino di ibaga na ay mangipalawlawas odom et mabalin ay pakawanen Diyos malaksig din mangipalawlawas sin Ispirito Santo. <sup>32</sup> Olay din mangipalawlawas en sak-en ay Anak di Ipogaw et mabalin ay mapakawan din basol na ay sana, ngem din mangipalawlawas pay sin Ispirito Santo et adi polos mapakawan basol na ed wani ya siya abe sin tapin di agew.”

*Din Kaiw Ya Din Lames Na*  
(*Luc. 6:43-45*)

<sup>33</sup> Pag kanan Jesus ay nangiarig, “Pan-iisoen yo koma di pannemnem yo sin kaiw ya sin lames na. Mo ibilang yo ay siged di esa ay kaiw, siged koma abe di pannemnem yo sin lames na. Mo pay ibilang yo ay lawa di esa ay kaiw, lawa koma abe di pannemnem yo sin lames na. Tan din kailasinan di kaiw et din lames na. <sup>34</sup> Peteg kayo kayman ay kaman eweg ay waday gita na! Mo lawa kayo, intoy iyat yo ngarud ay mangibagas siged? Tan din ibagbagan di ipogaw et mapo met laeng sin wada sin nemnem na. <sup>35</sup> Din siged ay ipogaw et siged di ipabela na, tan siged dedan din naiigto sin nemnem na. Ngem din lawa ay ipogaw et lawa abe din ipabela na, tan lawa abe dedan din naiigto sin nemnem na. <sup>36</sup> Nemnemen yo nan ibagak en dakayo. Sin agew ay pangokoman Diyos sin kaipoipogaw, makaoway da ay manongbat sin am-in ay inbagbaga da ay magay silbi na. <sup>37</sup> Tan din inbagbagan di esa ya esa en dakayo et osalen Diyos ay mangokom en dakayo, et say kaibasaran di pangwaniana ay waday basol yo ono maga.”

*Din Sinyal Ay Inpailan Jonas*  
(*Mar. 8:11-12; Luc. 11:29-32*)

<sup>38</sup> Asi et kanan di odom ay mamaestron di linteg ya Fafariseo, “Apo maestro, omipaila ka kod si nakaskasdaaw ay sinyal ay pangammoan mi ay napo en Diyos din panakabalin mo.”

<sup>39</sup> Kanan Jesus ay sinombat, “Lawlawas din ipogaw ed wani, tan dinokogan da din tet-ewa ay Diyos. Ipapilit da ay ipailak di nakaskasdaaw ay sinyal en daida, ngem iwed met maipaila mo adi anggoy din sinyal ay kaman din napasamak en Jonas ay mamadto ed idi. <sup>40</sup> Tan si Jonas et nantetee sin eges di dakdake ay nigay si tolo ay agew ya tolo ay labi, S ya sak-en ay Anak di Ipogaw et manteteeak abe sin kaiponponak\* si tolo ay agew ya tolo

§ 12:40 Jonas 1:17. \* 12:40 Din kanana sin Griego et: ...manteteeak abe sin dallem di lota. Di esa abe ay kaiologana et sin kad-an di natey ed Hades.

ay labi.† <sup>41</sup> Mo domateng din agew ay pangokoman Diyos sin kaipoipogaw, awni man et makipika din nan-ili ed Nineve ay mangipabasol en dakayo, tan mo daida et inbabawi da din basbasol da sin nanngan da sin inkaskasaban Jonas,‡ ngem mo dakayo et olay mo wada di naitatapi en dakayo ay napatpateg mo si Jonas, adi yo pay dedan pasien. <sup>42</sup> Din babai abe ay reyna ed Seba ed idi et makipika sin siya di ay agew ay mangipabasol abe en dakayo, tan mo sisya et inmey ay napo sin kaaddawian ay ili ta say ena dengngen din inbagbagan di nalaing ay Ari Solomon,§ ngem kanak en dakayo en napatpateg mo si Solomon din wadas na ed wani.”

*Din Nantaolian Di Anito*  
(*Luc. 11:24-26*)

<sup>43</sup> Intoloy Jesus ay nangiarig, “Mo komaan di anito ay kinmapet si ipogaw, en manliklied sin kabatbatoan ay magay danom na ay man-anap si pan-illengana. Et mo magay datngana, <sup>44</sup> kananas nemnem na en, ‘Olay mantaoliak sin beey ay napoak.’ Et mantaoli ya datngana ay magay mantetee ay enggay nadalosan ya kagkagam-is mo ed idi. <sup>45</sup> Pag en man-ayag si pito ay anito ay makmakedse mo sisya ta en da makibeey en sisya. Adi pay masepsep ay komaseseg-ang din ipogaw ay doy mo sin damo. Et kaman nidi abe di mapasamak sin lawlawa ay ipogaw ay matmatago ed wani.”

*Si Inan Jesus Ya Din Aag-i Na*  
(*Mar. 3:31-35; Luc. 8:19-21*)

<sup>46</sup> Mankalkali pay laeng si Jesus sin kaipoipogaw yan sinmawang si ina na ya din aag-i na sin beey ay kad-ana et inpaayag da. <sup>47</sup> Isonga wada di nangibaga en sisya, “Si inam ya din aag-im et wada da sin bel-ayan ay wada kanoy layden da ay ibaga en sik-a.”

<sup>48</sup> Kanan Jesus, “Aw pay dedan, ngem wada pay di odom ay ibilang ko ay inak ya aag-ik.” <sup>49</sup> Pag nan tedken din papasolot na yan kanana, “Da naey si inak ya aag-ik, <sup>50</sup> tan din mangamag sin layden Amak ed langit et daida di maibilang ay inak ya aag-ik.”

## 13

*Din Lalaki Ay En Nansapowak*  
(*Mar. 4:1-9; Luc. 8:4-8*)

<sup>1</sup> Sin agew ay doy, kinmaan si Jesus sin beey et inmey sin benget di annawa ay lebeng. Pag nan itokdo ay man-itdo, <sup>2</sup> ngem gapo ta ad-aad-ado di ipogaw ay nangal-alibongbong en sisya, en tinmokdo sin bangka dowan pay nantetee din kaipoipogaw sin benget di lebeng. <sup>3</sup> Ad-adoy initdo na en daida ay man-iar-arig. Kanana, “Sin namingsan, wada di esay ipogaw ay en nan-isapowak si bin-i sin nom-a na. <sup>4</sup> Idi insapsapowak na din bin-i, naekdag di odom sin danan et tintinpek di tititit. <sup>5</sup> Din odom ay insapowak na et naekdag da sin kabatbatoan. Gapo ta naisasapew di lota na, kasimit da. <sup>6</sup> Ngem idi kinmayang din agew, nay-osan ya nakpit da, tan kolang di lamot da. <sup>7</sup> Din odom abe et naekdag da sin kapagpagatan, ngem asi et nakigabay di papagat et insengan da din momola. <sup>8</sup> Ngem din odom pay et naekdag da sin siged ay lota, pag da et gomabay yan nanlames da. Waday nanlames si sagsisin-gasot, waday sagueenemapolo, ya wada abey sagtotolonpo.” <sup>9</sup> Inpaanongos Jesus ay nangwani, “Dakayo ay manmanngge, nemnemen yo san dinngge yo.”

*Din Olog Di Pangarig Maipanggep Sin Nansapowak*  
(*Mar. 4:10-20; Luc. 8:9-15*)

<sup>10</sup> Pag omasag-en din papasolot Jesus en sisya yan pooten da, “Apay nga pangarig di osalem ay mangitdo sin kaipoipogaw?”

† **12:40** Din nantean Jesus sin naiponponana et tolonpo ya enem ay oras et anggoy, ngem ogalin di Judio ay olay partin di kaagawan ono labi et maibilang ay esa ay agew, isonga mo maawatan tako din iyat di Judio ay manbilang si agew, kosto met laeng din kananas na en tolo ay agew ya tolo ay labi. ‡ **12:41** Jonas 3:5. § **12:42** 1 Aari 10:1-10.

<sup>11</sup> Kanan Jesus, “Tan dakayo di nangidawtan Diyos si gondaway ay mangammo sin adi naipaammo ed idi maipanggep sin panturayana, ngem adi na indawat sin odom ay ipogaw. <sup>12</sup> Tan din ipogaw ay mangikaskaso sin dengdengngena et mataptapian din pangawat na enggana ay ad-ado di maawatana, ngem din adi mangikaskaso et mamaiwed din olay at-atik ay kanana en naawatana. <sup>13</sup> Isonga pangarig di ososalek ay mangitdo en daida, tan olay mo il-ilaen da, adi da maimatonan, ya olay mo dengdengngen da, adi da maawatan. <sup>14</sup> Daida di katongpalan di inpaisolat Diyos en Isaias ay mamadto ay kanana,

‘Olay mo denggedengngen da, adi da maawatan. Ya olay mo isin-esin-eng da, adi da maimatonan. <sup>15</sup> Tan enggay kinmenteg di nemnem da. Tetewengen da din tetewa dowan da aben mankikimit tan into et mo makaila, makadnge ya makaawat da yan sagongen das sak-en ta agasak si daida.’ ”\*

<sup>16</sup> Pag itoloy Jesus ay nangwani, “Ngem mo si dakayo pay, nagasat kayo tan makaila ya makadnge kayo. <sup>17</sup> Tet-ewa nan ibagak en dakayo ay ad-ado met iman di mamadto ya nalinteg ay ipogaw ay mayad ay mangila sin inil-ila yo, ngem adi da inila, yan layden da abe ay dengngen din dindinngge yo, ngem adi da dinngge.

<sup>18</sup> “Dengngen yo ngarud ta ibagak din olog di pangarig maipanggep sin en nanisapowak si bin-i. <sup>19</sup> Din bin-i ay natekdag sin danan et maiarig dadi sin ipogaw ay mannge si maipanggep sin panturayan Diyos ngem adi da maawatan. Asi et emey si Satanas et posena sin nemnem da din kali ay dinngge da. <sup>20</sup> Din natekdag abe sin kabatbatoan et siya dadi din ipogaw ay manragragsak ay nangawat sin kalin Diyos sin nanngaan da. <sup>21</sup> Ngem adi linmamot din kali sin nemnem da, isonga mo domteng di ligat ono mapaligat da begew sin nangawatan da sin kalin Diyos, adi da itoloy ay mamati mo adi et dokogan da ay dagos din pammati da. <sup>22</sup> Din natekdag abe sin kapagpagatan et siya dadi din manmanngge sin kalin Diyos, ngem masangaw da sin pandandanagan ya bomaknangan da, isonga mas-engan din kali ay dinngge da et adi malamsan. <sup>23</sup> Din natekdag pay sin siged ay lota et siya dadi din manmanngge sin kalin Diyos dowan da aben maawatan, et waday pantongpalan din kali sin biyag da. Waday ad-ado di pantongpalana, waday namnamona ya wada abey at-atik.”

### *Din Pangarig Ay Maipanggep Si Logam*

<sup>24</sup> Pag kasin man-iarig si Jesus sin kaipoipogaw et kanana, “Din maamag sin panturayan Diyos et kaman din naamag si ipogaw ay waday inbonobona ay kagam-is ay pagey sin payew na. <sup>25</sup> Waday esa ay labi ay naseseyep da, inmey din kaibaw na ay nanisapowak si bin-in di logam ay naitapi sin pagey.† <sup>26</sup> Ginmabay da ay dowang enggana ay nanlames da, asi naimatonan ay waday logam ay naitapi. <sup>27</sup> Inmey din baan din akin payew en sisya yan kanan da, ‘Apo, ay baken mayat aya ay pagey di inbonobon tako sin payew mo? Into pay ngata di napoan din lolagam?’

<sup>28</sup> “ ‘Waday nangililiget en datako ay nangamag sidi,’ kanana ay sinombat.

“ ‘Ay laydem ay en kami kamasan?’ kanan da.

<sup>29</sup> “ ‘Aga,’ kanana, ‘tan makigabot din pagey. <sup>30</sup> Bay-an yo ta makigabay din logam engganang pinag-aani. Asiak ibaga sin man-ani ay pangon-onaen da ay alaen din logam ta labden da ay maipoo, asi da pay anien din pagey ya iala da sin agamang ko.’ ”

### *Din Kaiarigan Di Panturayan Diyos*

(*Mar. 4:30-32; Luc. 13:18-21*)

<sup>31</sup> Pag kasin man-iarig si Jesus en daida yan kanana, “Din panturayan Diyos et maiarig si esa ay bin-in di mostasa ay inis-ek di esa ay ipogaw sin nom-a na. <sup>32</sup> Siya na din

\* **13:15** Isaias 6:9-10. † **13:25** Din kalasin di logam ay nais-ek et kaman pagey di kailaana enggana ay bomala din lames na. Asi maimatonan ay baken baw pagey mo adi et esa ay kalasin di logam ay baken makan.

kakitkitoayan sin am-in ay bin-i, ngem mo gomabay ya maket-eng, siya na din kadakdakan sin am-in ay molmola ay kaman kaiw di kadakdake na, et mabalin ay man-obong di titit sin panga na.”‡

<sup>33</sup> Kanan aben Jesus, “Din panturayan Diyos et kaman labadura ay inlaok di esa ay babai sin ad-ado ay arina ta say palbagena.”

<sup>34</sup> Pangarig di inos-osal Jesus sin nangit-itdoana sin am-in dana sin kaipoipogaw. Maga di init-itdo na en daida ay adi mandaddad-at si pangarig. <sup>35</sup> Say in-inyat na ay nan-it-itdo ta say matongpal din inpaibagan Diyos sin mamadto ay kanana, “Pangarig di osalek ay mankali en daida. Ibagak en daida di adi naipaammo manlogi sin naparsuaan di lobong.”§

### *Din Olog Di Pangarig Maipanggep Sin Logam*

<sup>36</sup> Pag taynan Jesus din kaipoipogaw yan sinenggep sin beey. Inmonod din papasolot na et kanan da, “Tolog mo kod en dakami din pangarig ay maipanggep sin logam ay nakigabay sin pagey.”

<sup>37</sup> Kanan Jesus, “Din nangibonobon sin pagey et sak-en ay Anak di Ipogaw <sup>38</sup> ya din payew et din daga ay nay. Din mayat ay bin-in di pagey et daida din ipogaw ay maitatapi sin panturayan Diyos, ya din logam abe et din ipogaw Satanas. <sup>39</sup> Din kaibaw ay nangisapowak sin bin-in di logam et din Diablo. Din pinag-aani et din panpatinggaan di lobong, ya din nan-ani abe et din aanghel. <sup>40</sup> Din nangolnongan di baa sin logam ta maipoo et kaman nidi abe di maamag sin panpatinggaan di lobong, <sup>41</sup> tan sak-en ay Anak di Ipogaw et ibaak din aanghel ko ta en da olnongen sin panturayak din am-in ay ipogaw ay bomasolan di gait na ya am-in abe ay mangam-amag si lawa. <sup>42</sup> Itpig das daida sin kad-an di apoy ay adi kadm-ep, et man-anog-og da dowan da aben manggayetget. <sup>43</sup> Ngem din nalinteg ay ipogaw Diyos et mankoniniing da ay kaman din agew sin panturayan Ama da. Dakayo ay manmannge, nemnemen yo san dinnge yo.”

### *Din Pangarig Maipanggep Si Balitok Ya Perlas*

<sup>44</sup> Intoloy Jesus ay nangwani, “Din panturayan Diyos et maiarig si balitok ay naikakaot si nom-a. Idi dinteng di esa ay ipogaw, peteg di ragsak na. Intabona kasin et ena inlako din am-in ay sanikwa na, pag mantaoli ay manglako sin nom-a ay sana.

<sup>45</sup> “Di esa abe ay kaiarigan di panturayan Diyos et kaman mannigosyo ay nanganapanap si kagkagam-is ay perlas. <sup>46</sup> Idi inila na di esa ay nabanobanol, sinmaa et inlako na din am-in ay sanikwa na ta way iyat na ay en manglako sin perlas ay sana.”

### *Din Pangarig Maipanggep Sin Tabokol*

<sup>47-48</sup> “Din panturayan Diyos et maiarig abe si tabokol ay inoy-oy di manabtabokol sin baybay enggana ay mapno si ad-ado ay kalasin di nigay. Pag dan goyoden sin benget na et tinmokdo da ay mamispis sin ina da. Din mayat ay maisida et inpeey da sin timba, ngem din lawa et inwasit da. <sup>49</sup> Kaman nina abe di mapasamak sin panpatinggaan di lobong. Din aanghel et en da pispisen din lawa ay ipogaw ta ikasin da sin siked. <sup>50</sup> Pag dan iwasit sin apoy ay adi kadm-ep, et man-anog-og da dowan da aben manggayetget.

<sup>51</sup> “Ay naawatan yo am-in dana?” kanan Jesus.

“Aw,” kanan da.

<sup>52</sup> Pag kanan Jesus, “Maawatan yo ngarud ay mo waday maestron di linteg ay mamati sin it-itdok maipanggep si panturayan Diyos, maiarig si akin beey ay ammo na ay mangibela sin baak ya baro ay maosal ay naidodolin sin bodega na.”

‡ 13:32 Din kalasin di mostasa ay mais-ek sin ilin di Judio et dakdake mo din mais-ek sinan Pilipinas. Din kakayangan et emey ay sinpo ya dowan ay piya. § 13:35 Salmo 78:2.

*Din Nanigaan Da En Jesus Ed Nazaret  
(Mar. 6:1-6; Luc. 4:16-30)*

<sup>53</sup> Idi nakaitdos Jesus en dana ay pangarig, kinmaan sidi <sup>54</sup> et nantaoli sin ili ay nadakdak-ana. En nan-itdo sin sinagoga, et nasdaaw din nanngge yan kanan da, “Intoy nangaan ninas laing na ya panakabalin ay mangamag si nakaskasdaaw? <sup>55</sup> Ay baken si naey aya din anak di karpintiro? Ay baken si Maria din si ina na ya din aag-i na et da Santiago, Jose, Simon ya si Judas? <sup>56</sup> Din aag-i na abe ay babai et man-ili da met laeng isna. Into ngarud di nangaanas laing ya panakabalina?” <sup>57</sup> Isonga nasnit da en sisya et adi da namati.

Asi na et kanan en daida, “Maga di mamadto ay bigbigen di kailiana ya pamilya na, ngem bigbigen da met sin odom ay ili.” <sup>58</sup> Et gapo ta adi da namati en sisya, baken ad-adoy inamag na ay nakaskasdaaw sidi.

## 14

*Din Nateyan Juan Ay Mamonbonyag  
(Mar. 6:14-29; Luc. 9:7-9)*

<sup>1</sup> Sin doy ay timpo, nadamag Gobernador Herod\* ed Galilea din inam-amag Jesus <sup>2</sup> yan kanana sin oopisyal na, “Si naey si Juan ay Mamonbonyag ay natago kasin. Siya di din gapo ay wada en sisya di panakabalin ay mangam-amag en dana ay nakaskasdaaw.”

<sup>3-4</sup> Say kanan Herod na begew sin napasamak ed idi. Tan inpadpap nas Juan ya inpabalod na ay nakakadinaan begew sin namagbagaan Juan en sisya. Tan si Herod et inasawa na din aydo na ay si Herodias ay asawan iyogtana ay si Felipe. Et inpidwapidwan Juan ay nangwani en kontran di linteg ay asawaenas sisya. <sup>5</sup> Isonga layden Herod ay ipapse si Juan, ngem emegyat sin kaipoipogaw, tan binigbig das Juan ay mamadto.

<sup>6</sup> Domateng pay din agew ay naianakan Herod, nansala din balasang ay anak Herodias sin sangoanan di am-in ay naayagan ay nakiragragsak. Palalo ay ginanganas Herod din nansalaana, <sup>7</sup> isonga nan-ikari en sisya ay nangwani, “Mansapataak ay idawat ko en sik-a di olay sino ay kedawem!”

<sup>8</sup> Pag et itogon Herodias sin balasang na ay kanana en Herod, “Paialim ngarud isna din toktok Juan ay Mamonbonyag ay maipeey si palato.”

<sup>9</sup> Mansakit nemnem Herod sin nannggeanas di, ngem gapo ta nansapata sin sangoanan di ad-ado ay inayagana, inbilina ay matongpal din kindaw di balasang, <sup>10</sup> et inapoto na din toktok Juan sin balodan. <sup>11</sup> Inpeey das palato et in-ey da sin balasang ay en nangidawat en ina na. <sup>12</sup> Idi nadamag din papasolot Juan din nay naamag, en da ina din awak na et en da inponpon. Pag dan emey ibaga en Jesus.

*Din Namakanan Jesus Sin Kaipoipogaw Ay Nasurok Si Lima Ay Libo  
(Mar. 6:30-44; Luc. 9:10-17; Jn. 6:1-14)*

<sup>13</sup> Sin nannggean da Jesus sin napasamak, kinmaan das di et nanlogan das bangka ay emey sin naidodolin ay lugar ta maeng-enggay da koma. Ngem idi inammoan din kaipoipogaw ay inmey da, nanlobwat da sin kailiili et nandad-an da ay nanganonod. <sup>14</sup> Idi sinmanglad da Jesus et inila na din ad-ado ay ipogaw ay inmonod, naseg-angan en daida et inagasana din waday sakit na.

<sup>15</sup> Idi malablabi, inmey din papasolot na en sisya et kanan da, “Ibagam sin ipogaw ta en da manlakos kanen da sin naisasag-en ay il-ili, tan nay met ay enggay malablabi yan naidodolin isna.”

<sup>16</sup> Ngem kanan et Jesus en daida, “Olay adi da emey. Dakayo di mamakan en daida.”

<sup>17</sup> Pag dan kanan, “Lima ay tinapay ya doway ay piskaw et anggoy di wadas na.”

\* **14:1** Si Herod ay nay et Herod Antipas ay anak din si Herod ay ari sin kamoyang Jesus. Din kosto ay titolo na et tetrarco, ngem kaman gobernador di saad na.



<sup>18</sup> Ngem kanan pay Jesus, “Iali yos na.” <sup>19</sup> Inbilina ay itokdon din kaipoipogaw sin logam. Pag nan alaen din lima ay tinapay ya doway ay piskaw, et tinangad na ed langit ay nan-iyaman en Diyos. Asi na pag kinittoyen et indawat na sin pasolot na ta iwattwat da sin kaipoipogaw. <sup>20</sup> Nangan da amin et nabsog da. Olnongen da pay din nabay-an, sinpo ya doway ay basket di napay-an sin namekmek ay makan. <sup>21</sup> Di kabibilang di nangan et emey ay lima ay libo di nankakay ya babbaro, powira di babbabai ya anan-ak.

*Din Nandan Jesus Sin Labaw Di Danom*

*(Mar. 6:45-52; Jn. 6:16-21)*

<sup>22</sup> Pag panloganen Jesus din papasolot na sin bangka ta mangon-ona da sin demang na dowan pasaaen din kaipoipogaw. <sup>23</sup> Idi inpasaa nas daida, nantikid sin dontog ay esesa na ay en mankararag. Idi nalabi, wada pay laeng si Jesus sin dontog <sup>24</sup> dowan pay din bangka ay nanloganan di pasolot na et enggay inmaddawi sin benget na. In-giwewiwed din dalloyon tan maiab-abet din dagem. <sup>25</sup> Gomabgabis pay, nanballalong si Jesus yan nandan sin labaw di danom ay omasag-en en daida. <sup>26</sup> Sin nangilaan di papasolot na en sisya ay mandad-an sin labaw di danom, palalo ay inmegyat da. “Banig!” kanan da ay nanbogaw dowan da et man-olakis si egyat da.

<sup>27</sup> Kakali si Jesus en daida et kanana, “Laton! Sak-en na. Adi kayo emegyat!”

<sup>28</sup> Pag et kanan Pedro, “Apo, mo tet-ewa ay sik-a sa, omayag ka ay emeyak issa ay mandan sin labaw di danom.”

<sup>29</sup> “Omali ka,” kanana.

Pag komaan si Pedro sin bangka et inlogi na ay mandan ay emey en Jesus. <sup>30</sup> Ngem idi nilikna na din kapigsan di dagem, inmegyat et inlogi na ay malned. Kabogaw ay nangwani, “Apo, omisalakan ka!”

<sup>31</sup> Kaiadawas Jesus sin takkay na et kagamdot en sisya. “Apay nga at-atik di talek mo? Apay nga nandowadowa ka?” kanana.

<sup>32</sup> Pag dan somakyab sin bangka, et ginminek din dagem. <sup>33</sup> Asi pag dayawen din nanlologan sisya ay nangwani, “Tet-ewa ay sik-a din Anak Diyos.”

*Din Nangagasan Jesus Sin Mansaksakit Ed Gennesaret*

*(Mar. 6:53-55)*

<sup>34</sup> Idi nakaagadang da pay ya sinmanglad da sin sakop di Gennesaret, <sup>35</sup> naimatonan din man-ilis di si Jesus. Isonga paayag da din mansaksakit sin am-in ay nandinmang ay ili ta iala da en sisya. <sup>36</sup> Nanpakpakaasi da ay giwiten koma din mansakit olay owat din gayadan di bado na. Et am-in ay nangiwit et nailatonan da.

## 15

*Din Kaitkenan Di Init-itdon Di Fafariseo Sin Linteg Diyos*

*(Mar. 7:1-13)*

<sup>1</sup> Sin namingsan, wada di Fafariseo ya mamaestron di linteg ay inmey sin kad-an Jesus ay napo ed Jerusalem. Pinoot da en sisya, <sup>2</sup> “Apay nga lablabsingen din papasolot mo din ogali ay tinawid tako sin aap-o tako? Sana met ay mangmangan da yan adi da inonodan din kosto ay iyat di manbo.”

<sup>3</sup> Sinongbatan Jesus yan kanana, “Et mo si dakayo pay, lablabsingen yo met din bilin Diyos ta say onodan yo din ogali yo. <sup>4</sup> Tan din bilin Diyos et kanana, ‘Dayawem da amam en inam,’ et ‘Mo waday mangipalawlawwa en ama na ono en ina na, masapol ay matey.’\* <sup>5</sup> Ngem din it-itdo yo et natken. Tan kanan yo en mo waday ibadang koman di ipogaw en ama na ono en ina na, olay mo adi na idawat. Basta manpambal en daida ay mangwani, ‘Din ibadang ko koma en dakayo et enggay inkarik ay maidaton en Diyos.’ <sup>6</sup> Et kanan yo en mo say ibaga na di, olay adi na dayawen da ama na ay mangidawat si kasapolan da.

\* 15:4 Exodo 20:12; Deuteronomio 5:16.



Begew sin sana ay ogali ay on-onodan yo, nanbalinen yo damdama ay magay silbin din kalin Diyos. <sup>7</sup> Dakayo ay agin sisiged! Tet-ewa din nay kanan Diyos ay inpadton Isaias maipanggep en dakayo ay kanana,

<sup>8</sup> ‘Dana ay ipogaw, daydayawen das sak-en sin kali da, ngem addawi di nemnem da en sak-en. <sup>9</sup> Magay silbin di panaydayawan dan sak-en, tan din it-itdo da ay owat bilbilin di ipogaw et kanan da en bilbilin ko.’ ”†

### *Din Mangipakadodogis Si Ipogaw (Mar. 7:14-23)*

<sup>10</sup> Pag ayagan Jesus din kaipoipogaw yan kanana en daida, “Dengngen yo na ta say maawatan yo. <sup>11</sup> Baken din ipasgep di ipogaw sin tepek na di mangipakadodogis en sisya mo adi et din ipabala na sin tepek na.”

<sup>12</sup> Pag somag-en din papasolot Jesus en sisya yan kanan da, “Ay ammom ay nasnit din Fafariseo sin inbagam?”

<sup>13</sup> Ngem kanan et Jesus ay nangiarig, “Awni et magabot am-in ay esek ay adi inis-ek Amak ay wadad langit. <sup>14</sup> Bay-an yo ngarud da doy ay Fariseo, tan kaman dan nagodab ay mangipangpango si iib-a da sin danan. Et mo nagodab di mangipangpango sin ib-a na ay nagodab, matekdag da ay dowas sin deppas.”

<sup>15</sup> Pag kanan Pedro, “Iolog mo kod din pangarig ay inbagam ed kaonyan.”

<sup>16</sup> Kanan Jesus, “Dakayo abe, ay adi yo pay laeng maawatan? <sup>17</sup> Ay adi yo ammo ay din ipasgep di ipogaw sin tepek na et emey sin eges na et pag bomala? <sup>18</sup> Ngem din ipabala na sin tepek na et napo sin nemnem na, et siya dana di mangipakadodogis en sisya. <sup>19</sup> Tan din nemnem di ipogaw di kapoan di am-in ay lawa ay panggep. Et din lawa ay panggep di mangiturong si ipogaw ay mangamag si lawa ay kaman dana: manpese, makikamalala ya odom ay kadodogis, mangakew, mantistigo ay man-etek, ya mangipalawlawas si ib-a na. <sup>20</sup> Siya dana di mangipakadodogis si ipogaw. Ngem din panganan di ipogaw ay adi nanbo ay kosto et baken di si mangipakadodogis en sisya.”

### *Din Talek Di Esa Ay Babai Ay Taga-Canaan (Mar. 7:24-30)*

<sup>21</sup> Pag komaan da Jesus sidi et inmey da sin sakop di Tiro ya Sidon. <sup>22</sup> Wada di babai ay Gentil‡ ay man-ilis di. Inmasag-en en Jesus yan inpidwapidwa na ay mangibogaw, “Apo, polin David, maseg-ang ka paabe! Tan palalo ay mapalpaligatan din anak ko ay balasang ay kinapet di dimonyo.”

<sup>23</sup> Binaybay-an Jesus sisya ay ginmiginek, isonga inmasag-en din papasolot na en sisya yan kanan da, “Olay ngin amagem din laydena ta komaan, tan nay met ay omonoonod ay manbogbogaw.”

<sup>24</sup> Ngem kanan Jesus, “Magay odom ay nangibaaan Diyos en sak-en mo adi et anggoy sin Israelita ay maiarig si nasangaw ay karnero.”

<sup>25</sup> Ngem din babai ay doy et inmey pay dedan nandokmog sin sangoanan Jesus. “Apo, bomadang ka paabe,” kanana.

<sup>26</sup> Asi et kanan Jesus ay nangiarig, “Baken met kosto mo maipakan din kanen di anak si aso.”

<sup>27</sup> “Siya kayman, Apo,” kanan din babai, “ngem olay din aso et kanen da din mogay ay matekdag mo mangmangan din among da.”

<sup>28</sup> Pag kanan Jesus, “Ina, dakdake san talek mo! Matongpal ngarud din kindaw mo.” Et sin siya di ay oras, nailatonan din anak na ay balasang.

### *Din Nangagasan Jesus Sin Ad-ado Ay Waday Sakit Na*

† 15:9 Isaias 29:13. ‡ 15:22 Din kanana sin Griego et: babai ay taga-Canaan. Di laydena ay kalien et babai ay Gentil ono baken Judio.

<sup>29</sup> Pag komaan si Jesus et inmey sin benget di lebeng ay Galilea. Nantikid sin kadondontogan et tinmokdo. <sup>30</sup> Palalo ay ad-ado di inmey en sisya ay nangitaktakin si mansaksakit. Wada da di napilay, nagodab, paralitiko, naomel ya ad-adoy odom. Iney da sin sangoanan Jesus, et inagasanan daida. <sup>31</sup> Siya di et nasdaaw din kaipoipogaw et dinaydayaw das Diyos ay Diyos di Israelita, tan inila da ay mankalkali din naomel, nailatonan din paralitiko, manmandan din napilay, ya makaila din nagodab.

*Din Namakanan Jesus Sin Nasurok Si Opat Ay Libo Ay Ipogaw  
(Mar. 8:1-10)*

<sup>32</sup> Idi toloy agew das di, inayagan Jesus din papasolot na et kanana, “Masmaseganganak sin nay kaipoipogaw, tan toloy agew ay nakitetee das na en datako yan enggay naabos baon da. Adiak layden ay pasaaen daida mo adi da nangan pay laeng, tan mo masidingan da sin danan.”

<sup>33</sup> “Aw kayman,” kanan din papasolot na, “ngem intoy pangaan tako pay si omanay ay kanen da, tan nay met ay naidodolin isna?”

<sup>34</sup> “Pigay tinapay yo?” pinoot Jesus.

“Pitpito,” kanan da, “ya at-atik pay ay piskaw ay kinittoy.”

<sup>35</sup> Siya et di patokdoen Jesus din kaipoipogaw. <sup>36</sup> Pag nan alaen din pito ay tinapay ya din piskaw et nan-iyaman en Diyos. Asi na pag kinittoy en indawat na sin papasolot na ta iwatawat da sin kaipoipogaw. <sup>37</sup> Nangan da amin et nabsog da. Olnongen da pay din nabay-an, pito ay baskit di napay-an sin nabay-an ay makan. <sup>38</sup> Di kabibilang di nangan et opat ay libo di nankakay ya babbaro, powira di babbabai ya anan-ak.

<sup>39</sup> Pag pasaaen Jesus din kaipoipogaw et nakilogan sin papasolot na sin bangka ay emey sin sakop di Magadan.

## 16

*Din Nankedawan Din Fariseo Ya Sadduceo Si Sinyal  
(Mar. 8:11-13; Luc. 12:54-56)*

<sup>1</sup> Wada da di Fariseo ya Sadduceo ay inmey en Jesus. Layden da ay padasen sisya, isonga dawaten da ay paila nay nakaskasdaaw ay sinyal ay si Diyos di nangibaa en sisya. <sup>2</sup> Ngem kanan Jesus, “Mo madipdipos din agew ya mandalangdang ed daya, kanan yo en, ‘Laton ay maegew sin kabigatana.’ <sup>3</sup> Sin agsapa abe, mo mandalangdang ed daya ya manlibliboo, kanan yo en, ‘Omodan samet.’ Kabaelan yo ay pontosan mo man-odan ono maegew mo ilaen yo ed daya, ngem adi yo baw ammo din olog di sinyal ay inpappailan Diyos maipanggep sin maam-amag ed wani. <sup>4</sup> Lawlawwa din ipogaw ed wani, tan dinokogan da din tet-ewa ay Diyos. Ipapilit da ay ipailak di nakaskasdaaw ay sinyal en daida, ngem iwed met maipaila mo adi anggoy di sinyal ay kaman din napasamak en Jonas ed idi.” Kanan Jesus di, pag nan taynan daida et nadipos.

*Din In-arig Jesus Sin It-itdon Di Fariseo Ya Sadduceo  
(Mar. 8:14-21)*

<sup>5</sup> Idi nakaagadang da Jesus sin demang di lebeng, ninemnem din papasolot na ay magay baon da ay tinapay. <sup>6</sup> Pag kanan Jesus en daida, “Siliban yo din labaduran di Fariseo ya Sadduceo.”

<sup>7</sup> Sin nangibagaanas di, nanngangalat da ay nangwani, “Say kanan Jesus di, tan magay baon tako ay tinapay.”

<sup>8</sup> Ammon Jesus din ngalngalaten da, isonga kanana en daida, “Ay apaw kayo! At-atik anggoy di talek yo! Apay nga madandanagan kayo si magay tinapay yo? <sup>9</sup> Ay adi yo pay laeng maawatan? Ay nilinglingan yo din lima ay tinapay ay inmanay sin nasurok si lima ay libo ay ipogaw? Pigay baskit di pinay-an yos nabay-an? <sup>10</sup> Yan din pito ay tinapay

ay inmanay sin nasurok si opat ay libo ay ipogaw, pigay baskit di pinay-an yos nabayan? <sup>11</sup> Apay ngarud ay adi yo pay laeng maawatan ay baken tinapay di inbagbagak en dakayo ed kaonyan? Din inbagak et siliban yo din labaduran di Fariseo ya Sadduceo!”  
<sup>12</sup> Et pag dan maawatan ay din inbagbagan Jesus ay siliban da et baken din labadura ay maosal si oton di tinapay mo adi din it-itdon di Fariseo ya Sadduceo.

### *Din Nangibagaan Pedro Mo Sino Si Jesus*

*(Mar. 8:27-30; Luc. 9:18-21)*

<sup>13</sup> Idi sinmawang da Jesus sin sakop di Cesarea Filipos, pinoot na sin papasolot na, “Sinoy pangwanin di kaipoipogaw en sak-en ay Anak di Ipogaw?”

<sup>14</sup> “Wada di mangwani en sik-a si Juan ay Mamonbonyag. Kanan di odom en sik-a si Elias, yan kanan aben di odom en sik-a si Jeremias ono odom ay mamadto ed nabaon,” insongbat da.

<sup>15</sup> “Ngem dakayo pay,” kanan Jesus, “sinoy pangwani yo en sak-en?”

<sup>16</sup> Kanan Simon Pedro, “Sik-a din Messias ay Anak di matmatago ay Diyos.”

<sup>17</sup> Pag kanan Jesus, “Nagatat ka, Simon ay anak Jonas, tan baken ipogaw di nangipaamos na en sik-a mo adi et si Amak ed langit. <sup>18</sup> Et mo sak-en pay, ibagak ay sik-a si Pedro, di olog na et bato. Din bato ay nay di pangisaadak sin iglesiak ay siya da din am-in ay mamati en sak-en, et din panakabalin di pese,\* adi makaabak en daida. <sup>19</sup> Idawat ko en sik-a din sosi† ay panbokat sin panturayan Diyos, et olay sino ay iparit mo isnan daga et iparit aben Diyos ed langit. Olay sino abe ay ipalobos mo isnan daga et ipalobos aben Diyos ed langit.”‡ <sup>20</sup> Pag dadlon ibilin Jesus sin papasolot na en adi da polos ibagbaga si olay sino ay ipogaw ay sisya din Messias.

### *Din Nangipadtoan Jesus Sin Panligatana Ya Kateyana*

*(Mar. 8:31-33; Luc. 9:22)*

<sup>21</sup> Manlogi sin timpo ay doy, inlogin Jesus ay mangilawag sin papasolot na di mapasamak en sisya sin tapin di agew. Kanana, “Masapol ay emeyak ed Jerusalem et dadlon pomaligat din aam-a ya din papangolon di papadi ya din mamaestron di linteg. Omipapse da, ngem tagoen Diyos kasin sak-en sin maikatlo ay agew.”

<sup>22</sup> Asi et paay-ayeden Pedro yan inlogi na ay mangyamyam en sisya ay nangwani, “Apo, adi koma ipalobos Diyos din inbagam! Adi kabalin ay mapasamak dana en sik-a!”

<sup>23</sup> Sinagong Jesus sisya yan kanana, “Komaan kas na ay Satanas! Somangsangaw ka! Tan din nemnemnemem et baken din layden Diyos mo adi et din layden di ipogaw.”

### *Din Kabibiyag Di Manbalin Ay Pasolot Jesus*

*(Mar. 8:34-9:1; Luc. 9:23-27)*

<sup>24</sup> Pag kanan Jesus sin papasolot na, “Mo sino di mayad ay manbalin ay pasolot ko, masapol ay pandokogana din awak na ya tilidena din krus na ta asi makiey en sak-en.

<sup>25</sup> Tan din mangipatpateg sin awak na et matey met laeng, ngem din matey begew sin pammati na en sak-en et waday biyag ay iwed patingga na ay idawat Diyos en sisya.

<sup>26</sup> Tan sino aya di maganab di ipogaw mo okaena din intiro ay lobong yan asi et malitaw din biyag na et madosa ay eng-enggana? Maga! Tan magay mabalin ay isokat di ipogaw si biyag na. <sup>27</sup> Tan sak-en ay Anak di Ipogaw et omaliak ay mangikoyog si aanghel ko ya ipailak abe din dayaw Amak. Asiak gon-gonaan di esa ya esa ay ipogaw ay maibasar sin inam-amag na. <sup>28</sup> Tet-ewa nan ibagak ay wada en dakayo isna di daan pay laeng di kateyan da et ilaen das sak-en ay Anak di Ipogaw sin omaliak ay manturay.”

\* **16:18** panakabalin di pese –Din kanana sin Griego et: pasbol ay segpan ed Hades ay kad-an di natey. Di layden di pasbol ay kalien et panakabalin. † **16:19** Di layden di sosi ay kalien et kalebbengan. ‡ **16:19** Di esa abe ay kaiologan nina sin Griego et: ... et olay sino ay iparit mo isnan daga et enggay inparit aben Diyos ed langit. Olay sino abe ay ipalobos mo isnan daga et enggay inpalobos aben Diyos ed langit.

## 17

### *Din Nanbaliwan Di Kailaan Jesus (Mar. 9:2-13; Luc. 9:28-36)*

<sup>1</sup> Emey pay di enem ay agew, inayagan Jesus si Pedro ya din sin-agi ay da Santiago en Juan, et nantikid da si esay nakayang ay dontog ay ang-anggoy da. <sup>2</sup> Il-ilaen da pay sisya, nanbaliw di kailaana. Din ropa na et somisili ay kaman din agew ya din bado na abe et kinmilakilat ay komonkoniniing.

<sup>3</sup> Pag et manpailas da Moses en Elias ay makingalngalat en Jesus. <sup>4</sup> Kanan Pedro en sisya, “Apo, mayat din kawada takos na. Mo panlaydam, man-amagak et adis na si tolo ay pansidoman ta okam di esa, okan Moses di esa, ya okan Elias di esa.”

<sup>5</sup> Idi mankalkali pay laeng, kadateng di somisili ay liboo et sinalinanas daida am-in. Pag wada di kali ay napo sin liboo ay nangwani, “Si naey di laydelaydek ay anak ko ay kakapnekak. Dengngen yo din kanana!”

<sup>6</sup> Sin nanngaan din papasolot Jesus sin kali ay nay, kadokmog da ay nanyakog-ong si palalo ay egyat da. <sup>7</sup> Pag somag-en si Jesus yan kinapay nas daida ay nangwani, “Ibangon yo. Adi kayo emegyat.” <sup>8</sup> Manmeswat da pay yan magay odom si inila da mo adi et ang-anggoy Jesus.

<sup>9</sup> Idi manballalong da pay, inbilin Jesus en daida, “Adi yo daddad-aten din nay naipaila en dakayo si olay esa ay ipogaw enggana ay sak-en ay Anak di Ipogaw et matagoak kasin.”

<sup>10</sup> Pag pooten din pasolot na, “Mo tet-ewa din kanam en masapol ay matey ya matago ka kasin, apay ngarud ay it-itdon di mamaestron di linteg ay masapol ay mangon-ona ay omali si Elias mo din Messias ta olnosena di am-in?”\*

<sup>11</sup> “Tet-ewa iman din it-itdo da ay sana,” kanan Jesus ay sinombat. <sup>12</sup> “Ngem kanak abe en dakayo ay enggay inmalis Elias, ngem adi naimatonan di ipogaw mo adi et ol-olay di inyaat da en sisya. Et siya abe ay paligaten das sak-en ay Anak di Ipogaw.” <sup>13</sup> Sin nangwanian Jesus sisi, pag maawatan din papasolot na ay si Juan ay Namonbonyag di inbagbaga na.

### *Din Nangipakaan Jesus Sin Anito Ay Kinmapet Si Anak (Mar. 9:14-29; Luc. 9:37-43)*

<sup>14</sup> Idi nakaballalong da, ad-adoy dinatngan da ay ipogaw. Di esa en daida ay lalaki et inmasag-en en Jesus ya nandokmog sin sangoanana. <sup>15</sup> Kanana, “Apo, seg-angam kod nan anak ko ay mankedas. Tan mo domateng di kedas na, palalo ay maligligatan. Namin ado ay naidangdang-op ya naibenbenben. <sup>16</sup> In-alik sin papasolot mo, ngem adi da kabaelan ay agasan sisya.”

<sup>17</sup> “Ay daetan kayo pay! Adi kayo mamati dowan kayon adi kakwani!” kanan Jesus ay sinombat. “Kaman kayman nabayabayag di nakiteteek en dakayo! Ay ken manpigapiga pay di anos ko en dakayo?” Pag nan kanan sin aman di anak, “May, ialim isna din anak mo.” <sup>18</sup> Pag ibilin Jesus sin anito ay komaan yan tinaynana din anak ay sana et nailatonan ay dagos.

<sup>19</sup> Maaw-awni pay ay ang-anggoy Jesus ya din papasolot na, pinoot da en sisya, “Apay nga adi mi binaelan ay nangipakaan sin anito ay doy?”

<sup>20</sup> “Tan kolang di pammati yo,” kanan Jesus ay sinombat. “Tet-ewa nan ibagak en dakayo ay olay mo kitkittoy di pammati yo ay kaman din kakitkittoyan ay bin-i, mabalin ay kanan yo sin dontog ay nay, ‘Demenden kas di,’ et demenden tet-ewa. Maga polos di adi yo kabaelan! <sup>21</sup> Ngem din kaman nidi ay anito et adi komaan mo din mangipakaan en sisya et adi na ipapasnek ay mankararag en Diyos.”†

\* **17:10** Malakias 4:5. † **17:21** Din versikulo ay nay et maga sin kaad-adoan ay manuskrito sin Griego, ngem wada sin Marcos 9:29.

*Din Nangipidwaan Jesus Ay Nangolit Sin Kateyana  
(Mar. 9:30-32; Luc. 9:44-45)*

<sup>22</sup> Sin esay agew ay nasinop da Jesus ya din papasolot na ed Galilea, kanan Jesus en daida, “Sak-en ay Anak di Ipogaw, awni et maipolangak sin kaibaw ko <sup>23</sup> et pomse da, ngem tagoen Diyos kasin sak-en sin maikatlo ay agew.” Sin nanngean din papasolot nas di, peteg ay masmasadot da.

*Din Namayadan Da Jesus Sin Bowis Di Timplo*

<sup>24</sup> Idi sinmawang da Jesus ya din papasolot na ed Capernaum, inmey din mansingsingil si bowis di Timplo en Pedro et pinoot da, “Ay manbaybayad di maestro yo si bowis di Timplo?”

<sup>25</sup> “Aw yan,” kanan Pedro.

Senggep pay si Pedro sin beey ay kad-an Jesus, nangon-onas Jesus ay mankali yan kanana, “Ay Simon, sinoy pannemnem mo? Intoy pansingsingilan di aari isnan daga si bowis? Ay sin an-ak da ono odom ay ipogaw?”

<sup>26</sup> “Sin odom adi ay ipogaw,” kanan Pedro.

Kanan aben Jesus, “Mo siya sa ngarud, adi masapol ay manbayad din an-ak da. <sup>27</sup> Ngem adi tako koma sinsiniten din ipogaw ay nay, isonga en ka mamannait sin lebeng. Din damo ay bannaitam et takawem tepek na yan mailam di siping ay omanay si ibayad ta ay dowa. Alaem et en ka idawat en daida ta mabayadan bowis ta.”

## 18

*Sino Din Kangatoan  
(Mar. 9:33-37; Luc. 9:46-48)*

<sup>1</sup> Sin timpo ay doy, inmey din papasolot Jesus en sisya yan kanan da, “Sino en dakami di kangatoan sin panturayan Diyos?”

<sup>2</sup> Siya di inayagan Jesus di esay anak et inpapika na sin nan-gawaan da. <sup>3</sup> Pag nan kanan, “Tet-ewa nan ibagak en dakayo ay mo adi yo baliwan di nemnem yo ta mais-o kayos anan-ak, adi kayo polos maitapi sin panturayan Diyos. <sup>4</sup> Isonga din kangatoan sin panturayan Diyos et din mangibabas awak na ta komaman din anak ay nay. <sup>5</sup> Et olay sino ay mangawat si nababa ay ipogaw ay kaman nina ay anak manbegew sin pammati na en sak-en et sak-en di inawat na.”

*Maipanggep Si Pan-gapoan Di Solisog  
(Mar. 9:42-48; Luc. 17:1-2)*

<sup>6</sup> “Ngem olay sino ay manolisog ta manbasol din olay esa en da naey ay kababaan ay ipogaw ay namati en sak-en, agpos et koma mo tay-adan din bagang na si madagsen ay bato asi maitpig sin baybay mo din pangitoloyana sin solisog na. <sup>7</sup> Kaseseg-ang di kaipoipogaw isnan daga begew sin ad-ado ay solisog ay sangsangoen da. Wada kayman dedan di domteng ay solisog, ngem kaseseg-ang pay din ipogaw ay pan-gapoan di solisog ay sana. <sup>8</sup> Isonga mo din takkay mo ono sikim di panbasolam, potoam ta iwasit mo. Tan agpos mo en ka makilak-am sin biyag ed langit ay napopotoan di esay takkay mo ono sikim mo din dodoway takkay mo ono sikim yan maitpig ka sin kad-an di apoy ay adi kadm-ep. <sup>9</sup> Din matam abe, mo say panbasolam, okitem ta iwasit mo. Tan agpos mo en ka makilak-am sin biyag ed langit ay bolding ka mo din dodoway matam yan maitpig ka sin apoy ed inferno.”

*Din Nalitaw Ay Karnero  
(Luc. 15:3-7)*

<sup>10</sup> “Ilaen yo ta adi yo laslasoyen di olay esa en dana ay magay kaibilangan da. Tan kanak en dakayo en kanayon ay wada din aanghel da sin kad-an Amak ed langit. <sup>11</sup> Tan



sak-en ay Anak di Ipogaw et inmaliak isna ta enak anapen ya isalakan din nalitaw ay ipogaw.\*

<sup>12</sup> “Kaspangarigan, mo wada di nangin oka si sin-gasot ay karnero yan malitaw di esa, sino ngin di amagena? Adi na ngata taynan din siyamapolo ya siyam sin pastolan sin kabilbiligan ta ena anapen din nalitaw. <sup>13</sup> Tet-ewa nan ibagak en dakayo ay mo datngena din es-esa ay nalitaw, peteg di ragsak na mo din ragsak na sin siyamapolo ya siyam ay adi nalitaw. <sup>14</sup> Siya abe en Ama yo ed langit ay adi na layden ay maisian di olay esa ay kababaan ay ipogaw en sisya.”

#### *Din Amagen Sin Nakabasol En Datako*

<sup>15</sup> “Mo waday ib-am ay nakabasol en sik-a, en ka makingalat en sisya ay ang-anggoy yo ta ibagam en sisya din basol na. Mo patiena di ibagam, laton ay man-gayyem kayo kasin. <sup>16</sup> Ngem mo sigaana ay dengngen, asi ka man-ayag si esa ono doway ay ib-am ta say waday doway ono tolo ay mangipaneknek si am-in ay maibaga.† <sup>17</sup> Mo sigaana pay ay dengngen din ibagbaga da, ipaammom sin gimong, et mo sigaana pay ay dengngen din kankanan di gimong, ibilang yo ay ipogaw ay adi nangaammo en Diyos ono mansingsingil si bowis.

<sup>18</sup> “Tet-ewa nan ibagak en dakayo ay olay sino ay iparit yo isnan daga et iparit aben Diyos ed langit, ya olay sino abe ay ipalobos yo isnan daga et ipalobos aben Diyos ed langit.

<sup>19</sup> “Kanak pay en dakayo en mo mantotolag di doway en dakayo si maipanggep di kedawen yo en Amak ed langit, maitongpal en dakayo. <sup>20</sup> Tan mo nasisinop di olay doway ono tolo et anggoy begew sin nakies-esaan da en sak-en, wadaak sidi ay makikadkadwa en daida.”

#### *Din Opisyal Ay Magay Seg-ang Na Sin Gait Na*

<sup>21</sup> Pag emey si Pedro en Jesus yan kanana, “Apo, mo ipidwapidwan di gait ko ay manbasol en sak-en, mamin piga ay pakawanek sisya? Ay engganans mamin pito?”

<sup>22</sup> “Adiak kanan en mamin pito anggoy mo adi et mamin pitopolo ay pito,”‡ kanan Jesus ay sinombat. <sup>23</sup> “Tan din panturayan Diyos et maiarig si ari ay nannemnem ay mansingil si otang di oopisyal na.§ <sup>24</sup> Kailoglogi na ay mansingil yan waday opisyal ay naiey en sisya ay nakaotang si piga ay milyon.\* <sup>25</sup> Adi makabayad din opisyal ay sana, isonga inbilin din ari ay mailako di am-in ay sanikwa na ya mailako abes sisya, din asawa na, ya din aan-ak da ta manbalin das bag-en ta say mabayadan otang na. <sup>26</sup> Idi siya et di kadokmog din opisyal ay sana sin sangoanan di ari et nanpakpakaasi ay nangwani, ‘Apo, maseg-ang ka paabe! Anosam pay laeng sak-en ta bayadak am-in.’ <sup>27</sup> Siya et di naseg-angan din ari en sisya et pinogidas na din otang na. Pag nan palobosan.

<sup>28</sup> “Idi madipdipos din opisyal ay sana, dinatngana di gait na ay opisyal ay nakaotang en sisya si pigay libo et anggoy.† Kasee en sisya ay nangwani, ‘Bayadam otang mo!’

<sup>29</sup> “Pag et mandokmog din gait na ay sana yan nanpakpakaasi ay nangwani, ‘Maseg-ang ka paabe! Anosam pay laeng sak-en ta bayadak am-in.’ <sup>30</sup> Ngem sinigaana et inpabalod na enggana ay bayadana din otang na. <sup>31</sup> Idi inilan din gagait na ay opisyal din inamag na ay doy, peteg ay mansakit nemnem da, et inmey da sin ari ay among da et dinad-at da en sisya din am-in ay napasamak.

\* **18:11** Din versikulo ay nay et maga sin kaad-adoan ay manuskrito sin Griego. † **18:16** Deuteronomio 19:15.

‡ **18:22** Din kananas odom ay manuskrito sin Griego et: mamin pitopolo ya pito. Di laydena ay kalien et mamin pigapiga ay magay gedeng na. § **18:23** Din kanana sin Griego et: baa , ngem din laydena ay kalien et nangato ay oopisyal ay makaammo sin ad-ado ay pilak. \* **18:24** Din kanana sin Griego et: sinpo ay libo ay talento. Di esa ay talento et banol di enem ay libo ay denario, ya di esa ay denario et banol di poldiya. Isonga din otang na et banol di enemapolo ay milyon ay poldiya.

† **18:28** Din kanana sin Griego et: sin-gasot ay denario.



<sup>32</sup> “Asi et inpaayag din ari din opisyal na ay doy et kanana en sisya, ‘Lawlawo damdama san ogalim! Pinogidas ko din otang mo tan nan-adawag ka en sak-en.’ <sup>33</sup> Apay nga adi ka sineg-angan din gait mo ay opisyal ay kaman din inyat ko en sik-a?’ <sup>34</sup> Et begew sin palalo ay bonget din ari, kineddengana din opisyal ay doy ay mapaligatan sin balodan enggana ay bayadana din am-in ay otang na.” <sup>35</sup> Pag ipaanongos Jesus ay nangwani, “Et kaman nidi abe di amagen Amak ed langit sin esa ya esa en dakayo mo adi yo pakawanen ay sipoposo din gagait yo.”

## 19

### *Maipanggep Si Man-asawa Ya Man-idang* (*Mar. 10:1-12; Luc. 16:18*)

<sup>1</sup> Idi nakaitdos Jesus en dana ay banbanag, kinmaan ed Galilea et inmey sin demang di ginawang ay Jordan ay sakop di Judea. <sup>2</sup> Ad-ado di inmon-onod en sisya et inagasana din waday sakit da.

<sup>3</sup> Wada abe di Fafariseo ay inmey en Jesus ta padasen da ay mangiapat en sisya. Kanan da, “Ay ipalobos di linteg tako ay isian di lalaki di asawa na si kompormi ay begew?”

<sup>4</sup> Sinongbatan Jesus ay nangwani, “Ay adi yo binasa din naisolat ay kalin Diyos maipanggep sin namarsuaanas ipogaw? Din naisolat et kanana en din inyat di namarsua sin damo et inamag na di lalaki ya babai.\* <sup>5</sup> Pag nan kanan, ‘Say gapo na ay taynan di lalaki da ama na en ina na ta ibeey na din asawa na, et manbalin das es-esa.’† <sup>6</sup> Isonga baken dan dodowa mo adi et es-esa. Din nanbalinen ngarud Diyos si es-esa et adi koma pansianen di ipogaw.”

<sup>7</sup> “Aw ngin kayman,” kanan da. “Ngem apay ngarud ay ipalobos di linteg Moses ay idawtan di lalaki di asawa na si kasolatan ay mangipaneknek ay nansian da, pag nan pakaanen?”‡

<sup>8</sup> Kanan aben Jesus, “Inpalobos Moses ay isian yo din asawa yo begew sin kinakenteg di nemnem yo, ngem natken met di panggep Diyos sin damo. <sup>9</sup> Ibagak ngarud en dakayo ay din lalaki ay mangisian si asawa na malaksig mo nakilalaki et makibabai mo mangasawas odom.”

<sup>10</sup> Pag kanan din papasolot Jesus en sisya, “Mo kaman nidi ay adi kaisian di asawa, agpos et mo adi ta mangas-asawa.”

<sup>11</sup> Kanan pay Jesus, “Tet-ewa kayman ay waday ipogaw ay indawtan Diyos si kabaelan ay adi mangasawa, ngem din adi na indawtan et adi da makaanos sin nay ay inbaga yo. <sup>12</sup> Nankinalasi di gapo ay adi makaasawa di ipogaw. Waday naianak ay kaman dan nakakapon, di odom et kinapon di ib-a da ay ipogaw, ya di odom pay et adi da mangasawa ta say pan-es-esaen dan nemnem da sin pansilsilbian da en Diyos sin panturturayana. Din makabael ay mangonod isna et onodana koma.”

### *Din Namindisyonan Jesus Sin Anan-ak* (*Mar. 10:13-16; Luc. 18:15-17*)

<sup>13</sup> Sin namingsan wada di nangiey en Jesus si an-ak da ta kapayena ya ikararaganas daida. Inandiyan din papasolot na, <sup>14</sup> ngem kanan Jesus en daida, “Itay-on yo ta omali din anan-ak en sak-en. Adi yo andiyan, tan din kaman dana di maitapi sin panturayan Diyos.” <sup>15</sup> Pag nan kapayen ay mamindisyon en daida et pag komaan.

### *Din Lalaki Ay Nabaknang* (*Mar. 10:17-31; Luc. 18:18-30*)

<sup>16</sup> Sin namingsan abe, wada di lalaki ay inmey en Jesus. “Apo maestro,” kanana, “sinoy siged ay masapol ay amagek ta say wada en sak-en di biyag ay iwed patingga na?”

\* **19:4** Genesis 1:27. † **19:5** Genesis 2:24. ‡ **19:7** Deuteronomio 24:1-4.

<sup>17</sup> Kanan Jesus, “Apay nga pootem en sak-en maipanggep si siked? Tan ang-anggoy Diyos si siked. Ngem mo laydem ay makilak-am si biyag ay iwed patingga na, masapol ay patiem din bilbilin Diyos.”

<sup>18</sup> “Sino ay bilbilin?” pinoot kasin din lalaki.

“Adi ka manpespese, adi ka makikamkamalala, adi ka mangak-akew, adi ka mantistigo ay man-et-etek, <sup>19</sup> dayawem da amam en inam, § ya laylaydem di gait mo ay kaman din pananglayad mo sin awak mo,”\* kanan Jesus ay sinombat.

<sup>20</sup> Asi pay kanan din lalaki ay doy, “Tinongtongpal ko am-in dana ay bilbilin. Sino pay di masapol ay amagek?”

<sup>21</sup> Kanan aben Jesus, “Mo laydem ay maga di pankolangam, en ka ilako din sanikwam ta idawat mo din lako na si nabiteg, et mawada di kinabaknang mo ay indodolin Diyos ed langit. Asi ka omali ta manbalin ka ay pasolot ko.”† <sup>22</sup> Idi dinnge na din kanan Jesus ay doy, tinaynanas daida ay manladladingit, tan palalo ay baknang sisya.

<sup>23</sup> Pag kanan Jesus sin papasolot na, “Tet-ewa nan ibagak en dakayo ay naligat ay maitapi di baknang sin panturayan Diyos. <sup>24</sup> Kanak pay en nalaklaka ay senggep di kamel sin lokaw di dagom mo din kaitapian di baknang sin panturayan Diyos.”

<sup>25</sup> Sin nanngan di papasolot nas di, peteg ay nasdaaw da et kanan da, “Mo siya ngarud sa, sino ngin di maisalakan?”

<sup>26</sup> Insisin-eng Jesus daida yan kanana, “Mo ipogaw et adi da kabaelan ay mangamag isna, ngem mo si Diyos pay et kabaelana di am-in.”

<sup>27</sup> Pag et kanan Pedro, “Yan si dakami pay? Sino di gon-oden mi? Tan tinaynan mi di am-in ta manbalin kami ay pasolot mo.”

<sup>28</sup> “Aw kayman,” kanan Jesus, “yan tet-ewa pay din ibagak en dakayo ay mo mabaroan din lobong ay nay, maammoan din kinapateg ya panakabalin ko ay Anak di Ipogaw, tan tomokdoak sin tronok ay manturay. Ya dakayo abe ay papasolot ko et waday sinpo ya doway ay trono ay tokdoan yo ta okomen yo din kaipoipogaw ay naipoli sin sinpo ya doway ay an-ak Israel. <sup>29</sup> Olay sino ay manaynan sin beey na, aag-i na, da ama na en ina na, an-ak na ya daga na begew sin naitapiana en sak-en et mamin sin-gasot di awatena mo din banol di tinaynana ya makitawid abe si biyag ay iwed patingga na. <sup>30</sup> Ngem adado di nangato ed wani ay maibaba, ya ad-ado abe di nababa ed wani ay maipangato.”

## 20

### *Din Pangarig Maipanggep Si Nakipoldiya Sin Kaobasan*

<sup>1</sup> Kanan Jesus, “Din panturayan Diyos et maiarig si nakin okas kaobasan ay binmalas mapat-a ta en man-ilas mapoldiya. <sup>2</sup> Wada da di dinatngana et nakitolag en daidas esa ay denario si poldiya da, pag nan ibaa ay en man-obla sin kaobasan.

<sup>3</sup> “Maag-aggew pay, binmala kasin din nakin nom-a et inila na di manbolbolakbol sin markitan. <sup>4</sup> Kanana en daida, ‘Mo layden yo ay en makipoldiya sin kaobasak, lagboak dakayo si kosto.’ <sup>5</sup> Et inmey da nakiobla.

“Sin alas dosi ya siya abe sin alas tres, nan-iso di inyat din nakin nom-a ay sana. <sup>6</sup> Idi dandani ay alas singko, inmey kasin sin markitan yan wada pay di odom ay inila nas di ay owat dan manbolbolakbol. Kanana en daida, ‘Apay nga sinayang yo di esa ay agew ay owat kayon nan-ay-ayam?’

<sup>7</sup> “ ‘Maga di mamoldiya en dakami ngay,’ kanan da ay sinombat.

“ ‘May,’ kanan aben din nakin nom-a, ‘en kayo aben makiobla sin kaobasak.’

<sup>8</sup> “Idi pay madipdipos din agew, kanan din nakin nom-a sin kapatasa na, ‘Ayagam din man-ob-obla ta idawat mon poldiya da manlogi sin naodi ay en nakiobla enggana sin nangon-ona.’\* ”

§ 19:19 Exodo 20:12-16; Deuteronomio 5:16-20. \* 19:19 Levitico 19:18. † 19:21 Ilaen din footnote sin 9:9.

\* 20:8 Levitico 19:13.

<sup>9</sup> “Siya di inmali din nanlogi ay nan-obla sin alas singko, et nalagboan das sag-eesa ay denario. <sup>10</sup> Isonga idi inmali din nangon-ona ay nan-obla, namnamaen da ay ad-ad-ado di poldiya da, ngem kambaw sag-eesa ay denario met laeng di naidawat en daida. <sup>11</sup> Isonga nanmayotmot da sin nanpaobla en daida ay nangwani, <sup>12</sup> ‘Da naey ay naodi et es-esay oras anggoy di nan-oblaan da dowan pay dakami yan inan-anosan mi ay nan-ob-obla sin palalo ay segit sin intiro ay agew. Apay ngarud ay nan-iisoem din poldiya mi?’

<sup>13</sup> “ ‘Dengngem na ay ib-a,’ kanan din nakin nom-a sin esa en daida. ‘Adiak met sinowitik dakayo, tan nantolag takos esa ay denario, ay baken siya? <sup>14</sup> Alaem ngarud san lagbom et somaa ka. Mo laydek ay nan-iso di lagbon di naodi sin lagbo yo, adi ngata biyang ko di. <sup>15</sup> Ay bakenak aya lebbeng ay mangamag si laydek sin pilak ko? Ay inmapos kayo ngata tan adiak nan-imot?’ ”

<sup>16</sup> Pag ipaanongos Jesus ay nangwani, “Kaman nidi di mapasamak sin panturayan Diyos, tan din nababa ed wani et maipangato, ya din nangato ed wani et maibaba.”†

*Din Maikatlo Ay Nangibagaan Jesus Sin Kateyana*  
(Mar. 10:32-34; Luc. 18:31-34)

<sup>17</sup> Sin nantiktikidan da Jesus ay emey ed Jerusalem, inayagana din sinpo ya doway ay pasolot na ta omay-ayed da et kanana en daida, <sup>18</sup> “Dengngen yo. Nay ay tomiktikid tako ed Jerusalem. Mo somawang takos di, sak-en ay Anak di Ipogaw et maipolangak sin papangolon di papadi ya mamaestron di linteg. Keddengan das sak-en ay matey, <sup>19</sup> pag dan omipolang sin Gentil ta lomaslasoy ya somoplisoplit da yan pag dan omilansa sin krus, ngem sin maikatlo ay agew pay, matagoak kasin.”

*Din Kindaw Di Inan Da Santiago En Juan*  
(Mar. 10:35-45)

<sup>20</sup> Pag emey en Jesus din asawan Zebedeo ya din doway ay anak na, et nandokmog sisya sin sangoanan Jesus yan kanana, “Apo, wada kod di kedawek.”

<sup>21</sup> “Sinoy laydem?” kanan Jesus.

“Ikarim kod ay sin panturayam, makitokdo din doway anak ko ay nay en sik-a sin makannawan ya makannigid mo,” kanana ay sinombat.

<sup>22</sup> Asi et kanan Jesus sin doway ay pasolot na ay doy, “Adi yo ammo din ibagbaga yo. Ay maanosan yo aya din ligat ay nam-osek?”

“Mabalin,” kanan da.

<sup>23</sup> Pag kanan Jesus, “Siya kayman ay manligat kayo ay kaman din ligat ko. Ngem din tomokdo sin makannawan ya makannigid ko et magay lebbeng ko ay mangibaga, tan enggay pinilin Amak din tomokdos di.”

<sup>24</sup> Sin nanngean din sinpo ay gagait da, inbonget da din doway ay sin-agi ay doy. <sup>25</sup> Siya di inayagan Jesus daida am-in et kanana en daida, “Ammo yo ay din manturturay isnan daga et ipipilit da din layden da sin iturturayan da. Din nangato abe di saad na et ipaila da din turay da. <sup>26</sup> Ngem baken say iyat yo koma. Tan mo wada en dakayo di manglayad ay ngomato, masapol ay silbiana din gagait na ay kaman baa, <sup>27</sup> ya din manglayad ay kapatgan et masapol ay silbiana din gagait na ay kaman bag-en. <sup>28</sup> Tadonen yo komas sak-en ay Anak di Ipogaw, tan adiak inmali ay masilbian mo adi et ta mansilbiak si kaipoipogaw ya idawat kon biyag ko ay mangsobot si ad-ado.”

*Din Nangaanan Jesus Sin Godab Di Doway Lalaki*  
(Mar. 10:46-52; Luc. 18:35-43)

† **20:16** Di esa abe ay kaiologan nina sin Griego et: ... tan din naodi ed wani et mangon-ona da, ya din nangon-ona ed wani et maodi da.

<sup>29</sup> Sin kinmaan da Jesus ed Jerico, nabeweg di ipogaw ay omon-onod en sisya.  
<sup>30</sup> Wada et di doway ay nagodab ay tinmotokdo sin benget di kalsada. Idi dinnge da ay malablabas si Jesus, kabogaw da ay nangwani, “Apo, polin David, maseg-ang ka paabe!”

<sup>31</sup> Niyamyaman din kaipoipogaw daida ta gominek da koma, ngem sinepsep da et ay nangibogaw, “Apo, polin David, maseg-ang ka paabe!”

<sup>32</sup> Siya di et sinmaldeng si Jesus et inpaayag nas daida. Pag nan kanan, “Sinoy layden yo ay amagek en dakayo?”

<sup>33</sup> “Apo,” insongbat da, “layden mi ay makaila.”

<sup>34</sup> Sineg-angan Jesus daida et kinapay nan mata da. Makaila da ay dagos et nakiey da en sisya.

## 21

### *Din Nanaydayawan Di Kaipoipogaw En Jesus Sin Inmeyana Ed Jerusalem (Mar. 11:1-11; Luc. 19:28-40; Jn. 12:12-19)*

<sup>1</sup> Somagsag-en pay da Jesus ed Jerusalem, sinmawang da sin demang di Betfage sin gowab di bilig ay Olivo. Nangon-onaena di doway ay pasolot na <sup>2</sup> ay nangwani, “Emey kayo sin doy ay ili ed demang. Kostokosto ay mo domateng kayos di, datngan yo di dangki ay naitataked ya din anak na. Obaden yo ta ialyos na. <sup>3</sup> Mo waday manpoot sin am-amagen yo, kanan yo en, ‘Masapol din Apo mi,’ et ipalobos na ay dagos.”

<sup>4</sup> Naamag dana ta say matongpal din inpaibagan Diyos sin mamadto ay kanana,  
<sup>5</sup> “Ibaga yo sin omili ed Jerusalem, ‘Ilaen yo, nay omal-ali din ari yo ay nangibaba sin awak na ay mangakabayo si anak di dangki.’ ”\*

<sup>6</sup> Inmey ngarud din papasolot Jesus ay doy, et inamag da din intogon Jesus en daida.  
<sup>7</sup> In-ali da din dangki ya din anak na en Jesus, et in-ap-ap da din tak-ep di bado da sin edeg din doway ay animal. Asi pag mangabayos si Jesus. <sup>8</sup> Din kaad-adoan di kaipoipogaw ay wadas di et in-ap-aplag da din tak-ep di bado da sin kalsada. Din odom pay et inap-apan da si pangan di kaiw ay sinipat da ta say pandayaw da en Jesus. <sup>9</sup> Din nangon-ona ya inmon-onod et inbogbogaw da ay nangwani, “Madaydayaw nan polin David! Mabindisyonan koma nan inbaan Diyos ay panakaawak na!† Madaydayaw si Diyos ed langit!”

<sup>10</sup> Sin sinmawangan Jesus ed Jerusalem, nagolo din am-in ay omili et kanan da, “Sino od na?”

<sup>11</sup> “Si naey si Jesus ay mamadto ay napo ed Nazaret sin probinsiya ay Galilea,” insongbat din kaipoipogaw ay kakoykoyog Jesus.

### *Din Nangipabelaan Jesus Sin Man-ilaklako Sin Timplo (Mar. 11:15-19; Luc. 19:45-48; Jn. 2:13-17)*

<sup>12</sup> Pag senggep si Jesus sin Timplo‡ et inpabela na din man-ilaklako ya manlaklako si maidaton en Diyos. Tinokang na abe din lalamisaan di mansoksokat si pilak ya din totokdoan di man-ilaklako si kalapati, <sup>13</sup> yan kanana en daida, “Naisolat sin kalin Diyos, ‘Din beey ko et makwani en pankarkararagan di ipogaw.’ Ngem dakayo pay et nanbalinen yo si panosowitikan yos iib-a yo!”§

<sup>14</sup> Pag emey din nagodab ya napilay sin kad-an Jesus sin Timplo, et inagasanas daida. <sup>15</sup> Ngem din papangolon di papadi ya mamaestron di linteg et binmonget da sin nangilaan da sin nakaskasdaaw ay inam-amag Jesus ya din anan-ak ay nangipigsapigsa si kali da sin Timplo ay mangmangwani, “Madaydayaw din polin David!”

<sup>16</sup> Siya di et kanan da en Jesus, “Ay adim dengngen din kankanan di anan-ak ay sana?”

\* **21:5** Zekarias 9:9. † **21:9** Salmo 118:26. ‡ **21:12** Din kad-an Jesus et baken sin oneg di timplo mo adi et ed diyay di timplo ay pantean di ipogaw ay mandayaw. § **21:13** Isaias 56:7; Jeremias 7:11.

“Dengdenggek yan!” kanan Jesus ay sinombat. “Ay adi yo binasa din naisolat sin kalin Diyos ay kanana en initdoana din anan-ak ya momoyang ay mandayaw en sisya si kostokosto?”\* <sup>17</sup> Pag taynan Jesus daida sin siyodad et en nan-iyang ed Betania.

*Din Kaiw Ay Igos Ay Magay Lames Na*  
(Mar. 11:12-14,20-22)

<sup>18</sup> Sin napat-a ay pantattaolian da Jesus ed Jerusalem, mandagaang sisya. <sup>19</sup> Inila na di kaiw ay igos sin benget di danan, et sinag-ena ta ilaena mo waday lames na, ngem wada et anggoy di tobo na. Isonga kanana sin kaiw ay doy, “Adi ka kasin manlamlames.” Et nango ay dagos.

<sup>20</sup> Sin nangilaan di papasolot nas di, peteg ay nasdaaw da et kanan da, “Agasem! Nango ay dagos san kaiw ay igos mo?”

<sup>21</sup> “Tet-ewa nan ibagak en dakayo,” kanan Jesus ay sinombat. “Mo waday talek yo en Diyos ay adi kayo mandowadowa ay matongpal di ibaga yo, makaamag kayo si kaman din inamag ko sin kaiw ay nay. Baken anggoy nidi mo adi et mabalin abe ay kanan yo sin bilig ay nay, ‘Komaan kas na et pomadtok ka sin baybay,’ et matongpal. <sup>22</sup> Olay sino ay kedawen yo en Diyos et maidawat tet-ewa en dakayo mo talken yo ay maidawat.”

*Din Salodsod Maipanggep Sin Kalebbengan Jesus*  
(Mar. 11:27-33; Luc. 20:1-8)

<sup>23</sup> Pag mantaoli si Jesus sin Timplo. Sin nan-it-itdoana, inmey en sisya din papangolon di papadi ya din aam-a. Pinoot da en sisya ay nangwani, “Sinoy lebbeng mo ay mangam-amag en dana? Sinoy nangidawat en sik-a sin kalebbengam ay nay?”

<sup>24</sup> Kanan aben Jesus, “Wada abey pootek kod en dakayo on-ona. Mo songbatan yo, asiak aben ibaga din kalebbengak ay mangam-amag en dana. <sup>25</sup> Siya na din salodsod ko. Sinoy nangidawat en Juan si kalebbengana ay namonbonyag si kaipoipogaw? Ay si Diyos ono ipogaw?”

Pag dan man-asipoot ay nangwani, “Ay sinoy isongbat tako? Mo kanan tako en si Diyos di nangidawat si lebbeng na, kanan samet Jesus en, ‘Mo siya sa, apay ngarud ay adi yo pinatpatis sisya?’ <sup>26</sup> Ngem mo kanan tako abe en owat ipogaw di nangidawat, ay inayan! Kaeegyat di amagen di kaipoipogaw en datako, tan pasien da am-in ay mamadto si Juan.” <sup>27</sup> Pag da et kanan en Jesus, “Adi mi ammo.”

Kanan aben Jesus, “Mo siya sa, adiak aben ibaga en dakayo mo sinoy nangidawat en sak-en si kalebbengak ay mangam-amag en dana.”

*Din Pangarig Maipanggep Sin Doway Anak*

<sup>28</sup> Pag dad-aten Jesus din pangarig ay nay en daida. Kanana, “Sinoy pannemnem yo isna? Wada di ipogaw ay dodoway anak na ay lalaki. Sin namingsan, kanana sin pangpangoan, ‘Anak ko, en ka man-obla sin kaobasan.’

<sup>29</sup> “‘Sigaak,’ kanana, ngem maaw-awni pay, nanbaliw di nemnem na et en nan-obla.

<sup>30</sup> “Pag emey din ama sin iyogtan, et nan-iso di inbilina en sisya. ‘Aw adi, Ama, emeyak,’ kanana. Ngem adi baw inmey. <sup>31</sup> May ngarud,” kanan Jesus, “sino en da naey ay doway di nanongpal sin layden ama da?”

“Din pangpangoan adi,” kanan da.

“Kosto,” kanan Jesus, “et tet-ewa nan ibagak en dakayo ay din managbasol ay ipogaw ay kaman din mansingsingil si bowis ya din babbabai ay malaklakoan di kinababai da et on-onaan das dakayo ay maitapi sin panturayan Diyos. <sup>32</sup> Tan in mali si Juan ay Namonbonyag et init-itdo na en dakayo din nalinteg ay kabibiyag ay maonodan koma, ngem adi yo pinatis sisya. Et mo pay din mansingsingil si bowis ya din babbabai ay malaklakoan di kinababai da et pinati da. Et olay sin nangilaan yo sin inyat da, adi yo binaliwan nemnem yo ay mamati.”

\* 21:16 Salmo 8:2.



*Din Pangarig Maipanggep Sin Makitalalon Sin Kaobasan*  
(Mar. 12:1-12; Luc. 20:9-19)

<sup>33</sup> Pag kanan Jesus, “Dengngen yo kod di esa pay ay pangarig. Wada di esa ay ipogaw ay nangis-ek si ad-ado ay obas. Binatog na din nanliniked, et tinolikawana di bato ay manaytaya sin someset ay danom di lames na mo igatin da. Nan-isaad abe si nakayang ay kalapaw ay pantean di mangadog. Pag nan ipaayowan si odom ay mantaltalon, et pag emey sin addawi ay ili.† <sup>34</sup> Domteng pay din panagbobolas si obas, inbaan din nakin nom-a di babag-ena ta en da alaen din bingay na. <sup>35</sup> Ngem idi sinmawang dana ay babagen, sinoplit din nangnangset di esa, pinse day esa, ya pinigpig day esa enggana ay natey. <sup>36</sup> Pag ibaan din nakin nom-a di ad-ado ay babag-en mo sin damo, ngem nan-iso di inyat din nangnangset sin nom-a en daida. <sup>37</sup> Isonga pag nan ibaa din anak na, tan kananas nemnem na, ‘Kabain das sisya.’

<sup>38</sup> “Ngem sin nangilaan da doy ay makitalalon sin anak na ay sana, kanan da et en, ‘Si naey di akin tawid sin nom-a ay nay. Peslen tako et ta bansen tako nan tawid na!’ <sup>39</sup> Pag da et depapen et ipabela da sin kaobasan, asi da pag peslen.

<sup>40</sup> “Mo siya sa di napasamak,” kanan Jesus, “sino ngata di amagen din nakin nom-a sin doy da ay makitalalon mo mantaolis sisya?”

<sup>41</sup> “Kaeegyat di amagena ay mamse en da dooy ay ipogaw ay lawlaw,” kanan da ay sinombat. “Asi na aben ipaayowan din nais-ek sin odom ay ipogaw ay matalek ay mangidawat si bingay na mo panagbobolas.”

<sup>42</sup> Pag kanan Jesus en daida, “Kosto san songbat yo. Apay ngarud ay adi yo maawatan din inpaisolat Diyos ay kanana,

‘Din bato ay sinigaan din man-isassaad si beey et say nanbalinen Diyos ay kabanolan ay bato ay mangipakneg sin beey. Say inamag Apo Diyos na, et sigesiged ya nakaskasdaaw sin pangila tako.’‡

<sup>43</sup> Isonga kanak en dakayo ay isaldeng Diyos din pangiturturayana en dakayo et ilogi na ay mangituray si kaipoipogaw ay mangam-amag si maibagay sin panturayana. <sup>44</sup> Olay sino abe ay mag-as sin nay ay bato et magimok, ya mamekmek abe ay kaman tapok di olay sino ay pontaana.”

<sup>45</sup> Idi dinngen din papangolon di papadi ya din Fafariseo din naey da ay pangarig ay dinad-at Jesus, ammo da ay daida di inbagbaga na, <sup>46</sup> isonga layden da ay depapen. Ngem emegyat da sin kaipoipogaw, tan binigbig das sisya ay mamadto.

## 22

*Din Pangarig Maipanggep Sin Naayagan Ay Makikasal*  
(Luc. 14:15-24)

<sup>1</sup> Pag kasin man-iarig si Jesus ay nangwani en daida, <sup>2</sup> “Din panturayan Diyos et maiarig si ari ay nansagana, tan mankasal din lalaki ay anak na. <sup>3</sup> Idi naisagana am-in, inbaa na di babag-ena ta en da ibaga kasin sin sigod ay naayagan ay omali da koma ay makikasal. Ngem din naayagan et sinigaan da ay omali. <sup>4</sup> Isonga inbaa na kasin di odom ay babag-ena ta ibaga da sin ipogaw ay naayagan, ‘Omali kayo et ay makikasal, tan naisasagana am-in. Pinalti mi din nankalalames ay baka mi et naoto da am-in.’ <sup>5</sup> Ngem din doy da ay naayagan et tineteweng da. Adi da inmali mo adi et intoltoloy da din amagen da. Di esa et inmey sin payew na, di esa pay et inmey man-ilako. <sup>6</sup> Din odom et dinpap da din babag-en di ari, palalo ay pinaligat das daida yan pag dan peslen. <sup>7</sup> Palaloy bonget din ari sin nanngena sin napasamak, et inbaa na di sosoldado na ta en da peslen din doy da ay namse sin babag-ena ya pooan da din ili da. <sup>8</sup> Pag kanan din ari sin odom ay babag-ena, ‘Naisasagana am-in din para sin kasal, ngem din ipogaw ay inayagak et

† 21:33 Isaias 5:1-2. ‡ 21:42 Salmo 118:22-23.



adi da maikari ay omali. <sup>9</sup> Emey kayo ngarud sin kakalsadan di ili ta ayagan yo din am-in ay datngan yos di.' <sup>10</sup> Isonga inmey da et inayagan da din am-in ay dinatngan da ay siged ya olay lawa di ogali na, et napno din dakdake ay kowarto ay pankasalan.

<sup>11</sup> "Maaw-awni pay, sinenggep din ari ay makingalat sin sangaili na, et inila na di esa ay adi nanbado si maibagay sin kasalan. <sup>12</sup> 'Gayyem ko,' kanana en sisya, 'apay nga wada kas na yan adi ka nanbado si para kasal?' Ngem ginmiginek. <sup>13</sup> Isonga pag kanan din ari sin babag-ena, 'Baloden yon takkay ya siki na ta asi yo itpig sin bel-ayan ay mabolinget ay pan-og-ogaan ya pan-gaygayetgetana.'" <sup>14</sup> Pag ipaanongos Jesus ay nangwani, "Ad-ado di maayagan, ngem at-atik di pilien Diyos ay maitapi sin panturayana."

*Din Salodsod Maipanggep Sin Panbayadan Das Bowis*  
(Mar. 12:13-17; Luc. 20:20-26)

<sup>15</sup> Pag komaan din Fafariseo et en da nantotolag mo intoy iyat da ay mansalodsod en Jesus ta mo waday songbat na, say pangidaruman da en sisya. <sup>16</sup> Pag dan ibaa di papasolot da ay Fariseo ya din naitatapi sin bonggoy Herod ta emey da en Jesus. Idi dinatngan das sisya, kanan da, "Apo maestro, ammo mi ay tet-ewa am-in di kankanam. Ammo mi abe ay adi ka panlaslasinen din waday kabigbigana, mo adi et it-itdom din tet-ewa ay maipanggep sin layden Diyos ay amagen di ipogaw. <sup>17</sup> Isonga ibagam kod mo sinoy pannemnem mo isna. Ay labsingen mi din linteg tako mo manbayad kamis bowis sin Emperador ed Roma?"

<sup>18</sup> Ngem ammon Jesus din lawa ay panggep da, isonga pag nan kanan en daida, "Dakayo ay agin sisiged, apay nga padpadasen yos sak-en? <sup>19</sup> Omipaila kayo kod si esay denario ay maibayad si bowis." Idi in-ali da en sisya, <sup>20</sup> kanana en daida, "Sinoy nakin ropa ya nakin ngadan isna?"

<sup>21</sup> "Din Emperador," insongbat da.

"Mo siya sa," kanan Jesus, "din okan Emperador et idawat yo en sisya, ya din okan Diyos et idawat yo abe en Diyos."

<sup>22</sup> Sin nanngaan das di, peteg ay nasdaaw da, et kataynan da en sisya et nadipos da.

*Din Salodsod Maipanggep Sin Natey Ay Matago Kasin*  
(Mar. 12:18-27; Luc. 20:27-40)

<sup>23</sup> Maaw-awni pay, wada da di Sadduceo ay inmey en Jesus. Daida di esa ay bonggoy di Judio ay mangmangwani en adi kasin matago di natey. <sup>24</sup> Kanan da en sisya, "Apo maestro, kanan din linteg tako ay insolat Moses, 'Mo waday sin-asawa ay magay anak da ya matey din lalaki, masapol ay asawaen din agi na din nalasang ta say mo way anak da, kaman say anak din natey.'\* <sup>25</sup> May kod, wada kano di pito ay sisiag-i ay lallalaki. Nangasawa din pangpangoan, ngem natey ay iwed anak da. Isonga naiskat iyogtana et inasawa na din balo, <sup>26</sup> ngem natey ay iwed abey anak da. Iso na abe sin maikatlo. Pag siyasiya di enggana sin maikapito. <sup>27</sup> Pag omanongos ay matey din babai. <sup>28</sup> May kod, mo sin tapin di agew sin katagoan kasin di natnatey, sino ngin en daida di kosto ay akin asawa en sisya? Tan inasawa da am-in."

<sup>29</sup> Sinongbatan Jesus ay nangwani, "Naipaksaw kayo, tan adi yo maawatan din naisolat ay kalin Diyos ya adi yo aben maawatan din panakabalina. <sup>30</sup> Tan mo matago kasin di natnatey, adi da man-aasawa mo adi et mais-o da sin aanghel ed langit. <sup>31</sup> Et mo maipanggep abe sin kasin katagoan di natey, kaman yon adi binasa din naisolat ay kalin Diyos en dakayo ay kanana, <sup>32</sup> 'Sak-en si Diyos ay deda ay Diyos da Abraham en Isaac ya si Jacob.'† Say kanana di olay mo nabayag ay nanatey da Abraham. Di layden nina ay kalien et matago kasin di natey, tan si Diyos et baken Diyos di natey ay ipogaw

\* 22:24 Deuteronomio 25:5. † 22:32 Exodo 3:6.

mo adi et din matmatago.”<sup>33</sup> Din kaipoipogaw ay nandengdenge et peteg ay nasdaaw da sin init-itdo na.

*Din Kapatgan Ay Bilin Diyos*  
(Mar. 12:28-34; Luc. 10:27)

<sup>34</sup> Sin nanngan din Fafariseo ay inabak Jesus din Sadduceo, nasinop da et inmey da sin kad-an Jesus. <sup>35</sup> Di esa en daida ay nalaing ay maestron di linteg et nansalodsod en Jesus ta padasenas sisya. <sup>36</sup> Kanana, “Apo maestro, sino di kapapatgan ay bilin sin linteg Diyos?”

<sup>37</sup> Kanan Jesus, “Masapol ay imongsan mo di am-in ay nemnem ya laing mo ay manglaylayad en Diyos ay Apom.”<sup>‡</sup> <sup>38</sup> Siya na din kapapatgan ay bilin Diyos. <sup>39</sup> Din maikadwa ay kapapatgan et mais-o: ‘Masapol ay laylaydem di ib-am ay kaman din pananglayad mo sin awak mo.’<sup>§</sup> <sup>40</sup> Din intiro ay linteg Moses ya din insolat di mamadto et maibasar da sin doway ay bilbilin ay nay.”

*Din Salodsod Maipanggep Sin Messias*  
(Mar. 12:35-37; Luc. 20:41-44)

<sup>41</sup> Idi nasisinop pay laeng din Fafariseo, pinoot aben Jesus en daida ay nangwani, <sup>42</sup> “Sinoy pannemnem yo sin Messias? Sinoy nangipoli en sisya?”

“Polin David sisya,” kanan da ay sinombat.

<sup>43</sup> Kanan aben Jesus, “Mo siya sa, apay ngarud ay Apo di pangwanin David en sisya? Tan din inpaibagan di Ispiriton Diyos en David et siya na:

<sup>44</sup> ‘Kanan Apo Diyos en Apok: Tomokdo ka sin makannawan ko engganabakek din kaibaw mo.’”<sup>\*</sup>

<sup>45</sup> Pag itoloy Jesus ay nangwani, “Mo say kanan David en Apo na din Messias, intoy iyat na ay polin David?” <sup>46</sup> Ngem adi da polos makasongbat, et manlogi isdi, maga di mangitoleo ay manpoot en sisya.

## 23

*Din Pangwanin Jesus Sin Maestron Di Linteg Ya Fariseo*  
(Mar. 12:38-39; Luc. 20:45-46)

<sup>1</sup> Pag kanan Jesus sin kaipoipogaw ya sin papasolot na, <sup>2</sup> “Din mamaestron di linteg ya din Fafariseo et waday kalintegan da ay mangilawag sin linteg Moses, <sup>3</sup> isonga masapol ay dadlon yon patien din am-in ay it-itdo da en dakayo. Ngem adi yo tadtadonen din kabibiyag da, tan adi da on-onodan din it-itdo da ay mismo. <sup>4</sup> Ipag-en da sin kaipoipogaw di madagsen ay siya din ad-ado ay bilbilin ay ipapati da ay maonodan, ngem adi da pay makig-en si olay at-atik. <sup>5</sup> Am-in din am-amagen da et amagen da ta say ilaen ya it-ek di ipogaw daida. Isonga padakdak-en da din kaiigtoan di versikulo ay tapin di linteg ay ibebedbed da sin kitong ya takkay da<sup>\*</sup> ya paandoen da abe din pagaypay sin gayadan di tak-ep di bado da. <sup>6</sup> Sin en da makikanan, pilien da din napateg ay ipogaw si pakitokdoan da, ya pilien da abe din kasisigedan ay tokdoan sin sinagoga. <sup>7</sup> Layden da abe ay dayawen di ipogaw daida ay mangwani en ‘Apo’ mo en da manpasyal, ya layden da ay maibaga ay maestro.

<sup>8</sup> “Ngem mo dakayo pay, adi yo ipalobos ay maestro di pangwanin di gagait yo en dakayo, tan siag-i kayo am-in ya ang-anggoy ko ay maestro yo. <sup>9</sup> Adi yo aben aw-awagan di olay sino isnan daga si Ama, tan es-esa di Ama yo ay si Diyos ed langit. <sup>10</sup> Et adi yo aben ipalobos din gagait yo ay mangwani en Apo en dakayo, tan sak-en ay Messias din es-esa ay Apo yo. <sup>11</sup> Din kapatgan en dakayo et din mansilsilbi sin gagait na. <sup>12</sup> Din

‡ 22:37 Deuteronomio 6:5. § 22:39 Levitico 19:18. \* 22:44 Salmo 110:1. \* 23:5 Deuteronomio 6:8.

mangipapangato sin awak na et maibaba, ngem din mangibaba pay sin awak na et maipangato.”

*Din Nangyamyaman Jesus Sin Mamaestron Di Linteg Ya Fafariseo*

*(Mar. 12:40; Luc. 11:39-42,44,52)*

<sup>13</sup> Pag itoloy Jesus ay mangwani, “Kaseseg-ang kayo ay mamaestron di linteg ya Fafariseo, dakayo ay agin sisiged! Tan kaman yon in-eb din pantew ay senggapan koman di ipogaw sin panturayan Diyos. Sigaan yo ay maitapi sin panturayana downan yo aben sangsangawen di ipogaw ay manglayad ay maitapi.

<sup>14</sup> “Kaseseg-ang kayo ay mamaestron di linteg ya Fafariseo, dakayo ay agin sisiged! Tan iet-etekan yo di nabalo ay babbabai ta say alaen yo din gamgameng da ya olay din beey da downan yon paandoandoen din kararag yo sin pangiilaan di kaipoipogaw. Awni man et madagdagsen din dosa yo!†

<sup>15</sup> “Kaseseg-ang kayo ay mamaestron di linteg ya Fafariseo, dakayo ay agin sisiged! Tan omagadang kayo sin baybay ya emey kayo sin addawi ay il-ili ta way iyat yo ay mangawis si olay es-esa ay manbalin si pasolot yo. Et mo inawis yo, panbalinen yo si ipogaw ay mas maikari ay madosa ed inferno mo si dakayo!

<sup>16</sup> “Kaseseg-ang kayo! Kaman kayon nagodab ay mangipangpango si danan. Tan itido yo ay mo waday mansapata yan alaena din Timplo ay tistigo na, baken basol mo adi na tongpalen din insapata na, ngem mo din balitok sin Timplo di alaena ay tistigo na, masapol ay tongpalena. <sup>17</sup> Palalo kayo ay nagodab! Kaman magay nemnem yo! Sino aya di napatpateg? Ay din balitok ono din Timplo ay mangipabalin ay nasantoan din balitok? <sup>18</sup> Kanan yo abe en mo waday mansapata yan alaena din altar ay tistigo na, baken basol mo adi na tongpalen din insapata na, ngem mo din naidaton sin altar di alaena ay tistigo, masapol ay tongpalena. <sup>19</sup> Palalo san kinagodab yo! Sino aya di napatpateg? Ay din daton ono din altar ay mangipabalin ay nasantoan din daton? <sup>20</sup> Din altar ngarud! Isonga din mansapata yan alaena din altar ay tistigo na et baken anggoy din altar di alaena na mo adi aben din naidatdaton sin altar. <sup>21</sup> Ya din mansapata yan alaena din Timplo ay tistigo na et baken anggoy din Timplo di alaena ay tistigo mo adi si Diyos abe ay manbeey sisi. <sup>22</sup> Ya mo wada abe di mansapata ay mangwani, ‘Ilam ay langit,’ baken anggoy din langit di alaena ay tistigo na mo adi din tronon aben Diyos ya din tinmotokdos di.

<sup>23</sup> “Kaseseg-ang kayo ay mamaestron di linteg ya Fafariseo, dakayo ay agin sisiged! Tan es-esten yo ay mangidawat en Diyos sin inkasinpo, olay din ap-apiten yo ay maisabong sin madengdeng, ngem binaybay-an yo din nabanbanol ay bilbilin di linteg ay kanana en nalinteg koma di iyat yo sin iib-a yo, seg-angan yo komas daida ya matalek kayo. Agpos mo in-inset yo koma dana ay nabanbanol downan yo et aben intoltoloy ay mangidawat sin inkasinpo. <sup>24</sup> Dakayo ay nagodab ay man-ipangpango! Kaman kayon ipogaw ay mangset ay mansagat si inomena ta magay maitapi ay ngilaw ngem downan kaokmon si esay kamel!

<sup>25</sup> “Kaseseg-ang kayo ay mamaestron di linteg ya Fafariseo, dakayo ay agin sisiged! Kaman kayon ipogaw ay mangowas et anggoy sin baklang di tasa ya edeg di palato, tan siged di ogali ay ipappaila yo sin kaipoipogaw, ngem din nemnem yo et napnos kinagamgam ya plano ay manowitik si iib-a yo. <sup>26</sup> Ay daetan kayo! Dakayo ay Fariseo ay nagodab! Dalosan yo koma agan-o din wadas oneg di tasa ta nadalos abe din baklang na.

<sup>27</sup> “Kaseseg-ang kayo ay mamaestron di linteg ya Fafariseo, dakayo ay agin sisiged! Tan kaman kayon pansiyong ay napintolan si mankilat. Kagkagam-is di boya na, ngem napnos tong-an di natey ya odom ay kadodogis. <sup>28</sup> Et siya abe ay siged di ogali yo sin

† 23:14 Din versikulo ay nay et maga sin kaad-adoan ay manuskrito sin Griego.

pangiilaan di kaipoipogaw, ngem din katet-ewa na et agin sisiged kayo ya pag lawa di naiigtos nemnem yo.

<sup>29</sup> “Kaseseg-ang kayo ay mamaestron di linteg ya Fafariseo, dakayo ay agin sisiged! Tan iam-amagan yo si kagkagam-is ay pansiyong din mamadto ed nabaon ya altialtian yo abe din pansiyong di nalinteg ay ipogaw. <sup>30</sup> Kanan yo, ‘Mo wada kami koma sin timpon di aap-o mi, adi kami naitapi sin namsenamsean da sin mamadto.’ <sup>31</sup> Ngem begew sin kankanan yo ay sana, ipodno yo ay naipoli kayo sin namsenamse sin mamadto. ‡ <sup>32</sup> May ngarud, itoloy yo ay mangikdeng sin inlogin di aap-o yo! <sup>33</sup> Peteg kayo kayman ay kaman nasikap ay eweg! Ay siya mo mailsot yo din pangeddengian Diyos en dakayo ay madosa ed inferno? <sup>34</sup> Isonga ibaak en dakayo di mamadto ya mamasirib ay ipogaw ya man-it-itdo si kalin Diyos. Peslen yo di odom ya ilansa yo di odom sin krus. Di odom pay et soplisopliten yo sin kasinasinagoga yo, et olay intoy lomaylayawan da, atikoen yo ta paligaten yos daida. <sup>35</sup> Isonga makaoway kayo sin nateyan di am-in ay nalinteg ay ipogaw isnan daga manlogi sin namsean da en Abel§ enggana sin namsean di ap-apo yo en Zekarias ay anak Berekiyas sin nan-gawaan di altar ya din Timplo. <sup>36</sup> Tet-ewa nan ibagak en dakayo ay din ipogaw ed wani et makaoway da sin nateyan da am-in.”

*Din Layad Jesus Sin Man-ili Ed Jerusalem  
(Luc. 13:34-35)*

<sup>37</sup> Pag kanan Jesus, “Ay apaw kayo ay taga-Jerusalem ay namigpigpig ya namnamse sin mamadto ya odom ay inbaan Diyos! Namin piga ay laydek ay sinopen ya ay-ayowanen dakayo ay kaman din iyat di oboan ay manakoko sin an-ak na, ngem sinigaan yo! <sup>38</sup> Isonga makaoway kayo, tan taynan Diyos dakayo. <sup>39</sup> Tan kanak en dakayo en adi kayo kasin omil-ila enggana sin tapin di agew ay pangibagaan yo en, ‘Madaydayaw din nay omali ay inbaan Diyos.’ ”

## 24

*Din Timpon Di Ligat Ay Domateng Sin Tapin Di Agew  
(Mar. 13:1-13; Luc. 21:5-19)*

<sup>1</sup> Idi kinmaan si Jesus sin Timplo yan madipdipos, sinmag-en din papasolot na ta ipaila da en sisya din kinakagam-is di Timplo ya bebbeey ay linak-am na. <sup>2</sup> Kanan Jesus, “Il-ilaen yo am-in dana ay kagkagam-is, ay baken siya? Ngem tet-ewa nan ibagak en dakayo ay awni et maiwalang da am-in, tan iwed di olay esay bato si komakaman sin kad-ana.”

<sup>3</sup> Pag dan mantikid sin bilig ay Olivo et tinmokdos Jesus. Asi pay emey din papasolot na en sisya ay ang-anggoy da et kanan da, “Ibagam kod mo pig-an di kaamagan nisa ya sinyo sinyal si pangimatonan mi ay dandani di omaliam ya panpatinggaan di lobong.”

<sup>4</sup> Sinombat si Jesus ay nangwani, “Siliban yo ta adi kayo kaietekan. <sup>5</sup> Tan ad-ado da di omali ay mangwani en, ‘Sak-en met din Messias,’ et ad-ado di ietekan da. <sup>6</sup> Dengngen yo abe din banangbang di gobat ay maisag-en en dakayo ya damag di gobat sin odom ay il-ili, ngem adi kayo emeg-egyat. Masapol ay maamag dana, ngem daan pay din panpatinggaan di lobong. <sup>7</sup> Tan man-gogobat din kailiili ya siya abe sin gogobierno. Wada abe di betil ya yegyeg sin kailiili. <sup>8</sup> Ngem am-in dana et kaman owat din panngitingitan di eges di babai mo iloglogi na ay man-anak.

<sup>9</sup> “Awni et depapen das dakayo ta paligaten ya peslen das dakayo. Am-in di ipogaw abe et kaliliget das dakayo begew sin pammati yo en sak-en. <sup>10</sup> Sin timpo ay doy, ad-ado di manokog si pammati da en sak-en, et lipotan ya kaliliget da din iib-a da. <sup>11</sup> Ad-ado

‡ 23:31 Din pannemnem di Judio et isoen di anak si ama na. Isonga mo naipoli da sin makapese ay ipogaw, laydena ay kalien ay isoen das daida. § 23:35 Genesis 4:8.

abe di makaetek ay mamadto ay manpaila, et ad-ado di ietekan da. <sup>12</sup> Begew sin inmad-adoan di lawa, omat-atik din layad di kaad-adoan. <sup>13</sup> Ngem olay sino ay mangipapasnek ay mamati ay adi mankeykeyat et maisalakan. <sup>14</sup> Din siged ay damag ay maipanggep sin panturayan Diyos et maikasaba sin kailili isnan daga ta say dengngen di am-in ay ipogaw, et pag domateng din panpatinggaan di lobong.”

*Din Kabakasan Di Jerusalem*  
(Mar. 13:14-23; Luc. 21:20-24)

<sup>15</sup> Intoloy Jesus ay nangwani, “Awni et matongpal din inpadton Daniel ay wada di ‘kaliliget ay domadael’ ay pomipika sin nasantoan ay lugar ay siya din Timplo.\* (Din mamasa sin naipadto ay nay et maawatana koma.) <sup>16</sup> Mo ilaen yo di, din mantetee ed Judea et masapol ay dalasen da ay lomayaw sin kadondontogan. <sup>17</sup> Din wada sin bel-ayan di beey na et masapol ay adi mataktak ay senggep ay en manga sin bonag na. <sup>18</sup> Din wada abe sin payew et adi koma somaa ay en man-as tak-ep di bado na. <sup>19</sup> Sin da doy ay agew, kaseseg-ang iman din maliton ya din way pansosoena. <sup>20</sup> Ikararag yo ay adi koma maitompong din lomayawan yo sin pinag-aandap ono agew ay pan-ibbayan. <sup>21</sup> Tan din timpon di nalabes ay ligat ay sana et magay kaiisoana manlogi sin naparsuaan di lobong enggana ed wani, ya maga abe di makaiso sin tapin di agew. <sup>22</sup> Mo doy ya adi ninemnem Diyos ay paaptiken din doy timpo ay panligatan, maga di ipogaw si mabay-an isnan daga. Ngem laton ay paaptikena begew sin pinili na ay ipogaw na.”

<sup>23</sup> Intoloy Jesus ay nangwani, “Sin doy ay timpo, mo waday mangwani en dakayo, ‘Ilam, naey din Messias,’ ono ‘Dooy baw sisya,’ adi yo patpatien. <sup>24</sup> Tan manpaila di makaetek ay ipogaw ay mangwani en daida kano din Messias ya daida kano di mamadto. Et ipaila da di nakaskasdaaw ay sinyal ya milagro ta say ietekan da koma di kaipoipogaw ya olay din ipogaw ay pinilin Diyos mo mabalin. <sup>25</sup> Isonga nemnemen yo dana, tan nay ay indadaan ko en dakayo.

<sup>26</sup> “Isonga mo kanan da en, ‘Ilam, wada din Messias sin lugar ay magay omili,’ adi kayo em-emey. Mo kanan da abe en, ‘Ilam, wadas na ay nantatabon,’ adi yo patpatien. <sup>27</sup> Tan din pantaoliak ay Anak di Ipogaw et kaman din somilap ay kimat ay maila sin am-in ay banda. <sup>28</sup> Sigurado ay matongpal dana ay kaman din kankanan da, ‘Olay intoy kad-an di natey et say kasinopan di titit ay mangan en daida.’ ”

*Din Omalian Di Anak di Ipogaw*  
(Mar. 13:24-27; Luc. 21:25-28)

<sup>29</sup> “Makdeng pay din timpon di ligat ay doy, pag et bomolinget din agew ya adi somlag din bowan. Matekdag abe din katalatalaw ya maikiweg din am-in ay wada ed kayang. <sup>30</sup> Pag wada di sinyal ed kayang ay mangipaila ay dandani di omaliak ay Anak di Ipogaw, et manladingit di am-in ay grupon di ipogaw isnan daga. Ilaen das sak-en ay Anak di Ipogaw ay omal-ali ay maikoyog sin liboo. Peteg di panakabalin ko ya dadlonak mansilap si kinadiyos ko.† <sup>31</sup> Pag et wada di napigsa ay bongog di tanggoyob, et ibaak din aanghel ko sin opat ay kapoan di dagem ta en da sinopen din pinilik ay ipogaw ko sin am-in ay solin di lobong.”

*Din Maadal Sin Kaiw Ay Igos*  
(Mar. 13:28-31; Luc. 21:29-33)

<sup>32</sup> Pag kanan Jesus, “Nemnemen yo din kaiw ay igos ta say pan-adalan yo. Mo manngengeta din panga na yan tomobo, namnamaen yo ay dandani di pinag-oodan. <sup>33</sup> Et siya abe mo ilaen yo ay maam-amag am-in dana ay inbagbagak en dakayo, ammo yo ay dandani di omaliak. <sup>34</sup> Tet-ewa nan ibagak en dakayo ay matmatago pay laeng di

\* 24:15 Dan. 9:27; 11:31; 12:11. † 24:30 Zekarias 12:10-14.



odom ay ipogaw ay wada ed wani mo matongpal am-in din inbagak. <sup>35</sup> Mankaiiwed din wada ed kayang ya din daga ay nay, ngem din kalik pay et komakaman si eng-enggana.”

*Magay Mangammo Mo Pig-an Di Omalian Di Anak di Ipogaw*  
(Mar. 13:32-37; Luc. 17:26-30,34-36)

<sup>36</sup> Kanan aben Jesus, “Mo din inbagak en dakayo, magay nakin ammo sin agew ya oras ay katongpalana. Olay din aanghel ed langit et adi da ammo. Olay sak-en ay Anak Diyos et adiak aben ammo. Tan magay nakin ammo mo adi et anggoy si Diyos Ama. <sup>37</sup> Din ogalin di ipogaw sin agew ay kasinak omalian ay Anak di Ipogaw et kaman din timpon Noe. ‡ <sup>38</sup> Tan sin doy ay timpo ay daan malbeng di daga, intoltoloy da ay mangmangan ya man-in-inom ya man-aasawa enggana sin agew ay sinenggepan da Noe sin daong. <sup>39</sup> Adi da naawatan din kaeegyat ay awni et mapasamak en daida enggana sin kosto ay nalbengan din daga ay nalnedan da am-in. § Et kaman nidi abe di mapasamak sin omaliak ay Anak di Ipogaw. <sup>40</sup> Mo wada di doway ay lalaki ay man-ob- obla sin kapaypayewan, maa din esa yan mabay-an din esa. <sup>41</sup> Mo wada abe di doway ay babai ay manbaybayo, maa din esa yan mabay-an din esa. <sup>42</sup> Isonga mansasagana kayo si kanayon, tan adi yo ammo din kosto ay agew ay omalian din Apo yo.

<sup>43</sup> “Nemnemen yo na: mo ammon koma din akin beey din oras sin labi ay domatngan di mangakew, adi koma maseyep mo adi et manbantay koma ta adi makasgep din mangakew. <sup>44</sup> Isonga dakayo abe et masapol ay mansasagana kayo, tan sak-en ay Anak di Ipogaw et omaliak sin oras ay adi yo namnamaen ay omaliak.”

*Din Matalek Ya Adi Katalek Ay Baa*  
(Luc. 12:41-48)

<sup>45</sup> Dinad-at aben Jesus din pangarig ay nay. Kanana, “Din matalek ya masirib ay baa et sisya di dinotokan din among na ay makaammo sin odom ay baa ya mangidawat si kanen da si inagew. <sup>46</sup> Nagasat din sana ay baa mo somaa din among na ya datnganas sisya ay mangam-amag sin obla ay naitalek en sisya. <sup>47</sup> Tet-ewa nan ibagak en dakayo ay ipangaton din among nas sisya ta say makaammo sin am-in ay bonag na. <sup>48</sup> Ngem mo kaspangarigan lawa din baa ay sana, kananas nemnem na, ‘Mabayag pay samet di pantaolian din among ko.’ <sup>49</sup> Et palipaligatena din iib-a na ay baa dowan aben makikikan ya makiin-inom si makabeteng ay gagayyem na. <sup>50</sup> Asi et kataoli din among na sin agew ya oras ay adi namnamaen din baa ay sana. <sup>51</sup> Dadlonan dosaen sisya et iwasit na ed inferno ay pan-anog-ogan ya pan-gayetgetan di ipogaw ta say makilak-am sin dosan di agin sisiged.”

## 25

*Din Pangarig Maipanggep Sin Sinpo Ay Babassang*

<sup>1</sup> Intoloy Jesus ay nangwani, “Din manglayad ay maitapi sin panturayan Diyos et maiarig das sinpo ay babassang ay nangas silaw da ta en da abten din lalaki ay mangasawa.\* <sup>2</sup> Din lima en daida et nanemneman da, ngem din lima pay et maga. <sup>3</sup> Mo din lima ay baken nanemneman et intakin dan silaw da, ngem nilinglingan da ay nan- itakin si reserba da ay lana. † <sup>4</sup> Mo din nanemneman pay, waday intakin da ay botilya ay napnos reserba da ay lana. <sup>5</sup> Idi siya di, nabayabayag ay sinsin-ed da din omalian di mangasawa, isonga inlogi da ay manyek-ew et pag dan maseyep.

‡ 24:37 Genesis 6:5-8. § 24:39 Genesis 7:6-24. \* 25:1 Din ogalin di Judio mo waday mankasal, emey din lalaki sin beey di babai sin damo ay agew di kasal. Sin labi ay doy, mandad-an da ay sin-asawa ya din am-in ay naayagan ay makikasal ay emey sin panbeeyan to di sin-asawa. Ogali aben di Judio et siyat way silaw di esa ya esa ay makiey. Din babassang sin pangarig ay nay et sedsed-en da din mapo sin beey di babai ta makiey da sin beey di lalaki. † 25:3 Din inos-osal di Judio ed nabaon sin silaw da et lana ay napo sin napespesan ay lames di olivo.



<sup>6</sup> “Sin gawan di labi, waday nangibogaw, ‘Naey din mangasawa! Omali kayo ta abten yo!’ <sup>7</sup> Kabangon din sinpo ay babassang ay doy et insagana dan silaw da. <sup>8</sup> Asi et kanan din magay reserba na sin gagait da ay nanemneman, ‘Omya kayo kod si lana yo, tan nay madmad-ep din silaw mi.’

<sup>9</sup> “ ‘Adi mabalin,’ kanan din nanemneman ay sinombat. ‘Adi omanay din reserba mi en datako am-in. En kayo sin kantina ta manlako kayo.’

<sup>10</sup> “Siya di, en da nanlako. Ngem idi nadipos da, sinmawang din mangasawa. Din babassang ay maneseed ay nakasasagana et nakiey da sin beey ay emeyan da. Nakisgep da ta makikan ya makiragsak da sin odom ay naayagan, et pag main-eb.

<sup>11</sup> “Maaw-awni pay, sinmawang din babassang ay en nanlako, et nanbogbogaw da sin kad-an di pantew ay nangwani, ‘Apo, Apo! Senggep kami kod!’

<sup>12</sup> “Ngem sinombat din mangasawa ay nangwani, ‘Adi mabalin, tan adiak am-ammo si dakayo.’ ”

<sup>13</sup> Pag kanan Jesus ay nangipaanongos, “Masapol ngarud ay mansasagana kayo si kanayon, tan adi yo ammo din agew ya oras ay omaliak kasin.”

### *Din Tolo Ay Baa Ay Naidawtan Si Pilak*

*(Luc. 19:11-27)*

<sup>14</sup> Dinad-at aben Jesus din pangarig ay nay. Kanana, “Din panturayan Diyos et maiarig abe si lalaki ay mansagana ay emey sin addawi ay ili. Isonga inayagana din baa na ta say italek na en daida din kinabaknang na. <sup>15</sup> Indawtana di esa ya esa en daida insigon sin kabaelan da. Di esa et indawtana si lima ay talento,‡ di esa abe et doway ay talento, ya din esa abe et es-esa ay talento. Pag manlobwat.

<sup>16</sup> “Idi siya di, din naitalkan si lima ay talento et innigosyo na ay dagos, et nan-ganansiya si lima. <sup>17</sup> Siya abe ay din naitalkan si doway ay talento et doway abe di ganansiya na. <sup>18</sup> Ngem din naitalkan si es-esa ay talento et ena inkaot ay nangitabon sin sana ay pilak di among na.

<sup>19</sup> “Idi nabayag, sinmaa din among di baa ay doy, et inpaayag nas daida ta say damagena mo piga di ginanansiya da. <sup>20</sup> Siya di inmey din naitalkan di lima ay talento et kanana sin among na, ‘Apo, lima ay talento di intalek mo en sak-en. Naey abe din lima ay in-anak na.’ <sup>21</sup> ‘Sigid di inyat mo,’ kanan din among na. ‘Sigid ya matalek ka kayman ay baa. Gapo ta matalek ka sin at-atik ay intalek ko en sik-a, taptapiak ta say makaammo kas ad-ado. Omali ka ay makiragsak en sak-en.’

<sup>22</sup> “Pag emey abe din naitalkan di doway ay talento et kanana, ‘Apo, doway ay talento di intalek mo en sak-en. Naey abe din doway ay in-anak na.’ <sup>23</sup> ‘Sigid di inyat mo,’ kanan aben din among na. ‘Sigid ya matalek ka kayman ay baa. Gapo ta matalek ka sin at-atik ay intalek ko en sik-a, taptapiak ta say makaammo kas ad-ado. Omali ka abe ay makiragsak en sak-en.’

<sup>24</sup> “Asi pag emey din naitalkan di es-esa ay talento et kanana, ‘Apo, ammok ay natangsit ka ay ipogaw. Al-alaem din adi ka nanbowayan ya ap-apitem abe din adi ka inis-ek. <sup>25</sup> Isonga enak inkaot din pilak mo, tan emegyatak en sik-a. Naey din pilak mo.’ <sup>26</sup> Pag kanan din among na, ‘Lawa ya nasadot ka ay baa! Mo inaammom ay al-alaek din adiak nanbowayan ya ap-apitek abe din adiak inis-ek, <sup>27</sup> apay ngarud ay adim inbangko din pilak ko ta say mo somaaak, wada koma di olay at-atik ay anak na si alaek?’ <sup>28</sup> Pag nan kanan sin odom ay baa na, ‘Alaen yo din talento na ta asi yo idawat sin waday sinpo ay talento na. <sup>29</sup> Tan olay sino di waday kabaelana et matobtoban ta say omad-ado din wada en sisya, ngem din magay kabaelana et mataoli din olay at-atik ay wada en sisya. <sup>30</sup> Mo maipanggep abe sin nay magay silbi na ay baa, iwasit yo sin kad-an di mabolinget ay pan-anog-ogan ya pan-gayetgetan di ipogaw.’ ”

‡ 25:15 Di esa ay talento et banol di enem ay libo ay poldiya.

### *Din Kaodian Ay Kaokoman Di Kaipogaw*

<sup>31</sup> Intoloy Jesus ay nangwani, “Sak-en ay Anak di Ipogaw, mo omaliak ay mangipap-paila sin kalebbengak ya sin somilap ay kinadiyos ko ay mangikoykoyog sin amin ay anghel, tomokdoak sin tronok ay man-ari. <sup>32</sup> Am-in ay ipogaw isnan daga et masisinop da sin sangoanak, et pansianek daida ay kaman din iyat di mangay-ayowan si animal ay mangikasin sin karnero ya kalding. <sup>33</sup> Din nalinteg ay ipogaw ay maiarig si karnero et ipeey ko sin makannawan ko, ya din maiarig si kalding et ipeey ko abe sin makannigid ko.

<sup>34</sup> “Pag si sak-en ay ari et ibagak sin ipogaw ay wada sin makannawan ko, ‘Dakayo ay binindisyonan Amak, omali kayo ta ganasen yo din tawid yo ay siya din kaitapian yo sin panturayan Diyos ay naisasagana para en dakayo manlogi sin naparsuaan di lobong. <sup>35</sup> Tan nadagaanganak et pinmakan kayo, ya nabigawak et nan-inomen yos sak-en. Sangailiak abe sin kad-an yo et sinangaili yos sak-en. <sup>36</sup> Maga abey badok yan binadoan yos sak-en. Nansaksakitak abe yan inmay-ayowan kayo, ya sin naibabalodak yan pinmasyal kayo ta bomadang kayo.’

<sup>37</sup> “Pag kanan din nalinteg ay ipogaw, ‘Apo, pig-an ngin di nangilaan mi en sik-a ay nadagaangan yan pinakan daka, ya nabigaw ka yan pinainoman daka? <sup>38</sup> Pig-an abe di nanangilian mi en sik-a ya nangidawtan mi en sik-as bado? <sup>39</sup> Pig-an abe di nansakitam yan inay-ayowanan mis sik-a, ya naibabalod ka yan pinasyal mis sik-a ta badangan daka?’

<sup>40</sup> “Pag sak-en ay ari et kanak en daida, ‘Tet-ewa nan ibagak en dakayo ay sin nangam-amagan yos kaman dana sin olay esa ay kababaan en da naey ay aag-ik, § inamag yo en sak-en.’

<sup>41</sup> “Asiak pag kanan sin ipogaw sin makannigid ko, ‘Dakayo ay nakeddeng ay madosa, komaan kayo! En kayo sin kad-an di apoy ay adi kadkad-ep ay naisasagana para sin Diablo ya sin aanghel na. <sup>42</sup> Tan nadagaanganak ngem adi yo pinmakan, ya nabigawak ngem adi yo pinmainom. <sup>43</sup> Sangailiak ngem adi yo sinangailis sak-en. Maga abey badok ngem adi yo binadoan sak-en. Nansakit ya naibalodak abe ngem sinigaan yo ay inmayowan.’

<sup>44</sup> “Pag dan pooten en sak-en, ‘Apo, pig-an di nangilaan mi en sik-a ay nadagaangan ya nabigaw ya sangaili ya magay badom ya mansakit ya naibabalod yan adi mi binadangan sik-a?’

<sup>45</sup> “Asiak pag kanan en daida, ‘Tet-ewa nan ibagak en dakayo ay sin nanigaan yo ay mamadang sin olay esa ay kababaan en da naey ay aag-ik, sinigaan yo abe ay mamadang en sak-en.’”

<sup>46</sup> Pag ipaanongos Jesus ay nangwani, “Da dooy ngarud et maipakaan da ta madosa da ay eng-enggana, ngem din nalinteg ay ipogaw et ganasen da di biyag ay iwed patingga na.”

## 26

### *Din Nanganapan Da Si Iyat Da Ay Mamse En Jesus*

(*Mar. 14:1-2; Luc. 22:1-2; Jn. 11:45-53*)

<sup>1</sup> Idi nakdeng ay initdon Jesus am-in dana, kanana sin papasolot na, <sup>2</sup> “Ammo yo ay si loman, domateng din fiesta ay makwani en Nalabas, et sak-en ay Anak di Ipogaw et maipolangak ay mailansa sin krus.”

<sup>3</sup> Sin kosto ay nangwanian Jesus sidi, nasinop din papangolon di papadi ya din aam-a sin beey Caifas ay kangatoan ay padi <sup>4</sup> ta anapen da mo intoy iyat da ay manpap en Jesus ay adi maam-ammoan ta say ipapse da. <sup>5</sup> Kanan da, “Basta adi tako itomtompompong sin fiesta tan into et mo man-gogolo din kaipogaw.”

§ 25:40 Mo maipanggep sin aag-in Jesus et ilaen abe sin 12:48-50.

*Din Nangisoyatan Di Babai Si Bangbanglo Sin Toktok Jesus  
(Mar. 14:3-9; Jn. 12:1-8)*

<sup>6</sup> Sin kawadan da Jesus ed Betania, en da nakikan sin beey Simon ay kinaan Jesus din kaeegyay ay sakit di kodil na. <sup>7</sup> Idi mangmangan da, sinmag-en en Jesus di babai ay nananggen si botilya ay alabastro di amag na ay napay-an si kanginaan ay bangbanglo, et insoyat na sin toktok Jesus.

<sup>8</sup> Idi inilan din papasolot na, binmonget da yan kanan da, “Ay-ayyoayo! <sup>9</sup> Nailako koma di ta maidawat sin nabiteg, tan nangina!”

<sup>10</sup> Ngem ammon Jesus din kankan na da et kanana, “Bay-an yo! Apay nga palpaligaten yos sisya? Mayamayay di inamag na en sak-en! <sup>11</sup> Tan kanayon ay waday nabiteg sin kad-an yo,\* ngem mo sak-en pay, bakenak wadas kanayon en dakayo. <sup>12</sup> Insoyat na din bangbanglo ay nay en sak-en ta say isagana na din awak ko para sin kaiponponak. <sup>13</sup> Tet-ewa nan ibagak en dakayo ay olay intos nan daga di kaikaskasabaan di siged ay damag, madaddad-at abe din inamag di babai ay nay ay pangnemneman di ipogaw en sisya.”

*Din Nakitolagan Judas Ay Manglipot En Jesus  
(Mar. 14:10-11; Luc. 22:3-6)*

<sup>14</sup> Pag emey si Judas Iscariot ay esa sin sinpo ya doway ay pasolot Jesus sin papangolon di papadi, <sup>15</sup> et kanana, “Piga di mabalin ay ilagbo yo en sak-en mo ipolang kos Jesus en dakayo?” Et binilang da di tolonpo ay palata ay lagbo na.† <sup>16</sup> Et manlogis di, inan-anap na di waya na ay manglipot en Jesus.

*Din Nansaganaan Da Sin Maodi Ay Makiokoban Da En Jesus  
(Mar. 14:12-21; Luc. 22:7-13)*

<sup>17</sup> Domateng pay din damo ay agew di fiesta ay makwani en Tinapay ay Magay Labadura na, inmey din papasolot Jesus en sisya et pinoot da, “Intoy laydem ay en mi pangisaganaan si kanen tako para sin fiesta ay makwani en Nalabas?”

<sup>18</sup> Kanan Jesus, “En kayo sin kad-an din doylalaki ay ammo tako sin siyodad, et kanan yo en sisya, ‘Inbagan din Apo tako ay dandani din timpo ay inkeddeng Diyos para en sisya. Omali kami kanos na sin beey mo ta say pangiokoban mi en sisya sin fiesta.’”

<sup>19</sup> Siya di, tinongpal din papasolot na din intogona en daida et en da sinagana din kanen da ay para sin fiesta.

<sup>20</sup> Idi nalabi, nakitokdos Jesus sin papasolot na ay mangan. <sup>21</sup> Mangmangan da pay, kanan Jesus, “Tet-ewa nan ibagak en dakayo ay waday esa en dakayo ay manglipot en sak-en.”

<sup>22</sup> Palaloy sakit di nemnem da, et nansososkat da ay nanpoot en sisya, “Apo, tan mo sak-en, ay siya?”

<sup>23</sup> “Esa met en dakayo ay makisiwsiwsiw en sak-en si tinapay sin mallokong ay nay,‡ kanan Jesus ay sinombat. <sup>24</sup> “Sak-en ay Anak di Ipogaw et mateyak met, tan say inpaisolat Diyos ed nabaon, ngem kaseseg-ang pay san manglipot en sak-en. Agpos et koma mo adi naianak!”

<sup>25</sup> Pag et mankalis Judas ay awni et manglipot en sisya yan kanana, “Apo maestro, tan mo sak-en, ay siya?”

“Mo say kanam, kosto,” insongbat Jesus.

*Din Maodi Ay Nakiokoban Jesus Sin Pasolot Na  
(Mar. 14:22-26; Luc. 22:14-20; 1 Cor. 11:23-25)*

<sup>26</sup> Idi mangmangan da pay laeng, nan-as Jesus si tinapay et nan-iyaman en Diyos. Asi na pag pit-ipit-ingen et idawat na sin papasolot na ay nangwani, “Alaen yo na ta kanen

\* **26:11** Deuteronomio 15:11. † **26:15** Din tolonpo ay pilak ay nay et banol di 120 ay denario ay siya abe di kosto ay lakon di bag-en. Ilaen abe sin Zekarias 11:12. ‡ **26:23** Salmo 41:9.

yo, tan si naey di awak ko.” <sup>27</sup> Pag man-as tasa ay napay-an si danom di obas et maniyaman en Diyos. Pag nan idawat en daida ay nangwani, “Alaen yo na ta pantedted-an yo am-in, <sup>28</sup> tan si naey di dadak ay maniglot sin baro ay tolag Diyos. Omayos mo mateyak ta say mapakawan din basbasol di ad-ado ay ipogaw. § <sup>29</sup> Kanak en dakayo ay adiak kasin omin-inom si danom di obas enggana sin agew ay makiinomak en dakayo sin baro ay danom di obas sin panturayan Diyos.”

<sup>30</sup> Idi naibagan Jesus di, nankanta da ay nandayaw en Diyos, et pag dan bomala ay emey sin bilig ay Olivo.

*Din Nangipadtoan Jesus Sin Nangisaotan Pedro En Sisya*  
(*Mar. 14:27-31; Luc. 22:31-34; Jn. 13:36-38*)

<sup>31</sup> Idi wada da sin danan, kanan Jesus en daida, “Sin labi ay nay, awni man et tomaynan kayo am-in et lomayaw kayo, tan waday inpaisolat Diyos ay kanana, ‘Awni et peslek din mangay-ayowan sin kakarnero et mansisian da.’\* <sup>32</sup> Ngem mo tagoen kasin Diyos sak-en, mangon-onaak mo si dakayo ay emey ed Galilea.”

<sup>33</sup> Asi et kanan Pedro, “Olay mo lomayaw am-in dana ay gagait ko, adiak pay taynan sik-a.”

<sup>34</sup> Kanan Jesus, “Awni kadi, sin daan pantan-oan di kawwitan sin nay ay labi, mamitlo ka ay mangwani en adim am-ammos sak-en.”

<sup>35</sup> Pag et kanan Pedro, “Olay mo masapol ay makikateyak en sik-a, adiak polos isassaot sik-a.” Et siya abe di inbagan din am-in ay gagait na ay pasolot.

*Din Nankararagan Jesus Ed Getsemani*  
(*Mar. 14:32-42; Luc. 22:39-46*)

<sup>36</sup> Somawang pay da Jesus ya din papasolot na sin lugar ay makwani en Getsemani, kanana en daida, “Itokdo yos na, ta dowanak en mankararag ed dagas.” <sup>37</sup> Pag nan ayagan si Pedro ya din dowa ay anak Zebedeo, et nakiey da en sisya. Manlogi isdi, peteg ay mansakit nemnem na ya nadagsenan sisya, <sup>38</sup> et kanana en daida, “Nalabes nan sakit di nemnem ko. Kaman siya nay kateyak. Mantee kayos na ay komakadwa. Adi kayo kaseyseyep.”

<sup>39</sup> Pag emey sin dagdagas et nanlakob-o ay mankararag. “Ama,” kanana, “mo mabalin, ipalobos mo kod ay adiak nam-osen din nay omali ay ligat ko. Ngem baken koma din laydek mo adi din laydem di matongpal.”

<sup>40</sup> Mantaoli pay sin kad-an di tolo ay pasolot na ay doy, dinatnganas daida ay naseseyep. Siya di kanana en Pedro, “Ay adi kayo makaitoled si seyep yo si olay es-esa ay oras ta komakadwa kayo koma? <sup>41</sup> Adi kayo maseyep, mo adi et mankararag kayo ta say adi kayo masolsolisog. Tan kosto kayman di panggep yo, ngem nakapoy di awak yo.”

<sup>42</sup> Pag kasin en mankararag si Jesus ay nangwani, “Ama, mo adi mabalin ay mailisiak din ligat ko ay nay mo adi et masapol ay nam-osek, sapay koma ta matongpal din laydem.”

<sup>43</sup> Mantaoli pay kasin sin kad-an di papasolot na, naseseyep da kasin, tan adi da makakiyat sin mata da. <sup>44</sup> Isonga inmey kasin ay mankararag si maikapitlo ay nan-iso di inkararag na.

<sup>45</sup> Pag mantaoli sin kad-an di papasolot na et kanana en daida, “Kambaw gan-ganasen yo pay laeng ay maseseyep! Enggay dinmateng din oras ay inkeddeng Diyos, et sak-en ay Anak di Ipogaw et maipolangak sin managbasol ay ipogaw. <sup>46</sup> Ibangan yo, tan nay omal-ali din manglipot en sak-en. En tako abten.”

§ 26:28 Exodo 24:8; Jeremias 31:31-34. \* 26:31 Zekarias 13:7.

### *Din Nadpapan Jesus*

*(Mar. 14:43-50; Luc. 22:47-53; Jn. 18:1-11)*

<sup>47</sup> Deda ay mankalkali si Jesus, sinmawang si Judas ay esa sin sinpo ya dow a ay pasolot na. Ad-ado di kabeweg na ay inbaan din papangolon di papadi ya din aam-an di Judio ay nan-egeegen si kampilan ya pat-o. <sup>48</sup> Waday sinyas ay nakitolagan Judas sin kabeweg na ta say pangimatonan da en Jesus. Kanana, “Din ongoak et say depapen yo.” <sup>49</sup> Siya di inmey en Jesus ay dagos ay nangwani, “Apo maestro, komosta ka?” Pag na et ongoan.

<sup>50</sup> Kanan et Jesus, “Gayyem ko, tongpalem san panggep mo ay inmalis na.”†

Pag somag-en din kabeweg na. Dinpap das Jesus et pinden da. <sup>51</sup> Dowan et din esa ay gait Jesus et kaoksot sin kampilana. Kabetbet sin bag-en di kangatoan ay padi et nalongodan inga na. <sup>52</sup> Ngem kanan et Jesus, “Isiket mo sa, tan din mangos-osal si kampilan et matey si kampilan. <sup>53</sup> Ay adim ammo ay mo mankedawak komas badang en Amak, ibaa na ay dagos di nasurok ay pitopolo ya dow a ay libo ay anghel?‡ <sup>54</sup> Ngem mo say iyat ko koma, intoy iyat di inpaisolat Diyos ay matongpal ay kanana en masapol ay maamag dana?”

<sup>55</sup> Pag kanan Jesus sin kaipoipogaw, “Ay tollisanak aya ta inmali kayo ay nan-egeegen si kampilan ya pat-o ay en dompap? Inag-agew met ay nantoktokdoak sin Timplo ay nan-it-itdo, ngem adi kayo dinomdompap. <sup>56</sup> Ngem naamag am-in dana ta say matongpal din inpaisolat Diyos sin mamadto.” Sin nangwanian Jesus sidi, kalayaw din papasolot na et tinaynan da.

### *Din Namistigalan Di Tuteuray Di Judio En Jesus*

*(Mar. 14:55-64; Luc. 22:63-71; Jn. 18:19-24)*

<sup>57</sup> Din nanpap en Jesus et in-ey das sisya sin beey Caifas ay din kangatoan ay padi ay nasisinopan din mamaestron di linteg ya aam-a. <sup>58</sup> Mo si Pedro pay et inmon-onod ay namona di betaey da engganans dinmateng sin bel-ayan di beey ay sana. Pag en makitokdo sin gogowardiya ta ilaena mo sinoy mapasamak en Jesus.

<sup>59</sup> Mo din papangolon di papadi ya din odom ay papangolo et nan-an-anap das pamabasol ay olay baken tet-ewa en Jesus ta say pangidaruman dan sisya ta ipapse da. <sup>60</sup> Ngem olay ad-ado di nantistigo ay man-etek maipanggep en sisya, magay inanap das omanay si pangeddenggan da en sisya. Idi nabaybayag, wada di dow a ay inmey sin sango <sup>61</sup> et kanan da, “Kanan din ipogaw ay nay en mabalin kano ay bakasena din Timplon Diyos ta asi na kasin saaden si tolo ay agew.”

<sup>62</sup> Siya di pinmika din kangatoan ay padi et kanana en Jesus, “Ay magay maisongbat mo aya sin nay inpabasol dana en sik-a?” <sup>63</sup> Ngem ginmiginek. Isonga kanan aben din kangatoan ay padi, “Isapatam sin ngadan di matmatago ay Diyos ta ibagam mo sik-a din Messias ay Anak Diyos.”

<sup>64</sup> “Mo say kanam, kosto,” kanan Jesus ay sinombat. “Et wada pay di ibagak en dakayo am-in. Sin tapin di agew, ilaen yos sak-en ay Anak di Ipogaw ay tomotokdo sin makannawan Diyos ay manakabalin. Ilaen yo abes sak-en ay omal-ali ay mapod langit ay maikoyog sin liboo.”

<sup>65</sup> Sin nanngenas di, binisngit din kangatoan ay padi din mismo ay bado na begew sin bonget na yan kanana, “Inis-o nan awak na en Diyos! Ay siya mo masapol tako di manistigo? Nay met ay dinnge tako din lawa ay inbaga na. <sup>66</sup> Sinoy pannemnem yos na?”

“Nanbasol adi! Matey koma!” kanan da. <sup>67</sup> Pag dan togpatogpaan din ropa na dowan da aben despedespegen. Di odom en daida pay yan tinampitampik das sisya§ <sup>68</sup> ay nangwani, “Sik-a ay Messias kano, pogtoam kod mo sinoy nanampik en sik-a.”

† **26:50** Di esa abe ay kaiologana sin Griego et: “Gayyem ko, sinoy panggep mo ay inmalis na?” ‡ **26:53** Din kanana sin Griego et: nasurok ay sinpo ya dow a ay sinkabeweg ay aanghel. Sin timpon Jesus, din kabibilang di soldado sin sinkabeweg et enem ay libo. § **26:67** Isaias 50:6.



### *Din Nangisaotan Pedro En Jesus*

(*Mar. 14:66-72; Luc. 22:54-62; Jn. 18:15-18,25-27*)

<sup>69</sup> Mo si Pedro pay et nakitotokdo pay laeng sin bel-ayan di beey. Inmey di balasang ay baan di kangatoan ay padi en sisya yan kanana, “Esa ka met ay gait Jesus ay taga-Galilea.”

<sup>70</sup> Ngem insaot na sin sangoanan da am-in ay nangwani, “Ado paabe na! Adiak ammo san ibagbagam.”

<sup>71</sup> Pag emey sin benget di bel-ayan sin kad-an di pasbol. Ngem wada et di esa ay balasang sidi ay nangila en sisya et kanana sin pinmipikas di, “Din lalaki ay doy et esa met ay gait Jesus ay taga-Nazaret.”

<sup>72</sup> Ngem kasin insaot Pedro ay nangwani, “Isapatak ay adiak am-ammo din lalaki ay doy.”

<sup>73</sup> Maaw-awni pay, inmey din pinmipikas di en sisya yan kanan da, “Tet-ewa met ay esa ka en daida, tan mailasin mi din ayog di kalim!”

<sup>74</sup> Asi et manbayos si Pedro ay nangwani, “Sapay koma ta domosas Diyos mo baken tet-ewa nan kankanak. Isapatak ay adiak polos am-ammo san ipogaw,” kanana. Pag et katan-o din kawwitan. <sup>75</sup> Et pag nemnemen Pedro din inbagan Jesus ay sin daan pay pantan-oan di kawwitan, mamitlo ay kanana en adi na ammos sisya. Asi pay komaan et palalo di anog-og na.

## 27

### *Din Naipolangan Jesus En Pilato*

(*Mar. 15:1-2; Luc. 23:1-2; Jn. 18:28-38*)

<sup>1</sup> Sin napat-aana, nanmimiting din am-in ay papangolon di papadi ya aam-an di Judio, et nantotolag da sin iyat da ay mangipapse en Jesus. <sup>2</sup> Pag dan baloden et en da inpolang en Gobernador Pilato.

### *Din Nateyan Judas*

(*Ina. 1:18-19*)

<sup>3</sup> Mo si Judas ay nanglipot en Jesus, idi inammoana ay nakeddengnan si Jesus ay matey, inbabawi na din inamag na et intaoli na din tolonpo ay palata sin papangolon di papadi ya aam-a <sup>4</sup> yan kanana, “Nakabasolak, tan linipotak di ipogaw ay magay basol na et nay ay nakeddengnan ay matey.”

“Magay lawa na en dakami,” kanan da ay sinombat. “Sik-a di makaoway sidi.” <sup>5</sup> Siya di initpig Judas din pilak sin Timplo et kinmaan. Pag en manposos.

<sup>6</sup> Pinidit din papangolon di papadi din pilak ay sana yan kanan da, “Iparit di linteg tako ay maitapi na sin pilak di Timplo, tan naibayad sin biyag di ipogaw.” <sup>7</sup> Pag dan manngangalat mo intoy pangosalan da sin pilak, et ninemnem da ay ilako da sin dagan di esa ay man-am-amag si banga ta panbalinen da si kamposanton di mangili. <sup>8</sup> Isonga din daga ay doy et makwani en Daga ay Nabayadan si Dada enggana ed wani. <sup>9</sup> Et say natongpalan din inpadton Jeremias ay nangwani,

“Ina da din tolonpo ay palata ay nantotolagan di odom ay Israelita ay say kosto ay panbayad dan sisya, <sup>10</sup> et inbayad da sin dagan di man-am-amag si banga ay maibasar sin inbilin din Apo en sak-en.”\*

### *Din Namistigalan Pilato En Jesus*

(*Mar. 15:2-5; Luc. 23:3-5; Jn. 18:29-38*)

<sup>11</sup> Mo si Jesus et pinmipika sin sangoanan di gobernador. Pinoot din gobernador en sisya, “Ay sik-a baw din arin di Judio?”

“Mo say kanam et siya,” insongbat Jesus.

\* **27:10** Zekarias 11:12-13; Jeremias 32:6-9.



<sup>12</sup> Ngem olay mo pinabasbasol din papangolon di papadi ya aam-as sisya, adi sinom-sombat. <sup>13</sup> Siya di et kanan Pilato, “Ay adim dengdengngen din ad-ado ay ipabasbasol da en sik-a?” <sup>14</sup> Ngem adi polos sinongsongbatan Jesus di olay esa sin inabasbasol da en sisya, isonga peteg ay nasdaaw din gobernador.

### *Din Naikeddengan Jesus Ay Matey*

*(Mar. 15:6-15; Luc. 23:13-25; Jn. 18:39-19:16)*

<sup>15</sup> Din ogalin Pilato sin tonggal fiesta ay makwani en Nalabas et ibolos na di esa ay balod ay pilien di kaipoipogaw. <sup>16</sup> Sin doy ay timpo, wada di balod ay madamdamag begew sin lawa ay inam-amag na ay manngadan si Jesus Barabbas. <sup>17</sup> Isonga idi nasinop din kaipoipogaw, pinoot Pilato en daida, “Sinoy layden yo ay ibolos ko? Ay si Jesus Barabbas ono si Jesus ay makwani en Cristo?” <sup>18</sup> Say pinoot na di, tan ammo na ay inpolang din papangolon di Judio si Jesus en sisya begew si apos da.

<sup>19</sup> Idi wada pay laeng si Pilato sin tokdoan di mangokom, waday inpaw-it asawa na ay nangwani, “Adi ka makibiyang ay manosa sin ipogaw ay sana ay magay basol na, tan waday iniitaw ko ed labi maipanggep en sisya, et palalo ay napaligatanak begew sin iitaw ko ay nay.”

<sup>20</sup> Idi siya di, din papangolon di papadi ya aam-a et sinogsogan da din kaipoipogaw ta say kedawen da en Pilato ay si Barabbas di ibolos na dowana pay ipapse si Jesus. <sup>21</sup> Isonga sin namootan Pilato kasin ay nangwani, “Sino en da naey ay dowana di layden yo ay ibolos ko?”

“Barabbas!” kanan da ay sinombat.

<sup>22</sup> “Mo siya sa, intoy iyat ko ngarud en Jesus ay makwani en Cristo?”

“Ilansam sin krus!” insongbat da am-in.

<sup>23</sup> “Ay tan? Sino ngin di basol na?” kanan Pilato.

Pag da et kabanogaw ay nangwani, “Ilansam sin krus!”

<sup>24</sup> Sin nangilaan Pilato ay magay pamosposana tan dandani ay mawada di golo, nan-as danom et nanbo sin sangoanan di kaipoipogaw ay nangwani, “Siya nay inamag ko ta ipailak ay adiak makibiyang sin mapsean di ipogaw ay nay. Dakayo di makaammo!”

<sup>25</sup> Pag kanan da am-in ay sinombat, “Aw adi! Olay dakami ya din an-ak mi di makaoway sin kateyana!”

<sup>26</sup> Idi siya di, inbolos Pilato si Barabbas, ngem si Jesus pay et inpasoplit na et pag nan ipolang sin sosoldado ta en da ilansa sin krus.

### *Din Nanglaslasoyan Di Sosoldado En Jesus*

*(Mar. 15:16-20; Jn. 19:2-3)*

<sup>27</sup> Inisgep din sosoldado si Jesus sin beey di gobernador et inpasinop da din am-in ay gagait da et nilikob da. <sup>28</sup> Pag dan kaanen bado na et sinokatan das manbalanga ay naloyong. <sup>29</sup> Nan-apid da abe si pagat ay inkorona da en sisya. Nan-a da abe si pa-o et inpag-en da sin makannawan ay takkay na. Pag dan mandokmog sin sangoanana, et linaslasoy da ay nangwani, “Matagotago ka ay Arin di Judio!” <sup>30</sup> Tinogpatogpaan da dowan da aben nansosokat ay manga sin pa-o ay iin-genana ta iseppaseppat da sin toktok na. <sup>31</sup> Idi nakdeng ay nilaslasoy das sisya, kinaan da din manbalanga ay inbado da en sisya, et inpaibado da kasin en sisya din sigod ay bado na. Pag dan ikaan ay en da ilansa sin krus.

### *Din Nailansaan Jesus Sin Krus*

*(Mar. 15:21-32; Luc. 23:26-43; Jn. 19:17-27)*

<sup>32</sup> Wada da pay sin danan, inabat da di lalaki ay taga-Cirene ay manngadan si Simon, et pinilit da ay tilidena din krus Jesus. <sup>33</sup> Pag dan itoloy enggana ay sinmawang da sin lugar ay kanan da en Golgota, di olog na et kad-an di tong-an di toktok. <sup>34</sup> Domateng

da pay sidi, pan-inomen da komas Jesus si arak ay natapian si manpait ay mangipaon-onina kano si sakit. Ngem idi tinamtamana, sinigaana.†

<sup>35</sup> Pag dan ilansa sin krus. Asi da pag panbinnonotan din bado na ta say panbibin-gayan da,‡ <sup>36</sup> et pag dan tomokdos di ay mambantay. <sup>37</sup> Wada di naisolat ay inpakpak da sin toktokan Jesus ay mangibaga sin naipabasol en sisya. Kanana, “Si naey si Jesus ay Arin di Judio.” <sup>38</sup> Wada abe di doway ay tollisan ay inlansa da si natken ay krus, esa sin kannawan ya esa sin kattigid Jesus.

<sup>39</sup> Mo din malablabas, nanwegweg da ay nanglaslasoy en sisya§ <sup>40</sup> ay nangwani, “Kanam od abe en bakasem din Timplo ta asi ka kasin saaden si tolo ay agew. Mo siya sa, isalakan mon awak mo! Mo tet-ewa ay sik-a din Anak Diyos, komaan kas san krus ta bomaba ka!”

<sup>41</sup> Siya abe ay din papangolon di papadi ya din mamaestron di linteg ya aama et linaslasoy da ay nangwani, <sup>42</sup> “Insalakana met di odom ay ipogaw, ngem adi makaisalakan sin awak na. Sisya kano di Arin di Israelita. Mo tet-ewa di, olay bomaba sin krus et mamati kami en sisya. <sup>43</sup> Talkena kanos Diyos ya kanana en tet-ewa ay Anak Diyos, isonga ilaen tako mo layden Diyos ay mangisalaman en sisya.”\* <sup>44</sup> Olay din tollisan ay nailalansa sin krus da et kaman nidi abe di inyat da ay nanglaslasoy en sisya.

### *Din Nateyan Jesus*

*(Mar. 15:33-41; Luc. 23:44-49; Jn. 19:28-30)*

<sup>45</sup> Idi inmalas dosi, kasaldeng din agew ay mansey-ang, et binmolinget din intiro ay ili engganas alas tres. <sup>46</sup> Alas tres pay, inpigsan Jesus din kali na ay nangibogaw, “Eli, Eli, lama sabachthani?” laydena ay kalien, “Diyos ko, Diyos ko, apay nga tinmaynan ka?”†

<sup>47</sup> Idi dinngen di odom ay pinmipikas di, kanan da, “Ay-ayaganas Elias!” <sup>48</sup> Di esa en daida et katagtag ay en man-as kaman kapes. Inbebe na si soka, et pag nan tebken si pa-ota idewdew nan sisya ta sopsopana. <sup>49</sup> Ngem kanan di odom, “Awni ka kod ta ilaen tako mo omalis Elias ay mangisalaman en sisya.” <sup>50</sup> Pag kasin manbogaw si Jesus et intalek na din ab-abiik na en Diyos.

<sup>51</sup> Pag et nabisngit din kurtinan di Timplo et nandowa ay nanlogi sin ngato ay nanpababa. Nanyegyeg abe et nagpak di dadakke ay bato. <sup>52</sup> Dowan et nabokatan din liliyang ay kamposanto et natago di ad-ado ay nasantoan ay ipogaw Diyos ay natey ed idi <sup>53</sup> yan kinmaan da sin naiponponan da. Sin natagoan kasin Jesus, inmey da ed Jerusalem ay din Nasantoan ay Siyodad, et ad-ado di nangila en daida.

<sup>54</sup> Idi niliknan din kapitan di sosoldado ya din gagait na ay namanbantay en Jesus din yegyeg ya inila da din am-in ay napasamak, palalo di egyat da, et kanan da, “Tet-ewa ay Anak Diyos sisya.”

<sup>55</sup> Ad-ado abe di babbabai isdi ay nanatamang. Daida di nakikiey en Jesus ay napod Galilea ya namadbadang en sisya. <sup>56</sup> Di odom en daida et si Maria Magdalena ya si Maria ay inan da Santiago en Jose ya din asawan Zebedeo.

### *Din Naiponponan Jesus*

*(Mar. 15:42-47; Luc. 23:50-56; Jn. 19:38-42)*

<sup>57</sup> Idi masmasdem, sinmawang di nabaknang ay pasolot Jesus ay taga-Arimatea ay manngadan si Jose. <sup>58</sup> Inmey en Pilato ay nangdaw sin bangkay Jesus, et inbilin Pilato ay maidawat en sisya. <sup>59</sup> Isonga inmey si Jose ay en manga sin bangkay et binotibotana si siged ya baro ay lopot. <sup>60</sup> Pag nan igto sin liyang ay oka na ay adi naos-osal ay tiniktikana ay bato. Makdeng di, pinolag na di dakdake ay bato ta maenban din liyang, et pag komaan. <sup>61</sup> Si Maria Magdalena ya din kangadngadanana ay si Maria et wada da abes di ay tinmotokdo ay manasagang sin liyang.

† 27:34 Salmo 69:21. ‡ 27:35 Salmo 22:18. § 27:39 Salmo 22:7. \* 27:43 Salmo 22:8 † 27:46 Salmo 22:1.

### *Din Namanbantay Sin Naiponponan Jesus*

<sup>62</sup> Din agew ay doy ay Biyernes et say pansaganaan di Judio si para si bigat ay agew ay pan-ibbayan da. Sin pan-ibbayan ay doy,<sup>‡</sup> inmey din papangolon di papadi ya din Fafariseo en Pilato <sup>63</sup> et kanan da, “Apo, ninemnem mi ay sin matmatago pay laeng din doy makaetek ay ipogaw, kanana en matago kasin mo emey di tolo ay agew. <sup>64</sup> Isonga mayat ngin mo ibilin mo ay waday en mamanbantay sin naiponponana enggana si maikatlo ay agew tan into et mo emey din papasolot na ay mangakew sin bangkay na et pag dan ipadamadamag sin kaipoipogaw en natago kasin. Mo say amagen da di, adi ngin masepsep ay lawlawa di pantongpalan di etek da ay nay mo din nangon-ona ay etek Jesus ay sisya din Messias.”

<sup>65</sup> “May ngarud,” kanan Pilato, “man-ayag kayos sosoldado ta emey kayo sin naigtoana. Ipakat yo di kabaelan yo ay mamantay si kosto.” <sup>66</sup> Isonga pag dan emey sin liyang et minalkaan da din bato ay nain-eb ta say maila mo waday mangolin. Pag dan komaan ay nataynan din sosoldado ay mamanbantay.

## 28

### *Din Kasin Natagoan Jesus*

*(Mar. 16:1-8; Luc. 24:1-12; Jn. 20:1-10)*

<sup>1</sup> Idi nakdeng din agew ay pan-ibbayan yan pomatpat-a sin Dominggo, inmey si Maria Magdalena ya din kangadngadanana ay si Maria ta en da ilaen din naiponponan Jesus. <sup>2</sup> Pag et manyegyeg si napigsa, tan wada di anghel di Apo ay binmaba ay napod langit. Inolina din bato ay nain-eb sin liyang yan tinokdoana. <sup>3</sup> Din kailaana et mansilsilap ay kaman kimat ya din bado na abe et mankikilat ay kaman andap. <sup>4</sup> Idi inilan din gogowardiya din anghel ay sana, nanpayegpeg das palalo ay egyat da et natokang da ay kaman dan natey.

<sup>5</sup> Pag kanan din anghel sin babbabai, “Adi kayo emegyat. Ammok ay an-anapen yos Jesus ay nailansa sin krus. <sup>6</sup> Ngem maga isna, tan natago kasin ay say inbaga na. Omali kayos na ta ilaen yo din naipayagana. <sup>7</sup> Asi yo dalasen ay en ibaga sin papasolot na ay natago kasin et mangon-ona mo si dakayo ay emey ed Galilea. Maila yos sisyas di. Anggay nisas ibagak en dakayo.”

<sup>8</sup> Isonga pag dan dalasen ay komaan sidi ay emeegyat ngem dowan da aben naragsaragsakan, et nanagtag da ay en mangibaga sin papasolot na. <sup>9</sup> Sin nanagtagan da, kawada et si Jesus ay nangabat en daida yan kanana, “Komosta kayo?” Sinmag-en da en sisya, et nandokmog da ya in-gegan dan siki na ay nandayaw en sisya. <sup>10</sup> Pag kanan Jesus en daida, “Adi kayo emegyat. En kayo ibaga sin aag-ik ta emey da ed Galilea ta man-asiila kamis di.”

### *Din Nasoksokan Di Namanbantay*

<sup>11</sup> Idi wada din babbabai sin danan, di odom ay sosoldado ay wada sin naiponponan Jesus et inmey da sin siyodad, et insodsod da sin papangolon di papadi din am-in ay napasamak. <sup>12</sup> Siya di et nanmimiting din papangolon di papadi ya din aam-a ta mantolag das amagen da. Din ninemnem da ay amagen et pasoksokan da din sosoldado si ad-ado ay pilak <sup>13</sup> yan intogon da en daida, “Din ibaga yo sin ipogaw et naseseyep kayo yan inmali din papasolot Jesus sin gawan di labi et inakew da din bangkay na. <sup>14</sup> Tan into et mo madamag din gobernador na, makaammo kami ta mapnek sisya et maga di mapasamak en dakayo.”

<sup>15</sup> Siya di, inan din sosoldado din pilak ay sana et tinongpal da din naibilin en daida. Isonga enggana ed wani, siya na din mandindinamag sin Judio.

<sup>‡</sup> **27:62** Din ogalin di Judio, manlogi din agew ay pan-ibbayan sin kadiposan di agew sin Biyernes, et makdeng sin kadiposan di agew sin Sabado.

*Din Nanpailaan Jesus Sin Papasolot Na*  
(*Mar. 16:14-18; Luc. 24:36-49; Jn. 20:19-23; Ina. 1:6-8*)

<sup>16</sup> Inmey din sinpo ya esa ay pasolot Jesus sin dontog ed Galilea ay inbaga na ay pangabtana en daida. <sup>17</sup> Sin nangilaan da en sisya, dinaydayaw da, ngem di odom et nandowadowa da. <sup>18</sup> Pag omasag-en si Jesus en daida yan kanana, “Naidawat en sak-en din am-in ay kalebbengan ed langit ya isnan daga. <sup>19</sup> Emey kayo ngarud sin kaipoipogaw sin am-in ay il-ili ta say panbalinen yos daida si papasolot ko. Bonyagan yos daida sin ngadan Ama, Anak ya Ispirito Santo, <sup>20</sup> ya itdo yo en daida ay dadlon dan tongpalen din am-in ay inbilin ko en dakayo. Nemnemen yo abe ay kakadwaek dakayo si kankanayon enggana sin panpatinggaan di lobong.”

## **Din Sigid Ay Damag Ay Insolat San Marcos Maipanggep Sin Libro Ay Nay**

Din nangisolat sin libro ay nay et si Marcos ay anak Maria ay esa ay baknang ay taga-Jerusalem (Inam-amag 12:12). Kanan di kaad-adoan ay nangad-adal sin Biblia en sisya met laeng si Juan Marcos ay kasingsing Barnabas (Col. 4:10) ay nakiey en da Pablo en Barnabas sin damo ay nanbiyahian da ay en nangikasaba sin siged ay damag (Inam-amag 12:25; 13:5). Ammo tako abe ay si Marcos et gait en Apostol Pedro (1 Pedro 5:13), et kanan aben di kaad-adoan en si Pedro di nangadalan Marcos si maipanggep sin inam-amag ya init-itdon Apo Jesus.

Insolat Marcos din libro ay nay para sin kaipoipogaw ay Gentil, namnamed di taga-Roma, isonga at-atik di intapi na ay naipadto sin Daan Ay Tolag mo da San Mateo en San Lucas. In-olog na abe di odom ay kali ya ogalin di Judio ta say maawatan di Gentil. Ilaen sin 3:17; 5:41; 7:1-4, 11, 34.

Din nay siged ay damag ay insolat Marcos et ipaammo na ay si Jesus din Anak di Ipogaw ay nansilsilbi en Diyos ya sin kaipoipogaw. Din versikulo ay kasinopan nina et sin 10:45: “Olay sak-en ay Anak di Ipogaw et adiak inmali ay masilbian mo adi et ta mansilbiak si kaipoipogaw ya idawat kon biyag ko ay mangsobot si ad-ado.” Layden Marcos ay maawatan di mamasa sin libro na ay kanayon ay man-am-amag si Jesus si siged, isonga ad-ad-ado di dinad-at na ay inam-amag Jesus mo din init-itdo na. Pinaneknekana din panakabalin ya kalebbengan Jesus ay Anak Diyos babaen sin nanad-atana sin nakaskasdaaw ay milagro ay inam-amag Jesus, din nangagasana si waday sakit na ya din nangipakaanana si aanito.

Din kakedengan di libro (16:9-20) et maga sin nangon-ona ay manuskrito ono kopya ay naisolat sin kalin di Griego, isonga din pannemnem di kaad-adoan et baken si Marcos di nangisolat.

### **Din Linaona**

- Din nankaskasabaan Juan ay Mamonbonyag ya din nansaganaan Jesus ay man-itdo 1:1-13
- Din nan-it-itdoan Jesus ed Galilea 1:14-9:50
- Din oblan Jesus manlogi ed Galilea enggana ed Jerusalem 10:1-52
- Din naodi ay dominggong Jesus ya din nateyana 11:1-15:47
- Din kasin natagoan Jesus 16:1-8
- Din nanpail-ilaan Jesus ya din naikayangana ed langit 16:9-20

### *Din Nankaskasabaan Juan ay Mamonbonyag (Mat. 3:1-12; Luc. 3:1-18; Jn. 1:19-28)*

<sup>1</sup> Siya na di panlogian di siged ay damag ay maipanggep en Jesu Cristo ay Anak Diyos.

<sup>2</sup> Waday inbagan Diyos sin Anak na ed nabaon ay inpaisolat na en Isaias ay esa ay mamadto. Kanana,

“Dengngem, waday ibaak ay mangon-ona mo sik-a ay mangisagana sin danem.

<sup>3</sup> Manbogaw sin lugar ay magay omili ay mangmangwani, ‘Isagana yo din danen di Apo ay omali ta say siged di danan ay pandanana.’ ”\*

<sup>4</sup> Et natongpal di, tan nanpailas Juan ay Mamonbonyag sin lugar ay magay omili, et nangaskasaba sin en nandengdenge. Kanana, “Ibabawi yo din basbasol yo yan manpabonyag kayo ta say pakawanen Diyos din basbasol yo.” <sup>5</sup> Em-emey en sisya di

\* 1:3 Isaias 40:3.

omili ed Jerusalem ya din man-ili sin am-in ay ili ed Judea. Inpodpodno dan basbasol da et pag bonyagan Juan si daida sin ginawang ay Jordan.

<sup>6</sup> Din badon Juan et owat inabel ay book di kamel ya kopkop di animal di bilko na. Din kankanena abe et dodon ya danom di iyokan. <sup>7</sup> Inbagbaga na sin kaipoipogaw, “Wada di nangatngato mo sak-en ay omonod. Et begew din nay kinangato na, adiak maikari ay olay mangobad sin galot di sapatos na.† <sup>8</sup> Danom anggoy di ibonyag ko en dakayo, ngem mo sisya pay et bonyaganas dakayo si Ispirito Santo.”

*Din Nabonyagan Jesus*  
(Mat. 3:13-17; Luc. 3:21-22)

<sup>9</sup> Sin timpo ay doy ay nanbonbonyagan Juan, dinmateng et si Jesus ay napo ed Nazaret ay esa ay ili sin probinsiya ay Galilea, et binonyagan Juan sisya sin ginawang ay Jordan. <sup>10</sup> Sin kinmaanan Jesus sin danom, pag na et ilaen ed langit ay mabokbokatan ya din Ispirito Santo ay kaman kalapati ay bomabbaba enggana ay pinmatong en sisya. <sup>11</sup> Pag wada di kali ay napod langit ay kanana en, “Sik-a di laydelaydek ay anak ko. Sik-a di kakapnekak.”

*Din Namadanan Satanang Ay Nanolisog En Jesus*  
(Mat. 4:1-11; Luc. 4:1-13)

<sup>12</sup> Pag et iturong din Ispirito Santo si Jesus sin lugar ay magay omili. <sup>13</sup> Nantetees di si opatapolo ay agew down aben pinadapadas Satanang ay manolisog en sisya. Wada abey mankaaangkat ay animal sin kad-ana, ngem laton ay wada di aanghel ay namadbadang en sisya.

*Din Nanlogian Jesus Ay Nan-itdo*  
(Mat. 4:12-17; Luc. 4:14-15)

<sup>14</sup> Idi nakdeng ay naibalod si Juan, nantaoli si Jesus ed Galilea ay mangikasaba sin siked ay damag ay napo en Diyos. <sup>15</sup> Kanana, “Dinmateng din timpo ay inkeddeng Diyos. Dandani di panturayana. Ibabawi yo ngarud din basbasol yo yan mamati kayo sin siked ay damag.”

*Din Nangayagan Jesus Sin Damo Ay Papasolot Na*  
(Mat. 4:18-22; Luc. 5:1-11)

<sup>16</sup> Sin namingsan ay mandad-an si Jesus sin benget di annawa ay lebung ay Galilea, inila nas da Simon en Andrew ay sin-iyogtan ay manabtabokol, tan say obla da. <sup>17</sup> Kanana en daida, “Enggana ed wani, manabtabokol kayos nigay. Manbalin kayo et si pasolot ko‡ ta itdoak dakayo ay mangawis si ipogaw.”§ <sup>18</sup> Kaipayag da sin tabokol da yan nakiey da en sisya. <sup>19</sup> Mandad-an da pay sin benget di lebung, inilan Jesus di doway ay sin-iyogtan ay da Santiago en Juan. Nanlologan da sin bangsa da ay mangisagsagana sin tabokol da. <sup>20</sup> Kaayag si Jesus en daida, et tinaynan da si ama da ya din lallalaki ay laglagboana sin bangsa, et nakiey da abe en Jesus.

*Din Nangipakaanang Jesus Si Anito*  
(Luc. 4:31-37)

<sup>21</sup> Inmey da Jesus ed Capernaum. Sin agew ay pan-ibbayan, sinenggep da sin sinagoga, et inlogin Jesus ay man-itdo. <sup>22</sup> Nasdaaw din kaipoipogaw sin inyat na ay nan-itdo, tan sin nan-it-itdoana, maila da ay waday turay na, ay baken say in-inyat di mamaestron di linteg. <sup>23</sup> Wada et sidi di lalaki ay kinapet di anito. <sup>24</sup> Kaibogaw ay

† 1:7 Din esa ay obla ay naidawat sin kababaan ay baa ono bag-en ed idi et kaanena din sapatos di among na mo somaa et senggep sin beey. Isonga din layden Juan ay kalien et adi na ibilang din awak na ay maikari ay mansilbi ay olay owat bag-en en Jesus. ‡ 1:17 Din kanana sin Griego et: Omonod kayo... Di laydena ay kalien et makiey da en

§ 1:17 Din kanana sin Griego et: ...ta itdoak dakayo ay manabokol si ipogaw.



nangwani, “Inayan! Jesus ay taga-Nazaret, apay nga disdistolboem dakami? Ay in mali ka aya ta dosaem dakami? Am-ammok dedan sik-a. Sik-a din nasantoan ay Anak Diyos.”

<sup>25</sup> Pag bilinen Jesus din anito ay nangwani, “Igiginek mo! Taynam sisya.” <sup>26</sup> Asi et inpakedas din anito din lalaki ay sana dowanang pakilaladen, et pag nan taynan.

<sup>27</sup> Natekeng din matan di wadas di yan nan-asibaga da en, “Wey! Anna pay dis baro ay mait-itdo! Olay aanito yan wada iman di turay na ay mamilin en daida yan komaan da.”

<sup>28</sup> Siya di, naganno ay nandinamag di maipanggep en Jesus sin amin ay soli ed Galilea.

### *Din Nangagasan Jesus Sin Ad-ado Ay Mansakit*

*(Mat. 8:14-17; Luc. 4:38-41)*

<sup>29</sup> Idi binmala da Jesus sin sinagoga, nandagas da sin beey da Simon en Andrew. Nakiey abe da Santiago en Juan. <sup>30</sup> Kambaw et din katogangan Simon ay babai et binmabaktad, tan manpodpodot. Inbaga da ay dagos en Jesus. <sup>31</sup> Pag somag-en si Jesus en sisya, yan intakkayana ta badangana ay bomangon. Pag et makaan din podot na, et pinakanas daida. <sup>32</sup> Madipos pay din agew, in-ey din omili en Jesus din am-in ay kinapet di anito ya mansaksakit. <sup>33</sup> Nasinop abe din am-in ay omili sin bel-ayan di beey ay kadana. <sup>34</sup> Et inagasana din ad-ado ay mansakit si nakalalalasi ay sakit. Pinakaana abe din ad-ado ay anito dowanang paginken daida, tan ammo da mo sinos sisya.

### *Din Nan-it-itdoan Jesus Sin Kasinasinagoga*

*(Luc. 4:42-44)*

<sup>35</sup> Sin gabis, binmangon si Jesus et inmey sin naidodolin ay lugar ta say en mankararag sisi. <sup>36</sup> Bomangon pay da Simon, en da inanaanap. <sup>37</sup> Idi dinatngan da, kanan da en sisya, “Din kaipoipogaw et an-anapen das sik-a.” <sup>38</sup> Ngem kanana, “En tako pay dedan sin nandinmang ay il-ili ta say enak mangasaba abes di, tan say panggep ko ay inmalis na.” <sup>39</sup> Asi da pay manlikiked sin inil-ili ed Galilea ay mangaskasaba sin kasinasinagoga da.

### *Din Nangagasan Jesus Sin Mansakit Si Kaeegyat Ay Sakit Di Kodil*

*(Mat. 8:1-4; Luc. 5:12-16)*

<sup>40</sup> Sin namingsan, inmey en Jesus di lalaki ay mansakit si kaeegyat ay sakit di kodil. Nandokmog en sisya ay manpakpakaasi, “Ammok ay kabaelam ay mangaan sin sakit ko mo laydem.”

<sup>41</sup> Naseg-angan si Jesus et inoyad na din takkay na ta ikapay na sin lalaki ay sana. Pag nan kanan, “Laydek, madalosan ka.” <sup>42</sup> Et nakaan ay dagos din sakit na. <sup>43</sup> Asi pinakaan Jesus sisya et dadlonan binilin ay nangwani, <sup>44</sup> “Adi ka idaddad-at na si olay sino ay ipogaw mo adi et emey ka ay en manpaila sin padi ta ilaena ay nakaan sakit mo. Asi ka idawat en sisya din inbilin Moses ay idaton yo en Diyos ta say pangammoan din kaipoipogaw ay tet-ewa ay sinmiged ka.”\* <sup>45</sup> Ngem adi na pinati, mo adi et ena dinadadad-at din naamag en sisya. Di nantongpalana et adi makaeey si Jesus sin il-ili tan mo et abten di nabeweg ay ipogaw, mo adi et nantetee sin naidodolin ay luglugar ay magay omili. Ngem olay mo siya di, em-emey pay dedan di kaipoipogaw sin kadana ay napo sin am-in ay soli.

## 2

### *Din Nangagasan Jesus Sin Paralitiko*

*(Mat. 9:1-8; Luc. 5:17-26)*

<sup>1</sup> Idi inmey di piga ay agew, nantaolis Jesus ed Capernaum, et nandinamag ay wada sin beey na. <sup>2</sup> Pag et nasinop di kaipoipogaw isdi engganang magay pantean di odom, olay sin kad-an di pantew. Idi pay inkaskasaban Jesus din kalin Diyos en daida, <sup>3</sup> wada et di sinmawang ay nangialis paralitiko. Opat ay lalaki di nangaatayang en sisya. <sup>4</sup> Asi et

\* **1:44** Levitico 14:1-8.

magay iyat da ay mangisag-en en Jesus begew sin naposek ay ipogaw, isonga insakyab da sin atep et tinekla da din odom ay atep sin patag Jesus. Asi da pay oy-oyen din dayon ay binmabaktadan di paralitiko. <sup>5</sup> Sin nangilaan Jesus sin talek da en sisya, kanana sin paralitiko ay doy, “Napakawan din basbasol mo ay ib-a.”

<sup>6</sup> Asi et din mamaestron di linteg ay wadas di ay tinmotokdo et kanan da sin nemnem da, <sup>7</sup> “Apay nga say inbaga na di? Din ipogaw ay nay et is-is-o nan awak na en Diyos. Tan sino aya di akin lebbeng ay mamakawan si basol mo adi et si Diyos et anggoy?”

<sup>8</sup> Ngem ammon pay dedan Jesus ay say wada sin nemnem da, et kanana, “Apay nga say nemnemnemen yo sa? <sup>9</sup> Nalaklaka kayman ay kanan en, ‘Mapakawan san basbasol mo’ mo din ‘Ibangon mo, bidkingem san dayon mo ta mandan ka.’ <sup>10</sup> Ngem mo siya sa, ibagak ngarud din naligat ta say paneknekak en dakayo ay sak-en ay Anak di Ipogaw et waday kalebbengak isnan labaw di daga ay mamakawan si basol.” Pag nan kanan sin paralitiko ay doy, <sup>11</sup> “Din ibilin ko en sik-a et ibangon mo, bidkingem san dayon mo ta somaa ka.” <sup>12</sup> Pag bomangon din sana, kabidking sin dayon ay binmabaktadana, et binmala ay il-ilan da am-in. Et am-in din wadas di et nasdaaw da down da aben dayawen si Diyos ay mangmangwani, “Anna! Magay inil-ila takos kaman nina!”

### *Din Nangayagan Jesus en Levi*

*(Mat. 9:9-13; Luc. 5:27-32)*

<sup>13</sup> Inmey kasin si Jesus sin benget di lebeng. Nabeweg di ipogaw ay nasinop sin kad-ana et initdoanas daida. <sup>14</sup> Maaw-awni pay, malablabas si Jesus sin opisina ay panbaybayadan das bowis, et inila na si Levi ay anak Alfeus ay tinmotokdos di. “Manbalin ka et si pasolot ko,”\* kanan Jesus. Kapika si Levi et nakiey en sisya. <sup>15</sup> Mangmangan pay da Jesus ya din papasolot na sin beey da Levi, ad-adoy nakiokob ay mansingsingil si bowis ya odom ay managbasol ay ipogaw. Tan ad-ado da ay nakibeweg en Jesus. <sup>16</sup> Idi inilan di mamaestron di linteg ay Fariseo ay naiokob si Jesus sin kaman dadi ay ipogaw, kanan da sin papasolot Jesus, “Apay nga makikan sin mansingsingil si bowis ya odom ay managbasol ay ipogaw?”

<sup>17</sup> Ngem dinngen Jesus din pinoot da et kanana ay nangiarig, “Baken din nasalon-at ay ipogaw di makasapol si mangagas mo adi din mansaksakit. Adiak inmali ta enak ayagan din nalinteg ay ipogaw mo adi din nakabasol.”

### *Maipanggep Sin Kaitpean Di Dagaang*

*(Mat. 9:14-15; Luc. 5:33-35)*

<sup>18</sup> Sin namingsan ay iniitpen din papasolot Juan ay Mamonbonyag ya din Fafariseo di dagaang da, wada et di inmey en Jesus yan kanan da, “Din papasolot Juan ya din Fafariseo et waday agew ay pangit-itpean das dagaang da. Ngem mo din pasolot mo pay et maga. Apay?”

<sup>19</sup> Sinombat si Jesus ay nangiarig, “Mo waday mankasal, ay kanan yo aya en adi makikan din gagayyem di mangasawa ay inayagana? Mangan da met, tan eweewe mo itpe day dagaang da yan wada pay laeng din mangasawa sin kad-an da. <sup>20</sup> Ngem domateng di timpo ay maipakaan en daida din mangasawa, et siya di din pangitpean da sin dagaang da.”

### *Maipanggep Sin Baro Ay Initdon Jesus*

*(Mat. 9:16-17; Luc. 5:36-39)*

<sup>21</sup> Kanan aben Jesus ay nangiarig, “Iwed di ipogaw ay mangilkeb si baro ay lopot sin baak ay bado. Tan komsen din mailkeb et goyodena din dait, et mabisngit din nailkebana. <sup>22</sup> Iwed abe dedan di mangipeey si kabobbobod ay danom di obas sin nakpit ay sopot ay lalat,† tan mo maget, mabtakan din lalat et madadael din sopot down aben

\* **2:14** Din kanana sin Griego et: Omonod ka... Di laydena ay kalien et makiey en Jesus ay pasolot na. † **2:22** Din pangipay-an di Judio si danom di obas et lalat di kalding.

maiwasit din danom di obas. Din kabobbobod ay danom di obas ngarud et siyat baro ay lalat di kaipay-ana.”

*Maipanggep Sin Agew Ay Pan-ibbayan*

*(Mat. 12:1-8; Luc. 6:1-11)*

<sup>23</sup> Sin namingsan ay Sabado ay pan-ibbayan di Judio, mandad-an da Jesus sin kapaypayewan ay nas-ekan si bakakew. Yan din papasolot na et manposposngi das lames na et kotkotimen da. <sup>24</sup> Asi et wada da di Fariseo ay nangwani en Jesus, “Ilam, apay nga lablabsingen din papasolot mo din linteg tako ay Judio ay mangiparit si manani sin agew ay pan-ibbayan.”

<sup>25</sup> Sinongbatan Jesus ay nangwani, “Binasa yo met din inyat Ari David ya din gagait na sin dinmagaangan da. <sup>26</sup> Sinenggep sin beey en Diyos yan ina na din tinapay ay naidaton en Diyos ay iparit di linteg ay kanen di baken padi. † Ngem kinana pay dedan et inbingayana abe din kakoyog na. Naamag na sin madama ay Kangatoan ay Padi si Abiatar.” <sup>27</sup> Pag ipaanongos Jesus, “Adi pinarsuan Diyos di ipogaw para sin agew ay pan-ibbayan mo adi et inkeddeng Diyos di agew ay pan-ibbayan para si ipogaw. <sup>28</sup> Isonga sak-en ay Anak di Ipogaw di akin lebbeng sin mabalin ay maam-amag sin agew ay pan-ibbayan.”

### 3

*Din Lalaki Ay Nakingking Di Esay Takkay Na*

*(Mat. 12:9-14; Luc. 6:6-11)*

<sup>1</sup> Inmey kasin si Jesus sin sinagoga et sinenggep. Wada et sidi di lalaki ay nakingking di takkay na. <sup>2</sup> Wada abe di mangisisin-eng en Jesus mo agasana din lalaki ay doy sin agew ay pan-ibbayan, tan an-anapen day ipabasol da en sisya ta way pangidaruman da. <sup>3</sup> Kanan Jesus sin sana ay nakingking di takkay na, “Omali ka sin sangoanan mi.” <sup>4</sup> Asi pag kanan Jesus en daida, “Sinoy ipalobos di linteg tako ay amagen tako sin agew ay pan-ibbayan? Ay amagen din siged ono din lawa? Ay isalakan di ib-a ono peslen?” Ngem ginmiginek da. <sup>5</sup> Manbonget si Jesus sin nangisisin-engana en daida. Mansakit abe di nemnem na begew sin makenteg ay nemnem da. Pag na et kanan sin nakingking di takkay na, “Oyadem san takkay mo.” Inoyad na et dadlon nailatonan. <sup>6</sup> Siya di, kinmaan din Fariseo et en da nakitolag sin papasolot Ari Herod mo intoy iyat da ay mamse en Jesus.

*Din Inmeyan Di Kaipopogaw Sin Benget Di Lebeng*

<sup>7</sup> Asi et kinmaan da Jesus ya din papasolot na isdi et inmey da sin benget di lebeng. Nabeweg di ipogaw ay inmonod en daida ay napod Galilea. Ad-ado abe di napo ed Judea, <sup>8</sup> Jerusalem, sakop di Idumea, demang di ginawang ay Jordan, ya napo ed Tiro ya Sidon ya din linak-am da. Inmey da en Jesus, tan dindinne da din am-in ay inam-amag na. <sup>9</sup> Begew sin kaad-adon di ipogaw, inbaga na sin papasolot na ay en da man-as bangsa ay tomokdoana tan into et mo ipiten di kaipoipogaw sisya. <sup>10</sup> Tan ad-ado di inagasana, isonga din deday sakit na et inalibongbongan das sisya ta say giwiten da koma. <sup>11</sup> Din iipogaw abe ay kinapet di aanito, sin nangil-ilaan da en Jesus, nanyakyakog-ong da ay mandokmog sin sangoanana dowan aben pakilkilaladen di aanito ay nangwani, “Sik-a di Anak Diyos!” <sup>12</sup> Ngem dadlon inbilbilin Jesus en daida ay adi da ibagbaga di maipanggep en sisya.

*Din Namilian Jesus Sin Sinpo Ya Dowa Ay Aapostol*

*(Mat. 10:1-4; Luc. 6:12-16)*

† 2:26 Levitico 24:9; 1 Samuel 21:1-6.

<sup>13</sup> Pag mantikid si Jesus sin kadondontogan. Inayagana din ipogaw ay laydena, et inonod das sisya. <sup>14</sup> Somawang da pay, yan pag nan dotokan di sinpo ya dow.\* Kanana en daida, “Pinilik dakayo ta makitee kayo en sak-en ya ta ibaak dakayo ay mangaskasaba. <sup>15</sup> Iyaak abes dakayo si kalebbengan ay mangipakaan si aanito.” <sup>16</sup> Naey di ngadngadan din dinotokana: si Simon (ay bindayan Jesus si Pedro), <sup>17</sup> din dow ay anak Zebedeo ay da Santiago en Juan (ay bindayan Jesus si Boanerges, laydena ay kalien, kaman kido), <sup>18</sup> si Andrew, si Felipe, si Bartolome, si Mateo, si Tomas, si Santiago ay anak Alfeus, si Taddeus, si Simon ay makwani en Patriota tan insakit na din ili da, <sup>19</sup> ya si Judas Iscariot ay nanglipot en sisya.

### *Si Jesus Ya Si Beelzebul*

*(Mat. 12:22-31; Luc. 11:14-23)*

<sup>20</sup> Pag dan somaa. Asi et nasinop kasin di kaipoipogaw et magay wayan da Jesus ay mangan. <sup>21</sup> Idi nadamag din aag-i na, nanlobwat da ta en da ton-oden, tan wada da di mangmangwani en naboge sisya. <sup>22</sup> Wada abe di mamaestron di linteg ay napod Jerusalem ay nangnangwani, “Kinapet Beelzebul sisya. Din doy ap-apon di aanito di nangidawat en sisya si panakabalina ay mangipakpakaan si aanito.” <sup>23</sup> Siya di, inayagan Jesus daida yan kanana ay nangiarig, “Intoy iyat Satanas ay mangipakaan sin awak na? <sup>24</sup> Mo man-asigobat din kaipoipogaw sin esa ay ili, madadael din ili ay doy. <sup>25</sup> Siya abe sin pamilya, mo man-iibaw da, mansisian da. <sup>26</sup> Iso na abe en Satanas. Mo pakpakaanena din iib-a na ay anito, laydena ay kalien ay ib-ibawenas daida, et awni et maga di panturayana. <sup>27</sup> Maiarig si Satanas si mabikas ay ipogaw, tan magay makasgep sin beey na ta akewena din bonag na mo adi na baloden omonas sisya. Asi mabalin ay itagtag na din bonag na.

<sup>28</sup> “Tet-ewa nan ibagak en dakayo ay mabalin ay mapakawan di olay sino ay basol di ipogaw ya olay sino di ibaga na ay mangipalawlawas odom. <sup>29</sup> Ngem din mangipalawlawaya pay sin Ispirito Santo et adi polos mapakawan basol na, tan say basol na di ay eng-enggana.” <sup>30</sup> Say kanan Jesus di, tan inbagbaga da ay kinapet di anitos sisya.

### *Si Inan Jesus Ya Din Aag-i Na*

*(Mat. 12:46-50; Luc. 8:19-21)*

<sup>31</sup> Pag somawang si ina na ya din aag-i na sin beey ay kad-ana et inpaayag da. <sup>32</sup> Isonga din kaipoipogaw ay tinmotokdo ay nanglilikob en sisya et kanan da, “Si inam ya din aag-im et wada da sin bel-ayan ay ipaay-ayag daka.”

<sup>33</sup> Kanan Jesus, “Aw pay dedan, ngem wada pay di odom ay ibilang ko ay inak ya aag-ik.” <sup>34</sup> Il-ilaena pay din tinmokdotokdo ay doy, kanana, “Da naey si inak ya aag-ik, <sup>35</sup> tan din mangamag sin layden Diyos et daida di maibilang ay inak ya aag-ik.”

## 4

### *Din Lalaki Ay En Nansapowak*

*(Mat. 13:1-9; Luc. 8:4-8)*

<sup>1</sup> Sin namingsan, en kasin nan-itdos Jesus sin benget di annawa ay lebeng. Gapo ta nabeweg di ipogaw ay nangal-alibongbong en sisya, en tinmokdo sin bangka down pay nantetee din kaipoipogaw sin benget di lebeng. <sup>2</sup> Ad-adoy initdo na en daida ay man-iar-arig. Sin nan-it-itdoana, kanana, <sup>3</sup> “Dengngen yo. Sin namingsan, wada di esay ipogaw ay en nan-isapowak si bin-i sin nom-a na. <sup>4</sup> Idi insapsapowak na din bin-i, naekdag di odom sin danan et tintinpek di tititit. <sup>5</sup> Din odom ay insapowak na et naekdag da sin kabatbatoan. Gapo ta naisasapew di lota na, kasimit da. <sup>6</sup> Ngem idi kinmayang din agew, nay-osan ya nakpit da, tan kolang di lamot da. <sup>7</sup> Din odom abe

\* **3:14** Din naitapi sin odom ay manuskrito sin Griego et: sinpo ya dow ay nginadanana si aapostol.

et naekdag da sin kapagpagatan, ngem asi et nakigabay di papagat et insengan da din momola, isonga adi da nanlames. <sup>8</sup> Ngem din odom pay et naekdag da sin siged ay lota, pag da et gomabay yan nanlames da. Waday nanlames si sagsisin-gasot, waday sagueenemapolo, ya wada abey sagtotolonpo.” <sup>9</sup> Inpaanongos Jesus ay nangwani, “Dakayo ay manmange, nemnemen yo san dinnge yo.”

*Din Olog Di Pangarig Maipanggep Sin Nansapowak*  
(Mat. 13:10-23; Luc. 8:9-15)

<sup>10</sup> Idi kinmaan din kaipoipogaw, pag omasag-en din sinpo ya doway ay pasolot Jesus ya di odom ay nakikiey en daida yan pooten da en sisya maipanggep sin olog di pangarig. <sup>11</sup> Kanan Jesus, “Dakayo di nangidawtan Diyos si gondaway ay mangammo sin adi naipaammo ed idi maipanggep sin panturayana, ngem din odom ay ipogaw pay et pangarig anggoy di madaddad-at en daida, <sup>12</sup> ta say olay mo il-ilaen da, adi da maimatonan, yan olay mo dengdengngen da, adi da maawatan tan into et mo sagongen das sak-en ta agasak si daida.”\* <sup>13</sup> Pag kanan Jesus en daida, “Ay adi yo maawatan din pangarig ay nay? Mo siya di, intoy iyat yo pay ay mangawat si odom ay pangarig? <sup>14</sup> Din olog di pangarig et siya na. Din bin-i ay naisapowak et siya di din kalin Diyos. <sup>15</sup> Din natekdag sin danan et maiarig dadi sin ipogaw ay mange si maipanggep sin panturayan Diyos. Asi et emey si Satanas ay dagos et kaanena sin nemnem da din kali ay dinnge da. <sup>16</sup> Din natekdag abe sin kabatbatoan et siya dadi din ipogaw ay manragragsak ay nangawat sin kalin Diyos sin nanngaan da. <sup>17</sup> Ngem adi linmamot din kali sin nemnem da, isonga mo domteng di ligat ono mapaligatan da begew sin nangawatan da sin kalin Diyos, adi da itoloy ay mamati mo adi et dokogan da ay dagos din pammati da. <sup>18</sup> Din natekdag abe sin kapagpagatan et siya dadi din manmange sin kalin Diyos, <sup>19</sup> ngem masangaw da sin pandandanagan ya bomaknangan da, isonga mas-engan din kali ay dinnge da et adi malamsan. <sup>20</sup> Din natekdag pay sin siged ay lota et siya dadi din manmange sin kalin Diyos dowan da aben maawatan, et waday pantongpalan din kali sin biyag da. Waday at-atik di pantongpalana, waday namnamona ya wada abey ad-ado.”

*Din Pangarig Ay Maipanggep Sin Silaw*  
(Luc. 8:16-18)

<sup>21</sup> Kanan aben Jesus ay nangiarig, “Ay wada aya di maneteng si silaw ta asi na sakoboan si palanggana ono ipeey na sin dallem di katri? Ipatang na adi! <sup>22</sup> Iso na sin in-ar-arig ko, tan am-in din naitatabon ono adi naammoan ed wani et maammoan ya mailawag sin tapin di agew. <sup>23</sup> Dakayo ay manmange, nemnemen yo san dinnge yo.” <sup>24</sup> Pag intoloy Jesus ay nangwani, “Esten yo ngarud ay manmange sin ibagbagak, tan mo say iyat yo di, ad-ado abey maawatan yo, yan wada pay di itapin Diyos sin pangawat yo. <sup>25</sup> Tan din ipogaw ay mangikaskaso sin dengdengngena et mataptapian din pangawat na, ngem din adi mangikaskaso et mamaiwed din olay at-atik ay naawatana.”

*Din Inyat Di Naisapowak Ay Ginmabay*

<sup>26</sup> Wada abey esa ay pangarig ay dinad-at Jesus. Kanana, “Din panturayan Diyos et maiarig si esay lalaki ay en nangsek sin bangkag na. <sup>27</sup> Maseyep sin labi yan bomangon sin agsapa dowan pay somimsimit ya gomabgabay din inis-ek na. Ngem di iyat na ay gomabgabay et adi na ammo. <sup>28</sup> Tan gomabay pay dedan din mola. Somimit, pag manlitan et pag manbala. <sup>29</sup> Idi naom, pag nan en anien.”

*Din Kaiarigan Di Panturayan Diyos*  
(Mat. 13:31-33; Luc. 13:18-19)

\* 4:12 Isaias 6:9-10.



<sup>30</sup> Pag kanan Jesus, “Sino ngata di pangiarigak sin panturayan Diyos? Sinoy iso na? <sup>31</sup> Maiarig si esa ay bin-in di mostasa ay siya na din kakitkittoyan sin am-in ay bin-i isnan labaw di daga. <sup>32</sup> Ngem mo mais-ek, gomabay ay manbalin si kakayangan si am-in ay natnateng.† Manpanga abe si anando, et mabalín ay man-obong di titit sin nalidoman ay panga na.”

<sup>33</sup> Ad-adoy pangarig ay inos-osal Jesus sin nangikaskasabaana sin kalin Diyos en daida. Initdoanas daida insigon di kabaelan da ay mangawat. <sup>34</sup> Maga di init-itdo na en daida ay adi mandaddad-at si pangarig, ngem mo ang-anggoy na ya din papasolot na, inlawlawag na am-in en daida.

### *Din Nangipaginkan Jesus Sin Dagem Ya Dalloyon*

*(Mat. 8:23-27; Luc. 8:22-25)*

<sup>35</sup> Idi madipdipos din agew, kanan Jesus sin papasolot na, “Man-agadang tako.” <sup>36</sup> Pag da et manlogan sin bangka ay nanlologanan Jesus et tinaynan da din kaipoipogaw. Wada abey odom ay bangka ay nakiey en daida. <sup>37</sup> Siya et di kadateng di mappes ay dagem et sepyasepyatan di dalloyon din bangka et nganngani ay malned da. <sup>38</sup> Ngem kambaw et naseseyep si Jesus ay nanpopongan sin likod di bangka. Binangon din papasolot na ay nangwani, “Apo maestro, ay adi ka pagan-ano ay matey tako?”

<sup>39</sup> Pag bomangon et bilinena din dagem ay nangwani, “Somaldeng ka.” Kanana abe sin dalloyon, “Gominek kayo.” Pag somaldeng din dagem yan gominek abe din dalloyon. <sup>40</sup> Pag kanan Jesus sin papasolot na, “Apay nga emegyat kayo? Apay nga magay talek yo?”

<sup>41</sup> Peteg di egyat da am-in et nan-asibaga da, “Sino di kaipogaw nina? Kambaw olay dagem ya dalloyon et patien day ibaga na!”

## 5

### *Din Lalaki Ay Taga-Gerasa Ay Kinapet Di Kaanianito*

*(Mat. 8:28-34; Luc. 8:26-39)*

<sup>1</sup> Intoloy da Jesus ay mangagadang sin lebeng enggana ay somanglad da sin sakop di Gerasa.\* <sup>2</sup> Pag komaan si Jesus sin bangka. <sup>3</sup> Wada et sidi di nantetee sin liliyang ay kamposanto ay esay lalaki ay kinapet di kaanianito. Maga di makabalod en sisya olay mo kadina di ibalod da. <sup>4</sup> Tan namin ado ay kinadkadinaan dan takkay ya siki na, ngem kasokposokpot sin kadina sin takkay na ya dadaelena din wada sin siki na. Maga abe di makatengel en sisya, tan palalo di bikas na. <sup>5</sup> Inagew ya linabi, manlikliked sin liliyang ya kadondontogan ay mankilkilalad ya gedgedgedena din awak nas bato.

<sup>6</sup> Idi tinamang nas Jesus, nanagtag ay napo sin kad-an di liliyang ay en mangabat, et nandokmog sin sangoanana. <sup>7</sup> Pag nan kanan ay mangibogaw, “Ay Jesus, Anak di Kangatoan ay Diyos, apay nga domisdistolbo ka? Ibayos mon Diyos ta adi ka domosdosa!” <sup>8</sup> Siya di din inbaga na, tan enggay inbilin Jesus, “Sik-a ay anito, taynam sa!”

<sup>9</sup> Pag pooten Jesus en sisya, “Sinoy ngadan mo?”

“Linibolibo,” kanana, “tan ad-ado kami.” <sup>10</sup> Pag nan ipidwapidwa ay man-ad-adawag en Jesus ta adi na pakaanen daida sin ili ay doy.

<sup>11</sup> Wada et di kabisabisaang ay lomanoblob sidi sin matikid, <sup>12</sup> isonga nanpakpakaasi din aanito ay mangwani, “Itay-on mo kod ta en kami komapet sin kabisabisaang ay doy.”

“Aw adi,” kanana. <sup>13</sup> Isonga pag dan taynan din lalaki et en da kinmapet sin bibisaang. Pag tomanagtag din bibisaang ay namallalong et pag dan maekgas sin lebeng et nalned da. Din kabibilang di bisaang et emey ay dowá ay libo.

† **4:32** Din kalasin di mostasa ay mais-ek sin ilin di Judio et dakdakedake mo din mais-ek sinan Pilipinas. Din kakayangan et emey ay sinpo ya dowá ay piya. \* **5:1** Din naisolat sin odom ay manuskrito ay ngadan di ili ay nay et Gadara ono Gergesa.



<sup>14</sup> Mo din nangibanbantay sin kabisabisaang, katagtag da sin ili da ya sin nandinmang ay lugar ta en da ipadamag sin man-ilis di. Isonga din kaipoipogaw et en da inila mo sinoy napasamak. <sup>15</sup> Somawang da pay sin kad-an da Jesus, dinatngan da din lalaki ay tinaynan di kaanianito ay tinmotokdo ay nanbabado ya sinmiged di nemnem na. Et inmegyat da am-in. <sup>16</sup> Pag kasin dad-aten din nangilas napasamak sin doy lalaki ya kabisabisaang. <sup>17</sup> Et inlogi da ay nanpakpakaasi en Jesus ta komaan sin ili da. <sup>18</sup> Somaksakyab si Jesus sin bangsa yan down aben manpakpakaasi din lalaki ay tinaynan di aanito ta makeey koma en sisya. <sup>19</sup> Ngem inandiyan Jesus ay nangwani, “Olay somaa ka sin gagait mo ta en ka dad-aten din am-in ay inamag di Apo ay naneg-ang en sik-a.” <sup>20</sup> Pag komaan din lalaki ay doy, et nanlikeliked sin sakop di Sinpo ay Siyodad ay mangibagbaga sin inamag Jesus en sisya. Et nasdaaw di am-in ay ipogaw.

*Din Anak Jairus Ya Din Babai Ay Nangiwit Sin Tak-ep Di Badon Jesus  
(Mat. 9:18-26; Luc. 8:40-56)*

<sup>21</sup> Sin nangagadangan kasin Jesus ay mantaoli sin demang na, inalibongbongan di ad-aad-ado ay ipogaw. <sup>22</sup> Pag et somawang di pangolon di sinagoga ay manngadan si Jairus. Idi inila nas Jesus, nanyakog-ong ay nandokmog sin sangoanana. Nanpakpakaasi ay nangwani, <sup>23</sup> “Dandani ay matey din anak mi ay babai. Omali ka paabe ta kapayem sisya ta say mailatonan et matago.” <sup>24</sup> Isonga nakiey si Jesus en sisya. Inmon-onod abe di nabeweg ay ipogaw, et mansisinokikit da ay manag-en en Jesus.

<sup>25</sup> Wada et di babai ay adi katkatdok di manbolos ay dada na si sinpo ya doway ay tawen. <sup>26</sup> Peteg ay nanligligat sin ad-ado ay nangag-agas en sisya, et enggay nagastoan. Ngem adi nailatonan mo adi et nasepsep din sakit na. <sup>27</sup> Nadamag na di maipanggep en Jesus, et nansokikit sin kaipoipogaw ta omasag-en sin edegana. Pag nan giwiten din bado na. <sup>28</sup> Tan kananas nemnem na, “Olay mo owatak giwiten koma din bado na, mailatonanak.”

<sup>29</sup> Siya et di sinmaldeng ay dagos din manbolos ay dada na, et linikna na ay nakaan din sakit na. <sup>30</sup> Pag et manwingi si Jesus ta sagongena din kaipoipogaw, tan dinlaw na ay waday binmela ay panakabalin en sisya. Pag nan kanan, “Sinoy nangiwit sin badok?”

<sup>31</sup> Asi et kanan din papasolot na, “Il-ilam met dedan ay ad-ado di ipogaw ay managsagid en sik-a. Ay pootem pay laeng mo sino di nangiwit sin badom?” <sup>32</sup> Ngem nanmokmokilang pay dedan si Jesus ta ilaena mo sino. <sup>33</sup> Gapo ta ammon din babai din naamag en sisya, inmasag-en en Jesus ay manpayegpeg si egyat na et nanyakog-ong ay mandokmog sin sangoanana. Pag na et ipodno en sisya din am-in ay naamag.

<sup>34</sup> Pag kanan Jesus, “Anak ko, begew din talek mo, nailatonan ka. May, emey ka ay natalna di nemnem mo. Laton ay adi mantaoli san sakit mo.”

<sup>35</sup> Deda ay mankalkali si Jesus down et somawang di napo sin beey en Jairus ay nangibaga en sisya, “Olay adi tako sangsangawen pay laeng san maestro, tan natey san anak mo.”

<sup>36</sup> Ngem adi pagan-anon Jesus din inbaga da en Jairus mo adi et kanana en sisya, “Adi ka emeg-egyat. Basta mamati ka.” <sup>37</sup> Et maga di intay-on Jesus ay makiey en sisya malaksig si Pedro ya din sin-iyogtan ay da Santiago en Juan. <sup>38</sup> Idi sinmawang da sin beey en Jairus, inilan Jesus din manngalawngaw ay kaipoipogaw ay man-an-anog-og ya manpilpilalak. <sup>39</sup> Senggep pay si Jesus, kanana, “Apay nga manngalngalawngaw ya man-og-oga kayo? Din balasang ay nay et adi natey, naseseyep et anggoy.”

<sup>40</sup> Pag dan siniyesiyekan sisya. Isonga inpabala nas daida am-in. Asi na ayagan din nakin anak ya din papasolot na et senggep da sin kowarto ay kad-an di balasang. <sup>41</sup> Intakkayan Jesus sisya yan kanana sin kali da, “Talita kom.” Di olog na et: “Balasang, bomangon ka.” <sup>42</sup> Kabangon tet-ewa yan mandan. (Din balasang ay doy et mantawen si sinpo ya doway.)

Palalo ay nasdaaw da. <sup>43</sup> Ngem dadlon inbilin Jesus ay adi da polos ap-apaten din doy ay naamag si olay sino ay ipogaw. Pag nan ibaga ay pakanen da din balasang.

## 6

### *Din Nanigaan Da En Jesus Ed Nazaret*

*(Mat. 13:53-58; Luc. 4:16-30)*

<sup>1</sup> Pag komaan da Jesus ya din papasolot na sidi et inmey da sin ili ay nadakdak-ana. <sup>2</sup> Domateng pay din agew ay pan-ibbayan di Judio ay Sabado, en nan-itdos Jesus sin sinagoga. Et ad-ado di nasdaaw sin nanngenan da et kanan da, “Intoy nangaan ninas nemnem na? Intoy nangaanas laing na? Intoy iyat na pay ay mangamag si milagro? <sup>3</sup> Ay baken si naey aya din karpintiro ay anak Maria? Ay baken da Santiago, Jose, Judas ya si Simon din aag-i na? Din aag-i na abe ay babai et man-ili da met laeng isna.” Isonga nasnit da en sisya et adi da namati.

<sup>4</sup> Asi na et kanan en daida, “Maga di mamadto ay bigbigen di kailiana, toton-od na ya pamilya na, ngem bigbigen da met sin odom ay ili.” <sup>5</sup> At-atik di mansakit ay kinapay Jesus ay inagasana, ngem magay inyat na ay nangamag si ad-ado ay milagro sidi. <sup>6</sup> Et nasdaaw begew sin adi da namatian en sisya.

### *Din Nangibaaan Jesus Sin Sinpo Ya Dowa Ay Pasolot Na*

*(Mat. 10:5-15; Luc. 9:1-6)*

Pag en manlikiked si Jesus sin kailili ay man-it-itdo. <sup>7</sup> Asi na ayagan din sinpo ya dowa ay pasolot na ta ibaa nas daida ay sagdodowa. Inyaanas daida si kalebbengan ay mangipakaan si aanito <sup>8</sup> yan tinogonas daida ay nangwani, “Iwed di itaktakin yo sin pandad-anan yo, sokod anggoy. Adi kayo man-itaktakin si makan, sangi, ya pilak. <sup>9</sup> Mabalina ay mansinilas kayo, ngem adi yo pantaktak-epen di bado yo. <sup>10</sup> Mo emey kayo si esa ay ili ya waday mangayag en dakayo sin beey na, isdi di pantean yo engganay taynan yo din ili ay doy. <sup>11</sup> Ngem mo waday ili ay emeyan yo yan adi da awaten dakayo ya sigaan da abe ay mannge sin ibagbaga yo, taynan yos daida, et sin komaanan yo, pokpokan yo din dapan yo ta say pangammoan da ay makaoway da sin dosa da.”

<sup>12</sup> Pag manlobwat din papasolot na et en da inkaskasaba sin kaipoipogaw ay ibabawi da koma din basbasol da. <sup>13</sup> Pinakaan da di ad-ado ay anito ay kinmapet si ipogaw, et inap-aplosan das lana di ad-ado ay mansakit et nailatonan da.

### *Din Nateyan Juan Ay Mamonbonyag*

*(Mat. 14:1-12; Luc. 9:7-9)*

<sup>14</sup> Nadamag Ari Herod\* ed Galilea din inam-amag da Jesus, tan nandinamag di ngadan Jesus sin kailili. Waday nangwani en, “Si naey si Juan ay Mamonbonyag ay natago kasin. Siya di din gapo ay wada en sisya di panakabalin ay mangam-amag en dana ay nakaskasdaaw.” <sup>15</sup> Din odom abe et kanan da en si Elias ay natago kasin, ya din odom pay et kanan da, “Mamadto na ay kaman din mamadto ed nabaon.”

<sup>16</sup> Ngem sin nanngenan Ari Herod sin inam-amag Jesus, kanana, “Din ipogaw ay doy et si Juan ay Mamonbonyag ay inapapotok di toktok na. Kambaw natago kasin!” <sup>17</sup> Say kanan Herod na begew sin napasamak ed idi. Tan inpadpap nas Juan ya inpabalod na ay nakakadinaan begew sin namagbagaan Juan en sisya. Tan si Herod et inasawa na din aydo na ay si Herodias ay asawan iyogtana ay si Felipe. <sup>18</sup> Et inpidwapidwan Juan ay nangwani en kontran di linteg ay asawaena din asawan iyogtana. <sup>19</sup> Isonga malmaliget si Herodias en Juan et laydena ay ipapses sisya, ngem adi na kabaelan. <sup>20</sup> Tan emegyat si Herod en Juan et sinalsalaknibana, tan ammo na ay nalinteg ya nasantoan ay ipogaw

\* **6:14** Si Herod ay nay et Herod Antipas ay anak din Herod ay ari sin kamoyang Jesus. Din kosto ay titolo na et tetrarco, ngem sin pannemnem di taga-Roma ay nangisolatan Marcos, kaman ari di saad na.

sisya. Naligat di pannemnem na sin nannanngena en sisya, ngem laydena pay dedan ay dengdengnen din ibagbaga na.

<sup>21</sup> Domateng pay din agew ay naianakan Herod, inpaayag na din oopisyal ya ap-on di soldado ya din waday kabigbigana ed Galilea ta say makiragsak da en sisya. Et siya nan gondaway Herodias ay nangipapse en Juan. <sup>22</sup> Tan sinenggep din balasang ay anak Herodias sin kad-an da Herod ya din inayagana et nansala. Palalo ay ginan-ganas da din nansalaana, isonga kanan Herod en sisya, “Sinoy laydem? Ibagam ta idawat ko en sik-a.” <sup>23</sup> Insapata na abe ay kanana, “Olay mo sinoy kedawem, olay din kagodwan di panturturayak et idawat ko en sik-a.”

<sup>24</sup> Pag bomala din balasang et ena pinoot en ina na, “Sinoy kedawek?”

“Din toktok Juan ay Mamonbonyag,” insongbat ina na.

<sup>25</sup> Pag dalasen din balasang ay mantaoli en Ari Herod yan kanana en sisya, “Laydek ay paialim ay dagos din toktok Juan ay Mamonbonyag ay maipeey si palato.”

<sup>26</sup> Peteg ay mansakit nemnem Herod sin nanngenas di, ngem gapo ta nansapata sin sangoanan di ad-ado ay inayagana, mabain ay adi manongpal sin inkari na en sisya. <sup>27</sup> Isonga inbaa na ay dagos di esa ay soldado ta ena alaen din toktok Juan. Inmey din soldado sin balodan et pinotoana din toktok na. <sup>28</sup> Pag nan ipeey si palato et in-ey na sin balasang ay en nangidawat en ina na. <sup>29</sup> Idi nadamag din papasolot Juan din nay naamag, en da ina din awak na et en da inponpon.

*Din Namakanan Jesus Sin Kaipoipogaw Ay Nasurok Si Lima Ay Libo  
(Mat. 14:13-21; Luc. 9:10-17; Jn. 6:1-14)*

<sup>30</sup> Nantaoli din aapostol, et inbaga da en Jesus din am-in ay inam-amag ya init-itdo da. <sup>31</sup> Pag nan kanan, “Emey tako si esa ay naidodolin ay lugar ay maang-anggay tako ta way iyat tako ay man-illeng si sinkaattikan.” Tan mansinoskat di emey sin kad-an da et magay waya da ay mangan. <sup>32</sup> Et nanlogan das bangka ay inmey.

<sup>33</sup> Ngem ad-ado di nangimaton en daida sin nanlobwatan da. Nanagtag da ay napo sin inil-ili et nangon-ona da sin emeyan da Jesus. <sup>34</sup> Idi sinmanglad da Jesus et kinmaan da sin bangka, inila na din ad-ado ay ipogaw, et naseg-angan en daida, tan kaman dan karnero ay iwed di mangay-ayowan en daida. Pag na et ilogi ay mangitdo en daida si ad-ado ay banag. <sup>35</sup> Idi masmasdem, inmey din papasolot na en sisya et kanan da, “Nay met ay enggay masmasdem yan naidodolin isna. <sup>36</sup> Ibagam sin ipogaw ta en da manlakos kanen da sin naisasag-en ay il-ili.”

<sup>37</sup> Ngem kanan et Jesus en daida, “Olay dakayo di mamakan en daida.”

Pag dan kanan, “Ay laydem ay kalien en dakami di manlakos tinapay ay manbanol si pigay libo† ta ipakan mi en daida?”

<sup>38</sup> Pinoot Jesus, “Pigay tinapay yo? En kayo ilan.”

Idi en da pay inila, kanan da en, “Lima ay tinapay ya doway ay piskaw di wada.”

<sup>39</sup> Pag nan ibilin ay patokdoen da ay matopotopog din kaipoipogaw sin logam. <sup>40</sup> Et natopotopog da ay tinmokdo, waday sagsisin-gasot ya saglilimapolo. <sup>41</sup> Pag alaen Jesus din lima ay tinapay ya doway ay piskaw, et tinangad na ed langit ay nan-iyaman en Diyos. Asi na pag kinittoyen et indawat na sin pasolot na ta iwatwat da sin kaipoipogaw. <sup>42</sup> Nangan da amin et nabsog da. <sup>43</sup> Olnongen da pay din nabay-an, sinpo ya doway ay baskit di napay-an sin namekmek ay makan. <sup>44</sup> Di kabibilang di nankakay ya babbaro ay nangan et emey ay lima ay libo.

*Din Nandanang Jesus Sin Labaw Di Danom  
(Mat. 14:22-33; Jn. 6:16-21)*

† 6:37 Din kanana sin Griego et: doway gasot ay denario. Di esa ay denario et banol di poldiya.

<sup>45</sup> Pag panloganen Jesus ay dagos din papasolot na sin bangka ta omagadang da ay mangon-ona ed Betsaida dowan pasaaen din kaipoipogaw. <sup>46</sup> Idi inpasaa nas daida, nantikid sin dontog ay en mankararag. <sup>47</sup> Idi nalabi, wada pay laeng si Jesus sin dontog ay es-esa na dowan pay din bangka ay nanloganan di papasolot na et wada sin gawan di lebeng. <sup>48</sup> Idi inosdonganas daida, inila na ay maligligatan da ay mangipadan sin bangka, tan maiab-abet din dagem.

Gomabgabis pay, nanballalong si Jesus yan nandan sin labaw di danom ay omasag-en en daida. Linabsana komas daida, <sup>49-50</sup> ngem sin nangilaan da en sisya ay mandad-an sin labaw di danom, peteg di egyat da am-in et nankilalad da, tan kanan da en banig. Kakali si Jesus en daida et kanana, “Laton! Sak-en na. Adi kayo emegyat!” <sup>51</sup> Pag somakyab sin bangka, et ginminek din dagem. Palalo ay nasdaaw din papasolot na, <sup>52</sup> tan olay mo inila da din nangipaad-adoana sin tinapay, adi da naawatan din laydena ay kalien maipanggep sin panakabalina, tan makenteg pay laeng di toktok da.

*Din Nangagasan Jesus Sin Mansaksakit Ed Gennesaret*  
(Mat. 14:34-36)

<sup>53</sup> Idi nakaagadang da pay ya sinmanglad da sin sakop di Gennesaret, intaked da din bangka sin benget di lebeng. <sup>54</sup> Pag dan komaan sin bangka. Inmatonan ay dagos din nangila en Jesus, <sup>55</sup> et dalasen da ay emey sin nandinmang ay il-ili ta say dayonan da din mansaksakit ay mangiabat en Jesus olay mo intoy inammoan da ay kad-ana. <sup>56</sup> Et olay mo intoy in-inmeyan Jesus, dadakke ay ili ono barbaryo ono kinittoy ay sityo, iniis-ed da din mansaksakit sin markitan ay emeyana. Et nanpapakpakaasi da ay giwiten koma din mansakit olay owat din gayadan di bado na. Et am-in ay nangiwit et nailatonan da.

## 7

*Din Kaitkenan Di Init-itdon Di Fafariseo Sin Linteg Diyos*  
(Mat. 15:1-9)

<sup>1</sup> Sin namingsan, wada di Fafariseo ya mamaestron di linteg ay inmey sin kad-an Jesus ay napo ed Jerusalem. <sup>2</sup> Inila da ay mangmangan di odom ay papasolot Jesus ay kadodogis pay laeng di takkay da, laydena ay kalien, adi da inonodan din kosto ay iyat di manbo ay inbilin di Fariseo. <sup>3</sup> Tan din Fafariseo ya siya abe din odom ay Judio et on-onodan da din ogali ay tinawid da sin ap-apo da ay adi da mangan mo adi da manbo ay kosto agan-o. <sup>4</sup> Mo napo da abe sin markitan, adi da mangan mo adi da walsian on-ona din awak das danom.\* Ad-ado pay di ogali ay tinawid da sin ap-apo da ay kaman din iyat da ay mangowas si tasa, takori ya banga ay gambang. <sup>5</sup> Isonga din doy ay Fafariseo ya mamaestron di linteg et pinoot da en Jesus, “Apay nga adi on-onodan din papasolot mo din ogali ay tinawid tako sin aap-o tako? Sana met ay mangmangan da yan adi da inonodan agan-o din kosto ay iyat di manbo.”

<sup>6</sup> Sinongbatan Jesus yan kanana, “Tet-ewa din nay kanan Diyos ay inpadton Isaias maipanggep en dakayo ay kanana,

‘Dana ay ipogaw, daydayawen das sak-en sin kali da, ngem addawi di nemnem da en sak-en. <sup>7</sup> Magay silbin di panaydayawan dan sak-en, tan din it-itdo da ay owat bilbilin di ipogaw et kanan da en bilbilin ko.’†

<sup>8</sup> Et tet-ewa ay am-amagen yo nan insolat Isaias, tan binaybay-an yo din linteg Diyos ta say onodan yo din ogalin di ipogaw.”

<sup>9</sup> Pag intoloy Jesus ay nangwani, “Nalaing kayo kayman dedan ay mangiaw-awan sin linteg Diyos ta say onodan yo din ogali yo. <sup>10</sup> Tan din inpaisolat Diyos en Moses et kanana, ‘Dayawem da amam en inam,’‡ et ‘Mo waday mangipalawlawwa en ama na

\* **7:4** Din naisolat si odom ay manuskrito sin Griego et Mo wada abey minarkit da, adi da mangan mo adi da walsian on-ona si danom. † **7:7** Isaias 29:13. ‡ **7:10** Exodo 20:12; Deuteronomio 5:16.

ono en ina na, masapol ay matey.’ <sup>11</sup> Ngem din it-itdo yo et natken. Tan kanan yo en mo waday ibadang koman di ipogaw en ama na ono en ina na, olay mo adi na idawat. Basta manpambal en daida ay mangwani, ‘Din ibadang ko koma en dakayo et korban, laydena ay kalien, enggay inkarik ay maidaton en Diyos.’ <sup>12</sup> Et mo say kanana di, iparit yo ay eng-enggana din pangibadangana en da ama na en ina na. <sup>13</sup> Begew sin sana ay ogali ay it-itdo yo sin kaipoipogaw, nanbalinen yo damdama ay magay silbin din kalin Diyos. Et ad-ado di am-amagen yo ay kaman nina,” kanan Jesus en daida.

### *Din Mangipakadodogis Si Ipogaw*

*(Mat. 15:10-20)*

<sup>14</sup> Pag ayagan Jesus din kaipoipogaw yan kanana en daida, “Dengngen yo am-in na ta say maawatan yo. <sup>15</sup> Baken din ipasgep di ipogaw sin tepek na di mangipakadodogis en sisya mo adi et din ipabala na sin tepek na. <sup>16</sup> Dakayo ay manmannge, nemnemen yo san dinnge yo.”

<sup>17</sup> Idi tinaynan Jesus din kaipoipogaw et sinenggep sin beey, inbagan din papasolot na ay iolog na koma din in-arig na. <sup>18</sup> Kanan Jesus, “Dakayo abe, ay adi yo pay laeng maawatan? Ay adi yo ammo ay din ipasgep di ipogaw sin tepek na et baken say mangipakadodogis en sisya? <sup>19</sup> Tan din emeyana et baken din nemnem na mo adi din eges na et pag bomala.” Sin nangwanian Jesus sidi, laydena ay kalien ay mabalin ay kanen tako di am-in ay makan. Baken basol.

<sup>20</sup> Pag itoloy Jesus ay nangwani, “Din ipabalan di ipogaw sin nemnem na et say mangipakadodogis en sisya. <sup>21</sup> Tan din nemnem di ipogaw di kapoan di am-in ay lawa ay panggep. Et din lawa ay panggep di mangiturong si ipogaw ay mangamag si lawa ay kaman dana: manaag si bakenan asawa, mangakew, manpese, makikamalala, <sup>22</sup> mangamgam si bakenan oka, mamaligat si ib-a na, mangietek si ib-a na, naalas ay ogali, apos, mangipalawlaw si ib-a na, mangingato si awak na, ya adi mangosal si nemnem na. <sup>23</sup> Am-in dana et mapo das nemnem di ipogaw, et siya dadi di mangipakadodogis en sisya.”

### *Din Talek Di Esa Ay Babai Ay Taga-Canaan*

*(Mat. 15:21-28)*

<sup>24</sup> Pag komaan si Jesus sidi et inmey sin sakop di Tiro ya Sidon. Nantee si esa ay beey ay dinatngana, et laydena ay adi maammoan ay wadas di, ngem naammoan pay dedan. <sup>25</sup> Wada et di babai ay kinapet di anito din anak na ay balasang. Sin nanngena ay wadas Jesus sidi, dinalas na ay emey sin kad-ana. Nanyakog-ong ay nandokmog sin sangoanana, <sup>26</sup> et nanopakpakaasi ta pakaanena din anito ay kinmapet sin anak na. Din babai ay nay et naianak ed Fenicia ay sinakop di Syria et Griego di kali na. <sup>27</sup> Asi et kanan Jesus ay nangiarig, “Awni ta mabsog on-ona din anan-ak ay mangmangan, tan baken met kosto mo maipakan din kanen di anak si aso.”

<sup>28</sup> “Siya kayman, Apo,” kanan din babai, “ngem olay din aso et kanen da din mogay ay matekdag mo mangmangan din anan-ak.”

<sup>29</sup> Pag kanan Jesus, “Begew din sana ay songbat mo, mabalin ay somaa ka. Enggay tinaynan din anito din anak mo.” <sup>30</sup> Sinmaa din babai et dinatngana din anak na ay binmabaktad sin katri. Laton ay tinaynan tet-ewa din anitos sisya.

### *Din Nangagasan Jesus Sin Lalaki Ay Nateweng Ya Nadoti*

<sup>31</sup> Pag taynan Jesus ed Tiro et mandan ed Sidon, pag sin sakop di Sinpo Ay Siyodad, et nantaoli sin lebeng ay Galilea. <sup>32</sup> Wada da di nangiey en sisya si lalaki ay nateweng ya nadoti. Nanpakpakaasi da en Jesus ta kapayena din lalaki ay doy ta mailatonan.

<sup>33</sup> Idi siya di, inlasin Jesus din nateweng sin kaipoipogaw et dod-owa da. Pag nan ilwek din gomot na sin ingan di lalaki, asi nan togpaan gomot na yan ikapay na sin dilan di lalaki. <sup>34</sup> Pag nan tangaden ed langit ay manmag-es yan kanana sin kali da, “Eppata,” di



olog na et: “Mabokatan ka.” <sup>35</sup> Pag et mailit-ingan tet-ewa din ingan di lalaki. Nakaan abe din doti na et mandiwes di kali na.

<sup>36</sup> Asi et binilin Jesus daida ta adi da polos ap-apaten si olay sino ay ipogaw. Ngem olay mo inpidwapidwa na ay nangibilin, masepsep ay indaddad-at da pay dedan. <sup>37</sup> Palalo ay nasdaaw da et kanan da, “Pag siged di am-in ay inam-amag na. Olay din nateweng et kaanena din teweng da, ya din naomel et kaanena abe din omel da.”

## 8

### *Din Namakanan Jesus Sin Nasurok Si Opat Ay Libo Ay Ipogaw (Mat. 15:32-39)*

<sup>1</sup> Sin timpo ay doy, waday namingsan ay kasin nasinop di ad-ado ay ipogaw sin kad-an Jesus, yan enggay naabos baon da. Isonga inayagan Jesus din papasolot na et kanana, <sup>2</sup> “Masmaseg-anganak sin nay kaipoipogaw, tan toloy agew ay nakitetee das na en datako yan enggay naabos baon da. <sup>3</sup> Mo pasaaek daida yan adi da nangan pay laeng, waday masidingan sin danan, tan di odom et addawi di somaaan da.”

<sup>4</sup> “Aw kayman,” kanan din papasolot na, “ngem intoy pangaan tako pay si kanen da, tan nay met ay naidodolin isna?”

<sup>5</sup> “Pigay tinapay yo?” pinoot Jesus.

“Pitpito,” kanan da.

<sup>6</sup> Siya et di patokdoen Jesus din kaipoipogaw. Pag nan alaen din pito ay tinapay et nan-iyaman en Diyos. Asi na pag pit-ipit-ingen et indawat na sin papasolot na ta iwattwat da sin kaipoipogaw. <sup>7</sup> Wada abey at-atik ay piskaw ay kinittoy. Nan-iyaman kasin si Jesus, et inpaiwattwat na abe. <sup>8</sup> Nangan da amin et nabsog da. Olnongen da pay din nabay-an, pito ay baskit di napay-an sin nabay-an ay makan. <sup>9</sup> Di kabibilang di nangan et emey ay opat ay libo.

<sup>10</sup> Pag pasaaen Jesus din kaipoipogaw et nakilogan sin papasolot na sin bangka ay emey sin sakop di Dalmanuta.

### *Din Nankedawan Di Fafariseo Si Sinyal (Mat. 16:1-4; Luc. 12:54-56)*

<sup>11</sup> Wada di Fafariseo ay inmey en Jesus. Layden da ay padasen sisya, isonga inlogi da ay mangibaw downan da et dawaten ay paila nay nakaskasdaaw ay sinyal ay si Diyos di nangibaa en sisya. <sup>12</sup> Nanmag-es si Jesus begew sin sakit di nemnem na yan kanana, “Apay nga ipapilit di ipogaw ed wani ay ipailak di nakaskasdaaw ay sinyal en daida? Tet-ewa nan ibagak en dakayo ay iwed met maipaila en daida.” <sup>13</sup> Kanan Jesus di, pag nan taynan daida et nanlogan da kasin sin bangka ta omagadang da sin demang na.

### *Din In-arig Jesus Sin It-itdon Di Fariseo Ya Lawa Ay Ogalin Ari Herod (Mat. 16:5-11)*

<sup>14</sup> Kambaw nilinglingan din papasolot na ay man-itakin si baon da ay tinapay. Es-esay tinapay di wada sin bangka. <sup>15</sup> Pag bagbagaan Jesus daida ay nangwani, “Siliban yo din labaduran di Fariseo ya din labaduran Herod.”

<sup>16</sup> Sin nangibagaanas di, nanngangalat da ay nangwani, “Say kanan Jesus di, tan magay baon tako ay tinapay.”

<sup>17</sup> Ammon Jesus din ngalngalaten da, isonga kanana en daida, “Apay nga madan-danagan kayo si magay tinapay yo? Ay adi yo pay laeng maawatan? Ay naligat di pannemnem yo? <sup>18</sup> Waday mata yo, ngem adi kayo makaila. Wada abey inga yo, ngem adi kayo makadnge. Ay nilinglingan yo <sup>19</sup> din lima ay tinapay ay inmanay sin nasurok si lima ay libo ay ipogaw? Pigay baskit di pinay-an yos nabay-an?”

“Sinpo ya dowan,” kanan da.



<sup>20</sup> “Yan din pito ay tinapay ay inmanay sin nasurok si opat ay libo ay ipogaw, pigay baskit di pinay-an yos nabay-an?”

“Pito,” kanan da. <sup>21</sup> “Yan adi yo pay laeng maawatan din laydek ay kalien?” kanan Jesus.

### *Din Nangagasan Jesus Si Nagodab Ed Betsaida*

<sup>22</sup> Idi sinmawang da ed Betsaida, waday nangiey si lalaki ay nagodab en Jesus. Nanpapakaaasi da en sisya ta kapayena ta mailatonan. <sup>23</sup> Idi siya di, intakkayan Jesus din nagodab ay doy et inpango na sin benget di ili. Tinogpaana din mata na, asi na kapayen yan kanana, “Ay waday ilam?”

<sup>24</sup> Manmeswat pay din nagodab et kanana, “Wada. Mailak di ipogaw. Kaman kaiw di kailaan da, ngem mandad-an da.”

<sup>25</sup> Pag kasin kapayen Jesus din matan di nagodab. Tinekeng nan mata na et naibolinasnasan ay mabtag di pangila na. <sup>26</sup> Asi pag pasaaen Jesus ay nangwani, “Mandagdagas ka od ay somaa. Adi ka masmaspad sin ili ay tinaynan ta.”

### *Din Nangibagaan Pedro Mo Sino Si Jesus*

*(Mat. 16:13-20; Luc. 9:18-21)*

<sup>27</sup> Pag emey da Jesus sin il-ili ay sinakop di Cesarea Filipos. Sin pandad-anan da, pinoot na sin papasolot na, “Sinoy pangwanin di kaipoipogaw en sak-en?”

<sup>28</sup> “Wada di mangwani en sik-a si Juan ay Mamonbonyag. Kanan di odom en sik-a si Elias, yan kanan aben di odom en sik-a di esa ay mamadto ed nabaon,” insongbat da.

<sup>29</sup> “Ngem dakayo pay,” kanan Jesus, “sinoy pangwani yo en sak-en?”

Kanan Simon Pedro, “Sik-a din Messias.”

<sup>30</sup> Pag ibilin Jesus sin papasolot na en adi da polos ibagbaga na si olay sino ay ipogaw.

### *Din Nangipadtoan Jesus Sin Panligatana Ya Kateyana*

*(Mat. 16:21-23; Luc. 9:22)*

<sup>31</sup> Pag ilogin Jesus ay mangilawag sin papasolot na di mapasamak en sisya sin tapin di agew. Kanana, “Sak-en ay Anak di Ipogaw et masapol ay nam-osek di ad-ado ay ligat. Din aam-a ya din papangolon di papadi ya din mamaestron di linteg et sigaan das sak-en ya omipapse da, ngem kasinak matago sin maikatlo ay agew.” <sup>32</sup> Dadlonan inlawag na, asi et paay-ayeden Pedro yan inlogi na ay mangyamyam en sisya. <sup>33</sup> Sinagong Jesus din papasolot na yan niyamyamanas Pedro ay nangwani, “Komaan kas na ay Satanas! Tan din nemnemnemem et baken din layden Diyos mo adi et din layden di ipogaw.”

### *Din Kabibiyag Di Maitapi En Jesus*

*(Mat. 16:24-28; Luc. 9:23-27)*

<sup>34</sup> Pag ayagan Jesus din kaipoipogaw ya din papasolot na yan kanana en daida, “Mo sino di mayad ay manbalin ay pasolot ko, masapol ay pandokogana din awak na ya tilidena din krus na\* ta asi makiey en sak-en. <sup>35</sup> Tan din mangipatpateg sin awak na et matey met laeng, ngem din matey begew sin pammati na en sak-en ya din pangikaskasabaana sin siged ay damag et waday biyag ay iwed patingga na ay idawat Diyos en sisya. <sup>36</sup> Tan sino aya di maganab di ipogaw mo okaena din intiro ay lobong yan asi et malitaw din biyag na et madosa ay eng-enggana? Maga! <sup>37</sup> Tan magay mabalin ay isokat di ipogaw si biyag na. <sup>38</sup> Dadlon managbasol di ipogaw ed wani. Tinaynan das Diyos ta en da man-anap si odom ay diyos. Olay sino en daida di manigaan en sak-en ay Anak di Ipogaw ya din it-itdok et sigaak abes sisya sin omaliak ay kadwak din nasantoan ay aanghel ko ya pangipailaak sin dayaw Amak.”

\* **8:34** Mateo 10:38; Lucas 9:23.

## 9

<sup>1</sup> Pag nan itoloy ay nangwani, “Tet-ewa nan ibagak ay wada en dakayo isna di daan pay laeng di kateyan da et ilaen da din panakabalin Diyos sin panturayana.”

### *Din Nanbaliwan Di Kailaan Jesus* (Mat. 17:1-8; Luc. 9:28-36)

<sup>2</sup> Emey pay di enem ay agew, inayagan Jesus si Pedro ya da Santiago en Juan, et nantikid da si esay nakayang ay dontog ay ang-anggoy da. Il-ilaen da pay sisya, nanbaliw di kailaana <sup>3</sup> ya din bado na et kinmilakilat ay komonkoniniing. Din kakilat na et magay makaiso isnan daga.

<sup>4</sup> Pag et manpailas da Elias en Moses ay makingalngalat en Jesus. <sup>5</sup> Kanan Pedro en sisya, “Apo, mayat din kawada takos na. Man-amag kami et adi si tolo ay pansidoman ta okam di esa, okan Moses di esa, ya okan Elias di esa.” <sup>6</sup> Ngem say inbaga na di, tan adi na iman ammo din kankanana, tan palalo di egyat da.

<sup>7</sup> Pag et domateng di liboo et sinalinanas daida am-in. Pag wada di kali ay napo sin liboo ay nangwani, “Si naey di laydelaydek ay anak ko. Dengngen yo din kanana!”

<sup>8</sup> Kameswat da ay dagos, ngem magay odom si inila da mo adi et ang-anggoy Jesus.

<sup>9</sup> Idi manballalong da pay, inbilin Jesus en daida, “Adi yo daddad-aten din nay inila yo si olay esa ay ipogaw enggana ay sak-en ay Anak di Ipogaw et matagoak kasin.”

<sup>10</sup> Pinatin din papasolot na et adi da dinaddad-at si odom, ngem nanngangalat da pay mo sinoy laydena ay kalien sin nangwaniana en matago kasin. <sup>11</sup> Pinoot da en sisya, “Apay nga it-itdon di mamaestron di linteg ay masapol ay mangon-ona ay omali si Elias mo din Messias?”\*

<sup>12</sup> “Tet-ewa iman ay mangon-ona ay omali si Elias ta olnosena di am-in,” kanan Jesus ay sinombat. “Ngem wada abey inpaisolat Diyos maipanggep en sak-en ay Anak di Ipogaw. Kanana en masapol ay nam-osek di ad-ado ay ligat ya malasoyak abe. <sup>13</sup> Ngem kanak abe en dakayo ay enggay inmalis Elias, et ol-olay di inyaat di ipogaw en sisya ay siya met laeng di inpaisolat Diyos maipanggep en sisya.”

### *Din Nangipakaanan Jesus Sin Anito Ay Kinmapet Si Anak* (Mat. 17:14-21; Luc. 9:37-43)

<sup>14</sup> Idi nakaballalong da Jesus ay somagsag-en sin kad-an di odom ay papasolot na, inila da ay inaalibongbongan di ad-ado ay ipogaw din papasolot na. Wada abey mamaestron di linteg ay mangib-ibaw en daida. <sup>15</sup> Sin nangilaan di kaipoipogaw en Jesus, peteg ay nasdaaw da, et nanagtag da sin kad-ana yan pinakomostaan das sisya. <sup>16</sup> “Sinoy nangib-ibawan yo en daida?” pinoot Jesus.

<sup>17</sup> “Apo maestro,” kanan di esa ay sinombat. “In-alik koma en sik-a nan anak ko, tan kinapet di anito ay nangomel en sisya. <sup>18</sup> Mo depapenas sisya, maidogos, man-oosab tepek na, mankayetket bab-a na ya komenteg di awak na. Inbagak sin papasolot mo ay pakaanen da din anito, ngem adi da kabaelan.”

<sup>19</sup> “Dakayo ay adi mamati!” kanan Jesus ay sinombat. “Kaman kayman nabayabayag di nakiteteek en dakayo! Ay ken manpigapiga pay di anos ko en dakayo?” Pag nan kanan sin aman di anak, “May, ialim din anak mo.”

<sup>20</sup> Et in-ey da. Sin nangilaan di anito en Jesus, pag na et pankedasen din anak, et matokang yan manpolipolig-ad dowan aben man-oosab tepek na. <sup>21</sup> Pinoot Jesus sin aman di anak, “Pig-an di nangilogianas na?”

“Nanlogi sin kakitkitoy na,” kanana ay sinombat. <sup>22</sup> “Namin ado ay indangdang-op ya inbenbenben din anitos sisya ta peslena koma. Maseg-ang ka paabe ta badangam si dakami mo kabaalam.”

<sup>23</sup> “Sinoy kanam, mo kabaalak?” kanan Jesus. “Din waday pammati na en Diyos et maga di adi na kabaelan ay amagen.”

\* **9:11** Malakias 4:5.

<sup>24</sup> Pag et ipigsan din aman di anak di kali na yan kanana, “Mamatiak, ngem kolang. Bomadang ka kod ta maanayan di pammatik.”

<sup>25</sup> Idi inilan Jesus ay madalas ay masinsinop di kaipoipogaw, binilina din anito ay kanana, “Sik-a ay anito ay naneweng ya nangomel sin anak ay sana, taynam yan adim kasin kapkapten.” <sup>26</sup> Din anito et palalo ay nankekedasenas sisya dowanankilaladen, asi kataynan. Kaman natey din kailaan din anak, isonga kanan di kaipoipogaw en natey. <sup>27</sup> Ngem intakkayan Jesus ay namangon, et pinmika.

<sup>28</sup> Idi sinenggep pay da Jesus sin beey ay pantean da, et ang-anggoy da, pinoot din papasolot na en sisya, “Apay nga adi mi binaelan ay nangipakaan sin anito ay doy?”

<sup>29</sup> “Din kaman nidi ay anito et adi komaan mo din mangipakaan en sisya et adi mankararag en Diyos,” kanan Jesus ay sinombat.

### *Din Nangipidwaan Jesus Ay Nangolit Sin Kateyana*

*(Mat. 17:22-23; Luc. 9:44-45)*

<sup>30</sup> Pag taynan da Jesus din ili ay doy et nandan da sin probinsiya ay Galilea. Sigaan Jesus ay maammoan di kad-an da, <sup>31</sup> tan it-itdoana din papasolot na. Kanana en daida, “Sak-en ay Anak di Ipogaw, awni et maipolangak sin kaibaw ko et pomse da, ngem matagoak kasin sin maikatlo ay agew.” <sup>32</sup> Ngem adi da ammo din laydena ay kalien, yan emegyat da ay mamoot en sisya.

### *Sino Din Kangatoan*

*(Mat. 18:1-5; Luc. 9:46-48)*

<sup>33</sup> Domateng da pay ed Capernaum et senggep das beey, pag inbagan Jesus sin papasolot na, “Sinoy nan-iibawan yo sin danan ed kaonyan?” <sup>34</sup> Ngem ginmiginek da, tan nan-iibaw da mo sino di kangatoan en daida. <sup>35</sup> Pag tomokdo si Jesus. Inayagana din sinpo ya doway ay pasolot na yan kanana, “Din manglayad ay manbalin si kangatoan et masapol ay panbalinena din awak na ay kababaan yan mansilbi sin am-in ay ib-a na.” <sup>36</sup> Pag nan ayagan di esay anak et inpapika na sin nan-gawaan da. Asi na kinawe din anak ay doy yan kanana en daida, <sup>37</sup> “Olay sino ay mangawat si nababa ay ipogaw ay kaman nina ay anak manbegew sin pammati na en sak-en et sak-en di inawat na, yan din mangawat en sak-en et inawat na abe din nangibaan sak-en.”

### *Din Adi Mangontra Et Sisya Di Bomadang*

*(Luc. 9:49-50)*

<sup>38</sup> Pag kanan Juan en Jesus, “Apo maestro, inila mi di ipogaw ay mangipakpakaan si aanito ay mangos-osal sin ngadan mo, yan inandiyon mi tan baken takon ib-a.”

<sup>39</sup> “Adi kayo an-andiyon,” kanan Jesus, “tan din man-amag si milagro ay mangos-osal sin ngadan ko et adi na kabaelan ay mangipalawlawwa en sak-en si awni. <sup>40</sup> Tan din adi mangonkontra en datako et badbadanganas datako. <sup>41</sup> Tet-ewa nan ibagak en dakayo ay olay din owat mangipainom si esa ay tasa ay danom en dakayo gapo ta makwani kayo en pasolot Cristo et dadlon magon-gonaan.”

### *Maipanggep Si Pan-gapooan Di Solisog*

*(Mat. 18:6-9; Luc. 17:1-2)*

<sup>42</sup> “Olay sino ay manolisog ta manbasol din olay esa en da naey ay kababaan ay ipogaw ay namati en sak-en, agpos et koma mo tay-adan din bagang na si madagsen ay bato asi maitpig sin baybay mo din pangitoloyana sin solisog na. <sup>43</sup> Isonga mo din takkay mo di panbasolam, potoam. Tan agpos mo en ka makilak-am sin biyag ed langit ay napopotoan di esay takkay mo mo din dodoway takkay mo yan maitpig ka sin kad-an di apoy ay adi kadmep.” <sup>45</sup> Et mo din sikim di panbasolam, potoam. Tan agpos mo en ka makilak-am sin biyag ed langit ay napopotoan di esay sikim mo din dodoway

† 9:43 Versikulo 44 ya 46 et maga da sin kaad-adoan ay manuskrito sin Griego. Nan-iso din kanana sin versikulo 48.

sikim yan maitpig ka sin kad-an di apoy ay adi kadkad-ep. <sup>47</sup> Din matam abe, mo say panbasolam, okitem. Tan agpos mo en ka makilak-am sin biyag ed langit ay bolding ka mo din dodoway matam yan maitpig ka sin apoy ed inferno. <sup>48</sup> Tan ed inferno, adi katkatey din bigis ay mangmangan sin awak da ya din apoy et adi kasebseban.

<sup>49</sup> “Am-in ay ipogaw et masapol ay padasen day ligat ta somiged di ogali da ay kaman din makan ay masapol ay maasinan ta mam-is.‡ <sup>50</sup> Din asin et waday silbi na, ngem mo omamsit, adi met mabalin ay pataolien din pait na. Nemnemen yo ngarud din silbin di asin et manbinadang kayo ta say maoolnos kayo.”

## 10

### *Maipanggep Si Man-asawa Ya Man-idang*

*(Mat. 19:1-12; Luc. 16:18)*

<sup>1</sup> Kinmaan da Jesus sidi et inmey da sin sakop di Judea et pag sin demang di ginawang ay Jordan. Inalibongbongan kasin di kaipoipogaw et initdoana abes daida, tan say ogali na di.

<sup>2</sup> Wada abe di Fafariseo ay inmey en Jesus ta padasen da ay mangiapat en sisya. Kanan da, “Ay ipalobos di linteg tako ay isian di lalaki di asawa na?”

<sup>3</sup> “Sino di inbilin Moses en dakayo ed nabaon?” kanan Jesus.

<sup>4</sup> “Inpalobos Moses ay idawtan di lalaki di asawa na si kasolatan ay mangipaneknek ay nansian da, pag nan pakaanen,”\* kanan da ay sinombat.

<sup>5</sup> Kanan aben Jesus, “Inpalobos Moses ay isian yo din asawa yo begew sin kinakenteg di nemnem yo. <sup>6</sup> Ngem din inyat di namarsua sin damo et inamag na di lalaki ya babai.†

<sup>7</sup> “Say gapo na ay taynan di lalaki da ama na en ina na ta ibeey na din asawa na, <sup>8</sup> et manbalin das es-esa.‡ Isonga baken dan dodowa mo adi et es-esa. <sup>9</sup> Din nanbalinen ngarud Diyos si es-esa et adi koma pansianen di ipogaw.” <sup>10</sup> Idi nantaoli da Jesus sin beey da, pinoot din papasolot na mo sinoy olog din inbaga na ay doy. <sup>11</sup> Kanan Jesus, “Olay sino ay lalaki di mangisian si asawa na ya dowan makiasawa si odom ay babai et makibabbabai et makabasol en asawa na. <sup>12</sup> Ya olay sino abe ay babai di mangisian si asawa na ya dowan makiasawa si odom ay lalaki et makabasol en asawa na ay makilalaki.”

### *Din Namindisyonan Jesus Sin Anan-ak*

*(Mat. 19:13-15; Luc. 18:15-17)*

<sup>13</sup> Sin namingsan wada di nangiey en Jesus si an-ak da ta kapayena ya bindisyonanas daida. Ilaen pay din papasolot na et inandiyan da. <sup>14</sup> Ngem binongetan Jesus daida yan kanana, “Itay-on yo ta omali din anan-ak en sak-en. Adi yo andiyan, tan din kaman dana di maitapi sin panturayan Diyos. <sup>15</sup> Tet-ewa nan ibagak en dakayo ay mo adi yo awaten din pangiturayan Diyos en dakayo ay kaman din iyat di anak ay mangawat, adi kayo polos maitapis di.” <sup>16</sup> Pag nan saksaklien din anan-ak ay doy et kinapkapay na ay mamindisyon en daida.

### *Din Lalaki Ay Nabaknang*

*(Mat. 19:16-30; Luc. 18:18-30)*

<sup>17</sup> Idi manloblobwat da Jesus, wada et di lalaki ay nanagtag sin kad-ana. Nandokmog sin sangoanana yan kanana, “Sigid ka ay Apo, sinoy masapol ay amagek ta say wada en sak-en din biyag ay iwed patingga na?”

<sup>18</sup> Kanan Jesus, “Apay nga kanam en sigedak? Tan iwed polos di siged mo adi si Diyos et anggoy. <sup>19</sup> Ammom din linteg Diyos ay kanana, ‘Adi ka manpese, adi

‡ **9:49** Din kanana sin Griego et: Am-in ay ipogaw et masapol ay maasinan das apoy. Din pannemnem di ad-ado et ligat di maiarig si asin. \* **10:4** Deuteronomio 24:1-4. † **10:6** Genesis 1:27. ‡ **10:8** Genesis 2:24.

ka makikamkamalala, adi ka mangak-akew, adi ka mantistigo ay man-et-etek, adi ka mansowsowitik, ya dayawem da amam en inam.’”§

<sup>20</sup> Asi pay kanan din lalaki ay doy, “Apo maestro, manlogi sin kakitkitooy ko, tinong-tongpal ko am-in dana ay linteg.”

<sup>21</sup> Sin nangisin-engan Jesus, laylaydenas sisya yan kanana, “Wada pay di esa ay pankolangam. En ka ilako din sanikwam ta idawat mo din lako na si nabiteg, et mawada di kinabaknang mo ay indodolin Diyos ed langit. Asi ka omali ta manbalin ka ay pasolot ko.”\* <sup>22</sup> Idi dinnge na din kanan Jesus ay doy, maila sin mata na ay masmasadot, et tinaynanas daida ay manladladingit, tan palalo ay baknang sisya.

<sup>23</sup> Asi et insin-eng Jesus din papasolot na yan kanana, “Naligat ay maitapi di baknang sin panturayan Diyos.” <sup>24</sup> Nasdaaw da sin nanngaan das di, ngem inpidwan pay dedan Jesus ay nangwani, “An-ak ko, tet-ewa met ay naligat di kaitapian di ipogaw sin panturayan Diyos. <sup>25</sup> Nalaklaka pay ay senggep di kamel sin lokaw di dagom mo din kaitapian di baknang sin panturayan Diyos.”

<sup>26</sup> Nantatakaw din papasolot na sin nanngaan das di et kanan da, “Mo siya ngarud sa, sino ngin di maisalakan?”

<sup>27</sup> Insisin-eng Jesus daida yan kanana, “Mo ipogaw et adi da kabaelan ay mangamag isna, ngem mo si Diyos pay et mabalin, tan kabaelan Diyos di am-in.”

<sup>28</sup> Pag et kanan Pedro, “Yan si dakami pay? Tan tinaynan mi di am-in ta manbalin kami ay pasolot mo.”

<sup>29</sup> “Aw kayman,” kanan Jesus, “yan tet-ewa pay din ibagak en dakayo ay olay sino di manaynan sin beey na, aag-i na, da ama na en ina na, an-ak na ya daga na begew sin naitapiana en sak-en ya din pangikaskasabaana sin siged ay damag, <sup>30</sup> et mamin singasot di awatena sin naey ay biyag mo din banol di tinaynana. Ad-ad-ado di awatena ay beey, aag-i, iin-a, aan-ak ya daga. Mapaligat abe, ngem sin tapin di agew pay, maidawtan si biyag ay iwed patingga na. <sup>31</sup> Ngem ad-ado di nangato ed wani ay maibaba, ya ad-ado abe di nababa ed wani ay maipangato.”

### *Din Maikatlo Ay Nangibagaan Jesus Sin Kateyana* (Mat. 20:17-19; Luc. 18:31-34)

<sup>32</sup> Sin nantiktikidan da Jesus ay emey ed Jerusalem, mangon-on-onas sisya. Nasdaaw din papasolot na yan emeegyat abe din omon-onod ay ipogaw. Asi et inayagan Jesus din sinpo ya doway ay pasolot na ta omay-ayed da, <sup>33</sup> et kanana en daida, “Dengngen yo. Nay ay tomiktikid tako ed Jerusalem. Mo somawang takos di, sak-en ay Anak di Ipogaw et maipolangak sin papangolon di papadi ya mamaestron di linteg. Keddengan das sak-en ay matey, pag dan omipolang sin Gentil <sup>34</sup> ta lomaslasoy, tomogpatogpa ya somoplisoplit da ya pag dan pomse, ngem sin maikatlo ay agew pay, matagoak kasin.”

### *Din Kindaw Da Santiago En Juan* (Mat. 20:20-28)

<sup>35</sup> Pag emey en Jesus da Santiago en Juan ay anak Zebedeo yan kanan da, “Apo maestro, wada koma di kedawen mi en sik-a.”

<sup>36</sup> “May, sinoy layden yo ay amagek para en dakayo?” kanan Jesus.

<sup>37</sup> “Mo madayaw ka sin panturayam, patokdoem kod si dakami sin makannawan ya makannigid mo,” kanan da ay sinombat.

<sup>38</sup> Asi et kanan Jesus en daida, “Adi yo ammo din ibagbaga yo. Ay maanosan yo aya din ligat ay nam-osek? Ay maitoled yo ay matey ay kaman din iyat ko ay matey?”

<sup>39</sup> “Mabalin,” kanan da.



Pag kanan Jesus, “Siya kayman ay manligat kayo ay kaman din ligat ko. Matey kayo abe ay kaman din kateyak. <sup>40</sup> Ngem din tomokdo sin makannawan ya makannigid ko et magay lebbeng ko ay mangibaga, tan enggay pinilin Diyos din tomokdos di.”

<sup>41</sup> Sin nanngean din sinpo ay gagait da, inbonget das da Santiago en Juan. <sup>42</sup> Siya di inayagan Jesus daida am-in et kanana en daida, “Ammo yo ay din maibilang ay tuturay isnan daga et ipipilit da din layden da sin iturturayan da. Din nangato abe di saad na et ipaila da din turay da. <sup>43</sup> Ngem baken say iyat yo koma. Tan mo wada en dakayo di manglayad ay ngomato, masapol ay silbiana din gagait na ay kaman baa, <sup>44</sup> ya din manglayad ay kapatgan et masapol ay silbiana di am-in ay ipogaw ay kaman bag-en. <sup>45</sup> Tadonen yo komas sak-en ay Anak di Ipogaw, tan adiak in mali ay masilbian mo adi et ta mansilbiak si kaipoipogaw ya idawat kon biyag ko ay mangsobot si ad-ado.”

### *Din Nangaanan Jesus Sin Godab Bartimeus*

*(Mat. 20:29-34; Luc. 18:35-43)*

<sup>46</sup> Sinmawang da Jesus ya din papasolot na ed Jerico. Sin kinmaan da, nakiey di nabeweg ay ipogaw. Wada et di nagodab ay tinmotokdo sin benget di kalsada ay makipalpalimos, si Bartimeus ay anak en Timeus. <sup>47</sup> Idi dinnge na ay wada si Jesus ay taga-Nazaret, kabogaw ay nangwani, “Ay Jesus! Polin David! Maseg-ang ka paabe!”

<sup>48</sup> Ad-adoy nangyamyam en sisya ta gominek koma, ngem sinepsep na et ay inbogaw, “Polin David, maseg-ang ka paabe!”

<sup>49</sup> Siya di et sinmaldeng si Jesus et kanana, “Ayagan yo kod sina.”

Pag dan ayagan din nagodab yan kanan da, “Tomoled ka, ipikam, tan doy ipaayag daka.” <sup>50</sup> Kaiwalsi si Bartimeus sin tak-ep di bado na, kapika et omasag-en en Jesus.

<sup>51</sup> Pag kanan Jesus en sisya, “Sinoy laydem ay amagek en sik-a?”

“Apo,” insongbat din nagodab, “laydek ay makaila.”

<sup>52</sup> “May, en ka,” kanan Jesus. “Nailatonan ka begew din talek mo.” Et pag nakaan ay dagos din godab na et nakibeweg en da Jesus.

## 11

### *Din Nanaydayawan Di Kaipoipogaw En Jesus Sin Inmeyana Ed Jerusalem*

*(Mat. 21:1-11; Luc. 19:28-40; Jn. 12:12-19)*

<sup>1</sup> Somagsag-en pay da Jesus ed Jerusalem, sinmawang da sin demang di Betfage ya ed Betania sin gowab di bilig ay Olivo. Nangon-onaena di doway ay pasolot na <sup>2</sup> ay nangwani, “Emey kayo sin doy ay ili ed demang. Kostokosto ay mo domateng kayos di, datngan yo di anak di dangki ay adi nakabkabayoan ay naitataked. Obaden yo ta ialiyos na. <sup>3</sup> Mo waday mangipoot en dakayo, ‘Apay nga obaden yo sa?’ kanan yo en, ‘Masapol din Apo mi,’ et ipalobos na ay dagos.” <sup>4</sup> Inmey da ngarud, yan inila da tet-ewa din anak di dangki. Wada sin kalsada ay naitataked sin bel-ayan di esa ay beey. Sin nangobadan da, <sup>5</sup> kanan di pinmipikas di, “Apay nga ob-obaden yo sa?” <sup>6</sup> Insongbat da din intogon Jesus en daida, et pag itay-on din doy nangila en daida.

<sup>7</sup> Pag dan iey en Jesus. In-ap-ap da din tak-ep di bado da sin edeg di dangki et pag mangabayo si Jesus. <sup>8</sup> Ad-ado di ipogaw ay wadas di et in-ap-aplag da din tak-ep di bado da sin kalsada. Din odom pay et inap-apan da din kalsada si pangan di kaiw ay sinipat da sin benget na ta say pandayaw da en Jesus. <sup>9</sup> Din nangon-ona ya inmononod et inbogbogaw da ay nangwani, “Madaydayaw! Mabindisyonan koma nan inbaan Diyos ay panakaawak na!” <sup>10</sup> Mabindisyonan nan maiskat en Ari David! Madaydayaw si Diyos ed langit!”

\* 11:9 Salmo 118:26.



<sup>11</sup> Domateng da pay ed Jerusalem, sinenggep si Jesus sin Timplo et inila na di amin ay wadas di. Pag komaan et inmey da ya din papasolot na ed Betania, tan enggay masmasdem.

*Din Kaiw Ay Igos Ay Magay Lames Na*  
(Mat. 21:18-19)

<sup>12</sup> Sin napat-a ay pantattaolian da Jesus ay napod Betania, mandagaang sisya. <sup>13</sup> Tinamang na di kaiw ay igos ay ad-adoy tobo na, et sinag-ena ta ilaena mo waday lames na, ngem idi dinmateng sin kad-an di kaiw, wada et anggoy di tobo na, tan daan di panaglames di igos. <sup>14</sup> Isonga kanana sin kaiw ay doy, “Adi ka kasin manlamlames.” Et dinngen din papasolot na din inbaga na.

*Din Nangipabelaan Jesus Sin Man-ilaklako Sin Timplo*  
(Mat. 21:12-17; Luc. 19:45-48; Jn. 2:13-17)

<sup>15</sup> Pag senggep si Jesus sin Timplo et inpabela na din man-ilaklako ya manlaklako si maidaton en Diyos. Tinokang na abe din lalamisaan di mansoksokat si pilak ya din totokdoan di man-ilaklako si kalapati. <sup>16</sup> Inparit na abe ay mandan di man-egen si kalga sin lak-am di Timplo. <sup>17</sup> Pag nan itdoan din kaipoipogaw yan kanana, “Naisolat sin kalin Diyos, ‘Din beey ko et makwani en pankarkararagan di ipogaw.’ Ngem dakayo pay et nanbalinen yo si panosowitikan yos iib-a yo!”<sup>†</sup>

<sup>18</sup> Nadamag din papangolon di papadi ya mamaestron di linteg din inamag Jesus, et an-anapen da mo intoy iyat da ay mamse en sisya. Tan emegyat da en sisya, begew tan nasdaaw din kaipoipogaw sin init-itdo na. <sup>19</sup> Idi pay malablabi, kinmaan da Jesus sin siyodad.

*Din Maadal Sin Nangbaosan Jesus Sin Kaiw Ay Igos*  
(Mat. 21:20-22)

<sup>20</sup> Sin napat-a, linabsan da din kaiw ay igos, et kambaw enggay nango, pati din lamot na. <sup>21</sup> Pag nemnemen Pedro din inbagan Jesus et kanana, “Apo, ilam! Din kaiw ay binaosam et nango tet-ewa!”

<sup>22</sup> Pag kanan Jesus, “Masapol ay waday pammati yo en Diyos. <sup>23</sup> Tet-ewa nan ibagak en dakayo, mo pasien yo ay matongpal di ibaga yo ay adi kayo mandowadowa, mabalin ay kanan yo sin bilig ay nay, ‘Komaan kas na et pomadtok ka sin baybay,’ et matongpal. <sup>24</sup> Isonga kanak en dakayo, olay sino ay kedawen yo en Diyos et maidawat tet-ewa mo talken yo ay sigurado ay awaten yo. <sup>25</sup> Mo mankarkararag kayo abe yan waday pangiligetan yo sin ib-a yo, pakawanen yos sisya ta say pakawanen aben Ama tako ed langit si dakayo. <sup>26</sup> Ngem mo adi yo pakawanen, adi aben pakawanen Ama tako ed langit din basbasol yo.”

*Din Salodsod Maipanggep Sin Kalebbengan Jesus*  
(Mat. 21:23-27; Luc. 20:1-8)

<sup>27</sup> Sinmawang da kasin ed Jerusalem. Mandad-an pay si Jesus sin bel-ayan di Timplo, inmey en sisya din papangolon di papadi, din mamaestron di linteg ya din aam-a. <sup>28</sup> Pinoot da en sisya ay nangwani, “Sinoy lebbeng mo ay mangam-amag en dana? Sinoy nangidawat en sik-a sin kalebbengam ay nay?”

<sup>29</sup> Kanan aben Jesus, “Wada abey pootek kod en dakayo on-ona. Mo songbatan yo, asiak aben ibaga din kalebbengak ay mangam-amag en dana. <sup>30</sup> Siya na din salodsod ko. Sinoy nangidawat en Juan si kalebbengana ay namonbonyag si kaipoipogaw? Ay si Diyos ono ipogaw?”

<sup>31</sup> Pag dan man-asipoot ay nangwani, “Ay sinoy isongbat tako? Mo kanan tako en si Diyos di nangidawat si lebbeng na, kanan samet Jesus en, ‘Mo siya sa, apay ngarud ay adi yo pinatpatis sisya?’ <sup>32</sup> Ngem mo kanan tako en owat ipogaw di nangidawat, ay inayan!”

<sup>†</sup> 11:17 Isaias 56:7; Jeremias 7:11.

Say kanan da di, tan emegyat da sin kaipoipogaw, tan pasien da am-in ay tet-ewa ay mamadto si Juan. <sup>33</sup> Pag da et kanan en Jesus, “Adi mi ammo.”

Kanan aben Jesus, “Mo siya sa, adiak aben ibaga en dakayo mo sinoy nangidawat en sak-en si kalebbengak ay mangam-amag en dana.”

## 12

### *Din Pangarig Maipanggep Sin Makitaltalon Sin Kaobasan*

*(Mat. 21:33-46; Luc. 20:9-19)*

<sup>1</sup> Pag kanan Jesus ay mangiarig, “Wada di esa ay ipogaw ay nangis-ek si ad-ado ay obas. Binatog na din nanliniked, et tinolikawana di bato ay manaytaya sin someset ay danom di lames na mo igatin da. Nan-isaad abe si nakayang ay kalapaw ay pantean di mangadog. Pag nan ipaayowan si odom ay mantaltalon, et pag emey sin addawi ay ili.\* <sup>2</sup> Domteng pay din panagbobolas si obas, inbaan din nakin nom-a di bag-ena ta ena alaen din bingay na. <sup>3</sup> Ngem idi sinmawang sisya, sinoplit din nangnangset ya inpasaa da ay enggay nakoskosan. <sup>4</sup> Isonga kasin inbaan din nakin oka di esa ay bag-en. Ngem pinat-oan da din toktok na ya binabainan da. <sup>5</sup> Isonga namitlo ay nan-ibaa si bag-en, ngem din maikatlo ay nay et pinse da. Wada abey naiskat ay inbaa na, ngem sinoplit day odom ya pinse day odom. <sup>6</sup> Idi siya di, naabos din ibabbaa na et anggay din laydelaydena ay anak na si nabay-an. Isonga pag nan ibaa din anak na, tan kananas nemnem na, ‘Kabain das sisya.’

<sup>7</sup> “Ngem sin sinmawangan din anak na, kanan din makitaltalon, ‘Si naey di akin tawid sin nom-a ay nay. Peslen tako et ta bansen tako nan tawid na!’ <sup>8</sup> Pag da et depapen et peslen da, asi da initpig din awak na sin lasin di kaobasan.”

<sup>9</sup> Pag kanan Jesus, “Sino ngata di amagen din nakin nom-a sin doy da ay makitaltalon? Adi ena ngarud peslen daida ta asi na aben ipaayowan din nais-ek sin odom ay ipogaw.

<sup>10</sup> Apay nga adi yo maawatan din inpaisolat Diyos ay kanana,

‘Din bato ay sinigaan din man-isassaad si beey et say nanbalinen Diyos ay kabanolan ay bato ay mangipakneg sin beey. <sup>11</sup> Say inamag Apo Diyos na, et sigesiged ya nakaskasdaaw sin pangila tako.’”†

<sup>12</sup> Pag layden din doy papangolon di Judio ay depapen si Jesus, tan ammo da ay daida di inbagbagan di pangarig. Ngem emegyat da sin kaipoipogaw, isonga tinaynan da.

### *Din Salodsod Maipanggep Sin Panbayadan Das Bowis*

*(Mat. 22:15-22; Luc. 20:20-26)*

<sup>13</sup> Pag dan ibaa di odom ay naitatapi sin bonggoy Herod ya Fafariseo ta mo waday songbat na, say pangidaruman da en sisya. <sup>14</sup> Idi dinatngan das sisya, kanan da, “Apo maestro, ammo mi ay tet-ewa am-in di kankanam. Ammo mi abe ay adi ka panlaslasinen din waday kabigbigana, mo adi et it-itdom din tet-ewa ay maipanggep sin layden Diyos ay amagen di ipogaw. Isonga ibagam kod mo labsingen mi din linteg tako mo manbayad kamis bowis sin Emperador ed Roma. Ay bayadan mi ono adi?”

<sup>15</sup> Ngem ammon Jesus ay siksikapan das sisya, isonga pag nan kanan en daida, “Apay nga padpadasen yos sak-en? Omya kayo kod si esay pilak ta ilaek.” <sup>16</sup> Idi in-ali da en sisya, kanana en daida, “Sinoy nakin ropa ya nakin ngadan isna?”

“Din Emperador,” insongbat da.

<sup>17</sup> “Mo siya sa,” kanan Jesus, “din okan Emperador et idawat yo en sisya, ya din okan Diyos et idawat yo abe en Diyos.” Sin nanngaan das di, peteg ay nasdaaw da en sisya.

### *Din Salodsod Maipanggep Sin Natey Ay Matago Kasin*

*(Mat. 22:23-33; Luc. 20:27-40)*

\* **12:1** Isaias 5:1-2. † **12:11** Salmo 118:22-23.

<sup>18</sup> Wada da abe di Sadduceo ay inmey en Jesus. Daida di esa ay bonggoy di Judio ay mangmangwani en adi kasin matago di natey. Kanan da en sisya, <sup>19</sup> “Apo maestro, kanan din linteg tako ay insolat Moses, ‘Mo waday sin-asawa ay magay anak da ya matey din lalaki, masapol ay asawaen din agi na din nalasang ta say mo way anak da, kaman say anak din natey.’”<sup>‡</sup> <sup>20</sup> May kod, wada kano di pito ay sisiag-i ay lallalaki. Nangasawa din pangpangoan, ngem natey ay iwed anak da. <sup>21</sup> Isonga naisokat iyogtana et inasawa na din balo, ngem natey ay iwed abey anak da. Iso na abe sin maikatlo. Pag siyasiya di. Am-in din doy pito ay sisiag-i et nansosokat da ay nangasawa sin balo ay sana, <sup>22</sup> yan natey da am-in ay magay anak da. Pag omanongos ay matey din babai. <sup>23</sup> May kod, mo sin tapin di agew sin katagoan kasin di natnatey, sino ngin en daida di kosto ay akin asawa en sisya? Tan inasawa da am-in.”

<sup>24</sup> Sinongbatan Jesus ay nangwani, “Naipaksaw kayo, tan adi yo maawatan din naisolat ay kalin Diyos ya adi yo aben maawatan din panakabalina. <sup>25</sup> Tan mo matago kasin di natnatey, adi da man-aasawa mo adi et mais-o da sin aanghel ed langit. <sup>26</sup> Et mo maipanggep abe sin kasin katagoan di natey, kaman yon adi binasa din inpaisolat Diyos en Moses maipanggep sin manbidbidang ay kaiw ay kanana, ‘Sak-en si Diyos ay deda ay Diyos da Abraham en Isaac ya si Jacob.’”<sup>§</sup> Say kanana di olay mo nabayag ay nanatey da Abraham. <sup>27</sup> Di layden nina ay kalien et matago kasin di natey, tan si Diyos et baken Diyos di natey ay ipogaw mo adi et din matmatago. Isonga tet-ewa ay dadlon kayon naipaksaw.”

*Din Kapatgan Ay Bilin Diyos*  
(Mat. 22:34-40; Luc. 10:27)

<sup>28</sup> Wada di maestron di linteg ay nananngge sin nanngangalatan din Sadduceo ya si Jesus et pinoot na en Jesus, “Sino di kapapatgan ay bilin?”

<sup>29</sup> Kanan Jesus, “Siya na din kapapatgan ay bilin Diyos. ‘Dengngen yo ay Israelita. Es-esa di Apo tako ay si Apo Diyos, magay odom. <sup>30</sup> Masapol ay imongsan mo di am-in ay nemnem, laing ya bikas mo ay manglaylayad en Diyos ay Apom.’”<sup>\*</sup> <sup>31</sup> Din maikadwa ay kapapatgan et: ‘Masapol ay laylaydem di ib-am ay kaman din pananglayad mo sin awak mo.’ Maga di bilin ay napatpateg mo da naey.”<sup>†</sup>

<sup>32</sup> “Kosto, apo maestro,” kanan din maestron di linteg. “Tet-ewa din inbagam ay es-esa di Diyos, magay odom.”<sup>‡</sup> <sup>33</sup> Kosto abe ay masapol ay imongsan tako di am-in ay nemnem, laing ya bikas tako ay manglaylayad en sisya, yan masapol abe ay laylayden tako di ib-a tako ay kaman din pananglayad tako sin awak tako. Napatpateg mo pasien tako din dow a ay bilin ay nay mo din pangidatdatonan takos animal ya odom ay daton en Diyos.”<sup>§</sup>

<sup>34</sup> Sin nannggean Jesus sin kalaing di songbat na, kanana en sisya, “Dandani ay maitapi ka sin panturayan Diyos.” Et manlogi isdi, maga di mangitolead ay manpoot en Jesus.

*Din Salodsod Maipanggep Sin Messias*  
(Mat. 22:41-46; Luc. 20:41-44)

<sup>35</sup> Sin nan-it-itdoan Jesus sin Timplo, kanana, “Apay nga kanan din mamaestron di linteg en polin David din Messias? <sup>36</sup> Tan din inpaibagan di Ispiriton Diyos en David et siya na.

‘Kanan Apo Diyos en Apok: Tomokdo ka sin makannawan ko enggan as abakek din kaibaw mo.’”<sup>\*</sup>

<sup>37</sup> Pag itoloy Jesus ay nangwani, “Mo say kanan David en Apo na din Messias, intoy iyat na ay polin David?” Et laylayden din nabeweg ay ipogaw ay manmanngge sin kankanana.

‡ 12:19 Deuteronomio 25:5. § 12:26 Exodo 3:6. \* 12:30 Deuteronomio 6:4-5. † 12:31 Levitico 19:18. ‡ 12:32 Deuteronomio 4:35. § 12:33 Hosea 6:6. \* 12:36 Salmo 110:1.

### *Din Pangwanin Jesus Sin Maestron Di Linteg Ya Fariseo*

*(Mat. 23:1-36; Luc. 20:45-47)*

<sup>38</sup> Intoloy Jesus ay nan-itdo yan kanana, “Siliban yo din mamaestron di linteg, tan layden da ay manbabado si kagkagam-is ay nagayad ta say waday kailasinan da ya layden da abe ay daydayawen din mangila en daida ay mangwani en, ‘Emeyam, apo?’ mo en da manpasyal sin markitan. <sup>39</sup> Pilpilien da abe din kasigedan ay tokdoan sin sinagoga, ya mo en da makipangan, siyat din napateg ay ipogaw di en da pakitokdoan. <sup>40</sup> Iet-etekan da pay di nabalo ay babbabai ta say alaen da din gamgameng da ya olay din beey da dowan dan paandoandoen din kararag da sin pangilaan di kaipoipogaw. Awni man et madagdagsen din dosa da.”

### *Din Indawat Di Nalasang En Diyos*

*(Luc. 21:1-4)*

<sup>41</sup> Pag en tomokdo si Jesus et sasangena din kaikoskosnongan di pilak sin Timplo. Pag nan boyboyaen di kaipoipogaw ay mangikoskosnong si pilak da. Ad-adoy babaknang ay nangikoskosnong si ad-ado. <sup>42</sup> Asi et somawang di nalasang ay nabiteg ay nangikosnong si dowan ay balkeg ay kababaan di banol na. <sup>43</sup> Pag ayagan Jesus din papasolot na yan kanana en daida, “Tet-ewa met nan ibagak en dakayo ay ad-ad-ado din inkosnong din nay nabiteg ay balo mo din inkosnong am-in di odom. <sup>44</sup> Tan mo din odom et din sobran di kinabaknang da anggoy di indawat da, ngem din balo ay nay et olay nabibiteg, indawat na am-in ay katagoana.”

## 13

### *Din Timpon Di Ligat Ay Domateng Sin Tapin Di Agew*

*(Mat. 24:1-14; Luc. 21:5-19)*

<sup>1</sup> Sin binmalaan Jesus sin Timplo, kanan di esay pasolot na, “Apo maestro, ilam din dadakke ay bato ay in-amag das Timplo ya bebbeey ay linak-am na. Nais-et iman di inyat da ay nangiamag.”

<sup>2</sup> “Aw kayman,” kanan Jesus, “il-ilaen yo am-in dana ay beey ay dadakke, ngem awni et maiwalang da am-in, tan iwed di olay esay bato si komakaman sin kad-ana.”

<sup>3</sup> Pag dan mantikid sin bilig ay Olivo et tinmokdos Jesus ay sinasagang na din Timplo. Asi pay inmasag-en da Pedro, Santiago, Juan ya si Andrew en sisya ay ang-anggoy da et kanan da, <sup>4</sup> “Ibagam kod mo pig-an di kaamagan nisa ya sinoy sinyal si pangimatonan mi ay dandani di katongpalaan da am-in.” <sup>5</sup> Sinombat si Jesus ay nangwani, “Siliban yo ta adi kayo kaietekan. <sup>6</sup> Tan ad-ado da di omali ay mangwani en, ‘Sak-en met din Messias,’ et ad-ado di ietekan da. <sup>7</sup> Dengngen yo abe din banangbang di gobat ay maisag-en en dakayo ya damag di gobat sin odom ay il-ili, ngem adi kayo emeg-egyat. Masapol ay maamag dana, ngem daan pay din panpatinggaan di lobong. <sup>8</sup> Tan man-gogobat din kailili ya siya abe sin gogobierno. Wada abe di yegyeg sin kailili. Wada abe di betil. Ngem am-in dana et kaman owat din panngitingitan di eges di babai mo iloglogi na ay man-anak.

<sup>9</sup> “Siliban yo, tan depapen ya idarum das dakayo ya sopliten das dakayo sin kasinasi-nagoga. Begew sin pammati yo en sak-en, maidarum kayo abe sin gogobernador ya aari, et say waday gondaway yo ay mangibaga sin siged ay damag en daida. <sup>10</sup> Din siged ay damag et masapol ay maikasaba on-ona sin kailili isnan daga, asi domateng din panpatinggaana. <sup>11</sup> Mo bistigalen das dakayo, adi kayo madandanagan si ibaga yo, tan sin oras ay doy, maipaammo en dakayo din kosto ay ibaga yo. Tan baken si dakayo di nakin kali mo adi din Ispirito Santo.

<sup>12</sup> “Sin doy ay timpo, wada da di manglipot si agi na sin tuturay ta peslen da. Iso na sin aam-a ay lipotan dan aan-ak da sin tuturay ta peslen da. Din anan-ak abe et kontraen dan aam-a ya iin-a da et ipapse da. <sup>13</sup> Am-in di ipogaw et kaliliget das dakayo begew

sin nakies-esaan yo en sak-en. Ngem mo ipapasnek yo ay mamati ay adi mankeykeyat enggana ay makdeng di panligatan yo, maisalakan kayo.”

### *Din Kabakasan Di Jerusalem*

*(Mat. 24:15-22; Luc. 21:20-24)*

<sup>14</sup> Intoloy Jesus ay nangwani, “Awni et wada di ‘kaliliget ay domadael’ ay pomipika sin bakenan kalebbengan.\* (Din mamasa isna et maawatana koma.) Mo ilaen yo di, din mantetee ed Judea et masapol ay dalasen da ay lomayaw sin kadondontogan. <sup>15</sup> Din wada sin bel-ayan di beey na et masapol ay adi mataktak ay senggep ay en manga sin bonag na. <sup>16</sup> Din wada abe sin payew et adi koma somaa ay en man-as tak-ep di bado na. <sup>17</sup> Sin da doy ay agew, kaseseg-ang iman din maliton ya din way pansosoena. <sup>18</sup> Ikararag yo ay adi koma maitompong dana ay ligat sin pinag-aandap. <sup>19</sup> Tan din timpon di nalabes ay ligat ay sana et magay kaiisoana manlogi sin naparsuaan di lobong enggana ed wani, ya maga abe di makaiso sin tapin di agew. <sup>20</sup> Mo doy ya adi ninemnem Diyos ay paaptiken din doy timpo ay panligatan, maga di ipogaw si mabay-an isnan daga. Ngem laton ay paaptikena begew sin pinili na ay ipogaw na.”

<sup>21</sup> Intoloy Jesus ay nangwani, “Sin doy ay timpo, mo waday mangwani en dakayo, ‘Ilam, naey din Messias,’ ono ‘Dooy baw sisya,’ adi yo patpatien. <sup>22</sup> Tan manpaila di makaetek ay ipogaw ay mangwani en daida kano din Messias ya daida kano di mamadto. Et ipaila da di nakaskasdaaw ay sinyal ya milagro ta say ietekan da koma di kaipoipogaw ya olay din ipogaw ay pinilin Diyos mo mabalin. <sup>23</sup> Isonga siliban yo, tan nay ay indadaan ko en dakayo.”

### *Din Omalian Di Anak di Ipogaw*

*(Mat. 24:29-31; Luc. 21:25-28)*

<sup>24</sup> “Makdeng pay din timpon di ligat ay doy, pag et bomolinet din agew ya adi somlag din bowan. <sup>25</sup> Matekdag abe din katalatalaw ya maikiweg din am-in ay wada ed kayang. <sup>26</sup> Et pag dan ilaen sak-en ay Anak di Ipogaw ay omal-ali ay maikoyog sin liboo. Peteg di panakabalin ko ya dadlonak mansilap si kinadiyos ko. <sup>27</sup> Pag et ibaak din aanghel sin opat ay kapoan di dagem ta en da sinopen din pinilik ay ipogaw ko sin am-in ay solin di lobong.”

### *Din Maadal Sin Kaiw Ay Igos*

*(Mat. 24:32-35; Luc. 21:29-33)*

<sup>28</sup> Pag kanan Jesus, “Nemnemen yo din kaiw ay igos ta say pan-adalan yo. Mo manngengeta din panga na yan tomobo, namnamaen yo ay dandani di pinag-oodan. <sup>29</sup> Et siya abe mo ilaen yo ay maam-amag am-in dana ay inbagbagak en dakayo, ammo yo ay dandani di omaliak. <sup>30</sup> Tet-ewa nan ibagak en dakayo ay matmatago pay laeng di odom ay ipogaw ay wada ed wani mo matongpal am-in din inbagak. <sup>31</sup> Mankaiwed din wada ed kayang ya din daga ay nay, ngem din kalik pay et komakaman si eng-enggana.”

### *Magay Mangammo Mo Pig-an Di Omalian Di Anak di Ipogaw*

*(Mat. 24:36-42; Luc. 17:26-30)*

<sup>32</sup> Kanan aben Jesus, “Mo din inbagak en dakayo, magay nakin ammo sin agew ya oras ay katongpalana. Olay din aanghel ed langit et adi da ammo. Olay sak-en ay Anak Diyos et adiak aben ammo. Tan magay nakin ammo mo adi et anggoy si Diyos Ama. <sup>33</sup> Siliban yo ngarud, mansasagana kayo si kanayon, tan adi yo ammo mo pig-an di maamagana. <sup>34</sup> Maiarigak si lalaki ay mansagana ay emey si addawi ay ili. Italek na din beey na sin baa na, yan paamag na sin esa ya esa din kosto ay obla na. Bilinena abe din gowardiya ta adi kaseyseyep. <sup>35</sup> Isonga mansasagana kayo, tan adi yo ammo mo pig-an di pantaoliak ay nakin beey, mo sin malablabi, gawan di labi, gabis, ono mapat-aana. <sup>36</sup> Into et mo

\* **13:14** Daniel 9:27; 11:31; 12:11.



bigla di omaliak, agpos et mo adiak datngan dakayo ay naseseyep. <sup>37</sup> Din nay inbilin ko en dakayo, ibilin ko abe sin am-in ay ipogaw ta say mansasagana kayo am-in.”

## 14

### *Din Nanganapan Da Si Iyat Da Ay Mamse En Jesus*

(Mat. 26:1-5; Luc. 22:1-2; Jn. 11:45-53)

<sup>1</sup> Kolang di doway agew sin domatngan di fiestan di Judio ay makwani en Nalabas ay panganan da sin tinapay ay magay labadura na.\* Et din papangolon di papadi ya din mamaestron di linteg et an-anapen da mo intoy iyat da ay manpap en Jesus ay adi maam-ammoan ta say ipapse da. <sup>2</sup> Kanan da, “Basta adi tako itomtompok sin fiesta tan into et mo man-gogolo din kaipoipogaw.”

### *Din Nangisoyatan Di Babai Si Bangbanglo Sin Toktok Jesus*

(Mat. 26:6-13; Jn. 12:1-8)

<sup>3</sup> Sin kawadan da Jesus ed Betania, en da nakikan sin beey Simon ay kinaan Jesus din kaeegyat ay sakit di kodil na. Idi mangmangan da, sinmag-en en Jesus di babai ay nananggen si botilya ay alabastro di amag na ay napay-an si natanig ay nardo, esa ay kanginaan ay bangbanglo. Insoyat na sin toktok Jesus.

<sup>4</sup> Asi et binmonget di odom ay wadas di yan nankinali da, “Ay-ayyoayyo! <sup>5</sup> Nailako koma di si nasurok ay toloy gasot ay denario ta maidawat sin nabiteg.” Pag dan pis-epis-oyen din babai.

<sup>6</sup> Ngem kanan Jesus, “Bay-an yo! Apay nga palpaligaten yos sisya? Mayamayat di inamag na en sak-en! <sup>7</sup> Tan kanayon ay waday nabiteg sin kad-an yo, et olay sino ay oras ay layden yo, mabalin ay badangan yos daida,† ngem mo sak-en pay, bakenak wadas kanayon en dakayo. <sup>8</sup> Inamag na di kabaelana. Sinapsapa na ay nangisoyat sin bangbanglo ay nay en sak-en ta say isagana na din awak ko para sin kaiponponak. <sup>9</sup> Tet-ewa nan ibagak en dakayo ay olay intos nan daga di kaikaskasabaan di siged ay damag, madaddad-at abe din inamag di babai ay nay ay pangnemneman di ipogaw en sisya.”

### *Din Nakitolagan Judas Ay Manglipot En Jesus*

(Mat. 26:14-16; Luc. 22:3-6)

<sup>10</sup> Pag emey si Judas Iscariot ay esa sin sinpo ya doway ay pasolot Jesus sin papangolon di papadi ta makitolag mo intoy iyat na ay mangipolang en Jesus en daida. <sup>11</sup> Peteg di ragsak da et inkari da ay iyaan das pilak. Pag ilogin Judas ay manganap si waya na ay manglipot en Jesus.

### *Din Nansaganaan Da Sin Maodi Ay Makiokoban Da En Jesus*

(Mat. 26:17-25; Luc. 22:7-13)

<sup>12</sup> Domateng pay din damo ay agew di fiesta ay makwani en Tinapay ay Magay Labadura na, et say namaltian da si anak di karnero para sin fiesta ay makwani en Nalabas. Inmey din papasolot Jesus en sisya et pinoot da, “Intoy laydem ay en mi pangisaganaan si kanen tako para sin fiesta ay makwani en Nalabas?”

<sup>13</sup> Pag ibaan Jesus di doway ay pasolot na ay nangwani, “Emey kayo sin siyodad. Mo somawang kayos di, waday abaten yo ay lalaki ay en nanakdo. <sup>14</sup> Onoden yo sin beey ay segpena, et kanan yo sin akin beey, ‘Inbagan din Apo tako mo into di kowarto ay ena makiokoban en dakami ay pasolot na sin para fiesta?’ <sup>15</sup> Asi na itdo en dakayo di annawa ay kowarto ed kayang ay kad-an di am-in ay masapol tako. Saganaen yo din kanen takos di.”

<sup>16</sup> Siya di, pag manlobwat din doway ay pasolot na ay sana et inmey da sin siyodad. Et tinmet-ewa din am-in ay inbagan Jesus en daida. Et pag dan saganaen din kanen da ay para sin fiesta.

\* 14:1 Exodo 12:1-27. † 14:7 Deuteronomio 15:11.



<sup>17</sup> Idi nalabi, say inmeyan da Jesus ya din sinpo ya doway pasolot na din beey ay doy.  
<sup>18</sup> Mangmangan da pay, kanan Jesus, “Tet-ewa nan ibagak en dakayo ay waday esa en dakayo ay naiookob ay manglipot en sak-en.”<sup>‡</sup>

<sup>19</sup> Palaloy sakit di nemnem da, et nansosokat da ay nanpoot en sisya, “Tan mo sak-en, ay siya?”

<sup>20</sup> “Esa met en dakayo ay sinpo ya doway makisiwsiwsiw en sak-en si tinapay sin mallokong ay nay,” kanan Jesus ay sinombat. <sup>21</sup> “Tan sak-en ay Anak di Ipogaw et mateyak met, tan say inpaisolat Diyos ed nabaon, ngem kaseseg-ang pay san manglipot en sak-en. Agpos et koma mo adi naianak!”

### *Din Maodi Ay Nakiokoban Jesus Sin Pasolot Na*

*(Mat. 26:26-30; Luc. 22:14-20; 1 Cor. 11:23-25)*

<sup>22</sup> Idi mangmangan da pay laeng, nan-as Jesus si tinapay et nan-iyaman en Diyos. Asi na pag pit-ipit-ingen et idawat na sin papasolot na ay nangwani, “Alaen yo na, tan si naey di awak ko.”

<sup>23</sup> Pag man-as tasa ay napay-an si danom di obas et man-iyaman en Diyos. Pag nan idawat en daida et nantedted-an da am-in. <sup>24</sup> Kanan Jesus, “Si naey di dadak ay maniglot sin baro ay tolag Diyos. Omayos mo mateyak para sin ad-ado ay kaipoipogaw. § <sup>25</sup> Tet-ewa nan ibagak en dakayo ay adiak kasin omin-inom si danom di obas enggana sin agew ay makiinomak en dakayo sin baro ay danom di obas sin panturayan Diyos.”

<sup>26</sup> Idi naibagan Jesus di, nankanta da ay nandayaw en Diyos, et pag dan bomala ay emey sin bilig ay Olivo.

### *Din Nangipadtoan Jesus Sin Nangisaotan Pedro En Sisya*

*(Mat. 26:31-35; Luc. 22:31-34; Jn. 13:36-38)*

<sup>27</sup> Idi wada da sin danan, kanan Jesus en daida, “Awni man et tomaynan kayo am-in et lomayaw kayo, tan waday inpaisolat Diyos ay kanana, ‘Awni et peslek din mangay-ayowan sin kakarnero et mansisian da.’\* <sup>28</sup> Ngem mo tagoen kasin Diyos sak-en, mangon-onaak mo si dakayo ay emey ed Galilea.”

<sup>29</sup> Asi et kanan Pedro, “Olay mo lomayaw am-in dana ay gagait ko, adiak pay taynan sik-a.”

<sup>30</sup> Kanan Jesus, “Awni kadi, sin daan pamidwaan di kawwitan ay mantan-o sin nay ay labi, mamitlo ka ay mangwani en adim am-ammos sak-en.”

<sup>31</sup> Pag et ipipilit Pedro ay nangwani, “Olay mo masapol ay makikateyak en sik-a, adiak polos isassaot sik-a.” Et siya abe di inbagan din am-in ay gagait na ay pasolot.

### *Din Nankararagan Jesus Ed Getsemani*

*(Mat. 26:36-46; Luc. 22:39-46)*

<sup>32</sup> Somawang pay da Jesus ya din papasolot na sin lugar ay makwani en Getsemani, kanana en daida, “Itokdo yos na, ta downanak en mankararag.” <sup>33</sup> Pag nan ayagan da Pedro en Santiago ya si Juan, et nakiey da en sisya. Manlogi isdi, peteg ay mansakit nemnem na ya nadagsenan sisya, <sup>34</sup> et kanana en daida, “Nalabes nan sakit di nemnem ko. Kaman siya nay kateyak. Mantee kayos na yan adi kayo kaseyseyep.”

<sup>35</sup> Pag emey sin dagdagas et nanlakob-o ay mankararag ay mo mabalin koma, adi katoloy din maamag en sisya. <sup>36</sup> “Ama, Ama,” kanana, “kabaalam am-in. Ipalobos mo kod ay adiak nam-osen din nay omali ay ligat ko. Ngem baken koma din laydek mo adi din laydem di matongpal.”

<sup>37</sup> Mantaoli pay sin kad-an di tolo ay pasolot na ay doy, dinatnganas daida ay naseseyep. Siya di kanana en Pedro, “Ay Simon, ay naseseyep ka baw? Ay adi ka makaitoled si seyep mo si olay es-esa ay oras? <sup>38</sup> Adi kayo maseyseyep, mo adi et

‡ 14:18 Salmo 41:9. § 14:24 Exodo 24:8; Jeremias 31:31-34. \* 14:27 Zekarias 13:7.

mankararag kayo ta say adi kayo masolsolisog. Tan kosto kayman di panggep yo, ngem nakapoy di awak yo.”

<sup>39</sup> Pag kasin en mankararag si Jesus ay kaman din inyat na sin damo. <sup>40</sup> Mantaoli pay kasin sin kad-an di papasolot na, naseseyep da kasin, tan adi da makakiyat sin mata da. Et adi da ammoy ibaga da en sisya. <sup>41</sup> Isonga inmey kasin ay mankararag. Mantaoli pay sin naikapitlo, kanana sin papasolot na ay sana, “Kambaw gan-ganasen yo pay laeng ay maseseyep! Ado sa! Tan enggay dinmateng din oras ay inkeddeng Diyos, et sak-en ay Anak di Ipogaw et maipolangak sin managbasol ay ipogaw. <sup>42</sup> Ibangon yo, tan nay omal-ali din manglipot en sak-en. En tako abten.”

### *Din Nadpapan Jesus*

*(Mat. 26:47-56; Luc. 22:47-53; Jn. 18:1-11)*

<sup>43</sup> Deda ay mankalkali si Jesus, sinmawang si Judas ay esa sin sinpo ya dow a ay pasolot na. Ad-ado di kabeweg na ay inbaan din papangolon di papadi ya din aam-an di Judio ay nan-egeegen si kampilan ya pat-o. <sup>44</sup> Waday sinyas ay nakitolagan Judas sin kabeweg na ta say pangimatonan da en Jesus. Kanana, “Din ongoak et say depapen yo. Dadlon yon siliban ay mangikaan en sisya.” <sup>45</sup> Siya di inmey en Jesus ay dagos ay nangwani, “Apo maestro, komosta ka?” Pag na et ongoan. <sup>46</sup> Pag dan depapen si Jesus et pinden da. <sup>47</sup> Dowan et di esa ay pinmipika isdi et kaoksot sin kampilana. Kabetbet sin bag-en di kangatoan ay padi et nalongodan inga na.

<sup>48</sup> Pag kanan Jesus en daida, “Ay tollisanak aya ta inmali kayo ay nan-egeegen si kampilan ya pat-o ay en dompap? <sup>49</sup> Inag-agew met ay wadaak sin Timplo ay nan-it-itdo en dakayo, ngem adi kayo dinomdompap. Ngem naamag am-in dana ta say matongpal din inpaisolat Diyos.” <sup>50</sup> Sin nangwanian Jesus sidi, kalayaw din am-in ay pasolot na et tinaynan da.

<sup>51</sup> Wada et di esay baro ay omon-onod en Jesus ay nangigagaley si lopot et anggoy. Kanan din sosoldado en pakidpap da et ginamdot da din in-gagaley na. <sup>52</sup> Ngem kaiwalsi yan katagtag ay nanlallalabos.

### *Din Namistigalan Di Tukuray Di Judio En Jesus*

*(Mat. 26:57-68; Luc. 22:63-71; Jn. 18:19-24)*

<sup>53</sup> In-ey das Jesus sin beey di kangatoan ay padi ay nasisinopan din papangolon di papadi, aam-a ya mamaestron di linteg. <sup>54</sup> Mo si Pedro pay et inmon-onod ay namona di betaey da engganans dinmateng sin bel-ayan di beey ay sana. Pag en makitokdo sin gogowardiya ay man-anido.

<sup>55</sup> Mo din papangolon di papadi ya din odom ay papangolo et nan-an-anap das pamabasol dan Jesus ta say pangidaruman dan sisya ta ipapse da. Ngem magay inanap da, <sup>56</sup> tan olay ad-ado di nantistigo ay man-etek maipanggep en sisya, nankontra din intistigo da.

<sup>57</sup> Idi siya di, wada da di pinmika ay mantistigo. Kanan da ay nangietek, <sup>58</sup> “Dinng mi din nangwanian nina en bakasena kano din Timplo ay nay ay inamag di ipogaw ta asi na kanon saaden di esa ay Timplo si tolo ay agew ay baken ipogaw di mangisaad.” <sup>59</sup> Ngem olay din intistigo da ay nay et nankontra.

<sup>60</sup> Siya di pinmika din kangatoan ay padi sin sangoanan da am-in et kanana en Jesus, “Ay magay maisongbat mo aya sin nay inpabasol dana en sik-a?” <sup>61</sup> Ngem ginmiginek ay magay insongbat na. Isonga kanan aben din kangatoan ay padi, “Ay sik-a din Messias ay Anak di madaydayaw ay Diyos?”

<sup>62</sup> “Aw yan,” kanan Jesus ay sinombat. “Et mo sin tapin di agew, ilaen yos sak-en ay Anak di Ipogaw ay tomotokdo sin makannawan Diyos ay manakabalin. Ilaen yo abes sak-en ay omal-ali ay mapod langit ay maikoyog sin liboo.”

<sup>63</sup> Sin nanngeanas di, binisngit din kangatoan ay padi din mismo ay bado na begew sin bonget na yan kanana, “Ay siya mo masapol tako pay laeng di mantistigo? <sup>64</sup>Nay met ay dinnge tako din inbaga na ay mangis-o sin awak na en Diyos! Sinoy pannemnem yos na?” Et kineddengnan da am-in ay matey.

<sup>65</sup> Pag ilogin di odom en daida ay manogpatogpa sin ropa na. Kinopopan da aben mata na yan dinespedespeg da ay nangwani, “May kod ay, pogtoam mo sinoy nanespeg en sik-a.” Din gogowardiya abe et tinampitampik das sisya.

### *Din Nangisaotan Pedro En Jesus*

*(Mat. 26:69-75; Luc. 22:54-62; Jn. 18:15-18,25-27)*

<sup>66</sup> Mo si Pedro pay et wada pay laeng sin bel-ayan di beey yan nalabas di balasang ay baan di kangatoan ay padi. <sup>67</sup> Sin nangilaana en Pedro ay man-an-anido, insin-eng nas sisya yan kanana, “Esa ka met ay gait Jesus ay taga-Nazaret.”

<sup>68</sup> Ngem insaot na ay nangwani, “Ado paabe na! Adiak met ammo san ibagbagam ya adiak aben maawatan.” Pag emey sin benget di bel-ayan sin kad-an di pasbol. Et nantan-o di kawwitan.† <sup>69</sup> Pag kasin inilan din doy ay balasang sisya et kanana sin pinmipikas di, “Din lalaki ay doy et esa met en daida.” <sup>70</sup> Ngem kasin insaot Pedro.

Maaw-awni pay, kanan aben din pinmipikas di, “Tet-ewa met ay esa ka en daida, tan taga-Galilea ka abe.”

<sup>71</sup> Asi et manbayos si Pedro ay nangwani, “Sapay koma ta domosas Diyos mo baken tet-ewa nan kankanak. Isapatak ay adiak polos am-ammo din lalaki ay ibagbaga yo.”

<sup>72</sup> Pag et ipidwan din kawwitan ay toman-o. Et pag nemnemen Pedro din inbagan Jesus ay sin daan pamidwaan di kawwitan ay mantan-o, mamitlo ay kanana en adi na ammos sisya. Et dadlon naabak si sakit di nemnem na et man-anog-og.

## 15

### *Din Naipolangan Jesus En Pilato*

*(Mat. 27:1-2,11-14; Luc. 23:1-5; Jn. 18:28-38)*

<sup>1</sup> Sin napat-aana, nanmimiting din papangolon di papadi, aam-a, mamaestron di linteg ya din am-in ay waday turay na ay mangiosay, et nantotolag da mo sino di amagen da en Jesus. Pag dan baloden et en da inpolang en Gobernador Pilato.

<sup>2</sup> Pinoot Pilato en sisya, “Ay sik-a baw din arin di Judio?”

“Mo say kanam et siya,” insongbat Jesus.

<sup>3</sup> Din papangolon di papadi et ad-adoy inpabasbasol da en Jesus. <sup>4</sup> Siya di et kanan Pilato, “Dinngem din ad-ado ay ipabasbasol da en sik-a. Ay magay songbat mo?” <sup>5</sup> Ngem adi inpidpidwan Jesus ay nanongbat, isonga peteg ay nasdaaw si Pilato.

### *Din Naikeddengnan Jesus Ay Matey*

*(Mat. 27:15-26; Luc. 23:13-25; Jn. 18:39-19:16)*

<sup>6</sup> Din ogalin Pilato sin tonggal fiesta ay makwani en Nalabas et ibolos na di esa ay balod ay pilien di kaipoipogaw. <sup>7</sup> Sin doy ay timpo, ad-adoy balod ay namse si ipogaw sin nakigobatan da sin gobierno. Si Barabbas di ngadan di esa. <sup>8</sup> Idi siya di, nasinop din kaipoipogaw sin kad-an Pilato et kindaw da ay ibolos na di esa ay balod tan say ogali na. <sup>9</sup> Kanan Pilato, “Ay layden yo ay ibolos ko din Arin di Judio?” <sup>10</sup> Say pinoot na di, tan ammo na ay inpolang din papangolon di papadi si Jesus en sisya begew si apos da.

<sup>11</sup> Ngem din papangolon di papadi et sinogsogan da din kaipoipogaw ta say kedawen da ay si Barabbas di maibolos ay baken si Jesus. <sup>12</sup> “Mo siya sa, intoy iyat ko ngarud en Jesus ay kanan yo en Arin di Judio?” kanan Pilato.

<sup>13</sup> “Ilansam sin krus!” kanan da ay nangibogaw.

† 14:68 Din nay maipanggep sin kawwitan et maga sin odom ay manuskrito sin Griego.

<sup>14</sup> “Ay tan? Sino ngin di basol na?” kanan Pilato.

Ngem nasepsep et ay ibogbogaw da, “Ilansam sin krus!”

<sup>15</sup> Idi siya di, inbolos Pilato si Barabbas, tan laydena ay mapnek din kaipoipogaw, ngem si Jesus pay et inpasoplit na et pag nan ipolang sin sosoldado ta en da ilansa sin krus.

### *Din Nanglaslasoyan Di Sosoldado En Jesus*

*(Mat. 27:27-31; Jn. 19:2-3)*

<sup>16</sup> Inisgep din sosoldado si Jesus sin beey di gobernador et inpasinop da din am-in ay gagait da. <sup>17</sup> Pag dan badoan si Jesus si manbalanga ay nagayad ay kaman din ibadon di ari. Nan-apid da abe si pagat ay inkorona da en sisya. <sup>18</sup> Pag dan ilogi ay manglaslasoy ay mangwani, “Matagotago ka ay Arin di Judio!” <sup>19</sup> Sineppaseppat das pa-o din toktok na downan da aben togpatogpaan. Asi da aben mandokmog ay agin dadayaw en sisya. <sup>20</sup> Idi nakdeng ay nilaslasoy das sisya, kinaan da din manbalanga ay inbado da en sisya, et inpaibado da kasin en sisya din sigod ay bado na. Pag dan ikaan ay en da ilansa sin krus.

### *Din Nailansaan Jesus Sin Krus*

*(Mat. 27:32-44; Luc. 23:26-43; Jn. 19:17-27)*

<sup>21</sup> Wada da pay sin danan, inabat da di lalaki ay em-emey sin siyodad ay napo sin barbaryo, et pinilit da ay tilidena din krus Jesus. Din lalaki ay nay et si Simon ay taga-Cirene ay aman da Alexander en Rufus. <sup>22</sup> Pag dan itoloy enggana ay sinmawang da sin lugar ay kanan da en Golgota, di olog na et kad-an di tong-an di toktok. <sup>23</sup> Domateng da pay sidi, pan-inomen da komas Jesus si arak ay natapian si mirra ay mangipaon-onina kano si sakit. Ngem sinigaana. <sup>24</sup> Pag dan ilansa sin krus. Asi da pag manbibinonot ay mamingay sin bado na ta say ilaen da mo sinoy pontaan di esa ya esa en daida.\*

<sup>25</sup> Alas nowibi sin agsapa di nangilansaan da en Jesus. <sup>26</sup> Wada di naisolat ay mangibaga sin naipabasol en sisya ay kanana, “Arin di Judio.” <sup>27</sup> Wada abe di doway ay tollisan ay inlansa da si natken ay krus, esa sin kannawan ya esa sin kattigid Jesus. <sup>28</sup> Siya na di tinmet-ewaan di inpaisolat Diyos ay kanana, “Naibilang ay tollisan.”†

<sup>29</sup> Mo din malablabas, nanwegweg da ay nanglaslasoy en sisya ay nangwani, “O, kanam od abe en bakasem din Timplo ta asi ka kasin saaden si tolo ay agew.‡ <sup>30</sup> Mo siya sa, isalakan mon awak mo! Komaan kas san krus ta bomaba ka!”

<sup>31</sup> Siya abe ay din papangolon di papadi ya din mamaestron di linteg et linaslasoy da ay nangwani, “Insalakana met di odom ay ipogaw, ngem adi makaisalakan sin awak na.

<sup>32</sup> Olay koma bomaba din nay Messias ay Arin di Israelita sin krus ta say ilaen tako yan mamati tako en sisya,” kanan da. Olay din tollisan ay nailalansa sin krus da et linaslasoy da abes sisya.

### *Din Nateyan Jesus*

*(Mat. 27:45-56; Luc. 23:44-49; Jn. 19:28-30)*

<sup>33</sup> Idi inmalas dosi, kasaldeng din agew ay mansey-ang, et binmolinget din intiro ay ili engganang alas tres. <sup>34</sup> Alas tres pay, inpigsan Jesus din kali na ay nangibogaw, “Eli, Eli, lama sabachthani?” laydena ay kalien, “Diyos ko, Diyos ko, apay nga tinmaynan ka?”§

<sup>35</sup> Idi dinngen di odom ay pinmipikas di, kanan da, “Dengngen yo sa! Ay-ayaganas Elias!” <sup>36</sup> Di esa en daida et katagtag ay en man-as kaman kapes. Inbebe na si soka, et pag nan tebken si pa-o ta idewdew nan sisya ta sopsopana.\* “Awni kod ta ilaen tako mo omalis Elias ay mangipababa en sisya sin krus,” kanana.

\* 15:24 Salmo 22:18. † 15:28 Isaias 53:12. Din versikulo ay nay et maga sin odom ay manuskrito sin Griego.

‡ 15:29 Salmo 22:7; 109:25. § 15:34 Salmo 22:1. \* 15:36 Salmo 69:21.

<sup>37</sup> Pag manbogaw si Jesus et natey. <sup>38</sup> Pag et nabisngit din kurtinan di Timplo et nandowa ay nanlogi sin ngato ay nanpababa. <sup>39</sup> Idi inilan din kapitan di sosoldado ay nanasagang en Jesus di inyat na ay natey, kanana, “Tet-ewa ay Anak Diyos din ipogaw ay nay.”

<sup>40</sup> Wada abe di babbabai ay nanatamang. Di odom en daida et si Maria Magdalena ya si Maria ay inan da Jose en Santiago ay nabdayan si Kitkittoy ya si Salome. <sup>41</sup> Daida di nakikiey en Jesus sin kawada na ed Galilea ay namadbadang en sisya. Wada abe di ad-ado ay babbabai ay nakiey en Jesus ed Jerusalem.

### *Din Naiponponan Jesus*

*(Mat. 27:57-61; Luc. 23:50-56; Jn. 19:38-42)*

<sup>42</sup> Idi masmasdem sin agew ay doy ay pansaganaan di Judio para sin agew ay pan-ibbayan,† <sup>43</sup> wadas Jose ay taga-Arimatea ay nangitoleed ay inmey en Pilato ay nangdaw sin bangkay Jesus. Si Jose et esa ay madayaw ay pangolon di Judio ay manman-ed sin domatngan di panturayan Diyos.

<sup>44</sup> Nasdaaw si Pilato sin nanngena ay enggay natey si Jesus, isonga inpaayag na din kapitan di sosoldado ta pootena mo tet-ewa. <sup>45</sup> Kanan din kapitan en tet-ewa ay natey, et pag ipalobos Pilato ay en alaen Jose din bangkay Jesus. <sup>46</sup> Siya di inmey si Jose ay en manlakos lopot ay mankilat. Pag nan en ibaba din awak Jesus sin krus, et binotibotana sin lopot ay sana, asi na pag igto sin liyang ay natiktikan ay bato. Makdeng di, pinolag na di dakdake ay bato ta maenban din liyang. <sup>47</sup> Wada abes di da Maria Magdalena ya Maria ay inan Jose ay nangila sin naigtoan Jesus.

## 16

### *Din Kasin Natagoan Jesus*

*(Mat. 28:1-10; Luc. 24:1-12; Jn. 20:1-10)*

<sup>1</sup> Idi nakdeng din agew ay pan-ibbayan, inmey da Maria Magdalena, Salome ya si Maria ay inan Santiago ay en da manlakos bangbanglo ta en da iaplos sin bangkay Jesus. <sup>2</sup> Pomatpat-a pay sin Domingo, inmey da sin naiponponana. Enggay naaggew sin sinmawangan da. <sup>3-4</sup> Idi wada da pay laeng sin danan, nan-asipoot da ay nangwani, “Sino ngin di mangolin sin doy bato ay nain-eb sin liyang?” Say kanan da di tan palaloy kadakdaken din bato ay doy. Ngem sin sinmawangan da, nanmeswat da et ilaen da ay enggay naolin. <sup>5</sup> Pag dan senggep sin liyang et inila da di baro ay nanbabado si mankilat ay nagayad ay tinmotokdo sin kannawan. Et nakibtot da.

<sup>6</sup> Pag nan kanan en daida, “Adi kayo emegyat. Ammok ay an-anapen yos Jesus ay taga-Nazaret ay nailansa sin krus. Ngem maga isna, tan natago kasin. Ilaen yo! Si naey di naipayagana. <sup>7</sup> En kayo ibaga en Pedro ya sin odom ay pasolot na ay mangon-onas Jesus mo si dakayo ay emey ed Galilea. Maila yos sisyas di ay kaman met laeng din inbaga na en dakayo.”

<sup>8</sup> Pag et bomala din babbabai sin liyang et nanagtag da ay komaan, tan palalo ay nakibtot da et manpayegpeg das egyat da. Magay nangibagaan da si olay sino ay ipogaw, tan palalo di egyat da.

### *Din Nanpail-ilaan Jesus*

*(Mat. 28:9-20; Luc. 24:13-49; Jn. 20:11-23; Ina. 1:6-8)*

<sup>9</sup> Sin pomatpat-aan di Domingo di kasin natagoan Jesus. Sin kasinan natagoan, nangon-ona ay nanpaila en Maria Magdalena ay nangipakaanana si pito ay anito. <sup>10</sup> Pag emey si Maria sin kad-an di manladladingit ya man-og-oga ay papasolot Jesus, et inbaga

† 15:42 Din ogalin di Judio, manlogi din agew ay pan-ibbayan sin kadiposan di agew sin Biyernes, et makdeng sin kadiposan di agew sin Sabado.



na en daida ay inila nas Jesus. <sup>11</sup> Ngem sin nanngan da sin inbaga na ay doy, adi da pinati.

<sup>12</sup> Asi pag manpailas Jesus sin doway ay pasolot na sin pandad-anan da ay emey sin barbaryo, ngem nanbaliw di kailaana. <sup>13</sup> Din doway ay sana et nantaoli da ay en da ipadamag sin gagait da, ngem din gagait da et adi da aben pinati.

<sup>14</sup> Pag manpailas Jesus sin sinpo ya esa ay pasolot na sin pangpanganan da et niyamyamanas daida begew din magay pammati da ya kinakenteg di nemnem da, tan adi da pinati din inpadamag di nangil-ila en sisya sin kasinan natagoan. <sup>15</sup> Pag nan kanan en daida, “Emey kayo sin intiro ay lobong ta en kayo ikasaba din siged ay damag sin am-in ay ipogaw. <sup>16</sup> Din ipogaw ay mamati ya mabonyagan et maisalakan, ngem din adi mamati et makeddeng an ay madosa. <sup>17</sup> Da naey di sinyal ay ipailan di mamati. Pakaanen day aanito ay mangos-osal sin ngadan ko ya makakali das odom ay kali ay adi da ammo. <sup>18</sup> Mo piditen day eweg ono man-inom das nakedetan, maga di mapasamak en daida. Kapayen da abe di waday sakit na et mailatonan da.”

*Din Naikayangan Jesus Ed Langit*

*(Luc. 24:50-53; Ina. 1:9-11)*

<sup>19</sup> Idi nakdeng ay nakikalis Jesus en daida, naikayang ed langit et tinmokdo sin makannawan Diyos. <sup>20</sup> Pag emey din papasolot na ay mangikaskasaba sin siged ay damag sin inil-ili. Binadbadangan Apo Jesus si daida et pinaneknekana din katet-ewan di inkaskasaba da begew sin nakaskasdaaw ay sinyal ay inpaam-amag na en daida.



## **Din Sigid Ay Damag Ay Insolat San Lucas Maipanggep Sin Libro Ay Nay**

Din nangisolat sin libro ay nay et si Lucas ay esa ay doktor ay namati en Jesus ed idi. Ad-ad-ado di inbaga na maipanggep sin inam-amag ya init-itdon Apo Jesus mo din odom ay nangisolat sidi, manlogi sin naipadtoan di kaianakan Juan ay Mamonbonyag ya si Jesus enggana sin naikayangan Jesus ed langit. Si Lucas met laeng di nangisolat sin kaitoloyan di libro ay nay, Din Inam-amag Di Aapostol, maipanggep sin inmad-adoan di mamati sin nakdengnan di nantaolian Jesus ed langit. Din nangisolatana sin doway ay libro ay nay et si Teofilus ay kanan di odom en esa ay nangato ay taga-Roma. Magay odom ay ammo tako maipanggep en sisya.

Din nay sigid ay damag ay insolat Lucas et ipaammo na ay si Jesus din Messias ay inkarin Diyos ay mangisalakan sin Judio ya siya abe sin am-in ay ipogaw ay mamati en sisya. Insolat na ay pinilin Diyos si Jesus ay mangikasaba sin sigid ay damag sin nabibiteg (4:18), isonga ad-ado di mabasa isna maipanggep sin nangisaksakitan Jesus sin kaipoipogaw ay nankinalasi di kasapolan da, namnamed din mansaksakit, din kinapet di anito, ya din laslasoyen di odom ay ipogaw.

Ad-ado di daddad-at ay sin isna ay libro et anggoy di kad-ana ay kaman din kantan di aanghel ya din nanpasyalan di namanbantay si karnero en da Jesus sin naianakana, din nataynanan Jesus sin Timplo sin kakitkittoy na, din baknang ya si Lazarus, ya din papangarig maipanggep sin sigid ay taga-Samaria ya din nasangaw ay anak.

Di odom ay banag ay ibagabagan Lucas sin libro ay nay et din kararag, din Ispirito Santo, din ragsak, din badang di babbabai sin oblan Jesus, din pamakawanan Diyos sin basbasol, ya din pansaganaan di mamati sin kasin omalian Apo Jesus.

### **Din Linaona**

Din panlogian di solat 1:1-4

Din naianakan da Juan ay Mamonbonyag ya si Jesus 1:5-2:20

Sin kaan-anak Jesus 2:21-52

Din nankaskasabaan Juan ay Mamonbonyag 3:1-20

Din nabonyagan Jesus, din listaan di ap-apo na, ya din namadasan Satanas ay nanolisog en sisya 3:21-4:13

Din nan-it-itdoan Jesus ed Galilea 4:14-9:50

Din nan-it-itdoan Jesus manlogi ed Galilea enggana ed Jerusalem 9:51-19:27

Din naodi ay dominggon Jesus ya din nateyana 19:28-23:56

Din kasin natagoan Jesus, din nanpail-ilaana, ya din naikayangana ed langit 24:1-53

### *Din Panlogian di Solat*

<sup>1</sup> Patgek ay Apo Teofilus,

Ad-ado iman di namadpadas ay nangisolat si maipanggep sin am-in ay natongpal isnan kad-an tako. <sup>2</sup> Din insolat da et din dinaddad-at met laeng di nangil-ila manlogi sin damo ya nangikaskasaba si maipanggep en Apo Jesus. <sup>3</sup> Et sak-en abe, dadlonak sinolsolot am-in da sana manipod sin nanlogian da, isonga kanak en mayat ngin mo olnosek din dinaddad-at da ay sana ta say kosto di kaitoopan da ta asiak isolat en sik-a.

<sup>4</sup> Tan laydek ay ammoem ay dadlon tet-etet-ewa din am-in ay nait-itdo en sik-a.

### *Din Naipadtoan Di Kaianakan Juan Ay Mamonbonyag*

<sup>5</sup> Sin nanturturayan Ari Herod ed Judea, wada di padi ay manngadan si Zekarias ay naitatapi sin bonggoy di papadi ay polin Abias. Din asawa na ay si Elizabet, naipoli abe

en Aaron ay padi ed nabaon. <sup>6</sup> Nalinteg da ay sin-asawa sin pangilaan Diyos, et dadlon dan tinongtongpal din am-in ay bilina ya linteg na. <sup>7</sup> Ngem iwed pay et di anak da, tan basig si Elizabet. Esa pay, enggay nakay ya nabakes da.

<sup>8</sup> Sin esay agew, dinomteng di biyang da Zekarias ay mansilbi en Diyos sin Timplo. <sup>9</sup> Din ogalin di papadi et panbinnotan da mo sinoy oblan di esa ya esa, et si Zekarias di nabonot ay senggip sin Timplo ay mangipoo sin insinso ay mansengsengew. <sup>10</sup> Domateng pay din kosto ay oras, wadas sisya sin Timplo ay mamoppoo downan pay mankarkarag din nasinop ay ipogaw sin bel-ayan. <sup>11</sup> Asi et manpaila di anghel di Diyos en sisya ay pinmipika sin makannawan di altar ay pangipooan das insinso. <sup>12</sup> Nakibtot si Zekarias sin nangilaana yan inmegyaegyat. <sup>13</sup> Ngem kanan et din anghel en sisya, “Adi ka emegyat ay Zekarias, tan dinngen Diyos din kindaw mo. Isonga si asawam ay Elizabet et mawad-an to et man-anak si lalaki et asi ka ngadanan si Juan. <sup>14</sup> Peteg di ragsak mo ya siya abe sin ad-ado ay ipogaw mo maianak sisya, <sup>15</sup> tan napateg sisya sin pangilan Diyos. Masapol ay adi man-in-inom si danom di obas ono odom ay bemeteng,\* yan manipod pay laeng sin daan maianak, napno sin panakabalin di Ispirito Santo. <sup>16</sup> Awni man et ad-ado di pantaoliena ay iib-am ay Israelita en Diyos ay Apo da. <sup>17</sup> Mangon-ona mo din Apo, yan din panakabalina et kaman met laeng din panakabalin ay indawat di Ispirito Santo en Elias ay mamadto ed nabaon. Panoolnosena din man-iibaw ay sin-ama, ya pantaoliena abe din adi manongtongpal en Diyos ta din nemnem da et mais-o sin nemnem di nalinteg ay ipogaw.† Siya di din iyat na ta say masasagana din ipogaw sin omalian di Apo.”

<sup>18</sup> Pag kanan Zekarias sin anghel, “Aw, ngem intoy pangammoak ay matongpal dana? Tan nay ay enggay nakayak ya nabakes abe si asawak.”

<sup>19</sup> Kanan aben din anghel, “Sak-en si Gabriel ay mansilsilbi en Diyos, et sisya di nangibaa en sak-en ta enak ibaga en sik-a din nay siked ay damag. <sup>20</sup> Ngem gapo ta adim patien din inbagak, awni man et maomel ka enggana ay domateng din agew ay temet-ewaana, tan awni et matongpal din inbagak mo domateng din kosto ay timpo ay inkeddeng Diyos.”

<sup>21</sup> Masmadaaw din kaipoipogaw ay manman-ed en Zekarias, tan mabamabayag sin oneg di Timplo. <sup>22</sup> Idi bomala pay sisya, sinsinyasanas daida tan adi makakali, et say nangammoan da ay waday inpailan Diyos en sisya ed oneg.

<sup>23</sup> Makdeng pay ay nansilbi da sin Timplo, sinmaas Zekarias. <sup>24</sup> Baken nabayag et nawad-an si asawa na ay si Elizabet, et nanpopokok sin beey da si limay bowan. <sup>25</sup> Kanas nemnem na en, “Kambaw ed wani et sineg-angan Apo Diyos sak-en, tan kinaana din kaibabbainak sin ipogaw.”

### *Din Naipadtoan Di Kaianakan Jesus*

<sup>26</sup> Sin maikan-em ay bowan din liton Elizabet, inbaan Diyos din anghel na ay si Gabriel ed Nazaret ay esay ili sin probinsiya ay Galilea. <sup>27</sup> Tan waday ibaga na sin esay balasang ay magay nangiwiwit en sisya ay naitotolag ay makiasawa en Jose ay polin din si Ari David. Din ngadan di balasang ay sana et si Maria. <sup>28</sup> Inmey din anghel en sisya yan kanana, “Komosta ka. Kadkadwaen dakan Apo Diyos ya peteg di seg-ang nan sik-a.”

<sup>29</sup> Palalo ay nariribokan si Maria sin inbagan di anghel et anaanapena mo sino ngin di laydena ay kalien. <sup>30</sup> Siya di et kanan din anghel en, “Adi ka emegyat ay Maria, tan sineg-angan dakan Diyos. <sup>31</sup> Awni et mawad-an ka, et man-anak kas lalaki et ngadanam si Jesus. <sup>32</sup> Napateg tos sisya ya makwani en Anak di Kangatoan ay Diyos. Pan-arien aben Diyos sisya ay kaman din apo na ay si Ari David ed nabaon, <sup>33</sup> et sisya di mangituray sin polin Jacob ay eng-enggana, tan iwed polos patinggan di panturayana.”‡

\* 1:15 Bilbilang 6:3. † 1:17 Malakias 4:5-6. ‡ 1:33 2 Samuel 7:12,13,16; Isaias 9:7.

<sup>34</sup> Asi et kanan Maria sin anghel, “Aw, ngem intoy iyat na ngin, tan iwed met di nangiwgiwit en sak-en?”

<sup>35</sup> Sinombat din anghel yan kanana, “Awni et emey din Ispirito Santo en sik-a ya malinongan ka sin panakabalina. Et siya nay gapo ay din nasantoan ay ianak mo et makwani en Anak en Diyos. <sup>36</sup> Nemnemem din ton-od mo ay si Elizabet. Olay mo kanan da en basig ya nabakes pay sisya, nawad-an pay dedan, et enem ay bowan din litona ed wani. <sup>37</sup> Tan mo maipanggep en Diyos, maga di adi na kabaelan ay amagen.”

<sup>38</sup> Kanan pay Maria, “Naeyak kayman ay mansilbi en Apo Diyos. Sapay koma ta maitongpal en sak-en din inbagam.” Et pag komaan din anghel.

### *Din Nanpasyalan Maria En Elizabet*

<sup>39</sup> Idi siya di mansaganas Maria et dalasena ay emey sin beey da Zekarias ay wada sin esay ili sin kadondontogan ed Judea. <sup>40</sup> Somawang pay sisi, sinenggep sin beey da et komostaenas Elizabet. <sup>41</sup> Idi dinngen Elizabet din kalin Maria, mankeykey din litona. Pag mapno sin panakabalin di Ispirito Santo <sup>42</sup> yan ipigsa na ay mangwani, “Sik-a met kayman di kagagasatan sin am-in ay babai, yan nagasat abe din moyang ay ianak mo! <sup>43</sup> Ay sino aya di kaipogaw ko ta in mali ka ay pomasyal, sik-a pay san inan di Apok? <sup>44</sup> Tan idi kosto ay dinngek din kalim, nankeykey din liton ko si ragsak na. <sup>45</sup> Peteg ay nagasat ka, kanak, tan pinatim ay temet-ewa din inbagan Apo Diyos en sik-a.”

### *Din Nangidayawan Maria En Diyos*

<sup>46</sup> Pag kanan Maria,

“Daydayawek si Apo Diyos sin am-in ay nemnem ko, <sup>47</sup> et palalo di ragsak ko begew en sisya ay mangisalakan en sak-en, <sup>48</sup> tan ninemnem nas sak-en ay nababa ay baa na. Isonga manlogi ed wani, kanan am-in di ipogaw en nagasatak <sup>49</sup> manbegew sin nakaskasdaaw ay inamag din manakabalin ya nasantoan ay Diyos. <sup>50</sup> Masmaseg-ang sin am-in ay mangipateg en sisya ay manlogi sin damo ay ipogaw enggana sin am-in ay inmon-onod. <sup>51</sup> Ipappaila na din panakabalina, tan bokbokabokena di ipogaw ay mangipapangato sin nemnem da ya din am-in ay plano da. <sup>52</sup> Ipababa na abe din nankangangato ay manturay yan ipangato na abe din nababa ay ipogaw. <sup>53</sup> Idawtana pay din kaseseg-ang si siged enggana ay mapnek da, ngem din babaknang pay et pakaanenas daida ay nakoskosan da. <sup>54</sup> Tinongpal na din inkari na sin ap-apo tako ya binadbadangana abes datako ay Israelita ay mansilbi en sisya. <sup>55</sup> Aw, ninemnem na ay sineg-angan din si Abraham, siya abe en datako ya am-in ay poli na ay eng-enggana.”§

Siya say kanan Maria ay mangidayaw en Diyos.

<sup>56</sup> Nakitete en da Elizabet si tolo ay bowan, asi somaa.

### *Din Naianakan Juan Ay Mamonbonyag*

<sup>57</sup> Idi dinomteng din pan-anakan Elizabet, lalaki din in-anak na. <sup>58</sup> Idi dinngen din katokmang ya toton-od da din nakaskasdaaw ay seg-ang Diyos en sisya, nakiragragsak da abe.

<sup>59</sup> Sin maikawao ay agew din moyang, nasinop din katokmang ya toton-od da Zekarias ta kogiten ya ngadanan da, tan say ogalin di Judio.\* Inpangadan da koma din ngadan ama na ay Zekarias, <sup>60</sup> ngem kanan et ina na en, “Baken sa! Din ngadana et si Juan!”

<sup>61</sup> “Ay tan? Iwed polos di ton-od yos manngadan issa!” kanan da. <sup>62</sup> Asi da et sinyasan si ama na ay mamoot mo sinoy laydena ay ingadan sin moyang. <sup>63</sup> Nanpaa si Zekarias si pansolatana yan di insolat na yan, “Di ngadana, si Juan.” Et peteg ay nasdaaw da am-in ay wadas di. <sup>64</sup> Pag et nakaan din omel Zekarias yan komali ay mandayaw en Diyos.

§ 1:55 46-55 - 1 Samuel 2:1-10. \* 1:59 Levitico 12:3.

<sup>65</sup> Peteg ay nasdaaw din am-in ay kailian da, et mandinamag na ay naiyat sin am-in ay inil-ili sin kadondontogan ed Judea. <sup>66</sup> Am-in din nannange, nemnenemnen da yan kanan da, “Ay sino ngata di panbalinan nan moyang ay nay?” Tan maila dedan ay wada en sisya din panakabalin Diyos.

### *Din Inpadton Zekarias*

<sup>67</sup> Idi siya di, napno si ama na ay Zekarias sin panakabalin di Ispirito Santo yan kanana ay nangipadto:

<sup>68</sup> “Dayawen takos Diyos ay Apon di Israelita, tan inmali ay mangipawaya en datako ay ipogaw na. <sup>69</sup> Tan inbaa na di manakabalin ay mangisalakan en datako ay say polin di nansilbi en sisya ay si Ari David. <sup>70</sup> Siya met laeng din inpaipadto na sin nasantoan ay mamadto ed nabayag <sup>71</sup> ay mangwani en isalakanas datako sin kaibaw tako ya din am-in ay mangililiget en datako. <sup>72</sup> Kanana abe en tongpalena din inbaga na sin ap-apo tako maipanggep sin seg-ang na et adi na linglinglingan din nabanol ay inkari na en daida. <sup>73</sup> Inkari na abe en Abraham ay apo tako <sup>74</sup> ay isalakanas datako sin kaibaw tako ta say adi tako emegyat ay mansilbi en sisya <sup>75</sup> ya ta nasantoan ya nalinteg tako sin pangilaana enggana sin kaposposan di leng-ag tako.

<sup>76</sup> Sik-a pay abe ay anak ko, sik-a din makwani en mamadton Diyos ay Kangatoan, tan mangon-ona ka mo din Apo tako ta isaganam din danena.† <sup>77</sup> Ibagam sin ipogaw na ay mabalin ay maisalakan da mo mapakawan di basbasol da. <sup>78</sup> Tan din Diyos tako et masemaseg-ang ya naanos. Isonga waday ibaa na ay mapod langit ay mangisalakan en datako ay maiarig sin bomalaan di agew mo agsapa. <sup>79</sup> Tan mo omalis sisya, silawana di ipogaw ay mantetee sin mabolinget ay emegyat ay matey ya itdo na en datako din pandanan tako ta say natalna di nemnem tako.”‡

Say kanan Zekarias ay nangipadto.

<sup>80</sup> Mo din anak na pay, dinmakedake ya linmalaing dowan pay pinmigma din pammati na. En nantetee sin lugar ay magay omili enggana ay dinomteng din panpailaana ay man-itdo sin Israelita.

## 2

### *Din Naianakan Jesus*

*(Mat. 1:18-25)*

<sup>1</sup> Sin siya di ay timpo, inbilin Emperador Augustus ed Roma ay en manpalista am-in di ipogaw sin lak-am na. <sup>2</sup> Say damo na ay sinsos et naamag sin kagobernador Kirinio ed Syria. <sup>3</sup> Isonga esa ya esa yan emey sin ilin di apo na ay say ena panpalistaan.

<sup>4</sup> Siya aben Jose, inmey ay napo ed Nazaret ay ilin di Galilea ta en manpalista ed Betlehem ay ilin di Judea, tan say ilin Ari David ay apo na ed nabayag. <sup>5</sup> Nakiey abes Maria ay en manpalista, tan naitolag ay man-asawa da. Enggay nayadi din liton Maria, <sup>6</sup> et idi wada da ed Betlehem, timpon din moyang ay bomala. <sup>7</sup> Gapo ta magay pantean da sin pandagdag-osan di ipogaw, inmey da sin kolongan di animal. Et isdi di nangianakana sin besag na ay lalaki. Idi binmalas sisya, binotibotana, asi na iolig sin pangpanganan di animal.

### *Din Nanpailaan Di Aanghel Sin Mamanbantay Si Karnero*

<sup>8</sup> Sin siya di ay labi, wada da di ipogaw sin pastolan ay mamanbantay sin karnero da. <sup>9</sup> Pag et manpaila di esay anghel Apo Diyos en daida et nasilawan ya nasili da sin koniniing di Diyos, et palalo di egyat da. <sup>10</sup> Asi et kanan din anghel en daida, “Adi kayo emeg-egyat! Tan din ipadamag ko en dakayo et say panragsakan di am-in ay ipogaw. <sup>11</sup> Tan ed wani ay labi, naianak sin ilin David din mangisalakan en dakayo ay ipogaw,

† 1:76 Malakias 3:1. ‡ 1:79 Isaias 9:2.

din Messias\* ay Apo tako. <sup>12</sup> Siya na di pangammoan yo ay tet-ewa. Awni et datngan yo san moyang ay nabobotibotan ya naipababaktad sin pangpanganan di animal.”

<sup>13</sup> Sin kosto ay nangwanianas di, kabala et di ad-ado ay ib-a na ay aanghel ay napod daya ay manaydayaw en Diyos ay kankanan da,

<sup>14</sup> “Madaydayaw si Diyos ed langit. Tomalna abe di ipogaw sin daga ay panlaylaydana.”

<sup>15</sup> Idi nantaoli din aanghel ed langit, kanan din mamananbantay si karnero da, “En tako ed Betlehem ta en tako ilaen din napasamak sisi ay inpaammon Apo Diyos en datako.”

<sup>16</sup> Pag dan dalasen ay emey, et dinatngan das da Maria en Jose ya din moyang ay naipababaktad sin pangpanganan di animal. <sup>17</sup> Idi inila da din moyang, dinad-at da din inbagan di anghel maipanggep en sisya, <sup>18</sup> et nasdaaw da am-in din nanngge.

<sup>19</sup> Si Maria pay, inigto na am-in dana ay naamag sin nemnem na et nemnenemnemena.

<sup>20</sup> Mo din mamananbantay pay sin karnero, nantaoli da ay mankankanta ya manaydayaw en Diyos begew sin inila da ya dinngge da, tan tet-ewa am-in din inbagan di anghel en daida.

### *Din Nangadanan Jesus*

<sup>21</sup> Idi maikawao ay agew din moyang, inpakogit da ya nginadanan das Jesus ay say ngadan ay inbagan met laeng din anghel en daida sin daan pay laeng mawad-an si Maria.

### *Din Nangidatonan Dan Jesus En Diyos Sin Timplo*

<sup>22-24</sup> Idi dinmateng din agew ay panongpalan da Jose en Maria sin inbilin di linteg Moses† maipanggep sin kaan-anak na, inmey da ed Jerusalem ta en da idaton en Diyos din inbagan di linteg ay sana ay doway pagaw ono doway anak di kalapati. Intakin da abe din moyang ta say idaton das sisya en Apo Diyos. Tan din naisolat sin sana ay linteg Apo Diyos, “Masapol ay maidaton en Diyos din am-in ay besag ay lalaki.”‡

<sup>25</sup> Wada et di esay nakay ed Jerusalem ay manngadan si Simeon ay manman-ed sin kaisalakanan di iib-a na ay Israelita. Nalinteg ya relihioso ay ipogaw, yan wada abe din Ispirito Santo en sisya. <sup>26</sup> Inpaammon din Ispirito Santo en sisya ay adi matmatey enggana ay ilaena din Messias ay inkarin Diyos ay omali. <sup>27</sup> Idi siya di, dinmateng da aman Jesus ed Jerusalem et inisgep das sisya sin Timplo ta amagen da din inbilin di linteg maipanggep en sisya. Wada abes di si Simeon ay inpangon di Ispirito Santo.

<sup>28</sup> Inaklop na din moyang ya dinaydayaw nas Diyos ay mangwani,

<sup>29</sup> “Apo, olay ipalobos mo din kateyak ay bag-en mo, tan natalna di nemnem ko. Tan nay ay tinongpal mo din inkarim en sak-en. <sup>30-31</sup> Inilak baw kayman din insaganam ay pangiilaan di am-in ay ipogaw ay din inbaam ay mangisalakan en daida.

<sup>32</sup> Maiarig sisya sin silaw ay mangipaila sin Gentil sin danan ay emey en sik-a. Begew abe en sisya, madayaw din ipogaw mo ay Israelita.”§

<sup>33</sup> Nasdaaw da aman Jesus sin inbagan Simeon maipanggep en sisya. <sup>34-35</sup> Pag bindisyonan Simeon daida et kanana en Maria, “Din moyang ay nay et dinotokan Diyos ay sinyal, ngem ad-ado da ay manigaan sin sinyal ay sana. Isonga masakitan di nemnem mo ay kaman matbek sin matadem ay kampilan. Begew en sisya, ad-ado da ay taga-Israel di maisokba, ngem ad-ado abe di pomika ay maisalakan, et say kaammoan din tet-ewa ay wadas nemnem da.” <sup>36</sup> Wada abes di di mamadto ay enggay nabakes. Sisya si Anna ay anak en Fanuel ay polin Aser. Pito ay tawen di nakiasawaana,

<sup>37</sup> asi mabalo enggana ed wani ay waopolo ya opat di tawena. Inagew ya olay sin labi, wada sin Timplo ay manaydayaw en Diyos ya mankarkararag dowanen it-itpe din

\* **2:11** Din Messias sin kalin di Judio et siya met laeng din Cristo sin pangikalian di Griego. Din olog na et din dinotokan Diyos ay manturay. † **2:22-24** Levitico 12:6-8. ‡ **2:22-24** Exodo 13:2,12. § **2:32** Isaias 42:6; 49:6; 52:10.



dagaang na. <sup>38</sup> Sin doy ay oras ay wadas da Jesus sin Timplo, sinmawang sisya et nan-iyaman en Diyos. Manlogi sidi, daddad-atena din moyang sin am-in ay manman-ed sin pangipawayaan Diyos sin taga-Israel.

<sup>39</sup> Idi tinongpal da Jose en Maria din am-in ay inbilin di linteg Apo Diyos, sinmaa da sin ili da ed Nazaret ay ed Galilea. <sup>40</sup> Et say nadakdak-an din anak ay binmikas ya palalo di laing na, tan binadbadangan Diyos sisya.

### *Din Nataynanan Jesus Sin Timplo*

<sup>41-42</sup> Idi mantawen si Jesus si sinpo ya dowa, nakiey en da ama na ay emey ed Jerusalem, tan ogali da ay tinawen ay en da makifiesta sin fiesta ay makwani en Nalabas. <sup>43</sup> Makdeng pay din fiesta, somaa da am-in koma, ngem nataynan baw si Jesus ed Jerusalem yan adi ammon din napoana ay magas sisya, <sup>44</sup> tan kanan da en nakikoyog sin kabeweg da. Esay agew di nandad-anan da, asi da pag anapen sin totonod da ya am-ammo da, <sup>45</sup> ngem maga. Isonga nantaoli da ed Jerusalem ta say en da panganapan. <sup>46</sup> Sin katlo na, asi da datngan sisya sin Timplo ay nakitotokdo sin mamaestro ay mandengdenge ya mansalsalodsod en daida. <sup>47</sup> Nasdaaw da am-in ay manmannge en sisya, tan siged am-in din insongsongbat na. <sup>48</sup> Nasdaaw met laeng da ama na sin nangilaan da en sisyas di. Pag kanan ina na en, “Anak ko, apay nga inamag mo na en dakami? Palalo et ay madandanagan kami en amam ay nanganaanap en sik-a.”

<sup>49</sup> “Ay tan? Apay nga omanaanap kayo? Ammo yo koma ay masapol ay wadaak isnan beey en Amak,” kanan Jesus ay sinombat. <sup>50</sup> Ngem adi da naawatan din laydena ay kalien. <sup>51</sup> Pag maikoyog si Jesus en daida ay somaa ed Nazaret, et pinatpati na am-in din inbagbaga da en sisya. Mo si ina na, inigto na sin nemnem na am-in dana ay naamag. <sup>52</sup> Et si Jesus, nadakdakdake ya linmalaing. Masepsepsep abe ay laylayden Diyos ya din kaipoipogaw sisya.

## 3

### *Din Nankaskasabaan En Juan Ay Mamonbonyag (Mat. 3:1-12; Mar. 1:1-8; Jn. 1:19-28)*

<sup>1</sup> Idi maikasipno ya lima ay tawen di panturayan Emperador Tiberius, si Poncio Pilato di gobernador ed Judea ya si Herod ed Galilea. Din agin Herod ay si Felipe et say manturay abe sin sakop di Iturea ya ed Trakonitis, ya si Lisantias di manturay ed Abilene.

<sup>2</sup> Din kangatoan ay papadi et da Annas en Caifas.

Sin siya di ay timpo, waday inbagan Diyos en Juan ay anak en Zekarias ay mantetee sin lugar ay magay omili. <sup>3</sup> Pag emey si Juan ay en mangaskasaba sin kailiili sin nandinmang di ginawang ay Jordan. Inbagbaga na en, “Ibabawi yo din basbasol yo yan manpabonyag kayo ta say pakawanen Diyos din basbasol yo.” <sup>4</sup> Din sana ay inam-amag Juan et say natongpalan din insolat Isaias ay mamadto ay nangwani,

“Wada sin lugar ay magay omili di mangibogbogaw ay mangmangwani, ‘Isagana yo din danen di Apo ay omali ta say siged di danan ay pandanana. <sup>5</sup> Din iyat yo et singpaen yo din dontog ya bilig. Mo wada abe di nakillokillo et idoritso yo. Din lasonglasong pay et tab-okan yo <sup>6</sup> ta asi ilaen din am-in ay ipogaw din iyat Diyos ay mangisalakan en daida.’ ”\*

<sup>7</sup> Ad-ado di ipogaw ay inmey en Juan ay manpabonyag koma, ngem asi na et kanan, “Ay peteg kayo kayman ay kaman nasikap ay eweg! Sino ngata di nangibaga en dakayo ay mailsot yo din panosaan Diyos en dakayo mo mabonyagan kayo? <sup>8</sup> Adi met mabalin, tan masapol ay amagen yo din mangipaila ay tet-ewa ay inbabawi yo din basbasol yo. Adi yo aben kankanan en mailisi kayo tan si Abraham din apo yo, tan olay dana ay bato

\* 3:6 Isaias 40:3-5.



et mabalin met ay amagen Diyos si polin Abraham! <sup>9</sup> Din panosaan Diyos en dakayo et maiarig si wasay ay naibibiyad ay mamoyo sin kaiw, et am-in ay kaiw ay adi manlames si siged et mapoyo sin poona ta asi maitongo.”

<sup>10</sup> Pag pooten din kaipoipogaw en, “Ay intoy iyat mi ngarud?”

<sup>11</sup> Sinongbatan Juan yan kanana, “Din waday doway ay bado na, masapol ay idawat na din esa sin iwed di bado na, ya din waday kanena, ibingayana abe koma din magay kanena.”

<sup>12</sup> Wada da abe di mansingsingil si bowis ay en nanpabonyag. Kanan da en, “Apo maestro, intoy masapol ay iyat mi?”

<sup>13</sup> “Adi kayo mansingsingil si sobra mo adi din kostokosto,” kanana ay sinombat.

<sup>14</sup> Wada abey sosoldado ay en nanpoot en sisya ay nangwani, “Dakami pay abe yan intoy iyat mi?”

Kanan Juan en, “Adi kayo paeg-egyaten ono palawlawen di olay sino ay ipogaw ta say alaen yo din pilak na. Masapol pay ay mapnek kayo sin lagbo yo.”

<sup>15</sup> Begew sin inbagbagan Juan, masepsep ay namnamaen di kaipoipogaw din omalian di Messias, yan nemnenemnemen da, “Ay si naey ngata din Messias?” <sup>16</sup> Ngem kanan Juan en daida, “Wada di nangatngato mo sak-en ay omonod. Et begew din nay kinangato na, adiak maikari ay olay mangobad sin galot di sapatos na.† Danom anggoy di ibonyag ko en dakayo, ngem mo sisya pay et bonyaganas dakayo si Ispirito Santo ya apoy. <sup>17</sup> Maiarig sisyas ipogaw ay nananggen si liga-o ay paneg-ap na sin nabayo ay pagey. Din lames na et ena idolin sin beey na, ngem din teg-ap pay et ipoo na sin apoy ay adi kakkad-ep.”

<sup>18</sup> Siya na ya ad-ado pay di init-itdon Juan sin kaipoipogaw sin nangikaskasabaana sin siged ay damag en daida. <sup>19</sup> Niyamyamana abe si Gobernador Herod begew sin nangasawaana en Herodias ay asawan agi na ya din odom ay lawa ay inam-amag na.

<sup>20</sup> Ngem si Herod et nasepsep ay kinmedse et inpabalod na si Juan.

### *Din Nabonyagan Jesus*

*(Mat. 3:13-17; Mar. 1:9-11)*

<sup>21</sup> Idi daan pay laeng mabalod si Juan sin namonbonyagana sin kaipoipogaw et nanpabonyag abes Jesus. Makdeng di yan mankarkararag pay sisya, nabokatan ed langit <sup>22</sup> et binmaba din Ispirito Santo ay kaman kalapati et pinmatong en sisya. Pag wada di kali ay napod langit ay kanana en, “Sik-a di laydelaydek ay anak ko. Sik-a di kakapnekak.”

### *Din Listaan Di Ap-apon Jesus*

*(Mat. 1:1-17)*

<sup>23</sup> Sin nanlogian Jesus ay man-itdo, emey ay tolonpo di tawena. Et inbilang di ipogaw ay anak en Jose sisya. Si Jose et anak Heli <sup>24</sup> ay anak Mattat. Si Mattat et say anak Levi ay anak aben Melki. Si Melki yan anak Jannai ay anak aben Jose. <sup>25</sup> Si Jose et say anak Mattatias ay anak aben Amos. Si Amos di anak Nahum ay anak Esli ay anak aben Naggai. <sup>26</sup> Si Naggai et say anak aben Maat ay anak Mattatias ay anak Semein ay anak Josek ay anak aben Joda. <sup>27</sup> Si Joda et say anak Joanan ay anak Resa ay anak Zerubbabel ay anak Sealtiel ay anak aben Neri. <sup>28</sup> Si Neri abe et anak Melki ay anak Addi ay anak Cosam ay anak Elmadam ay anak aben Er. <sup>29</sup> Si Er yan anak Josue ay anak Eliezer ay anak Jorim ay anak Mattat ay anak aben Levi. <sup>30</sup> Si Levi et sisya di anak Simeon ay anak Juda ay anak Jose ay anak Jonam ay anak aben Eliakim. <sup>31</sup> Si Eliakim abe et anak Melea ay anak Menna ay anak Mattata ay anak Natan ay anak aben David. <sup>32</sup> Si David abe et say anak

† **3:16** Din esa ay obla ay naidawat sin kababaan ay baa ono bag-en ed idi et kaanena din sapatos di among na mo somaa et senggep sin beey. Isonga din layden Juan ay kalien et adi na ibilang din awak na ay maikari ay mansilbi ay olay owat bag-en en Jesus.

Jesse ay anak Obed ay anak Boaz ay anak Salmon ay anak aben Nason. <sup>33</sup> Si Nason yan anak Amminadab ay anak Admin ay anak Arni ay anak Hezron ay anak Perez ay anak aben Juda. <sup>34</sup> Et si Juda et say anak Jacob ay anak Isaac ay anak Abraham ay anak Tera ay anak aben Nahor. <sup>35</sup> Si Nahor et anak Serug ay anak Reu ay anak Peleg ay anak Eber ay anak Sela. <sup>36</sup> Si Sela abe et say anak Cainan ay anak Arfaxad ay anak Sem ay anak Noe ay anak Lamek. <sup>37</sup> Si Lamek abe et anak Metusela ay anak Enok ay anak Jared ay anak Mahalaleel ay anak Cainan. <sup>38</sup> Et si Cainan et say anak Enos ay anak Set ay anak Adan ay anak aben Diyos.

## 4

### *Din Namadasan Satanas Ay Nanolisog En Jesus*

*(Mat. 4:1-11; Mar. 1:12-13)*

<sup>1</sup> Idi napo si Jesus sin ginawang ay Jordan, napno si panakabalin di Ispirito Santo, et inpangon din Ispirito Santo sisya sin lugar ay magay omili. <sup>2</sup> Nantetees di si opatapolo ay agew yan dowan pinadapadas din Diablo ay manolisog en sisya. Adi polos nangnangan si Jesus sin doy da ay agew. Idi nakdeng di, nilikna na di dagaang na. <sup>3</sup> Asi et kanan din Diablo en sisya, “Mo tet-ewa ay Anak Diyos sik-a, bilinem din bato ay nay ta manbalin si makan.”

<sup>4</sup> Ngem sinongbatan Jesus ay nangwani, “Din naisolat ay kalin Diyos et kanana, ‘Baken makan et anggoy di katagoan di ipogaw.’ ”\*

<sup>5</sup> Idi nakdeng di, pag ipangon din Diablo sin nakayang ay lugar et sinkaattikan yan inpaila na en sisya din am-in ay nasyon isnan lobong. <sup>6</sup> Kanan din Diablo en, “Idawat ko en sik-a din kalebbengan ay mangituray sin am-in dadi ta say okam din kinabaknang da. Tan naidawat am-in en sak-en et mabalin ay idawat ko abe sin olay sino ay laydek. <sup>7</sup> Mandokmog ka ngarud ay mandayaw en sak-en, et okam am-in dadi.”

<sup>8</sup> Ngem sinombat si Jesus yan kanana, “Din naisolat ay kalin Diyos et kanana en, ‘Magay odom si dayawen yo ya pansilbian yo mo adi anggoy si Diyos ay Apo yo.’ ”†

<sup>9</sup> Pag ipangon din Diablo sisya ed Jerusalem et inpapika na sin kakayangan ay partin di Timplo. Asi na pag kanan, “Mo tet-ewa ay Anak Diyos sik-a, mantekgas ka kod, <sup>10</sup> tan kanan din naisolat ay kalin Diyos, ‘Bilinen Diyos din aangel na ta ayowanan daka. <sup>11</sup> Aklopen das sik-a ta say adi maidosnog sikim sin bato.’ ”‡

<sup>12</sup> “Aw kayman,” kanan Jesus ay sinombat, “ngem din naisolat ay kalin Diyos et kanana abe en, ‘Adi yo padpadasen si Diyos ay Apo yo.’ ”§

<sup>13</sup> Idi inamag Satanas din am-in ay kabaelana ay manolisog koma en Jesus, pag nan taynan enggana sin tapin di agew.

### *Din Nanlogian Jesus Ay Nan-itdo*

*(Mat. 4:12-17; Mar. 1:14-15)*

<sup>14</sup> Siya di et nantaoli si Jesus ed Galilea ay wada en sisya din panakabalin di Ispirito Santo. Et nandinamag din maipanggep en sisya sin kailili das di. <sup>15</sup> Nan-it-itdo sin kasinasinagoga yan daydayawen da am-in sisya.

### *Din Nanigaan Da En Jesus Ed Nazaret*

*(Mat. 13:53-58; Mar. 6:1-6)*

<sup>16</sup> Pag emey si Jesus ed Nazaret ay nadakdak-ana. Domateng pay din agew ay panibbayan di Judio ay Sabado, inmey sin sinagoga, tan say ogali na. Et pinmika ay manbasa sin kalin Diyos. <sup>17</sup> Indawat da en sisya din nalopilop ay libro ay insolat din mamadto ay si Isaias, pag nan bitlagen et datngena din naisolat ay nay,

\* 4:4 Deuteronomio 8:3. † 4:8 Deuteronomio 6:13. ‡ 4:11 Salmo 91:11-12. § 4:12 Deuteronomio 6:16.

18 “Wada en sak-en din Ispiriton Apo Diyos, tan pinili nas sak-en ay en mangikasaba sin siged ay damag sin nabibiteg. Inbaa nas sak-en ay en mangibaga sin balod ay mawayaan da ya mangagas sin nagodab ta makaila da ya mamadang sin maligligat. 19 Ya ta ipaammok abe sin kaipoipogaw ay dinmateng din timpo ay pangipailaan Apo Diyos sin seg-ang na.”\*

20 Idi nakdeng ay basaen Jesus di, linopilop na kasin din libro et intaoli na sin mansilsilbi, et pag tomokdo ay man-itdo downan pay inenengneng din am-in ay ipogaw sin sinagogas sisya. 21 Kanana en daida, “Din inpaisolat Diyos ay sana et natongpal ed wani sin kosto ay nanngaan yo.”

22 Dinaydayaw am-in din ipogaw sisya yan nasdaaw da sin makaay-ayo ay inbaga na. Ngem downan da et kanan, “Si naey met din anak Jose, ay baken siya?”

23 Asi na et kanan en daida, “Ammok met ay ibaga yo en sak-en din pangarig ay nay: ‘Doktor, agasam abe din awak mo.’ Layden yo ay kanan, ‘Amagem abe isnan ilim din dinngge mi ay inam-amag mo ed Capernaum.’”

24 Pag nan itoloy ay mangwani, “Tet-ewa din ibagak en dakayo ay maga di mamadto ay bigbigen di kailiana. 25 Nemnemen yo din naamag sin timpon Elias. Adi polos nan-od-odan si tolo ya kagodwa ay tawen, et palalo di betil sin intiro ay ili. Ad-ado di nalasang isnan ed Israel, 26 ngem adi met inbaan Diyos si Elias ay mamadang sin olay esa en daida, mo adi et inbaa na ay mamadang sin esa ay balo ay taga-Zarefat sin sakop di Sidon.† 27 Siya abe sin timpon din mamadto ay si Eliseo. Ad-ado abe di ipogaw isnan ed Israel ay kaeegyat di sakit di kodil da, ngem iwed di olay esa en daida ay inagasana, tan ang-goy Naaman ay taga-Syria si inagasana.”‡

28 Palalo di bonget am-in din ipogaw sin sinagoga sin nanngaan das di. 29 Pag dan pomanika et igalalad das Jesus ta pakaanen da sin ili da. Ginoyod da ay in-ey sin toktok di dontog ay kad-an di ili da ta tekdagen da koma sin deppas. 30 Ngem nandan si Jesus sin nan-gawaan da et nadipos.

### *Din Nangipakaan Jesus Si Anito*

*(Mar. 1:21-28)*

31 Pag bomallalong si Jesus ed Capernaum ay esay ili ed Galilea. Sin Sabado ay pan-ibbayan da et inmey sin sinagoga ay en man-itdo. 32 Et nasdaaw da sin inyat na ay nan-itdo, tan din kali na et kaman kalin di waday turay na.

33 Wadas di di lalaki ay kinapet di anito. Nankilalad ay nangibogaw, 34 “Inayan! Jesus ay taga-Nazaret, apay nga disdistolboem dakami? Ay in mali ka aya ta dosaem dakami? Am-ammok dedan sik-a. Sik-a din nasantoan ay Anak Diyos.”

35 Pag bilinen Jesus din anito ay nangwani, “Igiginek mo! Taynam sisya.” Asi et pan-idogos din anito din lalaki ay sana sin sangoanan di kaipoipogaw et pag nan taynan ay adi na sinakitan.

36 Natekeng din matan di wadas di yan nan-asibaga da en, “Wey! Anna pay dis inbaga na! Olay anito yan wada iman di turay na ya panakabalina ay mamilin en daida yan komaan da.” 37 Siya di, nandinamag di maipanggep en Jesus sin amin ay soli isdi.

### *Din Nangagasan Jesus Sin Ad-ado Ay Mansakit*

*(Mat. 8:14-17; Mar. 1:29-34)*

38 Bomala pay si Jesus sin sana ay sinagoga, inmey sin beey da Simon. Kambaw et din katogangan Simon ay babai et palalo ay manpodpodot, isonga inbaga da en Jesus ta agasanas sisya. 39 Sinmag-en si Jesus sin binmabaktadana et inbilina ay makaan din podot na. Nakaan ay dagos yan kabangon et doy ay pakanenas daida.

40 Madipdipos pay din agew, in-ey din omili en sisya din am-in ay mansaksakit si olay sino ay kalasin di sakit. Saes-aen Jesus ay mangapay en daida et nailatonan da am-in.

\* 4:19 Isaias 61:1-2. † 4:26 1 Aari 17:1,7-16. ‡ 4:27 2 Aari 5:1-14.

<sup>41</sup> Pinakaana abe di aanito sin ad-ado ay kinapet da, et sin kinmaan da, inbogbogaw da en, “Sik-a din Anak Diyos!” Dowan et yamyaman Jesus ay mangipaginek en daida, tan ammo da dedan ay sisya din Messias.

*Din Nan-it-itdoan Jesus Sin Kasinasinagoga*  
(Mar. 1:35-39)

<sup>42</sup> Idi mapat-a, tinaynan Jesus din ili ay doy et inmey sin naidodolin ay lugar. Isonga din ipogaw, en da an-anapen sisya. Idi dinatngan da, inpakodan da ta adi na taynan daida. <sup>43</sup> Ngem kanana, “Masapol ay enak ikaskasaba sin odom ay ili abe din siged ay damag ay maipanggep sin panturayan Diyos, tan say gapo si nangibaaana en sak-en.”

<sup>44</sup> En nanlikiked ngarud sin inil-ili ed Judea ay mangaskasaba sin kasinasinagoga.

## 5

*Din Nangayagan Jesus Sin Damo Ay Papasolot Na*  
(Mat. 4:18-22; Mar. 1:16-20)

<sup>1</sup> Sin namingsan, wadas Jesus sin benget di annawa ay lebeng ay Gennesaret ay man-it-itdo sin kalin Diyos, et inalibongbongan din kaipoipogaw tan layden da ay dengngen.

<sup>2</sup> Inilan pay Jesus di doway ay bangka sin benget di lebeng ay tinaynan di manabtabokol ay en nangowas sin tabokol da. <sup>3</sup> Isonga nanlogan si Jesus sin esa ay okan Simon yan kanana en sisya en iad-addawi da si at-atik sin benget. Pag tomokdo ay man-itdo et initdoana din kaipoipogaw.

<sup>4</sup> Idi nakdeng ay man-itdo, kanana en Simon, “Iay-ayed mo din bangkam sin kad-an di malosong ay danom ta asi yo oy-oyen din tabokol yo.”

<sup>5</sup> “Aw, Apo,” kanan Simon, “ngem tinpeg mi kayman din labi ay nanabtabokol yan maga met di ina mi. Ngem mo siya say ibagam, olay oy-oyen mi pay dedan nan tabokol mi.” <sup>6</sup> Siya di et inoy-oy da yan ad-ado tet-ewa di ina da enggana ay dandani ay mabisngit din tabokol. <sup>7</sup> Isonga sininyasan da din iib-a da sin esa ay bangka ta omali da ay badangan daida. Omali da pay yan pinno da din doway bangka si nigay et nganngani ay lomned da. <sup>8</sup> Idi inilan Simon Pedro\* din sana ay napasamak, nandokmog en Jesus yan kanana, “Apo, taynam kod sak-en, tan managbasolak kayman.” <sup>9</sup> Siya sa di inbaga na, tan nasdaaw da iman sin iib-a na sin kaad-adon di tinabokol da. <sup>10</sup> Et siya abe sin gagait Simon ay da Santiago en Juan ay an-ak Zebedeo.

Pag kanan Jesus en Simon, “Adi ka emeg-egyat, tan manlogi ed wani, adi ka manabtabokol si nigay mo adi et mangawis ka si ipogaw.” <sup>11</sup> Siya et di insang-at da din bangka, et tinaynan da am-in ta makiey da en Jesus ay pasolot na.

*Din Nangagasan Jesus Sin Mansakit Si Kaeegyat Ay Sakit Di Kodil*  
(Mat. 8:1-4; Mar. 1:40-45)

<sup>12</sup> Idi namingsan sin kad-an Jesus sin esay ili, sinmawang di lalaki ay mansakit si kaeegyat ay sakit di kodil. Idi inila nas Jesus, en nandokmog ay nanyakog-ong sin sangoanana et manpakpakaasi ay nangwani, “Apo, ammok ay kabaalam ay mangaan sin sakit ko mo laydem.”

<sup>13</sup> Inoyad Jesus din takkay na ta ikapay na sin lalaki ay sana. Pag nan kanan, “Laydek, madalosan ka.” Et nakaan ay dagos din sakit na.

<sup>14</sup> Asi ibilin Jesus en sisya, “Adi ka idaddad-at na si olay sino ay ipogaw mo adi et emey ka ay en manpaila sin padi ta ilaena ay nakaan sakit mo. Asi ka idawat en sisya din inibilin Moses ay idaton yo en Diyos ta say pangammoan din kaipoipogaw ay tet-ewa ay sinmigid ka.”† <sup>15</sup> Ngem masepsep pay dedan ay mandinamag din maipanggep en Jesus, isonga ad-aad-ado di in-inmey ay manmannge sin kankanana ya ta kaanena din sakit

\* 5:8 Si Simon et bindayan Jesus si Pedro, isonga kanan da en Simon Pedro. † 5:14 Levitico 14:1-8.

da. <sup>16</sup> Ngem mo si Jesus et namin ado ay inmey man-es-esa sin naidodolin ay luglugar ta say en mankararag.

*Din Nangagasan Jesus Sin Paralitiko*  
(Mat. 9:1-8; Mar. 2:1-12)

<sup>17</sup> Idi namingsan, wadas Jesus sin esay beey ay man-it-itdo, et wada abe di nakitotokdo ay Fafariseo ya mamaestron di linteg Diyos ay napo sin kailili ed Galilea ya ed Judea ya ed Jerusalem abe. Et wada en Jesus din panakabalin Apo Diyos ay mangagas sin way sakit na. <sup>18</sup> Idi siya di, wada et di sinmawang ay nangaatayang sin dayon ay binmabaktadan di paralitiko. Padasen da ay mangisgep sin beey ta ipayag da komas sisya sin sangoanan Jesus, <sup>19</sup> ngem iwed polos mabalin da begew sin naposek ay ipogaw. Isonga insakyab da sin atep et tinekla da din odom ay atep. Asi da pay oy-oyen din binmabaktadan di paralitiko enggana ay maipayag sin nan-gawaan di ipogaw sin kosto ay sinasagang Jesus. <sup>20</sup> Idi inilan Jesus din talek da en sisya, kanana sin lalaki ay doy, “Napakawan din basbasol mo ay ib-a.”

<sup>21</sup> Asi et da doy ay Fariseo ya maestron di linteg, kanan da sin nemnem da, “Apay nga say inbaga na di? Is-o nan awak na en Diyos. Tan sino aya di akin lebbeng ay mamakawan si basol mo adi si Diyos et anggoy?”

<sup>22</sup> Ngem ammon pay dedan Jesus ay say wada sin nemnem da et kanana, “Apay nga say nemnemnemen yo sa? <sup>23</sup> Nalaklaka kayman ay kanan en, ‘Mapakawan san basbasol mo’ mo din ‘Ibangon mo ta mandan ka.’ <sup>24</sup> Ngem mo siya sa, ibagak ngarud din naligat ta say paneknekak en dakayo ay sak-en ay Anak di Ipogaw et waday kalebbengak isnan labaw di daga ay mamakawan si basol.” Pag nan kanan sin paralitiko ay doy, “Din ibilin ko en sik-a et ibangon mo, bidkingem san dayon mo ta somaa ka.” <sup>25</sup> Pag kabangon din sana ay il-ilan da am-in, binidking na din dayon ay binmabaktadana yan pag somaa ay manaydayaw en Diyos. <sup>26</sup> Et am-in din wadas di et palalo ay nasdaaw da dowan da aben emegyat ya dayawen das Diyos ay mangmangwani, “Anna! Palalo ay nakaskasdaaw nan inila tako ed wani!”

*Din Nangayagan Jesus En Levi*  
(Mat. 9:9-13; Mar. 2:18-22)

<sup>27</sup> Nakdeng pay di et pag bomala si Jesus yan inila na di mansingsingil si bowis ay manngadan si Levi ay tinmotokdo sin opisina na. “Manbalin ka et si pasolot ko,”<sup>‡</sup> kanan Jesus. <sup>28</sup> Kapika si Levi yan tinaynana am-in ta makiey en Jesus.

<sup>29</sup> Pag da et emey sin beey da Levi, et inpaltianas Jesus si ad-ado. Ad-ado abey mansingsingil si bowis ya odom ay ipogaw ay naiokob en daida. <sup>30</sup> Asi et din odom ay Fafariseo ya din gagait da ay mamaestron di linteg, iniyew da din papasolot Jesus ay nangwani, “Apay nga makikan ya makiinom kayos mansingsingil si bowis ya odom ay managbasol ay ipogaw?”

<sup>31</sup> Ngem si Jesus di nanongbat et kanana ay nangiarig, “Baken din nasalon-at ay ipogaw di makasapol si mangagas mo adi din mansaksakit. <sup>32</sup> Adiak inmali ta enak ayagan din nalinteg ay ipogaw mo adi din nakabasol ta say ibabawi dan basbasol da.”

*Maipanggep Sin Kaitpean Di Dagaang*  
(Mat. 9:14-15; Mar. 2:18-20)

<sup>33</sup> Wada da di en nangibaga en Jesus, “Din papasolot Juan et namin ad-ado ay it-itpe day dagaang da dowan da pay mankararag ya siya abe sin papasolot di Fafariseo. Ngem din papasolot mo pay et adi da it-itpe di dagaang da. Apay?”

<sup>34</sup> Sinombat si Jesus ay nangiarig, “Mo waday mankasal, ay kanan yo aya en adi makikan din gagayyem di mangasawa ay inayagana? Mangan da met. <sup>35</sup> Ngem mo

<sup>‡</sup> 5:27 Din kanana sin Griego et: Omonod ka... Di laydena ay kalien et makiey en Jesus ay pasolot na.



domateng di timpo ay maipakaan en daida din mangasawa et siya di din pangitpean da sin dagaang da.”

*Maipanggep Sin Baro Ay Initdon Jesus*  
(Mat. 9:16-17; Mar. 2:21-22)

<sup>36</sup> Kanan aben Jesus ay nangiarig, “Iwed abe di ipogaw ay mamisngit sin baro ay bado ta asi na ilkeb sin baak ay bado. Tan mo say iyat na di, sayang dedan din baro ay bado yan adi maibagay abe din baro ay lopot sin baak ay mailkebana. <sup>37</sup> Iwed abe dedan di mangipeey si kabobbobod ay danom di obas sin nakpit ay sopot ay lalat, § tan mo maget, mabtakan din lalat et madadael din sopot down aben maiwasit din danom di obas. <sup>38</sup> Din kabobbobod ay danom di obas ngarud, siyat baro ay lalat di kaipay-ana. <sup>39</sup> Esa pay, din nairuam ay manginom si naket-eng ay danom di obas, sigaana ay tamtaman din daddaan, tan kanana en mammam-is din naket-eng ay nairuamana.”

## 6

*Maipanggep Sin Agew Ay Pan-ibbayan*  
(Mat. 12:1-8; Mar. 2:23-28)

<sup>1</sup> Sin namingsan ay Sabado ay pan-ibbayan di Judio, mandad-an da Jesus sin kapaypayewan ay nas-ekan si bakakew. Yan din papasolot na et manposposngi das lames na ta say polipoen da et kotimen da. <sup>2</sup> Asi et wada di Fafariseo ay nangila sin inyat da et kanan da en Jesus, “Apay nga lablabsingen yo din linteg tako ay Judio ay mangiparit si man-ani sin agew ay pan-ibbayan?”

<sup>3</sup> Sinongbatan Jesus ay nangwani, “Binasa yo met din inyat Ari David ya din gagait na sin dinmagaangan da. <sup>4</sup> Sinenggep sin beey en Diyos yan ina na din tinapay ay naidaton en Diyos ay iparit di linteg ay kanen di baken padi. Ngem kinana pay dedan et inbingayana abe din kakoyog na.”\* <sup>5</sup> Pag ipaanongos Jesus, “Sak-en ay Anak di Ipogaw di akin lebbeng sin mabalin ay maam-amag sin agew ay pan-ibbayan.”

*Din Lalaki Ay Nakingking Di Esay Takkay Na*  
(Mat. 12:9-14; Mar. 3:1-6)

<sup>6</sup> Idi esay Sabado kasin sinenggep si Jesus sin sinagoga ay man-itdo. Wada et sidi di lalaki ay nakingking di kannawan ay takkay na. <sup>7</sup> Wada abe di odom ay mamaestron di linteg ya Fafariseo ay mangisisin-eng en Jesus mo agasana din lalaki ay doy sin agew ay pan-ibbayan, tan an-anapen day ipabasol da en sisya ta way pangidaruman da. <sup>8</sup> Ngem ammon Jesus di wada sin nemnem da, et kanana sin sana ay nakingking di takkay na, “Ipikam ta omali ka sin sangoanan mi.” Pag pomika et emey. <sup>9</sup> Asi pag kanan Jesus en daida, “Wada kod di isalodsod ko en dakayo. Sinoy ipalobos di linteg tako ay amagen tako sin agew ay pan-ibbayan? Ay amagen din siged ono din lawa? Ay isalakan di ib-a ono peslen?” <sup>10</sup> Insisin-eng nas daida am-in, pag nan kanan sin nakingking di takkay na, “Oyadem san takkay mo.” Inoyad na et dadlon nailatonan. <sup>11</sup> Ngem asi et palalo di bonget da, et manngangalat da mo sino di mabalin ay iyat da en Jesus.

*Din Namilian Jesus Sin Sinpo Ya Dowa Ay Aapostol*  
(Mat. 10:1-4; Mar. 3:13-19)

<sup>12</sup> Nakdeng pay di et pag mantikid si Jesus sin dontog, et inlablabi na ay nankarkarag en Diyos. <sup>13</sup> Sin kabigatana, inayagana din papasolot na et nanpili si sinpo ya dowa ay nginadanana si aapostol. <sup>14</sup> Naey di ngadngadan din pinili na: si Simon (ay bindayana si Pedro) ya din agi na ay si Andrew, da Santiago en Juan, da Felipe en Bartolome, <sup>15</sup> da Mateo en Tomas, si Santiago ay anak Alfeus, si Simon (ay makwani

§ 5:37 Din pangipay-an di Judio si danom di obas et lalat di kalding. \* 6:4 1 Samuel 21:1-6; Levitico 24:9.



en Patriota tan insakit na din ili na), <sup>16</sup> si Judas ay anak Santiago, ya si Judas Iscariot ay nanglipot en Jesus.

*Din Nangagasan Jesus Sin Mansaksakit*

(Mat. 4:23-25)

<sup>17</sup> Nanballalong da Jesus enggana ay sinmawang da sin annawa ay dekkan ay nasinopan di ad-ado ay pasolot na ya ad-aad-ado abe ay ipogaw ay napo ed Judea ya ed Jerusalem ya din inil-ili sin benget di baybay ed Tiro ya ed Sidon. <sup>18</sup> Inmey das di ta dengngen da din kankanan Jesus ya ta kaanena din saksakit da. Inmey abe din pinalpaligat di anito et pinakaan Jesus din nangapet en daida. <sup>19</sup> Am-in din wadas di et inamag da din kabaelan da ay nangapay en sisya, tan wada di mapmapo en sisya ay panakabalin ay mangag-agas sin am-in da ay mansaksakit.

*Din Kanan Jesus En Nagasat Ya Kaseseg-ang*

(Mat. 5:1-12)

<sup>20</sup> Pag sagongen Jesus din papasolot na yan kanana, “Nagasat kayo ay nabibiteg, tan maitapi kayo sin panturayan Diyos.

<sup>21</sup> “Nagasat kayo ay mandagdagaang ed wani, tan mabsog kayo.

“Nagasat kayo ay man-og-oga ed wani, tan masiyek kayo.

<sup>22</sup> “Nagasat kayo mo kalkaliget di ipogaw dakayo ya ipowira das dakayo ya babbainen da abes dakayo ya palawaen da pay si dakayo begew sin pammati yo en sak-en ay Anak di Ipogaw. <sup>23</sup> Mo say iyat da en dakayo, manragsak kayo koma ya manlagto kayos ragsak yo, tan palalo ay dakdake di gon-gona ay naidodolin para en dakayo ed langit. Tan din iyat da en dakayo et siya met laeng din in-inyat di ap-apo da en daida ay mamadto.†

<sup>24</sup> “Ngem kaseseg-ang kayo ay babaknang, tan ed wani et anggoy di panganasan yo sin biyag yo.

<sup>25</sup> “Kaseseg-ang kayo abe ay nanabsog ed wani, tan awni et mandagaang kayo.

“Kaseseg-ang kayo abe ay masis-iyek ed wani, tan awni et manladingit ya man-anog-og kayo.

<sup>26</sup> “Kaseseg-ang kayo pay mo it-it-ek am-in di ipogaw dakayo, tan siya met laeng din in-inyat di ap-apo da sin makaetek ay mamadto.”

*Din Layad Tako Sin Kaibaw Tako*

(Mat. 5:38-48; 7:12a)

<sup>27</sup> Intoloy Jesus ay nangwani, “Din ibagak pay en dakayo ay manmannge et laylayden yo koma din kaibaw yo. Siged abe di iyat yo sin malmaliget en dakayo. <sup>28</sup> Din mamaos en dakayo et mankedaw kayo en Diyos ta bindisyonanas daida, ya din mamaligat en dakayo et ikararagan yos daida. <sup>29</sup> Mo waday manampik sin esay tamil mo, patampik mo abe din esa ya mo waday manga sin tak-ep di badom, olay bay-am ta alaena abe din badom. <sup>30</sup> Idawtam din am-in ay mankedaw en sik-a ya mo waday manga sin bonag mo, adim kankanan en itaoli na. <sup>31</sup> Amagen yo sin iib-a yo din layden yo ay amagen da en dakayo.

<sup>32</sup> “Mo anggoy din manglaylayad en dakayo si laylayden yo, ay magon-gonaan kayo aya? Olay din managbasol ay ipogaw et laylayden da dedan din manglaylayad en daida.

<sup>33</sup> Mo anggoy abe din mangamag si siged en dakayo din pangamagan yos siged, ay magon-gonaan kayo aya? Olay din managbasol ay ipogaw et say iyat da met laeng dedan. <sup>34</sup> Ya mo anggoy din ammo yo ay mangitattaolis boloden da di pabolbolodan yo, ay magon-gonaan kayo aya? Olay din managbasol et ibolodan da dedan ib-a da, tan namnamaen da ay itaolin din namolod met laeng din inbolod da. <sup>35</sup> Baken da sana koma di amagen yo mo adi laylayden yo koma abe din kaibaw yo ya siged abe di iyaat yo en daida. Man-ibolod kayo abe olay namnamaen yo ay adi da itaoli din boloden da. Tan mo

† 6:23 2 Cronicas 36:16.

siya nay iyat yo et dakdake di gon-gona yo et maibilang kayo ay anan-ak di Kangatoan ay Diyos. Tan mo si Diyos et masmaseg-ang sisya sin ipogaw ay lawa ya adi nangin ammo ay man-iyaman en sisya.”

*Din Adi Tako Panpabasbasolan Si Ib-a Tako*  
(Mat. 7:1-5)

<sup>36</sup> “Masapol ay managseg-ang kayo ay kaman din Ama yo ay managseg-ang. <sup>37</sup> Isonga adi yo panbalbalinen din awak yos mangokom ya mangikeddeng si ib-a yo ta adi aben okomen ya keddengan Diyos dakayo, mo adi pakawanen yo din ib-a yo ta pakawanen aben Diyos dakayo. <sup>38</sup> Idawtan yo din ib-a yo et idawtan aben Diyos dakayo. Tan din kaad-adon di idawdawat yo et say kaad-adon aben din idawat Diyos en dakayo. Asi et din iyat Diyos ay mangidawat et itamed ya iyagyag na ay mangisedsed, asi na kasin tapian ta lemeplepyas pay.”

<sup>39</sup> Dinad-at aben Jesus en daida din pangarig ay nay. “Ay mabalin aya ay ipangon di nagodab din ib-a na ay nagodab? Mo say iyat na, adi pay matekdag da ay dowo sin deppas. <sup>40</sup> Maga abe di man-ad-adal ay nangatngato mo din maestro na, ngem mo ikdeng na ay kosto din ad-adalena, pag komaman sin maestro na.

<sup>41</sup> “Apay nga delawem din kitkitoy ay mokat sin matan di ib-am, yan adim madlaw din dakdake ay mokat sin matam? <sup>42</sup> Apay nga ibagam sin ib-am, ‘Pangaasim kod ta ponasak san mokat mo,’ downan kan gogodaben din dakdake ay mokat mo? Sik-a ay agin sisiged, ponasam on-ona din dakdake ay mokat mo ta say makaila ka ay kosto, asi ka pay mabalin ay ponasan din mokat di ib-am.”

*Din Kaiw Ya Din Lames Na*  
(Mat. 7:16-20; 12:33-35)

<sup>43</sup> Kanan aben Jesus, “Din siged ay kaiw et adi manlames si lawa, ya adi aben manlames din lawa ay kaiw si siged. <sup>44</sup> Din kailasinan di am-in ay kaiw et din lames na, tan adi dedan pogasen di gayabas sin kawayan ono pogpogen di obas sin ewey. <sup>45</sup> Kaman datako abe ay ipogaw. Din siged ay ipogaw et siged di ipabela na, tan siged dedan din naiigto sin nemnem na. Ngem din lawa ay ipogaw et lawa abe din ipabela na, tan lawa abe dedan din naiigto sin nemnem na. Tan din ibagbagan di ipogaw, napo met laeng sin wada sin nemnem na.”

*Din Dowa Ay Nangisaad Si Beey*  
(Mat. 7:24-27)

<sup>46</sup> Intoloy Jesus ay nangwani, “Apay nga Apo di pangawag yo en sak-en downan kayon adi patpatien din ibagbagak? <sup>47</sup> Din omali en sak-en ay mannge ya mamati sin ibagbagak et iarig ko en dakayo di iso na. <sup>48</sup> Iso na din esa ay ipogaw ay nangisaad si beey na sin bato. Intikitik na ay kosto din fondasyona, asi na pay saaden din beey na. Omad-ado pay din danom sin ginawang et dinalapos na din beey ay sana, ngem laton ay adi naigiwed, tan makneg di amag na. <sup>49</sup> Ngem din ipogaw ay nandengdenge sin kankanak yan adi na patpatien et maiarig si ipogaw ay nangisaad sin beey na sin lota yan adi na intiktik din beey na si bato ay pangipatangana sin fondasyona. Isonga idi dinalapos din danom din beey na ay sana, natokang et dadlon nabakas.”

## 7

*Din Nangagasan Jesus Sin Baan Di Kapitan*  
(Mat. 8:5-13)

<sup>1</sup> Idi nakdeng ay initdon Jesus am-in dana sin kaipoipogaw, inmey ed Capernaum. <sup>2</sup> Wada di kapitan di soldado ay taga-Roma isdi ay wada di baa na ay laylaydena. Din baa na ay nay et mansaksakit yan dandani ay matey. <sup>3</sup> Idi dinngen din kapitan ay sana di maipanggep en Jesus, inbaa na di papangolon di Judio ta en da ayagan si Jesus ay en

mangagas sin baa na. <sup>4</sup> Inmey da en Jesus yan manpakpakaasi da ay nangwani, “Din ipogaw ay nay et maikari adi sin tolong mo, <sup>5</sup> tan laylaydena iman si datako ay Judio yan nanpasaad pay si sinagoga tako.” <sup>6</sup> Isonga nakiey si Jesus en daida.

Idi dandani ay somawang da sin beey di kapitan, inbaa na di gagayyem na ay en mangibaga en Jesus, “Apo, olay adi ka kano manboway ay somawang sin beey na tan kababain mo senggep kas di. <sup>7</sup> Adi aben maikari kano ay en manpaila en sik-a. Isonga omanay kano din kalim ay mangagas sin baa na. <sup>8</sup> Tan iso na kanos sisya ay wada di nangatngato ay mamibilin en sisya ya wada abey sosoldado na ay bilbilinena. Mo kanana sin esa en, ‘Emey ka,’ emey, ya mo kanana abe sin esa, ‘Omali ka,’ omali, ya mo ibaga na abe sin bag-ena en, ‘Amagem na,’ amagena.”

<sup>9</sup> Nasdaaw si Jesus sin nanngenas di. Sinagong na din kaipoipogaw ay omon-onod en sisya yan kanana, “Tet-ewa adi nan ibagak en dakayo ay magay dinatdatngak ay waday talek na ay kaman nina, olay en datako ay taga-Israel.” <sup>10</sup> Mantaoli pay din binaan di kapitan et dinatngan da ay nailatonan din baa na.

### *Din Nanagoan Jesus Sin Anak Di Nalasang*

<sup>11</sup> Baken nabayag et inmey si Jesus sin ili ay kanan da en Nain. Nakiey en sisya din papasolot na ya ad-ado ay ipogaw. <sup>12</sup> Idi inmasag-en da sin beddeng di ili, inabat da di ad-ado ay mabeb-eweg ay omili ay en mangiponpon si lalaki ay natey. Din natey ay sana et ang-anggoy nas anak di nalasang. <sup>13</sup> Olay si Jesus et palalo ay naseg-angan sin nangilaana sin nalasang ay sana, et kanana en sisya, “Laton sa. Adi ka man-ogoga.” <sup>14</sup> Pag et somag-en si Jesus et kinapay na din longen ay iin-gegan da ta somaldeng din nananggen. Somaldeng da pay et kanana sin natey, “Ibangon mo ay anak.” <sup>15</sup> Et pag kabangon tet-ewa din natey yan mankali. Pag kanan Jesus en ina na, “Naey din anak mo.” <sup>16</sup> Am-in ay wadas di et palalo di egyat da yan dowan da aben dayawen si Diyos. Kanan di odom, “Wey, manakabalin baw din nay mamadto ay inmali isnan kad-an tako!” Kanan aben di odom, “Inmali baw si Diyos ay mangisalakan sin ipogaw na!” <sup>17</sup> Et din nay inamag Jesus et nandinamag sin intiro ay Judea pati din nandinmang ay il-ili.

### *Din Inbagan Jesus Sin Inbaan Juan (Mat. 11:2-6)*

<sup>18</sup> Din papasolot Juan et in-inmey da sin balodan ay en nangibagbaga en sisya maipanggep sin am-in dana ay naam-amag. Isonga inayagana di dowan <sup>19</sup> et inbaa na ta en da pooten en Jesus mo sisya din inkarin Diyos ay omali ono waday natken si masmas-ed.

<sup>20</sup> Idi sinmawang da sin kad-an Jesus, kanan da en, “Inbaan Juan ay Mamonbonyag dakami ta pooten mi mo sik-a din inkarin Diyos ay omali ono waday natken si masmas-ed.”

<sup>21</sup> Sin kosto ay sinmawangan da, inag-aganan Jesus di ad-ado ay mansaksakit si nakalakalasi ay sakit ya pinakpakaana abe di ad-ado ay anito ya kinaana abe di godab di ad-ado ay ipogaw. <sup>22</sup> Isonga kanana en da sana ay inbaan Juan, “Mantaoli kayo en Juan ta en kayo ibaga en sisya din inila ya dinnge yo, ay din nagodab et makaila da, din napilay et makadan da, din waday kaeegyat ay sakit di kodil na et nailatonan da, din nateweng et makadnge da, din natey et natago da kasin, ya din siged ay damag et maikaskasaba sin nabibiteg.\* <sup>23</sup> Ibaga yo abe en sisya en nagasat din ipogaw ay magay dowadowna na maipanggep en sak-en.”

### *Din Inbagan Jesus Maipanggep En Juan (Mat. 11:7-19)*

\* 7:22 Isaias 35:5-6; 61:1.

<sup>24</sup> Idi kinmaan din inbaan Juan ay doy, nilogian Jesus ay mangibaga sin kaipoipogaw si maipanggep en Juan. Kanana, “Sin doy inmeyan yo sin kad-an Juan sin lugar ay magay man-ili, sino di layden yo ay en ilaen? Ay esa aya ay ipogaw ay kaman pa-o ay igiwgiwed di dagem? Baken samet. <sup>25</sup> Sino ngarud di en kayo inila? Ay esay ipogaw ay nanbabado si kagkagam-is ya nangina? Baken met abe dedan, tan din nanbabado si kaman nadi ya mayat di biyag na et sin beey di aari di pantetean da. <sup>26</sup> Ibaga yo ngarud mo sino di en kayo inila. Ay esay mamadto? Aw met a, ngem din katet-ewa na et nangatngato mo mamadto. <sup>27</sup> Tan si Juan di ibagbagan din naisolat ay kalin Diyos ay kanana en, ‘Waday ibaak ay mangon-ona mo sik-a ay mangisagana sin danem.’”<sup>†</sup>

<sup>28</sup> Pag itoloy Jesus ay nangwani, “Tet-ewa nan ibagak en dakayo ay magay ipogaw ay naianak isnan daga ay nangatngato mo si Juan, ngem olay siya di, din kababaan sin panturturayan Diyos et nangatngato pay mo sisya.”

<sup>29</sup> (Sin nanngaan das di, am-in di ipogaw ya olay din mansingsingil si bowis et binigbig da ay kosto din inyat Diyos, tan si Juan di namonyag en daida. <sup>30</sup> Ngem din Fafariseo pay ya din mamaestron di linteg et sinigaan da ay mangamag sin inplanon Diyos en daida, tan sinigaan da dedan ay nanpabonyag en Juan.)

<sup>31</sup> Kanan aben Jesus, “Sino ngata di pangiarigak sin ipogaw ed wani? Sinoy iso da? <sup>32</sup> Kaman dan anan-ak ay man-ay-ayam sin plaza ay adi polos mapmapnek. Kanan da sin iib-a da en, ‘Nanganggangs kami met, ngem sinigaan yo ay manayaw. Isonga nan-eyaey kami, ngem sinigaan yo pay dedan ay maitapi.’ <sup>33</sup> Daida di kaiarigan yo, tan in mali si Juan ay Mamonbonyag yan init-itpe nay dagaang na ya adi nan-in-inom si bemeteng yan kanan yo, ‘Nadimonyo di et abe.’ <sup>34</sup> Mo sak-en pay ay Anak di Ipogaw et nakikikanak ya nakiin-inomak en dakayo yan kanan yo en, ‘Ilan yo kadi nan ipogaw ay nay! Makaem ay mangan ya makabeteng dowana pay gayyemen din mansingsingil si bowis ya odom ay managbasol ay ipogaw!’ <sup>35</sup> Ngem olay mo siya di din kanan yo, maila pay dedan din kakoston di sirib Diyos sin biyag di mangawat.”

### *Din Namakawanan Jesus Sin Babai Ay Lawa Di Kaistoryaana*

<sup>36</sup> Sin esay agew, waday Fariseo ay manngadan si Simon ay nangayag en Jesus ta makikan sin beey na. Isonga inmey si Jesus et nakitokdo ay mangan. <sup>37</sup> Sin doy ay ili, wada di babai ay lawa di kaistoryaana. Idi dinnge na ay wadas Jesus ay makikikan sin beey di Fariseo, inmey sidi ay nangitatakin si botilya ay alabastro di amag na ay napay-an si bangbanglo. <sup>38</sup> Senggep pay sisya et inmey sin edegan di sikin Jesus<sup>‡</sup> ay man-og-oga enggana ay nabasa din siki na sin lowa na. Pag nan ponasan din siki na sin book na dowanang ongoan et pag nan soyatan sin bangbanglo ay sana. <sup>39</sup> Idi inilan din doy ay Fariseo ay nangayag en Jesus, kananas nemnem na, “Mo doy ya tet-ewa ay mamadtos sisya, ammo na koma mo sinoy kaipogaw din babai ay nay ay mangap-aplos en sisya.”

<sup>40</sup> Asi et kanan Jesus en sisya, “Ay Simon, waday ibagak en sik-a.”

“May, Apo maestro, ibagam adi,” kanana.

<sup>41</sup> Pag kanan Jesus, “Wada di doway ipogaw ay nan-otang si pilak sin esay man-ibolbolod si pilak. Din esa et limay gasot di otang na ya din esa pay et limapolo. <sup>42</sup> Ngem gapo ta adi makabayad din doway et pinogidas na iman din otang da. May koday, ibagam kod mo sino en daida di dakdake di layad na sin nangibolod en daida.”

<sup>43</sup> Sinombat si Simon et kanan, “Siguro, din ad-ado di otang na ay nakaan.”

“Aw, kosto san songbat mo,” kanan Jesus. <sup>44</sup> Pag nan sagongen din babai yan kanan en Simon, “Ilaem ngarud nan babai ay nay. Sinangailim kayman sak-en sin beey mo, ngem magay inbaan si en mangowas sin sikik, ngem si naey iman et inowasana din sikik sin lowa na yan pinonasana sin book na. <sup>45</sup> Adi ka aben inmongo ay inmabat ay

<sup>†</sup> 7:27 Malakias 3:1. <sup>‡</sup> 7:38 Din ogalin di Judio, ibabaktad da ay manpipiging mo mangan da, isonga nalaka ay inmey din babai ay doy sin kad-an di sikin Jesus.

kaman din ogali tako, ngem sisya pay et adi sinmalsaldeng ay mangong-ongo sin sikik manlogi sin inmaliak. <sup>46</sup> Adim aben linanaan din book ko, ngem sisya pay et sinoyatana din sikik si bangbanglo. <sup>47</sup> Ibagak ngarud en sik-a ay din dakdake ay layad ay inpaila na en sak-en et say mangipaila ay napakawan din ad-ado ay basol na. Ngem din ipogaw pay ay at-atik di basol na ay napakawan, at-atik abey layad ay ipaila na.”

<sup>48</sup> Pag kanan Jesus sin babai ay sana, “Napakawan din basbasol mo.” <sup>49</sup> Asi et din odom ay makikikan et kanan das nemnem da, “Ay sino ngin di kaipogaw nina ay olay din basol et pakawanena?”

<sup>50</sup> Ngem kanan Jesus sin babai, “Din pammatim et say begew ay naisalakanam. Somaa ka ay natalna di nemnem mo.”

## 8

### *Din Babbabai Ay Nangoykoyog En Jesus*

<sup>1</sup> Adi pay nabayag et nakilikliked si Jesus sin kailiili ay en mangikaskasaba sin siked ay damag ay maipanggep sin panturayan Diyos. Nakiey abe din sinpo ya dowa ay pasolot na, <sup>2</sup> pati di odom ay babai ay kinaan Jesus di sakit da ya nangipakaanana sin aanito ay nangapet en daida. Da naey ay babai et si Maria Magdalena ay tinaynan di pito ay anito, <sup>3</sup> si Joanna ay asawan Kuza ay esay opisyal en Herod, si Susanna, ya ad-ado pay ay babai ay nangidawdawat sin odom ay gamgameng da ay namadbadang en da Jesus.

### *Din Lalaki Ay En Nansapowak (Mat. 13:1-9; Mar. 4:1-9)*

<sup>4</sup> Nabeweg di ipogaw ay in-inmey sin kad-an Jesus ay napo sin kailiili ay pinaspasyal na. Idi nasinop da sin kad-ana, pag nan dad-aten en daida din pangarig ay nay. <sup>5</sup> Kanana, “Sin namingsan, wada di esay ipogaw ay en nan-isapowak si bin-i sin nom-a na. Idi insapsapowak na din bin-i, naekdag di odom sin danan et ginatgatinan di ipogaw dowan pay teptepken di tititit. <sup>6</sup> Din odom ay insapowak na et naekdag da sin kabatbatoan. Sinmimit da ngem pag dan makpit, tan namgaan dedan din lota. <sup>7</sup> Din odom abe et naekdag da sin kapagpagatan, ngem asi et nakigabay di papagat et insengan da din momola. <sup>8</sup> Ngem din odom pay et naekdag da sin siked ay lota, pag da et gomabay yan nanlames da si sagsisin-gasot.” Inpaanongos Jesus ay nangwani, “Dakayo ay manmange, nemnemen yo san dinnge yo.”

### *Din Olog Di Pangarig Maipanggep Sin Nansapowak (Mat. 13:10-23; Mar. 4:10-20)*

<sup>9</sup> Pag pooten din papasolot na en sisya mo sinoy layden din pangarig ay sana ay kalien. <sup>10</sup> Kanan Jesus, “Dakayo di nangidawtan Diyos si gondaway ay mangammo sin adi naipaammo ed idi maipanggep sin panturayana, ngem din odom ay ipogaw pay et pangarig anggoy di madaddad-at en daida ta say olay mo il-ilaen da, adi da maimatonan, yan olay mo dengdenggen da, adi da maawatan.

<sup>11</sup> “Siya na ngarud di olog din in-arig ko. Din bin-i et siya di din kalin Diyos. <sup>12</sup> Din natekdag sin danan et maiarig dadi sin ipogaw ay manmange sin kalin Diyos, asi et emey din Diablo et ena pakaanen sin nemnem da din kali ay dinnge da ta say adi da mamati ya maisalakan. <sup>13</sup> Din natekdag abe sin kabatbatoan et siya dadi din ipogaw ay manragragsak ay nangawat sin kalin Diyos sin nanngaan da. Ngem adi linmamot din kali sin nemnem da, isonga mo domteng di ligat, adi da itoloy ay mamati mo adi et pandokogan da din pammati da. <sup>14</sup> Din natekdag abe sin kapagpagatan et siya dadi din manmange sin kalin Diyos, ngem masangaw da sin pandandanagan ya bomaknangan da ya din odom ay laylayden da ay ganasen isnan biyag ay nay, isonga mas-engan din kali ay dinnge da et adi malamsan. <sup>15</sup> Din natekdag pay sin siked ay lota et siya dadi din



manmannge sin kalin Diyos dowan dan iigto sin siked ya napasnek ay nemnem da yan itoltoloy da ay mamati enggana ay waday pantongpalan din kali sin biyag da.”

*Din Pangarig Ay Maipanggep Sin Silaw*  
(*Mar. 4:21-25*)

<sup>16</sup> Kanan aben Jesus ay nangiarig, “Maga di maneteng si silaw ta asi na sakoboan si palanggana ono ipeey na sin dallem di katri mo adi ipatang na ta say maptag mo senggep di ipogaw. <sup>17</sup> Iso na sin in-ar-arig ko, tan am-in din naitatabon ono adi naammoan ed wani et maammoan ya mailawag sin tapin di agew. <sup>18</sup> Esten yo ngarud ay manmannge sin ibagbak, tan din ipogaw ay mangikaskaso sin dengdenggena et mataptapian din pangawat na, ngem din adi mangikaskaso et mamaiwed din olay at-atik ay kanana en naawatana.”

*Si Inan Jesus Ya Din Aag-i Na*  
(*Mat. 12:46-50; Mar. 3:31-35*)

<sup>19</sup> Pag somawang si inan Jesus ya din aag-i na sin kad-ana, ngem adi da makasag-en en sisya tan inalibongbongan di ad-ado ay ipogaw. <sup>20</sup> Isonga wada di nangibaga en Jesus, “Si inam ya din aag-im et wada da sin bel-ayan ay wada kanoy layden da ay ibaga en sik-a.” <sup>21</sup> Pag kanan Jesus, “Aw pay dedan, ngem wada pay di odom ay ibilang ko ay inak ya aag-ik et siya dadi din manmannge ya manongtongpal sin kalin Diyos.”

*Din Nangipaginkan Jesus Sin Dagem Ya Dalloyon*  
(*Mat. 8:23-27; Mar. 4:35-41*)

<sup>22</sup> Sin namingsan, kanan Jesus sin papaslot na, “Man-agadang tako.” Et nanlogan das bangsa ay nanlobwat. <sup>23</sup> Idi nanlologan da naseyep et sisya. Siya et di kadateng di mapges ay dagem et sepyasepyatan di dalloyon din bangsa et nganngani ay malned da. Peteg ay kaegyat! <sup>24</sup> Isonga pag dan bangonen si Jesus ay nangwani, “Ay Apo, Apo! Nay malned tako!”

Pag bomangon si Jesus et bilinena din dagem ya napigsa ay dalloyon, et ginminek da ay kosto. <sup>25</sup> Pag nan kanan sin paslot na, “Apay nga magay talek yo?”

Ngem nasdaaw da ya emegyat da pay laeng ya man-asibaga da en, “Sino di kaipogaw nina? Kambaw olay dagem ya dalloyon et bilinenas daida yan patien da!”

*Din Lalaki Ay Taga-Gerasa Ay Kinapet Di Kaanianito*  
(*Mat. 8:28-34; Mar. 5:1-20*)

<sup>26</sup> Intoloy da Jesus ay mangagadang sin lebeng enggana ay somawang da sin sakop di Gerasa\* ay naiidmang ed Galilea. <sup>27</sup> Idi sinmanglad da et kinmaan si Jesus sin bangsa, inabat di lalaki ay napo sin ili ay sana ay kinapet di kaanianito. Nabayag ay manlalal-abos ya adi somassaa, tan nantettee sin liliyang ay kamposanto. <sup>28-29</sup> Namin ado abe ay pinalpaligat di aanitos sisya, et olay inpokopokok ya kinadikadinaan di kakailiana din takkay ya siki na, sinoksokpot na pay dedan din kadina dowan patagtagtagen din anito sin naidodolin ay lugar. Isonga idi inila nas Jesus, man-olakis et kadokmog ay manyakog-ong en sisya. Pag nan kanan ay mangibogaw, “Ay Jesus, Anak di Kangatoan ay Diyos, apay nga domisdistolbo ka? Pangaasim ta adi ka domosdosa!” Siya di din inbaga na tan inbilin Jesus ay komaan din anito en sisya. <sup>30</sup> Pag pooten Jesus en sisya, “Sinoy ngadan mo?”

“Linibolibo,” kanana, tan ad-ado din anito ay nangapet en sisya. <sup>31-32</sup> Wada et di kabisabisaang ay lomanoblob sisi sin matikid, isonga manpakpakaasi din anito en Jesus ta adi na ibaas daida ed dallem ay kadosaan da, mo adi ta ipalobos na ay en da kapten din kabisabisaang ay doy.

\* **8:26** Din naisolat sin odom ay manuskrito ay ngadan di ili ay nay et Gadara ono Gergesa.



“Aw adi,” kanana. <sup>33</sup> Isonga pag dan taynan din lalaki et en da kinmapet sin bibisaang. Pag tomanagtag din bibisaang ay namallalong et pag dan maekgas sin lebeng et nalned da.

<sup>34</sup> Idi inilan din mangibanbantay sin kabisabisaang din sana ay napasamak, katagtag da sin ili da ya sin nandinmang ay lugar ta en da ipadamag sin man-ilis di. <sup>35</sup> Isonga din kaipoipogaw et en da inila mo sinoy napasamak. Somawang da pay sin kad-an da Jesus, dinatngan da din lalaki ay tinaynan di aanito ay tinmotokdo sin sangoanan Jesus ay nanbabado ya sinmiged di nemnem na, isonga inmegyat da am-in. <sup>36</sup> Pag kasin dad-aten din nangila din inyat di lalaki ay dooy ay nailatonan. <sup>37</sup> Et am-in da dooy ay napo sin sakop di Gerasa et nanpakpakaasi da en Jesus ta komaan sin ili da, tan enggay naabak das egyat da.

<sup>38</sup> Somaksakyab si Jesus sin bangka yan dowan aben manpakpakaasi din lalaki ay tinaynan di aanito ta makeey koma en sisya. Ngem inpasaan Jesus ay nangwani, <sup>39</sup> “Olay somaa ka ta en ka dad-aten din am-in ay inamag Diyos en sik-a.” Pag somaa din lalaki ay dooy, et maga di adi na inmeyan sin ili da ay mangibagbaga sin inamag Jesus en sisya.

*Din Anak Jairus Ya Din Babai Ay Nangiwit Sin Tak-ep Di Badon Jesus*

*(Mat. 9:18-26; Mar. 5:21-43)*

<sup>40</sup> Idi nantaoli da Jesus sin demang, naragsak din kaipoipogaw ay nangawat en sisya, tan sin-esin-ed da. <sup>41</sup> Pag et somawang di pangolon di sinagoga ay manngadan si Jairus. Nanyakog-ong ay nandokmog sin sangoanan Jesus ay manpakpakaasi en sisya ta emey sin beey da, <sup>42</sup> tan matmatey din es-esa ay anak da ay babai ay sinpo ya dowada di tawena.

Idi mandad-an si Jesus ay emey sidi, palalo ay inalibongbongan di kaipoipogaw sisya. <sup>43</sup> Di esa en daida et babai ay adi katkatdok di manbolos ay dada na si sinpo ya dowada ay tawen. Enggay nagastooan sisya si inbaybayad nas mangagas en sisya, ngem maga polos makaagas. <sup>44</sup> Inmasag-en sin edegan Jesus yan giniwit na din gayadan di bado na, pag et kasaldeng din manbolos ay dada na. <sup>45</sup> Pag kanan Jesus, “Sinoy nangiwit sin badok?” Ngem esaen nangwani en baken sisya.

Asi et kanan Pedro, “Apo, ad-ado met dedan din ipogaw ay mangal-alibongbong ya manikdon en sik-a.”

<sup>46</sup> Ngem kanan et Jesus, “Wada met di nangiwit sin badok, tan dinlaw ko ay waday binmela ay panakabalin en sak-en.”

<sup>47</sup> Inammoan din babai ay sana ay nasokalan sisya, isonga inmasag-en en Jesus ay manpayegpeg et manyakog-ong ay mandokmog sin sangoanana. Pag na et ibaga en Jesus sin pangiilaan di kaipoipogaw di begew ay nangiwitana sin bado na ya din nakaan di sakit na ay dagos. <sup>48</sup> Et pag kanan Jesus en sisya, “Begew din talek mo, nailatonan ka. May, emey ka ay natalna di nemnem mo.”

<sup>49</sup> Deda ay mankalkali si Jesus dowan et somawang di napo sin beey en Jairus ay nangibaga en sisya, “Olay adi tako sangsangawen pay laeng san maestro, tan natey san anak mo.”

<sup>50</sup> Ngem didinngen Jesus din inbaga da en Jairus yan kanana en sisya, “Adi ka emeg-egyat. Basta mamati ka et mailatonan anak mo.”

<sup>51</sup> Idi sinmawang da sin beey, magay intay-on Jesus ay makisgep en sisya malaksig si Pedro, da Juan en Santiago, ya da aman di balasang. <sup>52</sup> Am-in din ipogaw ay wadas di et inog-ogaan das sisya ay manladladingit da. Ngem kanan Jesus en daida, “Kosto sa, adi kayo man-og-oga, tan din balasang ay nay et adi natey, naseseyep et anggoy.”

<sup>53</sup> Pag dan siniyesiyekan sisya, tan ammo da ay enggay natey. <sup>54</sup> Ngem si Jesus pay, intakkayana din balasang yan kanana en sisya, “Anak ko, ibangon mo.” <sup>55</sup> Pag mantaoli din ab-abiik na et kabangon et pag ibilin Jesus ay pakanen da. <sup>56</sup> Palalo ay nasdaaw da ama na en ina na, ngem inbilin Jesus ay adi da polos ap-apaten din dooy ay naamag si olay sino ay ipogaw.

## 9

### *Din Nangibaaan Jesus Sin Sinpo Ya Dowa Ay Pasolot Na (Mat. 10:5-15; Mar. 6:7-13)*

<sup>1</sup> Idi esay agew, inayagan Jesus din sinpo ya dowa ay pasolot na, et nasinop da. Pag nan idawtan daida si panakabalin ya kalebbengan ay mangipakaan sin am-in ay anito ya mangagas sin mansaksakit. <sup>2</sup> Pag nan ibaa si daida ta en da ikaskasaba din maipanggep sin panturayan Diyos ya agasan da din mansaksakit. <sup>3</sup> Intogona en daida, “Iwed di itaktakin yo sin pandad-anan yo. Adi yo itaktakin di sokod, sangi, makan, pilak, ono pansokatan ay bado. <sup>4</sup> Mo waday mangayag en dakayo sin beey da, isdi di pantean yo engganay taynan yo din ili ay doy. <sup>5</sup> Ngem mo waday ili ay emeyan yo yan adi da awaten dakayo, taynan yos daida, et sin komaanan yo, pokpokan yo din dapan yo ta say pangammoan da ay makaoway da sin dosa da.”

<sup>6</sup> Pag manlobwat din papasolot na et en da manlikliked sin kailiili ay mangikaskasaba sin siged ay damag ya mangag-agas sin mansaksakit.

### *Din Nariribokan Di Nemnem Herod (Mat. 14:1-12; Mar. 6:14-29)*

<sup>7</sup> Idi dinamag Gobernador Herod ed Galilea am-in dana ay inam-amag da Jesus, nariribokan nemnem na, tan waday nangibaga ay natago kasin si Juan ay Mamonbonyag. <sup>8</sup> Din odom abe et kanan da en nanpaila si Elias, ya din odom pay et kanan da en waday mamadto ed nabaon ay natago kasin. <sup>9</sup> Ngem si Herod pay, kanana, “Inpapotok met din toktok Juan. Sino ngata din ipogaw ay ibagbaga da ay sana?” Et manlogi isdi, nemnenemmena mo intoy iyat na ay mangila en Jesus.

### *Din Namakanan Jesus Sin Kaipogaw Ay Nasurok Si Lima Ay Libo (Mat. 14:13-21; Mar. 6:30-44; Jn. 6:1-14)*

<sup>10</sup> Idi nantaoli din aapostol, inbaga da en Jesus am-in din inam-amag da. Pag na et koyogen daida et ang-anggay da ay inmey sin ili ed Betsaida. <sup>11</sup> Ngem idi inammoan din kaipogaw ay inmey da, inonod das daida. Pag ayagan Jesus daida yan itdoanas daida maipanggep sin panturayan Diyos. Inagasana abe din mansaksakit en daida.

<sup>12</sup> Idi malablabi, inmey din papasolot na en sisya et kanan da, “Ibagam sin ipogaw ta en da man-ila si kanen da ya pan-iyanan da sin naisasag-en ay il-ili, tan nay met ay naidodolin isna.”

<sup>13</sup> Ngem kanan et Jesus en daida, “Olay dakayo di mamakan en daida.”

Pag dan kanan, “Lima ay tinapay ya dowa ay piskaw et anggoy di wada. Ay en kami manlako si kanen da naey am-in?” <sup>14</sup> Say kanan da di tan di kabibilang di nankakay ya babbaro et emey ay lima ay libo.

Ngem kanan pay Jesus en daida, “Patokdoen yos daida si saglilimapolo.” <sup>15</sup> Et say inyat da di. <sup>16</sup> Pag alaen Jesus din lima ay tinapay ya dowa ay piskaw, et tinangad na ed langit ay nan-iyaman en Diyos. Asi na pag kinittoyen et indawat na sin pasolot na ta iwawat da sin kaipogaw. <sup>17</sup> Nangan da amin et nabsog da. Olnongen da pay din nabay-an, sinpo ya dowa ay basket di napay-an sin namekmek ay makan.

### *Din Nangibagaan Pedro Mo Sino Si Jesus (Mat. 16:13-19; Mar. 8:27-30)*

<sup>18</sup> Sin namingsan, ang-anggoy da Jesus sin papasolot na et mankarkararag si Jesus. Pag nan kanan en daida, “Sinoy pangwanin di kaipogaw en sak-en?”

<sup>19</sup> “Wada di mangwani en sik-a si Juan ay Mamonbonyag. Kanan di odom en sik-a si Elias, yan kanan aben di odom en sik-a di esa ay mamadto ed nabaon,” insongbat da.

<sup>20</sup> “Ngem dakayo pay,” kanan Jesus, “sinoy pangwani yo en sak-en?”

Kanan Pedro, “Sik-a din Messias ay dinotokan Diyos ay manturay.”

<sup>21</sup> Dadlon inbilin Jesus en daida ay adi da polos ibagbaga na si olay sino ay ipogaw. <sup>22</sup> Pag nan itoloy ay nangwani, “Sak-en ay Anak di Ipogaw et masapol ay nam-osek di ad-ado ay ligat. Din aam-a ya din papangolon di papadi ya din mamaestron di linteg et sigaan das sak-en ya omipapse da, ngem kasin tagoen Diyos sak-en sin maikatlo ay agew.”

### *Din Kabibiyag Di Manbalin Ay Pasolot Jesus*

*(Mat. 16:24-28; Mar. 8:34-9:1)*

<sup>23</sup> Pag ayagan Jesus din kaipoipogaw yan kanana en daida am-in, “Mo sino di mayad ay manbalin ay pasolot ko, masapol ay pandokogana din awak na. Inag-agew abe, masapol ay tilidena din krus na\* ta asi makiey en sak-en. <sup>24</sup> Tan din mangipatpateg sin awak na et matey met laeng, ngem din matey begew sin pammati na en sak-en et wada di biyag ay iwed patingga na ay idawat Diyos en sisya. <sup>25</sup> Tan sino aya di maganab di ipogaw mo okaena din intiro ay lobong yan asi et malitaw din biyag na et madosa ay eng-enggana? <sup>26</sup> Mo sinoy manigaan en sak-en ay Anak di Ipogaw ya din it-itdok et sigaak abes sisya sin omaliak ay pangipailaan sin dayaw ko ya din dayaw Amak ya din aanghel na. <sup>27</sup> Tet-ewa nan ibagak ay wada en dakayo isna di daan pay laeng di kateyan da et ilaen da din panturayan Diyos.”

### *Din Nanbaliwan Di Kailaan Jesus*

*(Mat. 17:1-8; Mar. 9:2-13)*

<sup>28</sup> Nalabas di esay dominggo sin nangibagaan Jesus sidi, pag nan ayagan da Pedro en Juan ya si Santiago et mantikid da si esay dontog ay en mankararag. <sup>29</sup> Mankarkarag pay si Jesus, nanbaliw din kailaan di ropa na ya din bado na et kinmilakilat ay komonkoniniing. <sup>30-31</sup> Pag et manpaila di doway ay nakay ay mankoniniing abe di kailaan da ay makingalngalat en Jesus ay da Moses en Elias. Din ibagbaga da et din nganngani ay kateyana ed Jerusalem ay manongpal sin planon Diyos. <sup>32</sup> Downan pay naseseyep da Pedro, ngem asi da igibek et ilaen da din koniniing en Jesus ya din doway ay nakay ay nakipipika en sisya. <sup>33</sup> Idi komakkaan din doway ay nakay ay sana sin kadan Jesus, kanan Pedro en sisya, “Apo, mayat din kawada takos na. Man-amag kami et adi si tolo ay pansidoman ta okam di esa, okan Moses di esa, ya okan Elias di esa.” Ngem say inbaga na di, tan adi na iman ammo din kankanana.

<sup>34</sup> Idi mankalkali pay laeng, kadateng di liboo et sinalinanas daida am-in. Asi pag malingban da Jesus et inmegyat din papasolot na. <sup>35</sup> Pag wada di kali ay napo sin liboo ay nangwani, “Si naey di anak ko ay pinilik. Dengngen yo din kanana.” <sup>36</sup> Somaldeng pay din kali, si Jesus anggoy di inila da. In-giginek din pasolot na din nay ay inila da ay magay nangibagbagaan da enggana ay tinaynan Jesus daida.

### *Din Nangipakaan Jesus Sin Anito Ay Kinmapet Si Anak*

*(Mat. 17:14-18; Mar. 9:14-29)*

<sup>37</sup> Sin kabigatana, binmallalong da Jesus sin dontog, yan ad-ado di ipogaw ay nangat en sisya. <sup>38</sup> Pag et kaibogaw di esa en daida, “Apo! Ilaem kod paabe, tan ang-anggoy nas anak ko! <sup>39</sup> Tan wada di anito ay mangapkapet en sisya. Mo depapena et kaolakis, mankededas ya man-oosab tepek na. Palalo ay palipaligatena enggana ay nasbas sisya ya adi na baybay-an. <sup>40</sup> Nanpakpakaasiak sin pasolot mo ta pakaanen da din anito, ngem adi da kabaellan.”

<sup>41</sup> “Ay daetan kayo pay! Adi kayo mamati downan kayon adi kakwani!” kanan Jesus ay sinombat. “Kaman kayman nabayabayag di nakiteteak en dakayo! Ay ken

\* **9:23** Sin timpo ay doy, mo waday ipogaw ay nakeddangan ay mailansa sin krus et kapilitan ay tilidena din krus sin lugar ay pangilansaan da. Isonga din layden Jesus ay kalien et mo waday mayad ay maitapi en sisya, masapol ay ibilang na din awak na ay enggay natey ta baken din laydena di nemnememena mo adi din layden Jesus.

manpigapiga pay di anos ko en dakayo?” Pag nan kanan sin aman di anak, “May, ialim isna din anak mo.”

<sup>42</sup> Somagsag-en pay din anak ay sana en Jesus et kaidogos din anito dowanan nankekedasen. Pag ibilin Jesus sin anito ay komaan yan tinaynana din anak ay sana et nailatonan. Asi kanan Jesus sin ama na, “Naey din anak mo.” <sup>43</sup> Et nasdaaw am-in din ipogaw sin panakabalin Diyos.

### *Din Nangipidwaan Jesus Ay Nangolit Sin Kateyana*

*(Mat. 17:22-23; Mar. 9:30-32)*

Deda ay masmasdaaw din kaipoipogaw sin am-in ay inam-amag Jesus dowana et kanan sin pasolot na, <sup>44</sup> “Adi yo linglinglingan din nay ibagak en dakayo. Sak-en ay Anak di Ipogaw, awni et maipolangak sin kaibaw ko ta oway di iyaat da en sak-en.” <sup>45</sup> Ngem adi da ammo din laydena ay kalien, tan adi inpalobos Diyos ay maawatan da yan emegyat da ay mamoot en Jesus.

### *Sino Din Kangatoan*

*(Mat. 18:1-5; Mar. 9:33-37)*

<sup>46</sup> Din pasolot en Jesus et waday nan-iibawan da mo sinoy kangatoan en daida. <sup>47</sup> Ngem ammon Jesus din wada sin nemnem da, isonga inayagana di esay anak et inpapika na ay naidking en sisya. <sup>48</sup> Pag nan kanan en daida, “Mo sinoy mangawat si anak ay kaman nina manbegew sin pammati na en sak-en et sak-en di inawat na, yan din mangawat en sak-en et inawat na abe din nangibaa en sak-en. Isonga din kababaan en dakayo et sisya di kangatoan.”

### *Din Adi Mangontra Et Sisya Di Bomadang*

*(Mar. 9:38-40)*

<sup>49</sup> Pag kanan Juan en Jesus, “Apo, inila mi di ipogaw ay mangipakpakaan si aanito ay mangos-osal sin ngadan mo, yan inandiyan mi tan baken takon ib-a.”

<sup>50</sup> “Adi kayo an-andiyan,” kanan Jesus, “tan din adi mangonkontra en dakayo et badbadanganas dakayo.”

### *Din Adi Nangawatan Di Taga-Samaria En Jesus*

<sup>51</sup> Idi nganngani din kaipangatoan Jesus ed daya, inpaes-esa na di nemnem na ay emey ed Jerusalem. <sup>52</sup> Isonga wada di inpaon-ona na ay emey sin esay ili ed Samaria ay mangisagana sin ena maspadan. <sup>53</sup> Ngem din omili isdi et sigaan da ay maspad da Jesus sin ili da, tan ammo da ay ed Jerusalem ay ilin di Judio di emeyan da. <sup>54</sup> Idi dinamag din papasolot na ay da Santiago en Juan ay say inyat din taga-Samaria ay doy, kanan da en Jesus, “Apo, ay laydem ay ibaga mi en Diyos ta ibaa na di apoy ta pooanas daida?” <sup>55</sup> Ngem sinagong Jesus daida et yinamyamana. <sup>56</sup> Et pag dan emey sin natken abe ay ili.

### *Din Ligat Di Makiey En Jesus*

*(Mat. 8:19-22)*

<sup>57</sup> Sin pandad-anan da, wada di lalaki ay nangwani en Jesus, “Omonodak en sik-a olay intoy em-emeyam.”

<sup>58</sup> Asi et kanan Jesus, “Olay din bewet et waday lokaw ay panbeeyan da, ya din titit abe et waday obong da, ngem sak-en ay Anak di Ipogaw et magay kosto ay kaseypak.”

<sup>59</sup> Kanan aben Jesus sin esa ay ipogaw, “Manbalin ka et ay pasolot ko.” | 9:59 Ngem sinongbatan din sana, “Apo, awni kod ta en mi iponpon agan-o si amak.”

<sup>60</sup> “Bay-am,” kanan Jesus, “ta din iib-an amam ay kaman dan nanatey† di en mangiponpon en sisya. Ngem mo sik-a pay, en ka ikaskasaba din panturayan Diyos.”

<sup>61</sup> Wada pay di esa ay nangwani, “Apo, omonodak en sik-a, ngem awni kod ta enak manpakada agan-o sin pamilyak.”

| 9:59 **9:59** Ilaen din footnote sin 5:27. † **9:60** Kaman dan nanatey sin pangilan Diyos tan adi da namati en Apo Jesus.

<sup>62</sup> Ngem kanan Jesus, “Din nanlogi ay man-alado ay manwingiwingi et iwed met silbin di obla na. Iso na sin makikiey en sak-en ay manwingiwingi, tan iwed iyat na ay mansilbi sin panturayan Diyos.”

## 10

### *Din Nangibaaan Jesus Sin Pitopolo Ya Dowa Ay Pasolot Na*

<sup>1</sup> Idi nakdeng di, pinilin Jesus di odom ay pitopolo ya dowa ay pasolot na yan inbaa nas daida si sagdodowa ta mangon-ona da ay en man-it-itdo sin inil-ili ay awni et emeyana. <sup>2</sup> Kanana en daida ay nangiarig, “Ad-ado di ipogaw ay maani koma, ngem kolang di mangan-ani en daida. Kedawen yo ngarud sin akin payew ta man-ibaa si odom ay en makiani. <sup>3</sup> En kayo! Ngem siliban yo, tan ibaak dakayo sin makedse ay ipogaw ay kaman kayon karnero ay emey sin kad-an di mabonget ay aso. <sup>4</sup> Adi kayo man-itaktakin si pilak ono sangi ono pansokatan ay sinilas, ya adi kayo masangsangaw si ngalat sin danan. <sup>5</sup> Mo senggep kayo sin esa ay beey, kanan yo agan-o, ‘Sapay koma ta bindisyonan Diyos dakayo ay bemeey.’ <sup>6</sup> Mo maikari da ay mangawat sin bindisyon ay inbaga yo, mabindisyonan da tet-ewa, ngem mo adi da maikari, adi da aben mabindisyonan. <sup>7</sup> Mo waday manangaili en dakayo, isdi di pantetean yo ay adi kayo man-et-etan si odom ay beey. Adi kayo aben mabain ay mangan ya man-inom si isango da en dakayo, tan din man-obla et maikari ay malagboan. <sup>8</sup> Isonga olay sino ay ili ay emeyan yo, mo sangailien das dakayo, kanen yo din isango da en dakayo, <sup>9</sup> agasan yo di mansaksakit, ya ibaga yo sin omili isdi en dandani din pangiturayan Diyos en daida. <sup>10</sup> Ngem mo emey kayos esa ay ili yan sigaan das dakayo, bomala kayo sin kalsada yan kanan yo en daida, <sup>11</sup> ‘Olay nan tapok di ili yo ay pinomket sin siki mi et nay ay pokpokan mi ta say pangammoan yo ay makaoway kayo sin dosa yo. Ngem dadlon yon nemnemen ay inmasag-en si Diyos pay dedan ay mangituray koma en dakayo.’ Say kanan yo di en daida,” kanan Jesus. <sup>12</sup> “Tan ibagak en dakayo ay mo domateng din pangokoman Diyos sin kaipoipogaw, madagdagsen din dosan di man-ili isdi mo din dosan di taga-Sodoma.”\*

### *Daida Ay Nanigaan Ay Manbabawi (Mat. 11:20-24)*

<sup>13</sup> Pag itoloy Jesus ay nangwani, “Kaseseg-ang kayo ay taga-Korazin ya siya abe en dakayo ay taga-Betsaida! Tan ad-ado di nakaskasdaaw ay inam-amag ko sin ili yo, ngem adi yo inbabawi din basbasol yo. Mo koma ed Tiro ya ed Sidon† di nangam-amagak sin nakaskasdaaw ay nay, nanbado da komas sako ay dagos ya dowan da pay itotokdo sin dap-o ay mangipaila ay nanbabawi da. <sup>14</sup> Isonga on-onina din dosan di taga-Tiro ya taga-Sidon mo si dakayo sin agew ay pangokoman Diyos sin kaipoipogaw. <sup>15</sup> Dakayo pay abe ay taga-Capernaum, ay kanan yo aya en maingato kayo ed langit ay madayaw? Awni man et maibaba kayo ed inferno.”

<sup>16</sup> Pag kanan Jesus sin pasolot na, “Din mangikaskaso sin ibagbaga yo et sak-en met laeng di ikaskaso na, ya din manigaan en dakayo et sak-en met laeng di sigaana, ya din manigaan en sak-en et si Diyos ay nangibaa en sak-en din sigaana.”

### *Di Nantaolian Din Pitopolo Ya Dowa*

<sup>17</sup> Idi nantaoli din doy ay pitopolo ya dowa ay inbaan Jesus, peteg di ragsak da yan kanan da, “Apo, olay din aanito et pinatpati das dakami idi pinakaan mis daida ay nangos-osal sin ngadan mo!”

<sup>18</sup> “Aw,” kanan Jesus, “inilak si Satanas ay matektekdag ay napod langit ay kaman din iyat di kimat ay mansilap. <sup>19</sup> Et sak-en met laeng di nangidawat si panakabalin

\* **10:12** Genesis 18-19. † **10:13** Din omili ed Tiro ya ed Sidon ed idi et nadamag ay kalawlawaan di ogali da. Din inbagan di mamadto maipanggep sin dosa da et basaen sin Isaias 23:1-18; Ezekiel 26-28; Amos 1:9-10.



yo ta say olay gatgatinan yo di eweg ya gayaman, maga di mapasamak en dakayo mo adi et abaken yo din am-in ay kabaelan Satanas. <sup>20</sup> Ngem din kalebbengan yo ay nay ay mamilin sin aanito et baken say kabanolan ay panragsakan yo koma mo adi et tan naisolat din ngadngadan yo ed langit.”

*Din Ragsak En Jesus*  
(*Mat. 11:25-27; 13:16-17*)

<sup>21</sup> Sin siya di ay oras, peteg ay inparagsak din Ispirito Santo si Jesus, et nankararag ay nangwani, “Ama, sik-a ay Apo ed langit ya isnan daga, dakdake di iyaman ko en sik-a tan din adi ka inpaammo sin masirib ya diadal ay ipogaw et say inpaammom sin baken diadal. Et inamag mo di ay Ama, tan siya kayman din nilayad mo ay naiyat.”

<sup>22</sup> Pag kanan Jesus sin kaipoipogaw, “Sak-en di nangipolangan Amak sin am-in. Tan magay mangam-ammo si kosto en sak-en mo baken si Amak, ya maga abe di mangam-ammo en Amak mo baken si sak-en ya din ipogaw ay laydek ay pangiammoan.”

<sup>23</sup> Asi pag sagongen Jesus din pasolot na yan kanana en daida, “Nagasat da am-in ay mangila sin inil-ila yo. <sup>24</sup> Tan ad-ado met iman di mamadto ya ari ed idi ay mayad ay mangila sin inil-ila yo, ngem adi da inila, yan layden da abe ay dengngen din dindinnye yo, ngem adi da dinnye.”

*Din Pangarig Maipanggep Sin Siged Ay Taga-Samaria*

<sup>25</sup> Sin namingsan wada di maestron di linteg ay inmey sin kad-an Jesus ta ena padasen sisya. Kanana, “Apo maestro, sinoy masapol ay amagek ta say awatek din biyag ay enggana?”

<sup>26</sup> “Sinoy kanan din naisolat ay kalin Diyos? Sinoy pangawat mo?” kanan aben Jesus en sisya.

<sup>27</sup> Sinongbatan din sana ay maestron di linteg, “Din inpaisolat Diyos et kanana en, ‘Masapol ay imongsan mo di am-in ay nemnem, bikas ya laing mo ay manglaylayad en Diyos ay Apom,’<sup>‡</sup> yan kanana abe, ‘Masapol ay laylaydem di ib-am ay kaman din pananglayad mo sin awak mo.’”<sup>§</sup>

<sup>28</sup> “Kosto din songbat mo,” kanan Jesus. “Mo say iyat mo di, wada di biyag mo ay iwed patingga na.”

<sup>29</sup> Ngem din maestro ay sana et laydena ay ipaneknek ay kosto di in-inyat na, isonga inbaga na pay en Jesus, “Aw, ngem sino ngarud di ib-ak?”

<sup>30</sup> Pag kanan Jesus ay nangiarig, “Wada di ib-a tako ay Judio ay napo ed Jerusalem ay manballalong ed Jerico. Idi wada pay sin danan, biniglan di tollisan ay nanga sin am-in ay in-genana pati bado na yan pinat-opat-oan das sisya enggana ay matmatey, yan pag dan taynan. <sup>31</sup> Idi siya di, wada et di padi ay manballalong sin sana ay danan, ngem idi inila na din matmatey ay doy, inligligana. <sup>32</sup> Maaw-awni abe wada di sinmawang ay polin Levi.\* Datngana pay din kaseseg-ang ay doy, inmasag-en en sisya ta ena ilaen, ngem pag nan inligligan ay nadipos. <sup>33</sup> Maaw-awni pay, wada iman di malabas ay taga-Samaria.† Idi inila na din matmatey ay Judio ay sana, naseg-angan, <sup>34</sup> et inmey sin kad-ana yan inagasana din sogat na si lana ya arak dowanen bedbedan. Pag nan ilogan sin kabayo na et iey na sin pandagdag-osan di ipogaw ta ayowananas sisya. <sup>35</sup> Sin kabigatana, indawtana din nakin beey si pilak yan kanana, ‘Ayowanam kod sisya. Mo mantaoliak, asiak tapian nan siping ay nay mo kolang.’”

<sup>36</sup> Inpaanongos Jesus din nay pangarig ay nangwani, “May kod ay, sin pannemnem mo, sino en daida ay tolo di kosto ay ib-an din pinaligat di tollisan?”

<sup>37</sup> “Yan din naneg-ang adi en sisya,” insongbat din sana ay maestron di linteg.

<sup>‡</sup> 10:27 Deuteronomio 6:5. <sup>§</sup> 10:27 Levitico 19:18. \* 10:32 Din polin Levi et daida din nanoltolong sin papadi sin obla da sin timplo. † 10:33 Din man-ili ed Samaria ya din Judio et man-asiliget da. Ilaen abe sin Juan 4:9; 8:48.



Pag kanan Jesus, “En ka ngarud ta say taddonem sisya.”

### *Din Nanpasyalan Jesus En Da Marta En Maria*

<sup>38</sup> Intoloy da Jesus sin papasolot na ay mandad-an enggana ay somawang da sin esa ay ili. Wadas di di babai ay manngadan si Marta, et sinangaili nas daida. <sup>39</sup> Wada abe di iyogtan en Marta ay si Maria ay tinmokdo sin kad-an Jesus ta dengngena din it-itdo na. <sup>40</sup> Asi et nasangaw si Marta sin ad-ado ay isagsagana na. Adi et nabayag, ena inbaga en Jesus, “Apo, ay adi ka pagan-ano ay bomaybay-an san iyogtan ko ta ang-anggoy ko ay man-ob-oblá? Ibagam koma en sisya ta bomadang!”

<sup>41</sup> Ngem kanan Jesus, “Marta, Marta, ad-ado di pandandanagam ya kariribokam, <sup>42</sup> ngem es-esa anggoy di masapol ay amagen, et siya di din kosto ay pinilin Maria. Adi met mabalin ay makaan en sisya.”

## 11

### *Din Initdon Jesus Maipanggep Sin Kararag*

*(Mat. 6:9-13; 7:7-11)*

<sup>1</sup> Sin namingsan, mankarkararag si Jesus sin esa ay lugar. Idi nakakararag, kanan di esa ay pasolot na en sisya, “Apo, itdoam kod dakami ay mankararag ay kaman din inyat Juan ay nangitdo sin papasolot na.”

<sup>2</sup> Kanan Jesus en daida, “Mo mankararag kayo, siya nay kanan yo: ‘Ama, madaydayaw koma din nasantoan ay ngadan mo. Domteng koma din panturayam isnan daga. <sup>3</sup> Iyaam dakamis inag-agew sin kanen ay kasapolan mi.

<sup>4</sup> Pakawanem din basbasol mi, tan pakawanen mi abe din binmasol en dakami. Bomadang ka abe ta adi kami masolsolisog.’ ”

<sup>5</sup> Kanan aben Jesus, “Mo kaspangarigan wada di esa en dakayo ay waday gayyem na, yan emey ka sin beey na sin gawan di labi ta en ka kanan en sisya, ‘Ay ib-ak, omya ka kod si makan, <sup>6</sup> tan wada di gayyem ko ay manbibbiyahe ay kadatdateng na ed bebbeey, yan magay ipakan ko en sisya.’ <sup>7</sup> Ngem sodsoden daka ay mangwani, ‘Apay nga domisdistolbo ka? Nay enggay naidadakig ya naseseyep kami am-in. Masadotak ay bomangon ay mangidawat en sik-a.’ <sup>8</sup> Mo kaspangarigan say napasamak di, sino pay di maamag? Kanak en dakayo, olay mo adi maawis gayyem mo ay bomangon begew sin pan-gayyeman yo, ngem gapo ta ipipilit mo ay mankedakedaw, bomangon pay dedan ta idawat na en sik-a din am-in ay kasapolam.

<sup>9</sup> “Ibagak ngarud en dakayo, kanayon koma ay mankedkedaw kayo en Diyos et idawat na en dakayo din kedkedawen yo. Itoltoloy yo abe ay man-an-anap et datngen yo din an-anapen yo. Iapati yo koma abe ay mantogtog et mabokatan pantew ta senggep kayo. <sup>10</sup> Tan olay sino di mankedaw en Diyos et maidawtan, ya olay sino di man-anap et datngena din an-anapena. Olay sino abe di mantogtog et mabokatan pantew para en sisya. <sup>11</sup> Tan ilan yo, dakayo ay aam-a, mo mankedaw di anak yo si piskaw, ay idawtan yo aya si eweg? <sup>12</sup> Ono mo mankedaw si itlog, ay idawtan yo aya si gayaman? <sup>13</sup> Dakayo ngarud ay lawa, mo ammo yo ay idawtan di anak yo si siged, adi namnamed pay ay idawat Ama tako ed langit din Ispirito Santo en daida ay mankedaw.”

### *Si Jesus Ya Si Beelzebub*

*(Mat. 12:22-30; Mar. 3:20-27)*

<sup>14</sup> Sin namingsan, pinakaan Jesus di anito ay nangomel sin esa ay lalaki. Idi kinmaan din anito ay sana, makakali kasin din tinaynana, et nasdaaw din kaipoipogaw. <sup>15</sup> Ngem kanan di odom en daida, “Si Beelzebub ay ap-apon di aanito di nangidawat en sisya si panakabalina ay mangipakpakaan si aanito.” <sup>16</sup> Din odom pay et layden da ay padasen sisya, isonga kindaw da ay man-amag si nakaskasdaaw ay mangipaila ay si Diyos di nangibaa en sisya.

<sup>17</sup> Ngem ammon Jesus di wada sin nemnem da, isonga kanana en daida, “Mo man-asigobat din kaipoipogaw sin esa ay ili, madadael din ili ay doy. Siya abe sin pamilya, mo man-iibaw da, mansisian da. <sup>18</sup> Iso na abe en Satanas. Mo ibawena din iib-a na ay anito, madadael met din panturayana. Say ibagak na en dakayo tan kanan yo en si Beelzebub di nangidawat si panakabalin ko ay mangipakaan si anito. <sup>19</sup> Mo tet-ewa sa, intoy inyat ngarud din papasolot yo ay nangipakpakaan si anito? Olay daida et paneknekan da ay naipaksaw din kankanan yo! <sup>20</sup> Tan din katet-ewa na et si Diyos di nangidawat si panakabalin ko ay mangipakaan si anito, et say pangammoan yo ay dinmateng din panturayan Diyos en dakayo.

<sup>21</sup> “Si Satanas et maiarig si mabikas ay ipogaw ay nan-aarmas. Mo banbantayana din beey na, magay makaakew sin bonag na. <sup>22</sup> Ngem mo ibawen ya abaken di mabmabikas ay ipogaw sisya, posena din armas ay nantalkan di kaibaw na et pag nan alaen din bonag di kaibaw na ay sana ta say ibingay na sin iib-a na.

<sup>23</sup> “Olay sino di adi maitapi en sak-en et komonkontra, ya din adi bomadang ay maninop si karnero et pansianenas daida.”

#### *Din Pantaolian Di Anito* (Mat. 12:43-45)

<sup>24</sup> Intoloy Jesus ay nangiarig, “Mo komaan di anito ay kinmapet si ipogaw, en manlikliked sin kabatbatoan ay magay danom na ay man-anap si pan-illengana. Et mo magay datngana, kananas nemnem na en, ‘Olay mantaoliak sin beey ay napoak.’

<sup>25</sup> Et mantaoli ya datngana ay enggay nadalosan ya kagkagam-is mo ed idi. <sup>26</sup> Pag en man-ayag si pito ay anito ay makmakedse mo sisya ta en da makibeey en sisya. Adi pay masepsep ay komaseseg-ang din ipogaw ay doy mo sin damo.”

#### *Din Tet-ewa Ay Nagasat*

<sup>27</sup> Sin nangwanian Jesus sidi, wada di babai ay naitatapi sin kaipoipogaw ay nangip-igsa ay nangwani, “Nagasat od kayman din nangianak ya nanpasoso en sik-a!”

<sup>28</sup> “Aw kayman,” kanan Jesus ay sinombat, “ngem nagasgasat pay di ipogaw ay manmanngge ya mamati sin kalin Diyos.”

#### *Din Sinyal Ay Inpailan Jonas* (Mat. 12:38-42)

<sup>29</sup> Masepsep ay inalibongbongan di kaipoipogaw si Jesus, et intoloy na ay nangwani, “Lawlawa din ipogaw ed wani, tan ipapilit da ay ipailak di nakaskasdaaw ay sinyal en daida, ngem iwed met maipaila mo adi anggoy din sinyal ay kaman din napasamak en Jonas ed idi. <sup>30</sup> Tan din naamag en Jonas\* et siya di din sinyal ay nangipaila en daida ed Nineve ay inbaan Diyos sisya. Ya din maamag abe en sak-en ay Anak di Ipogaw et sinyal para sin ipogaw ed wani. <sup>31</sup> Mo domateng din agew ay pangokoman Diyos sin am-in ay ipogaw, awni man et makipika din babai ay reyna ed Seba ed idi ay mangipabasol en dakayo, tan mo sisya et inmey ay napo sin kaaddawian ay ili ta say ena dengngen din inbagbagan di nalaing ay Ari Solomon, ngem kanak en dakayo en napatpateg mo si Solomon din wadas na ed wani. <sup>32</sup> Din nan-ili ed Nineve abe, makipika da sin siya di ay agew ay mangipabasol abe en dakayo, tan mo daida et inbabawi da din basbasol da sin nanngedan da sin inkaskasaban Jonas, ngem mo dakayo et olay mo wada di naitatapi en dakayo ay napatpateg mo si Jonas, adi yo pay dedan pasien.”

#### *Din Mapat-a Ya Din Mabolinget* (Mat. 5:15; 6:22-23)

\* **11:30** Din naamag en Jonas ay esa ay mamadto ed idi et inokmon di dakdake ay nigay. Toloy agew di nantean Jonas sin eges di nigay ay doy, ngem inay-ayowanen Diyos sisya et pag iotan din nigay sin benget di baybay.

<sup>33</sup> Pag itoloy Jesus ay mangiarig, “Maga di maneteng si silaw ta asi na ipeey sin nasasalinan ono sakoboana si palanggana mo adi et ipatang na ta say maptag mo senggep di ipogaw. <sup>34</sup> Din mata abe et kaman silaw di ipogaw. Isonga mo siged di pangilam, kaman dadlon nasilawan di nemnem mo, ngem mo lawa di pangilam, kaman palalo ay mabolinget di nemnem mo. <sup>35</sup> Silibam ngarud into et mo kanam en nasilawan nemnem mo ngem kambaw et mabolinget. <sup>36</sup> Tan mo dadlon maptag di nemnem mo ay iwed polos mabolinget, masilawan ka ay kosto ay kaman sin napigsa ay silaw.”

*Din Nangyamyaman Jesus Sin Fafariseo Ya Mamaestron Di Linteg*  
(Mat. 23:1-36; Mar. 12:38-40)

<sup>37</sup> Idi nakdeng ay nan-itdo si Jesus, inayagan di esay Fariseo ta en da mangan, isonga nakiey si Jesus sin beey na et nakitokdo ay nangan. <sup>38</sup> Ngem nasdaaw din Fariseo ay sana sin nangilaana ay adi nanbo agan-o si Jesus maibasar sin ogali da. <sup>39</sup> Isonga pag kanan Jesus en sisya ay nangiarig, “Palalo kayo ay Fafariseo! Kaman kayon ipogaw ay mangowas et anggoy sin baklang di tasa ya edeg di palato, tan esten yo ay manbo ngem baybay-an yo din nemnem yo ay napno si kinagamgam ya lawa. <sup>40</sup> Dakayo ay naong-ong! Si Diyos ay nangamag sin awak tako et inamag na abe dedan din nemnem tako, ay baken siya? <sup>41</sup> Isonga din amagen yo koma agan-o et pasigeden yo di nemnem yo ta say ibingay yo din wada en dakayo sin nabibiteg. Tan mo say iyat yo di, enggay nalinisan kayo.

<sup>42</sup> “Kaseseg-ang kayo ay Fafariseo, tan es-esten yo ay mangidawat en Diyos sin inkasinpo, olay din ap-apiten yo ay maisab-ong sin madengdeng, ngem binaybay-an yo din nabanbanol: din pangamagan yo si kosto sin iib-a yo ya din panlaylaydan yo en Diyos. Agpos mo in-inset yo koma dana ay nabanbanol downan yo et aben intoltoloy ay mangidawat sin inkasinpo.

<sup>43</sup> “Kaseseg-ang kayo ay Fafariseo, tan laylayden yo ay pilien din kasigedan ay tokdoan sin sinagoga ya layden yo abe ay dayawen di ipogaw dakayo ay mangwani en ‘Apo’ mo en kayo manpasyal.

<sup>44</sup> “Kaseseg-ang kayo, tan kaman kayon naiponponan di natey ay adi kailasin, isonga gatgatinan di ipogaw, ngem adi da ammo ay say gatgatinan da.”

<sup>45</sup> Asi et kanan di esa ay maestron di linteg, “Apo maestro, sin pangibagbagaam issa, itaptapim met dakami ay mapababbainan.” <sup>46</sup> Pag kanan Jesus, “Kaseseg-ang kayo abe ay mamaestron di linteg, tan ipag-en yo sin kaipoipogaw di madagsen ay siya din ad-ado ay bilbilin ay ipapati yo ay onoden da, ngem adi kayo pay makig-en si olay at-atik.

<sup>47</sup> “Kaseseg-ang kayo, tan iam-amagan yo si kagkagam-is ay pansiyong din mamadto ed nabaon ay pinpinsen din aap-o yo. <sup>48</sup> Ngem sin pangam-amagan yos di, ipaila yo ay apolbalan yo din sana ay inam-amag din aap-o yo, tan daida di namnamse, ngem dakayo pay di mangam-amag si beey din pinpinse da. <sup>49</sup> Siya na di mangipaila sin laing Diyos, tan kanana ed idi, ‘Waday ibaak en daida ay mamadto ya aapostol, ngem peslen dan odom ya paligaten dan odom.’ <sup>50</sup> Isonga din ipogaw ed wani et madosa da sin nateyan di am-in ay mamadto manlogi sin naparsuaan di daga, <sup>51</sup> manlogi sin namsean da en Abel enggana sin namsean da en Zekarias ay pinse da sin nan-gawaan di altar ya din Timplo. Aw, tet-ewa met nan inbagak en dakayo ay din ipogaw ed wani et makaoway da sin nateyan da am-in!

<sup>52</sup> “Kaseseg-ang kayo ay mamaestron di linteg, tan kinaan yo din maiarig sin sosi ay manglokat sin pangammoan di ipogaw sin kalin Diyos. Gogodaben yo din kosto ay olog na downan yo aben sangsangawen din kaipoipogaw ta adi da aben pasien!”

<sup>53</sup> Sin binmalaan Jesus sin beey di Fariseo ay doy, inpakat din mamaestron di linteg ya din Fafariseo di kabaelan da ay mangonkontra en sisya. Ad-ado abe di pinoppoot da <sup>54</sup> ay mangietek koma en sisya ta say waday isongbat na koma si mabalin ay pangipabasolan da en sisya.

## 12

### *Din Agin Sisiged Ay Fafariseo* (Mat. 10:26-27)

<sup>1</sup> Sin naam-amagan dana, nasinsinop di piga ay libo ay ipogaw enggana ay man-asigagatin da. Nakikali si Jesus sin papasolot na agan-o ay nangwani, “Siliban yo ta adi kayo maalinan sin labaduran di Fafariseo, laydek ay kalien, din ogali da ay agin sisiged. <sup>2</sup> Tan am-in ay naitatabon ya adi naammoan ed wani et maipaila ya maammoan sin tapin di agew. <sup>3</sup> Isonga olay sino ay inbagbaga yo sin labi et maammoan sin kaagawan, ya din in-ayaayasak yo sin naenban ay kowarto et maibogbogaw ta dengngen di kaipoipogaw.”

### *Din Emegyatan Koman Di Ipogaw* (Mat. 10:28-31)

<sup>4</sup> Kanan aben Jesus sin papasolot na, “Ibagak en dakayo ay gagayyem ko, adi kayo emegyat en daida ay mamse si awak et anggoy di ipogaw, tan say gedeng di kabaelan da, <sup>5</sup> mo adi et emegyat kayo en Diyos. Tan sin pangaanan Diyos si leng-ag di ipogaw, wada pay abe di kalebbengana ay mangitpig ed inferno. Isonga sisya et di emegyatan yo. <sup>6</sup> Ngem nemnemen yo abe din iyat Diyos sin boding. Mailako di lima ay boding si doway balkeg et anggoy, ay baken siya? Ngem adi linglinglingan Diyos di olay esa en daida. <sup>7</sup> Namnamed kayo ay ipogaw! Tan olay din book yo et ammo na di kabibilang da. Isonga adi kayo emeg-egyat, tan addawi ay nabanbanol di esa ya esa en dakayo mo kaad-adon di boding!”

### *Din Mangipodno Ay Mamati En Jesus Ya Din Mangisaot* (Mat. 10:32-33; 12:32; 10:19-20)

<sup>8</sup> Intoloy Jesus ay nangwani, “Kanak en dakayo, olay sino ay mangipodno sin sangoanan di kaipoipogaw en mamati en sak-en ay Anak di Ipogaw, siya met laeng di ipodnok sin sangoanan di aanghel en Diyos. <sup>9</sup> Ngem din mangwani en adi na am-ammos sak-en sin sangoanan di kaipoipogaw, siya abe di ibagak sin sangoanan di aanghel en Diyos.

<sup>10</sup> “Olay sino di mangipalawlaw en sak-en ay Anak di Ipogaw et mabalin ay mapakawan din basol na ay sana, ngem din mangipalawlaw pay sin Ispirito Santo et adi mapakawan basol na.

<sup>11</sup> “Mo depapen das dakayo ta en da idarum dakayo sin sinagoga ya sin sangoanan di gogobernador ya odom ay tuturay, adi kayo madandanagan si isongbat yo ya ibaga yo.

<sup>12</sup> Tan sin doy ay oras, ipaammon din Ispirito Santo en dakayo din kosto ay ibaga yo.”

### *Din Pangarig Maipanggep Sin Baknang Ay Naong-ong*

<sup>13</sup> Pag kanan di esa ay lalaki ay nakisinop sin kaipoipogaw, “Apo maestro, ibagam kod sin agik ta ibingayanas sak-en sin tawid mi.”

<sup>14</sup> Ngem kanan Jesus ay sinombat, “Ay tan wada aya di lebbeng ko ay mangiosay en dakayo ta say maibingay ay kosto din tawid yo? Maga met.” <sup>15</sup> Pag nan itoloy ay mangwani en daida am-in, “Siliban yo ta adi kayo masolisog ay man-gamgam si okan di iib-a yo, tan din biyag di ipogaw et adi maibasar sin kaad-adon di bonag na, olay mo sobra di kinabaknang na.”

<sup>16</sup> Pag dad-aten Jesus din pangarig ay nay en daida. Kanana, “Wada di esa ay baknang ay ad-ado ya siged di apit na. <sup>17</sup> Isonga kananas nemnem na, ‘Sino ngin di iyat ko? Tan nay kolang di agamang ko si pangigtoak sin am-in ay apit ko. <sup>18</sup> A, siya na baw di iyat ko. Bakasek am-in ay agamang ko ta asiak mansaad si daddadakke ta say omanay di pangidolinak sin am-in ay apit ko ya din bonag ko abe.’ <sup>19</sup> Asiak kanan si nemnem ko, ‘Nagasatak kayman ay ipogaw! Omanay dana ay siged ay indodolin ko si piga ay tawen. Namnam-ayek ngarud di biyag! Mangamanganak, ominoinomak, ya gan-ganasek et

anggoy!’<sup>20</sup> Ngem pag kanan Diyos en sisya, ‘Naong-ong ka ay ipogaw, matey ka met ed wani ay labi. Sino ngin di mangon-od sin am-in dana ay indodolin mo?’ ”

<sup>21</sup> Pag ipaanongos Jesus ay nangwani, “Siya na di maamag sin ipogaw ay mangidodolin si kinabaknang na para sin awak na, ngem baken baknang sin pangilan Diyos.”

### *Din Pangay-ayowanen Diyos En Daida Ay Mantalek En Sisya*

*(Mat. 6:25-34)*

<sup>22</sup> Pag kanan Jesus sin pasolot na, “Siya na di begew ay kanak en dakayo, adi kayo madandanagan si makan ya maibado ay kasapolan yo isnan biyag ay nay. <sup>23</sup> Tan addawi ay nabanbanol din biyag yo mo din makan, ya nabanbanol met abe din awak yo mo din bado. <sup>24</sup> Nemnemen yo din titit, adi da man-esek ya man-ani, iwed abe di baeg ya agamang da, ngem laton ay adi da madagdagaangan, tan idawdawtan Diyos daida si kanen da. Addawi met ay nabanbanol kayo mo din titit, ay baken siya? <sup>25</sup> Di esa pay, olay mo kankanayon ay mandandanag kayo, ay mabalin aya ay paandoen yo di biyag yo si olay esa ay oras? <sup>26</sup> Isonga mo adi yo kabaelan di olay esa ay oras, adi kayo koma madandanagan si odom ay kasapolan yo.

<sup>27</sup> “Ilaen yo din iyat di sabsabong ay madakdake. Adi da man-oblá ya man-abel si bado da, ngem kanak en dakayo en olay si Ari Solomon ay palalo di kinabaknang na et magay bado na ay kaman din kinapintas di esa sin nay da ay sabsabong.\* <sup>28</sup> Mo kaman nidi din kinapintas ay idawdawat Diyos sin nabeas ay wada ed wani ya mapooan si bigat, ay baken sigsigurado ngata ay ammo na ay mangidawat si bado yo? Apay ngin ngarud ay at-atik et anggoy di talek yo? <sup>29</sup> Isonga din kanen yo ya inomen yo et baken siya koma din kaimongsanan di nemnem yo ya pandandanagan yo, <sup>30</sup> tan say gamgamgamen din kaipoipogaw ay adi nangammo en Diyos. Ngem mo si dakayo pay et ammon din Ama yo ed langit ay masapol yo am-in dana. <sup>31</sup> Isonga imongsan yo koma di nemnem yo sin panturayan Diyos et idawat na abe dana en dakayo.

<sup>32</sup> “Adi kayo aben emegyat, olay mo at-atik kayo, tan ninemnem Diyos ay lak-amen yo din panturayana. <sup>33</sup> Isonga ilako yo din bonag yo ta idawat yo din lako na sin nabibiteg, et maisaganaan kayo si pitaka ay adi kadadael ay pangidolinan si kinabaknang yo ed langit. Isdi et adi makmaksayan, tan magay mangakew ay makasag-en ya maga abe di manadael. <sup>34</sup> Tan din kad-an di kinabaknang yo et siya abe di kad-an di nemnem yo.”

### *Din Nakasagana Ay Baa*

<sup>35-36</sup> Intoloy Jesus ay nangwani sin papasolot na, “Masapol ay nakasagana kayo ay kaman baa ay manman-ed sin among da ay en nakikasal. Nanbabado da ya nansisilaw da ta say mo somaa din among da ya mantogtog, mabalin ay bokatan da din pantew ay dagos. <sup>37-38</sup> Nagasat da ay baa mo datngan din among da ay manman-ed ya nansasagana, olay mo gawan di labi ono maladladaw pay di somaaana. Kanak en dakayo en mansokat din among da et patokdoena din baa na ay sana ta say pakanenas daida.

<sup>39</sup> “Nemnemen yo abe na: mo ammon koma din akin beey din oras ay domatngan di mangakew, nakasagana koma ta adi makasgep din mangakew. <sup>40</sup> Dakayo abe, masapol ay mansasagana kayo, tan omaliak sin oras ay adi yo namnamaen ay omaliak.”

### *Din Matalék Ya Adi Katalék Ay Baa*

*(Mat. 24:45-51)*

<sup>41</sup> Pag kanan Pedro, “Apo, ay dakami anggoy di nangiturongam sin pangarig ay sana ono am-in ay ipogaw?”

<sup>42</sup> Sinongbatan Jesus sisya ay nangiarig, “Din matalék ya masirib ay baa et sisya di dotokan din among na ay makaammo sin odom ay baa ya mangidawat si kanen da si inagew. <sup>43</sup> Nagasat din sana ay baa mo somaa din among na ya datnganas sisya

\* 12:27 1 Aari 10:4-7.



ay mangam-amag sin obla ay naitalek en sisya. <sup>44</sup> Tet-ewa nan ibagak en dakayo ay ipangaton din among nas sisya ta say makaammo sin am-in ay bonag na. <sup>45</sup> Ngem mo kaspangarigan lawa din sana ay baa, kananas nemnem na, ‘Mabayag pay samet di pantaolian din among ko.’ Et palipaligatena din iib-a na ay baa ay lallalaki ono babbabai ya dowan aben mangamangan, ominoinom ya manbetebeteng. <sup>46</sup> Pag et kataoli din among na sin agew ya oras ay adi namnamaen din baa ay sana. Et peslenas sisya ta say makilak-am sin dosan di adi mamati.

<sup>47</sup> “Din baa ay makin ammo sin layden di among na ay amagena, ngem adi na ilogi ay tongpalen et madosa si ad-ado ay soplit. <sup>48</sup> Ngem din baa ay adi makin ammo sin layden di among na ay amagena et bomasol si maikari si soplit, masoplit met laeng, ngem atatik. Tan din ipogaw ay naitalkan di ad-ado, ad-ado abe di manamna ay mapo en sisya, ya din naitalkan pay di ad-ad-ado et ad-ad-ado abe di manamna ay mapo en sisya.”

*Si Jesus Di Mangipasian Sin Kaipogaw*  
(Mat. 10:34-36)

<sup>49</sup> Kanan aben Jesus ay nangiarig, “Inmaliak ay mamoo isnan daga et laydek ay enggay manbidbidang koma ed wani. <sup>50</sup> Ngem masapol ay mannam-osak si ligat agan-o et nay nadadagsenanak enggana ay makdeng. <sup>51</sup> Kanan yon samet en inmaliak ay mangiali si talna isnan daga, ngem baken. Inmaliak ay mangipasian sin kaipogaw. <sup>52</sup> Isonga manlogi ed wani mankinontra da. Mo lima da ay sinpamilya, kontraen din tolo din dowan, ya din dowan et kontraen da abe din tolo. <sup>53</sup> Din sin-ama ya sin-ina et man-iibaw da ya siya abe din sinkakatogangan. Mankikinontra da am-in.”†

*Din Kailasinan Di Timpo*  
(Mat. 16:2-3)

<sup>54</sup> Pag kanan aben Jesus sin kaipogaw, “Mo ilaen yo di liboo ay mapmapo sin diposan di agew, kanan yo en, ‘Omodan samet,’ et man-odan tet-ewa. <sup>55</sup> Mo ammo yo abe ay mapmapo din dagem ed abagatan, kanan yo en, ‘Palalon samet ay omatong,’ et temet-ewa.‡ <sup>56</sup> Dakayo ay agin lalaing! Mo mailasin yo din sinyal ed daya ya sin daga maipanggep sin timpo, apay ngarud ay adi yo ammo din olog di sinyal ay inappailan Diyos maipanggep en sak-en?”

*Mankapya Koman Di Ipogaw Ta Adi Maidarum*  
(Mat. 5:25-26)

<sup>57</sup> Intoloy Jesus ay nangiarig, “Nemnemen yo koma din kosto ay amagen yo. <sup>58</sup> Kaspangarigan, mo waday mangiey en sik-a ed korti ta say idarum daka begew si otang mo, ipakat mo koma di kabaalam ay makikapya en sisya mo wada kayo pay laeng sin danan. Tan mo maga pay, goyoden daka sin sangoanan di howis, et pag ipolang din howis sik-a sin polis ta say ibalod daka. <sup>59</sup> Tet-ewa met ay adi ka makabala sin balodan enggana ay bayadam din am-in ay otang mo.”

## 13

*Masapol Ay Manbabawi*

<sup>1</sup> Sin nangit-itdoan Jesus en da naey ay banag, wada da di sinmawang sin kad-ana, et dinad-at da en sisya din inyat Gobernador Pilato ay nangipapse si taga-Galilea sin nangidatdatonan das animal en Diyos. <sup>2</sup> Kanan Jesus, “Kanan yon samet ay din nakateyan din taga-Galilea ay doy et ipaila na ay madagdagsen di basol da mo din am-in ay iib-a da ay taga-Galilea. <sup>3</sup> Ngem baken tet-ewa. Kanak en dakayo, mo adi

† 12:53 Mikias 7:6. ‡ 12:55 Sin ilin di Judio, mapo din odan sin diposan di agew, tan say kad-an di baybay. Sin abagatan di ili da abe et say kad-an di annawa ay kadardaratan ay palalo ay man-atong.



kayo ibabawi din basbasol yo, mais-o din dosa yo sin dosa da, tan malitaw kayo am-in. <sup>4</sup> Nemnemen yo abe din sinpo ya wao ay nagabonan sin nadadaelan di nakayang ay beey ed Siloam ay sakop di Jerusalem. Ay layden nina ay kalien en madagdagsen di basol da mo din am-in ay kailian da? <sup>5</sup> Kanak en dakayo, mo adi kayo ibabawi din basbasol yo, malitaw kayo ay kaman met laeng si daida.”

### *Din Pangarig Maipanggep Sin Kaiw Ay Adi Manlames*

<sup>6</sup> Pag dad-aten Jesus din pangarig ay nay en daida. Kanana, “Wada di esa ay ipogaw ay gomabgabay di kaiw ay igos sin daga na. Sin kosto koma ay panlamsana, ena inila mo waday lames na, ngem maga. <sup>7</sup> Isonga kanana sin laglagboana, ‘Ilaem, tolo ay tawen di inmal-aliak ay en mangil-ila mo nanlames din kaiw ay nay, ngem iwed polos dinatdatngak. Poyoem ngarud, tan ab-abosena din abonon di lota anggoy.’

<sup>8</sup> “Ngem kanan et din mambantay ay sana, ‘Apo, anosan ta kod si olay esa pay ay tawen anggoy ta downak sokayen din poona ya abonoak. <sup>9</sup> Mo manlames si taw-en, mayat, ngem mo maga, asi ka pay dedan poyoem.’ ”

### *Din Babai Ay Binok-ong Di Anito*

<sup>10</sup> Waday esay Sabado ay pan-ibbayan et man-it-itdo si Jesus sin sinagoga. <sup>11</sup> Wada abes di di babai ay binok-ong di anito si sinpo ya wao ay tawen et adi makaoyad. <sup>12</sup> Idi inilan Jesus sisya, inayagana et kanana, “Ina, mailatonan ka sin sakit mo!” <sup>13</sup> Pag nan kapayen sisya et nan-oyad ay dagos et nandaydayaw en Diyos.

<sup>14</sup> Asi et manbongget din ap-apon di sinagoga, tan inagasan Jesus din babai ay doy yan agew ay pan-ibbayan. Isonga pag nan kanan sin kaipoipogaw, “Enem ay agew anggoy di pan-oblaan tako koma. Siya koma ngarud dana ay agew di omalian yo ay panpaagasan ay baken din pan-ibbayan.”

<sup>15</sup> Sinongbatan Jesus sisya et kanana, “Dakayo ay agin sisiged, iwed samet di olay esa en dakayo si adi mangiwayway si animal na ta ena pan-inomen sin agew ay pan-ibbayan. <sup>16</sup> Yan nay ay wada en datako din nay polin Abraham ay kaman binalod Satanas si sinpo ya wao ay tawen. Ay siya mo lawa mo naiwayaan sisya sin sakit na sin pan-ibbayan?” <sup>17</sup> Enggay nabainan din nangonkontra en Jesus sin nay songbat na downan pay peteg di ragsak din kaipoipogaw sin am-in ay nakaskasdaaw ay inam-amag na.

### *Din Kaiarigan Di Panturayan Diyos*

*(Mat. 13:31-33; Mar. 4:30-32)*

<sup>18</sup> Pag kanan Jesus, “Sino ngata di pangiarigak sin panturayan Diyos? Sinoy iso na? <sup>19</sup> Maiarig si esa ay bin-in di mostasa ay kitkittoy ay inis-ek di esa ay ipogaw sin nom-a na. Ginmabay enggana ay kaman kaiw di kadakdake na et mabalin ay man-obong di titit sin panga na.”

<sup>20</sup> Pag kasin kanan Jesus, “Sino pay di pangiarigak sin panturayan Diyos? <sup>21</sup> Kaman labadura ay inlaok di esa ay babai sin ad-ado ay arina ta say palbagena am-in.”

### *Din Nalipit Ay Segpan*

*(Mat. 7:13-14, 21-23)*

<sup>22</sup> Pag itoloy Jesus ay emey ed Jerusalem ngem manseparepad sin lablabsana ay il-ili ay man-it-itdo. <sup>23</sup> Wada di namoot en sisya, “Apo, ay at-atik anggoy di maisalakan?”

Sinombat si Jesus et kanana, <sup>24-25</sup> “Ipakat yo din kabaelan yo ay senggep sin nalipit ay pantew ed langit tan wada pay laeng di waya yo. Tan manlogi sin pangin-eban din akin beey, ad-ado di mamadas ay senggep ngem adi da kabaelan. Olay mo mantogtog da ay mangmangwani, ‘Apo, bokatam kod,’ kanana ay mangisongbat, ‘Adiak ammo si dakayo ya din napoan yo.’ <sup>26</sup> Pag dan kanan, ‘Yan doy adi ay dakami din nakikikan ya nakiin-inom en sik-a. Nan-itdo ka pay sin ili mi!’ <sup>27</sup> Ngem dowana et kasin kanan, ‘Adiak met ammo si dakayo ya din napoan yo. Komaan kayo issa, dakayo am-in ay

mangam-amag si lawa!’ <sup>28</sup> Mo ilaen da si da Abraham en Isaac ya si Jacob ya din am-in ay mamadto ay naitatapi sin panturayan Diyos, palalo ay man-anog-og da downan da aben man-gaygayetget si bonget da, tan mo daida pay et maiwasit da. <sup>29</sup> Ngem ad-ado pay di maitatapi ay makiokob sin panturayan Diyos ay mapo sin belaan ya kadiposan di agew ya ed amyanan ya ed abagatan. <sup>30</sup> Tan wada da ed wani di nababa ay maipangato, ya wada da abe ed wani di nangato ay maibaba.”

### *Din Layad Jesus Sin Man-ili Ed Jerusalem*

*(Mat. 23:37-39)*

<sup>31</sup> Sin kosto ay nangwanian Jesus isdi, sinmawang di odom ay Fariseo, et kanan da en Jesus, “Agpos mo komaan kas na, tan layden kanon Herod ay mangipapse en sik-a.”

<sup>32</sup> Ngem kanan et Jesus en daida, “En kayo ibaga sin sana ay nasikap en itoltoloy ko pay laeng ay mangipakaan si aanito ya mangagas sin mansaksakit, ngem adi mabayag, tan dandani ay kedngkek din oblak. <sup>33</sup> Aw, adiak met matey isna mo adi et itoltoloy ko enggana ay somawangak ed Jerusalem, tan kaman adi mabalin ay matey di mamadto mo baken isdi.”

<sup>34</sup> Pag kanan Jesus, “Ay apaw kayo ay taga-Jerusalem ay namigpigpig ya namnamse sin mamadto ya odom ay inbaan Diyos! Namin piga ay laydek ay sinopen ya ayayowan an dakayo ay kaman din iyat di oboan ay manakoko sin an-ak na, ngem sinigaan yo! <sup>35</sup> Isonga makaoway kayo, tan taynan Diyos dakayo. Kanak en dakayo en adi kayo kasin omil-ila enggana sin tapin di agew ay pangibagaan yo en, ‘Madaydayaw din nay omali ay inbaan Diyos.’ ”

## 14

### *Din Kasin Nangagasan Jesus Si Mansakit Sin Agew Ay Pan-ibbayan*

<sup>1</sup> Sin esa ay Sabado ay pan-ibbayan, inmey si Jesus ay en nakikan sin beey di esa ay nangato ay Fariseo, et insisin-eng das sisya mo sinoy amagena, <sup>2</sup> tan wada abes di sin sangoanana di esa ay lalaki ay linmadag di awak na. <sup>3</sup> Kanan Jesus sin mamaestron di linteg ya Fafariseo ay wadas di, “Ay ipalobos di linteg tako ay agasan di mansakit sin agew ay pan-ibbayan?” <sup>4</sup> Ngem ginmiginek da. Isonga kinapay na din mansakit ay doy et nailatonan, et pag nan pasaaen.

<sup>5</sup> Pag kanan Jesus en daida, “Ya kod mo waday anak yo ono olay baka yo si matekdag sin bobon, dalasen yo met ay en enaten olay mo agew ay pan-ibbayan, ay baken siya?”

<sup>6</sup> Et magay iyat da ay manongbat.

### *Bibilin Sin Maayagan Ya Man-ayag*

<sup>7</sup> Inilan Jesus ay din odom ay inayagan din Fariseo et pinili da din kasisigedan ay tomokdoan da, isonga binagaanas daida am-in ay nangwani, <sup>8</sup> “Mo waday mangayag en sik-a ay makipangan, adi ka koma en makitokdo sin tomokdoan di nankangangato ay ipogaw tan mo et waday naayagan si nangatngato pay mo sik-a. <sup>9</sup> Tan mo somawang din nangatngato ay ipogaw, asi omali din bemeey en sik-a yan kanana, ‘Idenden mo kod ta say tomokdoan en naey.’ Adi pay kababain, tan masapol ay demenden ka ay en makitokdo sin benget. <sup>10</sup> Isonga din amagem koma mo maayagan ka ay makipangan et en ka makitokdo sin benget. Asi makaammo din bemeey ay mangwani en sik-a, ‘Lawlawa sa ay tokdoan, omali kas na tan naey di siged.’ Isonga madayaw ka sin pangilaan din odom ay nakipangan. <sup>11</sup> Tan din mangipapangato sin awak na et maibaba, ngem din mangibaba pay sin awak na et maipangato.”

<sup>12</sup> Pag kanan Jesus sin nangayag en sisya, “Mo man-ayag ka si makiokob en sik-a, baken anggoy di gagayyem mo, toton-od mo ya babaknang ay kailiam di ay-ayagam, tan en da aben ayagan sik-a et say masobalitan ka. <sup>13</sup> Din iyat mo koma et ayagam abe din nabibiteg, din paralitiko, din napilay, ya din nagodab, <sup>14</sup> et nagasat ka. Tan olay mo

adi da makasobalit en sik-a, magon-gonaan ka pay dedan, tan si Diyos di manobalit sin agew ay kasin katagoan di siged ay ipogaw.”

*Din Nakipangan Koma Ay Nanpampambal*  
(Mat. 22:1-10)

<sup>15</sup> Idi dinngen di esa ay nakiookob din inbilin Jesus ay sana, kanana en sisya, “Aw od kayman, palalo ay nagasat din maiokob sin panturayan Diyos.”

<sup>16</sup> Asi et songbatan Jesus sisya ay nangiarig. Kanana, “Wada di esa ay nakay ay nansagana ay manpakan si ad-ado, et ad-ado abe di inayagana. <sup>17</sup> Idi naisagana am-in, inbaa na di en nangibaga sin sangaili, ‘Omali kayo et ta en tako mangan.’ <sup>18</sup> Ngem din da doy ay naayagan et sinodsod di esa ya esa ay nanpambal. Kanan di esa, ‘Pasinsiya, tan kalaklakok si daga et masapol ay enak ilaen.’ <sup>19</sup> Kanan aben di esa, ‘Pasinsiya, tan nilakoak di sinbakid ay baka et emeyak ta eyak kod ipadas ay mangiobla en daida.’ <sup>20</sup> Di esa abe et kanana, ‘Kaas-asawak, isonga adiak makipangan.’

<sup>21</sup> “Idi siya di, pag mantaoli din baa ay sana et inpadnge na am-in sin among na. Palalo di bonget din among na ay sana et kanana sin baa na, ‘May ngarud, dalasem ta emey ka sin kalsada ya markitan di ili ay en mangayag si nabibiteg, paralitiko, nagodab ya napilay ta omali da ay makikan.’ <sup>22</sup> Et inmey. Maaw-awni pay, ena kanan sin among na, ‘Apo, tinongpal ko din inbilin mo, ngem wada pay di waya para sin odom.’ <sup>23</sup> Pag kanan din among na, ‘Emey ka ngarud sin kompormi ay ad-addawi ay danan ya lugar ta en ka pay man-awis si odom ay en makikan ta say mapno nan beey ko. <sup>24</sup> Kanak en sik-a en iwed di olay esa en daida ay inayagak sin damo ay en manamtam sin insasaganak ay makan.’ ”

*Din Ligat Di Manbalin Si Pasolot En Jesus*  
(Mat. 10:37-38)

<sup>25</sup> Idi namingsan, ad-ado di kaipoipogaw ay mangon-onod en Jesus. Sinagong nas daida yan kanana, <sup>26</sup> “Olay sino di mayad ay maitapi en sak-en ta manbalin si pasolot ko, masapol ay dakdake din layad na en sak-en mo din layad na en da ama na en ina na, si asawa na ya anan-ak na, din toton-od na, ya olay din awak na, tan mo maga, adi mabalin ay pasolot ko. <sup>27</sup> Tan adi mabalin ay manbalin di ipogaw si pasolot ko mo adi na tiliden din krus na ta asi makiey en sak-en.

<sup>28</sup> “Masapol ngarud ay nemnemen yo agan-o din ligat di manbalin si pasolot ko. Kaspangarigan, mo waday mangisaad en dakayo si dakdake ay beey, kowintaena agan-o din banol na mo omanay din pilak na si gastosena enggana ay makdeng. <sup>29</sup> Tan mo adi na kowintaen dowan adi omanay pilak na, awni et makdeng din tokod di beey anggoy et adi makaitoloy. Adi pay din am-in ay mangil-ila et siyekan das sisya <sup>30</sup> ay mangwani, ‘E, ilaen yo kadi! Inlogi na et anggoy yan adi makaitoloy.’

<sup>31</sup> “Din esa abe ay kairigana, mo wada di ari ay sinpo ay libo di soldado na ya en makigobat sin ari ay dowanpo ay libo di soldado na, nemnemen met agan-o mo kaya na ay abaken din kagobat na. <sup>32</sup> Mo pasalena ay adi makaabak, omibaa si en mangabat sin kaibaw na ay sana mo addawi da pay laeng ta en da pooten mo sinoy layden da ta say mankapyo da. <sup>33</sup> Iso na abe en dakayo mo layden yo ay manbalin si pasolot ko, ibilang yo koma din ligat on-ona. Tan adi mabalin ay manbalin di ipogaw si pasolot ko mo adi na taynan am-in din wada en sisya.”

*Maiarig Din Pasolot Jesus Sin Asin*  
(Mat. 5:13; Mar. 9:50)

<sup>34</sup> Nan-iarig kasin si Jesus ay nangwani, “Din asin et waday silbi na, ngem mo omamsit, adi met mabalin ay pataolien din pait na. <sup>35</sup> Isonga iwed polos silbi na olay sin lota ono para abono. Masapol ay maiwasit. Dakayo ay manmannge, nemnemen yo san dinnge yo!”

## 15

### *Din Nalitaw Ay Karnero (Mat. 18:12-14)*

<sup>1</sup> Ad-ado di mansingsingil si bowis ya din odom ay kanan di Judio en managbasol ay em-emey ay mandengdenge sin it-itdon Jesus. <sup>2</sup> Isonga nanmaymayotmot din Fafariseo ya mamaestron di linteg ay mangmangwani, “Ilan yo man nan ipogaw ay nay! Apay nga laylaydena ay makingalngalat sin managbasol ay ipogaw ya olay makikikan en daida!”

<sup>3</sup> Isonga pag dad-aten Jesus din pangarig ay nay en daida. Kanana, <sup>4</sup> “Kaspangarigan, mo wada en dakayo di nangin oka si sin-gasot ay karnero yan malitaw di esa, sino ngin di amagena? Adi na ngata taynan din siyamapolo ya siyam sin pastolan ta ena anapen din nalitaw enggana ay datngena. <sup>5</sup> Et mo datngena pay, peteg di ragsak na et tilidena <sup>6</sup> ay mangisaa. Pag nan ayagan din gagayyem na ya katokmang na et kanana, ‘Manragsak tako, tan nay dinteng ko din nalitaw ay karnerok!’ ” <sup>7</sup> Inpaanongos Jesus, “Kanak en dakayo ay peteg di ragsak da ed langit mo manbabawi di esa ay managbasol mo din ragsak da sin siyamapolo ya siyam ay nalinteg ay ipogaw ay adi da masapol ay manbabawi.”

### *Din Nalitaw Ay Palata*

<sup>8</sup> Intoloy Jesus ay mangiarig, “May kod mo waday babai ay wada di sinpo di palata na ya kambaw et nilitaw na di esa, sino di amagena? Man-eteg si silaw yan estena ay manigid sin beey na ay manganaanap enggana ay datngena, ay baken siya? <sup>9</sup> Et mo datngena, pag nan ayagan din gagayyem na ya katokmang na et kanana, ‘Makiragsak kayo en sak-en, tan nay dinteng ko din palatak ay nalitaw!’ <sup>10</sup> Kaman nina met laeng di,” kanan Jesus, “ay manragsak din aanghel en Diyos mo manbabawi di olay esa ay managbasol.”

### *Din Nasangaw Ay Anak*

<sup>11</sup> Pag itoloy Jesus ay mangidad-at sin pangarig ay nay. Kanana, “Wada di esay nakay ay doway anak na ay lalaki. <sup>12</sup> Kanan din iyogtan, ‘Ama, alaek kod din tawid ko.’ Isonga pag bingayen ama da din tawid da ay sin-agi.

<sup>13</sup> “Idi inmey di piga ay agew anggoy, inlakon din iyogtan ay sana din am-in ay bingay na et inmey sin addawi ay ili. Idi sinmawang isdi, ginastastos na din pilak na si niloloko ay kabibiyag. <sup>14</sup> Idi naabos pilak na, dinmateng di palalo ay betil sin ili ay kad-ana, ya nakoskosa abes sisya. <sup>15</sup> Isonga en nakilagbo sin esa ay man-ili isdi et inbaa nas sisya sin pastolan ay kad-an di bisaang ta banbantayanas daida. <sup>16</sup> Begew si dagaang na, laydena ay mangan koma sin lames di kaiw ay kankanen di bisaang, ngem iwed indawdawat da en sisya.

<sup>17</sup> “Pag mainemneman et kanana si nemnem na, ‘Am-in ay laglagboan amak et sopra di kankanen da, yan nay pay ay wadaak isna ay matmatey si dagaang na. <sup>18</sup> Olay et somaaak ta ibagak en amak: Ama, nanbasolak en Diyos ya siya abe en sik-a. <sup>19</sup> Adiak kayman maikari ay maibilang ay anak mo, ngem mo mabalin koma, makilagboak kod en sik-a.’

<sup>20</sup> “Sin nannemnemanas di, nanlobwat ay mantaoli sin kad-an da ama na. Idi addawi pay laeng, tinamang ama na ay napalalo di seg-ang na en sisya. Isonga nanagtag ay en mangabat en sisya et kinawe na dowan ongoan. <sup>21</sup> Pag kanan din anak na, ‘Ama, nanbasolak en Diyos ya siya abe en sik-a. Adiak kayman maikari ay maibilang ay anak mo.’

<sup>22</sup> “Ngem inayagan ama na din baa na yan kanana, ‘Dalasen yo. En kayo alaen din kasisigedan ay bado ta ipabado yo. Singsingan yo abe ya dowan yon sapatosan sisya.

<sup>23</sup> Asi kayo en alaen din malames ay kilaw ay baka ta paltien yo ta say isida tako ya

manragragsak tako, <sup>24</sup> tan din anak ko ay nay et kaman natey, ngem wada baw ay matmatago. Nalitaw sisya, ngem nay ay sinmawang.’ Pag dan ilogi ay manragragsak.

<sup>25</sup> “Ngem din pangpangoana et wada pay laeng sin kapaypayewan. Idi somassaa, dinnge na di mansasala, <sup>26</sup> isonga inayagana di esa ay baa ta pootena mo sinoy amagen da. <sup>27</sup> ‘Sinmaa din iyogtan mo,’ insongbat din baa ay sana, ‘isonga inpaltian ama yo si malames ay baka tan laton ay inpadateng na ay magay napasamak en sisya.’

<sup>28</sup> “Pag manbonget din pangpangoan et sigaana ay senggep. Isonga binmala si ama da ay manpakpakaasi ay mangayag en sisya. <sup>29</sup> Ngem sinongbatana ay nangwani, ‘Ay daetan! Pigay tawen ay nan-ob-oblaak ay kaman bag-en mo ya pinatpatik am-in din inbilbilin mo. Ngem iwed polos indawat mo si olay anak di kalding ta way pakiragragsakak koma sin gagayyem ko. <sup>30</sup> Ngem nay sinmaa pay din nay anak mo ay nangipakawas ay nangibabbabai sin gamgameng mo, et sisya pay di inpaltiam sin malames ay baka tako!’

<sup>31</sup> “Pag kanan ama na, ‘Anak ko, kankanayon ay nantetee kas na sin kad-ak. Am-in di wada en sak-en et okam met laeng. <sup>32</sup> Ngem masapol met ay manragragsak tako, tan din nay iyogtan mo ay kaman natey et nay baw ay matmatago. Nalitaw sisya ngem nay sinmawang.’”

## 16

### *Din Nasikap Ay Makaammo Sin Gamgameng Di Baknang*

<sup>1</sup> Pag nan-iarig kasin si Jesus sin papasolot na et kanana, “Wada di esa ay oblantis di baknang ay makaammo sin kinabaknang na. Asi et wada di nangipabasol en sisya ay nangwani en gasgastosena din gamgameng di baknang ay sana. <sup>2</sup> Isonga inpaayag din baknang et kanana en sisya, ‘Sino na ay nadamag ko maipanggep en sik-a? Ialim din listaan di inay-ayowanam, tan kaanek sik-a sin oblam.’

<sup>3</sup> “Pag kanan din oblantis ay sana sin awak na, ‘Intoy iyat ko ngin ed wani, tan nay kaanen among kos sak-en sin oblak? Adiak kabaelan ay manpala yan mabainak abe dedan ay makipalpalimos. <sup>4</sup> A, siya na baw di amagek ta say mo makaanak sin oblak, wada pay dedan di gagayyem ko ay mangayag en sak-en sin bebbeey da.’

<sup>5</sup> “Pag na et ayagan di am-in ay nakaotang sin among na. Kanana sin esa, ‘Piga di otang mo sin among ko?’ <sup>6</sup> ‘Sin-gasot ay lata ay mantika,’ insongbat na. ‘Naey di risibom. Tomokdo ka et ta isolat mo en limapolo,’ kanan din oblantis ay sana. <sup>7</sup> Kanana abe sin esa, ‘Sik-a pay abe, piga di otang mo?’ ‘Sinlibo ay salop ay bakakew,’ insongbat na. Pag kanan din oblantis, ‘Naey, alaem risibom et isolat mo en wao ay gasot.’

<sup>8</sup> “Idi inammoan din among na, initek na din oblantis ay sana sin kinasikap na ay mannemnem si katagoana. Tan tet-ewa ay din ipogaw ay adi mamati et nalalaing da ay makinigosyo sin iib-a da mo daida ay nasilawan di nemnem na,” kanan Jesus. <sup>9</sup> “Isonga ibilin ko ngarud en dakayo ay osalen yo din kinabaknang yo isnan daga ay pangayyeman yo sin iib-a yo ta mo domateng din agew ay magay kaosalan di pilak, awaten daka ed langit ay panteteean yo si eng-enggana.”

### *Din Kosto Ay Kaosalan Di Pilak*

<sup>10</sup> Intoloy Jesus ay nangwani, “Din matalek si at-atik et matalek abe sin ad-ado, ya din adi katalek si at-atik et adi aben katalek sin ad-ado. <sup>11</sup> Mo ngarud adi kayo katalek ay manggen si kinabaknang isnan daga, intoy iyat na ay maitalek en dakayo din tet-ewa ay kinabaknang? <sup>12</sup> Mo adi kayo aben matalek ay manggen sin gamgameng di odom, ay siya mo maidawtan ka abe si gameng ay okaem?”

<sup>13</sup> “Adi mabalin ay madodowa di among di bag-en, tan laylaydena din esa yan sigaana din esa. Patgena abe din esa dowanen laslasoyen din esa. Isonga adi mabalin ay pandesanan yo din pansilbian yo en Diyos ya din pilak.”



### *Din Inbagan Jesus En Daida Ay Fariseo*

(Mat. 5:31-32; Mar. 10:11-12)

<sup>14</sup> Idi dinngen din Fafariseo din nay inbagan Jesus, sinis-iyekan das sisya, tan laylayden da di pilak. <sup>15</sup> Pag kanan Jesus en daida, “Dakayo di mangipappaila sin kinalinteg yo sin kaipoipogaw, ngem ammon dedan Diyos din wada sin nemnem yo. Siliban yo tan din ibilang di ipogaw ay napateg et peteg ay sigaan Diyos.

<sup>16</sup> “Din linteg Moses ya din insolat di mamadto et naon-onodan enggana sin timpon Juan ay Mamonbonyag. Manlogis di abe, naikaskasaba din siged ay damag maipanggep sin panturayan Diyos, et ipapilit am-in di ipogaw ay maitapi. <sup>17</sup> Ngem nalaklaka pay dedan ay mankaiiwed din daga ya langit mo din kaaptikan ay kali sin linteg.”

<sup>18</sup> Kanan aben Jesus, “Mo sino ay lalaki di mangisian si asawa na ya dowan makiasawa si odom ay babai et bomasol sisya si kamalala. Iso na abe din lalaki ay mangasawa si babai ay naiidang et makabasol met laeng si kamalala.”

### *Din Baknang Ya Si Lazarus*

<sup>19</sup> Pag mandad-at si Jesus et kanana, “Wada di esa ay baknang ay manbabado si kanginaan ay bado et kankanayon ay mansidsida ya manragragsak. <sup>20</sup> Wada abe di nabiteg ay manngadan si Lazarus ay nabayabayangan di awak na. Inpapayag da sin pantew di baknang, <sup>21</sup> tan laydena ay mangan koma sin iwaswasit di baknang. Et baken anggoy nidi, tan olay din aso et en da dildilan din bayang na.

<sup>22</sup> “Idi natey din nabiteg ay sana, in-ey din aanghel sin kad-an Abraham. Idi natey abe din baknang, inigto da, <sup>23</sup> et inmey ed Hades ay kad-an di natnatey. Isdi et palalo ay mapalpaligatan sisya. Pag mantangad et inila na si Abraham sin ed addawi ya si Lazarus ay naidking en sisya. <sup>24</sup> Isonga inpigsa na ay nangwani, ‘Apo Abraham, masegang ka paabe ta ibaam si Lazarus ay sana ta itab-aw na din gomot na sin danom ta tedtedana din dilak ta say lomiteng. Tan nay palalo di ligat ko sin apoy ay nay.’

<sup>25</sup> “Ngem kanan et Abraham, ‘Nemnemem ay anak ko ay sin kamatagom, wada en sik-a din am-in ay siged ay laylaydem, ya mo si Lazarus pay et pag ligat di nilaklak-am na. Ngem ed wani, gan-ganasena isna ya sik-a pay di mapalpaligatan issa. <sup>26</sup> Baken pay anggoy nasa, tan wada di annaannawa ay dayokong ay nangikakasin en datako ta say din mayad ay emey issa ay mapos na et adi da makaeey, ya adi aben makaalis na din mapo sin kad-am.’

<sup>27</sup> “Pag kanan din baknang, ‘Kedawek ngarud en sik-a ay apo ta ibaam si Lazarus sin beey da amak, <sup>28</sup> ta say bagbagaana din lima ay aag-ik ay wadas di ta say adi da aben omalis na ay kad-an di palalo ay ligat.’

<sup>29</sup> “Pag kanan et Abraham, ‘Mo panggep din aag-im et wada din insolat Moses ya din insolat di mamadto ay mamagbaga en daida. Say ikaskaso da koma din kankanana da.’

<sup>30</sup> “ ‘Aw kayman, apo Abraham,’ kanan aben din baknang, ‘ngem adi met omanay sa. Mo wada koma di mapo sin kad-an di natey ay emey en daida, ibabawi da din basbasol da.’

<sup>31</sup> “Ngem pag kanan Abraham, ‘Mo adi da patpatien din insolat Moses ya din mamadto, adi da met maawis ay mamati olay mo waday kasin matago si natey.’ ”

## 17

### *Maipanggep Si Basol*

(Mat. 18:6-7,21-22; Mar. 9:42)

<sup>1</sup> Kanan Jesus sin pasolot na, “Wada kayman dedan di domteng ay solisog ay bomasolan di ipogaw, ngem kaseseg-ang pay din ipogaw ay pan-gapoan di solisog ay sana. <sup>2</sup> Agpos et mo tay-adan din bagang na si madagsen ay bato asi maitpig sin baybay mo din panolisogana si olay esa en da naey ay kababaan ay ipogaw. <sup>3</sup> Isonga siliban yo din am-amagen yo.



“Mo bomasol din ib-am, bagaam sisya, et mo manbabawi, pakawanem. <sup>4</sup> Olay mo mamin piga ay bomasol en sik-a si sin-agew, basta emey en sik-a ay mankombaba et masapol abe ay pakawanem.”

### *Maipanggep Si Pammati*

<sup>5</sup> Pag kanan din aapostol en sisya, “Apo, papigpigsuem kod nan pammati mi.” <sup>6</sup> Et kanana en, “Olay mo kitkittoy di pammati yo ay kaman din kakitkittoyan ay bin-i, mabalin ay kanan yo sin dakdake ay kaiw ay nay, ‘Gabotem san lamot mo et emey ka sin baybay ta say gomabayam,’ et ena tongpalen.”

### *Din Oblan Di Baa*

<sup>7</sup> Intoloy Jesus ay nangwani, “Mo kaspangarigan wada di esa en dakayo ay waday baa na ay man-al-alado ono manpaspastol si karnero, mo somawang din baam ay sana ay napo sin nan-ob-oblaana, ay kanam aya en sisya, ‘Omali ka et ta mangan ka?’ <sup>8</sup> Baken met, mo adi et kanam, ‘En ka mansokat ta asi ka isagana din kanek ya isangom en sak-en enggana ay makakanak, asi ka pay mangan abe.’ <sup>9</sup> Ay man-iyaman ka pay en sisya mo tinongpal na din inbilin mo? Maga adi! <sup>10</sup> Iso na abe en dakayo. Mo kindeng yo di am-in ay intogon Diyos ay amagen yo, kanan yo koma en, ‘Owat takon mababbaa. Inamag tako et anggoy din obla ay nanlebbengan tako.’”

### *Din Nangagasan Jesus Sin Sinpo Ay Mansakit Si Kaeegyat Ay Sakit Di Kodil*

<sup>11</sup> Idi em-emey da Jesus ed Jerusalem, indan da sin nanbeddangan di Samaria ya Galilea. <sup>12</sup> Somawang da pay sin esa ay ili, en inabat di sinpo ay mansakit si kaeegyat ay sakit di kodil. Pinnipika da sin dagdagas <sup>13</sup> yan kanan da ay nangibogaw, “Apo Jesus, maseg-ang ka paabe en dakami!”

<sup>14</sup> Idi inilan Jesus daida, kanana, “En kayo manpaila sin papadi ta ilaen da mo nakaan sakit yo.”\* Idi wada da pay laeng sin danan, nailatonan da.

<sup>15</sup> Idi inilan din esa en daida ay nakaan sakit na, nantaoli dowan ipigpigsu din kali na ay mangidaydayaw en Diyos. <sup>16</sup> Somawang pay sin kad-an Jesus et nandokmog ay nanyakog-ong sin sangoanana ay nan-iyaman en sisya. Din nantaoli ay sana et taga-Samaria.

<sup>17</sup> Pag kanan Jesus, “Sinpo da met di nailatonan. Into pay din siyam? <sup>18</sup> Apay nga maga da ay nantaoli ay man-iyaman en Diyos, owat et anggoy nan esa ay Gentil?” <sup>19</sup> Pag nan kanan sin lalaki ay doy, “Ipikam ta somaa ka. Din talek mo et say begew ay nailatonan ka.”

### *Din Panlogian Di Panturayan Diyos*

*(Mat. 24:23-28,37-41)*

<sup>20</sup> Sin namingsan wada da di Fariseo ay en nansalodsod en Jesus mo pig-an di panlogian di panturayan Diyos. Kanan Jesus, “Magay sinyal si mangipaila mo pig-an di panlogian di panturayan Diyos. <sup>21</sup> Maga abe di mangwani en, ‘Ilan, naey!’ ono ‘Ilan, dooy!’ Tan din katet-ewa na et enggay wada en dakayo din panturayan Diyos.”

<sup>22</sup> Pag nan kanan sin pasolot na, “Awni et domateng di timpo ay layden yo ay ilaen sak-en ay Anak di Ipogaw si olay sinkaattikan, ngem adi pay laeng mabalin. <sup>23</sup> Wada da di mangwani, ‘En kayo ilan, wadas di!’ ono ‘Omali kayo ta ilan yo, wadas na!’ Ngem adi yo kadin patpatien. <sup>24</sup> Tan din pantaoliak ay Anak di Ipogaw et kaman din somilap ay kimat ay maila sin am-in ay banda. <sup>25</sup> Ngem masapol ay lak-amek on-ona di ad-ado ay ligat ya dowan somigaan di ipogaw ay matmatago ed wani.

<sup>26</sup> “Din ogalin di ipogaw sin agew ay kasinak omalian et kaman din timpon Noe. <sup>27</sup> Tan sin doy ay timpo, intoltoloy da ay mangmangan ya man-in-inom ya man-aasawa enggana sin agew ay sinenggepan da Noe sin daong. Pag et malbeng din daga et nalned da am-in.† <sup>28</sup> Kaman aben sin timpo ay kawadan Lot ed Sodoma. Tan am-in da et

\* **17:14** Levitico 14:1-8. † **17:27** Genesis 6:5-8; 7:6-24.

intoltoloy da ay mangmangan ya man-in-inom, manlaktako ya man-ilaktako, man-es-esek ya mangisassaad si beey<sup>29</sup> enggana sin agew ay tinaynan da Lot din ili ay doy. Pag et natekdag di apoy ya manbidbidang ay bato ay makwani en sulfur ay napod langit et napooan da am-in.‡<sup>30</sup> Kaman nadi met laeng di mapasamak sin agew ay panpailaan din Anak di Ipogaw.

<sup>31</sup> “Sin agew ay doy, din wada sin bel-ayan di beey na et masapol ay adi senggep ay en manga sin bonag na. Din wada abe sin payew, adi koma somaa. <sup>32</sup> Nemnemen yo din napasamak sin asawan Lot. § <sup>33</sup> Din mangipatpateg sin awak na et matey met laeng, ngem din matey begew sin pammati na en sak-en et wada di biyag na ay iwed patingga na. <sup>34</sup> Ibagak en dakayo ay mo sin labi di omaliak ya wada di doway nandaag si esay katri, maa din esa yan mabay-an din esa. <sup>35</sup> Mo wada abe di doway babai ay manbaybayo, maa din esa yan mabay-an din esa. <sup>36</sup> Mo pay wada di doway lalaki ay man-ob-obla sin kapaypayewan, maa din esa yan mabay-an din esa.”

<sup>37</sup> Pag pooten din pasolot na en sisya, “Apo, intoy maamagan nina?”

Sinombat si Jesus ay nangiarig, “Olay intoy kad-an di natey et say kaagoman din titit ay mangan si natey.”

## 18

### *Din Nalasang Ya Din Howis*

<sup>1</sup> Pag dad-aten Jesus sin papasolot na din pangarig ay nay ta say itdo na en daida ay mankarkarag da koma si kankanayon ya adi da somadsadot. <sup>2</sup> Kanana, “Wada di howis sin esa ay ili ay adi polos emegyat en Diyos ya laslasoyena abe din gagait na ay ipogaw. <sup>3</sup> Wada abe di nalasang sin ili ay sana ay emeemey en sisya ay manpakpakaasi sin kalintegana ay mangmangwani, ‘Bomadang ka paabe ta adi omabak din kaibaw ko.’ <sup>4</sup> Nabayag ay adi inkaskason din howis, ngem sin naodi, kanana sin nemnem na, ‘Adiak kayman emegyat en Diyos ya laslasoyek abe din iib-ak ay ipogaw, <sup>5</sup> ngem gapo sin panisdistolboan di balo ay nay en sak-en, olay idawat ko en sisya din kedkedawena tan into et mo maomaak sin omalialiana.’ ”

<sup>6</sup> Pag ipaanongos Jesus, “Nemnemen yo na. Mo binadangan din lawa ay howis din balo ay doy, <sup>7</sup> adi pay masepsep ay badangan Diyos din ipogaw ay pinili na ay man-ad-adawag en sisya si inagew ya linabi. Ay taktakena aya din badang na? <sup>8</sup> Maga dedan, mo adi et idawat na ay dagos din kosto en daida. Ngem olay mo siya di, at-atik samet di napasnek di pammati da en sak-en mo omaliak kasin, sak-en ay Anak di Ipogaw.”

### *Din Fariseo Ya Din Mansingsingil Si Bowis*

<sup>9</sup> Dinad-at aben Jesus din pangarig ay nay en daida ay napnenapnek sin kinalinteg da ya dowan da pay laslasoyen din iib-a da. <sup>10</sup> Kanana, “Wada di doway ay ipogaw ay nanikid sin Timplo ay en mankararag. Din esa et Fariseo ya din esa et mansingsingil si bowis. <sup>11</sup> Idi sinenggep da, en pinmika din Fariseo ay naikakasin sin odom ay ipogaw yan nankararag ay nangwani, ‘Man-iyamanak en sik-a ay Diyos, tan bakenak kaman din odom ay ipogaw ay man-gamgam si baken dan oka ya manlablabsing si linteg ya makikamkamalala, ya bakenak aben kaman din nay mansingsingil si bowis. <sup>12</sup> Tan mo sak-en pay et mamim doway si dinominggo ay it-itpek di dagaang ko ya idawdawat ko abe en sik-a din inkasinpon di am-in ay lagbok.’ ”

<sup>13</sup> “Mo din mansingsingil si bowis pay et pinmika ed dagdagay ya adi mantangad ed langit mo adi et kepakepagenta din pagew na begew sin pangibabawiana sin basol na ay mangmangwani, ‘Ay Diyos, maseg-ang ka paabe en sak-en ay managbasol.’ ”

<sup>14</sup> Pag ipaanongos Jesus ay nangwani, “Ibagak en dakayo ay din inbilang Diyos ay nalinteg sin sinmaan da et din ipogaw ay nay ay baken din Fariseo. Tan din

‡ 17:29 Genesis 18:20–19:25. § 17:32 Genesis 19:26.

mangipapangato sin awak na et maipababa met laeng, ngem din mangibaba pay sin awak na et maipangato.”

*Din Namindisyonan Jesus Sin Anan-ak*

*(Mat. 19:13-15; Mar. 10:13-16)*

<sup>15</sup> Sin namingsan wada di nangiey en Jesus si an-ak da ta kapayena ya bindisyonanas daida. Ilaen pay din papasolot na et inandiyan da. <sup>16</sup> Ngem inayagan Jesus din anan-ak yan kanana sin pasolot na, “Itay-on yo ta omali din anan-ak en sak-en. Adi yo andiyan, tan din kaman dana di maitapi sin panturayan Diyos. <sup>17</sup> Tet-ewa nan ibagak en dakayo ay mo adi yo awaten din pangiturayan Diyos en dakayo ay kaman din iyat di anak ay mangawat, adi kayo polos maitapis di.”

*Din Lalaki Ay Nabaknang*

*(Mat. 19:16-30; Mar. 10:17-31)*

<sup>18</sup> Wada di ap-apon di Judio ay nangibaga en Jesus, “Sigid ka ay Apo, sinoy masapol ay amagek ta say wada en sak-en di biyag ay iwed patingga na?”

<sup>19</sup> Kanan Jesus, “Apay nga kanam en sigedak? Tan maga polos di siged mo adi si Diyos et anggoy. <sup>20</sup> Ammom din linteg Diyos ay kanana, ‘Adi ka makikamkamalala, adi ka manpespese, adi ka mangak-akew, adi ka mantistigo ay man-et-etek, ya dayawem da amam en inam.’ ”\*

<sup>21</sup> Asi pay kanan din lalaki ay doy, “Manlogi sin kakitkittoy ko, tinongtongpal ko am-in dana ay linteg.”

<sup>22</sup> Idi dinngen Jesus di, kanana en sisya, “Wada pay di esa ay pankolangam. En ka ilako din am-in ay sanikwam ta idawat mo din lako na si nabiteg, et mawada di kinabaknang mo ay indodolin Diyos ed langit. Asi ka omali ta manbalin ka ay pasolot ko.”† <sup>23</sup> Idi dinnge na din kanan Jesus ay doy, peteg ay masmasadot, tan palalo ay baknang sisya.

<sup>24</sup> Idi ilaen pay Jesus ay masmasadot, kanana, “Naligat ay maitapi di baknang sin panturayan Diyos. <sup>25</sup> Nalaklaka pay ay senggep di kamel sin lokaw di dagom mo din kaitapian di baknang sin panturayan Diyos.”

<sup>26</sup> Mo din nannges di et kanan da, “Mo siya ngarud sa, sino ngin di maisalakan?”

<sup>27</sup> Sinongbatan Jesus ay nangwani, “Din adi mabalin ay amagen di ipogaw et kabaelan pay dedan Diyos.”

<sup>28</sup> Pag et kanan Pedro, “Yan si dakami pay? Tan tinaynan mi di am-in ta manbalin kami ay pasolot mo.”

<sup>29</sup> “Aw kayman,” kanan Jesus, “yan tet-ewa pay din ibagak en dakayo ay olay sino di manaynan sin beey na, asawa na, aag-i na, da ama na en ina na, ya an-ak na begew sin pansilsilbiana sin panturayan Diyos <sup>30</sup> et addawi ay ad-ado di idawat Diyos en sisya sin naey ay biyag. Yan sin tapin pay di agew, maidawtan abe si biyag ay iwed patingga na.”

*Din Nangibagaan Kasin Jesus Sin Kateyana*

*(Mat. 20:17-19; Mar. 10:32-34)*

<sup>31</sup> Pag ayagan Jesus din sinpo ya doway ay pasolot na ta omay-ayed da yan kanana en daida, “Dengngen yo. Nay ay tomiktikid tako ed Jerusalem, et matongpal din am-in ay insolsolat di mamadto panggep en sak-en ay Anak di Ipogaw. <sup>32</sup> Maipolangak sin Gentil ay lomaslasoy, bomabbain ya tomogpatogpa. <sup>33</sup> Asi da somoplisoplit ya pag dan pomse, ngem sin maikatlo ay agew pay, matagoak kasin.”

<sup>34</sup> Ngem adi polos naawatan din papasolot na din laydena ay kalien, tan kaman nalingban di olog na en daida.

*Din Nangaanan Jesus Sin Godab Di Esa Ay Manpalpalimos*

*(Mat. 20:29-34; Mar. 10:46-52)*

\* **18:20** Exodo 20:12-16; Deuteronomio 5:16-20. † **18:22** Ilaen din footnote sin 5:27.

<sup>35</sup> Idi omas-asag-en da Jesus ed Jerico, wada di nagodab ay tinmotokdo sin benget di kalsada ay makipalpalimos. <sup>36</sup> Idi dinnge na din malablabas ay kaipoipogaw, pootena mo sinoy maam-amag. <sup>37</sup> “Nay malablabas si Jesus ay taga-Nazaret,” kanan da ay sinombat.

<sup>38</sup> Isonga pag nan kanan ay nangibogaw, “Ay Jesus! Polin David! Maseg-ang ka paabe!”

<sup>39</sup> Din nangon-ona et niyamyaman das sisya ta gominek koma, ngem sinepsep na et ay inbogaw, “Polin David, maseg-ang ka paabe!”

<sup>40</sup> Siya di et sinmaldeng si Jesus et inbilina ay itlod da din nagodab sin kad-ana. Idi naisag-en, pag kanan Jesus en sisya, <sup>41</sup> “Sinoy laydem ay amagek en sik-a?”

“Apo,” insongbat na, “laydek ay makaila.”

<sup>42</sup> “Makaila ka,” kanan Jesus. “Din talek mo et say nailatonam.” <sup>43</sup> Et pag makaan ay dagos din godab na et nakibeweg en da Jesus ay manaydayaw en Diyos. Olay abe din ad-ado ay ipogaw, idi inila da din naamag ay nay, dinaydayaw da abes Diyos.

## 19

### *Si Jesus Ya Si Zakeus*

<sup>1</sup> Sin pandad-anan da Jesus ed Jerico, <sup>2</sup> wada di baknang ay apon di mansingsingil si bowis ay manngadan si Zakeus. <sup>3</sup> Laydena ay ilaen si Jesus, ngem magay iyat na, tan ad-ado di ipogaw downan od iman aptiaptik sisya. <sup>4</sup> Isonga nanagtag ay nangon-ona mo da Jesus et en kinmalab sin esay kaiw ay sikomoro ta say way iyat na ay mangila en Jesus mo malabas.

<sup>5</sup> Idi naipatag si Jesus sin kad-an Zakeus, tinangad nas sisya et kanana, “Zakeus, omagpas ka, tan masapol ay madag-osak sin beey mo ed wani.”

<sup>6</sup> Kaagpas si Zakeus, et peteg di ragsak na ay nangipango en Jesus ed bebbeey da. <sup>7</sup> Ngem am-in da ay nangila et man-ag-agotoot da ay mangmangwani, “Apay man di ay en nanpasangaili sin beey di managbasol ay doy?”

<sup>8</sup> Downan et pomika si Zakeus yan kanana en Jesus, “Ay Apo, ilam! Idawat ko sin nabibiteg din kagodwan di bonag ko. Mo wada abe di sinowitik ko, itaolik en sisya si mamin opat ay kaad-ado na mo din inak.”

<sup>9</sup> Pag kanan Jesus, “Ed wani ay agew, naisalakan kayo ay bemeey, tan olay sik-a et esa ka ay nalitaw ay polin Abraham, <sup>10</sup> yan sak-en ay Anak di Ipogaw, inmaliak isna ta enak anapen ya isalakan di nalitaw ay ipogaw.”

### *Din Sinpo Ay Baa Ay Naidawtan Si Pilak*

*(Mat. 25:14-30)*

<sup>11</sup> Asi dad-aten Jesus din pangarig ay nay en daida ay nandengdenge en sisya, tan asag-en da ed Jerusalem et ipagarup da en nganngani din panlogian di panturayan Diyos.

<sup>12</sup> Kanana, “Wada di nangato ay ipogaw ay inmey sin addawi ay ili ta say dotokan das sisya ay mantaoli sin ili na ay man-ari. <sup>13</sup> Sin daan emey sisya, inayagana di sinpo ay baa na et indawdawtana si sag-eesa ay pilak ay balitok ay nangwani, ‘Paad-adoen yo din pilak ay sana enggana ay mantaoliak.’

<sup>14</sup> “Ngem kalkaliget din kakailianas sisya, isonga inmibaa da si mangonod en sisya ta en da ibaga sin mangdotok, ‘Adi mi layden din ipogaw ay nay si ari mi.’ <sup>15</sup> Ngem nadotokan ay ari pay dedan et pag somaa.

“Domateng pay sisya, inpaayag na din baa na ay nangidawtana si pilak ta say damagena mo piga di ginanansiya da. <sup>16</sup> Dinmateng din esa et kanana, ‘Apo Ari, din esa ay pilak ay balitok ay indawat mo en sak-en et nanbalin si sinpo.’ <sup>17</sup> ‘Sigid di inyat mo,’ kanan din Ari. ‘Sigid ka kayman ay baa. Gapo ta matalek ka sin at-atik ay intalek ko en sik-a, panturayek abes sik-a si sinpo ay siyodad.’

<sup>18</sup> “Inmey abe din maikadwa ay baa et kanana, ‘Apo Ari, din esa ay pilak ay balitok ay indawat mo en sak-en et nanbalin si lima.’ <sup>19</sup> Kanan aben din ari, ‘Mo siya sa, dotokak sik-a abe ay manturay si lima ay siyodad.’

<sup>20</sup> “Inmey pay di esa ay baa et kanana, ‘Apo Ari, naey abe din indawat mo ay pilak. Binotibotak si panyo et indodolin ko et anggoy, <sup>21</sup> tan emegyatak en sik-a, tan mabonget ka met ay ipogaw. Al-alaem din adi ka nanbowayan ya ap-apitem abe din adi ka inis-ek.’ <sup>22</sup> ‘Lawa ka ay baa!’ kanan din ari. ‘Din inbagam met laeng di pangikeddengak en sik-a. Mo inaammom ay mabongetak ay ipogaw ay mangmang-a si adiak nanbowayan ya mangap-apit si adiak inis-ek, <sup>23</sup> apay ngarud ay adim inbangko din pilak ko ta say mo somaaak, wada koma di olay at-atik ay anak na si alaek?’

<sup>24</sup> “Pag nan kanan en daida ay pinmipikas di, ‘Alaen yo din pilak na ta asi yo idawat sin waday sinpo ay pilak na.’

<sup>25</sup> “ ‘Aw, Apo,’ kanan da, ‘ngem sinpo met di nawawada en sisya.’

<sup>26</sup> “ ‘Yan aw adi,’ kanan din Ari ay sinombat, ‘tan tet-ewa met ay olay sino di waday kabaelana et matobtoban din wada en sisya, ngem din magay kabaelana et mataoli din olay at-atik ay wada en sisya. <sup>27</sup> Mo maipanggep abe sin doy ay kaibaw ko ay manigaan ay man-ariak en daida, ialy yo isna ta say peslen yos daida sin sangoanak.’ ”

*Din Nanaydayawan Di Kaipogaw En Jesus Sin Inmeyana Ed Jerusalem  
(Mat. 21:1-11; Mar. 11:1-11; Jn. 12:12-19)*

<sup>28</sup> Idi nakdeng ay in-arig Jesus di en daida, intoloy na ay nantikid ed Jerusalem ay mangipango en daida. <sup>29</sup> Somagsag-en da pay ed Betfage ya ed Betania sin gowab di bilig ay Olivo, nangon-onaena di doway pasolot na ay nangwani, <sup>30</sup> “Emey kayo sin doy ay ili ed demang. Kostokosto ay mo somawang kayos di, datngan yo di anak di dangki ay adi nakabkabayoan ay naitataked. Obaden yo ta ialy yos na. <sup>31</sup> Mo waday mangipoot en dakayo, ‘Apay nga obaden yo sa?’ kanan yo en, ‘Masapol din Apo mi.’ ”

<sup>32</sup> Inmey da ngarud et tinmet-ewa din am-in ay inbagan Jesus en daida. <sup>33</sup> Sin pangobobadan da sin iket na, kanan din nangin oka, “Apay nga ob-obaden yo sa?”

<sup>34</sup> “Masapol din Apo mi,” insongbat da. <sup>35</sup> Pag dan iey en Jesus. In-ap-ap da din tak-ep di bado da sin edeg di dangki et pag dan pangabayoan si Jesus. <sup>36</sup> Idi nankakabayo pay sisya, waday odom ay nangiap-aplag sin tak-ep di bado da sin kalsada ta say pandayaw da en sisya.

<sup>37</sup> Idi dinmateng da ed demang di Jerusalem sin panballalangan di kalsada ay napo sin dontog ay Olivo, peteg di ragsak din ad-ado ay pasolot na, et inlogi da ay mangipigpigma sin kali da ay manaydayaw en Diyos begew sin am-in ay nakaskasdaaw ay inil-ila da.

<sup>38</sup> Kanan da, “Madaydayaw nan ari ay inbaan Diyos ay panakaawak na!\* Talna ed langit ya madaydayaw si Diyos!”

<sup>39</sup> Asi et kanan din odom ay Fafariseo ay naitatapi sin kaipoipogaw en Jesus, “Apo maestro, paginkem koma din papasolot mo ay sana.”

<sup>40</sup> Ngem kanan Jesus, “Mo iginek da, awni man et maiskat olay din batbato ay nay ay domaydayaw.”

*Din Nan-ogaan Jesus Begew Sin Mapasamak Ed Jerusalem*

<sup>41</sup> Idi inmasag-en da Jesus ed Jerusalem, inila na din siyodad, et nan-oga gapo sin segang na <sup>42</sup> dowanen kankanen, “Ay Jerusalem, mo ammom koma ed wani di masapol ta say tomalna ka! Ngem adi ka pay laeng mailasin. <sup>43</sup> Awni man et domateng din agew ay likoben dakas kaibaw mo ya sawaden daka si am-in ay banda ta magay lomayawan di ipogaw mo. <sup>44</sup> Dadlon bakasen daka ya peslen da din ipogaw ay man-ili issa. Maga di olay esay bato ay komakaman sin kad-ana, tan adi ka nailasin din inmalian Diyos ay mangisalakan koma en sik-a.”

\* 19:38 Salmo 118:26.



### *Din Nangipabelaan Jesus Sin Man-ilaklako Sin Timplo*

*(Mat. 21:12-17; Mar. 11:15-19; Jn. 2:13-22)*

<sup>45</sup> Idi dinmateng si Jesus ed Jerusalem, inmey sin Timplo et nilogiana ay nangipabela sin man-ilaklako <sup>46</sup> ay nangwani, “Naisolat sin kalin Diyos, ‘Din beey ko et say pankarkararagan di ipogaw.’ Ngem dakayo pay et nanbalinen yo si panosowitikan yos iib-a yo!”†

<sup>47</sup> Inag-agew ay nan-it-itdo si Jesus sin Timplo. Din papangolon di papadi, din mamaestron di linteg, ya din ap-apon di kaipoipogaw et an-anapen da mo intoy iyat da ay mamse en Jesus, <sup>48</sup> ngem magay waya da, tan am-in din kaipoipogaw et laylayden da ay manmanng sin am-in ay kankanana.

## 20

### *Din Salodsod Maipanggep Sin Kalebbengan Jesus*

*(Mat. 21:23-27; Mar. 11:27-33)*

<sup>1</sup> Sin esay agew ay man-it-itdo si Jesus sin Timplo ya mangikaskasaba sin siged ay damag, inmey en sisya din papangolon di papadi, din mamaestron di linteg ya din aama. <sup>2</sup> Pinoot da en sisya ay nangwani, “Ibagam kod en dakami mo sinoy lebbeng mo ay mangam-amag en dana. Sinoy nangidawat en sik-a sin kalebbengam ay nay?”

<sup>3</sup> Kanan aben Jesus, “Wada abey pootek kod en dakayo on-ona. Ibagay yo en sak-en <sup>4</sup> mo sinoy nangidawat en Juan si kalebbengana ay namonbonyag si kaipoipogaw. Ay si Diyos ono ipogaw?”

<sup>5</sup> Pag dan man-asipoot ay nangwani, “Ay sino di isongbat tako? Mo kanan tako en si Diyos di nangidawat si lebbeng na, kanan samet Jesus en, ‘Apay ngarud ay adi yo pinatpatis sisya?’ <sup>6</sup> Ngem mo kanan tako abe en owat ipogaw di nangidawat, adi pay pigpigen din am-in ay kaipoipogaw si datako, tan dadlon dan pasien ay mamadto si Juan.” <sup>7</sup> Isonga kanan da et anggoy, “Adi mi ammo mo sinoy nangidawat.”

<sup>8</sup> Kanan aben Jesus, “Mo siya sa, adiak aben ibagay en dakayo mo sinoy nangidawat en sak-en si kalebbengak ay mangam-amag en dana.”

### *Din Pangarig Maipanggep Sin Makitalon Sin Kaobasan*

*(Mat. 21:33-46; Mar. 12:1-12)*

<sup>9</sup> Pag dad-aten Jesus din pangarig ay nay sin kaipoipogaw. Kanana, “Wada di esa ay ipogaw ay nangis-ek si ad-ado ay obas. Inpaayowana si odom ay mantaltalon, et pag emey sin addawi ay ili ay nabayag sisi. <sup>10</sup> Domteng pay din panagbobolas si obas, inbaan din nakin nom-a di esa ay bag-ena ta ena alaen din bingay na. Ngem idi sinmawang sisya, sinoplit din nangnangset ya inpasaa da ay enggay nakoskosan. <sup>11</sup> Isonga kasin inbaan din nakin nom-a di esa ay bag-en. Ngem iso met laeng ay sinoplit da ya binabainan da yan asi da pantaolien ay magay indawat da en sisya. <sup>12</sup> Isonga namitlo ay nan-ibaa si bag-en, ngem din maikatlo ay nay et sinogatan da dowan dan initpig sin lasin di kaobasan. <sup>13</sup> Pag kanan din nakin nom-a, ‘Sino ngata di mabalin ay amagek? Olay et ibaak din bogbogtong ya laydelaydek ay anak ko, tan mabalin siguro ay kabain das sisya.’

<sup>14</sup> “Ngem sin nangilaan da doy ay makitalon en sisya, kanan da et en, ‘Si naey di akin tawid sin nom-a ay nay. Peslen tako et ta bansen tako nan tawid na!’ <sup>15</sup> Pag da et ipabela sin kaobasan et peslen da.”

Pag kanan Jesus, “Sino ngata di amagen din nakin nom-a sin doy da ay makitalon? <sup>16</sup> Adi ena ngarud peslen daida ta asi na aben ipaayowan din nais-ek sin odom ay ipogaw.”

† 19:46 Isaias 56:7; Jeremias 7:11.



Sin nanngedan din kaipoipogaw sidi, kanan da, “Dakey kod ay! Maga koma di mapasamak si kaman nisa!”

<sup>17</sup> Ngem pag isisin-eng Jesus daida et kanana, “Mo siya sa ay adi mapasamak, sino ngarud di olog din inpaisolat Diyos ay nay?

‘Din bato ay sinigaan din man-isassaad si beey et say nanbalinen Diyos ay kabanolan ay bato ay mangipakneg sin beey.’\*

<sup>18</sup> Olay sino ay mag-as sin nay ay bato et magimok, ya mamekmek abe ay kaman tapok di olay sino ay pontaana.”

*Din Salodsod Maipanggep Sin Panbayadan Das Bowis*  
(Mat. 22:15-22; Mar. 12:13-17)

<sup>19</sup> Idi dinngen din mamaestron di linteg ya din papangolon di papadi din pangarig ay nay, layden da ay depapen si Jesus ay dagos, tan ammo da ay daida di inbagbagan Jesus. Ngem emegyat da sin kaipoipogaw, <sup>20</sup> isonga sedsed-en da di waya da ay manpap en sisya. Di inyat da et pinasoksokan da di odom ay lallalaki ta say en da paila en Jesus ay kaman dan nalinteg ay ipogaw, ngem din plano da et mansalodsod da en Jesus ta mo waday songbat na si pangidaruman da en sisya, asi da depapen et en da ipolang sin gobernador. Tan din gobernador et waday kalebbengana ay mangokom en sisya.

<sup>21</sup> Inmey ngarud dana ay lalaki en Jesus et kanan da, “Apo maestro, ammo mi ay kosto am-in di kankanam ya it-itdom. Ammo mi abe ay adi ka panlaslasinen din waday kabigbigana, mo adi et it-itdom din tet-ewa ay maipanggep sin layden Diyos ay amagen di ipogaw. <sup>22</sup> Isonga ibagam kod mo labsingen mi din linteg tako mo manbayad kamis bowis sin Emperador ed Roma.”

<sup>23</sup> Ngem ammon Jesus din sikap da, isonga pag nan kanan en daida, <sup>24</sup> “Omipaila kayo kod si esay pilak. Sinoy nakin ropa ya nakin ngadan isna?”

<sup>25</sup> “Din Emperador,” insongbat da.

“Mo siya sa,” kanan Jesus, “din okan Emperador et idawat yo en sisya, ya din okan Diyos et idawat yo abe en Diyos.”

<sup>26</sup> Siya di et enggay naabak da sin namadasan da ay nangietek en Jesus sin sangoanan di kaipoipogaw, isonga pag dan gomiginek, tan nasdaaw da sin insongbat na.

*Din Salodsod Maipanggep Sin Natey Ay Matago Kasin*  
(Mat. 22:23-33; Mar. 12:18-27)

<sup>27</sup> Wada da abe di Sadduceo ay inmey en Jesus. Daida di esa ay bonggoy di Judio ay mangmangwani en adi kasin matago di natey. Kanan da en sisya, <sup>28</sup> “Apo maestro, kanan din linteg tako ay insolat Moses, ‘Mo waday sin-asawa ay magay anak da ya matey din lalaki, masapol ay asawaen din agi na din nalasang ta say mo way anak da, kaman say anak din natey.’† <sup>29</sup> May kod, wada kano di pito ay sisiag-i ay lallalaki. Nangasawa din pangpangoan, ngem natey ay iwed anak da. <sup>30</sup> Isonga naisokat iyogtana et inasawa na din balo, ngem natey ay iwed abey anak da. <sup>31</sup> Iso na abe sin maikatlo. Pag siyasiya di. Am-in din doy pito ay sisiag-i et nansososkat da ay nangasawa sin balo ay sana, yan natey da am-in ay magay anak da. <sup>32</sup> Pag omanongos ay matey din babai. <sup>33</sup> May kod, mo sin tapin di agew sin katagoan kasin di natnatey, sino ngin en daida di kosto ay akin asawa en sisya? Tan inasawa da am-in.”

<sup>34</sup> Kanan Jesus en daida, “Aw kayman, mo din ipogaw ed wani et man-aasawa da, <sup>35</sup> ngem din ibilang Diyos ay maikari ay matago kasin ya maitapi en sisya ed langit et adi da man-aasawas di. <sup>36</sup> Tan kaman da din aanghel ay adi da katkatey. Daida di an-ak Diyos tan kasinan tagoen daida.

<sup>37</sup> “Et mo maipanggep abe sin kasin katagoan di natey, olay si Moses et dadlonan pinaneknekan ay matago kasin di natey. Tan mo din insolat na ay maipanggep sin

\* **20:17** Salmo 118:22. † **20:28** Deuteronomio 25:5.

manbidbidang ay kaiw et kanana en si Diyos di deda ay Diyos da Abraham en Isaac ya si Jacob.‡ Say kanana di olay mo nabayag ay nanatey da Abraham. <sup>38</sup> Di layden nina ay kalien et matago kasin di natey, tan si Diyos et baken Diyos di natey ay ipogaw mo adi et din matmatago, tan am-in da ay mamati et matmatago da sin pangila na.”

<sup>39</sup> Pag kanan di odom ay mamaestron di linteg, “Kosto met kayman din insongbat mo.”

<sup>40</sup> Et manlogi isdi, maga di mangitoleed ay manpoot en Jesus.

### *Din Salodsod Maipanggep Sin Messias*

*(Mat. 22:41-46; Mar. 12:35-37)*

<sup>41</sup> Pag kanan Jesus en daida, “Apay nga kanan da en polin David din Messias? <sup>42</sup> Tan olay si David et insolat na sin libro ay Salmo en,

‘Kanan Apo Diyos en Apok: Tomokdo ka sin makannawan ko <sup>43</sup> engganabakek din kaibaw mo.’”§

<sup>44</sup> Pag itoloy Jesus ay nangwani, “Mo say kanan David en Apo na din Messias, intoy iyat na ay polin David?”

### *Din Pangwanin Jesus Sin Maestron Di Linteg*

*(Mat. 23:1-36; Mar. 12:38-40)*

<sup>45</sup> Idi nandengdenge din am-in ay kaipoipogaw, kanan Jesus sin papasolot na, <sup>46</sup> “Siliban yo din mamaestron di linteg, tan layden da ay manbabado si kagkagam-is ay nagayad ta say waday kailasinan da ya layden da abe ay daydayawen din mangila en daida ay mangwani en, ‘Emeyam, apo?’ mo en da manpasyal sin markitan. Pilpilien da abe din kasigedan ay tokdoan sin sinagoga, ya mo en da makipangan, siyat din napateg ay ipogaw di en da pakitokdoan. <sup>47</sup> Iet-etekan da pay di nabalo ay babbabai ta say alaen da din gamgameng da ya olay din beey da dowan dan paandoandoen din kararag da sin pangiilaan di kaipoipogaw. Awni man et madagdagsen din dosa da.”

## 21

### *Din Indawat Di Nalasang En Diyos*

*(Mar. 12:41-44)*

<sup>1</sup> Pag manmeswat si Jesus et inila na di babaknang ay mangipeppeey si pilak da sin kaikoskosnongan di pilak sin Timplo. <sup>2</sup> Inila na abe di nalasang ay nabiteg ay nangikosnong si doway ay balkeg. <sup>3</sup> Pag kanan Jesus, “Tet-ewa met nan ibagak en dakayo ay ad-ad-ado din inkosnong din nay nabiteg ay balo mo din inkosnong am-in di odom. <sup>4</sup> Tan mo din odom et din sobran di kinabaknang da anggoy di indawat da, ngem din balo ay nay et olay nabibiteg, indawat na am-in ay katagoana.”

### *Din Timpon Di Ligat Ay Domateng Sin Tapin Di Agew*

*(Mat. 24:1-14; Mar. 13:1-13)*

<sup>5</sup> Din odom sin pasolot na et ngalngalaten da din kinapintas di Timplo, tan naamag si kagkagam-is ay bathato ya naaltian si odom ay napintas ay naidadaton en Diyos. Pag kanan Jesus, <sup>6</sup> “Awni man et domteng din agew ay maiwalang am-in da naey ay il-ilaen yo, tan iwed di olay esay bato si komakaman sin kad-ana.”

<sup>7</sup> Pag dan kanan, “Apo maestro, pig-an di kaamagan nisa ya sinoy sinyal si pangimatonan mi ay dandani ay domateng din agew ay sana?”

<sup>8</sup> Sinombat si Jesus et kanana, “Siliban yo ta adi kayo kaiietekan. Tan ad-ado da di omali ay mangwani en, ‘Sak-en met din Messias,’ ya kanan da abe en, ‘Dandani ay domateng din agew.’ Ngem adi kayo koma maitaptapi en daida. <sup>9</sup> Mo dengngen yo abe ay waday gobat ya golo, adi kayo emeg-egyat. Masapol ay maamag dana, ngem daan pay din panpatingaan di lobong.”

‡ 20:37 Exodo 3:6. § 20:43 Salmo 110:1.

<sup>10</sup> Intoloy na ay nangwani, “Tan din maamag et man-gogobat din kailili ya siya abe sin gogobierno. <sup>11</sup> Ad-ado abe di kaeegyat ay yegyeg, betil ya sakit ay mamse si ad-ado ay ipogaw sin kailili. Ya wada abe di kaeegyat ya nakaskasdaaw ay sinyal ed daya.

<sup>12</sup> “Ngem sin daan mapasamak dana, depapen ya paligaten das dakayo. Idarum das dakayo sin sinagoga et ibalod das dakayo. Begew sin pammati yo en sak-en, iey das dakayo sin aari ya gogobernador. <sup>13</sup> Et say waday gondaway yo ay mangibaga sin siked ay damag en daida. <sup>14</sup> Ipapasnek yo sin nemnem yo ta adi yo nemnemnemnem si isongbat yo, <sup>15</sup> tan sak-en met laeng di mangidawat en dakayo si laing ay mankali ya sirib ay manongbat ta say magay iyat di kaibaw yo ay mangabak en dakayo ya mangontra sin ibagbaga yo. <sup>16</sup> Sin doy ay timpo abe, olay din nanapoan yo, aag-i yo, toton-od yo ya gagayyem yo et lipotan das dakayo sin tuturay ta say peslen da di odom en dakayo. <sup>17</sup> Am-in din kaipoipogaw abe et kalkaliget das dakayo begew sin nakies-esaan yo en sak-en. <sup>18</sup> Ngem laton, tan ay-ayowanen Diyos dakayo ta adi malitaw di olay esa sin book yo. <sup>19</sup> Isonga anosan yo tan say iyat yo ay mangon-od si biyag ay iwed patingga na.”

### *Din Kabakasan Di Jerusalem*

*(Mat. 24:15-21; Mar. 13:14-19)*

<sup>20</sup> Kanan aben Jesus, “Mo ilaen yo ay likoben di ad-ado ay soldado ed Jerusalem, say pangammoan yo na ay dandani di kabakasana. <sup>21</sup> Isonga din mantetee ed Judea et masapol ay dalasen da ay lomayaw sin kadondontogan. Din wada ed Jerusalem et manbakwit da koma, ya din wada abe sin pastolan et adi da koma somaa ed Jerusalem. <sup>22</sup> Tan siya na di timpon di dosa ay katongpalan din am-in ay inpaisolat Diyos. <sup>23</sup> Sin da doy ay agew, kaseseg-ang iman din maliton ya din way pansosoena, tan am-in di ipogaw sin ili ay nay et palalo ay mapaligatan da ya liknaen da din panosaan Diyos en daida. <sup>24</sup> Di odom et matey das gobat ya din odom pay et iey das daida sin kailili ay addawi ta say panbalinen da ay bag-en. Et mo din ili ay nay Jerusalem, abaken din Gentil et manturay das na enggana ay pasaldengen Diyos daida.”

### *Din Omalian Di Anak di Ipogaw*

*(Mat. 24:29-31; Mar. 13:24-27)*

<sup>25</sup> “Pag wada di kaeegyat ay mapasamak sin agew, bowan ya din tatalaw.\* Et am-in ay ipogaw isnan daga et enggay mariribokan da ya palalo abe di egyat da sin dalloyon ya din napigsa ay agodood di baybay. <sup>26</sup> Matalimodaw da si egyat da sin pansedsed-an das mapasamak isnan daga, tan maikiweg din am-in ay maila ed kayang. <sup>27</sup> Et pag dan ilaen sak-en ay Anak di Ipogaw ay omal-ali ay maikoyog sin liboo. Peteg di panakabalin ko ya dadlonak mansilap si kinadiyos ko. <sup>28</sup> Isonga mo manlogi am-in dana ay maamag, papigsaen yo ya panragsaken yo di nemnem yo, tan dandani di kaisalakanan yo.”

### *Din Maadal Sin Kaiw Ay Igos*

*(Mat. 24:32-35; Mar. 13:28-31)*

<sup>29</sup> Pag dad-aten Jesus en daida din pangarig ay nay. Kanana, “Nemnemnemen yo din kaiw ay igos ya din odom ay kaiw. <sup>30</sup> Mo masokatan tobo da, namnamaen yo ay dandani di pinag-oodan. <sup>31</sup> Iso na abe din nay inbagbagak en dakayo, mo ilaen yo ay maam-amag dana, ammo yo ay dandani din panturayan Diyos.

<sup>32</sup> “Tet-ewa nan ibagak en dakayo ay matmatago pay laeng di odom ay ipogaw ay wada ed wani† mo matongpal am-in din inbagak. <sup>33</sup> Mankaiwed din wada ed kayang ya din daga ay nay, ngem din kalik pay et komakaman si eng-enggana.”

### *Masapol Ay Makasagana Tako*

\* 21:25 Joel 2:31. † 21:32 Di esa abe ay olog nina sin Griego et deda ay matmatago di Judio.

<sup>34</sup> Intoloy Jesus ay nangwani, “Siliban yo ta adi kayo masangangaw si beteng onodom ay niloloko ay ogali ya adi kayo madadagsenan si katagoan yo tan into et ya masngang kayo sin omaliak. <sup>35</sup> Tan masngang met di ipogaw sin am-in ay kailili isnan labaw di daga ay kaman titit ay nakna sin tagdey. <sup>36</sup> Mansasagana kayo ngarud si kankanayon down kayo aben mankarkararag ta waday bikas ya toled yo ay mangitpe sin am-in dana ay maamag ta say mabalin ay sangoen yos sak-en ay Anak di Ipogaw.”

<sup>37</sup> Inag-agew ay en man-it-itdo si Jesus sin Timplo ya nilablabi ay en man-iiyan sin dontog ay Olivo. <sup>38</sup> Isonga din kaipoipogaw et masapsapa das binigbigat ay emey sin Timplo ta en da dengdenggen din kankanana.

## 22

### *Din Nanganapan Da Si Iyat Da Ay Mamse En Jesus*

*(Mat. 26:1-5; Mar. 14:1-2; Jn. 11:45-53)*

<sup>1</sup> Dandani ay domateng din fiestan di Judio ay makwani en Nalabas ay panganan da sin tinapay ay magay labadura na. <sup>2</sup> Et din papangolon di papadi ya din mamaestron di linteg et an-anapen da mo intoy iyat da ay mangipapse en Jesus ay adi maam-ammoan, tan emegyat da sin kaipoipogaw.

### *Din Nakitolagan Judas Ay Manglipot En Jesus*

*(Mat. 26:14-16; Mar. 14:10-11)*

<sup>3</sup> Pag kapten Satanas si Judas Iscariot ay esa en daida ay sinpo ya doway ay pasolot Jesus, <sup>4</sup> et inmey sin papangolon di papadi ya din ap-apon di gogowardian di Timplo ta makitolag mo intoy iyat na ay mangipolang en Jesus en daida. <sup>5</sup> Peteg di ragsak da et nantotolag da ay idawtan si pilak. <sup>6</sup> Inaw Judas et pag nan ilogi ay manganap si waya na ay manglipot en Jesus mo maga di kaipoipogaw.

### *Din Nansaganaan Da Sin Maodi Ay Makiokoban Da En Jesus*

*(Mat. 26:17-25; Mar. 14:12-21)*

<sup>7</sup> Domateng pay din damo ay agew di fiesta ay makwani en Tinapay ay Magay Labadura na, et say namaltian da si anak di karnero para sin fiesta ay makwani en Nalabas. <sup>8</sup> Isonga binaan Jesus da Pedro en Juan ay nangwani, “En kayo isagana din kanen tako sin fiesta.”

<sup>9</sup> “Intoy laydem ay en mi pangisaganaan?” kanan da.

<sup>10</sup> Pag nan kanan, “Emey kayo sin siyodad. Mo somawang kayos di, waday abaten yo ay lalaki ay en nanakdo. Onoden yo sin beey ay segpena, <sup>11</sup> et kanan yo sin akin beey, ‘Inbagan din Apo tako mo into di kowarto ay ena makiokoban en dakami ay pasolot na sin para fiesta?’ <sup>12</sup> Asi na itdo en dakayo di annawa ay kowarto ed kayang ay kad-an di am-in ay masapol tako. Saganaen yo din kanen takos di.”

<sup>13</sup> Siya di, pag emey din doway ay sana et tinmet-ewa din am-in ay inbagan Jesus en daida. Et pag dan saganaen din kanen da ay para sin fiesta.

### *Din Maodi Ay Nakiokoban Jesus Sin Pasolot Na*

*(Mat. 26:26-30; Mar. 14:22-26; 1 Cor. 11:23-25)*

<sup>14</sup> Idi dinmateng din kosto ay oras, nakitokdo si Jesus sin aapostol na ay mangan. <sup>15</sup> Kanana en daida, “Peteg ay laydek ay makiokob en dakayo sin nay fiesta ay makwani en Nalabas, asiak pay manligat. <sup>16</sup> Tan kanak en dakayo ay adiak kasin makikan sin kaman nina ay fiesta enggana ay matongpal din ologena sin panturayan Diyos ed langit.”

<sup>17</sup> Pag man-as Jesus si tasa ay napay-an si danom di obas et man-iyaman en Diyos, asi na pag kanan, “Alaen yo na ta pantedted-an yo. <sup>18</sup> Tan kanak en dakayo en adiak kasin omin-inom si danom di obas enggana ay domateng din panturayan Diyos.”

<sup>19</sup> Pag na aben alaen din tinapay et man-iyaman en Diyos. Asi na pag pit-ipit-ingen et idawat na en daida ay nangwani, “Si naey di awak ko ay maidaton para en dakayo. Amagen yo na ta say pangnemneman yo en sak-en.”

<sup>20</sup> Idi nakakan da, kaman nidi met laeng di inyat na sin tasa ay ina na yan kanana, “Din tasa ay nay et say baro ay tolag Diyos ay siglotan di dadak ay omayos mo mateyak para en dakayo.\*

<sup>21</sup> “Ngem kanak abe en dakayo ay din manglipot en sak-en et wada isna ay nakiookob.†  
<sup>22</sup> Sak-en ay Anak di Ipogaw et mateyak met maibasas sin ninemnem Diyos ed idi, ngem kaseseg-ang pay din manglipot en sak-en.” <sup>23</sup> Pag dan man-asipoot mo sino ngin en daida di mangiat sisi.

### *Din Nan-iibawan Da Mo Sino Di Kapatgan*

<sup>24</sup> Idi maaw-awni, nansosongbat din papasolot Jesus mo sino en daida di maibilang ay kapatgan. <sup>25</sup> Kanan et Jesus en daida, “Din aari ya odom ay manturturay isnan daga et ipipilit da din layden da sin iturturayan da ya layden da abe ay mabdayan si Manageseg-ang. <sup>26</sup> Ngem baken say iyat yo koma, tan din kapatgan en dakayo et masapol ay ibilang na din awak na ay kaman sisya din anongos, ya din pangolo et komaman koman baa. <sup>27</sup> Sino aya di nangatngato, ay din tomokdo ay mangan ono din mansilsilbi en sisya? Din pansilbian ay mangmangan, ay baken siya? Ngem nay ay wadaak isna ay mansilsilbi en dakayo ay kaman baa.

<sup>28</sup> “Dakayo di nakilaklak-am sin am-in ay ligat ko ay adi tinmaytaynan, <sup>29</sup> isonga amagek en dakayo din inamag Amak en sak-en. Tan indawat na en sak-en din kalebbengak ay manturay et say iyat ko met laeng en dakayo <sup>30</sup> ta say makiokob kayo en sak-en sin panturturayak ya tomokdo kayo abe sin trono ay mangokom sin polin di sinpo ya doway ay an-ak Israel.”

### *Din Nangipadtoan Jesus Sin Nangisaotan Pedro En Sisya (Mat. 26:31-35; Mar. 14:27-31; Jn. 13:36-38)*

<sup>31</sup> Pag kanan Jesus en Pedro, “Simon, dengngem kod nan ibagak. Kindaw Satanas di waya na ay mamadas en dakayo am-in ta say ilaena mo waday maisian en dakayo ay kaman din kaisianan di begas ya teg-ap mo mateg-apan. <sup>32</sup> Ngem inkarkararakag sik-a ay Simon ta say itoltoloy mo ay mamati, et mo mansagong ka kasin en sak-en, masapol ay papigsaem din iib-am.”

<sup>33</sup> Asi et kanan Pedro, “Apo, enggay met nakasaganaak ay olay makibalodak ya makikateyak en sik-a.”

<sup>34</sup> “Siya say kanam,” kanan Jesus, “ngem ibagak en sik-a, mo sin daan pantan-oan di kawwitan si bigat, mamitlo ka ay mangwani en adim am-ammos sak-en.”

### *Pilak, Sangi Ya Kampilan*

<sup>35</sup> Pag kanan Jesus en daida, “Sin nangibaaak en dakayo ay magay intakin yo si pilak, sangi ya pansokatan ay sinilas, ay waday nankolongan yo?”

“Maga yan,” insongbat da.

<sup>36</sup> “Ngem ed wani pay,” kanan Jesus, “din waday pilak ya sangi na et olay itakina, ya din magay kampilana et masapol ay en manlako, olay mo masapol ay ilako na din tak-ep di bado na ta way ibayad na. <sup>37</sup> Tan masapol met ay matongpal din naisolat ay kalin Diyos maipanggep en sak-en ay kanana en,

‘Naibilang sisya ay tollisan.‡

Et nay dandani ay matongpal.”

<sup>38</sup> “Apo,” kanan da, “Naey di doway ay kampilan.”

“Kosto et sa,” insongbat na.

\* 22:20 Jeremias 31:31-34. † 22:21 Salmo 41:9. ‡ 22:37 Isaias 53:12.



### *Din Nankararagan Jesus Sin Dontog Ay Olivo*

*(Mat. 26:36-46; Mar. 14:32-42)*

<sup>39</sup> Pag komaan da Jesus ya din papasolot na sin siyodad et inmey da sin dontog ay Olivo, tan say in-inmeyan da met laeng mo malabi. <sup>40</sup> Idi dinmateng da, pag nan kanan en daida, “Mankararag kayo ta say adi kayo masolisog.”

<sup>41</sup> Pag nan addawian si daidas at-atik ay kaman din kaaddawin di maitpig ay bato, et nandokmog ay nankararag. <sup>42</sup> “Ama,” kanana, “mo laydem, ipalobos mo kod ay adiak nam-osen din nay omali ay ligat ko. Ngem baken koma din laydek mo adi din laydem di matongpal.” <sup>43</sup> Pag et manpaila di anghel en sisya ay napod langit ay nangipapigsa en sisya. <sup>44</sup> Et sin nay palalo ay ligat na, inapasnek na pay ay nankararag, et di linget na yan kaman dada ay manteded sin lota.

<sup>45</sup> Idi nakakararag, nantaoli sin kad-an di papasolot na, et dinatnganas daida ay naseseyep, tan enggay nabbay da sin palalo ay sakit di nemnem da. <sup>46</sup> Pag nan kanan, “Apay nga naseseyep kayo? Ibangon yo ta mankararag kayo ta say adi kayo masolisog.”

### *Din Nadpapan Jesus*

*(Mat. 26:47-56; Mar. 14:43-50; Jn. 18:3-11)*

<sup>47</sup> Deda ay mankalkali si Jesus, sinmawang di kaipoipogaw ay inpangon Judas ay esa sin sinpo ya dow a ay pasolot na. Sinmag-en en Jesus ta say ongoana, <sup>48</sup> ngem kanan Jesus, “Judas, apay nga nanbalinem din ongo ay sinyal di layad si sinyal di panglipotam en sak-en ay Anak di Ipogaw?”

<sup>49</sup> Ilaen pay din pasolot Jesus din maamag en sisya et kanan da en, “Apo, ay makibinetbetan kami?” <sup>50</sup> Dowan et kabebet din esa ay pasolot na sin bag-en di kangatoan ay padi et nalongodan inga na ay makannawan.

<sup>51</sup> Ngem kanan et Jesus, “Kosto sa!” Et kinapay na din ingan di bag-en ay sana et nailatonan.

<sup>52</sup> Pag nan kanan sin papangolon di papadi ya din ap-apon di gogowardiyen di Timplo ya din aam-a ay en nanpap en sisya, “Ay tollisanak aya ta in mali kayo ay nan-eggegen si kampilan ya pat-o ay en dompap?” <sup>53</sup> Inag-agew met ay wadaak sin Timplo ay man-it-itdo en dakayo, ngem adi kayo dinomdompap. Ngem nay dinmateng din waya yo ay inkeddeng Diyos ya din waya aben Satanas ay manturay sin mabolinget.”

### *Din Nangisaotan Pedro En Jesus*

*(Mat. 26:57-58,69-75; Mar. 14:53-54,66-72; Jn. 18:15-18,25-27)*

<sup>54</sup> Pag dan depapen si Jesus et in-ey da sin beey di kangatoan ay padi. Mo si Pedro pay et inmon-onod ay namona di betaey da. <sup>55</sup> Ngem idi namongpong da sin gawan di belayan ta man-anido da, en nakianido si Pedro. <sup>56</sup> Inilan di esa ay baa ay balasang sisya tan nasisilawan sin apoy, et insisin-eng na ay nangwani, “Din lalaki ay nay et esa met ay gait na.”

<sup>57</sup> Ngem insaot Pedro ay nangwani, “Maga yan, ay siya mo am-ammok sisya?”

<sup>58</sup> Maaw-awni pay, wada kasin di esa ay lalaki ay nangimat on en sisya et kanana, “Sika met di esa en daida.”

Ngem kanan Pedro, “Baken yan.”

<sup>59</sup> Malabas pay di esa ay oras, wada kasin di esa ay lalaki ay nangipapati en, “Tet-ewa met ay esa na ay gait Jesus, tan taga-Galilea met abe.”

<sup>60</sup> “Adiak polos ammo san kankanam,” insongbat Pedro. Mankalkali pay laeng sisya yan nantan-o din kawwitan. <sup>61</sup> Pag et mansagong si Apo Jesus et isin-eng nas Pedro, et asi na ninemnem din inbagan di Apo ay sin daan pay pantan-oan di kawwitan sin labi ay doy, mamitlo ay kanana en adi na ammos sisya. <sup>62</sup> Asi pag komaan et palalo ay man-og-og.



### *Din Nanglasoyan Ya Nanespegan Da En Jesus*

*(Mat. 26:67-68; Mar. 14:65)*

<sup>63</sup> Din namanbantay en Jesus et nilaslasoy da ya dinesdespeg da. <sup>64</sup> Kinopopan da aben mata na, asi da kanan, “May kod ay, pogtoam mo sinoy nanespeg en sik-a.” <sup>65</sup> Et ad-ado pay di kankanan da ay manglaslasoy ya manis-iyek en sisya.

### *Din Namistigalan Di Tukuray Di Judio En Jesus*

*(Mat. 26:59-66; Mar. 14:55-64; Jn. 18:19-24)*

<sup>66</sup> Sin napat-aana, naipango si Jesus sin kad-an di nasinop ay aam-an di Judio ya din papangolon di papadi ya din mamaestron di linteg. <sup>67</sup> Kanan da en sisya, “Ibagam kod, ay sik-a din Messias?”

Sinongbatan Jesus ay nangwani, “Olay mo ibagak, adi yo met laeng patien, <sup>68</sup> ya mo wada abe di isalodsod ko en dakayo, adi yo met laeng songbatan. <sup>69</sup> Ngem manlogi ed wani, sak-en ay Anak di Ipogaw et tomokdoak sin makannawan Diyos ay manakabalin.”

<sup>70</sup> Pag da kasin ipoot, “Ay sik-a ngarud din Anak Diyos?”

“Mo say kanan yo, kosto,” kanana.

<sup>71</sup> Pag da et kanan, “Ay siya mo masapol tako di manistigo? Nay met ay dinnge tako din inbaga na.”

## 23

### *Din Naipolangan Jesus En Pilato*

*(Mat. 27:1-2,11-14; Mar. 15:1-5; Jn. 18:28-38)*

<sup>1</sup> Pag pomika da am-in ta iey da si Jesus en Gobernador Pilato. Idi sinmawang das di, <sup>2</sup> indarum da ay nangwani, “Sinokalan mi na ay ipogaw ay mangaw-awis ay mangolo sin kailian mi ay Judio. Maikadwa, kanana en adi da koma baybayadan di bowis en Emperador, ya maikatlo, kankanana en sisya din Cristo ay ari.”

<sup>3</sup> Pag pooten Pilato en Jesus, “Ay sik-a baw din arin di Judio?”

“Mo say kanam et siya,” insongbat Jesus.

<sup>4</sup> Pag kanan Pilato sin papangolon di papadi ya din kaipoipogaw, “Magay ammok si basol na.” <sup>5</sup> Ngem inpapilit da pay ay nangwani, “Ginolgolo na din am-in ay kaipoipogaw, manlogi ed Galilea enggana ed Judea, et nay ay dinmateng abe isna.”

### *Din Naipolangan Jesus En Herod*

<sup>6</sup> Sin nanngaan Pilato isna, pinoot na mo taga-Galilea si Jesus. <sup>7</sup> Idi inammoana ay napo si Jesus ed Galilea ay nanturturayan Herod, inpaitlod nas Jesus en sisya, tan naidan ay wadas Herod ed Jerusalem sin da doy ay agew.

<sup>8</sup> Idi inilan Herod si Jesus, peteg di ragsak na, tan nabayag ay dindinngge na di maipanggep en sisya, yan laydena ay ilaen di esa ay nakaskasdaaw ay amagen Jesus.

<sup>9</sup> Isonga ad-ado di insalodsod na, ngem adi polos sinomsombat sisya. <sup>10</sup> Din papangolon di papadi ya din mamaestron di linteg et inpigpigma da abe ay mangipabasbasol en sisya. <sup>11</sup> Pag maitapi si Herod sin sosoldado na ay manis-iyek ya manglaslasoy en Jesus. Binadoan das sisya si kagkagam-is ay nagayad ay kaman din ibadon di ari et pag dan pataolien en Pilato. <sup>12</sup> Manlogi sin doy ay agew, dagos ay nan-gayyem da Herod en Pilato, tan sigod ay way ibaw da ed idi.

### *Din Naikeddangan Jesus Ay Matey*

*(Mat. 27:15-26; Mar. 15:6-15; Jn. 18:39-19:16)*

<sup>13</sup> Pag paayag Pilato din papangolon di papadi ya din odom ay aap-on di Judio ya din kaipoipogaw, <sup>14</sup> et kanana en daida, “Indarum yo na en sak-en ay kanan yo en aw-awisena din kaipoipogaw ay mangolo sin gobierno. Ngem nay binistigal ko sin nangiilaan yo et magay inammoak ay mangipaneknek sin inpabpabasol yo en sisya. <sup>15</sup> Olay si Herod abe et magay inammoana ay basol na, tan nay inpataoli na en datako,

isonga maga ngarud di basol na si omanay si kapseana. <sup>16</sup> Isonga ipasoplit ko et anggoy, asiak ibolosan.” <sup>17</sup> Say kanana di tan masapol ay ibolos na di esa ay balod sin tonggal fiesta ay makwani en Nalabas, tan say ogali na.

<sup>18</sup> Ngem din kaipoipogaw et kabanogbogaw da ay nangwani, “Peslem! Si Barabbas di layden mi ay ibolos mol!” <sup>19</sup> (Si Barabbas ay nay et naibalod tan nan-golo ed Jerusalem ya wada abey pinse na.)

<sup>20</sup> Layden Pilato ay mangibolos en Jesus, isonga nakikali kasin sin kaipoipogaw, <sup>21</sup> ngem inbogabogaw da en, “Ilansam! Ilansam sin krus!”

<sup>22</sup> Inpitlon Pilato ay nakikali en daida et kanana, “Ay tan? Sino ngin di basol na? Iwed ammok si inamag na ay gapo si kapseana. Olay pasoplit ko et anggoy ta asiak ibolos.”

<sup>23</sup> Ngem intoltoloy da ay mangibogbogaw ay mangipapilit en mailansa si Jesus sin krus enggana ay naabak si Pilato, <sup>24</sup> et inaw na din layden da. <sup>25</sup> Inbolos na din layden da ay maibolos ay naibalod begew si golo ya pese ngem inpolang na pay si Jesus en daida ta say matongpal din layden da maipanggep en sisya.

### *Din Nailansaan Jesus Sin Krus*

*(Mat. 27:32-44; Mar. 15:21-32; Jn. 19:17-27)*

<sup>26</sup> Pag ikaan din sosoldado si Jesus ay en da ilansa sin krus. Wada da pay sin danan et inabat da di esa ay lalaki ay si Simon ay taga-Cirene ay em-emey sin siyodad ay napo sin barbaryo. Dinpap das sisya et inapapilit da ay tilidena din krus, pag dan ipaonod en Jesus.

<sup>27</sup> Ad-ado abe di kaipoipogaw ay mangon-onod en Jesus pati babbabai ay mangogoga en sisya ya manladladingit. <sup>28</sup> Sinagong Jesus daida yan kanana, “Babbabai ay taga-Jerusalem, baken sak-en koma di og-ogaan yo mo adi din awak yo ya din anan-ak yo. <sup>29</sup> Tan awni et domteng di timpon di ligat ay pangwanian di ipogaw en, ‘Nagatat din babbabai ay basig ay adi nan-an-anak ya adi nanpaspasoso.’ <sup>30</sup> Tan mo sin timpo ay sana, man-adawag di ipogaw ay magday di dontog ta say tab-okanas daida.\* <sup>31</sup> Tan mo say amagen da na en sak-en ay kaman daan mango ay kaiw, adi pay masepsep di iyat da en dakayo ay kaman nanango.”

<sup>32</sup> Wada abe di doway ay tollisan ay inkoyog da en Jesus ta en da peslen. <sup>33</sup> Idi dinmateng da sin lugar ay kanan da en Tong-an di Toktok, inlansa da si Jesus sin krus. Din doway ay tollisan et inlansa da abe si natken ay krus, esa sin kannawan ya esa sin kattigid Jesus. <sup>34</sup> Pag kanan Jesus, “Ama, pakawanem daida, tan adi da ammo din amagen da.”

Mo din sosoldado, nanbinnotan da din badon Jesus ta say panbibingayan da.† <sup>35</sup> Din kaipoipogaw et pinmipika das di ay mamoyboya downan din papangolon di Judio et siniyeyekan das sisya ay nangwani, “Insalakana met di odom ay ipogaw. Isalakana kod abe din awak na mo tet-ewa ay sisya din Messias ay pinilin Diyos.”‡

<sup>36</sup> Sinis-iyekan abe din sosoldado. Sinmag-en da ta idewdewan das sokas sisya§ <sup>37</sup> downan dan kankan, “Isalakan mo ngarud din awak mo mo tet-ewa ay sik-a din arin di Judio.”

<sup>38</sup> Wada abe di naisolat ay naipakpak sin toktokan Jesus ay kanana en, “Si naey di arin di Judio.”

<sup>39</sup> Olay din esa ay tollisan ay nailansa et nilaslasoy na si Jesus ay nangwani, “Ay baken sik-a din Messias? Isalakan mo ngarud din awak mo ya dakami abe!”

<sup>40</sup> Ngem din kadwa na ay tollisan, iniyew na ay nangwani, “Ay adi ka emegyat en Diyos? Nan-iso di naikeddeng en datako am-in, <sup>41</sup> ngem mo daita pay et kosto din dosa

\* 23:30 Hosea 10:8; Naipaammo 6:16. † 23:34 Salmo 22:18. ‡ 23:35 Salmo 22:7. § 23:36 Salmo 69:21.

ta tan say gon-gona ta sin basol ta, ngem mo sisya pay, maga iman di basol na.” <sup>42</sup> Pag nan kanan en Jesus, “Apo Jesus, nemnemem kod sak-en mo omali ka ay manturay.”

<sup>43</sup> Et kanan Jesus en sisya, “Tet-ewa nan ibagak en sik-a. Ed wani ay agew, maitapi ka en sak-en ed langit.”

### *Din Nateyan Jesus*

*(Mat. 27:45-56; Mar. 15:33-41; Jn. 19:28-30)*

<sup>44</sup> Idi inmalas dosi, kasaldeng din agew ay mansey-ang et binmolinget din intiro ay ili enggan as alas tres. <sup>45</sup> Pag et nabisngit din kurtinan di Timplo et nandowa. <sup>46</sup> Inpigsan Jesus din kali na ay nangwani, “Ama, italek ko din ab-abiik ko en sik-a.”\* Say kanana di, pag matey.

<sup>47</sup> Idi inilan din kapitan di soldado am-in dana ay naamag, dinaydayaw nas Diyos ay nangwani, “Tet-ewa baw ay nalinteg na ay ipogaw!”

<sup>48</sup> Din kaipoipogaw abe ay nasinop ay namoya, idi inila da din naamag, sinmaa da ay nangepakepag sin pagew da begew sin sakit di nemnem da. <sup>49</sup> Ngem am-in din gagayyem Jesus ya din babbabai ay nakikiey en sisya ay napod Galilea et nantetee da sin ay-ayed ay nangil-ila.

### *Din Naiponponan Jesus*

*(Mat. 27:57-61; Mar. 15:42-47; Jn. 19:38-42)*

<sup>50-51</sup> Wada di lalaki ay manngadan si Jose ay taga-Arimatea ay esa ay ili sin probinsiya ay Judea. Sigid ya nalinteg ay ipogaw sisya ay manman-ed sin domatngan di panturayan Diyos. Olay mo sisya et esa ay pangolon di Judio, adi nakiaw sin planon di iib-a na ya din natongpalana. <sup>52</sup> Si Jose ay nay et inmey en Pilato ay nangdaw sin bangkay Jesus. <sup>53</sup> Pag nan en ibaba sin krus et binotibotana si sigid ay lopot, asi na pag igto sin liyang ay natiktikan ay bato ay adi naos-osal. <sup>54</sup> Sin nangamaganas di, dandani ay manlogi din agew ay pan-ibbayan, tan masdem di Biyernes ay pansaganaan di Judio.†

<sup>55</sup> Din babbabai ay nakikiey en Jesus ay napo ed Galilea et inmonod da en Jose et inila da din kad-an di naiponponan Jesus ya din inyat Jose ay nangigto sin bangkay na. <sup>56</sup> Pag dan somaa ta en da isagana din lana ya bangbanglo ay awni et en da iaplos sin bangkay na. Ngem sin kabigatana ay pan-ibbayan, nantetee da ed bebbeey da ay nan-illeng, tan say linteg di Judio.‡

## 24

### *Din Kasin Natagoan Jesus*

*(Mat. 28:1-10; Mar. 16:1-8; Jn. 20:1-10)*

<sup>1</sup> Idi Domingo, nasapa din babbabai ay sana ay inmey sin kad-an di naiponponan Jesus ay nangitatakin si bangbanglo ay insagana da. <sup>2</sup> Dintengan da ay naolin din bato ay nain-eb sin liyang, <sup>3</sup> isonga pag da et senggep, ngem magay dinatngan da sin awak Apo Jesus. <sup>4</sup> Idi pinmipika das di, nasdanasdaaw da, nanopaila et di doway ay lalaki ay mansilsilap di bado da ay nakipipika en daida. <sup>5</sup> Nanyongo din babbabai begew si palalo ay egyat da, ngem kanan din doylallalaki en daida, “Apay nga an-anapen yo din natago sin kad-an di natey? <sup>6</sup> Iwed si Jesus isna, tan natago kasin. Ay nilinglingan yo din inbaga na en dakayo sin kad-an yo ed Galilea <sup>7</sup> ay masapol ay maipolang din Anak di Ipogaw sin managbasol ta ilansa da sin krus, ngem matago kasin sin maikatlo ay agew?” <sup>8</sup> Et pag dan nemnemen din inbagan Jesus.

<sup>9</sup> Mantaoli da pay et inbaga da sin sinpo ya esa ay pasolot na ya din iib-a da din naamag. <sup>10</sup> Din ngadan di babbabai ay nay et da Maria Magdalena, Joanna, ya si Maria

\* **23:46** Salmo 31:5. † **23:54** Din ogalin di Judio, manlogi din agew ay pan-ibbayan sin kadiposan di agew sin Biyernes, et maldeng sin kadiposan di agew sin Sabado. ‡ **23:56** Exodo 20:10; Deuteronomio 5:14.

ay inan Santiago. Daida ya odom pay ay babbabai di en nangibaga sin aapostol sin naamag. <sup>11</sup> Ngem kanan din aapostol en taytayoktok et anggoy din inbagan di babbabai, isonga adi da pinati. <sup>12</sup> Ngem si Pedro pay et nanagtag ay inmey sin kad-an di liyang. Domateng pay isdi, nanyakog-ong ay nangitining, ngem magay inila na powira din lopot ay inbotibot da. Pag somaa ay manganaanap sin nemnem na mo sino di naamag.

*Din Nanpailaan Jesus Sin Dowa Ay Pasolot Na Ay Nanpa-Emmaus  
(Mar. 16:12-13)*

<sup>13</sup> Sin doy met laeng ay agew, mandad-an di dowa ay pasolot Jesus ay emey sin esa ay baryo ed Emmaus ay nasurok si sinpo ya esa ay kilometro din kaaddawi na ed Jerusalem. <sup>14</sup> Idi mandad-an da, ngalngalaten da din maipanggep sin am-in ay naam-amag. <sup>15</sup> Manngalngalat da pay yan inmasag-en si Jesus et nakiey en daida. <sup>16</sup> Ngem olay mo inila das sisya, adi da naimatonan tan kaman nagodab mata da. <sup>17</sup> Kanan Jesus en daida, “Sino di ngalngalaten yo dowan kayon mandad-an?”

Sinmaldeng da et maila sin mata da ay mansasadot da. <sup>18</sup> Pag kanan di esa en daida ay manngadan si Cleopas, “Anggoy mon samet si mantetee ed Jerusalem si adi makin ammo sin naam-amag isdi en dana ay agew ay nalabas.”

<sup>19</sup> “Ay sino di naam-amag?” kanan Jesus.

“Din naam-amag en Jesus ay taga-Nazaret,” insongbat da. “Mamadtos sisya et inbi-lang Diyos ya din am-in ay kaipoipogaw ay manakabalin sisya ay nan-it-itdo ya nangam-amag si nakaskasdaaw. <sup>20</sup> Ngem din papangolon di papadi ya din mangiturturay en datako et indarum das sisya ta matey et inpailansa da sin krus. <sup>21</sup> Sisya pay koma di namnamaen mi ay mangipawaya en datako ay Israelita. Ed wani pay, say maikatlo ay agew nanlogi sin naamagan dana. <sup>22</sup> Ed wani abe, waday naamag ay nasdaawan mi. Tan nasapa di odom ay babbabai ay iib-a mi ay inmey sin liyang <sup>23</sup> yan adi da kanon dintengan din bangkay na. Pag da et mantaoli ay manaddad-at en nanpaila kano di aanghel ay nangwani en natago kasin sisya. <sup>24</sup> Inmey abe di odom ay iib-a mi sin liyang yan kambaw tet-ewa am-in din inbagan din babbabai, ngem adi da met laeng inila si Jesus.”

<sup>25</sup> Pag kanan Jesus en daida, “Ay apaw kayo ay kolang nemnem na! Apay nga naligat ay patien yo din am-in ay inbagbagan di mamadto? <sup>26</sup> Maawatan yo koma ay masapol ay nam-osen din Messias din ligat ay sana agan-o, asi pag madayaw.” <sup>27</sup> Pag iolog Jesus en daida din am-in ay naisolat sin kalin Diyos maipanggep en sisya ay manlogi sin damo ay libro ay insolat Moses enggana sin insolat din am-in ay mamadto.

<sup>28</sup> Idi inmas-asag-en da sin ili ay emeyan da, intoloy Jesus ay manmandan, <sup>29</sup> ngem inpakodan das sisya ay mangmangwani, “Man-iyen takos na tan nay enggay nalabi.” Isonga pag makiey en daida.

<sup>30</sup> Idi tinmokdo da ay mangan, inan Jesus din tinapay et man-iyaman en Diyos. Pag nan pit-ingen et idawat na en daida. <sup>31</sup> Asi pag et maibolinasnasan mata da et inmatonan das sisya. Ngem pag et bigla ay namaga. <sup>32</sup> Asi da nan-asibaga, “Iso met gayam ay siged di nemnem ta sin danan sin nangi-ologana sin naisolat ay kalin Diyos en daita.”

<sup>33</sup> Kapika da ay dagos et nantaoli da ed Jerusalem. Dinatngan da din sinpo ya esa ay pasolot na ya din odom ay nakisinop en daida <sup>34</sup> ay mangmangwani, “Tet-ewa baw adi ay natago kasin din Apo, tan nanpaila en Simon!” <sup>35</sup> Pag dad-aten aben din dowa ay sana din naamag sin danan ya din nangimatonan da en Jesus sin namit-ipit-ingana sin tinapay.

*Din Nanpailaan Jesus Sin Papasolot Na  
(Mat. 28:16-20; Mar. 16:14-18; Jn. 20:19-23; Ina. 1:6-8)*

<sup>36</sup> Daddad-aten da pay laeng dana ay naamag yan kawada et si Jesus ay pinmipika sin kad-an da. “Talna koma di mawada en dakayo,” kanana.

<sup>37</sup> Ngem nakibtot da ya palalo di egyat da, tan kanan da en banig di il-ilaen da.

<sup>38</sup> Isonga pag nan kanan en daida, “Apay nga emegyat kayo ya mandowadowa kayo maipanggep en sak-en? <sup>39</sup> Ilaen yo nan takkay ko ya nan sikik ta pasien yo en tet-ewa ay sak-en. Kapayen yos sak-en ta say mapnek kayo. Tan din banig et magay awak na ya tong-a na, et mail-ila yo met ay wada en sak-en.”

<sup>40</sup> Sin nangibagaana isna, inpaila na en daida din takkay na ya siki na. <sup>41</sup> Adi da pay laeng pasien tan palalo ay masmasdaaw ya maragragsakan da, isonga kanan aben Jesus, “Ay wada di makan isna?” <sup>42</sup> Indawtan da si naidawis ay nigay, <sup>43</sup> et insida na sin nangiilaan da.

<sup>44</sup> Pag nan kanan en daida, “Da naey ay naam-amag et siya met laeng din inbagbagak en dakayo sin kawadak en dakayo ed idi: masapol ay matongpal am-in din insolat Moses ya din mamadto ya din wada abe sin libro ay Salmo ay maipanggep en sak-en.”

<sup>45</sup> Pag nan silawan din nemnem da ta say maawatan da din naisolat ay kalin Diyos

<sup>46</sup> yan kanana en daida, “Siya na di naisolat: masapol ay manligat ya matey din Messias et pag kasin matago sin maikatlo ay agew. <sup>47</sup> Masapol abe ay maikaskasaba din panbabawian di ipogaw ya din pamakawanan Diyos sin basbasol da begew en sak-en sin am-in ay ili isnan daga manlogi isnan ed Jerusalem. <sup>48</sup> Dakayo di mangipaneknek ay tet-ewa din nay inil-ila yo. <sup>49</sup> Awni et sak-en met laeng di mangibaa sin inkarin Amak ta say bomaba en dakayo. Sedsed-en yo ngarud ed Jerusalem enggana ay awaten yo din nay panakabalin ay mapo ed langit.”

### *Din Naikayangan Jesus Ed Langit*

*(Mar. 16:19-20; Ina. 1:9-11)*

<sup>50</sup> Pag nan ipango si daida ed Betania, et inkayang nan takkay na ay mamindisyon en daida. <sup>51</sup> Binbindisyonana pay laeng daida ya dowanana taytaynan daida et naikayang ed langit. <sup>52</sup> Dinaydayaw das sisya et pag dan mantaoli ed Jerusalem ay peteg di ragsak da. <sup>53</sup> Et kankanayon ay em-emey da sin Timplo ay manaydayaw en Diyos.



## **Din Sigid Ay Damag Ay Insolat San Juan Maipanggep Sin Libro Ay Nay**

Din nangisolat sin Sigid ay Damag ay nay et si Apostol Juan ay anak da Zebedeo en Salome ay taga-Galilea. Din panggep na ay nangisolat et wada sin 20:31: "...ta say patien yo ay si Jesus din Messias ay Anak Diyos ta say babaen sin pammati yo, wada en dakayo di biyag ay iwed patingga na begew sin nakies-esaan yo en sisya." Isonga ad-ado di mabasas na maipanggep sin kinadiyos Jesus ay Anak Diyos, din ison di pammati, ya din biyag ay iwed patingga na.

Sin panlogian di libro, inpalawag Juan ay si Jesus din makwani en Kali ay nanbalin si ipogaw ta say maila ya maammoan di kaipoipogaw din kinadiyos ya nemnem Diyos Ama. Sin kaitoloyan di libro, dinad-at na di pito ay nakaskasdaaw ay sinyal ay inpailan Jesus ay mangipaneknek sin kinadiyos na: din nangipabalinanas danom si arak (2:1-11), din nangagasana sin anak di esa ay manturay (4:46-54), din nangagasana sin lalaki ay mansakit ed Betzata (5:1-18), din namakanana sin kaipoipogaw (6:6-13), din nandanana sin labaw di danom (6:16-21), din nangagasana sin nagodab (9:1-7), ya din kasinan nanagoan en Lazarus (11:1-45). Lima en da naey ay sinyal, sin isna ay libro et anggoy di kad-an da. Dinad-at na abe din inbagan Jesus maipanggep sin kinadiyos na ya obla na, kaspangarigan din nangiarigan Jesus sin awak na ay makan (6:35), silaw (9:5), segpan (10:7), danan (14:6), ya poon di obas (15:1).

Ad-ado abe di maadal isna maipanggep sin kinadiyos Diyos Ama ya Diyos Ispirito Santo. Kaspangarigan, din kinaaman Diyos et nasurok si mamin sin-gasot di naiba-gaana. Wada abe di maadal maipanggep sin panagoana si natey (5:21), din kinangato na (10:29), din ipogaw ay panbeeyana (14:23), din kinasanto na (17:11) ya kinalinteg na (17:25). Mo din Ispirito Santo abe, ad-ado di naisolat sin kapitolo 14-16 maipanggep si ipaneknek na sin am-in ay ipogaw ya din panteteana, pamadbadangana ya pan-it-itdoana si mamati en Cristo.

Ad-ado di inbagbagan Jesus ay sin isna ay libro et anggoy di kad-ana ay kaman din nakingalatana en Nicodemus maipanggep si kasin maianakan di ipogaw (3:1-21), din nakingalatana sin babai ay taga-Samaria maipanggep si danom ay mangidawat si biyag (4:1-26), din nan-itdoana sin fiesta ay makwani en Ab-abong, din pangarig maipanggep sin siged ay mangay-ayowan si karnero (kapitolo 10), ya din inkararag na en Ama na (kapitolo 17).

### **Din Linaona**

Din kali ay nanbalin si ipogaw 1:1-18

Si Juan ay Mamonbonyag ya din damo ay papasolot Jesus 1:19-51

Din nan-it-itdoan Jesus sin kaipoipogaw 2:1-12:50

Din nan-it-itdoan Jesus sin papasolot na sin naod-odi ay agew na 13:1-17:26

Din nateyan Jesus 18:1-19:42

Din kasin natagoan ya nanpail-ilaan Jesus 20:1-21:25

### *Din Kali Ay Nanbalin Si Ipogaw*

<sup>1</sup> Sin damodamo, sin daan maparsuaan di lobong, nawawada din Kali.\* Sisya di kadwan Diyos yan Diyos met laeng sisya. <sup>2</sup> Nanipod sin eng-enggana, wada din Kali ay sana ay kadwan Diyos. <sup>3</sup> Sisya di nangipaamagan Diyos sin am-in ay wada, et maga

\* **1:1** Di kali et kaipaammoan di nemnem, isonga din kananas na en si Cristo din Kali et laydena ay kalien en sisya di pangammoan di ipogaw sin nemnem Diyos.



polos di naamag mo adi babaen en sisya. <sup>4</sup> Sisya abe di poon di biyag ay maiarig si silaw ay maninggaw si nemnem di ipogaw. <sup>5</sup> Tinitinggawana din mabolinget, yan din bolinget et adi makaabak sin silaw.

<sup>6</sup> Waday ipogaw ay inbaan Diyos ay manngadan si Juan.† <sup>7</sup> Inbaan Diyos sisya ta ena paneknekan sin kaipoipogaw di maipanggep sin silaw ta mamati koma am-in ay ipogaw begew din inpaneknek na. <sup>8</sup> Si Juan et baken din silaw ay mismo, mo adi et din inmali ay mangipaneknek si maipanggep sin silaw.

<sup>9</sup> Din kosto ay silaw et din inmali isnan daga ta ena silawan di nemnem di am-in ay ipogaw. <sup>10</sup> Ngem olay mo wada isnan lobong yan pinarsuan Diyos din am-in ay wadas na babaen en sisya, adi pay dedan inmatonan di ipogaw sisya. <sup>11</sup> Inmali sin ili na, yan adi aben inawat din kailiana. <sup>12</sup> Ngem wada pay di nangawat ay din namati en sisya. Daida di inyaanas kalintegan ay manbalin si anak Diyos. <sup>13</sup> Din nanbalinan da ay anak Diyos et baken naipogawan, tan baken maipoon sin nandaagan di sin-asawa ya din panggep da ay waday anak da, mo adi et maipoon sin panakabalin Diyos.

<sup>14</sup> Din Kali et nanbalin si ipogaw et nakitettee en dakami. Masemaseg-ang sisya ya pag tet-ewa din inbagbaga na. Inila mi din kinadiyos na ay din kinadiyos di bogbogtong ay Anak Diyos ay napo en Ama na.

<sup>15</sup> Pinaneknekan Juan sisya ay nangwani, “Si naey din inbagbagak sin nangwaniak en dakayo en nangatngato mo sak-en din omonod, tan sin daanak pay bomalaan, nawawadas sisya.” <sup>16</sup> Begew sin dakdake ay seg-ang na, kankanayon ay binbindisy-onanas datako am-in ay mamati. <sup>17</sup> Tan inpaammon Diyos din linteg na babaen en Moses, ngem din seg-ang na ya din tet-ewa ay maipanggep en sisya et inpaammo na en datako babaen en Jesu Cristo. <sup>18</sup> Maga di nakaila en Diyos, ngem din bogbogtong ay Anak na ay kadwan Ama na si kankanayon et sisya di nangipaammo.

### *Din Inpaneknek Juan ay Mamonbonyag* (*Mat. 3:1-12; Mar. 1:1-8; Luc. 3:1-18*)

<sup>19</sup> Sin namingsan, waday papadi ya Levita ay inmey sin kad-an Juan. Inbaan di papangolon di Judio ed Jerusalem si daida ta en da pooten en Juan mo sinos sisya. <sup>20</sup> Adi insaot Juan din katet-ewa na mo adi et inpodno na ay nangwani, “Bakenak din Messias.”‡

<sup>21</sup> “Sino ka ngarud? Ay sik-a si Elias?” kanan da.

“Baken,” kanana.

“Ay sik-a ngata din omali ay mamadto?”§ kasin dan inpoot.

“Baken,” kanana.

<sup>22</sup> “Yan sino ka ngarud? Ibagam kod tan siyat way isongbat mi sin nangibaa en dakami. Sinoy pangwanim sin awak mo?” kanan da.

<sup>23</sup> “Sak-en di natongpalan di inpadton Isaias ay wada sin lugar ay magay omili di mangibogbogaw ay mangmangwani, ‘Isagana yo din danan di Apo ta maidoritso’ ”\* kanan Juan.

<sup>24</sup> Asi et inbagan din doy inbaan di Fafariseo, <sup>25</sup> “Mo baken ka din Messias ya baken kas Elias ya din omali ay mamadto, apay ngarud ay manbonbonyag ka?”

<sup>26</sup> Sinongbatan Juan ay nangwani, “Danom anggoy di ibonyag ko en dakayo, ngem waday nakipipika en dakayo ay adi yon ammo. <sup>27</sup> Sisya di omonod en sak-en, et begew din kinangato na, adiak maikari ay olay mangobad sin galot di sapatos na.” <sup>28</sup> Naamag na ed Betania sin demang di ginawang ay Jordan ay nanbonbonyagan Juan.

### *Din Karneron En Diyos*

† **1:6** Si Juan ay nay et si Juan ay Mamonbonyag ay baken din pasolot Jesus ay nangisolat isna. ‡ **1:20** Din Messias (sin kalin di Judio) ono Cristo (sin Griego) et esa ay titulo. Din olog na et din dinotokan Diyos ay manturay. § **1:21** Malakias 4:5. \* **1:23** Isaias 40:3.

<sup>29</sup> Sin kabigatana, inilan Juan si Jesus ay omal-ali yan kanana ay nangiarig, “Dooy din karnero ay indawat Diyos ay maidaton ay mangaan sin basbasol di ipogaw. <sup>30</sup> Sisy di inbagbagak ay omonod ay nangatngato mo sak-en, tan sin daanak bomalaan, nawawadas sisy. <sup>31</sup> Olay sak-en et adiak ammo ed idi mo sinos sisy. Ngem inmaliak pay dedan ay mangibonyag si danom ta say maipaamos sisy en dakayo ay Israelita. <sup>32-33</sup> Ed idi, kanak, adiak am-ammos sisy. Ngem asi et din nangibaa en sak-en ta enak ibonyag di danom et kanana, ‘Din ilaem ay pomatongan ya pantean di Ispiritok et sisy di mangibonyag si Ispirito Santo.’ Yan siya et sa inilak din Ispirito Santo ay kaman kalapati ay binmaba ay napod langit et nantee en sisy. <sup>34</sup> Siya say inilak, isonga paneknekak en dakayo ay sisy di Anak Diyos.”

### *Din Damo Ay Papasolot Jesus*

<sup>35</sup> Sin kasin napat-a, wadas di da Juan ya doway ay pasolot na. <sup>36</sup> Inila nas Jesus ay malablabas yan kanana, “Si dooy din karneron en Diyos.” <sup>37</sup> Idi dinngen din doway pasolot na din nangwanianas di, kaonod da en Jesus. <sup>38</sup> Manwingi pay si Jesus, inila na din omon-onod en sisy et kananan daida, “Ay way ibaga yo?”

“Intoy panteteam ay Rabbi?” kanan da ay sinombat. (Din olog di Rabbi et maestro.)

<sup>39</sup> “Omali kayot ilan yo,” kanana. Isonga nakiey da et inila da din panteteana. Isdi di nakitean da en Jesus nanlogi sin alas kowatro engganans nalabi.

<sup>40</sup> Di esa en daida ay nanng sin inbagan Juan ya nakiey en Jesus et si Andrew ay iyogtan en Simon Pedro. <sup>41</sup> En kaanap en Simon et kanana en sisy, “Dintengan mi din Messias” (laydena ay kalien, din Cristo). <sup>42</sup> Asi na et ikoyog si Simon sin kad-an Jesus.

Insin-eng Jesus sisy yan kanana, “Sik-a si Simon ay anak Juan. Mabdayan ka si Cefas.” (Din ngadan ay nay et iso na en Pedro yan din olog na et bato.)

### *Din Namatian Aben Da Felipe En Nataniel En Jesus*

<sup>43-44</sup> Sin kasin napat-a, ninemnem Jesus ay emey ed Galilea. Dintenganas Felipe ay kailian da Andrew en Pedro ay taga-Betsaida yan kanana en sisy, “Manbalin ka et si pasolot ko.”†

<sup>45</sup> Si Felipe pay et ena dinatngan si Nataniel yan kanana en sisy, “Dintengan mi din ipogaw ay insolat Moses ya insolsolat aben di mamadto. Sisy si Jesus ay taga-Nazaret ay anak Jose.”

<sup>46</sup> Asi et kanan Nataniel, “Ay siya mo waday siged ay mapo ed Nazaret?”

“En ta ngarud ta en ka ilaen,” kanan Felipe ay sinombat.

<sup>47</sup> Sin nangilaan Jesus en Nataniel ay omal-ali, kanana, “Si naey di tet-ewa ay Israelita, tan magay siksikap na.”

<sup>48</sup> Pag pooten Nataniel, “Intoy nangammoam aya en sak-en?”

“Inilak sik-a sin poon di kaiw ay igos sin daan pangayagan Felipe en sik-a,” kanan Jesus ay sinombat. <sup>49</sup> Pag et kanan Nataniel, “Apo maestro, sik-a od baw din Anak Diyos. Sik-a di Arin di Israel.” <sup>50</sup> Kanan aben Jesus, “Mamati ka begew sin nangwaniak en inilak sik-a sin poon di kaiw ay igos, ay baken siya? Awni abe et mailam di nakaskasdaaw ay maam-amag mo sinay.” <sup>51</sup> Pag nan kanan en daida, “Tet-ewa nan ibagak en dakayo ay awni et ilaen yo ed langit ay mabobokatan. Et pag kayon ilaen din aanghel en Diyos ay em-emey ed langit ya bomabbaba en sak-en ay Anak di Ipogaw.”

## 2

### *Din Kasal Ed Cana*

† **1:43-44** Din kanana sin Griego et: Omonod ka... Di laydena ay kalien et makiey en Jesus ay pasolot na.

<sup>1</sup> Idi inmey di doway ay agew, waday kasal ed Cana sin probinsiya ay Galilea. Wadas di si inan Jesus, <sup>2</sup> ya siya abe en da Jesus ya din papasolot na, tan naayagan da abe. <sup>3</sup> Idi naabos din arak,\* kanan inan Jesus en sisya, “Naabosan das arak.”

<sup>4</sup> Kanan Jesus, “Ina, olay bay-am ta asiak makaoway, tan daan di timpo ay panongpalak sin planon Diyos.” <sup>5</sup> Pag kanan inan Jesus sin mantagtagay, “Tongpalen yo di amin ay itogona en dakayo.”

<sup>6</sup> Waday ogalin di Judio ay maipanggep si kosto ay iyat di manbo. Isonga waday naisasaad ay enem ay koli ay dadakke ta say os-osalen da. Di laonen di esa et emey ay lima ay lata.† <sup>7</sup> Kanan Jesus sin mantagtagay, “Pon-en yo din am-in ay koli ay sanas danom.” Et say inyat da di. <sup>8</sup> Pag nan kanan en daida, “Gomaok kayo ta en yo iyaan din pangolo ay makaammo si makan ya inom.” Et inyaan da. <sup>9</sup> Ngem din pangolo ay doy et adi na ammo di napoan din arak, tan din nangaok anggoy sin koli di nakin ammo. Siya di, idi tinamtamana din danom ay nanbalin si arak, inayagana din mangasawa <sup>10</sup> yan kanana en sisya, “Ogalin di ipogaw ay pangon-onaen da di kam-isan ay arak. Et mo nakainoinom da, asi da paanongosen di maamsit. Ngem sik-a pay, indolin mo baw din kam-isan enggana ed wani.”

<sup>11</sup> Din nay inamag Jesus ed Cana ay ili ed Galilea et say damo ay sinyal ay nangipailaana sin kinadiyos na. Et namnamed ay namati din papasolot na en sisya. <sup>12</sup> Makdeng pay din kasal, inmey da Jesus en ina na, din aag-i na ya papasolot na ed Capernaum, et nantetee das di si piga ay agew et anggoy.

*Din Nangipabelaan Jesus Sin Man-ilaklako Sin Timplo*  
(*Mat. 21:12-17; Mar. 11:15-19; Luc. 19:45-48*)

<sup>13</sup> Idi dandani din fiestan di Judio ay makwani en Nalabas, inmey da Jesus ed Jerusalem. <sup>14</sup> Sinenggep sin Timplo yan dinatngana di man-ilaklakos baka, karnero ya kalapati ya din mansoksokat si pilak. <sup>15</sup> Kaamag et si lobid ay soplit yan inpabela nas daida pati din karnero ya baka. Inwalang na abe din pilak di mansoksokat yan tinokang na din lalamisaan da. <sup>16</sup> Asi na et kanan sin man-ilaklakos kalapati, “Kaanen yo sa damdama! Adi yo panbalinen din beey Amak si panmarkitan!” <sup>17</sup> Et pag nemnemen din papasolot na din inpaisolat Diyos ay kanana, “Di palalo ay mangisaksakitak sin beey mo et say kateyak.”‡

<sup>18</sup> Idi siya di, kanan di papangolon di Judio en sisya, “Sinoy sinyal si pailam en dakami ay waday kalebbengam ay nangiyat sidi?”

<sup>19</sup> Kanan Jesus, “Bakasen yo din Timplo ay nay ta asiak kasin saaden si tolo ay agew.”

<sup>20</sup> Asi da et kanan, “Opatapolo ya enem ay tawen ket di naamagan din Timplo ay nay, asi ka et kanan en saadem kasin si tolo ay agew?” <sup>21</sup> Ngem din Timplo ay inbagan Jesus et din awak na. <sup>22</sup> Siyat kasin natago, asi ninemnem din papasolot na din kali na ay sana. Et pag dan pasien din inpaisolat Diyos ya din inbagan Jesus.

<sup>23</sup> Ad-ado da ay namati en sisya sin nakifestaana ay sana ed Jerusalem, tan inila da din nakaskasdaaw ay sinyal ay inam-amag na. <sup>24</sup> Ngem adi intalek Jesus din awak na en daida, <sup>25</sup> tan ammo na din ogalin di am-in ay ipogaw. Adi na masapol di mangibaga en sisya si wadas nemnem da, tan inaammo na met dedan.

### 3

*Din Nakingalatan Jesus En Nicodemus*

<sup>1</sup> Waday pangolon di Judio ay manngadan si Nicodemus ay naitatapi sin bonggoy di Fariseo. <sup>2</sup> Sin namingsan ay labi, inmey sin kad-an Jesus yan kanana en sisya, “Apo

\* **2:3** Din arak di Judio, naamag si danom di obas. Kaman tapey di kapigsa na. † **2:6** Lima ay lata ono sin-gasot ay litro ono dowanpo ono tolonpo ay galon. ‡ **2:17** Salmo 69:9.

maestro, ammo mi ay inbaan Diyos sik-a ay man-itdo en dakami. Tan maga polos di makaamag sin nakaskasdaaw ay sinyal ay inam-amag mo mo magas Diyos en sisya.”

<sup>3</sup> “Tet-ewa nan ibagak en sik-a,” kanan Jesus ay sinombat. “Mo adi kasin maianak di ipogaw, adi mabalin ay makilak-am sin panturayan Diyos.”

<sup>4</sup> Et pag pooten Nicodemus, “Intoy iyat ngin di nakay ay maianak kasin? Ay makataoli aya sin eges di ina na ta asi maipidwa ay maianak?”

<sup>5</sup> “Tet-ewa nan ibagak en sik-a,” insongbat Jesus. “Mo adi maianak di ipogaw si danom ya si Ispirito Santo, adi mabalin ay maitapi sin panturayan Diyos. <sup>6</sup> Tan din ianak di ipogaw et naipogawan, ngem din ianak pay di Ispirito Santo et naispiritoan. <sup>7</sup> Adi ka ngarud masdaaw sin inbagak en masapol ay maianak kayo kasin. <sup>8</sup> Tan olay mo adi maawatan di iyat na ay maamag, maamag met laeng. Kaman din dagem. Adi tako ammo din kapkapoana ya din em-emeyana, tan oway di iyaat na, ngem liknaen tako pay dedan. Iso na sin am-in ay maianak si Ispirito Santo.”

<sup>9</sup> Pag kasin pooten Nicodemus, “Intoy iyat ngin nina ay maamag?”

<sup>10</sup> Kanan Jesus, “Esa ka ay madayaw ay maestro isnan ed Israel, ngem adi ka maawatan? <sup>11</sup> Tet-ewa nan ibagak ay din kalien mi et din ammo mi ya inila mi. Ngem dakayo pay et adi yo awaten din kankanan mi. <sup>12</sup> Nay inpaammok en dakayo di maipanggep sin nay kalotaan, ngem adi yo patpatien. Mo siya sa, intoy iyat yo ngin ay mamati mo way dad-atek si maipanggep ed langit? <sup>13</sup> Maga met di kinmayang ed langit mo adi et sak-en anggoy ay Anak di Ipogaw ay binmaba ay napod langit. <sup>14</sup> Yan din maamag en sak-en et kaman din naamag sin sinan eweg ay intakap ya inkayang Moses si posti sin nandad-anan da sin lugar ay magay omili.\* Tan sak-en abe ay Anak di Ipogaw et masapol ay maitakapak sin krus ya maikayangak <sup>15</sup> ta say mo sino di mamati en sak-en et waday biyag na ay iwed patingga na,” kanan Jesus.

<sup>16</sup> Gapo ta peteg di layad Diyos sin ipogaw isnan lobong, inbaa na din bogbogtong ay Anak na ta say mo sino di mamati en sisya, adi kaisian en Diyos ta madosa, mo adi et wada en sisya di biyag ay iwed patingga na. <sup>17</sup> Tan adi inbaan Diyos din Anak na isnan lobong ta keddengana di kaipoipogaw, mo adi et ta maisalakan da babaen en sisya. <sup>18</sup> Isonga din mamati en sisya et adi da met madosa. Ngem din adi mamati et enggay nakeddengana da ay madosa, tan adi da gayam namati sin bogbogtong ay Anak Diyos.

<sup>19</sup> Siya nay begew si nakeddengana da. Inmali isnan lobong din silaw ay maninggaw si nemnem di ipogaw, ngem pinatpateg da din mabolinget mo din mapat-a, tan lawa di inam-amag da. <sup>20</sup> Tan din mangam-amag si lawa et sigaan da din silaw, et adi da sag-enan tan into et mo maipaila di basol da. <sup>21</sup> Ngem din mangon-onod si tet-ewa et omasag-en da sin silaw ta dalon maipaila ay si Diyos di nakin amag sin siked ay amagen da.

### *Din Pangwanin Juan En Jesus*

<sup>22</sup> Pag emey da Jesus ya din papasolot na sin probinsiya ay Judea et nantettee das di ay manbonbonyag. <sup>23</sup> Si Juan abe et manbonbonyag ed Enon ay naisag-en ed Salim, tan ad-adoy danom sidi. Nan-inonod di ipogaw ay emey en sisya ta en da manpabonyag, <sup>24</sup> tan daan pay laeng maibalod si Juan.

<sup>25</sup> Din papasolot Juan et waday nakisongbatan da si esa ay Judio maipanggep si iyat di bonyag. <sup>26</sup> Siya di, inmey din papasolot ay sana en Juan. Kanan da, “Apo maestro, ay manemnem mo din gait mo sin kawadam ed demang di Jordan, ay din inbagbagam met laeng? Wada kano ay manbonbonyag, yan am-in ay ipogaw et em-emey dan sisya.”

<sup>27</sup> Sinongbatan Juan yan kanana, “Olay mo sino ay ipogaw et maga di awatena ay kasasaad mo baken si Diyos di mangidawat. <sup>28</sup> Dinnye yo dedan din inbagak en bakenak din Messias mo adi et din inbaan Diyos ay mamangpango mo sisya. <sup>29</sup> Din kasasaad ko et

\* 3:14 Bilbilang 21:4-9.

kaman din gait di mangasawa ay makaammo sin saganan di kasal. Olay mo baken sisya di akin asawa sin babai, peteg di layad na pay dedan ay maitapi sin kasal, tan dengngena di ibagbagan di gait na. Isonga sak-en abe ay nangisagana si ipogaw para sin omalian di Messias et peteg di layad ko ed wani. <sup>30</sup> Masapol ay maipangatngatos sisya downak pay bomabbaba.”

### *Din Kinangaton Di Napo Ed Langit*

<sup>31</sup> Mo din napo sin daga et naidagaan, isonga din kalkaliena et naidagaan met laeng. Ngem mo din napo ed langit, sisya di kangatoan si am-in. <sup>32</sup> Kalkaliena di inila ya dinnge na, ngem at-atik di mamati sin ibagbaga na, olay mo sisya di kangatoan. <sup>33</sup> Ngem din mamati et paneknekan da ay tet-ewa din kalin Diyos, <sup>34</sup> tan say ibagbagan din inbaan Diyos din kalin Diyos met laeng. Tan sisya di inyaan Diyos sin am-in ay panakabalin di Ispirito na. <sup>35</sup> Tan si Diyos Ama et laylaydena din Anak na, et inpolang na di am-in en sisya. <sup>36</sup> Mo sino di mamati sin Anak na et waday biyag na ay iwed patingga na, ngem din adi manongpal sin Anak na et maga en sisya din biyag ay nay, mo adi et dosaen Diyos ay eng-enggana.

## 4

### *Din Nakingalatan Jesus Sin Babai Ay Taga-Samaria*

<sup>1</sup> Din Fafariseo et nadamag da ay ad-ado kano di aw-awisen ya bonbonyagan Jesus ay pasolot na mo si Juan. <sup>2</sup> Ngem di katet-ewa na et baken si Jesus di namonbonyag mo adi et din papasolot na anggoy.

<sup>3</sup> Idi inammoan da Jesus ay say nadamag din Fafariseo, kinmaan da ed Judea ta mantaoli da ed Galilea. <sup>4</sup> Masapol ay mandan da sin sakopen di Samaria, <sup>5</sup> et sinmawang da ed Sikar ay esa ay ili isdi. Din ili ay doy et asag-en sin daga ay intawid Jacob sin anak na ay si Jose ed nabaon. <sup>6</sup> Wada abes di din bobon ay kinaotan Jacob. Nabbay si Jesus sin nandad-anana tan enggay omalas dosi, et katokdo sin kad-an di bobon ay sana. <sup>7-8</sup> Din papasolot na pay et inmey da sin ili ta en da manlakos kanen da.

Idi nadipos da, waday babai ay man-ili ed Samaria ay en nanakdo. “Man-inomak kod,” kanan Jesus en sisya.

<sup>9</sup> “Aw a, ngem Judio ka met. Apay ngin ay mankedaw kas danom en sak-en ay babai ay taga-Samaria?” kanana ay sinombat. (Tan din Judio et adi da iman makipolpolapol si taga-Samaria.)\*

<sup>10</sup> Kanan pay Jesus, “Mo ammom koma din idawat Diyos ya mo sinoak ay mankedaw si danom, sik-a et koma di mankedaw en sak-en ta asiak iyaan sik-as danom ay mangidawat si biyag.”

<sup>11</sup> Asi et kanan din babai, “Apo, maga met di igaok mo yan sana ay malosong din bobon. Into ngin di pangaam si danom ay mangidawat si biyag? <sup>12</sup> Ay napatpateg ka aya mo din ap-apo tako ay si Jacob? Tan sisya met di nangitawid sin bobon ay nay, yan say nanaksakdoana ya din aan-ak na si inin-inom da ya din talaken da.”

<sup>13</sup> Kanan aben Jesus ay sinombat, “Mo sino di man-inom sin danom ay sana, manbigaw kasin. <sup>14</sup> Ngem din man-inom pay sin danom ay idawat ko, adi kabigbigaw. Tan din danom ay idawat ko et manbalin si kaman obbog sin awak na ay adi katkatdok ay mangidawat en sisya si biyag ay eng-enggana.”

<sup>15</sup> Pag kanan din babai, “Apo, omya ka kod sin danom ay sana ta adiak kabigbigaw ya adiak masapol ay omalialis na ay en manakdo.”

<sup>16</sup> Kanan Jesus, “En ka ayagan si asawam ta omali kayos na.”

<sup>17</sup> “Maga met di asawak,” insongbat din babai.

\* **4:9** Di esa abe ay kaiologan nina sin Griego et: (Tan din Judio et adi da iman pan-inoman din os-osalen di taga-Samaria.)



Kanan aben Jesus, “Tet-ewa kayman san kanam en magay asawam, <sup>18</sup>tan namin lima ka ay nakiasawa, yan din kabebbeey mo ed wani et baken mon asawa.”

<sup>19</sup>Pag kanan din babai, “Apo, mamadto ka baw! Waday ibagak en sik-a. <sup>20</sup>Din dontog ay nay et say nandaydayawan di ap-apo mi en Diyos ed nabaon. Ngem dakayo ay Judio et kanan yo en ed Jerusalem anggoy di kosto ay pandaydayawan di ipogaw en Diyos.”

<sup>21-22</sup>Asi et kanan Jesus, “Ina, dakayo ay taga-Samaria, adi yo met ammo si Diyos ay daydayawen yo, ngem dakami pay ay Judio et ammo mi, tan din mangisalikan si am-in ay ipogaw et naianak si Judio. Patiem man din nay kanak. Sin domateng ay timpo, baken sin dontog ay nay ya baken aben ed Jerusalem di pandaydayawan di ipogaw en Diyos Ama. <sup>23</sup>Di katet-ewa na et enggay dinmateng din timpo ay din kosto ay mandayaw en Diyos Ama et naimposoan di panangdayaw da en sisya babaen sin Ispirito na ay maibasar sin tet-ewa ay kinadiyos na. Tan layden Diyos ay say iyat di ipogaw ay mandayaw en sisya. <sup>24</sup>Si Diyos et ispirito gamin. Isonga din mandayaw en sisya et masapol ay naimposoan di panangdayaw da babaen sin Ispirito na ay maibasar sin tet-ewa ay kinadiyos na.”

<sup>25</sup>Pag kanan din babai, “Ammok kayman ay omali din Messias (ay mangadanan si Cristo). Et mo omali, ipaammo na di am-in en datako.”

<sup>26</sup>“Yan sak-en adi di, ay makingalngalat en sik-a,” kanan Jesus.

<sup>27</sup>Idi siya et di, kadateng din papasolot na. Nasdaaw da, tan makingalngalat si babai, ngem maga en daida di nanpoot mo sinoy layden din babai ya mo sinoy begew ay makingalngalat si Jesus en sisya.

<sup>28</sup>Siya et di, kaipayag din babai sin sinakdo na et kataoli sin ili. Kanana sin ipogaw ay wadas di, <sup>29</sup>“Omali kayot ilaen yoy lalaki ay nangibagan sak-en sin am-in ay inam-amag ko, mo sisya et din kanan da en Messias.” <sup>30</sup>Et inmey da sin kad-an Jesus.

<sup>31</sup>Idi nadipos din babai, inpidwapidwan din papasolot Jesus ay nangwani en sisya, “Apo maestro, mangan ka et.”

<sup>32</sup>Ngem kanana, “Kosto, tan waday kinan ko ay adi yon ammo.”

<sup>33</sup>Siya et di nan-asipoot din papasolot na, “Ay wada ngata di nangialis kinana?”

<sup>34</sup>Pag kanan Jesus, “Siya na di kanek, din panongpalak sin layden di inmibaa ta say makdeng di obla ay inpaamag na en sak-en. <sup>35</sup>Waday apat yo ay kanana, ‘Wada di opat ay bowan pay, asi domateng di pinag-aani.’ Ngem kanak en dakayo en enggay pinag-aani ed wani. Ilaen yo man din omal-ali ay ipogaw. Daida di iarig kos naom ay pagey sin payew, tan maani da koma. <sup>36</sup>Din man-ani et malagboan da, ya din ipogaw ay anien da et gon-oden da di biyag ay iwed patingga na. Isonga din nangibonobon sin kalin Diyos et makiragsak da sin man-ani. <sup>37</sup>Tet-ewa iman din apat di ipogaw ay kanana, ‘Manbonobon di esa, man-ani abey esa.’ <sup>38</sup>Tan inbaak si dakayo ay mangani si adi yo nanling-etan, et nay gon-oden yo din oblan di odom,” kanan Jesus sin papasolot na.

<sup>39</sup>Mo din taga-Samaria ay man-ili ed Sikar, ad-ado da ay namati en Jesus begew din nangwanian din babai en inbagan Jesus en sisya di am-in ay inam-amag na. <sup>40</sup>Isonga idi sinmawang da sin kad-an Jesus, inpakodan da ta makitee en daida. Et nantees di si doway agew. <sup>41</sup>Ad-ado pay di namati en sisya begew sin inbagbaga na. <sup>42</sup>Et pag dan kanan sin babai, “Din pamatian mi ed wani et baken anggoy manbegew din inbagam mo adi et begew tan dinnge mi din inbagbaga na, et ammo mi ay sisya tet-ewa di mangisalikan si kaipoipogaw isnan lobong.”

### *Din Nangagasan Jesus Sin Anak Di Esa Ay Manturay*

<sup>43</sup>Idi nakdeng din doway ay agew, kinmaan da Jesus ed Samaria et inmey da sin probinsiya ay Galilea. <sup>44</sup>Tan waday inbagan Jesus ed idi ay maga di mamadto ay bigbigen di kailiana. <sup>45</sup>Idi sinmawang da ed Galilea, sinangailin din omilis sisya, tan inila da din am-in ay inam-amag Jesus ed Jerusalem sin nakifiestaan das di.



<sup>46</sup> Idi siya di, nantaolis da Jesus ed Cana ay ili ed Galilea ay nangipabalinanas danom si arak. Sin dinmatnganas di, wada di esay opisyal di gobierno ed Capernaum ay mansakit di anak na ay lalaki. <sup>47</sup> Idi nadamag na ay sinmawang si Jesus ed Galilea ay napo ed Judea, en nanpakpakaasi en sisya ay emey koma ed Capernaum ta ena agasan din anak na ay enggay matmatey. <sup>48</sup> Kanan Jesus en sisya, “Ay peteg kayo kayman! Mo magay ilan yos nakaskasdaaw ay sinyal, adi kayo mamati.”

<sup>49</sup> Dowan et kanan din opisyal, “Apo, emey ta paabe ta adi matey din anak ko.”

<sup>50</sup> Pag kanan Jesus, “Emey ka et. Laton ay matago din anak mo.” Pinati na din kalin Jesus et doy ay somaa.

<sup>51</sup> Idi wada pay laeng sin danan sin napat-aana,† inabat na di baa na ay nangibaga en matmatago din anak na. <sup>52</sup> “Pig-an pay di nailatonana?” pinoot din opisyal.

“Nakaan din atong di awak na ed nasdem sin ala una,” kanan da.

<sup>53</sup> Pag nemnemen din opisyal ay siya di din oras ay nangwanian Jesus en, “Laton ay matago din anak mo.” Siya di, namatis sisya ya am-in da ay bemeey. <sup>54</sup> Siya na di maikadwa ay nakaskasdaaw ay sinyal ay inamag Jesus ed Galilea sin napoana ed Judea.

## 5

### *Din Nangagasan Jesus Sin Lalaki Ed Betzata*

<sup>1</sup> Idi nakdeng pay di, wada di fiestan di Judio ed Jerusalem et en nakifiesta si Jesus. <sup>2</sup> Ed Jerusalem, sin asag-en sin pasbol di karnero, waday nabyeng ay posong ay nginadanan di Judio si Betzata.\* Sin benget na, waday lima ay ab-abong <sup>3</sup> ay pansidsidoman di mansakit. Waday nagodab, waday napilay, ya wada abey paralitiko. Ad-ado da di binmabaktad isdi [ay manman-ed sin pankibyawan di danom. <sup>4</sup> Tan sagpamingan kano, waday anghel en Diyos ay en mantab-aw ay mangibyaw sin danom. Yan din mangon-ona ay mantab-aw sin danom sin pangibyawan di anghel et makaan mo sinoy sakit na.]†

<sup>5</sup> Waday lalaki sidi ay nansaksakit si tolonpo ya wao ay tawen. <sup>6</sup> Idi inilan Jesus sisya ya inammoana ay nabayag ay binmabaktad sidi, kanana en sisya, “Ay laydem ay mailatonan?”

<sup>7</sup> Sinongbatan din lalaki ay nangwani, “Laydek, Apo, ngem maga di mangiey en sak-en sin danom mo makibyaw. Pinadapadas ko ay emey, ngem sin daanak domateng, wada et di enggay nangon-ona.”

<sup>8</sup> Pag kanan Jesus, “Ibangon mo, bidkingem san abek mo ta mandan ka.” <sup>9</sup> Et nailatonan ay dagos, kabidking sin abek na, et pag mandan.

Naamag na sin agew ay pan-ibbayan. <sup>10</sup> Isonga kanan di papangolon di Judio sin lalaki ay sana, “Kontran di linteg tako ay egnam san abek mo, tan ed wani et agew ay pan-ibbayan.”

<sup>11</sup> “Aw kayman,” kanan din lalaki. “Ngem din nangagas en sak-en et kanana met en, ‘Bidkingem san abek mo ta mandan ka.’”

<sup>12</sup> “Yan sino ngin damdama san nangwanis sa?” pinoot da. <sup>13</sup> Ngem din lalaki ay sana et adi na ammo mo sino di nangagas en sisya, tan enggay nadipos si Jesus ay nilingban di nabeweg ay ipogaw.

<sup>14</sup> Maaw-awni pay, dinatngan Jesus sin Timplo yan kanana en sisya, “Ilam, nay nailatonan ka. Adi ka kasin manbasbasol tan mo waday mapasamak en sik-a et nakarkaro mo sin damo.”

<sup>15</sup> Pag emey din lalaki et inpaammo na sin papangolon di Judio ay si Jesus di nangagas en sisya. <sup>16</sup> Et say nangilogian da ay namalpaligat en Jesus, tan waday inam-amag na

† 4:51 Emey ay tolonpo ya dowan ay kilometro di kaaddawin di Capernaum ed Cana. \* 5:2 Din naisolat si odom ay manuskrito sin Griego et: Betesda. Din naisolat abe si odom et Betsaida. † 5:4 Din linaon di [...] et maga sin kaad-adoan ay manuskrito sin Griego.

ay kaman nina sin agew ay pan-ibbayan. <sup>17</sup> Kanan Jesus en daida, “Si Amak et adi na polos isalsaldeng di obla na, isonga sak-en abe et itoltoloy ko ay man-obla.” <sup>18</sup> Siya et di, nasepsep ay inapasnek dan nemnem da ay mamse en sisya. Tan adi na et anggoy nilabsing din linteg maipanggep sin agew ay pan-ibbayan mo adi et aben inis-o nan awak na en Diyos ay mangwani en si Diyos di Ama na.

### *Din Kalebbengan Jesus Ay Anak Diyos*

<sup>19</sup> Kanan Jesus en daida, “Tet-ewa nan ibagak en dakayo. Sak-en ay Anak Diyos et maga di mabalin ay amagek si bokod ko mo adi et amagek anggoy din ilaek ay amagen Amak. Mo sinoy amagena et siya abey amagek. <sup>20</sup> Tan si Amak et laylaydenas sak-en. Isonga ipappaila na en sak-en di am-in ay am-amagena. Yan wada abey pail-ila na en sak-en ay nakaskasdaaw mo din inamag ko ay nay. Et masdaaw kayo adi.” <sup>21</sup> Tan si Amak et tagoena di natey, et siya abey iyat ko ay Anak na, tan tagoek mo sino di laydek ay tagoen. <sup>22</sup> Si Amak abe et maga polos di okomena mo adi et inpolang na en sak-en ay Anak na din kalebbengan ay mangokom, <sup>23</sup> ta say dayawen di am-in ay ipogaw sak-en ay kaman din iyat da ay manaydayaw en Amak. Din adi mandayaw en sak-en et adi na aben dayawen si Amak ay nangibaa en sak-en.

<sup>24</sup> “Tet-ewa nan ibagak en dakayo. Mo sino di mamati sin kankanak ya mamati abe sin nangibaa en sak-en, waday biyag na ay iwed patingga na. Adi makeddengnan ay madosa, tan enggay nakdeng di naisianana en Diyos yan naidawtan si biyag ay eng-enggana. <sup>25</sup> Tet-ewa abe nan kanak. Am-in ay ipogaw et kaman dan natey, tan naisisian da en Diyos. Ngem enggay dinmateng din timpo ay olay din kaman natey et dengngen da din kalik ay Anak Diyos, yan din mamati sin dinnge da et matago da tet-ewa. <sup>26</sup> Tan si Amak di mangidawat si biyag. Et siya abe en sak-en, tan indawat na en sak-en din kalebbengan ay mangidawat si biyag. <sup>27</sup> Indawat na abe en sak-en ay Anak na din kalebbengan ay mangokom, tan sak-en din Anak di Ipogaw. <sup>28</sup> Adi kayo masmasdaaw sin nay inbagak, tan sin tapin di agew, am-in din natey et dengngen da din kalik <sup>29</sup> yan bomala da sin naiponponan da. Din nangam-amag si siked et matago da ta say gon-oden da di biyag ay eng-enggana, ngem din nangam-amag si lawa et matago da ta say makeddengnan da ay madosa. <sup>30</sup> Maga di mabalin ay amagek si bokod ko, tan di iyat ko ay mangokom et maibasar si ibagan Diyos en sak-en. Isonga kosto di iyat ko ay mangokom, tan baken din laydek di onodak mo adi et din layden di nangibaa en sak-en.”

### *Din Mangipaneknek Si Maipanggep En Jesus*

<sup>31</sup> “Mo sak-en anggoy di mangipaneknek si maipanggep sin awak ko, adi met mapati din ibagak. <sup>32</sup> Ngem wada abe si Amak ay mangipaneknek si maipanggep en sak-en, et ammok ay tet-ewa di ibagbaga na maipanggep en sak-en.

<sup>33</sup> “Wada pay di inbaa yo ay en nanngge en Juan, yan inbaga na di katet-ewan di maipanggep en sak-en. <sup>34</sup> Adiak od masapol di ipogaw ay mangipaneknek si maipanggep en sak-en. Ngem ipanemnem ko pay dedan en dakayo din inbagan Juan ta say pasien yo koma ya maisalakan kayo. <sup>35</sup> Si Juan et maiarig si silaw ay mansilsilaw, yan ginan-ganas yo di nanilsilawana sin nemnem yo si sinkaattikan. <sup>36</sup> Ngem waday mangipaneknek en dakayo sin katet-ewan di inbagagak ay madagdagsen mo din inbagan Juan. Tan din obla ay tongtongpalek ay inpaamag Amak en sak-en et siya di din mangipaneknek ay si Amak di nangibaa en sak-en. <sup>37</sup> Yan si Amak ay nangibaa en sak-en et sisya ay mismo di nangipaneknek si maipanggep en sak-en. Ngem adi yo polos dindinngge din kali na ya adi yo aben inil-ila din iso na. <sup>38</sup> Adi yo aben inigto din inbaga na sin nemnem yo, tan adi yo pasien sak-en ay inbaa na. <sup>39</sup> Adaadalen yo din inpaisolat Diyos ed nabaon, tan ipagarup yo ay mo say iyat yo di, waday biyag yo ay iwed patingga na. Ngem sak-en dedan di kankanana din naisolat ay sana, <sup>40</sup> yan sigaan yo pay dedan ay maitapi en sak-en ta idawat ko koma en dakayo di biyag.

<sup>41</sup> “Adiak masapol ay omit-ek di ipogaw, ngem olay mo say masapol ko koma, baken dakayo di omit-ek, <sup>42</sup> tan ammok dedan di nemnem yo ay magay layad yo en Diyos. <sup>43</sup> Nay inmaliak sina ay si Amak di nangidawat si kalebbengak, yan adi kayo omawat. Ngem mo waday esa ay omali ay mangit-ek sin mismo ay kalebbengana, sisya di awaten yo. <sup>44</sup> Intoy iyat yo aya ay mamati? Tan din layden yo et din pan-asidayawan yo, ngem adi yo pagan-ano din pangit-ekan di es-esa ay Diyos en dakayo. <sup>45</sup> Olay siya di, adi yo koman kanan en sak-en di mangidarum en dakayo en Amak, tan din mangidarum en dakayo et din insolat Moses. Namnamaen yo ay maisalakan kayo mo pasien yo din insolat Moses ay sana. Ngem adi yo met pasien, <sup>46</sup> tan mo pasien yo koma, pasien yo koma abes sak-en, tan din insolat Moses et sak-en di ibagbaga na. <sup>47</sup> Ngem gapo ta adi yo pasien din insolat na ay sana, intoy iyat yo ngarud ay mamati sin kankanak?”

## 6

### *Din Namakanan Jesus Sin Kaipoipogaw Ay Nasurok Si Lima Ay Libo* (*Mat. 14:13-21; Mar. 6:30-44; Luc. 9:10-17*)

<sup>1</sup> Idi inmey di piga ay agew, inmagadang da Jesus ya din papasolot na sin annawa ay lebeng ay Galilea ay nginadanan da abe si Tiberias. <sup>2</sup> Ad-aad-ado di ipogaw ay inmon-onod en daida, tan inila da din nakaskasdaaw ay inam-amag na en daida ay mansakit. <sup>3</sup> Pag manikid da Jesus si bilig et tinmokdo das di. <sup>4</sup> Din timpo ay doy et dandani din fiestan di Judio ay makwani en Nalabas.

<sup>5</sup> Idi tinamang Jesus din ad-ado ay ipogaw ay em-emey sin kad-an da, kanana en Felipe, “Into ngata di pangaan takos kanen da?” <sup>6</sup> Ammon Jesus pay dedan di amagena, ngem pinoot na di ay say pamadas na en Felipe mo sinoy isongbat na.

<sup>7</sup> Kanan pay Felipe, “Olay piga ay libo\* di ilako takos tinapay, adi omanay ta map-eng da, olay pay saat-ik di kanen da.”

<sup>8</sup> Asi et kanan di esa ay pasolot na ay manngadan si Andrew ay iyogtan en Simon Pedro, <sup>9</sup> “Naey di esa ay an-anak ay lalaki ay nanbaon si limay tinapay ay sabog† ya doway piskaw. Ngem pigpiga pay na sin nay kaad-adon di ipogaw.”

<sup>10</sup> “Patokdoen yo kod daida,” kanan Jesus sin papasolot na. Ad-adoy logam sin kad-an das di, et say tinmokdoan din kaipoipogaw. Di kabibilang di nankakay ya babbaro et emey ay lima ay libo. <sup>11</sup> Pag alaen Jesus din tinapay et nan-iyaman en Diyos. Pag nan paiwatwat sin papasolot na sin kaipoipogaw. Siya abe sin piskaw, inpaiwatwat na di kaad-adon di layden di esa ya esa. <sup>12</sup> Idi nabsog da am-in, kanan Jesus sin papasolot na, “Olnongen yo din binay-an da ta maga di mabalang.” <sup>13</sup> Olnongen da pay din nabayan sin sigod ay lima ay tinapay, sinpo ya doway ay baskit di napay-an sin namekmek ay makan.

<sup>14</sup> Sin nangilaan din kaipoipogaw sin doy ay nakaskasdaaw ay inamag Jesus, kanan da, “Si naey baw adi din mamadto ay pinadtoan da ay omali isnan lobong.” <sup>15</sup> Ngem si Jesus pay, ammo na ay en da koman piliten sisya ta man-ari en daida. Et kadipos ay emey sin kadondontogan ay ang-anggay na.

### *Din Nandanang Jesus Sin Labaw Di Danom* (*Mat. 14:22-33; Mar. 6:45-52*)

<sup>16</sup> Idi malablabi pay, nanballalong din papasolot Jesus sin lebeng, <sup>17</sup> et nanlogan das bangka ta omagadang da ed Capernaum. Enggay nalabi yan maga pay laeng si Jesus ay maitapi en daida.

<sup>18</sup> Siya et di domateng et di mapges ay dagem yan pomigsa et abe din dalloyon. <sup>19</sup> Idi inmaddawi das lima ono enem ay kilometro, inila das Jesus ay omas-asag-en en daida

\* **6:7** Din kanana sin Griego et: doway gasot ay denario. Di esa ay denario et banol di poldiya. † **6:9** Din tinapay ay sabog et say kanen di nabiteg.

ay mandad-an sin labaw di danom. Et inmegyat da. <sup>20</sup> Ngem kanan et Jesus, “Sak-en na! Adi kayo emegyat!” <sup>21</sup> Pag manbaliw di nemnem da et layden da ay mangipalogan en sisya sin bangka, yan sinkaattikan yan kasanglad da sin emeyan da.

### *Din Kaiarigan Jesus Sin Makan Ay Mangidawat Si Biyag*

<sup>22</sup> Sin napat-a, din kaipoipogaw ay nataynan sin demang na et sinsin-ed das Jesus. Tan ninemnem da ay es-esa ay bangka di wadas di sin labi, et ammo da ay adi nakilogan si Jesus mo adi et din papasolot na anggoy. <sup>23</sup> Siya di, sinmawang di odom ay bangka ay napod Tiberias et sinmanglad da sin asag-en di nanganan di ipogaw si tinapay idi nakaiyaman si Apo Jesus. <sup>24</sup> Sin nangilaan di kaipoipogaw ay magas da Jesus ya din papasolot na, nakilogan da sin bangka ay sana et inmey dad Capernaum ta en da anapen si Jesus.

<sup>25</sup> Idi dinatngan das sisya sin demang di lebeng, pinoot da en sisya, “Apo maestro, pigan di sinmawangam sina?”

<sup>26</sup> Kanan Jesus ay sinombat, “Tet-ewa nan ibagak en dakayo. Anaanapen yos sak-en tan nangan kayos tinapay et nabsog kayo, baken begew tan naawatan yo din nakaskasdaaw ay sinyal ay inil-ila yo. <sup>27</sup> Baken koma san makan ay madadael di maimongsanan di nemnem yo mo adi et din makan ay mabayag, ay din mangidawat si biyag ay eng-enggana. Din mangidawat sin makan ay nay en dakayo et sak-en ay Anak di Ipogaw, tan inpailan Amak ay Diyos ay inapolbalanas sak-en.”

<sup>28</sup> Asi da et pinoot, “Sino ngin di amagen mi ta say tongpalen mi di obla ay layden Diyos?”

<sup>29</sup> Sinombat si Jesus, “Siya nay obla ay layden Diyos ay amagen yo. Mamati kayo en sak-en ay inbaa na.”

<sup>30</sup> Pag da aben pooten, “Sino ngarud di sinyal ay pailam en dakami ta say mamati kami en sik-a? Sino ngatay amagem? <sup>31</sup> Mo si Moses et pinakana din ap-apo tako si manna sin nandad-anan da sin lugar ay magay omili. Et say kanan din inpaisolat Diyos met laeng en, ‘Pinakanas daida si makan ay napod langit.’”<sup>‡</sup>

<sup>32</sup> Sinongbatan Jesus yan kanana, “Tet-ewa adi nan ibagak en dakayo ay baken si Moses di nangidawat si makan ay napod langit mo adi et si Amak. Yan din kinan da ed idi ay napod langit et baken din tet-ewa ay makan ay idawdawat Diyos en dakayo ed wani. <sup>33</sup> Tan din tet-ewa ay makan ay idawat Diyos et siya din mapod langit ay mangidawat si biyag sin ipogaw.”

<sup>34</sup> Asi da et kanan, “Apo, idawat mo kod en dakami san makan si kanayon.”

<sup>35</sup> Kanan pay Jesus ay nangiarig, “Sak-en adi din makan ay mangidawat si biyag. Tan din omali en sak-en ay mamati et adi kasin domagdagaang ya kabigbigaw. <sup>36</sup> Ngem dakayo pay, olay mo inil-ila yos sak-en, adi yo pay dedan mamati. Et siya met laeng din inbagak en dakayo ed idi. <sup>37</sup> Mo sino da pay di italek Amak en sak-en et omali da en sak-en, yan din omali en sak-en et adiak polos pakaanen. <sup>38</sup> Tan adiak binmaba ay napod langit ta say amagek din laydek mo adi ta amagek din layden di nangibaa en sak-en. <sup>39-40</sup> Et din layden Amak ay nangibaa en sak-en et dadlonak ayowanan din intalek nan sak-en ta adi malitaw di olay esa mo adi et kasinak tagoen daida sin kaodian ay agew. Tan laydena ay am-in ay mangammo ya mamati en sak-en et wada di biyag da ay iwed patingga na.”

<sup>41</sup> Asi et nilogian di Judio ay nanmayotmot begew din inbagan Jesus ay sisya din makan ay napod langit. <sup>42</sup> “Ay baken si naey aya si Jesus ay anak Jose?” kanan da. “Ammo tako met da ama na en ina na. Apay nga kanana en binmaba ay napod langit?”

<sup>‡</sup> 6:31 Exodo 16:4-5,15; Salmo 78:24. Din kanan da en manna et kaman kinikinittoy ay bin-i ay mankilat ya mam-is. Napod daya sin labi ay kaman andap.

<sup>43</sup> Sinongbatan Jesus yan kanana, “Adi kayo manmaymayotmot. <sup>44</sup> Magay makaali en sak-en ay mamati mo adi awisen Amak ay nangibaa en sak-en, yan daida di tagoek sin kaodian ay agew. <sup>45</sup> Tan waday insolat di mamadto ay kanana, ‘Am-in ay ipogaw et itdoan Diyos si daida.’ § Et mo sino da ay mangitneng sin inbagan Amak ta say sisya di pan-adalan da, daida iman di omali en sak-en. <sup>46</sup> Adiak layden ay kalien ay waday nangila en Diyos, tan magay nakaila en sisya mo adi et anggoy sak-en ay napo en sisya. <sup>47</sup> Tet-ewa adi nan kanak ay din mamati en sak-en et wada en sisya di biyag ay iwed patingga na. <sup>48</sup> Tan sak-en din makan ay mangidawat si biyag. <sup>49</sup> Din ap-apo yo et nangan das manna sin nandad-anan da sin lugar ay magay omili, yan doy ay natey da pay dedan. <sup>50</sup> Din makan pay ay ibagbagak en dakayo ed wani et siya di din kosto ay makan ay napod langit, yan din mangan sin makan ay nay et adi katkatey. <sup>51</sup> Sak-en met laeng din makan ay matmatago ay napod langit, et mo sino di mangan sin makan ay nay, matagotago ay eng-enggana. Din makan ay nay et din awak ko ay idawat ko ta say mabalin ay matago di kaipoipogaw isnan lobong.”

<sup>52</sup> Asi et nan-iibaw din Judio ay nangwani, “Intoy iyat ngin san ipogaw ay mangidawat si awak na ta kanen tako?”

<sup>53</sup> Kanan aben Jesus, “Tet-ewa adi nan ibagak en dakayo ay mo adi yo kanen din awak ko ay Anak di Ipogaw ya adi yo inomen din dadak, maga en dakayo di biyag ay iwed patingga na. <sup>54</sup> Tan din mangan sin awak ko ya manginom sin dadak et daida di idawtan Diyos si biyag ay eng-enggana, yan daida abe di tagoek sin kaodian ay agew. <sup>55</sup> Tan din awak ko ya din dadak et siya dadi din kosto ay makan ya mainom. <sup>56</sup> Din mangan sin awak ko ya manginom sin dadak et wada en sak-en si kanayon, yan sak-en abe et wadaak en sisya. <sup>57</sup> Matagoak begew en Amak ay nangibaan sak-en, tan sisya di poon di biyag. Iso na abe sin mangan en sak-en ay matago begew en sak-en. <sup>58</sup> Tan sak-en din kosto ay makan ay napod langit ay maitken sin kinan din ap-apo yo ed idi. Tan din nangan sidi et natey da met laeng. Ngem din mangan pay sin makan ay nay et matago si eng-enggana.” <sup>59</sup> Say inidton Jesus am-in dana sin sinagoga ed Capernaum.

<sup>60</sup> Idi dinngen din nakikiey en sisya din inbagbaga na, ad-ado en daida di nangwani, “Palalo ay naligat nan itdo na! Magan samet di mamatis sa.”

<sup>61</sup> Magay nangibaga en Jesus, ngem ammo na pay dedan ay say nanmaymayotmotan da din inidto na ay sana, et kanana en daida, “Kambaw nasnit kayo! <sup>62</sup> Mo siya sa, sino ngata di wadas nemnem yo mo ilan yos sak-en ay Anak di Ipogaw ay komaykayang ay mantaoli sin napoak? Adi pay masepsep. <sup>63</sup> Din mangidawat si biyag et din Ispiriton Diyos, baken din awak. Magay silbin di awak sidi. Mo din inbagbagak en dakayo et napo da sin Ispiriton Diyos, isonga siya met laeng di mangidawat si biyag, dalo et mo mamati kayo. <sup>64</sup> Ngem wada en dakayo di adi mamati,” kanan Jesus. Say inbaga na di, tan sigod ay ammo na mo sinoy adi mamati ya mo sinoy manglipot en sisya. <sup>65</sup> Pag nan itoloy ay mangwani, “Say begew na ay inbagak en dakayo ay magay makaali en sak-en ay mamati mo adi ipalobos Amak.”

<sup>66</sup> Et manlogis di, ad-ado en daida ay nakikiey en sisya di nantallikod, et adi da intoloy ay makibebbeweg en sisya. <sup>67</sup> Siya di, kanan Jesus sin sinpo ya dow a ay pasolot na, “Yan dakayo pay, ay komaan kayo abe?”

<sup>68</sup> Pag et kanan Simon Pedro, “Apo, sino ngin pay di onodan mi? Sik-a met di mangibagas kali ay mangidawat si biyag ay eng-enggana. <sup>69</sup> Mo dakami pay et namati kami en sik-a yan dadlon min ammo ay sik-a din nasantoan ay dinotokan Diyos.”

<sup>70</sup> Kanan Jesus, “Sak-en di namili en dakayo ay sinpo ya dow a, ay baken siya? Ngem wada met di esa en dakayo ay nadimonyo.” <sup>71</sup> Din inbagbaga na et si Judas ay anak en Simon Iscariot, tan olay mo sisya di esa sin sinpo ya dow a ay pasolot na, sisya met laeng di awni et manglipot en Jesus.



## 7

*Din Initdon Jesus Sin Fiesta Ay Makwani En Ab-abong*

<sup>1</sup> Nakdeng pay di, pag lomikeliked si Jesus sin probinsiya ay Galilea. Sigaana ay emey ed Judea, tan din papangolon di Judio isdi et sissiimen da mo intoy iyat da ay mamse en sisya.

<sup>2</sup> Idi dandani din fiestan di Judio ay makwani en Ab-abong,\* <sup>3</sup> kanan din aag-in Jesus en sisya, “Komaan kas na ta emey ka ed Judea ta say mabalin ay ilaen di papasolot mos di di nakaskasdaaw ay am-amagem. <sup>4</sup> Tan din mayad ay madamdamag et adi mantetee sin barbaryo, tan adi dedan maammoan di am-amagena. Mo waday am-amagem si nakaskasdaaw, en ka ngarud ipaila ta maammoan sin intiro ay lobong,” kanan da. <sup>5</sup> Tan olay daida ay agin Jesus et adi da namati en sisya.

<sup>6</sup> Kanan Jesus en daida, “Daan met di kosto ay timpo ay panongpalak sin planon Diyos. Olay emey kayo, tan kinompolan di timpo ay emeyan yo. <sup>7</sup> Laton, tan din komonkontra et adi mabalin ay kaliliget das dakayo, ngem mo sak-en pay et kaliliget da, tan paneknekak ay lawlawa di am-amagen da. <sup>8</sup> En kayo ngarud makifiesta. Adiak pay makaey tan daan di kosto ay panongpalak sin planon Diyos,” <sup>9</sup> kanana. Et nataynan pay ed Galilea.

<sup>10</sup> Idi nadipos din aag-i na ay en makifiesta, asi inmonod si Jesus ay es-esa na ta adi kaammoan. <sup>11</sup> Siya di, din nakifiesta ay papangolon di Judio et inanaanap das Jesus ay nanpoopoot mo intoy kad-ana. <sup>12</sup> Mo din nasinop pay ay ipogaw et nan-ayaayasak da ay nansosongbat maipanggep en sisya. Waday nangwani en, “Siged iman di ogali na,” dowan kanan aben di odom, “Baken met a, tan iet-etekana di ipogaw.” <sup>13</sup> Ngem adi da et inpigpigsas din kali da, tan emegyat da sin papangolo da.

<sup>14</sup> Idi nagodwa din fiesta, inmey si Jesus sin Timplo ta en man-itdo. <sup>15</sup> Et say nasdaawan din papangolon di Judio ay kanan da, “Ay intoy nangaan ninas laing na, tan baken met naadal ay ipogaw?”

<sup>16</sup> Dengngen pay Jesus din kanan da ay sana, sinongbatanas daida yan kanana, “Din nay it-itdok et baken napos nemnem ko, mo adi et napo en Diyos ay nangibaa en sak-en. <sup>17</sup> Mo sinoy mayad ay mangamag si layden Diyos et sisya di mangammo mo intoy napoan di it-itdok, mo si Diyos ono din nemnem ko et anggoy. <sup>18</sup> Din mangibagbagas napos nemnem na et anggoy et ipakat nay kabaelana ta mait-ek din awak na. Ngem din mangipakat pay si kabaelana ta mait-ek di nangibaa en sisya et pag tet-ewa di ibagbaga na ay magay siksikap na.† <sup>19</sup> Si Moses di nangipaammo sin linteg Diyos en dakayo ed idi, ay baken siya? Ngem maga polos en dakayo di manongpal. Tan mo doy ya tongpalen yo koma, adi kayo koma gomagara ay pomse.”

<sup>20</sup> “Nadimonyo ka! Sino ngin di mangagara ay mamse en sik-a?” kanan da ay sinombat.

<sup>21</sup> Asi et kanan Jesus, “Idi namingsan, waday inagasak ay mansakit sin agew ay pan-ibbayan et nasdaaw kayo, <sup>22</sup> olay mo wada abey amagen yo sin siya di ay agew. Tan waday inbilin Moses en dakayo ay tinawid na sin ap-apo na ay kogiten yo di anak yo ay lalaki sin maikawao ay agew.‡ Mo maiponta pay din agew ay sana sin agew ay pan-ibbayan, kogiten yo pay dedan ta tongpalen yo din bilin ay sana. <sup>23</sup> Mo say iyat yo di sin agew ay pan-ibbayan ta matongpal din bilin Moses maipanggep si es-esa ay partin di awak, apay ngin ay ibobonget yos sak-en mo inagasak di lalaki sin agew ay pan-ibbayan ta dalon makaan din sakit di intiro ay awak na? <sup>24</sup> Adi yo koma pabasolen di ipogaw ay

\* **7:2** Levitico 23:34. Din fiesta ay makwani en Ab-abong et esa ay domingo di kabayag na. Am-in din Judio et nan-amag das ab-abong ay pansidoman da, et say nan-iyanan da ta say pangnemneman da sin nandad-anan di ap-apo da sin lugar ay magay omili sin napoan da ed Egipto. † **7:18** Di esa abe ay kaiologan nina sin Griego et: ...magay basbasol na. ‡ **7:22** Levitico 12:3.



dagos ay maibasar sin damo ay pangila yo, mo adi et dadlon yo koman nemnemen on-ona mo sinoy katet-ewa na ta waday kosto ay kaibasaran di ipabasol yo.”

### *Din Napoan Di Messias*

<sup>25</sup> Idi siya di, wada da di taga-Jerusalem ay nangwani, “Ay baken si naey aya din layden da ay peslen? <sup>26</sup> Doy ay mankalkali sin sangoanan di kaipoipogaw, yan gomineginek met din papangolo tako. Ay ninemnem da ngata ay sisya din Messias? <sup>27</sup> Aga ngin, tan mo omali din Messias, maga kano di nakin ammo si napoana. Ngem mo si dooy pay, ammo tako met di napoana.”

<sup>28</sup> Idi siya et di, inpigsan Jesus din kali na sin nan-it-itdoana sin Timplo yan kanana, “Kanan yo kayman en ammo yos sak-en, yan kanan yo abe en ammo yo din napoak. Ngem di katet-ewa na et baken sak-en di nakaammo sin inmaliak mo adi et wada met di nangibaa en sak-en. Et mo dakayo, adi yo ammos sisya. <sup>29</sup> Ngem mo sak-en pay, ammok dedan, tan napoak en sisya, yan sisya met laeng di nangibaa en sak-en.”

<sup>30</sup> Sin nangwanian Jesus sidi, pinadas din papangolo ay manpap en sisya, ngem magay kabaelan da, tan daan pay di timpo ay panongpalana sin planon Diyos. <sup>31</sup> Mo din kaipoipogaw pay, ad-ado da ay namati en sisya, et kanan da, “Ay baken si naey din omali ay Messias? Tan magan samet di makaamag si nakaskasdaaw mo din inam-amag nina.”

### *Din Nanpapan Koman Din Polis Di Timplo En Jesus*

<sup>32</sup> Idi dinngen din Fafariseo din sana ay inngayngayodongod di kaipoipogaw, din Fafariseo ya din papangolon di papadi et inbaa day polis di Timplo ta en da depapen si Jesus. <sup>33</sup> Ngem asi et kanan Jesus, “Baken mabayag di pakiteteek en dakayo, asiak pay mantaoli sin nangibaa en sak-en. <sup>34</sup> Awni et omanaanap kayo, ngem adi kayo makadteng en sak-en, tan din kad-ak et adi yo mabalin ay ayen.”

<sup>35</sup> Pag et man-asipoot din papangolon di Judio, “Into ngin di emeyana dedan ta adi tako makadteng? Ay siya et mo emey sin addawi ay il-ili ay kad-an di gait tako ay Judio ta ena itdoan di Gentil ay wadas di? <sup>36</sup> Kanana en awni et anaanapen takos sisya ngem adi tako makadteng. Kanana abe en adi tako makaey sin kad-ana. Sino ngin di laydena ay kalien?” kanan da.

<sup>37</sup> Pag domateng din agew ay kaodian di fiesta ay say kapatgan ay agew. Sin siya di ay agew, pinmika si Jesus yan inpigsa nan kali na ay nangwani, “Mo sinoy nabigaw, omali koma en sak-en ta man-inom. <sup>38</sup> Tan waday inpaisolat Diyos ay kanana, ‘Mo sinoy mamati en sak-en, wada en sisya di mangidawat si biyag ay kaman danom ay bemelbela si obbog si kankanayon.’” §

<sup>39</sup> Din inbagbagan Jesus ay nay et din Ispiriton Diyos ay awni et awaten da ay namati en sisya. Maga pay din Ispirito en daida, tan daan madayaw si Jesus sin kateyana ya kaikayangana ed langit.

<sup>40</sup> Di odom ay nannanngge sin nay inbagan Jesus et kanan da, “Si naey od baw din masmas-ed ay mamadto.” <sup>41</sup> Di odom pay et kanan da en, “Si naey din Messias,” dowan pay kanan di odom, “Ay siya mo ed Galilea di kapoan di Messias? <sup>42</sup> Tan kanan din inpaisolat Diyos en maipoli kano din Messias en Ari David ya maianak kano ed Betlehem ay ilin David.”\* <sup>43</sup> Siya et di nankontra din pangwanin di ipogaw en Jesus. <sup>44</sup> Wada abey mayad ay manpap en sisya, ngem maga en daida di en namden.

### *Din Adi Namatian Din Papangolon Di Judio En Jesus*

<sup>45</sup> Idi siya di, nantaoli din polis di Timplo sin kad-an di papangolon di papadi ya Fafariseo. Pinoot da en daida, “Apay nga adi yo in-alis na?”

<sup>46</sup> “Maga met di ipogaw ay makaiso sin iyat na ay mankali,” insongbat din polis.

§ 7:38 Ezekiel 47:1; Zekarias 14:8. \* 7:42 2 Samuel 7:12; Mikias 5:2.

<sup>47</sup> Pag lasoyen din Fafariseo ay nangwani, “Ay in-etekana abes dakayo? <sup>48</sup> Ay siya mo way olay esa en dakami ay tuturay ya Fafariseo ay namati en sisya? <sup>49</sup> Mo pay din doy kaipoipogaw ay namati et magay ammo das maipanggep di linteg tako. Awni man et dosaen Diyos daida,” kanan da.

<sup>50</sup> Waday esa en daida ay Fariseo ay si Nicodemus ay en nakingalat en Jesus ed idi. Kanana en daida, <sup>51</sup> “Mo maibasar kayman sin linteg tako, adi mabalin ay keddengan tako di ipogaw mo maga pay di kabistaana. Masapol ay wada omona di waya na ay manongbat ta asi tako nemnemen mo sinoy basol na. Ay baken siya?”

<sup>52</sup> Asi da et sombat yan kanan da, “Kaman ka aben taga-Galilea. En ka adalen din inpaisolat Diyos ta ammoem ay maga di mamadto ay napod Galilea.” <sup>53</sup> Pag dan somaa am-in.

## 8

### *Din Babai Ay Nasokalan Ay Makilallalaki*

<sup>1</sup> Mo si Jesus pay, inmey sin dontog ay Olivo. <sup>2</sup> Idi napat-a, nasapa ay nantaoli sin Timplo et inalibongbongan di am-in ay ipogaw. Asi na pay itokdo et initdoanas daida. <sup>3</sup> Pag et somawang di mamaestron di linteg ya Fafariseo ay nangialis babai ay nasokalan ay makilallalaki. Inpapika da sin sangoanan di kaipoipogaw. <sup>4</sup> Pag dan kanan en Jesus, “Apo maestro, din babai ay nay et nasokalan ay makilallalaki. <sup>5</sup> Kanan di linteg Moses en masapol ay pigpigen di kaman nina ay babai enggana ay matey. Mo sik-a pay, sinoy kanam?” <sup>6</sup> Say pinoot da di ay manikap koma en sisya, tan kanan da en osalen dan songbat na ay pangidaruman dan sisya. Ngem si Jesus et nanyakog-ong ay nangisolat si gomot na sin lota.

<sup>7</sup> Idi inpidwapidwa da ay nanpoot en sisya, nan-oyad si Jesus yan kanana, “Mo sino en dakayo di magay basol na, sisya di mangon-ona ay mamigpig en sisya.” <sup>8</sup> Asi pag kasin manyakog-ong yan insolat nan gomot na sin lota.

<sup>9</sup> Sin nanngaan da sin doy ay inbaga na, nasaes-a da ay kinmaan ay namangpango din kakayan en daida. Et maga di nataynan malaksig da Jesus ya din babai ay deda ay pinmipikas di.

<sup>10</sup> Idi siya et di, nan-oyad kasin si Jesus yan kanana en sisya, “Iyogtan, into pay da di? Ay magay nataynan ay mamigpig en sik-a?”

<sup>11</sup> “Maga, Apo,” insongbat na.

Kanan aben Jesus, “Adiak aben keddengan sik-a ay matey. Emey ka et, ngem adi ka ipidpidwa ay manbasol.”

### *Maiarig Si Jesus Sin Silaw*

<sup>12</sup> Idi kasin nankalis Jesus sin kaipoipogaw, kanana ay nangiarig, “Sak-en di silaw ay maninggaw si nemnem di ipogaw isnan lobong. Mo sinoy mangonod en sak-en, adi mandan sin mabolinget, tan wada en sisya din silaw ay mangidawat si biyag.”

<sup>13</sup> Asi et kanan din Fafariseo en sisya, “Adi met mapati san ibagbagam, tan sana ay paneknekam din mismo ay awak mo.”

<sup>14</sup> Kanan Jesus ay sinombat, “Olay mo din awak ko di paneknekak, tet-ewa pay dedan di ibagak, tan ammok din napoak ya din emeyak. Ngem mo dakayo pay, adi yo ammo.

<sup>15</sup> Di iyat yo abe ay mangokom en sak-en et naipaksaw tan maibasar sin mail-ila yo. Mo sak-en pay et maga di okomek. <sup>16</sup> Ngem mo wada, kosto di pangokom ko, tan bakenak ang-anggay ay mangokom. Wada pay di kadwak ay si Amak ay nangibaa en sak-en.

<sup>17</sup> Naisolat kayman sin linteg yo ay mapati di kanan di doway tistigo mo nan-iso di itistigo da.\* <sup>18</sup> May ngarud, di esa ay mangipaneknek en sak-en et sak-en ay mismo, ya din maikadwa et si Amak ay nangibaa en sak-en.”

\* 8:17 Deuteronomio 19:15.

<sup>19</sup> Asi da et pinoot, “Intoy kad-an amam?”

Kanan aben Jesus, “Adi yo ammos sak-en ya adi yo aben ammo si Amak. Mo ammo yo komas sak-en, siya koma abe en Amak.” <sup>20</sup> Say initdon Jesus am-in da naey sin naiasag-en si kaikoskosnongan di pilak sin Timplo. Ngem magay en nanpap en sisya, tan daan pay di timpo ay panongpalana sin planon Diyos.

### *Din Inbagan Jesus Sin Judio Ay Adi Namati*

<sup>21</sup> Pag kasin kanan Jesus en daida, “Awni et taynak si dakayo et asi yo anaanapen sak-en. Ngem adi kayo makaey sin emeyak, tan matey kayo ay adi napakawan di basol yo.”

<sup>22</sup> Isonga kanan din papangolon di Judio, “Apay ngata ay kanana en adi tako makaonod en sisya? Ay peslena ngata din awak na?”

<sup>23</sup> Kanan aben Jesus, “Mo si dakayo, napo kayo sin nay lobong et nailobongan di nemnem yo. Mo sak-en pay, napoak ed langit, isonga maitken di nemnem ko. <sup>24</sup> Say begew na ay kanak ed kaonyan en matey kayo ay adi napakawan di basol yo, tan say maamag tet-ewa mo adi yo pasien ay sak-en din inbagak.”

<sup>25</sup> “Yan sino ka ngarud?” kanan da.

“Din inbagbagak met laeng en dakayo nanlogi sin damo enggana ed wani. <sup>26</sup> Mo maipanggep en dakayo, ad-ado koma di ibagak ay mangipabasol en dakayo. Ngem siya anggoy di ipaammok sin kaipoipogaw, din dengngek ay mapo sin nangibaa en sak-en, tan pag tet-ewa di ibagbaga na.”

<sup>27</sup> Ngem adi da inawatan ay si Ama na ay Diyos din inbagbaga na. <sup>28</sup> Isonga kanan aben Jesus en daida, “Mo makdeng ay ipakayang yos sak-en ay Anak di Ipogaw sin krus, asi yo dadlon ammoan ay sak-en din inbagak. Ammoan yo abe ay maga di amagek si bokbokod ko ay nemnem, mo adi et ibagbagak anggoy di initdon Amak en sak-en. <sup>29</sup> Din sana ay nangibaa en sak-en et sisya di kadwak. Adi tinmaytaynan, tan say am-amagek si kankanayon din kapnekana.” <sup>30</sup> Et ad-ado da ay namati en sisya sin nanngaan das di.

### *Din Maibilang Ay Polin Abraham*

<sup>31</sup> Idi siya di, kanan Jesus sin Judio ay namati en sisya, “Mo ipapasnek yo ay mangonod sin init-itdok en dakayo, dakayo di tet-ewa ay pasolot ko. <sup>32</sup> Maammoan yo di katet-ewa ay maipanggep en sak-en, et babaen din tet-ewa ay nay, mapawayaan kayo.”

<sup>33</sup> Asi da et kanan, “Dakami et polin Abraham. Adi kami naibabag-en si olay sino. Apay nga kanam en mapawayaan kami?”

<sup>34</sup> Sinongbatan Jesus yan kanana, “Tet-ewa nan ibagak en dakayo. Mo sino di managbasol et bag-en di basol. <sup>35</sup> Mo din bag-en et adi maibilang si kanayon sin pamilya. Ngem din anak pay di nakin beey et maibilang si eng-enggana. <sup>36</sup> Isonga mo sak-en ay Anak Diyos di mangipawaya en dakayo si basol, maiwayaan kayo adi.

<sup>37</sup> “Ammok kayman dedan ay polin Abraham dakayo, ngem nay et ay layden yo ay pomse, tan sigaan yo din ibagbagak en dakayo. <sup>38</sup> Siya anggoy di ibagbagak, din inpailan Amak en sak-en. Yan say iyat yo met laeng, tan dakayo abe et onodan yo din inbagan ama yo.”

<sup>39</sup> Asi et kanan din Judio, “Si Abraham adi di ama mi.”

Ngem insongbat Jesus, “Mo siya ay an-ak Abraham si dakayo, onodan yo koma di inamag na. <sup>40</sup> Ngem nay napasnek di nemnem yo ay pomse, yan sak-en met di nangibagabaga en dakayos tet-ewa ay dinnggek en Diyos. Ay siya mo way inamag Abraham ay kaman nisa? <sup>41</sup> Din onodan yo ngarud et din tet-ewa ay ama yo.”

“Yan si Diyos adi di kosto ay Ama mi, magay odom, tan sisya anggoy di onodan mi,” kanan da.

<sup>42</sup> Kanan aben Jesus, “Mo tet-ewa ay si Diyos di Ama yo, laylayden yo komas sak-en, tan sak-en pay et inmaliak sina ay napo en sisya. Yan baken sak-en di nakaammo sin inmaliak, mo adi et sisya di nangibaa en sak-en. <sup>43</sup> Apay nga adi yo maawatan din

kanak? Ay tan tineteweng yo din laydek ay kalien, ay siya? <sup>44</sup> Is-iso yo si ama yo ay si Satanas, et din panggep yo et tongpalen yo din layden ama yo ay sana. Makapeses sisya nanlogi sin damo enggana ed wani. Maga abe di ibaga nas tet-ewa, tan magay biyang nas di. Mo man-etek, amagena di maibagay sin ogali na, tan makaetek sisya yan sisya met laeng di poon di etek. <sup>45</sup> Ngem mo sak-en pay et ibagak en dakayo di tet-ewa, et siya na di gapo ay adi yo pasien sak-en. <sup>46</sup> Ay wada ngata en dakayo di mangipaneknek ay waday binmasolak? Iwed met. Mo tet-ewa ngarud di ibagak, apay nga adi yo pasien? <sup>47</sup> Din an-ak en Diyos et esten da ay mannge ya mamati si ibaga na en daida. Ngem bakenan anak si dakayo, isonga say begew ay adi yo denggen ya pasien.”

### *Napateg Si Jesus Mo Si Abraham*

<sup>48</sup> Asi et kanan di Judio, “Tet-ewa baw adi din kanan mi ed idi en kaman kan taga-Samaria† ya nadimonyo ka abe.”

<sup>49</sup> “Bakenak nadimonyo,” insongbat Jesus, “tan daydayawek si Amak. Ngem dakayo pay et lomaslasoy kayo. <sup>50</sup> Adiak pay manpaidayaw, ngem wada pay dedan di makaammo sin kaidayawak, yan sisya met laeng di mangokom en daida ay lomaslasoy. <sup>51</sup> Tet-ewa nan ibagak en dakayo ay mo sinoy mamati sin ibagbagak et adi katey.”

<sup>52</sup> Asi et kanan di Judio, “Enggay magay dowadowa mi ay nadimonyo ka. Natey met si Abraham, yan siya abe en daida ay mamadto, yan kanam pay laeng en adi katey din mamati sin ibagbagam. <sup>53</sup> Ay siya mo napateg ka mo din ap-apo tako ay si Abraham ya din mamadto? Natey da met am-in. Sino ngin di pangis-oam sin awak mo?”

<sup>54</sup> Kanan aben Jesus ay sinombat, “Mo dayawek din awak ko, magay silbi na. Ngem wada pay si Amak ay kanan yo en Diyos yo ay mangidayaw en sak-en. <sup>55</sup> Adi yo inamammoan sisya, ngem mo sak-en pay et ammok. Mo kanak koma en adiak ammos sisya, isoek si dakayo ay makaetek. Ngem ammok dedan yan patiek din kanana. <sup>56</sup> Peteg di layad Abraham ay ap-apo yo, tan namnamaena ay ilaena din inmaliak sina, yan tet-ewa ay naipaila en sisya et nanragsak.”

<sup>57</sup> Kanan di Judio, “Maga pay di limapolo ay tawen mo. Ay siya mo inilam si Abraham?”

<sup>58</sup> Kanan aben Jesus, “Dadlon tet-ewa nan ibagak en dakayo ay sin daan bomalaan Abraham, nawawadaak.” <sup>59</sup> Asi da et pomanidit si bato ta pigpigen das sisya, ngem nanlingeb‡ si Jesus yan kinmaan sin Timplo.

## 9

### *Din Nangagasan Jesus Si Lalaki Ay Nangibelas Godab Na*

<sup>1</sup> Sin nandad-anan Jesus, inila nay lalaki ay naianak ay nagodab. <sup>2</sup> Din papasolot Jesus et pinoot da en sisya, “Apo maestro, sinoy nakin basol sin nagodaban din lalaki ay doy? Ay din nakin anak en sisya ono sisya ay mismo?”

<sup>3</sup> “Bakenan basol di nangodab en sisya. Baken aben basol di nakin anak en sisya. Naamag di en sisya ta say maipaila din panakabalin Diyos ay mangaan sin godab na,” kanan Jesus ay sinombat. <sup>4</sup> “Masapol ay amagen tako din inpaamag di nangibaa en sak-en tan kaagawan pay laeng, laydena ay kalien, wada pay laeng di waya tako. Tan awni et malabi et magay iyat tako ay mangamag. <sup>5</sup> Ngem nay wadaak pay laeng isnan lobong, et kamanak silaw ay maninggaw si ipogaw.”

<sup>6</sup> Sin nangwanian Jesus sidi, tinogpaanay lota et inamag nas pitek. Asi na in-aplos sin matan di nagodab <sup>7</sup> yan kanana, “En ka mandaop sin nanabyeng ay posong ed Siloam.” (Din olog di Siloam et naibaa.) Idi inmey din nagodab et nandaop, makaila et pag somaa.

† **8:48** Din Judio et laslasoyen da di taga-Samaria yan sigaana da ay maigait en daida. Isonga din kanan da en kaman taga-Samaria si Jesus et pamis-oy da en sisya. ‡ **8:59** Di esa abe ay kaiologan nina sin Griego et: ...nalingban si Jesus...

<sup>8</sup> Sin nangilaan di katokmang na ya din nangil-ila en sisya sin nanpalpalimosana ed idi, kanan da en, “Ay baken si naey aya din tomotokdos di si kanayon ay manpalpalimos?” <sup>9</sup> “Siya sa yan,” kanan di odom.

Ngem di odom pay et kanan da, “Baken met, ngem sana ay is-iso na.”

Asi et kanan din lalaki, “Sak-en adi di.”

<sup>10</sup> Asi da et pooten en sisya ay nangwani, “Yan nay ay makaila ka ed wani mo?”

<sup>11</sup> Kanana ay sinmongbat, “Din doy manngadan si Jesus et nan-amag si pitek, asi na pay in-aplos sin matak yan kanana en, ‘Emey kad Siloam ta en ka mandaop.’ Enak ngarud nandaop, et pag maibolinasnasan matak.”

<sup>12</sup> Asi da et kanan, “Intoy kad-ana?”

“Toan adi,” insongbat na.

### *Din Namistigalan Di Fafariseo Sin Sigod Ay Nagodab*

<sup>13</sup> Idi siya di, in-ey da din lalaki ay sana sin Fafariseo. <sup>14</sup> Tan agew ay pan-ibbayan di nangamagan Jesus si pitek ay nangaan sin godab na. <sup>15</sup> Pag pooten din Fafariseo mo sinoy naamag en sisya, pag makaila. Kanan din lalaki, “Waday in-aplos na ay pitek sin matak, asiak en daopan, et nay makailaak.”

<sup>16</sup> Isonga kanan di odom ay Fafariseo, “Adi met inbaan Diyos din ipogaw ay doy, tan adi na tongtongpalen din linteg maipanggep sin agew ay pan-ibbayan.”

Dowan et kanan di odom, “Aw kayman, ngem mo nakabasol iman di, ay siya mo makaamag si nakaskasdaaw ay sinyal ay kaman dadi?” Et nankinontra da.

<sup>17</sup> Idi siya di, pinoot da kasin sin lalaki ay doy, “Sik-a pay, sinoy kanam maipanggep en sisya, tan sik-a dedan di nakin matas naibolinasnasan?”

“Mamadtos sisya,” insongbat na.

<sup>18</sup> Ngem sigaan pay din papangolon di Judio ay mamati ay din doy lalaki ay makaila ed wani et naianak ay nagogodab mo adi da pooten agan-o sin nakin anak en sisya. Isonga inpaayag das daida <sup>19</sup> et inbagaan da, “Ay si naey din anak yo ay kanan yo en nangibelas godab na? Mo siya, intoy inyat na pay ay makaila ed wani?”

<sup>20</sup> Sombat pay din nakin anak, kanan da en, “Aw yan, anak mi adi sa et tet-ewa ay nagodab sin binmalaana. <sup>21</sup> Ngem mo maipanggep sin makailaana ed wani, adi mi ammo mo sinoy nangaan sin godab na ya mo intoy inyat na ay naamag. Sisya di panpootan yo, tan nakay et ammo na ay sombat.” <sup>22-23</sup> Say kanan da di, tan emegyat da sin papangolon di Judio. Tan enggay tinotolag da ay mo sinoy mangwani en Messias si Jesus, adi maibilang sin gagait na ay Judio.

<sup>24</sup> Pag ipaayag kasin din papangolon di Judio din nagodab et kanan da en sisya, “Isapatam en Diyos ay ibagam di tet-ewa, tan mo din doy nangagas en sik-a et ammo mi ay nakabasol ay ipogaw.”

<sup>25</sup> Kanan pay din lalaki, “Toan adi mo nakabasol sisya. Din ammok anggoy et nagodabak ed idi yan nay makailaak ed wani.”

<sup>26</sup> “Aw, ngem intoy inyat na pay ay nangaan sin godab mo? Sinoy inamag na?” kasin dan pinoot.

<sup>27</sup> “Enggay inbagak met, ngem adi yo pasien. Apay nga layden yo ay dengngen kasin? Ay layden yo abe ay manbalin si pasolot na aya?” kanana ay sinombat.

<sup>28</sup> Pag dan iyewen sisya ay nangwani, “Wo, sik-a od abe di pasolot din ipogaw ay doy. Mo dakami pay et pasolot en Moses. <sup>29</sup> Tan ammo mi ay nginalat Diyos si Moses, ngem mo maipanggep din ipogaw ay doy, adi mi pay ammo olay din napoana.”

<sup>30</sup> Asi et sinongbatan din lalaki, “Ado paabe na! Adi yo ammo din napoana, yan sisya di nangaan sin godab ko. <sup>31</sup> Ammo tako met ay adi dengngen Diyos di ibagbagan di nakabasol mo adi din mandayaw en sisya ay man-am-amag si laydena. <sup>32</sup> Nanipod sin nanlogian di lobong, maga met di nadamag ay ipogaw ay nangaan si godab di



nangibalas godab na. <sup>33</sup> Mo doy ya baken napo en Diyos sisya, adi met makaamag si kaman nina.”

<sup>34</sup> Pag da aben kanan ay sinombat, “Dadlon kan nakabasol nanlogi sin napkeam yan kanam pay laeng en itdoam si dakami?” Pag da et keddengan ay adi maibilang sin gagait na ay Judio.

<sup>35</sup> Idi nadamag Jesus ay say inyat da di sin nagodab, ena dinteng et kanana en sisya, “Ay mamati ka sin Anak di Ipogaw?”

<sup>36</sup> “Apo, ibagam kod mo sinos sisya ta say mamatiak en sisya,” insongbat na.

<sup>37</sup> Pag kanan Jesus, “Nay il-ilaem sisya, tan sisya nan makingalngalat en sik-a.”

<sup>38</sup> Asi kanan din lalaki, “Apo, mamatiak.” Et nandokmog ay mandayaw en sisya.

<sup>39</sup> Idi siya di, pag kanan Jesus, “Inmaliak isnan lobong ta mailasinan di nangin ammo en Diyos sin adi nangin ammo. Mo din adi nangin ammo en Diyos et maiarig si nagodab, kaanek di godab da. Ngem din mangwani pay en ammo das Diyos, ipailak ay nagodab da pay laeng.”

<sup>40</sup> Wada da di Fariseo sin kad-an Jesus ay nannge sin inbaga na, yan kanan da en sisya, “Ay laydem ay kalien aya en nagodab kami abe?”

<sup>41</sup> Songbatan pay Jesus yan kanana, “Aga, tan mo doy ya nagodab kayo, maga koma di basol yo. Ngem gapo ta kanan yo en makaila kayo, deda san basol yo.”

## 10

### *Maiarig Si Jesus Sin Sigid Ay Mangay-ayowan Si Karnero*

<sup>1</sup> Pag nan kanan ay nangiarig, “Tet-ewa adi nan ibagak en dakayo. Mo waday kodalan di kakarnero yan adi senggpep di ipogaw sin kosto ay segpan mo adi et komalab sin alad, mangakew ya tollisan di. <sup>2</sup> Tan din mangay-ayowan sin kakarnero et senggpep sin kosto ay segpan. <sup>3</sup> Sisya di pasgepen di gowardiya, et ayagana din kakarnero ay oka na. Mo ingad-ana pay si daida, maimatonan da din kali na et omonod da en sisya mo bomala da. <sup>4</sup> Mo bomala da pay am-in, ipango nas daida, et sisya di onoden da, tan ammo da din kali na. <sup>5</sup> Ngem adi da onoden di mangili mo adi et itagtagan da, tan adi da maimatonan din kali na.” <sup>6</sup> Say dinad-at Jesus di en daida ay nangiarig, ngem adi da inawatan din laydena ay kalien.

<sup>7</sup> Siya di, kasin kanan Jesus ay nangiarig, “Tet-ewa adi nan ibagak en dakayo ay sak-en di segpan di karnero. <sup>8</sup> Din am-in ay nangon-ona mo sak-en ay nangibagabagas etek et daida di mangakew ya tollisan. Ngem laton ay adi pinatpati di karnero. <sup>9</sup> Sak-en di segpan. Mo sinoy senggpep ay mandan en sak-en et maisalakan. Maiarig si karnero ay senggpep downan bomala ay en man-alab.

<sup>10</sup> “Di panggep di mangakew et en mangakew ono gandat ay manpese ono mansida si karnero et anggoy. Sak-en pay et inmaliak ta magon-od koman di ipogaw di sigesigid ay biyag ay magay kolang na.”

<sup>11</sup> Kanan aben Jesus ay nangiarig, “Sak-en di siged ay mangay-ayowan si kakarnero ya mangisalakan en daida, olay mo say kateyak. <sup>12</sup> Mo din owat nalagboan ay manpaspastol si karnero, mo tamangena di maangat ay animal ay omali, taynana din karnero et tomagtag, tan baken sisya di kosto ay mangay-ayowan ay akin oka sin karnero. Mo bomala pay din maangat ay animal, katenan odom downan pansisianen odom. <sup>13</sup> Et siya nay gapo na ay tomagtag din nalagboan ay sana, tan owat nalagboan et adi na banolen din kakarnero. <sup>14-15</sup> Ngem sak-en pay di siged ay mangay-ayowan. Tan din pan-iinammoan mi sin karnerok et iso na sin pan-inammoan mi en Amak. Sak-en abe di matey ta way iyat di karnerok ay matago. <sup>16</sup> Wada abey kakarnerok ay adi naitapi



sin kodalan ay nay.\* Siyatak aben ayagan si daida ta omali da et dengngen dan kalik. Asi da manbalin si esa ay sinkabeweg et es-esa di mangay-ayowan en daida.

<sup>17</sup> “Si Amak et laylaydenas sak-en, tan idawat kon biyag ko ta asiak kasin matago.

<sup>18</sup> Maga met di mamse en sak-en mo baken sak-en di akin nemnem, tan waday kalebbengak ay mangidawat sin biyag ko ya wada abey kalebbengak ay taolien. Tan siya na di inbilin Diyos en sak-en.”

<sup>19</sup> Pag kasin mankinontra din Judio begew din kanan Jesus ay sana. <sup>20</sup> Tan ad-ado da ay nangwani, “Binogen di dimonyos sisya! Apay ngarud ay layden yo pay laeng ay mannge?”

<sup>21</sup> Dowan kanan di odom, “Ay siya mo say iyat di nadimonyo sa ay mankali? Ay mabalin aya ay kaanen di dimonyo di godab di ipogaw?”

### *Din Nanigaan Di Judio en Jesus*

<sup>22</sup> Sin pinag-aandap, wada di fiesta ay makwani en Kaidatonan di Timplo ed Jerusalem. Idi dinmateng din fiesta ay doy, <sup>23</sup> wadas Jesus ay mandaddad-an sin lakam di Timplo ay makwani en Tambobong en Solomon.† <sup>24</sup> Inalibongbongan di Judio yan kanan da, “Ay ken pay omando san panlingbalingbam si maipanggep en sik-a? Idoritsom man mo sik-a din Messias.”

<sup>25</sup> Songbatan pay Jesus yan kanana, “Enggay inbagak yan, ngem adi yo met pasien. Din nakaskasdaaw ay inam-amag kos kalebbengan Amak et siya da di mangipaneknek en sak-en. <sup>26</sup> Ngem adi yo dedan pasien, tan baken kon karnero si dakayo. <sup>27</sup> Tan din karnerok et maimatonan da din kalik ya ammok abe si daida. Isonga sak-en di onoden da, <sup>28</sup> et iyaak daida si biyag ay eng-enggana. Adi da polos kaisian en Diyos, et maga abe di makapos en daida en sak-en. <sup>29</sup> Tan si Amak ay nangitalek en daida en sak-en di kapatgan si am-in.‡ Maga di makapos en daida sin pangay-ayowanen Diyos Ama. <sup>30</sup> Tan dakami en Diyos Ama et es-esa kami.”

<sup>31</sup> Siya et di kasin nanpidit din Judio si bato ta ipigpig da en sisya. <sup>32</sup> Isonga kanan Jesus en daida, “Ad-adoy inpailak en dakayo ay siged ay say inpaamag Amak en sak-en. Sino ngin en da nay ay inamag ko di begew si pamigpigan yon sak-en?”

<sup>33</sup> Sinongbatan pay din Judio ay kanan da, “Baken din siged ay inam-amag mo di gapo si pamigpigan mi en sik-a mo adi et din nanglaslasoyam en Diyos. Owat kan ipogaw dedan, ngem sana ay inis-om din awak mo en sisya.”

<sup>34</sup> Kanan pay Jesus, “Ngem wada pay dedan di inpaisolat Diyos ay kanan yo en linteg yo maipanggep si papangolon di Judio ed idi ay kanana, ‘Sak-en ay Diyos et inbagak ay didiyos kayo.’§ <sup>35</sup> Din inpaisolat Diyos ay sana et adi met mabalin ay mawaswas. Mo didiyos ngarud di inngad-an Diyos en da doy ay ipogaw ay nankalkaliana, <sup>36</sup> apay nga kanan yo en is-ok din awak ko en Diyos mo kanak en sak-en di Anak na? Tan sak-en di dinotokan ya inbaa na isnan lobong. <sup>37</sup> Mo adiak koman am-amagen din nakaskasdaaw ay inpaamag Diyos en sak-en, olay adi yo pomati. <sup>38</sup> Ngem mo say amagek dadi, say kaawisan yo koma ay mamati olay mo adi yo pasien din kankanak, ta say dadlon yon ammoan ay wadas Amak en sak-en ya wadaak abe en sisya.”

<sup>39</sup> Siya et di kasin dan pinadas ay manpaw en Jesus, ngem inlisianas daida. <sup>40</sup> Asi pag mantaoli sin demang di ginawang ay Jordan sin kad-an di nanbonbonyagan Juan ed idi, et say nanteana. <sup>41</sup> Ad-adoy ipogaw ay emeemey en sisya. Kanan da en, “Magay inamag Juan si nakaskasdaaw ay sinyal, ngem tet-ewa pay dedan di am-in ay inbaga na maipanggep en naey.” <sup>42</sup> Et ad-ado da ay namati en sisyas di.

\* **10:16** Din karnero ay inbagbagan Jesus isna et din kaipoipogaw ay baken Judio ay makwani en Gentil. † **10:23** Din Tambobong en Solomon et annawa ya nakayang ay pansidsidoman di ipogaw. Din tokod na et dandani ay sinpo ya doway ay metro di kakayang da. ‡ **10:29** Din kananas odom ay manuskrito sin Griego et: Tan din intalek Amak en sak-en di kapatgan si am-in. § **10:34** Salmo 82:6.

## 11

### *Din Nateyan Ya Kasin Natagoan Lazarus*

<sup>1-2</sup> Waday siag-i ay omili ed Betania ay da Maria en Marta ya si Lazarus. Si Maria ay nay di awni et mangisoyat si bangbanglo sin dapan Apo Jesus ta asi na ponasan sin book na. Si Lazarus pay et mansaksakit.

<sup>3</sup> Siya di inbaan da Maria en Marta di en mangipadamag en Jesus, “Apo, mansakit din laylaydem ay gayyem mo.” <sup>4</sup> Sin nanngedan Jesus sidi, kanana, “Din sakit na ay doy et adi mantongpal sin kateyana mo adi et napasamak na ta say maipaila din panakabalin Diyos ya mabigbig abe din kinadiyos ko ay Anak na.”

<sup>5</sup> Si Jesus et laylaydena din siag-i ay doy. <sup>6</sup> Ngem olay mo siya di, sin nanngedana ay mansakit si Lazarus, adi inmey, doway ay agew pay di nanteana sin kad-ana. <sup>7</sup> Asi na pag kanan sin papasolot na, “En tako kasin ed Judea.”

<sup>8</sup> “Ngem Apo maestro, magay bayag na din istay pamigpigan di Judio en sik-as di, yan sana ay mantaoli tako pay laeng?” insongbat da.

<sup>9</sup> Kanan pay Jesus ay nangiarig, “Laton, maga pay laeng di mapasamak en datako tan sinpo ya doway ay oras di kaagawan, ay baken siya? Mo mandan di ipogaw sin kaagawan, adi maisokba, tan maila din danan. <sup>10</sup> Ngem mo din labi di pandanana, maisokba, tan mabolinget ya maga en sisya di silaw.”

<sup>11</sup> Pag nan itoloy ay mangwani, “Naseseyep din gayyem tako ay si Lazarus. Enak bangonen.”

<sup>12</sup> Asi et kanan din papasolot na, “Apo, mo naseseyep et mayat, tan mailatonan.” <sup>13</sup> Say inbaga da di, tan kanan da en naseseyep si Lazarus tet-ewa, ngem di layden Jesus ay kalien et natey.

<sup>14</sup> Siya di, indoritson Jesus din kali na ay nangwani, “Natey si Lazarus, <sup>15</sup> ngem naragsakak pay dedan ay magaak sidi sin nateyana, tan awni et pomigsa di pammati yo begew sin ilaen yo. May, en tako ngarud sin kad-ana.”

<sup>16</sup> Asi et kanan Tomas ay nabdayan si Singin sin gagait na ay pasolot, “Siya, en tako iman ta olay makikatey tako en Jesus.”

<sup>17</sup> Somawang pay da Jesus ed Betania, inammoana ay nakap-at si Lazarus ay naiponpon. <sup>18</sup> Ed Betania ay nay, asag-en ed Jerusalem, emey ay tolo ay kilometro di kaaddawina. <sup>19</sup> Isonga ad-adoy inmey ay Judio ay en mangliwliwa en da Marta en Maria.

<sup>20</sup> Idi nadamag Marta ay wadas Jesus ay omal-ali, ena inabat, ngem nataynan si Maria ay tinmotokdo sin beey da. <sup>21</sup> Kanan Marta en sisya, “Apo, mo wada kas na ed idi, adi koman natey din agi mi. <sup>22</sup> Ngem ammok pay dedan ay olay ed wani, mo sinoy kedawem en Diyos et idawat nan sik-a.”

<sup>23</sup> Kanan Jesus, “Matago kasin din agi yo.”

<sup>24</sup> “Aw met kayman,” kanan aben Marta. “Ammok ay matago kasin sisya sin kasin katagoan di am-in ay natey sin kaodian ay agew.”

<sup>25</sup> Asi et kanan Jesus, “Sak-en di manago si natey. Sak-en di mangidawat si biyag. Mo sinoy mamati en sak-en, olay mo matey, matago met laeng ay eng-enggana. <sup>26</sup> Yan da sana ay matago ay mamati en sak-en et adi da polos kaisian en Diyos. Ay patiem na?”

<sup>27</sup> “Aw, Apo,” insongbat na. “Patiek ay sik-a din sinsin-ed mi ay omali sinan lobong. Sik-a din Messias ay Anak Diyos.”

<sup>28</sup> Asi pag mantaolis Marta ed beey da yan kanana en iyogtana ay mangiayasak, “Maria, wada din Maestro yan ipaay-ayag daka.” <sup>29</sup> Sin nanngedan Maria sidi, kapika et ena inabat, <sup>30</sup> tan wada pay laeng si Jesus sin benget di ili ay sin nangabtan Marta en sisya. <sup>31</sup> Din Judio pay ay wada sin beey ay mangliwliwa en da Maria, idi inila das sisya ay mandaldas ay komaan, inonod da, tan kanan da en mo emey sin naiponponan Lazarus ta en man-oga.

<sup>32</sup> Somawang pay si Maria sin kad-an Jesus, kadokmog sin sangoanana yan kanana, “Apo, mo wada ka komas na ed idi, adi koman natey din agi mi.”

<sup>33</sup> Idi inilan Jesus ay man-anog-og da Maria ya din nakiey ay Judio, peteg ay mansakit ya nariribokan di nemnem na, <sup>34</sup> et kanana, “Intoy nangiponponan yo?”

“En tako ilaen, Apo,” insongbat da.

<sup>35</sup> Yan pag manlolowas Jesus. <sup>36</sup> Asi kanan din Judio, “Ilan yo kadin kadakdaken di layad na en sisya.” <sup>37</sup> Ngem kanan di odom, “Mo inagasana din doy nagodab, ay maga ngata di mabalin ay inamag na ta adi koman natey si Lazarus?”

<sup>38</sup> Et palalo kasin ay mansakit nemnem Jesus. Pag somag-en sin naiponponan Lazarus ay liyang ay naenban si bato. <sup>39</sup> “Kaanen yo din bato,” kanan Jesus.

“Ngem Apo, enggay adi ay man-agob, tan nakap-at ay naiponpon,” insongbat Marta.

<sup>40</sup> Kanan pay Jesus, “Ay tan niliw-am din inbagak en sik-a ay mo mamati ka, ilaem din panakabalin Diyos?” <sup>41</sup> Et kinaan da din bato. Asi tangaden Jesus ed langit yan kanana, “Ama, man-iyamanak tan dinngem sak-en. <sup>42</sup> Ammok ay dengngem sak-en si kanayon, ngem say ibagak sa begew din naey da ay ipogaw ta say pasien da ay sik-a di nangibaa en sak-en.”

<sup>43</sup> Pag nan kanan ay nangibogaw, “Ay Lazarus, bomala ka!” <sup>44</sup> Et binmala din natey ay nabotibotan si lopot din takkay ya siki na ya nabedbedan abe din ropa na. Pag kanan Jesus en daida ay wadas di, “Obaden yo san naibotibot ta way iyat na ay somaa.”

### *Din Nanganapan Di Judio Si Iyat Da Ay Mamse En Jesus*

*(Mat. 26:1-5; Mar. 14:1-2; Luc. 22:1-2)*

<sup>45</sup> Idi siya di, din ad-ado ay Judio ay nakiey en da Maria ay nangila sin inamag Jesus ay doy et namati da en sisya. <sup>46</sup> Ngem di odom pay et inmey da sin Fafariseo ay en nangipadamag sin inamag Jesus.

<sup>47</sup> Idi siya di, din Fafariseo ya din papangolon di papadi et inpaayag da din odom ay papangolon di Judio yan kanan da, “Intoy iyat tako pay, tan din ipogaw ay doy et ad-adoy nakaskasdaaw ay inam-amag na. <sup>48</sup> Mo baybay-an tako, mamati am-in di ipogaw en sisya. Adi pay omali din taga-Roma ay mangituray en datako, et bakasen da din Timplo tako ay nay ya siya abe sin ili tako.”

<sup>49</sup> Ngem asi et si Caifas ay din kangatoan ay padi sin siya di ay tawen et kanana, “Maga polos di ammo yo. <sup>50</sup> Maawatan yo koma ay agpos mo matey di esa ay ipogaw ta matago din kakailiana mo din matey tako am-in ay man-ili.” <sup>51</sup> Din inbagan Caifas ay nay et baken napo sin bokbokod na ay nemnem, ngem gapo ta sisya di kangatoan ay padi, inpaipadton Diyos en sisya ay matey si Jesus ta say matago di kakailiana ay Judio. <sup>52</sup> Ya baken din kakailiana ay Judio anggoy mo adi et am-in ay anak Diyos ay man-ili sin kailili ta say panbalinenas daida si es-esa ay pamilya. <sup>53</sup> Et manlogi sin agew ay doy, inan-anap din papangolon di Judio mo intoy iyat da ay mangipapse en Jesus.

<sup>54</sup> Idi siya di, adi nanpappailas da Jesus sin kaipoipogaw ed Judea mo adi et kinmaan das di et inmey da ed Epraim, esa ay ili ay asag-en sin kadondontogan. Et say nantean da Jesus ya din papasolot na.

<sup>55</sup> Nganngani din fiestan di Judio ay makwani en Nalabas. Isonga ad-ado di nantikid ed Jerusalem ay napo sin barbaryo ta tongpalen dan ogali da ay masapol ay man-ames da ta asi da pay mabalin ay makifiesta. <sup>56</sup> Din ipogaw ay nay et inanaanap das Jesus, et sin nasinsinopan da sin Timplo, nan-asibaga da, “Sinoy kanam? Adi ngin omalis sisya ay makifiesta?” <sup>57</sup> Tan din papangolon di papadi ya Fafariseo et inbilin da ay mo sinoy nakin ammo sin kad-an Jesus et ipadamag na koma en daida ta depapen da.

## 12

### *Din Nangisoyatan Maria Si Bangbanglo Sin Dapan Jesus*

*(Mat. 26:6-13; Mar. 14:3-9)*

<sup>1</sup> Idi kolang di enem ay agew sin domatngan di fiesta, inmey da Jesus ed Betania ay ilin Lazarus ay din tinagon Jesus sin nateyana. <sup>2</sup> Nan-oto das kanen da ay nanangaili en Jesus, et si Marta di nandondono. Si Lazarus pay et nakiokob en da Jesus.

<sup>3</sup> Idi siya di, inan Maria di kagodwan di litro ay natanig ay nardo ay esay kanginaan ay bangbanglo. Et insoyat na sin dapan Jesus dowan ponasan sin book na. Et napno din beey si banglo na.

<sup>4</sup> Asi et si Judas Iscariot ay pasolot Jesus ay awni et manglipot en sisya et kanana, <sup>5</sup>“Apay! Nailako koma din bangbanglo ay nay ta maidawat sin nabiteg, tan manbanol si piga ay libo.”\* <sup>6</sup>Say kanana di baken gapo ta insaksakit na di nabiteg mo adi et gapo ta mangakew. Tan sisya di makaammo sin pilak dan da Jesus, et ogali na ay kolakolangana.

<sup>7</sup> Asi et songbatan Jesus si Judas yan kanana, “Bay-am sisya, tan indodolina din bangbanglo ay nay ta say mangon-ona ay mailalana sin awak ko para sin kaiponponak. <sup>8</sup>Mo di nabiteg et kanayon ay wada da sin kad-an yo, ngem mo sak-en pay, bakenak wadas kanayon en dakayo.” | 12:8

<sup>9</sup> Nadamag di ad-ado ay Judio ay wadas Jesus ed Betania, isonga inmey das di. Ngem baken begew si Jesus et anggoy di inmeyan da, mo adi et ta ilan da abes Lazarus ay tinago na. <sup>10</sup> Isonga din papangolon di papadi et nantotolag da ay peslen da abes Lazarus, <sup>11</sup> tan begew en sisya, ad-adoy Judio ay naisian en daida ta mamati da en Jesus.

*Din Nanaydayawan Di Kaipogaw En Jesus Sin Inmeyana Ed Jerusalem*  
(Mat. 21:1-11; Mar. 11:1-11; Luc. 19:28-40)

<sup>12</sup> Sin napat-a, nadamag din ad-aad-ado ay makifesta ay somawsawang si Jesus ed Jerusalem. <sup>13</sup> Et nan-a das pangan di palma† ta en da abten dowan dan ibogbogaw, “Madaydayaw si Diyos! Mabindisyonan koma nan inbaan di Apo ay panakaawak na!‡ Nagasat nan Ari tako sinan ed Israel!”

<sup>14</sup> Nangabayo si Jesus sin anak di dangki ay inpaiali na. Et say tinmet-ewaan din inpaisolat Diyos ay kanana,

<sup>15</sup> “Dakayo ay taga-Jerusalem, adi kayo emegyat, tan nay omal-ali din Ari yo ay nangakabayo si anak di dangki.”§

<sup>16</sup> Din papasolot Jesus et daan da pay maawatan din olog di napasamak ay nay. Siyat mantaolis Jesus ed langit, asi da nemnemen ay siya na din natongpalan di inpaisolat Diyos maipanggep en sisya yan daida met laeng di nangamag sin natongpalana.

<sup>17</sup> Din ad-ado ay ipogaw ay nangila sin nangayagan Jesus en Lazarus ay binmala sin liyang sin nanagoana en sisya et inpidwapidwa da ay nangipadamag sin inila das di.

<sup>18</sup> Isonga ad-ado di en nangabat en Jesus, tan dinamag da din doy nakaskasdaaw ay sinyal ay inamag na. <sup>19</sup> Siya di, nan-asibaga din Fafariseo, “Ilan yo kadi, naabak tako! Tan am-in ay ipogaw et nanbalin das pasolot na.”

*Din Nangipadtoan Jesus Sin Kateyana*

<sup>20</sup> Wada da abey baken Judio ay Griego ay en nakifesta ed Jerusalem ta dayawen das Diyos. <sup>21</sup> Inmey dan Felipe (ay taga-Betsaida ay esay ili ed Galilea) yan kanan da en sisya, “Apo, makingalat kami kod en Jesus.” <sup>22</sup> En inbagan Felipe en Andrew, et pag dan mankoyog ay en mangibaga en Jesus.

<sup>23</sup> Kanan Jesus, “Enggay dinmateng din timpo ay sak-en ay Anak di Ipogaw et maidayawak sin kateyak. <sup>24</sup> Kaman din maamag si bin-i. Tan tet-ewa nan ibagak en

\* 12:5 Din kanana sin Griego et: toloy gasot ay denario ay banol di toloy gasot ay poldiya. | 12:8 12:8 Deuteronomio 15:11. † 12:13 Kalasin di kaiw sin ilin di Judio ay kaman niyog di payak na. Din payak na et in-ap-ap da di odom sin kalsada ya inwasawas day odom ta say pandayaw da en Jesus. ‡ 12:13 Salmo 118:26. § 12:15 Zekarias 9:9. Ogalin di ari ed idi, mo omasag-en da si esa ay ili ta gobaten da, nangakabayo das kabayo. Ngem mo siged di nemnem da sin man-ili ay sana, nangakabayo das dangki.

dakayo ay mo adi mais-ek di esa ay bin-i ta say madonot ya somimit, komakaman ay esesa. Ngem mo mais-ek ya madonot, asi somimit et manlames si ad-ado. <sup>25</sup> Mo banolen di ipogaw din biyag na, matey pay dedan. Ngem mo ibilang na ay baken nabanol di biyag na isnan lobong, awni et matago ay eng-enggana. <sup>26</sup> Mo sinoy mansilbi en sak-en, masapol ay sak-en di itoltoloy na ay onodan ta say din kad-ak et siya abey kad-ana. Yan din sana ay mansilbi en sak-en et dayawen Amak sisya.”

<sup>27</sup> Pag itoloy Jesus ay mangwani, “Nay nariribokan di nemnem ko. Sino ngata di ikararag ko en Amak? Ay kanak ngin en ilisi nas sak-en sin kateyak? Aga, tan say panggep ko ay inmalis na et ta sagabaek am-in dana.” <sup>28</sup> Pag nan kanan en Diyos, “Ama, ipailam kod din kinadiyos mo ta say madayaw din ngadan mo.”

Et wada di kali ay napod langit ay kanana, “Enggay inpailak et ipailak kasin.”

<sup>29</sup> Din kaipoipogaw ay pinmipika sidi et dinnge da abe din kali. Ngem kanan di odom en nankido dowan pay kanan di odom, “Nginalat di anghel sisya.”

<sup>30</sup> Asi et kanan Jesus en daida, “Din sana ay kali ay dinnge yo et baken naikali para en sak-en mo adi et para en dakayo. <sup>31</sup> Tan nay dinmateng din timpo ay kaokoman di ipogaw isnan lobong. Ed wani abe di maabakan Satanas ay din ap-apon di ipogaw ay adi mamati. <sup>32</sup> Tan mo maikayangak, awisek am-in ay ipogaw ta mamati da koman sak-en.”\* <sup>33</sup> Say kanan Jesus di ta ipaammo na di iyat na ay matey.

<sup>34</sup> Asi et kanan din kaipoipogaw, “Apay ngin ay kanam en masapol ay maikayang din Anak di Ipogaw? Tan din inpaisolat Diyos ay naitdo en dakami et kanana en matagotago din Messias ay eng-enggana.† Sino ngin pay san Anak di Ipogaw?”

<sup>35</sup> Pag kanan Jesus ay nangiarig, “Baken mabayag di kawadan di silaw en dakayo. Onoden yo ngarud din nasilawan ay danan agpiya et wada pay laeng din silaw en dakayo tan into et ya mabolingetan kayo. Tan din mandan sin mabolinget et adi na ammo din emeyana. <sup>36</sup> Mamati kayo ngarud sin silaw agpiya et wada pay laeng en dakayo ta say manbalin kayos ipogaw ay nasilawan di nemnem na.” Sin nangwanian Jesus sidi, tinaynanas daida et en nanlingeb.

<sup>37</sup> Olay mo ad-adoy nakaskasdaaw ay sinyal ay enggay inpappailan Jesus en daida, adi da pay laeng namati en sisya, <sup>38</sup> ta say matongpal din inpadton Isaias ay kanana, “Apo, apay nga at-atik anggoy di namati sin inbagbaga mi? Apay nga at-atik di nangawat sin inpail-iam ay panakabalin mo?”‡

<sup>39</sup> Din begew ay adi da mabalin ay namati et siya abey insolat Isaias ay kanana,

<sup>40</sup> “Ginodab Diyos si daida ya pinakenteg na di nemnem da tan into et mo makaila ya makaawat da yan sangoen das sisya ta agasanas daida.”§

<sup>41</sup> Say kanan Isaias di tan naipaila di kinadiyos Jesus en sisya ed idi, yan si Jesus met laeng din inbagbaga na.

<sup>42</sup> Ad-ado pay dedan di papangolon di Judio ay namati en Jesus. Ngem adi da inpodpodno din pammati da begew din egyat da ay dosaen din Fafariseo si daida ay adi kaibilang sin gagait da ay Judio. <sup>43</sup> Tan say banolen da din pandayawan di ib-a dan daida mo din pandayawan Diyos.

<sup>44</sup> Idi kasin nankalis Jesus sin kaipoipogaw, inpigsa na ay nangwani, “Mo sinoy mamati en sak-en, baken sak-en anggoy di pinati na mo adi aben din nangibaa en sak-en. <sup>45</sup> Mo ilaenas sak-en, il-ilaena abe din nangibaa en sak-en. <sup>46</sup> Inmaliak ay kaman silaw isnan lobong ta mo sino da di mamati en sak-en et adi da mantettee sin mabolinget.

<sup>47</sup> “Mo din mannge sin kalik ngem adi na patpatien et baken sak-en di mangokom en sisya. Tan adiak inmalis nan lobong ay mangokom si ipogaw mo adi et ta isalakan kos daida. <sup>48</sup> Ngem wada pay di mangokom sin ipogaw ay manigaan en sak-en ay adi

\* **12:32** Juan 3:14-15. † **12:34** Salmo 110:4; Isaias 9:7; Ezekiel 37:25; Daniel 7:14. ‡ **12:38** Isaias 53:1. § **12:40** Isaias 6:10.



mangawat sin kankanak. Tan din nay inbagbagak ay mismo di mangeddeng en sisya sin kaodian ay agew. <sup>49</sup> Tan adiak inbaga dana si bokbokod ko mo adi et si Amak ay nangibaa en sak-en di nangibilin sin kaliek ya siya abe sin iyat ko ay mangikali. <sup>50</sup> Isonga siya anggoy di inbagbagak din inbilin Amak en sak-en, tan ammok ay din bilina et maiturong si biyag ay eng-enggana.”

## 13

### *Din Nangowasan Jesus Sin Sikin Di Papasolot na*

<sup>1</sup> Masm-as-ed din fiesta ay makwani en Nalabas, yan ammon Jesus ay enggay din-mateng din timpo ay komaanana isnan lobong ta mantaoli en Ama na. Nanlogi sin damo et nilaylayad nas kanayon din ipogaw na isnan lobong. Ngem ed wani ena ipaila din kadakdaken di layad na.

<sup>2</sup> Idi nalabi sin pangpanganan da Jesus ya din papasolot na, enggay inpanemnem Satanas en Judas ay anak en Simon Iscariot ay sin siya di ay labi di panglipotana en Jesus. <sup>3</sup> Ngem ammon Jesus ay indawat Ama na en sisya di am-in ay panakabalin. Ammo na abe ay si Diyos di napoana ya siya abe sin pantaoliana.

<sup>4</sup> Isonga pinmika et kinaana din tak-ep di bado na, asi man-eten si towalya. <sup>5</sup> Pag nan pay-an di palangganas danom et inlogi na ay mangowas sin sikin di papasolot na dowanon ponasan sin towalya ay in-etena.

<sup>6</sup> Datngana pay si Simon Pedro, kananan Jesus, “Apo, baken sik-a koma di mangowas sin sikik.”

<sup>7</sup> Kanan aben Jesus, “Adi ka maawatan ed wani din am-amagek. Awni ta sin tapin di agew, asim maawatan.”

<sup>8</sup> Asi et kanan Pedro, “Dakey, adim oowasan nan sikik.”

Ngem kanan Jesus, “Mo adiak owasan sikim, adi ka aben maibilang ay pasolot ko.”

<sup>9</sup> Asi pag kanan Pedro, “Apo, mo siya sa, baken ngarud din sikik et anggoy di owasam, pati din takkay ya toktok ko.”

<sup>10</sup> Pag kanan Jesus, “Din nakaames ay ipogaw et adi na masapol ay amsen kasin din awak na tan enggay sinmigid. Owat din siki na anggoy di maowasan koma. Yan dakayo et kinmagam-is kayo, ngem baken kayon am-in.” <sup>11</sup> Say kanana di en baken dan sinmigid am-in, tan inaammo na mo sino di manglipot en sisya.

<sup>12</sup> Makdeng pay ay owasan Jesus din siki da, kasinan inbado din tak-ep di bado na et nakitokdo kasin en daida. Asi na kanan, “Ay maawatan yo din kaam-amag ko en dakayo? <sup>13</sup> Din pangawag yon sak-en ay Maestro ya Apo et kosto kayman di, tan siya od ay si sak-en. <sup>14</sup> Mo sak-en ngarud ay apo ya maestro yo di nangowas sin siki yo, dakayo abe et man-asiowas kayo komas siki yo. <sup>15-16</sup> Tan tet-ewa nan ibagak en dakayo ay baken napateg di bag-en mo din among na, yan siya abe sin naibaa ay baken napateg mo din nangibaa en sisya. Inamag ko nan dakayo ta say waday tadonen yo ta siya abe di iyat yo sin gagait yo. <sup>17</sup> Yan gapo ta maawatan yo dana, nagasat kayo mo tongpalen yo.

<sup>18</sup> “Baken kayon am-in sin kankanak, tan ammok di nemnem yo am-in ay pinilik. Ngem pinilik dakayo am-in pay dedan ta say matongpal din inpaisolat Diyos ay kanana, ‘Din naiokob en sak-en et nanbalin ay kaibaw ko.’” <sup>19</sup> Et siya nay ibagak en dakayo ed wani ta mo matongpal si awni, pasien yo ay sak-en din Messias. <sup>20</sup> Tet-ewa nan kanak en dakayo. Mo sinoy mangawat sin ibaak et awatenas sak-en ya siya abe sin nangibaa en sak-en.”

### *Din Nangipadtoan Jesus Mo Sinoy Manglipot En Sisya (Mat. 26:20-25; Mar. 14:17-21; Luc. 22:21-23)*

<sup>21</sup> Sin nangwanian Jesus sidi, peteg ay mansakit di nemnem na yan kanana sin papasolot na ay nangidoritso, “Tet-ewa nan ibagak ay waday esa en dakayo ay manglipot

\* **13:18** Salmo 41:9.



en sak-en.” <sup>22</sup> Din pasolot na et owat dan man-asisisin-eng ay nagolo di nemnem da, tan adi da ammo mo sinoy kalkaliena. <sup>23</sup> Din kadiking en Jesus ay pasolot na et say laydelaydena en daida. <sup>24</sup> Sininyasan Simon Pedro sisya ta pootena en Jesus mo sino en daida di kankanana.

<sup>25</sup> Siya et di, nanwingi din pasolot ay sana en Jesus yan kanana, “Apo, sino san manglipot en sik-a?”

<sup>26</sup> “Din pangidawtak sin nay isiwsiw ko ay tinapay et sisya di,” kanan Jesus ay sinombat. Et pag nan isiwsiw din tinapay sin digo et indawat na en Judas ay anak en Simon Iscariot. <sup>27</sup> Sin kosto ay nangawatan Judas sin tinapay, sin-gep Satanas sisya.

Pag kanan Jesus en sisya, “Dalasem! Adim taktaken san en ka amagen.” <sup>28</sup> Din nakiookob ay papasolot Jesus et adi da ammo mo sinoy laydena ay kalien. <sup>29</sup> Ngem gapo ta si Judas di makaammo sin pilak da, din wadas nemnem di odom et ibaan Jesus sisya ay en manlakos kasapolan da sin fiesta ono ena iyaan si pilak di nabiteg. <sup>30</sup> Idi nakdeng pay ay kinan Judas din tinapay, kabala. Yan enggay nalabi.

<sup>31</sup> Idi nadipos si Judas, kanan Jesus, “Din maamag si awni en sak-en ay Anak di Ipogaw et say maidayawak ya maidayawan aben Diyos. <sup>32</sup> Et mo madayaw si Diyos babaen en sak-en, dayawena abes sak-en ed langit yan amagena ay dagos.

<sup>33</sup> “Anan-ak ko, baken mabayag di pakiteak en dakayo. Awni et omanap kayo, ngem ipidwak en dakayo din inbagak sin papangolon di Judio ay adi kayo makaey sin emeyak.

<sup>34</sup> Naey di baro ay ibilin ko en dakayo. Masapol ay manlinayad kayo. Kaman koman din layad ay inpappailak en dakayo di iyat yo ay manlilinayad. <sup>35</sup> Tan mo manlilinayad kayo, say pangammoan di am-in ay ipogaw ay pasolot kos dakayo.”

*Din Nangipadtoan Jesus Sin Nangisaotan Pedro En Sisya  
(Mat. 26:31-35; Mar. 14:27-31; Luc. 22:31-34)*

<sup>36</sup> Asi kanan Simon Pedro, “Apo, into pay san emeyam?”

Sinongbatan Jesus yan kanana, “Din emeyak et adi mabalin ay omonod ka ed wani. Ngem sin tapin di agew et siya ay omonod ka.”

<sup>37</sup> Kanan aben Pedro, “Apo, apay ngin ay adiak makaonod ed wani? Tan nay nakasaganaak ay matey para en sik-a.”

<sup>38</sup> “Ay siya mo nakasagana ka ay matey para en sak-en?” insongbat Jesus. “Awni kadi! Sin daan pantan-oan di kawwitan, mamitlo ka ay mangwani en adim am-ammos sak-en.”

## 14

*Si Jesus Di Pandanan Di Ipogaw Ay Emey En Ama na*

<sup>1</sup> Asi kanan Jesus en daida, “Adi kayo madanagan, mo adi et itoloy yo ay mamati en Diyos ya mamati kayo abe en sak-en. <sup>2</sup> Tan ad-adoy panbeeyan di ipogaw sin pantetean Amak ed langit, yan emeyak sidi ta enak isagana di panbeeyan yo. Mo baken koman tet-ewa nan kanak en dakayo, ay siya mo say ibagak? <sup>3</sup> Mo maisagana pay din panbeeyan yo, asiak mantaoli ta enak ayagan si dakayo ta makitee kayo sin kad-ak. <sup>4</sup> Ammo yo met din danan ay emey sin emeyak.”

<sup>5</sup> Pag kanan Tomas, “Apo, adi mi ammo din danan, tan adi mi ammo din emeyam.”

<sup>6</sup> Asi et kanan Jesus, “Sak-en din danan, tan sak-en din poon di tet-ewa ya din mangidawat si biyag. Magay emey en Amak mo baken sak-en di pandanana. <sup>7</sup> Mo tet-ewa ay ammo yos sak-en, ammo yo abe si Amak. Yan manlogi ed wani, tet-ewa ay ammo yo ya inila yos sisya.”

<sup>8</sup> Pag kanan Felipe, “Apo, ipailam ngarud en dakami si Amam ta mapnek kami.”

<sup>9</sup> Asi et songbatan Jesus, “Felipe, nabayag ay wadaak en dakayo, yan adi ka pay laeng ammos sak-en? Di nangila en sak-en et inila nas Amak. Apay ngarud ay ibagam en ipailak en dakayo si Amak? <sup>10</sup> Ay adim pasien ay wadaak en Amak ya wada abe si Amak

en sak-en? Din kankanak en dakayo et baken napo sin nemnem ko mo adi et napo en Amak ay mantettee en sak-en. Din inam-amag ko abe et sisya met laeng di nakin amag.<sup>11</sup> Isonga pasien yo koma din kanak en dakayo ay wadaak en Amak yan wada abe si Amak en sak-en. Et mo adi kayo mapnek sin kanak, pasien yo pay koma begew din nakaskasdaaw ay inam-amag ko.

<sup>12</sup>“Tet-ewa adi nan kanak en dakayo ay mo sino di mamati en sak-en, amagena abe din nakaskasdaaw ay inam-amag ko. Yan wada abey amagena ay nabanbanol mo da naey. Tan emeyak en Amak,<sup>13</sup> et mo sinoy kedawen yo begew sin nakies-esaan yo en sak-en,\* amagek ta say madayaw si Amak begew en sak-en.<sup>14</sup> Ipidwak ay mo sinoy kedawen yo en sak-en begew sin nakies-esaan yo en sak-en, amagek.”

<sup>15</sup> Kanan aben Jesus en daida, “Mo laylayden yos sak-en, pasien yo abe din bilbilin ko.<sup>16</sup> Yan kedawek en Amak ay ibaa na di maiskat en sak-en ay mamadang en dakayo ta mantettee en dakayo ay eng-enggana. Sisya din Ispirito na ay mangitdo en dakayos tet-ewa.<sup>17</sup> Di adi mamati en sak-en et adi da maawat sisya, tan adi da maimatonan ya adi da aben ammos sisya. Ngem dakayo pay et ammo yos sisya, tan nay mantettee sin kad-an yo et awni et wada en dakayo.

<sup>18</sup>“Adiak taynan si dakayo ay kaman nangoso, tan mantaoliak met laeng.<sup>19</sup> Baken mabayag yan din adi namati en sak-en isnan lobong et adi da omila. Ngem mo dakayo, awni et ilaen yos sak-en. Gapo ta matagoak kasin, matago kayo abe.<sup>20</sup> Sin siya di ay timpo, ammo yo ay wadaak en Amak down kayo aben wada en sak-en ya sak-en en dakayo.<sup>21</sup> Mo sino di mangigtos bilbilin ko sin nemnem na ta say patiena et sisya di manglayad en sak-en. Yan din manglayad en sak-en et laylayden Amak. Laylaydek abe et ipaammok en sisya din maipanggep en sak-en.”

<sup>22</sup> Asi et kanan Judas (baken si Judas Iscariot), “Apo, sinoy gapo na ay dakami anggoy di pangipaammoam issa ay baken am-in ay ipogaw sinan lobong?”

<sup>23</sup> Kanan aben Jesus, “Tan din manglayad en sak-en et patiena di ibagak. Sisya di laylayden Amak. Isonga dakami en Amak et en kami manbeey en sisya.<sup>24</sup> Ngem din adi manglayad en sak-en et adi na aben pasien di ibagak. Din nay inbagbagak en dakayo et baken sak-en di nakin kali mo adi et si Amak ay nangibaa en sak-en.”

<sup>25</sup> Pag nan itoloy ay nangwani, “Inbagak am-in dana en dakayo sin naitatapiak pay laeng en dakayo.<sup>26</sup> Ngem awni et ibaan Diyos din Ispirito Santo ay panakaawak ko ay mamadang en dakayo. Sisya di mangitdo en dakayo si am-in ay banag, ya ipanemnem na abe en dakayo di am-in ay inbagbagak.

<sup>27</sup>“Adi kayo madandanagan ya emeg-egyat, tan pantalnaek di nemnem yo. Yan din talna ay idawat ko en dakayo et baken din talna ay ibagbagan di ipogaw isnan lobong mo adi et din talnan di nemnem ko.<sup>28</sup> Dinnye yo din kanak en taynak si dakayo ngem asiak mantaoli. Mo laylayden yo komas sak-en, manragsak kayo koma, tan emeyak en Amak ay napateg mo sak-en.<sup>29</sup> Siya na di ipadadaan kon dakayo ed wani ta say pomigsa di pammati yo sin temet-ewaana.

<sup>30</sup>“Adiak pay makingalngalat en dakayo si mabayag, tan nay omali si Satanas ay apon di ipogaw ay adi mamati. Magay kalebbengana en sak-en,<sup>31</sup> ngem ipalobos ko di mapasamak ta say ammoan di am-in ay ipogaw ay laylaydek si Amak ya es-estek ay tongpalen din am-in ay inbilina en sak-en. May, en tako.”

## 15

### *Maiarig Si Jesus Sin Poon Di Obas*

\* **14:13** Din kanana sin Griego et: mo sinoy kedawen yo sin ngadan ko. Di dowababe ay kaiologan nina sin Griego et: mo sinoy kedawen yo ay panakaawak ko ono mo sinoy kedawen yo begew sin talek yo sin kalebbengak.

<sup>1</sup> Pag nan kanan ay nangiarig, “Sak-en di kosto ay poon di obas,\* ya si Amak di mangay-ayowan. <sup>2</sup> Potoana di am-in ay panga ay adi manlames dowan na dalosan di waday lames na ta say maad-ado di lames na. <sup>3</sup> Dakayo di panga ay enggay nadalosan begew din init-itdok ay inigto yo sin nemnem yo. <sup>4</sup> Itoltoloy yo ay makies-esa en sak-en yan itoloy ko abe ay makies-esa en dakayo. Din pangan di obas et magay iyat na ay manlames mo naisian sin poona. Iso na en dakayo, tan magay bonggan di pammati yo mo adi yo itoltoloy ay makies-esa en sak-en.”

<sup>5</sup> Asi na inpidwa ay nangiarig, “Sak-en di poon di obas yan dakayo di panga na. Mo sino di mangitoloy ay makies-esa en sak-en ta makies-esaak abe en sisya et siya na di ad-adoy bonggan di pammati na, tan magay kabaelan di ipogaw ay amagen mo magagak en sisya. <sup>6</sup> Mo sino pay di adi mangitoloy ay makies-esa en sak-en et kaman napotoan ay panga ay maiwasit. Mo mango din panga ay sana, masinop da et mapooan. <sup>7</sup> Ngem mo itoltoloy yo pay ay makies-esa en sak-en ya mangiigto sin kalik sin nemnem yo ta say onodan yo, olay mo sinoy kedawen yo et maidawat en dakayo. <sup>8</sup> Siya nay maidayawan Amak, mo ad-adoy bonggan di pammati yo, yan siya na abey iyat yo ay mangipaila ay pasolot kos dakayo.

<sup>9</sup> “Laylaydek si dakayo ay kaman din pananglayad Amak en sak-en. Itoltoloy yo ay gon-oden din nay layad ko en dakayo. <sup>10</sup> Say gon-oden yos kankanayon din nay layad ko dalo et mo pasien yo din bilbilin ko. Iso na en sak-en, tan patiek abe din bilbilin Amak et kanayon ay gon-odek din layad na. <sup>11</sup> Siya dana di ibagak en dakayo ta say peteg di ragsak yo ay kaman din ragsak ko.

<sup>12</sup> “Siya na abey ibilin ko en dakayo ay manlinayad kayo ay kaman met laeng din pananglayad ko en dakayo. <sup>13</sup> Siya nay kadakdak-an ay layad ay maipailan di ipogaw, mo matey ta say matago di gagayyem na. <sup>14</sup> Et dakayo adi di gagayyem ko mo pasien yo di bilin ko. <sup>15</sup> Baken baa di pangwanik en dakayo ed wani mo adi et gagayyem. Tan din baa et adi na ammo din planon di among na, ngem mo dakayo pay et enggay inpaammok en dakayo din am-in ay dinngek en Amak. <sup>16</sup> Baken met dakayo di namili en sak-en mo adi et sak-en di namili ya nangdotok en dakayo ta en kayo man-awis si ad-ado ay ib-a yo ay mamati ta say waday bonggan di pammati yo ay komakaman si eng-enggana. Tan mo say iyat yo di, olay mo sinoy kedawen yo en Amak begew sin nakies-esaan yo en sak-en et idawat na en dakayo. <sup>17</sup> Siya na kasin di bilin ko. Masapol ay manlinayad kayo.”

### *Din Pangiligtan Di Adi Mamati En Jesus Sin Papasolot Na*

<sup>18</sup> Kanan aben Jesus sin papasolot na, “Awni et kalkaliget di adi mamati en sak-en si dakayo. Mo say iyat da di, adi kayo masdaaw. Nemnemen yo ay inmon-ona ay inliliget das sak-en. <sup>19</sup> Mo doy ya nailobongan koma di ogali yo ay kaman din adi mamati, laylayden das dakayo ay gagait da. Ngem nay pinilik si dakayo ta mailasin kayo en daida ay adi mamati. Et say gapo na si pangiligtan dan dakayo. <sup>20</sup> Nenemnemen yo din inbagak en dakayo ay baken napateg di baa mo din among na. Mo pinmalpaligat da, siya abe en dakayo. Mo adi da pinati din inbagbagak, adi da aben pasien di kanan yo. <sup>21</sup> Say amagen da am-in da naey en dakayo begew din nakies-esaan yo en sak-en, tan adi da ammo din nangibaa en sak-en. <sup>22</sup> Mo doy ya adiak inmali ta enak ngalaten si daida, baken da koman basol din adi da pamatian. Ngem ed wani, magay ipambal das basol da. <sup>23</sup> Din mangililiget en sak-en et kaliliget na abe si Amak. <sup>24</sup> Baken da koma aben basol mo adiak inpaila en daida di nakaskasdaaw ay magay odom si nakaamag. Ngem nay inila da am-in dadi, yan kaliliget da pay laeng si dakami en Amak. <sup>25</sup> Ngem siya

\* **15:1** Sin Daan ay Tolag, maiarig di Judio ono polin Israel sin obas (Salmo 80:8-18; Isaias 5:1-2,7), ngem lawa di lames na tan dinokogan das Diyos, isonga baken daida di kosto ay obas.

iman, ta say temet-ewa din inpaisolat Diyos ay kanana, ‘Inliliget das sak-en ay magay na.’ ”†

### *Din Amagen Di Ispirito Santo*

<sup>26</sup> Pag itoloy Jesus ay nangwani, “Awni et ibaak en dakayo din Ispirito ay mapo en Amak ay mamadang en dakayo. Sisy di mangipaneknek sin katet-ewan di maipanggep en sak-en. <sup>27</sup> Yan dakayo abe et paneknekan yos sak-en, tan kinmoyokoyog kayo nanlogi ed idi.

## 16

<sup>1</sup> “Inbagak am-in dana en dakayo ta adi kayo maetnga sin maamagan da mo adi et itoltoloy yo ay mamati en sak-en. <sup>2</sup> Tan adi da ibilang dakayo sin gagait yo ay Judio. Sin tapin di agew abe, waday mamse en dakayo et kanan das nemnem da en say siged di si pandayaw dan Diyos. <sup>3</sup> Siya dana di amagen da tan adi da ammo si Amak ya sak-en. <sup>4</sup> Idadaan ko na ed wani ta sin tapin di agew yan maamag na en dakayo, nemnemen yo ay say inbagak en dakayo.

“Adiak inbaga na en dakayo sin damo, tan dedaak sin kad-an yo. <sup>5</sup> Ngem ibagak ed wani, tan mantaoliak sin nangibaa en sak-en. Yan nay ay maga en dakayo di mangipoot mo intoy emeyak mo? <sup>6</sup> Siya kayman, tan mansakit di nemnem yo begew din inbagak en dakayo. <sup>7</sup> Ngem tet-ewa pay dedan ay say pansigdan yo mo komaanak. Tan mo adiak komaan, adi aben omali din Ispirito Santo en dakayo. Ngem mo komaanak, ibaak sisy ay en mamadang en dakayo. <sup>8</sup> Sin omaliana, ipaneknek na sin kaipoipogaw ay naipaksaw da maipanggep si basol. Ipaneknek na abe ay naipaksaw da maipanggep si kinalinteg ko ya din pangokoman Diyos en daida. <sup>9</sup> Mo maipanggep si basol, ipaneknek na ay basol da din adi da pamatian en sak-en. <sup>10</sup> Mo maipanggep abe si kinalinteg ko, ipaneknek na ay tet-ewa ay nalintegak. Di pangammoan da et nay emeyak en Diyos Ama yan awni et adi kayo omil-ila. <sup>11</sup> Mo maipanggep abe si pangokoman Diyos sin kaipoipogaw, ipaneknek na ay enggay kineddengana si Satanas ay ap-apon di adi mamati.

<sup>12</sup> “Ad-ado pay di adiak maibaga en dakayo ed wani, tan palalo ay naligat di pannemnem yo. <sup>13</sup> Ngem olay, tan mo omali din Ispiriton Diyos ay pag tet-ewa di ibagbaga na, sisy di mangiturong si nemnem yo ta ammoan yo di am-in ay tet-ewa. Yan baken sisy di nakin kali, mo adi et ipaammo na din dengngena en Diyos. Olay din maamag sin tapin di agew et siya abe di ipaammo na en dakayo. <sup>14</sup> Sak-en di dayawena, tan din wadas nemnem ko et say ena ipaammo en dakayo. <sup>15</sup> Inbagak ay din wadas nemnem ko et say ipaammon din Ispirito en dakayo, tan am-in din nemnem Amak et say nemnem ko met laeng.”

### *Din Panladingitan Ya Panragsakan Di Papasolot Jesus*

<sup>16</sup> Intoloy Jesus ay nangwani sin papasolot na, “Baken mabayag et adi kayon omila. Ngem baken aben mabayag yan kasin kayon omila.”

<sup>17</sup> Siya di, di odom ay pasolot na et inpidwapidwa da ay nan-asipoot, “Sino ngin di laydena ay kalien? Kanana en baken mabayag et adi tako ilaen sisy, pag nan kanan en baken aben mabayag yan kasin takon ilaen. Yan kanana abe en emey en Ama na. <sup>18</sup> Din baken mabayag ay nay, sino ngin di laydena ay kalien? Adi tako iman maawatan.”

<sup>19</sup> Ammon Jesus ay layden da ay pooten, isonga namangpango ay nangwani, “Man-asipoot kayo maipanggep sin inbagak en baken mabayag et adi kayon omila, ngem baken aben mabayag yan kasin kayon omila, ay baken siya? <sup>20</sup> Tet-ewa nan ibagak en dakayo. Man-oga ya manladingit kayo dowan manragsak pay din adi mamati en sak-en. Mansakit adi di nemnem yo, ngem din sakit di nemnem yo et manbalin si ragsak. <sup>21</sup> Kaman babai ay palalo di ligat na sin pan-anakana. Ngem mo bomala pay din moyang,

† 15:25 Salmo 35:19; 69:4.

niliw-ana din ligat na, et peteg di ragsak na begew sin anak na. <sup>22</sup> Iso na en dakayo, tan ed wani, mansakit di nemnem yo. Ngem sin tapin di agew, man-asiila tako et asi kayo manragragsak. Yan din ragsak yo ay sana et magay mangaan en dakayo.

<sup>23</sup> “Sin siya di ay timpo, magay masapol ay pooten yo en sak-en. Tet-ewa nan ibagak en dakayo ay mo sino di kedawen yo en Amak et idawat na en dakayo begew sin nakies-esaan yo en sak-en. <sup>24</sup> Enggana ed wani, maga di kinkindaw yo begew sin sana ay nakies-esaan yo en sak-en. Ed wani pay, komedakedaw kayo ta say maidawtan kayo ta dadlon kayon maragsakan.

<sup>25</sup> “Inbagbagak na en dakayo ay nangiarig. Sin tapin di agew pay, magay odom ay pangarig si dad-atek, mo adi et idoritsok ay mangibaga en dakayo si maipanggep en Amak. <sup>26</sup> Mo domateng din agew ay sana, sisya di pankedawan yo begew sin nakies-esaan yo en sak-en. Adiak kanan en siyat sak-en di mankedaw en sisya para en dakayo, <sup>27</sup> tan si Diyos Ama ay mismo et laylaydenas dakayo. Yan siya nay gapo na ay laylaydenas dakayo, tan laylayden yo abes sak-en ya pasien yo ay napoak en sisya. <sup>28</sup> Si Amak di napoak ay inmali isnan lobong, yan sisya abe di pantaoliak, tan nay komaanak isnan lobong.”

<sup>29</sup> Sin nanngedan das di, kanan din papasolot na, “A, nay nalawag di kankanam, tan idordoritsom ay adi mangibagbagas pangarig. <sup>30</sup> Ed wani yan, dadlon min ammo ay ammom am-in. Olay din salodsod ay wadas nemnem di ipogaw et adi masapol ay maibaga en sik-a, tan enggay ammom. Isonga pasien mi ay napo ka en Diyos.”

<sup>31</sup> “Pasien yo kayman ed wani,” kanan Jesus ay sinombat, <sup>32</sup> “ngem nemnemen yo na. Dandani met di pansisianan yo. Esa ya esa et emey sin beey na et maes-esaak. Ngem bakenak es-esa tet-ewa, tan wadas Amak en sak-en si kankanayon. <sup>33</sup> Siya nay ibagak en dakayo ta say waday talna yo begew sin nakies-esaan yo en sak-en. Tet-ewa kayman ay mapaligatan kayo isnan lobong. Ngem olay, tomoled kayo, tan enggay inabak ko din lawa ay wadas nan lobong.”

## 17

### *Din Inkararag Jesus En Ama Na Para Sin Awak Na*

<sup>1</sup> Sin nangwanian Jesus isna, asi na pag tangaden ed langit yan kanana, “Ama, enggay dinmateng din timpo ay inkeddeng mo. Ipailam din dayaw ko ay Anak mo, ta asiak aben ipaila din dayaw mo ay Amak. <sup>2</sup> Tan inpolang mon sak-en di kalebbengan ay mangituray sin am-in ay ipogaw ta idawat koy biyag ay eng-enggana en daida am-in ay intalek mon sak-en. <sup>3</sup> Yan siya na di biyag ay iwed patingga na, din pangaammoan dan sik-a ay din es-esa ay tet-ewa ay Diyos ya sak-en ay inbaam ay si Jesu Cristo. <sup>4</sup> Inpailak isnan lobong din kinadiyos mo, tan dadlonak tinongpal din inpaamag mo en sak-en. <sup>5</sup> Ed wani, Ama, mantaoliak kod en sik-a ta say kasin kan ipaila din kinadiyos ko ay say kinadiyos ko idi wadaak en sik-a sin daan maamagan di lobong.”

### *Din Inkararag Jesus Para Sin Papasolot Na*

<sup>6</sup> “Din ipogaw mo ay pinilim isnan lobong ay intalek mo en sak-en et inpailak en daida din kinadiyos mo. Sigod ay ipogaw mos daida yan intalek mo en sak-en. Inon-onodan da din inbagbagam, <sup>7</sup> et ed wani inammoan da ay sik-a di napoan di am-in ay inam-amag ko ya inbagbagak. <sup>8</sup> Tan inawat da din initdok en daida ay inbagam en sak-en, et dadlon dan ammo ay sik-a di napoak ya sik-a di nangibaa en sak-en.

<sup>9</sup> “Di ikarkararak et baken si daida ay adi mamati en sak-en mo adi et din ipogaw mo ay intalek mon sak-en. <sup>10</sup> Tan am-in di okak et okam, yan din okam et siya met laeng ay okak. Yan enggay madaydayawak babaen en daida. <sup>11</sup> Adiak itoloy ay mantetee isnan lobong mo adi et mantaoliak en sik-a. Ngem da naey pay et mataynan da. Ama ay Nasantoan, salaknibam kod daidas panakabalin di ngadan mo ay indawat mo abe en



sak-en\* ta say kanayon ay mantimpoyog di nemnem da ta kaman din nemnem ta. <sup>12</sup> Idi wadaak sin kad-an da, sinalaknibak ya inayowanak si daidas panakabalin di ngadan mo ay indawat mo en sak-en. Et laton ay maga en daida di naisian en sak-en powira din esa ay natodingan ay madosa, ta say temet-ewa din inpaisolat mo.

<sup>13</sup> “Dandani di pantaoliak en sik-a, ngem dedaak pay laeng isnan daga. Isonga ipigsak ay mangikararag sina ta say dengngen da ta dadlon dan maragsakan sin mismo ay ragsak ko. <sup>14</sup> Inpaammok en daida din inbagbagam, isonga din adi mamati en sak-en et kaliliget da abe si daida, tan kaman dan sak-en met laeng ay baken nailobongan di ogali da ay kaman din adi mamati. <sup>15</sup> Adiak pay kanan en kaanem si daida isnan lobong mo adi et ta salaknibam si daida en Satanas. <sup>16</sup> Tan kaman dan sak-en ay adi da maibilang sin ipogaw ay adi mamati. <sup>17</sup> Iaddawim kod daida si lawa babaen sin kalim ay tet-ewa ta say mansilbi da en sik-a si kosto. <sup>18</sup> Tan nay ibaak si daida sin gagait das nan lobong ay kaman met laeng di inyat mo ay nangibaa en sak-en. <sup>19</sup> Et idaton ko din awak ko ay matey para en daida ta say maiaddawi da tet-ewa si lawa ay mansilbi en sik-a.”

### *Din Inkararag Jesus Para Sin Am-in Ay Mamati*

<sup>20</sup> “Baken anggoy da naey si ikararagak mo adi et olay daida abe ay mamati en sak-en begew di en da ibagbaga. <sup>21</sup> Ama, ikararag ko ay man-es-esa koma di nemnem da ay kaman aben din nemnem ta, ta say pasien di ipogaw ay sik-a di nangibaa en sak-en. Sapay koma ta wada da en daida ay kaman met laeng din kawadam en sak-en ya kawadak en sik-a. <sup>22</sup> Indawat ko en daida din mismo ay kinangato ay indawat mo en sak-en ta say man-es-esa di nemnem da ay kaman daida met laeng. <sup>23</sup> Wadaak en daida ya wada ka abe en sak-en ta say magay kolang din pan-es-esaan di nemnem da ay sana ta say ammoan di ipogaw ay sik-a di nangibaa en sak-en ya ammoan da abe ay nan-iso di layad mo en daida sin layad mo en sak-en.

<sup>24</sup> “Ama, laydek ay din ipogaw ay intalek mo en sak-en et maitapi dan sak-en ed langit ta ilaen da din somili ay kinadiyos ko. Siya na din kinadiyos ko ay indawat mo en sak-en tan nilaylayad mos sak-en sin daan maparsuaan di lobong.

<sup>25</sup> “Ama ay Nalinteg, din adi mamati en sak-en et adi da ammos sik-a. Ngem sak-en pay et ammok sik-a, yan din papasolot ko ay nay et ammo da ay sik-a di nangibaa en sak-en. <sup>26</sup> Tan inpaammok en daida din kinadiyos mo, yan itoltoloy ko ay mangipaammo ta say manlilinayad da ay kaman din pananglayad mo en sak-en ya ta wadaak en daida.”

## 18

### *Din Nadpapan Jesus*

(*Mat. 26:47-56; Mar. 14:43-50; Luc. 22:47-53*)

<sup>1</sup> Idi nakakararag si Jesus, binmala da ya din papasolot na et inmagadang da sin ginawang ay Kidron. Sin demang na, waday lugar ay naeskan si kakaiw ay olivo, yan say inmeyan da Jesus.

<sup>2</sup> Si Judas pay ay manglipot en Jesus, ammo na din kad-an da, tan namin ado ay inmey da Jesus ya din papasolot nas di. <sup>3</sup> Et isdi di nangipangoana si sinkabeweg ay soldado ya polis di Timplo ay inbaan di papangolon di papadi ya Fafariseo. Nansilasilaw ya nan-armaarmas da.

<sup>4</sup> Gapo ta ammon Jesus di am-in ay maamag en sisya, ena inabet daida yan kanana, “Sinoy an-anapen yo?”

<sup>5-6</sup> “Si Jesus ay taga-Nazaret,” insongbat da.

“Yan sak-en adi,” kanan Jesus. Idi kanana di, kasanod da et natokang da, pati si Judas ay nanglipot en sisya ay nakipipika en daida.

<sup>7</sup> Siya et di kasin pinoot Jesus, “Sino ngarud di an-anapen yo?”

\* **17:11** Din naisolat sin odom ay manuskrito sin Griego et: salaknibam kod daida ay intalek mo en sak-en si panakabalin di ngadan mo... Siya abe sin v. 12.

“Si Jesus ay taga-Nazaret,” kanan da.

<sup>8</sup> “Enggay met inbagak ay sak-en,” kanan Jesus. “Et mo sak-en di an-anapen yo, olay bay-an yo pay nan papasolot ko.” <sup>9</sup> Say kanana di ta matongpal din inbaga na ay iwed di malitaw en daida ay intalek Diyos en sisya.

<sup>10</sup> Kaoksot si Simon Pedro sin kampilana yan kabetbet en Malkus ay bag-en di kangatoan ay padi, et nalongodan din kannawan ay inga na. <sup>11</sup> Kanan Jesus en Pedro, “Isiket mo sa. Ay kanam en adiak masapol ay nam-osen di ligat ay inkeddeng Amak en sak-en?”

### *Din Damo Ay Nangisaotan Pedro En Jesus*

*(Mat. 26:69-70; Mar. 14:66-68; Luc. 22:56-57)*

<sup>12</sup> Siya et di, din sosoldado, din kapitan da ya din polis di Judio et dinpap das Jesus et binalod dan takkay na. <sup>13</sup> Din damo ay nangieyan da et si Annas ay katogangan Caifas. Si Caifas di kangatoan ay padi sin siya di ay tawen, <sup>14</sup> yan sisya abe di nangwani sin Judio en agpos mo matey di esa ay ipogaw ta matago di kakailiana.\*

<sup>15</sup> Si Simon Pedro ya di esa ay pasolot Jesus et inmonod da. Din esa ay nay et ammon din kangatoan ay padi, isonga inpalobos da ay makisgep en Jesus sin bel-ayan di beey na. <sup>16</sup> Si Pedro pay, nataynan sin bel-ayan sin kad-an di pantew. Siya et di, kataoli din gait na et ena ibaga sin babai ay manilsilib sin pantew mo mabalin ay senggep si Pedro. Et inpalobos na. <sup>17</sup> Idi sengsenggep si Pedro, kanan din babai ay sana, “Esa kan samet ay pasolot din ipogaw ay doy, ay baken siya?”

“Baken,” kanan Pedro.

<sup>18</sup> Din babag-en ya gogowardiya et nanpoo das oling yan man-an-anido da, tan teg-in. Et en nakipika si Pedro en daida ta makianido.

### *Din Namistigalan Di Kangatoan Ay Padi En Jesus*

*(Mat. 26:57-66; Mar. 14:55-64; Luc. 22:66-71)*

<sup>19</sup> Mo din kangatoan ay padi et binistigal nas Jesus maipanggep sin papasolot ya it-itdo na. <sup>20</sup> Kanan Jesus, “Kanayon met ay nan-it-itdoak ay dengdengngen di kaipoipogaw, tan nan-it-itdoak sin kasinsinopan di am-in ay Judio ay sin kasinasinagoga ya sin Timplo. Maga met di initedok ay inlimimed ko. <sup>21</sup> Apay nga salodsodem sak-en? Pootem koma en daida ay nannanngge en sak-en, tan ammo da din inbagbagak.”

<sup>22</sup> Sin nangwanian Jesus sidi, katampik di esa ay gowardiya ay wadas di ay kanana, “Ay say iyat mo sa ay manongbat sin kangatoan ay padi?”

<sup>23</sup> “Mo waday insongbat ko ay lawa, ibagam ta maammoan. Mo maga pay, apay nga tomampik ka?” insongbat Jesus.

<sup>24</sup> Idi siya di, inbaan Annas si Jesus ay nababalod en Caifas ay din kangatoan ay padi.

<sup>25</sup> Si Pedro et wada pay laeng ay makian-anido, yan kanan da en sisya, “Sik-a pay, esa kan samet ay pasolot na, ay baken siya?”

“Baken yan,” kanana ay nangisaot.

<sup>26</sup> Asi et waday bag-en di kangatoan ay padi ay ton-od din lalaki ay nilongodan Pedro di inga na. Kanana, “Ay baken sik-a din inilak ay esa ay gait Jesus sin kad-an di kakakkaiwan?” <sup>27</sup> Ngem kasin insaot Pedro dowan et katan-o din kawwitan.

### *Din Naipolangan Jesus En Pilato*

*(Mat. 27:1-2,11-14; Mar. 15:1-5; Luc. 23:1-5)*

<sup>28</sup> Makdeng pay din nabistigalan Jesus sin beey en Caifas, enggay pomatpat-a, et iney din papangolon di Judio sisya sin beey en Gobernador Pilato. Ngem sigaan da ay senggep, tan into et mo maibilang da ay naipakadodogis et maiparit ay makikan da sin

\* **18:14** Juan 11:50.

fiesta ay makwani en Nalabas.† <sup>29</sup> Siya di, binmala si Pilato et pinoot na en daida, “Sinoy darum yo sin ipogaw ay sana?”

<sup>30</sup> “Mo baken managbasol na, adi mi koman iall en sik-a,” insongbat da.

<sup>31</sup> Asi et kanan Pilato, “Dakayo ngarud di makaammo. Olay dakayo ay mismo di mangokom en sisya ay maibasar sin linteg yo.”

“Ngem dakami ay Judio et magay kalebbengan mi ay mangipapses ipogaw,” insongbat da. <sup>32</sup> Naamag na ta say matongpal din kanan Jesus maipanggep si iyat na ay matey.

<sup>33</sup> Siya et di kasin sinenggep si Pilato sin beey na et inpaayag nas Jesus. “Ay sik-a din Arin di Judio?” pinoot na.

<sup>34</sup> Kanan Jesus, “Ay napos nemnem mo din salodsod ay sana ono waday odom ay nangibaga en sik-a?”

<sup>35</sup> Kanan Pilato, “Ay kanam en Judioak aya? Din gagait mo ay Judio ya din papangolon di papadi yo di nangipolang en sik-as na. Sinoy basol mo ngarud?”

<sup>36</sup> Songbatan pay Jesus yan kanana, “Din kinaturay ko et naitken sin tuturay di lobong ay nay. Tan mo ariak koma isnan lobong, nakiibaw koma di ipogaw ko en daida ay Judio ta adi da dinompap. Ngem di katet-ewa na et baken din lobong ay nay di napoan di kinaturay ko.”

<sup>37</sup> “Isonga ari ka ngarud, ay baken siya?” kanan Pilato.

“Mo say kanam et siya,” insongbat Jesus. “Yan din panggep ko ay inmali isnan lobong ay maianak et ta ipaammok din tet-ewa. Mo sino di mamananol si tet-ewa et awaten da din kankanak.”

<sup>38</sup> Asi et kanan Pilato, “Sino ngin din tet-ewa ay sana?” Pag kasin bomala yan kanana sin Judio. “Magay ammok si basol na. <sup>39</sup> Ngem waday ogali yo ay ibolos ko di esa ay balod sin tonggal fiesta ay makwani en Nalabas. Ay layden yo ngarud ay ibolos ko din ari yo ay nay?”

<sup>40</sup> “Baken si sana! Si Barabbas di layden mi!” kanan da ay nangibogaw. Si Barabbas ay nay et tollisan ay nangonkontra sin gobierno.

## 19

### *Din Nanglaslasoyan Di Sosoldado En Jesus*

(*Mat. 27:27-31; Mar. 15:16-20*)

<sup>1</sup> Idi siya et di, inpasoplit Pilato si Jesus. <sup>2</sup> Pag man-apid din sosoldado si pagat ay inkorona da en sisya. Asi da badoan si manbalanga ay nagayad, <sup>3</sup> et nansinoskat da ay en nangwani en sisya, “Matagotago ka ay Arin di Judio,” dowan dan tampiken.

### *Din Naikeddangan Jesus Ay Matey*

(*Mat. 27:15-31; Mar. 15:6-15; Luc. 23:13-25*)

<sup>4</sup> Pag kasin bomala si Pilato yan kanana sin Judio, “Ilaen yo, nay ipabalak sisya ta maammoan yo ay magay ammok si basol na.” <sup>5</sup> Bomala pay si Jesus ay nabebedbedan si pagat ya nababadoan si manbalanga ay nagayad, yan kanan Pilato, “Ilan yo kadi nan ipogaw.”

<sup>6</sup> Sin nangilaan din papangolon di papadi ya din polis di Timplo en sisya, kabogaw da ay nangwani, “Ilansam! Ilansam sin krus!”

Ngem kanan Pilato, “Dakayo ngarud di mangilansa en sisya sin krus, tan mo sak-en pay et magay ammok si basol na.”

<sup>7</sup> Kanan aben din Judio, “Ngem wada abey linteg mi, yan mo maibasar sin linteg mi ay nay, siyat matey, tan kanana en Anak Diyos sisya.”

<sup>8</sup> Sin nanngean Pilato sidi, namnamed ay inmegyay, <sup>9</sup> et sinenggep kasin sin beey na yan pinoot na en Jesus, “Intoy napoam?” Ngem adi sinombat si Jesus. <sup>10</sup> Asi et kanan

† **18:28** Ogalin di Judio ay mo senggep das beey di Gentil, maibilang da ay naipakadodogis.

Pilato, “Adi ka somongbat mo? Ay adim ammo aya ay waday turay ko ay mangibolos en sik-a ono mangipailansa en sik-a sin krus?”

<sup>11</sup> Sinongbatan Jesus yan kanana, “Magay turay mo en sak-en mo adi koman indawat Diyos en sik-a. Isonga din nangipolang en sak-en en sik-a et madagsen di basol da mo din basol mo.”

<sup>12</sup> Sin nanngaan Pilato sidi, inpakat na di kabaelana ay mangwaya en Jesus. Ngem din Judio et intoltoloy da ay nangibogaw. “Mo wayaam sa ay ipogaw, maawatan ay baken dakan gayyem en Emperador. Tan din mangipaari si awak na et kontraena met si Emperador.”\*

<sup>13</sup> Sin nanngaan Pilato sin inbogbogaw da, kasinan inbala si Jesus et tinmokdo sin pantokdoan di howis. Din tokdoan ay nay et wada sin nabatoan ay makwani en Gabbata sin kalin di Judio. <sup>14</sup> Sin tinmokdoanas di, dandani ay alas dosi sin agew ay doy ay pansaganaan di Judio si para sin fiesta. Kanan Pilato sin Judio, “Naey san ari yo.”

<sup>15</sup> Ngem ibogbogaw da, “Pakaanem, peslem! Ilansam sin krus!”

Kanan aben Pilato, “Yan sana ay layden yo ay ilansak san ari yo mo?”

Asi et sinombat din papangolon di papadi yan kanan da, “Si Emperador anggoy di ari mi, magay odom.”

<sup>16</sup> Siya et di, inpolang nas Jesus en daida ta mailansa sin krus.

### *Din Nailansaan Jesus Sin Krus*

*(Mat. 27:32-44; Mar. 15:21-32; Luc. 23:26-43)*

<sup>17</sup> Din sosoldado pay et inpatilid dan Jesus din krus na et in-ey das sisya sin lugar ay kanan da en Kad-an di Tong-an di Toktok. Din ngadana sin kalin di Judio et Golgota.

<sup>18</sup> Say nangilansaan dan Jesus sin krus. Inkrus da abe di doway ay ipogaw, esa sin makannawana, esa sin makannigid na.

<sup>19</sup> Wada abey insolat Pilato ay inpakpak da sin krus en Jesus ay kanana, “Si Jesus ay taga-Nazaret, din Arin di Judio.” <sup>20</sup> Ad-ado di Judio ay namasas di, tan naisolat si Hebreo, Latin, ya Griego, ya naisag-en abe din nailansaan Jesus sin siyodad. <sup>21</sup> Siya di, inmey din papangolon di papadin di Judio en Pilato yan kanan da, “Din insolat mo koma et baken ‘Arin di Judio’ mo adi et ‘Kanan nina en Arin di Judio.’ ”

<sup>22</sup> Ngem insongbat Pilato, “Din enggay insolat ko et adi met masokatan.”

<sup>23</sup> Din sosoldado pay, idi inlansa das Jesus sin krus, ina da din bado na et nan-opaten da ta panbibingayan da. Ngem din nagayad pay, magay nansilpoana ay nakakanayon di abel na. <sup>24</sup> Isonga kanan din sosoldado, “Adi tako bisngiten. Mayat mo panbinnotan tako ta ilaen tako mo sinoy mamonta.” Et say inyat da. Naamag na ta matongpal din inpaisolat Diyos ay kanana, “Nanbibinisngitan dan badok yan din naloyong pay et nanbinnotan da.”†

<sup>25</sup> Waday pinmikapika sin sag-en di krus en Jesus ay si ina na, din iyogtan ina na, si Maria ay asawan Clopas ya si Maria Magdalena. <sup>26</sup> Idi inilan Jesus ay wada abe din pasolot na ay laydelaydena en daida ay nakipipika en ina na, kanana en ina na, “Ay ina, ibilang mo sa ay anak mo.” <sup>27</sup> Asi na aben kanan sin pasolot na ay sana, “Ibilang mo sa ay inam.” Et pag isaan din doy ay pasolot na si inan Jesus ta makitee sin beey na.

### *Din Nateyan Jesus*

*(Mat. 27:45-56; Mar. 15:31-41; Luc. 23:44-49)*

<sup>28</sup> Maaw-awni pay, ammon Jesus ay nakdeng am-in yan kanana, “Nay nabigawak,” ta matongpal din inpaisolat Diyos.‡

<sup>29</sup> Wadas di di koli ay napnos soka. Isonga din sosoldado, inbebe day kaman kapes. Asi da tebken si pingin di hisopo et indewdew dan Jesus ta sopsopana. <sup>30</sup> Idi sinopsopan

\* **19:12** Si Emperador Tiberius ed Roma di nangdotok en Pilato ay man-gobernador ed Judea, et waday turay na ay mangaan en Pilato mo way pankolangana. † **19:24** Salmo 22:18. ‡ **19:28** Salmo 69:21; 22:15.

Jesus, kanana, “Enggay natongpal.” Et pag manyongyong ya italek na din ab-abiik na en Diyos.

<sup>31</sup> Din kabigatan din agew ay doy et say agew ay pan-ibbayan, ya napateg abe ay agew di, tan naitompong sin fiesta. Isonga din papangolon di Judio et en da inbaga en Pilato ay gopngen koma din sosoldado din sikin di nailansalansa sin krus ta matey da ay dagos ta asi maibaba din awak da. Tan din Judio et paniyewen da mo domateng din agew ay pan-ibbayan yan deda din bangkay sin krus. <sup>32</sup> Siya di, en ginpong din sosoldado din sikin di doway ay naikrus ay naigawaan Jesus. <sup>33</sup> Ngem idi datngan da pay si Jesus, adi da ginpong din siki na, tan inila da ay enggay natey. <sup>34</sup> Ngem waday esa ay soldado, dinoyok nas gayang din bikes na et kabelay dada ya danom. <sup>35</sup> Din naamag ay nay et dadlon mapati, tan say pinaneknekan din nangilas di. Dadlonan ammo ay tet-ewa din inbaga na, ya din panggep na ay nangibaga et ta mamati kayo abe. <sup>36</sup> Naamag abe dana ta say matongpal din inpaisolat Diyos ay kanana, “Maga di magpong si olay es-esay tong-a na,” <sup>37</sup> ya din esa abe ay inpaisolat na ay kanana, “Awni et ilaen das sisya ay dinoyok da.”\*

### *Din Naiponponan Jesus*

*(Mat. 27:57-61; Mar. 15:42-47; Luc. 23:50-56)*

<sup>38</sup> Idi nakdeng am-in dana, wadas Jose ay taga-Arimatea ay inmey en Pilato ay nangdaw sin bangkay Jesus. Si Jose ay nay et namati en Jesus, ngem adi na inpaammo tan emegyat sin papangolon di Judio. Inpalobos Pilato, isonga ena ina din bangkay Jesus. <sup>39</sup> Nakiey si Nicodemus ay din inmey nakingalat en Jesus ed idi si namingsan ay labi. Si Nicodemus et nan-itatakin si bangbanglo ay naamag si nanlaok ay niket di mirra ya aloe. Din kadagsena et nasurok si tolonpo ay kilo. <sup>40</sup> Binotibotan din doway ay doy din bangkay Jesus si siked ya baro ay lopot ay naitapian din bangbanglo, tan say ogalin di Judio maipanggep si natey.

<sup>41</sup> Sin sag-en di nailansaan Jesus, waday lugar ay naeskan si kakaiw ay kad-an di liyang ay adi naos-osal ay katiktiktik da ay bato. <sup>42</sup> Gapo ta dandani din agew ay pan-ibbayan ya man-aagag da ay mangiponpon en Jesus, say nangiponponan da, tan asagen.

## 20

### *Din Kasin Natagoan Jesus*

*(Mat. 28:1-8; Mar. 16:1-8; Luc. 24:1-12)*

<sup>1</sup> Sin daan di kapat-aana sin Dominggo, inmey da Maria Magdalena sin naiponponan Jesus. Somawang da pay, inila da ay nakaan din bato ay nain-eb sin liyang. <sup>2</sup> Et nanagtag da ay emey sin kad-an da Pedro ya din pasolot Jesus ay laydelaydena. Kanan Maria en daida, “Kinaan da din awak di Apo tako sin liyang, yan adi mi ammoy nangipay-an da.”

<sup>3</sup> Isonga kalobwat et da Pedro ay emey sin kad-an di liyang. <sup>4</sup> Nanagtag da et ay doway, ngem gapo ta mabmabikas ay managtag din esa mo si Pedro, nangon-ona ay sinmawang sin liyang. <sup>5</sup> Nanyakog-ong ay nangitining, et inila na din lopot ay naibotibot en Jesus, ngem adi sinenggep. <sup>6</sup> Somawang pay si Pedro, kasegep et inila na din naibotibot ay lopot ay naipapayag <sup>7</sup> ya din panyo ay naibedbed sin toktok Jesus. Din panyo et nalopilop ay naikasin di kad-ana. <sup>8</sup> Asi aben senggep din esa ay nangon-ona. Sin nangilaana sin lopot ay wadas di, pinati na ay natago kasin si Jesus. <sup>9</sup> Tan din inpaisolat Diyos ay kanana en siyat kasin matagos sisya et daan da pay laeng maawatan.

### *Din Nanpailaan Jesus En Maria Magdalena*

*(Mat. 28:9-10; Mar. 16:9-11)*



<sup>10</sup> Asi pag somaa din doway pasolot ay sana. <sup>11</sup> Ngem si Maria pay, deda ay pinmipika sin kad-an di liyang ay man-og-oga. Man-og-oga ay nanyakog-ong ay nangitining sin liyang. <sup>12</sup> Kambaw et waday doway ay anghel ay nanbabado si mankilat. Tinmotokdo da sin sigod ay naipayagan Jesus, di esa sin toktokan ya din esa sin andayan. <sup>13</sup> Kanan da en sisya, “Ay iyogtan, sinoy pan-og-ogaam?”

“Tan ina dan bangkay di Apok, et adiak ammo mo intoy nangieyan da,” insongbat na.

<sup>14</sup> Pag manwingi et ilaenas Jesus ay pinmipika, ngem adi na naimatonan. <sup>15</sup> Kanan Jesus, “Iyogtan, apay nga man-og-oga ka? Sinoy an-anapem?”

Ngem si Maria et kananas nemnem na en sisya din mangay-ayowan sin nais-ek sidi et kananan sisya, “Apo, mo sik-a di nanga en sisya, ibagam kod mo intoy nangipay-am ta enak kod alaen.”

<sup>16</sup> “Maria,” kanan Jesus en sisya, dowan et mansagong si Maria ay nangwani en, “Rabboni,” sin kalin di Judio, di olog na et maestro.

<sup>17</sup> Ngem kanan et Jesus, “Adi ka omipakod,\* tan daanak pay mantaoli en Amak. En ka et ipaammo sin aag-ik ay mantaoliak en Amak ay siya abey Ama yo, ya en Diyos ko ay siya abey Diyos yo.”

<sup>18</sup> Idi siya di, inmey si Maria Magdalena et ena inbaga sin papasolot Jesus, “Inilak din Apo.” Asi na aben inpaammo en daida din inbagan Jesus en sisya.

#### *Din Nanpailaan Jesus Sin Papasolot Na*

*(Mat. 28:16-20; Mar. 16:14-18; Luc. 24:36-49)*

<sup>19</sup> Idi nalabi sin siya di ay Dominggo, naidakig din beey ay nasinopan di papasolot Jesus, tan emegyat da sin papangolon di Judio. Idi siya di, kasawang si Jesus ay pinmipika sin kad-an da, yan kanana en daida, “Talna koma di mawada en dakayo.”

<sup>20</sup> Asi na inpaila din takkay ya bikes na en daida. Et peteg di ragsak da ay nangila en Apo.

<sup>21</sup> Pag kasin kanan Jesus en daida, “Talna koma di mawada en dakayo. Ibaak si dakayo ay kaman din nangibaaan Amak en sak-en.” <sup>22</sup> Pag nan bod-okan si daida yan kanana, “Awaten yo din Ispirito Santo, <sup>23</sup> ta mo sino da di pangibagaan yo en napakawan di basbasol na, enggay pinakawan Diyos. Ya mo sino da di pangibagaan yo en adi napakawan di basbasol na, adi aben pinakawan Diyos.”

#### *Din Nanpailaan Jesus En Tomas*

<sup>24</sup> Idi nanpailas Jesus sin papasolot na, maga en daida si Tomas ay nabdayan si Singin ay esa sin sinpo ya doway. <sup>25</sup> Isonga pag kanan din odom ay pasolot en sisya, “Inila mi din Apo.”

Ngem kanan Tomas, “Mo adiak ilaen ya kampisen din takkay na ay dinan di lansa, yan mo adiak aben lesken si gomot ko din sogat sin bikes na, adiak pasien san kanan yo.”

<sup>26</sup> Malabas pay di esay domingo, kasin nasinop din papasolot Jesus sin beey, yan wadas Tomas. Naidadakig, ngem kasegep si Jesus pay dedan yan pinmipika sin kad-an da. “Talna koma di mawada en dakayo,” kanana en daida. <sup>27</sup> Asi na kanan en Tomas, “Nay din takkay ko, kampisem. Iadawam abe san takkay mo ta ilsek mo sin bikes ko. Adi ka mandowadowa mo adi et mamati ka.”

<sup>28</sup> Kanan Tomas, “Sik-a din Apok ya din Diyos ko.”

<sup>29</sup> Pag kanan Jesus, “Nay mamati ka tan inilam sak-en. Nagasat da di olay adi inmila, ngem mamati da pay dedan.”

<sup>30</sup> Ad-ado di nakaskasdaaw ay sinyal ay inpailan Jesus sin papasolot na ay adi naisolat sin libro ay nay. <sup>31</sup> Ngem da naey pay et naisolat das na ta say pasien yo ay si Jesus din Messias ay Anak Diyos ta say babaen sin pammati yo, wada en dakayo di biyag ay iwed patingga na begew sin nakies-esaan yo en sisya.

\* **20:17** Mateo 28:9.

## 21

### *Din Nanpailaan Jesus Sin Pito Ay Pasolot na*

<sup>1</sup> Idi inmey di piga ay agew, nanpailas Jesus kasin sin papasolot na sin benget di lebeng ay Tiberias. Siya nay inyat na ay naamag. <sup>2</sup> Nanbebeweg da Simon Pedro, si Tomas ay nabdayan si Singin, si Nataniel ay taga-Cana ed Galilea, din an-ak en Zebedeo, ya doway ay pasolot Jesus. <sup>3</sup> Kanan Simon Pedro sin gagait na, “Enak manabokol.”

“En tako ngarud,” kanan da. Et en da nanlogan si bangka. Ngem olay mo tinpeg dan labi ay manabtabokol, maga polos di ina da.

<sup>4</sup> Pomatpat-a pay, wadas Jesus ay pinmipika sin benget di lebeng, ngem adi naimatoman din papasolot na. <sup>5</sup> Kanan Jesus en daida, “Ay way ina yo ay iib-a?”

“Maga,” insongbat da.

<sup>6</sup> Kanan aben Jesus, “Ipolwak yo sin makannawan di bangka et way alaen yo.” Ipolwak da pay, adi da et makaigoyod begew din kaad-adon di tinabokol da ay nigay.

<sup>7</sup> Idi siya di, din pasolot Jesus ay laydelaydena et kanana en Pedro, “Din Apo baw adi di.” Sin nanngean Simon Pedro sidi, kaigaley sin tak-ep di bado na, tan sigod ay nanwaway-as, man-aagag yan kapadtok sin danom. <sup>8</sup> Din gagait na pay, nantee da sin bangka ay mangigoyoyod sin tabokol ay napnos nigay engganang somanglad da. Tan asag-en da ay dandani ay sin-gasot ay metro di kaaddawi da sin benget di lebeng.

<sup>9</sup> Idi binmela da sin bangka, inila day ninigay ay maidawdawis si man-ganggangab ay oling. Wada abey tinapay. <sup>10</sup> Kanan Jesus en daida, “Omiali kayo sin nigay ay ina yo.” <sup>11</sup> Nantaoli si Simon Pedro sin kad-an di bangka ay en mangigoyod sin tabokol sin bangkag. Napno si dadakke ay nigay ay sin-gasot ya limapolo ya tolo di kabibilang da, ngem olay say kaad-ado da, adi nabisngit din tabokol.

<sup>12</sup> Pag kanan Jesus en daida, “Omali kayot mangan tako.” Yan mabain da am-in ay nangipoot mo sinos sisya, tan ammo da ay din Apo. <sup>13</sup> Asi inan Jesus di nigay ya tinapay et inwatwat na en daida. <sup>14</sup> Siya nay maikatlo ay nanpailaan Jesus sin papasolot na nanlogi sin kasinan natagoan.

### *Din Inbagan Jesus En Pedro*

<sup>15</sup> Idi nakakan da, kanan Jesus en Simon Pedro, “Ay Simon ay anak Juan, ay dakdake di layad mo en sak-en mo din layad dana?”

“Aw yan, Apo, ammom ay laylaydek sik-a,” kanana.

Asi et kanan Jesus, “Mo siya sa, ayowanam di ipogaw ko ay maiarig ay kakarnerok.”

<sup>16</sup> Asi na pay inpidwa ay nangwani, “Ay Simon ay anak Juan, ay laylaydem sak-en?”

“Aw yan, Apo, ammom ay laylaydek sik-a,” kanana kasin ay sinombat.

“Mo siya sa,” kanan aben Jesus, “Ayowanam di ipogaw ko.”

<sup>17</sup> Asi pag ipitlon Jesus ay nangwani, “Ay Simon ay anak Juan, ay laylaydem od si sak-en?”

Siya et di mansakit di nemnem Pedro, tan namin tolo ay nangipoot mo laylaydenas sisya. Et kanana, “Apo, ammom di am-in. Ammom adi ay laylaydek sik-a.”

Pag kanan aben Jesus, “Ayowanam ngarud di ipogaw ko.” <sup>18</sup> Pag nan itoloy ay nangwani, “Tet-ewa nan kanak en sik-a. Sin kabarom, sik-a ay mismo di nangibakget si bilkom yan oway di in-inmeyam. Ngem mo makay ka pay, idpam san takkay mo, yan baloden daka ta asi daka iey sin adi ka layden ay emeyam.” <sup>19</sup> Say inbagan Jesus na ay nangipaammo sin iyat Pedro ay matey ay mangidayaw en Diyos. Pag nan kanan en sisya, “Omonod ka.” Et inmey da.

<sup>20</sup> Manwingi pay si Pedro, doy ay omon-onod din pasolot Jesus ay laydelaydena. Sisya di naidking en Jesus sin nanganan da ya din nangipoot mo sinoy manglipot en sisya.

<sup>21</sup> Sin nangilaan Pedro en sisya, kanana en Jesus, “Apo, si dooy pay, sinoy mapasamak en sisya?”

<sup>22</sup> Ngem kanan Jesus, “Olay mo laydek ay matagos sisya engganans mantaoliak, magay biyang mos di. Basta onodam sak-en.”

<sup>23</sup> Begew sin kanan Jesus ay nay, nandinamag sin namati en sisya ay adi matey din pasolot ay sana. Ngem baken say layden Jesus ay kalien, tan kanana anggoy en, “Olay mo say laydek ay matagos sisya engganans mantaoliak, magay biyang mos di.”

*Din Kaldengan Di Libro*

<sup>24</sup> Sak-en met laeng din pasolot ay inbagbagan Jesus sisi. Paneknekak ay tet-ewa di naisolat isna, tan sak-en met laeng di nangisolat, et ammo mi ay tet-ewa di am-in ay wadas na.

<sup>25</sup> Ad-ado pay kayman di inam-amag Jesus. Mo maisolat da am-in koma, olay din intiro ay lobong et adi ngin makalaon sin kalibrolibro ay kaisolatan da.

## **Din Inam-amag Di Aapostol Maipanggep Sin Libro Ay Nay**

Din Inam-amag Di Aapostol et siya na di kaitoloyan Din Sigid Ay Damag Ay Insolat San Lucas, esa ay doktor ay nakikiey en San Pablo sin odom ay nanbibiyahiana. Din maistorya isna et din nakaskasdaaw ay inam-amag ya inkaskasaban di aapostol manlogi sin siyodad ay Jerusalem, pag sin probinsiya ay Judea ya Samaria, ya enggana sin kailili isnan lobong. Kanan di odom en din ngadan koman di libro ay nay et Din Inam-amag Di Ispirito Santo, tan sisya di nangiturturong ya nangidawdawat sin aapostol si panakabalin ay mangasaba ya mangamag si milagro.

Nalaklaka ay maawatan tako din oblan di aapostol mo ammoan tako din olog di Messias ono Cristo ya din kasasaad di ipogaw sin timpo na. Ed wani, ibilang di odom ay ipogaw ay din olog di Messias et din moyang ay naianak ed Betlehem, ngem din kosto ay olog na et din dinotokan Diyos ay manturay. Isonga din kanana sin libro ay nay en sedsed-en di Judio din bomalaan di Cristo ono Messias, laydena ay kalien en sedsed-en da di pangibaaan Diyos si ari ay mangituray en daida, ngem adi da ammo din ngadan di ari ay sana.

Sin timpo ay binmalaan Jesus, waday napigsa ay siyodad ay Roma ay enggay nangabak sin kailili, pati din ilin di Judio ed Israel. Isonga sin nangilogian Jesus ay man-itdo ya man-amag si milagro, kanan di odom ay ipogaw en sisya di mangipango en daida ay mangabak sin sosoldado ay taga-Roma. Adi da inawatan ay din panggep Jesus ay in mali sinan daga et baken ta isalakana di kakailiana ay Judio sin kaibaw da ay taga-Roma mo adi et ta isalakana di am-in ay ipogaw sin basbasol da. Isonga di kaad-adoan ay Judio, idi inammoan da ay sigaan Jesus ay mangobat sin taga-Roma, adi da pinati ay sisya din Cristo ono Messias ay inkarin Diyos, mo adi et intoltoloy da pay laeng ay sedsed-en din somawangan di Cristo, tan kanan da en daan di pangibaaan Diyos en sisya.

Isonga din oblan di aapostol sin nakdengan di nantaolian Jesus ed langit et en da pinaneknekan sin gagait da ay Judio ay kasin tinagon Diyos si Jesus, et say pangammoan da ay sisya din dinotokan Diyos ay Messias. Am-in din Judio et pasien da ay kalin Diyos din naisolat sin Daan ay Tolag. Isonga din inyaat di aapostol ay nangawis en daida ta mamati da en Jesus et inpanemnem da en daida din naipadto sin Daan ay Tolag maipanggep sin Messias, asi da pinaneknekan ay si Jesus di natongpalana.

Ad-adoy Judio ay naawis ay namati en Jesus. Ad-ado abey baken Judio ay makwani en Gentil ay namati. Ngem di odom ay Judio ay namati et laslasoyen da di Gentil yan kanan da en adi mabalin ay maisalakan di Gentil mo adi da aben onodan din ogalin di Judio. Isonga inpaammon Diyos sin aapostol ay baken nabanbanol di Judio mo din Gentil mo adi et maisalakan di olay sino ay ipogaw ya awatena din Ispirito Santo babaen sin pammati na en Apo Jesus, baken din pangonodanas ogali ono bilbilin di ipogaw (10:1-11:18; 15:1-34).

Wada di mabasas na maipanggep sin Emperador ed Roma ya din makwani en Romano, isonga adalen tako abe. Ed Roma di kapital di Italia, et say kad-an di kangatoan ay pangolo da ay makwani en Emperador. Gapo ta inabak din sosoldadon di Italia din kailili, iturayan din Emperador daida am-in, yan sisya di nangdotok sin aari ya gogobernador ay nangituray en daida. Din man-ili ed Italia et makwani da en Romano. Siya abe din man-ili si odom ay ili ay nansidola ed Roma. Am-in dadi ay Romano et waday gon-gon-oden da. Kaspangarigan, kontran di linteg ay madosa di Romano mo adi mabistigal on-ona. Mo din baken Romano pay, mabalin ay sopliten da on-ona ta

piliten da ay mangipodno mo waday basol na. Di Romano abe, mo adi mabistigal ay kosto, mabalin ay iapilo na din kaso na sin Emperador. Ngem din baken Romano et adi mabalin. Say nemnemen tako di mo basaen tako di maipanggep en San Pablo, tan olay mo Judio sisya, nansidola abe ed Roma.

Ad-ado pay di mabasas na, tan ad-adoy nakaskasdaaw ay inam-amag din aapostol. Wada abey kaeegyat ay ligat ay nilaklak-am da. Sapay koma ta mo basaen tako ya ammoan tako din inyat Apo Jesus ay nangay-ayowan sin aapostol ed idi, pomigsa abe di pammati tako, tan man-iso di panakabalina ed wani ya ed idi.

### **Din Linaona**

Din naisaganaan di aapostol ay mangipaneknek en Jesus 1:1-26

Din nangipaneknekan dan Jesus ed Jerusalem 2:1-8:3

Din nangipaneknekan dan Jesus ed Judea ya Samaria 8:4-12:25

Din nangipaneknekan dan Jesus sin kailiili 13:1-28:31

a. Din damo ay nanbiyahian da Pablo ay en mangasaba 13:1-14:28

b. Din nasinopan di papangolon di mamati 15:1-35

c. Din maikadwa ay nanbiyahian da Pablo 15:36-18:22

d. Din maikatlo ay nanbiyahian da Pablo 18:23-21:6

e. Din naibalodan Pablo ed Jerusalem, Cesarea ya ed Roma 21:7-28:31

### *Din Panlogian Di Solat*

<sup>1</sup> Patgek ay Teofilus,

Sin damo ay libro ay insolat ko, dinad-at ko di am-in ay inam-amag ya init-itdon Jesus <sup>2-3</sup> nanipod sin nanlogiana ay nan-itdo enggana sin naikayangana ed langit. Idi natey asi kasin natago, nanpaila sin pinili na ay aapostol, yan ad-adoy inam-amag na ta dadlon dan ammoan ay natago kasin sisya. Inmey di opatapolo ay agew ay nanpappaila en daida ya init-itdo na di maipanggep si panturayan Diyos. Inbilina abe en daida din inpaibagan di Ispirito Santo en sisya.

<sup>4-5</sup> Sin namingsan ay nasinopan da, inbilin Jesus en daida, “Si Juan et binonyagana di ipogaw si danom, ngem awni et mabonyagan kayo sin Ispirito Santo. Isonga adi kayo komakkaan isnan ed Jerusalem mo adi et sed-en yo din Ispirito Santo ay maisagot en dakayo, tan sisya di inbagak en dakayo ed idi ay inkarin Amak.”

### *Din Naikayangan Jesus Ed Langit*

<sup>6</sup> Idi nasinop din aapostol ya si Jesus, pinoot da en sisya, “Apo, ay ed wani di pangipakaanam sin taga-Roma ay mangiturturay en datako ta say datako ay taga-Israel di manturay?”

<sup>7</sup> “Adi kabalin ay ammoan yo sa, tan si Amak anggoy di waday lebbeng na ay mangikeddeng mo sinoy maamag sin tapin di agew ya mo pig-an di kaamagana,” kanan Jesus ay sinombat. <sup>8</sup> “Ngem sin omalian di Ispirito Santo ta mantetee en dakayo, wada en dakayo di panakabalin Diyos, et paneknekan yo di ammo yo maipanggep en sak-en isnan ed Jerusalem ya sin kailiili sin probinsiya ay Judea ya Samaria, ya enggana sin intiro ay lobong.” <sup>9</sup> Sin nangwanian Jesus sidi, naikayang ed langit et tangtangaden da enggana ay nalingban si liboo.

<sup>10</sup> Inengnengneng da pay din nadiposan Jesus ed kayang, kawada et di doway anghel ay nanbabados mankilat ay nakipipika sin kad-an da. <sup>11</sup> Kanan da, “Dakayo ay taga-Galilea, apay nga tatangaden yo ed kayang? Si Jesus ay inila yo ay naikayang ed langit, mais-o din pantaoliana sin inmeyana, tan maila ay bomabbaba ay maikoyog sin liboo.”

### *Din Namilian Di Aapostol Si Maisokat En Judas*

<sup>12</sup> Pag mantaoli din aapostol ed Jerusalem ay napo sin dontog Olivo. Din kaaddawi na et nganngani ay esay kilometro. <sup>13</sup> Somawang da pay ed Jerusalem, inmey da sin



beey ay pan-iyanan da et sinenggep da sin kowarto sin kayang. Daidas da Pedro, Juan, Santiago, Andrew, Felipe, Tomas, Bartolome, Mateo, si Santiago ay anak Alfeus, si Simon ay makwani en Patriota tan insakit na din ili na, ya si Judas ay anak Santiago. <sup>14</sup> Am-in dana et nasinop das kankanayon ta mankararag da, pati din babbabai, si Maria ay inan Jesus ya din aag-in Jesus.

<sup>15</sup> Waday esay agew ay nasinopan di namati en Jesus ay emey ay sin-gasot ya downpo di kabibilang da. Pinmika si Pedro yan kanana, <sup>16</sup> “Aag-i, masapol ay natongpal din inpaisolat di Ispirito Santo en David ed nabaon ay maipanggep sin naamag en Judas. Si Judas ay nay di nangipango sin nanpap en Jesus, <sup>17</sup> ngem ed idi gait mis sisya, tan dinotokan Jesus ay makisilbi en dakami ay aapostol.”

<sup>18</sup> Siya na din naamag en Judas. Din pilak ay nailagbo en sisya sin lawa ay inamag na et inlako nas daga, et say ena namsean sin awak na. Natekdag et pag bomtak din awak na et binmel-ay din eges na. <sup>19</sup> Idi inammoan di man-ili ed Jerusalem din naamag en sisya, nginadanan da din daga ay doy si Akeldama, di olog na sin kali da et Daga ay Nabayadan si Dada.\*

<sup>20</sup> Intoloy Pedro ay nangwani, “Din insolat David sin libro ay Salmo et siya na: ‘Sapay koma ta mabaybay-an di beey na, et maga kasin di manbeey isdi.’†

Wada abey naisolat ay kanana, ‘Sapay koma ta bansen di odom ay ipogaw din saad na.’‡

<sup>21-22</sup> Masapol ngarud ay pilien tako di maisokat en Judas ta waday maitapi en dakami ay mangipaneknek sin kasin natagoan Apo Jesus. Din pilien tako et masapol ay nakibeb-eweg en dakami si kankanayon sin kawadan Jesus en datako, ay manlogi sin nanbonbonyagan Juan enggana sin naikayangan Jesus ed langit.”

<sup>23</sup> Pag da et ibaga din ngadan di doway ay ipogaw ta panpilian da, si Jose Barsabbas ay manngadan abe si Justus ya si Mattias. <sup>24</sup> Et nankararag da ay nangwani, “Apo, gapo ta sik-a di mangammo sin nemnem di am-in ay ipogaw, ipaammom kod en dakami din pinilim en da naey ay doway <sup>25</sup> ay maiskat sin kinaapostol en Judas, tan dinokogana din nansilsilbiana ay kinaapostol et inmey sin lugar ay kaibagayana.” <sup>26</sup> Pag dan manbonot, et si Mattias di nabonot, et naitapi sin sinpo ya esa ay aapostol.

## 2

### *Din Inmalian Di Ispirito Santo*

<sup>1</sup> Idi dinmateng din fiesta ay makwani en Pentecostes, nasisinop din am-in ay namati en Jesus si esay beey. <sup>2</sup> Idi siya di, kadenge das agodood ay napod langit ay kaman mappes ay dagem, yan pinno na din intiro ay beey ay nasinopan da. <sup>3</sup> Et inila da di kakam-an apoy ay mansisisian ay en pinmatong sin esa ya esa en daida. <sup>4</sup> Napno da am-in si panakabalin di Ispirito Santo, et pinakali nas daida ta mankali das nankinalasi ay kali ay adi da ammo.

<sup>5</sup> Wada da et di Judio ay mansilsilbi en Diyos ay mantettee ed Jerusalem. Napo da sin am-in ay nasyon isnan lobong.\* <sup>6</sup> Sin nanngaan da sin doy ay man-agodood, ad-ado da ay inmey ta en da ilaen. Nantatakaw da, tan idi dinnge da din ibagbagan di namati en Jesus, esaen nannges sin kosto ay kali na. <sup>7</sup> Peteg ay nasdaaw da ay nangwani, “Ay sino od na? Ay baken aya taga-Galilea am-in da doy ay mankalkali? <sup>8</sup> Intoy iyat na ngin ay dengdenggen di esa ya esa en datako di kosto ay kali na? <sup>9</sup> Wada en datako di

\* **1:19** Din kanana sin Griego et: Dagan di Dada. Di esa abe ay olog na et Daga ay Nasoyatan si Dada. Ilaen abe sin Mateo 27:6-8. † **1:20** Salmo 69:25. ‡ **1:20** Salmo 109:8. \* **2:5** Laydena ay kalien, din nanasyon ay nilak-am di Roma, tan say kanan da en anggay das nasyon.

taga-Partia, taga-Media ya taga-Elam. Wada abey taga-Mesopotamia, taga-Judea, taga-Cappadocia, taga-Pontus ya taga-Asia. <sup>10</sup> Wada pay di taga-Frigia, taga-Pamfilia, taga-Egipto ya napo sin sakop di Libya ay as-asag-en ed Cirene. Wada abey taga-Roma ay manpaspasyal isna. <sup>11</sup> Di odom et Judio, di odom pay et Gentil ngem inonodan dan ogali tako ay Judio. Wada abey taga-Creta ya taga-Arabia. Yan nay dengdengngen tako am-in ay ibagbaga da sin nankinalasi ay kali tako din nakaskasdaaw ay inam-amag Diyos. <sup>12</sup> Sinoy layden nina ay kalien?” kanan da ay nan-asipoot, tan peteg ay nasdaaw da ya naligat di pannemnem da.

<sup>13</sup> Ngem wada abey odom ay nanglaslasoy sin namati ay nangwani, “Owat nabeteng da dooy.”

### *Din Inkasaban Pedro*

<sup>14</sup> Idi siya di, pinmika da Pedro ya din sinpo ya esa ay gagait na, yan inpigsa na din kali na ay nangwani, “Gagait ko ay Judio ya am-in kayo ay mantettee ed Jerusalem, dengngen yo kod ta ibagak di layden nina ay kalien. <sup>15</sup> Kanan yo en nabeteng dana, ngem baken met, tan adi kabeteng di ipogaw sin alas nowibi sin agsapa. <sup>16</sup> Din naamag en dakami ed kaonyan et siya di din inpadton Joel ed nabaon ay kanana,

<sup>17</sup> “Siya na di kanan Diyos. Din amagek sin maod-odi ay agew et ibaak din Ispiritok ta senggep si olay sino ay ipogaw. Din an-ak yo et ibaga da din ipaibagak en daida, din babbaro et waday ipailak en daida ay kaman iitaw, ya din nankakay et wada abey ipaiitaw ko en daida. <sup>18</sup> Olay din babag-en ay mansilbi en sak-en, lallalaki ya babbabai et ipasgep ko din Ispiritok en daida et ibaga da din ipaibagak en daida. <sup>19</sup> Awni et wada di ipailak ed kayang ay nakaskasdaaw. Olay sin daga, waday ipailak ay sinyal ay dada, apoy ya kaeegyat ay asok. <sup>20</sup> Awni kadi et bomolinget din agew, ya din bowan et domalangdang ay kaman dada. Asi pay domateng din nabanol ay agew ay magay kais-oana ay omalian di Apo. <sup>21</sup> Yan am-in da ay manpakaasi en Apo et maisalakan da.”†

Siya di din inpadton Joel,” kanan Pedro.

<sup>22</sup> Pag nan itoloy ay nangwani, “Gagait ko ay Israelita, dengngen yo kod nan ibagak. Pinaneknekan Diyos en dakayo ay si Jesus ay taga-Nazaret di inbaa na babaen sin nakaskasdaaw ay milagro ya sinyal ay inpaam-amag na en sisya. Ammo yo sa tan naamag sina sin kad-an yo. <sup>23</sup> Si Jesus ay nay et sigod ay ninemnem Diyos ay maipolang en dakayo, tan say plano na ed nabaon et ammo na ay matongpal. Yan inpapse yos sisya ay inpolang yo si lawa ay ipogaw ta ilansa da sin krus. <sup>24</sup> Ngem tinagon Diyos kasin, tan adi mabalin ay ipapakodan di peses sisya. <sup>25</sup> Si Jesus met laeng di natongpalaan di inpadton David ay kanana,

‘Apo, adiak emegyat, tan ammok ay komadkadwa ya bomadbadang kas kankanayon.

<sup>26</sup> Isonga maragsakanak ya idaydayaw kos sik-a. Natalna abe di nemnem ko, tan waday namnamaek ay para sin awak ko <sup>27</sup> ay adi ka tomaynan sin kad-an di natey. Adi ka aben ipalobos ay madonot nan awak ko, tan neekak ay mansilbi en sik-a.

<sup>28</sup> Inpaammom en sak-en din danan ay maiturong sin biyag, et peteg di ragsak ko tan makikadwaak en sik-a.”‡

Siya sa di insolat David,” kanan Pedro.

<sup>29</sup> Pag nan kanan, “Dakayo ay iib-a, laydek ay ipaammo ay kosto en dakayo di maipanggep en David ay ap-apo tako ed nabaon. Si David et natey ya naiponpon, et deda ay mail-ila din naiponponana ed wani. <sup>30</sup> Ngem gapo ta mamadtos sisya, ammo na din inkarin Diyos en sisya ay wada di apo na ay pan-arien Diyos ay maisokat en sisya. § <sup>31</sup> Ammo na abe ay kasin tagoen Diyos din apo na ay sana, et din inpadto na ay adi mataynan sin kad-an di natey ya adi aben madonot din awak na et ibagbaga na

† 2:21 2:17-21 - Joel 2:28-32. ‡ 2:28 2:25-28 - Salmo 16:8-11. § 2:30 Salmo 132:11; 2 Samuel 7:12-13.

din Messias ay ibaan Diyos. <sup>32</sup> Si Jesus met laeng din Messias ay nay, tan sisya di kasin tinagon Diyos. Mabalín ay paneknekan mi na en dakayo, tan inila mi am-in sin kasinan natagoan. <sup>33</sup> Naikayang ed langit sin panakabalin Diyos,\* et indawat Diyos Ama en sisya di kalebbengan ay mangibaa sin Ispirito Santo ta mantee en dakami, tan siya met laeng din inkarin Diyos. Din inila ya dinnge yo ngarud et inamag din Ispirito Santo ay inbaan Jesus. <sup>34-35</sup> Waday insolat David maipanggep sin naikayang ed langit ay kanana, 'Kanan Apo Diyos en Apok: Tomokdo ka sin makannawan ko engganabakek din kaibaw mo.†

Ngem din inbagan David et baken din awak na, tan baken sisya di naikayang ed langit mo adi et din Apo na ay si Jesus. <sup>36</sup> Dadlonak ngarud ipaammo en dakayo ay Israelita, ay si Jesus ay inlansa yo sin krus et dinotokan Diyos sisya ay Apo ya Messias.”

<sup>37</sup> Sin nanngan din kaipoipogaw sin kanan Pedro, peteg di babawi da yan kanan da en Pedro ya din odom ay aapostol, “Gagait, sino ngarud di amagen mi?”

<sup>38</sup> Sinmongbat si Pedro ay nangwani, “Dakayo am-in, ibabawi yo din basbasol yo yan manpabonyag kayo ay mangipaammo ay Apo yo si Jesu Cristo,‡ ta say mapakawan din basbasol yo, et pag yon awaten din Ispirito Santo ay isagot Diyos en dakayo. <sup>39</sup> Tan say inkarin Diyos en dakayo ya sin poli yo ya en daida sin addawi ay kailili, olay sino ay ipogaw ay ayagan Diyos ay Apo tako.”

<sup>40</sup> Ad-ado pay di inbagan Pedro ay mamagbaga ya mangidadaan en daida ta maawis da koma. “Ilsot yo koma din dosan di adi kakwani ay ipogaw ed wani,” kanana. <sup>41</sup> Et ad-ado di namati sin inbagbaga na et nanpabonyag da. Di kabibilang di naitapi en daida ay namati sin agew ay doy et emey ay toloy libo. <sup>42</sup> Inpapasnek da ay mangadadal ya mangon-onod sin it-itdon di aapostol. Neekan da abe ay makikadkadwa ya makikarkararag sin iib-a da ay namati ya makikikan sin tinapay ay pangnemneman da sin nateyan Jesus.

### *Din Kabibiyag Di Namati En Jesus*

<sup>43</sup> Ad-adoy nakaskasdaaw ay milagro ay inpaam-amag Diyos sin aapostol, et peteg ay nasdaaw din kaipoipogaw. <sup>44</sup> Intoltoloy din am-in ay namati ay matoptopog ya manbiningay si sanikwa da. <sup>45</sup> Inlakolako da abe di daga ya sanikwa da ta ibingayan da din iib-a da insigon di kasapolan di esa ya esa. <sup>46</sup> Inag-agew ay nakigimgimong da sin Timplo. Nan-ookob da abe sin bebeey, yan naimposan di ragsak da sin nangamamagan das di. <sup>47</sup> Indaydayaw das Diyos si kankanayon, yan binigbig di am-in ay ipogaw din siged ay ogali da. Inag-agew abe ay maitaptapi en daida din isalsalakan Diyos.

## 3

### *Din Nangagasan Pedro Si Napilay*

<sup>1</sup> Idi namingsan, inmey da Pedro en Juan sin Timplo sin alas tres sin masdem, tan say oras ay pankarkararagan di Judio. <sup>2</sup> Wada pay di lalaki ay naianak ay napilay ay wada sin kad-an di makwani en Kagkagam-is ay segpan di Timplo. Inag-agew ay ineg-egnan das sisya ay nangiey sidi ta manpalimos sin sengsenggep. <sup>3</sup> Sin nangilaana en da Pedro en Juan ay senggep sin Timplo, nanpalimos abe en daida. <sup>4</sup> Asi da et insisin-eng sisya yan kanan Pedro, “Ilaem kod dakami.” <sup>5</sup> Inila na ngarud si daida tan namnamaena ay waday idawat da en sisya.

<sup>6</sup> Asi et kanan Pedro, “Iwed polos pilak ko, ngem din wada en sak-en et say ibadang ko en sik-a. Begew sin panakabalin di ngadan Jesu Cristo ay taga-Nazaret, mandan ka.”

<sup>7</sup> Pag itakkayan Pedro sin kannawan et paalageyena. Binmikas din siki na ay dagos,

\* **2:33** Di esa abe ay kaiologan nina sin Griego et: Naikayang ed langit sin makannawan Diyos, ... † **2:34-35** Salmo 110:1. ‡ **2:38** Din kanana sin Griego et: ...manpabonyag kayo sin ngadan Jesu Cristo, ... Ilaen abe sin 10:48.

<sup>8</sup> yan kapika et mandan. Pag makisgep en da Pedro en Juan sin Timplo, yan mandad-an dowan mantabtab-oy ay manaydayaw en Diyos. <sup>9</sup> Am-in din wadas di, idi inila da ay mandad-an ya mandaydayaw en Diyos, <sup>10</sup> inmatonan da ay sisya din tomotokdo ay manpalpalimos sin segpan ay makwani en Kagkagam-is, et palalo ay nasdaaw da sin naamag en sisya.

### *Din Nan-itdoan Pedro Sin Lak-am Di Timplo*

<sup>11</sup> Idi siya di, inmey da Pedro en Juan sin lak-am di Timplo ay kanan da en Tambobong Solomon. Nanpapakod din sigod ay napilay en daida dowan katanagtag din kaipoipogaw ay emey sin kad-an da, tan nasdaaw da. <sup>12</sup> Sin nangilaan Pedro en daida, kanana, “Gagait ko ay Israelita, apay nga nasdaaw kayos sa? Apay nga ominenengneng kayo? Ay siya mo din panakabalin ono kinasiged mi di nangipadan sin lalaki ay nay? <sup>13</sup> Baken met dakami mo adi et din Diyos ay dinaydayaw din aap-o tako ay da Abraham en Isaac ya si Jacob. Sisya di nangagas sin lalaki ay nay ta maila din kinadiyos Jesus ay nansilbin sisya isnan lobong, tan enggay inpangato nas Jesus ed langit. Si Jesus ay nay et inpolang yo sin tuturay, yan idi binistigal Gobernador Pilato, olay mo ninemnem Pilato ay mangibolos en sisya, sinigaan yo. <sup>14</sup> Nasantoan ya nalinteg sisya, ngem sinigaan yo pay dedan dowan yo pay kedakedawen en Pilato ta say ibolos na din pinomses biyag. <sup>15</sup> Inpapse yo din mangidawat si biyag, ngem si Diyos et tinago na kasin. Et paneknekan mi ay tet-ewa ay natago tan inila mi. <sup>16</sup> Din panakabalin di ngadan Jesus ya din talek mi en sisya di nangipabikas sin lalaki ay nay ay il-ilaen ya am-ammo yo. Si Jesus abe di nangipapigsa sin nemnem na ay mantalek en sisya, isonga dadlon nakaan di pilay na ay il-ilaen yo am-in.

<sup>17</sup> “Dakayo ay iib-a, ammok kayman ay idi inpapse yos Jesus, adi yon ammo ay sisya di inbaan Diyos. Olay din papangolo yo et adi da aben ammo. <sup>18</sup> Ngem din nateyan Jesus et say natongpalan din inpaisolat Diyos ed nabaon, tan din am-in ay mamadto et inbaga da ay masapol ay manligat ya matey din Messias ay ibaa na. <sup>19</sup> Ibabawi yo ngarud din basbasol yo ta sagongen yo si Diyos, ta asi na linglingan din basbasol yo. <sup>20</sup> Tan mo say iyat yo di, waday ipadateng Diyos ay timpon di pantatalnaan ya pomipigsaan di nemnem, yan kasina aben ibaas Jesus ay din Messias ay dinotokana ed idi ay mangituray en datako. <sup>21</sup> Ed wani pay, masapol ay mantetees Jesus ed langit enggana ay domateng di timpo ay panbaroan Diyos si am-in, tan say inpaibagbagan Diyos sin nasantoan ay mamadto ed nabaon. <sup>22</sup> Kaspangarigan, si Moses et kanana, ‘Awni kadi et wada di mamadto ay kaman sak-en ay ibaan din Apo tako ay Diyos en dakayo. Kailian takos sisya ay Israelita. Masapol ay patien yo di am-in ay ibagbaga na. <sup>23</sup> Mo sino di adi mamati et maisian sin iipogaw en Diyos ta madosa ay eng-enggana.’\*

<sup>24</sup> Si Samuel abe ya am-in din odom ay mamadto ay naisokat en sisya et wada abey inpadto da maipanggep sin maam-amag ed wani. <sup>25</sup> Datako pay di naitompongan di inpaibagan Diyos en da doy ay mamadto. Maibilang tako abe sin intolag Diyos sin aap-o tako, tan kanana en Abraham, ‘Babaen sin polim, mabindisyonan di kaipoipogaw sin am-in ay ili isnan lobong.’† <sup>26</sup> Isonga datako ay Judio di nangon-ona ay nangibaaan Diyos sin mansilbi en sisya ay din Messias, ta bindisyonanas datako babaen sin pangipadokogana en datako sin lawa ay am-amagen tako.”

## 4

### *Din Nabistigalan Da Pedro En Juan*

<sup>1</sup> Deda ay mankalkali da Pedro en Juan sin kaipoipogaw, wada et di sinmawang ay papadi, Sadduceo ya din kapitan di polis di Timplo. <sup>2</sup> Binmonget da tan init-itdon da

\* 3:23 Deuteronomio 18:15,18,19. † 3:25 Genesis 22:18.

Pedro ay natago kasin si Jesus, isonga matago abe din am-in ay natey. <sup>3</sup> Siya et di tinngel das daida et in-ey da sin balodan ta sin kabigatana asi da bistigalen, tan enggay malablabi. <sup>4</sup> Ngem ad-ado pay dedan en da doy ay nandengdenge di namati. Emey ay limay libo di kabibilang di lallalaki mo maibilang din namati sin damo.

<sup>5</sup> Sin napat-a, nasinop ed Jerusalem din tuturay, aam-a ya mamaestron di linteg Diyos. <sup>6</sup> Et nakimiting da en Annas ay din kangatoan ay padi ya da Caifas, Juan, Alexander ya din iib-a da ay toton-od Annas. <sup>7</sup> Inpapika das da Pedro en Juan sin sangoanan da, et binistigal das daida ay nangwani, “Intoy napoan di panakabalin yo ay nangagas sin napilay ay nay? Sinoy nakin ngadan si inosal yo?”

<sup>8</sup> Si Pedro et napnos panakabalin di Ispirito Santo, et sinombat yan kanana, “Dakayo ay tuturay ya aam-a, <sup>9</sup> din pamistigalan yo en dakami ed wani, mo maipanggep kayman sin siked ay inamag mi sin napilay ay nay ya din iyat na ay nailatonan, <sup>10</sup> dengngen yo kod ta ipaammok ay kosto en dakayo ya am-in kayo ay kailian ay Israelita. Din lalaki ay nay ay pinmipika sin sangoanan yo et dadlon nailatonan begew sin panakabalin di ngadan Jesu Cristo ay taga-Nazaret. Sisya di inlansa yo sin krus, ngem kasin tinagon Diyos. <sup>11</sup> Sisya abe di naiarigan di inpaisolat Diyos ay kanana,

‘Din bato ay sinigaan yo, dakayo ay man-isassaad si beey, et say nanbalinen Diyos ay kabanolan ay bato ay mangipakneg sin beey.’\*

<sup>12</sup> Ang-anggay Jesus si mabalin ay mangisalakan en datako. Tan magay odom sin intiro ay lobong ay inbaan Diyos ay mangisalakan en datako mo adi et sisya.”

<sup>13</sup> Idi inilan din papangolon di Judio din toled da Pedro en Juan ay nanongbat, nasdaaw da, tan ammo da ay nababa da ay ipogaw ay adi naadal. Pag da et nemnemen ay nakibeb-eweg da en Jesus, <sup>14</sup> ngem maga di maisongbat da, tan doy ay nakipipika din nakaan di pilay na en daida. <sup>15</sup> Siya et di inpabala das da Pedro ta iang-anggay da ay papangolo ay manngangalat. <sup>16</sup> Pag dan kanan, “Intoy iyat tako pay en da dooy, tan ammon di am-in ay ipogaw isnan ed Jerusalem din nakaskasdaaw ay milagro ay inamag da, et adi mabalin ay kanan tako en baken tet-ewa. <sup>17</sup> Paegyaten takos daida ta adi da ipidpidwa ay mangibagas ngadan en Jesus mo makingalat da sin kaipoipogaw, tan into et mo masepsep ay maammoan di odom.” <sup>18</sup> Pag dan ayagan da Pedro en Juan et dalon dan binilin ay nangwani, “Adi yo man ipidpidwa ay mangibagas ngadan Jesus. Adi yo aben it-itdo di maipanggep en sisya si olay sino ay ipogaw.”

<sup>19</sup> Ngem kanan da Pedro en Juan, “Nemnemen yo kod mo kosto sin pangiilaan Diyos mo pasien mi din kankanana yo ay baken din kankanana. <sup>20</sup> Tan mo si dakami et adi mi maisaldeng ay mangibagbaga sin inil-ila ya dindinngge mi en Jesus.”

<sup>21</sup> Asi et kasin pinaegyat din papangolon di Judio si daida et pag dan palobosan, tan adi da makanemnem si iyat da ay manosa en daida, tan din kaipoipogaw et daydayawen das Diyos begew din nakaskasdaaw ay naamag. <sup>22</sup> Tan din lalaki ay naagasan et nasurok si opatapolo di tawena.

### *Din Kararag Di Namati En Jesus*

<sup>23</sup> Idi naibolosan da Pedro en Juan, inmey da et sin kad-an di iib-a da ay mamati et inpadamag da en daida din inbagan di papangolon di papadi ya din aam-a. <sup>24</sup> Idi dinngen din iib-a da, nankararag da am-in ay es-esa di nemnem da ay nangwani, “Manakabalin ay Apo, sik-a di namarsua ed daya ya sin daga ya sin baybay ya sin am-in ay wadas di. <sup>25</sup> Sik-a met laeng di nakin kali sin inpaisolat di Ispirito Santo en David ay apo mi ay nansilbi en sik-a ed nabaon ay kanana,

‘Apay nga inpangaton di Gentil di awak da en Diyos? Apay nga ninemnem di Israelita di plano ay magay silbi na ay manglaban en sisya? <sup>26</sup> Din aari ya tuturay isnan

\* 4:11 Salmo 118:22.



lobong et nasinop ya nansagana da ay mangobat en Diyos ya din Messias ay dinotokana.’†

<sup>27</sup> Et natongpal din insolat David ay doy, tan nasinop adi isnan ed Jerusalem da Ari Herod en Poncio Pilato ya din Gentil ya din kailian mi ay Israelita ta mantotolag da ay mamse en Jesus ay din nasantoan ay nansilbi en sik-a ay dinotokam ay Messias.

<sup>28</sup> Et inamag da din am-in ay ninenemnem mo ed idi begew sin panakabalin mo ay matongpal koma. <sup>29</sup> Ed wani pay, Apo, dengngem kod din ibagbaga da ay mangipaegyat en dakami ay mansilsilbi en sik-a, yan dadlon kan patoleden dakami ay mangibagbagas kalim. <sup>30</sup> Ipailam kod abe din panakabalin mo ta agasan mi di mansakit ya amagen mi di odom ay nakaskasdaaw babaen sin ngadan Jesus ay nasantoan ay nansilbi en sik-a.”

<sup>31</sup> Idi nakakararag da, nan-giwed din beey ay nasinopan da. Pag dan mapno sin panakabalin di Ispirito Santo, et tinmoled da am-in ay nangibagbagas kalin Diyos.

### *Din Nanbingayan Di Namati En Jesus Sin Sanikwa Da*

<sup>32</sup> Am-in din namati et nan-es-esa di nemnem da. Adi da inbilbilang ay bokbokod da din sanikwa da mo adi et inbingbingay da sin makasapol en daida. <sup>33</sup> Din aapostol abe et napigsa di panakabalin da ay nangipaneknek sin kasin natagoan Jesus, et dadlon bininbindisyonan Diyos daida am-in ay mamati. <sup>34</sup> Maga di mankolang en daida, tan din waday daga na ono beey na et ilaklako da, <sup>35</sup> et ipolang dan lako na sin aapostol ta asi da iwaras sin odom ay mamati insigon di kasapolan di esa ya esa.

<sup>36</sup> Siya na met laeng di inamag Jose ay taga-Cyprus ay polin Levi. Din inpangadan di aapostol en sisya et Barnabas, di olog na et mangipapigsa si nemnem di ib-a na. <sup>37</sup> Di inamag na et waday inlako na ay daga na, yan ena inpolang din lako na sin aapostol.

## 5

### *Din Inamag Da Ananias En Safira*

<sup>1</sup> Ngem wada pay di sin-asawa ay da Ananias en Safira ay nangilakos daga da.

<sup>2</sup> Nantolag da ay man-idolin sin odom ay lako na, asi en inpolang Ananias din odom sin aapostol ay nangwani, “Naey din lakon di daga mi.”

<sup>3</sup> Asi et kanan Pedro, “Ananias, apay nga inpalobos mo ay kapten dakan Satanas et nan-etek ka sin Ispirito Santo ay mangisaot sin odom ay lako na? <sup>4</sup> Oka yo met din daga sin daan yon pangilakoan, et oway di pangosalan yo. Kompormi abe di pangosalan yo sin lako na. Apay nga ninemnem mo ay mangiyat sidi? Baken met ipogaw di nan-etekam mo adi et si Diyos.”

<sup>5-6</sup> Sin nanngean Ananias sin kanan Pedro, naidsan ay natokang ay natey. Binotibotan din babbaro din awak na, pag da et ibala yan en da iponpon. Et peteg di egyat di am-in ay nannange sin naamag en sisya.

<sup>7</sup> Emey pay di toloy oras, sinmawang abe din asawa na, ngem adi na pay ammo din naamag. <sup>8</sup> Kanan Pedro en sisya, “Ibagam kod mo siya na di kosto ay lakon din daga yo.”

“Aw yan, siya sa,” kanana. <sup>9</sup> Asi et kanan Pedro, “Apay nga nantolag kayo ay mamadas sin Ispiriton di Apo? Sana da sin pantew di nangiponpon en asawam. Ibala da abes sik-a.” <sup>10</sup> Et natokang ay natey. Sinenggep din doy da ay babbaro, et idi inila da ay natey, pag dan ibala ay en nangidking sin naiponponan asawa na. <sup>11</sup> Et am-in din namati en Jesus ya am-in abe ay nannange sin napasamak et inmegyaegyat da.

### *Din Nakaskasdaaw Ay Inam-amag Di Aapostol*

<sup>12-14</sup> Din masinsinopan di mamati et din kanan da en Tambobong Solomon ay wada sin lak-am di Timplo. Mo din adi namati et emegyat da ay maitapi, ngem binigbig pay dedan di kaipoipogaw din mamati et ad-ado di maitaptapi ay lallalaki ya babbabai ay namati. Ad-ado di nakaskasdaaw ay inam-amag din aapostol ay il-ilaen di kaipoipogaw.

† 4:26 Salmo 2:1-2.

<sup>15</sup> Isonga in-ey da din mansaksakit sin kalsada et pag dan pababaktaden sin kama ya abek da, tan kanan da en ta mo malabas si Pedro, et olay mo malidoman da anggoy si alidong na yan makaan sakit da. <sup>16</sup> Ad-ado pay di in-inmey ed Jerusalem ay napo sin nandinmang ay ili ay mangiey sin mansaksakit ya din kinapet di aanito, et nailatonan da am-in.

### *Din Napaligatan Di Aapostol*

<sup>17</sup> Idi siya di, din kangatoan ay padi ya din iib-a na ay Sadduceo et nalabes ay maapos da sin aapostol. <sup>18</sup> Isonga en da dinpap daida et inbalod da. <sup>19</sup> Ngem sin nalabi, waday anghel di Apo ay en namokat sin eneb di balodan. Inbala nas daida et pag nan kanan, <sup>20</sup> “Emey kayo sin Timplo ta dadlon yon ibaga sin kaipoipogaw di maipanggep sin baro ay biyag ay idawdawat Diyos.” <sup>21</sup> Idi pinmat-a, pinati da din inbagan di anghel. Sinenggep da sin Timplo et inlogi da ay man-itdo.

Maaw-awni pay, sinmawang din kangatoan ay padi ya din iib-a na sin panmitmitingan da, et inayagan da din am-in ay aam-a ya odom ay papangolon di Judio ta makimiting da. Asi da baaen di popolis ay emey sin balodan ta en da ton-oden din aapostol. <sup>22</sup> Ngem idi sinmawang das di, maga da, isonga nantaoli da ta en da isodsod. <sup>23</sup> Kanan da, “Idi sinmawang kami sin balodan, deda ay naitetelbek. Wada abe din gogowardiya ay pinmipika sin kad-an di eneb. Ngem idi binokatan mi, maga met di ipogaw sin oneg.”

<sup>24</sup> Sin nanngan din kapitan di polis di Timplo ya din papangolon di papadi, nariribokan da yan kanan das nemnem da, “Ay into ngin di kaiturongan nina?”\*

<sup>25</sup> Pag wada di sinmawang ay nangipadamag, “Din doy da ay inbalod yo et wada da sin Timplo ay man-it-itdo sin ipogaw.”

<sup>26</sup> Siya di et inmey din gogowardiya ya din kapitan da ay en manga en daida. Ngem adi da pinilit, tan emegyat da sin kaipoipogaw, tan mo et bomonget da ya pigpigen das daida.

<sup>27</sup> In-ey da din aapostol sin nasinsinopan di papangolon di Judio, et inpapika da sin sangoanan da. Pag yamyaman din kangatoan ay padi ay nangwani, <sup>28</sup> “Dadlon min inparit ay it-itdo yo di maipanggep en Jesus, yan sana ay sinepsep yo ay nangipaammo sin intiro ay Jerusalem dowan yon pabasbasolen dakami ay kanan yo en dakami di makaoway sin nateyana.”

<sup>29</sup> Sinongbatan da Pedro ya din iib-a na ay aapostol yan kanan da, “Masapol met ay si Diyos di pasien mi, baken ipogaw. <sup>30</sup> Tan dakayo pay et pinse yo met si Jesus ay inlansa yo sin krus. Ngem din Diyos ay dinaydayaw din aap-o tako et tinago na kasin <sup>31</sup> et inpangato na sin makannawana ta sisya di mangituray ya mangisalakan en datako. Say inamag Diyos di ta waday waya tako ay Israelita ay manbabawi ta pakawanena din basbasol tako. <sup>32</sup> Paneknekan mi ay tet-ewa am-in dana ya paneknekan aben din Ispirito Santo ay indawat Diyos en daida ay manongtongpal en sisya.”

<sup>33</sup> Sin nanngan das di, palaloy bonget da et layden da ay peslen din aapostol. <sup>34</sup> Ngem wada di esa ay Fariseo ay maestron di linteg ay binigbig din kaipoipogaw. Din ngadana et si Gamaliel. Pinmika yan kanana, “Pabelaen yos daida si sinkaattikan.” <sup>35</sup> Inpabela da, pag kanan Gamaliel, “Iib-a ay Israelita, annadan tako di iyaat tako en da doy. <sup>36</sup> Tan ed idi waday naamag ay kaman nina. Wadas Teudas ay binmala ay nangipangatos awak na, yan emey ay opat gasot ay ipogaw di sinmolot en sisya. Ngem pinse das sisya, et pag mansisian din papasolot na, et napap-eng. <sup>37</sup> Wada abes Judas ay taga-Galilea ay binmala sin timpon di nasinsosan di ipogaw. Ad-ado abey inawis na ay makibeweg en sisya. Ngem pinse da abes sisya, et nansisian abe din papasolot na. <sup>38</sup> Isonga din ibagak en dakayo ed wani, olay ibolosan ya baybay-an takos daida, tan mo owat nemnem di

\* **5:24** Di esa abe ay kaiologan nina sin Griego et: “Ay into ngin di napasamak en daida?”

ipogaw di napoan di panggep ya am-amagen da, adi katoloy. <sup>39</sup> Ngem mo si Diyos di napoana, magay iyat tako ay mangabak en daida, tan si Diyos di kontraen tako.”

<sup>40</sup> Inonodan din papangolon di Judio din kanan Gamaliel ay sana. Inpaayag da kasin din aapostol et pinasoplisoplit das daida. Pag dan ibilin ay adi da ipidpidwa ay mangibaga si maipanggep en Jesus, et inbolosan das daida.

<sup>41</sup> Komaan pay din aapostol, peteg di layad da tan inbilang Diyos ay maikari da ay maibabain para en Jesus. <sup>42</sup> Inag-agew ay inapasnek da ay man-it-itdo ya mangaskasaba sin Timplo ya sin kabeebeey ay si Jesus din Messias.

## 6

### *Din Namilian Da Sin Namadbadang En Daida*

<sup>1</sup> Siya di, namnamed ay maad-ado din namati en Jesus. Asi et din Judio ay Griego di kali da et nanmayotmot das maipanggep sin Judio ay mankalis Hebreo. Din nanmayotmotan da et kanan da en nabaybay-an din nalasalasang ay gait da sin kaiwarasan di pilak\* sin inag-agew. <sup>2</sup> Isonga din aapostol, inpasinop da din am-in ay namati en Jesus yan kanan da en daida, “Eweewe mo iwarwaras mi din pilak yan baybay-an mi din obla mi ay mangikasaba sin kalin Diyos. <sup>3</sup> Isonga dakayo ay aag-i, pomili kayos pito ay nalaing ay lallalaki ay napnos panakabalin di Ispirito Santo ya siged di damag di ogali da. Daida di pangitalkan mi sin kaiwarasan di pilak, <sup>4</sup> ta say mo dakami pay, mabalin ay neekan mi ay mankarkararag ya mangikaskasaba sin kalin Diyos.”

<sup>5</sup> Am-in din nasinop sidi et layden da din sana ay inbagan din aapostol, et pinili das da naey. Di esa et si Esteban. Napigsa di pammati na ya napno sin panakabalin di Ispirito Santo. Din iib-a na et da Felipe, Prokorus, Nicanor, Timon, Parmenas, ya si Nicolaus ay taga-Antiok. Si Nicolaus et Gentil, ngem inon-onodana din ogalin di Judio. <sup>6</sup> Da dooy ay pito et inpapika da sin sangoanan di aapostol, yan din aapostol et nankararag da ay nangapay en daida.

<sup>7</sup> Siya et di nasepsep ay naam-ammoan din kalin Diyos downan inmad-ado si kanayon di namati ed Jerusalem. Ad-ado abe di papadi ay nangonod sin kosto ay pammati.

### *Din Nanpapan Da En Esteban*

<sup>8</sup> Si Esteban et palalo ay nakaskasdaaw di inam-amag na ay milagro ya sinyal ay ilaen di ipogaw, tan dakdakey badang Diyos en sisya ya napno abe si panakabalina. <sup>9</sup> Ngem wada pay di Judio ay taga-Cirene ya taga-Alexandria ay naitatapi sin sinagoga ay makwani en Sinagogan di Nawayaan ay Babag-en. Daida ya di odom ay Judio ay taga-Cilicia ya taga-Asia et nakisongbat da en Esteban. <sup>10</sup> Ngem adi da makaabak en sisya, tan binadangan di Ispirito Santo et nalaing ay somongbat.

<sup>11</sup> Siya et di pinasoksokan day iipogaw ta pabasolen das sisya ay mangwani, “Waday dinnge mi ay inbagan Esteban ay mamispis-oy en Moses ya en Diyos.” <sup>12</sup> Et say binmongetan di kaipoipogaw, aam-a ya mamaestron di linteg en Esteban. Siya et di, en da dinpap et in-ey da sin nasinsinopan di papangolon di Judio. <sup>13</sup> Wada abey inayagan da ay nantistigo ay nan-etek maipanggep en sisya ay nangwani, “Si naey et palawlawenas kankanayon din nasantoan ay Timplo ay nay ya din linteg Moses. <sup>14</sup> Tan dinnge mi din nangibagaana ay bakasen Jesus ay taga-Nazaret din Timplo ay nay yan sokatana abe din ogali ay intawid Moses en datako.” <sup>15</sup> Din papangolo ay nasisinop sidi et inenengneng das Esteban, yan inila da ay din ropa na et kaman ropan di anghel.

## 7

### *Din Diskurson En Esteban*

<sup>1</sup> Pag pooten din kangatoan ay padi en Esteban, “Ay tet-ewa din inpabasol dan sik-a?”

\* **6:1** Ono kaiwarasan di makan.

<sup>2</sup> Sinongbatan Esteban yan kanana, “Aag-i ya aam-a, dengngen yo kod nan ibagak en dakayo. Ed nabaon, nanpaila din madaydayaw ya somili ay Diyos en apo tako ay si Abraham sin nanteteana ed Mesopotamia sin daan pay laeng man-etan ay emey ed Haran. <sup>3</sup> Yan kanana en sisya, ‘Komaan ka sin ilim ay sana ya taynam din toton-od mo ta emey ka sin ili ay awni et itdok en sik-a.’\* <sup>4</sup> Et kinmaan sin ili na ay din ilin di Kaldeo, et en nantee ed Haran. Matey pay si ama na, pag inpangon Diyos sin nay ay ili ay pantetean tako ed wani. <sup>5</sup> Sin inmalianas na, maga polos di indawat Diyos ay daga na si olay esay adpa. Ngem inkarin Diyos ay awni et idawat na en sisya din ili ay nay ta say ipatawid na sin poli na. Din nangwanianas di et maga pay laeng di anak da Abraham. <sup>6</sup> Kanan aben Diyos en sisya en emey di ap-o na sin ilin di natken ay ipogaw ta mabag-en ya mapalpaligat da enggana ay emey di opat gasot ay tawen. <sup>7</sup> Yan kanan Diyos en asi na dosaen din doy da ay mangibag-en en daida, ta asi pag komaan di ap-o nas di ta mantaoli da isnan ili ay nay, ta say isna di panaydayawan da en sisya.† <sup>8</sup> Intogon aben Diyos en da Abraham ay kogiten da din an-ak da ay lalaki ay sinyal di intolag na en daida. Bomala pay din anak Abraham ay si Isaac, kinogit na sin maikawao ay agew.‡ Et siya met laeng di inyat Isaac sin anak na ay si Jacob. Siya abe din inyat Jacob sin sinpo ya dow a ay an-ak na ay lallalaki ay am-a tako ed nabaon.

<sup>9</sup> “Asi et da doy ay am-a tako et inapalan da din iyogtan da ay si Jose, et inlako das sisya si taga-Egipto ta manbalin si bag-en sidi. Ngem wadas Diyos ay kadwa na, <sup>10</sup> et insalakanas sisya sin am-in ay nanligligatana. Indawtanang laing ya siged ay ogali ay say nanlaydan din Faraon ono arin di Egipto en sisya. Isonga dinotokan din Faraon ay man-gobernador sin am-in ay ili ed Egipto ya makaammo abe sin am-in ay sanikwa na.

<sup>11</sup> “Siya di dinmateng di betil sin kailili ed Egipto ya ed Canaan, yan palalo ay mapaligatan di ipogaw. Din am-a tako et magay pan-aan das kanen da. <sup>12</sup> Isonga idi dinngen Jacob ay wada di pansaoyan si makan ed Egipto, inbaa na din aan-ak na ay din am-a tako ta en da manlakos kanen da. Siya di din damo ay inmeyan da. <sup>13</sup> Sin maikapidwa ay inmeyan da, nanpaimaton si Jose en daida ay sisya din iyogtan da, et inpaammo na abe sin Faraon di maipanggep en daida ya din ama na. <sup>14</sup> Pag ipaayag Jose si ama na ay si Jacob ya din am-in ay aag-i na ya din pamilya da ta emey da ed Egipto. Pitopolo ya lima da am-in. <sup>15</sup> Inmey da ngarud ed Egipto ta say panteean da, yan din ili ay doy et say nateyan da Jacob ya din aan-ak na ay din am-a tako.§ <sup>16</sup> Din bangkay da pay et naisaa ed Sekem ya naigto da sin liyang ay nilakoan Abraham ed idi sin an-ak Hamor.

<sup>17</sup> “Idi nganngani di panongpalan Diyos sin inkari na en Abraham ed idi, nasepsep ay inmad-ado din ap-o tako ed Egipto. <sup>18</sup> Dowan nansososkat din aari enggana ay naisokat di esa ay magay ammo nas maipanggep en Jose. <sup>19</sup> Din ari ay doy et siniksikapana din ap-o tako ya pinalpaligat nas daida ay nangipilit ay iwasit dan momoyang da ta matey da.

<sup>20</sup> “Et siya di din timpo ay naianakan Moses ay kagkagam-is ay moyang. Toloy bowan di namaspasosoan ina na en sisya. <sup>21</sup> Idi pilit ay tinaynan da sin bel-ayan, dinatngan di esay babai ay anak en Faraon, yan tinagannoana ay kamanan anak. <sup>22</sup> Naitdoan sisya sin am-in ay maad-adal di man-ili ed Egipto, yan din inbagbaga na ya inam-amag na et waday dagsena.

<sup>23</sup> “Idi nantawen si Moses si opatapolo, ninemnem na ay en mamasyal sin gagait na ay Israelita. <sup>24</sup> Sin inmeyana, inaspoana di esa ay il-ilbasan di taga-Egipto. Ena binadangan yan inbaes na ay namse sin taga-Egipto. <sup>25</sup> Kanan Moses en maawatan di gagait na ay sisya di pinilin Diyos ay mangipawaya en daida, ngem adi da baw naawatan. <sup>26</sup> Sin kasin

\* 7:3 Genesis 12:1. † 7:7 Genesis 15:13-14. ‡ 7:8 Genesis 17:10-14; 21:2-4. § 7:15 Genesis 37-49.

napat-a, dinatngana di doway ay Israelita ay man-ib-ibaw, yan pinadas na ay anawaen daida ay nangwani, 'Ay iib-a, mansinakit kayo mo? Sin-agi kayo damdama!'

<sup>27</sup> "Ngem din binmasol et kaitodon en Moses ay nangwani, 'Ay siya mo waday lebbeng mo ay mangituray ya mangokom en dakami?' <sup>28</sup> Ay pomse ka aya ay kaman din inyat mo sin taga-Egipto ed nasdem?' <sup>29</sup> Inmegyat si Moses sin nanngenas di, et linmayaw ay en manbeey ed Midian.\* Nangasawa sidi et siya abe di binmalaan di doway anak na ay lalaki.

<sup>30</sup> "Idi inmey di opatapolo ay tawen, waday anghel ay nanpaila en Moses si manbid-bidang ay kitkittoy ay kaiw ay wada sin kabatbatoan ay asag-en di dontog ay Sinai. <sup>31</sup> Nasdaaw si Moses sin nangilaanas di, et inmasag-en ta isin-eng na ay kosto. <sup>32</sup> Dowana et dengngen din kalin di Apo ay nangwani, 'Sak-en di Diyos ay dinaydayaw da apom ay da Abraham en Isaac ya si Jacob.' Idi dinnge na di, nanpayegpeg si egyat na et adi na maitoled ay mangisin-eng. <sup>33</sup> Pag kanan Diyos en sisya, 'Kaanem sapatos mo, tan din pinmipikaam et nasantoan ay lota. <sup>34</sup> Inil-ilak din mapalpaligatan di ipogaw ko ed Egipto. Dindinngék abe din adawag ya bayeweng da. Isonga nay inmaliak ay mangipawaya en daida. Omali ka ta ibaak sik-a ay mantaoli ed Egipto,' kanan Diyos en Moses.†

<sup>35</sup> "Si Moses ay nay et sinigaan di iib-a na sin damo ay kanan da en, 'Ay siya mo waday lebbeng mo ay mangituray ya mangokom en dakami?' Ngem sisya pay din inbaan Diyos ay mangituray ya mangipawaya en daida, downan binadangan din anghel ay nanpaila en sisya sin manbidbidang ay kaiw. <sup>36</sup> Si Moses met laeng di nangipangpango sin Israelita sin kinmaan da ed Egipto, yan ad-adoy inam-amag na ay nakaskasdaaw sin deda da ed Egipto ya sin inmagadangan da sin makwani en Baybay ay Mandalangdang ya sin nandad-anan da sin lugar ay magay omili si opatapolo ay tawen. <sup>37</sup> Si Moses abe di nangibaga sin Israelita, 'Awni kadi et wada di mamadto ay kaman sak-en ay ibaan Diyos en dakayo. Kailian takos sisya ay Israelita.' <sup>38</sup> Idi nasinop abe din ap-o tako sin lugar ay magay omili ay sin dontog ay Sinai, si Moses di nginalat di anghel, yan inawat na din naisolat ay kalin Diyos ay mangidawat si biyag ta elbaten tako.

<sup>39</sup> "Ngem din ap-o tako et sinigaan das Moses ay adi da patien din kankanana, tan mail-iliw da sin ogalin di taga-Egipto. <sup>40</sup> Idi nabayag si Moses sin toktok di dontog ay doy, kanan da en Aaron, 'Man-amag ka kod si didiyos ay mangipango en datako, tan adi mi ammo mo sinoy naamag en Moses ay sana ay nangipango en datako sin kinmaan tako ed Egipto.'‡ <sup>41</sup> Pag da et man-amag si inol-olbon ay baka, et indatonan ya insidaan da ay manragragsak ya manaydayaw sin inamag da ay mismo. <sup>42</sup> Asi et dinokogan ya binaybay-an Diyos si daida, ta say olay din agew, bowan ya talaw di daydayawen da. Siya na met laeng di inpaisolat Diyos sin esa ay mamadto ay kanana,

'Dakayo ay Israelita, ay sak-en aya di insidasidaan yo sin opatapolo ay tawen ay nandad-anan yo issan lugar ay magay omili? <sup>43</sup> Baken met, tan din intakitakin yo et din toldan di sinan diyos ay makwani en Molek ya din tinaltalaw di sinan diyos ay makwani en Refan. Da sana din sinan didiyos ay inamag yo ta say daydayawen yo. Isonga pakaanek dakayo ta emey kayo sin ili ay adawdawi mo ed Babilonia.'§

<sup>44</sup> "Din ap-o tako ed idi, nan-amag das Tolda ay nangipay-an da sin bato ay naisosolatan din bilbilin Diyos. Din nangamagan da sin Tolda ay sana et inis-o da sin inpailan Diyos en Moses ay maonodan.\* <sup>45</sup> Idi natey si Moses, si Josue di naisokat ay nangipango en daida sin inmalian da sin ili ay nay. Yan din sana ay Tolda ay tinawid da et intakin da sin namansan da sin dagan di sigod ay man-ilis na ay inpakaan Diyos.† Yan din Tolda ay sana et nantetees nan ili tako enggana sin timpon Ari David. <sup>46</sup> Si David pay et nilaylayad

\* **7:29** Exodo 1:7-2:15. † **7:34** Exodo 3:1-10. ‡ **7:40** Si Aaron din pangpangoan Moses ay namadang en sisya ay nangipango sin Judio sin kinmaan da ed Egipto. Sisya abe din damo ay kangatoan ay padin di Judio. § **7:43** Amos 5:25-27. \* **7:44** Exodo 25:9,40. † **7:45** Josue 3:14-17.



Diyos, et nankedaw en Diyos mo mabalin ay mansaad si kosto ay panbeeyana ta say pandaydayawan di polin Jacob en sisya. † 47 Ngem baken si David di nangisaad mo adi et din anak na ay si Solomon. §

48 “Ngem din kangatoan ay Diyos et baken beey ay saaden di ipogaw di panbeeyana, tan kanan di esa ay nankalkalian Diyos ed idi,

49 ‘Ed langit di pantokdoak ay manturay, ya din lobong et say pan-andayak. Isonga olay sino ay beey di saaden yo et adi omanay si panteeak. 50 Tan sak-en di nangamag sin am-in ay wada.’\*

Say inpaisolat Diyos ed idi,” kanan Esteban.

51 Pag nan itoloy ay nangwani, “Makenteg san nemnem yo. Kaman kayon pagano ay manigaan ay mamati en Diyos ya maneteweng sin ibagbaga na. Isoen yo abe di inyaat di ap-o tako ay kokontraen yos kankanayon din Ispirito Santo. 52 Ay waday olay esa sin doy da ay mamadto si adi pinaligat di ap-o tako? Maga met. Olay din nangipadpadto sin inmalian di nasantoan ay Messias ay nansilbi en Diyos et pinse da. Yan dakayo pay et nilipotan ya pinse yo din Messias. 53 Dakayo di nanawid sin linteg ay inpasan Diyos sin aanghel ed idi, ngem adi yo pinatpati,” kanan Esteban.

### *Din Namigpigan Da En Esteban*

54 Sin nanngaan din papangolon di Judio sin kanan Esteban, peteg di bonget da dowan dan man-gayetget. 55 Ngem si Esteban et napnos panakabalin di Ispirito Santo. Tinangad na ed langit, et inila na din koniniing di Diyos ya si Jesus ay pinmipika sin makannawana. 56 “Alla! Ilan yo di!” kanana. “Nabokatan ed langit, et il-ilaek din Anak di Ipogaw ay si Jesus ay pomipika sin makannawan Diyos.”

57 Asi et din papangolon di Judio et inopop dan inga da dowan da et nanbogaw ta adi da dengngen di kankanana. Pag da et pomanika et kagamdot dan sisya, 58 dowan dan goyoden ay mangiey sin benget di ili ta pigpigen da. Din titistigo ay nangipabasol en sisya et inpayag dan tak-ep di bado da sin kad-an di esa ay lalaki ay si Saulo ta way iyat da ay makipigpig. 59 Sin namigpigan da en sisya, nankararag si Esteban yan kanana, “Apo Jesus, awatem nan ab-abiik ko.” 60 Pag mandokmog yan inbogaw na ay nangwani, “Apo Jesus, adi ka kod ibilbilang din basol da ay nay,” et pag matey.

## 8

### *Din Namalpaligatan Saulo Sin Gimgimong Di Namati*

1-3 Din agew ay doy ay nateyan Esteban et say nanlogian di napalalo ay napalpaligatan di gimgimong di mamati ed Jerusalem. Wada da di managtongpal sin linteg Diyos ay en nangiponpon en sisya dowan dan ogaan ay manpilpilalak. Ngem si Saulo et inapolbalana din nateyan Esteban et pinalaloana ay nangipakaseseg-ang en da doy ay mamati ta say maga koma di mabay-an. Sin-gesin-gep da Saulo din kabeebeey dowan ipagalalad din bemeey ta iey da sin balodan. Isonga am-in ay mamati, powira din aapostol, et nansisian da ay linmayaw sin kailili sin probinsiya ay Judea ya Samaria.

### *Din Nankaskasabaan Felipe Ed Samaria*

4 Din nansisian ay doy, olay intoy in-inmeyan da, et inkaskasaba da din kalin Diyos maipanggep en Jesus. 5 Di esa en daida et si Felipe. Inmey sin esay ili ed Samaria, yan inkaskasaba na ay si Jesus din Messias ay inbaan Diyos. 6 Idi dinngen din kaipoipogaw din inbagbaga na yan inila da din nakaskasdaaw ay inam-amag na, pinati da am-in din inbagbaga na. 7 Tan din aanito ay kinmapet et kinmaan da si ad-ado ay ipogaw dowan dan man-olakis, ya ad-ado abey paralitiko ya napilay ay nailatonan. 8 Isonga naragragaskan din omilis di.

† 7:46 2 Samuel 7:1-16. § 7:47 1 Aari 6:1-38. \* 7:50 Isaias 66:1-2.

<sup>9</sup> Ngem wada di nabayag ay man-gegey sin doy ay ili ay manngadan si Simon ay nasdaawan din am-in ay man-ili ed Samaria. Init-it-ek nan awak na ay nangwani en waday kinangato na. <sup>10</sup> Et din kaipoipogaw, olay nangato ya nababa, et pinatipati dan kankanana yan inbilang da ay sisya din nadiyosan ay makwani en Napigsa di Panakabalina. <sup>11</sup> Din nangon-onodan dan sisya et begew tan nabayag ay man-gegey, et nasdaaw da sin kabaelana. <sup>12</sup> Ngem idi namati da sin siged ay damag ay inkaskasaban Felipe ay maipanggep sin panturayan Diyos ya din saad Jesus ay Messias, nanpabonyag da, waday lallalaki ya babbabai. <sup>13</sup> Olay si Simon et namati abe et nabonyagan. Et pag makikiey en Felipe dowan nasdaaw sin nakaskasdaaw ay sinyal ya milagro ay inam-amag na.

<sup>14</sup> Sin nanngaan din aapostol ed Jerusalem ay inawat din taga-Samaria din kalin Diyos, binaa das da Pedro en Juan ay emey sidi. <sup>15</sup> Somawang da pay, pag dan ikararagan din namati ta say awaten da din Ispirito Santo, <sup>16</sup> tan daanan segpen daida. Nabonyagan da sin ngadan Jesus et anggoy. <sup>17</sup> Pag kapayen da Pedro en Juan si daida, et awaten da din Ispirito Santo.

<sup>18</sup> Idi inilan Simon ay sin-gep din Ispirito Santo daida sin nangapayan di aapostol, inpaila nay siping <sup>19</sup> ay nangwani, “Omya kayo kod si panakabalin ay sana ta say olay sino abe di kapayek et awaten da din Ispirito Santo.”

<sup>20</sup> Ngem kanan Pedro en sisya, “Maitapi koma san siping mo en sik-a ay mapooan ed inferno, tan kanam en mabalin ay lakoam din sagot Diyos ay adi malakoan. <sup>21</sup> Adi ka maibilang isnan obla mi, tan baken kosto di nemnem mo sin pangilan Diyos. <sup>22</sup> Ibabawim ngarud din lawa ay nemnem ya panggep mo ay sana, yan man-adawag ka en Diyos ta mo mabalin koma, pakawanen daka. <sup>23</sup> Tan mailak ay palalo di apos mo, ya deda ay binabalod dakas basbasol mo.”

<sup>24</sup> Pag kanan Simon, “Ikararagan yo paabes sak-en en Apo ta maga di mapasamak en sak-en sin sana ay inbaga yo.”

<sup>25</sup> Idi nakdeng pay ay inbagan da Pedro en Juan din kalin di Apo ya pinaneknekan da di inil-ila ya dindinngge da en Jesus, nantaoli da ed Jerusalem ay nansepsepad sin kailiili ed Samaria ay nilablabsan da ta ikaskasaba da din siged ay damag maipanggep en Jesus.

### *Din Namatian Di Opisyal Ay Taga-Etiopia*

<sup>26</sup> Idi siya di, waday anghel di Apo ay en nangibaga en Felipe, “Ipikam et manpaabagatan ka sin kalsada ay mapo ed Jerusalem ay emey ed Gaza.” Din kalsada ay nay et malabas sin lugar ay magay omili.\* <sup>27</sup> Kapikas Felipe et inmey. Idi wada pay sin danan, tinamang na di opisyal ay taga-Etiopia ay napod Jerusalem, tan inmey sidi ay en nandayaw en Diyos. Din opisyal ay sana et nangato di saad na, tan makaammo sin am-in ay gamgameng di reyna ono Candace† di Etiopia. <sup>28</sup> Nanlologan sin kalisa na ay somaa dowana pay basbasaen din libro ay insolat Isaias ay mamadto ed idi. <sup>29</sup> Din Ispirito Santo et kanana en Felipe, “En ka sag-enen din kalisa ay sana.”

<sup>30</sup> Nanagtag ngarud si Felipe et inmasag-en, pag nan dengngen din basbasaen di opisyal ay insolat Isaias. “Ay maawatam san basbasaem?” pinoot na en sisya.

<sup>31</sup> “Maga, tan iwed di mangiolog en sak-en,” kanana ay sinombat. Pag nan ayagan si Felipe ta makilogan. <sup>32</sup> Din basbasaena ay inpaisolat Diyos et siya na:

“Din in-inyat na et kaman din iyat di karnero ay adi manpekpekeng mo iey da sin panpalpaltian. Kaman aben iyat di anak di karnero ay igiginek na sin pamokisan da, tan ginmiginek met sisya. <sup>33</sup> Binabainan das sisya ya adi da binistigal si kosto. Maga abe di manad-at maipanggep sin poli na, tan ginagara dan biyag na isnan daga.”‡

\* **8:26** Dodowa pay di kaiologan nina sin Griego: 1) Din kalsada ay nay et adi maos-osal ed wani. 2) Din ili ay nay et magay man-ili ed wani. † **8:27** Candace et baken ngadan mo adi et titolo. Di olog na et reyna ono babai ay manturay. ‡ **8:33** Isaias 53:7-8.

<sup>34</sup> Sin namasaanas di, kanana en Felipe, “Ibagam kod mo sino di inbagbagan di mamadto. Ay din mismo ay awak na ono natken ay ipogaw?” <sup>35</sup> Yan inlawag Felipe ay si Jesus di kaiturongan din doy ay binasa na. Pag nan itoloy enggana ay inpaammo na din siged ay damag maipanggep en Jesus. <sup>36</sup> Maaw-awni pay, waday dinatngan da ay danom. “Dooy di danom,” kanan din opisyal. “Ay mabalin ay mabonyaganak?”

<sup>37</sup> “Mo dadlon kan mamati en Jesus, mabalin,” kanan Felipe ay sinombat.

“Mamatiak yan,” kanan din opisyal. “Patiek ay Anak Diyos si Jesu Cristo.”<sup>§ 38</sup> Pag nan ipasaldeng din kalisa ay nanloganan da, et inmagpas da ay doway ay en da pinmisok sin danom. Pag bonyagan Felipe sisya. <sup>39</sup> Idi kinmaan da pay sin danom, kaa din Ispiriton Diyos en Felipe, et adi kasin inilan din opisyal. Ngem intoloy na met laeng ay emey sin emeyana ay manragragsak. <sup>40</sup> Mo si Felipe et kawada ed Azotus, pag mandan sin kaililis di ay mangikaskasaba sin siged ay damag enggana ay sinmawang ed Cesarea.

## 9

### *Din Namatian Saulo En Jesus*

<sup>1</sup> Sin sana abe ay timpo, si Saulo et intoltoloy na ay mangeg-egyat en daida ay nangon-onod en Jesus, yan inpakapakat nay kabaelana ay mamse en daida. Isonga inmey sin kangatoan ay padi <sup>2</sup> ay mankedaw si solat ay pamalobos ta ena ipaila sin kasinasinagogan di Judio ed Damascus, ta mo waday datngana ay mangon-onod en Jesus, olay lallalaki ono babbabai, waday kalebbengana ay manpap en daida ta iey na ed Jerusalem. <sup>3</sup> Idi wada pay sin danan ay omas-asag-en ed Damascus, linikob di somilsilap ay pat-a ay napod langit, <sup>4</sup> et natokang. Pag nan dengngen di kali ay mangmangwani, “Saulo, Saulo, apay nga pomaligat ka?”

<sup>5</sup> “Sino ka ay Apo?” kanan Saulo.

“Sak-en si Jesus ay palpaligatem. <sup>6</sup> Ibangon mo ta emey ka sin ili ay sana, tan wadas di di mangibaga en sik-a si masapol ay amagem.”

<sup>7</sup> Din kabewbeweg Saulo et nasngang da, tan dinnge da din kali, ngem magay inila da. <sup>8</sup> Pag bomangon si Saulo, ngem idi kiniyat nan mata na, kambaw adi makaila. Isonga intakkayan da ay nangipango ed Damascus. <sup>9</sup> Toloy agew ay adi makaila downan aben adi mangmangan ya man-in-inom.

<sup>10</sup> Siya di, wada di pasolot Jesus ed Damascus ay manngadan si Ananias. Nanpailas Apo Jesus en sisya si kaman iitaw yan kanana, “Ay Ananias.”

“Sinoy ibagam, Apo?” kanana.

<sup>11</sup> “Emey ka sin kalsada ay nangadanan si Doritso, yan pootem sin beey en Judas mo wadas Saulo ay taga-Tarsus. Wadas di ay mankarkararag, <sup>12</sup> yan waday inpailan Diyos en sisya ay kaman iitaw ay sinenggep di lalaki ay manngadan si Ananias yan kinapay nas sisya ta kasin makaila,” kanan Apo Jesus.

<sup>13</sup> “Aw Apo, ngem ad-ado da ay nangipadpadamag en sak-en sin inam-amag Saulo ay namalpaligat sin ipogaw mo ed Jerusalem. <sup>14</sup> Yan ed wani kano, inmalis na yan inyaan di papangolon di papadi si kalebbengan ay manpap en dakami am-in ay manaydayaw en sik-a,” kanan Ananias.

<sup>15</sup> Pag kanan Apo Jesus, “Olay emey ka pay dedan, tan sisya di pinilik ay en mangibag-bagas maipanggep en sak-en en daida ay Gentil ya din aari da ya dakayo abe ay Israelita. <sup>16</sup> Ipaammok abe en sisya di kaad-adon di ligat ay nam-osena ta say maammoan di ngadan ko.”

<sup>17</sup> Pag emey si Ananias et senggep sin beey ay pantetean Saulo. Asi na pay kapayen downan kanan, “Agik ay Saulo, din Apo tako ay si Jesus ay nanpaila en sik-a sin inmaliam isna, sisya met laeng di nangibaa en sak-en ta kasin kan makaila ya awatem

§ 8:37 Din versikulo ay nay et maga sin odom ay manuskrito sin Griego.

din Ispirito Santo.”<sup>18</sup> Pag et mag-as sin matan Saulo di kaman siksik, et naibolinasnasan sisya. Asi pag pomika et mabonyagan.<sup>19</sup> Makdeng pay di, pag mangan et bomikas din awak na.

### *Din Nangaskasabaan Saulo Ed Damascus*

At-atik ay agew di nakitetean Saulo en daida ay mamati ed Damascus.<sup>20</sup> Pag et emey sin kasinasinagoga ay mangikaskasaba ay Anak Diyos si Jesus.<sup>21</sup> Nasdaaw din am-in ay nandengdenge. “Ay baken si dooy din namalpaligat sin manaydayaw en Jesus ed Jerusalem? Ay baken od din inmalianas na, et ta depapena din mamati ta iey na sin papangolon di papadi ed Jerusalem?” kanan da ay nan-asipoot.<sup>22</sup> Dowan si Saulo et nataptapian di kabaelana ay mangaw-awis si ipogaw ay mangipaneknek ay si Jesus din Messias. Yan din Judio ed Damascus et adi da makasongbat en sisya.

<sup>23</sup> Idi inmey di pigay agew, nantotolag din Judio ay sana si iyat da ay mamse en Saulo.<sup>24</sup> Inag-agew ya nilablabi ay sissiimen da sin segpan di ili da ta peslen da mo bomala. Ngem inammoan Saulo din plano da.<sup>25</sup> Isonga waday esay labi, din inawis na ay namati et nan-a das dakdake ay basket ta say panloganana, pag dan oy-oyen sin nakayang ay batog ay kodal di ili da ta way iyat na ay lomayaw.

### *Din Nantaolian Saulo Ed Jerusalem*

<sup>26</sup> Idi sinmawang pay si Saulo ed Jerusalem, en maitapi koma sin papasolot Jesus.\* Ngem emegyat da en sisya, tan adi da pasien ay pasolot Jesus abes sisya.<sup>27</sup> Asi et inkoyog Barnabas sisya sin kad-an di aapostol, et pag nan dad-aten din nangilaan Saulo en Jesus sin danan ya din nakingalatan Jesus en sisya. Dinad-at na abe din toled na ay nangikaskasabas maipanggep en Jesus ed Damascus.<sup>28</sup> Siya di, nakibewbeweg si Saulo en daida ed Jerusalem yan natoled ay nangikaskasaba si kalebbengan Jesus.<sup>29</sup> Nakingalngalat ya nakidisdiskotil abe si Judio ay Griego di kali da, ngem an-anapen da mo intoy iyat da ay mamse en sisya.<sup>30</sup> Idi inammoan pay din iib-a na ay namati, en da initlod ed Cesarea, pag dan palobwatan ay emey ed Tarsus.<sup>31</sup> Siya pay di, sinmaldeng di kapalpaligatan di mamati en Jesus sin kailili ed Judea, Galilea ya ed Samaria. Yan inmad-ado da dowan pomigpigsa di pammati da begew sin mamatpatgan da en Apo ya din badang di Ispirito Santo.

### *Din Nakaskasdaaw Ay Inam-amag Pedro*

<sup>32</sup> Si Pedro abe et nanlikliked sin kailili ay mamaspasyal sin ipogaw en Diyos. Idi sinmawang ed Lidda,<sup>33</sup> waday dinatngana ay lalaki ay manngadan si Eneas ay binmabaktad si wao ay tawen, tan paralitiko.<sup>34</sup> Kanan Pedro en sisya, “Ay Eneas, ibangon mo ta kopikopem san kamen mo, tan agasan dakan Jesu Cristo.” Pag et bomangon.<sup>35</sup> Yan din omili ed Lidda ya sin tanap ed Saron, idi inila das sisya, namati da en Jesus.

<sup>36</sup> Wada abey babai ay pasolot Jesus ed Joppa ay manngadan si Tabita. (Din inpan-gadan da sin kalin di Griego et Dorcas, di olog na et ogsa.) Pag siged di inam-amag nas kankanayon, et ammo na ay mamadbadang sin nankabibiteg.<sup>37</sup> Sin kawadan Pedro ed Lidda, nansakit si Tabita et natey. Inames dan awak na, et pag dan pabaktaden sin kowarto sin kayang.<sup>38</sup> Asi da ibaa di doway lalaki ay en mangayag en Pedro, tan dinnge da ay wada ed Lidda ay sag-en di ili da. Idi sinmawang da, kanan da, “Dalasem kod ta en tako ed Joppa.”<sup>39</sup> Pag mapika si Pedro et makeey en daida. Sin sinmawangan da, inpango da sin kowarto ay kad-an di natey. Et pag alibongbongan di man-og-oga ay nalasalasang ay wadas di, dowan dan ipaipaila en sisya din dinait Dorcas ay bado sin daanan kateyan.

\* **9:26** Din papasolot Jesus ay ibagbaga nas na ya sin odom ay versikulo sin Din Inam-amag Di Aapostol et baken anggoy din sinpo ya doway ay aapostol mo adi et am-in ay namati en Jesus. Makwani da abe en aag-i, tan naitapi da am-in sin pamilyan Diyos.

<sup>40</sup> Inpabalan Pedro si daida am-in, pag mandokmog ay mankararag. Asi na sagongen din bangkay di natey yan kanana, “Tabita, ibangon mo.” Nakiyat mata na, et sin nangilaana en Pedro, binmangon. <sup>41</sup> Intakkayan Pedro ta papikaenas sisya. Pag nan ayagan din doy ay nalasalasang ya din odom ay mamati, et inpaila nas sisya ay kasin natago. <sup>42</sup> Din naamag ay nay et nandinamag sin intiro ay ili ed Joppa, yan ad-ado da ay namati en Apo Jesus. <sup>43</sup> Si Pedro pay et namona ay agew di nanteteana ed Joppa sin beey Simon ay man-ob-obla si lalat.

## 10

### *Din Namasyalan Da Pedro En Cornelius*

<sup>1</sup> Wada ed Cesarea di kapitan di sin-gasot ay soldado ay manngadan si Cornelius. Sisya ya din sosoldado na di tapin din makwani en Kompanyan di taga-Italia. <sup>2</sup> Gentil sisya, ngem am-in da ay bemeey et relihioso da ya dinaydayaw das Diyos. Ad-ado abey badang na si nabibiteg ay Judio, ya nankarkarag en Diyos si kankanayan.

<sup>3</sup> Sin sinkamasdem sin alas tres, waday inpailan Diyos en sisya, yan dadlonan inila di anghel Diyos ay sinenggep sin beey na yan kanana, “Ay Cornelius.”

<sup>4</sup> Nanmomolagat si egyat na yan kanana, “Sinoy ibagam, Apo?”

Pag kanan din anghel, “Nenemnemen Diyos sik-a, tan dindinngge na din karkararag mo ya ammo na di iyaat mo ay mamadbadang sin nankabibiteg. <sup>5</sup> Boma ka ngarud si emey ed Joppa ay en mangayag en Simon ay nabdayan si Pedro. <sup>6</sup> Mantee sin benget di baybay sin beey en Simon ay man-ob-obla si lalat.”

<sup>7</sup> Idi nadipos din anghel, inayagan Cornelius di doway ay baa na ya esa ay soldado ay kabadbadang na ay manaydayaw abe en Diyos. <sup>8</sup> Dinad-at na en daida din am-in ay napasamak, et pag nan ibaa ed Joppa.

<sup>9</sup> Sin kabigatana sin alas dosi, wada da sin danan ay omas-asag-en ed Joppa dowan aben si Pedro et inmey sin nasingpa ay atep di beey da ay en mankararag. <sup>10</sup> Dinmagaang et mangan koma, ngem idi sagsaganaen da di pinangan, waday inpailan Diyos en sisya ay kaman iitaw. <sup>11</sup> Din inila na et nabokatan ed langit, yan wada di maoy-oy-oy sin kad-ana ay kaman dakdake ay lopot ay naitatayad sin opat ay soli na. <sup>12</sup> Din linaona et am-in ay boyan di aanimal, mankodkodap ya mantaytayaw, ay maiparit ay kanen di Judio. <sup>13</sup> Yan dinngge na di kali ay nangwani, “Pedro, ibangon mo ta pomalti kas isidam.”

<sup>14</sup> “Sigaak met, Apo,” kanana, “tan maga polos di insidsidak ay paniyewen mi ay Judio.”

<sup>15</sup> Kanan kasin din mankalkali, “Din inbagan Diyos en siked ay makan et adim paniyewen.” <sup>16</sup> Namitlo ay inila ya dinngge na di, asi naipataoli din lopot ed langit.

<sup>17</sup> Nemnemnemen pay Pedro mo sino ngin di laydena ay kalien, sinmawang din inbaan Cornelius yan dinamag da din kad-an di beey Simon. Somawang da pay sin segpan, <sup>18</sup> pag dan pooten mo siya sa di beey ay panteean Simon ay nabdayan si Pedro.

<sup>19</sup> Si Pedro et nemnemnemen pay laeng di kaiologan din inpailan Diyos en sisya, isonga kanan din Ispiriton Diyos en sisya, “Wada di tolo ay ipogaw ay mangan-anap en sik-a. <sup>20</sup> Bomaba ka, yan adi ka mandowadowa ay makeey en daida, tan sak-en dedan di nangibaa en daida.”

<sup>21</sup> Siya et di binmaba si Pedro yan kanana sin tolo ay sana, “Sak-en din an-anapen yo. Sino ngin di panggep yo ay inmalis na?”

<sup>22</sup> “Si Kapitan Cornelius et inbaa nas dakami ay en mangayag en sik-a, tan inbagan di anghel Diyos en sisya ay ipaayag daka ta dengngena di ibagam. Si Cornelius et siked ay ipogaw ay manaydayaw en Diyos. Din iib-am abe ay Judio et tangtangaden das sisya,” kanan da ay sinombat. <sup>23</sup> Pag pasgepen Pedro ta man-iyen das di.



Sin napat-aana, nakeey da Pedro ya di odom ay namati ay taga-Joppa en daida. <sup>24</sup> Idi sinmawang da pay ed Cesarea sin maikadwa ay agew, wadas da Cornelius ay mansesed, pati din inayagana ay aag-i ya gagayyem na. <sup>25</sup> Sengsenggep pay si Pedro, en inabat Cornelius yan nanyakog-ong ay nandokmog sin sangoanana ay mandayaw en sisya. <sup>26</sup> Ngem si Pedro et inpapika na ay nangwani, “Ipikam, tan sak-en abe et owatak ipogaw.” <sup>27</sup> Pag dan senggep ay manngalngalat. Sin nangilaan Pedro sin adado ay ipogaw ay nasinop sidi, <sup>28</sup> kanana en daida, “Ammo yo met din ogali mi ay Judio et maiparit di makipolpolapol ya olay manpasyal kami si Gentil. Ngem inpaammon Diyos en sak-en ay maga koma di ib-ak ay ibilang ko ay eweewe ono kadodogis. <sup>29</sup> Isonga idi inpaayag yos sak-en, inmaliak ay adi nanpampambal. Ibagay yo ngarud di nangipaayagan yo en sak-en.”

<sup>30</sup> Sinongbatan Cornelius yan kanana, “Ed esa ay on-ona sin kaman nina ay alas tres, nankarkararak sin beey ko ay nay. Yan kawada di mankoniniing di bado na ay pinmipika sin sangoanak. <sup>31</sup> Kanana en sak-en, ‘Cornelius, dinngen Diyos din kararag mo, yan nenemnemena abe di iyaat mo ay mamadbadang sin nankabibiteg. <sup>32</sup> Bomaa ka ngarud si emey ed Joppa ay en mangayag en Simon ay nabdayan si Pedro. Mantee sin benget di baybay sin beey en Simon ay man-ob-obla si lalat,’ kanana. <sup>33</sup> Isonga inpaayag kos sik-a ay dagos, yan inbag ta inmali ka, tan nay ay nasinop kamis na sin pangilaan Diyos ta dengngen mi am-in din inbilina ay ibagam,” kanan Cornelius.

<sup>34</sup> Pag mankali si Pedro yan kanana, “Tet-ewa baw adi ay magay idomdoman Diyos,\* <sup>35</sup> mo adi et awatena di olay sino ay ipogaw, Judio ono Gentil, mo patpatgen das Diyos ya siged di am-amagen da. <sup>36</sup> Ammo yo din siged ay damag ay inpaammon Diyos en dakami ay Israelita ay mabalin ay siged di pakikadkadwaan di ipogaw en sisya babaen sin inamag Jesu Cristo ay apon di am-in ay ipogaw. <sup>37</sup> Ammo yo abe din nabanol ay naam-amag ay manlogi ed Galilea ya sin intiro ay Israel sin nakdenggan di nan-itdoan Juan maipanggep si bonyag. <sup>38</sup> Ammo yo ay indawat Diyos din Ispirito Santo ya din panakabalina en Jesus ta olay intoy in-inmeyana, pag siged di inam-amag na ya inagagasana di am-in ay pinalpaligat din Diablo, tan wadas Diyos en sisya. <sup>39</sup> Yan dakami pay, inila mi di am-in ay inam-amag na ed Jerusalem ya sin odom ay ilin di Judio. Inlansa da sin krus et say nateyana. <sup>40</sup> Ngem si Diyos et tinago na kasin sin maikatlo ay agew. Inpaila na <sup>41</sup> en dakami, yan nakikikan kami en sisya sin kasinan natagoan. Adi inilan am-in di ipogaw mo adi et dakami anggoy ay pinilin Diyos ed idi ay mangipaneknek sin inila mi. <sup>42</sup> Yan binilinas dakami ay en mangikaskasaba sin siged ay damag ay maipanggep en sisya ya en mangipaneknek ay sisya di dinotokan Diyos ay mangokom sin am-in ay ipogaw ay matmatago ya siya abe din natenatey. <sup>43</sup> Am-in abe din mamadto ed nabaon et inbag da ay babaen en Jesus, mapakawan din basbasol di am-in ay mamati en sisya.”

### *Din Nangawatan Da Cornelius Sin Ispirito Santo*

<sup>44</sup> Deda ay mankalkali si Pedro, pag et segpen din Ispirito Santo am-in ay nandengdenge. <sup>45</sup> Idi siya di, nasdaaw din Judio ay mamati ay nakeey en Pedro, tan olay din Gentil et inawat da din Ispirito Santo ay insagot Diyos. <sup>46</sup> Din nangammoan da ay siya di din naamag, nankalkali das natken ay kali ay adi da inadal dowan da aben idaydayaw din kinangaton Diyos. Pag kanan Pedro sin gagait na, <sup>47</sup> “Da nay ay ipogaw et inawat da din Ispirito Santo ay kaman datako met laeng. Adi ngarud mabalin ay iparit tako di kabonyagan da.” <sup>48</sup> Pag nan ibilin ay manpabonyag da Cornelius ay mangipaila ay Apo da si Jesu Cristo. Nakdeng pay di, inpakpakodan da Cornelius si Pedro ta makitee en daida si sinkaattikan ay agew.

\* **10:34** Deuteronomio 10:17.

## 11

### *Din Inbagan Pedro Sin Namispis-oy en Sisya*

<sup>1</sup> Idi siya di, din aapostol ya din iib-a da ay namati sin kailili ed Judea et nadamag da ay inawat aben di Gentil din kalin Diyos. <sup>2</sup> Sin nantaolian Pedro ed Jerusalem, din mamati ay napinget ay mangonod sin ogalin di Judio et pinispis-oy das sisya ay nangwani, <sup>3</sup> “Aye ka kayman ay nanpasyal sin beey di Gentil yan nakikikan ka pay en daida.”

<sup>4</sup> Pag dad-aten Pedro din am-in ay naam-amag ay manlogi sin lamot na enggana sin tobo na. <sup>5</sup> Kanana, “Wadaak ed Joppa ay mankarkarag yan waday kaman iitaw ay inpailan Diyos en sak-en. Din inilak et kaman dakdake ay lopot ay maoy-oy-oy ay napod langit ay naitatkyad din opat ay soli na, et naipayag sin kad-ak. <sup>6</sup> Isisin-eng ko pay, wadas di di kakalasin di maayew ya atap ay animal, wada abey mankodkodap ya mantaytayaw. <sup>7</sup> Asiak dinnge di kali ay nangwani, ‘Pedro, ibangon mo ta pomalti kas isidam.’ <sup>8</sup> Asi et kanak, ‘Sigaak met, Apo, tan maga polos di insidsidak ay paniyewen mi ay Judio.’

<sup>9</sup> “Dinngek kasin din kali ay napod langit ay nangwani, ‘Din inbagan Diyos en siked ay makan, adim paniyewen.’ <sup>10</sup> Namitlo di nangilaak ya nanngreak isdi, pag mantaoli am-in ed langit.

<sup>11</sup> “Yan siya di, kasawang di tolo ay lalaki sin beey ay nanteak. Naibaa da ay napod Cesarea ay en mangayag en sak-en. <sup>12</sup> Idi siya di, inbagan din Ispirito Santo ay adiak mandowadowa ay makeey en daida. Nakeeyak ngarud ay kabeweg ko da naey ya enem ay aag-i tako. Somawang kami pay ed Cesarea, sinenggep kami sin beey da Cornelius. <sup>13</sup> Et pag nan dad-aten din nanpailaan di anghel en sisya sin beey na ya din inbagan di anghel ay nangwani, ‘Omibaa kas emey ed Joppa ay en mangayag en Simon ay nabdayan si Pedro, <sup>14</sup> ta ena ibaga en dakayo di iyat yo ay bemeey ay maisalakan,’ kanan kanon di anghel. <sup>15</sup> Kailoglogik pay ay mankali, sinenggep din Ispirito Santo en daida ay kaman met laeng din inyat na en datako sin damo. <sup>16</sup> Et say nannemnemak sin kanan Apo Jesus ed idi en binonyagan Juan di ipogaw si danom, ngem datako pay et mabonyagan tako sin Ispirito Santo. <sup>17</sup> Mo insagot ngarud Diyos din Ispirito Santo en daida ay Gentil ay say insagot na en datako sin namatian tako en Apo Jesu Cristo, sino aya di kaipogaw ko ay mangiparit en Diyos ay nangamag sidi?” kanan Pedro.

<sup>18</sup> Sin nanngaan das di, sinmaldeng da ay mamispis-oy en sisya yan dayawen da et si Diyos ay nangwani, “Kambaw olay din Gentil et indawtan Diyos daida si gondaway ay manbabawi ta gon-oden da abe di biyag ay iwed patingga na.”

### *Maipanggep Sin Gimong di Mamati Ed Antiok*

<sup>19</sup> Sin namsean di Judio en Esteban, napalpaligat di namati et nansisian da. Waday inmey enggana ed Fenicia, Cyprus ya ed Antiok ay mangibagbagas kalin Diyos, ngem din nangibagbagaan da et Judio anggoy. <sup>20</sup> Ngem wada abey taga-Cyprus ya taga-Cirene ay inmey ed Antiok, yan inbagbaga da abe din siked ay damag ay maipanggep en Apo Jesus sin Gentil. <sup>21</sup> Gapo ta wada din panakabalin Apo Diyos en daida ay man-itdo, ad-ado di nanagong en Apo Jesus ay namati.

<sup>22</sup> Idi nadamag din gimong ed Jerusalem ay namati di Gentil ed Antiok, inbaa das Barnabas. <sup>23</sup> Idi sinmawang pay sidi, naragsakan sin nangilaana ay sineg-angan Diyos si daida, yan tinogtogona ta dadlon dan ipapasnek ay mamati en Apo Jesus. <sup>24</sup> Tan siked ay ipogaw si Barnabas ay napno si panakabalin di Ispirito Santo, ya napigsa abe di pammati na. Isonga ad-ado pay di naitapi en daida ay namati.

<sup>25</sup> Pag emey si Barnabas ed Tarsus ay en manganap en Saulo. <sup>26</sup> Idi dinatngana, nantaoli da ed Antiok. Nakatawen das di ay makigimong, yan ad-ado abe di init-itdoan da. Din papasolot Jesus ed Antiok di damo ay makwani en Cristiano.

<sup>27</sup> Sin nantetean da Barnabas en Saulo sidi, wada da di mamadto ay sinmawang ay napod Jerusalem. <sup>28</sup> Din esa ay manngadan si Agabus et pinmika sin nasisinopan di gimong, et inpaipadton di Ispirito Santo ay waday domateng ay betil sin kailili isnan daga. (Din inpadto na ay nay et natongpal sin timpon Emperador Claudius.) <sup>29</sup> Siya di, din papasolot Jesus ay doy et nantotolag da ay mangipaw-it si badang sin aag-i da ed Judea. Esaen nan-alos insigon si mabalina, <sup>30</sup> et pag dan ipaw-it en da Barnabas en Saulo ta iey da sin papangolon di mamati ed Jerusalem.

## 12

### *Din Naibolosan Pedro Si Balodan*

<sup>1</sup> Sin timpo ay doy, inlogin Ari Herod\* ay mamaligat sin odom ay mamati en Jesus, <sup>2</sup> yan inpapoto na din toktok Santiago ay agin Juan. <sup>3</sup> Idi inammoana ay say nanlaydan di Judio, sinepsep na ay mangipadpap abe en Pedro. Naamag di sin fiesta ay makwani en Nalabas ay panganan das tinapay ay magay labadura na. <sup>4</sup> Idi nadpap pay si Pedro, inpabalod Herod ya inpagowardiya na si sinpo ya enem ay soldado ay sag-ooapat ay mansinoskat, tan plano na ay okomen ya ipapses sisya ay boyaen di kaipoipogaw mo makdeng din fiesta.

<sup>5</sup> Siya di, naibabalod si Pedro, dowan pay din gimong di mamati et inpapasnek da ay mangikarkararag en sisya.

<sup>6</sup> Waday sinlabi ay pag din kabigatana di planon Herod ay pangokoman ya pangipapsean en Pedro. Si Pedro et naseseyep sin nan-gawaan di dowan ay gowardiya. Nababalod pay si dowan kadina dowan aben nagogowardiyaan din eneb di balodan.

<sup>7</sup> Siya et di kawada di anghel di Apo ay nanpaila, yan waday silaw ay naninggaw sin kowarto ay kad-an Pedro. Pinagpag nas Pedro ay namangon en sisya, yan kanana, “Dalasem ay bomangon!” Pag et nankaeekdag din kadina ay naibabalod sin gadingana, <sup>8</sup> yan kanan din anghel, “Olnosem badom, mansinilas ka.” Idi pinati na, kanan din anghel, “Iewes mon tak-ep di badom ta omonod ka.” <sup>9</sup> Si Pedro et inonod na din anghel ay bomala, ngem di wada sin nemnem na et baken tet-ewa din am-amagen di anghel en sisya, owat iitaw et anggay. <sup>10</sup> Linabsan da din esa ya maikadwa ay gowardiya, pag dan somawang sin eneb ay landok ay bomala sin bel-ayan. Eteng nabokatan et binmala da. Mandan da pay si betaey di esa ay kalsada, pag namaga din anghel.

<sup>11</sup> Siya et di nainemnem si Pedro yan kanana, “Tet-ewa baw adi! Inbaan baw Diyos din anghel na ay mangisalakan en sak-en ta adi pomses Herod, ta say adi matongpal din namnamaen di Judio ay mapasamak en sak-en.”

<sup>12</sup> Idi ninemnem na di, inmey sin beey da Maria ay inan Juan Marcos ay nasinsinopan di ad-ado ay ipogaw ay mankarkararag. <sup>13</sup> Nantogtog et waday katolong ay manngadan si Roda ay en nangila. <sup>14</sup> Idi nailasinana din kalin Pedro, nilinglingana ay mamokat begew si ragsak na, et katagtag ay en mangibaga ay wadas Pedro sin segpan.

<sup>15</sup> “Naong-ong ka baw adi,” kanan da. Idi inpapilit na pay ay tet-ewa, kanan da, “Din anghel nan samet.”

<sup>16</sup> Dowan tomogtotogtog si Pedro. Neyneyna et binokatan da, kambaw tet-ewa ay si Pedro, et nasdaaw da. <sup>17</sup> Ngem si Pedro, nansinyas ay mangipaginek en daida, et pag nan dad-aten din nangipabalaan di Apo en sisya sin balodan. “Ibaga yo kod abe na en Santiago ya din odom ay aag-i tako,” kanana. Pag komaan ay emey si natken ay ili.

<sup>18</sup> Idi maagsapa pay, palalo ay nanngalawngaw din gogowardiya. “Namagas Pedro mo?” kanan da. <sup>19</sup> Inbilin Herod ay en da anapen sisya, ngem adi da makadteng. Isonga binistigal nas daida et pag nan ipapse. Asi pay komaan si Herod ed Judea et en nantee ed Cesarea.

\* **12:1** Din ari ay nay et si Herod Agrippa I ay apon Herod ay Napateg ya pangananen Herod Antipas ay nangipapoto sin toktok Juan ay Mamonbonyag.

### *Din Nateyan Ari Herod*

<sup>20</sup> Sin nantetean Herod sidi, palaloy bonget na sin omili ed Tiro ya ed Sidon. Isonga an-anapen da mo intoy iyat da ay mangabog en sisya, tan din lak-am na di panpan-aan das kanen da. Din inamag da et ginayyem das Blasto ay makaammo sin beey Herod. Pag dan masinop ay en manpakaasi en Herod ta makaan bonget na en daida.

<sup>21</sup> Domateng pay din agew ay inbagan Herod, inbado na din nagayad ay osal di ari, et en tinmokdo sin trono na ta mandiskurso sin kaipoipogaw. <sup>22</sup> Nakdeng din diskurso na, kanan da ay nangibogaw, “Kalin di Diyos sa, baken owat kalin di ipogaw.” <sup>23</sup> Siya et di, dagos ay inpasakit din anghel di Apo sisya, tan inawat na din panaydayawan dan sisya ay adi na padayaw si Diyos. Pag mabigis awak na et matey.

<sup>24</sup> Dowan et pay masepsep ay inmad-ado di ipogaw ay manmange ya mamati sin kalin Diyos.

<sup>25</sup> Mo da Barnabas en Saulo et nakdeng di naibaaan da ed Jerusalem. Nantaoli da ed Antiok ay gait das Juan Marcos.

## 13

### *Din Naibaaan Da Barnabas En Saulo Si Odom Ay Il-ili*

<sup>1</sup> Sin gimong di mamati ed Antiok, wada di naitatapi ay pankalkalian Diyos ya man-it-itdo sin kalin Diyos. Siya dana di ngadan da: da Barnabas, Simeon ay nabdayan si Natoling, Lucius ay taga-Cirene, Saulo, ya si Manaen ay gait Gobernador Herod ed Galilea.

<sup>2</sup> Sin esay agew, idi it-itpe day dagaang da ya daydayawen das Diyos, kanan din Ispirito Santo, “Dotokan yos da Barnabas en Saulo ay mansilbi en sak-en, tan waday ipaoblak en daida.”

<sup>3</sup> Kasin dan mankararag dowan adi da pay laeng nangan, pag dan kapayen da Barnabas en Saulo et palobwatan das daida.

### *Din Napasamak En Elimas Ay Man-gengey*

<sup>4-5</sup> Idi siya di, inbaan din Ispirito Santo si daida et inmey da ed Seleucia ta manlogan das bapor ay emey ed Cyprus. Intakin das Juan Marcos ay mamadang en daida. Somanglad da pay ed Salamis ay esay ili ed Cyprus, en da inkaskasaba din kalin Diyos sin kasinasinagogan di Judio.

<sup>6</sup> Asi da pinasyal din kailiili ed Cyprus enggana ay sinmawang da ed Pafos. Say nangaspoan das Judio ay man-gengey ay mangwani en pankalkalian Diyos sisya, ngem baken tet-ewa. Din ngadana et si Barjesus. <sup>7</sup> Sisya et esa ay gait di gobernador ed Cyprus ay si Sergius Paulus. Din gobernador et nalaing ay ipogaw, et inpaayag nas da Barnabas en Saulo tan laydena ay dengngen din kalin Diyos. <sup>8</sup> Ngem din man-gengey ay si Elimas (tan say ngadana sin kalin di Griego) et kinontra nas daida sin nakingalatan da sin gobernador ta masangaw ya adi na pasien din tet-ewa ay mait-itdo. <sup>9</sup> Asi et si Saulo ay manngadan abes Pablo et napnos panakabalin di Ispirito Santo, et intekengenas Elimas <sup>10</sup> yan kanana, “Sik-a ay anak di diablo ay mangontra sin am-in ay siged, kanayon ay iet-etekam ya sowsowitikem di iib-am dowan kan sepsepen ay panbalinen din tet-ewa ay kalin Diyos si etek. <sup>11</sup> Ed wani, dosaen dakan Diyos yan magodab kas piga ay agew, ta olay din segit et adi ka mailasin.” Sin kosto ay nangwanianan di, niliknan Elimas di kaman binmolinget ay liboo ay nanalin sin mata na, et mankapokap ay man-anap si mangitakkay en sisya.

<sup>12</sup> Idi inilan din gobernador din naamag ay sana, namati en Apo Jesus, tan nasdaaw sin panakabalin di init-itdo da ay maipanggep en sisya.

### *Din Initdon Da Pablo Ed Antiok Ay Ed Pisidia*



<sup>13</sup> Idi siya di, nanlobwat da Pablo ed Pafos, et nanlogan das bapor ay emey ed Perga ay esay ili sin probinsiya ay Pamfilia. Idi sinmawang das di, tinaynan Juan Marcos si daida et nantaoli ed Jerusalem, <sup>14</sup> dowan dan ikanayon ed esa ay Antiok ay wada sin sakop di Pisidia. Sin Sabado ay agew ay pan-ibbayan, inmey da sin sinagoga et nakitokdo da. <sup>15</sup> Waday nanbasa sin linteg Moses ya din insolat di odom ay mamadto, pag waday en inpaibagan din papangolon di sinagoga en da Pablo ay nangwani, “Aag-i, mo waday itdo yo ay mangipapigsa sin nemnem di ipogaw ay nay da, ibaga yo kod.”

<sup>16</sup> Siya di pinmika si Pablo, et inkayang nan takkay na ay mangipaginek sin ipogaw. Pag nan kanan, “Iib-a ay Israelita ya dakayo abe ay Gentil ay manaydayaw en Diyos, dengngen yo kod nan ibagak. <sup>17</sup> Din Diyos ay daydayawen tako ay Israelita et pinili na din aap-o tako ed idi ta say daida di ipogaw na. Sin nantean da ed Egipto ay baken dan ili, binadanganas daida et inmad-ado da, et pag nan ipaila din napigsa ay panakabalina ay mangipabala en daidas di.\* <sup>18</sup> Sin nandad-anan da pay sin lugar ay magay omili si opatapolo ay tawen, inan-anosana din basbasol da en sisya dowana aben inay-ayowanana daida.† <sup>19</sup> Idi sinmawang da pay ed Canaan, pinaabak na din pito ay nasyon ay wadas di ta din ipogaw na di mangoka sin daga da.‡ Manlogi sin inmeyan da ed Egipto engganans di, inmey di opat gasot ya limapolo ay tawen.

<sup>20</sup> “Makdeng pay di, dinotokan Diyos di mangokom en daida ay nansisinokat enggana sin timpon Samuel ay pankalkalian Diyos. <sup>21</sup> Idi siya di, nankedaw das ari en Diyos, et pinili nas Saulo ay anak Kis ay polin Benjamin ta say man-ari en daida si opatapolo ay tawen.§ <sup>22</sup> Pag kaanen Diyos sisya et insokat nas David ay man-ari en daida. Kanan Diyos, ‘Din anak Jesse ay si David et peteg ay laydelaydek, tan tongpalena di am-in ay panggep ko ay amagena.\*’ <sup>23</sup> Si David met laeng di nangin apo en Jesus ay inbaan Diyos ay mangisalakan en datako ay Israelita ay maibasar sin inkari na ed idi. <sup>24</sup> Sin daan di pangilogian Jesus ay man-itdo, wadas Juan ay nangaskasaba sin am-in ay Israelita ay ibabawi dan basbasol da ya manpabonyag da. <sup>25</sup> Nganngani ay makdeng di oblan Juan, kanana sin kaipoipogaw, ‘Ay kanan yo aya en sak-en di inbaan Diyos ay mangisalakan en dakayo? Baken sak-en mo adi et din maisokat en sak-en. Begew din kinangato na, adiak maikari ay olay mangobad sin galot di sapatos na.’

<sup>26</sup> “Iib-a ay polin Abraham ya dakayo ay Gentil ay manaydayaw en Diyos, datako met laeng di nangipaammoan Diyos sin iyat na ay mangisalakan en datako. <sup>27</sup> Ngem din omili ed Jerusalem ya din papangolo da et adi da nailasin ay si Jesus di inbaan Diyos. Adi da aben naawatan ay sisya din inbagbagan di mamadto ed nabaon, olay mo sinabado ay basbasaen da din insolat da. Ngem tinongpal da pay dedan din kanan di mamadto ay sana, tan kineddangan das Jesus ay matey. <sup>28</sup> Olay mo magay ammo das binmasolana, inbaga da pay dedan en Pilato ay ipapse na. <sup>29</sup> Idi inamag da di yan natongpal am-in din naisolat maipanggep en sisya, wada abe di nangibaba sin awak na sin krus, et en da inponpon si liyang. <sup>30</sup> Ngem kasin tinagon Diyos. <sup>31</sup> Et din nakiey en sisya sin napoan da ed Galilea ay inmey ed Jerusalem, daida di nanpaipailaana si pigay agew. Ed wani, daida met laeng di mangipaneknek si maipanggep en sisya en datako ay Judio. <sup>32</sup> Siya di di inmalian mi ta ibaga mi en dakayo din siged ay damag, et siya na. Din inkarin Diyos sin aap-o tako ed nabaon <sup>33</sup> et say naitongpal en datako ay poli da, tan sin timpo tako di nanagoana en Jesus. Siya na met laeng di inbagbagan din naisolat sin maikadwa ay Salmo ay kanana,

‘Sik-a din anak ko. Ed wani ipailak ay sak-en si Amam.’†

<sup>34</sup> Mo maipanggep abe sin kasin natagoan Jesus ta adi kasin matey, wada abey naisolat ay inkarin Diyos sin ipogaw na ed nabaon ay kanana,

\* **13:17** Exodo 1:7; 12:51. † **13:18** Bilbilang 14:34. ‡ **13:19** Deuteronomio 7:1. § **13:21** 1 Samuel 8:5; 10:21.

\* **13:22** 1 Samuel 13:14; 16:12; Salmo 89:20. † **13:33** Salmo 2:7.



'Idawat ko en dakayo din nasantoan ay bibindisyon ay inkarik en David ay dadlon matongpal.'‡

<sup>35</sup> Si Jesus di natongpalan di inkari na ay sana, tan wada abey naisolat ay kanan David en Diyos,

'Sak-en di matalek ay mansilbi en sik-a. Adim ipalobos ay madonot nan awak ko.'§

<sup>36</sup> Ngem si David, idi nakdeng ay inamag na din layden Diyos sin kamatago na, natey. Inponpon da sin naiponponan di aap-o na, et pag madonot din awak na. <sup>37</sup> Ngem si Jesus pay et adi nadonot awak na, tan tinagon Diyos kasin. <sup>38</sup> Iib-a, laydek ay ammoan yo ay kosto ay babaen din inamag Jesus, mabalin ay pakawanen Diyos din basbasol tako.

<sup>39</sup> Tan babaen en sisya, ibilang Diyos ay nalinteg di olay sino ay mamati, ngem maga en datako di mapalinteg sin pangiilaan Diyos babaen sin panongpalan tako sin linteg Moses. <sup>40</sup> Siliban yo ngarud ta adi mapasamak en dakayo din inbagan di pankalkalian Diyos ed idi ay nangwani,

<sup>41</sup> 'Dengngen yo, dakayo ay manlaslasoy, tan waday amagek sin kamatago yo ay masdaawan yo, ngem matey kayo pay dedan, tan adi yo pasien ay maamag, olay mo waday mangibaga ay kosto en dakayo.' \*\*

Siya di di kagdangan di inbagan Pablo en daida.

<sup>42</sup> Idi bomalbala pay da Pablo en Barnabas, inbagan di ipogaw mo mabalin ta ipidwa da ay man-itdo sin omali ay Sabado ay manilpo sin inbaga da. <sup>43</sup> Binmala da am-in, ad-adoy nakiey en daida ay Judio ya Gentil ay nangonod sin ogalin di Judio. Nakingalat da Pablo en daida, yan intogon da ta ipapasnek da ay mantalek sin seg-ang Diyos.

<sup>44</sup> Sinmabado kasin, nasinop di istay am-in di omili ay makidnge sin kalin Diyos. <sup>45</sup> Ngem din Judio, idi inila da din ad-ado ay ipogaw, palalo di apos da. Isonga inpalawlawwa das Pablo downan dan kinontra din inbagbaga na.

<sup>46</sup> Asi et intoled da Pablo en Barnabas ay nangwani, "Masapol ay dakayo ay Judio agan-o di pangibagaan mi sin kalin Diyos. Ngem gapo ta sigaan yo, dakayo ay mismo di mangibilang sin awak yo ay adi kayo maikari ay makilak-am si biyag ay eng-enggana. Isonga ed wani taynan mi ngarud si dakayo ta emey kami sin Gentil. <sup>47</sup> Tan say inbilin Diyos en dakami ay kanana,

'Dinotokak sik-a ay manilaw si nemnem di Gentil ta way iyat am-in di ipogaw isnan lobong ay maisalakan begew en sik-a.' †

<sup>48</sup> Sin nanngaan di Gentil sin kanan Pablo ay sana, naragsakan da downan dan idaydayaw din kalin Diyos. Yan am-in ay pinilin Diyos ta daida di waday biyag na ay eng-enggana et namati da.

<sup>49</sup> Siya di nandinamag din kalin Diyos ay maipanggep en Jesus sin kailiili das di. <sup>50</sup> Ngem din Judio ay adi namati et sinogsogan da di baknang ay iin-a ay mandayaw en Diyos ya din mabigbig ay papangoan sin ili ta ilogi da ay mamaligat en da Pablo en Barnabas. Et inpakaan das daida sin doy ay ili. <sup>51</sup> Asi et pinokpokan da Pablo din dapan da ta say pangammoan da ay omili ay makaoway da sin dosa da. Pag dan emey ed Iconium, <sup>52</sup> downan din papasolot Jesus ay nataynan ed Antiok, peteg di layad da pay dedan ya napno das panakabalin di Ispirito Santo.

## 14

### *Ed Iconium*

‡ **13:34** Isaias 55:3. Din inkarin Diyos en Ari David et wadan to di bomala ay poli na ay mangituray sin Judio ay eng-enggana. § **13:35** Salmo 16:10. \* **13:41** Habakkuk 1:5. Din natongpalan di naipadto ay sana et inmey din Kaldeo ay en nakigobat sin Judio et binakas da din timplo ed Jerusalem downan aben ad-adoy pinse da. Say nasdaawan din Judio, tan kanan da en maga di mamakas sin kagkagam-is ay timplo da. † **13:47** Isaias 42:6; 49:6.

<sup>1</sup> Ed Iconium abe, inmey da Pablo sin sinagogan di Judio ay man-itdo. Yan din initdo da et waday nantongpalana, tan ad-adoy Judio ya Gentil ay namati. <sup>2</sup> Ngem din Judio ay nanigaan ay mamati et sinogsogan da di Gentil ta lomawlawwa di nemnem da sin namati. <sup>3</sup> Ngem nabayag pay dedan da Pablo en Barnabas sisi. Natoled da ay man-itdo maipanggep en Apo Jesus. Yan pinaneknekan Jesus ay tet-ewa di inkaskasaba da maipanggep sin seg-ang na babaen sin panakabalin ay indawat na en daida ay mangam-amag si nakaskasdaaw ay sinyal ya milagro. <sup>4</sup> Ngem nagogodwa di nemnem din omilis di, tan waday inmonod sin Judio ay adi mamati, wada abey inmonod sin aapostol. <sup>5</sup> Idi siya di, nantotolag di Judio ya Gentil ya din papangolo da ay mamaligat ya mamigpig en daida ta matey da. <sup>6</sup> Sin nangammoan din aapostol, linmayaw da ed Listra ya ed Derbe ya sin nandinmang ay ili sin sakop di Licaonia. <sup>7</sup> Et intoloy da ay nangikaskasaba sin siked ay damag sisi.

### *Din Naamag En Da Pablo Ed Listra Ya Ed Derbe*

<sup>8</sup> Wada ed Listra di esay lalaki ay napengkey di siki na ay adi polos nandad-an manlogi sin binmalaana. <sup>9</sup> Sin nannangeana sin kankanan Pablo, insin-eng Pablo sisya, yan dinlaw na ay waday talek na ay mabalin ay mailatonan. <sup>10</sup> Isonga inpigsa na din kali na ay nangwani, “Ipikam!” Pag et kapika et mandan.

<sup>11</sup> Sin nangilaan di kaipoipogaw sin inamag Pablo, inlogi da ay mangibogaw sin kali da ed Licaonia, “Diyos dana ay nanpaila ay kaman ipogaw. Nay binmaba da en datako.” <sup>12</sup> Et nginadanan das daida sin ngadngadan di didiyos da. Si Barnabas et nginadanan das Zeus, ya si Pablo et nginadanan das Hermes, tan sisya di nankalkali.\* <sup>13</sup> Din timplo ay nanaydayawan da en Zeus et wada sin benget di ili. Isonga din padi da et in-ey na di bomaro ay babaka ay nakekean si sabsabong sin pasbol ay segpan di ili, tan layden da am-in ay ipaltian da Pablo.

<sup>14</sup> Ngem sin nangammoan da Barnabas en Pablo ay say amagen din kaipoipogaw di, binisngit dan bado da ay mangipaila sin bonget ya sakit di nemnem da, dowan da pay managtag sin kad-an di kaipoipogaw ay manbogbogaw, <sup>15</sup> “Dakey ay iib-a! Apay nga iyat yos sa? Owat kamin ipogaw ay kaman dakayo met laeng. Inmali Kamis na ta ibaga mi en dakayo din siked ay damag ay maipanggep en Apo Jesus, ta say pandokogan yo din sinan didiyos ay sana ay magay silbi na ta pasien yo din matmatago ay Diyos ay nangamag ed daya ya sin daga ya sin baybay ya din am-in ay wadas di. <sup>16</sup> Ed idi binaybay-an Diyos din aap-o yo ay Gentil ta oway di iyaat da. <sup>17</sup> Ngem wada met laeng di nangammoan dan sisya, tan inpaila nan kinadiyos na ay mangam-amag si siked en daida. Sisya di mangidawat sin odan ya din lomamsan di mais-is-ek ta waday katagoan yo ta say manragsak kayo.” <sup>18</sup> Ngem olay mo say inbaga na di, istay dan itoloy ay ipaltian daida.

<sup>19</sup> Idi siya di, wada et di sinmawang ay Judio ay napod Antiok ed Pisidia ya napod Iconium. Inawis da din kaipoipogaw ta pigpigen das Pablo, asi da ginoyod sin benget di ili, tan kanan da en natey. <sup>20</sup> Ngem idi nilikob di mamati, binmangon et nantaoli sin ili. Sin napat-aana, inmey da Pablo en Barnabas ed Derbe.

### *Din Nantaolian Da Pablo Ed Antiok Ed Syria*

<sup>21</sup> Sin sinmawangan da ed Derbe, inkasaba da din siked ay damag, et ad-ado di inawis da ay manbalin si pasolot Jesus. Pag dan mantaoli ed Listra ya ed Iconium ya pag ed Antiok ed Pisidia <sup>22</sup> ta papigsaen da di pammatin di papasolot. Sin esa ya esa ay ili ay inmeyan da, tinogon das daida ay nangwani, “Ipapasnek yo pay et ay mamati olay sino di maamag en dakayo, tan masapol ay nam-osen tako di ad-ado ay ligat, asi tako maitapi sin panturayan Diyos ed langit.” <sup>23</sup> Dinotokan da abe di papangolon di esa ya esa ay

\* **14:12** Din pammatin di pagano ed isdi, si Zeus di kangatoan ay diyos da. Si Hermes di inbaan di odom ay diyos mo waday ipaammo da sin ipogaw, tan nalaing sisya ay mankali.

gimong dowan dan itpe di dagaang da ay mangikarkararag en daida, yan intalek da en Apo Jesus ay pinati da, ta say sisya di mangay-ayowan en daida. Say inamag da Pablo sin esa ya esa ay ili ay inmeyan da.

<sup>24-25</sup> Asi da mandan sin probinsiya ay Pisidia, et inmey da ed Perga ay esa ay ili ed Pamfilia. Idi nankasaba das di, pag dan emey ed Attalia, <sup>26</sup> et nanlogan das bapor ay mantaoli ed Antiok ed Syria. Tan say kad-an di nangikarkararag en daida ay nangitalek en Diyos ta ay-ayowanana ya segseg-anganas daida sin obla ay kakedkedeng da.

<sup>27</sup> Idi sinmawang das di, inpasinop da din gimong, et pag dan dad-aten din am-in ay inpaamag Diyos en daida ya din namadangana en daida ay nangaskasaba sin Gentil ta wada abey gondaway da ay mamati. <sup>28</sup> Nabayag pay di nakitetean da sin mamati en Jesus ed isdi ay Antiok.

## 15

### *Maipanggep Si Kosto Ay Amagen Di Gentil Ay Mamati*

<sup>1</sup> Idi siya di, wada da et di napod Judea ay inmey ed Antiok ay nan-itdo en daida ay mamati. Kanan da, “Adi mabalin ay maisalakan kayo mo adi kayo manpakogit ay manongpal sin ogali ay initdon Moses.”\* <sup>2</sup> Ngem da Pablo en Barnabas et palalo di in-in-at da ay makisongsongbat en daida. Isonga nantotolag da am-in ay emey da Pablo en Barnabas ya di odom ay mamati ed Jerusalem ta en da makingalat sin aapostol ya papangolon di mamati maipanggep sin initdo da ay doy. <sup>3</sup> Pag palobwatan din gimong si daida. Sin nannandanan da pay sin probinsiya ay Fenicia ya Samaria, nansepsepad da ay nangidaddad-at sin mamatis di sin namatian di Gentil en Jesus. Et naragragsakan da sin nanngaan das di. <sup>4</sup> Somawang da pay ed Jerusalem, naragsak din gimong ya din papangolo da ya din aapostol ay nangila en daida. Et dinad-at da Pablo di am-in ay inam-amag Diyos babaen en daida.

<sup>5</sup> Ngem wada di aag-i ay naitatapi sin bonggoy di Fariseo, et pinmika da ay nangwani, “Masapol ay bilinen tako din Gentil ta manpakogit da ya pasien da abe din odom ay linteg Moses.”

<sup>6</sup> Siya di nanmimiting din aapostol ya papangolo ta say panngalatan da. <sup>7</sup> Nabayag di nansosongbatan da, asi pay pomika si Pedro yan kanana, “Aag-i, ammo yo ay sak-en di pinilin Diyos en datako ed idi ay en mangikaskasaba sin siged ay damag sin Gentil ta say dengngen da ya pasien da. <sup>8</sup> Yan si Diyos ay makin ammo sin wadas nemnem di ipogaw et inpaila na ay inawat na din Gentil ay mamati, tan inpasgep na din Ispirito Santo en daida ay kaman met laeng din inyat na en datako. <sup>9</sup> Baken naitken din inyat na en daida, tan manbegew din pammati da met laeng di nanalosana sin nemnem da. <sup>10</sup> Mo siya di ngarud, apay nga padpadasen yo si Diyos ay mangwani en siyat dan tongpalen di am-in ay ogali tako? Tan olay din aap-o tako ya olay datako ed wani, adi tako kabaelan ay tongpalen. <sup>11</sup> Nemnemen yo kod ay pasien tako ay maisalakan tako begew din seg-ang Apo Jesus, yan siya met laeng en daida,” kanan Pedro.

<sup>12</sup> Nakdeng di, ginmiginek din kaipoipogaw ta dengngen da din daddad-aten da Barnabas en Pablo maipanggep sin nakaskasdaaw ay sinyal ya milagro ay inam-amag Diyos babaen en daida sin en da nangaskasabaan sin Gentil.

<sup>13</sup> Nakdeng pay din apat da ay sana, pag mankali si Santiago ay nangwani, “Dakayo ay aag-i, dengngen yo kod nan kanak. <sup>14</sup> Kadaddad-at Simon Pedro din damo ay nangipailaan Diyos sin seg-ang na sin ipogaw ay Gentil ta pomili en daida si makwani en ipogaw na. <sup>15</sup> Din inamag Diyos ay sana et maikompas sin insolat di mamadto ay mangwani,

<sup>16</sup> Kanan di Apo, Mantaoliak sin tapin di agew ta isaad ko kasin din nabakas ay beey en Ari David ta dadlon mabaroan, <sup>17</sup> ta asi somagong en sak-en am-in din Gentil ay

\* **15:1** Levitico 12:3.

pinilik ay makwani en ipogaw ko. <sup>18</sup> Siya di di kinwanin di Apo ay inpaammo na ed nabaon.’†

<sup>19</sup> “Isonga din wadas nemnem ko et adi tako paligaten di Gentil ay managsagong en Diyos. <sup>20</sup> Olay mansolat tako anggoy en daida ta ibaga tako ay adi da isida di naidaton sin sinan didiyos, tan paniyew en datako, adi da daddaagen di baken dan asawa, ya adi da aben mansidas dada ono napososan ay animal, tan adi nakaan di dada na. <sup>21</sup> Tan ammon am-in di Judio dana ay linteg, tan manlogi ed nabaon, inbasbasa das sinabado din linteg Moses sin am-in ay sinagoga tako. Isonga olay tongpalen da dana tan into et mo masakitan di nemnem di Judio,” kanan Santiago.

### *Din Insolat Da Sin Gentil Ay Mamati*

<sup>22</sup> Siya di din aapostol ya din papangolo ya am-in da ay miembron di gimong et ninemnem da ay manpili sin gimong si makeey en da Pablo en Barnabas ay emey ed Antiok. Di pinili da et doway am-ama da ay da Judas ay nabdayan si Barsabbas ya si Silas. <sup>23</sup> Siya na di inpaw-it da ay solat en daida:

“Dakami ay aag-i yo ay aapostol ya papangolo isnan ed Jerusalem, isolat mi na en dakayo ay Gentil ay mamati issan ed Antiok, Syria ya Cilicia. <sup>24</sup> Wada kano di napos na ay en nangrribok en dakayo ay nangit-itdos natnatken. Ngem adi mi indawtan daidas kalebbengan ay nangiyat sidi. <sup>25-27</sup> Isonga nanmimiting kami, et ninemnem mi ay siged mo mantaolis sa da Pablo en Barnabas. Nabanol ay gayyem mis daida ay nangipospota si biyag da ay nansilbi en Apo Jesu Cristo. Pinili mi abes da Judas en Silas ay makeey en daida ta paneknekan das kali da din insolat mi ay nay. <sup>28</sup> Din layden mi ay ibaga en dakayo et siya met laeng di layden di Ispirito Santo, tan inpanemnem na en dakami en adi mi paligaten dakayo ay mangipapati ta onodan yo din ogali mi. Da naey ay bilin anggoy di masapol ay tongpalen yo. <sup>29</sup> Adi yo isidsida di naidaton sin sinan didiyos, adi kayo aben mansidsidas dada ono napososan ay animal, ya adi yo aben daddaagen di baken yon asawa. Kosto di amagen yo mo anosan yo ay tongpalen dana ay bilin. Anggay dana si layden mi ay ibaga en dakayo.”

<sup>30</sup> Idi nakasolat da, pinalobwat da din nangiey, et inmey da ed Antiok. Somawang da pay sidi, inpasinop da din gimong ta idawat da din solat en daida. <sup>31</sup> Idi basaen da pay, peteg di layad da sin mayat ay pamagbaga.

<sup>32</sup> Ad-ado abey inbagbagan da Judas en Silas ay mangiparagsak ya mangipapig-pigsa sin pammati da, tan nankalkalian Diyos daida. <sup>33</sup> Nantetee das di si nabay-bayag, pag palobwatan din mamati ay nangwani, “Sapay koma ta ayowanan Diyos dakayo sin emeyan yo.” Asi da pay mantaoli ed Jerusalem ay kad-an di nangibaa en daida. <sup>34</sup> ‡ <sup>35</sup> Ngem intoltoloy pay da Pablo en Barnabas ed Antiok ay man-it-itdo ya mangikaskasaba si maipanggep en Apo Jesus. Ad-ado abey iib-a da ay mamati ay nakibadang en daida sin sana ay obla da.

### *Din Nansianan Da Pablo En Barnabas*

<sup>36</sup> Emey pay di piga ay agew, pag kanan Pablo en Barnabas, “En ta pasyalen din aag-i sin kailiili ay en ta nangaskasabaan si maipanggep en Apo Jesus, ta ilan ta mo kasano da.” <sup>37</sup> Asi et layden Barnabas ay itakin das Juan Marcos, <sup>38</sup> ngem sigaan Pablo, tan tinaynanas daida ed idi sin kad-an da ed Pamfilia, et adi na intoloy ay binmadang sin obla da. <sup>39</sup> Pag nalabes di songbat da, et nansisian da. Intakin Barnabas si Marcos, et nanlogan das bapor ay emey ed Cyprus. <sup>40</sup> Ngem si Pablo et pinili nas Silas ay kadwa na. Inkararagan din mamatis daida ta seg-angan ya ayowanan din Apo si daida sin am-in

† 15:18 Amos 9:11-12. ‡ 15:34 Versikulo 34 et maga sin kaad-adoan ay manuskrito sin Griego: Ngem si Silas et ninemnem na ay mantee ed Antiok.

ay emeyan da. <sup>41</sup> Pag dan emey sin kailili ed Syria ya ed Cilicia ta en da papigsaen di nemnem di mamati sin kagimogimong.

## 16

### *Din Naitapian Timoteo En Da Pablo En Silas*

<sup>1</sup> Inmey da abe ed Derbe ya ed Listra, et say nanatngan da en Timoteo ay esa ay pasolot Jesus. Mamati abe din ina na ay Judio, ngem si ama na et Gentil. <sup>2</sup> Init-it-ek di am-in ay mamati ed Listra ya ed Iconium si Timoteo, <sup>3</sup> et layden Pablo ay itakin sisya. Ngem gapo ta ammon am-in di ipogaw sidi ay Gentil si ama na, inpakogit Pablo agan-o ta adi masakitan nemnem di ib-a da ay Judio sin kailili ay emeyan da. <sup>4</sup> Pag dan pasyalen din il-ili ed isdi ta en da ipaammo sin Gentil din ninemnem di aapostol ya papangolo ed Jerusalem ta say onodan da. <sup>5</sup> Isonga pinmigma din pammatin di aag-i sin kagimogimong downan da pay omad-ad-ado si inag-agew.

### *Din Iniitaw Pablo Maipanggep Si Taga-Macedonia*

<sup>6</sup> Pag mandan da Pablo sin sakop di Frigia ya Galacia, tan inparit di Ispirito Santo di emeyan da ed Asia ay en mangaskasabas di. <sup>7</sup> Somawang da pay sin gedeng di probinsiya ay Misia, kanan da en emey da ed Bitinia, ngem adi inpalobos di Ispiriton Jesus. <sup>8</sup> Isonga nandan da ed Misia ay nandagdagas ed Troas.

<sup>9</sup> Idi nalabi, waday inpailan Diyos en Pablo ay kaman iitaw, inila na di esay lalaki ay taga-Macedonia ay pinmipika ay manpakpakaasi en sisya, “Omagadang kas nan ed Macedonia ta badangam dakami,” kanana.

<sup>10</sup> Idi siya et di, nan-anap kamis panloganan mi ay emey ed Macedonia, tan inammoan mi ay say layden Diyos ay emeyan mi ay pangikaskasabaan sin siged ay damag.\*

### *Din Namatian Lydia Ed Filipos*

<sup>11</sup> Nanlobwat kami ed Troas, et nanlogan kamis bapor ay mandagas ed Samotracia. Mapat-a pay, asi kami inkanayon ed Neapolis. <sup>12</sup> Nandisaag kamis di, et nandan kami ed Filipos ay din kadakdak-an ay ili sin doy ay distriton di Macedonia. Din kaad-adoan ay man-ilis di et taga-Roma da. Taga-Roma abe din tuturay. Et say nantetean mis piga ay agew.

<sup>13</sup> Sin agew ay pan-ibbayan, tinaynan mi din ili, et inmey kami sin benget di ginawang, tan siya kano di pankarkararagan di Judio. Tinmokdo kami et nakingalat kami sin babbabai ay nasinop sidi. <sup>14</sup> Din esa ay nannanngge et si Lydia ay taga-Tiatira ay mangilaklakos nangina ay lopot ay manbalanga. Gentil sisya ay naitatapi sin Judio ay manaydayaw en Diyos. Sin nannannggeana sin inkasaban Pablo, inturong Diyos di nemnem na ta patiena. <sup>15</sup> Et nanpabonyag da am-in ay bemeey. Pag nan ayagan dakami ay makitee en daida. “Mo kanan yo en tet-ewa ay mamatiak en Apo Jesus, en tako ed bebbeey ta say pantean yo,” kanana. Yan inpapilit na ay emey kami.

### *Din Naibalodan Da Pablo Ed Filipos*

<sup>16</sup> Sin esa ay agew sin em-emeyan mi sin pankararagan, waday inabat mi ay balasang ay bag-en ay nalaing ay manpontos, tan kinapet di anito. Begew din kinalaing na ay sana, ad-adoy pilak ay al-alaen di nakin bag-en en sisya. <sup>17</sup> Inon-onod nas dakami en da Pablo, yan kanana ay nangibogabogaw, “Da naey ay ipogaw et mansilsilbi da sin Kangatoan ay Diyos! Ibagbaga da di iyat yo ay maisalakan!” <sup>18</sup> Pigay agew di nangiyatanas di enggana ay binmonget si Pablo. Pag nan sagongen yan kanana sin anito, “Begew din panakabalin di ngadan Jesu Cristo, taynam man sisya.” Et kinmaan din anito ay dagos.

\* **16:10** Din kami et laydena ay kalien en nakiey si Lucas ay nangisolat sin libro ay nay en da Pablo.



<sup>19</sup> Idi inammoan din nakin bag-en en sisya ay namaga din pansapolan das pilak, kagamdot da en da Pablo en Silas, et in-galalad da ay nangiey sin kad-an di tuturay di ili. <sup>20</sup> Pag dan idarum sin hohowis ay dinotokan di taga-Roma yan kanan da, “Da naey ay Judio et golgoloen da din ili tako, <sup>21</sup> tan din og-ogali ay init-itdo da et kontran di linteg tako, yan adi mabalin ay onodan tako ay Romano.” <sup>22</sup> Dowan pay naitapi din kaipoipogaw ay manbogbogaw ay mangipabasol en daida. Siya et di nanlabosen din hohowis daida et pasoplit da. <sup>23</sup> Idi palalo ay sinoplisoplit da, pag dan ibalod, et inbilin da sin gowardiya ta dadlonan bantayan. <sup>24</sup> Isonga din gowardiya et in-ey nas daida sin kowarto sin ed dogo na, et inpeey na din siki da sin nalolokawan ay nandemilan di dowan ay tabla, asi na pan-ipiten.

<sup>25</sup> Sin gawan di labi pay, mankarkararag ya mankankanta da Pablo en Silas ay manaydayaw en Diyos dowan et pay dengdengngen din iib-a da ay balod. <sup>26</sup> Idi siya et di, wada et di kaeegyat ay yegyeg ay palalo ay nangikiweg sin balodan, yan nankabkatan din eeneb, dowan et nankakakaan din kadina ay naiposas sin kabalobalod.

<sup>27</sup> Idi binmangon pay din gowardiya yan inila na ay nabobokatan din eeneb, inoksot nan kampilana ta peslena koma din awak na, tan kanana en linmayaw am-in din balod. <sup>28</sup> Ngem nanbogaw si Pablo ay nangwani, “Adim peslen awak mo, tan deda Kamis na am-in!”

<sup>29</sup> Siya et di kaayag din gowardiya sin iib-a na ta ieyan da si silaw. Pag na et dalasen ay senggep sin kad-an da Pablo en Silas, yan mandokmog ay manpaypayegpeg sin sangoanan da. <sup>30</sup> Pag nan pabel-ayan daida sin bel-ayan yan kanana, “Apo, sinoy masapol ay amagek ta maisalakanak?”

<sup>31</sup> “Mamati ka en Apo Jesus et maisalakan ka, pati am-in dakayo ay bemeey,” kanan da. <sup>32</sup> Pag dan itoloy ay mangikaskasaba sin kalin di Apo en daida am-in ay bemeey. <sup>33</sup> Deda ay gawan di labi, in-ey din gowardiyas daida sin kad-an di danom ta owasana din sogat da. Makdeng di, pag et manpabonyag pati da am-in ay bemeey. <sup>34</sup> Asi na pag ayagan da Pablo en Silas sin beey da ta pakanenas daida. Et naragsaragsakan da am-in ay bemeey begew sin namatian da en Diyos.

<sup>35</sup> Mapat-a pay, binaan din hohowis di popolis ay en mangibaga sin gowardiya, “Ibolosam din ipogaw ay da sana.”

<sup>36</sup> Isonga kanan din gowardiya en Pablo, “Kanan din hohowis en maibolosan kayo en Silas. En kayo ngarud, ngem igiginek yo kod ay komaan.”†

<sup>37</sup> Ngem kanan Pablo sin polis, “Pinasoplit das dakami ay binoboyan di kaipoipogaw ay adi da binmistigal agan-o, pag dan omibalod, yan Romano kami met. Yan nay et ay layden da ay igiginek mi ay komaan mo? Adi met mabalin! Olay omali din hohowis ta daida di mangitlod en dakami ay komaan.”

<sup>38</sup> Inmey din popolis ay en nangisodsod sin hohowis, et inmegyat da sin nanngedan da ay Romano da Pablo en Silas. <sup>39</sup> Isonga inmey da sin balodan ay en manpakombaba en daida. Asi da pay inpango sin bel-ayan, et kedawen da ta komaan da sin ili ay doy. <sup>40</sup> Komaan pay da Pablo en Silas sin balodan, pag dan emey sin beey en Lydia, et nakingalat da sin mamati ay nasinop sidi ay mangipapigsa sin nemnem da. Pag dan madipos.

## 17

### *Din Golo Ed Tessalonica*

<sup>1</sup> Nandan da Pablo ed Amfipolis ya ed Apollonia, et pag dan somawang ed Tessalonica ay kad-an di sinagogan di Judio. <sup>2</sup> Say inmeyan Pablo ay nakidisdiskotil maipanggep sin kalin Diyos, tan say ogali na, et say inamag nas tolo ay Sabado. <sup>3</sup> Inlawlawag na din

† 16:36 Di esa abe ay kaiologan nina sin Griego et: En kayo ngarud et sapay koma ta natalna di nemnem yo.

naisolat sin kalin Diyos ay nangipanekekana ay masapol ay nam-osen din Messias di ligat ya matey ya pag kasin matago. “Din si Jesus ay ibagbagak en dakayo et sisya met laeng din Messias,” kanana. <sup>4</sup> Wada di Judio ay naawis sin inbagbaga na, yan sinmolot da en da Pablo en Silas. Ad-ado abe di namati ay Gentil ay nakidaydayaw en Diyos ya babaknang ay iin-a.

<sup>5</sup> Asi et maapos din Judio ay adi mamati, et inpasinop da di mankakekedse ay owat manbolbolakbol ta manngalawngaw da enggana ay nagolo am-in din omili. Pag dan en piliten din eneb di beey en Jason ay pantetean da Pablo, ta pabel-ayen da komas daida ta iey da sin panmitmitingan di kaipoipogaw. <sup>6</sup> Ngem adi da makadteng en daida, isonga in-galalad das Jason ya odom ay mamati et in-ey da sin tuturay di ili, yan kanan da ay nangibogaw, “Din ipogaw ay mangologolo sin kailili et inmali da abes na, <sup>7</sup> yan si Jason ay nay et sinangaili nas daida. Am-in di somolot en daida et labsingen da di linteg di Emperador ay mangwani en waday natken ay ari ay manngadan si Jesus.” <sup>8</sup> Idi dinngen din tuturay ya din kaipoipogaw din inpabasol da ay sana, peteg ay madanagan da. <sup>9</sup> Et pinapiyansa das da Jason ya din iib-a na ay mamati, pag dan ibolosan.

### *Manang-awat Din Judio Ed Berea*

<sup>10</sup> Idi nalabi pay, pinalobwat din aag-i da Pablo en Silas ta emey da ed Berea. Somawang da pay sidi, inmey da sin sinagogan di Judio. <sup>11</sup> Din Judio ed Berea et mas manang-awat da mo din taga-Tessalonica, tan laydelayden da ay manmannge sin kalin Diyos, yan inag-agew ay basbasaen da ta ilaen da mo tet-ewa din it-itdon Pablo. <sup>12</sup> Isonga ad-ado da di namati, pati di ad-ado ay Gentil ay lallalaki ya babaknang ay iin-a.

<sup>13</sup> Ngem idi inammoan din Judio ed Tessalonica ay mankaskasabas Pablo ed Berea, inonod das di, et inlogi da ay manogsog ya mangolo sin kaipoipogaw. <sup>14</sup> Isonga din mamati et inpalobwat das Pablo ay dagos ta emey sin benget di baybay, ngem nataynan da Silas en Timoteo ed Berea. <sup>15</sup> Din kakoyog Pablo et initlet da enggana ed Athens, pag dan somaa ay en mangibaga sin intogon Pablo ay dalasen koman da Silas en Timoteo ay en manteng en sisya.

### *Din Kaad-adon Di Sinan Didiyos Da Ed Athens*

<sup>16</sup> Sin kawadan Pablo ed Athens ay manman-ed en da Silas, palalo di sakit di nemnem na sin nangilaana sin ad-ado ay sinan didiyos da. <sup>17</sup> Isonga inmey sin sinagogan di Judio ta makidiskotil en daida ya din Gentil ay manaydayaw en Diyos. Inag-agew abe ay in-inmey sin kasinsinopan di ipogaw ay makingalngalat ya makidiskotil sin ipogaw ay wadas di. <sup>18</sup> Wada abe di mamaestron di Epicureo ya Estoico\* ay nakidiskotil en sisya. Di odom et kanan da en, “Sino ngin di ibagbagan nan mansalsalawasaw?” Dowan kanan di odom, “Kamanan ibagbaga din didiyos da sin addawi ay ili.” Kanan da di, tan inkaskasaban Pablo di maipanggep en Jesus ya din kasin matagoan di ipogaw.†

<sup>19</sup> Idi siya di, in-ey das sisya sin kasinsinopan di aam-a ya papangolon di ili ay kanan da en Areopagus, yan kanan da en sisya, “Mo mabalin ta ipaammom kod en dakami din baro ay it-itdom, <sup>20</sup> tan di odom ay inbagbagam et magay dindinng mis kaman nidi, et layden mi ay ammoen din laydena ay kalien.” <sup>21</sup> Kanan da di, tan am-in di omili ed Athens, olay din napos natken ay ili ay nakiili en daida, iag-agew da ay mangibagbaga ya manmannge si baro ay mait-itdo.

\* **17:18** Din Epicureo, kanan da en gandat ay nawada din lobong, maga di namarsua. Kanan da abe en mo matey di ipogaw, mamaga abe di ab-abiik na. Isonga din panggep koman di ipogaw sin nay biyag, ta maganasan si kankanayon ay tongpalena di am-in ay aklongena. Din Estoico abe et kanan da en mamaga di ab-abiik di ipogaw sin kateyana. Ngem kanan da en onodan koman di ipogaw di wada sin nemnem na ay adi masangsangaw sin liknaen di awak na ay sakit ono pan-ganasan, tan din nemnem koma di mangituray sin baklang. † **17:18** Anastasis et say pangikalina di Griego din kasin katagoan, isonga nankamali ngin di taga-Athens ay mangwani en da Jesus en Anastasis di ngadngadan di doway ay diyos.

<sup>22</sup> Pag pomika si Pablo sin sangoanan da yan kanana, “Dakayo ay taga-Athens, ammok kayman ay es-esten yo ay manaydayaw sin didiyos yo, <sup>23</sup> tan idi nannandanak sin ili yo ay mamoyboya sin pandaydayawan yo sin kadiyodiyos, wada di dinatngak ay altar ay way naisolat ay kanana, ‘Para sin diyos ay adi mi am-ammo.’ Din Diyos ay doy ay daydayawen yo olay adi yo am-ammo et sisya di ipaammok en dakayo ed wani. <sup>24</sup> Sisya din Diyos ay namarsua isnan daga ya din am-in ay wadas na, yan adi manbeey sin timplo ay inamag di ipogaw, tan sisya di Apo sin ed langit ya sin daga. <sup>25</sup> Maga abe di masapol na si mabalin ay ibadang tako ay ipogaw en sisya, tan sisya met laeng di mangidawat si biyag, leng-ag, ya am-in ay masapol tako. <sup>26</sup> Es-esa ay ipogaw di pinarsua na sin damo ta say mapoan di nankinalasi ay ipogaw isnan labaw di daga. Inkeddeng na abe ed nabaon di timpo ay panturayan di esa ya esa ay nasyon ya din beddeng di ili da. <sup>27</sup> Say inamag na di ta anapen di ipogaw sisya bareng mo datngan das sisya sin pankapkapokapan da, tan baken met naiaddawi en datako. <sup>28</sup> Tan wada di nangwani, ‘Sisya di mangidawat si biyag en datako, yan sisya di mangay-ayowan sin pandad-anan ya katagoan tako.’

Wada abe di odom ay nakaadal ay iib-a yo ay nangwani, ‘Anak na met datako.’

<sup>29</sup> Mo tet-ewa ngarud ay an-ak Diyos datako, adi tako koman kanan en mais-o di kinadiyos na sin sinan didiyos ay naamag si balitok ono palata ono bato ay ninemnem di nalaing ay ipogaw ay amagen. <sup>30</sup> Ed idi, inan-anosan Diyos din natnatken ay inam-amag di ipogaw, tan daan da pay laeng ammoan sisya. Ngem ed wani, inbilina ay masapol ay pandokogan am-in di ipogaw din lawa ay am-amagen da. <sup>31</sup> Tan waday inkeddeng Diyos ay agew ay pangokomana sin am-in ay ipogaw isnan lobong. Wada abe di ipogaw ay pinili na ay mangokom ay kosto en daida, yan pinaneknekana ay sisya di pinili na babaen sin kasinan nanagoan en sisya.”

<sup>32</sup> Sin nanngaan da sin kanan Pablo en wada di kasin natago ay ipogaw, nilaslasoy di odom down aben kanan di odom, “Layden mi ay dengdengngen din it-itdom ay sana si mamingsan.” <sup>33</sup> Pag komaan si Pablo. <sup>34</sup> Ngem wada pay di sinmolot en sisya ay namati en Jesus. Wada si Dionisius ay esay pangpangoan di Areopagus, waday babai ay manggadan si Damaris, ya wada abey odom.

## 18

### *Din Naamag En Pablo Ed Corinto*

<sup>1</sup> Idi siya di, kinmaan si Pablo ed Athens, et inmey ed Corinto. <sup>2</sup> Dinatnganas di di Judio ay taga-Pontus ay manggadan si Aquila ya din asawa na ay si Priscilla. Kadatdateng da ay napod Italia, tan inbilin Emperador Claudius ay komaan am-in di Judio ed Roma ay say kapital di Italia. Inmey si Pablo ay en namasyal en daida, <sup>3</sup> yan gapo ta iso nas daida ay man-amag si tolda, nakitetee ya nakiob-obla en daida. <sup>4</sup> Sinabado pay yan en nakidisdiskotil sin sinagoga ta awisena koma di Judio ya Gentil ta mamati da en Jesus.

<sup>5</sup> Idi sinmawang pay da Silas en Timoteo ay napo ed Macedonia, in-ag-agew Pablo ay mangikaskasaba ay mangipaneknek sin Judio ay si Jesus din Messias. <sup>6</sup> Ngem idi kinontra ya pinalawlawan di Judio sisya, inkelyag nan bado na ta say pangammoan da ay makaoway da sin dosa da yan kanana, “Mo dosaen Diyos dakayo, gon-gona yo dedan! Baken kon basol. Manlogi ed wani, enak itdoan di Gentil.”

<sup>7</sup> Pag taynan Pablo si daida, et en nakibeey en Ticius Justus ay Gentil ay manaydayaw en Diyos. Din beey na et naiidking sin sinagoga. <sup>8</sup> Waday si Crispus ay pangolon di sinagoga ya am-in da ay bemeey et namati da en Jesus. Ad-ado abe di taga-Corinto ay namati sin nanngaan da sin inkaskasaban Pablo, et nanpabonyag da.

<sup>9-10</sup> Sin esay labi, iniitaw Pablo ay kanan Apo Jesus en sisya, “Adi ka emeg-egyat, maga di manakit en sik-a, tan kadkadwaek sik-a. Ipapasnek mo ngarud ay mangaskasaba ay

adi ka gomiginek, tan ad-ado pay laeng di omilis na ay manbalin si ipogaw ko.” <sup>11</sup> Isonga nantetees Pablo sidi si esa ya kagodwa ay tawen ay nan-it-itdo si kalin Diyos.

<sup>12</sup> Idi naisokat pay si Gallio ay man-gobernador ed Akaya, nantotolag di adi mamati ay Judio ay nanpap en Pablo, et in-ey da sin korti ta idarum da sin gobernador. <sup>13</sup> Kanan da, “Din ipogaw ay nay et aw-awisena di kaipoipogaw ta di iyat da ay mandayaw en Diyos et maikontra sin linteg.”

<sup>14</sup> Istay komali si Pablo, ngem dowan et kanan Gallio sin Judio, “Mo wada koma di basol nisa ono lawa ay inamag na, an-anosak adi kayman ay mannge en dakayo ay Judio. <sup>15</sup> Ngem gapo ta maipanggep anggoy sin kaiol-ologan di kali ya ngadngadan di ipogaw ya din linteg ay on-onodan yo di panririan yo, olay dakayo di makaamos sa, tan sigaak.” <sup>16</sup> Pag na et ipabela sin korti. <sup>17</sup> Siya et di, din Gentil ay mamoyboya et kagamdot da en Sostenes ay pangolon di sinagoga et sinoplit da sin bel-ayan di korti, ngem si Gallio et binaybay-anas daida.

### *Din Nantaolian Pablo Ed Antiok*

<sup>18</sup> Nabayag pay laeng si Pablo ed Corinto. Pag nan taynan din aag-i ay mamati, et inmey ed Cenkrea ay kinoykoyog da Aquila en Priscilla. Idi sinmawang das di, nanpakalbo si Pablo ta say pangipailaana ay natongpal din inkari na en Diyos.\* Pag dan manlogan si bapor ay emey ed Syria. <sup>19-21</sup> Maspad da pay ed Efeso, inmey si Pablo sin sinagoga et nakidiskotil sin Judio. Inpakodan da ta makitetees di, ngem sinigaan Pablo. “Mo say layden Diyos, asiak mantaoli,” kanana. Pag nan taynan da Aquila en Priscilla, et manlogan kasin sin bapor ay emey ed Syria.

<sup>22</sup> Somawang pay ed Cesarea ay esay ilin di Syria, nandad-an ay tinmikid ed Jerusalem ta en manpasyal sin gimong, asi pag manballalong ed Antiok. <sup>23</sup> Idi nabaybayag isdi, nanlobwat kasin ay ena pasyalen din kailili sin sakop di Galacia ya Frigia ay mangipapigpigma si nemnem di mamati.

### *Din Nan-itdoan Apollos Ed Efeso Ya Ed Corinto*

<sup>24</sup> Dowan pay et wada di esa ay Judio ay taga-Alexandria ay inmey ed Efeso. Di ngadana et si Apollos. Nalaing sisya ay man-itdo, ya ad-ado abey ammo na maipanggep sin inpaisolat Diyos. <sup>25</sup> Nagaget ay man-itdo si maipanggep en Apo Jesus, yan tet-ewa abe di inbagbaga na, tan waday nangitdo en sisya ed idi. Ngem asi et din ammo na anggoy et din init-itdon Juan sin deda ay nanbonbonyagana. <sup>26</sup> Inlogi na ay mangaskasaba sin sinagoga, yan natoled abe ay mankali. Sin nanngaan da Priscilla en Aquila, inayagan das sisya sin beey da, et initdoan da ay kosto sin adi na ammo ay maipanggep en Jesus ya din iyat Diyos ay mangisalakan si ipogaw. <sup>27</sup> Idi layden pay Apollos ay emey sin probinsiya ay Akaya, inaboloyan din aag-i ay mamati ed Efeso sisya, et nansolat da sin mamati ed Akaya ta awaten das sisya. Idi sinmawang sidi, ad-adoy badang na en daida ay namati babaen sin seg-ang Diyos. <sup>28</sup> Tan nalaing ay makidiskotil sin Judio ay il-ilan di ipogaw, yan inabak nas daida ay nangipaneknek sin kalin Diyos ay si Jesus din Messias.

## 19

### *Din Sinenggepan Di Ispirito Santo Sin Taga-Efeso*

<sup>1</sup> Idi deda si Apollos ed Corinto, inmey si Pablo ed Efeso ay napo ed Frigia ay nandad-an sin kadondontogan. Idi sinmawang sidi, waday dinatngana ay papasolot, <sup>2</sup> yan pinoot na en daida, “Ay inawat yo din Ispirito Santo sin namatian yo?”

“Aga, magay dindinng mi sin kanam en Ispirito Santo,” kanan da.

<sup>3</sup> “Mo siya sa, intoy ison ngarud di nanpabonyagan yo?” kanan Pablo.

“Din iyat di bonyag ay initdon Juan,” kanan da.

\* **18:18** Bilbilang 6:18.

<sup>4</sup> Pag kanan Pablo, “Din initdon iman Juan et kanana en masapol ay manbabawi di ipogaw sin basbasol da ta asi da manpabonyag. Ngem kanana abe en masapol ay mamati da sin omonod en sisya ay si Jesus.”

<sup>5</sup> Sin nanngenan das di, nanpabonyag da kasin ay nangipaammo ay si Jesus di Apo da.

<sup>6</sup> Pag kapayen Pablo si daida, et sin-gep di Ispirito Santo. Asi da pag mankali si natken ay kalkali dowan da aben ibagbaga din inpabagan Diyos en daida. <sup>7</sup> Di kabibilang da et emey ay sinpo ya dow a.

<sup>8</sup> Tolo ay bowan pay di nan-it-itdoan Pablo sin sinagoga, yan natoled ay nakidisdiskotil en daida maipanggep sin panturayan Diyos ta maawis da koma ay mamati. <sup>9</sup> Ngem wada di odom ay kinmenteg di nemnem da ay sinigaan da ay mamati, et pinalawlaw da din pammatin di Cristiano sin iib-a da ay makigimimong. Isonga tinaynan da Pablo ya din sinmolsolot en Jesus, et inmey da sin iskowilaan Tirannus. Say nakidisdiskotilan Pablo si inag-agew <sup>10</sup> enggana ay inmey di doway tawen. Isonga am-in din omili sin probinsiya ay Asia, olay Judio ya Gentil, dinnge da din kalin Diyos maipanggep en Apo Jesus.

### *Din Naamag Sin Pito Ay Anak Sceva*

<sup>11</sup> Palalo ay nakaskasdaaw din milagro ay inam-amag Diyos babaen en Pablo. <sup>12</sup> Tan olay panyo ono trapo ay osal na, mo iey da sin mansaksakit ya kinapet di anito, nailatonan da dowan aben tinaynan din aanito si daida. <sup>13</sup> Asi et wada da di Judio ay manlikliked ay mangipakpakaan si aanito, yan pinadpadas da ay nangos-osal sin ngadan Jesus. Din in-inyat da et kanan da, “Sik-a ay anito, begew din panakabalin di ngadan Jesus ay ikaskasaban Pablo, komaan ka.” <sup>14</sup> Waday pito ay an-ak Sceva ay esa ay pangolon di papadin di Judio ay nangiyat sidi. <sup>15</sup> Ngem sinongbatan din anito si daida ay nangwani, “Si Jesus et am-ammok, si Pablo abe et am-ammok, ngem dakayo pay, sino kayo?” <sup>16</sup> Pag et kadepap din kinapet di anito en daida, yan palalo di inyat na ay nangibaw en daida enggana ay naabak da am-in. Et nalabolabosan ya nasogasogatan da ay linmayaw sin beey na.

<sup>17</sup> Idi dinngen din omili ed Efeso, Judio ya Gentil, din naamag ay doy, inmegyaegyat da et binigbig da din ngadan Jesus. <sup>18</sup> Yan ad-ado di mamati ay nangipodpodno sin iib-a da sin in-inyat da ay nan-gegey, <sup>19</sup> dowan di odom et tinopog da din libro da et pinooan da ay boyboyaen di kaipoipogaw. Idi binilang da din banol di napooan, inmey ay limapolo ay libo sin pilak da.\* <sup>20</sup> Begew sin am-in dana ay naam-amag, nandinamag din kalin Diyos maipanggep en Apo Jesus, dowan aben inmad-ado di namati en sisya.

### *Din Golo Ed Efeso*

<sup>21</sup> Idi siya di, ninemnem Pablo ay mandan sin probinsiya ay Macedonia ya Akaya ay emey ed Jerusalem. Inbaga na abe ay mo makdeng di, masapol ay en manpasyal ed Roma. <sup>22</sup> Nangon-onaena ngarud ed Macedonia da Timoteo en Erastus ay dow a ya kabadbadang na, yan nabay-an sisya sin probinsiya ay Asia ay kad-an di Efeso.

<sup>23</sup> Siya di di binmalaan di kaeegyat ay golo ed Efeso maipanggep sin pammatin di Cristiano. <sup>24</sup> Tan wada di lalaki ay manngadan si Demetrius ay nalaing ay manpanday si palata.† Ad-ado abe di laglagboana ay mangam-amag si sinan titimplon di babai ay diyos da ay si Artemis, yan dakdake abe di ganansiya da. <sup>25</sup> Isonga inpasinop Demetrius din laglagboana ya din iib-a na ay manpanpanday yan kanana, “Gagait ko, ammo yo ay ad-adoy pilak ay al-alaen tako sin obla tako ay nay. <sup>26</sup> Inil-ila tako abe si Pablo, ya dindinnge tako di it-itdo na sin kaipoipogaw. Kanana en baken tet-ewa ay diyos di inamag di ipogaw, yan ad-adoy inaw-awis na isnan ed Efeso ya istay am-in ay ili isnan probinsiya ay Asia. <sup>27</sup> Adi pay mo mapalawlaw da di obla tako ay nay,

\* **19:19** Di esa ay drachma ay pilak da et banol di poldiya. † **19:24** Baken din pilak mo adi et din somigondas balitok.



awni kadi et mamaga di manlako. Yan baken ang-anggoy nina, mo adi et mamagay kowintan di timplon di nangato ay diyos tako ay si Artemis. Olay si Artemis ay mismo ay daydayawen da sin kailili isnan probinsiya ay Asia ya enggana sin intiro ay lobong, madadael abe iman din kinadiyos na.”

<sup>28</sup> Sin nanngan da sin kanan Demetrius ay sana, palalo ay binmonget da, yan kabanogaw da ay nangwani, “Madaydayaw si Artemis ay diyos tako isnan Efeso!” <sup>29</sup> Adi nabayag yan enggay nagolo din am-in ay omili. Kadepap da en da Gaius en Aristarkus ay kakoyog Pablo ay taga-Macedonia. Pag da et katantanagtag ay mangigalalad sin panboyboyaan di omili. <sup>30</sup> Si Pablo abe et laydena ay emey sidi ta makingalat sin kaipoipogaw, ngem adi inpalobos di mamati. <sup>31</sup> Wada abey tuturay di probinsiya ay gayyem Pablo ay nangibaas ipogaw ay en nangwani en sisya, “Adi ka kod paaben manpail-ila sin panboyboyaan di ipogaw.”

<sup>32</sup> Dowan pay din kaipoipogaw et nalabes ay ngomalangalawngaw da ay nantinetken ya mankokontra di ibogbogaw da, tan di kaad-adoan en daida et adi da ammo di poon ya gapon di nasinopan da. <sup>33</sup> Isonga din Judio et inapika da di esa ay ib-a da ay si Alexander sin sangoanan di kaipoipogaw ta lawaganas daida, tan emegyat da tan mo pabasolen di kaipoipogaw si daida. Nansinyas si Alexander ay mangipaginek koma sin ipogaw. <sup>34</sup> Ngem idi inlasinan da ay Judio sisya, nan-es-esaen dan ibogaw da si nganggani ay doway oras ay mangwani, “Madaydayaw si Artemis ay diyos tako isnan Efeso.”

<sup>35</sup> Pag bomala din mayor di ili. Idi inpaginek nas daida, kanana, “Iib-a ay taga-Efeso, ay ken wada di olay esay ipogaw ay adi mangammo ay datako di mangay-ayowan sin timplon di madaydayaw ay si Artemis ya din bato ay kais-is-oana ay natekdag ay napod langit ed nabaon? <sup>36</sup> Maga di mabalin ay mangwani en baken tet-ewa na, isonga iginek tako iman ay adi tako maag-agagan. <sup>37</sup> Din ipogaw ay in-ali yos na et maga met di inakew da sin timplo tako, yan adi da aben pinalawlawwa din diyos tako. <sup>38</sup> Mo si da Demetrius pay ya din iib-a na ay manpanpanday, mo wada di pangigab-itan das basol di ipogaw, wada di hohowis ya tuturay di ili sin opisina da. Say en da koman pangidaruman. <sup>39</sup> Mo wada di odom ay layden yo ay maibaga, awni kod ta asi tako ngalaten sin kosto ay miting tako. <sup>40</sup> Tan nay madanaganak, tan mo idarum das datako sin papangolo tako ed Roma manbegew din nan-goloan yo ay nay, sino ngin di ipambal tako, tan maga met di kosto ay nan-gapoana?” <sup>41</sup> Sin nangwanianas di, pag nan ibaga ta mansisian da.

## 20

### *Din Nantaolian Da Pablo Ed Macedonia Ya Ed Grecia*

<sup>1</sup> Idi nakdeng din golo ay doy, inpasinop Pablo din mamati ta papigsaena di nemnem da. Nanpakada, pag komaan ay emey ed Macedonia. <sup>2</sup> Pinaspasyal na din mamati sin kailili isdi ay mangipapigpigma en daida, asi pag emey ed Akaya ay makwani abe en Grecia. <sup>3</sup> Nantetees di si tolo ay bowan, pag nan kanan en manlogan si bapor ay emey ed Syria. Ngem idi manlobwat koma, inammoana ay nantotolag di Judio ay mamse en sisya, isonga inkotiwitiw na ay mandan ed Macedonia. <sup>4-5</sup> Idi sinmawang kami ed Filipos, inmon-ona din kakoyog mi ay maneseed en dakami ed Troas. Waday si Sopater ay anak Pirrus ay taga-Berea, da Aristarkus en Secundus ay taga-Tessalonica, si Gaius ay taga-Derbe, si Timoteo, ya da Tikicus en Trofimius ay taga-Asia. <sup>6</sup> Makdeng pay din fiesta ay panganan da sin tinapay ay magay labadura na, nanlogan kamis bapor ay mangonod en daida. Emey pay di limay agew, asi kami datngan din iib-a mi ed Troas. Et nakadominggo kamis di.

### *Din Natekdagan Eutikus Ed Troas*

<sup>7</sup> Sin sedem di Sabado, nan-gimong kami am-in ay mamati ta kanen mi din tinapay ay pangnemneman mi sin nateyan Jesus. Pag man-itdos Pablo enggana sin gawan di labi,

tan kanana en manlobwat sin kabigatana. <sup>8</sup> Ad-adoy silaw sin kowarto sin kayang ay nasinopan mi. <sup>9</sup> Wada abe di baro ay si Eutikus ay tinmotokdo sin tawa. Idi nabayag di nankalkalian Pablo, masmaseyep, neyneyna yan naseyep, et pag matekdag ay napo sin maikatlo ay galadon di beey. Idi en da binidking, enggay natey. <sup>10</sup> Asi et binmaba abe si Pablo, et ena sinakli, pag nan kanan, “Adi kayo madanagan, tan matmatago.” <sup>11</sup> Pag kasin somakyab si Pablo et mangan kami. Nakakan kami pay, intoltoloy na ay makingalngalat enggana ay mapat-a, asi kami pay komaan. <sup>12</sup> Din baro pay et insaa da sin beey da, yan peteg di layad da tan natagos sisya.

### *Din Inbagan Pablo Sin Papangolon Di Mamati Ed Efeso*

<sup>13</sup> Nansian kami en Pablo et en kami\* nanlogan si bapor ay emey ed Assos downan pay mandad-an si Pablo, tan say nantolagan mi ay dag-osen mis sisya sidi. <sup>14</sup> Idi nanabat kami ed Assos, nakilogan en dakami, et inmey kami ed Mitilene. <sup>15</sup> Mapat-a pay, nanlobwat kamis di, et nilabsan mi ed Kios. Sin maikadwa ay agew, naspad kami ed Samos, et sin katlo na pay, nandagas kami ed Miletus. <sup>16</sup> Adi kami naspad ed Efeso tan into et mo mataktak kamis di sin probinsiya ay Asia, tan man-gaganat si Pablo ay somawang ed Jerusalem ta mo mabalin, abotana din fiesta ay makwani en Pentecostes.

<sup>17</sup> Isonga sin kawada mi ed Miletus, binaan Pablo di emey ed Efeso ay en mangayag sin papangolon di gimong. <sup>18</sup> Idi sinmawang da, kanana en daida, “Ammo yo di kabibiyag ko sin nakiteteak en dakayo manlogi sin damo ay inmaliak isnan probinsiya ay Asia. <sup>19</sup> Tinongtongpal ko din inbilbilin Apo Jesus ay adi manpangpangato. Nanlolowaak abe sin sakit di nemnem ko begew sin namalpaligatan di iib-ak ay Judio en sak-en ay nanpaplanoan da ay pomse koma. <sup>20</sup> Ammo yo abe ay maga di binokbokodak ay pansigdan yo sin nangaskasabaak ya nangit-itdoak en dakayo sin mitmiting tako ya olay sin bebeey yo. <sup>21</sup> Dadlonak aben intogotogon sin iib-ak ay Judio ya din Gentil ay masapol ay dokogan da di basol da ta sagongen das Diyos ya mamati da en Jesu Cristo ay Apo tako.

<sup>22</sup> “Ed wani pay, emeyak ed Jerusalem, tan say inbilin din Ispirito Santo en sak-en, yan adiak ammo mo sino di mapasamak en sak-en sidi. <sup>23</sup> Ammok anggoy din indadaan di Ispirito Santo en sak-en sin kailili ay pinasyal ko en awni et maibalod ya mapaligatanak. <sup>24</sup> Ngem olay mateyak, tan din banolek et baken din biyag ko mo adi et ta kedngek am-in din paoblan Apo Jesus en sak-en ay mangipaneknek sin siged ay damag maipanggep sin seg-ang Diyos.

<sup>25</sup> “Dakayo ay nakiteteak sin nangikaskasabaak maipanggep si panturayan Diyos, ammok ay adi tako kasin man-asiila. <sup>26</sup> Isonga dadlonak ibaga en dakayo ed wani, mo wada en dakayo di maisian en Diyos ta madosa, baken kon basol, <sup>27</sup> tan inset ko ay nangitdo en dakayo sin am-in ay layden Diyos ay magay binokbokodak.

<sup>28</sup> “Siliban yo ngarud di iyat yos biyag yo, downan yo aben banbantayan din iipogaw ay intalek di Ispirito Santo en dakayo, tan say biyang yo ay papangolo da. Ay-ayowanan yo si kosto din ipogaw en Diyos, tan inisbot na din dadan di Anak na. <sup>29</sup> Tan ammok ay mo komaanak, wada di en man-itdo en dakayos natnatken. Kaman dan maangat ay animal ay mamse si talaken, tan kibolen da din pammatin di ipogaw ay ay-ayowanan yo, yan adi da seg-angan daida. <sup>30</sup> Wada abey naitatapi en dakayo ay mamati ay awni et man-itdos et-etek ta awisen da di mamati ta daida di soloten da. <sup>31</sup> Siliban yo ngarud. Nemnemnemen yo ay indadaan ko am-in en dakayo sin tolo ay tawen ay nakiteteak en dakayo, olay kaagawan ya labi, downanak aben nanlolowa si dakdake ay layad ya seg-ang ko en dakayo.

<sup>32</sup> “Ed wani pay, italek kos dakayo en Diyos ya sin inkari na ay seg-anganas dakayo. Sisya di manakabalin ay mangipapigsa sin pammati yo ya mangidawat sin bibindisyon

\* **20:13** Din olog di kami et da Lucas.

ay inkari na en daida am-in ay nanbalinenas ipogaw na. <sup>33</sup> Mo sak-en pay, adiak nankedkedaw si pilak ono bado sin olay sino en dakayo. <sup>34</sup> Ammo yo ay sak-en ay mismo di nan-ob-obla ay nangnang-a sin kasapolak ya din kasapolan di iib-ak ay kakoykoyog ko. <sup>35</sup> Say inamag kos kanayon ta waday tadonen yo, tan masapol ay man-gaget tako ay man-obla ta waday ibadang tako sin makasapol. Nemnemnemen tako koma din kanan Apo Jesus en, ‘Dakdake din ragsak di man-idawat mo din maidawtan.’ ”

<sup>36</sup> Sin nangwanian Pablo sisi, pag dan mandokmog am-in, et mankararag si Pablo. <sup>37</sup> Asi da pay maiog-ogaan ay mangawe ya mangongo en sisya, <sup>38</sup> tan peteg ay mansakit di nemnem da sin nangwaniana en adi da kasin man-asiila. Asi da pag itlod enggana sin kad-an di bapor.

## 21

### *Din Inmeyan Pablo Ed Jerusalem*

<sup>1</sup> Idi nanlogan kami en Pablo ay manaynan en daida, nandagas kami ed Cos. Sin kabigatana pay, inmey kami ed Rodes, sin katlo na, ed Patara, et say nandisaagan mi. <sup>2</sup> Asi mi dinatngan di esa ay bapor ay emey ed Fenicia, et nanlogan kami di. <sup>3</sup> Sin kannigid, matamang ed Cyprus sin nalabsan mi, pag kami et mandagas ed Tiro ay esay ili sin probinsiya ay Syria. Nandisaag kami di, tan say nangipadisaagan da sin kalga. <sup>4</sup> Datngan mi pay di papasolot Jesus, nakadominggo kami ay nakitetee en daida. Inpidwapidwa da ay mangidadaan en Pablo ay adi na koman itoloy ay emey ed Jerusalem, tan inpaammon din Ispirito Santo en daida ay mapaligat sisi. <sup>5</sup> Ngem idi nakdeng di nantetean mis di, inkanayon mi pay dedan. Daida am-in ay mamati, pati din babbabai ya din an-ak da et initlod das dakami enggana sin baybay ay wada sin beddeng di ili da. Et nandokmog kami di sin benget di baybay yan nankararag kami. <sup>6</sup> Asi kami nanpipinakada, et nanlogan kami kasin sin bapor dowan da pay somaa.

<sup>7</sup> Somawang kami pay ed Tolemais sin napoan mi ed Tiro, nandisaag kami, et en kami pinasyal din mamati en Jesus sisi. <sup>8</sup> Sin agsapa pay, kinmaan kami, et inmey kami ed Cesarea. Idi sinmawang kami di, en kami nakitetee sin beey Felipe ay esa sin pito ay pinili da ed Jerusalem ed idi. Din obla na abe et mangikaskasaba sin siged ay damag. <sup>9</sup> Wada abe di opat ay an-ak da ay babassang ay mamadto. <sup>10</sup> Idi nganngani di esay dominggo mis di, sinmawang di mamadto ay napod Judea ay manngadan si Agabus. <sup>11</sup> Ina na din balikes Pablo, yan inbalod na sin mismo ay takkay ya siki na. Pag nan kanan, “Siya na di kanan di Ispirito Santo, ‘Kaman nina met laeng di iyat di Judio ed Jerusalem ay mamalod sin nakin oka sin balikes ay nay, asi da pay ipolang sin Gentil.’ ”

<sup>12</sup> Sin nanngean mis di, nanpapkakaasi kami ya din odom ay wadas di ta adi emey si Pablo ed Jerusalem. <sup>13</sup> Ngem sinongbatana yan kanana, “Adi yo og-ogaan sak-en, tan pasaksakiten yon nemnem ko. Nakasaganaak ay mabalod ya olay mateyak ed Jerusalem para en Apo Jesus.”

<sup>14</sup> Idi adi kami makabaliw sin nemnem na, insaldeng mi, pag min kanan, “Sapay koma ta din layden Diyos di matongpal.”

<sup>15</sup> Pag kami mansagana, et emey kami ed Jerusalem. <sup>16</sup> Wada abe di papasolot Jesus ay taga-Cesarea ay nakeey. Idi sinmawang kami, in-ey das dakami sin beey Mnason ay napod Cyprus ay esa en daida ay sigod ay namati, ta say pantean mi kano.

### *Din Inpaamag Santiago En Pablo*

<sup>17</sup> Idi sinmawang kami di, maragsakan din aag-i ay nangawat en dakami. <sup>18</sup> Sin napat-aana, inmey kami en Pablo ay en mamasyal en Santiago. Wada abes di am-in din papangolon di mamati. <sup>19</sup> Idi nakisamano si Pablo en daida, dinad-at na din am-in ay inam-amag Diyos babaen sin ena nangaskasabaan en daida ay Gentil.

<sup>20</sup> Sin nanngean das di, dinayaw da am-in si Diyos. Ngem asi da kanan en Pablo, “Agi mi, layden mi mo nemnemem abe ay kalibolibo di bilang di Judio ay namati en Jesus, yan napinget da abe ay mangonod sin linteg tako ay Judio. <sup>21</sup> Dinngge da ay init-itdoam kano din Judio ay manbeey sin kailiilin di Gentil ta dokogan da din bilbilin Moses ya adi da kogiten din an-ak da ya adi da aben onodan din ogali tako ay Judio. <sup>22</sup> Intoy iyat tako pay ta ammoen da ay baken tet-ewa, tan dadlon dan madamag ay wada kas na? <sup>23</sup> Din wadas nemnem mi et siged mo siya na di amagem. Wada en dakami di opat ay lalaki ay nganngani ay makdeng ngilin da ay inkari da en Diyos. <sup>24</sup> Makeey ka en daida sin Timplo ta manpaila ka sin padi ya maitapi ka sin amagen da sin pito ay agew ay pangikdengn da. Mo makdeng di, asi ka bayadan din masapol ay paltien da ta mabalin ay koskosan di padi din toktok da ay mangipaila ay nakdeng di inkari da.\* Say pangammoan di ipogaw ay din nadamag da maipanggep en sik-a, owat etek di, tan maila dedan ay kosto di iyat mo ay manongpal sin linteg tako. <sup>25</sup> Mo maipanggep abe sin Gentil ay mamati, da naey ay bilin anggoy di insolat mi en daida ay masapol ay tongpalen da. Adi da isida di naidaton sin sinan didiyos, adi da aben mansidas dada ono napososan ay animal, ya adi da aben daddaagen di baken dan asawa.” Siya di di inbagan da Santiago en Pablo.

<sup>26</sup> Isonga sin kaagsapaana, kinoyog Pablo din opat ay lalaki ay doy, et naitapi sin inamag da ay nangilogi ay manglinis sin awak da. Asi da inmey sin Timplo, et inbagan Pablo sin padi din pitsa ay kakedngana, ta say panpaltian ya panpakalboan din opat ay gait na.

### *Din Nadpapan Pablo*

<sup>27</sup> Idi nganngani ay makdeng din pito ay agew, wada da di Judio ay napo ed Asia ay nangila en Pablo sin Timplo. Sinogsogan da din kaipoipogaw ta pabongeten da, asi da depapen si Pablo <sup>28</sup> ay mangibogbogaw, “Gagait mi ay Israelita, pakibadang kayo! Tan si naey di en mangit-itdo sin am-in ay ipogaw en lawa tako ay Judio ya lawa abe di linteg Moses ya din Timplo tako. Yan nay sinepsep na ay nangipakadodogis sin Timplo tako, tan inpasgep na di Gentil.”† <sup>29</sup> Say kanan da di, tan inil-ila da ay inkoykoyog Pablo di esa ay taga-Efeso ay si Trofimius ed Jerusalem, yan kanan da en inpasgep na abes sisya sin Timplo.

<sup>30</sup> Baken nabayag yan nagolo am-in din omili, et kasintatagtag da ay emey sin Timplo. Kagamdot da en Pablo et kaigalalad da ay mangibala. Pag da et in-eb. <sup>31</sup> Padpadasen da pay ay mamse en sisya, waday nangipadamag sin komander di sosoldado ay Romano ay man-gogolo din am-in ay omili. <sup>32</sup> Dagos et kaayag sisya sin kakapitan ya sosoldado, et tomanagtag da ay emey sin kad-an di kaipoipogaw. Sin nangilaan di ipogaw sin komander ya din sosoldado, kaisaldeng da ay manesdespeg en Pablo. <sup>33</sup> Pag tiliwen din komander sisya, et pabalod na si doway kadina. Asi na pay kanan sin kaipoipogaw, “Sino din ipogaw ay nay? Sinoy inamag na?” <sup>34</sup> Ngem nankinalasi din inbogbogaw da ay manongsongbat, dowan dan ngomanalawngaw, isonga magay iyat na ay mangammo sin katet-ewa na. Idi siya et di, inbilina sin sosoldado ta iey das Pablo sin kampo da. <sup>35</sup> Idi insawang da sin agdan, kapilitan ay ikayang da, tan gamboloken din kaipoipogaw si bonget da <sup>36</sup> yan nakikiey da en daida ay mangibogbogaw, “Peslen tako!”

### *Din Nanongbatan Pablo Sin Judio*

<sup>37</sup> Idi istay dan pasgepen si Pablo sin kampo da, kanana sin komander, “Wada kod di ibagak en sik-a.”

Nasdaaw din komander, tan Griego di inkali na, yan kanana, “Ammom baw ay mankalis Griego. <sup>38</sup> Kanak en sik-a din taga-Egipto ay nanglaban sin gobierno ed idi ay nangipango sin opat ay libo ay tollisan sin lugar ay magay omili.”

\* **21:24** Bilbilang 6:13-20. † **21:28** Paniyewen di Judio mo senggep di Gentil sin timplo da. Mo maibasar sin linteg da, mo waday Gentil ay sinenggep sisi, mabalin ay peslen da.



<sup>39</sup> “Baken met sak-en,” insongbat Pablo, “tan mo sak-en et Judioak ay taga-Tarsus sin probinsiya ay Cilicia ay madamdamad ay siyodad. Wada abey laydek ay ibaga sin ipogaw, mo mabalin.”

<sup>40</sup> Inpalobos din komander, isonga pinmika si Pablo sin agdan, yan nansinyas ay mangipaginek sin ipogaw. Idi ginminek da, kinmali sin kalin di Judio ay Hebreo, yan kanana,

## 22

<sup>1</sup> “Gagait ko ya aam-ak, dengngen yo kod din isongbat ko en dakayo.” <sup>2</sup> Sin nanngaan da ay Hebreo din ikalkali na, nasepsep ay ginminek da. Et pag itoloy Pablo ay mangwani, <sup>3</sup> “Sak-en et Judioak ay naianak ed Tarsus ed Cilicia, ngem isnan Jerusalem di nadakdak-ak. Si Gamaliel di maestrok, yan inset na ay nangitdo en sak-en sin am-in ay linteg di aap-o tako. Nineekak abe ay mansilbi en Diyos ay kaman si dakayo met laeng. <sup>4</sup> Tan inil-ilbasak din mamati en Jesus enggana ay inpapsek di odom. Lallalaki ya babbabai et dinpap kos daida ay inbalod. <sup>5</sup> Yan mabalin dedan ay paneknekan din kangatoan ay padi ya am-in da ay papangolo tako ay tet-ewa, tan daida met laeng di nangipaw-it en sak-en si solat ta iey ko sin aag-i tako ed Damascus. Isonga inmeyak sidi ay en manpap sin mamati en Jesus, ta ialik isnan ed Jerusalem ay mapoposasan ta madosa da.

<sup>6</sup> “Ngem idi wadaak sin danan sin alas dosi ay omas-asag-en ed Damascus, bigla ay linmikob di somilsilap ay pat-a ay napod langit, <sup>7</sup> et natokangak. Pagak dengngen di kali ay mangmangwani, ‘Saulo, Saulo, apay nga pomaligat ka?’

<sup>8</sup> “ ‘Sino ka ay Apo?’ kanak.

“ ‘Sak-en si Jesus ay taga-Nazaret ay palpaligatem,’ kanana. <sup>9</sup> Din kakoykoyog ko pay et inila da din sinmilap, ngem adi da dinnge din inbagbagan di nankalkali.

<sup>10</sup> “Asiak kanan, ‘Sinoy masapol ay amagek ay Apo?’

“Pag nan kanan ay somongbat, ‘Ibangon mo ta emey ka ed Damascus, tan wadas di di mangibaga en sik-a sin am-in ay ninemnem ko ay ipaamag en sik-a.’ <sup>11</sup> Ngem adiak makaila, tan nadidiak sin sinmilap, isonga intakkayan din kakoykoyog kos sak-en ay nangipango ed Damascus.

<sup>12</sup> “Siya di, wadas di di ipogaw ay manngadan si Ananias ay managtongpal sin linteg tako. Dadlon aben pinatpateg di am-in ay kailiana ay Judio. <sup>13</sup> Inmalis sisya et pinmika sin kad-ak. Pag nan kanan, ‘Agik ay Saulo, makaila ka kasin.’ Yan naidsan ay naibolinasnasan matak, et inilak sisya. <sup>14</sup> Asi na pag kanan, ‘Din Diyos ay dinaydayaw din aap-o tako et pinili daka ta ammoem din laydena ya ilaem din nasantoan ay Anak na ay nansilbi en sisya ya dengngem abe din kali na. <sup>15</sup> Tan sik-a di mangipaneknek sin am-in ay ipogaw sin inilam ya dinngem. <sup>16</sup> May ngarud, sinoy sedsed-em? Ibangon mo ta en ka manpabonyag dowan kan os-osalen din ngadan Jesus ay mangipaammo ay sisya di Apom, ta maowasan din basol mo,’ kanan Ananias en sak-en.

<sup>17</sup> “Idi nantaoliak ed Jerusalem, wadaak sin Timplo ay mankarkararag, yan waday inpailan Diyos en sak-en ay kaman iitaw. <sup>18</sup> Inilak din Apo ay nangwani en sak-en, ‘Dalasem! Komaan ka ed Jerusalem ay dagos, tan din ipogaw issa, adi da patien di ibagbagam maipanggep en sak-en.’

<sup>19</sup> “Ngem sinongbatak ay nangwani, ‘Apo, mabalin siguro ay patien da, tan ammo da ngarud ay sak-en di inmey sin kasinasinagoga ay en manpap sin mamati en sik-a ta ibalod ko ya soplitek si daida. <sup>20</sup> Ammo da abe ay naragsakanak sin namsean da en Esteban ay nangipaneknek en sik-a, tan wadaak sidi ay nanilsilib sin badon di namse,’ kanak en Apo.

<sup>21</sup> “Pag na et kanan en sak-en, ‘Emey ka pay dedan, tan ibaak sik-a ed addawi sin ipogaw ay Gentil.’ ”



<sup>22</sup> Sin nangwanian Pablo sidi, din kaipoipogaw ay nannanngge en sisya et inlogi da ay nangibogaw, “Peslen tako et! Magay silbin di biyag na!” <sup>23</sup> Intoltoloy da ay nanbogbogaw dowan dan iwaswasawas din badbado da, yan isapsapowak dan tapok sin kayang ay mangipaila sin bonget da. <sup>24</sup> Isonga inpasgep din komander si Pablo, et inbilina ta sopliten da ta ipodno na din nan-gapoan di namogbogawan di ipogaw en sisya. <sup>25</sup> Ngem idi intaked da ta say sopliten da, nankali si Pablo sin kapitan ay pinmipika sidi yan kanana, “Ay baken kontran di linteg ay sopliten yo di ipogaw ay Romano mo adi yo bistigalen on-ona?”

<sup>26</sup> Sin nanngenan din kapitan sin kanan Pablo ay sana, ena insodsod sin komander. “Silibam din amagem sin ipogaw ay doy, tan Romano kano.”

<sup>27</sup> Isonga inmey din komander ay en namoot en Pablo mo tet-ewa. “Ibagam kod, ay Romano ka kano?” kanana.

“Aw,” kanan Pablo.

<sup>28</sup> “Olay sak-en, ngem dakdake di inbayad ko asiak maibilang ay Romano,” kanan din komander.

“Ngem sak-en pay, Romanoak manlogi sin binmalaak,” kanan Pablo.

<sup>29</sup> Siya et di, man-aagag din istay manoplit en sisya ay komaan, yan olay din komander, inmegyat sin nangammoana ay inpabalod nas kadina di ipogaw ay Romano.

### *Din Nanpailaan Pablo Sin Papangolon Di Judio*

<sup>30</sup> Layden pay din komander ay ammoan di kosto ay ipabasol di Judio en Pablo. Isonga idi napat-a, inpasinop na din papangolon di papadi ya am-in ay aam-a. Pag nan ipaibolos si Pablo ta iey na sin panmitingan da, et inpapika na sin sangoanan da.

## 23

<sup>1</sup> Insisin-eng Pablo si daida yan kanana, “Aag-i, ammon Diyos ay nadalos di nemnem ko maipanggep sin inyat ko ay nansilsilbi en sisya manlogi ed idi enggana ed wani.” <sup>2</sup> Sin nangwanianas di, inbagan din kangatoan ay padi sin naisasag-en en Pablo ta tampiken da din tepek na. <sup>3</sup> Asi et kanan Pablo en sisya, “Sik-a ay agin ookom, awni kadi et tampiken aben Diyos sik-a! Tan tinmotokdo kas sa ay mamistigal en sak-en maibasar sin linteg tako, ngem nilabsing mo din linteg ay sana, tan patampik mos sak-en.”

<sup>4</sup> Pag et kanan din naisasag-en en Pablo, “Apay nga iy-iyewem din kangatoan ay padin Diyos?”

<sup>5</sup> Kanan pay Pablo ay sinombat, “Aag-i, mo doy ya inammoak koma ay sisya di kangatoan ay padi, adiak koman binabbain, tan wada kayman di naisolat sin kalin Diyos ay kanana, ‘Adim palawlawen din pangolon di ili yo.’ ”\*

<sup>6</sup> Idi siya di, gapo ta ammon Pablo ay nagogodwa din papangolo, ay Sadduceo di odom, Fariseo di odom, inpigsa na di kali na ay nangwani, “Aag-ik, Fariseoak. Fariseo abe din aap-ok. Isonga namnamaek ay matago kasin di natey, yan say gapo si pamistigalan yo en sak-en ed wani.”

<sup>7</sup> Idi kanana di, say nanlogian di Fariseo ya Sadduceo ay man-iibaw, et nagodwa da. <sup>8</sup> (Tan din Sadduceo et kanan da en adi kasin matago di natey. Kanan da abe en maga di anghel ono ab-abiik. Ngem din Fariseo et pasien da am-in dadi.) <sup>9</sup> Isonga palalo ay manngalawngaw da. Di odom ay Fafariseo ay mamaestron di linteg et pinmika da ta ipapilit dan nemnem da, yan kanan da ay mangwani, “Iwed polos ammo mis basol nina. Mo nginalat iman di anghel ono odom ay adi kaila, ay siya mo lawa di?”

<sup>10</sup> Idi siya et di, sinepsep da ay man-iibaw enggana ay madanagan din komander tan into et mo bisngiten das Pablo sin pan-asiposan da en sisya. Isonga inbilina ta emey di sosoldado ay en mamos en Pablo en daida ta iey da sin kampo da.

\* 23:5 Exodo 22:28.

<sup>11</sup> Sin siya di ay labi, nanpailas Apo Jesus en Pablo yan kanana, “Papigsaem nemnem mo, tan masapol ay en ka paneknekan di maipanggep en sak-en ed Roma ay kaman met laeng din inyat mo isnan ed Jerusalem.”

### *Din Nantolagan Di Judio Ay Mamse En Pablo*

<sup>12-13</sup> Idi napat-a, waday nasurok ay opatapolo ay Judio ay nantotolag ay mamse en Pablo. Insapata da am-in en adi da mangmangan ya man-in-inom enggana ay peslen das sisya. <sup>14</sup> Asi da inmey sin papangolon di papadi ya aam-an di Judio et kanan da, “Nansapata kami ta adi kami mangmangan enggana si pamsean mi en Pablo. <sup>15</sup> Isonga dakayo ya din odom ay papangolo et ibaa yo di en mangibaga sin komander ta ialli nas Pablo sina, ta bistigalen yo kano ay kosto maipanggep sin kaso na. Asi mi sissiimen ta peslen mi sin danan sin daan dan somawangan isna.”

<sup>16</sup> Ngem din panganaken Pablo ay anak di agi na ay babai et inammoana din sana ay totolagan di Judio, et inmey sin kampon di sosoldado ay en nangisipsip en sisya. <sup>17</sup> Pag ayagan Pablo di esa ay kapitan, yan kanana en sisya, “Itlod mo kod din baro ay nay sin komander, tan wada kano di ibaga na en sisya.”

<sup>18</sup> Isonga in-ey nas di yan kanana, “Din balod ay si Pablo et inayaganas sak-en, yan inbaga na ta ipangok din baro ay nay en sik-a, tan wada kano di ibaga na.”

<sup>19</sup> Siya et di, intakkayan din komander, et inmay-ayed da ta maang-anggay da. Pag nan pooten ay mangwani, “Sinoy laydem ay ibaga?”

<sup>20</sup> Sinongbatan din baro yan kanana, “Nantotolag din papangolon di Judio ta ibaga da en sik-a ta iey mos Pablo sin panmitmitingan da si bigat, ta bistigalen da kano ay kosto maipanggep sin kaso na. <sup>21</sup> Ngem adim patpatien, tan nasurok si opatapolo ay ipogaw di manisiim en sisya, yan insapata da ay adi da mangmangan ya man-in-inom engganas peslen das sisya. Enggay nakasagana da, yan din pangaboloyam anggoy di sedsed-en da.”

<sup>22</sup> Pag pasaaen din komander ay nangwani, “Adim ibagbaga si olay sino ay insipsip mo na en sak-en.”

### *Din Nangitlodan Da En Pablo En Gobernador Felix*

<sup>23</sup> Asi pay ayagan din komander di doway ay kapitan yan kanana en daida, “Isagana yo di doway gasot ay sosoldado ya doway gasot ay gomagayang ya pitopolo ay mangakabayo ta itlod yos Pablo ed Cesarea. Manlobwat kayo si alas nowibi si labi.

<sup>24</sup> Pangabayoen yo abes Pablo, yan esten yo ay mamantay en sisya ta say maga di maam-amag en sisya si lawa enggana ay idateng yo en Gobernador Felix.” <sup>25</sup> Nansolat abe ay nangwani, <sup>26</sup> “Apo Gobernador Felix, sak-en si Claudius Lisias di nansolat isna. Komosta ka. <sup>27</sup> Din ipogaw ay sana ay inpaitlod ko en sik-a et dinpap di Judio yan istay dan pinse. Ngem dakami sin sosoldadok et en mi insalakan, tan inammoak ay Romano sisya. <sup>28</sup> Laydek ay ammoan mo sino di ipabasol dan sisya, isonga in-ey ko sin papangolo da. <sup>29</sup> Din inammoak et magay basol na si omanay si kateyana ono maibalodana, tan maipanggep si linteg da et anggoy. <sup>30</sup> Idi wada pay di nangisipsip en sak-en ay nantotolag di Judio ay mamse en sisya, adiak tinaktak ay nangibaa en sik-a. Tinogon ko abe din nangipabasol en sisya ta en da idarum en sik-a. Anggay nisa.” Siya di din insolat na.

<sup>31</sup> Idi nalabi, tinongpal din sosoldado din inbilin di apo da, et initlod das Pablo enggana ed Antipatris. <sup>32</sup> Mapat-a pay, nantaoli din mandad-an ay sosoldado sin kampo da ed Jerusalem downay intoloy din nangakabayo ay mangoyog en Pablo. <sup>33</sup> Sin sinmawangan da ed Cesarea, indawat da din solat sin gobernador, et inpolang das Pablo en sisya. <sup>34</sup> Binasan din gobernador din solat, pag nan pooten en Pablo mo sino ay probinsiya di napoana. Idi inbagan Pablo ay taga-Cilicia sisya, <sup>35</sup> kanan din gobernador, “Asiak bistigalen sik-a mo omali din mangipabpabasol en sik-a.” Pag nan ibilin ta magowardiyaan sin beey na ay inpasaad Ari Herod ed idi.

## 24

### *Din Namistigalan Felix En Pablo*

<sup>1</sup> Idi inmey di lima ay agew, sinmawang din kangatoan ay padi ya di odom ay aam-a ed Cesarea. Wada abey intakin da ay abogado ay manngadan si Tertullus. Inmey da am-in sin kad-an Gobernador Felix ta idarum das Pablo en sisya. <sup>2</sup> Idi inpaayag din gobernador si Pablo, kinmali si Tertullus ay nangipabasol en sisya. Kanana, “Madayaw ay Apo Gobernador! Begew sin kinalaing mo ay mangituray en dakami, nabayag ay natalna di biyag mis na. Ad-ado abe di inam-amag mo ay nangipasiged sin ili ay nay. <sup>3</sup> Isonga olay intoy em-emeyan mi, dakdake di iyaman mi en sik-as kankanayon. <sup>4</sup> Ngem adiak layden ay sangawen sik-a, isonga mo mabalin ta anosam kod ay mannge sin nay at-atik ay ibaga mi.

<sup>5</sup> “Din padas mi maipanggep sin ipogaw ay nay et langgong, tan ginolgolo na din Judio sin am-in ay ili isnan labaw di daga. Sisya abe di esa ay pangolon di bonggoy ay somolsolot sin esa ay taga-Nazaret. <sup>6</sup> Pinadas na abe ay mangipakadodogis sin Timplo ed Jerusalem, isonga dinpap mi, [tan kanan mi en bistigalen mi maibasas sin linteg mi. <sup>7</sup> Asi et inmali din komander ay si Lisias et pinos na en dakami, <sup>8</sup> dowana aben inbilin ay omali Kamis na ta idarum mi en sik-a.]<sup>\*</sup> Mo bistigalem si naey, ipaammo na ngarud ay tet-ewa am-in din ibagbaga mi,” kanan Tertullus. <sup>9</sup> Din iib-a na abe ay Judio et pinaneknekan da ay tet-ewa am-in din inbagbaga na ay nangipabasol en Pablo.

<sup>10</sup> Pag sinyasan din gobernador si Pablo ta say maisokat ay mankali. Et siya na di songbat na. “Apo Gobernador, ammok ay nabayag di nangiturturayam ya nangok-okomam en dakami ay Judio, isonga manlayadak ay manongbat sin inpabasol da naey en sak-en. <sup>11</sup> Nalaka ay maammoam ay owat sinpo ya doway ay agew di inmey manlogi sin inmeyak ed Jerusalem ay en nakidaydayaw en Diyos. <sup>12</sup> Sin kawadak sidi, maga di nangil-ila en sak-en ay makisongsongbat sin Timplo ono mangolgolo sin ipogaw olay sin kasinasinagoga ono sin odom ay lugar. <sup>13</sup> Maga met abe di pangigab-itan da sin sana ay ipabasol da en sak-en. <sup>14</sup> Ngem wada pay di ipodnok en sik-a, et siya na. On-onodak di pammatin di Cristiano sin panaydayawak sin Diyos di aap-o mi, yan say kanan da en baken kosto ay mait-itdo. Ngem patiek pay dedan di am-in ay linteg mi ya am-iam-in ay insolat di mamadto ed nabaon. <sup>15</sup> Namnamaek abe ay tagoen Diyos kasin din am-in ay natey, olay din nalinteg ya olay din lawa, yan siya met laeng di namnamaen aben da naey. <sup>16</sup> Gapo ta siya di di patiek, ipakat ko di kabaalak ay addawian di lawa ta say nadalos di konsensiak ay magay basol ko en Diyos ya siya abe sin iib-ak.

<sup>17</sup> “Waday pigay tawen ay kinmaanak ed Jerusalem,<sup>†</sup> isonga inmeyak sidi ay en mangidawat si pilak ay maibadang sin iib-ak ay Judio ay mankolang ya ta enak aben manpalti si maidaton en Diyos sin Timplo. <sup>18</sup> Say inam-amag ko sin nanatngan di Judio ay taga-Asia en sak-en. Enggay inikdeng ko din ogali mi maipanggep sin ngilin mi. Maga met di manngalngalawngaw sidi, yan maga abe di ad-ado ay ipogaw. <sup>19</sup> Din doy da ay taga-Asia koma di inmalis na ay en mangidarum, mo waday ipabasol da en sak-en. <sup>20</sup> Ngem mo maga pay, olay ibagan da naey mo sinoy inammoan da ay basol ko sin pinmipikaak sin sangoanan da ed Jerusalem. <sup>21</sup> Tan sin kawadak sidi, inpigsak di kalik ay nangwani, ‘Mamatiak ay kasin matago di natey. Say gapo si pamistigalan yo en sak-en ed wani,’ kanak anggoy en daidas di.”

<sup>22</sup> Si Gobernador Felix et ad-ado di ammo na maipanggep si pammatin di Cristiano, isonga inpasaldeng na din kason Pablo ay nangwani, “Mo somawang din komander ay si Lisias, asiak osayen din kasom.” <sup>23</sup> Pag nan ibilin sin kapitan ta pagowardiya nas

<sup>\*</sup> **24:8** Din linaon di [...] et maga sin odom ay manuskrito sin Griego. <sup>†</sup> **24:17** Enem ay tawen di inmey manlogi sin inmeyan Pablo ed Jerusalem ay nanongpal sin inkari na (18:22). Siyam ay tawen di inmey manlogi sin nakimitingana sin aapostol ya papangolon di mamati (15:1-29).

Pablo, ngem ta ibilang da ay baken balod ya ipalobos da abe di emeyan di gagayyem na ay mangiey si masapol na.

<sup>24</sup> Idi siya di, wada di inmeyan Felix, ngem baken nabayag yan nantaoli ay nangitakin sin asawa na ay Judio ay si Drusilla. Inpaayag nas Pablo ta dengngen da di ibaga na maipanggep si pammati en Cristo Jesus. <sup>25</sup> Ngem sin nangit-itdoan Pablo si maipanggep si nalinteg ay ogali, din pangitpean di ipogaw sin awak na ya din omali ay agew ay pangokoman Diyos sin kaipoipogaw, inmegyat si Felix yan kanana, “Kosto sa, olay emey ka et ed wani, ta sin mamingsan abe mo waday wayak, asiak kasin ipaayag sik-a.” <sup>26</sup> Yan sin naod-odi ay agew, namin ado ay inpaay-agay na si Pablo ta manngalat da, ngem din wadas nemnem na et kanana en ta pasoksokan Pablo sisya.

<sup>27</sup> Idi makdeng pay di doway ay tawen, naisokat si Porcius Festus en Felix ay man-gobernador. Ngem sin kinmaan Felix, binaybay-anas Pablo sin balodan ta say layden di Judio sisya.

## 25

### *Din Nangiapiloan Pablo Sin Kaso na Sin Emperador*

<sup>1</sup> Inmey di tolo ay agew manlogi sin nangilogian Festus ay nan-gobernador ed Cesarea, asi emey ed Jerusalem. <sup>2</sup> Idi sinmawang sidi, en inilan din papangolon di papadi ya din papangolon di Judio ta idarum das Pablo en sisya. <sup>3</sup> Nanseg-asegang da abe ta paton-od nas Pablo ay mangipaiey ed Jerusalem, tan nemnem da ay siimen sisya sin danan ta peslen da. <sup>4</sup> Ngem sinongbatan Festus si daida ay nangwani, “Nagogowardiyaan si Pablo ed Cesarea, yan owat pigay agew yan mantaoliak abes di. <sup>5</sup> Isonga olay makeey di odom ay papangolo yo ta idarum das di, mo waday inamag na si lawa.”

<sup>6</sup> Nantetee ed Jerusalem si wao ono sinpo ay agew, asi nantaoli ed Cesarea. Sin kabigatana, nansagana ay mangasos, et pag nan ipaayag si Pablo. <sup>7</sup> Idi sinmawang sisya, nilikob din Judio ay napod Jerusalem ay nangidarum si ad-ado ay basol ay madagsen, ngem magay iyat da ay mangipaneknek sin inpabaklay da ay basol na.

<sup>8</sup> Asi pag songbatan Pablo yan kanana, “Maga polos di inamag ko ay lawa maipanggep sin linteg mi ay Judio ono din Timplo mi. Adiak aben nilabsing di olay sino ay linteg di Emperador.”

<sup>9</sup> Ngem layden Festus ta laylayden di Judio sisya, isonga kanana en Pablo, “Olay en tako ed Jerusalem ta bistigalek sik-as di maipanggep sin darum da ay sana, dalo et mo laydem ay emey a.”

<sup>10</sup> Ngem kanan Pablo ay sinombat, “Sigaak met, tan naeyak sina sin sangoanam, yan isna koma di kabistigalak, tan sik-a met dedan di dinotokan di Emperador ay mangokom en sak-en. Mo din Judio pay, ammom met ay magay basol ko en daida.

<sup>11</sup> Isonga mo waday basol ko si omanay si kapseak, adiak man-adawag ta mailsot ko. Ngem mo maga ngarud di tet-ewa sin inpabasol da en sak-en, maga abe di waday lebbeng na ay mangipolang en sak-en en daida ta say maragsakan da. Iapilok ngarud din kasok sin Emperador.”

<sup>12</sup> En nanngangalat da Festus ya din tuturay ay kabadbadang na. Pag nan kanan en Pablo, “In-apilom din kasom sin Emperador. Si Emperador ngarud din pangipaeyak en sik-a.”

### *Din Nanad-atan Festus En Ari Agrippa Maipanggep En Pablo*

<sup>13</sup> Idi nalabas di piga ay agew, inmey din Arin di Judio ay si Agrippa ya din iyogtana ay si Bernice ed Cesarea ta en da pasyalen si Festus. <sup>14</sup> Idi nabaybayag das di, dinad-at Festus en Ari Agrippa di maipanggep sin kason Pablo. Kanana, “Wada di balod isna ay tinaynan Gobernador Felix. <sup>15</sup> Idi wadaak ed Jerusalem, indarum di papangolon di padi ya aam-an di Judio en sak-en, yan inbaga da ta keddengak sisya. <sup>16</sup> Insongbat ko

ngarud en baken min ogali ay Romano ay mangipolang si naidarum ay ipogaw sin odom ta madosa mo daan mabistigal. Masapol ay waday gondaway na agan-o ay managang sin mangipabasol en sisya ta way iyat na ay manongbat en daida. <sup>17</sup> Idi sinmawang da pay isna, adiak tinaktak din kaso na mo adi et inlogik sin kaagsapaana. Inpaayag ko din balod, <sup>18</sup> et pag komali din kaibaw na. Kanak en waday madagsen ay ipabasol da en sisya, ngem maga met. <sup>19</sup> Din riri da anggoy en sisya et maipanggep si pammatin di Judio ya di esa ay natey ay manngadan si Jesus ay kanan Pablo en kasin natago. <sup>20</sup> Gapo ta kolang di padas ko ay mangiosay si kaman nadi ay riri, inbagak en Pablo mo laydena ay ed Jerusalem di mabistigalan di kaso na. <sup>21</sup> Ngem sinigaana. Kanana en olay sed-ena din kaiapiloan di kaso na sin Emperador ta sisya di mangiosay. Isonga inpagogowardiyak enggana si mawayaanak ay mangipatolod sin Emperador.”

<sup>22</sup> Asi pag kanan Ari Agrippa, “Olay sak-en et laydek abe ay mannge en sisya.”

“Si bigat ngarud,” kanan Festus.

<sup>23</sup> Isonga sin kabigatana, inmey da Ari Agrippa en Bernice sin panbistaan ay mangit-it-ek sin kinangato da. Nakiey abe din kokomander di sosoldado ya din babaknang di ili. Idi sinenggep da am-in, inpaayag Gobernador Festus si Pablo. <sup>24</sup> Pag nan kanan, “Madayaw ay Ari Agrippa ya dakayo am-in ay wadas na! Din ipogaw ay il-ilaen yo ay nay, si naey di riririen di Judio ed Jerusalem ya ed isna ay Cesarea en sak-en ay mangibogbogaw en adi koman lemebbeng ay matago. <sup>25</sup> Mo sak-en pay, magay inammoak si basol na si omanay si kapseana, ngem gapo ta in-apilo na din kaso na sin Emperador ed Roma, ninemnem ko ay mangipaiey sidi. <sup>26</sup> Ngem magay ammok si kosto ay isolat ko sin Emperador maipanggep en sisya. Et say begew si nangialiak en sisya sin sangoanan yo am-in, ya namnamed en sik-a ay Ari Agrippa, ta say wada di isolat ko mo makdeng ay bistigalen takos sisya. <sup>27</sup> Tan di wadas nemnem ko et magay silbi na mo maipolang di balod sin Emperador yan maga di kosto ay maipabasol en sisya.”

## 26

### *Din Insongbat Pablo Sin Sangoanan Ari Agrippa*

<sup>1</sup> Pag kanan Ari Agrippa en Pablo, “Mabalin ay komali ka.” Inoyad Pablo di takkay na, asi na kanan, <sup>2</sup> “Madayaw ay Ari Agrippa! Inbag ta wada kas na ed wani ta mabalin ay songbatak en sik-a din am-in ay pangidardaruman di iib-a ta ay Judio en sak-en. <sup>3</sup> Tan mo sik-a, dadlon mon ammo kayman di ogali tako ay Judio ya din pansosongbatan tako. Kedawek ngarud ta anosam ay dengngen nan kanak.

<sup>4</sup> “Ammon am-in di iib-a ta ay Judio di kabibiyag ko manlogi sin kakitkittoy ko, tan kankanayon ay nakiteteak en daida sin ili mi ya ed Jerusalem. <sup>5</sup> Isonga nabayag di nangammoan da ay manlogi sin damo naitatapiak sin bonggoy di Fariseo ay kapingetan sin relihion tako, yan in-inset ko ay nanganod sin am-in ay pammati da. Mabalin ay paneknekan da ay tet-ewa dana mo layden da. <sup>6</sup> Yan wadaak sina ed wani ay mabistigal maipoon sin namnamaek ay tongpalen Diyos di inkari na sin aap-o tako ed nabaon ay tagoena kasin di natenatey. <sup>7</sup> Am-in abe din iib-a tako ay Judio et siya met laeng di namnamaen da ay matongpal en daida, isonga neekan da ay manaydayaw en Diyos si inag-agew ya nilablabi. Ngem gapo ta patiek ay tinagon Diyos kasin si Jesus et say pannamnamaan tako ay tagoena abe di natenatey, siya sa ay Apo Ari di ipabasol da en sak-en. <sup>8</sup> Apay nga mailigligatan kayo ay mamati ay tagoen Diyos kasin di natey?

<sup>9</sup> “Olay sak-en ed idi, kanak en ipakat ko koma di kabaelak ay mangontra sin mamati en Jesus ay taga-Nazaret. <sup>10</sup> Et say inam-amag ko ed Jerusalem. Ad-ado di mamati ay inbalod ko, tan indawat din papangolon di papadi din lebbeng ko. Mo wada abe di kineddenggan da ay matey, inaw ko din kateyana. <sup>11</sup> Namin ado abe di inmeyak sin kasinasinagoga ay manosadosa en daida ay mamati ta ipilit ko, mo



mabalin, ay palawaen das Jesus. Olay sin addawi ay ilin di Gentil, inmeyak abes di ay nangipakaseseg-ang en daida, tan palalo di liget ko en daida.

<sup>12</sup> “Siya di di inmeyak ed Damascus ay nananggen si solat ay napo sin papangolon di papadi ay mangidawat si kalebbengak ay en manpap si olay sino ay mamati en Jesus. <sup>13</sup> Idi wadaak sin danan sin alas dosi, Apo Ari, inilak di sinmilap ay napod langit ay domidi mo din agew. Niliktob nas sak-en ya din kakoyog ko, <sup>14</sup> et natokang kami am-in. Asiak dengngen di kali ay nangwani sin kali ay Hebreo, ‘Saulo, Saulo, apay nga pomaligat ka? Din mismo ay awak mo di palpaligatem sin pangonkontraam en sak-en ay kaman nowang ay mangodtal sin pantebek di man-alado.’

<sup>15</sup> “Asiak kanan, ‘Sino ka, Apo?’

“Et kanana, ‘Sak-en si Jesus ay palpaligatem. <sup>16</sup> May, ibangon mo, tan nanpailaak en sik-a ta dotokak sik-a ay mansilbi en sak-en ay en mangipaneknek sin nangilaam en sak-en ed wani ya din ipailak en sik-a sin tapin di agew. <sup>17</sup> Isalakan kos sik-a sin iib-am ay Judio ya sin Gentil ay pangibaaak en sik-a. <sup>18</sup> Ibaak sik-a ta makaan godab da maipanggep en sak-en ta dokogan da di lawa ya masilawan nemnem da. Et mo dokogan da din pangiturayan Satanas en daida ya sagongen das Diyos, mapakawan basol da begew sin pammati dan sak-en, et maibilang da sin pinilin Diyos ay ipogaw na, dowan da aben makigon-od sin siged ay idawdawat Diyos en daida.’ Siya say kanan Apo Jesus en sak-en.

<sup>19</sup> “Et siya di ay Apo Ari Agrippa, dadlonak pinati din inpailan Diyos en sak-en ay napod langit. <sup>20</sup> Tan enak inkaskasaba sin kaipoipogaw ay manbabawi da sin basbasol da ta sagongen das Diyos ya amagen da abe din siged ay mangipaammo ay tet-ewa ay nanbabawi da. Say inkaskasabak ay nanlogi ed Damascus, pag ed Jerusalem, pag sin kailili sin probinsiya ay Judea, et pag aben sin Gentil. <sup>21</sup> Yan begew din inkaskasabak ay sana, dinompap di iib-a ta ay Judio sin Timplo, et pinadas da ay mamse en sak-en. <sup>22</sup> Ngem binadbadangan Diyos sak-en, isonga inpapasnek ko ay nangikaskasaba sin am-in ay ipogaw, olay nababa ono nangato, enggana ed wani. Yan magay odom si inbagbagak mo adi et din inbagan met laeng Moses ya din odom ay mamadto ed nabaon ay awni et matongpal. <sup>23</sup> Tan inpadto da ay masapol ay nam-osen din Messias di ligat ya matey, ta asi awni pay et sisya di mangon-ona ay matago kasin ta silawana di nemnem di kaipoipogaw, olay Judio ono Gentil, ay mangipaammo sin iyat Diyos ay mangisalakan en daida.”

<sup>24</sup> Sin nangwanian Pablo sidi, insingasing Festus ay nangibogaw, “Naboge ka, Pablo! Din nalabes ay adal mo di namoge en sik-a!”

<sup>25</sup> Ngem sinongbatan Pablo ay nangwani, “Bakenak naboge, Apo Gobernador, tan din nay ibagbagak et tet-ewa met, ya din kalik et kalin di nanemneman ay ipogaw. <sup>26</sup> Ammok abe ay enggay inammoan Ari Agrippa am-in dana, tan baken met naitatabon. Isonga ammok ay mabalin ay idoritsok nan ibagak en sisya. <sup>27</sup> Apo Ari Agrippa, ay patiem di inbagbagan di mamadto? Ammok ay patiem.”

<sup>28</sup> Ngem kanan Ari Agrippa, “Ay kanam en nalaka di pangawisam en sak-en ta manbalinak si Cristiano?”

<sup>29</sup> Pag kanan Pablo, “Olay nalaka ono naligat, Apo Ari ya am-in kayo ay manmannge en sak-en ed wani, din ikarkararag ko en Diyos et sapay koma ta mamati kayo am-in en Apo Jesus ay kaman sak-en, powira nan kadinak ay nay.”

<sup>30</sup> Pag pomika din ari ya din gobernador ya si Bernice ya din nakitokdo en daida, <sup>31</sup> et binmala da. Asi da pag manngangalat ay nangwani, “Si doy ay ipogaw et magay basol na si omanay si ipse na ono maibalodana.” <sup>32</sup> Kanan aben Ari Agrippa en Gobernador Festus, “Maibolosan komas sisya mo adi na koman in-apilo din kaso na sin Emperador.”

## 27

### *Din Nanlobwatan Da Pablo Ay Emey Ed Roma*

<sup>1</sup> Idi dinmateng din agew ay panlobwatan mi en Pablo ay emey ed Italia, inpolang das Pablo ya din odom ay balod en Julius ay esa ay kapitan din sosoldado ay makwani en Kompanyan di Emperador. <sup>2</sup> Et en kami nanlogan si bapor ay napo ed Adramittium ay emey sin il-ili ed Asia. Nakikoyog abes Aristarkus ay taga-Tessalonica ed Macedonia.

<sup>3</sup> Sin kabigatana, naspad kami ed Sidon, et sineg-angan Kapitan Julius si Pablo et inpalobos na ay emey sin beey di gagayyem na ta iyaan das kasapolana. <sup>4</sup> Idi kasin kamin manlobwat, nilabsan mi ed Cyprus sin bandan di nalingban, tan maiab-abet din dagem. <sup>5</sup> Asi mi inagadang din baybay sin demang di probinsiya ay Cilicia ya Pamfilia, et sinmanglad kami ed Mira sin probinsiya ay Licia. <sup>6</sup> Say nanatngan Kapitan Julius si esa ay bapor ay napo ed Alexandria ay emey ed Italia, et say nanloganan mi. <sup>7</sup> Nan-in-inayad din logan mi, tan mapaligatan sin dagem, isonga nabayag asi kami patagen din ili ed Cnidus. Asi et pinmigma din dagem enggana si adi makakonit din bapor, isonga linoman mi din danen mi, et indan mi sin bandan di Creta ay nalingban ay malabas ed Salmone. <sup>8</sup> Ngem olay mo nanpapaigid kami ed Creta, napaligatan kami pay dedan enggana ay sinmawang kami sin makwani en Sigid ay Somangladan ay naisag-en sin ili ed Lasea.

<sup>9</sup> Gapo ta nataktak kamis nabayag begew sin dagem, kaeegyat di manlogan si bapor, tan pinagpepewek. Isonga binagbagaan Pablo si daida ay nangwani, <sup>10</sup> “Iib-a, mo ipapati tako ay mangitoloy, ammok ay ad-adoy madadael sin kalga tako ya olay din nay bapor, yan wada abey matey.” <sup>11</sup> Ngem din kapitan et adi na pinati din kanan Pablo, mo adi et din kanan di manmaniho ya din nakin bapor. <sup>12</sup> Din kaad-adoan abe sin kalogan mi et layden da ay mangitoloy, tan baken siged sisi si pantean di bapor sin pinagpepewek. Isonga kanan da en ipadas mi ay sangboten ed Fenix ay esay ili ed Creta ta isdi koma di pantean mi sin pinagpepewek. Tan siged si somangladan, tan adi na sagangen din kapoan di dagem.

### *Din Pewek*

<sup>13</sup> Idi siya di, dinmateng di soyosoy ay napo sin abagatan, yan kanan da en mabalin et. Isonga ginoyod da ay inpasakyab din maikaw-it ay landok ay mangipasaldeng sin bapor, et pag kamin manlobwat ay man-iigid ed Creta. <sup>14</sup> Ngem baken nabayag, dinmateng et di mapges ay dagem ay napo sin namistongdon di Creta. <sup>15</sup> Naiseplit sin bapor, et maga polos di iyat da ay mansagang sin dagem. Isonga tinomlok da ay maidagem kami sin panturongana. <sup>16</sup> Idi dinmang mi din kitkittoy ay ili ed Cauda, inlogan mi din bangsa ay ginoygoyod din bapor, tan nalingban kamis at-atik, ngem napaligatan kami pay dedan. <sup>17</sup> Nakdeng di, pinotipotan da din bapor si dakdake ay lobid ta adi mawasak tabla na. Inbaba da abe din layag\* ta main-inayad ay maidagem din bapor, tan madanagan da tan mo maiponta sin kinmokoog ay darat sin demang di Sirtis. <sup>18</sup> Dowan et palalo di inyaat di dalloyon sin bapor, isonga sin kabigatana, inlogi da ay nangiwasit sin kalga ta yomapew. <sup>19</sup> Sin katlo na, inwasit da abe din mabidking ay maosal sin bapor. <sup>20</sup> Idi inmey di piga ay agew ay adi mi inil-ila din agew ya tatalaw dowanin inweswes ay mandagem si mapges, namagay namnama mi ay lomsot kami.

<sup>21</sup> Nabayag abe ay adi mi polos nangnangan, et pinmika si Pablo yan kanana, “Gagait, mo doy ya pinati yo din inbagak ta adi tako koman tinaynan ed Creta, maga koma di nadadael ya naiwasit. <sup>22</sup> Ngem laton, adi kayo madisdismaya, tan maga polos di matey en datako. Din bapor anggoy di madadael. <sup>23</sup> Tan ed labi, din Diyos ay daydayawek ay nakin oka en sak-en et inbaa na di anghel ay en pinmika sin kad-ak <sup>24</sup> ay nangwani, ‘Pablo, adi ka emegyat, tan masapol ay mabistigal ka sin sangoanan di Emperador.

\* **27:17** Din layag, masde ya annawa ay lopot ay manalapa sin dagem ay mangipakonit sin bapor.

Manbegew abe en sik-a, seg-angan aben Diyos di kalogan mo, yan maga polos di matey en daida, 'kanan din anghel en sak-en. <sup>25</sup> Tomoled kayo ngarud, ay iib-a, tan waday talek ko en Diyos ay dadlon matongpal din am-in ay inbaga na en sak-en. <sup>26</sup> Ngem masapol et kayman ay maisadsad din bapor sin esa ay ili sin gawan di baybay.”

<sup>27</sup> Idi inmey di doway ay domingo sin nanlogian di pewek, naidagem kami pay laeng sin gawan di baybay ay Adriatic. Sin gawan di labi, nadlaw din man-ob-obla sin bapor ay omas-asag-en kami sin benget na. <sup>28</sup> Lokden da pay din kalosong di danom, downpo ay depa pay laeng. Idi inmay-ayed kami si at-atik, linokod da kasin, yan sinpo ya lima ay depa. <sup>29</sup> Say inmegyatan da tan mo et maisedpek din bapor sin batbato. Isonga inoy-oy da di opat ay landok ay maikaw-it sin likod di bapor ta say mangipasaldeng koma, asi da pag mankararag ta adi koman mabayag di pomat-aana. <sup>30</sup> Asi et din da dooy ay man-ob-obla sin bapor, layden da ay lomayaw. Isonga inoy-oy da din bangka sin baybay ay agin papambal en masapol ay ilogan da di odom ay landok ta en da ibaba sin sagang di bapor. <sup>31</sup> Ngem kanan Pablo sin kapitan ya din sosoldado na, “Mo adi mantetee da dooy sin bapor, maga en dakayo di makalsot.” <sup>32</sup> Isonga kinsat din sosoldado din lobid ay mangipakod sin bangka ta ilayaw din dalloyon.

<sup>33</sup> Idi pomatpat-a, inpilit Pablo ta mangan da ay nangwani, “Nay et ay doway domingo ay adi kayo nangnangan si kosto, tan nasangaw kayos egyat yo. <sup>34</sup> Isonga mangan kayo kod ta way ikileg yo ay mangilsot sin pewek ay nay. Adi kayo mandandanag, tan maga polos di matey en datako. Maga abey masakitan.” <sup>35</sup> Pag nan alan di esa ay tinapay, et nan-iyaman en Diyos ay il-ilan da am-in. Asi na pag pit-ingen, et inlogi na ay mangan. <sup>36</sup> Sin nangilaan das di, pinmigma di nemnem da, et nangan da abe. <sup>37</sup> Din kabibilang mi am-in sin bapor et doway gasot ya pitopolo ya enem. <sup>38</sup> Idi nakakan kami am-in, inwasit da din inkalga da ay bakakew ta masepsep ay yomap-ew din bapor.

### *Din Nadadaelan Di Bapor*

<sup>39</sup> Idi pinmat-a, tinamang din man-ob-obla din benget di baybay. Adi da mailasin mo sino ay ili, ngem inila da ay nasoysoyoan ya nadardaratan din benget na, yan kanan da en siguro mabalin ay ipadan da din bapor sidi. <sup>40</sup> Isonga kinsat da din lobid ay naik-et sin landok ta mataynan sin baybay, down da et aben obaden din lobid ay nananggen sin tabla ay mangiturong sin emeyan di bapor. Asi da inpangato din layag ay wada sin sango di bapor ta maidogos sin benget na.

<sup>41</sup> Ngem asi et naidosnog din bapor sin kinmokoog ay darat, et dadlon naisagwed din sango na. Din likod na pay, tinopatopakan din dalloyon et matektekla.

<sup>42</sup> Idi siya et di, layden din sosoldado ay mamse sin babalod ta say mamaga di manlangoy sin benget na ay lomayaw. <sup>43</sup> Ngem inparit din kapitan, tan laydena ay matago si Pablo. Inbilina ay pomadtok din makalangoy sin baybay ta mangon-ona da ay emey sin benget na, <sup>44</sup> down pay omonod di odom ay nanlologan sin tabla ya odom ay kaiw ay napo sin bapor. Et siya di di inyat mi am-in ay nangilsot sin dalloyon ay dinmateng sin benget na.

## 28

### *Din Kawadan Pablo Ed Malta*

<sup>1</sup> Idi sinmawang kami sin benget na, say nangammoan mi ay Malta di ngadan din ili ay sinmawangan mi. <sup>2</sup> Din omilis di yan sigesiged di inyat da en dakami. Tinmago das nan-anidoan mi, tan man-od-odan et somkaw. <sup>3</sup> Si Pablo et nansinop si maitongo. Ngem idi inpeey na sin apoy, kabelang di eweg ay waday gita na, et kinat na din takkay na ay pinolipolana. <sup>4</sup> Idi inilan din omili din eweg ay maon-onanat sin takkay na, nan-asibaga da en, “Pinomses biyag samet dedan, tan olay mo inlosot na din baybay, dinosan di adi kaila met laeng, tan dooy et ay naisokat din eweg.” <sup>5</sup> Ngem kaiwalgi si Pablo sin eweg sin

apoy, et maga di napasamak en sisya. <sup>6</sup> Namnamaen da ay lomat-ed din takkay na ono matokang ay matey, ngem idi sinsin-ed das nabayag yan magay inil-ila das napasamak, binaliwan dan nemnem da ay nangwani, “Diyos baw adis sisya.”

<sup>7</sup> Wada pay sin sag-en di sinmangladan mi ay doy di dagan Publius ay gobernador di ili. Inpasgep nas dakami sin beey na, et say nantean mis tolo ay agew. <sup>8</sup> Naitompong ay nansakit din aman Publius ay manpodot ya mandisinteri. En pinasyal Pablo, et idi nakakararag, kinapay nas sisya et nailatonan ay dagos. <sup>9</sup> Idi naammoan din naamag en sisya, inmey am-in din odom ay mansaksakit sin ili ay doy en Pablo, et inagasanan daida. <sup>10</sup> Isonga ad-adoy siged ay insagot da en dakami, et sin kinmaan mi, in-ali da abe din am-in ay masapol mi sin panbiyahian mi.

### *Din Sinmawangan Da Pablo Ed Roma*

<sup>11</sup> Nantete kami ed Malta si tolo ay bowan, asi kami pay manlogan si bapor ay napo ed Alexandria ay nantetees di sin pinagpepewek. Din malka na et din Singin ay Diyos.\* <sup>12</sup> Inmey kami ed Siracusa, et toloy agew mis di. <sup>13</sup> Asi kami kasin nanlobwat ay emey ed Regium. Sin napat-aana pay, inlogi na ay nandagem sin napoan mi, isonga nanlobwat kami kasin, et sin kasin mapat-a, inmabot kami ed Puteoli. <sup>14</sup> Dinatngan mis di di iib-a mi ay mamati en Jesus, et inpakodan das dakami ta makitee kami en daida si esa ay dominggo. Pag kami et mandad-an ay emey ed Roma. <sup>15</sup> Idi nadamag din aag-i mi ay mamati ed Roma ay emey Kamis di, addawi di dinan da ay en inmabat. Di odom et inmabat da sin markitan ed Appius, di odom pay, sin makwani en Tolo ay Hotel.† Sin nangilaan Pablo en daida, nan-iyaman en Diyos ya pinmigma di nemnem na.

<sup>16</sup> Somawang kami pay ed Roma, inpabulos din tuturay ay man-abang si Pablo si esa ay beey ay es-esay soldado di manilib en sisya.

### *Din Nakingalatan Pablo Sin Judio Ed Roma*

<sup>17</sup> Idi inmey di toloy agew, inpaayag Pablo din papangolon di Judio ay wada ed Roma. Idi nasinop da, kanana en daida, “Aag-i, magay basol ko sin iib-a tako ay Judio. Maga abe di inamag ko ay kontran di ogalin di aap-o tako. Ngem dinompap da pay dedan ed Jerusalem, et inmipolang da sin Romano. <sup>18</sup> Din Romano pay, idi binistigal das sak-en, layden da ay omibolos, tan inammoan da ay magay inamag ko si omanay si pamsean da en sak-en. <sup>19</sup> Ngem asi et sinigaan din iib-a tako ay Judio, isonga kapilitan ay in-apilok din kasok sin Emperador. Adiak pay idarum si daida. Sak-en a di maidarum. <sup>20</sup> Et siya di di begew ay nangipaayagak en dakayo, ta man-asiila ya manngalat tako, tan laydek ay ipaammo en dakayo din kosto ay poon di nabalodak sin kadina ay nay. Maipoon sin pammatik sin namnamaen tako ay Israelita.”

<sup>21</sup> Asi da pag kanan, “Maga di inawat mi ay solat si napo ed Judea maipanggep en sik-a. Olay abe din iib-a tako ay napos di, maga di insodsod ono dinaddad-at das lawa ay inamag mo. <sup>22</sup> Ngem ammo mi pay et ay palawlawaen di ipogaw sin kailiili din iib-am ay somolsolot en Jesus, isonga layden mi pay ay dengngen mo sino di wada sin nemnem mo.”

<sup>23</sup> Pag dan tolagen di agew ay kasin dan panngangalatan. Idi dinmateng din agew ay sana, ad-ad-ado da di inmey sin kad-an Pablo. Et inlogi na sin agsapa enggana sin nalabi ay nangilawlawag ya nangipaneknek si maipanggep sin panturayan Diyos. Inlawlawag na abe din insolat Moses ya din odom ay mamadto maipanggep sin Messias ta awisena komas daida ay mamati en Jesus. <sup>24</sup> Wada da di naawis sin inbagbaga na, ngem di odom pay et adi da namati. <sup>25</sup> Isonga sin kinmaan da, nagogodwa da ya

\* **28:11** Din singin ay diyos ay da Castor en Pollux et daida din didiyos ay daydayawen di man-oblas bapor ed idi.

† **28:15** Din markitan ed Appius et emey ay pitopolo ay kilometro di kaaddawi na ed Roma. Ed Tolo ay Hotel pay, limapolo ya tolo ay kilometro di kaaddawi na.

nansosongbat da. Ngem sin daan dan komaanan, kanan Pablo ay nangilongbos, “Tet-ewa adi din inpaisolat di Ispirito Santo sin mamadto ay si Isaias maipanggep sin ap-o tako, tan kanana en Isaias,

<sup>26</sup> ‘En ka ibaga sin ipogaw ay sana: Olay dengngedengngen yo, adi yo maawatan, ya olay isin-esin-eng yo, adi yo aben maimatonan. Siya di di ibagam en daida, <sup>27</sup> tan din ipogaw ay sana et enggay kinmenteg di nemnem da. Tetewengen da din tet-ewa dowan da aben mankikimit tan into et mo makaila, makadnge ya makaawat da yan sangoen das sak-en ta agasak si daida, †

kanan din naisolat ay kalin Diyos. <sup>28</sup> Isonga laydek ay ipaammo en dakayo ay wada da di inbaan Diyos ay en nangibaga sin Gentil si maipanggep si iyat na ay mangisalakan sin ipogaw, yan mo daida pay et patien da.” <sup>29</sup> [Sin nangwanianas di, kinmaan din Judio ay palalo di pansosongbatan da.]§

<sup>30</sup> Dowa ay tawen di nantetean Pablo sin beey ay inabanganas di ed Roma, dowanan pinaspasgep di am-in ay en namasyal en sisya. <sup>31</sup> Natoled ay nangikaskasaba ya nangit-itdo si maipanggep sin panturayan Diyos ya si Apo Jesu Cristo, yan maga di nangiparit en sisya. Siya et sa.

---

† 28:27 Isaias 6:9-10. § 28:29 Din versikulo ay nay et maga sin kaad-adoan ay manuskrito sin Griego.



## **Din Solat San Pablo Sin Taga-Roma Maipanggep Sin Solat Ay Nay**

Din solat ay nay et insolat San Pablo sin mamati ed Roma. Kanan di odom en insolat na na sin oneg di tolo ay bowan ay kawada na sin probinsiya ay Akaya (Inam-amag 20:2-3), siguro ed Corinto, manlogi sin tapos di A.D. 55 ono 56.

Di esa ay gapo ay insolat na na et ta ipaammo na sin taga-Roma din plano na ay en mamasyal en daida (1:8-15; 15:22-33). Inpalawag na abe en daida din siged ay damag ay maipanggep sin planon Diyos ay mangisalakan si ipogaw begew sin pammati da en Jesu Cristo. Din kasinopan di planon Diyos ay nay et wada sin 1:17. “Din siged ay damag et ipaammo na din planon Diyos ta say mapalinteg di ipogaw sin pangilaana. Din kinalinteg ay nay ay napo en Diyos et maibasar sin pammati et anggoy.”

Manlogi sin versikulo ay nay, ilogin Pablo ay mangiolog si maipanggep sin kinalinteg ay nay. Omona, ipaammo na ay managbasol am-in di ipogaw, olay Judio ono Gentil, isonga kapilitan ay maisian da en Diyos ay madosa mo adi da mapalinteg sin pangilaana. Pag nan ipalawag ay magay ipogaw ay mapalinteg begew sin panongtongpalana sin linteg Diyos, tan maga di makatongpal. Ibilang Diyos ay nalinteg di olay sino ay ipogaw begew sin pammati na en Jesu Cristo et anggoy (3:20-22).

Sin kapitolo 5 enggana sin 8, ibagbagan Pablo di ison di baro ay biyag ay gon-gon-oden di mamati begew sin naitapiana en Cristo. Din mamati et mayat di pakikadkadwaana en Diyos ya wada abe din Ispirito Santo en sisya ay mangipawaywaya en sisya sin kabaelan di kinamanagbasol na. Sin dana ay kapitolo, ibagbaga na abe din kosto ay kaosalan di linteg Diyos, din mankinontra sin nemnem di ipogaw, ya din panakabalin di Ispirito Santo ay bomadang sin mamati.

Sin kapitolo 9-11, iol-olog Pablo din planon Diyos para sin Judio ya Gentil. Kanana en din nanigaan di kaad-adoan ay Judio en Jesu Cristo et maibasar met laeng sin planon Diyos ta say makilak-am abe di Gentil sin seg-ang na begew sin inamag Cristo. Ngem kanana en adi komakaman din manigaan di Judio en Cristo mo adi et mamati dan to en sisya.

Sin maod-odi ay kapitolo, wada di bilbilin maipanggep si kabibiyag di mamati, nam-named din iyat da koma ay manlilinayad ya man-iinawat. Wada abe di maipanggep si lebbeng di mamati ay manongpal sin gobierno ya din iyat da ay man-oolnos mo baken nan-iso di pangawat da sin kosto ya baken kosto ay maamag.

### **Din Linaona**

- Din panlogian di solat ya din napateg ay inbaga na 1:1-17
- Din begew ay masapol di ipogaw ay maisalakan 1:18-3:20
- Din planon Diyos ta say maisalakan di ipogaw 3:21-4:25
- Din baro ay biyag di ipogaw ay naitatapi en Cristo 5:1-8:39
- Din planon Diyos ay maipanggep sin Judio 9:1-11:36
- Din kabibiyag di mamati 12:1-15:13
- Din kacdengan di solat 15:14-16:27

### *Din Panlogian Di Solat*

<sup>1</sup> Sak-en si Pablo ay nangisolat isna. Esaak ay mansilbilbi en Cristo Jesus. Pinilin Diyos sak-en ay man-apostol ya dinotokana abes sak-en ay en mangikaskasaba sin siged ay damag ay napo en sisya. <sup>2</sup> Din nay siged ay damag et say inkarin Diyos ed nabaon ay inpaisolat na sin mamadto ay nankalkaliana. <sup>3</sup> Din kalkalien din nay siged ay damag et din Anak na ay si Jesu Cristo ay Apo tako. Mo maipanggep sin kaipogaw na et polin Ari

David. <sup>4</sup> Mo maipanggep abe sin nasantoan ay kinadiyos na, inpailan Diyos ay sisya din Anak na idi tinago na kasin babaen sin panakabalina.\* <sup>5</sup> Begew en sisya, sineg-angan Diyos sak-en et nanbalinenas sak-en si apostol ta say awisek din kaipoipogaw sin am-in ay ili ay mamati ya manongpal en Cristo ta say madaydayaw sisya. <sup>6</sup> Olay dakayo abe ed issa Roma et naitatapi kayo sin ipogaw ay inayagan Diyos ay maitapi en Jesu Cristo.

<sup>7</sup> Naey ngarud di solat ko en dakayo am-in issa ay laylayden Diyos ya inayagana ay manbalin si ipogaw na. Sapay koma ta wada en dakayo di seg-ang ya talna ay mapmapo en Diyos ay Ama tako ya si Apo Jesu Cristo.

### *Din Nanlaydan Pablo Ay Manpasyal Ed Roma*

<sup>8</sup> Din damo ay laydek ay ibaga et man-iyamanak en Diyos begew en dakayo am-in, tan mandindinamag din pammati yo sin olay addawi ay il-ili. Et dengdengngen Diyos nan iyaman ko begew en Jesu Cristo. <sup>9</sup> Si Diyos ay nay ay pansilsiak sin am-in ay kabaalak ay mangikaskasaba sin siged ay damag ay maipanggep sin Anak na, et ammo na ay sin am-in ay pankarkararakag et ikarkararakag dakayo. <sup>10</sup> Kedkedawek en sisya ta mo say laydena, waday wayak ay en mamasyal en dakayo, tan nabayag ay magay wayak. <sup>11</sup> Tan palalo di layad ko ay mangila en dakayo ta say ibingayak dakayo si bindisyon ay napo sin Ispirito Santo ta say pomigpigsa san pammati yo. <sup>12</sup> Din laydek ay kanan et ta pomigpigsa din pammati tako am-in. Mabadanganak begew sin pangilaak sin pammati yo ya mabadangan kayo abe sin pammatik.

<sup>13</sup> Aag-ik, laydek ay ammoan yo ay namin ado ay ninemnem ko ay en ilaen dakayo, ngem enggana ed wani, wada di manangsangaw en sak-en. Laydek ay pasyalen dakayo ta say wada abe en dakayo issa di awisek ay mamati ta kaman din naamag sin Gentil sin odom ay il-ili. <sup>14</sup> Tan lebbengek ay en mangibagbaga sin siged ay damag sin am-in ay kalasin di ipogaw, din wada sin siyodad ya din wada sin kadondontogan, din naadal ya din magay adal na. <sup>15</sup> Isonga silalayadak ay mangikasaba sin siged ay damag en dakayo abe ay omili ed issa Roma. <sup>16</sup> Tan adiak polos mabain ay mangibagbaga sin siged ay damag, tan siya na din kailaan di panakabalin Diyos ay mangisalakan sin am-in ay mamati. Naipaammo omona sin Judio, asi pay sin Gentil. <sup>17</sup> Tan din nay siged ay damag et ipaammo na din planon Diyos ta say mapalinteg di ipogaw sin pangiilaana. Din kinalinteg ay nay ay napo en Diyos et maibasar sin pammati et anggoy. Tan siya met laeng di kanan din inpaisolat Diyos ay kanana, “Din ipogaw ay pinalinteg Diyos begew sin pammati na et wada en sisya di biyag ay iwed patingga na.”†

### *Din Kinamanagbasol Di Kaipoipogaw*

<sup>18</sup> Si Diyos ay wada ed langit et inpaammo na ay dosaena din am-in ay ipogaw ay adi mamati en sisya ya mangam-amag si lawa. Begew sin kinalawa da, kalkaloban da din tet-ewa ay maipanggep en sisya. <sup>19</sup> Tan din mabalin ay maammoan ay maipanggep en Diyos et nalawag en daida, tan si Diyos met laeng di nangipalawag. <sup>20</sup> Tan manlogi sin namarsuaan Diyos sin lobong, nalaka ay maawatan di ipogaw di maipanggep sin kinadiyos ya panakabalina ay magay pap-eng na, olay mo adi kailas sisya, tan mail-ila din pinarsua na. Isonga maga polos pambal da ay adi mangammo sin tet-ewa. <sup>21</sup> Tan olay mo ammo da ay wada di Diyos, adi da bigbigen sisya ay Diyos ya adi da aben man-iyaman en sisya, mo adi et din pannemnem da et nanbalin si magay silbi na down aben binmolinget di nemnem da ay lawa. <sup>22</sup> Olay mo kanan da en nalaing da, nanbalin das naong-ong. <sup>23</sup> Tan din dinaydayaw da et baken si Diyos ay adi katkatey mo adi et din

\* **1:4** Di esa abe ay kaiologan nina sin Griego et: ...inpailan Diyos ay sisya din manakabalin ay Anak na babaen sin kasinan natagoan. † **1:17** Di esa abe ay kaiologan nina sin Griego et: Din nalinteg ay ipogaw et wada en sisya di biyag ay iwed patingga na begew sin pammati na (Habakkuk 2:4). Ilaen abe sin Galacia 3:11.

inamag da ay sinan didiyos ay mais-o sin ilan di ipogaw ay matey ya sin mantaytayaw, manmandan ya mankodkodap.

<sup>24</sup> Isonga binaybay-an Diyos daida ta tongpalen da din lawlawa ay laylayden di nemnem da ta say amagen da di kompormi ay kalasin di kadodogis ay mangibabain sin awak da. <sup>25</sup> Say am-amagen da di tan dinokogan da din tet-ewa ay maipanggep en Diyos ta say din etek di pasien da. Tan din dinaydayaw ya nansilsilbian da et din pinarsuan Diyos ay baken et si Diyos ay namarsua. Si Diyos ay nay di lebbeng na ay madaydayaw si eng-enggana. Siya sa.

<sup>26</sup> Siya di din gapo ay binaybay-an Diyos daida ta am-amagen da din kababain ay layden di awak da. Olay din babbabai et binaliwan da din kosto ay layden di awak da ta din iib-a da ay babai di daddaagen da ay baken lalaki. <sup>27</sup> Siya abe sin lallalaki. Dinokogan da din kosto ay panadaagan da sin babai ta din iib-a da ay lalaki di palalo ay aklongan da ay daddaagen. Isonga ikarkaro da di dosa ay maibagay sin kadodogis ay inam-amag da.

<sup>28</sup> Begew sin nangibilangan da ay magay silbin di mamigbigan da en Diyos, binaybay-anas daida ta am-amagen da din lawa ay nanbanagan di kinmadodogis ay nemnem da ay adi makailasin sin siged ya lawa. <sup>29</sup> Kankanayon ay am-amagen da din am-in ay kalasin di lawa. Man-gamgamgam da si baken dan oka ya makaapal da. Makapese da, makaibaw da, somisikap da, ya nemnenemnemem da ay mamaligat sin gagait da. Manag-olit da, <sup>30</sup> palawlawan da din gagait da, ya kaliliget da si Diyos. Magay rispito da sin olay sino ay ipogaw dawan da aben ipapangato ya it-it-ek din awak da. Kankanayon ay mannemnemnem das odom ay kalasin di lawa ya adi da polos pasien din aam-a ya iin-a da. <sup>31</sup> Magay nemnem da si Diyos ya adi da polos matalek ay ipogaw. Olay din pamilya da yan adi da laylayden ya maga abey seg-ang da. <sup>32</sup> Olay mo ammo da din linteg Diyos ay mangwani en lebbeng na ay madosa ay eng-enggana din mangam-amag en da dooy, itoltoloy da pay dedan ay mangam-amag. Yan baken anggoy nadi, mo adi et daydayawen da abe di odom ay ipogaw ay mangamag si kaman dadi.

## 2

### *Din Kosto Ay Panosaan Diyos Sin Kaipopogaw*

<sup>1</sup> Siguro, kanan yo en madosa koma din lawlawa ay ipogaw ay doy da. Ngem siliban yo, dakayo ay mamispis-oy sin gagait yo, tan nan-iso din am-amagen yo sin am-amagen da. Isonga mo pabasbasolen yos daida, din awak yo met laeng di pabasbasolen yo, isonga magay isongbat yo en Diyos. <sup>2</sup> Tan ammo tako ay kostokosto din panosaan Diyos sin ipogaw ay mangam-amag sin lawa ay kaman da doy. <sup>3</sup> Isonga mo pabasbasolen yos daida dawan pay man-iso din am-amagen yo ay lawa, naipaksaw kayo met mo kanan yo en mailisian yo din panosaan ton Diyos en dakayo. <sup>4</sup> Natnatken abe di nemnem yo maipanggep sin peteg ay seg-ang ya anos Diyos en dakayo, tan adi yo inaw-awatan ay din gapo ay segseg-angan Diyos dakayo et ta waday waya yo ay mangibabawi sin basbasol yo. <sup>5</sup> Ngem dakayo, sigaan yo ay manbabawi tan makenteg san nemnem yo. Isonga sepsepepen yo din dosa yo sin agew ay panosaan Diyos sin ipogaw ay adi mamati. Sin agew ay doy, maila ay kosto din pangokoman Diyos sin kaipopogaw, <sup>6</sup> tan gon-gonaana am-in daida ay maibasar sin inam-amag da.\* <sup>7</sup> Din ipogaw ay nangipapati ay mangamag si siged ta say dayawen Diyos daida ya matagotago da sin kad-an Diyos ay eng-enggana et idawat Diyos en daida di biyag ay iwed patingga na. <sup>8</sup> Ngem din ipogaw ay mangipaon-ona sin laylayden da ya manigaan ay mamati sin tet-ewa ta say amagen da di lawa et lak-amen dan to din madagsen ay panosaan Diyos en daida. <sup>9</sup> Aw, palalo ay sakit ya ligat di lak-amen da am-in ay mangam-amag si lawa, namnamed sin Judio ngem siya abe sin Gentil. <sup>10</sup> Ngem din mangam-amag si siged et gon-oden da di talna ya

\* 2:6 Salmo 62:12; Proverbio 24:12.

din pangidayawan Diyos en daida, namnamed sin Judio ngem siya abe sin Gentil. <sup>11</sup> Tan magay ipogaw si pabpaboran Diyos sin pangokomana en daida.†

<sup>12</sup> Tan am-in ay nakabasol et maisian da en Diyos ta madosa da ay eng-enggana. Mo din Gentil et adi da ammo din linteg Moses, isonga baken say kaibasaran di pangeddengan Diyos en daida, ngem madosa da pay dedan. Mo din Judio pay et ammo da din linteg Moses, isonga say osalen Diyos din linteg ay sana ay mangeddeng en daida.

<sup>13</sup> Tan din ibilang Diyos ay nalinteg sin pangilaana et baken din mandengdenge anggoy sin linteg mo adi din manongtongpal. <sup>14</sup> Olay mo adi ammon din Gentil din naisolat ay linteg Moses, on-onodan da pay dedan di odom ay bilbilin di linteg ay sana, tan din nemnem da di kaman dan linteg ay mangiturong en daida. <sup>15</sup> Isonga ipappaila da sin am-amagen da ay naiigto sin nemnem da din bilbilin di linteg. Din nemnem da abe et ipaneknek na ay tet-ewa di, tan din nemnem da met laeng di mangibagbaga en daida mo siked ono lawa di am-amagen da. <sup>16</sup> Kaman nina met laeng di mapasamak sin agew ay pangipaokoman Diyos en Jesu Cristo sin am-in ay amag ya nemnem di ipogaw, pati din adi naammoan. Siya na abe di ibagbagak sin pangikaskasabaak sin siked ay damag.

### *Din Judio Ya Din Linteg*

<sup>17</sup> Dakayo ay iib-ak ay Judio, banolen yo kayman din kajudio yo ya taltalken yo din panongtongpalan yo sin linteg ay mangisalakan en dakayo. It-it-ek yo abe din awak yo tan kanan yo en inaammo yo din tet-ewa ay Diyos. <sup>18</sup> Ammo yo din laydena ay amagen yo ya nalaing kayo abe ay manpili si kakostoan ay maamag begew sin nangad-adalan yo sin linteg. <sup>19</sup> Magay dowadowa yo pay ay dakayo di kosto ay mangitdo sin ipogaw ay nagodab maipanggep en Diyos ta say masilawan din mabolinget ay nemnem da. <sup>20</sup> Dadlon yo aben ammo ay waday kabaelan yo ay mamagbaga ya mangit-itdo sin ipogaw ay kaman dan anan-ak, tan baken dan naitdoan ya adi da ammo din kosto. Kanan yo di, tan ammo yo kayman din linteg Diyos ay kad-an di kosto ya tet-ewa. <sup>21</sup> May kod, dakayo ay mangit-itdo sin iib-a yo, apay nga adi yo itdoan din awak yo? Ibilbilin yo en daida ay mangmangwani, “Adi kayo mangak-akew.” Ngem ay tet-ewa ngata ay adi kayo nangak-akew? <sup>22</sup> Kankanan yo abe en, “Adi kayo makikamkamalala.” Ngem ay siya mo adi kayo nakikamkamalala? Palalo kayman ay malmaloya kayo sin sinan didiyos, ngem downan kayo aben sengsenggep sin timplo ay kad-an da ta akewen yo din wadas di. <sup>23</sup> Ay apaw kayo ay mangit-it-ek sin kinasiged di linteg Diyos ngem downan yon ibabain sisya sin panlablabsingan yo sin linteg na ay sana! <sup>24</sup> Siya na di ibagbagan din naisolat ay kalin Diyos ay kanana,

“Palawlawen di Gentil din ngadan Diyos begew en dakayo ay Judio.”‡

<sup>25</sup> Wada kayman di silbin di nanpakogitan tako ay Judio dalo et mo tongtongpalen tako din linteg Diyos, ngem mo adi tako tongtongpalen, magay silbi na, tan kaman takon Gentil ay baken ipogaw en Diyos. <sup>26</sup> Siya abe sin Gentil, olay mo adi da nanpakogit, ngem mo tongtongpalen da din linteg Diyos, ibilang Diyos ay kaman dan nanpakogit ay ipogaw na. <sup>27</sup> Isonga din Gentil ay adi nakogit ngem tongtongpalena pay dedan din linteg Diyos, ipaila na din basol di Judio begew sin kinalinteg na. Tan din Judio et olay mo wada din naisolat ay linteg Diyos en sisya ya olay mo nanpakogit sisya, lablabsingena pay dedan din linteg ay sana. <sup>28-29</sup> Tan din tet-ewa ay Judio, laydek ay kalien, din tet-ewa ay ipogaw en Diyos et baken din ipogaw ay kaman Judio di kailaana ya ogali na et anggoy mo adi din ipogaw ay kosto di nemnem na. Din kogit abe ay nabanol sin pangilan Diyos et baken din kakogitan di partin di awak mo adi et din kakaan di lawa sin nemnem di ipogaw ay oblan di Ispiriton Diyos, baken oblan di naisolat ay linteg. Din ipogaw ay kaman nina et olay mo adi daydayawen di iib-a nas sisya, daydayawen pay dedan Diyos.

† 2:11 Deuteronomio 10:17. ‡ 2:24 Ezekiel 36:22.

### 3

#### *Din Nanlasinan Di Judio (Roma 9:4,5)*

<sup>1</sup> Siguro, kanan yos nemnem yo, “Sino ngarud di nanlasinan di Judio sin Gentil? Ay maga abe di silbin di panpakogitan tako?” <sup>2</sup> Ngem ad-ado met di nanlasinan tako ay Judio. Omona, intalek Diyos din inpaisolat na ay kali en datako. <sup>3</sup> Tet-ewa ay wada da di Judio ay adi matalek, ngem ay layden nina ay kanan en adi aben matalek si Diyos ay manongpal sin inkari na? <sup>4</sup> Maga met! Tan olay mo man-et-etek am-in di ipogaw, adi polos mabalin ay man-etek si Diyos. Nemnemen yo din naisolat ay kalin Diyos ay kanana,

“Mo mankali ka ay Diyos, maammoan ay kostokosto di kankanam. Mo wada abe di mangpabasol en sik-a, adi mabalin ay maabak ka.”\*

<sup>5</sup> Wada da kano di pilosopo ay mangwani en baken kosto di amagen Diyos mo dosaenas datako, tan namnamed kano ay maila din kinalinteg na mo maiiso sin panbasbasolan tako. <sup>6</sup> Ngem baken met kosto san kankanana da, tan mo baken nalinteg si Diyos, into ngin di pangaanas lebbeng na ay mangokom sin am-in ay ipogaw?

<sup>7</sup> Mo ngin ta wada di makisongsongbat ay mangmangwani, “Adiak koma makeddeng-an ay madosa begew sin etek ko, tan begew sin etek ko, namnamed ay maila din katet-ewan di kalin Diyos et say kadayawana.” <sup>8</sup> Din mangwanis na et kamanan kanan, “Olay lawa di am-amagen tako ta say siged di pantongpalana.” Di odom ay ipogaw et palawlawan das sak-en ay mangmangwani en siya say it-itdok, ngem baken met tet-ewa. Lebbeng na ngarud din dosa da.

#### *Maga Di Nalinteg Ay Ipogaw*

<sup>9</sup> Sino ngarud di kanan tako? Ay sigsigid di kasasaad di Judio sin pangilan Diyos mo din Gentil? Maga, tan enggay inbagak ay iturayan di basol am-in ay ipogaw, olay Judio ono Gentil. <sup>10</sup> Tan siya na met laeng din kanan di naisolat ay kalin Diyos ay mangwani, “Maga polos di nalinteg ay ipogaw, maga di olay esa. <sup>11</sup> Maga abe di makaawat ay kosto si maipanggep en Diyos ya maga di manganap ay mangammo en sisya.

<sup>12</sup> Dinokogan da am-in si Diyos, isonga nanbalin das ipogaw ay magay silbi na. Maga di olay esa si mangamag si kosto.† <sup>13</sup> Din tepek da et kaman man-akoo ay kaot, tan kadodogis din ipabelbela da ay kali. Os-osalen da din kali da ay mangietek si iib-a da‡ ya domadael di kankanana da ay kaman din kedet di eweg.§

<sup>14</sup> Kankanayon ay ipappaila da din liget ya bonget da sin kali da.\* <sup>15</sup> Nalaka en daida di pomse, <sup>16</sup> ya olay intoy em-emeyan da et waday dadaelen da ya pakaseseg-angen da. <sup>17</sup> Adi da dinan din danan ay maiturong sin olnos ya talna,† <sup>18</sup> ya adi da aben ammo ay emegyat en Diyos.”‡

<sup>19</sup> Siya sa din kanan di naisolat ay kalin Diyos, et ammo tako ay din kaiturongana et din ipogaw ay naidawtana. Isonga adi kabalin ay manpambal di olay sino ay ipogaw ay mangwani en magay basol na ya am-in ay ipogaw abe et lebbeng na ay okomen Diyos. <sup>20</sup> Tan magay ipogaw si ibilang Diyos ay nalinteg begew sin panongtongpalana sin linteg, tan din kaosalan di linteg et ipaammo na anggooy sin ipogaw ay wada di basol na.

#### *Din Pangibilangan Diyos Ay Nalinteg Di Ipogaw*

<sup>21</sup> Ngem ed wani, naipaammo din planon Diyos ay mangibilang si ipogaw ay nalinteg sin pangilaana, ngem baken manbegew sin panongtongpalan da sin linteg. Din plano na ay nay ay inbagbagan met laeng di insolat Moses ya din tapin di mamadto et siya na. <sup>22</sup> Ibilang Diyos ay nalinteg di olay sino ay ipogaw begew sin pammati na en Jesu

\* **3:4** Salmo 51:4. † **3:12** Salmo 14:1-3; 53:1-3. ‡ **3:13** Salmo 5:9. § **3:13** Salmo 140:3. \* **3:14** Salmo 10:7.  
† **3:17** Isaias 59:7-8. ‡ **3:18** Salmo 36:1.



Cristo. Magay panlaslasinena. <sup>23</sup> Tan nakabasol tako am-in ya adi tako makad-as sin kinasiged Diyos. § <sup>24</sup> Ngem begew sin seg-ang na en datako ay magay bayad na, ibilang na ay nalinteg tako babaen sin inamag Cristo Jesus ay mangsobot en datako. <sup>25</sup> Inbaan Diyos sisya ay matey ta say ikaro na din dosan di basol tako, et babaen sin dada na, mabalin ay mapakawan din basbasol tako mo mamati tako en sisya. Inamag Diyos di ta say ipaila na din kinalinteg di inamag na ed idi. Tan ed idi, inan-anosana din basbasol di ipogaw ay adi na dinosa ay dagos, <sup>26</sup> ngem ed wani, inpaila na ay adi na owat nilinglingan din basbasol ay doy mo adi et intapi na sin basbasol ay binaklay Jesus sin krus. Isonga maila ay dalon nalinteg si Diyos dowan sisya abe di mangibilang ay nalinteg di am-in ay ipogaw ay mamati en Jesus.

<sup>27-28</sup> Isonga adi polos mabalin ay it-ek tako din kinalinteg tako, tan din pangibilangan Diyos ay nalinteg tako et baken begew sin nanongtongpalaan tako sin linteg na mo adi et begew sin pamatian tako en Jesu Cristo. <sup>29</sup> Isonga si Diyos et baken met Diyos di Judio et anggoy mo adi et Diyos aben di Gentil. <sup>30</sup> Tan es-esa di Diyos, et olay Judio ono Gentil, magay odom ay begew si pangibilangana en daida ay nalinteg mo adi din pammati da et anggoy. <sup>31</sup> Din nay ibagbagak maipanggep si pammati, ay laydena ay kanan en olay iwasit tako din linteg? Maga, tan mo mamati tako en Jesu Cristo, tongpalen tako din kosto ay layden di linteg ay kalien.

## 4

### *Din Nangibilangan Diyos Ay Nalinteg Si Abraham (Gal. 3:6-10)*

<sup>1</sup> Nemnemen tako si Abraham ay ap-apo tako ay Judio. Sinoy begew ay naibilang sisya ay nalinteg? <sup>2</sup> Mo kaspangarigan inbilang Diyos ay nalinteg sisya begew sin inam-amag na, wada koma di it-it-ek na, ngem din katet-ewa na et magay mabalin ay it-it-ek na en Diyos. <sup>3</sup> Tan wada di naisolat ay kalin Diyos ay mangwani, “Pinatin Abraham din inbagan Diyos, isonga inbilang Diyos ay nalinteg sisya.”\*

<sup>4</sup> Mo man-obla di ipogaw ya malagboan, adi tako ibilang di lagbo na ay rigalo mo adi et sokat di boway na. <sup>5</sup> Ngem mo adi ioblaan di ipogaw di kaisalakanana mo adi et mamati en Diyos ay sisya di mangibilang ay nalinteg di managbasol, din pammati na di gapo ay ibilang Diyos sisya ay nalinteg. <sup>6</sup> Siya na abe di layden David ay kalien sin nangibagaana sin ragsak di ipogaw ay ibilang Diyos ay nalinteg ay baken din inam-amag na si gapo na. <sup>7</sup> Kanana,

“Nagasat di ipogaw ay pinakawan ya nilinglingan Diyos di basbasol na. <sup>8</sup> Nagasat di ipogaw ay inbilang Diyos ay magay basol na.”†

<sup>9</sup> May kod, din gasat ay nay, ay para sin Judio anggoy ay nakogit? Aga, para sin Gentil abe, olay adi da nakogit. Nemnemen tako kasin din inpaisolat Diyos ay kanana en pinatin Abraham din inbagan Diyos, isonga inbilang Diyos ay nalinteg sisya. <sup>10</sup> Pig-an di naamagan nidi? Ay sin enggay nanpakogitana? Baken, mo adi et sin daan pay makogit.‡

<sup>11</sup> Et din nanpakogitana maibasar sin bilin Diyos et say sinyal ay mangipaneknek ay din nangibilangan Diyos en sisya ay nalinteg et begew sin pammati na sin daan pay laeng manpakogit. Isonga sisya di kaman ap-apon di am-in ay mamati ay ibilang Diyos ay nalinteg olay mo adi da nanpakogit. <sup>12</sup> Sisya abe di ap-apon di Judio ay adi nakogit anggoy mo adi et on-onodan da abe din pammatin Abraham sin daan pay laeng manpakogit.

### *Din Inkarin Diyos En Abraham*

§ **3:23** Di esa abe ay kaiologan nina sin Griego et: Tan nakabasol tako am-in ya addawi tako sin mangapolbalan Diyos en datako. \* **4:3** Genesis 15:6. † **4:8** Salmo 32:1-2. ‡ **4:10** Manlogi sin namatian Abraham sin inkarin Diyos en sisya enggana sin nanpakogitana et inmey di sinpo ya opat ay tawen.

<sup>13</sup> Inkarin Diyos en Abraham ya din aap-o na ay daida di manawid sin lobong. Ngem din begew ay inkarin Diyos di et baken din nanongtongpalan Abraham sin linteg mo adi et gapo ta namati yan inbilang Diyos sisya ay nalinteg. <sup>14</sup> Tan mo doy ya maidawat din inkarin Diyos en daida anggoy ay mantaltalek sin panongtongpalan da sin linteg, maga ngarud di silbin di pammati. Maga abey banol din inkarin Diyos, tan magay makagon-od. <sup>15</sup> Tan din panturongan di linteg et makeddengnan di ipogaw ay madosa. Tan basta waday linteg et wada met abe di manlabsing.

<sup>16</sup> Isonga din inkarin Diyos et matongpal anggoy sin ipogaw ay mamati ta say maibasar sin seg-ang na. Tan mo din seg-ang Diyos di kaibasarana et sigurado ay matongpal en datako am-in ay maibilang ay aap-on Abraham ay baken anggoy din Judio ay mangammo sin linteg mo adi et am-in ay mamati ay kaman din pammatin Abraham. Tan sisya di kaman apo tako am-in. <sup>17</sup> Tan wada di naisolat ay kalin Diyos ay mangwani, “Panbalinek sik-a si apon di ipogaw sin kailili.”§ Et natongpal di, tan si Abraham di apo tako am-in sin pangilaan Diyos. Et din Diyos ay nay ay pinatpati na et sisya din waday panakabalina ay manago si natey ya mangipawada si maga. <sup>18</sup> Pinatin Abraham ay nannamnama ay din inkarin Diyos en sisya et dadlon matongpal, olay mo kaman adi kabalin ay matongpal. Isonga nanbalin ay apon di ipogaw sin ad-ado ay ili ay maibasar sin inbagan Diyos en sisya ay mangwani, “Kaman din talaw di kaad-adon di bilang di polim.”\* <sup>19</sup> Sin nangwanian Diyos sidi, adi polos mabalin ay manpoli si Abraham, tan nganngani ay sin gasot di tawena dowan aben basig si Sara ay asawa na. Ngem adi kinmapoy din pammati na sin nannemnemanas di. <sup>20</sup> Adi aben mandowadowa ay tongpalen Diyos din inkari na mo adi pinmigpiga et din pammati na ya dowana aben dinaydayaw si Diyos. <sup>21</sup> Tan dadlon napasnek di nemnem na ay kabaelan Diyos ay manongpal sin inkari na. <sup>22</sup> Et din pammati na ay nay di begew ay inbilang Diyos ay nalinteg sisya. <sup>23</sup> Din kali ay nay ay mangwani en inbilang Diyos ay nalinteg sisya et adi naisolat para en Abraham anggoy, <sup>24</sup> mo adi et nailak-am tako. Tan siya abe ay ibilang Diyos ay nalinteg tako ay mamati en sisya ay nanago kasin en Jesus ay Apo tako. <sup>25</sup> Inpolang Diyos si Jesus ay natey begew sin basbasol tako ya tinago na kasin ta say mapalinteg tako.†

## 5

### *Din Talna Ya Ragsak Ay Lak-amen Tako Begew Sin Nangibilangan Diyos Ay Nalinteg Tako*

<sup>1</sup> Isonga gapo ta ibilang Diyos ay nalinteg tako begew sin pammati tako, siged abe di pakikadkadwaan tako en sisya begew sin inamag Jesu Cristo ay Apo tako. <sup>2</sup> Begew en sisya, nakilaklak-am tako sin seg-ang Diyos ay gon-gon-oden tako ed wani, et peteg di ragsak tako tan namnamaen tako pay ay makilak-am tako sin kinasiged ya kinangaton Diyos. <sup>3</sup> Et baken anggoy nidi si panragsakan tako mo adi manragsak tako abe sin mapalpaligatan tako, tan ammo tako ay din ligat et pawadaena di anos. <sup>4</sup> Et mo maanosan tako di ligat, mapaneknekan ay napasnek di pammati tako. Et mo napasnek di pammati tako, namnamaen tako ay matongpal din planon Diyos para en datako. <sup>5</sup> Et din namnama tako ay nay, adi omipadismaya, tan ammo tako ay matongpal begew sin Ispirito Santo ay indawat Diyos en datako, tan ipalpalikna na en datako din dakdake ay layad Diyos.

<sup>6</sup> Sin kosto ay timpo ay pinilin Diyos, idi maga pay laeng di kabaelan tako ay mangamag sin layden Diyos, natey si Cristo para en datako ay managbasol. <sup>7</sup> Siguro, maga ngin en datako di mayad ay matey para si ipogaw ay managtongpal sin linteg, ngem mabalin ngin ay waday natoled ay matey para sin siged ya managseg-ang ay

§ 4:17 Genesis 17:5. \* 4:18 Genesis 15:5. † 4:25 Isaias 53:4-5.

ipogaw. <sup>8</sup> Ngem inpailan Diyos din kadakdaken di layad na en datako, tan natey si Cristo para en datako idi managbasol tako pay laeng.

<sup>9</sup> Isonga mo enggay inbilang Diyos ay nalinteg tako begew sin dadan Cristo ay inmayos sin nateyana, namnamed pay ay namnamaen tako ay omisalakan si Cristo sin panosaan Diyos sin ipogaw. <sup>10</sup> Tan mo kinaan Diyos din nanasalin en datako en sisya babaen sin nateyan di Anak na idi kaibaw tako pay laeng sisya, namnamed ay maisalakan takon to begew sin kamatagon Cristo, tan nay enggay nanbalin tako si gagayyem na. <sup>11</sup> Ngem baken anggoy nidi si namnamaen tako, tan olay ed wani, manragragsak tako begew sin makikadkadwaan tako en Diyos begew en Jesu Cristo ay Apo tako ay nangipagayyem en datako en sisya.

### *Din Panturongan Di Inamag Adan Ya Din Inamag Cristo*

<sup>12</sup> Nemnemen tako din pantongpalan di inamag Adan ya din inamag Cristo. Binmasol si Adan ed nabaon et siya di din nanlogian di bomasbasolan di ipogaw.\* Begew abe sin basol na, nakeddangan sisya ay natey, isonga manlogi isdi et matey am-in di ipogaw, tan am-in di ipogaw et manbasbasol da. <sup>13</sup> Olay sin daan pangidawtan Diyos sin linteg na en Moses, nanbasbasol di ipogaw, ngem din basbasol da et adi naibilbilang ay nanlablabsingan da sin linteg. <sup>14</sup> Ngem olay mo adi da nilablabsing di esa ay bilin Diyos ay kaman din basol Adan, ammo tako ay waday basol da pay dedan, tan manlogi sin timpon Adan enggana sin timpon Moses, natenatey am-in di ipogaw.

Si Adan et waday kaiisoana en Cristo ay inmonod en sisya, tan din inamag da ay dowa et waday pantongpalana sin am-in ay ipogaw. <sup>15</sup> Ngem baken kayman naniso di pantongpalan di inamag da, tan addawi ay natken di insagot Diyos begew en Cristo mo din napasamak begew sin basol Adan. Tan begew sin basol din esa ay sana, nakeddangan am-in ay ipogaw ay matey, ngem madagdagsen pay din pantongpalan di seg-ang Diyos ya din insagot na sin am-in ay ipogaw begew sin seg-ang din esa ay si Jesu Cristo. <sup>16</sup> Di esa abe ay kailasinan din sagot Diyos ya din nantongpalan di basol di esa ay ipogaw et siya na. Din nantongpalan din es-esa ay basol ay doy et nakeddangan am-in ay ipogaw ay madosa, ngem begew sin seg-ang Diyos et mabalin ay mapakawan din ad-ado ay basbasol di am-in ay ipogaw ya maibilbilang da ay nalinteg sin pangiilaan Diyos. <sup>17</sup> Tet-ewa kayman ay masapol ay matey din am-in ay ipogaw begew sin basol di es-esa, ngem addawi ay madagdagsen din pantongpalan di inamag di esa ay ipogaw ay si Jesu Cristo. Tan begew en sisya, am-in ay mangawat sin palalo ay seg-ang Diyos ya din insagot na ay kinalinteg et gan-ganasen da din biyag ay iwed patingga na ya maitatapi da en Cristo sin panturayana.

<sup>18</sup> Isonga nakeddangan am-in ay ipogaw ay matey begew sin es-esa ay basol, ngem begew sin es-esa ay kosto ay inamag Cristo, mabalin abe ay maibilbilang ay nalinteg di am-in ay ipogaw ta say waday biyag da ay iwed patingga na. <sup>19</sup> Tan begew sin adi nanongpalan di esa ay ipogaw sin kanan Diyos, nanbalin am-in di ipogaw ay nakababasol. Ngem begew abe sin nanongtongpalan di esa ay ipogaw en Diyos, manbalin ay nalinteg din am-in ay mamati.

<sup>20</sup> Indawat Diyos din linteg na en Moses ta say masepsep ay maad-ado din basbasol di ipogaw. Ngem olay mo inmad-ado di basbasol, ad-ad-ado pay et din seg-ang Diyos.

<sup>21</sup> Tet-ewa ay inturturayan di basol di kaipoipogaw ta say matey da ya maisian da en Diyos ay eng-enggana. Ngem ed wani, din seg-ang Diyos di mangabak ya manturay, tan gapo sin inamag Jesu Cristo ay Apo tako, mabalin ay ibilbilang Diyos ay nalinteg di ipogaw ta say wada en daida di biyag ay iwed patingga na.

---

\* 5:12 Genesis 3:6.

## 6

### *Din Naitapian Tako En Cristo Ay Natey Ya Natago Kasin*

<sup>1</sup> Sino ngarud di kanan tako koma? Ay olay itoltoloy tako ay manbasbasol ta say omad-ado pay din seg-ang Diyos? <sup>2</sup> Adi polos mabalin! Tan mo maipanggep si basol, enggay natey tako, isonga adi mabalin ay itoltoloy tako pay laeng ay manbasbasol. <sup>3</sup> Ammo yo met ay sin nabonyagan tako ay sin naitapian tako en Cristo Jesus, kaman tako aben naitapi ay natey sin nateyana.\* <sup>4</sup> Aw, naitapi tako ay natey ya naiponpon sin nateyana ya naiponponana ta say onodan tako di baro ay kabibiyag ay kaman din kasin nanagoan Diyos en Cristo begew sin nakaskasdaaw ay panakabalin Diyos.

<sup>5</sup> Tan mo tet-ewa ay naitapi tako en sisya sin nateyana, tet-ewa abe ay maitapi tako sin kasinan natagoan. <sup>6</sup> Tan ammo tako ay din sigod ay biyag tako et naitapi sin nailansaana sin krus ta say makaan din kabaelan di kinamanagbasol tako ya adi tako pay laeng maibabag-en sin basol. <sup>7</sup> Tan mo matey di ipogaw, mapawayaan sin kabaelan di basol. <sup>8</sup> Ngem patien tako ay mo naitapi tako ay natey sin nateyan Cristo, maitapi tako abe ay matago sin matatagoana. <sup>9</sup> Tan ammo tako ay natago kasin sisya et adi kasin matey. Namaga din kabaelan di pese en sisya. <sup>10</sup> Tan namingsan anggoy di nateyana. Adi na ipidpidwa din namaklayanas basol. Et din matatagoana ed wani et ta say mansilbi en Diyos. <sup>11</sup> Isonga datako abe et ibilang tako koma ay natey tako tet-ewa mo maipanggep si basol ngem matmatago tako mo maipanggep sin pansilsilbian tako en Diyos begew sin nakies-esaan tako en Cristo Jesus.

<sup>12</sup> Isonga masapol ay adi tako ipalobos din pangiturturayan di basol en datako ta say adi tako tongtongpalen din lawlawa ay laylayden di awak tako. <sup>13</sup> Adi tako aben ipolpolang di olay esay partin di awak tako sin basol ta say maosal ay mangamag si lawa, mo adi et idaton tako din awak tako en Diyos ya ipolang tako din am-in ay partin di awak tako en sisya ta say maosal ay mangamag si siked, tan siya di din maibagay sin ipogaw ay kaman nanatey ay indawtan Diyos si baro ay biyag. <sup>14</sup> Tan laton ay adi kasin iturayan di basol si datako, tan ed wani, din kaibasaran di kaisalakanan tako et baken din panongtongpalan tako sin linteg mo adi din seg-ang Diyos.

### *Sino Di Among Tako*

<sup>15</sup> Sino ngarud di layden nina ay kalien? Mo maibasar din kaisalakanan tako sin seg-ang Diyos ay baken din panongtongpalan tako sin linteg, ay olay manbasbasol tako? Adi kabalin! <sup>16</sup> Ammo yo koma ay mo nanpabag-en kayo si esa ay ipogaw ta say tongpalen yo, sisya dedan din among yo. Isonga mo basol di tongtongpalen yo, basol met laeng di among yo ya din pantongpalana et maisian kayo en Diyos ta madosa kayo. Ngem mo din on-onodan yo et din panongtongpalan yo en Diyos, maiturong sin kinalinteg yo. <sup>17</sup> Man-iyamanak en Diyos tan olay mo bag-en dakayos basol ed idi, ngem ed wani pay, baken, tan inpasnek yo sin nemnem yo ay manongpal sin tet-ewa ay sursuro ay naitdo en dakayo. <sup>18</sup> Isonga napawayaan kayo sin basol et nanbalin kayos bag-en di kinalinteg. <sup>19</sup> Nay os-osalek di pangarig ay nalaka ay maawatan di ipogaw, tan adi pay laeng naket-eng san pammati yo. Ed idi, inpolang yo din am-in ay partin di awak yo sin basol ta say amagen yo di kadodogis ya masepsepsep abe ay am-amagen yo di kompormi ay kalasin di lawa. Ed wani, masapol ay baliwan yo di ta dadlon kayon maibag-en sin kinalinteg ta say nasantoan kayo.

<sup>20</sup> Sin ed idi ay bag-en dakayos basol, adi inturturayan di kinalinteg si dakayo. <sup>21</sup> Ngem sino ngata di ginanab yo sin inam-amag yo ed idi ay panbabainan yo ed wani? Maga polos, tan din pantongpalan din doy ay naam-amag et matey kayo ya maisian kayo en Diyos ay madosa. <sup>22</sup> Ngem ed wani, gapo ta napawayaan kayo sin basol ta manbalin kayos bag-en en Diyos, gon-gon-oden yo din panbalbalinan yo ay nasantoan ya din

\* **6:3** 1 Corinto 12:13; Galacia 3:27.

pantongpalana et din biyag ay iwed patingga na. <sup>23</sup> Tan din basol et laglagboana di babag-ena ya din ilagbo na et matey ya maisian da en Diyos ay eng-enggana. Ngem si Diyos et sagot di idawdawat na, yan din sagot na et din biyag ay iwed patingga na begew sin nakies-esaan tako en Cristo Jesus ay Apo tako.

## 7

### *Napawayaan Tako Sin Linteg*

<sup>1</sup> Dakayo ay aag-ik, ammok ay maawatan yo din nay ibagak, tan maawatan yo am-in din maipanggep si linteg. Ammo yo ngarud ay din linteg et waday lebbeng na sin ipogaw sin matatagoana et anggoy. <sup>2</sup> Kaspangarigan, din babai ay nangasawa. Kankanan di linteg en adi kabalin ay mangasawa si natken ay lalaki mo deda pay laeng din asawa na. Ngem mo matey din asawa na, mapawayaan din babai sin linteg ay sana et mabalin ay makiasawa kasin. <sup>3</sup> Isonga mo deda din asawa na yan makibeey si odom ay lalaki, kanan tako en makilallalakis sisya. Ngem mo matey din asawa na, mamaga abe din lebbeng di linteg ay sana en sisya, isonga adi makilallalaki mo kasin mangasawa.

<sup>4</sup> Siya abe en dakayo ay aag-ik. Napawayaan kayo sin lebbeng di linteg begew sin naitapian yo ay natey sin nateyan Cristo ta say mabalin ay maitapi kayo en sisya ay natago kasin ta say mansilbi kayo en Diyos. <sup>5</sup> Tan ed idi ay nanongtongpalan tako sin laylayden di naipogawan ay nemnem tako, nasepsep ay inmad-ado din laylayden tako ay lawa begew sin nangammoan tako sin linteg, et inam-amag tako din maiturong koma sin kateyan ya kaisianan tako en Diyos ay madosa. <sup>6</sup> Ngem ed wani, begew sin naitapian tako sin nateyan Cristo, napawayaan tako sin linteg ay nangibag-en en datako. Isonga din pansilsilbian tako en Diyos ed wani et adi maibasar sin pangon-onodan tako sin naisolat ay linteg ay kaman din inyat tako ed idi mo adi maibasar sin baro ay kabibiyag ay mapmapo sin Ispirito Santo.

### *Din Linteg Ya Din Basol*

<sup>7</sup> Ay layden nina ay kanan en lawa din linteg? Baken, tan mo maga koma di linteg, adiak koman mailasin din kinalawan di ogalik. Kaspangarigan, mo maga koma di linteg ay mangwani en, “Adi kayo man-gamgam si baken yon oka,”\* adiak koman mailasin ay basol di man-gamgam. <sup>8</sup> Ngem gapo ta managbasolak, masepsepsep ay man-gamgamgamak begew sin linteg ay mangiparit si man-gamgam. Tan mo maga di linteg, maga abey kabaelan di basol. <sup>9</sup> Ed idi, napnekak sin kabibiyag ko, tan adiak kayman inawatan ay kosto din kankanan di linteg. Ngem idi naawatak din laydena ay kalien, kaman binmangon din naipoli ay kinamanagbasol ko <sup>10</sup> et say nangammoak ay kamanak natey sin pangilan Diyos. Isonga din linteg et naidawat ta say maammoan di ipogaw din danan ay maiturong sin biyag, ngem begew sin adiak nanongtongpalan sin linteg ay doy, nakeddenganak ay matey ya maisian en Diyos. <sup>11</sup> Naietekanak kayman begew sin naipoli ay kinamanagbasol ko, tan kanak adi en mabalin ay maedasak di biyag begew sin panongtongpalak sin linteg, ngem din katet-ewa na et nilablabsing ko et baw, isonga nakeddenganak ay maisian en Diyos ay eng-enggana. <sup>12</sup> Isonga din linteg et napo en Diyos, ya din am-in ay bilbilin di linteg et kostokosto ya siged da, tan napo da met laeng en Diyos.

<sup>13</sup> Ay layden nina ay kalien en maisian tako en Diyos begew sin siged ay linteg na? Adi aben mabalin! Tan din begew et din kinamanagbasol tako. Ngem din planon Diyos maipanggep sin linteg na et ta maila din kalawlawan di kinamanagbasol tako. Tan begew sin basbasol tako, nanbalinen tako din siged ay linteg Diyos si osalena ay mangeddeng en datako. Isonga begew sin linteg na et dadlon maila din palalo ay kalawlawan di kinamanagbasol tako.

\* 7:7 Exodo 20:17; Deuteronomio 5:21.



### *Din Mankinontra Sin Nemnem Di Ipogaw*

<sup>14</sup> Ammo tako ay siged di linteg tan napo sin Ispiriton Diyos. Ngem sak-en, owatak ipogaw ay nalaka ay manbasol. Kamanak nailako ay bag-en di basol. <sup>15</sup> Masmadaawak sin am-amagek, tan din laydek ay amagen et say adiak amagen, ya downan et din sigaak ay amagen et say am-amagek. <sup>16</sup> Ngarud, din panigaak ay amagen din lawlawa ay am-amagek et siya say mangipaila ay awek ay siged di linteg. <sup>17</sup> Isonga baken sak-en di mangam-amag mo adi din kinamanagbasol ko. <sup>18</sup> Tan ammok ay maga polos di siged si wada sin naipogawan ay nemnem ko, tan olay mo laydek ay amagen di siged, adiak makaamag. <sup>19</sup> Isonga adiak makaamag sin siged ay laydek ay amagen ya downan am-amagen din lawlawa ay sigaak. <sup>20</sup> Mo ipapatik ngarud ay mangamag sin sigaak ay amagen, maila ay baken sak-en di nangamag mo adi din kinamanagbasol ko.

<sup>21</sup> Isonga din pinadpadas ko et siya na. Mo laydek ay man-amag si siged, ipapatik met laeng ay mangamag si lawa. <sup>22</sup> Tan mo din nemnem ko, laydelaydek din linteg Diyos, <sup>23</sup> ngem natken baw di mangiturturay sin awak ko. Et din nay mangiturturay sin awak ko ay din kinamanagbasol ko et gobgobatan din linteg Diyos ay laylayden di nemnem ko ta say manbasolak. Isonga din pantongpalana et kamanak balod di kinamanagbasol ko. <sup>24</sup> Ay apawak ay kaseseg-ang! Sino ngin di mangisalikan en sak-en sin nay awak ko ay nakeddangan ay matey? <sup>25</sup> Palalo di iyaman ko en Diyos, tan sisya di mangisalikan en sak-en begew en Jesu Cristo ay Apo tako!

Si naey ngarud di kasasaad ko. Sin nemnem ko et laylaydek ay tongpalen din linteg Diyos, ngem begew sin kinamanagbasol ko et ipapatik pay laeng ay manbasbasol.

## 8

### *Din Kabibiyag Di Ipogaw Ay Iturturayan Di Ispirito Santo*

<sup>1</sup> Isonga am-in tako ay nakies-esa en Cristo Jesus et adi tako polos madosa. <sup>2</sup> Tan begew sin nakies-esaan tako en Cristo Jesus, wada di baro ay biyag ay indawat di Ispirito Santo en datako, et din pangiturayana en datako di nangipawaya en datako sin kabaelan di kinamanagbasol tako ay mantongpal sin pese ya dosa. <sup>3</sup> Din linteg et adi kabalin ay ipawaya nas datako sin kabaelan di basol, tan owat takon ipogaw ay adi makatongpal sin bilbilin di linteg. Ngem inamag Diyos din adi kabalin ay amagen di linteg. Inbaa na din Anak na ay nanbalin si ipogaw ay kaman datako ta say sisya di madosa para sin basbasol tako. Et say nangaanan Diyos sin kabaelan di basol ay mangituray en datako ay ipogaw. <sup>4</sup> Inamag Diyos di ta say datako ay mangon-onod sin Ispirito Santo ay baken din naipogawan ay nemnem tako et waday kabaelan tako ay dadlon manongpal sin kosto ay bilbilin di linteg.

<sup>5-6</sup> Din ipogaw ay manongtongpal sin lawa ay laylaydena et siya anggoy di kaimongsanan di nemnem na, ya din kaiturongana et maisian en Diyos ay eng-enggana. Ngem din manongtongpal sin Ispirito Santo et din laylayden di Ispirito Santo di kaimongsanan di nemnem na, ya din kaiturongana et tomalna di nemnem na dowana pay gon-gon-oden di biyag ay iwed patingga na. <sup>7</sup> Tan din ipogaw ay mangimongsan si nemnem na si lawa ay laylaydena et konkontraenas Diyos. Adi na patpatien din linteg Diyos, ya din katet-ewa na et adi na kabaelan ay patien. <sup>8</sup> Isonga din ipogaw ay manongtongpal sin naipogawan ay nemnem na et adi kabalin ay malaylaydan si Diyos en sisya. <sup>9</sup> Ngem mo si dakayo pay, gapo ta mantetee din Ispiriton Diyos en dakayo, sisya di tongtongpalen yo ay baken din naipogawan ay nemnem yo. Nemnemen yo ay din ipogaw ay adi pantetean din Ispiriton Cristo et baken ipogaw Cristo. <sup>10</sup> Ngem mo mantetee si Cristo en dakayo, olay mo matey din awak yo begew sin basbasol yo,

matagotago pay dedan din ab-abiik yo sin kad-an Diyos\* begew tan inbilang Diyos ay nalinteg kayo. <sup>11</sup> Di esa pay, si Diyos di nanago kasin en Cristo, isonga mo wada en dakayo din Ispirito na, tagoena abe din awak yo ay matey begew sin Ispirito na ay mantetee en dakayo.

<sup>12</sup> Isonga, aag-ik, wada di lebbengen tako ay tongpalen, ngem baken din laylayden di naipogawan ay nemnem tako. <sup>13</sup> Tan mo say tongtongpalen tako din naipogawan ay nemnem tako, kapilitan ay maisian tako en Diyos ay eng-enggana. Ngem mo awaten tako din badang di Ispiriton Diyos ta say pandokogan tako din lawa ay am-amagen tako, wada en datako din biyag ay iwed patingga na. <sup>14</sup> Tan din ipogaw ay iturturong di Ispirito Santo et daida din anan-ak Diyos. <sup>15</sup> Tan din Ispirito ay indawat Diyos en datako et adi na nanbalinen si datako si bag-en ay emegyat ay madosa ay kaman din kasasaad tako ed idi, mo adi et nanbalinenas datako si anan-ak Diyos. Isonga begew en sisya, mabalin ay Ama di pangwani tako en Diyos. <sup>16</sup> Din Ispirito Santo met laeng di maikadwa sin nemnem tako ay mangipaneknek ay tet-ewa ay anan-ak Diyos datako. <sup>17</sup> Et gapo ta anan-ak Diyos datako, tawidana abes datako ta say makitawid tako sin am-in ay idawat na en Cristo. Tan mo mapaligatan tako ay kaman takon makiligat en Cristo,† maitapi tako abe en sisya sin kinangato na.

### *Din Sedsed-en Tako Ay Somigedan Di Am-in*

<sup>18</sup> Mo nemnemek san ligat ay laklak-amen takos nan daga, ibilang ko ay kaman magay dagsena mo nemnemek abe din kinasiged di ipailan Diyos en datako sin tapin di agew. <sup>19</sup> Olay din am-in ay pinarsuan Diyos et laydelayden da ay domateng din timpo ay pangipailaan Diyos sin kasasaad tako ay anan-ak na. <sup>20</sup> Tan kineddengnan Diyos din pinarsua na ta say adi matongpal din kosto ay kaosalan da.‡ Baken dedan daida di nanplano ay say lak-amen da di ay dosa, mo adi et planon Diyos. Ngem wada pay dedan di manamna, <sup>21</sup> tan planon Diyos ay mapawayaan to din am-in ay naparsua sin kabaelan di donot ya pese ta say makilak-am da sin sigesiged ay kasasaad di anan-ak na. <sup>22</sup> Tan manlogi ed idi enggana ed wani, kaman nanbaybayeweng din am-in ay naparsua ay kaman babai ay manpalpaligat mo man-anak. <sup>23</sup> Ngem baken daida anggoy di manpalpaligat mo adi olay datako abe ay naidawtan sin Ispirito Santo ay say damo ay indawat Diyos en datako ay mamati. Kaman tako aben manbaybayeweng sin nemnem tako sin pansedsed-an tako sin timpo ay dadlon ipailan Diyos din kasasaad tako ay anan-ak na ya baliwana din nay awak tako si baro ay awak ay adi katkatey. <sup>24</sup> Tan siya na di ninamnamnama tako manlogi sin naisalakanan tako. Tan mo enggay natongpal, ay siya mo namnamaen tako pay laeng? Tan maga di mannamnama sin enggay natongpal. <sup>25</sup> Ngem gapo ta daan matongpal din namnamaen tako, an-anosan tako ay mansesed.

<sup>26</sup> Baken anggoy din namnama tako si mamadbadang en datako, mo adi bomadang abe din Ispiriton Diyos sin kinakapoy tako. Tan adi tako ammo ay mankararag ay kosto, ngem din Ispiriton Diyos et makikali en Diyos para en datako si bayeweng ay adi maikali. <sup>27</sup> Et si Diyos ay mangammo sin wadas nemnem tako et ammo na abe dedan din nemnem di Ispirito na, tan din ikararag na en Diyos para en datako ay ipogaw na et maibasar sin layden Diyos.

<sup>28</sup> Ammo tako ay din am-in ay mapasasamak et mantitimpyog da§ ta say siged di pantongpalana para en datako ay manglaylayad en Diyos ay inayagana ay maibasar sin plano na. <sup>29</sup> Tan din sigod ay pinipilin Diyos, et daida din sigod ay ninemnem na ay

\* **8:10** Di esa abe ay kaiologan nina sin Griego et: Ngem mo mantetee si Cristo en dakayo, olay mo matey din awak yo begew sin basbasol yo, idawat pay dedan din Ispirito Santo en dakayo di biyag ay iwed patingga na... † **8:17** 2 Corinto 1:5; 1 Pedro 4:13. ‡ **8:20** Genesis 3:17-19. § **8:28** Di esa abe ay kaiologan nina sin Griego et: Ammo tako ay din am-in ay mapasasamak et pantitimpyogen Diyos...

komaman sin Anak na ta say sisya di pangpangoan tako am-in ay siag-i. <sup>30</sup> Da dooy ay ninemnem na ay komaman sin Anak na et inayagana abes daida, ya din inayagana et inbilang na abe ay nalinteg da. Baken anggoy nidi mo adi intapi nas daida sin kinasiged ya kinangaton Anak na.

### *Din Layad Diyos En Datako Begew En Cristo Jesus*

<sup>31</sup> Sino ngarud di layden am-in dana ay kalien? Din layden da ay kalien et siya na. Gapo ta si Diyos di wada en datako, sino ngata di makaabak en datako? <sup>32</sup> Tan olay din kosto ay Anak na et adi na kinayyawan mo adi et inpolang nas sisya ay madosa para en datako am-in. Mo say inamag Diyos di sin Anak na para en datako, ay mabalin ngata ay adi na aben idawat en datako din am-in ay masapol tako? <sup>33</sup> Sino ngata di makaidarum en datako ay pinilin Diyos? Tan si Diyos di mangibilang ay nalinteg tako. <sup>34</sup> Sino abe di mangeddeng en datako? Tan si Cristo di natey ay para en datako et baken anggoy nadi mo adi et kasin aben natago, et wada ed wani sin makannawan Diyos. Sisya pay di makikali en Diyos para en datako. <sup>35</sup> Isonga sino ngarud di mabalin ay mangisian en datako sin layad Cristo? Ay mabalin ngata di ligat ono danag ono din mamaligatan di ipogaw en datako? Ay mabalin abe di dagaang ono kinakolang di bado ono kaeegyat ay mapasamak ono olay din mapsean tako? <sup>36</sup> Din kaman dana ay ligat et siya met laeng di ibagbagan din inpaisolat Diyos ay kanana,

“Begew en sik-a ay Apo, sangsangoen mi di pese si kankanayon. Maibilang kami ay kaman kakarnero ay dandani ay mapalti.”\*

<sup>37</sup> Ngem olay mo lak-amen tako am-in dana ay ligat, magay kabaelan da ay mangabak en datako mo adi et mangabak tako ay kosto begew en Cristo ay nangipaila sin layad na en datako. <sup>38</sup> Tan dadlonak ammo ay maga polos di makaisian en datako sin layad na. Olay mo matey tako ono matmatago tako, lak-amen tako pay dedan din layad na. Olay aanghel ono aanito ono odom ay waday kabaelan da et adi da kabaelan ay manadael sin layad na en datako. Olay din mapasasamak ed wani ono din daan mapasamak, <sup>39</sup> olay sino di wada sin kayang ono ed dallem, ya olay sino abe ay naparsua et maga polos di makaisian en datako sin layad Diyos ay laklak-amen tako begew en Cristo Jesus ay Apo tako.

## 9

### *Din Lebbeng Diyos Ay Mangamag Si Kompormi Ay Laydena*

<sup>1</sup> Din nay ibagak en dakayo et tet-ewa, baken lastog, tan nakies-esaak en Cristo. Olay din konsensiak ay iturturong din Ispirito Santo et panpaneknekana ay baken kon etek. <sup>2</sup> Din laydek ay ibaga et palalo ay madadagsenanak, kanayon abe ay mansakit di nemnem ko begew sin iib-ak ay Judio ay kadadaak. <sup>3</sup> Tan mo mabalin koma, olay sak-en di maiskat en daida ay madosa ya maisian en Cristo. <sup>4</sup> Ad-ado di nanlasinan da, tan daida din polin Israel ay pinilin Diyos ay ipogaw na ya daida di nanbalinena si anan-ak na. Daida abe di nangipailaan Diyos sin kinadiyos na. Daida di nanawid sin inkarikarin Diyos sin aap-o da ya ad-ado abey inkari na en daida. Daida met laeng di nangidawtan Diyos sin linteg na ya nangipaammoana sin kosto ay iyat da ay manaydayaw en sisya. <sup>5</sup> Din aap-o da et nabanol da ay ipogaw ed nabaon. Olay din Messias ay si Cristo et polin di Judio mo maipanggep sin kaipogaw na, et sisya si Diyos ay mangituray sin am-in ay wada. Madaydayaw sisya koma si eng-enggana! Amen.

<sup>6</sup> Din nay inbakag ay maipanggep si iib-ak ay polin Israel ay adi mamati en Cristo, ay laydena ay kalien en adi tinongpal Diyos din inkari na sin ipogaw na? Aga, tan din polin Israel et baken da am-in tet-ewa ay ipogaw en Diyos. <sup>7</sup> Baken am-in abe ay naipolin Abraham di tet-ewa ay aap-o na, tan kanan Diyos en Abraham, “Din polin Isaac anggoy

\* 8:36 Salmo 44:22.

di maibilang ay aap-om.”\* <sup>8</sup> Layden nina ay kalien en baken am-in ay polin Abraham di ibilang Diyos ay anan-ak na mo adi et anggoy din maianak ay katongpalan di inkari na. <sup>9</sup> Tan siya na di inkarin Diyos en Abraham maipanggep en Isaac: “Mo domateng din kosto ay timpo, ipailak din panakabalin ko en dakayo, ay say pangianakan Sara si anak yo ay lalaki.”†

<sup>10</sup> Baken anggoy nadi si mangipaila si iyat Diyos ay manpili, tan wada abe din naamag sin singin ay anak Rebeka ay inpotot Isaac ay apo tako. <sup>11-12</sup> Tan sin daan maianak din doway ay sana ya maga pay laeng di inamag da ay siged ono lawa, kanan Diyos en Rebeka, “Din inoona et say mansilbi sin inoodi.”‡ Kanan Diyos di ta say maammoan ay din namiliana sin esa et adi maibasar sin inamag da ay doway mo adi et sin sigod ay ninemnem na ay ayagan. <sup>13</sup> Siya na met laeng di olog di inpaisolat Diyos ay kanana, “Inpailak din layad ko en Jacob, ngem si Esau et sinigaak.”§

<sup>14</sup> Ay layden nina ay kanan en baken kosto di inamag Diyos? Adi kabalin! <sup>15</sup> Waday lebbeng Diyos ay nangamag sisi, tan kanan Diyos en Moses, “Seg-angak din laydek ay seg-angan.”\* <sup>16</sup> Isonga say pangammoan tako ay din mamilian Diyos si ipogaw et adi maibasar sin layden da ya am-amagen da mo adi et sin seg-ang Diyos. <sup>17</sup> Nemnemen tako din naisolat ay kalin Diyos en Faraon ay arin di Egipto. Kanana, “Nanbalinek sik-a ay ari ta say ipailak din panakabalin ko begew en sik-a ya ta say maammoan din ngadan ko sin kailili isnan daga.”† <sup>18</sup> Isonga say pangammoan tako ay seg-angan Diyos din laydena ay seg-angan ya pakentegen a be din nemnem di ipogaw ay laydena ay pakentegen.

<sup>19</sup> Into et mo wada en dakayo di mangwani, “Mo siya sa ngarud, apay nga pabasbasolen Diyos pay laeng di ipogaw? Ay siya mo waday olay esa ay ipogaw si makabaliw sin layden Diyos?” <sup>20</sup> Ngem din isongbat ko, sik-a ay owat ipogaw, into ngin di pangaam si lebbeng mo ay makisongbat en Diyos? Ay mabalin aya ay kanan di banga sin namke en sisya, “Apay nga kaman nina di nangamagam en sak-en?” <sup>21</sup> Adi kabalin, tan din mangam-amag si banga ay linang, oway na ay mamke si kompormi ay laydena. Mo say laydena, way lebbeng na ay mamke si doway ay kalasin di banga ay mapo sin esa ay natoklo, di esa yan para nabanol di kaiosalana ya din esa et para kompormi, ay baken siya?

<sup>22</sup> Iso na en Diyos. Way lebbeng na ay mangamag si laydena. Mo laydena ay mangipaila si panakabalina ya liget nas basol sin panosaana sin ipogaw ay maikari ay madosa, kalebbengana di. Ngem inan-anosanas daida <sup>23</sup> ta say ipaila na abe din nakaskasdaaw ay kinadiyos na sin ipogaw ay segseg-angana ay sigod ay insagana na ta makilak-am da sin sigesiged ay biyag ed langit. <sup>24</sup> Datako adi din ipogaw ay doy ay inayagan Diyos, et baken anggoy dakami ay Judio mo adi et dakayo abe ay Gentil. <sup>25</sup> Siya na met laeng di kanan Diyos sin libro ay inpaisolat na en Hosea. Kanana, “Din baken kon ipogaw et ibilang kos daida ay ipogaw ko, ya din kaipoipogaw ay adiak nilaylayad et laydelaydek si daida. <sup>26</sup> Sin kosto ay lugar abe ay nangibagaak en daida en baken dan ipogaw ko, makwani da en anan-ak di matmatago ay Diyos.”‡

<sup>27</sup> Wada abe di inpadton Isaias maipanggep sin Israelita ay kanana, “Olay mo kaman din darat sin benget di baybay di kaad-adon di Israelita, at-atik anggoy pay dedan en daida di maisalakan. <sup>28</sup> Tan dadlon tongpalen Diyos din inkeddeng na ay dosaena din kaipoipogaw isnan lobong, et adi na pabayagen din pangamaganas di.”§

<sup>29</sup> Kaman aben din nangon-ona ay inpadto na ay kanana,

\* **9:7** Genesis 21:12. † **9:9** Genesis 18:10,14. ‡ **9:11-12** Genesis 25:23. § **9:13** Malakias 1:2-3. \* **9:15** Exodo 33:19. † **9:17** Exodo 9:16. ‡ **9:26** Hosea 2:23; 1:10. § **9:28** Isaias 10:22-23.

“Mo adi koman binay-an Diyos ay Kangatoan di at-atik en dakami ay Judio, namaga kami am-in ay kaman din napasamak sin taga-Sodoma ya taga-Gomorra.”\*

### *Din Adi Namatian Di Judio En Cristo*

<sup>30</sup> Siya na ngarud di kasinopan din inbagak ay da naey. Din Gentil ay adi nangipapakat ay mapalinteg da sin pangilaan Diyos et ginon-od da pay dedan di kinalinteg ay maibasar sin pammati da en Cristo. <sup>31</sup> Ngem din Israelita ay nangipapati si kabaelan da ay nangon-onod sin linteg Diyos ta say nalinteg da sin pangilaana et adi da ginon-od din kinalinteg ay doy. <sup>32</sup> Apay? Tan din nangan-anapan da si iyat da ay mapalinteg et adi naibasar si pammati mo adi et din nangam-amagan das siged. Nasnit da en Cristo ay maiarig sin bato ay kaisokbaan di ipogaw. <sup>33</sup> Si naey di ibagbagan di inpaisolat Diyos ay kanana,

“Ilaen yo, waday insaad ko ay bato ed Zion ay kaskasnitan ya kaisokbaan di ipogaw. Ngem olay sino ay mamati en sisya et adi polos mababainan.”†

## 10

### *Din Dowa Ay Kalasin Di Kinalinteg*

<sup>1</sup> Ay aag-ik, din naimposoan ay pannemnem ko sin iib-ak ay Judio et laydelaydek ay maisalakan da. Siya na di kankanayon ay ikarkararag ko en Diyos. <sup>2</sup> Mapaneknekak ay napasnek da ay mansilbi en Diyos, ngem din pansilsilbian da en sisya et baken kosto. <sup>3</sup> Tan binaybay-an da din planon Diyos ay mangibilang si ipogaw ay nalinteg ya dowan dan pinadpadas ay mapalinteg begew si inam-amag da ay siged, isonga adi da inbababa din awak da ay mangawat sin kinalinteg ay mapmapo en Diyos. <sup>4</sup> Ngem din katet-ewa na et si Cristo di nanpatinggaan di linteg, isonga am-in da ay mamati en sisya et mapalinteg da sin pangilaan Diyos.

<sup>5</sup> Si naey di insolat Moses maipanggep si kaibilangan di ipogaw ay nalinteg begew sin pangon-onodana sin linteg. Kanana, “Din ipogaw ay manongpal sin am-iam-in ay bilbilin di linteg et waday biyag na ay iwed patingga na.”\* <sup>6</sup> Ngem wada abe di inpaisolat Diyos ay mangipaammo en datako ay baken naligat ay magon-od din kinalinteg ay maibasar si pammati. Kanana,

“Adi yo kanan si nemnem yo en masapol ay waday emey ed langit ay en mangayag en Cristo ta bomabas na. <sup>7</sup> Adi yo aben kanan en masapol di emey ed dallem sin kadan di natey ay en manago en Cristo. <sup>8</sup> Tan din kalin Diyos et asag-en en dakayo. Wada sin nemnem yo ya mabalin ay ibagbaga yo.”†

Din kalin Diyos ay nay et siya di din ikaskasaba mi ay maipanggep si pammati ay mangmangwani: <sup>9</sup> Mo ipodno yo sin iib-a yo ay si Jesus din Kangatoan ay Apo ya dadlon naimposoan di pammati yo ay kasin tinagon Diyos sisya, maisalakan kayo. <sup>10</sup> Tan begew sin naimposoan ay pammati tako, ibilang Diyos ay nalinteg tako, ya begew sin pangipodpodnoan tako sin patpatien tako et maisalakan tako. <sup>11</sup> Tan waday inpaisolat Diyos ay kanana, “Am-in da ay mamati en sisya et maga polos di panbabawian da.”‡ <sup>12</sup> Din am-in ay nay et laydena ay kanan en magay kaitkenan di Judio sin Gentil sin pangilaan Diyos, tan es-esa anggoy di Apo tako ay mamindisyon si nawadwad sin am-in ay manpakaasi en sisya. <sup>13</sup> Tan waday inpaisolat Diyos ay kanana, “Am-in da ay manpakaasi en Apo et maisalakan da.”§

### *Magay Pambal Di Judio Sin Adi Da Namatian En Cristo*

<sup>14</sup> Ngem intoy iyat da ngata ay manpakaasi en sisya mo adi da namati? Ya intoy iyat da ay mamati en sisya mo adi da dindinnye din maipanggep en sisya? Intoy iyat da

\* **9:29** Isaias 1:9. † **9:33** Isaias 8:14; 28:16. Ilaen abe sin 1 Pedro 2:6-8. \* **10:5** Levitico 18:5. Ilaen abe sin Galacia 3:12. † **10:8** Deuteronomio 30:12-14. ‡ **10:11** Isaias 28:16. § **10:13** Joel 2:32.



abe ay mannge mo maga di en mangikasaba en daida? <sup>15</sup> Ya into abe di iyat di ipogaw ay en mangikasaba mo magay mangibaa en daida? Ngem din katet-ewa na et wada di naibaa, tan wada di inpaisolat Diyos ay kanana, “Peteg ay omiparagsak din omalian di mangibagas siged ay damag!”\* <sup>16</sup> Ngem din siged ay damag et adi inaw-awat di am-in ay ipogaw, tan kanan Isaias, “Apo, at-atik anggoy di namati sin inbagbaga mi.”† <sup>17</sup> Ngem olay mo siya di, tet-ewa pay dedan ay din pamatian di ipogaw et maipoon sin panngaan da sin tet-ewa ay maipanggep en Cristo.

<sup>18</sup> May kod ta pootek na. Ay mabalin aya ay adi dinngen din Judio din maipanggep en Cristo? Dinngge da met, tan kanan din inpaisolat Diyos, “Nadnge din kali da sin olay sino ay lugar; naipaammo din inbagbaga da sin am-in ay ili isnan daga.”‡ <sup>19</sup> Esa pay ay salodsod: Ay mabalin ngata ay adi da inawatan din dinngge da? Inawatan da met, tan olay din Gentil et naawatan da. Naey di kanan Diyos sin Judio ay insolat Moses ay kanana,

“Pan-aposek dakayo begew si kaipoipogaw ay laslasoyen yo. Pabongetek dakayo begew si kaipoipogaw ay magay ammo da si maipanggep en sak-en.”§

<sup>20</sup> Nalawlawag pay din inpaisolat Diyos en Isaias ay maipanggep sin Gentil. Kanana, “Din adi nangan-anap en sak-en et daida di nanteng. Din magay pinoppoot da si maipanggep en sak-en et daida di nanopailaak.”\*

<sup>21</sup> Ngem din kananas maipanggep sin Judio et siya na:

“Nabayag ay inayaayagak di kaipoipogaw ay adi manongtongpal en sak-en ya makenteg di nemnem da.”†

## 11

### *Din Seg-ang Diyos Sin Judio*

<sup>1</sup> Salodsodek ngarud: Ay nantallikodan Diyos din ipogaw na ay Judio? Aga, tan olay sak-en yan Judioak met ay polin Benjamin ay naipoli abe en Abraham. <sup>2</sup> Isonga ipidwak ay mangwani en adi dinokogan Diyos din ipogaw na ay sigod ay pinipili na. Nemnemen yo din dad-at sin kalin Diyos ay maipanggep en Elias. Nanriri en Diyos begew sin inam-amag di iib-a na ay Judio et kanana, <sup>3</sup> “Apo, pinse da din mamadto ay inbaabaam. Binakas da abe din am-in ay pangidatdatonan di ipogaw si animal en sik-a. Sak-en anggoy di nabay-an, et olay sak-en yan oman-anap da ta pomse da.” <sup>4</sup> Ngem sino din insongbat Diyos en sisya? Kanana, “Wada pay di nabay-an ay ipogaw ko, tan wada di pito ay libo ay adi polos nanaydayaw sin sinan didiyos ay manngadan si Baal.”\* <sup>5</sup> Kaman nidi di iso na ed wani ay timpo tako, tan wada di at-atik ay Judio ay pinilin Diyos begew sin seg-ang na. <sup>6</sup> Et mo din seg-ang na di begew si namiliana en daida, laydena ay kanan en baken begew sin inam-amag da ay siged. Tan mo doy ya din inam-amag da ay siged di begew, adi mabalin ay kanan tako en seg-ang.

<sup>7</sup> Din layden am-in dana ay kalien et adi dinatngan din kaad-adoan ay Judio din inan-anap da ay kinalinteg. Ang-anggay din at-atik ay pinilin Diyos si nanteng. Din tapin di Judio et pinakenteg Diyos di nemnem da. <sup>8</sup> Si naey met laeng di ibagbagan din inpaisolat Diyos ay kanana,

“Nanbalinen Diyos di nemnem da si kaman nemnem di naseseyep ay ipogaw. Isonga enggana ed wani, olay mo waday mata da, adi da makaila ya olay mo waday inga da, adi da makadnge.”†

<sup>9</sup> Si David abe et waday inpaisolat Diyos en sisya ay kanana,

“Sapay koma ta bigla ay madpap da sin makipangpanganan da ay kaman titit ay makna sin tagdey ono animal ay mag-as sin bito ta say madosa da ay kosto. <sup>10</sup> Bomolinget

\* **10:15** Isaias 52:7. † **10:16** Isaias 53:1. ‡ **10:18** Salmo 19:4. § **10:19** Deuteronomio 32:21. \* **10:20** Isaias 65:1. † **10:21** Isaias 65:2. \* **11:4** 1 Aari 19:10,14,18. † **11:8** Deuteronomio 29:4; Isaias 29:10.

koma abe di nemnem da ta say adi da maawatan din tet-ewa ya down da aben madadagsenan ya mapalpaligatan si kankanayon.”‡

<sup>11</sup> Salodsodek ngarud: Din naisokbaan di kaad-adoan ay Judio, ay laydena ay kalien en adi da kasin makabangon? Aga, din katet-ewa na et begew sin basol da ay adi namati en Cristo, nilak-am di Gentil ay maisalakan ta say apalan di Judio si daida tan layden da met laeng ay maisalakan. <sup>12</sup> Nemnemen tako na ngarud: mo peteg ay nabindisyonan di kaipoipogaw isnan daga begew sin basol di Judio ya din logi da, adi pay namnamed ay mabindisyonan da mo maisalakan din kosto ay bilang di Judio.

### *Din Kaisalakanan Di Gentil*

<sup>13</sup> Ed wani, wada di ibagak en dakayo ay Gentil. Dinotokan Diyos sak-en ay apostol ta enak itdoan dakayo, isonga patpatgek ya es-estek din oblak ay nay <sup>14</sup> ta balbalang apalan din iib-ak ay Judio si dakayo ta say awisek di odom en daida ay maisalakan. <sup>15</sup> Tan begew sin nanokogan Diyos en daida, way gondaway di odom ay kaipoipogaw ay manbalin si gagayem en Diyos. Isonga sigsiged pay mo awaten kasin Diyos din Judio, tan din pantongpalana et kaman din kasin katagoan di natey.

<sup>16</sup> Din Judio et maiarig das tinapay. Tan ammo tako ay mo maidaton en Diyos din damo ay pit-ing di tinapay, maibilang ay okan Diyos din tapin di tinapay abe. Di esa abe ay kaiarigan da et kaiw, tan mo naidaton en Diyos din lamot na, okan Diyos din panga na abe. <sup>17</sup> Itoloy ko kod din pangarig ay nay. Din Judio et maiarig das kaiw ay olivo ay inis-ek ya inay-ayowanan Diyos. Ngem gintad na di odom ay panga na. Dakayo pay ay Gentil et maiarig kayos pangan di olivo ay owat ginmabay. Din inyat Diyos et ina nas dakayo yan insolbong nas dakayo sin kaiw ay inis-ek na ta say maitapi kayo sin sigod ay panga ay nabay-an. Isonga ed wani, makilaklak-am kayo sin mangipagabay ay ngeta ay mapmapo sin lamot na. <sup>18</sup> Ngem siliban yo ta adi yo laslasoyen din sigod ay panga, tan nemnemen yo na: baken dakayo di mangipagpagabay sin lamot na mo adi et din lamot na di mangipagpagabay en dakayo. <sup>19</sup> Into et mo wada en dakayo di makisongbat ay mangwani, “Aw pay, ngem nagtad di odom ay panga ta say dakami di maiskat.” <sup>20</sup> Siya pay kayman, ngem nemnemen yo ay din begew ay nagtad da et tan adi da namati, down pay din naitatapian yo et begew anggoy tan mamati kayo. Isonga adi yo ipangpangato din awak yo mo adi et siliban yo. <sup>21</sup> Tan mo adi inanosan Diyos din sigod ay panga ay din Judio mo adi et kinaanans daida, adi na aben anosan dakayo. <sup>22</sup> Adi yo linglinglingan na: managseg-ang si Diyos ngem ammo na abe ay mandosa. Tan din adi namati et dinosa nas daida, ngem dakayo pay et segseg-anganans dakayo dalo et mo itoltoloy yo ay mamati. Ngem mo adi yo itoloy, getadena abes dakayo sin kaiw. <sup>23</sup> Down pay din Judio, mo sagongen das Diyos ta say mamati da, itaoli nas daida sin nakaan da, tan kabaelana ay mangamag sisi. <sup>24</sup> Tan dakayo ay kaman pangan di owat ginmabay ay olivo, mo mabalín ay insolbong Diyos dakayo sin nais-ek ay olivo ay baken din kosto ay napoan yo, adi pay nalaklaka ay itaoli na din nakaan ay pangan di kaiw ay doy sin kosto ay napoan da.

### *Din Seg-ang Diyos Sin Judio Ya Gentil Abe*

<sup>25</sup> Aag-ik, wada di adi naipaammo ed idi ay laydek ay maawatan yo ta say adi kayo ipangpangato di awak yo ay mangwani en nangato di laing yo. Din ipaammok et adi maitoloy ay eng-enggana din nanigaanan di tapin di Judio ay mamati en Cristo, mo adi et maitoloy anggoy engganans komosto di bilang di Gentil ay maisalakan. <sup>26</sup> Asi pag maisalakan din kajudiojudio, tan siya met laeng din inpaisolat Diyos ay kanana,

‡ **11:10** Salmo 69:22-23. Din kanana sin Griego et: Magodab da koma abe ta say adi da makaila down da aben mabobok-ong si kankanayon.

“Awni et omali din mangisalakan ay mapo ed Zion ta say kaanena din kinalawlawan di polin Jacob. <sup>27</sup> Et siya di din katongpalan din inkarik en daida ay kaanek din basbasol da.”§

<sup>28</sup> Mo maipanggep si manigaan di Judio sin siked ay damag, maibilang da ay kaibaw Diyos, et maiturong di sin pansigdan yo. Ngem mo maipanggep si namilian Diyos en daida, laydelaydena pay laeng si daida begew en da Abraham ay aap-o da. <sup>29</sup> Tan adi mabalin ay sokatan Diyos di nemnem na si maipanggep si inayagana ya din bindisyon ay indawat na. <sup>30</sup> Dakayo ay Gentil et adi yo pinatpati si Diyos ed idi, ngem ed wani, gon-gon-oden yo din seg-ang Diyos begew sin adi namatian di Judio. <sup>31</sup> Siya abe din Judio, adi da patpatien si Diyos ed wani, ngem daida abe et gon-oden da din seg-ang Diyos begew sin panegseg-angana en dakayo. <sup>32</sup> Tan inpalobos Diyos ay manbalin am-in di ipogaw si kaman balod di adi da namatian ta say ipaila na abe sin am-in ay ipogaw din seg-ang na.

### *Madaydayaw Si Diyos*

<sup>33</sup> Nabaknang adis Diyos si seg-ang! Maga abey gedeng di sirib na ya din ammo na. Olay sino ay ipogaw et adi makaawat ay kosto sin ninemnem na ay amagen ya din iyat na ay mangitongpal sin ninemnem na. <sup>34</sup> Tan din inpaisolat Diyos et kanana, “Ay siya mo waday ipogaw si nakin ammo sin nemnem Diyos? Ay siya mo waday nakabagbaga en sisya? <sup>35</sup> Maga abe di nangidawat si olay sino en sisya ta say waday otang na.”\*

<sup>36</sup> Tan sisya di namarsua sin am-in, sisya di mangituray sin am-in, ya naparsua am-in ta say madayaw sisya. Sapay koma ta madaydayaw sisya si eng-enggana! Amen.

## 12

### *Din Kosto Ay Kabibiyag Di Mamati En Cristo*

<sup>1</sup> Aag-ik, begew sin seg-ang Diyos en datako, pangaasi yo ta idaton yon awak yo en Diyos ay kaman daton ay matmatago ya nasantoan ya panlaylaydana, tan siya di din kosto ay iyat yo koma ay manaydayaw en sisya. <sup>2</sup> Adi yo is-isoen din ogalin di adi mamati mo adi et itoltoloy yo ay mangipabpabaro si nemnem yo en Diyos ta say mabaroan di kabibiyag yo. Tan mo say iyat yo di, ammoan ya awen yo din layden Diyos ay amagen yo ay din siked ya din panlaydana ya din kostokosto.

<sup>3</sup> Begew sin lebbeng ko ay apostol ay indawat Diyos en sak-en, bagbagaak di esa ya esa en dakayo ta adi yo ipangpangato di pannemnem yo sin kaipogaw yo mo adi et kostokosto koma di pannemnem yo sin awak yo ay maibasar sin laing ono kabaelan ay indawat Diyos sin esa ya esa en dakayo begew sin pammati yo. <sup>4</sup> Tan di awak tako ay ipogaw et ad-adoy parti na ya nankinalasi abe di obla da. <sup>5</sup> Iso na en datako ay mamati, tan olay mo ad-ado tako, maiarig tako sin partin di es-esa ay awak begew sin nakies-esaan tako en Cristo, isonga esa ya esa en datako et nantatapi tako. <sup>6</sup> Masapol ngarud ay osalen tako din nankinalasi ay kabaelan ay indawat Diyos en datako begew sin seg-ang na. Mo din kabaalam et din pangibagaam sin inpaammon Diyos en sik-a, osalem adi ay maibasar sin pammatim. <sup>7</sup> Mo din kabaalam et din pansilbiam si iib-am, mansilbi ka ay kosto. Mo din kabaalam abe et din pangitdoam sin kalin Diyos, estem ay mangitdo. <sup>8</sup> Mo indawat pay Diyos en sik-a din kabaelan ay mamagbaga si iib-am ya mangipapigsa si pammati da, say iyat mo di. Mo indawat na abe din kabaelan ay mangibingay si wada en sik-a ay ibadang mo sin makasapol, say amagem ay magay imotam. Mo abe din kabaelan ay mangipangolo di naidawat en sik-a, man-gaget ka koma ay mangipangolo. Et mo din kabaalam et din mamadangam sin kaseseg-ang, silalayad ka koma ay mangamag.

§ 11:27 Isaias 59:20-21; Jeremias 31:31,34. \* 11:35 Isaias 40:13; Job 41:11; 1 Corinto 2:16.

<sup>9</sup> Naimposoan koma di layad yo. Kaliliget yo din lawa dowan kayo pay on-onodan ay kanayon din siged. <sup>10</sup> Manlinayad kayo ay kaman din layad di siag-i. Ibilang yo ay natatpatag din iib-a yo mo din awak yo. <sup>11</sup> Adi kayo somadsadot mo adi et nagaget ya napasnek kayo koma ay mansilsilbi en Apo Jesus. <sup>12</sup> Manragsak kayo begew sin namnamaen yo, anosan yo mo waday ligat yo, ya ipapasnek yo ay mankararag. <sup>13</sup> Mo waday ipogaw en Diyos ay makasapol si tolong, ibingayan yos daida, ya ilaen yo ta manangsangaili kayo.

<sup>14</sup> Mo pay din mamaligat en dakayo, mankedaw kayo en Diyos ta bindisyonanas daida. Aw man! Adi yo baosan mo adi et ikararagan yos daida ta mabindisyonan da. <sup>15</sup> Makiragsak kayo en daida ay manragragsak ya makiladingit kayo en daida ay manladladingit. <sup>16</sup> Man-oolnos kayo. Adi yo ipangpangato di awak yo mo adi et makipolapol kayo si nababa ay ipogaw.\* Adi yo kankanan en dakayo anggoy di nalaing.

<sup>17</sup> Mo waday mangamag si lawa en dakayo, adi yo ibabbaes, mo adi et padasen yo ay mangamag si siged ya kosto sin pangilan di am-in ay ipogaw. <sup>18</sup> Amagen yo din kabaelan yo ay makioolnos sin am-in ay ipogaw, mo mabalin. <sup>19</sup> Gagayyem ko, adi kayo man-ibabbaes mo adi et bay-an yo ta si Diyos di makaammo ay manosa, tan wada di inpaisolat Diyos ay kanana,

“Sak-en ay Apo Diyos di way lebbeng na ay man-ibaes. Sak-en di manobalit.”†

<sup>20</sup> Et baken anggoy nadi di iyat yo mo adi et onodan yo pay din inpaisolat Diyos ay kanana,

“Mo mandagaang di kaibaw mo, pakanem; mo nabigaw, painomem; tan mo say iyat mo di, palalo ay mabainan sisya.”‡

<sup>21</sup> Adi yo ipalobos ay abaken di lawa si dakayo mo adi et abaken yo di lawa si siged ay am-amagen yo.

## 13

### *Masapol Ay Manpaituray Tako Sin Gobierno* (Tito 3:1; 1 Ped. 2:13-17)

<sup>1</sup> Am-in ay ipogaw et masapol ay manpaituray da sin way turay na sin gobierno, tan iwed manlebbeng ay manturay mo adi ipalobos Diyos, ya am-in di manturturay et si Diyos di nangisaad. <sup>2</sup> Isonga din mangontras manturturay et kontraena din dinotokan Diyos. Madosa dedan din mangamag sisi. <sup>3</sup> Din mangam-amag si siged et magay iegyat na sin manturturay, ngem din mangam-amag si lawa et emegyat dedan. Isonga mo layden yo ay adi emegyat sin tuturay, siged koma di amagen yo et dayawen das dakayo. <sup>4</sup> Tan baan Diyos daida para sin pansigdan yo. Ngem mo lawa di amagen yo, emegyat kayo koma, tan mabalin dedan ay osalen da din lebbeng da ay mandosa. Tan daida di baan Diyos ay pangipadosaana sin mangamag si lawa. <sup>5</sup> Isonga masapol ay manpaituray tako sin tuturay di ili, baken gapo ta emegyat tako ay madosa et anggoy mo adi et gapo ta ammo tako ay say kosto ay amagen tako koma.

<sup>6</sup> Siya na met laeng di begew ay manbaybayad takos bowis, tan din manturturay et mansilsilbi da en Diyos sin panongtongpalan da sin obla da. <sup>7</sup> Isonga bayadan tako din nankinalasi ay bowis ay lebbengen tako ay bayadan dowan tako pay rispitoen ay kosto din mangituray en datako.

### *Lebbengen Tako Ay Manlilinayad*

<sup>8</sup> Mo waday otang tako, adi tako baybayagen ay mamayad. Ngem din lebbengen tako ay manlilinayad et say ibilang tako ay otang ay magay patingga na. Tan din manglaylayad sin iib-a na et tongtongpalena din bilbilin Diyos. <sup>9</sup> Tan din bilbilin

\* **12:16** Di esa abe ay kaiologan nina sin Griego et: Adi yo ipangpangato di awak yo mo adi et nakasagana kayo ay mangamag si oblan di baa. † **12:19** Deuteronomio 32:35. ‡ **12:20** Proverbio 25:21-22.

ay mangmangwani, “Adi ka makikamkamalala, adi ka manpespese, adi ka mangak-akew, adi ka man-gamgamgam si baken mon oka,”\* ya din tapin pay di bilbilin et naimomongsan da am-in sin es-esa ay bilin ay nay: “Masapol ay laylaydem di ib-am ay kaman din pananglayad mo sin awak mo.”† 10 Tan mo laylayden takon iib-a tako, maga polos di lawa si amagen tako en daida, isonga say pantongpalan tako sin am-in ay bilbilin Diyos.

*Din Kabibiyag Ay Maibagay Sin Kaagawan*  
(Efeso 5:1-14; 1 Tes. 5:1-11)

11 Masapol ay amagen tako na, tan ammo tako ay nabanol di timpo ay matatagoan tako ed wani. Mo iarig ko din nay timpo sin malabi, kanak en masapol ay ibangon tako, tan dandani din kaisalakanan tako mo din namatian tako sin damo. 12 Tet-ewa ay mabolinget pay laeng, ngem dandani ay maaggew. Kaanen tako ngarud din lawlawa ay amag ay maibagay sin mabolinget ta say isokat tako din salida ya armas ay maibagay sin soldado ay wada sin kaagawan. 13 Din kabibiyag ay onodan tako koma et din nalinis ya siced ay maibagay sin ipogaw ay wada sin kaagawan. Adi tako manbetbeteng ya maitaptapi sin nalabes ay ragragsak. Adi tako aben makikamkamalala ya man-am-amag si odom ay kadodogis ono kababain, ya adi tako man-ap-apal ya makiib-ibaw. 14 Din amagen tako koma et tadonen tako din kabibiyag Apo Jesu Cristo ta say sisya di kaman salida ay ibado tako,‡ ya siliban tako ta adi tako pawayaan di awak tako ay manongpal sin lawlawa ay laylayden di naipogawan ay nemnem tako.

## 14

*Adi Tako Manpipinabasol Ya Manlilinasoy*  
(1 Cor. 8:1-13; 10:23-33)

1 Mo waday ipogaw ay daan maket-eng ono nakapoy di pammati na, awaten yo pay dedan ay adi kayo makisongsongbat en sisya maipanggep sin kaitkenan di nemnem na en dakayo. 2 Kaspangarigan, wada da di daan maket-eng di pammati na ay mamati ay paniyew mo mansida das karni, isonga manengdeng das natnateng et anggoy, dowan pay di odom et patien da ay magay paniyew si makan, isonga mansida das kompormi. 3 Din mangan si kompormi et adi na koman laslasoyen din man-ipangan si natnateng anggoy, ya din manengdengdeng si natnateng anggoy et adi na koman pabasbasolen din mangan si kompormi, tan inawat Diyos sisya. 4 Isonga sik-a ay mangipabasol si ib-am, magay lebbeng mo ay mangiyat sidi sin baan di odom. Tan si Apo Jesus ay Apo na di makaammo ay mangibaga mo kosto ono baken kosto din am-amagena. Et maapolbalan dedan ay kosto din am-amagena, tan kabaelan Apo Jesus ay tomolong en sisya.

5 Wada da abe di mangibilang ay nabanbanol di esa ay agew mo din odom ay agew, dowan aben kanan di odom en maga di maitken ay agew ay nabanbanol. Mo maipanggep isna, masapol ay adi mandowadowa di nemnem di esa ya esa ay kosto di am-amagena. 6 Din mangibilang ay nabanbanol di esa ay agew et amagena di ta say pangidayawana en Apo Jesus. Siya abe din mangan si karni. Laydena ay say pangidayawana en Apo Jesus, tan man-iyaman en Diyos sin isida na. Olay abe din manigaan ay mansidas karni, sigaana begew sin layad na ay mangidayaw en Apo Jesus, et man-iyaman abe sin kanena. 7 Tan am-in tako ay mamati et baken din kadayawan tako di an-anapen tako sin kamatago tako ya olay sin kateyan tako, 8 mo adi et layden tako ay madayaw din Apo begew sin kamatago tako ya siya abe sin kateyan tako. Isonga olay mo matmatago tako ono matey tako, din Apo di akin oka en datako. 9 Tan natey yan kasin natago si Cristo ta say sisya din Apon di matmatago ya siya abe din natenatey.

\* 13:9 Exodo 20:13-15,17; Deuteronomio 5:17-19,21. † 13:9 Levitico 19:18. ‡ 13:14 Ilaen abe sin Galacia 3:27.



<sup>10</sup> Isonga adi tako manpipinabasol ya manlilinasoy, tan sangoen tako am-in si Diyos ta say okomenas datako. <sup>11</sup> Tan waday inpaisolat Diyos ay kanana, “Dadlon sigurado ay matongpal din nay ibagak en dakayo, sak-en ay Apo yo: Awni et mandokmog din am-in ay ipogaw en sak-en. Bigbigen da am-in ay sak-en si Diyos.”\*

<sup>12</sup> Isonga si Diyos di sangoen di esa ya esa en datako ta say ibaga tako en sisya di inam-amag tako.

*Adi Tako Amagen Di Olay Sino Ay Bomasolan Di Ib-a Tako*

*(1 Cor. 6:12-20; 8:1-13)*

<sup>13</sup> Adi tako ngarud manpipinabasol mo adi et ipapasnek takon nemnem tako ay adi mangamag si olay sino ay kaisokbaan ono kasolisogan di iib-a tako ay mamati. <sup>14</sup> Begew sin nakies-esaak en Apo Jesus, dadlonak ammo ay magay makan ay kadodogis sin pangilan Diyos. Ngem mo ibilang di esa ay ipogaw ay kadodogis, kadodogis iman en sisya mo kanena. <sup>15</sup> Datako ngarud ay magay paniyew na si makan, mo mansakit nemnem di ib-a tako begew sin kanen tako, baken layad di ipaila tako en sisya. Isonga siliban tako ta adi tako dadaelen di pammatin di ib-a tako begew si owat makan, tan natey si Cristo para en sisya. <sup>16</sup> Adi tako amagen di olay sino mo din pantongpalana et mapalawlawaya din wayawaya ay ibilang tako ay siged. <sup>17</sup> Tan din nabanol sin panturturayan Diyos et baken din kanen tako ya inomen tako mo adi et din kinalinteg, din talna ya olnos, ya din ragsak ay mapmapo sin Ispirito Santo. <sup>18</sup> Mo kaman nina di kabibiyag tako sin pansilsilbian tako en Cristo, malaylaydan si Diyos en datako downan pay apolbalan di odom ay ipogaw din am-amagen tako. <sup>19</sup> Isonga ipakat takon kabaelan tako ay mangamag si maiturong sin olnos tako ya mangipapigsa si pammatin di esa ya esa. <sup>20</sup> Adi tako koman dadaelen din inamag Diyos begew si makan. Tet-ewa kayman ay magay makan si kadodogis sin pangilan Diyos, ngem basol tako pay dedan mo din panganan takos kompormi et say bomasolan di ib-a tako. <sup>21</sup> Agpos et mo adi tako mansidas karni ono man-inom si arak ono mangamag si olay sino ay maiturong sin bomasolan di ib-a tako ay mamati.

<sup>22</sup> Olay sinoy pasien di esa ya esa maipanggep sina, agpos et mo adi na ibagbaga sin iib-a na mo adi et ibilang na koma ay bin-i da en Diyos. Nagasat di ipogaw ay adi pabasbasolen di konsensia na begew sin ninemnem na ay kosto si amagena. <sup>23</sup> Ngem din mandowadowa maipanggep si makan ya downan kanen et basol na di, tan din pangpanganana et adi maibasar sin pasien ay kosto. Tan olay sino ay adi maibasar sin dadlon takon pasien ay kosto et basol tako mo ipapati tako ay amagen.

## 15

*Man-inawat Ya Manbinadang Tako Koma*

*(Gal. 6:1-5)*

<sup>1</sup> Datako ay naket-eng di pammati na et masapol ay an-anosan tako din pankolongan di ipogaw ay nakapoy di pammati na downan tako aben makiliklikna en daida. Adi tako nemnemnem din panlaylaydan di awak tako, <sup>2</sup> mo adi et am-amagen tako am-in din panlaylaydan di iib-a tako ay maiturong sin pansigdan da ya mangipapigsa sin pammati da. <sup>3</sup> Tan olay si Cristo et baken din panlaylaydan di awak na di ninemnemnem na, tan waday naisolat ay kalin Diyos ay maipanggep en sisya ay kanana, “Din panglaslasoyan di ipogaw en sik-a ay Diyos et sak-en di nalaslasoy.”\* <sup>4</sup> Ipanemnem ko en dakayo din naisolat ay nay, tan am-in din inpaisolat Diyos ed idi et naisolat ta say pan-adalan tako. Tan begew sin kalin Diyos, maipapigsa di nemnem tako ya mabalin ay anosan tako di ligat ta say ipapasnek tako ay mannamnama si idawat ton Diyos.

\* **14:11** Isaias 45:23. Ilaen abe sin Filipos 2:10-11. \* **15:3** Salmo 69:9.

<sup>5</sup> Et si Diyos met laeng di napoan di anos ya kapigsan di nemnem ay nay. Sapay koma ta sisya di mamadang en dakayo ta say man-oolnos kayo ay maikompas sin ogalin Cristo Jesus. <sup>6</sup> Tan mo say iyat yo, man-es-esa di nemnem yo ay mangidaydayaw en Diyos ay Diyos ya Aman Jesu Cristo ay Apo tako.

<sup>7</sup> Man-inawat kayo ngarud ay kaman din inyat Cristo ay nangawat en dakayo ta say madayaw si Diyos. <sup>8</sup> Adi yo linglinglingan ay inmali si Cristo ay mamadang sin Judio ta say ipaila na ay matalek si Diyos, tan tinongpal na din inkarin Diyos sin aap-o da. <sup>9</sup> Ngem din esa abe ay gapo si inmaliana et ta dayawen aben din Gentil si Diyos begew sin seg-ang na. Siya na met laeng di ibagbagan din inpaisolat Diyos ay kanana, “Maitapiak sin Gentil ay makidayaw en sik-a. Dayawek sik-a sin kankantak.”†

<sup>10</sup> Wada pay di naisolat ay kanana,

“Dakayo ay Gentil, makiragsak kayo sin pinilin Diyos ay ipogaw na.”‡

<sup>11</sup> Din esa pay et kanana,

“Dakayo ay Gentil, daydayawen yos Apo Diyos. Am-in kayo ay ipogaw, daydayawen yos sisya.”§

<sup>12</sup> Wada abe di insolat Isaias ay kanana,

“Awni kadi et waday maianak ay polin Jesse. Ipangaton Diyos sisya ay mangituray sin am-in ay Gentil ya sisya di pannamnamaan da.”\*

<sup>13</sup> Sapay koma ta si Diyos ay napoan di namnama tako di mangidawat abe si palalo ay ragsak ya talna en dakayo begew sin pammati yo en sisya ta say mataptapian pay din kinapasnek di namnama yo begew sin panakabalin di Ispirito Santo.

#### *Din Obla Ay Intalek Diyos En Pablo*

<sup>14</sup> Aag-ik, magay dowadowak ay sigesiged di ogali yo. Ammok abe ay maawatan yo ay kosto din maipanggep si pammati tako et kabaelan yo ay man-init-itdo ya manbinagbaga. <sup>15</sup> Ngem tet-ewa pay kayman ay dadlonak indoritso di odom ay inbagbagak sin solat ay nay ta say adi yo linglinglingan. Et din begew ay indoritsok dana et din lebbeng ko ay apostol ay indawat Diyos en sak-en begew sin seg-ang na <sup>16</sup> ta say mansilbiak en Cristo Jesus sin pangit-itdoak sin Gentil. Tan kamanak padi sin pangikaskasabaak sin siged ay damag ay napo en Diyos ta say waday Gentil si ipailak en sisya ay kaman daton ay panlaylaydana ay nanbalinen din Ispirito Santo si nasantoan ay ipogaw na. <sup>17</sup> Isonga begew sin nakies-esaak en Cristo Jesus, mabalin ay it-ek ko din nay pansilbiak en Diyos. <sup>18</sup> Ngem iwed di odom si mabalin ay ibagak mo adi et din inam-amag Cristo ay nangaw-awis si Gentil ay mamati en Diyos. Inos-osal na din inbagbagak ya inam-amag ko <sup>19</sup> ay din nakaskasdaaw ay sinyal ya milagro. Inamag ko amin dana babaen sin panakabalin di Ispirito Santo. Din nantongpalana et dadlonak inkaskasaba din siged ay damag ay maipanggep en Cristo ay manlogi ed Jerusalem enggana ed Illiricum. <sup>20</sup> Tan din kinmakaman ay panggep ko et ta ikaskasabak din siged ay damag sin il-ilin di ipogaw ay adi nangammo si maipanggep en Cristo ta say adiak taktak-eapan din oblan di odom ay ipogaw. <sup>21</sup> Din inam-amag ko et maibasar sin naisolat ay kalin Diyos ay kanana, “Din adi nannange si maipanggep en sisya et ilaen das sisya ya maawatan da din maipanggep en sisya.”†

#### *Din Planon Pablo Ay En Mamasyal En Daida Ed Roma*

*(1 Cor. 16:1-4; 2 Cor. 8:16-9:5)*

<sup>22</sup> Begew sin oblak ay nay, namin ado ay adiak nakatongpal sin layad ko ay en mamasyal en dakayo. <sup>23-24</sup> Ngem nay kindeng ko din oblak isna, isonga ninemnem ko ay maspadak issa mo emeyak ed Espanya, tan nay pigay tawen ay laydelaydek ay ilaen dakayo. Namnamaek ngarud ay mo maiiliwanak en dakayo, mabalin ay

† 15:9 Salmo 18:49. ‡ 15:10 Deuteronomio 32:43. § 15:11 Salmo 117:1. \* 15:12 Isaias 11:10. † 15:21 Isaias 52:15.

bomadang kayo ta asiak ikanayon ay emey ed Espanya. <sup>25</sup> Ngem ed wani pay, emeyak ed Jerusalem tan waday iey ko sin ipogaw en Diyos sisi. <sup>26</sup> Tan ninemnem din gimgimong ed Macedonia ya ed Akaya ay man-olnong si ibadang da sin mamati ay nabibiteg ed Jerusalem. <sup>27</sup> Daida met laeng iman di nannemnem ay mamadang, et maibagay, tan kaman waday otang da en daida. Tan begew sin mamati ay Judio ed Jerusalem, nakilakam din Gentil sin naispiritoan ay bindisyon Diyos en daida, isonga lebbengen aben din Gentil ay bomadang si katagoan di Judio. <sup>28</sup> Ngarud, mo makdeng ay iawat ko din pilak ay nay en daida, asiak et manlobwat ay manpa-Espanya et maspadak ay mamasyal en dakayo. <sup>29</sup> Et ammok ay mo somawangak issa, gon-oden tako am-in di sigesiged ya nawadwad ay bindisyon ay mapo en Cristo.

<sup>30</sup> Aag-ik, wada di kedawek en dakayo. Begew en Jesu Cristo ay Apo tako ya begew sin layad tako ay indawat din Ispirito Santo, pangaasi yo ta ipapasnek yo ay makikararag en sak-en ta bomadang si Diyos. <sup>31</sup> Ikararag yo ta salakniban Diyos sak-en sin adi mamati ed Judea ya ta malaylaydan din ipogaw en Diyos ed Jerusalem ay mangawat sin badang ay iey ko en daida. <sup>32</sup> Pangaasi yo ta ikarkararag yo dana ta say mo layden Diyos, peteg di ragsak ko ay somawang issa ya pomigpigsa di nemnem ko sin pamasyalak en dakayo. <sup>33</sup> Sapay koma ta si Diyos ay mangidawdawat si talna di wada en dakayo am-in. Amen.

## 16

### *Din Kakdengan Di Solat*

<sup>1</sup> Wada di agi tako ay babai ay laydek ay iam-ammo en dakayo begew sin solat ay nay. Sisy si Febe ay mansilsilbi sin gimong ed Cenkrea. <sup>2</sup> Mo domateng issa, awaten yo ay kosto begew sin nakies-esaana en Apo tako, tan say maibagay ay amagen di ipogaw Diyos. Badangan yo abes sisya mo waday kasapolana, tan ad-ado iman di binadbadangana patis sak-en.

<sup>3</sup> Pakomostaak da Priscilla en Aquila ay nakiob-obla en sak-en ay mansilsilbi en Cristo Jesus. <sup>4</sup> Inposta da iman din biyag da para en sak-en, isonga dakdake di otang ko en daida, ya baken sak-en anggoy mo adi et am-in abe ay gimong sin il-ilin di Gentil. <sup>5</sup> Pakomostaak abe din odom ay mamati ay matoptopog sin beey da.

Ad-ado pay di laydek ay pakomostaan. Di esa et din patpatgek ay gyyem ko ay si Epenetus ay say damo ay namati en Cristo sin probinsiya ay Asia. <sup>6</sup> Di esa abe et si Maria ay palalo di obla na para en dakayo. <sup>7</sup> Pakomostaak abes da Adronicus en Junias ay iib-ak ay Judio ay gagait ko ay balod ed idi. Madamdamag ay aapostol da ay nangon-ona mo sak-en ay namati.

<sup>8</sup> Pakomostaak si Ampliatus ay laydelaydek ay gyyem ko begew en Apo Jesus. <sup>9</sup> Siya abe en Urbanus ay makiob-obla en datako ay mansilsilbi en Cristo, ya si Estakis ay patpatgek ay gyyem ko. <sup>10</sup> Nemnemnemek abe si Apelles. Napadpadas di pammati na et napaneknekan ay matalek ay mansilbi en Cristo. Din pamilyan pay Aristobulus <sup>11</sup> ya si Herodion ay ib-ak ay Judio, ya din mamati sin pamilyan Narcissus et komosta en daida am-in.

<sup>12</sup> Pakomostaak da Trifena en Trifosa ay nagaget ay mansilsilbi en Apo Jesus, siya abe sin patgek ay gyyem ko ay si Persis ay esa pay ay babai ay palalo iman di obla na para en Apo Jesus. <sup>13</sup> Komosta abe en Rufus ay nadamag di pansilsilbiana en Apo Jesus ya si ina na ay ibilang ko abe ay inak. <sup>14</sup> Siya abe en da Asincritus, Flegon, Hermes, Patrobas, Hermas ya din odom ay aag-i tako ay mamati ay naitatapi en daida, pakomostaak daida am-in. <sup>15</sup> Ibagay yo pay din pakomostak en da Filologus en Julia, si Nereus ya din agi na ay babai, ya si Olimpasya ya din ipogaw en Diyos ay iib-a da. <sup>16</sup> Manpinakomosta kayo abe ay mangipaila ay manlilinayad kayo. Am-in di gimong di mamati en Cristo et pakpakomostaan da abe si dakayo issa.

<sup>17</sup> Pangaasi yo ay aag-ik ta siliban yo di ipogaw ay mangipasisian en dakayo ya manangaw si pammati yo begew sin it-itdo da ay maikontra sin kosto ay inadal yo ed idi. Addawian yos daida. <sup>18</sup> Tan din kaman dadi ay ipogaw et baken si Cristo ay Apo tako di pansilbilbian da mo adi et anggoy din awak da. Begew sin makaay-ayo ya bolboladas ay kali da, iet-etekan da di ipogaw ay si on-onod. <sup>19</sup> Ammok kayman ay nadamag di panongtongpalan yo en Cristo sin olay addawi ay il-ili, isonga naragsaragsakak maipanggep en dakayo, ngem laydek pay dedan ay nalaing kayos maipanggep si siged downan pay magay laing yos maipanggep si lawa. <sup>20</sup> Adi mabayag yan si Diyos ay mangidawdawat si talna et dadlonan abaken si Satanas ta say gatinan takos sisya. Sapay koma ta seg-angan Jesus ay Apo tako si dakayo am-in.

<sup>21</sup> Si Timoteo ay makiob-obla en sak-en et pakpakomostaanas dakayo, siya abe din iib-ak ay Judio ay da Lucius en Jason ya si Sosipater.

<sup>22</sup> Si Tercius ay nangipasolsolatak sin solat ay nay et pakomostaana abes dakayo, tan esa ay ib-a tako ay mamati en Apo Jesus.

<sup>23</sup> Manpakomosta abe en dakayo si Gaius ay panteteak. Din beey na met laeng di pantoptopogan di gimong di mamati. Si Erastus ay tesoreron di ili ay nay ya si Kuartus ay agi tako et maitapi da abe ay manpakomosta en dakayo.

<sup>24</sup> [Sapay koma ta seg-angan Jesu Cristo ay Apo tako si dakayo am-in. Amen.]\*

<sup>25</sup> Sapay koma ta madaydayaw si Diyos. Manakabalin sisya ay mangipapigsa sin pammati yo ay maibasar sin ikaskasabak ay siged ay damag ay maipanggep en Jesu Cristo. Din nay siged ay damag et nabayabayag ay adi naipaammo, <sup>26</sup> ngem ed wani, naipalawag ay maibasar sin inpaisolat Diyos sin mamadto. Et si Diyos ay magay nanlogiana ya magay patingga na et inbilina ay maipaammo din nay siged ay damag sin kaipoipogaw sin kailili ta say tongpalen das sisya et mamati da. <sup>27</sup> Ang-anggay sisya si nalaing si am-in. Sapay koma ta madaydayaw sisya si eng-enggana begew en Jesu Cristo. Amen.

---

\* **16:24** Din versikulo ay nay et maga sin kaad-adoan ay manuskrito sin Griego.

## **Din Damo Ay Solat San Pablo Sin Taga-Corinto**

### **Maipanggep Sin Solat Ay Nay**

Sin maikadwa ay nanbiyahian Pablo ay en nangikasaba sin siked ay damag, naspasyal ed Corinto ay kapital di Akaya, esa ay probinsiya sin sakop di Roma. Dakdake di ay siyodad ay ilin di Griego, Romano ya Judio. Gapo ta wada sin kad-an di baybay, ad-ado abe di namaspasyal isdi ay mannigosyos kompormi sin bapor. Nandinamag din siyodad ay sana begew sin kinabaknang na, din ad-ado ay relihion di omilis di, ya din ad-ado ay nakibabbabai ya nakilallalaki ya nangon-onod si odom ay ogali ay kaman dadi. Dandani ay doway tawen di nantetean Pablo isdi ay nangaskasaba, et ad-ado di namati (ilaen sin Inam-amag 18).

Idi inmey di nasurok ay tolo ay tawen, sin kad-an Pablo ed Efeso ay nangaskasaba, waday inawat na ay solat ay napo sin gimong ed Corinto (1 Corinto 7:1). Wada abe di dinamag na ay maipanggep sin nan-iibawan di miembron di gimong ya odom ay problima da. Din insongbat Pablo sin solat da ay sana ya din dinamag na ay problima et siya Din Damo ay Solat Pablo Sin Taga-Corinto. Sin solat ay nay, binagbagaanas daida maipanggep sin nan-iibawan da ya din nanigaan da ay mangipakaan sin miembro ay nakikamkamalala. Sinongbatana abe din salsalodsod da ay maipanggep sin pangasawaan di ipogaw, din amagen koman di balo ya odom ay magay asawa na, ya din makan ay naidaton sin sinan didiyos. Wada abe di inbaga na en daida maipanggep si olnos mo man-gimong da, din nankinalasi ay kabaelan ay indawat din Ispirito Santo ya din kosto ay kaosalan da, ya din kasin katagoan di natey.

Nabanol en datako din solat ay nay, tan say pan-adalan tako sin problima ay sinangsangon di kabangbangona ay gimong sin ilin di pagano ay kaman met laeng di problima ay sangsangoen di gimgimong tako ed wani. Siya na abe di pan-adalan tako sin insongbat Diyos en dana ay problima.

#### **Din Linaona**

Din panlogian di solat ya din nan-iyamanan Pablo 1:1-9

Din nan-iibawan di nankinalasi ay bonggoy sin gimong 1:10-4:21

Din lebbeng da ay mangipakaan sin miembro ay nanbasbasol 5:1-13

Din pangidaruman di mamati sin iib-a na ay mamati 6:1-11

Din kosto ay kaosalan di wayawaya tako ay Cristiano 6:12-20

Din salodsod ay maipanggep sin pangasawaan ya adi pangasawaan di ipogaw 7:1-40

Din salodsod ay maipanggep sin makan ay naidaton sin sinan didiyos 8:1-11:1

Din kosto ay amagen di babai sin simbaan 11:2-16

Din kosto ay maonodan sin pankumulgaran 11:17-34

Din kabaelan ay indawat di Ispirito Santo ya din kosto ay kaosalan da sin simbaan 12:1-14:40

Din kasin natagoan Jesus ya din kasin ton katagoan di natey 15:1-58

Din kaolnongan di maibadang sin mamati ed Jerusalem 16:1-4

Din planon Pablo 16:5-9

Din kagdengan di solat 16:10-24

#### *Din Panlogian Di Solat*

<sup>1</sup> Sak-en si Pablo ay pinilin Cristo Jesus ay apostol na maibasar sin layden Diyos. Din gait kos na et din agi tako ay si Sostenes. <sup>2</sup> Naey di solat mi en dakayo ay gimong di ipogaw en Diyos ed Corinto ay nanbalinena si nasantoan ay ipogaw na begew sin nakies-esaan yo en Cristo Jesus. Et baken dakayo anggoy di inayagana ay manbalin si



nasantoan ay ipogaw na mo adi et am-in abe ay wada sin kailili ay manaydayaw en Apo Jesu Cristo, tan sisya din Apo tako am-in. <sup>3</sup> Sapay koma ta wada en dakayo di seg-ang ya talna ay mapmapo en Diyos ay Ama tako ya si Apo Jesu Cristo.

*Din Nan-iyamanan Pablo Begew Sin Seg-ang Diyos En Daida*

<sup>4</sup> Kanayon ay man-iyamanak en Diyos begew sin seg-ang ay inpaila na en dakayo begew sin nakies-esaan yo en Cristo Jesus. <sup>5</sup> Tan peteg kayman ay binindisyonanas dakayo si pangawat yo sin tet-ewa ya laing yo ay mankali begew sin nakies-esaan yo en sisya. <sup>6</sup> Tan pinati yo ay kosto din init-itdo mi ay maipanggep en Cristo, <sup>7</sup> isonga magay pankolongan yo sin nankinalasi ay kabaelan ay idawdawat Diyos sin panedsed-an yo sin kasin omalian Jesu Cristo ay Apo tako. <sup>8</sup> Sisya di mangipapapigsa sin pammati yo ta say magay pankolongan yo sin agew ay kasinan omalian. <sup>9</sup> Tan matalek si Diyos ay nangayag en dakayo ta makikadkadwa kayo sin Anak na ay si Jesu Cristo ay Apo tako.

*Din Pamagbagan Pablo Maipanggep Sin Nan-iibawan Di Mamati*

<sup>10</sup> Dakayo ay aag-ik, wada di ibilin ko en dakayo sin ngadan Jesu Cristo ay Apo tako: pangaasi yo ta mankikinaawatan kayo ta say adi kayo mansinasina mo adi et man-esa di nemnem ya panggep yo. <sup>11</sup> Ibilin ko na en dakayo tan wada sin pamilyan Kloe di nangisodsod en sak-en ay mansosongbat kayo. <sup>12</sup> Din laydek ay kalien et natken di kanan di esa ya esa. Tan wada kano di mangmangwani, “Si Pablo di on-onodan mi,” dowan kankanan di odom, “Si Apollos abe di on-onodan mi.” Di odom et kankanan da en, “Naitatapi kami en Pedro,” ya di odom pay, “Mo si dakami abe yan si Cristo di naitatapi mi.” <sup>13</sup> Ay apaw kayo! Kaman yon nansisianen si Cristo! Ay siya mo sak-en ay si Pablo di natey sin krus para en dakayo? Ay sak-en ngata di naitapien yo sin nanpabonyagan yo? <sup>14</sup> Man-iyamanak en Diyos, tan da Crispus en Gaius anggoy di binonyagak issa. <sup>15</sup> Magay odom en dakayo si binonyagak, isonga adi mabalin ay kanan di olay sino en nanpabonyag kayo ay naitapi en sak-en. <sup>16</sup> Ay-aw baw adi kayman! Wada abes da Estefanas ay sinpangabong, ngem magay odom si manemnem ko ay binonyagak. <sup>17</sup> Tan adi inmibaas Cristo ta enak mamonbonyag, mo adi et inbaa nas sak-en ay en mangikasaba sin siged ay damag. Et sin nangam-amagak sidi, adiak inos-osal di naaltian ay kali ay mangipailas laing ko tan into et mo mamaga di pantongpalan di nateyan Cristo sin krus.

*Din Naipogawan Ay Sirib Et Baken Sirib Sin Pangilan Diyos*

<sup>18</sup> Tan din ipogaw ay maisian en Diyos ay madosa et ibilang da ay magay banol di mait-itdo maipanggep sin nateyan Cristo sin krus, ngem mo si datako pay ay maisalsalakan et ammo tako ay siya di din kailaan di panakabalin Diyos. <sup>19</sup> Tan wada di inpaisolat Diyos ay kanana, “Dadaelek din laing di masirib ya naadal ay ipogaw ya ipailak ay magay banol di laing da.”\* <sup>20</sup> Sino ngarud di kasasaad di masirib ay ipogaw ya din maestron di linteg ya din nalaing ay makidibati ay wadas nan daga? Tan enggay inpailan Diyos ay magay banol di naidagaan ay sirib. <sup>21</sup> Tan begew sin sirib Diyos, ninemnem na ay adi mabalin ay ammoan di ipogaw sisya babaen sin mismo ay sirib da, tan planon Diyos ay isalakana di mamati en Cristo babaen sin ikaskasaba mi ay say ibilang di adi mamati ay magay banol na. <sup>22</sup> Siya di din pannemnem da, tan mo din Judio et mansapol das milagro ay mangipaneknek sin katet-ewan di dengdengngen da ya din Griego abe et an-anapen da di naoneg ay mait-itdo ay maibasar sin sirib di ipogaw. <sup>23</sup> Ngem din ikaskasaba mi pay, si Cristo ay nailansa sin krus, et say kaskasniton di Judio ya kanan aben di Griego en magay banol na. <sup>24</sup> Ngem mo si datako pay ay inayagan Diyos, olay Judio ono Gentil, ammo tako ay si Cristo din kaipailaan di panakabalin ya sirib Diyos. <sup>25</sup> Tan olay din kinaong-ong Diyos sin pannemnem di ipogaw et addawi ay nangatngato

\* 1:19 Isaias 29:14.

mo din sirib da, ya olay din ibilang da ay kinakapoy Diyos et napigpigma mo din kabikas da.

<sup>26</sup> Nemnemen yo ay aag-i din kasasaad yo sin nangayagan Diyos en dakayo. Baken adado en dakayo di naadal sin pannemnem di ipogaw. At-atik kayo abe ay nangato di saad na ono anak di baknang. <sup>27</sup> Tan pinilin Diyos din baken naadal ono nalaing sin pangilan di ipogaw ta say mabainan din naadal. Pinili na din nakapoy sin pangilan di ipogaw ta say mabainan din mabikas. <sup>28</sup> Din ibilang aben di ipogaw ay nababa ya malaslasoy ya magay kowinta na, et siya da din pinilin Diyos ta ipaila na ay din patpatgen di ipogaw et maga baw di pateg na. <sup>29</sup> Inamag na di ta say magay iyat di olay sino ay ipogaw ay mangit-ek sin awak na sin sangoanana. <sup>30</sup> Tan si Diyos di nangitapi en datako en Cristo Jesus, et nanbalinenas Cristo si napoan di sirib tako. Babaen en sisya, maibilang tako ay nalinteg, manbalin tako ay nasantoan ay ipogaw Diyos, ya maipawaya tako. <sup>31</sup> Isonga onodan tako din inpaisolat Diyos ay kanana, “Mo waday mayad ay mangit-ek si kompormi, it-ek na koma din inamag di Apo.”†

## 2

### *Din Inkaskasaban Pablo Et Adi Maibasar Sin Sirib Di Ipogaw Mo Adi Et Din Panakabalin Diyos*

<sup>1</sup> Mo si sak-en ay aag-i, sin inmeyak issa ay nangikasaba sin inpaammon Diyos ay maipanggep en Cristo, adiak inos-osal di naoneg ay kali ono naaltian ay kaikaliana ya adiak aben inbagbaga din sirib di ipogaw. <sup>2</sup> Tan ninemnem ko ay mo wadaak sin kadan yo, imongsan kon nemnem ko en Jesu Cristo, namnamed din nateyana sin krus. <sup>3</sup> Sin nakiteteak en dakayo, nakapoy di liknak ya nankaykayebkebak tan mo et adiak makatongpal sin layden Diyos. <sup>4</sup> Sin nangit-itdoak en dakayo, adiak aben inos-osal di makaawis ay kali ay mangipailas laing ko mo adi et naipappaila sin inkaskasabak din panakabalin di Ispiriton Diyos. <sup>5</sup> Say inyat ko di ay nangaskasaba ta say adi maibasar di pammati yo sin naipogawan ay sirib mo adi et sin panakabalin Diyos.

### *Din Tet-ewa Ay Sirib Et Napo En Diyos*

<sup>6</sup> Wada pay dedan di naoneg ay it-itdo mi sin ipogaw ay naket-eng di pammati na, ngem maitken sin naidagaan ay sirib di ipogaw ya olay din sirib di manturturay isnan lobong ay mamaiwed di panakabalin da. <sup>7</sup> Din kinasirib ay ibagbaga mi et din planon Diyos ay ninemnem na sin daan maparsuaan di lobong ta maitapi tako sin kinangato na. Ngem adi na inpaammo na sin ipogaw ed idi. <sup>8</sup> Din ap-apo isnan daga et adi da polos naawatan din plano ay nay, tan mo naawatan da koma, adi da koma inlansa din kangatoan ay Apo sin krus. <sup>9</sup> Din ibagbaga mi et din katongpalan di inpaisolat Diyos ay kanana,

“Din adi inil-ila ya dindinngen di ipogaw ya adi da pay kabaelan ay olay owat nemnemen et siya di din insaganan Diyos para en daida ay manglaylayad en sisya.”\*

<sup>10</sup> Da naey di inpaammon Diyos en datako babaen sin Ispirito na, tan maga di adi ammon din Ispiriton Diyos. Olay din kaonegan ay nemnem Diyos et ammo na ay kosto.

<sup>11</sup> Tan maga di nakin ammo sin wadas nemnem di esa ay ipogaw mo baken et sisya ay mismo. Siya abe en Diyos, maga di nakin ammo sin nemnem na mo adi et din Ispirito na.

<sup>12</sup> Ngem mo datako ay mamati et baken nailobongan ay nemnem di inawat tako mo adi et din kosto ay Ispiriton Diyos ay inbaa na ta say maawatan tako din am-in ay indawat na en datako. <sup>13</sup> Isonga sin pangit-itdoan mi si maipanggep en Diyos, adi mi os-osalen di kali ay maibasar sin laing di ipogaw mo adi et din kali ay it-itdon din Ispiriton Diyos en

† 1:31 Jeremias 9:24. \* 2:9 Isaias 64:4.

dakami.† <sup>14</sup> Mo din adi mamati ay adi pantetean din Ispiriton Diyos, adi na awaten din mapmapo sin Ispiriton Diyos, tan magay banol na en sisya. Adi na aben maawatan, tan maawatan et anggoy din kosto ay olog ya pateg na babaen sin Ispiriton Diyos. <sup>15</sup> Ngem din pantetean din Ispiriton Diyos et maawatana din pateg di am-in, ngem adi maawatan di odom ay ipogaw sisya. <sup>16</sup> Tan wada di inpaisolat Diyos ay kanana, “Ay siya mo waday ipogaw si nakin ammo sin nemnem Diyos? Ay siya mo waday nakabagbaga en sisya?”‡  
Ngem mo datako pay, wada en datako din nemnem Cristo.

### 3

#### *Din Nan-iibawan Da Et Begew Sin Naipogawan Ay Nemnem Da*

<sup>1</sup> Aag-ik, sin nakiteteak en dakayo, adiak mabalin ay initdoan dakayo ay kaman din pangit-itdoak si naket-eng di pammati na ay iturturong din Ispirito Santo, mo adi et inbilang ko ay moyang kayos pammati tan naipogawan pay laeng di nemnem yo. <sup>2</sup> Isonga initdok en dakayo din maiarig si gatas ay maipainom si moyang, tan adi kayo nakaawat si naon-oneg ay maitdo ay maiarig si kosto ay makan. Et olay ed wani, adi kayo pay laeng makaawat, <sup>3</sup> tan naipogawan pay laeng di nemnem yo. Kanak di, tan sana ay mansosongbat ya makaapal kayo. Et mo siya say am-amagen yo, naipogawan kayo ngarud ya isoen yo di nemnem ya ogalin di nailobongan ay ipogaw. <sup>4</sup> Tan mo kanan di esa, “Si Pablo di on-onodak” down aben kanan di esa, “Si Apollos abe di on-onodak,” adi pay man-iso di ogali yo sin ipogaw ay adi mamati, ay baken siya?

#### *Adi Da Inawatan Din Kosto Ay Kasasaad Da Pablo En Apollos Ay Mansilsilbi En Diyos*

<sup>5</sup> Nemnemen yo na. Sino od si Apollos? Sinoak od? Baan Diyos si dakami et anggoy. Dakami kayman di inosal Diyos ay nangawis en dakayo ay mamati, ngem inamag mi anggoy din obla ay intalek na sin esa ya esa en dakami. <sup>6</sup> Mo iarig kos dakayo sin talon, sak-en di nangis-ek sin bin-i, si Apollos abe di nanibog, ngem si Diyos pay di nangipagabay. <sup>7</sup> Isonga magay pateg di man-esek ya mansibog. Si Diyos anggoy di napateg, tan sisya di mangipagabay sin mola. <sup>8</sup> Tet-ewa ay malagboan kami en Apollos insigon sin inamag mi ay dowa, ngem nan-iso pay dedan di kasasaad mi ay man-esek ya mansibog. <sup>9</sup> Tan mankakadwa kami ay mansilsilbi en Diyos et dakayo pay din talon Diyos ay pan-ob-oblaan mi.

Iarig ko abes dakayo sin beey ay am-amagen Diyos. <sup>10</sup> Sak-en di maiarig sin nalaing ay nangisaad sin fondasyon begew sin kabaelan ay indawat Diyos en sak-en. Wada abey odom ay mangitoltoloy ay mangisaad sin beey sin fondasyon ay insaad ko. Ngem masapol ay annadan di esa ya esa din am-amagena. <sup>11</sup> Tan adi mabalin ay sokatan di olay sino ay ipogaw din fondasyon ay enggay naisaad ay si Jesu Cristo. <sup>12</sup> Ngem mabalin ay nankinalasi di maosal ay maiamag sin fondasyon. Tan waday mangiam-amag si balitok ya palata ya nabanol ay bato ya wada abey mangiam-amag si kaiw ya pa-o ya garami. <sup>13</sup> Ngem sin agew ay pangokoman din Apo sin am-in ay ipogaw, maila din kosto ay banol di inamag di esa ya esa, tan maipadas si apoy. <sup>14</sup> Mo din ipogaw ay adi mapooan di in-amag na sin fondasyon, magon-gonaan sisya. <sup>15</sup> Ngem din ipogaw ay mapooan di in-amag na et magay awatena ay gon-gona. Maisalakan met, ngem kaman ipogaw ay makalayaw sin mapoppooan ay beey.

<sup>16</sup> Ay adi yo ammo ay dakayo din timplo ay panbebbeeyan Diyos tan wada en dakayo din Ispirito na? <sup>17</sup> Isonga mo waday manadael sin timplon Diyos, dadaelen aben Diyos

† **2:13** Di esa abe ay kaiologan nina sin Griego et: Isonga sin pan-it-itdoan mi, adi mi os-osalen di kali ay maibasar sin laing di ipogaw mo adi et kali ay it-itdon din Ispiriton Diyos en dakami. Iol-olog mi di maipanggep en Diyos sin ipogaw ay pantetean din Ispiriton Diyos. ‡ **2:16** Isaias 40:13. Ilaen abe sin Roma 11:34.

sisya. Tan din timplon Diyos et nailalasin para en sisya, et dakayo met din timplo ay sana.

<sup>18</sup> Adi yo iet-etekan di awak yo. Mo wada en dakayo di mangibilang sin awak na ay nalaing ay maibasar sin kinalaing di adi mamati, agpos et mo dokogana din laing na ay sana ta say ganabena din tet-ewa ay laing. <sup>19</sup> Tan din laing ay nailobongan et magay banol na sin pangilan Diyos. Tan wada di inpaisolat Diyos ay kanana, “Din osalen Diyos ay mangabak sin masirib ay ipogaw et din mismo ay kinasikap da.”\* <sup>20</sup> Et wada abe di naisolat ay kanana, “Ammon din Apo ay magay banol di nemnem di masirib ay ipogaw.”† <sup>21</sup> Isonga adi yo koma it-it-ek di owat ipogaw, tan oka yo am-in di wada.‡ <sup>22</sup> Oka yos dakami en Apollos ya si Pedro, tan inayagan Diyos dakami ay mansilbi en dakayo. Olay din lobong ay nay ya din katagoan ya kateyan yo ya olay abe din agew ed wani ya din tapin di agew et indawat Diyos am-in en dakayo. <sup>23</sup> Et mo si dakayo, okan Cristo, et mo si Cristo pay, okan Diyos.

## 4

<sup>1</sup> Isonga ibilang yo komas dakami ay baan Cristo ay nangitalkan Diyos sin obla ay mangitdo sin tet-ewa ay adi na inpaammo ed idi. <sup>2</sup> Ammo yo ay din ipogaw ay naitalkan di obla et masapol ay mapaneknekan ay matalek. <sup>3</sup> Ngem magay lawa na en sak-en mo dakayo ono odom ay ipogaw di mamistigal en sak-en mo nas-et di oblak ono adi. Olay sak-en et adiak bistigalen din mismo ay awak ko. <sup>4</sup> Nalinis met di konsensiak, ngem adi na layden ay kalien en maga tet-ewa di basol ko. Din Apo et anggoy di makaibagas di, tan sisya anggoy di mangokom en sak-en. <sup>5</sup> Isonga adi yo isapsapa ay okomen din iib-a yo ay ipogaw. Awni ta domateng din kosto ay timpo ay omalian din Apo ta say sisya di mangokom. Tan ipaammo na am-in di naisassaot, pati din nemnem ya gagaran di ipogaw.\* Asi pay dayawen Diyos di esa ya esa insigon sin kaikariana.

<sup>6</sup> Aag-i, sin am-in dana ay inbagak, si dakami en Apollos di inos-osal ko ay pangarig ay pan-adalan yo ta say adi yo labsingen din naisolat ay pamagbaga. Tan mo onodan yo di ay kosto, adi yo ipangpangato di awak yo ay mangwani en waday lebbeng yo ay mangit-ek si esa ya manglaslasoy si esa. <sup>7</sup> Tan sino ngata di kinapateg yo mo din iib-a yo? Ay wada ngata di laing ono kabaelan yo ay adi indawat Diyos? Et mo si Diyos di nangidawat, apay nga it-it-ek yo din awak yo ay kaman dakayo di nangiobla?

<sup>8</sup> Ay apaw kayo ay taga-Corinto! Kanan yo en nawawada en dakayo din am-in ay kasapolan yo ya enggay wada en dakayo din am-in ay kabaelan ay idawdawat di Ispirito Santo. Kanan yo en enggay inlogi yo ay manturay, ngem mo si dakami pay ay apostol et daan pay laeng. Mayat koma mo tet-ewa ay enggay manturturay kayo ta say makituray kami abe. <sup>9</sup> Tan din katet-ewa na si pannemnem ko et nanbalinen Diyos dakami ay apostol si kababaan ay ipogaw ay kaman din nakeddenggan ay matey sin pobluko ta boyaen di am-in ay ipogaw ya din aanghel abe. <sup>10</sup> Begew sin pansilsilbian mi en Cristo, naong-ong kami kano, ngem mo dakayo pay, kanan yo en nanemneman kayo begew sin naitapian yo en sisya. Mo dakami et maga kano di kabaelan mi, ngem mo dakayo et kanan yo en kabaelan yo am-in. Dakayo abe di daydayawen di ipogaw, ngem mo dakami pay et laslasoyen da. <sup>11</sup> Enggana ed wani, nadagaangan ya nabigaw kami ya kolang di bado mi. Wada abe di manesdespeg en dakami ya maga di kosto ay panbeeyan mi. <sup>12</sup> Manligligat kami ay man-obla ta waday katagoan mi. Mo palawlawen das dakami, mankedaw kami en Diyos ta bindisyonanas daida, et mo pomalpaligat da, anosan mi. <sup>13</sup> Mo lawa di ibaga da en dakami, nainayad abe di iyat mi ay manongbat. Ngem enggana ed wani, ibilang di ipogaw pay dedan ay kaman kamin owat basura ay maiwasit ono pagit ay magidgidan.

\* 3:19 Job 5:13. † 3:20 Salmo 94:11. ‡ 3:21 Ilaen abe sin Roma 8:17,32. \* 4:5 Ilaen abe sin Roma 2:16.

<sup>14</sup> Adiak insolat dana ay mangipabain en dakayo, mo adi et ta bagaak dakayo, tan ibilang kos dakayo ay laydelaydek ay anak ko. <sup>15</sup> Tan olay mo ad-ado di mangay-ayowan ya mangit-itdo en dakayo sin biyag yo ay Cristiano, nemnemen yo ay ang-anggayak si ama yo begew sin namatian yo en Cristo Jesus, tan sak-en di damo ay nangikasaba sin siged ay damag en dakayo. <sup>16</sup> Isonga pangaasi yo ta tadonen yos sak-en. <sup>17</sup> Siya na di begew ay inbaak si Timoteo ta tolonganas dakayo ay mangiyat sidi. Sisya di esa ay ibilang ko ay laydelaydek ay anak ko ay matalek abe ay mansilbi en Apo Jesus. Ipanemnem na en dakayo din kabibiyag ay on-onodak begew sin pammatik en Cristo Jesus ay say kabibiyag ay it-itdok abe sin gimgimong sin am-in ay ili.

<sup>18</sup> Wada kano en dakayo di nangato di nemnem da, tan kanan da en emegyatak ay en mamasyal en dakayo. <sup>19</sup> Ngem adi met mabayag yan emeyak issa, mo say layden di Apo. Asiak penken ay kosto mo waday panakabalin da sana ay nangato di nemnem na ono mo nalaing da anggoy ay man-apat. <sup>20</sup> Tan din kailaan di pangiturayan Diyos en datako et baken din apat tako mo adi et din panakabalin Diyos sin biyag tako. <sup>21</sup> Isonga oway kayo. Ay masapol ay emeyak issa ay manosa en dakayo ono layden yo ay ipailak di layad ya anos ko?

## 5

### *Din Lebbeng Da Ay Mangipakaan Sin Miembro Ay Nanbasbasol*

<sup>1</sup> Wada di nadamdama ko ay wada kano en dakayo di nangam-amag si palalo ay kadodogis, tan inasawa na din maikadwa ay asawan ama na. Olay din adi mamati en Diyos et adi da damdaman am-amagen din kaman nisa! <sup>2</sup> Yan sana et kayman ay nangato pay laeng di nemnem yo. Palalo koma ay mansakit di nemnem yo ta say pakaanen yo din nangamag sin sana ay lawlawa. <sup>3</sup> Tan olay mo magaak en dakayo, nemnemnemek pay dedan si dakayo, et begew sin kalebbengak ay panakaawak Apo Jesus, enggay kineddengak din nangamag sin basol ay sana ay kamanak wada en dakayo. <sup>4</sup> Isonga mo masinop kayo ya wada en dakayo din panakabalin Jesus ay Apo tako, siya na di amagen yo ay mangibilang ay wadaak abes sa. <sup>5</sup> Ipolang yo din lalaki ay sana en Satanas\* ta paligaten Satanas din awak na ta say maisalakan din ab-abiik na sin agew ay kasin omalian din Apo.

<sup>6</sup> Lawlawa san pangipapangatoan yo sin awak yo. Ay adi yo ammo ay olay at-atik ay labadura et palbagena di intiro ay nailaokana? <sup>7</sup> Masapol ngarud ay isaldeng yo din lawa ay ogali yo ay maiarig sin labadura ta mais-o di ogali yo sin nalinis ay kasasaad yo sin pangilan Diyos. Masapol ay amagen yo di ta maiarig kayo si tinapay ay kaiototo ay magay labadura na ay maikadkadwa sin karnero ay paltien di Judio sin fiesta ay makwani en Nalabas. Tan si Cristo ay kaiarigan din karnero ay doy et enggay natey ay mangipawaya en datako sin basol.† <sup>8</sup> Isonga sin makifestaan tako, adi tako mangan si tinapay ay waday labadura na. Din laydek ay kalien et sin biyag tako ay mamati, adi tako on-onodan di lawa ay ogali mo adi et din siged ya tet-ewa ay adi polos natapian si lawa.

<sup>9</sup> Din solat ko en dakayo ed idi‡ et inbagak ay adi kayo makigaygayem si ipogaw ay mangam-amag si kadodogis. <sup>10</sup> Ngem din inbagbagak et baken din adi mamati ay manaddaag si baken dan asawa ono man-gamgam si baken dan oka ono mangakew ono manaydayaw si sinan didiyos. Tan mo addawian yo am-in dadi ay adi mamati,

\* 5:5 Din layden ay kalien din mangipolang si ipogaw en Satanas et pakaanen sin gimong. Ilaen abe sin 1 Timoteo 1:19-20 ay maipanggep en da Himeneo en Alejandro ay naipolang abe en Satanas. † 5:7 Exodo 12:5. Din ogalin di Judio sin fiesta ay makwani en Nalabas et masapol ay iwasi da din am-in ay labadura ay wada sin beey da ta asi da manpaltis karnero sin kabigatana. Isonga mo enggay napalti din karnero, lawa mo waday binay-an da ay labadura. ‡ 5:9 Waday insolat Pablo sin gimong ed Corinto ay nangon-ona mo din solat ay nay, ngem adi maibilang ay din damo ay solat na en daida, tan adi tako ammo din linaona.



masapol ay komaan kayo isnan daga. <sup>11</sup> Di layden din inbagak ay kalien et mo waday ipogaw ay mangwani en agi yo ay mamati ngem dowana et daddaagen di bakenan asawa ono man-gamgamam ono manaydayaw si sinan didiyos ono palawlawaena di iib-a na ono makabeteng ono mangakew, adi kayo makigaygayyem en sisya. Olay pay makan, adi kayo makikan sin ipogaw ay kaman nidi. <sup>12-13</sup> Tan magay biyang tako ay mangokom si baken takon iib-a ay mamati, tan si Diyos di makaamos di. Ngem wada met di lebbeng yo ay mangokom sin naitatapi sin gimong yo, tan waday inpaisolat Diyos ay kanana, “Masapol ay pakaanen yo din naitatapi en dakayo ay nangamag si lawa.”§

## 6

### *Din Nangidaruman Da Sin Iib-a Da Ay Mamati*

<sup>1</sup> Mo wada di adi yo nankinaawatan, apay nga magay bain yo ay mangidarum sin ib-a yo ay mamati sin howis ay adi mamati? Din ipogaw Diyos koma di manongtong sin kaso. <sup>2</sup> Ay adi yo ammo ay din ipogaw Diyos di mangokom to sin kaipoipogaw isnan lobong?\* Mo siya di din amagen yon to, ay siya mo adi yo kaya ay manongtong si kaso ay baken madagsen? <sup>3</sup> Ay adi yo aben ammo ay datako di mangokom to sin aanghel? Mo kabaelan tako di, adi pay namnamed di maipanggep isnan daga et anggoy. <sup>4</sup> Mo wada ngarud di kaman dadi ay kaso yo, apay nga ipaokom yo sin magay pateg na sin gimong di mamati?† <sup>5</sup> Kababain damdama! Ay maga ngata di olay esa en dakayo si nalaing ay manongtong sin kaso yo ay mamati? <sup>6</sup> Ngem sana et ay idardarum yon iib-a yo ay mamati sin sangoanan di adi mamati!

<sup>7</sup> Olay din pan-asidaruman yo et laydena ay kalien en enggay inabak di lawa si dakayo. Maymayat damdama mo anosan yo din mangamag si lawa en dakayo. Olay masowitik kayo, adi kayo mandardarum. <sup>8</sup> Ngem imbis nga say amagen yo di, dakayo ay mismo di mangamag si lawa ya mansowitik, olay din aag-i yo ay mamati et sowitiken yo! <sup>9</sup> Ay adi yo ammo ay adi maitapi sin panturayan Diyos din mangam-amag si lawa? Adi yo iet-etekan din awak yo, tan din makibabbabai, din manaddaag si bakenan asawa, din lalaki ay manaddaag si ib-a na ay lalaki, ya din manaydayaw si sinan didiyos et adi da maitapi sin panturayan Diyos. <sup>10</sup> Adi aben maitapi din mangak-akew, din man-gamgamam si bakenan oka, din makabeteng, din mantistigo ay man-etek, ya din tollisan. <sup>11</sup> Ed idi, kaman dadi di inam-amag di odom en dakayo, ngem ed wani, begew sin naitapian yo en Apo Jesu Cristo ya babaen sin Ispiriton Diyos, nadalosan kayo sin basol yo, nanbalin kayos nasantoan ay ipogaw Diyos, ya naibilang kayo ay nalinteg sin pangilaana.

### *Din Kosto Ay Kaosalan Di Wayawaya Tako Ay Cristiano*

*(Roma 14:13-23; 1 Cor. 8:7-13; 10:23-30)*

<sup>12</sup> Wada en dakayo di mangmangwani, “Naiwayaanak ay mangamag sin olay sino ay laydek.” Tet-ewa kayman ay naiwayaan tako, ngem adi maiturong din am-in ay amagen tako sin pansigdan tako. Et mo sak-en pay, olay mo waday adi maiparit, adiak pay amagen mo maibag-enak sin amagek ay sana. <sup>13</sup> Wada abe di mangmangwani, “Naamag di makan ta way osal di egas, ya din egas et naamag ta way osal di makan.” Tet-ewa sa, ngem sin tapin di agew, gedngan Diyos din kaosalan da ay dowana. Ngem baken tet-ewa ay naamag di awak tako ta maosal ay daagen tako di baken takon asawa. Tan naamag di awak tako ta osalen tako ay mansilbi en Apo Jesus, downan si Apo Jesus et ay ayowanana din awak tako. <sup>14</sup> Wada abe di kaosalan di awak tako sin tapin di agew, tan tagoen Diyos datako babaen sin panakabalina ay kaman din nanagoana en Apo Jesus.

<sup>15</sup> Ay adi yo ammo ay din awak tako ay mamati et partin di awak Cristo? Mo siya di, ay olay komaan tako ay partin di awak Cristo ta maitapi tako sin awak di babai

§ 5:12-13 Deuteronomio 17:7. \* 6:2 Ilaen abe sin Lucas 22:28-30. † 6:4 Di esa abe ay kaiologan nina sin Griego et: Mo wada ngarud di kaman dadi ay kaso yo, ipaokom yo koma sin olay din kababaan sin gimong yo.

ay malaklakoan di kinababai na? Adi kabalin! <sup>16</sup> Ay adi yo ammo ay mo daagen di lalaki di kaman nidi ay babai et manbalin das esa ay awak? Tan waday inpaisolat Diyos ay kanana, “Din dow a et manbalin das es-esa.”<sup>‡</sup> <sup>17</sup> Ngem din maitapi en Apo Jesus et makies-esa ay naispiritoan en sisya. <sup>18</sup> Isonga adi yo daddaagen di baken yon asawa. Addawian yo din kaman nidi ay basol. Tan din iyat din basol ay nay ay manadael sin awak et naitken sin iyat di odom ay basol, tan din makikamkamalala et din mismo ay awak na di panbasolana. <sup>19</sup> Ay adi yo ammo ay din awak yo din timplo ay pantetean din Ispirito Santo ay indawat Diyos en dakayo? Baken dakayo di akin oka sin awak yo mo adi et si Diyos, <sup>20</sup> tan waday inbayad na ta say manbalin kayo si ipogaw na. Isonga osalen yo din awak yo ay mangidaydayaw en Diyos.

## 7

### *Din Salsalodsod Ay Maipanggep Sin Pangasawaan Ya Adi Pangasawaan Di Ipogaw*

<sup>1</sup> Siya na di songbat ko sin salodsod yo sin solat yo. Mayat mo adi mangasawa di ipogaw, <sup>2</sup> ngem gapo ta ad-ado di ipogaw ay manaddaag si baken dan asawa, maymayat pay mo mangasawa kayo ta waday kosto ay asawan di esa ya esa. <sup>3</sup> Sik-a ay lalaki, masapol ay tongpalem din lebbengem sin asawam, et siya abe en sik-a ay babai ta say mapnek kayo ay dow a. <sup>4</sup> Tan din naasawaan ay babai et baken sisya di akin oka sin awak na mo adi et din asawa na. Et siya abe sin lalaki, baken sisya mo adi et si asawa na di akin oka sin awak na. <sup>5</sup> Isonga adi kayo mansinigaan malaksig mo mantolag kayo ay dow a ay adi kayo mandaddaag si pigay agew ta way waya yo ay mankararag. Ngem mo makdeng di kararag yo, mandaag kayo kasin into et mo solisogen Satanas dakayo begew sin adi yo makaitpean sin likna yo. <sup>6</sup> Inbagak dana ta ammoan yo ay ipalobos ko di mangasawa, ngem baken kon bilin, <sup>7</sup> tan laydek ay mo mabalin koma, waday kabaelan di am-in ay ipogaw ay adi mangasawa ay kaman sak-en. Ngem ammok kayman ay baken man-iso di kabaelan ay indawat Diyos si esa ya esa en datako.

<sup>8</sup> Mo dakayo ay magay asawa na, namnamed dakayo ay nabalo, kanak en mayat mo itoloy yo ay adi makiasawa ay kaman met laeng sak-en. <sup>9</sup> Ngem mo adi kayo makaitpe sin likna yo, may, olay mangasawa kayo, tan maymayat di mangasawa mo din manpalpaligat begew sin adi matongtongpal ay layden di awak.

<sup>10</sup> Mo dakayo abe ay naasawaan, wada di ibagak en dakayo ay baken owat kon bilin mo adi et bilin Apo Jesus.\* Masapol ay adi taynan di babai din asawa na. <sup>11</sup> Ngem mo taynana, masapol ay itoltoloy na ay man-es-esa ono mantaoli en asawa na. Mo din lalaki abe et masapol ay adi na isian di asawa na.

<sup>12-13</sup> Mo dakayo abe ay sias-awa ay mamati di esa ya adi mamati di asawa na, naey di ibagak en dakayo. Baken bilin Apo Jesus na, tan magay inbaga nas maipanggep sina. Mo awen din adi mamati ay mantoltoloy da ay sin-asawa, adi koma isian din mamatis sisya. <sup>14</sup> Tan din adi mamati et enggay naidadaton en Diyos begew sin nakies-esaana sin asawa na ay mamati. Mo baken tet-ewa na, adi koma maibilang di anak da sin pangilan Diyos, ngem din katet-ewa na et maibilang da abe ay naidadaton en sisya. <sup>15</sup> Ngem mo layden din adi mamati ay maisian sin asawa na ay mamati, mabalin. Mo kaman nidi di mapasamak, mapawayaan din mamati, olay lalaki ono babai. Tan inayagan Diyos datako ta say natalna di biyag tako. <sup>16</sup> Tan sik-a ay mamati, adi ka ammo mo awisem si asawam ay maisalakan ono adi.

<sup>17</sup> Din kasinopan di inbagbagak et siya na: mantoltoloy koma di esa ya esa sin kasasaad ay indawat Apo en sisya ay say kasasaad na sin nanngena sin nangayagan Diyos en sisya. Siya na di ibilbilin ko sin am-in ay gimgimong. <sup>18</sup> Kaspangarigan, mo enggay nakogit di ipogaw sin daan pangayagan Diyos en sisya, adi na koma padasen

<sup>‡</sup> **6:16** Genesis 2:24. Ilaen abe sin Efeso 5:31. \* **7:10** Din inbilin Jesus et wada sin Mateo 5:31-32; 19:3-9; Marcos 10:2-12; Lucas 16:18.

ay sokatan, et siya abe sin adi nakogit et adi koma manpakogit. <sup>19</sup> Tan baken nabanol en Diyos mo nakogit ono adi nakogit di ipogaw. Din nabanol et din panongtongpalan tako sin bilbilin Diyos. <sup>20</sup> Isonga komakaman koma di esa ya esa sin kasasaad na sin nanngena sin nangayagan Diyos en sisya. <sup>21</sup> Ay bag-en ka sin namatiam? Olay. Ngem mo way wayam ay maipawaya, may et! <sup>22</sup> Tan mo bag-en ka sin naayagam ay maitapi en Apo Jesus, nemnemem ay inpawaya daka sin basol ta mansilbi ka en sisya. Et mo baken kan bag-en di ipogaw, nemnemem ay nanbalin kas bag-en Cristo sin namatiam en sisya. <sup>23</sup> Waday inbayad Diyos ta manbalin kayos ipogaw na, isonga adi yo ipalpalobos ay sangawen di owat ipogaw din pansilsilbian yo en sisya. <sup>24</sup> Ipidwak kasin din inbagak en dakayo ay aag-ik. Itoltoloy koma di esa ya esa en dakayo ay makikadkadwa en Diyos ya mantoltoloy kayo abe sin kasasaad yo sin nangayagan Diyos en dakayo.

<sup>25</sup> Mo maipanggep abe sin magay asawa na, maga di ibilin ko en dakayo ay napo en Apo Jesus, ngem gapo ta sak-en kayman di esa ay matalek ay ipogaw Diyos begew sin seg-ang di Apo, ipadngek kod en dakayo din pannemnem ko. <sup>26</sup> Begew sin palalo ay ligat ay laklak-amen tako ed wani ya sin tapin di agew abe, kanak en mayat mo adi yo sokokatan di kasasaad yo. <sup>27</sup> Sik-a ay lalaki, mo waday asawam, adi ka isissian, et mo maga, adi ka man-ilas asawam. <sup>28</sup> Ngem mo mangasawa ka, baken met basol. Iso na abe en sik-a ay balasang, baken mon basol mo makiasawa ka. Ngem ibagak pay dedan ay maymayat mo adi kayo mangasawa, tan laydek ay adi kayo mapaligatan sin ligat ay laklak-amen di sin-asawa isnan biyag ay nay.

<sup>29</sup> Laydek ay maawatan yo na ay aag-i. Enggay at-atik di agew ay nabay-an ay pansilbian tako en Apo Jesus. Isonga manlogi ed wani, din waday asawa na et ibilang na koma ay kaman magay asawa na. <sup>30</sup> Din mansasadot ya manragragsak et adi da koma masangsangaw sin sadot ya ragsak da. Din manlako abe et ibilang na koma ay bakenan oka din lakoana. <sup>31</sup> Olay sino ay os-osalen takos nan daga et baken di koma si kaimongsanan di nemnem tako, tan awni et mamaga din daga ay nay ya din kabibiyag ay laklak-amen takos na.

<sup>32</sup> Laydek ay maga di pandandanagan yo. Di lalaki ay magay asawa na et mabalin ay imomongsana di nemnem na sin pansilsilbiana en Apo Jesus ya din panlaylaydan din Apo. <sup>33</sup> Ngem din way asawa na et nemnemnemena din biyag da isnan daga ya din panlaylaydan di asawa na, <sup>34</sup> isonga mabibingay di nemnem na. Siya abe sin balasang ya sin babai ay namagay asawa na. Mabalin ay imomongsana di nemnem na sin pansilsilbiana en Apo Jesus, tan magay odom ay panggep na mo adi et din kanayon ay pangidadatonana sin awak ya nemnem na en sisya. Ngem din babai ay naasawaan et nemnemnemena din biyag da isnan daga ya din panlaylaydan di asawa na. <sup>35</sup> Siya dana di inbagak ta mabadangan kayo, adiak iparparit di makiasawaan yo. Laydek anggoy ay kosto ya naolnos di kabibiyag yo ya magay kasangawan yo sin pansilsilbian yo en Apo Jesus.

<sup>36</sup> Mo maipanggep abe si lalaki ay way anak na ay enggay binmalasang yan kanana en eweewe mo iparit na ay maasawaan, olay pangasawaena mo say kanana en kosto ay amagena. Baken basol di. <sup>37</sup> Ngem mo napasnek di nemnem na ay kosto di amagena mo adi na pangasawaen ya baken aben kapilitan ay maasawaan sisya, mayat abe di. <sup>38</sup> Isonga mo ipaasawa na din anak na, mayat di si amagena, ngem maymayat pay mo adi na ipaasawa.†

<sup>39</sup> Mo maipanggep pay sin babai ay naasawaan, adi mabalin ay mangasawa si natken ay lalaki mo deda pay laeng din asawa na, ngem mo matey din asawa na, naiwayaan sisya ay makiasawa si olay sino ay laydena, basta mamatis sisya en Apo Jesus. <sup>40</sup> Ngem

† 7:38 Baken es-esa din kaiologan di odom ay kali ay Griego sin vv. 36-38. Kanan di odom en din versikulo ay nay et maipanggep si esa ay baro ya din balasang ay naitotolag en sisya.

din pannemnem ko et ad-ad-adoy pansigdana mo komakaman ay man-es-esa, et kanak en iturturong abe din Ispiriton Diyos din nemnem ko.

## 8

*Din Salodsod Ay Maipanggep Sin Makan Ay Naidaton Sin Sinan Didiyos*  
(Roma 14:13-23; 1 Cor. 6:12-20)

<sup>1</sup> Siya na abe di songbat ko sin salodsod yo ay maipanggep sin makan ay naidaton sin sinan didiyos. Tet-ewa kayman din inbaga yo ay waday ammo tako am-in ay maipanggep sidi, ngem nemnemen yo na. Mo kanan tako en waday ammo tako, nalaka tako ay lomastog, ngem mo waday layad tako, nemnemen tako din pansigdan di iib-a tako. <sup>2</sup> Din ipogaw ay mangipagarup ay waday ammo na et adi na pay laeng ammo din layden Diyos ay maawatana. <sup>3</sup> Ngem din manglaylayad en Diyos et ibilang Diyos ay ipogaw na.

*Adi Tako Nemnemen Din Wayawaya Tako Ay Mangan Et Anggoy Mo Adi Et Din Pansigdan Di Iib-a Tako Ay Mamati*

<sup>4</sup> May ngarud ta songbatak din salodsod yo. Ammo tako ay baken tet-ewa ay diyos di sinan didiyos. Ammo tako abe ay es-esa di tet-ewa ay Diyos. <sup>5</sup> Tan olay mo ad-ado di kanan di pagano ay didiyos da ya ap-apo da ay mantetee ed kayang ya sin daga, <sup>6</sup> adi tako patien, tan mo si datako pay et es-esa di bigbigen tako ay Diyos. Sisyas di Ama tako ay namarsua sin am-in ay wada et matatago tako ay mansilbi ya mandayaw en sisya. Es-esa abe di bigbigen tako ay Apo ay si Jesu Cristo. Sisyas di nangipaparsuaan Diyos sin am-in ay wada ya babaen en sisya, waday biyag tako ay eng-enggana.

<sup>7</sup> Ngem wada di iib-a tako ay mamati ay baken pay laeng kosto di pangawat das na, tan inpaingsa da ay manaydayaw si sinan didiyos, isonga mo kanen da din naidaton sin sinan didiyos, ibilang da pay laeng ay makidaydayaw da en daida. Din pantongpalana et kadodogis di likna da, tan kanan da pay laeng en baken kosto di am-amagen da. <sup>8</sup> Tet-ewa kayman ay baken din kanen tako di begew ay malaylaydan si Diyos en datako. Adi aben somiged ono madadael di pakikadkadwaan tako en Diyos begew sin kanen tako ono adi tako kanen. <sup>9</sup> Ngem ilaen yo ta din wayawaya yo et baken say bomasolan di iib-a yo ay nakapoy pay laeng di pammati na. <sup>10</sup> Kaspangarigan, sik-a ay kosto di pangawat nas na, mo wada ka ay mangmangan sin timplon di sinan didiyos yan ilaen dakas ipogaw ay kanana pay laeng en basol di, adi pay mapapigsa di nemnem na ay makikan, olay mo kanana en basol? <sup>11</sup> Isonga begew sin kosto ay pangawat mo, madadael di pammatin di agim ay sana ay nakapoy di pammati na yan si Cristo pay et natey para abe en sisya. <sup>12</sup> Mo say bomasolan sin ib-am ay nakapoy di pammati na ya pansakitem di nemnem na, bomasol ka abe en Cristo. <sup>13</sup> Isonga mo bomasol di ib-ak ay mamati begew sin pangisidsidaak si naidaton sin sinan didiyos, adiak kasin isidsida ta say adi bomasol begew en sak-en.

## 9

*Ipanemnem Pablo En Daida Ay Olay Sisyas Ay Apostol Et Adi Na Ina Din Kalintegana*  
(2 Cor. 11:7-12; 1 Tes. 2:7-9)

<sup>1</sup> Nemnemen yos sak-en. Nawayaak, ay baken siya? Apostolak abe, tan inilak met si Jesus ay Apo tako ya dakayo met laeng di nantongpalan di inpaoblan di Apo en sak-en. <sup>2</sup> Olay mo adi bigbigen di odom ay ipogaw ay apostolak, maga koma di dowadowa yo, tan din naitapian yo en Apo Jesus di mangipaneknek sin kinaapostol ko. <sup>3</sup> Siya na di isongbat ko en daida ay manglaslasoy en sak-en. <sup>4</sup> Mo tet-ewa ngarud ay apostolak, ay magay kalintegak aya ay pomakan di it-itdoak? <sup>5</sup> Mo wada koma di asawak ay mamati, ay maga abey kalintegak ay mangitaktakin sin panbibiyahiak ay kaman si Pedro ya din



odom ay aapostol ya din aag-in Jesus? <sup>6</sup> Ay kosto ngata din kanan di odom en dakami en Barnabas anggoy di masapol ay man-obla ta waday katagoan mi?

<sup>7</sup> Nemnemen yo kod mo wada di soldado ay makaoway sin mismo ay gastos ya lagbo na. Ay wada abe ngata di mantaltalon ay magay lebbeng na ay mangan sin ap-apitena? Ono ay waday mangay-ayowan si karnero ay magay lebbeng na ay ominom sin gatas da mo say laydena? Maga. <sup>8</sup> Tet-ewa kayman ay din kadaddad-at ko ay pangarig et maibasar sin ammo tako ay tet-ewa isnan daga, ngem nan-iso met laeng din wada sin linteg Moses. <sup>9</sup> Tan waday naisolat sin linteg ay sana ay kanana, “Adim bosbosalan di baka ay mangigatgatin ay mangirik si pagey ta way iyat na ay mangan.”\* May kod, ay owat baka ngata di ninemnemnem Diyos sin nangipasolatana sin linteg ay sana? <sup>10</sup> Baken, mo adi et datako ay ipogaw ta say din makialado ya din makiani et waday namnama da ay makibingay sin maani. <sup>11</sup> Isonga dakami abe ay nangis-ek si naispiritoan ay bin-i sin kad-an yo, ay nalabes ngata mo apiten mi en dakayo din katagoan mi? <sup>12</sup> Mo waday odom ay mangam-amag sidi ay mankedkedaw en dakayo si kalintegan da ay katagoan, ay baken namnamed ay waday kalintegan mi?

Ngem olay mo siya di, adi kami polos nankedkedaw si kalintegan mi mo adi et inan-anosan mi di am-in ay kalasin di ligat ta say maga di nanangsangaw si ipogaw ay mangawat sin siked ay damag ay maipanggep en Cristo. <sup>13</sup> Ammo yo adi ay din mansilbi sin Timplo ay mangidatdaton en Diyos sin aanimal ay ial-alin di iib-a da et waday bingay da sin idatdaton da. <sup>14</sup> Et siya abe en daida ay mangikaskasaba sin siked ay damag, tan inbilin din Apo ay say pangaan da koma sin katagoan da.

<sup>15</sup> Ngem mo sak-en pay, adiak polos nankedkedaw sin kalintegak et baken aben say ipaspasagid ko sin insolat ko ay nay. Olay mateyak si dagaang ko! Maymayat di en sak-en mo din makaanan di lebbeng ko ay mangibaga ay adiak malaglagboan ay mangaskasaba. <sup>16</sup> Tan magay odom si mabalin ay it-ek ko. Din pangikaskasabaak sin siked ay damag et adi mabalin ay it-ek ko di, tan kaseseg-angak mo adiak ikasaba, isonga kapilitan ay amagek. <sup>17</sup> Mo sak-en koma di namili sin oblak ay nay, kosto mo malagboanak. Ngem gapo ta si Diyos di nangitalek en sak-en, basta tongpalek din inpaobla na. <sup>18</sup> Sino ngarud di gon-gonak? Magay odom mo adi din ragsak ko ay mangikaskasaba sin siked ay damag ay adi bayadan din manmannge, olay mo waday kalintegak ay manga si katagoak en daida.

<sup>19</sup> Isonga nawayaak ay maga di ipogaw si akin bag-en en sak-en. Ngem olay mo siya di, nanbalinek pay dedan di awak ko si bag-en di am-in ay ipogaw ta say ad-ad-ado di awisek ay mamati. <sup>20</sup> Kaspangarigan, mo it-itdoak di Judio ya odom ay mangon-onod sin linteg da, onodak abe di ogali ya linteg da ta say awisek daida ay mamati en Cristo, olay mo ammok ay adiak masapol ay onodan din linteg da ay sana. <sup>21</sup> Mo di it-itdoak abe et Gentil ay adi mangon-onod sin linteg di Judio, adiak aben onodan din linteg ay sana ta way iyat ko ay mangawis en daida. Ngem adi na layden ay kalien ay adiak patpatien di linteg Diyos, tan patpatiek met din bilin Cristo. <sup>22</sup> Mo wadaak abe sin ipogaw ay daan maket-eng di pammati na, ibagay ko di ogalik en daida ta say awisek daida ay mamati ay kosto. Isonga am-in ay kalasin di ipogaw et amagek di kabaalak ay mangibagay sin awak ko en daida ta say awisek di odom en daida ay mamati. <sup>23</sup> Am-amagek am-in dana ta maad-ado di mamati sin siked ay damag ta say makibingayak abe sin bindisyon ay idawat Diyos babaen sin siked ay damag.

<sup>24</sup> Nemnemen yo ay mo waday longba, ipakat am-in di makilonglongba din kabaelan da ay managtag, ngem es-esa anggoy di mangabak ya maidawtan si gon-gona. Isonga dakayo abe et ipakat yo din kabaelan yo ta say gon-oden yo din gon-gona ay idawat Diyos. <sup>25</sup> Am-in ay makikontis et esten da ay mangitpe ya mangipakneg sin awak da.

\* **9:9** Deuteronomio 25:4. Ilaen abe sin 1 Timoteo 5:17-18 ay maipanggep sin kalintegan di papangolon di mamati ay malagboan ay kosto.



Et mo daida, amagen da di ta makagon-od das gon-gona ay adi bomayag,<sup>†</sup> ngem mo datako pay, say amagen tako ta say gon-oden tako di gon-gona ay iwed patingga na.<sup>26</sup> Isonga mo si sak-en, tadtadonek di makilonglongba ay mandordoritso ay managtag sin panpatinggaan di longbaan ay adi masangsangaw. Kamanak aben boksineroy ay adi maik-iksaw di despeg na.<sup>27</sup> Itpek di awak ko ta adiak on-onodan di lawa ay laylaydena into et mo si sak-en ay nangaskasaba si odom et adiak maapolbalan.

## 10

### *Din Napasamak Sin Israelita Et Say Pan-adalan Tako Koma*

<sup>1</sup> Laydek ay nemnemen yo ay aag-i din napasamak sin aap-o tako ay nangon-onod en Moses. Am-in da et sinalakniban ya inpangon din liboo ay inpakoyog Diyos en daida. Laton abe ay dinan da am-in din makwani en Baybay ay Mandalangdang.\* <sup>2</sup> Et sin nalidoman da sin liboo ya nandanana da sin baybay, kaman da am-in nanpabonyag ay naitapi en Moses, tan binigbig das sisya ay apo da. <sup>3</sup> Nangnangan da am-in sin tinapay ay indawdawat Diyos,<sup>†</sup> <sup>4</sup> ya nan-inom da am-in abe sin danom ay inpabala na sin bato.‡ Din kaiarigan di bato ay sana et si Cristo, tan sisya met tet-ewa di nangadkadwa en daida ay nangidawdawat sin kasapolan da. <sup>5</sup> Ngem olay mo am-in da et pinadas da di, sinigaan Diyos din kaad-adoan en daida, et siya di din begew ay naiwalang din awak da sin lugar ay magay man-ili.§

<sup>6</sup> Am-in dana ay napasamak en daida et pan-adalan tako koma ta say siliban tako ta adi tako laylayden di lawa ay kaman daida\* <sup>7</sup> ya adi tako aben mandaydayaw si sinan didiyos ay kaman din odom en daida. Din inamag da et naisolat sin kalin Diyos ay kanana, “Tinmokdo din kaipoipogaw ay mangan ya man-inom et pag dan pomika ay maitapi sin nalabes ay ragragsak.”<sup>†</sup> <sup>8</sup> Adi tako aben daddaagen di baken takon asawa ay kaman din odom en daida, tan begew sin nangiyatan das di, emey ay downpo ya tolo ay libo di natey si esay agew. <sup>9</sup> Lawa abe mo padpadasen tako din anos di Apo ay kaman din inyat di odom en daida ay kinat di eweg et natey da.‡ <sup>10</sup> Adi kayo aben momayomayotmot, tan say inyat di odom en daida, et pinsen di anghel ay inbaan Diyos.§

<sup>11</sup> Am-in dadi ay napasamak en daida et ipaila da di iyat Diyos ay manosa sin nakabasol ay ipogaw, et inpaisolat na ay mangidadaan en datako, tan nay dandani di panpatinggaan di lobong. <sup>12</sup> Isonga din mangmangwani en napigsa di pammati na et silibana koma into et mo bomasol. <sup>13</sup> Maga di pinadas yo ay solisog ay adi aben pinadpadas di odom ay ipogaw. Et matalek si Diyos, tan adi na ipalobos en dakayo di solisog ay adi yo kabaelan ay labanen, mo adi et idawat na en dakayo din kabaelan ay kasapolan yo ta say mailisian yo di basol.

<sup>14</sup> Isonga dakayo ay laydelaydek, addawian yo din makidaydayawan yo sin sinan didiyos. <sup>15</sup> Ammo yo met ay mannemem, isonga nemnemen yo kod mo kosto ono baken din ibagak ay nay. <sup>16</sup> Sin makikumulgaran tako, mo man-inom tako sin wada sin tasa ay pan-iyamanan tako en Diyos ya mangan tako abe sin napit-ipit-ing ay tinapay, makilak-am tako sin bindisyon ay mapmapo sin dada ya awak Cristo, ay baken siya? <sup>17</sup> Olay mo ad-ado tako, kaman takon es-esa begew sin panganan tako sin es-esa ay tinapay.

<sup>18</sup> Nemnemen yo din Israelita. Mo makikan da sin naidaton en Diyos, ipaila da ay maitaptapi da ay manaydayaw en sisya, ay baken siya? <sup>19</sup> Ay laydek ay kalien en

<sup>†</sup> 9:25 Din gon-gona ay ginon-gon-od di makikontis sin timpon Pablo et bedbed ay naapid si sabsabong ono pingin di bebe ono olivo. \* 10:1 Exodo 13:21-22; 14:21-29. † 10:3 Exodo 16:35. ‡ 10:4 Exodo 17:6; Bilbilang 20:11. § 10:5 Bilbilang 14:29-30. \* 10:6 Bilbilang 11:4. † 10:7 Exodo 32:6. ‡ 10:9 Bilbilang 21:4-6. § 10:10 Bilbilang 16:41-50.

matmatago di sinan didiyos ya waday kaitkenan di naidaton en daida mo di odom ay makan? <sup>20</sup> Baken, ngem tet-ewa pay dedan ay din idatdaton di pagano sin sinan didiyos et baken si Diyos di pangidatdatonan da mo adi et dimonyo, et adiak layden ay makikadkado kayo sin dimonyo. <sup>21</sup> Adi kabalin ay maitapi kayo ay makikan ya makiinom sin naidaton sin dimonyo ya dowan kayo aben maitapi ay makikan ya makiinom sin pangnemneman tako sin nateyan din Apo. <sup>22</sup> Ay baken inayan aya mo pan-imonen yo din Apo sin pangam-amagan yos di? Ay kanan yo ngata en kaya yo ay mangabak en sisya?

<sup>23</sup> Wada en dakayo di mangmangwani, “Naiwayaanak ay mangamag si olay sino ay laydek.” Tet-ewa kayman ay naiwayaan tako, ngem adi maiturong din am-in ay amagen tako sin pansigdan tako ya adi da aben papigsaen din pammatin di iib-a tako. <sup>24</sup> Nemnemen koma di esa ya esa din pansigdan di iib-a na ay baken owat din pansigdana et anggoy.\* <sup>25</sup> Isonga mabalin ay isida yo di olay sino ay karni ay ilaklako da sin markitan ay adi kayo manpopoot mo naidaton si sinan didiyos ono baken, <sup>26</sup> tan waday inpaisolat Diyos ay kanana, “Okan Apo Diyos din daga ya am-in ay wadas na.”† <sup>27</sup> Mo wada abe di adi mamati ay mangayag en sik-a ta mangan kayo ya laydem ay en makikan, mangan ka ay kosto, olay sino ay isango da ay adi ka manpopoot mo naidaton si sinan didiyos. <sup>28-29</sup> Ngem into et mo waday makikan isdi ay mangwani en sik-a, “Naidaton din makan ay nay sin timplo,” adim kanen begew en sisya, tan sin nemnem na et basol. Tan sino ngata di silbi na mo ipapilit mo din wayawayam ay mangan yan kanan di ib-am en basol? <sup>30</sup> Sino abey pansigdam mo ipapatim ay mangan sin nan-iyamanam en Diyos ay din pantongpalana et palawlawan daka ib-am? Maga. <sup>31</sup> Isonga ilaen yo ta madayaw si Diyos begew sin am-in ay amagen yo, olay din pangpanganan yo ya pan-in-inoman yo. <sup>32</sup> Adi kayo amagen di olay sino ay bomasolan di iib-a tako, olay mo Judio da ono Gentil ono ipogaw Diyos. <sup>33</sup> Tadonen yos sak-en sin mamadpadasak ay mangibagay sin kabibiyag ko sin am-in ay ipogaw. Tan din nemnememek et baken din pansigdak mo adi et din pansigdan di iib-ak ta say maisalakan da.

## 11

<sup>1</sup> Tadonen yo ngarud sak-en ay kaman met laeng din panadtadonak en Cristo.

### *Din Kosto Ay Amagen Di Babai Sin Simbaan*

<sup>2</sup> Idaydayaw kos dakayo tan nemnemnemen yos sak-en sin am-in ay am-amagen yo ya on-onodan yo abe din tinawid tako ay mait-itdo ay inpasak en dakayo. <sup>3</sup> Ngem wada pay di laydek ay maawatan yo et siya na. Si Cristo di pangolon di am-in ay lalaki, din lalaki di pangolon di babai, ya si Diyos di pangolon Cristo. <sup>4</sup> Begew sin olnos ay nay, mo mangimong kayo yan waday lalaki ay nansosokdong ay mankararag ono mangibaga sin inpaammon Diyos en sisya, ibabainas Cristo ay pangolo na.\* <sup>5</sup> Ngem mo waday babai ay mankararag ono mangibaga sin inpaammon Diyos en sisya yan adi nansokdong, ibabaina din asawa na ay pangolo na, tan mo adi nansokdong, kababain ay kaman nanpakalbo. <sup>6</sup> Isonga mo sigaan di babai ay mansokdong, agpos manpapokis ay kaman book di lalaki. Ngem gapo ta kababain ay manpapokis ono manpakalbo, mansokdong koma.†

\* **10:24** Ilaen abe sin Filipos 2:4. † **10:26** Salmo 24:1. \* **11:4** Doway olog din sigod ay Griego ay naosal isna-toktok ono pangolo-isonga kanan di odom en din kosto ay kaiologan di vv. 4-5 et ibabaina din toktok na, baken ibabaina din pangolo na. † **11:6** Sin timpon Pablo, din sokdong et sinyal ay manpaituray di ipogaw sin esa ay nangatngato. Isonga baken bagay din lalaki mo mansosokdong sin simbaan, tan laydena ay kalien en ipababa na din awak na sin babai. Et mo say iyat na di, kaman baken si Cristo di panpaiturayana mo adi et din babai. Baken aben kosto mo adi mansokdong di babai, tan laydena ay kalien en las-iana din kalebbengan di lalaki. Ed idi abe, mo adi mansokdong di babai mo bomala sin beey na ono mo nanpakalbo, laydena ay kalien en babai ay lawa di kaistoryaana.

<sup>7</sup> Din begew ay adi koma mansokdong di lalaki sin simbaan et sisya din kaipailaan di kalebbengan ya kinangaton Diyos, ngem din babai pay et ipappaila na din panlebbengan di lalaki, isonga mansokdong koma. <sup>8</sup> Tan sin namarsuaan Diyos sin damo ay lalaki ya babai, baken napo sin babai din lalaki mo adi et napo din babai sin lalaki. <sup>9</sup> Adi aben pinarsuan Diyos din lalaki para sin babai mo adi et din babai para sin lalaki.‡ <sup>10</sup> Isonga gapo ta siya di din kasasaad di babai, mansokdong koma ta ipaila na ay manpaituray sin lalaki, tan olay din aanghel et boyboyaen da.

<sup>11</sup> Ngem nemnemen yo ay sin naitatapian tako en Apo Jesus, adi mabalin ay kanan di babai ay adi na masapol di lalaki. Adi aben mabalin ay kanan di lalaki en adi na masapol di babai, tan man-asisapol da ay dowa. <sup>12</sup> Tan olay mo napo din damo ay babai sin lalaki, ngem manlogi isdi, maga abe di lalaki ay adi ianak di babai. Siya abe ay am-iam-in ay wada, pati babai ya lalaki, et napo da en Diyos.

<sup>13</sup> Dakayo kod di mannemnem mo kosto mo adi mansokdong di babai mo mankararag en Diyos mo man-gimong kayo. <sup>14-15</sup> Olay mo maibasar sin sigod ay pannemnem di ipogaw, maawatan tako ay maibagay mo masokdongan di toktok di babai. Tan mo andoando di book di lalaki, maibabain sisya, ngem mo andoando pay di book di babai, say mangipapinpintas en sisya, tan say indawat Diyos en sisya ay panlingeb di toktok na. <sup>16</sup> Mo waday mayad ay mangontra sin inbagak ay nay, kanak en siya di din it-itdo mi ay ogali ya siya abe di ogali ay on-onodan am-in di gimgimong di ipogaw Diyos.

### *Din Kosto Ay Maonodan Sin Pankumulgaran*

<sup>17</sup> Mo maipanggep abe sin nay ibilin ko en dakayo, adi mabalin ay dayawek dakayo, tan mo man-gimong kayo ay mandayaw en Diyos, baken siged di pantongpalana mo adi et lawa. <sup>18</sup> Omona, dinamag ko ay nagodwagodwa kayo kano mo man-gimong kayo, et kamanak pasien ay waday katet-ewa na. <sup>19</sup> Tan masapol ay waday kaman nidi ta maammoan mo sino en dakayo di inapolbalan Diyos. <sup>20</sup> Ngem din pantongpalana et mo matopog kayo ay makikikan koma sin pangnemneman yo sin nateyan Apo Jesus, baken baw sisya di nemnemnemen yo. <sup>21</sup> Tan adi kayo kano man-asiseed ta mandededsan kayo koma ay mangan mo adi et man-aagag di esa ya esa ay mangan si intakina ay adi na ibingay sin iib-a na, isonga mabeteng kano di odom dowan et mandagaang pay laeng di odom. § <sup>22</sup> Ay daetan! Ay maga aya di beey yo si panganan yo? Apay nga laslasoyen yo din gimong di ipogaw Diyos ya pabainen yo din iib-a yo ay nabibiteg? Ay namnamaen yo aya ay dayawek dakayo begew sin am-amagen yo ay nay? Ado paabe!

<sup>23</sup> Tan din initdok en dakayo ay napo en Apo Jesus et siya na. Idi mangmangan da sin labi ay nalipotana, nan-as tinapay <sup>24</sup> et nan-iyaman en Diyos. Asi na pag pit-ipit-ingen yan kanana, “Si naey di awak ko ay maidaton para en dakayo. Amagen yo na ta say pangnemneman yo en sak-en.” <sup>25</sup> Idi nakakan da pay, kaman nidi met laeng di inyat na sin tasa ay ina na yan kanana, “Din tasa ay nay et say baro ay tolag Diyos ay siglotan di dadak. Sin tonggal pangin-inoman yos na, amagen yo na ta say pangnemneman yo en sak-en.”\* Siya di din inbilin Apo Jesus. <sup>26</sup> Isonga sin tonggal pangpanganan yo sin tinapay ya pangin-inoman yo sin tasa, ipaam-ammo yo din nateyan di Apo enggana sin kasinan omalian.

<sup>27</sup> Siya di din begew ay mo waday maitapi ay makikan sin tinapay ya makiinom sin wada sin tasa yan adi na nemnemen din kosto ay kaosalana, bomasol en Apo tan laslasoyena din awak ya dada na. <sup>28</sup> Isonga din ipaon-ona koman di esa ya esa et osigena koma din awak na mo kosto di nemnem na ta asi pag maitapi ay makikan ya makiinom.

‡ **11:9** Genesis 2:18-23. § **11:21** Din sigod ay ogalin di mamati mo nan-gimimong da et nakikikan da am-in sin intaktakin di esa ya esa, pag da aben mangan si tinapay ya man-inom si danom di obas ay pangnemneman da sin nateyan Apo Jesus. \* **11:25** Din naisolat ay maipanggep sin maodi ay nakiokoban Jesus sin papasolot na et wada sin Mateo 26:26-30, Marcos 14:22-26 ya Lucas 22:14-20. Di maipanggep abe sin baro ay intolag Diyos et wada sin Hebreo 8:6-12.

<sup>29</sup> Tan mo makikan ya makiinom dowan pay adi na maawatan din olog ya banol di awak Cristo, madosas sisya begew sin pangiyatanas di. <sup>30</sup> Siya na din begew ay ad-ado di mansaksakit ya makmakapoy en dakayo ya wada da abe di natey. <sup>31</sup> Mo inos-osig tako koma din awak tako, adi tako koma madosa. <sup>32</sup> Ngem mo dosaen din Apo si datako, say iyat na ay mamagbaga ono manoplit en datako ta say adi tako makeddengnan ay makidosa sin adi mamati.

<sup>33</sup> Isonga aag-ik, mo masinop kayo ay mangan ay manongpal sin inbilin Apo Jesus, mansinseed kayo. <sup>34</sup> Mo wada abe di mandagaang, mangan koma on-ona sin beey na ta say mo makigimong kayo, adi maiturong sin kadosaan yo. Mo maipanggep abe sin odom ay laydek ay ibilin en dakayo, awni ta emeyak issa.

## 12

### *Nankinalasi Din Kabaelan Ay Idawat Din Ispirito Santo Ngem Es-esa Di Napoan Da (Efeso 4:1-16)*

<sup>1</sup> Aag-i, mo maipanggep abe sin kabaelan ay idawdawat din Ispirito Santo, laydek ay maawatan yo ay kosto. <sup>2</sup> Tan ammo yo ay sin pagano kayo pay laeng, nasangsangaw kayo ay kankanayon, tan wada di nangiturturong en dakayo ta say daydayawen yo di sinan didiyos ay adi makakali. <sup>3</sup> Ngem ed wani pay, laydek ay ammoan yo ay mangilasin sin ipogaw ay iturturong din Ispirito Santo. Din iturturong na et adi na mabalin ay baosan si Jesus ya din adi na iturturong et adi mabalin ay kanana en si Jesus din Kangatoan ay Apo.

<sup>4</sup> Nankinalasi di kabaelan ay maidawdawat en datako ay mamati, ngem es-esa di mangidawdawat ay din Ispirito Santo.\* <sup>5</sup> Nankinalasi abe di iyat tako ay mansilbi, ngem es-esa di pansilsilbian tako ay si Apo Jesus. <sup>6</sup> Nankinalasi abe di pantongpalan di oblan Diyos sin biyag tako, ngem es-esa si Diyos ay mangob-obla. <sup>7</sup> Waday kabaelan ay maidawat sin esa ya esa en datako ay mangipaila sin kawadan di Ispirito Santo ta say badangan tako din iib-a tako ay mamati. <sup>8</sup> Idawat din Ispiriton Diyos si esa din kabaelan ay mangipaammo sin sirib Diyos, ya sin esa abe, din kabaelan ay mangawat ya mangitdo si maipanggep en Diyos. <sup>9</sup> Din Ispiriton Diyos met laeng di mangidawat si esa si napigsa ay pammati, ya sin esa abe, din kabaelan ay mangaan si sakit. <sup>10</sup> Idawat na abe sin odom din kabaelan ay mangamag si milagro, sin odom din kabaelan ay mangibaga sin inpaammon Diyos, ya sin odom abe din kabaelan ay makailasin mo napo en Diyos din naibaga ono baken.† Sin odom pay, idawat na din kabaelan ay mankali si nankinalasi ay kali ay adi na ammo, ya sin odom pay, idawat na din kabaelan ay mangiolog sin kali ay sana. <sup>11</sup> Ngem din Ispiriton Diyos anggoy di napoan di am-in dana ay kabaelan, et sisya di mangibingay sin esa ya esa ay maibasar sin laydena.

### *Es-esa Din Awak Tako, Ngem Ad-adoy Parti Na*

<sup>12</sup> Din awak tako ay ipogaw et ad-adoy parti na, ngem es-esa pay dedan ay awak. Iso na en Cristo ya din mamati en sisya. <sup>13</sup> Tan datako am-in, olay Judio ono Gentil ya olay bag-en ono baken bag-en et nabonyagan tako ay naitapi sin es-esa ay awak babaen sin es-esa ay Ispiriton Diyos, et din Ispirito ay nay di es-esa ay inawat tako am-in.

<sup>14</sup> Nemnemen tako kasin din awak tako ay baken es-esa di parti na mo adi et ad-ado. <sup>15</sup> Mo kaspangarigan kanan di siki, “Bakenak iman takkay, isonga bakenak partin di awak,” ngem naitatapi pay dedan sin awak, olay mo say kanana di. <sup>16</sup> Et mo kanan aben di inga, “Bakenak iman mata, isonga bakenak partin di awak,” ngem naitatapi pay dedan sin awak. <sup>17</sup> Mo mata et anggoy din awak, into ngin din para denge? Et mo inga et anggoy din awak, into ngin din para songsong? <sup>18</sup> Ngem baken dedan kaman nidi din

\* **12:4** Wada abey listaan di kabaelan ay idawdawat Diyos sin mamati sin Roma 12:6-8, Efeso 4:11 ya 1 Corinto 12:28.

† **12:10** Din maipanggep sin kabaelan ay nay et wada abe sin 1 Tessalonica 5:20-21 ya 1 Juan 4:1.

awak, tan in-olnos Diyos din am-in ay partin di awak sin kosto ay kad-ana ay maibasar sin laydena. <sup>19</sup> Mo es-esa anggoy di parti na, ay siya mo makwani en awak? <sup>20</sup> Ngem din katet-ewa na et ad-adoy parti na, ngem es-esa ay awak. <sup>21</sup> Isonga adi mabalin ay kanan din mata sin takkay ono din toktok sin siki, “Adiak kasapolan sik-a.” <sup>22</sup> Tan din partin di awak ay ibilang tako ay nakapkapoy mo din odom et daida baw di namnamed ay kasapolan tako. <sup>23</sup> Din ibilang tako abe ay baken onay napateg ya din adi koma maila et siya da din ay-ayowanan ya badoan tako ay kosto, <sup>24</sup> down din napintas di kailaana et adi da masapol ay maay-ayowanan ay kaman nidi. Din begew ay kaman nidi di nangiolnosan Diyos sin partin di awak tako et ta ay-ayowanan ya patgen tako ay kosto din ibilbilang tako ay at-atik di pateg na <sup>25</sup> ta say adi mankinontra din partin di awak mo adi et man-oolnos da ay manbinadang. <sup>26</sup> Isonga mo mansakit di esa ay partin di awak, liknaen da am-in, et mo madayaw abe di esa, makiragsak da am-in.

<sup>27</sup> Din kaiologan di inbagbagak et datako ay mamati di maiarig sin awak Cristo, et esa ya esa en datako di esa ay parti na. <sup>28</sup> Sin nay ay awak Cristo, waday dinotokan Diyos ay nankinalasi di obla da. Omona, waday dinotokana ay aapostol; maikadwa, din pankalkaliana; maikatlo, din man-it-itdo sin kalin Diyos; asi pag din mangam-amag si milagro, din waday kabaelana ay mangaan si sakit, din mamadbadang sin iib-a da, din mangipangpango ya mangol-olnos sin gimong, ya din waday kabaelana ay mankali si nankinalasi ay kali ay adi da inadal. <sup>29</sup> Ay apostol da am-in ngata ono pankalkalian Diyos daida am-in? Ay man-it-itdo da am-in sin kalin Diyos? Baken. Adi aben mabalin ay waday kabaelan di am-in ay mangamag si milagro <sup>30</sup> ono mangaan si sakit ono mankali si nankinalasi ay kali ono mangiolog sin layden din kali ay sana ay kalien. <sup>31</sup> Isonga gapo ta adi mabalin ay wada sin esa ya esa en datako din am-in ay kabaelan ay idawdawat Diyos, laydelayden tako koma ay awaten din napatpateg ay kabaelan.

Ngem ed wani, wada di ipaammok en dakayo ay addawi ay maymayat si maonodan.

## 13

### *Din Layad*

<sup>1</sup> Olay mo makakaliak sin kalkalin di ipogaw ya olay kalin di aanghel, ngem mo magay layad ko sin iib-ak, owat et ngalawngaw din ibagbagak ay kaman din mankanangkang ay gangsa. <sup>2</sup> Et olay mo pankalkalian Diyos sak-en ya ammok din am-in ay mabalin ay maammoan, pati din adi inpaammon Diyos sin odom ay ipogaw, ya olay mo omanay di pammatik ay mangidenden si dontog, ngem mo magay layad ko, maga polos di pateg ko. <sup>3</sup> Olay mo idawat ko din am-in ay bonag ko sin nabibiteg ya olay mo ipalobos ko ay mapooan din awak ko, ngem mo adi maipoon sin layad ko sin iib-ak, magay ganabek sin pangiyatak sidi.

<sup>4</sup> Din ipogaw ay managlayad et naanos ya mabmabadang. Baken makaapal. Adi na aben it-ek ono ipapangato din awak na. <sup>5</sup> Din ipogaw ay managlayad et baken naalas di ogali na ya adi na ipilit din laydena. Baken nalaka ay bomonget ono masnit mo adi et nalaka ay linglingana mo waday mangamag si lawa en sisya. <sup>6</sup> Din ipogaw ay managlayad et adi manragsak mo waday maamag ay lawa mo adi et maragsakan sin kosto ya tet-ewa. <sup>7</sup> Din ipogaw ay managlayad et anosana din am-in ay ligat ay adi manmaymayotmot. Kankanayon ay waday talek na ya namnama na sin iib-a na ya itoled na am-in ay adi madisdismaya.

<sup>8</sup> Mo din kabaelan ay idawdawat din Ispiriton Diyos ay kaman din kabaelan di pankalkalian Diyos, din kabaelan ay mankali si nankinalasi ay kali ay adi naadal ya din kabaelan ay mangammo si maipanggep en Diyos et manpatingga da am-in, ngem mo din layad pay et magay panpatinggaana. <sup>9</sup> Tan din ammo tako ed wani et kolang ya din ibagbagan din pankalkalian Diyos et adi omanay. <sup>10</sup> Ngem mo domateng din magay pankolangana, asi mamaga dana ay kabaelan. <sup>11</sup> Kaspangarigan, sin kakitkittoy



ko, kaman anak din inyaat ko ay mankali, mannemnem ya manplano, ngem ed wani ay nakayak, tinaynak din ogalin di anak. <sup>12</sup> Iso na en datako ay mamati, tan din pangila tako en Diyos ed wani et nagabogab ay kaman takon man-is-ispiko si lawlawa ay ispiko, ngem sin tapin di agew pay, ilaen takos sisya ay ropan ropa. Ed wani, adiak ammos sisya ay kosto, ngem sin tapin di agew pay, magay kolang din pangam-ammoak en sisya, tan mais-o sin nangaammoana en sak-en. <sup>13</sup> Isonga mantoltoloy dana ay tolo si eng-enggana: din pammati, din namnama, ya din layad; ngem din kapapatgan sin tolo ay nay et din layad.

## 14

### *Napatpateg Din Kabelan Di Pankalkalian Diyos Mo Din Makakali Si Kali Ay Adi Na Inadal*

<sup>1</sup> Ipakat yo ngarud di kabelan yo ay manlilinayad, ya dowan yo aben laydelayden ay mangawat sin nankinalasi ay kabelan ay idawdawat din Ispirito Santo, namnamed koma din kabelan di pankalkalian Diyos. <sup>2</sup> Tan din mankalis kali ay adi na inadal et ang-anggay Diyos si ngalngalatena ay baken ipogaw, tan adi da maawatan, tan din ab-abiik na\* di mangipakalkali en sisya sin adi ammon di odom ay ipogaw. <sup>3</sup> Ngem din pankalkalian Diyos et din iib-a na ay ipogaw di ngalngalatena, isonga mabalin ay papigsaena din pammati da ya bagbagaanas daida ya badanganas daida ay mangitoleo sin ligat. <sup>4</sup> Isonga din mankalis kali ay adi na inadal et ang-anggay din mismo ay pammati na si papigsaena, ngem din mangibaga sin inpaammon Diyos en sisya et papigpigsena din pammatin di iib-a na ay makigimgimong. <sup>5</sup> Laydek ay makaikali kayo am-in si kali ay adi yo inadal, ngem mas laylaydek pay mo wada en dakayo am-in din kabelan di pankalkalian Diyos. Tan napatpateg din pankalkalian Diyos mo din mankalis kali ay adi na inadal malaksig mo iolog na din inkali na ta say mabadangan din gimong.

<sup>6</sup> Nemnemen yo na ay aag-ik. Mo emeyak issan kad-an yo ya mankaliak si natken ay kali, sino ngata di pansigdan yo mo adiak aben ibaga en dakayo di inpaammon Diyos en sak-en ono adiak itdo en dakayo din ammok ay maipanggep en sisya? <sup>7</sup> Olay din pantoktokaran tako ay kaman din kolalleng ono gitara, mo nan-iis-o di ganges na, magay iyat din manmanngge ay mangilasin sin ayog na. <sup>8</sup> Kaman abe din tanggoyob ay osalen di soldado, mo baken nalawag di bongog na, ay siya mo waday mansagana ay makigobat? <sup>9</sup> Iso na en dakayo. Mo os-osalen yo di kali ay adi kaaw-awatan, sino ngata di makaawat sin ibagbaga yo? Kaman owat maidagem din kali yo. <sup>10</sup> Tet-ewa ay ad-adoy kalasin di kali sin daga ay nay ya waday olog da am-in. <sup>11</sup> Ngem mo adiak maawatan din ikalkalin di kangalat ko, adi pay ibilang kos sisya ay mangili ya siya abe din pangibilangana en sak-en. <sup>12</sup> Isonga dakayo ay silalayad ay mangawat sin kabelan ay idawdawat din Ispirito Santo et anapen yo koma din kabelan ay mantongpal sin pomigsaan di pammatin di iib-a yo.

<sup>13</sup> Isonga din mankali si natken ay kali ay adi na inadal et mankararag koma ta maidawtan si kabelana ay mangiolog. <sup>14</sup> Tan mo mankararagak si natken ay kali, din ab-abiik ko di mankararag, ngem din nemnem ko et adi maitapi. <sup>15</sup> Intoy kosto ay iyat ko ngarud? Din iyat ko et mankararagak si kali ay ipakalin din ab-abiik ko, ngem mankararagak abe sin kali ay maawatak. Mankantaak si kali ay ipakalin din ab-abiik ko, ngem mankantaak abe sin kali ay maawatak. <sup>16</sup> Tan kaspangarigan mo mankararag ka ay mandayaw ya man-iyaman en Diyos, ngem osalem anggoy di natken ay kali ay ipakalin din ab-abiik mo, intoy iyat ngin din ib-am ay makigimgimong ay mangwani en "Amen" sin inkararag mo? Tan adi na iman maawatan din inbagam. <sup>17</sup> Isonga olay mo maymayat din kararag mo ay man-iyaman en Diyos, adi polos mabadangan din ib-am.

\* 14:2 Di esa abe ay kaiologan nina sin Griego et: ...tan din Ispirito...

<sup>18</sup> Man-iyamanak en Diyos tan mo maipanggep sin mankalkaliak si kalkali ay adiak inadal, abakek di olay sino en dakayo. <sup>19</sup> Ngem mo makigimongak, agpos et mo lima ay kali anggoy di ibagak sin kali ay maawatan ta say maitdoan din iib-ak mo din sinpo ay libo ay kali sin natken ay kali ay adi kaaw-awatan.

<sup>20</sup> Aag-ik, baken koman kaman anak di iyat yo ay mannemnem si maipanggep isna. Mo maipanggep kayman si lawa, mayat mo komaman kayos anak, ngem mo maipanggep si nemnem yo, nanemneman kayo koma. <sup>21</sup> Nemnemen yo ngarud din inpaisolat Diyos ay kanana,

“Waday ibaak ay mapo sin addawi ay ili ay mankalis natken ay kali ta say ibaga da sin kaipoipogaw ay nay din laydek ay maibaga, ngem olay mo siya di din iyat ko, adi da pay dedan pasien sak-en.”†

<sup>22</sup> Din inpaisolat Diyos ay nay et say pangammoan tako ay din kabaelan di mankali si natken ay kali et in-gagaran Diyos ay mansilbi ay sinyal para sin adi mamati ay baken para sin mamati. Ngem din kabaelan di pankalkalian Diyos et mansilbi ay sinyal para sin mamati. Baken para sin adi mamati di kaosarana. <sup>23</sup> Isonga mo man-gimong kayo yan mankali kayo am-in sin nankinalasi ay kali, sino ngin di nemnemen di bisita yo ay adi mamati? Adi pay kanan da en naboge kayo! <sup>24</sup> Ngem mo ibagbaga yo am-in din inpaammon Diyos en dakayo yan wada di bisita yo ay adi mamati, matamaan di konsensia na begew sin ibagbagan di esa ya esa et maipaila en sisya din katet-ewa ay maipanggep sin basbasol na, <sup>25</sup> pati din adi naibaga ay was nemnem na. Et pag mandokmog ay manbabawi et mandayaw en Diyos ay mangwani, “Tet-ewa baw ay wadas Diyos en dakayo.”

### *Masapol Ay Maolnos Di Maamag Mo Man-gimong Kayo*

<sup>26</sup> Sino ngarud di laydek ay kalien ay aag-ik? Mo man-gimong kayo, siya na di amagen yo. Esa ya esa en dakayo et waday ikanta na ono itdo na ono waday ibaga na ay inpaammon Diyos en sisya. Wada abe di mankalis natken ay kali ay adi na inadal ya wada abey mangiolog sin inbaga na. Basta ilaen yo ta din am-in ay maamag et mantongpal sin pomigsaan di pammati yo am-in sin gimong. <sup>27</sup> Mo waday mankali si natken ay kali, masapol ay baken nasurok ay dowa ono tolo di mankali ya masapol ay masaes-a da. Masapol abe ay waday mangiolog sin kanan da. <sup>28</sup> Ngem mo maga di mangiolog, masapol ay adi da mankali sin simbaan. Awni ta ang-anggay da ta asi da makingalat en Diyos sin natken ay kali ay adi maawatan. <sup>29</sup> Mo wada abey pankalkalian Diyos, masapol ay baken nasurok ay dowa ono tolo di mankali ya dowan dadlon nemnemen di odom mo tet-ewa ay mapmapo en Diyos din ibagbaga da. <sup>30</sup> Et mo kaspangarigan mankalkali di esa yan waday ipaammon Diyos sin ib-a na ay tomotokdo, gominek koma din mankalkali ta say maiskat din ib-a na. <sup>31</sup> Tan mo say iyat yo di et waday waya yo am-in ay mansososkat ay mangibaga sin inpaammon Diyos en dakayo ta say maitdoan kayo am-in ya mapapigsa di pammati yo. <sup>32</sup> Tan din pankalkalian Diyos et mabalin ay isaldeng da din ibagbaga da. <sup>33-34</sup> Tan din layden Diyos et baken magolo mo adi et naolnos.

Gominek koma di babbabai mo man-gimong kayo ay kaman aben din iyaat da sin odom ay gimgimong di ipogaw Diyos. Adi maipalobos ay mankali da mo adi et masapol ay manpaituray da sin lallalaki ay kaman met laeng din naisolat sin linteg Diyos. <sup>35</sup> Mo waday layden da ay damagen, awni koma ta somaa da ta asi da pooten en as-awa da, tan naalas mo mankali di babai mo man-gimong kayo. <sup>36</sup> Ay apaw kayo! Ay siya mo napo en dakayo din kalin Diyos? Ono mo baken siya di di wadas nemnem yo, ay kanan yo ngata en dakayo anggoy di nangawat sin kali na? <sup>37</sup> Mo wada en dakayo di mangwani en pankalkalian Diyos sisya ono naidawtan sisya si odom ay kabaelan ay napo sin Ispirito

† **14:21** Isaias 28:11-12. Sin timpon Isaias, indadaan Diyos sin polin Israel ay ibaa nan to di taga-Assyria ay manosa en daida, tan adi da pinatpati din inbagbagan di mamadto.

Santo, bigbigena koma ay din nay insolsolat ko en dakayo et bilin Apo Jesus. <sup>38</sup> Ngem mo adi na bigbigen, olay adi aben mabigbig sisya.

<sup>39</sup> Isonga aag-i, din kasinopan di inbagbagak et silalayad kayo koma ay maidawtan sin kabaelan di pankalkalian Diyos, ngem adi yo iparparit di mankali si nankinalasi ay kali. <sup>40</sup> Ilaen yo ta din am-in ay maamag sin gimong yo et maikosto ya naolnos.

## 15

### *Din Kasin Natagoan Cristo Et Napateg Ay Tapin Di Siged Ay Damag*

<sup>1</sup> Ed wani ay aag-ik, ipanemnem ko en dakayo din inkaskasabak en dakayo ed idi ay din siged ay damag. Siya di din pinati yo ed idi ya siya abe din kaibasaran di pammati yo ed wani. <sup>2</sup> Et mo ipapasnek yo ay mamati sin nay siged ay damag, maisalakan kayo malaksig mo baken kosto din naibasaran di pammati yo.

<sup>3</sup> Et siya dana din kapapatgan ay naipaammo en sak-en\* ay initdok met laeng en dakayo. Natey si Cristo ta mapakawan din basbasol tako ay maibasar sin inpaisolat Diyos. <sup>4</sup> Naikaot yan pag kasin tagoen Diyos sin maikatlo ay agew ay maibasar met laeng sin inpaisolat Diyos.† <sup>5</sup> Pag manpaila en Pedro yan pag en daida am-in ay apostol na. <sup>6</sup> Asi pag manpaila ay namingpingsan sin nasurok ay limay gasot ay iib-a tako ay mamati. Wada en daida di natey, ngem matmatago pay laeng din kaad-adoan en daida ed wani. <sup>7</sup> Nanpaila abe en Santiago, pag kasin manpaila sin am-in ay apostol. <sup>8</sup> Din naodi ay nanpailaana et si sak-en ay kamanak liton ay bigla ay naianak sin bakenan timpo.

<sup>9</sup> Say kanak di tan sak-en di kababaan ay apostol sin aapostol. Adiak maikari ay maibilang ay apostol, tan pinalpaligat ko din namati ay ipogaw Diyos. <sup>10</sup> Ngem begew sin seg-ang na, nanbalinak ay kaman nina, et maila ay waday nantongpalan di seg-ang na, tan ad-ad-ado kayman di nantongpalan di oblak mo din iib-ak ay aapostol. Ngem adiak kayman inam-amag babaen si bikas ko mo adi et babaen sin seg-ang ya badang Diyos en sak-en. <sup>11</sup> Ngem magay kaitkenana mo sak-en di nangaskasaba ono daida, tan man-iso di ikaskasaba mi am-in, et siya di din pinatpati yo.

### *Din Kasin Natagoan Cristo Di Pangammoan Tako Ay Kasin Aben Tagoen Diyos Din Am-in Ay Natey*

<sup>12</sup> Mo say ikaskasaba mi ngarud ay kasin tinagon Diyos si Cristo, apay nga kanan di odom en dakayo en maga di kasin katagoan di natey? <sup>13</sup> Mo tet-ewa ay adi kasin matago di natey, laydena ay kalien ay adi kasin natago si Cristo. <sup>14</sup> Et mo adi kasin natago si Cristo, magay silbin di ikaskasaba mi ya maga abey silbin di pammati yo. <sup>15-16</sup> Baken anggay nidi mo adi et maammoan abe ay etek di inbagbaga mi ay maipanggep en Diyos, tan inpaneknek mi ay tinago na kasin si Cristo. Ngem mo tet-ewa ay adi na kasin tagoen di natey, baken aben tet-ewa ay tinago nas Cristo. <sup>17</sup> Et mo adi na tinago si Cristo, maga polos di silbin di pammati yo ya deda di basbasol yo. <sup>18</sup> Et siya abe ay din namati en Cristo ay natenatey, adi da ngarud naisalakan mo adi et nalitaw da. <sup>19</sup> Mo tet-ewa dana ya din namnamaen tako begew en Cristo et manpatingga sin biyag takos nan daga et anggoy, maga di mas kaseseg-ang ay ipogaw mo adi si datako.

<sup>20</sup> Ngem din katet-ewa na et natago kasin si Cristo, et siya di din dadlon takon pangammoan ay kasin aben tagoen Diyos din am-in ay natey. <sup>21</sup> Din gapo ay matey di ipogaw et begew sin inamag di esa ay ipogaw ed idi, et iso na abe sin kasin katagoan di natey, tan begew sin inamag di esa abe ay ipogaw. <sup>22</sup> Tan matey am-in di naipoli en Adan et siya abe ay matago kasin am-in di naitatapi en Cristo.‡ <sup>23</sup> Ngem mailasin dedan din kasin natagoan Cristo, tan nangon-onas sisya ay natago kasin. Et mo si datako

\* **15:3** Isaias 53:5-12. Ilaen abe sin 1 Corinto 11:23 ya Galacia 1:12. † **15:4** Salmo 16:8-10. ‡ **15:22** Wada pay di maipanggep en da Adan en Cristo sin Roma 5:12-21.

ay ipogaw na et asi tako pay dedan omonod sin agew ay kasinan omalian. <sup>24-25</sup> Asi pag domateng din kaodian ay timpo ay pangabakan Cristo sin am-in ay kaibaw na ay waday kalebbengan da ono panakabalin da ay manturay. Tan masapol ay manturay si Cristo enggana ay abakena din am-in ay kaibaw na, asi na ipolang en Diyos Ama din kalebbengana ay manturay. <sup>26</sup> Din kaodian ay maabak et din pese ay kateyan di ipogaw. <sup>27</sup> Ammo tako ay olay din kateyan di ipogaw et abakena, tan kanan din naisolat ay kalin Diyos, “Am-iam-in ay wada et inpaituray Diyos en sisya.”<sup>§</sup> Maawatan tako dedan ay adi maitapis Diyos ay manpaituray en Cristo, tan sisya dedan di nangipaituray sin am-in en sisya. <sup>28</sup> Ngem mo makdeng ay maipaituray am-in en Cristo ay Anak Diyos, asi pag manpaituray sisya en Diyos ta say si Diyos din kangangatoan ay mangituray sin am-in ay wada.

<sup>29</sup> Nemnemen tako kasin din kasin katagoan di natey. Mo baken tet-ewa ay matago da kasin, apay ngata ay waday manpabonyag para sin natey? Sino ngin di kanan da en silbi na? <sup>30</sup> Et mo si dakami pay, ay siya mo ipospota min biyag mi si kankanayon mo maga tet-ewa di kasin katagoan di natey? <sup>31</sup> Aag-i, dadlon tet-ewa ay sangsangoek di pese si inag-agew. Din katet-ewa nina et kaman din katet-ewan di ragsak ko begew sin naitatapian yo en Cristo Jesus ay Apo tako. <sup>32</sup> Palalo di ligat ay nilaklak-am ko isnan ed Efeso begew sin nangonkontra en sak-en ay kaman maangat ay animal. Sino ngata di ginanab ko sin sana ay ligat mo maibas anggoy sin pannemnem di ipogaw? Maga et abe. Isonga mo tet-ewa koma ay adi kasin matago di natey, agpos et mo onodan tako din apat di ipogaw ay kanana, “Mangan tako, man-inom tako, tan mo matey tako si bigat, say gedeng na di.”\*

<sup>33</sup> Siliban yo ta adi kayo maiet-etekan, tan tet-ewa din kankan di ipogaw en, “Mo makikadkadwa ka sin lawa ay ipogaw, madadael din siged ay ogalim.” <sup>34</sup> Masapol ngarud ay mainemneman kayo ta dokogan yo san basbasol yo. Kanak di ta manbain kayo koma, tan wada en dakayo di adi polos mangin ammo en Diyos.

### *Din Awak Di Ipogaw Ay Matago Kasin* (2 Cor. 5:1-5)

<sup>35</sup> Tan mo wada et di mansalodsod ay mangwani, “Intoy iyat ngin di natey ay matago kasin? Intoy ison di awak da?” <sup>36</sup> Din mangisalodsod isdi et kaman way kolkolang na. Nemnemen koma din mapasamak sin bin-i. Tan mo man-esek kas bin-i, adi somimit mo adi madonot agan-o. <sup>37</sup> Mo is-ek mo abe di pagey ono odom ay bin-i, adi ka is-ek din ginmagabay ay mola mo adi et din bin-i et anggoy. <sup>38</sup> Tan sigod ay ninemnem Diyos din ison di mola ay somimit sin bin-i, et ipagabay na di am-in ay kalasin di bin-i ta say wada di maibagay ay tobo ya baklang di esa ya esa. <sup>39</sup> Olay abe din lamlames di matmatago isnan daga et baken man-iis-o, tan nankinalasi di lamlames di ipogaw ya animal ya titit ya nigay. <sup>40</sup> Natken abe di itsuran di wada ed daya sin wada isnan daga, isonga baken man-iiso di kinapintas da. <sup>41</sup> Olay din wada ed daya et nankinalasi di kinapintas da, tan din sey-ang di agew et natken sin selag di bowan ay natken abe sin kimmin di talaw. Olay din tatalaw et baken nan-iiso di kimkimmi da.

<sup>42</sup> Siya abe ay natken di awak tako ed wani mo din awak di ipogaw ay tagoen Diyos kasin, tan din awak tako ed wani et matey yan madonot, ngem din awak di ipogaw ay tagoen Diyos kasin et adi katkatey. <sup>43</sup> Din awak di natey et lawa di kailaana ya maga abey kabaelana, ngem din awak di matago kasin et mapmapteng ya mabikas. <sup>44</sup> Waday awak tako ed wani ay maibagay sin biyag isnan daga, et siya abe ay waday awak di matago kasin ay maibagay sin biyag ed langit. <sup>45</sup> Maikompa na met laeng sin inpaisolat Diyos ay kanana, “Din damo ay ipogaw ay si Adan et naidawtan si biyag,”† ngem wada abe din makwani en Naodi ay Adan ay si Cristo, et sisya di mangidawdawat si biyag ay iwed

§ 15:27 Salmo 8:6. Ilaen abe sin Hebreo 2:8-9. \* 15:32 Isaias 22:13. † 15:45 Genesis 2:7.



patingga na. <sup>46</sup> Ngem nemnemen tako ay din nangon-ona ay naidawat en datako et din naipogawan ay awak tako, asi pag maiskat din nailangitan. <sup>47</sup> Din damo ay Adan et napo sin daga ay nay, tan naamag si tapok, ngem din maikadwa ay Adan ay si Cristo et napo ed langit. <sup>48-49</sup> Isonga datako abe ay naidagaan et isoen tako ed wani din napo sin daga, ngem sin tapin di agew, am-in tako ay naitatapi sin napo ed langit ay si Cristo et isoen tako abes sisya.

<sup>50</sup> Aag-ik, din laydek ay kalien et masapol ay mabaroan din awak tako, tan adi mabalin ay maitapi dana ay awak tako ay matey sin panturturayan Diyos ay kad-an di adi katkatey. <sup>51</sup> Dengngen yo na, tan siya na din planon Diyos para en datako ay adi naipaammo ed idi: adi tako matey am-in, ngem bigla ay mabaliwan tako <sup>52</sup> ay kaman din sinkakimkim di mata. Mapasamak na sin kaodian ay agew ay kadngean din tanggoyob Diyos. Tan mo madnge din bongog di tanggoyob ay sana, tagoen Diyos kasin din natenatey et idawtanans daida si awak ay adi katkatey dowana aben baliwan datako ay matmatago pay laeng. <sup>53</sup> Tan din awak tako ay nay ay nalaka ay matey ya madonot et masapol ay mabaliwan si awak ay adi katkatey ya adi kadondonot. <sup>54</sup> Mo maamag di, siya di din katongpalan din inpaisolat Diyos ay kanana, “Dadlon maabak ya mamaga di pese.” ‡ <sup>55</sup> Isonga mabalin ay kanan tako, “Ay siya mo omabak di pese? Ay siya mo waday panakabalina en datako?” § <sup>56</sup> Tan din pangaan di pese sin panakabalina et din panbasbasolan tako, ya din pangabak di basol en datako et din adi tako panongpalan sin linteg Diyos. \* <sup>57</sup> Ngem man-iyaman tako en Diyos, tan idawdawat na en datako din panakabalin tako ay mangabak sin basol ya pese begew sin inamag Jesu Cristo ay Apo tako. †

<sup>58</sup> Isonga laydelaydek ay aag-i, ipapasnek yo ay mamati ay adi kayo masangsangaw si baken kosto ay maam-amag ya mait-itdo. Man-gaget kayo ay mansilbi en Apo Jesu Cristo, tan ammo yo ay din am-in ay amagen yo para en sisya et waday silbi na.

## 16

### *Din Kaolnongan Di Maibadang Sin Mamati Ed Jerusalem (Roma 15:22-29; 1 Cor. 8:13-9:5)*

<sup>1</sup> Mo maipanggep sin kaolnongan di maibadang sin ipogaw Diyos ed Jerusalem, mayat mo onodan yo din inbilin ko sin gimgimong ed Galacia. <sup>2</sup> Dinominggo ay man-idolin koma di esa ya esa si idawat na insigon sin sapol na ta say masensen di pilak ay maidawat et adi yo masapol ay olnongen mo emeyak issa. <sup>3</sup> Mo domatengak pay, asiak ipaw-it sin ipogaw ay talken yo ta iey da ed Jerusalem. Wada abe di solsolat ay idawat ko en daida ay pangiam-ammoak en daida sin mamati ed Jerusalem. <sup>4</sup> Ngem mo pay agpos ay emeyak sidi, olay makiey da en sak-en.

### *Din Planon Pablo (2 Cor. 1:15-24)*

<sup>5</sup> Din nemnemek ed wani et mandanak ed Macedonia ta man-itdoak sidi, asiak en pasyalen dakayo. <sup>6</sup> Mabaybayag ngin di pakiteteek en dakayo, siguro enggana ay makdeng di pinag-aandap, asi mabalin ay bomadang kayo sin panbiyahiak sin olay intoy emeyak. <sup>7</sup> Isonga adiak emey issa ed wani, tan mo say iyat ko di, sinkaattikan anggoy di mabalin ay panpasyalak en dakayo, et laydek ay mabayagak sin kad-an yo mo ipalobos di Apo. <sup>8</sup> Ed wani pay, manteteek isnan ed Efeso enggana ay domateng din fiesta ay makwani en Pentecostes, <sup>9</sup> tan olay mo ad-adoy komonkontra, ad-ado abey wayak ay mangamag si obla ay nabanol di pantongpalana.

<sup>10</sup> Mo somawang si Timoteo issa, sangailien yo ay kosto, tan man-ob-obla para en Apo Jesus ay kaman met laeng sak-en. <sup>11</sup> Ilaen yo ta maga di manglaslasoy en sisya mo adi

‡ 15:54 Isaias 25:8. § 15:55 Hosea 13:14. \* 15:56 Ilaen abe sin Roma 5:12 ya 7:7-13. † 15:57 Ilaen abe sin Roma 8:1-4.



et badangan yo ay kosto sin komaanana ay mantaoli isna ta say sixed di nemnem na en dakayo, tan sedsed-ek sisya ya din kakadwa na ay aag-i tako.

<sup>12</sup> Mo maipanggep abe sin agi tako ay si Apollos, inamag ko din kabaalak ay mangawis koma en sisya ay makiey sin odom ay aag-i tako ay en mamasyal en dakayo. Kanana en emey issa mo waday waya na, ngem sigaana ay emey ed wani.

### *Din Kakdengan Di Solat*

<sup>13</sup> Siliban yo, ipapasnek yo ay mamati ya ilaen yo ta natoled kayo ya napigsa di pammati yo. <sup>14</sup> Ipaila yo din layad yo sin iib-a yo sin am-in ay am-amagen yo.

<sup>15</sup> Aag-ik, ammo yo ay da Estefanas ay sinpamilya di damo ay namati ed Akaya, et manlogis di enggana ed wani, inapati da ay nansilsilbi sin ipogaw Diyos. Pangaasi yo ngarud <sup>16</sup> ta manpaituray kayo sin kaman dana ay ipogaw ya olay sino abe ay nagaget ay makiobla para en Apo Jesus.

<sup>17</sup> Peteg di layad ko sin inmalian da Estefanas en Fortunatus ya si Akaicus, tan naksayan di iliw ko en dakayo begew en daida. <sup>18</sup> Pinapigsa dan nemnem ko ay kaman met laeng di iyat da en dakayo mo somaa das sa. Sapay koma ta bigbigen yo di kaman dadi ay ipogaw.

<sup>19</sup> Din gimgimong sin probinsiya ay Asia et pakpakomostaan das dakayo. Siya abe en da Aquila en Priscilla ya din odom ay mamati ay makigimong sin beey da. Layden da ay ipaammo en dakayo din dakdake ay layad da en dakayo begew sin nakies-esaan yo am-in en Apo Jesus. <sup>20</sup> Am-in di aag-i takos na et pakomostaan das dakayo. Manpinakomosta kayo abe ay mangipaila ay manlilinayad kayo.

<sup>21</sup> Sak-en si Pablo ay nangisolat sin nay kakdengan di solat ay inpaisolat ko. Komosta kayo.

<sup>22</sup> Mo waday ipogaw ay magay layad na en Apo Jesu Cristo, sapay koma ta dosaen Diyos sisya. Omali ka ay Apo!

<sup>23</sup> Sapay koma ta seg-angan Apo Jesus si dakayo. <sup>24</sup> Sapay koma abe ta liknaen yo am-in din layad ko en dakayo begew sin nakies-esaan tako en Cristo Jesus.

## **Din Maikadwa Ay Solat San Pablo Sin Taga-Corinto Maipanggep Sin Solat Ay Nay**

Sin Damo ay Solat Pablo sin Taga-Corinto, binagbagaanas daida maipanggep sin nan-iibawan da ya odom ay problima da. Pinasyal na abes daida (2 Corinto 2:1; 12:14; 13:1-2), ngem siyang na ay tineteweng da din inbagbaga na, isonga peteg ay nansaksakit di nemnem na sin nantaoliana ed Efeso. Pag en mankasaba ed Troas ya ed Macedonia. Sin sinmawangana ed Macedonia, inabat nas Tito ay napo ed Corinto, et peteg di ragsak na sin nanngena ay nanbabawi da ya sinmigid di nemnem da en sisya (2 Corinto 7:5-7). Sin kad-ana ed Macedonia, insolat na din solat ay nay.

Tolo di napateg ay linaon din solat ay nay. Din omona et inbagan Pablo di nemnem na en daida ed Corinto ya din ragsak na sin nanbabawian da. Inpalawag na abe din kabibiyag ya it-itdon di aapostol sin nansilsilbian da en Cristo. Maikadwa, inbaga na ay man-olnong da koma si maibadang sin mamati ed Jerusalem. Maikatlo, inkalintegana din kalebbengana ay esa ay apostol, tan wada pay laeng di naitatapi sin gimong ed Corinto ay nanglaslasoy sin kinaapostol na downan da aben kankanan en daida di tet-ewa ay apostol.

### **Din Linaona**

Din panlogian di solat 1:1-11

Din nemnem Pablo sin gimong ed Corinto ya din kabibiyag na ya it-itdo na ay esa ay apostol 1:12-7:16

Din maibadang sin mamati ed Jerusalem 8:1-9:15

Din nangikalintegana Pablo sin kalebbengana ay esa ay apostol 10:1-13:10

Din kacdengan di solat 13:11-14

### *Din Panlogian Di Solat*

<sup>1</sup> Sak-en si Pablo ay apostol en Cristo Jesus ay maibasar sin layden Diyos. Din gait kos na et din agi tako ay si Timoteo. Naey di solat mi en dakayo ay ipogaw en Diyos ed Corinto ya pati am-in di ipogaw na sin probinsiya ay Akaya. <sup>2</sup> Sapay koma ta wada en dakayo di seg-ang ya talna ay mapmapo en Diyos ay Ama tako ya si Apo Jesu Cristo.

### *Din Mamadangan Diyos En Datako Sin Ligat Tako*

<sup>3</sup> Dayawen takos Diyos ay din Diyos ya Aman Jesu Cristo ay Apo tako, tan sisya din manageg-ang ay Ama tako ay napoan di am-in ay badang ya liwliwa. <sup>4</sup> Liwliwaenas datako sin am-in ay ligat tako ta say maammoan tako abe ay mangliwliwa sin iib-a tako mo waday kompormi ay ligat da ya maibadang tako en daida din badang Diyos met laeng en datako. <sup>5</sup> Tan din kaad-adon di mapalpaligatan tako ay kaman din ligat Cristo et siya met laeng din kadakdaken di ibadang Diyos en datako begew sin nakies-esaan tako en Cristo. <sup>6</sup> Isonga din ligat ay laklak-amen mi et maiturong sin pomigsaan di nemnem yo ya kaisalakanan yo, ya din laklak-amen mi abe ay liwliwa et maiturong sin pangammoan mi ay mangliwliwa en dakayo sin ligat tako ta say mabalin ay an-anosan yo. <sup>7</sup> Isonga dakdake di namnama mi en dakayo, tan ammo mi ay mo makilaklak-am kayo sin ligat mi, makilaklak-am kayo abe sin mamadbadangan Diyos en dakami.

<sup>8</sup> Dakayo ay aag-i, layden mi ay ammoan yo din nalabes ay ligat ay pinadpadas mi sin probinsiya ay Asia. Palalo ay nadagsenan kami sin ligat ay sana enggana ay adi kami makaitoled ya enggay magay namnama mi ay matago. <sup>9</sup> Din katet-ewa na et kanan mi en enggay dinmateng din kateyan mi. Ngem napasamak di ta baken din awak mi di pantalkan mi, mo adi et si Diyos ay makabael ay manago si matey. <sup>10</sup> Et tet-ewa

ay insalakanas dakami sin kaeegyat ay ligat mi, et omisalakan to. Sisyay di kanayon ay pannamnamaan mi ay mangitoltoloy ay mangisalakan en dakami, <sup>11</sup> dalo et mo bomadang kayo si kararag yo. Et mo say iyat yo di, songbatan Diyos din ad-ado ay kararag yo ya bindisyonanas dakami, et ad-ado di man-iyaman en sisya.

*Din Gapo Ay Binaliwan Pablo Din Plano Na*  
(1 Cor. 16:5-9)

<sup>12</sup> Manragsak kami ay mangwani en maga polos di ammo mi si inamag mi ay nan-et-etek sin iib-a mi ay ipogaw, namnamed en dakayo. Tan inturturong Diyos dakami ta naimposoan di am-in ay inam-amag mi ya inbagbaga mi, isonga adi maipoon din ogali mi ay nay si naipogawan ay sirib mo adi et din seg-ang Diyos. <sup>13-14</sup> Din insolsolat mi abe en dakayo et baken nalilingban di olog na mo adi et nalaka ay mabasa ya maawatan. Ammok ay adi yo pay laeng maawatan ay kosto di nemnem ya ogali mi, ngem sapay koma ta mataptapian di maawatan yo ta say din ragsak yo en dakami et komaman din ragsak mi en dakayo sin agew ay kasin omalian Jesu Cristo.

<sup>15</sup> Gapo ta magay dowadowak ay maragsakan kayo en dakami, ninemnem ko ay mamin dowak koma ay en mamasyal en dakayo ta say mamin dowak abe ay mabindisyonan kayo. <sup>16</sup> Din nay sigod ay planok et maspadak koma sin kad-an yo sin emeyak ed Macedonia, asiak kasin pasyalen dakayo sin pantaoliak ta say bomadang kayo sin panbiyahiak ed Judea. <sup>17</sup> Gapo ta adi natongpal din planok ay nay, kanan yo ngin en nalaka ay mabalibaliwan nemnem ko, ngem adi. Adiak aben manpaplano ay kaman din nailobongan ay ipogaw ay mangwani en “Aw,” kambaw din wadas tet-ewa ay nemnem na et “Baken.” <sup>18</sup> Tan din ibagbaga mi en dakayo et dadlon tet-ewa ay kaman din katet-ewan di kankanan Diyos. <sup>19</sup> Tan din Anak Diyos ay si Jesu Cristo ay inkaskasaba mi en da Silas ya si Timoteo en dakayo et adi na balibaliwan di nemnem na mo adi et tongtongpalena ay kosto din am-in ay ibagbaga na. <sup>20</sup> Et sisya din katongpalaan di am-in ay inkarin Diyos, isonga begew en sisya, awen tako ay tet-ewa din karkarin Diyos sin pangpangwanian tako en “Amen,” et say kaidaydayawana. <sup>21</sup> Din Diyos ay nay di mangipapapigsa sin pammati tako en Cristo ya pinili nas datako ay mansilbi en sisya. <sup>22</sup> Indawat na abe en datako din Ispirito Santo ay kaman malka ono sinyal ay ipogaw nas datako, et din panteteana en datako di dadlon takon pangammoan ay tongpalena din am-in ay inkari na en datako.

<sup>23</sup> Ibagak ed wani din gapo ay adiak inmey issa ay mamasyal en dakayo. Adiak inmey ta say waday waya yo ay mangibabawi sin basbasol yo ta adiak masapol ay dosaen dakayo. Manbayosak ta domosa si Diyos mo baken tet-ewa nan inbagak. <sup>24</sup> Ngem adiak layden ay kanan isna ay dakami di makaammo sin pammati yo, tan enggay napigsa kayman di pammati yo. Layden mi anggoy ay mamadang en dakayo ta say maragsakan kayo ay kosto.

## 2

<sup>1</sup> Ninemnem ko ngarud ay adiak kasin pasyalen dakayo mo kaman din nangon-ona ay namasyalak issa ay nansakitan di nemnem yo. <sup>2</sup> Tan sino aya di omiparagsak mo baken dakayo? Et intoy iyat yo aya ay omiparagsak mo enggay nansakitek di nemnem yo? <sup>3</sup> Siya di din gapo ay nansolatak en dakayo ed idi imbis ay pasyalek komas dakayo ay dagos, ta say mo emeyak issa, adi mansakit di nemnem ko begew en dakayo ay mangiparagsak koma en sak-en. Tan magay dowadowak ay mo manragsakak, say panragsakan yo abe. <sup>4</sup> Isonga sin nansolatak en dakayo, peteg kayman ay nadadagsenanak ya nanlolowa din matak begew sin palalo ay sakit di nemnem ko. Ngem laydek ay ammoan yo ay adiak nansolat ta say pansakitek di nemnem yo mo adi et ta ipailak din dakdake ay layad ko en dakayo.

*Masapol Ay Mapakawan Din Nakabasol*

<sup>5</sup> Mo maipanggep sin nanbasol issa ay nansaksakitan di nemnem yo, baken sak-en anggoy di nanbasolana mo adi dakayo, ngem baken dakayo am-in. Kanak en baken dakayo am-in, tan adiak layden ay padagsenen di basol na. <sup>6</sup> Omanay din nanosaan di kaad-adoan en dakayo en sisya. <sup>7</sup> Din iyat yo koma ed wani et pakawanen yos sisya ya papigsaen yo di nemnem na ta say adi mataptapian din sakit di nemnem na et say kaabakana. <sup>8</sup> Isonga pangaasi yo ta ipaila yo kasin din layad yo en sisya. <sup>9</sup> Din esa ay gapo ay nansolatak en dakayo ed idi et ta padasek mo managtongpal kayo. <sup>10</sup> Ngem ed wani, inammoak ay tinongpal yo din inbagak, isonga mo pakawanen yos sisya, pakawanek abe. Din katet-ewa na et enggay pinakawan ko sin pangiilaan Cristo para sin pansigdan yo, dalo et mo wada tet-ewa di masapol ay pakawanek. <sup>11</sup> Inamag ko di ta say adi ietekan ya abaken Satanas si datako, tan dadlon takon ammo din lawa ay panggep na.

### *Din Nandanagan Pablo Ed Troas*

<sup>12</sup> May, sin sinmawangak ed Troas ay mangikasaba sin siged ay damag ay maipanggep en Cristo, mayat baw di gondaway ko ay indawat Apo en sak-en ay mangiyat sisi. <sup>13</sup> Ngem gapo ta magas Tito ay mangabat koma en sak-en, peteg ay nadandanaganak, isonga nanopakadaak sin aag-i takos di ta ikanayon ko ay emey ed Macedonia.

### *Din Pantongpala Di Oblan Da Pablo*

<sup>14</sup> Ngem dakdake pay dedan di iyaman ko en Diyos, tan begew sin nakies-esaan mi en Cristo, kankanayon ay ipangpango nas dakami sin pangiilaan di kaipoipogaw ay kaman kamin balod ay inabak Cristo.\* Os-osalenas dakami ay mangipaammo sin ipogaw sin kailili si maipanggep en Cristo ay siya din maiarig si nabanglo ay insinso. <sup>15</sup> Tan din pangikaskasabaan mi si maipanggep en Cristo et kaman nabanglo ay insinso ay kapkapnekan Diyos ay songsongsongen di am-in ay manmanngge, mamati ya adi mamati. <sup>16</sup> Mo din ipogaw ay maisalsalakan et nabanglo di kasongsongana en daida, tan maiturong sin biyag da ay iwed patingga na ay idawat Cristo. Ngem mo din malitlitaw, man-agob en daida ay kaman din agob di natey, tan din adi da mamatian et maiturong sin dosa da ay eng-enggana. Palalo ay napateg din obla mi ay nay. Sino aya di makabael ay mangamag? <sup>17</sup> Ngem kabaelan mi kayman, tan inbaan Diyos dakami ya naimposoan din am-in ay ibagbaga mi sin pangiilaana begew sin nakies-esaan mi en Cristo. Baken kamin kaman din ad-ado ay mangit-itdo sin kalin Diyos ta say bomaknang da.

## 3

### *Din Kabaelan Da Pablo Et Napo En Diyos*

<sup>1</sup> Kanan yo siguro en nay ay it-it-ek mi kasin din awak mi, ngem ay siya mo masapol mi ay mangiyat sisi? Ay siya mo masapol mi di solat ay mangiam-ammo sin awak mi en dakayo? Ay masapol abe ay waday ipasolat mi en dakayo ta ipaila mis ipogaw sin odom ay il-ili ay em-emeyan mi? Siya iman di di am-amagen di odom, ngem adi mi kasapolan. <sup>2</sup> Tan dakayo ay mismo di maiarig si solat ay kaipailaan di obla mi. Enggay wada sin nemnem mi din laonen di solat ay sana, et nalaka abe ay basaen di olay sino ay ipogaw ay mangammo en dakayo. <sup>3</sup> Maila sin kabibiyag yo ay si Cristo di nangisolat babaen en dakami, ngem baken tinta di naisolat mo adi din Ispiriton di matmatago ay Diyos. Baken aben nadampilak ay bato ay kaman din naigolitan di linteg Moses di nangisolatana, mo adi et sin nemnem yo.

<sup>4</sup> Dadlon min pasien ay tet-ewa dana, tan si Diyos di pantalkan mi ay bomadbadang babaen en Cristo. <sup>5</sup> Ammo mi kayman ay maga di kabaelan mi mo bokbokod mi, tan din

\* **2:14** Din pangarig ay nay et maibasar sin ogalin di Romano ed idi. Mo inabak dan kaibaw da, din nangabak ay ap-apon di soldado et inpango na din sosoldado ay inabak na sin kalsadan di ili ta boyaen di kaipoipogaw. Gapo ta si Pablo di esa ay nanganonkontra en Cristo ed idi, ibilang na di awak na ay esa ay balod ay inabak Cristo.

kabaelan mi et mapmapo en Diyos. <sup>6</sup> Tan sisya di nanganay sin kabaelan mi ay mangit-itdo si maipanggep sin baro ay intolag na sin kaipoipogaw. Din baro ay tolag ay nay et baken kaman din naisolat ay linteg Moses, mo adi et maibasar sin oblan di Ispiriton Diyos. Tan din pantongpalan din naisolat ay linteg et dosa ay iwed patingga na, ngem din Ispiriton Diyos pay et idawdawat na di biyag ay iwed patingga na.

*Din Nanlasinan Di Baro Ay Tolag Ay Init-itdon Da Pablo  
(Heb. 8:1-13)*

<sup>7</sup> Nemnemen tako din nangipailaan Diyos sin panakabalina sin nangidawtana sin linteg na en Moses. Tan palalo ay nankonkoniniing di ropan Moses sin nangidatngana sin linteg ay sana ay naigolit si bato sin Israelita. Olay mo komapkapoy di koniniing di ropa na, nasili da pay dedan, et adi da makaisin-eng en sisya.\* Mo kaman nidi din panakabalin ay inpailan Diyos sin nangidawtana sin linteg ay mantongpal sin dosa ay iwed patingga na, <sup>8</sup> adi pay namnamed ay maila din kinadiyos na ya panakabalina sin pangidawdawtana sin Ispirito na begew din siged ay damag ay ikaskasaba mi. <sup>9</sup> Tan mo naila din koniniing di Diyos sin nangidawtana sin linteg ay mangeddeng sin kaipoipogaw, namnamed ay maila din kinadiyos na begew sin plano na ay mapalinteg di ipogaw. <sup>10</sup> Din katet-ewa na et kaman enggay namaga din kinangaton di linteg mo iso tako sin kinangaton di planon Diyos ay naiskat ed wani. <sup>11</sup> Tan mo waday kinangaton di nasokatan, nangatngato pay din naiskat ay komakaman si eng-enggana.

<sup>12</sup> Gapo ta say namnamaen mi di, natoled kami ay mangipalawag sin it-itdo mi ay maga di linglingban mi. <sup>13</sup> Baken kamin kaman si Moses ay nilingbana din ropa na ta say adi ilaen din Israelita sin komapkapoyan di koniniing na.† <sup>14</sup> Ngem kinmenteg di nemnem da et adi da inawatan din olog di napasamak en Moses. Tan olay ed wani, kaman nalilingban di nemnem di Judio mo basaen da din Daan ay Tolag, tan adi da maawatan din kosto ay olog na. Et adi makaan din naililingeb enggana ay maitapi da en Cristo. <sup>15</sup> Aw, tet-ewa sa, tan olay ed wani, mo mabasa din insolat Moses, kaman waday sokdong ay mangililingeb sin nemnem da. <sup>16</sup> Ngem mo waday mansagong en Apo, makaan din manglilingeb ay sana.‡ <sup>17</sup> Din Apo ay inbagak isna et din Ispiriton di Apo, et olay sino ay pantetean din Ispiriton di Apo et waday wayawaya na. <sup>18</sup> Isonga datako am-in ay mamati, et baken takon kaman si Moses ay nalilingban di ropa na, mo adi et ipappaila tako ay kosto ay kaman ispiko din kinadiyos en Apo Jesus downan tako aben mabalbaliwan si kankanayon ay somigsiged enggana ay komaman tako en sisya. Din mangitongtongpal isna en datako et din Apo met laeng ay din Ispirito Santo.

## 4

*Ipalawlawag Da Pablo Din Siged Ay Damag Ta Masilawan Di Wada Sin Mabolinget*

<sup>1</sup> Isonga gapo ta intalek Diyos en dakami din sigesiged ay obla ay nay begew sin segang na, adi kami madisdismaya. <sup>2</sup> Dinokogan mi din am-in ay am-amagen di ipogaw ay naitatabon ya kababain ya maga di siksikapan mi. Adi mi aben sokskokatan din kalin Diyos mo adi et ipalawlawag mi ay kosto din tet-ewa. Am-amagen mi dana sin pangiilaan Diyos ta say pangammoan di olay sino ay ipogaw ay siged di ogali mi. <sup>3</sup> Tet-ewa kayman ay nalilibooan di nemnem di odom ta adi da maawatan din siged ay damag ay ikaskasaba mi, ngem daida di madosa ay eng-enggana <sup>4</sup> ay adi mamati. Tan si Satanas ay diyos di lawa ay ipogaw isnan lobong et ginodab na di nemnem da ta adi da ilaen din silaw ay mapmapo sin siged ay damag ay mangibagbaga sin kinadiyos en Cristo. Tan si Cristo din kostokosto ay kaipailaan di Diyos, <sup>5</sup> et sisya di ikaskasaba mi ay baken din awak mi. Din ibagbaga mi et si Jesu Cristo di Apo ya dakami di mansilbilbi en dakayo begew en sisya. <sup>6</sup> Tan si Diyos di nangibilin ay “Awni et pomat-a”\* ta say waday

\* 3:7 Exodo 34:29. † 3:13 Exodo 34:33. ‡ 3:16 Exodo 34:34. \* 4:6 Genesis 1:3.



mansilsilaw sin mabolinget. Et sisya met laeng di naninggaw sin nemnem mi ta ipaila na babaen en dakami din kinadiyos na ay maila sin ropan Cristo.

### *Intalek Diyos Nan Nabanol Ay Maitdo Sin Owat Ipogaw*

<sup>7</sup> Ngem mo dakami pay, maiarig kami sin banga ay magay banol na ay naigtoan di nankababanol ay gameng, tan intalek Diyos din siged ay damag ay nankababanol en dakami ay owat ipogaw. Inamag na di ta say maila ay din panakabalina ay magay kaiisoana et baken napo en dakami mo adi et en sisya. <sup>8</sup> Kankanayon ay maip-ipit kami ngem adi kami maab-abak. Namin ado ay magay ammo mis pamosposan mi, ngem namnamaen mi ay ipaammon Diyos din kosto ay amagen mi. <sup>9</sup> Palpaligaten di ipogaw si dakami, ngem adi tomaytaynan si Diyos. Mo mamingsan, nganngani ay pomse da, ngem matmatago kami pay laeng. <sup>10-11</sup> Olay intoy em-emeyan mi, kankanayon ay sangsangoen mi di pese ay kaman si Jesus begew sin naitatapian mi en sisya ta say maila sin matey ay awak mi din biyag ay idawdawwat na. <sup>12</sup> Isonga tet-ewa ay sangsangoen mi di pese, ngem din pantongpalana et gon-oden yo di biyag ay iwed patingga na.

<sup>13</sup> Wada di naisolat sin kalin Diyos ay kanana, “Namatiak en Diyos, isonga waday inbagak.”† Kaman nidi met laeng di pammati mi, tan olay mo mapalpaligatan kami, ibagbaga mi pay dedan di patpatien mi. <sup>14</sup> Tan ammo mi ay si Diyos ay nanago kasin en Apo Jesus et tagoena abes dakami begew sin nakies-esaan mi en sisya. Iso na en dakayo ta say alaenas datako am-in ay mamati ta maitapi tako en sisya sin kad-ana. <sup>15</sup> An-anosan mi am-in dana ay ligat, tan layden mi ay mantongpal sin pansigdan yo ta say maad-ado di ipogaw ay makilak-am sin seg-ang Diyos. Tan mo maad-ado da, maad-ado abe di man-iyaman en Diyos et say kadayawana. <sup>16</sup> Isonga adi kami madisdismaya, tan olay mo komapkapoy di awak tako, inag-agew ay pomigpigma din biyag ay wada en datako ay adi katkatey. <sup>17</sup> Tan din ligat ay laklak-amen tako et adi mabayag ya kaman magay dagsena mo mais-o sin gon-oden tako sin tapin di agew. Tan din pantongpalan di ligat ay nay et din sigesiged ay biyag ed langit ay magay patingga na ya magay kaiisoana. <sup>18</sup> Isonga din nemnemnemen tako et baken din maila tako isnan daga mo adi et din daan takon maila ay wada ed langit, tan din maila isnan daga et waday patingga da, ngem din adi maila et magay patingga da.

## 5

### *Din Baro Ay Awak Ay Namnamaen Di Mamati (1 Cor. 15:35-58; Flp. 1:19-26)*

<sup>1</sup> Tan ammo tako ay mo matopi din tolda ay pan-iyanan tako isnan daga, laydena ay kalien, din awak tako, sokatan Diyos si kosto ay beey tako ed langit ay komakaman si eng-enggana ay adi amagen di ipogaw. <sup>2</sup> Ed wani kayman, kaman takon manbaybayeweng begew sin peteg ay layad tako ay maiskat din baro ay awak tako <sup>3</sup> ta say wada ay dagos di ibadon di ab-abiik tako ta adi malalabosan mo taynan tako din sigod ay awak tako. <sup>4</sup> Tet-ewa adi ay nadadagsenan tako isnan daga, isonga kaman takon manbaybayeweng, ngem adiak kankanen en layden tako ay taynan din sigod ay awak tako ay matey, mo adi et layden tako ay maiskat din baro ay awak ay adi katkatey. <sup>5</sup> Si Diyos di nangisagana en datako ay mangon-od sina babaen sin Ispirito na ay indawat na en datako. Et din Ispirito na di dadlon takon pangammoan ay tongpalena din am-in ay inkari na.

<sup>6</sup> Isonga napigma di nemnem mi si owaoway. Ammo mi kayman ay mo wada kami isnan daga, maga kami pay laeng sin kad-an di Apo, <sup>7</sup> tan din biyag mis nan daga et maibasar sin pammati, baken din maila. <sup>8</sup> Ngem napigma pay dedan di nemnem mi. Agpos et mo taynan mi nan awak mi isnan daga ta say en kami makitetee en Apo, <sup>9</sup> ngem

† 4:13 Salmo 116:10.

olay mo wada kamis nan daga ono sin kad-ana ed langit, din kapapatgan ay panggep mi et ta malaylaydan sisya en dakami. <sup>10</sup> Tan masapol ay sangoen tako am-in si Cristo ta okomenas datako ta say magon-gonaan di esa ya esa ay maibasar sin inam-amag na sin kawada nas nan daga, mo siked ono lawa.

*Din Oblan Da Pablo Et Din Pangaw-awisan Das Ipogaw Ta Manbalin Das Gayyem En Diyos*

*(Roma 5:9-11; Col. 1:19-22)*

<sup>11</sup> Gapo ta ammo mi ay emegyat en Apo Jesus, isonga kankanayon ay aw-awisen mi din ipogaw ay mamati sin ibagbaga mi. Ammon Diyos ay naimposan di panggep mi, et sapay koma ta ammo yo abe. <sup>12</sup> Baken min panggep ay it-it-ek di awak mi sin inbaga mi ay nay. Layden mi anggoy ay waday pangit-ek yo en dakami ta say waday iyat yo ay manongbat sin ipogaw issa ay mamatpateg sin kasasaad di ipogaw ay baken din wada sin nemnem na. <sup>13</sup> Mo kaspangarigan waday mangwani en naboge kami, olay, tan para en Diyos din am-in ay am-amagen mi. Et mo kanan di odom en kostokosto di nemnem mi, ammo yo met dedan ay para en dakayo di obla mi. <sup>14</sup> Tan din layad Cristo di mangiturturong en dakami sin am-in ay am-amagen mi, tan magay dowadowa mi ay mo natey di esa ay ipogaw ay si Cristo para sin am-in, maibilang ay natey am-in di ipogaw. <sup>15</sup> Natey sisya para sin am-in ta datako ay matmatago et baken koma din laylayden tako di on-onodan tako mo adi et din laylayden Cristo ay natey ya natago kasin para en datako.

<sup>16</sup> Isonga ed wani, adi kami bigbigen di olay sino ay ipogaw ay maibasar sin kasasaad na isnan daga. Kaman nidi kayman di namigbigan mi en Cristo ed idi, ngem nabaliwan di pannemnem mi en sisya ed wani. <sup>17</sup> Tan olay sino ay nakies-esa en Cristo et nanbalinen Diyos si baro ay ipogaw. Din sigod ay nemnem na et nanpatingga, tan nasokatan si baro. <sup>18</sup> Si Diyos et anggoy di nangamag isna, tan kinaana din nanasalin en datako en sisya babaen en Cristo ya intalek na en dakami din obla mi ay mangaw-awis si ipogaw ta manbalin das gagayyem na. <sup>19</sup> Din ibagbaga mi et kinaan Diyos din nanasalin sin kaipoipogaw en sisya babaen sin nateyan Cristo sin krus, adi na ibilbilang din basbasol da. Siya na di intalek Diyos en dakami ay mait-itdo. <sup>20</sup> Isonga dakami di panakaawak en Cristo, et kaman si Diyos ay mismo di mangaw-awis sin kaipoipogaw babaen sin ibagbaga mi. Man-ad-adawag kami ngarud ay mangmangwani, “Pangaasi yo ta itay-on yo ay panbalinen Diyos dakayo si gagayyem na.” <sup>21</sup> Tan siya na di inamag Diyos para en datako. Inbilang na ay si Cristo di akin basol sin basbasol tako, olay mo maga polos di basol na, ta say ibilbilang na abe ay wada en datako din kinalinteg na begew sin nakies-esaan tako en Cristo.

## 6

<sup>1</sup> Isonga gapo ta makiob-obla kami en Diyos, bagbagaan mis dakayo ta din seg-ang Diyos ay inawat yo et waday kosto ay pantongpalana sin biyag yo. <sup>2</sup> Tan waday inpaisolat Diyos ay kanana,

“Dinngek din kararag mo sin timpo ay ninemnem ko ay maneg-ang en sik-a, ya binadangk sik-a sin dinmatngan di kosto ay agew ay pangisalamanak en sik-a.”\* Nemnemen yo ngarud na. Ed wani di kosto ay timpo ay pangawatan yo sin seg-ang Diyos. Ed wani di kosto ay agew ay maisalakanan yo.

*Din Naligat Ay Biyag Da Pablo*

<sup>3</sup> Siliban mi ta maga di am-amagen mi si kasnitan ono bomasolan di iib-a mi ay ipogaw ta say maga di manglaslasoy sin obla mi ay nay. <sup>4</sup> Sin am-in ay am-amagen mi, ipappaila mi ay si Diyos di pansilsilbian mi begew sin pangan-anosan mi sin am-in ay danag ya

\* 6:2 Isaias 49:8.

ligat ya kaeegyat ay mapaspasamak en dakami. <sup>5</sup> Da naey di odom ay ligat ay nilaklakam mi. Namin piga ay nasopsoplit kami ya naibalbalod kami ya nagolgolo kami! Nan-ob-obla kami enggana ay nabbanabbay kami, ya inan-anosan mi abe di dagaang ya poyat. <sup>6</sup> Mail-ila abe ay si Diyos di pansilsilbian mi begew sin nalinis ay ogali mi, din pangammoan mi en Diyos, ya din anos ya seg-ang mi sin iib-a mi. Mail-ila abe begew sin kabaelan mi ay idawdawat din Ispirito Santo, din naimposoan ay layad mi, <sup>7</sup> din pangititdoan mi sin tet-ewa, ya din panakabalin Diyos ay ipappaila na babaen en dakami. Wada abe di kinalinteg mi ay idawdawat Diyos ay maiarig si kampilan ya kasay mi. <sup>8</sup> Din pansilsilbian mi en Diyos et waday mangipatpateg ya manglaslasoy en dakami, waday omit-it-ek ya waday mangipalawlawwa en dakami. Waday mangmangwani ay makaetek kami, ngem tet-ewa met di ibagbaga mi. <sup>9</sup> Kankanan di odom en magay kaibilangan mi, ngem mandindinamag met di ngadan mi. Kaman kamin matmatey sin pangilan di odom, ngem nay ay matmatago kami pay laeng. Sinopsoplit aben Diyos dakami, ngem adi pinompomse. <sup>10</sup> Wada di pansaksakitan di nemnem mi, ngem komakaman pay dedan di ragsak mi. Nabibiteg kami pay, ngem ad-ado di pabakbaknangen mi. Maga abe di sanikwa mi isnan daga, ngem oka mi pay dedan di am-in.

<sup>11</sup> Ay aag-ik ay taga-Corinto, maga di wadas nemnem ko si adiak inbaga en dakayo. Dakdake adi di layad ko en dakayo. <sup>12</sup> Baken met dakami di mangiimot sin layad mi mo adi et dakayo. <sup>13</sup> Isonga dakayo ay ibilang ko ay anak ko, pangaasi yo ta sobalitan yo din dakdake ay layad mi en dakayo.

#### *Adi Koma Makiasawa Ono Makisosyo Di Mamati Sin Adi Mamati*

<sup>14</sup> Adi kayo makias-asawa ono makisososyo sin adi mamati tan adi kayo mankakompasan. Ay mabalin aya ay man-oolnos di nalinteg ya nakillo ay ipogaw? Ay siya mo mabalin ay mankakadwa di pat-a ya bolinget? <sup>15</sup> Maga polos di pan-es-esaan di nemnem da Cristo en Satanas, isonga maga abe di pankokompasan di mamati ya adi mamati. <sup>16</sup> Ay maibagay aya mo maitapi di sinan didiyos sin timplon Diyos? Aga, et siya abe en datako, tan datako din timplon ay panbebbeeyan di matmatago ay Diyos. Tan kanan Diyos,

“Manbeeyak en daida ya kadjadwaek daida. Sak-en di bigbigen da ay Diyos da ya daida di ipogaw ko.”†

<sup>17</sup> Isonga kanan aben Diyos,

“Taynan yos daida ta maikakasin kayo en daida. Adi yo aben sagsag-enen di kadodogis ta say awatek dakayo.‡ <sup>18</sup> Tan mo say iyat yo di, maibilangak ay Ama yo ya maibilang kayo ay anak ko.” Siya dadi din kanan din manakabalin ay Diyos.§

## 7

<sup>1</sup> Patpatgek ay gagayyem, gapo ta inkarin Diyos dana en datako, dokogan tako koma di am-in ay mangipakadodogis sin awak ya nemnem tako et ipakat tako ay mangon-onod si dadlon nasantoan ay kabibiyag begew sin pangipatpatgan tako en Diyos.

#### *Din Pinmigsan Di Nemnem Pablo Begew Sin Inbagan Tito*

<sup>2</sup> Pangaasi yo ta ipaila yo din layad yo en dakami, tan magay inamag mis lawa en dakayo, maga abe di natnatken ay initdo mi ono lawa ay ogali ay inpaila mi ay nasangawan yo, ya maga abe di sinowitik mi. <sup>3</sup> Adiak pabasbasolen si dakayo begew sin inbagak ay nay, tan tet-ewa din enggay inbagak ay laydelayden mis dakayo. Isonga olay sino di mapasamak en datako sin matatagoan tako ya olay abe mo matey tako, adi makmaksayan nan layad mi en dakayo. <sup>4</sup> Peteg ay taltalkek ya it-it-ek kos dakayo. Olay mo palalo ay mapalpaligatan kami, pinmigsan di nemnem mi sin inmalian Tito ya peteg di ragsak mi begew sin inbaga na. <sup>5</sup> Tan olay sin sinmawangan mi ed Macedonia, magay

† 6:16 Levitico 26:11-12. Ilaen abe sin Naipaammo 21:3. ‡ 6:17 Isaias 52:11. § 6:18 Isaias 43:6; Jeremias 31:9.

nan-ib-ibbayan di nemnem ya awak mi begew sin kaad-adon di ligat ay nilaklak-am mi. Tan wada da di nangunkontra en dakami ya wada abe di nandandanagan mi. <sup>6</sup> Ngem si Diyos ay mangipapigsa si nemnem di nadismaya ay ipogaw et inpapigsa na di nemnem mi begew sin inmalian Tito. <sup>7</sup> Et baken anggoy din inmaliana di nangipapigsa sin nemnem mi mo adi et olay pay din inpadamag na ay maipanggep sin nangiparagsakan yo en sisya. Tan kanana en laydelayden yo kano ay mangila en sak-en ya peteg kano di babawi yo sin lawa ay inamag yo ed idi. Kanana abe en enggay kano ay silalayad kayo ay mangisakit ya mangikalintegan en sak-en, isonga nasepsep ay naragsakanak.

<sup>8</sup> Tan olay mo nasakitan di nemnem yo begew sin doy ay solat ko en dakayo, magay babawik ed wani ay insolat ko di. Nanbabawiak kayman sin nangammoak ay nasakitan kayo, olay mo sinkaattikan anggoy di sakit di nemnem yo. <sup>9</sup> Ngem ed wani nay et ay maragragsakanak, baken gapo ta nansakitek di nemnem yo mo adi et gapo ta nantongpal din sakit di nemnem yo sin nanbabawian yo. Din sana ay sakit di nemnem yo et naibasar met laeng sin layden Diyos ta say adi masakitan din pammati yo. <sup>10</sup> Tan din sakit di nemnem ay panlaydan Diyos et mantongpal sin pangibabawian di ipogaw sin basbasol na ta say maisalakan sisya. Maga di manbabawi manbegew sidi. Ngem din nailobongan ay sakit di nemnem et mantongpal sin dosa ay eng-enggana. <sup>11</sup> Nemnemen yo din siged ay inamag Diyos begew sin sakit di nemnem yo ay sana. Tan ed wani man-gaget kayo ay mangipaila ay kosto di inyat yo. Nanbonget kayo begew sin nababainan yo ya inmegyat kayo tan mo madosa kayo. Laylayden yo ay somiged kasin di pankakadwaan tako. Silalayad kayo abe ay nanosa ay kosto sin nakabasol. Begew sin am-in dana ay inamag yo, inpaila yo ay enggay maga di maipabasol en dakayo sin napasamak ay doy. <sup>12</sup> Et baken anggoy din nakabasol ono din nanbasolana di gapo ay nansolatak, mo adi et nansolatak ta say maipalawag en dakayo sin pangilaan Diyos ay tet-ewa ay laylayden yo ya isaksakit yos dakami. <sup>13</sup> Isonga pinmigma di nemnem mi tan maila mi ay natongpal dadi.

Ngem baken anggoy dadi si nanragsakan mi mo adi et namnamed ay naragragsakan kami sin nangilaan mi sin ragsak Tito, tan enggay tinmalna ay kosto di nemnem na begew en dakayo am-in. <sup>14</sup> Tan ed idi init-it-ek mis dakayo en sisya, et laton ay adiak napabainan begew sin inbagak. Tan nay ay napaneknekan ay tet-ewa din nangit-it-ekan mi en dakayo en sisya ay kaman met laeng din katet-ewan di am-in ay inbagbaga mi en dakayo. <sup>15</sup> Isonga masepsep ay laylayden Tito si dakayo ed wani, tan nemnemnemen ay malaylaydan kayo ay namati sin am-in ay inbaga na ya dadlon yo aben pinatpateg sisya sin sinmawangana issa. <sup>16</sup> Et peteg abe di ragsak ko, tan ammok ay mabalin ay talkek dakayo si kosto.

## 8

### *Din Gapo Ay Maga Koma Di Imotan Di Taga-Corinto Ay Bomadang Da Sin Makasapol*

<sup>1</sup> Aag-i, layden mi ay ammoan yo din siged ay nantongpalan di seg-ang Diyos sin gimgimong ed Macedonia. <sup>2</sup> Tan olay mo palalo ay napalpaligatan da ya palalo abe ay nabiteg da, ad-ado di indawat da ay badang sin iib-a da ay mamati begew sin peteg ay ragsak da. <sup>3</sup> Mabalin ay paneknekak ay din indawat da et baken owat maibasar sin kabaelan da ay idawat mo adi et nasurok mo din kabaelan da. Et daida din akin nemnem ay nangidawat. <sup>4</sup> Din katet-ewa na et nanopakpakaasi da en dakami ta maidawtan das gondaway ay makibadang sin ipogaw en Diyos ed Jerusalem. <sup>5</sup> Din inyat da et sinurokan da din namnamaen mi, tan adi da indawat anggoy di pilak da, mo adi et nangon-onaen da ay nangitalek sin biyag da en Diyos ya pag en dakami, tan ammo da ay say layden Diyos ay amagen da.

<sup>6</sup> Ngarud, gapo ta si Tito di nangipailogi ed idi ay man-olnong kayo si idawat yo, inawis mis sisya ay mantaoli issa ta badanganas dakayo ay mangikdeng sin inlogi yo ay sana

ay kaipailaan di seg-ang yo. <sup>7</sup> Enggay kayman nabaknang kayos pammati. Nabaknang kayo abes pangam-ammoan yo en Diyos ya din kabaelan yo ay man-it-itdo. Nagaget kayo pay ay mansilsilbi en Diyos ya dakdake abe di layad yo en dakami. Ay adi mabalin aya ay ipaila yo ay nabaknang kayo abes seg-ang sin iib-a yo ta say badangan yos daida?

<sup>8</sup> Baken kon bilin din inbagak ay nay. Laydek anggoy ay ipaammo en dakayo ay silalayad di odom ay bomadang ta say mo tadonen yos daida, say pangammoak ay naimposoan abe di layad yo. <sup>9</sup> Tan ammo yo din kadakdaken di seg-ang Jesu Cristo ay Apo tako. Olay mo palalo ay nabaknang sisya ed langit, binmitteg sisya para en datako sin nanbalinana si ipogaw, ta say bomaknang tako begew sin kinabiteg na ay sana. <sup>10</sup> Isonga siya na di pannemnem ko. Agpos et mo itoloy yo din enggay inlogi yo ed taw-en, tan dakayo kayman di damdamo ay nannemnem ya dakayo met laeng di damdamo ay nangilogi. <sup>11</sup> Iapati yo ngarud ay manongpal sin plano yo insigon sin kabaelan yo. Sapay koma ta din layad yo ay manongpal sin plano yo et maiiso sin layad yo ay nanplano. <sup>12</sup> Tan mo man-idawat kayo insigon sin kabaelan yo, mapnek si Diyos sidi, basta silalayad kayo ay mangidawat. Adi na namnamaen ay idawat yo din adi yo kabaelan.

<sup>13</sup> Adiak layden ay kanan en bomaknang koma di odom begew sin idawdawat yo dowan kayo pay manpalpaligat. <sup>14</sup> Ngem gapo ta ad-ado di wada en dakayo ed wani, kosto mo badangan yo din makasapol ta say mo dakayo di makasapol sin tapin di agew, mabalin abe ay badangan das dakayo. Tan mo say amagen yo di, man-isos-o kayo. <sup>15</sup> Kaman din inpaisolat Diyos ay maipanggep sin nangol-olnongan di Judio si makan ay napod langit ay kanana,

“Din nangolnong si ad-ado et maga di nabay-an en sisya, ya din nangolnong si at-atik et inmanay en sisya.”\*

### *Din Planon Da Pablo Ta Maga Di Manriri Maipanggep Si Kaolnongan Ya Kaipaw-itan Di Pilak*

*(1 Cor. 16:1-4)*

<sup>16</sup> Man-iyamanak en Diyos tan inis-o na din layad Tito ay bomadang en dakayo sin layad ko. <sup>17</sup> Ammok ay tet-ewa na, tan nilayad na ay dagos din plano mi ay mangibaa en sisya issa ya din katet-ewa na et sigod ay ninemnem na ay ena kasin pasyalen dakayo begew sin peteg ay pangisaksakitana en dakayo. <sup>18</sup> Din ibaa mi ay kadwa na et din agi tako ay mamati ay patpatgen am-in di gimgimong begew sin pangikaskasabaana sin siged ay damag. <sup>19</sup> Et baken anggoy nidi, tan sisya met laeng din dinotokan di gimgimong ay makiey en dakami ay mangiey ed Jerusalem sin inolnong yo ya din odom ay gimgimong. Amagen mi di ta say madayaw di Apo ya ta ipaila mi abe ay silalayad kami ay bomadang sin iib-a mi. <sup>20</sup> Es-esten mi ay mangolnong ya manggen sin dakdake ay maibadang ay sana ta say maga di mangwani en natnatken di panggep mi. <sup>21</sup> Tan layden mi ay kostokosto di amagen mi baken anggoy sin pangiilaan Diyos, mo adi et sin pangiilaan aben di ipogaw.

<sup>22</sup> Wada di esa pay ay agi tako ay ipakoyog mi en daida. Namin ado ay inpanpaneknek na en dakami ay nagaget ay mansilsilbi en Diyos. Et ed wani, namnamed ay laydelaydena ay makiey begew sin dakdake ay talek na en dakayo. <sup>23</sup> Mo si Tito abe, makiob-oblala en sak-en ay mansilsilbi en dakayo. Et mo din iib-a na pay ay aag-i tako, daida iman din panakaawak di mamati sin gimgimong, et madaydayaw si Cristo begew en daida. <sup>24</sup> Ipaila yo ngarud din layad yo en daida ta say maipaneknek en daida ya sin gimgimong ay namili en daida ay naimposoan di layad yo ya tet-ewa abe din inbagbagak ay nangit-it-ek en dakayo.

---

\* 8:15 Exodo 16:18.



## 9

### *Din Sigid Ay Pantongtongpalan Di Man-idawat*

<sup>1</sup> Ammok kayman ay adiak masapol ay mansolat en dakayo maipanggep sin kaolnongan di maibadang sin ipogaw en Diyos ed Jerusalem. <sup>2</sup> Tan ammok ay laylayden yo ay bomadang, et siya na abe di init-it-ek ko sin gimgimong ed Macedonia. Inbagbagak ay nakasasagana kayo ed Akaya ay bomadang manlogi ed taw-en, et begew sin inbagbagak ay nay, naawis di kaad-adoan en daida ay mangolnong abe si ibadang da. <sup>3</sup> Ngem ibaak pay dedan din dooy da ay aag-i tako ta badangan das dakayo ta say maila ay baken owat kali ay magay dagsena din nangit-it-ekak en dakayo ya ta maisagana din idawat yo ay kaman din inbagak. <sup>4</sup> Tan mo somawangak issa ay komoykoyog di aag-i tako ay taga-Macedonia yan ammoen da ay daan maisagana din ibadang yo, palalo ay mabainanak begew sin namnamak ay enggay naisagana, siya abe en dakayo. <sup>5</sup> Isonga ninemnem ko ay agpos et mo ipaon-onak dana ay aag-i tako ta badangan das dakayo sin kaolnongan di inkari yo ta say maisagana ay kosto mo somawangak issa. Tan mo say iyat tako di, maila ay maipoon sin layad yo di idawat yo, ay adi kayo mapilit.

<sup>6</sup> Nemnemen yo kod na. Din mangis-ek si at-atik et at-atik abe di apitena, ngem din mangis-ek si ad-ado et ad-ado abe di apitena. <sup>7</sup> Isonga nemnemen koman di esa ya esa din laydena ay idawat, ta asi na idawat begew sin ragsak na. Baken mayat mo mansakit di nemnem na begew sin idawat na ono kanana en mapilpilit sisya. Tan laydelayden Diyos di maragsakan ay man-idawat. <sup>8</sup> Et kabaelana ay mangidawat en dakayo si amin ay kalasin di bindisyon ta say kankanayon ay omanay di wada en dakayo sin amin ay masapol yo ya ad-ado pay di mabay-an ay maibadang yo si odom. <sup>9</sup> Kaman din inpaisolat Diyos ay maipanggep sin nalinteg ay ipogaw ay kanana, “Ad-ado di idawdawat na sin nabibiteg, isonga adi malinglinglingan di kinasiged na ay eng-enggana.”\*

<sup>10</sup> Tan si Diyos ay mangidawdawat si bin-i sin man-esek ya din kanen di ipogaw et sisya met laeng di mangidawdawat ya mangipaad-ado sin wada en dakayo ta say mataptapian abe din siged ay am-amagen yo ay man-idawdawat. <sup>11</sup> Pabaknangenak dakayo sin am-in ay kalasin di kinabaknang ta say mabalin abe ay ibingbingayan yos kankanayon din makasapol. Et ad-ado di man-iyaman en Diyos mo awaten da din ipaw-it yo en dakami. <sup>12</sup> Isonga doway pantongpalan din nay ay panagsilbi yo. Maidawat sin ipogaw en Diyos din kasapolan da ya masepsep abe ay maad-ado di man-iyaman en Diyos. <sup>13</sup> Tan mo mapaneknekan din katet-ewan di pammati yo begew sin panagsilbi yo ay nay, ad-ado di mandayaw en Diyos, tan maila da ay on-onodan yo din siged ay damag ay maipanggep en Cristo ay ipodpodno yo ay patpatien yo. Dayawen da abes sisya begew sin dakdake ay badang yo en daida ya sin tapin di ipogaw. <sup>14</sup> Ikararagan da pay si dakayo dowan da aben laylayden ay ilaen dakayo begew sin nakaskasdaaw ay seg-ang Diyos en dakayo. <sup>15</sup> Man-iyaman tako en Diyos sin indawat na en datako ay adi kabilang di banol na.

## 10

### *Din Kaibasaran Di Kalebbengan Pablo*

<sup>1</sup> Wada kano di mangmangwani ay mabmabainak ya nakapoyak mo wadaak en dakayo ngem natoledak ay mansolat mo addawi di kad-ak. Isonga sak-en ay si Pablo et wada di kedawek en dakayo begew sin anos ya kinababan di nemnem Cristo ay tadtadonek. <sup>2</sup> Pangaasi yo ta adiak masapol ay ipaila din toled ko mo emeyak issa. Tan way toled ko met ket ay mangyamyam sin dooy da ay mangmangwani en nailobongan di ogali ya panggep mi. <sup>3</sup> Tet-ewa kayman ay owat kamin ipogaw ay kaman si dakayo,

\* 9:9 Salmo 112:9.

ngem baken naipogawan di iyat mi ay makigobat sin lawa. <sup>4</sup> Tan din armas ay os-osalen mi et baken din os-osalen di nailobongan ay ipogaw mo adi et din napigsapigsa sin pangilan Diyos, tan kabaelan da ay mangabak sin mangonkontra en sisya. <sup>5</sup> Isonga abaken mi din am-in ay agin kokosto ay rason ya nemnem di nalalastog ay ipogaw ay manalsalin sin pangammoan da en Diyos ta say mabaliwan di nemnem da ay maibasar sin layden Cristo. <sup>6</sup> Et mo ipaila yo ay tongtongpalen yo ay kosto si Cristo, asi mi dosaen di olay sino ay manigaan ay manongpal en sisya.

<sup>7</sup> Din pankolkolangan yo et patpatgen yo din kasasaad di ipogaw ay maibasar sin maila yo. Tan wada da issa di mangmangwani en daida di kosto ay panakaawak Cristo, ngem mo say kankanan da di, nemnemen da koma ay dakami abe di kosto ay panakaawak Cristo. <sup>8</sup> Tan olay mo kaman palalo ay ad-ado di inbagbagak ay maipanggep sin lebbeng mi, adiak mabain, tan din Apo di nangidawat en dakami ta papigsaen mi di pammati yo, ay baken min dadaelen. <sup>9</sup> Say inbagak na ta adi yo kanan en padpadasek ay mangegyat en dakayo begew sin solsolat ko. <sup>10</sup> Kankanan di odom en din solsolat ko et waday dagsen da ya ipaila da din lebbeng ko, ngem mo wadaak issa, kaman magay pateg ko dowan aben magay dagsen di ibagbagak. <sup>11</sup> Din mangmangwanis di et agpos mo nemnemen da ay din ibagbaga mi sin solat mi et siya met laeng di itet-ewa mi mo somawang kamis sa.

### *Din Obla Ay Lebbengen Da Pablo Ay It-ek*

<sup>12</sup> Adi mi kayman layden ay mangis-o si awak mi sin dooy da ay mangit-it-ek sin awak da. Kaman kolang di nemnem da! Tan din lokod da sin kinasiged da et din ogali da met laeng. <sup>13</sup> Ngem mo dakami pay, waday kosto ay panpatinggaan di it-it-ek mi. Tan maga di it-it-ek mi mo adi din obla ay intalek Diyos en dakami, et dakayo di maibilang sin obla ay nay. <sup>14</sup> Isonga adi mi lablaben din kosto ay biyang mi mo it-it-ek mi din obla mi sin kad-an yo, tan dakami met di nangon-ona ay en nangikaskasaba sin siged ay damag ay maipanggep en Cristo en dakayo. <sup>15</sup> Adi mi aben ibilbilang di oblan di odom ay obla mi ta say it-ek mi. Ngem namnamaen mi ay pomigpigsa di pammati yo ta say makdeng di obla mi en dakayo. Asi kayo mabalin ay tomolong en dakami <sup>16</sup> ta en kami ikasaba din siged ay damag sin naiad-addawi ay il-ili ay maga pay laeng di man-it-itdo. Tan adi mi layden ay it-ek din inoblan di odom ay mangwani en biyang mi di ay obla. <sup>17</sup> Onodan tako din inpaisolat Diyos ay kanana, “Mo waday mayad ay mangit-ek si kompormi, it-ek na koma din inamag di Apo.”\* <sup>18</sup> Tan din tet-ewa ay maapolbalan et baken din mangit-ek si awak na, mo adi et din it-ek di Apo.

## 11

### *Din Nandanagan Pablo Ay Din Baken Tet-ewa Ay Aapostol Et Ietekan Da Din Mamati Ed Corinto*

#### *(1 Cor. 9:1-18)*

<sup>1</sup> Sapay koma ta anosan yo ay dengngen nan at-atik ay ibagak en dakayo. Adi yo kod tetewengen, olay mo kamanak ipogaw ay waday kolkolang na. <sup>2</sup> Tan iimonak dakayo ay kaman din pangiimonan Diyos sin ipogaw na. Tan maiarig kayo si balasang ay inkaising ko sin es-esa ay asawaena ay si Cristo, isonga es-estek dakayo ta nalinis kayo sin agew ay pankasalan yo. <sup>3</sup> Ngem emegyatak into et mo masangaw kayo et taynan yo din naimposan ay layad yo en Cristo ay kaman si Eva ay naitekan sin sikap di eweg. <sup>4</sup> Tan mo wada di somawang ay natken di ikaskasaba da ay maipanggep en Jesus, adi yo met tetewengen daida. Nalaka kayo abe ay mangawat si ispirito ay naitken sin Ispirito Santo ay sigod ay inawat yo. Ya nalaka kayo abe ay mamati si damag ay kanan da en siged ngem naitken sin siged ay damag ay inkaskasaba mi en dakayo. Ay apaw kayo!

\* **10:17** Jeremias 9:24. Ilaen abe sin 1 Corinto 1:31.

Apay nga an-anosan yos daida? <sup>5</sup> Kankanan da en daida kano di kangatoan ay aapostol, ngem ay siya mo waday pangabak da en sak-en? <sup>6</sup> Bakenak kayman nalaing ay mankali, ngem adiak met mankolang sin ammok ay maipanggep en Diyos. Ammo yo ay tet-ewa di, tan kankanayon ay inpappailak en dakayo sin am-in ay init-itdok.

<sup>7</sup> Inpababak iman di awak ko ay man-oblas katagoak ta say maipangato kayo begew sin init-itdok. Adiak polos nanpalagbo en dakayo sin nangikaskasabaak en dakayo sin siged ay damag ay napo en Diyos.\* Ay basol ko aya din nangiyatak sidi? <sup>8</sup> Din katet-ewa na et kamanak nangakew, tan sin nakiteteeak en dakayo, inaw-awat ko din badang di odom ay gimgimong ta way iyat ko ay nansilbi en dakayo. <sup>9</sup> Tan idi kolang di masapol ko, adiak nankedaw en dakayo, tan waday aag-i tako ay napod Macedonia ay nangiali sin masapol ko.† Isonga adiak polos pinalpaligat si dakayo et siya abe sin tapin di agew. <sup>10</sup> Maga abe di makaipasaldeng en sak-en ay mangit-ek sina, tan adiak polos mankedaw si badang en dakayo ono odom ay ipogaw sin il-ili ed Akaya. Tet-ewa di ay kaman din katet-ewan di ibagbagan Cristo ay wada en sak-en. <sup>11</sup> Sino ngin di gapo ay adiak mankedkedaw en dakayo? Ay tan kolang di layad ko en dakayo? Ammon Diyos ay laydelaydek si dakayo! <sup>12</sup> Et itoltoloy ko ay adi mankedkedaw en dakayo ta say magay wayan din dooy ay agin aapostol ay mangit-ek si obla da ay mangwani en magay kaitkenan di am-amagen da sin am-amagen mi.

<sup>13</sup> Tan da dooy ay ipogaw et manpaila da ay kaman dan tet-ewa ay aapostol Cristo, ngem din katet-ewa na et agin aapostol da ay mangiet-etek si it-itdoan da. <sup>14</sup> Adi tako koma masdaawan sidi, tan olay si Satanas et mabalin ay manpaila ay kaman mankoniniing ay anghel Diyos. <sup>15</sup> Et mo kabaelana di, baken nakaskasdaaw mo din mansilsilbi en sisya et manpaila da ay kaman nalinteg ay mansilsilbi en Diyos. Ngem din mapasamak en daida sin tapin di agew et maibasar sin lawa ay inam-amag da.

### *Din Nangit-ekan Pablo Sin Ligat Na*

<sup>16</sup> Ibagak kasin ay adi yo koma nemnemnemen ay naong-ongak gapo ta din awak ko di ibagbagak. Ngem olay mo say pannemnem yo en sak-en, dengngen yo pay dedan nan at-atik ay it-it-ek ko, tan dinnge yo met din init-it-ek di odom. <sup>17</sup> Din nay ay pangit-it-ekak sin awak ko et adi maibasar sin ogalin Jesus mo adi et din ogalin di naong-ong. <sup>18</sup> Ngem gapo ta ad-ados sa di mangit-it-ek sin awak da ay maibasar si napateg isnan daga, may kod ta sak-en abe. <sup>19</sup> Tan sana ay an-anosan yo di makiteteean di naong-ong ay ipogaw en dakayo. Maragsakan kayo pay! Anna pay dis kinasirib yo! <sup>20</sup> Panbalbalinen das dakayo si bag-en da, ab-abosen dan gamgameng yo, siksikapan das dakayo, ipangpangato dan awak da en dakayo, ya palalo ay babbainan das dakayo, ngem an-anosan yo pay laeng si daida! <sup>21</sup> Palalo kayman di bain ko ay mangipodno ay kolang di toled ko ay mangiyat sidi en dakayo.

Ngem mo maipanggep si toled da ay mangit-ek sin awak da-nay ay mankalkaliak ay kaman naong-ong ay ipogaw-abakek si daida. <sup>22</sup> It-it-ek da ay Hebreo da, ay baken siya? May, Hebreoak abe. Kankanan da en polin Israel daida, ay baken siya? Sak-en abe et esa ay polin Israel. Ay si Abraham din apo da? Olay sak-en abe. <sup>23</sup> Kankanan da ay mansilsilbi da en Cristo, ay baken siya? Kamanak naboge sin nay ay ibagbagak, ngem ipapatik pay dedan ay mangwani en napatpateg din nansilsilbiak en Cristo. Tan addawi ay nagagetak ay man-obla para en Cristo mo si daida. Ad-ad-ado di naibalbalodak. Adi kabilang di nasopsoplitak. Namin ado ay nganngani ay mateyak. <sup>24</sup> Namin lima ay sinmopsoplit di gagait ko ay Judio si tolonpo ya siyam. <sup>25</sup> Namin tolo ay napat-oanak. Namingsan abe ay pinigpig das sak-en si bato enggana ay mateyak koma. Sin nakilogloganak si bapor, namin tolo ay nalned. Et sin namingsan, wadaak sin baybay ay nantaytay-apew si sin-agew ya sinlabi. <sup>26</sup> Sin ad-ado ay nanbibiyahiak, ad-ado abe

\* **11:7** 1 Corinto 9:3-18. † **11:9** Filipos 4:14-15.

di nilaklak-am ko ay kaeegyat. Wada di dakdake ay danom sin ginawang, wada di tollisan. Wada abe di kaeegyat ay inam-amag di gagait ko ay Judio ya siya abe din Gentil ya agin papati en Cristo. Wada pay di kaeegyat ay sinangsangok sin dadakke ay il-ili, sin luglugar ay magay omili ya sin nakilogloganak si bapor. <sup>27</sup> Nan-ob-oblaak enggana ay nabbanabbayak. Namin ado ay adiak naseyseyep. Nadagdagaanganak ya nabigbigawak. Nasnaskawak abe tan kolang di badok. Namin ado ay adiak nangnangan begew sin oblak. <sup>28</sup> Et baken anggoy dana, tan kankanayon ay madadagsenanak begew sin pangisaksakitak sin am-in ay gingimong. <sup>29</sup> Tan mo waday nakapoy di pammati na, makilikliknaak en sisya. Mo wada abe di masolisog ay manbasol, palalo di sakit di nemnem ko.

<sup>30</sup> Sigaak ay mangit-ek sin awak ko, ngem mo masapol ko ay mangiyat sidi, it-ek ko di mangipailas kinakapoy ko. <sup>31</sup> Si Diyos ay din Diyos ya Aman Apo Jesus et ammo na ay baken etek di ibagbagak. Madaydayaw sisya ay eng-enggana. <sup>32</sup> Dad-atek di esa ay napasamak ay nangipaila sin kinakapoy ko. Ed idi, sin kawadak ed Damascus, din gobernador ay dinotokan Ari Aretas et laydena ay mangipadpap en sak-en. Isonga inbaa na di sosoldado ay en mamantay sin segpan di ili. <sup>33</sup> Ngem waday binmadang. Nan-a das dakdake ay basket, et inpabela da sin tawa ta say panloganak. Pag dan oyoyen sin nakayang ay batog ay kodol di ili ta way iyat ko ay lomayaw.

## 12

### *Din Nangammoan Pablo Ay Omanay Di Seg-ang Diyos Sin Kinakapoy Na*

<sup>1</sup> Kapilitan ay itoloy ko ay mangit-ek sin awak ko, olay mo magay silbi na. Isonga ibagak en dakayo ed wani din inpappailan Apo Jesus en sak-en ay kaman iitaw ya din inpaam-ammo na abe en sak-en. <sup>2-3</sup> Waday napasamak sin mamati en Cristo ay amammok.\* Manlogi sin napasamakana enggana ed wani, inmey di sinpo ya opat ay tawen. Din doy ay pasamak et naikayang ed langit sin kad-an Diyos.† Adiak kayman ammo mo eng-enggay din ab-abiik na si inmey ono naitapi din awak na. Eng-enggay Diyos si nakin ammos di. Ngem ammok ay naikayang din ipogaw ay doy ed Paraiso, <sup>4</sup> et sin kawada nas di, waday dinnge na ay adi mabalin ay maibaga sin kalin di ipogaw ya adi aben inpalobos Diyos ay maibaga. <sup>5</sup> Mo laydek koma ay it-ek di kaman nidi ay ipogaw begew sin naipaila en sisya, lebbeng ko di, ngem mo maipanggep si biyag ko isnan daga, maga di it-ek ko mo adi din mangipailas kinakapoy ko. <sup>6</sup> Ad-ado di mabalin ay it-ek ko mo laydek koma, et bakenak naong-ong mo say iyat ko di, tan tet-ewa am-in di ibagbagak. Ngem iginek ko ta adi palaloen di ipogaw ay mangipangpangato en sak-en. Tan laydek ay din pannemnem da en sak-en et maibasar sin inam-amag ko ya inbagbagak ay inil-ila ya dindinnye da ay mismo.

<sup>7</sup> Gapo ta adi layden Diyos ay ipangpangatok di nemnem ko begew sin peteg ay nakaskasdaaw ay naipappaila en sak-en, inpalobos na ay ibaan Satanas di maiarig si sobe ay kanayon ay pomalpaligat. <sup>8</sup> Namin tolo ay nan-ad-adawagak en Apo Jesus ta pakaanena koma. <sup>9</sup> Ngem kanana en sak-en, “Omanay di seg-ang ko en sik-a ta maanosam san ligat mo, tan kostokosto ay maipaila di panakabalin ko sin kinakapoy di ipogaw.” Isonga begew sin songbat Apo Jesus ay nay, adiak itoltoloy ay mankedaw ay pakaanena, mo adi et maragsakanak ay amatpateg sin kinakapoy ko ta say kankanayon en sak-en din panakabalin Cristo. <sup>10</sup> Isonga mo laklak-amek di kinakapoy

\* **12:2-3** Sigaan Pablo ay nangit-ek sin awak na, isonga sin nanad-atana sin iniitaw na ay nay, kaman natken ay ipogaw di inbagbaga na. Ngem maawatan tako sin versikulo 1 ya 7 ay din awak na met laeng di inbagbaga na.

† **12:2-3** Din kanana sin Griego et: ...naikayang sin maikatlo ay langit. Tolo ay langit di inbagbagan di Biblia. Din kababaan et din kad-an di liboo. Din maikadwa et din kad-an di agew, talaw ya bowan. Din maikatlo et din kad-an

ko, odom ay ligligat ono kaeegyat ay paspasamak begew en Cristo, mapnekak. Mapnekak abe mo wada di bomabbain ono pomalpaligat begew en Cristo. Tan mo liknaek di kinakapoy ko, napigsaak abe begew sin pangipapigsaana en sak-en.

*Din Layad Pablo En Daida Ed Corinto Ya Din Nandandanagana Ay Maipanggep En Daida*

<sup>11</sup> Kamanak ipogaw ay waday kolkolang na begew sin nay ay nangit-it-ekak sin awak ko, ngem dakayo dedan di pinmilit. Tan dakayo koma di nangit-it-ek en sak-en. Tan olay mo magay pateg ko, bakenak pay dedan nababa mo din dooy da ay agin apostol ay mangmangwani en daida kano di kangatoan. <sup>12</sup> Tan inil-ila yo ay tet-ewa ay apostolak begew sin sinyal ya odom ay nakaskasdaaw ay kaipailaan di panakabalin Diyos ay inananosak ay nangam-amag sin nakiteteeak en dakayo. <sup>13</sup> Ay wada aya di siged ay inam-amag ko para sin odom ay gingimong ay adiak aben inamag para en dakayo? Maga di naitkenan di inam-amag ko en dakayo mo adi et din nanigaak ay mamalpaligat en dakayo sin kasapolak. Pangaasi yo ta pakawanen yo san basol ko!

<sup>14</sup> Nakasaganaak ed wani ay en mamasyal kasin en dakayo, et siya na di maikatlo ay emeyak issa. Adiak emey manpatagano en dakayo, tan din gamgamamak et baken din gameng yo mo adi et dakayo ay mismo. Tan dakayo di kaman kon anan-ak, et baken din anan-ak di mansensensen si pilak para en da ama da mo adi et baliktad. <sup>15</sup> Isonga peteg di ragsak ko ay maabosan si pilak ya bikas ya olay sino para en dakayo. Ay makmaksayan aya di layad yo en sak-en begew sin nay palalo ay layad ko en dakayo?

<sup>16</sup> Mabalín siguro ay awen yo am-in ay adiak nankedkedaw si katagoak en dakayo, ngem wada da di mangmangwani ay in-etekak dakayos sikap ko. <sup>17</sup> Intoy inyat ko aya ay nangiyat sidi? May kod ta ibaga yo. Ay sinowitik kos dakayo babaen sin inbabbaak en dakayo? <sup>18</sup> Kaspangarigan, si Tito ay inawis ko ay emey en dakayo ya din agi tako ay inbaak ay kadwa na, ay sinowitik da aya si dakayo? Ado paabe na! Et mo kosto ngarud di panggep ya ogali da en dakayo, ay siya mo natken di panggep ya ogalik?

<sup>19</sup> Din wada ngin sin nemnem yo et inkalkalintegan mi din awak mi en dakayo babaen sin inbagbaga mi. Ngem din katet-ewa na, inbagbaga mi am-in sin pangiilaan Diyos begew sin nakies-esaan mi en Cristo, ya maga di panggep mi mo adi et di pomigsaan di pammati yo ay gagayyem ko. <sup>20</sup> Emegyatak ay mo somawangak issa, datngak si dakayo ay mangam-amag si adiak layden ay ilaen. Et mo say mapasamak di, adi yo aben layden di amagek en dakayo. Madandanaganak ay datngak di man-iibaw ya mangolgolo, ono wada di apal, bonget, imon, ya nalalastog di nemnem na. Ono wada di mangipalawlaw si ib-a na ya man-apat. <sup>21</sup> Emegyatak ay mo omaliak kasin, ipidwan Diyos ay mangipabain en sak-en begew sin am-amagen yo ay lawa. Emegyatak abe tan mo masakitan di nemnem ko begew sin ad-ado ay nakabasol ed idi yan adi da pay laeng ibabawi din kadodogis ay am-amagen da ay kaman din kamalala ya odom ay naalas ay maamag.

## 13

*Din Maod-odi Ay Indadaan Ya Inbilbilin Pablo Sin Mamati Ed Corinto*

<sup>1</sup> Siya na di maikatlo ay mamasyalak en dakayo. Nemnemen yo din inpaisolat Diyos ay kanana,

“Mo waday mangidarum si ib-a na, masapol ay waday dowo ono nasurok ay tistigo ay mangipaneknek sin katet-ewa na.”\*

<sup>2</sup> Sin naikadwa ay namasyalak en dakayo, indadaan ko sin nakabasol ed idi pati din odom en dakayo ay nanbasbasol ay dadlonak dosaen daida sin pantaoliak mo adi da pay laeng manbabawi. Et ipidwak ed wani ay mangidadaan en daida olay mo magaa sin kad-an yo. <sup>3</sup> Layden yo ay ipaneknek ko en dakayo ay si Cristo di mankalkali babaen en

\* **13:1** Deuteronomio 19:15.



sak-en, ay baken siya? Ipailak ngarud di katet-ewa na sin enak panosaan sin mangam-amag si lawa. Tan baken nakapoy si Cristo ay manosa en dakayo mo adi et ipaila na din panakabalina. <sup>4</sup> Tet-ewa kayman ay naila di kinakapoy Cristo sin nailansaana sin krus, ngem din panakabalin Diyos di mail-ila ed wani sin matatagoana. Et siya abe ay makilaklak-am kami sin kinakapoy na begew sin naitatapian mi en sisya, ngem mo maipanggep si iyat mi en dakayo, ipaila mi din panakabalina ay napo en Diyos begew sin makikadkadaan mi en sisya sin matatagoana.

<sup>5</sup> Baken koman dakami di bistigalen yo mo adi et din awak yo ta paneknekan yo mo tet-ewa san pammati yo. Tan nalaka koma ay mailasinan yo ay wadas Cristo Jesus en dakayo malaksig mo mapaneknekan ay maga baw di pammati yo. <sup>6</sup> Et mo say amagen yo di, namnamaek ay maammoan yo abe ay tet-ewa ay apostolak. <sup>7</sup> Ikarkarag mi en Diyos ay maga koma di am-amagen yo ay lawa. Ngem din gapo ay ikarkarag mi di et baken ta mapaneknekan di kinaapostol mi. Layden mi anggoy ay siged ya kosto di am-amagen yo, olay magay waya mi ay mangipaneknek sin kinaapostol mi babaen sin panosaan mi en dakayo. <sup>8</sup> Tan adi kabalin ay kontraen mis dakayo mo on-onodan yo din tet-ewa ay mait-itdo mo adi et masapol ay badangan mis dakayo. <sup>9</sup> Isonga maragsakan kami mo nakapoy di pangilan di ipogaw en dakami, basta napigsa kayo. Tan din ikarkarag mi et komoskosto di ogali yo ya olnos yo enggana ay magay kolang na. <sup>10</sup> Isonga insolat ko dana sin kawadak pay laeng isna ta adiak koma masapol ay ipaila di kalebbengak ay indawat Apo en sak-en sin panosaak en dakayo. Tan din kosto ay kaosalan di kalebbengak ay nay et ta papigsaek di pammati yo ay bakenak dadaelen.

#### *Din Kakdengan Di Solat*

<sup>11</sup> At-atik pay di laydek ay ibaga en dakayo ay aag-ik sin nay kakdengan di solat ko. Esten yon ogali yo ta madiyosan kayo. Adi yo tetewengen din inbagbagak en dakayo. Pan-es-esaen yo di nemnem yo ya man-oolnos kayo tan mo say iyat yo di, wada en dakayo si Diyos ay napoan di layad ya talna.

<sup>12</sup> Manpinakomosta kayo ay mangipaila ay manlilinayad kayo. <sup>13</sup> Am-in ay ipogaw en Diyos isna et pakpakomostaan das dakayo.

<sup>14</sup> Sapay koma ta lak-amen yo am-in di seg-ang Apo Jesu Cristo ya din layad Diyos ya din makikadkadaan di Ispirito Santo en dakayo.

## **Din Solat San Pablo Sin Taga-Galacia Maipanggep Sin Solat Ay Nay**

Din siged ay damag ay inkaskasaban Pablo et mapalinteg di ipogaw sin pangiilaan Diyos begew sin pammati na en Jesu Cristo et anggoy. Sin ena nangikaskasabaan sin nay siged ay damag sin il-ilin di Gentil ed Galacia ay esa ay probinsiya ed Asia Minor, nanragsak da ay nangawat en sisya et ad-ado di namati. Ngem sin doy ay timpo, wada di bonggoy di Judio ay namati en Cristo, ngem baken kosto di init-itdo da maipanggep sin iyat di Gentil ay maisalakan. Idi nabaybayag, wada en daida di inmey ed Galacia ay nangonkontra sin initdon Pablo. Kanan da en baken tet-ewa ay apostol sisya, tan baken esa sisya sin sinpo ya dow a ay aapostol ay nakikadkadwa en Apo Jesus sin kawada nas nan daga. Kanan da abe en baken tet-ewa ay mapalinteg di ipogaw sin pangiilaan Diyos begew sin pammati et anggoy. Mo laydena ay maisalakan, masapol abe ay manpakogit ya onodana di odom ay linteg Moses. Kanan da abe en lawa di inkaskasaban Pablo ay maipanggep si wayawayan di namati en Cristo, tan mo napawayaan di ipogaw sin lebbeng di linteg, masepsep kano ay manbasbasol. Siya dana di init-itdon di Judio sin gingimong ed Galacia.

Idi nadamag Pablo ay ad-ado di namati ay masangsangaw en dana ay baken kosto ay mait-itdo, insolat na din solat ay nay ta pantaolienas daida sin tet-ewa ay pammati da en Cristo. Sin nangon-ona ay dow a ay kapitolo, inkalintegana din kinaapostol na. Dinad-at na din nangayagan Diyos en sisya ay en mangikasaba sin siged ay damag sin Gentil, et pinaneknekana ay din init-itdo na et baken napo si nemnem di ipogaw mo adi et napo en Diyos. Inpanemnem na abe en daida ay olay din aapostol ed Jerusalem et binigbig da din kinaapostol na. Sin kapitolo 3 ya 4, inpalawag na ay din pangibilangan Diyos ay nalinteg di ipogaw et adi maibasar sin pangon-onodana sin linteg mo adi et din pammati na en Cristo et anggoy. Sin maod-odi ay kapitolo, sinongbatana din nangnangwani en lawa mo mapawayaan di ipogaw sin lebbeng di linteg. Kanana en inayan mo dokogan da din seg-ang Diyos en daida ta maibag-en da sin linteg Moses. Binagaana abe si daida ta manpaituray da sin Ispirito Santo ta say mabaroan di kabibiyag da ya adi da onodan din lawa ay laylayden di naipogawan ay nemnem da.

### **Din Linaona**

Din panlogian di solat 1:1-10

Din nangikalintegana Pablo sin kinaapostol na 1:11-2:21

Din kaibasaran di pangibilangan Diyos ay nalinteg di ipogaw 3:1-4:31

Din wayawayan di mamati en Cristo ya din lebbeng da ay manpaituray sin Ispirito Santo 5:1-6:10

Din kagdengan di solat 6:11-18

### *Din Panlogian Di Solat*

<sup>1</sup> Sak-en si Pablo ay nadotokan ay apostol Jesu Cristo. Baken ipogaw di nangdotok ono nangibaa en sak-en ay man-apostolak mo adi et si Jesu Cristo ya si Diyos Ama ay nanago kasin en sisya. <sup>2</sup> Naey di solat ko en dakayo ay man-gingimong sin il-ili ed Galacia. Din gagait kos na ay mamati et maitapi da am-in en sak-en ay pakomostaan dakayo. <sup>3</sup> Sapay koma ta wada en dakayo di seg-ang ya talna ay mapmapo en Diyos ay Ama tako ya si Apo Jesu Cristo <sup>4</sup> ay nangidawat sin biyag na ta mapakawan din basbasol tako. Inamag na di ay maibasar sin layden Diyos ay Ama tako ta say maisalakan ya mapawayaan tako sin lawa ay wadas nan daga. <sup>5</sup> Madayaw komas Diyos ay eng-enggana. Amen.

*Es-esa Di Tet-ewa Ay Siged Ay Damag. Madosa Si Eng-enggana Di Man-itdos Natken*

<sup>6</sup> Palalo ay nasdaawak en dakayo, tan dokdokogan yo kano ay dagos si Diyos ay nangayag en dakayo begew sin seg-ang Cristo, et say onodan yo kano di natken ay mait- itdo ay kanan yo en siged ay damag. <sup>7</sup> Din katet-ewa na et maga di odom si siged ay damag mo adi din maipanggep en Cristo, ngem wada da kano di mangol-olaw en dakayo ay mamadpadas ay mamaliw sin nay siged ay damag. <sup>8</sup> Idadaan ko en dakayo ay olay mo dakami ay mismo ono anghel ay napo ed langit di en mangikasabas natken mo din siged ay damag ay inkasaba mi en dakayo ed idi, sapay koma ta madosa ed inferno ay eng-enggana. <sup>9</sup> Siya na di inbaga mi en dakayo ed idi, ngem ipidwak pay dedan: mo olay sino ay mangikaskasabas natken mo din siged ay damag ay sigsigod ay inawat yo, sapay koma ta madosa ed inferno ay eng-enggana.

<sup>10</sup> Mo nemnemen yo din nay inbagbagak, maawatan yo koma ay din an-anapek et baken din pangapolbalan di ipogaw en sak-en mo adi et din pangapolbalan Diyos. Baken abe din panlaydan pay laeng di ipogaw en sak-en di gamgamgamek, tan mo doy ya siya di, adi mabalin ay maibilangak ay mansilbi en Cristo.

### *Din Nangikalintegan Pablo Sin Katet-ewan Di Inkaskasaba Na Ya Din Kinaapostol Na*

<sup>11</sup> Aag-ik, laydek ay dadlon yon maawatan ay baken napos nemnem di ipogaw din siged ay damag ay inkasabak en dakayo. <sup>12</sup> Tan baken ipogaw di nangammoak sin nay siged ay damag. Maga abe di nangitdo en sak-en, mo adi et si Jesu Cristo ay mismo di nangipaammo en sak-en.

<sup>13</sup> Enggay dinnge yo din sigod ay kabibiyag ko sin nangon-onodak sin ogalin di Judio. Ammo yo ay nalabes ay pinalpaligat ko din ipogaw Diyos ay namati en Jesu Cristo, et inpakpakat ko din kabaalak ta say mamaga koma di mamati en sisya. <sup>14</sup> Mo maipanggep abe sin pammati mi ay Judio, nanlaslasinak mo din ad-ado ay gagait ko ay Judio ay katawenak, tan addawi ay nagagetak ay mangonod ya mangikalintegan sin ogali ay tinawid mi sin aap-o mi.

<sup>15</sup> Ngem natken baw di panggep Diyos en sak-en, tan sigod ay pinili nas sak-en sin daanak maianak, et begew sin seg-ang na, inmayag ta mansilbiak en sisya. <sup>16</sup> Sin dinmatngan din timpo ay laydena ay ipaila en sak-en din Anak na ta say ikasabak sisya sin Gentil, maga polos di ipogaw si inmeyak ay nanopaitdoan. <sup>17</sup> Adiak aben inmey ed Jerusalem ay makingalat sin nangon-ona ay aapostol mo sak-en, mo adi et inmeyak ay dagos ed Arabia. Asiak nantaoli ed Damascus. <sup>18</sup> Idi nalabas di tolo ay tawen manlogi sin namatiak, inmeyak ed Jerusalem ay mamasyal en Pedro et nakiteteek en sisya si doway ay dominggo. <sup>19</sup> Ngem ang-anggay da Pedro en Santiago ay agin di Apo si inilak ay aapostol. Magay odom. <sup>20</sup> Ammon Diyos ay tet-ewa dana ay insolat ko en dakayo, baken etek.

<sup>21</sup> Asiak pag emey sin il-ili ed Syria ya ed Cilicia. <sup>22</sup> Sin timpo ay doy, din gimgimong di namati en Cristo ay wada ed Judea et adi da pay laeng inil-ilas sak-en. <sup>23</sup> Nadamdama da anggoy ay din namalpaligat en daida ed idi ta say mamaga koma di mamati en Cristo et wada ed wani ay mangikaskasaba sin pammati ay sana. <sup>24</sup> Isonga dinaydayaw das Diyos begew en sak-en.

## 2

### *Din Namigbigan Di Aapostol Ay Gait Da Ay Apostol Si Pablo Ya Din Nangapolbalan Da Sin Inkaskasaba Na*

<sup>1</sup> Idi nalabas di sinpo ya opat ay tawen, inmeyak kasin ed Jerusalem ay nangikoykoyog en Barnabas. Intakin mi abe si Tito. <sup>2</sup> Inmeyak sidi tan inpailan Diyos en sak-en ay say amagek di koma. Idi sinmawang kami, nakimitingak en daida anggoy ay maibilang ay papangolo, et inlawag ko en daida din siged ay damag ay ikaskasabak sin kaipoipogaw ay Gentil. Inamag ko di ta say ammoan da ay kosto di init-itdok tan into et mo masayang din nangaskasabaak ed idi ya siya abe ed wani. <sup>3</sup> Din nantongpalana et inapolbalan da

din inbagak, tan olay din kadwak ay si Tito ay Gentil et adi da inpilit ay manpakogit. <sup>4</sup>Ngem wada et di agin papati en Cristo ay naitapi en dakami ta siimen da din wayawaya tako begew sin nakies-esaan tako en Cristo Jesus. Kanan da en manpakogit komas Tito, tan din panggep da et maibag-en tako kasin ay mangonod sin linteg Moses. <sup>5</sup>Ngem adi mi polos intolok, olay sinkaattikan, ay matongpal din inbaga da ta say adi masoksokatan din tet-ewa ay siged ay damag ay patpatien yo.

<sup>6</sup>Kaman din inbagak, din doy ay maibilang ay papangolo-(magay lawa na en sak-en mo sino di kasasaad da ed idi, tan magay panlaslasinen Diyos si ipogaw ay maibasar sin kasasaad na)-magay intapi da sin it-itdok, <sup>7-9</sup> mo adi et inaw da ay kosto. Tan inammo da ay begew sin seg-ang Diyos, intalek na en sak-en din kinaapostol ko ay mangikasaba sin siged ay damag sin Gentil ay kaman met laeng din nangitalkana en Pedro sin kinaapostol na ay mangasaba sin Judio. Din nangammoan das di et inila da ay bininbindisyonan Diyos din nangaskasabaak sin Gentil ay kaman met laeng din naminbindisyonana sin oblan Pedro sin Judio. Isonga din doy ay maibilang ay way kalebbengana ay da Santiago en Pedro ya si Juan et sinamano das dakami en Barnabas ay mangipaila ay nankikinaawatan kami ay kosto. Din nantolagan mi et itoloy mi en Barnabas ay mangasaba sin Gentil dowan da aben itoloy ay mangasaba sin Judio. <sup>10</sup>Intogon da anggoy en dakami ay itoltoloy mi ay bomadang sin nabibiteg ay Judio, et siya met laeng ay inpakpakat kon kabaalak ay amagen.

### *Din Nangontraan Pablo En Pedro*

<sup>11</sup>Ngem sin inmalian Pedro ed Antiok, kinontrak sisya sin sangoanan di kaipoipogaw, tan nalawag ay baken kosto din inamag na. <sup>12</sup>Tan sin kaal-ali na, kanayon iman ay nakiok-okob sin aag-i tako ay Gentil. Ngem idi dinmateng day Judio ay inbaan Santiago, inin-inayad na ay nangisaldeng et adi nakiok-okob sin Gentil, tan emegyat sin bonggoy di Judio ay nangipapilit ay maonodan din linteg Moses.\* <sup>13</sup>Isonga din odom ay namati ay Judio et tinadon das Pedro, olay mo daida ya si Pedro et ammo da am-in ay baken kosto di inam-amag da. Olay si Barnabas et nasangaw ay manadon en daida. <sup>14</sup>Idi inammoak ay inam-amag da di maikontra sin tet-ewa ay mait-itdo sin siged ay damag, kanak en Pedro sin sangoanan da am-in, “Olay mo Judio ka, binaybay-am di odom ay ogalin di Judio ay kaman kan Gentil. Mo sik-a ay Judio et inyat mo di, apay nga ipapilit mo ay onodan di Gentil di ogali tako ay Judio?”

<sup>15</sup>Asiak intoloy ay nangwani en daida am-in, “Naianak tako kayman ay Judio; baken takon Gentil ay adi nangammo sin linteg Diyos. <sup>16</sup>Ngem ammo tako pay dedan ay adi mapalinteg di ipogaw sin pangiilaan Diyos begew sin panongtongpalana sin linteg na mo adi et begew sin pammati na en Jesu Cristo et anggoy. Isonga olay datako abe ay Judio et namati tako en Cristo Jesus ta say ibilang Diyos ay nalinteg tako begew sin pammati tako en Cristo, baken din panongtongpalan tako sin linteg. Tan maga polos di mapalinteg sin pangiilaan Diyos begew sin panongtongpalana sin linteg.†

<sup>17</sup>“Namnamaen tako ngarud ay mapalinteg tako sin pangiilaan Diyos begew sin nakies-esaan takon Cristo. Ngem mo maibilang tako ay managbasol ay ipogaw ay kaman din Gentil begew sin talek takon Cristo, ay laydena ay kalien en aw-awisen Cristo di ipogaw ay manbasol? Adi polos mabalin! <sup>18</sup>Tan din katet-ewa na et ipailak ay nakabasolak mo mansagongak ay mangonod kasin sin linteg ay dinokogak ed idi. <sup>19</sup>Tan begew sin linteg ay adiak kabaelan ay onodan, inammoak ay nakeddenganak ay matey ya maisina en Diyos. Isonga ibilang ko ay nateyak mo maipanggep sin linteg ta say matagoak para en Diyos. <sup>20</sup>Tan maibilang ay nakikateyak en Cristo sin krus, isonga kaman baken sak-en di matmatago ed wani mo adi et si Cristo di matmatago en sak-en.

\* **2:12** Mo maibasar sin linteg Moses, maiparit ay makikan di Judio si baken Judio ay makwani en Gentil tan into et mo mangan si panyew et maipakadodogis. † **2:16** Salmo 143:2.

Tan din biyag ko ed wani et maibasar sin pammatik sin Anak Diyos ay nangipaila sin layad na en sak-en sin nangidawtana sin biyag na para en sak-en. <sup>21</sup> Adiak panbalinen ay magay silbin din seg-ang Diyos ay kaman din iyat di mantaltalek sin linteg, tan mo doy ya mabalin koma ay mapalinteg di ipogaw sin pangiilaan Diyos begew sin panongtongpalana sin linteg, adi pay sayang ngarud di nateyan Cristo!” Siya din inbagak en daida ed Antiok.

### 3

#### *Din Nangawatan di Taga-Galacia Sin Ispirito Santo Et Baken Begew Sin Nanongtongpalan Da Sin Linteg*

<sup>1</sup> Ay daetan kayo ay taga-Galacia! Kaman magay nemnem yo! Maiila ay waday nangolaw en dakayo ta masangaw kayos natnatken ay mait-itdo. Apay? Dadlon mi met inpalawag en dakayo di maipanggep sin nateyan Jesu Cristo sin krus. <sup>2</sup> Nemnemen yo kod nan pootek en dakayo: ay inawat yo din Ispiriton Diyos begew sin nanongtongpalan yo sin linteg Moses ono begew sin namatian yo sin siged ay damag ay naikasaba en dakayo? <sup>3</sup> Ay daetan kayo! Kaman magay nemnem yo! Mo nilogian yo din biyag yo ay Cristiano babaen sin panakabalin di Ispiriton Diyos, apay ay kankanan yo en panbalinen yon awak yo si ipogaw ay magay pankolkolangana babaen sin mismo ay kabaelan yo? <sup>4</sup> Ay maga ngatay silbin din ad-ado ay pinadpadas yo manlogi sin namatian yo? Sapay koma ta wada. <sup>5</sup> Nemnemen yo mo sinoy gapo ay indawat Diyos en dakayo din Ispirito na ya inam-amag na en dakayo di nakaskasdaaw. Ay begew sin nanongtongpalan yo sin linteg Moses ono begew sin namatian yo sin siged ay damag ay naikasaba en dakayo?

#### *Din Pammatin Abraham Di Begew Ay Inbilang Diyos Ay Nalinteg Sisya (Roma 4:1-3)*

<sup>6</sup> Nemnemen yo abe din inpaisolat Diyos maipanggep en Abraham ay kanana, “Pinatin Abraham din inbagan Diyos, isonga inbilang Diyos ay nalinteg sisya.”\* <sup>7</sup> Maawatan yo koma ngarud ay din kaipoipogaw ay way pammati na di maibilang ay aan-ak Abraham. <sup>8</sup> Naipadto abe sin kalin Diyos ay mapalinteg di baken Judio sin pangiilaan Diyos begew si pammati, tan siya na din olog di siged ay damag ay inbabagan Diyos en Abraham ay naisolat abe sin kali na. Kanana, “Begew en sik-a, mabindisyonan di kaipoipogaw sin am-in ay kailiili.”† <sup>9</sup> Isonga bindisyonan Diyos di am-in ay mamati ay kaman din namindisyonana en Abraham begew sin pammati na.

#### *Din Nantongpalan Di Linteg Et Dosa*

<sup>10</sup> Ngem am-in ay mantaltalek sin panongtongpalan da sin linteg et madosa da ay eng-enggana, tan wada di inpaisolat Diyos ay kanana, “Madosa ay eng-enggana di olay sino ay adi manongtongpal si kanayon sin am-in ay bilbilin ay naisolat sin linteg Diyos.”‡ <sup>11</sup> Nalawag ngarud ay maga polos di mapalinteg sin pangiilaan Diyos begew sin panongtongpalana sin linteg, tan waday inpaisolat Diyos ay kanana, “Din ipogaw ay pinalinteg Diyos begew sin pammati na et wada en sisya di biyag ay iwed patingga na.”§ <sup>12</sup> Addawi abe ay natken di pammatin di ipogaw en Diyos mo din pangon-onodana sin linteg, tan wada abe di inpaisolat Diyos ay kanana, “Din ipogaw ay manongpal sin am-in ay bilbilin di linteg et waday biyag na ay iwed patingga na.”\* <sup>13</sup> Ngem maga di makatongpal sin am-in ay bilbilin di linteg, isonga madosa tako am-in koma. Ngem laton tan sinobot Cristo si datako ay say kasokat tako babaen sin nadosaana sin krus. Ammo tako ay dinosan Diyos sisya, tan waday inpaisolat Diyos ay kanana, “Mo waday

\* **3:6** Genesis 15:6. † **3:8** Genesis 12:3. ‡ **3:10** Deuteronomio 27:26. § **3:11** Habakkuk 2:4. Ilaen abe sin Roma 1:17. \* **3:12** Levitico 18:5. Ilaen abe sin Roma 10:5.



nakeddenggan ay matey ya maibay-at si kaiw, say kailaan di nanosaan Diyos en sisya.”†  
 14 Inamag Cristo di ta say babaen en sisya, maitongpal sin Gentil din inkarin Diyos en Abraham ya awaten tako din inkari na ay Ispirito na begew sin pammati tako.

### *Adi Mabalin Ay Waswasen Diyos Din Inkari Na En Abraham Begew Sin Linteg Moses Ay Inmonod*

15 Aag-i, nemnemen yo nan pangarig ay kaiarigan di inkarin Diyos en Abraham. Di ogali tako ay ipogaw mo waday tolagan ay enggay napirmaan si kosto et adi mabalin ay labsingen ono tapian. 16 Siya abe sin inkarin Diyos en Abraham ya sin es-esa ay poli na. Es-esa kanak, tan din kali ay poli ay inpaisolat Diyos et baken din ad-ado ay Judio ay polin Abraham di laydena ay kalien mo adi et din es-esa ay poli na ay si Cristo. 17 Din laydek ay maawatan yo maipanggep sin nay intolag Diyos ay kari na et siya na. Nanlogi sin intolag na en Abraham enggana sin nangidawtana sin linteg na en Moses, inmey di opat ay gasot ya tolonpo ay tawen. Isonga adi mabalin ay waswasen ono adi tongpalen Diyos din intolag na ay kari na babaen sin linteg ay inmonod, tan sigod ay insapata na ay tongpalena. 18 Natken abe din kaibasaran di ipatawid Diyos si ipogaw. Tan mo tawiden da di idawat na begew sin panongtongpalan da sin linteg, laydena ay kalien en adi maibasar din idawat Diyos sin nangikariana mo adi et din inam-amag da. Ngem din katet-ewa na et indawat Diyos en Abraham gapo ta inkari na.

### *Din Silbin Di Linteg Moses*

19 Sino ngarud di silbin di linteg? Apay nga inpaonod Diyos sin inkari na? Indawat Diyos din linteg na ta say maammoan di ipogaw ay managbasol da begew sin nanlablabsingan da sin linteg ay doy. Din panggep na et mantoloy din linteg enggana sin omalian din polin Abraham ay si Cristo ay inbagbagan din inkari na. Maila ay nabanbanol din inkari na mo din linteg, tan mo din linteg et waday aanghel ay inbaan Diyos ay nangibaga en Moses, asi na ibaga sin kaipoipogaw, 20 ngem mo din inkari na en Abraham, maga di inbaa na mo adi et sisya ay mismo di nangibaga.

21 Ay layden nina ay kalien en maikontra din linteg sin inkarin Diyos? Aga, adi kabaln! Adi da mankontra, mo adi et nantinken di panggep Diyos ay nangipaammo. Tan mo indawat koman Diyos di linteg ay say mabalin ay mangidawat si biyag, mabalin koma ay mapalinteg di ipogaw begew sin panongtongpalan da sin linteg ay doy. 22 Ngem adi da kabaelan, tan kanan di inpaisolat Diyos en am-in ay ipogaw et naibabalod das panakabalin di basol. Planon Diyos di ta say din inkari na ay maibasar si pammatin di ipogaw en Jesu Cristo et maidawat anggoy en daida ay mamati.

23 Sin daan domateng di timpo ay pamatian di ipogaw en Cristo, kaman takon balod ay pinopokok ya sinisiliban di linteg enggana sin inmalian Cristo ay pinatpati tako. 24 Mabalin abe ay maiarig di linteg si mambantay si anak,‡ tan kamanan binambantayan datako enggana sin inmalian Cristo ta say mapalinteg tako sin pangilaan Diyos begew si pammati. 25 Ngem ed wani, gapo ta inmali si Cristo, nakdeng di namanbantayan di linteg en datako.

26 Nemnemen yo ngarud din kasasaad yo ed wani. Begew sin nakies-esaan yo en Cristo Jesus babaen sin pammati yo en sisya, maibilang kayo am-in ay nadakdake ay an-ak Diyos. 27 Tan nabonyagan kayo am-in ay nakies-esa en Cristo, isonga kaman sisya di inbado yo, tan maila din mayat ay ogali na sin kabibiyag yo. 28 Sin pangilaan Diyos ngarud, maga di makwani en Judio ya baken Judio, bag-en ya baken, lalaki ya babai,

† 3:13 Deuteronomio 21:22-23. Din ogalin di Judio ed idi, sin namsean das ipogaw ay nakeddenggan ay matey, alaen dan awak na et isad-ang das kaiw ono posti ay sinyal ay dinosan Diyos sisya. ‡ 3:24 Din ogalin di nabaknang ay pamilya ay Romano ya Griego ed idi et waday bag-en da ay namanbantay si anak da nanlogi sin mantawen si enem enggana si sinpo ya enem. Din oblan di bag-en ay nay et it-itlod na din anak ay man-iskowila ya banbantayan sisya ta adi masangaw si lawa ay ogali. Mo enggay nadakdake din anak ya maibilang ay nakay, nakdeng di oblan di mambantay.

tan man-es-esa kayo am-in begew sin nakies-esaan yo en Cristo Jesus. <sup>29</sup> Et mo naitatapi kayo en Cristo, maibilang kayo ay polin Abraham et makitawid kayo sin inkarin Diyos en sisya.

## 4

### *Din Kasasaad Tako Ay An-ak Diyos*

<sup>1</sup> Naey di esa pay ay pangarig ay maipanggep sin inbagbagak. Mo waday anak ay manawid sin sanikwan ama na, ngem kolang pay laeng di tawena, kaman magay nanlasinanas bag-en, olay mo sisya di akin oka sin am-in ay kinabaknang ama na. <sup>2</sup> Tan baken nawayaan ay mangamag si laydena mo adi et waday makaammo en sisya ya wada abey nananngel sin kinabaknang ama na enggana ay domateng din timpo ay inbagan ama na ay pangaana sin tawid na. <sup>3</sup> Siya abe en datako. Sin daan takon maawatan di tet-ewa ay mait-itdo, naibabag-en tako sin bilbilin isnan daga ay say sigod ay inon-onodan tako.\* <sup>4</sup> Ngem idi dinmateng din kosto ay timpo ay inkeddeng Diyos, inbaa na din Anak na ta ianak di babai. Naianak ay Judio ay nangon-onod sin linteg Moses <sup>5</sup> ta sobotena di naibabag-en si linteg ta say datako ay mamati et maibilang tako ay nadakdake ay anan-ak Diyos. <sup>6</sup> Din nangipailaan Diyos ay anan-ak nas datako et inbaa na din Ispiriton di Anak na ay mantetee sin nemnem tako. Begew en sisya, Ama di pangwani tako en Diyos. <sup>7</sup> Isonga di esa ya esa en dakayo et baken kayon bag-en ed wani, mo adi et anak Diyos. Et gapo ta nanbalinen Diyos dakayo si anan-ak na, tawidana abe si dakayo.

### *Din Nangisaksakitan Pablo En Daida Ed Galacia*

<sup>8</sup> Ed idi sin adi yo inammoan si Diyos, naibabag-en kayos sinan didiyos. <sup>9</sup> Ngem ed wani ay inammoan yos Diyos-kanak koma en inammoanas dakayo-apay nga sagsagongen yo kasin din doy ay bilbilin ay inon-onodan yo† ay magay kabaelan da ay mangisalakan en dakayo ya magay idawdawat da ay bindisyon? Ay layden yo aya ay maibag-en kasin en daida? <sup>10</sup> Kanak di, tan sana ay on-onodan yo din ogalin di Judio maipanggep si banolen da ay agew, bowan, fiesta ya tawen. <sup>11</sup> Isonga madandanaganak maipanggep en dakayo, tan mo et magay silbin di nanligligatak ay nan-it-itdo en dakayo.

<sup>12</sup> Pangaasi yo ay aag-i ta tadonen yos sak-en, tan nanbalinak si kaman dakayo ay Gentil ay nawayaan sin linteg Moses. Baken met lawa di inyat yo en sak-en ed idi. <sup>13</sup> Nemnemen yo ay din gapo ay nakiteteek en dakayo sin damo ay nangikaskasabaak sin siged ay damag en dakayo et waday sakit di awak ko. <sup>14</sup> Et olay koma mo nasolsolisog kayo ay manglaslasoy ono manigaan en sak-en begew sin sakit ko ay sana, baken say inamag yo di‡ mo adi et sinangaili yos sak-en ay kamanak anghel en Diyos ono si Cristo Jesus ay mismo. <sup>15</sup> Sinoy napasamak sin sana ay ragsak yo en sak-en? Paneknekak ay ed idi, mo mabalin koma, inokit yo din mata yo ta idawat yo en sak-en.§ <sup>16</sup> Apay ngarud ay ed wani, ibilang yos sak-en ay kaibaw yo? Ay begew sin nangibagbagaak si tet-ewa en dakayo?

<sup>17</sup> Da dooy ay man-it-itdos baken tet-ewa et kaman dan isaksakit si dakayo sin pangaw-awisan da en dakayo, ngem baken kosto di panggep da, tan layden da anggo ay pandokogan yos sak-en ta say daida di isakit ya onodan yo. <sup>18</sup> Kosto kayman di pangisakitan di ipogaw si ib-a na dalo et mo mayat di panggep na, kaman din inyat yo en sak-en, ngem kanayon koma di pangisaksakitan yo, baken anggo sin kawadak en

\* **4:3** Di esa abe ay kaiologan nina sin Griego et: ...naibabag-en tako sin aanito ay manturturay isnan daga. † **4:9** Di esa abe ay kaiologan nina sin Griego et: ...apay nga sagsagongen yo kasin din doy ay aanito... ‡ **4:14** Di esa abe ay kaiologan nina sin Griego et: Et olay mo napalpaligatan kayo begew sin sakit ko ay sana, adi yo nilaslasoy ono sinigaan sak-en,... § **4:15** Kanan di odom en din sakit Pablo et sakit di mata, et siya din gapo ay inbaga na di. Kanan aben di odom en ogalin di kali et anggo. Din laydena ay kalien et mo mabalin koma, indawat da en Pablo din kabanolan ay sanikwa da.

dakayo. <sup>19</sup> Laydelaydek ay an-ak ko, manpalpaligatak begew en dakayo ay kamanak ipidwa ay mangianak en dakayo, et itoloy ko ay manpalpaligat enggana ay isoen yos kosto si Cristo. <sup>20</sup> Laydek ay wadaak koma issa ta mabalin ay manngalat tako, tan adiak kayman ammo mo intoy kosto ay iyat ko en dakayo.

### *Din Kaiarigan Da Hagar En Sara*

<sup>21</sup> May kod, dakayo ay manglayad ay maibasar di kaisalakanana sin pangon-onodana sin linteg Moses, nemnemen yo koma din kankanan di linteg ay sana. <sup>22</sup> Tan naisolat sin kalin Diyos ay dodowa di inpotot Abraham ay lalaki. Di esa et anak Hagar ay bag-en asawa na ya din esa et anak Sara ay asawa na ay baken bag-en.\* <sup>23</sup> Din anak di bag-en et baken nakaskasdaaw din naianakana, ngem din anak asawa na et adi koma naianak mo baken begew sin inkarin Diyos en daida. <sup>24</sup> Din nay ay napasamak et waday naoneg ay olog na, tan mabalin ay maiarig din dow a ay babai sin dow a ay intolag Diyos sin kaipoipogaw. Di esa ay tolagan et din linteg ay indawat Diyos en Moses sin dontog ay Sinai ay wada ed Arabia. Din maiarig sin tolagan ay nay et si Hagar, tan bag-en si Hagar ya din an-ak na, ya siya abe ay bag-en din an-ak di tolagan, laydena ay kalien, din mangibasar si kaisalakanan da sin pangon-onodan da sin linteg. <sup>25</sup> Si Hagar et maiarig abe sin dontog ay Sinai ay napoan din linteg ya din siyodad ay Jerusalem ed wani, tan din man-ili ed Jerusalem ya din am-in abe ay Judio ay mantaltalek sin linteg Moses et maibabag-en da sin linteg ay doy. <sup>26</sup> Ngem din kaiarigan di babai ay baken bag-en et din nailangitan ay Jerusalem† ay maiarig si ina tako ay mamati. <sup>27</sup> Tan waday inpaisolat Diyos ay kanana,

“Sik-a ay basig ay adi polos nanpaligat ay nan-anak, manragsak ka. Ipicsam pay di kalim ay mangipaammo sin ragsak mo. Tan sik-a ay tinaynan di asawa na et ad-adon to di anak mo mo din babai ay makitete di asawa na.”‡

<sup>28</sup> Aag-i, datako ay mamati et waday kaiisoan tako en Isaac, tan naianak sisya begew sin inkarin Diyos, et datako abe, maibilang tako ay anak Abraham begew sin mismo ay inkarin Diyos. <sup>29</sup> Ed idi abe, din anak ay baken nakaskasdaaw din naianakana et pinaligat nas Isaac ay naianak babaen sin panakabalin di Ispiriton Diyos. Siya abe ed wani, tan din maibabag-en sin linteg et palpaligaten das datako. <sup>30</sup> Ngem nemnemen tako din inpaisolat Diyos ay kanana, “Pakaanem san bag-en ya din anak na ay sana, tan adi mabalin ay makitawid di anak di bag-en sin tawiden di anak di baken bag-en.”§

<sup>31</sup> Isonga aag-i, din kasinopan di inbagbagak et siya na: adi tako maibilang ay an-ak di bag-en mo adi et an-ak di baken bag-en.

## 5

### *Din Wayawayan Di Mamati En Cristo*

<sup>1</sup> Winayaan Cristo si datako ta say waday tet-ewa ay wayawaya tako. Iapasnek yo ngarud ay ikalintegan din wayawaya yo. Adi yo ipalobos din pangipabaklayan da en

\* **4:22** Di maipanggep sin naianakan Ismael ay anak Hagar et wada sin Genesis 16:1-16. Di maipanggep abe en Isaac ay anak Sara et wada sin Genesis 21:1-7. † **4:26** Din olog di siyodad ay Jerusalem ed wani et din ipogaw ay Judio ay mantaltalek pay laeng sin linteg Moses, tan ed Jerusalem di kapatgan ay siyodad di Judio ya din relihion da. Din olog di nailangitan ay Jerusalem et din am-in ay ipogaw ay mamati en Jesu Cristo ay makwani en iglesian Diyos. ‡ **4:27** Isaias 54:1. Din inpadton Isaias isna et din nantaolian di Judio ed Jerusalem ay napo ed Babilonia (ilaen sin 2 Cronicas 36:15-23), isonga din olog di babai ay basig et din siyodad ay Jerusalem ay namaga di man-ili. Din layden Isaias ay kalien, nangatngato din dayaw di Jerusalem mo mantaoli din man-ili mo din sigod ay dayaw na. Mo si Pablo pay et natken di pangosalana sin pangarig ay nay. Dodowa di olog na. Di esa et maipanggep en da Hagar en Sara, tan si Sara et sigod ay basig, ngem ad-adoy polin di anak na mo si Hagar. Di esa abe ay kaiologana et maipanggep sin Judio ya din mamati en Cristo ay makwani en iglesia. Laydena ay kalien en sin tapin di agew, ad-ad-ado di mamati en Cristo ya ad-ad-ado di bindisyon Diyos en daida mo din Judio. § **4:30** Genesis 21:9-10.

dakayo sin linteg Moses, tan manbalin kayo kasin si bag-en. <sup>2</sup> Dengngen yo na, tan sak-en si Pablo ay nangibaga: mo manpakogit kayo tan kanan yo en masapol ay amagen yo ta mapalinteg kayo sin pangilaan Diyos, maga polos silbin di inamag Cristo para en dakayo. <sup>3</sup> Dadlon ibagak kasin en dakayo ay mo waday en manpakogit, masapol ngarud abe ay tongpalena din am-in ay bilbilin di linteg Moses. <sup>4</sup> Isonga din ipogaw ay gagait yo ay mamadpadas ay mapalinteg sin pangilaan Diyos begew sin panongtongpalan da sin linteg et enggay naisian da en Cristo ya nandokogan da din seg-ang Diyos. <sup>5</sup> Ngem datako pay et namnamaen tako din pangibilangan Diyos ay nalinteg tako, et din Ispirito Santo di mamadbadang en datako sin panedsed-an tako sin katongpalana babaen si pammati. <sup>6</sup> Tan mo naitatapi tako en Cristo, magay lawa na mo nakogit tako ono adi. Din waday banol na et din pammati tako ay maipaila sin panglaylaydan takos gagait tako.

<sup>7</sup> Ed idi, mayat di nangon-onodan yo en Cristo. Sino ngata di nanangaw en dakayo ta adi yo et patien di tet-ewa? <sup>8</sup> Din nangawisan da en dakayo et baken dedan napo en Diyos ay nangayag en dakayo. <sup>9</sup> Siliban yo, tan tet-ewa din kanan di ipogaw en, “Olay at-atik ay labadura et palbagenana di intiro ay nailaokana.” <sup>10</sup> Ngem olay mo tet-ewa di, talkek pay dedan dakayo begew sin nakies-esaan tako en Cristo, isonga magay dowadowak ay adi yo onodan di baken kosto ay mait-itdo. Ammok abe ay dosaen Diyos din mangol-olaw en dakayo, olay sino di kasasaad na.

<sup>11</sup> Mo si sak-en, wada kano di mangmangwani en it-itdok ay masapol ay manpakogit di Gentil mo mamati da, ngem nemnemen yo na ay aag-i. Mo doy ya tet-ewa di, apay ngarud ay mapalpaligatak pay laeng? Tan mo it-itdok koma ay masapol ay manpakogit di ipogaw, adi koma aben masmasnit di Judio sin ikaskasabak maipanggep sin nateyan Cristo sin krus. <sup>12</sup> Mo pay da sana ay mangol-olaw en dakayo, mo nabanobanol en daida di kogit, en da koma aben manpakapon!

#### *Din Kosto Ay Kaosalan Di Wayawaya Tako*

<sup>13</sup> Mo si dakayo ay aag-i, inayagan Diyos dakayo ta mapawayaan kayo. Ngem adi yo koma os-osalen din wayawaya yo ay pambal yo ay manongpal sin lawa ay laylayden yo, mo adi et man-asisilbi kayo begew sin panlilinaydan yo. <sup>14</sup> Tan din bilbilin di linteg et naimomongsan da am-in sin es-esa ay bilin ay nay: “Masapol ay laylaydem din ib-am ay kaman din pananglayad mo sin awak mo.”\* <sup>15</sup> Ngem mo itoltoloy yo ay man-iibaw ay kaman maangat ay aso ay man-asikakat, siliban yo, tan din pantongpalana et man-asidadael kayo.

#### *Din Lebbengen Tako Ay Manpaituray Sin Ispirito Santo*

<sup>16</sup> Siya na di pamagbagak en dakayo: itoltoloy yo ay manpaituray sin Ispiriton Diyos, tan mo say amagen yo na, adi yo tongpalen din lawa ay laylayden di naipogawan ay nemnem yo. <sup>17</sup> Tan din laylayden di naipogawan ay nemnem tako et maikontra sin laylayden di Ispiriton Diyos. Din laylayden aben di Ispiriton Diyos et maikontra sin laylayden di naipogawan ay nemnem tako. Mankikinontra da, isonga adi tako makaa-mag sin layden tako ay amagen. <sup>18</sup> Ngem mo din Ispiriton Diyos di mangiturturong en dakayo, adi yo masapol ay onodan din linteg.

<sup>19</sup> Nalaka ay mailasin di am-amagen di ipogaw ay napo sin naipogawan ay nemnem da. Siya dana: daddaagen dan baken dan asawa ya am-amagen da di kadodogis ya naalas; <sup>20</sup> daydayawen da di sinan didiyos ya mansapsapo ya man-gegey da; makaliget, makaibaw, makaapal ya makabonget da; nalalastog di nemnem da, adi da mankikinaawatan ya mansisian da; <sup>21</sup> gangamgamen da din baken dan oka, makabeteng da, maitaptapi das nalabes ay ragragsak, ya am-amagen da di odom ay kaman dana. Indadaan ko en dakayo ed idi ya ipidwak ay mangidadaan en dakayo ed wani: din mangamaamag si kaman dadi et adi da maitapi sin panturayan Diyos.

\* 5:14 Levitico 19:18.



<sup>22</sup> Ngem din ogali ay pabelaen di Ispiriton Diyos et siya dana: layad, ragsak, olnos, anos, mabmabadang, siged di am-amagena si iib-a na, matalek, <sup>23</sup> ibaba nan nemnem na ya itpe nan awak na. Din mangon-onod en dana ay ogali et maga di amagena ay iparit di linteg. <sup>24</sup> Tan din ipogaw en Cristo Jesus et kaman enggay inlansa na din naipogawan ay nemnem na sin krus, pati din am-in ay lawa ay laylaydena. <sup>25</sup> Gapo ta din baro ay biyag tako et napo sin Ispiriton Diyos, masapol abe ay sisya di mangiturturong en datako. <sup>26</sup> Adi tako koma ipangpangato di awak tako, ya adi tako abe mankinarit ya man-inapal.

## 6

### *Manbibinadang Tako Koma*

<sup>1</sup> Aag-i, mo maammoan yo ay wada di gait yo ay nasangaw si basol, dakayo ay iturturong di Ispirito Santo et bagaan yos sisya ta pantaolien yo koma sin kosto ay danan. Nainayad koma di iyat yo ay mamagbaga en sisya ya down aben siliban di esa ya esa en dakayo tan into et mo masolisog kayo abe. <sup>2</sup> Manbibinadang kayo mo maligatan ono madagsenan kayo, tan mo say iyat yo di, tongpalen yo din inbilin Cristo.\* <sup>3</sup> Tan mo waday mangibilang ay waday kabaelana ono kaipogaw na ngem baken tet-ewa, iet-etekana din mismo ay awak na.† <sup>4</sup> Masapol ngarud ay nemnemen di esa ya esa din awak na ta paneknekana mo kosto di am-amagena. Tan mo kosto, mabalin ay maragsakan begew sin mismo ay am-amagena ay adi na is-is-o sin am-amagen di iib-a na. <sup>5</sup> Tan esa ya esa et makaoway sin mismo ay am-amagena.

<sup>6</sup> Din mait-itdoan sin kalin Diyos et masapol ay ibingayana din mangit-itdo en sisya sin am-in ay siged ay wadan sisya.‡

<sup>7</sup> Adi yo iet-etekan di awak yo. Adi mabalin ay masiksikapan si Diyos. Tan din is-ek di ipogaw et siya abe din apitena. <sup>8</sup> Din mangis-eis-ek si panlaydan di naipogawan ay nemnem na et apitena di dosa ay eng-enggana, ngem din mangis-eis-ek si panlaydan di Ispiriton Diyos et apitena di idawat din Ispiriton Diyos ay biyag ay iwed patingga na. <sup>9</sup> Isonga adi tako koma madisdismaya sin pangam-amagan takos siged, tan mo domateng di kosto ay timpo, wada abe di apiten tako mo adi tako somadot. <sup>10</sup> Isonga basta wada pay laeng di waya tako, itoltoloy tako ay mangamag si siged sin am-in ay ipogaw, namnamed din aag-i tako ay mamati.

### *Din Kakdengan Di Solat*

<sup>11</sup> Sak-en ay mismo di nangisolat sin nay kakdengan di solat. Ilaen yo din kadak-daken di letra na! <sup>12</sup> Din mangipipilit ay manpakogit kayo et daida di manglayad ay mangipailas kinasiged da sin pangilan di ipogaw. Di gapo ay ipilit da di et sigaan da ay mapaligatan. Tan ammo da ay mo itdo da ay omanay din nateyan Cristo sin krus, paligaten din gagait da ay Judio si daida. <sup>13</sup> Olay daida ay nakogit et adi da patpatien din am-in ay linteg Moses, ngem layden da ay manpakogit kayo ta say mabalin ay it-ek da ay nanpakogit kayo begew en daida. <sup>14</sup> Ngem mo sak-en pay, maga di it-ek ko mo adi din nateyan Jesu Cristo ay Apo tako sin krus, tan begew sin nateyana ay sana, din banolen di nailobongan ay ipogaw et namaga di banol na en sak-en, ya sak-en abe et namaga di kowintak sin pangilan di nailobongan ay ipogaw. <sup>15</sup> Magay lawa na mo nanpakogit di ipogaw ono adi, tan din nabanol et din nangipabalinan Diyos en datako si baro ay ipogaw. <sup>16</sup> Sapay koma ta wada di talna ya seg-ang ay mapmapo en Diyos sin am-in ay mangon-onod sin kaibagbagak. Daida di tet-ewa ay ipogaw Diyos.

<sup>17</sup> Manlogi ed wani, maga koma di pomaligat ay manglaslasoy sin it-itdok, tan din awak ko ay nakibakibatan et say mangipaila ay tet-ewa ay mansilsilbiak en Cristo.

\* **6:2** Din inbilin Cristo et wada sin Juan 13:34; 15:12. † **6:3** Roma 12:3; 1 Corinto 3:18. ‡ **6:6** Lucas 10:7; Roma 15:27; 1 Corinto 9:11,14; 1 Timoteo 5:17-18.



<sup>18</sup> Sapay koma ay aag-i ta wada en dakayo din seg-ang Jesu Cristo ay Apo tako. Amen.

## **Din Solat San Pablo Sin Taga-Efeso**

### **Maipanggep Sin Solat Ay Nay**

Din solat ay nay et insolat Pablo sin gimong di mamati ed Efeso ya sin odom ay ili ed Asia Minor. Sin nangisolatanas na, naibabalod ed Roma begew sin nangikaskasabaana sin siked ay damag ay maipanggep en Apo Jesu Cristo.

Sin logian di solat na, ilawlawag Pablo di maipanggep sin planon Diyos ay mangolnos sin am-in ay wada isnan daga ya ed langit ta anggoy si Cristo si ap-apo da (1:10). Isonga bagbagaana abe din mamati ta pan-iisoen dan nemnem da begew sin naitatapan da am-in en Cristo ta say maikompa di kabibiyag da sin planon Diyos para en daida.

Osalen Pablo di papangarig ta ipaammo na din ison di pan-es-esaan tako ay mamati. Kanana en di am-in ay mamati et maiarig das partin di es-esa ay awak, et si Jesu Cristo din toktok din awak ay doy. Kanana abe en kaman beey din mamati, et si Cristo din kamanan tokod. Iarig na pay di sin-asawa en Cristo ya din mamati en sisya.

Wada abe di adalen takos na maipanggep si kosto ay ogalin di sin-asawa, anan-ak ya akin anak, ya din babag-en ya among da. Sin kagdengan di solat, wada abey adalen tako maipanggep sin idawdawat Diyos si mamati ay isalida da koma sin osalen Satanas ay mangietek en daida.

#### **Din Linaona**

Din panlogian di solat 1:1-2

Din kasasaad di mamati en Cristo 1:3-3:21

Din kabibiyag ay onodan koman di mamati 4:1-6:9

Din salidan di mamati 6:10-20

Din kagdengan di solat 6:21-24

#### *Din Panlogian Di Solat*

<sup>1</sup> Sak-en si Pablo ay apostol en Cristo Jesus ay maibasar sin layden Diyos. Naey di solat ko en dakayo ay ipogaw en Diyos ed Efeso ay mangipapasnek ay mamati en Cristo Jesus.

<sup>2</sup> Sapay koma ta wada en dakayo di seg-ang ya talna ay mapmapo en Diyos ay Ama tako ya si Apo Jesu Cristo.

#### *Din Nakaskasdaaw Ay Planon Diyos*

<sup>3</sup> Dayawen tako si Diyos ay din Diyos ya Aman Jesu Cristo ay Apo tako, tan begew sin naitatapan tako en Cristo, indawat na en datako din am-in ay naispiritoan ay bindisyon ay wada ed langit. <sup>4</sup> Tan sin daan kaparsuaan di lobong, enggay pinipilin Diyos datako ta maitapi tako en Cristo ta say panbalinenas datako ay nasantoan ay ipogaw ay magay basol na sin pangilaana. <sup>5</sup> Begew sin layad na, sigod ay ninemnem na ay panbalinenas datako si an-ak na babaen sin inamag Jesu Cristo, tan say laydena. <sup>6</sup> Isonga dayawen takos sisya begew sin nakaskasdaaw ay seg-ang ay inpaila na en datako ay naitatapi sin laydelaydena ay Anak na. <sup>7</sup> Tan babaen sin dadan di Anak na ay sana, mawayaan tako, laydena ay kalien, mapakawan din basbasol tako. Gon-oden tako am-in dana begew sin peteg ay seg-ang Diyos <sup>8</sup> en datako ay magay kais-oana. Ad-ado abe di laing ay indawat na en datako ta say dadlon takon maawatan di maipanggep en sisya ya din siked ay kabibiyag ay onodan tako koma. <sup>9</sup> Tan inpaammo na en datako din plano na ay adi naipaammo ed idi ay nemnem na ay matongpal begew en Cristo. <sup>10</sup> Et siya na di plano na: mo makdeng din am-in ay masapol ay mapasamak yan domteng di kosto ay timpo, pag nan olnosen din am-in ay wada isnan daga ya ed langit ta anggoy si Cristo si ap-apo da.

<sup>11</sup> Am-amin ay mapaspasamak et maibasar sin sigod ay planon Diyos, et siya abe sin namiliana en dakami ta manbalin kamis ipogaw na begew sin naitatapian mi en Cristo. Say ninemnem na di nanlogi sin damo <sup>12</sup> ta madayaw din kinadiyos na begew en dakami ay nangon-ona ay nantalek en Cristo. <sup>13</sup> Ya dakayo abe, idi dinnge yo din tet-ewa ay kali ay din siged ay damag maipanggep sin kaisalakanan yo, namati kayo en Cristo et naitapi kayo en sisya. Isonga minalkaan Diyos dakayo si ipogaw na idi indawat na en dakayo din Ispirito Santo ay inkari na. <sup>14</sup> Yan din nakitetean din Ispirito Santo en datako et say dadlon takon pangammoan ay tongpalen Diyos din pangipawaywayaana en datako ya awaten tako din am-in ay inkari na sin ipogaw na ta say madayaw din nakaskasdaaw ay kinadiyos na.

### *Din Kararag En Pablo*

<sup>15</sup> Isonga manlogi sin nanngreak sin pammati yo en Apo Jesus ya din layad yo sin am-in ay ib-a yo ay ipogaw en Diyos, <sup>16</sup> adiak insalsaldeng ay man-iyaman en Diyos begew en dakayo downak aben ikarkararagan dakayo. <sup>17</sup> Din kedkedawek en sisya ay din madayaw ay Ama tako ay daydayawen aben din Apo tako ay si Jesu Cristo et siya na. Kedkedawek ay idawat koman din Ispirito na en dakayo di sirib ya ipaammo na en dakayo di maipanggep si kinadiyos na ta say ammoan yos sisya ay kosto. <sup>18</sup> Kedkedawek pay ay silawan Diyos di nemnem yo ta dadlon yon ammoan din namnamaen tako begew sin namiliana en datako ya ta maawatan yo din kaad-ado ya kinasiged di bindisyon ay inkari na sin ipogaw na <sup>19</sup> ya ta liknaen yo din kapigsan di panakabalina ay mamadbadang en datako ay mamati. Din panakabalin ay nay et mais-o sin nakaskasdaaw ay panakabalina ay iwed kais-oana <sup>20</sup> ay inpaila na sin kasinan nanagoan en Cristo ya sin nangipangatoana en sisya ed langit ta patokdoena sin makannawana. <sup>21</sup> Say panturturayana ed wani, et nangatngato di turay na mo din am-iam-in ay pangolo ya turay isnan daga ya din am-in ay adi kaila ed langit ay waday turay na. Maga polos di waday kinangato na si nangatngato mo sisya ed wani ya siya abe sin tapin di agew. <sup>22</sup> Inpangaton Diyos si Cristo ta sisya di mangituray sin am-in ay wada, et sisya abe di dinotokan Diyos ay pangolon di am-in ay mamati. <sup>23</sup> Isonga datako am-in ay mamati en Cristo et maiarig tako sin awak na ya sisya abe di maiarig sin toktok tako. Isonga datako ay mamati di kaman mangomplito en Cristo down pay sisya met laeng di wada sin am-in ay lugar ay mangomkomplito sin am-in ay wada.

## 2

### *Din Seg-ang Diyos*

<sup>1</sup> Ed idi, sin daan kayon namatian, kaman kayon nanatey maipanggep en Diyos begew sin basbasol yo. <sup>2</sup> Tan inon-onodan yo din lawa ay ogalin di adi mamati yan pinatpati yo din ap-apon di aanito ed daya ay mangiturturay met laeng en daida ay mangipipilit ay adi manongtongpal en Diyos. <sup>3</sup> Olay abe si datako am-in ed idi et say inam-amag tako met laeng din laylayden tako ay lawa. Olay mo sino di layden di awak tako ya din wada sin nemnem tako et say inon-onodan tako. Isonga din sigod ay kasasaad tako et maikari tako ay madosa ay ison din sigod ay kasasaad di am-in ay ipogaw.

<sup>4</sup> Ngem peteg pay dedan di seg-ang ya layad Diyos en datako. <sup>5</sup> Olay mo kaman takon natey begew sin basbasol tako, indawat na en datako di baro ay biyag begew sin naitapian tako en Cristo. Isonga din seg-ang Diyos di begew ay naisalakan tako. <sup>6</sup> Et manbegew sin naitapian tako en Cristo ay natago, inpangato na abe si datako ta makituray tako en Cristo ed langit. <sup>7</sup> Inamag Diyos dana ta say maila ay eng-enggana din kadakdaken di layad ya seg-ang na ay inpaila na en datako begew en Cristo Jesus. <sup>8</sup> Tan din seg-ang Diyos et anggoy di begew ay naisalakan tako babaen sin namatian tako en Cristo. Baken met begew sin inam-amag tako, mo adi et sagot di Diyos. <sup>9</sup> Isonga

magay begew si pangit-it-ekan tako sin awak tako, tan din naisalakanan tako et baken manbegew sin siged ay inam-amag tako. <sup>10</sup> Tan si Diyos et anggoy di nangipabaro sin biyag tako begew sin naitapian tako en Cristo Jesus ta say amagen tako koma din siged ay ninemnem na ed idi ay amagen tako.

### *Nan-iso Di Judio Ya Gentil Begew Sin Naitatapian Da En Cristo*

<sup>11</sup> Isonga dakayo ay naianak ay Gentil et nemnemen yo din kasasaad yo ed idi. Si dakayo et laslasoyen di Judio ay mangwani en adi nakogit, dowan daida pay yan kanan da en naibilang da ay ipogaw en Diyos begew sin nakogitan da (towali et din kogit yan owat inamag di ipogaw sin awak da). <sup>12</sup> Ngem tet-ewa pay dedan ay ed idi, naisisian kayo en Cristo. Naipopowira kayo sin Israelita ay pinilin Diyos ay ipogaw na. Adi kayo aben nailak-am isnan inpidwapidwan Diyos ay inkari sin ipogaw na ay omalin to di mangisalakan en daida. Isonga maga di siged ay namnama yo sin nangon-onodan yo sin sigod ay ogali yo, et addawi kayo pay laeng en Diyos. <sup>13</sup> Ngem ed wani, gapo ta naitatapi kayo en Cristo Jesus, dakayo ay addawi ed idi et naisag-en kayo en Diyos ya en dakami ay ipogaw na begew sin dadan Cristo ay inmayos sin nateyana. <sup>14</sup> Tan si Cristo ay mismo di kaibasaran di olnos tako ay Judio ya Gentil. Nan-es-esaena di nemnem tako tan kinaana din poon di pan-asiligetan tako. <sup>15-16</sup> Tan sin nateyana sin krus, winaswas na din linteg di Judio ay nanlaon si ad-ado ay bilbilin ta maanggoy sisya si on-onodan mi ay Judio ya dakayo ay Gentil. Isonga ed wani, say kaolnosan tako tan pinabaro nas datako ay nanbalinena ay kaman es-esa ay awak begew sin naitapian tako en sisya. Say inamag na di ta isag-enas datako am-in en Diyos. <sup>17</sup> Aw, inmali si Cristo ta ikasaba na en dakayo ay naiaaddawi en Diyos ya en dakami dedan ay naisasag-en en sisya din siged ay damag ay mabalin ay maitapi tako en Diyos. <sup>18</sup> Isonga babaen en Cristo, makasag-en tako am-in en Diyos ay Ama tako, tan es-esa din Ispiriton Diyos ay wada en datako.

<sup>19</sup> Ngarud, dakayo ay Gentil et baken kayon mangili mo adi et naitapi kayo ed wani sin odom ay ipogaw en Diyos ay iturturayana. Naitapi kayo abe sin pamilyan Diyos. <sup>20</sup> Isonga dakayo abe et maiarig kayos partin di timplo ay am-amagen Diyos. Din aapostol ya pankalkalian Diyos et daida di maiarig sin fondasyon di timplo ay nay, ya si Cristo Jesus din kababanolan ay bato sin solin di fondasyon ay mangipapakneg sin intiro ay timplo. <sup>21-22</sup> Sisya dedan di nananggen sin am-in ay partin di timplo ta makneg di amag na. Et manbegew sin naitatapian yo en sisya, maibilang kayo sin amin ay mamati ay sassaaden Diyos si nasantoan ay timplo ay panteteana babaen sin Ispirito na.

## 3

### *Din Inpaoblan Diyos En Pablo Para Sin Gentil*

<sup>1</sup> Da dooy am-in di wadas nemnem ko sin pankarkararagak en Diyos, sak-en ay naibabalod begew sin nansilbiak en Cristo Jesus para sin pansigdan yo ay Gentil. <sup>2</sup> Siguro, dinnge yo met ay intalek Diyos en sak-en din oblak ay nay ay mangipaammo en dakayo sin seg-ang na. <sup>3</sup> Tan inpaammon Diyos en sak-en din plano na ay adi naipaammo ed idi, et siya met laeng nan at-atik ay inbagak sin solat ko ay nay. <sup>4</sup> Et mo basaen yo pay si kosto, ammoan yo din pangawat ko sin plano na ay sana ay matongpal begew en Cristo. <sup>5</sup> Maga di nangam-ammo isna ed idi, ngem ed wani inpaammon din Ispiriton Diyos en dakami ay aapostol ya pankalkalian Diyos ay pinili na ay mansilbi en sisya. <sup>6</sup> Et siya na din inpaammo na. Begew sin namatian yo sin siged ay damag, makilak-am kayo ay Gentil sin ad-ado ay bindisyon Diyos ay gon-oden mi ay Judio et maibilang kayo sin am-in ay mamati ay maiarig sin awak Cristo. Makibingay kayo abe sin inkarin Diyos ay idawat na sin am-in ay naitapi en Cristo Jesus.

<sup>7</sup> Et mo sak-en pay, dadlon sineg-angan Diyos, tan begew sin panakabalina, intalek na en sak-en din nabanol ay obla ay mangikaskasaba sin nay siged ay damag. <sup>8</sup> Olay

mo sak-en di kababaan sin am-in ay ipogaw na, indawat na pay dedan en sak-en din gondaway ay mangipaammo en dakayo ay Gentil sin kinasiged di bindisyon Cristo\* ay magay kais-oana. <sup>9</sup> Inbaa na abes sak-en ta ipalawag ko sin am-in ay ipogaw din iyat di plano na ay matongpal. Tan si Diyos ay namarsua sin am-in ay wada et adi na inpaam-ammos nabayag din nay plano na enggana ed wani <sup>10</sup> ta say maammoan ed wani begew en datako am-in ay mamati. Tan mo ilaen di papangolon di anghel ya odom ay manakabalin ay adi kaila ed langit din pantongpalaan di planon Diyos maipanggep en datako ay mamati, asi dan ammoan din kinasirib na ya din nankinalasi ay kaipailaana. <sup>11</sup> Din inamag Diyos ay nay et maibasar sin ninemnem na ed nabaon ay amagen, et say tinongpal na babaen en Cristo Jesus ay Apo tako. <sup>12</sup> Isonga datako ay naitatapi en sisya et adi tako koman mabain ay mankararag en Diyos, tan ammo tako ay dengngenas datako begew sin talek tako en Cristo Jesus. <sup>13</sup> Isonga adi kayo kod madisdismaya begew sin mapalpaligatak para en dakayo, tan say pansigdan yo met laeng.

### *Din Kakdengan Di Kararag En Pablo*

<sup>14</sup> Mo nemnemek am-in dana downak et mandokmog ay mankararag en Diyos ay Ama tako <sup>15</sup> ay napoan di ngadan ono kinapamilyan di am-in ay pamilya† isnan daga ya ed langit. <sup>16</sup> Et kedkedawek en sisya ta papigsaen din Ispirito na din nemnem yo maibasar sin panakabalina ya kinangato na ay magay iso na <sup>17</sup> ta itoltoloy Cristo ay mantetee en dakayo begew sin pammati yo en sisya. Kedkedawek abe ta pomigpiga pay et din layad yo en Diyos ya sin iib-a yo <sup>18</sup> ta say mabalin koma ay maawatan yo ya din am-in ay ipogaw en Diyos din pateg ya kadakdaken di layad Cristo en datako. <sup>19</sup> Adi kayman mabalin ay maawatan di ipogaw si kosto din layad na ay nay, ngem sapay koma ta mataptapian din ammo yo ya likna yo sin layad na ta somigsiged di ogali yo enggana ay komaman din ogalin Diyos ay magay pankolangana.

<sup>20</sup> Sapay koma ta madayaw si Diyos ay manakabalin am-in. Tan kabaelana ay mangamag si addawi ay nasursurok mo olay sino ay kedawen tako ya olay pay din nemnemen tako begew sin panakabalin di Ispirito na ay wada ay man-ob-obla en datako. <sup>21</sup> Sapay koma ta dayawen tako am-in ay mamatis sisya ya ta madayaw abe begew en Cristo Jesus. Sapay koma ta madayaw si Diyos si eng-enggana. Amen.

## 4

### *Din Pan-es-esaan Di Nemnem Di Mamati Ay Awak En Cristo (1 Cor. 12:1-31)*

<sup>1</sup> Mo si sak-en ay naibabalod begew sin pansilsilbiak en Apo Jesus et bagbagaak dakayo ta pangaasi yo koma ta maikompa din kabibiyag yo sin planon Diyos para en datako ay inayagana. <sup>2</sup> Din iyat yo komas kankanayon et ibaba yo din awak yo ya naanos kayo. Anosan yo abe din pankolkolongan di iib-a yo begew sin panlilinaydan yo. <sup>3</sup> Ipakat yo din kabaelan yo ay man-oolnos ta adi madadael din pan-es-esaan di nemnem yo amin ay idawdawat din Ispirito Santo. <sup>4</sup> Am-in tako ay nakies-esa en Cristo et kaman takon es-esa ay awak ya es-esa din Ispiriton Diyos ay wada en datako. Es-esa abe di namnama tako begew sin nangayagan Diyos en datako. <sup>5</sup> Es-esa di Apo tako, es-esa di pammati tako, ya es-esa abe di nabonyagan tako. <sup>6</sup> Es-esa pay di Diyos ay Ama tako am-in. Sisya di mangiturturay en datako am-in, paam-amag na en datako am-in din laydena ay matongpal, ya down aben mantetee en datako am-in.

\* **3:8** Di esa abe ay kaiologan nina sin Griego et: ...kinasiged Cristo... † **3:15** Di esa abe ay kaiologan nina sin Griego et: ...intiro ay pamilya na. Sin kalin di Griego, waday kaiisoan din kali ay ama (pater) ya pamilya (patria). Isonga nalaklaka ay maawatan din kanan Pablo en si Diyos Ama di napoan di ngadan di am-in ay pamilya. Sin Griego abe, din olog di patria et am-in ay es-esa di naipolian da, kaspangarigan, esa ay pamilya, tribu ono nasyon.



<sup>7</sup>Ngem sinassaes-an Cristo pay dedan ay nangidawat en datako si nankinalasi ay laing ono kabaelan ay maibasar sin ninemnem na ay idawat. <sup>8</sup>Siya met laeng din inpaisolat Diyos maipanggep en Cristo ay kanana, “Idi nantaoli ed langit, inkoyog na di ad-ado ay inabak na, yan down waday insagot na sin ipogaw na.”\*

<sup>9</sup>Sino ngarud di laydena ay kalien sin nangibagaana en nantaoli ed langit? Laydena ay kalien en binmaba agan-o ay napod langit enggana sin kababaan ay partin di lobong. <sup>10</sup>Yan din binmaba ay napod langit et sisya met laeng din nginmato kasin isdi ta sisya di mawada sin olay sino ay lugar ay mangituray sin am-in ay wada. <sup>11</sup>Et sisya abe di nangisagot si nankinalasi ay kabaelan di ipogaw na. Dinotokana din odom ay manapostol ya din odom ay pankalkaliana. Din odom et dinotokana ay en mangikaskasaba sin siged ay damag sin kailili, ya din odom pay yan pastor ay mangay-ayowan ya mangit-itdo sin mamati. <sup>12</sup>Indawat na dana ay kabaelan sin odom ay ipogaw na ta say maitdoan ya maisagana din am-in ay ipogaw en Diyos ay mansilbi en sisya ya sin iib-a da. Tan din pantongpalana et komkomneg din awak en Cristo ay kaiarigan tako ay mamati <sup>13</sup>enggana ay man-iso din pammati tako ya din ammo tako ay maipanggep en Cristo ay Anak Diyos. Asi tako mabalin ay maiarig si mabikas ay nakay et din ogali tako, komaman din kamayat di ogalin Cristo ay magay pankolangana. <sup>14</sup>Et mo say iso tako, baken takon kaman anak ay nalaka ay balibaliwanan nemnem na, tan adi tako dedan maietekan sin baken tet-ewa ay it-itdon di nalaing ya maetek ay ipogaw. <sup>15</sup>Aw, adi tako koman owat mamatpati sin natken ay mait-itdo, mo adi et on-onodan ya ibagbaga tako sin iib-a tako din tet-ewa ay mait-itdo begew sin layad tako en daida ta say mais-o tako en Cristo ya komosto din kaitapian tako en sisya ay maiarig sin toktok tako. <sup>16</sup>Et gapo ta sisya di maiarig sin toktok tako, makaammo dedan en datako ay awak na et olnosena din am-in ay partin di awak na ay nay ta say kostokosto din kaiamagana. Isonga mo tongpalen di esa ya esa din naidotok ay obla na, pomigpigsa ya madakdakdake din awak. Et say isoen tako mo manlinayad tako.

### *Mabaroan Koma Din Ogalin Di Mamati*

<sup>17</sup>Naey ngarud di layden din Apo ay ibilin ko en dakayo begew sin nakies-esaan tako en sisya. Dadlon masapol ay pandokogan yo din ogalin di adi mamati, tan din on-onodan da et din mapo sin nemnem da ay magay silbi na. <sup>18</sup>Gapo ta makenteg di nemnem da, sigaan da ay mangammo si maipanggep en Diyos, isonga mabolinget pay laeng di nemnem da et maga en daida din biyag ay idawat Diyos. <sup>19</sup>Isonga enggay maga di bain da, tan olay mo sino ay layden di awak da ay lawa ono kababain et down dan am-amagen ay adi da isaldeng.

<sup>20</sup>Ngem mo dakayo pay et baken kaman dadi di inad-adal yo maipanggep en Jesu Cristo, <sup>21</sup>tan sin nangon-onodan yo en sisya, nait-itdoan kayo met sin tet-ewa ay mait-itdo ay naipaila met laeng sin biyag na. <sup>22</sup>Isonga masapol ay iwasit yo din sigod ay nemnem ya ogali yo, tan say napoan di lawa ay layden ono aklong ay mangietek en dakayo et say manadael en dakayo. <sup>23</sup>Et masapol ay dadlon mabaroan di nemnem yo. <sup>24</sup>Awaten yo ngarud din baro ay nemnem ay napo en Diyos ay mais-o en sisya, tan mo say tongpalen yo di, maipaila sin kabibiyag yo di tet-ewa ay kinalinteg ya kinasanto.

<sup>25</sup>Adi kayo koman manlaslastog mo adi din tet-ewa et anggoy di ibagbaga yo sin gagait yo, tan naitatapi tako am-in sin awak en Cristo. <sup>26</sup>Mo bomonget kayo, down yon siliban ta baken say bomasolan yo. Dadlon yo aben pabaewen di nemnem yo. Adi yo itoltoloy din bonget yo sin sin-agew <sup>27</sup>ta say magay wayan Satanas ay manolisog en dakayo. <sup>28</sup>Mo waday mangakew en dakayo, isaldeng na koma ta man-gaget et sisya ay man-obla ta say waday kosto ay katagoana ya wada abe di ibadang na sin mankolkolang. <sup>29</sup>Adi

\* 4:8 Salmo 68:18.

kayo koman mankalkali si olay at-atik ay lawa, mo adi et san ibaga yo anggoy et din mamadang ya mangipapigsa sin nemnem di manmannge insigon sin kasapolan di esa ya esa ta say pansigdana. <sup>30</sup> Et adi yo koman pansaksakiten di nemnem di Nasantoan ay Ispiriton Diyos, tan sisya di indawat Diyos en dakayo ay kaman malka ono sinyal ay ipogaw nas dakayo, et din panteteana en dakayo et say dadlon yon pangammoan ay ipawayan ton Diyos dakayo si kosto. <sup>31</sup> Isonga liklikan yo koma di am-in ay sakit di nemnem, liget, ya bonget sin iib-a yo. Adi kayo aben makiib-ibaw ya makisongsongbat ya adi yo palawlawan din iib-a yo. Maga koma abe di nemnem yo ay mamaligat si iib-a yo. <sup>32</sup> Baken koman dadi di iyat yo mo adi manbinadang ya man-asiseg-ang kayo downan kayo aben manpinakawan ay kaman din inyat Diyos ay namakawan en dakayo begew en Cristo.

## 5

### *Din Kabibiyag Di Mantetee Sin Mapat-a*

<sup>1</sup> Isonga gapo ta dakayo di an-ak Diyos ay laydelaydena, sisya koma di tadtadonen yo <sup>2</sup> ta say managlayad kayo ay kaman din pananglayad Cristo en dakayo. Tan sisya et indawat na din awak na ay matey para en dakayo, yan din nateyana et kaman mansengseng-ew ay naidaton en Diyos ay say kapnekana.

<sup>3</sup> Isonga adi kayo koman makikamkamalala ya man-am-amag si odom ay kalasin di kadodogis. Adi kayo aben man-gamgam si baken yon oka. Tan olay din kaistoryaan anggoy din kaman dadi ay lawa et adi maibagay en dakayo ay ipogaw en Diyos. <sup>4</sup> Adi aben maibagay en dakayo din ol-olay ay ngalat ay iwed silbi na ya din kadodogis ay is-istorya maipanggep si babai, tan din iyat yo koma et man-iyaman kayo en Diyos. <sup>5</sup> Tan ammo yo dedan ay maga di makikamkamalala ono mangam-amag si odom ay kadodogis ay maitapi sin panturayan Cristo ya si Diyos. Iso na abe din man-gamgam si bakenan oka, tan din kinagamgam na et say kamanan diyos. <sup>6</sup> Adi kayo maiet-etekan sin manlaslastog ay mangibagbaga en baken lawa di mangamag si kaman dadi ay basol, tan din kaman dadi ay maam-amag et say begew ay dosaen Diyos din adi manongtongpal en sisya. <sup>7</sup> Isonga adi kayo makikadkadwa si kaman dadi ay ipogaw. <sup>8</sup> Tan ed idi, mabolinget kayman di nemnem yo, ngem ed wani nasilawan pay begew sin nakies-esaan yo en Apo. Onodan yo ngarud din ogali ay maibagay sin ipogaw ay mantetee sin mapat-a <sup>9</sup> ya amagen yo din am-in ay kalasin di mayat ya nalinteg ya tet-ewa ay pantongpalan di nasilawan ay nemnem. <sup>10</sup> Adalen yo koma din panlaydan di Apo et say amagen yo. <sup>11-12</sup> Adi kayo maitaptapi sin am-amagen di mabolinget di nemnem na ay magay silbi na, tan din am-amagen da ay sana ay adi da ipaam-ammos odom et kababain, olay owat maistorya. Din amagen yo koma et ipaila yo en daida din mayat ay ogali yo ta say pangammoan da sin kalawan di am-amagen da. <sup>13</sup> Tan mo masilawan din wada sin mabolinget, maila din iso na. <sup>14</sup> Et am-in ay dadlon masilawan et pomat-a. Siya met laeng din kankanan din kansiyon ay mangwani,

“Ibangon mo, sik-a ay naseseyep,

Matago ka ay natey

Ta silawan Cristo di nemnem mo.”

<sup>15</sup> Siliban yo ngarud din kabibiyag yo ta adi yo tadonen din ogalin di naong-ong mo adi et din masirib ya nanemneman ay ipogaw. <sup>16</sup> Nakasagana kayo komas kankanayon ay mangamag si mayat, tan ed wani, ad-ado din mangam-amag si lawa. <sup>17</sup> Isonga adi yo koman oong-ongen mo adi et nemnemen yo din layden di Apo ay amagen yo. <sup>18</sup> Adi kayo manbetbeteng, tan domadael dedan sa, mo adi et mapno kayo sin panakabalin di Ispirito Santo. <sup>19</sup> Tan mo sisya di mangiturturong sin nemnem yo, siya dana di iyat yo: mo matotopog kayo, mannginalat kayo ay mangibagbaga sin Salmo, naikansiyon ay kalin Diyos ya odom ay kankantan di mamati downan kayo et ikankanta ay mandayaw

en Apo. Et baken din tepek yo anggoy di mangikanta mo adi din nemnem yo abe. <sup>20</sup> Et man-iyaman kayo abe en Diyos Ama sin am-in ay mapasasamak begew sin talek yo en Apo tako ay si Jesu Cristo. <sup>21</sup> Di esa abe et manpinaituray kayo begew sin pamatpatgan yo en Cristo.

*Pamagbaga Si Sin-as-awa  
(Col. 3:18-19; 1 Ped. 3:1-7)*

<sup>22</sup> Dakayo ay babbabai, manpaituray kayo sin as-awa yo, tan say layden din Apo ay iyat yo. <sup>23</sup> Tan din lalaki di pangolon di asawa na ay kaman met laeng si Cristo di pangolon di am-in ay mamati en sisya ay maiarig sin awak na. Et si Cristo abe dedan di mangisalakan sin am-in ay mamati. <sup>24</sup> Isonga dakayo ay babbabai et masapol ay dadlon kayon manpaituray sin as-awa yo ay kaman din iyat tako ay mamati ay manpaituray en Cristo.

<sup>25</sup> Dakayo abe ay lallalaki et masapol ay laydelayden yo din as-awa yo ay kaman din pananglayad Cristo en datako am-in ay mamati. Tan din inyat na et indawat na din biyag na para en datako <sup>26</sup> ta say panbalinenas datako ay nasantoan ay ipogaw en Diyos begew sin nangowasana en datakos danom ya sin kalin Diyos. <sup>27</sup> Di begew ay say inyat na di et ta dadlon nasantoan tako ay iwed polos basol tako ta say mo omalis sisya ay en mangayag en datako, peteg ay kagkagam-is tako sin pangiilaana, tan maiwed polos pankolongan tako. <sup>28</sup> Isonga dakayo ay lallalaki et masapol ay laydelayden yo din as-awa yo ay kaman din pananglayad yo sin awak yo. Mo say iyat yo di, din awak yo met laeng di laylayden yo, tan nan-esa kayo dedan ay sin-as-awa. <sup>29</sup> Maga abe di ipogaw ay manigaan sin awak na mo adi et ayowanana. Et kaman nadi din in-inyat Jesus en datako ay mamati, <sup>30</sup> tan ibilang na ay awak nas datako. <sup>31</sup> Wada di naisolat ay kalin Diyos ay kanana, "Say gapo na ay taynan di lalaki da ama na en ina na ta ibeey na din asawa na, et manbalin das es-esa."\* <sup>32</sup> Wada di nabanol ya nalaed ay mait-itdo ay mabalin ay maawatan takos na, et mo sak-en et iarig ko en Cristo ya din mamati en sisya. <sup>33</sup> Ngem wada pay dedan di laydena ay kalien maipanggep en dakayo ay sin-asawa, et siya na. Sik-a ay lalaki et masapol ay laydelaydem din asawam ay kaman din pananglayad mo sin awak mo. Sik-a pay abe ay babai, masapol ay rispitoem si asawam.

## 6

*Pamagbaga Si Anan-ak Ya Akin Anak  
(Col. 3:20-21)*

<sup>1</sup> Dakayo ay anan-ak, patien yo din ama yo ya ina yo begew sin nakies-esaan yo en Apo Jesus, tan say kosto ay iyat yo koma. <sup>2</sup> Tan din bilin Diyos ay damo ay waday ikari na ay gon-gona sin manongtongpal et kanana en, "Dayawem da amam en inam <sup>3</sup> ta say lak-amem di siged ya ando ay biyag isnan daga."\*

<sup>4</sup> Dakayo pay ay nakin anak et adi yo pabongbongeten di an-ak yo mo adi et bilinen ya itdoan yo si kosto ay mannemnem mo intoy iyat Apo Jesus mo sisya koma di akin anak.

*Pamagbaga Si Babag-en Ya din Among Da  
(Col. 3:22-25; Tito 2:9-10; 1 Ped. 2:18-20)*

<sup>5</sup> Dakayo ay bag-en, patien yo koma din among yo isnan daga. Ibainan yos daida yan ipakat yo din kabaelan yo ay mangamag sin ibaga da en dakayo ay kaman din iyat yo koma mo si Cristo di mangibabaa en dakayo. <sup>6</sup> Baken anggoy din pangiilaan din among yo en dakayo si pangsetan yo sin obla yo ta say panlaydan da en dakayo, mo adi ibilang yo ay mansilbi kayo en Cristo ya man-gaget kayos kankanayon ay mangamag sin layden Diyos. <sup>7</sup> Esten yo ngarud din obla yo dowan yo aben ganasen ay kaman si

\* **5:31** Genesis 2:24. \* **6:3** Deuteronomio 5:16.

Cristo di pansilsilbian yo ay baken owat ipogaw. <sup>8</sup> Tan ammo yo ay gon-gonaan din Apo din am-in ay ipogaw sin siged ay amagen da olay mo bag-en sisya ono baken.

<sup>9</sup> Dakayo pay abe ay among da et masapol ay siged abe di iyat yo sin babag-en yo. Adi yo paeg-egyaten daida, tan ammo yo ay nan-iso kayo sin babag-en yo sin pangilan di Apo ed langit ay apo tako am-in, et magay ipogaw si idomdoma na.

### *Din Salida Ay Indawat Diyos*

<sup>10</sup> Siya na di kakdengan di ibagak en dakayo. Awaten yo din panakabalin ay oka tako ay naitatapi en Apo Jesus ta say papipigsaen yo di pammati yo. <sup>11</sup> Osalen yo abe din am-in ay indawat Diyos ay salida ta say adi kayo maabak sin lawa ay pangietek Satanas. <sup>12</sup> Tan baken ipogaw di kaibaw tako, mo adi din papangolo ya tuturay di dimonyo ed daya ya din mankakekedse ay kaanianito ya din odom ay manakabalin ay adi kaila ay mangiturturay sin ipogaw ay deda sin mabolinget isnan daga. <sup>13</sup> Siya di di begew ay masapol ay osalen yo din am-in ay salida ay indawat Diyos ta say nakasagana kayo mo waday mapasamak si lawa. Tan mo say iyat yo di, kokomneg kayo ay mangobat en Satanas enggana ay somaldeng di gobat, et adi polos makaabak en dakayo.

<sup>14</sup> Da naey ngarud di kaman armas ya badon di soldado ay kasapolan yo ta say nakasagana kayo ay makigobat. Din ibilko yo et say pangibagaan yo sin tet-ewa. Din ibado yo abe ay manalida sin pagew yo et din nalinteg ay kabibiyag yo. <sup>15</sup> Din isapatos yo pay ay makapet sin pandad-anan yo et din siged ay damag ay maipanggep sin talna ay idawdawat Diyos. <sup>16</sup> Din kasay yo et din pammati yo en Cristo. Say osalen yos kankanayon ta komedyas ya mad-ep din manbidbidang ay pana ay bekasen Satanas. <sup>17</sup> Din ihelmet yo abe et din namnama yo ay maisalakan kayo. Ya din kampilan yo et din kalin Diyos ay ipanemnemnem din Ispirito Santo en dakayo.

<sup>18</sup> Sin pangos-osalan yo am-in en dana, kanayon koma ay mankararag kayo en Diyos ay mangikarkararag ya mankedkedaw sin ipanemnemnem di Ispirito Santo en dakayo. Isonga adi kayo aben linglinglingan ay mankedaw si tolong en Diyos para sin am-in ay ipogaw na, mo adi siliban yo ta man-gaget kayo ay mangikararag en daida si kanayon. <sup>19</sup> Ikararagan yo kod abe si sak-en ta itdon Diyos din ibagak mo mankasabaak ya ta tomoledak ay mangipaammo sin siged ay damag ay adi naipaammo ed idi. <sup>20</sup> Tan inbaan Cristo si sak-en ay panakaawak na ta ipaammok din nay siged ay damag, et say begew ay naibabalodak ed wani. Isonga ikarkararagan yos sak-en ta tomoledak ay mangikasaba, tan say kosto ay iyat ko koma.

### *Din Kakdengan Di Solat*

<sup>21</sup> Si Tikicus di ibaak en dakayo ta ipaammo na din am-in ay mapaspasamak en sak-en. Sisya di esa ay laylaydek ay agi tako ya matalek ay mansilbi en Apo. <sup>22</sup> Isonga ibaak sisya en dakayo ta ipadamag na din maam-amag en dakami isna ya ta papigsaena di nemnem yo.

<sup>23</sup> Sapay koma ay aag-i ta gon-oden yo di talna ay mapmapo en Diyos Ama ya en Apo Jesu Cristo ya ta papigsaen da din pammati yo ta say mataptapian abe din panlilinaydan yo. <sup>24</sup> Sapay koma abe ta seg-angan Diyos dakayo am-in ay komakaman di layad na en Jesu Cristo ay Apo tako.

## **Din Solat San Pablo Sin Taga-Filipos Maipanggep Sin Solat Ay Nay**

Din solat ay nay et insolat Pablo sin damo ay gimong di mamati ay binangona sin probinsiya ay Macedonia ed Europa (Inam-amag 16:6-40). Sin nangisolatanas na, naibabalod begew sin nangikaskasabaana sin siked ay damag ay maipanggep en Apo Jesu Cristo.

Di esa ay gapo ay insolat na na et ta man-iyaman sin mamati ed Filipos sin badang ay inpaw-it da en sisya. Wada abe di inbaga na ay mangiparagsak en daida ya mangipapigsa sin pammati da tan into et mo sinmadot da begew sin naibabalodana ya din ligat abe ay nilaklak-am da.

Binagbagaanas daida ta tadonen da koma din nangipababaan Cristo sin awak na sin kawada nas nan daga ya ta nemnemen da koma din pansigdan di iib-a da ay baken owat din pansigdan da. Inpanemnem na en daida ay maisalakan da begew sin seg-ang Diyos ya din pammati da en Cristo et anggoy, isonga adi da koman pantaltalkan din linteg Moses ono ogali ay kanan di ipogaw ay siyat maonodan. Wada abey inbaga na en daida ay maipanggep sin natalna ay nemnem ay idawdawat Diyos sin mangikararag sin problima na en sisya ya din gon-gona ay awni et idawat Diyos sin am-in ay mamati en Cristo sin kaitapian da en sisya ed langit.

### **Din Linaona**

Din panlogian di solat 1:1-11

Din kasasaad Pablo ed Roma 1:12-26

Din kabibiyag ay onodan koman di mamati 1:27-2:18

Maipanggep en da Timoteo en Epafroditus 2:19-30

Din poon di kinalinteg Pablo 3:1-15

Din man-it-itdos baken tet-ewa 3:16-21

Pamagbaga maipanggep si olnos ya talna 4:1-9

Din nan-iyamanan Pablo sin badang di taga-Filipos 4:10-20

Din kagdengan di solat 4:21-23

### *Din Panlogian Di Solat*

<sup>1</sup> Dakamis da Pablo en Timoteo ay mansilsilbi en Cristo Jesus, et naey di solat mi en dakayo am-in ed issa Filipos ay ipogaw en Diyos begew sin naitatapian yo en Cristo Jesus, pati din mangipangpangolo en dakayo ya din mamadbadang en daida. <sup>2</sup> Sapay koma ta wada en dakayo di seg-ang ya talna ay mapmapo en Diyos ay Ama tako ya si Apo Jesu Cristo.

### *Din Kararag En Pablo Para Sin Taga-Filipos*

<sup>3</sup> Mo nemnemek dakayo, man-iyamanak en Diyos ay pansilsilbiak. <sup>4-5</sup> Tan manlogi sin nanlogian di namatian yo enggana ed wani, binadbadangan yos sak-en sin oblak ay mangipaam-ammo sin siked ay damag. Isonga peteg di layad ko mo mankararagak para en dakayo. <sup>6</sup> Man-iyamanak abe tan dadlonak ammo ay itoltoloy Diyos din siked ay am-amagena sin biyag yo enggana ay matongpal din plano na para en dakayo sin agew ay kasin omalian Cristo Jesus. <sup>7</sup> Et kosto dedan mo siya di di nemnemnemek maipanggep en dakayo, tan kankanayon ay inemnemnem kos dakayo. Tan nakilaklak-am kayo dedan sin seg-ang ya badang Diyos en sak-en sin naibabalodak ya siya abe sin nangipanpaneknekak sin katet-ewan di siked ay damag ay maipanggep en Cristo. <sup>8</sup> Ammon Diyos ay peteg di iliw ko en dakayo, tan laydelaydek dakayo ay kaman din pananglayad Cristo Jesus en dakayo.



<sup>9</sup> Siya na di ikarkararag ko en Diyos. Kedkedawek ay pomigpigsa pay et koma din layad yo en sisya ya sin iib-a yo dowan aben mataptapian din ammo yo maipanggep en Diyos ya din kabaelan yo ay mangilasin mo sino di kosto ay amagen yo <sup>10</sup> ta say mabalin ay onodan yo din kasigedan. Tan mo siya di, pag siged di ogali yo, et maga polos di maipabasol en dakayo sin agew ay kasin omalian Cristo. <sup>11</sup> Badangan aben Jesu Cristo si dakayo ta ad-ado di siged ay pantongpalan di nalinteg ay ogali yo ta say dayawen di ipogaw si Diyos ya bigbigen da din kinasiged na.

### *Din Mayat Ay Nantongpalan Di Naibabalodan Pablo*

<sup>12</sup> Laydek ay ipaammo en dakayo ay aag-ik ay baken lawa din nantongpalan di napasamak en sak-en mo adi et mayat, tan masepsepsep pay dedan ay maam-ammoan din siged ay damag. <sup>13</sup> Tan inammoan din am-in ay sosoldado ay mambantay sin palasyo ya din odom ay ipogaw isna ay magay odom si begew ay naibalodak mo adi anggoy din nansilbiak en Cristo. <sup>14</sup> Begew abe sin naibalodak, pinmigma din talek di kaad-adoan ay aag-i tako en Apo, isonga adi da emeg-egyat mo adi et masepsep ay tomoltoled da ay mangibagbaga sin kalin Diyos.

<sup>15</sup> Tet-ewa pay kayman ay wada di mangikaskasabas maipanggep en Cristo begew sin apal da en sak-en, ngem wada pay abe di odom ay kosto di panggep da. <sup>16</sup> Da naey yan mankaskasaba da begew sin layad da en sak-en, tan maawatan da ay din gapo si naibalodak et tan dinotokan Diyos sak-en ay mangipaneknek sin katet-ewan di siged ay damag. <sup>17</sup> Ngem da dooy ay omapal et baken naimposan di iyat da ay mangikasaba si maipanggep en Cristo, tan layden da ay mangingato sin awak da ay daida koma di mangipangolo si ad-ado ay ipogaw, yan kanan da en mo say iyat da di, sepsepen da din ligat ko sin naey ay balodan. <sup>18</sup> Ngem olay say am-amagen da di, tan mo lawa ono siged di panggep da, basta maikaskasaba din maipanggep en Cristo et naragsakak met laeng.

### *Din Pansilbian Di Biyag Isnan Daga*

*(2 Cor. 5:6-10)*

<sup>19</sup> Baken anggoy nidi mo adi et itoltoloy ko abe ay manragsak, tan ammok ay din naligat ay kasasaad ko ed wani et mantongpal pay dedan sin pansigdak\* begew sin kararag yo ya din badang di Ispiriton Jesu Cristo. <sup>20</sup> Di namnamaek ya di peteg ay laydek et iwed koma di panbainak en Diyos mo adi omanay di toled ko ay mangikasaba sin kalin Diyos ed wani ay kaman ed idi ta maitoltoloy ay madaydayaw koma si Cristo begew en sak-en ed wani ay sibibiyagak ya olay mo mateyak. <sup>21</sup> Tan mo sak-en et iwed odom si panggep ko isnan kamatagok mo adi ta madayaw si Cristo, ngem mo mateyak, sigsiged pay, tan emeyak sin kad-ana. <sup>22</sup> Ngem mo sibibiyagak, maitoloy ko din naey ay nabanol ay oblak. Isonga mo sak-en koma di manpili, adiak ammo mo sino di kasigedan, <sup>23</sup> tan tet-ewa ay omolaw din dowa ay nay si nemnemnek. Tan laydelaydek ay komaanak koma isnan daga ay nay ta eyak makitee en Cristo, tan addawi ay sigsiged di. <sup>24</sup> Ngem begew en dakayo, kasasapalan ay matagoak pay isnan daga. <sup>25</sup> Magay dowadowak isna, isonga ammok ay adiak matey ed wani mo adi manteteek isna ta bomadagak en dakayo ta say pomigpigsa koma di pammati yo ya mataptapian abe di ragsak yo. <sup>26</sup> Laydek abe ay mantaoli issa ta mo makiteteek kasin en dakayo, say namnamed ay panaydayawan yo en Cristo Jesus begew en sak-en.

<sup>27</sup> Ngem olay mo sino di mapasamak, ilaen yo ta maikompas di kabibiyag yo sin siged ay damag ay maipanggep en Cristo. Ipapasnek yo ay mangiyat sidi ta mo emeyak issa yan ilaek dakayo, mo maga pay ta dengdengnek anggoy di maipanggep en dakayo, ammoak met laeng ay kanayon ay pan-es-esaen din Ispirito Santo di nemnem yo dowan kayo aben mankokompas ay mangipanpaneknek sin siged ay damag ay patpatien tako.

\* **1:19** Dodowa pay di olog nina sin Griego: 1) ...mantongpal pay dedan sin maibolosak; 2) ...mantongpal pay dedan sin maisalakanak.

<sup>28</sup> Maga koma di egyat yo en daida ay mangonkontra en dakayo, tan din toled yo et say sinyal ay pangpailaan Diyos en daida ay madosa dan to si eng-enggana. Et siya met laeng di pangammoan da ay maisalakan kayo. <sup>29</sup> Tan indawat Diyos en dakayo din gondaway ay mansilbi en Cristo, ngem din iyat yo ay mansilbi en sisya et baken anggoy din pammati yo en sisya mo adi din mapalpaligatan yo abe. <sup>30</sup> Et din laklak-amen yo ay ligat et mais-o sin inil-ila yo ay ligat ko ed idi ya siya abe sin dengdengngen yo ay mapaspasamak en sak-en ed wani.

## 2

### *Tadonen Tako Koma Din Nangipababaan Cristo Sin Awak Na*

<sup>1</sup> Ammo yo ay pinmigma di nemnem yo begew sin naitatapian yo en Cristo yan rinmagsak kayo abe begew sin layad na en dakayo. Makikadkadwa kayo abe sin Ispirito Santo yan ammo yo abe ay man-asise-gang. <sup>2</sup> Gapo ta tet-ewa am-in dana, pangaasi yo kod ta man-es-esa abe di nemnem ya panggep yo ya ta tadonen yo am-in din panglaydanan Cristo en dakayo ta say maragsakanak ay kosto. <sup>3</sup> Di panggep yo ay mangamag si olay sino et baken koman din kaingatoan ono pansigdan di awak yo ono din kait-ekan yo, mo adi et ibaba yo di nemnem yo ta say ibilang yo ay napatpateg di gagait yo mo din awak yo. <sup>4</sup> Nemnemen yo koma abe din pansigdan di gagait yo ay baken owat din pansigdan yo et anggoy.

<sup>5</sup> Tadonen yo koma di nemnem ya kabibiyag en Cristo Jesus. <sup>6</sup> Tan olay mo sigod ay wada en sisya din kosto ay kinadiyos en Diyos, adi na inapilit ay gon-oden din kosto ay kinangaton Diyos, <sup>7</sup> mo adi tinaynana et nanbalin si ipogaw. Et sin nanbalinana si ipogaw, mais-o din kailaana sin kailaan di iib-a na ay ipogaw. Inbilang na abe ay bag-en sisya, <sup>8</sup> et inbababa na di nemnem na ta tongpalena din panggep Diyos en sisya olay mo say nakateyana. Di inyat na abe ay natey et kaeegyat ya kababain, tan nailansa sin krus. <sup>9</sup> Isonga inpangaton Diyos sisya ta sisya di kangatoan sin am-in ay wada <sup>10</sup> ta say madayaw sisya. Tan din am-in ay wada ed langit ya isnan daga ya olay din natenatey ya odom ay adi kaila et mandokmog da am-in ay mandayaw en sisya <sup>11</sup> ay mangmangwani en si Jesu Cristo din Apo. Et say kaidaydayawan Diyos Ama.\*

<sup>12</sup> Isonga naey di ibagak en dakayo ay gagayyem ko. Mo siya di di inam-amag Cristo, masapol abe ay managtongpal kayo. Sin kawadak sin kad-an yo, kanayon ay pinatpati yos sak-en, ngem ed wani ay kinmaanak en dakayo, namnamed koma di iyat yo ay mamati sin nay ibagbagak. Itoltoloy yo ngarud ay mangam-amag sin siged ay pantongpalaan koman di pammati yo enggana ay matongpal din pangisalakanan Diyos en dakayo down kayo et ibainan sisya ay kosto. <sup>13</sup> Tan si Diyos met laeng di wada en dakayos kankanayon ay mangidawdawat si layad yo ay mangamag sin laydena, et sisya abe di mangidawdawat si kabaelan yo ay manongpal.

<sup>14</sup> Sin am-in ay am-amagen yo, adi kayo manmaymayotmot ya makisongsongbat <sup>15</sup> ta say maga di maipabasol en dakayo ay an-ak Diyos ya pag siged di ogali yo. Tan olay mo makitetee kayo si lawa ya managbasol ay ipogaw sin nay ay daga, maga koma pay dedan di pankolongan yo ta say maiarig kayos tatalaw ay maningtinggaw sin labi, <sup>16</sup> down kayo et ipaam-ammo en daida din kalin Diyos ay pangaan das biyag ay iwed patingga na. Tan mo say amagen yo di, peteg di ragsak ko begew en dakayo sin agew ay kasin omalian Cristo, tan maipaila ay baken sayang di inpakpakat ko ay obla. <sup>17</sup> Waday iarig ko en dakayo. Mo waday animal ay idaton di ipogaw en Diyos, wada abey danom di obas ay isiit da ay tapin di daton ay sana. May ngarud, din pammati yo et kaman say idaton yo en Diyos. Et gapo ta dandani samet din pomsean da, maiarig abe di biyag ko sin danom di obas ay makidaton en Diyos. Ngem olay mo say namnamaek, naragsakak

\* **2:11** Isaias 45:23.

pay dedan downanak aben makiragsak en dakayo. <sup>18</sup> Yan dakayo abe et makiragsak kayo koma en sak-en.

### *Maipanggep En Da Timoteo En Epafroditus*

<sup>19</sup> Mo ipalobos Apo Jesus, namnamaek ay adi mabayag yan ibaak si Timoteo en dakayo ta say mo mantaolis sisya, say panragsakan di nemnem ko begew sin ipadamag na maipanggep en dakayo. <sup>20</sup> Magay ammok si odom ay gait ko si tet-ewa ay mangisakit en dakayo mo adis sisya et anggoy. <sup>21</sup> Tan am-in din odom et din pansigdan da anggoy di nemnemnemen da ay baken din layden Jesu Cristo si amagen da. <sup>22</sup> Ngem si Timoteo pay et ammo yo met ay siged di ogali na, tan inil-ila yo ay kaman kamin sin-ama sin nan-ob-oblaan mi ay nangikaskasaba sin siged ay damag. <sup>23</sup> Namnamaek ngarud ay sisya di ibaak en dakayo ay dagos mo ammoak din kagdengan di kasok. <sup>24</sup> Et sapay koma abe ta ipalobos din Apo ay adi mabayag yan mabalin ay waday wayak ay enak aben pasyalen dakayo issa.

<sup>25</sup> Ninemnem ko abe ay masapol ay pasaaen din agi tako ay si Epafroditus ay kaoblaak ya gait ko ay soldadon Cristo. Sisya di inbaa yo en sak-en ay bomadang sin am-in ay masapol ko, <sup>26</sup> ngem ipasaak en dakayo issa tan mailiw en dakayo yan peteg ay madandanagan sin nangammoana ay dinnge yo ay mansakit sisya. <sup>27</sup> Tet-ewa ay palalo di sakit na, tan nganngani ay matey, ngem laton ay sineg-angan Diyos sisya. Et baken sisya anggoy di sineg-angana mo adi sak-en abe ta adi masepsep din sakit di nemnem ko mo matey sisya. <sup>28</sup> Isonga laydelaydek ay pantaolien sisya ta maragsakan kayo kasin mo ilaen yo ya ta say tomalna abe di nemnem ko. <sup>29</sup> Peteg koma ngarud di ragsak yo ay mangawat en sisya, tan tet-ewa ay agi tako begew sin naitatapiana en Apo. Din ipogaw ay ison Epafroditus et mayat mo patgen yo, <sup>30</sup> tan mo sisya et istay matey begew sin nangam-amagana sin inpaoblan Cristo en sisya, yan inposta nan biyag na ay mamadbadang en sak-en sin kamaga yo.

## 3

### *Din Kinalinteg Ay Maipoon Sin Pammati En Cristo*

<sup>1</sup> Di esa pay ay ibagak en dakayo ay aag-i et manragsak kayo koma begew sin naitapian yo en Apo. Mo sak-en et adiak maom-oma ay mangipidwapidwa sin inbag-bagak en dakayo, et say pansigdan yo ta adi kasangsangaw di pammati yo. <sup>2</sup> Siliban yo koma di ipogaw ay mangam-amag si lawa ay iarig kos maangat ya kadodogis ay aso. Ipapilit da ay mo adi kakogit di ipogaw, adi maisalakan. <sup>3</sup> Ngem di katet-ewa na et datako di ibilang Diyos ay nakogit ay baken daida, tan mo datako et daydayawen tako si Diyos sin panakabalin di Ispirito na. It-ek tako abe si Cristo Jesus. Adi tako pantaltalkan din kogit ya odom ay linteg ono ogali ay kanan di ipogaw ay siyat maonodan.

<sup>4</sup> Mo waday ipogaw si mabalin ay mantalek sin kaman dana, maga di odom mo adi si sak-en. Olay mo sino di mangwani en waday inamag na ono kabigbigana ay pantaltalkana ay say maisalakanana, namnamed en sak-en. <sup>5</sup> Tan dengngen yo na: nakogitak sin maikawao ay agew ko, tan naianakak ay Judio ay polin Benjamin ay anak en Israel. Puroak abe ay Hebreo, tan Hebreo da amak, ya Hebreo abe din kalik ya ogalik. Mo maipanggep abe sin linteg ay indawat Diyos en Moses, in-inset ko ay nanongtongpal, tan Fariseoak. <sup>6</sup> Palalo abe ay insaksakit ko din linteg mi ay sana enggana ay dadlonak pinalpaligat din mamati en Jesus. Isonga mo maibasar sin linteg, peteg ay nalintegak, tan maga met di nangipabpabasol en sak-en. <sup>7</sup> Ngem begew en Cristo, am-in dadi ay kanak en pansigdak ed idi et ibilang ko ay maga baw di silbi na ed wani. <sup>8</sup> Et baken anggoy nidi mo adi ibilang ko ay iwed polos silbin di am-in mo is-ok sin kinabanol di pakiam-ammoak en Cristo Jesus ay Apok, tan addawi ay nabanbanol di mo olay sino ay odom ay banag. Begew en sisya, tinaynak am-in dadi et ibilang ko ay owat basura ta say

mabalin ay gon-odek din pakikadkadwaak en Cristo <sup>9</sup> ya maitatapiak en sisya. Isonga din kinalinteg ko ed wani et baken din maibasar sin nanongtongpalak sin linteg mo adi din kinalinteg ay idawdawat Diyos begew sin pammatik en Cristo et anggoy. <sup>10</sup> Magay odom si panggep ko mo adi ta ammoak si Cristo ay kosto ya lak-amek din panakabalin ay okan Cristo sin kasinan natagoan. Ngem baken anggoy nadi mo adi ta lak-amek abe din ligat na ya maitapiak en sisya ay matey. <sup>11</sup> Tan namnamaek dedan ay tagoen Diyos kasin si sak-en.

### *Din Gon-gona Ay Ipakpakat Pablo Ay Gon-oden*

<sup>12</sup> Adiak kanan en enggay indasak dana ya adiak aben kanan en enggay maga di kolang ko. Ngem ipakat ko din am-in ay kabaalak ta tongpalek din panggep Cristo sin nangipabalinana en sak-en ay ipogaw na. <sup>13</sup> Aag-i, tet-ewa kayman ay adiak pay laeng indasan na, ngem din am-amagek ed wani et adiak nemnemnemen din inam-amag ko ed idi mo adi imongsan kon nemnem ko sin daan matongpal ay planon Diyos para en sak-en. <sup>14</sup> Ipakpakat ko din kabaalak ta domatengak sin maiarig si patinggan di longbaan ta say gon-odek din gon-gona ay idawat Diyos sin am-in ay inayagana ay maitapi en sisya ed langit begew en Cristo Jesus.

<sup>15</sup> Kaman nidi koma di nemnem tako am-in ay naket-eng di pammati na. Ngem into et mo wada di natken di nemnem na en dakayo, si Diyos di mangipaammo sin kosto en sisya. <sup>16</sup> Ngem olay mo sino di wada sin nemnem di odom, din masapol en datako am-in et ta itoltoloy tako ay mangonod sin inpaammon Diyos en datako ed idi ay kosto.

<sup>17</sup> Sapay koma ay aag-i ta man-es-esa di nemnem yo am-in sin panadtadonan yo en sak-en. Ilaen yo abe din mangon-onod sin kabibiyag ay inpail-ila mi en dakayo ta daida abe di tadonen yo ay baken din odom. <sup>18</sup> Tan ad-ado da di mangonkontra en Cristo, tan laslasoyen da din nateyana sin krus babaen sin lawa ay kabibiyag da. Namin ad-ado di nangibagbagaak isna en dakayo ed idi, ngem ipidwak pay dedan ed wani down aben mantededted di lowak ay mannemnem en daida. <sup>19</sup> Tan din pantongpalaan di biyag da et madosadosa da ay eng-enggana sin ed inferno. Tan din panbalbalinen da ay diyos da et din layden di awak da. Et din it-it-ek da et din kababain ay am-amagen da. Din naimongsanan aben di nemnem da et din wadas nan daga. <sup>20</sup> Ngem mo datako pay, ed langit di kosto ay ili tako, et siya abe di kapoan din sedsed-en tako ay si Apo Jesu Cristo ay mangisalakan en datako. <sup>21</sup> Panbalinena din naey ay kaseseg-ang ya matey ay awak tako si kaman din kagkagam-is ay awak na sin kasinan natagoan. Et mabalin ay amagena di begew sin panakabalina ay mangawis si am-in ay wada ta manpaituray da en sisya.

## 4

### *Din Maod-odi Ay Bilbilin Pablo*

<sup>1</sup> Isonga dakayo ay aag-ik, ipapasnek yo ay mamati en Apo. Laydelaydek dakayo ya peteg abe ay mail-iliwak en dakayo, tan dakayo kayman dedan di mangiparagragsak en sak-en ya dakayo pay di kaman gon-gonak sin oblak.

<sup>2</sup> Dakayo ay da Evodia en Sintike, pangaasi yo koma ta mankinaawatan kayo, tan kaman kayo dedan sin-agi begew sin nakies-esaan yo en Apo. <sup>3</sup> Sik-a abe ay matalek ay gait ko,\* badangam kod da naey ay babbabai, tan nagaget da iman ay nakiob-oblak en sak-en sin nangikaskasabaak sin siged ay damag, pati da Clemente ya din odom ay kaoblaak ay wada di ngadan da am-in sin libro ay naisolatan di ngadngadan di waday biyag na ay iwed patingga na.

<sup>4</sup> Kanayon koma ay manragsak kayo begew sin naitatapian yo en Apo. Ipidwak kasin ay mangwani en manragsak kayo koma. <sup>5</sup> Ipaila yo din kinaanos yo sin am-in ay

\* **4:3** Di esa abe ay kaiologan nina sin Griego et: Sik-a abe ay Syzygus ay matalek... Din olog di syzygus sin kalin di Griego et gait.

ipogaw, tan dandani din omalian din Apo. <sup>6</sup> Olay sino ay ligat di domateng en dakayo, maga koma di pandandanagan yo mo adi et ikarkararag yo en Diyos ay mankedkedaw en sisya sin kasapolan yo dowan kayo aben man-iyaman en sisya. <sup>7</sup> Tan mo say amagen yo di, wada en dakayo din talna ay idawdawat Diyos ay adi mabalin ay las-ian di nemnem di ipogaw, et say kaman gowardiya ay mamananbantay sin nemnem yo begew sin naitatapihan yo en Cristo Jesus.

<sup>8</sup> Din maodi ay ibagak en dakayo ay aag-i et kanayon koma ay nemnemnemen yo din tet-ewa, din napateg, din kosto, din nasantoan, din kagkagam-is, ya din madayaw. Yan olay mo sino pay di odom ay siged ono mait-ek et say nemnemnemen yo koma. <sup>9</sup> Am-in abe ay inad-adal yo en sak-en ay inil-ila ya dindinngge yo et say on-onodan yos kankanayon. Et din Diyos ay mangidawdawat si talna et say maitatakdo en dakayo.

### *Din Nan-iyamanan Pablo Sin Badang Di Taga-Filipos*

<sup>10</sup> Peteg di layad ko sin naitatapihan en Apo, tan ed wani, waday waya yo kasin ay binmadang. Nabayag kayman ay adi kayo binmadbadang, ngem ammok kayman ay din gapo na et baken yon niliw-an si sak-en, mo adi et magay waya yo ay mangipaila sin layad yo ay bomadang. <sup>11</sup> Adiak kanan na begew sin kakolang di masapol ko, tan inpaingsak ay mapnek sin olay sino ay kasasaad ko. <sup>12</sup> Nilaklak-am ko ay nankolkolang ya siya abe ay nasobsobraan. Olay mo sino di mapasamak en sak-en, olay mo madagda-gaanganak ono mamabsogak ya mo kolang ono sobra di masapol ko, inaammok din iyat ko ay mapnek. <sup>13</sup> Kabaalak ay sangoen din am-in ay mapasamak begew sin naitatapihan en Cristo ay mangipabikbikas en sak-en. <sup>14</sup> Ngem olay mo siya di, siged kayman dedan di inyat yo ay tomolong en sak-en isnan maligligatak. <sup>15</sup> Dakayo ay taga-Filipos, ammo yo met ay din damdamon di nangikaskasabaak sin siged ay damag en dakayo sin doy nanlobwatak ed Macedonia et magay odom ay gimong di mamati si namadbadang en sak-en mo adi dakayo et anggoy. <sup>16</sup> Olay sin doy kawadak ed Tessalonica et namidwa kayman ay inpawpaw-it yo din kasapolak. <sup>17</sup> Ngem laydek ay ipaammo en dakayo ay baken din idawdawat yo di an-anapek mo adi din kataptapihan di gon-gona yo. <sup>18</sup> Ed wani, maga met di kasapolak mo adi et sobra, tan laton ay inawat ko din am-in ay inpaw-it yo en Epafroditus. Et din inpaw-it yo ay sana et kaman dan manseng-ew ay maidaton en Diyos ay kapnekana ya panlaydana. <sup>19</sup> Et si Diyos ay pansilbiak ay adi kaabos di kinabaknang na di mangidawat en dakayo sin am-in ay kasapolan yo begew sin naitatapihan yo en Cristo Jesus. <sup>20</sup> Sapay koma ta daydayawen takos Diyos ay Ama tako si eng-enggana. Amen.

<sup>21</sup> Pakomostaak din am-in ay ipogaw en Diyos issa ay naitatapihan en Cristo Jesus. Din aag-i tako ay gait kos na et pakomostaan da abes dakayo, <sup>22</sup> pati din am-in ay ipogaw en Diyos isnan ed Roma, ngem namnamed din man-ob-obla sin beey di Emperador.

<sup>23</sup> Sapay koma ta seg-angan Apo Jesu Cristo si dakayo am-in.



## **Din Solat San Pablo Sin Taga-Colosas**

### **Maipanggep Sin Solat Ay Nay**

Din solat ay nay et insolat Pablo sin gimong di mamati ed Colosas ay esa ay ili ed Asia Minor ay naibanda sin belaan di agew ed Efeso. Baken si Pablo di namangon sin nay ay gimong, et adi na pinaspasyal si daida (2:1), ngem insaksakit na pay dedan et kanayon ay inkarkararaganas daida.

Nadamag Pablo ay waday nan-it-itdo si baken tet-ewa sin gimong ed Colosas. Din initdo da et mo layden di ipogaw ay maisalakan ya ammoan si Diyos ay kosto, adi omanay di pammati na en Cristo. Masapol kano ay tongpalena di odom ay ngilngilin ya bilbilin di ipogaw ya dayawena abe din anghel.

Isonga insolat Pablo na sin gimong di mamati ta ipaammo na en daida din katet-ewa na ay maipanggep en Jesu Cristo. Kanana en si Jesus di nangipaparsuaan Diyos sin am-in ay wada, isonga nangatngatos sisya mo din am-in ay anghel ya odom ay adi kaila. Wada abe en sisya din am-in ay kinadiyos Ama na, et magay odom ay napoan din baro ay biyag di mamati mo baken sisya. Isonga masapol ay adi masangangaw di mamati sin bilin ya ogalin di ipogaw mo adi si Cristo et anggoy di on-onodan ya pantaltalkan da.

#### **Din Linaona**

Din panlogian di solat 1:1-2

Din inkarkararag Pablo para sin mamati ed Colosas 1:3-14

Din kinangaton di saad Cristo ya din inamag na 1:15-23

Din nansilsilbian Pablo sin am-in ay mamati 1:24-2:5

Din kasasaad di mamati begew sin nakies-esaan da en Cristo 2:6-15

Pamagbaga ta adi tako masangangaw si baken tet-ewa ay mait-itdo 2:16-23

Din sigod ya din baro ay biyag 3:1-4:6

Din kakdenggan di solat 4:7-18

#### *Din Panlogian Di Solat*

<sup>1</sup> Sak-en si Pablo ay apostol en Cristo Jesus ay maibasar sin layden Diyos. Din gait kos na et din agi tako ay si Timoteo. <sup>2</sup> Naey di solat mi en dakayo ay ipogaw en Diyos ed Colosas ay matalek ay aag-i mi ay naitatapi en Cristo. Sapay koma ta wada en dakayo di seg-ang ya talna ay mapmapo en Diyos ay Ama tako.

#### *Din Inkarkararag Pablo Para Sin Mamati Ed Colosas*

<sup>3</sup> Mo ikarkararagan mis dakayo en Diyos ay Aman Jesu Cristo ay Apo tako, kanayon ay man-iyaman kami en sisya, <sup>4</sup> tan nadamag mi din maipanggep sin pammati yo en Cristo Jesus ya din layad yo sin am-in ay ipogaw en Diyos. <sup>5</sup> Et din pammati ya layad yo ay sana et maipoon sin namnamaen yo ay awaten yon to din indodolin Diyos ed langit para en dakayo. Inammoan yo di maipanggep sin nay ay namnamaen yo sin nanngaan yo ed idi sin tet-ewa ay kali ay din siged ay damag. <sup>6</sup> Et din nay ay siged ay damag et mandindinamag ed wani sin am-in ay ili isnan daga. Wada abey pantongtongpalana sin kabibiyag di ad-ado ay manmange ya mamatpati. Et kaman nidi met laeng di napadpadasan yo manlogi sin nanngaan yo si maipanggep sin seg-ang Diyos ya din nangammoan yo sin kosto ay kaiso na. <sup>7</sup> Din nangitdos na en dakayo et si Epafras ay esa ay laylayden mi ay gait. Matalek sisya ay panakaawak mi ay nakisilsilbi en Cristo. <sup>8</sup> Sisya abe di nangibaga en dakami si maipanggep sin layad yo en dakami ya sin iib-a yo ay idawdawat di Ispirito Santo.

<sup>9</sup> Isonga manlogi sin nandamagan mis maipanggep en dakayo, adi mi insalsaldeng ay mangikarkararag en dakayo. Kedkedawen mi en Diyos ta din Ispirito na di mangidawat sin am-in ay sirib ya panakaawat en dakayo ta say ammoan yo ay kosto din am-in ay laydena ay amagen yo. <sup>10</sup> Tan mo siya di, mabalin ay onodan yo din kabibiyag ay maikompas sin kinasiged di Apo yan kanayon ay amagen yo din panlaydana. Et sapay koma ta say omad-ado din am-in ay kalasin di siged ay am-amagen yo begew sin pangam-ammoan yo en Diyos.\* <sup>11</sup> Sapay koma abe ta din nakaskasdaaw ay panakabalin Diyos di mangipapipigsa sin nemnem yo ta olay mo sino di mapasamak en dakayo, mabalin ay maanosan yo dowan kayo aben maragragsakan. <sup>12</sup> Itoltoloy yo pay ay maniyaman en Diyos ay Ama tako ay nangidawat en datako si kalebbengan ay makibingay sin insasagana na para sin am-in ay ipogaw na ay naitatapi sin panturayana ay mapata. <sup>13</sup> Tan insalakanas datako sin panakabalin Satanas ay manturturay sin kad-an di mabolinget, et intapi nas datako sin panturayan di laydelaydena ay Anak na <sup>14</sup> ay nangsobot en datako ta mawayaan tako, laydena ay kalien, mapakawan din basbasol tako begew sin naitapian tako en sisya.

### *Din Kinangaton Di Saad Jesus Ya Din Inamag Na*

<sup>15</sup> Si Cristo di nangipaila mo sinoy ison Diyos ay adi kaila. Nawawadas sisya sin daan kaparsuaan di lobong, et nangatngato mo din am-in ay pinarsuan Diyos. <sup>16</sup> Tan sisya dedan di nangipaparsuaan Diyos sin am-in ay wada ed langit ya isnan daga ay maila ya adi kaila pati din am-in ay papangolo ya tuturay di aanghel ya odom ay adi kaila. Olay mo sino di wada et naparsua begew en sisya ya para en sisya. <sup>17</sup> Sin daan kawadaan di olay sino, nawawadas sisya, et sisya dedan di makaammo sin am-in ay wada ta say maoolnos da. <sup>18</sup> Sisya abe di makaammo en datako am-in ay mamati, isonga sisya di maiarig sin toktok tako yan datako di kamanan awak. Sisya abe di napoan din baro ay biyag tako, tan sisya di damo ay natago kasin ay adi kasin matey, ta say sisya di kangatoan sin am-in. <sup>19</sup> Tan layden Diyos ay wada din am-in ay kinadiyos na sin Anak na. <sup>20</sup> Et ninemnem na ay isag-ena kasin en sisya din am-in ay wada isnan daga ya ed langit babaen sin Anak na ay sana, isonga kinaana din nanasalin en daida en sisya babaen sin dadan Cristo ay inmayos sin nateyana sin krus.

<sup>21</sup> Olay dakayo ed idi et addawi kayo pay laeng en Diyos, et kinonkontra yos sisya begew sin lawa ay ninemnemnem ya inam-amag yo. <sup>22</sup> Ngem ed wani, nanbalinen Diyos dakayo ay gagayyem na ay naisag-en en sisya babaen sin nateyan di awak en Cristo ta say nasantoan ya nalinis kayo sin pangilaana† ya maga polos di maipabasbasol en dakayo. <sup>23</sup> Ngem masapol dedan ay ipapasnek yo ay mamati ay adi kayo mandowadowa ya masangsangaw, ya adi kayo kaaw-awis ay omaddawi sin namnama tako ay ibagbagan din siged ay damag. Tan din siged ay damag ay dindinngge yo et iso na din nandindinamag sin intiro ay lobong, yan siya met laeng din inkaskasabak sin nansilsilbiak en Cristo.

### *Din Nansilsilbian Pablo Sin Am-in Ay Mamati*

<sup>24</sup> Olay mo mapalpaligatak begew sin inkaskasabak ay nansigdan yo, naragsakak pay dedan, tan din ligat ko ay nay et say tobtob di ligat ay inanosan Cristo para sin am-in ay mamati ay maiarig ay awak na. <sup>25</sup> Tan dinotokan Diyos sak-en ay mansilbi sin am-in ay mamati, yan intalek na en sak-en din obla ay mangipaammo ay kosto sin kali na ta say pansigdan yo ay Gentil. <sup>26-27</sup> Din nay ay inpaam-ammok et adi naipaam-ammo manlogi ed nabaon sin olay sino ay ipogaw, ngem ninemnem Diyos ay mangipaammo

\* **1:10** Di esa abe ay kaiologan nina sin Griego et: Et sapay koma ta say omad-ado din am-in ay kalasin di siged ay am-amagen yo ya mataptapian abe din pangam-ammoan yo en Diyos. † **1:22** Di esa abe ay kaiologan nina sin Griego et: ...ta say nasantoan ya nalinis kayo mo ipapika nas dakayo sin sangoanana.

ed wani en datako ay ipogaw na pati dedan dakayo ay Gentil. Et siya na din kagam-is ya nakaskasdaaw ay inpaammon Diyos: mantetee si Cristo en dakayo, et sisya di pannamnamaan yo ay makilak-am kayo sin sigesiged ay biyag sin kad-an Diyos ed langit. <sup>28</sup> Isonga si Cristo di ikaskasaba mi sin am-in ay ipogaw. Osalen mi din am-in ay sirib mi ay mamagbaga ya mangit-itdo sin am-in ay ipogaw ta say mamagay pankolongan di pammati da sin pangiilaan Diyos mo adi et naket-eng da koma sin naitatapihan da en Cristo. <sup>29</sup> Ipakat ko din am-in ay kabaalak ta say matongpal dana ay mangos-osal sin napigsa ay panakabalin ay idawdawat Cristo en sak-en.

## 2

<sup>1</sup> Inbagak na en dakayo tan laydek ay ammoan yo ay ipakpakat ko din kabaalak para en dakayo ay taga-Colosas ya taga-Laodicea ya din am-in ay odom ay adi nangil-ila en sak-en. <sup>2</sup> Tan laydek ay pomigsa koma di nemnem yo ya man-es-esa kayo begew sin pan-asilaydan yo ta say adi kayo mandowadowa mo adi dadlon kayon maawatan din maipanggep si adi inpaammon Diyos ed idi, laydena ay kalien, din maipanggep en Cristo. <sup>3</sup> Tan si Cristo di pangammoan tako sin am-in ay naidodolin ay sirib ya nemnem en Diyos. <sup>4</sup> Inbagak dana en dakayo ta adi kayo kaiet-etekan si baken tet-ewa ay ibagbagan di nalaing ay manpilosopo. <sup>5</sup> Tan olay mo adiak makitetee en dakayo issa, nemnemnemek pay dedan si dakayo, et naragsaragsakanak sin nandamagak sin kinaolnos di nemnem yo ya kapigsan di pammati yo en Cristo.

### *Din Kasasaad Di Mamati Begew Sin Nakies-esaan Da En Cristo*

<sup>6</sup> Gapo ta inawat yo din tet-ewa ay mait-itdo ay si Cristo Jesus din Apo, masapol abe ay onodan yo di kabibiyag ay maibagay si ipogaw ay nakies-esa en sisya. <sup>7</sup> Din pammati yo en sisya et kaman koman din kaiw ay andoando di lamot na ono kaman din maam-amag ay beey ay makneg di tokod na. Onodan yo pay din naitdo en dakayo ay maipanggep en sisya ta say pomigsa pay et din pammati yo dowan kayo aben man-iyaman en Diyos si kanayon.

<sup>8</sup> Siliban yo ta adi kayo kaaw-awis ay mangonod si baken tet-ewa ay mait-itdo ay magay silbi na, tan din kaman nidi ay mait-itdo ay mangietek si ipogaw et adi maibasar en Cristo mo adi et din ogali ay ninemnem di ipogaw ed idi ya din bilbilin isnan daga.\* <sup>9</sup> Tan din katet-ewa na ay maipanggep en Cristo et nanbalin si ipogaw ngem wada pay dedan en sisya din am-in ay kinadiyos en Diyos. <sup>10</sup> Isonga nangatngato si Cristo mo din am-in ay adi kaila ay papangolo ya tuturay, et begew sin nakies-esaan yo en sisya, wada en dakayo din am-in ay kasapolan yo sin baro ay biyag yo.

<sup>11</sup> Begew abe sin nakies-esaan yo en sisya, waday pinadasan yo ay sinyal ay ipogaw en Diyos dakayo. Din pinadasan yo ay nay et maiarig sin kogit, ngem baken din kogit ay amagen di ipogaw sin awak mo adi din pangaanan Cristo sin lawa ay nemnem yo begew sin nakies-esaan yo en sisya. <sup>12</sup> Tan idi nabonyagan kayo, kaman kayon naitapi ay naiponpon sin naiponponan Cristo yan naitapi kayo abe ay natago sin kasinan natagoan begew sin pammati yo sin panakabalin Diyos ay nanago met laeng en Cristo. <sup>13</sup> Ed idi, kaman kayon natey maipanggep en Diyos begew sin basbasol yo ya gapo ta dakayo ay Gentil et magay ammo yo maipanggep sin linteg Diyos. Ngem ed wani, intapin Diyos dakayo sin baro ay biyag ay indawat na en Cristo tan pinakawana din am-in ay basol tako. <sup>14</sup> Din inamag Diyos para en datako et maiarig isna: ina na din listaan di basol ono otang tako en sisya ay manbegew sin adi tako nanongtongpalaan sin linteg na et inlansa na sin krus, laydena ay kalien, inwasit na din listaan pati din linlinteg ay nangipabpabasol en datako babaen sin nateyan Cristo sin krus. <sup>15</sup> Et babaen abe sin

\* **2:8** Di esa abe ay kaiologan nina sin Griego et: ...baken napo en Cristo mo adi et din ogali ay ninemnem di ipogaw ed idi ya din aanito ay manturturay isnan daga. Ilaen abe sin Galacia 4:3,9.

doy nateyana sin krus, kinaan Diyos din kalebbengan di manakabalin ay adi kaila yan inpaila na ay enggay naabak da sin pangilaan di am-in ay wada.

### *Pamagbaga Ta Adi Tako Masangangaw Si Baken Tet-ewa Ay Mait-itdo*

<sup>16</sup> Isonga adi yo koman patpatien din mangipabasbasol en dakayo ay mangmangwani en masapol ay onodan yo din ad-ado ay ngilngilin da ay kaman din maipanggep si makan ya mainom ya din ngilinen da ay agew ay tinawen ya din bemeskaan di bowan ya din Sabado ay pan-ibbayan da. <sup>17</sup> Tan am-in dana ay naitdo ed idi et kaman owat alidong ay mangon-ona sin akin alidong. Laydena ay kalien, say nangammoan di ipogaw ed idi ay wadan to di maisokat sin bilbilin ay sana. Ngem nay met ay dinmateng si Cristo ay din kosto ay kasokat na, isonga sisya koma di onodan tako. <sup>18</sup> Adi yo aben patpatien din manglaslasoy en dakayo ay mangipapilit ay ibaba yo din awak yo ay manongpal sin ngilngilin da ya maitapi kayo sin panaydayawan da sin aanghel. Da naey ay ipogaw et kanan da en waday naipaila en daida ay kaman iitaw ay say nanlasinan da, ngem din doy ay nangipangatoan das nemnem da et magay kosto ay kaibasarana, tan napo anggoy sin nailobongan ay nemnem da. <sup>19</sup> Naisian da en Cristo ay maiarig ay toktok tako ay mamati, ngem datako pay et naitatapi tako en sisya, tan datako di maiarig sin awak na. Yan makaammo din toktok sin am-in ay partin di awak ta awaten di esa ya esa din kasapolana ya kostokosto di kaiolosan ya kaimagan da am-in. Isonga madakdakdake din awak ay maibasar sin planon Diyos.

<sup>20</sup> Dakayo ay mamati, begew sin naitapian yo ay natey sin nateyan Cristo, napawayaan kayo sin bilbilin isnan daga.† Apay ngarud ay on-onodan yo pay laeng din ogalin di nailobongan ay ipogaw? Apay nga patpatien yo din bilbilin da ay kaman da naey: <sup>21</sup> “Adi yo eg-egnan dadi! Adi yo tamtaman dasa! Adi yo giwgiwiten dana!”? <sup>22</sup> Tan din am-in ay makan ya odom ay ibagbagan din bilbilin da ay sana et inamag Diyos ta osalen di ipogaw ta say maabos. Din napoan aben da doy ay bilbilin ya it-itdo da et din nemnem di ipogaw et anggoy. <sup>23</sup> Kaman kayman wada di kinasiged din bilbilin da ay doy, tan din mangon-onod sidi et esten da ay mandayaw si aanghel yan ipababa da din awak da ay manongpal sin ogali da dowan da pay dadlon paligligaten din awak da. Ngem din katet-ewa na et magay silbin dana ay manopap sin laylayden di awak.‡

## 3

### *Din Sigod Ya Din Baro Ay Biyag*

<sup>1</sup> Gapo ta naitapi kayo ay natago sin kasin natagoan Cristo, patgen yo koma din wada sin panturturayan Cristo sin makannawan en Diyos ed langit. <sup>2</sup> Say nemnemnemen yo koma di ay baken din wadas nan daga. <sup>3</sup> Tan kaman kayon natey maipanggep sin sigod ay biyag yo, yan din baro ay biyag yo et adi maila ay kosto din iso na, tan naitapi kayo sin biyag Cristo ay nakies-esa en Diyos ed langit. <sup>4</sup> Din sana ay biyag yo et say biyag en Cristo met laeng, isonga mo manpaila kasin sisya, maitapi kayo abe en sisya ya makilakam kayo sin kinasiged ya kinangato na.

<sup>5</sup> Isonga masapol ngarud ay pandokogan yo din sigod ay nemnem ya ogali yo ay lawa ay kaman din kamalala ya odom ay kalasin di kadodogis, din am-in ay layden di awak ay lawa, ya din kinagamgam, tan din gamgamen di ipogaw et say kamanan diyos. <sup>6</sup> Tan din kaman dadi ay maam-amag et say begew ay dosaen Diyos din adi manongtongpal en sisya. <sup>7</sup> Et isona di din kabibiyag yo sin daan kayon namatian. <sup>8</sup> Ngem ed wani masapol ay liklikan yo am-in dana: adi kayo bomongbonget, adi kayo mannemnemnem ay mamaligat sin iib-a yo, ya adi yo palawlawen daida. Adi yo aben pabelbelaen di kadodogis ay kali. <sup>9</sup> Adi kayo pay manlilinstog, tan enggay inwasit yo

† **2:20** Di esa abe ay kaiologan nina sin Griego et: ...napawayaan kayo sin aanito ay manturturay isnan daga. ‡ **2:23** Di esa abe ay kaiologan nina sin Griego et: ...magay silbin dana, mo adi et mantongpal da sin kapnekan di laylayden di awak.

din sigod ay nemnem ya ogali yo <sup>10</sup> yan inawat yo din baro ay nemnem ay indawat Diyos ay barbaroana si kanayon ta komaman kayo en sisya ya ammoan yos sisya ay kosto. <sup>11</sup> Begew sin nay ay inamag Diyos, maga di kailasinan din am-in ay ipogaw ay binaroana. Olay mo Judio ono Gentil, olay nakogit ono adi nakogit, olay mangili ya boso, ya olay mo bag-en ono baken bag-en, nan-iso da am-in sin pangilan Diyos, tan si Cristo et anggoy din napateg, et wadas sisya sin am-in ay namati.

<sup>12</sup> Isonga gapo ta dakayo din pinilin Diyos ay ipogaw na ay laylaydena, onodan yo koma dana ay ogali: managseg-ang ya mabmabadang kayo ya ipababa yo di nemnem yo dowan kayo aben naanos. <sup>13</sup> Anosan yo koma abe din pankolkolongan di iib-a yo yan manpinakawan kayo mo waday panririan yo ono bomasol en dakayo ay kaman din inyat din Apo ay namakawan en dakayo. <sup>14</sup> Din masapol abe ay itapi yo sin am-in dana ay siged ay ogali et layad, tan mo man-asilayad kayo, magay kolang din pan-esaan di nemnem yo. <sup>15</sup> Sapay koma abe ta din talna ya olnos ay idawdawat Cristo di mangiturong sin nemnem yo si kanayon, tan din begew ay intapin Diyos dakayo sin esesa ay awak en Cristo et ta lak-amen yo din talna ya olnos ay sana. Et adi yo koman linglinglingan ay man-iyaman en sisya. <sup>16</sup> Kankanayon koma ay nemnemnemen yo din nabanol ay init-itdon Cristo. Osalen yo abe din am-in ay sirib ay indawat na ay man-asiitdo ya manbinagbaga. Kantaen yo din naikansiyon ay kalin Diyos ya odom ay kankantan di mamati dowan kayo aben man-iyaman en Diyos sin nemnem yo. <sup>17</sup> Olay mo sino ay am-amagen ya ibagbaga yo et nemnemnemen yo ay dakayo din panakaawak Apo Jesus dowan kayo aben man-iyaman en Diyos Ama begew en sisya.

*Bilbilin Maipanggep Si Pamilya*  
(Efeso 5:22-33; 1 Ped. 3:1-7)

<sup>18</sup> Dakayo ay babbabai et manpaituray kayo sin as-awa yo, tan say maibagay sin mamati en Apo. <sup>19</sup> Dakayo abe ay lallalaki et masapol ay laydelayden yo din as-awa yo. Adi yo aben ibongbonget daida mo adi et naanos kayo koma en daida.

<sup>20</sup> Dakayo ay anan-ak, pasien yo din ama yo ya ina yo si kankanayon, tan say panragsakan Diyos yan siya abe di kosto ay amagen koman di mamati. <sup>21</sup> Dakayo pay ay aam-a da et adi yo palpalaloen din panyamyamyaman yo sin an-ak yo ta adi da madisdismaya.

*Bilbilin Maipanggep Si Bag-en Ya Din Among Da*  
(Efeso 6:5-9; Tito 2:9-10; 1 Ped. 2:18-20)

<sup>22</sup> Dakayo ay bag-en, tongpalen yo din am-in ay ibagbagan din among yo isnan daga. Et baken anggoy din pangiilaan da en dakayo si pangsetan yo sin obla yo ta say malaydan da en dakayo, mo adi naimposan koma din iyat yo ay manongpal en daida begew sin pangibainan yo en Apo. <sup>23</sup> Olay mo sino di am-amagen yo, ipakat yo din kabaelan yo ay mangamag ay kaman si Cristo di pansilsilbian yo ay baken owat ipogaw. <sup>24</sup> Tan ammo yo ay idawat din Apo en dakayo din gon-gona ay inkari na sin ipogaw na, tan si Cristo din Apo ay tet-ewa ay pansilsilbian yo. <sup>25</sup> Mo wada abey mangamag si lawa, sobalitan Diyos ay kosto, tan magay ipogaw si pabpaborana sin pangokomana en daida.

## 4

<sup>1</sup> Dakayo pay abe ay among di bag-en et masapol ay siged ya kosto di iyat yo en daida, tan ammo yo ay wada abe dedan di Apo yo ed langit.

*Bilbilin Maipanggep En Daida Am-in Ay Mamati*

<sup>2</sup> Ipapasnek yo am-in ay mankararag si kanayon dowan yo aben esten ta adi masangsangaw di nemnem yo sin ikarkararag yo, ya man-iyaman kayo abe en Diyos. <sup>3</sup> Ikararagan yo abe si dakami ta idawat Diyos di wayawaya mi ay mangikaskasaba si adi naipaammo ed idi ay maipanggep en Cristo, tan din nangamagak sidi et siya dedan di



begew ay naibabalodak ed wani. <sup>4</sup> Omikararag kayo ngarud ta kabaalak ay mangilawag ay kosto, tan say kosto ay iyat ko koma.

<sup>5</sup> Annadan yo di iyat yo en daida ay adi mamati ta magay kasnitan da en dakayo down kayo aben nakasagana si kankanayon ay mangibaga en daida si maipanggep en Cristo. <sup>6</sup> Kanayon koma abe ay omiparagsak di iyat yo ay mankali down aben makaay-ayo di kadngeana ta say ammoan yo ay manongbat si kosto sin olay sino ay mansalodsod en dakayo ta maibagay din songbat yo.

### *Din Kakdengan Di Solat*

<sup>7</sup> Si Tikicus di ibaak en dakayo ta ipaammo na din am-in ay mapasasamak en sak-en. Sisyas di esa ay laylaydek ay agi tako ay matalek ay nakisilbi en Cristo. <sup>8</sup> Isonga ibaak sisya en dakayo ta ipadamag na din mapasasamak en dakami isna ya ta paragsakena di nemnem yo. <sup>9</sup> Makeey abe din laylayden mi ay kailian yo ay si Onesimus ay matalek ay agi tako. Daida di en mangipadamag en dakayo sin am-in ay mapasasamak isna.

<sup>10</sup> Si Aristarkus ay gait ko ay balod ya si Marcos ay kasingsing en Barnabas et pakomostaan das dakayo. (Enggay inawat yo di bilin ay maipanggep en Marcos ay mo en manpasyal issa, awaten yo ay kosto.) <sup>11</sup> Si Jesus Justus et pakomostaana abes dakayo. Am-in ay Judio ay mamati ay wadas na et anggoy din tolo ay nay di nakiob-oblak en sak-en ay mangibagbaga si maipanggep sin panturturayan Diyos. Ad-ado di badang da en sak-en ay inmparagsak.

<sup>12</sup> Si Epafras ay esa pay ay kailian yo ay mansilbi en Cristo et pakomostaana abe si dakayo. Kanayon ay ipapasnek na ay mangikarkararag en dakayo ta pomigsa koma di pammati yo ya magay pankolongan yo ta say dadlon yon ammoan ya pasien din am-in ay layden Diyos ay adi kayo mandowadowa. <sup>13</sup> Paneknekak ay nagaget sisya ay man-ob-oblak para en dakayo ya para en daida abe ed Laodicea ya ed Hierapolis. <sup>14</sup> Din gayyem mi ay si Doktor Lucas ya si Demas abe et pakomostaan das dakayo.

<sup>15</sup> Sak-en abe dedan et pakomostaak din iib-a tako ay mamati ed Laodicea ya siya abe en Nimfa ya din gimong di mamati ay matoptopog sin beey na. <sup>16</sup> Mo makdeng ay maibasa en dakayo din nay ay solat, ipaw-it yo kod sin gimong di mamati ed Laodicea ta basaen da abe. Asi yo aben alaen din solat ko en daida ta say basaen yo issan ed Colosas. <sup>17</sup> Di esa pay et ibaga yo kod en Arkippus ay tongpalena koma din oblak ay naitalek en sisya begew sin nakies-esaana en Apo.

<sup>18</sup> Sak-en si Pablo ay nangisolat sin nay kakdengan di solat ay inpaisolat ko. Adi yo kod liwliw-an ay naibabalodak. Sapay koma ta seg-angan Diyos dakayo am-in.

## **Din Damo Ay Solat San Pablo Sin Taga-Tessalonica Maipanggep Sin Solat Ay Nay**

Din ili ay Tessalonica et kapital di probinsiya ay Macedonia. Say inmeyan da Pablo sin kinmaanan da ed Filipos, et nangaskasaba das di sin sinagoga si toloy Sabado. Wada di at-atik ay Judio ya ad-ado ay Gentil ay namati. Asi et din Judio ay adi namati et ginolo da din intiro ay ili begew sin apos da, et kapilitan ay komaan da Pablo. Inmey da ed Berea et pag ed Athens. Sin kawada das di, nadamag da ay mapalpaligatan abe di namati ed Tessalonica, isonga inbaan Pablo din gait na ay si Timoteo ay en mangipapigsa sin pammati da dowan pay emey ed Corinto. (Mo layden ay basaen din tobtob nina, ilaen sin Inam-amag 17:1-15.) Sin kawada nas di, sinmawang da Timoteo en Silas ay napod Macedonia, et inpadamag Timoteo di maipanggep sin pammatin di taga-Tessalonica. Et pag mansolat si Pablo en daida ta papigsaena di nemnem ya pammati da.

Nan-iyaman en Diyos begew sin pammati ya layad da. Inpaammo na abe en daida di maipanggep sin kasin omalian Apo Jesus ya din mapasamak sin mamati ay natey. Gapo ta wada abey ipogaw ed Tessalonica ay nangibagbagas etek ay maipanggep sin gagaran da Pablo ay nangaskasabas di, inpalawag na di maipanggep sin gagara ya ogali da sin nantetean das di. Wada abey odom ay inbilina ta ammoan da din kabibiyag ay kapnekan Diyos.

### **Din Linaona**

Din panlogian di solat 1:1

Din nan-iyamanan Pablo begew sin siged ay kabibiyag di taga-Tessalonica 1:2-10

Din siged ay ogalin da Pablo ed Tessalonica 2:1-12

Din napaligatan di mamati ed Tessalonica 2:13-16

Din nailiwan da Pablo sin mamati ed Tessalonica 2:17-20

Din nangibasaan da Pablo en Timoteo ed Tessalonica 3:1-13

Din kabibiyag ay kapnekan Diyos 4:1-12

Din maamag sin mamati ay natey 4:13-18

Din pansed-an tako sin kasin omalian Apo Jesus 5:1-11

Din maod-odi ay bilbilin da Pablo 5:12-28

### *Din Panlogian Di Solat*

<sup>1</sup> Sak-en si Pablo ay napoan din solat ay nay. Din gait ko abe ay nangisolat et da Silas en Timoteo. Naey di solat mi en dakayo ay gimong di mamati issan ed Tessalonica ay naitatapi en Diyos Ama ya si Apo Jesu Cristo. Sapay koma ta itoloy Diyos ay manegsegang en dakayo ya ta natalna abe di biyag yo.

### *Din Nan-iyamanan Pablo Begew Sin Siged Ay Kabibiyag Di Taga-Tessalonica*

<sup>2-3</sup> Mo mankararag kami, adi mi linglinglingan ay ikararagan dakayo am-in yan kanayon abe ay man-iy-iyaman kami en Diyos ay Ama tako begew en dakayo, tan nenemnemen mi din siged ay am-amagen yo begew sin pammati yo ya din gadget yo ay mansilbi en Diyos ay manbegew sin layad yo en sisya ya din anos yo ay maipoon sin namnama yo en Jesu Cristo ay Apo tako. <sup>4</sup> Aag-i mi ay laylayden Diyos, man-iyaman kami abe tan ammo mi ay pinilin Diyos dakayo. <sup>5</sup> Din nangammoan mi et sin nangikaskasabaan mi sin siged ay damag en dakayo, baken anggoy din inbagbaga mi si dindinnye yo mo adi et aben nakilikna kayo sin panakabalin di Ispirito Santo yan maga polos di dowadowa tako ay maipanggep sin katet-ewan di naikaskasaba. Inila yo abe din ogali mi sin nakitetean mi en dakayo, et ammo yo ay din pansigdan

yo di ninenemnem mi. <sup>6</sup> Di esa abe ay pangammoan mi ay pinilin Diyos dakayo et tinadtadon yos dakami ya si Apo Jesus, tan olay mo palalo ay napalpaligatan kayo begew sin pammati yo, peteg pay dedan di layad yo ay nangaw-awat sin kalin Diyos, tan din Ispirito Santo di nangidawat sin layad yo ay sana. <sup>7</sup> Et siya na di gapo ay nanbalin kayo si nantadtadonan di am-in ay mamati sin probinsiya ay Macedonia ya Akaya. <sup>8</sup> Tan nanlogi en dakayo, nandindinamag din kalin Diyos ay maipanggep en Apo Jesus sin dowaga ay probinsiya ay doy, ngem baken sidi anggoy, tan olay sin odom ay kailili, madamdamag din pammati yo en Diyos. Isonga maga di masapol ay ibaga mi ay maipanggep en dakayo, <sup>9</sup> tan daida baw di mangidamdamag en dakami sin inyat yo ay nangawat en dakami ya din nanokogan yo sin sinan didiyos ay managong ya mansilbi sin tet-ewa ay Diyos ay matmatago. <sup>10</sup> Ibagbaga da abe din panedsed-an yo sin pantaolian din Anak na ay si Jesus ay mapod langit. Sisya di kasin tinagon Diyos et sisya met laeng di mangisalakan en datako sin kaeegyat ay panosaan ton Diyos sin kaipoipogaw.

## 2

### *Din Sigid Ay Ogalin Da Pablo Ed Tessalonica*

<sup>1</sup> Aag-i, dakayo ay mismo et ammo yo kayman dedan ay waday nantongpalan di nanpasyalan mi issa. <sup>2</sup> Tan ammo yo ay olay mo pinmaligat da ya inminsolto da ed Filipos sin daan kamin emeyan issa ya olay mo ad-ado abey nangontra en dakami issan ili yo, wada pay dedan di toled ay indawat Diyos en dakami ay mangibaga sin siged ay damag ay napo en sisya. <sup>3</sup> Tan pag tet-ewa di ibagbaga mi ay mangaw-awis si ipogaw. Din panggep mi abe et baken ta siksikapan mis daida ya baken aben babai di nemnemnem mi, <sup>4</sup> mo adi et pinaneknekan Diyos ay matalek kami ay mangikaskasaba sin siged ay damag. Say obla ay intalek na en dakami, isonga din laydena anggoy di ibagbaga mi. Et baken din panlaydan di ipogaw en dakami di ipakpakat mi di kabaelan mi ay gon-oden mo adi din panlaydan Diyos, tan sisya dedan di nakin ammo sin wadas nemnem mi. <sup>5</sup> Et ammon Diyos ay adi mi in-inyat si owat abog sin nan-it-itdoan mi. Baken aben agin-agin di inyat mi ay nan-itdo ta say bomaknangan mi. Ammo yo abe dedan ay tet-ewa dana. <sup>6</sup> Et baken din pangidayawan yo ono din pangidayawan di natken ay ipogaw en dakami di inan-anap mi, <sup>7</sup> olay mo waday kalintegan mi ay aapostol en Cristo ay manpaidayaw en dakayo ya manpaalos si kasapolan mi, mo adi et nan-anos kami ay kaman din iyat di ina ay manpaspasoso ya mangay-ayowan si kosto sin an-ak na. <sup>8</sup> Yan sin nangibagbagaan mi sin siged ay damag en dakayo, nakasagana kami abe ay olay matey para en dakayo, tan peteg adi din layad mi en dakayo.

<sup>9</sup> Adi yo ngata nemnem di boway mi ay nan-ob-obla sin kawada mi issa, tan baken kamin owat inkaskasaba en dakayo din siged ay damag ay napo en Diyos, mo adi inpakat mi ay nan-oblas inag-agew ya olay sin labi ta waday katagoan mi ta say adi kayo maligatan ay nangisilap-oy en dakami.

<sup>10</sup> Inil-ila yo yan ammon Diyos abe din ogali mi en dakayo ay mamati issa. Nasantoan ya nalinteg kami met ya maga abe di inam-amag mi si nadeldelawan mi. <sup>11</sup> Ammo yo abe ay kaman din iyat di ama sin an-ak na di in-inyat mi sin esa ya esa en dakayo. <sup>12</sup> Tan pinapipigsa mi di nemnem yo dowan mi aben binagabagaan ya binilibilin dakayo ta onodan yo di kabibiyag ay maibagay si ipogaw en Diyos, tan sisya di mangayag en dakayo ta maitapi kayo sin panturayana ya makilak-am kayo abe sin kinangato na.

### *Din Napaligatan Di Mamati Ed Tessalonica*

<sup>13</sup> Kanayon adi ay man-iyaman kami en Diyos, tan sin nanngedan yo sin kalin Diyos ay inbagbaga mi, pinati yo, et adi yo inbilang ay owat kalin di ipogaw mo adi nailasinan

yo di katet-ewa na ay siya di din kalin di Diyos. Et din kalin Diyos ay nay, itoltoloy na ay way pantongpalana sin biyag yo ay mamati. <sup>14</sup> Mail-ila ay namati kayo tet-ewa, tan din naamag en dakayo et iso na din naamag sin gimgimong di ipogaw en Diyos ed Judea ay naitatapi en Jesu Cristo. Tan mo daida, pinalpaligat din kailian da ay Judio, yan mo si dakayo abe et din kailian yo. <sup>15</sup> Judio di namsenamse sin mamadto ed nabaon, din poli da di namse en Apo Jesus, ya din iib-a da ay Judio met laeng di namalpaligat en dakami. Isonga din am-amagen da et dadlon maikontra sin layden Diyos, et kaman da aben kaibaw di am-in ay ipogaw, <sup>16</sup> tan padpadasen da ay manopap en dakami sin pangibagbagaan mi sin kalin Diyos sin Gentil ta maisalakan da. Et siya na di panaptapian da sin basbasol da enggana ay dadlon tomapog. Enggay kineddenggan Diyos daida ay madosa ay kosto.

### *Din Nailiwan Da Pablo Sin Mamati Ed Tessalonica*

<sup>17</sup> Olay mo baken nabayag di naisianan mi en dakayo ay aag-i, peteg pay dedan di iliw mi en dakayo, et inpakat mi din kabaelan mi ay mantaoli issa ta kasin takon man-asiila. Tet-ewa pay kayman ay olay mo addawi nan kad-an mi, wada kayo pay dedan sin nemnem mi. <sup>18</sup> Ngem layden mi pay dedan ay mantaoli issa. Et mo sak-en pay, namin ado ay pinadpadas ko ay emey issa, ngem tinopatopap Satanas dakami. <sup>19</sup> Di gapo ay layden mi pay laeng ay pasyalen dakayo, tan namnamaen mi ay ipapasnek yo ay mamati, isonga dakayo di panragsakan mi ya kaman aben gon-gona mi ay dadlon min banolen mo wada takon to sin kad-an Apo Jesus sin kasinan omalian. <sup>20</sup> Tet-ewa od adi na: dakayo di panragsakan mi ya din gapon di madayawan mi.\*

## 3

### *Din Nangibaaan Da Pablo En Timoteo Ed Tessalonica*

<sup>1</sup> Isonga idi enggay adi kami makaitpe sin nalabes ay iliw mi en dakayo, ninemnem mi ay agpos et mabay-an kami en Silas isnan ed Athens <sup>2</sup> ta dowan min ibaa issa din agi tako ay si Timoteo ay kaoblaan mi ay mansilbi en Diyos sin pangikaskasabaan mi sin siged ay damag ay maipanggep en Cristo.\* Inbaa mis sisya ta papigsaena ya badanganas dakayo sin pammati yo <sup>3</sup> ta say maga en dakayo di masangaw† begew sin mapalpaligatan yo ay sana. Ammo yo met kayman ay intoding Diyos ay mapaligatan tako, <sup>4</sup> tan sin nakitetean mi en dakayo, indadaan mi ay domteng di ligat tako et ammo yo kayman ay siya met laeng di napasamak. <sup>5</sup> Siya na di begew ay inbaak si Timoteo issa ta ammoak di maipanggep sin pammati yo, tan adiak naanosan din nandeds-an mis damag maipanggep en dakayo yan nadandanaganak into et mo sinolisog Satanas dakayo et magay pantongpalan di obla mi issa.

<sup>6</sup> Ngem nay ay nantaolis Timoteo isna et mayat di inpadamag na maipanggep sin pammati yo ya din layad yo en Diyos ya sin gait yo. Inbaga na abe ay kanayon ay nemnemnemen yos dakami, yan din iliw yo en dakami et kaman met laeng din iliw mi en dakayo. <sup>7</sup> Isonga aag-i, olay mo palalo ay maligligatan kami ya wada abey mangipakaseseg-ang en dakami, napapigsa pay dedan di nemnem mi begew sin dinamag mi ay maipanggep sin pammati yo, <sup>8</sup> et kaman nabaroan din biyag mi gapo ta ipapasnek yo ay mamati en Apo Jesus. <sup>9</sup> Mo nemnem mi abe din peteg ay ragsak mi sin sangoanan Diyos begew en dakayo, maga di omanay ay kali si ibaga mi sin nalabes ay iyanan mi en sisya. <sup>10</sup> Isonga inag-agew ya nilablabi, dadlon kamin mankararang en Diyos ta kasin takon man-asiila ta say tapian mi din kolang pay laeng sin pammati yo.

\* **2:20** Di esa abe ay kaiologan nina sin Griego et: ...dakayo di panragsakan mi ya din gapon di pandayawan mi en Apo Jesus. \* **3:2** Din naisolat sin odom ay manuskrito sin Griego et ...si Timoteo ay kaoblaan Diyos sin kaikaskasabaan di siged ay damag ay maipanggep en Cristo. † **3:3** Di esa abe ay kaiologan nina sin Griego et: ...maga en dakayo di mankeyat ay mamati...

<sup>11</sup> Sapay koma ta kaanen Diyos ay Ama tako ya si Jesus ay Apo tako din manoptopap en dakami ta way iyat mi ay emey issa. <sup>12</sup> Sapay koma abe ta taptapian pay din Apo tako din layad yo sin iib-a yo ya sin am-in ay ipogaw ta komaman din dakdake ay layad mi en dakayo. <sup>13</sup> Tan mo say iyat na di, pomigsa di nemnem yo ta say nasantoan kayo ya maga di pankolongan yo sin pangiilaan Diyos ay Ama tako mo kasin omalis Jesus ay Apo tako ay mangikoyog sin am-in ay ipogaw na.

## 4

### *Din Kabibiyag Ay Kapnekan Diyos*

<sup>1-2</sup> Wada pay di ibaga mi en dakayo ay aag-i. Ammo yo kayman din intogon mi en dakayo ed idi begew sin kalebbengan ay indawat Apo Jesus en dakami ay maipanggep si kabibiyag ay kapnekan Diyos. Et maila ay inawatan yo ay kosto, tan siya met kayman di on-onodan yo. Ngem bagbagaan mi pay dedan si dakayo begew sin kalebbengan mi ay napo en Apo Jesus: pangaasi yo ta tapian yo pay et din siged ay ogali yo ay sana. <sup>3</sup> Tan din layden Diyos et din panbalinan yos nasantoan ay ipogaw. Isonga masapol ay dadlon yon liklikan di panaddaagan yos baken yon asawa. <sup>4</sup> Dakayo abe ay lalaki, masapol ay ammoan yo di iyat yo koma ay man-ilas asawa yo.\* Mapteng ya nalinis koma di iyat yo. <sup>5</sup> Baken koman din ak-aklongan di awak yo di mangiturong en dakayo ay kaman din iyat di ipogaw ay adi nangaammo en Diyos. <sup>6</sup> Mo maipanggep isna ngarud, siliban yo ta say maga en dakayo di bomasol si ib-a na. Adi yo sowsowitiken ay manpos si baken yon oka. Tan dosaen din Apo di mangam-amag si kaman dadi ay basol ay siya met laeng din dadlon min indadaan en dakayo ed idi. <sup>7</sup> Tan adi pinilin Diyos datako ta man-amag takos kadodogis mo adi et ta onodan tako di nasantoan ay kabibiyag. <sup>8</sup> Mo sino ngarud di maneteweng sin inbagak ay nay, baken owat dakami ay ipogaw di tetewengena mo adi et si Diyos, tan sisya di nangibaa sin Ispirito na ay dadlon nasantoan en dakayo.

<sup>9</sup> Mo maipanggep pay sin layad yo sin iib-a yo ay mamati, maga met di masapol ay isolat mi en dakayo, tan enggay initdoan Diyos dakayo, <sup>10</sup> et siya met kayman di inyaat yo sin am-in ay aag-i tako sin intiro ay probinsiya ay Macedonia. Isonga bagbagaan mi anggoy si dakayo ta taptapian yo et pay. <sup>11</sup> Agpos abe mo ipapakat yo di kabaelan yo ay maoolnos yan adi kayo makibibiyang sin am-amagen di gagait yo, mo adi et man-gaget kayo ay man-obla ta say waday katagoan yo ay siya met laeng din intogon mi en dakayo ed idi. <sup>12</sup> Tan mo say ogali yo di, rispitoen din adi mamati si dakayo yan adi masapol ay mankedaw kayos kasapolan yo.

### *Din Maamag Sin Mamati Ay Natey*

<sup>13</sup> Aag-i, wada et pay di ipaammo mi en dakayo ta dadlon yon maawatan di maipanggep sin mamati ay natey ta say adi mansakit di nemnem yo ay kaman din ipogaw ay iwed namnama da. <sup>14</sup> Patien tako ay natey ya kasin natago si Jesus, et say gapo na ay pasien tako abe ay kasin tagoen Diyos din natey ay namati en sisya et ipakoyog na en sisya sin kasinan omalian. <sup>15-16</sup> Naey di inpaammon Apo Jesus en dakami ay maipanggep sin omaliana ay sana. Bomabas sisya ay mapod langit ay mangibogaw si bilin dowan aben mankali di kangatoan ay anghel ya madnge abe din bongog di tanggoyob en Diyos. Ngem datako ay sibibiyag pay laeng sin agew ay doy, adi tako on-onaan din mamati ay natey ay en mangabat en Apo Jesus, mo adi et kasin dan matago agan-o, <sup>17</sup> asi tako am-in mabigla ay maikayang ay en mangabat en sisya sin liboo. Et manlogis di, makitetee tako sin kad-ana ay eng-enggana. <sup>18</sup> Siya na ngarud di ipanemnem tako sin iib-a tako ay mangliwliwa en daida.

\* **4:4** Dodowa pay di kaiologan nina sin Griego: 1) ...masapol ay ammoan yo di iyat yo koma ay mangayowan si asawa yo. 2) ...masapol ay ammoan yo di iyat yo koma ay mangitpe sin awak yo.



## 5

*Din Pansed-an Tako Sin Kasin Omalian Apo Jesus*

<sup>1</sup> Mo maipanggep pay sin timpo ay maamagan dana, maga di masapol ay isolat mi en dakayo ay aag-i, <sup>2</sup> tan ammo yo od kayman ay bigla di omalian din Apo ay kaman din domatngan di mangakew sin labi. <sup>3</sup> Sin agew ay doy, wada da di mangwani en natalna di biyag da ya maga abe di pandandanagan da, asi et bigla ay domteng di dosa da ay kaman din bigla ay panligligatan di babai sin pan-anakana. Et adi da polos makalsot sin dosa ay doy.

<sup>4</sup> Ngem dakayo pay ay aag-i, laton ay adi kayo masdaaw sin domtengan din agew ay doy ay kaman din kasdaawan yo mo bigla ay somawang di mangakew, tan baken din mabolinget di kad-an yo. <sup>5</sup> Tan sinilawan Diyos di nemnem tako am-in ay mamati, isonga baken din mabolinget ono labi di kad-an tako mo adi et din mapat-a ono kaagawan. <sup>6</sup> Mo siya di, adi tako on-onodan din ogalin di adi mamati ay kaman dan naseseyep, mo adi et mansasagana tako yan itpe tako aben awak tako. <sup>7</sup> Tan din labi di kaseyseypan di ipogaw ya din panbetbetengan di makabeteng. <sup>8</sup> Ngem datako pay et wada tako sin kaagawan, isonga itpe tako koma di awak tako. Ipapasnek tako abe ay mamati ya mangipailas layad en Diyos ya sin iib-a tako, tan din pammati ya layad tako et kaman din pansalida sin pagew di soldado ta adi lesken di lawa. Itoltoloy tako abe ay mannamnama sin kaisalakanan tako, tan din namnama tako ay nay et kaman helmet ay mansalida sin toktok di soldado. <sup>9</sup> Tan adi met pinilin Diyos datako ta namosen tako di dosa na mo adi et ta maisalakan tako begew en Apo Jesu Cristo. <sup>10</sup> Natey sisya para en datako ta say olay mo natey ono deda ay matmatago tako sin kasinan omalian, makitetee tako en sisya. <sup>11</sup> Isonga itoltoloy yo san inyaat yo ay man-asiliwliwa ya manbinbinadang ay mangipapapigsa sin pammati yo.

*Din Maod-odi Ay Bilbilin Da Pablo*

<sup>12</sup> Wada pay di kedawen mi en dakayo ay aag-i. Agpos mo bigbigen yo ay kosto di mangipangpangolo en dakayo ay mangikalkaligatan ay mangay-ayowan ya mamagbaga en dakayo sin pangon-onodan yo en Apo Jesus. <sup>13</sup> Dadlon yo koman patgen daida yan ipaila yo abe din layad yo en daida begew sin obla da. Maoolnos kayo koma.

<sup>14</sup> Itogon mi abe en dakayo ay aag-i ay bagaan yo di manbolbolakbol, papigsaen yo di nemnem di baken natoled ya madisdismaya, ya badangan yo di nakapoy di pammati na. Ipaila yo di anos yo en daida am-in. <sup>15</sup> Mo wada abe di mangamag si lawa en dakayo, adi yo ibabbaes mo adi et padasen yos kankanayon ay mangamag si siged sin iib-a yo ya sin am-in abe ay ipogaw.

<sup>16</sup> Naragsak kayo komas kanayon. <sup>17</sup> Kankanayon abe ay mankararag kayo. <sup>18</sup> Olay mo sino abe ay maamag en dakayo, man-iyaman kayo en Diyos, tan siya dana di laydena ay onodan yo ay naitatapi en Cristo Jesus.

<sup>19</sup> Adi yo toptopapen din layden di Ispirito Santo ay ipabaga en dakayo. <sup>20</sup> Adi yo aben laslasoyen din kanan di pankalkalian Diyos. <sup>21</sup> Ngem masapol ay penken yo di am-in ay mait-itdo ta ammoan yo mo tet-ewa ay napo en Diyos. Dadlon yon onodan din siged <sup>22</sup> dowan yo pay addawian din am-in ay lawa.

<sup>23</sup> Sapay koma ta si Diyos ay mangidawdawat si talna di mangipabalin en dakayo si dadlon nasantoan. Sapay koma ta salsalagnibana din ab-abiik, nemnem ya awak yo ta say maga polos di pankolongan yo sin kasin omalian Jesu Cristo ay Apo tako. <sup>24</sup> Si Diyos ay nangayag en dakayo et amagena dana, tan matalek sisya.

<sup>25</sup> Aag-i, ikararagan yo kod dakami.

<sup>26</sup> Komostaen yo abe din am-in ay gait tako ay mamati issa ay mangipaila ay manlilinyad kayo.

<sup>27</sup> Begew sin kalebbengak ay napo en Apo Jesus, ibilin ko en dakayo ay ibasa yo din solat ay nay sin am-in ay aag-i tako issa.

<sup>28</sup> Sapay koma ta seg-angan Jesu Cristo ay Apo tako si dakayo.

## **Din Maikadwa Ay Solat San Pablo Sin Taga-Tessalonica Maipanggep Sin Solat Ay Nay**

Olay mo inawat din gimong ed Tessalonica din damo ay solat Pablo en daida, wada pay laeng di adi da inawatan ay kosto ay maipanggep sin kasin omalian Cristo, tan nasangsangaw da sin kanan di odom en enggay inmali kasin sisya. Isonga insolat Pablo din maikadwa ay solat ay nay ay mangipaammo en daida ay siyat bomala onona din makwani en Mangontra Sin Am-in Ay Linteg Diyos downan aben masepsep din kinamanagbasol di ipogaw, asi mantaolis sisya.

Tinogon aben Pablo si daida ta ipapasnek da ay mamati ya mangam-amag si siged, olay mo mapaligatan da begew sin pammati da. Et binagbagaana abes daida ta adi da mansadsadot mo adi et man-gaget da ay man-obla ay kaman met laeng din inyat da Pablo.

### **Din Linaona**

Din panlogian di solat ya din nan-iyamanan da Pablo begew sin pammatin di taga-Tessalonica 1:1-4  
 Din kosto ay pangokoman Diyos sin kaipoipogaw 1:5-12  
 Pamagbaga maipanggep sin kasin omalian Apo Jesus 2:1-17  
 Pamagbaga maipanggep si kararag ya sadot 3:1-15  
 Din kagdengan di solat 3:16-18

### *Din Panlogian Di Solat Ya Din Nan-iyamanan Da Pablo Begew Sin Pammatin Di Taga-Tessalonica*

<sup>1</sup> Sak-en si Pablo ay napoan din solat ay nay. Din gait ko abe ay nangisolat et da Silas en Timoteo. Naey di solat mi en dakayo ay gimong di mamati issan ed Tessalonica ay naitatapi en Diyos Ama ya si Apo Jesu Cristo. <sup>2</sup> Sapay koma ta wada en dakayo di segang ya talna ay mapmapo en Diyos Ama ya si Apo Jesu Cristo.

<sup>3</sup> Masapol ay kanayon ay man-iyaman kami en Diyos begew en dakayo ay aag-i, et kosto mo say iyat mi di, tan manamnamed ay pomigpigsa di pammati yo ya downan aben mataptapian di panlilinaydan di esa ya esa en dakayo. <sup>4</sup> Isonga sin gimgimong di ipogaw en Diyos ay paspasyalen mi, it-it-ek mi din anos yo ya din pangipapasnekan yo ay mamati olay mo peteg ay mapalpaligatan kayo begew sin pammati yo ay sana.

### *Din Kosto Ay Pangokoman Diyos Sin Kaipoipogaw*

<sup>5</sup> Say kaipailaan di kostokosto ay pangokoman Diyos sin kaipoipogaw, tan din pangan-anosan yos ligat gapo ta ipogaw en Diyos dakayo et maam-amag en dakayo ta say ikeddeng Diyos ay maikari kayo ay maitapi sin panturayana. <sup>6</sup> Kostokosto met di iyat Diyos ay mangokom, tan din mamalpaligat en dakayo et paligatena abe si daida, <sup>7</sup> dowana pay pasaldengen din ligat tako ay mapalpaligat ed wani. Say amagena di mo manpailas Apo Jesus sin kasinan omalian ay mapod langit ay mangikoyog sin manakabalin ay aanghel na.\* <sup>8</sup> Wada abey manbidbidang ay apoy ay manlikob en sisya. Omalis sisya ay ena dosaen daida ay manigaan ay mangammo en Diyos ya adi mamatpati sin siged ay damag ay maipanggep en Jesus ay Apo tako. <sup>9</sup> Din ison di dosa da et maisian da ay eng-enggana en Apo Jesus yan adi da il-ilaen din nakaskasdaaw ay panakabalina. <sup>10</sup> Din omaliana abe sin agew ay doy et ta dayawen am-in ay ipogaw na ay mamati ya masdaaw da sin kinadiyos na. Et maibilang kayo abe en daida, tan pinati yo din kalin Diyos ay inbagbaga mi en dakayo.

\* **1:7** Di esa abe ay kaiologan nina sin Griego et: ...mangikoykoyog sin aanghel na ay kaipailaan di panakabalina.

<sup>11</sup> Isonga kanayon ay ikarkararagan mis dakayo ta panbalinen Diyos dakayo si ipogaw ay maikari sin nangayagana en dakayo. Sapay koma abe ta iturong nas dakayo si panakabalina ta matongpal am-in di siged ay panggep yo ya makdeng abe di am-in ay am-amagen yo begew sin pammati yo. <sup>12</sup> Tan mo say maamag di, madayaw si Jesus ay Apo tako begew en dakayo yan madayaw kayo abe begew en sisya. Maamag am-in dana begew sin seg-ang en Diyos tako ya si Jesu Cristo ay Apo tako.

## 2

### *Din Mangontra En Diyos*

<sup>1</sup> Wada pay di kedawen mi en dakayo ay aag-i maipanggep sin kasin omalian di Apo tako ay si Jesu Cristo ya din masinopan tako sin kad-ana. <sup>2</sup> Baken koman nalaka ay magolo di nemnem yo ono madanagan kayo sin pinalpalbo da ay wada di inpadto mi ono inbaga mi ono insolat mi ay enggay dinmateng din agew ay kasin omalian din Apo. <sup>3</sup> Olay mo sinoy ibagbaga da, adi kayo maiet-etekan ay mamatis di, tan adi mabalin ay domteng din agew ay doy engganay bomala di ad-ado ay ipogaw ay mangontra en Diyos ya manpaila abe din mangontra sin am-in ay linteg Diyos ay natodingan ay madosa ed inferno. <sup>4</sup> Kontraenas Diyos ya din am-in ay sinan didiyos ya olay mo sino abe ay daydayawen di ipogaw yan pangangatoena din awak na mo si daida am-in. Et en tomokdo sin Timplon Diyos ay mangwani en sisya ay mismo si Diyos.\*

<sup>5</sup> Adi yon samet nilinglingan am-in dana, tan inbagak met dedan en dakayo sin kawadak issa. <sup>6</sup> Isonga ammo yo abe mo sino di manoptopap sin doy ay mangontra sin am-in ay linteg Diyos ta adi manpaila engganans domateng din timpo ay inkeddeng Diyos. <sup>7</sup> Wada da kayman ed wani di mangonkontra en Diyos, ngem adi pay laeng maammoan din amagen ton din doy ay mangontra sin am-in ay linteg Diyos, yan adi aben maamag engganans kaanen Diyos din manoptopap en sisya. <sup>8</sup> Mo makaan di, asi pag manpaila din doy ay mangontra. Pag omali si Apo Jesus yan maila din mankoniniing ay kinadiyos na, et bigla ay maabak din doy ay mangontra yan peslen Apo Jesus ay mamod-ok en sisya. <sup>9</sup> Ngem sin daan di kaabakana, gapo ta wada en sisya din panakabalin Satanas, ipaila na di am-in ay kalasin di milagro ya nakaskasdaaw ay sinyal <sup>10</sup> ya am-in abe ay lawa ay mangietek en daida ay maisian en Diyos ay madosa. Din begew ay madosa da et sinigsigaan da ay mamanol ya mamati sin tet-ewa ay maipanggep en Apo Jesus ta maisalakan da koma. <sup>11</sup> Isonga iturong Diyos di nemnem da ta dadlon dan maietekan ya patien da di baken tet-ewa <sup>12</sup> ta asi da am-in makeddangan ay madosa, tan adi da dedan pinati din tet-ewa, mo adi et ginan-ganas da di basol.

### *Din Pinilin Diyos Ay Maisalakan*

<sup>13</sup> Ngem mo dakayo pay ay aag-i ay laylayden din Apo, masapol ay man-iyaman kami en Diyos si kankanayon begew en dakayo. Tan nanlogi sin damdamo, pinipilin Diyos ay dakayon to di maisalakan begew sin pamatian yo sin tet-ewa ya din pangipanbalinan di Ispirito Santo en dakayo si nasantoan ay ipogaw na. <sup>14</sup> Inayaganas dakayo ay maisalakan babaen sin siged ay damag ay inkaskasaba mi en dakayo ta maibilang kayo sin mankoniniing ay kinadiyos en Jesu Cristo ay Apo tako. <sup>15</sup> Isonga aag-i, ipapasnek yo sin nemnem yo din tinawid tako ay mait-itdo ay init-itdo mi en dakayo sin kawada mi issa ya sin insolat mi en dakayo ta say dadlon yon onodan si kankanayon ay adi masangsangaw.

<sup>16-17</sup> Sapay koma ta si Jesu Cristo ay Apo tako ya si Diyos ay Ama tako di mangipapig-pigsa sin nemnem yo ya mamadang en dakayo ta pag siged di am-amagen ya kankanayan yo. Tan inpailan Diyos din layad na en datako, yan begew sin seg-ang na en datako, indawat na abe di komakaman ay pomigsaan di nemnem tako ya din siged ay namnama tako.

\* [2:4 Daniel 11:36.](#)

### 3

#### *Din Nankedawan Da Pablo Si Kararag*

<sup>1</sup> Wada pay di at-atik ay ibaga mi en dakayo ay aag-i. Ikararagan yo kod dakami ta maganno ay mandinamag din kalin di Apo ya ta banolen ya patien di ipogaw ay manmannge ay kaman din inyaat yo. <sup>2</sup> Ikararag yo kod abe ay salakniban Diyos dakami si lawa ay ipogaw, tan baken am-in ay ipogaw dedan et mamati da en Diyos.

<sup>3</sup> Ngem olay, tan matalek din Apo, et sisya di mangipapigpigsya ya manalaknib en dakayo en Satanas. <sup>4</sup> Manbegew abe en sisya, namnamaen mi ay itoltoloy yo ay mangam-amag sin ibilbilin mi en dakayo. <sup>5</sup> Sapay koma ta iturong na di nemnem yo sin layad Diyos en dakayo ya din anos en Cristo.

#### *Din Inbilin Da Pablo Ay Maipanggep Si Nasadot Ay Ipogaw*

<sup>6</sup> Naey di ibilin mi en dakayo ay aag-i begew sin kalebbengan mi ay napo en Apo Jesu Cristo. Adi kayo makipolpolapol sin iib-a yo ay mamati ay nasadot ay man-obla ay adi manongpal sin inbilin mi en dakayo. <sup>7</sup> Tan dakayo ay mismo et ammo yo met dedan ay tadonen yo koma din ogali mi sin nakitetean mi en dakayo. Tan adi kami met nasadot ay man-obla. <sup>8</sup> Maga abe di in-ina mis masapol mi si adi mi binaybayadan, tan inkalkaligatan mi ay nan-obla si inagew ya linabi ta say maga en dakayo di maligatan sin kasapolan mi. <sup>9</sup> Say inyaat mi di ta waday tadonen yo, olay mo waday kalintegan mi ay mankedaw en dakayo si kasapolan mi. <sup>10</sup> Tan sin deda Kamis sa, inbilin mi en dakayo ay adi kayo pakpakanen din manigaan ay man-obla.

<sup>11</sup> Say isolat mi na en dakayo tan wada kano en dakayo di manbolbolakbol ay baken dan man-gaget ay man-obla mo adi man-gaget da anggoy ay makibibiyang sin amagen di gagait da. <sup>12</sup> Begew sin kalebbengan mi ay napo en Apo Jesu Cristo, bagaan mi din ipogaw ay doy yan ibilin mi en daida ay neekan da koma ay man-obla ta say waday katagoan da.

<sup>13</sup> Mo dakayo abe ay aag-i, adi kayo maom-oma ay mangam-amag si siked. <sup>14</sup> Mo wada pay di manigaan ay manongpal sin inbagbaga mi sin solat ay nay, nemnemnemen yo mo sinos sisya dawan yo aben adi kapolpolapol ta way iyat na ay mabainan. <sup>15</sup> Ngem adi yo pay ibilbilang ay kaibaw yo mo adi et agi yo ay masapol ay mabagbagaan.

#### *Din Kakdengan Di Solat*

<sup>16</sup> Sapay koma ta din Apo ay napoan di talna tako di kanayon ay mangidawat en dakayos talna olay intoy mapasamak en dakayo. Sapay koma abe ta kanayon ay wadas sisya en dakayo am-in.

<sup>17</sup> Sak-en si Pablo ay nangisolat sin nay kakdengan di solat ay inpaisolat ko. Siya nay iyaat ko sin am-in ay solat ko ta maammoan ay tet-ewa ay napo en sak-en, tan maimatonan dedan din iyaat ko ay mansolsolat. <sup>18</sup> Sapay koma ta seg-angan Jesu Cristo ay Apo tako si dakayo am-in.



## **Din Damo Ay Solat San Pablo En Timoteo Maipanggep Sin Solat Ay Nay**

Si Timoteo et esa ay baro ay dinatngan Pablo sin nangaskasabaana sin sakop di Licaonia. Gapo ta naimposan di pammati na en Cristo, inayagan Pablo ay makiey en sisya ay mamadang sin obla na ay mankasaba ya man-itdo. Di esa ay ili ay nangaskasabaan da et ed Efeso, et say nanaynan Pablo en Timoteo ta sisya di maiskat en Pablo ay man-itdo sin gimong di mamatis di. Idi binmaybayag din nanteenan Timoteo isdi, pag mansolat si Pablo en sisya. Mantawen si Timoteo si tolonpo ono nasurok sin nansolatan Pablo en sisya.

Di esa ay napateg ay banag sin solat ay nay et maipanggep si nan-it-itdos baken tet-ewa. Binilin Pablo si Timoteo ta iparit na din pan-it-itdoan da (1:3), tan init-itdo da ay mo layden di ipogaw ay maisalakan, masapol ay paniyewen da di odom ay makan ya adi da aben mangas-asawa.

Wada abe di inbilin Pablo ay maipanggep si iyat di man-gimong ay mankararag ya mandayaw en Diyos, din ogalin di babbabai ay mamati, din kabibiyag di ipogaw ay pilien da si mangipangolo sin gimong ya din pilien da abe ay mamadbadang sin papangolo ay sana, ya din iyat di mamati sin iib-a da ay nabalo, papangolo ya babagen. Wada abey odom ay inbilin Pablo en Timoteo ay maipanggep si iyat na ay mansilbis kosto en Cristo. Sin maodi ay kapitolo, wada abey inbaga na ay maipanggep sin mangipapakat ay bomaknang ya din tet-ewa ay kinabaknang.

### **Din Linaona**

Din panlogian di solat 1:1-2

Maipanggep si nan-it-itdos baken tet-ewa 1:3-11

Din nan-iyamanan Pablo en Diyos begew sin seg-ang na 1:12-20

Pamagbaga maipanggep si man-gimong ya din papangolo da 2:1-16

Pamagbaga en Timoteo maipanggep sin pansilsilbiana en Cristo 4:1-16

Pamagbaga maipanggep sin nankinalasi ay ipogaw sin gimong 5:1-6:2

Din man-it-itdos natken ya din mayad ay bomaknang 6:3-10

Din maod-odi ay bilbilin Pablo en Timoteo 6:11-21

### *Din Panlogian Di Solat*

<sup>1</sup> Sak-en si Pablo ay apostol en Cristo Jesus, tan say inbilin Diyos ay mangisalakan en datako ya si Cristo Jesus ay namnamaen tako ay mangamag sin am-in ay sedsed-en tako.

<sup>2</sup> Naey di solat ko en sik-a ay Timoteo ay ibilang ko ay tet-ewa ay anak kos pammati. Sapay koma ta wada en sik-a di seg-ang ya talna ay mapmapo en Diyos ay Ama tako ya si Cristo Jesus ay Apo tako.

### *Maipanggep Si Nan-it-itdos Baken Tet-ewa*

<sup>3</sup> Sin kinmaanank issa ay manpa-Macedonia, intogon ko en sik-a ay mantetee ka issan ed Efeso et nay ipidwak ay mangitogon, tan wada da issa di mangit-itdos natnatken et masapol ay bilinem daida ta isaldeng da. <sup>4</sup> Bilinem abe ta adi da nemnemnemen si kanayon din daddad-at di ipogaw ed nabaon ya din andoando ay lislistaan di ngadngadan di iiyon-a, tan din kaman dadi et owat pan-iibawan di ipogaw. Maga di ibadang da sin matongpalan di planon Diyos, tan din pangammoan ya pangon-onodan tako sin planon Diyos et babaen sin pammati tako. <sup>5</sup> Say ibilin mo dana en daida ta mo pasien da, waday kosto ay layad da sin iib-a da, tan din napoan di layad ay nay et din siged ya nalinis ay nemnem ay adi nataptapian si kadodogis ya din naimposan ay

pammati. <sup>6</sup> Wada di odom ay ipogaw ay nanaynan sin siked ay ogali ay nay, et say begew ay nasangaw das diskotil ay magay silbi na. <sup>7</sup> Layden da ay mangitdo sin linteg Diyos, ngem di katet-ewa na et adi da maawatan din ipapapilit da ay tet-ewa yan olay din kali ay ibagbaga da et adi da ammo din laydena ay kalien.

<sup>8</sup> Mo maipanggep pay sin linteg Diyos, ammo tako kayman ay siked din linteg ay sana dalo et mo din pangos-osalan di ipogaw et din kosto ay kaiosalana. <sup>9</sup> Maawatan tako koma ay baken din nalinteg ay ipogaw di gapo ay naamagan di linteg mo adi et din lawa ay ipogaw ay kaman dana: din managlabsing si linteg ya adi manpaituray sin waday turay na, din manigaan ay mandayaw en Diyos ya din makabasol, din baken relihioso ya din manglaslasoy si maipanggep en Diyos, din manpeses ama na ono ina na ya din manpeses ib-a na ay ipogaw, <sup>10</sup> din manaddaag si bakenan asawa, din lalaki ay manaddaag si ib-a na aylalaki, din manpap si ib-a na ay ipogaw ta ilako na ay maibagen, din makaetek ya mangisapatas baken tet-ewa, ya am-in di odom ay mangamag si maikontra sin kosto ay mait-itdo. Para sin ipogaw ay kaman dana din naamagan di linteg. <sup>11</sup> Din tet-ewa ay initdok ay nay ay maipanggep sin linteg et maibasas sin sigesiked ay damag ay intalek din kangatoan ya madaydayaw ay Diyos en sak-en.

### *Din Nan-iyamanan Pablo En Diyos Begew Sin Seg-ang Na*

<sup>12</sup> Man-iyamanak en Cristo Jesus ay Apo tako ay mangipapigpigma en sak-en ay mangamag sin nay ay obla, tan inbilang na ay matalekak ay ipogaw et dinotokanas sak-en ay mansilbi en sisya. <sup>13</sup> Say inyat na di olay mo ed idi, pinalawlawak sisya downak aben pinalpaligat ya inin-insolto. Ngem sineg-angan Diyos sak-en pay dedan, tan ed idi adiak pay laeng mamati isonga adiak ammo ay lawa di inam-amag ko. <sup>14</sup> Peteg adi ay dakdake di seg-ang ay inpailan din Apo en sak-en, tan indawat na en sak-en din pammati ya layad para en sisya ya sin gagait ko ay siya met laeng di idawdawat na en datako ay naitatapi en Cristo Jesus. <sup>15</sup> Tet-etet-ewa din nay mait-itdo ya dadlon mapati: inmalis Cristo Jesus isnan daga ta say isalakana di nakabasol. Sak-en od kayman din kalawlawaan en daida. <sup>16</sup> Et siya na met laeng di begew ay naseg-angan Diyos en sak-en, ta way iyat Cristo Jesus ay mangipaila sin adi kaabos ay anos na en sak-en ay kalawlawaan ay nakabasol. Inyat nas di ta say pannemneman di ipogaw ay mamati en sisya sin tapin di agew ya mangawat si biyag ay iwed patingga na. <sup>17</sup> Isonga sapay koma ta mabigbig ya madayaw ay eng-enggana din Ari ay iwed patinggan di panturayana, din es-esa ay Diyos ay adi katkatey ya adi kaila. Amen.

<sup>18</sup> Din inbilin ko ay nay en sik-a ay Timoteo ay anak ko et maibasas met laeng sin naipadto ed idi ay maipanggep en sik-a. Adim linglinglingan din naipadto ay sana ta say tomoled ka ay manglaban sin am-in ay lawa. <sup>19</sup> Sin panglablabanam si lawa, ipapasnek mo ay mamati ya dadlon mon siliban ta nadalos di konsensiam, tan wada di ipogaw ay gapo ta tineteweng da din konsensia da, dinadael dan pammati da.\* <sup>20</sup> Din dowan en daida et da Himeneus en Alexander ay inpolang ko en Satanas ta say pan-adalan da ay adi da palawlawaan si Diyos.

## 2

### *Maipanggep Si Kararag Sin Gimong*

<sup>1</sup> Naey pay di ibagak en sik-a. Di damo et masapol ay ikararagan tako di am-in ay ipogaw yan mankedaw ya man-iyaman tako en Diyos para en daida. <sup>2</sup> Ikararagan tako abe din aari ya am-in di odom ay nangato di saad na ta say natalna di biyag tako sin pansilsilbian tako en Diyos ya sin pangon-onodan takos kosto ay ogali. <sup>3</sup> Tan siked mo say iyat tako di et siya abe di kapnekan Diyos ay mangisalakana en datako. <sup>4</sup> Mapnek si

\* **1:19** Di esa abe ay kaiologan nina sin Griego et: ...gapo ta tineteweng da din konsensia da, tinaynan da din tet-ewa ay mait-itdo ay patien tako.

Diyos sidi tan laydena ay maisalakan am-in ay ipogaw ya maammoan da abe din tet-ewa ay mait-itdo. <sup>5</sup> Say laydena di tan es-esa di Diyos yan es-esa abe di makikali en sisya para sin am-in ay ipogaw. Sisya din ipogaw ay si Cristo Jesus <sup>6</sup> ay nangidawat sin awak na ta say mangsobot sin am-in ay ipogaw. Naamag di sin kosto ay timpo ay pinilin Diyos, et say nangipailaana ay laydena ay maisalakan am-in ay ipogaw. <sup>7</sup> Siya na abe di begew ay dinotokanas sak-en ay mangaskasaba ya man-apostol ta enak itdo en daida ay Gentil din tet-ewa ay mait-itdo ta say pasien da. Tet-ewa met na, baken etek.

<sup>8</sup> Laydek pay ngarud ay sin am-in ay gimong di mamati, din lallalaki di mangipangolo sin pankararagan yo, ngem masapol ay nasantoan da ya maga abe di ibobonget da ono ib-ibawen da\* mo ikayang dan takkay da ay mankararag.

### *Din Ogali Ay Onodan Koman Di Babbabai Sin Gimong*

<sup>9</sup> Mo din babbabai abe, manbabado da koma si baken nangingina ya maianam ay bado ay maibagay en daida. Adi da koma aben palaloen din pangaltian da sin book da ya din pangiamagan da sin nabanol ay aritos ya keke ya odom ay kaman da nay ay naamag si balitok ono odom ay nangina. Tan din nemnemen da koma et baken din pangipailaan da sin kabasang da, <sup>10</sup> mo adi et din siged ay amag ay pangipailaan da sin pammati da, tan say maibagay sin babbabai ay mangwani en mandayaw da en Diyos. <sup>11</sup> Igiginek koma abe din babbabai sin pan-ad-adalan da sin kalin Diyos yan ibaba dan awak da sin man-it-itdo. <sup>12</sup> Adiak it-itlok ay din babbabai di mangitdo sin lallalaki ono mangipangolo en daida. Masapol ay igiginkan da. <sup>13</sup> Tan sin namarsuaan Diyos si ipogaw, pinarsua nas Adan agan-o, asi pag si Eva.† <sup>14</sup> Yan baken si Adan di naietekan mo adi din babai, isonga sisya di nangon-ona ay binmasol en Diyos.‡ <sup>15</sup> Siya na di begew ay mapaligatan di babbabai ay man-anak,§ ngem maisalakan da pay dedan\* dalo et mo itoltoloy da ay mamati ya manglaylayad sin iib-a da ya mangonod si nasantoan ay kabibiyag dowan da pay an-annadan abe din am-amagen da.

## 3

### *Din Papangolon Di Mamati*

<sup>1</sup> Tet-ewa adi din kanan da ay din mayad ay manbalin si pangolon di mamati et nabanol ay obla di laydena. <sup>2</sup> Gapo ta nabanol di ay obla, masapol ay maga di maipabasol sin pangolo. Masapol abe ay es-esa di asawa na ya adi makibabbabai. Masapol ay nanemneman ya naannad ay ipogaw ay makaitpe sin awak na. Masapol ay managsangaili ya nalaing ay man-itdo. <sup>3</sup> Din ogali na abe et masapol ay baken makabeteng ya baken mabonget ono makaibaw mo adi et naanos. Masapol ay adi na gangamgamen di pilak. <sup>4</sup> Mo maipanggep abe sin familya na, masapol ay kosto di iyat na ay mangolnos ya mamilin en daida ta say managtongpal di an-ak na ya rispitoen das sisya ay kosto. <sup>5</sup> Tan mo adi na ammo ay mangolnos sin familya na, ay kabaelana aya ay mangayowan sin gimong en Diyos? <sup>6</sup> Din pangolon di mamati et masapol abe ay baken ipogaw ay kapatpati na tan into et mo ngomato di nemnem na et say begew si pangeddengan Diyos en sisya ay madosa ay kaman din naamag sin Diablo. <sup>7</sup> Masapol abe ay mayat di ogali na sin pangilan di adi mamati tan into et mo pis-oyen das sisya et say maknaana sin tagdey di Diablo.

### *Din Mamadbadang Sin Papangolon Di Mamati*

<sup>8</sup> Din mapili pay si mamadbadang sin papangolo et masapol met laeng ay maikari da ay marispito ya baken makalkalopti di dila da. Masapol ay adi da makabeteng ya adi

\* **2:8** Di esa abe ay kaiologan nina sin Griego et: ...maga abe di ibobonget da ono dowadowa da... † **2:13** Genesis 2:7,21-22. ‡ **2:14** Genesis 3:1-6. § **2:15** Kanan di odom en baken anggoy din pan-anakan da di maibagbagas na mo adi din ligat da abe ay iin-a. \* **2:15** Di esa abe ay kaiologan nina sin Griego et: ...ngem makalosot da pay dedan...

da gamgamgamen di pilak. <sup>9</sup> Masapol abe ay dadlon dan pasien din tet-ewa ay mait-itdo ay maipanggep sin pammati ay inpaammon Diyos en datako dowan nadalos abe di konsensia da. <sup>10</sup> Din pilien yo ay bomadbadang, masapol ay mapaneknekan da on-ona ta mo maga di maammoan ay basol da, asi mabalin ay mansilbi da. <sup>11</sup> Din as-awa da abe et masapol ay maikari da ay marispito ya baken aben manag-olit. Masapol abe ay naannad\* ya matalek da sin am-in ay am-amagen da. <sup>12</sup> Di esa abe ay masapol en daida ay mamadbadang et masapol ay es-esa di as-awa da ya adi da makibabbabai. Masapol abe ay ammo da ay mangolnos ay kosto sin an-ak da ya pamilya da. <sup>13</sup> Mo es-esten da abe din obla da ay mamadbadang, gon-oden da din rispiton di iib-a da et wada abe di toled da ay mangibaga si maipanggep sin pammati da en Cristo Jesus.

<sup>14</sup> Sapay koma ta adi mabayag yan way iyat ko ay emey issa, ngem isolat ko dana en sik-a pay dedan <sup>15</sup> into et mo mataktakak, ta say ammoem din kabibiyag ay onodan koma din pamilyan di matmatago ay Diyos.† Siya dana din am-in ay ipogaw Diyos ay nangitalkana sin tet-ewa ay mait-itdo ta ilaen da ay maitdo ay kosto ya adi masoksokatan. <sup>16</sup> Ammo tako od am-in ay peteg ay nabanol din patpatien tako ay maipanggep en Cristo Jesus. Adi naipaammo ed idi ngem inpaammon Diyos en datako ed wani:

Nanpaila ay ipogaw, et pinaneknekan din Ispirito Santo ay maga polos di pankolan-gana. Inil-ilan aben di aanghel. Naikaskasaba din maipanggep en sisya sin kailiili, et wada da isnan lobong di namati en sisya. Naikayang abes sisya ed langit ay madayaw.

## 4

### *Din Man-itdos Baken Tet-ewa*

<sup>1</sup> Nalawag din inpaammon din Ispirito Santo ay sin tapin di agew wada di manaynan sin kosto ay pammati, tan pasien da di makaetek ya nasikap ay dimonyo et onodan da din it-itdo da. <sup>2</sup> Din mait-itdo ay nay et say it-itdon di agin sisiged ya makaetek ay ipogaw ay enggay nadadael di konsensia da ay kaman naatongan si naldang ay landok. <sup>3</sup> Din ipogaw ay nay et iparit da di mangasawa yan kanan da abe en maiparit di odom ay makan, ngem si Diyos pay et pinarsua na dana ay kalasin di makan ta say kanen tako ay mamati en Cristo ya mangammo sin tet-ewa ay mait-itdo mo makaiyaman tako en sisya. <sup>4</sup> Tan siged am-in di pinarsuan Diyos, isonga maga koma di paniyewen tako mo adi et awaten tako am-in ay idawdawat Diyos ay man-iy-iyaman en sisya. <sup>5</sup> Tan maibilang ay siged begew sin kalin Diyos ya din kararag tako.

### *Din Siged Ay Mansilbi En Cristo Jesus*

<sup>6</sup> Mo itdom dana sin iib-a ay mamati issa, siged di pansilsilbiam en Cristo Jesus, et ipailam abe ay dadlon kan naawatan din tet-ewa ay maipanggep sin pammati tako ya din siged ay mait-itdo ay inon-onodam. <sup>7</sup> Addawiam din doy ay daddad-at ed nabaon ay magay silbi na, tan baken maipanggep sin tet-ewa ay Diyos, yan paingsaem ay mangadal ya mangonod si nadiyosan ay kabibiyag. <sup>8</sup> Tan mo paknegen tako din awak tako, wada kayman di at-atik ay silbi na, ngem mo paingsaen tako pay di nemnem tako ay mangonod si nadiyosan ay kabibiyag, magay gedeng di pansigdan tako, tan gon-oden tako di baro ay biyag ay mapmapo en Diyos, baken owat ed wani mo adi et sin tapin di agew abe. <sup>9</sup> Tet-etet-ewa din nay inbagak ya dadlon mapati. <sup>10</sup> Say gapo na ay ipakat takon kabaelan tako ay mansilbi en Cristo, tan din poon di namnama tako et din matmatago ay Diyos ay mangisalakan sin am-in ay ipogaw, namnamed si datako ay mamati.

\* **3:11** Di esa abe ay kaiologan nina sin Griego et: ...Masapol abe ay adi da bemebeteng... † **3:15** Di esa abe ay kaiologan nina sin Griego et: ...din panbebeeyan di matmatago ay Diyos.

<sup>11</sup> Say itdom am-in dana ay inbagak en sik-a en daida issa yan bilinem abes daida ta onodan da. <sup>12</sup> Adi ka manbabbain mo waday manglaslasoy en sik-a begew sin kinaanak mo, mo adi et siged di iyat mo ay mankali ya siged abey ogalim ta say tadonen di mamati. Ipailam abe en daida din layad mo sin iib-am, din talek mo en Diyos, ya din kinamaiwed di kadodogis sin nemnem ya amag mo ta siya abe di tadonen da. <sup>13</sup> Di laydek ay amagem engganas emeyak issa et estem ay mangibasbasa sin kalin Diyos mo masinop kayo dowan ka aben mankaskasaba ya man-it-itdo. <sup>14</sup> Adi ka baybay-an din kabaelan ay indawat din Ispirito Santo en sik-a ed idi sin nangapayan di papangolon di mamati en sik-a ya din nangibagaan di mamadto ay siya say kabaelam, mo adi et osalem din kabaelam ay sana. <sup>15</sup> Imongsan mon nemnem mo sin pangon-onodam en dana ay intogon ko ta say ilaen am-in di ipogaw ay komoskosto di iyaat mo. <sup>16</sup> Dadlon kan siliban din ogalim ya din it-itdom, tan mo ipapasnek mo ay mangiyat sina, baken din awak mo anggoy di isalakan mo mo adi et daida abe ay manmannge en sik-a.

## 5

### *Maipanggep Si Nalasang, Papangolon Di Mamati Ya Bag-en*

<sup>1</sup> Mo wada di bomasol ay naknakay mo sik-a, adim bodbodtaken, mo adi nainayad di iyat mo ay mamagbaga en sisya ay kaman mon say si ama. Din lallalaki abe ay iiyogtan mo sik-a, ibilang mo ay kaman mon agi si daida. <sup>2</sup> Mo din babbabai pay ay pangpangoan mo sik-a, ibilang mo ay kaman mon si ina, ya din iiyogtan abe mo sik-a, kaman mon agi si daida ay maga di natken ay nemnem mo en daida.

<sup>3</sup> Mo wada di babbabai ay nalasang, rispitoen yos daida yan badangan yo abe mo iwed di toton-od das mangay-ayowan en daida. <sup>4</sup> Ngem mo wada di an-ak ono aap-oda, masapol ay maawatan dana ay din pangon-onaen da koma sin pansilsilbian da en Diyos et din pangay-ayowan da sin nakin anak en daida ya sin apo da ay manobalit en daida, tan say kapnekan Diyos. <sup>5</sup> Din nalasang ay maga polos di mangay-ayowan en sisya et namnamaena ay si Diyos di mamadbadang en sisya, isonga itoltoloy na ay mankarkararag ay mankedkedaw si badang Diyos si inag-agew ya linablabi. <sup>6</sup> Ngem din nalasang pay ay naimongsan di nemnem na sin pannam-ayana, kaman natey ay maipanggep en Diyos olay mo matmatago pay laeng. <sup>7</sup> Say ibilin mo dana sin mamati issa ta maga di pangipabasbasolan di odom ay ipogaw en daida. <sup>8</sup> Tan mo waday mamati ay manigaan ay mangayowan sin toton-od na, namnamed din pamilya na, tinaynana din pammati na. Din kaman nadi ay ipogaw et lawlawwa di ogali na mo din adi namati, tan olay din adi namati, ammo da ay mangayowan sin toton-od da.

<sup>9</sup> Din nalasalasang ay ilita yo, masapol ay mantawen das enemapolo ya nasurok yan namingsan anggoy ay nakiasawa da.\* <sup>10</sup> Masapol abe ay madamdamag din siged ay inam-amag da ay kaman dana: kosto di inyaat da ay nangay-ayowan sin an-ak da, managsangaili da, inbaba dan awak da ay mansilbi sin ipogaw en Diyos,† binadbadangan da di naligatan ay ipogaw, ya nagaget da ay nangam-amag si kompormi ay siged.

<sup>11</sup> Mo din nalasang pay ay baken onay nabakes, adi yo itaptapis daida sin listaan, tan mo pomigsa din layden di awak da mo din panggep da ay mansilbi en Cristo, layden da kasin ay makiasawa. <sup>12</sup> Et mo say iyat da di, pabasolen di ipogaw si daida,‡ tan nilabsing da dedan din sigod ay inkari da en Cristo. <sup>13</sup> Di esa abe ay begew ay adi yo koma itaptapis daida sin listaan et ipaingsa da di sadot et owat dan lomikeliked sin kabeebeey dowan da et aben mantaytayoktok ya makibibiyang sin am-amagen di iib-a da ay mangingalngalawngaw si adi lemebbeng ay maibaga. <sup>14</sup> Isonga din pannemnem

\* **5:9** Di esa abe ay kaiologan nina sin Griego et: ...yan adi nakilallalaki. † **5:10** Din kanana sin Griego et: inow-owasan da din sakin di ipogaw en Diyos. ‡ **5:12** Dodowa pay di kaiologan nina sin Griego: 1) ...pabasolen di konsensia das daida,...; 2) ...manbasol da,...



ko et agpos mo kasin makiasawa din nalasalang ay baken onay nabakes ta man-anak da yan asikasoen dan beey da ta say magay wayan di kaibaw tako ay mamis-oy en datako. <sup>15</sup> Say itogon ko na, tan waday odom ay nalasang ay enggay nasangaw da ay nangonod en Satanas.

<sup>16</sup> Din maodi ay ibagak ay maipanggep sin nalasalang et mo waday babai ay mamati ay way toton-od na ay nalasang, sisya koma di mangayowan en daida ta adi maligatan din gimong di mamati ta say way iyat di gimong ay mangayowan sin nalasalang ay magay toton-od na.

<sup>17</sup> Maipanggep loman sin papangolo ay nas-et di pangipangoloan da sin mamati et ibilang yo koma ay maikari da ay mabigbig ya malagboan ay kosto, namnamed si daida ay nagaget ay mangaskasaba ya man-it-itdo. <sup>18</sup> Tan waday inpaisolat Diyos ay kanana, “Adim bosbosalan di baka ay mangigatgatin ay mangirik si pagey ta way iyat na ay mangan.” § Yan kanana abe, “Din man-obla et maikari ay malagboan.”\*

<sup>19</sup> Mo waday ipabasol da sin pangolon di mamati, adi ka dengdengngen malaksig mo waday dowan ono tolo ay ipogaw ay manistigo. <sup>20</sup> Ngem mo tet-ewa ay binmasol yan adi na dokogan, masapol ay bagbagaam sisya sin sangoanan di gimong ta emegyat di odom ay manadon en sisya.

<sup>21</sup> Bilinek sik-a sin pangiilaan Diyos ya si Cristo Jesus ya din nasantoan ay aanghel ta patiem dana ay inbagbagak ay adi ka idomdoma di olay sino ay ipogaw, mo adi pan-iisoem di nemnem mo en daida am-in. <sup>22</sup> Mo wada abey piliem si mansilbi en Cristo, adi ka maag-agagan ay mangdotok en sisya. Tan mo waday basol na dowan ka et dotokan, mailak-am ka dedan sin basol na. Estem ngarud din amagem ta addawiam din am-in ay lawa.

<sup>23</sup> Baken anggoy di danom si in-inomem, mo adi et man-inom ka abes sinat-ik ay arak† para sin sakit di eges mo, tan namin ado ay nansaksakit ka.

<sup>24</sup> Maipanggep loman sin mamiliam si mansilbi en Cristo, nemnemem ay waday ipogaw ay naammoan di basol na olay mo daan dan maidarum. Wada abey naisassaot di basol na, ngem maammoan sin tapin di agew. <sup>25</sup> Iso na sin ipogaw ay mangam-amag si siged, tan waday siged ay amag ay nalaka ay maammoan, wada abey adi maammoan ay dagos, ngem maammoan dedan sin tapin di agew.

## 6

<sup>1</sup> Naey abe di ibilin ko sin babag-en ay mamati. Masapol ay rispitoen da ay kosto din among da tan into et mo wada di mangipalawlawwa sin ngadan Diyos ya din it-itdo tako begew sin kolang di rispito da. <sup>2</sup> Din bag-en abe ay mamati din among na et adi na koma kanan en gapo ta agi na ay mamati, olay adi na rispitoen ay kosto. Es-estena koma ay mansilbi en sisya, tan din mangon-gon-od sin obla na et ib-a na ay mamati ay laylayden Diyos.

### *Din Man-it-itdos Natken Ya Din Mayad Ay Bomaknang*

Siya dana di itdom ya ibilin mo sin mamati issa. <sup>3</sup> Mo waday man-itdos natken ya adi na onodan din kosto ay mait-itdo ay napo en Jesu Cristo ay Apo tako ay maiturong si nadiyosan ay kabihiyag, <sup>4</sup> siya di din ipogaw ay nalalastog di nemnem na dowan et maga di ammo na. Din kaman dana ay ipogaw et natnatken di nalabes ay layad da ay makidisdiskotil sin banag ay magay silbi na ya makisongsongbat si maipanggep sin olog di kali. Din pantongpalan di kaman dadi ay ogali et apos, mankokontra ay nemnem, lawa ay kali maipanggep si ib-a, lawa ay sospitsa si ib-a, <sup>5</sup> ya kanayon ay ibaw, tan enggay lawa di nemnem da et inaddawian da din tet-ewa ay mait-itdo. Kanan da en mo mamati da en Diyos, say bomaknangan da.

§ 5:18 Deuteronomio 25:4. Ilaen abe sin 1 Corinto 9:9. \* 5:18 Lucas 10:7. † 5:23 Din arak di Judio et naamag si danom di obas.

<sup>6</sup> Ad-ado kayman di ganaben di ipogaw ay mamati en Diyos dalo et mo mapnek sin wada en sisya, ngem baken gamgameng. <sup>7</sup> Tan maga di inbel-ay takos nan lobong sin naianakan tako; maga met abe di itakin tako sin komaanan tako. <sup>8</sup> Isonga basta waday omanay si kanen tako ya bado tako, mapnek tako. <sup>9</sup> Ngem din man-gamgamgam ay bomaknang, nalaka ay masolisog da et kaman dan nakna sin ad-ado ay ak-aklongan da ay niloloko ay manadael en daida. Yan din ak-aklongan da ay doy et kaman say manganod en daida sin dosa ay iwed patingga na. <sup>10</sup> Tan din pangamgamgaman di ipogaw si pilak et siya na di poon di am-in ay kalasin di lawa. Begew sin kinagamgam da ay nay, waday ipogaw ay nanokog sin patpatien tako, et say nangaan das ad-ado ay sakit di nemnem da.

*Din Maod-odi Ay Bilbilin Pablo En Timoteo*

<sup>11</sup> Ngem mo sik-a pay ay mansilbilbi en Diyos, addawiam am-in dana et ipakat mo di kabaalam ay mangonod si nalinteg ya nadiyosan ay kabibiyag dowan ka aben ipapasnek ay mamati en Apo Jesus. Ipakat mo abe di kabaalam ay manglaylayad en Diyos ya din iib-am, et mo mapaligatan ka, anosam. Ilaem abe ta naanos ka sin iib-am. <sup>12</sup> Ipakat mo di kabaalam ay mamati ya mansilbilbi en Apo Jesus ay kaman din atlit ay mayad ay mangabak ta say gon-odem di biyag ay iwed patingga na. Tan pinili dakan Diyos ay mangon-od sin biyag ay nay sin nangibagaam ed idi ay mamati ka en Apo Jesus sin sangoanan di ad-ado ay ipogaw. <sup>13</sup> Naey pay di ibilin ko en sik-a sin pangiilaan Diyos ay managtago sin am-in ya si Cristo Jesus ay nangipaneknek si tet-ewa sin sangoanan Poncio Pilato. <sup>14</sup> Din ibilin ko et dadlon kan tongpalen din am-in ay bilbilin Diyos yan silibam ta adi da mataptapian si baken tet-ewa ya ta maga di mangwani en waday kolang na. Say amagem dana enggana ay domateng din agew ay panpailaan en Jesu Cristo ay Apo tako. <sup>15</sup> Din makaammo sin panpailaana ta maitongpal sin kosto ay agew et din madaydayaw ay Diyos. Ang-anggay na ay mangituray sin am-in, tan sisya din kangatoan ay Ari sin am-in ay ari ya din kangatoan ay Apo sin am-in ay apo. <sup>16</sup> Ang-anggay na si poon di biyag ay eng-enggana tan adi katkatey. Din kad-ana abe et adi mabalin ay sag-enen di ipogaw, tan palalo ay somisili. Maga polos di ipogaw si nangilila en sisya ya maga abe di makaila. Sapay koma ta madayaw ya manturay sisya ay eng-enggana. Amen.

<sup>17</sup> Ay Timoteo, bilinem din babaknang si wadas nan kalotaan ta adi da pangangatoen nemnem da. Ibagam abe ay din pantaltalkan da koma et baken din gamgameng da ay baken sigurado mo adi et si Diyos ay adi na imotan ay mangidawdawat en datako sin am-in ta say ganasen tako. <sup>18</sup> Ibilin mo abe en daida ay man-amag das siged ta baknang da abes siged ay amag. Adi da koma aben imotan di kinabaknang da mo adi et ibingayan da koma din iib-a da. <sup>19</sup> Tan mo say iyat da di, wada di kinabaknang ay idolin da ed langit ay maiarig si makneg ay fondasyon ono kaibasaran di namnamaen da sin tapin di agew, et gon-oden da din tet-ewa ay biyag ay eng-enggana.

<sup>20</sup> Timoteo, estem ay mangasikaso sin intalek Diyos en sik-a. Addawiam din ngalat ay magay silbi na sin pangilan Diyos ya din mankinontra ay mait-itdo ay kanan di odom ay ipogaw en laing, ngem nankamali da. <sup>21</sup> Tan wada da ay nangonod sisi ay naiksaw sin tet-ewa ay mait-itdo ay patpatien tako.

Sapay koma ta seg-angan Diyos dakayo am-in.

## **Din Maikadwa Ay Solat San Pablo En Timoteo Maipanggep Sin Solat Ay Nay**

Sin nangisolatan Pablo sin maikadwa ay solat ay nay en Timoteo, nabayag ay naibabalod ed Roma begew sin pammati na en Cristo. Si Timoteo pay et wada pay laeng ed Efeso ay man-it-itdo sin gimong di mamatis di.

Sin solat ay nay, ad-adoy inbagan Pablo en Timoteo ay mangipapigsa sin nemnem na ta ipapasnek na ay mangaskasaba ya mangam-amag sin odom ay obla ay intalek Diyos en sisya, olay mo waday mamaligat en sisya ya mangontra sin init-itdo na.

Inpanemnem na abe en Timoteo din lawa ay ogalin di ipogaw sin maod-odi ay agew et binagaanas sisya ta addawiana din kaman dadi. Inbaga na abe ay adi koma maitaptapis Timoteo sin diskotil ay magay silbi na sin pangilan Diyos, mo adi et es-estena koma ay mangon-onod ya mangit-itdo sin tet-ewa ay mait-itdo ay napo en Diyos.

### **Din Linaona**

Din panlogian di solat 1:1-2

Din nan-iyamanan Pablo begew en Timoteo ya din inbaga na en sisya ta ipapasnek na ay mansilbi en Diyos 1:3-20

Din ogalin di matalek ay mansilbi en Cristo 2:1-13

Din kabibiyag ay apolbalan Diyos 2:14-26

Din ogalin di ipogaw sin maod-odi ay agew 3:1-9

Pamagbaga ta ipapasnek Timoteo ay mamati ya mangitdo sin kalin Diyos 3:10-4:8

Maod-odi ay bilbilin 4:9-18

Din kagdangan di solat 4:19-22

### *Din Panlogian Di Solat*

<sup>1</sup> Sak-en si Pablo ay apostol en Cristo Jesus, tan say layden Diyos. Inbaa nas sak-en ta enak ikaskasaba din biyag ay inkarin Diyos en datako ay naitatapi en Cristo Jesus.

<sup>2</sup> Naey di solat ko en sik-a ay Timoteo ay ibilang ko ay laylaydek ay anak ko. Sapay koma ta wada en sik-a di seg-ang ya talna ay mapmapo en Diyos ay Ama tako ya si Cristo Jesus ay Apo tako.

### *Din Nan-iyamanan Pablo Begew En Timoteo Ya Din Inbaga Na En Sisya Ta Ipapasnek Na Ay Mansilbi En Diyos*

<sup>3</sup> Nadalos di konsensiak sin pansilbilbiak en Diyos ay kaman din ap-ok met laeng. Sin pankarkararakag en Diyos si inag-agew ya linablabi, adiak linglinglingan ay mangikarkararakag abe en sik-a ya man-iiyamanan en Diyos begew sin pammattim.

<sup>4</sup> Nemnemnemek abe din nanlolowaan di matam sin nansianan ta ed idi, isonga laydelaydek ay mangila en sik-a ta maragsakanak si kosto. <sup>5</sup> Adiak aben nilinglingan din naimposuan ay pammattim, et magay dowadowak ay kaman met laeng din pammattim Lois ay apom ya si Eunice ay inam ay nangon-ona mo sik-a ay namati. <sup>6</sup> Ipanemnem ko ngarud en sik-a ay dadlon kan osalen din kabaelan ay indawat Diyos sin nangapayak en sik-a. <sup>7</sup> Adi ka emeg-egyat ay mangosal, tan wada en datako din Ispirito Santo ay indawat Diyos, yan din idawdawat din Ispirito Santo en datako et baken din maneneene ay nemnem, mo adi din kabaelan tako ay mansilbi en Diyos ya mangipailas layad sin iib-a ya mangitpe sin awak.

<sup>8</sup> Isonga adi ka manbabbain ay mangipaneknek si maipanggep en Apo tako. Adi ka aben mababbain begew en sak-en ay naibabalod begew sin pansilbilbiak en sisya, mo adi et anosam din ligat ay lak-amen tako begew sin pangikaskasabaan tako sin siged ay

damag. Anosam, tan laton ay papigsaen dakan Diyos <sup>9</sup> ay nangisalakan en datako ya inayaganas datako ta datako di nasantoan ay ipogaw na. Din nangiyatanas di et baken begew sin inam-amag tako, mo adi begew sin plano na ay seg-anganas datako. Tan sin daan maparsuaan di lobong, enggay ninemnem na ay mangipailas seg-ang en datako babaen en Cristo Jesus. <sup>10</sup> Et ed wani inpaila na en datako din seg-ang na ay sana, tan inmali tet-ewa si Cristo Jesus ay mangisalakan en datako. Kinaana din kabaelan di pese yan inpaammo na ay mo mamati di ipogaw sin siged ay damag, waday biyag da ay mapo en Diyos ay iwed patingga na.

<sup>11</sup> Dinotokan Diyos sak-en ay man-apostol ta enak ikaskasaba ya it-itdo din siged ay damag ay nay, <sup>12</sup> et siya di din begew ay mapalpaligatak. Ngem adiak met mabain isna, tan am-ammok din taltalkek et dadlonak ammo ay waday panakabalina ay manalaknib sin intalek na en sak-en\* enggana ay domateng din agew ay kasin omalian Cristo.

<sup>13</sup> Mo man-itdo ka, dadlon kan tadonen din tet-ewa ay initdok en sik-a dowan ka aben itoltoloy ay mangipaila sin pammati ya layad ay idawdawat Cristo Jesus en datako ay naitatapi en sisya. <sup>14</sup> Babaen sin panakabalin di Ispirito Santo ay mantetee en datako, silibam din nabanol ay mait-itdo ay intalek Diyos en sik-a ta adi polos masoksokatan.

<sup>15</sup> Ammom ay istay am-in ay mamati ed Asia et binaybay-an das sak-en, pati da Figelus en Hermogenes. <sup>16</sup> Ngem mo si Onesiforus pay, sapay koma ta seg-angan Diyos am-in daida ay sinpamilya, tan namin ado ay inmiparagragsak. Adi aben mabain sin nakakadinaak, <sup>17</sup> mo adi inmanaanap sin dinmatnganas nan ed Roma enggana ay dinteng nas sak-en. <sup>18</sup> Ammom met abe din kadakdaken di badang na ed idi ed Efeso. Sapay koma ta maseg-ang din Apo en sisya sin agew ay pangokomana sin kaipoipogaw.

## 2

### *Din Ogalin Di Matalek Ay Mansilbi En Cristo*

<sup>1</sup> Sik-a pay ay anak ko, awatem din panakabalin ay oka tako ay naitatapi en Cristo Jesus begew sin seg-ang na en datako ta say papipigsaem di pammatim. <sup>2</sup> Ipasam abe sin matalek ay ipogaw din init-itdok ay dinngem ya dinngen aben di odom ay ad-ado ay ipogaw ta way iyat da ay mangitdo sin odom.

<sup>3</sup> Pakinam-os ka sin ligat ay domteng en datako ay mamati en Cristo Jesus ay kaman din iyat di matalek ay soldado ay manganos si ligat. <sup>4</sup> Tadonem abe din iyat di soldado ay adi masangsangaw sin am-amagen di sibilyan, tan laydena ay mapnek din apo na en sisya. <sup>5</sup> Nemnemem abe din atlit ay makilongba. Maga met di gon-gona na mo adi na onodan din bilbilin sin longbaan. <sup>6</sup> Siya na abe di esa ay pangarig. Di nagaget ay mansiwsiwat si talon et sisya koma di mangon-ona ay manga sin bingay na sin naapit. <sup>7</sup> Nemnemem si kosto dana ay inbagak en sik-a, et badangan dakan Apo Jesus ta maawatam am-in.

<sup>8</sup> Dadlon kan iigto sin nemnem mo din siged ay damag ay ikaskasabak ay tinagon Diyos kasin si Jesu Cristo ay polin Ari David. <sup>9</sup> Gapo sin pangikaskasabaak sin siged ay damag ay nay, mapalpaligatak ed wani ya nakakadinaanak abe ay kamanak tollisan. Ngem mo din kalin Diyos pay, adi mabalin ay makadinaan. <sup>10</sup> Isonga an-anosak din am-in ay ligat ko ay nay para sin kaipoipogaw ay pinilin Diyos ta say maisalakan da ya gon-oden da din sigesiged ay biyag ed langit ay iwed patingga na. <sup>11</sup> Tet-ewa adi din maibagbaga,

“Mo kaman takon naitapi ay natey sin nateyan Cristo, maitapi tako abe en sisya ay matago ed langit. <sup>12</sup> Mo ipapasnek tako ay mangan-anos si ligat, makituray tako en sisya, ngem mo isaot tako din nangammoan tako en sisya, isaot na abes datako.

\* **1:12** Di esa abe ay kaiologan nina sin Griego et: ...intalek ko en sisya...

<sup>13</sup> Mo baken takon matalek, matalek sisya pay dedan, tan adi mabalin ay adi na tongpalen din inbaga na.”

### *Din Kabibiyag Ay Apolbalan Diyos*

<sup>14</sup> Itoltoloy mo ay mangipanemnem sin inbagbagak sin mamati issa, yan daddaanam daida sin pangiilaan Diyos ta adi da mansosongbat ay maipanggep si owat kali, tan magay silbi na mo adi et dadaelena din pammatin di manmannge. <sup>15</sup> Mo sik-a pay, ipakat mo din kabaalam ay mangit-itdo ay kosto sin tet-ewa ay kalin Diyos ta maapolbalan ka sin pangiilaana ay kaman man-ob-oblá ay iwed panbainana sin am-amagena. <sup>16</sup> Adi ka maitaptapi sin niloloko ay tayoktok ay magay silbi na sin pangilan Diyos, tan din mangam-amag sidi et masepsep ay omaddawi da en sisya. <sup>17</sup> Din it-itdo da abe et kaman bayang ay komarkaro ay maot-otoot. Di dowá ay mangam-amag sidi et da Himeneus en Filetus. <sup>18</sup> Golgoloen da din pammatin di odom, tan naiksaw da sin tet-ewa yan it-itdo da ay enggay natago din natey. <sup>19</sup> Ngem olay mo waday kaman dadi ay mangit-itdos etek, adi met masoksokatan din tet-ewa ay kalin Diyos, tan kaman makneg ay fondasyon ay adi kaikiwkiweg, yan waday naisolat sidi ay kanana, “Ammon din Apo di ipogaw ay oka na.”\* Di esa abe ay naisolat sidi, “Mo sino ay mangwani ay mamati en Apo, masapol ay dokogana din lawa.”

<sup>20</sup> Sin dakdake ay beey di baknang, baken man-iso din kalasin di maos-osal. Wada di balitok ya palata di amag na ay nabanol di kaiosalana, wada abey kaiw ya linang di amag na ay para kompormi. <sup>21</sup> Siya abe sin ipogaw, mo addawiana di am-in ay lawa, osalen din Apo sisya si para nabanol, tan maibagay ya nasasagana ay maosal si para am-in ay siged ay maamag. <sup>22</sup> Isonga dokogam ngarud din laylayden di babbaro ay lawa, et ipakat mo ay mangamag sin siged ya mangipapigsa sin pammatin. Ipakat mo abe ay manglayad sin iib-am ya makiolnos si am-in ay nadalos di nemnem da mo mankedaw das tolong en Apo. <sup>23</sup> Addawiam abe din niloloko ay diskotil di ipogaw ay kolang di ammo na, tan maiturong dedan sin ibaw. <sup>24</sup> Yan din mansilbi en Apo, adi koma makiib-ibaw, mo adi et naasi di iyat na koma sin am-in ay ipogaw. Masapol abe ay nalaing ya naanos ay man-itdo <sup>25</sup> dowan aben nainayad di iyat na ay mamagbaga ya mamilin en daida ay mangontra sin tet-ewa ay mait-itdo ta balbalang baliwan Diyos di nemnem da ta say ibabawi da din basol da ya ammoan da din tet-ewa ay mait-itdo. <sup>26</sup> Tan mo say maamag en daida, mailit-ingan da et lomisi da sin kaman tagdey en Satanas ay nangna en daida ta pasien da din laydena.

## 3

### *Din Ogalin Di Ipogaw Sin Maod-odi Ay Agew*

<sup>1</sup> Masapol ay nemnemem ay sin maod-odi ay agew wada di domteng ay timpon di ligat. <sup>2</sup> Tan din ogalin di ipogaw et din awak da anggoy di nemnemnemem da, mangamgam das pilak, it-ek dan awak da ya nalalastog abey nemnem da. Iyewen dan iib-a da, adi da pasien da ama da en ina da, adi da ammo ay man-iyaman ya adi da polos nemnemem si Diyos. <sup>3</sup> Olay din an-ak da ya nankapoan da et adi da laylayden. Mo wada abey ililiget da, adi da polos pasinsiyaan. Palawlawaen dan iib-a da, adi da makaitpe sin awak da ya natangsit da. Palalo ay kaliliget da din siged. <sup>4</sup> Makalipot da ya oway di iyaat da ay adi da nemnememem din losot na. Nalabes ay nangato abe di nemnem da. Baken si Diyos di laylayden da mo adi et din pan-ganasan da. <sup>5</sup> Agin dadayaw da en Diyos, ngem adi dan bigbigen din panakabalina ay mamaliw sin lawa ay ogali da. Addawiam din kaman dadi ay ipogaw. <sup>6</sup> Tan wada en daida di em-emey sin kabeebeey ay mangaygayyem sin manbeey ta asi da isapitan di babbabai ay nalaka ay maawis ta onodan da din it-itdo da. Din babbabai ay nay et nadadagsenan da

\* 2:19 Bilbilang 16:5.



sin tinmapog ay basbasol da, et nalaka ay maitodtodon da sin ad-ado ay kalasin di lawa ay layden da. <sup>7</sup> Kankanayon ay man-ad-adal das baro ay mait-itdo, ngem adi da makailasin sin tet-ewa ay mait-itdo. <sup>8</sup> Din ipogaw ay maniksikap sin babbabai ay nay et pag kadodogis di nemnem da, et magay kowintan di agin papammati da sin pangiilaan Diyos. Konkontraen da din tet-ewa ay mait-itdo ay kaman da Jannes en Jambres ay nangontra en Moses ed idi. <sup>9</sup> Ngem adi mabayag di pangaw-awisan das ipogaw, tan ammoan di kaipoipogaw ay naloko da ay kaman met laeng din naamag en da Jannes en Jambres.

*Pamagbaga ta Ipapasnek Timoteo Ay Mamati Ya Mangitdo Sin Kalin Diyos*

<sup>10</sup> Ngem sik-a pay, laton ay inil-ilam yan inammoam din init-itdok ya din ogalik ya din panggep ko sinan biyag ko. Ammom din ison di pammatik, anos ya layad ko sin iib-ak ya din nangipapasnekak ay mangonod en Diyos. <sup>11</sup> Ammom abe din nalabes ay ligat ay ninamnam-os ko ay kaman din naamag en sak-en ed Antiok, Iconium ya ed Listra. Ngem laton ay inmisalakan din Apo sin am-in ay ligat ay nay ay nilak-am ko. <sup>12</sup> Et baken si sak-en anggoy di mapaligat, mo adi am-in da ay mayad ay mangonod sin nadiyosan ay ogali begew sin naitatapian da en Cristo Jesus. <sup>13</sup> Dowan pay din ipogaw ay lawa ya din mangiet-etek si iib-a da et masepsepsep din lawa ay am-amagen da, tan itoltoloy da ay mangietek sin iib-a da dowan da et aben maietekan. <sup>14</sup> Ngem sik-a pay, itoltoloy mo ay mamati sin inad-adal mo ay dadlon kan ammo ay tet-ewa, tan ammom dedan din nangitdo en sik-a. <sup>15</sup> Nanlogi abe sin kakitkittoy mo, nait-itdoan ka sin inpaisolat Diyos ay mabalin ay maninggaw sin nemnem mo ta mamati ka en Cristo Jesus ya maisalakan ka. <sup>16</sup> Am-in din inpaisolat Diyos et sisya di akin nemnem, et nabanol ay maosal, tan itdo na en datako din tet-ewa, ipaammo na mo waday kamali ya basol tako, bagaanas datako sin iyat di lawa ay ogali tako ay mabaliwan et paingsaenas datako ay mangonod si nalinteg ay kabibiyag, <sup>17</sup> ta say maga polos di kolang tako ay mansilbi en Diyos mo adi mansasagana tako ay mangamag si am-in ay kalasin di siged.

## 4

<sup>1</sup> Wada di dadlonak ibilin en sik-a sin pangiilaan Diyos ya si Cristo Jesus ay mangokom si am-in ay ipogaw, pati din matmatago ya din natey, et siya na. Begew sin kasin omalian Cristo Jesus ay en manturay, ibilin ko ay <sup>2</sup> mansasagana kas kankanayon ay mangikasaba sin kalin Diyos. Ipatatim ay mangikasaba mo layden di ipogaw ay mannge ono adi, mo maibagay di timpo ono adi. Ipaammom en daida mo waday kamali ya basol da yan bagaam daida ta ibabawi da koma. Papigsaem abe di nemnem da ay mangamag si siged. Ilaem ta ipapasnek mo ay mangipailas anos sin pangit-itdoam en daida. <sup>3</sup> Tan awni et domateng di timpo ay sigaan di ipogaw ay mannge sin tet-ewa ay mait-itdo, yan gapo ta layden da ay mangonod sin lawa ay wadas nemnem da, man-ayag das ad-ado ay ipogaw ay mangitdo sin layden da ay dengngen. <sup>4</sup> Isonga tetewengen da din tet-ewa ay mait-itdo dowan da pay onodan din baken tet-ewa ay daddad-at di ipogaw ed nabaon. <sup>5</sup> Ngem mo sik-a pay, masapol ay natimbeng kas owaoway. Mo domateng di ligat, anosam. Itoltoloy mo ay mangikaskasaba sin siged ay damag, ya estem ay mangamag sin am-in ay obla ay intalek Diyos en sik-a.

<sup>6</sup> Tan mo sak-en pay, maiarig di biyag ko si arak ay isiit da mo way animal ay idaton da en Diyos, din laydek ay kalien et dinmateng din timpo ay komaanak isnan daga. <sup>7</sup> Mo iarig ko abe din nansilsilbiak en Diyos sin longba, enggay inpakat ko din kabaalak sin longba ay nay et pinospos ko din longbaan. In-inset ko abe ay nangonod sin patpatien tako yan sinilsilbak ta adi masoksokatan. <sup>8</sup> Isonga wada di gon-gonak ay indodolin din Apo ay mangokom si kosto, et say idawat na en sak-en sin agew ay pangokomana sin am-in ay ipogaw begew sin nalinteg ay kabibiyag ko. Yan baken sak-en anggoy di gongonaana, mo adi am-in da ay mail-iliw sin panpailaana.

### *Maod-odi Ay Bililin*

<sup>9</sup> Mo mabalin, dalasem ay omalis na, <sup>10</sup> tan si Demas et kataynan en sak-en et inmey ed Tessalonica begew tan naimongsan di layad na sin biyag isnan daga. Mo si Cresente abe et inmey ed Galacia, ya si Tito et inmey ed Dalmacia. <sup>11</sup> Ang-anggay Lucas si wada ay kadwak. Mo omali ka, dag-osem si Marcos, tan mabalin ay tomolong sin oblak. <sup>12</sup> Inbaak si Tikicus ed Efeso. <sup>13</sup> Yan mo omali ka, dag-osem din obolkot ay inpayag ko en Carpus ed Troas. Itapim abe din kalibrolibrok ya namnamed din nalopilop ay lalat ay nasolasolatan.

<sup>14</sup> Si Alexander ay manpanday et ad-adoy lawa ay inamag na en sak-en, ngem si Diyos di makaammo ay manobalit en sisya insigon di inamag na. <sup>15</sup> Sipsipotam sisya tan napinget ay nangonkontra sin it-itdo tako.

<sup>16</sup> Sin damo ay namistigalan da en sak-en, maga polos di ib-ak si binmadang sin insongsongbat ko. Tinmaynan da am-in. Sapay koma ta adi ibilang Diyos ay basol da. <sup>17</sup> Ngem olay mo say inyat da di, laton ay adi tinmaytaynan din Apo, mo adi et kinmadkadwa et inyaanas sak-en si panakabalin. Isonga waday wayak ay nanongpal sin nangikaskasabaak sin siged ay damag, et dinngen am-in di Gentil ay wadas di. Insalakana abes sak-en sin kaeegyat ay ligat ay maiarig sin tepek di layon. <sup>18</sup> Yan ammok ay isalakan din Apo si sak-en sin am-in ay lawa enggana ay iey nas sak-en sin panturayana ed langit. Sapay koma ta madaydayaw sisya ay eng-enggana. Amen.

### *Din Kakdengang Di Solat*

<sup>19</sup> Pakomostaam da Priscilla en Aquila, ya siya abe en Onesiforus ya din pamilya na. <sup>20</sup> Nataynan si Erastus ed Corinto, et si Trofimus pay, tinaynak ed Miletus tan mansaksakit. <sup>21</sup> Ikalkaligatam ay omalis na ta asi pinag-aandap.

Da Eubulus, Pudens, Linus ya si Claudia ya am-in din odom ay mamati ay wadas na, siya abe dedan ay pakomostaan daka.

<sup>22</sup> Sapay koma ta kanayon ay kadjadwaen dakan Apo ya ta itoltoloy na ay manegsegang en dakayo am-in.

## **Din Solat San Pablo En Tito Maipanggep Sin Solat Ay Nay**

Din solat ay nay et insolat San Pablo en Tito ay esa ay Gentil ay namati begew sin initdo na (1:4). Si Tito et dadlon matalek ya nagaget ay kaoblaan Pablo. Nakiey en da Pablo en Barnabas sin en da nakimitingan ed Jerusalem (Galacia 2:1), ya nabanol abe di inpaob-oblan Pablo en sisya ed Corinto. Sisya di inbaan Pablo isdi ay makaammo sin kaolnongan di pilak ay maibadang sin mamati ed Jerusalem (2 Corinto 8:6, 16-24), ya sisya abe di nangikalintegang sin kinaapostol Pablo sin gimong ed Corinto ta say somiged kasin di nemnem da en sisya (2 Corinto 7:5-7). Nakioblas Tito en Pablo sin nangikaskasabaan da sin siged ay damag ed Creta, et tinaynan Pablo isdi ta itoloy na ay mangit-itdo sin man-gimgimong.

Sin nangisolatan Pablo isna, kasasadot di kasasaad di gimgimong ed Creta. Ad-ado di nangit-itdos baken tet-ewa ay nanangsangaw si odom ay mamati (1:10-11), et maga pay laeng di nadotokan ay papangolon di gimgimong ay mangipalawag si tet-ewa ay mait-itdo. Naalanan abe din mamati sin lawa ay ogalin di iib-a da ed Creta ay kaman din kamalala ya sadot. Isonga insolat Pablo na en Tito ta ipaammo na en sisya din kosto ay iyat na ay mangolnos sin problima ay nay. Inpaammo na abe ay waday kalebbengan Tito ay say panakaawak na ta pasien koma di taga-Creta din bilbilina ya it-itdo na (1:5).

Tolo di napateg ay linaon din solat ay nay. Din omona et inpanemnem Pablo en Tito din siged ay ogali ay on-onodan koma din madotokan ay papangolon di gimgimong, namnamed tan wada di nangit-itdos baken tet-ewa ya mangon-onod si kadodogis ay kabibiyag. Maikadwa, inbaga na din kosto ay maitdo sin nankinalasi ay ipogaw sin gimgimong ay kaman din nankakay, nankababkes, iiyogtan ay lallalaki, ya babag-en. Maikatlo, inpalawag na din kabibiyag ay onodan koma di am-in ay mamati begew sin naisalakanan da.

### **Din Linaona**

Din panlogian di solat 1:1-4

Maipanggep si papangolon di gimgimong 1:5-9

Maipanggep si nangit-itdos baken tet-ewa 1:6-15

Bilbilin sin nankinalasi ay ipogaw sin gimgimong 2:1-15

Din kabibiyag ay onodan koma di am-in ay mamati 3:1-11

Maod-odi ay bilbilin ya kagdangan di solat 3:12-15

### *Din Panlogian Di Solat*

<sup>1</sup> Sak-en si Pablo ay dinotokan Diyos ay mansilsilbi en sisya. Esaak abe ay apostol Jesu Cristo. Inbaa nas sak-en ta papigsaek din pammatin di pinilin Diyos ay ipogaw na ya ta ipaammok en daida din tet-ewa ay maitdo ay napo en Diyos ay mantongpal si nadiyosan ay kabibiyag. <sup>2</sup> Amagek dana ta say waday namnamaen da ay biyag si eng-enggana. Si Diyos ay adi polos man-et-etek et inkari na din biyag ay nay sin daan maparsuaan di lobong. <sup>3</sup> Et sin kosto ay timpo ay inkeddeng na, inpaammo na sin kaipoipogaw babaen sin siged ay damag. Din siged ay damag ay nay di intalek na en sak-en, et siya na din ikaskasabak, tan si Diyos ay mangisalakan en datako di nangibilin en sak-en.

<sup>4</sup> Naey di solat ko en sik-a ay Tito ay ibilang ko ay tet-ewa ay anak ko begew sin pammati tako. Sapay koma ta wada en sik-a di seg-ang ya talna ay mapmapo en Diyos Ama ya en Cristo Jesus ay mangisalakan en datako.

*Maipanggep Si Papangolon Di Gimgimong  
(1 Tim. 3:1-7)*

<sup>5</sup> Din gapo si nanaynanak en sik-a ed Creta et ta say olnosem din daan pay laeng maikosto ya mandotok kas papangolo sin esa ya esa ay gimong sin kailiili issa. Adi ka linglinglingan din intogon ko ay maipanggep si madotokan. <sup>6</sup> Din pangolon di gimong et masapol ay maga di maipabasol en sisya. Masapol abe ay es-esa di asawa na ya adi makibabbabai. Olay din an-ak na et masapol ay mamati ya managtongpal da ya maga di kadamagan da ay mangam-amag si lawlawa. <sup>7</sup> Din gapo ay maga koma di maipabasol sin mangipangolo si gimong et sisya di naitalkan di oblan Diyos. Isonga masapol ay baken nangato di nemnem na, baken nalaka ay bomonget, ya baken makabeteng. Masapol abe ay baken maisik ya adi man-gamgam si pilak, <sup>8</sup> mo adi et masapol ay managsangaili ya mananglayad si siked. Masapol abe ay nanemneman ya naannad ay ipogaw ay makaitpe si awak na. Masapol abe ay nalinteg ya nasantoan. <sup>9</sup> Mo maipanggep si pammati na, masapol abe ay dadlonan pasien din tet-etet-ewa ay initdo ta ay mabalin ay talken di ipogaw. Masapol ay dadlonan patpasien ta say mabalin ay itdo na abe sin iib-a na ya bagbagaanas daida ya ipaila na din nankamkamalian di mangonkontra si tet-ewa.

### *Maipanggep Si Nangit-itdo sin Baken Tet-ewa*

<sup>10</sup> Tan ad-ado di adi kabagaan ay ipogaw ay mangiet-etek si iib-a da babaen sin it-itdo da ay magay banol na, namnamed di Judio ay namati. <sup>11</sup> Masapol ay maipasaldeng da, tan sangsangawen dan pammatin di ad-ado ay ipogaw ya olay am-in ay miembron di odom ay pamilya begew sin pangit-itdoan das baken lebbeng na ay maitdo. Kababain di panggep da ay mangiyat sidi, tan owat pilak di gamgamgamen da. <sup>12</sup> Wada di kailian da ay mamadto ay kanana, “Nanlogi ed idi, nadamdama ay makaetek di taga-Creta. Makedse da ay kaman maangat ay animal. Nasadot da ay man-obla ngem makaem da ay mangan.” <sup>13</sup> Siya di din kanan di kailian da ay taga-Creta, et tet-ewa iman. Isonga dadlon kan ipaneknek en daida din nankamkamalian da ta say komosto di pammati da <sup>14</sup> et adi da patpasien din daddad-at di Judio ya din bilbilin di ipogaw\* ay manigaan sin tet-ewa ay mait-itdo. <sup>15</sup> Mo din ipogaw ay nalinis di nemnem na et nalinis abe di pangibilangana si am-in, ngem mo din kadodogis di nemnem na ay adi mamati et kadodogis am-in en sisya, tan enggay kinmadodogis din nemnem na et adi na mailasin di siked ya lawa. <sup>16</sup> Kankanan da en ammo das Diyos, ngem maila ay baken tet-ewa begew sin am-amagen da. Kaliliget Diyos daida, adi da patpasien sisya, ya maga polos di kabaelan da ay mangamag si siked.

## 2

### *Bilbilin Sin Nankinalasi Ay Ipogaw Sin Gimgimong*

<sup>1</sup> Ngem sik-a pay ay Tito, itoltoloy mo ay mamagbaga sin mamati ta onodan da di maibagay sin kosto ay mait-itdo. <sup>2</sup> Mo din nankakay, bagaam daida ta ten-en day inomen da ya odom ay am-amagen da, ta maikari da ay marispito begew sin siked ay ogali da, ya ta itpe day awak da. Bagaam abe ta napasnek ya kosto di pammati da, naimposan di layad da, ya peteg ay naanos da.

<sup>3</sup> Mo pay din nankababkes, bagaam abe si daida ta onodan day nasantoan ay kabibiyag ay maibagay sin pammati da. Bagaam abe si daida ta adi da palawlawen di iib-a da ono manbetbeteng, mo adi et siked di itdo da <sup>4</sup> sin babbabai ay iiyogtan da ta say maitdoan da si kosto ay iyat da ay manglayad sin as-awa ya aan-ak da. <sup>5</sup> Bagaan da abe si daida ta itpe day awak da ya nalinis di ogali da. Masapol abe ay asikasoan da di

\* **1:14** Ad-adoy bilbilin di Judio ay maipanggep si makan ya odom ay maos-osal ay ibilang da ay nalinis ono kadodogis. Ngem kanan Jesus en baken makan di mangipakadodogis si ipogaw mo adi din lawa ay wada sin nemnem na. Isonga mo enggay nalinis di nemnem di ipogaw, mabalin ay nalinis di pangibilangana si am-in ay makan ya kaman nidi. Ilaen sin Marcos 7:14-19 ya Colosas 2:20-22.

beey da, naanos da, ya manpaituray da sin as-awa da. Tan mo onodan da dana ay ogali, adi malaslasoy din kalin Diyos ay it-itdo tako.

<sup>6</sup> Siya abe sin iiyogtan ay lallalaki, bagaam si daida ta it-itpe day awak da sin am-in ay am-amagen da. <sup>7</sup> Sik-a abe et siged koma di ogalim si kanayon ta say siged kas tadonen di iib-am. Sin pangit-itdoam, ilaem ta naimposoan di panggep mo ya maibagay di iyat mo ay mankali sin napateg ay it-itdom. <sup>8</sup> Ilaem abe ta kosto di it-itdom ta say maga di manglaslasoy. Tan mo kaman dana di iyat mo, mabainan di komonkontra, tan adi da mabalin ay palawlaween si datako.

<sup>9</sup> Mo pay din babag-en et bagaam daida ta manpaituray da sin among da sin am-in ay am-amagen da ta say mapnek di among da en daida. Adi da koma makisongsongbat en daida <sup>10</sup> ono manman-a si sanikwa da, mo adi et ipaila da komas kankanayon ay dadlon dan matalek ta say begew sin am-in ay am-amagen da, madaydayaw din mait-itdo ay maipanggep en Diyos ay mangisalakan en datako.

<sup>11</sup> Tan inpailan Diyos di seg-ang na ta maisalakan di am-in ay ipogaw. <sup>12</sup> Begew sin seg-ang na ay nay, it-itdoanas datako ay manokog sin am-in ay mangiaddawi en datako en sisya ya am-in ay laylayden di nailobongan ay ipogaw ta say itpe tako di awak tako ya onodan tako di nalinteg ya nadiyosan ay ogali sin kawada takos nan lobong. <sup>13</sup> Siya dana di ogali ay onodan tako koma sin panedsed-an tako sin omiparagsak ay namnamaen tako. Din namnamaen tako ay nay et din kaipailaan di mankoniniing ay kinadiyos Jesu Cristo ay napateg ay Diyos tako ya mangisalakan en datako. <sup>14</sup> Sisya di nangidawat sin awak na ay matey para en datako ta mapawayaan tako sin am-in ay kabaelan di basol ya ta panbalinenas datako si nasantoan ay ipogaw na ay silalayad ay mangamag si siged.

<sup>15</sup> Siya dadi di itdom sin ipogaw issa dowan ka aben bagaan daida ta onodan da ya ipaammom mo waday pankolongan da. Sin pangam-amagam en dana, ipailam din am-in ay kalebbengam ta adi dakan laslasoyen.

### 3

#### *Din Kabibiyag Ay Onodan Koma Am-in Di Mamati*

<sup>1</sup> Ipanemnem mo sin mamati issa ay masapol ay manpaituray da sin tuturay ya odom ay waday kalebbengana en daida ta patien das daida. Nakasagana da koma abe ay bomadang mo waday siged ay maamag. <sup>2</sup> Maga koma di palawlaween da ya adi da koma makiib-ibaw mo adi et naanos da ya kanayon ay patpatgen da din am-in ay ipogaw.

<sup>3</sup> Tan olay datako ay mamati et kolang abe di nemnem takos maipanggep en Diyos ed idi et baken takon managtongpal. Naiet-etekan tako et nasangaw tako si baken kosto ya naibabag-en tako sin nankinalasi ay laylayden di awak tako ya lawa ay ginan-ganas tako. Lawa di nemnem takos iib-a tako, nan-inapal tako ya nanliniget tako. <sup>4</sup> Ngem si Diyos ay mangisalakan en datako et inpaila na di seg-ang ya layad na <sup>5</sup> et insalakanas datako. Inmisalakan baken gapo sin inam-amag tako ay siged mo adi et din seg-ang na. Insalakanas datako babaen sin nangowasana en datako sin nangidawtan di Ispirito Santo en datakos baro ay biyag ya namaroana en datako. <sup>6</sup> Indawat na en datako din Ispirito Santo ay maga polos di inimotana babaen en Jesu Cristo ay mangisalakan en datako. <sup>7</sup> Inamag na di ta say waday namnama tako ay makitawid sin biyag ay eng-enggana. Din kaibasaran di namnama tako ay nay et din nangibilangana ay nalinteg tako begew sin seg-ang na. <sup>8</sup> Tet-etet-ewa dana ay inbagak ya dadlon mapati, isonga laydek ay dadlon kan itdo sin namati en Diyos issa ta man-gaget das kanayon ay mangamag si siged.

Sigesiged dana ay maitdo ya maiturong da sin pansigdan di am-in ay ipogaw. <sup>9</sup> Ngem adi ka maitaptapi sin magay silbi na ay pansosongbatan di ipogaw ay maipanggep sin lislistaan di ngadngadan di iiyon-a. Addawiam abe din pan-iibawan da ay maipanggep sin linteg Moses, tan din kaman dana ay ib-ibaw et magay siged ay pantongpalan da,



tan maga di ibadang da sin pammati tako. <sup>10</sup> Mo waday ipogaw ay mangit-itdos baken tet-ewa ay mangisissian si mamati, bagaam sisya ta isaldeng na. Mo mamin doway ay bagbagaam yan adi na pasien, adim kadmawaen, <sup>11</sup> tan ammom ay din kaman nidi ay ipogaw et managbasol ay enggay inmaddawi sin tet-ewa. Olay sisya et ammo na ay lawa di am-amagena.

*Maod-odi Ay Bilbilin Ya Kadmangan Di Solat*

<sup>12</sup> Ibaak si Artemas ono si Tikicus ay emey issa. Mo somawang, ipakat mo di kabaelam ay en omila ed Nicopolis, tan isdi di ninemnem ko ay en pantean sin pinag-aandap.

<sup>13</sup> Ipakat mo abe ay bomadang en Zenas ay abogado ya si Apollos mo manlobwat das sa ta wada koma en daida din am-in ay kasapolan da sin panbiyahian da. <sup>14</sup> Ilaem abe ta ingsaan din gagait tako ay mamati ay mangam-amag si siged ta bomadang da sin tet-ewa ay makasapol si badang ta say waday siged ay pantongpalan di biyag da.

<sup>15</sup> Am-in ay gagait kos na et pakpakomostaan daka. Pakomostaan mi abe din manglaylayad en dakami begew sin pammati tako.

Sapay koma ta seg-angan Jesu Cristo ay Apo tako si dakayo am-in.

## Din Solat San Pablo En Filemon Maipanggep Sin Solat Ay Nay

Si Filemon et esa ay baknang ed Colosas ay namati en Apo Jesus. Waday bag-ena ay manngadan si Onesimus ay linmayaw, et inmey ed Roma ay naibabalodan Pablo. Sin kawadan Onesimus isdi, namati begew sin init-itudon Pablo et nanbalin si napasnek ay Cristiano. Layden koman Pablo ay makitetees Onesimus en sisya, tan dakdake di badang na, ngem gapo ta maga di pamalobos Filemon, kanan Pablo en pantaoliena en among na. Isonga insolat na din solat ay nay ta kedawena ay pakawanen Filemon si Onesimus. Kedawena abe ay adi koma ibilang Filemon si Onesimus ay owat nan bag-en mo adi et agi na begew sin nakies-esaan da en Apo Jesus.

### **Din Linaona**

Din panlogian di solat 1-3

Din nan-iyamanan Pablo begew en Filemon 4-7

Din kindaw Pablo maipanggep en Onesimus 8-22

Din kakdangan di solat 23-25

### *Din Panlogian Di Solat*

<sup>1</sup> Sak-en si Pablo ay naibabalod begew sin pansilsihiak en Cristo Jesus. Din gait kos na et din agi tako ay si Timoteo. Naey di solat mi en sik-a ay Filemon ay laydelayden mi ay gayyem ya kaoblaan mi. <sup>2</sup> Iturong mi abe din solat ay nay en Apia\* ay kababaian mi ya si Arkippus ay gait mi ay soldadon Cristo ya pati daida am-in ay mamati ay makigimong sin beey yo. <sup>3</sup> Sapay koma ta wada en dakayo di seg-ang ya talna ay mapmapo en Diyos ay Ama tako ya si Apo Jesu Cristo.

<sup>4</sup> Agi ay Filemon, kanayon ay man-iyamanak en Diyos sin pangikarkararak en sik-a, <sup>5</sup> tan madamdag ko din pammatim en Apo Jesus ya din layad mo sin am-in ay ipogaw en Diyos. <sup>6</sup> Ikarkararak ko ay begew sin nan-es-esaan tako sin pammati tako, mataptapian koma di pangawat mo sin amin ay bindisyon ay idawdawat Diyos en datako begew sin panggep na ay madayaw si Cristo. <sup>7</sup> Man-iyamanak abe ay agik, tan palalo ay naragsaragsakanak ya pinmigma di nemnem ko begew sin layad mo sin ipogaw en Diyos. Tan inpapigsam di nemnem da.

### *Din Kindaw Pablo Maipanggep En Onesimus*

<sup>8</sup> Isonga wada di kedawek en sik-a. Olay mo waday kalebbengak ay indawat Cristo ay mangibilin si kosto ay amagem, baken sas iyat ko, <sup>9</sup> mo adi et manpakpakaasiak en sik-a begew sin layad. Amagek na olay mo sak-en si Pablo ay enggay nakay† ya naibabalod pay begew en Cristo. <sup>10</sup> Pangaasim ta seg-angam si Onesimus ay nanbalin si anak kos pammati sin naibabalodak. <sup>11</sup> Ed idi, kaman kayman magay badang na en sik-a, ngem ed wani, ad-ado di maibadang na en daita ay dowa.‡

<sup>12</sup> Nay ay pantaoliek en sik-a, sisya ay laydelaydek, ta makaoway ka en sisya. <sup>13</sup> Laydek koma pay ay ipakodan sisya ta bomadang en sak-en sin kamaiwed mo sin nay naibabalodak begew sin nangikaskasabaak sin siged ay damag. <sup>14</sup> Ngem ninemnem ko ay baken kosto mo say iyat ko di tan nay maga pay laeng di wayam ay mangipalobos. Tan

\* **1:2** Si Apia et asawan Filemon, ya si Arkippus et kanan di odom en pangolon di gimong ay natoptopog sin beey da. Kanan aben di odom en anak da Filemon en Apia sisya. † **1:9** Din naisolat sin odom ay manuskrito sin Griego et ...sak-en si Pablo ay panakaawak Cristo... Sin Griego, es-esa ay letra di kailasanan di kali ay nakay ya panakaawak ‡ **1:11** Din olog di ngadan Onesimus et waday badang na.

adiak layden ay mapilpilit ka ay mangamag si siged mo adi et mapo koma sin mismo ay nemnem mo.

<sup>15</sup> Mabalín ay din gapo ay naisian si Onesimus en sik-a si sinkaattikan et ta mantaoli ay maitapi en sik-a si eng-enggana. <sup>16</sup> Ngem manlogi ed wani, baken owat esa ay bag-en di pangilam koma en sisya mo adi et nabanbanol mo esa ay bag-en. Tan ed wani, sisya di esa ay laydelayden tako ay agi. Dakdake di layad ko en sisya, ngem namnamed ay laydelaydem, baken owat begew sin kaipogaw na ngem gapo ta agim sisya begew sin nakies-esaan yo en Apo Jesus. <sup>17</sup> Isonga mo tet-ewa ay ibilang mos sak-en ay kadwam ay mamati, awatem sisya sin pantaoliana ay kaman din pangawatam koma en sak-en. <sup>18</sup> Mo wada di basol ono otang na en sik-a, olay sak-en di pansingilam. <sup>19</sup> Sak-en ay mismo di akin solat ya akin pirma isna ta say pangammoam ay tongpalek din inbagak: “Sak-en si Pablo. Bayadak din otang Onesimus en sik-a.” Adiak ngin masapol ay ipanemnem en sik-a ay otang mo en sak-en din biyag mo ay eng-enggana. <sup>20</sup> Isonga agik, sapay koma ta patgam nan kedaw ko en sik-a begew sin pammati ta en Apo Jesus. Omiparagsak ka koma ya papigsaem nan nemnem ko, tan sin-agi ta begew sin nakies-esaan ta en Cristo. <sup>21</sup> Insolat ko dana en sik-a tan dadlonak namnamaen ay tongpalem din kedaw ko ya nasursurok pay. <sup>22</sup> Wada pay di esa ay ibagak. Mo mabalín, isaganaam kod sak-en si kowarto ay panteak. Tan namnamaek ay songbatan Diyos di karkararag yo ta maipawayaak ay mamasyal en dakayo.

#### *Din Kakdengan Di Solat*

<sup>23</sup> Si Epafras ay gait ko ay balod begew en Cristo Jesus et pakomostaanas dakayo. <sup>24</sup> Siya abe sin kaoblaak ay da Marcos, Aristarkus, Demas ya si Lucas. <sup>25</sup> Sapay koma ta seg-angan Apo Jesu Cristo si dakayo am-in.

## Din Solat Sin Hebreo Maipanggep Sin Solat Ay Nay

Din solat ay nay et naisolat sin esay gimong di Judio ono Hebreo ay mamati. Naisolat ta mapapigsa din pammati da, tan masepsep ay mapalpaligatan da, et nganngani ay taynan da din pammati da en Cristo ta mantaoli da sin relihion di Judio. Din inyat di nangisolat ay nangipapigsa en daida et inpaammo na din kinangaton di kasasaad Jesus.

Tolo di napateg ay inpalawag na ay maipanggep en Jesus. Din damo et Anak Diyos sisya ay magay nanlogiana ya patingga na. Gapo ta sisya din Anak Diyos, nangatngato mo din mamadto ya si Moses ya olay din aanghel. Maikadwa, nabanbanol di inamag Jesus mo din inam-amag di papadin di Judio, isonga sisya di naiskat en daida ay mangiaalagey si ipogaw en Diyos ay eng-enggana. Maikatlo, begew en sisya, maisalakan ay kosto di ipogaw, tan sisya din kosto ay natongpalan di og-ogalin di Judio ya din aanimal ay indatdaton da en Diyos.

Pag dad-aten din nangisolat din inam-amag di madayaw ay Judio ed nabaon begew sin pammati da ta say ipapasnek koman din mamasa ay mamati en Jesus, olay mo peteg ay mapalpaligatan da. Sin kagdangan di solat, binagbagaanas daida ta adi da omaddawi en Diyos mo adi et onodan da di kabibiyag ay panlaylaydana.

### **Din Linaona**

Din kinadiyos Jesus ay Anak Diyos 1:1-3

Nangatngato si Jesus mo din aanghel 1:4-2:18

Nangatngato si Jesus mo da Moses en Josue 3:1-4:13

Din nanlasinan di kinapadin Cristo 4:14-7:28

Din nanlasinan di intolag Diyos ay siniglotan Cristo 8:1-9:28

Din nanlasinan di indaton Cristo 10:1-31

Din pateg di pammati 11:1-40

Din kabibiyag di mamati 12:1-13:19

Din kagdangan di solat 13:20-25

### *Din Kinadiyos Jesus Ay Anak Diyos*

<sup>1</sup> Ed nabaon, namin ado ay waday inpaammon Diyos sin aap-o tako babaen sin nankalkaliana ay mamadto. Nankinalasi abe di inyat na ay nangipaammo. <sup>2</sup> Ngem sin nay maod-odi ay agew pay, din nakikaliana en datako et din Anak na. Din nay Anak na di nangipaparsuaana sin am-in ay wada ya sisya di pinili na ay manawid sin am-in. <sup>3</sup> Maiila abe en sisya din am-in ay kinasiged ya kinangaton Diyos, tan sisya din kostokosto ay kaipailaan di kinadiyos en Diyos. Sisya abe di mangol-olnos ya manmanngel sin am-in ay wada, et din kali na anggoy di os-osalena tan manakabalin. Idi nakdeng di inamag na ta malinisan din basbasol di ipogaw, nantaoli ed langit et tinmokdo sin makannawan Diyos.

### *Nangatngato Din Anak Diyos Mo Din Aanghel*

<sup>4</sup> Isonga nanbalin ay nangatngato mo din aanghel. Siya abe din inpangadan Diyos en sisya et madaydayaw mo din ngadan di aanghel. <sup>5</sup> Tan maga polos di anghel si nangibagaan Diyos en,

“Sik-a din Anak ko. Ed wani ipailak ay sak-en si Amam.”\*

Adi aben inbagan Diyos maipanggep si olay sino ay anghel,

“Sin-ama kami.”†

\* 1:5 Salmo 2:7; Inam-amag 13:33. † 1:5 2 Samuel 7:14.

6 Et sin nangibaaan Diyos sin besag ay Anak na sinan daga,‡ kanana,  
 “Dakayo ay aanghel ko, dayawen yo am-in sisya.”§  
 7 Siya na di kanan Diyos maipanggep sin aanghel,  
 “Din aanghel ko et ibabbaak daida ay kaman dagem ya apoy.”\*  
 8 Ngem din kanana pay sin Anak na et,  
 “Sik-a ay Diyos, manturay ka ay eng-enggana. Nalinteg abe di iyat mo ay manturay.  
 9 Laylaydem din siked ya kalkaliget mo din lawa. Isonga sak-en ay Diyos mo et  
 peteg di dayaw ya ragsak ay indawat ko en sik-a mo din iib-am.”†  
 10 Kanana abe,  
 “Sin damodamo, sik-a ay Apo di namarsua sin daga ya am-in abe ay wada ed daya.  
 11-12 Awni et mamaga da am-in, ngem sik-a pay et wada kas eng-enggana. Kaman  
 dan bado ay domaan ya masokatan, tan awni et sokatam daida. Ngem mo sik-a  
 pay, komakaman ka, tan magay pap-eng di biyag mo.”‡  
 13 Maga abe di olay esay anghel ay nangibagaan Diyos sin inbaga na sin Anak na ay  
 kanana,  
 “Tomokdo ka sin makannawan ko ta downak ipagatin en sik-a am-in di kaibaw mo.”§  
 14 Sino ngarud di kasasaad di aanghel? Daida met din adi kaila ay mansilsilbi en Diyos,  
 et ibabbaa nas daida ay en mamadang sin kaipoipogaw ay maisalakan.

## 2

### *Masapol Ay Patien Tako Din Inbagbagan Apo Jesus*

1 Gapo ta kaman nidi din kinangaton di Anak Diyos, namnamed ay masapol ay pasien  
 tako din dindinnye tako ta say adi tako omaddawi sin tet-ewa. 2 Tan kapilitan ay  
 tongpalen di ipogaw din linteg ay inpasan Diyos sin aanghel ed idi,\* et olay sino ay  
 nakalabsing et nilak-am na din lebbeng na ay dosa. 3 Mo kaman nidi di napasamak  
 en daida ay adi nanongpal sin inbagan di aanghel, ay siya mo mailisian tako di dosa  
 mo baybay-an tako din nabanobanol ay kaisalakanan di ipogaw ay inbagan Apo Jesus?  
 Tan si Apo Jesus din damdamo ay nangibaga si maipanggep sin nay kaisalakanan tako,  
 et din nanngge en sisya, pinaneknekan da din katet-ewa na en datako. 4 Si Diyos abe  
 et naitapi en daida ay nangipaneknek ay tet-ewa begew sin nakaskasdaaw ay inpaam-  
 amag na ay sinyal ya nankinalasi ay milagro. Pinaneknekana abe begew sin kabaelan  
 ay inpawaras na sin Ispirito Santo ay maibasar sin laydena.

### *Si Jesus Et Nanbalin Si Ipogaw Ta Isalakanas Datako*

5 Din baro ay lobong ay ibagbaga mi ay maiskat, baken din aanghel di pinilin Diyos ay  
 mangituray mo adi et ipogaw. 6 Tan say kalkalien din inpaisolat Diyos ay kanana,  
 “Ay Diyos, sino aya di kasasaad di ipogaw ta say nemnemnemem ya segseg-angam  
 daida? 7 Tan olay mo owat dan ipogaw, insaad mos daida si nababbaba si at-atik  
 mo din aanghel. Palalo abe ay indayaw mos daida ay kaman din dayaw di ari,  
 8 tan inpaituray mo en daida din am-in ay wada.”†  
 Din kananas na en inpaituray Diyos sin ipogaw din am-in ay wada et laydena ay kalien  
 en maga polos di adi da iturayan. Mail-ila kayman ay datako ay ipogaw et adi tako  
 iturturayan ed wani din am-in ay wada. 9 Ngem ammo tako ay natongpal na begew  
 en Jesus. Tan sisya di naipababa si at-atik mo din aanghel sin nanbalinana si ipogaw.  
 Inamag na di ta say matey sisya para sin am-in ay ipogaw begew sin seg-ang Diyos en

‡ 1:6 Mo maipanggep si ibilang Diyos ay besag na, ilaen sin 12:23. Mo maipanggep abe si lebbeng di besag, ilaen  
 sin 12:16-17 ya Genesis 25:29-34 ya Genesis 27. § 1:6 Deuteronomio 32:43. \* 1:7 Salmo 104:4. † 1:9 Salmo  
 45:6-7. ‡ 1:11-12 Salmo 102:25-27. § 1:13 Salmo 110:1; Inam-amag 2:34-35. \* 2:2 Ilaen abe sin Inam-amag  
 7:38 ya Galacia 3:19. † 2:8 Salmo 8:4-6.



datako. Ngem ammo tako ay ed wani, indayaw Diyos sisya ay kaman din dayaw di ari begew sin nateyana ay sana.

<sup>10</sup> Si Diyos di namarsua sin am-in ya naparsua am-in ta say madayaw sisya. Kostokosto ngarud di plano na ay nanbalinenas Jesus si kosto ay pangolo tako babaen sin ligat ay nilak-am na, tan si Jesus di mangipangpango en datako sin kaisalakanan tako. Inamag Diyos di ta say ad-ado di anak na ay ayagana ed langit ay makilak-am sin kinangato na. <sup>11</sup> Si Jesus ay mangipabalin en datako si nasantoan ay ipogaw en Diyos ya datako ay panbalinena si nasantoan et es-esa di Ama tako am-in, isonga adi mabain si Jesus ay mangwani en aag-i nas datako. <sup>12</sup> Tan kanana en Diyos, “Ibagbagak din maipanggep en sik-a sin aag-ik. Mankankantaak ay mangidaydayaw en sik-a sin kasinsinopan mi.” ‡

<sup>13</sup> Kanana abe, “Talkek si Diyos,” ya kanana pay, “Naeyak ay naitatapi sin aan-ak Diyos ay intalek na en sak-en.” §

<sup>14</sup> Gapo ta din aan-ak Diyos ay kankananas na et ipogaw da ay waday awak da ay matey, nanbalin abes Jesus si ipogaw ay waday awak na ay kaman daida ta waday iyat na ay matey. Inamag na di ta say begew sin nateyana, dadlonan abaken din Diablo ay napoan di kateyan ya kaisianan di ipogaw en Diyos <sup>15</sup> ya ipawaya na abe am-in daida ay kaman bag-en manlogi sin binmelaan da begew sin egyat da ay matey. <sup>16</sup> Nalawag ay baken aanghel di badbadangana mo adi et datako ay ipogaw ay maibilang ay aap-on Abraham. <sup>17</sup> Isonga masapol ay nanbalin sisya si kostokosto ay kaman datako ay aag-i na ta say manbalin si kangatoan ay padi tako ay managseg-ang ya matalek ay mangiaalagey en datako en Diyos. Ya din gapo ay nanbalin si kangatoan ay padi tako et ta ikaro na din dosan di basbasol tako ta say mabalin ay mapakawan din basbasol tako. <sup>18</sup> Et gapo ta pinadpadas na di ligat ya solisog, ammo na ay bomadang sin am-in ay ipogaw ay manlak-am si solisog.

### 3

#### *Nangatngato Si Jesus Mo Si Moses*

<sup>1</sup> Isonga aag-ik ay pinilin Diyos ay ipogaw na ya inayagana ay maitapi en sisya ed langit, nemnemnemen takos Jesus, tan mo maipanggep sin pammati ay ipodno tako, sisya din inbaan Diyos ay Apostol na ya din Kangatoan ay Padi ay mangiaalagey en datako en Diyos. <sup>2</sup> Matalek ay nanongtongpal en Diyos ay nangdotok en sisya ay kaman si Moses ay matalek ay nansilsilbi sin am-in ay ipogaw sin pamilyan Diyos. <sup>3</sup> Ngem si Jesus et maibilang ay napatpateg mo si Moses ay kaman din kinapateg di mangisaad si beey mo din beey ay saadena. <sup>4</sup> Tan am-in di beey et waday nangamag, ngem din nangamag sin am-in et si Diyos. <sup>5</sup> Tet-ewa ay matalek si Moses ay nansilsilbi sin am-in ay iib-a na sin pamilyan Diyos, ngem owat baan Diyos sisya ya din inam-amag na et owat kaiarigan di ipaammon ton Diyos. <sup>6</sup> Ngem si Cristo pay, baken owat baan Diyos mo adi et Anak na ay matalek ay makaammo sin pamilyan Ama na. Et datako di naitatapi sin pamilya na ay sana dalo et mo itoltoloy tako ay natoled ya adi tako mabmabain sin namnamaen tako.

#### *Siliban Tako Ta Adi Tako Dokogan Si Diyos*

<sup>7</sup> Isonga masapol ay pasien tako din inpaisolat di Ispirito Santo ay kanana, “Ed wani, mo dengngen yo din kalin Diyos, <sup>8</sup> adi yo pakenkentegen di nemnem yo ay kaman din inyat di aap-o yo ay nangonkontra en Diyos sin nandad-anan da sin lugar ay magay omili. <sup>9</sup> Tan olay mo inmey di opatapolo ay tawen ay nangil-ilaan da sin nakaskasdaaw ay inam-amag na, pinadapadas da pay dedan sisya.\* <sup>10</sup> Isonga binmonget si Diyos sin kaipoipogaw ay doy yan kanana,

‡ 2:12 Salmo 22:22. § 2:13 Isaias 8:17-18. \* 3:9 Exodo 17:1-7.

‘Kankanayon ay masangsangaw das natken. Sigaan da ay mangonod sin bilbilin ko.’ <sup>11</sup> Isonga inkarik si bonget ko ay adiak polos pasgepen daida sin pan-illengan ay insaganak.”<sup>†</sup>

Siya di din kanan Diyos.

<sup>12</sup> Isonga aag-ik, siliban yo ta maga koma en dakayo di lawlawa di nemnem na ay adi mamati en Diyos ta say maga en dakayo di manokog sin matmatago ay Diyos. <sup>13</sup> Din amagen yo komas inag-agew enggana ay maabos di agew tako et manbinagbaga kayo ta say maga en dakayo di maietekan si basol ay say komentegan di nemnem yo. <sup>14</sup> Tan mo napasnek di pammati tako manlogi sin damo enggana sin maodi ay agew, itoltoloy tako abe ay makikadkadwa en Cristo. <sup>15</sup> Nemnemen tako kasin din inpaisolat Diyos ay kanana,

“Ed wani, mo dengngen yo din kalin Diyos, adi yo pakenkentegen di nemnem yo ay kaman din inyat di aap-o yo idi kinonkontra das Diyos.”

<sup>16</sup> Sino da di nannange sin kanan Diyos ngem kinonkontra da pay dedan? Daida met din inpangon Moses sin kinmaan da ed Egipto. <sup>17</sup> Et sino da di binmongetan Diyos si opatapolo ay tawen mo baken da doy ay nanbasbasol ay natey sin lugar ay magay omili? <sup>18</sup> Sino da abe di nangibagaan Diyos ay adi na polos pasgepen sin pan-illengan ay insagana na? Daida met din nanigaan ay nanongtongpal en sisya.<sup>‡</sup> <sup>19</sup> Say pangammoan tako ay din begew ay adi da nakasgep sin pan-illengan ay insaganan Diyos et din adi da namatian en sisya.

## 4

### *Adi Tako Makasgep Sin Pan-illengan Ay Insaganan Diyos Mo Adi Tako Mamati*

<sup>1</sup> Ngem din inkarin Diyos ay waday insagana na ay pan-illengan, mabalin pay laeng ay maitongpal en datako, isonga siliban tako koma into et mo wada en datako di adi makasgep. <sup>2</sup> Tan dinnge tako din nay siged ay damag ay kaman met laeng din aap-o tako, ngem mo daida pay et magay silbin di nanngean da, tan adi da pinatpati. <sup>3</sup> Datako et anggay ay mamati di sengggep sin pan-illengan ay sana, tan kanan Diyos maipanggep en da doy ay adi namati,

“Isonga inkarik si bonget ko ay adiak polos pasgepen daida sin pan-illengan ay insaganak.”

Din katet-ewa na et naisasagana din pan-illengan ay sana manlogi sin nangdengan Diyos sin obla na ay namarsuaana sin daga. <sup>4</sup> Tan wada di inpaisolat Diyos maipanggep sin maikapito ay agew ay kanana, “Sin maikapito ay agew, nan-illeng si Diyos, tan enggay nakdeng din obla na.”<sup>\*</sup> <sup>5</sup> Nemnemen yo kasin din inpaisolat Diyos ay inbagak ed kaonyan en adi na polos pasgepen daida sin pan-illengan ay insagana na.<sup>†</sup> <sup>6</sup> Din kananas di en wada di pan-illengan ay insagana na, laydena ay kalien ay wada di layden Diyos ay sengggep. Et gapo ta adi sinengggep din nannge sin siged ay damag ed idi gapo sin adi da namatian, <sup>7</sup> wada di esa ay timpo ay indawat Diyos sin kaipoipogaw ta say mawayaan da ay sengggep, et ed wani din timpo ay doy. Ammo tako di tan idi adi sinengggep din doy ay ipogaw ed nabaon, nalabas di ad-adoy tawen, asi inpaisolat Diyos en David din inbagak ed kaonyan ay kanana,

“Ed wani, mo dengngen yo din kalin Diyos, adi yo pakenkentegen di nemnem yo.”

<sup>8</sup> Ammo tako abe ay din pan-illengan ay inkarin Diyos et baken din ili ed Canaan ay nangipangoan Josue sin aap-o tako. Tan mo ed Canaan koma, adi koma inbagan Diyos sin maod-odi ay agew ay wada pay di esa ay timpo. <sup>9</sup> Say pangammoan tako ay wada pay laeng di pan-illengan ay naisasagana para sin ipogaw en Diyos ay kaman din nan-illengan Diyos sin maikapito ay agew. <sup>10</sup> Tan olay sino ay sengggep ay makiilleng en

<sup>†</sup> 3:11 Salmo 95:7-11. <sup>‡</sup> 3:18 Bilbilang 14:1-35. <sup>\*</sup> 4:4 Genesis 2:2. <sup>†</sup> 4:5 Salmo 95:11.

Diyos, man-illeng ay kosto sin obla na ay kaman din inyat Diyos. <sup>11</sup> Isonga ipakat tako din kabaelan tako ay senggep sin pan-illengan ay sana. Siliban tako ta say maga en datako di manadon sin aap-o tako ay adi nakasgep begew sin adi da nanongpalan sin inbagan Diyos.

<sup>12</sup> Tan din kalin Diyos et matmatago, tan manakabalin ya waday pantongpalana. Matadtadem mo din katatademan ay kampilan ay doway tadem na ay maibetbet enggana sin nansisilpoan di tong-a ya din otek da. Tan din kalin Diyos et makasgep sin nemnem ya ab-abiik, et kabaelana ay mangilasin sin am-in ay wada sin nemnem di ipogaw ay olay din naisasaot ay plano na ya laydena. <sup>13</sup> Olay sino ay parsua et adi na maitabonan si Diyos. Kaman da am-in nakalalabos sin pangilaana, tan ammo na am-iam-in di maipanggep en daida. Et sisya di panongbatan tako sin am-in ay inam-amag ya ninemnem tako.

### *Si Jesus Din Kangatoan Ay Padi Tako*

<sup>14</sup> Iapasnek tako ngarud sin nemnem tako din pammati ay ipodno tako, tan si Jesus ay Anak Diyos din Kangatoan ay Padi ay inmey sin kosto ay kad-an Diyos ed langit ay mangiaalagey en datako. <sup>15</sup> Et din nay Kangatoan ay Padi tako, ammo na ay makiliklikna en datako sin kinakapoy tako, tan din am-in ay kalasin di solisog ay laklak-amen tako et nilak-am na abe, ngem mo sisya pay, adi polos nanbasbasol. <sup>16</sup> Isonga natoled tako koma ay omasag-en en Diyos ay managseg-ang, tan mo manpakpakaasi tako en sisya, seg-anganas datako ya badanganas datako sin oras ay kasapolan tako di badang.

## 5

<sup>1</sup> Din madotokan ay kangatoan ay padin di Judio et mapili sin iib-a na ay ipogaw ta say ialagey nas daida en Diyos. Sisya di mangidatdaton en Diyos si animal ono odom ay daton ay idawdawat di iib-a na para sin basbasol da. <sup>2</sup> Maanosana din iib-a na ay masangsangaw ay adi da ammo ay baken kosto di am-amagen da, tan olay sisya et wada abey pankolkolangana. <sup>3</sup> Isonga mo waday ena idaton para sin basbasol di kaipoipogaw, masapol ay wada abey idatona para sin mismo ay basbasol na.\*

<sup>4</sup> Maga di mamili sin awak na ta alaena din nangato ay saad di kangatoan ay padi mo adi et masapol ay si Diyos di mangayag en sisya ay kaman din naamag en Aaron.† <sup>5</sup> Iso na abe en Cristo, adi na inpangato din awak na ta manbalin si madayaw ay kangatoan ay padi mo adi et si Diyos di namili en sisya. Tan kanan Diyos en sisya, “Sik-a din Anak ko. Ed wani ipailak ay sak-en si Amam.”‡

<sup>6</sup> Wada abe di esay inpaisolat na ay kanana,

“Padi ka ay eng-enggana ay kaman din kinapadin Melkizedek.”§

<sup>7</sup> Sin kawadan Jesus isnan kalotaan, inapasnek na ay nankarkararag en Diyos ay man-og-oga ya mangipigpigma sin kali na, tan ammo na ay manakabalin si Diyos ay mangisalakan en sisya sin kateyana. Et dinngen Diyos din kararag na, tan inbaba na din awak na ay manongpal sin layden Diyos. <sup>8</sup> Olay mo Anak Diyos sisya, inadal na pay dedan ay manongpal en Diyos begew sin napalpaligatana. <sup>9</sup> Et gapo ta tinongpal nas Diyos ay kostokosto, nanbalin si kapoan di kaisalakanan ay eng-enggana di am-in ay mamati en sisya, <sup>10</sup> tan dinotokan Diyos sisya ay kangatoan ay padi ay kaman din kinapadin Melkizedek.

### *Siliban Tako Ta Adi Tako Pandokogan Din Pammati Tako*

<sup>11</sup> Ad-ado pay di laydek ay ipaammo en dakayo maipanggep isna, ngem naligat ay maiolog en dakayo, tan kinmenteg di toktok yo et baken kayon alisto ay mangawat. <sup>12</sup> Olay mo nabayag kayo ay mamati ya dakayo koma di mangit-itdo sin iib-a yo, masapol

\* 5:3 Levitico 9:7. † 5:4 Exodo 28:1. ‡ 5:5 Salmo 2:7. § 5:6 Salmo 110:4.

yo pay laeng di mangitdo kasin en dakayo sin kalalakaan ay maipanggep en Diyos. Kaman kayon nanbalin si moyang ay masapol pay laeng ay mansoso, tan adi makagaga si makan. <sup>13</sup> Din kaman nidi ay ipogaw, adi makailasin si kosto ya nalinteg ay ogali. <sup>14</sup> Ngem din maiarig sin naket-eng ay ipogaw ay makagaga si kosto ay makan et din ipogaw ay naket-eng di pammati na ay makaawat sin naoneg ay mait-itdo. Din kaman nidi ay ipogaw, inpapaingna na din nemnem na ay makailasin si siged ya lawa.

## 6

<sup>1</sup> Isonga olay adi tako ipidpidwa din kalalakaan ay mait-itdo ay maipanggep en Cristo mo adi et adalen tako abe di naon-oneg ay mait-itdo ta say maket-eng di pammati tako. Adi tako kasin adalen din maiarig sin fondasyon di pammati tako ay kaman dana ay mait-itdo: din pandokogan tako sin maam-amag ay magay silbi na\* ta mansagong tako en Diyos, <sup>2</sup> din kaowasan di awak ya bonyag, din kaikapayan di takkay sin toktok di ib-a, din kasin katagoan di natenatey, ya din pangokoman Diyos sin kaipoipogaw ay magay patinggan di pantongpalana. <sup>3</sup> Din amagen tako koma mo ipalobos Diyos et adalen tako din naon-oneg ay mait-itdo.

<sup>4</sup> Tan din manokog sin kinakristiano da et adi da mabalin ay maawis kasin ay manbabawi. Tan enggay nasilawan di nemnem da, nakagon-od da sin indawat Diyos ya nakilak-am da sin Ispirito Santo. <sup>5</sup> Pinadpadas da abe din kinasiged di kalin Diyos ya niliklikna da din panakabalin Diyos ay maipaila abe sin tapin di agew. <sup>6</sup> Mo nandokogan da am-in dana, adi mabalin ay manbabawi da kasin, tan kaman da kasin ilanlansa din Anak Diyos sin krus et pababbainan das sisya sin sangoanan di kaipoipogaw.

<sup>7</sup> Maiarig da sin lawa ay lota. Tan din naeskan ay lota ay maodaodanan, mo say gomabayan di molmola ay way silbi na sin akin daga, bindisyonan Diyos din lota ay sana. <sup>8</sup> Ngem din lawa ay lota ay gomabayan di nabeas ya pagat et magay silbi na, isonga baken mabayag yan dosaen Diyos tan pooana.

<sup>9</sup> Ngem olay mo kaman dasa di inbagak en dakayo ay patpatgek ay aag-i, ammok pay dedan ay sigsiged di kasasaad yo et maiturong sin kaisalakanan yo. <sup>10</sup> Tan nalinteg si Diyos. Adi na linglinglingan din siged ay inam-amag yo ya din layad yo en sisya ay intoltoloy yo ay mangipappaila enggana ed wani sin namadbadangan yo sin iib-a yo ay mamati. <sup>11</sup> Din palalo ay laydek et ipapasnek abe di esa ya esa en dakayo ay mannannama sin katongpalan di inkarin Diyos enggana sin maodi ay agew. <sup>12</sup> Tan mo say amagen yo di, adi kayo somadsadot mo adi et tadonen yos daida ay mangawat sin inkarin Diyos begew sin napasnek ay pammati ya anos da.

### *Dadlon Tongpalen Diyos Din Inkari Na*

<sup>13</sup> Nemnemen takos Abraham, tan wada abey inkarin Diyos en sisya, et insapata na ay tongpalena din inkari na. Gapo ta magay nangatngato mo sisya, din awak na met laeng di nansapataana. <sup>14</sup> Kanana en Abraham, "Dadlonak bindisyonan sik-a yan paad-adoek din polim."† <sup>15</sup> Gapo ta inan-anosan Abraham ay nanseseed, naitongpal en sisya din inkarin Diyos.

<sup>16</sup> Mo layden di ipogaw ay ipaammo sin iib-a na ay tet-ewa din ibagbaga na, mansapata sin nangatngato mo sisya. Tan mo say amagena di, say patinggan di pansosongbatan da. <sup>17</sup> Si Diyos abe et laydena ay dadlon ammoan din manawid sin inkari na ay adi na polos sokokatan di nemnem na, isonga kinadwaana din inkari na sin insapata na. <sup>18</sup> Inamag na di ta say wada di doway ay adi kasoksokatan ay pangammoan di ipogaw ay temet-ewa din inkari na, tan adi mabalin ay man-etek si Diyos. Tan layden Diyos ay

\* **6:1** Di esa abe ay kaiologan nina sin Griego et: ...maam-amag ay maiturong sin kaisianan tako en Diyos ay eng-enggana... † **6:14** Genesis 22:16-17. Nanlogi sin damdamo ay inkarin Diyos di en Abraham (Gen. 12:4) enggana sin naianakan Isaac (Gen. 21:5), inmey di downpo ya lima ay tawen. Et nalabas pay kasin di enemapolo ay tawen, asi binmela din aap-o na (Gen. 25:26).

datako ay nanpasalaknib en sisya et wada dana ay doway ay pomigpigsan di nemnem tako ta say ipapasnek tako ay mannannama sin inkari na. <sup>19</sup> Din namnama tako ay nay et say mangipakpakneg sin pammati tako, tan sigurado ay matongpal. Begew sin namnama tako, kaman takon enggay nakasgep sin kosto ay kad-an Diyos ay kaman din sinenggepan di kangatoan ay padi sin Kasasantoan ay Kowarto sin Timplo ay nilingban di kurtina. ‡ <sup>20</sup> Say nangon-onaan Jesus ay makikalkali en Diyos para en datako, tan sisya di nanbalin si kangatoan ay padi ay eng-enggana ay kaman din kinapadin Melkizedek.

## 7

### *Din Kinapadin Melkizedek*

<sup>1-2</sup> Si Melkizedek ay nay et ari ed Salem. Padi abes sisya ay nansilbi en Diyos ay Kangatoan. Din olog di ngadana et “nalinteg ay ari” ya din olog aben di saad na et “arin di talna,” tan din olog di Salem et “talna.” Sin pantattaolian da Abraham ay napo sin nangabakan da sin opat ay ari, en inabat Melkizedek et binindisyonanas sisya. Pag idawat Abraham en sisya di inkasinpon di am-in ay gamgameng ay tinaoli na sin nangabakanas gobat.\* <sup>3</sup> Si Melkizedek et magay naisolat si maipanggep en da ama na en ina na ya siya abe sin aap-o na. Adi aben kaammoan din naianakana ya din nateyana, isonga sisya et kaman din Anak Diyos, tan magay panpatinggaan di kinapadi na.

<sup>4</sup> Nemnemen tako din peteg ay kinangaton Melkizedek. Omona, olay si Abraham ay din madayaw ay poon tako ay Judio et indawat na en Melkizedek di inkasinpon di tinaoli na sin nakigobatana. <sup>5</sup> Mo Levita komas Melkizedek, nalaka ay maawatan din begew ay indawtan Abraham sisya, tan waday linteg di Judio ay kanana en din Levita ay manbalin si padi et masapol ay idawdawtan din iib-a da ay Judio si inkasinpon di ap-apiten da, olay mo polin Abraham daida am-in. <sup>6</sup> Ngem olay mo baken Levita si Melkizedek, indawtan Abraham pay dedan si inkasinpo. Maikadwa, binindisyonan Melkizedek si Abraham, olay mo si Abraham di nangikarian Diyos sin karkari na. <sup>7</sup> Et ammo tako am-in ay din waday kalebbengana ay mamindisyon et nangatngato mo din bindisyonana. <sup>8</sup> Maikatlo, din Levita ay maidawdawtan si inkasinpo et ipogaw da am-in ay matey, ngem si Melkizedek et magay naibaga si nateyana sin kalin Diyos mo adi et kanana en komakaman din kinapadi na ay eng-enggana. <sup>9</sup> Maikap-at, olay da Levi ay maidawdawtan si inkasinpo et mabalin ay kanan tako en naitapi da en Abraham ay nangidawat si inkasinpo en Melkizedek, <sup>10</sup> tan olay mo daan maianak si Levi sin nangabtan Melkizedek en Abraham, maibilang pay dedan ay nawawada sin awak Abraham, tan si Abraham di apo na.

### *Nasokatan Din Kinapadin Levi Sin Kinapadin Melkizedek*

<sup>11</sup> Din nangidawtan Diyos sin linteg na sin Judio et naibasar sin nandotokana sin Levita ay papadi ta say makaammo da sin datdaton ay inbilin di linteg. Ngem din oblan di papadi ay doy et adi inman-anay si mapalinteg di ipogaw, isonga masapol ay wada di esa ay padi ay maiskat ay kaman din kinapadin Melkizedek, baken din kinapadin Aaron ay esay apon Levi. <sup>12</sup> Et mo masokatan din kinapadin di mangiaalagey si ipogaw en Diyos, masapol abe ay masokatan din linteg ay maon-onodan. <sup>13-14</sup> Ammo tako ay enggay nasokatan dana tan din Apo tako ay ibagbagan din inpaisolat Diyos ay nay et baken polin Levi. Ammo tako am-in ay si Juda di nangipoli en sisya, et maga polos di polin Juda si nansilbi ay padi ay makaammo sin naidatdaton en Diyos. Maga abe di inbagan Moses maipanggep si polin Juda ay padi.

<sup>15</sup> Nalaklaka pay ay maawatan tako ay enggay nasokatan din sigod ay kalasin di padi ya din linteg ay inon-onodan da mo nemnemen tako ay si Jesus ay kasokat da et natken ay kalasin di padi ay kaman din kinapadin Melkizedek. <sup>16</sup> Et din nanbalinan Jesus si

‡ 6:19 Levitico 16:2. \* 7:1-2 Genesis 14:17-20.



padi et adi maibasar sin naipoliana ay kaman din inbilin di linteg mo adi et maibasar sin panakabalina ay maipoon sin biyag na ay eng-enggana. <sup>17</sup> Tan din inpaisolat Diyos maipanggep en sisya et kanana,

“Padi ka ay eng-enggana ay kaman din kinapadin Melkizedek.”†

<sup>18</sup> Isonga nasokatan din sigod ay linteg, tan adi na kabaelan ay mangisag-en si ipogaw en Diyos et adi na mabalin <sup>19</sup> ay mamalinteg ay kosto si ipogaw. Et ed wani wada di sigsiged ay namnama tako, tan begew en Jesus ay poon di namnama tako, makasag-en tako en Diyos.

<sup>20-21</sup> Di esa abe ay nanlasinan di kinapadin Jesus et wada di insapatan Diyos en sisya sin nanbalinana si padi, tan kanan Diyos,

“Sak-en ay Apo Diyos et isapatak ay padi ka ay eng-enggana. Adi polos kasoksokatan nan nemnem ko.”‡

Ngem sin nanbalbalinan di Levita si papadi, maga di insapatan Diyos. <sup>22</sup> Begew sin insapatan Diyos ay nay, mabalin ay ipaneknek Jesus ay dadlon matongpal din baro ay intolag Diyos sin ipogaw ay sigsiged mo din sigod.

<sup>23</sup> Di esa pay ay nanlasinan di kinapadin Jesus sin ad-ado ay papadi ay Levita et adi da intoltoloy din obla da ay padi mo adi et nansosokat da, tan natenatey da am-in dedan.

<sup>24</sup> Ngem si Jesus et adi katkatey, isonga komakaman din kinapadi na si eng-enggana.

<sup>25</sup> Isonga kabaelana ay mangisalakan ay kostokosto sin am-in ay omasag-en en Diyos begew sin pammati da en sisya, tan matagotago ay eng-enggana ay makikalkali en Diyos para en datako.

<sup>26</sup> Isonga si Jesus din kangatoan ay padi ay maibagay ay kosto en datako, tan nasantoan ya maga polos di pankolangana ono basol na. Naitken en datako ay managbasol ya naipangato abe ed langit ay magay kaison di kinangaton di saad na. <sup>27</sup> Si Jesus et baken kaman din tapin di kangatoan ay padi ay inag-agew ay masapol waday idatdaton da en Diyos para sin basbasol da ya asi da abe man-idaton para sin basbasol di kaipoipogaw. Tan si Jesus et namingsan anggoy di nangidatonana sin awak na en Diyos para sin basbasol di kaipoipogaw. Din nateyana ay sana et omanay si eng-enggana. <sup>28</sup> Tan mo maibasar sin linteg Moses, din madotokan ay kangatoan ay padi et ipogaw da ay waday pankolkolangan da. Ngem mo maibasar sin insapatan Diyos ay naod-odi mo din linteg, din nadotokan et din Anak na ay nanbalin si padi ay magay pankolkolangana ay eng-enggana.

## 8

### *Din Nanlasinan Di Baro Ay Tolag Ay Siniglotaan Cristo*

#### *(2 Cor. 3:7-11)*

<sup>1</sup> Din laydek ay maawatan yo sin nay inbagbagak et wada din kangatoan ay padi tako ay nay ay tinmotokdo sin makannawan di Kangatoan ay Diyos ed langit ay makiturturay en sisya. <sup>2</sup> Et din kad-an di pansilsilbiana ay kangatoan ay padi et din tet-ewa ay kad-an Diyos ay inamag Diyos met laeng, baken din makwani en Kasasantoan ay Kowarto sin Tolda ay inamag di owat ipogaw ed idi.

<sup>3</sup> Am-in ay kangatoan ay padi et madotokan da ay mangidatdaton en Diyos si aanimal ya odom ay kalasin di daton ay idawdawat di ipogaw, isonga din kangatoan ay padi tako et masapol abe ay waday idatona en Diyos. <sup>4</sup> Ngem baken din daga ay nay di pansilsilbiana, tan mo wada koma pay laeng isnan daga, adi mabalin ay padis sisya, tan enggay nawawada di papadi ay mangidatdaton si ibilbilin di linteg. <sup>5</sup> Ngem din pansilsilbian dadi et kaman owat dolowing ono alidong di kosto ay wada ed langit. Ammo tako ay kaman owat alidong, tan idi nakasagana da Moses ay mangiamag sin Tolda ay pandaydayawan da, tinogon Diyos sisya ay nangwani, “Silibam ta din am-in

† 7:17 Salmo 110:4. ‡ 7:20-21 Salmo 110:4.

ay iimag yo et maibasar sin inpailak en sik-a sin dontog.”\* <sup>6</sup> Ngem din obla ay intalek Diyos en Jesus et nangatngato mo din oblan di sigod ay papadi, tan din baro ay intolag Diyos sin ipogaw ay siniglotan Jesus et nangatngato abe mo din daan ay intolag na. Yan din gapo ay nangatngato et sigsigid din karkarin Diyos ay kaibasarana.

<sup>7</sup> Mo maga koma di kolang din damo ay tolag, adi koma masapol di esa ay maiskat.

<sup>8</sup> Ngem inpaammon Diyos ay waday kolang din tolag ay sana ya wada abey nankolongan di ipogaw na, tan kanana,

“Domteng to di timpo ay man-amagak si baro ay tolagan sin ipogaw ed Israel ya Juda. <sup>9</sup> Din nay baro ay tolagan et baken kaman din intolag ko sin aap-o da sin nangitakkayak en daida sin nangikaanak en daida ed Egipto, tan adi da tinongtongpal din doy ay intolag ko en daida, isonga binaybay-ak si daida. <sup>10</sup> Ngem sin domtengana di ay timpo, siya na di itolag ko sin polin Israel: isolat ko din linteg ko sin nemnem da ta maigtos di, et sak-en di bigbigen da ay Diyos da ya daida di ipogaw ko. <sup>11</sup> Isonga sin doy ay timpo, adi masapol ay itdoan dan aag-i da ya kailian da ay mangwani en ammoan da komas Diyos, tan ammo da am-in sak-en, olay din kababaan ay ipogaw ya olay abe din kangatoan. <sup>12</sup> Tan pakawanek din basbasol da et adiak kasin nemnemnemen din lawa ay inam-amag da,” kanan Apo Diyos.†

<sup>13</sup> Begew sin nangibagaan Diyos isna ay wada di baro ay tolag, inpaammo na ay enggay daan din damo. Et ammo tako ay olay sino ay namaga di kaosarana tan enggay daan, et baken mabayag yan mamaga.

## 9

### *Din Inyat Di Ipogaw En Diyos Ay Nanaydayaw En Sisya Sin Tolda Ed Idi*

<sup>1</sup> Din damo ay intolag Diyos sin ipogaw na et waday bilbilina ay maipanggep sin kosto ay iyat da ay mandayaw en sisya. Wada abe di in-amag da ay Tolda ay pandaydayawan da en sisya isnan daga.\* <sup>2</sup> Din Tolda ay nay et waday doway ay kowarto na. Din damo ay masgep et makwani en Nasantoan ay Kowarto. Say kad-an din silaw ya din lamisaan ay naipatpatangan di tinapay ay naidatdaton en Diyos. <sup>3</sup> Nakurtinaan din segpan di kowarto ay doy. Wada abe di esa ay kurtina ay nanasalin sin maikadwa ay kowarto ay makwani en Kasasantoan ay Kowarto. <sup>4</sup> Din wadas di et din altar ay nabalitokan ay nangipoppooan das insinso ya din Baol di Tolagan ay napakpakan si balitok. Din naigtos di et din koli ay balitok ay napay-an si manna, din tinmobo ay sokod Aaron ya din doway ay nadampilak ay bato ay naigolitan di bilbilin Diyos. <sup>5</sup> Sin kaleb di Baol, wada di doway ay napayakan ay sinan paparsua ay makwani en kerubim ay sinyal di kawadan Diyos. Din nandedepa ay payak da et pinapayongan da din kaleb di Baol ay naiwalwalsian di dada ta malingban din basbasol di kaipoipogaw. Ngem olay adiak itoloy ed wani ay mangiolog si maipanggep sin am-in dadi.

<sup>6</sup> Kaman nidi di ison di Tolda ay nandaydayawan da en Diyos ed idi. Et din papadi, inag-agew ay sengsenggep da sin damo ay kowarto ay manongtongpal sin obla da.

<sup>7</sup> Ngem din maikadwa ay kowarto et din kangatoan ay padi anggoy di makasgep sisi ya mamingsan anggoy si tinawen. Adi aben mabalin ay senggep mo magay isgep na ay dada ay idatona en Diyos para sin basbasol na ya para abe sin basbasol di ipogaw ay adi da ginagara.† <sup>8</sup> Babaen sin am-in dadi, ipaammon din Ispirito Santo ay adi mabalin ay omasag-en di ipogaw sin kosto ay kad-an Diyos mo naon-onodan pay laeng din sigod ay bilbilin maipanggep sin Nasantoan ya Kasasantoan ay Kowarto. <sup>9</sup> Am-in dadi et owat kaiarigan di natongpal ed wani begew en Cristo. Tan din aanimal ya odom ay indatdaton di nanaydayaw en Diyos et adi da makalinis sin nemnem di ipogaw. <sup>10</sup> Tan

\* 8:5 Exodo 25:40. † 8:12 Jeremias 31:31-34. \* 9:1 Exodo 25-27, 30; Levitico 24:1-9. † 9:7 Levitico 16.

maibasar das bilbilin ay maipanggep sin awak anggoy ay kaman din makan ya mainom ya din kosto ay kaowasan di kompormi. Masapol ay natongtongpal dana enggana ay naiskat din baro ay tolag ay siniglotan Cristo.

*Si Cristo Di Naniglot Sin Baro Ay Tolag Babaen Sin Dada Na*

<sup>11</sup> Et nay enggay inmali si Cristo ay nanbalin si kangatoan ay padi tako, et gon-gonden tako din siged ay bindisyon ay maibasar sin baro ay tolag ay siniglotana. Et din pansilsilbiana ay din kosto ay kad-an Diyos ed langit et nabanbanol ya sigsigid mo din Kasasantoan ay Kowarto sin Tolda, tan baken ipogaw di nangamag ya baken aben naidagaan. <sup>12</sup> Din sinenggepana isdi et baken babaen sin dadan di kalding ya bomaro ay baka mo adi et babaen sin mismo ay dada na, et namingsan anggoy din sinenggepana, adi masapol ay maipidwa, tan enggay tinongpal na din masapol ay maamag ta say mapawayaan tako ya maisalakan tako ay eng-enggana. <sup>13</sup> Wada kayman di silbin di dadan di kalding ya bomaro ay baka ya siya abe din kaiwalsian di dap-on di napooan ay bomalasang ay baka, ngem nansilbi anggoy dana ay manalos sin awak di ipogaw ay naibilang ay kinmadodogis ta say mabalin ay makidaydayaw da kasin en Diyos. ‡ <sup>14</sup> Isonga mo kabaelan dana ay manalos sin awak di ipogaw, adi pay addawi ay nabanbanol di pantongpalan din dadan Cristo. Tan kabaelan din dada na ay manalos sin nemnem tako ay kinmadodogis begew sin inam-amag tako ay magay silbi na ta say mabalin ay mansilbi tako sin matmatago ay Diyos. Tan si Cristo ay maga polos di kolang na ono basol na et indatona din awak na en Diyos begew sin panakabalin di Ispiriton Diyos ay matagotago ay eng-enggana.

<sup>15</sup> Isonga si Cristo di naniglot sin baro ay intolag Diyos ta say makatawid din am-in ay inayagan Diyos sin inkari na ay magay patingga na. Et mabalin ay tawiden da di, tan natey si Cristo ay mangsobot en daida ta say mapawayaan da sin basbasol ay inam-amag da sin timpon di damo ay tolag. §

<sup>16</sup> Ammo tako ay mo waday anongos ay bilbilin ay isolat di ipogaw maipanggep si kabingayan di itawid na mo matey, masapol ay mapaneknekan ay tet-ewa ay natey. <sup>17</sup> Asi mabalin ay gon-oden din matawidan din naitawid en sisya. Tan mo matmatago pay laeng din mangitawid, adi mabalin ay maitongpal din bilbilina ay sana. <sup>18</sup> Isonga olay din damo ay intolag Diyos, adi koma natoloy mo magay dada ay nangipaila ay waday natey.\* <sup>19</sup> Tan din inamag Moses ed idi et inbaga na din am-in ay bilbilin di linteg sin kaipoipogaw. Pag oma sin dadan di napalti ay aan-ak di baka et sinayaw nas danom. Ina na abe di dotdot di karnero ay nakoloran si manbalanga et inbotibot na si pingin di hisopo. Pag nan isawsaw sin dada et inwalsi na sin nalopilop ay papil ay naisolatan din linteg ya sin kaipoipogaw. <sup>20</sup> Pag nan kanan, “Din dada ay nay di mangipaneknek sin intolag Diyos en dakayo ay inbilina ay pasien yo.” † <sup>21</sup> Pag na aben walsian din Tolda ya am-in ay inos-osal das di ay manaydayaw en Diyos. <sup>22</sup> Tan mo maibasar sin linteg, din kadaldalosan di istay am-in et masapol di dada. Adi aben kabalin ay mapakawan di basbasol mo magay dada ay omayos.

<sup>23</sup> Isonga da naey ay owat kaiarigan di tet-ewa ay wada ed langit et masapol ay nadaldalosan das dadan di napalpalti ay aanimal. Ngem masapol ay sigsigid di naidaton ta

‡ **9:13** Dowa ay kalasin di daton di maibagbaga isna. Din kalding ya bomaro ay baka et siya da di naidatdaton si tinawen para sin basbasol di kangatoan ay padi ya din kaipoipogaw. Mo din maipanggep sin dap-o, ilaen sin Bilbilang 19. Mo waday ipogaw ay maibilang ay kinmadodogis begew sin nangiwitana sin awak di natey, masapol ay mawalsian si danom ay natapian sin dap-on di napooan ay manbalanga ay bomalasang, asi pag maibilang ay nadalosan kasin. § **9:15** Din sigod ay kali ay Griego ay naosal isna ya sin omon-onod ay versikulo et doway olog na. Di esa et tolagan. Di esa abe et bilbilin ay insolat di ipogaw maipanggep sin kabingayan di itawid na. \* **9:18** Din ogalin di Judio, mo waday nantolagan di doway ipogaw, waday paltien da ay pangipaneknekan da ay tongpalen da din nantolagan da. Ilaen abe sin Genesis 15 din inamag Diyos ay nangipaneknek ay tongpalena din inkari na en Abraham. † **9:20** Exodo 24:8. Ilaen abe din inbagan Apo Jesus sin Lucas 22:20.

madalosan din wada ed langit. <sup>24</sup> Tan din sinenggepan Cristo et baken din Kasasantoan ay Kowarto ay inamag di ipogaw ay owat kaiarigan di kosto ay kad-an Diyos ed langit mo adi et ed langit ay mismo. Et say kad-ana ed wani ay mangiaalagey en datako en Diyos. <sup>25</sup> Din inamag Cristo et mailasin abe sin am-amagen di kangatoan ay padin di Judio, tan mo daida, tinawen ay sengsenggep da sin Kasasantoan ay Kowarto ay mangis-isgep si dadan di animal. Ngem mo si Cristo pay, adi na inpidpidwa ay nangidaton sin awak na. <sup>26</sup> Tan mo doy ya say inamag na, namin ado koma ay nanligligat manlogi sin naparsuaan di lobong. Ngem din katet-ewa na, namingsan anggoy di inmaliana isnan daga sin nay maod-odi ay agew ta kaanena di basol babaen sin nangidatonana sin awak na. <sup>27</sup> Tan kapilitan ay matey tako am-in ay ipogaw si mamingsan, et pag takon maokom. <sup>28</sup> Siya abe ay namingsan anggoy di naidatonan Cristo ay nangikaro sin basbasol di kaipoipogaw. Isonga mo omali kasin et baken manbegew sin basbasol tako mo adi et omali ta isalakana ay kosto din am-in ay manesseed en sisya.

## 10

### *Din Nanlasinan Di Indaton Cristo*

<sup>1</sup> Din linteg Moses et kaman owat alidong ono dolowing ay nangipappaila sin ison di siged ay bindisyon ay idawat Cristo, ngem baken nan-iso sin bindisyon ay doy. Isonga olay mo tinawtawen ay intoltoloy din nanaydayaw en Diyos ay nangidatdaton si inbilin di linteg, adi polos mabalin ay manbalin das ipogaw ay magay pankolkolangana begew sin nangam-amagan das di. <sup>2</sup> Tan mo doy ya tet-ewa ay nadalosan da ay kosto sin basbasol da, adi da koma intoltoloy ay nan-idatdaton, tan adi da koma niliklikna pay laeng ay waday basbasol da. <sup>3</sup> Ngem din katet-ewa na mo maipanggep sin da doy ay indatdaton da et tinawen ay inpanemnemnem da en daida ay waday basbasol da. <sup>4</sup> Tan din dadan di bomaro ay baka ya kalding et adi polos mabalin ay kaanena di basbasol. <sup>5-6</sup> Siya di din gapo ay sin inmalian Cristo sin daga, kanana en Diyos, “Baken din napalpalti ay animal ya odom ay daton di laylaydem. Baken abe din kapoppooan di aanimal ya odom ay daton para sin basbasol di panragragsakam. Isonga waday awak ay insaganam para en sak-en. <sup>7</sup> Et naeyak ay Diyos ay manongpal sin laydem ay kaman din inpaisolat mo maipanggep en sak-en sin nalopilop ay libro.”\*

<sup>8</sup> Nemnemen tako din olog di inbagan Cristo ay kaisolsolat ko. Din damo ay inbaga na et adi laylayden Diyos din nankinalasi ay daton ay naidatdaton en sisya. Baken say panragragsakana. Say kanana di, olay mo am-in dana ay daton et maibasar da sin inbilin di linteg. <sup>9</sup> Pag nan kanan, “Naeyak ay manongpal sin laydem.” Din nangwanianas di et say pangammoan tako ay sinokatana din sigod ay datdaton ta say isokat na din nangidatonana sin awak na ay maibasar sin layden Diyos. <sup>10</sup> Et gapo ta tinongpal Jesu Cristo din layden Diyos ay sana, nanbalinenas datako si nasantoan ay ipogaw en Diyos begew sin nangidatonana sin mismo ay awak na ay adi masapol ay maipidwa.

<sup>11</sup> Din papadin di Judio et inag-agew ay pomipika da ay mangam-amag sin obla da. Inag-agew ay mamidwa da ay mangidatdaton sin iso na ay kalasin di daton. Ngem maga polos di kabaelan din idatdaton da ay doy ay mangaan si basbasol. <sup>12</sup> Ngem si Cristo pay, omanay si eng-enggana din es-esa ay indatona para si basbasol, isonga en tinmokdo sin makannawan Diyos <sup>13</sup> ay manesseed sin kaabakan di kaibaw na ay ipagatin Diyos en sisya. <sup>14</sup> Tan begew sin es-esa ay indatona, nanbalinena am-in di nasantoan ay ipogaw en Diyos si ipogaw ay magay pankolkolangana da ay eng-enggana.

<sup>15</sup> Paneknekan din Ispirito Santo en datako ay tet-ewa dana begew sin naisolat ay kalin Diyos ay kanana,

\* **10:7** Salmo 40:6-8.

16 “Si naey di itolag ko en daida sin tapin di agew. Isolat ko din linteg ko sin nemnem da.”

17 Pag nan itoloy ay mangwani,

“Adiak kasin nemnemnemen din basbasol da ya olay sino ay inam-amag da ay lawa.”†

18 Ngarud, mo enggay napakawan dana, adi masapol ay wada kasin di maidaton para sin basbasol.

### *Natoled Tako Koma Ay Somag-en En Diyos Begew En Cristo*

19 Isonga aag-i, begew sin dadan Jesus ay inmayos sin nateyana, adi tako emegyat ay senggep sin kosto ay kad-an Diyos ay maiarig sin Kasasantoan ay Kowarto. 20 Tan begew sin nateyana ay maiarig sin nabisngitan di kurtina ay nanalsalin sin segpan,‡ inamag Jesus di baro ay pandanan tako ay kaman matmatago, tan din danan ay nay et sisya met laeng ay matmatago. 21 Isonga gapo ta wada di napateg ay padi tako ay makaammo en datako am-in sin pamilyan Diyos, 22 omasag-en tako koma en Diyos ay naimposan di nemnem tako ya napasnek di pammati tako. Masapol abe ay nadadalosan din nemnem tako ay kaman takon nawalsian si dadan Cristo ya kaman aben naowasan din awak tako si nalinis ay danom.§ 23 Ipapasnek tako abe sin nemnem tako din namnama ay ipodno tako. Adi tako mandowadowa, tan matalek si Diyos ay manongpal sin inkari na. 24 Nemnemnemen tako abe mo intoy iyat tako ay manbinadang ta say masepsep ay manlilinayad tako ya man-am-amag takos siged. 25 Adi tako baybay-an din makitoptopogan tako ay kaman din am-amagen di odom, mo adi et papipigsaen tako din pammatin di iib-a tako, namnamed tan maila tako ay omas-asag-en din agew ay kasin omalian Apo Jesus.

### *Adi Tako Laslasoyen Din Nateyan Jesus Mo Adi Et Ipapasnek Tako Ay Mamati*

26 Tan mo enggay inammoan tako din tet-ewa ay maipanggep en Cristo yan igagara tako pay dedan ay manbasbasol sin panokogan tako en sisya, magay odom ay daton ay mabalin ay mangaan sin basbasol tako. 27 Magay odom ay masmas-ed mo adi et din kaeegyat ay pangokoman Diyos en datako ya din kaeegyat ay apoy ay mamoppoo sin am-in ay mangonkontra en Diyos. 28 Nemnemnemen tako din napasamak si olay sino ay dadlon nanokog sin linteg Moses ed idi. Basta waday tolo ono dowwa ay nanistigo sin basol na, nakeddenggan ay matey ay adi maseg-angan.\* 29 Mo kaman nidi din dosan di nanokog sin linteg Moses, adi pay madagdagsen di dosan di ipogaw ay manglaslasoy ya manokog sin Anak Diyos ya mangibilang ay magay banol din dada na, olay mo din dada ay nay di nangipaneknek sin intolag Diyos ya din nanalos en sisya ta manbalin si nasantoan ay ipogaw en Diyos. Din ipogaw ay mangiyat sidi et sinsinitena abe din Ispiriton Diyos ay pandanan di seg-ang na. Palalo ay madagsen din lebbeng ay dosa na. 30 Tan ammo tako ay magay odom mo adi si Diyos di nangwani, “Sak-en di way lebbeng na ay man-ibaes. Sak-en di manobalit.” Sisya abe di nangwani, “Sak-en ay Apo di mangokom si ipogaw ko.”† 31 Isonga peteg ay kaeegyat di datngen din dosan di matmatago ya manakabalin ay Diyos.

32 Nemnemnemen yo di inyaat yo ed idi sin nasilawan di nemnem yo, tan olay mo peteg ay napalpaligatan kayo, inan-anosan yo pay dedan et adi kayo naabak. 33 Waday timpo ay naibabainan ya napalpaligatan yo sin pangiilaan di ad-ado ay ipogaw. Mo mamingsan abe, olay mo baken dakayo di napalpaligat, ngem inpappaila yo pay dedan ay nakikadkadwa kayo en daida. 34 Tan sinegseg-angan yo din iib-a yo ay naibabalod. Et sin namosan da sin sanikwa yo, manragragsak kayo ay nangan-anos, tan inaammo yo

† 10:17 Jeremias 31:33-34. ‡ 10:20 Din nabisngitan di kurtinan di timplo et mabasa sin Marcos 15:38. § 10:22 Din bilbilin ay maipanggep sin kawalsian di papadi si dada et wada sin Exodo 29:21. Din maipanggep sin kaowasan di awak da et wada sin Exodo 29:4, 30:17-21, 40:30-32. Ilaen abe din inkarin Diyos ay wada sin Ezekiel 36:25. \* 10:28 Deuteronomio 17:2-7. † 10:30 Deuteronomio 32:35-36.



ay wada pay laeng en dakayo di sigsiged ya komakaman ay kalasin di sanikwa. <sup>35</sup> Isonga adi yo taytaynan din toled yo ay nay mo adi et itoltoloy yo, tan dakdake di gon-gona yo mo say iyat yo. <sup>36</sup> Masapol ay ipapasnek yo ay man-anos ta say tongpalen yo din layden Diyos ya gon-oden yo din inkari na. <sup>37</sup> Tan wada di inpaisolat Diyos ay kanana, “Sinkaattikan anggoy yan somawang din omal-ali. Adi na baybayagen. <sup>38</sup> Din nalinteg ay ipogaw ko et maibasar din biyag da sin pammati da, ngem mo waday mankeyat, adiak malaylayan en sisya.”<sup>‡</sup>

<sup>39</sup> Ngem mo datako pay, adi tako maibilang sin odom ay kaipoipogaw ay mankeyat ya maisian en Diyos ay eng-enggana, mo adi et maibilang tako sin kaipoipogaw ay mamati ya maisalakan.

## 11

### *Din Pateg Di Pammati*

<sup>1</sup> Sino ngarud di pammati? Di pammati et din kinapapasnek di nemnem tako ay matongpal din namnamaen tako ya din dadlon takon pangammoan ay wada tet-ewa din adi tako mail-ila. <sup>2</sup> Begew sin pammatin di aap-o tako ed nabaon, inapolbalan Diyos daida. <sup>3</sup> Begew abe sin pammati tako, maawatan tako ay naparsua din lobong ya din am-in ay wada begew sin bilin Diyos,\* isonga din mail-ila et adi naamag sin mail-ila.

<sup>4</sup> Nemnemen takos Abel. Begew sin pammati na, sigsiged di indatona en Diyos mo si Cain.† Begew abe sin pammati na, inbilang Diyos ay nalinteg sisya, et din pangammoan tako et inawat Diyos din indatona. Isonga olay mo natey si Abel, wada pay laeng di ibagbaga na en datako begew sin pammati na.

<sup>5</sup> Di esa abe ay namati et si Enok. Begew sin pammati na, adi natey mo adi et inan Diyos sisya ay matmatago pay laeng. Isonga olay mo inanaanap das sisya, adi da makadteng, tan inan Diyos dedan. Wada di inpaisolat Diyos ay kanana en sin daan maas sisya, nalaylayan si Diyos en sisya.‡ <sup>6</sup> Et olay sino ay ipogaw, adi mabalin ay malaylayan si Diyos en sisya mo magay pammati na. Isonga din mayad ay omasag-en en Diyos et masapol ay patiena ay wadas sisya ya masapol abe ay patiena ay gon-gonaana din mangan-anap en sisya.

<sup>7</sup> Nemnemen tako abes Noe. Begew sin pammati na, dadlonan pinatpati din indadaan Diyos en sisya maipanggep sin mapasamak sin tapin di agew. Olay mo magay inil-ila nas kaman nidi, pinati na pay dedan et nan-amag si daong ta say maisalakan da ay sinpamilya.§ Begew sin pammati na ay nay, inbilang Diyos ay nalinteg sisya, ngem mo din iib-a na pay ay adi namati, naipaila ay naipaksaw da.

<sup>8</sup> Si Abraham abe di esa ay nanongpal en Diyos begew sin pammati na. Tan idi tinogon Diyos sisya ay emey sin esa ay ili ay okaenan to, pinati na ay dagos et nanlobwat, olay mo adi na ammo mo intoy emeyana.\* <sup>9</sup> Begew abe sin pammati na, inan-anosana ay manbebbeey si tolda ay kaman mangili sin sana ay ili ay inkarin Diyos ay oka na. Et siya abe di inam-amag Isaac ay anak na ya si Jacob ay apo na ay naibibilang met laeng en sisya ay makitawid sin inkarin Diyos. <sup>10</sup> Inan-anosan Abraham din kaman nidi ay nanbebbeeyana, tan namnamaena ay en makiili sin komakaman ay ili ed langit ay ninemnem ya inamag Diyos.

<sup>11</sup> Si Sara abe ay asawan Abraham et basig ay enggay nabakes, ngem begew sin pammati na, indawat Diyos en sisya din kabaelan ay mawad-an, tan inbilang na ay matalek si Diyos ay manongpal sin inkari na.† <sup>12</sup> Isonga olay mo adi koma makaipoli

‡ **10:38** Isaias 26:20; Habakkuk 2:3-4. Ilaen abe sin Roma 1:17 ya Galacia 3:11. \* **11:3** Salmo 33:6,9. † **11:4** Genesis 4:3-10. ‡ **11:5** Genesis 5:21-24. § **11:7** Genesis 6:13-22. \* **11:8** Genesis 12:1-5. † **11:11** Genesis 18:11-14; 21:2. Din naisolat sin odom ay manuskrito sin Griego et: Begew sin pammati na, indawat Diyos en sisya din kabaelan ay man-ipoli, olay mo enggay nakay sisya ya basig ya enggay nabakes si Sara ay asawa na, tan inbilang na ay matalek si Diyos ay manongpal sin inkari na.

si Abraham tan enggay nakay, inmad-ado pay dedan din polin di es-esa ay ipogaw ay nay ay kaman din kaad-adon di bilang di talaw ono din adi kabilang ay darat sin benget di baybay.

<sup>13</sup> Am-in din ipogaw ay nay et namatpati da pay laeng en Diyos sin nateyan da. Olay mo adi da inawat sin kamatago da din inkarin Diyos en daida, kaman dan tinamtamang din maidawat to en daida, et naragragsakan da. Isonga inpodno da ay owat dan mangili ay magay kosto ay ili da isnan daga. <sup>14</sup> Mo kaman nidi di inpodno da, say pangammoan tako ay nan-an-anap das kosto ay ili da. <sup>15</sup> Et baken din sigod ay ili da ay tinaynan da din was nemnem da, tan mo tet-ewa di koma, wada iman di waya da ay mantaoli. <sup>16</sup> Ngem baken tet-ewa, tan din laydelayden da ay emeyan et din sigsigid ay ili ed langit. Isonga adi mabain si Diyos ay makwani en Diyos da. Ammo tako ay tet-ewa di, tan wada di insagana na ay ili da ed langit.

<sup>17-18</sup> Nemnemen tako din pammati ay inpailan Abraham sin namadasan Diyos en sisya. Begew sin pammati na, nakasagana ay mamse sin bogbogtong ay anak na ay si Isaac‡ ay idatona en Diyos, olay mo inkarin Diyos ay si Isaac di kapoan di poli na. <sup>19</sup> Tan ninemnemnem Abraham ay kabaelan Diyos ay manago kasin en Isaac. Et kamanan kasin tinago, tan mo adi koma inpasaldeng Diyos si Abraham, inapati na koma ay mamse sin anak na ay sana.

<sup>20</sup> Si Isaac abe et pinati na ay tongpalen Diyos din inkari na, et begew sin pammati na ay sana, binindisyonana din anak na ay da Jacob en Esau ay mangwani en wada di bindisyon ay idawat ton Diyos en daida. §

<sup>21</sup> Et siya abe en Jacob, inpaila na din kaman nidi ay pammati, tan idi dandani ay matey, nanpag-en sin sokod na ay nanaydayaw en Diyos, et binindisyonana din doway apo na ay anak Jose.\*

<sup>22</sup> Si Jose abe et begew sin pammati na, idi dandani ay matey, inbaga na din komaanan ton di iib-a na ay Israelita ed Egipto et inbilina abe ay itakin dan tong-a na ta iponpon da sin ili ay emeyan da. †

<sup>23</sup> Wada abey pammatin da aman Moses, isonga idi naianak sisya, adi da emegyat ay adi manongpal sin inbilin di ari ay siyat mapse din kaian-anak ay lalaki ay Judio mo adi et intabon das tolo ay bowan, tan inila da ay kagkagam-is ay moyang sisya. ‡

<sup>24</sup> Begew abe sin pammatin Moses sin naket-engana, sinigaana ay maibilang ay anak din nanagibi en sisya ay din anak Faraon ay ari da. § <sup>25</sup> Din gapo ay sinigaana di et banbanolena din kaitapiana sin ipogaw en Diyos ay mapalpaligatan mo din pan-gan-ganasanas basol ay sinkaattikan anggoy di kaganasana. <sup>26</sup> Tan olay mo nilaslasoy das sisya begew sin pammati na sin omali ay Messias, inbilang na ay nabanbanol din nalaslasoyana ay doy mo din pangon-odana sin am-in ay kinabaknang ed Egipto, tan ninemnemnem na din gon-gona ay maidawat en sisya sin tapin di agew. <sup>27</sup> Begew sin pammati na, tinaynana ed Egipto ay adi emegyat sin bonget di ari. Inan-anosana din ligat ay nilak-am na, tan kamanan inil-ila si Diyos ay adi kaila. <sup>28</sup> Begew abe sin pammati na, initdo na sin iib-a na ay Israelita din masapol ay amagen da sin fiesta ay makwani en Nalabas. Inbilina en daida ay manpalti das karnero ta iwalsi dan dada na sin nan-inigid di pantew da ta say mo omali din anghel ay mamse sin besag ay anan-ak ed Egipto, labsana din bebbeey di Israelita ay magay pespeslena ay besag.\*

<sup>29</sup> Begew sin pammatin di Israelita ay doy, dinan da din makwani en Baybay ay Mandalangdang ay kaman din iyat di ipogaw ay manmandan sin namgaan ay lota. Ngem idi inpadas din taga-Egipto ay mangonod en daida, nalned da am-in. †

‡ **11:17-18** Genesis 22:1-14. Waday odom ay anak da Abraham, ngem maibilang si Isaac ay bogbogtong ay anak na, tan sisya anggoy di naianak ay katongpalaan di inkarin Diyos. Ilaen abe sin Roma 9:7-9. § **11:20** Genesis 27:27-29.

\* **11:21** Genesis 47:31; 48:1-20. † **11:22** Genesis 50:24-25. ‡ **11:23** Exodo 1:22; 2:2. § **11:24** Exodo 2:10-12.

\* **11:28** Exodo 12:21-30. † **11:29** Exodo 14:21-31.

<sup>30</sup> Din pammati da met laeng di begew ay natekdag din nakayang ay batog ay kodal di siyodad ed Jerico idi nakdeng ay nilikeliked das pito ay agew.‡

<sup>31</sup> Sin siyodad ay doy, wada di babai ay manngadan si Rahab ay mabaybayadan di kinababai na. Ngem gapo ta namati en Diyos, sinangaili na din Israelita ay en nansiim sin ili na ya binadanganas daida. Isonga adi naitapi sin napsean di kailiana ay nanigaan ay mamati en Diyos.§

<sup>32</sup> Ad-ado pay di mabalin ay ibagak maipanggep sin pammatin di aap-o tako ed nabaon, ngem omanay nging na, tan kolang di oras ko mo dad-atek ay kosto din maipanggep en da Gideon, Barak, Samson, Jefta, David, Samuel, ya din mamadto.\*

<sup>33</sup> Napateg en daida am-in di pammati, tan begew sin pammati da, wada en daida di nangabak sin nakigobgobatan da sin odom ay il-ili, waday nanturturay ay kosto, ya waday nangawat sin inkarin Diyos. Di odom et way inpasaldeng da ay kaeegyat ay layon ta adi da mankat,† <sup>34</sup> di odom et adi da naatongan idi naitpig da sin napigsa ay apoy,‡ ya di odom abe et inlisian da di ipogaw ay mamse koma en daida. Nakapoy di odom, ngem nanbalinen Diyos si mabikas. Di odom pay et pinmigma da ay nakigobat et inpalayaw da din sosoldado ay napo sin odom ay ili ay en nakigobat en daida. <sup>35</sup> Wada abe di babbabai ay natago kasin di natey ay an-ak da.§

Ngem wada abe di napalpaligat enggana ay natey da, tan sinigaan da ay mangisaot sin pammati da ta mawayaan da koma. Tan din namnamaen da et din sigsigid ay biyag ed langit sin kasin dan katagoan. <sup>36</sup> Wada da abe ay begew sin pammati da, palalo ay nalaslasoy da ya nasoplisoplit da ya wada da abe di nakakadinaan ay naibabalod. <sup>37</sup> Di odom et pinigpig das bato enggana ay natey da, di odom et nilagadi da, di odom pay et pinse das kampilan. Pinakaan day odom sin ili da ya nalabes ay pinalpaligat das daida, isonga palalo ay kaseseg-ang da. Nanbabado das owat kopkop di karnero ya kalding <sup>38</sup> et linnikeliked da sin luglugar ay magay omili ya sin kadondontogan ay man-iy-iyen si liliyang ya os-osok. Ngem din katet-ewa na et adi maikari din kaipoipogaw sin nay daga ay makikadkadwa en daida.

<sup>39</sup> Am-in dana et inapolbalan Diyos begew sin pammati da, ngem adi da pay dedan ginon-od din natongpalan di inkari na. <sup>40</sup> Tan wada di sigsigid ay planon Diyos ay adi na tongpalen din inkari na en daida enggana ay maitapi tako ta say panbalinenas datako am-in si ipogaw ay magay pankolkolangana.

## 12

### *Nemnemen Tako Din Ligat Ay Nilak-am Jesus*

<sup>1</sup> Mo si datako ed wani, maiarig tako sin makilonglongba ay boyboyaen am-in da doy ay nangipaneknek sin kinapateg di pammati ed idi. Isonga tadonen tako din amagen di makilonglongba ta kaanen tako di olay sino ay komawed en datako, pati din basbasol ay kaman maiipket en datako. Ipapasnek tako ay managtagtag sin longbaan ay initdon Diyos en datako <sup>2</sup> ay maimomongsan di nemnem tako en Jesus, tan sisya di mangipangpango en datako ya mangan-anay sin pammati tako. Begew sin ragsak ay namnamaena, inanosana din nanligatana sin krus et adi na inkaskaso din naibabainana, et ed wani wada ay tinmotokdo sin makannawan di manturturay ay si Diyos.

<sup>3</sup> Dadlon yon nemnemen din inyat Jesus ay nangan-anos sin palalo ay nangonkontraan di managbasol ay ipogaw en sisya ta say adi kayo madisdismaya ya mankeykeyat.

‡ **11:30** Josue 6:12-21. § **11:31** Josue 2:1-21; 6:22-25. \* **11:32** Papangolo 6:11-8:32 (Gideon); 4:6-5:31 (Barak); 13:2-16:31 (Samson); 11:1-12:7 (Jefta); 1 Samuel 16:1-1 Aari 2:11 (David); 1 Samuel 1:1-25:1 (Samuel). † **11:33** Daniel 6:1-27. ‡ **11:34** Daniel 3:1-30. § **11:35** 1 Aari 17:17-24; 2 Aari 4:25-37.

<sup>4</sup> Tan sin mamadpadasan yo ay mangabak si basol, maga pay laeng en dakayo di inmayos di dada na begew sin pammati na.

*Anosan Tako Di Ligat, Tan Say Osalen Diyos Ay Mangitdo En Datako*

<sup>5</sup> Ay nilinglingan yo ngata din inpaisolat Diyos ay mangipapigsa koma sin nemnem yo ay an-ak na? Kanana,

“Anak ko, adim laslasoyen mo itdoan dakan Apo. Adi ka aben madisdismaya mo bagaan daka. <sup>6</sup> Tan bagaan din Apo din laydelaydena, ya soplitena din am-in ay ibilang na ay an-ak na.”\*

<sup>7</sup> Isonga ibilang yo din ligat yo ay pamagbagan Diyos en dakayo et anosan yo, tan say pangammoan yo ay ibilang Diyos dakayo ay an-ak na. Tan ay wada aya di anak si adi bagbagaan di ama na? <sup>8</sup> Isonga mo adi kayo makilak-am sin pamagbagaan ya panopsoplitan Diyos sin am-in ay an-ak na, laydena ay kalien ay baken kayon tet-ewa ay an-ak na. <sup>9</sup> Mo maipanggep si aam-a tako isnan daga, binagbagaan da iman si datako, et nirispito takos daida begew sin nangiyatan das di. Isonga namnamed koma ay manpaituray tako en Ama tako ed langit ta say matagotago tako. <sup>10</sup> Tan din aam-a takos nan daga et pigay tawen anggoy di namagbagaan da en datako ay maibasar sin kanan da en kosto. Ngem din mamagbagaan Diyos en datako et maibasar sin ammo na ay mantongpal sin pansigdan tako ay din makilak-aman tako sin kinasanto na. <sup>11</sup> Tet-ewa kayman ay adi omiparagsak di pamagbaga ya soplit sin domatngan da, tan mansakit, ngem mo maitdoan takos di, siged di panbanagana, tan maiturong sin natalna ay nemnem ya nalinteg ay ogali.

*Esten Takon Kabibiyag Tako Ta Adi Tako Masangsangaw*

<sup>12</sup> Isonga dakayo ay kaman nalalaylay di takkay na ya man-gaygayenggeng di peweg na begew sin ligat yo, papigsaen yo di nemnem yo. <sup>13</sup> Mantoltoloy kayo sin kosto ay longbaan ay adi kayo masangsangaw ta say din iib-a yo ay kaman manpilpilay di pammati da et waday kosto ay tadtadonen da, et adi masepsep ay komapkapoy di pammati da mo adi et pomigsa kasin.

<sup>14</sup> Ipatat yo din kabaelan yo ay makiolnos si am-in ay ipogaw. Ipatat yo abe ay mangon-onod si nasantoan ay kabibiyag, tan din baken nasantoan ay ipogaw et adi na maila si Apo Diyos. <sup>15</sup> Man-asibantay kayo ta maga en dakayo di manokog sin seg-ang Diyos, tan din kaman nidi ay ipogaw et maiarig sin mola ay manpait di lames na, et mo gomabay sin kad-an yo, ad-ado di papaitena ay maalinan sin basol na. <sup>16</sup> Ilaen yo abe ta maga en dakayo di manaag si bakenan asawa ya maga di manadon en Esau ay magay nemnem nas Diyos. Tan si Esau et sinokatana si owat esa ay kinakan din lebbeng na ay besag ay tawidena koma ay maibasar sin inbilin Diyos.† <sup>17</sup> Ammo tako ay idi nakdeng di, inbabawin Esau din inamag na tan laydelaydena ay awaten din bindisyon ama na ay tapin di lebbeng na ay besag. Ngem olay mo nanpakpakaasi en sisya ay nan-og-oga, adi mabalin, tan magay inyat na ay mamaliw sin nantongpalan di inamag na.

<sup>18</sup> Isonga aag-ik, ipapasnek tako ay mamati, tan addawi ay sigsiged din baro ay intolag Diyos en datako mo din damo ay intolag na sin aap-o tako ed idi. Tan din sinmag-enan tako en Diyos et baken kaman din aap-o tako. Tan mo daida, sinmag-en da sin naila da ay dontog ay Sinai ay manbidbidang. Pinadpadas da din palalo ay mabolinget ya din mapges ay dagem. <sup>19</sup> Dinngge da abe di tanggoyob ya din kaeegyat ay kalin Diyos. Sin nanngean da sin sana ay kalin Diyos, nan-ad-adawag da ta adi maitoloy, <sup>20</sup> tan naabak das egyat begew sin inbilina ay mo waday olay animal ay mangatin sin dontog, masapol ay pigpigen das bato enggana ay matey.‡ <sup>21</sup> Palalo ay kaeegyat din mail-ila ya madmadnge, isonga olay si Moses et kanana, “Manpayegpegak kayman si egyat ko.”§

\* **12:6** Proverbio 3:11-12. † **12:16** Genesis 25:27-34. ‡ **12:20** Exodo 19:12-22; 20:18-21. § **12:21** Deuteronomio 9:19.

<sup>22</sup> Ngem mo datako pay, sinmasag-en tako sin dontog ay Zion ay din Jerusalem ay wada ed langit. Sinmasag-en tako sin siyodad di matmatago ay Diyos ay kad-an aben di kalibolibo ay aanghel ay makiragragsak ay mandaydayaw en sisya. <sup>23</sup> Naitatapi tako sin am-in ay ibilang Diyos ay besag na ay din iib-a tako ay mamati ay naisolat di ngadan da ed langit, pati din ab-abiik di nalinteg ay ipogaw ed idi ay enggay nanbalinen Diyos si ipogaw ay magay pankolkolangan da. Sinmasag-en tako abe sin Diyos ay mangokom sin am-in ay ipogaw <sup>24</sup> ya en Jesu Cristo ay naniglot sin baro ay tolag. Din inmayos ay dada na et sigsiged di laydena ay kalien mo din dadan Abel, tan din dadan Abel et kaman nankedaw ay maibaes et anggoy.\*

<sup>25</sup> Ilaen yo ngarud ta adi yo tetewengen din kankanan Diyos. Tan mo nadosa din aap-o tako ay nanigaan ay mannge sin inbagan Diyos en daida ed Sinai isnan daga, namnamed ay madosa tako mo pandokogan tako din ibagbaga na en datako ay mapo ed langit. <sup>26</sup> Tan sin nankalkalian Diyos ed idi ed Sinai, nanyegyeg. Ngem wada di inkari na ay daan matongpal ay kanana, “Mamingsan pay yan ikiweg ko din daga, et baken din daga anggoy mo adi et am-in abe ay wada ed daya.”† <sup>27</sup> Din kanana en mamingsan pay yan ikiweg na, laydena ay kalien en mamaga dana ay naparsua ay mabalin ay maikiweg ta say ang-anggay din adi kaikiwkiweg si komakaman. <sup>28</sup> Isonga man-iyaman tako en Diyos, tan maitaptapi tako sin panturayana ay adi kaikiwkiweg, siya din dayawen tako ya patgen takos sisya ay kosto maibasar sin laydena. <sup>29</sup> Tan din Diyos ay daydayawen tako et maiarig din panosaanas ipogaw si kaeegyat ay apoy ay mamoo si am-in.

## 13

### *Maod-odi Ay Bilbilin*

<sup>1</sup> Itoltoloy yo ay manlilinayad ay kaman siag-i. <sup>2</sup> Ilaen yo abe ta manangsangaili kayo, tan wada da di nanangaili si kanan da en iib-a da ay ipogaw, yan kambaw aanghel.\*

<sup>3</sup> Seg-angan yo din naibabalod ya din mapalpaligatan ay kaman kayon makilaklak-am sin ligat da.

<sup>4</sup> Banolen yo am-in koma din kasasaad di sin-asawa ta adi kayo masangsangaw si baken yon asawa, tan dosaen Diyos din makikamkamalala ya olay sino ay manaag si bakenan asawa. <sup>5</sup> Adi kayo man-gangangam si pilak mo adi et mapnek kayo sin wada en dakayo, tan kanan Diyos, “Adiak polos taytaynan ono pandokdokogan dakayo.”†

<sup>6</sup> Isonga adi tako mabain ay mangwani, “Si Diyos di bomadang, isonga adiak emegyat. Sino aya di mabalin ay amagen di owat ipogaw en sak-en?”‡

<sup>7</sup> Nemnemen yo din nangipangpango en dakayo ed idi ay nangit-itdo sin kalin Diyos en dakayo. Nemnemen yo din nantongpalan di biyag da ta say tadonen yo din pammati da. <sup>8</sup> Tan si Jesu Cristo et adi manbalbaliw mo adi et man-iso ed idi ya ed wani ya eng-ggana. <sup>9</sup> Isonga adi kayo masangsangaw si kompormi ay natnatken ay mait-itdo. Tan din mangipapigsa si nemnem tako et din seg-ang Diyos, baken din pangon-onodan takos bilbilin ay maipanggep si makan. Din nangon-onod si kaman dadi ay bilbilin et adi da polos nabadbadangan sidi. <sup>10</sup> Isonga din mangipapasnek ay mangon-onod sin linteg Moses et magay lebbeng da ay makilak-am sin bindisyon tako ay pantongpalan di naidatonan Jesus sin krus para si basbasol. <sup>11</sup> Magay lebbeng da ay makilak-am, tan olay mo maibasar sin linteg Moses, adi da mangan sin aanimal ay maidaton para si basbasol. Tan din aanimal ay mapalti et isgep din kangatoan ay padi di dada da sin Kasasantoan ay Kowarto ta idatona en Diyos para si basbasol, ngem din awak da pay et maiey sin away di ili ta mapooan da. <sup>12</sup> Isonga si Jesus abe ay natongpalan di datdaton ay doy, nanligat sin lasin di ili ta panbalinena di kaipoipogaw si nasantoan ay ipogaw Diyos

\* **12:24** Genesis 4:10. † **12:26** Haggai 2:6. \* **13:2** Genesis 18:1-8; 19:1-3. † **13:5** Deuteronomio 31:6; Josue 1:5. ‡ **13:6** Salmo 118:6.



babaen si dada na. <sup>13</sup> En tako ngarud maitapi en sisya sin lasin di ili, laydena ay kalien, taynan tako din ogalin di Judio ta makilak-am tako sin napabainana. <sup>14</sup> Tan baken isnan daga di panbeeyan tako si eng-enggana mo adi et naimomongsan di nemnem tako sin ili ay panbeeyan takon to. <sup>15</sup> Et din kanayon ay idatdaton tako koma en Diyos begew en Jesus et din panaydayawan ya pan-iy-iyamanan tako en sisya. Siya da di din kosto ay idatdaton di ipogaw ay mangipodno ay sisya din Apo. <sup>16</sup> Adi tako aben liwliw-an ay mangam-amag si siged ya mamadbadang sin iib-a tako ay mankolkolang, tan siya da din datdaton ay panlaylaydan Diyos.

<sup>17</sup> Patien yo din papangolo yo ya manpaituray kayo en daida, tan ay-ayowanan das dakayo sin pammati yo. Es-esten da abe din obla da, tan ammo da ay sangoen das Diyos ta ibaga da en sisya din inam-amag da. Isonga pasien yos daida ta say maragsakan da ay manongtongpal sin obla da. Tan mo adi yo patpatien, masmasadot da, et dakayo met laeng di malogi.

<sup>18</sup> Itoltoloy yo ay mangikarkararag en dakami, tan ammo mi ay nalinis di konsensia mi et layden mi ay itoltoloy ay mangam-amag si kosto si kankanayon. <sup>19</sup> Pangaasi yo abe ta ikararagan yos sak-en ta adi mabayag yan pantaolien Diyos sak-en en dakayo.

### *Din Kakdengnan Di Solat*

<sup>20-21</sup> Sapay koma ta si Diyos ay napoan di talna di mangidawat en dakayo sin am-in ay kasapolan yo ay manongpal sin laydena. Sapay koma ta panbalinenas datako am-in si ipogaw ay panlaylaydana begew en Jesu Cristo. Tan gapo ta mapnek sisya sin dadan Jesus ay Apo tako ay nangipaneknek sin baro ay tolag ay magay patingga na, tinago na kasin sisya ta say sisya di napateg ay mangay-ayowan en datako ay kamanan karnero. Madaydayaw komas sisya ay eng-enggana. Amen.

<sup>22</sup> Pangaasi yo ay aag-i ta anosan yo ay mangawat sin nay insolat ko ay mamagbaga ya mangipapigsa en dakayo, tan baken met andoando nan solat ko en dakayo.

<sup>23</sup> Laydek ay ipaammo en dakayo ay naibolosan si Timoteo ed balodan. Mo somawang isna ay dagos, makiey en sak-en ay en mangila en dakayo.

<sup>24</sup> Pakomostaak din mangipangpango en dakayo ya olay am-in di ipogaw en Diyos issa. Din iib-a tako ay mamati ay napod Italia et pakpakomostaan da abes dakayo.

<sup>25</sup> Sapay koma ta wada en dakayo am-in di seg-ang ay mapmapo en Diyos.

## Din Solat Santiago

### Maipanggep Sin Solat Ay Nay

Din nangisolat isna et si Santiago ay pangolon di mamati en Jesu Cristo ed Jerusalem. Insolat na sin Judio ay mamati ay en nakiili sin kailili. Ad-ado ay banag di insolat nas na. Insolat na di maipanggep si nabibiteg ya babaknang, di ligat ya solisog, din pangidomdomaan di ipogaw si iib-a da, din pammati ya siged ay amag, din dila, din kinalaing ay mapo en Diyos, ya din gapoan di ib-ibaw, ya wada abey odom.

Di esa ay banag ay layden Santiago ay maawatan tako sin solat ay nay et magay silbin di pammatin di ipogaw mo owat sin kali et anggoy. Masapol ay maipaila sin amagena din katet-ewan di pammati na.

#### **Din Linaona**

Din panlogian di solat 1:1  
 Din kapadpadasan di pammati 1:2-8  
 Din nabibiteg ya babaknang 1:9-11  
 Din ligat ya solisog 1:12-27  
 Din panngaan ya panongpalaan si kalin Diyos 1:19-27  
 Adi idomdoma din waday kabigbigana 2:1-13  
 Din pammati ya siged ay iyat 2:14-26  
 Din dilan di ipogaw 3:1-12  
 Din kinalaing ay mapo en Diyos 3:13-18  
 Din nailobongan ay nemnem 4:1-17  
 Maod-odi ay pamagbaga 5:1-20

#### *Din Panlogian Di Solat*

<sup>1</sup> Sak-en si Santiago ay mansilsilbi en Diyos ya en Apo Jesu Cristo. Naey di solat ko en dakayo ay Judio ay mamati en Cristo ay man-ili sin kailili isnan daga. Komosta kayo?

#### *Din Kapadpadasan Di Pammati*

<sup>2</sup> Aag-ik, mo lak-amen yo di nakalalakasi ay ligat, sapay koma ta peteg pay dedan di layad yo, <sup>3</sup> tan ammo yo ay din kapadpadasan yos ligat et say pomigsaan di pammati yo ta ipapasnek yo pay ay mamati.\* <sup>4</sup> Ipapasnek yo ngarud ay mamati ay adi mankeykeyat, tan din pantongpalana et komoskosto di ogali yo enggana ay maga polos di pankolangana.

<sup>5</sup> Ngem mo wada en dakayo di adi makin ammo sin kosto ay iyat na, mankedaw komas laing en Diyos et maidawtan sisya. Tan si Diyos et malmalayad ay mangidawat sin kedawen di am-in ay ipogaw. Adi na aben pabainen. <sup>6</sup> Ngem din mankedaw et masapol ay dadlonan pasien ay idawat Diyos en sisya din kedkedawena ay adi mandowadowa, tan din mandowadowa et kaman din dalloyon sin baybay ay isebsebwag di dagem. <sup>7</sup> Din kaman nadi ay ipogaw, adi na koman kanan en waday idawat Diyos en sisya, <sup>8</sup> tan mandowadowa dedan, et olay sinoy am-amagena, balibaliwanan nemnem na.

#### *Din Nabibiteg Ya Babaknang*

<sup>9</sup> Dakayo ay aag-i ay nabibiteg, peteg koma di layad yo, tan naipangato kayo sin pangilan Diyos. <sup>10-11</sup> Dakayo abe ay babaknang, peteg koma abe di layad yo mo bomaba kayo begew sin pammati yo en Cristo, tan din baknang et kaman din sabsabong ay gomabgabay sin nabeas. Mo komayang din agew yan peteg ay man-atong, makpit din

\* **1:3** Ilaen abe sin Roma 5:3-4 ya 1 Pedro 1:6-9.

molmola dowan mag-as din benga da, isonga madadael din kinapintas da.† Siya abe di mapasamak sin baknang, tan sin pangas-asikasoana sin nigosyo na, say domtengan di kateyana.

### *Din Ligat Ya Solisog*

<sup>12</sup> Nagasat di ipogaw ay maligligatan, ay mangipapasnek ay mangonod en Diyos, tan mo mapaneknekan ay napasnek di pammati na, awatena din gon-gona ay inkarin Diyos sin manglaylayad en sisya ay siya din biyag ay iwed patingga na. <sup>13</sup> Mo wada pay en dakayo di maligligatan dowan masolsolisog, adi na koman kanan en si Diyos di manolsolisog. Tan si Diyos et adi mabalin ay masolisog yan baken aben sisya di manolisog si olay sino ay ipogaw. <sup>14</sup> Tan din kasolisogan di ipogaw et mapo sin lawa ay laydena ay maiarig si tapan ay mangaw-awis en sisya. <sup>15</sup> Mo nemnemen pay ay mangamag sin laydena ay sana, say pan-gapoan di basol, yan din pantongpalan di basbasol di ipogaw et pese ya maisianan en Diyos si eng-enggana.

<sup>16</sup> Isonga laylaydek ay aag-i, adi yo iet-etekan di awak yo ay mangibagbaga ay si Diyos di manolsolisog en dakayo, <sup>17</sup> tan si Diyos ed langit di kapoan di am-in ay siged ya kosto. Sisya abe dedan di namarsua sin am-in ay mansilaw ed daya, ngem olay mo manbalbaliw di kailaan da, adi met manbalbaliw sisya. <sup>18</sup> Gapo ta siya nay ninemnem na, nanbalinenas datako ay an-ak na begew sin namatian tako sin tet-ewa ay kali na ta say datako di kangatoan sin am-in ay parsua na.

### *Din Panngean Ya Panongpalan Si Kalin Diyos*

<sup>19</sup> Nemnemen yo na ay aag-ik. Alistoan tako koma ay mandenge dowan tako aben siliban di iyat tako ay mankali. Adi tako aben nalaka ay bomonget, <sup>20</sup> tan din bonget, adi dedan maiturong sin nalinteg ay kabibiyag ay layden Diyos. <sup>21</sup> Dokogan yo ngarud di am-in ay kadodogis ya odom ay kalasin di lawa ay nemnemnemen ya am-amagen yo, yan ibaba yo pay et di nemnem yo ay manongpal sin kalin Diyos ay inigto na sin nemnem yo ay say mabalin ay mangisalakan en dakayo.

<sup>22</sup> Adi yo dengdengngen din kalin Diyos et anggoy, mo adi et tongpalen yo abe, tan mo dengdengngen yo et anggoy yan adi yon tongpalen, adi pay iet-etekan yo din awak yo. <sup>23</sup> Tan din mandengdenge sin kalin Diyos ngem adi na tongtongpalen, kaman din manis-ispiko ay isinsin-eng na din kaipogaw na. <sup>24</sup> Asi et mo makaispiko yan komaan, owat sinkaattikan yan kambaw kaliw-an ay dagos mo intoy iso na. <sup>25</sup> Ngem din mangipapati ay mannemnemnem dowana pay tongpalen din siged ay linteg Diyos ay mangipawaya si ipogaw, siya di din bindisyonan Diyos sin amin ay am-amagena, tan adi na dedan owat dindinngge yan asi na pag linglingan.

<sup>26</sup> Mo wada pay di mangwani en relihioso dowan oway di kalkaliena, din mismo ay awak na di iet-etekana tan magay silbin dedan di kinarelihioso na. <sup>27</sup> Tan din mangon-onod sin tet-ewa ya kosto ay relihion sin pangilan Diyos ay Ama tako et din mamadbadang si nangoso ya nalasang sin maligligatan da yan adi maal-alinan si ogali ay maikontra sin layden Diyos.

## 2

### *Adi Idomdoma Din Waday Kabigbigana*

<sup>1</sup> Aag-i, mo mamati kayo sin madaydayaw ya kangatoan ay Apo tako ay si Apo Jesu Cristo, adi yo idomdoma din waday kabigbigana. <sup>2-3</sup> Kaspangarigan, mo emey di baknang ay nansisingsing si balitok ya nanbabado si kagam-is sin simbaan yo yan kanan yo en sisya, “Omali kas na ta itokdom sin siged ay tokdoan ay nay.” Yan mo domateng abe di nabiteg ay nanbabado si nalkenalkeban, ngem kanan yo pay en sisya,

† 1:10-11 Isaias 40:6-7.

“Olay ialagey mos di ono itokdom isdi sin det-a,”<sup>4</sup> adi pay lawa san nemnem ya panggep yo, tan binigbig yo din esa begew sin kinabaknang na.

<sup>5</sup> Nemnemnemen yo kod na ay aag-i. Pinilin Diyos di nabibiteg sin pangilan di ipogaw ta manbalin das baknang si pammati ya maitapi da sin panturayana ay inkari na sin manglaylayad en sisya. <sup>6</sup> Ngem dakayo pay et laslasoyen yo din nabibiteg. Sino aya din mamalpaligat ya mangidardarum en dakayo mo adi et din babaknang?<sup>7</sup> Ay baken daida dedan di mangipalawlawwa sin madayaw ay ngadan Jesu Cristo ay naitapian tako?

<sup>8</sup> Wada di nabanol ay linteg Diyos ay inpaisolat na ed nabaon ay kanana, “Masapol ay laylaydem din gait mo ay kaman din pananglayad mo sin awak mo.”\* Mo dadlon yon on-onodan din linteg ay nay, kosto kayman di iyat yo. <sup>9</sup> Ngem mo adi yo pan-iisoen di nemnem yo sin iib-a yo mo adi et idomdoma yo din waday kabigbigana, bomasol kayo tan nilabsing yo met din linteg Diyos ay sana. <sup>10</sup> Tan mo waday nangon-onod sin am-in ay linteg Diyos malaksig di esa anggoy, nakabasol dedan sisya, isonga kamanan nilabsing am-in. <sup>11</sup> Tan din Diyos ay nangibilin en, “Adi ka makikamkamalala,” inbilina abe en, “Adi ka manpese.”† Isonga kaspangarigan, mo laton ay adi kayo nakibabbabai ono nakilallalaki ngem pinomse kayos ib-a yo, nakalabsing kayo pay dedan sin linteg. <sup>12</sup> Isonga siliban yo din am-in ay ibagbaga yo ya am-amagen yo, tan awni et okomen Diyos dakayo ay maibasar sin linteg ay mangipawaya si ipogaw sin basol. <sup>13</sup> Tan din adi maseg-ang si ib-a na, adi aben seg-angan Diyos mo okomenas sisya. Ngem mo din manageg-ang pay, magay ieg-egyat na sin pangokoman Diyos.

#### *Din Pammati Ya Din Sigid Ay Iyat*

<sup>14</sup> Aag-i, mo waday mangwani en mamati en Jesu Cristo ngem maga di am-amagena ay mangipaila ay tet-ewa, sino aya di silbi na? Ay mabalin aya ay maisalakan sisya babaen sin kaman nidi ay pammati? <sup>15</sup> Kaspangarigan, mo waday agi tako ay mankolang di bado na ya kanena <sup>16</sup> yan wada en dakayo di mangibaga en sisya, “Adi ka madandangan issa, sapay koma ta adi ka kaskaw ya mangan kas kosto,” dowan adi na idawtan, sino aya di silbin din inbaga na ay sana? <sup>17</sup> Iso na abe sin pammati. Mo owat maibagbaga et anggoy yan adi maipaila sin am-amagen tako, magay silbi na abe.

<sup>18</sup> Ngem wada ngata di mandiskotil ay mangwani, “Nakalalakasi met di iyat di ipogaw ay mamati, tan di esa et waday pammati na anggoy, ngem din esa pay, din siged ay iyat na anggoy di wada.” Mo way mangwani issa, naey abe di isongbat ko. “May kod ay, mo mamati ka et anggoy, intoy iyat mo ngin ay mangipaila sin katet-ewan di pammatim? Tan mo sak-en pay, paneknekak din pammatik sin am-amagek.” <sup>19</sup> Patiem kayman ay es-esa di Diyos, et siged kayman sa. Ngem olay abe din dimonyo, say pasien da di met laeng yan manpayegpeg das egyat da begew sin panosaan ton Diyos en daida. <sup>20</sup> Ay naong-ong ka si ipogaw! Ay siyatak dadlon paneknekan en sik-a ay magay silbin di pammati mo maga di siged ay iyat si kailaana? <sup>21</sup> Nemnemem kod si Abraham ay apapo tako ed nabaon. Inbilang Diyos ay nalinteg sisya begew sin nanongpalana en sisya sin nangipatangana sin anak na ay si Isaac sin altar ta idatona en Diyos.‡ <sup>22</sup> Baken samet naligat ay maawatan ay nantimpoyog din pammati na ya inamag na. Din inamag na di nangipaila sin katet-ewan di pammati na. <sup>23</sup> Et say natongpalaan din inpaisolat Diyos ay kanana, “Pinatin Abraham din inbagan Diyos, isonga inbilang Diyos ay nalinteg sisya.”§ Say gapo na abe ay makwani en gayyem Diyos sisya. <sup>24</sup> Isonga say pangammoan tako ay ibilang Diyos ay nalinteg di ipogaw begew sin am-amagena, baken begew sin pammati na et anggoy.

<sup>25</sup> Kaman aben si Rahab ay hostess ed nabaon. Inbilang Diyos ay nalinteg sisya begew sin siged ay inamag na sin Judio ay inbaan Diyos ay mansiim sin ili na. Tan sinangaili nas

\* 2:8 Levitico 19:18. † 2:11 Exodo 20:13-14; Deuteronomio 5:17-18. ‡ 2:21 Genesis 22:1-14. § 2:23 Genesis 15:6. Ilaen abe sin Roma 4:3.

daida et initdo na abe en daida din pandanan da ay lomayaw.\* <sup>26</sup> Din maawatan tako komas na et siya na: din pammati ay magay kailaana si siged ay amag et kaman natey tan magay silbi na. Kaman aben din awak di ipogaw ay enggay naisian di ab-abiik na, tan siya abe ay natey.

### 3

#### *Din Dilan Di Ipogaw*

<sup>1</sup> Aag-i, agpos mo at-atik en dakayo di manplano ay man-itdo sin kalin Diyos, tan ammo yo ay madagdagsen din dosa mi ay man-it-itdo mo mankamali kami mo din mait-itdoan. <sup>2</sup> Am-in tako ay ipogaw, mamin ado dedan ay mankamali tako, namnamed sin iyat tako ay mankali. Ngem into et mo waday ipogaw ay makaitpe sin dila na ta magay pankolangana sin kankanana, maga polos di pankolangana, tan kabaelana ay mangitpe abe sin amin ay partin di awak na. <sup>3</sup> Kaspangarigan, mo bokadoan tako din tepek di kabayo ta say tongpalenas datako, mabalin ay iturong tako sin layden tako ay emeyan. <sup>4</sup> Kaman aben din bapor, tan olay mo dakdake ya maidogos sin mapges ay dagem, din mangiturong sin layden di mangimaniho ay emeyan et din landok ay kitkittoy sin likodana. <sup>5</sup> Siya abe sin dilan di ipogaw, tan olay kitkittoy, dakdake pay dedan di kabaelana.

Nemnemen tako din iyat di apoy. Olay kitkittoy sin kailogiana, annawa ay dontog di pooana. <sup>6</sup> Siya abe di kaiarigan din dila tako, tan say partin di awak tako ay poon di adado ay kalasin di lawa ay mangipalawlawwa sin kaipogaw tako. Din lawa ay nay et napo dedan en Satanas, et say kaman mamoo sin intiro ay biyag tako.

<sup>7</sup> Kabaelan di ipogaw ay mangipaayew sin am-in ay kalasin di parsua pati atap ay animal, titit, mankodkodap ya din wada sin baybay, yan wada iman di ipogaw ay nangipaayew sin am-in ay kaman dana. <sup>8</sup> Ngem maga met pay laeng di ipogaw ay makatiped sin dila na, tan din dila et kaman napnos kedet. Nakasasaganas kankanayon ay mangibagas lawa. <sup>9</sup> Siya din os-osalen tako ay mandayaw en Apo Diyos ay Ama tako, ngem siya dedan abe di os-osalen tako ay mangipalawlawwa si iib-a tako, olay mo pinarsuan Diyos daida ay kaman sisya met laeng di iso da. <sup>10</sup> Es-esa ay tepek di pankalkalian tako, et mo mamingsan daydayawen takos Diyos, ngem mo mamingsan down tako aben iy-iyewen din ib-a tako. Aag-ik, baken koman kaman nadi di maam-amag. <sup>11</sup> Ay siya mo waday olay esay obbog ay bomalbalaan di siged ya mantab-ang ay danom? <sup>12</sup> Maga abe di igos ay manlames si olivo, yan maga abey poon di obas ay manlames si igos. Baken aben din baybay di kapoan di siged ay danom. Say tadonen koma din dila tako ta adi manlaok di siged ya lawa ay kali.

#### *Din Kinalaing Ay Mapo En Diyos*

<sup>13</sup> Mo wada en dakayo di nanemneman ya manakaawat, ipaila na koma din kinalaing na sin siged ay ogali na ya din pangibabaanas awak na sin pangam-amaganas siged. <sup>14</sup> Ngem mo makaapos ya naimot kayo ya din kaipangatoan di awak yo din wadas nemnem yo, olay adi yo it-it-ek din kinalaing yo, tan mo say iyat yo di, konkontraen yo din katet-ewa na. <sup>15</sup> Din kaman nadi ay kinalaing et baken si Diyos ed langit di napoana, tan baken nadiyosan mo adi et nailobongan ya nadimonyoan. <sup>16</sup> Basta mo waday ipogaw ay makaapos ya mangipakat ay manpangato, say kad-an di golo ya am-in ay kalasin di lawa. <sup>17</sup> Ngem mo si Diyos di kapoan din kinalaing di ipogaw, pag siged di nemnem na, naolnos, naanos, adi na ipapilit din laydena, managseg-ang, ad-adoy siged ay am-amagena, magay idomdoma na sin iib-a na, ya adi man-agin-agin. <sup>18</sup> Din daida ay naolnos down da aben segsegagen din iib-a da ay man-iibaw, kaman dan man-esek si talna ya olnos, et mo gomabay din inis-ek da ay sana, din nalinteg ay kabibiyag di lames na.

\* 2:25 Josue 2:1-21.



## 4

### *Din Gapoan Di Ib-ibaw*

<sup>1</sup> Tan sinoy poon od di pan-iibawan ya pansosongbatan yo? Maipoon met sin ad-ado ay layden yo ay ganasen di mangriribok sin siged ay nemnem yo. <sup>2</sup> Tan wada di layden yo ay okaen, ngem adi yon maa, isonga nakasagana kayo ay pomse. Man-apal kayo abe, ngem adi yo magon-od, isonga man-iibaw ya mansosongbat kayo. Ngem di begew ay adi yo magon-od et adi kayo od mankedaw en Diyos. <sup>3</sup> Ngem olay mo mankedaw kayo, adi na pay dedan idawat, tan lawa dedan di panggep yo ay mankedaw. Layden yo ay osalen si pan-ganasan yo et anggoy.

<sup>4</sup> Ay daetan kayo pay ay adi matalek ay mangonod en Diyos! Ay adi yo ammo ay mo laydelayden yo din wadas nan daga et konkontraen yos Diyos? Isonga olay sino ay mangagagara ay mangonod sin kinaogali ay maikontra sin layden Diyos, panbalinena din awak na ay kaibaw na. <sup>5</sup> Adi yo koma kanan en magay silbin din inpaisolat Diyos ay kanana,

“Din Ispirito ay inbaan Diyos ay mantetee en datako et man-imon mo baken si Diyos anggoy di maimongsanan di layad tako.”

<sup>6</sup> Naligat na ay tongpalen, ngem ad-ado abe di seg-ang ya badang na en datako ta say onodan takos sisya ay kosto. Gapo ta say iyaat na, wada abey inpaisolat na ay kanana, “Konkontraen Diyos din mangipapangato si nemnem na, ngem segseg-angana din napakombaba.”\*

<sup>7</sup> Manpaituray kayo ngarud en Diyos. Kontraen yo abe si Satanas ta say itagtaganas dakayo. <sup>8</sup> Mo sag-enan yos Diyos, somag-en abe en dakayo. Dakayo ay makabasol, dokogan yo din basbasol yo ta malinisan di kabibiyag yo. Dakayo abe ay nagogodwa di nemnem na, ipaes-esa yo di nemnem yo ay mangonod en Diyos. <sup>9</sup> Mansakit koma di nemnem yo, manladingit ya man-oga kayo koma begew sin basbasol yo. Isaldeng yo san iyaat yo ay masis-iyek ya manragragsak begew sin basbasol yo ta say isokat yo din ladingit ya bain. <sup>10</sup> Tan mo ibaba yo din awak yo sin pangiilaan Diyos, ipangato na abes dakayo.

### *Din Manpinalawlaw*

<sup>11</sup> Aag-i, adi kayo man-asipalawlaw, tan din mangipalawlaw si gait na, kamanan palawlawen abe din linteg Diyos ay mangwani en manlilinayad tako koma. Yan din mangipalawlaw sin linteg Diyos et say kailaana ay adi na tongtongpalen din linteg ay sana, mo adi et ibilang na ay magay kowinta na. <sup>12</sup> Si Diyos et anggoy di nangidawat en datako sin linteg yan sisya anggoy di waday turay na ay mangokom en datako. Maga abe di odom ay makabael ay mangisalikan ya manosa en datako. Mo siya di, maga met di turay tako ay ipogaw ay mangokom sin ib-a tako ay mangibaga ay lawas sisya.

### *Adi Pangon-onaen Din Amagen Sin Tapin Di Agew*

<sup>13</sup> May kod, mo wada en dakayo di mangwani, “Ed wani ono si bigat yan emey kami si natken ay ili ta mannigosyo Kamis di si esay tawen ta say pomilak kami.” Nemnemnemen yo nan kanak. <sup>14</sup> Ay ken inaammo yo di mapasamak si bigat? Aga! Tan din biyag tako et maiarig si liboo ay maila ed wani ngem sinkaattikan yan kamaga.† <sup>15</sup> Isonga agpos et mo kanan yo koma en, “Mo say ipalobos Apo Diyos, matagotago kami ta siya na yan siya di di amagen mi.” <sup>16</sup> Ngem kambaw nalalastog met di nemnem yo dowan yo aben it-it-ek di am-amagen yo. Lawa am-in din pangit-ekan di ipogaw sin kaman nidi. <sup>17</sup> Ngarud, din ipogaw ay nangin ammo si kosto ay iyat na koma ngem adi na ipapati ay amagen et manbasol.

\* 4:6 Proverbio 3:34. † 4:14 Proverbio 27:1.

## 5

*Din Naidadaan Sin Babaknang*

<sup>1</sup>Dakayo abe ay babaknang, dengngen yo nan kanak. Man-anog-og kayo koma begew sin kaeegyat ay ligat ay awni et domteng en dakayo. <sup>2</sup>Iwed met silbin di kinabaknang yo, tan awni man et madadael din bonag yo ya mabootan din indodolin yo ay bado. <sup>3</sup>Malatian abe din balitok ya palata yo, yan din lati na et say kailaan di basol yo ay mangamgam. Din pantongpalana et madosa kayo ed inferno, isonga din lati et kaman apoy ay mangan sin awak yo. Enggay inmad-ado kayman din gamgameng yo sin nay ay maod-odi ay agew yan nay et ay dandani din pangokoman Diyos sin kaipoipogaw. <sup>4</sup>Et si Diyos ay manakabalin am-in, inil-ila na met din kinayyawan yo ay pilak ay inlaglagbo yo koma en daida ay nakipolpoldiya ay nakian-ani sin payew yo. Dinngge na abe din adawag da. <sup>5</sup>Peteg kayman ay manam-ay ya naganas di biyag yo isnan daga, et maiarig kayos baka ay owat man-al-alab ta say lomames, ngem adi na ammo ay nganngani ay mapalti. <sup>6</sup>Ay daetan pay san inyaat yo, tan indardarum ya pinpinse yo di ipogaw ay magay basol na, down magay kabaelan da iman ay mangontra en dakayo. Siya sa anggoy di ibagak en dakayo ay babaknang.

*Din Anos Ya Kararag*

<sup>7</sup>Mo dakayo abe ay aag-i, masapol ngarud ay anosan yo din ligat yo enggana ay omali din Apo. Nemnemen yo di mantaltalon. Naanos da iman ay mansesseed si odan ta asi da man-esek ya mantonod. Asi da pay anosan ay mansesseed enggana ay maom din pagey ay nabanol en daida, asi da anien. <sup>8</sup>Isonga dakayo abe, man-an-anos kayo ya papigsaen yo di nemnem yo, tan nganngani din omalian din Apo. <sup>9</sup>Adi kayo man-asiririri ay aag-i, ta adi kayo makeddeng ay madosa, tan dandani dedan di domatngan din mangokom. <sup>10</sup>Nemnemen yo din mamadto ay nangibagbaga sin inpaammon Apo Diyos en daida ta say tadonen yo, tan olay mo napalpaligatan da, inan-anosan da pay iman. <sup>11</sup>Ibilang tako pay ay naragsak ed wani am-in din kaman dadi ay nangipapasnek ay mangonod en Diyos. Kaspangarigan, dinngge yo am-in din maipanggep sin kinaanos en Job ed nabaon. Olay palalo ay napalpaligatan, intoltoloy na pay dedan ay mamati, et idi nakdeng, asi naammoan din mayat ay planon Diyos para en sisya.\* Tan si Diyos et dadlon managsegang ya makiliklikna.

<sup>12</sup>Wada pay di ibagak en dakayo ay aag-i ay dadlon napateg. Mo waday ibaga yo, adi kayo mansapsapata. Adi yo isapsapata ed langit ono din daga ono kompormi ay odom. Basta ibaga yo en “Aw” mo awen yo yan “Maga” mo sigaan yo, ta adi dosaen Diyos dakayo.

<sup>13</sup>Mo wada en dakayo di maligligatan, mankararag koma. Mo wada abe di naragsak, mankanta koma ay mandayaw en Diyos. <sup>14</sup>Et mo wada pay en dakayo di mansaksakit, paayag na koma din papangolon di mamati ta ikararagan das sisya down dan aplosan si lana ay mangos-osal sin ngadan Apo Jesus. <sup>15</sup>Yan din kararag da ay sana ay maibasar sin talek da en Apo Jesus et say mangaan sin sakit na ta mailatonan, tan agasan din Apo sisya. Mo binmasol pay sisya et down pakawanen Diyos. <sup>16</sup>Isonga mo binmasol kayo, ipodno yo sin iib-a yo ay mamati ta ikararagan das dakayo ta mailatonan kayo. Tan din kararag di nalinteg ay ipogaw et napigsa tan waday pantongpalana. <sup>17</sup>Nemnemen yos Elias. Ipogaw sisya ay kaman datako met laeng, ngem idi inpapasnek na ay nangikararag ay adi omod-odan, naegew tet-ewa si tolo ya kagodwa ay tawen. <sup>18</sup>Asi pag kasin mankararag ay omodan, et nan-odan tet-ewa et ginmabay din molmola.†

<sup>19</sup>Nemnemen yo na ay aag-i. Mo wada en dakayo di omaddawi sin kosto ay mait-itdo ono ogali ay layden Diyos yan wada en dakayo di mamagbaga en sisya ay mangipataoli

\* 5:11 Job 1:21-22; 2:10. † 5:18 1 Aari 17:1; 18:42-45.

sin kosto, <sup>20</sup> dakdake iman di tolong na sin nakabasol ay sana, tan say maisalakanana ta adi maisian en Diyos, yan din ad-ado abe ay basbasol na et mapakawan da.

## Din Damo Ay Solat San Pedro Maipanggep Sin Solat Ay Nay

Din solat ay nay et insolat San Pedro si mamati en Jesu Cristo ay man-ili sin lima ay probinsiya ed Asia Minor. Din kapatgan ay panggep na ay nangisolat et ta papigsaena di nemnem da, tan palalo ay napalpaligatan da begew sin pammati da. Isonga inpanemnem na en daida din sigesiged ay namnama da ay naibasar sin nateyan, natagoan ya kasin omalian Jesu Cristo. Tan ammo na ay mo nemnemen da din namnamaen da ed langit, maanosan da di ligat da. Inpanemnem na abe en daida ay onodan da koma di nasantoan ay kabibiyag ya manpaituray da sin waday kalebbengana en daida.

### **Din Linaona**

Din panlogian di solat 1:1-2

Din nangisalakanan Diyos en datako 1:3-12

Din kabibiyag ay onodan tako koma begew sin nangisalakanan Diyos en datako 1:13-2:3

Din kasasaad tako begew sin sinmag-enan tako en Cristo 2:4-10

Din panpaiturayan tako sin waday kalebbengana en datako 2:11-3:7

Din amagen tako koma mo mapalpaligatan tako 3:8-4:19

Pamagbaga sin papangolo ya odom ay mamati 5:1-11

Din kagdangan di solat 5:12-14

### *Din Panlogian Di Solat*

<sup>1</sup> Sak-en si Pedro ay apostol en Jesu Cristo. Naey di solat ko en dakayo ay ipogaw Diyos ay mangili isnan lobong ay man-ili ed Pontus, Galacia, Cappadocia, Asia ya ed Bitinia.

<sup>2</sup> Pinilin Diyos Ama dakayo ay maibasar sin sigod ay ninemnem na ay panbalinenas dakayo si nasantoan ay ipogaw na babaen sin Ispirito Santo. Ninemnem na di ta say patien yos Jesu Cristo ya malinisan kayo babaen sin dada na. Sapay koma ta masepsep ay lak-amen yo di seg-ang ya talna.

### *Din Namnama Tako Begew Sin Naisalakanan Tako*

<sup>3</sup> Dayawen takos Diyos ay din Diyos ya Aman Jesu Cristo ay Apo tako. Tan begew sin dakdake ay seg-ang na, indawat na en datako di baro ay biyag babaen sin kasin natagoan Jesu Cristo. Isonga wada di namnamaen tako ay dadlon matongpal,<sup>4</sup> et siya na di tawiden tako ay adi kadaddadael, adi kamanmasaan ya adi kakeskesayan di banol na, ay naidodolin ed langit. <sup>5</sup> Idodolin Diyos para en dakayo enggana ay tongpalena din insasagana na ay kaisalakanan yo, et salsalaknibanas dakayo si panakabalina begew din pammati yo enggana ay ipaila na din katongpalana sin maodi ay timpo.

### *Din Ragsak Tako Begew sin Naisalakanan Tako*

<sup>6</sup> Manragsak kayo begew am-in dana, olay mo masapol kayman ay nam-osen yo di nankikinalasi ay ligat si sinkaattikan. <sup>7</sup> Di gapo ay laklak-amen yo dana ay ligat et ta mapaneknekan di katet-ewan di pammati yo. Tan olay balitok ay adi komakaman si eng-enggana et masapol ay maipadas si apoy ta mapaneknekan mo tet-ewa ay balitok. Isonga masapol abe ay mapaneknekan di pammati yo, tan nabanbanol mo din balitok. Et mo maila di katet-ewan di pammati yo, apolbalan, dayawen ya bigbigen Diyos dakayo sin agew ay panpailaan Jesu Cristo. <sup>8</sup> Adi yo inil-ilas sisya, ngem laydelayden yo pay dedan. Olay ed wani, adi yo maila, ngem mamati kayo pay dedan en sisya. Isonga peteg ay maragragsakan kayo si ragsak ay magay kaikaliana ya magay kaiisoana, <sup>9</sup> tan enggay gon-gon-oden yo din kaiturongan di pammati yo ay siya din kaisalakanan yo.

### *Din Naipadtoan Di Naisalakanan Tako*

<sup>10</sup> Waday inpadpadton di mamadto ed idi ay maipanggep sin nay ay kaipailaan di segang Diyos ay siya din pangisalakanana en dakayo. Ngem adi da naawatan di inpadpadto da, mo adi et dadlon dan ninemnenemnem mo sinoy laydena ay kalien. <sup>11</sup> Tan olay mo si daida di nankalkalian di Ispiriton Cristo sin nangipadtoana sin nanligligatan Cristo ya din inmonod ay naipangatoana, inanaanap da pay dedan ta say ammoen da koma di timpo ay katongpalana ya din iyat na ay matongpal. <sup>12</sup> Et inpaammon Diyos en daida ay din inbagbaga da et adi mantongpal sin pansigdan da ed idi mo adi et din pansigdan yo ed wani. Tan din inbagbaga da ay sana et siya abe din inbagbagan di nangikaskasaba sin siked ay damag en dakayo babaen sin panakabalin di Ispirito Santo ay inbaan Diyos ay napod langit. Olay din aanghel et laydelayden da ay maawatan dana ay kosto.

### *Nasantoan Koma Di Kabibiyag Tako*

<sup>13</sup> Gapo sin nay ay nangisalakanan Diyos en dakayo, isagana yo ngarud di nemnem yo ay mangamag si laydena ya ten-en yo di am-in ay amagen yo. Dadlon yon ipasnek sin nemnem yo din siked ay namnamaen yo ay idawat Diyos en dakayo sin panpailaan Jesu Cristo. <sup>14</sup> Managtongpal kayo koma ay anan-ak Diyos. Adi yo on-onodan din lawa ay laylayden yo ed idi sin adi yo inammoan si Diyos, <sup>15</sup> mo adi et onodan yo komas kankanayon di dadlon nasantoan ay kabibiyag ay kaman din kinasanton Diyos ay nangayag en dakayo. <sup>16</sup> Tan waday inpaisolat Diyos ay kanana, “Masapol ay nasantoan kayo, tan sak-en et nasantoanak.”\*

### *Patgen Tako Koma Si Diyos*

<sup>17</sup> Nemnemen yo ay din Diyos ay bigbigen yo ay Ama sin pankarkararagan yo et sisya abe di mangokom. Et okomena di am-in ay ipogaw ay maibasar sin inam-amag di esa ya esa ay magay panlaslasinena. Isonga patgen yo ya egyatan yo komas sisya sin kawada yos nan daga. <sup>18</sup> Tan sinobot nas dakayo ta mapawayaan kayo sin magay silbi na ay kabibiyag ay tinawid yo sin aap-o yo. Et ammo yo ay din inisbot na en dakayo et baken palata ono balitok ay mamaga di banol na, <sup>19</sup> mo adi et din nabanol ay dadan Cristo ay maiarig si karnero ay maga polos di kolang na ay maidaton en Diyos. <sup>20</sup> Sin daan maparsuaan di lobong, pinilin Diyos sisya ay mangsobot sin kaipoipogaw, ngem adi naipaila para sin pansigdan yo enggana sin nay maod-odi ay agew. <sup>21</sup> Begew en sisya, taltalken yos Diyos ay nanago kasin ya nangipangato en sisya. Isonga si Diyos di kaimongsanan di pammati ya namnama yo.

### *Manlilinayad Tako Koma*

<sup>22</sup> Gapo ta enggay dinalosan yo di nemnem yo begew sin nanongpalan yo sin tet-ewa ay mait-itdo, nawada di naimposan ay layad yo sin aag-i yo ay mamati. Ipapasnek yo ngarud ay manlilinayad sin am-in ay nemnem yo. <sup>23</sup> Tan naianak kayo kasin, et din baro ay biyag yo et baken napo si ipogaw ay matey mo adi et napo en Diyos ay adi katkatey. Nanbalinenas dakayo si an-ak na babaen sin kali na ay mangidawdawat si biyag ya komakaman si eng-enggana. <sup>24</sup> Siya na abe di inpaisolat Diyos ay kanana, “Am-in ay ipogaw et kaman dan logam, ya din dayaw da et kaman din sabsabong na. Tan din logam et makpit, ya din sabsabong na et mag-as, <sup>25</sup> ngem din kalin di Apo et komakaman si eng-enggana.”†  
Din nay ay kalin di Apo et siya na di siked ay damag ay naikaskasaba en dakayo.

## 2

### *Bigawen Tako Koma Di Naispiritoan Ay Gatas*

\* 1:16 Levitico 11:44-45; 19:2. † 1:25 Isaias 40:6-8.



<sup>1</sup> Isonga gapo ta wada di baro ay biyag yo, dokogan yo di am-in ay lawa ya am-in ay etek ya sikap. Liklikan yo abe di am-in ay panggep ya amag ay baken naimposan ya am-in ay apal ya lawa ay kali maipanggep si gagait yo. <sup>2</sup> Maiarig kayos kaian-anak ay moyang, isonga tadonen yo koma di ogalin di moyang ay manlalayad ay mansossosos kanayon. Bigawen yo koma di naispiritoan ay gatas ay din tet-ewa ay kalin Diyos ta say domakdake kayo isnan pammati yo enggana ay matongpal di kaisalakanan yo. <sup>3</sup> Tan enggay pinadas yo din kinasiged ya seg-ang di Apo.\*

### *Maiarig Si Cristo Ya Din Mamati En Sisya Si Matmatago Ay Bato*

<sup>4</sup> Somag-en kayo ngarud sin poon di biyag ay si Cristo ay maiarig si matmatago ay bato ay mangipakneg sin beey. Din bato ay nay et sinigaan di kaipoipogaw, ngem sisya di pinilin Diyos, et nabanol ya madaydayaw sin pangila na. <sup>5</sup> Begew sin somagenan yo en sisya, maiarig kayo abe si matmatago ay batbato, tan maos-osal kayo ay maisassaad si naispiritoan ay timplo. Mansilsilbi kayo abe ay nasantoan ay papadin Diyos ay mangidatdaton en sisya si naispiritoan ay daton† ay kapkapnekana babaen en Jesu Cristo. <sup>6</sup> Ammo tako ay tet-ewa dana, tan waday inpaisolat Diyos ay kanana, “Ilaen yo, waday pinilik ay kababanolan ay bato ay insaad ko ed Zion ay mangipakneg sin beey. Olay sino ay mamati en sisya et adi polos mababainan.”‡

<sup>7</sup> Isonga mo si dakayo ay mamati et makilak-am kayo sin kinangaton Cristo. Ngem mo si daida ay adi mamati, nemnemen da koma din inpaisolat Diyos ay kanana, “Din bato ay sinigaan din man-isassaad si beey et say nanbalinen Diyos ay kabanolan ay bato ay mangipakneg sin beey.”§

<sup>8</sup> Nemnemen da koma abe din inpaisolat Diyos ay kanana, “Siya na din bato ay kaskasnitan ya kaisokbaan di ipogaw.”\*  
Maisokba da tan adi da patpatien din kalin Diyos, et siya na abe di planon Diyos para en daida.

### *Din Kasasaad Di Ipogaw Ay Pinilin Diyos*

<sup>9</sup> Ngem dakayo pay di “napili ay pamilyan Diyos” ya din “groupon di papadi ay mansilsilbi sin Ari tako.” Dakayo abe di “iturturayana ay naidataton en sisya,” tan dakayo din “ipogaw ay pinilin Diyos ay oka na.”† Sisya di nangayag en dakayo ta komaan kayo sin mabolinget ta say masilawan kayo sin nakaskasdaaw ay pat-a na. Et pinili nas dakayo ta say ipaammo yo din sigesiged ay inam-amag na. <sup>10</sup> Ed idi, baken ipogaw Diyos si dakayo, ngem ed wani, ipogaw nas dakayo. Ed idi, adi kayo aben nakilaklak-am sin seg-ang na, ngem ed wani, laklak-amen yo.‡

### *Din Panpaiturayan Tako Sin Waday Kalebbengana En Datako (Roma 13:1-7; Tito 3:1)*

<sup>11</sup> Gagayyem ko, gapo ta mangili kayo isnan daga ya sinkaattikan anggoy di pan-iyanan yos na, pangaasi yo ta dokogan yo din lawa ay laylayden di naipogawan ay nemnem yo ay mangobgobat en dakayo. <sup>12</sup> Kanayon koma ay on-onodan yo di siged ay kabibiyag sin pangilaan di kailian yo ay adi mamati. Tan mo say iyat yo di, olay mo pabasbasolen das dakayo ed wani ay mangwani en man-am-amag kayos lawa, ilaen da pay dedan din siged ay am-amagen yo, et dayawen das Diyos sin agew ay omaliana.

<sup>13</sup> Begew en Apo tako, manpaituray kayo sin am-in ay ipogaw ay waday kalebbengana en datako. Manpaituray kayo sin Emperador ay din kangatoan ay manturay <sup>14</sup> ya siya abe sin gogobernador ay ibabbaa na ta en da dosaen di mangamag si lawa ya dayawen

\* **2:3** Salmo 34:8. † **2:5** Mo maipanggep si idaton tako en Diyos, ilaen abe sin Roma 12:1 ya Hebreo 13:15. ‡ **2:6** Isaias 28:16; Roma 9:33. § **2:7** Salmo 118:22; Lucas 20:17. \* **2:8** Isaias 8:14; Roma 9:33. † **2:9** Din nay opat ay titulo et naibaga sin Daan ay Tolag (Exodo 19:5-6; Deuteronomio 7:6) maipanggep sin Judio ono polin Israel ay ipogaw Diyos. Din layden Pedro ay kalien et din mamati en Cristo di maibilang ed wani ay tet-ewa ay Judio sin pangilan Diyos. ‡ **2:10** Hosea 2:23.

di mangamag si siked. <sup>15</sup> Tan layden Diyos ay maipasaldeng din taytayoktok di baken nanemneman ay ipogaw begew sin am-amagen yo ay siked. <sup>16</sup> Ipaila yo begew sin kabibiyag yo ay nawaya kayo ay ipogaw, ngem adi yo os-osalen din wayawaya yo ay pambal yo ay mangamag si lawa, mo adi et osalen yo ay mansilbi en Diyos. <sup>17</sup> Patgen yo koma ay kosto din am-in ay ipogaw, laydelayden yo din aag-i yo ay mamati, egyatan yo si Diyos, ya patgen yo din emperador.

*Pamagbaga Sin Mababbaa*

*(Efeso 6:5-9; Col. 3:22-25; Tito 2:9,10)*

<sup>18</sup> Mo si dakayo ay mababbaa, manpaituray kayo sin among yo ya dadlon yon rispitoen daida. Say amagen yo na koma sin siked ya naanos ay among yo ya olay abe sin among ay makedse. <sup>19</sup> Tan mo anosam di mapalpaligatam ay magay gapo na begew sin pangnenemneman en Diyos, malaylaydan si Diyos sidi. <sup>20</sup> Tan mo despegen daka begew sin nangamagam si lawa yan anosam din dosam ay sana, adi ka dedan maikari ay madayaw. Ngem mo paligaten daka begew sin nangamagam si siked yan anosam, siya di din panlaydan Diyos. <sup>21</sup> Tan inayagan Diyos dakayo ta say onodan yo di kaman nisa ay kabibiyag. Tan nanligligat si Cristo para en dakayo, et inpaila na din kabibiyag ay tadonen yo koma. <sup>22</sup> Adi polos nanbasbasol, ya maga polos di etek na. <sup>23</sup> Idi nilaslasoy das sisya, magay lawa si insongsongbat na. Idi pinalpaligat da, adi na aben ineg-egyatan daida si dosa, mo adi et intalek na am-in en Diyos ay mangokom si kosto. <sup>24</sup> Si Cristo ay mismo di nangikaro sin basbasol tako sin nateyana sin krus ta say isaldeng tako ay manbasol ya onodan tako di nalinteg ay kabibiyag. Begew sin sogsogat na, nailatonan tako. <sup>25</sup> Tan ed idi, nasangaw kayo ay kaman kakarnero ay lomikeliked, ngem nay ay nantaoli kayo sin mangay-ayowan ya mamananbantay en dakayo. §

### 3

*Pamagbaga Si Sin-as-awa*

*(Efeso 5:22-23; Col. 3:18-19)*

<sup>1</sup> Dakayo pay ay babbabai ay naasawaan, manpaituray kayo abe sin as-awa yo ta say mo wada en daida di adi mamati sin kalin Diyos, maawis da ay mamati begew sin siked ay ogali yo. Olay mo maga di ibaga yo, mamati da pay dedan, <sup>2</sup> tan ilaen da din nalinis ay kabibiyag yo ya din pamatpatgan yo en Diyos. <sup>3</sup> Din kinapintas yo et adi koma maibasar sin al-alti ay os-osalen di babbabai ay kaman din pangaltian da sin book da, din pangiamagan da sin nangina ay gading ya keke, ya din pangibadoan das nangina, <sup>4</sup> mo adi et maibasar koma sin wadas nemnem yo. Tan din kinapintas ay adi kakaan ay nabanobanol sin pangiilaan Diyos et din kinapintas di naanos ya natalna ay ipogaw. <sup>5</sup> Siya dadi din ogali ay inon-onodan di nasantoan ay babbabai ed idi ay nantalek en Diyos. Pinapintas dan awak da sin nanpaiturayan da sin as-awa da. <sup>6</sup> Kaman nidi di ogalin Sara ed nabaon ay pinatpati nas Abraham ya binigbig nas sisya ay among na. Maibilang kayo ay an-ak na mo kosto di am-amagen yo ya adi kayo emeg-egyatan.

<sup>7</sup> Dakayo abe ay lallalaki et masapol ay patpatgen ya ay-ayowan yo ay kosto din as-awa yo, tan nakapkapoy da mo si dakayo. Patgen yo abes daida, tan makitawid da en dakayo sin biyag ay iwed patingga na ay idawdawat Diyos. Onodan yo dana ta say maga di manopap sin karkararang yo.

*Din Amagen Tako Koma Mo Mapalpaligatan Tako*

<sup>8</sup> Naey di kasinopan di inbagbagak. Pan-es-esaen yo am-in di nemnem yo ya makiliklikna kayo sin iib-a yo. Manlilinayad kayo ay kaman siag-i, man-asiseg-ang kayo ya ibaba yo di awak yo. <sup>9</sup> Mo waday mangamag si lawa en dakayo, adi yo ibabbaes. Mo wada abey mankalis lawa, adi yo songsongbatan si lawa, mo adi et mankedaw kayo en

Diyos ta bindisyonanas daida. Tan inayagan Diyos dakayo ta say bindisyonana abe si dakayo. <sup>10</sup> Tan waday inpaisolat Diyos ay kanana,

“Mo layden di ipogaw ay ganasen di biyag na ya maragsakan, masapol ay adi mankalis lawa ya adi man-et-etek. <sup>11</sup> Masapol ay dokogana di lawa ta din siged di amagena, ya masapol abe ay ipakat na di kabaelana ay makiolnos si gagait na. <sup>12</sup> Tan kankanayon ay il-ilaen din Apo di nalinteg ay ipogaw ya dengdenggena din karkararag na, ngem dadlonan konkontraen di ipogaw ay mangam-amag si lawa.”\*

<sup>13</sup> Mo silalayad kayo ngarud ay mangamag si siged, ay wada aya di mangamag si lawa en dakayo? <sup>14</sup> Ngem olay mo mapaligatan kayo begew sin pangam-amagan yos kosto, nagasat kayo pay dedan. Isonga adi kayo emeg-egyat sin mamalpaligat en dakayo ya adi kayo madandanagan, <sup>15</sup> mo adi et dadlon yon patgen ya bigbigen si Cristo ay say nasantoan ay Apo.† Kanayon ay mansasagana kayo ta mo waday manpoot en dakayo maipanggep sin kaibasaran di namnama yo ay Cristiano, mabalin ay songbatan yo. Ngem ilaen yo ta nainayad di iyat yo ay manongbat ay mangipailas kosto ay rispito. <sup>16</sup> Kanayon koma ay nalinis di nemnem yo ta say mo waday mangipalawlaw en dakayo begew sin siged ay ogali yo ay Cristiano, mabainan da sin lawa ay kali da. <sup>17</sup> Tan mo layden Diyos ay mapaligatan kayo, agpos et mo din ligat yo et manbegew sin pangam-amagan yos siged mo din pangam-amagan yos lawa. <sup>18</sup> Tan si Cristo abe et nanligat ya natey begew sin basbasol tako. Namingsan anggoy di nateyana, adi masapol ay maipidwa. Sisyay ay nalinteg et natey para en datako ay managbasol ta say isag-enas datako en Diyos. Pinse da din awak na, ngem din ab-abiik na et natatago. <sup>19</sup> Inmey din ab-abiik na sin kad-an di naibabalod ay ab-abiik di natenatey‡ et waday inbaga na en daida. <sup>20</sup> Dana ay naibabalod et daida din adi namati en Diyos sin timpon Noe ed nabaon. Sin timpo ay doy ay nangam-amagan Noe sin daong, inan-anosan Diyos ay naneseed sin mamatian koman di ipogaw en sisya, ngem at-atik di adi nalned sin nalbengan di daga, tan wao da anggoy di sinenggep sin daong et naisalakan da sin danom. <sup>21</sup> Din danom ay doy et siya di din kaiarigan di bonyag. Tan begew sin nanpabonyagan yo, isalakan Diyos dakayo babaen sin kasin natagoan Jesu Cristo. Et din olog di nanpabonyagan yo et baken din naamsan di awak yo ta makaan di logit mo adi et din nankararagan yo en Diyos ta linisana di nemnem yo.§ <sup>22</sup> Enggay nantaolis Cristo ed langit, et wada sin makannawan Diyos ay mangiturturay sin am-in ay aanghel ya odom ay adi kaila ay parsua ay waday saad na ono panakabalina.

## 4

### *Din Nabaliwan Ay Kabibiyag Tako*

<sup>1</sup> Gapo ta nanligligat ya natey si Cristo isnan daga, saganaen yon nemnem yo ay matey abe maipanggep si basol. Tan din ipogaw ay natey maipanggep si basol et enggay sigaana ay manbasol.\* <sup>2</sup> Saganaen yo ngarud di nemnem yo ta say manlogi ed wani enggana sin kateyan yo, adi yo on-onodan din lawa ay laylayden di ipogaw mo adi et din laylayden Diyos. <sup>3</sup> Tan enggay palalo di sinayang yo ay timpo ed idi ay nangam-amag sin laylayden di magay Diyos na ay am-amagen. Tan ed idi, inam-amag yo di ololay ay kadodogis ya kababain ay laylayden di awak yo. Nanbetbeteng kayo, naitaptapi kayo sin nalabes ay ragragsak, ya magay bain yo sin nanaydayawan yo si sinan didiyos.

\* **3:12** Salmo 34:12-16. † **3:15** Isaias 8:12-13. ‡ **3:19** Kanan di odom en din naibabalod ay nay et din ab-abiik di natenatey sin timpon Noe. Kanan aben di odom en daida di lawa ay aanghel (ilaen sin Genesis 6:1-4, 2 Pedro 2:4, ya Jude 6). § **3:21** Di esa abe ay kaiologan nina sin Griego et: ...mo adi et din inkari yo en Diyos begew sin nalinis ay nemnem yo. \* **4:1** Di esa abe ay kaiologan nina sin Griego et: Gapo ta napalpaligatan si Cristo isnan daga, saganaen yon nemnem yo ay makilak-am abe si ligat. Tan din ipogaw ay napalpaligatan et enggay sigaana ay manbasol. Ilaen abe sin Roma 6:1-11; Colosas 2:12; 3:3.

<sup>4</sup> Isonga ed wani, nasdaaw di adi mamati et palawlawen das dakayo, tan adi kayo maitaptapi sin nalabes ay lawlawa ay am-amagen da. <sup>5</sup> Ngem masapol ay sangoen das Cristo ta say ibaga da en sisya di inam-amag da, tan nakasaganas sisya ay mangokom sin am-in ay ipogaw ay matmatago ya siya abe din natenatey. <sup>6</sup> Siya na din gapo ay naikasaba abe din siged ay damag en daida ay natey. Tan olay mo nilak-am da din dosan di am-in ay ipogaw et natey da, sigod ay naikasaba en daida din siged ay damag ta say matagotago din ab-abiik da ay kaman si Diyos.

#### *Pamagbaga Begew Sin Dandani Ay Panpatinggaan Di Am-in*

<sup>7</sup> Dandani di panpatinggaan di am-in, isonga nanemneman kayo koma ya ten-en yo di am-amagen yo ta say siged di pankarkararan yo. <sup>8</sup> Din kapatgan ay amagen yo koma et ipapasnek yo ay manlilinayad, tan mo manlilinayad kayo, adi yo nemnen-emnemen din basbasol di gagait yo<sup>†</sup> mo adi et man-inanos ya manpinakawan kayo. <sup>9</sup> Mansinangaili kayo ay adi manmaymayotmot. <sup>10</sup> Mo pay din kabaelan ay intalek Diyos sin esa ya esa ay namati, osalen yo ay manbibinadang ay kaman kayon matalek ay baa ay makaammo ay man-ibingay sin nankinalasi ay bindisyon Diyos. <sup>11</sup> Din mangasaba et nemnemen koma ay din kalin Diyos di ikaskasaba na. Din mansilbi si gagait na et man-gaget koma ay mansilbi ay mamigbig ay si Diyos di mangidawdawat si bikas na. Sin am-in ay am-amagen yo, ilaen yo ta madayaw si Diyos begew en Jesu Cristo. Sisya di madaydayaw ya manakabalin ay manturturay si eng-enggana. Amen.

#### *Din Pannemnem Di Mamati En Cristo Mo Mapaligatan*

<sup>12</sup> Gagayyem ko, adi kayo masmasdaaw sin palalo ay mapalpaligatan yo ay mangmangwani en natnatken di mapasasamak en dakayo. Tan dinmateng din ligat ay sana ta say mapaneknekan di pammati yo. <sup>13</sup> Isonga manragsak kayo koma mo mapalpaligatan kayo ay kaman din ligat Cristo ta say peteg di ragsak yo sin agew ay kaipailaan di mankoniniing ay kinadiyos na. <sup>14</sup> Nagasat kayo abe mo malaslasoy kayo begew sin pammati yo en Cristo, tan say pangammoan yo ay mantetee din manakabalin ay Ispiriton Diyos en dakayo. <sup>15</sup> Ngem sapay koma ta mo mapaligatan kayo, baken koma manbegew sin nangamagan yos lawa ay kaman di manpeses biyag, mangakew, makalabsing si linteg ono makibibiyang si am-amagen di iib-a na. <sup>16</sup> Ngem mo mapaligatan kayo begew sin pammati yo en Cristo, adi kayo manbabbain mo adi et dayawen yos Diyos, tan maibilang kayo ay ipogaw Cristo.

<sup>17</sup> Tan enggay iloglogin Diyos ay mangokom sin am-in ay ipogaw, et pangon-onaenas datako ay naitatapi sin pamilya na. Mo din ligligat tako ay nay di panlogiana, adi pay kaeegyat di mapasamak en daida ay manigaan ay mamati sin siged ay damag ay napo en Diyos. <sup>18</sup> Siya abe din inpaisolat Diyos ay kanana, “Mo naligat di kaisalakanan di nalinteg ay ipogaw, ay siya mo maisalakan di ipogaw ay magay nemnem nas Diyos ya din managbasol?”<sup>‡</sup>

<sup>19</sup> Isonga mo mapaligatan kayo ay maibasar sin layden Diyos, ipapasnek yo ay mangamamag si siged ya italek yo di awak yo en Diyos. Tan sisya di namarsua en dakayo et matalek ay manongpal sin inkari na.

## 5

#### *Pamagbaga Sin Papangolo Ya Odom Ay Mamati*

<sup>1</sup> Wada di laydek ay ibaga en dakayo ay papangolon di mamati, tan sak-en abe et esaak ay pangolo. Esaak abe ay nangila sin nanligatan Cristo ya makilak-amak sin kinangato na ay maipaila sin tapin di agew. <sup>2</sup> Siya dana di itogon ko en dakayo. Esten yo ay mangay-ayowan sin mamati sin kad-an yo, tan kaman dan karneron Diyos ay intalek na en dakayo. Manragsak kayo koma ay mangay-ayowan en daida ay adi kayo mapilpilit,

<sup>†</sup> 4:8 Proverbio 10:12. <sup>‡</sup> 4:18 Proverbio 11:31.

tan say layden Diyos. Adi yo aben am-amagen di obla yo begew sin pangamgaman yos owat pilak, mo adi et begew sin layad yo ay mansilbi en Diyos ya din gagait yo. <sup>3</sup> Adi yo aben ipilit di layden yo sin ipogaw ay naitalek en dakayo, mo adi et siged koma di ogali yo ta say waday kosto ay tadonen da. <sup>4</sup> Et mo manpailas Jesu Cristo ay din kangatoan ay pangolon di mamati, idawtanas dakayo si gon-gona ay komakaman si eng-enggana ay siya din makilak-aman yo sin kinangato na.

<sup>5</sup> Dakayo abe ay iiyogtan, masapol ay manpaituray kayo sin papangoan yo. Am-in kayo ay mamati et masapol ay ibaba yo din awak yo sin gagait yo ta man-asisilbi kayo. Tan wada di inpaisolat Diyos ay kanana, “Konkontraen Diyos din mangingato si nemnem na, ngem segseg-angana din mangibaba si nemnem na.”\*

<sup>6</sup> Ibaba yo ngarud di awak yo en Diyos ay manakabalin ta say ipangato nas dakayo sin agew ay pinili na. <sup>7</sup> Isoko yo abe en Diyos din am-in ay dandanag yo, tan isaksakit ya ay-ayowananas dakayo.

<sup>8</sup> Ten-en yo di am-amagen yo ya siliban yo. Tan din kaibaw tako ay din Diablo et marig si manngangaed ay layon ay lomikeliked ay mangan-anap si kanena. <sup>9</sup> Kontraen yos sisya babaen sin napasnek ay pammati yo, tan ammo yo ay din mapalpaligatan yo et kaman aben din ligat ay laklak-amen di aag-i yo ay mamati sin kailili isnan daga. <sup>10</sup> Adi mabayag nan mapalpaligatan yo yan panbalinen Diyos dakayo si ipogaw ay magay pankolkolangana. Papigsaenas dakayo ta napasnek di pammati yo ay adi kaikiwkiweg. Tan sisya din manageg-ang ay Diyos ay nangayag en dakayo ay makilak-aman sin kinangato na ay iwed patingga na begew sin nakies-esaan yo en Cristo. <sup>11</sup> Sisya di manakabalin ay manturturay si eng-enggana. Amen.

### *Din Kakdengan Di Solat*

<sup>12</sup> Din namadang en sak-en ay nangisolat sin aptik ay solat ay nay et si Silas ay ibilang ko ay matalek ay agi tako. Insolat ko na ta papigsaek di pammati yo ya ipaneknek ko en dakayo ay din linaklak-am yo et din tet-ewa ay seg-ang Diyos. Ipapasnek yo sin nemnem yo din seg-ang na ay sana ta adi yo linglinglingan ono dokdokogan.

<sup>13</sup> Din iib-a yo ay mamati ay wada ed Babilonia ay pinilin aben Diyos et pakomostaan das dakayo. Siya abe en Marcos ay ibilang ko ay anak ko. <sup>14</sup> Manpinakomosta kayo ay mangipaila ay manlilinayad kayo. Sapay koma ta natalna di nemnem yo am-in ay nakies-esa en Cristo.

---

\* 5:5 Proverbio 3:34.



## Din Maikadwa Ay Solat San Pedro Maipanggep Sin Solat Ay Nay

Din solat ay nay et insolat San Pedro sin mamati en Jesu Cristo, siguro din wada sin kailili ed Asia Minor (1 Pedro 1:1; 2 Pedro 3:1). Din panggep na ay nangisolat et ta kontraena din oblan di nangit-itdos baken tet-ewa ya din kadodogis ay ogali ay nantongpalan di init-itdo da. Isonga binagaanas daida ta adi da masangsangaw si baken kosto ay mait-itdo mo adi et masepsep ay lak-amen da din seg-ang Apo Jesu Cristo ya taptapian da din pangam-ammoan da en sisya (3:17-18).

Di esa ay init-itdo da et adi kano mantaolis Cristo, tan enggay nabayag yan daan di pantaoliana. Sinongbatan Pedro si daida ay nangwani en dadlon mantaolis Cristo. Din gapo ay nabayag yan daan di pantaoliana et naanos si Diyos sin managbasol ay ipogaw. Laydena ay waday waya da ay mangibabawi sin basbasol da ta adi da madosa mo adi et maisalakan da.

Nabanol din solat ay nay en datako, tan papigsaena din namnama tako ay mantaolis Cristo. Paneknekana abe ay din Biblia et baken napo sin nemnem di ipogaw mo adi et napo en Diyos, tan din mamadto ya odom ay nangipaisolatan Diyos sin kali na et inturturong di Ispirito Santo din inbagbaga da (1:20-21; 3:15-16).

### **Din Linaona**

Din panlogian di solat 1:1-2

Din siged ay ogali ay itapi tako sin pammati tako ay mangipaneknek sin nangayagan

Diyos en datako 1:3-11

Din kaibasaran di tet-ewa ay pammati tako 1:12-21

Din mangit-itdos baken tet-ewa 2:1-22

Din kasin omalian Jesu Cristo 3:1-18

### *Din Panlogian Di Solat*

<sup>1</sup> Sak-en si Simon Pedro ay mansilbilbi en Jesu Cristo. Esaak abe ay apostol na. Naey di solat ko en dakayo ay naidawtan si pammati ay magay kaitkenana sin pammati mi, begew sin kinalinteg Jesu Cristo ay Diyos tako ya mangisalakan en datako. <sup>2</sup> Sapay koma ta masepsep ay lak-amen yo di seg-ang ya talna begew sin pangammoan yo ay mismo en Diyos ya en Jesus ay Apo tako.

### *Din Siged Ay Ogali Ay Itapi Tako Sin Pammati Tako Ay Mangipaneknek Sin Nangayagan Diyos En Datako*

<sup>3</sup> Babaen sin panakabalina ay siya abe din panakabalin Diyos, indawat na en datako din am-in ay kasapolan tako ay mangonod si nadiyosan ay kabibiyag. Mabalin ay say onodan tako di, begew sin nangammoan tako en sisya ay nangayag en datako babaen sin mismo ay kinangato ya kinasiged na. <sup>4</sup> Begew sin nay ay kinangato ya kinasiged na, waday indawat na en datako ay nangilisi sin kadadaelan di awak ya nemnem ay nantongpalan di lawa ay laylayden di ipogaw isnan lobong. Din indawat na en datako et din nankababanol ya nankapapateg ay inkari na ta say babaen en dana, makilak-am tako sin kinadiyos na. <sup>5</sup> Isonga ipakat yo din kabaelan yo ta tapian yo din pammati yo si siged ay ogali. Din itapi yo abe sin siged ay ogali yo et din pangammoan yo sin kosto ay amagen yo. <sup>6</sup> Din itapi yo abes di et din pangitpean yo sin awak yo, ya din itapi yos di et anos. Din anos yo et tapian yo koma abe si nadiyosan ay ogali, <sup>7</sup> ya din nadiyosan ay ogali yo et tapian yo abe si layad sin aag-i yo ay mamati. Maodi, tapian yo din layad yo

\* **1:3** Di esa abe ay kaiologan nina sin Griego et: ...sisya ay nangayag en datako ta makilak-am tako sin kinangato ya kinasiged na.

ay sana si layad para sin am-in ay ipogaw. <sup>8</sup> Tan mo maad-ado en dakayo dana ay siked ay ogali, mantongpal sin kosto ay pangammoan yo en Jesu Cristo ay Apo tako.† <sup>9</sup> Ngem mo waday ipogaw ay adi mangon-onod en dana ay ogali, kaman nagodab ono ipogaw ay asag-en di pangila na. Tan enggay nilinglingana ay naowasan din sigod ay basbasol na.

<sup>10</sup> Isonga aag-i, dadlon yon ipakat din kabaelan yo ay mangon-onod si siked ay kabibiyag ta say mapaneknekan din namilian ya nangayagan Diyos en dakayo. Tan mo say amagen yo di, adi kayo polos maisokba, <sup>11</sup> mo adi et maragsakan si Diyos ay mangipasgep en dakayo sin komakaman ay panturturayan Jesu Cristo ay Apo tako ya mangisalakan en datako.

### *Din Kaibasaran Di Tet-ewa Ay Pammati Tako*

<sup>12</sup> Isonga olay mo enggay ammo yo dana ya ipapasnek yo ay mangon-onod sin tet-ewa ay nait-itdo en dakayo, kanayon pay dedan ay ipanemnem ko dana en dakayo babaen sin solat ay nay. <sup>13</sup> Din pannemnem ko et lebbeng ko ay mangamag sidi ed wani ay matmatagoak pay laeng. <sup>14</sup> Tan ammok ay dandani di panaynanak sin awak ko ay nay ay maibasar met laeng sin inpaammon Apo Jesu Cristo en sak-en. <sup>15</sup> Ipakat ko ngarud din kabaalak ta say olay mo komaanak isnan daga, wada pay di komakaman ay pangnenemneman yo en dana ay inbagak.

<sup>16</sup> Tan din inpaammo mi en dakayo maipanggep sin panakabalin Jesu Cristo ay Apo tako ya din kasinan omalian et adi naibasar sin baken tet-ewa ay daddad-at di nalaing ya nasikap ay ipogaw. Tan dakami ay mismo di nangila sin kinangato na ya kinadiyos na. <sup>17-18</sup> Tan dakami di gagait na sin nasantoan ay dontog sin nangidayawan Diyos Ama en sisya ya nangipailaana sin mankoniniing ay kinadiyos na. Dakami ay mismo di nanngesin kalin di manakabalin ay Diyos ay napod langit ay kanana, “Si naey di laydelaydek ay anak ko. Sisya di kakapnekak.”‡

<sup>19</sup> Isonga napaneknekan en dakami ay dadlon tet-ewa din inbagbagan di mamadto ay naisolat ed nabaon. Et kosto mo patien yo din inbagbaga da, tan kaman silaw ay manilsilaw sin mabolinget ay lugar. Iapasnek yo ay patpatien enggana ay bomala din batakagan ya pomat-a, laydena ay kalien, enggana sin agew ay kasin omalian Cristo ay manilaw ay kosto sin nemnem yo. <sup>20</sup> Nemnemen yo na, tan dadlon napateg: maga di naipadto ay inpaisolat Diyos ay inbagan di mamadto si bokbokod na. § <sup>21</sup> Tan maga di naipadto ay napo sin nemnem di ipogaw, mo adi et din Ispirito Santo di nangiturturong en daida sin nangibagaan das kali ay napo en Diyos.

## 2

### *Din Mangit-itdos Baken Tet-ewa (Jude 1:4-16)*

<sup>1</sup> Ngem wada abe di baken tet-ewa ay mamadto ay nanpaila sin kaipoipogaw ed idi. Et siya abe ay mawada di nasikap ay mangitdos baken tet-ewa ay maitatapi en dakayo. Man-itdo das etek ay makadadael si pammati, ya olay din Apo tako ay nangsobot en daida et dokogan da. Gon-gona da ngarud din bigla ay kadosaan da. <sup>2</sup> Ngem ad-ado pay dedan di mangonod sin kadodogis ay kabibiyag da, et begew en daida, mapalawlaw din tet-ewa ay mait-itdo ay on-onodan tako. <sup>3</sup> Begew sin pangamgamaman das pilak, sikapan dana ay mangit-itdos baken tet-ewa si dakayo ay mangidaddad-at si mapo si nemnem da et anggoy, et osalen das dakayo ay pan-ganansiyaan da. Ngem adi yo

† **1:8** Di esa abe ay kaiologan nina sin Griego et: ...waday kosto ay pantongpalaan din pangammoan yo en Jesu Cristo ay Apo tako. ‡ **1:17-18** Din dad-at ay maipanggep sin naamagan nina et wada sin Mateo 17:1-9, Marcos 9:2-10 ya Lucas 9:28-36. § **1:20** Di esa abe ay kaiologan nina sin Griego et: ...maga di naipadto ay inpaisolat Diyos ay mabalin ay iolog di ipogaw si bokbokod na.

kankanan en naseseyep di mangokom en daida, tan enggay kineddenganas daida ed nabaon et naisasagana din dosa da.

<sup>4</sup> Ammo tako ay madosa da, tan olay din aanghel ay nanbasol ed nabaon et dadlon dinosan Diyos si daida, tan initpig nas daida sin mabolinget ay lugar ed dallem,\* et in-balod nas di ta say panedsed-an da sin agew ay pangokomana en daida. <sup>5</sup> Dinosan aben Diyos din kaipoipogaw ay magay nemnem da en sisya ay matmatago sin timpon Noe ed nabaon, tan nilbeng na din daga et nalned da. Ngem mo si Noe ay nangikaskasaba ay onodan da koma di nalinteg ay kabibiyag et insalakan Diyos sisya ya pito pay ay ipogaw. <sup>6</sup> Nemnemen yo abe din nanosaan Diyos sin man-ili ed Sodoma ya Gomorra. Tan pinooan Diyos daida ya din il-ili da enggana ay dinmap-o da ta say maidadaan sin am-in ay magay nemnem nas Diyos. <sup>7-8</sup> Ngem insalakanas Lot ay nakiili en daida,† tan inag-agew ay nadadagsenan ya nasaksakitan di nemnem din doy ay nalinteg ay ipogaw begew sin kadodogis ya lawlawa ay inam-amag di makedse ay kakailiana ay inil-ila ya dindinne na. <sup>9</sup> Am-in dadi ay napasamak ed nabaon et pangammoan tako ay ammon Diyos ay mangisalakan si nadiyosan ay ipogaw ay mapalpaligatan. Et ammo na abe ay mangibalod si lawa ay ipogaw ta say madosa da sin agew ay pangokomana en daida. <sup>10</sup> Namnamed ay madosa din mangon-onod sin kadodogis ay laylayden di awak da ya manglaslasoy sin kalebbengan di nangatngato mo daida.

Da dooy ay mangit-itdos baken tet-ewa et magay rispito da ya ipipilit dan layden da. Adi da aben emegyat ay mangipalawlawwa si manakabalin ay adi kaila ay parsua. <sup>11</sup> Olay din aanghel ay nangatngato di panakabalin da mo daida et adi da palawlawwaen din nakabasol ay gagait da sin sangoanan di Apo. <sup>12</sup> Ngem dana ay ipogaw et palawlawwaen da din adi da maawatan. Kaman dan atap ay animal ay adi nanemneman. Din panturongan di biyag dana ay animal et makna ya mapse da. Et siya abe en daida, tan madosa da ay eng-enggana. <sup>13</sup> Nam-osen da din ligat ay gon-gonan di lawa ay inam-amag da. Din gan-ganasen da et din panongtongpalan da sin lawa ay laylayden di awak da, olay mo kaagawan pay laeng. Maiarig das mansa ay mangipalawlawwa si nalinis ay bado, tan maitaptapi da en dakayo mo mangan ya mankumulgar kayo, ngem dowan da et itoltoloy ay man-gan-ganas sin nalabes ay panragragsakan da. <sup>14</sup> Ak-aklongan da di olay sino ay babai ay il-ilaen da, et olay mamin piga ay manbasbasol da, adi da met laeng kapkapnek. Nalaing da abe ay mangawis si ipogaw ay baken napasnek di pammati na ta masolisog da ay manbasol. Enggay naingsa da ay man-gamgam si baken dan oka. Awni man et dosaen Diyos daida! <sup>15</sup> Tinaynan da din nalinteg ay danan et nasangaw da, tan tadtadonen da din ogalin Balaam ay anak Bosor‡ ay nang-aw ay mangamag si lawa begew sin layad na ay malagboan. <sup>16</sup> Ngem din dangki ay nangakabayoana ay adi koma makakalis kalin di ipogaw et niyamyamanas sisya ta adi na itoloy din plano na ay kaman planon di naboge ay ipogaw.

<sup>17</sup> Da naey ay mangit-itdos baken tet-ewa et waday kabolingetan ay lugar ay insaganaan Diyos ay pantean das eng-enggana. Tan maiarig das obbog ay natdok ono liboo ay itaytayaw di mapges ay dagem. <sup>18</sup> Ad-ado abe di ibagbaga da ay mayat di kadngeana, ngem magay dagsena. It-itdo da ay baken lawa ay onodan din laylayden di awak, et say pangawis da ay manbasol din kapatpati na ay ipogaw ay kataytaynana sin lawa ay gagait ya ogali na. <sup>19</sup> Ikarkari da ay mawayaan di ipogaw mo on-onodana din it-itdo da, ngem din katet-ewa na et daida ay mismo di naibabag-en sin basbasol ay mangipakadodogis ya manadael en daida. Tan di ipogaw et manbalin si bag-en di olay sino ay mangabak en sisya. <sup>20</sup> Mo enggay nanlisi di ipogaw sin kadodogis ay kabibiyag

\* **2:4** Din kanana sin Griego et: Tartarus. Mo maibasar sin ogalin di Griego, ed Tartarus di mabolinget ay lugar ay kaibalodan di nakabasol ay didiyos da ay wada ed dallem mo ed Hades. † **2:7-8** 6-7 - Genesis 19:1-16,24. ‡ **2:15** Din naisolat sin odom ay manuskrito sin Griego et: ... anak Beor. Si Beor di kosto ay ngadan ama na. Ilaen sin Bilbilang 22-24.

di kaipoipogaw isnan lobong begew sin nangammoana en Jesu Cristo ay Apo tako ay mangisalakan en datako, ngem mantaoli ay maibag-en kasin ya maabak sin sigod ay basbasol na, lawlawa din maodi ay kasasaad na mo din sigod. <sup>21</sup> Agpos mo adi na koman inammoan din danan ay maiturong sin mapalintegan di ipogaw mo din nangammoana, asi na pay pandokogan din nasantoan ay bilbilin ay naitdo en sisya. <sup>22</sup> Din naamag en sisya et paneknekana din katet-ewan di dow a ay proverbio ay kanana, “Kanen kasin di aso din in-ota na”<sup>§</sup> ya “Olay mo amsem di kaong, en kasin mantabbak.”

### 3

#### *Din Kasin Omalian Jesu Cristo*

<sup>1</sup> Gagayyem ko, siya na din maikadwa ay solat ko en dakayo. Sin dow a ay solat ay nay, waday inpanemnem ko en dakayo ta say nalinis ya naimposan di nemnem yo. <sup>2</sup> Laydek ay nemnemen yo din inbagbagan di nasantoan ay mamadto ed nabaon ya din bilbilin di Apo tako ya mangisalakan en datako ay inpaammo na en dakayo babaen sin aapostol ay nangit-itdo en dakayo. <sup>3</sup> Nemnemen yo na tan dadlon nabanol: mo domateng di maod-odi ay agew, wada di manlaslasoy ay mangon-onod sin laylayden da ay lawa. Siyekan das dakayo <sup>4</sup> ay mangwani, “Inkarin Jesus ay mantaoli, ay baken siya? Intoy kad-ana ngarud? Enggay natey din aap-o tako yan daan pay laeng omali. Nanlogi sin naparsuaan di lobong enggana ed wani, iso met laeng ay magay nanbalbaliw.” <sup>5</sup> Siya di din kankanan di manlaslasoy, ngem igagara da ay linglingan din inyat Diyos ed nabaon. Tan ed nabaon, pinarsuan Diyos din daga ya din wada ed daya babaen sin bilina. Danom di inosal na ay nangamag sin daga et nabonsian din daga ay napo sin danom. <sup>6</sup> Babaen abe sin bilina, linbeng na din sigod ay daga si danom, et nalned di kaipoipogaw ya nadadael din daga. <sup>7</sup> Babaen met laeng sin bilina, banbantayana din daga ay wada ed wani ya din wada ed kayang enggana sin agew ay tinodingana ay pooana, siya abe na din agew ay pangokomana sin kaipoipogaw ay magay nemnem da en sisya ta madosa da ay eng-enggana.

<sup>8</sup> Ngem adi yo linglinglingan na ay gagayyem ko. Sin pannemnem Diyos, din kabayag di es-esa ay agew et kaman sinlibo ay tawen, ya din kabayag di sinlibo ay tawen et kaman aben es-esa ay agew.\* <sup>9</sup> Mo maibasar sin pannemnem di odom, naladaw din Apo ay manongpal sin inkari na, ngem baken tet-ewa di. Din katet-ewa na et peteg ay naanos en dakayo, tan laydena ay maga koma di madosa mo adi et manbabawi koma di am-in ay ipogaw sin basbasol da. <sup>10</sup> Ngem domateng pay dedan din agew ay omalian di Apo, et bigla di omaliana ay kaman din domatngan di mangakew. Sin agew ay doy, wada di napigsa ay agodood et maomas ed daya. Matenaw abe din agew, din bowan ya din tatalaw sin apoy, ya siya abe ay mapooan<sup>†</sup> din daga ya din am-in ay wadas nan daga.

<sup>11</sup> Mo kaman nidi di kadadaelan di am-in, masapol ay nasantoan ya nadiyosan di kabibiyag yo <sup>12</sup> sin panedsed-an yo sin agew ay pangokoman Diyos sin kaipoipogaw. Amagen yo koma abe din kabaelan yo ta say goman-gano din domatngana. Tet-ewa ay sin agew ay doy, mapooan ed daya et matenaw din am-in ay wadas di si apoy. <sup>13</sup> Ngem mo si datako et namnamaen tako ay tongpalen Diyos din inkari na, et mawada di baro ay daya ya baro ay daga ay pag nalinteg di ogalin di am-in ay mantetees di.‡

<sup>14</sup> Isonga gagayyem, gapo ta siya na din sedsed-en yo, ipakat yo din kabaelan yo ta say nalinis kayo ay magay pankolkolangan yo sin pangiilaan Diyos ya ta siged di pakikadkadwaan yo en sisya. <sup>15</sup> Nemnemen yo ay din gapo ay naanos di Apo et laydena ay waday wayan di ipogaw ay maisalakan. Siya abe dana di insolat din laydelayden tako ay agi ay si Pablo en dakayo ay maibasar sin laing ay indawat Diyos en sisya. <sup>16</sup> Et sin

§ 2:22 Proverbio 26:11. \* 3:8 Salmo 90:4. † 3:10 Din naisolat sin odom ay manuskrito sin Griego et: ...maomas din daga ya din am-in ay wadas nan daga. ‡ 3:13 Isaias 65:17; Naipaammo 21:1.

am-in ay solat na ay nangibagaanas na, kaman nidi met laeng di inbagbaga na. Wada kayman di naligat ay maawatan sin solsolat na. Et din ipogaw ay kolang di ammo da ya baken napasnek di pammati da et balbaliwan da din kosto ay laydena ay kalien ay kaman aben din iyat da si odom ay inpaisolat Diyos. Begew sin pangam-amagan das di, madosa da ay eng-enggana.

<sup>17</sup> Ngem mo si dakayo ay gagayyem, enggay indadaan ko en dakayo di maipanggep sin lawa ay ipogaw ay mangit-itdos baken tet-ewa. Siliban yo ngarud ta adi kayo masangaw sin nankamkamalian da et omaddawi kayo sin napasnek ay pammati yo, <sup>18</sup> mo adi et taptapian yo din siged ay ogali ay kailaan din seg-ang Jesu Cristo ay Apo tako ya mangisalakan en datako. Taptapian yo abe din pangammoan yo en sisya. Sapay koma ta madayaw sisya ed wani ya eng-enggana. Amen.



## Din Damo Ay Solat San Juan Maipanggep Sin Solat Ay Nay

Din nangisolat isna et si Juan ay esay pasolot Jesus ay nakikoykoyog en sisya sin kawada na isnan daga. Insolat na sin mamati ay man-ili sin kailili ed Asia Minor. Enggay nakay sisya sin nangisolatanas na.

Di gapo ay insolat na na et tan wada da di naisian sin gimgimong di mamati (2:19) di nan-it-itdo si baken tet-ewa maipanggep en Jesu Cristo. Init-itdo da ay din am-in ay mantetee isnan daga et maalinan si lawa. Isonga adi kano mabalin ay nanbalin si Cristo si tet-ewa ay ipogaw. Init-itdo da abe ay si Jesus et baken din Messias ono Cristo ay Anak Diyos. Et baken anggoy din init-itdo da si naipaksaw mo adi aben din am-amagen da, tan kanan da en olay adi pandokogan di mamati din basbasol da ya olay adi da manlilinayad.

Isonga dadlon paneknekan Juan sin mamasas na ay si Jesu Cristo din Anak Diyos ay nanbalin si ipogaw. Ipidwapidwa na abe ay mangwani ay din ipogaw ay manglaylayad en Diyos et masapol ay laylaydena abe di gagait na ya on-onodana din bilbilin Diyos.

Ad-ado pay di mabasas na ay mangiparagsak sin nemnem tako ay mamati: din nakaskasdaaw ay layad Diyos para en datako, din iyat tako ay malinisan sin am-in ay kadodogis, din iyat tako ay mangabak sin wadas nan daga ay maikontra en Diyos, ya din pangammoan tako ay wada en datako di biyag ay iwed patingga na.

### **Din Linaona**

Din panlogian di solat 1:1-4

Din mantetee sin mapat-a ya sin mabolinget 1:5-2:29

Din nalinteg ay kabibiyag di an-ak Diyos 3:1-10

Din panlilinaydan di an-ak Diyos 3:11-24

Din kailasinan di tet-ewa ya baken tet-ewa 4:1-6

Din layad Diyos ya din layad di mantetee en Diyos 4:7-5:5

Din nangipaneknek ay Anak Diyos si Jesu Cristo 5:6-12

Din mabalin ay dadlon ammon di mamati sin Anak Diyos 5:13-21

### *Din Kali Ay Poon Di Biyag*

<sup>1-2</sup> Sin solat ay nay, waday ibaga mi en dakayo maipanggep sin makwani en Kali ay poon di biyag ay iwed patingga na. Nawawadas sisya sin kad-an Diyos Ama manipod sin damodamo, ngem nanopaila ay ipogaw sinan daga, isonga inil-ila mi ay kosto. Dindinngge mi abe din kali na yan kinapkapay mis sisya. <sup>3</sup> Din sana ay inil-ila mi ya dindinngge mi et say ipaneknek mi en dakayo sin solat ay nay ta maitapi kayo sin kaikadkadwaan mi en Diyos ay Ama tako ya si Jesu Cristo ay Anak na <sup>4</sup> ta say maragsakan tako ay kosto.

### *Din Mantetee Sin Mapat-a Ya Sin Mabolinget*

<sup>5</sup> Naey din dindinngge mi sin Anak Diyos ay sana et say ipaammo mi en dakayo: si Diyos et kaman silaw, tan maga polos di mabolinget en sisya. <sup>6</sup> Isonga mo kanan tako en makikadkadwa tako en sisya ngem asi et mantetee tako sin mabolinget, man-et-etek tako, tan adi maikompas din am-amagen tako sin tet-ewa ya kosto ay layden Diyos.

<sup>7</sup> Ngem mo mantetee tako pay sin kad-an di mapat-a ay kaman din iyat Diyos, siged di makikadkadwaan tako sin iib-a tako ay mamati ya dowan pay maow-owasan am-in di basbasol tako begew sin dadan Jesus ay Anak na.

<sup>8</sup> Mo kanan tako en magay basol tako, iet-etekan tako din awak tako yan adi tako awen din katet-ewa na. <sup>9</sup> Ngem mo ipodno tako en Diyos din basbasol tako, pakawanena da

nay ay basbasol tako yan linisanas datako sin am-in ay kadodogis. Matalek sisya ay mangiyat sidi et kosto pay abe mo say iyat na. <sup>10</sup> Ngem mo kanan tako pay en adi tako binmasbasol, panbalinen tako ay maetek si Diyos, et adi naiigto din kali na sin nemnem tako.

## 2

### *Si Cristo Di Mangiaalagey En Datako En Diyos*

<sup>1</sup> Dakayo ay anak ko, insolat ko na en dakayo ta adi kayo manbasbasol. Ngem mo wada en datako di bomasol, laton ay wadas Jesu Cristo ay maga polos di basol na ay makikali en Diyos Ama para en datako. <sup>2</sup> Yan si Cristo met laeng di nangikaro sin dosan di basbasol tako ta say mabalin ay mapakawan da, yan baken din basbasol tako anggoy mo adi et din basbasol di am-in ay ipogaw.

### *Din Bilbilin Diyos*

<sup>3</sup> Mo tongtongpalen tako din bilbilin Diyos, say dadlon takon pangammoan ay am-ammo takos sisya. <sup>4</sup> Isonga mo waday mangwani en am-ammo na si Diyos down pay adi na on-onodan din bilina, makaetek sisya et maga en sisya din tet-ewa ay maititdo. <sup>5-6</sup> Ngem mo din mangon-onod pay sin kalin Diyos, sisya di magay pankolongan di layad na en Diyos. Mo wada ngarud di mangwani en naitatapi en Diyos, masapol ay tadonenas Jesu Cristo. Et mo say iyat tako, say dadlon takon pangammoan ay tet-ewa ay naitatapi tako en Diyos.

<sup>7</sup> Gagayyem ko, baken baro ay bilin di ipaammok en dakayo, tan manlogi sin namatian yo en Jesu Cristo, dindinnye yo din bilin ay mangwani en masapol ay manlinayad tako. <sup>8</sup> Ngem kaman baro pay dedan din bilin ay nay, tan nail-ila din kosto ay natongpalana sin inam-amag Cristo ya siya abe sin kabibiyag yo ed wani. Tan enggay makakkaan din mabolinget ya tomingtinggaw din kosto ay silaw.

<sup>9</sup> Mo waday mangwani en wada sin mapat-a down pay iligliget na di gait na, deda met laeng sin mabolinget. <sup>10</sup> Ngem din manglaylayad sin ib-a na et mantetee sin mapmapat-a, isonga maga en sisya di bomasolana.\* <sup>11</sup> Ngem din mangiligliget pay sin ib-a na, din mabolinget di panteteeana ya dad-anena. Adi na ammo din em-emeyana, tan ginodab dedan din bolinget sisya.

<sup>12</sup> An-ak ko, insolat ko na en dakayo tan enggay napakawan din basbasol yo begew en Cristo. <sup>13</sup> Nansolatak abe en dakayo ay aam-a, tan am-ammo yos sisya ay nawawada nanipod sin damodamo. Ya dakayo abe ay babbaro, nansolatak en dakayo tan inabak yo si Satanas.

<sup>14</sup> Ipidwak kod loman din gapo si nansolatak en dakayo. Mo dakayo ay an-ak ko, nansolatak en dakayo, tan am-ammo yo din Ama tako. Dakayo abe ay aam-a, tan am-ammo yos sisya ay nawawada nanipod sin damodamo. Dakayo pay abe ay babbaro, tan mabikas kayo, naiigto sin nemnem yo din kalin Diyos ya inabak yo abe si Satanas.

<sup>15</sup> Adi yo koman laylayden din ogali ay maikontra sin layden Diyos ya din wadas nan daga, tan mo say laylayden yo dana, maga abe di layad yo en Diyos ay Ama tako. <sup>16</sup> Tan am-in din kaman da nay: din lawa ay laylayden di nakabasol ay ipogaw, din pangamgamaman da si il-ilaen da, ya din pangit-it-ekan da sin sanikwa ya kasasaad da et baken si Diyos ay Ama tako di kapkapoan da mo adi et mapos nan daga. <sup>17</sup> Yan din daga ya am-in ay lawa ay an-anapen di kaipoipogaw et mankamamaga, ngem din mangamag pay sin layden Diyos et waday biyag na si eng-enggana.

### *Din Mangontra En Cristo*

\* **2:10** Dodowa pay di olog nina sin Griego: 1) ...maga en sisya di bomasolan di gait na; 2) ...maga di bomasolana isdi.

<sup>18</sup> Laylaydek ay an-ak ko, dandani din kasin omalian Cristo. Ammo tako ay omali onona din Mangontra en Cristo, yan nay ed wani enggay inmad-ado din mangonkontra en sisya, isonga say pangammoan tako ay dandani din kasinan omalian. <sup>19</sup> Da doy ay mangonkontra, naitatapi da en datako ed idi, ngem baken dan tet-ewa ay ib-a tako ay mamati, isonga kinmaan da. Mo tet-ewa ay iib-a takos daida, adi da koman kinmaan. Ngem panggep Diyos ay komaan da ta say dadlon maila ay maga en daida di kosto ay ib-a tako.

<sup>20</sup> Ngem mo dakayo pay, wada en dakayo din Ispirito Santo ay indawat Cristo, isonga ammo yo am-in din tet-ewa ay mait-itdo. <sup>21</sup> Di gapo ay insolat ko na en dakayo et baken din adi yo nangammoan sin tet-ewa, mo adi et begew tan inaammo yo yan ammo yo abe ay maga polos di etek ay mapo sin tet-ewa ay mait-itdo.

<sup>22</sup> Sino ngarud di maetek mo baken din mangwani en si Jesus et baken din si Cristo ay inbaan Diyos? Din mangibagas na et sisya di mangontra en Cristo, et baken din Anak Diyos anggoy di adi na bigbigen mo adi et si Diyos abe. <sup>23</sup> Tan olay sino ay adi mamigbig sin Anak Diyos, adi na dedan am-ammo din si Ama na, ngem mo din mamigbig pay sin Anak Diyos ay adi mangisaot, wada abe en sisya si Diyos Ama. <sup>24</sup> Ipasnek yo ngarud sin nemnem yo din tet-ewa ay mait-itdo ay dindinnye yo manlogi sin namatian yo. Tan mo say iyat yo di, kankanayon ay wada kayo en Diyos ya en Jesu Cristo ay Anak na, <sup>25</sup> tan siya na met laeng di biyag ay iwed patingga na ay inkarin Cristo en datako.

<sup>26</sup> Insolat ko na en dakayo maipanggep en daida ay mamadpadas ay manangsangaw en dakayo sin tet-ewa ay mait-itdo. <sup>27</sup> Ngem ammok pay kayman ay kanayon ay wada en dakayo din Ispirito Santo ay indawat Cristo, isonga adi yon masapol di odom ay mangitdo en dakayo. Tan it-itdo na en dakayo din am-in ay masapol ay ammoan yo yan pag tet-ewa din it-itdo na. Onodan yo ngarud din it-itdo na ay sana yan itoltoloy yo pay ay mamati en Cristo.

<sup>28</sup> Siya adi ay an-ak ko, ipapasnek yo ay mamati en sisya ta say magay pan-egyatan ya panbainan yo sin kasinan omalian. <sup>29</sup> Ammo yo kayman ay nalinteg si Diyos,<sup>†</sup> isonga maawatan yo koma abe ay an-ak en Diyos am-in da dooy ay mangam-amag si siged ya kosto.

### 3

#### *Din Nalinteg ay Kabibiyag di An-ak Diyos*

<sup>1</sup> Nemnemen tako din peteg ay layad Diyos en datako, tan begew sin nay nakaskasdaaw ay layad na, ibilang na ay an-ak nas datako, et siya pay di si datako. Ngem din adi mamati et adi da bigbigen ay an-ak nas datako, tan adi da aben binigbig si Diyos ay Ama tako. <sup>2</sup> Gagayyem ko, an-ak Diyos datako ed wani, ngem daan takon maawatan si kosto din panbalinan tako sin tapin di agew, ngem ammo tako pay kayman ay sin kasin omalian Cristo, mais-o tako en sisya, tan dadlon takon ilaen din iso na. <sup>3</sup> Am-in ay ipogaw ay mannannama en da naey, ipapasnek na ay pandokogan din lawa ta nadalos di biyag nas kankanayon ay kaman si Cristo met laeng.

<sup>4</sup> Olay sino ay bomasol et nilabsingana din linteg Diyos, tan din basol et din panlabsingan si linteg met laeng. <sup>5</sup> Ammo yo ay inmalis Cristo isnan daga ta kaanena din basbasol di ipogaw, yan sisya pay et maga polos di basol na. <sup>6</sup> Isonga olay sino ay naitatapi en Cristo, adi na itoltoloy ay manbasbasol, tan din mangitoltoloy ay manbasbasol et adi namati en Cristo ya adi na polos inammoan sisya.

<sup>7</sup> Patpatgek ay an-ak ko, siliban yo ta adi kayo kaiet-etekan. Olay sino ay manganayon ay mangamag si siged, nalinteg di ay ipogaw ay kaman si Cristo met laeng. <sup>8</sup> Ngem din mangitoltoloy pay ay manbasbasol et naitatapi en Satanas ay din Diablo, tan mo din Diablo et binmabasol manlogi sin damodamo. Et siya na di begew ay inmali din Anak

<sup>†</sup> 2:29 Di esa abe ay kaiologan nina sin Griego et: ...nalinteg si Cristo...

Diyos isnan daga, ta say dadaelena din am-amagen di Diablo. <sup>9</sup> Isonga din ipogaw ay tet-ewa ay anak Diyos et adi na itoltoloy ay manbasbasol, tan din nemnem Diyos di wada en sisya. Begew sin nanganakan Diyos en sisya, adi mabalin ay itoltoloy na ay manbasbasol. <sup>10</sup> Din pangilasinan tako sin an-ak Diyos ya din an-ak di Diablo et siya na: di ipogaw ay baken anak en Diyos et daida di adi mangam-amag si siged ya di adi manglaylayad si iib-a da.

#### *Din Pananglayad Tako Sin Iib-a Tako*

<sup>11</sup> Din tet-ewa ay mait-itdo ay dindinnye yo manlogi sin namatian yo et siya na: masapol ay manlinayad tako. <sup>12</sup> Baken din ogalin Cain koma di tadonen yo, tan mo si Cain et ipogaw Satanas et pinse na din iyogtana ay si Abel. Sinoy begew si namseana? Tan lawa di inam-amag na ngem mayat pay di inam-amag din iyogtana.\* <sup>13</sup> Isonga adi kayo masmasdaaw ay aag-i mo kaliliget di adi mamati si dakayo. <sup>14</sup> Olay, tan ammo tako ay adi tako maisian en Diyos ay kaman ed idi, mo adi et manlogi ed wani waday biyag tako ay iwed patingga na. Ammo tako ay tet-ewa di, tan laylayden tako din aag-i tako ay mamati. Din adi manglaylayad si iib-a na ay ipogaw et kaman nanatey pay laeng, tan deda ay naisisian en Diyos. <sup>15</sup> Tan din mangiliget si agi na et kaman met laeng din pomepese, et ammo tako dedan ay din pomepese, maga en sisya din biyag ay iwed patingga na.

<sup>16</sup> Din pangammoan tako sin ison di tet-ewa ay layad et indawat Jesu Cristo din biyag na para en datako. Isonga datako abe, nakasagana tako koma ay mangidawat sin biyag tako para sin aag-i tako. <sup>17</sup> Ngem mo wada di ipogaw yan ammoana ay waday agi na ay mankolang di kasapolana dowanen adi seg-angan, ay siya mo laydelaydena si Diyos? <sup>18</sup> Dakayo ay an-ak ko, din pananglayad tako sin iib-a tako et baken koman owat sin kali et anggoy, mo adi et naimposoan koma yan maipaila sin am-amagen tako.

<sup>19-20</sup> Mo say iyat tako di ay manlinayad, say pangammoan tako ay tet-ewa ay naitatapi tako en Diyos. Et olay mo omipabasol di nemnem tako, mabalin pay dedan ay patalnaen tako di nemnem tako ta adi tako mabain ay mankararag en sisya. Tan ammo tako ay nangatngato di nemnem Diyos mo din nemnem tako yan pag nan ammo di am-in. Ammo na ay naitatapi tako en sisya. <sup>21</sup> Isonga gagayyem ko, mo adi pay laeng omipabasbasol di nemnem tako, natoled tako ay somag-en en Diyos sin pankararagan tako en sisya. <sup>22</sup> Et olay sino di kedawen tako en sisya, idawat na tan patpatien tako din bilbilina ya am-amagen tako din kapnekana. <sup>23</sup> Et naey di inbilina en datako: masapol ay mamati tako sin Anak na ay si Jesu Cristo ya manlinayad tako ay kaman met laeng din inbilin Cristo en datako. <sup>24</sup> Din manongtongpal sin bilbilin Diyos et mantetee en Diyos yan mantetee abes Diyos en sisya. Di pangammoan tako ay mantetee si Diyos en datako et wada en datako din Ispirito Santo ay indawat na.

## 4

#### *Din Pangilasinan Tako Sin Tet-ewa Ya Baken Tet-ewa*

<sup>1</sup> Dakayo ay gagayyem ko, adi kayo mamatpati sin am-in ay mangwani en pankalkalian Diyos daida, mo adi et polbalen yo ay kosto mo tet-ewa ay napo en Diyos din ibagbaga da, tan ad-ado da ay maetek ay mangwani en pankalkalian Diyos daida ay binmala sin kailili isnan daga. <sup>2</sup> Din pangilasinan yo mo din Ispiriton Diyos di napoan di ibagbaga da et siya na: mo bigbigen da ay si Jesus din si Cristo ay nanbalin si ipogaw, din Ispiriton Diyos di napoana. <sup>3</sup> Ngem mo adi da pay bigbigen ay si Jesus din si Cristo ay nanbalin si ipogaw, baken din Ispiriton Diyos di wada en daida, mo adi et din nemnem ay mais-o sin Mangontra en Cristo. Dindinnye yo ay omalis sisya yan enggay mait-itdo ed wani din maikonkontra en Cristo.

\* 3:12 Genesis 4:1-8.

<sup>4</sup> Ngem mo dakayo pay ay an-ak ko, an-ak en Diyos dakayo et inabak yo din maetek ay sana, tan laton ay adi da in-etekan dakayo. Tan napatpateg din Ispiriton Diyos ay wada en dakayo mo si Satanas ay mangiturturay en daida ay adi mamati. <sup>5</sup> Mo din man-it-itdos etek et on-onodan da di kabibiyag ay maikontra sin layden Diyos, et din it-itdo da, maikompa sin kabibiyag da ay sana, isonga laylayden di adi mamati ay manmannge en daida. <sup>6</sup> Ngem mo datako pay, an-ak en Diyos datako, isonga din mayad ay manmannge sin it-itdo tako et din iib-a tako ay nangaammo en Diyos, ngem din baken an-ak en Diyos et sigaan da ay manmannge. Siya di di esay pangammoan tako mo intoy napoan di mait-itdo, mo napo sin Ispirito Santo ay poon di tet-ewa ono si Satanas ay poon di etek.

### *Din Layad En Diyos*

<sup>7</sup> Gagayyem ko, manlinayad tako tan si Diyos di napoan di layad. Isonga din manglaylayad sin ib-a na, siya di din anak en Diyos ay mangammo en sisya. <sup>8</sup> Ngem din magay layad na sin ib-a na, adi na aben ammo si Diyos, tan si Diyos et managlayad. <sup>9</sup> Et din nangipailaana sin layad na en datako et inbaa na din bogbogtong ay Anak na isnan daga ta say mabalin ay gon-oden tako di biyag ay iwed patingga na begew en sisya. <sup>10</sup> Siya na din ison di layad ay magay kolkolang na: baken din layad tako en Diyos, mo adi et din layad ay inpailan Diyos en datako sin nangibaaana sin Anak na ta ikaro na din dosan di basbasol tako ta say mapakawan da.

<sup>11</sup> Gagayyem ko, mo say inyat Diyos di ay nanglayad en datako, datako abe et man-asilayad tako koma. <sup>12</sup> Tan olay mo maga di ipogaw si nakaila en Diyos, ngem mo man-asilayad tako, mantetees Diyos en datako et maila sin biyag tako din layad Diyos ay magay kolkolang na.

<sup>13</sup> Din dadlon takon pangammoan ay mantetee tako en Diyos yan mantetee abes sisya en datako et indawat na en datako din Ispirito na. <sup>14</sup> Dakami abe kayman, inil-ila mi si Jesus, isonga mabalin ay ipaneknek mi ay inbaan Diyos din Anak na isnan daga ta sisya di mangisalakan sin kaipoipogaw. <sup>15</sup> Et olay mo sino ay mamigbig ay si Jesus din Anak Diyos et mantetee en Diyos ya mantetee abe si Diyos en sisya. <sup>16</sup> Isonga datako ay mamigbig en Jesus et niliklikna tako din layad Diyos en datako et say pantaltalkan tako.

Managlayad si Diyos. Isonga din ipogaw ay kankanayon ay manglaylayad en Diyos ya sin iib-a na et mantetee en Diyos ya mantetee abe si Diyos en sisya. <sup>17</sup> Et mo say ison di biyag tako di, mataptapian din layad tako enggana ay magay kolkolang na, et magay pan-egyatan tako sin agew ay pangokoman Diyos sin ipogaw, tan din ogali tako isnan daga et kaman din ogalin Cristo met laeng. <sup>18</sup> Basta mo waday layad et adi mabalin ay mataptapian si egyat, tan din layad ay magay kolkolang na et topapena din egyat. Isonga din ipogaw ay emegyat begew tan nemnememena din dosan Diyos, say kailaana ay kolang pay laeng di layad na.

<sup>19</sup> Manlayad tako tan nangon-ona ay nilayad Diyos datako. <sup>20</sup> Mo waday mangwani en laylaydena si Diyos down pay kaliliget na din ib-a na et makaetek sisya. Tan mo magay layad na si ib-a na ay il-ilaena, adi mabalin ay laylaydena si Diyos ay adi na inila. <sup>21</sup> Din inbilin Diyos en datako et siya na: din manglaylayad en Diyos et masapol ay laylaydena abe din ib-a na.

## 5

### *Din Iyat Tako Ay Mangabak Sin Maikontra En Diyos*

<sup>1</sup> Olay mo sino di mamati ay si Jesus din inbaan Diyos ay makwani en Cristo, anak Diyos sisya. Yan din manglaylayad sin ama, laylaydena abe din an-ak na. <sup>2</sup> Isonga mo laylayden tako si Diyos ya tongtongpalen tako din bilbilina, say pangammoan tako ay laylayden tako abe din iib-a tako ay an-ak Diyos. <sup>3</sup> Tan din pananglayad tako en Diyos et din panongpalan tako sin bilbilina. Yan din bilbilina et baken aben naligat ay tongpalen, <sup>4</sup> tan olay mo sino ay anak Diyos et ab-abakenas kankanayon din wadas nan



daga ay maikontra en Diyos. Yan din pangabak tako et din pammati tako. <sup>5</sup> Tan maga di makaabak sin wadas nan daga ay maikontra en Diyos malaksig din mamati ay si Jesus din Anak Diyos.

*Din Mangipaneknek Si Maipanggep En Jesu Cristo*

<sup>6-8</sup> Sin inmalian Jesu Cristo sin nay daga et wada di tolo ay nangipaneknek ay Anak Diyos sisya. Din esa et din nanpabonyagana si danom. Ngem baken anggoy din nanpabonyagana di nangipaneknek mo adi aben din dada na ay inmayos sin nateyana. Din maikatlo pay, din Ispirito Santo, et tet-ewa am-in din kankanana. Din tolo ay nay et nan-iiso din inpaneknek da ay maipanggep en Jesu Cristo. <sup>9</sup> Patien tako kayman din ipaneknek di ipogaw, ngem mo say pasien tako di, namnamed koma ay pasien tako din tolo ay nay ay nangipaneknekan Diyos sin maipanggep sin Anak na, tan nabanbanol dedan din kankanana Diyos. <sup>10</sup> Mo sino ngarud di mamati sin Anak Diyos et naiigto sin nemnem na din inpaneknek Diyos ay maipanggep en sisya, ngem din adi mamati pay sin inbagan Diyos et panbalinenas Diyos ay maetek, tan adi na patpasien din inbaga na. <sup>11</sup> Din inbaga na et siya na: indawat na en datako di biyag ay iwed patingga na, yan din poon di biyag ay nay et din Anak na. <sup>12</sup> Isonga din naitatapi sin Anak Diyos et wada en sisya din biyag ay iwed patingga na, ngem din adi pay naitatapi sin Anak na, adi na aben gon-oden din biyag ay nay.

<sup>13</sup> Insolat ko dana en dakayo ay mamati sin Anak Diyos ta say ammoan yo ay wada en dakayo di biyag ay iwed patingga na. <sup>14</sup> Wada abey toled tako ay mankararag en Diyos, tan dadlon takon ammo ay olay mo sino ay kedawen tako en sisya ay maikompas sin laydena et dengngena. <sup>15</sup> Et mo ammo tako ay dengngena din kedawen tako, ammo tako abe ay enggay oka tako.

<sup>16</sup> Mo ilaen tako di ib-a tako ay manbasbasol, downan tako et ikararagan ta idawat Diyos en sisya di biyag ay iwed patingga na. Din laydek ay kalien et ikararagan tako dalo et mo din basol na et din kalasin di basol ay mabalin ay mapakawan isonga adi maiturong sin dosa ay iwed patingga na. Tan wada met di basol ay adi mabalin ay mapakawan, ngem adiak kanan en say ikararagan tako di koma. <sup>17</sup> Tet-ewa kayman ay basol am-in di maamag ay lawa, ngem wada pay dedan di basol ay mabalin ay mapakawan isonga adi maiturong sin dosa ay iwed patingga na.

<sup>18</sup> Isonga wada di tolo ay ammo tako. Din damo et ammo tako ay maga di anak Diyos ay mangitoltoloy ay manbasbasol, tan salsalagniban din Anak Diyos ay si Jesu Cristo, et magay iyat Satanas ay mangiwit en sisya.

<sup>19</sup> Maikadwa, ammo tako ay olay mo iturturayan Satanas din am-in ay adi mamati, ngem datako pay yan an-ak Diyos.

<sup>20</sup> Maikatlo, ammo tako ay inmali din Anak Diyos sin nay daga et sinilawana din nemnem tako ta say ammoan tako din tet-ewa ay Diyos. Isonga naitatapi tako sin tet-ewa ay Diyos tan naitatapi tako sin Anak na ay si Jesu Cristo. Sisya din tet-ewa ay Diyos met laeng ya din poon di biyag ay iwed patingga na.

<sup>21</sup> Laylaydek ay an-ak ko, dadlon yon addawian di sinan didiyos.

## Din Maikadwa Ay Solat San Juan Maipanggep Sin Solat Ay Nay

Siya na di solat Juan sin esa ay Ina ay pinilin Diyos ya sin an-ak na. Waday mangwani en da naey di siin-a ay am-ammon Juan. Di odom et kanan da en din layden nina ay kalien et esay gimong di mamati ya din naitatapis di.

Olay mo aptik din solat ay nay, nabanol pay dedan din mabasas na. Kanas na en masapol ay manlinayad din mamati dowan da aben silsiliban ta adi da malet-etekan si baken tet-ewa ay mait-itdo.

### **Din Linaona**

Din panlogian di solat 1-3

Pamagbaga maipanggep si layad 4-6

Pamagbaga maipanggep si man-it-itdos baken tet-ewa 7-11

Din kagdangan di solat 12-13

<sup>1</sup> Patgek ay Ina,

Sak-en si Juan ay esa ay pangolon di mamati. Naey di solat ko en sik-a ay pinilin Diyos ya sin an-ak mo abe. Naimposan din layad ko en dakayo, et baken sak-en anggoy di manglaylayad en dakayo mo adi et am-in abe ay mangin ammo sin tet-ewa ay mait-itdo. <sup>2</sup> Manlinlinayad tako tan naiigto sin nemnem tako din tet-ewa ay mait-itdo ay komakaman sin nemnem tako ay eng-enggana. <sup>3</sup> Mo itoloy tako ay mangon-onod sin tet-ewa ay mait-itdo ya manlinlinayad tako, gon-oden tako di badang, seg-ang ya talna ay mapmapo en Diyos ay Ama tako ya si Jesu Cristo ay Anak na.

<sup>4</sup> Peteg di ragsak ko sin nangammoak ay on-onodan din odom ay an-ak mo din tet-ewa ay mait-itdo ay inbilin Ama tako ay si Diyos. <sup>5</sup> Ngem wada pay et di laydek ay ibaga en dakayo: masapol ay manlinayad tako. Baken baro ay bilin na, tan say dindinngge tako manlogi sin damo. <sup>6</sup> Mo tet-ewa pay ay manlaylayad tako, tongpalen tako din bilbilin Diyos. Yan din bilina ay inammoan tako sin damo et masapol ay manlinayad tako.

<sup>7</sup> Say inpanemnem ko na en dakayo, tan ad-ado di binmala ed wani ay mangiet-etek sin kaipoipogaw. Baken tet-ewa din it-itdo da, tan adi da bigbigen ay nanbalin si Jesu Cristo si tet-ewa ay ipogaw sin inmaliana sin nay daga. Din kaman dadi et maetek da ay ipogaw ay mangonkontra en Cristo. <sup>8</sup> Siliban yo ngarud ta adi maiaw-awan din kosto ay init-itdo mi en dakayo, tan mo say iyat yo di, adi makolkolongan din gon-gona ay gon-oden yo sin tapin di agew.

<sup>9</sup> Olay mo sino ay ipogaw, mo adi na itoltoloy ay mangonod sin init-itdon Cristo mo adi et sursurokana, adi na am-ammo si Diyos. Ngem din mangipapati pay ay mangonod sin init-itdon Cristo et wada en sisya si Diyos Ama ya din Anak na abe. <sup>10</sup> Isonga mo waday emey en dakayo si natken di it-itdo na, adi yo ipaspasgep sin beey yo. Olay adi yo aben pakomkomostaan. <sup>11</sup> Tan mo say amagen yo di, badbadangan yos sisya sin lawa ay am-amagena.

<sup>12</sup> Ad-ado pay di laydek ay ibaga en dakayo, ngem adiak intapi sin solat ay nay, tan mo mabalin koma, enak pasyalen dakayo. Asi tako manngangalat ay kosto yan peteg di layad tako ay man-asiila.

<sup>13</sup> Din an-ak di agim ay babai ay pinilin aben Diyos et pakpakomostaan das dakayo. Anggay ninas mabalin ay ibagak.

## Din Maikatlo Ay Solat San Juan

### Maipanggep Sin Solat Ay Nay

Siya na di solat Juan sin esay gayyem na ay manngadan si Gaius ay nangipangpangolo si esa ay gimong di mamati. Dinaydayaw Juan sisya tan pinakpakana iman din man-gaskasaba ay manlikliked sin kailiili. Wada abey indadaan Juan en sisya maipanggep sin lawa ay ogalin di esa ay ipogaw ay manngadan si Diotrefes.

#### **Din Linaona**

Din panlogian di solat 1-4

Din pangidayawan Juan en Gaius 5-8

Din lawa ay inam-amag Diotrefes 9-10

Din siged ay inam-amag Demetrius 11-12

Din kagdengan di solat 13-15

1-2 Patgek ay Gaius,

Sak-en ay nangisolat isna et si Juan ay esa ay pangolon di mamati. Naimposoan din layad ko en sik-a ay gayyem ko. Sapay koma ta mayat di biyag mo issa ya napigsa abe di awak mo ay kaman din kapigsan di pammatim. <sup>3</sup> Waday aag-i tako ay inmal-alis na, et inbagabaga da ay ipapasnek mo ay mangonod sin tet-ewa ay mait-itdo. Am-in kano di am-amagem yan maikomkompas sin mait-itdo ay sana. Isonga peteg ay naragsakanak, <sup>4</sup> tan magay kamamayatan si panragsakak mo adi din nanngreak ay on-onodan din an-ak ko din tet-ewa ay mait-itdo.

<sup>5</sup> Sigesiged di in-inyap mo sin aag-i tako ay nan-iy-iyen issa, tan olay mo sangaili da anggoy kayman, inay-ayowanam kanos daida ay kosto pay dedan. <sup>6</sup> Sin kawada das na, dinaddad-at da abe sin gimong di mamati din siged ay pananglayad mo en daida. Mo waday kaman dana ay kasin maspad issa, pangaasim ta itoltoloy mo kod ay mamadbadang en daida yan idawat mo en daida din kasapolan da sin danan. Mo mabalin abe, ilaem ta maibagay din badang mo en daida sin nabanol ay pansilsilbian da en Diyos. <sup>7</sup> Tan sin en da pangikaskasabaan si maipanggep en Apo Jesus, adi da manman-a si kasapolan da sin ipogaw ay adi mamati. <sup>8</sup> Isonga masapol ay datako ay mamati di mamadang en daida ta say makibingay tako sin obla da ay mangipaam-ammo sin tet-ewa ay mait-itdo.

<sup>9</sup> Wada di insolat ko ed idi sin gimong di mamati issa, ngem adi inkaskason Diotrefes tan adi na bigbigen din turay mi. Laydena gamin ay sisya di manpangolo issa. <sup>10</sup> Ngarud, mo emeyak issa, enak ibaga en dakayo din lawa ay am-amagena sin baken tet-ewa ay ipabpabasol na en dakami. Et baken anggoy dana si am-amagena, tan adi na aben paspasgepen din aag-i tako ay mamati ay em-emey sin ili yo yan iparparit na pay din mayad ay mangipasgep en daida dowanen pakaanen sin gimong di mamati.

<sup>11</sup> Gayyem ko, adi ka tadtadonen din lawa mo adi din siged. Tan din mangam-amag si siged et sisya di anak Diyos, ngem din mangam-amag pay si lawa et addawi pay laeng di nemnem na en Diyos.

<sup>12</sup> Mo si Demetrius et pag mayat di ibagbagan di ipogaw maipanggep en sisya. Din kabibiyag na abe et paneknekana din kinasiged na, tan maikokompas din am-amagena sin tet-ewa ay mait-itdo. Dakami abe et paneknekan mis sisya en dakayo, yan ammom ay tet-ewa di ibagbaga mi.

<sup>13</sup> Ad-ado pay di laydek ay ibaga en sik-a, ngem adiak intapi sin solat ay nay <sup>14</sup> tan mo mabalin koma, adi mabayag yan enak ilaen sik-a. Asi ta manngalat si kosto.

<sup>15</sup> Sapay koma ta natalna di biyag mo. Pakpakomostaan daka sin am-in ay gagayyem mo isna. Saes-aem ay pakomostaan kod din gagayyem takos sa. Anggay ninas mabalin ay ibagak.

## Din Solat San Jude

### Maipanggep Sin Solat Ay Nay

Din solat ay nay et insolat Jude ay iyogtan Santiago sin gimong ono gimgimong di mamati ay adi tako ammo di kad-an da. Din gapo ay insolat na na et wada di naitapi en daida ay nangit-itdos baken tet-ewa. Kankanan da en olay onodan di mamati di kadodogis ay kabibiyag, tan laton pay dedan ay pakawanen Diyos daida begew sin seg-ang na. Isonga nansolat si Jude sin gimong ta ipalawag na en daida din lawa ay ogalin di agin papati ay doy ya din dosa da. Binagaana abes daida ta esten da ay mangonod sin tet-ewa ay mait-itdo ay napo en Diyos.

#### **Din Linaona**

Din panlogian di solat 1-2

Din panggep di solat 3-4

Din nanosaan Diyos sin nanbasbasol ed nabaon 5-7

Din ogalin di nangit-itdos baken tet-ewa ya din dosa da 8-13

Din inpadton Enok maipanggep sin kaokoman ya kadosaan da 14-16

Din inpadton di aapostol ay wada di agin papati 17-19

Pamagbaga ay esten di mamati ay mangonod si kosto ay mait-itdo ya ogali 20-23

Kararag ay pamindisyon ya pandayaw en Diyos 24-25

#### *Din Panlogian Di Solat*

<sup>1</sup> Sak-en si Jude ay iyogtan Santiago di nangisolat isna. Esaak ay mansilsilbi en Jesu Cristo. Naey di solat ko en dakayo ay inayagan Diyos Ama. Dakayo di laydelaydena ya salsalagnibana enggana sin kasin omalian Jesu Cristo. <sup>2</sup> Sapay koma ta masepsep ay lak-amen yo di seg-ang, talna, ya layad ay mapmapo en Diyos.

#### *Din Panggep Di Solat: Waday Naitatapi Sin Gimong Ay Agin Papati*

<sup>3</sup> Laydelaydek ay gagayyem, nansolatak koma en dakayo maipanggep sin kaisalakanan tako am-in ay mamati, tan say laydelaydek ay ibaga en dakayo. Ngem adiak intoloy ay nangisolat sisi, tan ninemnem ko ay masapol ay bagaak dakayo ta ipakat yo din kabaelan yo ay mangonod ya manalagnib sin pammati tako ay enggay intalek Diyos en datako ay ipogaw na ta adi mataptapian ono masoksokatan. <sup>4</sup> Tan wada da kano di magay nemnem das Diyos ay naitapi en dakayo ay nangisassaot sin lawa ay panggep ya ogali da. Balbaliwan da din tet-ewa ay maipanggep sin seg-ang Diyos, tan kanan da en olay kano amagen di mamati di kompormi ay laylayden di awak da ay lawlawaya ya kadodogis, tan laton kano ay masemaseg-ang si Diyos. Adi da aben bigbigen di tet-ewa ay maipanggep en Jesu Cristo ay eng-enggay nas Apo ay pansilsilbian tako. Naipadto sin naisolat ay kalin Diyos ed nabaon din kadosaan da.

#### *Din Nanosaan Diyos Sin Nanbasbasol Ed Nabaon*

<sup>5</sup> Enggay kayman inammoan yo di am-in ay enak ibaga en dakayo ay maipanggep si nanosaan Diyos sin nanbasbasol ed nabaon, ngem laydek pay dedan ay ipanemnem en dakayo. Nemnemen yo ay insalakan Apo Diyos din ipogaw na sin nangipangoana en daida ay kinmaan ed Egipto, ngem asi na pag dosaen din adi namati et natey da. <sup>6</sup> Nemnemen yo abe din aanghel ay adi napnek sin saad ay indawat Diyos en daida mo adi et tinaynan da din kosto ay nanbeeyan da ed langit. Begew sin nangamagan das di, kinadinaan Diyos daida si kadina ay adi kakaan et inbalod na sin kad-an di mabolinget ed dallem enggana sin nabanol ay agew ay pangokomana en daida. <sup>7</sup> Nemnemen yo



abe din man-ili ed Sodoma ya Gomorra ya din nandinmang ay il-ili.\* Din basbasol da et mais-o sin nanbasolan di aanghel ay doy ay nanaddaag si baken dan lebbeng ay daddaagen,† tan dinaddaag da di baken dan asawa, ya din lallalaki en daida et inak-aklongan da ay daddaagen din iib-a da ay lalaki. Isonga pinooan Diyos daida ya din il-ili da, et siya di din maidadaan en datako ay din adi mamati et dosaen Diyos si apoy ay adi kadjad-ep.

### *Din Ogalin Di Nangit-itdos Baken Tet-ewa Ya Din Dosa Da*

<sup>8</sup> Ngem kaman nidi pay dedan di am-amagen dana ay mangit-itdos baken tet-ewa. Maiarig das man-iitaw, tan kaman adi da ammo di am-amagen da. Pakadodogisen dan awak da, adi da bigbigen di nangatngato mo daida, ya palawlawawen da di aanghel. <sup>9</sup> Olay pay din kangatoan ay aanghel ay si Miguel et adi na intoled ay nangiyat sidi. Tan sin nan-ibawan da en Satanas ay maipanggep sin way lebbeng na ay manga sin bangkay Moses, adi na pinalawlawas sisya, mo adi et kanana, “Si Apo Diyos di makaammo ay mangyamyam en sik-a.”‡ <sup>10</sup> Ngem dana ay ipogaw et palawlawawen da di olay sino ay adi da maawatan. Kaman dan animal ay adi nanemneman, tan din maawatan da et din liknan di awak da et siya met laeng di manadael en daida.

<sup>11</sup> Kaseseg-ang da tan kaeegyat di dosa da! Tan tadtadonen da din lawa ay ogalin Cain,§ ipapati da abe ay manbasol ay kaman din nasangawan Balaam\* begew sin pangamgamaman das pilak, ya konkontraen da abe di papangolo da ay kaman din nangontraan Kora en Moses ed idi.† Awni man et madosa da ay eng-enggana ay kaman met laeng din dosan Kora.

<sup>12</sup> Din naitatapian da en dakayo mo mangan ya mankulgar kayo et maiarig si mansa ay mangipalawlawaw si nalinis ay bado. Magay egyat da en Diyos sin nalabes ay iyat da ay mangan ya man-inom, mo adi et din awak da et anggoy di nemnemnemen da. Maiarig das liboo ay itaytayaw di dagem ay magay egen da ay odan. Kaman da aben kaiw ay adi manlames sin kosto ay panlamsana ono kaiw ay baken owat namgaan mo adi et nagabot abe. <sup>13</sup> Maiarig da pay si dadakke ay dalloyon sin baybay ay mangisabosabo si kadodogis ay osab na sin benget na, tan kankanayon ay am-amagen da di kababain. Di esa abe ay kaiarigan da et managtagtag ay talaw ay nasangaw sin kosto ay pandanan da. Isonga waday kabolingetan ay lugar ay insanganan Diyos ay kaibalodan das eng-enggana.

### *Din Inpadton Enok Maipanggep Sin Kaokoman Ya Kadosaan Di Mangit-itdos Baken Tet-ewa*

<sup>14</sup> Si Enok ay naikan-em ay pankappon Adan et waday inpadto na ay maipanggep en daida. Kanana, “Ilaen yo, awni et omali din Apo ay mangikoykoyog si kalibolibo ay nasantoan ay aanghel na <sup>15</sup> ta ena okomen di am-in ay ipogaw. Keddengana am-in di nakabasol ay magay nemnem das Diyos begew sin am-in ay inam-amag da ay lawa ya am-in ay kasisinit ay inbagbaga da sin pangontraan da en sisya.” Siya din inpadton Enok. <sup>16</sup> Din ipogaw ay nay et kanayon ay manmaymayotmot da ya adi da polos mapmapnek. Din on-onodan da et din lawa ay laylayden da. It-it-ek day awak da dowan da aben bolboladasen iib-a da ta maa dan layden da.

### *Din Inpadton Di Aapostol Ay Wada Di Agin Papati*

<sup>17</sup> Ngem dakayo ay gagayyem, adi yo linglinglingan din inpadton di aapostol Jesu Cristo ay Apo tako. <sup>18</sup> Kanan da en dakayo, “Mo domateng di maod-odi ay agew, wada di manlaslasoy ay manongtongpal sin laylayden da ay lawa.” <sup>19</sup> Daida di mangodwagodwa

\* **1:7** Genesis 19:1-24. † **1:7** Kanan di odom en din aanghel ay doy et dinaddaag da di babbabai isnan daga. Ilaen abe sin Genesis 6:2-4 ya 2 Pedro 2:4. ‡ **1:9** Daniel 10:13,21; 12:1. § **1:11** Genesis 4:1-8; 1 Juan 3:12. \* **1:11** Bilbilang 22-24; 31:16; 2 Pedro 2:15-16. † **1:11** Bilbilang 16:1-35.

en dakayo.‡ On-onodan da din naipogawan ay nemnem da, tan maga en daida din Ispiriton Diyos.

*Pamagbaga Ay Esten Di Mamati ay Mangonod Si Kosto Ay Mait-itdo Ya Ogali*

<sup>20</sup> Ngem dakayo pay ay gagayyem, itoltoloy yo ay papigpigsan di pammatin di iib-a yo babaen sin pangad-adalan yo sin dadlon nasantoan ay mait-itdo ay patpatien tako. Ipapasnek yo abe ay mankarkarag, ya ilaen yo ta din Ispirito Santo di mangiturturong en dakayo sin pankarkaragan yo. <sup>21</sup> Adi yo pandokdokogan ono linglinglingan din layad Diyos en dakayo, mo adi et anosan yo ay mansesed sin agew ay pangon-odan yo si biyag ay iwed patingga na ed langit begew sin seg-ang Jesu Cristo ay Apo tako. <sup>22</sup> Maseg-ang kayo sin mandowadowa ta papigsan yo din pammati da. <sup>23</sup> Mo din masangsangaw et awisen yos daida ay mamati, tan mo say iyat yo di, kaman yon gamdoten ay mangisalakan en daida sin apoy. Mo pay din managbasol et seg-angan yo abes daida, ngem kaliliget yo din basbasol da, tan kaman logit ay manmansa, et dadlon yon siliban tan mo maalinan kayo.

*Kararag ay Pamindisyon Ya Pandayaw En Diyos*

<sup>24-25</sup> Sapay koma ta madayaw si eng-enggana din es-esa ay Diyos ay mangisalakan en datako babaen en Jesu Cristo ay Apo tako. Kabaelana ay manalagnib en dakayo ta adi kayo maisokba ay manbasol, et awni et maga polos di pankolongan yo mo ipapika nas dakayo sin sangoanana, et peteg di ragsak yo ay mangisin-eng sin mankonkoniniing ay kinadiyos na. Madayaw sisya, tan sisya di kangatoan ya manakabalin ay Diyos ay magay gedeng di kalebbengana manlogi sin damodamo ya ed wani ya eng-enggana. Amen.

---

‡ **1:19** Di esa abe ay kaiologan nina sin Griego et: Daida di mangilalasin si awak da en dakayo.

## **Din Inpaammon Jesu Cristo En San Juan (PALTIING) Maipanggep Sin Libro Ay Nay**

Din Inpaammon Jesu Cristo en Juan maipanggep di mapasamak sin tapin di agew et naisolat sin timpo ay napalpaligatan di Cristiano begew sin pammati da en Apo Jesu Cristo. Din kapatgan ay panggep Juan ay nangisolat isna et ta papigsaena di nemnem da ta say ipapasnek da ay mamati olay mo napalpaligatan da.

Din kaad-adoan ay linaon din libro ay nay et din inpail-ilan Jesu Cristo en Juan ay kaman iitaw ay waday olog da am-in. Siguro din Cristiano sin timpon Juan et naawatan da din layden dana ay iitaw ay kalien, ngem ed wani, naligat di odom ay maawatan et baken nan-iso di pangawat di ipogaw sin olog da. Olay mo siya di, maawatan din olog di odom ay simbolo ono pangarig ay insolat Juan. Kaspangarigan, din layden di mata ay kalien et panangammo, din sakngod et panakabalin ya kalebbengan, ya din siki et kinabaked. Nalaka abe ay maawatan din kapatgan ay maibagbagas na ay siya din dadlon pangabakan Diyos sin am-in ay kaibaw na babaen en Cristo ya din pangongonaana sin matalek ay ipogaw na ay makitetee en sisya si eng-enggana. Sin maod-odi ay kapitolo, wada di omiparagsak ay maipanggep sin baro ay langit ya daga ay amagen Diyos ya din baro ay siyodad ay Jerusalem ay mapo ed langit.

### **Din Linaona**

Din panlogian di solat 1:1-8

Din damo ay naipaila en Juan ay kaman iitaw 1:9-20

Din solsolat sin pito ay gimgimong 2:1-3:22

Din kadayawan Diyos ed langit 4:1-11

Din nalopilop ay papil ya din karnero 5:1-14

Din pito ay naiipket sin nalopilop ay papil 6:1-8:1

Din pito ay tanggoyob 8:2-11:19

Din babai, dragon ya doway ay kaeegyay ay animal 12:1-13:18

Din karnero ya din 144,000 ay sinobot na 14:1-5

Din kaapitan di kaipoipogaw sin daga 14:6-20

Din pito ay mallokong ay napnos dosa 15:1-16:21

Din babai ay nangakabayos kaeegyay ay animal 17:1-18

Din nabakasan di Babilonia ya naabakan di am-in ay kaibaw Diyos 18:1-20:10

Din maodi ay pangokoman Diyos sin kaipoipogaw 20:11-15

Din baro ay langit, baro ay daga ya baro ay Jerusalem 21:1-22:5

Din kaddengan di solat 22:6-21

### *Din Panlogian Di Solat*

<sup>1</sup> Din linaon din libro ay nay et din inpaammon Jesu Cristo maipanggep sin dandani ay mapasamak. Si Diyos di nangipaammo en sisya ta say ipaammo na abe sin kaipoipogaw ay mansilsilbi en sisya. Isonga inbaan Cristo di anghel na ta ipaammo na en sak-en ay si Juan ay mansilsilbi en sisya. <sup>2</sup> Insolat ko din am-in ay naipaila en sak-en, et paneknekak ay siya dana di tet-ewa ay kalin Diyos ay inpaammon Jesu Cristo. <sup>3</sup> Nagasat di ipogaw ay mangibasa sin naipadto ay naisolat isna, ya nagasat abe di mannge ya mamati, tan dandani di katongpalana.

<sup>4-5</sup> Naey di solat ko en dakayo ay man-gimgimong sin pito ay gimong sin probinsiya ay Asia. Sapay koma ta wada en dakayo di seg-ang ya talna ay mapmapo en Diyos ya

din Ispirito na ya si Jesu Cristo. Si Diyos et wada ed wani, wada ed idi ya wada si eng-enggana. Din Ispirito na ay wada sin sangoanan di trono na et pito di kaipailaan di panakabalina.\* Si Jesu Cristo et sisya din matalek ay mangipaneknek si maipanggep en Diyos. Sisya abe di damo ay natago kasin ay adi kasin natey ya din mangituray sin am-in ay tuturay isnan lobong. Laydelaydenas datako, et pinawayaanas datako sin basbasol tako babaen sin dada na ay inmayos sin nateyana. <sup>6</sup> Intapi nas datako sin panturayana ta makituray tako en sisya, et nanbalinena abe si datako si papadi ay mansilsilbi en Diyos ay Diyos na ya Ama na.† Sapay koma ta madaydayaw ya manturturay si eng-enggana. Amen.

<sup>7</sup> Nemnemen yo na. Omali si Jesus ay maikoyog sin liboo, et ilaen di am-in ay ipogaw. Olay din nangilansa en sisya sin krus et ilaen das sisya. Et palaloy sakit di nemnem di am-in ay ipogaw isnan daga begew en sisya. Dadlon tet-ewa na.

<sup>8</sup> Si Apo Diyos ay manakabalin am-in ay wada ed wani, wada ed idi ya wadas eng-enggana et kanana, “Sak-en di makwani en Alfa ya Omega, laydena ay kalien, sak-en di logian ya panpatinggaan di am-in.”‡

### *Din Damo Ay Naipaila En Juan Ay Kaman Itaw*

<sup>9</sup> Sak-en si Juan ay agi yo ay mamati. Begew sin nakies-esaan tako en Jesus, makilaklak-amak sin pangan-anosan yo sin ligat yo ya sin makiturayan yo en sisya. Din napasamak en sak-en ed idi et kineddangan das sak-en ay maiey ed Patmos ay kitkittoy ay ili ay linilikob di baybay. Say inamag da di begew sin nangikaskasabaak sin kalin Diyos ya sin mait-itdo ay inpaammon Jesus. <sup>10</sup> Sin esa ay Domingo ay agew di Apo, inpaaitaw din Ispiriton Diyos sak-en, et dinngek di napigsa ay kali sin edegak ay kaman bongog di tanggoyob. <sup>11</sup> Kanana, “Isolat mo din ilaem ta ipaw-it mo sin pito ay gimgimong ay wada ed Efeso, Esmirna, Pergamum, Tiatira, Sardis, Filadelfia ya ed Laodicea.”

<sup>12</sup> Idi dinngek din kali ay sana, nanwingiak ta ilaek mo sino di mangalkali en sak-en, et inilak di pito ay balitok ay patangan di silaw. <sup>13</sup> Sin nan-gawaan da, wada di kaman ipogaw di kailaana ay nanbabado si nagayad. Wada abe di balitok ay naibibilko sin pagew na. <sup>14</sup> Din book na et mankilat ay kaman kapes ono andap, ya din mata na et kaman manbidbidang ay apoy. <sup>15</sup> Din siki na et mankonkoniniing ay kaman natanig ay gambang ay naoto si apoy ya nalaslasan, ya din kali na et kaman din ganayaas di nakayang ay manpaypayasapas ay danom.§ <sup>16</sup> Sin makannawan ay takkay na, wada di pito ay talaw ay iin-genana, ya wada abe di matadem ay kampilan ay doway tadem na ay bomalbala sin tepek na. Din ropa na abe et somili ay kaman din agew sin alas dosi.

<sup>17</sup> Sin nangilaak en sisya, natokangak sin sangoanana ay kamanak natey. Ngem inkapay nan sak-en din makannawan ay takkay na yan kanana, “Adi ka emegyat, tan sak-en di omona ya maodi.\* <sup>18</sup> Sak-en di matatago, tan olay mo nateyak, ilam, nay matmatagoak si eng-enggana. Sak-en abe di makaammo sin pese ya wada en sak-en di sosi ay panbokat ed Hades ay kad-an di natey. <sup>19</sup> Isolat mo ngarud din am-in ay ipailak en sik-a ay mapasasamak ed wani ya mapasamak sin tapin di agew. <sup>20</sup> Din pito ay talaw ay inilam sin makannawan ay takkay ko ya din pito ay balitok ay patangan di silaw et adi naipaammo di olog na ed idi, ngem nay ipaammok en sik-a ed wani. Din pito ay talaw et daida di aanghel ay mambantay sin pito ay gimgimong. Din pito abe ay patangan di silaw et daida di pito ay gimgimong.”

\* **1:4-5** Sin libro ay nay, maipidwapidwa din numero ay pito. Din olog di pito sin pannemnem di Judio et kosto kosto, komplito, magay kolang na. † **1:6** Exodo 19:6. ‡ **1:8** Alfa di damo ay letra sin abakadan di Griego. Omega di maodi ay letra. § **1:15** 13-15 - Daniel 7:9,13; 10:5-6. \* **1:17** Isaias 44:6.

## 2

### *Din Pamagbaga Sin Gimong Ed Efeso*

<sup>1</sup> “Din isolat mo sin anghel ay mamananbantay sin gimong ed Efeso et siya na. ‘Sak-en di nananggen sin pito ay talaw sin makannawan ay takkay ko ya manmandan sin nangawaan di pito ay balitok ay patangan di silaw. Siya na di ibagak en dakayo. <sup>2</sup> Ammok di kabibiyag yo. Nagaget kayo ay man-obla para en sak-en ya naanos kayo. Kinonkontra yo abe din it-itdon di lawa ay ipogaw, tan pinadpadas yo di mangmangwani en aapostol da, et inammoan yo ay man-et-etek da. <sup>3</sup> Ammok ay inan-anosan yo di napalpaligatan yo begew en sak-en, et inapasnek yo ay namati ay adi nankeykeyat.

<sup>4</sup> “ ‘Ngem wada di panigaak sin kabibiyag yo et siya na. Adi yo laylayden sak-en ya din gagait yo ay kaman koma din sigod ay layad yo. <sup>5</sup> Masapol ngarud ay nemnemen yo din napigsa ay layad yo sin damo. Manbabawi kayo ta amagen yo kasin din inam-amag yo sin damo. Tan mo adi kayo manbabawi, emeyak issa ta kaanek din patangan di silaw yo sin kosto ay kad-ana. <sup>6</sup> Ngem wada pay di panlaydak en dakayo, tan kaliliget yo din amagen di Nicolaita\* ay kaliliget ko met laeng. <sup>7</sup> Dakayo ay manmannge, nemnemen yo din ibagbagan di Ispiriton Diyos sin gimimong. Di ipogaw ay mangabak si lawa et idawat ko en daida di kalebbengan ay mangan sin lames di kaiw ay mangidawat si biyag ay gomababay ed Paraiso ay kad-an Diyos.’ ”

### *Din Pamagbaga Sin Gimong Ed Esmirna*

<sup>8</sup> Pag nan kanan, “Din isolat mo abe sin anghel ay mamananbantay sin gimong ed Esmirna et siya na. ‘Sak-en di omona ya maodi. Sak-en abe di natey ya natago kasin. Siya na di ibagak en dakayo: <sup>9</sup> Ammok ay mapalpaligatan ya nabibiteg kayo, ngem din katet-ewa na et nabaknang kayo. Ammok abe ay palawlawan di Judio si dakayo, ngem olay mo kankanan da en Judio da, baken dan tet-ewa ay ipogaw Diyos mo adi et gimong di ipogaw Satanas. <sup>10</sup> Adi kayo emegyat sin ligat ay nganngani ay lak-amen yo. Awni man et padasen din Diablo si dakayo, tan ipabalod na di odom en dakayo et mapaligatan kayos sinpo ay agew. Ngem ipapasnek yo ay mamati en sak-en olay mo say kateyan yo, et idawat ko en dakayo di korona ay siya din biyag ay iwed patingga na. <sup>11</sup> Dakayo ay manmannge, nemnemen yo din ibagbagan di Ispiriton Diyos sin gimimong. Di ipogaw ay mangabak si lawa et adi da maitapi ay madosa si eng-enggana sin makwani en maikadwa ay kateyan di ipogaw.’ ”

### *Din Pamagbaga Sin Gimong Ed Pergamum*

<sup>12</sup> Pag nan kanan, “Din isolat mo abe sin anghel ay mamananbantay sin gimong ed Pergamum et siya na. ‘Sak-en di waday matadem ay kampilana ay doway tadem na. Siya na di ibagak en dakayo: <sup>13</sup> Ammok ay panturturayan Satanas di ili yo, ngem olay mo siya di, itoltoloy yo pay dedan ay mamati en sak-en. Ammok abe din naamag en Antipas ay matalek ay nangikaskasabas maipanggep en sak-en. Olay mo pinse das sisya issa ay ilin Satanas, adi yo dinokogan di pammati yo en sak-en.

<sup>14</sup> “ ‘Ngem wada di at-atik ay panigaak sin kabibiyag yo, tan wada da di naitatapi en dakayo ay mangon-onod sin initdon Balaam ed idi. Si Balaam et initdo na en Balak di amagena ta masolisog di Israelita ay manbasol. Isonga inawis nas daida ay makikan si naidaton si sinan didiyos ya manaag si baken dan asawa.† <sup>15</sup> Siya abe en dakayo, tan wada en dakayo di mangon-onod sin it-itdon di Nicolaita. <sup>16</sup> Manbabawi kayo ngarud, tan mo adi kayo manbabawi, adi mabayag yan emeyak issa, et osalek din kampilan ay bomalbala sin tepek ko ay mangobat en daida. <sup>17</sup> Dakayo ay manmannge, nemnemen yo din ibagbagan di Ispiriton Diyos sin gimimong. Di ipogaw ay mangabak si lawa et

\* **2:6** Din makwani en Nicolaita et daida di nan-it-itdo ay mabalin ay tongpalen di Cristiano din laylayden di awak na ya pantapiena di pammati na en Cristo ya ogalin di pagano. † **2:14** Bilbilang 22:5,7; 31:16.



idawtak daida sin naitatabon ay makan ay makwani en manna. Idawtak abe di esa ya esa en daida si mankilat ay bato ay nasolatan si baro ay ngadan, et magay nakin ammo sin ngadan ay sana mo adi din ipogaw ay naidawtana.’ ”

### *Din Pamagbaga Sin Gimong Ed Tiatira*

<sup>18</sup> Pag nan kanan, “Din isolat mo sin anghel ay mamananbantay sin gimong ed Tiatira et siya na. ‘Sak-en din Anak Diyos ay kaman manbidbidang ay apoy di mata na ya kaman nalaslasan ay gambang di koniniing di siki na. Siya na di ibagak en dakayo. <sup>19</sup> Ammok din kabibiyag yo, isonga ammok din layad ya pammati yo, din pansilsilbian yo sin gagait yo ya din anos yo sin maligligatan yo. Ammok abe ay sigesiged di am-amagen yo ed wani mo sin damo.

<sup>20</sup> “ ‘Ngem wada pay dedan di panigaak sin kabibiyag yo, tan inpalpalobos yo din naitatapihan din sana ay babai ay si Jezebel<sup>‡</sup> en dakayo. Kankanana en pankalkalian Diyos sisya, ngem begew sin it-itdo na, aw-awisena din mansilsilbi en sak-en ta daddaagen da di baken dan asawa ya mangmangan das makan ay naidaton sin sinan didiyos. <sup>21</sup> Indawat ko en sisya di waya ay mangibabawi sin basbasol na, ngem sigaana ay pandokogan din panaddaagana si bakenan asawa. <sup>22</sup> Isonga palalo ay pansakitek sisya ta adi makabangon sin katri na. Palalo abe ay paligatek din nakibasbasol en sisya mo adi da ibabawi din naitatapihan da sin kadodogis ay ogali na. <sup>23</sup> Peslek abe din maibilang ay aan-ak na ay mangon-onod en sisya. Et siya din pangammoan di am-in ay gimgimong ay sak-en di dadlon nangaammo si nemnem ya laylayden di ipogaw. Et gon-gonaak di esa ya esa en dakayo ay maibasar sin inam-amag na.

<sup>24</sup> “ ‘Ngem di odom en dakayo issa ed Tiatira et adi kayo nasangsangaw sin lawa ay it-itdo na ay sana ya magay inadal yo sin kanan da en naoneg ay mait-itdo ay napo en Satanas. Isonga adiak tapihan din on-onodan yo ay bilbilin. <sup>25</sup> Ibagak anggoy en dakayo ay itoltoloy yo ay mamati sin tet-ewa enggana ay omaliak. <sup>26</sup> Di ipogaw ay mangabak si lawa ya itoltoloy da ay mangamag si laydek enggana sin kateyan da et iyaak daidas kalebbengan ay makituray en sak-en sin kailili <sup>27</sup> ay kaman din kalebbengan ay indawat Amak en sak-en. Isonga maga di makaabak en daida mo adi et dadlon dan abaken di adi mamigbig sin turay da ay kaman dan gepaken di linang ay banga si landok. <sup>§</sup> <sup>28</sup> Idawat ko abe en daida din batakagan ay maila sin gabis. <sup>29</sup> Dakayo ay manmannge, nemnemen yo din ibagbagan di Ispiriton Diyos sin gimgimong.’ ”

## 3

### *Din Pamagbaga Sin Gimong Ed Sardis*

<sup>1</sup> Pag nan kanan, “Din isolat mo sin anghel ay mamananbantay sin gimong ed Sardis et siya na. ‘Sak-en di kad-an di Ispiriton Diyos ay pito di kaipalaan di panakabalina. Sak-en abe di nananggen sin pito ay talaw. Siya na di ibagak en dakayo. Ammok di kabibiyag yo. Ammok ay sin pangilan di ipogaw, waday naispiritoan ay biyag yo, ngem sin pangilan Diyos, natey kayo. <sup>2</sup> Ibangon yo ngarud ta papigsaen yo din nakapoy ay pammati yo ay nabay-an ay dandani ay mamaga. Tan inammok ay adi omanay di am-amagen yo si kapnekan Diyos ko en dakayo. <sup>3</sup> Nemnemen yo ngarud din nait-itdo en dakayo ed idi ay inawat yo. Masapol ay say pasien yo di dowan yo aben ibabawi din basbasol yo. Tan mo adi yo igibek, somawangak ay kaman mangakew sin labi ay manosa en dakayo, et maetnga kayo, tan adi yo namnamaen din oras ay omaliak.

<sup>4</sup> “ ‘Ngem wada pay di at-atik en dakayo issan ed Sardis ay adi namansaan di bado na. Sin tapin di agew, makikadkadwa da en sak-en ay manbabados mankilat, tan maikari da ay mangiyat sisi. <sup>5</sup> Di ipogaw ay mangabak si lawa et manbabado da abes mankilat ay kaman si daida. Adiak polos kaanen ngadan da sin libro ay naisolatan di

<sup>‡</sup> 2:20 1 Aari 16:31. <sup>§</sup> 2:27 26-27 - Salmo 2:8-9.

ngadngadan di waday biyag na ay iwed patingga na, mo adi et ipodnok ay ipogaw kos daida sin sangoanan Amak ya din aanghel na. <sup>6</sup> Dakayo ay manmannge, nemnemen yo din ibagbagan di Ispiriton Diyos sin gimgimong.’ ”

### *Din Pamagbaga Sin Gimong Ed Filadelfia*

<sup>7</sup> Pag nan kanan, “Din isolat mo abe sin anghel ay mambantay sin gimong ed Filadelfia et siya na. ‘Sak-en di matalek ya nasantoan ay nananggen sin sosin di ilin Ari David. Mo bokatak, maga di makain-eb, et mo in-eb ko, maga di makabokat.\* <sup>8</sup> Ammok di kabibiyag yo. Ammok ay at-atik anggoy di kabaelan yo, ngem olay, tan pinatpati yo din inbagbagak ya adi yo insassaot ay mamati kayo en sak-en. Isonga wada di maiarig si segpan ay binokatak para en dakayo ay maga di makain-eb.

<sup>9</sup> “Dengngen yo na. Waday Judio issa ay kaman dan naitatapi sin gimong Satanas, tan kankanan da en ipogaw Diyos daida, ngem etek da, tan baken tet-ewa. Awni et pilitek daida ay emey mandokmog sin sangoanan yo, et say pangammoan da ay laydelaydek dakayo. <sup>10</sup> Gapo ta pinatpati yo din bilin ko ay anosan yo din mapalpaligatan yo, ilisik dakayo sin kaeegyat ay ligat† ay domateng sin intiro ay lobong ay panligatan di ipogaw ay adi mamati. <sup>11</sup> Dandani di omaliak, isonga ipapasnek yo ay mangonod sin tet-ewa ay mait-itdo ta say maga di mangaan sin korona ay gon-gona yo. <sup>12</sup> Di ipogaw ay mangabak si lawa et panbalinek sisya si tokod sin timplon Diyos, laydena ay kalien, komakaman sidi ay adi polos komakkaan. Malkaak abes sisya sin ngadan Diyos ay Apok ya din ngadan di ilin Diyos ay din baro ay Jerusalem ay bomaba ay mapo en Diyos ed langit. Malkaak abes sisya sin baro ay ngadan ko. <sup>13</sup> Dakayo ay manmannge, nemnemen yo din ibagbagan di Ispiriton Diyos sin gimgimong.’ ”

### *Din Pamagbaga Sin Gimong Ed Laodicea*

<sup>14</sup> Pag nan kanan, “Din isolat mo abe sin anghel ay mambantay sin gimong ed Laodicea et siya na. ‘Sak-en di makwani en Amen, tan matalekak ya tet-ewa am-in di ipaneknek ko ay maipanggep en Diyos. Sak-en abe di poon di am-in ay pinarsua na. Siya na di ibagak en dakayo. <sup>15</sup> Ammok di kabibiyag yo. Maiarig kayos danom ay man-at-atong ay baken man-atong ono mantetek. Laydek ay man-atong ono mantetek kayo koma,‡ <sup>16</sup> ngem gapo ta man-at-atong kayo, itogpak dakayo. <sup>17</sup> Kankanan yo en baknang kayo ay wada en dakayo di am-in ay kasapolan yo, ngem adi yo ammo ay din katet-ewa na et kaseseg-ang kayo. Tan tet-ewa ay nabibiteg kayo, magay bado yo, ya nagodab kayo. <sup>18</sup> Bagbagaak ngarud dakayo ta sak-en di panlakoan yos natanig ay balitok ay nalinisan si apoy ta say tet-ewa ay bomaknang kayo. Sak-en koma abe di panlakoan yos mankilat ay ibado yo ta say adi kayo mabainan begew sin nalalabosan yo. Sak-en koma abe di panlakoan yos agas ay iagas yo sin mata yo ta say makaila kayo kasin.§ <sup>19</sup> Am-in ay laydelaydek et bagbagaak ya sopsoplitek daida, isonga ibabawi yo san basbasol yo ta onodan yos sak-en ay kosto. <sup>20</sup> Dengngen yo, wadaak ay pinmipika sin kad-an di segpan ay mantogtogtog. Mo waday mannge sin kalik et bokatana, senggepak et makiokobak en sisya. <sup>21</sup> Di ipogaw ay mangabak si lawa et iyaak daidas kalebbengan ay makitokdo en sak-en ay manturay ay kaman abe din nakitokdoak en Amak ay manturay

\* **3:7** Isaias 22:22. † **3:10** Di esa abe ay kaiologana sin Griego et: ...ayowanak dakayo sin kaeegyat ay ligat... ‡ **3:15** Wada di doway ay ili ay nadamdag begew sin danom da ay asag-en ed Laodicea. Ed Hierapolis, wada di obbog ay bemelaan di man-atong ay danom ay en nan-am-amsan di ipogaw ta makaan sakit da. Ed Colosas abe, wada di mantetek ay danom ay mam-is. Ngem din danom da ed Laodicea et man-at-atong ya mantab-ang. Isonga kanan di odom en din layden Cristo ay kalien et waday silbin di man-atong ay danom ya siya abe sin mantetek, ngem din man-at-atong ay danom ay kaiarigan din gimong ed Laodicea et magay silbi na. § **3:18** Maibagay din inbagan Apo Jesus en daida ed Laodicea, tan nadamdag da begew sin ad-ado ay bangko ya nigosyo da, din napintas ay lopot ay mangitit ay inam-amag da, ya din agas di mata ay inlakoan das odom ay il-ili.

sin nangabakak en Satanas. <sup>22</sup> Dakayo ay manmannge, nemnemen yo din ibagbagan di Ispiriton Diyos sin gimgimong.’ ”

## 4

### *Din Kadayawan Diyos Ed Langit*

<sup>1</sup> Nakdeng pay di, tinamang ko di segpan ay nabobokatan ed langit. Dinngek abe din kali ay sigod ay dindinngek ay kaman bongog di tanggoyob ay mangmangwani en sak-en, “Omali kas na ta ipailak en sik-a din maamag sin tapin di agew.” <sup>2</sup> Inmipaiitaw din Ispiriton Diyos ay dagos, et inilak di tronon di ari ay waday tinmotokdo. <sup>3</sup> Din kailaan di tinmotokdo et mankonkoniniing ay kaman din nabanol ay bato ay makwani en haspe ya karnelia. Wada di badkong ay maata di kolor na ay kaman din bato ay makwani en esmeralda ay nangaabonga sin trono.\* <sup>4</sup> Sin nanlikdan di trono, wada abe di downpo ya opat ay kasin trono ay tinmotokdoan di downpo ya opat ay pangolo. Nanbabado das mankilat ya nankokorona das balitok. <sup>5</sup> Wada abe di silsilap di kimat ya managood ay kido ay mapmapo sin naigagawa ay trono, et sin sangoanana, wada di pito ay manbidbidang ay silaw ay siya din kaiarigan di Ispiriton Diyos ay pito di kaipailaan di panakabalina. <sup>6</sup> Sin sinagang na abe, wada di kaman baybay ay naamag si salming ay mankoniniing ay kaman kristal.†

Sin sag-en di opat ay benget di trono, wada di opat ay matmatago ay parsua ay pag namataan di awak da, sin sango ya siya abe sin edeg da. <sup>7</sup> Din omona ay parsua et kaman layon di kailaana, din maikadwa et kaman baka, din maikatlo et waday ropa na ay kaman ropan di ipogaw, ya din maikap-at et kaman dakdake ay titit ay mantaytayaw. <sup>8</sup> Napapayakan da am-in si sag-eenem, ya pag namataan di awak da, pati sin dallem di payak da.‡ Inagew ya linabi, adi da isalsaldeng ay mankankanta ay mangmangwani, “Dadlon nasantoan si Apo Diyos ay manakabalin amin. Maga polos di makaiso sin kinasanto na. Wadas sisya ed idi, wada ed wani ya wada abe si eng-enggana.”§

<sup>9</sup> Dana ay opat ay matmatago ay parsua et bigbigen da din kinapateg di tinmotokdo sin trono ay matmatago si eng-enggana, et daydayawen ya pan-iy-iyamanan das sisya. Et mo say am-amagen da di, <sup>10</sup> mandokmog ay manyakog-ong din downpo ya opat ay pangolo sin sangoanan di tinmotokdo sin trono ay matmatago si eng-enggana, et dayawen da abes sisya. Ipayag da abe din korona da sin sangoanana ay mangmangwani,

<sup>11</sup> “Sik-a ay Apo ya Diyos mi, maikari ka ay bigbigen mi din kinapateg ya panakabalin mo ya dayawen mis sik-a. Tan sik-a di namarsua sin am-in. Begew sin panggep mo, naparsua ya matmatago da.”

## 5

### *Din Nalopilop Ay Papil Ya Din Karnero*

<sup>1</sup> Pagak ilaen ay din tinmotokdo ay manturay et waday iin-genana ay papil ay nalopilop sin makannawan ay takkay na. Nasosolatan din nanbinas-il ya waday pito ay kaman istam ay naiipket sin benget na ta adi maoklag.\* <sup>2</sup> Inilak abe di anghel ay dakdake di panakabalina ay nangipigsa sin kali na ay nangwani, “Sino di maikari ay manglatlat en dana ay naiipket ta oklagena din papil?” <sup>3</sup> Ngem olay ed langit ono sin daga ono ed dallem ay kad-an di natey, maga polos di waday kalebbengana ay mangoklag ta basaena. <sup>4</sup> Isonga inmogaogaak, tan magay dinatnganas maikari ay mangoklag. <sup>5</sup> Ngem pag kanan di esa sin dooy ay papangolo en sak-en, “Adi ka manog-oga, tan ilam, wada di makwani en Layon ay polin Juda ya polin aben David. Inabak nas Satanas, isonga kabaelana ay latlaten din naiipket sin papil ta oklagena.”†

\* 4:3 2-3 - Ezekiel 1:26-28. † 4:6 Ezekiel 1:22. ‡ 4:8 6-8 - Ezekiel 1:5-6,10-18. § 4:8 Isaias 6:2-3. \* 5:1 Ezekiel 2:9-10. † 5:5 Genesis 49:9; Isaias 11:1,10.

<sup>6</sup> Sin nangwanianas di, inilak di anak di karnero ay pinmipika sin gawan di opat ay matmatago ay parsua ya din papangolo ay nanlilikob sin trono. Din kailaan di Karnero et kaman waday namse en sisya ed idi. Pito di sakngod na ya pito abey mata na ay siya din Ispiriton Diyos ay pito di kaipailaan di panakabalina ay naibaa sin am-in ay ili isnan lobong. <sup>7</sup> Inmey din Karnero sin kad-an di trono, et ina na din nalopilop ay papil sin makannawan ay takkay di tinmotokdo. <sup>8</sup> Sin nangaanas di, din opat ay parsua ya din dowanpo ya opat ay pangolo et nandokmog da ay nanyakog-ong sin sangoanana. Esa ya esa ay pangolo et waday arpa ay kotkotingtingena ya waday iin-genana ay balitok ay mallokong ay napnos insinso ay siya din karkararag di ipogaw Diyos. <sup>9</sup> Nankanta das baro ay kanta ay nangwani,

“Sik-a di maikari ay manga sin nalopilop ay papil ya manglatlat sin naiipket sin benget na. Tan pinse daka, et din dadam di inbayad mo sin kaipoipogaw ta waday manbalin si ipogaw Diyos ay mapo sin am-in ay nasyon ya grupo ay nankinalasi di kali ya kodil da. <sup>10</sup> Intapim daida sin panturayam ta makituray da en sik-a sin daga ya nanbalinem abe si daida si papadi ay mansilsilbi en Diyos tako.”

<sup>11</sup> Nantamagak kasin et dinngek di kalin di kalibolibo ay aanghel ay adi kabilang ay nanlilikob sin trono ya sin matmatago ay parparsua ya papangolo. <sup>12</sup> Inpigma dan kali da ay nangikankanta,

“Din Karnero ay pinse da et maikari ay mabigbig di kalebbengana, kinabaknang na, sirib na ya panakabalina. Sisya koma di madayaw ya maipangato ya mait-ek.”

<sup>13</sup> Pagak dengngen din pankankantaan di am-in ay wada ed langit ya sin daga, sin dallem ay kad-an di natey ya sin baybay. Am-in di pinarsuan Diyos et mankankanta da ay mangmangwani,

“Sapay koma ta din tinmotokdo sin trono ya din Karnero et mait-ek, maipangato, madayaw ya mabigbig di kalebbengan da si eng-enggana.”

<sup>14</sup> Pag songbatan din opat ay matmatago ay parsua yan kanan da, “Amen.” Dowan pay din papangolo et kasin dan nandokmog ay nanyakog-ong ay nanaydayaw sin Karnero ya sin tinmotokdo sin trono.

## 6

### *Din Nalatlatan Di Nangon-ona Ay Enem Ay Naiipket*

<sup>1</sup> Idi manboyboyaak, linatlat din Karnero din omona sin pito ay naiipket, et waday dinngek ay kaman kido ay kalin di esa sin opat ay matmatago ay parsua. “Omali ka et,” kanana. <sup>2</sup> Sin nangisisin-engak, kasawang di mankilat ay kabayo ay waday nangakabayo ay nananggen si pana ay igobat na. Naidawtan sisya si korona et kadipos ay mangaabak si kaibaw na.

<sup>3</sup> Pag latlaten din Karnero din maikadwa ay naiipket, et dinngek din kalin di maikadwa ay parsua ay nangwani, “Omali ka et.” <sup>4</sup> Kabala et di esa ay kabayo ay manbalanga, et din nangakabayo et naiyaan si kalebbengan ay mangaan si talna isnan daga ta say man-gogobat ya man-asipse di ipogaw. Naidawtan abe si ando ay kampilan.

<sup>5</sup> Pag latlaten din Karnero din maikatlo ay naiipket, et dinngek din kalin di maikatlo ay parsua. “Omali ka et,” kanana. Idi manboyboyaak, kabala et di mangitit ay kabayo. Din nangakabayo en sisya et waday iin-genana ay timbangan. <sup>6</sup> Asiak dinnge di kali ay kaman napo sin gawan di opat ay matmatago ay parsua ay kanana, “Awni et waday betil sin daga, isonga din lagbon di ipogaw si sin-agew et omanay anggoy si kanena sin doy ay agew, begas ono tigi. Ngem adi yo panginnginaen di mantika ya danom di obas.”

<sup>7</sup> Pag latlaten din Karnero din maikap-at ay naiipket, et dinngek din kalin di maikap-at ay parsua ay nangwani, “Omali ka et.” <sup>8</sup> Il-ilaek pay et kabala di inmoopsat ay kabayo. Din nangakabayo et manngadan si Pese ya din kakoyog na ay omon-onod et si Hades ay

siya din kad-an di natey. Naidawtan das kalebbengan ay mamse si inkap-at di ipogaw isnan daga babaen si gobat, betil, sakit ya atap ay aanimal.

<sup>9</sup> Pag latlaten din Karnero din maikalima ay naiipket, et inilak sin dallem di altar di ab-abiik di kaipoipogaw ay napsenapse begew sin nangon-onodan da sin kalin Diyos ya sin mait-itdo ay inpaammon Apo Jesus. <sup>10</sup> Kanan da ay nangibogaw, “Ay Apo Diyos ay manakabalin, nasantoan ya matalek ka. Ay daetan pay di kabayag di pangokomam sin adi mamati ay kaipoipogaw sin daga ta man-ibaes ka sin namse en dakami?” <sup>11</sup> Et pag dan naidawtan am-in si nagayad ay bado ay mankilat ya naibaga en daida ay man-ibbay da pay si sinkaattikan enggan komosto di bilang di aag-i da ay mansilsilbi en Diyos ay peslen di ipogaw ay kaman abe din napsean da.

<sup>12</sup> Idi nanboyboyaak pay, linatlat din Karnero din maikan-em ay naiipket. Wada et di napigsapigsa ay yegyeg. Binmolinget din agew ay kaman mangitit ay lopot ya din bowan et dinmalangdang ay kaman dada. <sup>13</sup> Natekdag abe din katalatalaw sin daga ay kaman din daan maom ay lames di kaiw ay pogopogen di napigsa ay pewek. <sup>14</sup> Dowan aben nandowa din daya et nalopilop ay kaman nalopilop ay papil ay mabitlag ya magodwa ay malopilop kasin. Am-in abe din dontog ya din il-ili ay linilikob di baybay et naikiweg ya naidenden da. <sup>15</sup> Inmegyat et am-in di ipogaw isnan daga. Din aari ya odom ay tuturay, din papangolon di sosoldado, din babaknang ya odom ay waday kabaelan da, ya am-in di odom ay ipogaw ay bag-en ono baken bag-en et en da am-in nantabon sin liliyang ya sin kad-an di batbato sin dontog. <sup>16</sup> Et nan-adawag da ay nangnangwani sin dontog ya batbato, “Magday kayo paabe ta tab-okan yos dakami\* ta say adi omila din tinmotokdo sin trono ya mailisian mi din kaeegyat ay panosaan din Karnero en dakami. <sup>17</sup> Tan dinmateng din nabanol ay agew ay panosaan da en dakami ya adi kami polos makaitoled!”

## 7

### *Din Sin-gasot Ya Opatapolo Ya Opat Ay Libo Ay Ipogaw Diyos*

<sup>1</sup> Idi nakdeng di, inilak di opat ay anghel ay pinmipika sin opat ay solin di lobong ay mangipapakod sin opat ay kapoan di dagem ta say adi polos madageman din daga ya baybay ya siya abe sin kakaiw. <sup>2</sup> Daida di inyaan Diyos si panakabalin ay manadael sin daga ya sin baybay. Asiak et inila di esa ay anghel ay komaykayang ay napo sin belaan di agew ay nananggen sin malkan di matmatago ay Diyos. Binogawana din opat ay iib-a na ay anghel yan kanana, <sup>3</sup> “Adi yo dadaelen din daga ono din baybay ono din kakaiw enggana ay malkaan mi din kikitong di mansilsilbi en Diyos tako.” <sup>4</sup> Idi nakdeng ay minalkaan da, naibaga en sak-en din kabibilang di ipogaw ay namalkaan: sin-gasot ya opatapolo ya opat ay libo da am-in ay naipoli sin sinpo ya doway ay an-ak Israel. <sup>5-8</sup> Sagsisinpo ya doway ay libo di namalkaan ay naipoli sin tonggal esa ay anak Israel ay da Juda, Ruben, Gad, Aser, Naftali, Manasses, Simeon, Levi, Issakar, Zebulun, Jose ya si Benjamin.

### *Din Adi Kabilang Ay Ipogaw Ay Nanbabados Mankilat*

<sup>9</sup> Idi nantamangak kasin, kambaw et wada di ad-ado ay ipogaw ay adi kabilang ay napo sin am-in ay nasyon ya grupo ay nankinalasi di kali da ya kodil da. Pinmipika da sin sangoanan di trono ya din Karnero. Nanbabado das nagayad ay mankilat ya waday iin-gegan da ay tobon di kaiw ay palma ay kailaan di ragsak da. <sup>10</sup> Inpigsan da kali da ay nangwani, “Din nangisalakan en datako et din Diyos tako ay tinmotokdo sin trono ya din Karnero.” <sup>11</sup> Wada abe din am-in ay aanghel ay nanlilikob sin trono ya din papangolo ya din opat ay matmatago ay parsua. Nandokmog da ay nanyakog-ong sin sangoanan di trono, et dinaydayaw das Diyos <sup>12</sup> ay nangwani, “Siya sa a! Man-iyaman tako en Diyos ay

\* 6:16 Hosea 10:8; Lucas 23:29-30.



pansilsilbian tako. Bigbigen tako din sirib, kalebbengan ya panakabalina. Sapay koma ta madayaw ya maipangato ya mait-ek sisyas eng-enggana. Amen!”

<sup>13</sup> Pinoot di esa ay pangolo en sak-en, “Ay ammom mo sino dana ay nanbabados mankilat ya din napoan da?”

<sup>14</sup> “Adiak ammo, apo. Ibagam kod,” kanak ay sinombat.

Pag nan kanan, “Da naey di nakilak-am sin timpon di kaeegyat ay ligat. Linabaan dan bado da sin dadan di Karnero ta komilat. <sup>15</sup> Siya di din gapo ay wada da sin sangoanan di tronon Diyos ay mansilsilbi en sisya sin timplo na si inagew ya linabi. Din wada sin trono et kanayon ay kadmadaena ya banbantayanas daida. <sup>16</sup> Adi da polos kasin madagdagaangan ya mabigbigaw, ya adi da aben masgitan ono mapaligatan si odom ay man-atong. <sup>17</sup> Tan din Karnero ay wada sin kad-an di trono et sisya di mangay-ayowan en daida, et ipangpango nas daida sin kad-an di ob-obbog ay bemelaan di danom ay mangidawat si biyag.\* Ponasan aben Diyos di lowa da, et adi da kasin man-og-oga.”

## 8

### *Din Nalatlatan Di Maikapito Ay Naiipket*

<sup>1</sup> Idi linatlat din Karnero din maikapito ay naiipket sin nalopilop ay papil, ginmiginek din am-in ay wada ed langit si kagodwan di oras. <sup>2</sup> Asiak inila din pito ay anghel ay pinmipika sin sangoanan Diyos. Naidawtan das pito ay tanggoyob.

### *Din Balitok Ay Naipapay-an Di Insinso*

<sup>3</sup> Pag somawang di esa ay anghel ay nananggen si balitok ay naipapay-an di insinso, et en pinmipika sin kad-an di nabalitokan ay altar ay nangipoppooan das insinso ay wada sin sangoanan di trono. Naidawtan sisyas ad-ado ay insinso ta maitapi sin karkararag di am-in ay ipogaw Diyos ay maipoo sin altar ay maidaton en Diyos. <sup>4</sup> Et din asok di insinso ay napo sin ineegnan di anghel et naitapi sin karkararag di ipogaw Diyos ay komaykayang sin sangoanana. <sup>5</sup> Pag kasin alaen din anghel din naipapay-an di insinso et pinno nas man-ganggangab ay oling ay napo sin altar, et initpig na sin daga. Pag et man-agodood di kido ya mankimat dowan aben manyegyeg.

### *Din Nangon-ona Ay Enem Ay Tanggoyob*

<sup>6</sup> Pag et mansagana din doypito ay anghel ay mananggoyob. <sup>7</sup> Nananggoyob din damo ay anghel, et pag nan-odan si dalalo ya apoy ay nalalaokan si dada. Et napoan di inkatlon di daga, pati din inkatlon di kakaiw ya am-in ay lologam.

<sup>8</sup> Pag aben mananggoyob din maikadwa ay anghel, et wada di kaman dakdake ay dontog ay manbidbidang ay naitpig sin baybay. Di inkatlon di baybay et nanbalin si dada, <sup>9</sup> et natey di inkatlon di matmatagos di. Nadadael abe di inkatlon di bapapor.

<sup>10</sup> Asi pag mananggoyob din maikatlo ay anghel, et wada di dakdake ay talaw ay manbidbidang ay natekdag ay napod daya et naiponta sin inkatlon di ginawang ya obbog. <sup>11</sup> Din talaw ay doypito et manngadan si Manpait. Di nantongpalana et pinmait din inkatlon di danom, et ad-adoyp natey ay ipogaw begew sin nangin-inoman das di.

<sup>12</sup> Pag aben mananggoyob din maikap-at ay anghel, et napontaan di inkatlon di agew, bowan ya tatalaw ta say namaga di inkatlon di silaw da. Isonga manbolinget sin inkatlon di kaagawan ya inkatlon di labi.

<sup>13</sup> Intoltoloy ko ay nanboyboya, et inilak di dakdake ay titit ay mantaytayaw ed kayang. Inpigsa nay kali na ay nangwani, “Inayan! Inayan! Inayan di mapasamak sin am-in ay manbeey sin daga mo mananggoyob din tolo pay ay anghel.”

\* 7:17 Salmo 23:1-2.

## 9

<sup>1</sup> Pag et mananggoyob din maikalima ay anghel, et inilak di talaw ay enggay natekdag sin daga. Din talaw ay nay et naidawtan sin sosi ay panbokat sin balodan ed dallem.

<sup>2</sup> Idi binokatana, kabala di naposkol ay asok ay kaman din napo sin dakdake ay poo. Sinalinana din agew, et binmolinget din daga. <sup>3</sup> Wada abe di dodon ay nakibala sin asok, et binmaba da sin daga. Naidawtan das kabaelan ay manted ay kaman gayaman.

<sup>4</sup> Naibilin en daida ay adi da dadaelen din logam ya kakaiw ya odom ay molmola, mo adi et sakitan da anggoy di kaipoipogaw ay adi namalkaan di kitong da sin malkan Diyos.

<sup>5</sup> Ngem adi da napalobosan ay mamse sin ipogaw ay doy mo adi et paligaten da anggoy si lima ay bowan. Din kapigsan di sakit di ted da et kaman din palalo ay sakit ay namosen di ipogaw ay tinedan di dakdake ay gayaman. <sup>6</sup> Isonga sin oneg di lima ay bowan ay doy, laydelayden dadi ay ipogaw ay matey koma ya padasen da ay mansegang, ngem adi da kabaelan.

<sup>7</sup> Din kailaan di dodon ay doy et kaman dan kabayo ay nakasagana ay en makigobat. Nankakalogong das kaman korona ay balitok, ya din ropa da et kaman ropan di ipogaw.

<sup>8</sup> Din book da et anaanando ay kaman book di babai, ya din bab-a da et kaman bab-an di layon. <sup>9</sup> Nasasalidaan di pagew da si kaman salida ay landok. Din ganges di payak da et kaman din danegdeg di ad-ado ay kalisa ay goygoyoden di kabayo ay managtagtag ay en makigobat. <sup>10</sup> Waday ted da sin iko da ay kaman ted di gayaman ay say kad-an di kabaelan da ay mamaligat si ipogaw si lima ay bowan. <sup>11</sup> Din ari da et magay odom mo adi din anghel ay makaammo sin balodan ed dallem. Din ngadana sin kalin di Hebreo et Abaddon ya sin kalin di Griego et Apolyon, laydena ay kalien, Manaddadael.

<sup>12</sup> Siya na di nakdenggan di omona ay kaeegyat ay ligat. Wada pay di doway ay domateng.

<sup>13</sup> Pag mananggoyob din maikan-em ay anghel, et dinngek di kali ay napo sin opat ay solin di nabalitokan ay altar ay wada sin sangoanan Diyos. <sup>14</sup> Kanan din kali ay sana sin maikan-em ay anghel, "En ka obaden din opat ay anghel ay nababalod sin kad-an di dakdake ay ginawang ay Eufrates." <sup>15</sup> Et ena inobad, tan naisagana da para sin nay ay kostokosto ay tawen ya bowan, agew ya oras ay en da pamsean sin inkatlon di kaipoipogaw. <sup>16</sup> Naibaga en sak-en ay din kabibilang di sosoldado da ay nangakabayo et doway gasot ay milyon. <sup>17</sup> Kaman nina di kailaan di kabayo ya nangakabayo ay naipaila en sak-en ay kaman iitaw. Din salidan di pagew da et tolo di kolor na. Wada di mandalangdang ay kaman apoy, asul ay kaman din nabanol ay bato ay makwani en safiro, ya mansila ay kaman asufre. Mo din kabayo et kaman toktok di layon di toktok da, ya bomalbala di apoy, asok ya asufre sin tepek da. <sup>18</sup> Natey di inkatlon di kaipoipogaw begew en da dooy ay pomse ay siya din apoy, asok ya asufre ay binmalbala sin tepek da. <sup>19</sup> Tan din kabaelan din doy ay kabayo ay pomse et wada sin tepek da. Inosal da abe din iko da ay manakit si ipogaw, tan natoktokan di iko da ay kaman toktok di eweg.

<sup>20</sup> Ngem din ipogaw ay nabay-an ay adi natey sin doy ay ligat et adi da pay dinokogan din nanaydayawan da sin aanito ya sin sinan didiyos ay inam-amag da ay mismo ay balitok, palata, gambang, bato ya kaiw. Adi da dinokogan olay mo din didiyos da ay doy et adi da makaila, makadnge ya makadan. <sup>21</sup> Adi da aben inbabawi din odom ay lawa ay inam-amag da ay kaman din namnamsean das ipogaw, nansapsapoan ya nanggenggeyan da, nanaddaagan das baken dan asawa, ya nangak-akewan da.

## 10

### *Din Anghel Ya Din Kitkittyoy Ay Papil*

<sup>1</sup> Pagak ilaen di esa ay manakabalin ay anghel ay bomabbaba ay napod langit. Nagagaleyan si liboo ya nanbebedbed si abonga. Din ropa na et somili ay kaman din

agew ya din siki na et kaman manbidbidang ay apoy. <sup>2</sup> Nan-eegen si kitkittoy ay papil ay naoklag. Din makannawan ay siki na et in-gagatina sin baybay ya din kannigid sin lota. <sup>3</sup> Nanbogaw ay kaman din napigsa ay ngaed di layon, et nan-agodood din pito ay kido ay sinombat. <sup>4</sup> Inlogik koma ay mangisolat sin kanan di kido, ngem wada et di kali ay dinngek ay napo ed langit ay nangwani, “Igiginek mo, adim isolsolat din inbagan di pito ay kido.”

<sup>5</sup> Asi et din doy ay anghel ay pinmipika sin baybay ya sin daga et inkayang na din makannawan ay takkay na, <sup>6</sup> et nansapata en Diyos ay matmatagos eng-enggana ay namarsua ed daya ya sin daga ya sin baybay ya sin am-in ay wadas di. Kanana, “Awni man et adi kasin mataktak di mapasamak, <sup>7</sup> tan mo mananggoyob din maikapito ay anghel, matongpal din planon Diyos ay inbaga na sin mamadto ay nansilsilbi en sisya ngem adi na inpaammo sin odom ay ipogaw.”

<sup>8</sup> Asiak kasin dinnged din doy ay kali ay napod langit ay nangwani, “En ka alaen din naoklag ay papil ay iin-gegan din anghel ay sana ay pinmipika sin baybay ya sin daga.” <sup>9</sup> Isonga inmasag-enak sin anghel yan kindaw ko din kitkittoy ay papil. “Alaem ta kanem,” kanana. “Din katamtamana et mam-is ay kaman danom di anig, ngem awni et mansakit eges mo sin pait na.” <sup>10</sup> Isonga inak din papil ay sana ay iin-gegan et kinan ko. Et tet-ewa ay mam-is di katamtamana ay kaman danom di anig, ngem sin nangokmonak, nansakit eges ko. <sup>11</sup> Pag waday nangibaga en sak-en, “Masapol ay kasin kan ipadto di mapasamak sin ad-ado ay nasyon ya grupon di ipogaw ay nankinalasi di kali da ya sin aari da.”

## 11

### *Din Dowa Ay Nangipaneknek Sin Inpaammon Diyos*

<sup>1</sup> Asi pag waday nangidawat en sak-en si pa-o ay panlokod. Kanana en sak-en, “En ka lokoden din timplon Diyos ya din altar, et bilangem din manaydayaw en sisya sin timplo. <sup>2</sup> Ngem bay-am din diya, adi ka loklokoden, tan naipolang sin Gentil ay mangipakadodogis sin nasantoan ay ili si opatapolo ya dowa ay bowan. <sup>3</sup> Ngem wada abe di dowa ay tistigok ay ibaak ay en mangipaneknek si maipanggep en sak-en. Manbabado das sako,\* et ibaga da din ipaammok en daida sin oneg di sinlibo ya doway gasot ya enemapolo ay agew ay doy.”

<sup>4</sup> Din dowa ay tistigo ay nay et daida din naiarig ed nabaon si doway kaiw ay olivo ya din doway patangan di silaw ay wada sin sangoanan Diyos ay Apon di kaipoipogaw isnan daga. <sup>5</sup> Mo waday mamadas ay manakit en daida, bomala di apoy sin tepek da ay mamoo en sisya, et siya din kateyan di am-in ay kaibaw da ay mamadas ay manakit en daida. <sup>6</sup> Naiyaan da abes kabaelan ay mangipatiyagew ta adi polos man-od-odan sin timpo ay pangibagbagaan da sin inpaammon Diyos en daida. Wada abey kabaelan da ay mangipabalin si obbog si dada ya kabaelan da abe ay mamaligat si kaipoipogaw isnan daga si kompormi ay ligat olay mamin piga, mo say layden da.

<sup>7</sup> Mo makdeng di pangibagbagaan da sin inpaammon Diyos en daida, bomala din kaeegyat ay animal ay mapo sin balodan ed dallem et makigobat en daida. Abakena ya peslenas daida† <sup>8-9</sup> sin kalsadan di dakdake ay ili ay nailansaan met laeng din Apo da sin krus. Din ili ay doy et maiarig ed Sodoma ya ed Egipto. Pag emey di toloy agew ya kagodwa yan mabaybay-an di awak da sin kalsada ay doy dowan pay boyboyaen di ipogaw ay napo sin am-in ay nasyon ya grupo ay nankinalasi di kali da ya kodil da. Et adi da itolok ay maiponpon da. <sup>10</sup> Di adi mamati ay manbeey isnan daga et manfiesta da ya

\* **11:3** Din mamadto ed idi et nanbabado das sako, namnamed din mamadto ay nangikaskasaba ay masapol ay manbabawi. Din sako abe et sinyal di sakit di nemnem. † **11:7** Daniel 7:7,21.

man-asidawat das rigalo begew sin ragsak da sin nateyan da, tan palalo ay pinalpaligat din nay dowa ay pankalkalian Diyos si daida.

<sup>11</sup> Ngem idi nakdeng din tolo ay agew ya kagodwa, sinenggep en daida di leng-ag ay mangidawat si biyag ay napo en Diyos, et binmangon da. Et peteg ay emegyat din nangila. <sup>12</sup> Pag wada di napigsa ay kali ay napo ed langit ay dinnge da ay dowa ay nangwani, “Omali kayos na.” Et nakingato da sin liboo ay emey ed langit ay iilaen din kaibaw da. <sup>13</sup> Pag et wada di napigsa ay yegyeg ay namakas sin inkasinpon din doy ay siyodad, et natey di pito ay libo ay ipogaw. Palaloy egyat di nabay-an, et dinaydayaw da din kinangaton Diyos ay wada ed langit.

<sup>14</sup> Siya na di nakdenggan di maikadwa ay kaeegyat ay ligat.‡ Wada pay di esa ay dandani ay domateng.

### *Din Maikapito Ay Tanggoyob*

<sup>15</sup> Pag mananggoyob din maikapito ay anghel, et wada di napigsa ay kali ed langit ay nangwani, “Manlogi ed wani, magay odom si manturay isnan lobong mo baken anggoy din Apo tako ya din Messias ay inbaa na, et manturay si eng-enggana.” <sup>16</sup> Asi pag din dowanpo ya opat ay pangolo ay tinmotokdo sin sangoanan Diyos et nandokmog da ay nanyakog-ong yan dinaydayaw das sisya <sup>17</sup> ay nangwani,

“Apo Diyos ay manakabalin am-in ay wada ed idi ya siya abe ed wani, man-iyaman kami en sik-a, tan nay inpailam din nakaskasdaaw ay panakabalin mo et inlogim ay manturay. <sup>18</sup> Din mangonkontra en sik-a et palaloy bonget da, ngem ed wani, dinmateng din timpo ay panosaam en daida, tan ed wani din timpo ay pangokomam sin am-in ay natey. Ed wani abe din timpo ay gon-gonaam din mamadto ay mansilsilbi en sik-a ya din am-in ay ipogaw mo ay mamatpateg en sik-a ay din nababa ya siya abe din nangato, dowan ka pay dadaelen di nanaddadael si ipogaw isnan daga.”§

<sup>19</sup> Pag mabokatan din timplon Diyos ed langit, et mailas di din Baol di Tolagan. Pag et wada di kaeegyat ay kimat ya man-agodood ay kido dowan aben manyegyeg ya napigsa di dalalo.

## 12

### *Din Babai Ya Din Dragon*

<sup>1</sup> Idi nakdeng di, wada di nakaskasdaaw ay sinyal ay maila ed daya. Tan nanpaila di babai ay pinmipika sin bowan ay nanbabados somili ay kaman din agew. Nankokoronas sinpo ya dowa ay talaw. <sup>2</sup> Makaan-anak sisya, isonga nan-ad-adawag begew sin sakit di eges na.

<sup>3</sup> Wada abe di esa ay sinyal, tan nanpaila di dakdake ay dragon\* ay manbalanga ay pito di toktok na ay nakokoronaan da am-in ya sinpo di sakngod na. <sup>4</sup> Sineppat na di inkatlon di talaw sin iko na et naitpig da sin daga. Pag emey sin sangoanan di babai ay makaan-anak ta say kanena koma din anak na mo bomala. <sup>5</sup> Ngem sin binmalaan di anak na ay lalaki, waday nangamdot ay nangiey en sisya sin kad-an Diyos ay manturturay, tan awni et sisya di mangituray sin am-in ay nasyon, et dadlonan abaken di adi mamigbig sin turay na. <sup>6</sup> Mo din babai pay et linmayaw ay emey sin lugar ay magay man-ili ay

‡ **11:14** Din maikadwa ay kaeegyat ay ligat et din kabayo ay naibaga sin 9:13-21. Din maipanggep sin kitkittoy ay papil ya sin dowa ay tistigo (10:1-11:13) et baken tapin di maikadwa ay kaeegyat ay ligat. § **11:18** 15-18 - Din linaon din versikulo ay nay et kasinopan di daan mapasamak ay maibagbaga sin omon-onod ay kapitolo. Sin pannemnem di papangolo et enggay dinmateng din timpo ay ibagbaga nas na, tan sigurado ay matongpal. \* **12:3** Daniel 7:7. Ad-adoy dad-at di ipogaw ed nabaon ay maipanggep si kanan da en dragon. Sin pannemnem di taga-Egipto, din dragon et kaman dakdake ay bowaya. Sin pannemnem aben di odom, kaman andoando ay boklat ay nanbeey sin baybay. Din kaiarigana et si Satanas.

insaganan Diyos ay panteteana ta say maay-ayowan an sidi si sinlibo ya doway gasot ya enemapolo ay agew.

<sup>7</sup> Asi pag bomtak di gobat ed langit, tan si Miguel ya din gagait na ay aanghel et ginobat da din dragon ya din gagait na abe ay aanghel. <sup>8</sup> Et naabak din dragon ya din gagait na, isonga pinakaan das daida ed langit, tan magay kalebbengan da ay mantetee pay sidi. <sup>9</sup> Isonga naitpig sisya ya din aanghel na sin daga. Din dakdake ay dragon ay doy et sisya met laeng di nanpaila ay eweg ed nabaon ay manngadan abe si Satanas ono din Diablo. Sisya di nangiet-etek sin kaipoipogaw isnan lobong.

<sup>10</sup> Asiak dinnge di napigsa ay kali ed langit ay nangwani, “Nay ay natongpal din nangisalakanan Diyos si kaipoipogaw. Dinmateng din agew ay pangipailaana sin panakabalina ay manturay ya siya abe ay inpailan din Messias ay inbaa na din kalebbengana. Tan din nangipabpabasol sin aag-i tako sin sangoanan Diyos si inagew ya linabi et naitpig sisya ay napod langit. <sup>11</sup> Inabak din aag-i tako begew sin dadan di Karnero ay inmayos sin nateyana ya begew abe sin siged ay damag ay pinaneknekan da. Adi da nankeykeyat mo adi et intoltoloy da ay namati olay mo say kateyan da. <sup>12</sup> Isonga manragsak kayo am-in ay wada ed langit, ngem kaseseg-ang kayo ay wada sin daga ya sin baybay, tan binmaba si Satanas sin kad-an yo, et palaloy bonget na, tan ammo na ay at-atik di nabay-an ay timpo na.”

<sup>13</sup> Idi naammoan din dragon ay naitpig sisya sin daga, kaatiko sin babai ay nangianak sin lalaki ay doy. <sup>14</sup> Ngem naidawtan din babai si doway ay payak di dakdake ay titit ta say makatayaw sin lugar ay magay man-ili ay insaganan Diyos ay panteteanas tolo ay tawen ya kagodwa† ta isdi di maay-ayowanana ya mailisiana sin eweg ay siya din dragon. <sup>15</sup> Isonga intogpan din eweg di ad-ado ay danom ay kaman ginawang ta say maianod koma din babai. <sup>16</sup> Asi et binadangan din lota din babai ay sana, tan nantekang et kamanan inokmon din danom ay intogpan din dragon. <sup>17</sup> Pag palaloy bonget din dragon sin babai, et inmey nakigobat sin odom ay aan-ak na ay siya da din mangon-onod sin bilbilin Diyos ya sin mait-itdo ay inpaammon Jesus. <sup>18</sup> En pinmika sin benget di baybay.

## 13

### *Din Kaeegyat Ay Animal Ay Napo Sin Baybay*

<sup>1</sup> Pagak ilaen di kaeegyat ay animal ay bomalbala sin baybay. Pito di toktok na ya sinpo di sakngod na. Nakokoronaan din am-in ay sakngod na, ya nasosolatan di esa ya esa ay toktok na si ngadan Diyos ay bakenan lebbeng ay osalen. <sup>2</sup> Din kailaana et kaman leopard, ngem din dapana et kaman dapan di bear\* ya din tepek na et kaman tepek di layon. Din dragon et indawat na sin kaeegyat ay animal di panakabalina ya din nangato ay kalebbengana ay manturay. <sup>3</sup> Sin esa ay toktok na, waday kibat di sogat ay annawa ay ipse na koma, ngem laton ay napey-an, isonga nasdaaw di kaipoipogaw isnan daga et inon-onodan das sisya. <sup>4</sup> Dinaydayaw da din dragon, tan sisya di nangidawat sin kalebbengan di kaeegyat ay animal, ya dinaydayaw da abe din doy kaeegyat ay animal ay nangnangwani, “Sino ngata di makaiso sin nay kaeegyat ay animal? Sino ngata di makaabak en sisya?”

<sup>5</sup> Inpalobos Diyos ay manturay din doy kaeegyat ay animal si opatapolo ya doway ay bowan ya mankalis natangsit ay manglaslas-i en sisya. <sup>6</sup> Isonga inos-osal na din ngadan Diyos ay bakenan lebbeng ay osalen dowana aben palawlawen din ngadan Diyos ya din panbebbeeyana ya siya abe da din manbeey ed langit.† <sup>7</sup> Naipalobos abes sisya ay

† **12:14** Daniel 7:25; 12:7. \* **13:2** 1-2 - aniel 7:3-6. Din leopard et kaman tigre ngem nalabalabangan. Din bear (oso sin Ilocano) et dakdake ay animal ay anaanando di koko na. † **13:6** Di esa abe ay kaiologan nina sin Griego et: ...din ngadan Diyos ya din panbebbeeyana ay siya da din manbeey ed langit.



en mangobat sin ipogaw Diyos et abakenas daida, ya naiyaan sisyas kalebbengan ay mangituray sin am-in ay nasyon ya grupo ay nankinalasi di kali da ya kodil da.‡ <sup>8</sup> Isonga am-in ay ipogaw isnan daga et dayawen da din kaeegyay ay animal ay doy malaksig din naisolat di ngadan da sin libro ay naisolatan di ngadngadan di waday biyag na ay iwed patingga na. Sin daan maparsuaan di lobong, naisosolat di ngadan da sin libro ay doy ay okan din Karnero ay napse ay naidaton.

<sup>9</sup> Dakayo ay manmannge, nemnemen yo na. <sup>10</sup> Di natodingan ay maibalod et maibalod da ngarud, ya din natodingan ay matey si kampilan et peslen da ngarud si kampilan. Isonga masapol ay anosan di ipogaw Diyos din ligat ay lak-amen da ya ipapasnek da ay mamati.

### *Din Kaeegyay Ay Animal Ay Napo Sin Lota*

<sup>11</sup> Pagak ilaen di esa abe ay kaeegyay ay animal ay bomalbala sin lota. Dodoway sakngod na ay kaman sakngod di anak di karnero, ngem din kali na et kaman kalin di dragon. <sup>12</sup> Wada en sisya din am-in ay kalebbengan din nangon-ona ay kaeegyay ay animal, et inos-osal na ay nansilsilbi en sisya. Et pinilit na ay dayawen di am-in ay ipogaw isnan daga din nangon-ona ay sana ay napey-an di sogat na ay ipse na koma. <sup>13</sup> Din maikadwa ay animal et nakaskasdaaw di sinyal ay inam-amag na, tan inpatekdag na di apoy sin daga ay napo ed daya sin pangiilaan di kaipoipogaw! <sup>14</sup> Isonga inetekana din adi namati ay kaipoipogaw isnan daga begew sin nakaskasdaaw ay sinyal ay naipalobos ay ipaila na sin pansilsilbiana sin nangon-ona ay animal. Et tinogonas daida ay mangamag si sinan animal ay pandayaw da sin nangon-ona ay animal ay nasogatan si kampilan ngem matmatago pay dedan. <sup>15</sup> Naipalobos abe sin maikadwa ay animal ay panleng-agenan din sinan animal ta say makakali ya keddengana ay matey di am-in ay nanigaan ay mandayaw en sisya. <sup>16</sup> Pinilit abe din maikadwa ay animal ay mamalkaan di am-in ay ipogaw sin makannawan ay takkay da ono sin kitong da. Olay din nangato ay ipogaw ya din nababa, din babaknang ya nabibiteg, din bag-en ya baken bag-en et pinilit na ay mamalkaan da. <sup>17</sup> Inamag na di ta say maga polos di ipogaw si man-ilako ono manlako mo adi namalkaan sin ngadan di nangon-ona ay kaeegyay ay animal ono din numero ay sinyal di ngadana.

<sup>18</sup> Masapol di nalaing ay ipogaw ay mangammo sin olog di numeron din kaeegyay ay animal. Din waday laing na et mabalin ay pasalena din olog di numero, tan din numero et say naitatabonan di ngadan di ipogaw. Din numero et enem ay gasot ya enemapolo ya enem.

## 14

### *Din Karnero Ya Din 144,000 Ay Sinobot Na*

<sup>1</sup> Idi nantamangak kasin, kambaw et wada din Karnero ay pinmipika sin dontog ay Zion, ya wada abe di sin-gasot ya opatapolo ya opat ay libo ay ipogaw ay nakipipika en sisya ay nasolatan di kitong da sin ngadana ya sin ngadan aben Ama na. <sup>2</sup> Dinnggek abe di kali ay napod langit ay kaman din ganayaas di nakayang ay manpaypayasapas ay danom ono din man-agodood ay kido. Kaman aben din ganges di ad-ado ay arpa ay makotkotingting. <sup>3</sup> Pinmipika din sin-gasot ya opatapolo ya opat ay libo ay ipogaw ay manasagang sin trono ya sin opat ay matmatago ay parsua ya papangolo. Mankankanta da si baro ay kanta ay magay odom si nakin ammo mo adi et daida anggoy, tan daida di nasobot sin daga. <sup>4</sup> Daida abe di adi nangipakadodogis sin awak da maipanggep si babai, tan dadlon dan nalinis si kankanayon. On-onodan da din Karnero olay intoy ememeyana. Nasobot da ay mailasin sin kaipoipogaw, et naidadaton da en Diyos ya sin Karnero ay kaman din damo ay maani ay maidaton en Diyos. <sup>5</sup> Adi da polos nan-et-etek, tan maga polos di pankolongan da.

‡ 13:7 5-7 - Daniel 7:8,21,25; 11:36.

### *Din Tolo Ay Anghel*

<sup>6</sup> Pagak ilaen di esa abe ay anghel ay mantaytayaw ed kayang. Waday siged ay damag ay komakaman si eng-enggana ay ena ibaga sin kaipoipogaw sin am-in ay nasyon ya grupo isnan daga ay nankinalasi di kali da ya kodil da. <sup>7</sup> Inpigsa nan kali na ay nangwani, “Patgen yos kosto si Diyos ya bigbigen yo din kinangato na, tan dinmateng din timplo ay pangokomana sin kaipoipogaw. Dayawen yo din nangamag ed daya ya sin daga, din baybay ya din obbog ya ginawang.”

<sup>8</sup> Wada di maikadwa ay anghel ay inmonod ay nangwani, “Nabakas! Nabakas din madamdamag ay siyodad ay Babilonia, tan din man-ilis di et bineteng da din kaipoipogaw sin am-in ay nasyon sin napigsa ay arak da, laydena ay kalien, inaw-awis das daida ay mangonod sin kadodogis ay ogali da ay maiturong sin kadosaan da.”

<sup>9</sup> Wada abe di maikatlo ay anghel ay inmonod sin doway ay nangon-ona. Inpigsa na abe din kali na ay nangwani, “Mo wada di mandayaw sin kaeegyay ay animal ya din sinan animal ay kais-iso na ya namalkaan din kitong ono takkay da si malkan din kaeegyay ay animal, <sup>10</sup> man-inom da abe sin napigsa ay arak Diyos ay adi nadanoman, laydena ay kalien ay nam-osen da din palalo ay bonget na ya kaeegyay ay dosa ay insagana na ay adi natapian si seg-ang. Mapaligatan da sin manbidbidang ay asufre sin pangilaan di nasantoan ay aanghel ya din Karnero. <sup>11</sup> Kanayon ay komaykayang di asok ay mapmapo sin apoy ay kad-an di panpalpaligatan da si eng-enggana. Inagew ya linabi, adi omon-onina di ligat da, tan daida di nanaydayaw sin kaeegyay ay animal ya din sinan animal ay kais-iso na, ya namalkaan da abe sin ngadan din kaeegyay ay animal.”

<sup>12</sup> Begew dana ay mapasamak, din ipogaw Diyos ay manongtongpal sin bilbilina ya mantaltalek si kanayon en Jesus et masapol ay ipapasnek dan pammati da ay adi mankeykeyat.

<sup>13</sup> Pagak dengngen di kali ay napod langit ay nangwani, “Isolat mo na: Manlogi ed wani, di ipogaw ay matey ay nakies-esa en Apo Jesus et peteg ay nagasat da.”

“Tet-ewa adi na,” kanan din Ispiriton Diyos. “Tan say pan-illengan da sin naligat ay obla da, tan magon-gonaan da sin siged ay inam-amag da.”

### *Din Kaapitan Di Kaipoipogaw Sin Daga*

<sup>14</sup> Idi nantamangak kasin, wada di mankilat ay liboo. Wada di tinmotokdos di ay kaman ipogaw di kailaana ay nankokoronas balitok ya nananggen si matadem ay kompay. <sup>15</sup> Pag bomala di esa ay anghel sin timplo et inpigsa na ay nangwani sin tinmotokdo sin liboo, “Alaem san kompay mo ta en ka man-ani, tan pinag-aani ed wani. Enggay naom di maani ay siya din kaipoipogaw sin daga.” <sup>16</sup> Isonga inmey nankompay din tinmotokdo sin liboo et nakdeng di ani.

<sup>17</sup> Asi pag bomala di esa abe ay anghel sin timplo ed langit, et wada abey iin-genana ay matadem ay kompay. <sup>18</sup> Yan pag wada di esa ay anghel ay napo sin kad-an di altar ay say makaammo sin apoy. Binogawana din gait na ay nananggen si matadem ay kompay yan kanana, “Alaem san kompay mo ta en ka pogasen din namengyet ay lames di obas sin daga, tan enggay naom da.” <sup>19</sup> Isonga inwasawas nan kompay na ay namogas sin am-in ay lames di obas et intep-a na sin dakdake ay panpespesan ay siya din kaiarigan di kaeegyay ay panosaan Diyos si ipogaw. <sup>20</sup> Napespesan din binoras na sin panpespesan di obas ay wada sin lasin di ili, et manipod sidi, inmayos di dada si toloy gasot ya dowanpo ay kilometro ya enggana sin bagang di kabayo di kaadalem na.

<sup>1</sup> Idi nakdeng pay di, inilak di esa abe ay nakaskasdaaw ay sinyal ed langit. Wada di pito ay anghel ay naitalkan di pito ay ligligat. Da naey di maodi ay ligat, tan daida di panpatinggaan di dosa ay ipadateng Diyos isnan daga.

<sup>2</sup> Pagak ilaen di kaman baybay ay naamag si salming ay natapian si apoy. Wada di pinmipikas di ay siya da di nangabak sin kaeegyat ay animal, tan adi da dinaydayaw din sinan animal ay kais-iso na ya adi da aben intolok ay mamalkaan da sin numero ay sinyal di ngadana. Nan-eegen das arpa ay indawat Diyos, <sup>3</sup> et kinankanta da din kantan Moses ay nansilbi en Diyos ed idi ay siya abe din kantan di Karnero. Kanan da,

“Apo Diyos ay manakabalin am-in, nabanol ya nakaskasdaaw di inam-amag mo. Sik-a ay Apon di am-in ay il-ili et kosto ya nalinteg di am-in ay am-amagem. <sup>4</sup> Maga polos di adi mamigbig en sik-a ay Apo. Maga di adi mangidayaw sin ngadan mo. Tan sik-a anggoy di dadlon nasantoan. Masinop di ipogaw ay mapo sin am-in ay ili sin sangoanam ta say dayawen daka, tan inil-ila da am-in din nalinteg ay inam-amag mo.”

<sup>5</sup> Idi nakakanta da, inilak ay nabokatan din Kasasantoan ay Kowarto sin timplo ed langit ay kad-an din naisosolat ay bilbilin Diyos. <sup>6</sup> Et binmala sin timplo din doy pito ay anghel ay naitalkan di pito ay ligligat. Nanbabado das nangina ay mankilat ay bado ay nalinis ya mankoniniing ya wada abey balitok ay naisisikget sin pagew da. <sup>7</sup> Pag din esa sin opat ay matmatago ay parsua et inwaras na sin pito ay anghel ay doy di pito ay mallokong ay napnos dosa ay napo en Diyos ay matmatagos eng-enggana. <sup>8</sup> Pag mapno din timplo si asok ay sinyal di dayaw ya panakabalin Diyos, isonga maga di nakasgep isdi enggana ay nakdeng din pito ay ligat ay naitalek sin pito ay anghel.

## 16

### *Din Pito Ay Mallokong Ay Napnos Dosa*

<sup>1</sup> Asiak pag dengngen di napigsa ay kali ay napo sin timplo ay kanana sin pito ay anghel, “En kayo isodag sin daga din dosa ay napon Diyos ay wada sin pito ay mallokong.” <sup>2</sup> Isonga inmey din omona ay anghel ay en mangisodag sin naigto sin mallokong na sin daga. Et din ipogaw ay namalkaan si malkan di kaeegyat ay animal ya nanaydayaw sin sinan animal ay kais-iso na et naboyoyan da si kaeegyat ya dadakke ay boyoy.

<sup>3</sup> Pag emey din maikadwa ay anghel et ena insodag din wada sin mallokong na sin baybay. Et nanbalin din danom si dada ay kaman din dadan di natey, et natey am-in di wadas di.

<sup>4</sup> Asi pag emey din maikatlo ay anghel ay en mangisodag sin naigto sin mallokong na sin ginawang ya ob-obbog, et nanbalin das dada. <sup>5</sup> Et pag kanan din anghel ay makaammo sin danom, “Sik-a ay nasantoan ay wada ed idi ya wada ed wani, kosto di inkeddeng mo ay dosa. <sup>6</sup> Tan din dosdosaem et pinse da din ipogaw mo pati din mamadto ay inbaabaam et binmolos dada da, et ed wani, dada di ipainom mo en daida. Gon-gona da ngarud!” <sup>7</sup> Dinngek abe di kali ay napo sin altar ay nangwani, “Ay Apo Diyos ay manakabalin am-in, tet-ewa iman din kanan di anghel ay sana, tan kosto ya nalinteg di am-amagem ay manosa si ipogaw.”

<sup>8</sup> Pag en isodag din maikap-at ay anghel din wada sin mallokong na sin agew, et napalobosan din agew ay omat-atong, isonga naatongan di ipogaw sin palalo ya kaeegyat ay atong na. <sup>9</sup> Ngem olay mo naatongan da sin kaeegyat di atong na ay sana, adi da inbabawi din basbasol da ta dayawen da komas Diyos ay makaammo sin doy kaeegyat ay ligligat, mo adi et pinalawlawa dan ngadana.

<sup>10</sup> Asi pag en isodag din maikalima ay anghel din naigto sin mallokong na sin tronon di kaeegyat ay animal, et binmolinget din il-ili ay panturturayana. Kinakinat di ipogaw

din dila da sin palaloy sakit da, <sup>11</sup> et pinalawlawwa das Diyos ed langit begew sin sakit ya boyoy da, ngem adi da inbabawi din lawa ay inam-amag da.

<sup>12</sup> Pag en isodag din maikan-em ay anghel din naigto sin mallokong na sin dakdake ay ginawang ay Eufrates, et natdok danom ta say maisasagana di pandanan di aari ya din sosoldado da ay mapo sin belaan di agew. <sup>13</sup> Asiak pag ilaen di tolo ay lawlawwa ay anito ay kaman bakbak di kailaan da. Binmala di esa sin tepek di dragon, di esa sin tepek di kaeegyat ay animal, ya di esa abe sin tepek di makaetek ay mamadto. <sup>14</sup> Dana ay aanito et didimonyo ay waday kabaelan da ay mangamag si milagro, et en da pasinop din manturturay sin am-in ay ili isnan daga ta en da gobaten si Apo Diyos ay manakabalin am-in sin nabanol ay agew na. <sup>15-16</sup> Siya di, inpasinop da din tuturay ya din sosoldado da sin lugar ay makwani en Armageddon sin kali ay Hebreo. Isonga kanan Apo Jesus, “Dengngen yo na. Bigla di omaliak ay kaman din omalian di mangakew. Nagasat di adi kaseyseyep ay manbabado ay nakasagana, tan adi mabainan sin omaliak ay kaman soldado ay nanlalabos ay siyat bomangon ay manbado, asi en makigobat.”

<sup>17</sup> Idi nakdeng di, pag en isodag din maikapito ay anghel din wada sin mallokong na sin dagem, et wada di napigsa ay kali ay napo sin trono sin timplo ay nangwani, “Nakdeng!” <sup>18</sup> Pag et mansilap di kimat ya mankido. Wada abe di kaeegyat ay yegyeg. Maga di makaiso sin kapigsa di yegyeg ay nay manlogi sin naparsuaan di ipogaw isnan daga, tan si naey di kapipigsaan. <sup>19</sup> Nantolo din dakdake ay siyodad ya nabakas abe din am-in ay siyodad isnan daga. Isonga tet-ewa ay adi nilinglingan Diyos ay manosa sin man-ili sin dakdake ay siyodad ay Babilonia, mo adi et inpainom na en daida din am-in ay arak ay kaiarigan din kaeegyat ay dosa ay pantongpalan di bonget na. <sup>20</sup> Am-in di kinittoy ay ili ay linilikob di baybay et nalned da, ya am-in abe di dontog et namaga da. <sup>21</sup> Nandalalo abe si dadakke ay emey ay limapolo ay kilo di kadagsen da, et napontaan di ipogaw isnan daga. Ngem din nantongpalana et pinalawlawwa das Diyos begew sin dalalo, tan palalo ay kaeegyat din ligat ay sana.

## 17

### *Din Babai Ay Nangakabayo Sin Kaeegyat Ay Animal*

<sup>1</sup> Idi nakdeng di, inmasag-en di esa sin pito ay anghel ay nananggen sin pito ay mallokong yan kanana en sak-en, “Omali ka ta ipailak en sik-a din kadosaan di madamdamag ay babai ay malaklakoan di kinababai na. Sisyas di tinmotokdo sin kad-an di kaginaginawang. <sup>2</sup> Din manturturay isnan daga et dinaddaag das sisya, ya olay abe din kaipoipogaw isnan daga et kaman dan nabeteng sin arak na ay siya din kadodogis ay ogali na ay inon-onodan da.”

<sup>3</sup> Pag kasin omipaiitaw din Ispiriton Diyos, et in-ey din anghel sak-en sin lugar ay magay man-ili. Inilak sidi din babai ay nangakabayos kaeegyat ay animal ay manbalanga ay pito di toktok na ya sinpo di sakngod na. Din awak na abe et nasosolatan si ngadngadan Diyos ay bakenan lebbeng ay osalen. <sup>4</sup> Din badon di babai et manbalanga ya asul ay kaman badon di turay. Naaltialtian abes sisya si balitok ya nankababanol ay bato ya perlas. Waday iin-genana ay tasa ay balitok ay napnos omipaloya ya kadodogis ay inam-amag na. <sup>5</sup> Din ngadana ay naoneg di olog na et naisosolat sin naibebedbed sin kitong na. Kanana, “Babilonia ay madamdamag, inan di babbabai ay malaklakoan di kinababai da, ya poon di am-in ay kadodogis ay maam-amag sin daga.” <sup>6</sup> Inilak ay nabeteng din babai si dadan di ipogaw Diyos ay natey begew sin pammati da en Jesus.

Sin nangilaak en sisya, peteg ay nasdaawak, <sup>7</sup> ngem kanan din anghel en sak-en, “Apay nga nasdaaw ka? Ibagak en sik-a din olog di babai ay sana ya din kaeegyat ay animal ay nangakabayoana ay pito di toktok na ya sinpo di sakngod na. <sup>8</sup> Din animal ay inilam et nawada ed idi, ngem maga ed wani. Sin tapin di agew, bomala ay mapo sin balodan ed dallem, ngem asi pag maiey sin kadosaana ay eng-enggana.

Din kaipoipogaw sin daga ay maga di ngadan da sin libro ay naisolatan di ngadngadan di waday biyag nas iwed patingga na ay naisolat sin daan kaparsuaan di lobong et masdaaw da mo ilaen da din kaeegyat ay animal ay sana. Masdaaw da tan nawada ed idi, maga ed wani, et mawada kasin.”

<sup>9</sup> Pag itoloy din anghel ay nangwani, “Masapol di nalaing ya nanemneman ay ipogaw ay makaawat isna. Din olog di pito ay toktok et pito ay dontog ay tinmotokdoan din babai. <sup>10</sup> Ya di esa ay olog na et pito ay ari. Enggay nakaan di lima en daida, manturturay di esa ed wani, ya wada pay di esa ay omali ay manturay sin tapin di agew, ngem sinkaattikan anggoy di panturayana. <sup>11</sup> Din doy ay nawada ed idi ya maga ed wani et maibilang ay maikawao ay ari, ngem esa met laeng sin doy pito. Awni et emey sin kadosaana ay eng-enggana.

<sup>12</sup> “Din sinpo ay sakngod ay inilam et daida di sinpo ay ari ay daan pay laeng manturay, ngem maiyaan das kalebbengan ay makituray sin kaeegyat ay animal si es-esa ay oras. <sup>13</sup> Gapo ta es-esa di panggep da, ipolang dan panakabalin ya kalebbengan da sin kaeegyat ay animal. <sup>14</sup> Pag dan gobaten din Karnero, ngem din Karnero ya din matalek ay mangon-onod en sisya ay pinili na ya inayagana et abaken das daida, tan sisya di kangatoan ay Apo sin am-in ay apo ya kangatoan ay Ari sin am-in ay ari.”

<sup>15</sup> Intoloy din anghel ay nangwani en sak-en, “Din kaginaginawang ay inilam ay kadan din babai ay malaklakoan di kinababai na ay tinmotokdo et daida di nasyon ya grupo ay nankinalasi di kali da ya kodil da. <sup>16</sup> Waday agew ay domateng ay kaliliget din kaeegyat ay animal ya din sinpo ay sakngod din babai ay sana. Alaen da din am-in ay sanikwa na ya panlabosen das sisya. Isida da abe din lamlames na, et pag dan poan din nabay-an. <sup>17-18</sup> Din babai ay doy ay inilam et din dakdake ay siyodad ay mangituray sin am-in ay ari isnan daga. Napasamak dana en sisya, tan si Diyos di nangiturong si nemnem da ay manongpal sin panggep na. Siya din gapo ay inpolang da sin kaeegyat ay animal din kalebbengan da ay manturay enggana ay matongpal din am-in ay inbagan Diyos.”

## 18

### *Din Nabakasan Di Babilonia*

<sup>1</sup> Idi nakdeng di, inilak di esa ay anghel ay bomabbaba ay napod langit. Dakdakey kabaelana, et nasilawan din daga sin koniniing na. <sup>2</sup> Kanana ay nangibogaw, “Nabakas! Nabakas din madamdama ay siyodad ay Babilonia. Nanbalin si pantetean di dimonyo, pipinad-ing ya kompormi ay aanito. Am-in abe ay kalasin di titit ay maibilang ay kadodogis ya lawlawa et man-ob-obong das di ed wani. <sup>3</sup> Tan bineteng na din kaipoipogaw sin am-in ay nasyon sin napigsa ay arak na, laydena ay kalien, inaw-awis nas daida ay mangonod sin kadodogis ay ogali na ay maiturong sin kadosaan da. Din manturturay isnan daga et dinaddaag das sisya, ya din mannignigosyo isnan lobong et binmagnang da sin nalabes ay gangam na ay bomakbagnang,” kanana.

<sup>4</sup> Pagak dengngen di esa pay ay kali ay napod langit ay kanana, “Dakayo ay ipogaw ko, komaan kayos sa, taynan yo din ili ay sana tan into et mo maitapi kayo sin panbasbasolana ya makilak-am kayo abe sin kadosaana. <sup>5</sup> Tan ad-ado di basol na ay kaman dan nantotoon enggana ed langit, et adi linglinglingan Diyos din lawa ay inam-amag na. <sup>6</sup> Isonga magon-gonaan sisya et madosa ay kosto sin lawa ay sana. Din am-in ay inam-amag na ay namalpaligat si ipogaw et maisobalit en sisya. Din kapigsan di arak ay inpainom nas odom, siya met laeng din kapigsan di maipainom en sisya.\* <sup>7</sup> Din kaad-adon di kinabagnang na ya pangipapangatoana sin awak na et siya abe din

\* **18:6** Din kanana sin Griego et: madobli di maisobalit en sisya ya madobli di kapigsan di maipainom en sisya, ngem ogalin di kali. Di laydena ay kalien et dadlon madosas sisya ay maibasas sin inam-amag na.



kaad-adon di ligat ya sakit di nemnem na. Kanas nemnem na, 'Naeyak ay reyna ay manturay. Ay siya mo manladingitak ay kamanak nabalo?' <sup>8</sup> Isonga domateng en sisya di mandededsan ay ligligat, et bigla ay lak-amena di pese, sakit di nemnem ya betil, et pag mapooan, tan din manosa en sisya et si Apo Diyos ay manakabalin." Siya di din inbagan di kali ay napo ed langit.

<sup>9</sup> Isonga din manturturay isnan daga ay nakidaddaag en sisya ya nakigan-ganas sin kinabaknang na et palaloy sakit di nemnem da et ladingitan das sisya mo tamangen da din asok ay napo sin kapoppooana. <sup>10</sup> Begew sin egyat da ay makidosa en sisya, pomipika da sin addawi yan kanan da, "Ay inayan pay! Palalo ay kaseseg-ang din doy madamdماغ ay siyodad ay Babilonia! Olay mo dakdake di ay siyodad, ngem bigla di nadosaana, tan owat es-essay oras yan nabakas!"

<sup>11</sup> Siya abe ay ogaan ya ladingitan di mannignigosyo isnan dagas sisya, tan enggay namaga di manlakos ilaklako da. <sup>12</sup> Maga di manlako sin balitok, palata, nabanol ay bato, ya perlas da. Siya abe sin nankangingina ay lopot ay ilaklako da ay kaman din asul ya manbalanga di kolor na. Maga abe di manlako sin nabanglo ay kaiw da ya din kompormi ay naamag sin sawing di elefante, nankababanol ay kakaiw, gambang, landok ya kagam-is ay bato ay makwani en marbel. <sup>13</sup> Maga abe di manlako sin cinnamon, nabanglo ay lana, insinso, mirra ya frankincense da. Siya abe sin lako da ay inom, mantika, kamayatan ay arina, trigo, baka ya karnero, kabayo ya kalisa, ya olay ipogaw ay ilaklako da ay para bag-en.

<sup>14</sup> Am-in ay mannignigosyo et kanan da en sisya, "Maga polos di man-ilako en sik-a sin nangina ay prutas ay inak-aklongam. Namaga en sik-a di makan ay naligat ay maa ya di nangina ay al-altin di babaknang, et adim kasin maa." <sup>15</sup> Siya di din kanan di man-ilaklako ay binmaknang sin nannignigosyoan da sin siyodad ay sana. Begew sin egyat da ay makidosa en sisya, pomipika da sin addawi. Man-oga ya manladingit da <sup>16</sup> ay mangwani, "Ay inayan pay! Palalo ay kaseseg-ang din doy madamdماغ ay siyodad! Tan ed idi, nanbabado di man-ilis di si nangina ay mankilat ya asul ya manbalanga. Peteg ay naaltialtian das balitok, nabanol ay bato ya perlas. <sup>17</sup> Ngem sin oneg di es-esa ay oras, nadadael am-in dana ay kinabaknang da!"

Am-in abe ay kapitan di bapor ya din man-ob-obla ya makiloglogan sidi, ya am-in abe ay manman-as katagoan da sin baybay et pomipika da abe sin addawi <sup>18</sup> ay mamoyboya sin asok ay mapo sin kapoppooana. Sin pangilaan das di, ipigsa dan kali da ay mangwani, "Maga polos di siyodad ay makaiso sin kinapateg di siyodad ay nay!" <sup>19</sup> Sapowakan dan toktok das tapok dowan dan man-og-oga ya manladladingit ay mangwani, "Ay inayan pay! Palalo ay kaseseg-ang din doy madamdماغ ay siyodad! Din kinabaknang na di inbaknang aben din am-in ay waday bapor na. Yan doy iman ay nabakas sin oneg di es-esa ay oras!" kanan da.

<sup>20</sup> Dakayo ay wada ed langit, manragsak kayo. Dakayo ay ipogaw Diyos, aapostol ya mamadto, manragsak kayo abe, tan din nangidaruman din siyodad ay sana en dakayo et binaliktad Diyos, et inokom na ya dinosa nas daida.

<sup>21</sup> Pag wada di mabikas ay anghel ay kabidking sin dakdake ay bato ay kaman kadakdak-an ay losongan, et initpig na sin baybay ay nangwani, "Kaman nina di mapasamak sin napateg ay siyodad ay Babilonia, tan dadlon mabakas et adi kasin maisaad. <sup>22</sup> Isonga magan to sin doy ay siyodad di mankankanta, mankotkotingting, mankolkolalleng ya mantangtangyob. Maga abe di maan-anap ay nalaing ay mangamag si kompormi, ya maga abe di manbaybayo. <sup>23</sup> Maga di matetengan kasin ay silaw ya maga di mankasal. Siya dadi din dosan di Babilonia, tan din man-ilaklakos di et nalalastog di nemnem da ay nangwani en daida di kababaknangan isnan daga, ya din man-ilis di abe et sinangaw da di kaipoipogaw sin daga si etek da. <sup>24</sup> Di esa ay gapo ay madosa di Babilonia et isdi di inmayosan di dadan di am-in ay mamadto ya odom ay

ipogaw Diyos. Aw, am-in ay namati ay napsenapse isnan daga et madatngan di dada da sin siyodad ay doy,” kanan din anghel.

## 19

### *Din Nanragsakan Di Wada Ed Langit*

<sup>1</sup> Idi nakdeng di, dinngek di napigsapigsa ay kali ay kaman kalin di palalo ay ad-ado ay ipogaw ay nankankanta. Kanan da,

“Dayawen takos Diyos ay Apo tako! Bigbigen takos sisya ay manakabalin ay nangisalakan en datako ya ipangato takos sisya, <sup>2</sup> tan kosto ya nalinteg di iyat na ay mangokom. Tan kineddengana ay madosa din madamdamag ay babai ay malaklakoan di kinababai na ay nangaw-awis si kaipoipogaw ay maitapi sin kadodogis ay ogali na. Inbaes Diyos din mansilsilbi en sisya ay pinse na.”

<sup>3</sup> Kasin dan inpigsa din kali da ay nangwani, “Dayawen takos Diyos, tan komaykayang si eng-enggana din asok ay napo sin kapoppooan din babai.” <sup>4</sup> Pag din downpo ya opat ay pangolo ya din opat ay matmatago ay parsua et nandokmog ay nanyakog-ong ta dayawen das Diyos ay tinmotokdo sin trono da. Kanan da, “Siya sa! Dayawen takos Diyos!”

### *Din Kasal Di Karnero*

<sup>5</sup> Pag wada di kali ay napo sin kad-an di trono ay nangwani, “Dakayo ay mansilsilbi ya amatpateg en Diyos, olay mo nangato ono nababa kayo et dayawen yo am-in din Diyos tako.”

<sup>6</sup> Pagak dengngen di napigsapigsa ay kali ay kaman din kalin di ad-aad-ado ay ipogaw. Din kapigsa na et kaman din ganayaas di nakayang ay manpaypayasapas ay danom ono man-agodood ay kido. Kanan da ay nangikanta,

“Dayawen takos Diyos ay Apo tako ay manakabalin am-in, tan inlogi na ay manturay.

<sup>7</sup> Manragsaragsak tako ya dayawen tako din kinangato na, tan ed wani di kasal di Karnero. Din makiasawa abe en sisya et nakasasagana, <sup>8</sup> tan inbabado na din nangina ay mankilat ay naidawat en sisya ay mankoniniing ya nalinis.”

Din olog di mankilat ay bado et din siged ay inam-amag di ipogaw Diyos.

<sup>9</sup> Pag kanan din anghel en sak-en, “Isolat mo na: Nagasat di ipogaw ay naayagan ay makikikan sin kasal di Karnero.” Pag nan itoloy ay nangwani, “Siya dana di tet-ewa ay kalin Diyos.”

<sup>10</sup> Sin nangwanianas di, nandokmogak ay nanyakog-ong sin sangoanana ay mandayaw koma en sisya. Ngem kanana, “Dakey! Si Diyos anggoy di dayawem! Tan sak-en abe di esa ay mansilsilbi en Diyos ay kaman met laeng sik-a ya din aag-im ay mangon-onod sin tet-ewa ay mait-itdo ay inpaammon Jesus. Tan din inpaibagbagan di Ispiriton Diyos sin mamadto et napo met laeng sin inpaammon Jesus.”

### *Din Nangabakan Di Nangakabayos Mankilat Ay Kabayo*

<sup>11</sup> Pagak ilaen ay nabobokatan ed langit, et kabala di mankilat ay kabayo ay waday nangakabayo ay manngadan si Matalek ya Tet-ewa. Nalinteg di iyat na ay mangokom ya nalinteg abe di iyat na ay mangobat sin kaibaw na. <sup>12</sup> Din mata na et kaman manbidbidang ay apoy ya ad-adoy korona sin toktok na. Naisolat abe en sisya di ngadana, ngem magay nangaammo sin olog na mo adis sisya et anggoy. <sup>13</sup> Nanbabados nagayad ay naisiblaw si dada, ya din inpangadan da en sisya et Kalin Diyos. <sup>14</sup> Din ad-ado ay sosoldado ed langit et inmon-onod da en sisya. Nangakabayo da abes mankilat ay kabayo ya nanbabado das mankilat ay nangina ay maga polos mansa na. <sup>15</sup> Din makwani en Kalin Diyos et waday matadem ay kumpulan ay bomalbala sin tepek na ay osalena ay mangabak sin kailiili. Sin pangiturturayana en daida, dadlonan dosaen di olay sino ay adi mamigbig sin turay na. Ipaila na din kaegyay ay liget di manakabalin

ay Diyos si basol, tan din panosaana en daida et kaman din pamespesan di ipogaw si obas ta someset danom na. <sup>16</sup> Sin bado na ya sin opo na, naisolat din ngadan ay nay: “Kangatoan ay Ari sin am-in ay ari ya kangatoan ay Apo sin am-in ay apo.”

<sup>17</sup> Asiak inila di anghel ay pinmipika sin siney-angan di agew. Inpigsa nay kali na ay nangibogaw sin am-in ay titit ay mantaytayaw ed kayang, “Omali kayo ta masinop kayo ay mangisida sin ad-ado ay ipakan Diyos en dakayo. <sup>18</sup> Omali kayo ay makikan sin awak di aari, sosoldado ya ap-apo da, kabayo ya nangakabayo, ya am-in ay ipogaw ay manigaan en Diyos ay bag-en ya baken bag-en, nangato ya nababa.”

<sup>19</sup> Pagak ilaen ay nasisinop din kaeegyat ay animal ya din manturturay isnan daga ya din sosoldado da ta en da gobaten din nangakabayo sin mankilat ay kabayo ya din sosoldado na. <sup>20</sup> Ngem nadpap din kaeegyat ay animal ya din makaetek ay mamadto ay nangipaila ed idi si nakaskasdaaw ay sinyal sin nansilsilbiana sin animal ay doy. Dana ay sinyal di nangietekana sin ipogaw ay namalkaan si malkan di kaeegyat ay animal ya nanaydayaw sin sinan animal ay kais-iso na. Dana ay doway ay matmatago pay laeng et naitpig da sin annawa ay lebeng ay kad-an di manbidbidang ay asufre.

<sup>21</sup> Am-in abe ay sosoldado da et napse da sin kampilan ay bomalbala sin tepek di nangakabayo sin mankilat ay kabayo. Et pag mangamangan din nasisinop ay titit enggana ay nabsonabsog da.

## 20

### *Din Sinlibo Ay Tawen*

<sup>1</sup> Pagak ilaen di anghel ay bomabbaba ay napod langit ay nananggen si dakdake ay kadina ya din sosi ay panbokat sin balodan ed dallem. <sup>2-3</sup> Dinpap na din dragon ay magay odom mo adi din narpaila ay eweg ed nabaon ay din Diablo ay manngadan abe si Satanas. Kinadinaanas sisya et initpig na sin balodan ed dallem. Pag nan itelbek ya minalkaana din segpan ta say magay iyat na ay en mangietek sin kaipoipogaw sin kailiili enggana ay makdeng di sinlibo ay tawen. Mo pay ta makdeng di, masapol ay maipalobos kasin, ngem sinkaattikan anggoy.

<sup>4</sup> Pagak ilaen di tinmotokdo sin totrono ay naiyaan das kalebbengan ay mangokom. Inilak abe din ab-abiik di napsenapse begew sin nangibagbagaan da sin kalin Diyos ya sin mait-itdo ay inpaammon Jesus. Daida di adi nanaydayaw sin kaeegyat ay animal ya din sinan animal ay kais-iso na, ya adi da aben namalkaan si malka na sin kitong ono takkay da. Natago da kasin et makituray da en Cristo si sinlibo ay tawen. <sup>5</sup> Siya na di omona ay katagoan kasin di ipogaw. Din odom ay natenatey et adi da kasin matago enggana ay makdeng din doy ay sinlibo ay tawen. <sup>6</sup> Din makilak-am sin omona ay katagoan kasin di natey et nagasat ya peteg ay mabindisyonan da, tan adi da polos makiligat sin maikadwa ay pese mo adi et papadi da ay mansilbi en Diyos ya en Cristo, et makituray da en sisya si sinlibo ay tawen.

### *Din Kaabakan Ya Kadosaan Satanas*

<sup>7</sup> Mo makdeng din sinlibo ay tawen, maibolos si Satanas sin naibalodana, <sup>8</sup> et ena ietekan din makwani en Gog ya Magog ay din kaipoipogaw sin kailiili sin opat ay solin di lobong. Ipaasinop nas daida ta en da makigobat. Di kaad-ado da et kaman din adi kabilang ay darat sin benget di baybay. <sup>9</sup> Mandad-an da sin annawa ay labaw di daga ta en da likoben din siyodad ay laylayden Diyos ay pankampoan di ipogaw na. Ngem pag wada di apoy ay mapod langit ay mamoo en daida. <sup>10</sup> Et si Satanas pay ay nangietek en daida et maitpig sin annawa ay lebeng ay kad-an di manbidbidang ay asufre ay enggay naitpigan din kaeegyat ay animal ya din makaetek ay mamadto, et mapalpaligatan das inagew ya linabi si eng-enggana.

### *Din Maodi Ay Pangokoman Diyos Sin Kaipoipogaw*

<sup>11</sup> Idi nakdeng di, inilak di dakdake ay mankilat ay trono ya inilak abe din tinmotokdos di. Pag maomas din daga ya din wada ed daya ay kaman dan ilayawan sisya, et adi da kasin mail-ila. <sup>12-13</sup> Inilak abe din am-in ay natey ay nangato ya nababa ay pinmipika da sin sangoanan di manturay. Wadas di di am-in ay napo ed Hades ay kad-an di natey, pati am-in ay inan di baybay. Nabitlag din libro ay naisolatan di ngadngadan di waday biyag na ay iwed patingga na. Nabitlag abe din lilibro ay naisolatan di inam-amag di kaipoipogaw, et naokom di esa ya esa ay maibasar sin inam-amag na ay naisolat sin lilibro ay doy. <sup>14</sup> Pag maiwasit di pese ya din sigod ay kad-an di natey ed Hades sin annawa ay lebeng ay kad-an di manbidbidang ay apoy. Siya na din makwani en maikadwa ay pese. <sup>15</sup> Et mo sino di magay ngadana sin libro ay naisolatan di ngadngadan di waday biyag na ay iwed patingga na et naiwasit sin doy kad-an di manbidbidang ay apoy.

## 21

### *Din Baro Ay Daya Ya Baro Ay Daga*

<sup>1</sup> Pagak ilaen di baro ay daya ya baro ay daga, tan enggay naomas din nangon-ona ay daya ya daga, ya namaga abe di baybay. <sup>2</sup> Inilak abe din nasantoan ay siyodad ay din baro ay Jerusalem ay bomabbaba ay napo en Diyos ed langit. Dadlon nasasagana ay kaman babai ay nanbabados kagakagam-is ay en mangabat sin mangasawa en sisya. <sup>3</sup> Dinngek abe di napigsa ay kali ay napo sin trono ay nangwani, “Ed wani, wada din panbeeyan Diyos sin kad-an di ipogaw, et makitete en daida. Sisya ay mismo et bigbigenas daida ay ipogaw na et kadmadaenas daida, ya bigbigen da abes sisya ay Diyos da.\*” <sup>4</sup> Ponasana din am-in ay lowa da, et maga kasin di matey, maga abe di manladingit ya man-oga, ya maga abe di sakit, tan am-in dana ay wada ed idi et namaga.”

<sup>5</sup> Pag kanan din tinmotokdo sin trono, “Ilam, pabarbaroek am-in di wada.” Kanana abe en sak-en, “Isolat mo dana ay inbagak, tan tet-ewa ya dadlon mapati.” <sup>6</sup> Pag nan kanan, “Dadlon matongpal am-in dana. Sak-en di makwani en Alfa ya Omega, laydena ay kalien, sak-en di logian ya panpatinggaan di am-in. Idawat ko sin nabigaw ay ipogaw di libre ay danom ay napo sin obbog ay mangidawat si biyag ay iwed patingga na. <sup>7</sup> Di ipogaw ay mangabak si lawa et tawidena am-in dana. Bigbigenas sak-en ay Diyos na et bigbigek abes sisya ay anak ko. <sup>8</sup> Ngem din ipogaw ay adi mangipapasnek ay mamati begew sin egyat nas ligat, din magay pammati na, din kadodogis di ogali na, din makapese, din manaddaag si bakenan asawa, din mansapo ya man-engey, din manaydayaw si sinan didiyos, ya am-in ay man-et-etek et mantete da am-in sin annawa ay lebeng ay kad-an di manbidbidang ay asufre. Siya na di makwani en maikadwa ay pese.”

### *Din Baro Ay Jerusalem*

<sup>9</sup> Pag omali di esa sin doy pito ay anghel ay wada di pito ay mallokong da ay napno sin pito ay kaodian ay ligat. Kanana en sak-en, “Omali ka ta ipailak en sik-a din babai ay asawaen din Karnero.” <sup>10</sup> Pag omipaiitaw din Ispiriton Diyos, et in-ey din anghel sak-en sin toktok di nakayakayang ay dontog et inpaila na en sak-en din nasantoan ay siyodad ay Jerusalem ay bomabbaba ay napo en Diyos ed langit. <sup>11</sup> Somisili ay kaman din koniniing di Diyos ay mismo, ya din silsilap na et kaman din koniniing di kristal ono din kabanolan ay bato ay makwani en haspe. <sup>12</sup> Din batog ay kodal di ili et nakayang ya makneg. Waday sinpo ya doway ay segpan ay banbantayan di sinpo ya doway ay anghel, et nasosolatan din segpan ay sana sin ngadngadan di sinpo ya doway ay anak Israel. <sup>13</sup> Sagtotolo di segpan sin nan-inigid-sin belaan di agew ya diposan di agew, sin makin

\* **21:3** 2 Corinto 6:16.

amyanan ya makin abagatan. <sup>14</sup> Din fondasyon di batog di ili et sinpo ya doway ay bato ay dadakke ay naisosolatan di ngadngadan din sinpo ya doway ay apostol di Karnero.

<sup>15</sup> Din anghel ay nangalkali en sak-en et waday iin-genana ay balitok ay panlokod ta lokodena din ili ay sana, pati din batog na ya segpan. <sup>16</sup> Nadapig din ili ay nan-iso di kaando na ya kaannawa na. Idi linokod din anghel, doway libo ya opat ay gasot ay kilometro di kaando na ya kaannawa na ya siya abe sin kakayang na. <sup>17</sup> Linokod na abe din batog di ili, et enemapolo ya enem ay metro di kakayang na. Din metro ay lokod ay inosal din anghel et nan-iso sin metro ay iloklokod di ipogaw. <sup>18</sup> Naamag din siyodad si natanig ay balitok ay mankoniniing ay kaman salming, ya din batog na et naamag si haspe. <sup>19</sup> Din bato ay fondasyona et naaltialtian si am-in ay kalasin di nabanol ay bato. Din omona ay bato et naaltian si haspe, din maikadwa et safiro, din maikatlo et kalsedonia, din maikap-at et esmeralda, <sup>20</sup> din maikalima et sardonika, din maikan-em et karnelia, din maikapito et krisolito, din maikawao et berilo, din maikasiyam et topasio, din maikasinpo et krisoprasio, din maikasinpo ya esa et hasinto, ya din maikasinpo ya doway et amatista. <sup>21</sup> Din sinpo ya doway abe ay segpan et naamag si sanes-a ay perlas, ya din kalsadan di ili et nasamintoan si natanig ay balitok ay mankonkoniniing ay kaman salming.

<sup>22</sup> Magay inilak ay timplo sin siyodad ay doy, tan si Apo Diyos ay manakabalin am-in ya din Karnero et daida ay mismo di timplo na. <sup>23</sup> Adi aben masapol di pat-an di agew ya bowan, tan masilawan din siyodad sin koniniing Diyos ya din Karnero. <sup>24</sup> Din kaipoipogaw sin daga et masilawan da sin pat-a na, ya am-in di tuturay et iey dan kinabaknang da ta isgep das di. <sup>25</sup> Nabobokatan si kanayon din am-in ay segpan di ili, tan adi da main-in-eb si kaagawan dowan adi polos malablabi. <sup>26</sup> Maiey sidi din kinabaknang ya kinadayaw di kaipoipogaw sin kailili. <sup>27</sup> Ngem maga polos di makasgep si ibilang Diyos ay kadodogis ay kaman din mangam-amag si kababain ya din makaetek, tan anggoy din naisosolat di ngadan da sin libron di Karnero ay nailistaan di waday biyag na ay iwed patingga na di mabalin ay senggep.

## 22

<sup>1</sup> Pag ipailan din anghel en sak-en din ginawang ay napoan di danom ay mangidawat si biyag. Din ginawang ay nay et mankonkoniniing ay kaman kristal, et mapmapo sin tronon Diyos ya din Karnero <sup>2</sup> ay man-oy-oyang sin gawan di kalsadan di ili. Sin bebenget di ginawang, wada di kakaiw ay mangidawat si biyag. Manlames da si mamin sinpo ya doway si tinawen ay mamingsan si binowan. Din tobo da abe et pangagas di kaipoipogaw sin kailili ta say adi da mansaksakit. <sup>3</sup> Maga kasin di dosdosa ay inbagan Diyos ed nabaon.\* Din tronon Diyos ya din Karnero et wada da sin siyodad ay doy, ya din mansilsilbi en Diyos et dayawen das sisya. <sup>4</sup> Ilaen da din ropa na, ya din ngadana et maisolat sin kitong da. <sup>5</sup> Adi kasin malablabi, et adi da masapol di silaw ya agew, tan si Apo Diyos di manilsilaw en daida. Et makituray da en sisya si eng-enggana.

<sup>6</sup> Pag kanan din anghel en sak-en, “Tet-ewa ya dadlon mapati am-in dana ay naibaga en sik-a. Tan si Apo Diyos ay nangidawat sin Ispirito na ay mangiturong sin nemnem di mamadto et sisya abe di nangibaa en sak-en ay anghel na ta ipaammok en dakayo ay mansilsilbi en sisya din masapol ay dandani ay mapasamak.”

### *Din Kasin Omalian Jesus*

<sup>7</sup> Kanan Jesus, “Dengngen yo na. Dandani di omaliak. Nagasat di ipogaw ay mangononod sin naipadto sin libro ay nay.”

<sup>8</sup> Sak-en si Juan ay nannange ya nangil-ila en dana ay naisolat isna. Sin nanngiak ya nangilaak, nandokmogak ay nanyakog-ong sin sangoanan di anghel ay nangipaila en sak-en ta dayawek komas sisya. <sup>9</sup> Ngem kanana en sak-en, “Dakey! Si Diyos anggoy di

\* 22:3 Genesis 3:17-19.



dayawem! Tan sak-en abe di esa ay mansilsilbi en Diyos ay kaman met laeng sik-a ya din iib-am ay mamadto ya din am-in ay manongtongpal sin naisolat sin libro ay nay.”

<sup>10</sup> Pag nan itoloy ay nangwani, “Adim igiginek mo adi et ibagam din naipadto ay naisolat sin libro ay nay, tan dandani di katongpalana. <sup>11</sup> Et mo domateng din timpo ay doy, din mangam-amag si lawa ya kadodogis et masapol ay itoltoloy da ay mangam-amag si lawa ya kadodogis. Din mangam-amag pay si siged ya din nasantoan di kabibiyag na et masapol ay itoltoloy da ay mangam-amag si siged ya mangon-onod si nasantoan ay kabibiyag.”

<sup>12</sup> Kanan Jesus, “Dengngen yo na. Dandani di omaliak. Et mo omaliak, ialik di gongona ay idawat ko si esa ya esa ay maibasar sin inam-amag na. <sup>13</sup> Sak-en di makwani en Alfa ya Omega, tan sak-en di omona ya maodi. Sak-en abe di logian ya panpatinggaan di am-in.”

<sup>14</sup> Nagasat di ipogaw ay manlabas bado da, tan waday kalebbengan da ay senggep sin segpan di ili ya mangan si lames di kaiw ay mangidawat si biyag. <sup>15</sup> Ngem din mangam-amag si lawa ay maiarig si nalogit ay aso, din mansapo ya man-gegey, din manaddaag si bakenan asawa, din makapese, din manaydayaw si sinan didiyos, ya am-in ay makaetek ya agin sisiged et adi da makasgep sisi.

<sup>16</sup> Kanan aben Jesus, “Sak-en si Jesus ay nangibaa sin anghel ko ay mangipaneknek sin katet-ewa dana en dakayo ta asi yo aben ipaammo sin gimgimong. Sak-en di polin David ya din makwani en batakagan ay napigsa di silaw na sin gabis.”

<sup>17</sup> “Omali ka,” kanan din Ispiriton Diyos ya din ipogaw na ay maiarig sin asawaen din Karnero. “Aw, omali ka,” kanan koma aben di mandengdenge. Olay sino ay nabigaw et omali koma ta man-inom sin libre ay danom ay mangidawat si biyag.

### *Din Kakdengan Di Solat*

<sup>18</sup> Naey di idadaan ko en dakayo am-in ay nannanngge sin naipadto sin libro ay nay: Mo waday manaptapi sin naisolat isna, tapian aben Diyos din dosa na sin ligligat ay maibagbagas na. <sup>19</sup> Mo wada abey mangeskesay sin naipadto sin libro ay nay, kaanen aben Diyos din kalebbengana ay makikan sin lames di kaiw ay mangidawat si biyag ya din kalebbengana ay manbeey sin nasantoan ay siyodad ay naibaga sin libro ay nay.

<sup>20</sup> Din mangipaneknek ay tet-ewa am-in dana et kanana, “Tet-ewa ay dandani di omaliak.”

Siya sa koma. Omali ka ay Apo Jesus.

<sup>21</sup> Sapay koma ta wada en dakayo am-in din seg-ang Apo Jesus. Amen.